

16.4.5

SERMONVM

Yale College Library
Decades quinque, de potissimis
Christianæ religionis capitibus,
in tres tomos digestæ, authore
Heinrycho Bullingero,
ecclesiæ Tigurinæ
ministro.

Cum Indice uario & copiosissimo.

Yale
TOMVS



College
PRIMVS.

Library

I E S V S.

HIC est filius meus dilectus, in quo placata est
anima mea. Ipsum audite. Matth. 17.

TIGVRI IN OFFICINA CHRISTOPH.
FROSCHOVERI. ANNO M.D.LXVII. *ep*

242

SYMOT

CLARISSIMIS VIRIS D. RO- DOLPHO GVALTHERO, PETRO SYMLERO,

IOANNI STUMPFIO, IOANNI FLORO, IOANNI SEY-
lero, Adriano Hospiniano, Nicolao Sactorio, & Ioanni Hugoni Decanis seu ar-
chipresbyteris, omnibusq; Christi & ecclesiarum ministris, Classiū Tigurini
lacus, Liberæ prouinciæ, Steinæ, Vituduri, Heligouæ, Vuetzi-
konæ, & Reginospurgi, in agro Tigurino, uenerandis
suis dilectissimisq; symmystis & fratribus,
S. D.



*I*llum aliud tempus uberem dicendi suppeditauit materiam,
presens hoc nostrum exhibet uberrimam. Nam quid fiat hodie,
& quid orbi Christiano immineat, manifestius est quàm multis
recitare oporteat. Irascitur peccatis nostris iustus Dominus, ac pu-
nit etiam, sed longè grauiora parat, quæ effundat in capita impænitentium. No-
strum autem officium est vigilare pro grege Domini, & adueniente gladio om-
nes nostræ fidei commissas oues admonere in tempore, ne sanguis pereuntium re-
quiratur de manibus nostris. Videbor ergo mihi operæpretium facturus si collo-
quar uobiscum, uenerādi Symmystæ & fratres charissimi, de officio nostro,
periculoso hoc seculo ritè faciendo, ac de certa ratione qua exasperatam peccatis
nostris Dei iram piè placemus. Scio quibus cum loquar, nempe cum peritissimis
rerum diuinarum: breuitati ergo studebo.

Dubium non est quin propter peccata hominum irascatur iustissimus Domi-
nus, unde consequens est unicam esse placandæ iræ diuinæ rationē, peccata ab-
luere. Ea uerò non abluuntur nisi agnoscantur primùm, deinde deponantur per
fidem & pœnitentiam. Proinde si uolumus pro nostro officio sublatam à grege
Domini iram & pœnas graues, peccata populi proferre & accusare, sed & fidē
docere & pœnitentiam urgere oportebit. Dominus enim per Ezechielem, Et tu
fili hominis an non iudicabis, inquit: an non iudicabis ciuitatē sanguinū? Indica
ei cunctas abominationes suas, dicesq;, O ciuitas effundens sanguinem in medio
sui, ut tēpus eius appetat, & quæ idola fecit contra se ut pollueretur. In sangui-
ne tuo quem effudisti deliquisti: & in idolis tuis quæ fecisti polluta es: & adduxi-
sti dies tuos: ideo tradā te gentibus. En principes uiri tui quisq; pro uirili in hoc
est ut sanguis effundatur. Patrem & matrem uilipenderunt in te. Peregrino
qui est in medio tui fecerunt calumniam. Pupillum & uiduam afflixerunt in
te. Sancta mea despexisti & sabbata mea prophanasti. Viri dolosi fuerunt in te
ut effunderent sanguinem. Et in montibus comederunt in te, atq; scelus medita-
tum in te designarunt. Verenda patris in te retexit, pollutamq; mensibus in te hu-
miliarunt, & quisq; cum uxore proximi sui abominanda designauit, quisq; nu-
rum suam polluit abominando scelere, quisq; sororem suam filiam patris sui in

Protrahenda &
accusanda sunt
peccata hominū.

QVOMODO POSSIT IRATVS PECCA-

te humiliavit. Munera acceperunt in te ad effundendum sanguinem, & scelus siue excessum accepisti, & emolumentum tuum promouisti cum iniuria proximi tui, atq; mei es oblita, dicit dominus Deus. Et ecce ego comploso manus meas super auaritia tua, quam exercuisti, et super sanguines tuos qui fuerunt in medio tui. Num aut praeualebis cum ego contra te insurrexero? Ego dissipabo te in gentes & dispergam te in nationes & finem faciam immunditiae tuae quae est in te. Hac uerbotim recensui hactenus ex Ezechiele, fratres, et hoc quidem libentius, quod ista generalē quandā nobis formulā exhibent non modò accusandi scelera, sed iudicandi etiā de sceleribus quae Deus maximè oderit, et quae acerrimè impetiti uelit. Cauendum enim nobis etiam & etiā ne duces caci culicem excolamus, deglutiamus aut camelum: id est, minutulis erroribus & uitijs inhereamus accusandis exagitandisq;, transcamus aut scelera & flagitia enormia intacta. Ostendit ergo hic Ezechielis locus, indicant & alij loci scripturae sanctae, quae nā sint maximè detestanda flagitia, illa nimirum quae rectā tendunt in subuersionem gloriae Dei, in oppressionem iustitiae & sanctimoniae, deniq; in dissipationē charitatis. Scio horrenda illa flagitia non regnare (gratia domino) aut inueniri in singulis ecclesijs. Aliae alijs laborant morbis. Neq; utile est horrenda illa proponere populo ubi non inueniuntur. Prudentis autem pastoris est diligenter discernere quid cuiq; congruat ecclesiae, quid sit honestum, utile ac necessarium. Id urgeat. Quae uerò non sunt damnata diuino in scripturis iudicio & cōtra modò recensita capita non pugnāt, non sunt persequenda à nobis. Peccant enim grauius, qui pro peccatis damnāt quae Deus ipse non dānauit. Vae his, inquit, Deo dilectus Isaias, qui dicunt malum bonum, & bonum malum, qui ponunt tenebras lucem, & lucem tenebras, amarū dulce, & dulce amarum. Proinde nihil hic agendum nobis ex animi nostri arbitrio, sed iudicandum & agendū potius ex praescripto diuino. Cauendum praeterea ne more quorundam extenuemus scelera, sed ligonem, quod dicitur, ligonem, sicum sicum appellemus, & loquamur disertè, sed sobriè & uerecundè tamē. Absit quoq; fel amaritudinis & affectus carnis prauus. Absit petulantia linguae, absit dicacitas, obscenitas, scurrilitasq;, ne videamur & decorum praeterire & maledicendi libidine laborare, non feruere zelo Dei, ueritatis et iustitiae. Intelligant equi auditores nos affectu paterno obiurgare, ac seruandi studio, non perdendi, homines peccatores persequi, adeoq; scelus magis quam personam scelerati persequi. Dicendi enim libertas in ecclesia ministrorum uerbi Dei, spiritus est ingenuitas, non affectati & liuore egrotantis libido. Nec omnia ministris licent, nec conducunt omnia. Proinde nulli bono potest probari quorundam procax audacia scurrilisq; petulantia, qui non putant se suo fūctos officio, nisi plena cōuitiorū plaustra citra omnē modū et iudicium, effuderint exonerarintq; in miseros auditores. Huiusmodi rabulas non iuuant exempla prophetarum, quae praeteritis circumstantijs, non bene aptant. Sit autem increpatio aut obiurgatio ministrorū ueritatis prudens, potius quam audax,

Malz 5.

Modus accusandi scelera.

TIS NOSTRIS DEVS PLACARI.

audax, grauis & expensa, non leuis & effusa, ardeat non ira sed spiritus uehementia: sit uerecunda, modesta, iustaq; seueritate sanctè temperata, qua ipsa rei perspicuitate, euidentia & dignitate magis urgeat reum atq; constringat, quàm malorum uerborum copia pungat: hoc est, quæ scelerum uiuaci demonstratione & rerum malarum indignitate uel enormitate reos magis uulneret, quàm scommatis & impuris dictærijs exasperet. Et quidem ualde commouentur homines, cum clarè intelligunt res quas designant tendere cōtra Deum, & in excidium proprii corporis, inq; æternum animæ interitum.

Agnoscentia sunt
ac confitenda
peccata.

Frustra autem nulloq; cum fructu accusauerimus scelera, nisi simul & fidem uerferimus ac pœnitentiam. Non placatur iratus Dominus ceremonijs quibusdam & rebus uulgaribus, protrititis, ex traditione humana acceptis. Frustra me colunt, ait dominus, docentes doctrinas præcepta hominum. Imò indignissimè fert dominus, si pergamus cum illo redire in gratiam per cultum quendam Dei præposterum. Clamat enim apud Ieremiam, Emendate uias uestras & studia uestra, tum efficiam ut habitetis in loco isto. Sed ecce uos confiditis in rebus nihili. Num furando, occidendo, adulteria committendo, perfidè iurando, sequendoq; deos alienos, audebitis nihilominus uenire in conspectum meum, in domo ista quæ appellatur meo nomine, ac dicere, Liberati sumus, etiamsi cuncta hæc abominanda fecimus? Num spelunca latronum facta est domus mea? Proinde repudiata doctrina falsa, discamus ex uerbo Dei quæ Deo placeat conuersio, quæ uera sit pœnitentia & fides. Ergo post acrem peccatorum increpationem per ministros uerbi Dei factam, flagitat uerbum ueritatis à pijs auditoribus, ut agnoscant ex animo obiecta peccata, quæ designarunt contra legem Domini, confiteanturq; Deo omniscio & omnipotenti (cui omnium patent

Daniel. 9. cap.

corda) tribuantq; Deo, qui uerax, sanctus & iustus est, omnem gloriam, ipsis autem mendacium, scelera & ignominiam. Nam sanctus Ioannes Apostolus & Euangelista, Si dixerimus, inquit, peccatum nō habemus, nos ipsos fallimus, & Deum facimus mendacem, nec ulla est in nobis ueritas. Apud Ieremiam quoque legimus, Cur bonam facis uiam tuam cum sit mala? Dicis innocens sum: at ego te iudico. An non inuenitur sanguis pccperum sub alis tuis? Et in Euangelio dicit Dominus, Si cæci essetis, non haberetis peccatum: nunc uerò cum dicitis uidemus, idcirco peccatum uestrum manet. Ideoq; necessaria est ante omnia peccatorū agnitio & confessio. Præit hæc humiliationem corā Deo.

Humiliatione &
dolore opus.

Quisquis enim peccata sua agnoscit ac Deo confitetur ex animo, non potest non humiliari coram Deo. Gemit, dolet, & suspiria imo ducit ex pectore. Pudet illum toties & tam indignis modis offendisse patrem benignissimum: ideoq; abiicit sese in pulueres ad pedes domini. Ita uerò peccatrix illa in urbe dominum in conuiuio sedentem accedens, & Petrus post abnegatum dominum iam ex atrio pontificis egrediens, prostrati coram domino, profusissimas profundunt lachrymas. Clamat Dauid, Sagittæ tuæ in me defixæ sunt, & depressa est in me manus tua. Nihil integrum est in carne mea propter indignationem tuam: non

QVOMODO POSSIT IRATVS PECCA

est pax osibus meis propter peccatū meum. Nam iniquitates transcendunt caput meum, & grauiore sunt pondere quā sim ferendo. Ego iniquitatem meam fateor, & ob peccatum meum sollicitor, sed & anima mea territa est uehementer. Defatigatus sum in gemitu meo, fluctuare facio tota nocte lectum meum, lachrymis meis liquefacio. Expressit his uerbis grauem dolorem ex peccatorum agnitione conceptum enatumq̃, ac in ijs uerum nobis uera humiliatio nis exemplum reliquit.

Credamus peccata nobis condonata esse propter Christum.

Neque uerò fuerit satis agnoscere & confiteri peccata humiliariq̃ coram domino & dolere, nisi praeterea credamus peccata omnia nobis condonata esse propter Christum. Nam indoluit grauius Iudas propter proditum Christum: confessus est peccatum ingenuè, dicens, Peccaui, tradens sanguinem innoxium: imò pretium quoq̃ sanguinis acceptū à latronibus, restituit in templo, sed quia fide uera in dominum Iesum caruit, nihil dolor & professio profuit. Fides ergo docenda & urgenda erit imprimis, fides inquam qua credant pœnitentes remissa sibi esse peccata gratis propter Christum. Id quod apertis dei promissionibus & exemplis illustribus comprobare imò & demonstrare oportet. Nam fides ex auditu est, teste Apostolo, auditus autem per uerbum Dei. Atque hoc agendum uel demonstrandum est tanto diligentius, quanto grauius tentatur hac in re fidelium animi. Ex lege & prophetis (licet in ijs sint copiosissima) nulla profeceram testimonia, sed ex euangelicis duntaxat & Apostolicis literis, quae unice docent fidelibus gratis condonari peccata propter Christum. Clamat praecursor domini Baptista, digito in ipsum dominum Iesum extento, Ecce agnus Dei qui tollit peccatum mundi. Nam Ioannes apostolus dixit, Sanguis filij Dei emundat nos ab omni peccato. Ipse enim est propitiatio pro peccatis nostris, non pro nostris autem tantum, sed etiam pro peccatis totius mundi. Ipse uerò dominus Iesus testificans de his dicit, Sicut exaltauit Moses serpentem in deserto: ita oportet exaltari filium hominis, ut omnis qui credit in eum non pereat, sed habeat uitam aeternam. Paulus quoque apostolus testificatur & ait, Certus sermo & dignus quem modis omnibus amplectamur, quod Iesus Christus uenit in mundum ut saluos faciat peccatores. Nam & Petrus dixit, Christo omnes prophetae testimonium ferunt, quod remissionem peccatorum accepturus sit per nomē eius quisquis crediderit in eum. Exempla uerò remissionis gratuita et receptionis in gratiam Christi fidelium siue pœnitentium, innumera exhibet nobis scriptura praesertim euangelica. Huc enim pertinent exempla Matthaei, Zachaei, Peccatricis, Petri, Pauli, Latronis in cruce morientis, & multorum aliorum. Hac urgeat fidelis Christi minister in ecclesia constanter, ne quis mœrore absorptus & conscientia scelerum territus contabescat, desperet & conficiatur. Credat quisque sibi placatum esse patrem caelestem propter mortem, iustitiam, & redemptionem per Christum. Sola enim hac fide conceditur pax & tranquillitas perturbatis conscientijs.

Caterum

Iean. 1.
2. Ioan. 1. 2.

Ioan. 3.

2. Tim. 1.
Act. 10.

TIS NOSTRIS DEVS PLACARI.

Caterum fides qua credit nobis propter Christum, patrem cœlestem esse placatum, nec porro animaduersurum in nos propter delicta admissa, fides qua animos nostros serenat & tranquillās reddit conscientias, non omnem expectoratur solitudinem, neq. ullam inducit segnem inertiam, quin potius ad preces & ad omnia pietatis officia excitat. Credidit Abraham Deo, Verū ideo orare non desijt, imò quò certius se accepturum Dei promissiones credidit, hoc ardentius orauit. Minimè dubitauit Dauid se accepturū à domino quod hic ei promiserat, nihilo minus sine intermissione precatus est. Proinde admonendus erit nobis populus sedulo, ut nunquam desinat preces supplices effundere coram domino, quò ille misertus nostri propter Christum, auertat à nobis iram suam, fidem quoque veram donet & augeat, spiritu suo nos semper dirigat, deniq. ab omnibus liberet cum anima tum corporis nostri malis, pacem nobis & incolumitatem concedat: principibus & magistratui nostro donet sapientiā, prudentiam, fortitudinem, iustitiam & felicitatē. Cauendum erit tamē in precibus ne populus alium inuocet quàm solum Deum patrem per dilectum & unicū filium dominum nostrum Iesum Christum, ne sine fide & charitate inuocet. Qui enim dubitat in fide, non putet se quicquā accepturum. Et qui munus suum ad altare offert, prius recōcilietur cum fratre suo, quàm oblationem faciat. Retineat autem omnes in orandi studio quod in euangelio dixit dominus, Petite & dabitur vobis, querite & inuenietis, pulsate & aperietur vobis. Quisquis enim petit accipit, et quicumque querit inuenit, & pulsanti aperietur. An quisquam est, qui si filius eius petierit panem, lapidem daturus sit illi? aut si piscem petierit, num serpentem dabit illi? Si vos igitur cum sitis mali, nostis bona dare filiis vestris, quantò magis pater vester qui est in cœlis dabit bona, si postulaueritis ab eo.

Fides excitat
ad preces.

Licet Verò beatus Ieremias oraret aliquando strenuè & assiduè pro populo domini, audit tamē à domino. Et tu ne oraueris pro populo isto, neq. attollas pro illis clamorem et deprecationē, neq. interuenias apud me: quoniam nequaquam te audiam. An tu non vides quid isti faciant in Urbe & in agro? Filij colligunt ligna, & patres incendunt ignem, uxores autē farinam aqua conspersam subiungunt, ut placentas faciāt reginae cœli, & alienis dijs fundant libamina, me Verò ad iram prouocent. Proinde nemo putabit solis precibus licet prolixis aut frequentibus placari posse iram numinis, si illam interim irritare perrexerimus quotidianis flagitijs. Vrgeamus ergo populos nostræ commissos fidei, ut orent ardentè & indefinenter, simul autē & prauos mutet mores: hoc est, deposita auaritia, usura, superbia, incestu, adulterijs, fornicatione, luxuria, ebrietate, crapula, blasphemijs, obrectatione, idololatria, superstitione, impietate, ira, inuidia, corrupto & venali iudicio, effusione sanguinis, militia mercenaria iniusta, oppressione & contemptu pauperum, Deo seruiant in Christo beneficentia, liberalitate, humilitate, pudicitia, castitate, continentia, sobrietate, ieiunijs, benedictione, gratiarum actione, religione, pietate, lenitate, beneuolentia, iudicio & iustitia,

Vitendum præ
terea sanctè, iustè
& inculpate.

QVOMODO POSSIT IRATVS PECCA.

assertione & cura pauperum, fide, spe, charitate, amore patriæ, obedientia & spiritu, patientia & reliquis virtutibus. Verissimè enim pronunciauit sapientissimus mortalium Solomon, Qui aurem suam auertit ne audiat legem, eius precatio abominabilis est domino. Interim si faciamus omnia quæ præcepta sunt dicamus tamen, Serui inutiles sumus, quod debuimus facere fecimus. Sicuti docuit in Euangelio dominus. Credamus autem nos Deo propter Christum & merita Christi, non propter nos & propter merita nostra, Deo patri gratos atque acceptos esse.

Patientia & spe
opus immota.

Postremò opus erit ad hæc longanimi patientia & spe firma atque immota in omnibus periculis circumuenientibus nos, ne deficiamus à fide, ne & sp̃iā vacillemus in spe, aut sp̃em nostrā figamus in res perituras. Occurrat ergo oculis omnium illa egregia domini apud Isaiā sententia: Sedendo & quiescendo seruabimini: in vacando siue cessando & fidendo erit robur vestrum. Sed non voluistis, quin dixistis, Nequaquā: sed equis effugiemus. Fugietis igitur et concidet spes vestra ut ruptura ruens. In presenti itaque cōmodè eripienda confringendaque sunt hominibus omnia presidia quibus ferè niti solet hoc seculum, ut omnibus rebus destituti & nudati à solo pendeant cælo: media tamen instrumentaque concessa aut etiam mandata vel non prohibita à Deo non aspernentur, his tamē non plus tribuant, quàm ipsa permittit tribuere pietas, his omnino per se non fidant. Nisi enim dominus custodierit ciuitatem, frustra vigilat qui custodit eam. Nisi dominus vires & consilia suffecerit senatui alioqui sapientissimo vel exercitui etiam robustissimo & instructissimo, in momento oculi interit, implicatur ac dispergitur veluti puluis à facie venti. Atque huc mirum in modum quadrauerit prophetia Abdiæ: Nam miro compendio docet minimè praua litura quibus fidebant Idumæi, non loca natura & arte munita, non sapientiā, non opes, non fœdera, non milites exercitatissimos. Nam apud Ieremiam quoque ait dominus. Non gloriatur sapiens in sapientia sua, neque gloriatur robustus in robore suo, neque gloriatur diues in diuitijs suis: sed in hoc gloriatur qui gloriatur, quòd intelligat & cognoscat me, quòd ego sum dominus qui facio in terra misericordiam, iudicium & iustitiam: quapropter & his unice delector.

Summa omnium.

Iam ut conferamus omnia in summā, quæ hæcenus contulimus vobiscū, venerandi charissimique symmystæ & fratres, didicimus ex his omnibus iratū Deum peccatis nostris aliter placari nō posse, quàm si omnes agnoscamus & confiteamur peccata nostra quæ nobis obijcit verbum dei, & quæ contra Deum patrem nostrū designauimus: si humiliemur & ex animo doleamus corā domino Deo nostro: si non desperemus propter peccata, sed indubitatè credamus illa in uniuersum nobis ablata & cōdonata esse, nō propter nos aut propter merita nostra, sed propter Iesum Christū dominū nostrum saluatōrē totius mūdi, in quē omnia peccata mundi coaceruauit pater cælestis, quæ etiā idem Dei filius expiauit in cruce: si denique perseueremus in supplicatione continua & precibus perpetuis,

TIS NOSTRIS DEVS PLACARI.

tuis, ac demum vera pœnitentia dignisq; pœnitentiæ fructibus, spe firma, dilectione non simulata, beneficentia, iustitia, sanctimonia, patientia & innocentia seruiamus Deo qui redemit nos & cui addicti sumus toti.

Hanc verò esse unicam euadendi mala quæ nobis impendent viam, hanc esse unicam placandi numinis irati rationem, testatur vniuersa scriptura vtriusque testamenti. Decreuerat Deus Niniuitas subuertere, curauitq; illam subuersionem in tempore per clarissimum prophetam Ionam Niniuitis prædicari, consignato etiam dierum 40. numero, quo expleto corrueret vrbis. Verum ubi crederet Niniuitæ Deo, et pœnitentiâ agerent, iugibusq; precibus clamarent ad dominum, pepercit pœnitentibus Deus ac seruauit eos. Quid quod Iudæi impij & sacrilegis clamoribus ad crucem postularunt Iesum Christum dei filium saluatorem mundi? verum clamat & docet Petrus tantum nephas vera fide & fideli pœnitentia posse elui. Ne ergo dubitemus, fratres, de veritate tot & tam apertis asserta testimonijs.

Certissimam esse hanc rationem.

A. Ror. 3.

Scio quid contra hæc asserant quidam, frustra hæc inculcari de pœnitentia, quæ nihil sit effectura propter latam à Deo sententiam & propter decretum Dei immutabile, quo statuit nos excindere propter peccata. Ceterum si scripturam propius inspiciamus, non loquitur ipsa adeo rigidè de decreto Dei. Nam apud Ieremiam hæc legimus verba, Repente loquar aduersus gentem & regnum ut eradicem & destruam & perdam illud: si verò pœnitentiam egerit gens illa à malo suo contra quod loquutus sum, agam & ego pœnitentiam super malo quod cogitavi ut facerem ei. Exemplum appositissimum iam iam adduxi ex Iona propheta de Niniuitis, contra quos lata fuerat sententia excidij, sed reuocabatur illa protinus, ad pœnitentiam Niniuitarum. Nam excidij decretum non alia erat latum conditione, quàm si manerent impœnitentes. Similis locus extat Deutero. 9. capite. Moses enim dicit, Procidi coram domino quadraginta diebus & quadraginta noctibus, quoniam dixerat dominus quod vellet vos delere. Oraui igitur ad dominum, ac placatus est furor eius. Proinde neminem à pœnitentia, vel precibus pertinacibus, retrahat decretum dei contra peccatores pronunciatum, quod ut immutabile est contra impios, ita nihil officit pœnitentibus.

De decreto Dei contra peccatores.

Ierem. 18.

Porro obijcientibus peccata patrum nostrorum, respondit iam olim Ezechiel in capite 18. Persequitur enim grauitè parabolam, quam suo quoque iactabant tempore contra pœnitentiam dicentes, Patres comederunt vnam acerbam & dentes filiorum obstupuerunt. Post longam verò disputationem tandem insert, Anima quæ peccauerit, ipsa morietur: filius non portabit iniquitatem patris, neque pater portabit iniquitatem filij: sed iustitia iusti erit super eum: & impietas impij erit super eum.

Peccata patrum pœnitentibus uocis officiant.

Scio non omnes agere pœnitentiam commissorum scelerum. Ergone inanis erit pœnitentia fidelium? Legimus nō rarò parsum multis peccatoribus propter

Non est inanis pœnitentia fidelium.

QVOMODO POSSIT IRATVS PECCA-

pauculos probos atque iustos. Præterea dicit dominus apud Isaiam disertè, Dicite iusto quòd bene ei erit, siquidem fructu studiorum suorum fruetur. Va impio malo, quoniam secundum opera manuum suarum rependetur ei. Ita enim educitur per angelos Lot iustus ex urbe Sodomorum, igni cælesti concrematur urbs scelerata cum omnibus inhabitantibus. Liberatur ex imminente periculo & ab Assyrijs iam urbem aggredi volentibus Ezechias rex fidelis, inglorius perit Sobna cæcellarius. Capitur & in captiuitatem abducitur rex Zedechias, liberatur à morte & libertate donatur Ieremias. Vnde verissimè dixit sanctus Petrus, Nouit dominus pios à tentatione eripere, iniustos autem in diem iudicij puniendos seruare. Studeamus ergo virtutibus constanter. Non erit labor noster frustraneus. Si communi aliqua calamitate orbem uisitarit dominus propter enormia scelera atq; nephanda flagitia, non obliuiscetur timentium & inuocantium nomen eius, tametsi paribus cum impijs inuoluti malis, videantur similem cum impijs sortiri finem.

Impoenitentes
percutiunt.

Certum enim est, regnum aut rempublicam pœnitere nesciam & impiam atq; contumacem, non posse diu subsistere. Nec proderit huiusmodi contemptoribus Dei & legum diuinarum euangelica prædicatio. Rursus enim apud Ieremiam dicit dominus, Subitò loquar de gente & de regno ut adificem & plantem illud. Si fecerit malum in oculis meis ut non audiat vocem meam, pœnitentiam agam super bono quod loquutus sum ut facerem ei. Nemo tamen censens populum ad scelera procliuem ruere de peccato in peccatum, mox despons deat animum. Si uideris multos pertinaci improbitatis studio perrumpere, indurato & tu animum tuum, ac non segniore studio boni & veri te illis oppone. Hic enim memores simus oportet uerborum Apostoli dicentis, Oportet seruum domini placidum esse erga omnes, propensum ad docendum, tolerantem malos cum mansuetudine, erudiantem eos qui obsistunt, si quando det illis deus pœnitentiam ad agnoscendum ueritatem, ut resipiscant è diaboli laqueo capti ab eo ad ipsius uoluntatem. Magna uerò sunt nobis proposita præmia, fratres, si fuerimus fideles & strenui: infidelibus & ignauis contra paratum est supplicium horrendum, cum perpetua ignominia. Vigilemus ergo & oremus. Semper obuersetur oculis & animis nostris hac domini nostri Iesu Christi doctrina, O quàm præstans res est fidelis seruus & prudens, quem præfecit dominus famulus suo ut det illis cibum in tempore. Beatus seruus ille, quem cum uenerit dominus eius inuenerit sic facientem. Amen dico uobis, quoniam super omnia bona constituet eum. Quòd si dixerit seruus ille malus in corde suo, Cunctatur dominus meus uenire, cæperitq; percutere conseruos, imò edere et bibere cū ebrijs, ueniet dominus serui illius, in die quo nō expectat & hora qua ignorat, et discabit eum, partemq; eius ponet cum hypocritis: illic erit ploratus & stridor dentium. Hæc inquam semper obuersentur oculis & animis nostris. Oremus præterea, spiritum illum suum principalem nobis concedat, & in diem augeat, ut
eius

2. Tim. 3.

Matth. 24.

TIS NOSTRIS DEVS PLACARI.

eius instinctu & ductu fideliter, prudenter & multo cum fructu faciamus officium nobis iniunctum à domino.

Ego certè ut meam operam vobis collocarem, iuuarem studia vestra, iam occasionem singulis præberem cogitandi & indagandi ampliora, scripsi sermones hos, non quibus verbotim uteretur quæque in sibi credita ecclesia. Opus est enim delectu & iudicio, ne videlicet dicamus aliena aut parum utilia & necessaria ecclesie nostræ. Prudens pastor diligenter consideret quales sint mores sibi crediti populi, quæ illi maximè necessaria, ea verò illis proponat, semper spectans adificationem, fidem veram, pietatem, charitatem & innocentiam. Docendum enim & adhortandum, ut pia & sancta sit ecclesia, cui nos præesse voluit dominus. Ego formulas aliquot Sermonum propono, illis quoque gratificaturus qui hoc à me annis iam multis postularunt. In omnibus his & per omnia volo valere apud omnes lectores illam iustissimam Apostoli regulam, Omnia probate, quod bonum est tenete. Nec admodum curo eorum calumnias qui clamant huiusmodi Sermonibus segnes reddi fratres, sicuti quondam est factum cum legerentur sermones Discipuli & Pelbarti. Habeo enim pro me exemplum maximorum in ecclesia luminum, præstantissimorum inquam in ecclesia episcoporum, qui & ipsi non sine utilitate ecclesie conscripserunt Sermones & Homelias. Inertes semper manent inertes, etiam si nihil prorsus scribatur. Preposui his symbola vetustissima cum antiquissimorum Conciliorum in ecclesia, tum patrum siue episcoporum maximè orthodoxorum, non alio consilio quàm ut manifestum facerem, doctrinam nostram ac fidem, quæ hodie apud multos pessimè audit & hæreseos accusatur indignissimè, consensum habere cum doctrina apostolica & veteris ecclesie, quæ ab initio non aliud tradidit credendum & docendum quàm hodie in ecclesijs nostris credimus & docemus. Innocentius tertius eius nominis, ausus est primus plures attexere articulos quàm nobis exhibeant vetera Christianæ fidei symbola. Extat eius symbolum in Decretalibus cap. Firmiter credimus. At tenuit ille sedem Romanam circa annum domini 1215. ediditq; symbolum ex concilio Lateranensi.

Vos autem quoniam scitis fratres cui credidistis, & quod doctrina fidei nostra Christiana, apostolica, catholica, orthodoxa & vera, antiqua & indubitata fides & doctrina est, perseverate in illa tenenda & docenda. Vincet in æternum Veritas, quæ premi quidem potest, opprimi non potest. Veritas domini, ait propheta, manet in æternum. Et porta inferorum, ait dominus in Evangelio, non praualebunt aduersus eam, nimirum ecclesiam in petram collocatam, quam confessus est Petrus dicens, Tu es Christus filius Dei viui: & de qua Paulus disputans dicit, Petra autem erat Christus. Fundamentum enim aliud poni non potest, quàm quod positum est, quod est Christus Iesus. Nam & spiritus sanctus per prophetas prædixit, Ecce pono in Sion lapidem angularem seu fundamenti, electum, pretiosum: qui crediderit in eo, non pudebit.

QVOMODO POSSIT IRATVS PEC. &c.

Imponamus ergo huic fundamento Christo domino, qui alibi appellatur fundamentum prophetarum & apostolorum, populos aut ecclesias nostra fidei creditas, ut iuxta doctrinam beati Petri doctoris ecclesie nostra, ipsi quoque veluti vivi lapides edificemur, domus spiritualis, sacerdotium sanctum ad offerendum spirituales hostias acceptabiles Deo per Iesum Christum dominum nostrum. Id si bona fide fecerimus, nunquam deseret nos dominus. Siue enim uiuamus siue moriamur, erit dominus petra, merces, & retributio nostra.

Labores uero hosce meos benignè suscipite & boni consulite. Prodeu nbi vestro omnium nomine, quos amo ex animo, quibus inservire cupio fideliter.

Valete memores semper horum Apostoli verborum. Videte ministerium quod accepistis à domino ut illud impleatis. Tiguri

prima Martij, Anno domini 1549.

Vester ex animo frater & symmysta
Heinrychus Bullingerus.



DE QVATVOR VNIVERSALIBVS

SYNODIS SIVE CONCILIIS.

ATEMPORIBVS Apostolorum multa per uarias prouincias celebrata sunt Concilia. Ea tunc erant Synodi uel conuentus Episcoporum atq; sanctorum, coeuntium ad consultandū de seruanda puritate fidei, unitate doctrinæ, de disciplina atq; Pace ecclesiarum. Non pauca huiusmodi exhibent nobis Epistolæ beati martyris Cypriani.

Prima uerò generalis siue uniuersalis Synodus conuocata dicitur ab Imperatore beatissimo Constantino in urbe Nicæa, anno Domini 324. *Nicæna Synodus.* contra Arrium & eius complices, negantes naturalē Domini nostri Iesu Christi deitatem. Ac conuenerunt ex omnibus quæ sub cœlo sunt nationibus Episcopi & uiri excellentiores 218. conscripseruntq; symbolum quod appellatur Symbolum Nicænum.

Sufficiebat hætenus symbolum Apostolorum, & suffecisset ecclesiæ Christi etiam Constantini seculo. Confitentur enim omnes, omnes ecclesias non alio symbolo, quàm Apostolico (quod prima Decade & recitamus & exponimus) usas, eodemq; fuisse per totum terrarum orbem contentas. Quoniam uerò Constantini magni ætate emerfit impius & blasphemus Arrius, qui Christianæ fidei puritatē corrupit, & simplicitatem doctrinæ Apostolicæ peruertit, coacti sunt ipsa necessitate ecclesiarū ministri sese impostori opponere, ac symbolo edito ueram, id est ueterem fidei confessionem (damnata Arrii nouitate) declarando ex scripturis canonicis illustrare. Neq; enim & in alijs mox sequentibus tribus concilijs generalibus, editis symbolis, quicquam mutatum est in doctrina Apostolorum, neq; quicquam noui adiectum, quod prius ex scriptura sancta ecclesiæ Christi non habuerunt & crediderunt, sed corruptionibus nouitatibusq; hæreticorum antiqua ueritas illustrata per symbola prudenter, utiliter & religiose est opposita. Scriptura autem prophetica & Apostolica in hisce omnibus est fons, directio, regula & iudex: nihil hic suo permiserunt arbitrio patres. Ac significanter loquor de Symbolis illis priscis duntaxat, non etiam de omnibus constitutionibus aut canonibus: quibus tantum tribuimus quantum permittit scriptura canonica, quam confitemur unicum esse iudicandi, dicendi, agendiq; canonem.

Secunda Synodus generalis celebrata est Constantinopoli in urbe regia, sub imperio Gratiani Cæsaris, anno Domini 384. *Synodus Constantinop.* Conuenerunt in ea patres seu Episcopi, teste Prospero Aquitanico, 180. damnaruntq; Macedonium & Eudoxium, negantes spiritum sanctum esse Deum.

*Synodus Ephes.
ana.*

At circa annum Domini 434. eo ipso anno quo beatus pater Augustinus excessit è uiuis, regnante Theodosio magno & religioso principe, Ephesi conuenit Synodus tertia sacerdotum plus minus 200. contra Nestorium, mysterium incarnationis lacerantem, docentemq; duos esse filios, Alium Dei, alium uerò hominis: quem & condemnauit unà cum multis Pelagianis qui cognatum sibi dogma iuuabant.

Synodus Chalcedonensis.

Quarta uniuersalis Synodus congregatur anno Domini 454. sub Martiano principe, Chalcedoni, conuenientibus patribus 630. qui secundum scripturas damnarunt Eutychem, confundentem naturas in Christo propter personæ unitatem.

Beda de ratione temporum, & alij scriptores multi, coniungunt quatuor his œcumenicis concilijs adhuc duas generales Synodos, quintam & sextam, Constantinopoli celebratas. Quinta enim sub Iustiniانو Imperatore conuenit contra Theodorum & omnes hæreticos, circa annum Domini 552. Sexta conijt sub Constantino Constantis filio, anno Domini 682. Conuenerunt autem Episcopi 289. contra Monothelitas. Nihil tamen definitum est in his, quod non reperiatur in Symbolis superiorum quatuor conciliorum, Vnde ex his nihil annotaui.

Symbolum Nicænum ex historia Ecclesiastica & Tripartita.

CRedimus in unum Deum, patrem omnipotentem, omnium uisibilium & inuisibilium factorem. Et in unum Dominum Iesum Christum filium Dei, de patre natum unigenitum, id est, ex substantia patris, Deum ex Deo, lumen ex lumine, Deum uerum ex Deo uero, genitum non factum, *ὁμοούσιον*, consubstantialem patri, per quem omnia facta sunt, quæ in coelis & quæ in terra. Qui propter nos homines & propter nostram salutem descendit, incarnatus, humanatus (homo factus est.) Passus est, & resurrexit tertia die, ascendit in coelos, uenturus iudicare uiuos & mortuos. Et in spiritum sanctum. Eos autem qui dicunt, Erat aliquando quando non erat, & antequam nasceretur non erat: & quia ex non ex tantibus (ex nihilo) factus est, aut ex altera substantia uel substantia, dicentes esse uel creatum uel conuertibilem uel mutabilem filium Dei, hos anathematizat sancta catholica & Apostolica ecclesia.

Symbolum Constantinopolitanum ex exemplari quodam Græcolat.

CRedo in unum Deum, patrem omnipotentem, factorem coeli & terræ, uisibilium omnium & inuisibilium.

Et in unum Dominum Iesum Christum filium Dei unigenitum, ex patre natum ante omnia secula, lumen ex lumine, Deum uerum ex Deo uero,

uero, genitum, non factum, consubstantialem patri per quem omnia facta sunt.

Qui propter nos homines & propter nostram salutem descendit de coelis, & incarnatus ex spiritu sancto & Maria uirgine, & homo factus est. Crucifixus etiam pro nobis sub Pontio Pilato, passus & sepultus est. Et resurrexit tertia die secundum scripturas. Et ascendit in coelos, & sedet ad dexteram Dei patris. Et iterum uenturus est cum gloria iudicare uiuos & mortuos, cuius regni non erit finis.

Et in spiritum sanctum Dominum uiuificantem, ex patre procedentem, & cum patre & filio coadorandum & conglorificandū. Qui loquutus est per prophetas in unam catholicam & Apostolicam ecclesiam.

Confiteor unum baptisma in remissionem peccatorum. Expecto resurrectionem mortuorum: & uitam uenturi seculi.

Fides vel confessio fidei Ephesinae Synodi.

Quoniam per compendium hic omnia consignamus, non licuit copiosam S. Cyrilli ad Nestorium synodalem Epistolam, qua continetur decretum Ephesinae Synodi, describendo his inferere: delegi magis ex eiusdem Cyrilli Epistola 28. confessionem breuem in Synodum missam, ac à tota Synodo comprobata. Præmittuntur confessioni hæc uerba, Quemadmodum initio ex diuinis scripturis & sanctorum patrum traditione accepimus, breuiter dicemus, nihil omnino fidei in Nicæa à sanctis patribus expositæ addentes. Hæc enim sufficiens est cum ad omnem pietatis cognitionem, tum ad cuiusuis hæreticæ prauitatis abdicationem. Paulo autem post hæc ponitur confessio in hæc uerba,

Confitemur Dominum nostrum Iesum Christum filium Dei unigenitum, Deum esse perfectum & hominem perfectum, ex anima rationali & corpore, ante secula quidem ex patre secundum diuinitatem, postremis uerò diebus eundem ipsum propter nos & propter nostram salutem ex Maria uirgine, secundum humanitatem natum. Duarum siquidem naturarum facta est unio. Quapropter & unum Christum, unum filium, & unum Dominum confitemur. Et secundum hunc inconfusæ unitatis intellectum, sanctam uirginem Deiparam esse confitemur: propterea quòd Deus uerbum incarnatus & homo factus est, & ex ipsa conceptione acceptum ex ea templum sibi ipsi adunauit. Euangelicas uerò & Apostolicas de Domino uoces, scimus uiros theologos, tanquam ad unam personam pertinentes, ratione duarum naturarum, diuidere, & alias quidem, utpote diuinitati competentes, ad diuinitatem Christi, alias uerò humiles, ad illius humanitatem referre.

Huc confessioni Cyrillus hæc subiungit uerba, Cum sacras istas uestras uoces legissemus (nimirum in Synodo in quam missa erat confessio) nosq; ipsos etiam ad hunc modum sentire deprehendissemus (unus enim Dominus, una fides, & unum baptisma (glorificauimus omniū seruatore Deum, mutuò nobis congratulantes, quòd ecclesiæ cum nostræ tum uestræ fidem habent diuinis scripturis & traditioni sanctorum patrum conuenientem.

Confessio fidei Chalcedonensis Synodi, ex libro Isidori.

Post recitata Symbola Nicenæ & Constantinopolitanæ Synodorum, & interiectis uerbis aliquot, mox in hæc uerba definit sancta Chalcedonensis Synodus.

Consentientes itaq; sanctis patribus, unum eundemq; filium confiteri Dominum nostrum Iesum Christum consona uoce edocemus, pariter perfectum eundem in deitate Deum, & hominem uerum eundem ex anima rationali & corpore: secundum diuinitatem unius cum patre naturæ: secundum humanitatem eundem unius naturæ nobiscum, per omnia similem nobis, absque peccato. Ante secula quidem ex patre natum secundum diuinitatem: in nouissimis uerò diebus eundem propter nos & propter nostram salutem hominem factum. Hunc unum eundemq; Christum filium Dominum unigenitum * in duas naturas inconfusè, immutabiliter, indiuisè, inseparabiliter cognoscendum, in nullo naturarum differentias propter unitatē perimendas, magis autem salua utriusq; naturæ proprietate, * & in una coeunte persona unoq; statu concurrente, nō in duabus personis partiendum uel diuidendum, sed unum eundemq; filium unigenitū Deum uerbum Dominum Iesum Christum: sicut ab exordio prophetæ de eo, & ipse nos erudiuit, & nobis patrum tradidit Symbolū. His ergo cum omni undiq; diligentia & sollicitudine à nobis ordinatis, statuit sancta & uniuersalis Synodus, aliam fidē nulli licere profiteri, aut scribere, aut docere, aut dicere aliter.

* in duabus naturis.

* & in unam personam & in unam substantiam concurrente.

Decretum Synodi Chalcedonensis non pugnare cum doctrina beati Cyrilli Episcopi ex 5. lib. sancti Vigilij martyris contra Eutychen.

Sed iam ultimū decreti capitulum uideamus ex Decreto Synodi Chalcedonensis. Vnum eundemq; Christum Dominum unigenitū (confitemur (in duabus naturis inconfusè, inconuertibiliter, indiuisè, inseparabiliter cognoscendum, nusquam duarum naturarum diuersitate euacuata propter unionem, salua magis proprietate utriusq; nature, in unam personam atque substantiam conuenientibus, non ut in duas personas diuisum

diuifum aut segregatum, fed unum eundemq; unigenitum filium Deum uerbum Dominum Iefum Chriftum.

In hoc capitulo hoc eis displicet quod dixerunt, Salua proprietate utriusque naturæ: uel, Non euacuata naturarum differentia: quæ ut firma eſſe perdoceant, conſueta uerborum prolixitate & inani aſſertione utentes, multa de Cyrilli capitulis interponunt teſtimonia, quibus ille in Chriſto non duas negat naturas, ſed unam docet eſſe perſonam. Ne igitur ſoli eos noſtra diſputatione refutemus, Cyrilli etiam nos uerba ponamus, ut quomodo Cyrillo teſte nituntur, Cyrillo teſte uincantur. Ex Synodiciſ Cyrilli ad Neſtorium literis hæc ſunt, Non enim dicimus, inquit, quod diuina natura conuerſa uel immutata facta ſit caro, nec quod in totum hominem, quod ex anima eſt & corpore, transformata ſit, ſed illud magis quod carnem animatam rationabile ſibi copulauerit uerbum ſubſtancialiter, ineffabiliter & indeprehenſibiliter factus ſit homo, & nuncupatus ſit etiam filius hominis, non nudæ tantummodo uoluntatis, ſed nec aſſumptione ſola perſonæ, ſed quod diuerſæ quodam modo naturæ in unum conuenerint. Vnus tamen ex ambabus Chriſtus & filius, non euacuata aut ſublata diuerſitate naturarum, per coniunctionem, ſed quia ſimul effecerunt nobis unum Dominum & Chriſtum & filium, id eſt diuinitas & humanitas per arcanam illam ineffabilemque copulationem ad unitatem. Quid hoc maniſeſtius? quid clarius ad conſonantiam Synodici decreti Chalcedonenſis ex literis Cyrilli potuit demonſtrari? Ecce nec dicta dictis, nec ſententiæ ſententijs aduerſantur, ſed ſicut uno fidei ſenſu, ita iſdem penè uſi ſunt uerbis. Dixit ſancta Synodus, Nuſquam duarum naturarum diuerſitate euacuata. Dixit beatus Cyrillus, Non euacuata aut ſublata diuerſitate naturarum per coniunctionem. Dixit ſancta Synodus, Vtriſque naturis in una perſona conuenientibus. Dixit beatus Cyrillus, Non nudæ tantummodo uoluntatis, ſed nec aſſumptione ſola perſonæ, ſed quod diuerſæ quodammodo naturæ in unum conuenerint. Dixit ſancta Synodus, Non in duas perſonas diuiſum, ſed unum eundemque Chriſtum. Dixit beatus Cyrillus, Vnus tamen ex ambabus, id eſt, naturis Chriſtus filius. Et iterum, Sed quia ſimul nobis effecerunt unum Dominum Chriſtum & filium, id eſt, diuinitas & humanitas, &c.

Symbolum Toletani Concilij primi, regnantibus Honorio & Arcadio, ex libro Iſidori.

Circa annum
domini 400.

CRedimus in unum uerum Deum, patrem omnipotentem & filium & ſpiritum ſanctum, uiſibilem & inuiſibilem factorem, per quem omnia facta ſunt in cœlo & in terra: unum Deum & unam eſſe diuinæ

substantiae trinitatem. Patrem autem non esse filium ipsum, sed habere filium, qui pater non sit, Filium non esse patrem, sed filium Dei de patris esse natura. Spiritum quoque esse paracletum, qui nec pater sit ipse, nec filius, sed à patre filioque procedens. Est ergo ingenitus pater, genitus filius, non genitus paracletus, sed à patre filioque procedens. Pater est cuius uox hæc audita est de coelis, Hic est filius meus dilectus, in quo mihi bene complacui; ipsum audite. Filius est qui ait, Ego à patre exiui & à Deo ueni in hunc mundum. Paracletus est spiritus de quo filius ait, Nisi ego abiero ad patrem, paracletus non ueniet. Hanc trinitatem personis distinctam, substantia unicam, uirtute & potestate & maiestate indiuisibilem, indifferentem, præter hanc nullam credimus diuinam esse naturam, uel angeli, uel spiritus, uel uirtutis alicuius quæ Deus credatur.

Hunc ergo filium Dei, Deum genitum à patre ante omne omnino principium, sanctificasse uterum uirginis Mariæ, atque ex ea uerum hominem sine uirili generatum semine suscepisse, duabus duntaxat naturis, id est, deitatis & carnis, in unam conuenientibus omnino personam, id est, Dominum nostrum Iesum Christum. Nec imaginarium corpus aut phantasmatis alicuius in eo fuisse, sed solidum atque uerum, hunc & eluserisse, & sitisse, & docuisse, & fleuisse, & omnes corporis iniurias pertulisse. Postremo à ludæis crucifixum & sepultum, & tertia die resurrexisse, conuersatum postmodum cum discipulis suis, & quadragesima post resurrectionem die ad coelum ascendisse. Hunc filium hominis etiam filium Dei, & filium Dei & filium hominis appellamus.

Resurrectionem uerò futuram humanæ credimus carnis; animam autem hominis non diuinæ esse substantiæ aut Dei patris, sed creaturam Dei uoluntate creatam.

Symbolum Toletani Concilij quarti, ex libro Isidori.

Quemadmodum à sanctis patribus accepimus patrem & filium & spiritum sanctum unius Deitatis atque substantiæ, confitemur in personarum diuersitate trinitatem credentes, in diuinitate unitatem prædicantes, nec personas confundimus, nec substantiam separamus. Patrem à nullo factum uel genitum dicimus: filium à patre non factum, sed genitum asserimus: spiritum sanctum uerò nec creatum nec genitum, sed procedentem ex patre & filio profiteamur. Ipsum autem Dominum Iesum Christum Dei filium & creatorem omnium ex substantia patris ante secula genitum descendisse ultimo tempore pro redemptione mundi à patre, qui nunquam desinit esse cum patre. Incarnatus est enim ex spiritu sancto & gloriosa sancta Dei genitrice uirgine Maria, & natus ex ipsa solus

solus idem Dominus Iesus Christus, unus in sancta trinitate, anima & carne perfectus, sine peccato suscipiens hominem, manens quod erat, assumens quod non erat: æqualis patri secundum diuinitatem, minor patre secundum humanitatem, habens in una persona duarum naturarum proprietatem. Naturæ enim in illo duæ, Deus & homo. Non autem duo filij uel duo dñj, sed idem una persona in utraq; natura perferens passionem & mortem pro nostra salute: non in uirtute diuinitatis, sed in infirmitate humanitatis. Descendit ad inferos, ut sanctos qui ibi tenebantur erueret. Et deuicto mortis imperio resurrexit. Assumptus in cœlos, unde uenturus est iudicare uiuos & mortuos. Cuius morte & sanguine mundati remissionem peccatorum consequuti sumus, resuscitandi ab eo in die nouissima, in ea qua nunc uiuimus carne, in ea qua resurrexit idem Dominus forma, percepturi ab ipso, alij pro iustitiæ meritis uitam æternam, alij pro peccatis supplicij æterni sententiam. Hæc est ecclesiæ Catholicæ fides, hanc confessionem seruamus atq; tenemus, quam quisquis firmissimè custodierit, perpetuam salutem habebit.

Expositio fidei seu prædicationis euangelicæ & apostolicæ veritatis, per beatum martyrem Irenæum, ex libro eius 1. capite 2. contra Valent.

Circa annum
domini 185.

Ecclēsia per uniuersum orbem usq; ad fines terræ dispersa, ab apostolis & ipsorum discipulis eam accepit fidem, quæ est in unum Deum patrem omnipotentem, qui fecit cœlum & terram, mare & omnia quæ in eis sunt. Et in unum Iesum Christum filium Dei incarnatum pro nostra salute. Et in spiritum sanctum, qui per prophetas prædicauit dispensationis mysterium & aduentum, & ex uirgine natiuitatem et passionem & resurrectionem ex mortuis, & in carne ad cœlos ascensionem dilecti Iesu Christi Domini nostri: & ipsius ex cœlis in gloria patris aduentum ad instauranda omnia & resuscitandam omnem humani generis carnem, ut Christo Iesu Domino nostro, & Deo, & saluatori, & regi, iuxta uoluntatem patris inuisibilis, omne genu flectatur cœlestium & terrestrium ac infernorum, & omnis lingua confiteatur ipsi, & iudicium iustum in omnibus faciat: & spiritalia quidem nequitiei & angelos transgressores ac desertores factos, & impios ac iniustos, & iniquos & blasphemos homines in æternum ignem mittat: iustis uerò & sanctis & qui mandata eius seruauerunt & in dilectione eius permanserunt, partim ab initio, partim ex pœnitentia, uitam largitus, incorruptibilitatem donet & gloriam æternam tribuat.

Hanc prædicationem & hanc fidem, ecclesia, uelut dixi, adepta, quam per totum orbem dispersa, diligenter conseruat, quasi unam do-

num inhabitans; & similiter his credit uelut unam animam & idem cor habens, & consonè hæc prædicat & docet ac tradit uelut uno ore prædita. Nam lingue in mundo dissimiles sunt, uerùm uirtus traditionis una & eadem est. Neq; in Germania fundatæ ecclesiæ aliter credunt aut aliter tradunt; neq; in Hispanijs, neq; in Celtis, neq; in Oriente, neq; in Aegypto, neq; in Lybia, neq; hæc quæ in mundo constitutæ sunt: sed quem admodum sol creatura Dei, in toto mundo unus & idem est, sic etiam prædicatio ueritatis ubique lucet & illuminat omnes homines ad cognitionem ueritatis uenire uolentes. Et neq; qui ualde potens est in dicendo, ex ecclesiæ præfectis, alia ab his dicet. Nemo enim est super magistrum. Neq; debilis in dicendo hanc traditionem imminuet. Cum enim una & eadem fides sit, neq; is qui multum de ipsa dicere potest, plus quàm oportet dicit; neq; qui parum, ipsam imminuit.

Lege præterea eiusdem lib. 3. contra Valent. cap. 4. & uidebis ipsum Traditionis apostolicæ uocabulo intelligere Symbolum apostolorum.

Circa annum
domini 210.

Regula fidei secundum Tertullianum, ex libro eius de Præscriptionibus hæreticorum.

Regula est autem fidei, ut iam hinc quid credamus profiteamur, illa scilicet qua creditur unum omnino Deum esse, nec alium præter mundi creatorem, qui uniuersa de nihilo produxerit per uerbum suum primò omnium emissum. Id uerbum filius eius appellatum, in nomine Dei uariè uisum patriarchis, in prophetis semper auditum, postremò de latum ex spiritu patris Dei & uirtute, in uirginem Mariam, carnem factum in utero eius & ex ea natum, egisse Iesum Christum, exinde prædicasse nouam legem, & nouam promissionem regni cœlorum, uirtutes fecisse, sedisse ad dexteram patris, fixum cruci, tertia die resurrexisse: in cœlos ereptum, sedere ad dexteram patris, misisse uicariam uim spiritus sancti qui credentes agat: uenturum cum claritate ad sumendos sanctos in uitæ æternæ & promissorum cœlestium fructum: & ad prophanos iudicandos igni perpetuo, facta utriusque partis resurrectione cum carnis restitutione.

Hæc regula à Christo, ut probabitur, instituta, nullas habet apud nos quæstiones, nisi quas hæreses inferunt & quæ hæreticos faciunt.

Circa annum
domini 333.

Symbolum beati Athanasij Alexandrini episcopi, ex libris eius.

Quicumq; uult saluus esse, ante omnia opus est ut teneat catholicam fidem, quam nisi quisq; integram inuiolatamq; seruauerit, absque dubio in æternum peribit.

Fides

Fides autem catholica hæc est, ut unum Deum in trinitate, & trinitatem in unitate ueneremur; neque confundentes personas, neque substantiam separantes.

Alia est enim persona patris, alia filij, alia spiritus sancti: sed patris & filij & spiritus sancti una est diuinitas, æqualis gloria, coæterna maiestas.

Qualis pater, talis filius, talis spiritus sanctus. Increatus pater, increatus filius, increatus spiritus sanctus. Imensus pater, imensus filius, imensus spiritus sanctus. Aeternus pater, æternus filius, æternus spiritus sanctus. Et tamen non tres æterni, sed unus æternus: sicut non tres increati, nec tres immensi, sed unus increatus & unus imensus.

Similiter omnipotens pater, omnipotens filius, omnipotens spiritus sanctus. Et tamen non tres omnipotentes, sed unus omnipotens. Ita Deus pater, Deus filius, Deus spiritus sanctus. Et tamen non tres dñi, sed unus est Deus. Ita Dominus pater, Dominus filius, Dominus spiritus sanctus. Et tamen non tres Domini, sed unus est Dominus.

Quia sicut sigillatim unamquamque personam Deum aut Dominum confiteri Christiana ueritate compellimur: ita tres deos aut dominos dicere catholica religione prohibemur.

Pater à nullo est factus, nec creatus, nec genitus. Filius à patre solo est, non factus nec creatus, sed genitus. Spiritus sanctus à patre & filio non factus nec creatus nec genitus, sed procedens. Vnus ergo pater, non tres patres; unus filius, non tres filij; unus spiritus sanctus, non tres spiritus sancti.

Et in hac trinitate nihil prius aut posterius, nihil maius aut minus: sed totæ tres personæ coæternæ sibi sunt & coæquales. Ita ut per omnia, sicut iam dictum est, & unitas in trinitate, & trinitas in unitate ueneranda sit. Qui uult ergo saluus esse, ita de trinitate sentiat.

Sed necessarium est ad æternam salutem, ut incarnationem quoque Domini nostri Iesu Christi fideliter credat. Est ergo fides recta, ut credamus & confiteamur, quia Dominus noster Iesus Christus, Dei filius, Deus & homo est.

Deus est ex substantia patris ante secula genitus; & homo ex substantia matris in seculo natus. Perfectus Deus, perfectus homo, ex anima rationali & humana carne subsistens. Aequalis patri secundum diuinitatem, minor patre secundum humanitatem.

Qui licet Deus sit & homo, non duo tamen, sed unus est Christus. Vnus autem non conuersione diuinitatis in carnem, sed assumptione humanitatis in Deum. Vnus omnino non confusione substantiæ, sed unitate personæ. Nam sicut anima rationalis & caro unus est homo, ita Deus & homo unus est Christus.

CHRISTIANAE FIDEI.

Qui passus est pro salute nostra; descendit ad inferos, tertia die resurrexit à mortuis. Ascendit ad coelos: sedet ad dexteram Dei patris omnipotentis: inde uenturus est iudicare uiuos & mortuos.

Ad cuius aduentum omnes homines resurgent cum corporibus suis, & redditori sunt de factis proprijs rationem. Et qui bona egerunt, ibunt in uitam æternam: qui uerò mala, in ignem æternum.

Hæc est fides catholica, quam nisi quisque fideliter firmiterque crediderit, saluus esse non poterit.

Circa annum
domini 376.

Symbolum beati Damasi Romani episcopi, ex 2. tomo operum
S. Hieronymi.

CRedimus in unum Deum patrem omnipotentem, & in unum Dominum nostrum Iesum Christum dei filium, & in spiritum sanctum. Deum non tres deos, sed patrem, filium & spiritum sanctum, unum Deum colimus & confitemur: non sic unum Deum quasi solitarium, nec eundem qui ipse sibi pater sit, ipse & filius: sed patrem esse qui genuit, & filium esse qui genitus sit: spiritum uerò sanctum non genitum neque ingeneratum, non creatum neque factum, sed de patre filioque procedentem, patri & filio coæternum & coæqualem & cooperatorem: quia scriptum est, Verbo Domini coeli firmati sunt, id est, à filio Dei, & spiritu oris eius omnis uirtus eorum. Et alibi, Emitte spiritum tuum & creabuntur, & renouabis faciem terræ. Ideoque in nomine patris & filij & spiritus sancti unum confitemur Deum, quod nomen est potestatis non proprietatis. Proprium nomen est patri Pater: & proprium nomen est filio Filius: & proprium nomen spiritui sancto Spiritus sanctus. In hac trinitate unum Deum colimus, quia ex uno patre quod est, unius cum patre naturæ est, unius substantiæ & unius potestatis. Pater filium genuit non uoluntate, nec necessitate, sed natura.

Filius ultimo tempore ad nos saluandos & ad implendas scripturas descendit à patre, qui nunquam desijt esse cum patre. Et conceptus est de spiritu sancto, & natus ex uirgine: carnem & animam & sensum, hoc est, perfectum suscepit hominem, nec amisit quod erat, sed coepit esse, quod non erat, ita tamen ut perfectus in suis sit, & uerus in nostris. Nam qui Deus erat, homo natus est, & qui homo natus est, operatur ut Deus: & qui operatur ut Deus, ut homo moritur: & qui ut homo moritur, ut Deus resurgit. Qui deuicto mortis imperio cū ea carne qua natus & passus & mortuus fuerat & resurrexit, ascendit ad patrem, sedetque ad dexteram eius in gloria, quam semper habuit & habet. In huius morte & sanguine credimus emundatos nos: & ab eo resuscitandos die nouissimo in hac

S Y M B O L A.

in hac carne qua nunc uiuimus. Et habemus spem nos consequuturos
præmium boni meriti, aut poenam pro peccatis æterni supplicij. HAEC
lege, hæc crede, hæc retine, huic fidei animam tuam subiuga, & uitam con-
sequeris & præmium à Christo. E A D E M docuit & credidit cum bea-
to Athanasio & Damaso S. Petrus episcopus Alexandrinus, sicut colligi <sup>Petrus Alexan-
drinus episcopus.</sup>
potest ex Tripartitæ historiæ lib. 7. cap. 37. & lib. 8. cap. 14.

Decretum Imperatorium de fide Catholica, ex Tripartitæ historiæ
libro 9. cap. 7.

Circa annum
domini 382.

IMpp. Gratianus, Valentinianus, & Theodosius Aug. populo urbis
Constantinopolitanæ: Cunctos populos, quos clementiæ nostræ re-
git imperium, in ea uolumus religione uersari, quam diuinum Petrum
apostolum tradidisse Romanis religio usque nunc ab ipso insinuata de-
clarat, quamq; pontificem Damasum sequi claret & Petrum Alexandriae
episcopum, uirum apostolicæ sanctitatis: hoc est, ut secundum Apostolis
cam disciplinam euangelicamq; doctrinam, patris & filij & spiritus san-
cti unam deitatem sub pari maiestate & sub pia trinitate credamus. Hanc
legem sequentes, Christianorum catholicorum nomen iubemus ample-
cti: reliquos uerò dementes uæsanosq; iudicantes, hæretici dogmatis in-
famiam sustinere, diuina primùm uindicta, post etiam motus animi no-
stri, quem ex cœlesti arbitrio sumpserimus, ultione plectendos.

Data 3. Calendas Martias Theffalonicae, Gra-
tiano 5. Valent. & Theod.
Aug. Coss.

F I N I S.

INDEX CONTINENS POTISSIMA CA

PITA, QVAE IN HIS CE SERMONIBVS TRACTANTUR, secundum Decades digestus. Significat autem praefixa nota numerum Sermonum.

DECADIS PRIMAE LOCI.



De Verbo Dei, eius origine, auctoritate, progressu, praestantia & virtute.
De sensu & legitima expositione Verbi Dei.

- 4 De Fide vera, quid sit, unde oriatur, & quae fidei virtus.
- 5.6 Expositio brevis sed dilucida Symboli apostolorum vel XII. articulorum Christianae fidei.
- 8 De Incarnatione filij Dei, passione, resurrectione & ascensione in caelos, & sessione ad dexteram patris, denique de iudicio eius extremo.
- 9 De resurrectione mortuorum vera.
- 10 De Dilectione Dei & proximi.

DECADIS SECVNDAE LOCI.

- 1 De lege naturae, diuina, & humana.
- 2 Expositio brevis sed perspicua Decalogi. De imaginibus.
- 3 De iureiurando.
- 4 De Sabbato & eius religiosa obseruatione.
- 5 De Honorandis parentibus et ijs qui loco parentum sunt.
- 6 De Magistratu, eius origine, speciebus, electione aut constitutione & officijs. An cura religionis ad magistratum pertineat.
- 7 De Legibus magistratus.
- 8 De iudicio & iudicis officio. An liceat magistratui fontes caedere. An propter religionem possit punire. An liceat magistratui bellum gerere. An Christianus magistratum gerere possit. De subditorum officio.
- 10 De coniugio, contra adulterium, libidines vagas, omnemque intemperantiam. De Continentia & Ieiunio.

DECADIS TERTIAE LOCI.

- 1 De proprietate rerum iusteque parandis possidendis & usurpandis facultatibus terrenis.
- 2 De Restitutione eorum quae inique parata sunt.

- 3 De Beneficentia.
- 3 De Calamitatibus & miserijs causisq; earum.
- 4 De Patientia, spe, & consolatione fidelium.
- 4 De mendacio & alijs linguae vitijs.
- 4 De Concupiscentia.
- 5 De Ceremonijs & legibus Iudaeorum ceremonialibus.
- 5 De Sacerdotio Iudaico, eius origine, ordine, officio, & omnium istorum significatione.
- 5 De loco sacro seu Tabernaculo & Templo, eorumque significatione.
- 5 De ijs quae fuerunt in Tabernaculo et templo, utpote arca foederis, mensa, candelabro, ara, similiaque, & eorum significatione.
- 5 De Templo sacro, hoc est, de ferijs vel festiuitatibus populi Dei, earumque significatione.
- 6 De Sacramentis Iudaeorum, de Circumcisione inquam & foedere Dei sempiterno.
- 6 De Agno paschali & eius mysterijs.
- 6 De Sacrificijs, eorum origine, generibus, ritibus, ratione & mysterijs.
- 6 De Votis & Nazaræis.
- 6 De Mundis & immundis, ciborumque delectu.
- 7 De Legibus Iudicialibus Iudaeorum.
- 8 De Vsu, effectu, & impletione legis dei.
- 8 De Abrogatione legis Dei.
- 8 De Decreto Apostolico edito ex Concilio Hierosolymitano, ex 15. Actuum Apostolorum.
- 8 De similitudine & differentia veteris & noui testamenti ac populi.
- 9 De Libertate Christiana, eius vero vsu et abusu.
- 9 De Scandalo.
- 9 De Bonis operibus. Nō iustificare bona opera hominem Christianum, sed duntaxat fidem in Christum. Quomodo tribuat scriptura iustificationē bonis operibus.
- 9 De argumentis quae videntur operibus attribuire iustificationem.
- 9 De Meritis & praemijs bonorum operum.
- 9 De Peccato & eius origine vera.
- 9 De Originali peccato.
- 9 De Peccato actuali, peccatiq; speciebus varijs.
- 9 De Peccato in spiritum sanctum.
- 9 De iusto & certo peccatorum supplicio.

DECADIS QUARTAE

LOCI.

- 1 De Evangelio & gratia dei.
In solo Christo omnem salutem & plenitudinem fidelibus esse exhibitam.
Fide Christum recipi, & quis sit modus iustificationis Christiani hominis.
Quare doctrinam de fide absq; operibus iustificante synceram in ecclesia retineri oporteat.
- 2 De Pœnitentia.
De timore & dolore pœnitentium.
De Confessione peccatorum.
Côntra auricularem confessionem peccatorum.
De satisfactione operum.
De indulgentijs Rom.
De Veteri & nouo homine.
De Viribus hominis.
De fructibus pœnitentia dignis, & ijs quæ necessaria sunt pœnitentibus.
- 3 De Deo & eius cognitione uera, varijsq; cognoscendi modis.
Vnum esse Deum essentia, personis trinū.
- 4 De Creatore rerum omnium & prouidentia Dei.
De Prædestinatione Dei.
De solo deo adorando.
De solo deo inuocando.
De unico apud deum intercessore Domino nostro Iesu Christo.
De solo deo colendo.
De vera religione & de superstitione.
- 6 Iesum Christum dei filium ab æterno genitū pari esse consubstantialē per omnia, deum verum.
De vera Christi humanitate & rationali eius anima.
Christum utraq; naturas & diuinam & humanam retinere impermixtas.
Christū in vna persona indiuisum manere.
Christum esse regem vniuersorum.
- 7 De regno Christi.
Christū esse Pontificem maximū et vnicū.
De sacerdotio Christi.
De nomine Christiano.
- 8 De Spiritu sancto & eius virtute.
- 9 De angelis dei sanctis eorumq; officijs.
De Cacodæmonibus seu spiritibus immūdis.
- 10 De anima hominis rationali.
De anima separata à corpore et eius immortalitate.
Animas separatas à corporibus nō purgari igni purgatorio.
De certissima salute animarum mox ab ipsa corporis morte succedente.

DECADIS QUINTAE

LOCI.

- 1 De sancta catholica ecclesia, quid sit, vnde oriatur & quā latè pateat.
De veris ecclesiæ dei notis.
An errare possit ecclesia dei.
De potestate & studijs ecclesiæ.
- 2 Vnam esse sanctam catholicam ecclesiam.
Côntra schismata & schismaticos.
Quis sit hæreticus vel schismaticus.
De defectione Evangelio credentium à nūpera illa non prisca Rom. ecclesia.
Ecclesiæ veræ præstātia, & laus, caput et corpus, &c.
- 3 De ministerio & ministris verbi dei, eorū origine & dignitate.
Quos instituerit ordines in ecclesia sua Dominus.
Aequales esse episcopos & presbyteros, & vnde prærogatiua episcoporum.
An vtile sit & necessariū vnum aliquem omnibus præminere pastoribus.
- 4 De vocatione ad ministerium & vocationis generibus.
Qui eligere debeant ministros in ecclesia et quales.
Quomodo vocati sint initiandi.
Quod nā sit officiū ordinatorū in ecclesia.
De clauibus regni cœlorum in ecclesia.
De ratione docendi ecclesiam.
De vita sancta et autoritate vera pastorum ecclesiæ.
- 5 De modo & ratione orandi deum.
Quid oratio & quæ eius species.
De Cœtib; sacris.
Quis inuocandus sit & per quem inuocare oporteat.
Quibus facultatibus oporteat esse instructū eum qui oraturus est.
Quando, vbi, quo habitu, quid & qua lingua sit orandum.
De cantu ecclesiastico & horis canonicis.
Quomodo sit orandum.
Expositio orationis Dominicæ brevis et luculenta.
De gratiarum actione.
De virtute orationis.
- 6 De signis & signorum ratione.
De sacramentis Christi & ecclesiæ. Quid sacramentum.
Quis author sacramentorū & quare sint instituta.
Numerus sacramentorum.
Quibus rebus consent Sacramenta.
De vera sanctificatione & consecratione sacramentorum.
Discretas signi & rei signatæ manere naturas, &c.

P R I M V S.

- ras, & quomodo coeant & sacramentum efficiant.
- Signa mutare rerum signatarum nomina: & de Loquutionibus sacramentalibus.
- 7 Religiose versandum esse in caussa sacramentorum.
- De similitudine & differentia Sacramentorum veteris & noui testamenti.
- An gratia dei contineatur aut conferatur sacramentis.
- Quæ sit virtus, quis finis & vsus legitimus sacramentorum.
- Sine fide non prodesse sacramenta, & fidem habentibus non esse superuacanea.
- Sacramenta nõ pendere à nostra vel dignitate vel indignitate.
- 8 De Baptismo quid sit, quis instituerit, quibus constet.
- Vnum esse baptismum.
- De ritu baptismi.
- De loco, tempore & ministro baptismi: vbi & de baptismo obstericum agitur.
- De salute infantium sine baptismo excedentium.
- Qui nam sint baptizandi.
- Contra Anabaptistas pro paruulorum baptismo.

- 9 De virtute baptismi.
- De Cœna domini & vocabulis eius.
- Quid sit Cœna, quis eius author, & quibus constet.
- Quo ritu celebrata & instituta sit.
- De vtraq; specie & danda & accipienda.
- De loco, valis, tempore & reliquis id genus in cœna.
- De finibus Cœnæ domini.
- De genuino sensu verborum domini, Hoc est corpus meum, & de præsentia Christi in Cœna.
- De vera manducatione corporis Christi.
- Quomodo præparemus nos ad mœsam domini.
- 10 De Scholis, & vestigalibus sacris vel de bonis ecclesiasticis.
- De Templis Christianorum et instrumentis sacris.
- De Synodis & disciplina ministrorum ecclesiæ.
- De matrimonio Christiano.
- De viduis & virginibus.
- De monasterijs, monachis & votis monasticis.
- Quid agat ecclesia apud ægrotantes.
- De funeribus & sepultura Christianorum.

INDEX LOCORVM VETERIS ET NO-

VI TESTAMENTI, QUAE PASSIM AB AV-
thore in hoc libro explicantur.

EX GENESI.



- I**n principio creauit dii fol. 206. 213
- 1 Fiat lux 329. b
- 1 Producat terra animã viuente 257
- 1 Faciamus hominẽ in imagine nõ 165. b
- stra
- 1 Inspirauit in faciẽ eius spiraculũ vitæ 259. b
- 2 Ne comederis ex fructu scientiæ boni et ma 163. b. 164. 165
- li
- 2 De institutione matrimonij 77
- 3 Serpens erat callidior 254. b
- 3 Dixit ne deus non manducandũ esse? 255. b
- 3 Mulier quam tu dedisti mihi 162. b
- 3 Inimicitias ponam inter te 180. 232
- 3 Adam ille factus est sicut vnus ex nobis 214
- 4 Vox sanguinis fratris tui 58. b
- 5 Adam genuit in similitudine 169
- 6 Pœnitet me fecisse hominem 190
- 9 Animalium esus conceditur 131
- 9 Sanguinis effusione vltione persequar 131
- 13 Pharaõ Saram in aulam iubet deduci 80

- 14 Melchizedek rex Salem 238
- 14 Da mihi animas 257
- 15 Iubet deus Abrahamum animalia dissecare 325. b
- 16 Hagar domino agit gratias 252. b
- 17 Ego deus Schaddai 206. b
- 17 De foedere & circumcisione 121. 333
- 18 Abraham angelos excepit hospitio 97. b
- 18 Num celabo Abrahamum? 1. b
- 18 Nunquid perdes iustũ cum impio? 175. b
- 19 Festina in Zoar 216
- 19 Pluit dominus à domino 214
- 20 En morieris ppter mulierẽ quã rapuisti 80
- 22 Tentauit deus Abraham 164. b
- 22 Benedicentur in semine tuo 18. 180. b
- 19 Iris foederis signum 323
- 24 Ipse mitter angelum suum ante te 252
- 25 Adpositus est ad patres suos 265
- 32 Iacob angelos sibi occurrentes vidit 251. b
- 34 Dina à Sichem constuprata 81
- 35 Abraham aram erexit in Bethel 308
- 39 Ioseph sollicitatur ab vxore Putipharis 80
- 44 Deducetis canos meos ad inferos 23. b
- 48 Inuocetur nomen meum super eos 221. b

49 Non recedet sceptrum de Iuda 180.b

EX EXODO.

3 Si veniens ad filios Israel dixeris eis, Deus pater vestrorum 205, 206.b

4 Induravit deus cor Pharaonis 166.b

4 Angelus minatur Mosi eadem 347

6 Ego apparui Abraham 206.b

9 Peccaui etiam nunc, dominus iustus est 166.b

12 Depascha, cum filij vestri ad vos dixerint 56, 124, 333.b

13 Sanctifica mihi 56

17 Qui immolat dijs 69.b

18 Ex omni populo prospice viros virtutis 61
132.b, 301

19 Iubetur Moses sanctificare populum, &c. 7.b

19 Circumscribe terminum 204.b

19 Loquere tu nobiscum 292

20 Ego dominus deus tuus 210.b

21 Qui maledixerit patri, &c. 55

21 Plagij poena 95

22 Si quis dederit proximo suo iumentum ad custodiendum 46.b

22 Mandatur restitutio 95

22 Maleficum ne patiaris vivere 68.b

22 Si afflixeritis viduas 55.b, 172

23 Ne receperitis rumorem falsum 133

23 Non sequeris multitudinem 67.b

23 Ter in anno apparebit, &c. 120

31 Observabitis sabbata mea, &c. 51

31 Historia de vitulo conflati 279

32 Consecrate hodie manus 113

33 Ostende mihi gloriam tuam, &c. 208

33 Non poteris videre faciem meam 205, 207.b

34 Quomodo deus se Mosi videndum exhibuerit 208

34 Ecce ego mitto angelum ante faciem tuam 252

EX LEVITICO.

*Leuitici potissima capita explicantur
in lege ceremoniali.*

6 Praecipitur ut sacerdotes perpetuum ignem foueant 215.b

7 De votivis sacrificijs 129.b

9 Bucula rufa appellatur peccatum 333.b

10 Vinum & siceram non bibes 114.b

10 Formula publicae confessionis 193

11 De animalibus mundis & immundis 130.b
A 12. cap. ad 16. de corporeis contaminationibus tractatur 129.b

17 Quicumque e domo Israel mactauerit bouem 117

17 Prohibetur esus sanguinis 131

18 Contra Sodomiam 81.b

19 Non facietis peruersum 67.b

19 Non furabimini 93.b

19 Bilanx iusta, lapides iusti 92.b

20 Anima quae declinavit ad magos, &c. 257

20 De poena adulterij 81.b

20 Incestus poena 81.b

20 Lex contra Sodomiam 81.b

22 Nullum vitium sit in eo 125.b

24 De poena blasphemantium 45.b

25 Si ad inopiam fuerit redactus proximus tuus, &c.

26 Inhabitabo in illis 336

Arca foederis domini 339.b

27 De votis 129.b

EX NUMERIS.

3 Ecce ego selegi Leuitas 113

3 Leuitae custodient omnia instrumenta tentorii 115

3 Et dabis Leuitas Aaroni 113

6 De disciplina Nazaraeorum 129.b

6 Sic benedicetis filiis Israel 114.b

11 Congrega mihi 60. viros 295

15 Violator sabbati lapidibus obruitur 50

19 Quomodo paranda sit aqua lustralis, contra omnes pollutiones 118

20 Prehende Aaron fratrem tuum 300.b

24 Balaam praedixit euereda Hierosolyma 142

27 Praeficiat dominus deus spirituum uniuersae carnis 61.b, 132.b

27 Iosue iubetur stare ante Eleazarum 63

30 De personis vouentibus 129.b

EX DEUTERONOMIO.

1 Date ex vobis viros sapientes 61.b, 132.b

301

1 Audite causam fratrum vestrorum 67, 123

1 Deus non suscipit nec personam 67

4 Vocem verborum audiistis, at simulachrum nullum videbatis 42.b

5 Non concupisces, &c. 110

6 Audi Israel, dominus deus noster dominus vnus est 20.b, 210.b

6 Diliges deum tuum toto corde, &c. 33.b

6 Inculcabis ea filiis 56, 294.b

6 Dominum deum tuum timebis, &c. 211, 226.b

6 Per nomen dei iurabis 47

8 Caue ne forte obliuiscaris 99.b

9 Decreuerat vos dominus delere 308.b

10 Et nunc Israel, quid dominus deus tuus petit a te, nisi ut timeas dominum deum tuum 161, 225.b

10 Circuncidite praeputium cordis 123, 346

12 Non faciet vnusquisque quod rectum est in oculis suis 159.b

12 Prohibetur esus sanguinis 131

12 Caue tibi ne requiras deos gentium 228.b

13 Dominum deum vestrum sequimini 40

226.b

13 Iubet deus bello adoriri ciuitatem quae a dei cultu desciuit 73

De

14	De animalibus mundis & immundis	130.b
15	Vide ne obfirmes cor tuum, neq; contrahas manum	98
16	Iudices constitues tibi	201
16	Venit magistratum lucos plantare	62.b
17	Institutio regis	85.b.133
18	Prohibet dominus veritatem ex mortuis sciscitari	264.b
19	Si mendax testis deprehensus fuerit	109
20	Leges belli ponuntur	74
21	Iubentur parentes filios rebelles accusare in foro	56.b
24	Nemo pignoris loco accipiat superiorem vel inferiorem molarem	93
24	Ne neges aut detineas mercedem pauperi	93
25	Ne sint tibi in sacculo tuo diuersi lapides	92.b
28	Si audiueris vocem domini dei tui	216.b
30	Circuncidet dominus deus cor tuum	112.b
	154.b.341	

EX IOSVE.

1	Vide ut custodias & agas	64
1	Non recedet liber legis	85.b
2	Date mihi signum	322.b
23	Cum veneritis inter gentes	47

EX IVDICVM.

6	Dominus appellatur qui iam angelus dictus fuerat	252
17	Micha deo cultum instituit	228.b

EX LIBRO PRIMO

SAMVELIS.

3	Erat autem peccatum filiorum Heli grande	306.b
4 & 5	Abusus arcæ	118.336.b
15	Nunquid vult deus holocausta	228.b
15	Ecce melius est audire quam sacrificare	160
16	Spiritus sanctus recessit a Saule	244.b
26	Anima mea preciosa fuit in oculis tuis	257
28	Excitatur Samuel	254

EX LIBRO SECUNDO

SAMVELIS.

6	Arca deducitur non legitime	275
7	Cum completi fuerint dies tui	232
7	Ego ero illi pater	20.b
7	Quis ego sum domine deus?	321
8	Filij Dauidis sacerdotes appellantur	295.b
12	Tu cape urbem	221.b
12	Gladius non recedet a domo tua	176.b
15	Si inuenero gratiam in oculis domini	312
15	Reportate arcam Dei	104.b
19	Cur efficiamini mihi hodie in satana?	254.b

EX LIBRO PRIMO

REGVM.

1	Cum ad Dauidem ingrederetur, adorauit pronus in terram	219.b
3	Solomon duntaxat in excelsis sacrificabat	117.b

8	Fecerunt ut prominerent vestes	118
8	Ecce cæli & cæli cælorum non capiunt te	222
	317.b.339	
11	Ahaz dicit ad Ieroboam, Quod si audieris omnia	64.b
16	Achab seruiuit Baal	225.b
18	Quousque vos tandem claudicatis?	220.b
19	Zelo zelatus sum	286.b

EX LIBRO SECUNDO

REGVM.

5	Nunquid ego sum Deus	322
5	Audit Naaman ut se septies lauet	28
6	Aperi quæso oculos pueri	25.b
17	Et nihilominus colebant deum	218
17	Ambulauerunt in ceremonijs Israel	112
22	Dominus mei curam suscepit	223

EX LIBRO PRIMO PARA-

LIPOMENON.

15	Arcam portarunt filij Leuitarum	336.b
21	Hæc est domus domini dei	117

EX SECUNDO LIBRO PARA-

LIPOMENON.

1	Abierunt Solomon & omnis cæterus cum eo in excelsum	117
19	Præscribit Iosaphat suum officium iudicibus	67.b
29	Ezechias dicit ad sacerdotes, Sanctificamini	63.b
29	De canendi ritu	314
36	Misit dominus deus ad eos mane surgendo	54.b

EX NEHEMIA.

5	Exemplum Nehemie cohercentis auaritiam fornicatorum	94.b
8	Attulit sacerdos Esdra legem	9
8	Formula extat celebrati festi tabernaculorum	120
8	Ite & comedite pingua	97

EX LIBRO IOB.

1	Comparet satanas inter ministros dei	254
1	Nudus exi de utero matris	106
4	Ecce qui seruiunt ei non sunt stabiles	253
9	Si iustificare me voluero	158.b
10	Manus tuæ fecerunt me	259
14	Quis dabit mundum ex immundo?	177.b
25	Verè scio quod non iustificabitur homo compositus deo	136.b
26	Spiritus eius ornauit cælos	242.b
31	Si concupiscentia vxoris alienæ	80

EX PSALMIS.

2	Filius meus es tu	229
2	Sapite o reges	236
5	Non deus volens iniquitatem tu es	163
5	Perdes oēs qui loquuntur mendacium	46.b
8	Quam admirabile est nomen tuum in vniuersa terra?	215.321
10	Pluet super impium laqueos	175.b
14	Dixit insipiens in corde suo	204
25	Domine quis habitabit tecum?	161

16 Non derelinques in inferno animā meam

260

16 Dominus mihi semper à dextris est 147

18 Ascendit super Cherubim 250.b

18 Via dei integra est 210.b.289

19 Cœli enarrant gloriam dei 209.b

19 Lex dei integra est 8

21 Tu es qui extraxisti me ex utero matris meę

104

22 In te sperauerunt 104.311

26 Quoniam pater meus & mater mea dereliquerunt me 223

31 Confitebor aduersus me 193.b

33 Verbo domini cœli facti 214

34 Castra figit angelus domini 251.b

38 Domine ne in furore 309.b

38 Sagittę tuę in me defixę sũt 190.b

45 Regnabit dominus in æternum 215.b

45 Męc sunt omnes ferę sylvarum 44.b

50 Si videbas furem, currebas cum eo 82

50 Sacrifica deo sacrificium laudis 40.b

222.310.b.321

51 Tibi soli peccaui 193.b

51 Ecce in iniquitatibus conceptus sum 167.b

51 Cor mundum crea in me 273.b

51 Spiritum sanctum ne auferas à me 244.b

62 Collocare spem in deum 96

67 Deus misereatur nostri 318

73 De felicitate impiorum 99.b.102

75 Vouete & reddite 129.b

78 Quę audiuius & cognouimus 210

79 Adiua nos deus 310.b

88 Tu domine dominaris in mari 216

89 Tui sunt cœli 215

91 Tu es spes mea 103.b

91 Angelis suis mandauit de te 251.b

94 Venite exultemus domino 220

103 Benedic anima mea dominum 291.b.321

103 Benedicite domino omnes angeli eius 250.b

103 Quemadmodum pater miseretur filiorum 20.b.217.b.317.b

104 Qui creat angelos suos spiritus 249.250.b

104 De fructu operum tuorum, o deus satiabitur terra 216

107 Summa & argumentum 221.b

110 Dixit dominus domino meo 21.214

234.236

110 In magnificentijs sanctitatis ex utero aurore 22.b

110 Iurauit dominus & non pœnitebit eum 238

113 Omnia quęcunque voluit fecit 318.b

113 De simulachris gentium 42

115 Tibi sacrificabo hostiam laudis 321.b

118 Notam mihi facies semitam vitę 25.b

119 Encomium verbi dei 87

119 Concupiui mandata tua 110.b

119 Bonum est mihi domine quod humiliauer-

ris me

120 Libera animam à labijs iniquis 116

132 De fructu ventris tui ponam super sedem tuam 232

132 Dominus elegit Sion 272.b

135 Scio quod magnus est dominus 216

136 Confitemini domino quoniam bonus 224

138 Quod ibo à spiritu tuo? 206

139 Tu domine cognouisti siue sedeam 215.b

142 Ne introieris in iudicium 158.b

145 Iustus dominus in omnibus vijs suis 167

145 Propè adest dominus 310.b

145 Cum colligis spiritum eorum 242.319

146 Sustentat dominus omnes cadentes 216

EX LIBRO PROVER-

biorum Solomonis.

1 Fili mi, si te laetauerint, &c. 58.b

1 Sapientia dicit se inuocantes non auditu-

rum 399

3 Beneficentia ne te destituat 98

3 Castigatione domini caue auerferis 100.b

3 Quos diligit corripit 209

3 Latere cum muliere 82

6 Ipiger ad fornicam 92

6 Testem fallacem odit deus 109

6 Qui ingreditur ad coniugem proximi 80

10 Charitas operit multitudinem peccatorum 197.b

16 Omnia propter se condidit dominus 167

16 Diuinitas in labijs regis 75.b

17 Malum non recedet à domo ingrati 55

17 Dominus abominatur eum qui scelestum

absoluit, &c. 59

18 Turris fortissima est nomen domini 222

310.b

18 Qui subducit aurem suam ne audiat legem

311

19 Abominatio hominum detestator 110

20 Diuerso pondere vti, detestatur dominus 92.b

20 Contumelijs afficiens patrem 58

20 Pietas & veritas custodiunt regem 62

21 Cor regis in manu domini 215.b

21 Qui obturat aurem suam ad clamorem 309

23 Apud quem est vix, &c. 82.b

24 Time dominum & regem 76

25 Quemadmodum multum mellis edero 204

25 Vrbi dissipata similis est, &c. 242

26 Verba susurronis 110

28 Qui confitetur & deserit iniquitates suas

193

29 Virga dat sapientiam 56.b

30 Duo à te postulauit 319

31 Encomium bonę matris familię 92

EX ECCLESIASTE

Solomonis.

7 Melius est audire increpationem sapientis

20

S E C V N D V S.

31 Cum nubes impletae fuerint 162.b
 41 Reuerteretur puluis in terram sicut fuit 160
 30 Sapienſu ſermones ſunt velut ſtimuli 330

EX GANTICIS SOLOM.

4 Vna eſt columba mea 181.b

EX ISAIA.

1 Cum multiplicaueritis orationes 309.311
 1 Si peccata veſtra fuerint vt coccus 191.b
 3 Conſtabunt gladios ſuos in ligones 71.b
 3 Repleta eſt terra idolis 219.b
 3 Dabo principes pueros eorum 60.b
 3 Dicite iuſto quod bene habebit 158.b
 3 Dominus veniet ad iudicandum ſenatores 95.b
 4 Inuocetur nomen meum ſuper eos 221.b
 5 Vineae domini 289.b
 5 Deus minatur ebrijs 83
 6 Sanctus ſanctus 251
 7 Ecce virgo concipiet 22.b.233.b.231.b
 9 Puer natus eſt nobis 233.b
 11 Super quo ſpiritus domini requieſcet 246.b
 23 Negotiatio & merces eius, &c. 98
 26 I popule mi intra penetralia tua & claude 105.b
 29 Populus hic labijs ſuis me honorat 220.b
 38 Morieris tu & non viues 308.b
 40 Quis menſus eſt vola? 210
 40 Ecce gentes tanquam guttula ſiculae 42.b
 40 Attollite oculos veſtros 209.b
 42 Ego dominus faciam omnia, extendens coelum 213.b
 42 Ego dominus, hu eſt nomen meum 210.b
 222.231.b
 42 Dominus gigantis inſtar prodibit 206
 44 Effundam aquas 239.245.b
 44 Ligni partem combuſti igne 219.b
 45 Ego dominus faciens pacem & creans tenebras 166.b
 45 Per meipſum iuraui 231.b
 49 Dedi te in lucem gentium 231.b
 49 Ecce tollam ad gentes 63.236
 49 Reges eccleſiae nutritij appellantur 278.b
 50 Nunquid obliuiſci poteſt mulier infantis ſui 309.b
 52 Confert liberationem Iſraelis ex Aegypto, cum liberatione per Chriſtum 40.b
 53 Liuiore eius ſanati ſumus 17
 53 Nos omnes tanquam ouis errauimus 127
 53 Generationem eius quis enarrabit? 229
 53 Cum nihil iniquum fecerit 126.b
 53 Vir dolorum eſt & qui expertus eſt ærumnas 23
 58 Reprehendit deus Iudaeorum ieiunia 84
 59 Fœdus meum pangam cum eis 274.b

61 Spiritus domini ſuper me 177.b
 61 Vnxit te deus 238.b
 63 Tu es pater noſter o deus 223.309.b
 64 Quae oculus non vidit 32.b
 65 Qui benedicere ſe vult, &c. 47
 65 Erit vt antequam clament, ego exaudia eos

311
 66 Qui bouem immolat, &c. 228.b
 66 Super quo requieſcit ſpiritus meus 241

EX IEREMIA.

2 Quid nam iniquitatis deprehenderunt patres veſtri 227.b
 Non dicent amplius arca fœderis domini 140.b
 4 Si reuerſi volueris, ad me reuertere 190
 4 Iurabis, viuit dominus, &c. 47
 4 Et benedicent ſe gentes, &c. 48
 4 Circuncidimini domino 123
 5 Quomodo bellum excutiat 72.b
 7 Holocauſta veſtra addite victimis veſtris 112.338
 7 Tu ne oraueris pro populo iſto 311
 8 Verbum domini proiecerunt 152.279
 9 Ne gloriatur ſapiens 210
 10 Haec dicit dominus, iuxta vias gentium nolite diſcere 169
 10 Domine nemo eſt ſicut tu 209
 22 Qui ſit quod via impiorum proſperetur 102
 17 Maledictus vir qui 289
 17 Vade & ſta in porta filiorum, &c. 50
 18 Repente loquar aduerſus gentem 308.b
 20 Dominus eſt mecum teu gigas robuſtus 206
 22 Facite iudicium & iuſtitiam 67.b.168
 22 Vae qui ædificat domum ſuam in iniuſtitia 82.b
 22 Viuo ego dicit dominus, quia ſi eſſet Chemonias 341.b
 23 Ipſi currebant 300.b
 23 An non deus de propinquo ego 206
 23 Propheta apud quem eſt ſomnium 304.b
 25 Sume calicem 107.b
 29 Orate dominum pro Babylone 53.76
 29 Inuocabitis me 220
 31 Venient & iubilabunt in Zion 97
 31 Prohibe vocem tuam à ſletu 158.b
 31 Conuerſe me domine 190.b
 31 Non docebit quiſque proximum ſuum 294.b
 31 Hoc eſt teſtamentum 245
 44 Quando deus iniquitatem patrum in filijs puniat 44

EX EZECHIELE.

1 Beata eſt gloria domini ex loco eius 258
 3 Audies ex ore meo verbum 304.b
 7 Animam ſuam non ſaturabunt 257
 13 Vae illis qui dicunt populo pax pax 220
 222 4

I N D E X.

14	Si malum immiserō	311			EX MICHA.		
16	Per parabolam connubij explicantur beneficia Israelitis collata	291	4	Sedebit vir sub vire sua	25.b		
18	Filius non portabit iniquitatem patris	168	4	Regnabit dominus super eos	236.b		
18	Catalogum recenset bonorum operum	161	4	Ambulabimus in nomine dei nostri	231.b		
28	Patres comederunt vnam acerbam	44	5	Et tu Bethlechem	229.234		
34	An leue est vobis quod pascua bona depascitis?	9.b	6	Quare deus bella immittat	72.b		
34	Solus ego pascam gregem meum	231.b	6	De pœna iniusto pondere vrentium	92.b		
34	Vae pastoribus Israel	305	6	Indicabo tibi ô homo	225.b		
34	Suscitabo super oues meas	290					
	EX DANIELE.			EX MALACHIA.			
2	Domini est sapientia & fortitudo	215.b	1	Cum hostiam cœcā sacrificatis	125.b.321.b		
4	Peccata tua in iustitia redimantur	197.b	2	Fœdus meum fuit Leui	304.b		
7	Mille millia ministrabant ei	206.250	3	De felicitate impiorum	102		
7	Putabit se tempora & leges mutare posse	298	3	Clamant hypocritæ, frustra seruitur deo, &c.			
7	Apparet angelus domini	252.b		EX SOPHONIA.			
9	Peccauimus, iniqui fuimus	104.b	1	Excindam eos, &c.	47		
9	Non in iustitijs nostris	310.b	1	EX HAGGEO.			
9	Adhuc autem me loquentē & supplicante	250	1	Bibitis, sed non ad inebriationem	97		
9	Populus super quem inuocatum est nomen Dei	221.b	2	Assumam te Zorobabel	341.b		
10	Angeli regnorum præsidēs, inducuntur	252		EX ABACUK.			
10	Descriptio angeli	250	1	Vsquequo domine clamabo	99.b		
12	Multitudo dormientium in puluere terræ	253.b	2	Quid prodest sculptile	43.b		
	EX OSEA.			EX ZACHARIA.			
2	Filiorum eius non miserebor	228.291.b	1	Inducitur angelus sollicitus de miseria captiuorum in Babylone	251		
3	Eritis sine Ephod	113.b	3	En ego adduco seruum meum germen	127.b		
6	Beneficium, pietatem desidero	161	7	Iudicate iudicium veritatis	168		
14	Tollite vobiscum verba	321.b	8	Reprehenduntur hypocritica ieiunia	84		
	EX IOELE.		11	Adhuc tibi sume vasa pastoris stulti	277		
2	Conuertimini ad me	201	12	De bello gentibus inferendo	278		
2	Clangite tuba in Zion	308.312.b	12	Ecce ego pono Hierusalē vt sit calix	107.b		
2	Omnis qui inuocauit nomen dei	222		EX ECCLESIASTICO.			
	EX ABDIA.		13	Excitare ô gladiæ	229.b		
1	Abdias commemorat seruatōres ascensuros in montem Sion	292.b	3	Altiora te ne quæsieris	217.b		
	EX IONA.		7	Deus hominem probum condidit	163		
3	Jonas Niniuitis denunciat exitium	308.b	15	Ne dicas, Defeci, inquit, impulsu domini	166		
3	Crediderunt Niniuitæ Deo	201	15	Deus ab initio creauit hominem	163.b		
4	Dicit dominus se infantium habere rationem	353		EX LIB. SAPIENTIAE.			
	EX AMOS.			Deus mortem non fecit	163		
1	Vade protinus, & recipete in terram Iuda	286.b	3	Iustorum animæ in manu dei sunt	261.295		
2	Suscitauī de filijs vestris prophetas	378.b		EX LIB. IVDITH.			
3	Non est malum in ciuitate	166.b	8	Iudith irascitur Ozīæ pontifici	328		
3	Congerunt thesauros	59.b		EX SECVNDO LIBRO Machabæorum.			
7	Non sum ego propheta	378.b		De auctoritate huius libri	269.b		
8	Audite istud vos qui anhelī absorbetis pauperes	94	2	De oratione pro defunctis	263		
9	Requirent qui reliqui sunt homines domini	144.b					
				EX EVANGELIO			
				S. Matthæi.			
			1	Quod in illa conceptum est	331.b		
			1	Vocabis nomen eius Iesum	21.b		
			3	Confitentes peccata sua	139.b		
			3	Ego baptizo vos aqua	301.b		
			3	Facite fructus dignos pœnitentiæ	200.b		
			3	Mihi opus est abs te baptizari	347.b		
			3	Hic est filius meus dilectus	178.183.230.b		
			4	Christus cum satana pugnauit	256.b		
				Non			

S E C V N D V S.

4	Non solo pane viuit homo	319	12	Septem nequiores dæmonas assumit	254
4	Hæc omnia dabo tibi	220.b	13	Quisquis habet	244.b
4	Dominum deum tuum adorabis	226.b	13	Sermo regni	336.324
5	Beati mundo corde	183.b	13	Omni habenti dabitur	161.218
5	Beati qui persecutionē patiuntur	104.b	13	De zizania in agro dominico	273
5	Beati estis cum probra in vos iecerint	158.b	13	Sinite crescere	384.b
306.b			13	Parabola de eemente preciosam margaritā	8
5	Qui soluerit vnū ex mandatis istis minimis		13	In fine seculi mittet angelos suos	251
362			14	Adorauerunt eum	220
5	Vos estis sal terræ	305.b	15	Frustra me colunt	7.38.b.160.268.b.276.b
5	Vos estis lux mundi	206.b	305.311.b.362		
5	Sic luceat lux vestra	161.154	15	Quicquid ingreditur in os, &c.	110.b
5	Ne existimetis quod venerim ad destruendā		15	Ex corde exeunt cogitationes malæ	170
legem		3.b.139.b	16	Tu es Christus ille	188.b.210.b
5	Quisquis irascitur fratri, &c.	113.172	16	Caro & sanguis non reuelauit tibi	279.b
5	Si obtuleris munus tuū ad altare	194.311.b	16	Tu es Petrus & super hanc petrā, &c.	272.b
5	Audistis quod dictū fuerit antiquis, nō com		288.b.289.b.298.b.299.b		
	mittes adulterium	81	16	Tibi dabo claues regni cælorū	279.b.393.b
5	Ei qui velit te in ius trahere	67.b	16	Vade retro satana	254.b
5	Ne iuretis omnino	46	16	Si quis vult post me venire	23.105
5	Perfecti estote	138	16	Qui voluerit animam suam seruare	260.b
6	Tu cum oras introito in cubiculū tuū	312.b	17	De transformatione Christi in monte	31.b
308.a.b			18	Nisi efficiamini sicut pueri	342.b.296.323
6	Oratio dominica explicatur	317.318.319	18	Nō est voluntas patris vt pereat vnus	353.b
320.337			355.b		
6	Si remiseritis hoībus errata sua	311.b.194	18	Væ mundo ab offendiculis	153.b
6	De superstitioso ieiunio	83.b	18	Puellis additos esse angelos	251.b.335.b
6	Ne reponatis vobis thesauros	90.b	18	Si scandalizans ecclesiam monitores nō au-	
6	Lucerna corporis est oculus	90.b.	dierit, dic ecclesiæ		273
7	Ne proieceritis margaritas	324	18	Vbicunque duo vel tres fuerint	290.308
7	Omnia quæcunque volueritis	36.b	18	Dominus remittit debitum	320
7	Contendite intrare per arctam portam	241	19	Si vis ad vitam ingredi	139.160.b
7	Cauete vobis à Pseudoprophetis	288	19	Sinite paruulos ad me venire	347
8	Vade ostende te sacerdoti	195.b	19	Si vis perfectus esse	90.a.b
8	De Centurione	13	20	Nescitis quid petatis	309.b
8	Quemadmodum credis ita fiat tibi	264	21	Vna tantum vinea collocatur colonis	282
9	Non opus habent qui validi sunt	192	21	Baptismus Ioannis è cælo nē an ex homini-	
9	Num possunt filij thalami nuptialis lugere?		bus erat?		325.349
83.b			22	Date deo quæ dei sunt, &c.	76
9	Petite & accipietis	310.312	22	Erratis nescientes scripturas	248.b
10	Apostoli acceperunt potestatem super omnia		22	Resuscitados similes futuros angelis	248.b
280.b			249.b		
10	Dignus est operarius mercede sua	379.b	22	Dilige proximum sicut teipsum	34.b
380			22	Quid vobis videtur de Christo	234
10	Gratis accepistis, gratis date	380	23	In cathedra Moſis	283.b.307
10	Si ipsum patrē familiās vocarūt Beelzebub		23	Væ vobis scribæ	171.b.311.b
306.b			23	Mitto ad vos prophetas	54.b
10	Ne metuatis vobis ab his qui, &c.	260	24	Non relinquetur lapis super lapidem	148
10	Non veni ad mittendum pacem	153.b	24	Nos sumus Christi	198
10	Qui vos audit me audit	54	24	Surgent pseudochristi	288
11	Lex & prophetæ vsque ad Ioannem	148.b	24	Ecce hic est Christus	370.b
11	Tyro et Sidoni tolerabilius erit in die iudicij		24	Cælum & terra transibunt	13.b
171.b			24	Veniet dominus serui illius	272.b
12	Disputatio de Sabbato	50.b	25	Venite benedicti patris mei	159.236.b.382
12	Si ego in Beelzebub eicio dæmonia	297	25	Discedite à me maledicti	253.b.254.374.b
245.b.256			26	Hoc est corpus meum	326.b
12	Omne peccatum	174.b	26	Cum hymnum cecinissent	314
12	Quemadmodum fuit Ionas in ventre	24.b	26	Tristis est anima mea	233
13	Ex verbis tuis iustificaberis	159	26	Conuerte gladium	10.b.278

I N D E X.

26	An non putas quod possem nunc rogare patrem, &c.		6	Dominus vocauit discipulos suos, & apostolos nominauit	295
28	Data est mihi omnis potestas	211.b	6	Si mutuum dederitis	93.b
28	Docete eos quæ ego præcepi vobis	280. b 336.304.b.347.b	7	Remittantur peccata eius multa, quia dilexit multum	
28	Baptizantes eos in nomen patris	243.b	7	Fides saluam te fecit	338.b
28	Ecce ego vobiscum	290.234.371.b	8	Parabola seminantis	7.b
	EX EVANGELIO MARCI.		8	Diuitiæ spinæ sunt	90.b
1	Impletum est tempus, instatq; regnum Dei		10	Videbam satanam sicut fulgur	253.b
185			10	Qui vos audierit	325
1	Baptizabat Ioannes	359	10	De proximo, &c.	34.& 35
3	In principe dæmoniorum eiicit dæmonia		10	Maria bonam partem delegit	226.b
254.			11	Petite, & dabitur vobis	218.b
3	Omnia remittentur filiis hominum	174.b	11	Si digito dei eiicio dæmonia	245.b
5	Legio mihi nomen est	254	11	Væ vobis legisperitis	303.b
6	Vngebant oleo multos ægros	387.b	12	Quisquis loquitur dictum in filium hominis	174.b
9	Quandocunque corripuerit, lacerat eum		12	Quis constituit me diuisorem inter vos;	67.b
225.b			12	Videte & cauere ab auaritia	92
9	Age si quid potes domine	218.b	12	Hodie animam tuam à te reperent	265
9	Si potes credere	263	12	Quisnam est fidelis dispensator	305.b
9	Omnia possibilia sunt credenti	13	12	Seruus qui cognouit voluntatem	171.b
9	In gehenna vermis eorum non moritur		13	De illis quos turris in Siloe oppressit	190.b
253.b			13	Contracta dicitur à satana ligata	255.b
10	Sinite pueros venire ad me	342.b.353.b.357	14	Omnes ad conuiuium vocantur	185
10	Amen dico vobis, nullus est qui reliquit domum, &c.	106.b.158.b	14	Si quis venit ad me, nec odit patrem	51.b
11	Quæcunque orantes petitis	311	16	De diuite purpurato & Lazaro	261.b.262
11	Cum steteritis orantes	311.b	264. b.265.176.150		
12	Primum omnium præceptum est	210. b	19	De sinu Abraham	23
13	Tradent vos in concilia	100	17	Cum feceritis omnia	158.b
14	Pauperes semper habebitis vobiscum	382	17	Sicut accidit in diebus Noe	82.b
16	Non est hic, resurrexit	235.b.370	18	Pharisæus confitens repellitur	310.b
16	Dicite discipulis & Petro	192.b	18	Deus propitius esto mihi peccatori	309
16	Ite in mundum vniuersum	328.b.295	19	De Zachæo quomodo restitutionem promiserit	95.b
303.b. 304.b.325.326.342.536			21	Per patientiam vestrâ possidete animas	103
	EX EVANGELIO LVCAE.		22	Desiderio desideravi hoc pascha manducare	233
1	Præcedet dominus in spiritu Heliae	292.b	22	Reges gentium dominantur eis	75.b
1	De conceptione Christi	22.b.212	290. b.298. b.299		
1	Et dabit illi dominus deus sedem David		22	Ecce satanas expetiuit vos	255.b.273.b
232.b			22	Christus vocat magistratum potestatem tenebrarum	60.b
1	Quod nasceretur sanctum, &c.	234	23	Si in humido ligno	101.b
1	Non erit apud deum impossibile omne verbum		23	Hodie mecum eris in paradiso	257.b
1	Vt sine timore de manu inimicorum liberati		262		
1	Benedictus dominus Deus Israel	242.b	24	Tunc aperuit mentem illorum dominus	303.b
2	Quia viderunt oculi mei salutare tuum	182.b	24	Spiritus carne & ossa non habet	31.b.242
2	Quod Anna à templo non discesserit	312		EX EVANGELIO IOANNIS.	
2	De modo natiuitatis Christi	23	1	In principio erat verbum	229
2	Ne timeatis	177.b	1	Verbum caro factum est	233.b.367
2	Gloria in excelsis Deo	251	1	Ego baptizo aqua	293.349.b
3	Veniebant & publicani ad Ioannem	94.b	1	Ecce agnus dei qui tollit	124.b
3	Christus baptizatus	359	1	Vidi spiritum descendentem	230.b.352
4	Christus in schola Nazarethana surrexit vt legeret	9	349		
5	Exi à me domine	204.b	3	Amen dico tibi, nisi quis natus fuerit è supernis	353.b.354.b.169.185.b
5	Filij sponsi ieiunant si sponsus auferatur	83.b			3 Quod
6	Disputatio de sabbato	50.b			

	S	R	C	V	N	D	V	S.
2	Quod natum est ex carne caro est	198.b	9	Peccatores deus non audit	309.311			
3	Si terrena dixi vobis	325.b	10	Qui non intrat per ostium in stabulum o-	184.			
3	Spiritus ubi vult spirat	242	10	uium	184.			
3	Nemo ascendit in cœlum	235	10	Oues meæ vocem meam audiunt	205.b			
3	Sicut Moses exaltauit serpentem	17.b	10	276.b				
3	Sic deus dilexit mundum	17.b.279	10	Ego pono animam meam	358			
365.b			10	Si tu es Christus	182			
3	Hæc est condemnatio quod lux	185	10	Multa bona opera ostendi vobis	230.b			
3	Baptizauit Ioannes in Aenon	350	10	Ego & pater vnum sumus	21.b.211.236			
3	Qui habet sponsam sponsus est	291	12	Nisi granum frumenti deiectum in terram				
3	Qui è supernis venit	332		mortuum fuerit	23			
3	Quem misit deus, &c.	212	12	Anima mea turbata est	233			
4	Quisquis biberit ex aqua.	338.b	12	Vbi exaltatus fuero	23			
4	Veniet hora, & nunc est	141.b.220.b	13	Si quis audierit verba mea	346.b			
312.b.339			13	Satan ingressus est cor iudæ	256.376			
4	Deus est spiritus	242	13	Qui lotus est non opus habet	29.118.b			
4	Ego sum qui loquor tibi	182.b	13	174.263				
5	Quærebant iudæi magis interficere Iesum		13	Non est apostolus maior	295			
21.b.229.b.230.b.231.			13	Qui recipit quemcunq; misero	178.b			
5	Qui sermonem meum audit	260. b. 262. 265. b	13	374				
5	Qui bona fecerunt prodibunt in, &c.		14	Ne turbetur cor vestrum	21.231			
253.b			14	Vado vobis paraturus locum	25.261.b			
6	Pater omne iudicium dedit filio	231. b	14	Si abiero	370			
310			14	Ego sum via	184.318			
5	Sicut pater habet vitam	373	14	Ostende nobis patrem	209			
5	Est qui vos accusat Moses	128.136.b	14	Quicquid petieritis nomine meo	223.311			
6	Fugit dominus dum voluit eum regem de-		14	319.b				
clarare		75	14	Ego rogabo patrem	211.245			
6	Verba domini de manducatione sui corpo-		14	In illo die cognoscetis quod ego sum in pa-				
ris, faciunt ad explicanda verba cœnæ		19.b		tre	275.b			
335.342.b.372.a b			14	Qui habet præcepta mea, & seruat ea	156.b			
6	Hæc est voluntas eius qui misit me, &c.		14	Paracletus ille, qui est spiritus sanctus	212			
17.b			14	245.b				
6	Nemo venit ad me	218	14	Pater maior me est	10.b			
6	Qui edit meam carnem	17.b.275.b	15	Ego sum vitis	154.289. b			
6	Hoc vos offendit?	25	15	Iam mundi estis propter sermonem quem				
6	Domine, ad quem ibimus?	184. b. 230. b	15	dixi vobis	328. b			
6	Iudas diabolus appellatur	254. b	15	Si quis in me manserit	276			
348. b			15	Hoc est præceptum meum, vt diligatis vos				
7	Christus cum venerit, num signa plura e-		15	inuicem, sicut &c.	38			
det ijs?		182	15	Si non venissem, & locutus fuisset eis pec-				
7	Si quis sitit	275. b. 245. b	15	carum non haberent	172			
7	Nondum erat spiritus sanctus	146. b	15	Si me persequuti sunt	107. b. 306. b			
8	Si filius liberos reddiderit vos	151	15	Quem ego mittā vobis à patre	243. b. 244			
8	Ego ex deo veni	230	16	Alienos à synagogis facient vos	107. b			
8	Nos è stupro non sumus nati	230. b	16	Veritatē dico vobis, Expedi vt vadā	247			
8	Diabolus homicida erat ab initio	164. 235	16	369				
254			16	Multa habeo vobis dicere	7			
8	Qui sermonem meum seruauerit, mortem		16	Cum venerit paracletus	245. b			
non videbit		260. b	16	Amen dico vobis, Plorabitis & lamentabi-				
8	Abraham exultaui, vt videret diem meum			mini	99			
147			16	Quæcūq; petieritis à patre sub nomine meo				
8	Quinquaginta annorum nondum es	269		147. b. 223. 239. 311				
8	Antequam Abraham fieret ego sum	229	17	Pater, venit hora, glorifica filium tuum				
230			17	231.				
9	Christus ad cæcum, Credis in filium Dei?		17	Hæc est vita æterna	21. 29. b			
21. 99. b			17	Et nunc glorifica tu me pater	231. b			
9	Credo domine, & adorauit eum	210. b	17	Ego sanctifico meipsum pro eis	263. 239			
9	Me oportet operari opera	262. b						

18	Regnum meum non est ex hoc mundo	
	75.b.137.	
19	Nos habemus legem	230.b
19	In illo non est confractum os vllum	124.b
19	Inclinato capite tradidit spiritum	358
20	Sicut me misit pater	303.b
20	Quorum remisistis peccata	30
20	Hæc autem scripta sunt	7
21	Pasce oues meas	291.295.298.b.299.b

EX ACTIS APO-
stolorum.

1	Ne discesseritis Hierosolyma	349.b
1	De ascensione Christi	370
2	De missione spiritus sancti	246
2	Erant perseverantes	274.b.336.378
2	Iesum hunc excitavit deus	24.212.b
2	Quid faciemus viri fratres	193.196.b
2	Resipiscite & baptizemini.	274.304.326.b
	334.359.	
2	Qui libenter acceperunt sermonem Petri,	
	baptizati sunt	340
2	Servemini à generatione prava	288
2	In nomine Iesu surge	328
2	Pœnitementi & convertimini	190
2	Scio quod per ignorantiam fecistis	174.b
2	Non est in alio quoquam salus	262.b
2	De communitate bonorū apostolica	89.b
	379	
2	Cur seduxit satanas cor tuum?	243
2	Angelus domini per noctem aperuit ianuas	
	249.b	
2	Oportet deo plus obedire	51.b
2	Hierosolymis fuisse collegia	378.b
2	De primis diaconis	382
2	Expletis annis quadraginta apparuit ange- lus	252
2	Iesu suscipe spiritum meum	258.265
2	Samaritani ciues baptizati sunt à Philippo	
	350.358.b	
2	Date & mihi potestatem hanc	198
2	Non est tibi pars	355.b
2	De eunucho Candacis reginæ	292.b.339.b
	340.348	
10	Surge Petre, macta & vescere	300.b
10	Cornelius iubetur accersere Petrum	292
10	Historia de Cornelio	288.b.251.311.b.340
	348.350.	
10	Surge & ego ipse homo sum	221.299
10	Vos scitis me vocatum cœlitus	144
10	Nū quis prohibere potest vt baptizetur	357
12	Ecce angelus domini astitit	249.b
12	Notum sit vobis fratres	139
12	Nemo hoc sibi honoris vsurpat	300.b
12	Vobis oportebat primum loqui sermonem	
	Dei	304
14	Deus nō expertē testimoniū sinebat	215.b
15	Fide purificans cor	328.b.375

15	Credimus per gratiam dei	16
15	In synodali epistola prohibetur sanguis & suffocatum 143. item fornicatio	81.338
	Epistola synodalis ad verbū ponitur	143.b
	144.a.b.388.	
16	Crede in Dominum Iesum	304
17	Deus qui fecit mundum &c.	42.b
17	Non procul abest Deus	206.231.b.339
18	Sanguis vester super caput	304
19	Duodecim viri Ephesij an rebaptizati	358.b

	350	
19	De filiis Sceuxæ sacerdotis	297.328
20	Anima eius in ipso est	257
20	Attēdite vobis & cuncto gregi, ego no- ui &c.	277.b.291.295.298.303.b
22	Paulus seder ad pedes Gamalielis	378.b
22	Exurge & baptizare	334.358
23	Sadducæi negant esse angelos	248.b
23	Paulus ad Felicem deducitur	278.b
24	Credo omnibus quæ in lege & prophetis	
	32.b	
27	Mitto te ad gentes	292.b
27	Astitit mihi hac nocte angelus dei &c.	216.b
	251.b.252.b	

EX EPISTOLA PAULI
ad Romanos.

1	Dicit se vocatum apostolum &c.	134.
	Se- gregatum ad prædicandum euangelium	280.b
1	Euangelium ante quidē promissit deus	146.
	304.b	
1	Euangelium est potentia dei	178
1	Revelatur ira dei de cœlo	175.b.183
1	Quod de deo cognosci potest manifestū est	
	36.b	
1	Quæ sunt inuisibilia dei	209.b
1	In sua ipsorū ratiocinatione stulti facti sunt	
	209	
1	Tradidit eos in reprobū sensum	166
2	Diuitias bonitatis illius contemnis	44.b
	176.b	
2	De lege naturali	36
2	De duplici circumcisione	129
3	Num incredulitas illorum fidem dei faciet irritam?	346.b
3	Quod si iniustitia nostra commendat	163.b
3	Ex operibus non iustificabitur omnis caro	
	183.b	
3	Abseq; lege iustitia dei manifestata est	186
3	Omnes peccauerunt & destituuntur gloria Dei	169
4	Quid dicemus Abraham inuenisse	4.187
4	Credidit autē Abrahā deo.	18.154.b.339.b
4	Beati quorum remissæ sunt iniquitates	188
4	Signum accepit circumcisionis	341.b
4	Vbi nō est lex, ibi non est transgressio	169.b
4	Idcirco ex fide datur hæreditas	18
5	Iustificati ex fide	19.b.338.b
5	Gloriamur super afflictionibus	100
5	Dilectio effusa in corda nostra	39
	Chri-	

S E C V N D V S.

3	Christus cum adhuc essemus peccatores	2	Prædicatio mea non erat in persuasoria
325. b		276. b	
3	Quemadmodum per vnum hominem peccatum in mundū introiit	2	Si ipsum cognouissent
136. b. 167. b. 353. b		233	
3	Vnius delicto mortui sumus	2	Deus revelauit per spiritum suum
17. b. 169. b		247	
6	An ignoratis quod quicumque baptizati sumus	2	Animalis homo
346. 359. b		169 199	
6	Ne regnet peccatum	3	Quis est Paulus?
151. 240. 172. b		293. 332. 386	
7	Peccatū nō cognoui nisi per legē	3	Nihil est qui rigat
111. 136. b		8	
7	Scimus quod lex spiritualis est	3	Vt sapiens architectus
138. 167. b		288. b	
7	Noui quod bonū non habitat in me	3	Spiritus dei habitat in vobis
163. b		243. 245	
199. 200. b		4	Sic homo nos æstimet
7	Volenti mihi facere bonum	296. 276	
172. b		4	Per Euangelium ego vos genui
7	Miser ego homo	276. b	
193		5	Decreui, vt qui hoc scelus patrauit, tradatur
7	Idē ego mente quidem seruo legi dei	384	
172. b		5	Festum celebremus non in fermento veteri
8	Lex spiritus vitæ per Christum	125	
151. b		5	Si quis cum frater appellatur
8	Quod lex præstare non poterat	273. b. 384	
138. b		6	Disputat contra fornicationem
8	Affectus carnis inimicitia est aduersus deum	81	
111		6	Abluti estis, sanctificati estis
8	Qui in carne sunt	334	
246. b		6	Nescitis quod corpora vestra
8	Si quis spiritū Christi non habet	243	
245. 275. b		6	Precio empti fuistis
8	Qui spiritu dei ducuntur	21. b. 151. b	
243. b. 347. b. 357		7	Propter stupra viranda, &c.
8	Cum Christo patimur	78. 385. 386. b	
105. b		7	Vxori vir debitā beneuolentiam reddat
8	Spes si videatur non est spes	78	
103. b		7	Sanctificatus est vir infidelis
8	Spiritus opitulatur infirmitatibus nostris	168	
310		7	Filij sancti sunt
8	Spiritus intercedit pro nobis	353. b	
224. b		7	Vnusquisque vt vocauit eum dominus
8	Quos præsciuit, &c.	150	
179. b		7	Qui in domino vocatus est seruus
8	Qui proprio filio non peperit	150	
217. b		7	Precio empti fuistis
8	Quis nos separabit à dilectione dei?	386. b	
105. b		7	Virgo ea curat quæ sunt domini
33. b		385	
9	Non omnes qui sunt ex Israel	273. b	
274		8	Scientia inflat
9	Si confessus fueris ore	84	
328. b. 340		9	Esca nos non commendat deo
10	Quisquis inuocauerit nomen Domini	380. b	
223		9	Si spiritualia vobis seminauimus
10	Quomodo audiet absque prædicante	385	
100. b		10	Dicit se habere potestatem circunducendi
10	Fides est ex auditu	385	
318		10	Omnes patres nostri baptizati sunt
11	Si per gratiam saluamur	301. b	
186. b		351. b	
11	O altitudo diuitiarum sapientiæ	10	Nolo vos ignorare patres nostros
217. b		148	
11	Obsecro vos fratres	337	
225. b		10	Petra erat Christus
12	Iubemur probare quæ sit bona dei voluntas	289	
340		10	Contra scortationem
125		81	
12	Parabola sumpta à membris humani corporis	10	Fidelis est deus
27. b		162. b. 60. b. 105. b. 256. b	
12	Ne vlciscamini vo sipsos	10	Vnus panis, vnum corpus multi sumus
68		292. b	
13	Omnis anima	10	Nōne qui edunt victimas
60. 257		112	
13	Oportet subditos esse non solum propter iram, &c.	10	Poculū benedictionis & panis, &c.
76		329. b	
13	Qui diligit alterum, legem impleuit	345. a. b	
35. b		10	Imitatores mei estote
14	Eum qui infirmatur fide, assumite	277. b	
153		11	Iubet mulierem tecto capite orare
14	Regnum dei non est cibus & potus	120	
236. b		11	Ego accepi à domino
14	Omnia mihi licent	325. 361. 365. 360	
152. b		11	Probet semetipsum homo
16	Phœbe Cenchreenfis	264. 284. 375. b	
295. b		340. 376	
	EX PRIORE EPISTOLA ad Corinthios.	11	Cum iudicamur
1	An nō in Christi nomē baptizati estis?	104. b	
345		11	Cætera cum venero disponam
350. 352. 357		268. b	
1	Postquam in sapientia dei nō cognouit mundus	12	Diuisiones donorum sunt, sed idem spiritus
209		242. b. 243	
1	Ego per infirmitatem & cū timore, &c.	12	Quemadmodum vnum corpus est
278		345. 359	
		12	Vnicuiq; datur manifestatio spiritus
		247	
		13	Si habeam omnem fidem
		156. b	
		13	De ingenio dilectionis
		35. b	
		13	Cernimus nunc per speculum
		205	

INDEX.

14	Qui prophetae dicti sunt	295	3	Execrabilis omnis	198.b
14	Si orem lingua	314	3	Si data fuisset lex quae possit viuificare	137
14	Orabo spiritu	242.311.b.314.a.b	3	Concluser omnes sub peccatum	183
14	Si conuenerit tota ecclesia in idem	308.b	3	Non est iudeus	271.b
14	Prophetae duo aut tres loquantur	281	3	Lex paedagogus noster fuit ad Christum	338
14	Vetat mulieres docere in ecclesia	295.b	3	Omnes filij dei estis	342.b
15	Tradidi vobis in primis q̄ acceperam	268.b	3	Quicumque baptizati estis	359
15	De resurrectione Christi ex mortuis	24.b	3	Abraham non est iustificatus per legem	18
370			4	Vbi venit plenitudo temporis	153
15	Seminatur in corruptione	32.b	4	Quoniam autem estis filij	243.b
15	Caro & sanguis non erunt in caelo	10.32	4	Dies observatis & menses	388
15	Ecce mysterium vobis dico	31	4	Non respuistis infirmitatem meam in carne	

EX EPISTOLA POSTERIORE AD CORINTHIOS.

1	Qui confirmat nos	246.b.343	4	Fingit duas matres	148.b
2	Sufficit homini increpatio haec	384	4	Quae sursum est Hierusalem	276.b.291.b
3	Estis epistola Christi	293.b	5	Quod si circumcidamini, Christus nihil vobis proderit	142.b
3	Non idonei sumus ex nobis ipsis	199	5	Vos in libertatem vocati estis	152.b
3	Paulus appellat legem literam	136.b	5	Caro concupiscit aduersus spiritum	243.b
4	Quod si adhuc velatum est euangelium	324	318.b		
4	Non nos ipsos praedicamus	293.b	5	Fractus spiritus est charitas	247
4	Habemus thesaurum in testaceis vasculis		6	Fratres etiam si preoccupatus fuerit homo	

100			194		
4	In omnibus premimur, at non anxij reddimur	105.b	6	Operemur bonum cum erga omnes	98.b

4	Semper nos qui viuimus, &c.	13	161.b.382		
4	Credidi propter quod loquutus sum	244.b			
5	Scimus quod si terrenum nostrum domicilium tabernaculi destruat	261.b			
5	Et si cognouimus secundum carnem Christum	233			

5	Erat deus in Christo	187.b	1	Elegit nos deus in Christo	217.b
6	Nolite iugum trahere cum incredulis	385	1	Obsignati estis spiritu promissionis	246.b
6	Quis consensus Christi & Belial?	255	343		
6	Exite de medio illorum	288	1	Deus excitauit Christum ex mortuis	237.b
7	Tristitia quae secundum deum est	200.b	290.b		
8	Nullus est deus nisi vnus	210.b	2	Secundum spiritum cui potestas est aeris	255.b
11	Adiunxi vos vni viro	291.b	2	Eramus natura filij irae	169.b
11	Alias deprædatus sum ecclesias	381	2	Gratia estis seruati	18
11	Satanam se transfigurare in angelum lucis		2	Mementote quod vos quondam gentes in carne vocabamini	345

254			2	Conditi sumus in Christo Iesu ad opera bona	160.b
11	Si qui alij sunt ministri Christi, excellentior sum ego	107	2	Christus est pax nostra	140.b
12	Ne excellentia reuelationum efferrer, &c.	256	2	Iam non estis hospites & incolae	289.b
12	Timeo ne forte cum venero	384.b	2	Fundamentum Apostolorum	289
13	Gratia domini nostri Iesu Christi, &c.	242.b	3	Deus secundum reuelationem	7

			3	Christus inhabitat per fidem in cordibus nostris	275.b
			4	Vnum corpus & vnus spiritus	281.b
			4	Vnus dominus	210.b.350
			4	Qui descendit idem ille est	294.b
			4	Quos ordines deus in ecclesia instituerit	
			294.b		
			4	Christus dedit alios Apostolos	13.b.276.b
			4	Instituit ministros ad instaurationem sanctorum	294
			4	Hoc dico & testor per dominum	170.200
			4	Renouamini spiritu mentis, & induite nouum hominem	165.b
			4	Deposito mendacio	91.b

Iraſcimini

S E C V N D V S.

4	Irascimini & ne peccetis	57.b
4	Omnis sermo spurcus	82
4	Ne contristetis spiritum	343
5	Scortatio & omnis immunditia, &c.	82
5	Neq; scortatores	81
5	Ne inebriemini vino	314
5	Christus est caput ecclesiae	237.b, 290.b
5	Christus dilexit ecclesiam, &c.	28.359
5	Christus semetipsum exposuit pro ecclesia	274.328
5	Ecclesia sponsa	291.b, 278
5	De institutione matrimonij	79.b
5	Gratias agite semper	320.b
6	Filij obedite parentibus	55.b, 57
6	Patres ne prouocetis	Ibidem
6	Sitis fortes per dominum fratres	201
6	Pugna est nobis aduersus spirituales nequitias	255.b
6	Diaboli varia nomina	255
6	Panoplia militis Christiani	256.b
6	Petit Paulus intercessionem ab ecclesia	313

EX EPISTOLA AD
Philippenes.

1	Vobis donatum est	154.b
1	Cupio dissolui	261.b, 265
2	Adhortatio ad charitatem	35.b
2	Cum esset æqualis deo, &c.	22.b, 230
2	Donatum est Christo nomen	231.b
3	Nostri conuersatio est in cælis	25.b, 31.b
3	Christus transfigurabit corpus nostrum humile	30.b, 32
4	In omni precatone	307.b
4	Didicimus in ijs in quibus sumus esse contenti	106

EX EPISTOLA AD
Colossenses.

1	Deus eripuit nos à potestate tenebrarum	169.b
1	Christus est imago Dei	230
1	In filio cõplacitum patri est vniuersam plenitudinem inhabitare	27.183.184.b
1	Suppleo in corpore meo	156.b, 198
2	Cauendum à philosophia	332.b
2	In Christo estis completi	337
2	Comparat ceremonias chirographo	140.b
2	Per Christum estis circumcisi	317
2	Ne quis vos iudicet	49.b, 142
2	Si mortui estis cum Christo ab elementis mundi	151.b
2	De decretis hominum	276.b
2	Damnat idolopoiatam	160.b
2	Non per honorem aliquem	152
3	Superna quærite	364.b
3	Mortificate membra vestra	200
3	Serui obedite	150
4	Orationi instate	307.b

4	Vide ministerium quod accepisti à domino	305
---	--	-----

EX EPISTOLA PRIORE
ad Thessalonicenses.

1	Ipsi de vobis annunciant, &c.	225.b
2	Exhortatio nostra non fuit ex impostura	278.300
2	Gratias agimus deo quod cum acceperitis sermonem à nobis	5.292.b, 324
2	Hi vt dominum Iesum occiderunt	153.b
3	Misi ad hoc Timotheum	13.b, 343
4	Hæc est voluntas dei	8
4	Qui reijcit nos	292.b
4	Nolo vos ignorare de dormientibus	262
4	Ipse dominus cum hortatu & voce archangelis	27.250.b, 261.b
4	Nos qui viuimus, &c.	25
5	Rogamus vos fratres vt agnoscatis eos, &c.	54.381.b
5	Indefinenter orate	312
5	Omnia probate	281.283

EX EPISTOLA POSTE-
riore ad Thessalonicenses.

1	Reuelabitur dominus noster, &c.	26.b, 251.b
2	Antichristi aduentus est secundum operationem satanæ	256
2	Antichristus collocauit se in solium	287
2	Reuelabitur antichristus	298
2	Quomodo antichristus conficiendus sit	278
2	De falsis miraculis	371
2	State & tenete traditiones quas accepistis	268.b
3	Præcipimus vobis fratres, vt subducatis	9.b
3	Si quis non obedit sermoni nostro	384.b

EX PRIMA EPISTOLA
ad Timotheum.

1	Finis præcepti est charitas ex puro corde	34.b, 136
1	Iusto lex non est posita	65.69.138
1	Gratiam habeo ei, quia fidelem me iudicauit	172.b
2	Adhortor ut ante omnia fiant deprecationes	308.59.b
2	Pro quibus orandum	313
2	Pro magistratu	76
2	Deus vult omnes homines, &c.	5.b
2	Vnus deus, vnus mediator	22.210.b, 223.b
2	Volo in omni loco orare viros	308
2	De vestitu	82.b
2	Mulier docere non permitto	352.b
2	Canon Apostolicus	280.b, 301
3	Episcopus sit vnus vxoris vir	78.b
3	Quæ est ecclesia dei viuentis	279.305

I N D E X

4	Spiritus certo loquitur	84.b.300.b.384.b	4	Nobis annunciarum est quemadmodum &	
4	Pietas ad omnia utilis	158.b		illis	301.b.246.b
4	Esto forma fidelium	303.b	4	Exhortemini vos inuicem	240.b
4	Donec venero attende lectioni, &c.	106.b	5	Nemo sibi ipsi usurpat honorem	238.b
4	Comonefacio te ut suscites donum dei	218.b	5	Semel exauditus est pro reuerentia a patre	239
5	Qui bene praesunt presbyteri	295	6	Impossibile ut qui semel	10.374.b
5	De viduis	385	6	Homines per eum iurant	46.b.325.b
5	Peccantes coram omnibus argue	307	7	Christus perpetuum habet sacerdotium	224
5	Qui bene praesunt	380.b	7	Et illi quidem plures facti sunt sacerdotes	239.b
5	Aduersus presbyterum accusationem ne ad-		7	Nostro pontifici non est necesse, &c.	127
	miseris	384	8	Si esset in terra Christus	239
5	Vide ne cui manus cito imposueris	172.b.301	8	Quoniam propitius ero iniustitijs eorum	149
6	Quicumque sub iugo sunt serui	150	9	Non in manu facta sancta ingressus est Chri-	
6	Haece doce & exhortare	379		stus	239.b
6	Est quaestus magnus pietas	105.b	9	Christus non iuueni aut hirci sanguine	127
6	Qui volunt ditescere	91	9	Si cinis iuuentiae aspersus	128.b
6	Deus habitat lucem inaccessam	297.b	9	Christus semel sub consummationem secu-	
6	Diuitibus praecipe, &c.	90.98.382		lorum	371
EX SECVNDA EPIST. PAV-			10	Non potest sanguis taurorum	333.b
LI AD TIMOTHEVM.			10	Omnis quidem sacerdos assuit	239.b
1	Dicit vitam per Christum reparata esse	260.b	10	Vnica oblatione perfectos efficit	263.363
1	Deus saluos nos fecit	179.217	10	Voluntarie peccantibus	175
2	Memento Iesum Christum resurrexisse a mor-		10	Ne abieceritis fiduciam vestram	103
	tuis	100	10	Patientia vobis opus est	159
2	Certus sermo, nam si commotui sumus	159	11	Definitio fidei	11
2	Stude te ipsum probatum exhibere	305.b	11	Sine fide impossibile est placere deo	346.b
2	Seruum domini non oportet pugnare	306			373
3	Omnis scriptura diuinitus inspirata	6.b	11	Isti per fidem expugnaverunt regna	53
	183.b		11	Oberrant in ouillis	106
4	Obtestor te coram deo	306	11	Atque omnes hi patres sancti testimonium pro-	
4	Erit tempus cum sanam doctrinam non su-			meriti per fidem	147.b
	stinebunt	110	12	Fili mi ne neglexeris correptionem	104.b
4	Bonum certamen certavi	159.b	12	Patres carnis vestrae	105.b
EX EPIST. AD TITVM.			12	Non accessistis ad montem Sina	271.b.250
1	Constitues oppidatim presbyteros	301	13	Memores estote vincitorum	35
1	Episcopus sit vnius uxoris vir	384.385	13	Honorabile est, &c.	77.78.384.b
1	Oportet vaniloquis obturare os	305.b	13	Beneficentiae non obliuiscamur	382
1	Redarguito illos seueriter	39	13	Parere ijs qui praesunt vobis	54
1	Constituentur se nosse deum	193	13	Animalium quorum sanguis infertur pro pec-	
2	Anus doceto	78		cato	127.b
2	De officijs seruorum	93.b	13	Per Christum offerimus hostiam	240.b.320
2	Bonitas apparuit erga homines	22.179	EX EPISTOLA IACOBI.		
3	Admoneto illos ut principatibus	59.b	1	Quod si cui vestrum deest sapientia	6.b.103.b
3	Deus secundum misericordiam saluos nos		1	Postulet cum fiducia	310.b
	fecit	212.328.359	1	Beatus qui suffert tentationem	320
3	Haereticum hominem, &c.	70.a.b	1	Nemo cum tentatur dicat se a deo tentari	
3	Zenam iuris peritum studiose deducito	378.b			164.b
EX EPIST. AD HEBRAEOS.			1	Omnis donatio bona	309
1	Christus appellatur paternae gloriae splendor	209	1	Religio pura & immaculata, &c.	161.226
1	Christus appellatur imago dei, &c.	229.230	2	Abite in pace, &c.	35
1	Per semetipsum purgauit peccata nostra	262.b	2	Abraham non ratum fide iustificatus est	10.b.157.b
1	Qui creat angelos	248.b	2	Vides quod fides ex factis perfecta fuerit	156.b
1	Nonne omnes sunt administratorij spiritus		3	De lingua, ecce exiguus ignis	82.108.b
	350.b		4	Petitis & non accipitis	309.b
2	De Christi incarnatione & intercessione	22	4	Vnus est legislator	305
2	Christus carnis & sanguinis nobiscum par-		5	Ecce merces operariorum	93.172
	riceps factus est	152	5	In delitijs vixistis super terram	102
3	Nusquam angelos assumit	22.b.232.233.b.248.b	5	Quomodo cum morietibus sit agendum	356.b.387
			5	Constitemini alterutrum pecc. vestra	194.b.196
					E X

S E C V N D V S.

EX PRIMA EPIST.

P E T R I.

- 1 Dicit prophetas scrutatos esse ad quem articulum temporis, &c. 123.b
- 1 In prophetis fuisse spiritum Christi 244.b
- 1 Euangelium iucundū spectaculum esse angelis 251
- 1 Perfecite sperate in eam quæ ad vos defertur gratiam 103.b
- 1 Redempti estis, non auro, &c. 21.b, 262.b
- 1 Renati estis 8.276.b
- 2 Christum lapidem esse illum uiuū 289.a.b
- 2 De ædificio spirituali 224
- 2 Noui testamenti ministros appellat sacerdotes 295.b, 375
- 2 Subditi estote omni humanæ constitutioni 38.b
- 2 Tanquam liberi, non veluti, &c. 152.b
- 2 Deum timete, regem honorate 53
- 3 De officio mariti & vxoris 385
- 3 De vestitu 82.b
- 3 Oculi domini super iustos 176
- 3 Christum iuisse ad inferos 23.b
- 3 Baptismus nos saluos reddit 318.b
- 334
- 4 Dicit mortuis prædicatum euang. 260.b
- 4 Ut quisq; accepit donum 304.b
- 4 Nemiremini dū per ignē exploramini 100
- 4 Ne quis vestrū affligatur vt homicida 100.b
- 4 Tempus est vt iudicium dei à domo ipsius incipiat 101.b, 107.b
- 5 Presbyteros qui inter vos sunt obsecro 291
- 5 Prohibetur dominiū in gregē Christi 298.b
- 5 Aduersarius vester diabolus 254.b, 255.b
- 256.b

EX SECVNDA EPIST.

P E T R I.

- 1 Nos habere ædificationem ex deo 261.b
- 1 Scriptura prophetica non est priuatæ interpretationis 305.b
- 1 Non voluntate hominis allata est olim propheta 4.b
- 1 Omnis prophetica scriptura 9.b, 243
- 2 Deus angelis non pepercit 253
- 2 Noe iustitiæ, &c. 251.b
- 2 Nouit deus suos è tentatione eripere 60.b
- 2 Isti sunt fontes aqua carentes 152.b
- 3 Fuerunt olim Pseudoprophetæ 198.b
- 3 Dicit in epistolis Pauli quedā esse difficilia 9

EX EPIST. D. IYDAE.

Dominus angelos qui nō seruauerunt suam originem, &c. 253

Iudas dicit angelū pugnare cum satana 254

EX PRIMA EPISTOLA

I O A N N I S.

- 1 Quod vidimus & audiuius 29
- 1 Sanguis filij dei, &c. 262.b
- 1 Sanguis Christi emundat nos ab omni peccato, &c. 29.b

- 1 Si dixerimus peccatum non habemus 136
- 167.b, 193.b, 309
- 2 Si quis peccauerit 224.310
- 2 Christus propitiatio pro peccatis nostris 118
- 2 Si quis diligit mundum, non est charitas patris in eo 163.b
- 2 Exiuerunt ex nobis 273.b
- 2 Quis est mendax, nisi is qui negat Iesum esse Christum? 212.b
- 2 Quisquis negat filium 310
- 2 Vnctio quam vos accepistis ab eo 62.b, 199
- 239.246
- 3 Scimus quoniam si apparuerimus 183.b
- 205.246.b
- 3 Qui committit peccatū ex diabolo est 164.b
- 3 Si habeas substantiam mundi 98.b, 175.381
- 3 Filioli ne diligamus verbo 34.b
- 3 Per hoc scimus quod manet in nobis 275.b
- 4 Ne cuius spiritui credatis 242.281
- 4 Omnis spiritus qui nō cōfiteretur 232.b, 340
- 4 Omnis qui diligit eum qui genuit 276
- 4 Vos estis ex deo filioli 246.b
- 4 Ex hoc cognoscimus quod in eo manemus 275.b
- 4 Quisquis confessus fuerit quod Iesus est filius dei 157.275.b, 373.374
- 4 Per hoc cognouimus charitatem, &c. 53
- 4 Deus charitas est 276
- 5 Omnis qui credit Iesum 340
- 5 Hæc est charitas vt eius præcepta seruemus 139
- 5 Omne quod natum est ex deo 240
- 5 Hæc est victoria quæ vincit mundum 19.b
- 5 Si testimonium hominum accipimus 186
- 5 Qui non credit deo, mendacē facit eum 17.b
- 5 Hæc est fiducia quā habemus apud eū 19.b
- 5 Scimus quod filius dei venit 231.b
- 5 Fugite idola 288

EX APOCALYPSI

I O A N N I S.

- 1 Noli timere, ego sum primus 281
- 3 Hæc dicit sanctus & verax 280
- 3 Ego quoscunq; amo arguo 100
- 3 Vincenti dabo edere 289.b
- 6 Vidit Iōānes animas sub ara latitantes 260.b
- 261.b
- 6 Vsq; quo domine qui es sanctus, &c. 157.b
- 7 Post hæc vidi, & ecce turba multa 271.b
- 14 Timete deum 221
- 14 Scribe, beati mortui 265
- 16 Angeli phialas effundunt 251.b
- 17 Babylon magna mater scortationum 292
- 18 Exire de illa populus meus 288
- 19 Vide ne feceris 221
- 20 Alligat satanam angelus domini 251
- 20 Fumum ex condemnatis ascensurum in secula seculorum 254
- 22 Vide ne feceris 252.b
- 22 Conseruus tuus sum 282

INDEX RERVM ET VERBORVM

QVAE HOC OPERE CONTI-
NENTVR.

A



Arontypus Christi	113	Afflictionis exempla	99.106.b
Aaronis virga	113	Afflictionis tempus breue	105.b
Abad	225.b	Afflictiones nostræ non sunt satisfactio pro pec-	
Abigei	95	catis	17.30
Abraham	97.b.98	Afflictiones testimonia doctrinæ	100
Abraham propheta	1.b	Afflictionum causæ in sanctis	99.b in im-
Abraham quomodo iustificatus	18.a.b	pijs	101.b
Abrahæ sinus	23.b	Afflictionum vsus	17
Abrogatio legis	139.b.145	Afflictionibus probamur	100
Abrogata non sunt moralia	140	in Afflictionibus quo pacto se gerant pij	102
Abrogata quatenus sint ceremonialia	140.b	Afflictorum consolatio	104
Absolutio priuata	30.296.b	Affliguntur boni & mali	99
Abstinencia	82	Affliguntur illi quibus peccata remissa sunt	197
Accusatio iusta	109.b	Affliguntur pij, in voluptatibus viuunt impij	99
Actiones sacræ	119	Agape	364.b
Actuale peccatum	167.170.b	Agnus paschalis figura Christi	124.b
Adam	2	Ahlias Silonita	64.b
Adam & Christi antithesis	17.b	Alea	93.b
Adami lapsus	163.b	Alienum quid in sacris literis	41
Adamo cur lex data	165	Aliena mulier	41
Admonitio pœnam debet præcedere	70	Alieni dij	40.b
Admonitio & correctio ecclesiastica	384	Altare aureum	116
Adolescentium officia	54	Ambitus	95
Adonai	205.b	Amen	320
Adorare quid	43.219.b	Amicitia & societas hominum seruanda	36.b
Adoratio duplex	219.b	Amos propheta	286.b
Adorare deum verè quid sit	220.b	Amram	2
Adorare homines	219.b	Anabaptismi piaculum	358
Adorantium & non adorantium deum præmia		Anabaptismi historia	357.b
& pœnæ	221	Anabaptistæ	282.b.355
Adorandum ad quam mundi plagam	282.b	Anabap. sacros cœtus negligunt	50
Aduentus Christi duplex	26.b	Anabaptistæ coercentur imper. legibus	358
Adulatio	110	Anabaptistæ quibus argumentis doceant infan-	
Adulterium	80.134	tes non esse baptizandos	356
Adulterium Davidis	80.b	Anachoretæ	53.b
Adulterium & fornicatio spiritualis	44.291.b	Analogia	325.b
Adulterij pœna	34.b	Analogia in negotio cœnæ	344
Adulteræ ignouit Christus	80.b	Angeli	215.248
Aduocatus	224.b	Angeli adfectibus non sunt obnoxij, quemadmo-	
Aedificia	82.b	dum nos	252
Aedificia publica	76	Angeli consolantur afflictos	251.b
Aedificia sacra	382.b	Angeli creati sunt	248.b
Aegyptij scholas habuerunt	378	Angeli defendunt nos	251.b
Circa ægrotantes quid faciat ecclesia	387	Angeli incorruptibiles	249.b
Aeneus serpens	186	Angeli loco suo modo continentur	249.b
Aerius hæreticus	264	Angeli mandata dei exequuntur	251.b
Aeterna damnatio	32.b	Angeli non adorandi	220.b.252.a.b
Aeterna salus	32.b.183.b	Angeli potentiæ & virtutes appellantur	250
Afflictio à quo sit	104	Angeli sceleratos puniunt	251.b
Afflictio piorum argumentum est iusti dei iudicij		Angeli se opponunt pseudoapostolis	251
in impios	101	Angeli spiritus boni	249
		Angeli substantiæ corporeæ quomodo dicantur	249
		Angeli	

Angeli sunt expeditissimi	249. b	Antonius Monachus	385. b
Angeli quales sint substantiæ	249	Anthropomorphitæ	207
Angeli qualia corpora assumant	249	ἀνθρώποινα Stoicorum	102
Angeli quando creati	248. b	Apocalypsis Ioannis	5
Angeli varijs nominibus appellantur	250. b	ἀποκάλυψις 17	Apostatæ 135
Angeli vnde dicti	250. b	Apostasia duplex	183
Angelorum cultus grauius damnatus	252. b	Apostolus	4. b. 295
Angelorum è cœlo lapsus	253	Apostoli acceperunt stipendium	380. b
Angelorum multitudo & ordo	250	Apostoli doctrinā salutis perfectè tradiderunt	7
Angelorum nouem chori	250	Apostoli quomodo soluerunt & ligarint	303. b
Angelorum obedientia	251	Apostoli scripserunt lingua Græca	313. b
Angelorum opera vtitur deus	250. b	Apostolorum scripta	4. b
Angelorum oratio	224. b	Apostoli quare scripserint	8. b
Angelorum robur & fortitudo	250	Apostolici hæretici	90
Angelorum sapientia	250	Apotactitæ hæretici	90. b
Angelorum varia ministeria	251	Apparitiones animarum	265
Angelorum varia officia adumbrantur nominibus		Appellatio	133. b
An in angelis deus exaudit	252 (250. b)	Applicatio scripturæ	304
Angelis non est nimium tribuendum	252	Aqua	227. b. 244. 246
Angelis non est sacrificandum	222. b	Aqua baptismi sancta est	351. b
Angelici hæretici	252. b	Aqua cur suos baptizari dominus uoluerit	351. b
Anima quid sit	257	Aquarij	362. b
Anima à corpore separata	259. b	Ara holocaustorum	116. 118. b
Anima an loco contineatur	261	Ara thymiamatis	118
Anima est immortalis	23. b. 259. b. 260	Ara vel mensa Dei	363. b
Anima nec deus nec pars dei est	258	Arare sabbato	50. b
Anima redit ad corpus, sed non ante iudicium	261. b	Arbor scientiæ boni & mali	165. b
Anima vna est	257	Arca fœderis	116
Animam rationalem habere Christum	233	Arca fœderis	177. b
Animæ uocabulum variè sumitur	257	Arca fœderis vnde dicta	39. b
Animæ partes siue facultates	171. 199. 259	Arca Noe	180. b
Animæ species tres	257	in Arca quæ fuerint recondita	177. b
Animæ an corporeæ vel incorporeæ substantiæ	257. b. 158	Arcae domini historia	116. b
Animæ quomodo & quando ad locum destinatum transferantur	261. b. 262	Arcae usus, & significatio	277. b
Animæ operationes & vires	259	Archangeli	260. b
Animæ plene purgantur sanguine Christi	262. b	Archidiaconi	296. b
	263	Archiepiscopi	295. b
Animæ separatæ à corporibus non deferuntur in purgatorium	262	Archipresbyteri	297. b
Animæ non dormiunt	262	Arta siue arrhabon	246. b
Animæ vbinam agant	261	Aristocratia	59
Animas non oberrare in his regionibus	264. b	Arrius	229. b
Animas fidelium certò & mox à morte corporea beari	265. b	Arriani	275
Animas esse substantias	257. b	Articuli fidei sunt veluti materia fidei	20
Animas immortales esse docuerunt omnes sapientes	23. b. 261	Artificium discant pueri	56. b
Animarum origo	258. b	Artes discendæ	56. b
Animarum mors	259	Artotyritæ	361. b
Animus ab animo quid differat	257	Asyla	38. b. 135. b
Animale corpus	32	ἀσφύλοι	24. b
Animalium quorundam esum quare deus prohibuerit	130. b	Atrium templi	115. b
ἀνομία 162	ἀντίτυπον 17	Auaritia	61. b
Antipatris sententia de nuptijs	77. b	Auditorium verbi dei morbi	7. b
ἐντιμολογία 52		Auris confessio	195
		Auersio	190
		B.	
		Baasa rex	64. b
		Balthasar rex Babylonis	88
		Baptismus admonet nos officiorum pietatis	359
		Baptismus apostolorum Ioannis & Christi, qui & ignis	349. b. 352

I N D E X.

Baptismus infantium	347.365	Beneficiorum pluralitas	303
Baptismus quibus constet	349	Bibliorum liber authenticus	270
Baptism ⁹ quid, à quo, quando institutus	349.a.b	Blasphemia	174.b
Baptismus seruit vocationi nostræ	359.b	Blasphemia in spiritum sanctum non remittitur	175
Baptismus successit in locum circumcisionis	357	Bona ecclesiæ	54.b. 379.b
Baptismus valet in omni uita hominis	358.359	Bonorum ecclesiasticorum abusus	383
Baptismi benedictio	339	Bono operi præmium datur	157.b
Baptismi effecta	358.b	Bona opera non reijciuntur	155
Baptismi locus	351.b	Bona opera quid	154.153.b
Baptismi omisio non est libera	351	Bona opera vera	160.b
Baptismi tempus	351	Bonorum operum finis	161
Baptismi vox	349	Bona uentura de confessione	195.b
de Baptismo canon Nicænus	339.b	Bonifacius 8.	142
Baptismo ceremoniæ adiectæ	350.b.351	Bonitatis dei nullus modus	44.b
Baptismo colligitur populus dei	359	C.	
sine Baptismo excedentium salus	353	Cacodæmones	253
Baptizare in nomine domini	350.b	Cædes ex quibus causis existat	57
Baptizare qui debeant 352.b. an laici 354. b. an	352.b	Cædis modus	58
obstetrices	352.b	Calamitatum causæ	99.b
Baptizari in nomine & in nomen domini	343.b	Calamitatum species	99
Baptizari qui debeant	355	Calendæ feriarum genus	119.b
Baptizarunt apostoli in aqua consecrata	339.b	Calumniator diabolus	254.b
Baptizantur infantes non credentes	341. b	Calumniatores	135
an Baptizandum aqua non consecrata	351	Calumniæ	109
Baptizandum quare sit aqua	351.b	Campanæ	383
Baptizati ab hæreticis, non rebaptizati	273	Campanarum baptismus	383
Baptizati albis vestibus induti	351	Candelabrum aureum	116. 118
Baptista quid efficiat	352	Candidis vestibus induuntur baptizati	351
Bardeanes	162.b	Canones exponendi scripturas	10.b
Beata uita	183.b	Canonici	316
Beelzebub	255	Canonici & ecclesiastici libri	269.b
Belial	255	Canonicæ horæ	315.b. 316
Bellum flagellum dei	72.b	Canentes Paulus non coërcet	314
Bellum gerere an magistratui licitum sit	71.b	Cantus ecclesiasticus	314
Bellum iniustum	73.b	Cantus ecclesiæ vetustissimus	314.b
Bellum uile	72.b	Cantus Gregorianus	315
Bellum res periculosa	72	Cantus veterum liber fuit nunquam uniuersalis	314.
Belli effecta	52.b. 72.b	Cantus veterum qualis fuerit	314. b
Bello intersint sacerdotes	115	in Cantu concordia	315
Bello superantur qui iustā causam habent	72.b	Cantus ecclesiastici turpes abusus	315
Bella gerenda propter religionem	73	Cantores ecclesiæ Israëliticæ	115
Bella iusta	50	Caput ecclesiæ	290
Bellorum causæ	73	Caput serpentis	121.b
in Bellis inferendis vel depellendis peccatur	59	Cardinales	297.b
Bellis non ædificatur ecclesia	278	Caro quid	30.b. 198.b
Benedicere quid	121. b	Carnis cum spiritu pugna perpetua	200.b
Benedicere officium sacerdotum	114. b	Carnis opera	170
Benedicti monachi uita	386	Carnalis populus	137.b
Benedictiones	41.b	Carthusiani	97
Benedictionis vocabulum	329.b	Catechistæ	305. b
Benedictio baptismi	339	Catechesis	305
Benedictionis solennis formula	114.b	Catechumeni	356.a. b
Benedictione rerum naturæ non mutantur	329.a. b	Cathari hæretici	284
Benedixit dominus sabbato	49	Cathedrales ecclesiæ	315.b
Benefaciendum quantum, quibus, quomodo	98.b	Catholica ecclesia	28.b. 271. 282
Beneficentia nobis commendatur	98.382.a.b	Catholici	285
Beneficia dei varia sunt	129. 321	Censura & examen	301.b
		Centu	

T E R T I V S.

Centurionis fides in euang.	111. b. 327	Christi vera humanitas	232
Ceremoniæ quid	111. b. 327	in Christo omnia uitæ & salutis plene nobis data	
Ceremoniæ diuinæ & humanæ	111. b. 112	esse	14. b. 27. b. 183. b
Ceremoniæ sunt cultus dei	112	per Christum aperit se deus euidentiff.	209
Ceremoniarum finis	112	Christum habere animam rationalem	233
Ceremoniarum multitudo	388	Christum verum esse deum	230. b
Ceremonias & iudicia veteres habuerunt	39. b	Christum vtrasque naturas retinere impermixtas	
Ceremonialis lex	39. 111. b		233. b
Ceremonialia quatenus abrogata	140	Christiani pauci sunt	242
Cestus quid	81. b	Christiani reges	240
Character indelebilis	279. b	Christiani sacerdotes	240
Charitas	33. 276	Christiani regni termini	237
Charitas plenitudo legis	19. b	Christiana libertas	150. b
Cherubim	42. 150. b	Christianæ doctrinæ summa	4. b
Chorepiscopi	296. b	Christianum nomen	240. a. b
Chriæ	323	Christianorum officium	240
Christus	21. b. 27. b. 240	Chrisma sacrum quid	242
Christus agnus appellatur	246	Cibarium sacrificium	126
Christus benedicit	238. b	Ciboria	370. b
Christus concipitur de spiritu sancto	22	Ciborum delectus	84
Christus Davidis filius dicitur	22. b	Ciconia pietatis symbolum	52
Christus deus	21. b	Circuncisio quid sit	121
Christus doctor est ecclesiæ	238. b	Circuncisio fœdus appellatur	122
Christus est dominus	21. b	Circuncisio membro genitali inditur	342
Christus Iesus pontifex maximus	238	Circuncisio octauo die	353
Christus impleuit legem	138. b	Circuncisio pro populo dei	122. b
Christus intercedit	238. b	Circuncisio signum fœderis	122
Christus in vna persona manet indiuisus	234. b	Circuncisio vnde	122
Christus est monarcha	236	Circuncisionis ritus	122
Christus multa dixit & fecit quæ scripta nō sunt	7	Circuncisionis signum	18. 122
Christus non est diuidendus	372	Circuncisioni non est alligata gratia	122. b
Christus non est frustra mortuus	18	Codri pietas in patriam	53
Christus non pro originali duntaxat passus est	186. b	Cœlum	317. b
Christus plene saluat	183. b	in Cœlum ascendere quid	370
Christus primogenitus	112. b. 229. b	Cœlum & sydera	215
Christus propter nos passus	23	Cœlum varia significat in scripturis	25
Christus quando passus sit	23	Cœlestis exercitus	250. b
Christus quando resurrexit	24. b	Cœna dominica quid sit	360
Christus quomodo recipiatur	185	Cœna est actio sacra	360
Christus resuscitatus corporis veritatem non depoluit	232. b	an Cœna celebranda sit contra imminentiā mala	365
Christus est rex vniuersorum	236	in Cœna celebranda nihil aliud sequendū, quàm	
Christus sacrificat	238. b	quod à Christo accepimus	362
Christus sanctificat	238. b	Cœna dominica differt à vulgari	360
Christus solus est vita & salus nostra	183. b	Cœna in quo loco celebranda	363
Christus solus est intercessor & aduocatus apud deum	233. b	Cœna non priuatim ægris, nec in templo sanis est instituenda	365. b
Christus spes	232	in Cœna, panis fermentatus an azymus usurpandus sit	361. b
Christus suscepit in se peccata nostra	16. b	in Cœna præsentia Christi	371
Christus verè passus est	23	in Cœna qua lingua vtendum	364
Christus via	231. b	Cœna quando celebranda	364. b
Christi aduentus duplex	26. b	Cœna quando instituta	360. b
Christi ascensio	24. b	in Cœna qua veste vtendum	363. b
Christi mors plenaria expiatio peccatorum	17	Cœna dominica quare sub panis & vini specie sit instituta	361. b
Christi persona non discerpitur	235. b	Cœna quibus rebus constet	60. b
Christi regis palatium	237. b	Cœna quomodo quondam celebrata in ecclesia	
Christi sacerdotium	138. b		361. b
Christi transformatio in monte	31. b		

INDEX

Cœna dominica quoties sit celebranda	364. b	Coniugium quid sit	76. b
Cœna sacra quibus instituta sit	365	Coniugia à religione auspicanda	79. b
Cœna domini est vice omnium sacramentorum	143	Coniugij dignitas	77
in Cœna uinone miscenda aqua	362	Coniugij mala unde sint	77. 78. b
in Cœna vtraque species danda est & accipienda	362. b	per Coniugij parabolam coniunctio hominum	44
Cœnæ dominicæ author	360. b	cum deo adumbratur	44
Cœnæ dominicæ fines	366. b. 375	Consanguinei honorandi	54. b
Cœnæ forma	363	Conscientia	36. a. b
Cœnæ dominicæ forma paulatim immutata	361. b	Consecratio	300. b
Cœnæ dominicæ materia	361. b	Consecratio Leuitarum	113
Cœnæ dominicæ prophanatio	365. b	Consecratio panis & vini in cœna	363
Cœnæ instrumenta	363. b	Consilium	246. b
Cœnæ reliquiæ	364	Consilia dei	85. b
Cœnæ ritus	369. b	Consolatio afflictorum Christiana	104. Phi-
Cœnæ ritui an aliquid sit adiiciendum, an adi-	361	losophica	104.
mendum	361	Consolator est spiritus sanctus	245
Cœnæ dominicæ vasa	363. b	Constantia sanctorum abstinentium ab immun-	130. b
Cœnæ dominicæ vocabula	359. b	dis	63
Cœnæ dominicæ uerba	360. b	Constantinus Synodum indixit	63
Cœnam indignè sumentes	376	Constantinus Magnus	63
Cœnam quis administrare debeat	363	Constantini donatio	298. b
ad Cœnam quomodo homines sint præparandi	365. 376. b	Constitutiones humanæ	151. b. 152
Cœtus ecclesiastici	38. b	Constitutiones principum	145
Cœtus sacros collegit dominus	49. b. 308	Consultatio	194
Colere quid	225. b	Contemptus ministrorum uerbi	54
Colendus est solus deus	226. b	Continentia quid	82
Collybus quid	92. b	Contractus liciti	91. b
Columbæ ingenium	246	Contumaces & infirmi	153
Comam nutrire	130	Conuersio ad deum	190
Cômunionis uocabulum	29. 345. b. 360. 367.	Cornelius Romanus episcopus	358
Communitas bonorum apostolica	89. b	Corpus gloriosum	31. b
Conceptionis puræ causæ	22. b	Corporalia	363. b
Concilium Carthaginense	301. b. 352. 354	Corporis Christi vera manducatio	372
269. b		Correctionis tempus	6
Concilium Nicænum	5. b	Correptio puerorum	56. b
Concilium Tridentinum	267. b. 268	Crapula	82. b
Concilij determinatio non est expectanda refor-	202. b	Creatio	2. b. 214. b
mare uolentibus	202. b	Creatio cœli & terræ	20. 21
Concilia qualia aliquot seculis celebrata	202. b	Credere quid	21
Concio & celebritas magna	120. b	Crimen	162
in Concionibus cur multi segniores sint	1	Crucis supplicium	23
Concordia familiæ	54. b	Culpa & pœna nobis condonantur	17
Concupiscentia	110. b	Cultus dei	3. 225. b
Concupiscentia damnatur ab Ethnicis	38	Cultus dei non ex nostro cerebro est fingendus	226. b
Concupiscentia peccatum	169	Cultus dei duplex est	225. b
Confessio	193	Cultus dei legitimus & illegitimus	44. b
Confessio auricularis	30. 195	de Cultu dei uero, humana testimonia	226
Confessio auricularis non retinenda est propter	196. b	Cultus deorum	37
priuatam absolutionem	196. b	Cultuum nouorum inuectores à deo maledicti	64. b
Confessio auricularis retinenda non est propter	196	Cultus peregrini Dei	41. b
disciplinam	196	Cupiditates sunt duplices	171. b
Confessio diuina	193	Curiosa negotia	91. b
Confessio humana	194	Curiosæ quæstiones	7. b
Confessio publica	193. b	Cypriani error de sacramento baptismi	348
Confessio priuata	193		
Coniugium Christianum	384	D.	
		Dæmon	254. b
			Dæmo-

T E R T I V S.

Dæmonum infinita turba	254	Deus se peculiariter aperuit populo Israelis	8
Dæmon futura prædicit	265	Deus solus adorandus	220.b
Dagon	42	Deus solus colendus	226.b
Damnum datum & acceptum	135	Deus solus est inuocandus	222
Damnati ne sint omnes maiores nostri	287.b	Deus solus loco non concluditur	25.249.b
Daniel	215.b.181	Deus vnde dictus	40.206
Danielis autoritas	4	Deus vnus	37
Daniel polyhistor dictus	4.b	Deus vnus est essentia, personis trinus	20 a.b
Dauidis filius Christus	22.b.23	Deus vritur opera angelorum, non quod perse omnia efficere non possit	250.b
Decalogus quid	39.b	Deus zelotes	43.b
Decalogi diuissio	39.b	Dei bonitas	20.b
Decalogi mirifica pronuntiatio	39.b	Dei cognoscendi formæ & rationes	204.b
Decalogus plena bonorū operū formula	160.b	Dei digitus	245.b
Decalogi præceptorum enumeratio	140	Dei cultus	3.225.b
Decalogi præstantia & dignitas	39.b	Dei facies	33
Decalogi summa	39.b	Dei nomina	205.b
Deceptio	93.b	Dei imago apud gentes in templis non fuit	37.b
Defectionum genera	288	Dei longanimitas	44.176.b
Defectio à Romana ecclesia præcipitur	288	Dei misericordiæ nullus modus	44.b
Defectionis libera confessio	285	Dei nomen	318
Delatio	109.b	Dei nomen ineffabile	204.b
Delectus ciborum	84	Dei opera	219
Delectus ciborum abrogatus	143	Dei opera bifariam considerantur	209.b
Delictum quid à peccato differat	162	Dei populus quis	355
Delicta quid	127	Dei posteriora	208
Democratia	59.b	Dei proprietates	41
Demuth	156.b	Dei proprietates non tribuendæ sunt alienis	228
Depositorum	93.134.b	Dei prouidentia & gubernatio	21
Deprauatio naturæ qualis & quantā	168.b	Dei spectra vel icones	207
Deprecatio	307.b	Dei vnitas	40
Desperatio animæ moræ	260	de Deo disputatio exorta	211
Detractio	109.b	Deo incorporeo quomodo membra attribuantur	207
Deus	2.b	Deo os tribuitur	1.b
Deus Abraham, Isaac, Iacob	206.b	ex Deo patre gignitur filius	22
Deus alienus	220.b	Deo soli sacrificandum	221.b
Deus erga homines qualis	40	de Deo variæ opiniones	204
Deus essentia vnus est	210	Deum esse	204.b
Deus cognoscitur ex sententijs & testimonijs	210	Deum esse quid	18
Deus cognoscitur per collationem	210	Deum quomodo viderint patres	207.b
Deus colendus est quemadmodum ipse præscrip- sit	228.b	Deum vere adorare quid sit	220.b
Deus cordium scrutator	222.b	Dij appellantur magistratus	53.b.75.b.219.b
Deus est creator cæli & terræ	20.b	Dij alieni	40.b
Deus cuncta gubernat	215.b	Deos alienos deo vero relicto colere	227.b
Deus exaudit in angelis	252	Deorum cultus	37
Deus exercituum	20.b	Dextra dei patris	25.b
Deus ex suis operibus cognoscitur	209.b	Diabolus	254.b
Deus gratuito bona confert	208	Diabolus æternum est damnatus	253.b
Deus huius seculi diabolus	255	Diabolus calumniator	110
Deus Iudæorum non colitur à Romanis	221	Diabolus est creatura	253
Deus mundo iratus fuit	183	Diabolus expeditus, vafer & potens	254
Deus non est author peccati	162.163	Diabolus mille artifex	254
Deus omnipotens	20.b	Diabolus non malus creatus est	253
Deus pater dicitur	ibidem	Diabolus quid sit	253
Deus placatus est per Christum	183	Diabolus solus non est causa peccati	162.b
Deus per filium egit omnia cum patribus	207.b	Diaboli nomina quæ vires eius adūbrāt	254.a.b
Deus quid sit	208.b	Diaboli operationes	255.b
Deus quid sit, sobrie est inquirendum	204.b	Diaboli potestas est circumscripta	256.a.b

I N D E X.

Diaboli regnum	318	Ecclesiæ vocabulum	271
Diaboli sunt substantiæ spirituales	254	Ecclesia quid	28.b.271
Diaboli vna est substantia vel persona	254	Ecclesia assimilatur domo, vineæ, corpori huma-	
Diaboli voluntas	254.b	no	289.a.b.290
Diaboli voluntas est nocere animis, corporibus,		Ecclesia bellis non ædificatur	278
facultatibus	255.b	Ecclesia an erret	225.278.b
Diabolorum corpora assumpta qualia	254	Ecclesia errat aliquando	279
Diabolos esse	253	Ecclesia catholica	28.b
Diaconi	295.b.296.b	Ecclesia dei domus est	288.b
Diaconissæ	295.b.353	Ecclesia dei semper fuit eritq; semper	272.b
Dies dominica	49.b	Ecclesia diaboli	272.b
Dies festus	119	Ecclesia etiam malos complectitur	272
Dies nouissima hominis	265.b	Ecclesia externa	274
Dies prophanus	119	In Ecclesia extruenda quare opera hominum deus	
Difficultas scripturæ vnde	9	utatur	292
Digitus dei	24.b	Ecclesiæ fundamentum	289
Digne & indigne manducare & bibere corpus &		Ecclesia inuisibilis	274
sanguinem Christi	375.b	Ecclesia est mater	291.b
Dilectio	33	Ecclesia militans	271.b
Dilectio dei	33.b	Ecclesiæ origo	276
Dilectio duplex	33	Ecclesia orthodoxa	28.b
Dilectio è cælo	33	Ecclesia ouile est Christi	291
Dilectio sincera	34.b	Ecclesia particularis	272
Dioeletiani persecutio	100.b	Ecclesia prophetica & apostolica	277
Dionysius de diuinis nominibus	207	Ecclesiā non oneravit deus multis legibus	377.b
Distinctio personarum diuinitatis	210.b	Ecclesiā reseruat sibi deus etiam aberrantibus gu-	
Diui	41	bernatoribus	286
Diuis non sunt extruenda templa	383	Ecclesia sancta est	28.b.29.272
Diuinitatis Christi testimonia	21.b	Ecclesia est sponsa Christi	292
Diuitiæ	89	Ecclesia triumphans	237.b.271.b
Diuitiæ quomodo possidendæ	96	Ecclesia veterum & nostra eadem	145.b
Diuitiæ non profundendæ	ibidem	Ecclesia virgo appellatur	291.b
Diuortium	78.b.134.385	Ecclesia visibilis	274
Docendi ecclesiam ratio	304	Ecclesia vniuersalis	272.b
Docere officium sacerdotum	114.b	Ecclesiæ caput Christus	28.b.290
Doctores	295	Ecclesiæ domesticæ	56
Doctores ecclesiæ patres à Paulo dicuntur	51.b	Ecclesiæ ministrorum officium	303.b
Doctrina bona propter doctoris vitam non bo-		Ecclesiæ ministris deberi mercedem	380
nam, non est reiicienda	307	Ecclesiæ non opus esse pædagogia legali	388
Doctrina eadem veteribus & nobis	146	Ecclesiæ notæ internæ & externæ	285.274.b
Doctrina vnde petenda	303.b		275.b
Doctrinæ priuatum genus	306	Ecclesiæ particulares	28.b
Doctrinæ dijudicatio	281	Ecclesiæ potestas	279
Doctrinæ sacræ summa	155	Ecclesiæ senatus	384
Dolor duplex	191	Ecclesiæ vnitas	281.b
Domesticæ ecclesiæ	56	Extra Ecclesiam non est salus	282.b
Dominus quis	40	Ecclesiarum ministri honorandi	54
Dominus excelsus	106	Ecclesiastica bona	54.379.b.380.b
Dominatio appellatur magistratus	59	Ecclesiastica correctio	384
Dominationes	250.b.255	Ecclesiasticæ functionis vocabula	295.a.b
Domini vocabulo apost. libenter quare vsi sint		Ecclesiasticæ leges	38
Dominica dies	49.b	Ecclesiasticæ personæ	297
Domus quid	288.b	Educatio sobolis	78
Domus dei quid sint	289	El	206
Donatistæ	283.b.288.352.b	Eleemosyna præcipitur	98
Donatiua baptisatis dantur	351	Elementa mundi	137
Draco diabolus	254.b	Electio iudicium	61.132.b
		Electus ad vitam æternam quis sit	217.b
Ebrii sancti quomodo	97	Elohim	37.206
		Eloquentiæ	

TERTIVS.

Eloquentiæ vis	330	Expositio scripturarū debet analogā esse fidei	10
Emptio, venditio	134	Expositio excutiat quid præcedat, quid consequatur	10
Enceniorum festum	119.b	Expositio fiat ex pectore religioso cum oratione	10.b
Enochi scriptum	1.b	Expositio scripturarum fiat per collationem aliorum locorum	10.b
Enthusiastæ	347.b.356.b	Expositio scrip. non pugnet cum charitate	10
Ephod vestis sacerdotalis	65.b	Exuere veterem hominem quid	161
Episcopi	113.b	Excommunicandi potestas	180
Episcopis aliquē præeminere an sit vtile	295	Exhæredatio	134
Episcopis nō permissum est novas leges condere	298.b	Exilium	106
Episcoporum dignitas & prærogatiua creuit	303.b	Exhomologesis	194
Episcoporum genera	296.b	Exorcistæ	197
Episcoporum prælatura	297.b	Expiationis festum	120.b
Episcoporum & presbyterorum æqualitas	296.a.b		
Episcoporum vita inculcata	296.b	F.	
Episcopos solos non habere potestatem ordinandi	301	Facies dei	33
Error quid	162	Facinorosi quare palam puniendi	68.b
Eruditio puerorū in quibus rebus sit posita	55.b	Facultates dona sunt dei pro quibus gratiæ agendæ	96.b
Essentia	211.b	Facultates seruiant necessitati	96.b
Esū quorundā aialiu cur deus phibuerit	130.b	Facultates ecclesiasticæ	34.b
Ethnici damnant concupiscentiam	152	Falsi testis pœna apud Romanos	38
Ethnica sacrificia	38	Familiæ concordia	54.b
Ethnicorū præclara facta non vituperanda	125	Fatum quid	162.b
Euangelij vox	174	Fatum non esse causam malis	162.b
Euangelium quid sit	177.b	Felix & Regula martyres	107.b
Euangelium annunciat gratiam	177.b	Feriæ conceptiue	119.b
Euangelium appellatur testimonium	178.b	Feriæ sanctæ	119
Euangelium esse nuncium cœleste	341	Feriarum numerus & modus	119.b
Euangelium non habet partes	178	Festus dies quid	119
Euangelij descriptio	181.b	Festum corporis Christi	364.b
Euangelij summa	178	Festum enceniorum	119.b
Euangelica prædicatio accusat peccata	184.b.178	Festum expiationis	120.b
Euangelica salus ad omnes pertinet	190	Festum purim	119.b
Euangelicæ prædicationis scopus	184.b	Festum tabernaculorum	120.2.b
Euangelistæ	180	Festum tubarum	120
Euangelistæ quid tractent	295	Festa stata & anniuersaria	119.b
Eucharistia	181.b	Festi dies quare instituti	119
Eucharistia pueris olim data	329.b.360	Fides	12
Eucharistia quid	354.b	Fides a. b	Fides Abrahæ
Eucharistia an sit recludenda & adoranda	321.b	Fides augmenta habet	218
Eucharistiam in manus accipere	364	Fides beat	35.b
Eucharistia non offerenda pro mortuis	364	Fides certa & indubitata	13
Eucharistię perceptio an infatib ⁹ necessaria	366	Fides Christiana consistit in causa duorum hominum	170.b
Euchiræ	213.358.b	Fides coniungit nos cum deo	15.b
Eucharisticum sacrificium	129	Fides est donum dei	70.b
Eulogia	329	Fides se exerit per opera	19
Euryches	233.b	Fides formata	15
Exactiones	76.b	Fides generalis	15
Examen veterum episcoporū quale fuerit	301.b	Fides incrementum suū habet & defectum	14.b
Examen Papisticum	303	Fides infusa & acquisita	15
Excæcare	166	Fides indubitata persuasio	12
in Excelsis adolere	117.118.b	Fides iustificat	15.b
Exempla singularia in scriptura	353	Fides non quælibet credit	12.b
Exercitus	250.b	Fides plantatur verbo dei	11.b
Excommunicatio	384	Fides propria non aliena	20.b
Expositio verbi dei	9.a.b	Fides propter se iustificat	17.b
		Fides quomodo plantetur	35

I N D E X

Fides radix est bonorum operum	19.b	Gentes cognouerunt deum	16.b
Fides reddit sapientes	15	Gentes & iudei fide iustificantur	18
Fides pro religione sumitur	14.b	Gentes iustificari	18
Fides tria tempora respicit	1	Gentes peccatores esse	36
Fides veteribus & nobis eadem	146	Gentes sacrorum studiosæ	37.b
Fides vna est	14.b	Gentilium sacerdotes	37.b
Fidei causa efficiens	11	Gentiliū virtuosa opera an sint peccata	173.b
Fidei definitiones	11	Gentiles quidam saluati	170.b
Fidei descriptio	11	Gentibus se deus patefecit	6
pro Fidei dono orandum	12	Genus dicendi quo sacri scriptores vtuntur	8.b
Fidei effectus	15	Gesticulationes in Missa	364
Fidei exempla	13	Gladius quid significet	68
Fidei fundamentum	13.b	Gladij vsus duplex	71.b.68
Fidei notæ	12	Gloriam deo tribuere	12.b
Fidei obiectum	20.b	Gloriosa corpora	31.b.32
Fidei significatio	11	Golgatha	117
Fidei summa in symbolo apostolorum	14.a.b	Gratia quid sit	337.b.178.b
Fidei veræ capita	13.b	Gratia dei in sacramentis an contineatur	338
Fidei vocabulum aliter vsurpat Paulus, aliter la-		Gratia in Christo exhibetur	2.b.180
cobus	157.b	Gratiam gratis conferri, recipi per fidem	338
Fidei fructus, effectus	28	Gratiam sacramenta non conferunt	338
Fide non operibus recipitur Christus	185.b	Gratiæ dei sedes	339
Fide sola iustificamur	17.b	Gratiæ diuisio	179.b
Figuratæ loquutiones quando sint	373.b	Gratiæ agendæ deo per Christum	320
de filio dei confessio	229.b	Gratiæ diuinæ causa	179
Filius dei patri est consubstantialis	21.229.b	Gratiarum actio	207.b
Filius ex patre ab æterno ineffabiliter genitus		Gratiarum actio est sacrificium	320.b.321.363
228. b		Gratiarum actio deo soli debetur	320.b
Filius dei quis sit	21	Gratis remittuntur peccata	29.b
Filius dei verus est deus	230.b	Gratianus	195
Filius iræ 169.b Filius dei vnicus	21	Gregorius quintus	315
Filius mortis	169.b	Gubernatores	195.b
Filij dei adoptati	31.b		
Filij tonitruj	246		
Fœdus quid	33. b	Hæreditas	134
Fœdus dei	2.b	Hæretici qui	63.b.135.285
Fœdus dei & hominum	121	Hæretica defectio	288
Fœdus quousque initum	221. b	Hermiani	358.b
Fœderis conditiones	221. b	Hæsitatio duplex	21. b
Fœderis personæ	121. b	Hierarchia in ecclesia	295.296
Fœderum sciendorum mos	325. b	Hierocles de nuptijs	77. b.78. b
Fœmoralia	113. b	Hieronymus	168. b
Formata fides	15	Hierosolymorum vrbs quare excisa	72. b
Fornicatio	18	Hierosolymorū urbem restaurare tentarunt	141
Fortitudo	246	Holocaustum	125. b
Fractio panis	360	Holocaustorum ara	118. b
Fraus	39. b. 134. b	Homicidium punitur ex legibus gentiliū	34. b
Fructus mortis Christi	23	quantum sit scelus	58. b
Fulminea legio	74. b	Homicidij causæ	57. 58
Funera Christianorum	387. b	Homicidij species	58. a. b
Furtum	134. b	Homicidia	135
Furti definitio	92. b. 93. b	Homicida diabolus	254. b
Furti species variæ	37. b. 93. 94. 95	Homo	215
		Homo nouus	298. b
G.		Homo labilis est conditus	165
Gabriel angelus	150. 251. b. 252.	Hominis finis	219
Gangrensis synodus	90. b	Hominis officia	221. b
Gaudium verum vnde sit	245	Hominis vires	199
Gedeonis vellus	322. b. 323	Honor dei semper præcedit	51. b
Genesis quid contineat	77	Honor parentum	52

T E R T I V S.

Honor piorum	221	Iodolentia Stoicorum	102
Honorare quid	51.b	Indurare	166
Hu	205.b	Indulgentia liberorum	56
Horæ canonicæ	315.b	Indulgentiæ	197.b
Hospitalitas patrum	97.b	Indulgentiarum nundinatio	198
Hugo	195	Infans quoties mergendus	351.b
Humanae traditiones	7	Infantes baptizandi	355.356
Humeralis vestis sacerdotalis	13.b	Infantes sunt credentes	356
Humilitas	151	Infantibus cæna dominica non est instituta	365
Humiliatio & agnitio peccatorum	190.b	Inferi	23.b
Hypocrisis	109.b	Infirmi & contumaces	153
Hypocritæ censentur in ecclesia	272.b	Infirmetas fidei	12.b
Hymnus	314	Innocentius 3. Papa	195.b
Hypodiaconi	296.b	Institutio puerorum in religione	55.b
I		Instrumenta sacra	383
Iacob	2	Intellectus	199
Iah	205.b	Intelligentia	246.b
Ianitores	115	Intentionis bonæ exemplum	160
Idiomatum communicatio	235	Intercessor apud deum	223.310
Idolum	41.b	Intercessio Christi qualis	224.b
Idola adorare	219.b	de Intercessione diuorum argumenta papistica	
Idololatria	133.b.228	224.b	
Iehouah	205.b	Interpellatio	307.b
Ieiunium quid	83.b.119.b	Inuenta	93
Ieiunij qualitas	83.b	Inuidia	57.b
Ieiunij species	83.b	Inuocatio	307.b
Ieiuniorum diuersitas	84.b	Inuocatio eadem veteribus quæ nobis	147.b
Ieiuniorum leges	84	Inuocatio dei quid	45.221.b
Ieiunia libera	83.b	Inuocare quid	221.b
Ieroboami impietas	64.b	Inuocat sanctos ecclesia	225
Iesus	21.b	Inuocandus quis sit	309.b.222
Ignatij martyrium	107	Ioannes Baptista	5
Ignis	248	Ioannis Apocalypsis	5
Ignis alienus	41	Ioannis Baptistæ testimonia de Christo	181.b
Ignis perpetuus non alienus	125.b	Iobis historia vetusta	1.b
Ignorantia	172	Ioci	109
Imagines	228	Ioseph Arimathæus senator	75
Imago Christo non ponenda	43	Iosias rex	203.b
Imago dei	165.b	Ira	57.b.169.b
Imago dei apud gentes in templis non fuit	37.b	Irae filius	169.b
Imago dei in homine	169	Irenæi martyrium	107
Imago diaboli	189	Isaias Euangelista à quibusdam appellatur	181
Imaginem cur deus nolit exprimi	42	Isaiæ præscientia	4.b
Imagines creaturarum ad cultum positæ prohibentur	42.b	Israeliticorum regum catalogus	80
Impænitentes sunt infelices	201.b	Iubileus Romanus	142
Impij in patriam	53	Iubilei institutio	120.b
Impiorum felicitas	102	Iudas an comederit corpus Christi	301.b.374
Impositio manuum	302	Iudæ doctrina & baptismus	348.b
Immunda	310	Iudam fuisse in vltima cæna	374
Immundorum tactus	131.b	Iudæi negant Iesum esse Christum	182.b
Inaugurandi iudices ritus	132.b	Iudex	132.b
Inaugurandi magistratus ratio	62	Iudex debet imitari exemplum dei	67
Incarnatio Christi, & eiusdem causæ	22	Iudicare quid	26.b.29.132
Incarnationis Christi fructus	23	Iudicare officium sacerdotale	115
Incarnationis Christi modus	22	Iudices inaugurandi ritus	132.b
Incestus	81.b	Iudicia non abrogata	67.b
Incircumcisi	345	Iudicialis lex	39.131.132.b
Indifferentia quæ sunt	383.b	Iudiciales leges ad decalogum referendæ sunt	132.b
		Iudicij extremi pictura	3.26.b

I N D E X.

Iudicium appellantur articuli fidei	20	Lex grauis & non grauis	139. b
Iudicium	66. b. 132	Lex Mosis	4
Iudicium vitia	67	Lex naturæ scriptæ legi opponitur	36. b
Iuge sacrificium	126	Lex Mosis non obtrudenda regnis	65. b
Iulia lex	80. b	Lex naturæ	36
Iumentis quoq; ocium concedendum	94	Lex naturæ cur dicatur	36
Iuramentum quid	46. b	Lex Pompeia	55
Iuramenta impia, iniqua	47. b	Lex relata in tabulas	39
Iuramentum cultus dei	47	Lex talionis	138. 135. b
Iuramentum episcoporum	302. b	Lex vitam hominum format	137. b
Iuramentum monachorum	386. b	Legis abrogatio	139
Iuramentum procerum ecclesiæ papæ præstitum	267. b	Legis diuinæ distributio	39
Iuramentum quotidianum	46	Legis diuinæ duæ tabulæ	39. b
Iuramentum religiose seruandum	47. b	Legis finis	36
Iuramentum solenne	46	Legis naturalis officium	36. b
Iuramenti condiciones	47	Legis vsus multiplex	136
Iuramenti forma	46. b. 47	Legem implere nostris viribus non possumus	138
Iuramenti præstatio & solutio	47. b	Legem impleuit Christus	138. b
Iuramenti religio apud gentiles	37. b	Legem seruantibus promittitur vita	139
Iuramenti ritus	47	Leges ciuiles quales?	65. b
Iurare an liceat	46	Leges ecclesiasticæ	38
Iurisdictio ecclesiastica	279. b	Leges ecclesiasticæ supersticiosæ	38. b
Iuste punit dominus	175. b	Leges humanæ	38
Iustificatio forense est vocabulum	26	Leges imperatoriarum cum lege dei magnam habent	similitudinem
Iustificatio quid	188	Leges iudiciales	131. b
Iustificationis articulus syncerus in ecclesia reti-	188. b	Leges politice	38
nendus	188. b	Leges rebus pub. necessariæ	65
Iustificamur sola fide	17. b	Leges de religione	63. b. 64
Iustificandi modus	186. b	Leges iudiciales	132
Iustificare & iustificatio	16. 138. b	Leges vetustissimæ	131
Iustitia Christianorum imputatiua	187. b	Legum causa efficiens	36
Iustitia dei	186	Legum diuinarum diuisio	36
Iustitiæ exempla	176	Legum humanarum diuisio	38
Iustitia iustificans	157	Legum politicarum effectus	38
Iustitia obediens	157	Legibus addere & adimere	65. b
Iustitia ueteris populi	137. b	de Legibus quid Ethnici sentiant	65
		Legibus scriptis opus est	65. b
Kahad	2	Legum subiectum	69
Καθάρα	127. b	Leo rugiens	254. b
Κοινωνία	345. b	Leuitarum consecratio	113
Κυρίαν	271	Leuitarum ordo	113
		Leuitæ sacerdotes	113
Labor animi & corporis	91. b	Leuitica oppida	115. 378
Labor commendatur	91	Leuitici argumentum	125
Laborandum fideliter & strenue	92	Libamina	126
Labrum æneum	119. 116	Liberatio ex Aegypto typus Christi	40
Læsis varijs modis perficitur	58	Liberationis exempla	105
Lamina aurea	114	Liberator quis	149. b
Lapis angularis	289. b	Liberi	133. b
Lapsi recipiendi	192. b	Liberi docendi	284. b
Lateranense concilium	195. b	Libertas Christiana	149. b
Laurentij mors	107	Libertas Christiana	49. b
Lectores	296. b	Libertas quæ & qualis sit in homine	199. b
Lex quid	36	de Libertate paradoxon	150
Lex coercet	138	Libertatis Christianæ abusus	152. b
Lex dei quid	39	Libertorum ingenium	152. b
Lex fuit ante Mosem	39	Liberorum officium	57
		Liberum	

T E R T I V S.

Liberum arbitrium	199.b	Mediator	21
Licentia	152.b	Mediator redemptionis & intercessionis	223.b
Linea Mefsiaë	2.b	Megil vestis sacerdotalis	113.b
Lingua	108.b	Mel remouetur à sacrificijs	126
Lingua qua orandum fit	313	Melchisedek	62
Linguaë continentia	82	Meliton episcopus	269.b
Longanimitas Dei	44.176.b	Mendacium	38.108.b.109
Locus liber	141.b	Mendacij genera, officiosum, iocosum, pernicio-	
Locus sacer	155	sum	109.b
Lotharius Leuita	195.b	Mendax diabolus	254.b
Lucis opera	154	Mensa aurea	116.118
Lucernæ in templis	383	Mensa domini	359.b
Luctus publicus	83.b	Mensura iusta	92.b.135
Lustralis aqua	128	Mercatura	92
Lustrationis ceremonia quæ vsum habuerit	128.b	Mercenarij qui	93
Luxus & profusio	92.96	Merces laboris detenta	93.135
Δύτορι	1	Meriti vocabulum	158.b
M		Merita bonorum operum	158.b
Machabæi à porcilla abstinere	130.b	Messaliani	347.b.358.b
Magia prohibita	265	Metropolitani	297.b
Magiæ neruus	256.b	Merus	67
Magistratus quid	59	Michael	252
Magistratus à deo ad bonum hominum	69	in Monte Gargano	252.b
Magistratus boni forma	61	Micheæ vaticinium de Christo	181
Magistratus debent curare religionem	62	Militans ecclesia	271
Magistratus genera	59	Milites Christiani veteres	74.a.b
Magistratus lex viua	65	Milites mercenarij	53
Magistratus sit pius	61	Milites pij	74
Magistratus boni sunt patres	51.b	Militum & imperatorum exempla	74.b
Magistratus malus an à deo	60	Militum commendatio & officium	73.b
Magistratus necessarius	59.b	Mileuantanum concilium	179.b
Magistratus occidit	59	Minha	126
Magistratus officia	62	Ministerium non est inane	293
Magistratum potest gerere Christianus	75	Ministerium sacrum circa quæ versetur	292
Magistratibus impijs non parendum	76	per Ministerium verbi agit deus in ecclesia salu-	
Magistri patres	51.b	tem	292.b
Malefici	135	Ministerium verbi audiendum in ecclesia	294.b
Mancipatio	134.b	Ministerij origo & dignitas	294
Mancipia	150	Ministerij finis	294
Manducatio vera corporis Christi	372	Ministerio hominum utitur deus in extruenda ec-	
Manichæi	358.b	clesia	292
Manumissio	134.b	Ministri ecclesiæ defendendi	54
Manuum impositio	225.b	Ministri à quibus vitijs immunes esse debeant	
Mare	215	300	
Maria mater domini	232.b	Ministri ecclesiæ saluatores dicuntur	292.b
Marianus Scotus	386	Ministri quales ordinandi sint	301
Martinus de continentia	83	Ministri quomodo audiendi	294.b
Masilien.	56.b	Ministri ecclesiæ honorandi	54
Mathematici	135	Ministorum disciplina & correctio	383.b
Marris beneficia quæ filijs confert	51.52.b	Ministorum ecclesiæ stipendium	95
Matrimonium Christianum	384	Ministorum ecclesiæ contemptus	54
Matrimonium quid sit	76.b	Ministorum ecclesiæ officium	303.b
Matrimonium ob quas causas institutū sit	77.b	Ministorum ecclesiæ & magistratus officia non	
385		confundenda sunt	63
Matrimonium quomodo contrahendum	78	Ministorum ecclesiæ contemptus vnde sit	292.b
Matrimonij officia	79.a.b	294.b	
Matrimonij opera	179	Ministis ecclesiæ deberi mercedem	380
Matrimoniale forum	385	Miracula circa eucharistiam	372
Mathusalem	2	Miracula prophetarum	4

I N D E X.

Miraculosa signa	323	Nestorius	233.b.234.b
Miraculorum falforum author	256	Nicenum concilium	5.b
Missæ	361.b	Nisan mensis	123.b
Missæ priuatæ	363	Nohe oppidum	116.b
Moderatio in puniendo adhibenda	70	Noe	2
Monachi	296.b.385.b	Noe arca	180.b
Monachæ	385.b	Noctus hæreticus	211
Monachismus	386	Nomen dei	45.318
Monachi mendicantes	386	Nomen dei apud gentiles in pretio	37.b
Monachi principes fiunt	386.b	Nominis dei prophanatio & abusus	45.a.b
Monarchia	59	Nominis diuini sanctificatio	45
Monarchæ rarò boni	39.b	Nomine dei abutentium pœna	45.b
Monasteria	385.b	Notiones naturales	36
Monasteriorû reformatio an speranda sit	386.b	Nouatiani	192.b
	387	Nouilunium	119.b
Monothelitæ	233.b	Nouus homo	199.b
Moralis lex	39	Nuptiæ	133.b
Moralis lex non abrogata	39.b.140	Nuptiæ secundæ non damnantur	79
Mores puerorum formandi	56		
Morijs mons	117	O	
Mortificatio veteris hominis	200		
Moses	2	Obedientia	60.b.157.319
Moses adducit ad Christum	127	Obedientia qualis esse debeat	51.b
Moses desiderat videre gloriam dei	208	Obiectum fidei	20.b.13
Moses scribit traditiones patrum	3	Oblatio	126.b
Moses quare scripserit	3	Obscratio	307.b
Mosis autoritas	3.a.b	Obstetrices an baptizare possint	352.b
Mosis aduersarij	3.b	Orium	49
Mosis librorum argumentum	3.b	Odium damnatur	91.a.b
Mulier est viri brachium	77.b	Otiosi stertere non debemus	216
Mulieres arcentur à ministerio ecclesiæ	352.b	Odium homicidium	58
Mundus quid	255	Oligarchia	59
de Mundis & immundis	130.b	ὀλιγὰρχία	228.b
Mysterium quid	324	Omnipotentia quomodo verbo dei attributa	
			330
N		Opus quid significet	154
Næphæsch	257	Opera bona	19.153.b
Natales infames	134.b	Opera bona fiant secundum regulam verbi dei	
Natiuitas Christi pura	22.b		160
Natura	36	Opera bona non reiiciuntur	155
Natura hominis non est causa peccati	162	Opera domini quid	154
Natura sine gratia nihil efficit	38	Opera carnis	170
Naturæ deprauatio qualis & quanta	168.b	Opera dei imputantur homini	154.b
Naturæ in Christo non confunduntur	234	Opera legis quid	138.b
Naturæ lex cur dicatur	36.a.b	Opera lucis	154
Naturalis legis capita	36.b	Opera non iustificanc	155
Naturalis legis causa efficiens	36.b	Opera nostra dona sunt dei	159.b
Naturalis legis officium	36.b	Opera nostra omnia sunt peccatum	174
Naturales notiones	36	Opera sanctorum bona an sint peccatum	174
Naturales cupiditates	171.b	Opera satisfactionis	197
Nazaræi vnde dicti	129.b.296.b.378.b	Opera vere bona	160.b
Nazaræorum disciplina	129.b	Operum bonorum finis	161
Nazaræi vino abstinerunt	130	Operum bonorum causa	154
Negotiationes variæ	91.b	Opera bonorum plena forma est decalogus	
Necem nemo sibi inferre debet vt peccatum deu- uitet	173		160.b
Nectarius episcopus	194.b	Operum significatio	154
Negatione ueri non retineri res	106	Operibus legis non iustificatur	18
Neomenia	119.b	Operibus nostris quomodo deus mercedem re- pendat	159.b
			Operibus

T E R T I V S.

Operibus nostris quomodo scriptura iustitiā tri-	Ostiarj	296
buat	Othomannus	142
Opes publicæ	Ouile Christi	291
Opes sacræ		
Opum vñus	P	
Oppressi quo pacto se gerere debeant	Pædobaptismum negant Pelagiani	353.b
Oratio fidelium	Pædagogia legali ecclesiæ non est opus	388
Oratio quid sit	Pallium	302
Oratio qualis esse debeat	Pallium olim gratis collatum	302
Oratio necessaria	Panis	319.372.b
Oratio per Christum offertur	Panes propositionis	118
Oratio pro fidei pastoribus	Papa	298
Oratio pro defunctis	Papa non est caput ecclesiæ	290.b
Orationis dominicæ verbis an simus alligati	Papias	269
316.b	Paphnutius	78
Orationis effecta	Paracletus	245
Orationis efficientes causæ	Paradigmatica signa	323
Orationis partes	Parentum cultores præmijs afficiuntur	55
Orationis species	Parochus	272
in Oratione multiloquium est prohibitum	Parochia	272
Orandum est ex corde	Paræcia	272
Orantes non semper petita accipiunt	paropysius	576
Orandum quid	Parentes	133.b
312. 313. quando	Parentes honorandos esse Ethnici quoq; docue-	
vbi 313.b quo habitu	runt	37.b.52
qua lingua 313.b quomodo	Parentibus quatenus obtemperandum sit	51.b
Orandum pro fide	Parentum nomine quis intelligendus	51
Orantium vita fidei respondeat	Pascha	120
Orare	Paschæ author	123.b
Orare sacerdotum officium	Paschæ conuiuæ	124
Oraturos quibus rebus instructos esse deceat	Paschæ finis	124
310	Paschæ locus	123.b
Oratoria veterum	Paschæ ritus	124
Ordinatio ministrorum	Paschæ tempus	123.b
Ordines cur ab episcopis Papisticis non recipia-	Paschalis agnus	123.b
mus	de Paschate celebrando contentio	269
Ordines maiores & minores	383.b	
Ordines quos deus in ecclesia instituerit	Pasisionis Christi fructus	23
295.b	Pasisionis Christi modus	23
Ordo qualis in ecclesia fuerit	Pastores	295
Organum	Pastorale munus non est dominium	291
Originale peccatum	Pastorum autoritas	307
Originale peccatum confitentur omnes antiqui	Pastorum ecclesiæ scopus	304
doctores	Pater	317
Originale peccatum damnat	Paterfamiliâs curare debet vt familia sabbatum	
Originale peccatum nascitur nobiscum	sanctificet	49.50
Originale peccatum alienum dicitur ab August.	Patrispalsianorum hæresis	211
169. b	Patresfamiliâs in captiuitate detenti quomodo	
Originale peccatum primi parentes non habue-	se gerant	55.b
runt	Patres non iustificatos esse per legem	186.b
Originale peccatum profert opera carnis	Patriarchæ	296.b.297.b
Originale peccatum proprium	Patrum peccata quomodo in filijs visitet deus	
Originale peccatum voluntarium ab Augustino	44	
alicubi appellatur	Patrum scripta quomodo legenda	163.b
Originalis peccati origo	Patria potestas	134
Orosius	Patriæ etymologia	53
Os dei	pro Patria orandum	53
Osculum cultus symbolum	Patria honoranda	51.b.52.b
Ozias leprosus	pro Patria pugnandum	52.b
Ostenta		

I N D E X

Patientia sanctorum	103	Peccata sanctorum qualia	190.b
Patientiae fons	19.b	Peccata remittit solus deus	30
Patientiam docet mors Christi	23	Peccata remittuntur propter Christum	29
Patroni coelites	222.a.b	Peccatores sumus omnes	18, 29, 111, 136
Paulus Apostolus	5	Peccatorum agnitio & confessio	29
Paulus eremita	385.b	Peccatorum poena certa & iusta	175.b
Paulus litigavit in iudicio	68	Pectorale iudicii	113.b
Paulus postulat defensionem ab Ethnicis	73	Peculatus	95
Pauli doctrina commendatur ecclesijs	144	Pelagius de gratia dei	179.b
Pauli discipuli & comites	378.b	Pelagiani	167
Pauperes	133.b	Pelagianismus	353.b, 354.b
Pauperum cura	306	Pellicatus quid	161.b
Pauperes fraudare sua portione quantum peccatum	381.b	Pentecoste	120
Pauperum genera	381.b	Perditi homines	56.b
Pauperibus prospiciendum ex opibus ecclesiae	381.b	Persecutiones ecclesiae decem	107
Peccatum a baptismo remanens in paruulis, an sit peccatum	173.b	Persecutionis ecclesiae causae	100.b
Peccatum actuale	167, 170.b	Persecutorum exitus	107.b
Peccatum cogitationis	172	Persuerantia in precibus	312
Peccatum cum lege dei pugnat	171	Personae diuinitatis	211
Peccatum & mors	2.b	Personarum distinctio	20
Peccatum ignorantiae	172	Personae ecclesiasticae	297, 381.b
Peccatum in spiritum sanctum	173.b, 174.b	Personae priuatae	313
Peccatum mortale	173.b	Personae publicae	76.b, 313
Peccatum non est creatura	165	Personarum respectus	67
Peccatum operis	171.b, 172	Persuasio quomodo aliquando vsurpetur	12
Peccatum oris	171.b, 172	Petitio	307.b
Peccatum originale	167	Petrus Apostolorum princeps	298.b
Peccatum originale confitentur omnes antiqui doctores	168	Petri nomen	188.b, 289, 299.b
Peccatum originale est deprauatio imaginis dei in nobis	169	Petri poenitentia	190.b
Peccatum originale morbus quomodo	170	Petrus non est fundamentum ecclesiae	289
Peccatum proprietas est hominis	162.b	Petrus Lombardus	195
Peccatum veniale	175.b	Pharaones	68
Peccatum voluntarium esse	167.b	Pharisei	169
Peccati actualis causa	171	Phileni fratres	53
Peccati causa	162	Philosophia	15
Peccati causa non est solus diabolus	162.b	Philosophi	204
Peccati definitio	162	Piaculare sacrificium	126.b
Peccati discrimina	167	Pignus	93, 134
Peccati gradus	110.b	Pietatis praecipua capita	377.b
Peccati poena & culpa sublata	17	Pij in patriam	53
Peccati species	126.b	Plagium	134.b
Peccati vocabulum	161.b	Plagiarij	95
de Peccato originali catholicum dogma	168	Plebani	297.b
Peccata aliena	172.b	Πορροφία quid sit	12.b
Peccata capitalia	172	Poena aliquando differtur	176
Peccata clamantia	172	Poena & culpa peccati sublata est per Christum	17
Peccata gradibus assurgunt	171.b	Poena imponitur nobis	17
Peccata manifesta	173.b	Poena domini iusta	176
Peccata non esse paria	171.b	Poena peccatorum certa & iusta	175
Peccata occulta	173.b	Poena peccatorum quae deus remisit	176.b
Peccata omnia remittuntur	29.b	Poena diuinæ exempla	176
Peccata patrum quomodo in filijs puniantur	44	Poena fontium	135
Peccata quae deus remisit cur puniantur	176.b	Poenitentia	185, 190
Peccata quomodo remittantur	30	Poenitentia non est procrastinanda	202
		Poenitentia nulla sera	202
		Poenitentia priuata	201.b
		Poenitentia publica	201.b
		Poenitentia spontanea	201.b
		Poeni-	

T E R T I V S.

555 5

INDEX.

Religionis causa bella gerenda	73	Sabbata quare instituta	119. a. b
an Religionis causa aliquis puniendus sit	69. b	Sabellius	211
Religionis cura ad magistratum pertinet	62	Sacerdos	295. b
Remissio peccatorum	29	Sacerdotes bello interficiunt	115
Remissionis uocabulum	29. b	Sacerdotes gentilium	37. b
Renouatio hominis per spiritum	199. b	Sacerdotes papistici religiosi & seculares	297
Repetitiones	7	Sacerdotum officium	114. b. 238. b
in Reprobum sensum dare	166	Sacerdotum tractationes & uestigalia	115
Rerum diuifio	111. 134	Sacerdotalis uestis	113
Res militaris	135. b	Sacerdotalis uestitus significatio	114
Res sacra	133. b	Sacerdotium	112. b
Restitutio	135	Sacerdotium abrogatum	141. b
Restitutio necessaria	95. b	Sacerdotium Christi	138. b
Restitutio cui fiat	95. b	Sacra quæ sint	295. b
Restitutio quando facienda	59. b	Sacra uasa	118. 119
Restituere quantum quisq; debeat	96	Sacræ literæ	1
Resurgere quid sit	24. b	Sacræ literæ perfectæ	6. b
Resurrectio Christi	24	Sacramentum	323. 360. b
Resurrectio iniustorum	32	Sacramentum pro iureiurando	323. b
Resurrectionis ueræ testimonia	6	Sacramentum militare	324
Ritus quomodo perpetui sint	141	Sacramenta an conferant gratiam	337. 338
Rodorychus Gotthorum rex	81	Sacramenta cur nobis instituta in rebus uisibili-	
Roma pœnas dedit	107. b	bus	325
Romana ecclesia	284. b	Sacramenta euacuare	340. b
Romana ecclesia non existente ecclesia, deus ni-		Sacramenta fidem excitant	344. b
hilominus ecclesiam in terris habet	287	Sacramenta quæ nota sunt ecclesiæ qualia esse de-	
Romana ecclesia non est sancta mater	292	beant	275
Romana ecclesia uetus & noua	285. a. b	Sacramenta quibus rebus consistunt	326. b
à Romana ecclesia secessio	284. b	Sacramenta repræsentant res	343. b
Romanæ ecclesiæ ministrorum uita	285. b	Sacramenta sine fide non prodesse	346. b
286		Sacramenta sunt testimonia ueritatis, beneuolen-	
Romanæ ecclesiæ ueteris doctrina	278	tiam dei erga nos obfignant uisibiliter	341
Romana sedes	288. b	Sacramenta synagogæ	128
Roris generatio	22. b	Sacramenta ueteris populi abrogata	142. b
Ruth exemplum	45. b	Sacramentorum author	324. b
S.		Sacramentorum fines	341
Sabaoth dominus	205. b	Sacramentorum numerus	326
Sabbatum quid	48	Sacramentorum ritus	327
Sabbatum Christianorum	49. b	Sacramentorum ueteris & nouæ legis similitudo	
Sabbatum egit dominus	49	& differentia	337
Sabbatum ordinatio religionis externa	48. b	in Sacramentis an contineatur gratia dei	338. b
Sabbatum propter hominem non homo propter		Sacramentis nimium tribuere	336. b
sabbatum	50. b	Sacramentis uisibiliter colligimur in vnam reli-	
Sabbatum spirituale	48. b	gionem, separamur ab alijs	345
Sabbati contemptores redigendi in ordinem	50	Sacramentales loquutiones	335. b. 334
Sabbati finis & usus	50. b	Sacramentales loquutiones sacramentaliter expo-	
Sabbati abusus & prophanatio	50	nendæ sunt	334. b
Sabbati institutio uetus	48	Sacramentaliter	335. b
Sabbati opera	48. b	Sacrificium cibarium	126
Sabbatum partim ceremoniale	49. b. 140	Sacrificium eucharisticum	129
Sabbati religionem transferat paterfamilias in do-		Sacrificium expiatorium & confessionis	366. b
miu suam	49	Sacrificium iuge	126
Sabbati sanctificatio in quibus consistat	48. b	Sacrificium Missæ	363
49. a. b		Sacrificium piaculare	126. b
in Sabbato arare	50. b	Sacrificium primitiarum, primogenitorum, deci-	
Sabbato benedixit dominus	49	marum	ibidem
de Sabbato leges imperatoriæ	50. b	Sacrificium vaccæ rufæ	128
de Sabbato obseruando lex imperatoria	50. b	Sacrificij locus	287. b
Sabbato promissiones & minæ additæ	50	Sacrificia	125
			Sacri-

T E R T I V S.

Sacrificia abrogata	142. b	Non propter indignos cœna domini participantes	284
Sacrificia initiationis	126	Non propter diuersitatem doctrinæ	282. b
Sacrificia non omnia reiecit deus	338	Schismaticus quis	285
Sacrificia per Christum sublata	6	Schismatica defectio	288
Sacrificia pro corporeis sanctificationibus	128. b	Scholæ	64. b. 115. b. 378. a. b
Sacrificia quomodo dicantur peccata expiare	197	Scholarum corruptio	379
Sacrificia spontanea	129	Scopus	379
Sacrificia votiuæ	ibidem	Scientia	246. b
Sacrificiorum species	125	Scriptura est absoluta	6. b
Sacrificare in excelsis	141. b. 118. b. 117	Scriptura est integra	5
Sacrificare officium sacerdotum	115	Scriptura quomodo exponenda	9. b
Sacrificandum est soli deo	222. b	Scriptura lucerna	9
Sacrificantium in excelsis peccatum	117. 118. b	Scriptura quibus difficilis	ibidem
Sacrum tempus	119	Scriptura quomodo legenda	6. b
Sacrilegi	94. b. 95	Scripturæ ad omnes pertinent	6
Sacrilegium	94. b. 135	Scripturæ canonicæ omnia quæ de deo credenda sunt continent	211. b
Salus æterna	183. b	Scripturæ finis	5. b
Salus est omnium	184. b	Scripturæ interpretatio	304
Saluantur fideles	185	Scripturæ non corrumpendæ	9. b
Samsonis peccatum	130	Scripturæ plenam suppeditant reformationis formam	203. b
Samsonis fortitudo non fuit in coma	ibidem	Scripturæ quomodo à Papa tractentur	285. b
Samuel à morte sua non apparuit	265	Scripturæ sacræ libri	5
Sancta ecclesia	272	Scripturæ sensus adulterinus quis	11
Sancti nolunt à nobis coli	252	Scripturæ utilitas	6. b
Sancti qui Paulo	29. 272	Scripturarum enarratio	283
Sancti quomodo colendi	227	Scripturarum interpretatio	270
Sanctificare quid	318	Qui Scripturas exponendas negant, quid querant	9. b
Sanctificat dominus	50. b. 51	Scottatio spiritualis	44
Sanctificatio cui ascribenda	245	Scottationis fructus	81
in Sanctificatione duo sunt	157	Secessio à Rom ecclesia	284. b
Sanctificatio nominis diuini	4. 5	Sedere est quiescere	25. b
Sanctitas perfectiss., unde sit	271. b	Seditiosi	53. b. 135
Sanctum	115. b	Seleuciani	358. b
Sanctum sanctorum	115. b. 289. b	Sem	2
Sanguis res pretiosa	131	Semen appellatur Christus	180
Sanguis & suffocatum prohibita ab apostolis	131. 143	de Semine excitando fratri defuncto	22. b
Sanherib punitus	45. b	Senatus ecclesiæ	384
Satan	254. b	Seneca de cultu deorum	37
Sanctificatio operum	157	Senecæ error	173
Saturnus unde deriuetur	121. b. 206. b	Senatores	295
Saulis pœna	45. b	Senes honorandi	54. b
Sapientia	246. b	Sephora circumcidit filium	353
Sapientia quomodo comparanda	15	Sepultura Christianorum	387. b
Sapientia Solomonis	ibidem	Sepultura Christi	23
Sapientia uera petenda ex uerbo dei	1	Sepultura infantium qui decedunt sine baptismo	355
Scandalum	152. b	Seraphim	250. b
Scandalum datum & acceptum	153	Serpens æneus	186
Scandalum est grande peccatum	153. b	Serpens diabolus	254. b
Scandala non sunt ex euangelio	ibidem	Serpentis caput	131. b
Scelus	162	Serui in religione instituendi	49
Scelera	172	Seruire quid sit	43. b
Schaddai	40. 121. b. 206. b	Seruitus	134. b. 150
Schahah	219. b	Seruitus duplex	150
Schisma non faciendū propter doctorū uitia	283. b	Seruitus legalis in ueteri testamento	148. b
Non propter diuersitatem doctrinæ	282		
Non propter uitia ministrorum	283. b		
Non propter rituum diuersitatem	ibidem		
Nō ppter impuriore uitā hominū in ecclesia	284.		

I N D E X

Seruitus spiritualis	150.b	Spiritus vocabulum varie vsurpatur	242
Seueritas	68.b	Spiritus ueteribus & nobis idem	146
Signaculum	341.b	Spiritus incrementa	244.b
Sigillum	341.b	Spiritus sancti effectus & virtus	245
Signum quid	322. 341.b	Spiritus sancti lingua ignea	246
Signa muta, uocalia, militaria, naturalia, miracu- losa, exhibitua, paradigmatica, sacramentalia	322. 323	Spiritus sancti nomina	245
Signa praesentiae dei	42	Spiritus S. operationes	242. b. 245. a. b. 246. a. b
Signa rerum signatarum nomina accipiunt	333. b. 334	Spiritus sancti processio	243. b
Signorum ab hominibus institutorum finis	322. b	Spiritus sancti processio duplex	244
Signorum varietas	322. 323	Spiritus sancti temporaria missio	244
Silo	116. b	Spiritus varij	245
Simonia	95. 116. b	Spirituum apparitio	264. b
Simulachrum	41. b. 228. 219. b	Spiritualis libertas	150. b
Simulachra dicuntur labores & dolores	41. b	Spirituale corpus	32
Simulachra non docent	43. b	Sponsa Christi est ecclesia	291
de Simulachris Varro	37. b	Spontanea sacrificia	129
Sinus Abrahæ	149	Stellarum fatum	162. b
Sobrii	364. b	Studiosi alendi stipendio ecclesiae	381. b
Socrus & nurus	54. b	Stuprum	81
Sola fides iustificat	17. b. 18. 19	Stupra	134
Solomon	353	Subditorum erga magistratus officia	75. b
Solium regis Christi	237. b	Subsistentia	211. b
Solomonis sapientia	4. 15	Substantiae quid	248. b
Solomonis templum	117	Substantiae corporeae	249
Spectra	242	Successio episcoporum continua	277
Spes quid	12	Suffocati & sanguinis eius prohibitus	131
Spes à deo est	103	Suffraganei	296. b
Spes fidelium	103	Sumptuariæ leges	37. b
Spiritus aqua & fons uiuus	245. b	Superstitio	227. b
Spiritus & futura praedicat	247	Superstitio quibus in rebus versetur	ibidem
Spiritus malignus & immundus	254. b	Superstitiosi	ibidem
Spiritus mortificat & uiuificat	246. b	Suppliciorum genera	69. 70
Spiritus plene reuelat mysteria regni dei	247	Susceptores	351
Spiritus promissionis	245. b	Suspiciones	109. b
Spiritus sanctus	27. b. 242. b. 245	Symbolum	214
Spiritus sanctus à patre & filio procedit	243. b	Symbolum apostolorum	20
Spiritus S. arrhabo hæreditatis nostræ	246. b	Symbolum apostolorum quis primus conscripse- rit	20
Spiritus sanctus charitas	246. b	Symboli apostolici diuifio	20
Spiritus sanctus columba	246	Symbolum quid	324
Spiritus sanctus consolator	245	Synagoga	271
Spiritus sanctus dei & filij spiritus	245	Synagogæ	115. b
Spiritus sanctus digitus dei	245. b	Synaxis	344
Spiritus sanctus est verus deus	242. b	Synodum conuocare	281
Spiritus sanctus ignis	246	Synodum indixit Constantinus	63
Spiritus sanctus flatus uehemens	246	Synodi	384
Spiritus sanctus non est minister nec instrumen- tum	243	Systremma	56. b
Spiritus sanctus obfignat	343	T.	
Spiritus sanctus oleum & vnctio	246	Tabernaculum constitutionis	115. b
Spiritus sanctus vnus est	244. b	Tabernaculi domini historia	116. b
Spiritus sancti operatio	27. b	Tabernaculum portatile	115
Spiritus sanctus paracletus	245	Tabernaculum quale fuerit	115. b
Spiritus sanctus spiritus veritatis	245. b	Tabernaculum typus ecclesiae	289. b
Spiritus sanctus substantia est nō accidens	243. b	Tabernaculi significatio	116
Spiritus sancti varia dona	242	in Tabernaculo quæ reposita fuerint	116
Spiritus sanctus uisibiliter mittitur	244	Tabernaculorum festum	120
		Tabulae legis	39. b. 40
		Tabularum legis diuifio	33
		Tactus immundorum	131. b
		Talionis	

Talionis lex	58.535.b	Tributa pendenda magistratibus	76
Temperantia quomodo à continentia differat		Trinitas	206.b
28		Trinitatis mysterium similitudinibus adumbratur	212.b
Templum dei	288.b	Trinitatis mysterium non curiosis disputationibus ventilandum	214
Templum quàm diu steterit	117.b	Trinitatis mysterium patriarchis & prophetis cognitissimum	213.b
Templum Solomonis	115.b. 117	Trinitatis testimonia	211.b
Templum quomodo destructum à Romanis postea reaedificari coeptum sit	141	de Trinitate doctrinæ certitudo	213
Templum Solomonis typus ecclesiæ	289.b	Triumphans ecclesia	271.b
Templi instrumenta	383	Tubæ	112
Templi locus	117	Tubarum festum	120
Templa augusta vetus ecclesia diu non habuit		Tunica stricta sacerdotum	113.b
363 b		Tutores honorandi	53.b
Templa Christianorum	382.b	Tutores patres	51.b
Templorum consecratio	382.b	Tyrannis	59
Templa diuis non extruenda	383	Tyrannicidæ	61
Tempus liberum	142	Tyrannorum miserabiles exitus	61
Tempus sacrum	119.383		
Tenebræ in scripturis quid	255	V.	
Tentare quid	164.b	Vaccæ rufæ sacrificium	128
Tentatio de electione	217.b	Varro de simulachris	37
Tentator	254.b	Vasa gratiæ	339
Tentationes variæ	320	Vestigalia sacra	115.b
Tentoria habuerunt patriarchæ	28.b	Verbum quid	1
Terra	215	Verbum dei essentiale	330
Tertullianus	213	Verbum dei fidei obiectum	13.b
Testamentum dei	18	Verbum dei quid	1.5.b
Testamentum nouum	17	Verbum dei quare reuelatum	5.b.6.b.8.b
Testamentum nouum non habet conditionem certæ terræ	149	Verbum dei quibus reuelatum	5.b
Testamentum nouum nullas habet figuras	148.b	Verbum dei quod nota est ecclesiæ, quale esse debet	275
Testamenti noui & ueteris differentia & similitudo	145.b	Verbum dei quomodo audiendum	7.b
Testamenti noui populus ampliff.	148.b	Verbum dei reuelatum per filium dei	4.b
Testamenti noui dona ampliff.	149	Verbum dei reuelatur per homines	1.b
Testes apellantur euang.præcones	342	Verbum suum deus uult intelligi	8.b
Testes & testimonia	133.b	Verbi dei effectus	6.b.7.b.8
de Testimonio dicendo	108.b	Verbi dei expositio	9
Theschuah	189.b	Verbi significatio	7
Throni	250.b	Verbi dei nomina	3
Thruma & tnupha	129	Verbi dei origo	1.b
Thumim	114	Verbi dei progressus	3.b
Thuribulum aureum	116	Verbi dei proprietates	1
Thora	162	Verbi dei usus	8
Thymiamatis ara	118	Verbo dei conseruari ecclesiam	276.b
Tiara vestis sacerdotalis	113.b	Veritatis spiritus	245.b
Timor	246.b	Veste qua in cœna dominica utendum	364
Timor dei duplex	191	Vestimenti genus	113
Timor dei in pœnitentibus	190.b	Vestitus orantium	313
Torculares psal.	120.b	Vestitus qualis esse debeat	82.b
Tractus prædestinatorum	218	Vestitus sacerdotalis	113
Traditiones apostolicæ	7.268.b.263.b.264	Vestitus sacerdotalis significatio	114
Traditiones humanæ	38.b	Vetus homo	198.b
Traditiones Iudæorum	268.b	Veteris & noui populi similitudo & differentia	145.b
Traditiones non scriptæ	268	Veteris Testamenti scripta ad Christianos pertinent	6
Traditiones patrum	268.b	Vicarium ecclesia dei nullum habet	290
Traditiones uiuæ patrum	2		
Transfiguratio Christi	31.b		
Transsubstantiatio	352.363		

INDEX TERTIVS.

Viduae	385	Vocandi ministros quinam ius habeant	300.b
Vindicta	68	Voluntas	199
Vinea comparatur ecclesia	289.b	Voluntarium & inuoluntarium	172.b
Vino quomodo Nazaræi abstinuerint.	130	Voluptas concessa	82
Violenti species	172.b	Votum quid	129.b
Violentum	172	Vota abrogata	143
Vires hominis	199	Vota Monastica	47.b. 386.b
Virgo peperit Christum	22.b	Votiva sacrificia	119
Virgines	385	Votorum diuersitas	129.b
Virtutes	250.b	Vrim	114
Viscera quid	54.b	Vsura	93.b. 94
Visio dei	207.b	Vsurarij	94.a.b
Visionibus adumbratur deus	208		
Vita æterna	3. 32. b	Zælem	165.b
Vnctio	246	Zelotes deus	43.b. 44
Vnctio extrema	387.b	Zona sacerdotum	113.b
Vnio sacramentalis	333	Zuinglius de peccato originali	169.b
Vnitas seruanda	284.b	Zuinglij de sacramentis 343. quomodo fidem ful-	
Vocatio ad ministerium & eius genera	300	ciant	344.b
Vocati ad ministerium quomodo initiandi sint	302		

F I N I S.

SERMONVM DECAS

PRIMA, AVTHORE HEINRY-

CHO BVLLINGERO.

De verbo Dei, origine eius, quomodo & per quos mundo sit reuelatum.

S E R M O I.



OMNIA dogmata fidei Christianæ, omnis item rectè, benè, beateq; uiuendi ratio, omnis deniq; sapiētia uera diuināq; semper petita est ex uerbi Dei testimonijs seu iudicatis: neq; hodie uel à uerè sapientibus uiris, uel à fidelibus & à Deo uocatis ecclesiarum ministris illa aliunde quàm ex uerbo Dei hauriri, doceri deniq; & confirmari solide possunt. Quisquis itaq; ignorat quid sit uerbum Dei, & quæ uerbi Dei ratio, in ipso templo Domini auditorioq; Christi, adde & in lectione scripturarum sacrarum, ueluti cæcus, surdus & amens uersari uidetur. Imò quòd aliqui in audiendis sermonibus sacris ecclesiasticis uel, irreligiosiores & segniores apparent, non alio exoritur fonte, quàm quòd uirtutem & ueram rationem uerbi Dei, neque rectè intelligunt, neque satis diligenter expendunt. Ne quid itaq; remoretur hinc studiosos ueritatis ac uerbi Dei: quinimò ut in omnium animos iusta uerbi Dei existimatio reponatur, explicabo, Deo iuuante, charitati uestræ, quænam religiosum hominē de uerbo Dei sentire & tenere oporteat. Vos assiduīs & intentis precibus benignas Dei nostri aures pulsate, quò & mihi sanctam & efficacem dicendi facultatē concedat, & uobis aures & mentem aperiat, ut in omnibus laudetur nomen Domini, uberemq; fructum percipiant animæ nostræ.

Principiò explicandum erit nobis quid sit uerbum Dei. Verbum in scripturis & iuxta idioma linguæ Hebrææ latissimè patet. Significat enim rem quamlibet, sicuti & Germanis latissimè patet uocabulū *ding*. Apud sanctum Lucam dicit ad beatam uirginem angelus Dei, Non erit apud Deū impossibile omne uerbum. Id quod perinde est ac si dixisset, Deo omnia possibilia, aut res nulla erit impossibilis Deo. Significat uerbum & dictionem ore hominis prolatā. Aliquando usurpatur pro cōmissione, aliquando & pro integra sententiā aut etiam oratione aut prophetiā. Exempla de his in scripturis copiosa sunt. Cæterum cū uerbum coniungitur cum alio, ut cū dicitur in præsentī uerbum Dei, etiam sic nō usurpatur eadem significatione. Nam uerbū Dei significat uirtutem & potentiam Dei: ponitur & pro filio Dei, qui est secunda in adoranda trinitate persona. Manifesta est enim omnibus illa diuī Euangelistæ uox, Verbum caro factum est. Propriè autem in nostro hoc negotio significat uerbum Dei, eloquium Dei, reuelationēq; uoluntatis diuinæ, per os Christi, prophetarū ac Apostolorum, primū quidem uisua uoce prolatam, deinde etiam relatā in literas, quas rectè appellant sacras atq; diuinas. Verbum enim mentem eius ex quo prodit refert: proinde uerbum Dei Deum refert. Est autem Deus natura sua uerax, iustus, bonus, purus, immortalis, æternus, iccirco consequens est & uerbum Dei quod prodit ex ore Dei, uerum esse, iustū, sine fraude & dolo, sine errore & affectu prauo, sanctum, purum, bonum, immortale, æternū. Dominus enim in Euangelio dicit, Sermo tuus ueritas est. Et Apostolus Paulus, Verbum Dei, inquit, non est alligatum. Rursus clamat tota scriptura,

Verbum quid.

Verbum Dei quid.

A

Verbum Domini manet in æternum. Nam & Solomon dicit, Omne eloquium Dei est repurgatum. Nihil adijcias uerbis eius, ne forte redarguat te, & inueniaris mendax. David quoque, Eloquia Domini, ait, eloquia munda, argentum igne expurgatum, defæcatum à terra septemplex.

*De causis &
origine uerbi
Dei.*

Hæc intelliget charitas uestra plenius, si paulò copiosius de causa siue origine, tum & certitudine uerbi Dei dixerò. Verbum Dei ueritas est: atqui ueritatis unicus fons est Deus: origo ergo & causa uerbi Dei Deus est. Atque hic quidem Deus cum membra, mortalium hominum instar, minimè habeat, ore caret etiam corporeo: quia tamen os instrumentum est uocis, tribuitur Deo os. Nam loquutus est hominibus uoce humana, id est, uoce hominibus perceptibili atque effigiata ad sermonem usitatum inter homines. Claret hoc in rebus gestis cum sanctis patribus, quibus cum, ut cum parentibus nostris Adamo & Eua, cum Noe & reliquis patribus frequentissimè colloquutus legitur. In monte Sina ipse Dominus concionatur ad magnam Israelis ecclesiam, recitans significanter decem illa capita, in quibus omnis comprehenditur pietas. Nam Deut. 5. cap. sic legimus, Verba ista (decalogum intelligens) loquutus est Dominus ad omnem ecclesiam de medio ignis uoce magna. Et in cap. 4. Vocem uerborum uos audistis, similitudinem autem nullam uidistis, præter uocem. Frequentissimè uerò usus est Deus opera angelorum, per quorum ministerium colloquutus est cum mortalibus. Cognitissimum uerò illud est omnibus hominibus, quòd filius patris incarnatus in terris obambulauit, uerusque Deus & homo Israeliticum populum ferme per triennium docuit. Quondam autem & antequam nasceretur mundo Dei filius, insinuauit se Deus animis sanctorum patrum, deinde etiam mentibus sanctorum prophetarum, ac deinceps per ipsorum ora & scripta mundum docuit. Ita & Christus Dominus spiritum sanctum, qui patris & filij spiritus est, misit in Apostolos, per quorum ora, uoces, ac clamores toti mundo innotuit.

*Verbū Dei re-
uelatur mundo
per homines.*

Atque hi serui Dei omnes, ceu electa Dei organa, reuelationem Dei à Deo percipientes animis syncerissimis, oracula seu eloquia Dei quæ perceperant, primum quidem uiua uoce mundo tradiderunt, deinde senescente mundo, quidam ipsorum & literarum monumentis mandarunt. Hæc autem quomodo & per quos facta sunt, præstat cognosceat. Nam ex hac historia elucescit uera uerbi Dei ratio, certitudo & dignitas.

Ab exordio rerum ad tempora usque Moysi nulla extant scripta quæ peruenerint ad nostram notitiam: quamuis uerisimile sit priscum & primum illud seculum non omnino fuisse sine omni scriptura. Nam citatur à S. Iuda Apostolo fratre beati Iacobi scriptum, uaticinium beati patris nostri Enoch, qui legitur septimus fuisse à patre nostro Adam. Videtur præterea scriptum aut historia Iob antiquis edita temporibus. Utique uerò hoc habeat, sancti in ecclesia Dei omnes, primum inter scriptores sacros collocant fidelissimum Dei seruum Moysen.

*Quomodo &
per quos ab
exordio mun-
di reuelatum
sit uerbū Dei.*

Ab exordio itaque mundi Deus per spiritum suum, per ministeria quoque angelorum locutus est sanctis patribus, ac hi filijs nepotibusque & toti posteritati quæ à Deo acceperant, uiua uoce tradiderunt: cum ea utique acceperant, non ut sibi reseruarent, sed posteris quoque communicarent. Deus enim subinde testabatur se uelle Deum esse & patrum & seminis ipsorum in sempiternum. Elucescit hoc in historia Adæ, Noæ & Abrahamæ primorum genearcharum maximè. Certè Gen. 19. legimus angelum domini, adeoque ipsum Dominum dixisse ad Abrahamum, Num celabo Abrahamum, quæ ego facturum sum, cum Abraham omnino futurus sit in gentem magnam & ualentem, benedicendaque sint in eo omnes nationes terræ? Hoc quoque

Abraham.

quoque scio quod mandaturus sit filiis suis & domui suae post se, ut custodiant usam Domini, faciantque iustitiam & iudicium, & reliqua. Abraham itaque fidelissimus & religiosissimus Dei cultor (sicuti & prisci illi primi seculi patres) nihil hac in re neglexit, sed diligentissime homines de uoluntate & iudicijs Dei instituit. Vnde & a Mose, adeoque ab ipso Deo appellatus est propheta. Vsurpata est autem religiosa & uiua illa traditio sanctorum patrum ab exordio mundi usque ad tempora Moysi. Præterea curauit diuina bonitas, ne ulla unquam secula carerent clarissimis luminibus indubitatae fidei testibus & maximæ authoritatis patribus. Seculum enim ante diluuium habuit clarissimos & sanctissimos sapientissimosque uiros nouem, Adam, Seth, Enos, Kenan, Malalehel, Jared, Enoch, Mathusale & Lamech. Ex his præcipui Adam & Mathusalem ordiuntur & concludunt omnes annos seculi ante diluuium 1656. Nam Adam uixit annos uitæ 930. Moritur ergo ante diluuium anno 726. Mathusalem uero uixit annos uitæ 969. Moritur eo ipso anno, quo inundauit diluuium: ac uixit unâ cum Adamo annos 243. ut abunde potuerit institui ab Adamo de exordio rerum, de Deo, de lapsu hominis & restitutione, rebusque ad religionem pertinentibus omnibus, quemadmodum ipse ab ipso Deo erat institutus. Ego hi duo patres unâ cum alijs supra nominatis, totum illud seculum abunde satis erudire potuerunt de salute uera ac de iustis ujs Domini. A diluuiio dedit Deus iterum mundo uiros clarissimos & lumina maxima. Horum nomina sunt, Noe, Sem, Arphaxat, Sale, Heber, Palec, Reu, Saruch, Nachor, Thare, Abraham, Isaac, Jacob. Habemus hic patriarchas præstantissimos 13. In quibus primi duo Noe & Sem principatum tenent: post quos illustriores sunt Abraham, Isaac & Jacob. Vixit Noe annos uitæ in uniuersum 950. Natus erat annos 600. cum inundaret diluuium. Vidit ergo & audiuit omnes sanctos patres primi seculi ante diluuium, tribus duntaxat exceptis, Adamo, Seth & Enos. Ac cum reliquis, qui hos uiderat & audierant, conuixit annis plurimis, ut nihil eorum quæ Adam tradiderat ignorare potuerit. Moritur Noe (quod dictum mirum, sed tamen uerum est) anno ætatis Abrahamæ 49. Cum patre uiuit multos annos filius Sem. Vixit enim annos uitæ in uniuersum 600. Natus est ipsi Noe ante diluuium annis circiter 96. Vidit ergo & audiuit non tantum patrem Noe & auum Lamech, sed etiam proauum Mathusalem, cum quo uixit ante diluuium annos illos 96. Ab eo erudiri potuit de omnibus quæ Mathusalem audierat & didicerat ab Adamo ac reliquis patriarchis. Moritur autem Sem post fata Abrahamæ anno Iacobi 52. nimirum 37. anno post mortem Abrahamæ, anno ætatis Isaac 112. ut Iacob patriarcha ab ipso Sem omnem ueram theologiam uti hic à Mathusale acceperat, discere potuerit, à tertio post Adam teste ac præceptore. Porro Iacob patriarcha suis quoque liberis tradidit, quod ut traderet à Deo per patres accepit. Nascitur Iacobo in Mesopotamia Leui filius, & huic rursus Kahad, qui uidit & audiuit Iacobum. Nam non paucos annos uixit Kahad cum auo Iacobo. Recensetur enim in catalogo liberorum descendantium cum Iacobo in Ægyptum: at uixit Iacob in Ægypto cum liberis suis annos 17. Hic autem Kahad est auus Moysi, pater Amram, à quo plenam & certam illam traditionem de uoluntate præceptis & iudicijs Dei perfectissime hausit, sicuti Amram pater didicerat ex patre Kahad, Kahad à Iacobo, Iacobus à Sem, Sem à Mathusale atque Adamo primo patre omnium nostrum, ut iam Moses stet in mundo septimus testis ab ipso Adamo. Complentur autem anni mundi ab exordio rerum ad natiuitatem usque Moysi 2368. Reperiet autem hanc supputationem ueram & iustam esse, quisquis annos à Mose in Genesi & Exodo non frustra consignatos diligenter supputauerit.

Iam præstat etiâ scire prima illa capita uiuæ traditionis à sanctis patribus, Deo

sic disponente, ueluti per manus totī posteritati tradita. Tradiderunt patres posteris suis Deum pro natiua sua bonitate bene uelle hominibus, uelle ut homines omnes ad agnitionem ueritatis ueniant, & diuinæ cōsortes naturæ, sancti, felices et beati fiant. Ideoq; ab initio Deum condidisse hominem ad similitudinem & imaginem suam, ut esset bonus, sanctus, immortalis, beatus, & omnium bonorum Dei particeps: hominem autem in ea dignitate & felicitate non perstitisse, sed opera diaboli & culpa propria incidisse in peccatum, miseriam & mortem, cōmutasseq; imaginem Dei imagine diaboli. Porro Deum opus hīc iterum ceu nouum salutis instituisse, per quod homo restitutus, & ab omnibus malis liberatus, Deo rursus similis fiat: ac opus quidem hoc ingens & diuinum medio quodam perfecturum, nempe per Verbum incarnatum. Nam ut hoc incarnando hominē Deo coniunxit, ita moriendo in carne expiauit, sanctificauit & liberauit hominem, eidemq; spiritum sanctum donando, eundem reddidit diuinæ consortem naturæ, immortalem & beatum. Efficit deniq; ut conemur ingenium moresq; eius exprimere, ad cuius imaginē sumus conditi, ut simus anima & corpore sancti. Adiecerunt, Verbum suo tempore & seculo fore incarnandū. Restare item diem iudicij magnum, in quo omnes homines congregati, pñ uerō duntaxat percepturi sint prāmia illa immortalitatis diuinitatisq;. Hæc autem est summa breuis traditionis sanctorum patrum, quam præstat copiosius retexere, & ueluti per partes diligentius professui. Principiō ergo tradiderunt patres, unum esse Deum in adoranda trinitate, patrem, filium & spiritum sanctum, conditorem & gubernatorem cœli & terræ, ac omnium quæ in eis sunt, à quo conditus sit homo, & qui propter hominem omnia condiderit, omniaq; subiecerit homini, cui necessaria sufficiat tanquam fidus pater & Dominus munificentissimus. Deinde tradiderunt hominem cōstare anima & corpore, & bene quidem conditum esse ad imaginem & similitudinem Dei, sua autem culpa & diaboli instigatione prolapsus in peccatum, mortem & condemnationem unā cum inexplicabili ærumnarum tela inuexisse in mundum, ut iam omnes filij Adæ ex Adam nascantur filij iræ & calamitatum. Deum autem qui diues est misericordia, pro immensa sua bonitate misertum humanæ miseræ, ex mera sua gratia condonationem culpæ promississe, pœnæq; grauitatē imposuisse filio unico, ut hic postquam ipsi à serpente contritus sit calcaneus, conterat & ipse caput serpentis. Hoc est, promittit Deus semen siue filium qui ex singulari fœmina, id est, ex laudatissima uirgine incarnandus, morte mortem & mortis authorem fatanam sit superaturus, fidelesq; Adæ filios liberaturus, imō & adoptaturus in filios Dei ac hæredes uitæ æternæ. Docuerunt ergo sancti patres fidem in Deum & in filium eius totius mundi redemptorem: cū etiam sacrificarunt figurantes mortem siue hostiam eius immaculatam, qua deterfurus & expiaturus erat peccata totius mundi. Ideō & diligentissimē obseruarunt genus & generis lineam Mesiæ. Nam deducitur ea quasi filo ab Adamo ad Noe, à Noe per Sem ad ipsum usq; Abrahamum: ad quem rursus dicitur, In semine tuo benedicentur omnes nationes terræ: quibus uerbis prima promissio Adæ facta de Christo redemptore & maledictionem benedictione permutante, renouatur & inculcatur. Eadem linea ab Abrahamo deducitur per Isaacum in Iacobū, ac ipse Iacob plenus spiritu Dei Iudam filium seminis benedicti designat genearchā, sicut uidere licet Genes. 49. In tribu Iuda demum designatur domus Dauid, ex qua sit semen & germen illud uitæ proditum. Præterea tradiderunt beati patres Deum cum genere mortaliū fœdere quodam coaluisse, ac se fidelibus, fideles sibi Deo inquam arctissimē obstrinxisse. Vnde iam docebāt Deo fidem seruare, Deum adorare, falsos deos abominari

Deus.
Creatio.

Peccatum &
mors.

Gratia, uita, &
redemptio per
Christum.

Linea Mesiæ.

Fœdus diuinū.

minari, Deum inuocare solum, & colere religiosè. Porro cultum Dei constare re- *Cultus Dei.*
 bus spiritalibus, fide, spe, charitate, obedientia, iustitia, sanctimonia, innocentia,
 patientia, ueritate, iudicio & pietate. Ideoq; accusabant scelera atq; peccata, perfu-
 diam, incredulitatem, desperationem, inobedientiã, impatientiam, mendacium,
 hypocrisim, odia, contumelias, uim, iniurias, iniustitiam, impuritatem, luxum, cra-
 pulam, stupra, iniquitatem, impietatem. Docebant Deum boni esse remunerato-
 rem, mali autem uindicem ultoremq;. Docuerunt animas hominum esse immor- *Vita eterna &*
 tales, & corpora quoq; resurgere in iudicio: ergo hortabantur ita in hac uita tem- *iudicium.*
 porali uiueremus omnes, ne amitteremus æternam. Hæc est summa uerbi Dei re-
 uelati patribus, & per hos tradita posteritati. Hæc est traditio diuina patrum, quæ
 omnem pietatem comprehendit. Hæc est deniq; fides patrum uera, uetus, indubi-
 tata, authentica, orthodoxa & catholica. Ad hæc tradiderunt sancti patres liberis
 & posteris suis supputationem annorum ab exordio mundi, certam deniq; histo- *Historia certa*
 riam utilem & necessariam rerum à condito mundo ad suam usq; ætatem, ne filij *& annales*
 ignorarent principium & successionem rerum humanarum, iudicia item Dei & *iusti.*
 exempla piæ pariter & impiæ uiuentium. Possemus autem hæc omnia ex primo li-
 bro Mosis qui Genesis dicitur, clarè & ordine pulcherrimo demonstrare, nisi pro-
 lixè nimis protraheretur sermo. Sed & pauculos adeoq; nullos astare arbitror, qui
 non intelligant me ista de ueterum traditione quasi uerbotim recitasse ex lib. Ge-
 nes. ut iam liceat in cœpta pergere historia.

Cæterum quæ hæcenus ore ac ueluti per manus tradita sunt à patribus mun- *Traditiones pa-*
 do, primùm à beato Mose relata sunt in literas, unà cum ijs quæ toto uitæ Mosis *trum conscribit*
 tempore per annos 120. gesta sunt. Atq; ut maiorem in toto terrarum orbe & apud *Moses in histo-*
 omnes homines omnibusq; seculis authoritatem haberet, nemoq; ignoraret scri- *ria.*
 pta Mosis ipsissimum esse Dei uerbum, ornatur à Deo Moses & ueluti inaugura-
 tur signis & portentis uerè stupendis, quæ per Mosis manum, hoc est, ministerium
 patrabat omnipotens, & patrabat quidem nō in angulo aliquo mundi, aut in loco
 obscuro, sed in eius ætatis florentissimo famosissimoq; Ægyptiaco regno. Miracu-
 la illa maiora et plura sunt, quàm hîc paucis recensere liceat: neq; uerò illa repetere
 necesse est, cùm eorum charitas uestra non sit omnino rudis & ignara. Deinde con-
 ciliauit Mose authoritatem Deus etiam alijs modis. Frequentissima enim cum Mo-
 se habuit colloquia Deus: ac inter alia, Ecce ueniam ad te, ait, in densa nube ut au-
 diat me populus tecum loquentem, & credat tibi in perpetuum. Nec his conten-
 tus Dominus, iubet Mosen in concionem euocare totum populum, sexcentena
 inquam uirorum millia, unà cum uxoribus & liberis. Euocati sunt ad montem Si-
 na, in hoc apparet Deus mirifica ac terribili specie, ac ipse concionatur ad ecclesiã,
 recitans ipsis decem præcepta. Populus uerò territus diuina maiestate deprecatur
 ac poscit, ne Dominus ipse porrò pergat ore proprio concionari ecclesiæ, satis esse
 si Mose utatur ad ipsos interprete, ac per ipsum ecclesiæ loquatur. Recepit condi-
 tionem altissimus, ac porrò per Mosen populo locutus est quod uoluit.

Et quoniam populus ille erat duræ ceruicis populus, in Ægypto quoque ex
 consortio idololatrarum non uulgariter corruptus, cœpit iam quoq; literis com-
 mittere Moses quæ tradiderant sancti patres, quæ item ipsi iam reuelauerat Domi-
 nus. Ea ideo in literas retulit, ne apud segnem populum obliuione, & temporum
 diuturnitate, & improbitate, uel interirent uel corrumperentur. Præit autem Mose
 Dominus suo exemplo. Nam quæ recitauerat Deus apud ecclesiam in mōte Sina,
 eadem mox digito suo inscribit tabulis lapideis duabus, qui eadem ab exordio
 mundi digito suo inscripserat cordibus patrum. Deinde Mose quoq; disertè præ-

cepit ut scribat quæ reuelarat Dominus. Obtemperauit præcepto Domini Moses ac scripsit. Scribentis manum direxit spiritus sanctus, qui totam Mosi mentem occuparat. Nulla deerat facultas Mosi necessaria scriptori absolutissimo. Abundè instructus erat à maioribus suis. Natus enim est ex prosapia sanctissima patrū, quos Dominus testes uoluntatis, mandatorum, iudiciorūq; suorum constituerat, puto autem Amram, Kahad, Iacobum, Sem, Mathusalem & Adamū. Potuit itaq; ueram & certam ab exordio mundi ad sua usque tempora historiam scribere. Cui ea adiecit quæ sua ætate in populo Dei facta sunt, quorum ipse erat ueracissimus, & oculatus atque auritus testis. Imò quæ libris comprehendit, populo suo recitauit, nec inuentus est in tot millibus qui recitatis contradiceret: ut non parum estimationis addat scriptis Mosi, ecclesiæ illius maximæ unanimis consensus ac testificatio.

Maximæ authoritatis est Mosi.

Complexus est autem Moses historiam ab exordio mundi ad mortem usque suam per annos 2488. libris quinque, qui & libri Mosi quinque dicuntur. In ijs copiosissimè exposuit reuelationem uerbi Dei factam hominibus, & quid contineat & doceat uerbum Dei. Habemus in his, ut ipsius Dei multiplicia oracula, ita clarissimorum, uetustissimorum, sanctissimorum, sapientissimorum, maximorumq; totius mundi uirorum illustrissima testimonia, sententias, exempla, dogmata, de omnibus quæ ad ueram pietatem, bene beateq; uiuendi rationem pertinere uidentur. Ideò apud omnes posteros hi libri ut authentici, & qui ex seipsis sat authoritatis habent, & quibus citra contradictionem totus mundus credere debet, fidem inuenerunt paratissimam. Quinimò Dominus noster Iesus Christus unigenitus Dei filius, fideles ad lectionem Mosi relegat, ac id quidem in rebus salutis nostræ maximis. Loca extant Ioan. 5. & Lucae 16. Apud Matth. in 5. dicit, Ne existimetis quòd uenerim ad destruendam legem aut prophetas, imò non ueni ut destruam, sed ut compleam. Amen quippe dico uobis, donec prætereat cælum & terra, iota unum aut apex non præterierit ex lege, quoad omnia facta fuerint. Quisquis igitur soluerit unum ex mandatis hisce minimis, & docuerit sic homines, minimus uocabitur in regno cælorum. Quisquis autem fecerit & docuerit, hic magnus uocabitur in regno cælorum. Certè reperti sunt qui contradixerint Mosi seruo Dei. Sed Deus contradictionem illam ueluti maiestati diuinæ illatam reputauit, ac seuerissimè puniuit. Testimonia extant Exodi 16. & Numeri 12. Primum quidem murmurantis populi contra Mosen: secundum Mariæ sororis Mosi contradicentis fratri. Caterum populus audit, Non contra ministros tendunt querimonie uestre, sed contra Dominum. Maria uerò lepra horribiliter percussa est. Theotectus tragœdiarum scriptor oculis capitur: & Theopompus incidit in insaniam, quòd irreligiosus attigisset uerbum Dei. Quanquam enim uerbum Dei reueletur, proferatur aut scribatur per homines, non desinit tamen esse quod reuera est, neque incipit humanum esse uerbum, quod ab hominibus prædicatur aut auditur: nō magis quàm regis præceptum, præconis præceptum dicitur, quod à præcone annunciat. Spernit Deum, & cum Deo omnes sanctos patriarchas, quisquis contempserit Mosen, per quem nobis loquitur Deus, & à quo recepimus quæ ab exordio mundi posteris tradiderunt patriarchæ. Nullum est inter uerbum Dei traditum uiua uoce hominis & stilo hominis scriptum, discrimen, nisi quatenus uox uiua & scriptura inter se differunt, materia certè, sensus & intentio utrobique eadem est. Intellexit autem ex his charitas uestra certam originis uerbi Dei historiam.

Progressus uerbi Dei.

Pergamus iam ad reliqua, addere uidelicet historiam progressus uerbi Dei, ac quomodo

quomodo subinde clarius illustriusq; mūdo illuxerit. Post sublatum ex hoc mundo in cœlos beatum Moſen, dedit benignus Dominus cōtinuē prophetas præſtantiffimos ſuæ Eccleſiæ, quam elegerat, ut per ipſam uniuerſo mundo uerbum ſuum reuelaret. Fuerunt autem quondam ueteribus prophetæ, qui hodie nobis ſunt uates, ſacerdotes, ſapientes, concionatores, paſtores, epiſcopi, doctores uel theologi, rerum diuinarū ſcientiffimi, & rectores populi à Deo in fide dati. Huiusmodi autem nec paucos nec obſcuros floruiſſe in populo ſiue Eccleſia Dei ad captiuitatē uſq; Babylonicam, teſtabitur quiſquis diuinam legerit hiftoriam. Inter eos numerantur ſingulares & excellentes, Phinees, Samuel, Helias, Helifeus, Iſaias, & Ieremias. Reges ſimul & prophetæ fuerunt Dauid & Solomon. In captiuitate Babylonica clari fuerunt Daniel & Ezechiel. Poſt captiuitatem floruit inter alios Zacharias ille Barachizæ filius. Paucos hic ex multis numerauī. Qui, tametiſi diuerſis temporibus & longiſſimis inter ſe ſpacijs temporum floruerunt, unanimēs tamen omnes agnouerunt Deum orbī loquutum eſſe per Moſen, qui, Deo diſponente, ueræ theologiæ compendium & pleniffimam uerbi Dei ſummam reliquerit ſcriptis comprehenſam Eccleſiæ in mundo. Omnes iſti ſacerdotes uates ac prophetæ, in omnibus unicē reſpexerunt ad doctrinam Moſis. Omnes itē relegarunt in cauſa fidei & religionis ad libros Moſis. Legem Moſis, quæ reuera Dei eſt, ac propriſſimè Thora ſeu directorium & regula fidei & uitæ dicitur, inculcauerunt omnibus hominibus. Hanc explicarunt pro ratione temporum, perſonarū, & locorum hominibus. Omnes enim ſacerdotes & prophetæ ante incarnationem Chriſti, pietatem & ueram religionē tradiderunt ſui ſeculi hominibus uiua uoce. Nec aliud tradiderunt, quàm quod patres acceperant à Deo, Moſes à Deo & patribus, idipſum mox ſcriptis etiam mandantes commendarunt uniuerſæ poſteritati ad finem uſq; mundi: ut in prophetis iam habeamus doctrinam quidem Moſis patrumq; traditionem, ſed omnia & ſingula plenius & ſignificantius expoſita expolitaq;, inſuper etiam locis temporibus & perſonis aptata.

Prophetæ.

Lex.

Porrò doctrina & ſcripta prophetarum maximæ ſemper authoritatis fuerunt apud omnes ſapientes homines in toto mundo. Multis enim argumentis deprehenſum eſt, illa non iſtis exorta eſſe authoribus, ſed cœlitus ac diuinitus inſpirata à ſpiritu Dei ſancto. Deus enim eſt qui ſpiritu ſuo inhabitās animis, per ora nobis reſonat prophetarum. Habent ergo ampliſſimum à Chriſto Dei filio & ab electis eius Apoſtoliſ teſtimonium. Quid quod Deus ſtupenda nec pauca per ipſorum miniſterium miracula prodigiaq; patrauit: ut uel ex ſignis maximis diſceremus Deum eſſe, cuius inſtinctu agant, docent atque ſcribunt quæ nobis reliquerunt in monumentis prophetæ. Præterea perhibent prophetis illuſtriſſima teſtimonia diuinæ ueritatis, tot reſpublicæ ſiue Eccleſiæ à prophetis ſecundū uerbum Dei congregatæ ac gubernatæ. Laudantur excellentiſſimi Plato, Zenon, Ariſtoteles & reliqui gentium philoſophi. Sed quis iſtorum unquam potuit colligere Eccleſiam ſecundum ſua uiuentem placita: Atqui prophetæ noſtri clariſſimas & famoſiſſimas in toto terrarum orbe reſpub. ſiue Eccleſias, imò regna florentiſſima ſub ſuo habuerunt magiſterio. Solomonem regem & prophetam tantum non adorarunt omnes totius mundi, qui ſuo ſcilicet ſeculo uiuebant, ſapientes, proficiſcentes ad ipſum ab ipſis mundi finibus. Daniel quoq; in monarchia totius mundi præſantiſſima Babylonica, primas tenuit inter ſapientes. Sed & magnæ authoritatis erat apud Dariū Medum, Aſtyagis uel Aſſueri filium, atq; apud excellentiſſimum regem Cyrum. Libet hic quoq; commemorare diuinam illam in prophetis noſtris præſcientiam, & futurarum rerum poſt multa ſecula certiſſimam prædictionem.

Authoritas ſanctorum prophetarū maxima.

Nam ut hic ex alijs nihil commemorem, nōne prædixit Isaias certissima prædictione, quæ postea in Christo Domino per Iudæos sunt completa? Vetustis non frustra uisus est Euangelista magis esse quàm propheta siue uates. Cyri regis nomen prodidit centū sexaginta ad minimū annis priusquam nasceretur Cyrus. Ac Daniel rectè à uetustis appellatus est polyhistor. Nam quæ à suo seculo ad tempora usq; Christi, imò ad extremum usq; iudicij diem fiant ac facta sunt in omnibus ferè regnis mundi, in populoq; Dei, tam significanter ille prædixit, ut uideri possit historiam contexuisse rerum præteritarum. Hæc inquam omnia euidentissimè euincunt doctrinam & scripta prophetarum ipsissimū esse uerbum Dei: quo nomine & titulo etiam ornantur passim in scripturis. Petrus certè Apostolus, Non uoluntate hominis allata est olim prophetia, inquit, sed à spiritu sancto impulsus, loquuti sunt sancti Dei homines.

2. Pet. 1.

*Verbum Dei
reuelatum per
filium Dei.*

*Summa capita
doctrinæ Christi.*

Apostoli Christi.

Quamquam uerò Deus uerbū suum copiosè, clarè, disertè & simpliciter mundo per patriarchas, per Moysen, per sacerdotes, & per prophetas reuelauit, in fine tamen temporū omnium luculentissimè, simplicissimè, abundantissimeq; toti terrarum orbi per filium exposuit. De cœlis enim descendens ipse Dei patris unigenitus filius, uti prædixerant prophetae, omnia quæ prædixerant complet, & omnem pietatē ferè per triennium docet. Nam Ioannes, Deum nemo uidit unquam, ait, Unigenitus qui est in sinu patris ipse enarrauit. Sed & ipse Dominus ad discipulos ait, Omnia quæ audiui à patre meo, nota feci uobis. Et iterum, Ego sum lux mundi: qui sequitur me non ambulat in tenebris, sed habebit lumen uitæ. Docuit autē Dominus noster uolēti cœlos ingredi atq; saluari, necesse esse regenerationē cœlestem. Prima enim natiuitate hominem nasci mortis, secunda uitæ. Regenerationem autem illam perfici spiritu Dei, qui fide corda nostra imbuat, fide inquam in Christum, qui mortuus est propter peccata nostra, & resurrexit propter iustificationem nostram. Ea fide docuit iustificari credentes; & ex eadem fide subnasci uarios charitatis & innocentiae fructus; ad quos proferendos constantissimè adhortatus est. Docuit præterea se esse legis & prophetarū complementum aut plenitudinem, adeoq; & Moysis prophetarumq; doctrinam approbavit & exposuit. Doctrinæ coniunxit uaria miracula & beneficia, quibus declarauit se esse lumen illud mundi, & potentem benignumq; mundi redemptorem. Iam ut doctrina & beneficia eius toti innotescerēt orbi, delegit sibi testes quos appellauit Apostolos, eò quòd ipsos in orbem terrarum ad prædicandum ablegare statuisset. Erant testes illi homines simplices, innocentes, iusti, ueraces, doli & artiū expertes, & per omnia sancti probiq; quorū nomina in Ecclesia frequenter recitare utile est. Sunt hæc Apostolorum nomina, Petrus & Andreas, Iacobus & Ioannes, Philippus & Bartholomæus, Thomas & Matthæus, Iacobus Alphæi & Iudas frater eius cognomento Thaddæus, Simon & Iudas Iscariotes, in cuius locū (quòd prodidisset Dominum) subiit beatus Matthias. Hos ferè per triennium habuit auditores doctrinæ suæ cœlestis, & spectatores diuinorum operum. Hos ab ascensione ad cœlos, misso è cœlis sancto spiritu, instruxit omni facultate. Nam ut scripturarum erant peritissimi, ita linguarum omnium nec ignari nec infacundi. Ad eum autem modum instructi exeunt ex Hierosolymorum urbe & permeant orbē terrarum, omnibus populis & gentibus prædicantes, quod prædicandū acceperant ab ipso mundi saluatore & Domino Iesu Christo. Cūq; annis iam aliquot uiua uoce prædicassent, quod prædicarunt etiam scriptis commiserunt. Nam aliq; quidem scripserunt historiam de dictis & factis Christi, aliq; de dictis & factis Apostolorū. Aliq; uarias ad uarias gentes miserunt epistolas. In quibus omnibus ad confirmationē ueritatis,

ueritatis, ueteri quoque legis & prophetarum scriptura utuntur, sicuti & Dominus
factitasse legitur. Porro coniunguntur 12. Apostolis, duo magna orbis lumina, Ba-
ptista Ioannes, quo sanctior non est natus ex mulieribus, & uas electionis Paulus,
doctor ille magnus Gentium. *Ioannes Bapti-
sta & Paulus.*

Nec uero mirum est præcursores & Apostolos Christi, semper in Ecclesia ma-
ximam habuisse & dignitatem & auctoritatem. Nam sicut legati fuerunt regis
æterni, & omnium seculorum totiusque mundi, ita spiritu Dei donati, nihil ex suo
fecerunt arbitrio. Ac Dominus per ipsorum ministerium, maxima patrauit mira-
cula, quibus ipsorum ornaret ministerium, ipsorumque nobis doctrinam commenda-
ret. Quid quod uerbo illo Dei totum mundum conuerterunt, & præclaras per
orbem terræ Ecclesias collegerunt atque fundarunt? Id quod humanis Concilijs &
uerbis nequaquam perficere potuissent. His accedit quod doctrinæ propagatæ,
tanquam uiuificæ innitentes, mori non recusarunt. Præterea quotquot credide-
rant doctrinæ Euangelicæ, non horruerunt per aquas, ignes & gladios, uitam hæc
abrumperet, futuramque apprehendere. Neutiquam hæc potuissent sancti fideles,
nisi doctrina cui crediderant esset diuina. Quamuis itaque Apostoli fuerint homi-
nes, doctrina tamen ipsorum, primum quidem tradita uoce uiua, deinde calamis
relata in literas, est diuina, adeoque ipsum uerbum Dei uerum. Ideo enim Apostolus
scriptum reliquit, Cum acciperetis à nobis sermonem quo Deum disceratis, acce-
pistis non sermonem hominum, sed sicut uerè erat, sermonem Dei, qui & agit in
nobis credentibus. *1. Thess. 2.*

Verum res ipsa & locus iam postulant, ut etiam colligamus & disertè annu-
meremus libros illos sacros; in quibus comprehensum est ipsum uerbum Dei, pri-
mum quidem à patribus, item ab ipso Christo & Apostolis uiua uoce proditum,
deinde etiam in libros conscriptum, à prophetis & Apostolis. Et primo quidē lo-
coponuntur libri quinque Moysi. Sequuntur deinde libri Iosue, Iudicum, Ruth, Sa-
muelis 2. Regum 2. Paralipomenon 2. Esdræ, Nehemiæ & Hester singuli. Acce-
dunt his deinceps Iob, Dauid siue liber Psalmorum, Solomonis libelli tres, Prouer-
biorum, Ecclesiastes & Cantica. Quibus annumeratur quatuor maiores prophe-
tæ, Isaias Ieremias, Ezechiel, Daniel; & prophetae minores 12. quorum nomina
sunt notissima. His libris absoluitur uetus testamentum. Nouum habet initio hi-
storiam de Christo Domino Euangelicam, à quatuor scriptam authoribus, à duo-
bus inquam Apostolis, Matthæo & Ioanne, & à duobus discipulis, Marco & Lu-
ca, qui etiam librum composuit mirè elegantem & utilem, de actibus Apostolorum.
Inter Apostolos, Paulus edidit ad uarias Ecclesias atque personas 14. epistolas. Re-
liqui scripserunt septem, quæ & Canonice & Catholice appellantur. Clauduntur
autem libri noui testamenti Reuelatione Iesu Christi, quam aperuit dilecto disci-
pulo Ioanni Euangelistæ & Apostolo, ostendens ipsi adeoque toti Ecclesiæ fata Eccle-
siæ ad iudicii usque diem. His itaque libris pauculis & sobrijs non immensis, planis
& simplicibus, non obscuris & impexis continetur plena pietatis doctrina, ipsum
inquam uerbum ueri, uiui, & æterni Dei.

Peruenerunt autem libri Moysi & prophetarum ad tempora usque Christi &
Apostolorum integri & incorrupti per tot secula, pericula & captiuitates. Nam Do-
minus Iesus & Apostoli illis libris ceu authenticis usi sunt. Id quod non fecissent
aut facere potuissent, si uel corrupti fuissent, uel penitus interijissent. Libri quoque
quos adiecerunt Apostoli Christi, unà cum lege & prophetis integri & incorrupti
asseruati sunt in Ecclesia per omnes persecutiones, & integri incorruptique in
manus nostras, in quos fines seculorum inciderunt, peruenerunt. Nam uigilanti
*Scriptura est
integra & in-
corrupta.*

D E V E R B O D E I

eura & bonitate ineffabili Dei patris nostri factum est, ne ulla unquam secula thesauro caruerint careantq̃ tanto.

Hæc autem hætenus exposui charitati uestræ, de eo quid sit uerbum Dei, quæ eius origo in Ecclesia, quis eius progressus, quæ dignitas & certitudo. Verbum Dei est eloquium Dei, reuelatio uidelicet uoluntatis eius bonæ erga homines, quam ab initio, nunc ore suo, nunc per colloquia angelorū, primis illis uetustissimis & sanctissimis patribus aperuit: hi uerò posteris suis fideliter tradiderunt. Veniunt hic commemoranda maxima orbis lumina Adam, Seth, Mathusalem, Noe, Sem, Abraham, Isaac, Iacob, Amram, & huius filius Moses, qui Deo iubente, & historiam & traditiones sanctorum patrum scripto comprehendit, quibus legem scriptam & expositionem legis cum historia sui temporis copiosa & luculenta coniunxit. Post Moysen dedit Deus Ecclesiæ suæ præstantissimos homines, prophetas & sacerdotes, qui & ipsi quæ acceperant à Domino, posteris & uita uoce & scriptis tradiderunt. Post hos descendit è cœlis in mundum ipse Dei unigenitus filius, & impleuit quæcunq̃ de ipso in lege & prophetis legebantur scripta. Idem plenissimam beatè beneq̃ uiuendi rationē tradidit: Apostolos sibi testes adhibuit. Hi uerò testes postea omnia quæ tradiderat Dominus, primum quidē uoce uita prædicarunt, deinde ne unquam uel corrumperentur, uel è memoria hominum auferrentur, chartis commendarunt: ut iam habeamus & prædicatum & scriptum uerbum Dei à patribus, à prophetis, & ab Apostolis. Profecta sunt hæc ab uno eodēq̃ spiritu Dei, & tendunt ad unum finem, ut doceant homines beatè beneq̃ uiuere. His qui non credit, præsertim unigenito Dei filio, cui quæso credet: Habemus hic totius mundi & orbis terrarum uiros sanctissimos, innocentissimos, integerrimos, laudatissimos, iustissimos, antiquissimos, sapientissimos, diuinissimos, breuiter modis omnibus incomparabiles. Nihil tale ostenderit nobis totus mundus, etsi totus millies congregetur in Synodum. Collegit beatus Cōstantinus Imperator ex toto terrarum orbe œcumenicum Concilium: ac coierunt tum præstantissimi ex toto mundo patres 318. sed hos prudentissimi quicq̃ non dixerint uel umbras esse collatos illis, à quibus accepimus uerbum Dei. Credamus ergo in omnibus uerbo Dei nobis per scripturas tradito. Teneamus per scripturas nobis loqui ipsum Dominum Deum, uerum, uiuum, & æternum. Laudemus nomen & bonitatem eius in secula, qui dignatus est miseris mortalibus nobis uniuersam benè beateq̃ uiuendi rationem aperire, tam fideliter, plenè, ac simpliciter. Ipsi laus & gloria, &c.

De uerbo Dei, quibus & in quem finem reuelatum, quomodo item audiendum sit, & quòd omnem pietatis doctrinam plenè doceat.

S E R M O I I.



DI D I C I T charitas uestra proximo sermone quid sit uerbum Dei, unde profectum, quibus reuelatum auctoribus, qui eius progressus, quæ dignitas & certitudo sit. Adsum iam iterum, deoq̃ propitio & uestris precibus iuuantibus, exponam charitati uestræ, quibus & in quem finem reuelatum sit uerbum Dei. Quomodo sit audiendum, quæ eius sit uirtus, aut quis effectus.

Quibus reuelatum sit uerbum Dei.

Deus noster omnium hominum gentiumq̃ deus est, qui iuxta Apostoli dictū uult omnes homines saluos fieri, & ad agnitionem ueritatis uenire: ideoq̃ in omnium hominum gratiam, uitam, & salutem uerbum suum reuelauit, ut scilicet regula & uia quædam sit ducendi homines per uiam iustitiæ in uitam sempiternam. Israelitico

Israelitico quidem sancto & peculiari populo suo Deus quondam se familiariter aperuit quam alijs gentibus, propheta dicente, Annunciat uerba sua Iacob, & iudicia sua Israeli; non fecit taliter omni nationi, & iudicia sua non manifestauit eis: attamen non omnino gentes neglexit. Vt enim Ionam Niniuitis misit, ita Isaias, Ieremias, Daniel & reliqui prophetae multum operae collocarunt in docendis & admonendis gentibus. Ac patres illi uetustissimi Noe Abraham & reliqui, non erudierunt duntaxat Iudaicum de se descendentem populum, sed alios quoque filios docuerunt Dei iudicia. Certè Dominus noster Iesus Christus totum orbem apostolis suis aperiens, Docete, inquit, omnes gentes. Prædicate Euangelium omni creaturæ. Cumque sanctus Petrus nondum plenè intelligeret etiam gentes pertinere in consortiū Ecclesiæ Christi, & gentium quoque esse prædicationem Euangelij de parta per Christum fidelibus salute, erudit ipsum Dominus cœlesti uisione, uocibus item additis e cœlo, legationeque à Cornelio ueniente: sicuti nouit charitas uestra ex historia Actuum Apostolorum. Teneamus itaque fratres uerbum Dei ac scripturas sanctas reuelatas esse omnibus hominibus, omnibus in mundo ætatibus, sexibus, ordinibus & cōditionibus. Nam & Paulus Apostolus testificans de his, dicit, Quęcunque scripta sunt, in nostram doctrinam scripta sunt, ut per patientiam & consolationem scripturarum spem habeamus.

Nullus ergo nostrum dixerit posthac, Quid ad me quid scriptum sit in testamento ueteri Iudæis, aut quid Apostoli Romanis, Corinthijs & alijs populis scripserint: Ego sum Christianus. Prophetæ suis hominibus & Apostoli suo seculo prædicauerunt & scripserunt. Nā si rem rectè æstimemus, uidebimus ideo quia Christiani sumus, scripturas ueteris & noui testamenti nobis esse recipiendas. Nam Christus & seruator & magister noster relegauit nos ad scripta prophetarum & Moysis. Sanctus Paulus Christi organum electissimum, nobis ueterum & sacramenta & exempla applicat, nempe circumcisionem in baptismo, ad Coloss. 2. & agnum paschale in cœna siue mysterio 1. Cor. 5. In 10. cap. eiusdem epistolæ accomodat nobis uaria patrum exempla. Et in 4. cap. ad Rom. disputans de fide iustificante absque adminiculo legis & operum, profert exemplum Abraham. Deinde subiungit, Non scriptum est autem propter Abraham tantum imputatam fuisse illi fidem ad iustitiam, sed etiam propter nos quibus imputabitur si credamus, &c.

Ea lege aiunt quidam, implicabimur rursus legi, cogemur circumcidi, sacrificare carnes & sanguinem, recipere sacerdotium Aaronicum cum templo & reliquis ceremonijs. Permittetur rursus diuortij aut repudij libellus cum Polygamia. Respondeo, in ueteri testamento considerandum esse, quædam esse perpetua, quædam ceremonialia & ad tempus usque correctionis data. Tempus correctionis Christi tempus est, qui satisfecit legi & sustulit maledictionem legis. Idem circumcisionem baptismo permutauit. Sacrificia omnia sustulit unico suo sacrificio, ut iam nobis unicum Christi relictum sit sacrificium pro omnibus, in quo item discimus nostra ipsorum corpora & preces unā cum beneficentia spirituales Deo hostias offerre. Aaronis sacerdotium commutauit suo Christus & omnium Christianorum sacerdotio. Templum Dei sumus nos, quos spiritu suo inhabitat Deus. Ceremonias omnes antiquauit Christus, qui & libellum diuortij abrogauit unā cum polygamia apud Matthæum in cap. 19. Quamuis uero ceremoniarum istarum & actiones aliquot externæ, per Christum sint abrogatæ & sublatae, ut nos non obligent: scriptura tamen de his prodita, non est sublata uel antiquata per Christum. Oportet enim semper extare in Ecclesia Christi certum testimonium, unde discamus quales habuerint ueteres cultus & typos Christi. Hi hodie nobis interpre-

psal. 147.

act. 10.

rom. 15.

Quid ad me,
quid ueteribus
scriptum sit?Etiam ueteris te-
stamenti scripta
data esse Chri-
stianis.
Hebr. 7.
Hebr. 10.
Rom. 12.
Hebr. 13.
1. Cor. 3.

tandi sunt Ecclesiae spiritualiter, & ex ijs nō minus quā noui testamenti scriptis Christus, remissio peccatorum, & poenitentia praedicanda. Omnibus ergo Christianis etiam ueteris testamenti scripta data sunt diuinitus. Sicuti & Apostoli ad omnes scripserunt Ecclesias, quae nomen aut inscriptionem singularum habent.

*In quem finem
reuelatum sit.
uerbum Dei.*

In hunc autem finem reuelatum est uerbum Dei hominibus, ut eos erudiat de Deo & uoluntate eius, quis & qualis sit Deus erga homines, quod uelit eos saluos fieri, & per fidem quidem in Christum: quis sit Christus, & quae salutis ratio: quid deceat ueros Dei cultores, quid fugiant, quid persequatur. Neque enim satis est nouisse Dei uoluntatem, nisi eandem faciamus ut salui fiamus. Ideo uero Moses dixit, Audi Israel statuta & iudicia, quae ego doceo uos, ut faciatis & uiuatis. Et dominus in Euangelio testificans clamat, Beati qui audiunt uerbum Dei & custodiunt illud.

*Laudanda bonitas
Dei docentis nos.*

mat. 13. 12

jacob. 1. 5

Venit autem hic laudanda immensa Dei bonitas, quae nihil eorum nos uoluit latere, quae faciunt ad recte bene & beate uiuendum. Sapientes & docti huius seculi inuident ferē alijs ueram sapientiam. Dominus autem noster ultrō offert omnem rerum coelestium scientiam, cupitque ut in ea proficiamus, imō iuuat studium nostrum & absoluit. Quisquis enim habet, ait ipse in Euangelio Dominus, dabitur ei ut reddatur abundantior. Et omnis qui petit accipit, & qui quaerit inuenit, & pulsanti aperietur. Vnde & beatus Iacobus Apostolus, Si cui uesterū inquit, deest sapientia, postulet ab eo qui dat, nempe Deo, qui dat inquā omnibus simpliciter, nimirum promptē, nec grauatim, nec exprobrat, ac dabitur ei. Vbi obiter etiam uidemus officium nostrum, quod est, inter legendum & audiendū uerbum Dei, sedulō & ardentē orare, ut ad eum finem perueniamus, in quem datum aut reuelatum est nobis uerbū Dei, Sed ea de re pluscula dicemus, ubi exposuerimus quomodo audiendum sit uerbum Dei.

*Omnia uerae
pietatis nobis
tradita esse in
sacris literis.*

2. Tim. 3.

Iam quia diximus uerbum Dei reuelatum esse in hunc finem, ut plenē nos instituat de uis de ac salutis nostrae, paucis ostendā charitati uestre, uerbo Dei tradito nobis per prophetas & Apostolos, abundē comprehensam esse uniuersam pietatis rationem & quaecunq; pertinent ad recte bene beateque uiuendum. Equidem necesse est illam doctrinam esse plenam & omnibus modis perfectam, cui nihil debet uel addi uel adimi. Talis est autem doctrina uerbo Dei tradita, ut testatur Moses Deut. 4. & 12. & Solomon Prouerb. 30. Quis ergo non confiteatur omnia uerae pietatis nobis tradita esse in sacris literis? Praeterea nemo negauerit absolutissimam esse doctrinam, per quam homo plenē absoluitur ut in praesenti seculo pro iusto censeatur, & in futuro in perpetuum Dei accenseatur consortio. Ceterū qui uerbo Dei per prophetas & Apostolos orbi tradito credit & iuxta id uiuit, & iustus appellatur, & haeres uitae aeternae. Est itaque doctrina illa, absoluta doctrina. Nam & Paulus copiosius & plenius hoc declarans, Omnis scriptura, inquit, diuinitus inspirata, utilis est ad doctrinam, ad redargutionem, ad correctionē, seu instaurationem, ad institutionē, quae est in iustitia, ut integer sit Dei homo ad omne opus bonum apparatus. Habetis fratres luculentum de plenitudine uerbi Dei testimonium. Habetis omnes partes absolutae doctrinae. Habetis effectum uerbi Dei perfectissimū, quod ex hac doctrina homo Dei seu cultor Dei pius & uerē religiosus integer est, non ad quaedam bona opera, sed ad omne bonum opus apparatus. Quid ergo desideres? Non arbitror quenquam tam esse stupidum, ut haec Pauli uerba interpretetur duntaxat de ueteri testamento: cum luce manifestius sit, Paulum ista applicasse Timotheo suo qui erat Euāgelista & minister noui testamenti, Quod si plena est doctrina testamenti ueteris, quanto quidem plenior erit,

¶ &

si & noui testamenti codex adijciatur? Non ignoro Dominum Iesum fecisse & dixisse plurima quæ non sunt scripta ab Apostolis. Sed ideò non sequitur inabsolutam esse doctrinam uerbi Dei per Apostolos traditi. Nam Ioannes Apostolus & Euangelista fatetur ingenuè Dominum & alia multa fecisse quæ non sint in suo libro scripta: sed idem mox addit, Hæc autem scripta sunt, ut credatis quòd Iesus est Christus filius Dei, & ut credentes uitam habeatis per nomen eius. Afferit hac doctrina sua quam scripto comprehendit, plenè fidem tradi, & per fidem uitam concedi à Deo æternam. Atqui finis absolutæ doctrinæ est, felicem & uerè beatū esse. Quod cum obtingat homini per doctrinam Euangelicam scriptam, certè absolutissima est.

Multa fecit & dixit Dominus quæ non scripta sunt.

Scio dixisse in Euangelio Dominum, Multa habeo quæ uobis dicam: sed modò non potestis portare. Verùm scio eundem mox subiēcisse, Cum autem uenerit spiritus ueritatis, ducet uos in omnem ueritatem. Scio præterea uenisse spiritum ueritatis in discipulos, itaq; credo ipsos iuxta ueracem Christi promissionem, ductos esse in omnem ueritatem, ut certissimum sit his nihil defuisse.

Multa habeo uobis dicere, &c.

Cæterum cum quidam hoc negare non possint, ad hoc cōuertuntur, ut dicant Apostolos quidem nouisse omnia, at nō nisi uiua uoce tradidisse, scripto non item commendasse omnia quæ ad ueram pietatem pertinent. Quasi uerisimile sit, fidelissimos Christi Apostolos posteritati malignè aliquid uoluisse negare. Quasi uerò mentitus sit qui dixit, Hæc scripta sunt, ut credentes habeatis uitam æternam. Nihil omisit ergo Ioannes, quod ad fidem plenè informandam pertinet. Nihil omisit Lucas. Nil omiserunt reliqui Apostoli & discipuli Domini nostri Iesu Christi. Et Paulus scripsit Epistolas 14. sed plerasq; eiusdem argumenti. Vnde conijcere licet in ijs plenam contineri pietatis doctrinam. Nō enim inculcasset subinde unam & eandem rem tam multis, si fuissent adhuc alia quædam pro consequenda salute necessaria plenius tradenda. Hæc tradidisset haud dubiè, non repetiuiset eandem rem toties. Certè in 3. cap. Epistolæ ad Ephesios testatur, sese primis eius Epistolæ capitibus exposuisse suam de Euangelio Christi cognitionē. Deus secundum reuelationem, inquit, notum mihi fecit mysterium, quemadmodum ante scripsi paucis, ex quibus potestis legentes intelligere cognitionem meam in mysterio Christi. Hæc autem de unica Epistola, imò de primis duobus eius Epistolæ capitibus loquutus est. Quibus cum accedant copiosissimæ & luculentissimæ eiusdem Pauli, adde & aliorum Apostolorum literæ siue Epistolæ, quis quæso nisi ineptissimus quisq; cogitauerit Apostolos imperfectam posteris doctrinam scripto reliquisse?

Scripto cōprehenderunt Apostoli omnē pietatis doctrinā.

Qui uerò acriter contendunt, uiua quidem uoce, non autem scripto, omnia pietatis tradita esse posteris per Apostolos, hoc agunt, ut suas, hoc est, humanas constitutiones pro uerbo Dei uenditant. Sed contra hoc uenenum istud habetote uobis fratres antidotum. Conferte quæ isti uenditant pro uiuis non scriptis Apostolorum traditionibus, cum manifestis Apostolorum scripturis, & sicubi tradita illa à scriptis discrepare uideritis, colligite figmentum id esse hominum, non traditionem Apostolicam. Qui enim unum & eundem spiritum habuerunt ueritatis, non aliud scripto nobis reliquerunt, aliud uiua uoce tradiderunt. Præterea diligenter inuestigandum est, traditiones illæ gloriam Dei magis an hominum, incolumitatem item fidelium magis quam priuatum sacerdotum compendium promoueat. Cauendum est autem ab humanis traditionibus, præsertim cum Dominus dicat, Frustra me colunt docentes doctrinas præcepta hominum: ut iam tutissimum sit adhærere uerbo Domini nobis in scripturis relicto, abundè omnia quæ ueræ pietatis sunt tradenti.

Cōtra uiuas & confictas Apostolorum traditiones.

Quomodo audiendum sit uerbum Dei.

Restat iam ut dicamus, quomodo perfecta hæc pietatis & salutis doctrina, ipsam inquam uerbum Dei sit audiendum à fidelibus, quò aliquo & ubere quidem cum fructu audiatur. Summatim id comprehendam. Audiatur uerbum Dei cum reuerentia magna, quæ iure ipsi Deo rebusq; diuinis debet. Audiatur multa cum sedulitate: intermixtis iugibus precibus, ardentibusq; uotis. Audiatur utiliter & sobriè, in hoc, ut reddamur meliores, ut per nos glorificetur Deus: non ut curiosè perquiramus consilia Dei abdita, aut habeamur docti & multarum rerum periti. Sit modus & certus finis auscultationi & lectioni nostræ constitutus, fides uera, gloria Dei, & salus nostra. Nam in Exodo iubetur sanctus Dei seruus Moses sanctificare populum & præparare concioni sacræ, postmodum ab ipso Deo habendæ. Adest ergo Moses, et poscit ab uniuerso populo obedientiam iustam, tam Deo quam ministris Dei præstandam. Deinde præcipit ut uestimenta sua lauent, sibiq; temperent ab uxoribus. Postea terminos designat certos, quos nephas imò capitale sit transire. Ex quibus liquide discimus quales auditores requirat Dominus, in primis obediens & reuerentes Dei in omnibus. Deus enim loquitur hominibus. Deo honorem & timorē debemus omnes. Deo nisi quis supplex ac humiliter subiiciatur & obtemperet, impius est. Deinde requiritur ab idoneis uerbi Dei auditoribus, ut conuersationem deponant mundanam, per uestimenta significatam: ut calcemus omnem spurcitiam, animæ & corporis impuritatem: ut temperemus nobis uel à licitis uoluptatibus. Amat spiritus sanctus animos purgatos, qui tamen non nisi per spiritum Dei purgantur. Opus est fide sincera in Deum, & uoluntate prompta, quæ cupiat uiuere secundum ea quæ præcipiuntur uerbo Dei. Iam etiam sapiendum est ad sobrietatem. Reijciendæ quæstiones curiosæ. Discantur duntaxat utilia. Postremò summa adhibeatur in audiendo & discendo diligentia. Solomon enim, Si indagaueris, inquit, sapientiam ut aurum, assequeris eam. Idem, Scrutator maiestatis opprimetur à magnifica gloria. Item, Altiora te ne quaeris, & ne scruteris quæ uires tuas superant: sed quæ præcepit tibi Deus, illa cogita semper: & in pluribus operibus eius ne fueris curiosus: non est enim tibi necessarium abscondita uidere oculis tuis. Vnde & Apostolus, Ne quis arroganter sentiat, ait, sed ita sentiat ut modestus sit & sobrius, ut cuiq; Deus partitus est mensuram fidei. Huc pertinet quod idem Apostolus dicit, Scientia inflat, charitas autem ædificat.

Morbi & pestes auditorum uerbi Dei.

In primis uerò ab illis cauendum erit pestibus, quæ semen uerbi Dei præfocant, & sine fructu omni extinguunt in cordibus auditorum. Pestes & morbos illos recitauit aut annumerauit Dominus in parabola seminantis. Principiò enim fluxæ & uanæ cogitationes semper patentes inspirationibus satanicis & pessimorum hominum sermonibus, pestes sunt uerbi Dei. Molles quoque, delicatuli & amatores huius seculi, qui propter Christum & Euangelium nihil perpeti calamitatum sustinent, nullo cum fructu uerbum Dei audiunt, tametsi uideantur audire cum gaudio. Præterea cura huius seculi deceptioq; diuitiarum, pestilentissimi sunt morbi auditorum uerbi Domini. Non enim obstant tantum quò minus fructificet semen in cordibus, sed incitant extimulantq; homines ad contradicendum uerbo Dei affligendumq; uerbi Dei studiosos. Hic ergo uigilandum accuratissimè, ne his morbis infecti, uani & ingrati efficiamur auditores uerbi Dei. Orandum assidue, ut spiritum suum nobis conferat benignus & munificus Dominus, quo uiuificetur semen uerbi Dei in cordibus nostris, ac sancti & legitimi auditores uerbi dei fructum uberem feramus ad gloriam Dei, & nostrarum animarum salutem perpetuam.

Que uirtus, et quis effectus sit uerbi Dei.

Quid enim profuerit audire uerbum Dei sine fide, & sine spiritu Dei sancto intus in animis nostris operante aut agente? Clamat Apostolus Paulus, Nihil est qui

est qui rigat aut qui plantat, sed qui incrementum dat Deus. Dei ergo irrigatione opus est ut adolescat in animis nostris, & incrementum recipiat, imò ad iustam frugem perueniat uerbum Dei. Idem Apostolus Paulus, Nobis quoque annunciatum est uerbum Dei, ait, sicut & patribus nostris. At non profuit illis audisse sermonem, quòd is non esset cum fide coniunctus apud eos qui audierant. Nam conciderunt in deserto. Idem mox, Studeamus igitur ingredi in illam requiem, ne quis eodem concidat incredulitatis exemplo. Proinde si sonet in auribus nostris uerbum Dei, interim autem in cordibus nostris uim suam exerat spiritus Dei, fideque uera uerbum Dei recipiamus, maxima uirtus & mirificus effectus est uerbo Dei in nobis. Depellit enim errorum caliginem, oculos nostros aperit, conuertit, illuminat mentes, & in absoluta ueritate & pietate plenissime erudit. Canens enim uates diuinus testificatur, & ait, Lex Domini integra est conuertens animas, testimonium Domini uerum, imperitis sapientiam suppeditans. Præceptum Domini repurgatum est, illuminans oculos. Cibatur præterea uerbum Dei animas nostras, roborat, confirmat, & consolatur. Regenerat item, mundat, gaudio perfundit, & cum Deo coniungit, imò impetrat à Deo omnia & felicissimos reddit, ut uerbo Dei nulla bona, nulli denique thesauri totius mundi conferri possint. Ac tanta quidem tribuimus uerbo Dei, non citra uerbi Dei testimonia. Nam minatur Dominus per prophetam Amos famem & sitim, non utique panis & aquæ, sed audiendi uerbum Dei. In lege enim & Euangelio dicitur, hominem non solo pane uiuere, sed omni uerbo quod egreditur ex ore Dei. Et Apostolus Paulus dicit, omnia scripturæ exarata esse in nostram doctrinam, ut per patientiam & consolationem scripturarum, spem habeamus. Petrus item, Regenerati estis, inquit, non ex semine mortali, sed ex immortali, per sermonem uiuentis Dei & manentis in æternum. Hoc autem est uerbum quod per Euangelium delatum est ad uos. Dominus quoque in Euangelio testificatur, & ait, Iam uos mundi estis propter sermonem, quem locutus sum uobis. Idem in Euangelio clamat, Si quis diligit me, sermonem meum seruabit, & pater meus diliget eum, & ad eum ueniemus & mansionem apud eum faciemus. Iam & Ieremias, Verbum tuum, inquit, factum est mihi in gaudium. Et Dauid Propheta dicit, Decreta Domini recta sunt, cor exhilarantia. His adde illud Domini ex euangelio dictum, Si manseritis in me, & uerba mea in uobis manserint, quicquid uolueritis petetis, & fiet uobis. Alibi uerò propheta clamat, Si uolueritis & audieritis, bona terræ comedetis: quòd si audire uerbum meum nolueritis, gladius deuorabit uos. Sed & multus ac copiosus est Moses in recensendis bonis, quæ obueniunt uerbo Dei obsequentibus, in Leuitici capite 26. & Deut. 28. cap. Vnde Dauid, uerbum Dei omnibus huius mundi delicijs & thesauris præferre ausus fuit, Timor domini mundus perstans perpetuò, iudicia domini uera simulque iusta. Magis expetibilia quàm sit aurum uel præstantissimum atque plurimum, & dulciora melle & fauis stillantibus. Etenim seruus tuus perspicue illis admonetur, in illorum obseruantia multa merces est. Ergo tui oris lex melior mihi est, quàm auri & argenti millenarij. Nisi lex tua mea delicia essent, perissem in miseria mea. Huc iam pertinet parabola Euangelica de emente margaritam preciosam: item de uendente omnia quæ habebat, & emente agrum in quo sciebat absconditum esse thesaurum. Nam margarita illa, thesaurus ille, Euangelium siue uerbum Dei est. Quod & propter præstantiam in scripturis appellatur Lux uel lumen, Ignis, Gladius, Malleus conterens petras, Clypeus, & quæ illis alia sunt similia multa.

Audiuit hac hora charitas uestra benignum dominum & Deum nostrum, qui uult omnes homines saluos fieri, & ad cognitionem ueritatis uenire, uerbum suum

h. 6. 4. 2.

Psal. 19.

Amos 8.

Deut. 8.

Matth. 4.

Rom. 15.

1. Pet. 1.

Ioan. 14.

Ioan. 15.

Ierem. 15. 16

Psal. 19.

Ioan. 15.

Isaie 1.

Psal. 19.

Psal. 119.

Matth. 13.

Psal. 119.

Prouerb. 30.

Epilogus.

Hebr. 4.

Ierem. 23.

reuelauisse omnibus in toto mundo hominibus, atque in hunc finem reuelauisse, ut omnes ubiq; cuiuscunq; sint sexus, ætatis & conditionis homines, cognoscant ueritatem, erudianturq; de uera salute, habeantq; absolutissimam benè, rectè & beatè uiuendi rationem, ut homo Dei integer sit, & ad omne bonum opus apparatus. Tradidit enim Dominus in uerbo ueritatis ecclesiæ suæ, omnia quæ ueræ pietatis & salutis sunt. Quæcunq; de Deo, de operibus, iudicijs, de uoluntate & præceptis Dei, de Christo, fideq; in Christum & officijs uitæ sanctæ cognitu necessaria sunt, plenè uerbo Dei tradita sunt. Nec opus est ecclesiæ aliunde mendicare aut sarcire hominum supplementis, quod deesse uidetur uerbo Domini. Dominus enim non uiua duntaxat uoce omnem pietatem & salutem docuit patres nostros per Apostolos, sed & eorundem opera scripto cõprehendi curauit. Id quod manifestè propter posteritatem, id est, propter nos & posteros nostros factum esse apparet, nimirum, ne quis nostrum aut nostrorum seduceretur, aut ne cui falsæ traditiones pro ueris subijcerentur. Cauendum ergo nobis omnibus, uigilandum est omnibus, inhærendumq; uerbo Dei in scripturis per prophetas & Apostolos nobis relicto. Curemus deniq; neruis omnibus, ut cum fide & fructu audiamus quæ annunciantur nobis à Domino. Abijciamus & calcemus quæcunq; ex carne nostra aut ex mundo satanæue obijciuntur impedimēta pietatis. Scimus qui sint morbi, quæ pestes seminis uerbi Dei seminati in corda fidelium. Scimus quanta sit uirtus uerbi Dei in religiosis auditoribus. Oremus ergo Deum & Dominum nostrū, spiritum suum sanctum infundat animis nostris, cuius uirtute uiuificetur semen uerbi Dei in cordibus nostris, multumq; fructus ferat ad salutem animarum nostrarum & gloriam Dei patris nostri. Cui gloria semper.

De sensu & expositione legitima uerbi Dei, quibus modis & rationibus exponi possit. S E R M O I I I.

Intelligo, fratres dilecti, ex doctrina mea de Verbo Dei, uarias in multorum cordibus cogitationes exoriri, imò à quibusdam seri sermones satis irreligiosos. Sunt enim qui arbitrantur scripturas, id est, ipsum Dei uerbum, obscurius esse, quàm quod ullo possit legi cum emolumēto. Alij ex aduerso cõtendunt, uerbum Dei à Deo simpliciter hominibus traditum, nulla indigere interpretatione. Clamant ergo scripturas legi oportere quidem ab omnibus, omnibus autem licere sibi sensum fingere deligereq; quem putet quisq; maximè conuenientem esse. Illi ipsi damnant modum in ecclesijs receptum, quo minister ecclesiæ cœtui scripturas explanat. Ego uerò, si charitas uestra uti cœpit, perrexerit precari Dominum, Domini bonitate fretus, confido me demonstrare posse, scripturam non esse obscuram pijs, Dominumq; omnino uelle ut eam intelligamus. Deinde scripturas omnino esse exponendas. Vbi etiam modum & rationes aliquot simplices interpretandi scripturas explicabo. Remouebunt hæc, obstacula, quæ à lectione uerbi Dei arcent, reddentq; lectionem uel auscultationem uerbi Dei salubrem atq; frugiferam.

Deus uult uerbum suum intelligi.

Ac principiò quidem quòd Deus uelit intelligi uerbum suum ab hominibus, inde potissimùm possumus colligere, quòd loquens seruis suis, genere dicendi sit usus maximè uulgarì, ipsis etiam idiotis consueto. Neq; alio dicendi genere usi leguntur propheta & Apostoli serui dei, summæ et æternæ sapientiæ interpretes: ut in omni scriptorū turba non inuenias ullos, qui simpliciōri magisq; perspicuo stilo præcellant. Creberrimè utuntur sententijs generalibus & uulgaribus, similibus, parabolis, collationibus, fictis narrationibus, exemplis, & id genus alijs formis, quibus

quibus uulgarem sensum hominis nihil magis mouet & clarius docet. Oboritur, fateor, aliqua in scripturis caligo ex idiomate, schematismis & insolentia linguarum. Verum ei difficultati facile mederi poterit studium, diligentia, fides & peritia interpretum. Iam & Petrus Apostolus dicit in Paulinis Epistolis quaedam esse *Difficultas scripturae.* difficilia intellectu. Sed mox addit, Quae indocti parumque integri aut firmi detorquent, sicut & ceteras scripturas, ad suam ipsorum perniciem. Vnde colligimus, indoctis, imperitis, parum exercitatis, & malignis aut corruptis ingenijs, non studiosis & pijs lectoribus aut auscultatoribus difficilem esse scripturam aut obscuram. Proinde cum Paulus quoque dicit, Si adhuc uelatum est euangelium nostrum, in his qui pereunt uelatum est, in quibus Deus huius seculi excæcauit sensus incredulorum, ne illucesceret illis lumen euangelij gloriæ Christi, qui est imago dei: cul-
pam obscuritatis non in ipsum Dei uerbum, sed in auditores parum idoneos retorquet. Curemus itaque quicumque uerbum Dei recte intelligere cupimus, ne satanas animos nostros occupet & oculos perstringat. Nam & saluator noster dixit in euangelio, Hæc est condemnatio, quod lux uenit in mundum, & homines dilexerunt magis tenebras quam lucem. Alioquin legimus sanctos Dei prophetas & Apostolos uerbum Dei siue scripturas appellasse non tenebras, obscuritatem aut caliginem, sed iubar quoddam atque lucernam. Lucerna, inquit Dauid, pedibus meis uerbum tuum, & lumen semitis meis. Et quid quaeso manifestius est, quam quod in rebus dubijs & obscuris illustrandis, nemo relegat ad caliginosa & incerta? Incerta, dubia & obscura declarantur per certiora, firmiora & clariora. At quoties in fide negotijs quaestio aut cōtrouersia incidit, an non omnes cōsentiunt scripturis illam dirimi dissoluique oportere? Proinde necesse est scripturas esse claras, disertas, certissimasque.

Quamquam uerò clara sit scriptura & uerbum Dei apertum, non tamen respuit *Verbum Dei expositionem requirit.* expositionem religiosam seu piam, imò expositio sancta addit uerbo Dei ornamentum, & profert in auditore pio fructum multiplicem. Quoniam autem multi negant scripturas esse exponendas, ostendam exemplis irrefragabilibus omnino exponendas esse. Nam Deus ipse legis uerba prolata in monte Sina ad totam Israelis ecclesiam scriptaque in duas tabulas, multis colloquijs per 40. dies & annos habitis cum Mose, exponit ecclesiae per Mosen, qui nobis Deuteronomium & alios quosdam libros ceu diuinæ legis Cōmentarios reliquit. Insequuti sunt mox prophetae qui legem Moysi interpretantes suis temporibus, locis & hominibus applicauerunt, & sermones suos ueluti Enarrationes diuinæ Legis scriptos reliquerunt posteris. In Nehemia cap. 8. legimus in hæc uerba, Attulit sacerdos Esdra legem, librum Mo-
sis, & stetit super turriculam ligneam, nimirum in sacra cathedra. Et aperuit Esdra *Solennis expositio uerbi Dei.* librum coram ecclesia ex uiris & mulieribus, & quicumque intelligentes erant. Et Leuitæ stabant cum eo. Ipse uerò legit ex libro, & Leuitæ docebant populum in lege: & populus erat in statione sua. Et legerunt in libro legis Dei luculenter, explicantes sensum, & erudientes inter legendum. Hæc Nehemias. Obseruate fratres, quod legitimi & sancti ecclesiae Dei ministri uerbum Dei non tantum legerunt, sed exposuerunt etiam. Hunc ritum legendi & explicandi scripturas uel uerbum Dei nec abrogauit neque neglexit, cum in carnem uenisset Dominus noster Iesus Christus, atque iam uerus propheta & doctor cœlestis, adeoque noui testamenti aut Christianæ ecclesiae doctor instrueret suum populum. Nazarethi enim synagogam ingressus surrexit ut legeret: & traditus est illi liber Isaia propheta. Explicuit autem librum, & legit locum quendam insignem ex cap. 61. Deinde complieuit librum, ministro reddidit, & quod prælegerat exposuit, demonstrans uaticinium iam esse in ipso completum. Præterea cum resurrexisset ex mortuis, comitem se iungit duo-

bus discipulis Emaum euntibus, cum quibus cōtulit uaria: tandem uerò exorsus à Mose & omnibus prophetis, interpretabatur illis in omnibus scripturis, quæ de ipso erant. Hoc Domini exemplum imitati Apostoli & ipsi uerbum Dei exposuerunt. Nam Petrus Psalmum 16. interpretatur de Christo resurgente ex mortuis, in Actis Apostolorum cap. 2. Sed & Philippus principi Æthiopico Isaia uaticinium luculenta interpretatione aperit, & ea ipsum ad fidem Christi ecclesiæq; consortium adducit. Pauli facta & scripta nec legit nec uidit, quisquis negauerit Paulum ubique sacras interpretari scripturas. His dilucidè & solidè satis, opinor, demonstrauit uerbum Dei esse exponendum.

*Quid querant
qui scripturas
exponi nolunt.*

Qui uerò expositioni scripturarum reclamant, & nolunt ministros uerbi ac ecclesiarum publicè & solenniter enarrare scripturas, easq; applicare locis, temporibus, rebus & personis, aliud quàm pietatem quærunt. Viuunt isti aliter quàm deceat pios uiros. Loquuntur impia, indecora & absurda. Designant scelera & flagitia. Et hæc quidem cupiunt facere impunè: itaq; sublatam uolunt scripturarum expositionem. Si enim quis uerba duntaxat scripturæ legat, nec applicet rebus, locis, temporibus & personis, non admodum ipsorum impietati & sceleratæ uitæ contradixisse uidetur. Proinde cùm clamant e medio auferri oportere conciones & expositiones scripturarum, scripturas purè & sine additione legendas esse, non aliud uolunt, quàm abiicere legem Dei, disciplinam & correptionem omnem calcare, ac peccare impunè. Quos tamen suo tempore iustus Dominus puniet tanto grauius, quantò audacius insurgunt contra Deum.

*Non sunt cor-
rumpenda scri-
ptura peregrini
expositioni-
bus.*

Cauendum erit interim omnibus ecclesiarum ministris, ne uel hic affectui tantillum indulgeant, uel scripturas sanctas interpretando corrumpant, & hoc modo ecclesiæ suæ figmenta, non uerbum Dei proponant. Tale quidpiam uidentur designasse ueteris quondam populi doctores, quos apud Ezechielem accusans Dominus dicit, An leue uobis est quòd pascua bona depascitis, nisi residua pascuorum uestrorum pedibus uestris conculcetis, & bibentes limpidiores aquas, residuas pedibus uestris conturbetis? Et oues meæ conculcatum pedibus depascunt, & conturbatum pedibus uestris bibunt. Grande hoc est flagitium quod Dominus pro iustitia sua punit grauissimè. Curandum itaq; interpretibus sanctis & fidis, Christi ecclesiarumq; ministris, ut scripturas integras retineamus, & uerbum Dei purum tradamus populo Christi, illustratum inquam non corruptum aut obscuratum ineptis, detortis, & non natiuis nostris expositionibus.

*Scripturae sanctae
non sunt exponenda
ingenio humano.*

Ac locus quidem & tempus postulant, ut modò nonnihil dicamus c. v. de interpretandis scripturis sanctis, uel de exponendo uerbo Dei. Vbi non commemorabo quicquam de linguis linguarumq; peritiis, aut de bonis artibus, bono interpreti necessarijs, sed generalia duntaxat perstringam. In primis uerò sciendum est quadā in scripturis uel uerbo Dei tam clarè proponi, ut nec indigeant expositione, nec recipiant ullam enarrationem. Quæ si quis pergat suis illustrare interpretationibus, nihilo prudentius facere uideatur, quàm si quis conetur facibus aut tædis exorientem iuuare Solem, quò orbi clariùs illucescat. Quæ autē ita posita sunt, ut nostram postulent expositionem, non pro nostri animi arbitrio sunt interpretanda, sed pro eius ingenio & sensu, qui scripturas reuelauit. Nam S. Petrus, Omnis prophetica scriptura, inquit, non est priuata interpretationis. Non enim uoluntate hominis allata est olim prophetia: sed à spiritu sancto impulsus, locuti sunt sancti Dei homines. Proinde sensus uerbi Dei genuinus ex ipsis est petendus scripturis, non inferendus ex nostro arbitrio in scripturas. Simul autem Canones aliquot obseruandi sunt, quos per sequentia paucis perstringentes proferemus.

Principiò

Principiò cum Apostolus Paulus uelit prophetiam respondere analogiæ seu proportioni fidei: sicut legis ad Rom. 12. & idem in posteriore ad Corinth. dicat, Cum habeamus eundem spiritum fidei, iuxta illud quod scriptum est, Credidi, & ideo locutus sum: & nos credimus, quapropter & loquimur, catholicum sit nihil adferre in expositionibus nostris, aut nihil recipere quod alij adduxerint cōtra receptos fidei articulos in symbolo Apostolorū & alijs uetustissimis symbolis cōprehensos. Nam pro ueritate possumus aliquid, ait Apostolus, contra ueritatem nihil possumus. Legētes ergo in Euang. Ioānis illud domini dictū, Pater maior me est, cogitabimus articulis fidei contrariū esse, inæqualitatē constituere aut admittere in diuinitate patris & filij, & proinde aliud sensisse dominum quā ipsa uerba prima protinus fronte significare uideantur. Rursus eū in Apostolo legimus, Impossibile est ut qui semel fuerint illuminati, si prolabantur denuò, reparentur per pœnitentiam; ne credamus lapsis negandā esse pœnitentiā. Fides enim catholica credit omni loco, omni tempore, quoad in his terris uiuimus, & omnibus hominibus ad dominum conuersis promissam esse omnium delictorū ueniam. Ita cum audimus dominum accepisse panē & de pane dixisse, Hoc est corpus meum, reuocamus in memoriam articulos fidei, tribuentes domino nostro uerum & humanum corpus, quod ascendit in cœlos, sedet ad dexteram patris, inde uenturum iudicare uiuos & mortuos, ac cogitemus dominum de sacramento locutum, uelle ut sacramentalia uerba exponamus sacramentaliter, nō transubstantialiter. Similiter legentes illud Apostoli, Caro & sanguis regni Dei hæreditatē consequi nō possunt, ne ex his uerbis protinus pronunciemus, sed articulo fidei inhærentes, Credo huius carnis resurrectionem, intelligamus per carnem & sanguinem affectiones & infirmitates, non naturam substantiam uē carnis nostræ.

Expositio scripturæ non aduersetur fidei articulis.

Deinde legimus dominum legis & prophetarum summam colligere ac dicere in Euāgelio, Diliges dominū Deum tuum, ex toto corde tuo, & in tota anima tua, & in tota mente tua: hoc est primum & magnum mandatū. Secundum autem simile est huic, Diliges proximū tuū sicut teipsum. In his duobus mandatis tota lex & prophetæ pendēt, Matt. 22. Propter hæc Domini uerba beatus Aurel. August. lib. de Doct. Christ. 1. cap. 36. Quisquis, inquit, scripturas diuinas uel quamlibet earum partem intellexisse sibi uidetur, ita ut eo intellectu non ædificet istam geminā charitatem Dei & proximī, nondū intellexit. Quisquis uerò inde talem sententiā duxerit, ut huic ædificandę charitati sit utilis, nec tamē hoc dixerit quod ille quem legit eo loco sensisse probabitur, nō perniciosē fallitur, nec omnino mētitur. Hoc Augustinus scriptū reliquit. Cauendū ergo modis omnibus, ne nostra interpretatio tendat in subuersionē charitatis, sed hanc prouehat & omnibus cōmendet. Dixit quidem dominus, Ne resisteritis malo. Cæterū si hæc uerba etiam magistratui dicta esse cōtendamus, uiolabitur & ē mediō tolletur charitas proximī, periclitantium salus, oppressorūq; defensio. Nam latrones & cōtumaces homines, raptores & contumeliosi oppriment uiduas, pupillos & pauperes, regnabitq; & exultabit omnis iniquitas. Porro plurib. exēplis in re manifestissima nō arbitror esse opus.

Expositio non pugnet cū charitate Dei & proximī.

Præterea necessarium est in exponendis scripturis & sensu genuino uerbi Dei indagādo, expendere, qua occasione quid dicatur, quid præcedat, quid sequatur, quo tempore aut modo, aut de qua persona aliquid dictum sit. Ex occasione, ex præcedentibus & consequentibus sententijs exponuntur ferē exempla & parabolæ. Imò nisi quis semper obseruet in omnibus scripturæ locis contextum orationis, idēq; diligentissimē, exponendo nō poterit non plurimum à iusto aberrare tramite. Obseruauit S. Paulus circumstantiam temporis, & inde conclusit Abra-

Expositio præcedentiæ & consequentiæ item circumstantias excutiat.

hamum neq; circuncisione neq; lege fuisse iustificatum. Loci extant Roma. 4. & Galat. cap. 3. Rursus cum S. Petro dicitur, Conuerte gladium tuum in uaginam, Qui gladium sumit, gladio perit: considerandum est Petrum Apostoli non magistratus gerere personam. De magistratu enim legimus datū ei gladium ad uindictam. Prolixū autē esset nedum laboriosum, plura de singulis coaceruare exempla.

Expositio uerbi Dei fiat per collationem locorum.

His iam accedit & alia ratio interpretandi uerbum Dei, collatio uidelicet locorum uel similium uel dissimiliū, & quod obscuriores per clariores, item pauciores per plures sunt exponēdi. Ergo cū dominus dicit, Pater maior me est, cogitandū est quod alibi idē dicit, Ego & pater unū sumus. Cumq; Iacobus Apostolus dicit operibus & Abrahamum & nos iustificari, plures ex sancto Paulo loci huic sunt opponendi. Probauit hanc interpretandi rationē Petrus Apost. dicens, Habemus firmiorem sermonē prophetiū, cui dum attenditis, ceu lucernæ in obscuro loco, rectē facitis, donec dies illucescat, & lucifer exoriatur in cordibus uestris. Vetus scriptor Tertullianus author est, hæreticos, non uiros orthodoxos, quādā ex scripturis ad suam sententiam decerpere, ac cetera nō intueri. Ita paucula sibi deligere testimonia, quibus omnino credi postulent, reclamante interim tota scriptura, cū oporteat secundum plura intelligi pauciora.

Expositio fiat ex pectore religioso & cum orationibus.

His omnibus addimus iam omnium efficacissimū uerbum dei exponendi canonem, pectus Dei & gloriæ eius amans, non superbū, non ambitiosum, non hæresibus, non prauis corruptū affectibus: quod precibus indefinentibus uocet spiritum sanctum, per quem prodita & inspirata est scriptura, ut per eundē etiam explicetur ad gloriā Dei & fidelium incolumitatē. Ardeat interpretis animus studio prouehēdi uirtutes, & odio omniū scelerū, eaq; opprimendi. Ne admittat huiusmodi interpretis pectus in consiliū sophistam diaboli, qui sensum uerbi Dei, nūc quoq; sicuti olim in paradiso, corrumpat. Ne audiat humanā sapientiam directē spiritui Dei contradicentem. Hæc si fecerit bonus & fidelis interpret uerbi Dei, etiam si alicubi non attigerit (quod dici solet) acu occultiore scripturæ sensum, error tamen ille nec damnandus erit nec perniciosus iudicabitur. Et quisquis occultiore & magis propriū scripturæ sensum protulerit, imperfectiorem tamen illius sensum non damnabit: quemadmodum & hic, imperfectioris uidelicet sensus author, magis propriū non reiiciet, sed agnoscens recipiet cum gratiarum actione.

Epilogus.

Ista diximus hucusq; de sensu & expositione uerbi Dei: quod ut hominibus reuelauit Deus, ita illud omnino uult intelligi. Vnde non est quod quisquam desperet de genuino sensu scripturæ, propter aliquot difficultates, assequendo. Admittit piā & religiosā interpretationem scriptura. Verbum Dei regula est uitæ omnium hominum & temporū. Omnibus ergo temporibus & omnibus hominibus interpretando applicandum est. Nam ipse etiam Deus noster legē quam in monte Sina tulerat aut promulgarat, multis per Moysen exposuit, populoq; suo aprauit. Præterea celebre fuit uetustis prophetis & legem Dei populo prælegere, & explicando aptare. Exposuit scripturas ipse quoq; dominus noster Iesus Christus. Exposuerunt easdem & Apostoli. Exponendum est itaq; uerbum Dei: quod qui exponi nolunt, uolunt utiq; peccare impunē. Cæterum quia expositionem recipit scriptura, non quamlibet recipit: humanam enim repellit. Sicuti enim scriptura reuelata est ex spiritu Dei, ita per eundem ipsam explanare cōuenit. Sunt itaq; Canones aliquot piē exponendi uerbum Dei ex ipso uerbo Dei: nempe ne expositio fidei articulis contradicat, aut cum charitate Dei & proximi pugnet: sed ut circumspecta sit, petita ex præcedentibus & consequentibus, diligenter pensitatis omnibus circumstantiis, locorumq; collatione. In primis autē necesse est pectus interpre-

terpretis pium sit, uirtutes plantatas uitiaq; extirpata modis omnibus uelit, deniq; quod iuges fundat ad dominum preces, ut is animos nostros illuminet, quò glorificetur nomen Dei in omnibus. Ipsius est enim gloria, honor & regnū, in secula seculorum, Amen.

De fide uera, unde oriatur, quòd sit certa persuasio mentis, & innitatur Deo & verbo eius.

S E R M O I I I I.

DO cui sermone proximo sanam uerbi Dei expositionem nihil discrepare à regula fidei ueræ, & à dilectione Dei & proximi. Est enim adulterinus scripturæ sensus proculdubio, qui cum fide pugnat & gemina dilectione. Proinde consequens est, ut iam etiam dicamus aliquid de fide uera, & de dilectione Dei atq; proximi, ne quid hic desideretur à quoquam. Principiò autem Deo iuuante, & uestris intercedentibus precibus, disseram de fide uera.

Vocabulum fidei patet in sermonibus hominum latissimè. Accipitur enim pro religione & cultura qualibet. Nam dicimus, fides Christiana, fides Iudaica, fides Turcica. Deinde sumitur fides pro opinione concepta ex relatione aliqua, ueluti cum audimus nobis recitari aliquid ex Indianis aut Aethiopicis historijs, dicimusq; illa nos credere, in quæ tamen non collocamus ullam fiduciam, aut ex quibus nihil omnino speramus utilitatis. Hac significatione ait S. Iacobus diabolum credere & contremiscere. Postremò usurpatur fides pro certa & indubitata in Deum & uerbum eius fiducia. Apud Hebræos fides nomē habet à ueritate, certitudine & constantia. Latinis dicitur Fides, quòd fiat quod dicitur. Vnde ille, Interrogo te utrum credas? Dicis, Credo. Fac quod dicis, & fides est. Proinde in argumento nostro, fides est indubitata & persuasissima fiducia.

Hæc fides quæ persuasissima ac indubitata est persuasio aut fiducia, ac in Deū & uerbum eius tendit, uariè describitur à purioris notæ theologis. S. Paulus, Fides, ait, est substantia rerum sperandarum, argumentum non apparentium. Substantia siue hypostasis, basis seu fulcrum est firmissimum illud quod nos sustinet, & cui nos tutò innitimur atq; incumbimus. Res sperandæ sunt res cœlestes æternæ ac inuisibiles. Dicit itaq; Paulus, Fides est immota subsistens & certissima fiducia rerum à Deo promissarum, uitæ æternæ uidelicet & omnium bonorū. Cæterum ipse Paulus expositionem eorum quæ attulerat proferens subnectit, Fides est argumentum non apparentium. Argumentum uel elenchus est euidentis demonstratio, qua euincimus manifestissimè quod alioqui dubium esset, ut in eo quem sumpsimus erudiendū, nulla supersit dubitatio. Iam uerò mysteria Dei, prodita oraculis Dei, in se siue in natura sua cerni non possunt oculis corporeis: unde appellantur non apparentia. Fides autem illa mente illuminata corde apprehendit, uti sunt proposita Dei uerbo. Idcirco fides est, iuxta finitionem Pauli, euidentissima mentis uisio, & certissima cordis comprehensio rerum inuisibilium, id est, æternarum, Dei inquam & eorum omnium quæ nobis de rebus diuinis proponit uerbo suo. Ad hanc Paulinam definitionem respexerunt qui fidem sic finierunt, Fides est rerum diuinarum persuasio, quarū cogitationi ita incumbere debemus, propter oraculorū fidem, ut non minus ea cernere animo credamus, quàm oculis res sensu perceptas & aspectabiles cernimus. Ab hac finitione nō multum discrepat hæc uiri cuiusdā pī & docti definitio, Fides est firma animi persuasio, qua nobiscum statuimus tam certam esse Dei ueritatem, ut non possit non præstare quod se facturum sancto suo uerbo recepit. Item, Fides est firma conscientia cer-

*Definitiones
fidei.*

titudo quæ Christum amplectitur, qualis nobis per Euangelium offertur. Est alius quidam qui ad eundem ferè modum fidem sic describat, Fides est donum diuini tus infusum menti hominis, qua citra ullam hæsitantiã credit esse uerissima, quæcunq; nobis Deus per utriusq; testamenti uolumina tradidit atq; promisit. Fidem ergo extendit idem ille ad tria tempora, ad præteritum, præsens & futurum: uide licet credendum docens mundum à Deo conditum, & quicquid superioribus seculis gestum narrant diuinæ literæ: item Christum pro nobis mortuum, unicam salutem esse credentium: deinde ab eodem Deo & hodie mundū Ecclesiamq; gubernari, & credentes in Christo saluari: postremò euenturum certissimè tum impijs quæ minantur, tum pijs quæ pollicentur sacrae literæ.

Descriptio ueræ fidei.

Ex istis ergo omnibus diligenter expensis, fidem secundū scripturas ita possumus describere, Fides est donum Dei, homini cœlitus infusum, quo edoctus indubitata persuasione in Deum & uerbū eius innititur, per quod à Deo in Christo uita omneq; bonum gratis promittitur, omnisq; ueritas credēda exponitur. Quam descriptionem fidei consequentibus explicabimus, Deo iuuante, per partes, adductisq; scripturarum locis ipsam & confirmabimus & illustrabimus. Vos quod fecistis hætenus, diligentes auditores este, inq; animis uestris sedulò orate.

Origo & causa fidei.

Principiò causa & origo fidei deducitur non ex homine ullo uel ullis hominū uiribus, sed ex ipso Deo, qui per spiritum sanctū infundit in corda nostra fidem. Dominus enim in Euangelio dixit, Nemo uenit ad me, nisi pater meus traxerit eum. Et iterum, Caro & sanguis (ait Dominus ad Petrum uera fide agnoscentem Christum) nō reuelauit tibi, sed pater meus qui in cœlis est. Quo alludens etiam Apostolus, Non idonei sumus, ait, ex nobis ipsis cogitare quicquam, tanquam ex nobis ipsis, sed omnis idoneitas nostra ex Deo est. Et iterum, Vobis donatum est pro Christo, non solū ut in eum credatis, uerum etiam ut pro illo patiamini. Fidem ergo infundit cordibus nostris Deus, qui est fons & origo bonorū omnium.

Per uerbum dei plātatur fides.

Vbi tamē considerandum uenit, Deum in donanda aut infundenda fide, non uti absoluta potentia aut miraculo, sed medio & ordine congruo hominibus: quamuis etiam sine illo medio fidem donare possit, quibus, quando & quomodo uult. Ordine uerò ab ipso rerum exordio hoc usus legitur dominus. Quos erudire & fide donare statuit, ijs mittit doctores, qui uerbo Dei ueram fidem tradant. Non quòd in hominum potestate, arbitrio, aut ministerio sit dare fidem, aut quòd externum uerbum ab homine annunciatum per se aduehat fidem: sed uox hominis & uerbum Dei annunciatū erudit homines quæ sit uera fides, quid uere credendum uelit præcipiatq; Deus: hic uerò solus demisso in corda & mentes hominum spiritu sancto aperit corda, impellit mentes, efficitq; ut toto corde credamus, quod ex eiusdem uerbo & eruditione credendum esse intelleximus. Potuisset dominus Cornelio centurioni apud Cæsaream Stratonis, citra prædicationem, cœlitus & mirabiliter conferre fidem in Christum, sed remittit ipsum per angelum ad prædicationē S. Petri. Ac dum is prædicaret, operatur Deus in animo Cornelij per spiritum sanctum, ut crederet prædicationi. Certè S. Paulus. Quomodo credent ei, ait, de quo nihil audierunt? Quomodo audient absq; prædicante? Quomodo autem prædicabunt nisi fuerint missi? Ergo fides ex auditu est: auditus aut per uerbum Dei. Idem tamen alio loco, Quis est Paulus, ait, quis Apollos, nisi ministri per quos credidistis, & ut cuiq; dominus dedit: Ego plātaui, Apollos rigauit, sed deus dedit incrementum. Itaq; non qui plantat est aliquid, neq; qui rigat, sed qui incrementum dat Deus. Congruunt cum hac S. Petri & S. Pauli doctrina quæ Augustinus scribit in Præfatione ad lib. de Doctrina Christiana, dicens, Quod ab homine discenda

ne discendum est, quisque sine supercilio ab homine discat. Neque tentemus eum cui credimus, neque decepti nolimus ire ad Ecclesias audiendum aut ex libris discendum, & expectemus rapī in tertium cœlum. Caueamus tales tentationes superbissimas, magisque cogitemus ipsum Paulum Apostolū, licet diuina & cœlesti uocatione prostratum & instructum, ad hominem tamen missum esse: & Cornelium quamuis orationes eius audisset Deus, Petro tamen traditum imbuendum, per quem non solum sacramenta perciperet, sed etiam quid credendum, quid sperandum, quid diligendum esset audiret: quæ tamen omnia poterant per angelū fieri, &c. Idem quoque in epistola ad Circenses ait, Conuersionem operatur ille & efficit, qui per ministros suos rerum signis extrinsecus admonet, rebus autem ipsis per seipsum intrinsecus docet. Item Tractatu in Ioan. 16. Quid faciunt homines, inquit forinsecus annuntiantes? Quid facio ego modò cum loquor? Strepitum uerborū ingero auribus uestris: nisi ergo reuellet ille qui intus est, quid dico aut quid loquor? Exterior cultor arboris, interior est creator, &c. Hæc ille.

Quemadmodum uerò Dominus poscit ut uerbo suo credamus, (Nam & propheta clamat & dicit, Hodie si uocem eius audieritis, nolite obdurare corda uestra:) Ita omnino à nobis omnibus auditoribus uerbi ipsius flagitat, ne simus orando segnes. Nam audiētes uerbū Dei, orare debemus pro dono fidei, ut Dominus aperiat corda nostra, conuertat animas nostras, duritiā mentis frangat atque contundat, fidemque datam adaugeat. Exempla huiusmodi orationis plurima sunt in sacris literis. Cū in Euangelio ad quendam diceret Dominus. Potēs ne credere? omnia possibilia credenti. Respondit ille, Credo Domine, succurre incredulitati meæ. Et Apostoli clamantes ad Dominum, dicunt, Adauge nobis Domine fidem. Sed & oratio hæc qua postulamus nobis infundi fidem, ex gratia & dono Dei est, non ex nostra iustitia quæ coram Deo nulla est. Relinquitur ergo certissimum & indubitatum, quòd fides uera merū Dei donum est, id quod cœlitus cōfertur animis nostris per spiritum sanctum, proponitur autem uerbo ueritatis per doctores à Deo missos, orationibusque indefessis & ardentibus impetratur. Vnde discimus frequenter & diligenter esse nobis audiendum uerbum Dei, & orandum sine intermissione, quòd fidem ueram à Deo consequamur.

Quòd autem fides illa cœlitus infusa, & ex uerbo ueritatis percepta, mentem hominis imbuat indubitata persuasione, id est, quòd ea quæ ex uerbo Dei credimus, firmissimè & citra omnem ambiguitatem & dubitationem credamus, certi ita habere prorsus rem, ut habere credit fides, (usurpo enim uocabulum persuasionis non uulgariter, sed pro firmo animi assensu à spiritu sancto inspirato & persuaso (ostendemus exemplo fidei Abraham, quam his uerbis describit Paulus ad Romanos cap. 4. Abraham præter spem sub spe credidit: ac non infirmatus fide haud considerauit suum ipsius corpus iam emortuum, cum centū ferè annos natus esset, nec emortuam uuluum Saræ, uerū ad promissionem Dei nō hæsitabat ob incredulitatē, sed robustus factus est fide, tribuens gloriam Deo, certa persuasionē concepta, quòd is qui promiserat, idem potens esset & præstare. Obseruanda sunt autem notæ in uerbis Apostoli, quæ nobis approbant fidem, credentis animi & cor imbuere certa persuasione, adeoque fidem esse consciā indubitatam rerum creditarum fiduciam: id est, fidem ueram non tantū uolitare in animo hominis instabilem, sed altissimè fixis radicibus in Christo hære in illuminato corde. Principio Abraham, ait Apostolus, præter spem sub spe credidit: id est, ibi firma spe fuit, ubi tamen, rebus huius seculi more expensis, nihil erat sperandum. Est autem spes firmissima & indubitata expectatio earum rerum quas credimus; ut

Orandum est
pro uera fide.

Fides est mentis
indubitata per
suasio.

Hæsitatio duplex.

uideamus Apostolum fidem illustrasse per spem, & spei certitudine exposuisse fidei firmitatem. Deinde subdit, Abraham non est infirmatus fide, neque ad promissionem Dei hæsitauit ob incredulitatem, sed robustus factus est fide. Duplex quidem est hæsitatio in hominibus. Vna quæ tentationibus aduersis superata uergit in desperationem, promissionesque Dei contemnit. Talis erat hæsitatio in decem illis exploratoribus terræ sanctæ, quorum mentio fit Numeri. 13. & 14. cap. Altera potius fidei imbecillitas est, quæ & ipsa tentatur, ut iam non cōmemorem, quod nobis omnibus diffidentia quædam originali labe est ingenita, quodque mens hominis nunquam ita illuminata & stabilita est, quin nebulae ignorantiae dubitationisque oboriantur: cæterum non succumbit fides tentationi, neque immergitur aut inhæret hæsitati, sed apprehenso uerbo ueritatis promisso eluctatur & rursus confirmatur. Ita legimus ad promissionem diuinam Abraham animum subiisse, Num centenario tibi nascetur filius? Hæc erat infirmitas illa & hæsitatio aut imbecillitas fidei. Atqui hic Apostolus uincentem & non succumbentem Abraham fidem celebrans, simul etiam nos docens qualis esse debeat uera fides, firma nimirum & certissima persuasio, dicit, Abraham non infirmatus fide, non considerauit corpus suum iam emortuum, cum ferè centum esset annos natus, nec emortuam uulua Saræ. En subiit quidem animum Abraham, Num centenario nascetur filius? Cæterum non infirmatus est fide. Fides Abraham ob istam tentationem non incipiebat languescere. Non enim considerauit ea quæ in ipso erant infirma & parum diuinæ promissioni congrua. Quid ergo? Ad promissionem Dei non hæsitabat ob incredulitatem. Id est, locum non cedebat tentandi incredulitati: non diiudicabat & anxie inquirebat, quod diffidentes solent. Nam proposita animo suo diuina promissione, ei inquam immotè inhæsit, hæsitatiōe & diiudicatione omnino excussa. Nam fides minimè spectat imbecillitatem, miseriam, defectumque homini proprium, sed innititur diuinæ uirtuti. Sic inquam Abraham robustus factus est fide, id est, inualuit & superior in tentatione euasit. Opponitur enim illi superiori, Non infirmatus seu debilitatus est fide. Sequitur in Apostolo, Abraham tribuit gloriam Deo, nimirum credens Deum bene uelle hominibus, ueracem esse ac omnipotentem. Tribuit enim Deo gloriam, qui proprietates Dei Deo tribuit, qui uerbo seu promissioni Dei non contradicit. Nam Ioannes Apostolus ait, Qui non credit Deo, mendacem facit Deum. Credidit ergo Abraham Deo, & credendo tribuit gloriam Deo. Sequitur enim in uerbis Apostoli Pauli, Certa persuasione cōcepta, quod is qui promiserat, idem potens esset & præstare. Scripsit Paulus Græcè *πληροφορέως*, id quod perinde est ac si tu dicas, certificatus. Nam *πληροφορέω* significat plenam facio fidem. Vnde *πληροφορία* certa fides, quæ fit argumentis aut re ipsa exhibita. Et *πληροφορία* uocant, quod nos dicimus certificationem, cum nobis res sic persuasa sedet animo, ut nihil amplius addubitemus. Ergo fides Abrahamum certificauit, & indubitata persuasione imbuit, ut iam non dubitaret Deum posse præstare quod promiserat: fide ergo immotus inhæsit promissioni Dei, certus se assecuturum quod promiserat Dominus. Certissimum ergo & uerbis Apostoli demonstratum est, fidem ueram esse indubitatam persuasionem in animo credentis, omnino rem sic habere sicuti creditur & sicuti habere dicitur aperto Dei Verbo. Vnde etiam discimus fidem non esse uagam & temerariam confidentiam hominis, qui credat rem quamlibet grandem & impossibilem. Fides enim regitur & astringitur uerbo Dei, & uerbo quidem Dei ritè atque legitime intellecto. Pius ergo & fidelis non quidlibet colligit ex omnipotentia Dei, quasi quidlibet faciat Deus quia potest omnia, aut fides quidlibet credat, quia scriptum est, Omnia possibilia sunt credenti

Fides non credit rem quamlibet.

dent. Nam plus ideo credit, quia quod credit, ita uerbo Dei propositum & illustratum est sicuti credit. Præterea cum Dominus in Euangelio dicit, Omnia possibilia sunt credenti, non absolute quidem id nobis intelligendum est, sed coniunctum cum uerbo & cum uoluntate gloriae Dei & cum animarum nostrarum salute. Omnia enim quæ uerbo suo promissit, & omnia quæ uult Deus, omnia denique quæ faciunt ad Dei gloriam animarumque nostrarum salutem, possibilia sunt credenti. Et ea de causa aperte & disertè dixit Apostolus, Quæ promissit Deus eadem & potest præstare. Quæ enim non promissit, & quæ non sunt uoluntatis diuinæ, aut quæ pugnant cum uoluntate & cum expresso uerbo Dei, non potest Deus, non quod non possit omnia, sed quod nolit omnia. Posset Deus ex lapidibus panem facere, sed ideo non credendum est lapides esse panem, neque ideo panis sunt, quia Deus potest omnia. Id quod rectius & plenius intelligemus, ubi paulò post ostenderimus fidem ueram non oberrare & uagam fluctuare, sed Deo & uerbo eius inharere & inniti pertinacissimè.

Interea uerò quia ex Pauli testimonio & exemplo Abrahamæ ostendimus fidem esse substantiam & indubitatum cordis persuasionem, & multi contendunt hominem non esse certum suæ salutis, aliquot exempla ex Euangelio subiiciam, ex quibus certò deprehendatur fidem firmissimam esse hypostasim, obfirmatamque de Deo & salute nostra sententiam. Et principiò quidem Centurio ille Euangelicus firmissimam conceperat spem, fore ut seruulus eius curaretur à Domino. Intellexerat enim quàm ampla & magnifica polliceretur credentibus. Colligebat item ex operibus Christi, non difficile ipsi fore sanitati restituere seruulū. Accedit itaque Dominum, ac inter alia, Non est, inquit, quod tectum meum subeas, imò tantum dic uerbum & sanabitur famulus meus. Testificantur hæc uerba certam in Centurionis animo & corde persuasionem fuisse certissimæ salutis, quam & collatione quadam sic illustrat & plenius exprimit, Sum enim homo alterius potestati subditus, & habeo sub me milites, & dico huic uade, & uadit: & alteri ueni, & uenit: & seruo meo fac hoc, & facit. Hanc animi certificationem cum ex uerbis fide plenissimis peruidisset Dominus, clamat se tantam fidem non reperisse in uniuerso Israele. Idem celebrat in Euangelio fidem mulieris profluuio sanguinis miserè laborantis. At eam fidem fuisse indubitatum cordis illuminati persuasionem ex eo intelligi potest, quod apud se (prius nimirum excitata operibus & uerbis Domini) sic reputat, Si tantum tetigero uestimentum eius, salua ero. Ideoque & per confertam turbam se usque ad ipsum Dominum penetrando ingressit. Sed quid multa congero exempla? An non una Chananæ seu Syrophœniæ mulieris fides declarat irrefragabiliter, fidem esse certissimam rerum creditarum persuasionem? Nam præterita & quasi contempta à Domino non fluctuat fide, sed insequens Dominum, & iam etiam audiens Dominum perditis Israeliticæ domus ouibus missum esse, adorare quoque pergit. Imò repulsa & quasi notata atroci cōuitio canis, pergit rursus se supplicem Domino prosternere, & ab eo quod postulabat impetrare. Non perseverasset adeò pertinaciter, si fides in animo & corde credentis non esset certificatio quædam. Vnde & Dominus ea fide permotus, clamat, O mulier, magna est fides tua, fiat tibi sicut uis. Constat ergo ex his diuinæ scripturæ testimonijs omnibus, fidem esse certam & indubitatum persuasionem in animo & corde credentis.

His absolutis, uideamus iam cui innitatur fides hominis, unde simul elucescat fidem non esse uanam & uagam opinionem (sicuti paulò superius dicere coeperamus) rei cuiuslibet conceptæ in animo hominis, sed metis adeoque legibus quibusdam astrictam atque contentam. Diximus ergo in descriptione fidei, fidem ten-

*Exempla fidei
indubitata.*

*Fides cui innitatur, & quod sit
fidei obiectum
seu fundamentum.*

dere in Deum & inniti uerbo eius. Deus ergo & uerbum Dei obiectum siue fundamentum est fidei ueræ. Firmum omnino & immotum sit oportet, cui homo tutò, certò & indubitato inniti debet, quod salutem præstat, quod seruat, quod omnem plenitudinem sufficit aut suppeditat. Hæc enim quarit & poscit fides. Illa uerò non sunt extra Deum. In solum ergo Deum tendit & innititur uera fides. Deus æternus est, summè bonus, sapiens, iustus, potens & uerax. Idèq; operibus & uerbo suo testat. Ideò in prophetis dicitur fortis & immota petra, arx, murus, turris, munimentum insuperabile, thesaurus, fons inexhaustus. Hic Deus æternus potest omnia, nouit omnia, ubiq; præsens est, impensè diligit homines, prouidet hominibus qui etiam omnia gubernat. Fides ergo cum sit fiducia de bona Dei uoluntate & auxilio eius in omnibus necessitatibus, deq; uera hominis salute, in solum Deum tendit, nec potest inniti ulli creaturæ, in qua non sunt illa quæ quarit fides. Et ut Deus uerax est & mentiri non potest, ita uerbum eius uerax est & neminem fallit. Verbo exprimitur uoluntas & ingenium Dei. Ad uerbū ergo Dei respicit fides, ac fundat se in uerbum Dei, de quo Dominus in Euangelio pronunciauit, Cælum & terra transibunt, uerbum meum non præteribit. Confertur uerbum Dei cum præstantissimis elementis. Aër & aqua sunt elementa fluida instabiliaq;. Cælum autem licet uoluatur seu moueatur, mira tamen & certissima lege mouetur, firmatq; sunt in eo omnia. Terra multò firmissima est & immobilis. Proinde si facilius est ista insolubilia solui, quàm uerbum Dei, consequens est uerbū Dei per omnia esse longè firmissimum, immobile & insolubile. Si irritum facere potestis fœdus meum, ait apud Ieremiam Dominus, quod inij cum die, aut fœdus quod pepigi cum nocte, ut non sit suo tempore uel dies uel nox, iam irritū potest esse fœdus meum quod pepigi cum Dauide. Cæterum ne totus quidem mundus iunctis simul uiribus omnibus poterit efficere, ut dies sit cum nox est, aut ut una hora citius quàm leges cœli dictant, luceat: ergo ne apicem quidem infirmare aut infringere, mutare aut abolere in uerbo Dei ueritateq; uerbi Dei poterit totus hic orbis cū omni sua uirtute & pompa. Proinde fides quæ innititur in rem multò firmissimā, non poterit non esse persuasio indubitata. Cumq; uerbum Dei sit fidei fundamentum, non potest fides oberrare uaga, & inniti in uerbum quodlibet. Nequit enim quælibet opinio extra uerbum Dei, aut etiam cōtra uerbū Dei concepta, appellari uera fides. Ideoq; sanctus Christi Apostolus Paulus noluit fidem uerā uel Christianam ullis imponere fulcris carnalibus aut opinionibus hominum, sed ueritati & potentiæ Dei. Verba eius concludent hunc locum, Fides, inquit, ex auditu est, auditus autem per uerbum Dei. Per uerbum Dei ait, non per uerbum hominis. Et iterum ad Corinth. Prædicatio mea, inquit, non erat in persuasorijs humanæ sapientiæ uerbis, sed in ostentatione spiritus & potentiæ, ut fides uestra non sit in sapientia hominum, sed in potentia Dei. Vbi etiam discimus quosdam præter rationem à nobis flagitare fidem, hoc est, ut credamus id quod ex uerbo Dei ostendere nequeunt, aut quod uerbo Dei repugnat. Facit ad illustrationem prædictorum & illud quod in descriptione fidei compendium quoddam uerbi Dei & fidei contextum est: uerbi inquam quod proponit quid credamus, & fidei quæ credit credenda. Recensentur autem duo capita fidei & uerbi. Primum est, quod à Deo in Christo uita & omne bonum gratis promittitur. Deus enim qui fidei obiectum seu scopus & fundamentum est, cum sit natura sua uiuus, æternus & bonus, ab æterno generat ex se sui similem per omnia filium. Is cum sit eiusdem cum patre substantiæ, est & ipse naturaliter uita & omne bonum. Ac ut nobis filijs fratribusq; suis uitam & omne bonum communicaret, hominē assumpsit, & cum hominibus

uerus

Duo sunt capita
fidei ueræ.

uerus Deus & homo cōuersatus, testificatur Deum patrem se per filium totū cum omnibus bonis trāsfundere in credentes, hos uiuificare, omni bono adimplere, & eosdem ad se transferre tandem in uitam illam beatam. Et hoc quidem beneficiū constare gratis, ut laudetur in omnibus glōria gratiæ suæ. Id quod credit fides uera. Et huc quidem pertinet bona scripturarum pars, testificans Deum in Christo communicare credentibus uitam & omne bonum. Ioannes Apostolus clamans testificatur, In principio erat uerbū, & uerbum erat apud Deum, & Deus erat uerbum, Et uerbum caro factum est, & habitauit in nobis. Et cōspeximus gloriā eius, gloriā uelut unigeniti à patre, plenus gratia & ueritate. Et de plenitudine eius nos omnes accepimus, &c. Ipse enim Dominus in Euangelio Ioan. dicit, Amen dico uobis, Quæcūq; pater fecerit, hæc itidem & filius facit. Sicut enim pater suscitatur mortuos & uiuificat, sic & filius quos uult uiuificat. Neque enim pater iudicat quenquam, sed omne iudicium filio dedit, ut omnes honorent filium sicut honorant patrem. Qui non honorat filium, non honorat patrem qui misit illum. Amen amen dico uobis, qui sermonem meum audit & credit ei qui misit me, habet uitā æternam; & in iudicium non ueniet, sed transiit à morte in uitam. Cum his Euangelicis uerbis congruit hæc Paulina sententia, In Christo sunt omnes thesauri sapientiæ & scientiæ reconditi. Quoniā in illo inhabitat omnis plenitudo Deitatis corporaliter, & estis in illo completi. Quod autem ingentia hæc beneficia Dei gratis conferantur fidelibus, uas electionis his exposuit uerbis. Benedictus Deus qui elegit nos in Christo antequam iacerentur fundamenta mundi, qui prædestinauit nos ut adoptaret in filios per Iesum Christum in sese, iuxta beneplacitum uoluntatis suæ, ut laudetur gloriā gratiæ suæ, qua charos nos reddidit per dilectū, per quē habemus redemptionem in sanguine eius, &c. Item, Omnes peccauerunt & destituuntur gloriā Dei, iustificantur autem gratis per illius gratiam, per redemptionē quæ est in Christo. Et reliqua. Vera itaque fides credit sibi à Deo per Christum uitam & omne bonum gratis contingere: quod primum est fidei caput, quod in articulis fidei spargitur latius. Secundum uerbi Dei & fidei caput est, quod uerbo Dei omnis ueritas credenda exponitur: & quod uniuersæ narrationi in scriptura uera fides credit. Exponit enim quod sit Deus, qualis sit, quæ opera Dei, quæ iudicia, quæ uoluntas, quæ mandata, quæ promissiones, quæ minæ, denique quicquid creditu utile & necessarium est, id totum exponit nobis uerbum Dei, id quod uera fides recipit, credens omnibus quæ scripta sunt in lege & prophetis, in Euangelio & Apostolorum literis. Quæ uerò ex his deduci aut probari non possunt, aut quæ his contraria sunt, non credit fidelis. Est enim de natura ueræ fidei, non credere illis quæ cum uerbo Dei pugnant. Proinde qui non credit fabulis & hominum opinionibus, is demum uerè credit: pendet enim à solo Dei uerbo adeoq; ab ipso Deo unico omnis ueritatis fonte. Et materia, argumentum & summa fidei tota proposita est nobis per compendium in articulis fidei Christianæ. De quibus alio tempore. Exposui hac hora charitati uestræ, fratres in Domino honorandi, descriptionem fidei, quam ut omnium mentibus infigam, omnesq; quid fides sit intelligant, repeto, eaq; sermonem hunc concludo. Fides est donum Dei, homini cœlitus infusum, quo edoctus indubitata persuasione in Deum & uerbum eius innititur, per quod à Deo in Christo uita omneq; bonum gratis promittitur, omnisq; ueritas credenda exponitur. Oremus omnes Deum patrem nostrum per unigenitum filium eius Dominum nostrum Iesum Christum, ut omnibus nobis cœlitus ueram fidem conferat, per quam ipsum rectè cognoscentes, tandem etiam consequamur uitam æternam.

*Fides uera quæ
rit in deo per
Christū omne
bonum.*

*Fides uera crea-
dit scripturis
sanctis.*

Epilogus.

TEMPORIS exclusus breuitate, præpeditusq; argumenti præstantia, non potui sermone proximo omnia quæ de fide institueram dicere, absoluerem; iam ergo diuina aspirante gratia, subiiciam quæ eius argumenti restare uidentur. Vos orate Dominum, ut quod uoce hominis infertur auribus uestris, id ipsum digito Dei uestris inscribatur cordibus.

Vna est fides.

Nescit fides uera ullas partes. Apostolus enim, Vnus, inquit, Dominus, una fides, unum baptisma, unus Deus & pater omnium. Manet enim ab ipso mundi exordio ad finem usq; una & eadem in omnibus electis Dei fides. Vnus & idem est perpetuo Deus, unus omnium bonorum fons inexhaustus. Vna & eadem est ab exordio rerum Dei ueritas, Dei uerbo exposita hominibus. Vnum ergo & idem perpetuo manet obiectum & fundamentum fidei, Deus & uerbum Dei. Vna & eadem nobiscum fide crediderunt omnes ab exordio rerum electi, per Christum nobis omnia bona gratis donari, & in uerbo Domini omnem ueritatem credendam exponi: proinde fideles antiquorum seculorum fidem suam in Deum & uerbum eius semper collocarunt: ut iam proculdubio non sit nisi una fides uera.

Varie sunt religiones, sed non nisi una uera fides.

Scio plures easq; uarias in orbe iactari fides, id est, religiones. Est enim fides Indiana, est fides Iudaica, est fides Mahometica, est fides Georgiana, interim tamen non est nisi una uera fides Christiana, cuius compendium continetur in articulis fidei, & plenitudo eius in sacris utriusque testamenti literis. Scio item uarias esse fides hominum, innitentium in res uarias credentiumq; contraria ueræ fidei, sed manet interim non nisi una uera fides in Deum & uerbum eius, indubitata rerum uerissimarum certissimarumq; persuasio fiduciaq;.

Fides habet suum incrementum & defectum.

Ea fiducia suscipit incrementum in animis fidelium, decrescit item & deficit prorsus. Ideoq; Apostoli Dominum orabant, Aduerge nobis fidem Domine. Et Apostolus ubique imprecatur fidelibus in scriptis suis spiritus & fidei incrementum. Nam & Dauid prior orauit, Cor mundum crea in me Deus, & spiritum sanctum tuum ne auferas à me. Nam uiderat à Saule, cui ipse successerat in regno, recessisse spiritum Dei bonum, ac subiisse animum eius spiritum nequam, qui ipsum miserè diuexabat. Huc pertinet illud Euangelicum, Omni habenti dabitur: non habenti autem auferitur quod non habet aut pro nihilo reputat, & dabitur habenti. Neq; frustra dixit ad Petrum Dominus, Oraui pro te Petre ne deficiat fides tua. Paulus enim commemorat quosdam suo seculo circa fidem fecisse naufragium, aliorumq; fidem subuertere. Et quorsum quæso audimus quotidie uerbum Dei ac precamur supplices Domino, nisi quod incrementum pietatis speramus, & poscimus ne à uera fide excidamus? Certè Paulus ad Thessalonicenses, Nocte & die oramus, inquit, sedulo ut uideamus faciem uestram, & suppleamus quæ desunt fidei uestre. Nam & paulò superius dixerat, Misi ad hoc Timotheum, ut cognoscerem fidem uestram, ne quo pacto tentasset ille qui tentat, & inanis factus esset labor noster. Siquidem ad Ephesios idem ille Apostolus dicit, Christus dedit alios Apostolos, alios uerò prophetas, alios autem pastores & doctores, ad instaurationem sanctorum in ædificationem corporis Christi, donec perueniamus omnes in unitatem fidei & agnitionis filij Dei, in uirum perfectum, in mensuram ætatis plenæ adultæ Christi, ut non simus amplius pueri. Proinde quoad uiuimus discimus, ut perficiatur fides nostra, & sicubi tentationibus debilitata fuerit, reficiatur ac confirmetur rursus. Atq; in hac uarietate, in hoc incremento & imbecillitate fidei non est ulla partitio aut diuisio, manet eadem semper fidei radix, eadem substantia, licet iam

iam maior sit, nunc uerò minor. Eodem modo fidem nec mutat nec scindit in partes, quòd alia dicitur fides generalis, alia fides specialis. Generalis enim fides non alia est, quàm quæ credit omnia uerba Dei uera esse & Deum bene uelle hominibus. Non aliud credit Specialis fides, tantum quod omnibus còmune est, sibi specialiter applicat fidelis, credens Deum non tantum alijs, sed sibi quoq; bene uelle. Sed & totum quasi in partes, genus in species deducit. Nam quia generali fide credit omnia uerba Dei uera esse, pari ratione credit speciali fide immortales esse animas, & resurgere nostra corpora, saluandos fore fideles, perdendos infideles, & siquid huius generis aliud est quod uerbo Dei credendum traditur.

Porro disputationem de fide Infusa & Acquisita, de fide informi & formata, illis excutiendam relinquo, qui ex seipsis nouas illas disputationes inuehunt in ecclesiam. Vera fides nullis acquiritur uiribus & meritis humanis, sed infunditur à Deo, sicut exposui superiori concione; & cum auscultatione uerbi diuini ab homine acquiritur, nihilo minus totum gratiæ Dei imputatur, quæ nisi operetur in animo auditoris interne, nihil proficit externus cultor aut prædicator. Legimus in libro S. Augustini de Prædestinatione sanctorum cap. 3. quòd aliquando fuit in errore, putans fidem qua in Deum credimus non esse donum Dei, sed à nobis esse in nobis, & per illam nos impetrare Dei dona, quibus iuste & pie uiuamus in hoc seculo. Sed eam opinionem eo libro copiose & grauitè refellit. Ita fides uera quæ in unum Deum tendit, & dirigitur uerbo Dei, satis est formalis aut formata. Certè forma fidei sculpsit in corde credentis per spiritum sanctum. Et quamuis sit minuta neq; excreuerit ad gradum supremum, uera tamē fides est, uim suam habens ceu granum sinapi. Credidit in Dominum Iesum latro cum Domino crucifixus, & saluatus est, licet fides in eo uiguerit pauculo tempore, neq; uberem protulerit bonorum operum segetem: denique fides illa latronis non fuit diuersa aut aliena à fide S. Petri & S. Pauli, sed eadem prorsus, licet horum uberem bonorum operum segetem protulerit. Gratis iustificati sunt Petrus & Paulus, licet multa haberint bona opera: gratis iustificatur latro, licet pauca aut nulla habuerit opera bona. Teneamus itaq; fidem ueram esse unicam quidem, quæ tamen augmenta seu incrementum recipiat, deniq; deficere possit & extingui.

Restat iam ut explicemus uirtutem & effectus fidei ueræ. Præstitit hoc ante me multò feliciter imò absolutissimè S. Apostolus Paulus. Verum cum multa ad Hebræos II. capite attulisset, cogitur tamen fateri se non posse commemorare omnia: idcirco recensebo aliquot modò fidei uirtutes, reliquas charitati uestræ indagandas & expendendas relinquens.

Fides uera ante omnia confert ueram scientiam, uerè sapientes reddens. Fides enim Deum cognoscimus, rectèq; de iudicijs & operibus Dei, de uirtutibus & uitijs iudicamus. Quam illa confert, uera proculdubio est sapientia. Sperant multi se ueram consequuturos sapientiam ex studijs philosophiæ: sed errant toto cœlo. Nam philosophia perperam iudicat, & uitiosè pleraq; docet de Deo, de operibus Dei, de summo bono, de fine bonorū & malorum, de expetendis & fugiendis. Eadem autem uerè & rectè traduntur in uerbo Dei, intelliguntur uerò percipiunturq; fide. Fides ergo est uera sapientia, & reddit uerè sapientes. Nam Ieremias quoq; Ecce uerbum Domini, inquit, reprobarunt, quæ ergo illis sapientia reliqua esse poterit? Celebris est in toto terrarum orbe Solomonis sapientia. Sed legimus in Euangelio secundum Matthæum, Dominum cōtra Iudæos hanc protulisse sententiam, Regina Austri surget in iudicio cum generatione hac, & condemnabit eam, quòd uenerit à finibus terræ ad audiendam sapientiam Solomonis: & ecce

plus quam Solomon est in loco hoc. Præfertur Christus Solomoni, & sapientia Christi sapientiæ Solomonis. Constat autem sapientiam Christi filij Dei non posse percipi nisi fide. Præstantissimam ergo sapientiam confert fides. Eximiam uero laudem hæc nostra sapientia meretur, quod qui eam ambiunt, non ad exterarum gentes multo cum sumptu & labore relegantur, uelut ad Ægyptios sacerdotes, ad gymnosophistas Indorum, ad philosophos Græcorum, aut ad Iudæorum Rabbinos. Verbum Dei, Deus per totum orbem terrarum dispergit, ut iam uerbum fidei sit in fidelium omnium cordibus. Nam Apostolus Paulus, Iustitia fidei, ait, ita loquitur, Ne dixeris in corde tuo, Quis ascendet in cælum? hoc est, Christum ex alto deducere: aut quis descendet in abyssum? hoc est, Christum ex mortuis reducere. Sed quid dicit? Prope te uerbum est in corde tuo: hoc est uerbum fidei quod prædicamus, nempe si confessus fueris ore tuo Dominum Iesum, & credideris in corde tuo, quod Deus illum excitauit ex mortuis, saluus eris. Ergo fides nos non tantum sapientes, sed & felices reddit, attestante etiam Domino & dicente discipulis suis, Beati oculi qui uident quæ uos uidetis. Dico enim uobis, quod multi prophetae & reges uoluerunt uidere quæ uos uidetis & non uiderunt, & audire quæ auditis & non audierunt.

Quomodo homo summum bonum assequatur.

Inueniemus ergo in fide certissimam determinationem famosissimæ quæstionis ab exordio mundi exagitatae à doctis & præstantissimis ingenijs, quomodo uidelicet homo uiuere, beari, summum bonum assequi, & cum summo bono coniungi adeoque & iustificari possit? Variæ fuerunt & sunt etiam hodie pugnantes inter se de hac re sententiæ. Cæterum breuiter & uerè dicimus nos, Fide uera hominem uiuere, beari, summum bonum consequi, cum summo bono coniungi atque iustificari, sic ut Deus uiuat in nobis & nos in ipso, simusque fide felices & beati. Quid uero potuisset de fidei uirtute dici præstantius, maius, diuinius? Fides ecce uiuificat, beat, cum summo bono coniungit, ut Deus in nobis, nos in ipso uiuamus, & iustificat plenissimè. Sed præstat iam audire scripturarum testimonia. Fides beat. Audiat enim beatus Petrus uera fide Dominum Iesum confitens, Beatus es Simon filius Ionæ. Caro & sanguis non reuelauit tibi, sed pater meus qui in cælis est. Adducit S. Paulus pro fide illud Dauidis, Beati quorum remissæ sunt iniquitates, & quorum obiecta sunt peccata. Beatus uir cui non imputabit Dominus peccatum.

Fides beat.

Fides uiuificat.

Fides coniungit nos Deo.

Fides uiuificat. Nam iustus ex fide uiuit. Id quod Paulus ex prophetis frequentissimè in scriptis suis citauit. Idem, Vitam quam nunc uiuo in carne, inquit, per fidem uiuo filij Dei, qui dilexit me, & tradidit semetipsum pro me. Fides coniungit nos æterno & summo bono, adeoque facit nos frui summo bono, ut Deus in nobis uiuat, & nos in Deo. Nam ipse Dominus Iesus in Euangelio ait, Qui edidit meam carnem, & bibit meum sanguinem, in me manet & ego in eo. Sicut misit me uiuens pater, ita & ego uiuo propter patrem: & qui edidit me, uiuet & ipse propter me. At qui edere & bibere Dominum, est credere in Dominum, quod seipsum pro nobis tradiderit in mortem. Vnde Ioannes Apostolus, Nos uidimus & testamur, inquit, quod pater misit filium seruatorem mundi. Quisquis confessus fuerit quod Iesus est filius Dei, Deus in ipso manet, & ipse in Deo. Vnde & Paulus dixit, Viuo iam non ego, sed uiuit in me Christus.

Fides iustificat.

Iustificat præterea fides. Ea tractatio cum non possit hac hora commodè & plenè determinari, differemus in futuram concionem sacram. In præsentem teneat charitas uestra, unam esse ueram fidem, nimirum Christianam. Licet enim plures dicantur esse fides, id est, religiones, una tamen duntaxat uera est & indubitata. Incrementa ea habet, ac deficit in quibusdam. In quibus rectè & piè colitur, miras exerit

exerit uirtutes. Confert enim ueram sapientiā, denique uiuificat & efficit uerè beatos ac felices. Deo patri authori omnis boni & felicitatis nostræ, sit laus & gloria per Iesum Christum Dominum nostrum, in secula seculorum, Amen.

Fide iustificari homines fideles absq; lege operibusq;.

S E R M O V I.

DI C T V R V S apud charitatē uestram de fide absq; operibus iustificante credentes, inuoco patrem qui in cœlis est per filium eius unigenitū dominum nostrum Iesum Christum, obsecrans, ut os meum & labia mea ad depromendam laudem eius aperiat, & corda uestra illuminet, quò Dei beneficium maximum agnoscentes, uerè grati & sancti efficiamini.

Ab initio autem dicam quædam huic causæ uel tractationi in primis necessaria de uocabulo iustificationis. Iustificandi uerbum Hebræis usitatissimū & uulgatissimum, amplissimæ item significationis, hodie non est, ita uti decebat, cognitum omnibus. Significat iustificare, absolvere à iudicio adeoq; ab intentata & lata condemnationis sententia. Significat remittere peccata, purgare, beatificare, & hæredem constituere uitæ æternæ. Est enim iuridicum aut forense uocabulum. Finge ergo hominem produci ad tribunal Dei, ibidemq; agi reum, id est, accusari & conuinci de grauissimis peccatis, ideoq; postulari ad pœnam uel ad condemnationis sententiam. Intercedere uerò mediumq; se ingerere Dei filium, ac postulare, ut in ipsum omnis culpa & pœna hominibus debita imponatur, quæ moriendo mox expiet & auferat, liberatisq; à morte conferat uitam æternam, Deum autem supremum & iustissimum iudicem recipere conditionem, ac pœnam cum culpa transferre in caput filij, decernereq; ut quicumq; credit filium dei pro peccatis mundi passum, confregisse mortis uires & liberasse à condemnatione, purgatus à peccatis ac hæres sit uitæ æternæ. Hic uerò quis usque adeò stupidi possit esse ingenij, ut non uideat fide iustificari homines?

Ceterū ne quid dubij aut obscuri resideat in animo cuiusquam, quod in genere & per parabolam imaginemq; forensem proposui, per species aut partes quasdam diducam, singulaq; scripturis diuinis & roborabo & illustrabo, ut uel tardis ingenijs uirtus fidei & iustificationis negotium fiat planissimum.

Principiò demonstrabo iustificationis uocabulum in præsentī causa usurpari pro absolute siue remissione peccatorum, pro beatificatione & adoptione in numerum filiorum Dei. Act. 13. dicit Apostolus Paulus: Notum sit uobis, uiri fratres, quòd per hunc Christum Dominum uobis remissio peccatorum annuntiatur: & ab omnibus à quibus non potuistis per legem Moysi iustificari, per hunc omnis qui credit iustificatur. En annuntiatur in Christo nobis remissio peccatorū: & qui credit annunciato Christo remittenti peccata, iustificatur. Sequitur ergo iustificationem esse remissionem peccatorum. Ad Rom. 5. ait idem Apostolus, Iustificati sanguine Christi seruabimur per ipsum ab ira. Sanguis autem Christi abluat peccata. Iustificatio itaq; est ablutio siue remissio peccatorum. Et in eodem capite adhuc clarius, Iudicium quidem ex uno ad condemnationem, donum autem ex multis delictis ad iustificationem. Hic opposuit condemnationi iustificationem: ergo iustificatio est absolutio & liberatio à condemnatione. Quid quod iustificationem manifestè appellat donum, id est, condonationem delictorum? Huc pertinent & illa, Sicut per unius delictum in omnes homines condemnatio deriuata est, sic per unius iustitiam in omnes homines propagata est iustificatio uitæ. Rursum opponitur iustificatio uitæ condemnationi propter peccatum irrogatæ nobis

ad mortem: est ergo iustificatio uitæ absolutio à peccatis, liberatio à morte, uiuificatio, seu trāslatio à morte in uitam. Nam in 4. cap. idem Apostolus ad Rom. iustificationem exponit per beatificationem, & hanc per remissionem peccatorum. Disputans enim de fide qua iustificamur, uel quam nobis imputat Deus pro iustitia, absq; operibus, quemadmodū & Dauid explicat, inquit, beatificationem hominis, cui Deus imputat iustitiam absq; operibus, Beati quorum remissæ sunt iniquitates, & quorum obiecta sunt peccata, &c. Quid clarius adferri his poterat? Manifestè enim iustificationem exponit per beatificationem, & hanc per remissionem peccatorum. Præterea quid est beatificatio aliud, quàm adoptio ea, qua recipimur in gratiam & in numerū filiorum Dei? Quis ergo non uideat iustificationē in hac disputatione Pauli pro adoptione usurpari? præsertim cum contendat in eodem ad Romanos cap. 4. hæreditatem fidei deberi, cui & iustificationem tribuit. Ex quibus omnibus planum fit quæstionem de iustificatione aliud non continere quàm modum & rationem beatificandi, nempe per quid aut quomodo remittantur hominibus peccata, recipiantur autem in gratiam & in numerum filiorum Dei, fiantq; iusti & hæredes regni Dei.

*Christus in se
suscepit peccata
nostra & expiavit.*

Deinde uideamus an scripturis traditum sit quod diximus, Christum coram tribunali Dei, cum contra nos damnationis sententia pronuncianda fuerat, propter peccata nostra, in se suscepisse peccata nostra, & expiasse morte crucis, adeoque Deum in Christum trās tulisse & pœnam & culpam, ut unus Christus sit fidelium satisfactio & expiatio solus? Hoc significantissimè docēs Paulus Apostolus, Quis inquit, intentabit crimina aduersus electos Dei? Deus est qui iustificat, quis ille qui condemnet? Christus est qui mortuus est, imò qui & suscitatus est, qui etiam est ad dextram patris, & intercedit pro nobis. Et iterum, Christus nos redemit, ait, ab execratione legis dum pro nobis factus est execratio. Scriptū est enim, Execrabilis omnis qui pendet in ligno, ut in gentes benedictio Abrahamæ ueniret per Christum Iesum, &c. Hæc ex Mose docuit Apostolus. Ac Moses creberrimè in libris suis repetit, peccata imponi in capita animantium quæ sacrificabantur. At sacrificia illa typum prætulere mortis & hostiæ Christi. Significantissimè autē Isaias in cap. 53. Verè languores nostros ipse tulit, ait, & dolores nostros ipse portauit. Ipse uulneratus est propter iniquitates nostras, attritus est propter scelera nostra, Multa enim correctionis nostræ ei imposita est, & liuore eius sanati sumus. Omnes nos quasi oues errauimus; unusquisq; in uiam suam declinauit, & posuit dominus in eo iniquitatem omnium nostrum. Et mox, Ipse peccata multorum tulit, & pro transgressoribus rogauit. His uerbis nō opinor quicquam posse significantius & magis appositū nostro instituto adferri. Allusit ad ea S. Petrus cum dixit, Ipse Dominus peccata nostra pertulit in corpore suo super lignum, quò peccatis mortui iustitiæ uiueremus, cuius eiusdem uibice sanati estis. Allusit ad ea beatissimus præcursor Domini Ioannes cum dixit, Ecce agnus Dei qui tollit peccatum mundi. Sed & Apostolus Paulus clamans testificatur, Eum qui non nouit peccatum pro nobis peccatū fecit, ut nos efficeremur iustitia Dei per illum. Et in epist. ad Coloss. In Christo, ait, complacitum est patri uniuersam plenitudinem inhabitare, & per eum reconciliare cuncta erga se, pacificatis per sanguinem crucis eius per eundem, siue quæ in terra sunt, siue quæ in cœlis. Hæc opinor satis clara sunt testimonia, probantia in Christum imposita esse peccata nostra execrationemq; uel condemnationem peccatis nostris debitam, ac Christum sanguine expiasse peccata, & morte sua mortem & authorem mortis diabolum oppressisse, & pœnam nobis debitam sustulisse.

Quia

Quia tamen non pauci negant Christum morte sua & poenam & culpam nobis peccatoribus sustulisse, factumque esse unicam totius orbis satisfactionem, ad quam iam & alia quaedam testimonia, repetamque ex praecitatis quaedam, quibus manifestum fiat, Christum unicam orbis satisfactionem pro poena & culpa satisfecisse. Isaïas certe & culpam peccati & poenam simul sublatam esse testificatus est, cum dixit, Ipse languores nostros tulit, & uulneratus est propter iniquitates nostras: denique disciplina pacis, id est, disciplina uel castigatio poenae uel pacem faciens, aut multa correctionis nostrae, id est, poena quae nobis debebatur propter peccata, ei imposita est. Audi uero quid sequatur, Et liuore eius sanati sumus. Id quod manifeste docet poena Christi sublatam nobis esse poenam. Quae enim nobis debatur poena, multa uel correptio, aut disciplina, ipsi est imposita Domino: ideoque uulneratus est dominus, & liuores accepit. At his medicatus est nobis. Medicatus autem esset nobis minime, si uulnera & liuores atque plagas, id est, poenam pro peccatis adhuc expectaremus. Proinde Christi mors est plenaria satisfactio pro peccatis nostris. Et quid obsecro praestitisset nobis Christus, si adhuc pro peccatis nostris exigeretur a nobis poena? Itaque cum dicimus eum pertulisse omnia peccata nostra in corpore suo super lignum, quid quaeso aliud significamus, quam sustulisse dominum nobis indebita morte uindictam, ne ea in nos animaduertat? Ac quoties de redemptione per Christum facta meminit Paulus, uocare solet ἀντὶ λύτρωσιν, quo non simpliciter, uti uulgo putatur, redemptio intelligitur, sed precium ipsum & satisfactio redemptionis. Qua ratione etiam scribit Christum ipsum se pro nobis ἀντὶ πάντων dedisse. Id significat precium quo redimuntur captiui ab hostibus in bello. Siquidem quae uulgo uocant ransonas, Graeci λύτρα uocant: ἀντὶ λύτρου uero est cum caput capite, uita redimitur uita. Ceterum ita redemptis & liberatis nulla porro irrogatur poena, cum translata sit ex uno capite in aliud. Praeterea hoc est testamentum nouum quod Deus in Christo suo nobiscum pepigit, quod iniquitatum nostrarum non recordabitur. At quomodo non recordaretur iniquitatum nostrarum, si illas postulare pergeret ad poenam? Itaque relinquitur iam indubitatum, Christum dominum plenariam esse propitiationem, satisfactionem hostiamque ac uictimam pro peccatis, pro poena inquam & pro culpa totius mundi, & quidem solum, Non est enim in alio quoquam salus. Nec enim aliud nomen est datum inter homines in quo oporteat nos saluos fieri.

Non nego disciplinam, castigationis & exercitij gratia imponi hominibus uaria poenarum genera, affligique & exerceri homines propter peccata uarie. Ceterum illae afflictiones utcumque perferantur a fidelibus patienter, non tamen peccata abluunt, neque pro peccatis satisfaciunt. S. Petrus, Ne miremini, inquit, dum per ignem exploramini, quae res ad experimentum uestri fit, perinde quasi nouum uobis aliquid obtingat: imò in hoc quod consortes estis afflictionum Christi, gaudete, ut in reuelatione quoque gloriae eiusdem gaudeatis exultantes. Is inquam finis & usus afflictionum est. Manet interim Christo sua gloria illibata.

Restat iam ut diuinis scripturis demonstrem Deum patrem constituisse, ut qui credit in unigenitum Dei filium, particeps fiat iustitiae Christi, id est, iustificetur per Christum, absoluator a peccatis, fiatque haeres uitae aeternae. Isaïas itaque, Cognitione sui, uel in scientia sua iustificabit ipse iustus seruus meus multos, quorum iniquitates ipse portabit. At quae est cognitio aut scientia Christi domini, nisi uera fides? Iam uero ipse dominus Iesus in Euangelio secundum Ioannem dicit, Et sicut Moses exaltauit serpentem in deserto, ita exaltari oportet filium hominis, ut omnis qui credit in eum non pereat, sed habeat uitam aeternam. Non fuit remedium in de-

poenam & culpam peccati sublatam esse per Christum.

Christi mors plenaria satisfactio pro peccatis.

Quomodo imponatur nobis poena.

Deus constituit ut qui credit habeat uitam aeternam, et sit iustus.

serto aliud contra uenenatum serpentium morsum, nisi contemplatio erecti suspensiq; serpentis. Non medicabatur ueneno infectis emplastrum, non oblatio facta Deo, non oratio ipsa Deo oblata, non opus ullum, nō ratio ulla: sola cōtemplatio uirus per membra diffusum reddebat innoxium. Ita nulla omnino res seruat à morte, nisi unica fides in Christum. Fide enim aspicimus & uidemus erectū Christum in stipite crucis, sicuti claret ex 6. cap. Ioannis. Sequitur ergo in uerbis saluatoris, Sic Deus dilexit mundum, ut filium suum unigenitum daret, ut omnis qui credit in eum nō pereat, sed habeat uitam æternam. Non enim misit Deus filium suum in mundum, ut condemnet mundum, sed ut seruetur mundus per eum. Qui credit in eum non condemnatur, qui uerò non credit condemnatus est: quia non credit in nomē unigeniti filij Dei. His uerbis tertio inculcatur fides per quam redimur participes filij Dei, uitæ eius, salutis, redemptionis ac bonorum omnium. In 6. cap. euangelij Ioannis idem Dominus dicit, Hæc est uoluntas eius qui misit me patris, ut omnis qui uidet filium & credit in eum, habeat uitā æternam, & ego suscitabo eum in nouissimo die. Quibus uerbis instituto nostro nihil poterat afferri efficacius. Nam disertè dicitur, uoluntatē esse Dei patris ut credamus in filium, & per hanc fidem saluemur. Vnde & Ioannes ille Euāgelista & Apostolus in Canonica sua ausus fuit in hæc prorumpere uerba, Qui non credit Deo, mendacem facit eum: quia nō credidit in testimonium quod testificatus est Deus de filio suo. Et hoc est testimonium, quod uitam æternam dedit nobis Deus, & hæc uita in filio eius est. Qui habet filium, habet uitam: qui non habet filium, uitā non habet. Obseruet hæc charitas uestra. Aeterna & immutabilis Dei uoluntas est, quod uult uitam æternam dare mundo. Vult autem dare per Christum, qui naturaliter uita est, & uiuificare potest. Vult idem ille Deus ut uitam consequamur habeamusq; in nobis: & habeamus quidem per fidem. Nam & Apostolus Paulus docuit Christum per fidem habitare in cordibus nostris. Sed & ipse Dominus rursus testatur & ait, Qui edit me, uiuet & ipse propter me. At nouit charitas uestra, Edere esse credere. Concludimus ergo hunc locum his beati Petri uerbis, Hunc Christo omnes prophetae testimonium ferunt, quod remissionem peccatorum accepturus sit per nomen eius, quisquis crediderit in eum. Habemus in his totius scripturæ sanctæ testimonium amplissimum. Ostendimus istis manifestè satis, Deum cōstituisse ut quicumq; credit in Christum, purgatus à peccatis hæres sit uitæ æternæ.

Sola fide iustificari homines.

Antithesis Adæ & Christi.

Ista reddemus adhuc illustriora, demonstrando fidem solam, id est, fidem propter se & non propter opera nostra iustificare credentes. Propter se dicimus, non quatenus fides in nobis est animi nostri qualitas aut opus nostrum in nobis, sed quatenus fides donum est gratiæ diuinæ, promissionem habens iustitiæ & uitæ, ac quatenus natura sua certa indubitataq; fiducia aut persuasio est, innitens Deo & credens Deum propter Christum placatum, per Christum uitam & omne bonum nobis cōtulisse. Itaq; fides propter Christum & ex gratia Dei aut pacto Dei iustificat: adeoq; fides est id quod credimus & in quo acquiescimus, ipse inquam Deus, ipsa Dei gratia per redemptionē Christi nos iustificat: ut iam opera & merita nostra nullum hic locum habeant, nempe iustificandi. Alioqui locum suum habent bona opera in fidelibus: sicut suo loco dicemus. Nam doctor Gentium Paulus antithesi quadam committit Adamo Christum, & ostendit ex Adamo adeoq; ex natura nostra & uiribus nostris nos nihil habere quàm peccatum, indignationē Dei, & mortem. Ideo nomine ostendit, ne quis in carne quærat iustitiam ac uitam. Ex aduerso autem demonstrat nos à Christo habere iustitiam, gratiā Dei, & uitam, sed & condonationem omnium peccatorum. In ea antithesi uehementer urget & replicat

plicat uocabulum VNIUS, certè ut intelligeremus solam fidem iustificare.

Ad Galatas hac utitur demonstratione profectò euidentissima, Testamento ^{Testamentum Dei.} hominis, siquidem sit comprobatum, nemo addit aut adimit aliquid. Aequissimū ergo est, ne quis Dei testamento aut addat aut adimat aliquid. Cæterum hoc est testamentum quod sanciuit Deus, quòd benedictionē semini Abrahamæ, non in multis aut per multos, sed per unum conferre uelit. Nam non dicit, Et seminibus, tanquam de multis, sed tanquam de uno, Et in semine tuo, qui est Christus. Proinde nefas est huic testamento Dei quicquam adiungere uel detrahere: manetq; solus Christus saluator: homines non sunt saluatores uel sui uel aliorum.

In eadem ad Galatas epistola, Scimus, inquit, non iustificari hominem ex operibus legis, nisi per fidem Iesu Christi. Et nos in Iesum Christū credidimus, ut iustificaremur ex fide Christi, & non ex operibus legis: propterea quòd non iustificabitur ex operibus legis omnis caro. Tertiū repetit Paulus homines non iustificari ex operibus legis. Qua sententia omnis generis opera cōprehendit. Nulla itaq; opera iustificat. Quid autem iustificat? Fides in Christū: & ea quidem sola. Quid enim aliud potest loquutio, Scimus hominem non iustificari, nisi per fidem Iesu Christi? Aequipollentes enim sermones sunt, Sola fides iustificat. Et, Certum est non iustificari nos, nisi per fidem Iesu Christi. Adiungit exemplum Apostolorum. Et nos in Christum Iesum credidimus, ut iustificaremur ex fide Iesu Christi: & nō ex operibus legis. Ita etiam Petrus argumentatur ab exemplo in Actis apostolorum, dicens, Credimus per gratiam domini nostri Iesu Christi nos saluos futuros, quemadmodum & illi, Acto. 15. cap.

In eodem ad Galat. capite, Nō aspernor, inquit, gratiam Dei. Nam si per legem ^{Christus nō est} est iustitia, igitur Christus frustra mortuus est. Si enim in nobis erat per quod po- ^{frustra mor-} tueramus seruari, quid opus erat filiū Dei incarnari, pati & mori? Quia uerò Dei ^{tuus.} filius incarnatus, passus & mortuus est: neq; frustra mortuus est: ideo non erat in carne quod poterat salutem impetrare hominī. Solus ergo Dei filius manet saluator: ac salutem nobis communicat per ueram fidem.

In epistola ad Romanos per initium euincit Paulus omnes homines esse pec- ^{Omnes homi-} catores, neq; ullas superesse hominibus uires quibus iustificentur, legemq; ipsam ^{nes sunt pecca-} Dei peccata eruere, id est, applicare, proferre & manifestare, nō tollere, ex punge- ^{tores.} re, aut extinguere: ideoq; Deum pro bonitate sua, ne periret prorsus quod condiderat, gratis iustificare in fide Iesu Christi credentes. Verba aliquot Apostoli recitabo, iustitia Dei, inquit, absq; lege manifestata est, cōprobata tamen legis & prophetarum testimonio, iustitia inquam Dei per fidē Iesu Christi in omnes & super omnes eos qui credunt. Non enim est distinctio. Omnes enim peccauerunt & destituuntur gloria Dei: iustificantur autem gratis per illius gratiam, per redemptionem quæ est in Christo Iesu, quem proposuit Deus reconciliatorem per fidem in sanguinem eius. Hæc opinor uerba Apostoli planissima sunt omnibus credentibus. Adimit nostris meritis & uiribus iustificationem, tribuit illam gratiæ, qua datus est orbi filius Dei ad supplicium crucis, in hoc, ut omnes qui credunt se sanguine filij Dei redēptos esse, iustificati sint. Idem Apostolus mox subiicit, Colligimus ergo fide iustificari hominem absq; operibus legis. His argumenta subiicit, An Iudæorum Deus tantū? An non & gentium? Certè & gentium: quandoquidē unus Deus qui iustificabit circumcissionem ex fide, & præputium per fidem. ^{Deus iustificat} Deum esse aliud nō est, quàm uitam esse & salutem. Est autē Deus gentium quoq; ^{fide Genes 22} Iudæos. ^{Iudæos.} Deus, non Iudæorum tantū: ergo Deus est uita & salus gentiū. Hanc uitam & salutem non communicat per legem aut per circumcissionem; sed per fidem in

Christum. Sola ergo fides iustificat. Demonstrari hoc potest exēplo Cornelij Centurionis, cui cum prädicasset Christum S. Petrus, & ille credidisset, protinus iustificatus fuit, etiam si non recepisset circumcisionem uel legem, etiam si non sacrificasset, aut ullo opere promeruisse iustitiam: Gratis enim fide per Iesum Christum iustificatus est. Nam Petrus sermonem suum ita concluderat, Huic Christo omnes prophetæ testimonium ferunt, quòd remissionem peccatorum accepturus sit per nomen eius quisquis crediderit in eum.

Abraham pater noster quomodo sit iustificatus.

Galat. 3.

Profert Apostolus post illa eximium & singulare exemplū patris nostri Abraham, docens quomodo iustificatus sit pater noster Abraham. Hoc enim ubi certò expositum fuerit, non poterit non constare & manifestum esse omnibus, quomodo Deus uelit iustificare omnes homines. Nequeunt enim alia ratione iustificari filij quàm iustificatus est pater. Abraham ergo non iustificatus est ex circumcisione aut sacramentorum perceptione. Nam prius dicitur iustificatus quàm circumciscus. Postea accessit circumcisionis signum, signaculum iustitiæ fidei, id est, sigillum aut obsignatio, quòd fide iustificatur omne semen Abraham. Idem ille pater noster Abraham non est iustificatus per legem. Nam lex demum post annos 430. addita est promissioni, non ut peccatum tolleretur uel iustificaret, sed ut peccatum ostēderet, & nos totos euacuaret, & euacuatos relegaret & quasi cogeret ad Christum. Idem Abraham non iustificatus est per opera sua. Et tamen inueniuntur in hoc sanctissimo patriarcha bona opera ac fidei quidem ueræ opera bona, & illustra & multa, qualia & quanta uix reperiās in alio. Nihilominus dicit Apostolus, Quid dicemus inuenisse uel meruisse (utrunq; enim significat *εὐρηκέναι*) Abraham patrem nostrum secundum carnem, qui inquam secundū carnem pater est? Nam si Abraham ex operibus iustificatus fuit, habet quod gloriatur: at nō apud Deum. Deus enim solus iustus est & iustificans. Omnes homines corrupti sunt, etiam Abraham peccator est, & omnes homines destituuntur gloria Dei. Vnde & propheta disertè prohibuit gloriari, nisi in misericordia Dei. Proinde Abraham minime contra Deum gloriatus est: agnouit se peccatorem esse, & gratis, non propter merita sua iustificari. Sequitur enim in Apostolo, Quid enim scriptura dicit? Credidit autem Abraham Deo, & imputatum est ei ad iustitiam. Duo dicuntur, Primum, quòd Abraham Deo crediderit, Secundum, quòd id ei imputatum sit pro iustitia. Ex ijs consequitur fide iustificatum esse Abrahamum, non per opera. Id enim colligit Apostolus ad hunc modum, Ei qui operibus meretur iustitiam, non imputatur iustitia. Imputatur autem Abraham iustitia, ergo non meruit iustitiam operibus. Rursus, Ei certè imputatur iustitia, qui credit non operatur. Credidit autem Abraham Deo, ergo fides ei imputatur pro iustitia.

Nec fides neque promissio est inanis.

In eodem capite profert idem Apostolus & alia non minus firma pro fide iustificante absq; operibus argumenta. Si ij qui ad legem pertinet, ait, hæredes sunt, inanis facta est fides, & irrita facta est promissio. Ad legem pertinent qui operibus legis iustitiam quærūt. Cæterum fides innititur in misericordiam Dei. Quem uerò locum habebit gratia & misericordia Dei, si meremur iustitiā? Quid necesse est credere iustificandum me fore Christi sanguine, si propter opera mea placatur mihi numen, propter peccata mea iratum? Deniq; promittitur salus & iustitia à Deo. Promissio autem ibi cessat ubi incipit meritū se nostrum ingerere. Nam ad Galatas quoq; dixit Apostolus, Si ex lege est hæreditas, iam non est ex promissione. Atqui Abraham per promissionē donauit Deus: proinde ut firma maneat promissio, fides iustificat non meritum.

Rursus ad Romanos cap. 4. Idcirco ex fide datur hæreditas, ait, ut secundum gratiam,

gratiam, ut firma sit promissio uniuerso semini, non ei tantum qui est ex lege, uerum etiam ei qui est ex fide Abraham. Duas commemorat causas, ob quas fidei & non operibus tribuat iustificationem. Prior, ut iustificatio constet gratis, & laude-
 tur gratia Dei. Posterior, ut firma sit promissio & salus, cedatque ea etiam gentibus. *iustificatio con- fiat gratis.*
 Non daretur autem gentibus, si legi & circumcisioni, quibus gentes carent, deberetur. Denique oportet firmam esse spem salutis nostrae. Nunquam autem uel firma uel *Salus certa sit*
 tuta esset futura, si tribueretur nostris operibus aut meritis. His enim semper deest *oportet, non dubia.*
 aliquid. In Deo autem & merito filij eius nihil potest desiderari. Rata ergo salus est, indubitata & certa, si illam per fidem quaeramus in filio Dei, qui est iustitia nostra & salus.

His omnibus subiungam adhuc aliud ex S. Paulo testimonium, & hoc quidem euidentissimum clarissimumque. Ad Ephesios scribit, & ait, Gratia estis seruati per *Ephes. 2.*
 fidem, idque non ex uobis, Dei donum est, non ex operibus, ne quis glorietur. Nam ipsius sumus figmentum conditi in Christo Iesu ad opera bona, quae praeparauit Deus ut in eis ambulemus. Plura his non adijciam, nec Pauli uerba multis interpre-
 tabor. Sunt enim luce meridiana clariora, & clarissime testantur fide nos non ul-
 lis operibus iustificari.

Nullum autem hic periculum est fratres in Domino honorandi, ne uilescant *Fides exerit et*
 hac doctrina de sola fide iustificante, bona opera. Apostoli Christi sic docuerunt, *exprimit se*
 cur non ita etiam doceremus & nos? Apostolos Christi, non nos accusent, quibus *per opera.*
 uidetur genus doctrinae, quod de fide iustificante absque operibus constanter a no-
 bis proponitur, esse irreligiosum. Praeterea cum dicimus sola fide, aut fide absque *Sola fides iusti-*
 operibus iustificari credentes, non hoc dicimus quod multi intelligunt, fidem esse *ficat.*
 solam aut destitutam bonis operibus. Nam ubicunque fides est, ibi se exerit per bo-
 na opera. Iustus enim non potest non operari iustitiam. Antequam tamen opere-
 tur iustitiam, id est, opera bona, iustus sit necesse est: ergo iustus per opera sequen-
 tia, praecedentem iustitiam non assequitur. Ea ergo iustitia gratiae tribuitur. Iusti-
 ficatur enim gratis credentes in fide, iuxta illud, Iustus fide sua uiuet, & postquam
 iustificati sunt, incipiunt proferre opera iustitiae. Proinde nolumus hac disputatio-
 ne bona opera impugnare, quae suum locum & suam dignitatem habent in ec-
 clesia apud fideles coram Deo: sed uolumus modis omnibus adserere gratiam Dei
 & meritum filij Dei, quo solo iustificamur, eueri & conculcari, cum coniungimus
 nostra merita & opera merito Christi & fidei qua apprehendimus Christum. Quid
 enim clarius quam quod dicit beatus Apostolus? Si per gratiam saluamur, non iam
 ex operibus. Alioquin gratia iam non est gratia. Sin autem ex operibus, iam non ex
 gratia. Quandoquidem opus iam non est opus. Rom. II. Nequeunt ergo haec duo
 gratia & meritum uel opus simul consistere. Ergo ne subuertamus Dei gratiam, &
 fructum passionis Christi negemus impie, iustificationem tribuimus solae fidei, quia
 haec tribuit merae Dei gratiae morte filij Dei.

Agnoscamus interim nos conditos esse, iuxta Pauli doctrinam, ad opera bona, ad *De bonis operi-*
 ea inquam quae praeparauit Deus, quae uerbo suo praescribit, exigiteque ut in eisambu-
 lemus. Cumque in his ambulamus & bonis operibus diuites sumus, his tamen iusti-
 ficationem non tribuimus: sed iuxta doctrinam Euangelicam humiliamus nos sub ma-
 num eius qui dicit, Sic & uos, cum feceritis omnia quae praecepta sunt uobis, dici-
 te, Serui inutiles sumus: quod debuimus facere fecimus. Ergo quoties legit pius *Luce 14.*
 opera nostra nos iustificare, opera nostra appellari iustitiam, operibus nostris tribui
 mercedem uitamque aeternam, non superbit, non obliuiscitur meriti Christi, sed huius-
 modi loca pie & comode interpretans, intelligit omnia esse diuinam gratiam, & tan-

ta tribui hominum operibus, quia ipsi sunt recepti in gratiam, & quia iam sunt filii Dei propter Christum: ut tandem omnia ad ipsum reuoluantur Christum, propter quem sciunt sancti se & omnia sua Deo patri gratos atque acceptos esse.

Illis uero pauculis quidem, si amplitudinem argumenti spectaueritis, copiosioribus autem, si praefixum horae spacium respexeritis, ostendi charitati uestrae maximam fidei uirtutem, nempe quod iustificet credentes, ubi obiter totum fere iustificationis negotium utile & cognitu necessarium omnibus, perstrinximus uerius quam tractauimus. Transimus ergo iam ad alia quoque.

Fides radix bonorum operum.

Fides uera est fons & radix omnium uirtutum bonorumque operum, ac satiat in primis mentem ac desiderium hominis & tranquillam reddit ac hilarē. Nam Dominus in Euangelio, Ego sum, inquit, panis uitae: qui uenit ad me, non esuriet: & qui credit in me, non sitiet unquam. Quid enim desideret amplius, qui sentit uera fide se iam possidere ipsum Dei filium, in quo sunt omnes thesauri coelestes, in quo est omnis plenitudo & gratia: Serenas & tranquillās reddit conscientias nostras, postquam uera fide apprehendimus Christum Dei filium planē esse nostrū, illum nobis placasse patrem, illum apparere nunc in conspectu patris, & intercedere pro nobis. Ideoque Paulus dixit, Iustificati ex fide, pacem habemus erga Deum per Dominum nostrum Iesum Christum. Per eundem in fide habemus liberū ad patrem aditum. Inuocamus ergo patrē per filium, & impetramus ab eo omnia, quae nobis sunt salutaria. Verē enim dixit Ioannes Apostolus, Et haec est fiducia quam habemus apud eum, quod si quid petierimus secundum uoluntatem eius, audit nos. Et si scimus quod audit nos quicquid petierimus, scimus quod habemus postulationes quas postulauimus ab eo. Qui fide carent, nec Deum inuocant, neque salutaria ab eo accipiunt munera. Fides praeterea gratos efficit Deo, eadem iubet donis Dei bene uti. Fides efficit ne in tribulationibus deficiamus. Imō fide uincimus mundum, carnem, diabolum, & aduersa omnia. Nam Ioannes Apostolus, Quoniam omne quod natum est ex Deo, ait, uincit mundum. Et haec est uictoria quae uincit mundum, fides uestra. Quis est qui uincit mundum, nisi qui credit quod Iesus est filius Dei: Paulus, Alii uero dissentī sunt, ait, aspernati fide redemptionem, ut potiore sortirentur resurrectionem. Alii ludibrijs & flagris explorati sunt, insuper & uinculis, & carcere: lapidati sunt, dissecti sunt, acie gladii interierunt: oberrarunt in ouillis & caprinis pellibus, destituti, pressi, afflicti, quibus indignus erat mundus, in desertis errantes & montibus, in speluncis & cauernis terrae. Dominus enim ipse in Euangelio dixit, Haec locutus sum uobis ut in me pacem habeatis. In mundo afflictionem habetis, sed confidite, ego uici mundum. Erit itaque & est neruus & robur patientiae fides. Haec fulcit, erigit & conseruat spem. Ex fide existit charitas. Charitas est plenitudo legis, quae in se continet uniuersitatem bonorum operum. Nisi uero uera in Deum imbuti simus fide, nulla erit in nobis charitas. Omnis qui diligit eum qui genuit, dicit Ioannes Apostolus, diligit & eum qui natus est ex eo. Verūm hora iam dudum elapsa est, neque quisquam poterit multis horis uirtutem fidei omnem pro dignitate explicare.

Fides est uictoria Christianorum.

Epilogus.

Intellexit charitas uestra, fidem esse uerā ecclesiae seu fidelium Dei iustificationē, absolutionē inquam omnium peccatorum, receptionē in gratiā Dei, imō adoptionē in numerū filiorum Dei, & beatificationē certissimam felicissimāque, fontem denique omnium bonorum operum. Oremus itaque uera fide Deum patrem per Dominum nostrum Iesum Christum, ut is nostra corda huiusmodi fide uera adimpleat, ut in praesenti seculo ipsi fide coniuncti, seruiamus ei legitimē: & postquam hinc soluerimus, uiuamus in aeternum cum eo cui credidimus. Cui laus & gloria semper, Amen.

De

De primis fidei Christianæ articulis, Symbolo Apostolorum comprehensis.

S E R M O VII.

PROXIMI proximis sermonibus duobus de uera fide & uirtutibus eius, ac inter alia commemorauit alicubi, Articulos fidei Christianæ compendium esse quoddam ueræ fidei, unde iam operæ precium & mei officij esse putauit, paucis explicare uobis Duodecim illos fidei articulos. Sunt enim ueræ fidei ueluti subiectum & materia circa quæ uersatur fides: quæ cum sit substantia rerum sperandarum, articulis hisce exponitur simpliciter & breuiter quænam sint res illæ sperandæ. Nemo autem expectet à me in præsentī operosam & plenam de articulis fidei disputationem: perstringam illos duntaxat, maximè necessaria tantum attingens. De singulis dicitur aliàs copiosius. Vos mecum orate Dominum, ut is uias suas nobis ostendat, in ijs deducat & seruet, ad gloriam nominis sui & animarum nostrarum salutem æternam.

Principiò dicendum est aliquid de communi appellatione, qua uulgò articuli fidei nostræ appellantur Symbolum Apostolorum. Symbolum autem dicitur & collatio & indicium. Collatio uerò nuncupantur articuli, quòd ex collatione doctrinæ Apostolicæ sint compositi atq; conscripti, ut sint regula & epitome quædam fidei prædicatæ ab Apostolis, & receptæ à Catholica siue uniuersali ecclesia. Quis autem primus hos articulos sic ordinauerit conscripseritq; incertum est, neq; traditum sacris literis. Sunt qui id ipsis tribuant Apostolis, ac eo nomine appellent Symbolum Apostolorum. Beatus Cyprianus martyr in expositione Symboli Apostolici, Tradunt maiores nostri, inquit, quòd post ascensionē Domini, cum per aduentum sancti spiritus super singulos quosq; Apostolos igneæ linguæ sedissent, ut loquelis diuersis uarijsq; loquerentur, per quod eis nulla gens extera, nullæ linguæ Barbaræ inaccessæ uiderentur, & in uia præceptum eis à Domino datum ob prædicandū Dei uerbum ad singulas quasq; proficisci nationes. Discessuri itaq; ab inuicem, normam prædicationis in cōmune constituunt, ne fortè alius ab alio abducti, diuersum aliquid his qui ad fidem Christi mutabantur exponerent. Omnes ergo in unū positi & spiritu sancto repleti, breue istud futuræ sibi, ut diximus, prædicationis indicium, conferendo in unum quod sentiebat unusquisq; componunt, atq; hanc credentibus dandam regulam esse statuunt. Hæc Cyprianus. Siue uerò ipsi fecerint Apostoli siue alij uiri Apostolici, satis tamen constat ipsam Apostolorum doctrinam purè in his contineri atq; tradi. Indicium ideo appellantur hi 12. articuli, quòd per illam notam seu indicium ueri Christiani à falsis dinoscantur.

Iam indicabimus quo ordine in illis explicandis simus progressuri. Poterit tota Epitome aut totū compendium fidei distribui in quatuor ordines, ut tres primi ordines explicent triū personarū unius Dei mysteria: quartus aut, fructus fidei, quæ scilicet bona expectemus ex fide, & quæ Deus suis donet fidelibus. Interim progrediemur nihilominus eo ordine, quo articuli duodecim collocati aut positi sunt.

Primus fidei Christianæ articulus hic est, C R E D O I N D E U M, P A T R E M O M N I P O T E N T E M, C R E A T O R E M C O E L I E T T E R R A E. Et primus quidem hic Symboli ordo duo continet. Primò enim in genere dicimus, Credo in Deum. Deinde speciatim descendimus ad distinctionem personarum, adiicientes, Patrem omnipotentem. Est enim unus Deus substantia, personis trinus. Vnde significanter unitatem substantiæ significantes, dicimus, Credo in Deum. Rursus personarum distinctionem obseruantes, & non confundentes, subiungimus, In patrem omnipotentem. In Iesum Christum fi-

hum eius unicum. Et in spiritum sanctum. Credamus ergo Deum simplicem, unū, & purum esse substantia, personis autem trinum, patrem, filium, & spiritum sanctum. Scriptum est enim in lege, Audi Israel, Dominus Deus noster Dominus unus est. Rursus in Euangelio legimus dixisse Dominum, Baptizantes eos in nomen patris, & filij, & spiritus sancti.

Credo in Deū.

Obseruandum uerò singulariter, quòd orantes dicimus, Pater noster qui es in coelis, da nobis hodie panem nostrum quotidianum: confitentes autem non dicimus Credimus, sed Credo. Nam requiritur ab unoquoque nostrum fides, quam quisque teneat synceram corde, profiteatur simpliciter ore. Non potuit Abraham credere pro uniuerso semine suo. Neque enim profuerit tibi si alius credat, tu uerò non credas. Requiritur enim à singulis fides à Domino. Singuli ergo profitentes dicimus Credo. Porro quid sit credere, exposui Sermone 4. Præterea sequitur in professione, Credo in Deum. Deus est obiectum & fundamentum fidei nostræ, utpote æternum, summum, inexhaustum & obuium bonum. In Deum ergo credimus, id est, spem omnem, omne præsidium & totos nos collocamus, ueluti in eum qui seruare & omnia salutaria conferre potest.

Deus pater dicitur.

Sequitur enim iam quis sit ille Deus cui innitimur, & cui nos totos committimus, Pater omnipotens. Pater appellatur Deus noster, quia ab æterno sibi similem genuit filium. Scriptura enim nominat Deum, patrem Domini nostri Iesu Christi. Hic, inquit Apostolus, est splendor gloriæ, & expressa imago substantiæ paternæ: ad quem dixit, Filius meus es tu, ego hodie genui te. Et rursum, Ego ero illi pater, & ille erit mihi filius. Deinde Deus pater dicitur per similitudinē quandam, quam habet cum patre nostro terrestri, nimirum propter creationem, fauorē, amorem, curam & sollicitudinē qua erga nos affectus est. A Deo enim sumus conditi. Deus amat nos, curat res nostras, & pro nobis sollicitus est, & magis quidē uel impensius quàm sit ullus pater terrenus. Nam Dauid, Quemadmodum pater miseretur liberorum, ita Dominus miseretur timentium eum. Ipse enim nouit conditionem nostram, recordans quoniam puluis sumus. At Isaias in cap. 50. Nunquid obliuisci potest, inquit, mulier infantis sui, quò minus misereatur & eximiē afficiatur erga eum quem suis ex uisceribus genuit? Sed esto, obliuiscatur illa, ego tamen tu non obliuiscar. His ergo declaratur bona erga nos Dei uoluntas: & nos profitentes Deum esse patrem nostrum, profitemur nos credere Deum nobis esse clementem, benignum, misericordem, qui uelit omnia quæ nobis sunt salutaria, denique ipsum erga nos nihil nisi bonum & salutare instituire: præterea nos ab illo habere quicquid habemus boni corporaliter & spiritualiter.

Deus omnipotens.

Omnipotens dicitur Deus, quia omnia potest, quia omnium Dominus est, omniaque habet suo subiecta imperio. Ideò enim & Dominus exercituum appellatur. Cælum, terra, & quæ in eis sunt, astra, elementa omnia, homines, angeli, diaboli, animantia omnia, res conditæ omnes, in potestate sunt supremi & æterni numinis. Quæcunque iusserit, faciunt, nihil eius uoluntati resistere potest. Quod ipse uoluerit, fieri necesse est: ac utitur rebus illis omnibus prout uult, & ut iustitia eius denique salus hominū poscit. Confessi sumus prius Deum nobis bene uelle, iam confitemur illum quæ uult etiam posse. Confitemur enim Deum omnipotentem esse, id est, nihil non posse quod utile & necessarium est hominibus, adeoque illum esse Dominum uniuersorum, & auxiliatorem nostrum fortem.

Deus est creator cæli & terre.

Quòd autem Deus sit pater noster bonus, benignus, clemens, & misericors, denique fortis, omnipotens, Dominus uniuersorū, atque defensor & assertor noster, declarat operibus eius mirificis. Est enim Creator cæli & terre, Porro creatione cæli

cœli & terræ declarauit quomodo affectus sit erga homines. Dum enim illi nondum essent, neque meritis officiisque prouocare possent Deum ad benefaciendum ipsis, Deus prior ex mera sua & natua bonitate condidit cœlum & terram, palatium longè præstantissimum & elegantissimum, & hoc ipsis ad inhabitandum concessit, subiectis hominibus creaturis in toto hoc mundo uniuersis. Quantam uerò potentiam exeruerit in creatione rerum omnium, claret ex hoc, quod dixit, & facta sunt mandauit & creata sunt. Quæ si per partes digeramus & sigillatim exponamus quid per sex dies condiderit, quo ordine, quo cum ornatu, quanta cum utilitate hominum, denique quam nullo negotio ista omnia produxerit, sicuti fusè scribitur à Mose Genes. i. cap. cogèris ad beneuolentiam & potentiam Dei planè obstupescere. Interim talem quoque Creatorem uniuersorum cogitare oportet, qui condiderit quidem per filium suum siue per æternam sapientiam omnia, tam uisibilia quam inuisibilia, eaque ex nihilo: sed nunc quoque nihilominus per spiritum suum æternum sustineat, foueat, agat, & conseruet omnia, citra quem omnia statim collapsura essent & abitura in nihilum. Confitemur ergo hinc quoque Dei æterni prouidentiam, & gubernationem sapientissimam.

Et hoc quidem ordine primo expositum est, quod patris quidem quasi proprium est. Est enim pater, & pater quidem Domini nostri Iesu Christi: & pater noster est Dominus uniuersorum, creator cœli & terræ, gubernator & conseruator rerum omnium, ex quo sunt omnia, & in quo consistunt omnia. Ex hoc ab æterno gignitur filius æternus, patri coæqualis, coessentialis, eiusdem cum patre potestatis & gloriæ, per quem & secula condidit: ex utroque procedit spiritus sanctus, Dauide quoque attestante & dicente, Verbo Domini cœli facti sunt, & spiritu oris eius omnis exercitus eorum.

Sequitur iam ordo secundus, in quo continentur omnia mysteria filij Dei Domini nostri Iesu Christi. Secundus enim articulus fidei Christianæ ad uerbum sic habet, *ET IN IESVM CHRISTVM FILIVM EIVS VNICVM DOMINVM NOSTRVM.* Duo autem continet hic articulus. Alterum, quod credimus in filium Dei: Alterum, quis sit ille Dei filius. Profitemur enim nos credere, id est, fiduciâ & spem omnem uitæ ac salutis perinde in filiū collocare atque in patrē. Disertè ergo dicimus, Credo in Iesum Christū: quemadmodū diximus, Credo in Deū, &c. Nam Ioan. 14. cap. dicit ipse Dominus Iesus, Ne turbetur cor uestrū: creditis in Deū, & in me credite. Itē, Hoc est opus Dei, ut credatis in eū quē misit ille. Et iterum, Hæc est uita æterna, ut cognoscāt te solū Deum uerum, & quem misisti Iesum Christum. Præterea legimus in Euangelio Ioannis, Dominum ad cæcū cui aperuerat oculos dixisse, Credis in filiū Dei? Cæcum uerò illuminatū illi respondisse, Quis est Domine, ut credam in eum? At Dominū subiecisse, Et uidisti eum & qui loquitur tecum ipse est. Tunc autem excepisse cæcum, Credo Domine: sed & adorasse. Credamus ergo & nos ac adoremus, credamus autē Iesum esse uerum Dei patris filium, eiusdem potestatis cum patre, distinctam tamen à patre personā. Quando & Dauid dixit, Dixit Dominus Domino meo, sede à dextris meis.

Cæterum copiosè explicamus quis sit ille filius Dei in quem credimus. Vbi tria ueniunt obseruanda. Primū illud est quod appellatur Filius unicus. Si filius est, & filius quidem Dei patris, ergo natura & substantia eius diuina est natura & substantia. Hoc enim nomine appellatur ab Apostolo splendor gloriæ paternæ, et expressa imago substantiæ illius. Rectissimè itaque filius dicitur à sanctis patribus consubstantialis & coessentialis patri. Quò illud pertinet quod dicitur filius unicus, alibi unigenitus & primogenitus. Nuncupamur enim & nos filij, sed non com-

Articulus fidei
dei 2.

Credere in filium Dei.

Quis sit filius Dei.

Filius unicus.

munione naturæ, aut substantiæ æqualitate, uel naturaliter, sed per adoptionem. Et proinde non offendeabantur Iudæi, quod se nuncuparet filium Dei, sicuti omnes fideles dicuntur & sunt filij Dei, sed quod intelligerent ipsum amplius quippiam de se prædicare, nempe quod sit naturalis Dei filius, Deo æqualis, & Deus ipse. Sic enim legis in Euangelio Ioannis 5. cap. Propterea magis quærebant Iudæi interficere Iesum, quia non solum soluisset sabbatum, sed & patrem suum dixisset Deum, æqualem se faciens Deo. Et in cap. 10. ubi dixisset Dominus, Ego & pater unum sumus, sustulerunt Iudæi lapides ut lapidarent eum: at hunc respondisse, Multa bona opera præstiti uobis, ob quod eorum me lapidatis? Iudæos uerò dixisse, Ob bonum opus non lapidamuste, sed ob blasphemiam: & quia tu homo cum sis, facis teipsum Deum. Sunt hæc clarissima diuinitatis Christi naturalis testimonia: quibus qui non credit, ne patrem quidem habet. Nam qui honorat filium, patrem honorat: & qui filio caret, ne patrem quidem habet: ac nisi filius naturalis esset Deus, non posset esse saluator mundi.

Iesus.

Deinde nomen proditur unigeniti filij Dei, & appellatur Iesus Christus. Exprimatur autem nomen ne sit error in persona, & ut intelligamus ex nomine quis sit ille in quem credimus, Iesus est: quo nomine donatus est oraculo cœlesti, quemadmodum etiam typi præcesserant de eo in Iosue duce, & in Iesu sacerdote summo, Angelus apud Matthæum erudiens Iosephum, Pariet filium, inquit, Maria, & uocabis nomen eius Iesum. Is enim saluum faciet populum suum à peccatis suis.

Christus.

Filius ergo hic Dei Iesus saluator est mundi, qui remittit peccata, & liberat ab omni potestate aduersaria, quod nullo modo posset nisi esset Deus uerus. Dicitur idem Christus, quod perinde sonat atque si tu dicas, Vnctus. Hebræi uocant Messiam. Et uocabulum hoc tam regni est, quam sacerdotij. Olim enim ungebantur & reges & sacerdotes: & ungebantur quidem chrismate aut oleo externo siue typico. Christus ipse ipsa uera unctione spiritus sancti plenitudine unctus est: sicuti narratur in Ioanne cap. 1. & 3. Propriissimè ergo hoc uocabulum Christus tribuitur Domino nostro. Nam primum quidē rex est & sacerdos populi Dei. Deinde plena omnigena quæ ubertate in Iesum effusus est spiritus sanctus, unde ueluti è scaturigine uel fonte uiuo exuberat in omnia Christi membra. Hic enim est ille Aaron, in cuius caput effusum est oleum, quod descendit in barbam & in extimos uestimenti eius lumbos. Nam de plenitudine eius accepimus nos omnes.

Christus est Dominus.

Postremò obseruandum uenit in secundo articulo, quod nuncupamus Dei filium Dominum nostrum. Ac peculiariter & duplici quidem nomine appellatur filius Dei Dominus noster. Principiò propter mysterium redemptionis. Christus enim Dominus est omnium electorum, quos asseruit à potentia & dominatu satanæ, peccati & mortis, & fecit sibi eos populum acquisitionis. Fit autem allusio ad dominos qui pecunia sibi emunt seruos, aut qui in bello seruant captiuos, quos occidere potuissent, aut qui aliàs à morte præsentis liberant damnatos. Sunt ergo domini ueluti liberatores, redemptores, ac saluatores. Certè Paulus quoque huc alludens, Precio empti fuistis, inquit, nolite fieri hominū serui. Et beatus Petrus, Redempti estis, inquit, non auro & argento, sed precioso sanguine agni immaculati. Deinde Christus appellatur Dominus propter diuinam potentiam & naturam, secundum quam omnia subiecta sunt filio Dei. Et quia amplissimum est uocabulum domini, diuinam etiam naturam et maiestatem cōprehendens, libenter leguntur eo usi Apostoli. Paulus ad Corinthios, Licet multi sint domini, ait, nobis tamē unus est Dominus Iesus Christus, per quem omnia & nos per illum.

Articulus secundus
del 3.

Tertius fidei Christianæ articulus hic est, QVI CONCEPTVS EST DE

DE SPIRITU SANCTO: NATVS EX MARIA VIRGINE.

Secundo articulo professi sumus nos credere in Iesum Christum Dei filiū Dominum nostrum: quo certē adumbrāuimus nos firmiter credere Deum patrem nobis & in nostram salutem dedisse mundo filiū saluatorem & liberatorem. Huc enim pertinent uocabula Iesus & Dominus. Iam itaq; tertio articulo exponimus modum & rationem qua uenit in mundum, nimirum per incarnationem. Duo ergo comprehendit articulus, Conceptionem Christi, & natiuitatem eiusdem. De quibus ordine dicemus, ubi prius & paucis quidem explicauerimus incarnationis dominicæ causas.

Actum erat cum hominibus, & perisset totum genus mortalium propter peccatum quod contraximus omnes ex protoplasto. Nam stipendium peccati mors. Ideoq; non potuissimus cælum ingredi qui eramus ad tartara projiciendi, nisi ad nos descendisset Dei filius, ac Immanuel factus secum nos traxisset ad cælos. Proinde summa incarnationis causa est, mediare inter deū & homines, & mediando coniungere uel adunare disiunctos. Nam ubi mediator est, ibi dissidiū & partes sūt necesse est. Partes sūt Deus & homines. Causa dissidij est peccatum. At mediatoris est dissidentes partes rursus coniungere: id quod fieri non potest, nisi prius tollatur ē medio causa dissidij, peccatum. Peccatū autem neq; expiatur, neq; tollitur, nisi fundatur sanguis & sequatur mors. Testimonium huius rei præbet Paulus ad Hebræos 9. cap. Oportuit ergo mediatorem assumere carnem nostram & sanguinem, quō & mori posset & fundere sanguinem. Præterea necesse est sequestrem aut mediatorem utrisque communem esse quos conciliare debet: unde oportuit Christum Dominū, & Deum esse uerum, & hominem uerum. Deus purus, formidabilis, & parum accommodus fuisset hominibus. Homo purus nō potuisset accedere ad Deum qui est ignis cōsumens: quapropter utrunque existens Dominus noster Iesus Christus, utriq; parti accommodus est mediator. De qua re testificans Apostolus dicit, Vnus Deus, unus etiam mediator Dei & hominū, homo Christus Iesus, qui dedit semetipsum preciū redēptionis pro omnibus. Idem Apostolus ad Hebr. 2. & 9. cap. plura differit quæ ad hunc locū pertinent. Et in 2. cap. alteram quoq; incarnationis Christi causam recitans dicit, Debit per omnia fratribus similis reddi, ut misericors esset & fidelis pontifex, in ijs quæ apud Deum forent agenda, ad expiandum utiq; populi peccata. Nam quod ipsi quoq; accidit tentatio, potest tentatis quoq; succurrere. Rursus ut erudiret homines in omni pietate & iustitia, deniq; ut esset lux mundi & exemplum sanctissimæ uitæ, incarnatus est Dominus noster. Nam Paulus, Gratia aī Dei salutifera apparuit nobis, erudiens nos, ut abnegata impietate sanctē uiuamus. In summa, ut nos propter peccata disiunctos à Deo, cum Deo rursus coniungeret, & in societatem suū ipsius suorumq; bonorum omnium nos reciperet, naturæ communionē nobiscum coaluit, hoc est, incarnari uoluit.

Descendimus nunc ad modum incarnationis explicandum. Articulus fidei duo habet mēbra. Alterum est, Conceptus est de spiritu sancto. Homines alioqui omnes concipimur ex uirili semine eoq; immundo, & idcirco nascimur peccatores, adeoq; ut Paulus ait, nascimur filij iræ. Cæterum corpus Christi adeoq; Dominus noster nō concipitur in Maria uirgine de Ioseph, aut ex ullo uirili semine, sed de spiritu sancto: non quod spiritus fuerit loco seminis. Nequit enim ex spiritu aliud generari nisi spiritus. Atqui habet Dominus noster non phantasticū corpus, sed uerum & nobis consubstantialē. Conceptus est ergo Dominus noster in utero uirginis ē spiritu sancto. Nam effecit aterna sua potentia spiritus sanctus,

ut illibata uirginitate matris, ipsa inquam foecunda facta conceperit ex suo ipsius sanguine, dederitque corpus purum & uerè humanum filio Dei. Id quod multis exponitur per angelum Gabrielem apud S. Lucam in cap. 1. De quo loco cum alibi dicturi simus copiosius, iam transimus intactum. Prædixit conceptionem illam sic futuram ipse Deus mox ab ipso mundi principio. Non enim dixit, semē uiri conculcabit caput serpentis, sed semen mulieris. Præterea dicit per prophetas Deus, Ego excitabo semen ipsi Dauidi. Nota est autem lex Moysis de excitando semine fratris defuncti. Si enim excessisset frater sine liberis, cogeatur frater superstes uxorem ducere defuncti fratris, ac ex ea procreare liberos, qui nomine appellabantur censebanturque non uiui quidem, sed defuncti fratris. Proinde cum ex Dauide non esset uir qui idoneus foret gignere ex uirgine filium Dei saluatorem mundi, Deus ipse suscitauit Dauidi semen, ac per spiritum suum foecundam reddit uirginem: quæ quanquam non concepit ex uiro Dauidico, quia tamen ipsa erat Dauidis filia, & ex sua ipsius substantia, Deo sic efficiente, dedit substantiā filio Dei, est hic, & dicitur Dauidis filius. Quid quod ipse Dauid in Psalmo 110. uaticinans dicit? In magnificentijs sanctitatis ex utero auroræ tibi ros natiuitatis tuæ. Vel, Ros natiuitatis tuæ tibi ex utero auroræ in magnificentijs sanctitatis. Hoc est, magnifica quadam sanctitate & modo mirabili nasceris. Habebit enim se tua natiuitas sicut generatio roris, qui ex aurora pura uelut matrice nascitur. Elicit enim interdiu sol è terra uaporem, qui ob calidi sursum ducentis paucitatem, temperatæ noctis uel uesperarum frigore deorsum ducitur, atque in aquam soluitur. Sic autem soli iustitiæ Deus è terra, ex corpore inquam intemeratæ uirginis Mariæ, sanguinem elicuit, & mirabili modo sanctè & purè effecit, ut è matrice munda nascetur concipereturque sanctissimus Dei filius.

*Causæ puræ
conceptionis
Christi.*

Causæ purissimæ huius cōceptionis filij Dei in utero sanctissimæ uirginis hæ sunt. Qui concipitur in utero uirginali Deus est: at Deus est ignis consumens, qui nullam potest in se recipere immunditiam. Et quoniā uenit Deus nostram, id est, humanam impuritatem purificaturus, oportuit certè ipsum ab omni originali labe exemptum, per omnia esse sanctissimū, ut unica eaque illibata hostia pro peccatis totius mundi oblata, omnia mundi peccata semel tolleretur è medio. Nam quod inquinatum est, non potest id quod inquinatum est purgare, quinimo labe & immunditia per alterius immundi accessione conduplicat impuritatem.

*De natiuitate
Christi.*

Alterum membrum huius articuli tertij est, Natus ex Maria uirgine. Natus est Dominus ex Maria matre eademque uirgine. Homo ergo uerus est, qui ex homine natus est. Sed & pura est eius natiuitas. Nam ex uirgine natus est, ita ut simul & mater fuerit & uirgo. Nam & Isaias dixit, Ecce uirgo concipiet & pariet filium. Virgo inquit faciet utrumque, concipiet & pariet, ita ut maneat uirgo. Purissima ergo est filij Dei natiuitas. Et uera quoque est. Trahit enim carnem ex substantia & ex uisceribus uirginis. Quo nomine etiam appellatur Dominus noster Iesus filius Dauidis. Non posset dici Dauidis filius, nisi ex Maria, puella, aut filia utique Dauidica accepisset ueram substantiam humanam. Ad quam significandam & propriissime exprimendam Ioannes Apostolus dixit, Verbum caro factum est. Et apostolus Paulus, Nuspiam assumit angelos, sed semen Abraham. Ibidem dicit Dominum fratribus suis factum esse similem per omnia excepto peccato. Ad Philippenses ait, Cum esset æqualis Deo, semetipsum inaniuit forma serui sumpta, in similitudine hominum constitutus, & figura repertus ut homo. Rursus autem testificatur Ioannes Apostolus, & ait, Omnis spiritus qui confitetur Iesum Christum uenisse in carne, ex Deo est, & omnis spiritus qui non confitetur Iesum Christum in carne

In carne uenisse, ex Deo nō est. Modum natiuitatis exposuit multis Lucas cap. 2. Et nos aliās de eo dicemus copiosius. Credamus ergo & confiteamur Iesum Dei filium conceptum esse ex spiritu sancto, natum ex Maria uirgine.

Quartus fidei Christianæ articulus hic est, PASSVS SVB PONTIO *Articulus fidei*
PILATO, CRVCFIXVS, MORTVVS, ET SEPVLTVS, DE- *dei 4.*
SCENDIT AD INFERNV. Exponitur hoc articulo quarto, finis, usus
& fructus incarnationis dominicæ potissimus. Homo enim factus est, ut pati &
mori posset, moriendoq; & patiēdo à morte æterna & tormentis inferorum re-
dimere, purgatosq; constituere hæredes uitæ æternæ. Nam hic est finis mortis do-
minicæ, ut mox indicabimus, & copiosè exposuit Paulus ad Hebræos cap. 9.

Diducitur hic articulus rursus in suas portiones. Principiò confitemur Domi- *Christus pas-*
num nostrum passum esse, uerè utiq; non putatiuè, & passum quidem ærumnas *sus est.*
& miseras huius seculi, deinde tormenta carnificum & ipsam mortem acerbissi-
mam. Passus est itaq; animo & corpore, & multifariè quidem. Isaías enim dicit,
Vir dolorum est, & qui expertus est ærumnas. Ipse portat infirmitates nostras, &
dolores nostros ipse baiulauit. Nam & in Euangelio ipse dixit, Tristis est anima
mea usq; ad mortem. Ea uerò omnia propter nos passus est. Non enim erat in ipso
peccatum aut causa ulla cur pateretur.

Secundo loco notatur tempus & iudex Pontius Pilatus sub quo mortuus est *Passus sub Pon-*
dominus, & redemit mundum à peccato, morte, diabolo, & inferis. Passus est er- *tio Pilato.*
go sub monarchia Romanorum, sub Imperatore Tiberio, cum iam secundū uati-
ciniū Iacobi Israelis, populus Iudaicus pareret exteris regibus, neq; præessent
amplius reges uel præfides e stirpe Iudaica. Tum enim uenturum prædixerat
Messiam. Quid quod ipse Dominus in Euangelio nō semel prædixerat se traden-
dum fore in manus Gentium, & ab his occidendum?

Tertio loco significamus etiam modum passionis. Subiungimus enim, Cruci *Crucifixus est*
fixus & in cruce mortuus. Erat autem supplicium crucis ut probrosissimum, ita *dominus no-*
etiam acerbissimum. Id autem supplicij in se suscepit, ut satisfaceret pro mundo, *ster.*
& quod ab initio typi præcesserant fore ut suspenderetur in ligno. Strui lingnorū
imponeretur Isaac immolandus. In palum quoq; impositum serpentē Moses eri-
gebat. Sed & ipse Dominus, Vbi exaltatus fuero, inquit, omnes traham ad me.
Porro in cruce expirauit tradens spiritum Deo. Verè enim mortuus est, ut mox
sequetur. Vbi paucis dicendum est quis sit fructus mortis Christi. Principiò ma- *Fructus mor-*
ledicti eramus propter peccatum: maledictionem ergo in se suscepit, sublatus in *tis Christi.*
crucem, ut tolleret maledictionem, essemus autem benedicti in ipso. Deniq; non
potuit nobis obuenire hæreditas testamento legata, nisi is qui legauit fuisset mor-
tuus. Deus autem legauit: qui ut mori posset, hominē assumpsit, idemq; mortuus
est iuxta humanam naturam, ut hæreditatem uitæ acciperemus. Alibi rursus Pau-
lus, Qui peccatum non nouit, pro nobis (Deus) peccatum fecit, ut nos efficeremur
iustitia Dei per illum. Homo ergo piacularis factus est pro nobis dominus noster,
in quem ceu hircū peccati cum collata congestaq; essent omnia totius mundi pec-
cata, ipse moriens ea omnia sustulit ac expiauit: ut iam unica Christi hostia satisfe-
cerit pro peccatis totius mūdi. Qui certè maximus est mortis Christi fructus ubi-
que traditus ab Apostolis Christi. Deinde docet nos mors Christi patientiā & mor-
tificationem carnis nostræ: imò communione sui efficit in nobis Christus spiritu
suo ne regnet in nobis peccatum. De qua re multa tradidit Apostolus Paulus ad
Romanos 6, cap. Dominus in Euangelio dicit, Si quis uult post me uenire, abne-
get semetipsum, & tollat crucem suam & sequatur me. Hi & nōnulli aliq; sunt fru-

Sepultus est dominus noster.

ctus passionis dominicæ uel mortis Christi.

Quarto loco subiungitur, Sepultus. Verè enim in cruce mortuus est dominus noster. Probata est ueritas mortis eius à milite qui latus eius transfixit. Sublatus est deinde ex cruce, & positus in monumentum. Ponuntur in Euangelio illorum nomina qui ipsum sepeliuerunt, Ioseph & Nicodemus. Ostenditur item modus quomodo sepeliuerint eum. Fructum sepulturæ his uerbis tradidit ipse saluator, Amen amen dico uobis, nisi granum frumenti deiectum in terram mortuum fuerit, ipsum solum manet: si uerò mortuum fuerit, multum fructum adfert. Vnde & Apostolus hortatur ut sepeliatur cum Christo in morte eius, quò in nouitate uitæ resurgamus, imò & uiuamus regnemusq; æternum cum eodem. Ergo si nostra quoq; corpora sepeliantur aliquando, ne simus solliciti. Sepeliuntur enim fideles ut resurgant cum Christo.

Descendit ad inferna.

Quintam particulam articuli 4. quidam separatim ponunt pro articulo fidei quinto. Ego non uideo cur auelli debeat à præcedentibus, neq; cur peculiarè constituat articulum fidei. Verba sic habent, Descendit ad inferna. De his uariæ sunt apud sacros interpretes sententiæ. Augustinus in libro de fide & symbolo hæc uerba neq; ponit in regula fidei neq; exponit. Cyprianus hæc tradit: Sciendum sanè est, quòd in Ecclesiæ Romanæ symbolo non habetur additum, Descendit ad inferna, sed neq; in Orientis Ecclesijs habetur hic sermo: uis tamen uerbi eadem uidetur esse in eo quod sepultus dicitur. Hæc ille. Videtur autem sentire Cyprianus, Descendere ad inferna, aliud non esse quàm condi sepulchro, iuxta illud Iacobi, Deducetis canos meos cum mœrore ad inferos. Verum non desunt, quibus appareret hoc quod allatum est carere iusta ratione. Nam consentaneum non esse quòd rem semel apertè expositam, obscuriore mox loquendi genere implicuerint. Imò quoties coniunguntur duæ sententiæ eandem rem significantes, semper posteriorem prioris esse explicationem. Caterum planiorem esse illam loquutionem Sepultus est: implicationem, Descendit ad inferna. S. Augustinus ad Euodium epistola 99. torquet se in hac causa. Ad Dardanum de Dei præsentia, scribit Dominum ingressum fuisse tartarum, sed nullum sensisse cruciatum. Longè simplicius uidebimur articulum hunc intelligere, si senserimus uirtutem mortis Christi dimanasse etiam ad defunctos, & his profuisse: id est, propter mortem Christi omnes patriarchas & fideles homines ante Christi aduentum mortuos, ab æterna morte præseruatos esse. Sicut & S. Petrus cõmemorat dominum abiisse in spiritu, & spiritibus inobedientibus ac in carcere detentis prædicasse. Nimirum innotuit & his iusta damnationis ex morte Christi sententia, quòd uiui nō credidissent cum ipso Noe ac suis in uenturum Messiam. Vel certè per inferos uel inferna intelligimus non locum supplicij destinatum impijs, sed defunctos fideles, quemadmodum per superos significamus adhuc superstitēs in uita. Proinde anima Christi descendit ad inferos, id est, delata est in sinum Abraham, in quo collecti fuerunt omnes defuncti fideles. Ergo cum latroni secum crucifixo dixit, Hodie mecum eris in paradiso, promisit ei consortium uitæ & beatorum spirituum. De sinu Abraham differuit copiosius dominus noster apud S. Lucam in cap. euang. 16. Licet enim dominus descendisse dicatur, fit tamē id ex more loquendi. Alioqui ex Luca claret sinū Abraham locum esse longissimè separatum à tartaro, & positum quidem in sublimi. Caterum de his curiosius inquirere & differere, curiosi magis quàm pii est hominis. Confitemur in hoc articulo animas esse immortales, easq; protinus à morte corporea transire ad uitā, & sanctos quidem ab initio mūdi omnes fide sanctificatos per Christum, in Christo & per Christum hæreditatem accipere uitæ æternæ.

Adderem

Adderem istis articulum 5. nisi hora iam præterisset. Differemus ergo in ser-
monem proximum. Iam uerò orabimus unà omnes Deum patrem nostrum qui *Epilogus.*
in cœlis est, ut per spiritum suum nobis inspirare dignetur ueram & uiuificam il-
lam fidem, quæ tendit in patrem & filium: in patrem ut creatorem uniuersorum:
in filium ut saluatorem totius mundi: qui ideo cœlo descendit, & in utero sanctis-
simæ uirginis Mariæ incarnatus est, ut esset mediator inter Deum & homines, at-
que hos inter se reconciliaret seu coniungeret, haberetq; quod offerret ad satisfa-
ciendū diuinæ iustitiæ, & ad purganda peccata nostra: quæ & in corpore suo tu-
lit, imò abstulit, omnesq; fideles hæredes fecit uitæ æternæ. Laudemus iam Dei
gratiam, & agamus gratias filio Dei. Cui soli debetur omnis honor & gloria, in se-
cula seculorum, Amen.

De posterioribus fidei Christianæ articulis, symbolo Apostolorum comprehensis.

S E R M O V I I I.

R E M V S ante omnia Deum nostrum, ut is pro sua bonitate concedat *Articulus fi-*
nobis feliciter, expeditè, & multo cum fructu procedere in explanandis *dei.*
alijs fidei nostræ Christianæ articulis.

Quintus fidei nostræ articulus hic est, TERTIA DIE RESVR-
REXIT A MORTUIS. Et tenet quidem hic articulus fidei inter omnes alios
fermè primas. Nec sunt Apostoli in alijs declarandis & confirmandis operosio-
res quàm in hoc uno. Nec satis fuisse si Dominus noster duntaxat pro nobis mor-
tem oppetisset, nisi etiam resurrexisset ex mortuis. Nam si non resurrexisset ex *Resurrectio*
mortuis, sed mansisset in morte, quis persuaderet hominibus peccatum morte *Christi glo-*
Christi esse expiatum, morte Christi mortem superatam, satanam deuictū, & tar- *riosa.*
tarum fidelibus confractum: Imò pergerent absurdi nostri homines perpetuò bla-
sphemare Deum uerū, ac spem nostram suggillare, dicereq; Quis unquam rediit
ex ijs qui mortem obierunt, ac enarrauit nobis an sit uita in alio seculo post hanc
uitam, & qualis illa sit: Quia ergo nemo rediisse legitur, dubium relinquitur quod
garriunt spermologi de uita futuri seculi. Idcirco ut toti mundo declararet domi-
nus post hanc uitam superesse aliam uitam, animam quoq; cum corpore non in-
terire, sed uiuere, tertia die rediit ad discipulos suos rediuiuus dominus noster: si-
mul etiam demonstrauit expiatum esse peccatum, exarmatam mortem, deuictum
diabolum, & destructum infernum. Nam aculeus mortis est peccatum. Vel sti-
pendium peccati mors est. Mortis imperium habet diabolus, & concludit ob pec-
cata in tartarum. Iam itaq; cum resurgit uiuus ex mortuis Christus, non potuit ei
dominari mors: & quia mors dominio amisso cōfracta est, pari ratione consequi-
tur & diabolus & infernum per Christum esse deuictum, deniq; horū omnium
uim & uirtutem, peccatum, esse expiatum. Claret ergo resurrectionē Domini no-
stri Iesu Christi quasi certificare obsignareq; salutem & redemptionem nostram,
ut de ea addubitare non possimus amplius. Confitemur itaq; hoc articulo, resur-
rexisset Dominum nostrum Iesum Christum ex mortuis, & nobis quidem resurre-
xisse, id est, nobis deleuisse peccatum, nobis deuicisse mortem, infernū, & diabo-
lum: iuxta illud Apostoli, Deus fecit nos saluos, & uocauit uocatione sancta, non
secundum opera nostra, sed secundum suum propositum & gratiam, quæ data est
nobis per Iesum Christum ante tempora æterna, sed palàm facta est nunc per ap-
pāitionem seruatoris nostri Iesu Christi, qui mortem quidem aboleuit, uitam au-
tem & lucem produxit & immortalitatem per Euangelium. Sunt huius generis

alia multa ad Rom. 4. & 1. Cor. 15. Nam & in Euangelio Ioannis dicit Dominus, Ego sum resurrectio & uita: qui credit in me, etiam si mortuus fuerit, uiuet; & omnis qui uiuit & credit in me, non morietur in æternum.

Resurgere quid sit. Inspiciamus iam etiam singula uerba articuli. Confitemur Dominum resurrexisse. Est autem resurgere, denuo surgere. Surgit quod cadit. Corpus Christi cecidit, ergo corpus Christi surgit, adeoque resurgit: id est, illud ipsum corpus Christi quod priusquam caderet uiuebat & operabatur, iam resurgit, rursus inquam uiuit & operatur. Verè enim Tertullianus de resurrectione carnis, Resurrectionis uocabulum, ait, non aliam rem uindicat quàm quæ cecidit. Resurgere enim non est nisi eius quod cecidit. Iterum enim surgendo quia cecidit resurgere dicitur. Re enim syllaba semper iterationi adhibetur. Proinde dum matronæ euangelicæ abeunt ad sepulchrum uncturæ corpus Domini quod pependerit in cruce, audiunt ab angelo Domini, Quid queritis uiuentem cum mortuis? Non est hic, sed surrexit, &c. Nota est enim historia dominicæ resurrectionis apud Lucam in cap. 24. & apud Marcum in cap. 16. Petrus quoque Apostolus ex Dauide resurrectionem ueram astruens 2. cap. Actuum, in prima illa concione sua, disertè ostendit Christum uerè resurrexisse ex mortuis.

Ex uel à mortuis resurgit. Deinde addimus dominum resurrexisse ex mortuis uel à mortuis. Quæ particula exprimit & mortis & resurrectionis ueritatem. Corpus enim uel caro moritur & corrumpitur: atqui mortuum resuscitatur. Corpus ergo uel caro resuscitatur: quasi dicat confitens, Ea qua cæteri mortales lege naturæ defunctus est dominus noster, at nō mansit aut hæsit inter mortuos. Eandem enim carnem quam semel assumpserat mortalem, ac per mortem deposuerat, iam resumit immortalem. Prædixerat enim Dauid, Quoniam non derelinques animam meam in inferno, neque dabis ut sanctus tuus uideat corruptionem. Est enim primogenitus resurgentium Christus, in quo ceu in capite declarari oportuit, qualis sit futura resurrectio omnium membrorum Christi in die iudicii.

Tertia die resurgit. Hanc uerò resurrectionem confitemur factam esse die tertia, à morte inquam. Deponitur enim in die parasceues à cruce, & infertur sepulchro, quiescit sabbato toto, & circa principium diei primi sabbatorum, qui primus inquam occurrit in hebdomada, quæ nobis hodie dominica est, resurgit circa auroram ex mortuis. Quamuis ergo in Euangelio Matthæi 12. cap. legamus dixisse dominum, Quemadmodum fuit Ionas in uentre ceti tribus diebus & tribus noctibus: sic erit filius hominis in corde terræ tribus diebus & tribus noctibus: attamen in cap. 16. & 20. seipsum quasi exponens loquutum id per synekdocham, dicit, Oportet me abire Hierosolymam, & multa pati à scribis & senioribus. & occidi, & tertio die resuscitari.

Articulus fidei 6. Sextus fidei nostræ articulus hic est, ASCENDIT AD COELOS, SEDET AD DEXTERAM DEI PATRIS OMNIPOTENTIS. Corpus illud quod corpori nostro consubstantiale est, desumptum ex Maria uirgine, adeoque ex substantia uirginis assumptum, quod pependit in cruce & excessit, sepultum est & resurrexit, illud ipsum inquam ascendit ad coelos, & sedet à dextris Dei patris. Nam posteaquam per dies 40. abundè satis instruxisset Dominus noster discipulos suos de ueritate resurrectionis suæ & de regno Dei, sublatus est in cælum.

Ascensio Christi gloriofa. Ascensione illa sua declarat uniuerso terrarum orbi dominus noster, quod sit uniuersorū Dominus, omniaque sibi habeat subiecta quæcunque in cælo sunt & in terra, quod ipse sit robur nostrum, uirtus fidelium & gloriatio contra portas inferi. Ascendens enim in cælum captiuam duxit captiuitatem, spoliatisque hostibus populum

populum suum locupletauit, quem & indies spiritualibus donis cumulat. Nam in excelsis residet, ut transfusa inde ad nos sua uirtute, uita nos uiuificet spirituali, uarijsq; gratiarum muneribus exornet, deniq; ut ecclesiam aduersus omnia mala defendat. Est enim Deus seruator, rex & pontifex noster. Vnde cum offenderentur quondam Capernaïtæ, quod Dominus appellasset se panem uitæ de cœlo descendentem ad uiuificandum mundum, ait, Hoc uos offendit? Quid ergo si uideritis filium hominis eò ascendentem ubi erat prius? nimirum ex uiuifica resurrectione & gloriosa ad cœlos ascensione, colligetis me esse panem uitæ de cœlo delatū, & iam iterum assumptum in cœlos manere seruatorem, uitam, & Dominum cœli & terræ. Sed & beatus Petrus Apostolus in Actis, Certò sciat tota domus Israel, inquit, quod Dominū & Christum fecerit Deus hunc Iesum quem uos crucifixistis.

Deinde non tantum à morte resurgens rediit ad suos, uerum his insipientibus ascendit in cœlos, quò redderemur omnes certiores æternæ salutis. Ascendendo enim parauit nobis locum, strauit uiam, hoc est, ipsum aperuit fidelibus cœlum. In cœlo posuit quod à nobis assumpsit Deus, uerum hominem, uiuū utiq; & irrefragabile testimonium, in cœlos aliquando totum hominem esse transferendum. Nam necesse est membra capiti conformia fieri. Resurrexit ex mortuis Christus caput nostrum; resurgent ergo & membra. Et quemadmodum nubes Dominum abstulit ab oculis discipulorum: ita p̄i feremur in occursum Domino in nubibus, totiq; tam anima quam corpore erimus & æternū habitabimus in cœlis apud caput nostrum Christum Dominū. Id quod clarissima lectione traditur Ioan. 14. cap. dicente Domino, Vado paraturus uobis locum, iterumq; ueniam ad uos & assumam uos ad me ipsum, ut ubicunq; ego sum & uos sitis. Apostolus quoq; Paulus testatur, & ait, Nos qui uiuimus & reliqui erimus in aduentu Dñi, simul cum resuscitatis ex mortuis rapiemur in nubibus in occursum Domini in aëra. Confitemur ergo hoc articulo Iesum Christum in cœlos sublatū, uniuersorum esse Dominum, regem & pontificē, assertorem & saluatorem omnium in orbe uniuerso fidelium. Confitemur in Christo & propter Christum nos credere uitā æternam, quam corpore in fine mundi, anima quoq; protinus atq; hinc excefferimus, percepturi simus.

Porro ueniunt ipsa articuli uerba pensanda, Ascendit, profiteamur. Quis oro ascendit? Qui ex Maria uirgine natus est, qui crucifixus, mortuus & sepultus est, qui resurrexit ex mortuis: is inquam ascendit, nimirum corpore & anima. Quò autem ascendit? Ad cœlos. Cœlum in scripturis non uno modo accipitur. Principiò ponitur pro firmamento & extensione illa quæ est supra capita nostra, in qua uolitant ultrò citroq; auiculæ, & in qua insunt astra, quæ dicuntur ornatus & exercitus cœlorum. Nam Dauid, Amictus est Deus luce ceu uestimento, & extendit cœlos ueluti cortinam. Item, Videbo cœlos tuos, opus digitorum tuorum, lunam & stellas quæ tu fundasti. Et iterum, Qui operit cœlum nubibus, & parat terræ pluuiam. Rursus, Cœli enarrant gloriam Dei, & opera manuum eius annunciat firmamentū. Deinde cœlum ponitur pro throno & habitatione Dei, deniq; pro ipso loco, sede & receptaculo beatorum, in quo Deus se suis uisendū & fruendum præbet. Dauid enim iterum testificans, dicit, Dominus in cœlis parauit solium suum. Vnde & Dominus in Euangelio dixit, Ne iuretis per cœlū, quia thronus Dei est. Paulus uerò Apostolus, Scimus, ait, quod si terrenū nostrū domiciliū huius tabernaculi destructum fuerit, ædificationem ex Deo habemus, domiciliū non manufactum æternum in cœlis. Hac itaq; significatione Cœlum appellatur Regnū Dei, regnum patris, Gaudium, Beatitudo & felicitas, æterna uita, pax & tranquillitas. Et quanquam Deus nullo concludatur loco. Nam dicit, Cœlum mihi sedes, terra

Ascendit dominus supra omnes cœlos.

Sedet ad dexteram Dei patris omnipotentis.

Dextera Dei finita est et loci nomen.

Sedere est quiescere, imò frui gaudio.

autem est scabellum pedum meorum: attamen quia maximè elucescit in cœlo gloria Dei, & in cœlis se suis uisendū fruendumq; præbet, iuxta illud, Videbimus eū sicuti est: Item, Nemo uidebit me, ait Dominus, & uiuet, dicitur cœlos inhabitare Deus. Sed & Christus Dominus iuxta diuinitatem nullo concluditur loco: iuxta assumptam humanam naturam quam uexit ad cœlos, loco cœli certo continetur, nec est interea in terris aut ubiq; locorū corporaliter, sed seiunctus à nobis corpore uersatur in cœlis. Ascendit enim, qui inferiora relinque ns ad superiora contendit. Christus ergo relictis terris supra omnes cœlos sedem corpori suo collocauit: non quòd elatus sit extra omnes cœlos, sed quòd supra omnes orbes ascendens, in ipsum extimum atq; supremum cœlum, in sedem inquam beatorum sit receptus. Paulus enim Apostolus significatissimè loquens, Nostra conuersatio, inquit, in cœlis est, ex quo & seruatore[m] expectamus, &c. Eodem modo & Lucas Euangelista dicit, Et cū benediceret eis, recessit ab eis, ac ferebatur in cœlum.

Sed quid multis exponimus, quod in ipso Symbolo per consequentia clarissimè illustratur? Sequitur enim, Sedet ad dexterā Dei patris omnipotentis. Ex his enim intelligimus qualis locus sit cœlum, & quid in cœlis agat Dominus noster. Non est quidem nostræ fragilitatis cœlorum secreta rimari & discutere, interim non impium est, illud quod scripturis nobis traditur inquirere, & ita ut nobis traditum est fideliter tenere. Simpliciter dicitur Dominus noster sedere, & ad dexteram quidem patris omnipotentis sedere. Quæramus ergo ex scripturæ testimonijs quid sit Dextera patris, & quid sit sedere in dextera patris.

Dextera Dei patris in scriptura duplicem habet significationem. Principiò dextera Dei est locus beatorum & felicitas æterna in cœlis. Id quod ante nos obseruauit beatus Augustinus, qui in libro de Agone Christiano cap. 26. sic reliquit scriptum, Dextera patris est beatitudo perpetua quæ sanctis datur: sicut Sinistra rectissimè dicitur miseria perpetua quæ impijs datur: ut non in ipso Deo, sed in creaturis hoc modo quo diximus intelligatur dextera & sinistra. Hoc autem dixit beatus Augustinus secundum scripturas. Dauid enim canit, Notam mihi facies semitam uitæ, satietas gaudiorum in conspectu tuo est, & iucunditates in dextera tua in perpetuum. Hoc quid aliud est, quàm si dixisset? Perduces me ad uitam, in ipsos inquam cœlos, ubi satiabor gaudijs, nimirum te inspiciendo & te contemplan-do atq; fruendo. In dextera tua, in æterna beatitudine sunt gaudia perpetua. Et in Euangelio legimus oues ad dexteram, hœdos collocari à iudice in sinistra.

Iuxta hanc significationem dexteræ, Sedere, significat quiescere ab omnibus laboribus, & tranquillè beateq; uiuere. Notissimum est enim illud propheticū, Sedebit uir sub uite sua, pro eo quod est, pacata, secunda & tranquilla erunt omnia. Dextera itaq; patris hac significatione finita est: & cū confitemur sedere filium in dextera patris omnipotentis, confitemur Dominum nostrum liberatum omni molestia & infirmitate humana, secundum humanam naturam quiescere iam & lætari in certo cœli loco, ubi & animas & corpora nostra credimus æternū & futura & uictura. Nam in Euangelio ipse Dominus testatur in domo patris sui mansiones esse multas, ad quas parandas ut & ipsis locus sit abeat, & quanquam abeat, rediturum tamen ad ipsos & assumpturum ipsos ad semetipsum, ut ubi ipse sit, ibi aut eodem in loco futuri sint & illi. Proinde credimus Christum quiescere in cœlis, ubi nobis quoq; locum parauit quietis, in quo æternū in gaudio futurum. Et quia corpora nostra in beatitudine non sunt ubique futura, sed in loco certo, ideo rectè dixit beatus Augustinus, Christum Dominum iuxta ueri corporis modum in uno aliquo loco cœli esse, Et S. Cyprianus, Sedere ad dextram patris

patris, carnis assumptæ mysterium est.

Deinde ponitur Dextera Dei pro uirtute, regno, protectione, assertione & potentia Dei. Dauid enim dixit, Dextera Domini excelsa est, dextera Domini facit fortia. Et Moses, Dextera tua Domine magnificata est in uirtute, Dextera tua Domine fregit inimicum. Et iuxta hanc dexteræ significationē, Sedere significat regnare, asserere, potentiam exercere & obire munus principis. Nam Dauid dixit, Dixit Dominus Domino meo, sede à dextris meis, donec ponā inimicos tuos scabellum pedum tuorum. Et Zacharias, Ecce uir, ait, cuius nomen est Germen, de loco suo germinabit, & ædificabit templū Domini, sedebit & dominabitur super solium suum, eritq; sacerdos super solium suum. Hac ratione Dextera Dei infinita est & nullo loco concluditur: & cum confitemur Dominum nostrum sedere ad dexteram patris, confitemur filium exaltatum esse super omnia subiectis sibi rebus omnibus, ut Paulus ait ad Ephes. i. cap. deniq; filium sic exaltatum, posse omnia, regnare in tota ecclesia, asserere suos, intercedere in cœlis apud patrem, ubiq; præsentem esse diuina uirtute. Huc enim pertinet, quod omnipotentiam sessioni huic adiunxit Symbolum dicens, Sedet ad dexteram patris omnipotentis. Nam et apud Matth. dicit: Data est mihi omnis potestas in cœlo & in terra, abite ergo & adducite mihi omnes gentes.

Dextera Dei finita est et potentia nomen. Sedere est regnare, &c.

Sic pulchrè pauculis hisce uerbis expressum puto qualis sit locus cœli, nimirum locus quietis, gaudiū & æternæ felicitatis, in quo sedet, habitat & uersatur iuxta assumptā naturam filius Dei, sicut & nos qui sumus Christi membra futuri sumus in illo loco sine omni dolore & molestia, in gaudio sempiterno. Et quamuis Dominus noster molestia omni liberatus sit, intelligimus tamen ipsum non otiosum desiderare. Est enim rex, sacerdos & Deus uerus in templo dei uero: non potest ergo non pro ingenio & officio suo operari salutē in electis, & omnia facere quæcunq; facit Deus rex & sacerdos. Ita scimus iam omnes quid in cœlis residens dominus noster faciat. Neq; ullam ei adfert molestiam quod agit & operatur: non enim necessitate quadam, sed natura & uoluntate operatur.

Non aliter tractarunt hunc fidei articulum & ueteres sanctæ scripturæ interpretes, quorum aliquot proferemus testimonia. S. Hieronymus exponens i. cap. Pauli ad Ephesios scribit, Per humanam similitudinem Dei potentiā demonstrauit: non quò solum ponatur & deus pater in eo sedeat, secumq; filium habeat residentem: sed quò nos aliter iudicantem atq; regnantem, nisi per nostra uerba intelligere nequeamus. Sicut ergo proximum esse deo, uel ab eo procul recedere non secundum locorum spacia, sed iuxta merita sentiendum est, quod sancti iuxta eum sint, peccatores uerò (de quibus ait propheta, Ecce qui elongant se à te peribunt) ab omni eius uicinia submoueantur: Sic uel in dextris uel sinistris dei esse accipiendū est, quod sancti à dextris eius sint, peccatores uerò à sinistris. Salvatore quoq; id ipsum in Euangelio cōprobante, cum oues à dextris, hœdos uerò memoret esse à sinistris. Sed & ipsum uerbum sedere, regni significat potestatem, per quam beneficium eis deus tribuit super quibus sedere dignatur, quod scilicet regat eos, & in cursu suo habeat, & ad nutum proprium uaga prius & libera colla conuertat.

S. Hieron. de dextera patris.

S. Augustinus de Fide & Symbolo, Credimus, inquit, quòd sedet ad dexterā dei patris. Nec ideo tamen quasi humana forma circumscriptum esse deum patrē arbitrandum est: ut de illo cogitantibus dextrum aut sinistrum latūs animo occurrat: aut id ipsum quòd sedere pater dicitur, flexis poplitibus fieri putandum est, ne in illud incidamus sacrilegium quo execratur Apostolus eos, qui cōmutauerūt

S. August. de dextera patris.

Vide.

gloriam incorruptibilis Dei in similitudinem corruptibilis hominis. Tale enim simulachrum Deo nephas est Christiano in templo collocare: multo magis in corde nepharium est, ubi uerè est templum Dei, si à terrena cupiditate atque errore mundetur. Ad dexteram ergo intelligendum est dictum esse, in summa beatitudine, ubi iustitia & pax & gaudium est: sicut ad sinistram hœdi constituuntur, id est, in miseria propter iniquitates & labores atque cruciatus. Sedere ergo quod dicitur Deus, non membrorum positionem, sed iudiciariam significat potestatem, qua illa maiestas nunquam caret semper, dignis digna tribuendo. Et reliqua.

S. Fulgentius.

Beatus Fulgentius Episcopus lib. ad Trasimundū regem 1. Dominus, inquit, ut localem ostenderet humanitatem suam, dicit discipulis suis, Ascendo ad patrem meum & ad patrem uestrum, Deum meum & Deum uestrum. Et mox, Immensitatem uerò suæ diuinitatis ostēdens dicit discipulis suis, Ecce ego uobiscum sum omnibus diebus usque ad cōsummationem seculi. Quomodo autem ascendit in cœlum, nisi quia localis & uerus est homo? Aut quomodo adest fidelibus suis, nisi quia idem immensus & uerus est Deus?

S. Vigilius.

Beatus martyr & Episcopus Tridenti Vigilius libro cōtra hæreses. 1. Hoc erat, inquit, ire ad patrem & recedere à nobis, auferre de hōc mūdo naturam quam susceperat ex nobis. Vides ergo eidem naturæ proprium fuisse ut auferretur & abiret à nobis, secundum attestantium uocem angelorum, Hic Iesus qui receptus est à uobis, sic ueniet quemadmodum uidistis eum euntem in cœlum. Nam uide miraculum. Vide utriusque proprietatis mysterium: Dei filius secundum humanitatem suam recessit à nobis: secundum diuinitatem suam ait nobis, Ecce ego uobiscum sum omnibus diebus usque ad consummationem seculi. Si nobiscum est, quomodo ait, Venient dies quando desiderabitis uidere unum dierum filij hominis, & non uidebitis? Sed & nobiscum est, & non est nobiscum. Quia quos reliquit & à quibus discessit humanitate sua, nō reliquit nec deseruit diuinitate sua. Hæc ille.

Articulus fidei
dei 7.
Iudex Christus.

Septimus fidei nostræ articulus hic est, INDE VENTURVS IUDICARE VIVOS ET MORTVOS. Præcedentibus articulis proposita & confessa est diuina in Christo bonitas, beneficentia, & gratia: iam declarabitur in ipso etiam diuina iustitia, seueritas & uindicta. Nam duo sunt aduentus Domini nostri Iesu Christi. Primo uenit humilis in carnem redemptor & seruator mundi. Secundo ueniet gloriosus in iudicium, iudex & ultor inexorabilis contra omnes impœnitentes & impios. Venturus est autem e cœlis e dextera patris, corpore uisibili & uerè humano conspicuus omni carnī, cum immensa diuinitatis potentia & gloria, cum angelorum omnium satellitio. Ipse enim Dominus in Euangelio, Videbunt, inquit, filium hominis uenientem in nubibus cœli cum uirtute & gloria multa, & mittet angelos suos cum tubæ uoce magna, &c.

Iudicare quid.

Porro iudicare significat pro tribunali sedere, causas audire & discutere, litem dirimere, decernere & pronunciare, denique defendere & asserere, rursus punire aut afficere supplicio, atque ita coercere & opprimere uim & malitiam. Credimus ergo Dominum nostrum Iesum Christum in die illo asserturum omnes pios & perditurum omnes impios: iuxta illud Apostoli, Reuelabitur Dominus noster de cœlo cum angelis potentia suæ, cum incendio flammæ, & infliget ultionem ijs qui non nouerunt Deum: rursus idem iudex iustus reddet coronam iustitiæ omnibus qui diligunt aduentum eius.

Pictura iudicij
extremi.

Modum enim iudicij talem proponunt nobis Euangelica & Apostolica scripta. Postquàm iniquitas huius seculi peruenerit ad summum, ac orbem seduxerit Antichristus

Antichristus, ut minimum supersit fidei, impijque dixerint pax & securitas, tum re-
 pentinus ueniet interitus. Mittet enim archangelum suum iudex Dominus noster,
 qui clangat tuba, & à quatuor uentis colligat omnem carnem ad iudicium: mox
 sequetur ipse iudex Dominus noster Iesus Christus cum toto exercitu cœlorum:
 descendet autem e cœlo in nubes: ac in nubibus ceu in tribunali sublimis residens
 apparebit illustris omni carni. Qui enim uixerint in hoc seculo, isto iudicij tempo-
 re stabunt coram iudice in puncto immutati: mortui uerò resurgent in momento
 omnes. Tunc iudex separabit oues ab hœdis: & pronuntiabit iustam pro ouibus
 & contra hœdos sententiam, Venite benedicti, &c. Et, Abite maledicti, &c. Seque-
 tur mox ipsa executio. Oues enim sursum protinus rapiuntur in nubes obuiam
 Domino in aëra, ascendentque cum illo lati in cœlos ad dexteram Dei patris, æter-
 num uiaturi in gloria & gaudio. Impijs dehiscet ima tellus, absorbebitque horribili-
 ter uniuersos, demittens eos ad tartara æternum cum satana & angelis eius cruci-
 andos. Fient hæc omnia non longo, molesto, uersipelli et iuridico quodam proces-
 su, sed extemplo. Tunc enim patebunt omnium corda, & accusabit unumquemque
 sua ipsius conscientia. Copiosius hæc traduntur Matth. 24. & 25. Sap. 3. & 5. 1. Co-
 rinth. 15. 2. Corinth. 5. 1. Thess. 4. & 5. Rom. 2. 2. Pet. 3. &c.

Cæterum singulariter confitemur iudicandos fore uiuos & mortuos. Id quod *iudicantur uiui
& mortui.*
 nonnulli exponunt de pijs & impijs. Atqui Symbolum paratum est simplicibus
 maximè. At simplicibus cōueniunt simplicia. Idcirco mortui sunt omnes, quicunque
 ab exordio mundi ad diem usque ultimum excesserunt e uiuis. Viui autem sunt,
 quos deprehendet dies illa uiuentes adhuc in hoc seculo. Apostolus enim, Ecce
 mysterium uobis dico, ait, Non omnes quidem dormiemus, omnes tamen immu-
 tabimur in puncto temporis, in momento oculi per extremam tubam. Canet enim,
 & mortui resurgent incorruptibiles, & nos immutabimur. Rursus alio in loco
 idem Apostolus, Hoc dicimus uobis in uerbo Domini, quod nos qui uiuemus &
 reliqui erimus in aduentum Domini, nequaquam præueniemus eos qui dormie-
 runt. Quoniã ipse Dominus cum hortatu & uoce archangeli ac tuba Dei descen-
 det e cœlo, & mortui in Christo resurgent primum, deinde nos qui uiuemus qui
 reliqui erimus, simul cum illis rapiemur in nubibus, in occursum Domini, in aëra:
 & sic semper cum Domino erimus,

Confitemur ergo hoc articulo 7. nos credere finem affore rerum omnium in *Premia & sup-
hoc seculo, felicitatemque impiorum non fore perpetuam. Deum enim iustum esse plicia certissi-
qui omne dederit iudicium filio suo, qui & repensurus sit in illo die unicuique iux- ma.*
 ta opera sua, impijs tormenta nunquam terminanda, pijs æterna gaudia. Adeoque
 profiteamur hoc articulo nos expectare liberationem, refrigerium, & præmium ui-
 tæ æternæ. Quomodo enim credentes suos, populum suum, & seruos suos perde-
 ret, qui in ueracissimo Euāgelio dixit, Amen dico uobis, quod uos qui secuti estis
 me, in regeneratione, cum sederit filius hominis in sede maiestatis suæ, sedebitis &
 uos super sedes duodecim iudicantes duodecim tribus Israel. Certissima sunt præ-
 mia & supplicia pijs & impijs in uerbo ueritatis proposita. Veracissimus est qui
 ad Isaiam dixit, Dicite iusto quod benè sit habiturus, fructu studiorum suorum
 fruetur. Væ impio, malè habebit, quoniam rependetur ei secundum opera ma-
 num suarum. Et hæc quidem hætenus de ordine Symboli secundo. Descendi-
 mus iam ad ordinem tertium.

Articulus fidei octauus hic est, Credo in Spiritum Sanctum. *Articulus fi-
Continet hic ordo tertius, tertiæ in adoranda Trinitate proprietatem personæ. Re dei 8.*
 cte autem credimus in spiritum sanctum, sicut in patrem & in filium. Deus enim

Spiritus sanctus.

unus est cum patre & filio spiritus sanctus: & rectè sequitur fides in spiritum sanctum fidem in patrem & filium. Nam per ipsum diuinæ salutis completæ in filio fructus obsignatur, sanctificatioq; & ablutio nostra nobis per spiritum confertur aut in nos deriuatur. Apostolus enim, Qui unxit nos Deus est, inquit, qui etiam obsignauit nos, deditq; arrham spiritus in cordibus nostris. Et iterum, Eratis quidem sceleribus polluti, iam uerò abluti & sanctificati estis, deniq; & iustificati per nomen Domini Iesu, & per spiritum Dei nostri. Sanctificat quidem & pater, sed per sanguinem Iesu Christi, & eandem in nos sanctificationem transfundit per spiritum sanctum: ut spiritus sancti quasi proprium sit sanctificare, unde & nomen obtinet sancti uel sanctificatoris. Proinde cum spiritus sancti nomen audimus, cogitandus est effectus quem ei tribuit scriptura, expectandaq; beneficia quæ ex ipso in nos manant. Virtus enim, operatio, seu actio spiritus, est quicquid operatur in nobis per filium gratia Dei patris: ut necessaria sit fides in spiritum sanctum. Et profitemur quidem hoc articulo octauo nos credere fideles omnes purgari, abluui, regenerari, sanctificari, illuminari, uarijsq; gratiarum muneribus donari à Deo propter Christum, sed per spiritum sanctum. Extra hunc enim non est ulla sanctificatio uera: unde non oportet charismata alijs tribuere medijs: hæc gloria solius est spiritus diuini. De quo differemus in alijs concionibus fusius & plenius.

In Christo dedit nobis pater plenè omnes thesauros cælestes.

Quoniam uerò elapsa hora nos admonet uela colligere, hortamur omnes ut fidem in Dominum Iesum religiosè teneant: hunc enim misit nobis pater cælestis, in hoc se totum nobis & exprimit & exhibet, hunc inscribit cordibus, & retinet in animis spiritus sanctus. Est autem tota salus hominis, & singulæ salutis partes comprehensæ in Christo: unde cauendum est, ne aliò deriuemus. Placuit patri, ait Apostolus, uniuersam plenitudinem inhabitare in filio, & in ipso recapitulare ac uelut in summam redigere salutis omnia: ac in ipso fideles sint completi. Si enim salus quæritur, ipso nomine docemur penes ipsum esse salutem. Dicitur enim Iesus, id est, saluator. Si ipsum Dei sanctum spiritum ac dona eius uaria desideramus, reperiemus & in Christi unctione. Dicitur enim Christus, unctus inquam, sanctus sanctorum & sanctificans, siue inungens nos spiritu suo. Si opus est alicui robore & fortitudine, assertionem & potentiam, habet in dominio Christi. Est enim Christus uniuersorum Dominus. In eodem inuenimus redemptionem. Redemit enim nos uenditos sub iugum satanæ. Habemus puritatem in eius conceptione, indulgentiam in eius natiuitate. Nostri enim similis factus est ut cōdolere nobis posset. Habemus remissionem in eius passione, absolutionem in eius damnatione, satisfactionem in eius hostia uel sacrificio expiatorio, purgationem in eius sanguine, reconciliationem uniuersalem in descensu eius ad inferos. Habemus mortificationem carnis nostræ in sepultura eius, uitæ nouitatem, imò & animæ immortalitatem, corporumq; resurrectionem in eius gloriosa resurrectione. Habemus item regni cælestis hæreditatem & hæreditatis obsignationem in ascensione eius, sessioneq; in dextera patris. Ibidem est intercessor, sacerdos & rex noster, præsidium & caput nostrum, defensor noster & securitas nostra tutissima. Inde transfundit in nos omnium bonorum copiam spiritum suum sanctum, & communicat se totum nobis, & nos ipsos sibi coniungit nexu indissolubili. Inde confidentes & lætantes expectamus ipsum iudicem, assertorem inquam & patronum nostrum, qui damnabit & in tartarum cum satana præcipites dabit omnes hostes nostros: nos autem & omnium seculorum omnes credentes secum subuehet in cælos, ut ibi canamus canticum nouum, & in eo exulemus in secula seculorum. Ipsi gloria semper.

De po-

De postremis fidei Christianæ articulis Symbolo Apostolorum comprehensis.

S E R M O I X.

IN V O C E M V S patrem nostrum in cœlis, per Dominum nostrum Iesum Christum, ut gratiam suam in nos transfundat, quò postremam partem expositionis articulorum fidei Christianæ multo cum fructu expediāmus.

Articulus fidei nonus sic habet, S A N C T A M E C C L E S I A M C A T H O L I C A M, S A N C T O R V M C O M M V N I O N E M. Post confessionem fidei in sanctam trinitatē & in mysteriū filij Dei domini nostri Iesu Christi, deniq; in sanctificatorem & reparatorem omnium spiritum sanctum: quarto ordine iam enumeratur fructus uel uirtus, effectus & finis fidei, quæ uidelicet contingant & donentur fidelibus. Obuenit his communio cum deo & cum omnibus sanctis, sanctificatio, remissio peccatorum, resurrectio carnis, & uita sempiterna. De his ordine dicemus, quantum facultatis dederit benignus Dominus.

Porro repetendum est ex articulo 8. Credo, Credo inquā sanctam Ecclesiam catholicam. Contendunt hic imperiti quidam cōfitendum esse, Credo in sanctam Ecclesiam. Nimirum quòd scriptum sit in Constantinopolitano symbolo, Et in spiritum sanctum Dominum uiuificantem: qui ex patre filioq; procedit, qui cum patre & filio simul adoratur & cōglorificatur, qui locutus est per prophetas in unam catholicam & Apostolicā Ecclesiam. Nam hæc ita distinguunt, ut sicut repetunt ex præcedentibus Credo, & intelligunt, Credo in spiritum sanctū Dominum: ita Credo hic quoq; repetunt, & hunc sensum colligunt, Credo in unam catholicam & Apostolicam Ecclesiam. Caterum præter necessitatē & contra pietatem uerba symboli ita detorquent. Nam refertur hoc, In unam catholicam & Apostolicā Ecclesiam non ad uerbum Credo, sed ad spiritum sanctum, nempe quòd is locutus sit per prophetas in unam catholicā & Apostolicā Ecclesiam. Significamus enim & confitemur unum atq; eundem spiritum omnia egisse in utroq; testamēto, contra eos qui confinxerunt duos sibi quasi cōtrarios spiritus. Sed & beatus Cyprianus in expositione symboli Apostolici, Non dixit In sanctam ecclesiam, ait, nec In remissionem peccatorum, nec In carnis resurrectionē. Si enim addidisset In præpositionem, una eademq; uis fuisset cum superioribus. Ne autem in illis quidem uocabulis ubi de diuinitate fides ordinatur, In Deo patre dicitur, & in Iesu Christo filio eius, & in spiritu sancto: in cæteris uerò ubi nō de diuinitate, sed de creaturis ac mysterijs sermo est, In præpositio non additur, ut dicatur, In sanctam Ecclesiam, sed sanctam Ecclesiam credendā esse, non ut in Deum, sed ut Ecclesiam Deo congregatam: & remissionem peccatorum credendam esse, non in remissionem peccatorum: & resurrectionem carnis, non in resurrectionem carnis. Hac itaque præpositionis syllaba creator à creaturis secernitur, & diuina separantur ab humanis. Hæc Cyprianus.

S. Augustinus de Fide & symbolo legit, Credo sanctam Ecclesiam: & non, Credo in sanctam Ecclesiam. Allegantur præterea uerba eius ad Neophytos de Consecrat. Distinct. 4. cap. Prima, Non diximus ut in Ecclesiam quasi in Deum crederetis, sed intelligite nos dixisse, ut in Ecclesia sancta catholica conuersantes in Deum crederetis.

Multò clarius autem Paschasius in lib. 1. de Spiritu sancto cap. 1. Credimus Ecclesiam, inquit, quasi regenerationis matrem: non in Ecclesiam credimus quasi in salutis authorem. Qui in Ecclesiam credit, in hominem credit. Nō enim homo ex

Ecclesia, sed Ecclesia coepit esse ex homine. Recede itaq; ex hac blasphemia persuasionem, ut in aliquam humanam te aestimes debere credere creaturam; cum omnino nec in angelum nec in archangelum sit credendum. Imperitia nonnullorum præpositionem In, uelut de proxima uicinaq; sententia in cōsequentem traxit & rapuit, & ex superfluo imprudenter apposuit. Caterum hic liber S. Paschasij ualde probatus est à beato Gregorio magno Romano Episcopo.

S. Gregorius.
Thomas Aquinas.

Leo papa.

Ecclesia.

Catholica
Ecclesia.

Orthodoxa
Ecclesia.

Credimus sanctam
esse Ecclesiam.

Quid quod Thomas Aquinas disputans de fide lib. 2. part. 2. artic. 9. quæst. 1. ait: Si dicitur, Credo in sanctam Ecclesiam, intelligendū, quod fides nostra refertur ad spiritum sanctum qui sanctificat ecclesiam; ut sit sensus, Credo in spiritum sanctum sanctificantem Ecclesiam. Sed melius est & secundum communiorum usum ut nō ponatur ibi In, sed simpliciter dicatur sanctam Ecclesiam catholicam; sicut etiam Leo papa dicit. Hæc ille. Habetis sententias ueterum Ecclesiæ doctorum, Cypriani, Augustini, Gregorij, Paschasij, Leonis papæ, sed & Thomæ Aquinatis, qui in hisce postremis temporibus docuit. Intellexit autem charitas uestra ex rationibus desumptis ex scriptura canonica, confitendum esse sanctam catholicam, & non credendum in sanctam catholicam Ecclesiam.

Videndū porrò quid Ecclesia dicatur, & quid catholica Ecclesia. Ecclesia propriè est concio, populus inquam euocatus aut collectus ad audiendum de reipublicæ negotijs. In præsentem est omnium profitentium nomen Christi cœtus, communio aut collectio, multitudo & societas. Catholica, id est, uniuersalis dicitur hæc societas, quia per omnia loca & tempora extēditur. Sancti enim omnes ita ununtur, ut membra in uno corpore quæ ab uno dependent capite. Ergo uniuersitas totaq; multitudo fidelium dicitur Ecclesia. Non enim restricta est Ecclesia Christi in angulum aliquem Aphricæ Donatianicum: extendit se per orbem terræ, & ad omnia tempora, & complectitur omnes fideles ab ipso Adamo ad ultimum usq; sanctum qui futurus est ante finem mundi. Habet hæc particulares Ecclesias, Ecclesiam inquam Adæ & patriarcharum, Ecclesiam Moysis & prophetarū antenatiuitatem Christi, Ecclesiam Christianam quæ à Christo denominatur: & Apostolicam, apostolica doctrina collecta in nomine Christi. Ecclesiam deniq; Hierosolymitanam, Antiochenam, Alexandrinam, Romanam, Asiaticam, Aphricanam, Europeam, Orientalem, Occidentalem, &c. Et hæc tamen omnes ueluti membra unius corporis sub unico capite Christo (solus enim Christus est caput Ecclesiæ suæ, non tantum triumphantis, sed & militantis) unicam duntaxat cōstituunt catholicam Ecclesiam; in qua non reperiuntur uel hæreses uel schismata, ideo etiam appellatur orthodoxa, nimirum à recta & uera opinione, sententia, fide atq; doctrina. In sola enim Ecclesia est uera fides, & extra Ecclesiam dei nulla est ueritas, nulla salus.

Confitemur autem hoc articulo, quod omnes fideles per totum terrarum orbem dispersi, sed & qui hodie uiuunt in cœlis; quotquot inquam saluati sunt, & in finem usq; seculi nascentur saluandi, unum sint corpus, nacti societatem & participationē cum Deo & inter se mutuam. Et quoniam nemo cum Deo uniri potest, nisi & ipse sanctus atq; purus sit, quemadmodum Deus sanctus & purus est, ideo credimus sanctam esse Ecclesiam, id est, sanctificatam per deum patrem in sanguine filij & dono spiritus sancti. Testimonia plura audiui in superioribus concionibus. Vnum Pauli satis fuerit quod ad Ephes. ita legitur scriptum, Christus dilexit Ecclesiam, & tradidit semetipsum pro ea, ut illam sanctificaret mundatā lauacro aquæ per uerbum, ut adhiberet eam sibi ipsi gloriosam Ecclesiam, non habentem maculam aut rugam, &c. Ex quibus uerbis etiam hoc intelligimus, Ecclesiam

fiat appellari incontaminatam & prorsus puram, non propter ipsam, sed propter Christum. Ita enim sancta est Ecclesia Christi ut quotidie proficiat, nondū quoad in terris uiuit, perfecta sit. In Christo tamen eius sanctitas perfectissima est. Quo nimirum pertinet illa egregia domini uox, Qui lotus est non opus habet, nisi ut pedes lauet, sed est mundus totus. Propter Christum enim lauante sanguine suo, fideles perfecte mundati sunt, sed quia caro repugnat quoad uiuitur in terris spiritui, opus est pijs pedes, id est, carnis reliquias & maculas ex quotidiana mundi conuersatione aspersas, eluere atq; extergere spiritu ac fide.

Sed quorsum pertinet quod appenditur, Sanctorum communionem? Ea uerba non habentur neq; apud Cyprianum, neq; apud Augustinum, neq; ab eis exponuntur. Vnde uerisimile est adiecta esse interpretandi gratia: ut enim apparet Ecclesiam catholicam esse societatem & contubernium fidelium, adiecit Sanctorum communionem, id est, quæ Ecclesia est cōmunio sanctorum. Sanctos appellauit Paulus fideles sanguine & spiritu dei sanctificatos. Sed & Communionis uocabulum plurimum habet euidentiae & consolationis. Primò enim innuit inter nos & deum esse communionem, id est, societatem & participationem, & per consequens omnium bonorum cœlestium communicationem. Deinde intelligimus societatem & participatum esse nobis cum omnibus sanctis, cum in cœlis tum in terris uiuentibus. Horum enim membra sumus sub uno capite Christo. Ioannes enim Apostolus dicit, Quod uidimus & audiuius annūciamus uobis, ut & uos societatem habeatis nobiscum, & societas uestra sit cum patre & filio eius Iesu Christo. Huc pertinet similitudo elegans de corpore & membris sub uno capite, copiose tractata ab Apostolo Paulo. Quis uerò satis digne præstantiam doni beneficij Dei explicuerit, quòd nos sumus participes dei cum quo arctissimam conjunctionem imò cōmunionem habemus cum omnibus bonis cœlestibus? Quid iucundius auditu est, quàm quòd omnes sancti tam in cœlis quàm in terris fratres nostri sunt, & nos istorum membra participesq; & socij sumus? Benedictus Deus qui nobis in Christo tam liberaliter benedixit. In hunc locum pertinet tractatio sacramentorum, de quibus aliàs, sicut & de Ecclesia aliàs dicemus copiosius. Hæc ad institutum præsens sufficiunt. Abundè enim satis fidei in deum patrem, filium, & spiritum sanctum fructum exprimunt & exponunt, nempe quòd communionem habemus cum deo & cum omnibus sanctis, & quòd in hac societate sanctificamur ab omnibus inquinamentis, purgati iam & sancti in Christo Domino nostro.

Sequitur articulus fidei decimus, R E M I S S I O N E M P E C C A T O R V M. Fructus alter fidei in deum patrem, filium, & spiritum sanctum exponitur, remissio uidelicet peccatorum, quæ tametsi in sanctificatione superioris articuli sit comprehensa, uiuidius tamen exprimitur. Extra Ecclesiam ceu arcam Noe nulla est salus: in Ecclesia autem, in societate inquam Christi & sanctorum, est plenaria remissio omnium peccatorum. Hæc ut rectius intelligantur, digeremus in aliquot capita.

Principio necesse est, omnes agnoscamus & confiteamur nos esse peccatores, ac natura proprioq; nostro merito filios iræ & condemnationis. Nam non frustra neq; uanè mendacem appellauit beatus Ioannes omnem qui negat se esse peccatorem. Et qui corda hominum nouit Deus, iussit nos ad extremum usq; halitum orare, Remitte nobis debita nostra. Sed & in Euangelio duo elegantia habemus confitentium deo peccata sua apertè exempla, filij uidelicet prodigi, & publicani apud Lucam. Teneamus ergo nos omnes esse peccatores, sicut & Paulus docuit

Quomodo Ec-
clesia sancta,

Sanctorum
communio.

Articulus fidei
dei 10.

Agnitio &
confessio pecca-
torum.

DE SYMBOLO APOST.

Imò euicit ad Rom. 3. cap. & confiteamur Deo ingenue peccata nostra cum Dauid Psal. 13. & 51. dicentes, Peccatum meum tibi notum feci, & iniquitatem meam non abscondi. Dixi: confitebor aduersum me iniquitatem meam, & tu remisisti iniquitatem peccati mei. Miserere mei Deus secundum magnam misericordiam tuam, &c. Notus est Psalmus.

Remittuntur à
deo peccata nō
propter merita
nostra, sed pro-
pter Christum.

Deinde credamus nobis peccata illa nostra condonata & remissa esse à Deo, non propter illam nostram peccatorum agnitionem & confessionem, sed propter meritum ac sanguinem filij Dei: non propter opera & merita nostra, sed propter ueritatem & misericordiam siue gratiam Dei. Disertè enim profiteamur, Credo remissionem peccatorum: nō dicimus, Emo, aut muneribus impetro, aut operibus assequor remissionem peccatorum, sed, Credo remissionem peccatorum. Ac Remissionis uocabulum gratuitam condonationē significat, metaphora tracta à creditoribus & debitoribus. Remittit enim debitori creditor cum ille non est soluendo: ergo remissio est donatio: iuxta illud saluatoris in Euangelio, Duo debitores erant cuidam creditori: cumq; illi non essent soluendo, donauit utrisq;. Huc pertinet illud ex oratione dominica, Et remitte nobis debita nostra. Debita enim nostra peccata sunt, ea nobis remitti, id est, condonari postulamus. Huc pertinent illa sancti Pauli uerba, Ei qui operatur, merces non imputatur secundum gratiā, sed secundum debitum. Porro ei qui non operatur, sed credit in eum qui iustificat impium, imputatur fides sua ad iustitiam. Quemadmodum & Dauid explicat beatificationem hominis cui deus imputat iustitiā absq; operibus, Beati quorum remissæ sunt iniquitates, & quorum obiecta sunt peccata. Beatus uir cui non imputabit dominus peccatum. Proinde gratis quidem quod nos quidē attinet, qui non habemus quod rependamus, quantum uerò ad iustitiam dei, propter meritum & satisfactionem Christi, condonantur nobis peccata.

Remittuntur
peccata omnia.

Condonantur autem peccata, non paucorum, non unius aut alterius seculi, non certa & numerata, sed omnium hominum, omnium seculorum, & tota multitudo peccatorum, quicquid est & dicitur peccatum, siue originale sit, siue actuale, siue alienum sit, breuiter omnia peccata remittuntur nobis. Id quod sic intelligimus, unicam uidelicet Christi hostiam satis esse efficacem ad abluenda omnia omnium peccatorum fide ad thronum gratiæ accurrentium peccata. Ergo nō docemus homines peccare, quia iam olim pro peccatis satisfecit dominus: sed si quis peccauerit, docemus illum bene sperare non desperare, & accedere ad thronum gratiæ. Christum enim residentem ad dextram patris, esse agnum illum dei qui tollat peccata mundi. Et significanter quidem in symbolo ponitur, Credo remissionem peccatorum, & non peccati. Peccatorum enim dicētes, agnoscimus deum remittere omnia peccata. Nam ut Pauli testimonia ad Rom. 3. & 5. non proferamus, sufficient illa Ioannis Apostoli & Euangelistæ testificantis in epistola illa sua, atq; dicentis, Et sanguis Iesu Christi filij dei emundat nos ab omni peccato. En ab omni peccato dixit. Ab omni inquam qui dicit, nullum excludit, nisi fortè quod exclusit ipse dominus, peccatum in spiritum sanctum, pro quo & Ioannes ille idē orare prohibuit. Rursus, Si confitemur peccata nostra, ait idem ille, fidelis est & iustus ut remittat nobis peccata nostra, & emundet nos ab omni iniquitate nostra. Non satis erat Apostolo dixisse, Vt remittat nobis peccata nostra, adiecit insuper ut rem proprijsimè & significantissimè explicaret, Et emundet nos ab omni iniquitate nostra. Rursus ab omni iniquitate dicit. Et quia calumniator aliquis obijcere poterat, Efficit huiusmodi doctrina inertes & segnes homines. Nam homines prætenu gratiæ diuinæ pergent peccare: respondet ergo Ioannes in cap. 2. & ait,

ait. Filioli mei hæc scribo vobis ne peccetis; & si quis peccauerit, aduocatum habemus apud patrem Iesum Christum iustum. Et ipse est propitiatio pro peccatis nostris, non pro nostris autem tantum, sed etiam pro totius mundi. Proinde certum est morte Christi condonari credentibus peccata omnia.

Porro remittit dominus solus peccata. Solius enim Dei gloria est remittere peccata, & ex iniustis facere iustos. Ergo quanquam homines dicantur remittere, id tamen de ministerio non potestate intelligendum est. Annunciat minister credenti propter Christum remissa esse peccata; nec fallit; Deus enim uerè peccata remittit credentibus; iuxta illud, Quorum remisistis peccata, remittuntur eis. Id fit quotiescunq; annunciatu uerbum euangelij, ut nihil necesse sit comminisci, confessione auriculari & priuata sacerdotis absolutione ad condonationem peccatorum opus esse. Nam ut auricularis confessio non fuit usurpata sanctis ante aduentum Christi, ita non legimus Apostolos priuatas audiuisse confessiones, uel priuatas absolutiones usurpasse in Ecclesia Christi. Satis est cōfiteri Deo inspicienti corda nostra, & idcirco legitimo confessionario peccata nostra. Satis est, si iuxta uerbum S. Iacobi alter alteri fateatur delicta & offensas, precemurq; cōdonationem, & mutuò redeamus in gratiam. Satis est audiuisse Euangelium, promittenti nobis per Christum remissionem peccatorum si credamus. Credamus ergo remissionem peccatorum, orantes interim dominum ut is & fidem concedat & augeat. Hæc quondam & in primitiua Ecclesia satis fuerunt efficacia ad consequendam indulgentiam & plenariam peccatorum remissionem; sufficiunt haud dubiè etiam hodie.

Solus Deus nō homo remittit peccata.

Præterea remittit dominus nobis peccata, non ut non sint & reliquias in carne nostra ceu aculeum non relinquant, sed ne imputentur nobis ad condemnationem. Hæret & exerit sese cōcupiscentia in carne nostra, spirituiq; Dei bono repugnat uel in sanctis, quoad uixerimus in hisce terris. Multa ergo hîc opus uigilia, multis ieiunijs quibus carni detrahamus fomēta mali, multis precibus quibus imploremus Dei auxilium ne uincamur à malo. Quòd si quis succubuerit tentationi, ne præbeat se irretiendum diabolo, resurgat per pœnitentiam, recurrat ad Christum, credens sibi per mortem Christi hunc quoq; lapsum esse condonatum. Recurret autem toties, quoties à concupiscentia & peccato fuerit superatus. Huc enim pertinent omnes adhortationes prophetarum & Apostolorū suadentes conuersionem ad Dominum.

Quomodo remittantur peccata.

Peccata deniq; nostra ita condonat dominus, ut eorum planè recordari nolit. Ita enim prædixit per Ieremiam in cap. 31. Ergo non animaduertit in nos. Non enim culpam modò, sed & pœnam peccati cōdonauit. Quòd autem non rarò flagellis suis nos cædit, & cædit quidem propter peccata, sicuti clarè exprimit scriptura sancta, id quidem non fit ut afflictione nostra satisfaciamus pro peccatis commissis, ita enim euacuaretur mors Christi: sed flagellando castigat nos Dominus, & flagellando declarat se non probare peccata quæ designauimus, ac ipse gratis condonauit: flagellando item exempla statuit nos alijs, ne ipsi quoq; peccent; sed & nobis ipsis occasionem peccandi amputat, & cruce nostram exercet patientiā. Hæc hætenus de Remissione peccatorum. De qua nonnulla differuimus etiam in sermone de Fide iustificāte, et alijs.

Nos non satisfacimus pro pœna.

Articulus fidei undecimus hic est, CARNIS RESURRECTIO. Duo articuli postremi, hic & duodecimus, fructum fidei præstantissimum summamq; totius perfectionis succincta breuitate concludunt, finem inquam fidei, æternam uitam, & totius hominis plenam & perfectam salutē profitentes. Totus enim homo saluabitur cū anima tum corpore. Nam ut homo anima & cor-

Articulus fidei dei 11.

pore perierat, ita anima & corpore restitui debebat, adeoq; & per Christum restitutus est. Anima quidem hominis spiritus est, neq; interit unquam: corpus terrenum est, moritur ergo ac computrescit. Quare multi arbitrantur interire corpora, neq; ea unquam uel gaudiorum uel pœnarum fore consortia. Diuersum uerò hoc articulo profitemur, confitentes corpora illa nostra adeoq; carnem nostram resurgere & ingredi in uitam æternam.

Carnis resurrectionis.

De uocabulo resurrectionis diximus, ubi explicaremus articulum illum, Tertia die resurrexit ex mortuis. Caro uerò multò significantius huius nostræ carnis resurrectionem, quàm si corpus diceremus, exprimit. Certè Cyprianus author est in aliquot Orientis Ecclesijs hunc articulum sic fuisse pronūciatum, Credo huius carnis resurrectionem. Nam & Augustinus De fide & symbolo cap. 10. scriptum reliquit, Hæc uisibilis quæ caro propriè dicitur, sine dubitatione credenda est resurgere. Hanc uidetur Paulus Apostolus ceu digito suo ostendere cum ait, Oportet corruptibile hoc induere incorruptionem. Cum enim dicit, Hoc, in eam quasi digitum intendit. Hæc ille. Sed & diuus Hieronymus urget Ioan. Hierosolymitanum episcopum, ut palàm confiteatur carnis non tantum corporis resurrectionem. Alia, ait, carnis, alia corporis definitio est. Omnis caro est corpus: nō omne corpus est caro. Caro est propriè quæ sanguine, uenis, ossibus neruisq; cōstruitur. Corpus quanquam & caro dicatur, interdum tamen uel ætherium uel ærium nominatur, quod tactui uisuiq; non subiaceret: & plerumq; uisibile est atq; tangibile. Paries est corpus, sed non caro, &c. Hæc Hieron. Credamus itaq; corpora hominum quæ de terra sumpta sunt, & quæ homines hic uiuentes gerunt, in quibus uiuunt & uersantur, quæ moriuntur, inq; cinerem & puluerem abeunt, rursus reuiuiscere.

An resurgant corpora illa ipsa quæ corrumpuntur.

Sed rogas quomodo possit hæc caro redacta in fauillam & puluerem adeoq; in nihilum, resurgere in substantia & forma pristina: ueluti cum à ferarum dentibus dilacerata, aut ignium flammis prorsus absumpta est, cumq; in monumentis nō nisi tenuissimus & rarissimus reperitur puluisculus. Relego te ad omnipotentiam Dei, quam & Apostolus citauit dicens, Christus transfigurauit corpus nostrum humile ut conforme reddat corpori suo glorioso, secundum efficaciam qua potest etiam sibi subijcere omnia. Proinde qui ab initio cum nullus omnino esset homo in mundo, hominem potuit ex puluere terræ producere, tametsi idem homo iterum resoluatur in id unde sumptus est, nempe terrā, iuxta quod dixit, Puluis es & in puluerem reuerteris, certè poterit idem ille Deus etiam in fine seculi hominem rursus excitare e terra. Disertè enim dixit in Euangelio Dominus, Veniet hora in qua omnes qui in monumentis sunt audient uocem filij Dei, & prodibunt, qui bona fecerunt in resurrectionem uitæ, qui uerò mala egerunt in resurrectionem iudicij. Iam uerò fides nostra certa concipit persuasionem, ut Apostolus ait, quod is qui promisit, idem potens est & præstare. Sunt præterea uiua huius rei exempla, sunt clarissima sanctæ scripturæ testimonia. Ionas deglutitur à ceto in Syriaco mari, at idem post triduum, ad declarandam carnis resurrectionem ueram, e uisceribus beluæ euomitur uiuus in aridam. Proinde iam non amplius creditu difficile est, quod in theologia domini mare dicitur reddere mortuos suos. Nō potuit impetus ignis nocere tribus socijs Danielis, imò rabies ferarum contra naturam pepercit ipsi Danieli: ergo quid mirum, si potentia Dei ne hodie quidem resistere possit uis ignis & rabies ferarum, creaturas suas excitare uolenti? An non triduo iam in sepulchro iacentem imò & foetentem Lazarum excitauit Dominus noster Christus? An non ipse confRACTA mortis tyrannide, tertia die resurrexit ex mortuis,

mortuis, & resurrexit quidem eadem carnis substantia & corporis forma, qua penderat in cruce, & sublatus è cruce fuerat sepultus? In Christum, qui dicitur primogenitus ex mortuis, meritò respicimus, quoties cogitamus qualis futura sit resurrectio carnis nostræ. Ad eum enim modum resurgent membra, quemadmodum resurrexit caput: non quidem tertia die à morte nostra, sed nostro modo & ordine in die illa última: uero tamen & nostro illo corpore in quo iam uiuimus.

Testimonia de resurrectione carnis nostræ aliquot subiungemus. Profitetur *Testimoniare resurrectionis ueræ.* Iob fidem suam de resurrectione mortuorum in maxima sua infirmitate, afflictione & aegritudine, ac dicit, Scio quòd redemptor meus uiuit, & in nouissimo die de terra surrecturus sum. Et rursus circundabor pelle mea, & in carne mea uidebo Deum: quem uisurus sum ego ipse, & oculi mei conspecturi sunt, & non alius. Reposita est hæc spes in sinu meo. Clarissimum est hoc testimonium non indigens ulla copiosiore expositione.

Non minus clara sunt testimonia Isaia 26. Ezech. 37. Psal. 15. Matth. 22. Ioan. cap. 5. 6. 11. In Actis nullibi non inculcatur resurrectio mortuorum. S. Paulus in 1. ad Corinth. 15. cap. plenè de hac resurrectione disputat. In 2. Epistola cap. 4. Semper nos qui uiuimus, inquit, in mortem tradimur propter Iesum, ut & uita Iesu manifestetur in mortali carne nostra. En quid poterat dici clarius, quàm uitam Christi manifestandam esse in mortali carne nostra? Mox enim subiungit, Scientes quòd qui suscitauit Dominum Iesum, nos quoque per Iesum suscitabit. Et in 5. cap. Omnes nos manifestari oportet, ait, coram tribunali Christi, ut reportet unusquisque ea quæ fiunt per corpus, iuxta id quod fecit, siue id bonum sit siue malum. Corpora ergo nostra uera resurgent in die iudicii.

Explicandum porrò erit charitati uestræ, quomodo resurrectura sint corpora nostra, & qualia in resurrectione futura. In fine & exitu seculorū siue huius mundi, ueniet in iudiciū magna cum maiestate Dominus noster Iesus Christus, & tunc quidem quos dies illa deprehendet uiuos, in puncto temporis mutabuntur, mortui autem à primo homine ad ultimum, uniuersi inquam resurgent, ac in propria carne stabunt inter uiuos illos immutatos ante tribunal Christi, ultimam illam expectantes sententiam. Id quod Paulus hisce uerbis exposuit, Ecce mysterium uobis dico, Non omnes quidem dormiemus, omnes tamen immutabimur in puncto temporis, in momento oculi, per extremam tubam. Canet enim, & mortui resurgent incorruptibiles: & nos immutabimur. Oportet enim corruptibile hoc induere incorruptibilitatem, & mortale hoc induere immortalitatem.

Ex hoc claro Apostoli testimonio colligere licet etiā qualia sint futura corpora nostra ex resurrectione: non alia quidē erunt corpora nostra ex resurrectione quàm nunc sint, nisi quòd ab omni corruptione & affectione corruptibili erunt aliena. Dicit enim Apostolus, Mortui resurgent. Item, Nos immutabimur. Rursum emphaticè & *ἀκατάκλητος* ipsamet corpora nostra quæ nunc circunferimus demonstrans, dicit, Hoc corruptibile, Hoc mortale, Hoc, inquam, corpus & non aliud, sicut & Iob testificatus est, resurget: resurget autem incorruptibile quod aliquando erat corruptibile: resurget immortale, quod ante resurrectionem erat mortale. Liberabitur ergo in resurrectione corpus nostrum ab omni affectione praua & passibili, ab omni corruptione: non autem annihilabitur eius substantia, non conuertetur in spiritum, non erit à sua figura alienum. Et hoc quidem corpus propter purificationem & defæcationem illam, imò propter dotes cælestes & diuinas, appellatur & Corpus spirituale, & corpus gloriosum ac clarificatum.

Corpus gloriosum.

Paulus enim ad Philippen. 3. Conuersatio nostra, inquit, in cœlis est, ex quo & seruatores expectamus Dominum Iesum Christum, qui transfigurabit corpus nostrum humile, ut conforme reddat corpori suo glorioso. Ecce resurrectionem nostram ex mortuis appellat Apostolus non transubstantiationem aut annihilationem corporis nostri, sed transfigurationem: deinde corpus transfiguratum quale sit ostendens, nominat gloriosum, non utique alienum ab omni figura aut exemptum forma, sed auctum gloria; imò ipsum Domini Iesu corpus nobis proponit, in quo ostendit qualia sint futura corpora nostra in gloria. Diserte enim dicit, Conforme reddet corpus nostrum humile corpori suo glorioso. Videamus ergo quale habuerit corpus à resurrectione Dominus noster; non erat hoc conuersum uel in spiritum, uel annihilatum, uel nulla forma & figura cognobile. Manus enim & pedes ostendens fixura clauorum insignes dicit, Videte quia ego ipse sum, nimirum eodem indutus corpore quo pependi in cruce. Clarius enim loquens & corpus suum à spiritali substantia asserens, ait, Spiritus carnem & ossa non habet sicut uidetis me habere. Habet ergo clarificatum corpus, carnem & ossa, nec alia membra quam quæ habuit dum nondum fuisset clarificatum. Ideò enim & Thomæ palpandum & contrectandum præbuit idem Dominus & latus & cicatrices quinque uulnere, ne quid dubitarem de ueritate corporis resuscitati. Edit cum discipulis & bibit, sicuti Petrus testatur coram Cornelio in Actis, ut appareret omnibus illud ipsum corpus resurrexisse quod ceciderat.

Iam etsi hoc corpus loco sit circumscriptum, non per omnia diffusum, licet suam habeat dimensionem, figuram seu formam, & suum pondus, sexum & suam naturam, alienum tamen est ab omni passione, corruptione & infirmitate. Nam corpus Domini resuscitatum in horto, non in sepulchro erat, dum hoc uentura uenirent mulieres, his & redeuntibus quidem à sepulchro in itinere occurrerit, in horto Magdalene se uidendum exhibet: æquis passibus contendit Emaum cum duobus illis Emaum petentibus: interea dum apud hos esset corpore suo, non erat apud alios: ubi redissent illi duo ad undecim discipulos, adest & ipse ad uesperam Dominus. Præcedit suos in Galilæam: redit mox in Iudæam, ubi ex monte oliueti corpus eius sublatum est in cœlum. Hæc omnia approbant corporis Christi ueritatem. Sed quoniam hoc corpus quamuis uerum, sui sexus, loci, ingenij & suæ formæ ac naturæ sit, glorificatum & gloriosum dicitur corpus, pauca dicemus & de gloria illa, quæ uidelicet accedit ueræ corporis resuscitati formæ atque substantiæ.

Gloriosa corpora illustra sunt.

Principio gloria usurpatur in hoc negotio pro lumine atque illustri splendore. Nam & Paulus dicit filios Israel præ gloria uultus Moysis non potuisse oculos intendere in faciem Moysis: ita gloriosum corpus erit illustre & splendens corpus. Huius rei elegans specimen exhibuit Dominus noster uel ante resurrectionem suam, dum discipulis suis qualemcunque gustum futuræ gloriæ uellet propinare, ac idcirco delectos subduceret in montis cuiusdam cacumen, ubi & transformatus est coram ipsis, ita ut species uultus eius splenderet sicut Sol, uestimenta autem eius albicarent ac candida essent tanquam lumen. Eandem quidem corporis substantiam retinuit Dominus, eadem corporis membra: hæc autem sunt transformata. Transformatio autem illa ostenditur fuisse in accidentijs, Accessit enim lux & splendor, ut manente substantia & forma uultus & corporis, uultus & corpus ueluti Sol & lumen rutilarit. Et quamuis resuscitatum Domini corpus non legatur in quadraginta diebus, in quibus se rediuium ostendit discipulis, exersisse aut fuisse de se fulgorem, idcirco propter dispensationem iuxta quam cum discipulis suis

suīs comedit, cū clarificata corpora nullo indigeant alimento: tamen fulget iam, sicuti Ioannes testatur in Apocalypsi cap. I. in cœlis, & spem certam aperiunt nobis sacrae literæ, etiam corpora nostra fore clarificanda in resurrectione. Nam ipse Dominus in Euangelio ex Daniele loquens de die iudicii, Tunc iusti fulgebunt, inquit, uelut Sol in regno patris sui. Hac de causa corpora gloriosa etiam appellantur clarificata, à cœlestis luminis quo illustrantur & ornantur claritate.

Deinde opponitur gloria humilitati. Paulus enim dicit, Transfigurabit corpus nostrum humile, ut conforme reddat corpori suo glorioso. Opponuntur in his uerbis Humilitas & Gloria. Humilitas comprehendit omne quod propter peccatum irrogatum est corpori miseriarum & infirmitatum, passionum & affectionum. Ab illis omnibus repurgantur corpora nostra in resurrectione uitæ: ut iam gloriosa corpora sint corpora defæcata ab omni corruptione, passione, infirmitateq; induta autem perpetuitate & cœlesti sensu & gloria. Apostolus enim, Seminatur in corruptione, inquit, resurgit in incorruptibilitate: seminatur in ignominia, resurgit in gloria: seminatur in infirmitate, resurgit in potentia: seminatur corpus animale, resurgit corpus spirituale. Pollent ergo gloriosa uel clarificata corpora multis dotibus, incorruptibilitate inquam, gloria, potentia ac spiritu uiuificante. Ipse enim Apostolus sese declarans quid intellexerit per animale & spirituale corpus, subiungit, Est corpus animale, est & corpus spirituale: sicut scriptum est, Factus est primus homo in animam uiuentem: extremus homo in spiritum uiuificantem. Deinde adhuc clarius, At non primum quod spirituale, sed quod animale, deinde quod spirituale. Primus homo de terra terrenus: secundus ipse Dominus de cœlo. Qualis terrenus ille, tales & hi qui terreni sunt: & qualis ille cœlestis, tales & hi qui cœlestes sunt. Et quemadmodum gestauimus imaginem terrenam, ita gestabimus & imaginem cœlestis. Proinde appellauit Paulus animale corpus terrenum corpus, quod habemus ab ipso Adamo parente nostro, quod ab anima uegetatur ac uiuit. Spirituale autem corpus appellauit cœleste, quod à Christo & ad similitudinem corporis Christi habemus, quod licet uerum corpus & uera caro sit, per spiritum tamen Christi uiuificatur & seruetur, nec ullis indiget animæ uegetatiuæ potentijs.

Gloriosa corpora liberata sunt humilitate.

Animale et spirituale corpus.

Quanquam ergo hæc ipsa corpora nostra & membra eadem quæ nunc gerimus, futura sint post resurrectionem in cœlo, quia tamen clarificata sunt, & ab omni corruptibilitate ac animali sensu purificata, certè non erit ullus animalis corruptibilisq; uel sensus uel affectus adeoq; carnalis corporis aut membrorum usus. Id quod Dominus contra Sadducæos in cœlis nuptias imaginantes, aut hoc absurdo potius resurrectionem suggillantes, asserit & ait, Filij huius seculi ducunt uxores & nuptum dant: illi uerò qui digni habebuntur seculo illo & resurrectione ex mortuis, neq; ducunt uxores, neq; nuptum dant: neque enim ultra mori possunt. Aequales enim angelis sunt & filij sunt Dei, cū sint filij resurrectionis. Ad quem modum & Paulus, Caro & sanguis ait, regni Dei hæreditatem consequi non possunt. Id ne quis de substantia carnis intelligeret, per interpretationem subdit, Neque corruptio incorruptibilitatis hæreditatem accipiet. Proinde caro & sanguis, id est, carnales affectiones & cupiditates non erunt in electis agentibus in cœlo. Nam cœlestia gaudia aliena sunt à gaudijs terrestribus, adeoq; sunt alterius naturæ, ut huiusmodi corruptos hæredes non admittant, ideoq; prius corpora corruptibilia ab omni corruptione purgari adeoq; clarificari oporteat. Errant Turci expectantes gaudia terrestria.

Resurgent & impiorum corpora.

Porro resurgent & impiorum corpora. Paulus enim in Actis, Credo, inquit,

omnibus quæ in lege & prophetis scripta sunt, spem habens in Deum fore, quem admodum ipsi expectant resurrectionem mortuorum, simul iustorum & iniustorum. En iniustorum quoque dicit Apostolus Cæterum non tollentur in resurrectione ex horum corporibus infirmitas, ignominia, corruptio & miseria: interim uero hoc ipsum corpus quod resurgit in ignominia, iudicio & potentia Dei confirmabitur in ignominia & corruptione, adeoque ad æterna tormenta perferenda perpetuabitur, immortaleque & incorruptibile in morte & corruptione reddetur: ut quem admodum corpora quædam reperiuntur in terris, quæ in ignibus perdurant, ita non atterentur neque frangentur ullis tormentis maledicta impiorum corpora: subinde enim ac in momenta vires nouas patiendi accipient, luenteque hoc modo commeritas pœnas sine fine in secula seculorum. Dominus enim in Euangelio, Qui mala, inquit, egerunt, resurgent in resurrectionem condemnationis, id est, in perseverantem perpetuamque condemnationem. Nam Daniel prior dixit, Et multitudo ex ijs qui dormiunt in puluere terræ euigilabunt, hi ad uitam perpetuam, illi uero ad probra & contemptum æternum. Rursus enim in Euangelio dicit Dominus, Illorum uermis non moritur, & ignis non extinguitur. Nam iisdem uerbis prior usus est Isaias in cap. 66. Semper ergo illa Domini uox retinenda erit in cordibus nostris, Illum metuite qui potest & animam & corpus perdere in gehenna. Hæc hætenus de resurrectione carnis.

Articulus fidei
dei 12.

Vita æterna.

Ultimus fidei nostræ articulus omnia feliciter concludens hic est, **ET VITAM AETERNAM.** Audiuius & intelleximus animas hominū esse immortales, insuper & corpora nostra resurgere in fine mundi. Hoc nos credere professi sumus. Sequitur ergo in calce Symboli, quo anima illa perpetua & corpus resuscitatum sint peruentura. Proitemur itaque, Et uitam æternam, uidelicet credo me corpore & anima consecuturum & uicturum. Et æternitas quidem perpetua est, nec admittit ullum finem, sicut modò declaratum est diuinæ scripturæ testimonijs.

Porro uitæ huius participes sunt animæ simul atque migrant à corporibus, Domino ipso testante, Qui credit in filium Dei, in iudicium non ueniet, sed transiit à morte in uitam. Corpora uero sepeliuntur & computrescunt, interim illa ipsa non sunt expertia uitæ. Sed tum demum recipiuntur in æternam uitam, cum post diem iudicii excitata obuiam Christo rapiuntur in aëra, ut semper sint cum Domino. Tunc enim animæ e cœlis redeunt ad sua corpora, ut totus perfectus & plenus homo anima & corpore uiuat in æternum. Nam anima Christi in cruce morientis migravit ex templo in paradysum, tertia uero die rediit ad corpus, quod resurrexit & ascendit in cœlum. Quemadmodum ergo capiti obtigit uita æterna, ita omnibus & singulis Christi membris eadem obueniet.

Qualis sit uita
æterna.

Cum autem Paulus dicat ex Isaiâ, Quæ oculus non uidit, & auris non audiuit, & in cor hominis non ascenderunt, ea præparauit Dominus diligentibus se, arbitror ego si omnia de uita æterna dicta fuerint, quæ omnium hominum omniumque seculorū ora profari potuerint, uix minimam eius particulam fuisse & esse delibatam. Nam utcumque disertis & tropicis uerbis, allusionibus & ænigmatibus scriptura uitam & gaudia illa adumbrat euidentissime, modica tamen sunt reuera illa omnia, donec illa dies uenerit qua ipsum Deum conditorem omnium in sua gloria, Christum seruatorem nostrum in sua maiestate, omnes denique beatos spiritus, angelos, patriarchas, prophetas, Apostolos, martyres, patres nostros, & omnem gentem nostram, & omnem exercitū cœlestem, omnemque illam gloriam diuinam & cœlestem ineffabili cum gaudio uiderimus. Verissime ergo dixit Aurelius Augustinus

Augustinus libro de ciuitate Dei 22. cap. 29. Cum ex me quaeritur quid acturi sint sancti in illo corpore spiritali: non dico quod iam uideo, sed quod credo. Dico itaque quod uiuuri sint Deum in ipso corpore. Et iterum, Illa actio uel quies atque otium quale futurum sit, si uerum uelim dicere, nescio. Pax enim Dei superat omnem intellectum. Breuiter uidebimus ipsum Deum de facie ad faciem, laudabimus Deum in secula seculorum, fruemur Deo ad satietatem omni carentem fastidio. Et facies Dei non est uultus ille qui in nobis apparet, sed reuelatio iucundissima Dei, & fruitio quam nulla digne satis explicari mortalibus lingua. Age ergo credamus & uiuamus, charissimi fratres, ut ubi hinc migrauerimus, re ipsa experiamur ineffabilia uitae futurae & aeternae gaudia quae hodie credimus.

Hactenus enim fidei Christianae fructum & finem per quatuor articulos ultimos exposuimus. Tendit fides in unum Deum, patrem, & filium, & spiritum sanctum, qui fideles sanctificat, purgat & consecrat sibi ecclesiam. Haec habet communionem cum Deo & cum omnibus sanctis. Huic condonat Deus omnia delicta. Hanc anima & corpore seruat. Vt enim animae mori non possunt, ita excitat Deus corpora sanctorum, quae & gloriosa reddit & perennia, ut totus homo aeternum uiuat in caelis cum Domino. Cui laus & gloria in secula seculorum, Amen.

De dilectione Dei & proximi.

S E R M O X.

EST AT ut postquam sermonibus aliquot de uera fide disserui, subiungam modò sermonem de dilectione Dei & proximi. Nam sermone quarto pollicitus sum me dicturum post fidem expositam, de dilectione Dei & proximi: quòd extra fidem & dilectionem expositio scripturarum, ceu extra legitimas & sacras metas, non debeat exorbitare. Quod autem fecistis hactenus, porro facere non desinite, orare, ut haec salutaris doctrina per me iuste tradatur, & à uobis recipiatur multo cum fructu.

Initiò non distinguam curiosè inter charitatem & dilectionem. Vtrunq; enim pro eodem accipiam. Sanctus Augustinus de doctrina Christi. Charitatem uoco, ait, animi motum ad perfruendum Deo propter ipsum, & se atq; proximo propter Deum. Ego itaq; appello dilectionem donum homini coelitus datum, quo ex animo Deum diligit ante & super omnia, proximum uerò tanquàm semetipsum. Proinde oritur dilectio à cœlo, unde infunditur cordibus nostris. Prouehitur autè & augetur partim beneficiorum Dei cōmemoratione & consideratione, partim crebra oratione, item auscultatione & exercitatione uerbi Christi. Quae & ipsa spiritus dona sunt. Apostolus enim Paulus, Dilectio Dei effusa est in corda nostra, ait, per spiritum sanctum qui datus est nobis. Equidem charitas Dei qua is cōplectitur nos, fundamentum est & causa nostrae dilectionis qua Deum amamus, & ex utraque existit dilectio proximi. Apostolus enim dicit, Nos diligimus eum, quoniam is prior dilexit nos. Item, Omnis qui diligit eum qui genuit, diligit & eum qui natus est ex eo.

Inde rursus colligimus, donum hoc dilectionis esse indiuisum, etsi sit geminū. Nam qui uerè diligit Deum, proximum non odit: & tamen propter duplicem respectum, nempe ad Deum & ad proximum, dilectio haec bipertita est. Nam & tabulae diuinæ legis propter geminam dilectionem diuiduntur in duas: quarum prima habet praecepta dilectionis Dei 4. secunda habet praecepta dilectionis proximi 6. De quibus suo loco dicetur. Iam uerò quia alia Dei, alia proximi dilectio est, dicam primò de dilectione Dei, deinde de dilectione proximi. In his duobus

mandatis, ait Dominus, pendent lex & propheta.

Dilectio Dei.

Dilectione Dei Deum amamus, Deo tanquam unico summo & aeterno bono adhaeremus, in ipso nos oblectamus & acquiescimus, nosq; ad uoluntatem eius componimus, in omnibus dilectum respicientes atque desiderantes. Plurima hic simul sunt proposita, quae sigillatim & per partes copiosius paulò exponemus.

Dilectione Dei unimur Deo.

Amamus dilectione Deum. Amamus autem chara & quae uidentur nobis esse expetibilia, & amamus quidem illa non tam propter bonum nostrum, quam quòd nos ipsos totos adamatis coniungere, & quasi perpetuò consecrare dedicareq; desideramus. Ita certè cupimus cum Deo aeternum coniungi, adeoq; & charitate coniungimur cum Deo: iuxta illud Apostoli, Deus charitas est, & qui manet in charitate, in Deo manet, & Deus in eo. Sic autem adhaeremus Deo tanquam unico, summo & aeterno bono, in quo etiam nos oblectamur non uulgariter. In eo acquiescimus, sentientes extra hunc non esse bonum ullum: & in hoc rursus inueniri bona omnia. Proinde non aliud bonum extra Deum amamus. Ac prae dilecto facile fastidimus & calcamus alia in orbe quae uidentur bona omnia: imò superat in nobis Dei dilectio ea quoq; mala quae alioquin uidentur inuicta. Paulum audia-

Dilectione Dei superantur mala omnia.

mus hanc magno spiritu perorantem atq; dicentem, Quis nos separabit à dilectione Dei? num afflictio? num angustia? nū persecutio? num fames? num nuditas? num periculum? num gladius? Quemadmodum scriptū est, Propter te tradimur morti tota die: habitum sumus uelut oues destinatae mactationi. Verum in his omnibus superamus per eum qui dilexit nos. Nam mihi persuasum habeo, quòd neq; mors, neq; uita, neq; angeli, neq; principatus, neq; potestates, neq; instantia, neque futura, neque altitudo, neq; profunditas, neq; ulla creatura alia poterit nos separare à Dilectione Dei quae est in Christo Iesu Domino nostro. Haecenus recensimus uerba Pauli.

Dilectio Dei conformat nos uoluntati Dei.

Dilectio Dei efficit ut nos totos componamus ad eius uoluntatem & instituta, quem diligimus ex animo. Imò iucundum & suauissimum est diligenti Deum, facere quod intelligit gratum esse Deo si fiat. Reueretur dilectum animus diligentis. Nuspiam amouet oculos à dilecto. Desiderat semper & in omnibus dilectum. Gaudet omnino frequenter colloqui cum Deo, & uicissim audire uerba loquentis in scriptura Dei. Dominus enim in Euangelio dicit, Si quis diligit me, sermonem meum seruabit Qui non diligit me, sermones meos non seruat. Item, Manete in dilectione mea. Si praecepta mea seruaueritis, manebitis in dilectione mea, sicut & ego praecepta patris mei seruauī, & maneo in eius dilectione. Rursus, Si quis diligit me, sermonem meum seruabit, & pater meus diliget eum; & ad eum ueniamus, & mansionem apud eum faciemus.

Modus dilectionis Dei.

Sed audiamus porro ipsum Moysen Dei seruum, explicantem atque tradentem nobis modum & rationē dilectionis Dei, quanta scilicet esse debeat in electis. Diliges Dominum Deum tuum, ait, toto corde tuo, & tota anima tua, ac tota uirtute tua. Eadē propè uerba repetijt in Euāgelio Dominus noster, ac dixit, Diliges Dominum Deum tuū ex toto corde tuo, & ex tota anima tua, & ex totis uiribus tuis, & ex tota mente tua. Intelligimus ex his omnium maximam à nobis requiri dilectionem Dei: quippe quae sibi totum hominem quantus quantus est, & omnes partes eius uindicat. Mente homo intelligit. In corde est sedes affectuum & uoluntatis. Vires hominis sunt omnes facultates hominis, ipsa inquam dicta, facta, consilia opes, & tota substantia. Anima deniq; uita est. Haec autem omnia ad diligendum Deum cōuertere iubemur, dum praecipitur Deus diligendus esse ex tota anima, ex totis uiribus, ex tota mente, ex toto corde. Nihil in his omittitur quod non compre-

comprehendatur. Toti sumus Dei, toti ergo diligamus deum. Nihil sit in toto hoc orbe quod deo sit charius, nihil sit in omnibus rebus nostris uel charissimis & præstantissimis, cui parcamus propter deum, quod non propter deum & iuxta os domini relinquamus, expendamus, aut disponamus. Sic enim diligimus deum ante & super omnia, Soli autem adhærere, solum complecti iubemur. Cui enim omnia nostra eaquæ tota debemus, ei omnia nostra & tota quidem syncerè, simpliciter & plenè sunt præstanda. Damnantur hic quicunque & Deum amare, simul & mundum quoque uolunt diligere. Totum requirit cor Dominus, totam mentem, totam animam, & omnes uires, denique quicquid sumus & possidemus: nihil relinquit ergo tibi quod impendas alijs. Quo ergo iure dabis carni, diabolo, dijs alijs uel mundo, quod solius Dei est peculium? Ac solus quidem Deus summus, æternus, maximus, potentissimus, creator, liberator, conseruator, clementissimus, iustissimus & optimus est. Solus præstat, præstitit, & præstare potest hominibus quæcunque ad incolumitatem corporis & animæ pertinent. Solus sufficit homini ad beatè & benè uiuendum Deus: solus ergo diligere meretur Deus, & diligere quidem ante & supra omnia. Hæc dilectio Dei benedicit omnibus hominum casibus & euentibus, ut eis profint, iuxta illud, Diligentibus Deum omnia cooperantur in bonum. Hæc dilectio Dei comprehendit & hoc, ne quem adoremus, colamus, ueneremur, timeamus, inuocemus, ne cui fidamus, obediamus, & adhæreamus, nisi uni & soli Deo, cui debetur omnis gloria.

*Diligamus
Deum super
omnia.*

*Solus diligens
deus.*

Rom. 8.

Priusquam uerò dicamus de dilectione proximi, præmittere necesse est quis sit proximus, de quo uideo quosdam addubitare & hædere ancipites. Sunt enim qui arbitrentur proximos esse consanguineos. Alij putant benefactores suos esse proximos, alienos iudicant quicunque malefaciunt. At dominus noster Iesus Christus ostendit quemlibet etiam inimicum nostrum, qui nostro consilio & auxilio indiget, proximum esse. Fingit enim hominem Iudæum incidisse in latrones, semiuivumque & uulneribus tuberibusque oppletum iacuisse in itinere, & neglectum quidem fuisse à suæ gentis hominibus, Leuita ac sacerdote prætereuntibus, tandè uerò receptum in curam à Samaritano. Erat autem odium maximū inter Iudæos & Samaritanos: nihilominus tamen benefacit hic isti, quod uideret ita res & necessitatem afflictī postulare. Ea uerò applicans suo instituto dominus interrogat illum, qui cupiebat erudiri quisnam esset proximus suus, & ait, Quis horum trium uidetur tibi fuisse proximus illi? Respondit, Qui fecit misericordiā, Ait dominus, Vade & fac tu similiter. Quasi dicat, quemadmodum Samaritanus iudicauit etiā hostem suum esse proximum, & indigenti beneficio beneficium contulit: ita tu quoque reputato quemlibet tua indigentem opera tuum esse proximum, & benefac illi. Ergo secundum scripturā iudicans Aurel. Augustinus dixit, Eum proximum esse intelligimus, cui uel exhibendum est officium misericordiæ si indiget, uel exhibendum esset si indigeret. Heluetij proprijsimè hoc exprimimus, cum proximū nostrum appellamus den nächsten menschen / id est, quemlibet indiscriminatim quem nobis sors obtulerit. Præterea nuncupamus proximū in nostrate lingua der åbenmensch / namlich ein yeder der so wolein mensch ist als wir. Significantes quemlibet hominem siue is sit amicus siue hostis. Huc pertinet illud Lactantij lib. 6. cap. 11. Quid personas eligis? Quid membra inspicis? Pro homine tibi habendus est quisquis precatur, ideo quia te hominem putet. Largire cæcis, debilibus, claudis, destitutis, quibus nisi largiari, moriendum est. Itē, Conseruanda est humanitas, si homines rectè dici uelimus. Conseruare autem humanitatem quid aliud est, quàm diligere hominem quia homo sit & idem quod nos sumus?

*Quis sit pro-
ximus noster.*

*De Do. Christo
lib. 1. cap. 30.*

Certè dominus in Euangelio de dilectione proximi disputās, Diligite, inquit, inimicos uestros, bene precemini deuouentibus uos, benefacite ijs qui uos odio prosequuntur, orate pro illis qui laedunt uos. Item, Omni exigenti à te tribue. Et si diligitis eos qui uos diligunt, quæ uobis est gratia? Nam & peccatores diligunt se diligentes. Proximus est ergo homo quilibet qui nostra indiget opera.

Ordo & modus est in dilectione.

2. Theff. 3.
2. Cor. 8.
Galat. 6.

Hæc interim non efficiunt ne ullus sit in dilectione aut beneficentia ordo, modus aut ratio decens. Rectè enim dixit S. Augustinus de Doct. Christ. lib. 1. cap. 27. Nullus peccator in quantum peccator est, diligendus est. Et 28. cap. Omnes homines æquè diligendi sunt, sed cum omnibus prodesse non possis, his potissimum consulendum est, qui pro locorum, uel temporum, uel quarumlibet rerum opportunitatibus, constrictius tibi quasi quadam sorte iunguntur. Apostolus enim Paulus eadem nos ante augustinum docuit, dicens, Qui non operatur, non edat. Item, Dum tempus habemus operemur bonum, cum erga omnes homines, tum uerò maximè erga domesticos fidei. Et alibi non iubet nos erogare alijs, & interim domi nostræ egere. Imò præcipit cuilibet piè curet domum propriam. Notus est locus in 1. ad Timoth. 5. cap.

Quomodo diligendus sit proximus.

Porro explicato eo quis nam sit proximus noster, uideamus iam quomodo diligendus sit proximus. Diligendus est proximus syncerè & sine furo, ea dilectione qua nosmetipsos diligimus, uel qua nos dilexit Christus. Nam inseruire oportet proximo in omnibus, præstareq; officia beneficentiæ & humanitatis. Quatuor in hac consignatione plenius considerata ueniunt.

Dilectio proximi sit sincera.

Principio requiritur à nobis dilectio proximi sincera, quæ careat omni dolo fraude & furo. Inuenias enim multos qui mellitis compellant uerbis proximos, ac simulant se diligere, quos reuera odiunt, aut blandiloquio decipere, resq; suas conficere cogitant. Apostoli ergo Christi Paulus & Ioannes acriter à dilectione remouent hypocrisim. Ille enim, Dilectio inquit, sit non simulata. Item, Finis præcepti est charitas ex puro corde, & conscientia bona, & fide non simulata. Hic uerò clamat, Filioli mei ne diligamus uerbò neq; lingua, sed opere & ueritate. Porro in hac synceritate comprehendimus alacritatem spontaneam & hilarem, ne quid inuitè aut coactè fiat. Paulus enim dicit, Vnusquisq; agat secundum bonum animi propositum, non ex molestia aut necessitate. Nam hilarem datorem requirit Deus.

Diligamus proximum tanquam nosipsos.

Deinde requiritur à nobis ut proximum diligamus tanquam nosipsos. Dominus enim dixit, Dilige proximum tuum sicut teipsum: nimirum ardentissimè & modis omnibus maximè. Non enim uel ualidior uel uehementior est affectus, quàm amor sui. Neq; uerò uoluit Dominus priores partes dare philautiæ, posteriores dilectioni proximi: sed magis significauit dilectionem ardentissimam, nimirum ut eum affectum quo nos & res nostras prosequimur, eundem inquam alijs impendamus, ut eadem cura, fide, diligentia, eodem ardore & studio alijs benefacere aut mala ab eis arcere pergamus, quo nobis ipsis prouidemus. Vnde dominus alibi quoq; Quod tibi, ait, uelis fieri, feceris alteri: & quod tibi nolis fieri, alteri non feceris. Et duo quidem requirit à nobis Dominus, innocentiam, & beneficentiam. Non enim satis est ne cui noceamus, sed oportet præterea benefacere quantum possumus. Nam & nobis ipsis bene esse cupimus, non tantum mala à nobis arcemus.

Diligamus proximum sicut dilexit nos Christus.

Quòd si nondum satis intelligit c. v. modum dilectionis proximi, expendite obsecro quid loco tertio posuerim, Diligendus est proximus ea dilectione qua nos dominus Christus dilexit. Nam in Euangelio Ioannis dicit dominus, Hoc est præceptum

ceptum meū, ut diligatis uos inuicem, sicut dilexi uos. Habetis modum dilectionis nostræ, proximos diligere oportet sicut Christus dilexit nos. Quomodo autem dilexit nos Christus? Hic in euangelio rursus dicit, Maiorem hac dilectionem nemo habet, ut quis animā suā ponat pro amicis. Proinde modus dilectionis proximi erit, ut animam ponamus pro proximo. Quod si uitam debemus proximo, certē nihil non debemus, cū uita nihil sit hominī prāstantius. Omnium ille iacturam facit, priusquam uitam subiiciat periculo. Proinde Ioannes Apostolus clamat, Per hoc cognouimus charitatem, quoniam ille animam suā pro nobis posuit; & nos debemus animas ponere pro fratribus. Facilia sunt hæc intellectu propter exemplum clarissimum. Oremus ardentē & sedulō dominum ut opere perficiamus, quod ex uerbo Dei clarē iam intelleximus, ne ab eodē Apostolo damnemur dicente, Qui habuerit substantiam mundi, & uiderit fratrem suū egere, & clauerit uiscera sua ab eo, quomodo charitas Dei manet in illo?

Agē explicemus quarto & ultimo loco, quomodo oporteat inferuire proximo in omnibus, prāstareq; officia beneficentiæ, dilectionis & humanitatis. Id eleganter exposuit Dominus illa ipsa parabola, qua docuit nos quis sit proximus non ster. Eadem enim prosequitur breuiter, sed euidenter omnia dilectionis proximi officia. Principiō Samaritanus uiso saucio misericordiā cōmotus est. Requiritur ergo a nobis affectus misericordiæ, quo aliorum calamitates existimemus etiam ad nos pertinere; requiritur cōdolentia animi, iuxta illud Apostoli, Memores este uinctorum tanquam unā cum illis uincti, eorū qui affliguntur tanquam ipsi quoque uersantes in corpore. Deinde accedit Samaritanus, non prāterit, non uerbis lugubribus imprecatur saucio sanitatem, & ad res proprias conficiendas properat. Nam Iacobus Apostolus, Quod si frater aut soror nudi fuerint, inquit, & egen- *Quomodo oporteat inferuire proximo.* tes quotidiano uictu, dicat autem nostrum aliquis illis, Abite in pace, calefcite & saturemini, non tamen dedit illis quæ sunt necessaria corpori, quæ erit utilitas? Samaritanus ergo accedit, deniq; admouet manum, & artem qualemcunq; (quando meliorem non didicerat) profert medicaturus saucio. Nec abhorret a uulnerū liuore, sanie, purulentia & fœtore, ipsius obligat, non reijcit ad alium. Non causatur se non esse medicum: quod poscit necessitas & quod potuit, facit, præsens utens medicaminibus, donec melioribus uti liceat. Vinum & oleum sumpserat secum in uiam, ijs utitur necessitate; & non admodum incommodis quidem illis, cū uinum purget uulnera, oleum leniat. Hinc omnia quæ habet miseri usus concedit, suum etiam genū defraudans. Descendit enim ex iumento cui ineq̃uitarat, & eius usum afflicto concedit. Quin sublatum ē terra suis manibus deficientem, iumento imponit. Ipse deniq; uia dux est, non alijs eius curam committit. Ducit enim cum in proprias aedes non posset, saltem in diuersoriū publicum. Vbi rursus nullis neq; impensis, neq; laboribus parcat. Ipse enim miseri curam agit: quod in diuersorijs publicis languentium res segnius ferē cūrentur. Cæterū dum itineris urgeret necessitas, pecuniam depromit quantū ad reditum usq; eius sufficere putauit, & hanc annumerat hospiti meritorio. Nec eo contentus, cōmendat insuper diligenter miserrum hospiti. Præterea obstringit se pro eo & ait, Si quid in eius curam & necessitatem impenderis ultra summam tibi creditam, nihil tibi peribit. Vbi enim rediero, reddam bona fide omnia. Ergo & reditū pollicetur, & declarat se non quieturum donec saucium uideat incolumem. Habet c. v. in hac parabola domini pulcherrimum & plenissimum dilectionis modum. Totum enim sese Samaritanus proximo indigenti impendit liberalissimē promptissimeq;: totos ergo nos ipsos & omnia nostra debemus proximo, quæ cū ei impendi-

mus, officia dilectionis humanitatisq; præstamus.

Charitatis ingenium.

His subiungemus adhuc aliquot scripturæ testimonia, ex quibus ingenium dilectionis intelligatur plenius, si quid hæcenus allatis deesse uideatur. Paulus ergo ad Corinth. scribens, Charitas patiens est, ait, benigna est, charitas nō inuidet, non est procax, non inflatur, non est fastidiosa, non quærit quæ sua sunt, non irritatur, non cogitat malum, non gaudet de iniustitia, sed congaudet ueritati, omnia suffert, omnia credit, omnia sperat, omnia sustinet. Et iterum ad Romanos scribit idem Apostolus, Dilectio præuenit alios honore, communicat necessitatibus sanctorum, sectatur hospitalitatem, bene loquitur de persecutoribus, persequentibus mala non imprecatur, gaudet cum gaudentibus, flet cum flentibus, accommodat se infirmis. Item, Nemini quicquam debeatis, nisi ut inuicē diligatis. Nam qui diligit alterum, legem expleuit. Siquidem illa, Non cōmittes adulterium, Non occides, Non furaberis, Non falsum testimonium dices, Non cōcupisces, & si quod aliud præceptum, in hoc sermone summatim cōprehenditur: nempe, Diliges proximum tuum sicut teipsum. Dilectio proximo malum non operatur. Consummatio itaq; legis est dilectio.

Charitas impletio legis.

Opera misericordie.

Huc etiā pertinent opera misericordiæ, quæ ut manāt ex dilectione, ita cōmemorantur à domino in euangelio Matthæi, hæc potissimū, Pascere esuriētes, potare sitientes, colligere uagos & hospites, operire uel uestire nudos, uisitare infirmos, uinctos inuiscere & cōsolari. Ad hæc respiciens Lactātius lib. Instit. 6. cap. 12. dicit, Præcipua uirtus est hospitalitas, & alere pauperes. Captiuorum redemptio, magnum quoq; & præclarum iustitiæ opus est. Non minus magnū iustitiæ opus est, pupillos & uiduas, destitutos & auxilio indigentes tueri atq; defendere: quod ubiq; lex diuina præcipit. Aegros quoq; quibus defuerint qui assistant, curandos fouendosq; suscipere, summæ humanitatis & magnæ operationis est. Vltimum illud & maximum pietatis officium est, peregrinorum & pauperum sepultura. Hæc hæcenus de officio humanitatis, quod præstat uera proximi dilectio.

Adhortatio ad charitatem.

Cæterum non satis fuerit, fratres, quod creberrimè nobis repetendum est, intelligere quomodo diligamus proximum, quin potius diligendus est impensissimè. Audiendus Apostolus qui mira orationis uirtute & pulcherrimo, exactissimo, sanctissimoq; Christi exemplo nos omnes ad charitatem proximo præstandā adhortatur & dicit, Si qua igitur consolatio est in Christo, si quod solatium dilectionis, si qua communio spiritus, si qua uiscera ac miserationes, complete meum gaudium, ut similiter affecti sitis, eandem charitatē habentes, unanimes, idem sentientes, ne quid fiat per contentionem aut inanem gloriam, sed per humilitatem animi alium quisq; se præstantiorem existimet, ne sua quisq; spectetis, sed unusquisque quæ sunt aliorum. Is enim affectus sit in uobis, qui fuit & in Christo Iesu, qui cū esset in forma Dei, nō rapinam arbitratus est ut esset æqualis Deo, sed semetipsum inaniuit forma serui sumpta, in similitudine hominum constitutus, & figura repertus ut homo, humiliavit semetipsum, factus obediens usq; ad mortem, mortem autem crucis. Quapropter & Deus illum in summā extulit sublimitatem, ac donauit illi nomen quod est supra omne nomen, ut in nomine Iesu omne se genu flectat, cœlestium, terrestrium, ac infernorum, omnisq; lingua confiteatur quod Dominus sit Iesus Christus ad gloriā Dei patris. Ei soli sit honor & imperium, in secula seculorum, Amen.

Finis primæ Decadis Sermonum.

S E R M O

36

SERMONVM DECAS

SECUNDA, AVTHORE HEINRY

CHO BVLLINGERO.

De Legibus, & primum quidem de lege naturæ, deinde uerò de legibus humanis.

S E R M O I.



V M M A omnium legum est dilectio Dei & proximi, de qua cum summam dictum sit proximo sermone, consequens est ut porro differam sigillatim de Legibus & partibus atque speciebus earum. Inuocemus ergo legum authorem Deum, ut is nos spiritu suo semper dirigat in uia ueritatis ac iustitiæ, per Christum dominum nostrum.

Legem definiuit quidam ex Gentilibus non obscurus author, rationem esse summam in natura insitam, quæ iubeat facienda, prohibeatq; contraria. Et certè Lex aliud non est quàm declaratio diuinæ uoluntatis, præscribens quid facias aut quid omittas. Origo & causa legum est ipse Deus, fons omnis boni, æqui, ueri & iusti. Ergo omnes leges æquæ & bonæ, sunt ex ipso Deo, licet ferè promulgentur proferanturq; per homines. De humanis legibus est consideratio peculiaris.

Nam leges aliæ quidem sunt Diuinæ, aliæ Naturæ, aliæ Humanæ. De Lege diuina dicam in 2. Sermone, iam attingam primum quidem legem Naturæ, deinde legem Humanam.

Lex naturæ est dictamē conscientia, adeoq; directio quædam ab ipso Deo hominum animis & cordibus insita, admonēs quid uel faciant uel omittant. Et Conscientia quidem cognitio est, iudicium & sensus hominis, quo apud semetipsum in animo suo sibi quisq; cuiuslibet rei peractæ uel non peractæ conscius semetipsum uel damnat uel absoluit. Et hic sensus proficiscitur ex Deo, dictante inscribenteq; iudicia sua hominum cordibus & animis. Natura uerò est ingenium cuiusq; rei proprium. Porro ingenium hominis planè corruptū per peccatum, ut cæcum, ita in omnibus est prauum. Deum non nouit, Deum non colit, sed & proximum non diligit, seipsum potius amat, & sua quærit. Vnde nimirū Apostolus dixit nos esse natura filios iræ. Proinde lex naturæ dicta est non eo nomine, quòd in natura uel ingenio hominis ex semetipso sit illuminatio quædam, ratio deprecans ad optima & operatio sancta; sed quòd deus notiones quasdam & principia religionis æqui & boni generalia animis nostris impressit aut insculpsit, quæ quasi insertæ & nobiscum natæ, & idcirco ueluti naturales esse uidentur.

Paulum Apostolum de his testificantem atq; dicentem audiamus. Cùm Gentes quæ legem non habent, ait, natura quæ legis sunt fecerint, eæ legem non habentes sibi ipsis sunt lex, quæ ostendunt opus legis scriptū in cordibus suis: simul attestante illarum conscientia & cogitationibus inter se accusantibus, aut etiam excusantibus, in eo die cū iudicabit Dominus occulta hominū iuxta euangelium meum per Iesum Christum. Duobus argumentis euincit Apostolus Gentes esse peccatores. Principiò enim ne excusarent se quòd non habent legem, ostendit ipsas habere legem, & quia hanc præuaricantur, esse peccatores. Licet enim legem Moysi scriptam non habuerint, fecerunt tamen natura quæ legis sunt. Legis est reuelare dei uoluntatem, quid agas aut quid omittas. Id habent à natura, id est, id norunt ex lege naturæ. Sequitur enim quod hoc exponat, Cū non habent legem,

Quid lex.

Diuisio Legū

*Lex Naturæ.
Conscientia.*

Natura.

*Locus Pauli
Rom. 2. de lege
naturæ.*

ea sibiipsis sunt lex. Nimirum habēt in seipsis quod scriptum est in lege. Sed quomodo habent in seipsis? Sequitur iterum interpretatio, Quippe ostendūt opus legis inscriptum cordibus suis. Quis autem inscribit in corda, nisi solus Deus qui est cordium scrutator? Quid autem inscribit? Opus legis, ipsam inquam legem præcipientem bona & uetantem mala, ut sine lege scripta ex dictamine naturæ, id est, ex impressis à Deo naturæ notionibus intelligāt quid bonum sit, quid malū, quid appetendū, quid fugiendum. Intelligimus ex hisce Apostoli uerbis, quod lex naturæ opponatur legi Dei scriptæ, & ideo lex naturæ dicatur, quia ueluti naturæ insita uidetur. Intelligimus legem naturæ non scriptam, sed insitam, idem habere officium quod legem scriptam, dirigendi uidelicet homines & docēdi, imō & discernendi bonū à malo, iudicandiꝑ peccatum. Intelligimus originem illius legis non existere ex corrupto hominis ingenio, sed ex ipso Deo, qui digito suo cordibus inscribit & naturæ infigit inseritꝑ notiones & regulam iusti, æqui & boni. Deinde producit Apostolus secundum argumentum, quo Gentes peccati cōuincit, à testimonio conscientia. Hæc enim instructa à lege naturæ, malum commissum accusat & damnat; ac una & sola est loco mille testium. Eadem etiam excusat, id est, absoluit, si nihil commissum est contra legem. Quod si in præsentī contemnamus iudiciū conscientia, certè non licebit tunc conscientia accusationes aspernari & præterire, cū Dominus iusto iudicio iudicabit orbem. Ex his autem omnibus consequitur omnes Gentes esse peccatores, quas nisi à peccatis repurget filius Dei communis & unicus totius orbis saluator & liberator, necesse est omnes gentes perire in peccatis suis.

*Duo præcipua
capita legis na-
turæ.*

*Gentes cognos-
uerunt Deum.*

Sed redimus iam ad legem naturæ, cuius duo potissimum commemorantur capita: Alterum, Deum agnoscito & colito; Alterum, societatem & amicitiam inter homines seruato. De priorē hæc habemus Apostoli Christi uerba, Quod de Deo cognosci potest, manifestum est in illis (nimirū Gentibus) Deus enim illis patefecit. Siquidem quæ sunt inuisibilia illius ex creatione mundi, dum per opera intelliguntur, peruidentur, ipsa nempe æterna eius potentia & diuinitas, in hoc ut sint inexcusabiles: propterea quod cū Deum cognouerint, nō ut deum glorificauerunt, neq; grati fuerunt, &c. Et Gentes cognouerunt Deum, imō quicquid cognosci potest de Deo cognouerūt. Sed quo auctore aut præceptore? Deo. Quo modo is docuit, aut ex quo libro docuit? Non ex libris Moysi aut prophetarū manu scriptis, sed ex magno illo libro naturæ. Nam quæ alioqui nō uidentur in Deo, cuius generis sunt æternitas, perpetuitas, uirtus, potentia, maiestas, bonitas, diuinitasꝑ, ea uoluit æstimari ex rebus uisibilibus, nimirum ex rebus conditis. Nam diuinitas Dei æterna cognoscitur ex cōditione hominis, ex cœli motu perpetuo, ex fluminum perpetuitate. Potentissimū esse necesse est illum, qui ista omnia sustinet, qui mouet, uegetat, conseruat in esse omnia, qui nutu concutit orbē. Optimum uerò esse illum quis non uideat, qui Solem oriri finit super bonos & malos? Sed in quem oro finem hæc reuelat Gentibus? Vt agnoscant Deum, glorificēt & colant Deum, ut gratæ sint tanto benefactori. Id quando nō faciunt, inexcusabiles sunt & merito pereunt suo, nimirum propter incredulitatem & ingratitude. Constat autem lege naturæ disertè doceri atq; tradi Deum esse, & hunc quidem agnoscendum atq; colendum.

*Seruanda ami-
citia & socie-
tas hominum.*

De capite posteriore, nempe seruandam esse amicitiam & societatem inter homines, hæc tradit in Euangelio Dominus, Omnia quæcūq; uolueritis ut faciant uobis homines, sic & uos facite illis. Eam sententiam extulit Alexander Seuerus Imperator per contrarium, Quod tibi non uis fieri, alteri ne feceris. Quam usque-
adeo

adeo dilexit, ut in palatio & publicis operibus perscribi iuberet. Porro ad generalem illam legem pertinent hæ quoque, Honestè uiuere, Alterum ne lædite, Suum cuique tribuite, Vitæ commoda tueto, incommoda propulsato. Quoniam uero lex naturæ ab Apostolo opponitur legi Dei scriptæ, ideo necesse est ut illa huic respondeat: uideamus ergo quid proditum sit à Gentium sapientibus & legislatoribus, quod respondeat Decalogo, & quatenus respondeat.

*Lex naturæ
respondet legi
scriptæ.*

Pythagoras apud S. Cyrillum contra Iulianum libro 1. de Deo sic scribit, Deus quidem unus: & ipse non ut quidam suspicantur extra mundi gubernationem, sed in ipso totus in toto circulo omnes generationes considerat, contemperatio existens omnium seculorum, & lux suarum uirtutum, & operum principium omnium, lumen in cælo, & pater omnium, mens & animatio omnium, circulatorum omnium motio. En confitetur Pythagoras unum esse Deum, eumque creatorem, conseruatorem, gubernatoremque omnium, patrem omnium, lumen & uitam omnium. Zaleucus in Proœmio legum suarum hæc scripta reliquit, Omnes qui urbem ac regionem inhabitant, persuasos esse oportet deos esse: quod manifestum fit ex cæli & totius mundi inspectione, rerumque in ipsis dispositione pulcherrima & ordine. Haud enim fortuita aut humana huiusmodi opera putare cõuenit. Deinde colendi honorandique dii sunt, ut bonorum omnium nobis authores quæ aliqua ratione fiunt. Singulos igitur habere & comparare animam quemque suam oportet, ut ab omnibus malis pura sit. Nam ab improbo homine non honoratur Deus, neque sumptibus colitur, neque tragœdijs capitur instar hominis mali, sed uirtute ac instituto bonorum operum & iustorum. Quocirca opus est unumquemque pro uirilibus bonis esse tum factis tum uoluntate, qui modò futurus sit Deo charus, &c. Cicero de Natura deorum 2. lib. Cultus deorum is est optimus, inquit, idemque sanctissimus & castissimus pietatis, ut deos semper pura, integra, incorrupta, & mente & uoce ueneremur. Seneca autem lib. ad Lucill. 5. dicit, Quomodo sint dii colendi solet præcipi. Accendere aliquem lucernas sabbatis prohibeamus, quoniam nec lumine dii indigent, & ne homines quidem delectantur fuligine. Vetemus salutationibus matutinis fungi, & foribus assidere templorum. Humana ambitio istis officijs capitur. Deum colit qui nouit. Vetemus linthea & strigiles Ioui ferri, & speculum tenere Iunoni. Non querit ministros Deus. Quid nisi ipse generi humano ministrat. Vbiq; & omnibus præstò est. Audiat licet quemadmodum seruire in sacrificijs debeat, quam procul resilire à molestis superstitionibus, nunquam factis perfectum erit, nisi qualem debet Deum mente conceperit, omnia habentem, omnia tribuentem, beneficia gratis dantem. Quæ causa est dijs benefaciendi? Natura. Errat quisquis putat illos nocere uelle uel posse: nec accipere iniuriam queunt nec facere. Lædere enim lædique coniunctum est. Summa illa ac pulcherrima omnium natura, quos periculo exemit, nec periculosos quidem fecit. Primus est Deorum cultus, deos credere: deinde reddere illis maiestatem suam, reddere bonitatem sine qua nulla maiestas est. Scire illos esse qui præsident mundo: qui uniuersa ut sua temperant, qui humani generis tutelam gerunt, interdum curiosi singulorum. Hi nec dant malum nec habent. Cæterum castigant quosdam & coercunt & irrogant pœnas, & aliquando spe boni puniunt. Vis deos propitiare? Bonus esto. Satis illos coluit, quisquis imitatus est.

De Deo.

De cultu diuinorum.

In hisce Senecæ uerbis etsi egregijs & religioni ueræ congruis, desidero tamen duo. Prius quod subinde deorum facit mentionem, cum tamen alibi ingenuè fateatur unum modò substantiam esse Deum. Nec ausim asseuerare illum more scripturæ usum. Illa uocat Deum Elohim, quasi tu dicas Deos, propter Trinitatis ad-

*Sententia de
Deo gentili-
um non sunt
integre.*

randæ mysteriū. Interim non nescio doctissimos religionis nostræ viros ex Gentium testimonijs probare voluisse, Gentes quoque agnouisse Trinitatis mysterium. Posterius est, quod non disertè (quantum ego quidem noui) exprimit & docet Seneca cum alijs Gentium sapientibus solidam in Deum fiduciam.

²
Gentes contra
idola.

Porro non fuit apud Romanos ulla in ullis templis imago Dei, annis ab urbe condita plus minus 170. Plutarchus enim in uita Numæ Pompilij scribit, Quæ de Deorum immortalium simulachris etiam Numæ statuit, quàm simillima sunt prorsus Pythagoræ documentis. Nam primum principium ille neque sensui neque perturbationi subiectum, sed mentem inuisibilem & increatam esse censuit. Hic autem Romanos prohibuit existimare imaginem Dei, aut hominis speciem aut animalis habere figuram uel formam. Nec fuit apud eos neque picta neque ficta Dei prius species, sed in prioribus 170. annis, templa quidem ædificabant sacraque tuguria erigebant, simulachrum uerò nullum corporeum faciebant, perinde atque nephas esset deterioribus meliora assimilare, neque aliter quàm intelligētia percipi possit Deus. Eadem testatur de Romanis M. Varro apud Augustinum lib. de Ciuitate Dei 4. cap. 31. Dicit enim Romanos coluisse Deos sine simulachris annos 170. & addit, Quod si adhuc mansisset, castius Dij obseruarentur. Nec dubitat eum locum sic cōcludere ut dicat, Qui primi simulachra populis posuerūt, eos ciuitatibus suis & metum dēpisse & errorem addidisse: prudenter existimans Deos facile posse in simulachrorum stoliditate contemni, &c.

³
Nomen Dei in
summo precio.

Quanti uerò Gentiles æstimauerint nomen Dei, claret ex religione maxima sacramenti siue iuramenti. Historia extat elegans apud Gellium lib. 7. cap. 18. ubi & illud inter alia legitur, Iusiurandum apud Romanos inuiolatè sanctèque habitū seruatumque est: id & moribus legibusque multis ostenditur. Quod si quis conuictum dixisset in Deum apud Gentiles, grauissimæ obnoxius pœnæ reddebatur.

⁴
Sacrorum studiose
Gentes.

Præterea fuerunt Gentibus sua sacra, suæ feriæ ceremoniæque, & sacrorum antistites. Insignes fuerunt Gentium sacerdotes Melchizedek & Iethro. Et quanquam Paulus fateatur id quod Gentes obtulerūt, non Deo obtulisse, sed dæmonijs: quia tamen sacra & ceremonias sacras magni fecerunt, declarauerunt Deum notiones cultus & religionis indere animis hominum, quas deinde corrumpunt falsæ doctrinæ & opiniones conceptæ de Deo & sacrorum ritibus.

⁵
De honorandis
parentibus.

De honorandis parentibus & magistratibus, item de educandis liberis, deque liberorum officio præcepta & sententiæ sunt apud gentium sapientes illustrissimæ. Hierocles inter alia, Si quis, inquit, parentes, secundos ac terrestres quosdam Deos dixerit, non errabit, cum nobis propter uiciniam, si dicere fas est, uel ipsis Dijs honorabiliores sint. Necessariū autem est ita existimare, & perpetua animi promptitudine conandum, ut beneficijs eorum paria faciamus. Quantumuis uerò multa in eorum gratiam fecerimus, semper tamen inferiora erunt omnia quàm esse deberent. Et reliqua. Tempus enim me citius destituet, quàm hæc & alia huc pertinentia commemorem ex Gentibus: neque hoc institui.

⁶
Homicidium et
adulterium.

Contra homicidium, uiolentiam & iniurias latæ sunt leges grauissimæ à Gentibus. Ab iisdem profecta est lex Iulia contra adulteria & nephandos concubitus. Statuerunt egregia decreta de connubijs ritè contrahendis & colendis. Ac uerbum ueritatis disertè indicat Chananæos esse deletos propter incestas nuptias & nephandas libidines, Leuit. 8. Sed & Lycurgus, Solon & Romani contra omnem luxum promulgauere leges sumptuarias: ut iam non commemorem insitum esse naturaliter gignere & nutrire sobolem.

⁷
Furti.

⁸ Contra furta & dolos, contra usuram, de iusta rerum acquisitione & possessione,

hone, item de rerum diuisione & contractibus, habet Ethnici leges pulcherrimas. Celebre est illud Aufonij,

Si turpia lucra

Fanoris & velox inopes usura trucidat.

Veritatem quoque celebrant gentiles omnes: mendacium, detractionem & his similia scelera damnant modis omnibus. Lex 12. tabularum iubet e Tarpeia rupe precipitem dare testem falsum. Charondas uero Catanæus inter alia egregia dicta, Quisq; ait, honestatem ac ueritatem colat, turpitudinem atque mendacium odere. Nam hisce notis uirtus & malitia discernuntur. Quare statim a pueris assuefacere oportet castigando quidem mentiendi studiosos, ueritatis autem amando, ut quod in uirtute optimum & fecundissimum est, animis singulorum innascatur, & quasi in naturam ipsorum conuertatur, &c.

Damnatur item concupiscentia, damnantur & affectus prauis a sapientibus Ethnicorum. Hanc ueluti malorum radicem culpans Satyricus canit,

Inde ferè scelerum causa, nec plura venena

Miscuit aut ferro grassatur sæpius vllum

Humanæ mentis vitium, quàm seua cupido.

Caterum ex his omnibus facile est colligere gentium animis inscriptas esse Dei notiones ac præcepta fugiendorum & appetendorum: quæ interim corruerunt & obscurarunt suis affectatis & uitiatas a carne iudicijs. Proinde Deus præter legem naturæ alias quoque suæ uoluntatis expositiones dedit, nimirum uiuam traditionem patrum, angelorum responsa, oracula, prodigia, leges scriptas per homines sapientissimos & religiosissimos. His omnibus adiuuit Deus legem naturæ. Ergo quæcunque reperiuntur in Ethnicis uera & bona, ad authorem omnis boni Deum sunt referenda: falsa uero, ad corruptam hominis naturam & ad affectus prauos.

In his omnibus inprimis illud obseruandum esse monemus, nos hic loqui de cognitione, non de facultate. Clara utcunque est cognitio legis, sed assensus & uoluntas efficiendique potestas & infirma est & implicatissima. Quanquam ut intellectum illuminari oportere, ita & uires cœlitus concedi necessarium esse contendimus. Nihil hic efficit natura sine gratia. Quod si qui ex Gentibus laudem habent iustitiæ, ut Melchizedek, Iob, Iethro, & alij multi, id quidem non habent ex suis uiribus, sed ex gratia Dei. Sicuti ex historia Iob clarissimis licet colligere argumentis. Ergo si qui ex Gentibus sunt saluati, non per opera naturæ aut merita propria sunt saluati, sed per misericordiam Dei in Christo Domino nostro. Neque uero Lex naturæ insita est hominibus a Deo, ut saluet homines sine gratia & Christo, sed magis ut doceat quid bonum sit quid malum, ut euincat nos esse peccatores & inexcusabiles coram Domino. Paulus certè per legem naturæ Gentes non minus quàm per legem Moysi Iudæos peccati reuincens, demonstrat in solo Christo Dei filio esse iustificationem, uitam & omne bonum. Hæc de lege Naturæ.

Humanæ leges sunt (nam secundo loco de his nos dicturos polliciti sumus) quæ ab hominibus ad conseruationem utilitatemque uel reipub. uel ecclesiæ ordinantur ac promulgantur. Hæ enim diuersi sunt generis. Sunt enim politice leges, sunt ecclesiasticæ & Traditiones humanæ. Politicæ leges sunt, quas magistratus sancit pro ratione locorum, temporum ac hominum, ad conseruandam pacem & honestatem publicam. Huius generis sunt innumera exempla in Iure ciuili & Imperatorum Constitutionibus, maxime Iustiniani. Debent hæc omnes quàm proximè accedere ad leges Dei ac naturæ, nec cum his pugnare, aut habere quicquam impietatis, crudelitatis & tyrannidis. Huiusmodi legibus iubet parere S. Petrus

9
Mendacia.
Falsi testes.

10
Concupiscentia.

Nihil efficit natura sine gratia.

Humanæ leges.
Leges Politicæ.

dicens, Subditi estote omni humanae constitutioni, propter Dominum, siue regi tanquam praecellenti, siue praesidibus, ut qui per eum mittantur ad uindictam quidem nocentium, laudem uero recte agentium. Quanquam enim per ordinationem siue constitutionem intelligat ipsos reges ac magistratus, sicuti ipse altero orationis membro protinus exponit, quia tamen magistratus conditis legibus rempublicam gubernant, ideo aequis legibus nos parere iubet Apostolus. Porro politicae leges aequae & sanctae adiuuant charitatem, tranquillitatem, & hominum societatem conseruant, bonos defendunt, inordinatos redigunt in ordinem, religionem denique non mediocriter iuuant, sed & malas abrogant consuetudines, & proscribunt scelera. Exempla cernere licet in rebus gestis a Nabuchodonosore, Cyro, Dario, Artaxerxe, & ab alijs principibus. Verum alio loco dicetur de Magistratu, eius legibus & officio.

*Ecclesiasticae
leges.*

Ecclesiasticae leges sunt, quae ex uerbo Dei quidem petita, at pro ratione hominum, temporum, locorumque accommodatae, in ecclesia a populo Dei agnoscuntur & usurpantur. Has ecclesiasticas leges non traditiones humanas appello, quod est scripturis diuinis petita non hominum ingenio inuenta & prodita, ab ea usurpantur, quae solius pastoris uocem audit, alienorum non agnoscit. Coit ecclesia ad audiendum uerbum Dei, & ad preces publicas matutinis ac uespertinis adeoque statim horis, prout cuique loco & populo commodum est, idque legis uice est. Habet ecclesia supplicationes, ferias, & ieiunia sub legibus certis. Celebrat ecclesia certis temporibus, certo loco & modo praescripto sacramenta, idque secundum leges & ritum ecclesiae receptum. Baptizat ecclesia infantes. A coena Dominica non remouet mulieres: idque pro lege habet. Iudicat ecclesia per deputatos iudices in causis matrimonij, & habet in his leges certas. Atqui has omnes & his similes alias deducit ex scripturis, & applicat pro aedificatione locis temporibus & hominibus: ut aliquam quidem in uarijs ecclesijs diuersitatem, nullam discordiam uidere liceat.

*Superstitiosae
leges.*

Ceterum habent leges ecclesiasticae modum certum & metas certas, nimirum ne quid fiat aut recipiatur contra uerbum Dei aut alienum a uerbo Dei, contra charitatem & decorum, ne quid nimis aut ne quid minus: denique ut per omnia ualeat haec D. Apostoli regula, Omnia decenter, secundum ordinem & ad aedificationem ecclesiae fiant. Proinde si quis superstitiosas, operosas, & indecoras hominum traditiones a scripturis quoque alienas, sub praetextu ecclesiasticarum legum proferens pijs obtrudere conatus fuerit, probabunt illi ad regulam uerbi Dei imposturam illam ac repellent.

*Traditiones
humanae.*

Restant Traditiones humanae, quae sunt ab hominibus electione propria, ex intentione stulta aut alio ex affectu humano, contra aut citra scripturam diuinam natae, conditae atque inuenta. Cuius quidem generis innumera inuenias exempla, sectas uidelicet, regnum & coelibatum spiritualium, ritus & consuetudines in ecclesia horum multifarias. De his omnibus simpliciter pronunciauit Dominus in Euangelio ex Isaia propheta, & dixit, Quare transgredimini praeceptum Dei propter traditionem uestram? Hypocritae, recte uaticinans de uobis Isaia dixit, Appropinquat mihi populus hic, ore suo & labijs me honorat, ceterum cor eorum procul abest a me: sed frustra me colunt, docentes doctrinas praecepta hominum. Ad ea uero uerba alludens beatus Christi martyr Cyprianus Epistolarum lib. 1. epist. 8. Adulterum est, alt, impium est, sacrilegum est, quodcunque humano furore instituitur, ut dispositio diuina uioletur. Procul ab huiusmodi hominum contagione discite, & sermones eorum ueluti cancrum & pestem fugiendo uitate, praemonente Domino, & dicente, Caeci sunt & duces caecorum. Nam & D. Paulus in epist. ad Titum

Titum, Redarguito illos seueriter, inquit, ut sani sint in fide, non attendentes Iudaicis fabulis & præceptis hominum auersantium ueritatem. Studiò omitto locum Pauli ad Coloss. 2. cap. quòd is omnibus sit cognitissimus.

Nolo charitati uestre operosiore & copiosiore expositione molestus esse. *Epilogus.* Pau- cula enim hæc de legibus naturæ & humanis, politicis inquam, ecclesiasticis & merè humanis traditionibus sufficere arbitror diligentibus & fidelibus, qui domum redeuntes singula apud se diligentius expendunt, lectis etiam scripturarum locis quos frequenter citamus ac religiose excussis. Dominus concedat nobis omnibus, ne unquam admonitiones legis naturalis in animis nostris contemnamus, neue humanis traditionibus implicemur, sed in legibus politicis æquis, & in ecclesiasticis legibus sanctis, legitimè ambulantes, seruiamus Domino. Cui gloria, honor, & imperium, in secula seculorum, Amen.

De Lege Diuina, ac duobus primis primæ tabulæ seu Decalogi præceptis.

S E R M O II.

EX diuina ab ipso Domino Deo nostro promulgata, quid faciamus aut *Lex Dei quid.* omittamus præscribit, requirens obedientiam, ac inobsequentibus interminans interitum. Diuiditur in legem Moralem, Ceremonialem, & Iudicialem. Omnium istarum partium diligentissimus scriptor & expositor est Moses. *Moralis.* Moralis informat mores, adeoque uirtutum formas tradit, demonstrans quantam à nobis Deus iustitiam, sanctimoniam, obedientiam, & perfectionem requirat. *Ceremonialis.* Ceremoniales leges sunt, quæ præcipiunt de ritibus sacris seu ecclesiasticis, denique de personis & rebus ministrantibus & destinatis sacris. *Iudicialis.* Leges autem Iudiciales præcipiunt de rebus ciuilibus seu forensibus, de pace publica, æquitate & honestate. Et de his quidem postremis dicetur suo loco. De Morali lege in præsentia differemus.

Nemo tamen putauerit nullam ante Mosén fuisse legem, ac à Mose primùm *Fuit lex etiam ante Mosén.* proditam. Nam eadem illa Moralis legis capita quæ Moses exponit Decalogo, patribus ab ipso mundi initio fuerunt cognitissima. Nam unum illum uerum Deum coluerunt unicè pro Deo suo, hunc adorauerunt & inuocauerunt. Idola Syriaca Labani aufert è sua familia Iacob, & defodit in Bethel, subter quercum uel terebinthum quæ erat prope Sichem. Sacrosancta erat iurisiurandi religio Abrahamo, unde consequens est sanctum & celebre ipsi fuisse nomen Domini. Sacra celebrant patres sancti omnes & diligentissimè & religiosissimè. Cham maledictionem à patre accipit, quòd irreuerenter sese gessisset erga patrem. Damnatur propter parricidium Cain. Sanguini parcere iubet Noe. Laudatur Ioseph quòd respuit amplexus coniugis alienæ, nempe uxoris domini sui. Vituperatur Ruben quòd incestuoso concubitu polluisset thorum paternum. Irascitur non immeritò Iacob Labano socero, quòd ipsum furti suspectum habuisset. Mendaces & falsos testes damnauerunt omnes patres, quemadmodum & cupiditates prauas. Proinde non caruerunt ipsis Decalogi præceptis patres ab ipso mundi exordio, ad usque Mosi tempora; interim non habuerunt illa tabulis incisa aut membranis inscripta. Inscripta quidem illa Dominus digito suo in corda ipsorum, eademque excolebat uiua patrum traditio uel doctrina. Eadem tamen est lex utrobique, eadem semper Dei uoluntas, quia unus modò Deus est, qui non mutatur. Sub Mose primùm tamen illa sunt relata auctore & scriptore ipso Deo in tabulas, & scripta in libros per Mosén.

Veteres habue-
runt ceremonias
& iudicia.

Moralis lex
perpetua.

Decalogus.

Maeestas &
dignitas De-
calogi.

Due tabulae
diuinae legis.

Similiter non caruerunt ueteres & sancti ante Moſen patres ceremonijs & iudicialibus. Habuerunt enim ſuos ſacerdotes, ipſos inquam patresfamilias, habuerunt ſua ſacra, ſuas aras & hoſtias, habuerunt ſuos coetus ſacros, & ſuas purificationes. Habuerunt leges de hæreditatibus rerum, de diuiſione & poſſeſſione, de contractibus, de puniendis ſontibus. Cæterum Moſes illa omnia in certas redegit leges: multa etiam diligentius expoſuit: multa inſtituit quibus ueteres uel caruerunt, uel paulò diuerſa ratione uſi ſunt. Cuius quidem generis ſunt, Tabernaculum, Vaſa ſacra, Arca fœderis, Menſa, Candelabrum, Ara holocauſti & thymiamatis, Sacerdotium Leuiticum, Veſtes ſacræ, Feriæ & Feſta: & ſi quid aliud eſt huius generis: quæ quidem omnia abrogantur per Chriſtum, ſicuti ſuo loco dicemus. Mores quoniam conſtare non poſſunt niſi ſaluo decalogo, ideò Moralis lex ut propriè legis nomen obtinuit, ita nunquam abrogatur. Eſt enim Decalogus uera & abſoluta æternaq; uerè iuſtitia & omnium uirtutum regula, omnibus præſcripta locis, hominibus, temporibus. Summa enim Decalogi eſt, ut Deum diligamus & nos mutuò: id quod ſemper ab omnibus ubiq; hominibus requirit Dominus. Porrò Decalogus ſignificat librum ſeu expoſitionem & uolumen decem capitum præceptorum uel articulorum.

Illud uerò ſingulare habet Decalogus legis, quòd Ceremonialia & Iudicialia omnia à Deo per angelos Moſi & per hunc populo Dei reuelata, & quòd à Moſe, Deo iubente, conſcripta ſunt. Decalogus uerò non ab homine neq; per hominem, ſed ab ipſo Deo optimo maximo ad montē Sina inter prodigia maxima & ſtupenda, in concione publica & maxima hominū & angelorum recitatus eſt. Idem non manu Moſis, ſed digito Dei ſcriptus eſt in tabulas non cereas, ſed lapideas durabilesq;. Seruatae ſunt illæ tabulae tanquam theſaurus præſantiſſimus in Arca, quæ à tabulis fœderis (fœderis enim æterni capita continebant) nomen indepta ac appellata eſt Arca fœderis. Repoſita eſt hæc in ipſum Sanctum ſanctorum. Quæ omnia modis omnibus commendant nobis Decalogi præſtantiam, admonentq; ut illum Deum reueremur qui legem promulgauit, quippe qui Dominus ſit cœli & terræ, elementisq; omnibus utatur pro ſua uoluntate contra rebelles ſuos: admonent præterea ut Decalogum uel hodie loco theſauri in mundo omnium præſantiſſimi habeamus. Diuinæ enim in eccleſia Chriſti reliquiæ ſunt Decalogus, Symbolum Apoſtolorū & Oratio Dominica, adeoq; tota Biblia. De Decalogi promulgatione mirifica & copioſiora habemus apud Moſen Exo. 19. & Deut. 4. & 5. cap.

Dux autem ſunt tabulae diuinæ, in quas digeſta ſunt decem diuinæ legis capita. Prior tabula continet capita quatuor, poſterior ſex. Nam ultimum mandatum quod nonnulli diuidunt in duo, reuera unicum & indiuiſum eſt. Nam in genere primū præcipit Dominus, Ne concupiſcas: deinde per ſpecierum enumerationem recenset quid non concupiſcamus, nempe uxorem proximi, ædes eius, agros, iumenta & opes. Præterea unus eſt duntaxat uerſus in Hebraica ueritate, non duo diuiſi. Cum noſtra diuiſione faciunt Iosephus lib. Antiq. 6. cap. 3. Origenes in Exodum Homelia 8. Ambroſius in 6. cap. Epistolæ ad Ephes. Porrò Magiſter in ſententijs ultimum mandatum diſſecuit in duo, idcirco in primam tabulam tria duntaxat præcepta collocat. Sequutus eſt fortassis S. Auguſtinus, qui quæſtio. in Exodum. 71. & Epistoła ad Ianuariū 19. etiam tria tantū primæ tabulae præcepta numerat, idq; propter myſteriū Trinitatis. Idem tamen non omittit mandatum de non habendis colendisq; idolis, memor haud dubiè illorum in Euangelio uerborū Domini, Amen dico uobis, donec prætereat cœlum & terra, iota unum aut apex non præterierit ex lege, quoad omnia facta fuerint. Quisquis igitur

igitur soluerit unum ex mādatis illis minimis, & docuerit sic homines, minimus uocabitur in regno cœlorum. Idem rursus in Quaestionibus ueteris & noui testamenti lib. 1. cap. 7. ponit primæ tabulæ præcepta 4. secundæ sex. Nec multum ab ea sententia abludit lib. 3. ad Bonifacium, &c.

Diuisit autem Dominus præcepta illa sua in duos ordines uel in duas tabulas, *Quid continentur in duabus tabulis legis.* propter rerum quæ tractantur differentiam. Prima enim tabula pertinet ad Deū, secunda ad homines. Prima docet quid de deo & cultu eius sentiamus, id est, tradit pietatem, quomodo uidelicet piē uiuamus. Secunda docet quid debeamus proximo, id est, tradit humanitatem, quomodo uidelicet tranquillē humaniterq; uiuamus. In his autem continentur omnia officia uitæ, ut nihil omnino dici possit ab ullis totius mundi sapientibus de pietate & humanitate, quod non comprehendatur in Decalogo.

PRIMUM Decalogi præceptum hisce uerbis pronuntiatiuit ipse Dominus, *Præceptum Dei 1.* EGO DOMINVS DEVS TVVS, QVI EDVXI TE EX TERRA AEGYPTI, DE DOMO SERVITVTIS: NON HABEBIS DEOS ALIENOS CORAM ME. Duo habet membra hoc præceptum. Prius & ipsum uaria continet. Principiō enim offert se nobis deus, & exponit nobis qualis sit erga homines, imō qualis erga nos esse uelit. Vnde nos secundo loco colligimus, quid uicissim à nobis requirat, & quodnam sit officium nostrum. Tercio & ultimo loco appendit euidentem demonstrationem eius quod dixit se esse Deum nostrum.

Ab initio pronunciat & dicit, Ego Dominus Deus tuus. Quibus uerbis exponit qualis sit, qualisq; esse uelit erga omnes homines. Congruunt hæc uerba cum uerbis fœderis domini cum Abrahamo adeoq; omnibus credentibus iſti, Ego, inquit dominus, sum deus fortis & Schaddai, quasi tu dicas Saturnus à saturando. Est enim Deus copię cornu, qui exaturat omnes & omnia, fons inexhaustus & perennis bonorum omnium. Id quod & Ieremias copiosius enarrat in cap. 2. sermonum suorum. Et certē hæc omnia cōprehendit his paucis uocibus, Ego dominus Deus tuus. Ego inquā qui iam loquor tibi ex medio ignis. Ego & nō alius. Significatur hic unitas Dei. Docemur hic unum agnoscere deum, non plures, uni adhærere, non corda pluribus diuidere. Ego dominus tuus, ego Deus tuus. Dominus est, quia merum habet imperium in omnes creaturas, domino subiecta sunt omnia, domino obtemperant ad nutum omnia. Dominus omnia gubernat & sustinet. Est enim cœli & terræ & omnium quæ in eis sunt conditor, rector, conseruator, rex & princeps summus & maximus. Proinde in unica hac uoce comprehenditur Dei sapientia, uirtus, potestas & maiestas immensa. Deus fortē deriuatur à Daij uoce Hebraica, quæ sufficientiam significat. Solus enim Deus sufficit sibi ad beatitudinem & felicitatē plenissimam modisq; omnibus absolutissimam; præterea sufficit deus omnibus requirentibus ipsum in ueritate, ditissimus in omnes inuocantes nomē ipsius. Qua parte notatur Dei omnisufficientia, liberalitas, bonitas & misericordia; maximē cum additur, Ego dominus Deus tuus, Tuus inquam. Deus enim nō sibi modò bonus est, sed nobis quoq;. Totum se cupit effundere cum omni sua bonitate, cum omnibus suis dotibus in fideles. Nō est parcus, non est malignus, gaudet distrahi & impartiri se nobis fruendum abundantissimē, adq; satietatem iucundissimam, idq; omni tempore, necessitatis maximē. Et significanter quidem T V V S ait, non uester, ut intelligamus singuli deum æternum, optimum, beatissimum, singulorum fore esseq; deum & dominū, id est, seruatorem, liberatorem, redemptorem, acruum & mare bonorum omnium, anti-

mae & corporis praesentium & futurorum.

*Quid exigit à
nobis hoc prae-
ceptum.*

Ex istis colligimus secundo loco quid uicissim à nobis requirat bonus domi-
nus, & quodnam sit nostrum officium. Apertam relationem etenim habet Tuus.
Si enim ille uult esse meus, ego uicissim debeo esse suus. Ille uult esse Dominus, &
est deus meus, ego itaque illum pro domino & deo meo habere & uenerari debeo.
Ideoque requiritur hoc mandato à nobis, ut non tantum deum uerum pro deo uero,
sed pro deo nostro, pro domino, pro rege, pro conditore, pro seruatore & patre no-
stro agnoscamus, utque illi suas tribuamus proprietates, quod unus est, solus bono-
rum omnium fons & largitor, quod uiuus est, aeternus, iustus, uerax, beatus, fe-
lix, clemens, potens, optimus, maximus. Huic itaque adhaereamus, huic obediamus
in omnibus, in illum credamus, illum inuocemus solum, omnia ad ipsum bona re-
ferentes, omnia bona ab ipso petentes, & pro omnibus beneficijs gratias agentes,
hunc adoremus, hunc colamus timore synero & dilectione ardentissima, spe per-
tinacissima. Huc enim pertinent illae ex sancto Mose & euangelio sententiae, Do-
minum deum tuum adorabis, & illi soli seruias. Et iterum, Dominum deum ue-
strum sequimini, illum timete, illius praecepta custodite, illius uocem audite, illi ser-
uite, & illi adhaere. Quid quod ipse Dominus in Psal. clamat, Sacrifica deo lau-
dem, & persolue altissimo uota tua. Et inuoca me in die tribulationis, &c.

Deut. 13.

Psal. 50.

*Demonstratio
quod Deus ue-
rus Deus no-
ster est.*

Iam uero demonstratio qua ostendit se fuisse, esse & fore deum & dominum
omnium nostrum, & patrum nostrorum liberorumque nos insequentium, euiden-
tissima est, nimirum liberatio ex Aegypto. Continet ea omnes uirtutes diuinas, sa-
pientiam, bonitatem, iustitiam, ueritatem, potentiam, & quid non? Declarat se esse
dominum in caelo & in terra, in omnibus elementis, in omnibus creaturis. Libe-
rat benignè suos Israelitas, tuetur, ornat uarijs muneribus, & seruat uel inuito &
fremente toto regno Aegypti. Aegyptios autem uariè, horribiliter, sed iuste tamen
punit, tandem & cum rege suo submergit in mari rubro. Potuerunt Israelitae ex
hoc unico dei facto colligere Deum, ut potentissimum esse, ita futurum ipsorum
deum, sicuti fuerat deus patrum ipsorum. Facto enim declarauit qualis fuerit, &
quantae potentiae & bonitatis sit uel hodie omnibusque in finem usque seculis. No-
bis quidem recentior est liberatio qua obtigit per Iesum Christum dominum no-
strum, qui nos non ex Aegypto aliqua, aut ex manibus Pharaonis asseruit, sed ex
potestate tenebrarum peccati, mortis & diaboli liberauit. Vnde colligimus deum
aeternum, uerum, optimum, maximum, beatissimumque, ut potentissimum, sic no-
strum esse Deum, & hunc nobis bene uelle, nos curare & amare, iuxta illud Apo-
stoli, Qui proprio filio suo non pepercit, sed pro nobis omnibus tradidit illum, qui
fieri posset ut non cum eodem omnia nobis donet? Equidem mysterium redem-
ptionis nostrae per Christum dominum nostrum, comprehensum est manifestissi-
me in primo Decalogi praecepto. Nam clarum est liberationem populi Israelitici
ex Aegypto, typum fuisse futurae liberationis totius orbis terrarum & omnium
regnum mundi per Christum dominum, qui totum orbem liberauit ex seruitu-
te peccati & diaboli. Quod si quis dubitat, inspiciat ceremoniam siue sacramentum
huius corporalis liberationis, ipsum inquam Pascha. Quis uero nesciat agnum il-
lum typum praetulisse Christo liberatori? An obscura est haec Pauli uox, Pascha
nostrum immolatus est Christus? An non omnes Apostoli cum Ioanne Baptista
appellarunt dominum nostrum Dei agnum qui tollat peccata mundi? Praeterea
clara sunt Isaiae prophetae uerba in cap. 52. ubi disertè inter se confert liberationem
Israelis ex Aegypto, & liberationem totius orbis ex seruitute peccati per Christum.
Proinde continetur mysterium Christi domini & redemptionis nostrae in primo
Decalogi

*Mysterium Chri-
sti comprehen-
sum est in pri-
mo praecepto.*

Decalogi præcepto: ut iam recitantibus nobis uerba Dei, non tam uetus illa liberatio Israelis ex Ægypto, quam noua illa quæ obtigit per Christum, oculis & animis nostris obuersari debeat, excitareq; spem nostram, ne quid diffidamus, Deum illum optimum maximum & fore & esse Deum nostrum.

Posterius membrum primi præcepti uetat nobis, ne quis nostrum habeat Deos *Prohibetur dij alieni.* alienos, id est, excludit extra Deum omnia præsidia uitæ, quæcunq; tandem præter deum uel fingi uel eligi possunt. Ac utitur Dominus uehementissimo loquendi genere. Nam dicit, Non habebis deos alienos coram me. En nō habebis, & non habebis quidem coram me, uel ante faciem meam, uel mecum, uel apud me. Germanice, *Si mir/oder nābend mir. Oder laß michs nit sāhen vor minen ougen.* Ita enim loquuntur irati patres, quando prohibent rem uehementer turpem & abominandam, Vide ne ante oculos meos, & me quidem spectante hoc facias. Atqui ubiq; adest Deus, omnia inspicit Deus, etiam corda & cordiū abscondita. Proinde nullo pacto uel palām uel occultē habendi sunt nobis dij alieni: id est, ne mo nostrum habeat ullam creaturam, siue ea in cœlis siue in terris sit, pro Deo nostro: nemo nostrum tribuat creaturis proprietates Dei, eaq; quæ ex officio debemus Deo. Proprietates dei sunt ubiq; esse, omnia uidere, omnisciū & omnipotentem esse, uiuificare, liberare, à peccatis purgare, seruare uel saluare, iustificare, sanctificare, & si quæ aliæ huius generis sunt. Officia nostra sunt Deum adorare, inuocare, timere, colere, sperare in Deum, adhærere Deo, audire Deum, credere Deo, obedire Deo.

Ideoq; alienus Deus erit quod propriē & naturaliter non est Deus, imō quicquid nobis præter deum hunc uerum, uiuum & æternum confingimus, cui confidimus, in quod speramus, quod inuocamus, quod amamus & metuimus, in quod animū nostrum intendentes defigimus, à quo dependemus, quod pro thesauro, auxilio & præsidio nostro in prosperis & aduersis habemus agnoscimusq;. Dum Rahel à Iacobo sobolem postularet, audit, Num pro deo tibi sum, qui reddidi te sterilem? Rursus cum Ioram rex Israeliticus à rege Syrorum Benhadad, per Naamanū accepisset literas, in quibus postulabatur purgatio lepræ, scidit uestes suas iratus atq; exclamauit, Egōne Deus sum, ut interficiam & rursus uitæ restituar? Solus ergo Deus sit Deus noster, id est, uita & salus nostra, auxilium, refugium, protectio, liberatio, spes, amor, terror & tremor noster. Si hæc tribuamus alijs & non soli Deo, alienos constituemus deos. Et alienum nō rarō dicitur, quod nō est institutum à Deo. Sic alienus ignis dicitur illatus esse tabernaculo, diuersus nimirum ab eo quem accendere iusserat Dominus. Aliena dicitur mulier in Prouerbijs, quam non concessit dominus. Alieni ergo dij sunt quos nobis ipsi fingimus, quos Deus nobis non constituit tutelares, à quibus pendentes auxilia poscimus. Proinde erunt alieni dij, diui ipsi, nunc quidē triumphantes cum rege Christo in cœlis, non ipsi quidem per se, sed nobis erunt dij alieni, qui perperam de ipsis iudicamus, & honorem deo debitum ipsis impendimus, colentes eos pro tutelaribus inuocantesq;. Erunt dij alieni ipsi diaboli & homines diabolici, si ipsis timorem deo debitum, ita impendamus, ut hos præferamus deo. Dij alieni erunt astra, planetæ signaq; cœlestia, si à mathematicis decepti, ab ipsis pependerit, respicientes in omnibus ad signa cœli, & totam uitam nostram dirigentes ad astrorum cursum. Ita si pecuniam, si homines diuino honore & amore prosequamur, erunt pecuniæ & homines nostri nobis dij alieni. Ad eundem modum damnatur in rege Afa 2. Paralip. 7. nimia fiducia in medicos. Herbe ergo & medici fiunt dij alieni. Damnantur Isaia 30. cap. Iudæi, quod Ægyptijs confederatis nimirum fide-

rent: fiunt ergo confœderati dii alieni. Multò magis damnantur hic fœdera & pãcta propter magicam cum dæmonibus facta. Damnantur benedictiones illæ quæ rectius dicerentur maledictiones, superstitiosi inquam exorcismi, in quibus præterea accusandus est abusus diuini nominis. Verùm quis exactè omnia recenset, quæ fiunt contra hoc primum mandatum, quo uera traditur pietas, internus dei cultus, ut agnoscamus Deum, credamus ei, rectè sentiamus de eo, ipsum inuocemus, ipsi adhæreamus, ei in omnibus obediamus?

*Præceptum
Dei 2.*

Secundum Decalogi præceptum hoc est, **NON FACIES TIBI SCULPTILE, NEQUE SIMILITUDINEM VLLAM EORVM QVE IN COELIS SVNT SVRSVM, VEL IN TERRA DEORSVM, VEL IN AQVIS QVAE SVB TERRA SVNT; NON ADORABIS EA NEQUE COLES. EGO SVM DOMINVS DEVS TVVS FORTIS, ZELOTES, VISITANS INIQUITATEM PATRVN IN FILIIS IN TERTIAM ET QVARTAM GENERATIONEM, EORVM QVI ODERVNT ME, ET FACIENS MISERICORDIAM IN MILLIA HIS QVI DILIGVNT ME, ET CVSTODIVNT PRAECEPTA MEA.**

Finis huius præcepti retrahere à peregrinis cultibus.

Primo præcepto internam religionem formauit tradiditq; dominus: secundo corrigit externam. Si rectè iudicaremus de Deo, seruaremusq; ritè ac religiosè præceptum primum, nihil opus fuerat præcepto secundo: sed quia nouit ingenia nostra dominus, ideo prohibet quod alioqui fueramus facturi. Videtur enim plerisque deum exprimendū esse imagine aliqua, & uenerandum corporali uisibiliq; cultu aliquo, oblati ipsi auro, argento, gemmis, ebore, ac rebus preciosis. Proinde finis generalis huius præcepti est, retrahere nos à carnalibus imaginationibus cultus Dei, qui ut potentia est immensa & spiritus æternus, ita non potest ulla exprimi imagine corruptibili: spiritu & sanctitate uult colì. Idolū uerò seu simulachrum continet omnem externum cultum: ergo cū idola prohibentur, simul prohibetur omnis cultus Dei externus & peregrinus. Nam ubi idolum est, ibi basim ei oportet statuere, sedem collocare, aram extruere, templum ædificare. Hæc protinus custodes, curatores, ministros seu sacerdotes requirunt, hostias & oblationes, anathemata, ornamenta, ferias & sumptus atq; labores nunquā exantlandos & finiendos. Eo nomine prophetae appellarunt simulachra labores & dolores. Nam semel receptis idolis, nullus est neq; finis neq; modus sumptuum atque laborum. Experientia id uerum esse docet.

*Deus prohibet
sculptile.*

Porrò præceptum hoc secundum habet partes tres. Principiò enim prohibet Deus facere sculptile uel simulachrum: hoc est, Deus uetat sibi ullam cuiuscunque tandem formæ aut materiæ sit, imaginem ponere aut consecrare. Nam ut Deus nō uult, ita non potest repræsentari ulla imagine. Species uerò omnes ferè enumerat quibus solemus effigiare res. Non affinges Deo, ait, speciem aut formam earum rerum quæ supra nos sunt, in ipso cœlo. Sunt autem in cœlo corpora cœlestia, ueluti, sol, luna, planetae, astra, ipsæ deniq; aues uariæ speciei. Sub quibus quidē speciebus ferè omnibus, non pauci apud gentes deum adorarunt & coluerunt. Nec affinges deo speciem aut formam earum rerum quæ sunt in terra. In terra sunt homines, animantia, herbe, frutices, arbores, &c. Ac constat gentes Deum ueneratas esse sub imagine hominum & animalium. Cornel. Tacitus de Germanis, Cæterum nec deos cohibere parietibus, ait, neque in ullam humani oris speciem assimilare, ex magnitudine cœlestium arbitrantur, lucos ac nemora consecrant, deorumq; nominibus appellant secretū illud, quod sola reuerentia uident. En co-

luerunt

Iuerunt maiores nostri Deum sub specie arborum uel sylvarum. Quod tamen hic prohibetur hominibus, quemadmodum ne sub specie earum rerum, quæ in aquis aut sub aquis sunt, effigiantes Deum nostrum ueneremur. Coluerunt Palæstini Deum sub imagine piscis. Dagon Deus Palestinus præ se ferebat piscis figuram. Ægyptus coluit serpentes. Imò Paulus hæc omnia cōprehendens ad Rom. i. cap. contra gentiles disputans, Obtenebratum est, inquit, insciēs cor eorum: cum se crederēt sapientes, stulti facti sunt, mutaueruntq; gloriam immortalis Dei, in imaginem non solum mortalis hominis, uerumetiam uolatilium & quadrupedum, & reptilium. Contra hanc insaniam pugnat prima legis pars.

Cur autem Deus nolit ulla exprimi imagine sensibili aut uisibili, in promptu causa est. Deus spiritus est, Deus immensus est, incircumscriptibilis, ineffabilis, ubi que præsens, cœlum & terram implens, æternus, uiuus & uiuificans atq; conseruans omnia, gloriæ & maiestatis supra cœlos exaltatæ. Quis autem exprimat ulla uel imagine uel materia spiritum? Deus est immensa potentia, omnia uiuificans atq; conseruans. Sed imagines Dauid describit ac dicit, Simulachra gentium argentum & aurum, opera manuum hominum. Aures habent & non audiunt, nares habent & non odorantur. Manus habent nec palpant, pedes habent nec ambulant, neque sonus ullus est in gutture eorum. Quid obsecro hæc cum Deo collata similitudinis habent? Proinde uelle Deum exprimere simulachro uisibili, est Deum probro exponere facereq; contemptibilem. Dei oculus omnia uidet, idola nihil uident. Dei aures omnia audiunt, idola nihil audiunt. Per Deum uiuunt & mouentur conseruanturq; omnia: Idola nec uiuunt nec mouentur, & nisi retineantur ab hominibus fabricantibus, concidunt & pereunt. Simulachrum non spirat: Deus dat omnibus halitum spiritumue. Vbi ergo & in quo est similitudo? In materia ne, an in forma? Si in materia, ergone deus aureus, argenteus, ligneus? Si in forma, ergone inuisibilis uirtus caduca habet membra? Quid ergo peccarunt Anthropomorphitæ? Quod si nulla est similitudo, cur quæso dicuntur imagines aut simulachra, Dei similitudines ac icones? Si quis nostrum alterum appellitet idolum aut simulachrum, uidetur magna affecisse contumelia. Scimus enim idola speciem falsam hominis referre, non hominem: proinde idolum appellamus hominem ineptum, fungum, torpidum, inertem, & in quo nihil cerebri, qui nihil minus sit quam quod audit. Cur ergo posthac appellaremus simulachra, Dei similitudines? Deus uiuus est: simulachra sunt hominum mortuorum signa, sicut dicit author libri Sapientiæ. Deus gloriosus est, ac pleni sunt cœli & terra gloria maiestatis eius: simulachra uerò carent omni gloria, & exposita sunt hominum probris & ludibrio. Simulachra absentium signa sunt. Deus autē semper & ubiq; præsens est. Ac signa quæ quondā instituit & dedit populo suo Deus, nō fuerunt simpliciter signa uel imagines dei, sed signa præsentiae Dei, significantia deum, qui natura spiritus & inuisibilis est, incomprehensibilis & immensus, præsentem esse. Tale signū fuit nubes, fumus, ignis, ipsa deniq; arca fœderis, quam interim ad operiebant alis suis Cherubim, significantes in ipsam Dei faciem neminem mortaliū posse aspicere: animas ergo, mentes & spiritum esse eleuandum contemplatione in cœlos. Nam Moses, qui tamen dicitur Deum facie ad faciem aspexisse, audit, Nemo uidebit me ac uiuet. Vbi hinc soluerimus, uidebimus eum sicuti est, uti ait beatus Ioannes. Hæc inquam causæ sunt, cur nolit ulla materia ullæue forma se exprimi & effigiari Dominus.

Cur Deus nolit
lit exprimi
imagine.

Huc iam pertinent loca scripturæ, & testimonia maximorum in religione ac pietate uera uirorum, Moïsis, Isaïæ, & Pauli. Moïses in Deuter. Loquutus est nobis

dominus, ait, de medio ignis: & quidem uocem uerborum audistis, at simulachrum nullum uidebatis, ultra uocem Cauete ergo accurate quam chara uobis est anima uestra (quandoquidem nullum omnino eodem die simulachrum uidistis) ne forte corrumpatis uos, faciendo scilicet uobis sculptile, simulachrum cuiuscunque figuræ, formam maris aut foeminæ, formam cuiuscunque animantis quod est in terra, formam cuiuscunque uolucris uolantis sub cælo, formam cuiuscunque reptantis super terram, formam cuiuscunque piscis qui est in aquis sub terra. Et ne forte attollas oculos tuos in cælos, & uisis sole & luna stellisque & exercitu cælorum, proster naris & adores colasque ea quæ distribuit dominus deus tuus omnibus populis sub uniuerso cælo. Cauete ergo ne quando obliuiscamini foederis domini Dei uestri, quod pepigit uobiscum, ita ut faciatis uobis sculptile aut simulachrum cuiuscunque rei, quod prohibuit tibi Dominus Deus tuus. Hæc Moses hætenus.

Isaias uerò in cap. 40. dicit. Ecce gentes (nimirum collatae deo) tanquam gutta situlae, & ut puluis adhaerens bilanci reputantur. Ecce insulae quasi puluis exiguius. Libanus non satis esset excitando igni, neque feræ eius sufficerent holocausto. Omnes Gentes coram Deo quasi nihil sunt, & res inanes atque friuolae reputantur erga ipsum. Cui ergo similem facietis Deum? aut quodnam simulachrum adornabitis ei? Simulachrum fudit artifex, & auri fusor diducit illud, & laminis argenteis obducit. Qui opibus destitutus est, ut & ipse offerat, eligit imputrescibile lignum, & quaerit sibi artificem peritum, qui sculptile præparet, ne moueatur loco. An hæc ignoratis? an non illa audistis? Et mox, Qui sedet super globum terræ, & habitatores eius sunt quasi locustae. Qui extendit cælos ut cortinam, ac uelut tentorium ad habitandum. Qui redigit potentes in nihilum, & redigit iudices terræ ad nihilum. Cui ergo me assimilabitis, aut cui similis ero, ait sanctus. Attollite in sublimem oculos uestros, & cõtemplamini quis creauerit ista, producens in numero exercitum eorum, singula suis nominibus uocans. Et cætera. Tantum enim Isaias.

Acto. 17.

Paulus uerò Apostolus Christi apud Athenienses disserens de uera religione, dicit, Deus qui fecit mundum & omnia quæ in eo sunt, hic cæli & terræ cum sit dominus, non in manufactis templis habitat, nec manibus humanis colitur, indigens aliquo: cum ipse det omnibus uitam & halitum per omnia, fecitque ex uno sanguine omne genus hominum, ut inhabitaret super uniuersam faciem terræ, præfinitque præstituta tempora, præfixitque terminos habitationis eorum, ut quærent deum, si forte palpent eum & inueniant, quamuis non longe absit ab unoquoque nostrum. Per ipsum enim uiuimus, mouemur & sumus: sicut & quidam uestratum poetarum dixerunt, Nam huius progenies etiam sumus. Genus ergo cum simus Dei, non debemus existimare auro aut argento, aut lapidi arte sculpto & inuento hominis numen esse simile. Hæc testimonia tam sunt illustra & simplicia illustrantia institutum nostrum, ut nihil necesse sit expositionis gratia quicquam adijcere amplius. Proinde maximis ex causis iudicauit beatus Augustinus magnum esse sacrilegium, si quis in templo ponat dei patris imaginem flexis poplitibus in solio sedentem. Nepharium enim esse si quis tale in animo suo concipiat. Verba authoris recensui Sermone 8. Decad. 1. ubi differui de Dextra patris, docens quid sit sedere ad dextram patris.

Prohibite &
aliae imagines
ad cultum.

Iam uerò quod alias attinet imagines, quas homines erigunt creaturis siue dijs, non minus hæ, quam Dei icones prohibita sunt. Si enim Deo uero non licet consecrare statuam, minus licebit alieno Deo statuere imaginem. Animus hominis deligit sibi deum, mox imaginatione affingit ei speciem aliquam, postremo manibus perficit, ut uere dictum sit mentem concipere idolum, manum uerò parere. Atqui

Atqui prohibuit primo præcepto Dominus ne habeamus deos alienos. Qui uerò deos alienos nō habet aut sibi deligit, nullas certè ijs affingit imagines, nullas itaq; ponit statuas. Nam nephas esse ducit Deo uero constituere imaginem, impium esse credit sibi deligere deum alienum, ergo & dei alieni figuram in templo Dei erigere. Ea de causa non legis in ueteri ecclesia ullas imagines ullis diuis, quorum tum magna erat copia (patriarcharum, iudicum, regum, sacerdotum, prophetarum & martyrum, matronarum & uiduarum agmina puto) esse positas. Ecclesia item Christi Apostolorum primitiua, nullas habuit imagines uel Christi uel diuorum in oratorijs uel templis suis. Notissimum est S. Epiphanijs factū in Syria designatum Anablachæ, descriptum Gracè in Epistola ad Ioannem Hierosolymitanum Episcopum, & in Latinum sermonem conuersum à S. Hieronymo. Scidit ille uelum pendens in templo imaginem Christi uel sancti alicuius exhibens, testificatus contra Christianam religionem, in templo Dei hominis pendere imaginē. Nam D. Augustinus in Catalogo hæreseōy commemorat etiam Marcellam quandam fuisse sociam sectæ Carpocratianæ, quæ imagines Iesu, Pauli, Homeri & Pythagoræ coluerit, adorando incensumq; ponendo. Verè ergo & prudenter in ueterum ecclesiasticorum scriptorum lucubrationibus probè uersatus Erasmus Roterod. ubi multa de Vsu imaginum in templis differuisset acutè, tandem subiiciens dixit, Ut imagines sint in templis, nulla præcipit uel humana constitutio. Et ut facilius, ita tutius quoq; est omnes imagines è templis amouere, quàm impetrare ut nec modus prætereatur nec admisceatur superstitiō. Iam ut animus sit ab omni superstitione purus, tamen non caret superstitionis specie, orantem ad ligneum simulachrum procumbere, in hoc intentos habere oculos, ad hoc uerba facere, huic oscula figere, nec orare prorsus nisi coram imagine. Illud addam, Quicumque sibi aliusmodi fingunt deum quàm est, contra præceptū hoc colunt sculptilia. Et idem in eadem sua Catechesi, Vsq; ad ætatem Hieronymi erant probatæ religionis uiri, qui in templis nullam ferebant imaginem, neq; pictam neq; sculptam, nec textam, ac ne Christi quidem, ut opinor propter Anthropomorphitas. Paulatim autē imaginum usus irrepsit in templa. Hæc ille.

Porro Christo Domino & Deo uero nostro, propter assumptam naturā humanam non ponendum est simulachrum. Nam non in hunc finem assumpsit hominem. Præterea humanam naturam subuexit in cœlum, iubens orantes in cœlum & animi & corporis oculos attollere. Spiritum suum uim uicariam misit ecclesiæ, ac regnum in hac habet spirituale, non egens ullis rebus corporalibus. Iussit enim pauperibus, non imaginibus suis conferre si quid in ipsum eramus collaturi. Iam cum citra controuersiam Christus noster sit Deus uerus: & Deus uerus prohibeat sibi cōsecrare hominis imaginē, id est, Deū repræsentare humana specie, cōsequēs est, quòd Christo nulla sit consecranda imago, quia est Deus uerus & uita æterna.

Secunda parte huius præcepti docetur, quatenus non liceat facere imagines Dei & deorum, & si quis fecerit, quomodo nos geramus. Simulachra non sunt facienda ad cultum aut ut sint religionis instrumenta. Quòd si quis illa fecerit & religioni miscuerit, pñs Dei cultoribus contemnenda & negligenda, neq; adoranda neq; colenda sunt, nulloq; modo ijs seruiendum est. Duo autem in præcepto ponuntur obseruanda. Prius, Non adorabis. Adorare est caput nudare, geniculari seu flectere aut inclinare caput uel corpus, procumbere, honorem exhibere, & uenerari reuereriq;. Adorarunt (id est, genu flexerunt, caput nudarunt, & procubuerunt sancti) magistratus & prophetas, principes & doctores populi, uirosq; uenerabiles. Quia Deus hoc præcepit, qui & operatur per illos salutem hominum;

H

Christo Domino
no nulla po-
nenda imago.

Quatenus non
liceat fabrica-
re imagines.

Adorare.

*Seruire.**Simulachra
non docent.*

& homines sunt uiua Dei imago. At idola muta, cæca, surda, lignum & lapides sunt, quæ adorare prohibemur, etiam cùm speciem Dei præ se ferunt. Posterius est, Neq; coles, siue Non seruias eis. Eo membro prohibetur omnis externus & illegitimus cultus, qui exhibetur Deo uel Dñs religione, id est, superstitione & cultu templorum, sacrorum, feriarum, omniumq; rerum similium. Seruire enim est colere, uenerari, maiestatem aliquam & diuinum aliquid ei quod colimus tribuere, magni pendere, incensum ponere, donaria afferre, præstareq; seruitia. Notum est omnibus quid sit seruire, & seruire in negotio religionis. Prohibemur ergo cursitare ad idola etiã Dei. Prohibemur illis seruire, donando eis munera aut tribuendo eis aliquid diuini, unde eis obstringamur quò retineamus dignemurue ullo honore, miscentes ea rebus religionis nostræ sanctissimæ. Ergo non uideo cùm cultum latriæ imaginibus minimè tribuamus, quomodo his quod spiritus Dei ac uerbi Dei officium ac beneficium est, tribuere possimus, munus docendi, admonendi adhortandiq;: cùm clarissimus & Apostolico testimonio commendatissimus propheta Abacuk, scripta nobis reliquerit hæc diuinissima certè uerba, Quid prodest sculptile, quia sculpsit illud fictor suus, fusile quod annunciat mendaciũ: & tamen fiduciam habet in eo, fictor scilicet in figmento suo, ut faceret simulachra muta: Væ qui dicit ligno, euigila, & lapidi insensibili, excitare. Ipsene doceret? Ecce opertus est auro & argento, & non est ullus spiritus in eo. At Dominus in templo sanctitatis suæ: taceat à cōspectu eius uniuersa terra. Quid poterat dici clarius simul & uerius? simulachra sunt mendacia. Quomodo autem doceat ueritatem quod manifestè est mendacium? Nullus est motus, nulla uita, nullus spiritus in pictura & in imaginibus. Dominus autem sedet in templo sanctitatis suæ, regnans & docens spiritu & uerbo suo omnem pietatem, uiuensq; in cordibus sanctorum suorum. Taceant ergo omnes omnium in orbe terrarum linguæ uolentium tueri idololatriam.

*Nulla causa ob
quam deos alie
nos nobis deli-
gamus.*

Tertia parte præcepti rursus agit Dominus uaria. Principiò enim ostendit homines non habere causam iustam ullã, ob quam auersi à Deo, alienos sibi deos deligant aut Deũ illegitimo cultu uenerentur. Ego, inquit, sum Dominus Deus tuus fortis. Si Dominus sum, meritò mihi seruis, me colis, mihi obedis, & ita me colis sicuti coli uelle & delectari intelligis. Si Deus sum, omnisufficiencia sum: ergo quid desideres quod in me non inuenias? Cur ergo ad alienos diuertas? Nullam certè causam diuertendi habes. Præterea fortis sum, potens, imò omnipotens. Non est quòd tibi quæras potentiorẽ & opulentiorẽ principem, cuius manu libereris ex meis manibus, aut cuius munificentia abundantius locupleteris, quàm ex meis opibus facultatibusq;. Ego enim sum uerus ille æternus, inuictus, omnipotens, princeps orbis, uerus & unicus auxiliator & liberator, liberalis & munificus omnium bonorum largitor. Sum autem tuus Dominus, tuus Deus. Mea illa bona, tua sunt. Nam ego tuus sum: ergo & contra omnia mala auxiliator & liberator tuus sum. Meus es. Ego te creauĩ. In te uiuo, te conseruo. Quid ergo diuerteres ad alienum? quid tibi opus erit posthac ullis idolis? Templum Dei es. An non sentis me inhabitare cor tuum? Quid oro templo Dei negotij cum simulachris?

*Deus consortis
impatiens.*

Deinde addit minas ut iustissimas ita sauiissimas. Ego, inquit, sum Deus Zelotes. Iã quod duplici, sed non cōtrario sibi sensu, exponere licet. Velenim tale quid dicit, Nolo alios tibi quæras deos, aut illegitimos cultus recipias. Causa. Sum Deus Zelotes, æmulator inquam, consortis impatientissimus, imò qui corrualem nullo modo ferat. Solus diligi & coli uolo, nec alio modo, quàm eo quem ipse præscripsi. Nam nemo ignorat Deum in sacris literis coniunctionem & uinculum quo fide religamur

religamur Deo (unde et religionis nomē est) adumbrare p parabolam humani conjugij. Deus enim est maritus & sponsus noster: nos sumus eius uxor uel sponsa. Casta uxor & fidelis, solius mariti uocem audit, solū amat, soli obedit, post maritum non desiderat ullos alios uiros. Impudica autē & perfida, adultera & meretrix potius quā uxor, adhæret quidē uiro suo, sed sui copiam etiā alijs facit, alios quoq; amat, & ferē ardentius quā maritū propriū. Atqui Deus est zelotypus, qui uult solus & citra consortem amari & colī. Adulteriū & scortatio spiritalis est, quoties homines diligunt quidē & colunt Deum, sed simul etiā uenerantur deos alienos. Contra hoc perfidū nephas impatientissimis & planē tragicis uocibus cōclamant omnes prophetae. Est enim scelus longē nephandissimū. Vrinā uerò non habeatur hodie à multis pro cultu Dei gratissimo. Vel certē tale quid dixit Dñs, Nolo alios *Deus ultor & uindex.* tibi quæras Deos: nolo ipse tibi cōminiscaris cultū. Causa, Sum Deus Zelotes, nimirū irritabilis, qui non patior impunē præteriri me meaq; legitima. Atq; ad hunc sensum porrò exponit multis quomodo sit Zelotes, uisitans utiq; iniquitatē patrū in filijs, in tertiā & quartam generationē, eorū qui oderunt me. Deus ergo uindex est seuerissimus & ultor iustissimus cōtra eos primū qui alienos sequuntur deos, prohibitisue cultibus Deo seruiunt, deinde contra omnes qui præuaricant legem Dei. Nam præcipuē quidē minā idololatriæ pœnam grauissimā, simul autē & illis minatur, qui uiolāt leges Dei alias quoq;. Generale est enim quod hīc profert Dñs, ualens contra omnē impietate & contra omnem iniustitiam hominū. Quia tamen humanis diuina longē præstant, grauius peccant, qui cōtra primam tabulā, quā qui contra secundā peccāt: sed & grauioribus sese pœnis aut supplicijs subiiciunt.

Cæterum dicit Dominus iniquitatem patrum se uisiturum aut inquisiturū *Quomodo patrum peccata uisitet Deus in filijs.* in filijs in tertiā & quartam generationem: non quòd iniustus sit Deus & puniat alienum peccatum in innocentibus, hoc est, in ijs qui peccatum non cōmiserunt: sicuti impiē calumniabantur Deum in Ezechiele Iudai, hoc proferentes dicterij, Patres comederunt uiram acerbam, & dentes filiorum obstupuerunt. Non ita habetres. Quisq; enim suum portabit peccatum, nec filius patris, neq; pater filij iniquitatem feret dependetq;. Ita sanē constanter docet apud Ezechielem & in tota *Ezech. 18.* scriptura ueracissimus Deus. Proinde si liberi aut nepotes uestigijs patrū obliquis insistant, ac ipsi sicuti & patres eorum idolis seruiant: idcirco autē se securos impunesq; futuros arbitrentur, quòd idololatriā acceperunt à maioribus, quòd maiores licet fuerint idololatra, bona tamen usi sint fortuna: tunc inquam iniquitatē patrū in filijs castigabo, id est, peccatum hoc quod à patribus didicerunt filij & iam pertinaciter propter exemplum & bonam fortunam patrū exercent, puniam *Ierem. 44.* grauissimē, etiamsi in patribus non puniuerim. Ideoq; significanter appenditur, Eorum qui oderunt me. Exempla plurima eaq; pulcherrima suppeditabunt libri Regum. Ieroboami enim domus funditus est excisa, eò quòd Ieroboam & idololatriam & peregrinos cultus erexit in Israele. Mox interit etiam tota familia Baasa regis: ita radicitus euellitur domus Achab. Tandem captiui abducuntur Israelitæ in Assyriorum regna. Solomon rex Iuda potētissimus, opulentissimus, & sapientissimus felicissimusq;, propter idololatriam & peregrinos cultus repente fit miserimus. Quid acciderit filio eius Roboam, Ioramo quoq; filio Iosaphat, Ahas, Manassi, Iehoiachimo & Zedechiæ propter idololatriā & peregrinos cultus, nemo ignorat, nisi qui sacras historias nescit. Teneamus ergo firmiter minas Dei esse seueras, Deum esse uindicem & ultorem in idololatra & impios supersticiososq; homines, deniq; contra scelera hominū uniuersa, ut seuerissimū, ita iustissimū. *Li. Longanimitas Dei.* cet uideatur Deus aliquādo dormire hominibus impijs, euigilat tamē iusto tēpore, Dei.

& rependit impijs semper pro sua impietate. Longanimis non negligit pios & oppressos, non fauet impietati & fouet impios iustus Dominus: sed spacium concedit poenitentiae, quod quicumque negligunt, grauiorem tandem sentiunt poenam: iuxta illud Apostoli, An diuitias bonitatis, tolerantiae & lenitatis Dei contemnis, ignorans quod bonitas Dei te inuitat ad poenitentiam? Sed iuxta duritiam tuam & cor poenitere nescium colligis tibi ipsi iram in die irae, quo patefiet iustum iudicium Dei, qui redditurus est unicuique iuxta facta sua, &c.

*Amplissima
promissio fit
pijs Dei cul-
toribus.*

Rursus promittit maxima quaeque suis cultoribus & perseuerantibus in uera pietate religioneque munificus Dominus. Deus sum, inquit, faciens misericordiam seu beneficentiam praestans in millia. Qua parte excellere uidetur. Animaduertit enim iratus in tertiam & quartam generationem: sed beneficus est in multa millia. Bonitatis enim beneficiorumque eius nullus modus, nullus finis: & misericordia Domini super omnia opera eius. Hic tamen rursus duo appendit, His qui diligunt me & custodiunt praecepta mea. Duo inquam requirit a suis. Primum, ut diligant Deum & hunc habeant pro Deo suo: quod cum sit, nullus erit in pijs deus alienus. Secundum, ut obediant Deo, ambulent in praeceptis Dei: quod cum sit, conciderunt omnia idola cum cultibus peregrinis, & regnat solus Deus per uerbum suum in animo religiosi hominis, quem omni benedictione impinguat benignus Dominus. Et hoc quidem membrum pertinet praecipue ad praesens mandatū, sed simul etiam ad alia omnia, ut ex ipsis uerbis Dei colligere licet. Teneamus ergo ambulantibus in lege Domini parata esse immensa Dei praemia.

Haec habui in duo illa Decalogi seu primae tabulae mandata: quae iam non licet recolligere, cum & sesquihora lapsa sit, ac sperem me singula in eum redegisse ordinem, & tam perspicue ac simpliciter tradidisse, ut omnia sint uobis & perspicuissima & praesentissima in animis uestris. Laudemus iam Dominum, & agamus gratias bonitati eius, qua ostendit nobis uias suas, orantes ut in his recta incedentes, perueniamus ad coelestia gaudia, Amen.

De tertio prima tabulae seu Decalogi praepito: & de Iureiurando. SERMO III.

*Præceptum
Dei 3.*

TERTIVM mandatum primae tabulae siue Decalogi ad uerbum sic habet, NON ASSVMES NOMEN DOMINI DEI TVI IN VANVM. QVONIAM NEVTIQVAM IMPVNITVM DIMITTET DOMINVS EVM, QVI ASSVMPSERIT NOMEN DOMINI DEI SVI FRVSTRA. Exposuit Dominus mandato secundo quem nolit, auersetur ac prohibeat cultum, mundanum uidelicet, carnalem & terrenum, protritum & uulgarem illum, cum spiritu & diuina natura atque maiestate pugnantem per omnia & ex diametro, nempe Deum uelle assimilare specie hominis aut alterius creaturae, ex materia terrena & corruptibili, & eundem deinceps sub illis speciebus colere rebus corruptibilibus usui & conseruationi hominum institutis. Deus enim spiritus est aeternus, omnia permeans atque omnia conseruans, quem totius mundi creaturae, & praestantissimae quidem illae, simul coniunctae, non possunt referre, imò ne minimum quidem in Deo assimilare atque exprimere. Non eget Deus ullis rebus corruptibilibus: nobis potius sufficit omnia. Stultum est ergo datori luminis uelle lumen & cereum quidem illud aut fumantem tadam incendere. Stultum est pecuinas carnes offerre spiritui aeterno, qui in Psalmis dicit, Meae sunt omnes ferae sylvarum, pecudes in mille montibus. Noui cunctas in montibus uolucres, penes me sunt animantes agrestes. Si esuriero non est ut tibi indicem, cum meus sit orbis & quicquid ille continet. Iam itaque praepito

tertio

tertio diligentissimè describit Dominus, licet utatur paucis uerbis, quomodo colit uelit, nimirum sanctificatione nominis diuini. Nomen Dei ipse Deus est, Dei maiestas, ueritas, potentia, iustitia. Præcipitur ne nomine diuino abutamur, ne usurpamus hoc ad res inanes & leues; sed sentiamus, loquamur, & iudicemus de Deo & rebus diuinis magnificè, reuerenter, sanctè & purè. Pondus autem habet quod dicit, Nomen Domini Dei tui, supremi uidelicet boni, creatoris, assertoris & patris tui. Cæterum non uetat simpliciter Dominus usurpare nomen suum, sed ne uatamur ipso in uanum, uanè uel frustra, id est, citra usum salutarem ac necessarium, citra honorem & gloriam Dei. Videamus ergo quomodo sanctificemus nomen Domini, & quomodo religiosè usurpemus nomen Dei, adeoq; legitimè ipsum Deum colamus.

Nomen Dei.

Frustra.

Principiò sentiendum est de Deo ueluti de summo bono & thesauro bonorū inexhausto, cuius uoluntas erga nos bona sit & planè paterna, utpote qui uelit & cupiat homines saluos fieri, & ad cognitionem ueritatis uenire: cuius iudicia omnia æqua sunt & iusta, cuius opera præstantissima, cuius uerba ueracissima. Deinde inuocandum est hoc nomen Domini sanctum in omnibus uotis & necessitatibus. Petenda ab ipso solo quæcunq; animæ & corpori necessaria sunt. Agendæ semper gratiæ pro exhibitis beneficijs. Quicquid enim bonorum homines accipiunt & habent, non ex alio fonte quàm diuino hauriunt. Hæc gloria semper Deo danda est. Si premimur aduersis, ne obmurmuremus bonæ Dei uoluntati & iustissimis eius iudicijs, patientes potius & humiliati sub manu potenti & paterna, cum Dauide clamemus, Bonum est mihi Domine quod humiliaueris me. Neq; præscribamus hîc Deo quicquā, sed subiiciamus nos totos & semper bonæ, sanctæ, & iustæ eius uoluntati. Demus item Deo gloriā in omnibus, confitentes nomen & doctrinam eius coram regibus & principibus, imò coram omnibus mundi hominibus, quoties uidelicet res & gloria Dei exposcit. Ne pudeat nos Dei patris nostri, ueritatis eius, & ueræ religionis. Ne pudeat nos Christi redemptoris & crucis eius. Pudeat errorum, idololatriæ, mundi, uanitatis, mendaciorū & iniquitatis. Loquamur item & sentiamus de operibus & uerbis Dei sanctè, honorificè & religiosè. Sancta sit nobis lex Dei, sacrosanctum sit nobis Euangelium, sanctissima sit nobis doctrina patriarcharum, prophetarum & Apostolorum. Nunquam accipiamus nomen Domini Dei nostri in os nostrum, nisi magna sit causa; ne blasphememus, ne execremur, aut mētiamur sub nomine Dei; ne abutamur nomine & uerbo Dei ad res magicas, ad circulatoriā, ad incantamenta. His enim maximè prophana nomen Dei. Seruemus etiā sanctissimè quæ iurauimus per nomen æterni Dei. Simus ueraces & fideles in omnibus, ut hic cæcus mundus uidens in nobis tantam nominis Dei reuerentiam & sanctificationem, glorificet patrem nostrum qui est in cœlis. Atq; hic erit religiosus usus diuini nominis, & beneplacens Deo cultus.

Quomodo sanctificemus nomen Domini.

Abutimur uerò nomine Dei uariè, & initiò quidem, dum corda nostra nulla imbuta sunt reuerentia erga ipsum Deum, quando de Deo, de iudicijs Dei, de uerbis & legibus Dei irreuerenter, petulanter, impiè & blasphemè loquimur: quando uerba Domini rebus leuibus & nihili scurriliter applicamus, scripturas in prophanum & impudicum sensum conuertimus abripimusq;. Deinde prophanamus nomen Domini Dei nostri, quādo non inuocamus nomē Domini, sed conuertimur potius ad deos, nescio quos, ad hominum artes & præsidia, ad res prohibitas, ad idola, ad magicas artes. Id quod tunc maximè fieri solet, quādo malis, propter peccata nostra, uel ut probemur à Domino, inuoluti, obmurmuramus Deo, accusamusq; eius iudicia, impatientissimè nec sine blasphemia perferentes quod merito

Quomodo abutimur nomine diuino.

nostro maximo patimur. Huc pertinet quod impuri homines sanctissimo Dei nomine utuntur ad conciliandos amores turpes, item ad res perditas furtive sublatas rursus recuperandas & indagandas. Prophanamus nomē Domini Dei nostri, quando non omnem gloriam Deo tribuimus. Perfectum est per nos aliquid boni operis, est in nobis aliquid laude dignum: id si nobis arrogemus, uel saltem decedamus nobis partem aliquam, reliquum Deo consecrantes, non autem in solidū omnia bona referentes ad authorem omnis boni Deum, polluimus nomē Dei, quod solum confitendum & laudandum est in secula. Præterea si negemus Dominum, & pudeat nos doctrinæ Euangelicæ, idē propter scelestissimum hunc mundum & immundissimos huius seculi homines: si turpia aut impura uita polluiamur, quod cedit in ignominiam nominis Dei & scandalū proximī, certē usurpauimus nomen Domini in uanum, imō ad dedecus & opprobrium. Abutimur præterea nomine Dei etiam in solenni iuramento, uel cū iuramus ob res leues, uel iurata non præstamus seruamusq̃. In colloquijs quotidianis, frequenter & quaslibet ferē ob res prophanas uocamus & obtestamur tremendum nomen Dei, uel assuetudine mala sic docti, uel animi commotione excitati: addimus deiterationes alias innumeras, uulnera, crucem, passionem Domini, ipsum cœlum terramq̃, sacramenta, diuos superos & inferos uocantes. Porro mentiendo uariē prophanatur nomen Domini. Mentitur in negotio religionis concionator & doctor ecclesiæ, quando clamat, Sic dixit Dominus, cū Dominus nihil tale loquutus sit. Prætexit hic suæ imposturæ nomen Dei, & sub nomine Dei decipit simplices. Clamat magistratus, Omnis potestas est à Deo, & prætextu diuini nominis uim facit subditis, tyrannū agens non magistratum. Populus sub nomine Domini decipit in contractibus & stipulationibus. Quid quod mendicus ualidus & beneficentia indignus nomen Dei habet in quæstus? Sed quis omnes prophanationis diuini nominis species enumeret? Cauendum nobis omnibus ne prophanemus nomen Dei, sed sanctificemus potius & sanctē colamus.

Pœna abutenti nomine dei.

Sequitur enim in uerbis Domini quæ nam pœna maneat prophanatores diuini nominis, Quotiam nequitiam, inquit, impunitū dimittet Dominus eum, qui assumpserit nomen Dei sui frustra. Et quanquam hæc comminatio Dei, certē horribilis & per se satis efficax sit deterrendi pios à prophanatione diuini nominis, adijciam tamen his unum & alterum exemplū supplicij sumpti per Deum à temeratores diuini nominis. Clamat Dauid, Non persistent iniusti ante oculos tuos Domine: odisti omnes qui operantur iniquitatem: perdes omnes qui loquuntur mendacium. Quantō uerō similius est Dominum perditurum omnes qui loquuntur blasphemiam, & abutuntur sanctissimo Dei nomine? Saul certē quia in extrema sua necessitate Dominum non inuocauit, sed pythonissam consuluit, propria manu consciiuit sibi ipsi necem, ubi prius uidisset populū suum cædi à Palæstinis, atq̃ in populo quoq̃ proprios occumbere filios. Mentitur Ananias spiritui sancto, prophanatq̃ nomē Domini, ac repentina morte collapsus, summa cum ignominia migrat ad inferos. Sanherib ante mœnia Hierosolymorum blasphematur nomen dei æterni, sed mox immenso exiit exercitū, deinde sagittis configitur in templo dei sui à proprijs suis filijs. Iehoiachim cum Zedechia reges Iuda nomen Domini prophanant, unde capiuntur & cæduntur à Nabuchodonosore rege Babylonio. Achab, Isebel & sacerdotes Baalis funditus extirpantur à Iehu rege, quia sub prætextu Dei & religionis ueræ, nomen dei blasphemauerunt & persequuti sunt. Leuit. 24. lapidibus obruitur qui blasphemauerat nomen domini.

Pœna ab impatore contra blasphemos decreta.

Ideoq̃ Iustinianus Imperator in Nouellis Constit. 77. Constantinopolitanis ciuibus

ciuibus scribens, Insuper, inquit, quia supra infandas libidines quidam execrabilia etiam uerba & iuramenta de deo proferunt, deum prouocantes ad iracundiam, adhortamur hos, ut tam execrabilibus uerbis, & item per capillum & caput adiuurationibus, & id genus uerbis alijs abstineant. Nam si conuitia hominibus ingesta, saltem inulta non relinquuntur, multo magis qui diuinum numen conuiuijs incessit, dignus est qui supplicium sustineat. Et propter huiusmodi delicta & famines, & terræ motus & pestilentia oboriuntur. Admonemus ergo ut abstineant à sceleribus illis, quod si post hanc nostram admonitionem in illis deprehendantur sceleribus, principio quidem indignos sese præbent dei erga homines amore, deinde legitimas etiam sustinebunt pœnas. Dedimus enim gloriosissimo regiæ urbis Præfecto negotium ut reos comprehendat, & ultimo submittat supplicio: ne quando ex talium peccatorum contemptu, per tam impia facinora, tam hæc urbs quam tota respublica à diuina opprimatur uindicta. Hæc ille. Colligimus ex his, non minimam calamitatum nostri seculi portionem deberi nephandis execrationibus & blasphemijs, quas pauci aut nulli ferè magistratus coërcent, ac pro merito puniunt. Blasphematur nomen Dei benedicti in secula, omnium ordinum sexuum & ætatum exquisitis & execrandis deierationibus, adeo ut putem nullum à mundi exordio tam blasphemum fuisse populum, quam est seculum hoc nostrum maledictum. Ideoq; infandis & nunquam terminandis premimur calamitatibus. Nam uerax est deus, qui dicit non impunè laturus si qui nomen domini in uanum usurpauerint. Isti non modò frustra assumunt, sed malitiosè & blasphemè cōspurcant. Utinam uerò syncerius promoueant cultum dei in populo magistratus: aut si hoc ab eis impetrari non potest, saltem Caiapha ne peiores & impietiores sint, qui cum audisset, uti ipse putabat, diuini nominis blasphemiam, dirupit uestem & clamabat, blasphemum cōmeruisse mortem. Nisi enim seueriores fuerint contra blasphemos Christiani magistratus, non uideo quomodo non sint sceleratiores ipso impio nebulone Caiapha. Certè uerax est Dominus (id quod singuli uestrum altissimis reponetis animis) qui certò puniet in omnibus hominibus sui nominis prophanationem, magis autem blasphemiam.

Exigit hic locus ut nonnihil dicamus de Iuramento siue Iureiurando, quod fit sub inuocatione & obtestatione diuini nominis. Multa uerò in tractatione huius negotij ueniunt considerata & expendenda. Video enim primùm dubitari à quibusdam, iurare liceat an non liceat: eò quod apud Matthæum dixerit dominus, Audistis dictum antiquis, Non peierabis, sed persolues domino iuramenta tua: at ego dico uobis ne iuretis omnino, &c. Caterum dominus apud Matthæum non uult è medio auferre ueram & antiquam legem, sed interpretari & ad sensum sanum reducere, corruptam prius uarijs & adulterinis glossis pharisaorum. Horum doctrina institutus cauebat sibi populus à periurijs, de superuacaneis & inutilibus aut frustraneis iuramentis alijs non erat admodum sollicitus, non dedecere arbitrans si iuraret per cœlum & per terram: proinde dominus legem patris sui exponens dicit, Iuramenta in uniuersum omnia esse prohibita, nimirum quibus nomen domini in uanum assumitur, & quibus superuacue iuratur. Interea solenne iuramentum nec damnauit nec sustulit. Multum uerò interest inter Iuramentum solenne, & inter iuramenta quotidiana, quæ nihil aliud sunt quam deierationes, non tantum superuacaneæ, sed noxiæ quoq;. Solenne uerò iuramentum utile est & necessarium. Atqui lex Dei & sermo Christi nō prohibet res utiles & necessarias, ergo non damnant iuramentum solenne. Imò in lege permittitur iusiurandum, prohibetur duntaxat inutilis usurpatio diuini nominis. Ac Christus domi-

De Iureiurando.

An iurare liceat.

Iuramentum solenne et quotidianum.

nus non uenit legem soluere, sed adimplere. Proinde iusiurandū in Matthæo non damnauit: nisi quis contendat filium doctrina sua impugnare doctrinam patris sui cœlestis: quæ quidem esset blasphemia in patrem & filium intoleranda. Quid quod ipse Deus iurat, quod non faceret si iusiurandum fieri non posset sine scelere. Dicit enim, post longā legis expositionem, Sancti estote, nam & ego sanctus sum. Sitis perfecti, quemadmodum pater uester cœlestis perfectus est. Vnde legimus præstantissimos utriusque testamenti uiros sub inuocatione & obtestatione diuini nominis in rebus grauibz iurasse, & sine peccato quidē iurasse. Iuramentum itaque lege Christi minimē est prohibitum, licetq; hominibus Christianis iuramenta & exigere & præstare. Imò non uideo quomodo Christiano dignus sit nomine, quisquis legitimē requisitus iurare detrectauerit. Sed de hac re alibi contra Anabaptistas plenius disputauimus.

*Quas ob res
iurandum sit.*

Secundo loco considerandum est, quas ob res iurandum sit. Apud multas respublicas receptum est quamlibet leuem ob causam interponere religionem iusiurandi, atq; ea de causa uidemus ualde uilescere iuramentum. Quid enim hoc aliud est quàm nomen dei assumere in uanum? Discant ergo & sciant magistratus, iuramentum nō esse requirendum quàm in rebus serijs, dum agitur de gloria dei, de proximi incolumitate, & utilitate publica. Obseruandū ergo quando & quas ob res iurauerit populus domini in scripturis sanctis. Iurat beatus Abraham in fœdere sanciendo cum rege Abimelech. Iurat populus domini per frequenter sub regibus, fœdere sese constringens cum deo ad obseruationem puræ religionis. Purgarunt sese iuramentis ueteres à grauibz suspicionibus. In Exodo legimus, Si quis dederit proximo suo iumentum ad custodiendū, atq; illud fuerit mortuum, aut uiabactum, nemine uidente, iuramentum domini inter utrosq; intercedat, quod non extenderit manum in rem proximi sui: quod recipiet dominus eius, & alter nihil restituet. Nam Paulus quoq; ad Hebræos 6. cap. Homines quidem, ait, per eum iurant qui sit maior: atq; iisdem omnis controuersia finis ad confirmationem est iusiurandum. In hunc ergo finem applicet magistratus iusiurandū: ac curet per cætera quoq; ut religiosē uersetur in iuramentis dandis & recipiendis: sanctē quoq; seruent iurata procures populi, neq; admittant unquam ut uel leuibz hominibus credant iurandi religionem, uel quicquam conferant cum iureiurando aut æquent iuramento, sed magna cum obseruatione, ultimo semper loco, tanquam ad supremum recurrant remediū, periurosq; grauiter puniant. Ita minus uilescet in popularium animis iuramenti religio. Væ autem populi proceribus, si propter ipsorum impiam negligentiam uilipendatur iusiurandum. Supplicium graue de his accipiet proculdubio, qui dixit, Quoniam neutiquam impunitum dimittam eum, qui assumpserit nomen Domini in uanum.

Quid sit iuramentum.

Tertio dicemus quid sit Iuramentum seu iusiurandum. Est inuocatio & attestatio diuini nominis ad ueritatem sermonis nostri cōfirmandam. Separatur ergo iuramentum à deierationibus, probra dei continentibus. Separatur item ab execrationibus mala precantibus proximis nostris. Hæ prorsus indignæ sunt quæ appellantur iuramenta. Quoniam uerò uocabulum iuramenti late patet, nō imprudenter legitima & diuina iuramenta denotata sunt uocabulo Iurandi. Apponitur enim ius, admonens iuramentum hoc iuris esse ac iustitiæ. Cæterum attestatio diuini nominis mixtam habet deuotionem & inuocationem. Forma enim iurandi est, Dicam aut faciā hoc uerē, sanctē, & sine dolo malo, Sic me deus adiuuet. Obijcimus ergo capita nostra diuinæ iræ & uindictæ, nisi uerē & sanctē agamus & dicamus quod nos uel dicturos uel facturos promittimus. Grauis est ergo

ergo obtestatio illa qua non inuenitur ulla in orbe grauior. Ad hanc considerationem pertinet & ritus iuramenti. Ab antiquo enim iurarunt patres nostri per nomen domini sublata manu in cœlū. In cœlis habitat dominus Deus noster. Testamur animis nos ascendere in cœlum, & inspiciente deo, ac in cōspectu dei nos iurare, sicuti in oculis iudicum exaltamus manum ad cœlos. Imò quasi data dextra fidem nostram obstringimus Deo, iurantes in nomen Dei. Ad hunc modū iurauit singularis Dei amicus Abraham pater fidei.

Ritus iuramenti.

Igitur non est quod porrò disputemus multis, per nomen nē Dei solius, an & per nomina diuorum, an etiam ad sacrosanctum Euangelium attestatio iurandi fieri debeat. Constat enim iurandum esse fidelibus per solius Dei æterni & altissimi nomen. Habemus ea de re manifesta præcepta iubentia iurare per nomen domini, & prohibentia rursus iurare per nomina deorum. Prioris generis sunt hæc, Timebis dominum deum tuum, illi seruiēs, iurabisq; per nomen eius, Deut. 6. & 10. cap. Dominus item ipse apud Isaïam, Mihi, inquit, incuruabitur omne genu, & iurabit omnis lingua. Nam & in 65. cap. idem propheta dicit, Qui benedicere se uolet, in deo benedicet: & qui iurauerit, iurabit per deum uerum. Posterioris generis sunt hæc sanctæ scripturæ testimonia, Exod. 23. Omnia quæ dixi seruare, & nomina aliorum deorum ne cogitetis, neq; audiātur ex ore uestro. Iosue quoq; dicit cap. 23. Cum ueneritis inter gentes istas, ne iuraueritis per nomen deorum earum, & ne colatis aut adoretis eos. Apud Ierem. in 5. cap. dicit dominus, Filij tui deseruerunt me, & iurauerunt per deos, qui dī non sunt: saturauī eos, & mœchati sunt, &c. Iam & Sophonias inducit loquentem dominum & dicētem, Excindam eos qui adorant ac iurant per dominum, iurantq; per Malchom, id est, regem uel patronum suum. Nec mirum est quod dominus excidiū minatur iurantibus per nomina creaturarum. Est enim iuramentum præcipuus cultus qui debetur Deo, ideoq; alijs non potest communicari. Iuramus enim per supremum, quem uidelicet credimus summum esse bonum, largitorem omnis boni & uindictam mali. Quod si per nomina deorum iurauerimus, certē deo ipsi æquauerimus diuos, diuinosq; honores ipsis tribuerimus. Ideoq; maluit beatus Christi martyr Polycarpus flammam subire ignis, quàm iurare fortunam Cæsaris. Historia extat apud Eusebium lib. 4. cap. 15.

Formula iuramenti.

Iuramentū cultus Dei.

Quarto loco inspicendum quomodo iurare conueniat, & quæ sint conditiones iusti, æqui & boni iurandi. Ieremias ergo, Iurabis, inquit, uiuit Dominus, in ueritate, in iudicio, in iustitia. Et benedicent se gentes in eo, atq; in eo gloriabuntur. Quatuor ponuntur iusti iuramenti cōditiones. Prima est, Iurabis, Viuit dominus. Repetitur quod iam inculcatum est toties, iurandum esse per nomen uiuentis Dei. Formula autem iuramenti patribus nostris talis erat, Viuit dominus, ut claret ex scriptis prophetarum. Ne ergo iuremus per alium, quàm per Deum. Secunda cōditio est, Iurabis in ueritate. Requiritur itaq; ut non lingua solum, sed & mens iuret, ne postea dicamus, iurauit lingua, mens est iniurata. Fideles ergo simus, sine dolo malo, ne mentiamur nēue deludamus iuramentum artibus. Id exprimunt Germani, *On alle gfarð*. Vel, *On gfarð*/id est, non utar ullo dolo malo, sed simpliciter & uerè hoc præstabo. Exemplum mendacis & dolosi iuramenti egregium habes apud Aul. Gel. lib. noct. Att. 7. cap. 18. Tertia cōditio est, Iurabis in iudicio: cum discretionē utiq; non temere, non leuiter, sed expensis rebus omnibus: sed in magna necessitate & utilitate. Quarta cōditio est, Iurabis in iustitia, ne uidelicet sit iuramentum nostrum contra ius & fas, hoc est, ne peccemus contra iustitiā, quæ Deo & hominibus sua tribuit; ne tendat rectā contra dilectionem

Cōditiones iuramenti sancti.

dei proximiq̃. Habet c.v. paucis hisce uerbis comprehensum, & à deo nobis traditum, quomodo iuremus, qualia esse debeant sancta iuramenta, quibus circumscripta conditionibus. Porro si iurauerimus contra has à deo nobis præscriptas conditiones, illegitima erunt nostra sacramenta uel iuramēta; quæ si præterea præstare perrexerimus, incurremus grauem iram Domini.

An iuramenta
impia sint præ-
standa.

Proinde interrogari solet in præsentī, an iuramenta & uota impia uel iniqua, iniusta & mala seruare uel præstare oporteat, nempe si iuramentum aut uotum tuum tendat contra deum, contra ueram religionem, contra uerbum Dei, & contra salutem proximi?

Soluere præ-
stare.

Adducam & recitabo hic responsionem uulgarem, sed ueram & exemplis sanctæ scripturæ subnixam ueritatēq̃ per omnia consentaneam. Sic ergo respondetur, Si quis aliquid iurauerit contra fidem & charitatem, quod obseruatum peiorem uergat in exitum, iuramentum potius est mutandum quàm adimplendum. Vnde Ambrosius, Est contra officiū aliquando promissum soluere iuramentum, ut Herodes fecit. Item Isidorus, In malis promissis rescinde fidem: in turpi uoto muta decretum. Quod incautē uouisti, ne feceris. Impia est promissio, quæ scelere adimpletur. Idem, Non est obseruandum sacramentum, quo malum incautē promittitur. Vt si quis adulteræ perpetuam fidem cum ea permanendi polliceatur. Tolerabilius est enim non implere sacramētum, quàm permanere in stupro. Item Beda, Si quid nos incautius iurare contigerit, quod obseruatum peiorem uergat in exitum, liberē illud salubriori consilio mutandum nouerimus: ac magis instante necessitate peierandum esse nobis, quàm pro uitando periurio in aliud crimen grauius esse diuertēdū. Deniq̃ iurauit Dauid per deum occidere Nabal uirum stultum: sed ad primam intercessionem Abigail fœminæ prudētis, remisit minas, reuocauit ensē in uaginam, nec aliquid culpæ se tali periurio contraxisse doluit. Item Augustinus ait, Quod Dauid iuramentū per sanguinis effusionem non adimpleuit, maior pietas fuit. Iurauit Dauid temere, sed non adimpleuit iuramentum maiori pietate. Ex his alijsq̃ multis ostenditur quædam iuramenta non obseruanda esse. Qui autem sic iurat, peccat. Cum autem mutat, benefacit. Qui non mutat, dupliciter peccat, & quia iniustē iurauit, & quia facit quod non debet. Hæc hæc nus aliorum uerbis recensui, quæ nemo non recipit proculdubio pro ueris & iustis. Ex ijs uerō facilē intelligit charitas uestra, quid præterea sentiendum sit de uotis illis monasticis, & iuramento sacerdotum, castitatem, quantum uidelicet humana permittit fragilitas, promittentium. Nam melius est nubere, inquit Apostolus, quàm uri. Et satius est promissa stulta & noxia atq̃ impura, id est, quæ ad immunditiam perpellunt nō præstare, quàm sub prætextu sacramenti ueritatēq̃ & mentiri & parum pudicē uiuere.

Vota mona-
stica.

Quæ religio-
ne oporteat ser-
uare iuramēta.

Quinto & ultimo loco, paucis admonēdi estis ut magna religione iuramentū seruare modis omnibus contendatis: indicandū præterea paucis, quod præmiū paratum sit sanctis iuramentū sanctū sanctē colentibus obseruantibusq̃. Si deū diligimus, & nomen eius sanctificare cupimus, si deū uerū habemus pro deo uero, & pro deo nostro, si uolumus ut is nobis sit clemēs, propitius & auxiliator præsentissimus, & perpetuus, etiā atq̃ etiā curabimus & religiosē iurare, & quod religiosē iurauimus, sanctissimē seruare atq̃ præstare. Nisi uerō hoc faciamus, minē cœlitus & iudicia seuerissima, sed iustissima, contra nos sunt pronunciata. Gentiles in die iudicij condemnabunt nos. Nam Sagūthini, Numantini, & Petilini maluerunt flamma & fame interire, quàm fidem sacramento confirmatam infringere dissoluereq̃. Ac leges quidem sapientissimorum & iustissimorum quorumuis principum

pum & populorum, periuros damnant capitis. Quanta uerò scandala, quanta corruptiones, & quanta quæso damna existunt ex periurijs? Implicant illa, affligunt, uexant, cōficiunt & subuertunt res Ecclesiasticas & politicas. Quisquis ergo ama uerit rempublicam & incolumitatē patriæ: quisquis amauerit Ecclesiam & incolumitatem Ecclesiæ, curabit ante omnia ut religiosè custodiat iurisiurandi sacramentum. Porro amplissimum uberrimumq; præmiū sanctè colentibus iuramentum à deo promissum est. Ieremias enim, Et benedicent se gentes in eo, inquit, atq; gloriabuntur. Tanta, inquit, felicitas & ubertas optimarum rerum à domino effundetur in populum Iudaicum sanctè iurantem, ut quicumq; posthac uoluerit alteri bene precari, dicturus sit, Benedicat tibi dominus quemadmodū olim benedixit Iudæis. Quisquis uoluerit aliquem laudare, dicet esse similem Israelitis. Relinquitur ergo certissimum, omnigenis locupletandos bonis, deniq; omni laude dignissimos fore, quotquot sacramentum iurisiurandi sanctè coluerint.

*Premium amplius seruanti-
bus iuramentis
promissum.*

Studeamus oro fratres nomen domini sanctificare, & huic præcepto tertio coniungere ardentibus perpetuasq; preces, iuxta domini Iesu doctrinam orantes, O pater coelestis sanctificetur, seu sanctè colatur nomen tuum. Cui gloria in secula seculorum, Amen.

De quarto primæ tabulæ seu Decalogi præcepto, nempe de ratione & obseruatione sabbati.

SERMO IIII.



QUARTVM primæ tabulæ præceptum de uerbo ad uerbum sic habet, *Præceptum Dei 4.*
MEMENTO UT DIEM SABBATI SANCTIFICES.
SEX DIEBUS OPERABERIS ET FACIES OMNIA OPERA TUA, SEPTIMO AUTEM DIE EST SABBATVM DOMINI DEI TVI, IN QVO NON FACIES VL-
LVM OPVS, NEQVE TV, NEQVE FILIVS TVVS, NEQVE FILIA TUA, NEQVE SERVVS TVVS, NEQVE ANCILLA TUA, NEQVE IUMENTVM TVVM, NEQVE ADVENA TVVS QVI EST INTRA PORTAS TVAS. QVONIAM SEX DIEBUS FECIT DOMINVS COELVM ET TERRAM, MARE ET OMNIA QVE IN EIS SVNT, SEPTIMO AUTEM DIE QVIEUIT, IDEO BENEDIXIT DOMINVS DIEI SABBATI, ET SANCTIFICAVIT EVM.

Naturalis & ualde elegans est ordo præceptorum domini. Primo mandato docuit dominus fidem & amorem erga deum. Secundo remouit idola & omnem peregrinum cultum. Tertio præcepto cœpit de uero & legitimo cultu dei homines instruere. Consistit is in sanctificatione nominis diuini, ut hoc inuocemus, & sanctè ac ingenuè confiteamur, deq; ipso iudicemus & loquamur religiosissimè. Quartum præceptum instruit & ipsum dei cultum, nominisq; diuini sanctificationem, sed deflectitur iam nonnihil etiam ad externum cultum, licet quartum hoc mandatum & internum formet. Sabbatum enim uersatur & in interno & externo Dei cultu. *Ordo præceptorum domini.*
Inquiramus ergo quid sentiamus de sabbato, & quàm latè sabbati usus pateat, ac quomodo in obseruatione sabbati colamus deum nostrum. Sabbatum significat requiem & uacationem ab opere seruili. Ac obseruandum censeo quòd dominus nō ait, Sanctifica sabbatum, sed Memento ut diem sabbati sanctifices. *Sabbatum.*
Significat autem uetustissimam esse sabbati institutionē, iam olim patribus traditam, nunc uerò per dominum esse in populo Israelis repetitā & renouatam.

Cæterum summa totius mandati est, Sanctifica sabbatum. Hanc summā mox fufius exponit ipsis etiam diebus annumeratis, recensita item uniuersa familia, cui imponitur sabbati religio. Postremò adiicitur exemplum quoq; ipsius Dei quiescentis & sanctificantis sabbatum.

Sabbatum spirituale est.

Sabbatum ipsum patet latissimè. Nam principiò meminit scriptura sabbati cuiusdam spiritualis & perpetui. Eo cessamus ab opere seruili, abstinentes utique à peccatis, curantes ne in nobis ipsis inueniatur nostra uoluntas, ne ipsi operemur opera nostra, sed cessantes ab his, sinamus deum operari in nobis, subiiciamusq; gubernationi spiritus corpora nostra. Hoc sabbatū spirituale, sequitur sabbatum siue requies æterna. De quibus plura Isaías in cap. 58. & 66. Paulus item ad Heb. 4. cap. Verè autem Deum colimus, quando à malis quiescentes sanctoq; dei spiritui obediētes, studio bonorum operum exercemur. Non uacat autem neq; admodum utile fore existimamus, copiosius & subtilius de sabbati allegoria siue sabbato spirituali disputare. Conemur potius fratres in mortalibus hisce corporibus nostris Deo bene placens sabbatum indefesso sanctimoniae studio sanctificare.

Sabbatum ordinatio religionis externa.

Deinde sabbatum est ordinatio religionis externa. Voluit enim dominus hoc præcepto tradere externam religionem & cultum in quo exerceremur omnes. Ac dei cultus nequit esse sine tempore. Instituit ergo tempus dominus, in quo ab externis uel corporalibus abstineremus operibus, sed interea uacaremur spiritibus. Ideo enim externa quies præcipitur, ut operatio spiritualis corporali opere non inturbetur. Porro uersabatur spiritualis illa operatio apud patres nostros circa quatuor, nempe circa lectionem & interpretationem scripturæ publicam adeoq; circa auscultationem, circa orationem & preces publicas, circa sacrificia siue celebrationem sacramentorū, & circa collectam ac beneficentiam. In his erat religio externa sabbati. Ferias enim agebat populus, coibat in cœtum sanctum. In hoc prælegebant prophetae uerbum domini, interpretabantur hoc & instituebant auditores in uera pietate. Deinde orabant communibus uotis & precibus coniunctis fideles pro omnibus necessitatibus. Laudabant nomen domini, & agebant gratias pro beneficijs acceptis. Præterea sacrificabant secundum uerbū domini, mysteria & sacramenta redemptoris Christi celebrantes & fidem suam exercentes, consociabantur in super sacris, sed & sui admonebantur officij ut & semetipsos offerrent deo hostiam uiuam. Postremò conferebant in cœtibus liberaliter munera sua Ecclesiae usibus. Munera cedebant necessarijs Ecclesiae usibus, ministris & egentibus. Hæc autem erant sancta dei opera, quæ dum fide & dilectione instructi perficiebant, sanctificabant certè sabbatum & nomen domini: id est, in sabbato ea operabantur opera, quæ & nomen Dei sanctificant, & cultores ornant, uereq; sancta & deo placentia opera sunt. Exemplum si quis requirat apertū & elegans sabbati aut festi sanctè celebrati, inueniet apud Nehemiam in cap. 8. Ibidem enim sacerdotes legunt & interpretantur uerbum dei, laudant nomen dei, precantur cū populo, sacrificant, liberalem munificentiam exercent, & per omnia sese gerunt sanctè & religiosè.

Sat temporis laboribus concessum est.

Iam ne quis obiiceret, Otia dant uitia. Præterea laborandum est manibus, ut suppetat uictus, ne peream fame & perdam meam familiam: respondet, Sat temporis concessum est tibi à domino laboribus, quibus quisq; uictum suæ paret familie. Nam sex dies operari licet, septimam demum diem deus cupit sibi & sancto consecrari otio. Septimana quælibet septem completur diebus. Ex his autem septem diebus unam modò sibi postulat dari dominus. Quis iure quæso iniuriam sibi fieri clamitet? Plus certè temporis laboribus quàm sacro tribuitur otio. Et qui

hco

hoc otium postulat, Deus est, hominis conditor, pater & Dominus.

Præterea iubet Dominus hoc sacrum otium, hanc disciplinam & hunc cultum externum in totam transferre domum. Vnde etiam colligimus quodnam sit officium boni patris familiæ, curare ut tota familia sabbatum sanctificet, id est, opera sancta faciat in sabbato, quæ prius recensuimus. Ac quoniam nouit Dominus ingenium hominis, quod euectum imperitat ferè insolentius, ideoque ne durius aut inclementius patres siue domini tractarent familiam, aut impedirent eam in cultu sabbati, disertis uerbis & diligenti enumeratione præcipit, ut familiæ & singulis in familia cõcedant otium ad negotium sanctum. Imò non liberat aut excipit uel aduenam. Non uult apud eos segnium quorundam ualere regulam, Fides & religio libera sit, nemo compellatur ad religionem. Nam aduenam, intra portas populi Dei, id est, in iurisdictione agentem, astringere iubet religioni sabbati. Otium uero præcipitur non propter se quidè (Otium enim semper fuit illaudabile) sed propter istas præcipue causas. Vult esse locum & tempus reseruatum religioni. Ea præclara sunt externis laboribus addictis. Non coniungitur cœtui sacro, nō audit sermōnem Dei, non precatur cum ecclesia, non astat sacris, qui iubente hero suo uel proficiscit peregrè, aut uendit res domini sui in foro, aut in area purgat frumentū, in agro exercet opera rustica, uel domi stat ad lincudē, aut consuit calceos aut caligas. Fides ergo & pietas iubet te concedere otium seruis tuis & familiæ tuæ: imò præcipit segnes alioqui instigare & propellere ad negotiū utile & sanctum. Vult præterea Dominus laborantes respirare. *Quod caret alterna requie, durable non est.* Ergo benignus Dominus qui uult conseruare creaturas suas, modum præcipit, & cauet ne auaritia & duritia dominorū nimis affligant creaturā Dei. In Deuteronomio addit Moses affectum commiserationis, dicens, Memento quod & tu aliquando fueris seruus in Ægypto. Charitas ergo humanitasque requirunt modum, ne nimis laboribus atteramus familiam. Præterea constat patres familiæ plantatione pietatis in famulitio, priuatam & domesticam utilitatem promouere plurimū. Seruuli enim impij, sunt ferè furaces & infideles: pñ, fidi & œconomici. Quid quod in enumeratione familiæ pecoris quoque uel iumentorū fit mentio: non tam quod iumentis dominus sit homo, ac idcirco benignè & moderatè eo uti debeat, quàm quod sine ministerio hominum iumenta exerceri non possunt. Abducuntur ergo a religione sabbati per iumenta homines: unde ne abstrahantur, præcipitur disertè ut quietem concedamus iumentis.

Postremò adhibet suum exemplum Dominus, eo ipso docens religiosè colere sabbatum. Quoniam, ait, sex diebus fecit Dominus cœlum & terram, mare & omnia quæ in eis sunt, septimo autem die quieuit. Ideò benedixit Dominus diei sabbati & sanctificauit eum. Operatus est Dominus Deus sex diebus creando cœlū, terram, mare, & omnia quæ in eis sunt, septimo autem die quieuit & consecrauit certam diem quieti. Consideranda sunt septimo die opera Dei quæ condidit sex diebus, recolligendum est filijs Dei quæ & quanta beneficia tota illa septimana acceperint, deinde agenda gratia, laudandus est Deus, & ex operibus eius discendus. Consecrandum illi totum corpus cum anima: consecranda sunt ipsi dicta & facta nostra omnia. Quieuit quidem Dominus à creando, sed non quieuit à conseruando. Quiescendum ergo à manuarijs & corporalibus operibus, sed non cessandum ab ijs quæ beneficentiæ sunt & cultus diuini. Proinde non nocuit rebus conditis quies diuina. Non damno afficiet & affliget res & negotia nostra, feriata & rebus diuinis impensa dies. Nam Dominus benedixit sabbato, benedicet ergo & tibi & domui, rebus & negotiationibus tuis omnibus, si curaueris sanctificare

Pater familiæ transferat religionem sabbati in domum suam.

Otium.

Sabbatum egit Dominus.

Benedixit sabbato Dominus.

sabbatum Domini, id est, ea facere opera quæ præcepit fieri in sabbato. Errant ergo toto cœlo quicunque religionem & sanctam sabbati quietem contemnunt, iners otium appellant, ac sabbatis perinde ut prophanis diebus laborant, prætexentes curam familiæ ac necessitatem.

Sabbati Christianorum.

Hæc enim omnia nobis quoque & nostris ecclesijs applicare oportet. Certissimum est, spirituale sabbatum Christianis ante omnia & per omnia esse mādātum. Nec dubium est, quin bonus Dominus uelit in nostris quoque, ut quondam in Iudæorum ecclesijs, iustum seruari ordinem, in exercenda religione externa maxime. Scimus sabbatum esse ceremoniale quatenus coniunctum est cum sacrificijs & reliquis Iudaicis ceremonijs, & quatenus alligatum est tempori; cæterum quatenus sabbato religio & pietas propagatur, & iustus ordo retinetur in ecclesia, ipsa quoque charitas proximi seruetur, perpetuum & non ceremoniale est. Oportet certe & hodie parci familiæ, oportet & hodie familias institui in religione. Cœtus sacros nullibi dissipauit Christus Dominus, sed recollegit maxime. Oportet autem ut locum certum ita definitum tempus consecratum esse exercitio religionis, ergo & otium sanctum. Vetus ergo ecclesia diem mutauit sabbati, ne uideretur Iudaizare & ceremonijs affixa hære: & cœtus omnia quoque sacra celebrauit prima sabbati, quam Ioannes appellat Dominicam, haud dubie propter gloriosam Domini resurrectionem. Et quamuis nullibi legatur præcepta in Apostolicis literis Dominica dies, quia tamen quarto hoc præcepto primæ tabulæ præcipitur cura religionis & exercitium externi cultus diligenter, alienum à pietate & charitate Christiana foret, nolle Dominicam sanctificare: præsertim cum sine tempore statō & citra otium sanctum, cultus ille externus constare non possit. Idem sentiendum arbitror de pauculis quibusdam Christi Domini ferijs aut festis, quibus peragimus memoriam natiuitatis, incarnationis, circuncisionis, passionis, resurrectionis, ascensionis in cœlum, & missionis sancti spiritus in discipulos Domini nostri Iesu Christi. Libertas enim Christiana, non est licentia & dissolutio ecclesiastica piæque obseruationis, iuuantis & prouehentis gloriam Dei & charitatem proximi. Quoniam uero Dominus uult sibi soli festa celebrari, non probo festa creaturis instituta. Hæc gloria, hic cultus est solius Dei. Clamauit Paulus, Nolo quisquam uos iudicet in parte diei festi aut sabbatorum, quæ sunt umbra rerum futurarum. Item, Dies obseruatis & menses, tempora & annos, metuo ne frustra in uobis laborauerim. Et proinde nihil nobis hodie cum obseruatione Iudaica in ecclesia Christi, Christianam modò uolumus obseruationem, seu exercitium religionis Christianæ custodiri liberè.

Dies Dominica.

Sanctificatio sabbati Christianorum.

Versabitur tamen sanctificatio & exercitium Dominicæ diei nostræ etiam circa quatuor, quæ in sancto Christianorum cœtu inueniantur oportet, siquidem fuerit uerè sancta. Principiò ingrediantur in cœtum sanctorum pñ omnes. In cœtu exponatur uerbum Dei, annuncietur quoque sermo Euangelicus, ex quo discant auditores quid sentiant de Deo, quod nam sit officium cultorum Dei, quomodo sanctificent nomen Domini. Deinde fiant in cœtu orationes & obsecrationes pro omnibus omnium necessitatibus. Laudetur bonitas Domini, & agantur gratiæ pro beneficijs Dei quotidianis & inestimabilibus. Si uero tempus, occasio & consuetudo ecclesiæ poscat, religiosè celebrentur sacramenta ecclesiæ. Requiritur enim potissimum hoc præcepto quarto, ut sacramenta & ritus ecclesiæ sanctos, legitimos & utiles ac necessarios, & obseruemus sanctè, & exerceamus religiosè. Postremò habeat in cœtu sanctorum summa locum humanitas & beneficentia, discant omnes priuatim largiri eleemosynā & benefacere quotidie, liberalissimè autē ac publicè, quoties

quoties temporis necessitas & rerum opportunitas poposcerit. His autem officijs sanctificabitur sabbatum Domini etiam in ecclesia Christianorum, maxime si accedat his tota die studium innocentiae diligens.

Est autem haec disciplina in singulas domos nostras transferenda ab omnibus patribus familiis, non minus quam in domos Iudaicas. De qua re non est quod plura dicamus, cum hoc caput superius ita tractauerim, ut ecclesiae Christianae etiam congruat. Hoc adijciam in praesenti, Christiani magistratus aut saltem boni patris officium esse, uiolatores & contemptores sabbati aut cultus diuini redigere in ordinem. Principes populi Iudaici ac totus populus Dei, hominem cotumaciter colligentem ligna in die sabbati, lapidibus, Deo mandante, obruerunt. Cur ergo nonliceret Christiano magistratui punire in corpore, fortunis, & uita contemptores religionis, ueri & legitimi cultus sabbati? Certè si cesset corrupto hoc seculo demens & ebrius magistratus, cuius patrifamilias opera danda ne impia sit familia, Puniat suos sibi licitis puniendi modis. Potest enim quilibet paterfamilias, si habet inter idololatrias, qui nec habent, nec habere cupiunt legitimos & Christianos coetus, in aedibus proprijs coetum sanctum colligere, sicuti fecisse constat Lotum in Sodomis, Abrahamum, Isaacum & Iacobum in terra Chanaan & Aegypti. Grande uero & peccatum & schisma est detestandum, si celebrentur in ciuitatibus & pagis legitimi coetus, tu uero quaeras diuerticula, & spernas ecclesiam Dei siue coetum sanctorum. Id quod solent Anabaptistae.

Veniunt ergo hic quoque paucis recensendi abusus sabbati, siue peccata contra hoc mandatum commissa. Peccant qui non quiescunt a malis operibus, imò otio sancto abutuntur ad irritamentum carnis & uoluptatum. Nam hi sabbatum agunt Deo, operantur autem diabolo, alea ludendo, potando, choros ducendo & alijs mundi uanitatibus indulgendo, quibus non tam abducimur a coetu sancto, quam polluimus corpora nostra, quae sanctificare debueramus. Peccant qui uel operas manuaras exercent in sabbato, uel lectis implicati dormiunt in multam lucem, negligentes coetum Dei. Peccant qui urgent seruos, & negotijs eis impositis abstrahunt a cultu diuino, qui alias res putidas praefereunt cultui Dei. Peccant praeter alijs quicumque sabbatum non modo non sanctificant, sed etiam alijs sacra contemnendi suis impuris disterijs & malo exemplo authores sunt: qui ritus sacros, ministerium, ministros, scholas sacras, & studia pia, & fastidiunt & suggillant. Peccant hic maxime patres & matres familias, si negligant sanctificationem sabbati in domibus suis urgere & obtinere. Quicumque spernunt religionem sabbati, apertum de se praebent testimonium impietatis uel contemptus numinis. Proinde magnas habet promissiones & minas obseruatio & contemptus uel neglectus sabbati. Ad quam rem demonstrandam recitabo charitati uestrae Ieremiae uerba ex cap. 17. Sic dixit Dominus ad me, inquit, Vade & sta in porta filiorum populi per quam ingrediuntur & egrediuntur reges Iuda, atque in omnibus portis Ierusalem, & dices ad eos, Cauete quam chara sunt uobis animae uestrae, ne tollatis onus die sabbati ut inferatis per portas Ierusalem, neque efferatis onus e domibus uestris in die sabbati, imò nihil operis faciatis, sed sanctificate diem sabbati, quemadmodum praecepit patribus uestris. At illi non audierunt neque inclinarunt aurem suam, sed indurarunt ceruicem ne reciperent disciplinam: uos autem si me diligenter audieritis, ait Dominus, nulla inferetis onera die sabbati, sed sanctificabitis sabbatum, neque quicquam operis in eo facietis. Tunc enim transibunt per portas huius urbis reges & principes sedentes in solio Dauidis uecti curribus & equis, sedebitque ciuitas ista in perpetuum: & ferent de ciuitatibus Iuda & Beniamin sacrificia, thus & laudem

Officium patrumfamilias.

Num. 15.

Abusus sabbati.

Promissiones & minae additae sabbato.

in domum Domini. Si uerò me non audieritis sanctificando diem sabbati, sed tuleritis onus, ieritisque per portas in die sabbati, incendam ignem in portis eius qui deuorabit magnificas aedes eius, neque extinguetur. Hæc Ieremias.

Lex imperatoria de obseruando sabbato.

Proinde iustis de causis religiosi principes Leo & Anthemius. A. A. Armasio P. P. scribentes mandant in hæc uerba, Dies festos maiestati altissimæ dicatos, nullis uoluptatibus occupari, neque ullis exactio-um uexationibus prophanari. Dominicum itaque diem semper honorabilem decernimus uenerandum, ut à cunctis exequutionibus excusetur, nulla quenkumque urgeat admonitio, nulla fideiussionis flagitetur exactio, taceat apparitio, aduocatio delitescat, sit ille dies à cognitionibus alienus, &c. Et mox, Nec huius tamen religiosi diei otia relaxantes obscœnis quibuslibet patimur uoluptatibus detineri. Nihil eodem die uindictet sibi scena theatralis, aut Circense certamen, aut ferarum lachrymosa spectacula; etiamsi in nostro ortu aut natali celebranda solennitas inciderit, differatur. Amissionem militiæ proscriptionemque patrimonij sustinebit, si quis unquam hoc die festo spectaculis interesse, uel cuiuscunque iudicis apparitor prætextu negotij publici seu priuati, hæc, quæ lege hac statuta sunt, crediderit temeranda.

Sabbatum propter hominem, non homo propter sabbatum.

Interea uerò non obliuiscuntur Christiani horum in Euangelio uerborum Christi, Sabbatum propter hominem conditum est, non homo propter sabbatum: proinde filius hominis est Dominus etiam sabbati. Intelligunt per sabbatum institutum esse diuinitus ad conseruandum non perdendum hominem, ideoque sabbatum admittere dispensationem, quoties uel necessitas ineuitabilis, aut salus hominis requirit. De qua re disputatum est ab ipso saluatore nostro Christo apud Matthæum in 12. & apud Lucam in 6. & 13. cap. Certè in his uersatur libertas Christiana. Cumque excusantur sacerdotes & Leuitæ in templo propalam mactantes, excoriantes, incendentes & coquentes, hoc est, sacrificia perficientes, ita ut minimè teneantur rei sabbati uiolati, licet utique sabbatis ea parare citra peccatum quæ externo cultui deserviunt. Pari ratione licebit præparare cibum, & pro necessitate curare corpus. Licebit & medicari ægrotis, inuisere decumbentes, iuuare inopes, ut creaturam Dei conseruemus. Instruit nos in his exemplum saluatoris nostri, sabbato operantis opera charitatis & humanitatis. Exemplum non unum extat in historia Euangelica, præsertim Luc. 6. 13. Ioan. 5. cap. Quod si licet demersum pecus aut iumentum sabbato extrahere ex fouea, cur non liceat domum ruinosam & iamiam in lapsum propendentem, sabbato fulcris sustentare? Cur non liceat sabbato fœnum aut frumentum iniuria cœli æquo diutius per agros dispersum & imbribus expositum, recolligere, & ab interitu, ne in uniuersum computrescat, uindicare? Diuus Constantinus Imperator in legibus suis Elpidio scribens, Omnes iudices, inquit, urbanaeque plebes, & cunctarum artium officia, uenerabili die Solis quiescant. Ruritanen positi agrorum culturæ liberè licenterque inseruiant. Quoniam frequenter uenit ut non alio die aptius frumenta sulcis & uineæ scrobibus commendentur: & ne occasione momenti pereat commoditas cœlesti prouisione concessa. Hæc Imp. A. Non concedit rusticis omnimodam & perennem sabbati prophanationem. Requiritur enim à rusticis quoque perinde ut ab oppidanis cultus Dei & quarti præcepti cultus, sed libertas permittitur in necessitate. Caterum pietas & charitas in his erit optima dispensatrix & magistra, ne uidelicet sub prætextu libertatis aut necessitatis exerceamus impietatem, & agamus auarorum non religiosorum opera. Hæc hæctenus de altero sabbati usu.

Sanctificat Dominus.

Tertiò sabbatum significationem habet augustissimam. Signum enim perpetuum est, quod deus solus is est qui sanctificat suos cultores. Sic enim loquitur Dominus

minus Mosi, Obseruabitis sabbata mea: quoniam signum est inter me & inter uos in posteritates uestras, ut sciatis quia ego Dominus qui sanctifico uos. Et reliqua quæ habentur Exodi 31. cap. & repetuntur Ezech. 20. cap. Ad hunc autem usum mutuam operam confert, quod modò præcessit in declaratione secundi usus. Deus enim sanctificat homines suos fideles per spiritum sanctum: id quod annunciat ecclesiæ per uerbum Euangelij, testatur autem & obsignat sacramentis, sed & iugibus precibus ab ipso sanctificationem nos postulare iubet. Quæ quidem omnia maximè in sabbatis exercentur, in hoc ut sanctificationem à Deo unice sancto consequamur.

Hactenus enarraui charitati uestre breui compendio primam præceptorum Dei tabulam, quæ nobis cultum diuini nominis descripsit diligentissimè. Quoniã uerò filij Dei sunt non illi quidè qui uoluntatem Dei intelligunt, sed faciunt etiam, oremus patrem nostrum qui in cœlis est, animos nostros illuminet, ut opere fidelis ac Deo grato colamus benedictum in secula.

De primo secundæ tabulæ præcepto, quod ordine in Decalogo quintum est, de honorandis parentibus. SERMO V.

EQUITVR tabula legis diuinæ secunda, quam Deo inspirante & iuante ea exponam breuitate, qua enarraui primam. Et ut prima docuit dilectionem Dei, ita secunda tradit dilectionem proximi, erudiens omnes homines quæ nam sint officia proximo debita, & quomodo uiuamus in hoc seculo honestè, humaniter & tranquillè. Bonus enim Dominus uult nos uiuere commodè & suauiter. Nos quoniam id nolumus agnoscere, neque mandatis eius bonis obtemperare, nostris uitijs & malis aceruamus in capita nostra cumulum malorum. Continet tabula hæc sex præcepta, quorum primum est tale, *HONORA PATREM TVVM ET MATREM TVAM, VT SIS LONGÆVVS SVPER TERRAM, QVAM DOMINVS DEVS TVVS DABIT TIBI.* Rectè orditur secundam tabulam ab honorandis parentibus. Nam post pietatē in Deum, proxima est pietas in parentes, à quibus post Deum habemus uitam, & qui inæstimandis uigilijs & laboribus imensis nos educarunt ab infantia. Ac naturalis quidem ordo requirit ut semper præcedant præstantiora.

Distinguemus hoc mandatum perspicuitatis gratia in tres partes. Primò explicabimus qui gradus & quæ genera hominum cōprehendantur sub uocabulo parentū. Secundò inuestigabimus quis nam sit ille honor, & quàm latè pateat, quem iubet Dominus impendere parentibus. Postremò attingemus & promissionē pijs factam liberis, & inde colligemus poenam impijs destinatam.

Parentes qui sint nemo ignorat. Dedit hos nobis Dominus Deus noster ut ab ipsis acciperemus initium uitæ, qui nutrent & educarent nos, qui deniq; ex barbaris & semibrutis uerè homines facerent. Maius est beneficiū quod liberis conferunt parentes, maior labor & sumptus quem faciunt, maior cura, dolor & ærumna, quàm quisquam uel eloquentissimus enumerauerit. Significanter autem non patris tantum, sed & matris nomen exprimitur in lege, ne propter sexus imbecillitatem uideretur citra grauem noxam contemni. Plus laboris dolorisq; sustinent & sentiunt piæ matres in partu, educatione & nutritione liberorum quàm patres. Magna ergo de causa & matris nomen in præcepto disertè est expressum. Comprehendimus autem hîc quoq; auum & auiam, abauum & abauiam, omniacq; hu-

Præceptum Dei.

Quid parentū nomine intelligendum.

*Patria.**Magistratus.**Tutores &
Magistri.**Doctores
Ecclesiae.**Consanguinei
& affines.**Senes.**Honorare
quid.**Præcedit semper
per honor Dei.*

ius generis alia. Comprehendimus secundo loco patriam cuiusque in qua natus est quisque, quæ aluit, fouit, ornauit atque defendit. Comprehendimus tertio loco principes seu magistratus. Senatores enim seu principes, & patres & pastores populi in sacris nuncupantur. Xenophon putauit bonum principem nihil distare à bono patre. Quarto loco recenseantur parentum nomine Tutores, quos appellant aduocatos pupillorum aut orphanorum. Succedunt enim in locum demortuorum parentum, sumpta cura & tutela liberorum, quos ueluti proprios & ex se genitos (hic enim affectus in eis sit oportet) educant, tuentur & prouehunt. Quibus accensendi sunt magistri artium, opifices. Hi enim docent iuuenes seu adolescentes honestum aliquod artificium, quo quisque sibi honestè uictum paret, erudiunt in bonis moribus, & quodammodo hominem adhuc rudem expoliunt perficiuntque. Quinto reputantur pro parentibus ministri, doctores, & pastores ecclesiarum, quos ipse Paulus patres uocauit, non tam propter curam & amorem quibus affecti sunt erga discipulos ac ouiculas, quam quod per Euangelium generamur Christo. Sexto loco ueniunt numerandi consanguinei & affines, frater & soror, nepotes & neptes, focrus & nurus, focer & gener: qui inter se necessitudine ceu neruis membra connectuntur & conseruantur. Ultimo uerò loco senes, uiduæ, pupilli, imbecilles & infirmi parentibus nostris coniunguntur: quorum causam non uno loco commendauit nobis scriptura diuina. Habetis fratres quos intelligamus in hoc primo mandato secundæ tabulæ esse parentes, & parentum nomine comprehensos & commendatos: iam audite quem his debeamus honorem, & quis uel quid sit honor ille quem debemus parentibus.

Honorare significat in scripturis uaria, & in præsentī quidem magnificare, reuereri, plurimū facere, ceu rem à Deo institutam uenerari & pro diuino beneficio, pro re diuina, sancta, utili & necessaria agnoscere, amare & laudare. Honorare est morem gerere aut obedire, & obedire quidem, tanquam ipsi Deo, à quo præcepta ac cui acceptam esse nouimus nostram obedientiam. Alioqui parentibus & maioribus iniqua uel facientibus uel præcipientibus, non est aut imitatione aut obedientia obtemperandū. Nam posteriora præcepta referuntur ad priora. At in secundo didicimus Deum iniquitatem patrum requirere in filiis, idcirco minime parendum parentibus præcipientibus contra Deum & contra legem Dei. Non obediebat Ionathan patri suo Saulo persecutionē mandanti contra Dauidem: ac laudem inde adeptus est in sacris literis maximam. Tres Danielis socij Nabuchodonosor obtemperabant per omnia, & amabant ipsum, ac obseruabant ceu maximum & potentissimum, imò & munificentissimum regē, ceterum præcipientem idololatriam tantū non contempserunt. Et S. Petrus qui docuit obedientiam & honorē quem debemus parentibus & magistratui exhibere, præcipientibus principibus & patribus populi ne porro annuntiaret populo Christum crucifixū, respondit, Oportere Deo plus obedire quam hominibus. Sed quid multis hæc enuero, cū Dominus hæc & alia similia in hanc breuem concluderet sententiā: Si quis uenit ad me, nec odit patrem suum, aut matrem suam, & uxorem, & filios, & fratres, & sorores, præterea autē & animam suam, non potest meus esse discipulus. Præterea honoras parentes, cū non cōtemnis, non negligis, cū te ipsorū nec piget nec pudet propter afflictā fortunam. Honoras parentes, cū iuuas consilio & auxilio, confectos uidelicet diuturna ætate, uel subleuas inopia oppressos, uel iuuas alioqui laborantes. Hoc enim uerē & propriē est parentes honorare, teste & interprete ipso Domino apud Matth. in cap. 15, consulere inquā parentibus & opitulari, eos tueri uel defendere, imò te totum adeoque ipsam uitam eis impendere.

Iam

Iam quò plus lucis & euidentia habeant ista omnia, conferemus aut applicabi-
mus hunc honorem septem illis gradibus uel membris, ex quibus intelligat quis-
que, quomodo debitum honorem parentibus, patriæ, magistratui, & alijs supra
memoratis impendat. Parentibus quia honorem debemus, certè magnificè de eis
est sentiendum, quòd à deo nobis dati sunt, ut eos reueremur, amemus, & modis
omnibus suspiciamus, idè propter dominum: qui certò contemnetur si pergāmus
parentes aspernari, & de ipsis sentire uulgariter. Nec interest digni ne an indigni
sint, quibus honorem deferre iubet dominus. Nam qualescunq; tandem sint, non
tamē sine dei prouidentia hunc locum assecuti sunt, cuius ratione ipse legislator
eos honorari uoluit. Reuerentiam itaq; & affectum filialem sonet, quicquid lin-
gua liberorum dixerit. Ex affectu & reuerentia tali obediant parentibus liberi. Si
morosiores aut iniquiores uideantur, dissimulemus prudenter, & declinemus in-
terim à malo in quod nos uidebantur impulsuri, & ita rem temperemus, ut quā
minimum fieri potest, offendamus parentes. Ionathas filius Saulis religiosissimus
& piissimus, sit nobis exemplum. Vidit is magno cum dolore & molestia furores
contra Dauidem & iniuriam patris contra seipsum, tolerauit tamē dissimulauitq;
prudenter, alicubi etiam & in loco reprehendit, nullibi iniquitatem patris adiu-
uit, semper iusto & bonis adhæsit, pertinaciam patris deplorauit, uim uerò inferre
paranti patri, audacius non restitit, sed fuga sibi consuluit, interea nihilominus di-
lexit patrem, orauit pro eius salute, ac in reliquis filium præstitit obsequentissi-
mum. Hoc scilicet officium est pijs filijs. Hoc exemplum quilibet nostrum in obser-
uandis parentibus etiam duris & iniquis, studiosè imitari conabitur. Nemo aspe-
rius responset, imò prorsus nullo modo responset parentibus; nemo maledicat pa-
tri aut matri; nisi suppremi & iustissimi dei maledictionem certò reportare cupiat.
Si pauperes sunt parentes, si deformes, si laborent uitijs, ne illuserit his quisquam,
nemo nostrum contemnat. Ne simus ingrati erga optimè meritos. Nutriamus, fo-
ueamus, iuueamus eos in omnibus, imò impendamus illis & nos ipsos & nostra
omnia. Omnia enim nostra illorum sunt: omnia nostra ab illis habemus, sine qui-
bus non uiueremus. Meminerimus quantopere hanc legem commendarit nobis
apud Matthæum dominus. Inspiciatur cap. 15. Meminerimus quid gentibus fue-
rit *ὡς πατέρες*, nimirum mutuam officij uicem rependere, maxime nutriendi fo-
uendiq; eos à quibus aliquando fueris enutritus: ut cum liberi parentes ætate fe-
los uicissim alunt fouentq;. Et extat lex apud gentes pietatis magistra, quæ edi-
cit, ut liberi parentes alant, aut uinciantur. Hanc legem quam multi mortales ne-
gligunt, sola Ciconia inter omnia animantium genera exprimit. Siquidem reli-
qua tantisper amant agnoscunq; parentes, dum egent illorum ad nutritionem
opera: una ciconia parentes senecta defectos, uicissim alit, & uolandi impotētes,
humeris gestat.

De honore pa-
rentum.

Ciconia pieta-
tis symbolum.

Extant apud Gentiles piæ & elegantes sententiæ de honorandis parentibus.
Isocrates, Talem erga parentes te præsta, ait, quales se tibi tuos liberos exhibere
optares. Anaximenes dixit, Ille sui genitoris apprimè amator est, qui operam dat,
ut patrem sine ulla molestia plurimū exhilaret. Plato quoq; in Legibus putat eum
ingentem domi tenere thesaurum, quicunq; patrem uel matrem, aut horum pa-
rentes senio confectos domi alit, nec alio simulachro in ædibus opus esse existi-
mat, cum omne studium conuertere iubeat ad ritè colendos parentes. Idem, Pa-
rentibus, inquit, uiuentibus debita omnium antiquissima, prima, & maxima per-
soluamus. Putare enim quisq; debet omnia quæ possidet eorum esse, qui genue-
runt & educarunt, ita ut hæc illis omnia pro uiribus ministrare debeat: primum

Gentilium sen-
tentia de hono-
randis parenti-
bus.

quidem externa bona: deinde corporis: postremo quæ ad animum pertinent, hæc omnia uidelicet mutuò data persoluens, & pro curis doloribusq; priscis parentū in senecta recentes reddens, quando maximè indigent. In uerbis quinetiam per totam uitam parentes uenerari maximè decet. Leuium enim uolatiliūq; uerborum grauissima imminet pœna. Nam omnibus proposita est Nemesis iudicij angelus horum omnium consideratrix. Oportet ergo iratis animumq; explentibus cedere, seu uerbis siue rebus id faciant, non ignorantes patrem iure admodum filio succensere, si quando iniuriā sibi ab eo fieri arbitretur. Mortuis uerò parentibus monumenta decentissima, sed temperanter tamen construamus. Hæc si seruabimus, præmia à dijs reportabimus maxima. Hæc Plato. Sanctus Hieronymus dicit, Matribus debitam impendite reuerentiam, quæ uobis uteri labore seruientes, pondus uestri corporis tolerant, atq; ignotam portantes infantiam, famulatum quendam exhibent nascituris. Illo tempore non sibi tantum mater esurit, nec acceptos sola digerit cibos. Materno uictu alitur & ille qui latet, eiusq; membra alterius comestione pascuntur, ut homo futurus alienis morsibus saturetur. Quid ipsa memorem nutrimenta, & teneræ infantiae dulces iniurias, quas nutritoris affectus de suis paruulis sumit? Quid cibos in matre confectos, qui foemineis manantes ex membris lacteum soluuntur in succum, & fauces inualidas liquido sapore perfundunt? Cogente natura sumunt infantes de matre quod bibant, & dente non nato hoc sibi currentibus labris eliciunt quod non sit necesse mordere. Seruiunt materna posteris pectora, seruiunt ipsis incunabilis, manus & terga membris deuota lactentium gratos artus accipiunt. Optat mater paruulum crescere, optat citò uidere maiorem. His tot tantisq; præcedentibus factis, matri debet tota alacritate serui. Reddatur naturæ debitum, reddatur & posteris quod debetur. Exolue fili quod debes, & officia debita qualicunq; exhibe famulatu. Quia parentibus nemo potest reddere quod debetur. Hæc ille.

Matris labores

De honoranda patria.

Porro patriam quisq; suam meritò magnificat, amat, prouehere cupit, ornatq; suis uirtutibus, iuuat omnigenis beneficijs, defendit ipsam strenuè & pugnat pro ea fortissimè, siquidem necesse sit ipsam asserere à latronibus. Quid est obsecro ciuitatis forma, ut ille dicebat, iucundius, in qua rectè constituta est Ecclesia, in qua legitimè colitur deus, & obeditur (fide & dilectione, quantum scilicet gratiæ concesserit deus) uerbo dei? in qua magistratus tuetur disciplinam & bonas & æquas leges, ciues obtemperant, sunt concordēs, habent suos cœtus ueræ religionis & iudiciorum causa, habent congressus honestissimos, in templis, in curia, in scholis, colunt uirtutem & literarum studia, quærunt uictum honestis artibus, quibus uita opus habet, cultura agrorum, mercatura, opificijs, educant liberos, bene efficijs prosequuntur parentes, pauperes, peregrinos. Sunt ergo in hac republica uirgines, nuptæ, pueri, senes, matronæ, uiduæ, pupilli. Si qui pro ingenio humano peccant contra leges, puniuntur, defenduntur innoxij, floret pax, iustitia, & humanitas. Quis autem æquis & patientibus oculis uideat talem rempublicam, patriam scilicet suam, uel à seditiosis ciuibus, uel ab externo milite turbari, uexari, subuer-ti atq; discerpi? Seditionibus uel bellis subuertuntur cum studijs omnes uirtutes, constuprantur uirgines & matronæ, afficiuntur contumelia senes, perit religio & omnis pietas. Ergo fortissimus militiæ imperator Ioab contra Syros pugnaturus pro patria, ad Abisai fratrem suum dixit, Si fuerint Syri me ualidiores, opem mihi feres; sin filij Ammon tibi præualuerint, adero tibi auxilium laturus. Sis ergo fortis, & pugnemus fortiter pro populo nostro & pro ciuitatibus dei nostri. Dominus autem faciat quod bonum est in oculis suis. Iudas quoq; Machabeus uir in

Pugnandū pro patria.

Israelitica

Israelitica gente clarissimus bellator, & in patriam suam piissimus, milites seu ciues suos ad pugnam contra hostes animans, Illi nos aggrediuntur, ait, copia, per iniuriam, ut nos cum uxoribus & liberis nostris deleant & deprædentur, nos autem pugnamus pro uita legibusque nostris: ac deus illos in conspectu nostro conficiet. Sed & ipsi ciues se mutuò adhortantes, clamant, Submoueamus à populo nostro afflictionē hanc, & pro gente sacrisque nostris dimicemus. Nec est quòd quisquam nostrum dicat hæc esse opera legalia, quæ nihil ad nos qui in Ecclesia Christi sumus, pertineant. Nam Apostolus Paulus de fide Christiana loquens ad Heb. Isti per fidem, inquit, expugnauerunt regna, operati sunt iustitiam, effecti sunt robusti in bello, incursiones auerterunt exterorum. Proinde cum eadem utrisque sit fides, licet nobis quoque iusto bello tueri patriam, religionē, uirgines, senes, uxores, liberos, libertatem & facultates. Impij sunt in patriam, & peccant contra hoc præceptum, qui prætextu fidei deserunt bello afflictam patriā, nec asserunt à barbaris exterisque nationibus aut militibus, uita in ipsum mortis præsentissimum periculum profusa. Beatus Ioannes, Per hoc cognouimus charitatem, ait, quoniam ille animam suam pro nobis posuit, & nos debemus pro fratribus animas ponere. Milites mercenarii, qui iniquam pro stipendio militiam sequuntur, uenalia habentes corpora sua, iudicabunt ciues desertores patriæ. Nam animas suas deponunt propter pauculos aliquot coronatos: quas ciues molliculi & effœminati uel periclitari nolūt pro religione, magistratu, uxoribus, liberis, & uniuerfa facultate sua. Quid oro dicent patriæ desertores in die illa, qua rependet dominus & pijs & impijs in patriam, cum uiderint se longè uinci à Gentilibus uirtute? Curtius Romanus adolescens nobilissimus, in hiatum fori ingētem sese præcipitem dedit, ut sua morte spontanea seruaret patriam. P. Decius pater & P. Decius filius deuouerunt capita sua pro salute reipublicæ, ac fortiter occubuerunt amore patriæ. Codrus rex Atheniensium piissimus, cum ex oraculo Apollinis intellexisset Athenas non posse seruari, nisi morte regis, ac hostes ea de causa præcepissent, ne quis corpus regis uulneraret, deposuit Codrus cultum regium, & uulgariter uestitus irruit in hostes, atque quendam ex ijs in cædem suam compulit. Phileni fratres patriæ quàm uitæ suæ longiores terminos esse maluerunt, ideoque uiuos se terra obrui passi sunt. Quid uerò nos pro salute & incolumitate patriæ sustinemus? Hierocles, Est patria, ait, uelut alter quidam deus & primus maximusque parens. Quare qui nomen ei imposuit, à re ipsa non temere patriam appellauit, uocabulo quidem à patre deducto, pronunciato tamen fœminina terminatione, ut ex utroque parente mixtum esset. Atque hæc ratio insinuat patriam unam ex æquo duobus parentibus colendam esse: & cum præferat honorem patriæ, ne simul quidem parentes ambos maioris fieri concedit, sed æquali honore dignatur.

Orandum est præterea sedulò pro incolumitate patriæ. Babylon non erat Iudeorum patria, sed quia ad spacium septuaginta annorum, propter peccata, à Deo in Babylonem relegati erant Iudæi. Babylon reputabatur iam pro patria. Ideoque Ieremias, Edificate domos, ait, & inhabitate, plantate hortos, & comedite fructus eorum. Ducite uxores, & generate filios & filias, ac ipsis filijs & filiabus dabitis coniuges, ut generent liberos. Quærite pacem eius ciuitatis, ad quam ego uos transtuli, & orate dominum pro ea, quoniam uestra pax & incolumitas coniuncta est cum illius pace, cap. 29. Grauiissime ergo peccant patriæ proditores, quos leges propter sceleris atrocem enormitatem in partes dissecant.

De Magistratu dicemus aliàs: quantum uerò præsentī loco satis fuerit, dicit sanctus Petrus, Deum timete, regem honorate. Agnoscamus ergo magistratum

Hebr. 11.

2. Cor. 4.

1. Iod. 4.

pij in patriam.

Orandum pro patria.

De honorando magistratu.

à deo ad utilitatem hominum esse ordinatum, ac deum per magistratū nobis conferre maxima beneficia. Vigilant pro repub. principes, si functioni suæ uerè respondent ac non sint tyranni, iudicant populum, dirimunt lites, iustitiam conseruant, plectunt noxios, tuentur innocentes, pugnant pro populo. Et propter excellentiam sui muneris & summi & maximè necessarij, deus ipse suū nomen magistratui communicat, appellans principes aut senatores deos, ut uel ipsa appellatione ipsi admoneantur sui officij, & subditi discant ipsos reuereri. Deus bonus est, iustus, æquus, personam non accipit nec munera. Talis sit oportet & bonus iudex aut magistratus. Anachoretæ & Monachi laudarunt institutum suum, ac tantum non supra astra hoc extulerunt: ego uerò iudico plus esse uerarum uirtutum in uno uiro politico magistratum gerente ac ritè suo defungente officio, quàm in multis chiliadibus Monachorū & Anachoretarū, qui præterea suæ uocationis & instituti nullum habent expressum dei uerbum: ut pigeat me sanctissimum magistratum contulisse cum his qui nihil habent cum illis conferendū: imò labores & ordinationem dei utilem fugiunt. Certè si princeps ex fide suum faciat officium in repub. ingentem sibi coaceruat uerè bonorum operum cumulum, & laudē sempiternam. Ergo obediendum est magistratui & legibus eius æquis & bonis. Nulla est cōmouenda contra ipsum seditio. Magistratui non maledicendum: uel ipso deo in lege sua mandante & dicente, Dñs nō maledices, & principem populi tui non execraberis. Sicubi peccauerit, geramus nos erga ipsum tanquam erga patrem. De quo superius dixi.

Contra seditiones.

Fit per frequenter ut Senatores bene uelint religioni, iustitiā promoueant publicam, leges defendant, honestati faueant, interim laborent suis uitijs, imò sceleribus. Propter hæc autem non erunt à populo contemnendi aut è gradu deiciendi. Habuit Dauid sua uitia, alioqui optimus princeps. Suo adulterio plurimum incommodauit regno. Peccauit tamen grauiter Absolon, qui ipsum solio deturbare uoluit. Ita sunt in alijs principibus non pauca scelera, quæ tamen ad seditionem non commouent neq; commouere debent populum religiosum, modò ualeat nihilominus iustitia, bonæq; leges & pax publica defendantur. Orandum est sedulo & ardentem pro magistratu. Iuuandus est à nobis consilio & auxilio, quoties ipsa poposcerit res. Non parcendum uel facultatibus uel nostrorum ipsorum corporibus. Contulerunt in commune sancti opes suas, magistratum iuuantem, quoties incolumitas publica poposcit. Pugnarunt omnibus seculis pro iudicibus & regibus atq; magistratibus suis Israelitæ, & omnes populi sano utentes sensu ac iudicio. Pugnarunt & principes pro populo uicissim. Illa itaq; pietatis officia ualeant & uigeant etiam hodie in omnibus regnis, ciuitatibus & rebus publicis. Tribuat quæq; gens suo magistratui, quod uel lege, uel ex consuetudine, aut propter necessitatem debet. Paulus enim Apostolus, Reddite, inquit, omnibus quod debetis, cui tributum tributum, cui uestigal uestigal, cui timorem timorem, cui honorem honorem. Rom. 13.

De honorandis Tutoribus ac magistris artium.

Tutores quoniam successerunt in locum parentum, & officia parentum defunctorum præstant liberis, merentur certè debitam parentibus gratiam, uidelicet amorem, reuerentiam, gratitudinem & obedientiam. Ita ferè iudico de opificibus & artificiorum magistris, qui ut patris animum, amorem, studium, fidem & diligentiam erga discipulum suscipere debent, ita hic meritò magistrum suspicit, ueneratur, metuit & audit ut patrem. Caterum est hic detestanda in magistris negligentia, sed & non ferenda in discipulis proteruitia & barbaries. Discant ergo in præsentiarū magistri patres esse, nec aliter erga discipulos affecti, quàm erga suos

Officium magistrorum ex discipulorum.

ipsum

ipsorum filios. Doceant artificium, instruant in moribus & omnibus uitæ partibus discipulos, ea diligentia & fide, qua uterentur erga filios proprios. Rursus discant iuuenes infringere ingenitam barbariem, ac frænum inijcere iuuenilibus cupiditatibus: discant humiliari, subesse, silere, reuereri, timere, amare, & obedire. Agnoscant sibi magistros à deo esse datos, ideoque deum cõtemni in magistris. Sint ergo diligētes, seduli & fideles in opere. Experiatur magister studium & propensam uoluntatem erga ipsum, erga artificium & erga præcepta artis. Meditetur quisque & exerceat opere diligenter, quod ore traditum est à magistro. Non parcat uigilijs & laboribus. Sit gratus fideliter docenti magistro, ut sæpius roganti de modo agendi, dignetur fideliter indicare omnia. Ingratitudo & indiligentia discipuli, reddit nonnunquam segnem magistrum. Per cætera time Deum, & sis religiosus. Foris ne misceare blasphemorum & luxuriosorum consortio, honestè te gerito, neminem laceſſito, neminem contemnito, nulli maledicito, paci studeto, omnes honorato, omnibus prodesse contendito. Domi promoueto domini tui utilitatē, nihil damni uel ipsi uel rebus ipsius inferto, si quis uel intulit uel inferre uoluerit, maturè admoneto: occasiones rixarum aut malorum pro tua facultate sopito: quod domi audieris ne efferto, rursus quod foris audieris ne in domū importato. Sis taciturnus, pacificus, iustus, castus, abstinens, temperans, uerax & facilis ad quælibet honesta & domestica seruitia. Caue tibi ab ijs ex quibus exoriuntur suspensiones malæ & noxiæ. Ne audacius contrectaueris magistri uel uxore uel filias, aut etiam ancillas, ne colloquaris uel liberius uel secretò. Arbitrare, uti reuera res est, uxorem magistri tui matrē esse tuā, filias sorores. Has polluere est scelus grande & enorme. Sit iuuenū quisque mundus non sordidus, facilis, iustus, ac cibi uulgaris, nō palato delicato & moroso. Sed quid multis? Imo pectore quisque adulescentum recondat retineatque iuuenū officium esse, castum se seruare ab omni immunditia, subesse nō dominari, seruire omnibus, semper discere, pauca loqui, nunquam quicquam insolentius iactare, non respondere, multa uerò pati & dissimulare.

De honorandis Ecclesiarū ministris qui sunt pastores, doctores, & patres populi Christiani, multa solent ab illis adferri, quibus gratius est dominiū quàm ministeriū. Nos agnoscere debemus illos nobis esse datos à domino, & per illos nobis loqui dominum. De ijs loquor, qui non sua nobis adferunt somnia, sed uerbū ueritatis. De his enim dixit in Euangelio Dominus: Qui uos audit, me audit: qui uos spernit, me spernit. Proinde ministerium quoque ipsum est à domino, per quod salutem nostram operatur dominus. Ideoque obediendum est ministris rectè suo ualentibus ministerio, bene de his sentiendum, amandi sunt, & pro eis assidue orandum est. Et cum ijs nobis seminent spiritalia, ijsdem non neganda est messis corporeæ ac temporalis. Nam dignus est operarius mercede sua. Et si Romanorū præses apud Iudæos, Apostolo Paulo non negauit auxilium contra Iudæorū latrocinium conceptum & contra manifestam uim, certè Christianus magistratus nunquam negabit pñs Christi & Ecclesiarum ministris defensionem. Huc iam pertinent S. Pauli testimonia. In 1. ad Theſſal. cap. ult. Rogamus, inquit, uos fratres, ut agnoscat is eos qui laborant inter uos, & qui præſunt uobis in domino & admonēt uos, ut habeatis illos in summo pretio per charitatē, propter opus illorum, pacem habete cum illis. Idem ad Heb. Parete ijs qui præſunt uobis, ait, & cõcedite: siquidem illi uigilant pro animabus ueſtris, tanquā rationē reddituri, ut cū gaudio hoc faciant, & nō gemētes. Nā id est inutile uobis Etenim quanta calamitas & regnis & populis exoriat ex contemptu uerbi Dei ac ministrorum, multa nos docere possunt exēpla, illud in primis quod hisce uerbis describitur in ult. cap. 2. lib. Para.

De honorando ministro ecclesiarum.

1. Cor. 9.

Matth. 10.

Acto. 23. 24.

25.

Cōtemptus ministrorum uerbis

Misit dominus Deus patrum eorum ad eos manē surgendo, & nuncios suos mītendo, quoniam parcere cupiebat populo suo atq; habitaculo suo. At illi subsannabant nuncios Dei, & contemnebant uerba eius, illudentes prophetis eius, donec ascenderet furor domini contra populum suum, & donec nullum esset remedium. His congruunt per omnia, uerba saluatoris nostri in euangelio dicentis, Mitto ad uos prophetas & sapientes, quorum aliquot flagellabitis & occidetis, ut ueniat super uos omnis sanguis iustus qui effusus est super terrā à sanguine Abel iusti, usq; ad sanguinem Zachariæ filij Barachiae, quem occidistis inter templum & altare. Et reliqua. Notus est enim charitati uestræ locus, qui extat Matth. 23. Cauendum ergo modis omnibus, ne contemnamus deum loquentē nobis in uerbo suo per seruos suos prophetas.

De honorandis
consanguineis
& affinibus.

Consanguineis & affinibus debemus iuxta hoc præceptū amorem, reuerentiam, auxilium, consolationem, & omnem deniq; humanitatem. Damnantur hoc præcepto sicut & Apostolicis scriptis *ἀσέβητοι*, qui uidelicet nullo erga suos naturali affectu commouentur. Est naturalis quædam affectio, beneuolentia, amor & commiseratio (quæ scriptura uiscera uocat) in patre & matre erga liberos, in fratre erga fratrem, in consanguineo aut affine erga consanguineū & affinem. Egregia sunt nobis in scripturis exempla proposita in Abrahamo paternis uisceribus amante filium Isaac, in Iosepho item diligente patrem Iacob & fratres suos, præsertim autem uterinū fratrem Beniamin. Habent egregium, quod socrus & nurus imitentur, exemplum, in Noemi & Ruth. Ferē odiunt se mutuō socrus & nurus, unde multa mala deriuantur in familias. Discant ergo ex lepido illo exemplo, quomodo se gerant utraq; ex parte. Reputet socrus nurum esse filiam, uti reuera est: nurus socrum colat, & reuereatur ueluti matrem. Vtrinq; permulta dissimulanda, multa boni consulenda & benignē perferenda. Condonanda multa, nec cedendus locus garrulis obrectatoribus atq; suspicionibus prauis. Eximius thesaurus est familiæ concordia: malum inexplicabile & perniciosissimū discordia domus. De beneficijs & honore exhibendo nepotibus, notus est locus Pauli 1. Timot. 5.

De honorandis
senibus.

Postremo extat etiam peculiaris lex in uerbo dei de senibus honorandis, præcipiens surgere coram cano capite. Honorandi ergo sunt senes, quos meritō magnificamus, agnoscentes in ipsis dei beneficium non uulgare, longæuitatem, & quod diuturna omnium rerum experientia multam sibi sapientiā & prudentiam compararunt, unde nos suis possunt iuuare consilijs. Laudandi sunt itaq; ut omnes intelligant & prædicent canos esse coronam gloriæ. Præterea si desint senio confectis facultates, nostra copia ipsorum debet subleuare inopiam. Breuiter non negabimus ulla senibus officia humanitatis. Simili ratione cōmendantur hic nobis uiduæ, orphani, pupilli, pauperes, peregrini, ægrotantes & calamitosi. Ideo autem quondam contulere opes liberaliter homines pīj & benefici, ne quid rerum necessariorum deesset senibus, uiduis, pupillis & pauperibus. Appellantur ea bona hodie Facultates ecclesiasticæ: quæ haud dubiē rectē dispensantur, si cesserint his quibus donatæ sunt. In legibus Cæsarum uidere licet quondam publicas aedes & opes, singulis hominum egentium generibus, fuisse extructas atq; destinadas. Nam mentio fit Orphanotrophiorum, Gerontocomiorum, Ptochotrophiorum, Nosocomiorum, & Brephotrophiorum. Hodie supersunt nobis Cœnobīa & Hospitalia, quorum pleraq; singulis illis, nempe orphanis, senibus, pauperibus languentibus seu ægrotantibus & infantibus peculiaria habent destinata loca. Inexpiable peccatum committunt, quicumq; opes & loca senibus & pauperibus consecrata, alijs usibus dedicant, atque algentibus esurientibusq; senibus & pauperibus,

Bona ecclesiastica.

ribus, luxu opes pauperum prodigunt. Et hactenus quidem docuimus quomodo parentes, & illi qui sub parentum nomine comprehenduntur, honorandi sint.

Restat tertium & ultimum, ut inspiciamus quid promittat Dominus cultoribus pijs parentum, unde mox colligamus quid mali immineat impijs parentum contemptoribus. Dominus ergo in lege dicit, Vt sis longæuus super terrā, quam Dominus Deus tuus dabit tibi. Sensus est, Honora patrē & matrem, quō per longum uitæ spacium frui tibi diu liceat ea terræ possessione, quæ tibi futura est in gratiæ meæ testimonium. Hæc propriè ad Iudæos pertinent. Cæterum optimè & uerissimè scribitur in hunc locum à pijsimo quodam Christi seruo, Quia tota terra fidelibus benedicta est, præsentem uitam inter Dei benedictiones meritò reponimus: quare ad nos similiter spectat ista promissio, quatenus scilicet diuinæ beneuolentiæ documentum nobis est præsentis uitæ duratio. Certè promittit pijs parentum cultoribus in quauis terra habitantibus omnimodam benedictionē & felicitatem copiamq; rerū temporaliū, cum uitæ iucunda diuturnitate. Apostolus enim Paulus hæc interpretans Ephes. 5. cap. Vt bene tibi sit, inquit, & sis longæuus in terra: quamlibet utiq; significans, & benedictionem Domini temporalem promittens. Colligimus ergo diuersa minari & irrogari impijs parentum contemptoribus. Exemplis & alijs scripturæ locis hæc reddentur illustriora. Cham maledictionem accepit à patre Noe, quod parum reuerenter sese gessisset erga patrem ebrium licet. Ioseph fit princeps Ægypti, quod à puero in Deum pius, magnificaret & magno honore prosequeretur patrem suum Iacob. Solomon Prouerbiorum 17. clamat, Non recedet malum à domo ingrati. Item, Contumelijs afficiens patrem & contemnens senectam matris suæ, confundetur & in opprobrijs erit. Filius derelinquens custodire disciplinam patris, meditabitur sermones malitiæ. Maledicenti patri & matri extinguetur lumen, & pupillæ oculorum eius uidebunt tenebras. Nam monstra non homines sunt, qui impij sunt in parentes, præsertim illi qui non modò negligunt aut contemnunt, sed etiam feriunt aut alioqui malè tractant parentes. Hos trucidari iubet Dominus, ut beneficio lucis indignos, qui nō recognoscunt quorum opera in illam peruenerint. Qui maledixerit patri aut matri, ait Dominus, morte moriatur. Et iterum, Qui percusserit patrem suum aut matrem suam, morte moriatur. Notissima est omnibus lex Pompeia lata contra parricidas. Præstat hîc quoq; audire Gentilium iudicia. **Homerus,**

*Nec nutricandi officium genitoribus unquam
Perfoluit charis, breue at illi contigit æuum.*

Et antiquissimus Poëta Orpheus canit,
*Iuppiter inspicit illos qui colunt iura parentum,
Et qui negligunt præ animi impudentia,
Ac illis quidem benignus & mitis bona largitur,
His uero infensus indignatur per furias.
Sunt enim uehementes in terra parentum furia.*

Iam & Euripides tragicus dicit,
*Quisquis in uita sua parentes colit,
Hic & uiuus & defunctus dijs charus est.*

Sed & Menander Comicus dixit,
*Cum parentibus causam agens aut litigans insanus ô miser.
Parentes magnum sunt numen prudentibus.*

Vergilius inter immania scelera quæ apud inferos horrendum puniuntur æternis & infandis pœnis, & hæc commemorat.

*Hic quibus inuisi fratres, dum vita manebat,
Pulsatus ue parens.* Et mox,

Vendit hic auro patriam dominumq, potentem

Imposuit, fixit leges pretio atq, refixit, &c.

Dulce & decorum est pro patria mori.

Iamq, hoc ne dubites longæuinate parentis

Accipe, & aeterno fixum sub pectore serua,

Succensere nephas patriæ, nec fœdior ulla

Culpa sub extremas fertur mortalibus umbras.

Sic docuere senes, &c.

*Cecinit in Odis Flaccus,
Silius Italicus,*

Exod. 22.

Hæc testimonia non frustra commemoro, ut ex his colligat c. v. sceleris huius atrocitatem, quod usque adeo grauiter ipsæ etiam Gentes accusauerunt atq; condemnauerunt. Occidit Cain fratrem suum Abelum, sed perpetuam sibi ineluctabilem ea re ignominiam contraxit adeoq; inuictus. Conuitia intoleranda coniecit in Dauidem ordinarium suum magistratum Semei, sed commeritas pendit pœnas. Seditiosus & impius est Absalom in patrem Dauidem, sed crinibus implicitus arbori, confoditur horribiliter pendens inter cœlum & terram. Occisores prophetarum nuncupauit Dominus progeniem uiperarum ac diaboli filios. Si qui uero unquam contumelia senes affecerunt & conturbauerunt uiduas, non impune tulerunt. Clamat enim in lege Dominus, Viduam & pupillum non affliges. Si uero affligere eos pergatis, indubie ad me clamabunt, & ego certissime exaudiam eos: & indignabitur furor meus, percutiamq; uos gladio, & erunt uxores uestre uiduæ, & filij uestri pupilli. Sed hæc hæc hactenus.

Ephes. 5.

Officia parentum quæ debent liberis.

S. Paulus hanc Domini legem producens in Epist. ad Ephes. pulchre accommodat nostræ eruditioni. Dicit enim, Filij obedite parentibus uestris in Domino. Nam id est iustum. Honora patrem & matrem: quod est præceptum primum in promissione, ut bene tibi sit, & sis longæuus in terra. Patres ne prouocetis ad iram liberos uestros, sed educetis eos per eruditionem & correptionem Domini. His præscribit tam parentibus quam liberis suum officium. Tria requirit à parentibus, ut educent liberos, erudiant & corripiant. Parentum est enim liberos nutrire & alere, siue educare, ac ad iustam usq; prouehere ætatem, qua iam non sumptibus & cura parentum, sed absoluti iam ex proprijs uiuant laboribus. Parentum est erudire & recte instituere liberos. Eruditio seu institutio illa uersat in tribus, in religione, in moribus, & in artificio.

Institutio in religione.

Consilium pro patribus familiaribus in captiuitate detentis.

Iam quod religionem attinet, habet ipsa initia quædam, rudimenta inquam seu Catechesin: habet deinde scripturas tradentes uerbum Dei, & plenior omnium rerum diuinarum expositionem: habet item mysteria, signa sacra seu sacramenta. Si paterfamilias uersatur in populo, qui ueram religionem colit, & cultum Dei legitimum & ueros fideles & religiosos Christi ministros doctoresq; habet, curet ut liberi eant in cœtus sacros, & discant ex doctore ecclesiastico religionem. Nihilominus requirat domum à liberis quid didicerint in concione sacra. Addant patres & matres domum priuatam suam operam, doceant liberos præcepta Dei, doceant Symbolum Apostolorum, doceant orationem Dominicam, tradant breuem & certam ex scripturis rationem de sacramentis. Exerceant frequenter cum liberis catechismum, inferant sententias maxime necessarias de fide & officijs uitæ. Cæterum si paterfamilias in populo uersetur, qui persequitur fidem & doctrinam Christianam & cultus Dei legitimos odit, nec cœtus sacros, nec ministros Christi ueros agnoscit: ut sit in captiuitatibus Turcicis ac persecutionibus nostri seculi grauib; cauebit

cauebit sibi ab idololatria, neq̃ accedet ipse ad prophanos cœtus, neque familiam suam accedere sinat, sed domi suæ potius in uera religione instituat: primùm quidem in Catechesi, deinde in perfectiore theologia. Præter hæc quoties res & usus postulauerit, palàm & liberè confiteatur Christum & Euangelium. Tales enim ecclesias in domibus magnarum urbium tempore Apostolorum, & in grauibus illis persecutionibus antiquis fuisse, apparet ex Epistolis Apostoli Pauli & historijs. Nec uerisimile est Iudæos in captiuitate Babylonica, ut maximè externum sacrificium non habuerint, omni prorsus cultu caruisse. Daniel tametsi non sacrificauit, adorauit tamē certis horis interdum in ædibus suis proprijs. Domus Cornelij apud Cæsareā ecclesia erat in qua Petrus prædicabat in cœtu uerè ecclesiastico: ac ipse dum Ioppe templū non haberet in quo oraret, ascendit in superiora domus. Neq̃ dubium est quin ecclesiam instituerit in Æthiopia princeps ille eunuchus Candaces reginæ, cuius mentio fit in Actis Apostol. Meminerint qui usu publico legitimq̃ sacramentorum carent, sibi non esse fraudi aut reputari pro culpa, quod non proprio, sed alieno delicto committitur. Quanquam & in hac causa possit Dominus suis salubre inspirare consilium. Cæterum ubi per Domini gratiam licet publicos cœtus sacros celebrare, & liberam, apertam & ueram prædicationem Euangelij audire, deniq̃ sacramentis Christi participare, tum desinunt priuatæ illæ ac domesticæ ecclesiæ: non quòd domus p̃ij patris familiæ non sit ac maneat semper ecclesia, sed quòd auscultatio uerbi Dei, preces, & celebratio sacramentorum publica & omnibus sanctis communis esse debeat. Merito enim damnantur Anabaptistarum & omnium sectariorum furtiua conuenticula.

Audiamus nunc etiam scripturarum testimonia, quæ præcipiunt omnibus patribus familiæ, familiam suam sanctè instituant in uera religione, adde & explanent liberis sacramentorum rationem. Deut. 6. dicit Moyses, Audi Israel, Dominus Deus noster Deus unus est. Diliges itaq̃ Dominum Deum tuum toto corde tuo, & tota anima tua, & tota uirtute tua. Sintq̃ uerba ista quæ ego tibi hodie præcipio in corde tuo. Et inculcabis ea filijs tuis: & loqueris de eis cū domi tuæ resides, & cū in uia incedis, cū cubitū uadis, & cū surgis. Ligabis deniq̃ ea in signum ad manum tuam, eruntq̃ monumēta inter oculos tuos. Scribes quoq̃ ea super postes domus tuæ & in portis tuis. Et iterū. Cū interrogauerit te posterioribus temporibus filius tuus, & dixerit, Quid sibi uolunt hæc testimonia, ritus & iudicia quæ præcepit nobis Dominus Deus noster? respōdebis filio tuo, Serui fuimus Pharaonis in Ægypto: & eduxit nos Dominus ex Ægypto manu ualida, ediditq̃ signa & portenta magna, idq̃ nobis spectantibus, nosq̃ eduxit illinc, & dedit nobis omnia præcepta & statuta hæc ut faceremus, & timeremus Dominū Deum nostrum. Huc pertinent multa Psal. 78. Exod. 13. iterū dicit Dominus, Sanctifica mihi omne primogenitū. Cūq̃ interrogarit te posteris seculis filius tuus, dicens, Quid hoc? dices ad eū, Dominus interfecit omne primogenitū Ægypti, & idcirco ego sacrifico Domino omne primogenitū masculinū. Rursus in 12. cap. exponēs Dominus uel Moyses Domini nomine mysteriū uel sacramentū Pasce inter alia dicit, Cū dixerint uobis filij uestri, Quæ est ista religio? dicetis, Victima trāsitus Dñi est, quando transiuit super domos filiorū Israel, &c. Testimonia hæc clara sunt, nec ulla indigent expositione operosiore. Addamus ergo his alia quæ parens doceat liberos.

Erudiat in moribus. Agrestes ferè nascimur, & barbaris siue incultis sunt moribus pueri omnes: quod malum conduplicatur assuetudine & consortio rustico. Mature itaque formet parens pueri mores, qui ipsum domi & foris ornent. Tradat quomodo se incessu, corporis motu ac habitu, quomodo se in templo, in foro,

*Præcepta Dei
de erudiendis
liberis.*

*Erudiat pater
in moribus.*

ad mensam, in hominum frequentia omnibusque locis decenter gerat. Extant ea de re elegantes libelli, ut nihil uobis opus sit meis praeceptionibus.

Doceat pater
artificium.

Postremo tradat parens liberos fidis & peritis artificibus aut opificibus, qui ipsos doceant artem aliquam manuariam, qua sibi uictum aliquando quærant ac parent. Prius tamen exploranda sunt ingenia, quæ quibus idonea sint artibus ac delectentur. Nam inuita Minerua nihil feliciter perfeceris. Si quos habeas literarum studiis idoneos, piissime facies consecrando tales ministerijs ecclesiae seu scholae. Illi uero uituperandi sunt parentes, qui liberos educant in otio altissimo. Tam etsi enim auri aceruos ingentes ipsis relinquant, perire tamen & diripi possunt opes amplissimae pauculis horis. Quò tunc confugiet miser telluris inuile pondus? Massilienses non recipiebant in ciuium numerum, qui non didicisset artificium. Nam ciue perduto nihil est urbibus pestilentius. Quis autem magis perditus ciuis censeatur, quam is qui otio assuetus deliciisque, modò autem his per repentinum aut inopinatum casum aut per luxum destitutus, ac in summa constitutus inopia, iniustissimas planeque seditiosas animo suo rationes alias opes acquirendi uersat? Præterea usurpata est apud ueteres paræmia omnibus parentibus obseruatu dignissima, Artem quauis alit terra. Ea sententia significatum est, certissimū uaticum esse eruditionem aut artificium aliquod. Nam hæc neque eripi possunt à latronibus, & quocumque terrarum abeas, te comitantur, nihil adferentia sarcinæ. Ergo si fortuna auferat liberis tuis opes relictas, si docuisti eos artificium, tenent quo sibi uictum parent. Deiciuntur reges ex opibus maximis & dignitate regia, ut mirum non sit si inferiores regibus spoliuntur facultatibus suis, aut iubeantur ire in exilium. Dionysius Syracusanus propter tyrannidem legitur exutus imperio. Sed qui rex fuerat Corinthum abiit, Corinthi ludum aperuit, ac pueros literas ac musicam docuit: qua re uictum sibi parauit. Miserrimus autem & deploratus fuisset, si nihil unquam didicisset, sed in regias duntaxat opes sperasset. Vana spes perdidisset illum. Nam periisset inedia. Hæc de eruditione.

De correptione.

Restat ut dicamus de Correptione. Consistit hæc partim in uerbis, partim in uerberibus. Vtraque suum modum & rationem certam habeant, ne quid nimis. Admonitio quæ uerbis fit, non sit acerbior delicti merito. Sit grauis, sed non perpetua. Perpetua obiurgatio abit in contemptum. Inuenias item pueros apud quos plus efficias lenitate. Ac nisi laudem admisceas aliquando, bonique consulas res diligenter, etsi non plenè aut feliciter expeditas, uidebis hos certo animos despondere. Neque uerò nimium oneris imponendum arbitror humeris iuuenū, & spontè onera ferentium. Verbera non infligantur nisi maximis de causis, neque infligantur unquam ab irato patre, & infligantur moderatè, ad emendationem non defectionem. Semper insideat animis parentum illud aureum Pauli dictum, Patres ne prouocetis ad iram liberos uestros. Sæuitia enim pereunt & optima ingenia. De moderata correptione loquens Solomon, Virga, inquit, & obiurgatio dat sapientiam, & puer sibi dimissus confundit matrem suam. Item, Castiga filium tuum & quietus eris, dabitque delicias animæ tuæ. Indulgentiam hæc uel paternā uel maternam condemnant, quæ multos corrumpit liberos. Non minus autem à patribus indulgentia peccatur quam sæuitia. Heli in scripturis pessimè audit propter indulgentiam nimiam, perit miserè, & perdit secum perditos nebulones filios audacissimos atque impiissimos. Quid quod Deut. 21. iubentur ipsi parentes filios rebelles protrahere ad tribunal, & ibi accusare capitaliter? Exemplo hoc aliàs seuerio uoluit Deus alios in officio retinere filios. Nā Deus est Deus salutis, non perditionis, adeò ut cum rebelles sua culpa pereunt, perditionem eam ipse conuertat ad salutem

Indulgentia.

tem obedientium. Teneant ergo pectoribus suis patres hanc ex Euangelio infamam sententiam, Non est uoluntas coram patre uestro cœlesti, ut pereat unus de pusillis illis. Qui offenderit tales, expedit ei ut suspēdatur mola asinaria in collum eius, ac demergatur in profundum maris.

Porro de officio filiorum disputauimus iam ante, ubi docuimus quomodo honorandi sint parentes. Paulus uno uerbo multa complexus, dicit, Filij obedite parentibus uestris in Domino. Causam addit: Nam id iustum est. Rationem iterum subiungit: Nam Deus hoc præcepit. Agnoscant ergo liberi parentum uigilias & labores educationi insumptos, ac grati rebusq̃ præsentibus contenti sint. Cum erudiuntur à parentibus, discant sedulo, & sint religiosi Iacob, non prophani Esau. Discant assuescere bonis moribus. Discant artes libenter. Subijciant se correctioni. Ne irritent aut ad irā prouocent parentes. Eligant sua sponte magis quàm uerbis & iurgiis adacti sapere & parere. Si paucula relinquant liberis parentes decedentes, ne obloquantur defunctis. Docuit te artificium aut artem aliquam parens, satis amplum reliquit patrimoniū. Sed & frugalitas ac parsimonia magnum est uectigal. Instituit te sanctè & pulchrè in moribus, in uera sapientia & religione pater, hæreditatem legauit longè opulentissimam. Quid enim sunt opes amplissima in manibus stulti & irreligiosi uiri relictæ, quàm gladius in manibus furiosius? Abundè opulentus es ex parentū hæreditate relictæ, si pius es, laboriosus, diligens & probus. Diuturniores & beatiores sunt ferè opes nostro labore partæ, quàm ab alijs relictæ.

Rursus sesquihoram in explicando hoc argumento de colendis parentibus insumpsimus, diutius quàm par erat charitatem uestram detinentes. Sed dabitis hoc studio & amor. Non nescio quàm necessarium sit multis hoc argumentum. Diutius ergo his inhæsi. Vtilia enim & necessaria charitati uestræ non modò tradere, sed etiam inculcare modis omnibus satago. Dominus concedat uobis omnibus uerrimam iacti seminis in corda uestra uerbi sui segetem. Oremus, &c.

De secundo secundæ tabule præcepto, quod ordine in Decalogo sextum est, Non occides.

Item de Magistratu.

SERMO VI.

RE C T E subiungitur authoritati & imperio iustitia & innocentia, muniturq̃ hac lege sexta, pax & tranquillitas publica & priuata. Cumq̃ uita hominis excellentissimum illud sit in orbe, cui omnia alia, licet præstantissima, ancillantur, denique cum corpus hominis præcellat omnes alias dotes, naturali ordine sequitur præceptum sextum, duabus duntaxat uocibus ab ipso Deo sic proditum, NON OCCIDES. Hoc enim mandato præcipitur iustitia & innocentia, & cauetur ne quis alterius uel corpus uel uitam lædat; itaque mandatur omnibus pax & tranquillitas.

Cæterum considerandi hîc ueniunt gradus quibus peruenitur ad eadem, considerandæ & læsionis species atque causæ. Dominus enim non prohibet duntaxat ipsam eadem, sed omnia ea ex quibus existit cædes. Proinde prohibetur omnis prouocatio, prohibentur conuitia & iurgia, prohibetur contentio, ira & inuidia. Atq̃ hîc habemus ipsum Christum Dominum huius legis interpretem, dicentem apud Matthæum, Audistis dictum esse antiquis, Non occides. Quisquis autē occiderit, obnoxius erit iudicio. At ego dico uobis, quisquis irascitur fratri suo temere, obnoxius erit iudicio. Quicumque uerò dixerit fratri suo Rhaca, obnoxius erit consilio. Quisquis autem dixerit Fatue, obnoxius erit gehennæ incendio. Audis

prohiberi iram, simul etiam conuitia & iurgia, imò omnes significationes animi commoti ad probra. Quid ergo faciendum? Redeundum cum eo quem offenderis in gratiam, ponendaq; simul omnis ira animi inuidiaq;, nisi malis omnē tuum cultum quem Deo exhibes tibi in peccatum aut ad nihilum reputari, imò nisi malis condemnari. Sequitur enim in Euangelio secundum Matthæum, Itaq; si obtuleris munus tuum ad altare, & illic recordatus fueris fratrem tuum habere aliquid aduersum te, relinque illic munus tuum ante altare (loquitur illis quibus adhuc erat templum, ara, & holocaustum: nobis hodie alius est cultus) & abi, priusq; reconciliare fratri tuo, & tum ueniens offer munus tuum. Et iterum, Habeto beneuolentiam cum aduersario tuo citò, dum es in uia cum illo, ne quādo te tradat aduersarius iudici, & iudex te tradat ministro, & in carcerem coniciaris. Amen dic tibi, non exhibis inde donec persolueris extremum quadrantem. Quoniam uerò huic sanæ Domini doctrinæ pauci obtemperamus, ideoq; magnæ sunt inter homines turbæ. Minus quidem opum est obsequentibus uerbo Dei, sed plus quietis & tranquillitatis. Quid uerò iucunditatis homini afferunt immensæ opes, cum quibus animi curas graues, turbas ingentes & impexas, nec quietem ullam unquam habeas? Proinde lex quæ suauem & tranquillam homini uitam tradere contendit, huiusmodi affectiones immodicas eius animo eximit, præsertim iram inuidiamq;, duo pestilentissima in rebus humanis mala.

De ira.
Seneca.

De Ira non statui operosius in præsentī differere, sicuti ne de Inuidiā quidem. De ira disputarunt multi utilissimè. Est tamen ira quam non improbat scriptura sancta, adeò ut nisi quis irascatur, non sit futurus uir bonus. Bonus enim uir habet zelum Dei. Zelo diuino irascitur impietati & sceleribus hominum. Cuius quidem rei plurima habemus in sacris exempla. Et tendit hæc quidem ira magis in ipsum scelus, quàm in personam scelus perpetrantem. Nihil enim in scelerati persona odit uir bonus, quàm ipsum scelus: quo sublato, sublata sunt simul & odium & ira. Hæc damnatur cum ex corruptis oritur affectibus, neq; ullas habet causas iustas, sed iratus uel explet affectum, uel nocet aut nocere instituit ei cui iratus est. Grande est hoc malum, & uberrima inexplicabilium malorum seges. Idcirco Apostolus Christi suadet omnibus, ne ullum cedant iræ locum: quòd si subierit animum & hæserit aliquantisper, ne adhærescere & radices agere sinamus. Irascimini & ne peccetis, ait, Sol ne occidat super iram uestram, & ne cedatis locum diabolo. Hoc enim sentit Apostolus, Si contigerit irasci, tamen ne peccetis, id est, compescite iram. Neq; enim iubet Apostolus nos irasci, sed iram non uult esse diuturnam, neq; ad iniuriam usq; progredi. Ac *ᾠργισμός* (quo uocabulo usus est Paulus) iram quidem significat, sed magis commotionem & irritationem, ut intelligamus ei qui laceffitus est iniuriā, etiamsi quid doleat, tamen eum dolorem breuem esse oportere: neq; admittendum ullo modo ut pedē figat calumniator siue diabolus, qui hoc modo per iram sensim irrepit in animos, & ex ira diuturna format inuidiam, per quam totum hominem, omnes sensus, & omnia dicta & facta occupat atque peruertit.

De inuidia.

Inuidia enim est inueterata ira, quæ iam inuidentem ferè torquet, urit & excarnificat magis quàm eum cui inuidetur. Quanquam nunquam cesset ei cui inuidet machinare malum. Ingens est & implacabile malum. Ideoq; Gentes id exagitant miris modis. Nec pigebit proferre quædam ex his, ut erubescant pseudochristiani tantum non inuidiæ addicti; si fortè discant erubescere ab ipsis redarguti ethnicis.

Clamat Maro,

Liuior tabificum malis venenum

Inuidia

*Intactis vorat ossibus medullas,
Et totum bibit artubus cruorem.* Ergo Flaccus cecinit,
*Inuidia Siculi non inuenere tyranni
Maius tormentum.* Exclamat Silius,

*O dirum exitium mortalibus, ô nihil unquam
Crescere, nec magnas patiens exurgere laudes
Inuidia.* Hanc describens Naso ait,

*Videt intus edentem
Vipereas carnes vitiorum alimenta suorum.
Pallor in ore sedet, macies in corpore toto.
Nusquam recta acies, liuent rubigine dentes,
Pectora felle virent, lingua est suffusa ueneno.
Risus abest, nisi quem uisi mouere dolores.
Nec fruitur somno, vigilantibus excita curis:
Sed videt ingratos intabescitq, videndo
Successus hominum, carpitq, & carpitur una,
Suppliciumq, suum est.
Quacunq, progreditur florentia proterit arua
Exuriscq, herbas, & summa papauera carpit.
Afflatuq, suo populos vrbesq, domosq,
Polluit.*

Ergo cum tantum malum sit inuidia, quam nobis prohibet dominus, certe apparet ea in re, quam bonus sit dominus, quam bona & utilis sit lex eius, quæ cupit nos liberare à tantis malis. Videmus obiter & illud, nostram esse culpam non Dei morositatem, quod multi in hoc seculo nihil pacis aut quietis sentiunt, sed magis exercentur tormentis perpetuis. Nam ut inuidere alijs non desinunt, ita ira sua omnia conturbant, scelerisq, sui commeritas luunt pœnas.

Prohibetur lege constringiturq, non tantum commotio animi per indignationem, iram & inuidiam, sed & læsio quæ ex illis oritur. Læsio perficitur varijs Omnis læsio prohibetur. modis, uerberando, impellendo, prosternendo, trahendo diuexandoq, tametsi ea afflictione proximo nullum infligas uulnus. Grauius autem peccaueris, si uulnus inflixeris, quouis id modo instrumentoue inflixeris. Enormius adhuc peccaueris, si resecaris aut infregeris membrum aliquod corporis, si effoderis oculos, si excusseris dentem. Ac increscit quidem peccatum pro nobilitate membri amputati aut luxati. Vnde haud dubie Lex talionis originem trahit, præcipiens ei amputare manum, qui alteri resecuit manum: ei eruere oculum, qui alteri effodit oculum.

Modus quoq, cædis non est omnino hic transeundus. Dicit dominus, Ne occideris. Cædimus uel ipsimet uel per alios, palam uel occulte. Et huius quidē modi sunt variæ rationes. Occidimus enim silentio, dissimulatione, consilio, approbatione seu consensu & auxilio, instigatione deniq. Non faceret alius quod facit, Quouis modo occidere prohibetur. nisi te haberet approbatorem, nisi sciret se facere rem tibi gratam, nisi tuo fulciretur auxilio. Tametsi ergo tua ipsius manu non occidas, perinde tamē alterius homicidium instigati à te reputabitur, ac si manu tua occidisses. Nec mirum cum Ioannes Apostolus & Euangelista odium appellauerit homicidium.

Sed & causæ cædis uel damni dati perstringendæ sunt. Nam ex his increscit Causæ cædis. malum & sceleris enormitas. Homicidia fiunt, & datur malum proximo uel imprudentia quadam, uel malitia. Imprudentia fiunt, cum aliud instituenti, fortuna quadam, aut potius diuina prouidentia, prouenit cædes. Veluti cum exonero in

Asylum.

ceruum, feram confecturus, bombardam, ac interim perfodio hominem quem ignoravi in eadem sylva ligna diffindere; uel cum per errorem amico uenenū porrigo, cui statueram salutarem propinare medicinam. Huiusmodi casibus parauit dominus asyla in lege & apud omnes gentes. Malitia proueniunt cædes, quando cupiditate priuata cæcatus alteri suas facultates eripere pergo, ac renitentem occido. Eius generis sunt pleraque bella, præcipue autem latrocinia & parricidia. Vel certe cum propter acceptum ab altero damnum, cæde me uindico. Vel ira mihi ipsi ereptus, aut ebrietate captus cædo, quem alioqui & extra hunc affectum corruptissimum fouerem atque amarem.

Quantum scelus sit homicidium.

Quantum uero scelus sit homicidium ex malitia profectum, præstat consequenter inspicere & expendere. Hæc enim consideratio rite pensiculata efficit proculdubio, ut minus crebra sint homicidia, & magis studeant singuli coercita ira conseruare sanctam Dei imaginem. Pugnat recta & contumaciter cum ipso Deo æterno, qui salus & uita est mundi, ipsum homicidium. Homicidium enim ipsam dei imaginem extinguit. Nam homo conditus est ad similitudinē & imaginē Dei. Quod si quis euerteret in foro statuam regis aut principis, accusaretur læsæ maiestatis; quanto ergo crimine obnoxius fuerit, quisquis rationalem, animalē, & uiuam Dei imaginem, ipsum hominem perdidit? Legimus Theodosium Imperatorem statuisse ciuium Antiochenorum plurimos perimere, non aliam ob causam quam quod subuertissent Placillæ Augustæ statuam in foro. Cæterum Macedonium quendam eremitam Imperatoris accessisse legatos ac dixisse, O amici, dicite imperatori, Non es imperator solummodo, sed etiam homo. Noli crudeliter Dei delere imaginem. Irritas creatorem, cum illius deles imaginē. Considera illud etiam, quod tu æneæ duntaxat statuæ gratia contristaris. Quantum uero differat res inanimata ab animata, uiuente & rationali, omnibus est apertissimum. Sed & facile erit pro una statua ærea plures reparare statuas æreas: impossibile autem fuerit unum peremptis capillum restituere. Deinde repugnat cædes naturæ humanæ. Homo enim sese fouet, & caro seipsam non destruit, sed conseruat potius & nutrit. Sumus autem unius massæ ac carnis, quotquot uiuimus homines: hominem ergo cedere repugnat naturæ humanæ. Præterea sunt omnes homines unius patris filij, eiusdem generis & propaginis: pugnat ergo cum ipsa humanitate homicidium, estque pestis generis humani. Quid quod Dominus & redemptor noster ab omnibus requirit charitatem, & talem quidem quæ sustineat mori pro proximo? Occidere itaque proximum ex diametro pugnat cum religione Christiana. His accedit, quod sanguis humanus per cædem effusus, ex terra in cælum clamat pro uindicta. Cain enim homicida audit, Vox sanguinis fratris tui clamat ad me de terra. Reuera enim sanguis effusus ipsam terram in quam effusus est polluit redditque maledictam, nec repurgatur & placatur facile, nisi prius noxium eorum bibat sanguinem qui effuderunt sanguinem innoxium. Postremo pariunt cædes inuruntque patritoribus maculam aut ignominiam perpetuam, adde & perditionem sempiternam. Ideoque Solomon in Prouerbijs suis, Fili mi, ait, si te lactauerint peccatores, ne consentias. Si dixerint, Veni nobiscum, insidias struemus sanguini: absconditi latitabimus contra infontem absque causa. Deuorabimus eos uiuos instar inferorum, & integros quidem ut qui descendunt in foueam. Omnis generis preciosas opes reperiemus, & implebimus præda domos nostras. Sortire tu nobiscum: unum erit omnibus nobis marsupium. Tu autem fili mi ne abeas cum eis in uiam: quin potius retrahito pedem tuum à semitis ipsorum. Pedes enim eorum ad malum currunt, ac festinant ut effundant sanguinem. At Dauid, Virum sanguinarium, ait,

Voces militares.

ait, & hypocritam abominatur Dominus.

Excipitur ab hac lege magistratus à deo ordinatus, quē ipse deus occidere iubet, poenamq; intentat grauissimam, nisi occiderit quos iubet cadere. Lex ergo hac sexta prohibet, ne quis priuata autoritate cadat. Caterum occidit magistratus deo iubente, uel cum iure damnatos propter maleficia cadit, uel cum pro defensione suorum iustum & necessarium bellum suscipit. Vtrobique tamen peccare possunt, idēq; modis duobus. Aut enim iure, id est, iuris prætextu occidunt innoxios, nimirum ut libidini suæ, odio aut auaritiæ faciant satis: sicuti legitur Iesabel occidisse cum prophetis domini iustissimum uirorum Naboth. Aut certè dimittunt peruersa quadam clementia indulgentiaq;, quos deus cadere iusserat: sicuti peccasse leguntur Saul & Achab, dimittendo sanguinarios reges, quos iusserat occidere dominus. Ac Solomon Prouerb. 17. est testis dominum ex æquo abominari eum qui scelestū absoluit, quàm qui infontem damnat. In bellis uel inferendis uel depellendis peccant dupliciter hoc modo. Aut enim ipsi alijs inferunt bellum iniustū ac simul eidem suos implicant: Aut certè sinunt exteros hostes grassari in populum suæ fidei creditum, nec pro uirili sua apertam & iniustissimam uim depellunt. Vtrunq; peccatum est multijugum & inextinguibile. Legis itaq; sanctos Israelis reges nullū bellum intulisse cuiquam, nisi iussisset dominus. Illi idem pugnauerunt pro suo populo, neq; passi sunt abduci in captiuitatem miseros. Sic enim beatus pater Abraham persequitur quatuor illos reges, imò deprædatores orientis, recuperans manu armata Lotum, res Loti, & populum Sodomæ abductum. Ac suscipiuntur quidem huiusmodi bella propter pacem, uel recuperandam, uel confirmandam: ut huiusmodi magistratus hac de causa bellum gerentes reuera sint filij Dei, quia sunt pacifici. Omnes enim pacifici sunt filij Dei.

Postulat autem hic locus & hoc argumentū ut dicamus de magistratu: id quod deo iuuante faciemus, non omnia quæ de ipso dici possunt proferentes, sed quæ uidebuntur propriè eius rationem explanare, & maximè necessaria esse.

Vocabulum Magistratus inde est, quod designat nobis magistros populi, duces & imperatores. Potestas appellatur ob potestatem à Deo acceptā. Dominatio nuncupatur propter dominium concessum à Domino in terra. Dominium exercentes dicuntur principes: præminent enim in populo: & Consules à consulendo: & reges ab imperando, gubernando siue regendo. Officium est ergo Magistratus & actio. Aristoteles finijt magistratum esse custodem legum. Plutarchus in eo libello quo ostendit in principe requiri doctrinam, inter alia, Principes ministri dei sunt, inquit, ad curam & salutem hominum, uti bona quæ illis largitur partim distribuunt, partim seruent. Ex scripturis definiri potest Magistratus esse ordinatio seu actio diuina, qua procerum opera defensis bonis, coercitis autem malis, pietas, iustitia, honestas, pax & tranquillitas publica & priuata conseruatur. Unde colligimus cultum esse dei præesse reipub. & munia exercere magistratus. Placeat hoc Deo. Nam magistratus est res optima & feracissima multum bonorum operum, sicuti ostendi sermone proximo.

Species magistratus tres sunt, Monarchia, Aristocratia & Democratia. Monarchiam possumus appellare regnum, in quo unus omnia moderatur iustis & æquis legibus. Nam si neglecta iustitia & æquitate, pro sua libidine contra phas & ius omnia moderetur, Tyrannus est, & potestas eius Tyrannis, uis inquam siue uiolentia, regni morbus ac uitiū regno uelut oppositum. Aristocratia optimatum potentatus est, ubi optimi quicq; sanctissimi & iustissimi certo numero electi, populo præsunt. Nata est hæc ex tyrannide. Dum enim homines uiderent non

Magistratus
occidit.

Quomodo pec-
cat occidendo
magistratus.

De magistratu.

Magistratus
quid.

Species magi-
stratus.

Monarchia.

Tyrannis.

Aristocratia.

Oligarchia.

Democratia.

Systremma.

Obediendū ma
gistratui.Cause et origo
magistratus.

fatis tutum esse uni uiro committere omnia, pluribus & ijs quidē praestantissimis ea credidere. Cæterum dum optimates malis artibus emergūt ad imperium, posthabitaq; repub. sua compendia sequuntur & quærunt, horum gubernatio oligarchia non aristocratia dicenda est, nimirum paucorum uiolenta libido, non optimatum administratio æqua. Ita oligarchæ opponuntur optimatibus. Democratia respublica dici potest, cum imperium siue potestas est apud uniuersum populum. Enata est hæc ex oligarchia. Cum enim uideret populus etiam optimates sua abuti potestate, ac degenerare in oligarchas, deiectis his, ipse sibi retinuit imperium, per suffragia omnia moderaturus. Erumpit hæc in Systremma, hoc est, in seditionem & conspirationem; dum uidelicet nemo se patitur cogi in ordinem, quolibet sibi omnem potestatem uindicante ex integro, eò quod sit portio populi, apud quem est summa potestas. Porro quænam ex illis speciebus uel generibus sit præferenda ut excellentissima, non est meum pronunciare. Prætulere multi monarchiam: sed addiderunt si princeps sit optimus. Id quod tamen rarum est. Præterea qui sic pronunciarunt, uixerunt sub principibus. Atqui difficile est loqui contra Iouem. Certè paucos inuenies inter multos Iudæ & Israelis reges bonos uel mediocres, ut appareat nō frustra suasisse dominum populo per Samuelem, retineat aristocratiam olim auctore deo per Mosen & Iethro uiros in orbe sapientissimos institutam. Interim nemo negauerit maxima cum pericula tum incommoda esse ex aristocratia quoq; plura ex Democratia. Sed tales sunt res hominū in hac corrupta carne, ut nihil sit omni parte beatum, uideaturq; illud esse præstantissimum & optimum, quod etsi non alienum sit prorsus ab incommodis uitijsq; reliquis tamen collatum, minora pericula & pauciora mala habeat. Vtuncq; uerò id habeat, Apostoli Christi obtemperare nos iubent magistratui, siue is rex sit, siue senatus præstantissimorum uirorum. Paulus enim 3. cap. in epistola ad Titum, Admoneto illos, inquit, ut principatibus & potestatibus sint subditi, ut magistratibus pareant. Nam ad Romanos dicit, Omnis anima potestatibus supereminentibus subdita sit. Non enim est potestas nisi à Deo: quæ uerò sunt potestates, à deo ordinatæ sunt. Rursus ad Timotheum, Adhortor, ait, ut deprecationes fiant pro regibus, & omnibus in eminentia constitutis. Proinde si quis uiuat sub regno, regi obediat: si sub republica, consulibus, tribunis & magistris tribuum senatoribusq; pareat. Obediendum est enim magis ordinationi dei, quàm curiosius disputandum de speciebus magistratus, quæ nam ex his sit præstantior.

Et necessarius est per omnia magistratus hominibus, atq; adeo necessarius, ut citra magistratus operam, res mortalium feliciter subsistere nequeant. Nec legis res Israelitarum unquam æque malis fuisse obnoxias, atq; cum ante Heli & post Samsonis gubernationem nullo regerentur magistratu, sed quisq; faceret quod sibi bonum esse uidebatur. Nascuntur enim omnes homines in philautia, ideo suas res quærunt, placent quæ ipsi faciunt, aliorum dicta & facta displicent, imò eò procedit cupiditas nostra praua, & amor nostri pertinax, ut causis nostris licet pessimis ius prætexamus & iustitiam. Hoc qui negare pergat, hominis ingenium nunquam cognouit. Populus Israeliticus ex Ægypto liberatus uiderat prodigia stupenda, alebatur mirabiliter è cælo in deserto, uidebat in diem noua miracula. Sed audite fratres quid de populo sancto, de populo hoc Dei, quem deus appellat suum peculium, pronunciet mitissimus, & patientissimus hominum Moses. Quo modo feram solus, ait ad populum, molestiam uestram & onus uestrum atq; lites uestras: Quid quod in sodalitie ueteris ac apostolicæ ecclesiæ cōiunctissimo, inq; renatis ipsis sese carnis ingenium exeruit: Murmur enim Græcorum exortum est aduersus

aduersus Hebræos, quòd in ministerio quotidiano uiderentur negligentius curare ipsorum uiduæ. Corinthij etiam coram ethnicis iudicibus litigant, & eam ob rem acriter obiurgantur ab Apostolo, iubente fideles deligere arbitros qui dirimant litigantes. Nemo ergo obijciat ueterem Israelis populum, populum fuisse carnalẽ, nondum renatum. Videmus enim & in renatis remanere carnis reliquias, quæ se nunquam non, oblatiis occasionibus, exerunt & res pacatas implicant atq; conturbant. Non enim iam dicam maiorem partem hominum carnem magis sectari quàm spiritũ. Proinde deus amator hominũ, & fautor conseruatorq; humanitatis & tranquillitatis societatisq; humanæ, medelam morbis illis hominum grauib; adhibuit instituitq; ipsum inquam magistratum, qui se medium iure & iustitia interponat inter litigantes, qui iudicet & dirimat litigantes, coërceat uim & affectiones, defendatq; innoxios. Quisquis hanc diuinam ordinationem, priusquam homines angelicum recipiant ingenium, è medio sustulerit, confusionem rerum pariter omnium inducit, uiolentisq; hominibus uires sufficit opprimendi & extirpandi optimos quosq;. Certè ex his quæ hætenus adduximus, liquidò claret magistratũ à deo esse institutum ad tuitionem boni, & punitionem mali, id est, ad bonum incolumitatemq; hominum. Quo iam illud pertinet quod ab initio rerum legitur magistratus fuisse in orbe. Ad ea quoq; pertinent hæc scripturæ testimonia. Moses in lege ipsos iudices appellat deos: & Iudiciũ hoc, inquit, Dei est. Vnde & Iosaphat desumpsit quod iudicibus dicit, Dispiciate quid agatis: non enim hominĩ iudicabitis, sed domino, qui uobiscum est in causis quas iudicatis: sit ergo metus domini in uobis, &c. S. Petrus dicit obtemperandum esse magistratui propter dominum à quo ille ordinatus sit ad laudem bonorum, metum uerò malorum. Sic & doctor Gentium Paulus, Non est potestas, inquit, nisi à deo: & quæ potestates sunt, à Deo ordinatæ sunt. Et quisquis resisterit potestati, dei ordinationi resistit: & qui resisterit, iudiciũ sibi consciscit. Nam principes non sunt terrori bene agentibus, sed male. Dei enim minister est tibi in bonũ, ultor ad iram ei qui quod malum est fecerit. Ideoq; magistratus à Deo est, & actio eius bona, sancta, deo bene placens, iusta, utilis & necessaria hominibus, ipsi uerò optimates hoc munere rectè fungentes sunt amici cultoresq; dei & electa organa dei, per quæ deus salutem hominum operatur. Exempla sunt Adam, Patriarchæ omnes, ipse etiam pater noster Noe, Ioseph, Moses, Iosue, Gedeon, Samuel, Dauid, Iosaphat, Ezechias, Iosias, Daniel & multialij post tempora Christi magistratus munere fungentes.

Magistratus à
Deo ad bonum
hominum.

Porro duplicis generis faciunt pleriq; magistratum, bonum uidelicet & malum. Bonus est qui legitime ordinatus legitime suum facit officium. Malus est qui malis artibus parauit sibi imperium, idq; pro sua libidine administrat. Interrogari autem solet, An magistratus malus, hoc est tyrānicus, sit à deo? Respondeo Deum esse boni authorem, non mali. Deus enim natura sua bonus est, & omnia Dei instituta sunt bona, ordinata ad incolumitatem & salutem hominum, non ad perniciem. Ita magistratus bona & salutaris ordinatio haud dubiè à deo est, qui est author omnis boni.

Magistratus
bonus et malus.

An magistratus
malus à Deo.

Atqui hic oportet secernere ab officio & instituto Dei optimo, personā bono officio non respondentem. Ergo si in magistratu reperitur malum, non bonum, propter quod institutus est, id alijs oritur causis, culpaq; hæret in personis uel hominibus deum negligentibus, & institutum bonum corruptentibus, non in deo aut in instituto Dei: uel enim princeps malus à diabolo seductus uias dei corrumpit, & suo uitio & malo præuaricatur ut mereatur nomen satanicæ non diuinæ potestatis. Videre hoc licet in magistratu Hierosolymitano. Quaquam enim

principium suae potestatis ad Moysen usque ascendendo, adeoque ad ipsum deum authorē referre potuisset, quia tamen saluatorem capit & uinculis in horto innodat, audiunt ministri, Quasi ad latronem existis cum gladijs & fustibus, cum quotidie uobiscum fuerim in templo, nec extendistis manus uestras in me. Sed haec est hora illa uestra, & potestas tenebrarum. En uocat ordinarium magistratum, sed potestate sua abutentem, potestatem diabolicam. Quid dici poterat clarius? Haec autem conuictum in personis, non in officio. Ita Romanum regnum ordinatum fuit à deo, sicuti ex Danielis uisionibus manifestè apparet. Interim cum in hoc regno non sine deo regnaret Nero, non tamen ex deo, sed ex diabolo facit quod rex & imperator, attamen contra boni regis officium facit. Ex diabolo enim erat quod apostolos Christi suspendit ac obtruncauit, & cruentam in Ecclesiam Christi persecutionem mouit. Ita sanè nunquam oportet tyrannicam potestatem defendere pro diuina. Nam tyrannica administratio diabolica est administratio non diuina, & tyranni diaboli propriè non dei serui sunt. Vel certè populus aliquis meretur impijs suis factis habere non regē, sed tyrannum. Sic iterum culpa reuoluitur in hominem peccantem. Interim concepit regem dominus, ac facit regnare hypocritam. Ita magistratus malus à deo est, sicuti & seditiones & bella, pestes, grādo, pruina & aliae hominum calamitates sunt à domino, uelut poenae peccatorum scelerumque, irrogatae à iusto domino, dicente, Dabo pueros principes eorum, & infantes imperitabunt eis. Quoniam lingua & studium eorum contra dominum. Ad eum modum excitauit dominus reges Assyriorum & Babyloniorum crudelissimos, contra urbem & gentem suam parum respondentem professioni suae.

*Consilium pro
oppressis.*

Ceterum quali animo oporteat esse affectos subditos erga duos hosce & scilicet uos principes aut tyrannos, discimus partim ex Dauidis, partim ex doctrina Ieremiae & Apostolorum. Dauid non ignorabat qualis erat Saul, impius & crudelis latro, fugit tamen: & cum semel & iterum oblata esset occasio cædendi ipsum, non occidit, sed pepercit tyranno, imò coluit ut patrem. Ieremias orauit pro Ioakim & Zedechia regibus nequam, & obtemperauit eis usque ad religionem. Cum enim differuimus de Honorandis parentibus, per scripturas ostendimus impijs impiorum mandatis non oportere obedire. Neque uerò licet magistratibus quicquam statuere & facere contra legem naturae ac diuinam. Iam quomodo Apostoli se gesserint erga magistratum tyrannicum, docent Acta Apostolorum. Qui tyrannide premuntur, sed & opprimuntur à magistratu impio & scelerato contra ius & phas, hoc habeant pro se consilium. Cogitent primò qualia & quanta sint peccata idololatriae & impuritatis, quae iram dei punientem iam meruerunt. Deinde cogitent Deum flagella non retracturum, nisi emendatis religionibus moribusque corruptis. In primis est ergo instituenda & perficienda religionis iusta reformatio, & morum sancta emendatio. Præterea orandum est assidue ut oppressos dignetur dominus eripere & extrahere ex cæno malorum. Hoc enim consilij dedit oppressis ipse dominus apud Lucam in cap. 18. promittens etiam certum auxilium & liberationem praesentissimam. Quid autem & quomodo orent oppressi, exempla & formulae extant Danielis 9. & Act. cap. 4. Inter haec occurrat animis laborantibus, quod Apostolorum primarij Petrus & Paulus docuerunt. Ille dicit, Nouit dominus suos è temptatione eripere, sicuti & Lotum eripuit. Hic ait, Fidelis est Deus qui non sinet suos tentari supra id quod ferre possunt, imò temptationibus etiam felicem concedet euentum. Subeat in animum captiuitas illa populi Dei, qua in Babylone detenti sunt annis septuaginta: & pulcherrima captiuorum consolatio, quam contexuit Isaïas à cap. 40. usque ad cap. 49. Cogitemus dominum esse & bonum,

1. Cor. 10.

2. Pet. 2.

num, clementem, & omnipotentem, unde facile nos liberare queat. Habet is varias liberandi rationes. Curemus nos modò, ne impœnitens & turpis ac impia uita nostra uires addat tyrannis. Dominus potest principum animos (sunt enim regum corda in manibus Domini, ueluti riui aquæ, quocunq; uoluerit inclinabit illa) derepente mutare, ut qui hætenus contra nos fuerunt crudelissimi, fiant protinus benigni & clementes: & qui ueram religionem persecuti sunt hætenus truculentissimi, iam eandem amplectantur ardentissime & prouehant diligentissime. Aperta huius rei exempla habemus in historia Regum & Esdræ atq; Nehemiæ libris, item in prophetia Danielis. Nabuchodonosor qui igni fideles & constantes Dei martyres torrere delereq; statuerat propter ueram religionem, idem laudat mox Deum, quòd seruatos uideret martyres, ac ipse Deum & ueram religionem edictis promulgatis prædicat atq; ppagat. Darius Assueri filius finit proijci Daniëlem in lacum leonum: sed protinus extracto hoc, omnes Danielis hostes in eandem leonum caueam discerpandos concludit. Cyrus rex Persarum potentissimus iuuat ueram religionem: ita Darius Hystaspis, Artaxerxes cognominatus, modis omnibus populi Dei conatus religiosos in extruenda æde sacra & urbe adiuuat. Ne ergo dubitemus de Dei auxilio. Idem Deus tollit aut castigat aliquando tyrannos horribili & repentino aliquo morbo: quod Antiocho, Herodi magno & nepoticius Herodi Agrippæ, Maxentio item & alijs hostibus Dei hominumq; euenisse constat. Excitat aliquando heroas ac uiros fortes qui extinguant tyrannos & liberent Dei populum. Id quod frequens est in libris Iudicum & Regū. Porro ne quis ijs abutatur exemplis, obseruanda est in eis uocatio diuina. Eam si quis non habeat aut præuertat, planè nihil efficiet suo tyrannicidio, imò metuendum est ne malum conduplicet. Hæc hætenus. Redimus iam ad intermissa.

Dicendum hîc erit de Magistratus electione: principiò quorum sit eligere & ordinare magistratum: deinde quos uel quales eligere conueniat: postremò quæ electos inaugurandi ratio. De eo autem quorum intersit eligere magistratum, nulla potest præscribi lex unica & certa. Alibi enim tota plebs eligit optimates. Alibi optimates deligunt optimates. Alibi etiam nascuntur principes. Neq; hîc censeo ullam esse turbam commouendam. Cuilibet enim regno & urbi meritò relinquatur suus mos patrius, nisi omnino corruptissimus & intolerabilis sit. Vbi uerò nascuntur principes, orandus est sedulò Dominus, ut det optimos.

Caterum quos uel quales eligere conueniat, ipse Dominus hisce uerbis exposuit. Ex omni populo prospice, & diligenter considerando delige uiros uirtutis, timorantes Deum, uiros ueraces, odientesq; auaritiā, & hos fac tribunos, centuriones, quinquagenarios & decuriones, qui iudicent populum omni tempore. Quatuor requirit Dominus à senatore bono. Principiò sit uir uirtutis, roboris uel fortitudinis, id est, qui facultates habeat ad efficiendum hoc, cuius rei gratia deligitur. Facultates illæ in animo potius quàm corpore sitæ sunt. Requiritur enim ne sit fatuus, sed sapiens & rerum peritus. Ducis enim ædilis & aurigæ interest scire quomodo instruat aciem, quomodo extruat publica ædificia, aut regat currum. Deinde requiritur etiam animi fortitudo, ut quod nouit ausit. Vbi constantia & tolerantia opus est multa. Secundo loco ponitur quod reuera primum est omnium, Timeat Deum, sit religiosus, non superstitiosus, Nullus idololatra seruat rempublicā: perdit magis, & impij non propagant ueritatem & religionem, sed persequuntur & exterminant. Sit ergo noster ille uir orthodoxus, sanæ fidei, qui credat uerbo Dei, ac sciat Deum semper hominibus præsentem esse atq; adeò cuilibet rependere pro meritis. Ideoq; Imperator Iustinianus in Nouellis Constit. 109. ingenuè fa-

Tyrannicide;

De electione
magistratus.
Quorum sit
deligere.

Quales eligendi
duæ forma boni
magistratus.

Magistratus sit
orthodoxus.

tetur omne suum praesidium esse à Deo, ideoque conuenire ut leges ex eodem pendeant. Deinde subiungit, Omnes nouerunt, quod qui ante nos imperium rexerunt, & maximè Leo pia memoriae & sacratissimus princeps Iustinus pater noster, in Constitutionibus suis in uniuersum omnibus haeticis interdixerint, ne quam ipsi uel militiam capefferent, uel in publicis curis ullam communionem haberent, quò minus occasione tum militiae, tum tractatione publicorum negotiorum, sanctae, catholicae & Apostolicae Dei Ecclesiae partes uiderentur corrumpere. Et nos quoque hoc ipsum fecimus. Hac Imp. Aug. Certè qui pius est, Deum inuocat ac sapientiam accipit à Domino. Et si amici Dei sint principes & frequenter colloquantur cum Deo, spes est felices fore respub. Ex aduerso metuenda infelicitas, si praesint hostes Dei. Tertiò requiritur à deligendo accensendoque magistratui, ut sit uerax, ne sit hypocrita, mendax, fallax, uersipellis, subdolanus aut qui ex eodem ore frigidum & calidum efflet: sed fidelis sit, expositus, simplex & candidus. Ne sit in promittendo liberalior quam in praestando. Ne sit irreligiosus erga iuramentum, ne sit perfidus & periurus. Quartò quoniam multi in magistratus functione quarunt opes & rei familiaris incrementum, remouet tales Dominus & auaritiā prohibet bonis magistratibus: imò poscit ut auaritiā oderint. Sicuti alibi non tantum prohibet accipere munus, sed iubet praeterea à muneribus excutere manus. Auaritia & munerum cupiditas est ipsissima pestis boni magistratus. Auarus & munerum cupidus uenalia sunt iura, sententiae, libertas, iustitia adeoque patria ipsa. Ac nominauit quidem in praesenti pestilentissimum scelus, interea uerò nihil dubium est, quin uitia & scelera alia quoque eius generis proscribat ac à bono magistratu iubeat esse aliena. Ea sunt haud dubie, Superbia, Inuidia, Ira, Alea, Crapula, Ebrietas, Scortatio, Adulterium, & si quid aliud est huius notae.

Deut. 1.

Hunc locum illustrant alij ex lege Dei huic collati. In Deuteronomio ait Moses ad populum, Date ex uobis uiros sapientes & intelligentes, & spectatae probitatis secundum tribus uestras. Tria iterum his uerbis requirit ab ordinandis Moses sapientissimus. Primò sapientes sint ait. Cæterum initium sapientiae est timor Domini. Sint ergo ordinandi amici Dei & uerae religionis, qui ite sapiant non sint fatui. Secundò sint intelligentes, prudentes nimirum, qui exercitati longo rerum usu, usum rerum sibi parauerint, ac possint res praesentes applicare legibus. Praeterea sint spectatae probitatis uiri, quorum uita & integritas morum ex antea actis iam olim sit nobis perspecta atque testificata: denique qui sint praediti autoritate, non contemnantur ceu leues & uiles nebulones.

Num. 27.

In libro Numerorum iterum dicit Moses, Utinam Deus spirituum uniuersae carnis constituat uirum super synagogam, qui ingrediatur & egrediatur ante eos, & qui introducat & educat eos, ne sit coetus Domini ueluti oues absque pastore. Discimus ex his etiam uerbis diuini prophetae, qui & quomodo in magistratum eligendi sint. Orauit Moses ad Dominum pro idoneo uiro: orandus erit itaque & nobis Deus cordium scrutator, ut det uiros omnibus numeris absolutos. Sæpe quidem fallit nos species externa, iudicamusque uirum bonum & pium esse, qui insignis est hypocrita. Deus solus nouit mentes, hic ergo orandus est ne sinat nos in delectu aberrare & impingere. Optimus fuerit, qui instructus erit spiritu Dei sancto. Praeterea decet hunc esse primum & ultimum in rebus gerendis & exequendis. Inertes agunt alios, ipsi sibi cauent post principia. Iniqui praescribunt alijs, ipsi nunquam quicquam faciunt æqui & boni. Pastor sit oportet uir delectus in magistratum, qui dies atque noctes curet ne dissipetur aut periclitetur pereatque grex Domini. Tales autem sint qui populo Domini praeficiendi sunt.

Postremò

Postremo quod attinet ad rationem inaugurandi magistratum, dissimiles sunt Ratio inaugu-
urbibus & regionibus consuetudines. Liberum autem sit cuique genti suis uti mo-
ribus. Eum ego ritum maxime probo, qui minimum habet pompæ, rationis ue-
rò plurimum. Vtilissimum est autem certa & moderata ceremonia inaugurare de-
lectos, idque coram uniuersa plebe, ut quisque non nesciat qui sint patres populi, &
quibus debeat honorem, denique quibus obediat & pro quorum salute supplicet.
Certa fuit populo Dei ceremonia, qua usi leguntur in inaugurandis regibus &
magistratibus: & certum est id à Deo utiliter & certis ex causis esse inuentum atque
traditum. Reliqua quæ de magistratu dicenda restant differemus in crastinum.
Iam uerò laudate Dominum, &c.

*De officio magistratus, quæ ordinet, an cura religionis ad ipsum pertineat: an de religione
constituat, & de legibus eius.* SERMO VII.

QUOD primum & maximum est in magistratu, perspicitur in explicatio-
ne officiorum eius. Diximus heri quid magistratus, quæ magistratus spe-
cies, quo auctore profectus, & quas ob causas institutus sit, quomodo pro-
ceres eligendi, aut qui ad hanc functionem sint uocandi. Addamus illis quæ nam
sint propria magistratus officia.

Omne magistratus officium uidetur redigi posse in tria capita. Ordinet enim *Magistratus
iudicet & Puniat. De singulis ordine dicetur. Ordinatio magistratus est constitu-
tio pro conseruatione religionis ac honestatis, iustitiæ & pacis publicæ: uersaturque
in duobus capitibus, in recte constituenda religione, & in recte constituenda publi-
ca honestate, iustitia & pace. Priusquam uerò dicamus de religionis constitutione
seu ordinatione, tractabimus paucis quæstionem, An cura religionis ad magistra-
tum pertineat? Video enim multos in ea esse sententia, quod cura & ordinatio re-
ligionis ad solos pertineat Episcopos, non etiam ad reges, principes ac senatores.*

Veritas autem catholica docet curam religionis maxime pertinere ad magi-
stratum, & hunc non tantum posse, sed debere etiam disponere & prouehere reli-
gionem. Nam apud ueteres, reges simul erant sacerdotes, religionis utique magistri. *An cura reli-
Laudatur in sacris ualde piissimus ille, & sapientissimus princeps Chananaica
gentis, qui & Christo Domino typum prætulit, Melchizedek: is uerò fuit rex pari-
ter & sacerdos. Sed & in Numeris traduntur nuper ordinato & inaugurato Io-
sue leges ad religionem pertinentes. Ac reges Iuda & electi populi Dei, ex ordina-
tione religionis, uti mox pluribus exemplis monstrabo, maximam indepti sunt lau-
dem: ignominiam sustinent perpetuam, qui segnes fuerunt in curanda religione.
Quis uerò ignorat magistratus primam esse curam, incolumem & felicem serua-
rerem publicam? Id uerò non potest, nisi uerbum Dei curet annunciari populo suo,
ac cultum Dei uerum applicet eidem, adeoque fiat ueluti minister ueræ religionis. In
Leuitico & Deut. multis exponit Dominus bona uerè religiosis parata homini-
bus, rursus enumerat mala contemptoribus ueræ religionis irroganda. Atqui fe-
licitatem in populo suo retinere, infelicitatem propellere iubetur bonus magistra-
tus. Audiamus etiam sapientissimum Solomonem in Prouerbijs dicentem, Pietas
& ueritas custodiunt regem, & solium eius sustentatur in pietate. Quando multi-
plicantur iusti, gaudet populus, & quando impius dominatur, ingemiscit populus,
Rex per iudicium firmat ditionem, uir exactionum euerit eam. Quando multiplican-
tur impij multiplicatur iniquitas, & ruinam eorum uidebunt iusti. Quando non est uisio
dissoluitur populus: & qui obseruat legem, est beatus. Ex quibus & illud colligimus*

confusionem omnium rerum, principumque & populi dissolutionem illos quæ-
re aut inducere, denique pauperum neglectum & oppressionem, quicumque contem-
dunt religionis curam nihil pertinere ad principes. Præterea præcipit Deus magi-
stratui examen habeat doctrinarum, ac pertinaciter contra scripturas docentes &
abstrahentes à Deo feriat. Locus extat Deut. 13. Vetuit item magistratui ne lucos
plantet aut statuas erigat. Locus extat Deut. 17. Per species uerò insinuauit genus,
ne superstitionem aut idololatriam instituat, foueat, propaget, præcepit ergo ut
ueram religionem prouehat: unde consequens est religionis curam pertinere ad
magistratum. Quid quod Deo dilectissimi optimique in populo Dei principes curam
religionis, ut maxime ad se pertinentem, in se susceperunt adeoque & exercuerunt
procuraruntque ueluti sacrorum antistites? Iosue in monte Hebal extrui curauit
aram, totumque cultum uti à Deo per Mosen præceptus fuerat expleuit. Dauid in
deducenda arca & collocanda, inque ordinando Dei cultu fuit usque ad miraculū di-
ligens. Ita filius Dauidis Solomon. Nec obscurum cuiquam esse puto, quid in re-
formanda religione corrupta & collapsa præstiterint Abia, Iosaphat, Ezechias &
Iosias. Laudatur in ethnicis regibus & principibus, quod post cognitam ueritatem
edicta uulgarunt pro uera religione contra blasphemias. Nabuchodonosor Chal-
daus potentissimus orbis monarcha, quo an unquam maior & potentior in mun-
do regnauerit, dubito, promulgat decretum ut in partes disseccetur, & domus eius
redigatur in latrinam, quisquis conuictum dixerit contra uerum Deum condito-
rem cœli & terræ. Locus extat Daniel. 3. Darius Medus Assueri filius, Cyri regis
auunculus, A me positum est decretum, ait, ut omnes in omni imperio regni mei
metuant Deum Danielis. Locus extat Daniel. 6. Cyrus rex Persarum soluit Iudæos
captiuitate, præcipitque templum reparent & sacra restituant. Darius Persa Hysta-
spis filius, A me positum est decretum, ait, ut omnis uir qui mutauerit quicquam in
sententia mea de reparando templo & restituendo Dei cultu, excerpatur lignum
de domo eius, erigatur, atque in eo suspendatur, ac domus eius fiat sterquilinum.
Idem ille & Artaxerxes appellatus, Quicumque noluerit, inquit, facere legem Dei
tui (Esdra) & legem regis, absque mora fiat iudicium de eo, siue in mortem, siue in
eradicationem, siue in multationem facultatum, siue in uincula. Leguntur hæc
omnia in libro Esdræ.

*Responsio ad
obiecta.*

2. Ioan. 2.

Obijciunt, quibus animo sedet curam & ordinationem religionis ad Episco-
pos duntaxat pertinere, ista exempla quæ adduximus nihil ad nos pertinere, qui
sumus Christiani. Nam illa esse Iudaica exempla. Respondemus. Isti probarent
Dominum Iesum & Apostolos eius curam religionis à magistratu transtulisse ad
solos Episcopos. Id nunquam poterunt: nos autem ostendemus paucis priscos illos
populi Dei principes Iosue, Dauidem & alios reuera fuisse Christianos, idcirco ua-
lere exempla quæ ab illis ducuntur & aptantur Christianis principibus. Adijciam
& Isaiaë uaticinium, ex quo appareat idem esse adhuc in ecclesia regum officium,
quod fuit priscorum regum in ecclesia quam appellant illi Iudaicam. Dubium non
est quin illi censendi sint ueri Christiani, qui uncti spiritu Christi, in Christum cre-
dunt & sacramentis participant Christi. Christus enim perinde sonat, ac situ dia-
cas, unctus. Christiani ergo uncti sunt. Unctio illa, iuxta Apostolicam interpreta-
tionem, est spiritus Dei uel donum sancti spiritus. Ceterum spiritum Christi fuisse
in prophetis & regibus, locupletissimus est testis sanctus Petrus. Sanctus Pau-
lus manifestè ait nos eundem fidei spiritum habere cum ueteribus. Idem commu-
nicat illis sacramenta nostra, dum dicit illos baptisatos esse sub nube, omnesque bi-
bisse de spiritali & consequente eos petra, Christo. Quæ cum ita habeant, ualent
certè

certè exempla quæ pro fide & dilectione à dictis & factis priscorum regum ducuntur. Scio interim non quodlibet consequi ex collectione exemplorum. Sed habemus hîc præterea manifestum pro nostra causa uaticinium Isaia, uaticinantis reges & principes post tempora Christi & post reuelatum Euangelium diligenter curaturos ecclesiam, adeoq̃ futuros fidelium alumnos & nutrices. Atqui palàm est quid sit alere & nutrire: perinde enim est ac si dixisset, illos patres & matres ecclesiae futuros. Hoc autem non uerè dicitur, si cura religionis ad principes non pertinet, sed ad solos Episcopos. Verba Isaia hæc sunt, Ecce tollam ad gentes manum meam, ait, & ad populos signum meum erigam, & afferent tibi filios in gremio, & filia tua in humeris portabuntur. Et erunt reges nutriti uel alumni tui, & regina eorum nutrices tuæ, uultu ad terram demisso adorabunt te, & puluerem pedum tuorum lingent, &c. An non abundè impleta hæc esse dicemus in quibusdā Christianis principibus? Quorum primus beatus Constantinus Synodo indicta, ueram & synceram Christi in ecclesia doctrinam instituire, falsam & hæreticam uoluit exterminare. Cumq̃ Episcopi non recto pede incederent ad regulā Euangelij charitatisq̃, increpauit ipsos, tyrannorum eis crudelitatem rememorans, & quæ iam per ipsum diuinitus pax ecclesijs concessa sit exponens. Indignum esse adiiciens, si Episcopi pergant Deo ingrati, sese mutuis lacerare conuiitijs & dentatis libellis, ac eo modo impijs idololatri delectationem & risum præbere: cum potius ex scripturis diuinis res sacras tractarent. Euangelici enim libri sunt, ait, & Apostolici antiquorumq̃ prophetarum oracula, quæ nos erudiunt quid de sacra lege sapiamus. Expellentes ergo hostile certamen, ex uerbis diuinitus inspiratis, solutionem quæstionum mente percipiamus.

Isaia. 49.

Constantinus Magnus.

Huc accedit quòd sacri imperatores Gratianus, Valentinianus & Theodosius sic & in hæc uerba decernunt, Cunctos populos quos clementiæ nostræ regit imperium, in tali uolumus religione uersari, quam diuinum Petrum Apostolum tradidisse Romanis, religio usque ad hunc ab ipso insinuata, declarat. Et reliqua. Cernit charitas uestra, quomodo reges & principes in populo noui Testamenti alumni & nutriti ecclesiae fuerint, ac arbitrati sint curam religionis ad se in primis pertinere.

Gratianus, Valentinianus, & Theodosius.

Obijciunt rursus lepram Osia regis Iuda, ex eo contractam, quòd sacerdotis munus sibi uendicans usurpare præsumpsisset in adolendo suffitum in ara thymiamatis. Obijciunt præceptum Domini iubentis Iosue stare ante Eleazarum sacerdotem: mandantis deniq̃ regi librum legis accipiat à Leuitis. Cæterum nostra disputatio non huc tendit, ut munia siue officia magistratus atq̃ ministrorum ecclesiae confundantur, ut rex cōcionetur, baptizet, & administret coenam Domini: sacerdos autem pro tribunali sedens pronunciet sententiam contra homicidam, litigantesue sententia lata dirimat. Habet & retinet Christi ecclesia officia distincta, & Deus est ordinis Deus, non confusionis. Huc tendit nostra demonstratio, ut omnibus probemus magistratum ex officio curare religionem, uel ut collapsa reparetur, uel ut integra conseruetur, procedatq̃ iuxta regulam uerbi Domini. Ideo enim lex Dei dabatur in manus regis per sacerdotes, ne ignoraret uoluntatē Dei circa res ecclesiasticas atq̃ politicas, adeoq̃ iuxta hanc legem gubernaret uniuersa. Statuitur quidem ante Eleazarum dux populi Dei Iosue, sed hic uicissim præcipit sacerdotibus, coniungiturq̃ uelut in unum corpus uir politicus & ecclesiasticus Iubetur uir politicus audire ecclesiasticum, & hic rursus obedire debet politico in omnibus quæ lege præcepta sunt. Idcirco magistratus nō est subiectus sacerdotibus, à Deo, tanquā dominis, sed tanquam Domini Dei ministris, & idcirco

Osias leprosus.

Officia magistratus & ministrorum nō confundenda sunt.

magis ipsi Domino & legi eius, cui & sacerdotes perinde ut principes, subiecti sunt. Si sacerdotis labia non loquantur uerbum Dei, non est quod quisquam ex plebe nedum princeps audiat aut reueretur titulotenus sacerdotem. Labia sacerdotis, inquit Malachias, custodiunt scientiam, & legem requirunt ex ore eius: quia angelus Domini exercituum est. Huiusmodi sacerdotes nolle audire, est ipsum Deum repellere. Et tales sacerdotes adiuuarunt pii principes Israelis, pseudosacerdotes deiecerunt ex gradu, negligentius facientes officium suum increparunt, atque de officijs obeundis & rite administrandis decreta tulere.

De religione
decreuerunt
principes.

De Solomone scriptum legimus, Solomon eiecit Abiathar ne esset sacerdos Domini, ut impleret uerbum Domini quod dictum erat super Heli in Silo, & posuit Zadok sacerdotem pro Abiathar. Et in lib. Paralip. 2. legis, Et constituit rex Solomon iuxta ordinationem Dauidis patris sui diuisiones sacerdotum super ministerijs suis & Leuitas in custodijs suis, ad laudandum & ministrandum coram sacerdotibus iuxta exigentiam cuiusque diei. In eodem libro inungit quidem Ioiada sacerdos regem Ioas, sed hic uicissim uocat sacerdotem, & tradit mandatū de colligenda pecunia & reparando templo. Iam & Ezechias princeps religiosissimus & optimus uocat sacerdotes ac Leuitas, & ait, Sanctificamini & sanctificate domum Domini Dei nostri, & efferte immunditiam ex sanctuario. Filij mei ne sitis modo socordes, quia uos elegit Dominus ut ministretis ei. Idem rex mox iubet sacerdotes sacrificare Domino. Constituit itē cantores in domo Domini, qui canerent in templo musicis instrumentis. Præterea constituit Ezechias rex diuersas turmas sacerdotū & Leuitarum, iuxta uaria officia eorum, unumquemque secundum ministerium suum. Quid quod ipsas quoque portiones, ipsa stipendia sacerdotibus, per sacerdotū distribuit? Idem rex pascha toti populo celebrandum indixit, adde & sacerdotales planè Epistolas de religione & uera poenitentia agenda, ad omnē populum scripsit. Quibus omnibus tandem subiicitur, Et operatus est rex quod bonum & rectum atque uerum erat coram Domino Deo suo. Ergo cum principes ordinant religionem secundum uerbum Dei, rem placitam Deo faciunt. Hoc ipsum recolligitur & de Iosia principe pijsimo. Quis ergo dixerit posthac curā religionis ad solos pertinere Episcopos?

Præfunden
ordenen.

Christiani prin
cipes ordina
runt religionē.

Certè Imperatores Christiani principum priscorum ueluti patrum suorum exempla imitantes, diligentissimè procurarunt res religionis ueræ in ecclesia Christi. Rectè censent Arcadius & Honorius, Quoties de religione agitur, Episcopos conuenit agitare. Atqui ante hos Gratianus, Valentinianus & Theodosius, legē tulere sacratissimam, qua orbi exposuerunt quam religionem & fidem uelint recipi tenerique ab omnibus, nempe doctrinam & fidem S. Petri. Declararunt in eodem edicto omnes eos esse hæreticos qui diuersum sentiunt & docent: catholicos autem quicumque in fide S. Petri perseverant. Colligimus ex his sacerdotum proprium officium esse de religione ex uerbo Dei constituere, principum autem esse iuuare sacerdotes, & prouehere tuerique ueram religionem. Quod si cessent sacerdotes, principum officium proprium est sacerdotes redigere in ordinem, & iuxta uerbum Domini constituere de religione. Certè Iustinianus Imperator in Nouellis Constit. 3. ad Epiphaniū regiae urbis archiepiscopum, Communi & generali lege, ait, ad beatitudinem tuam, o patriarcha, de ordinatione sanctissimorum Episcoporum & reuerendissimorum clericorum disposuimus quaecumque honesta & decora sacrisque regulis conformia esse uidebantur. Et Constit. 7. Mandamus, inquit ne quis Episcoporum per omnis ditionis nostrae terras, licentiam habeat alienandi rem immobilem, aut in domibus aut in agris ecclesiarum. Item Constit. 57. prohibet

hibet in priuatis domibus sacra celebrare mysteria. Addit poenā, Alioqui domus in quibus peraguntur publicæ fient, & sub ærarium imperatoris deducuntur. Constit. 67. præcipit omnibus Episcopis ne absint à suis Ecclesijs: si uerò abfuerint, nihil emolumenti aut stipendij accipiant à prouinciarum oconomis, sed in usus Ecclesiæ pios conferatur. Constit. 123. præcipit prouinciarum præsidibus, ut episcopis cessantibus ipsi cōuocent Synodum, ac leges exerceant tueanturq; Ecclesiasticas. Mox, Interdicimus, ait, Episcopis & presbyteris omnibusq; cuiuscunque gradus clericis, ne ad tabulam ludant, aut tali ludo utentibus se associant, aut spectatores sint, aut ad quodcunq; spectaculum spectandi gratia accedant. Hæc non proferimus tanquam scripturas canonicas, sed duntaxat ueluti indicta quæ declarant in Ecclesia quondam fuisse principibus potestatem, officium, consuetudinemq; nimirum à Deo concessam (iuxta Isaia uaticinium) & ex ueteri desumptam exemplo, præcipiendi Episcopis, constituendiq; de religione in Ecclesia Christi.

Qui uerò hic obijciunt priuilegia Ecclesiastica, sciant nulli principi, imò nulli mortalium permissum esse dare priuilegia pugnancia cum mandatis & cum ueritate uerbi Dei. S. Paulus dixit sibi datā esse potestatem ad ædificationem non ad destructionem. Non enim iam commemoro, priuilegijs æquis indignos esse qui non sunt hoc quod audiunt sacerdotes & ministri Christi, sed milites potius & multis corrupti sceleribus. Leguntur in iure Canonico Distinct. 40. hæc inter alia, Videte fratres quomodo sedetis super cathedram: quia non cathedra facit sacerdotem, sed sacerdos cathedram: non locus sanctificat hominem, sed homo locum sanctificat. Non omnis sacerdos sanctus, sed omnis sanctus est sacerdos. Qui bene federit super cathedram, honorem accipit cathedræ: qui male federit, iniuriam facit cathedræ. Itaq; malus sacerdos de sacerdotio suo crimen acquirit non dignitatem. Sed illa hæcenus.

Postquam demonstrauius c. v. ad magistratum quoq; non ad Episcopos tantum pertinere religionis curam, & magistratum etiam leges constituere de religione, inquiramus modò quas constituat de religione leges. Non est autē quod rex uel magistratus arbitretur sibi potestatem datam esse constituendi nouas leges de Deo, de cultu dei, de mysterijs: de uero & bono. Nam omnis magistratus ut à deo ordinatus, ac dei minister est, ita Deo obedire & legi uel uerbo Dei obtemperare, ac in hoc unice respicere, & ab hoc solo pendere debet. Scriptura, quæ uerbum Dei est, abunde satis exponit quæcunq; ueræ religionis sunt: imò uetat Dominus uerbo suo quicquam uel addere uel subtrahere: magistratus ergo nullas condit leges nouas de Deo & cultu Dei, sed ueteres illas religiose suscipit atq; custodit, applicat & propagat in regno sibi diuinitus concesso. Huc enim pertinet quod regibus Israeliticis dabatur liber Legis diuinæ, ex quo regulam sumerent agendi quæ ex officio agenda erant. Ad Iosue dicit Dominus, Vide ut custodias & agas secundum uniuersam legem, quam præcepit tibi seruus meus Moses. Nō recedes ab ea, uel ad dextram uel ad sinistram. Nec recedet liber legis huius ab ore tuo, sed meditaberis in eo die & nocte, ut custodias & agas iuxta totum illud quod scriptum est in eo. Tunc enim prosperū reddes iter tuum, & tunc ages prudenter. Principes ergo religiosi & sancti summa fide & diligentia contenderunt prædicationem uerbi Dei, leges, ritus & statuta Dei tradere populo, retinere conseruareq; in populo, imò & quàm latissimè per omnes propagare, pro loco item & tempore sanctè accommodare: falsam doctrinam, prophanos cultus & blasphemias proscribere, adde & eradicare. Sic inquam religiosas leges de religione con-

Priuilegia ecclesiastica.

Quas leges constituat de religione magistratus.

stituerunt aut ordinarunt pī magistratus, Sic curauerunt sanctē & religiosē religionis negotium.

Scholæ.

Scholæ erant quondam urbes Leuitarum in Israele. At has urbes studiorum causa & pietatis ergo diligenter constituit Iosue. Ezechias rex non minus sollicitus est de stipendijs ministrorum ritē constituendis & reparandis, quā de officijs restituendis formādisq̃. Honos enim alit artes; & inopia varias excogitat exactiōnes; uenalia fiunt ipsa etiā sacra, nedum uana hominis lingua. Iosaphat unā cum sacerdotibus siue doctoribus senatores & tribunos mittit in totum regnum. Cupiebat enim modis omnibus uerbum dei prādicari cum authoritate & dignitate quadam, prādicatum autē defendi ac in ipsa opera produci sancta. Iosias rex unā cum idololatria & prophanis cultibus tollit ē medio pseudosacerdotes: restituit ueros uerbi dei doctores, restituit sacra: sicuti & Ioas rex ædificia sacra collapsa (obiurgatis Leuitis) restaurat. Non possum omnia recensendo proseguī: discat ex his pauculis pius princeps aut magistratus, quid & quo modo de religione constituat.

Nouorum cultus inuentores à Deo maledicti.

Ex aduerso Ieroboam quidem audierat ab Ahia Silonita, Sic dicit Dominus, Regnabis iuxta id quod desiderat anima tua, & eris rex supra Israelem. Quod si audieris omnia quæ præcepero tibi, & ambulaueris in uīs meis, fecerisq̃ quod rectum est in oculis meis, ut custodias statuta & præcepta mea, quemadmodum fecit Dauid seruus meus, ero tecum, & ædificabo tibi domum firmam. Sed contempsit miser amplissimas illas promissiones, ac reiecto uerbo dei, tēplo Dei Hierosolymitano & cultu legitimo, ipsis quoq̃ Leuitis repudiatis, ex face plebis creauit sibi sacerdotes, templa sibi noua extruxit, idolis ornauit seu deformauit potius, sacrificia non tradita uerbo Dei instituit & obtulit, adeoq̃ nouum quendam Dei cultū, religionem nouam adinuenit. Et quamuis Deum colere uelle uideri cuperet, tamen diuinitus pro impio damnatur. Audite obsecro quid contra ipsum pronunciarit os domini, Tu (inquit Ahia ex sententia domini) malum designasti super omnes qui fuerūt ante te. Iuisti enim ac fecisti Deos alios, ac fusiles quidem illos, ut irritares me, & proiecisti me post tergum tuum. Ob id adducam malum super domum Ieroboam, excindamq̃ ipsi Ieroboam, mingentē ad parietem, clausum & derelictum in Israele, & expurgabo posteritatem Ieroboam, ceu stercus expurgatur, donec consumetur. Ac ad uerbum hæc omnia completa esse testatur scriptura hisce uerbis, Cum regnaret Baasa, percussit uniuersam domum Ieroboam, ita ut nihil spirans de Ieroboam faceret reliquum. Ac idem ille rex Baasa nihilo melior & prudentior factus alieno & miserabili sui prædecessoris exemplo, pergit religionem exoticam & uerbo Dei contrariam, à Ieroboamo cœptam, continuare, populo tradere, in hoc propagare & defendere, Audit itaq̃ & ipse à domino per prædicationem Hanani prophetæ, Quando euexi te de cœno, & posui te principem super populum meum Israel, tu autem ambulasti in uia Ieroboam, & fecisti peccare populum meum Israel, ut prouocares me in peccatis eorum, en ego excindam posteros Baasa, & ponam domum tuam sicut domum Ieroboam. Id quod factum exponit scriptura per Simri principem militiæ. Hic enim & Hela regem filium Baasa probè potum, & omnem eius posteritatem deleuit. Successit in regno Amri pater Achabi perditissimi nebulonis, quem in acie cæciderunt Syri. Regnarunt post ipsum filij Ochosias & Ioram. Verum quando traditam uerbo Dei religionem reliquerant, & Ieroboami regiam sed nouam traditionem sequebantur, adde & Baalis pudendi idoli cultum adiecerant, excinduntur tandem funditus opera sæuissimi sed iustissimi principis Iehu. Regnarat propago Amri plus minus

minus annis 40. multo cum innoxiorum sanguine, sed perit postquam mensura impietatis esset impleta: & radicitus iusto dei iudicio tandem excinditur. Discant ex his stupendis sanè exemplis omnes principes & magistratus cauere sibi à nouandis religionibus, & mutandis à Deo institutis cultibus legitimis ueteribusq;. Bonus est fidelis Dominus noster, religionē uerā & cultum legitimū plenē, simpliciter & absolute in uerbo suo instituit, hominibusq; unicē & semper custodiendum tradidit: hanc ergo retineant omnes, huic immoriantur qui æternū uiuere uolunt. Puniuntur cœlitus quicunq; religioni & cultui à Deo instituto uel addunt uel adimunt aliquid. Obseruate hæc o uiri principes. Maxima hinc prouenit felicitatis & infelicitatis seges. Ergo qui habet aures ad audiendum audiat. Nemo patiatur se seduci bonis, sed uanis reuera impijsq; intentionibus. Multo gratior est Deo obedientia quā uictimæ. Neq; indigent Dei statuta nostris emblematis.

Sequitur iam alterum caput ordinationis magistratus, id quod uersatur in re. cōstituenda honestate, iustitia & pace publica. Id quod iterum absoluitur æquis & bonis legibus. Atqui sunt quibus uideatur tyrannicum esse, liberis hominibus iniicere leges, ceu iugum in colla libera: suo potius quemlibet relinquentum arbitrio. Dixit sanè Apostolus, Lex iusto nō est posita, sed iniustis. Cæterum ideo iusto non est posita lex, quoniam iustus est: iustus autem operatur iustitiam ac facit sponte sua quod exigit lex à quolibet mortalium. Proinde iusto lex minime difficilis est, utpote quæ animo & menti hominis iusti consentit, & hæc illam cupide amplectitur. Iniustus uerò animū explere sitit, & à lege per omnia dissentit, lege interim ne sibi & alijs noceat coërcendus. Ita consequens est, cum leges bonis nō sint onerosæ, sed gratæ magis, propter iniustos autem necessariae etiam, adeoq; ipsis iniustis quoq; coërcendis datæ, eas omnibus esse bonas & utiles minimeq; reiiciendas. Quid quod ipse deus, qui prænouit quales sint futuri homines atq; ueræ libertati fauet, ipsamq; in populo suo conseruatam cupit, & qui nihil facit instituitq; inutiliter, legem tulit, nec ulla unquam secula sine legibus uiuere permisit: Ac felices fuerunt respublicæ, quæ receperunt leges ac legibus se gubernandas præbuere: infelices seditionibusq; & bellis discerptæ, quæ legibus repulsis, suam illam libertatem, suum arbitrium, suam licentiam, id est, belluinam libidinem & probrosam barbariem retinere contenderunt. Sunt itaq; leges bonæ, salutares, adeoq; necessariae ad pacem incolumitatemq; regni uel reipublicæ. Ac mirum est ita desipere quosdam Christianorum, cum Ethnici de legibus pronunciarint honestissimè. Agnouerunt legislatores suos pro dijs, ea re testantes, se fieri bonas leges munus esse Dei. Nequit autem Dei munus esse inutile & superuacaneum. Plutarchus appellauit leges urbium uitas. Demosthenes disertè cōfessus est leges esse dona Dei. Cicero nuncupauit illas uincula ciuitatis (utpote quæ sine legibus dissoluta dispergitur) fundamenta libertatis, æquitatis, & honestatis fontes. Leges enim reuera sunt nerui reipub. ualidissimi, & animæ magistratuum: ut nec cōmodè uiuant & gubernent rempub. sine legibus, neq; leges uim suam exerant adeoq; & uiuant sine principibus. Itaq; magistratus est lex uiua, lex autem est magistratus mutus. Exequutione & applicatione redduntur leges uiuæ & uocales. Id non intelligunt principes qui dicunt, wir sind das rächt. Nos sumus ius & lex. Intelligunt enim se pro sua libidine quidlibet præcipere posse, atq; id protinus recipiendum esse ab omnibus pro lege. Cæterum hoc citra controuersiam est tyrannicum. Notissimum est illud ex poëta desumptum, planè tyrannicum,

Sic uolo, sic iubeo, sit pro ratione voluntas.

Est sanè princeps uiua lex, si animus eius obediat legibus scriptis, & nō dissentiat

*Leges regnis
aut rebpub.
bonas & neces-
sarias esse.*

*Magistratus
lex uiua.*

à legibus naturæ. Ergo subiicitur legibus magistratus & dominatus. Nisi enim principis animus consentiat legi, legem habens scriptam in pectore, & legem dictis & factis exprimat, non est appellandus uir bonus nedum princeps. Rursus dominatur legi, & magister est legum princeps aut magistratus bonus: non quod liceat ei illas calcare, abolere, dissoluere, figere & refigere: sed quod illas & exercere in populo, & adhibere applicareque pro rerum exigentia, atque eo modo & hac ratione moderare siue interpretari potest.

Addere & adimere legibus.

Errant ergo toto cœlo, qui arbitrantur propter aliquot Imperatorum & regum priuilegia, concedentia magistratui, legibus alicubi adijcere aut adimere aliquid mutareque illas, licere sibi bonas leges abolere in uniuersum, uiuereque contra ius & decorum. Nam sicut nullis permissum est imperatoribus & regibus, priuilegia donare quæ pugnent cum æquo, bono, & honesto: ita si donet tale quidpiam, nec recipiendum nec agnoscendum est ab honestis ciuibus tanquam donum aut beneficium, sed habendum magis pro perniciæ, uti reuera est, & pro maleficio. Semper permanet apud omnes & omnibus seculis immota legum de honestate, iustitia & pace publica, mens & substantia, in circumstantiis fit mutatio, & adhibetur interpretatio pro rei exigentia, pro æquo & bono. Lex est, Nemo cadat alterum: si ceciderit, cadatur & ipse. Illa lex perpetua est, immutabilis, neque licet illam cuiquam abolere ullis temporibus. Interim rigor legis imminui potest, & lex ipsa interpretari commodè: nempe si quis alterum cadat, qui sit ipsi eximie charus, & cadat forte fortuna, non dedita opera, non odio & malitia, ideoque cadem redimere cupiat, si fieri posset, magno. Hic sanè minimè cadendus est, ac dispensat hac parte cum rigore legis magistratus. Est alius qui diutino & uatiniano quidem odio alterum persecutus est, quem & cadit, sed prætextu fortunæ. Occasionem enim quæsiuit, ut speciem pro se habeat casus fortuiti. In huiusmodi causa nihil legis potest mutare magistratus, sed cadat oportet eum, quem legis mens iussit cadere. Huius generis & alia possem proferre exempla, sed caueo, quantum fieri licet, ne sim C. V. nimia copia & prolixitate onerosus. Satis claret ex disputatis, leges esse bonas & sempiternas, ac quatenus admittant principum, quam uocant *ἐνέκλειον*, id est, moderationem, uel æquitatem, uel interpretationem, limitationem, dispensationemue, ne ipsis illud tritum & uulgare hæreat, Summum ius, summa iniuria.

Qualibus & quibus legibus utatur magistratus.

Legibus scriptis opus.

Demonstrauimus hætenus leges esse bonas, utiles, necessarias, æternas: cõsequens ergo est istis adijcere, qualibus uel quibus maximè legibus utatur magistratus, quibus honestatem, iustitiam & pacem publicam pro suo officio constituat atque conseruet. Visum est quibusdam magistratum nullis oportere uti legibus scriptis, sed pro naturali æquitate, pro temporis, loci, personarum & rerum exigentia, id quod ipsi uideatur optimum, pronunciare. Alij cõtendunt omnibus regnis & rebus publicis leges Mosis iudiciales obtrudere. Sunt qui hac repudiata & proscrippta, nihil agnoscant quàm quod petiitum est ex legibus principum ethnicorum. Atqui cum illi, qui in magistratu uersantur, uel boni sint uel mali uiri: cumque in optimos uiros cadant cupiditates, ira, odium, fauor, dolor, metus & affectiones aliæ, cui quæso tradiderunt rempublicam gubernandam, quicumque scriptis legibus ac certo iure repudiato, iubent hominem quemlibet in magistratu constitutum pro animi sui sententia pronunciare? An non belluæ subiecerunt rempublicam? Quid hic dicam de malis in magistratu hominibus? Furijs subdidit regnum, qui pessimorum hominum decretis subdidit. Sed uolumus, inquit, illos pronunciare ex naturali æquitate, non ex animi corrupti libidine. Pronunciabunt ergo

ergo isti ex corrupta animi libidine, ac increpiti, dicent se pronunciaſſe ex naturali æquitate. Adſcient ſe non aliter poſſe iudicare, neq; aliter negotium poſſe intelligere. Id iſtis uideri optimū quod decreuerunt: nec hic quicquam actū contra conſcientiam. Te autem in ius uocabunt qui auſus fueris iſſorum uituperare ſententiam. Ita uerò peribit iuſtus, & dominabuntur barbariſſimi affectus, & homines ſceleſtiſſimi. Et ut maxime donemus omnes in magiſtratu conſtitutos eſſe uiros bonos, excitabit tamen inter iſſos ſententiarum diuerſitas iurgia & turbas perpetuas. Proinde expenſis omnibus, longè præſtabilius eſt ſcriptis uti legibus. Hoc iſſum doceat nos exemplū dei noſtri æterni, ſapientis, optimi, maximi, dantiſ populo illi ſuo peculiari leges ſcriptas. Sat relinquitur aliàs negotij magiſtratus, iudicandi ſcilicet, id eſt, applicandi cōferendiq; cauſas legibus, quatenus conueniant aut diſcrepent, qui peccarit contra leges, qui minus. Porro in lege Moſaica, iudiciali in primis, ſunt multa genti Iudaicæ propriā peculiariaq; , pro ratione loci, perſonarum & temporis ſic conſtituta: ut ſi ea pergamus omnibus alijs imponere & aptare gentibus, cum ratione inſanire uideamur. Quorſum uerò attinet iam olim eliminatas ethnicorum immunditias poſtliminio reducere in forum populi Dei? Apoſtoli itaq; domini noſtri Ieſu Chriſti, neminē obſtrinxerunt aut grauauerunt legibus Moſaicis, neq; bonas ethnicorum leges damnarunt, neque malas cuiquam commendauerunt, ſed leges iſſarumq; uſum uel delectum permiſere ſanctis liberum. Interim diligentiſſimè inculcarunt omnibus timorem Dei, fidem, charitatem, iuſtitiam & temperantiam, quòd imbuta hiſ uirtutibus peſtora, nullo negotio uel iſſi bonas leges condunt, uel ex aliorum legibus optimas deligunt. Nihil enim refert ſiue ex Iudaicis legibus Moſis, ſiue ex Ethnicorum legibus probatis, ſibi magiſtratus leges, quantum ſatis eſt, colligat, uel ueteres illas & hæcenus uſurpatas, reſecatis impijs, iniquis & turpibus duntaxat, ſi quæ in iſſis inueniantur, retineat. Cenſeo enim magiſtratibus æquis diligenter cauendam curioſitatem & nouitatis ſtudiū. Rarò ſine motibus & turbis configuntur, quod Pro uerbio dici conſueuit, cornicum oculi: & quæ ordinantur à curioſulis, ferè abolitis ſunt deteriora.

Lex Moſis non obtrudenda regnis.

Curioſitas & nouandi ſtudiū.

Porro leges omnes uel de religione & cultu Dei externo præcipiunt, uel de externa uitæ conuerſatione ciuilibusq; moribus. De religionis legibus dictum eſt ſuperius. De ciuilibus uel politicis legibus hæc addimus, optimas uideri illas quæ pro cuiuſlibet loci, perſonarum, rerum, temporisq; ratione, quàm proximè accedunt ad Decalogi præcepta & charitatis regulam, nec habent quicquam iniquitatis uel licentiæ & turpitudinis. Sint præterea breues ſuccinctæq; , nō in immenſum extenſæ aut multis impliciæ expoſitionibus: ſint directæ ad iuſtum ſcopum, ad rem facientes, non ſuperuacua. Tribus autem comprehenduntur ferè capitibus leges politicæ, honeſtate, iuſtitia, & pace. Proinde huc ſpectent leges, ut in re publica plantetur uel retineatur diſciplina & honeſtas: nempe nequid fiat indecore, libidinoſè ac turpiter. Legibus proſcribatur omnis obſcœnitas, petulantia, leuitas, libido & luxuria, in uestibus, ædificijs, poculis, cibis. Sanctè colatur coniuſgium. Exulent fornices cum ſcortatione. Exulent adulteria, ſupra, raptus, atque inceſtus. Exhibeantur conuiuiā moderata. Colatur frugalitas, ueſtigal omnium maximum. Breuiter quicquid cū honore & decore pugnat, legibus explodatur. Muniatur legibus iuſtitia. Caueatur ne quis uel indigenarum uel peregrinorum lædatur, in fama, in fortunis, in corpore uel uita. Lædens alium uiolenter uel inſidioſè, puniatur ſecundū leges. Sint leges iuſtæ de adeundis hæreditatibus, de contractibus, ſtipulationibus, fideiuſſionibus, emptionibus, de ponderibus & men-

Leges ciuiles quales.

Leges de honeſtate.

Leges de iuſtitia.

DE PRAECEPTO DECALOGI VI.

suris, de locationibus, mutuo, deposito, de mercede conductis, de usu fructibus & usura. Sit ordo inter patrem & liberos, inter coniuges, inter dominum & seruum, breuiter suū cuiq; cedat ex integro. Neq; enim statui hic omnes iuris titulos commemorare. Præterea procuranda erit legibus pax, ut quisq; suis tranquille possit frui. Depellenda est omnis uiolentia & iniuria, sopiendæ simultates & insidiæ. Bella quoque sopienda sunt prudentia, uel excipienda finiendaq; fortitudine heroica.

Cæterum ut talis nobis & magistratus & uita obtingat, iussit Apostolus ualde precari dicens, Adhortor ut ante omnia fiant deprecationes & obsecrationes, interpellationes item, & gratiarum actiones, pro omnibus hominibus, pro regibus & omnibus in eminentia constitutis, ut placidam ac quietā uitam degamus cum omni pietate & honestate. Rursus cogor nundum plenè absoluta hac causa uela colligere. Cras adiiciam reliqua. Vos iam diligenter animis in cœlum sublati orate, &c.

De iudicio & officio Iudicis. Iudicia non esse Christianis prohibita. De uindicta & pœna. An liceat magistratui cadere fontes. Quare, quando, quomodo, & quid puniat. An propter religionem punire possit. SERMO VIII.

DIXI heri de ordinatione magistratus, restant duo reliqua huius officia, Iudicium & Pœna siue ultio, de quibus, pro gratia à deo concessa, breuitate succincta dicam: uos intentis animis attendite, & domino pro gratia supplicate.

Iudicium quid.

Iudicium uariè accipitur, sed in præsentia est sententia iudicum interposita inter litigantes, desumpta autem ex legibus secundum æquum & bonum, prout causa proposita à partibus requisit, pronunciata in hoc, ut dirimat litigantes, & ut suum cuiq; cedat. Prodeunt enim in iudicum confessum partes, litigant de hæreditate aut possessione aliqua, quam partium quælibet ad se iure pertinere contendit, propositis in medium argumentis, quibus suum ius probant atq; demonstrant. Ea diligenter audiunt & colligunt iudices, deinde eadem conferunt inter se & cum legibus, postremò ferunt sententiam, qua possessionem alteræ parti decernunt, alteræ adimunt. Similis ratio est & in alijs causis. Hoc uerò iudicium est, ipsa inquam iustitiæ executio. Est autem hæc ratio dirimendi & componendi partes lenior, consequente nimirum pœna atq; uindicta, cum iam non tantum uerbis res agitur & sententijs, sed uerberibus & gladio. Et sunt quidem causæ diuersæ, quarum aliæ non possunt nisi gladio finiri, aliæ sententijs & mitius longè tran-

Iudiciū et ultio præstantissima in officijs magistratus.

figuntur. Cæterum in his est salus & incolumitas regni uel reipub. Sunt itaq; iudicium & pœna in officijs magistratus longè præstantissima, etsi uideantur dura ac crudelia. Verum nisi exerceatur hæc (ut uidetur) crudelitas, omnes ætates, ordines & sexus experientur longè crudeliora & reuera crudelissima. Nam crudelitas non est, quæ iubente domino, ad seruandos innoxios, & ad tranquillitatem in regno seruandam, exercetur, iusta magis est seueritas. Finge autem rem publicam esse quæ absolutissimis instructa sit legibus, quod religionem attinet & mores politicos: finge præterea nullum esse in republica illa magistratum qui leges illas exerceat & tueatur, qui omnia dicta & facta hominum ad illas leges redigat atq; reducat: & iccirco quemlibet pro sua libidine perrumpere & quidlibet agere, quid oro leges illæ scriptæ profunt ciuibus? Nihil prorsus. Præstantissima ergo officiorum pars in iudicio & ultione consistit. Et requirunt illa uirum siue iudicem præstantem

stantem & heroicum: quem ipse Dominus in lege sua, qualem esse cupit ac officiū quod agat graphice describit: quam descriptionem recitabimus atque explicabimus, quando in hac re iudicis persona primas tenet.

Moses præcipiente Domino ad iudices ait, Audite causam fratrum uestrorū, *iudicis officiū describitur.* & iudicate iustē inter uirum & fratrem eius & inter peregrinum eius. Non recipietis faciem in iudicio: tam paruum quā magnum audietis: neque timebitis ab ullo uiro, quia iudicium Domini est. Duo agit diuinus propheta in his uerbis. Indicat quodnam sit iudicis officiū: & quæ uitia quæue morbi inficiant iudicem, quò minus suo officio satisfaciatur. Et quantum attinet ad officiū boni iudicis, primò requiritur ab eo ne quem repellat, sed audiat omnes, parū, magnum, inquilinum, *Audiat ex eo cognoscat.* ciuem & peregrinum, notum & ignotum. Audiat autem partes beneuolē, diligenter, attentē. Excluditur his socordia & animus à dicente alienatus. Excluduntur præiudicia, quæ mentem iudicis alienant. Ipsa res clamat audiendum esse intelligendumque sobriē priusquā iudicandum. Et uulgare est illud, Audiat & altera pars. Prudenter dicebat iudex ille accusatori se alteram præbuisse aurem, alteram reseruasse reo. Comprehendimus in his cognitionem iudicis diligentem, ne accelleret iudex in causis nondum plenē cognitis, quas uidelicet iudex ex re ipsa non ex delatione partium iudicare debet. Deinde iudicet, ait, & iustē quidem iudicet *iudicet iustē.* iudex. Iudicare est discernere & pronunciare secundum leges pro æquo & bono, quid bonum, quid malum, quid rectum, quid iniquum. Heluetij utimur uocabulo *urteilen oder ertheilen oder richten*, quasi quis dicat rem diligenter expensam discriminare, & incuruam complanare & rectam facere. Partes affectibus cæcaturæ res rectas incuruas faciunt. iudex ad normam æquitatis & legū adhibens, rursus rectificat: ergo iudicare est rectificare. Præterea iudicare est defendendo & puniendo asserere. iudex ergo iudicat cū asserit innoxium, coercet nocentem. Cæterum iudicandum est iustē, id est, secundum iustitiam & leges, quæ unicuique suum illud reddunt. Iniustē iudicat iudex, cū contra leges & iustitiam, ex uitata affectibus mente, pronunciat. Inspicienda ergo iam sunt uitia iudicum.

Et plurima quidem sunt iudicum uitia morbiq; animorum uarij: sed præcipui *iudicum uitia.* duo. Alter morborum corruptentium animos iudicum, quò minus suum exequantur officiū, est receptio facierum seu respectus personarum, nempe cū *Respectus personarum.* iudex in iudicio non ipsas res, uel causas quales reuera sunt causarumque circumstantias, sed uel dignitatem excellentiæ uel humilitatem sortemue afflictam, uel genus, uel clientelam, uel tale quidpiam spectat. Hoc malum excludens Dominus, Iustē, inquit, iudicabitis, non recipietis faciem in iudicio: tam parū quā magnum audietis. Alter morborum est metus, sanē uehemens affectus, omnia di- *Uehemens affectus.* sturbans præclara consilia, omnesque præfocans uirtutes. Sub metu intelligimus & spem, nimirum emolumentum, adeoque & munerum corruptelam. Qui metuit uitæ suæ aut fortunæ suæ, aut ne quem offendant magnatum, neue iudicia & odia uulgi in se excitet: qui munera accipit, aut se accepturum ab altera partium sperat, impingit in iustitiam, & promouet iniquitatem. Dominus itaque, Non timebitis, inquit, ab ullo mortalium: non sperabitis à quoquam quicquam munerum. Ratio, Non uestra res agitur, neque huc uocati estis ut rem uestram conficiatis, sed Dei iudiciū est. Spectanda est ergo uoluntas & lex Dei. Ac Deus tueri potest iudices iustos contra iniqua quorumuis odia, & contra omnem uiolentiam. Præterea cū dicitur iudiciū esse Dei, admonent iudices Dei iudicis supremi exemplum ipsis esse imitandū. Quale uerò Dei exemplum sit, exponit idem Moses in 1. cap. Deut. *iudex Dei exemplum imitetur.* & ait, Deus non suscipit nec personā nec munus, ipse facit iudiciū pupillo & ui-

2. Paralip. 19.

duæ: & amat peregrinum, ut det illi panem & uestitum, diligetis ergo & uos peregrinū. Ita agere oportet etiam iudices diuinos in iudicio Dei. Certè Iosaphat princeps religiosissimus constitutus à se iudicibus dicit, Videte quid agatis: non enim hominis exercetis iudiciū, sed Domini, qui uobiscū est in causis quas iudicatis. Sit ergo timor Domini in uobis, obseruate & diligentes estote. Quoniā non est ulla peruersitas aut corruptio apud Dominum Deum nostrum, ut uel personas suscipiat uel munera recipiat.

Exod. 23.

Leuit. 19.

Ierem. 22.

Iudicia non esse
abrogata inter
Christianos.

Isaia 1.
Zach. 7.

His adiiciam alios quoque scripturæ locos qui superiores illustrent partim, partim officiū iudicis significantius explicent & ornent. In Deuteronomio legimus, Iudices iudicabunt populum iusto iudicio. Non declinabis iudiciū, nec agnoscas personam, neque accipies munus. Quoniā munus excæcat oculos sapientū, & peruertit uerba iustorum. Iustitiam iustitia prosequaris, ut uiuas & possideas terram. Rursus in Exodo legimus, Non sequeris multitudinem in malo, neque respondebis in causa, ut declines post multos ad peruertendum. Pauperem non ornabis in causa sua: neque peruerteris causam pauperis tui in causa sua. A uerbo falso longè aberis: nec innocentem & iustum occides. Quoniā non iustifico impium. Munus ne acceperis, quia munus excæcat uidentes & peruertit uerba iustorum. Item in Leuitico sic legis, Non facietis peruersum quid in iudicio, nec suscipias faciem pauperis, neque honorabis uultum magnifici, in iustitia iudiciū proximi tui decernes. Item, Nolite facere iniquum aliquid in iudicio, in regula, in pondere & in mensura. Bilanx iusta, lapides iusti, epha iustum, & hin iustū sit uobis. Ego Dominus Deus uester, &c. Comprehensum in his Domini Dei nostri uerbis aut præceptis paucissimis, omne illud arbitror, quod philosophi & iurisprudentes uix multis absoluunt libris. Super hæc omnia sanctissimus Dei propheta Ieremias clamat, Facite iudiciū & iustitiam, & liberate uī oppressum de manu calumniatoris: peregrinum quoque, pupillum & uiduam ne contristetis, neque iniuriam faciatis, & sanguinem innocentem ne effuderitis. Hæc de iudicū officio.

Frustra uerò de his hucusque apud quosdam differuimus, nisi etiam ipsorum obiectiones diluamus, quibus contendunt demonstrare forum in uniuersum omne abrogatū esse, in euangelio dicente Domino, Ei qui te uelit in ius trahere ac tunicam tuam tollere, permitte illi & palliū. Et iterum, Cū abis cum aduersario tuo ad magistratum, da operam ut in itinere componas cum illo, ne fortè tradaris torori. Addunt lites forenses ab Apostolo Paulo ad Corinth. scribēte in cap. 6, damnatas. Ad quæ sic respondemus. Sicut œconomia non abolet & damnat doctrina Euangelij & Apostolorū, ita neque politia. Obiurgat & repellit Dominus in Euangelio secundū Lucam, adolescentem qui postulabat ut cum fratre suo ageret, quò is partē hereditatis æquam cederet: non quòd damnaret si quis posceret diuisionem æquam, aut partē iure sibi debitam, sed quòd existimaret id nequaquam sui esse officij, sed iudicū. Quis, ait, constituit me iudicem aut diuisorem inter uos? Præterea sicut in Euangelio scriptum legimus, Si quis uelit te rapere in ius, & tunicam tuam à te tollere, cede illi & palliū: ita ex aduerso non requiritur aliud in tota euangelica doctrina maiore diligentia quàm charitas & beneficentia. Caterū confertur beneficentia si aliàs, per iudiciū & iustitiā maximè. Cū autē propter iudiciū & iustitiā exercendam & conseruandam inuenta sint iudicia: claret ipsa per Euangelium minimè esse abrogata. Clamant insignes prophetae Isaia & Zacharias: Ille, Cessate malefacere, discite benefacere, quærite iudiciū, subuenite oppresso, agite in iudicio causam pupilli & uiduæ: Hic uerò, Iudicate iudiciū ueritatis, & facite beneficentiā ac misericordiam unusquisque cum fratre suo. Viduam & pu-

& pupillum, peregrinum & pauperem nolite calumniari. Peccant ergo qui iudicia perturbare, & iudices è subsellijs deturbare pergunt. Nam ut bonā ueri Dei cultus partem auferunt, sic iniurijs, rapinis & oppressioni pauperū, ianuam aperiunt. Præcepit Dominus, fateor, quæ recitata sunt ab aduersarijs Ea ratione uoluit consilere hominū quieti: sed quoniam malitia hominum est insuperabilis, patientiaq; innocuorum animos addit iniquis nebulonibus, nequaquam damnauit dominus moderatum iudiciorum usum. Sed & Paulus Apostolus nō semel iudicijs legitur usus in Actis Apostolorum, non propter pecuniam sanē aut peculium, sed propter uitam suam quam cupiebat seruata defensamq; à latronibus. Nec consentit in iniquum Festi præsidis iudicium, sed appellat ad Cæsarem: & tamen non ignoramus Paulum actione hac sua nihil peccasse contra doctrinam Christi euangelicā. Idem Paulus ad Corinth. non damnat absolutē quòd in foro decertarent Corinthij super rebus ad uictum pertinentibus, sed quòd sub infidelibus litigarent iudicibus. Decebat quidem æquo animo iniurias ferre, indecens est ulli ullam inferre iniuriam: quoniam uerò Dominus iniuriam sustinentibus mederi subueniriq; uoluit in iudicio, nihil peccat qui cupiat iniuriam à se propulsatam, non uindicta priuata, sed æqua iudicum sententia. Ideoq; præcipit Corinthijs Apostolus, sibi ex fidelibus deligant iudices, qui litigantes propter res temporales dirimant.

Exposita parte officiorum magistratus secunda, iudicio uidelicet, descendimus ad tertiam & postremam explicandam, ad uindictam & pœnam. Nam magistratus pro officio suo gerit gladium: ergo diuinitus iubetur uindicare bonos & cadere malos. Gladius enim diuina est uindicta seu instrumentum, quo Deus suas persequitur iniurias & hostes suos: ac usurpatur generaliter in scripturis pro ultione & uindicta. Apud Ieremiam clamat Dominus, Gladium uoco super omnes habitatores terræ. Item apud Ezechielem, Gladius acutus & politus est ut iugulet uictimam. Rursus, Dabo gladium meum in manus regis Babel. Certè Pharaones Ægyptijs dicti sunt reges ipsorum, quasi tu dicas uindices. Est autē duplex apud magistratum gladij usus. Vel enim fontes puniunt propter iniurias alijs illatas & propter maleficia uaria: Vel bello depellunt hostem grassantem, aut opprimunt rebelles uel seditiosos suos ciues.

Verū obijcitur hic nobis iterum, secundum doctrinam Euangelij neminem posse uel occidi uel occidere, eò quòd dictum sit à Domino, Ne resistatis malo. Et ad Petrum, Conuerte gladium tuum in uaginam suam. Omnis qui gladiū sumit, gladio interit. Respondemus in tota scriptura priuatam prohiberi uindictam, non publicam. Priuata autem erat uindicta & inordinaria, quam exercere parabat Apostolus Petrus, ad prædicationem uerbi Dei, non ad tribunal, ad arma aut militiam uocatus. Atq; contra priuatam & inordinariam uindictam rectē pronunciat, Omnis qui sumpserit gladium, interibit gladio. Caterum publicam uindictā & ordinarium gladij usum minimē à Deo in ecclesia prohibitum esse, demonstro hoc diuini Apostoli testimonio. Docuit Paulus in 12. cap. ad Romanos quid à nobis exigit Euangelica perfectio, & inter alia profert & hæc, Ne ulciscamini uos ipsos dilecti, quin potius date locum iræ. Scriptū est enim, Mihi ultio, & ego rependam. Quoniam uerò obijci poterat, Atqui hac ratione Christiana patientia cædibus & parricidijs copiosissimā suppeditabit materiam, subiicit in mox insequente cap. 13. Magistratus Dei minister est, tibi in bonum, ad terrorem malè agentibus. Non enim frustra gladium gestat. Nam Dei minister est, ultor ad iram, ei qui quod malum est, fecerit. Colligimus ergo ex hac Apostoli doctrina abs quolibet nostrum Deo permittendam ultionē, nec licitam esse uindictam priuatam. Licita est

Clementia præpostera.

Seueritas non est crudelitas.

Quare deus iubet punire facinorosos.

Luce 23.

Quando animaduertat magistratus in noxios.

autem publica & ordinaria. Nam Deus qui dixit nobis, Mihi uindictam cedito, & ego retribuam, idem uindictam illam sibi permissam aut datam, concedit magistratui. Idcirco magistratus est gladio persequi hominum iniurias, idque diuino nomine & iussu. Ergo quando punit magistratus, Deus ipse, cuius est uniuersa ultio, punit per magistratum, qui hoc nomine appellatur Deus. Præterea scriptum est, Maleficum non patieris uiuere. Item, Dissipat impios rex sapiens, & conuertit super eos rotam. Rursus, Qui iustificat impium, & qui condemnat iustum, uterque est abominatio Domini. Nec desunt exempla approbantia nobis quosdam incurrisse iram Domini grauissimam, quod clementia præpostera pepercerunt illis, quos mandarat Deus gladio percutere. De Saule loquor & Achabo. Ex aduerso sunt innumera optimorum principum exempla, testantia maxima cum laude supplicium sumi de sceleratis. Neque enim ullum peccatum aut ulla culpa hæret in feriente & supplicium sumente principe de noxio & scelerato homine. Ideoque in lege usque ad fastidium repetitur, Sanguis eius super eum. Porro sanguis noxii licet non effusus sit, imputatur magistratui pro culpa, quando sui negligens officij ueniam dat nulla uenia dignis, nec uindicat innoxium. Nam particeps efficitur iniuriæ & effusi sanguinis iusti, quem non uindicat, dum illi parcat cui iusserat Dominus in ceruicem deurgere gladium. Profecto non est crudelitas (uti falso iudicatur) iusta magistratus seueritas, in puniendis maleficis hominibus. Præpostera autem clementia parcens facinorosis & indignis uita confortioque hominum, reuera atrox est crudelitas. Nam cum magistratus mortem meritos nephandis flagitijs dimittit impunitos ac incolumes, augetur principio audacia simili scelere obnoxii, progrediendi uidelicet in sceleribus. Vident enim parsum esse simili facinore diffamatis. Deinde qui nondum in profundum scelerum demersi sunt, tentantur autem a malo in horas, ut se totos demergant in nephanda flagitia, facilius manus dabunt. Vident enim clementer tractari facinorosos. Postremo nihilo meliores ferè redduntur impune dimissi: imò conduplicant iam mala, eoque recidit tandem res ut cogaris illum iam ferire propter parricidia multa, in quo noluiisti punire unum homicidium, seruareque innoxios quos interea latro sustulit. Lupos ergo & ursos emittunt in plebem, qui nebulones nepharios dimittunt.

Ostenso iure gladij, & quod magistratus uindicare iniurias hominum, & facinorosos occidere possit, consideremus porro quæ sint causæ, ob quas Deus iubet supplicium sumere de noxijs hominibus, item quando sit sumendum supplicium, denique quæ sint suppliciorum aut poenarum irrogandarum a magistratu genera.

Causæ potissimæ propter quas noxios punire palam præcipit Dominus, illæ ferè sunt. Vim ui repellit, & hominum salutem & incolumitatem operatur Dominus, uindicat iniuriam perpeffos, & restituit quæ restitui possunt. Idem iustitiam suam declarat, quæ cuique rependit pro suo facto. Probrosa ergo facta, morte eluit probrosa. Admonet reos sui sceleris, & sensum ferè indit poenitentiae & salutis. Nā si facinorosus agnoscat scelus admissum, poeniteatque ipsum delicti, & toto pectore credat in Christum, remittitur ipsi peccatum & saluatur: sicuti apertum habemus in latrone crucifixo testimonium. Cui certè supplicium fuit salutis occasio. Alteri latronum nihil salutis obuenit, quia non credidit in Christum, neque diuexatione illa sua admonitus sapere coepit. Præterea exhibetur iudicij publicis & uindicta, exemplum omnibus alijs hominibus, quod discant ipsi sibi ab huiusmodi cauere flagitijs, nisi simili malint perire supplicio.

Non animaduertat autem magistratus in quenquam nisi constet prius puniendum, eam quam decernunt iudices poenam commeruisse, ac Deum iussisse in

tale

tale delictum animaduerrere, id est, iure Dei damnatum esse quod punitur. Illud uerò constabit ex propria liberaque puniendi confessione, uel ex testimonijs probatis contra puniendum latis siue collectis, denique ex collatione legum cum ipsis puniendorum sceleribus. Ergo non licet magistratui animaduerrere in uirtutes, in ueram religionem & in uiros probos, honestos, & religiosos. Magistratus enim ordinatus est à Deo ad terrorem non bonis sed facinorosis.

Ac de modo & ratione pœnarum non est curiosius disputandum. Seruet quælibet gens aut ciuitas sua supplicia & modum suppliciorum, nisi forte mores patrij habeant aliquid truculenti & iniqui. Hoc enim ad æqui & boni regulam moderandum esse, nemo sanus negauerit. Species suppliciorum sunt deportatio siue exilium, diminutio capitis, mulctatio in fortunis, carcer ac uincula, uirga, stigmata, amputatio membrorum, ipsa denique mors perfecta gladio, igni, aqua, laqueo, aut modis alijs, cuiuslibet genti proprijs. Nec caret scriptura tristium huiusmodi titulorum catalogo. Legimus enim in libro Esdræ, Quicumque autem facere noluerit legem Dei tui atque legem regis, de hoc illico fiat iudicium, siue ad mortem, siue in exilium, siue ut facultatibus mulctetur, siue ut coniciatur in uincula & carcerem. Hæc non temere propter eos commemoro, quibus hæc uidentur inter fideles non esse uel nominanda.

Quæ suppliciorum genera.

Caterum modus in his discretioque apud iudices sit oportet, certe ut enormia peccata grauius puniantur, minora delicta mediocribus supplicijs coercerentur, in minima uerò seu leuia moderatius animaduertatur. Notissimum est illud è lege diuina, Pro mensura peccati erit & plagarum modus. Vbi etiam locum habet consideratio clementiæ iudicis. Excusat reum non raro uel sexus uel ætas. Excusantur aliquando facta eius alioqui non bona circumstantijs ritè expensis. Consideratur item à iudice diligenter Rei antea facta uita, quæ cum hætenus fuit honesta & proba, plus meretur reus clementiæ, nisi facinus ob quod modò tenetur uinctus tam sit enorme, ut nullam admittat clementiam. Verum pietas siue timor Dei, preces quoque effusæ ad Dominum, & diligens legitimaque facti aut dicti, id est, facinoris examinatio, optima erunt regula quando iudex uel clementer uel seueriter agat. Alioqui decens clementia maximam habet laudem cum apud Deum, tum apud homines.

Discretio et clementia iudicis.

Demonstrauimus charitati uestræ quod magistratus punire fontes & possit & debeat, deinde quare uoluerit Deus puniri palam facinorosos, hinc quando, quomodo, & quantum sint puniendi. Restat ut dicamus propter quid, uel ob quæ delicta sint puniendi. Id autem uno uerbo exponi potest, omnia dicta & facta quæ legibus Dei & magistratus contraria sunt, id est, omnia quæ contra leges scelerate sunt, sunt punienda. Iam uerò leges latæ sunt uel de religione, uel de rebus ciuilibus. Ac hæc quidem uersantur circa honestatem, iustitiam, pacem. Proinde punire aut coercere oportet omnes quotquot honestatem, iustitiam, & pacem publicam, & ciuium priuatam conturbant, affligunt, uexant, perdunt atque subuertunt. Puniantur foeditas, obscœnitas, libido, stuprum, fornicatio, adulterium, incestus, sodomia, luxus, ebrietas, crapula, auaritia, impostura, usura atterens, proditio, cædes, parricidium, seditio, & si quid aliud est huius generis. Catalogum satis prolixum texit Dominus in lege sua apud Moysen Leuit. 18. & 20. Et ne quis hodie illa arbitretur esse abolita, audiat sanctum Paulum dicentem, Iustis non est lex posita, sed iniustis & inobsequentibus, impijs & peccatoribus, irreuerentibus & prophanis, patricidis & matricidis, homicidis, scortatoribus, masculorum concubitoribus, plagarijs, mendacibus, periuris, & si quid aliud est quod sanæ doctrinæ ad-

Quæ nam sint puniendæ innoxij.

uerfetur. Sed contra religionis leges peccant apostatae, idololatrae, blasphemae, haeretici & falsi doctores, religionis denique irrisores.

An magistratus punire possit propter religionem uiolatam.

Controuersum est autem & controuertitur hodie adhuc, an liceat magistratui suae potestati subditos punire religionis uel contemptae, uel contumelijs affectae gratia. Manichaei & Donatistae fuerunt in ea sententia, quod nemo sit religionis gratia urgendus, nedum caedendus, sed quilibet suo relinquendus arbitrio. Verum scriptura diuina disertè mandat magistratui, ne pseudoprophetis parcat: imò iubentur rebelles Deo, legibus & iudicijs sanctis, occidi sine misericordia. Loca sunt in scripturis illustrissima, & nemini non notissima. Alter habetur Deut. 13. alter in eodè lib. cap. 17. In exodo haec ponitur lex, Qui immolat dijs praterquam Domino soli, exterminetur. Occiditur ac lapidibus obruitur blasphemus in Leuitico. In Numeris caeditur qui uiolat religionem sabbati. Et quot quaso illorum cadunt gladio ultore sternente, qui uitulum erexerant & coluerant in deserto? Helias celebri sacrificio mastrauit aliquot centurias pseudoprophetarum ad montem Carmeli. Eliseus mandante Domino inungit Iehu in regem ad hoc, ut & domum Achabi extirpet, & sacerdotes Baal immolet unam omnes. Ioiada sacerdos Athaliae caecidit. Iosias rex Deo dilectissimus, sacerdotes excelsorum sacrilegos & pertinaces ad unum omnes sustulit. S. Augustinus Tractatu in Ioan. 11. contra Donatistas disputans, exemplo Nabuchodonosoris ostendit, Christianos principes iuste animaduerrere in Donatistas, Christum & doctrinam eius uilipendentes. Inter alia, Si rex Nabuchodonosor, ait, gloriam Deo dedit, quia liberauit de igne tres pueros, & tantam gloriam dedit, ut decretum mitteret per regnum suum: quomodo isti (nostri) reges non moueantur, qui non tres pueros attendunt liberatos de flamma, sed seipsos liberatos de gehenna, quando uident Christum à quo liberati sunt exufflari in Christianis, quando audiunt dici Christiano, dic te non esse Christianum? Talia facere uolunt, & saltem talia pati nolunt. Nam uidete qualia faciunt, & qualia patiuntur. Occidunt animas: affliguntur in corpore. Sempiternas mortes faciunt, & temporales se perpeti conqueruntur. Haec ille. In nouo testamento habemus maximorum Christi Apostolorum Petri & Pauli exempla clarissima. Horum alter Ananiam & Sapphyram sternit propter hypocrisin & mendacium siue fictam religionem, Alter Elymam magum, quasi erutis oculis, caecum reddit. Neque admodum refert cadatur aliquis gladio, poculis, an uerbis. Occidere est occidere, quocunque fiat modo aut instrumento. Et Deus egit per Apostolos: idem ille agit per magistratum. Nam ultio est Dei, qui illam tradit magistratui uirisque primarijs exercendam uel sumendam de facinorosis. Extant leges multae sanctissimorum principum Christianorum, in negotio religionis latae, mandantes punire idololatrias, apostatas, haereticos & impios. Vnam ex multis S. Constantini Imperatoris charitati uestra recitabo. Scribens enim ad Taurum P. P. Placuit omnibus locis atque urbibus uniuersis, ait, claudi protinus templa, & accessu uetito omnibus licentiam delinquendi perditis abnegari. Volumus etiam cunctos sacrificijs abstinere. Quod si aliquid forte huiusmodi perpetraverint, gladio ultore sternantur, facultates etiam perempti fisco decernimus uindicari. Et similiter puniri rectores prouinciarum, si facinora uindicare neglexerint. Eadem propè mandant uulgatis edictis Theodosius & Valentinianus in codice Theodosiano tit. 2. item Valentinianus & Martianus in codice Iustiniano tit. 11. lib. 1. His omnibus accedit illud, quod citra controuersiam iure & religiose puniuntur adulteri, homicidae, seditionosi, impostores & blasphemae. Inde consequens est optimo iure occidi & pseudoprophetas aut haereticos. Nam sunt impostores, blasphemae, & homicidae.

Ceterum

Cæterum in puniendis his magna est seruanda habendaq; ratio: primò quidem personarum: deinde uerò errorum: postremò ipsarū quoq; pœnarum. Nam in persona magna est diuersitas. Sunt enim antesignani & duces peruicaces in erroribus, qui audaces sunt, hypocritæ & loquaces, & idcirco ad seducendum appositissimi, ipsi quidem citra emendationem in propriam ruentes perniciem, & alios secum pertrahentes. Et hi modis omnibus sunt coërcendi ueluti Ecclesiæ pestes, ne contagio ipsorum ceu cancer serpat latius. Sunt deinde seducti quidam ac dementati ab alijs, qui errant, sed non malitia neq; pertinaciter, sed resipiunt in tempore. Hos non oportet damnare protinus, sed sustinere ac orare Dominū, errantesq; spiritu lenitatis & mansuetudinis erudire, donec redeant ad mentem meliorem.

Quæ moderatio adhibenda sit in puniendo.

Porro in erroneis dogmatibus alia alijs sunt grauiora. Sunt quædam adeò impia, blasphema, & indigna, ut ne audiri quidem nedum ferri possint. Sunt quæ rectè & palàm tendant in subuersionem reipub. nisi in tempore sopiantur. Oportet autem scripturis & manifesta ueritate euincere illa quæ in accusationem ueniunt, esse talia, qualia dicuntur. Comperta ueritate, & productis apertis testimonijs scripturæ, licebit in blasphemos & euersores Ecclesiæ reipublicæq; grauissimè animaduertere. Sed leuior mitiorq; pœna decernatur contra errantes in leuibus, non capitalibus erroribus. Nam errant quidam, sed ita ut erroribus horum Deus non blasphemetur, & ecclesia consistat, deniq; ipsa non inturbetur respublica. Vbi rursus occurrat cuilibet illud Apostoli, Alter alterius onera portate. Item, Infirmos in fide suscipite, non ad dijudicationes disceparationum.

Iam & in supplicijs & pœnis insigne est discrimen. Pertinaciter errantes & alios secum in errorem abducere, inq; erroribus retinere contententes, blasphemij & perturbatores, imò subuersores Ecclesiarum iure cædi possunt. Ideo tamen capitij supplicio non protinus afficiendus est omnis qui errat. Et quæ minis & increpationibus curari possunt, non debent acerbioribus elui & puniri. Modus in re qualibet optimus est. Est & multa pecuniaria. Sunt carceres in quos concludi possunt, ne alios inficiant qui ueneno prauæ doctrinæ & fidei corrupti sunt. Sunt & aliæ corporum afflictiones quibus coërcentur errantes, & ut noceant minus alijs sanis, & ut ipsi seruentur, non toti pereant, sed resipiscant. Sed timor Dei, æquitas & prudentia iudicis intelliget ex circumstantijs, quomodo punienda sint in seductoribus & seductis praua dogmata & peruicax rebellio, aut stolidi & minime malitiosa credulitas.

Admonitio seria & diligens locū non habet in sceleribus nephandis iam perpetratis & gladio eluendis: curet ergo magistratus ut moneat in tempore monendos. Nam admonitio seria & diligens, diligenter commendata est omnibus proceribus exercenda erga subiectos, & iam aliqua in re periclitantes. Sed & prudentes & pii magistratus non rarò pepercerunt peccantibus ignoranter, resipiscantibus autem ad seriam admonitionem. Dominus in Euangelio iubet admonere peccantem, & obsequenti parcere, rebelli grauiora inijcere. Et Iosue priusquā ad arma conclamaret, missa legatione iubet Rubenitas cum socijs demoliri arā, quam illi uidebantur extruxisse contra legem Domini. Et Iustinianus Cæsar resipiscantibus amplectentibusq; meliorem sententiam ueniā concessit, Constit. 109. Nam & Iosias non omnes erroribus implicitos occidit, sed incurabiles maxime. Moderatio ergo adhibenda magistratui in fontibus puniendis.

De admonitione præcedente pœnam.

Non possum hic dissimulare & transilire quod his hæcenus de supplicio à me allatis obijcitur à quibusdam, nempe Apostolum Paulum non præcepisse, Hæreticis obiectiones.

Respondetur ad obiectiones.

cum hominem post unam aut alteram admonitionem occide aut multato, sed deuota. Fidem item esse donū Dei, quod non possit ulli inferi aut dari gladio. Praeterea neminem esse cogendum. Qui cogit, hypocritam facere, religiosum facere non posse. Iam etiam Apostolos nulla à regibus subsidia uel ad tuendam religionē Christi, uel ad propagandam, aut ad puniendos hostes religionis atq; blasphemos postulasse. Ad quæ paucis sic respondeo. Scripsit Paulus ad Apostolum dum scripsit epistolam ad Titum. Apostolum ergo informat, quomodo se gerat in suo officio erga hæreticum deploratum. Si ad Sergium Paulum aut ad præsidem aliquē scripsisset, proculdubio & huic præscripsisset suum officium. Certè idem ille Paulus stans coram Sergio Paulo principe Cypri, suo facto demonstrauit Sergio quid deceat magistratum. Nam Elymam pseudopropheta non tantum obiurgat uerbis acerbissimis, deinde eius se abdicat consortio, ipsumq; deuotat & fugit, sicut Cerinthus Ioannes Apostolus, sed & corporali percutit cæcitate.

Fides est donum Dei.

Fateor fidem esse donū Dei in corde hominis, cuius scrutator solus est Dominus. Cæterum ex dictis & factis iudicantur homines; ut ergo non sit punienda errorum animi opinio, neutiquam tamē ferenda est pestilens & impia professio siue doctrina. Nemo sanè punit in hoc seculo prophanas aut impias animi cogitationes: at si hæ in apertas erumpant blasphemias, puniuntur iam à bonis principibus blasphemæ uoces: interim pietas non confertur per magistratum. Iustitia ipsius Dei donū est, quod à solo Deo hominibus cōceditur. Sed quis adeo ineptus ut inde colligat, ergo iniusti, raptores, parricidæ & uenefici non sunt puniendi? Nam puniendo magistratus non potest iustitiam conferre iniusto. Oportet itaq; discriminare inter fidem uti est donum Dei inhærens animo hominis, & uti est externa professio pronunciata & testificata coram hominibus. Dum enim fides falsa in animo sepulta latet, nec inficit quenquam nisi infidelem, puniri nō potest infidelis: ubi autem fides latens erumpit in blasphemias, ac Deum palam lace rat, & proximos quosq; inficit, protinus coercendus est blasphemus & seductor, ne malum latius serpat. Hunc nolle coercere, est gladiū furioso dare in manus, ut conficiat imprudentes & imbelles. Fides est donū Dei, sed confert hoc suū donum Deus per media. Ea nō uult negligi. Scit pater familiās fidem esse donū Dei, sed nihilominus erudit liberos suos in uerbo fidei, & præcipit ut abeant in cœtum sacrum, pro fide orent, ac fidem ex uerbo docentis discant. Indignissimè ferret, imò non ferret parens bonus, si filius diceret, Noli pater me erudire, noli me mittere in cœtum Ecclesiasticum, noli negligētem scutica excitare. Fides est donum Dei, quod non per scuticam incutitur. Quis ergo æquis auribus audiat clamantes fidem esse donū Dei, ergo neminem propter fidem, id est, propter fidei corruptionem & propter blasphemiam esse castigandum?

An liceat quemquam cogere ad fidem.

Ac Petilianus quidem clamabat dicens, Absit absit à conscientia nostra, ut ad nostram fidem aliquem compellamus. Author August. lib. 2. contra Petilianum literas cap. 83. Ergone pergemus paria proferre cum hæreticis? aut dicere dominum Deum in scripturis hypocrisin plantare, cum minis & castigationibus perpellit ad bonum? Dauid dicit, Bonum est mihi domine quod humiliaueris me. Et Ierem. Castigasti me domine, ait, & castigatus sum, uelut i uitulus indomitus. Quod si nemo cōpellendus est ad bonum, cur quæso toties iubet mortalium sapientissimus Solomō castigare liberos? Qui parcit uirgæ, odit filium, ait: tu quidem percutis eum, sed uirga liberas animam eius à morte. Quotidiana experientia rerumq; natura euincit uehementissimos in hominibus esse affectus, quibus nisi medeamur & frænum iniiciamus, perdunt & se & alios, qui facile & leui aliqua castigatione poterant

poterant seruari. Dum insaniunt homines, uim & castigationem uituperant, ubi autem redierunt ad mentem, ac cernunt iam palam à quantis per eos qui ipsos coegerunt, sint liberati malis, gaudent se salubriter esse castigatos, & laudant iam uiolentiam quam prius uituperarant. Audiamus quid in hac re exercitatus plurimum senserit & docuerit S. Augustinus. De uí coërcendis hæreticis ad Vincentium contra Donatistas epist. 48. scribit in hæc uerba, Mea primitus sententia erat neminem ad unitatem Christi esse cogendum, uerbo esse agendum, disputatione pugnandum, ratione uincendū, ne fictos catholicos haberemus, quos apertos hæreticos noueramus. Sed hæc opinio mea non contradicentium uerbis, sed demonstrantium superabatur exemplis. Nam primum mihi opponebatur ciuitas mea (Hippone) quæ cum tota esset in parte Donati, ad unitatem catholicam timore legum imperialium conuersa est: quam nunc uidemus ita huius uestre animositatis perniciem detestari, ut in ea nunquam fuisse credatur. Ita alia multa quæ mihi nominatim commemorabantur, ut ipsis rebus agnoscerem etiam in hac causa rectè intelligi posse quod scriptum est, Da sapienti occasionem, & sapientior erit. Rursus, Non omnis qui parit amicus est, nec omnis qui uerberat inimicus. Meliora sunt uulnera amici, quàm uoluntaria oscula inimici. Melius est cum seueritate diligere, quàm cum lenitate decipere. Et qui phreneticū ligat, & qui lethargicum excitat, ambobus molestus, ambos amat. Quis nos potest amplius amare quàm Deus? & tamen nos non solum docere suauiter, uerum etiam salubriter terere non cessat. Putas neminem cogi debere ad iustitiam, cum legas patrem familiars dixisse seruis, Quoscunq; inueneritis cogite intrare: cum legas ipsum primo Saulum, postea Paulum ad cognoscendam & tenendam ueritatē, magna uiolentia Christi cogentis esse compulsū? Nam idem in epist. ad Bonifacium comitem 59. Vbi est, inquit, quod isti clamare consueuerunt, liberum esse credere uel non credere? Cui uim Christus intulit: quem coegit: Ecce habent Paulum Apostolū, agnoscant in eo prius cogentem Christum, & postea docentem: prius ferientem, & postea consolantem. Mirum est autē, quomodo ille qui poena corporis ad euangelium intrauit coactus, plus illis omnibus qui solo uerbo uocati sunt in Euangelio laborauit: & quem maior timor compulit ad charitatem, eius perfecta charitas foras mittit timorem. Cur ergo non cogeret Ecclesia perditos filios ut redirent, si perditii filij coegerunt alios ut perirent?

Rursus in eadem epistola idem August. Quod dicunt, inquit, qui contra suas impietates leges iustas constitui nolunt, non petiisse à regibus terræ talia Apostolos, nō considerant aliud tunc fuisse tempus, & omnia suis temporibus agi. Quis enim tunc in Christum crediderat imperator, qui ei pro pietate contra impietate leges ferendo seruiret? Quando adhuc complebatur illud propheticum, Quare fremuerunt gentes, & populi meditati sunt inania: Astiterunt reges terræ, & principes conuenerunt in unum, aduersus Dominū & aduersus Christum eius. Non dum autem agebatur quod paulo post in eodem Psalmo dicitur, Et nunc reges intelligite, erudimini qui iudicatis terram, Seruite ei in timore, & exultate cum tremore. Quomodo ergo reges seruiūt Deo in timore, nisi ea quæ contra iussa domini fiūt, religioſa seueritate prohibendo atq; plectendo? Aliter enim seruit quia homo est: aliter quia etiam & rex est. Quia homo est, ei seruit uiuendo fideliter: quia uerò etiam rex est, seruit leges iusta præcipientes & contraria prohibentes conuenienti uigore sanciendo. Sicut seruiuit Ezechias lucos & templa idolorum, & illa excelsa quæ contra præceptū Dei fuerant extructa destruendo. Sicut seruiuit Iosias talia & ipse faciendo. Sicut seruiuit rex Niniuitarum uniuersam ciuitatem ad

Apostoli nulla subsidia à magistratu pro religione contra hostes postularūt.

placandum dominum compellendo. Sicut seruiuit Darius idolum frangendum in potestatem Danieli dando, & inimicos eius leonibus ingerendo. Sicut seruiuit Nabuchodonosor omnes in regno suo positos à blasphemando deo lege terribili prohibendo. In hoc ergo seruirent domino reges in quantum sunt reges, cum ea faciunt ad seruiendum illi, quæ non possunt facere nisi reges. Cum igitur nondum reges domino seruirent temporibus Apostolorum, sed adhuc meditarerentur inania aduersus Deum & aduersus Christum eius, ut prophetarum prædicta omnia complerentur, non utique tunc potuerunt impietates legibus prohiberi, sed potius exerceri. Sic enim ordo temporum uolebatur, ut & Iudæi occiderent prædicatores Christi, putantes se officium præstare Deo, sicut prædixerat Christus: & gentes fremarent aduersus Christianos, & omnis potentia martyrum uinceret. Postea uero quam cœpit impleri quod scriptum est, Et adorabunt eum omnes reges terræ, omnes gentes seruient ei, quis mente sobrius regibus dicat, Nolite curare in regno uestro à quo tueatur uel oppugnetur Ecclesia domini uestri: non ad uos pertineat in regno uestro, quis uelit pudicus esse, quis impudicus? Cur enim cum datum sit diuinitus homini liberum arbitrium, adulteria legibus puniantur, & sacrilegia permittantur? An fidem non seruare leuius est animam Deo quam fœminam uiro? Aut si ea quæ non contemptu, sed ignorantia religionis committuntur mitius uindicanda, nunquid ideo negligenda sunt? Melius est quidem, quis dubitauerit ad Deum colendum doctrina homines duci, quam pœnæ timore uel dolore cœpelli. Sed non quia isti meliores sunt, ideo illi qui tales non sunt, negligendi sunt. Multis enim profuit (quod experimentis constat) prius timore uel dolore cogi, ut postea possint doceri, aut quod iam uerbis didicerant opere sectari. Hactenus recensuimus S. Augustini uerba respondentis ad obiectiones eorum qui arbitrantur nullo iure animaduerti religionis causa in inobsequentes & rebelles, seductos & seductores.

Frustratum me spe mea uideo, qui existimaui posse me quæ de Magistratu dicere institui, plenè absoluere hoc sermone. Nam uideo hic mihi subsistendum, nisi pergam c. v. supra modum esse molestus. Cras ergo adiiciam his residua. Vos modo supplices ante Dominum prostrati, orate, deinde abite in pace.

De bello. An liceat magistratui gerere bellum. Quid tradat de bello scriptura, An magistratum gerere possit homo Christianus. Et de officio subditorum. S E R M O IX.

AD ius gladii dati à Deo magistratui pertinet Bellum. Nam sermone proximo docui usum gladii in manibus magistratus esse duplicem. Velenim fontes punit. Vel hostem grassantem aut grassari uolentem repellit, aut ciues rebelles aut seditiosos obtruncat.

An licitum bella gerere magistratui.

Dubitant autem multi an licitum sit magistratui bellum gerere. Atqui mirum est eos in re alioqui clarissima sic cæcutire. Si enim magistratus iure diuino plectitur fontes, latrones seu noxios homines, neque quicquam refert paucine numero an plures sint (quod hesterno in sermone demonstraui) eodem profecto iure ciues rebelles & seditiosos, barbarum item militem idem palam prætextu militiæ tentantem, quod latrones clam solent perficere, bello persequi, repellere & conterere potest. Dixit sanè diuinus uates de Christianis prophetans inter alia, Conflabunt gladios suos in ligones, & lanceas suas in falces. Nam Christiani pacem habent cum omnibus hominibus, & prorsus abstinent ab armis. Quisque enim alteri præstat quod ab altero expectat. Quia uero non omnes sic animati sunt, quin
potius

potius turbatores multi sceleratīq; latrones & oppressores inter honestos & humanos ciues ceu feræ beluē inter animantia innoxia uersantur, Deus gladium in defensionem innocuorum ē cœlis magistratui porrexit. Nullibi uerò prohibitum legitur, ne lupos, apros, ursos, huiusq; generis feras alias uel in homines uel pecudes grassantes, opprimamus cōficiamusq;. Quid ergo prohibeat bello iustē suscepto repellere iniustam uim latronum, quando latrones, raptores, barbari milites, seditiosi ciues parum aut nihil discrepent à feris beluis: Certè scriptura eos non alijs quàm bestiarum nominibus dignatur. His aspirat & sensus naturę communis. Cōgruit cum his doctrina religionis & fidei. Si fieri potest, ait Apostolus, quātum in uobis est, cum omnibus hominibus in pace uiuite: non uosmetipsos ulciscētes. En quantum in uobis est, inquit, Et Si fieri potest. Alioqui subiungit mox, Magistratus non frustra gestat gladium, nimirum propter eos qui pacem habere cupientibus obstrepunt, omniaq; conturbant. Consentunt exempla sanctissimorum in orbe heroum, qui bella susceperūt pro defensione patriæ & innoxiorum: sicuti exposui ex S. Paulo ad Hebręos, cum enarrarem in quinto p̄cepto quem honorem debeat quisq; suę patrię. Adijciam his disputata quædam S. Augustini contra Faustum Manichæū edita lib. 22. cap. 75. Nec bella, inquit, per Mosen gesta miretur aut horreat, quia & in illis diuina sequutus imperia non seuiens, sed obediens fuit. Nec Deus cum iuberet ista seuebat, sed digna dignis retribuebat dignosq; terrebat. Quid enim culpatur in bello? An quia moriuntur quandoque morituri, ut dominantur in pace uicturi? Hoc reprehendere timidorū est non religiosorum. Nocendi cupiditas, ulciscendi crudelitas, impacatus atque implacabilis animus, feritas rebellandi, libido dominandi, & si quæ similia, hæc sunt quæ in bellis iure culpantur, ut etiam iure puniantur. Aduersus uiolentiam resistentium, siue Deo siue aliquo legitimo imperio iubente, gerenda ipsa bella suscipiuntur à bonis, cū in eo rerum humanarum ordinē inueniuntur, ubi eos uel iubere tale aliquid, uel in talibus obedire iustē ordo ipse cōstringit. Alioqui Ioannes cum ad eum baptisandi milites uenirent, dicētes, Et nos quid faciemus? responderet eis, Arma abiicite, militiam istam deserite, neminē percutite, uulnerate, prosterne. Sed quia sciebat eos cum hac militando facerent non esse homicidas, sed ministros legis, & non ultores iniuriarum suarum, sed salutis publicę defensores, respondit eis, Neminem concusseritis, nulli calumniam feceritis: sufficiat uobis stipendium uestrum. Sed quia Manichæi apertē Ioannem blasphemare consueuerunt, ipsum Dominum Iesum Christum audiant, hoc stipendium iubentem reddi Cæsari, quod Ioannes dicit debere sufficere militi. Reddite, inquit, Cæsari quæ Cæsaris sunt, & Deo quæ Dei sunt. Ad hoc enim tributa pręstātur, ut propter bella necessariò militi stipendium præbeatur. Merito & illius Centurionis dicentis, Et ego homo sum, sub potestate constitutus, habens sub me milites: & dico huic, Vade, & uadit: & alij, Veni, & uenit: & seruo meo, Fac hoc, & facit, fidem laudauit, non illius militiæ desertionem imperauit. Huc pertinet & sequens cap. 75. & 76. &c. Sed libenter parco uobis, neq; prolixis recitationibus sententiarum obturbo. Hæc hætenus dixi de eo quod bellum liceat gerere magistratui. Vnde & illud colligimus iure & sine culpa subditos suscipere bella ac belligerari, quando ex p̄cepto magistratus id faciunt. Verū si hic innoxios trucidare pergeret, ostensum est superioribus sermonibus, impijs magistratus iussis non esse parendum. Videat ergo magistratus ne suo abutatur iure. Et quanquam ob causas iustas & necessarias liceat magistratui bella gerere, est tamē res periculosissima bellum, ac trahit secum agmē quoddam malorum inexplicabile. Puniantur sanē ad eum

Populus obedi
diat magistra
tui bellum ima
peranti.

Bellum res per
iculosa.

Bellum dei flagellum.

modum iusto Dei iudicio, quos nulla potest paterna commouere admonitio: sed plerumque implicantur & innoxij. Fit ferè ut iure suo abutantur milites, ac iram & ipsi incurrant grauem Domini. Ac reuera locum in bello habent mala orbis ferè omnia. Oboritur ex bello caritas rerum protinus omnium, & fames funestissima, Nam obsidentur itinera, proteruntur segetes, ardent uillae, dissipantur frumenta luxuriosissime, cessant artificia & negotiationes omnes, perit cum diuite pauper. Fortissimi quique cadunt in acie, fuga sibi consulunt meticulosi, ac seruant seipsos maioribus & crudelioribus excarnificandos supplicijs: sustolluntur enim in fastigium pessimi, qui hominibus perinde ut pecudibus abutuntur. Gemunt hic uniuersi. Lugent uiduae & pupilli. Diripiuntur in futuram necessitatem congestae opes ac facultates, incendio conflagantur urbes, uirgines & innubiles puellae constuprantur, uiolatur omnis pudor, absque reuerentia tractantur senes, silent iura & leges, sacra simul cum studijs corruunt, regnant sacrilegi & nepharij. Idcirco nominatur in scripturis bellum flagellum Dei. Hoc enim incutit ferè incurabilibus & pertinaciter contemnentibus uerbum Dei. Hanc enim ob causam excisa est Hierosolymorum urbs cum uniuersa Iudaeorum gente. Non enim agnouit diem, ut in Euangelio ait Dominus, suae uisitationis, quin potius effudit sanguinem Apostolorum Domini, quo in se deriuauit omnem effusum sanguinem à primo Abel iusto ad Zachariam usque. Propter cades, idololatriam, incestus & luxuriam detestandam, dicuntur excindi funditus Chananaei, Moabitarum, Isaia teste, pereunt propter crudelitatem, inhumanitatem, & contemptum pauperum. Niniuita iniustis bellis alias gentes diuexarunt, & auarè deprædati sunt: proinde eadem mensura ipsis alij mensurant, sicut legitur in propheta Nahum, qua ipsi alijs mensi fuerant. Micheas in 6. commemorat Deum bella immittere iniustis, propter auaritiam & dolum admissum. Apud Ieremiam dicitur arrogantia & superbia: apud Isaiam luxus & ebrietas, in causa esse belli. Porro malum belli regnis & rebus pub. ita adhæret, ut non possit remoueri aut tolli excutiue quando nos uolumus, ulla humana sapientia, ullis foederibus, ullis opibus, ulla munitione, fortitudine aut potentia, ut uidere licet in Abdia. Sola sincera ad Deum conuersio medetur: id quod Ieremias in cap. 5. testatur. Constat hæc agnitione & confessione peccatorum ingenua, uera fide de peccatorum remissione per gratiam Dei ac meritum Iesu Christi: deinde odio & abnegatione iniustitiæ, studio iustitiæ, innocentiae, charitatis & omnium uirtutum: postremo precibus & obsecrationibus perpetuis.

Bellum utile.

Vincuntur iustam habentes causam ab iniustis.

Rursus uideas bella alijs adferre emolumentum, utilitatem, & opes inæstimabiles, pauculo aut ferè nullo damno accepto partas. Tale erat Israelitis bellum Chananaeis sub duce Iosue illatum. Nolo autem spes lucri quenquam abstrahat à iusto & æquo. Ac arbitrantur non rarò magistratus se habere ius, bellum iuste inferendi alijs & puniendi noxios, cum Deus iustus hac occasione ipsos protrahit in harenam, ut puniantur ipsorum peccata ab illis in quibus ipsi statuerant malum persequi. Exempla eius rei manifesta extant in scripturis. Undecim tribus Israeliticæ bellum inferunt iustissimum Beniamitis, ultura scelus nepharium à nebulonibus quibusdam commissum, quibus adhærebat tota tribus, ac ita se sceleris reddebat participem. Sed funduntur & fugantur ab iniquis & sceleratis secundum. Israelitæ uim Palæstinorum idololatrarum sub Heli repellere uolunt à patria, sed cadunt in acie, & capitur arca Domini, deportaturque in urbes idololatrarum. Ita cadit à Chaldaeis cæsus optimus princeps Iosias, quia dominus statuerat animaduertere in totum populum eius inferre mala, quæ noluit inspicere principem sanctissimum, meliora meritum. Ex quibus & illud discimus, religionis ueritatē non esse

esse æstimandam ex populi alicuius uictoria uel fuga, ut ea religio uera sit & orthodoxa, cuius cultores uincunt, falsa uerò cuius confessores terga dant. Separanda enim religio à personis siue hominibus, qui alijs de causis uisitantur à Domino.

Vniuersa autem illa admonent nos, magno & multo timore Dei opus esse magistratui, in suscipiendis & deponendis bellis, ne dum uitant carbonariã, incidant in calcariam, aut arbitrentur se deponere ex humeris malum unum, & ea ipsa depositione suscipiant imprudentes maiora uel multò plura mala. Causæ ergo bellorum penitus sunt à principibus inspiciendæ. Sunt hæ uariæ ac multiplices, potissimæ tamen illæ. Velenim cogitur magistratus præsidij pro defensione collocatis alicubi in urbibus suis, iam autem obsidione cinctis suppetias ferre hostemq; depellere. Nephas enim esset parricidale, & urbes & præsidia in extremo laborantes periculo perfidè deserere. Vel certè cogitur magistratus pro suo officio inferre bellum hominibus incurabilibus, quos ipsa damnat sententia Domini, & cadere iubet absq; misericordia. Qualia fuere bella Madianitis à Mose, & Amalechitis à Saule illata. Eius generis bella sunt quibus opprimuntur, qui inuincibili malitia perire & alios secum in perniciem rapere uolunt, qui omnem iustitiam & æquitatem respuunt, in sceleribus contumaciter perseuerare pergunt. Tales erant Beniamitæ cùm uastarentur ferro & flamma ab undecim tribubus. Tales sunt hodie contumaces & seditiosi defectores & turbatores reipub. uel regnorum, qualis fuit quondam Absolom & Seba filius Bochrì: quorum mentio fit in 2. lib. Samuelis. Huc pertinent bella contra idololatrias & oppressores catholicæ & orthodoxæ fidei, pro uera religione suscepta. Errant qui arbitrantur nulla propter religionem bella geri posse. Dominus Petrum gladio ferientem coërcuit, tanquam Apostolum, magistratum non iussit religionis esse negligentem, neq; prohibuit defendere puritatem fidei. Si enim licet magistratui tueri minora, cuiusmodi sunt libertas, facultates, pudor, corpora, &c. cur maiora imò maxima non defenderet aut uindicaret? Nihil autem religione uera & syncera habemus maius. Extat præterea apertum Dei super hac re mandatum in Deuteronomio. Iubet enim Dominus ciuitatē, quæ à Deo, & à Dei cultu (in iurisdictione cuiusq; magistratus) desciiuit, bello adoriri, ac pertinacem funditus eruere. Extat locus Deut. 13. cap. Porro si iubetur magistratus animaduertere in apostatas bello, licet certè bello defendere ecclesiam, quam uolet princeps aliquis barbarus bello à uera religione ad falsam abstrahere. Iosue uoluit Rubenitas cum socijs debellare propter erectā aram contra uerbum Dei. Iudas Machabæus pugnat pro populo Dei cōtra gentes & milites regis Antiochi, cui animo sedebat religionem Iudaicam, quæ tum uera erat, cōculcare, gentilitiam autem superstitionem obtrudere omnibus. Ita à Paulo laudantur duces qui per fidem incursiones auerterunt exterorum. Ac Paulus ipse bellum gessit in Cipro contra Elymam pseudoprophetam, quem & cæcitāte percussit. Rationem subiungit ex religionis obseruantia petitam, Non desinis subuertere uias Domini rectas, &c. Act. 13. Eidem Paulo insidiantur uiri quadraginta, qui arbitrabantur Paulo debellato & extincto, bonam Euangelicæ prædicationis partē esse extinctam, & Iudaicam (quæ tamen falsa erat) religionem assertam. Atqui Paulus hic non est segnis, nec obuertit alteram maxillam, sed sollicitè & suppliciter postulat assertionem & defensionem: & postulat quidem illam non à Christiano magistratu, cùm nondum esset, sed à Centurione Romano: neq; uel uerbo reclamabat, dum ille delectis & quasi in aciem dispositis peditibus quadringentis & equitibus septuaginta, deduceret ipsum ex urbe Hierosolymorū Antipatrida usq;. Sic autē seruabatur electionis uas Paulus armata Romanorū militū manu. De Arme

De bellorum
causis

Bella propter
religionem
suscepta.

Si ab ethnicis
postulat, magis
postulasset à
Christianis si
tum fuissent.

nijs uim à Maximino Imp. sustinentibus hæc scripta reliquit Eusebius Eccles. hist. lib. 9. cap. 8. Armeniorū gens olim & utilissima & amicissima populo Rom. dum à Cæsare Maximino Christianæ religionis ritum (cui deuotissime uniuersa dedicata est) in idolorum cultum mutare cogeretur, & daemones uenerari pro Deo, inimici pro amicis & pro socijs aduersarij effecti, manu se aduersum nepharia eius edicta defendere parant ac sponte bella inferunt, & eum uehementer & acriter urgent. Hæc ille. Proinde licet magistratui suos subditos defendere contra idololatrias, & armis ueram asserere religionem. Huic confinis est alia causa. Vel enim irruit barbarus hostis aliquis in tuæ fidei creditos ciues, lacerat hos & grassatur ceu in grege lupo crudelissime, cum tamen tu non modò nō prouocaris illos iniurijs prior, sed & pacis conditiones obtuleris æquas. In huiusmodi causa iubetur magistratus leonis instar prosilire, & tueri suos contra apertam uim, & contra truculentos latrones. Exemplum præbet Moses pugnans contra reges Amorrhæorū Aradum, Seonem & Ogem. Exemplū præbet rex Iosaphat pugnans contra Ammonitas & incolas montis Seir. Exemplum præbet Dauid quoq; bellum propellens sibi illatum à Syris. Vel suppetias fert magistratus confœderatis (fœdera enim cum uicinis gentibus iungere potest magistratus, modò nihil in his contra uerbum Dei fiat) iniusta ui pressis. Sic enim Iosue Gabaonitas liberat obsidione, & Saul ciues urbis Iabes Galaad, pugnans contra Naas principem tyrannicissimum. Huiusmodi uerò ob causas recte suscipiuntur à magistratibus & principibus bella, recte obtemperant milites siue ciues magistratui, imò magna cū gloria nec infelicitate occumbūt, cum in causa iusta pro religione, pro legibus Dei, & pro patria chara, uxoribus liberisq; occumbunt. Ergo militiā ingredientēs, & grauissimos belli suscipientes labores, non ad quæstum aut ad uoluptates spectabunt, quibus depulso periculo, immergantur: sed iustitia & pax publica, ueritatis & innocentiae assertio sit scopus omnium: nimirū ut debellatis impijs partaq; uictoria, ac repulsis, caesis uel redactis hostibus in ordinem, floreat religio, iudicium, & iustitia, floreat ecclesia, floreant sacra, ritus, instituta & disciplina ecclesiae, floreant studia & bonæ artes, curentur pauperes & beneficia conferantur uiduis & pupillis, uiuant & tranquillè uiuant, Deoq; seruiant, Deum laudent, & Deū colant uenerandi senes, castæ puellæ, & bonæ matres familiās. Ad hunc scopum animi & corporis oculos intenderunt, hæc unicè in cordibus suis cogitarūt patres nostri fortissimi, quoties bella susceperunt ac in aciem pgressi sunt contra nepharios, pro ecclesia & repub. Abrahamum puto, Moysen, Iosue, Dauidem & alios heroes, deniq; beatæ recordationis patres nostros. Quibus & omnibus alijs strenuis & religiosi militibus debetur aterna in ecclesia sanctorum gloria. Ignauis & timidis militibus, impijs, avaris, blasphemis, luxu perditissimis & leuissimis nebulonibus proditoribusq;, quorum ignauia, gula, libidine & impietate pereunt hodie regna præclara & subuertuntur florentes res publicæ, debetur ignominia sempiterna, ac Deus maledixit huiusmodi profligatis nebulonibus in secula seculorum.

Militum & militiæ commendatio.

Iniusta bella.

Ergo non licet bella gerere nisi cōtra hostes ac sceleratissimos incurabilesq; homines. Iniustissima bella sunt, quæ suscipiuntur contra socios, & cōtra innocētes, aut apud quos spes est resipiscentiæ. Iniusta bella sunt etiā ea quæ non suscipiunt iusto modo, nec ob res grauissimas. Omnia prius tētanda sunt quàm experiendū armis. Nō sunt petendi termini alieni: nō opprimenda libertas aliarū gentiū uel tibi subiectarū. Non sequendus hic est affectus ullus abripiens mentē & seducens, qualis est libido dominādī, auaritia, munerū cupido, inuidia, et si quis huius generis alius affectus est. Medela quidē est bellū, sed periculosa & funesta, qualis est incisio aut resectio

refectio membrorū. Ardet manus, & periculū est ne & brachium inardescat, atq; totus extingatur homo; non refecas tamen manum, nisi prius expertus omnia, intellexeris, nulla alia ratione mederi posse morbo. Ita non nisi desperatis rebus tandē bella cōuenit suscipere, ut meminerint tamē principes, Ne quid serò nimis.

Adeò enim à iustis bellis non abhorret uerbum Dei, ut & leges belli dicat, & exempla bellorum, prudentiumq; & fortium imperatorū suppeditet plurima. *Leges belli dicat uerbum Dei.* Le- ges contexuntur Deut. 20. cap. utiles & necessariae, sed & clarae, ut mea non indi- geant expositione. Vulgares & ex scripturis petuntur hae leges. Locū habeat ante omnia religio in castris, & primum quidem. Nam ipse Dominus bellis adhibuit sacerdotes, religionis uerae ministros. Valeant in castris perinde ut in urbibus aequae leges; uiuant sub disciplina honeste, iuste & sancte milites. Etenim nō ex Deo sed diabolo exortum est quod uulgò iactatur, Sileant inter arma leges. Eligatur imperator & dux belli pius, iustus, sanctus, fortis, prudens & felix, quales apud ueteres fuerunt Iosue, Dauid, Iudas Machabaeus, Constantinus, Theodosius, Maelzelzer & multi alij. Huic addatur manus selecta. Nam militum habendus est delectus, ne exercitus sit turba imbellium & imperitorum hominum, uel perfidorum et blasphemorum cōsceleratorumq; nequam, & ebriosorum, gulonum, porcorumue grex. Nō in multitudine hominum consistit uictoria, sed in gratia Dei & in manu delecta. Vulgare est, Vbi multitudo, ibi confusio. Magni & innumerabiles exercitus cōculcant semetipsos. Experientia magistra hoc ipsum discimus quotidie, & exempla omniū seculorum id testantur. Porro improbantur modis omnibus milites ignaui. Semper itaq; agat miles Christianus aliquid, sit strenuus, fidelis, laboriosus, centurionibus obsequens, nullam negligat occasionem, exerceatur in disciplina militari: non sit mollis, sed fortis: non sit crudelis & truculentus, sed seuerus & clemens, suis quibusq; temporibus. Quod seruare potest ne perdat. Prae omnibus autem rebus, non negligat & extra periculum & in ipso periculo preces ad Dominum iuges. Cum Deo auspicetur omnia, sine Deo nihil tentet prorsus: sinistram expertus fortunam, ne despondeat animum; fortuna usus feliciore, ne effertur, sed agat Deo gratias, clementerq; utatur uictoria: à Deo pendeat prorsus, neq; aliud cupiat magis quam defensam rempub. leges, religionē, iustitiam, innoxios. Mirum scio uidebitur multis hac me postulare à milite, quae alioqui uidentur, ut uulgò dici consuevit, postulari à religioso aliquo. Quasi uerò irreligiosi & impij soli queant esse milites. Sunt certē pleriq; tales. Sed quales oro fructus metimus hodie ex huiusmodi semente? Vincimur à Turcis, ludibrium sumus omnibus gentibus, pereunt & Mahumetismo subduntur regna, & inexplicabilibus in diem malis inuoluimur. Quales uerò olim fuerint milites qui ex ecclesia aut numero Christianorum sese dediderunt militiae, uel ex unica, sed memorabili, colligere possumus historia, quam hisce uerbis perstringit ad Scapulam Tertullianus: Marcus quoq; Aurelius in Germanica expeditione Christianorum militum orationibus ad Deum facis, imbres in siti illa impetrauit. Quando non geniculationibus & ieiunationibus nostris etiam siccitates sunt depulsae? Tunc & populus acclamans Deo deorum, & qui solus potens, in Iouis nomine, Deo nostro testimonium reddidit. Hac ille. Copiosius autem & plenius eandem historiam retexit beatus Eusebius libro Eccles. histor. 5. cap. dicens, M. Aurelium fratrem Antonini Cæs. bella inferentem Germanis & Sarmatis, tradunt historiae, cum siti eius periclitaretur exercitus, aestuantem & quarentem quid facto opus esset, reperisse in legione quadam milites Christianos, quibus (sicut & nostris mos est) flexis genibus obsecrantibus exaudisse Deum supplicationes eorum, & subito contra omnium

Milites pij non sunt impij.

Quales olim milites Christiani.

spem largissimis imbris profusis, exercitus quidem periclitantis, pro quo orauerant Christiani, sitim sedatam: hostes uero qui iam exitialiter imminebant, fulminibus crebris & coelitus delapsis ignibus effugatos. Quod factum refertur quidem & ab historicis gentiliū. Sed quod nostrorum orationibus id impetratum sit non refertur. Quippe apud quos etiam caetera miracula quae à nostris gesta sunt non habent fidem. Nostrorum uero & Tertullianus haec memorat, & apud Graecos Apollinaris, qui etiam ipsam legionem pro insignis facti miraculo, mutato nomine uocitatam dicit ab Imperatore Fulmineam. Tertullianus addit Marci imperatoris Epistolas etiam nunc haberi, quibus de his apertius indicatur. Haec Euseb. Ex quibus colligimus milites Christianos non tantum ad orandum fuisse quondam propensos, sed iustissimos quoque, & uitae sanctimonia claros. Quis enim ignorat Iacobum Apostolum dixisse: Multum ualeat deprecatio iusti efficax. Helias homo erat similibus obnoxius affectibus ut nos sumus, & precatione precatus est, & coelum dedit pluuiam, & terra dedit fructum suum. Manifestissimum est itaque milites ueteres fuisse uiros religiosissimos. Nostri quia alieni sunt à religione, imò hostes religionis uerae, pro uictorijs reportant clades & subuersiones urbium. Neque immerito haec patiuntur ciues, quia confidunt in huiusmodi milites nepharios. Id enim perinde est, ac si fiduciam suam collocarent in ipsos diabolos, quos milites isti ferè superant foeditate, immunditia, crudelitate & artibus pessimis.

Exempla militiae & imperatorum ex scriptura.

Exempla uero militiae sanctae & iustae, & optimorum imperatorum siue ducum, exhibet nobis uerbum Dei innumera ferè. Abraham pater noster modico instructus exercitu, insequitur quatuor orbis potentissimos reges siue praedones, fundit & fugat hos, suos autem cum ipsorum facultatibus recuperat & restituit, gratias agens Deo auctori insperatae uictoriae. Moses cum Iosue sternunt reges circiter triginta nouem, puniunt infanda scelera seueriter, & populum sibi creditum collocant in terram promissam à Deo. Iudices populi Israelitici memorabilia gesserunt bella contra ethnicos & infideles, ac his infregere tyrannidem impiorum, impii exercitum in populo Dei, ac hunc suae libertati & religioni restituerunt. Venit hic & Samuel propheta, commemorandus inter illustres populi Dei duces. Praestantissimus dux fuit Ionathas Saulis filius, singulare pietatis specimen. Dauide uero nullus est praeclarior. Debellaui hic Palaestinos, Idumaeos, Syros, & bonam Orientis partem, bello prosequutus iniurias, bello item uindicans libertatem, & mala innumera à populo Dei propulsans. Et tamen qui haec fecit, dicitur esse uir secundum cor Dei, imò & pater Domini nostri Iesu Christi secundum carnem. In posteritate Dauidis plurimos inuenias clarissimos bellatores & duces fortissimos, Abiam, Asam, Iosaphat, Amasiam, Osiam, Ezechiam, & alios multos. Iudas Machabaeus inter hos non habet postremum locum, qui tam strenue pro legibus Dei, pro cultu Dei, & pro populo Dei pugnaui, tandem & in acie pro religione & re publica cecidit. Non adijciam his exempla Constantini, Gratiani, Theodosij, & aliorum insignium in hac re uirorum. Scripsere de his & alijs S. Augustin. in fine lib. 5. de Ciuitate Dei, & copiose Orosius in historia sua lib. 7. à 28. cap. ad finem usque. Sufficiunt haec prijs magistratibus. Haecenus de Bello à magistratu gerendo, & de Usu gladij differui, de quo etiam quaedam obiter sparsi in sermone quo quintum praecceptum enarraui.

Christianus potest gerere magistratum.

His absolutis, demonstrabimus magistratum geri posse à Christianis hominibus. Eam autem demonstrationem idcirco illis attexam, quod Anabaptistae homines furiosi, & alij quidam Vtopianae reipublicae extructores, haec à nobis allata haecenus oppugnantes, contendunt Christianum non posse fungi magistratus officio;

cio: eo quod Christiani nec contendant in foro, nec occidant quenquam, neque bellos ablatas repetant, aut iniurias illatas vindicent. Et quanquam his suis quibusque locis responsum sit, colligam tamen aliquot argumenta in compendium, ex quibus uir politicus & Christianus contra furores & somnia Anabaptistarum intelligat, si uocetur ad munus magistratus, & posse & debere ipsum in suscipiendo & gerendo magistratu seruire Deo. Quod enim fingunt doctrinam Euangelij e medio tollere defensionem & quae defensionis sunt confinia, toto errant caelo. Nam ueritas aliud tradit.

Quaecunque enim diuinitus sunt ordinata ad hominum salutem ac incolumitatem, adeo non dedecet Christianum hominem, si ijs utatur & ijs se accommo-
det, ut si huiusmodi respuat, non sit futurus uerus Christianus. Nam Christiani cuiusque prima & maxima cura est, salutem & incolumitatem hominum summa promouere diligentia. Est autem magistratus non ab ullo homine, sed ipso Deo ordinatus ad salutem & incolumitatem hominum, quemadmodum disertis uer-
bis testatum est a prophetis & Apostolis, Paulo praesertim ad Romanos 13. Quis autem inde non colligat Christianum cum laude & gloria fungi posse magistra-
tus munere?

Præterea nemo negauerit, seio, Christiani hominis esse fidem, non modo uer-
bis, sed ipsis operibus, iustitiae in primis ac misericordiae attestari, curare item mo-
dis omnibus quae publicae pacis & tranquillitatis sunt, insuper facere iudicium &
iustitiam, tueri uiduas, pupillos, orphanos, ac afferere oppressos. Occasionem quo-
que, locum & rationem non spernit, non fugit, nec reijcit, per quae illa opera bene-
ficiæ exercere potest. Ideoque Christianus nequaquam detrectat munus seu offi-
cium magistratus. Est enim magistratus officium, facere iudicium & iustitiam, &
curare pacem publicam.

Iam uero indubitatum & superius demonstratum est, Moysen, Samuelem, Io-
sue & Dauidem non excludi a Christiano homine, Cum autem isti gesserint ma-
gistratum, quid prohibebit obsecro uel hodie hominem uerè Christianum fungi
officio magistratus? Quid quod in nouo testamento celebrantur uiri egregij, &
ipsi constituti in magistratu, & non depositi propter ueram religionem ab officio?
De Iosepho Arimathæo sic legimus apud Lucam, Ecce uir nomine Ioseph, decu-
rio (Marcus habet, honestus senator) erat uir bonus & iustus, nec consenserat con-
silio & facto eorum, oriundus ab Arimathæa ciuitate Iudæorum, qui expectabat
& ipse regnum Dei. Obseruate obsecro quam illustre sit hoc testimonium. Ioseph
est decurio uel senator, & senator quidem honestus. Idem sedit in eo senatu & in-
ter illos iudices, qui condemnant Christum, sed quia non consensit in ipsorum
sententiam, non imputatur innoxio parricidium. Idem prædicatur esse bonus, ius-
tus, & de eorum numero, qui expectant regnum Dei, id est, de numero Christia-
norum, interim decurio siue senator est & manet in urbe Hierosolymorum. Licet
ergo Christiano fungi magistratus officio. Huc pertinent exempla de Æthiopico
principe, Actorum 8. cap. de Cornelio Centurione, Act. 10. cap. & de Erasto, qua-
store ærario urbis Corinthiæ, Rom. 16. 2. Timoth. 4. Caterum cupimus Ana-
baptistas scripturis euincere aut demonstrare, quod obijciunt istos ad fidem con-
uersos deposuisse trabeam & gladium. Nos enim superius adductis S. Augustini
uerbis ex responsione S. Ioannis Baptistæ, qui & ipse prædicauit Euangelium, de-
monstrauimus milites baptizatos nequaquam depositos esse ex officio, aut præce-
ptum eis per Ioannem ut defererent militiam.

Obijciunt aliud, Dominum se abduxisse dum populus cogitaret ipsum creare

Fugit dominus
dñ uoluit ipsum
creare regem.

Regnū meum
non est ex hoc
mundo.

Vos autem non
sic.

De officio sub-
ditorum.

& salutare regem; id quod non fecisset, nisi uellet suo exemplo omnibus Christianis commendare humilitatem, ac ueluti praecipere, ne unquam sibi patiantur gubernationem reipub. imponere. Adijciunt his illas Domini sententias, Regnum meum non est ex hoc mundo. Item, Reges gentium dominantur eis, uos autem non sic. Caterum fugit Dominus populum non rationē sanam sequentem, & uoluntatem Dei facere parantem, sed affectibus cæcatum & quærentem ea perficere quæ uentris erant. Quia enim pauperat eos mirabiliter, ideò arbitrantur hunc sibi futurum regem cōmodum, qui possit suos subditos nullo sumptu facto cibare. Præterea non uenerat Dominus noster in terris regnaturus, more huius seculi, quemadmodum imaginabantur Iudæi, somniantes Messiam instar Solomonis regnaturum, & sicut metuebat Pilatus. Ideò rectē dicit Dominus, Regnum meum non est ex hoc mundo. Ascendit enim in cœlos, cōsedit ad dexteram patris, subiectis sibi regibus & toto mundo, in quo regnat per uerbum & spiritum, quem & iudicaturus ueniet in fine seculi. Et quanquam neget Christus regnum suum esse ex hoc mundo, nullibi tamen negauit ē mundo reges & principes in ecclesiam uenturos, qui in ea Domino non tantum ut homines, sed etiam ut reges essent seruituri. Non possunt autem reges ut reges Domino seruire aliter, quàm ea exercendo propter quæ uocantur reges. Et nisi reges Christiani facti in officio manerent, gubernarentq; regna secundum regulam & leges Christi, quomodo obsecro Christus diceretur Rex regum, & Dominus dominantium? Ergo quando dixit, Reges gentium dominantur eis, uos autem non sic, Apostolis suis de primatu concertantibus est loquutus. Quasi dicat, Principes in orbe dominantes per meam doctrinā non deijciuntur ē subsellijs uel ex cathedra & throno: manet enim in mundo hoc adeoq; in ipsa ecclesia magistratus. Hic regnabit, Vos autem non sic: non regnabitis, non eritis principes, sed doctores orbis & ministri ecclesiarum. Hæc paucis ad Anabaptistarum obiecta respondimus, quæ alias sæpe copiosius dissoluimus. Istis autem omnibus demonstratum abunde existimo, Christianum nō posse tantum, sed debere etiam si legitimē offeratur, recipere magistratus munus.

Priusquàm uerò disputationem huius loci concludamus, subiiciemus iam paucis quod nam sit officium subditorum, quod quicq; suo debent magistratui. Principiō subditorum est, sanctē, reuerenter, & honorificē, non abiectē & uulgariter sentire de principibus uel magistratibus suis. Reuerentur ac uenerentur hos ueluti legatos & ministros æterni Dei. Exhibeant eis etiam foris honorem cuiq; regno & patriæ cōsuetum. Turpissimum est, si subditi indecenter se gerant erga dominos suos. Caterum opinio uel falsa uel leuis & protrita de rebus uel personis concepta, contemptum rerum & personarū parit. Colligenda sunt ergo clara aliquot scripturæ testimonia, & omnium cordibus inferenda, ex quibus enascatur et conseruetur iusta existimatio seu autoritas magistratus. Caueant hīc principes & optimates, ne impura & indecenti uita contemnendos irridendosq; se præbeant, atq; ita sua culpa autoritatem amittant omnem in populo. Certē ipse Dominus Deus principes ac magistratus populi suo non dedignatur nomine, appellans ipsos deos. Loci extant Exodi 21. & Psal. 82. Apostoli nominarunt eos Dei legatos & ministros. Loci extant 1. Pet. 2. Rom. 13. Quis uerò non magnificiat deos, Deiq; legatos & ministros, per quos salutem populi operatur ipse Deus? Qui legatum spernit, spernit illum qui misit legatum. Qui honorat legatum, uidetur ipsum honorem exhibuisse leganti magis quàm legato. Præterea dicit Solomon Prouer. 16. Diuinitas in labijs regis, ideò in iudicio non præuaricatur cor eius. Et Eccles. 8. Meum est obseruare præceptum regis, & rationem habere iuramenti Dei. Item Prouerb.

Proverb. 24. Time Dominum fili mi & regem, & non immisceas te illis qui defectores sunt. Repente enim cōsurget perditio eorum. Nam & Paulus dixit, Quisquis resistit potestati, Dei ordinationi resistit: qui autem resisterint, iudicium sibi accipient. Huius generis contextui quædam & in 5. præceptum.

Deinde orent subditi pro principibus & magistratibus suis, ut Deus ipsis sapientiam, prudentiam, fortitudinem, temperantiam, iustitiam, iustamq; seueritatem, clementiam & reliquas uirtutes heroicas dare, ducere item in uis suis, & seruare ab omni malo dignetur: quò tranquillè & honestè uiuamus in hoc seculo. Id poscit à subditis S. Paulus ad Timotheum 1. cap. 2. & Ieremias in cap. 29. Verba alias recitauimus. Valde segnes & incurij sunt hic multorum animi, ideoq; experiuntur saepe quod nolunt, & quod dolet. Sed meritò. Si enim officium suum facerēt sedulò, ardentè orando pro magistratu, meliora experirentur. Quàm uerò feruidum fuerit studium precandì pro magistratu in ueteri ecclesia, colligere licet uel ex his Tertulliani uerbis, quæ in Apologetico eius cap. 30. sic leguntur: Precamur semper pro omnibus imperatoribus, uitam illis prolixam, imperium securum, domum tutam, exercitus fortes, senatum fidelem, populum probum, orbem quietum, & quacuncq; hominis & Cæsaris uota sunt.

Obediat item populus æquis & bonis magistratus legibus: obediat autem sanctè, reuerenter, & ex animo religioso, iam non tantum obediens legibus ipsius ut legibus hominum, sed ueluti legibus ministrorum & legatorum Dei. Nam Petrus iubet nos obedire propter dominum. Et Paulus, Oportet esse subditos non solum propter iram, uerum etiam propter conscientiam. Id est, non modò obediendum est magistratui, ne contemptus & inobedientiæ pœnas demus, sed ne peccemus in ipsum Deum, nostraq; conscientia nos sceleris admissi accuset. Ostendimus autem in 5. præcepto scripturarum testimonijs & exemplis, non parendum esse impijs magistratibus, impia & pugnantia manifestè cum uerbo Dei mandantibus. Maluerunt Apostoli & primitiua ecclesiæ fideles homines cōcludi in carceres, relegari in exilium, spoliari facultatibus, proijci bestijs, feriri gladio, & ignibus cremari, ac laqueo præfocari, quàm impijs obedire mandatis. Proconsuli Romano respondens beatus martyr & episcopus Polycarpus, dixit, Docemur principibus & potestatibus his quæ à Deo sunt, honorem deferre, eum scilicet qui religioni nō sit contrarius. Et diuus Ioannes Chrysostomus ad Gainam dixit, Non licet Imperatori pietatem custodienti aliquid contra diuina mandata tentare.

Postremò pendat populus magistratui tributa, impendat cum poscit necessitas, & ipsum corpus & uitam propriam pro incolumitate magistratus & patriæ, quemadmodum in 5. mandato faciendum ostendi. Dominus in Euangelio simpliciter dicit, Date Deo quæ Dei sunt, & Cæsari quæ sunt Cæsaris. Damnantur meritò qui hac parte sunt parci, maligni, & furaces. Debentur tributa magistratui ueluti merces laboris, & ueluti neruus publicæ tranquillitatis & utilitatis. Quis enim suo militat stipendio? Viuit quisque ex eo labore, quem exercet. Laborat magistratus, laborat princeps in gubernanda republica & conseruanda hac in pace. Negligit sua priuata & domestica negotia, quæ alioqui uictum & necessaria uitæ suppeditarent: iniquissimum ergo foret nisi aleretur aut certè iuuaretur publicis sumptibus. Præterea necesse est regna & respublicas iustis instructas esse opibus, quibus in bello, in fame, in incendijs, alijsq; calamitatibus publicis utantur, uel ad reparationem collapsorum, uel ad depulsionem grauiorum calamitatum. Nihil nunc dico de publicis ædificijs conseruandis, utpote mœnijs, turribus, uallo, fossis, portis, pontibus, itineribus, fontibus, aquaductibus, prætorio & foro, alijsq; id

Obedientia.

Publice opes.

Exactiones.

genus innumeris. Sunt etiā publicæ personæ, apparitores, uigiles, & similes alia plures, publico alendæ stipendio. Ac nisi in promptu sit pecunia, nullū regnum, nulla respub. stabit incolumis diu. Ergo qui tributa negant, mercedem laboris negant, adde & rempublicam omnino subuersam & conculcatam uolunt. Qui in publicis operibus, sicuti quibusdam mos est, segnes & ignaui sunt, nō peccant in unum aliquem Dominum, sed in totam rempublicam. Ac uideas ferē segnes huiusmodi operarios, nulla aut modica uti diuina benedictione. Admonendi tamen hīc sunt magistratus & principes, populum suæ fidei & suo imperio subditum diligant, eiq; benignē parcant, nec immoderatis atterant exactionibus. Id fiet si sint frugales, & ab omni abstineant luxu & superbia. Cogitet princeps bonus quanta sit iniquitas aulam redundare luxu & crapula, ciuitates autem ac uillas cruciari & absumi inedia. Cogitent reipub. præsidēs tributa & uectigalia, publica, nō priuata esse bona. Odit Deus expilatores. Odit Deus exactiones immoderatas. Male dicit Deus exactoribus tyrannis: benedicit commodis & moderatis optimatibus. Plus efficit in pace & bello concordia iusta, quā pecunia iniusta. Et fortius quidem est regnum ualidiorq; respublica, quæ amore & concordia principum & populi, non magno tamen thesauro reposito, commendatur, quā quæ opes habet inestimabiles, partas & extortas ē uisceribus ciuium, interim similitate & odijs dissidentibus inter se magistratibus & ciuibus. Nihil hīc fingo. Experientia omnium seculorum testis est.

Hæc hætenus de magistratu ex occasione sexti mandati, Non occides, quanta potui breuitate complexus, proposui charitati uestræ, declarans ob quid ille institutus à Deo, quodnam eius erga subditos, & rursus subditorum erga ipsum officium sit. Oremus iam dominum, ut is benignē tam magistratui quā subditis concedat cuiq; dignē sua uocatione ambulare.

De tertio secunda tabulæ præcepto, quod in Decalogo septimum est, Non mæchaberis. De Coniugio, contra adulterium & omnem intemperantiam, de Continentia.

S E R M O X.

Præceptum
Dei 7.

PROXIMUM uitæ & corporibus nostris coniunx est cuiusque hominis. Coniugio enim coniunguntur duo corpora, ut fiant unum corpus. Dominus enim dixit, Erunt duo in carne una. Tertio itaque mandato, & proximē quidem post prohibitum homicidium, præcipitur de coniugio sanctē colendo, item de sanctificatione uera corporis contra adulteria, contra uagas libidines & incontinentiam omnem. Muniuntur coniugia, ut floreat apud bonos honestas, castitas, sancteq; educentur liberi. Præceptum rursus duobus exprimitur uerbis, NON MOECHABERIS. Explicaturus hoc mandatum, Deo spirante, dicam primò de Coniugio sancto: deinde de Adulterio: hinc quæ sub nomine adulteriū sint comprehensa atq; prohibita: postremò de Continentia.

Coniugiū quid
sit.

Coniugium, quod & matrimonium appellatur, fœdus & coniunctio est diuina uiri & mulieris, ex cōsensu mutuo sociata & adunata, in hoc ut omnibus utentes cōmuniter, castē uiuant, & educant in timore Dei liberos. Ac Euangelium quidem appellauit coniugiū Coniunctionem diuinam. Dominus enim Iesus, Quod Deus coniunxit, ait, homo ne separet. Neq; licet matrimoniū ad alium referre auctorem quā Deum ipsissimū. Instituit hic alias bonas & necessarias hominibus ordinationes per angelos suos & delectissimos homines, sed matrimonium absq; ulla

ulla interueniente persona media ipse deus instituit, legibus muniuit, primos coniuges ipse copulauit, ipse copulatis uerè summus sacerdos benedixit.

Ex his liquidò possumus colligere præstantiam seu excellentiam matrimonij. *De dignitate et præstantia coniugij.* Deus enim hoc instituit, & in paradiso quidem instituit, tunc quando nullis adhuc miserijs obnoxius esset homo. Non uidebatur Adam in paradiso commodè & satis suauiter uicturus, nisi ipsi esset adunata coniunx. Non est bonum, ait Deus, ut homo sit solus, faciam illi adiutorium, quod ei cohabitaret. Adduxerat enim Deus ad Adamum omnia animantia quæ condiderat, ut nomina imponeret singulis: sed in omnibus nihil erat quod concupisceret Adā, abhorrebat animus & genius eius à coniunctione ipsorum. Deus ergo sopore immisso ipsi Adamo, condit ex dormientis latere mulierem, quam ab ipso Deo conditore adductam protinus atque uidisset, exclamat, Hoc scilicet esse quale uelit, quod amare possit, consentiente per omnia genio suo. Hoc nunc os, ait, ex ossibus meis, & caro ex carne mea. Inueni, inquit, inueni adiutorium conueniens mihi, mecum carne & sanguine, ipsaq; substantia communicans. Vnde adhuc existit naturalis illa uirorum erga mulieres propensio: ac rursus igni aboletur naturæ humanæ repugnans cum bestiis execrabilium hominum cōmixtio & uenus præpostera. Inter alia adijcit dominus, Deseret uir patrem suum & matrem suam, & adhærebit uxori suæ, eruntq; in carnem unam. At dudum intelleximus quanti fiat amor & studium liberorum erga parentes apud dominum: quāta diligentia hos præcipiat honorare. Necesse est itaq; coniugium longè diuinissimū esse institutum, quod præfertur honori parentum. Interim uerò lege matrimonij non aboletur lex de honorandis parentibus, sed uia & ratio indicatur, si fortè parentes dissidia pergant excitare inter coniuges, quid hi agant, non patiantur se diuelli, interim in alijs & per cetera honorant parentes. Sancti patres nostri coniugij legem custodierunt, & coniugium ipsum coluerunt sanctissimè. Nec puduit sanctum Dei spiritum multis recensere & describere matrimonia ipsorum. Nam primus & præstantissimus in sacris literis liber, Genesis appellatus, in matrimonijs sanctorum describendis bona parte consumitur. Nec piget ipsum seruum Dei incomparabilē Moysen cōmemorare coniugij negotia & opera, ueluti pura & egregia, quæ hodie iudicantur à multis esse fordida & putida. Honorauit & commendauit ipse Christus (in cōiugio quidem, sed ex purissima uirgine natus naturalis Dei filius) nuptias, dum in nuptijs primū suorū signorū edere dignatur, & tale quidem signum quod ostendit, dominum posse amara coniugij reddere dulcia, & inopiam subleuare diuite copia. Apostoli ut mariti fuerunt ad exemplum patriarcharum, regum, principum, sacerdotum, & prophetarum, ita præcipuus inter eos Paulus clamat, Honorabile est inter omnes coniugium, & cubile impollutum. Scortatores autem & adulteros iudicabit Deus. Dicit coniugium esse honorabile apud omnes, nimirum gentes. Pauculas enim inuenias quæ non maxime laudarint nuptias. Xenophon arbitratur inter omnia Dei instituta uix aliud inueniri coniugio pulchrius & utilius. Musonius, Hierocles, & alij sapientes prisce, coniugium usque adeo necessarium putant ad bene & commodè uiuendum, ut uita hominis extra matrimonium uideatur manca. Illi ipsi mala & incommoda matrimonij ex coniugibus non cōiugio deriuant. Bonum enim est coniugium, sed multi bono non bene utuntur, ideoq; abusus sui meritas luunt pœnas. Quis enim nesciat ebrietatis mala non referenda esse ad saluberrimam Dei creaturam uinum, sed ad ingurgitationē uerius atq; prauam cupiditatem hominis bona Dei creatura abutentis? Quod egreditur ex corde hominis, ait in Euangelio dominus, non quod ingreditur per os, coinquinat hominem.

Huc pertinet quod Apostolus Christi Paulus sanctificationem tribuit connubio. Cubile enim, inquit, impollutum est. Et alibi testatur sanctificari intercedente matrimonio incredulum maritum per fidelem uxorem: afferit praeterea liberos è coniugio natos esse sanctos siue mundos. Nam & Christum idem statuit exemplum coniugalís amoris: denique mysteria Christi & Ecclesiae adumbrat per coniugium, rem utique diuinam per typum sanctissimum & Deo probatissimum. Vnde alio in loco idem Apostolus dicit eorum doctrinam planè demoniorum esse doctrinam, qui prohibent contrahere matrimonium. Inde rursus consequens est, eam doctrinam esse diuinam, quæ liberum permittit coniugium omnibus, ipsumque commendat & colit.

Causa coniugij.

*Mulier est uiri
brachium.*

Præstantia & dignitate matrimonij intellecta, inspiciamus iam causas, ob quas diuinitus institutum est matrimonium. Deus pro bona sua natura, omnia sua instituta dirigit ad bonum & utilitatem hominum uberrimam: ergo & matrimonium instituit ad conseruationem generis humani, denique ut commoda, ornata & suauius esset hominis uita. Verum redigi possunt causæ omnes ad numerum ternarium. Principio Deus ipse dicit, Non est bonum ut homo solus sit, faciamus ergo adiutorium quod coram ipso sit, uel ei cohabitaret. Prima ergo causa instituti coniugij est hominis commoditas, nimirum ut uita eius sit suauior & comodiore. Non enim uidebatur Adam satis feliciter & suauiter uicturus, nisi adiuncta coniuge. Ea appellatur non impedimentum aut malum necessarium, ut poetæ quidam mulierum ofores & malæ bestiae nugati sunt, sed adiutorium uel brachium uiri. Ac ex Gentilibus, quod tamen mirum uideri poterat, Antipater in Sermonem de Nuptijs protulit, quod mirum in modum huc quadrat, & quale nam brachium, aut quale adiutorium coniunx sit, exponit. Quisquis uxorem, inquit, & liberos non expertus est, uerissimam & geminam beneuolentiam ignorat. Vndiquaque commiscetur coniugalís amor, cum non solum opes & liberos & animam, sed etiam corpora soli coniuges communia habeant. Ideo Euripides, deposito mulierum odio quo laborabat, hos uersus scripsit,

*Coniunx in agilitudinibus & sinistra fortuna, marito
Suauissima est, si domum honestè inhabitet,
Iram suauiter mitigans & molestias
Animi iucunditate leuans ac fraudes amicorum.*

Quemadmodum enim si quis unam habens manum, alicunde & alteram indipiscatur, aut unico pede utens, etiam alium aliunde acquirat, facilius multò aliquid apprehendere, aut quo libuerit ire potest: ita qui uxorem duxit, facilius fruetur salubribus & utilibus uitæ commoditatibus. Nam coniuges pro duobus oculis quaternos habent, & pro duabus manibus totidem alias, quibus unà iunctis, facilius agent opus manuum. Proinde fessis alteris reliquæ suum officium præstabunt. Coniugium ergo quod unius membri uice ex geminis coalescit, felicius omnia administrare in uita poterit. Hac omnia Antipatri sunt. Hierocles uerò in libro suo de Nuptijs, Vtilis est, inquit, cum muliere conuictus, etiam præter liberorum procreationem. Primum enim externis laboribus attritos suscipit, officiose tractans, & omni cum studio recreans. Deinde animi tristitiæ obliuionem inducit. Tristiores enim uitæ casus & in uniuersum omnis sollicitudinis aut negotij, agentibus nobis circa forum, rus, aut inter amicos, non facile feruntur necessarijs occupationibus admixti: expeditis autem inde & domum regressis, animoque in otium & libertatem suam restituto, leuiora fiunt omnia, & hac occasione nos anagere desinunt. Nec profectò uxor molesta est, imò res molestias ipsa leuat. Nihil enim

enim usque adeo onerosum est, quod maritus & uxor non facillimè ferant concordes, & communi opera quicquid est ferre uolentes. Et reliqua.

Secunda instituti matrimonij causa est procreatio sobolis, ad conseruandum genus humanū, & educatio liberorum in timore Domini. Nam benedixit dominus Adā atq; Euā, ac dixit, Crescite & multiplicamini, & replete terram. Paulus item Apostolus ad Titum, Anus doceto, ait, ut honesta doceāt, quò intelligentes ac modestas reddant adolescentulas, ut maritos suos diligant, ut liberos ament, ut sobriæ sint, domus custodes, bonæ, subditæ suis uiris. Et iterum ad Timotheum, Adam non fuit deceptus, ait, sed mulier seducta fuit, salua tamen fiet per generationem liberorum, si manserint in fide & dilectione, & sanctificatione cum castitate. Caterum inutilis foret generatio, nisi accederet & educatio liberorum. Præterea quæ uerè liberos diligit, educat ipsos in timore domini. Et hinc profluit maximus in rempub. & ecclesiam fructus. Accedit item per plurimum gloriæ ac cultui Dei, cum prouenit ex sancto coniugio maximus hominum numerus uerè Deum agnoscentium, inuocantium, colentiumq;.

Procreatio & educatio sobolis.

Tertiam causam instituti matrimonij, huiusmodi uerbis commemorat Apostolus, Propter supra uitanda suam quisq; uxorem habeat, & suū quæq; uirum habeat. Bonum quidem esset & cōmodum nullam contingere mulierem, cœlibemq; uiuere hominem, sed quia hoc non omnibus datum est, sicut in Euangelio ait dominus, ac urit quosdam aut plerosq; ferè carnis concupiscentia, dominus coniugium uelut medelam instituit, testante Apostolo rursus atq; dicente, Qui se non continent, contrahant matrimonium. Nam satius est matrimonium contrahere, quàm uri. Discimus hic concubitum naturalem cum propria coniuge non reputari à Deo pro culpa aut pro immunditia. Fornicationis opus est immunditia, quia pugnat cum lege diuina. Coniugium uerò permisit Deus & benedixit ei, ergo sanctificantur coniuges benedictione Dei, fide & obedientia. Nec desunt hic nobis argumenta & testimonia clarissima Pauli. Is enim ad Hebræos dixit, Honorabile est inter omnes coniugium, & cubile impollutum: scortatores autem & adulteros iudicabit Deus. Verecundè locutus est Apostolus, ac per cubile intellexit concubitum conjugalem, quem testatur esse impollutum. Quod autè mundauit Deus, quis oro immundum dixerit? Quis negauerit mundis omnia esse munda? Rectè ergo de his iudicans in Nicena Synodo Paphnutius confessor & episcopus dixit, castitatem esse concubitum cum uxore propria. Neq; uerò puduit uerecundissimum Christi Apostolum leges de his ferre. Scribit enim, Vxori uir debitam bene uolentiam reddat: similiter autem & uxor uiro. Vxor proprii corporis ius nō habet, sed maritus. Similiter & maritus proprii corporis ius non habet, sed uxor. Ne fraudetis uos inuicem, nisi quid fiat ex consensu mutuo & pro tempore, ut uacetis ieiunio & precationi: & rursus in unum conueniatis, ne tentet uos satanas propter intemperantiam uestram. Clara sunt hæc Apostoli uerba, nec ulla interpretatione nostra addita indigent. Idem Apostolus ad Corinthios, Si duxeris uxorem, ait, non peccasti. Item, Si uirgo nupserit, non peccauit. Quid autem uirginitate præstantius, purius, sanctius? At non peccat uirgo, si uirginitatē sancto commutet connubio. Bene ergo Chrysostomus in Homilia quadam, Primus, inquit, gradus castitatis est syncera uirginitas, secundus fidele coniugium. Sed & beatus Augustinus nuptias uocat castitatē siue continentiam. Locus extat de Bono coniugali cap. 19. & 20. item Epistola 198. Ex hoc fonte dimanat honestatis publicæ portio maxima. Approbat enim Deus coniugia, improbat fornicationem & omnem immunditiam. Sancto suo instituto uult omnem turpitudinem à suis exclu-

Cubile in coniugio impollutū.

*Acto. 10.
Titum. 1.*

1. Cor. 7.

Honestas.

dere fidelibus. Videant ergo sancti, magistratus imprimis, ne hic sint segnes, sed alacres, sancta tueantur coniugia, persequantur seuerissimè obscenitates, fornicationes, & omnem immunditiam.

Nemini prohibitū coniugium.

Vinculum coniugij indissolubile.

Quomodo contrahendum sit matrimonium.

Contra Polygamiam.

Hæc ex scriptura sancta recitavi hucusq; paulò copiosius, ut omnibus manifestum facerem coniugium esse sanctum, & idcirco eius moderato, sancto, legitimoq; usu neminem posse inquinari: ergo omnibus quoq; esse permissum. Apostolus enim, Episcopus, inquit, sit unius uxoris uir, qui suæ domui bene præsit, liberos habens fideles. Nam & Apostolos Christi, apostolicosq; uiros sanctissimos Ecclesiarum pastores, habuisse uxores, diuino & humano testimonio comprobatur. Neq; uerò aliud post prauam doctrinam magis inficit Ecclesiam, omnemq; disciplinam subuertit ecclesiasticam, quàm si ministri ecclesiarum, qui debuerant esse lumina, sint fornicarij & adulteri. Scandalum hoc præ cæteris honestatem omnem fatigat atq; conspurcat. Sed de his in præsentiarum non statui prolixius & plenè disputare. His adijcio uinculum coniugij esse indissolubile & sempiternum, id est, nunquam dissipandum. Fit enim ex duobus una caro, unum corpus. Hoc si disseces, perdis. Quod ergo Deus coniunxit, homo non separet. Ergo huius corporis eadem faciunt, qui adulterium perpetrant. Diuortium enim admittit lex euangelica & lex humana inter maritum & adulteram. Neq; sit minor & leuior causa, quæ inter coniuges uinculum hoc dirimit, quàm fornicatio. Alioqui maiores in Euangelio non prohibuit esse diuortij causas, qui minorem permisit. Ac in ecclesia ueteri non unam fornicationē separationis causam fuisse, testes sunt Christianorum principum epistolæ atq; constitutiones. De quibus aliàs.

Vt autem uinculum hoc sanctum coalescat firmitus, multum refert si sanctè, legitimè, cum timore Dei, & cum iudicio, coeant coniugia. Ne sint inuita aut coacta, iungantur prius animorū consentientium genij, quos postea coniungit professio consensus mutui & externa confœderatio. Iungantur qui non sunt propinquitate sanguinis aut affinitatis disiuncti. Iungantur qui per leges diuinas atque patrias, parentum consensu consilioq; accedente, coniungi possunt. Adsit in contrahentibus mens sincera, quæ quærat incolumitatem & felicitatem perennem, hoc est, quæ unicè spectet uoluntatem Dei: neq; admittat ulla parte prauos affectus in consilium. Hierocles in lib. de Nuptijs, Imprudentia omnino grauis est, inquit, ut quæ res etiam per se faciles, onerosas efficiat, & inter alias uxore quoq;. Non paucis enim intolerabiles fuerunt nuptiæ: non quòd sua culpa aut suapte natura talis sit cum uxore societas, sed quando ducimus, quas non oportebat, inde usu uenit, ut fiat intolerabilis illa societas. Hoc sanè modo nuptiæ uulgo eueniunt. Nō enim procreationis liberorum, aut uitæ societatis gratia ducunt uxores: sed alij propter magnitudinem dotis, alij excellentia formæ, alij uerò alijs istiusmodi causis ducti, ceu mals consiliarijs usi, de ingenio & moribus sponsæ nulla cura habita, in perniciem suam nuptias celebrant. Huc pertinet quod Plutarchus in libello De liberis educandis parētes admonet, ut eiusmodi liberis suis uxores despondeant, quæ non sint multò uel ditiores uel potentiores. Prudenter enim dici Prouerbio, Tuæ sortis uxore ducito. Breuiter præluceat in his omnibus timor Dei, uerbum Dei, & ardens ad Deum effusa precatio.

Cæterum non conuenit in legitimo coniugio plures esse quàm duos, qui constringantur unum sub iugum. Polygamia enim usurpata patribus nostris citra culpam, nullam nobis constituit legem. Illuxerunt correctionis tempora, & uenit in orbem Messias omnia docens atq; reformans. Leges ergo coniugij idem ille reduxit ad primam regulā & legem. Erunt, ait Dominus, duo in carne una. Et Apostolus,

stolus, Habeat quisque suam uxorem, & quæque suum maritum. Nihil ergo ad nos pertinent greges concubinarum Solomonis. Nihil ad nos pertinet quod Iacob legitur duabus coniugatus fororibus. Interea secundas, tertias aut etiam plures nuptias non damnat uerbum ueritatis. Generale enim est illud Apostolicum, adde & perpetuum, Qui se non continent, contrahant matrimonium. Satius est enim contrahere matrimoniū, quam uri. Desumpta est ea sententia ex illis Euangelicis uerbis, Non omnes capiunt uerbum hoc: sed ij quibus datum est. Sunt enim eunuchi de utero matris sic nati: sunt qui ita facti sunt ab hominibus: & sunt qui seipsos castrauerunt propter regnum cœlorum. Qui potest capere capiat. Ergo qui non potest capere, uxorem quoties necesse est, ducat.

In primis uero scire refert quomodo colamus matrimonium, quo dirigant omnia sua coniuges, quid agant in coniugio, & quomodo animati esse debeant erga hoc sanctum Dei institutum. Ea de re paucula, sed maxime necessaria capita recensbo, singulis suppedians occasionem plura & maiora cogitandi. Principio teneant coniuges pro re certissimam, & compertissimamque, se esse in opere Dei cum uiuunt in coniugio, se placere Deo, & rem gratam Deo facere, idque propter uerbum Dei, quo benedixit huic uiuendi generi, ac sanctificauit omnes coniuges fide in hoc opere & instituto Dei uiuentes. Ergo cum coniugati molestias ex matrimonio consequentes perferunt patienter, dum laborant fideliter, dum ea faciunt decenter quæ opera uel officia sunt coniugum, ueluti dum uxor amat maritum, dum ei inseruit pro officio, dum parit cum dolore liberos, dum genitos fouet & magna diligentia multoque labore educat: dum maritus uxorem diligit, uxori mutuam præbet operam, ac in domo per omnia fidelem agit patrem familiam: non minus in his placet Deo, quam cum in sacrum prodeunt cœtum, uerbum Dei audiunt & Dominum adorant. Nam opera illa coniugij non minus reputantur pro bonis operibus, quam ipsa eleemosyna, iustitia & pax. Opus itaque fuerit coniugibus ante omnia uera fide in Deum authorem coniugij. Ita enim per fidem placebunt Domino. Hæc non uerserunt monachi, quæ tamē iubentur urgere in uerbo Dei, suam potius fictam sanctimoniam & sua uota supra astra extulerunt.

Deinde requiritur à coniugibus, ut memores datæ & acceptæ fidei, se mutuò non fallant perfide, sed fœdus initum & fidem datam sanctè seruent, & seruent quidem syncerè animo & corpore. Nemo admittat in animum concupiscentiam alienam aut odium fastidiumue coniugis. Et corpus tuum, quisquis maritus es, non tuum, sed uxoris est: sicuti & uxoris corpus, non uxoris tuæ, sed tuum est. Rapinam committis & furtum, si alienum bonum sustuleris, aut ab hero proprio abalienaueris alterique communicaueris. Sit mens coniugum integra & corpus illibatam. Pollicetur quisque, dum sacra ceremonia inítiat & dedicat coniugium sub obtestatione diuini nominis coram Deo & ecclesia, se fidem coniugi sanctè seruaturum, hæc & non alia ulla usurum muliere, huic uni adharere illamque diligere & fouere uelle. Hanc fidem datam quisquis uiolauerit, perfidus est, diuini uiolator fœderis & sanctæ ueritatis.

Nec satis est si sis fidelis, nisi etiam sis humanus & cohabites uxori cum scientia, ut ait S. Petrus. Sit maritus uxoris caput, mens uidelicet sapientiaque, communis moderator, uia dux, conuictor iucundus, monitor in rebus omnibus opportunus, defensor fidus. Vxor sit obediens, ut uidemus membra parere capiti, præbeat se agendam & regendam uiro, non spernat æqua mariti dogmata aut imperia. Cogitent se esse unum corpus uel membra unius corporis. Discant ergo ex gubernatione corporis humani quomodo sese gerant in connubio. Nobiliora mem

Secundæ
nuptiæ.

Quomodo colendum
matrimonium.

Fideles sint
coniuges.

Cohabitandum
cum scientia.

Ephes. 5.

bra non contemnunt ignobiliora, sed eis deferunt magis ac laborem leniunt & auxilium conferunt. Ignobiliora suspiciunt nobiliora, nec istis inuident quicquam. Membrum non collidit aut affligit membrum, sed mutuò se fouent omnia, & defendunt se inuicem ab iniurijs. Talis sit inter coniuges mutua connexio, & operatio, & beneuolentia & charitas, tale studium & cōsortium. Ideò enim ex corpore uiri desumpta est mulier, ut suum corpus colere & amare pergeret maritus. Ideò etiam Apost. Sic debent uiri suas diligere uxores, ait, ut sua ipsorum corpora. Qui diligit suam uxorem, seipsum diligit. Nullus enim unquā suam ipsius carnem odio habuit: imò enutrit & fouet eam, sicut & Dominus ecclesiā. Quid quod Apost. eodem in loco ipsum Dei filium & sanctā ecclesiā, coniugatis exemplū statuit, requirens à marito ut diligit uxorem suam sicut Christus dilexit ecclesiā: uxor uero ita obseruet maritum, eundemq; diligit sicut ecclesiā Christū. Eo exemplo non est aliud in toto hoc orbe sanctius & uehemētius. Nullus enim amor Christi amore in ecclesiā maior: nec alia inuenitur observatio castior quā ecclesiā erga Christum. Requiritur ergo à coniugatis ut ardentissimè & sanctissimè se ament mutuū. Omnibus utantur communiter, bonis simul & malis: idem trahant iugum, alter alterius onus portet. Breuiter, sint unius corporis mēbra. Alibi descripsimus hac officia copiosius, dum conscripsimus institutionem Christiani matrimonij.

Gignant & educent liberos.

Postremò educent liberos in sancta disciplina & timore Dei, ad salutē domus propriā & totius reipublicae. Paulus, Volo, inquit, iuniores nubere, liberos gignere, domum administrare. Hoc enim est honestum & acceptum coram Deo. Porro de educatione liberorum dixi Sermone quinto huius Decadis. Vtilissimū est autem hac parte matrimonium cū suae cuiusque domui, tum uniuersae reipublicae: ut iam non commemorem & cultum, & gloriam Dei propagari quā latissimè, si uidelicet liberi non tantū generentur, sed & sanctè instituantur à parentibus in timore Domini & in omni pietate. Hierocles, Vtiles, inquit, esse nuptias assero. Primum quidem quia diuinū reuera fructum producant liberorum generationē, qui nobis & ualentibus adhuc, utpote consanguinei, in omnibus negotijs opem ferunt, & aetate confectis senioq; pressis boni sunt auxiliarij: familiares quidem in secunda fortuna latitiae socij, in aduersa uerò condolentes rerum tristium successores. Et reliqua. Antipater uerò, Hominem, ait, ingenio ciuili prae dūm, commune negotium patriae oportet augere. Nam alia ratione ciuitates seruari non possent, nisi optimi quicq; ciues & generosorum filij, prioribus tanquam arboris pulchrae folijs marcescentibus & defluentibus, uxores tempestiue ducerent, & liberos ceu generosa quaedam germina patriae successores relinquerent, ut ipsam florere semper & in uigore perpetuo durare efficerent, nunquam hostibus oppugnati facilem fieri pro uirili sua molientes. Hoc igitur sibi scopo proposito ut & uiui & defuncti patriam tueantur & adiuuent, nuptias contrahere maximè necessarium, ac in primis conueniens aestimant, cū omnia quae requiruntur à natura perficere cupientes, tum illud apprimè quod salutem & augmentum patriae, ac multò magis diuinum cultum attinet, &c.

A religione auspicianda coniugia.

Cū autem tanta ad beatè feliciterq; uiuendum momenta habeat iustum matrimonium, non prae ter causam auspiciantur hoc à religione fideles. Certè primo parentum nostrorum coniugio protinus ab initio benedixit Dominus, qui & eos copulauit. Vnde receptus est in ecclesiā Dei mos, quòd qui matrimonium contraxerunt, priusquā cohabitent, in templū Domini ueniant, ubi sub inuocatione diuini nominis & in medio interpellātis ecclesiā, copulantur & benedicuntur à ministro Dei sub nomine Dei. Proinde locum primariū in coniugio habent assidue

duæ coniugum preces ad Deum, ut hic dignetur facere maritos sapientes, religiosos, modestos, benignos, probos, laboriosos & patientes amantesq; uxorū: uxores uerò obsequentes, placidas, castas, fidas, diligētes maritos & liberos, æconomicas & fecundas. Quanta enim uel ex unico matrimonio prauo & corrupto existant mala, nemo unus explicauerit. Conturbantur hoc familiæ, perit pudor & facultas omnis, corrumpuntur liberi, offenditur imò irritatur Deus, malum ingens datur uniuerſæ reipub. Proinde sedulò orandus Deus ut benedicat omnibus coniugibus, quò nomen eius sanctum incolumitasq; reipublicæ incrementa accipiat.

Descendo iam ad adulterium, quod huiusmodi scelus est, quo ad alteram accedit maritus, uel uxor ad alterum diuertit, cui corporis sui imò maritalis corporis copiam facit. Blandiuntur sibi quidam existimantes nulla se teneri culpa adulterij, si consuetudinem habeant cum libera aliqua puella uel non maritata: rursus si mulier se prostituat homini nondum coniugato. Fornicationem hoc non adulterium esse contendunt. Sed scriptura diuersum iudicat. Accedis ad alteram, adulter es: fidem fallis, perfidus es: corpus tuum non tuum, sed uxoris corpus est, proinde alienæ corpus hoc impendens, adulterium committis. Si cōiugatus cum maritata concumbis, peccatum adulterij conduplicas. Grauiſſimis supplicijs hoc statim à rerum exordio punitum est. Pharaonem & domum eius plagis magnis propter Saram uxorem Abraham. En punitur rex Ægypti plagis grauiſſimis propter adulterium: interim ignorauit rex Saram esse uxorem Abraham: quantæ ergo plagæ illis paratæ sunt, qui scientes & uolentes impudenter cōmittunt adulteria. Ad Abimelechem regem Palæstinorū dicit Dominus, En morieris propter mulierem quam tulisti à marito suo. Atqui abduxerat & hic rex Saram nesciens esse uxorem Abraham. Ioseph sollicitatus ab uxore herili ad adulterium, simpliciter dicit, Quomodo designarem ingens hoc malum siue flagitiū, quo & in Deum peccarem? Singula uerba suum pondus habent. Nam grande scelus est adulterium. In libro enim Iob, ipse Iob sic pronunciat, Si concupiscentiæ uxoris alienæ obnoxium fuit cor meum, & ad ostium sodalis mei sum insidiatus, nimirum ut corrumperem uxorem eius, scortum alterius sit uxor mea, & rem habeant alij cum ea. Hoc enim grande flagitium est & iniquitas capitali actione persequenda. Ignis enim est qui ad interitum usq; deuorat, ac omnem prouentum meum euellit. Dicit Iob se non modò non perpetrasse adulterium, sed ne tentasse quidem unquam alienam corrumperere uxore. Profitetur nephas siue grande scelus esse adulterium, quod mereatur ut adulterio sua quoq; corrumpatur. Addit adulteriū ignem esse funditus absumentē ac deuorantem omnia, deniq; iniquitatē esse capitali actione persequendam. Nam & Solomon mortalium sapientissimus, Num quispiam in sinu suo, inquit, ignem fouet, ut uestimenta sua non adurantur? Aut incedet quis super prunas ut pedes eius non adurantur? Sic qui ingreditur ad coniugē proximi sui, culpa non uacabit quisquis tetigerit eam. Nō reputant probro furari, si esuriens furetur ut uitam sustentet. Sed deprehensus septuplum rependit & uniuerſam rem familiarem expendit. Qui autem adulterium committit cum muliere, excors est, & qui hoc facit, animā suam perdit. Verbera insuper & ignominia inuenit, cuius opprobriū nunquam poterit deleri. Maritus enim incēsus zelotypia cū ei offertur uindicandi occasio, non parcat: neq; ullius intercessoris faciē suscipit, nec munera quantumuis magna admittit. Plurima certē in his Solomonis uerbis consideranda ueniunt. Principiò ut fieri nequit quin adurat ignis uestem si in ueste gestetur:

Contra adulterium.

Genes. 12.

Genes. 20.

Genes. 39.

Iob. 31.

Proverb. 6.

ita impune nemo commiserit adulterium. Deinde collatio fit inter furem & adulterum: non quod furtum defendatur, sed quod fures licet sint ignominiosi, minus tamen peccare, quam adulteri uideantur. Potest enim satisfacere fur restitutione ei cui suffuratus est aliquid: adulterium recompensari non potest. Et quis non malit sibi arcam funditus euacuari à furibus, quam adamatam uitiari uxorem? Præterea appellatur à Solomone adulter excors & insanus. Adulterium iudicatur esse scelus morte dignum, & infamia ineluctabilis. Nam Dominus ipse in lege non tantum dicit, Ne committas adulterium: sed alibi quoque addit, Et uir qui adulterium committit cum uxore alicuius, qui adulterium inquam committit cum uxore proximi sui, omnino moriatur adulter & adultera, Leuit. 20. Ac poena hæc capitalis, non est uel sublata uel mutata à Gentibus. Notissima est enim lex Iulia Romanorum, quæ iubet adulteros plecti capite. Viguit ea lex Hieronymi adhuc seculo, sicut colligere licet ex historia, quam is conscribit de muliere adultera septies ista. Nec certe mirum est adulterium apud priscos fuisse, & esse uel hodie iuxta leges capitale. Nam scelus est multifarium. Principio enim perfidus est adulter. Fidem enim coram Deo & ecclesia palam datam sub diuinæ & adorandæ Trinitatis obtestatione, & ministro Christi manus uel dextras coniugum conserente, fefellit atque uiolauit. Deinde furtum & rapinam admisit. Nam cum adultera sui corporis copiam facit alteri, non suum quidem, sed mariti corpus prostituit, inquinat & perdit. Quibus accedit quod spurij ex adulterio nati, non raro hæreditates adeunt cum legitimis liberis æquis portionibus. Id quod fieri non potest citra maximam legitimorum liberorum iniuriam. Spoliantur enim iniustissime debita hæreditate, diuiditurque ei cui nullo iure debetur. Præterea mala exoriuntur innumera ex adulterijs. Ergo cum hydra sit multorum capitum, lex diuina & humana, non præter rationem, adulteros supplicio capitis puniuit.

David adulter.

Suaues uero illi sunt homines, si deus placet, quibus adulteria lusus esse uidentur. Illi ipsi pro se facere credunt Davidis adulterium, & quod Dominus noster propitius fuisse legitur adulteræ in ipso scelere deprehensæ. Quare non animaduertunt illi ipsi quanta seueritate in Dauidem cœlitus animaduersum sit? Polluitur mox funesta domus Davidis incestu foedo. Amnon enim uitiat per uim sororem suam Thamarem. Protinus & parricidio infamatur crudelissimo, Absolone Amnonem fratrem iugulante in conuiuio. Idem ille Absalom Davidis filius corrumpit aut uitiat patri uxores, idque in propatulo, omni posito pudore. Expellit patrem ex regno quem & trucidare festinat. Agnoscit hic merito se tanta propter admissum adulterium & parricidium sustinere. Tandem in pugna occiduntur populi multa millia. Vix restituitur regno David, ac restitutus perpetuam agit poenitentiam. Mirum uero si pergant adulteri porro pro se Davidis exemplum adducere. Saluator noster non uenit iudex sed saluator in mundum, neque usurpauit sibi alicubi ius gladij. Quis ergo miretur adulteram non esse ab eo damnatam ad lapides? Dicebat tamen, Nemo te condemnauit? quasi non impugnaturus, si lata fuisset condemnationis sententia. Non enim uenit patrocinator adulteris, neque ut legem solueret, sed ut impleret. Quod si adulteris adeo placet adulteram illam non esse condemnatam à Domino, placeat clausula qua terminatur historia, dicente Domino, Vade, & posthac ne peccaueris. Desinât ergo & ipsi adulterijs seipso inquinare & perdere.

Saluator absoluit adulteram.

Quæ amplius prohibeantur sub adulterij titulo.

Dominus in lege sua Adulterium quidem nominauit, sed omnes libidinis & luxus species, omniaque ea quæ ad libidinem incitant & fomenta præbent, intellexit, quæ non minore seueritate & iustitia quam adulterium prohibuit. Dominus

in Euan.

in Euangelio prohibet nō modò opus adulteriij externum, sed ipsam affectionem & cupiditatem animi libidinofam. Audistis, inquit, quòd dictum fuerit antiquis, Non committes adulterium. At ego dico uobis, quòd quicumq; aspexerit uxorem alterius ad concupiscendum eam, iam adulterium cum ea commisit in corde suo. Ibidem docet eruere oculos & amputare manus, nimirum extinguere in herba exurgentes affectiones immundas, ne in ipsum opus erumpant. Prohibetur ergo hoc mandato omnis affectio immunda, omnis immūditia & turpitudine oris & corporis totius. Prohibetur fornicatio seu scortatio, quæ dicitur esse congressus soluti cum soluta. Is putatur à multis uel modicum uel nullum esse peccatū. Sed diabolus huiusmodi homines sic animat, sic fascinat & impellit. Doctrina enim Euangelica & Apostolica longè aliud docet. Nam Apostoli in Synodali illa Epistola sua missa ex urbe Hierosolymorum ad omnes gentes, manifestissimè prohibent fornicationem. S. Petrus scortationem inter scēdissima numerat scelera, à quibus quàm altissimos uult esse Christianos. S. Paulus, Fugite, inquit scortationē. Item, Ne fornicatione inquinemur, sicuti quidam illorū inquinati sunt, & conciderunt uno die uiginti tria millia. Pugnat fornicatio cum scēdere Dei, quo is nobis, & nos cū Deo cohæremus. Sed & Deum gloria sua spoliatur scortatio, templumq; Dei polluit scēdissimè. Audiamus super ea re Apostolum testificantem atq; dicentem, An nescitis quòd corpora uestra membra sunt Christi? Num igitur tollens membra Christi, faciam scorti membra? Absit. An nescitis quòd qui adglutinetur scorto, unum corpus est? Rediguntur enim duo, inquit, in carnem unam. At qui adglutinetur Domino, unus spiritus est. Fugite scortationem. Omne peccatum quod fecerit homo, extra corpus est: sed qui scortatur, in propriū corpus peccat. An nescitis quòd corpora uestra sint templa eius qui est in uobis spiritus sancti: quē habetis à Deo, & non estis ipsi uestri iuris? Nam empti estis precio. Ergo fornicatio excludit fornicatores ex regno Dei. Idem enim Apostolus, Neq; scortatores, ait, neque adulteri, regni Dei hereditatem accipient. Ideoq; alibi ne nominari quidem inter Christianos sustinet fornicationē, tantum abest ut fornices lupanariaue tulisset seruus Iesu Christi. Præterea opplet totum corpus uarijs morbis scortatio, exuit cultores suos omni facultate atq; substantia, redigit ad extremam paupertatem & miseriam, adigit demum ad desperationem. Adobruit autem omni ignominia: cuius rei uiuum exemplum statuitur in sacris literis fortissimus Israelitarum Samson. Proinde in loco & tempore omnes homines admonet Solomon sapientissimus, ut fugiant scortorum suauiloquia. Desinunt enim in uenena, & hominem præcipitem agunt in abyssum malorum.

Prohibetur hac lege & stuprum siue uiolatio uirginum, item raptus quo liberi parentibus per uiolentiam corrumpuntur & abducuntur. Differunt inter se stuprum ui factum, & stuprum sine uiolentia factum. Dinam Iacobi filiam uitiat Sicheus, & quamuis corruptam sibi matrimonio iungi cuperet mutareq; religionē, confoditur tamen à fratribus Dinæ Leui & Simeone, totaq; ciuitas subuersa & cruore caesorum oppleta diripitur. Historia legitur Gen. 34. Propter stuprum Iuliani præfecti filia illatum à rege Roderycho Gottho Hispaniam tenente, uniuersa penè Hispania igni & cruore commixta est. Volaterranus enim Geograph. lib. 2. Roderychus tres annos regnauit, inquit, cuius scēda libido finem attulit Gotthorū non tam generi quàm pacifico imperio, Saracenīs superuenientibus. Nam cū filiam cuiusdam Iuliani præfecti, qui Tingitanā administrabat prouinciā, uitiasset, dolor domesticus patrem ad ultionem sollicitauit, loci fretum commoditate. Quare Iulianus clām ex Aphrica Saracenos euocat: qui anno salutis 714.

duce Muzza, misso à Mirmomelino eorum tunc rege, per angustias Herculei freti ingresso, biennij spatium omnem ferè Hispaniā occupant præter Astures. In quo temporis spatium dicuntur ad septies centena hominum millia bello utrinque absumpta. Cecidit in eodem bello cum omni sua nobilitate rex uirginis constuprator. In Israele interierunt propter uirgines compressam Leuitæ concubinam à Gabao-nitis ciuibus Beniamitarum 25000. ut iam non commemorem eos qui ceciderunt ex undecim tribubus, quorum numerus peruenit ad 40000. Neque ullis obscurum est reges urbe eiectiones Roma, & Troiam decenniali bello (cui oriens & occidens inuoluebatur) fatigatam, tandem funditus euersam esse, quod Tarquinius uiopressisset Lucretiam, & Alexander Paris à Græcia abduxisset alienam coniugem Menelai Helenam. Exempla innumera suppeditant omnia ferè secula. Semper enim iustissimus Deus editis exemplis declarauit quā irascatur uirginum constupratoribus ac raptoribus mulierum. Ideoque leges & supplicia grauissima in huiusmodi nebulones sunt constituta. Raptum siue stuprum ui factum capitaliter puniunt leges. Non uiolento constupratori præcipit Deus, Ducas & dores. Aliud alia leges statuunt De quibus plura traduntur in iure ciuili.

Incestus.

In primis autem prohibetur Incestus. Incestum uocant illegitimam coniunctionem contra sanguinis honorē. Cestus enim zona est nuptialis quam gerebant sponsæ, significans iustas nuptias. Germani uocamus hoc scelus *Blutschand*, uitium scilicet sanguini uel consanguineis illatum. In Leuitico post gradus inhibitos, subiungit Dominus, In his omnibus ne polluamini. Nam in hisce omnibus gentes polluuntur, quas ego eicio ante uos. Et hinc contaminata est terra, & ego uisitaui iniquitatem eius super eam, & terra ipsa euomuit habitatores suos. Vos igitur custodite statuta & iudicia mea, & ex omnibus istis abominandis rebus nullam designabitis. Nam quicumque sic fecerit, excindetur. Et in 20. cap. Leuit. statuit contra incestus supplicium capitis, quod non mutarunt leges ciuiles seu imperatoriae.

Sodomia.

Prohibetur item abominandum nephas Sodomia & commixtio cum brutis. Apertissimas habemus contra hæc in Leuit. cap. 18. & 20. expressasque leges. Habemus item seuerissimum, sed iustissimum supplicium ab ipso iustissimo Deo sumptum de Sodomitis. Nam igne & sulphure fœtente cœlitus demisso fœditissimos homines in cineres redegit, ac cineres abluuit maris mortui undis, ne superesset de nepharijs hominibus uel fauilla. Arserunt præterea integræ urbes & agri fertilissimi. Neque enim oportebat uel tantillum superesse de rebus etiam scelestissimorum hominum. Locus nomen obtinuit Maris mortui. Vnde necessariò colligimus Deum iustissimum minime parsurum gentibus simili scelere implicitis, tamen dissimulet ad tempus. Abolebuntur incendio cum ipsæ tum res ipsarum: ardebunt apud inferos æternū, nec aliud de eis quā infamis remanebit memoria. In Theologia enim Domini nostri Iesu Christi legimus, Et descendit ignis à Deo ex cœlo, & deuorauit eos; & diabolus qui seducebat eos, missus est in stagnum ignis & sulphuris, ubi & bestia & pseudopropheta cruciabuntur die ac nocte in secula seculorum. Apoc. 20.

Illecebra prohibita.

Prohibentur præter illa, etiam omnia quæcunque incitant & illicitum ad libidinem prohibent. Huius generis sunt cultus corporis immodicus, consortium prauum & luxuriosum, gula uel crapula & ebrietas. Nam Ezechiel inter alia, Hæc fuit iniquitas Sodomæ, inquit, fastus, copia ciborum, felicitas & otium. Ad libidinem incitant carmina spurca uel audita uel lecta, cantilenæ obscenæ, chori uel choreæ lasciuæ, spectacula impura, exempla & colloquia fœda. Damnantur ergo hac

hac lege conuiuentes & fouentes, aut etiam mediantes atq; copulantes fornicarios homines. Impio dicit Deus in Psalmis, Quare assumis testamentum meum in os tuum, cum odio habeas disciplinam, & uerba mea post te reſicias? Si uidebas furem, currebas cum eo, & cum adulteris portionem tuam ponebas, &c. Punit ergo ista omnia in sceleratis iustus dominus, unumquodq; pro magnitudine sua. Sunt enim alia peccata alijs grauiora. Adulter est qui concupiscit in animo suo uxorem alterius: sed idem peccat grauius si etiam opere pergat complere scelus, grauius rursus si compleat, & adhuc grauius si repetat. Ita peccat quidem adulter, sed peccat is quoq; qui iuuat adulterum, qui defendit. Peccat grauius scortator, sed grauius peccat qui se polluit incestu, grauiſſime omnium qui communiſcat cum abominandis Sodomitis. Praecipitur itaq; hoc mandato septimo uerecundia, pudor, sobrietas, temperantia, castitas & honestas publica, deniq; uera animi & corporis sanctimonia. Restat iam ut aliquid dicamus de Continentia.

Abſtinentia ab alienis abſtinemus ne cui eripiamus suum. Temperantiam uolunt continentia patere latius. Nam hanc illius partem faciunt. Ego simpliciter Continentiam oppono intemperantiae aut incontinentiae. Est enim uirtus & animi uis a spiritu Dei accepta, quae comprimit affectus, nec quicquam permittit uoluptatibus illicitis. Haec exercet se & locum habet in sermone hominum, in uoluptate etiam concessa, in uestibus, in habitatione seu aedificijs, in cibo & potu, ac in rebus quoq; alijs. Nos enumerata duntaxat in praesenti excutiemus.

Principio requiritur a nobis ut linguam nostram contineamus, neq; laxemus ipsam in contumeliam gloriae Dei, aut in proximi nostri detrimentum. Sit sermo hominis Christiani honestus, utilis & sale conditus, sit prorsus alienus a scurrilitate, leuitate, mendacio, a turpitudine & obscenitate. De lingua multis egit beatus Iacobus in epistola sua cap. 3. In primo capite, Sit omnis homo, ait, uelox ad audiendum, tardus ad loquendum, tardus ad iram. Et Paulus, Omnis sermo spurcus, inquit, ex ore uestro ne procedat, sed si quis est bonus ad aedificationem, quoties opus est, ut det gratiam audientibus, & ne contristetis spiritum sanctum Dei, per quem obſignati estis in diem redemptionis. Item, Scortatio & omnis immunditia aut auaritia ne nominetur quidem inter uos, sicut decet sanctos, aut obscenitas, aut stultiloquium, aut urbanitas, quae non conueniunt, sed magis gratiarum actio. Ne quisquam decipiat uos inanibus sermonibus. Propter haec enim uenire solet ira Dei in filios inobedientes. Nam & alibi ex Menandro hanc protulit sententiam, Corruptum mores bonos colloquia praua. Sed & uiri animus inspicitur in sermone. Ex abundantia enim cordis os loquitur. Ergo si alibi uſpiciam hic in primis conuenit Christianos esse continentes & sobrios.

Concessit quidem dominus homini uoluptates. Licet enim ad sobrietatem ornare uestibus corpora, & iisdem ab eis depellere frigus. Concessit amplexus coniugales sanctos. Concessit contra intemperiem coeli habitationes commodas, nec flagitat ut pecudum aut belluarum instar per agros & syluas oberremus. Concessit ad necessitatem adeoq; ad iucundam satietatem cibos atq; potum. Concessit otium, quietem atq; somnum mirabiliter uires etiam deficientes reparantem. Proinde cum illis fruatur, & illa percipit, illisq; cum honesta uoluptate delectatur uir pius, agat Deo gratias, moderatè & cum timore Dei illis utatur. Non enim peccat contra dominum. Abusu illarum rerum, ingratitude & intemperantia peccatur.

Nam quid permissum sit coniugibus, superius exposui in hoc eodem sermone, ut idem repetere non sit necessarium. Solomon dicit, Latere cum muliere adolescentiae tuae: sit haec amata cerua & caprea gratiosa: amores eius omni tempore

te reficiant, in amore eius delectare iugiter, &c. Interim contineat se quisque ab omni abusu & intemperantia: ac sicubi postularit necessitas secubent coniuges, iuxta Pauli consilium: uel audiant Ioelem prophetam dicentem, Sanctificate ieiunium, congregate cœtum: egrediatur sponsus de cubiculo suo, & sponsa de uelo suo.

Continentia in uestitu.

1. Pet. 3.

1. Tim. 2.

Titum. 2.

Vestes sint munda & honestae iuxta morem patrium, nisi is sit corruptissimus, tegant & ornent: nihil in his sit sordidum aut hypocriticum, nihil peregrinū, leue, & indecorum. Non puduit Apostolos Christi primarios Petrum & Paulum bene longas leges ferre de ornatu & uestibus mulierum: quod hoc hominum genus ferè insolentius se hic gerat. Cogitet quisque fidelium quid se deceat, non tam ex conditione & statu, quam ex religione. Luxus in re qualibet improbatur Christianis. Quorsum uerò attinet uestes, quæ ut contegant corpus consuuntur, discindere, nisi quod anatomia ineptissima aperimus & omnium oculis exponimus quales simus apud nos ipsos domi nostræ in pectore, discissi uidelicet, laceri, uani, leues & integri parum? Ac uestis è lino uel lana parata, non minus contegit & ornat hominem, quam Damascena aut holoserica, imò onerant & deformem te reddunt, quæ te non decent & luxuriosa sunt.

Continentia in ædificijs.

In ædificijs non prohibetur mundities & necessitas, sed splendor & excessus. Ac splendida illa ædificia rarò construuntur sine pauperum oppressione aut iniustitia graui. Ieremias adducit dominum loquentem contra regem Iuda atque dicentem, Væ qui ædificat domum suam in iniustitia, & cœnacula sua non in iudicio, qui utitur seruitio proximi sui gratis, & mercedem eius non reddit ei: qui dicit, Ædificabo mihi domum latam & cœnacula spaciofa: qui aperit sibi fenestras & facit laquearia arcuata ex cedro pingitque synopide. Num regnaturum te putas quod cum cedris contendis? An non & pater tuus edit & bibit, & executus est iudicium & iustitiam: & bene illi erat tunc? Nemo ergo nostrum ex rapina & sudore pauperum extruat ædes magnificas. Inhabitaret quisque domum sua professione & sua conditione decentem. S. Hieronymus luxum etiā in templis damnat. Nec uideo quid splendida ædificia conferant homini quàm ingens malum. Aegerri-me auellimur ex palatijs, his ergo metum mortis cōduplicamus. Patriarchæ certè inhabitauerunt tentoria, testificantes se hic esse exules, patriam autem inquirere aliam, nempe cœlestem.

Continentia in cibo & potu.

Continentia in cibo & potu nõ requirit odium cibi & uini, sed ut illis utamur moderatè ad necessitatem, non ad ingurgitationem. Damnatur in scripturis gula, crapula, comeffatio atque ebrietas, & hæc in primis. Nam ex ebrietate seruntur mala inexplicabilia, nempe scelera innumera, morbi graues, egestas & miseria. Solomon, Apud quem est uæ, ait, apud quem est dolor? apud quem cōtentiones? apud quem nugæ? apud quem uulnera sine causa? apud quem rubedo oculorum? Apud eos nimirum qui uina sectantur, apud eos qui ueniunt inquitū ubi misceatur. Noli contemplari uinum cum rubet, & cum splenduerit in uitro color eius: ingreditur blandè, & in nouissimo mordet ut coluber, & sicut regulus uenenum diffundet. Non commemorabo omnia quæ uel ex gentibus contra crapulā & ebrietatem proferre possem. Vnus Solomon pleraque comprehendit modò recitata sententia. Præterea qui non audit Christum, quem putas alium in orbe terrarum auditurum? At hic in Euangelio sub parabola diuitis epulonis mirabili euidētia pingit, quem finem fortiantur epulones. Apud eundem Lucam taxans nostri seculi, hoc est, proximè diem iudicij præcedentis, crapulam & ebrietatem, Sicut accidit in diebus Noe (ait) & Lot, edebant & bibebant usque ad diem quo ingrediebatur Noe in arcam, & Lot exiret è Sodomis: tunc uenit diluuium, & pluit igni & sulphure

Contra ebrietatem Christus.

phure de coelo & perdidit omnes. Addit idem, Cauete uobis ne quando grauetur corda uestra crapula & ebrietas, & curis huius uitae, subitusq; ingruat uobis dies ille. Tanquam laqueus enim superueniet super omnes qui sedent super faciem totius terrae. Vigilate itaque omni tempore, deprecantes, ut liceat uobis effugere ista omnia, & stare ante filium hominis. Atq; utinam plures hanc auream, coelestem & diuinam admonitionem saluatoris scriberent non tantum in omnibus aulis & hospitij ubi exhibentur conuiuia, sed in cordibus singulorum. Quoniam enim ebrietas regnum nostro seculo apud omnes fere gradus siue ordines, sexus & aetates obtinet, experimur in diem mala illa quae ebrijs minatus est dominus apud Isaiam in capite 5. & 28. Ac metuendum est ualde, ne ebrios dies illa domini innumeros sit deprehensura ad suum ipsorum interitum. Ergo qui aures habet ad audiendum audiat.

Non possum hic mihi temperare quin recitem c.v. quae S. Martinus non Turonensis ille, sed Dumienensis Episcopus, sub Iustiniano Caesare florens, in libello ad Mironem Galliciae regem de Continentia scripta reliquit, Continentiam, inquit, si diligis, circuncide superflua, & in arcum desideria tua constringe. Considera tecum quantum natura poscat, & non quantum cupiditas expetat. Impone concupiscentiae tuae frenum & modum, omniaq; blandimenta quae occultam uoluptatem trahunt reijce. Ede citra cruditatem, bibe citra ebrietatem. Nec praesentibus delicijs inharebis, nec desiderabis absentes. Victus tibi ex facili sit, nec ad uoluptatem sed ad cibum accede. Palatum tuum famem excitet, non sapores. Desideria tua paruo redime, quia hoc tantum curare debes ut desinant: atq; quasi ad exemplar compositus diuinum, a corpore ad spiritum, quantum potes te festina reducere. Si continentiae studes, habita non amoenè sed salubriter, nec dominum esse uelis notum a domo, sed domum a Domino. Non tibi ascribas quod non eris, nec quod es, nec maior quam es uideri uelis. Hoc magis obserua ne paupertas tibi immunda sit, nec parsimonia sordida, nec simplicitas neglecta, nec lenitas languida: & si tibi res exiguae sunt, non tamen sint angustae. Nec tua desleas, nec mireris aliena. Si continentiam diligis, turpia fugito, antequam accidant: nec quenquam alium uereberis plus quam te. Omnia tolerabilia praeter turpitudinem crede. A uerbis quoque turpibus abstineto, quia eorum licentia impudentiam nutrit. Sermones utiles magis quam facetos & amabiles ama, rectos potius quam obsecundantes. Miscebis interdum serijs iocos, sed temperatos & sine detrimento dignitatis ac uerecundiae. Nam reprehensibilis risus est si immodicus, si pueriliter effusus, si muliebriter fractus. Non erit tibi scurrilitas sed urbanitas grata. Sales tui sint sine dente, ioci non sine utilitate, risus sine cachinno, uox sine clamore, incessus sine tumultu. Quies tibi non desidia erit. Et cum ab alijs luditur, tu sancti aliquid honestiq; tractabis. Si continens es, adulationes euita, sitq; tibi tam triste laudari a turpibus, quam si laudaris ob turpia. Latior esto quoties displices malis, & malorum de te existimationes malas ueram tui laudationem ascribe. Difficilissimum continentiae opus est assentationes adulatorum repellere, quorum sermones animum uoluptate resoluunt. Non eris audax aut arrogans. Submittes te, non proijcies, grauitate seruata. Admoneberis libenter, & reprehenderis patienter. Si merito obiurgabit aliquis, scito quia profuit. Si immerito, scito quia prodesse uoluit. Non accerba, sed blanda timebis uerba. Esto uitiorum fugax ipse, aliorum uero neq; curiosus scrutator, neq; acerbus reprehensor, sed sine exprobratione correptor, ita ut admonitionem hilaritate praeuenias: & errori facile ueniam das. Nec extollas quenquam nec desicias. Dicentium esto tacitus auditor, audien-

S. Martini de
Crisina de Con-
tinentia,

tium promptus receptor: requirenti facile responde; contemnti facile cede, nec in iurgia execrationesque discedas. Si continens es, animi tui motus corporisque obserua ne indecori sint: nec illos ideo contemnas quia latent. Nam nihil differt si nemo uideat, cum tu ipse illos uideas. Mobilis esto non leuis, constans non pertinax. Cunctis esto benignus, nemini blandus, paucis familiaris, omnibus æquus. Rumoribus, criminibus, suspicionibus minimè credulus uel malignus. Vanæ gloriæ contemptor, & bonorum quibus præditus es ne sis acerbus exactor. Rari sermonis ipse, sed loquentium patiens. Seuerus non sæuus, sed hilarem non aspernans. Sapientiæ cupidus & docilis, quæ nosti sine arrogantia postulanti imparties: quæ nescis sine occultatione ignorantia tibi postula impartiri. Non conturbabit sapiens mores publicos, nec populum in se uitæ nouitate conuertet. Hæc de Continentia ex beato Martino episcopo recitauimus hætenus. Orandus interim est dominus ut nobis spiritum suum largiatur, per quem continentia uirtus apud nos in his omnibus floreat. Nisi enim hic nos animet atque inspiret, frustra tot & tanta audiuius præcepta, ac nisi temperanter & sobrie uiuamus, Christiano nomine sumus indigni.

De ieiunio.

Ad hunc locum pertinet etiam Ieiunii cōsideratio, quam paucis attingemus. Ieiunium Christianum est disciplina, custodia, ac castigatio corporis, pro necessitate præsentis, sponte suscepta, qua humiliamur coram Deo, fomentaque carnis corpori detrahimus, ut pareat spiritui. Nam quandiu in hoc corpore uiuimus mortales, caro subinde rebellat spiritui, tum uerò maximè cum bene curata cute delicijs affluimus. Proinde ieiunium detrahīt corpori omne id per quod incitatur & roboratur contra bona spiritus diuini dictata.

Species ieiuniorum duplex.

Ac necessitas illa propter quam suscipitur ieiunium, duplex est, publica & priuata. Publicam ob necessitatem suscipitur ieiunium, quando aliqua calamitas Ecclesiam uel premit uel Ecclesiæ imminet. Eius ieiunii exempla extant in prophetis apud Ioëlem in cap. 2. & apud Ionam in cap. 3. Usurpatum est hoc ipsum adhuc Apostolorum tempore: sicuti declarat lectio Actuum Apostolorum. Ac uidetur huiusmodi ieiunia apud ueteres parum aut nihil abfuisse à luctu publico, adeoque nihil aliud fuisse quàm luctum. Exempla ubique in sacris occurrunt plurima, docentia quomodo se sancti humiliarint coram Deo, agentes poenitentiam ueram. Priuatam ob necessitatem suscipit quisque ieiunium, cum sentit se uexari à cupiditate propria, ac huic mox detrahīt materiam, quò minus inardescat. Nam in euangelio dixit Dominus, filios sponsi tunc ieiunare cum ab ipsis aufertur sponsus, in tempore uidelicet difficili. Nuptiæ significant uinculum quo cōnectimur cum Christo fide & spiritu. Hoc integro, perpetuò gaudet pius. Edit & bibit cum gratiarum actione & moderatione, quantum satis est, & lætatur etiam in his externis Dei donis: ubi uerò sentit sponsum parare discessum, aut excessisse ferè ex pectore, id est, cum sentit spiritum insolentia carnis extinguī & fidem frigere, tunc preces & ieiunia instituit, ut sponsum uel retineat, uel discedere parantem retrahat.

Qualia sint ieiunia.

Non amant autem ieiunia uel priuata uel publica uim. Non enim cogi, sed libera, hilari, & spontanea mente proficisci uolunt. Ab inuitis nihil fit perfectum. Hilarem datorem requirit Deus. Sint præterea ieiunia moderata pro locorum, personarum, periculorum, aut tentationum ratione aut magnitudine indicata atque suscepta, si non perpetua saltem crebra, donec liberemur. Sint aliena à superstitione & hypocrisi, sicuti docuit Dominus noster in Euangelio Matthæi capite sexto. Huc quadrant mirum in modum sancti Hieronymi uerba de ieiunio ad Nepotianum sic exarata, Tantum tibi ieiuniorum modum impone, quantum ferre posses,

tes. Sint tibi pura, casta, simplicia, moderata & non superstitiosa ieiunia. Quid prodest oleo non uesci, & molestias quasdam difficultatesq; ciborum quærere, carycas, piper, nuges, palmarum fructus, similam, mel, pistacia? Tota hortorum cultura uexatur, ut cibario nō uescamur pane, & dum delicias sectamur, à regno cœlorum retrahimur. Audio præterea quosdam contra rerum hominumq; naturam aquam non bibere, nec uesci pane, sed sorbitiunculas delicatas & contrita olera betarumq; succum non calice sorbere sed concha. Proh pudor, non erubescimus huiusmodi ineptiis, nec tædet superstitionis? Hæc Hieronymus. Constat autem hoc uitium hodie inter diuites & spirituales potissimum esse receptissimū. Porro finem habent ieiunia Christiana hunc, humiliet se ecclesia aut peccator corā domino, obediat & subiiciatur caro spiritui, minus obstrepat caro operati iustitiam, & sit orantis intentio & affectus ardentior erga Deum. Ieiunium enim de eorum est numero, quæ non per se sunt absoluta opera, sed ad aliud & propter alia instituta: ergo ieiunium est adminiculum quodpiam orationis sanctorum & uirtutum omnium. Proinde legis in prophetis ieiunia Iudæorum displicuisse domino. Nihil enim aliud quàm ieiunabant, id est, certo & stato tempore abstinebant à cibis consuetis, at à sceleribus interim non abstinebant, sed laxabant nihilominus fræna carni, cum reuera carni sua debuissent fomēta detrahare, quò fuisset infirmior, spiritus autem in operandis bonis operibus robustior. Dicit itaq; Dominus, Ego tale ieiunium non elegi: & quæ his subiiciuntur apud Isaiam in cap. 58. & apud Zachariam in cap. 7. & 8.

Finis ieiuniorum

Certè Apostolus Christi Paulus manifestè dicit, Esca nos nō commendat Deo: neq; si comedamus, aliquid nobis superest, neq; si non comedamus, quicquam nobis deest. Non ergo ieiunat uerè qui nihil aliud quàm abstinet certo tempore à cibis certis, sed qui ideo abstinet ab omnibus fomentis carnis, ut & carnem spiritui subiiciat, & opera fidei charitatisq; Deo placentia perficiat. Proinde si cupis uerè ieiunare, ede, bibe, dormi, corpusq; cura ne insolescat, ieiuna ab omni peccato, nullum cibum sumas malitiæ, nullas capias uoluptatis epulas, nullo uino luxuriæ concalescas. Ieiuna à malis actibus, abstine à malis sermonibus, contine te à cogitationibus pessimis. Nam & Basilus, Verum ieiunium est, inquit, à uitiiis immunem esse, continentia linguæ, iræ cohibitio, concupiscentiarum amputatio, obtreptionis, mendacii, periurii, &c. Quemadmodum uerò ipsa bona opera ex se facta, regnum cœlorum non merentur (debetur hæc gloria unico Christi merito) ita neque ieiunium, ad opera bona adminiculum & subsidium, regnum Dei meretur.

Verū ieiunium

Iam uerò uideo anxie de tempore modoq; ieiuniorum atque ciborum delectu disputari à plerisque theologis nostri seculi. Sunt qui stata ieiunia quadragesimæ, quatuor temporum & alia multa pro diuinitus institutis tueantur ieiunia. Sunt qui nullo modo te ieiunasse aiunt, si edas carnem. Sunt qui certas designent ieiunio horas. Ego uerò non uideo talia nobis tradi in scripturis diuinis. Nam dominus nō ieiunauit in Euangelio quadraginta diebus, sed in uniuersum ab omni cibo humano abstinuit, sicut & Moses & Helias. Eo itaque facto suo non tradidit nobis leges ieiuniorum. Præterea dominus in Euangelio clarè docet, id quod per os ingreditur non pollueret hominem, sed quod ex corde egreditur. Puris omnia pura sunt. Et Paulus, Noui & persuasum habeo per Dominum Iesum nihil esse commune per se, nisi ei qui existimat aliquid esse commune, illi commune est. Item qui uescitur, non uescentem ne despiciat: & qui non uescitur, uescentem ne iudicet. Deus enim illum (nimirum uescentem) assumpsit. Iam etiam no-

De modo temporeq; ieiuniorum & delectu ciborum.

tissimus est eiusdem Pauli locus in 1. ad Timoth. 4. cap. ubi prohibitionem ciborum appellat doctrinam daemoniorum. Nec est quod quisquam nobis hic quicquam dicat de Tacianis & Encratitis. Hi enim in uniuersum bonam Dei creaturam infamabant. Paulus autem de illis loquitur, qui tametsi cibum & coniugium in uniuersum non damnant, tamen usum ciborum prohibent.

Diuerſitas ieiuniorum.

Huc accedit quod seculo mox Apostolorum praedicationem insequuto non legimus ullas de ieiunio certas leges esse institutas, modum, delectum ciborum & tempus praescribentes. Recitabo charitati uestrae, Iraneum martyris uerba ex Ecclesiastica historia Eusebii, quae ita habent, Non solum de die paschae agitur controversia, sed & de ipsa specie ieiuniorum. Quidam enim putant uno tantum die obseruari debere ieiunium, alij duobus, alij uero pluribus, nonnulli etiam quadraginta, ita ut horas diurnas nocturnasque computantes diem statuunt. Quae uarietas obseruantiae, non nunc primum neque nostris temporibus coepit, sed multo ante nos, ex illis (ut opinor) qui non simpliciter quod ab initio traditum est tenentes, in alium morem uel per negligentiam uel per imperitiam postmodum decedere. Et tamen isti omnes licet in obseruationibus uariarent, fuerunt tamen nobiscum pacifici & sunt, nec dissonantia ieiunii fidei consonantiam rupit. Haec ille. Porro illam ipsam diuersitatem fuisse adhuc in ecclesia regnante Theodosio iuniore, circa annum Domini circiter 453. testis est Socrates Constantinopolitanus in Tripartita historia libro nono capite tricesimo octauo sic scribens, Sed etiam ciborum abstinentiam non similem habent. Nam alij omnino ab animatis abstinent: alij ex animantibus pisces solummodo comedunt. Quidam cum piscibus uescuntur & uolatilibus, dicentes haec secundum Moysen ex aqua habere substantiam. Alij etiam caulibus & ouis abstinere noscuntur. Quidam sicco tantummodo pane uescuntur. Alij neque hoc. Alij usque ad nonam ieiunantes horam, sine discretionem ciborum reficiuntur. Et innumerae consuetudines apud diuersos reperiuntur. Atque idem ille Socrates suam super hac diuersitate sententiam adferens, dicit, Et quia lectio nulla de hoc inuenitur antiqua, puto Apostolos hoc singulorum reliquisse sententiae, ut unusquisque operetur non timore aut necessitate quod bonum est. Haec Socrates. Debent itaque ieiunia Christianorum esse libera non legibus irretita. Apollonius quidam scriptor uetustus & ecclesiasticus disputans contra Montanum haeticum, Hic est, inquit, qui docuit nuptias solui, & qui ieiuniorum leges primus imposuit. Author Eusebius Ecclesiast. hist. libro quinto capite decimo octauo. Et certe uelle omnibus regionibus & hominibus eandem ieiunii formam in tempore, modo, delectuque ciborum praescribere, est desipere prorsus. Nam pro ratione caeli diuersissime affecta sunt corpora hominum, & idem cibus diuersae complexionis homines non ad eadem incendit studia. Pijssimum ergo utilissimumque fuerit Ecclesiae, si omnes pastores ubique doceant sobrietatem & temperantiam, ipsumque ieiunium uerum: leges autem de ciborum delectu & temporis, praescribant nullas, sed liberum cuilibet regioni & homini permittant, qui haud dubie ab illis maxime sibi temperabit, a quibus ipse sibi periculum suae integritati imminere sentit, ac eo praesertim tempore quo maxime insolescit caro aut magnum imminet periculum. Nam tempus ieiunii non prorogatur ad annos uel dies certos, sed ad remissionem aut insolentiam carnis uel tentationum & affectuum. Ita sane ieiunia, ut sunt exercitia pietatis, maximam habent laudem in Ecclesia.

Ieiunia sunt libera.

Summa huius mandati septimi.

Haec haecenus de ieiunio. Iam ut praecipuum septimum concludam, prohibet hoc omnem intemperantiam, & praecipit sanctimoniam, denique singulorum membro-

membrorum totius corporis usum purum & legitimum. Vnde comprehenditur in hoc breui mādato bona pars doctrinæ Christianæ & Apostolicæ. Paulus enim ad Thessalonicēses, Rogamus uos, ait, & adhortamur per Dominū Iesum, quem admodum accepistis à nobis, quemadmodū oporteat uos uersari & placere Deo, ut abundetis magis. Nostis enim quæ præcepta dederimus uobis per Dominum nostrum Iesum. Hæc enim est uoluntas Dei, sanctificatio uestra, ut abstineatis à fornicatione, & sciat unusquisq; uestrum suum uas (suum inquam corpus) possidere cum sanctificatione & honore, nō cum affectu concupiscentiæ, quemadmodum gentes quæ non nouerunt Deum. Vltor est Deus de omnibus his, quemadmodum & ante diximus uobis & testati sumus. Non enim uocauit nos Deus immunditiæ causa, sed ad sanctificationem. Et mox, Deus pacis sanctificet uos totos, ut integer sit uester spiritus & anima & corpus, ita ut in nullo possitis culpari in aduentu Domini nostri Iesu Christi.

Iterum constitutas concionis metas transiui, ac solito longius uos detinui fratres. Condonate mihi hanc culpam. Neq; enim citra utilitatem (spero) uobis molestus fui per horas ferè duas integras. Orate iam & abite felices. Si Dominus iuuerit & uoluerit, paucos post dies residua Decalogi adiiciam. Gratia Domini Iesu Christi salutatoris nostri sit uobiscum.

PRIMI TOMI FINIS.

P

THE HISTORY OF THE
CITY OF LONDON
FROM THE FOUNDATION
TO THE PRESENT
BY JOHN STOW
1618

THE HISTORY OF THE
CITY OF LONDON
FROM THE FOUNDATION
TO THE PRESENT
BY JOHN STOW
1618

86

SERMONVM DECAS
tertia & quarta, ad Serenissimum
Angliæ regem Eduardum
Sextum, authore Hein-
rycho Bullingero.

TOMVS SECVNDVS.

I E S V S.

HIC est filius meus dilectus, in quo placata est anima
mea. Ipsum audite. Matth. 17.

P a

SERENISSIMO ANGLIAE ET FRANCIAE

REGI, HYBERNIAE DOMINO, VVALLIAE ET CORNVBIAE

principi, Christianæ fidei defensori, Eduardo eius nominis Sexto, Gra-
tiam & pacem, à Deo patre, per Dominum nostrum
Iesum Christum.

ADMITTERET ad colloquium Regia tua maiestas, sat scio, si quis nouus hospes ad-
ueniens promitteret ex sapientiss. hominū sententijs ostensurum, se paucis verissimas felici-
tatis vel infelicitatis cuiusq. regni omniumq. regum causas: ideoq. me nullatenus R. T.
M. colloquio excludendū spero, qui certō polliceor breuibus ipsissimas causas vel felicitatis vel in-
felicitatis & regum & regnorum, tam clarē & euidenter demonstraturum, vt auditori nulla opus
sit laboriosa diligentia, sed duntaxat beneuola attentione. Etenim, Deo adiuvante, hoc negotium nō
modō percipiendū ingenio, sed etiam oculis quasi conspiciendū, et veluti manibus palpandū ex-
hibebo, idq. non ex dubijs hominum placitis, sed ex certissimis veracissimi Dei oraculis. Fallunt non
rarō consilijs suis etiam sapientissimi homines, ac ingentia dant damna obsequentibus ipsorum con-
silijs. Deus verō, qui lux est & sapientia aeterna, nunquam errare, nunquam vllas prauas vel inter
se confligentes sententias concipere, nedum alijs suggerere, neminemq. prorsus seducere potest. Cla-
mat in sacrosancto Euangelio sapientia patris, & ait, Ego sum lux mundi: qui sequitur me, non am-
bulabit in tenebris, sed habebit lumen vitæ. Hæc aeterna Dei sapientia vt res ipsas non inuoluit, sed
explicat, sic nō modō salutaria sufficit consilia, sed & euentum præstat exoptatū obsequentibus. Sa-
pissimè quidē non insalubria dantur ab hominibus cōsilia, sed illud interim præteritur quod maximè
& inprimis dictum oportuerat. Consenserunt omnes fere sapientes orbis, reges & regna fore felicissi-
ma, si rex regno sapiens præsideat, habeatq. multos à consilijs viros prudentes, senes, fidos, rerumq. pe-
ritos: si habeat duces fortes, exercitatos, & in rebus bellicis fortunatos: si instructus sit copia rerum:
si probè vndiquaq. munitum sit regnum: deniq. si populus sit concors & obediens. Ac uerè quidē, re-
dē & prudenter dicuntur hæc omnia, uerū est aliud quidpiam singulare & excellentissimū, quod
in his non cōmemoratur, sine quo nulla uera felicitas vel cōparari uel conseruari potest: quo denique
vno præsentē, enumerata illa omnia sua sponte accidunt. Dominus ergo Deus noster, qui solus & sa-
pientissima & absolutissima suggerit consilia, succinctius & melius ita pronunciat in Euangelio,
Quin potius querite primū regnum Dei, & iustitiam eius, & hæc omnia adiicientur vobis. Et ite-
rum, Beati oculi qui vident quod vos videtis. Dico enim vobis, quod multi reges & prophetae volu-
runt videre & audire quæ vos videtis & auditis, & non viderunt nec audierunt. Et iterum, Quin
imò beati sunt qui audiunt verbū Dei, & custodiunt illud. Ac vnū quidem hoc est necessariū. Maria
bonam illam partem delegit, quæ non auferetur ab ea. Diuinis ergo instructus oraculis, ex sententia
planè diuina pronuncio, Illos reges fore felices, qui semetipsos totos, & regnū suum totum, Iesu Chri-
sto, vnigenito Dei filio, regi regū, & Domino dominorum, & offerunt & subiiciunt, illū agnoscentes
summū esse principem & monarcham, se verō illius vasallos, feudatarios, uel seruos: qui deniq. in om-
nibus nō suum arbitriū, non hominū vel leges cum diuinis pugnantes, uel intentiones hominū bonas,
sed ipsissimas summi & aeterni regis vel monarchæ leges duntaxat & sequuntur & regno sequendas
tradunt, omniaq. sua ad normā uerbi Dei vnicam reformant. Sic enim & florentissimis, tranquil-
lissimisq. fruuntur regnis, & in his reges opulenti, victoriosi, longæui, & felicissimi erunt. Ad hunc
enim modū loquitur os Domini, quod mentiri nescit. Cum sederit rex in folio regni sui, accipiet librū
legis Dei, vt legat in eo cunctis diebus vitæ suæ, et faciat eam, nec recedat ab ea, vel ad dextrā uel ad
sinistrā, vt proroget dies in regno suo ipse & filij eius. Et iterū, Nō recedat liber legis Dei ab ore tuo
(ô Iosue, vel quisquis es ô rex) sed meditaberis in eo die & nocte, vt custodias & agas iuxta omne il-
lud quod scriptū est in eo, nec recedes ab eo vel ad dextrā uel ad sinistram. Tunc enim prosperū red-
des iter tuū, & felix eris. Certissimū ergo testimonioq. veracissimi Dei confirmatum, & disertissimis
verbis pronunciatū est, Regū regnorumq. felicitatē versari in fide vera, in auscultatione & obedientia
fidei Verbi seu legis Dei: infelicitatē autem esse in contrario.

Hoc

Math. 6.
Lucæ 10.

Lucæ 11.

Vnde regum &
regnorum felici-
tas uel infelici-
tas.

Deut. 17.

Iosue 1.

Hoc ipsum consequenti demonstratione, etiam oculis conspiciendū, manibusq; veluti palpandū, sicuti pollicitus sum, exhibebo, productis in medium, non ex Herodoto aut prophana, sed ex sacra veracissimaq; historia regibus maximis. Saul primus Israelitarum rex felicissimus & victoriosissimus fuit, quoad sequeretur in omnibus verbū Dei: ubi autē suis intentionibus bonis locū dedit, repudiatus à Deo, per Samuelem sibi annunciari audit, Tu reprobasti ac reiecisti verbum Domini, ergo abiecit te quoq; Dominus ne sis rex super Israelelem. Nolo hīc multis exponere quantis malis inuolutus sit Saul ab eo tempore. Nam sicut ipse horribiliter exagitabatur à malo spiritu, ita regnum truculenter vexare & excarnificare non desijt, donec abduceret omnes suos in summū discrimen, caderetq; cū suis casus crudelissimè ab Ethnicis, æterna post se ignominia relicta. Sequitur Saulem in regno David, qui citra controuersiam omnium regum felicissimus fuit. At quanti hic fecerit uerbum Domini, ex multis ipsius clarissimis factis claret, imprimis verò ex Psalmo illo alphabetico, qui ordine & numero est 119. Hoc enim canit encomium Verbi Dei, cuius vim salutiferā mira copia exponit, docens quanto studio ardoreq; hoc persequi conueniat. Didicerat enim ex probris domesticis, & infelicissima Absolonis filij sui seditione, quantum malum sit deflectere à verbo Domini. Solomon Davidis filius, regū totius orbis & sapientissimus & laudatissimus, eatenus felicitatē laudemq; obtinuit, quatenus verbo Domini religiosè obtēperauit. Quamprimū verò prauaricaretur legē Domini, audit à Domino, Quandoquidē hoc apud te fuit, nec seruasti fœdus meū, & statuta mea quæ tibi præcepi, omnino rescindā à te regnū, & tradam illud seruo tuo. Certē à morte Solomonis regnum in duas partes est discissum, & decē tribus secutæ sunt Ieroboam seruū Solomonis. Duæ tribus adhæserunt Roboam filio Solomonis. Hic quoniā & ipse negligit verbum Dei, deosq; sequitur alienos, multis adobruitur calamitatibus. Scriptura enim commemorat, Ægyptios ascendisse contra Hierusalem, ac templum, regiam & urbem diripuisse. Abia filius Roboam cecidit exercitū Israeliticū, et victoriā reportauit magnificā, vulneratis occisisq; ex decē tribubus quingentis millibus. Nec alia cōmemoratur huius victoriæ causa, quā quod credidisset verbo Dei. Abia patri successit in regno Afa filius rex inelytus & potentissimus, de quo scriptura sancta commemorat, quod superstitiones sustulerit è medio, verā vero religionē iuxta verbum Dei restituerit: vnde & regnū consecutus sit florentissimū & tranquillissimū per annos 40. Rursus de Iosaphat filio Afae legimus, Fuit Dominus cum Iosaphat, quoniam ambulauit in vijs Davidis patris sui primis, nec quæsiuit Baalim, sed Deū patris sui quæsiuit, & in præceptis eius ambulauit. Opibus ergo verè regijs, & victorijs celeberrimis, toti inclaruit orbi. Cæterum filius eius Ioram, quod defecisset à verbo Domini, audit ab Helia propheta, Quandoquidem nō ambulasti in vijs Iosaphat patris tui, & in vijs Afae regis, sed ambulasti in via regum Israelis, ecce Dominus percutiet plaga magna populū tuū, et filios tuos, et vxores tuas, & cunctam substantiā tuā. Te autē percutiet doloribus magnis, morbo viscerū tuorū, donec effluant. Quæ autē ipsi minatus est Dominus per prophetā, ea ipsa infandis cum tormentis & summa cū ignominia sensit infelix: exemplū factus infelicitatis miseriæq; omnibus ijs obuenturæ, qui deserunt verbū Domini. Nec meliorē sortē expertus Ochosias, Iorā regis Atthaliaq; filius: Iehu iubēte cōfossus miserè interijt: eò q; maluisset sequi leges et ritus regū Israelis, quā ipsas Domini Dei sui leges. Porro Ioas adhuc puer, septem annos natus, opera, fide, et industria fidelissimi sacerdotis Ioiada in locum patris cassusfectus, interēpta impia Atthalia, felicissimè regnauit, donec viueret Ioiada sacerdos. Huius enim suggestionē & vigilantia ad normā verbi Domini in omnibus respexit rex. Vbi verò pontifex migrasset ex hoc seculo ad Dominū, rex consiliariorū suorū vafrie & malitia seductus, verbū Domini reliquit. Simul autē reliquit ipsum felicitas & gloria. Nā Syri modicis instructi copijs, Iudæorum amplissimas copias fundunt & fugant, omnes regis cōsiliarios conficiunt, totumq; regnum diripiunt. Rex Ioas hæc inestimabili cum mærore videre, simul & diutina tæbe consumi, tandē à seruis suis in lecto suo crudeliter iugulari meruit. Amasias filius Ioas, clarā consecutus legitur victoriā, quā de Idumæis reportauit, non aliā ob causam, nisi quod obtēperauisset verbo Domini. Sed idē ille rebellis factus Deo et prophetis Dei, superatur à Ioas rege Israelitico, à quo etiā spoliatur, diruta interrim bona murorum parte vrbs Hierosolymorū: ipse quoq; ab insidiatoribus interemptus, miserè

Saul 1. Samuelis
13. 14. 15. & 16.

David.

Solomon 1. Reg.
4. & 11.Reboam 2. Paral.
lip. 12.

Abia 2. Paral. 13.

Afa 2. Paral. 14.

Iosaphat 2. Paral.
lip. 17.

Ioram 2. Par. 21.

Ochosias 4.
Reg. 9.
Ioas 2. Paral.
23. 24.Amasias 2. Paral.
lip. 25.

DE FELICITATE ET INFELICITATE.

Oſias 2. Par. 26. occubuit. Succellit ei Oſias filius, qui & ipſe felicitate uſus eſt ſingulari, donec ore diuino non cōtradi-
ceret: ubi verò eam ſibi uſurparet functionē, quā Leuitis propriam voluit eſſe Dominus, & oppone-
ret ſe verbo Domini, lepra percuffus, habitauit in domo ſeparata, exclusus ex conſortio hominum ad
Iothā. 2. Par. 17. diem uſq; mortis ſuæ. Porro diues et victorijs clarus fuiſſe dicitur Iotham Oſiæ filius: cauſſam huius
felicitatis reddit ſcriptura paucis, dicens, Roboratus eſt Iotham, quoniā direxit vias ſuas corā Do-
Achaꝝ 2. Par. 29. mino Deo ſuo. Cōtra verò Achaꝝ filius Iotham, omnium regum Iudaicorū, vt penē impiſſimus, ita
infeliçiſſimus fuit. Quoniā enim dereliquit legē Domini Dei ſui, tradidit ipſum ac populū eius in ma-
nus regis Syrorum, deinde & in manus Iſraelitarū, qui vno die occiderunt centena & viginti mil-
lia Iudaorum, mulierū autem & liberorum ceperunt millia ducentena. Idem Achaꝝ cum ſuis om-
nis generis calamitates expertus, exemplum factus eſt horrendum omnibus verbi Dei præuariato-
ribus. Secutus eſt in regno patrem impiſſimū piſſimus filius Ezechias. De hoc legimus in ſacra
Ezechias 4. Reg. 18. hiſtoria, Hic fecit quod rectum erat in oculis Domini, iuxta omnia quæ fecerat Dauid pater eius.
Is ſuſtulit excelsa, confregit ſtatuas, ſuccidit lucos, contriuit deniq; ſerpentē anem, quæ fecerat Mo-
ſes, cui adolebant filij Iſraelis incenſum. Fiduciam collocauit in Domino Deo Iſraelis. Adherebat
enim Domino, nec deflexit ab eo, ſeruans præcepta eius, quæ mandauit Dominus Moſi. Audiamus
verò iam etiam quid hanc eius obedientiam & fidem ſit conſecutum. Sequitur in ſacra hiſtoria, Et
fuit Dominus cum eo, vt felix eſſet in omnibus ad quæ egrediebatur. Hoc regnante fracta eſt vetu-
ſtiſſima & potentiſſima orbis monarchia Aſſyriorum. Cum enim rex Aſſyriorum Senacherib vr-
bem Hieroſolymorum obſideret, vna nocte trucidauit angelus Domini in caſtris Aſſyriorū militum
centena octogintaquinq; millia. Sed & princeps Babylonicus honorifica legatione miſſa ad Eze-
chiam, amicitiam eius, regijs donis oblatiſ, ſtudioſe ambiuit. Gloria enim principis piſſimi iam in
toto innotuerat orbe. Rurſus cum patris pietatem non imitaretur exprimeretq; impiſſimus filius
Manaſſes, rex factus annos natus duodecim, ſed reſponſaret ex aduerſo verbis Dei, omnēq; ſuperſti-
tionē à parente abolitam reduceret, captus abducitur in Babylonē: & quamuis reſtitueretur diuina
bonitate & miſericordia, moriens tamen afflicto lacerumq; regnum reliquit filio ſuo Ammoni,
qui & ipſe infeliçiſſimus propter rebellionē, duobus duntaxat annis regnauit, tandem à ſeruis ſuis
Iofias 4. Reg. 22. confoſſus miſerè interiit. Surrogatus eſt mortuo patri in regno filius Iofias, puer adhuc, annos cum
coronaretur natus octo. Hic regum Iudaicorum corona & gloria extitit ſingularis. Regnauit tran-
quilliſſimè, & modis omnibus feliciſſimè, annis triginta & vno. Caterum prædicat ſcriptura vera-
ciſſima Iofiæ fidē & obedientiā, quam verbo Dei religioſiſſimè præſtitit, quā & inſignis illa felicitas
eſt conſecuta. Nihil cōmouerunt ipſum monita conſiliariorum patris ſui Ammonis. Cum ſemel au-
diſſet verba libri legis reperti in templo ab Hilikia pontifice, totū ſeſe Deo & verbo eius concredidit.
Nec expectata aliorum regnorum vel regum ſententia aut reformatione, maturè ſuis conſulens, re-
formare cœpit, maximè anno vitæ 18. Et in ipſa reformatione ſolius ſcriptura ſanctæ ſententiam,
non regum vel maiorum facta, vel longi temporis præſcriptionē, aut plurium ſuffragia ſibi ſequenda
exiſtimauit. Conuocatis enim ſuis, & his propoſito in medium libro legis Dei, ad regulam verbi Dei
omnia inſtituit. Inde factum legimus, quòd vetuſtiſſimis templis à Solomone & Ieroboamo colloca-
tis, contra legē Dei, antiquiſſimisq; ritibus, minimè ſit parſum. Breuiter, ſubuertit hic rex quicquid
contra verbum Dei erectum ſtabat in eccleſia & regno Iuda vniuerſo. Ac ne quis calumniaretur
ipſum nimis fuiſſe vel audacē vel rigidum, ſcriptura hoc ipſi fert teſtimoniū, Ante eum non fuit ta-
lis rex, qui conuerſus fuerit ad Dominum in toto corde ſuo, tota anima ſua, totisq; uiribus ſuis, iuxta
vniuerſam legem Moſis; nec exortus eſt poſt eum talis. Ergo quòd hic laudatiſſimus & feliciſſimus
rex tandem in acie victus occubuiſſe legitur, ſub felicitatē, non miſeriam, eſt referendum. Nam ipſe
Dominus ad Iofiā dixit, Colligam te ad patres tuos, et ſepelieris in pace, ne oculi tui malum videant,
quòd inducam huic loco. Populum enim, ac ipſos etiam principes regni, ſub ſanctiſſimo rege hypocri-
tas fuiſſe, illud maximè arguit, quòd extincto patre, filij & proceres regni, protinus verbo Dei repu-
diato, omnē ſuperſtitionē & impietate reuocarunt. Proinde legimus integris viginti duobus annis,
quibus poſt mortē Iofia regnatum eſt adhuc à regibus Iuda, nullam pacē vel ſecuritatē fuiſſe, ſed ſe-
ditiones

ditiones & cades perpetuas. Regnavit post Iosiam patrē filius Ioachas: verum post tres regni menses, captus abducitur in Ægyptum. Coronatur post fratrem abductum, Ioachim, sed undecimo regni anno catenis vincitur & occiditur à Nabuchodonosore, sepeliturq; sepultura, ut Ieremias ait, asini. Ioachas, Ioachim, Iechonias, Zedechias. 4. Regum 23. 24. 25. Surrogatur filius Ioachimi Iechonias, sed post tres menses captus, una cum proceribus & facultatibus totius regni, in Babylonem abducitur. Regnat post ipsum Zedechias Iosia filius: sed quia noluit obedire verbis domini per Ieremiam predicatis, & vitam & regnum amittit, anno regni undecimo. Simul autem inflammatur templum, & diruitur vrbs sedes regni vetustiss. populus vel trucidatur, vel abducitur in durissimam captiuitatem. Hec haftenus de regibus Iuda. Nam in Zedechia defecit & regnum & regia dignitas vel maiestas.

His si coniungamus fata regum Israelis, rursus consiteamur oportet, omnem felicitatē regum Israelitarū regum & regnorum existere ex obseruantia verbi domini, infelicitatem miseriamq; ex contemptu & neglectu legis Dei. Nam Ieroboā, primus Israelitarū rex, praterito verbo Dei, novos ritus vel nouū Dei cultum instituit, nouaq; templa fundauit, sed ea re & se & domum suā & totum regnum pessundedit. Sequitur eum in regno & in religione rex Baasa, ipsius ergo cum suis perijt. Succedit Amri pater Achabi, qui cum augetet impietatē, horribiliter trucidatur cum filiis & cum tota sua familia, ita ut ne vnus quidem euaderet gladium Dei ultorē. Et quia Iehu fidelis & strenuus fuit in occidendis hisce tyrannis, in conficiendis item sacerdotibus Baalis, & in euertenda idololatria, audit sibi annunciari à Domino, Quandoquidē zelo quodam fecisti quod fecisti, iuxta omnia quae fuerunt in corde meo, ecce sedebunt filij tui super solium Israelis in quartam vsq; generationem. Et certe legimus illustres fuisse principes, qui ipsum in regno sequuti sunt filij & nepotes, Ioachas, Ioas, Ieroboā eius nominis secundus, & Zacharias. Reliqui reges, Sellum, Manahem, Pekaiab, Peka, & Osee, huiusmodi omnino regnum obtinuerunt, quale filij Iosia, id est, seditiosum, turbulentum, & calamitosissimum. Nam spreuerunt os domini. Ergo funditus excisi, & ab Assyrijs vel casi vel in captiuitatem subducti sunt. Regum Israeliticorum post Solomonem à diuiso regno numerantur decem & nouem, Iudaicorum decem & octo. Regnarunt illi annos circiter ducentos septuaginta duos: hi uerò circiter trecentos nonaginta tres. Potuerunt autem tot annis & in gente Dei famosissima, quae ceu speculum quodpiam omnibus proponebatur populis, verissimā felicitatis vel infelicitatis & regum & regnorum omnium in toto orbe terrarum causae, clarissimē plenissimēq; proponi, ut nihil necesse sit aliunde declarationem petere illustriorem.

Interim tamē non destituimur vel externis exemplis. Pharaones enim & seipso & regnum Reges exteri. Ægypti vetustissimum, sola rebellione cōtra verbum Dei pertinaciter instituta, perdiderunt. Rursus sensit felicitatem maximam Darius Priscus, & Nabuchodonosor magnus, ex eo quod non spreuissent Danielis cōsilia. Balthazar rex Babylonius, cōtempitor Dei & verbi diuini, interit una nocte cum omnibus suis, capta, incensa, direpta & diruta vrbe vetustissima & in toto orbe famosissima Babylone, regnoq; translato ad Medos & Persas. Nec infelices fuerunt reges Persarum, Cyrus & Darius, Artaxerxes dictus, quod fauerent verbo Dei, & verum Dei cultum populumq; prouerent. Contra verò infelicissimus fuisse legitur Antiochus, licet Epiphanes cognominatus, qui veluti bello cum Deo impiissimē suscepto, sacros etiam tolices exurebat. Præterea non minor Reges Christum persequentes & adorantes. est nobis copia exemplorum ex historijs, eorum quoq; temporum quae insequuta sunt ascensionem Christi domini in cælos. Quotquot enim imperatores Romani, Reges & Principes euangelicam domini nostri Iesu Christi prædicationem & Ecclesiam Christi persequuti sunt, idololatriam autem & superstitionem prouexerunt ac propugnarunt, ignominiosa morte interierunt. Testes sunt Eusebius & Orosius historici clarissimi. Rursus commemorat beatus Augustinus 5. lib. de Ciuit. Dei, victorias, gloriam & felicitatē absolutissimā cælitus illis concessam regibus, qui vera fide Christum amplexi, idololatriam & superstitionē subuerterunt. Claret ergo felicitatem parari studio & obedientia verbi Dei, infelices fore omnes reges & regna omnia, quae relicto verbo Dei ad humanas conuertuntur inuentiones. Idq; adeo manifestē me declarasse hucusq; spero, ut auditores rem non tantum intelligere & oculis coram cernere, sed veluti ambabus manibus tenere videantur.

DE FELICIT. ET INFELICIT. REGVM ET REG.

Quorsum verò hæc omnia tendunt? Vt R. T. M. pro indubitato, imò pro cõpertissimo teneat, veram felicitatẽ & parari & paratam retineri fideli studio verbi Dei, nimirum si & temetipsum totum, & regnum vniuersum Christo summo principi subijcias, omniq; religionis & iustitiæ negotia in toto regno tuo ad regulam verbi Dei componas, si ab hac unica regula nuspiam vel latum pilum discedas, Christi regis regum regnum propages, Antichristi verò (vri feliciter cõpisti) subuer- tas atq; conculces. Non quòd mea admonitione vel doctrina indigeat R. T. M. Habet in animo haud dubiè doctorem illum cœlestem, suggerentem omnia vera veræ religionis dogmata. Habet li- brum illum omnium sacerrimum Sacra Biblia, in quibus vt in regula vel canone perfectiss. totum pietatis veræq; salutis nostræ negotium absolutissimè continetur ac traditur. Habet doctos, sapien- tes, pios, fideles in regno doctores & pastores multos. Habet proceres regni consiliariosq; plurimos, fidos, fortes, iuris diuini & humani consultissimos, prudentissimos & veritatis sincera amantissi- mos, etiam apud exterarum gentes laudatissimos. Quo nomine imprimis felicem prædicant pij omnes R. T. M. Ceterum non spreuit beatissimus rex Ezechias (licet opera vteretur clarissimorũ viro- rum Isaia & Michea) monitores fideles, vel ex gregarijs Leuiticis: neque hi existimabant se re- gem admonendo oleum & operam perdere. Ego itaq; regia tua pietate fretus, spero & hanc meam dissertationem breuem de veris causis felicitatis vel infelicitatis regum regnorumq; suum & lo- cum & fructum habituram. Certè qui ante annos XII. felicitis memoriæ parenti tuo Heinrycho, eius nominis VIII. lib. de Authoritate scripturæ sanctæ, & Episcoporum institutione & fun- ctione, contra superstitionis tyrannidisq; Romanæ antistites inscripsi, ac expertus sum eum labo- rem in Anglia non nullum protulisse fructum salutarem: idem nunc quoq; ausus sum R. T. M. hos meos Sermones dedicare. Tractò in his Christianæ religionis veræ non postremos locos, legem, peccatum, gratiam, euangelium & pœnitentiam. Nec hos irreligiøsè me existimo tractare. Vtor enim scripturarum collatione, qua nihil est in tractandis nostræ religionis negotijs cùm melius tum tutius. Et quia Christianæ fidei verus defensor es, proculdubiò minimè erit ingratum, quod sub no- mine patrocinioq; R. T. M. in publicum prodeunt Sermones Christiani. Volui his quoq; pietatis negotium in Anglia iam magna cum omnium bonorum gratulatione renascens, pro mea virili & fide iuuare. Copiosos ergo Sermones scripsi, ac res ita tractaui, vt ex vno parari possint plures. Vbi prudentia pastorum nullo negotio quid Ecclesiæ cuiq; potissimum conducatur, & necessarium sit intel- liget. Ac pastorum reuera est rectè secare verbum veritatis, & pabulum vitæ dominico gregi com- modè administrare. His non ingrati fuerit, spero, quod in his, ijsdem sæpe rebus, ijsdem argumen- tis, adeoq; & ijsdem verbis vtor, quibus alij ante me cùm veteres tum noui scriptores (quos scriptu- ras sequutos iudicau) vsi sunt, deniq; quibus ipse quoq; vsus sum in alijs meis libris antea à me edi- tis. Nam vt doctrina sibi semper & per omnia consentiens tutior est, ita semper laudari meruit à bonis omnibus. Si dominus vitam, otium, viresq; concesserit, breui alios quoq; Sermones octo Deca- dis 4. residuos adiiciam. Omnia autem hæc profero saluo semper & illibato orthodoxæ ecclesiæ iu- dicio. Dominus Iesus, rex regũ, & dominus dominantium, ducat te spiritu suo, & tueatur ad glo- riam nominis sui & totius regni incolumitatem. Tiguri, Mense Martio, Anno domini 1550.

R. T. M.

deditiss. H. Bullingerus, Tigurina
Ecclesiæ in Heluetia minister.


SERMONVM DECAS

TERTIA, AVTHORE HEINRY-

CHO BVLLINGERO.

*De quarto secunda tabula præcepto, quod in Decalogo octauum est, Non furtum facias.
De proprietate rerum, iusteq; parandis opibus, contra furti species varias.*

S E R M O I.



AD uitam familiamq; sustentandam alendamq; opus est homini facultatibus terrenis. Proximè itaq; post mandata de uita conseruanda, & matrimonio sanctè colendo, quarto mandato præcipitur de facultatibus siue opibus, nimirum rectè parandis, possidendis, usurpandis, administrandisq; ne eas paremus furto aut artibus malis, ne possideamus iniuste, nèue usurpemus aut dispensemus illegitimè. Iustitia exigit ut rebus bene utamur, & ut suum cuique tribuamus: & cum leges diuinæ iustitiæ sint leges, necessariò præcipiunt, **NON FURTVM FACIAS.** *Præceptum Dei 8.* Habemus rursus uerba oppidò paucula, sed sensus eorum patet latissimè. Prohibetur enim hoc mandato ipsum furtum, prohibentur omnes artes malæ, dolus malus, omnis impostura, adeoq; ipsa auaritia, prohibetur otium, prodigalitas seu profusio, & omnis iniustitia: præcipitur præterea iustitia, maxime in contractibus & commercijs. Certè ex acquisitione, possessione, & dispensatione bonorū temporalium, mirificæ excitantur in mundo apud homines turbæ: oportuit ergo Deum in lege sua, qua hominum salutem, commodo & tranquillitati consulit, modum statuere, & certam rationem bonorum terrenorum indicare: id quod hac lege præstitit: quæ quò rectius intelligatur, dicemus in præsentem, domino inspirante, de proprietate rerum, rebusq; iustè parandis: in qua quidem tractatione aperiet sese uniuerfa furti consideratio per species eius varias.

Proprietas enim & possessio rerum non prohibetur mandato hoc, sed ne paremus opes ullas artibus iniustis, ne possideamus iniuste, aut dispensemus iniuste: imò statuitur & confirmatur hoc præcepto rerū proprietas. Prohibet enim furta dominus, ergo statuit & confirmat rerum proprietatem. Quid enim furari possis, si omnia sint communia? Tuum enim non alienum surripuisti, si alteri suam suffuratus fueris substantiam. Sed prohibet Deus furta, ergo rerum proprietatem munit hac lege lata. Quoniam uerò sunt non pauci ex furiosa Anabaptistarum turba, qui negant rerum proprietatem, apertis aliquot scripturæ testimonijs illam demonstrabo. De Abraham, qui in sacris appellatur pater fidei, prædicat Eliezer, & dicit, Locupletauit dominus herum meum insigniter, ut potens seu opulentus sit, deditq; illi greges & armenta, argentum & aurum, seruos & ancillas: ac dedit filio suo omnia quæ habet. En locuples fuit Abraham, & possedit proprietatis iure, quæ ipsi dedit dominus: & ista omnia hæreditatis titulo ut peculium filio reliquit. Ergo opes proprias possedit Isaac & Iacob. Deus quoq; per Moysen induxit Israelitas suum populum in terram promissam, in qua sorte tribubus per Iosue distribuit terram, singulis suis assignatis possessionibus: sed & legibus cauit ne illæ confunderentur. In Solomone & Prophetis sunt præceptiones & sententiæ multæ huc pertinentes. Scio autem quid obijciant turbatores, Hæc testimonia è ueteri testamento petita nō constringere Christianos. Et quanquā demonstrare possem

De proprietate rerum.

illos locos in tali nos causa constringere, malo tamen breuitatis gratia certa aliqua testimonia ex noui testamenti scriptis proferre. Laudat dominus Iesus in suis cultoribus opera misericordiae, quod pascunt esurientes, potant sitientes, induunt uestibus nudos, captos & agrotantes inuifunt, & exules atque uagos inducunt in aedes suas. Concedit ergo suis rerum proprietatem, ex qua praestent alijs beneficentiam, & indigentibus quidem. Sublata autem rerum proprietate, sublata erit & beneficentia eleemosynarum. Nam si omnia sunt communia, nihil tu de tuis, sed omnia ex communibus bonis elargiris. Sed Apostolus Paulus ad Corinthios iubet quemlibet apud se eleemosynam reponere, quam ipse accipiat ab eis, ubi Corinthum redierit. Praecipit item tantum quisque conferat, quantum suggerit animi promptitudo, & quantum quisque possidet, non quantum non possidet: neque ita conferat ut accipientibus sit superfluitas, dantibus autem angustia & indigentia. Idem Apostolus, Obsecramus uos fratres, inquit, ut in hoc incumbatis, ut quieti sitis & agatis res proprias, & operemini proprijs manibus uestris, sicuti uobis precepimus: & ut uos geratis honeste erga extraneos, & nulla re uobis sit opus. Huius generis alia ex alijs epistolis proferre possem: sed sufficiunt haec abunde demonstrantia proprietatem rerum hominibus Christianis in utroque testamento esse permissam.

Quomodo apostolorum etate omnia fuerint communia.

Legimus sane in Actis Apostolorum priscis & Apostolicae Ecclesiae indigenis omnia fuisse communia: sed adijciuntur in eodem libro quae declarant qualis illa fuerit communio. Nemo eorum quae possidebat, ait Lucas, suum esse dicebat. En possidebant primi Christiani domos proprias, proprios agros, & proprias opes alias: sed ita interim possidebant, quasi non propriae, sed aliorum quoque & ueluti communes essent, ut nihilominus proprietatis ius maneret apud possessores: sicuti ubi uero postulare necessitas, uendebant agros aut aedes, & inopiae subueniebant egentium. Si uendebant, certe propria erant quae uendebant. Nullus enim uir bonus uendit aliena, sed propria, aut ea quae tanquam propria accepit procuranda. Praeterea S. Petrus totam hanc componens controuersiam, ad Ananiam dicit, Nonne prorsus tibi manebat ager, & uenundatus adhuc in tua erat potestate? Quorsum ergo attinebat metiri spiritui sancto, & fraudare de pretio agri, interim nihilominus quasi totum contuleris pretium confiteri? Potuisset Ananias agrum non uendere, & cum uendiderat, nihilo minus retinere integram pecuniam: non fuisset ea de causa ex sanctorum Ecclesia exclusus uel exturbatus. Liberum ergo erat, ut hodie quoque est, uendere uel non uendere possessiones, & in comune conferre sustentandis pauperibus. Proinde locus ille in Actis Apostolicis non tollit ius proprietatis, neque praecipit communionem talem, qualem Anabaptistae uolunt statuere. Et quoniam intelligo quosdam ualde pertinaciter literae inherere & urgere communionem illam, non pigebit & aliorum de hoc iudicium C. V. recitare, eorum inquam qui ex scripturarum collatione hoc negotium illustrissimum plane reddiderunt. Quod Acto. 2. legitur, Omnes autem qui credebant, erant coniuncti, non est intelligendum, quod monachorum more desertis quisque proprijs aedibus, in communi istis aedibus conuixerint, sed ut statim eodem loco subditur, In templo erant quotidie perdurantes unanimiter: non quod in aedibus suis interea non comederint aut necessitati naturae consuluerint, aut quod uniuersi suas uendiderint aedes, cum mox subiiciatur, Frangentes panes per singulas domos. Si panes per singulas domos fregerunt, respondeant isti per quas domos Christiani Hierosolymis panes fregerint. Per infidelium ne? Non opinor. Ergo per fidelium domos frangebant panem, sumentes cibum. Quomodo igitur uniuersi domos suas

suas uendiderunt aut reliquerunt, quomodo cœnobarum more cohabitarunt? Nihil ergo est aliud quod Lucas dicit, Quotquot crediderant erant coniuncti, quàm erant frequētes in templo. Nihil ergo fuit illa communicatio bonorum inter Christianos aliud, quàm quòd ditiores domos, agros, & prœdia uendebant, ut collatis in unum pecunijs succurreretur pauperioribus, ne famis improbitate adacti ad Iudaismum reuerterentur. Quin plerisq; Actorum locis legimus, Christianos domos & propriarum facultatum sibi retinuisse administrationem, ut Acto. 9. legitur de Tabitha quæ plena fuerit operibus bonis, tunicas & uestes faciēs uindis & pauperibus. 12. cap. legimus Petrum Apostolum eductū ē carcere uenisse ad domum Mariæ matris Ioannis cognomento Marci, ubi multi erant congregati orantes. Non dicit habitantes, sed orantes, ut intelligas in ea domo conuenisse Ecclesiam ad orandum. Rursus cap. 9. manet Petrus apud Simonem coriarium dies multos, utiq; apud hominem Christianum ædes suas retinentem. Et cap. 11. discipuli prout cuiq; suppetebat, subsidiū mittebant fratribus habitantibus in Iudæa. Ecce, Prout cuiq; ait, suppetebat. Quid autem cuiq; suppetere potuisset, si nihil possedissent? 16. cap. Lydia purpuraria cum esset baptizata, dicebat, Si me fidelem domino iudicatis, introite in domum meam, & manete apud me. Cur non dicit, Vendite domum meam; sed, Introite in domum meam; nisi quia ita domum suam possidebat fidelis facta, ut hanc & Apostolis cōmunem faceret? Et cap. 20. gloriatur Paulus se non concupiuisse ullius aurum, argentum, aut uestem pretiosam. Quam haberent autem ista rationem, si nō liceret Christianis retinere rerum suarum possessionem? Et cap. 21. Philippus Cæsariæ domum & quatuor filias habet. Cur domum suam non uendidit? Et Philemon hospes Pauli, non solum domum, sed & seruum habet. Relinquitur ergo pro compertissimo, consilium sancti spiritus minimè fuisse, ut tale uitæ genus statuatur quale isti fingunt, sed ut quisq; domum suam bene gubernet, & fratrum necessitatibus pro sua uirili consulat. Huc pertinent loci quoq; alij, 1. Timoth. 5. ad Titum 2. 1. Thess. 4. & 2. Thess. 3. Et cum in omnibus propè epistolis, parentibus & liberis, coniugibus, dominis & seruis præcipit quid agant, quid aliud quàm administrationem domesticam bene instituit? Hæc hæc hactenus.

Quid quòd diuites fuisse dicuntur multi in Euangelio & in scriptis Apostolorum cultores Dei? Ioseph ab Arimathæa, qui dominum crucifixum sepeliuit, & discipulus Christi fuisse prædicatur. Diuites erant mulieres quæ dominum sequutæ à Galilæa, Domino & discipulis ex suis subministrabant facultatibus. Diues erat Eunuchus reginæ Candaces thesaurarius. Diues fuit Ioppensis Tabitha, quam S. Petrus ē morte reuocauit in uitam, ac diuitias illas suas liberaliter sparserat in pauperes. Diues fuit Lydia purpuraria. Diuites fuere innumeri alij uerè p̃ij & fideles. Ergo quod dominus adolescenti dicit, Si uis perfectus esse, uade uende quæ habes, & da pauperibus, & habebis thesaurum in cœlo, & ueni sequere me: non est generalis lex aut doctrina simplex ad omnes pertinens, sed demonstratio duntaxat, quòd adolescens ille, ad quem hæc dixit, nondum usque adeo perfectè legem absoluisset, sicuti absoluisse se existimabat. Nam arbitrabatur sibi nihil deesse. Pluris faciebat adolescens diuitias suas, quàm Deum & uocē Dei mandantis. Abijt enim tristis, nec fecit quod imperauerat dominus: itaq; declarauit se nondū impleuisse legem. Sed & ex alijs locis colligere possumus Dominum cultores suos non deiecisse ad mendicitatem. Nec pudit Paulum Apostolum leges ferre diuitibus, præscribereq; quomodo se gerant. Diuitibus, inquit, in præsentī seculo, præcipe ne elato sint animo, neq; spem ponant in diuitijs incertis, sed in Deo uiuente,

qui præbet nobis omnia affatim ad fruendum, ut benefaciant, ut diuites sint operibus bonis, ut faciles sint ad impartendum, libenter communicantes, recondentes sibi ipsis fundamentum bonum in posterum, ut apprehendant uitam æternam. Huc iam pertinet admonitiones saluatoris dicentis, Non potestis Deo seruire & mammonæ. Item, Diuitiæ spinæ sunt, quæ præfocant semē uerbi dominici. Item, Amen dico uobis, diues difficilē intrabit in regnum cœlorum. Facilius est camelum perforamen acus transire, quàm diuitem in regnū Dei ingredi. Et ut animi diuitum non sunt deiciendi aut adigendi ad desperationem, quasi diuites saluari non possint; ita rursus admonendi sunt periculorum, ne securi indormiant diuitijs, & seducantur à satana, abutanturq; diuitijs, quin illis potius rectè utantur iuxta canonem apostolicum iam iam recensitum. Damnauit Gangresis, sanè antiqua Synodus, docentes diuites fideles qui non omnibus renunciant quæ possident, spem apud Dominum non habere. S. Augustinus in Catalogo hæreticorum ponit & numerat Apostolicos. Hi arrogantissimè seipso hoc nomine ornantes, non recipiebant in communionem suam, utentes cōiugibus & res proprias possidentes. Addit, Ideo isti sunt hæretici, quoniam se ab Ecclesia separantes, nullam spem putant eos habere, qui utuntur his rebus quibus ipsi carent. Encratitis isti similes sunt. Nam & Apotactitæ appellantur. Et diuitiæ quidem, per se, non sunt malæ, imò sunt dona Dei. Abusus reddit eas prauas. Sed de usu postea dicitur.

*Falsa doctrina
de Diuitijs.*

*De iustè paran-
dis facultatibus*

Sequitur iam consideratio de parandis facultatibus siue rebus ad uitam familiamq; sustentandam necessarijs. De acquirendis rebus copiosissima est apud Iurisperitos disputatio. Tradunt enim res acquiri Iure gentium & Iure ciuili. Iure gentium, ut Occupatione, Captiuitate, Inuentione, Natiuitate, Alluione, Specificatione, Accessione, Confusione, Aedificatione, Plantatione, Satione, Cultura, Traditione, Iure ciuili, ut Vscupatione, Præscriptione, Donatione, Testamento, Legato, Fideicomisso, Successione, Arrogatione, Adiectione. De quibus ordine differere nimis operosum, & c. v. non admodum utile foret. Attemperabimus ergo hunc nostrum sermonem nostris moribus, proferemusq; nobis maxime necessaria. Ante omnia claudendus est oculus nequam, ne seducamur nimia cupiditate. Lucerna corporis, ait in Euangelio dominus, est oculus. Si igitur oculus tuus simplex fuerit, totum corpus lucidum erit. Quod si oculus tuus malus fuerit, totum corpus tuum tenebrosus erit. Mens hominis fide imbuta & concupiscentijs non infecta & corrupta, lumen præfert omnibus actionibus hominis. Si uerò mens fuerit corrupta, corruptæ erunt actiones hominis omnes. Cōpescendæ sunt ergo fide & recta opinione nimia cupiditas auaritiæq; quæ existit ex diffidentia, & omnia consilia, dicta & facta hominis cōtaminant atq; prophanant. Ut autem compescere ualeamus, cœlesti gratia opus est, quam pius quisq; pijs ambit precibus. Neesse est doctrinam de his saluatoris nostri, & doctrinam sanctorum Apostolorū eius, semper habeamus ante oculos, adeoq; pectori nostro teneamus insculptam. Neq; illa immensa est. Tres recitabimus charitati uestre locos, duos quidem ex Euangelio, & tertium ex Paulo: in quibus uelut in compendio absolutissimo habeatis comprehensa quæcūq; requiri possunt à ueris Dei cultoribus, In Euangelio secundum Mattheum dicit dominus, Ne reponatis uobis thesauros in terra, ubi ærugo & tinea corrumpit, & ubi fures perfodiūt ac furantur: sed recondite uobis thesauros in cœlo, ubi neq; ærugo neq; tinea corrumpit, & ubi fures non perfodiunt neq; furantur. Nam ubi fuerit thesaurus uester, ibi erit & cor uestrum. Nemo potest duobus dominis seruire. Aut enim unum odio habebit, & alterum diliget: aut unū adherēbit, & alterū contemnet. Non potestis Deo seruire & mammonæ.

monia. Propterea dico uobis, ne solliciti sitis pro uita uestra quid edatis & quid bibatis, neque pro corpore uestro quibus induamini. Nonne uita pluris est quam cibis, & corpus pluris quam indumentum? Intuemini uolucres cœli: quia non ferunt, neque metunt, neque conuehant in horrea, & pater uester cœlestis alit illas? Nonne uos longius præcellitis illas? Quis autem ex uobis sollicitè cogitando potest addere ad staturam suam cubitum unum? Ac de indumento quid estis solliciti? Considerate lilia agrî quomodo crescant: non laborant neque nent: attamen dico uobis ne Solomonem quidem in uniuersa gloria sua sic amictum fuisse ut unum ex his. Quod si gramen agrî quod hodie cum sit, cras in clibanum mittitur, Deus sic uestit, an non multo magis uos, ô parum fidentes? Ne sitis igitur solliciti, dicentes, Quid edemus, aut quid bibemus, aut quo operiemur? Nam ista omnia gentes exquirunt, Nouit enim pater uester cœlestis uos opus habere his omnibus. Quærite autem primum regnum Dei & iustitiam eius, & hæc omnia adiicientur uobis. Ne sitis igitur solliciti in crastinum. Nam crastinus dies curabit quæ sua sunt. Suficit sua diei afflictio. Hæc Dominus noster apud Matth. in cap. 6.

Rursus in Euangelio secundum Lucam in cap. 12. dicit idem Dominus noster, Videte & cauete ab avaritia: quia non in eo ut supersit cuiquam, uita eius est ex facultatibus ipsius: id est, uita non opus habet superfluis: uel, nullius uita opus habet ut illi supersit aliquid. Dixit autem hanc illis similitudinem, Hominis cuiusdam diuitis uberes fructus ager attulit, & cogitabat apud se, dicens, Quid faciam, quia non habeo ubi recondam fructus meos? Et dixit, Hoc faciam, destruam horrea mea & maiora extruam, & illuc congregabo omnes prouentus meos, & bona mea: & dicam animæ meæ, Anima habes multa bona reposita in multos annos requiesce, comede, bibe, gaude. Dixit autem illi Deus, Stulte, hac nocte animam tuam repetunt abs te: quæ uerò paraasti cui cedent? Sic qui recondit sibi ipsi nec est erga Deum diues.

Præceptorem & magistrum in omnibus sequutus S. Paulus uas electionis clamat, Est quæstus magnus pietas cum animo sua sorte contento. Nihil enim intulimus in mundum, uidelicet nec efferre quicquā possumus: sed habentes alimenta & quibus tegamur, his contenti erimus. Cæterum qui uolunt ditescere, incidunt in tentationem & laqueum & cupiditates multas stultas ac noxias, quæ demergunt homines in exitium & interitum. Siquidem radix malorum omnium est avaritia siue studium pecuniæ: quam quidam dum appetunt, aberrauerunt à fide, & seipsos implicauerunt doloribus multis. Tu uerò homo Dei ista fuge, sectare autem iustitiam, pietatem, fidem, charitatē, patientiam, mansuetudinem, &c. Quicumque ergo laboribus aut negotiatione uictum & necessaria uitæ suæ & suorum quærere instituit, hisce diuinis præceptis ceu theriaca ac pharmaco quodam, animum suum præmuniat contra uenenatas cupiditates & avaritiam pestilentissimam.

Vbi uerò animum antidoto Euangelicæ & Apostolicæ doctrinæ præmuniuit, Labor commen-
adiiciat mox animum ad laborem & negotiationem. Deligat autem quisque nego-
tiationem utilem & honestam, non curiosam, non ulli damnosam. Otium denique
fugiat ut pestem. Audiamus rursus hac in causa uerba planè diuina Apostoli, Præ-
cipimus uobis fratres per nomen Domini nostri Iesu Christi, ut subducatis uos ab
omni fratre, qui inordinatè se gerit, & non iuxta institutionem quam accepit à no-
bis. Etenim cum essemus apud uos, hoc præciplebamus uobis, ut si quis nollet o-
perari, is nec ederet. Audimus enim quosdam uersantes inter uos inordinatè, ni-
hil operis facientes, sed curiosè agentes. Iis autem qui sunt eiusmodi, præcipimus
& obsecramus per Dominum nostrum Iesum Christum, ut cum quiete operantes

Labor commen-
datur, otium
damnatur.

suum ipsorum panem edant. Damnata sunt omnibus seculis & apud omnes homines cordatos & otia & curiosa negotia. Hesiodus dixit,

Illi pariter indignantur & dii & homines, quisquis otiosus

Vixerit, fucis absq; aculeis similis studio,

Qui apum opus sine labore comedunt.

Sophocles item.

Nil boni, ait, parit otium inane.

Curiosa negotia.

Ex hereditatibus diuites.

An contractus & commercia licita?

Lucrum ex negotiatione.

Negotiationes sunt uariae.

Deus enim otiantibus haud assistit. Porro curiosa negotia, artes sunt malè feriatum & malè ingeniosorum hominum, quibus proximis graues sunt & imponunt hominibus, exercentes quidem negotiationem aliquam, sed illegitimam & alijs inutilem, sibi uerò utilissimam: cuius quidem generis usurarij, monopolæ, & propolæ, alijsq; negotioso otio se saginantes habent artes plurimas. Qui uerò non laboribus suis uel negotiatione æqua, sed per hereditates acceptas diuites sunt, cogitent apud se quo pacto paratæ sint opes quæ iam ad ipsos per hereditatē deuolutæ sunt: & si intelligunt se hæredes esse opum iniustarum, sint benefici, nec conduplicent malum, ut quod malè partum est, iniquissimè possideant & sceleratius multò concoquant. Ne fidant istis opibus, neq; sint otiosi, agant semper aliquid honesti. Ferè tamen fit, ut malè partum malè dilabatur. Optimum ergo fuerit uel boni, iusti & benefici hominis esse hæredem, uel laboribus proprijs & negotiatione iusta parare facultates, quibus tuam & familiæ uitam sustentantes.

Videō autem hîc hæere multos, addubitareq; primò, an contractus & commercia licita sint, deinde quæ nam negotiatio ex omnibus maximè conueniat homini pio. His pauca hæc expendenda propono. Principiò constat contractus ferè uoluntarios esse commerciaq; spontanea, ut quisq; hîc quod uelit, quod conducat & maximè deceat deliberare & eligere possit. Huius enim generis sunt commutatio rerum, fideiussio, locatio, cōductio, depositio, mutuum, pactio, uenditio, emptio, & alia his simillima. Hisce rebus, sicut ipsa experientia euincit, carere non possunt homines etiam sanctissimi, donec in hoc mundo uiuunt. Nec legis Dominus ullibi prohibuit huiusmodi commercia & contractus, imò format illos, instituens rempub. Israelis, ut agnoscere oporteat illas esse ordinationes diuinas: abusus, dolus, impostura & confidentia in istis prohibentur uerbo Dei. Ergo si quis ijs utatur moderatè, neq; innitatur & inhæreat, non peccat. Audiamus denuo Apostolum clamantem, Qui habent uxores, sint tanquam non habeant: & qui plorant, tanquam non plorent: & qui gaudent, tanquam nō gaudeant: & qui emunt, tanquam non possideant: & qui utuntur mundo hoc, tanquam non utantur. Præterit enim habitus huius mundi. Parī modo nullibi legimus prohibita esse lucra iusta & æqua. Imò benedicit Dominus laboribus & negotiationibus suorum, ut quemadmodum in uirtutibus ita pariter crescant & in opibus. Exemplum huius præbent Abraham, Isaac & Iacob. Et Apostoli non iubent nos nullum sperare lucrum, sed nolunt nos turpis lucri esse cupidos.

Negotiationes quidem hominum sunt uariæ. Ac uarijs quidem multisq; indigent res hominum. Est negotium siue labor crassior, qui manibus roboreq; corporis magis quàm arte, quamuis non sine ingenio, perficitur. Est & ingenij labor subtilior, qui tametsi extra corpus & uires hominis non fiat, ingenio tamen magis quàm robore perficitur. Prioris generis sunt artificia omnia, siue artes, ut uocant, mechanicæ, quibus annumeramus mercaturā, agriculturam & pecuariam. Posterioris generis sunt studia literarum, medicinæ, iurisprudentiæ, præsertim theologiæ, philosophiæ quoq; denique gubernatio. Ac patriarchæ quidem homines innocentissimi & excellentissimi, ferè fuerunt agricolæ, aut exercuerunt pecuariam.

euariam. Exempla sunt plurima, Abelis, Noe, Abrahæ, Isaac, Iacobi, Iob, & aliorum. Leuitæ & prophetæ uixerunt ex literarum studio siue ministerio ecclesiastico. Mercatura nullibi damnatur in sacris literis: damnantur autem mercatores Deum non timentes & requirentes, homines uersipelles ac impostores. Nam Iacobus Apostolus Domini, Age nunc qui dicitis, inquit, Hodie & cras eamus in hanc ciuitatem, & transigamus ibi annum unum, & mercemur & lucrum faciamus (qui ignoratis quid futurum sit postero die. Quæ est enim uita uestra? Vapor enim est qui ad exiguum tempus apparet, & deinde euanescit) pro eo quod dicere debueritis. Si Dominus uoluerit, & si uixerimus, faciamus hoc aut illud. Nec uituperatur in Actis Apostolorum purpuraria illa quod uenderet purpuram. Nam in encomio probæ matrisfamilias, laudatur materfamilias ex mercatura. Ex gubernatione uixerunt optimi quique reges, Ioseph Ægypti saluator, & Daniel satrapa Babylonis & Mediæ. Nam ut multa sunt in corpore hominis membra, & uariis est usus membrorum, omnia tamen in summa concordia tendunt ad conseruationem incolumitatis corporis: ita uaria ordinauit Deus negotia & artificia, quæ tamen omnia seruire uult incolumitati reipublicæ.

Prouerb. 31.

1. Corinth. 12.

Iam uero quæ ex his omnibus negotiationibus homini pio amplectenda aut suscipienda sit, non est meum pronunciare. Expendat quisque apud se quæ attulimus hucusque, deinde exploret seipsum, ad quas res, aut ad quæ negotia animus maximè propendeat, ad quæ sit utilis & idoneus: inspiciat item diligenter quæ artes sint maximè simplices & secundum naturam, quæ item quàm minimum cognitionis habeant cum dolo & impostura, aut quæ minimè abstrahant à Deo & iustitia. His expensis deligat quisque quod putauerit maximè cōuenire et salutare esse, cum animæ tum corpori suo. Non possumus omnes agros colere, nec congruunt omnibus literarum studia, pauci gubernant rempublicam, nec artificiis exercendis omnes ubique idonei sunt. Habet suum quisque genium, habet inspirationem à Domino, habet amicorum consilia & auxilia, habet occasiones uarias, habet regulam uerbi Dei: his acquiescat, ut primas interim tribuat præceptionibus diuinis.

Quæ maximè negotiatio amplectenda pio uiro.

Cæterum laboranti iam & negotianti, post recitatos canones necessarij sunt & sequentes. Principio enim cauenda erit cuique profusio siue luxuria in cibo, potu, uestibus, cultu corporis & ædificijs, fugiendi sumptus inutiles ac uani. Nam Dominus uult unumquemlibet suas retinere non prodigere res. Odit & execratur Dominus luxum & inanes sumptus siue superbiam. Præterea qui sui profusus est, aliena ferè appetit: unde innumera exoriuntur mala, furta, insidiæ, doli, imposturæ, adde & cædes ac seditiones. Deinde strenuus sit qui laborat aut negotiatur, sit per omnia uigilans & laborum tolerans, non segnis, mollis, iners. Fideliter & diligenter agat omnia. Displicet Deo ignauia & inconsideratio. Displicet stupina rei familiaris negligentia. Laudat scriptura fideles laboratores, & negotiatores probos & industrios. Audiamus quæso auream sapientissimi mortalium Solomonis doctrinam ita dicentis, I piger ad formicam, inspicite uias eius, ut sapiens fias. Ea enim cum neque principem, neque exactorem aut ducem habeat, tamen æstate cibum suum parat, & in messe alimentum suum comportat. Quandiu piger dormies? & quando à somno tuo surges? Paululum dormiendum: paululum dormiendum: paululum complicandæ manus ad dormiendum. Interim uero ceu uiator ueniet egestas tua, & inopia tua ceu uir scuto munitus. Rursum clamat Dauid in Psalmis, Beati omnes qui timent Dominum, qui ambulant in uis eius. Labores manuum tuarum manducabis, beatus es, & bene tibi erit. Quid quod Dominus Deus Adamum in paradiso & felicissimo uitæ statu noluit

Cauenda profusio.

Laborandum fideliter.

otiosum uiuere: Nam cultum horti ipsi iniunxit. Otiosi ergo homines omnium mortalium infelicissimi sunt: ita & ignaui nō aliud sunt, quā telluris inutile pondus. Postremō curet negotiator ne cui damnum det sua negotiatiōe. Regulam hīc sibi praefigat in omnibus negotiis, Quod tibi uelis fieri, feceris alteri: & quod tibi nolis fieri, alteri ne feceris. Porro datur damnum dupliciter, nempe retinendo uel auferendo: uidelicet si retineas quod debes, & tuū non est: uel auferas quod alterius est, & quod tibi non debet. Verū de damno in retinendo aut auferendo dicam iam paulō fusius, ut ex his rectius intelligatur mandatum Domini, Nō furtum facias, & quā nam sint furti species.

Furtum.

Aiunt furtum esse fraudulosam contrectationem rei alienae, mobilis & corporalis, quā sit inuito domino, lucri faciendi gratia, uel ipsius rei, uel etiā usus eius, possessionisue. Proinde furiosum non dicunt committere furtum: quod in ipso nulla sit euidentis doli machinatio. Neq; ullum furti argui posse tradunt, qui per errorem nō malitiam, alienam rem abstulit pro sua. Cāterum contrectare dicitur non is solum qui manibus rem apprehendit, sed qui quouis modo eam subtrahit iusti possessoris dominio. Inuito autem domino dici aiunt, non tantū si uiolenter ipsi eripiatur, sed etiā nescienti: aut si sciat, non possit tamen prohibere: aut cū possit, certas ob causas nolit. Nec temerē adiungitur furtum fieri lucri gratia. Nam si quis ludens, aut aliam ob causam honestam aliquid auferat, minimē furtum committit. Furti uerō genera duo faciunt, Manifestum, utpote in quo deprehenditur fur: & non manifestum, nempe si post furtum furti conuincatur. De his copiosē differitur Digestorum lib. 47. tit. 2. & c. Nos redimus ad propositionem nostram explicandam.

Damnum datur retinendo uarijs modis.

Damnum das retinendo, quando in contrahendo non iusta titeris mensura, non pondere iusto. Huc pertinet collybus iniustus & fraudulentus. Collybus autem, ait Pollux, est permutatio pecuniae. De his recitabimus modō praecepta & sententias Domini Dei nostri. In Leuitico legis, Ne feceritis quidpiam iniqui in iudicio, in dimensione, in pondere & mensura. Bilanx iusta, lapides iusti, epha (modium uel quartale, mensura aridorum) & hin iustum (liquidorum mensura sextarium uel cyathus) iustum sit uobis. Ego Dominus Deus uester, qui eduxi uos e terra Aegypti. Et in Deuter. legimus, Ne sint tibi in sacculo tuo diuersi lapides, magnus scilicet & paruus. Ne sint tibi in domo tua diuersa epha, magnum scilicet & paruum (ut uidelicet in recipiendo aut emendo utaris magno, in erogando autem uel uendendo, paruo) sed pondus æquum & iustum sit tibi: & epha æquum & iustum sit tibi, ut prorogentur dies tui super terram, quam Dominus Deus daturus est tibi. Nam abominatio Domino Deo tuo est, quicumq; ista facit, & quicumq; iniquitatem perpetrat. Ad hanc pertinet hanc Solomonis sententia ex Proterbijs, Diuerso pondere uti, aut diuersa mensura, ambo hanc detestatur & abominatur Dominus. Quid autem grauius & horribilius audiri, imō & cogitari poterat, quā hominem esse abominationem Deo? Apud Micheam in 6. cap. minatur praeterea Dominus uarias & graues poenas, quas irrogare uelit iniusto pondere & iniqua utentibus mensura. Quin ergo fugiamus iniquitatem & iniustitiam, ac eligamus potius felices quā infelices esse, audiamusq; ipsum Dominum dicentem, Mensuram bonam & pressam & concussam & superfluentem dabunt in sinū uestrum. Eadem quippe mensura qua metimini, alij metientur uobis. Persuasissimum ergo habeamus, fraude & furto partas res neque diu florituras, neque futuras nobis salutares.

Alienatio & fraus.

Rursus retinendo dant alijs damnum, quotquot hereditates alijs debitas occupant

cupant: qui frustrantur & fallunt in contractibus, in pactis aut conventionibus: qui simulant se dare quod dolo malo aut mutant aut apud se retinent, corruptum autem aut uitiosum dant. Ea reuera hæc deceptio & fraus est siue dolus. Constat autem alienarum hæreditatum possessores, & breui uita, & nulla uti fortuna felici. De fraudulentis pronunciat Solomon, fraudulentos nullum inuenturos lucrū. Lucrum enim iniustum utcunque sit grande, detrimentum tamen uerius quàm lucrum uocari meretur.

Huc pertinent res inuentæ, quas tu repetenti negas, quasi non inueneris uel *Inuenta.* tui sint iuris. Huc pertinet depositum & pignus retentum. Deposuit apud te, qui *Deposita.* peregrè abiit, pocula argentea & auri pondo, quod sperauit ista apud te tutò late- re: tu uerò redeunti & reposcenti depositum negas, suffuratus es, præterea fidem amici fefellisti & conduplicasti peccatum. Oppignerauit uir pauper tibi rem sibi *Pignus.* charam & pretiosam, quam cum repetit annumerata tibi pecunia tua quam mutuò à te acceperat, negas tu pignus, & confingis calumnias, uterisq; dolo malo ut pignore fraudes pauperem: suffuratus es pignus. Tulit præterea Dominus alias de pignore accipiendo leges populo suo huc quoq; pertinentes. In Deut. enim dicit, Nemo pignoris loco accipiat inferiorem & superiorem molarem. Nam is uitam oppignerauit. Id enim perinde est ac si dixisset, Ne pignoris loco id acceperis à proximo tuo, quo sibi & suis uictum quarit ac parat. Vitam enim seu uictum illi sustulisses. Et mox, Cum mutuò dederis aliquid proximo tuo, ne ingrediaris in domū eius ut pignus inde tollas: sed sta foris, ut uir ille ad te pignus proferat. Prohibet truculentiam, & ne diuites sint crudeles in scrutandis pauperum domibus, neue sint morosi in recipiendo pignore. Iterum uerò addit Dominus, Quod si uir huiusmodi pauper est, non dormies in pignore eius: omnino reddes illi pignus cum Sol occidit, ut is dormiat in uestimento suo, beneq; & fausta tibi imprecetur: & id erit tibi iustitia coram Domino Deo tuo.

Postremò grauissimum proximo damnum retinendo dant, quicunque laboris *Mercēs detenta laboris.* mercedem detinent. Detinetur ea dupliciter. Vel enim nunquam soluis mercedem: Vel soluis grauatim, differs diu nimis, sed & de mercede aliquid detrahis. Cæterum uocabulum mercenariorum patet & ipsum latissime, & extendit se ad omnes quoq; artifices. Vulgus diuitum utitur ferè opera artificum, & mercedem consignare iubet in codices rationarios, interim cum istos egere intelligit, nihil tamen numerat, imò postulantibus debitum sæuis dictis excipit & uacuos dimittit. Interea superbiunt stulti & impij diuites, & luxu prodigunt res suas (imò non iam suas sed alienas quoq; turpissime. Sed audiamus iudicia & leges Dei nostri super hac re pronunciatas. In Deut. sic legimus, Ne neges aut uir retineas mercedē mercenario pauperi & inopi, siue sit de fratribus tuis, siue peregrinis tuis qui sunt in terra tua atq; intra portas tuas. Die suo dabis ei mercedem suam, neq; Sol occidat super eum: quoniam pauper est, & ad mercedē tollit animum suum (id est, spem uitæ collocat in eam, utpote uicturus ex ea) ne contra te ad Dominum clamet, & cedat tibi in peccatum. Cum hac diuina lege congruunt hæc Apostoli Iacobi uerba, Ecce merces operariorum, qui messuerunt regiones uestras, quæ fraude non reddita est à uobis, clamat, & clamores eorū in aures Domini sabaoth introierunt. Quid horribilius audiri poterat: clamat merces detenta laboris, & clamat quidem in cælum: adde, & ingreditur clamor in aures Dei iustissimi, seuerissimi, potentissimiq;. Quid aliud iam expectent fraudatores illi quàm pœnam grauissimam? Rectissime ergo breuissimeq; hoc negotiū concludens & omnibus optime consulens Tobias, Ne moretur, inquit, apud te ullius hominis, cuius opera usus fueris,

DE PRAECEPTO DECALOGI VIII.

merces: sed eam protinus illi depende. Etenim tibi quoque Deum colenti gratia referetur.

Dammum quod auferendo datur.
Furtum.

Negare officium debitum.

Rapina et deceptio.

Alea.

Vsura.

Sequitur membrum alterum, damnum uidelicet quod auferendo datur: id quod multiplex est. Primum autem locum habet ipsum furtum, (de quo & paulo ante diximus aliquid,) quod non in pecunia duntaxat ablata committitur, sed in mercibus quibusuis, in agris, in terminis transponendis, & in iure cuiusque quod transfertur, negatur, auferitur, aut malitiose, contraque & citra conscientiam & consensum alterius, hoc est, iusti possessoris, differtur. Nam in lege Leuit. 19. ait Dominus, Non furabimini, ne mentiamini, nemo dolo malo agat cum proximo suo. Et Paulus ad Ephesios ait, Deposito mendacio, loquamini ueritatem quisque cum proximo suo: quoniam sumus inuicem membra. Qui furabatur non amplius furetur, magis autem laboret operando manibus quod bonum est, ut possit impartiri ei qui opus habuerit. Hac extendere licet ad omnia penè hominis officia. Quicunque enim debitum negat officium, nec facit quod facere iure deberet, in hoc mandatum delinquit: ueluti si pater suae familiae suum neget officium: rursus si familia rem familiarem dissipet, & patrem familiars ritè inuigilantem rei domesticæ decipiat, & prodigendo & suffurando perdat. Item si dominus aut herus (quamquam hac referri possint ad titulum de dato damno retinendo) nimis sit rigidus colonis suis: aut si coloni otiosi deuorent substantiam domini, uel negligant agriculturam, & luxu prodigant res. Ita peccat seruus in hoc præceptum, si non omnibus modis omnes res heri sui curet & prouehat fidelissimè. Pari modo & in suis officijs peccant ancillæ contra dominas. Certè Apostolus Paulus ad hoc mandatum respiciens præcipit Tito & ait, Seruos hortare ut suis dominis pareant, in omnibus illis placeant, nec sint responsatores, aut suffurantes, sed fidem omnem præstent optimam, ut doctrinam seruatoris nostri Dei ornent in omnibus. Paria inculcat idem Apostolus ad Ephes. 6. Colos. 3. 1. Tim. 6. Hic enim locum habet doctrina de officijs dominorum & seruorum (quod uidelicet attinet rem familiarem) & si quid aliud est huius generis.

Huc pertinent Rapina & Fraus, quarum utraq; latissimè patet. Fraus immensa est: nam iniquitas hominum abyssus est, artes hominum multiplices ac uariæ sunt, quas nemo facile enumerauerit omnes. Et Rapina uim habet non semper armata, sed & ingenio & lingua instructa: nec agunt in syluis duntaxat & campis raptores, sed in medijs quoque urbibus. Eripis res suas proximo tuo, titulo aut sub specie iuris, nempe dum eloquentia, muneribus, aut alijs artibus extorques apud iudices sententiam pro tua iniquitate, rapuisti. Sunt qui donationis titulo integras hæreditates iustis præripiunt hæredibus. Hæ & similes artes uel imposturæ, partim sub rapinam, partim sub fraudes, omnes autem sub furtum ueniunt.

Alea quamuis habeat consensum mutuum ludentium, quia tamen quisque alteri suas res eripere ardet, diuisoremque fortunarum cæcam fortunam, id est, talos aut chartas lusorias constituit, meritò alea damnatur à theologis. Et Iustinianus Imperator, uti extat Cod. lib. 3. tit. ultimo, commodis subiectorum prospiciens, decreuit ut nulli liceat in publicis uel priuatis domibus ludere: quamuis enim alearum lusus antiqua res sit, prodixisse tamen in lachrymas: multos enim perdere omnem substantiam propriam, tandem & in blasphemias in Deum prorumpere. Alioqui nemo ignorat ingenij & corporis exercitia, à ueneno lucris aliena, neque implicita damno proximi & proprio, non esse illicita.

Vsura est cum alteri concedis usum tui peculij, utpote agri, uel domus, uel pecuniæ, uel alterius alicuius rei, unde in annum percipis fructum aliquem. Ha-

bes

bes enim uillam, prædium, agros, prata, pascua, uineas, ædes, pecunias, quas elocas alteri, sub certa pactione fœnoris ad te redeuntis. Hic contractus, hæc pactio per se non est illicita aut scripturis sanctis damnata. Et Usuræ uocabulum inhonestum non est, abusus reddidit inhonestum, ut non immeritò hodie omnibus sit abominandum. Damnatur enim usura in scripturis, quatenus coniungitur cum iniquitate & perniciæ proximi. Quis enim prohibeat elocare usum agri, domus, pecuniæ, & inde æquum aliquem fructum percipere? Emptio enim, locatio, & similes contractus liciti sunt. Et ut dantis est benefacere: ita accipientis est beneficium non gratis usurpare in dantis detrimentum. Beneficij meritalia est consideratio. De ea legis Lucæ sexto capite, Si mutuum dederitis his, à quibus speratis, &c. Et Iurisperiti de his ita constituunt, non esse usuram, quando pacto de retro uendendo creditæ pecuniæ apponitur aliqua pensio extra sortem danda à debitore: quia mutuum esse desinit, quod ita alterius usui subijcitur, ut debitore nolente, non liceat creditori illud repetere, donec ipse pensionem, ad quam se debitor astrinxit, soluat. Nam tale creditum transit in contractum emptionis. Dicunt ergo Usuram in solo mutuo (quod debet esse gratuitum) committi, non in reliquis contractibus. Sit in hisce commercijs utriusque præfixa regula, Quod tibi uelis fieri, alteri feceris: & quod tibi nolis fieri, alteri ne feceris. Et illa Apostoli, Nemo circumueniat in negotio fratrem suum. Scio quid adferatur de pecunia, hanc non ita ut agros & uineas manere, sed usu consumi, ergo nullo iure posse ullum à pecunijs fructum percipi. Sed si quis alteri det pecuniam, qui prædium aut uillam, agros aut uineas ea pecunia sibi comparet, negotietur denique & lucretur, non uideo cur uir bonus non fructum æquum de pecunia elocata ueluti ex fundo accipere possit. Potuisset qui elocauit pecuniam, emere prædium, ex quo totus ad ipsum ementem redisset fructus: iam uerò alteri concedit pecuniæ usum ad luculentam istius utilitatem. Parat is sibi accepta mutuò aut per contractum data pecunia peculium, ex cuius prouentu totam suam alit familiam, portionem interim condictam ei pendit, à quo accepit pecuniam, quam cum restituit integram, ius proprietatis redemit, ac se à pensione annua liberauit. In hac pactione nemo opinor dixerit usura opprimi pauperem, cum ipsa res potius clamet, pauperem usura tali iuuari. Usura ergo prohibetur in uerbo domini quatenus mordet (ut scripturæ uerbo utar) proximum, quatenus ei nocet & ipsum perdit. Sic enim dicit dominus in Leuitico, Si ad inopiam fuerit redactus frater tuus, nuda ueritque manus eius tecum (id est, si facultas eius apud te deficere incœperit) siue aduena fuerit, siue inquilinus, corrobora eum ut tecum uiuat. Ne acceperis ab eo fœnus, neque plus æquo: sed time dominum ut tecum uiuere possit frater tuus. Ne des illi pecuniam tuam ad fœnus, neque des illi alimentum tuum ad nimium siue excessum, siue superabundantiam. Ego dominus Deus uester. Improbat ergo dominus omnes auarorum & impostorum artes, quibus non tantum modum excedunt in fœnore exigendo, sed in hunc maximè finem pecunias & res suas elocant alijs, ut hac ueluti occasione rebus suis omnibus exuant. Artes usurariorum iniquissimas nemo opinor paucis exposuerit, cum in diem exoriantur nouæ. Recitabo ergo hic domini iudicium contra usurariorum aliquot in mutuando, locando, diuendendoque scelestissimas artes atque sordes, ut quisque deinde similiter iudicet de similibus. Ita loquitur propheta Amos capite 8. Audite istud uos qui anhelis absorbetis pauperes, & afflictos è terra exterminatis, dicentes, Post mensum uenum exponemus annonam, & exacta hebdomade aperiemus frumentum, epha diminuemus, siclo autem addemus, & bilancem dolo deprauabimus, ut com-

paremus nobis tenues argento, & inopem pro pari calceamentorum, deinde & quisquilias frumento distrahemus. Iurauit Dominus per excellentiam ipsius Iacob, Non perpetuò obliuioni tradam omnia opera eorum. An non huius rei gratia terra contremiscat? an non omnis inhabitans eam lugeat? Quin uniuersa ea ut fluuius intumescet, &c.

Contra usurarios.

Proinde ne ira Dei in regna & respublicas propter iniquas usuras & perditos perdentesque usurarios desaxiat, sancti magistratus erit coërcere usurarios æquis legibus, constituereque pro temporum & locorum, personarum & rerum qualitate, quod æquum, iustum & sanctum fuerit, ne in mutando, elocando, emendo & uendendo usurarii miserum opprimant populum, sed æquitas & iustitia seruetur in omnibus. Habet huius sui officij elegans exemplum magistratus in Nehemia coërcente auaritiam, crudelitatem, & summam iniustitiam usurariorum & oppressorum miseræ plebeculæ Israeliticæ. Extat fuscè descriptum in historia Nehemiæ cap. 5. Iniquis ergo & iniustis negotiatoribus & usurarijs eorumque auaritiæ nolo his patrocinari: sed dico illos uictitare sanguine & ex uisceribus ciuium: & certè damnandos fore, nisi pœniteat eos sceleris. Obijcio illis hoc ueluti naturæ decretum, Quod tibi nolis fieri, alteri ne feceris. Veniebant & publicani ad Ioan- nem ut baptizarentur ab ipso, & dicebant, Magister quid faciemus? At ille dixit eis. Nihil amplius quàm quod constitutum est uobis exigatis. Publicani uictitabant ex publicis illis uectigalibus, quæ redemerant certa & præsentī pecuniā à Romanis. Publicanos autem hos non iubebat relinquere negotiationem, sed constituto pretio esse contentos. Ita usurarijs et negotiatoribus omnibus idem inculco, Nihil amplius quàm quod constitutum est uobis exigatis. Quod si certa constitutione aut ordinatione magistratus caretis, age ualeat apud uos æquitas, humanitas & charitas, ualeat lex communis, Omnia quæcunque uolueritis ut faciant uobis homines, sic & uos facite illis. Si oculus tuus simplex fuerit, ait dominus, totū corpus lucidum erit: quod si lumen quod est in te, tenebræ fuerint, ipsæ tenebræ quantæ?

Sacrilegium.

Sacrilegium direptio est rerum sacrarum, Deo inquam dicatarū. Habet enim Ecclesia Dei opes uel facultates sacras, quibus partim doctrinā synceram seu ministerium Ecclesiæ sanctum, partim pauperes Ecclesiæ fideles sustentet. Habet item opes ad sarta tectaque templi ædiumque sacerdotalium, & xenodochiorum aut hospitalium: denique ad subuentionem communem in publicis & grauibz calamitatibus. Sacrilegi ergo sunt, qui facultates Ecclesiasticas à legitimo & sacro usu ad prophanum & impium transferunt, illasque prodigunt uenationibus, pompis, superstitionibus, scortatione, alea, poculis & luxu. Quibus rebus hodie grauius peccatur cum ab episcopis tum magistratibus. Nec est quod abusum illū foedissimum, aliud consequatur quàm ingens aliquod infortunium, nec una aliqua aut modica calamitas. Nam ut in pauperibus ipse Dei filius Christus dominus noster spoliatur atque defraudatur: ita interit doctrina pietatis, pereunt studia honesta, ac destituuntur oues Christi bonis & fidelibus pastoribus, fiuntque præda lupis & latronibus. Cæterum inter sacrilegos minimè recensendi sunt procures & antistites sancti religionis, quales fuerunt aliquot reges Iuda, & in primis Ezechias, ac aliquot ueteris Ecclesiæ episcopi uel pastores, qui grauibz bellis atterentibus respublicas uel regna, aut fame, uel alia calamitate publica premente, imò & cōficiēte miseros mortales, thesauris illis sacris minimè pepercerunt, sed euacuatis scrinijs subuenerunt sacra pecuniā oppressis. Fuissent autem enormes sacrilegi, si inanimatis uasis pepercissent, animata autem ab interitu non uindicassent. Elegans est hac

hac de re locus apud D. Ambrosium Officiorum lib. 2. cap. 28. Sunt & exempla egregia in Ecclesiastica historia. Inter sacrilegos commemorantur à theologis & Simoniaci, Chanangi inquam, id est, mercatores rerum diuinarum & Ecclesiastica-
rum. Talis enim refertur fuisse horum patriarcha Simon Magus in Actis apostolorum. In iure ciuili qui ambitiose suffragia hominis clancularijs largitionibus emunt, ut ipsis publica munera & dignitates conferantur, incidunt in crimen ambitus, & centum aureis cum infamia puniebantur quondam. Sed quia hæc nihil ad sacrilegium, redimus in uiam. Sacrilegi sunt, quicunque bona Ecclesiæ debita, decimas scilicet & census, uel non soluunt, uel malignè soluunt. Extant minæ atroces prophetarum contra sacrilegos. Haggæus testatur non aliam esse causam quare fruges malè uel parçè proueniant, quàm quòd populus non solueret quæ debebat templo. Apud Malachiam fertilitatè promittit populo, si liberaliter soluat tributa & uectigalia ecclesiastica. Possunt autem ministri Ecclesiarum ijs uectigalibus uti iure optimo, perinde ut alij utuntur prouentu agri à se culti. Id quod testatur Dominus Numeri 18. cui succinit Apostolus 1. Cor. 9. Sed & ipse dominus Iesus de stipendio suo eleemosynas pauperibus distribuebat, uti uidere est apud Iohannem in cap. 13. Sacrilegium committunt & mendici, nomine Christi abutentes, & egestatem prætexentes ignauia. Præcipit Timotheo Apostolus, ne ignauos huiusmodi hypocritas recipiat in curam Ecclesiæ. Sacrilegium uerò omnium maximum est, si quis gloriam Dei transferat ad creaturas.

Peculatus furti genus est quod committitur in opibus publicis, aut pertinentibus ad principem. Parit hoc nouas subinde exactiones, ut maior sit occasio atque copia expilandi improbis magnatibus. Propter hos fortè dixit Cato Romanus, Priuati fures in neruo & compede uitam agunt, publici uerò in auro & purpura. Peculatores sunt præterea omnes, qui tributa & uectigalia magistratui debita uel non pendunt uel pendunt malignè. Peculatores sunt omnes, quotquot abutuntur opibus publicis.

Plagiarij sunt, qui quos liberos norunt uendunt, aut seruos alienos furto abducunt: genus furti appellant plagium. In hunc censum ueniunt qui seditione, persuasione, doctrinâque seditiosa mancipia siue seruos & ancillas abstrahunt ab obedientia dominorū, liberos à reuerentia & obseruantia parentum. Cumque imperatores mercenariæ militiæ inuitis parentibus cohortes militum, promissionibus dementatos & artibus irretitos, abducant, qui nunquā ad parentes redeunt, sed in bello pereunt, aliquem certè inter plagiarios locum habent. Quondam fuit capitale plagium, sicuti claret ex 21. cap. Exodi, & lege Constantini, quæ habetur Cod. lib. 9. titulo 20.

Abigei sunt qui & abactores dicuntur, ac iumenta aliena abducunt. Quibus annumerantur qui mutuò acceptis abutuntur iumentis; qui item periclitantibus, cum possent, non subueniunt. Nam dominus in lege errantia reducere iussit, & suo restituere Domino.

Hæc hætenus fratres dixi de uarijs furti speciebus, & iustè acquirendis opibus, adde & de rerum proprietate.

*De legitimo usu facultatum terrenarum: hoc est, quomodo rectè possideamus
& iustè dispensemus opes iustè acquisitas: ubi & de Restitutione & Beneficentia differitur.*

EXPOS. VI C. V. sermone proximo, quomodo iuste parentur opes, & quae sint species furti modique inique consequendi facultates uarij: superest iam ut adiciam & doceam quis sit uerus usus opum iuste acquisitarum, quomodo legitime & iuste illas & possideamus, & dispensemus, uel usurpemus. Iustitia enim non modo non fraudat neminem, sed quantum in ipsa est, omnibus benefacere satagit. Neque enim satis fuerit homini pio nemini nocere, nisi benefaciat etiam quibus potest. Atque hic peccatur a pluribus, existimantibus se suo functos officio si laedant neminem, si sua quiete possideant, nulla interim cura habita quibus prosint ac benefaciant. At peccat coram domino non minus qui iuste partis opibus non recte utitur, quam qui facultates sibi parat iniquitate & malis artibus. Dicam ergo, quantum dederit gratiae dominus, quomodo pii sancte opes suas possideant & dispensent.

Ne quid alieni possideas.

In primis ut salutaris esse possit usus opum terrenarum, diligenter dispiciunt sancti ne quid supersit in facultatibus alieni, hoc est, diligenter separant iusta ab iniustis, ac restituunt fideliter si quid deprehenderint in rebus suis iure ad alios pertinens. Credunt enim hac ratione relictas opes, etsi per restitutionem diminutas, & feliciores magisque diuturnas, & fecundiores futuras.

Restitutio necessaria.

Præcepta autem & omnino necessaria est Restitutio. Dominus enim in lege illam uarijs modis & diligenter mandat, uti uidere licet Exodi 22. Quoties uero æquum & sanctum Dei mandatum per avaritiam & iniquitatem hominum iacuit neglectum, excitauit dominus grandia mala contra contemptores, ac iniustas opes dissipauit bello, aut infortunijs calamitatibusue uarijs. Clamat enim Isaias, & dicit, Dominus ueniet ad iudicandum senatores & magnates populi sui. Vos enim incendistis uineam meam; & spoliū pauperis est in domibus uestris. Amos in 3. cap. clamans ait, Congerunt thesauros in palatijs suis per uiolentiam & uastationē siue rapinam. Propterea sic dicit dominus Deus, Angustiae inuadent te undique in terra; & hostis auferet a te robur seu facultates tuas, & diripientur palatia tua. Legimus ergo in euangelio Zachaeum sua sponte quadruplicem, id est, plenariam siue absolutam promisisse restitutionem, ac praestitisse haud dubie. Intelligebat enim ex spiritus sancti instinctu restitutionem in primis esse necessariam, neque felicem se futurum, nisi facta restitutione integra. Recte ergo iudicauit S. Aurelius August. epist. 54. ad Macedonium scribens, Si res aliena, cum reddi possit, non redditur, non agitur poenitentia, sed fingitur; si autem ueraciter agitur, non remittetur peccatum, nisi restituatur ablatum, sed ut dixi, cum restitui potest.

Quando facienda restitutio.

Quando uero facienda sit restitutio, docet exemplum Zachaei, qui quam primum receptus esset in gratiam Christi, ac intellexisset ueritatis & iustitiae negotium, promittit restitutionem, ac praestat eandem euestigio. Proinde restitutio non est procrastinanda. Non est quod quis peccatum conduplicet. Cui enim facultates suas tua eripuisti arte dolosa, aut uiolentia praua, ille his quidem sua cum iactura diu nimis caruit hactenus, ut nihil sit necesse procrastinatione tua augere incommoditatem & detrimentum.

Cui fiat restitutio.

Si roges, Cui nam fiat restitutio? Respondeo ei cui abstulisti, si quidem scias cui abstuleris, aut quem defraudaueris. At eo modo, ais, me ipsum reddam infamem. Id non iubeo. Verum si inuenisti uiam auferendi, cogita de commoda uia restituendi, per quam non incurras infamiam. Ora praeterea dominum ut rationes certas & commodas tibi sufficiat. Si serio de restitutione uera cogitas, inuenies haud dubie uiam minime dedecorosa. Si non agis serio coram domino, mille occurrent excusationes, quarum tamen nulla tranquillam efficiet tuam conscientiam.

Neque

Neguerò Deus irridetur. Nescio, inquis, cui abstulerim, ignoro ergo cui restituā. Si seriò nescis cui abstuleris, habes pauperes uel egenos, quibus largiaris. His iniustæ opes, non superstitioni aut superstitionum ministris, erogandæ sunt.

Tantum uerò restituat quisque quantum surripuit aut quantum restituere potest. Multi enim prodegerunt aliena ut restituere nihil possint. Agnoscāt interim peccatū, & pœniteat eos ex animo. Et si aliquando assequuntur opes, de suis sint tanto liberaliores quanto profusiores fuerunt in alienis. Si uerò omnia tua, quæ iam possides, aliena, & furto aut rapinis parta sunt, ut si iustam facias restitutionē nihil retineas prorsus, ac mendicandum sit protinus, profectò miser es & infelix nimium, insanus uerò & furiosus, si pergas superbire in alienis, si libidinem tuam expleueris in uisceribus & sanguine atque sudore pauperum. Cur non potius deijciste te ad pauperes, ac iniuste acquisitis ita uteris ut eleemosyna utuntur egeni? Nam uiuis ex ijs quæ pauperum sunt. Depone ergo fastum, depone luxum. Cogita diligenter quis sis & unde uiuas. Interea conandum est perpetuò ut fiat restitutio, quatenus licet, ac semper dolendum si ad plenū fieri non potest. Si non graue sit tibi pauperiem experiri ad tempus, laborare, aut honestū aliquod negotium fideliter exercere, atque ad eadē instituere ac ueluti manu ducere liberos tuos, non deerit unde uiuas, tametsi restituas aliena omnia. Verū modica adeoque nulla est fides in multis hominibus, inde est, quòd pauculis aut nullis persuadeatur uera restitutio, His & illud (priusquā transeam ad alia) adiiciam, illos in primis de restitutione cogitare debere, qui pestilentibus colloquijs corruperunt mentes simpliciū, qui obtreptionibus læserunt famam alienā, qui itē peruersis cōsilijs potentiores concitarūt in imbelles. Hæc enim terrenas facultates multis modis superant. Hæc dixi hactenus de Restitutione, de qua prolixas disputationes reliquerūt alij. Ego autem uideo animo pio restitutionis negotium esse breue & expositum. Nam cupit ex animo obedire diuinis legibus, ideoque diuino auxilio inuocato, facile uiam inuenit faciendæ iustitiæ. Qui autem uideri magis iusti, quàm esse, cupiunt, atque hunc mundum, magis quàm decet, diligunt, inexplicabile reddunt suis quæstionibus & casibus negotium restitutionis. Nihil ergo his amplius respondebimus, quàm ut suam ipsorum conscientiam propriam interrogent quid ipsa eos iubeat. Conscientiam autem uolo hac generali lege imbutam, Quod tibi uelis fieri, feceris alteri: & quod nolis tibi fieri, alteri ne feceris.

Post hæc iam liberius differemus de iuste possidendis, usurpandis, uel dispensandis iustis facultatibus terrenis. Principiò nihil omnino fiducia in istis cuiquam est collocandum, utpote in rebus fluxis & perituris: non acquiescendum in eis, nec admirandæ sunt, curandumque modis omnibus ne in idololatriam nos impellant, neue cursum impediānt cœptum. Ad cœlos tendimus. Audienda est hic rursus omnibus nobis uox diuina & cœlestis edita per Dauidem dicentem, Collocante spem in Deum omni tempore, effundite ante conspectum eius cor uestrū, Deus refugium nobis. Reuera filij hominum uani sunt, mendaces filij uiri, si simul ponantur in bilance, ipsa uanitate leuiore erunt. Ne collocetis spem in iniuria & rapina: nolite uos dedere uanitati: opes si affluunt, nolite cor apponere. Eodem spiritu imbutus Apostolus Paulus, iubet nos mundo & rebus mandanis ita uti quasi non utamur. Idem appellat auaritiā idololatriam: & diuitibus mandat ne spem ponant in diuitijs incertis, sed in Deo uiuente, qui suppeditat omnibus uiuentibus quantum necesse est. Ergo & dominus in Euangelio uetat thesauros recondere in terra. Rursus nō iubemur ab apostolis nostra prodigere luxuriosè. Nam opibus a domino concessis minimè abutendum est ad luxum & superbiam. Multi uerò

Quantū quisque restituat.

Consilium.

Copiose disputationes de Restitutione.

Nō acquiescendum in opibus, non diligendæ opes.

psal. 62.

prohibetur profusio.

luxuriose res suas profundunt alea, sumptuosis ædificijs, peregrinis aut exoticis uestibus, poculis & exquisitis cibis. Horum finem & interitum uenuste, sed non sine horrore audientium proponit dominus in parabola diuitis illius epulonis, qui post mensam lautissimam & mollissimas uestes in alio seculo apud inferos inedibili siti torquetur & flammis perpetuis torretur. Rectè itaq; piè & moderatè bona illa temporalia sunt usurpanda.

Facultates dona sunt dei, pro quibus agenda gratia.

Agnosendum cuiq; bona illa terrestria, dona esse benigni patris nostri coelestis, nō nostro merito aut nostris uiribus parata. Nam ex Dei liberalitate habemus quæ ad uitam sustentandam nobis sunt necessaria. Fortunat seu benedicit laboribus nostris dominus. Deniq; bona sunt dona Dei, nō mala: ac dat illa mundo ad uitam, non ad interitum; nostra culpa conuertuntur multis sæpe in laqueū. Præterea requirit ipse dominus in uerbo suo ut grati simus Deo pro datis muneribus, ut his utamur cum gratiarum actione, laudantes in omnibus nomen Domini, atq; exulemus in ipso. Sic enim præcipit Moses famulus Dei in Deuteronom. Dominus Deus tuus dabit tibi terram præstantissimam, in qua nulla re indigebis. Cum ergo comederis & satur factus fueris, age gratias domino Deo tuo in terra illa bona, quam dedit tibi. Caue ne fortè obliuiscaris domini Dei tui, & non custodias præcepta, iudicia & ritus eius, quæ ego præcipio tibi hodie: ne fortè comedas & satur factus, domos pulchras extruas & inhabites; armenta tua & greges tui augeant tibi, aurum & argentum multum sit tibi, & quicquid deniq; habes augeat: & hinc eleuetur cor tuum, & obliuiscaris Domini Dei tui, qui eduxit te de terra Aegypti, de domo seruitutis. Ne dixeris in corde tuo, Virtus mea & robur manus meæ parauit mihi hanc opulentiam. Memineris domini Dei tui, quia ipse est qui dat tibi uirtutem, ut opes tibi pares, &c. Sed & Paulus Apostolus omnes creaturas Dei bonas esse dicit, ad bonum & conseruationem hominum cōditas, hasq; iubet usurpare cum timore Dei & gratiarum actione. Et iterum, Siue, inquit, editis siue bibitis, siue quid facitis, omnia in gloriam Dei facite. Itē, Sint mores uestri alieni ab auaritia, contenti his quæ adsunt, Siquidem ipse dixit, Non te desero neque derelinquo, ut fidentes dicamus, Dominus mihi auxiliator, non timebo quid faciat mihi homo.

Facultates seruiant necessitati.

Seruiant autem facultates terrenæ necessitati nostræ. Necessitas postulat habitationem commodam, uictum quantum satis est, uestitumq; decentem, ac ut honestè possimus uersari inter homines nostriq; æquales. Id quisq; de sua ipsius persona primū, deinde & de familia eius intelligat. Nam patrifamiliās prospiciendum est, ne quid, quod ad necessitatem pertinet, desit familiæ. Extant manifesta de hac re scripturæ testimonia, Pauli in primis 1. Tim. 5. cap. Et necessitas cōprehendit omnia, quibus indiget corpus aut uita hominis, deniq; quæ honestas aut decorū cuiusq; requirit aut flagitat. Et hætenus quidem & in hunc finem aliquid recondere licet in futurum. Pluribus opus est ei qui numerosam alit familiā, quam qui familiam habet paruam. Et alia decent eum qui publicam gerit personam, alia qui priuatus est. Cogitet autem quisq; hic quid necessitas poscat, quid luxus & libido suggerat. Cogitet quisq; quid se deceat, uel dedecet.

Necessitas non excludit uoluptatem concessam.

Et necessitatem quidem in præsentī non tam arcuè constringimus, ut omnem uoluptatē aut moderatam copiam tanquam libidinem & luxuriam damnemus. Scio enim diuinitus concessum esse homini, non modò necessitatis usum, earum inquam rerum usum, quibus homines carere non possumus, sed etiam uoluptatem moderatam, quæ delectat homines. Nemo ergo sibi in suauī sed iusto rerum terrenarum usu faciat conscientiam, quasi ea iucunditate qua fruitur peccet cōtra Dominum

Dominum. Hic enim hilaritatem, gaudia & iucundum rerum usum, modò nihil
 contra decorum aut ingratè & iniquè fiat, nuspiam prohibuit. Ieremias enim pro-
 pheta alludens ad promissiones legis diuinæ contentas Levit. 26. & Deut. 28. sic
 dicit, Venient & iubilabunt in Zion, & affluent bonitate Domini, in frumento,
 in musto, in oleo, & in foetibus gregum & armentorum, eritq; anima ipsorum si-
 milis horto irriguo, nec ultra dolebunt. Tunc lætabitur uirgo in choro, iuuenes &
 senes pariter. Conuertam enim luctum eorum in gaudiū: & consolabor eos & ex-
 hilarabo ipsos. Inebriabo etiam animam sacerdotū pinguedine, & populus meus
 bonis saturabitur, dicit Dominus. Ierem. 31. Legimus enim & in historia sacra 3.
 Regum 4. capite. Sub Solomone crescebant & erant multi in Iuda & Izraele si-
 cut arena maris, comedentes, bibentes & lætantes. Ita legimus 8. cap. eiusdem li-
 bri, Et fecit Solomon solennitatem omnisq; Izrael cum eo, cœtus magnus qui con-
 fluxerat ex omni populo ab Hemath usq; ad torrentem Ægypti coram Domino
 septenis diebus, id est, quatuordecim diebus. Postea dimisit populum, ipsiq; gratu-
 lantes regi abierunt in tentoria sua, lætantes & hilari corde, propter uniuersa be-
 neficia quæ contulerat Dominus Dauidi & uniuerso populo Izraelis. Congruunt
 cum his quæ apud Nehemiam in cap. 8. sic leguntur: Dixit autem Esdras cum Le-
 uitis ad uniuersum populum qui tristis erat, Dies hodiernus sanctus est Domino
 Deo uestro: ne ergo luctu uosipsum conficiatis. Ite & comedite pingua, & bibite
 dulcia, & mittite partes his qui non habent, &c. Et Dominus quidem nō requirit
 ab hominibus ne uoluptatibus, quibus nos ex gratia perfundit, permoueantur,
 tanquā stipites, trunci, & saxa. Nam sensum boni & mali, amari & dulcis indidit
 nobis omnibus. Idem pro æterna sua bonitate & sapientia rebus quoque conditis
 indidit natiuam quandam elegātiā, & eas ita ornauit delectabilesq; fecit, ut de-
 sideremus illas, imò uim ipsis inseuit demulcendi nos. Dauid enim dicit, Et ui-
 num (prouenire facit) quod exhilarat cor hominis, & oleum quod nitidam red-
 dit faciem, & panem qui cordi uires subministrat. Arboresq; succo abundant, in
 quibus aues nidificant & cantillant, &c. Sed & Iacob patriarcha dicitur bibisse ad
 ebrietatem: & de Ioseph ac fratribus eius dicit scriptura, Et bibentes cum eo, ui-
 no inebriati sunt. Id quod nemo intelliget de ebrietate luxuriosa, quam ubiq; con-
 demnat scriptura sancta, sed de iucunda quadam expletione, quodq; saturi iu-
 cundè sint exhilarati. Infana enim illa ebrietas perdit omnem sensum, nec uerè hi-
 lares & iucundos reddit, sed morosos, difficiles, turbatos, turpes, apros & porcos.
 Simili genere dicendi usus beatus Haggæus, dicit, Diligenter perpendite uias ue-
 stras, seminatis multum, & metitis atq; infertis in horrea parum: comeditis, sed
 non ad satietatem: bibitis, sed non ad inebriationem: id est, non ad iucundam ex-
 pletionem, ut saturi hilaresq; nihil amplius desideretis, atq; idcirco gratias agatis
 Domino benefactori. Hæc aliquanto copiosius declaro propter Anabaptistas &
 Stoicos quosdam stupidos nouosq; hypocritas, monachos Carthusianos, qui ut ex
 hominibus truncos facere conantur, ita etiam concessam uoluptatem damnant
 clamoribus tragicissimis. Abutuntur ad hoc institutum suum colorandum, & ho-
 minibus cōmendandum, pluribus scripturæ locis, Væ uobis qui saturi estis nunc,
 qui ridetis nunc, esurietis & flebitis aliquando. Hæc aut & similia scripturæ uerba
 prolata sunt diuinitus contra impios, contra ingratos & beneficijs Dei abutentes.
 Adijcimus ergo his quæ hætenus protulimus, diligēter pijs inuigilandū esse, ne li-
 bidini laxent fræna, & ne quid nimis. Mediocritas hîc quoq; ut alibi probat, De-
 inde seruiant opes seu facultates terrenæ honorî & humanitati. Honorem enim
 & humanitatem debemus cognatis, affinibus, amicis, notis, indigenis & peregrin-

Ebrii sancti
 quomodo.

Seruiant opes
 honorî & hu-
 manitati.

Hospitalitas
patrum.

nis. Non enim nostris duntaxat, sed & alienis benefacere atque hospitales erga peregrinos esse debemus, quatenus uidelicet permiserit nostra facultas. Nam si uix suppetant opes alendae propriae familiae, nulla Dei uel aequa lex praecipit te facultates tuas diuidere alienis. Satis fuerit tua cura prouidere, ne tui aliquando alij fiant onerosi. Ita qui nullis instructus est facultatibus, non cogitur expendere honoris & humanitatis causa quod non habet. Satis fuerit, si hic forti animo miseram sortem suam ferat, caueatque necubi propter inopiam peccet in iustitiam & probitatem. Qui autem mediocres aut amplas diuitias consequuti sunt, humani & hospitales sint. Honorem & liberalitatem, non auaritiam & sorditiam suis adhibeant consilij. Inuenias enim facultatibus utcumque quidem instructos, sed ita congerendis deditos diuitijs, ut ne teruncium quidem honoris & humanitatis gratia uel indigenis uel peregrinis expendant. Hi occultantur semper, saccis indormiunt, nusquam prodeunt, ne hospitalitatem aut humanitatem saltem per occasionem praestare cogantur alij. Scriptura longe alia praedicat de sanctissimis & clarissimis patribus nostris. Lot sedebat in porta Sodomae, ut hospites aliquot aucuparetur, quos domum abductos secum, humanissime exciperet, ac omnigenis beneficijs afficeret. Et si quos assequeretur, non officiose, hoc est, fictè inuitabat, sed urgebat serio modisque omnibus. De patre nostro Abrahamo legis in Genesi, quod in ipso seruire diei sedens ad ostium sui tabernaculi, uiderit tres uiros peregre uenientes, quos ad primum protinus aspectum, licet ignoraret quinam essent, exceperit humanissime. Non enim expectauit donec ipsi accedentes supplicesque facti aliquid postularent, sed occurrit eis ab ostio tabernaculi, priorque ipsos compellans, & honoris gratia proque more gentis reuerenter se coram eis inclinans, amicissimis uerbis ipsos inuitat, & ait, Quaesio domine, si hanc à te gratiam impetrare possum, ne quaeso praetereas seruum tuum. En dominum appellat uirum peregrinum & ignotum (quemadmodum & nobis Heluetijs in usu est excipere peregrinos, & dicere, Sind mir Gott wol kômen/lieben herren vnd guten fründ) & quamuis esset in eagine, in qua habitabat, heros celeberrimus & laudatissimus, sui tamen ueluti oblitus, ait, Ne quaeso praetereas seruum tuum. Seruum se dicit esse peregrinorum. Addit & hoc, Afferatur quaeso pauxillum aquae, & lauentur pedes uestri, recumbite sub arbore. Ego uero afferam frustum panis, & reficite cor uestrum, deinde in instituto itinere pergite. Omnia ferè humanitatis officia comprehendit in hisce uerbis pauculis. Neque uero uerbis his duntaxat magnificus & liberalis fuit Abraham: sed cum impetrasset à peregrinis quod uerbis postulauit, festinauit Abraham in tabernaculum ad Saram, & dixit, Accelera, commisce tres modios farinae purgatissimae, & fac placentas. Addit & aliud scriptura, Abraham uero accurrens ad armenta, & accepto uitulo pingui & bono, dedit puero: qui festinauit, & parauit eum. Butyrum quoque tulit & lac, & uitulum quem parauerat, & apposuit eis: & comedentibus illis, ipse sub arbore apud eos stabat, id est, ipsis ministrabat. Admiranda profecto haec sunt, & expendenda diligentius. Merito erat diues, munificus, liberalis & humanissimus hic Abraham, qui norat diuitijs uti tam honestè & tanta cum laude. Nec ipse solus in familia sua liberalis erat, sed uxor & famuli eius omnes exercitatissimi, & maxime spontanei & benigni erant in hoc exercitio sancto. Protinus ergo parata sunt omnia. In parandis quoque rebus summa adhibetur diligentia, habetur item delectus: neque enim prima quaeque obuenientia recipiuntur, sed delectissima & optima eliguntur. Currit ipse heros in famulorum turba. Ipse delicias rusticas, superantes longe principum & regulorum omnes cupedias, infert hospitibus, butyrum scilicet & lac, quibus coniungit

iungit uirulinas carnes probè saginatas & paratas. Neq; his officijs & hac beneuolentia contentus est, nisi edentibus quoque adstet, id est, ministrum se mensæ præbeat. Ministrat, inquam, mensæ, qui habuit pmissiones Dei eximias, qui est pater omnium credentiũ, qui est proauus Christi, qui erat confœderatus Dei & regum potentissimorum, deniq; qui erat quasi princeps honoratissimus in illa terra: quicq; quatuor Orientis reges potentissimos uicerat bello, & reges captos cum captiuis suis reduxerat. Hic, inquã, uir inclytus atq; clarissimus, omnibus opulentis exemplum prætulit honoris impendendi peregrinis, humanitatis item & hospitalitatis erga omnes exercendæ. Accedit enim illis omnibus, quòd conuiuio finito comitem se itineris coniungit peregrinis, & hos aliquousq; deducit. Pudeat ergo & pigeat tandem diuites iniquos suæ auaritiæ & sorditiei. Quid quæso uoluptatis capiunt ex suis diuitijs? cui quæso profunt? quem honorant? aut quem honorem, quàm uelaudem sibi parant apud homines? Quin relictis istis turpissimis nebulonibus, audiant potius, qui sapiunt, diuites, Apostolum dicentem, Hospitalitatis ne sitis immemores. Per hanc enim quidam inscientes exceperunt angelos hospitio. Ac reuera loquitur de Lot & Abrahamo. Neq; dubium est, quin ipsos quoq; angelos Dei adeoq; ipsum Christum excipiamus hospitio, quotiescunq; humanitatis hospitalitatisq; officia exhibemus hominibus pijs & claris.

Postremò seruiant opes diuitum non tantum honoratis hominibus, sed maxime indigis & pauperibus. Repetenda enim hoc loco uenit saluberrima Pauli doctrina, Diuitibus præcipe, ut benefaciant, ut diuites sint operibus bonis, ut faciles sint ad impartendum, libenter cõmunicantes, recondentes sibiipsis bonum fundamentum in posterum, ut accipiant uitam æternam. Cum doctrina Apostolica congruit prophetica per omnia. Isaïas enim de Tyro, Negotiatio & merces eius sacro sanctæ erunt Domino: non reponetur negotiatio eius, nec recondetur, sed erit eorum qui habitant ante Dominum ad comedendum ad saturitatem, & ad operimentum senum. En docet & Isaïas, quomodo thesaurum semper permanentem recondamus. Eadem leguntur & Matth. cap. 6. quæ superius recitata sunt. Reuocet hinc quisq; in memoriam & alias salutes Domini Dei sententias in scripturis propositas, quibus excitetur ad beneficentiam. Moses in lege dicit, Vide ne obfirmes cor tuum, neq; contrahas manum tuam à fratre tuo paupere: sed liberaliter aperiās illi manum tuam. Omnino dabis ei, & non sit pectus tuum malignum cum das ei. Nam huius rei gratia Dominus Deus tuus locupletabit & fortunabit te in cunctis operibus tuis, & in cunctis ad quæ admoueris manum tuam. Quoniã nunquam deerunt pauperes in terra: proinde præcipio tibi, dicens, Liberaliter aperi manum tuam fratri tuo pauperi atq; inopi in terra tua. Sic legimus in Psalmis, Vir bonus confert beneficia, & dat mutuò, suasq; res obit exactissimo iudicio. Spargit dans pauperibus, iustitia eius manet in seculum seculi, cornu eius exaltabitur in gloria. Solomon quoq; dicit, Beneficentia & fidelitas ne te destituant, liga eas ad colum tuum, & tabulis cordis tui inscribito. Assequeris gratiam, & bonam existimationem in oculis Dei & hominum. Item, Honora Dominum de tua substantia, & de primitijs omnium frugum tuarum da pauperibus: & implebuntur horrea tua saturitate, & uino redundabunt torcularia tua. Et iterum, Qui obturat aurem suam ad clamorem pauperis, clamabit & ipse, & non exaudietur. Cum his per omnia congruunt sententiæ Apostolicæ & euangelicæ, Omni poscenti abs te tribue. Item, Amen dico uobis, quatenus fecistis misericordiã cum his fratribus meis minimis, mihi fecistis. Id quod reuera insigne est, & animo cuiusq; penitus recondendum. Sibi enim impensum reputat Dñs Iesus, quod impendis cuilibet pauperi:

Seruiant facultates beneficentia.

se neglectum & praeteritum putat, si neglexeris praeterierisq; pauperem aliquem. Certa & indubitata sunt haec. Nam ipse Dominus et iudex asserit se ita in fine mundi, & in ultimo illo iudicio pronunciaturum extremam sententiam, Venite bene dicti patris mei, possidete regnum, &c. Esuriui enim, & dedistis mihi cibum: sitiui, & dedistis mihi potum. Et caetera quae leguntur Matthaei 25. cap. Huc pertinet & illa S. Ioannis Apostoli sententia, Qui habuerit substantiam mundi, & uiderit fratrem suum egentem, & clauferit uiscera sua ab eo, quomodo manet charitas Dei in eo? Vnde haud dubie accepere quod dixerunt ueteres, Si uideas interire pauperem fame, nec iuuisti, cum potueris, occidisti. Sciat itaque & persuadeat animo suo qui facultates habet, ante omnia benefaciendum esse indigis.

Quibus benefaciendum.

Benefaciat autem opulentus omnibus quibus benefacere potest. Dicit enim Dominus, Omni petenti da. Et Tobias, Noli faciem tuam auertere ab ullo paupere. Id si per tenuitatem non potes, benefac maxime illis, quos maxime pietati studere, ac interim egere uideris. Paulus enim, Operemur bonum, ait, cum erga omnes, tum uero maxime erga domesticos fidei. Iuuemus ergo pupillos, orphanos, uiduas, senes, aegros, persecutione propter ueritatem pulsos, & calamitatibus afflictos oppressosq;. Iuuemus studia bona & sancta, studiosos item & ueros Dei ministros paupertate laborantes. Iuuemus denique peregrinos, & quoscunque iuuare possumus.

Quomodo benefaciendum.

Iuuemus autem consilio, consolatione, auxilio, pecunijs, cibo, potu, hospitio, uestibus, commedatione, & in omnibus in quibus illos uidemus nostra opera indigere. De qua re dixi nonnihil Sermone 10. Decadis primae. Iuuemus item prompte, animo propenso, hilariq; mente. Hilarem enim datorem requirit Deus. Et iuuemus quidem liberaliter. Tobias dicit, Quomodo potueris ita esto misericors. Si multum tibi fuerit, abundanter tribue: si exiguum fuerit, etiam de eo libenter impartire. Ita benedicet Dominus tibi & tuis omnibus.

Quantum benefaciendum.

Dixi haec haecenus fratres, de legitimo usu bonorum terrenorum, ea recondat quisq; in animo, ac producat mox in opus sanctum: oret Dominum ut in uis suis nos dirigat, ne propter peritura illa bona amittamus aeterna.

De calamitatibus miserisq; uarijs patienter perferendis: item de spe & multijuga fidelium consolatione. SERMO III.

NON inepte mihi uideor facturum, fratres honorandi, si dissertationi de facultatibus hominum, earumq; usu & abusu, subiungam modo disputationem de calamitatibus uarijs, quibus genus humanum, donec in hisce terris uiuit, affligitur. Cum enim multi res temporales amittant, uel eas colligere non possunt, ideoq; paupertate & inopia rerum omnium premantur, utile sane, imo necessarium fuerit pio cuilibet certam ex uerbo Dei rationem tenere calamitatu, & item consolationis in calamitatibus, ne absorptus nimis doloribus desperatione neq; irretitus, mancipium se dedat diabolo. Seruit autem ista tractatio uniuersae uitae hominis. Neq; enim de una aliqua duntaxat calamitate, utpote paupertate aut rerum inopia, sed generaliter de omnibus dicam afflictionibus. Certum cum homo ad laborem aërumnasq;, perinde ut auis ad uolandum, piscis ad natandum natus sit, nunquam erit uita hominis tranquilla & suauis, nisi certam teneat calamitatu rationem. Si uero hanc ex uerbo Dei decerptam aut petitam religiosè teneat, non poterit non suauis esse uita etiam cum uidetur alioqui esse amarissima. Affligitur quidem & premitur grauiter animus hominis calamitatibus, sed idem rursus cognitione calamita-

calamitatum uera & consolatione sancta, desumpta ex uerbo Domini, ualidissime subleuatur.

Principio præstat ipsa genera seu species calamitatum potissimas oculis nostris propositas coram intueri. Innumerabilia quidem sunt mala, quæ miseros nos exercent, sed uulgatissima sunt pestis, morbi uarij & innumeri, ipsa denique mors & mortis metus, ipsa morte durior. Accedit his mors atq; sinistra fatum præstantissimorum, uel nobis charissimorum hominum, deprædatio, oppressio, infortunia innumera, paupertas, inopia rerum omnium, desertio ab omnibus, infamia, exilium, persecutio, carcer, tormenta & supplicia, eaq; exquisita, horrenda, & uaria, cœlum tempestuosum, sterilitas, fames, gelu, pruina, grando, diluuium, terræ motus, absorptæ urbes, uastati agri, incēdia, ruinae, odia, factiones, simultates, proditones, seditiones, bella, strages, captiuitates, insolentia & crudelitas hostium, tyrannis: item orbitas, uel afflictiones, curæ & miseria ex incommodis coniugibus, ex liberis uel miseris uel malitiosis, inobedientibus & ingratis, cura deniq; & sollicitudo iugis & uaria de rebus uarijs & misere excruciantibus nos. Verum nemo quantumuis copioso recensuerit catalogo mala omnia, quibus obnoxium miserandum genus hominum in momenta excarnificatur. Enascuntur in diem malanoua, incognita nostris maioribus. Et hæc quidem est sors nostra, qui nouis subinde peccatis noua meremur supplicia, cum alioqui sat imò nimium erat miserationum atterentium hominem.

Genera seu species calamitatum.

His autem malis exercetur tam boni siue pii Dei cultores, quam impij Dei contemptores: imò affliguntur per omnem propè uitam sancti, prophani contra affligunt delicijs & uoluptatibus: unde graues exoriuntur apud pios tentationes & querelæ. Impij ex sua fortuna & uita uoluptuosa colligunt & cultum & mores ipsorum probari Deo, confirmanturq; in suis erroribus. Quid quod pii propter miseras diutius perpeffas à pietate deficiunt ad impios, quod & illis uideatur horum sortem esse præstantiorem. Ac confert ista sigillatim cognoscere ex scripturis.

Affliguntur boni & mali calamitatibus.

Affligi pios æquè atq; impios, claret mox ab exordio rerum in exemplo Abelis & Caini. Sicut enim ille ab hoc misere cæsus est & sublatus è terra propter synceriorem Dei cultum: ita hic propter parricidium profugus, pavidus & trepidus in terra locum non habuit, in quo quiesceret. Calamitatibus multis & uarijs legitur oppressus fuisse Iacob Israel. Idem traditur in scripturis & de Ægyptijs Izraelitas persequentibus. Afflictus est Saul: afflictus est etiam Dauid. Grauiissimam crucem cum discipulis suis sustinuit Dominus & saluator noster. Rursus horribili sed condigno excidio sublati sunt truculentissimi persequutores Christi & discipulorum Iudæi. Infanda mala pertulit sancta Christi ecclesia, in decem illis cruentissimis Constantini magni imperium præcedentibus persecutionibus: sed commemorat Orosius illustris, diligens & fidelis historicus, meritis protinus poenas sumptas esse de persequutoribus, de quibus aliqua dicam suo loco. Vnde diuino & humano testimonio, adde & multiplici experientia comprobatum cernimus, tam pios quam impios calamitatibus affligi.

Imò affliguntur ferè optimi quicq; immunes à calamitatibus in tranquillitate, uoluptatibus & otio uiuunt impij & pessimi. Adde quod persecutionem & iniurias sustinentibus bonis, exultant mali. Dominus enim in Euangelio dicit discipulis suis, Amen amen dico uobis, plorabitis & lamentabimini uos, mundus contra gaudebit: uos autem mœrore afficiemini. Cæterum quales in animis sanctorum tentationes ob hæc suas tribulationes exoriantur, & quid colligant ex felicitate impiorum non prorsus alieni à Deo & ipsi etiā hostes Dei, passim in scripturis

Affliguntur pii, in uoluptatibus uiuunt impij.

Abac. 1.

Malach. 3.

Psal. 73.

Causse calamitatum.

Causse afflictionum in sanctis. Ioan. 9.

Ioan. 11.

Liberamur dei bonitate, non nostro consilio.

occurrit, in primis autem in admiranda illa disputatione Iobi & amicorum eius. Cōqueritur propheta celeberrimus Abacuk, & ait, Vsq̃uequò Domine clamabo, & non exaudies? uociferabor ad te uim patiens, & non asseris? Quare cogor uidere iniquitatem, prādā & iniustitiam contra me? Quare respicis contemptores, & taces conculcante impio iustiorē se? Iustum impius circumuenit, & ideo iudicium peruersum exit. Apud Malachiam uerò clamant hypocritæ, Frustra seruitur Deo; quæ enim utilitas, quòd mandata eius obseruamus? & quòd humiliati uel tristes coram Deo exercituum ambulamus? Nunc ergo beatos & felices iudicamus arrogantes & contumaces. Etenim impietatem patrans felicitē agunt & ædificantur, & qui Deum tentant, pergunt nec intereunt. Significantissimè autem plenissimeq̃ ista omnia comprehendens diuinus propheta Asaph doctissime canit, Parum abfuit quin nutauerint pedes mei, & ferè effusi fuissent gressus mei. Nam urebat me æmulatio propter stultos, cū prosperitatem impiorū uiderem. Neq̃ enim sunt illis nexus ad mortem; nullis inquam morbis diuexantur, quibus ueluti ad mortem pertrahuntur, quin pingues sunt & prauvalidi. Nulla eos, ut reliquos mortales, premit molestia: malorum, quibus alij homines afficiuntur, immunes sunt. Hinc fit ut superbia eos totos possideat, & ceu ueste inuoluantur uolentia. Præ pinguedine oculi eis turgent, in imaginationibus cordis sui pergunt, dum eis uidelicet pro uoto omnia succedunt. Protendunt os suum in cœlum, & lingua eorum orbem peruagatur. Quin & dicere audent, Quomodo cognosceret omnia Deus? estne cognitio apud altissimum? Sic inquam impij sunt isti, & tamē felices in hoc seculo, & multas assequuntur diuitias. Profectò frustra purum seruauit cor meum, frustra manus meas abluo in innocentia: plagasq̃ perfero quotidie. Et cū ita mecum reputarem, parum abfuit quin defecissem à generatione filiorum Dei.

Et cū hæc ita se habeant, cōsequens est ut diligentissimè excutiamus causas calamitatum. Sic enim rectius de afflictionibus tum piorum tum impiorum iudicabimus. Causse malorum multæ sunt ac uariæ: generalis tamen ipsum reputatur peccatum. Nam ex inobedientia intrauit peccatum in mundum, & per peccatum mors, adeoq̃ morbi & mala orbis omnia. Vanissimi sunt quicunq̃ hæc referunt ad constellationes nescio quas. Cæterum cupiditatibus & affectionibus corruptis cumulamur in diem mala malis. Accedit ad ea suggestor & incentor satanas. Adiuuant præterea homines pessimi & corruptissimi: uariæq̃ oboriuntur quotidie instrumenta tribulationum, quibus Deus sapientissimus & iustissimus omnes ferè homines exerceri torqueriq̃ permittit.

Sed non eadem semper inueniuntur afflictionū causse in pijs Dei cultoribus, quæ in impijs Dei contemptoribus. Affliguntur sancti persæpe, ut per afflictionē suam Dei gloria innotescat. Videntes enim discipuli Domini cæcum illum euangelicum, qui fuerat à natiuitate cæcus, dicunt ad Dominum, Rabbi, quis peccauit, hic an parentes eius, ut cæcus nasceretur? Respondit Iesus, Neq̃ hic peccauit, neq̃ parentes eius, sed ut manifestentur opera Dei in illo. Ita cū Dominus audiret ægrotare Lazarū, Infirmitas hæc, inquit, non est ad mortem, sed pro gloria Dei, ut glorificetur filius Dei per eam. Quanquam si ad uiuū hanc rem rescemus, nemo inueniatur in mūdo purus, ut si uolet obseruare iniquitates Dominus, semper inueniat in nobis quod puniat. Sicuti copiosissimè exponitur in libro Iob.

Præterea affligi sinit sponsam suam ecclesiam sibi longè charissimā Dominus, in hoc, ut declararet diuina potentia & ope, non cōsilio aut auxilio humano defendi, seruari & liberari electos. Paulus enim, Habemus thesaurum hunc, inquit, in testaceis

testaceis uasculis, ut uirtutis eminentia sit Dei, & non ex nobis, dum in omnibus premimur, & non anxij reddimur: laboramus, at non destituimur: persecutio- nem patimur, at non in ea deserimur: deijcimus, at non perimus: semper mortifi- cationem domini Iesu in corpore circumferentes, ut & uita Iesu in corpore no- stro manifestetur. Semper enim nos qui uiuimus, in mortem tradimur propter Iesum, ut & uita Iesu manifestetur in mortali carne nostra: Idem Apostolus, Vir- tus (inquit) in infirmitate perficitur.

Rursus sicut afflictiones sanctorum martyrum & fidelium Christi testimonia sunt doctrinae fidei, dicente in Euangelio saluatore, Tradent uos in concilia, & in conciliabulis suis uirgis caedent uos: quin ad principes ac reges ducemini propter me, in testimonium ipsis & gentibus: Ita proponuntur nobis sancti attriti malis, ex- empla, ex quibus discamus uincere & calcare mundum, aspirare aut ad coelestia.

*Afflictiones te-
stimonia do-
ctrinae.*

Denique cruce imposita suos probat dominus, atque purgat ceu aurum igni, mul- tas mali occasiones amputat, ut ad maiorem uberioresque nos prouehat frugem. Imitatur ea in re domini sapientia aurifabros, qui aurum igni imponunt, ut pur- gent, non ut perdant: item homines agricolas, qui segetem luxuriantem aliquan- do demetunt, & arbores non in alium finem putant, nisi ut uberiores proferant fructus. Ac caro quidem nostra pacatis & tranquillis rebus ferè segnis, iners, so- cors, & ad res honestas planè torpida est: acquiescit in rebus terrenis, dedicat se uoluptatibus, obliuiscitur Dei rerumque coelestium: talem uero afflictionibus & per- sequutionibus excitari exerceri non conducibile tantum, sed & pernecessarium est. Euenit hic electis quod ferro: quod si exerceamus, atteritur quidem non nihil usu, quod si non usurpemus exerceamusue, plus arroditur rubigine. Verissime ergo dixit S. Petrus, Charissimi, ne miremini dum per ignem exploramini, quæ res ad experimentum uestri sit, perinde quasi nouum aliquid uobis obtingat: imò in hoc quod consortes estis afflictionum Christi, gaudete, ut in reuelatione quoque gloriae eiusdem gaudeatis exultantes. Paulus enim ad Timotheum, Memento inquit, Iesum Christum resurrexisse à mortuis, ex semine Dauid, secundum euan- gelium meum, propter quod malis affligor quasi facinorosus usque ad uincula: om- nia tamen suffero propter electos, ut & ipsi salutem consequantur, quæ est in Chri- sto Iesu cum gloria æterna. Certus sermo, Nam si commortui sumus, & conuiue- mus: si sufferimus, & conregnabimus: si negamus, & ille negabit nos. Nam idem & ad Romanos scripsit, Quos præsciuit, eosdè & præfiniuit conformes imaginis Rom. 8. filij sui, ut ipse sit primogenitus inter multos fratres. Et quos prædestinauit, eosdem & uocauit: & quos uocauit, eosdem & iustificauit: & quos iustificauit, eosdem & glorificabit. Rursus in eadem epistola clamat idem Apostolus, Gloriamur etiam Rom. 5. super afflictionibus, scientes quod afflictio patientiam pariat, patientia uero pro- bationem, probatio autem spes: spes autem non pudefacit, &c. Declarant hoc ip- sum priuata sanctorum & publica Ecclesiae totius exempla. Abraham, Isaac & Ia- cob non ita fidele & præsens Dei auxilium sensissent, neque tam firma spe obfirmati fuissent, patientiaque speciosissimos edidissent fructus, nisi multis fuissent exerci- tati periculis & calamitatibus uelut oppressi. Vnde & Dauid clamauit, Bonum est mihi domine quod humiliaueris me. Opprimatur Ecclesia Izraelitica in Aegy- pto, sed ut maiore cum gloria liberetur & proficiscatur in terram promissam. Af- fligitur à Babylonijs & Assyrijs Ecclesia Iudaica, adeoque diruto templo, in captiui- tatem abducuntur cum pessimis optimique. Verum post in ipsa captiuitate mi- rificum Dei auxilium sentiunt, adeoque puriores fiunt per afflictiones, ac innotescit nomen Domini per Assyrios, Chaldaeos, Medos & Persas quam latissime, & ma-

*Afflictionibus
probamur.*

1. Pet. 4.

2. Tim. 2.

Rom. 8.

Rom. 5.

Psalm. 119.

xima quidem cum gloria, sicut copiose exponitur in historia Danielis, Hester, & Esdrae.

*Certa supplicia
certis peccatis
constituta.*

Huc pertinet, quod certa supplicia certis à domino peccatis constituuntur, ut ferè per ea puniatur aliquis, per quæ peccando Dominum offendit. Peccarat contra Dominum parricidio & adulterio Dauid: punitur ergo ipse quoque domesticis probris, stupris, incestu, & parricidijs nequandissimis, tandem & in exilium efficitur. Arrogantia & superbia peccauit Nabuchodonosor, ergo sibiipso abreptus & conuersus in bestialem furorem, inter bestias destinato tempore agebat. Nam ut suo tempore restituitur Nabuchodonosor regno suo: ita Dauid quoque misericordiam domini experitur. Firmum enim manet hoc uerbum domini, non soli Dauidi, sed cuilibet fidei, quod in sacris literis sic proditum legimus, Si filij eius legem meam deseruerint, & praecepta mea non custodierint, prauaricationes eorum uirga uisitato, & iniquitates eorum flagellis: at bonitatem meam non auferam ab eo. Non prophanabo foedus meum, & quod semel egressum est ex ore meo, nunquam mutabo. Ergo ad utilitatem nostram affligimur à domino, dicente in theologia sua, edita per Ioannem Apostolum & Euangelistam, Ego quoscunque amo, arguo & castigo. Nam Solomon prior dixit, Castigationem domini caue auerferis, fili mi, neque fastidias aut molestè feras cum te corripit. Quem enim amat Dominus, obiurgat, & tanquam pater in filio delectatur.

*Apoc. 3.
Proverb. 3.*

*Persecutiones
ecclesiae peccata
quoque causas
habent.*

Proinde persecutiones & supplicia saeva Ecclesiae Dei, uel singulis illata martyribus, ut ferè fuerunt illata propter confessionem & testimonium fidei ueritatisque euangelicae: ita plerumque causas habuerunt delicta & peccata sanctorum, quae in sanctis iustitia Dei uisitauit utique in bonum & incolumitatem sanctorum. Nam de famosa illa Imp. Diocletiani & Maximiani persecutione, quae tot nobis martyrum celeberrimorum chiliades, imò & myriades dedit, haec legimus apud Eusebium Caesariensem, testem oculatum, non auritum duntaxat. Vbi ex multa libertate multaque indulgentia uitati sunt mores & disciplina corrupta est, dum alter alteri inuidemus, & alter alteri derogamus, dumque nos inuicem mordemus & incusamus, & aduersus nos ipsos intestina praelia commouemus, dum simulatio in uultu, dolus in corde, fallacia profertur in uerbis, & malorum per singula cumulus intumescit, aggreditur dominus sensim refranare lapsantes, & congregationibus adhuc manentibus, indulget eos tantum, qui in militia erant gentilium, persecutione pulsari. Sed cum ne sic quidem populis ullus sensus redderetur, & in malis suis persisteret, atque ipsi etiam duces populi & principes diuini immemores mandati, aduersum se inuicem, contentione, zelo, liuore, superbia, inimicitijs atque odijs inflammarentur, ita ut tyrannidem potius quam sacerdotium se tenere crederent, Christianae synceritatis & puritatis oblitae: tunc demum domus orationis & ecclesiae Dei uiui ad solum usque deductae sunt, diuinae autem scripturae in medio platearum igni crematae sunt. Haec uerbotim leguntur in 8. lib. Eccles. hist. Eusebii.

*Peccata sanctorum
qualia.*

Distinguo tamen hic inter peccata. Peccant enim sancti, sed abstinere interim à sceleribus, licet in hac quoque nonnunquam ruant, ut claret in exemplo Dauidis. Fugiant tamen ferè furta, parricida, stupra, & alia his similia morte expianda piacula. Ac dum supplicijs afficiuntur à tyrannis sancti, non propter iustitiam aut religionem ueram neglectam supplicijs afficiuntur, sed propter spretam superstitionem & uerae religionis studium pertinacissimum. Condonat ergo & abluit Christi sanguine peccata sanctorum martyrum dominus, & reputat mortem ipsorum, non ex peccatis commissis, sed ob religionis studium perpeccatam. Punit item tyrannos ob casos martyres, quod tyrannidem, non iustum Dei iudicium in his plectendis,

plectendis, sunt sequuti. Voluit quidem dominus castigare suos per tyrannos: sed illi non ita reputarunt (ut est apud Isaïam in 10. cap.) quin potius suos affectus sequuti, modum nec seruauerunt in supplicijs sumendis, nec iustitiam quaesierunt: puniuntur ergo à Domino quòd innoxios trucidarunt. Nam quod Dominus in suis persequutus est, delicta utiq; atq; peccata, tyranni nec persequuntur nec puniunt: quod autem probat dominus, studium utiq; religionis ueræ, fugam & execrationem idololatriæ, id inquam ferro & igni persequuntur isti. Huc itaq; pertinet illud S. Petri dictum, Ne quis uestrum affligatur ut homicida, aut fur, aut facinorosus, aut curiosus alienarum rerum. Quòd si quis ut Christianus affligitur, ne erubescat, imò glorificet Deum in parte hac.

Interim non iubeo desperare facinorosos. Habent hi exemplum latronis cum Christo crucifixi, quod imitentur: agnoscant uidelicet culpam, credant in Christum, huic se commendent, & ferant tormenta patienter. Id si faciunt, dubiū non est quin à Christo recipiantur in paradysum, in æternum apud Christum cum latrone uicturi.

Supplicium sceleratorum.

Et quanquam pius inter sceleratissimos trucidetur, non magis supplicij societate contaminatur, quàm Christus dominus contaminatus legitur cum suspendatur inter latrones. Licet enim pari implicentur supplicio pii & impij: disparitatem fine dissociantur, dum impius abripitur à morte corporea in tartarum, æternum arsurus, pius uerò euestigio migrat in cælum, uicturus cum Christo domino, cui sese credidit atq; obtulit. De hac re, & de causis afflictionū sanctorum Dei hominum, non grauabor C. V. recitare elegantem locum ex 1. lib. S. Augustini de Ciuitate Dei, Quicumq; inquit, boni maliq; similiter afflicti sunt, non ideo ipsi distincti non sunt, quia distinctum non est quod utriq; perpessi sunt. Nam sicut in uno igne aurum rutilat, & palea fumat, & sub eadem tribula stipulae comminuuntur, frumenta purgantur, nec ideo cum oleo amurca confunditur, quia eodem praeli pondere exprimitur: Ita una eademq; uis irruens bonos probat, purificat, eliquat: malos damnat, uastat, & exterminat. Vnde in eadem afflictione mali Deum detestantur atq; blasphemant, boni autem precantur & laudant. Tantum interest non qualia sed qualis quisq; patiat. Nam pari motu exagitatum & exhalat horribiliter cœnum, & suauiter fragrat unguentum. Quid igitur in illa rerum uastitate & Barbarorum irruptione Christiani passi sunt, quod eis nō magis fideliter ista considerantibus ad profectum ualeret? Primò quòd ipsa peccata, quibus Deus indignatus impleuit tantis calamitatibus mundum, humiliter cogitantes, quamuis longè absint à facinorosis, flagitiosis atq; impijs, tamen non usque adeo se à delictis deputant alienos, ut nec temporalia pro eis mala perpeti se iudicet dignos. Excepto enim quod unusquisq; quamlibet laudabiliter uiuēs, cedit in quibusdam carnali concupiscentiæ, etsi non ad facinorum immanitatem & gurgitem flagitiorum atque impietatis abominationem, ad aliqua tamē peccata uel rara uel tanto crebriora quanto minora. Hoc ergo excepto, quis facile reperitur qui eosdem ipsos, propter quorum horrendam superbiam, luxuriam & auaritiam, atq; execrabiles iniquitates & impietates Deus, sicut minando prædixit, conterit terras, sic habeat, ut habendi sunt, sic cum eis uiuat ut cum talibus uiuendum est? Plerumq; enim ab eis docendis, admonendis, aliquando etiā obiurgandis & corripiendis male dissimulatur: uel cum laboris piget, uel cum os eorum, cum quibus sumus, uerecundamur offendere, uel cum eorum inimicitias deuitemus, ne impediānt & noceant in rebus temporalibus, siue quas adipisci adhuc appetit nostra cupiditas, siue quas amittere reformidat infirmitas: ita ut quamuis bonis uita malorum displiceat, &

Quare Deus cum malis bonos quoq; puniat.

ideo cum eis non incidant in illam damnationem, quæ post hanc uitã talibus præparatur: tamen quia propterea peccatis eorum, damnabilibus parcunt, dum eos in suis licet leuibus & uenialibus metuunt, iure cum eis temporaliter flagellatur, quamuis in æternum minimè puniantur. Iure istam uitam quando diuinitus affliguntur cum eis amaram sentiunt, cuius amando dulcedinẽ, peccantibus eis amari esse noluerunt. Non mihi itaq; uidetur hæc parua esse causa, quare cum malis flagellentur & boni, quando Deo placet perditos mores, etiam temporalium poenarum afflictione punire. Flagellantur enim simul, non quia simul malam agunt uitam, sed quia simul amant temporalem uitam: non quidem æqualiter, sed tamen simul, quam boni contemnere deberent, ut illi correpti atq; correcti consequerentur æternam, ad quam consequendam si nollent esse socij, ferrentur & diligerentur inimici: quia donec uiuunt, semper incertum est, utrum uoluntatẽ sint in melius mutaturi. Quare non utiq; parem, sed longè grauiorem habent causam, quibus per prophetam dicitur, Ille quidem in suo peccato morietur, sanguinem autem eius de manu speculatoris requiram. Ad hoc enim speculatores, id est, populorum præpositi, constituti sunt in Ecclesijs, ut non parcant obiurgando peccata: nec ideo tamen ab huiusmodi culpa penitus alienus est, qui licet præpositus non sit, in eis tamen quibus uitæ huius necessitate coniungitur, multa monenda & arguenda nouit & negligit, deuotans eorum offensionem, propter illa quibus in hac uitã, non ut debuit, utitur, sed plus quàm debuit delectatur. Et reliqua. Hæc enim omnia hucusq; recitauimus ex S. Augustino.

*Afflictio piorũ
argumentũ iu-
sti iudicij Dei
in impios.*

Luce 23.

Ad causas calamitatum prementium sanctos Dei homines accedit insuper & illa, quod ipse dominus affligens amicos suos, euidentissimum iusti sui iudicij in impios & contemptores Dei argumentũ edit. Nam S. Petrus, Tempus est, inquit, ut incipiat iudicium, afflictio inquam & tribulatio, à domo Dei. Quod si primum incipit à nobis, quis erit finis eorum qui non credunt Dei Euangelio? Et si iustus uix saluatur, impius & peccator ubi comparebit? Huc pertinet & illa domini exeuntis ad locum supplicij memorabilis sententia, atq; dicentis, Si in humido ligno hæc faciunt, in arido quid fiet? Si sancti arbores frugiferae, speciosissimos bonorum operum fructus proferentes, in hoc seculo, Deo permittente, usque adeo miserè diuexantur & torquentur, quid quæso dicemus de impijs, qui alienissimi sunt ab omni uirtute & opere bono? Cruciabuntur haud dubiè modis, poenis aut supplicij omnino infandis.

*Causæ afflictio-
num in impijs.*

Quod enim causas attinet calamitatum, quibus impij diuexantur, non possunt esse ullæ aliæ quàm ipsa quæ quotidie patrant scelera, ideoq; puniuntur iusto Dei iudicio, ut omnibus appareat Deum odisse impietate cum impijs. Ita afflictus legitur Pharaos. Saul incubuit proprio mucroni, ceciditq; in monte Gelboe cum multis Izraelitarum millibus, eo quod peccasset contra dominum, qui ipsum in argumentum sui iusti iudicij, deniq; reliquis ad terrorẽ perdere uoluit. Morbo horribili corripuntur & extinguuntur Antiochus Epiphanes, Herodes magnus, Herodes Agrippa, & Galerius Maximianus Cæs. Quia peccauerunt in Deum & fideles Dei, quos hic ulcisci iustiq; sui iudicij argumẽta proferre uoluit: adeoq; illos statuere exempla tyrannis, in quibus uideant quæ maneant persecutores piorũ supplicia. Et quamuis bonus dominus creaturis suis omnia ad bonum instituat, & ferè calamitates omnes immittat ut à sceleribus retrahat: quia tamen hypocritæ & impij consilia Dei aspernantur, neq; Deum percutiente agnoscere, neq; ad Deum conuerti sustinent, omnia ipsis cedunt ad interitum, quemadmodum diligentibus Deum omnia cooperantur ad bonum, ideoq; pereunt in suis calamitatibus, adeoq; in præ-

in presenti hoc seculo iram Dei per supplicia horrenda persentiscere incipiunt, & eadem, imò longè maiora & acerbiora multò, simul atq; hinc migrarint, in futuro seculo aeternum perferunt.

Quòd si nulla hic sentiunt incommoda uel mala impij, grauius affligentur in futuro seculo. Notissima est parabola illa euangelica de diuite epulone, qui cum in hac uita uixisset in delicijs, in futura siti torquetur, & ignibus infernalibus torretur saeuissimè. Est ergo felicitas impiorum in hac uita aliud nihil, quàm extrema miseria. Nam S. Iacobus Apostolus, In delicijs uixistis super terram, inquit, & lasciuiistis, enutriistis corda uestra, ut in die macerationis, quod inquam cedit uobis sicuti saginatis pecudibus, quæ ad lanienam saginantur. Significantius enim Ieremias, Iustus es tu ô domine, inquit, ut maximè tecum expostulem: expostulabotamen. Qui fit ut uia impiorum prosperetur, & feliciter agant omnes qui impudentissimè præuaricantur? Plantasti eos, radices agunt, proficiunt, quin & fructum edunt. Et mox, Tu autem domine, extrahe eos sicut pecudem è grege ad lanienam, & consecra siue destina eos ad diem occidionis. Cum his faciunt illa quod quæ post felicitatem impiorum copiosè & rotundè enumeratâ, Asaph in hæc uerba subiungit, Certè istos tu constituisti in lubricum, deiciēs eos præcipites, ut prorsus dissiliant. O quàm subita calamitate oppressi sunt: perierunt, terroribus absorpti sunt. Non aliter quàm somnium quod disparuit quàm primum quis eui-
gilauit. Domine cōtemptissimas reddes in ciuitate eorum imagines. Nam & Dauid prior cecinit, Paulum adhuc, & nusquam erit impius: cumq; inspexeris locum eius, nusquam apparebit. Vidi impium potentem & uirentem ac sese diffundentem instar frondosæ lauri; & transiui, & ecce nusquam erat, quæsiui eum & non est inuentus. Ad eundem modum testatur & Malachias permultum interesse in die iudicij inter colentem Deum & non colentem, inter iustum & impium. Venturâ enim diem domini in qua feroces & arrogantes omnes, omnes item qui iniquitatem patrant, ceu stipula igni cœlitus immisso sint inflammandi, ut neque radix neq; ramus eis relinquatur. Proinde qui sapiunt, nunquam posthac offenduntur impiorum felicitate, nunquam desiderabunt consortes fieri infelicissimæ felicitatis: neq; admodum horrebunt crucis & calamitatum miseriam, quam audiunt à clementissimo Deo sanctis immitti, ut probentur & excoquantur à scoria carnis, & immundissimi huius mundi. Hæc enim sufficiunt disputata de causis calamitatum.

De infelicitate impiorum.

Iacobi 5.

Ierem. 12.

Psal. 71.

Psal. 37.

Videamus iam honorandi fratres, quomodo pius & syncerus Dei cultor se gerat in quibuslibet calamitatibus siue afflictionibus. Non despondet animum, imò omnem desperationem calcat, quia fortiter sibi in fide, mala ferenda intelligit. Spe ergo patientia & precibus se armat. Sunt sanè inter homines, qui simul atq; affliguntur illud uulgare ingeminant, Optimū non nasci, aut quàm citissimè aboleri. Impia hæc uox est & indigna Christiano homine. Longè impientiores isti sunt, qui sibiipsis uiolentam & armatam manum inferūt, ne diutius mala ferre, aut contumelia affici cogantur. Repudianda est rursus Stoicorum insulsa sententia de indolentia. De qua recitabo c. v. elegantissimam eximij in Ecclesia Christi doctoris disputationem, hisce proditam uerbis.

Quomodo se gerant pij in calamitatibus. Malach. 3.

Nimis ingrati sumus, nisi calamitates libenter atq; hilariter è manu Domini suscipimus. Neq; uerò ea à nobis requiritur hilaritas, quæ omnem acerbitalis dolorisq; sensum tollat. Alioqui nulla esset in cruce sanctorum patientia, nisi & dolore torquerentur, & angerentur molestia. Si nulla esset in egestate asperitas, nullus in morbis cruciatus, nulla in ignominia punctio, nullus in morte horror, cuius

Contra indolentiam Stoicorū.

foret uel fortitudinis uel moderationis ea usque deus habere. At cum unumquodque ipsorum ingenita sibi amaritudine nostros omnium animos naturaliter mordeat, in eo se profert fidelis hominis fortitudo, si eiusmodi amaritudinis sensu tentatus, utcumque grauiter laboret, fortiter tamen obsistendo eluctatur. In eo se exerit patientia, si acriter extimulatus, timore tamen Dei refrænatur ne in aliquem intemperiem erumpat. In eo elucet alacritas, si tristitia & mœrore uulneratus, in spiritali Dei consolatione acquiescit. Hunc conflictum quem aduersus naturalem doloris sensum sustinent fideles, dum patientiæ ac moderationi student, eleganter descripsit Paulus his uerbis. In omnibus premimur, at non anxij reddimur: laboramus, at non destituimur: persecutionem patimur, at in ea non deferimur: desicimur, at non perimus. Vides ut patienter ferre crucem, non sit prorsus obstupescere, & omni doloris sensu priuari: quemadmodum Stoici magnanimum hominem stultè olim descriperunt, qui exuta humanitate, rebus aduersis perinde ac prosperis, tristibus perinde ut lætis afficeretur, imò qui instar lapidis nulla re afficeretur. Et quid ista sublimi patientia profecerunt? Nempe simulachrum patientiæ depinxerunt, quod neque repertum est unquam inter homines, neque extare potest. Quin potius dum nimis exactam ac præcisam patientiam habere uolunt, eius uim sustulerunt è uita humana. Nunc quoque sunt inter Christianos noui Stoici, quibus non modò gemere ac flere, sed tristari quoque ac sollicitum esse, uitiosum est. Atque hæc quidem paradoxa ferè ab otiosis hominibus procedunt, qui speculando magis quam agendo se exercentes, nihil quàm talia paradoxa parere nobis queunt. At nihil nobis cum ferrea ista philosophia, quam magister ac Dominus noster, non uerbo tantum, sed exemplo etiam suo damnavit. Nam & suis & aliorum malis ingemuit & illachrymauit, nec aliter discipulos suos instituit. Mundus, inquit, gaudebit, uos autem lugebitis & flebitis. Ac ne quis uitio id uerteret, proposito edicto beatos pronunciauit qui lugent. Nec mirum. Nam si improbantur omnes lachrymæ, quid de domino ipso iudicaremus, cuius è corpore sanguineæ lachrymæ distillarunt? Si quælibet formido infidelitatis notatur, quo loco habebimus horrorem illum, quo non leuiter consternatum fuisse legimus? Si omnis tristitia displicet, quomodo placebit quod animam suam fatetur esse tristem usque ad mortem? Hæc eò dicere uolui, ut pios animos à desperatione reuocarem, ne studio patientiæ ideo protinus renuncient, quòd naturalem doloris affectum exuere non possunt. Quod necesse est euenire ijs, qui ex patientia stuporem, ex homine forti & constanti stipitem faciunt. Sanctis enim tolerantia laudem defert scriptura, dum ita malorum duritia affligantur, ut non frangantur nec concidant: ita amaritudine punguntur, ut simul perfundantur spiritali gaudio: ita premuntur anxietate, ut Dei cōsolatione exhilarati respirent. Interim uersatur in eorum cordibus illa repugnantia, quòd naturæ sensus, quod sibi sentit aduersum, refugit atque horret: pietatis autem affectus ad obedientiam diuinæ uoluntatis etiam per has difficultates contendit. Hæc repugnantia expressit dominus cum ita loqueretur Petro, Cum esses iunior cingebas te, & ambulabas quo libebat: cum autem senueris, præcinget te alius, & ducet quo non uis. Non est sanè uerisimile Petrum cum necesse esset Deum glorificare per mortem, inuitum ac resitantem eò pertractum esse. Alioqui parum haberet laudis eius martyrium. Verum utcumque cordis summa alacritate diuinæ ordinationi pareret, quia tamen humanitatē non exuerat, duplici uoluntate distringebatur. Nam dum cruentam illam mortē, quam erat obiturus per se reputabat, eius horrore perculsus, libenter effugisset. Rursus dum succurrebat Dei imperio se ad eam uocari, euictio & proculcato timore, libenter atque adeò hilariter eam subibat.

Dolent sancti.

1047.23.

subibat. Hoc ergo studendū est, si Christi discipuli esse uolumus, ut tanta Dei ob-
seruantia atq; obedientia imbuantur animi nostri, quæ contrarias omnes affectio-
nes domare ac subiugare eius ordinationi queat. Ita fiet ut quocunque uexemur
crucis genere, in summis etiam animi angustijs patientiam cōstanter retineamus.
Res enim ipsæ aduersæ habebunt suam asperitatem, qua mordeamur: sic morbo af-
flicti & ingemiscemus, & inquietabimur, & sanitatē expetemus: sic egestate pres-
si, & solitudinis & tristitiæ aculeis perstringemur: sic ignominia, contemptus,
iniuriæ dolore feriemur: sic in funeribus nostrorum debitas naturæ lachrymas ex-
oluemus. Sed hæc semper erit clausula, Atqui Dominus ita uoluit. Ergo eius uo-
luntatem sequamur. Hactenus ille.

Proinde calamitatibus appetiti & irretiti fideles inprimis medentur sibi patien- *De patientia*
tia. Ea est, authore Lactantio, malorum quæ aut inferuntur aut accidunt cum æ- *sanctorum.*
quanimitate perlatio. Patiens enim fidelis, fixis in uerbum Dei oculis, fide ac spe
Deo & promissioni eius inhæret, suffert quæ accidunt aduersa, temperans animi
dolorem & corporis tormenta sapientia cœlesti, ut nuspiam superatus doloris ma-
gnitudine deficiat à Deo & mandatis eius, faciens ea quæ prohibuit facere Domi-
nus. Vincit ergo seipsum & affectiones suas patiens, uincit dolores & calamita-
tes omnes, perstat in æquanimitate & pietate. Et quamuis sufferat omnia fidelis
patientia, impia tamen nec approbat, nec falsa tolerat. Nam saluator noster unicū
patientia exemplum, patientissimè præbuit impijs manus suas adeoq; totum cor-
pus uinciendum: sed idem interim improbat ipsorum iniquitatem, dicens, Quasi
ad latronem existis cum gladijs & fustibus, cum quotidie uobiscum fuerim in tem-
plo: sed hæc est hora illa uestra & potestas tenebrarum.

Huc iam pertinet elegans descriptio aut prosopopœia Patientia per Floren- *Patientia simul*
tem Tertullianum, his proposita uerbis, Agē iam patientia effigiem habitumq; *lachrum.*
comprehendamus, Vultus illi tranquillus & placidus, frons pura, nulla mœroris
aut iræ rugositas contracta: remissa æquē in lætum modum supercilia, oculis hu-
militate non infelicitate deiectis. Os taciturnitatis honore signatum. Color qualis
securis & innoxijs. Motus frequens capitis in diabolum, & minax risus. Cæterum
amictus circum pectora candidus & corpori impressus, ut qui nec inflatur, nec
inquietatur. Sedet enim in throno spiritus eius mitissimi & mansuetissimi, qui nō
turbine glomeratur, nō nubilo liuet, sed est teneræ serenitatis apertus & simplex,
quem tertio uidit Helias. Nam ubi Deus, ibidem & alumna eius, patientia scilicet.

Iam & uires Patientia enumeratione quadam colligens beatus martyr Cy- *Vires & effe-*
prius in Sermonē de Bono patientia dicit, Patientia est quæ nos Deo commen- *tu patientia.*
dat & seruat. Ipsa est quæ iram temperat, quæ linguam frænā, mentem gubernat,
pacem custodit, disciplinam regit, libidinis impetum frangit, tumoris uiolentiam
comprimit, incendium simultatis extinguit, coërcet potentiam diuitum, inopiam
pauperum refouet, tuetur in uirginibus beatam integritatem, in uiduis laborio-
sam castitatem, in coniunctis & maritatis indiuiduam charitatem, facit humiles
in prosperis, in aduersis fortes, contra iniurias & contumelias mites, docet delin-
quentibus citò ignoscere, si ipse delinquas, diu & multum rogare: tentationes ex-
pugnat, persecutiones tolerat, persecutiones & martyria consummat. Ipsa est quæ
fidei nostræ fundamenta firmiter ponit: ipsa est quæ incrementa spei sublimiter
prouehit: ipsa actum dirigit, ut tenere possimus uiam Christi, dum per eius tole-
rantiam gradimur: ipsa efficit ut perseueremus filij Dei, dum patientiā patris imi-
tamur. Hæc Cyprianus. His si libet, colophonis uice adijcias licet ex Euangelio *Luce 12.*
Christi breuem illam, sed euidentem sententiā, Per patientiam uestram possidete *Hebr. 10.*

Iacobi 1.

De Spe fidelium.

Spes est absentium.

Spes est rerum certissimarum.

animas uestras: denique hæc Apostoli uerba, Ne abieceritis fiduciam uestram, quæ magnam habet præmij retributionem. Nam patientia uobis est opus, ut ubi uoluntatem Dei peregeritis, reportetis promissionem. Adhuc enim perpusillum temporis & qui uenturus est, ueniet, & non tardabit. Iustus autem ex fide uicturus est; & si se subduxerit, non probabitur animo meo. At nos non sumus, qui subducamus nos in perditionem, sed ad fidem pertinemus in acquisitionem animæ. Cæterum cum patientia non innascatur nobis, sed conferatur cœlitus, orandus est pater cœlestis, ut hanc nobis conferre dignetur, iuxta doctrinam Apostoli Iacobi dicentis, Patientia perficit. Quod si cui uestrum deest sapientia, postulet ab eo qui dat, nempe Deo, qui dat, inquam, omnibus simpliciter, nec exprobrat, ac dabitur ei. Sed postulet cum fiducia nihil hæsitans.

Patientiam uerò Christianam fulcit spes solida fidelium. Spem aiunt esse opinionem futurorum, communem quidem tam ad bona quam ad mala: sed reuera, Spes est expectatio certissima eorum quæ uerè & diserte à Deo promissa, fides credidit. Est ergo relatio quædam spei ad fidem, & mutui quidam inter utramque nexus. Fides credit Deum esse ueracem, & intendit oculos in ipsum Deum. Spes autem expectat ea quæ credidit fides. At quomodo expectes, nisi scias id quod expectas à Deo, promissum, quod suo tempore accipias: Fides credit remissa esse nobis peccata, & paratam uitam æternam per Christum: spes autem expectat illa ut accipiat ea suo tempore quæ promisit Deus, utcūq; interim iactetur aduersis. Neq; enim mergitur spes & euanescit, licet nō cernat quod sperat: imò nō euanescit, tametsi contraria prorsus se obijciant, quasi nulla sint quæ expectat. Ideoq; Paulus dixit, Spe seruati sumus: porro spes si uideatur, nō est spes. Quod enim quis cernit, cur idem speret? Si uerò quod nō uidemus, speramus, id certè per patientiam expectamus. Sperauit Abraham se accepturum promissam, in qua tamen ne latum quidem pedem obtinebat, & quam uidebat à potentissimis gentibus occupari, terram. Sperauit Moses se liberaturum ex Ægypto, & repositurum Izraelis populum in terram promissam, quanquā non uideret rationes & modum quomodo id pficeret. Sperauit Daud se regnaturū super Izraelem, & tamen sensit imminentē sibi Saulem & Saulinos potentissimos, adeo ut non semel periclitaretur de uita. Sperarunt Apostoli & sancti Dei martyres uitā se accepturos æternam, & Deum nunquā ipsis defuturum: interim tamen sentiebant omnium hominum odia, eijciebantur in exilium, tandem & per uaria supplicia occidebantur. Sic inquam spes absentium & non comparentium spes est, & expectatio quidem, sed expectatio certa, imò longè certissima: nec quarumlibet rerum, sed quæ comprehendimus uera fide, adeoq; earū rerum quæ ab ipso Deo uiuo, uero & æterno promissa sunt. Nam S. Petrus, Perfectè, inquit, sperate in eam quæ ad uos defertur gratiam. Perfectè autem sperant, qui indubiè & totos sese committunt diuinæ gratiæ, ac hæreditatem uitæ expectant sine dubitatione. Sed & Paulus Apostolus spem appellat animæ, uelut ancoram tum tutam tum firmam. Ac quantò firmior est diuina promissio, tanto certior & securior est ipsa spes. Spes enim non est expectatio rei cuiuslibet, sed fidei, id est, quam fides credidit, & quam scimus uerbo Dei nobis promitti. Ideoq; Paulus fidem per spem exponit, dum dicit, Fides est substantia rerum sperandarum, argumentum non apparentium. Fides ergo ueluti fundamentum est, cui innititur spes, adeoq; ipse Deus & uerbum Dei infallibile obiectum est spei nostræ. Ideoq; Paulus appellat Deum spem nostram: ita & propheta. Huc pertinet Psal. 91. in quo fidelis clamat, Tu es Domine spes mea, in edito collocasti habitationē tuam. Verum innumera inuenias in Psalmis exempla. Nequit autem firma esse spes, ubi

ubi non est solida fides & diserta Dei promissio. Ea cum sit rerum temporalium & aeternarum, spes quoque est temporalium & aeternarum.

Et ut fides diuinæ gratiæ donum est, non naturæ nostræ uis, ita spes coelitus *Spes à Deo est.* nobis donatur, & confirmatur per spiritum Dei. In expectatione enim est gemitus & desiderium. Impetunt tentationes & urgent, quasi prorsus negetur quod differatur, aut ignoret res nostras Deus, qui expectantes subinde, & quasi perpetuò negligere uidetur: multa ergo consolatione & confirmatione spiritus diuini opus habet spes nostra. Quæ si solida sit, sustentat & erigit animum cupidum quidē boni, sed interim tamē infirmitate grauatum. Et cum Dominus differt promissa sua, ac uidetur plus æquò diutius nos negligere, aut afflictos alioqui satis, molestiis onerare, spes accurrit, faciensque officium suum, iubet nos longanimes expectare Dominum, qui ut non potest odisse cultorem suum, ita non fallit, nō mentitur uel in minimo, qui est æterna ueritas & bonitas. Hic iam profunt scripturæ loci de spei certitudine, & quod non sunt confusi qui sperarunt in Deum, tametsi diutissime auxilium protraxerit. Promittit terram Chanaan Dominus semini Abraham, sed eandem tradit possidendam demum post 430. annos, imò circūducit prius etiam per desertum uastissimū annis 40. Liberat ex Babylone, sed post annos 70. Exempla huius rei in scripturis innumera sunt. Quid quod filium unigenitum ab initio mox mundi promissum, exhibet tandem in fine seculorum? Durandum est ergo sanctis, expectandum hoc potissimum nomine, quod fallere non potest ueritas, quod omnes expectantes ipsum seruati sunt. Clamat Dauid, In te sperauerunt patres nostri, sperauerunt & liberaisti eos. Ad te clamauerunt, & salui facti sunt: in te sperauerunt, & non sunt confusi. Et iterum, Bonus est Dominus, beatus uir qui sperat in eo. Item, Qui confidunt in Domino ut mons Sion, non mouebuntur, sed permanebunt in æternum. Clamat etiam Paulus in suis tentationibus, dicens ad Philip. Noui quod calamitas mea mihi cedit ad salutem, secundum expectationē & spem meam, quod nulla in re pudeam.

Non fallit, licet aliquoties diu protrahat promissa dominus.

Psal. 22.

Hæc diximus hucusque de eo quomodo se gerant in calamitatibus uarijs fideles. *Generales consolationes.* Non enim despondent animum, sed obfirmant sese firma spe, & mala quælibet patienter sufferunt expectantes in omnibus Dominum, unicam omnium fidelium spem. His sub finem adiiciemus generales aliquot consolationes, quæ spem fidelium confirmant magis, patientiamque in malis perferendis commendent, ac in casibus quibuslibet afflictos & pressos erigant.

Principiò expendat afflictus malis ante omnia, à quo proficiatur afflictio. *A quo sit afflictio.* Affligunt sanè homines mali, affligit cacodæmon & morbus, affligit mundus: sed non sine Deo, imò permittente Deo. Iobum non potuit uexare satanas, uel in fortunis, uel in ipso corpore, nisi permittente Deo. Clamat item propheta Dauid, Tu es qui extraxisti me ex utero matris meæ, in te cōfusus sum cum adhuc penderem ab uberibus matris meæ: in te coniectus sum à partu. Deus meus es tu: in manu tua sunt tempora mea. Et in Euangelio dicit Dominus, Nōne duo passeruli minuto asse ueneunt, & unus ex illis non cadet in terram sine patre uestro? Vestri uerò etiam pili capitis omnes numerati sunt. Deus autem cuius imperiū reguntur omnia, pater est, non modò Deus & Dominus mortalium. Et uoluntas eius optima & salutaris est hominibus, ut iam non dicam ipsum omnia ordine & iustissime agere, quæ agit. Quod si bona est uoluntas Dei erga nos, non potest non optimum esse nobis, quod euenit, illo permittente aut uolente qui nos amat. Atque hic permultū discrepant à filiis Dei, filij huius seculi. Hi enim in calamitatibus suis sese consolantes dicunt, Feras non culpes, quod mutare non potes. Deus ita uult,

cui nemo potest resistere: feras ergo imperium Domini, nisi malis malum necessarium conduplicare. Hi rogati quomodo ferant manū Domini, & an Deo sese subiiciant, respondent, Cogor quidem, *Ich muß wol*, cum resistere non possim. Si ergo possis, audio quid factururus sis. Illi autem patienter ferunt manū Dei, non quod resistere nequeant & omnia in necessitatem reiiciant, sed quia credunt Deum esse iustum & patrem benignissimum: ideo enim agnoscunt Deum iusto iudicio persequi mala, in maiora atrocioraque meritis; agnoscunt praeterea Deum benignū patrem castigare ad emendationem & sanitatem: unde & pro castigatione magnas agunt gratias, penitusque sibiipsis & suo arbitrio renunciantes, totos sese Deo uiuos & mortuos permittunt. Hoc ipsum impetrare uolens Apostolus à fidelibus dicit, Deus uobis tanquam filiis loquitur. Fili mi, ne neglexeris correptionem Domini, neque deficias cum ab eo argueris. Quem enim diligit Dominus, corripit: flagellat autem omnem filium quem recipit. Si castigationem sustinetis, ueluti filii offert se Deus. Quis enim est filius, quem non castigat pater? Quod si alieni estis à castigatione, cuius participes sunt omnes, igitur spurii estis, non filii. Itaque cum carnis nostrae patres habuerimus castigatores, & reueriti simus illos, an non multo magis subiiciemur patri spirituum, & uiuemus?

Propter quid
affligamur.

Matth. 5.

Daniel. 9.

2. Reg. 15.

1. Corinth. 11.

Promissiones
factae afflictis.

Deinde inspiciat calamitosus fidelis ipsas causas propter quas affligitur. Vel enim propter studium iustitiae & religionis diuexatur & persecutionem sustinet ab hominibus: Vel propter peccata commissa commeritas luit poenas. Qui persecutionem patiuntur propter iustitiam, gaudeant & gratias agant Deo cum Apostolis, quod digni habiti sint, ut pro nomine Christi patiantur. Dixit enim in Euangelio Dominus, Beati qui persecutionem patiuntur propter iustitiam: quoniam illorum est regnum coelorum. Beati estis cum probra eiecerint in uos homines, & insectati fuerint, & dixerint omne malum uerbum aduersus uos, mentientes, propter me. Gaudete & exultate, quoniam merces uestra multa est in coelis. Sic enim persecuti fuerunt prophetas, qui fuerunt ante uos. Si uero quis sustinet mala propter commissa peccata, agnoscat iustum Dei in se iudicium, humiliet se sub potenti manu Domini, confiteatur Deo, ueniam supplicibus postulet precibus, patienterque ferat quod merito suo maximo fert. Exemplum sequatur Danielis & Davidis. Daniel confitetur peccata sua Domino, & ait, Peccauimus, iniqui fuimus, impii egimus, neque obediimus seruis tuis prophetis, qui loquuti sunt nobiscum in nomine tuo. Tibi quidem Domine iustitia, nobis autem pudor. Visitasti nos et afflixisti, sicut praedixisti per Moysen seruum tuum. Dauid autem in exilium abiens, sacerdotibus arcam post regem portantibus, dicit, Reportate arcam Dei in urbem. Si gratiam inuenero coram Domino, me restituet, ostendetque mihi & se & habitaculum suum. Quod si dixerit, Non te delector, neque mihi gratus es: praestò sum, faciat mecum quod sibi bonum uisum fuerit. Et sane satius multo, melius & conducibilius est in praesenti seculo puniri, & postquam hinc migrauerimus aeternum uiuere, quam hic malorum esse exortes, & in alio mundo in sempiternum aeternis subiici supplicijs. Certè Paulus disertè dixit, Cum iudicamur, à Domino corripiamur, ne cum mundo condemnemur. Et finis quidem castigationum & calamitatum omnium, quibus exercentur sancti, alius non est, quam ut calcato & spreto mundo, emendatique conuertantur ad Dominum & salui fiant. Verum de fine afflictionum superius diximus.

Praeterea praefigunt sibi calamitatibus subiecti, disertas & copiosas Dei promissiones, à quibus oculos non auertunt, ut neque à sanctorum exemplis. Infinita sunt exempla diuini auxilij & liberationis praesentissimae. Promittit autem bonus Dominus

minus auxilium & liberationem, nō illis modò qui affliguntur propter iustitiam, sed illis etiam qui propter peccata uisitantur à Domino. Dauid enim canit, Dominus sanat contritos corde, & obligat contritiones eorum. Dominus soluit compeditos: Dominus illuminat cæcos: Dominus erigit inclinatos. Non in perpetuum irascitur, neq; in æternum litigabit. Non secundum peccata nostra facit nobis, neq; secundum iniquitates nostras retribuit nobis. Et quàm longè distat ortus Solis ab Occasu, tam longè remouit à nobis scelera nostra. Huc pertinet integrū caput 30. Ieremiæ prophetæ. Et Apostolus testatur, & ait, Sicut abundant afflictiones Christi in nobis, ita per Christum abundat & consolatio nostra. Neq; desunt nobis exempla quæ de his testantur, & præsentissimam liberationem sanctorum, adde & peccatorum pœnitentiam in maximis ærumnis positorum, oculis proponunt. Liberantur fortī manu Dei ex diluuiō omnem carnem sub cœlo præfocante, & ex incendio Sodomitico sauo & horrendo, patres nostri Noe & Lot cum suis familijs. Varijs impliciti tribulationibus Iacob & Ioseph, explicantur à benigno Domino. Sicuti & filij Izraelis educuntur & liberantur ex seruitute Ægyptiaca planē ferrea. Peccat contra Dominum populus Izraeliticus in deserto, sub iudicijs & regibus creberrimè & enormiter, puniturq; grauiter à Domino, sed celeriter rursus liberatur à Domino, quoties peccata agnouit & se conuertit ad Dominum. Peculiarīa sed egregia liberationis exempla sunt in Dauide, Iosaphat, Ezechia, Manasse, & multis alijs. Innumera extant in Euangelio liberationes per Christum à peccatis, à morbis, à malis, à periculis, & ab ipso cacodæmone. In Actis Apostolorum præclarissima leguntur liberationis exempla. Concluduntur Apostoli in carcerem, sed educuntur ab angelo Dei, & statuuntur in templum, in quo prædicent Euangelium. Ita ex carcere liberatur Petrus Apostolus, cū postridie Agrippa ipsum iugulare constituisset. Paulus Apostolus innumeris oppressus malis, semper præsentissimum expertus est Dominum. Hoc autem suæ tribulationis liberationisq; exemplum omnibus proponens fidelibus, ad Timotheum dicit, Tu nosti patientiam afflictionesq; quæ mihi acciderunt Antiochiæ, Iconij, Lystris, quas persecutiones sustinuerim. At ex his omnibus eripuit me Dominus: sed & omnes qui uolunt piè uiuere in Christo Iesu, persecutionem patientur. Multò plura exempla idem Apostolus congerit in 11. cap. ad Hebr. Hæc inquam omnia colligunt sancti, ac in tempore tentationis afflictionisq; hisce sese consolantur & erigunt. Ita enim docet nos Paulus, cū dicit, Quæcūq; scripta sunt, in nostrā doctrinam scripta sunt, ut per patientiam & consolationem scripturarum spem habeamus.

*Liberationis
exempla.*

Neq; hoc solum faciunt fideles, sed recordantur etiam mandatorū Christi Domini, quibus ille nobis patientiam præcipiens, crucem nobis imposuit omnibus. Dicit enim in Euangelio, Si quis uult post me uenire, abneget semetipsum, & tol-
lat crucem suam, & sequatur me. Qui enim uoluerit animam suam seruare, perdet eam: rursus qui perdiderit animam suam mea causa, inueniet eam. Quid enim prodest hominī si totum mundum lucratus fuerit, animæ uerò suæ iacturam fecerit? Aut quid dabit homo cuius permutatione redimat animam suam? Futurum est enim ut filius hominis ueniat in gloria patris sui, cum angelis suis: & tunc reddet unicuiq; iuxta facta sua. Et rursus alio in loco, Si quis uenit ad me, inquit, nec odit patrem suum & matrem suam, & uxorem, & filios, & fratres, & sorores, præterea autem & animā suam, non potest meus esse discipulus. Et quisquis non ba-
iulat crucem suam, & uenit post me, non potest meus esse discipulus. Post quæ uerba Dominus parabolas profert, quibus docet explorare uires priusquam recipiamus professionem Euangelicam. Ad præcepta certè præceptoris, Christi respicien-

*Mandata Domini de feren-
da cruce.*

tes fideles Apostoli, Petrus & Paulus, omnes nos ad crucem patienter ferendam adhortantur. Ille enim, Christus afflicus est pro nobis, inquit, relinquens nobis exemplum, ut insequeremini uestigia ipsius. Hic uerò dicebat, Per multas tribulationes oportet nos intrare in regnum Dei.

*Tempus afflictio-
nis breue, prae-
mium amplissi-
mum & aeter-
num.*

Consolatur fideles uarijs calamitatibus oppressos, quòd tempus afflictionis breue est, quòd præmium & gaudium ineffabilibus modis est præstantius quàm sit tribulatio, adeò ut nulla sit inter ipsa collatio: denique quòd bonus Dominus non imponat grauiora onera, quàm simus ferendo. Sed libet iam de singulis scripturarum audire testimonia. S. Petrus appellat afflictionis tempus breue tempus. Nam & Isaias uel ipse apud Isaiam Dominus, prior dixit, I popule mi intra penetralia tua, & claude post te ostia tua, lateas paululum uel ad momentum, donec prætereat indignatio mea. Paulus uerò, Patres carnis uestre, inquit, ad paucos dies pro arbitratu suo uos erudierunt, pater autem spirituum (breue tempus) ad commodum uestrum erudit, in hoc ut impartiat uobis suam sanctimoniam. Omnis autem castigatio in præsens quidem non uidetur esse gaudij, sed molestia. Ac postea fructum tranquillum iustitiæ reddit ijs, qui per illam fuerint exercitati. Et idem Apostolus, Cum Christo patimur, ait, ut & unà cum illo glorificemur. Nam reputo non esse pares afflictiones præsentis temporis ad gloriam quæ reuelabitur erga nos. Nam momentanea leuitas afflictionis nostræ mirè supra modum æternum pondus gloriæ parit nobis, dum non spectamus ea quæ uidentur, sed ea quæ non uidentur. Nam quæ uidentur temporaria sunt, ea quæ non uidentur æterna. Rursus in Epistola ad Corinthios dicit idem ille, Fidelis est Deus, qui non finet uos tentari supra id quod potestis, imò faciet unà cum tentatione euentum, quò possitis sufferre. Quòd si diutius æquo uideatur nobis Dominus protendere tribulationē, cogitabimus nullos terminos esse diuinæ uoluntati præscribendos, sed permittendum ipsi, ut liberè quantum, & quandiu, & quibus modis uelit, affligat suæ manui subditos. Nouit ille qui est æterna sapientia, & qui amat homines impenisissimè, quando finem imponat malis, & liberet nos à malo. Nec desunt exempla quæ diutius afflictos consolantur. Laborabat profluuiò sanguinis mulier illa Euangelica ad desperationem usq; annos duodecim. Alia quædam decubuit contracta ad annos decem & octo. Ad probaticam piscinam iacebat miser quidam, qui morbo fuerat graui obnoxius annos triginta & octo. Spatium hoc erat sanè quàm molestissimum. Sed in tempore tamen illis omnibus succurrit, qui optimè nouit quando maximè opportunum & utile homini sit auxilium. Illius ergo bonæ, iustæ, & sapientissimæ uoluntati permittamus, quando & quomodo nos liberet.

*Pios nulle affli-
ctiones à Deo
disiungunt.*

Rom. 8.

In primis uerò illud consolatione & fiducia in tribulationibus refertissimum est, quòd fideles & electos Dei à Deo nō facile ulla uis aut malum ullum disungere potest. Clamat enim in Euangelio Dominus, Oues meæ uocem meam audiunt, & ego cognosco eas, & sequuntur me, & ego uitam æternam do eis, nec peribunt in æternum, neque rapiet eas quisquam de manu mea. Pater meus qui dedit mihi, maior omnibus est: & nemo potest rapere de manu patris mei. Ego & pater unum sumus. Huc pertinet illud S. Pauli tripudium ac celestina, Quis nos separabit à dilectione Dei? num afflictio? num angustia? num persecutio? nū fames? num nuditas? num periculum? num gladius? Quemadmodum scriptum est, Propter te morti tradimur tota die: habiti sumus uelut oues destinatae macrationi. Verum in his omnibus superamus per eum qui dilexit nos. Nā mihi persuasum habeo quòd neq; mors, neq; uita, neq; angeli, neq; principatus, neq; potestates, neque instantia,

neq;

neq; futura, neq; altitudo, neq; profunditas, neq; ulla creatura alia, poterit nos separare à dilectione Dei, quæ est in Christo Iesu Domino nostro.

Sentiunt sanè in tribulationibus suis sancti dolores & incommoda multa, sed in ipsis incommodis interim habent multò plura commoda: ergo imminuuntur in uno quidem, at augentur in altero, ut ipsa crux non sit perditio, sed exercitatio & salubris medicina. Vbi reuocandam iterum existimo in animum uerè auream S. Pauli sententiã. In omnibus premimur, at non anxij reddimur: laboramus, at non destituimur: persecutionem patimur, at non in ea deserimur: deijcimus, at nò perimus. Amittunt ergo fideles in hoc seculo facultates istas suas terrenas, sed nunquid ideo amittunt fidem? nunquid pietatem? nunquid interioris hominis bona, quæ ueræ sunt apud Deū diuitiæ? Clamat Apostolus, Est quæstus magnus pietas cum animo sua sorte contento. Nihil enim intulimus in mundum, uidelicet nec efferre quicquam possumus: sed habētes alimenta, & quibus tegamur, his cōtenti erimus. Et certè bonus dominus, qui coelū & terrā, & omnia quæ in eis sunt condidit propter hominē, qui pullos coruorum pascit, nequaquam animam enecabit iusti inedia aut fame. Præterea non amittit thesaurum suum in hoc seculo, qui eo modo thesaurizat quo præcepit Dominus, apud quem sciunt sibi repositū esse diuersissimum thesaurū, quicunq; spoliatur facultatibus suis terrenis propter dominū. Sed & Iob insignis ille dei seruus clamat, & dicit, Nudus exij de utero matris meę, nudus in terrā reuertar. Dñs dedit, dominus abstulit, sicut domino placuit ita factū est. Sit nomen domini benedictū. Adijciendum his, abnegatione ueritatis & fuga afflictionū, minimè retineri opes & tranquillitatem, sed amitti magis, imò infames nos redi apud omnes omniū seculorum bonos homines. Videmus enim eos qui noluerunt fortunas suas periclitari propter Christū & ueritatē eius, sed elegerunt magis dissimulatione uel abnegatione uerī res suas uel retinere uel augere, retinuisse infamiam fœdissimā, auxisseq; tormenta horribiliter excruciantia cōscientiam, ac amisisse nihilominus opes, nō iam in nomine Christi, sed in nomine diaboli. Qui uerò unquā coniecerūt & se & omnes fortunas suas in discrimē, & contempserunt fortiter omnia pericula, semper suauē & iueundā in animis suis consolationem senserunt. Cum Apostolo enim clamant, Didicimus in ijs in quibus sumus esse contenti: nouimus & humiles esse: nouimus & excellere: ubiq; & in omnibus instituti sumus, & saturari, & esurire, & abundare, & penuriā pati. Omnia possumus per Christū, qui nos corroboret. Sciunt eundem Apostolū dixisse, Directionem facultatū uestrarū cum gaudio accepistis, sciētes uos habere potiorē substantiā in coelis, ac permanentē. Nam & in euāgelio dixit dominus, Amen dico uobis, nullus est qui reliquit domū, aut fratres, aut sorores, aut patrē, aut matrem, aut uxorem, aut liberos, aut agros mea causa & Euangelij, quin recipiet centupla nūc in tempore hoc cum persecutionibus, ac in seculo uenturo uitā æternam, Mar. 10. cap. Ita quidem opprimuntur seruitute sancti, pīj & fideles in hoc seculo: sed norunt ipsum quoq; dominū prius factum esse seruū propter homines, adeoq; seruos in mundo, per Christum factos esse liberos, adeoq; per seruitutem terrenam adiutum sterni ad libertatem cœlestem. Eijciuntur fideles in exiliū. Cæterū dicebat propheta ille, Omne solum fortis patria. Certè ubicunq; sumus in hoc seculo, in exilio sumus. Pater noster in coelis est, patria ergo cœlum est. Cum ergo morimur, ex exilio liberamur, & imponimur patriæ cœlesti & uerè felici. Eodem modo quos necat fame & inedia tyrannus, eos ceu morbus aliquis innumeris liberat malis. Quos autem non necat fames, sed excruciat, docet parcius uiuere, & productius ieiunare. Reuocant hic ueterum sanctorum exempla fideles esurientes,

*Incommoda per
opposita com-
moda sattuimur.*

*Negatione uerī
nō retineri res.*

*Incōmoda
per opposita
commoda
sattuimur.*

de quibus Apostolus loquens, Oberrarunt, inquit, in ouillis & caprinis pellibus, destituti, pressi, afflicti, quibus indignus erat mundus: in desertis errantes & montibus, in speluncis & cauernis terræ. Considerant item Christiani longè meliorem fuisse sortem famelicientis Lazari, inter linguas canum ulcera lambentium excrescentis, quàm crapula distenti epulonis sepulti & demersi in inferos. Horrendum quidem & abominandum illud est, quòd uis infertur à barbaris militibus nō matronis tantum, sed uirginibus etiam nondum uiri potentibus. Verum consolatur nos illud maxime in scelere maximo, & contumelia intolerabili, quòd pudicitia animi uirtus est. Si enim bonum animi est, planè non amittitur etiam corpore oppresso: quemadmodum & fides hominis non expugnata creditur, licet totum corpus hominis comburatur. Et sanè castitas propter corpus uiolatum non perditur, quia ea sanctè utendì perseuerat uoluntas, & quantum in ipso est etiam facultas. Neque enim eò corpus sanctū est, quòd eius membra sunt integra, uel eò quòd nullo cōtrectantur attactu: cum possint diuersis casibus etiam uulnerata uim perpeti: ac medici aliquando salutis opitulantes hæc ibi faciant, quæ horret aspectus. Quocirca proposito animi permanente, per quod etiam corpus sanctificari meruit, nec ipsi corpori aufert sanctitatē uiolentia libidinis alienæ, quam seruat perseuerantia continentiae suæ. Interea dubium non est, iustissimum dominum grauiter in belluas istas & naturæ monstra, qui tā nephanda audent, animaduersurū.

*In cruce nihil
euenit pijs noui*

*Afflictionis
exempla pa-
triarcharum.*

Confirmantur sancti tribulationibus diuexati exemplis sanctorum innumeris, ex quibus colligunt sibi noui obuenire nihil, cum Deus ab initio seruos suos & Ecclesiam sibi charissimam multis exercuerit tentationibus & afflictionibus. Ac plurimum hinc referre, & ad consolandum afflictos animos conducere puto, in numero tenere optima & delectissima quidem exempla. Sunt ea priuata & publica plurima. Priuata sunt, ut multa ueterum transeam, patriarcharum posteriorum casus & peregrinationes. Euocatur enim diuina uoce pater noster Abraham ex Vra Chaldaeorum in terram Palæstinorum, ex qua rursus fame eicitur in Aegyptum, ubi iterum difficillimam experitur fortunam. Reuersus autem in Palæstinam, nunquam non habet ad ultimum usque diem uitæ suæ, quod animum conturbet atque affligat. Isaacum quoque fames excruciat, quemadmodum & domestica infortunia eundem perpetuò excruciarunt. Iacobum à domino Israelem cognominatum, si quis ætumnosissimum hominem appellet, nihil peccauerit. Nam in ipso matris utero, necdum editus in lucem, certamen init cum fratre suo Esau: cuius manus parricidales uix euasit adolescens, dum in Syriam usque exul profugit. Vbi iterum tanquam in exquisitissima afflictionum palæstra seu officina exercitatur. Dum redit in patriam, malis & periculis maximis inuoluitur. Liberos scelera infanda, optimum senem tantum non enecant. In senectute, fame pressus, descendit in Aegyptum, ubi in uera fide & patientia sanctum Deo tradit spiritum. De Mose maximo & fidelissimo Dei seruo testatur scriptura, quòd in aula regis educatus quidem, sed grandior factus renuit uocari filius filiæ Pharaonis, potius eligens simul affici malis cum populo Dei, quàm temporarijs peccati commodis frui, maiores arbitratus diuitias probrum Christi, quàm Aegyptiorum thesauros. Idem grauissimam sustinuit persecutionem, primum quidem à Pharaone & principibus eius, deinde à domesticis suis & suo populo, quem eduxerat ex Aegypto. Dauid quoque unctus domini, diu Saulis furorem fugit, regnum adeptus difficillimis bellis grauissimè oppressus laborauit, tandem post multos labores exaltatus, à filio exutus regno, multis simul malis immergitur, rursus tamen restituitur.

*Exempla Christi
et Pauli.*

In nouo testamento excellentissima exempla sunt ipse Dominus & saluator noster

noster Christus, & singularis Apostolus eius Paulus Dominus ab ipsis incunabulis coactus est tyrannorum fugere insidias & parricidas manus, innumera quoque mala in uita sua passus, postremo crucifigitur inter latrones. Et Paulus de seipso loquens, Si qui alij sunt ministri Christi, inquit, excellentius sum ego, in laboribus copiosius, in uerberibus supra modum, in carceribus abundantius, in moribus frequenter. A Iudæis quinquies quadragenas plagas una minus accepi, ter uirgis cæsus fui, semel fui lapidatus, ter naufragium feci, noctem ac diem in profundo egi, in itineribus sæpe, in periculis fluminum, periculis latronum, periculis ex genere, periculis ex gentibus, periculis in ciuitate, periculis in deserto, periculis in mari, periculis inter falsos fratres, in labore & molestia, in uigijs sæpe, in fame & siti, in ieiunijs sæpe, in frigore & nuditate, præter ea quæ extrinsecus accidunt, incumbens mihi cura quotidiana omnium Ecclesiarum. Hæc inquam priuata sunt exempla.

Publicum autem exemplum est Ecclesia Israelitica afflictæ in Ægypto, diuexata multis malis sub iudicibus & regibus, adde & abducta in captiuitatem ab Assyrijs & Babylonijs. Eadem restituta per Dei gratiam, uariam & difficilem experitur fortunam, idem sub regno Persarum, Græcorum & Romanorum. Quid uero dicam de Ecclesia Apostolica Christi, quæ ab ipsis incunabilis crucem experta, in ipsis afflictionibus floruit quàm felicissimè, & laborat in iisdem grauiter, uel hodie adhuc? Commemorant historiæ persecutiones decem, quibus Ecclesia Christi ad imperium Constantini magni usque, ab 8. Neronis anno, concussa, per 318. annos grauissimè laborauit, concessis tamen nonnunquam interuallis quibusdam, satis quidem accisis, quibus respiraret Ecclesia. Primus primam in Christianos mouit persecutionem fera illa bellua & monstrum libidinis, Nero, in qua etiam clarissimos Christi Apostolos Petrum & Paulum cecidisse ferunt. Secundam excitauit Fl. Domitianus, qui & Ioannem Apostolum relegauit in Pathmon. Tertius à Nerone grauius edidit in Christianos edicta Traianus, sub quo insignis Christi martyr & doctor Ignatius, unà cum alijs multis præclaris Christi seruis, dilaniandus bestijs obijcitur crudelissimè. Quartam in Ecclesiam persecutionem commouit per totam Galliam & Asiam Verus Imperator, in qua beatus Polycarpus igni uiuus comburitur, sanctus autem Irenæus Lugdunensis Episcopus gladio obtruncatur. In quinta Ecclesiæ persecutione Septimius Seuerus per diuersas prouincias quàm plurimos laurea martyrij coronat: inter quos numeratur & pater Origenis Leonidas. Iulius Maximinus sextus à Nerone tyrannidem exercuit in Ecclesiam: in ea persecutione præ alijs petiti sunt Ecclesiarum doctores atque ministri. Interierunt in ea strage inter innumeros excellentissimos uiros Pamphilus & Maximus, par clarissimorum luminum. Porro septimus à Nerone feralia disperfit edicta Decius Imperator: sub quo & S. Laurentius Ecclesiæ diaconus ferrea in crate tostus est, & Apollonia uirgo laudatissima in extructum insilijt rogam. Nihilominus omnibus illis erat Licinius Valerianus octauam inferens Ecclesiæ persecutionem. Sustulit ea multas Christianorum myriades, & præsertim famosissimos in toto orbe doctores, S. Cornelium & Cyprianum. Cæterum Val. Aurelianus nonam in Ecclesiā persecutionem decreuit magis quàm sit exequutus. Fulmen enim ante ipsum magno pauore circumstantium ruit, ac non multo post in itinere cæsus, sæuire desijt. At horribili hoc exemplo nihil commotus C. Aur. Val. Diocletianus, item Maximianus, Maxentius, & M. Iulius Licinius decimam commouerunt in Ecclesiam Christi persecutionem, quæ cum decem durasset annos continuos, innumerabilem Christianorum hominum turbam in toto orbe sustulit. Pingit illam

Exempla afflictionum ueteris Ecclesiæ.

Decem Ecclesiæ Christi persecutiones.

Anno domini
306.

Praedictae affli-
ctiones.

Psal. 22. 69.
Isa. 49. 51.
Dan. 7. 8. 11.
Zach. 13.

Repeditur per
secutoribus
persecutio.

Zach. 12.

Ier. 25.

Vindicta sum-
pta de sangui-
naria Roma.

graphicè Eusebius Caesariensis, utpote multorum agonum certaminumque quae narrat spectator, & pingit quidem in 8. lib. Historiae Ecclesiasticae. Caei sunt in illa Ianiena primi Ecclesiae nostrae Tigurinae Apostoli laudatissimi, martyres Christi praeconesque Euangelici, beatus Felix, & soror eius germana S. Regula. Post illas persecutiones decem, insequuta sunt multo plures & atrociores excitatae a regi- bus, insuper & a barbaris hominibus in diuersis partibus mundi, insequuta sunt sanguinolenta flagra Saracenorum, Tartarorum, Turcarum denique: praeterea in- festarunt Ecclesiam Dei horribiliter pseudopontifices, qui exterorum domestico- rumque armis plus hauserunt Christiani sanguinis, quam ulla uox humana expli- care possit. Nihil ergo noui nobis hodie obuenit, qui in Ecclesia Christi uarias sus- tinemus persecutiones & afflictiones, confirmamur exemplis ueteribus & no- uis ipsaque efficacissimis.

Huc accedit, quod prophetae apostolique & horum rex & dominus Iesus Chri- stus ista pericula, illas calamitates & persecutiones praedixit omnes, nimirum ut animos nostros in singulas horas contra mala ista obfirmaremus, ne inopinato ca- su aut infortunio concussi a fide excideremus. Quia uos de mundo selegi, ait domi- nus ad discipulos, ideo odit uos mundus. Mementote sermonis mei quem dixi uo- bis. Non est seruus maior domino suo. Si me persequuti sunt, & uos persequentur. Si sermonem meum seruauerunt & uestrum seruabunt: sed haec omnia facient uo- bis propter nomen meum: quia non nouerunt eum qui me misit. Haec loquutus sum uobis ne quid offendamini. Alienos a synagogis facient uos: imò ueniet tem- pus, ut quisquis interficiat uos, uideatur cultum praestare Deo. Reliqua his similia ex Prophetis & Apostolis non recitabo, quod paucis recitari non possint. Deligat sibi quisque maximè euidentia & perspicua testimonia quae ubique occurrunt.

Et quamuis sancti non gaudent de interitu persecutorum, quos mallent con- uerti & seruari, quam puniri in praesenti seculo, & in futuro aeternum damnari: gaudent tamen cum uident dominum supplicium sumere de persecutoribus, hoc potissimum nomine, quod uident pios curae esse Deo, Colligunt item ex praesenti Dei uindicta contra impios parata, afflictiones sanctis ut salutare, ita impijs esse perniciosas. Nam in direptione sua lacerantur, & dum Ecclesiam uiuentis Dei per- sequuntur, ignem excitant in se inextinguibilem. Sic enim legis Apud Zachariam de Ecclesia sua loquentem dominum, Ecce ego pono Hierusalem ut sit calix so- poris omnibus circumquaque gentibus. Quin & in Iuda erunt qui obsideant Hie- rusalem. Eritque illo die ut ponam Hierusalem ceu lapidem grauem omnibus po- pulis: quicumque eum sustollere conantur, omnino lacerabuntur, congregabun- turque contra eum omnes gentes terrae. Ad eundem modum dicit apud Ieremiam dominus, loquens contra persequutores Ecclesiae, Sume calicem uini furoris hu- ius de manu tua, & fac ex eo bibant omnes gentes ad quas ego te mitto: & bibent commoti in infanient metu gladii quem in eos mittam. Ego enim incipio affligere in urbe quae nomine meo appellatur, & uos impune abiretis? Non impune fere- tis. Hoc nimirum illud est, ad quod alludens beatus Petrus dixit, Tempus est ut iudicium Dei a domo Dei incipiat: quod si primum a nobis incipit, quis erit finis eorum qui non credunt euangelio? Recensui paulò ante haec decem ordine perse- cutiones quas Romanorum Imperatores Ecclesiae Christi intulerunt: sed testatur historia nullam non insigni aliqua calamitate esse repensam. Cui accedit quod iu- stissimus dominus post annos 342. (totidè enim anni numerantur ab ultimo Ne- ronis anno ad secundum usque annum Honorij & Theodosij Caesarum) longe abun- dantius coepit Romae sanguinariae rependere. Nam inter annos 139, sexies capta,

in mas

In manus devenit Barbarorum. Nam anno 412, qui erat 2. Impp. Honorij & Theo. Visigothi duce Alarycho ceperunt quidem urbē & diripuerunt, sed clementer interim usi sunt uictoria. Deinde uerò Vuandali duce Genserycho urbē irruerunt crudelissimē, avarissimēq; diripuerunt. Post quos aduolantes Heruli, Athilani exercitus reliquiae, duce Odacre, urbē occuparunt, regnumq; sibi usurparunt, imperio Romano in Occidente prorsus extincto atq; sublato. Inde uerò exactis annis circiter 14. adest cum Ostrogotthis Theodorychus Veronensis, qui cæsis Herulis, urbe potitur. Restituitur uerò hæc demum, Bellisarij inclyti ducis opera & fide, Iustiniano principi orientali, sed eandē mox capit Totilas princeps Gothicus, direptamq; ferro & igni uastat, publicis ædificijs dirutis, & mœnjs bona parte subuersis, adeoq; tota Roma sic uastata, ut aliquot diebus nullum haberet inhabitatorem hominem. Incidit ea uastatio urbis in annū domini 548. Atque ad hunc modū meritas pœnas dependit uindicti suæ Ecclesiæ Christo Roma sanguinaria. Necdum retuli quæ hæc præterea sustinuerit ab Hunis & Longobardis. Nam satis est indicasse quàm miserè cesserint Romæ afflictiones illatæ Ecclesiæ, quæ interim salua, incolumis & uictrix mansit, regnabitq; cum Christo principe in secula seculorum. Ad eundem modum deleti sunt etiam maximis prius cladibus acceptis, uarijs difficilibusq; casibus per totam ferè terram exagitati Saraceni. Sed & Turcæ suas quoq; sentiunt calamitates quotidie, & sentient olim longè atrocissimas. Iam & pseudopontifices poculis ueneno temperatis sese mutuo confecerunt, iidem mirificis exagitantur terroribus. Nuspiam ferè tuti in uita sua, sed & in corona amicorum suorum malis septi, semper & æternū miserī sunt. Quibus accedit, quòd felicissimi illorū fœdis computrescunt uoluptatibus, quo non est aliud mortis genus uel probrosius uel difficilius. Qui his adhærent & horum instinctu persequuntur Ecclesiam Christi, uel in fœdis & ipsi uoluptatibus computrescunt, uel morbis Antiochicis & Herodianis, lentaq; sed graui morte consumuntur, sed & bellis sese atterunt & conficiunt intestinis. Iustus ergo est dominus, & æqua atq; iusta sunt iudicia eius, qui amicorum suorum nunquam obliuiscitur, rursus hostes suos & suorum semper inuenit ac pro merito conficit.

Hæc cum ita habeant fratres, sustineamus quæso patienter manum domini *Peroratio.* Dei nostri, quoties calamitatibus premimur tentamurq; à domino Deo nostro, scientes benignum dominum percutere ut sanet, conturbareq; ut consoletur & in gaudia recipiat sempiterna. Hoc ut præstare possimus, qui alioqui sumus infirmi & imbecilles, oremus patrem nostrum qui in cœlis est per Iesum Christum dominum nostrum, ne in tentationibus nostris desit nobis, sed dirigat nos in uia constantiæ, pacis & iustitiæ. Proponat hic sibi quisq; saluatoris & magistri dominiq; nostri exemplum, qui passionē suam auspicatur à precibus. Ascendēs enim montem oliuarum, patri supplicat, & intentissima quidem mente supplicat. Idem preces suas iterat, precandoq; patrem urget: ita tamen, ut omnia eius uoluntati subiiciat. Hoc ipsum faciamus & nos, quò præsens auxilium patris nostri & consolationem animorum experiamur efficacissimam, laudemusq; bonitatem illius in secula seculorum, Amen.

De quinto & sexto secundæ tabulæ præceptis, quæ in Decalogo sunt nonum & decimum, nempe, Ne loquaris contra proximum tuum falsum testimonium.

Et, Ne concupiscas domum proximi tui, &c.

Præceptum
Dei 9.

Lingua.

VENIMVS iam ad expositionem duorū ultimorum in Decalogo præceptorum. Nonum huiusmodi est, NE LOQVARIS CONTRA PROXIMUM TVVM FALSVM TESTIMONIUM. Sancitur hoc fides in pactis & contractibus, hoc præterea moderatur linguam, commendat item uirtutum pulcherrimam ueritatem, modestiam quoque & synceritatem in dictis & factis. Hactenus de lingua in præceptis Dei nihil audiuius, nisi paucula quædam in præcepto tertio. Cæterum ex lingua exoriuntur commoda & incommoda uitæ maxima. Lingua enim pusillum membrum est, dicit Iacobus Apostolus, & magna iactat. Ecce exiguus ignis quamnam materiam incendit. Et lingua ignis est, mundus iniustitiæ. Sic lingua constituitur in membris nostris, quæ maculat totum corpus, & inflammat rotam natiuitatis, & inflammatur à gehenna. Omnis enim natura & ferarum & uolucrum, serpentiumq; & marinarum domatur, & domita est à natura humana: linguam autem nullus hominum domare potest, incoercibile malum, plena ueneno mortifero. Per ipsam benedicimus deo & patri, & per ipsam maledicimus hominibus, qui ad similitudinem Dei conditi sunt. Ex eodem ore procedit benedictio & maledictio. Proinde rectè necessariò & utilissimè informatur hoc nono præcepto lingua hominum. Summatim uerò comprehendit & præcipit hoc mandatum, ut bene utamur lingua, neue uel priuatim uel publicè noceamus fratris nostri uitæ, famæ aut fortunis, sermone uel scriptis, uel picturis, uel dissimulatione aut etiam simulatione, adeoque ne nutibus quidem. Prohibentur omnia ueritati & synceritati aduersa. Requiritur abs quolibet nostrum simplicitas, ingenuitas, candor & integritas. Breviter mandatur nobis, ut omnes ueritatem inter nos mutuò colamus. Nam Exodi 23. legimus præcepisse dominum, A uerbo mendaci longissimè absis. Et Leuit. 19. cap. Non furabimini, ait dominus, ne mentiamini, nemo dolo malo agat cum proximo suo. Et beatus Iacobus Apostolus, postquam linguæ mala attigisset, maxime quòd ex eodem ore proficiscatur bonum & malum, subiungit, Non oportet fratres mei hæc ita fieri. Nunquid fons ex eodem foramine emittit dulcem & amarum aquam? Nunquid potest, fratres mei, ficus oleas gignere, aut uitis ficus? Sic nullus fons falsam & dulcem potest edere aquam. Certè cum dominus homini linguam dederit, ut hac internuncia homo hominis mentem & animū cognoscat, ut deum benedicat, & omnibus prosit hominibus etiam sibi ipsi, decet omnino ut imago respondeat archetypo, atque ex bono corde proferat homo sermonem bonum, alienum à furo & perniciè, à blasphemia & contumelia, denique ab omni petulantia.

De testimonio
dicendo.

Sed præstat per partes potissima huius generis & argumenti cognoscere penitus. Principiò prohibetur hoc mandato, ne quis in foro aut iudicio requisitus falsum dicat testimoniū. Ergo nō prohibetur simpliciter testificatio, sed falsa duntaxat, Ne dicas, ait, falsum testimonium. Verum ergo testimonium dicere licet, maxime si hoc à te requirat magistratus. Vnde significanter ex ueritate Hebraica legimus, Ne respondeas contra proximum tuum falso testimonio. Respondet autem rogatus. Et in testimonijs dicendis solus Deus & ipsa ueritas est dicenti spectanda, ponendusq; affectus prauus, odium, metus uel studium partium: interim nihil uel celandum uel dissimulandum: nihil affingendum de tuo: neq; corrumpendus sensus: sicut fecerunt falsi illi testes in Euangelio, illud apud iudices proferentes, Destruam templum hoc, & in triduo ipsum excitabo. Nam corruerunt sensum. Et in lege dicit Dominus, Non assumes rumorem falsum, neq; pones malum tuū cum impio, ut sis testis iniquus. Nec eris post multos in malo in causa, ut de-

ut declines post multos ad peruertendum. Ergo qui falsum dicit testimonium, peccat contra Deum & contra proximum. Nam primum quidem sacrilegio & periurio se commaculat, adeoque sub nomine Dei mentiendo Deum contumelia afficit: proximo deinde tantum nocet, quantum is damni à iudice accipit, in corpore, fortunis & uita. Constat enim iudicem falso commotum testimonio, reum mulctare in corpore, in fortunis, aut in ipsa uita: quod non faceret, nisi tuo huc pertraheretur testimonio. Proinde minimè iniqua lex est, quam Moses hisce prodidit uerbis: Si mendax testis fuerit deprehensus, facietis ei quemadmodum ipse sceleratè cogitauerat facere fratri suo: & auferes malum è medio tui: ut reliqui id audiant & timeant, neque audeant amplius designare rem usque adeò sceleratam in te. Neque hinc ulla afficeris misericordia: animam pro anima, oculum pro oculo, dentè pro dente, manum pro manu, pedem pro pede. Huc pertinet quod in Prouerbijs clamat Solomon, Testem fallacè odit Deus. Et, Testis mendax non erit impunitus. Exemplum nobis suppeditant iniqui testes contra pudicissimam foeminarum Susannā.

Deinde damnantur hac lege omnes sycophanticæ aut calumniosæ accusationes in foro, denique emptæ falsæque iudicū sententiæ. Proinde damnantur etiam illi quibus uenalis est lingua, hoc est, qui uel frusto panis conducì possunt, ut uel benedicant uel maledicant innoxijs. Cuius quidem generis maledicas & petulantæ adde & assentatrices linguas plurimas inuenire licet in infimo & supremo, sacro & profano hominum ordine.

Calumnie.

Præterea commendantur nobis contractus, pactiones & fœdera religiosè custodienda seruandaque: ex aduerso damnantur artes, doli mali, imposturæ & circumscriptiones. De quibus dictum est cum ageretur de Furto.

In primis uerò prohibetur fidelibus Mendacium, quo uidelicet nocendi uoluntate, aut ex leuitate uana, aut alioqui praua affectione, falsum profertur. Numerant enim mendaciorum species uarias. S. August. ad Consentium de Mendacio, capite 14. recenset genera 8. Ego pauca duntaxat ex multis cōmemorabo. Est mendacium iocosum, ueluti cum dico me mentiri, & alij me mentiri sciunt, indeque aliquid percipiunt utilitatis, aut uoluptatis potius. Id quanquam non sit grande peccatum, habet tamen leuitatis plurimū: quam Apostolus improbat in fidelibus, sicut extat in 5. cap. Epistolæ ad Ephes. Non arbitror autem huc referendos esse apologos, parabolas, & fictas narrationes: quas ut scriptura ubique adhibet rebus etiā grauissimis, ita plurimum habent gratiæ, necessitatis, & utilitatis. S. August. iocos collocat extra mendacia. Est præterea mendacium officiosum, quo uidelicet falsum uel fingo, uel refero, officiij causa, ut uidelicet ingens aliquod malum à proximi depellam ceruicibus. Huius generis plurima sunt in sacris literis exempla. Ægyptiæ obstetrices seruabant uiuos Hebræorum recens natos filios, quos Pharaon trucidare præceperat: ac accusatæ coram rege legis uiolatæ, prætexuerunt officioso certè & ingenioso mendacio mirā quandam pariendi celeritatem, qua Hebræorum mulieres Ægyptias antecellant. Rahab mirifico figmento illudit ciuibus suis Ierichontinis, & mentiendo seruat populi Dei exploratores. Sed & Michol uxor Davidis, mendacio seruauit maritum, seruos autem patris sui Saulis frustratos & hiantes dimisit. Fingit & Ionatham plurima in mensa patris sui, dum Dauid patrocinaretur, quæ mox artibus & pijs dolis eripit ex cruentis manibus patris sui Saulis. Iudith quoque uidua sanctissima, mentiendo & dissimulando penetrat in tentoria Holophernis, quem fortiter obtruncat, populumque Dei afflictissimum liberat.

Mendacium et eius genera.

Porrò disputatum est à primarijs theologis, peccarint ne illi mentiendo, quorum modò exempla adduximus. Ac Origenes & qui ipsum sunt secuti, permittunt

T

bat sapienti bonoq; uiro mendacium, modò ijs salutare foret quorum gratia fieret. Nec caruit suspicione Origenici dogmatis S. Hieronymus. Scripsit enim in Epistolam Pauli ad Galat. & Petrum & Paulum pro tempore ufos esse simulatione. Verùm S. Augustinus ea de re D. Hieronymum admonuit, negans in literis diuinis ullam mendacij suspensionem esse recipiendā. S. uerò Hierony. suae sententiae admonet fuisse optimos quosq; ueteris ecclesiae interpretes. Scriptae sunt ultrò citroq; Epistolae doctae & proluxae ab utroq; : quae cum extent hodie, non est quòd his inhæream diutius. Idem August. lib. contra Mendacium ad Consentium cap. 15. Nihil, inquit, iudicandus est dicere qui dicit aliqua iusta esse mendacia, nisi aliqua iusta esse peccata, ac per hoc aliqua iusta esse quae iniusta sunt. Quo quid absurdius dici potest? Vnde enim est peccatum, nisi quia iustitiae contrarium est: Ea uerò quae contra legem Dei fiunt, iusta esse non possunt. Dictum est autem Deo, Lex tua ueritas: ac per hoc, quod est contra ueritatem, iustum esse non potest. Quis autem dubitet omne mendacium esse contra ueritatem? Nullum ergo iustum potest esse mendacium. Et quae sequuntur. Rursum uisum est alijs uiris eruditiss. August. mendacio obstinacius fuisse infensum. Ergo non desunt qui ueluti media ingredienti uia, istos (quorum adduximus exempla) non omni quidem peccato liberent, sed leue interim fuisse existiment. Certè si qui hic sibi aliquid permiserint, caueant tamen diligentissime ne affectibus suis nimium permittentes, officiosum putent mendacium, quod reuera perniciosum est. Vltimum enim mendacij genus est perniciosum, quod uidelicet proficiscitur ex praua uoluntate, & tendit in detrimentum proximi tui, nihil malè meriti. Hoc in scripturis passim damnatur: & excrescit quidem eius culpa iuxta detrimenti quantitatem. Nam perniciosissime mentiuntur theologi ac doctores ecclesiastici, utpote mendacijs suis siue doctrina corrupta perimentes animas hominum, sed & corpora & facultates seductorum exponentes maledictioni Dei & mille periculis. Huc pertinet & hypocrisis, quam miris modis persequitur & exagitat Dominus Iesus in Euangelio. Exerit autem se hypocrisis non tantum in uerbis dolosis, sed etiam & amplius in conuersatione uitae tota, ut cum simulamus uel dissimulamus quae non sunt, atque ita mentimur Deo, & fucum facimus proximo nostro.

Delationes & petulans ad maledicendum lingua.

Iusta increpatio.

Detrahitio perniciofa.

Porro proscribuntur hac lege delationes, calumniae, obrectationes, susurri, & ex his enatae suspensiones. Damnantur itaq; petulantia & ad maledicendum appositae instructae ingentia. Inuenias enim qui non reuereantur detrahere infimis & supremis, priuatis & publico munere insignibus personis: in quem usum spargunt famosos libellos, conscribunt Pasquillos, adduntq; picturas infamatrices. Ac discreti quidē sibi esse uidentur cum amaris laedorijs omnes taxant, imò effraenis linguae petulantia garriendiq; temulentia, libertas quaedam siue parrhesia appellatur. At qui peccant grauissime, qui ex maledicentia uoluptatem capiunt, hoc est, qui circumferunt os plenum amaritudine, maledictione & dolo: sicut & illi à peccato alieni non sunt, quibus uolupte est uenenatā audire maledicentiam. Extra calumnias uero & extra peccatum ponimus accusationes iustas, siue scripto siue oratione uiua prolatae in medium, item obiurgationes & castigationes quae fiunt sacris in concionibus. Nam qui uitia & errores sic castigant ac persequuntur, non alium finem habent propositum, quam gloriam Dei & animarum salutem, quae omnibus modis cupiunt promota, non autem releuatam bilem & satisfactum prauis affectibus. Ceterū maximum esse scelus calumniari & detrahere proximis, multis colligi potest argumentis. Vix enim aliud est uitium, quod ita nos deformet atq; obrectatio. Conditī sanē sumus ad imaginem & similitudinē Dei, ut simus filij Dei: at ex filijs Dei

Dei efficiunt nos calumniæ filios diaboli. Ac omnes quidem abhorremus à diaboli nomine, si autem sis calumniator, certè hoc ipsum es quod execraris. Nam à calumniando nomen habet diabolus, quod nihil aliud est, quàm si dicas calūniator. Iam etiam Deus in Prouerbijs dicitur odisse calumniatores, siue detractores. Item Prouerb. 19. cap. legimus, Cogitatio stulti peccatum est, & abominatio hominum detractor. Est enim nomen bonum, eodem Solomone teste, thesaurus pretiosus. Ergo cùm per calumnias & delationes hominis bona fama periclitatur, præstantissimum illud hominis periclitatur: ut reuera grauius uideatur peccare detractor quàm fur: nisi quis præferat putidas opes nomini glorioso. Proinde mirum est qui fiat hodie, quòd furibus non parçitur in furto deprehensis, delatoribus autem calumniatoribusq; nihil aut minimū mali irrogatur. Vtinam res aliquando rectius perpendant principes, ac mala quidem puniant omnia æquis poenis, inprimis autem supplicia digna sumant de sceleribus grandioribus. Deus certè ab uno quouis nostrum requirit, ut proximis nostris fidelem operam, quoad licet, in asserenda ueritate commodemus, ad tuendam & nominis & rerum proximi integritatem.

Videtur item hac lege proscripta esse Adulatio, quæ ex stulto, ut uerè dicitur, *Adulatio.* reddit insanum, ex insano insanabilem. Itaq; Solomon pronunciat adulatorem publica dignum execratione. Qui dicunt, inquit, impio iustus es, maledicent eis populi, & detestabuntur eos tribus. Et alibi, Verba susurronis quasi simplicia, & ipsa perueniunt ad intima cordis. Cùm submiserit uocem, ne credideris ei: quoniam septem nequitiae sunt in corde illius. Rectissime ergo pronunciatur in Ecclesiasta, Melius est audire increpationem sapientis, quàm carmen uiri stulti, adulatoris nimirum. Ac cùm tantum malum sit adulatio, amatur tamen ab omnibus ferè, adeò ut pestis illa inuaserit, adde & occuparit sacram in templo cathedram, aulas regum, curias senatorias & priuatorum quoq; ædes. Habet enim illa Syren cantionem carni nostræ suauissimam. Impensè enim amamus nosipsos, stulti, non animaduertentes istas blanditias pellicere in amarum exitium. Doctores adulantes Ezechiel grauius increpat, & ait, Væ illis qui dicunt populo pax pax, cùm non sit pax: qui liniunt maceriam absq; temperamento, qui consuunt blandos puluillos sub omni axilla aut cubito, & ceruicalia blanda sub omni capite, ad capiendas animas. De huiusmodi doctoribus & hominibus, adulatione magis mendacijsq; quàm ueritate syncera gaudentibus, loquens Apostolus quoq; Paulus dicit, Erit tempus cùm sanam doctrinam non sustinebunt: sed iuxta concupiscentias suas coaceruabunt sibi doctores, ij quibus pruriunt aures, & à ueritate quidem aures auertent, ad fabulas uerò cōuertentur. Iam Dauid quoq; hanc deprecans pestem, utpote omnibus regibus & principibus, uel in eminentia constitutis perniciosissimam, Corripiet me iustus, inquit, in misericordia, & increpabit me: oleum autem peccatoris non impinguabit caput meum. Et iterum, Domine libera animam à labijs iniquis, & à lingua dolosa. Hæc hæcenus expositionis gratia in nouum præceptum Domini protulimus.

Sequitur præceptum decimum, quod ad uerbum sic habet, NON CON- *Præceptum Dei 10.*
CUPISCES DOMVM PROXIMI TVI, NON CONCPISCES
VXOREM PROXIMI TVI, NEC SERVVM EIVS, NEC
ANCILLAM EIVS, NEC BOVEM EIVS, NEC ASINVM E-
IVS, NEC QVICQVAM QVOD EST PROXIMI TVI. Quæ
quidem uerba Deut. 5. cap. hoc ordine & modo exponuntur, Non concupisces
uxorem proximi tui, non concupisces domum proximi tui, nec agrum eius, nec
seruum eius, non ancillam eius, nec bouem eius, non asinum eius, nec quicquam

quod est proximi tui. Nec est ulla diuersitas, aut contrarietas in re ipsa, tametsi in Exodo domus proximi, in Deuteronomio autem uxor proximi, primo ponatur loco. Facit autem hoc nonnihil contra illos, qui ultimum hoc praeceptum in duo dissecant, cum sit inseparabile: id quod ordo hic inuersus utcunque indicat.

Concupiscentia.

Prohibetur autem ante omnia concupiscentia, nimirum mala, siue praua cupiditas. Concupiscentia enim medium est uocabulum. Nam refertur ad bona & ad mala. Dauid enim testatur se affici concupiscentia Dei & legis eius. Concupiui, inquit, salutare tuum Domine. Et, Concupiui mandata tua, Psal. 119. Sanè discernere oportet inter affectionem à Deo bene creatam, & inter illam quæ innata est nobis radix malorum ex propagine primorum parentum. Erat in Adamo ante lapsum appetitus cum delectatione non malus. Non esuriebat cum dolore (id quod peccati supplicium est) sed edebat cum appetitu delectabili. Delectabatur amoenitate paradisi. Amabat & concupiscebat sancta quadam concupiscentia foeminam, quam ei adduxerat Deus. Atque hic appetitus non malus ab ipso Deo creatore bono proficiscebatur. Ac sunt etiam hodie in hominibus naturales affectiones uel cupiditates, edendi uidelicet, bibendi, dormiendi, & alia his similes, ad conseruationem ac propagationem hominis pertinentes, quæ per se quidem sub censum peccati non ueniunt, nisi quatenus originali uitio deprauata legitimis transiliunt terminos. In praesenti uerò negotio usurpatur pro mala, siue pro malorum concupiscentia. Ea in omnes ex Adamo transfusa, fructus est corruptæ naturæ nostræ, uel foetus peccati originalis. Hæc sedem habet in ipso corde hominis, & est fons & origo omnium quæ in homine sunt uel existunt, malorum siue scelerum. Dominus enim disertè in Euangelio dicit, Quicquid ingreditur in os, in aluum abit, & in secessum eicitur: at ea quæ proficiscuntur ex ore, ex ipso corde egrediuntur, & illa impurum reddunt hominem. Nam ex corde exeunt cogitationes malæ, cædes, adulteria, stupra, furta, falsa testimonia, conuitia: hæc sunt quæ impurum reddunt hominem. Nec obscurius beatus Iacobus Apostolus dicit, Ne quis cum tentatur, dicat se tentari à Deo. Nam unusquisque tentatur dum à propria concupiscentia abstrahitur & inescatur: deinde concupiscentia posteaquam concepit, parit peccatum, peccatum uerò perfectum progignit mortem.

Concupiscentia ergo est animi motus siue affectio, quæ ex ingenita corruptione in nobis inardescit contra Deum & legem eius, nosque sollicitat ad malum, etiam si consensus aut opus ipsum non accedat subsequaturue. Nam si hæc accedant cupiditati, increscit gradibus & auctibus peccatum. In peccato enim primò considerata uenit ipsa imaginis uel ingenij Dei in nobis oblitteratio aut corruptio, uitium agnatum, & morbus ille latens in membris nostris, siue affectio praua. Deinde considerandum, quòd hæc increscit delectatione. Inde sequitur ferè consensus consiliūque perficiendi sceleris: quod & non rarò in opus erumpit: quod & ipsum grandescit per circumstantias accedentes. Veniunt autem singula illa sub peccati censum, quanquam interim alia alijs fiant grauiora. De qua re copiosius dicitur, ubi, Deo uolente, uentum fuerit ad tractationem Peccati. Proinde affectio illa praua & illegitima, quæ est ex ingenita corruptione, sed in natura nostra latitat, exerit autem se in cordibus nostris contra puritatē diuinæ maiestatis & legis, illud ipsum est peccatū, quod hac lege damnatur. Tametsi enim non desint quibus uideantur huiusmodi animi motus, morbi, uitia, & affectiones non esse peccata, Deus tamen illas lege hac prohibens, manifestè cōdemnat. Quòd si quis de nostra expo-

stra expositione ambigit, Paulum audiat Apostolum dicentem, Peccatum non cognoui nisi per legem. Nam & concupiscentiam non nouissem, nisi lex dixisset, Nō concupisces. Absq̃ lege peccatum erat mortuum: ac ipse quondam sine lege uiuebam: ueniente autem mandato, peccatū reuixit, ego uerò mortuus sum. Et iterum, Affectus carnis mors est: affectus uerò spiritus, uita & pax. Propterea quòd affectus carnis inimicitia est aduersus Deum. Nam legi Dei non subijcitur: siquidem ne potest quidem. Qui uerò in carne sunt, Deo placere non possunt. Damnat itaq̃ nos concupiscentiæ affectus, siue nos iusto Dei iudicio cōdemnamur meritò, propter concupiscentiam in nobis latentem atq̃ sese exerentem in horas, ac ueluti in momenta singula. Existunt sanè phantasiæ uariæ & plurimæ cogitationes in animis hominum: dum tamen non tendunt uel in offensionem Dei, aut proximi, nec impuritatis aut philautiæ quicquā habent, non ueniunt sub censum peccati: quod mox ab initio diximus.

Ethaetenus quidem Deus lege sua prohibuit crassiora quidem peccata, quæ ab hominibus committuntur contra Deum, sub finem uerò peruenitur ad ipsam concupiscentiam & corruptam hominis naturam, omnium malorum fontem, quem modò etiam sopit & obstruit: aut, ut rectius loquamur, infirmitatem generis humani omnium oculis exponit. Quis enim non concupiuit aliquando? imò quis non in singula propè momenta sentit concupiscentiæ stimulos? Quis obsecro non laborat ingenito omnibus morbo, siue labe illa geniali? Deprehensi ergo in peccatis coram Domino, non habemus quo extenuemus nostram culpam, aut elabamur ex sententia iudicis omnem carnem condemnantis. Damnat enim disertè iustus Deus corruptionem natiuam prauamq̃ inclinationem, quæ est perpetua auersio à Deo & rebellio cōtra integritatem, quam à nobis exigit Deus. Beati enim pronunciantur qui sunt mundo corde præditi, quoniam ipsi Deum uidebunt. Ergo quibus cor est cupiditatibus implicatum, morbidum, imbutum ueneno & pollutum, non uidebunt Deum. Huiusmodi autem sumus omnes quotquot censemur filij Adæ. Proinde ultima hæc lex omnes reuincit peccati & infirmitatis siue corruptionis humanæ, & quæ hanc sequitur, condemnationis.

Deinde requirit Deus lege sua non tantum corporis siue externam puritatem uel mundiciam, sed animi quoq̃, spiritus & omnium affectuum: & præcipit ut in salutem & profectum proximi tendat quicquid cogitamus, consultamus, moliamur & agimus. Referri ergo poterit hæc lex ad omnes ferè alias præcedentes. Nam ipse quoque Dominus Iesus exponens hanc legem, Non occides, addit, Quisquis irascitur fratri suo, obnoxius erit iudicio: & reliqua Matth. 5. Rursus ibidem explicans hoc præceptum, Non cōmittes adulterium, adijcit, Quicumq̃ aspererit uxorem alterius, ad concupiscendum eam, iam adulterium commisit cum ea in corde suo.

Ac diligentissimè quidem recenset enumeratione quadam res, quas concupiscendo desideramus, & peccare solemus: rebus cōiungit personas. Res partim immobiles, partim mobiles sunt: id quod Helueticè eloquimur, *Ser gùteren sind etliche ligende/etliche farende*. Immobiles sunt domus, uillæ, agri, uineta, syluæ, prata, pascua, piscinæ, & alia huius generis. Mobiles sunt pecuniæ, iumenta, siue pecora, honores, officia, dignitates. Ad personas referuntur, uxor, liberi, serui, ancillæ. Hæc & similia quæ sunt in possessione proximi, nemo nostrum in detrimentum proximi concupiscat: aut si concupiuerit, ne consentiat concupiscentiæ, aut delectationem capiat ex ipsa: ne consilium capiat quomodo assequatur cupita, ne conceptum cōsilium protinus producat in opus, eripiatq̃ proximo uel

Cōmicitur homo peccati.

Que requiritur ab homine puritas.

Non concupiscenda quæ.

res uel personas. Huiusmodi uerò iustitiam requirit à suis cultoribus Deus, quæ ex ipso animo & propensa uoluntate nostra, nō tantum opere externo, integra & absoluta sit. Vnde in Euangelio dicit Dominus, Nisi abundauerit uestra iustitia plus quàm scribarum & pharisæorum, non introibitis in regnum Dei. Caterum quomodo compleantur mandata Dei, & quòd fides sit absoluta iustitia, explicabo sermone alio, & dixi quædam in Sermone quem habui de Vera fide.

Hucusque per Sermones duodecim enarraui decem capita legis moralis, quæ diximus tradi nobis uirtutum formas, adeoq; mores nostros informari, quomodo hos componamus ad uoluntatem Dei. Distinxit ipse omnium Dominus Deus hoc negotium in duas tabulas. Prima ostendit quid homines Deo debeamus, & quomodo uerè colamus Deum. Secunda autem per sex præcepta exposuit, quid quisque proximo suo debeat, & quomodo omnes commodè, tranquillè & humaniter uiuamus. Iubet ergo honorare parentes, & omnes eos qui sunt à Deo parentum loco constituti. Prohibet homicidium, & omnem iniuriam quæ infertur uitæ hominis corporiq;. Prohibet stupra, adulteria & libidines nepharias, cōmendat coniugium & mundiciam uitæ temperantiamq;. Prohibet furta, dolos, imposturas. Prohibet mendacia, falsa testimonia, cupiditates prauas & noxias. Iubet nos ex animo amare proximos, & his benefacere semper. Domino & legislatori nostro sapientissimo, sit laus & gratiarum actio in sempiternum.

De Legibus Dei Ceremonialibus, præcipuè autem de Sacerdotio, Loco & Tempore sacro. SERMO V.

IN partitione legum diuinarum, proximè post legem moralem posuimus legem Ceremonialem: unde morali lege per partes explicata, dicendum erit porro, Deo iuuante, de lege Ceremoniarum. Ac ne quid dissimulem, scribunt alij Ceremoniæ, alij Cerimonix: & de uocabulo nō idem sentiunt omnes. Est enim qui ex Seruij Sulpitij sententia ceremonias à carendo dictas esse arbitretur. Festus autem, Ceremoniarum causam, inquit, alij ob oppido Cære dictam existimant. Nam Lilius in 5. commemorat à Cæretibus sacra Romanorum in bello Gallico, Gallis inquam occupantibus Romam, esse asseruata. Vnde uidetur in eius beneficij memoriam, omnem cultum Dei, & omnes ritus sacros, ceremonias esse appellatos. Vndecunq; uerò deriuatum sit uocabulum, nos illud in præsentī usurpamus pro actione sacra sacrorumq; ritu ecclesiastico.

Ceremoniæ in genere quid.

Sunt autem Ceremoniæ ritus sacri circa personas sacras, locum item & tempus cultumq; sacrum uersantes, qui quomodo legitime fiant, leges quæ uocantur ceremoniales exactè tradunt atq; describunt. Ceremoniæ ergo actiones uel ritus sunt, quos formant leges siue præscriptiones, appellatæ leges Ceremoniales. Porro instituit ceremonias uel Deus uel Homo. Et Deus quidem instituit alias in testamento uel populo ueteri, alias sub Christi primum aduentum in populo noui testamenti. De noui testamenti Ceremonijs dicitur, ubi uentum fuerit ad Ecclesiæ & Sacramentorum ecclesiæ tractationem. In præsentī differemus de Veteris populi uel testamenti Ceremonijs. Eæ sunt instituta uel actiones seu ritus sacrorum, populo Israelis, ab ipso Deo traditi, ad tempus quiddē correctionis, sed & ad repræsentanda uelandaq; Dei mysteria, deniq; ad cultum Deo præstandum, & ut his populus Dei retineretur in religione legitima, & societate unius corporis ecclesiastici.

Ceremoniæ iudaicæ quid.

Ceremoniæ humane.

Porro homines instituerunt Ceremonias uarias & multiplices: quod fecerunt apud

apud Ethnicos archiflamines sacerdotes & ministri idolorum, aliquando reges & principes. Apud Hebræos diuinas ceremonias Ieroboam rex Israeliticus in suum & suæ domus exitium, suis, id est, humanis & impijs, permutauit. Ceremoniarum ab hominibus institutarum, in hoc postremo seculo nostro nullus est neque modus neque finis. Id quod multi uiri docti deplorarunt, & deplorant adhuc. Conqueritur Augustinus suo seculo admodum auctas esse ceremonias in Ecclesia: quid putas hodie dicturum si reuiuisceret? Verum de his dicemus alias. Quoniam uero uocabulum Ceremoniæ quibuslibet etiam ethnicis ritibus attribuitur, nos in descriptione nostra iam proposita disertè significamus, nos loqui non de quibuslibet ceremonijs, sed à deo traditis, nimirum populo Izraelis à Mose: non utique ex Mosis, sed Dei, arbitrio, per illius autem ministerium: iuxta illud quod Mosi dictum legimus, Vide ut facias omnia secundum exemplar quod ostensum est tibi in monte. Nostræ ergo Ceremoniæ prima origine referuntur ad Deum ipsum autorem uerissimum, ac ea de causa Deo placuerunt, quia diuinæ fuerunt & fide exhiberi potuerunt. Damnantur contra Ceremoniæ in cultu diuino inuentæ & institutæ ab hominibus. Locus illustris est Deut. 12. Sed & 4. Regum 17. dicitur, Ambulauerunt in institutis siue ceremonijs Izrael, quas illi fecerunt. Notissimum est quid euenerit domui Ieroboam, & ipsi Ieroboam, denique omnibus regibus Izrael ambulanti in uia Ieroboam. Ita Ceremoniæ hæ nostræ, id est, de quibus loquimur in præsentia, actiones sunt siue ritus, non prophani, sed rerum sacrarum: quas uidelicet instituit ipse Deus, & exercet Dei populus. Et fuerunt quidem traditæ non omnibus gentibus, sed populo Izraelis, & ad tempus quidem, ut Apostolus dicit, correctionis, utpote quæ humeris Iudæorum ad Messiam usque exhibiti tempora insiderent, inde autem deciderent aut deponerentur atque disparent. Certè hoc nomine appellata est lex Apostolo Paulo pædagogia ad Christum. Iam & finis in quem institutæ sunt Ceremoniæ inspicendus est. Pertinent ceremoniæ ad doctrinam pietatis & fidei maxime. Nam adiectæ sunt primæ tabulæ, ueluti subsidium quoddam & fulcrum. Tradunt enim cultum Dei ueri externum, quem uero Deo præ exhibeant, ac per eas abstrahantur, non tam ab alienis dijs, quam cultibus peregrinis, quibus plus nimium in Aegypto assueuerant: non habentes utique modò ullam occasionem peregrinos cultus recipiendi, quando tam exquisitis instructi & quasi inuoluti erant sacris. Hanc causam concessarum ceremoniarum commemorat ipse Moses Deuter. 12. Ergo ceremoniæ & ceremoniarum exercitium disertè appellatur in diuinis legibus cultus Dei. His enim coluit Deus: ac retinebāt populū Dei in uero cultu Dei, & in uera religione & societate unius corporis Ecclesiastici. Dispergitur enim Ecclesia nouis aut peregrinis ceremonijs receptis: sicuti claret in rebus Solomonis & Ieroboami. Sed & Paulus Apostolus dixit, Nonne qui edunt uictimas, participes sunt sacrarum, adeoque totius religionis? Ad hæc, uelata abscondebantur potissima Christi & Ecclesiæ mysteria in ceremonijs, fueruntque sacramenta Iudaici populi, quibus dominus sibi hunc obstringere firmiter uoluit, adde & refricare sua beneficia, denique exerceri pietatem & obedientiam, adeoque fidem sui populi. Cumque in eis fidem & fidelem obedientiam exigeret ante omnia, non placuerunt ceremoniæ hæ domino, quoniam populus sensu mysteriorum destitueretur, fide careret, atque externum modò cultum exerceret. Nam apud Ieremiam clamat dominus, Holocausta uestra ad dote uictimis uestris, & comedite carnem: quoniam nihil locutus sum cum patribus uestris, neque præcepi eis cum educerem eos ex Aegypto de holocausto & sacrificio: sed hoc uerbum præcepi eis, dicens, Audite uocem meam, & ero uester

Ceremoniæ
diuinæ.Ceremoniæ
Iudaicæ.

Finis ceremoniarum.

Cultus Dei.

1. Cor. 10.

Quomodo probemur ex improbemur ceremoniis.

Deus, uos autem eritis populus meus. Alibi uerò legimus sacrificia oblata, & cultum illum exhibitum à populo, fuisse Deo gratissimum, odorisque suauissimi. Vnde uerò illa diuersitas, nisi ex animis colentium Deum cultumque exhibentium? Placuerunt enim sacrificia, placuit cultus qui fiebat ex simplici obedientia ac fide; displicebat qui sine fide & sincera obedientia animi, forinsecus non intrinsecus, persoluebatur Deo: quo nomine & Cain peccasse legitur: atque eo modo sacrificare non præceperat. Rursus legitime & in fide Christi uenturi Messiae sacrificare & colere Deum, instituto externo cultu, iusserat: non ut ex ipso opere patratò sperarent iustitiam, sed ex eo qui in omnibus præfigurabatur ceremonijs. Hic erat Christus, qui mens & uita est omnium quæ in lege tradita sunt ceremoniarum.

Non inutilis cognitio ceremoniarum.

Sed præstat per partes, non omnes quidem aut singulas, sed potissimas tamen inspicere expendereque ceremonias. Nemini autem hic labor noster curiosus aut inutilis esse uideatur. Nam mirè conferet ad sanam intelligentiam legis abrogatæ. Præterea quæ à Deo tradita sunt in scripturis sanctis, utilitatem habent luculentissimam, & auctoritatem diuinam: adeo ut stulti simul ac impij sint, aut ut mitius loquar, ignari rerum bonarum & temerarij, qui fastidiunt & ceremonias diuinitus traditas & ipsarum tractationem sobriam atque piam. Inuenias non paucos qui bus utilissimum excellentissimumque uideatur Homerum & Maronem allegorice interpretari: in solis ceremonijs diuinis nulla stultis uidetur recondita uel utilitas uel sapientia: cum reuera nihil habeat orbis hic totus, utilius, iucundius, elegantius, excellentius, & eruditius in hoc argumento, quam ceremonias sacras. Describuntur enim his mysteria Christi & Ecclesiæ catholicæ, idque perspicue, eleganter & excellenter.

Ceremoniarum summa.

Atque in his recensendis perstringendisque sequar maximè ordinem naturalem. Ceremonia pertinet ad cultum Dei ecclesiasticum. Atqui necesse est ut sint personæ destinatae in Ecclesia, quæ magistri uel ministri potius publici sint ceremoniarum, & eas exerceant in Ecclesia secundum instituta domini. Necesse est ut sit locus quoque certus & tempus certum, quo maximè exerceatur cultus: sed & ritus sacros, hoc est, ipsas ceremonias circumscriptas, numeratas aut designatas certasque esse oportet, ut norint cultores Dei, qualem Deo cultum exhibeant. De personis, id est, Sacerdotibus siue Leuitis, primo loco dicemus pauca, ubique auditorem relegantes ad lectionem sacri codicis, in quo descriptiones singulæ plenius & copiosius continentur.

Sacerdotium.

Origo sacerdotij.

Origo sacerdotij in ueteri populo ad ipsa se extendit rerum exordia. Tradunt enim primogenitos in qualibet familia fuisse sacerdotes. Certè cæsis Ægyptiorum primogenitis, Israelitarum primogenitos lege sibi cōsecrat dominus. Ac semper fuit magna primogenitorum dignitas & excellentia uel in legibus ciuilibus. Tenuit primogenitus in domo paterna dominatum, adeoque regnum inter fratres: primogenito cedebat hæreditas, reliquis dabantur munera: primogenitus sacerdotij præfulgebat dignitate. Ergo cum Cain atque Abel concertarent de primogenitura, non concertarunt de re leuicula, sed omnium præstantissima. Vnde cum uirgo mater dicitur à Luca primogenitum suum genuisse filium, nemo cogitet secundò genitum aut ipsam plurium liberorum fuisse matrem. Dignitas enim excellentiaque notatur. Ad Christum enim Dominum pertinet regnum, sacerdotium & hæreditas. Huius liberalitate & munificentia adoptamur & nos in participatum, ut simus & nos reges, sacerdotes & hæredes uitæ æternæ & omnium bonorum coelestium. Verum ut redeamus ad id quod instituimus, sacerdotij dignitas iure primogenituræ Rubenis erat in populo Israelis. Cæterum is nephando flagitio

Christus primogenitus.

gitio, incestu uidelicet admissio, ius suum amisit. Successit ergo Levi: sed & is dignitatem eam scelere perdidit, quod Sichimitis perfide cladem intulisset, atque prophanasset sacramentum circumcisionis. Quoniam uero eadem tribus praeclare se gessit, non modo in educendis filiis Israel ex Aegypto, sed in puniendis idololatris, uiculi inquam cultoribus, sacerdotij functionem seu dignitatem ceu uirtutis praemium recepit, in quo locum primogenitorum uniuersi seminis Israel Leuitae sunt repositi. Sic enim legimus, Et ait Moses ad Leuitas, Consecrate hodie manus uestras domino, quisque in filio suo & in fratre suo, ut detur uobis hodie benedictio. Et iterum, Et loquutus est dominus ad Moysen dicens, Ecce ego selegi Leuitas ex medio filiorum Israel pro omni primogenito quod primum nascitur in filiis Israel: & Leuitae erunt mei. Meum est enim omne primogenitum a die quo percussi omne primogenitum in terra Aegypti, consecraui mihi omne primogenitum in Israele, &c. Ex his constat Leuiticam tribum consecratam fuisse sacerdotio in Ecclesia Israelis. Porro haec dignitas seu hoc ministerium huic tribui singulariter confirmatum est mox a seditione Choritica, Dathanica, Abyramicaque, signum edente domino in uirga Aaronis, quae floruit inter undecim surculos sola, in testimonium, quod Deus sacerdotio Leuiticam tribum & solam quidem illam destinasset. Ideo uero eadem illa uirga & in arcam reposita seu asseruata est in tabernaculo, ne post hac unquam aliae tribus sacerdotium affectarent. Haec fusius exponuntur Numeri 16. & 17. cap.

Leuitae sacerdotes.

Exod. 32.

Numeri 3.

Erat autem inter Leuitas ordo certus, erant gradus, erat distributio quaedam in partes certas. Diducebantur enim Leuitae in tres familias, nempe Cahatitas, Gersonitas & Meraritas: ac haec rursus distribuebantur in ordines quatuor. Principio enim deligebantur ex familia Cahat principes, qui praesidebant: deinde qui reliqui erant inter Cahatitas, & duo alij ordines Gersonitae & Meraritae, uelut subditi praesidibus parebant. Omnibus enim praefulgebat Aaron summus pontifex cum Ithamar & Eleazar filiis. Ita enim legimus Numeri 3. Et dabis Leuitas Aaroni & filiis eius. Dedititque enim sunt ex filiis Israel. Aaronem uero & filios eius praeficias, ut custodiant sacerdotium suum. Alienus si accesserit, interficiatur. Ea re praeferebat summus sacerdos Aaron typum Christo regi & pontifici uero optimo maximo, cui subiecti sunt Christiani omnes, quorum ipse summus pontifex & caput in coelis est.

Ordo inter sacerdotes certus

Sciendum autem est non omnes Leuitas inseruisse tabernaculo, neque omnes ubique per uniuersam Israelis terram docuisse. Certae erant leges quinam uocandi ad ministerium sacrum ex Leuitis, qui repellendi. Leges non uacat hic recensere omnes. Praecipuae extant Leuit. 21. & 22. cap. Numeri 8. cap. designatur & aetas idonea ministerio, nempe a 25. anno ad 50. usque annum. Praeterea consecrabantur uocati & delecti ad ministerium sacerdotes. Ritus consecrandi copiosior operosiorque est, quam per compendium referre liceat. Significabatur consecratione, donis uariis instructos, & conuersatione sanctissima praeditos esse oportere eos qui seruiunt Ecclesiae in munere sacerdotali. Huc enim in primis pertinebat unctio sacerdotalis, typus sancti spiritus, quo nisi imbutus sit minister ecclesiasticus, munere sibi ipsi ad interitum fungitur. Porro sacerdotalis consecratio describitur a Mose Exodi 29. Leuit. 8. & Numeri octauo capite. Hoc loco commemorari oportet etiam cultum, siue uestitum sacerdotalem. Vtebantur sacerdotes extra ministerium uestitu politico, ut colligere ex Ezechiele possumus: sed in ministerio, sacro ceremonialique. Eius descriptionem copiosam exhibet nobis Moses Exodi uicesimo octauo & 39. cap.

Ex Leuitis ad ministerium deligebantur idonei.

1. Ioan. 2.

Vestis sacerdotalis.

Numerantur nouem uestium genera, alij octo duntaxat recensent. Iosephus

decem. Ante omnia abluebantur aqua munda sacram rem facturi sacerdotes, deinde uestibus sacris induebantur. Fuerunt in his communes uestes sacerdotum atq; Pontificis. Principiò lineis fœminalibus, quæ usque ad genua & poplites ueniunt, uerenda celantur, & superior pars supra coxendicem astringebatur, simile quippiam habens cum superiore caligarum nostrarum parte, ut si quando expediti mactarent uictimas, trahunt & portant onera, etiamsi lapsi fuerint, non pateat quod opertum est. Deinde lineis fœminalibus inducebatur tunica stricta, duplici sindone, quam & ipse Iosephus byssinam uocat. Adhæret corpori plana & sine ruga uel plica, descenditq; ad crura usq;. Solebant quondã militantes habere lineas, quas camisias uocant, sic aptas membris & astrictas corporibus, ut expediti essent uel ad cursum uel ad prælia. Ergo & sacerdotes parati ad ministerium Dei utuntur hac tunica, ut pulchrè tecti, interim & expediti suum perficiant ministerium.

Fœminalia. Tertium genus uestimenti zona, cingulum uel balteus, astringebat tunicam illam. Contexta erat purpura, cocco, bysso, hiacynthoq; in similitudinem pellis colubri, dependebatq; ad crura usq;, sed in ministerio sacro retorquebatur in lauum humerum.

Tunica stricta. Quartum genus uestimenti numeratur thiara, uel rotundum pileolum, quod caput obtexit fermè ad aures usq;, ea forma, quasi mediâ sphaera sit diuisa, superiorq; pars imponatur capiti. Hinc fuit Ephod (cuius quidem in scripturis alibi, non in Exodo, ubi ex professo uestimenta sacerdotum describuntur, fit mentio) communis uestis omnibus sacerdotibus. Pallium fuisse putatur ex lino, quo & Dauid indutus erat cum saltaret ante arcam. De Sacerdotibus à Saule cæsis per Doeg Aedomæum legimus, Et interfecit eo die 85, uiros ferentes Ephod lineum; non quòd tum ferrent cum interficerentur, sed quòd essent in ea ætate eoq; ordine ut ferre possent, hoc est, ut ministrarent in sacerdotio domini. Ergo in Osea legimus, Eris sine Ephod & Teraphim, nimirum sine sacerdotio & cultu. Nam Ephod cœpit usurpari pro ipso sacerdotio, uestis siue signum pro re signata. Quòd si quis hæc Oseæ de nobiliore Ephod, de quo mox dicemus, intellexerit, non refragabor. Nec multum uidetur distare Ephod lineum à ueste quam Papistæ hodie pallium, camisiam uel uestem chori uocant. His autem quinque uestibus communiter utebantur pontifex ac sacerdotes. Reliquæ quatuor propriæ pontificum sunt, quarum primam uocant Megil, ea fuit tunica talaris, uestis inquam sinuosa, tota hiacynthina, à collo demissa in solū, ad pedes, conclusa omni ex parte, nisi ubi exertum caput et brachia; infernè ex limbis eius dependebant septuaginta duo tintinnabula seu nolæ, & totidem mala granata uel punica, ita collocata, ut semper fuerit inter duo tintinnabula unum malum punicum, & inter duo mala punica unū tintinnabulum; caussa q; redditur, ut cum ingreditur pontifex in sancta sanctorum, totus uocalis incedat, statim moriturus nisi sic fecerit. Sequitur Ephod pontificis, longè diuersum ab illo, de quo prius diximus. Hoc enim non erat lineum, sed contextum opere textorio polymito, ex auro, purpura, byssoq; etiã forma diuersum à priore. Pontificium enim hoc erat humerale uel pectorale, à collo ad coxendicem usq; per cubitum extensum; contextit enim ueluti thorax pectus, scapulas & infra axillas utrunq; latus; ea forma qua uidemus hodie thoraces mulierum, quos appellant Helueticè *Zybli*, præditos. Hoc supra talem induebantur. In utroque humero singuli hærebant Onychini, schoham dicti, gemmæ pretiosæ, nomina filiorum Izrael habentes insculpta; contra pectus nihil contextum erat, sed locus Rationali apparatus. Nam Rationale, quod Hosien appellatur, octauum erat uestimenti genus, pectorale iudicij quoque nuncupatum: id erat ex auro, purpura, & bysso textus pannus, palmi habens magnitudinem per

Zona.

Thiara.

Ephod.

Megil.

Humerale.

Rationale.

per quadrum, & duplex, & limbis ex quatuor partibus munitum, ne facile rumpatur. Intexti erant ei lapides siue gemmae, mirae magnitudinis (in hoc genere) & pretij, per quatuor ordines, ita ut in singulis uersibus terni lapides collocarentur; quibus etiam ut onychinis inscripta erant nomina filiorum Israel. Radiabant uero miro quodam fulgore: neque enim alij lapides nisi splendentes pectorali inferebantur. Vnde *Vrim & Thummim* non uidetur fuisse aliud quam hic lapidum ordo. Significat enim *Vrim & Thummim* splendores & integritates. Nam ut gemmae hae fulgurabant, ita erant integerrimae, nullumque in eis uitium apparebat. Ac arbitrantur sacerdotem summum nunquam in re graui dixisse ius, aut responsa oraculaque rogatum edidisse, nisi cum pectorale hoc iudicij in pectore haberet positum. Connectebatur enim aureis annulis ipsi Ephod uel humerali seu thoraci, insuper & catenulis aureis suspendebatur ex humeris, sub onychinis lapidibus demissis. Praestantissimum hoc in ornatu ac uestitu pontificis habebatur. Erat enim scrinium pectoris & thesaurus omnis iuris & scientiae, omnis denique aequitatis & iudicij, unde ueluti responsa petebantur, quomodo se gererent in causis difficilibus Israelitae. Proinde alij uertentes *Vrim & Thummim* *δύλωσις καὶ ἀλήθεια*, id est, manifestatio, uel doctrina, inquit, Et ueritas in pectore sacerdotis est. Ultimo loco ponitur Lamina aurea. Fuit enim in capite sacerdotis summi uitta hiacynthina, in qua erat lamina aurea, acuminata quidem illa, ea propemodum forma, quam uidemus hodie in insulis Episcoporum. Inscriptum in ea continebatur, Sanctum domino, uel sanctitates domini. Solus enim sanctissimus & sanctificans est ipse Christus dominus: Antichristus est qui hoc nominis sibi usurpat. Sunt qui putent laminae inscriptum nomen domini ineffabile. Constringebatur equidem haec lamina apud pileolum illud lineum, commune omnium sacerdotum, in fronte per uittam hiacynthinam, adeoque pontificem ueluti coronabat. Hic inquam, fuit uestitus sacerdotum sacer & Pontificis summi in primis.

Significationem illa habent pulcherrimam & multiplicem. Vsum & finem ipse Dominus per Moysen indicauit, instituta haec esse ad gloriam & decorem: non tantum ad conciliandam ministris sacra peragentibus auctoritatem, sed etiam ad commendationem sacrorum. Videntur enim haec augustiora quae tanto cum apparatu celebrantur. Ac utile & propemodum necessarium erat populum istum ad gentiliu ritus recipiendos promptissimum, his in officio retinere. Praeterea exhibent haec quoque Christum uerum & summum sacerdotem nobis spectandum. Vestitus is erat ueste iustitiae, temperantiae & uirtutis, hancque uestem nobiscum habet communem. Oportet enim omnes Christianos ipsum induere Christum. Excellit interim Christus tanquam Pontifex summus, non modo quod ipse nos consecrat, & uirtutibus instruit: sed quod peculiaria habet, utpote Deus uerus & saluator mundi. Gestat nos in humeris suis & in pectore suo, ueluti gemmas pretiosas. Non enim uiles, sed pretiosi sumus in conspectu eius. E pectore pontificis nostri Christi resplendet & emicat lux sapientiae aeternae. Nam in ipso ut in scrinio aeternae Dei sapientiae, sunt reconditi omnes thesauri sapientiae & scientiae. Ipse est lux mundi, ueritas & integritas, ut totus mundus ab uno Christo iure poscat leges, iura, responsa, & quicquid ei opus est ad perfectionem & ueram beatitudinem. Ipse est sanctus sanctorum, diuina maiestas & sanctitas: cuius capiti recte & iure optimo insidet corona gloriae, utpote qui solus sanctificat, regnat gloriosus, & uiuit in secula. Iam etiam instituebantur hisce ceremonijs sacerdotes, ut uel ex uestitu intelligerent quid ab ipsis requiratur, & quales ipsos esse oporteat. Sint sacerdotes semper accincti ad officium, ambulent hos

Vrim & Thummim.

Lamina aurea.

*Significatio uel
fuitus sacerdos
talibus.*

nestè coram Deo & hominibus; sint temperati & alieni à luxu & libidine: sint lum-
bi eorum astricti balteo iustitiæ & ueritatis: pectus, latera & dorsum sint munita
uerbo Dei: sit caput ipsum tectum galea salutis: super imponatur capiti ipse Chri-
stus saluator: sit hic caput ministrorū & ministerij: in primis uerò sit sacerdos uo-
calis in Ecclesia. Nam si mutus sit, morietur: si autem strenuè prædicarit nomē do-
mini & legem eius, odorem excitat in Ecclesia puniceorum malorum fragrantia
gratiorem. Ergo sub uestium inuolucro teguntur mores, uirtutes & uitia. Post ser-
monem nil magis commendat hominē quam uestis. Qualis animus, talis ferè ser-
mo & uestis: ergo uestis conuersationem significat. Vnde iubemur in sacris aliam
induere uestem, cum postulatur conuersationis immutatio: adeò ut bona pars do-
ctrinæ sacerdotalis quid ipsos deceat in uestitu contineatur.

*Officium sacer-
dotum.
Doccant.*

Verum tempus & res ipsa postulat ut disertè iam loquamur de officio sacer-
dotum. Id erat uarium & multiplex, obtinebat tamen primas in omnibus institu-
tio siue doctrina. Nam præcipuè ordinati sunt à Deo sacerdotes, ut Ecclesiā insti-
tuant in uera pietate, doceantq; legem & instituta domini. Nam in hæc uerba le-
gimus dominum dixisse ad Aaronem, Vinum & siceram non bibes, tu & filij tui
qui sunt tecum, cum ingressi fueritis tabernaculum testificationis, ne moriamini.
Statutum sempiternum sit in generationes uestras: & ut discrimen faciatis inter
sanctum & inter prophanum, inter immundum & mundum: utq; doceatis filios
Israel omnia statuta quæ locutus est dominus ad eos per ministerium Moysi. Le-
uit. 10. Eandem legem repetit Ezechiel totidem propè uerbis in cap. 44. Ac illu-
strat eandem Malachias etiam in cap. 2. Errat ergo quibus persuasum est, sacerdo-
tes Leuiticos duntaxat ad lanienam esse conductos. Materiā quoq; quid doceant
Leuitici sacerdotes hic & ubiq; in legibus suppeditat dominus, non utiq; philoso-
phiam ethnicam, edicta & placita regum aut decreta seniorum, sed ipsum uerbū
Dei traditum à Deo. Iam uerò ut doctrina commodè proponi posset populo, sa-
cerdotes populo quoq; indicebant Fastos.

Benedicant.

Num. 6.

Post doctrinam non minimum officiorum erat Benedictio. Ea non permitte-
batur eorum arbitrio, sed astricta erat ad certam formam, eamq; solennem, huius-
modi uidelicet, Et locutus est dominus ad Moysen, dicens, Loquere ad Aaronem
& ad filios eius, dicēs, Sic benedicetis filiis Israel, & dicetis eis, Benedicat tibi do-
minus, & custodiat te: ostendat tibi dominus faciem suam, & misereatur tui: attol-
lat dominus faciem suam super te, & det tibi pacem. Hæc formula erat, qua ute-
bantur haud dubiè in cœtibus sacris, maximè cum dimitteretur populus. Alibi
uerò dicitur benedicere Deus, hic Aaron & filij eius: cæterum quod externis sen-
sibus ingerunt sacerdotes, id internè operatur atq; præstat dominus fidelibus, ut
benedictio proprium Dei opus maneat. Nam significanter solenni formæ subiun-
gitur, Inuocabuntq; nomen meum super filios Israel, & ego benedicam eis. Pro-
ponunt ergo sacerdotes nomen domini: commendant diuinam naturam: osten-
dunt omne bonum profluere à Deo, & quomodo id possimus consequi per Chri-
stum, qui est semen benedictum, benedicens inuocantibus nomen eius. Compre-
henduntur sex capita in benedictione solenni. Primò dicitur, Benedicat te Deus,
id est, conferat tibi quæcunq; pertinent ad incolumitatem corporis & animæ. Se-
cundò dicitur, Custodiat te. Non enim satis est accipere bona corporis & animæ
à Deo, nisi etiam conseruentur integra, nec eripiantur nobis iterum per iram Dei,
aut nos nostra amittamus negligentia. Tertiò dicitur, Ostendat tibi dominus fa-
ciem suam. Vel, Illuminet Dominus uultum suum super te. Ostendit nobis Deus
benignam faciem, cum redijt nobiscum in gratiam, ac nobis beneuolus est. Ideò
quartò

quarto loco sequitur expositio planior, Et misereatur tui: semper tibi sit clemens & propitius Dominus in omnibus tuis institutis, dictis & factis. Quinto sequitur loco, Attollat Dominus faciem suam super te. Attollit uultum suum Dominus, quando respicit nos, uigilat super nos, & dirigit uias nostras. Ultimo loco ponitur Pax, quæ est salus & summum bonum, quanquam & bello opponatur: est & conscientiarum pax, iuge conuiuium. Hæc tanta bona imprecabantur populo sacerdotes, qui haud dubiè & orare Dominum docebant, & ad sedulas preces hortabantur. Extant uel hodie Psalmi compositi à sacerdotibus in gratiam populi. Postquam enim Dauid in templum induxisset musicam, cantus quoque musicorum instrumentorum, suauis tractatio siue modulatio, ipsa inquæ Psalmodia cœpit numerari inter officia sacerdotum. De Musica sacra multis agit prior liber Paralipomenon in rebus Dauidis, ubi etiam traditur, quod Cantores ipse Dauid distribuerit in classes 24. idè per sortes.

Orare.

1. Par. 25.

Præterea iussi sunt sacerdotes rem facere diuinam, administrare inquam sacramenta, ac sacrificare. Circuncidebant enim infantulos, pascha procurabant, & sacrificia uarij generis offerebant Domino: de quibus mox dicemus suo loco. Ut autem commodius sacrificaretur à sacerdotibus, Dauid instinctu sancti spiritus, diuinitus duas Eleasaris & Ithamaris familias in uices 24. Per uices enim obibant ministeriū sacrum, sicuti copiose exponitur 1. Paral. 24. Toto autem ministerij tempore in ipso tēplo perseverabant, nuspiā egredientes templū. Erāt enim habitationes in ipso templo extructæ, pro ministrantibus in uice sua. Reuertebantur domum ubi expleuissent ministeriū suum. Huc pertinet, quod sacerdotes asseruabant uasa sacra, quod ea purgabant: alebant lumina, ignemq; fouebāt perpetuum: breuiter curabant illa omnia quæ ad rem sacram pertinere uidebantur, oleum, thus & similia.

Rem sacram
faciant.

Priusquam uerò extrueretur Templum, & sedes in terra promissa fixas Israelitæ consecuti essent, sacerdotes tabernaculum curabāt in portando, erigendo, ac deponendo. Numeri enim 3. cap. sic legimus, Leuitæ custodient omnia instrumenta tentorij constitutionis, & obseruationem filiorum Israel, ut obeant ministerium tabernaculi. Nam Tabernaculum ita constitutum erat, ut posset ad profectionem in multas dissolui partes. Ergo cum Israelitæ iā uellent mouere castra, accessit Aaron cum filiis, & uelis ad hoc dispositis inuoluebat uasa sacra. Cahatitæ portabant arcam, mensam, aras & instrumenta ad ista pertinentia. Gersonitæ curarunt ligatilia, integumenta, aulæa, tapetia, uela & funes. Meraritæ portabant duriora ex ligno & ære, columnas, uectes, palos, asseres. Quæ qui exactius intelligere cupit, legat 3. & 4. cap. libri Numerorum. Extructo templo, ianitores ex Leuitis templi custodes ordinati sunt. Sed & Tubæ quibus conuocabatur cœtus, erant in manibus sacerdotum. De qua re legitur Num. cap. 10. Adhibebantur etiam Bello sacerdotes: sicut uidere est Deut. 20. cap. Dominus enim noluit silere leges inter arma, imò uictorias maximè refert ad pietatem studiumq; religionis.

Portent tabernaculum
et uasa domini.Ianitores.
Tubæ.
Bello interfine
sacerdotes.

His accessit & aliud officium sacerdotale, nempe iudicare inter causam & causam, inter mundum & immundum. Vtrunq; fusius describitur Deut. 17. & Leuit. 13. & 14. Nam exorta causa aliqua difficiliore, referebatur ea ad metropolim: & si quis de lepra fuisset suspectus, iudicabant de morbo, iuxta leges præscriptas, Leuitici sacerdotes. Et hæcenus quidem in arctum constrinxi sacerdotale ueteris populi officium, potissimas tantum partes commemorans. Iam ut sacerdotes ecclesiæ Israeliticæ inseruiebant, ita uiuebant ex ecclesiæ redditibus. Certas enim habitationes & uectigalia certa his destinauit in terra promissa Dominus. Nam designauit urbes per totum terræ Israeliticæ orbem, quadraginta octo, ex quibus sex

Iudicent.

Habitationes
et uectigalia
sacerdotum.

Schola.

refugij habebantur oppida. Sed & suburbana siue prædia pro iumentis & familijs sacerdotum proximè ante ciuitatum mœnia, per mille cubita circunquaq; extendere ac designare fuit Dominus. In his oppidis erant scholæ, pulchrè per totam terram sic distributæ, ut omnes ex uicinis locis non iniquo itinere ad synagogas hæc peruenire possent. In his non sacrificabatur. Nam in uno duntaxat loco sacrificabatur ex præcepto: ac ter in anno ascendebant ad templum sacrificaturi: in omnibus autem synagogis, singulis sabbatis docebatur lex Domini. Porro uestigalia fuerunt ampla. Describuntur enim Numeri 18. & Leuit. ultimo. Amplæ satis opes erant sacerdotibus, ad alendas ipsorum familias, honestèq; uiuendum. Rursus non uacabant otio, neq; diffiuebant luxu, sed temperanter uiuentes, literis inuigilabant & docebant fideliter. Hæc de Personis sacris hucusq;.

De loco sacro.

Et quoniam iuxta legem non licebat nisi in uno loco sacrificare, certus utique fuit locus populo designatus, in quo ceu in officina sacra, sacerdotes sacra facerent, ut iam ordo seriesq; rerum requirataliquid dicere etiam de loco sacro. Is erat initio quidem Tabernaculū Mosis, postea uerò Templum Solomonis. Lex de sacrificijs non ubiq; nisi per dispensationem, sed in uno eoq; certo loco offerendis, extat apud Mosen Deutero. 12. Leuit. 17. cap. ac mysterium continet Christi, qui non nisi semel, uno in loco, oblatus est, ad expiationem peccatorum totius mundi. De quo paulò post plura. Tabernaculum autem siue Tentorium (constitutionis tentorium appellatum, eò quòd diuinitus constitutum esset, & ad responsa ibi danda & ad cultum Dei legitimum perficiendum) populo fuit in deserto erranti templi loco. Quia enim per annos 40. per desertum oberrabant, non conueniebat eis fixum aliquod templum, sed portatile. Id in hunc modum erigebatur, & erat ferme huiusmodi. Principiò infigebantur terræ foramina habentes argenteæ bases, pro asseribus in parietem compingendis erigendisq;: singulis uidelicet asseribus aut tabulis bases binæ. Nam singulæ tabulæ habebant inferius duos dentes, quibus inferebantur basibus. Tabulæ in utroque tabernaculi latere uicenæ & ad Occidentem in capite decem erant, omnes obductæ auro, altæ cubitos decē. Hæ inquam erectæ imponebantur aut infigebantur basibus: à tergo habebant circulos aut annulos aureos, per quos uestes ex ligno Sittim (putatur ea esse spina alba) inferebantur, ut asseres inter sese astrictæ, sibi constarent, nec hiaret structura siue paries, tabulæ uel aut antrorsum uel retrorsum inclinarent. Ab Oriente claudebatur uelo sanctum, Porro contextæ erant cortinæ seu aulæa decem opere phrygio, quæ ansulis seu fibulis inter sese conferebantur. Hæ autem ceu contignatio aut laquearium quoddam summitati tabularum erectarum imponebantur: quibus rursus inducebatur tectum triplicatum, quorum supremum erat taxinum imbrisibus arcendis idoneum. Habebat autem tabernaculum in longitudine cubitos triginta, in latitudine decem. Id quod colligi potest ex mensura asserum. Diuidebaturq; in partes tres. Prima appellabatur Sanctum sanctorum, & Adytum ædis, uel oraculum templi. Secunda sanctum, longum cubitos uiginti, ut illud decem. Tertia uocabatur Atrium, cuius longitudo erat centum, latitudo quinquaginta cubitorum. Inclusum hoc erat columnis quinquaginta tribus defixis in æneas bases, & altis quinque cubitis, ex quibus dependebant taperia reticulata ac perspicua: in ingressu suspensum erat ad columnas quatuor uelum uiginti cubitorum. Sanctum sanctorum dirimebatur à Sancto per uelum pretiosissimum in quatuor columnis argenteis suspensum: sed & Sanctum ab Atrio claudebatur uelo secundo, & ipso pretioso, quod quinq; auro obductis columnis sustentabatur. In medio atrij stabat erecta domus interior, ipsum inquam tabernaculum, distincta

Tabernaculum quale fuerit.

ut mox

ut modò diximus in Sanctum sanctorum & sanctum. In Sanctum sanctorum non ingrediebatur, nisi semel in anno summus Pontifex. In ipso reposita erat Arca fœderis Domini nostri inter Cherubim: cui alij ex autoritate Apostolica cōiungunt thuribulum aureum. Sunt alij tamen qui per θυμιατήριον nō thuribulum sed altare suffitus intelligunt. Hi si non falluntur, apparet altare aureum eo tempore, quo illa scribebat Apostolus, intra uelum stetisse in adyto. Cæterum constat ex cap. Exodi 40. ab initio altare aureum (sicuti mox subiiciam) collocatum stetisse in Sancto ante uelum. Nec diuersum uidetur colligi posse ex 1. cap. Euangelij secundum Lucam. Porro Arca fœderis non apparebat ulli mortalium, nisi soli sacerdoti semel in anno incensum inferenti oraculo. Nam recondebatur Velo primo, uestibus, quibus ferebatur, non nihil prominentibus in Sancto, obscurius tamen, fortè impulsu ueli, in quo uestium extrema quasi ubera uel tubera exprimebant, quæ quidem in ipso Sancto propius stanti cernebantur, remotius non item. Nam 3. Reg. 8. cap. ita legis, Fecerunt quoq; ut prominerent uestes, ita ut uiderentur capita uestium de Sancto ante adytum, foris autem non uidebantur. Sanctum patebat quotidie sacerdotibus per uices sacra facientibus, seu ministrantibus. In ipso posita erat ante uelum Mensa aurea panibus propositionis instructa, in parte inquam australi: ex opposito autem in latere meridionali conspiciebatur Candelabrum aureum. Cæterum in medio, intra utraq; illa, ante uelum & arcam stabat Altare aureū thymiamatis appellatum, quòd sacris consecratū esset suffimentis adolendis. In Atrio autem non ita procul à uelo secundo Sancti apparebat Ara holocaustorum, ac inter aram & uelum collocatum erat solium siue labrum, è quo se abluebant sacerdotes, rem facturi sacram. Ad aram omni ex parte prospectare poterat populus, qui contemplandorum sacrorum gratia aduenerat. Huiusmodi uerò fuit locus sacrorum, ipsum populi Izraelitici templum. De quo copiosiora & pleniora leget, qui uolet, Exodi 26. 27. 36. 38. 40. &c.

*Que fuerint
in Tabernaculo
reposita*

Quæ autem hæcenus protulimus de Tabernaculi structura, usum splendidum & significationem minimè obscuram habent. Vtile fuit in primis ad unitatem fidei catholicæ tum alendam tum retinendam. Vno enim hoc tabernaculo ceu uinculo firmissimo, primùm Deo & eius cultui, deinde ipsi inter sese, ueluti in unum corpus Izraelitæ constringebantur. Nam ad hoc tabernaculum totus populus colligebatur tanquam ad unam parochiam, sub unius Dei cultum. Cumq; degerent in tabernaculis filij Izraelis, uoluit etiam sibi Dominus extrui tabernaculū, & hoc in medio ipsorum collocari, ut uel ita testaretur se in medio ipsorū habitaturum. Tabernaculum ergo ueluti palatium Dei ac regis supremi in medio populi stabat, præsentia diuinæ testimonium, & ut omnibus timorem reuerentiamq; incuteret præsentia numinis. Homines in tabernacula seu domos nostras recondimus res nostras, ac domi nostræ quæri uolumus. Reposuit ergo Dominus in tabernaculo res sacras ueluti thesaurum suum, ac se in tabernaculo requiri uoluit, promittens ibi se exauditurum preces & uota fidelium supplicum. Præterea reconduntur in his mysteria Ecclesiæ & Christi. Paulus enim appellat nos templum Dei & corpora nostra tabernacula. In nobis enim uult habitare Dominus. Tabulæ tabernaculi sunt ueluti tigna, trabes & columnæ ædis sacre. Habet & ecclesiæ colūnas, doctores & uiros alios heroico uel principali spiritu præditos: ac singuli quidem fideles tabulæ sunt deauratæ, si custodiant fidei sinceritatem, maneatq; in fidei unitate. Vestræ coniungebantur tabulæ: doctrina enim solida in officio & concordia retinere oportet fideles. Cortinæ quamuis multæ essent, coniungebantur tamen aureis fibulis ceu in unam texturam: ergo & diuersa ecclesiæ membra per

*Significatio
Tabernaculi.*

Hebr. 9.

charitatem colligi ac connecti oportet, ut sint unum inter se ac operimentum quoddam iustitiæ in ecclesia. Tectum, ecclesiæ fides est, pœnitentiæq; uel studium innocentiae. Basis est ipse Christus. Nam fundamentum aliud poni non potest, quàm quod positum est, Christus Iesus. Porro uelum expansum ante Sanctum sanctorum, significabat nōdum manifestatam esse, ut inquit sacer Apostolus Paulus, sanctorum uiam, adhuc priore tabernaculo cōsistente. Ergo dum aduenisset Christus & morte sua impleisset omnia, uelum quod tunc in templo pendeat, à summo imum usque scissum est, ut hinc omnes intelligerent uiam apertam esse in Sancta sanctorum, in ipsum inquam cœlum, & omnibus in lege satisfactum. Dependebant & alia in tabernaculo uela, nimirum purissimæ carnis Christi umbracula. Dependebant illa in ingressu Sancti & Atrij. At uia & ostium est Christus Dominus per cuius incarnationem & mortem aditus nobis patet in regnum Dei. Quid quod Christus ipse nostrum est tabernaculum, in quo habitamus & uiuimus, Deumq; colimus ac Deo placemus; ipse cortina & integumentum, contignatio & ornamentum ecclesiæ: ipse tectum firmissimum & tutissimum protegit nos contra omnes iniurias hominum & diaboli, ipse est uetis ecclesiæ, membra connectens & in unitate fidei ac omnis boni conseruans, ipse est columna & basis suæ ecclesiæ, caput & uirtus, breuiter omnia uitæ & salutis ueræ solus. In his ergo habuerunt ueteres potissima Christi & ecclesiæ mysteria abscondita, quibus quidem Christus nunc non aliter proponitur contemplandus, quàm olim ab ipso mundi exordio patribus est expositus, nempe uerus Deus & homo, Rex & Pontifex summus & unicus, uerus mundi saluator, in quo solo fideles habent omnia salutis.

Historia arce
domini.

Porro Tabernaculum hoc iubente Domino erectum est in Silo, quamprimum ingressi essent terram promissam, & floruit ad tempora usq; Heli, sicuti clarè legitur Iosue 18. & 1. Samuelis 1. & 3. cap. Sub Heli autem capta est Arca Domini à Palæstinis & abducta in urbes Palæstinorum, mox tamen restituta, collocabatur in Bethsemes, inde in Kiriathiearim, in domo Abinadab in Gibeā, in excelso inquam, siue in colle. Nam domus eius erat extructa in edito loco. Legimus enim 1. Samuelis 6. capite, Dauid abiit unā cum populo, ut transferret ex Baale Iuda (dicitur autem Iosue 15. Baalam, alio nomine appellata Kiriathiearim) arcam Domini. Et mox, Et tulerunt eam de domo Abinadab, quæ erat in Gibeā, id est, in colle. Locus enim in urbe eminentior erat, in quo habitabat Abinadab. Alij Gabaa putantes proprium esse urbis nomen, dixerunt arcam translata à Palæstina in Gabaa. Caterum arca ex domo Abinadab, translata est in domum Obedom, inde in ciuitatem Dauidis, hoc est, in Sion. Ita enim exponitur ciuitas Dauidis 3. Regum octauo capite. In Sion extruxit tetenditq; Dauid arcam Domini Tabernaculum nouum, in quod arcam collocauit, constitutis ibi sacerdotibus qui ministrarent Domino. Id quod clarè describitur 1. Paralipom. decimosexto capite.

Historia Taber
naculi domini.

Interea Tabernaculum constitutionis non neglexit Dauid. Hoc enim post tempora Heli & captam arcam à Palæstinis uariè translatum uidetur. Silo certè, in qua primò collocatū fuit, desolata est, quod Psalmo 78. & Ieremiæ 7. capite indicatur. Proinde regnante Saule erectum apparet in Gilgal, ubi is gratulatoria obtulisse sacrificia coram Domino dicitur 1. Samuelis undecimo. In eodem libro uigesimoprimum capite apparet Tabernaculum aliquandiu stetisse in Nobe (urbe non ita procul dissita à Hierosolyma, Isaia decimo capite) ubi ab Achimelech sacerdote Dauid donatur panibus propositionis recentibus ex aurea mensa defumptis. Dauidis tempore ac regno erectum stetit in Gabaon Beniamitarum oppido.

Sic

Sic enim legimus 1. Paralip. 21. Tabernaculum Domini quod fecerat Moses in deserto, & altare holocausti, erant tunc (cū angelus stricto gladio Dauidi appareret) in colle uel excelsu Gabaon. Eo loci erat & Solomonis regno, & hoc excelsus petijt Solomon cū ante extructum templum supplicaret Domino. In hac enim uerba legimus scriptum 2. Paralip. 1. cap. Abierunt Solomon & omnis cœtus cum eo in excelsus quod erat in Gabaon. Nam illic erat tentoriū constitutionis Dei, quod fecerat Moses seruus Domini in deserto. Caterū arcam Dei adduxerat Dauid de Kiriathiearim, ad locum quem ei parauerat Dauid. Nam ei tetenderat tabernaculum Hierosolymis. Porro altare æneū, quod fecerat Bezaleel filius Uri, erat ibi ante tabernaculum Domini, quod quæsiuit Solomon & cœtus. Ergo cū legimus 3. Regum 3. cap. Solomon dilexit Dominum, ambulans in institutis Dauid patris sui, duntaxat in excelsis sacrificabat & adolebat: non in uituperium quidem, sed in laudem Solomonis profertur, nempe quod non promiscuē in locis omnibus sacrificarit, sed in excelsis, nimirum in unica illa ara consecrata & destinata à Domino, cuius iam iam mentionē fecimus. Alijs uisum est Solomonem istis uerbis non simpliciter taxatum, quod sacrificasset in ara holocausti (id enim maxime licebat) sed quod hactenus distulisset templi ædificium. Verū consequentia & præcedentia sensum priorem admodum adiuuant. Idem ille Solomon extructo templo, & arcam illam ueterem & tabernaculi omnia, tanquam thesaurum aliquē, ex Gabaon in ipsum templum ab ipso extructum, per sacerdotes inferri & reponi curauit. Sic attestante scriptura sacra, & dicente, Et adduxerunt arcam Domini & tentorium constitutionis, & omnia uasa sacra quæ erant in tentorio: adduxerunt, inquam, illa in templum sacerdotes & Leuitæ. Hac leguntur 3. Regum 8. & 2. Paralip. 5. cap. Ita uerò tabernaculum Domini, quod stetit annis 478, abrogatū quidem, templum uerò in eius locum est repositum.

Templum porro Domini paratum quidem à Dauide, sed extructum à Solomone, non est quod pluribus describam, quod id in 3. libro Regum, & in 2. lib. Paralip. operosè & graphicè depictum exhibeatur. Locus templi indicatus refertur Dauidi ab ipso Dei angelo 1. Paralip. 21. ac ipsum Dauidē primū ibi sacrificasse, his insuper uerbis additis, Hæc est domus Domini Dei, & hæc ara ad holocaustū Israelis. Quasi dixerit, Hæc area templo designata est, in hac ædificabitur domus Dei, imò in hac immolabitur unica illa & æternū efficax hostia, ipse incarnatus Dei filius. Consentiunt enim omnes sacrorum interpretes, hunc locum Hierosolymis fuisse in monte Moria, ubi quondam Abraham filium suum Isaac immolare uoluit: & in hunc quidem locum fatalem impositum esse templum: nec procul hinc adeoq; in eodem montis iugo esse montem Golgotha, siue Caluarie: illum inquam locum & montem sacerrimum, in quo sacra Euangelia commemorant Christum esse immolatum pro peccatis totius mundi, quem sacrificia & templi & ueterum omnia præfigurarunt. Vfus & finis templi non fuit aliū quā Tabernaculi.

Grauiſſimè ergo peccarunt cū Ieroboam reges Izraelis, qui deserto templo sacrificarunt Deo in excelsis, in suis cathedralibus ecclesijs, nempe in Bethel, & in Dan, deniq; in alijs locis editis & amœnis. Grauiſſimè peccauit cum regibus suis populus Iuda, qui uel in excelsis immolauit Deo, uel non in uniuersum excelsa excidit. Dominus enim uno in loco, quē ipse designarat, coli uoluit. Extat aperta lex Deut. 12. & textitur significantissimè Leuit. 17. cap. in hæc uerba, Quicumque è domo Izrael mactauerit bouem, aut ouem, aut capram in castris aut extra castra (uidelicet in sacrificium Domini. Alioqui enim licebat mactare extra sacrificium

De templo Solomonis.

Peccatum sacrificantium in excelsis.

quouis in loco) & ad ostium tentorii constitutionis non adduxerit, ut sacrificet sacrificium Domino ante tabernaculum Domini, sanguis imputabitur illi uiro ac si fudisset sanguinem. Proinde quando filij Israel uolunt sacrificare, adducant sacrificia ad Dominum ante ostium tentorii constitutionis ad sacerdotem ut is offerat. Nec ultra sacrificent sacrificia sua Satyris uel dæmonibus, post quos scortati sunt. Ritus hic erit perpetuus eis & posteris. Qui autem hoc non fecerit, is excindetur de populis suis. Tria in his ueniunt obseruanda. Primum, quod non licebat sacrificare nisi ante aram holocaustorum uno in loco. Secundum, quod ideò hoc præcipiebatur, ut omnes intelligerent sacrificium Deo fieri, cuius erat tabernaculum. Tertium, quod extra hunc locum offerre, contra præceptum Dei, erat diabolo immolare; quod iudicandus ut homicida: & quod excommunicatus erat ab ipso Domino Deo, exclusus utiq; ex cõsortio Dei & sanctorum. Quod uerò Samuel, Helias & nonnulli alij alibi sacrificarunt Deo concedente, ob certas causas, dispensationis erat. Proinde qui in excelsis, etiam Deo ipsi, non tantum alienis dijs immolarunt, peccauerunt primò inobedientia. Improbat Deus, imò execratur cultum quem ipsi nobis extra uerbum eius confingentes instituimus: placet ei fidelis obedientia. Deinde quod unitatem corporis ecclesiastici dilacerauerunt: hinc quod mysterium Christi olim in monte Golgotha offerendi ueluti aspernantes, conculcarunt, & non omnia sua ad Christum tanquam ad unicum scopum sacrorum retulerunt: præterea quod suis sacrificijs tanquam operibus operatis confisi sunt, & quod neglecto Dei cultu ipsi sibi cultum peculiarem confinxerunt. Stetit Templum à prima sui fundatione Solomonis ad excidium primum, sub Zedechia rege annis 440. Reparatum uerò ad secundum excidium sub Vespasiano stetit annis 582. Alij aliam supputationem ineunt. Hæc paucis ex multis de Templo hætenus.

Isaie 66.

Restat ut nonnihil porro attingamus instrumenta Tabernaculi aut Templi sacra, ipsaq; ueluti per transennam inspiciamus. Præmas in his tenet Arca fœderis, à Tabulis fœderis in ea collocatis sic dicta. Appellabatur etiam Arca Domini Dei exercituum, habitantis super ipsam, inter cherubim, adeoq; ipse Dominus exercituum nuncupabatur sedens inter cherubim, eò quod inde ederet responsa, & illam reposuisset in medio populi signum suæ præsentiae inter ipsos. De materia & forma Arcæ hic nihil dicam. Hæc enim suis coloribus uiuidè exhibentur depicta Exodi 25. cap. De significatione, mysterio & usu arcæ dicam pauca. Homines in arcas aut cistas nostras reponimus nostros thesauros. Proinde intelligimus in Arca repositum esse thesaurum ecclesiæ, adeoq; uniuersa fidelium bona. Nō ergo quærenda hæc erunt in hominibus, in Noe, Abraham, Isaac, Iacob, Mose, Dauide, S. Maria, Ioanne, Petro aut Paulo, multò minus in cista Chananaica ac Romanensi indulgentiaria, sed in eo, in quo habitat omnis plenitudo, & in quo sunt omnes thesauri sapientiæ & scientiæ Dei reconditi, qui non in terris spectatur, sed in ipso sancto sanctorum, in ipso inquam cœlo uersatur. Is est Iesus Christus: cuius diuinitas significatur per aurum purissimum, humanitas autem per lignū Sittim, id est, cedri, uel potius spinæ albæ. Assumpsit enim carnem peccatrici similem, ueram quidem illam nostram, sed non peccatricem: nulla in eo peccati spina existente. Ex hac Arca depromunt pij quæcunq; ipsis bona sunt necessaria. In Arca enim reposita leguntur hæc, Tabulæ testimonij, Vrna mannae, & Virga Aaronis florens. Nam in Christo repositos audiuius thesauros ecclesiæ. Christus est sapientia nostra, lex & uerbum patris, legis consummatio, impletio, iustus, & iustitia nostra. In Christo est alimentum cœleste. Ipse enim panis de cœlo descendit uiuus, ut quicunq; de ipso edat, uiuat æternū. In Christo reffloruit sacerdotium. Visum quidem

Significatio & mysteriū arcæ.

Quæ recondita in Arca fœderis.

quidem illud mortuo Christo in cruce excisum esse, sed resurgens accepit sacerdotium æternum. Nunc enim consistens ad dextram patris in cœlo, intercedit pro nobis. Sed & corona circumdabatur arca, quia Christus dominus rex est, qui nos fideles suos liberat ab omni malo, & filios Dei efficit. Ad arcam legitur applicitum uel impositum Propitiatorium, siue illud operculum arcæ, siue sedes quædam fuerit arcæ superimposita. Significabatur illo interpretibus apostolis Ioanne ^{1. Ioan. 3.} & Paulo, Christus, qui est thronus gratiæ, & propitiatio pro peccatis nostris, non ^{Rom. 3.} pro nostris autem tantum, sed pro peccatis totius mundi. Ex propitiatorio item edebantur oracula. Vfus enim propitiatori ostenditur in historia sacra. Nam Moses tabernaculum ingressus, accepit responsa eaq; retulit ad populum. Et Christus is est, per quem loquitur nobis pater cœlestis, & quem nobis unice audiendum proposuit, dicens, Hic est filius meus dilectus, in quo placata est anima mea: ipsum audite. In propitiatorium duo Cherubim aspiciunt, & se mutuò quoq; contemplantur. Vnde nimirum S. Petrus dixit, etiam angelos desiderare in ipsum saluatorem mundi, qui per euangelium nunciatur, prospicere. Iidem angeli, ipsi domino nostro seruiunt, semperq; ei, ut domino uniuersorum, assistunt. Porro Arcam domini nulli portant nisi sacerdotes domini. Nam soli inuncti per spiritum sanctum & uera fide præditi Christum recipiunt, & donorum eius participes fiunt. Nec dissimulandum quod 1. Sam. 4. & 5. cap. traditur Izraelitas dum Arca abute ^{Abusus & usus} rentur, iamq; in alium usum, quàm data erat, raperent, & plus ei tribuerent quàm ^{arcæ uerus.} tribuere docuit scriptura, cecidisse uictos à Palestinis, sed & arcam esse in captiuitatem abductam: nimirum ut discerent omnes Sacramentis aut mysterijs Dei non plus tribuere, quàm conuenit, neque in alium finem usurpare aut applicare quàm instituit dominus. Non enim in hoc erat instituta, ut haberetur pro Deo, licet nomen Dei gereret, non ut gratiam & auxilium ab ipsa peterent, sicuti fecisse leguntur, sed ut esset testimonium, Deum utpote confœderatum adesse medium in populo, si modò hic seruaret tabulas fœderis arcæ inclusas, soli q; Deo adhæreret, à quo omne bonum expectaret per Christum, qui per arcam præfigurabatur.

Egredientibus ex adyto uel sancto sanctorum in sanctum, primum occurrit ^{Mensa aurea;} Mensa aurea, quæ quali fuerit forma & materia, exponitur Exodi 25. cap. Mensæ imponitur cibus & alimentum hominis, ex mensa reficiuntur homines, in mensa curas deponunt & fiunt hilares. Ergo non alia esse potest mensa, quàm Christus dominus & doctrina Christiana. Christus enim est alimentum uitale, gaudium & exultatio hominum fidelium, Aurea est foris, lignea intus tota, quia cibus noster Deus est & homo. Proponitur mensa in Ecclesia; non ergo quærenda est Athenis aut apud Sophistas, aut apud Gymnosophistas, aut in synagoga. Mensæ imponuntur panes recentes duodecim, diuisi in partes duas. Nam panis uitæ alit utrunque populum Iudæorum & Gentium, & recens quidem suauis & exaturans. Iam etiã panis hic sanctus est, non prophanus, quo soli uescuntur sacerdotes. Quia soli fideles eo digni sunt, soli q; eo participant. Panes autem appellantur propositionis ^{Panes propositionis.} siue facierum, eo quòd hunc uitalem cibum oporteat nobis uersari ob oculos. Et ut perpetuò oportet panes hos expositos esse coram domino in conspectu hominum: ita non decet abditam & reclusam esse doctrinam Christianam. Vasculum thuris imponebatur panibus. Quoniam isti qui uescuntur pane cœlesti, preces & gratiarum actiones sine intermissione Deo offerunt. Leuit. 24. multis describitur, quomodo panes facierum parentur.

Candelabrum aureum in Sancto ex latere seu opposito mensæ ante uelum ap- ^{Candelabrum} paret. Descriptionem eius habemus Exod 25. cap. Lucernæ in domibus nostris ^{aureum.}

ponuntur ut luceant omnibus in domo uersantibus. Et Christus Dominus datus est mundo lux, ut qui eum sequutus fuerit, indispiscatur lumē uitæ. Illuminat Ecclesiam Christus. Ex Christo cannæ & luminaria prodeunt, quæ ex ipso lumē habent. Dominus ad Apostolos dixit, Vos estis lux mundi. Stipes ergo candelabri Christus est: ex stipite prodeunt cannæ in suprema parte habentes lumina. Quicquid enim luminis est in ministris Ecclesiæ, id totum est ex fonte luminis Christo. Porro aurea sunt candelabri omnia. Christus enim Deus lux & sapientia patris est: ministros quoque Christi decet esse synceros & repurgatos ab affectibus carnis; quo & mysterium pertinet emunctoriorum.

Ara thymiamatis.

In medio inter mensam & candelabrum stabat ante uelum in sancto aurea ara, quæ thymiamatis appellatur, uel incensi, ac diligenter describitur Exod. 30. cap. Vfus aræ huius erat duplex. Principio enim quotidie offerebatur in ipsa incensum siue suffimentum: quod nephas erat ulli creaturæ aut Deo apparare uel offerre. Id fiebat bis in die, mane & uesper. In hoc ministerio dum esset Zachariæ pater diui Baptistæ, uiso angelo, propter incredulitatem obmutuit ad certū tempus. Deinde semel in anno offerebatur singulari quodam modo incensum, nempe in festo Expiationis, sicuti describitur Leuit. 16. cap. Per incensum uerò, thymiamata uel suffimentum intelligendæ sunt sanctorum preces, teste Dauide, dicente, Dirigatur oratio mea tanquam incensum, in conspectu tuo, eleuatio manuum mearum sacrificium uespertinum. Erat autem altare illud unicum planè. Si quis plura construxisset, extremæ fuisset damnatus impietatis. Per aram illam unicam figuratur Christus dominus Deus & homo, mediator & intercessor inter deum & hominem, per quem sancti omnes uniuersas suas preces domino Deo patri offerunt. Proinde plures sibi extruunt aras qui sibi deligunt creaturas pro intercessoribus, per quorum interuentum aliquid à Deo patre impetrent. Disertè profectò dicitur in fine 30. cap. Quicumque tale sibi fecerit incensum ut id olfaciat, peribit anima eius. Per Christū ergo solū omnes preces suas Deo patri offert fidelis dei Ecclesia. Ara illa nostra aurea corona est redimita. Nā Christus Dominus noster uerus est rex & pontifex. Orandū autē est mane & uesper, id est, perpetuò & iugiter. Orandum semper per Christum. Quid quòd unus est Christus, per quem Deo placuerunt preces & eorum qui mane, ab initio inquam mundi, & qui uesper, id est, in fine mundi Deo supplicant? Grauius ergo peccarunt contra Dominū, qui incensa obtulerunt passim in excelsis. Nam ut Deo inobedientes imò rebelles apparuerunt, denique suas inuentiones Dei legibus prætulerunt, adeoque Dei leges neglexerunt: ita mysterium unici intercessoris Christi spreuerunt, dum ab unica illa ara recesserunt.

In excelsis adolere.

Ara holocaustorum.

In Atrio altera stabat Ara, quæ dicebatur ænea & holocaustorum: quæ depingitur graphicè Exodi 27. cap. quæ ipsa unica & sola erat. Non enim licebat alibi, nisi per singularem quandam dispensationem, quā in loco sancto ad hanc aram sacrificare cuiquam religioso. Proinde cum Rubenitæ unā cum suis socijs extruxissent aram in ripa Iordanis, idque delatum esset fama ad alias tribus Israelis, decernunt hæ publico bello id sceleris esse persequendum. Vnde rursus astimare licet peccatum eorum qui offerebant, hac præterita ara, in excelsis. De quo supra quoque dictum est. Altare uerò nostrum unicum illud & catholicum Christus est: qui seipsum obtulit hostiam uiuentem Deo. Nec est ullum in toto mundo sacrificiū, quod peccata expiet nisi hoc unicum. Nec placent Deo patri fidelium sacrificia, nisi in ara Christo oblata per fidem. Sanctificat enim nos Christus, sanctificati per ipsum offerimus Deo gratam hostiam. Hæc sumpta sunt ex Apostoli doctrina

doctrina ad Hebræos decimotertio, & ad Romanos duodecimo capite.

Vltimum uerò inter uasa sacra solium siue labrum æneum erat, collocatum inter uelum sancti & aram holocaustorū in atrio. Describitur Exodi cap. 30. Continebat aquam qua se abluebant sacerdotes ministraturi coram Domino. Significabatur & hoc Christus, qui est ablutio fidelium. Significabatur item non illotis manibus & pedibus sacra esse tractanda. Abluunt sese qui per spiritum sanctum purificantur, & per gratiam Dei idonei efficiuntur ad obeunda sacra munia. Morti autem obnoxius est, qui non fuerit particeps gratiæ uitalis. Cōmemorantur præter illa & alia instrumenta Tabernaculi sacra: sed illa ferè potissima sunt. Noluī uel singula operosius excutere, uel minutias persequi, ne molestiam adferre charitati uestræ nimis prolixa tractatione. Porro eadem in templo fuerunt uasa siue instrumenta sacra quæ reperiiebantur in Tabernaculo, nisi quod in templo Solomonis maior apparatus & splendor in omnibus conspicitur: non alia de causa haud dubiè, quàm quòd mysteria Christi & Ecclesiæ subinde magis ac magis, illustrius inquam, sese proferrent. Christus uerus Solomō rex pacis & felicitatis, ipsa inquam æterna felicitas, ecclesiā in hoc mundo excitauit, quæ finibus mundi terminatur. De quo multis agunt prophetae, Zacharias in primis, & clarissimus prophetarum Nathan, 2. Sam. cap. 7. Hæc de Loco sancto.

Labrū æneum.

Post Locum sacrum in sacris ceremoniis, sacrum Tempus occurrit tractandum. Vt enim religioni externæ locus certus est datus, ita eidem tempus fixum est designatum. Et feriæ quidem sacrae referuntur ad actiones sacras. Actiones autem aliæ sunt manuariæ & quasi prophanae, pro uictu & amictu necessarijsq; uitæ parandis inuentæ. Aliæ sunt sacrae adeoq; religiosæ, pro exercitio religionis externæ susceptæ. Non insumendum est omne tempus labori manuum: nec rursus omne tempus externæ religioni potest impendi. At actiones illæ nō sunt sine tempore. Omnis enim actio tempore continetur. Proinde distinxit Deus ipsum tempus ad actiones, ita ut uoluerit alios quidem dies prophanos manuarijs artibus, alios autem sacros exercitio religionis externæ inseruire. Nō quòd prophani dies, in quibus laboratur manibus, nō sint sancti & dicati Deo. Hic enim omne tempus & singulos sibi uendicat dies, quippe qui omni tempore coli postulat: sed quòd feriæ singulariter & magis quàm dies prophani externo Dei cultui sunt destinatæ.

Tempus sacrum.

Est ergo festus seu sanctus dies, qui ex institutione Dei sacer est domino, susceptus ad cultum Dei externum religiosè exercendum. Ideo sancti dies & legitimæ feriæ non sunt, quæ non uni & soli Deo Iehouah celebrantur: neq; legitimæ sunt, in quibus non exercetur legitimus Dei cultus. Eas ob causas non raro in prophetis reijciuntur sabbata seu feriæ populi Izraelitici: nimirum quòd sine fide ac illegitimè celebrarentur.

Quid festus dies.

Omnes autem dies festi commune habuerunt uocabulum, appellati sabbata, item festa, feriæ, dies stati & sancti, panegyres & cœtus. Omnibus commune erat festis, quòd deo soli erant instituta, non creaturis, non uentri, aut Veneri. Commune erat omnibus, quòd in salutem, utilitatem & recreationem hominum erant inuenta. Feriæ enim non sunt onus, sed oneris leuamen. Sunt quidem utilia opera prophana, sed otium quoque necessarium est: sine quo labor non est durabilis. Vult ergo dominus cōcedere homini recreationem, adeoq; iubet in diebus festis suos latari, latari autem in sanctitate & modestia, ut sit honesta recreatio, non profusa libido. Rursus otium per se bonum non est, sed respectu alterius bonum est. Iubet Deus cessare à laboribus, sed in hoc, ut interim aliud agant homines, ut designant laborare corpore, animo laborare incipiant, totiq; sacris inuigilare. Opus

Ad quid instituti dies festi.

itaque hic erit coetu sacro, lectione sacra, precibus publicis, sacrificijs, (etenim quod singulis ferijs offerre oporteat, praescriptum legitur Num. 28. & 29. cap.) sacramentorum celebratione, & si quid aliud est quod in ferijs facere iussit dominus. Vnum enim illud hic requiritur in primis, id uidelicet, quod Maria inuenit desidens ad pedes Iesu, & audiens uerbum ipsius. Habent & illud commune festa omnia, quod maximarum rerum continent & refricant memorias: quanquam singula singulas suppeditent. Sabbatum suggerebat beneficium conditi orbis à Deo, in gratiam & utilitatem hominum. Præterea signum erat, Mose teste Exodi 31. sanctificationis ueræ, quam suis cultoribus confert solus Deus sanctus. Alia festa alia Dei beneficia reuocabant in memoriam, suasque peculiare (ut suo loco dicetur) habebant significationes.

Sabbatum.

Modus & numerus certus in ferijs.

Porro modus erat & numerus feriarum certus, ac distinctæ quidem habebantur: primum in septimanas, quarum singulae habebant sabbatum, diem inquam septimam; deinde in menses. Nam prima cuiusque mensis consecrata erat Domino. Eas ferias appellarunt Neomenias siue Nouilunia, uel Calendas: & postremo in annuas ferias, eae erant anniuersaria & statuta festa: quorum tria commemorantur, Pascha, Pentecoste & Septimi mensis. Præter hæc fuerunt & Conceptiua feriæ nimirum non præceptæ à Deo, sed receptæ ab Ecclesia ad gloriam Dei, & ad retinendam maximorum beneficiorum Dei memoriam. Festum enim sortium quod appellarunt Purim, à tota receptum fuit Ecclesia, ex relatione Mardochei: sicut uidere est Esther 9. cap. Festum Enceniorum instituit Iudas Machabæus cum totius Ecclesiae consensu, in memoriam reparati templi liberationisque ex tyrannide Antiochi regis, sicut legitur 1. Machab. 4. cap. Et Christus dominus honestat Encenia illa sermonibus sacris. Fuerunt in populo Dei etiam instituta Ieiunia, ut quinto mense, quo inflammata est urbs: & septimo mense, quo cæsus est Godolias: & decimo mense, quo cincta fuit obsidione urbs. De quibus Zacharias disseruit capite 7. & 8. Iam institutum fuit tempore Esther ieiunium in mense Adar, in memoriam calamitatis Iudæorum, illatae aut intentatae ab Amano.

Ieiunia.

Sabbatum.

De Sabbato & eius significatione dixi modò ac quondam dum exponere Decalogum. Id obseruatum est quasi naturali & diuina lege à condito orbe. Est autem caput feriarum omnium. Neque enim institutum est primum per Moysen, exhibito cœlitus Decalogo. Nam religio sabbati fuit recepta à sanctis mox à mundo condito. Ideoque in Decalogo legimus dixisse dominum, Memeto ut diem sabbati sanctifices. Sed & ante legem latam manifeste fit sabbati mentio. Exodi decimo-sexto & Genesis secundo capite.

Noemenia.

Secundum genus sabbati siue feriarum sunt Calendæ uel Neomeniæ, id est, nouilunia, ea celebrabantur in capite singulorum mensium. Eius mentio fit Numeri 10. & 28. 1. Samuelis 20. Psal. 81. Ezech. 46. & 2. Paralip. 2. Dicitur ea celebritas in memoriam creatæ lucis esse instituta, admonuisse cultores, ne menses uel Iano uel Marti, aut alij alicui diuo uel planetæ, sed uni soli Deo conditori omnium & temporum gubernatori seu moderatori subicerent. Præterea significationem habuit reparationis uel renouationis animi fidelis, per illuminationem cœlestem: ut Nouilunium Christiani uerè celebremus, cum ex tenebris in lucem à filio Dei producti ambulamus ut decet filios lucis, omnibus tenebrarum operibus reiectis.

Conuentus & celebritates annue tres.

Tertium feriarum genus comprehendit festa anniuersaria, quorum tria numerantur Pascha, Pentecoste, & Festum mensis septimi. Ceterum uoluit dominus in hisce tribus festis in loco sancto, nempe ad Tabernaculum, & hoc translato ad Templum generales celebrari syndos ac panegyres. Sic enim ait Moyses in Deute.

Deuteronomio, Ter in anno apparebit omnis mas coram Domino Deo tuo, in loco, quem elegerit, nempe in festo azymorum, in festo hebdomadum, & in festo tabernaculorum; nec apparebit in conspectu domini uacuus. Quisq; iuxta donum manus suæ, & iuxta benedictionem domini Dei tui, quam dedit tibi: id est, Quisq; quod potest & pro modo facultatum suarum quas concesserit Dominus, Domino offeret. Distribuit autem ferias illas statas siue solennes in tres menses, peregrinationi seu profectioni conuenientes. Verno tempore celebrabatur pascha, cum iam aristæ seu spicæ erupissent. Circa messem, festum peragebant Pentecostes, ruris laboribus operibusue primis confectis. Porro collectis fructibus omnibus, proficiscebantur ad Festum tabernaculorum. Et proficiscebantur quidem qui uenire poterant. Putant quidam cum ijs dispensatum esse, qui semel in anno apparuissent coram domino, ita ut duobus alijs festis domi manere licuerit. Ego uero arbitror homines religiosos raro huiusmodi usos esse dispensationibus. Pollicetur alibi Dominus se interea limites & facultates peregre euntium defensurum atque custoditurum. Certè ex historijs constat hisce diebus festis conciones fuisse longè frequentissimas.

Pascha multas habuit appellationes, præcipuè tamen dictum est festum azymorum. Totis enim diebus septem, in fermentatis uescebantur panibus. Ceremonia eius festi cum sacrificijs offerendis fusè describitur Exodi 12. & Leuit. 23. Exhibebatur in eo Epulum agni, nec alibi quàm uel apud tabernaculum uel templum. Lex extat Deut. 16. Memoriam memorabilis illius ex Ægypto liberationis populi Israelitici Izraelitis & omnibus pijs refricabat. Voluit sibi in eo festo primas offerri fruges, ut ita beneficium mannae exhibitæ repararet. Habuit præterea festum illud significationem transitus & liberationis, quæ effuso sanguine, perfecta est per Christum. Vnde Apostolus dixit, Pascha nostrum immolatus est Christus 1. Cor. 5. Verùm de Pascha dicam plura consequenti mox sermone.

Pascha.

Pentecoste dicebatur etiam festum hebdomadum, siue septimanarum, & nouarum frugum. Proponebantur enim eo festo panes propositionum ex nouis confecti frugibus. Numerabant autem à proxima post pascha die septimanas septem, dies inquam quinquaginta, ac celebrabant die quinquagesima memoriam reuelatæ ac promulgatæ cœlitus ab ipso deo diuinæ legis. Nam quinquagesima die exitus ex Ægypto legimus Deum ipsum in monte Sinai fuisse cōcionatum, tulisseq; ac promulgasse legem. Erat itaque Pentecoste memoraculum illustratæ Ecclesiæ. Erat item typus eius diei, quo Christus dominus finis legis spiritum sanctum misit in discipulos, uniuersamq; illuminauit Ecclesiam. Ceremonias huius festi describit Moses Leuit. 23.

Pentecoste.

Festum tabernaculorum peragebant mense septimo, ita præcipiente in Deuteronomio Mose, Cum collegeris de area tua, & de torculari tuo, celebrabis 7. diebus festum tabernaculorum: lætaberisq; in die festo tuo: tu & filius tuus & filia tua, seruus tuus atq; ancilla tua, Leuita, peregrinus, pupillus, atq; uidua, qui sunt intra portas tuas. Septem diebus ages festum domino Deo tuo, in loco quem elegerit dominus: quoniã felicem rerum successum dedit tibi Dominus Deus tuus in cunctis prouentibus tuis, & in omni opere manuum tuarum. Omnino igitur sis lætus. Adhæc extat formula celebrati huius festi legitime in Nehemia capite 8. unde plura peti possunt. Fuit autem festum hoc Tabernaculorum siue mensis septimi quadripartitum. Nam primo die mensis fuit festum Tubarum siue clangoris: id quod grauiâ illa bella reuocabat in memoriâ, quæ populus Deo auspice ac duce gesserat felicissimè, primò quidem contra Amalechitas, deinde uerò contra

Festum mensis
7. seu Tabernaculorum.

Festum tubarum.

Festum expiationis.

Festum tabernaculorum.

Concio & celebritas magna.

Annus iubilus.

omnes hostes ethnicos. Significabatur item uitam hominis super terram esse militiam perpetuam. Decima die eiusdem mensis peragebatur festum expiationis. Præibat formula solenni sacerdos, peccata Deo confitens, confitentemque publice quisque e plebe sequebatur, & priuatim apud se recitabat: mente colloquens cum domino. Addebatur hircus emissarius, & sacrificium illud, quod fusc describitur Leuit. 16. cap. Ita uero peccatorum fiebat expiatio: quæ typus erat futuræ per Christum expiationis, qui semel oblatus, unica hostia sui corporis, omnia abstulit peccata totius mundi. Continebat præterea doctrinam de poenitentia uera. Die decimaquinta incipiebat festum Tabernaculorum. Septem enim integris diebus, nempe à 15. ad 22. degebat populus in tabernaculis. Finis huius ceremoniæ indicatur ab ipsa scriptura, ut posterius scirent dominum maiores ipsorum collocasse in tabernaculis. Repetebatur ergo memoria beneficii in deserto exhibiti. Seruari enim sunt in deserto per annos 40. integros, ut nec uictus nec amictus defuerit. Significabatur & illud, hanc huius seculi uitam esse scenam, neque nos hic habere mentem locum, sed futurum inquirere: sicuti & Apostolus docuit 2. Cor. 5. & ad Hebræos 13. cap. Quartum huius septimi mensis festum celebrabatur in octaua, nempe 22. appellaturque Concio siue Cœtus. In eo congregabatur census, oblatio & uestigial sacrum, ad facta rectaque templi, ad sumptus sacrificiorum sustinendos, denique ad conseruationem ministerij. In hoc festo arbitrantur cantatum Psalmum 84. Quam dilecta tabernacula tua, &c. & alios nonnullos Torculares appellatos. Hæc hæcenus de festis anniuersarijs.

Hic commemorare necesse est & Iubilei institutionem. Erat autem annus iubilus quinquagesimus quisque, qui multis describitur cum suis ceremonijs, Leuitici 25. Indicebatur toti populo in terra promissa per cornu arietinum, proclamabaturque libertas omnibus seruituti implicitis. In eo non obscure continebatur mysterium Christi domini, qui ipse nobis huius ceremoniæ significationem aperuit ex Isaia 61. cap. apud Lucam in cap. 4. ubi dicit se esse illum qui reuera iubileum aperiat, & ueram denunciet libertatem, ipsum inquam annum domini acceptum. Annunciauit autem remissionem & libertatem omnibus fidelibus, non tuba quidem arietina, sed euangelica. Nam per misericordiam Dei in merito Iesu Christi filij Dei, remittuntur credentibus per uniuersam terram agentibus, omnia debita siue peccata: ea tamen conditione, ut nos quibus iam dimissa sunt debita, illis uicissim debita remittamus qui nobis debent, id est, contra nos peccauerunt. Ac in Christo quidem habemus uacationem & requiem ueram & sempiternam. Per Christum conceditur nobis reditus ad possessionem, uel patriam, unde excideramus, ueterem nimirum ad terram uiuentium.

Hæc de tempore sacro & ferijs quanta potuimus breuitate differuimus. Copiosiora inuenire licet de his Exod. 23. Leuit. 23. Num. 28. & 29. & Deut. 16. cap. Reliqua huius argumenti, nempe de Ceremonijs Iudaicis, absoluemus, Deo uolente, mox sequenti concione: iam uero supplices Deo facti, oremus, &c.

De Sacramentis Iudaorum, de Sacrificiorum generibus varijs, & alijs quibusdam pertinentibus sub legem Ceremoniarum. S E R M O VI.

DIXI sermone proximo de Personis sacris, ministris inquam diuini cultus, sacerdotibus Leuiticis, item de loco & tempore sacro: restat iam ipsa res considerata, quam personæ illæ sacræ, in loco & tempore sacro, exercebant, ipse inquam cultus & ritus sacer, ab ipso domino sic institutus

tutus traditus & præscriptus, ut omnes intellexerint quid cultus Deo, id est, qualem cultum ei exhibeant. Veniunt autem hinc consideranda in primis sacramenta, deinde sacrificia.

Sacramenta ueteri ecclesiæ sanctorum fuerunt duo præcipua, Circuncisio & Pascha. De singulis sigillatim dicemus, quod loqui dederit ex suo uerbo Dominus.

Duo sacramenta synagoge. De Circuncisione quid sit.

Erat autem Circuncisio actio sacra, qua refecabatur præputium in obsignationem diuini cum hominibus fœderis. Vel ut copiosius describamus, Circuncisio erat signum æterni fœderis Dei, quod dabatur in membro genitali, in hoc instituta diuinitus, ut testaretur bonam Dei erga circuncisos uoluntatem, moneretque regenerationis & puritatis, adeoque & confœderatos Dei separaret ab alijs populis seu gentibus.

Author ergo Circuncisionis Deus est: origo uetustissima. Etenim ipse in Euangelio Dominus, Non ex Mose, inquit, est Circuncisio, sed ex patribus. Repetit qui dem & reparauit Circuncisionis legem seu morem Moses, sed primus circuncisus est eximius ille Dei amicus Abraham cum annum uitæ ageret nonagesimum nonum, ac eo ipso die est circuncisus, quo Dominus fœdere cum Abraham inito circuncisionem instituisse. Nam hanc adiecit ceu sigillum fœderis, quod pepigerat cum Abraham & semine eius in seculum. Locus extat Genes. 17. Annus is erat ab origine rerum 2046, à diluuio autem 390. cum Sem filius Noe natus esset annos 487. Ergo Moses post institutam circuncisionem, nimirum post annos 320. demum natus deprehenditur: unde apparet patres usurpasse Circuncisionem ante legem latam annis circiter 400.

Origo circuncisionis.

Quoniam uerò Circuncisio addita est fœderi iuncto inter Deum & Abrahamum signum uel sigillum, paucis & in transcurso perstringenda est nobis eius fœderis ratio. Imitatur Deus in pangendis fœderibus, ut & in alijs rebus, morem seu ritum hominum. Hi fœderibus ceu uinculis arctissimis firmissimisque sese constringunt in unius corporis aut populi societatem atque compagem, qua ut ipsis bene sit tutique contra omnium iniurias agant, mutuò sibi communicant uitam ipsam simul & fortunas omnes. Atque in his disertè exprimitur qui coaluerint fœdere, quibus conditionibus coierint, & quousque. Proinde cum Deus humano generi gratiam suam declarare uellet, & se totum & omnia sua bona ei communicare adeoque in nos effundere, ut nobis bene sit, fœdus init cum homine. Id autem non primò inijt cum Abrahamo, sed cum hoc renouauit uetus. Pepigit autem primò cum patre omnium nostro Adamo, tum cum ipsum iam profugum in gratiam reciperet, filiumque unigenitum promitteret, in quo orbi placari & per quem se totum nobis impendere uellet, omnia bona sua nobis communicando: & uicissim nos sibi fide & obedientia obstringendo. Hoc fœdus primò & uetustissimum reparauit deinde cum Noe, postea ferè clarius cum beato Abrahamo. Sed & post annos 400, sub Mose ad montem Sinai idem rursus est reparatum, conditionibus fœderis copiosius in Tabulas geminas relatis, adiectis simul ceremonijs multis. Excellentissimè uerò omnium, purissimè & clarissimè idem hoc illustrauit tandem ipse Dominus noster & saluator Iesus Christus, qui ceremonias, typos, figuras & umbras omnes expunxit rursus, ueritatem substituit, omniaque perfectissimè impleuit, redactis omnibus salutis nostræ & pietatis ueræ capitibus in breue compendium, quod etiam nouum fœdus seu nouum Testamentum, nimirum propter innouationem & impletionem omnium ueterumque ceremoniarum abrogationem, nuncupauit. In eo solus prædicatur Christus perfectio & plenitudo omnium: in eodem nihil post fidem & charitatē exigitur, libertasque prijs conceditur sancta & admiranda.

De fœdere Dei & hominum.

De qua re aliàs. Sed redimus iam ad fœdus cum Abrahamo reparatum.

Qui coierint
fœdere.

Disertè in hoc indicatur nobis qui coierint fœdere, Deus inquam uiuus, æternus, omnipotens, ac summus rerum conditor, conseruator & moderator: ac Abrahamus cum uniuerso suo semine: id est, cum omnibus cuiuscunq; gentis & nationis sint fidelibus. Ita enim exponit Apostolus semen Abrahamæ, præsertim cum Galatis dicit, Si Christi estis, igitur semen Abrahamæ estis, & iuxta promissionem hæredes.

Quousq; in-
tum fœdus.

Iam etiam tempus constituitur quo duret hoc fœdus, adeoq; nullum tempus definitur. Est enim æternum. Quanquam enim multa accesserint in renouationibus declarationibusq; fœderis, ceu accessoria, quæ postea euauerunt, præsertim Christo ueniente in carnem, in substantialibus tamen nihil inuenias mutatum. Deus enim semper est Deus sui populi: semper ab eo flagitat ac requirit fidelē obedientiam. Id quod in nouo Testamento omnium significantissimè perspicitur.

Conditiones
fœderis.

Capita enim siue conditiones huius fœderis duæ duntaxat ex præcipuis ponuntur. Prima exponit quid Deus polliceatur, & quid nobis confœderatis uelit præstare, quid inquā expectemus à Domino. Secunda cōtinet officium hominis, quod Deo debet cōfœderato & principi suo. Ergo quod Deū attinet, Ego, inquit, ero Deus tuus, & Saddai, id est, omnisufficientia, quidē: tuus inquam Deus & seminis tui post te. Sibi sufficiens est Deus ad absolutissimam perfectionem & beatitudinē, neq; indiget alieno subsidio, cum quod uspiam est, ex ipso sit & per ipsum subsistat. Solus sufficit homini Deus, solus præstat quæcunq; sunt in uotis hominū, & ad perfectam felicitatem pertinent. Vnde & quondam ab Ethnicis Saturnus (fortassis ex occasione uocabuli Saddai) est nuncupatus, à saturando haud dubiè.

Deus est omni
sufficiens fœ-
deratorum.

Solus enim saturare potest, qui est satietas & perfectio. Quod autem seminis Abrahamæ futurus sit omnisufficientia Deus, demonstrat duplici argumēto. Principiò, Dabo semini tuo terram Chanaan. Qua promissione comprehendit omnia beneficia terrena & corporalia, nempe facultates amplas, felicitatem, tranquillitatem, rerum abundantiam, sanitatem, gloriam, splendidas uictorias, & quæcunq; ad conseruationem beatitudinemq; hominis temporalem pertinent. At quomodo hæc præstiterit semini Abrahamæ, multis illustrat historia sacra: eo modo declarans, Deum uerum seminis Abrahamæ fuisse ita ut promiserat Deum. Deinde promittit semen in quo benedicendæ sint omnes gentes terræ: nimirum promittit saluatorem Christum, quem & antea Adamo promiserat. Benedicere uerò, est omni benedictione spiritali ditare: quo comprehendit omnia dona Dei spiritalia, remissionem peccatorum, innouationem uitæ, & gloriam æternam. Benedicere est & maledictionem tollere: ita ut hoc idem polleat cum illo, quod dicebatur Adamo, Semen mulieris calcabit caput serpentis. Veteris enim draconis caput nil aliud est, quam uis & regnum satanæ. Vis eius est maledictio, peccatum, & mors. Calcato ergo capite, maledictio est sublata, & succedit benedictio. His inquā declarat se fore Deum Abrahamæ & seminis eius.

Ephes. 1.

Quid exigatur
ab homine.

Secunda fœderis inter Deum & hominem initi conditio, homini præscribit quid agat, & quomodo se gerat erga principem & confœderatum suum, nempe Deum. Ambula, inquit, coram me, & esto integer. Ambulant autem coram Deo, qui omnem uitam suam, dicta & facta sua omnia instituunt ad uoluntatem Dei. Ea est, ut simus integri. Paratur illa integritas fide, spe & charitate: in quibus comprehenduntur omnia officia sanctorum Dei confœderatorum. Docet ergo posterior illa conditio fœderis, quid agant fœderati, quomodo se gerāt coram Domino, nimirum habeant illum pro Deo suo, adhæreant ei soli qui est omnisufficientia, inuocent

inuocent solum, colant unum, & ex Messia expectent sanctificationem uitamq̃
perennem. Hæ fœderis conditiones erant: quibus nondum coniuncta erat cere-
moniarum turba, quæ postea sub ducatu Moſis accessit.

Huic confœderationi addidit signum, adeoq̃ sigillum Dominus ipsam Circun- *signum fœde-
ris Circuncisio.*
cisionem. Sigilla appenduntur tabulis fidei faciendæ aut confirmandæ gratia. Ta-
bulæ continent & exhibent omnem totius fœderis rationem. Circuncisio ergo &
tabularum loco & signi uice adiecta est fœderi, eoq̃ nomine fœdus ipsum appella-
tur: sicuti literæ uel tabulæ fœderis apud nos quoque uulgariter uocantur. Sic
p̃iūdit, ipsum inquam fœdus, cū nihil aliud sint quàm literæ fœderis, omnem
rationē fœderis scripto comprehendentes, & sigillo confirmantes. Verū uul-
gare hoc est, quod signa rerū signatarum nomina accipiunt, ut nihil mirum sit cir-
cuncisionem appellari fœdus, cū reuera fœdus sit communio & societas quam
cum Deo habemus. Genes. 17. ita loquitur de signo hoc Dominus. Hoc est fœdus
meum quod obseruabitis inter me & inter uos, atq̃ inter semen tuum post te. Cir-
cuncidetur in uobis omnis masculus. Circuncidetis autem carnem præputij ue-
stri: & erit in signum fœderis inter me & uos, &c. En Circuncisio in hisce uerbis
Domini primū fœdus, deinde signum fœderis explicandi gratia nuncupatur.
Non alia ratione appellat eandem S. Stephanus in Actis cap. 7. testamentum.

Sed & modus Circuncisionis indicatur, Circuncidetis, inquit, carnem præpu- *Ritus ex mo-
dus circunci-
sionis.*
tij uestri. Nam glandem, quæ summītas est penis, membri inquam uirilī, cutis uel
pellis obtegit aut ambit, prominens nonnihil, ea uocatur præputiū, eò quod præ-
emineat. Hanc pelliculam resecabant cultro petrino, nudabantq̃ glandis summi-
tatem. Resectio inquam illa, putatio & incisio, dicta est Circuncisio. Quis uerò
amputarit pelliculam, non exprimitur. Apparet autem honoratissimum quenque
in domo aut gente, ipsum inquam primogenitum aut patrem familiās, aut legem,
in lege sacerdotes circuncidisse. Singulare est quod Zipora uxor Moſis circuncidit,
Exod. 4. cap. Iam & tempus indicatur circuncisionis, dies octaua, cū puer
recens natus ualidior paulò esset factus. Cæterum circuncidisse illos non ferreis,
sed petrinis cultris, colligimus ex 5. capite Iosue: ubi Dominus apertè iubet filios
Izraelis circuncidere cultris petrinis. At Deum nihil mutare in cerimonia sacra-
mentorum, claret ex ipsis sacramentorum ritibus: unde conijcimus etiam Abraha-
mum non alijs quàm petrinis usum esse cultris, præsertim cū & Zipora uxor
Moſis petra filium circuncidisse legatur. Alias Iudæorum nugas, quas hîc spar-
gunt, data opera transimus intactas. Indignæ enim sunt quæ audiantur, nec quic-
quam habent mysterij. Petrinus autem culter confert ad mysterium circuncisio-
nis explicandum.

Mysterium enim & significationem certissimam habuit circuncisio. Principiò *Mysterium ex
significatio Cir-
cisionis.*
enim significabatur Circuncisione, impuram & corruptam esse totam siue uni-
uersam hominis naturam, atq̃ idcirco omnes homines opus habere putatione re-
generatione. Hoc nomine dabatur in membro genitali. Nam omnes concipi-
mur & nascimur filij iræ in peccato originali. Nec quisquam à damnatione illa li-
berat, nisi qui exors est peccati, nimirum benedictum semen, Dominus noster Ie-
sus Christus, conceptus è spiritu sancto, & natus ex Maria uirgine: qui sanguine
fuso (id quod in cruore circuncisionis præfigurabatur) emundat nos à peccato,
& facit hæredes uitæ æternæ. Ac Circuncisio hæc ualde oppugnat negantes ori-
ginale peccatum: ualde impugnat tribuentes nostris uiribus iustitiam & salutem.
Si enim puri eramus, si nostris uiribus saluari potuimus, quid quæso opus erat pa-
tres nostros putari? Quæ putantur impura sunt uel superuacua. At nihil impuri

aut superuacui condidit Deus. Condidit autem præputium. Si malum esset præputium, non condidisset Deus hominem præputiatum. Per se ergo malum non est, nec superuacuum præputium: sed significationi potius seruit præputij incisio, nimirum ut intelligeremus ex natiuitate & natura nostra nos esse corruptos, nec purgari posse nisi gladio petrino. Certè hac de causa data est circumcisio in hoc membro & non in alio. Subijciemus mox & aliam ex Lactantio causam, cur in membro genitali data sit, & non in alio membro. Deinde significabat, imò & attestabat circumcisio, Deum omnipotentē ex mera gratia & bonitate coherere indissolubili fœderis nexu cum hominibus, quos uelit sanctificatos iustificare, omnibusq; celestibus donis locupletare per Christum. Ideò enim adhibebatur culter saxeus siue petrinus. Christus enim semen illud benedictum est petra, ex qua undæ profluunt purificantes, ac ipse nobis spiritu suo refecat quæcūq; amicitia inter nos & Deum mutuam impediunt; idem confert & auget spem & charitatem in fide, ut Deo coniungi & coherere possimus in æternum, quæ est uerè beata & felix uita. Huc pertinent iam testimonia legis & Apostolorum. In Deut. cap. 30. dicit Moyses, Circumcidet Dominus Deus tuus cor tuum & cor seminis tui, ut diligas Dominum Deum tuum. Huius autem internæ circumcisionis externa et uisibilis signum erat. Deniq; Paulus de Abrahamo loquens, dicit, Et accepit signum circumcisionis, signaculum iustitiæ fidei quæ fuerat in præputio, ut esset pater omnium credentium per præputium, ut imputaret & illis iustitia. Et cætera. En circumcisio Abrahamæ erat signaculum quod Deus gratia sua iustificarat Abraham; quam iustificationē fide receperat, & receperat quidē antequā circumcideretur, in argumentum quod qui præputiati credunt, iustificantur cum fidei Abraham; & rursus qui circumciduntur Iudæi, sciant se per fidem iustificari à Deo. Ideoq; dabatur circumcisio in ipsum hominis corpus, ut in corpore gereret fœdus Dei, admonereturq; gratia per fidē se iustificari. Vnde illud quoq; colligimus gratiam Dei & iustificationē hominis pñ, non fuisse alligatam signo. Alioqui enim Abraham non fuisset iustificatus ante circumcisionem, sed in ipsa demum circumcisione. Præterea non præcepisset Dominus, qui uult homines saluos facere, octaua demum die circumcidere. Multi enim pueri ante diem octauam excedebant è uicis, neq; perueniebant ad circumcisionem, qui tamen non condemnabantur. Quibus accedit quod Sara, Rebecca, Rahel, Iochabeth, & Maria soror Moysis, unā cum innumeris alijs matronis & uirginibus sanctis nō potuerant circumcidi, & tamen saluatæ sunt per gratiam Dei in fide uenturi Messia. Ergo sacramento Circumcisionis gratia Dei non fuit alligata: sed idcirco à sanctis ueteris ecclesiæ non spreta nec neglecta, sed usurpata in illum finem ad quem instituta erat, ut esset testimonium & sigillum gratiæ iustificationis in Christo uenturo, qui circumcidit spiritualiter sine manibus per spiritum sanctum.

Gratia Dei nō
alligata Circun-
cisioni.

Coloss. 2.

Circumcisione
colliguntur cir-
cuncisi in unū
corpus.

1. Sam. 17.
Acto. 11.

Circūcisio ad-
monet hominē
sui officij.

Præterea colligebat foris uisibiliter Deus in unam ecclesiam qui circumcidebantur, ex quibus electos prius spiritus sui uinculo sibi copulauerat. Nam S. Paulus hac de causa appellauit populum unius religionis circumcisionem, ut claret in 15. cap. ad Romanos, & ad Philippenses 3. Ergo per circumcisionem separauit suum populum ab infideli populo. Vnde incircuncisi uel præputiati uocabulum abiit in probrum maximum & cōuitium intolerandum, perinde ut apud nos probrum Canis. Incircuncisus enim uel præputiatus reputabatur pro impuro & prophano homine, alieno prorsus à Deo & à testamentis Dei.

Deniq; Circumcisio admonerat circumcisos per omnem uitam sui officij, nempe ut cogitaret quisque apud se, quod nomen suum dedisset Deo, ac sacramentum Dei portet in corpore suo. Hac enim de causa & in circumcisione indebantur nomina

nomina Israelitis. Clare enim apud Lucam ostenditur nomen & Ioanni Baptistæ & saluatori nostro Iesu in circuncisione, sicuti & Abraham hoc nominis Abraham, qui prius nuncupabatur Abram, fuisse datum. Admonebat hoc circuncisum sui officij, quippe qui dedisset nomen confederato sibi Deo, adeoque se iam inscriptum esse in registrum siue catalogum Dei, cuius nomine iam censeatur: unde ex pacto & officio uitam suam non pro sua libidine aut aliorum uoluntate, sed secundum uoluntatem Dei instituere debeat. Requirebat enim fœderis conditio, ne idololatria & peregrinis cultibus seipsos prophanarent circuncisi, ne impuritate uitæ corpora & animas Deo consecratas polluerent, sed in uera fide perseverantes, sanctitati studerent, poenitentiam agerent, Deoque obedirent per omnia. Sic enim dicit Moses Deut. 10. Circūcidite præputium cordis uestri, & ceruicem uestram ne induretis amplius. Ad quæ uerba alludens Ieremias in cap. 4. Circuncidimini Domino, inquit, & auferte præputia cordis uestri. Et Stephanus martyr infideles Iudeos obiurgans, Duri, inquit, ceruice, & incircuncisi corde & auribus. Vos semper resistitis spiritui sancto. Rectissime ergo S. Paulus Apostolus ad Romanos 2. ostendit duplicem esse circuncisionem: alteram literæ, carnis, & externam, quæ hominum fit manibus: alteram uerò cordis, spiritus, & internam, quæ fit opera spiritus sancti. Hanc approbavit Deus in suis, illam hac non præsentem reprobauit. Vtraque ex præcedentibus satis iam clara est, ut pluribus non sit opus.

Duplex circuncisio, spiritus & literæ.

Operæpretium uerò facturum me existimaui, si in præsentem recitarem Charitati uestre, priusquam hunc locum de Circuncisione concludam, uerba uetusti scriptoris Lactantij, quæ de Circuncisione in hunc modum protulit lib. Instit. 4. cap. 17. Significabat Circuncisio, inquit, nudandū esse pectus, id est, aperto & simplici corde oportere nos uiuere. Quoniam pars illa corporis, quæ circunciditur, habet quandam similitudinem cordis, & est pudenda: & ob hanc causam Deus nudari eam iussit, ut hoc argumento nos admoneret ne inuolutum pectus haberemus, id est, ne quod pudendum facinus intra conscientie secreta uelemus. Hæc est cordis circuncisio, de qua propheta loquuntur, quam Deus à carne mortali ad animam transtulit, quæ sola mansura est. Volens enim uitæ ac salutis nostræ pro æterna sua pietate consulere, poenitentiam in illa Circuncisione proposuit: ut si cor nudauerimus, id est, si peccata confessi satis Deo fecerimus, ueniam consequamur: quæ contumacibus & admissa sua celantibus denegatur ab eo, qui non faciem sicut homo, sed intima & arcana pectoris intuetur. Hæc hactenus uetustus ille ecclesiæ scriptor Lactan. Firmianus de mysterio Circuncisionis nobis retulit.

Lactantius de Circuncisione.

Hæc omnia quæ diximus hucusque de significatione & mysterio Circuncisionis, omnium oculis ceu in tabula proponebantur contemplanda, quoties in ecclesia quondam frequentabatur Circuncisio. Renouabatur quasi ipsum Dei fœdus iustum cum hominibus. Prædicabatur Dei gratia & eius sanctificatio, nostra item corruptio: lucebat in his Petra Christus, qui spiritu suo omnes maculas ecclesiæ resecat & abluit. Præterea discebant ex signo adeoque ex tota cerimonia sacra cultores Dei, quod uno in corpore existentes ecclesiastico, uitæ puritate confederato Deo sese debebant approbare. Quandoquidem circuncisione uisibili quodammodo fiebat religionis ueræ, & consensionis in ueram religionem confessio, & in eandem obligatio. Ergo qui contempsisset aut temerè neglexisset hanc sacram ceremoniam, puniebatur grauissime: sicuti colligere licet ex Gen. 17. & Exodi 4. cap. Hæc de Circuncisione hactenus.

Summa Circuncisionis.

Sequitur secundum ecclesiæ ueteris Sacramentum Pascha. Ea uox Hebraica De agno Pascha est, non significans passionem, ut ex etymo Græco uideri poterat, sed saltum, schali.

transcensum, seu transitum. Nam *חַדַּח* significat transilire aut transcendere. Rationem huius uocabuli reddit ipse in lege Moses, dicens, Transibit Dominus ut percutiat Ægyptios, & ubi uiderit sanguinem in superliminari atq; in duobus postibus, *חַדַּח*, id est, transiliet Dominus ultra ianuam istam, & non permittet interemptorem uenire in domos uestras. Insignitur hoc sacramentum etiam alijs uocabulis. Appellatur enim Signum, appellatur Memoria, item Celebritas ac *מַזְמֶנֶת*, Coetus siue conuocatio sancta, Festum Domini, Cultus & Observatio, item Oblatio & Sacrificium. Quod autem nuncupatur ceremonia illa transitus, non fit citra tropum. Nam Transitus illud ipsum est beneficiū, quo angelus Domini ædes Iudæorum transiit intactas, eorumq; uitæ pepercit: sed quoniam eius beneficij memoria & reparatio fuit, beneficij nomen induit. Sicuti prius admonui uulgare esse in negotio sacramentario, ut signa rerum signatarum nomina propter similitudinem & analogiam mutuū accipiant.

Quid pascha.

Videamus modò quid sit Pascha, & qualis fuerit eius ceremonia. Erat Pascha actio sacra diuinitus instituta in mactatione & epulo agni, ad hoc ut retineretur in ecclesia memoria beneficij semel in Ægypto præstiti, deinde ut esset testimonium diuinæ erga fideles beneuolentiæ, typum quoq; Christo præferret, denique participantes in unius corporis societatem colligeret, gratitudinisq; & innocentiae admoneret.

Author et tempus pasche.

Author huius sacramenti ipse Deus est, non homo ullus. Moses enim quæ acceperat à Domino tradidit filijs Israelis: sicut copiose exponitur Exodi 12. cap. Aceo quidem tempore Ceremoniam instituit, quo populum Israelis ex Ægypto eduxit. Cumq; authore Deo profecta sit, consequens est omnia paschata insequuta, ad illud usq; quod cum suis discipulis proximè ante mortem suam Dominus celebrauit, diuinas fuisse actiones. Carni & sapientiæ humanæ multa imò omnia ferè huius sacramenti uidentur absurda & superuacanea, ceterum fides quæ in authorē Deū intendit oculos, omnia suspicit & reueretur. Sicut enim Deus summa & perfectissima est sapientia, ita omnia & singula eius instituta absolutissima & inastimabilis utilitatis sunt.

Iam etiam tempus indicatur quo primū hoc sacrum sit traditum ecclesiæ Israeliticæ, annus uidelicet 430. (à promissione nimirum Abrahamæ facta, siue ab eius peregrinatione supputata) qui erat annus ab origine rerum 2447. à diluuiō 791. Definitur præterea tempus quando celebrandum sit pascha, nempe annis singulis, mense Nisan, qui respondet partim nostro Martio, partim Aprili. Sed & dies mensis indicatur, 14. mensis, supputatione nimirum inita ab æquinoctio uerno. Nam 10. die deligebant pecus ad festum, 14. die mactabant. Quid quod & partem diei denotat, qua sit mactandum? nempe inter uesperas, nimirum à tertia nostra pomeridiana ad 5. usque, iuxta nostra horologia, iuxta Iudæorum supputationem à 9. ad 11. usq;. Ita uerò expressum est Christum in fine mūdi fore mactandum, imò ipse temporis articulus mortis seu immolationis eius ita prædictus est. Nam expirauit circa horam 9. Vnde S. Petrus dixit, prophetas scrutatos esse ad quem aut cuiusmodi temporis articulum significaret spiritus Christi, qui in eis erat, Christū uenturum atq; passurum.

1. Pet. 1.

Locus pasche.

Sed & Locus certus erat huic sacro designatus. In Ægypto quidem sparsim per sodalitia in domibus epulabantur. Vbi uerò peruenissent in terram promissam, non licebat alibi quàm apud tabernaculum, & postea apud templum Hierosolymis celebrare pascha. Dispersi ergo Hierosolymis per ædes, sed per sodalitia, ut & Lucæ 22. uidere licet, epulabantur. Illa præfigurabant Christum non nisi semel

semel immolandum in monte Caluarix, semper efficacem fore ad expianda populi peccata.

Designantur item qui celebrent pascha, uniuersus nimirum Izraelis coetus circumcissus, per domos & familias tanto collectus numero, quantus sufficiebat agno absumendo. Nam ut Christus omnium est saluator, sic omnes sunt in causa peccatores (sumus autem omnes peccatores) quod Christus dominus in ara crucis est oblatus.

Qui conuiuunt.

Præterea multa fide & diligentia describitur ritus epulandi maſtandiq; agni. Principio deligebant sibi agnum hunc, eumq; ex agnis & hœdis: deinde iugulabant eundem quinto post die: in pateram cruorem eius excipiebant, quem mox aspergillo hyſopi postibus ianux atq; superliminari aspergebant. Agnum ipsum, non elixatum quidem aquis, sed assatum igni, & integrum, hoc est, caput cum pedibus, nec non cum intestinis, publico edebant in epulo: additis lactucis siue amaribus herbis, & pane azymo siue infermentato. Ipsi interim epulantes stabant, lumbos succincti, calceati, & baculos tenentes in manibus. Cæterum edebant agnum hunc festinantissimè: ossa nec confringebant, nec proſciebant canibus, sed exurebant igni. Ex ipsis domibus à uespera usq; mane nemo egrediebatur.

Ritus Pasche.

Hæc fines suos, magna mysteria, & euidentem habuerunt significationem rerum præteritarum, præsentium & futurarum. Compungebāt item totum cœtum Ecclesiasticum in unum corpus & in unam religionis professionem: sed & gratitudinis & studij pietatis admonebant epulantes. Id quod per partes quanta possumus breuitate perstringemus.

Scopus ceremonie.

Principio enim uoluit Dominus retinere hoc epulo in memoria, & quasi æternitati consecrare maximum illud beneficium, quod semel populo Izraelis in Ægypto contulit, illud inquam, quod seruatō suo populo mirabiliter, omnia Ægyptiorū primogenita una nocte peremit, postera uerò die suos ex Ægypto, ex dura inquam seruitute, eduxit. Hoc beneficium non tantum uoluit prædicari uerbo (certum enim est eo festo conciones habitas ardentissimas de beneficijs Dei) sed etiam per actionē sacram siue ceremoniam, ceu per spectaculum & picturam uiuam, omnium oculis proponere ac renouare. Nam uisibilis actio prædicationem quodammodo subiiciebat oculis sensibusq; alijs. Vnde Moſes interpretans ceremoniam & actionem illam sacram, Cum filij uestri ad uos dixerint, ait, Quis hic cultus uester? Respondebitis, Victima hæc transitus domini est, qui præterijt domos filiorum Izrael in Ægypto, cum caderet Ægyptios, & domos nostras liberauit.

Beneficium retinetur in memoria.

Cæterum significatio hæc fuit rei præteritæ, proinde non fuisset admodum utilis insequentibus hominibus, quippe qui beneficium nihil ad se pertinens celebrassent, nisi id ipsum & singulis adaptasset seculis. Voluit ergo Deus hoc ueluti testimonium extare apud posteros suæ gratiæ, bonitatis & liberationis perpetuæ: nempe quod non tantum patrum uel maiorum fuerit Deus, sed & omnium quoque posterorū Israelitarum Deus esse, & his quoque propter Christi sanguinem parcere, deniq; omnia ab eis depellere mala, & omnia conferre bona & uelit & possit. Nam Psal. 136. in hæc uerba legimus, Confitemini domino quoniam bonus est: quoniam in æternum misericordia eius. Qui percussit Ægyptiorum primogenita: quoniam in æternum misericordia eius. Et Israelem eduxit e medio eorū: quoniam in æternum misericordia eius. Manu ualida & brachio extento: quoniam in æternum misericordia eius. Ergo præterito Dei beneficio patribus collato, exultabant fidem suam posteris, fore ut & ipsis misereretur & beneficeret ex solita in-

Testimonium beneuolentiæ Dei erga suum populum.

genitaq; misericordia sicuti & patribus benefecerat. Eratq; hæc ceremonia non uulgare fidei exercitium.

*Agnus erat fi-
gura Christi,
passionis &
redemptionis
eius.*

Præterea exhibebantur in his quoq; futura Christi saluatoris mysteria. Nam præfigurabatur quis futurus Christus, quid mundo collaturus, quomodo eius fi-
ant participes pñ. & quomodo hi se gerant coram ipso. Etenim inter alia animalia multa, non aliud eligebatur huic sacramento magis idoneum quam agnus, non tam propter significationē simplicitatis & patientiæ in Christo, quam quod uicti-
ma est. Paulus enim, Pascha nostrum, inquit, immolatus est Christus. Agnus quo-
que iuxta legem mane & uesperī immolabatur. Christus enim est agnus occisus ab origine mundi. De quo & Baptista testificans dixit, Ecce agnus Dei, qui tollit peccatum mundi. Et quoniam nos omnes sicuti oues errauimus, quisque in uiam suam, descendit ad nos filius Dei, & factus est ouis, nostræ scilicet substantiæ atq; naturæ. Sed hic noster integer est & purus, sine peccato & uitio: conceptus ē spi-
ritu sancto, natus ex Maria uirgine. Masculus erat & anniculus: fortis nimirum, idem hodie & heri, & idem usq; in secula, nimirum saluator uniuersi orbis. Sumebatur ex agnis & hœdis. Christus enim prognatus est ex peccatoribus & iustis: sicuti commemorat Matthæus in capite primo. Ac propter fusum sanguinē agni, parci-
tur toti Ecclesiæ Israelitarum. Nam sanguinem Christi oportuit fundi, ut purgarentur eius sanguine omnes fideles, iratusq; pater propter effusum cruorē parceret toti ecclesiæ. Idem aspergitur aspergillo hyssopino, postibus & superliminari domus. Contempta quidem & humilis est herba hyssopi: & stulta uidetur humi-
lisq; & abiecta prædicatio euāgelij: at per ipsam oportet nobis, qui sumus domus Dei, aspergi siue prædicari sanguinē Christi in remissionem peccatorum. Recipi-
mus autem agnum ad uitam, cum edimus, id est, credimus Christū pro nobis esse passum. Nam fide editur Christus: id quod ipse fusc exponit Ioan. cap. 6. Agnus igni paratur non aqua: nec crudus, sed tostus comeditur. Non enim homo dunta-
taxat, sed Deus simul est uerus, uerum holocaustum. Potest is nos absoluerē plenē ut nostra additione nihil opus sit. Aquæ & planē frigida sunt nostra addimenta. Iam & totus est edendus agnus, caput cum pedibus & intestinis. Nisi enim cre-
damus Christum & Deum esse uerum, & hominem uerum, sapientiam quoque & iustitiā nostram, non totum edimus. Caput non edunt, qui Christum negant esse Deum. Pedes non edunt, qui negant esse hominem. Intestina non edunt, qui non agnoscunt, quæ intra Christum sunt & fidelibus communicantur dona, iustitia uidelicet, sapientia, sanctificatio redemptio & uita. Ossa in agno nec confringe-
bantur nec proijciabantur canibus, sed cremabantur igni. Nam in Christo non est confractum os ullum. Id quod commemorat beatus Ioannes Euangelicæ historiæ cap. 19. Latet in hoc præterea mysteriū. Licet enim pateretur filius dei, in eo quod pati potuit, in humanitate, in diuinitate tamen mansit impassibilis. Quæ uerò in Christo propter diuinitatis excellentiam non assequimur, meritò ardenti profes-
quimur desiderio. Sed & Christus cibus est animæ rationalis fidelisq;, nō canibus & impijs proijciendus. Idem edendus est præcipitanter, nec cunctandū. Nam pro-
tinus & citra procrastinationem & maximo cum desiderio manducandus est fi-
de Christus. Simul autem præcipiuntur comedendæ acidæ herbæ, cum panibus infermentatis. Nam fidelibus agenda est pœnitentia uitæ præteritæ malæ, & stu-
dendum porrò puritati uitæ. Sequitur enim copiosius quomodo nos geramus er-
ga redemptorem nostrum. Stantes edebant agnum, renibus uel lumbis accincti, calceati quoq;, & baculos tenentes in manibus. Erat is habitus peregrinantium. Ita ergo nos in præsentī seculo geramus oportet, ut decet peregrinos, qui hunc mundum

mundum contemnunt, aliam inquirunt patriam. In itinere itaq; temperantia studeant: muniti sint pedes eorum euangelio pacis, ac innitantur interim baculo diuini auxilij, egredianturq; qua possunt festinantia ex seruitute & corruptione huius seculi.

Hæc eadem ceremonia erat quasi confessio religionis ueræ, & tessera quæ ab alijs populis & gentibus Dei populum separabat. Ergo colligebantur omnes Israe litæ in unam Ecclesiam & societatem: in qua pascha celebrantes, profitebantur se esse Dei redemptos, Dei liberos & populū. Huc enim pertinet quod præcipitur ne ex illo ullus edat extraneus: sed ut circumcisi duntaxat de eo participant: ne diuidatur in partes, neue alibi quàm uno in loco edatur, & edatur quidem per sodalitia ab uniuerso Israele: rursus ne quis exeat ex ædibus usq; mane. Qua re significabatur extra Ecclesiam in sectis & schismatis hæreticorū nec Christum inueniri, nec salutem. Christus agnus ille Dei colligit omnes in unam Ecclesiam, & retinet in ipsa, saluatq; credentes.

Tessera ex confesio fidei.

Postremò admonebat hic ritus populum Dei sui officij, gratitudinis præsertim & studij pietatis, siue innocentia. Agebant ergo Deo gratias pro hoc & pro alijs eius beneficijs, laudabant nomen eius: ac abstinebant in uniuersum ab omni fermento. Nec legas quicquam prohibitū esse tam seueriter in hac ceremonia, quàm ut abstineant à fermento. Qui comederit fermentatum, inquit, peribit anima eius de cœtu Israelis, tam de aduenis quàm de indigenis terræ. Idem postea sæperepetitur & inculcatur. Cæterum peritissimus & doctissimus in lege Moysis Apostolus Paulus, quid per fermentum sit significatum exponens, Itaq; festum celebremus inquit, non in fermento ueteri, nec in fermento malitiæ & uersutia, sed in panibus fermento carentibus, hoc est, synceritate & ueritate. Hæc hætenus de epulo agni paschalis.

Pascha particula pates admonet sui officij.

1. Cor. 5.

Sacramentis his accedunt porrò sacrificia, eaq; uaria & multiplicia. Hæc non primū ab ipso Mose sunt inuenta & tradita, sed usurpata iam inde à rerum origine. Nam Cain ex frugibus terræ, Abel uerò è grege suo pecus obtulit in holocaustum domino conditori omnium. Ita & Seth, Noe, Sem, Abraham, Isaac & Iacob, omnes deniq; patres domino sacrificasse creduntur. Certè cum Gentilitia siue Ethnica sacrificia, cum sacrificijs Iudæorum, uel ipsis ethnicis scriptoribus testificantibus, plurimum affinitatis & similitudinis habere deprehendantur, non dissimile uero est, gentium genarchas à primis suis patribus Semo, Iapheto & Chamo, deniq; à sanctissimo patre Noe, sacrificandi ritum quemq; ad suam detulisse gentem. Atqui indubitatum est sanctos patres ex seipsis hic confinxisse nihil, sed omnia accepisse ab authore omnis boni Deo. Porrò Moses sacrificiorum discrimina, species & genera exactius distinxit, redegitq; in ordinem certum. Quod autē fecit, Deo authore fecit. Deus omnia tradidit Mosi. Nam liber Leuitici, in quo maxime describuntur omnes sacrificiorum species, mox ab initio testatur Mosen à Deo uocatū, à Deo didicisse quæcunq; tradidit de ritu sacrificandi. Sed & Num. 7. legimus, Cumq; ueniret Moses in tentorium constitutionis, audiuit uocem colloquentis ad eum è propitiatorio.

De sacrificijs ex eorum origine.

Sicut autem modò dicere cœperam, sacrificia fuerunt uaria & inter se distincta, & tamen habuerunt quædam inter se communia & generalia. Generale id erat omnibus, quod non nisi uno in loco offerebantur. Generale erat, quod ex fide & legitime, utiq; secundum uerbum Dei offerri debuerunt. Generale erat, quod sacrificari præcipiebatur igne sacro, non alieno. Interierant filij Aaronis, Nadab & Abihu, non alia de causa, quàm quod prophanum siue alienum ignem usur-

Sacrificia quædam habent cōmunia, quedā particularia.

Ignis perpetuus non alienus.

passent in sacris. Deus enim cum Israelitæ uel Leuitæ primùm sacrificarent iuxta ipsius mandatum in tabernaculo, demisso cœlitus igne, sacrificandi ritum sic approbavit. Vnde Leuit 6. cap. præcipitur ut sacerdotes perpetuum ignem foueant in tabernaculo siue templo. Id quod & Ethnicos inepta imitatione exprimere uoluisse constat, dum Virgines Vestales Romæ perpetuum iuberent fouere ignem. Sed significabatur igne perpetuo perpetua in Ecclesia spiritus sancti operatio. Hic fouendus & excitandus est in Ecclesia: id quod fit p̄is precibus & synce-
ra doctrina domini, legitimoq̃ sacramentorum usu. Generale erat & illud, quod nec feræ syluestres nec immunda animalia offerebantur. Præterea legitur generalis canon traditus de sacrificijs à Mose in Leuit. cap. 22. hisce uerbis, Nullum uisum sit in eo quod obtuleris. Si cæcum fuerit, si fractum, si saucium, si papulas habuerit aut scabiem impetiginemq̃, non offeretis ea domino, nec dabitis ex eis super altare domini. Certè si quis obtulisset uitiosam oblationem domino, magnum de se argumentum præbuerat contemptus numinis ingratitudeisq̃ eximie erga dominum. Ideo clamat apud Malachiam dominus, & ait, Cum hostiam cæcam sacrificatis, an non peccatum committitis? & quando adducitis claudum & agrotum, an non peccatum committitis? Adduc quæso tale duci aut principi tuo: num id probabit? num suscipiet faciem tuam? dicit dominus exercituum. Ita inquam uile fit & sordescit uobis nomen meum. Requirit ergo omnibus temporibus iustus & uerax Deus ueritatem, liberalitatem, synceritatem, & integritatē à suis cultoribus, odit sordiciem, hypocrisim & mendacium. Sunt & alia quædā quæ oblationes diuinæ habent communia: sed nolumus prosequi minutatim omnia. Quæ uerò quæq̃ aut singula habent peculiaria, inclarescit ex diuersis ipsarum speciebus: quas modò attingemus.

Holocaustum.

Primo loco explicabimus sacrificij genus, quod uocant Holocaustum. Id totum igne absumebatur, ita ut nihil præter pellem aut tergo cederet sacerdoti. Origo uocis est Græcanica. Dicitur enim holocaustum quasi ὅλον καυσόμεν, hoc est, totum combustum aut igne consumptum. Constabat autem tribus speciebus, maioribus, inquam, animantibus, minoribus & minimis: boue nimirum, iuuenco uel uitulo: aut si cui non esset facultas tanta, offerebat agnum uel caprum: quod si id quod negatum esset propter paupertatem, licebat sacrificare auiculas: non quidem gallos uel anseres, uel alias aues immundas, sed mundas, turtures uidelicet uel columbas. Ritus autem holocaustorum erat talis, Sistebatur animal offerendum ad latus altaris, imponebantur ei manus, iugulabaturq̃ protinus à sacerdote. Sanguis uerò excipiebatur, ut spargeretur per aræ circuitum: iugulato mox detrahebatur pellis, quæ sola cedebat sacerdoti. Crura truncabātur, deinde abluebantur cum intestinis, mox excitato in ara igni, imponebatur tota hostia cum capite & trunco corporis, cum cruribus item & intestinis, ac concremabantur uersa in altari coram domino. Si uerò offerretur turtur aut columba, & obtorto sacerdotisq̃ digito disrupto collo, iugulabatur: sanguis exprimebatur ad latera altaris, Struma & pennæ proijciebantur item ad latus altaris, in locum utique cinerum, alæ quoq̃ findebantur, postremò tota comburebatur in ara. Hic ritus erat sacrificij uel oblationis, quam holocaustum appellarunt: cuius significatio ijs erat augustissima & iucundissima, quibus persuasum erat holocausto præfigurari ipsum Dei filium incarnandum ex illibata uirgine, & offerendū pro expiatione omnium peccatorum totius mundi. Hi enim in sacrificij spectaculo cōtemplati sunt ipsam crucem & passionem domini, qui nostra in se peccata suscepit (huc enim pertinet maxime manuum impositio, quæ cōmunionis erat symbolum) ac casus sanguis

sanguinem suum effudit in remissionem peccatorum, totum se Deo patri in igne charitatis diuini ardoris offerens. Hic idem turtur est ac columba. Caterum requirebatur præter hæc in ritu holocausti, ne unquã de animantibus offeratur holocaustum sine oblatione, quam uocant Minha: quæ erat huiusmodi, Ex farre pugillus granorum, aut farinæ, aut crustularum panis cocti in cacabo, aut torta panis cocti in elibano aut frixorio, cum oleo & thure comburebatur in ara holocaustorum. Certè Christus est panis uitæ, qui per spiritum æternum, ut ait Apostolus, se Deo patri obtulit pro nobis in cibum uel conseruationem uitæ.

Holocaustis connumerantur Iuge sacrificium, & sacrificia initiationis. De Iuge sacrificio copiosa fit expositio Exodi 29. & Leuit. 6. Quotidianum id erat, Nam offerebantur singulis diebus mane & uesperi agni duo, unus nempe uesperti, alter mane. In his manifestè prænũciabatur Christus, qui est agnus ille Dei qui tollit peccatum mundi, cuius uirtus semper efficax est ad tollenda omnia omnium fidelium peccata. Est enim agnus ille occisus ab origine mundi: semel quidem cæsus & occisus in cruce, sed cuius meritum & efficacia semper durat, & omnes absoluit quotquot liberantur à peccatis. Porro sacrificia initiationis, sacerdotum uidelicet, tabernaculi & omnium uasorum seu instrumentorum ministerij sancti, pleraque habent communia cum holocaustis, quædam peculiaria. De quibus copiosè differitur Exodi 29. & Leuit. 8. cap. Christus autem dominus noster initiatus est per passionem, ac sibi consecrauit in sacerdotes omnes fideles.

Secundum genus sacrificiorum erat Oblatio, quam uocant Minha, munus inquam uel donum, farreum seu adorem sacrificium, quod & cibarium cognominatur. Constat hoc frugibus terræ, quæ non uno modo adhibebantur. Nam commemorantur tres species. Offerebatur enim far tostum in spicis, aut farina siue simila munda nondum cocta, aut certè paratus ex farina panis: qui sanè triplici modo aut forma siue ratione parabatur. Vel enim coquebatur in furno aut elibano: uel in cacabo aut sartagine; uel in frixorio crustularum pleno. Accedebat his uelut auctarium & condimentum sacrificiorum sal, oleum, thus. Remouentur autem generali canone ab omnibus sacrificijs mel & fermentum. Non enim admittebantur libæ melleæ. In epulo tamen eucharistico admittebatur panis fermentatus ad esum. Proinde si quis offerret farinam, ungebatur ea prius à sacerdote oleo, & condiebatur sale, mox ei imponebatur thus: inde uolam plenam accipiebat sacerdos (in sacrificio pro sacerdote comburebatur totum) & adolebat in ara, reliquum sibi conseruabat. Et in omnibus quidem cibarijs oblationibus ponebatur thus, præterquam in sacrificio pro peccato, & in sacrificio zelotypiæ: id quod uidere licet Leuit. 5. & Num. 5. At Leuit. 2. cap. reliqua qui cupit inueniet, quæ pertinent ad ritum oblationis cibarij plenum. Non enim singula minutatim hic prosequimur. Porro sicuti antea Christus in animantibus, hoc est, pecudibus, armentis & auibus præfiguratus est, ita nunc significatur in panibus. Est enim panis uitæ: & habet formas uarias infirmitatis & gloriæ. In Christo non reperias ullum fermentum, peccatum aut acerbitem, hypocrisim aut superbiam. Nulla est in Christo dulcedo uoluptatis, mellea, inquã, affectio. Sed sal in ipso inuenias, temperamentum planè diuinum, & sapientiam absolutissimam. Propter Christum omnia hominum grata sunt Deo: propter Christum exaudimur à patre: est ergo thus super Christo. Quanquam simul in his adumbretur qualia & nostra esse debeant sacrificia, utiq; sine hypocrisi, amarulètia, odio, inuidia, & citra uoluptatem carnalem, mixta autem pijs precibus.

Sacrificio cibario connumerari possunt libamina. His enim uinum domino

fundeatur in sacrificiis, sicuti claret Exodi 29. Leuit. 6. & Numeri 28. Est autem Christus uinum, potus & gaudium nostrum ad uitam æternam. Is effundit se in animos piorum, ut ipsos gaudio perfundat, uiuatque in eis & ipsi in eo. Ideo autem memoriam sanguinis effusi pro nobis in remissionem peccatorum uino consecrauit. Cibariis oblationibus annumerari possunt sacrificia primitiarum, primogenitorum, & Decimarum. De quibus passim in lege multa commemorantur, ut Exodi 13. & 23. Deut. 18. Numeri 18. Est autem Christus primogenitus & primitia omnium, propter cuius dignitatem & meritum nobis paritur, & per quem sanctificati, efficimur filij adeoque & hæredes Dei. Eidem ut auctori & redemptori nostro debemus & animas nostras, & omnia quæ in nobis sunt præstantissima. Sed & illud gratitudinis est, quod de terrenis facultatibus nostris, quæ ab ipso habemus, Deo liberaliter impartimur, ad sustentationem cultus Dei legitimi atque egenorum omnium.

Sacrificiū piacularare pro peccato.

Tertium sacrificiorum genus est quod offertur pro peccato, ac iccirco appellatur Hattah piacularare, & Ascham sacrificium pro delicto. Nos uno uocabulo appellare possumus sacrificium expiatorium. Immolabatur enim pro peccato commissio, uel per imprudentiam: quod gradibus hominum peccantium quadrifariam distribuitur, nempe, si pontifex peccarit, aut tota Ecclesia, aut princeps, aut uulgaris quispiam. Vel offerunt pro peccato dedita opera uel à scientibus commissio, attamen mediocri: uel pro grâdi & capitali scelere, quod nulla excusat imprudentia. Ritus huius sacrificij latissimè se extendit, & est copiosus ac multiplex, adeo ut in præsentia per compendium commemorare non placeat. Describitur diligentissimè per partes Leuit. cap. 4. 5. 6. 7. Nec dubium est quin eo sacrificio Christus sit propositus, sicuti & in omnibus alijs oblationibus. Finis enim legis Christus est. Et Isaias in cap. 53. Cum nihil iniquum fecerit, ait, & dolus non fuit in ore eius, complacuit tamen domino ipsum infirmando atterere, ut ubi posuerit animam suam hostiam delicti uel uictimam pro culpa (hic enim ponitur אשחא ascham) uideat semen, & proroget dies, ac uoluntas Domini prosperè cedat in manu eius. Huc pertinet tota illa disputatio Apostoli Pauli in epistola ad Hebræos, in qua ostendit Christum esse ueram illam expiatricem pro peccatis uictimam, quæ purget uniuersam Ecclesiam & peccata omnia. Ritu partim peccatorum ingenia, partim passionem Christi & mortis uirtus adumbrata sunt.

Anniuersarium & uniuersale sacrificium piacularare.

Hæc uerò pro peccatis instituta sacrificia multa & uaria, conceptiua erant, quippe quæ offerri solebant ab his qui peccassent, & eo quidem tempore quo peccassent: statum porro anniuersarium & uniuersale sacrificium illud erat, quod multis describitur Leuit. 16. cap. & huc sub piacularia referri debet. In festo enim propitiationis 10. die 7. mensis peragebatur annua solennitate pro omnibus omnium peccatis uniuersale expiatorium seu propitiatorium sacrificium. Eius ritum nolo in præsentiarum copiosius prosequi, cum luce clarius proponatur omnibus in eo loco Leuitici, quem modò citauimus, & nos iam illum in explicando mysterio, quantum satis est, adumbrare cogitemus. De significatione enim & mysterio eius dicam pauca.

Figurabatur illo spectaculo, certè iucundissimo, tota passio & effectus passionis domini nostri Iesu Christi: quæ quotannis semel exhibebatur & renouabatur uniuersæ Ecclesiæ Dei. Placuit enim deo hic modus repræsentandi mysteria redemptionis & salutis per sacramenta, & non per picturas aut colores, aut denique per scenicos ludos: quæ non pauci hodie parum religiosè in delicijs habent. Solus autem pontifex summus in hac cerimonia obibat omnia; nisi quod duo ei adiungebantur

bantur ministri, quorum alter educebat hircum emissarium piacularemque, alter portabat extra castra iuuenicum & hircum expiatorium. Imò diligentissime præcipitur, ne quis hominum se coniungat summo pontifici tabernaculum ingredienti, & propitiationem pro peccatis facienti. Nullus homo, ait Dominus, sit in tentorio constitutionis, cum ille ingreditur ad expiandum in sanctuario, donec egrediatur. Nam Christo in peragendo salutis redemptionisque nostræ negotio, nemo coniungendus est. Solus enim saluator est, calcavit solus torcular, nemo alius pro nobis crucifixus est. Excluduntur ergo Patriarchæ, Prophetæ, Apostoli & Martyres, omnes denique creaturæ, ne his unquam quicquam salutis acceptæ tribuamus. Solus Christus manet saluator & redemptor mundi. Creaturis aut operibus aut meritis nostris salutem tribuere, est cum summo Pontifice creaturas in tabernaculum admittere, & incurrere indignationem omnipotentis, id est, anathema horrendum ueri & in æternum uiuentis Dei. Nam per summum sacerdotem præfiguratur nobis saluator Christus, qui Apostolo teste sacerdotium habet, quod successionem ad neminem transire potest. Aaron porro de suis accipiebat iuuenicum expiatorium & arietem pro holocausto, à populo autem duos hircos. Proinde Christus Dominus noster uerus & unicus ecclesiæ suæ sacerdos, quod pro nobis obtulit, à nobis accepit, substantiā carnis nostræ. Additur interim Aaron (sub quo nomine quemlibet intelligimus summum populi Dei sacerdotem) sacrificaturum induisse uulgares siue communes sacerdotum uestes, sed tamen sanctas & cādidas. Licet enim nostram assumpserit naturam Dei filius, & nobis similis factus, quasi uulgari nobiscum ueste indutus sit, immunis tamen est ab omni corruptione & macula peccati. Principiò autem pro se & pro domo sua mactabat Aaron iuuenicum. Quare declarabat se non esse uerum illum pontificem summum, sed eius modò typum. Paulus enim, Nostro Pontifici, inquit, non est necesse, quemadmodum illis pontificibus, prius pro proprijs peccatis uictimas offerre, deinde pro peccatis populi. Nam id fecit semel cum semetipsum obtulit. Postea fortiebatur Aaron ad ostium tentorii inter duos hircos, uter mactaretur uel dimitteretur in desertum. Hirci duo significant Christum Dominum, uerum Deum & hominem in diuersis, sed non separatis consistentem naturis. Mactatur & moritur secundum id quod mori potuit: non mactatur nec moritur secundum diuinitatem. Vnus tamen & idem indiuisus Christus redemptor est mundi, & perficit redemptionem. Sic & uterque hircus mysterio adhibebatur. Et quoniam Dominus temperat sortes, teste Solomone, non sine uoluntate patris sacrificatus est filius. Iam uerò Pontifex primùm quidem iuuenici sanguinem, deinde & hirci mactati cruorem, & cum his thuribulum accipiebat & intra uelum ingrediebatur, ubi thymíama coram propitiatorio excitabat nubes instar, sed & sanguinem aduersus propitiatorium digito aspergebat septies. Quæ Apostolus Paulus exponens in 9. cap. ad Heb. dicit Christum non cum iuuenici aut hirci, sed proprio cum sanguine, non in tabernaculum manu factū, sed in ipsum cœlum esse ingressum, reperta expiatione & remissione peccatorum perpetua. Ipse enim est propitiatio nostra, non pro peccatis nostris tantum, sed etiam pro peccatis totius mundi. Huc spectarunt scilicet Apostoli, quoties appellarunt Christum propitiationem, sicuti S. Paulus ad Romanos 3. & S. Ioannes, 1. Ioan. cap. 2. & 4. Significat autem septenarius asperisionis numerus, purgationis plenitudinem & perfectionem. At necesse est interim ut aspergatur nobis digito, non hominis, sed Christi summi nostri pontificis. Cuius digitus est spiritus sanctus, per quem applicatur & confertur nobis purgatio. Accedit præterea thymíama uel incensum aromaticum contusum. Cum lachrymis

Heb. 9.

enim, teste Apostolo, preces pro nobis obtulit Pontifex Christus, & exauditus est pro reuerentia. Vnde fumus nubes, id est, ingens fumus, significauit maximam precum efficaciam.

Illis peractis egrediebatur rursus in sanctum Pontifex, collocans sanguinem super altare thymiamatis aureum. Nam oportet in redemptione nostra coniuncta sint cruor innoxius & oratio ardentissima pro nobis. Inde porro egrediebatur ad altare holocaustorum, quod stabat in atrio, ac alterum hircorum tradebat uiro tempestiuo abducendum in desertum, non sine singulari ritu aut ceremonia. Pontifex enim hirco imponebat manum utranque, confitebaturque peccata populi, qui nimirum & ipse confitebatur iniquitates, præeunte formula certa pontifice: simul autem omnibus peccatis in caput hirci coniectis, ablegabatur hic, ut eo modo peccata totius ecclesie deferret in desertum. Hinc mutuati sunt sine dubio Gentiles sua illa, quæ uocarunt, καθάρματα siue piamina. Fuit enim mos ethnicis ut in maximis discriminibus, unus aliquis sese deuoueret pro omnibus, quem acceptum uel macrabant cremabantque in ara, uel proiciebant in aquam, precantes ut simul omnia secum auferret mala, ac dei unius capite placati, rursus benefacerent. Sed aberrarunt toto cælo miseri. Christus enim Dei filius factus est pro nobis peccatorum, id est, sacrificium pro peccato, factus est pro nobis execratio, ut benedictionem ab ipso acciperemus. Huc scilicet spectauit Isaïas, cum dixit, Nos omnes tanquam ouis errauimus, quisque in uiam suam respexit, Dominus autem effecit in illum incurrere omnium nostrum iniquitatem. Item, Ipse uulneratus est propter iniquitates nostras, attritus est propter scelera nostra. Et iterum, Verè languores nostros ipse tulit, & dolores nostros ipse portauit. Portat autem hircus peccatum in desertum, non ut non sit, sed ne imputetur. Nam in ecclesia est quidem in sanctis peccatum, sed non imputatur eis. Extra ecclesiam, in deserto, omnibus imputatur. Et Vir ille tempestiuus alius esse non potest, quàm ipse Christus, qui ubique in diebus carnis suæ tempus & occasionem iustam obseruauit, subinde repetens horam suam nondum uenisse, & cum tempestiuum esset mori, aiebat modò adesse horam suam. Moriendo autem abduxit hircum adeoque peccatum totius mundi.

His ad eum modum absolutis, abluitur iterum Pontifex, & exutis uestibus uulgaribus, pontificijs induitur. Cæterum ablutio illa uaria & multiplex in hoc sacro ritu adumbrat plenissimam peccatorum remissionem; sicut & mutatio uestis glorificationem: id quod clarius uidere licet apud Zachariam in cap. 3. Glorificatus autem Christus cælos ingressus est, ut ibi semper appareat pro nobis in conspectu Dei, unica & in æternum efficax hostia. Ergo sacrificat Aarō arietem in holocaustum. Christus enim est uictima æternum durans & purgans. Misit præterea Aaron iuuenicum & hircum alterum in locum sacrum extra castra, ut ibi prorsus comburerentur. Id quod Paulus exponens, Animalium, inquit, quorum sanguis inferitur pro peccato in sancta per Pontificem, horum corpora cremantur extra castra: quapropter & Iesus ut sanctificaret per proprium sanguinem populum, extra portam passus est, Hebr. 13.

Et quamuis in his quæ adduximus hucusque, sparsim finem & fructum huius ceremonie indicauimus, non pigebit tamen hic eundem singulariter commemorare: quando uideo spiritum sanctum in scriptura illum inculcare tanta fide & diligentia. Finis omnium est, quod peccata omnia, omnia inquā, totius ecclesie Dei unica hostia, semel duntaxat oblata, è medio, perfectissime, sunt sublata & purgata. Audiamus ergo ipsa spiritus sancti in scriptura loquentis uerba, eaque euidentissima & apertissima. 1. Et confitebitur Pontifex super hircum cunctas iniquitates filiorum

filiorum Israel, & omnes transgressiones eorum, omniaque peccata eorum. 2. Et feret hircus ille super se omnes iniquitates illorum in terram desertam. 3. Eodē die expiabitur pro uobis, ut mundi fiatis, & mundi sitis ab omnibus peccatis uestris coram Domino. 4. Sitque uobis hoc statutum perpetuum, ut expiet filios Israel ab omni peccato eorum semel in anno. At quis adeo stupidus & plumbeus est, ut credat animantium sanguine abluta esse omnia populi peccata? Si, inquit, Apostolus, semel expiassent peccata plenē, desinissent utique offerri. His ergo Christi uenturi mysterium omnibus inculcatum, & omnium oculis semel in anno est propositum. Ex hac enim ceremonia mutuatus est Zacharias suum de Christo uaticiniū in cap. 3. sic propositum, En ego adduco seruum meum germen. En lapis quem posui ante Iosue, super lapidem unum sunt septem oculi: en ego sculpam sculpturā eius, ait Dominus exercituum: & auferam iniquitatem terræ huius uno die. Promittit Dominus Messiam, quem præfigurarunt sacerdotes, in primis autem summus sacerdos Iosue. Christus est lapis, in quem omnium oculi ut in unicum saluatorem sunt intenti. Foditur & scalpitur is in passione, & patiēdo atque moriēdo semel, omnia peccata expiat totius terræ. Ex hac ceremonia & hoc scripturæ loco mutuauit S. Christi Apostolus Paulus in Epist. ad Hebr. totam ferē disputationem suam de sacrificio Christi semel duntaxat pro peccatis totius mundi oblato: in qua toties ex lege, suum illud Semel inculcat.

Porro alios constituere sacerdotes, aliud tempus, & aliam rationem sacrificandi pro peccatis, est calcare diuinam & clarissimā hanc ueritatē. Est autem hæc doctrina de unica Christi hostia, uera, & antiqua, & orthodoxa, et irrefragabilis perpetuaque doctrina: per quam saluantur quotquot saluantur, & saluati sunt per eandem quotquot saluati sunt ab ipso mundi exordio. Huius doctrinæ hostes appellauit legis peritissimus Christi & gentiū Apostolus Paulus stultos, imperitos, amētes, insanos, instabiles, leues & cuius expositos uento, impios, apostatas, qui defecerunt à Christo, pseudologos, pseudoprophetas, pseudapostolos, seductores, conscissores, canes, incantatores, ueneficos, & anathemate implicitos, execrabiles & maledictos. Proinde si angelus ē cœlis aliud nos docuerit, sit nobis anathema.

*Unica Christi
hostia sufficit
uniuerso mun-*
do.

Id tamen minimē prætereundum, ab hominibus in anniuersaria illa expiatione requiri primū quidem peccatorum confessionem: deinde afflictionem animarum, dolorem inquam serium, ex agnitione peccati conceptum: & postremo sabbatum, non utique otium ignauum à studijs honestis, sed quietem in fide Christi, & cessationem à sceleribus. Qui ita sese parat in festo propitiationis, nimirum in tempore prædicationis gratiæ Dei, per Christum, proculdubio purgatur plenē per hanc uictimam unicam Christi. De qua paulo fusius non sine ratione disserui hucusque. Nam unus hic locus & multos alios scripturæ locos mirifice illustrat, & mysterium redemptionis Christi & redemptoris, ita clarē, ut uix alius, exponit, exornat atque cōmendat: præterea docet nos intelligere Christi Domini in Euangelio Ioannis uerba, dicentis, Est qui accusat uos Moses, in quo uos speratis. Si enim credidissetis Moysi, credidissetis utique mihi. De me enim ille scripsit.

Porro propitiatorio sacrificio & alijs piacularibus meritò annumeramus & sacrificium Vaccæ rufæ, adeoque ipsam lustrationem siue aquam lustralem, institutam contra omnis generis pollutiones. Erant enim pollutionis uariæ species. De quibus in lege differitur copiosē, ipsdemque exhibetur nobis typus impuræ nostræ naturæ, & peccatorum nostrorum. Describitur autem in lege Numeri 19. primū ceremonia ipsa siue ritus sacer, ostenditurque quomodo paranda sit aqua lustralis contra omnes pollutiones. Deinde eiusdem usus atque effectus subiicitur. Adduce-

*Sacrificium
Vaccæ rufæ.*

batur ad sacerdotem Eleazarum uacca rufa, eaq; sine macula, & quæ iugum nunquam subierat, ea protinus educebatur extra castra & mactabatur. Partem sanguinis excipiebat sacerdos, ac digito suo septies aspergebat contra tentorium constitutionis. Sed uaccam ipsam totam, ita ut nihil fieret ex ea reliqui, combussit igne, in quem etiam iniecit lignum cedrinum, hyssopum & coccum. Hic se eluebat sacerdos aqua, succedebat uir mundus, qui cinerem colligens, deposuit in locum sanctum. Ergo quoties usus postularet, ponebantur cineres in uas testaceum, affundebatur aqua uiua, & ita parabatur aqua lustralis, quam pollutis aspergebant aspergillo hyssopino. Hæc erat lustrationis ceremonia, & hic finis & usus ceremoniæ.

*Lustrationis
mysterium.*

Porro euidentissimum hæc Christi typum nobis exhibere, testis est Apostolus, qui ad Hebr. 9. cap. dixit, Si cinis iuuentæ aspersus eos qui communicant, sanctificat ad carnis puritatem, quanto magis sanguis Christi? Ergo & sacerdos & uacca typum prætulere Christi. Sexus, infirmitatem denotat naturæ humanæ: rufus color admonet sanguinis Domini, per quem abluti sumus. Nulla uerò macula reperta est in Christo: quippe qui erat sanctus sanctorum, immunis prorsus ab omni peccato. Nec ulla fuit adactus necessitate ad mortem. Nam sua sponte sese obtulit. Et obtulit quidem extra castra siue mœnia in monte Caluariæ. Id quod & Paulus attigit ad Hebr. cap. 13. Totus autem Christus Deus & homo, corpore & anima oblati est. Cuius sanguis fit nobis salutaris, si spiritu sancto aspergatur animis nostris. Simul autem & fideles cum Christo mori oportet, humiliari, ardere amore diuino & extolli: ergo in eundem ignem iniiciebantur cedrinum lignum, hyssopus, & coccum. Iam & Cineres ex sacrificio confecti colliguntur ad purificationem seu emundationem. Cineres autem aliud non sunt quam effectus mortis & sacrificij Christi, ipsa inquam purificatio siue peccatorum remissio. Ideo enim ex morientis & iam extincti Christi latere aperto, ebulliens effundebatur larga aqua & sanguinis copia, ut disceremus ex morte Christi emanare nobis purgationem & uitam. Nam in sanguine uita est, in aqua expurgatio. Cæterum cineres colligebat homo mundus, qui tamen immundus manebat ad uesperam usq;. Aqua deniq; pollutis ad sanctificationem aspergebatur aspergillo hyssopino. Quid quod in loco sancto hæc erat collocata? Nam canibus & porcis margaritæ & sanctum minime est obijciendum. Requirit item Dominus prædicatores, qui effectum passionis Christi doceant, & Euangelij (coram mundo) contempta humiliq; prædicatione redemptionem & sanctificationem in morte & sanguine Christi annuncient: requirit, inquam, doctores sanctos & fideles sanguineq; Christi mundatos. Illi interim cum tota ecclesia ad finem usq; uitæ orant, Remitte nobis debita nostra. Nam & Dominus dixit, Qui lotus est, mundus est, nec opus habet, nisi ut pedes lauet. Huc pertinet & frequens in hac ceremonia ablutio, significans & gratia Dei omnia peccata purgari, & sanctos perpetuò inuigilare sancta cura contra peccata, eaq; non alia quam gratiæ Christi aqua abluere. Diligentissimè autem in lege inculcatur, impuros manere omnes quotquot coinquinati hac aqua lustrali non repurgantur. Dixit enim Dominus Petro, Nisi ego te lauero, non habebis partem mecum. Non omnia & singula huius ceremoniæ, sed potissima sic uolui perstringere. Pergo ergo iam ad alia.

*Sacrificia pro
corporeis con-
taminationi-
bus.*

His piacularibus adiungi possunt Sacrificia, quibus corporeæ contaminationes, peccatorum uarias coinquinationes præfigurantes, purificabantur uel expiabantur, quales erant pollutiones seminis, esus & tactus immundorum, item lepræ, & puerperæ. De quibus fusè agitur à Mose à 12. cap. Leuit. usque ad cap. 16. Neque aliud istis omnibus ecclesiæ Dei propositum est, quam nostra corruptio natua & per-

& perditissima, gratuitaque per gratiam Dei in sanguine Christi purgatio. Hic commemorare & recensere possumus etiam zelotypiae sacrificium. De quo qui copiose loqui uideret cupit, legat 5. cap. lib. Numerorum. Quamuis is ritus magis uideatur pertinere ad iudicialia.

*Sacrificium ze-
lotypiae.*

Quartum sacrificiorum genus erat sacrificium Eucharistiae, gratiarum actionis, uel gratulatorium, quod appellant Schelamim uel Schlomim, sacrificium, inquam, pacificorum uel salutis. Offerebatur enim gratitudinis ergo, nimirum pro salute indepta, & propter felicitatem & integritatem, accepto, inquam, beneficio, uel malo aut infortunio depulso. In hoc adhibebatur uel armentale uel gregale pecus: aues non offerebantur. Peragebatur enim iuuenco & bucula, agna & agnos, capro & capra. Macrabatur ante atrium. Tergus aut pellis obueniebat sacerdoti. Sanguis spargebatur iuxta altare. Renes, reticulum epatis, agni cauda & omnis adeps comburebantur in ara holocaustorum. Armus dexter sursum eleuabatur, pectus agitabatur in cardines mundi. (Nam Thruma & Thnupha, hoc est, leuatio & motio siue agitatio, non fuerunt genera aut species sacrificiorum, sed tantum ritus quibus utebantur sacerdotes in oblationibus seu sacrificiis peragendis. Eleuatione significabatur Christus exaltandus, & quod exaltatus omnes ad se trahe-
ret. Motione in omnes mundi cardines adumbrabatur praedicatio Christi spargenda in totum orbem terrarum) utrunque cedebat sacerdoti, similiter maxilla & uenter. Reliquae carnes redibant ad offerentem, qui eas epulo sacro absumebat. Reliqua huius generis quae pertinent ad ritum huius sacrificii require ex 3. cap. Leuitici. Si enim Thoda, confessio, laus & protestatio esset, addebatur & mola similis imbuta oleo, uel coctae crustae, uel lagana. E quibus pars sursum eleuabatur & cedebat sacerdoti: reliquum redibat ad offerentem, sicut & panis fermentatus concedebatur in epulo manducandus.

*Sacrificium
Eucharisticum.*

*Thruma &
Thnupha.*

Ceterum praedicabatur & in hoc sacrificii genere Christus cum effectu & uirtute mortis suae: ostendebatur item tota ratio agendi gratias Deo pro beneficiis. Varia sunt beneficiorum genera. Si aliquid beneficii esset collatum: si ablatum malum, si quis reualuisset ex morbo, aut aliquod effugisset infortunium, offerebat Domino. Sunt beneficia uetera Dei, uidelicet quod mundum condidit, & omnia quae sunt in mundo: quodque per Christum fideles redemit. Sunt quotidiana: denique omnia plena sunt Dei beneficiis. Pro his omnibus Deo tantum, non creaturis, est offerendum: offerendum autem ex toto corde: omnes affectus Deo consecrandi sunt. Deo enim separabantur partes animalium, in quibus maxime perspiciuntur uires animae. In renibus uis est generandi, in sanguine spiritus uitalis, in epate fons sanguinis, &c. Porro agenda gratiae per sacrificium, id est, per Christum. Seruamus enim propter Christum: & omnia bona conferuntur nobis à Deo, non propter nos, non propter ulla creaturas, sed propter Christum. Concedebatur offerentibus epulum sobrium ac laetum: quia non ingratis conduplicatur fere felicitas. Est & Christi cognitio epulum splendidissimum & conuiuium iuge.

Cum Eucharisticis congruunt maxima ex parte Spontanea & Votiuia. Spontanea oblatio ea erat, quae nulla necessitate cogente aut lege requirente, sed ex mera proficiscebatur beneuolentia & animi deuotione. Veluti cum seruus non debet quod debet Domino praestat, sed munus quod non debet donat, ad declarandam animi sui erga Dominum beneuolentiam. In hoc autem differunt ab Eucharisticis spontanea, quod in illis mandatur ne quid postera die, quod prima quaque non absumptum sit epulo, edatur, sed igni crementur reliquiae: in spontaneis licebat reliquias & postea edere. Tertia demum die iuebantur exurere. Votiuia uero

Spontanea sacrificia.

Sacrificia uotiuia.

sacrificia erant quæ ex pacto offerebantur : ueluti si quis fuisset in periculo, uouisset autem Deo sacrificium si liberetur : quod ergo liberatus offerebat Deo, uotiuum erat sacrificium. Congruebant hæc ritu cum Eucharisticis. Plura de illis traduntur Leuitici cap. 7. Significabatur & his sacrificijs propter Christum omnia nobis cœlitus concedi ac præstari beneficia, atque adeo ipsam quoque beneuolentiam seruendi Deo. Hæc hætenus de sacrificijs populi Dei attuli, non singula tractans, sed potissima ferè. Proponebatur istis ceu in actione uiua Christus Dominus, & passio eius, passionisque meritum efficacissimum : ita ut possimus sacrificiorum sacras actiones appellare conciones de passione Christi, & catecheses redemptionis nostræ de Christo.

De uotis.

Quoniam uerò dictum est de sacrificijs uotiuis, consequenter aliquid subiungendum erit in transcurso & de Votis. Pertinent enim & hæc ad ceremonias ludæicas. De Votis autem nuncupandis, persoluendis ac redimendis multus est in lege Dei sermo, præsertim Leuit. 27. cap. Est autem uouere, aliquid sanctè Deo pro salute uel propria uel alterius promittere. Erat itaque uotum actio quæ tantum referebatur ad Deum, nec in alia quam re sancta atque legitima. Fuit autem in Votis diuersitas. Nam res uotiuæ fuerunt distinctæ quatuor generibus. Vouebant enim aliquando ipsos homines, aliquando animantia, aliquando domos, aliquando autem agros & alias res inanimes. Homines rursus distinguebantur per ætates, ac iuxta has permittebatur redemptio. In mundis animantibus nulla adittebatur redemptio. Porro liberum erat domos uel relinquere usibus sacris, uel pro æstimatione sacerdotis æqua redimere. In agris permittebatur aliquando redemptio, aliquando non permittebatur. Iam etiam in Num. cap. 30. diligenter præcipitur de personis uouentibus, & quando rata, quando irrita æstimari conueniat uota. Vbi diligenter inculcatur, Deo facta uota legitime minimè rescindenda, sed maxime seruanda esse uel præstanda. Temeraria uel illegitima uota nunquam approbavit aut recepit Dominus. De legitimis & uni Deo nuncupatis loquens uares diuinus dixit, Vouete & reddite. Non legimus quenquam sanctorum ulla diuis uel ulli creaturæ uota nuncupasse, nec illud uouisse quod non erat in potestate uouentis, aut pugnabat cum uoluntate Dei, cui nuncupabatur uotum, aut coniunctum esset cum iniuria proximi, aut non haberet luculentam aliquam utilitatem. Et certe non alia de causa populo Israelis permissa sunt uota huiusmodi ad tempus usque correctionis, quam ut in cultu unius ueri Dei persisterent, & ne unquam ulli Deo uota sua nuncuparent.

Disciplina Nazaræorum.

Ad Votorum considerationem pertinet institutio uel disciplina Nazaræorum. De qua dicuntur multa Num. cap. 6. Nazaræi erant, qui ut liberius uacarent rebus diuinis, uel quod hætenus uixissent paulò indulgentius, iam ut cæteris essent exemplum uirtutis, sua sponte suoque arbitrio seuerius uiuendi genus, disciplinæ loco, in se suscipiebant. Vnde sunt qui existiment Nazaræos dictos à separatione, quod Nazir Hebræis significet separationem, & Nazaræi à cōmuni aliorum hominum uiuendi ratione se subducentes, peculiari cuidam uiuendi generi propter Deum se dediderunt. Durauit ea disciplina in Nazaræis aliquando per totam uitam, ut in Samfone & Samuele. Sed & studiosi diuinarum literarum à prophetis Amoz & Ieremia propter temperantissimam (quæ à studiosis requiritur) uitam, & quod diuino mancipati essent ministerio, Nazaræi appellati sunt. Aliquando per certum tempus durauit disciplina illa, ad menses uel dies aliquot. Abstinebāt autem iuxta legem à quibusdam, à quibus nulla lege alioqui arcebantur, nec in alijs hominibus uoto solutis aut liberis erant illicita aut damnata. Principiò abstinebant

nebant à uino & ab omnibus quæ proferebat uitis, & quæ inebriabant. Atqui clarum est, ut uinum bonam esse Dei creaturam, sic nullum potum prohiberi lege. Quia tamen Nazaræi domino erant consecrati, uel sanctificati peculiari quodam uiuendi genere, & uinum gradum præstruit ad ebrietatem, quæ omnium flagitiorum colluuius est, meritò Nazaræi à uino sibi temperabant. Simul autem & otium, matrem uitiorum cauerunt, & omnem uoluptatem calcarunt. Deinde toto uoti tempore nutrierunt comam. Ex qua re quidam deriuarunt uocabuli originem. Quia enim Nazer significat comam, Nazareum appellatum existimant, quasi tu dicas comatum. Cæterum Apostolus Paulus non aliam ob causam iubet mulierem tecto uel obuelato capite orare, aut concionem sacram audire in cœtu Ecclesiastico, quàm quòd non sit sui iuris, sed alienæ subdita potestati, nempe uiri. Poinde comam nutriebant Nazaræi, quòd iam propter uotum Deo nuncupatū, non amplius suæ essent potestatis, sed toti concessissent in ius Dei. Et caput quidē corporis humani arx & præstantissima corporis pars, cæsarie ueluti obuelata significabat totum hominem Deo esse deuotum siue consecratum, ad quē unice spectare, & à quo uno pēdere debeat. Requirebatur præterea ne se coinquinaret consortio & contagio sceleratorum impiorumq; hominum. Quo & illud pertinet quòd Nazaræus prohibetur interesse funeri parentum, liberorum, uxoris & fratrum, atq; sororum. Vnicē enim oculos animi in deum cōjicere debet, & præ hoc fastidire uel charissima & pretiosissima. Si uerò uel de improviso contaminatus fuisset super mortuo, non reputabatur ei amplius ista uita ad uoti exolutionem. Nam 7. die iuebatur se sanctificare, deinde uerò uotum repetere. Ex istis omnibus colliquescit quale ac quantum fuerit peccatum Samsonis, qui erat Nazaræus domini. Quia enim non tantum in ganea apud scortum delitescibat, sed in scorto prodebat secretū Dei, pactumq; cum Deo initum & coma nutrita testificatum proculcabat, deseruit ipsum dominus, ac recessit ab eo miraculosum illud robur cœlitus concessum. Fortitudo enim Samsonis nō fuit in cæsarie, ut hac abrafa, simul rafa ceciderit, sed in spiritu diuino, qui ei à Deo dabatur. Ideo enim toties repetitur in historia, Et factus est spiritus domini super Samsonem. Proinde recedente spiritu Dei, recessit robur; recessit autem, cum scorto prorsus agglutinator unus cum eo spiritus esset factus, & scorto iam Deum & institutū Dei post haberet, adeo ut sineret sibi detonderi sacram comam, ac prorsus recederet ab institutis Dei. Ita enim & spiritus Dei recessit ab eo. Vnde mox redactus est in potestatem Palæstinorum: in qua cum diuexaretur miserè, & propter ipsum, nomē Dei malè audiret blasphemareturq;, pœnitentiā egit, nomen domini inuocauit, unde fruticantibus capillis, rediit robur, id est, rediit spiritus domini, non adductus capillorum fruticatione, sed pœnitētia & inuocatione diuini nominis. Nec Samson tantopere cupiebat priuatam ulcisci iniuriā, quàm blasphemos coërcere, populumq; dei (ad quos uocatus fuerat) liberare asserereq;. Rediit ergo diuina uirtus, ex qua collisis theatri columnis, ruina palatii oppressus, moriendo plures interfecit, quàm confecerat uiuus. Sed redimus iam ad institutum nostrum, ut subiungamus & alia quæ pertinent ad plenam expositionem uoti Nazaræorum. Finito ergo tempore quod in se susceperat Nazaræus, ueniebat ad tabernaculū domini, offerens quæ in lege præscribuntur sacrificia: quibus se peccatorem esse testabatur, omneq; bonum, id est, si quid uirtutis in ipso repertum esset, id inquam omne sibi cœlitus collatum fatebatur. Ergo & cæsariem detondebat, quam & protinus iniiciebat in craticulam, in qua cremabantur gratulatoria. Post quæ ad eum modum perfecta, liberum erat Nazaræo iam uelut exauthorato redire ad uitam

Samson Nazaræus domini
peccat graui-
ter.

pristinam. Hæc hætenus de instituto Nazaræorum.

De mundis & immundis.

Quare Deus prohibuerit esum quorundam animalium.

Constantia sanctorum abstinentiæ ab immundis.

Porro de mundis & immundis multus est in lege sermo: nos in superiore tractatione quædam perfunctoriè attigimus: sub calcem tamen (his enim finem imponam dissertationi de legibus Ceremonialibus) de delectu ciborum, de cibis inquam mundis & immundis nonnihil adijciemus. Ab initio quidem condidit omnia Deus, & ita condidit, ut quemadmodum conditor bonus est, ita res conditæ omnes uel hodie sint ualde bonæ: neque sibiipsi nunc contradicit cum cibos quosdam prohibet, quasi per se aliquid immundum sit. Alia sub hac doctrina recondita latent mysteria. Minutæ & leues uidentur leges, latæ de cibo siue uictu, sed uoluit re minuta in speciem admonere dominus & in minimis respiciendam esse diuinam authoritatē. Legis enim authoritas ex Deo pender: ipse est legislator, lex ipsa Dei inuentū est. Coërcent hæc audaciam humanam, quæ subinde leges figit ac refigit nouasque in diem comminiscitur. Proinde commendauit huiusmodi legibus Deus obedientiam fidelem suo populo: sicuti ab initio quoque Adamo præcipiens ne gustaret de arbore scientiæ boni & mali, fidelem ab eo requirebat obedientiam. Certè obedientia & fides quæ erat in Machabæis, in Eleazaro & in pijs aliquot uiris Antiocho regi resistentibus, usque ad sanguinem & mortem acerbissimam, Deo placuit. Plures alij à porcilla carne abstinerunt, unde tamen nihil laudis uel gloriæ sunt consequuti. Cum uerbum Dei dicit rem aliquam esse sanctam, sancta est, idque propter iubentem qui sanctus est. Cum Deus dicit aliquid esse impurum, impurum est, adeo ut edere aliquid contra uerbum Dei sit seipsum polluere. Vos iam mundi estis, ait dominus in euangelio, propter sermonem quem dixi uobis. Necessè est ergo ut uerbo Dei credamus, & præcedat obedientia fidei, inde uerò opus aut factum quod ex fide existit, quale fuit Eleazari porcillam carnem gustare nolentis, non potest non probari Deo, apud quem quicquid non est ex fide peccatum est. Præterea habuit dominus in quibusdam hisce suis legibus, de non edendis animalium quorundam carnibus, sanitatis humani corporis rationem. Quædam enim quæ hic è cibo hominum remouentur, & à medicis ueluti parum salutaria condemnantur. Vnde & illud syllogismo quodam colligunt sancti, Si corporis sanitas Deo curæ est, certè animarum salus ab eodem longè diligentius procuratur. Quid quod gentes multæ à quorundam animalium & esu & contactu sibi temperarunt? Ergo ne populus Israelis, satis alioqui superstitiosus & curiosus, hic aliquid sibi permetteret, proprioque tentaret arbitrio, leges de his mysticas dedit, quibus & ab humanis retraxit inuentis, & ab alijs secreuit gentibus: dicente Mose in Deut. 14. cap. Populus es sanctus domino deo tuo, & te elegit dominus Deus tuus, ut sis tu ei populus peculiaris de cunctis gentibus super faciem terræ. Certè S. Petro obijcitur in Actis uisum quo per immunda animalia gentes representantur. Deinde uoluit Deus respici naturam & ingenium animalium quorum esum prohibet. In mensa enim per symbola descripsit philosophiam cœlestem, super peditans in ipsa mensa occasionem cogitandi & loquendi de sanctimoniam uera animi, ne simus obscœni, impudētes, fœdi & impuri. Ideoque subinde repetitur hæc clausula, Ego dominus Deus uester sanctus sum. Quasi dicat, Huc pertinent illa omnia, ut studeatis sanctimoniam. Docuit ergo in illis symbolis quid sequantur pii, quidue fugiant.

Ponit autem primò in lege de immundis & mundis animalibus generalia quædam, deinde per species & per catalogum quendam prosequitur singula ordine maximè naturali. Locus est copiosè expositus Leuit. 11. cap. & Deut. 14. cap. Conceduntur in usum quæ ungulam findunt & ruminant. Vbi protinus duo ponuntur, in

tur, in quibus boni uiri officium comprehenditur. Si enim uolumus munda esse animalia, & diuidere ungulā, & ruminare oportet. Pes animi affectus est, qui minime sequendus est, discretio habenda in rebus, & quemadmodum in fissura sunt partes duæ dextra & sinistra, ita uir bonus bonum eligit, fugit contrarium. Ruminationio iudicium est. Nō enim quælibet admittenda sunt quæ uidemus & audimus, sed ea duntaxat quæ diligentī examine expendimus, deprehendimusq; Deo & legi eius non aduersari. Subiunguntur deinde animalia multa catalogo certo per species, quibus illicitum erat uesci populo domini. Hæc erant uel quadrupedia terrestria, uel aquatilia, uel uolucris, uel reptilia. Quadrupedia animantia quatuor nominatim prohibentur, Camelus qui est elata ceruice, docens superbiam ac arrogantiam modis omnibus fugiendā: Cuniculus item uel mus montanus. Nam improbantur Deo homines terrenis prorsus immergi. Lepus animal timidum, ignauum pauorem depellendum monet: sicut & Poreus immunditiem omnem. Nam typus & symbolum impuritatis est porcus, qui & Prouerbij locum dedit. Et de Circe dicitur, quod suis incantationibus Vlyssis socios cōuerterit in porcos. Porro aquatilia conceduntur in cibum, quæ squamas & pinnas habent: si altero carent, uetita erant, ut anguilla, quæ etsi pinnas habeat, squamis tamen caret. Vt enim corpora piscium reguntur pinnis: sic spe firma oportet regi totum hominem. Squamæ duræ sunt, ac contegunt corpora: nisi uerò constantes ac patientes simus in opere domini, meritò abominatur nos dominus. Ex uolucris prohibentur maximè rapaces aues, uoraces, rebus impuris uiscitantes & gaudentes, crepusculares, noctuanæ, lucifugæ, & subdolæ, instabiles, & parū alacres. Commendatur ergo nobis beneficentia, abstinentia, temperantia, deniq; simplicitas, lux, constantia, alacritas, integritas & puritas uitæ. Iam ex reptilibus quoq; non pauca notantur. Nam displicent Deo homines in lutum immergi prorsus. Nolui singula uetitorum animantium uocabula recensere, cum quod id fuisset molestum satis, tum quod mirè in his interpretandis laborant ac uariant expositores sacri codicis: ut hic non satis admirari possim extremè cæcam Iudaici populi pertinaciam in delictu ciborum mordicus conseruando, cum ipsorum Rabbini hic se non satis explicent, nec disertè & certò dicere possint quanam sint illa animalia quæ prohibuit dominus.

Huc pertinet, quod ante legē, temporibus Noe, Deus sanguinis, & carnis cum sanguine siue morticini lacerati à feris, aut suffocati esum prohibuit. Ante diluuiū oleribus fructibusq; terræ uescebantur patres, à diluuiō concessit eis & animalium esum, sed iugulare illa, sanguinemq; elicere uel fundere iussit. Extat locus Gen. cap. 9. Porro in lege magna cum seueritate dicit dominus, Quicumq; de domo Israel aut ex incolis qui inter uos habitant ullum sanguinem comederit, ponam faciem meam contra animam talem, & excindā eam de mediō populi sui. Leuit. 17. Ac repetitur eadē lex Leuit. 19. & Deut. 12. & 15. Iteratur subinde Leuit. 3. & 7. cap. Nec caret iustis & maximis causis, quod sanguinis esum tanta seueritate prohibuit. Principiō enim post recitata uerba, mox subiungit, Nam anima carnis est in sanguine: & ego dedi illum uobis super altare, ad expiandum animas uestras. Sanguis enim animam expiabit. Et ob id dixi filijs Israel, Nulla anima ex uobis sanguinem edat, &c. En ratio in his redditur luculentissima cur non liceat uesci sanguine, quia præstantissima res sanguis, utpote sanctificationi hominum destinatus. Dedit enim sanguinem Deus uelut pretium quo expient peccata, pretium inquam redemptionis, quo absoluantur à peccato. Præterea sanguis est anima, id est, alimentum uitæ. Sanguis ergo sanguinem Christi in cruce fundendum

Prohibetur es
sus sanguinis es
suffocati.

significauit, per quem ut propitiationem plenissimam expiati ac sanctificati sunt credentes: & in quo est alimentum animæ ad uitam æternam, & quemadmodum non licebat uesci de carne sacrificiorum, quorum sanguis pro peccato inferebatur in sancta, sed extra castra cremabantur: ita nephas erat uesci sanguine, utpote expiatione pro peccato. Edebat ergo sanguinem, qui expiationem sanguine Christi perfectam suis attribuebat uiribus aut operibus, uel tanquam prophanū æstimabat, non plenam ei tribuens satisfactionem omnium peccatorum. Non edebat sanguinem, sed effundebat ad aram, qui beneficium redemptionis unico Christi ascribebat merito, & tantū æstimabat quanti meritū æstimari debet. Deinde uoluit Deus animis hominum altissimè impressum, ne quis hominis effunderet sanguinem, aut ex hominis sanguine & uisceribus uiueret: quod faciunt milites mercenarij & impij, auari, usurarij, & impostores, artibus malis, ui atq; iniuria effundentes uel deglutientes miserorum cruorem. Horrorem autem minis & rationibus grauissimis, cum Noe colloquens, omnibus incussit, ac dixit, Ego, si cessent homines, sanguinis effusionem ultione persequar. Cōditus est enim homo ad imaginem & similitudinem Dei: unde non potest nō Deus in se recipere contumeliā, quæ illata est eius imaginī. Qui enim regis deijcit imaginem, in ipsum peccat regem, & accusatur criminis læsæ maiestatis. Porro de suffocato hæc lata est lex, Ne ederis cum sanguine. Item, Ne ederis de cadauere uel morticino, aut discepto a feris, &c. Cæterum suffocato & morticinis significata sunt opera mortuaria, a quibus se expurgare iubetur per diuinam gratiam quicumq; cupit placere Deo. Suffocatis ergo uescebatur, quicumq; uiuebat in sceleribus sine pœnitentia, neq; Christi sanguinem magnopere curabat.

Tactus immundorum.

Iam & Tactus tribus circumscribitur notis in lege, nempe si attingas rem immundam, aut gestes, aut ea tibi cadat in uas aliquod aut in uestimentū. Casu certè contaminatur, quisquis peccat per imprudentiam. Grauius peccat, quisquis sciēs & uolens aut dedita opera præuaricatur. Grauiissimè uerò delinquit, qui defendit scelera, & alios in ipsa impellit. Quòd autem in attactu & in alijs locis dicitur immunditia duratura ad uesperam, apertissima textitur de Christo prophetia, nempe uenturum sub uesperam, id est, in fine seculi Messiam, qui expiet peccata totius mundi. Satis superq; satis uideor hætenus per duos Sermones, utinam multo cum fructu C. V. immoratus esse legibus Ceremonialibus, ergo ut his tandē omnibus finem imponam, in summam summa redigam capita de quibus dixi. Partitus sum uniuersam disputationem in tria capita. Dixi enim de Personis sacris, de loco temporeq; sacro, & de ipsa re sacra, quam exercuerunt personæ in loco sacro, de ipsis inquam sacramentis, sacrificijs, & alijs nonnullis huius generis. Personæ sacre sacerdotes sunt. Ostendimus horum originem primam, ordinationem, uerū situm mysticum, & officium uarium. De loco & tempore sacro differentes descripsimus Tabernaculum, ubi etiam annotauimus quid fuerit in tabernaculo, nimirum Arca fœderis, Mensa aurea, Candelabrum aureum, Ara thymiamatis & holocaustorum, & Labrum æneum: quorum mysteria quoq; perstrinximus. In tractatione temporis sacri attigimus omnis generis ferias uel festa solennia, statuta & conceptiua. Postremò autem cum exponeremus res sacras & cultum sacrum, disceptauimus de sacramentis ueteris Ecclesiæ duobus, Circūcisione & Pascha; item de Sacrificijs, quorum alia fuerunt holocausta, alia cibaria, alia peculiaria, alia item gratulatoria seu eucharistica, ubi dictum est nonnihil de Spontaneis & uotiuis, denique de Votis, de disciplina uel instituto Nazaræorū, de mundis & immundis, de delectu ciborum, de sanguine & suffocato, & de tactu immundorum. Dominus

minus Iesus illuminet corda uestra, ut hæc omnia cedant ad gloriã nominis sui, & ad salutem animarum uestrarum, Amen.

De Legibus Dei Iudicialibus.

SERMO VII.

SE Q V V N T V R iam loco postremo in tractatione legum diuinarum leges iudiciales: de quibus dicam quanta possum breuitate, & quantum C. V. ad ædificationem fore existimauero. Non inutilis & iniucunda *vtiles leges iudiciales.* erit hæc tractatio licet sit forensis. Nam leges iudiciales ab optimo & sapientissimo Deo traditæ sunt per Moſen, mira fide & diligentia. Deus autem nihil temere aut citra eximiam aliquam utilitatem, tanta diligentia hominibus reuelat. Licet autem leges hæ iudiciales pauculæ sint, si conferas cum libris legum decretorumq; Imperatorum, Regum & hominum sapientissimorum uastissimis, in compendioſa tamen illa sua breuitate complectuntur præcipua capita iudicij & iustitiæ, adeoq; tantum ferè quantum comprehenditur in libris legum & constitutionum Imp. & iurisperitorum. Noluît bonus dominus populo suo prolixitate & copia siue onere legum molestus aut onerosus esse: neq; uerò necesse erat curiosius prosequi singula male feriatorum hominum cogitata: sufficit omnibus sapientibus, nationibus & populis, si tantum quibusq; sit legum, quantum satis est ad conseruationem pacis, honestatis, tranquillitatisq; publicæ. Tantum uerò fuisse populo Israelis testatur uniuersa historia sacra. Sunt autem antiquissimæ hæ leges, & *Vetustissimæ leges.* fontes quidam omnium ferè aliarum in mundo bonarum legum. Præcessit Moſes omnes alios legislatores celebriores. Vetustissimi ex his Mercurius ille trismegistus & Rhadamanthus Licius. Ægyptij legislatorem suum Mercurium appellarunt Thoth, qui & authore Lactantio, Argum multioculum illum occidit, & in Ægyptum profugit. Vixit autem Argus & Atlas circa Cecropis Diphyis tempora. Cecrops autem coætaneus fuisse dicitur Moſis. Rhadamanthus uerò putatur uixisse post tempora Iosue. At longissimo interuallo post Moſen succedunt legislatores famosissimi maximarum & antiquissimarum gentium, Draco & Solon Atheniensium, Minos Cretensium, Charondas Tyrriorum, Phoronæus Argiuorum, Lycurgus Lacedæmoniorum, Pythagoras Italorum, Romulus & Numa Romanorum. Plato de Legibus cõmentatur paulò ante regnum Philippi Macedonum regis, Alexandri illius magni patris. Cicero quoq; 2. lib. de Legibus. Hanc igitur, inquit, uideo sapientissimorum fuisse sententiam, legem neq; hominum ingenijs excogitatam, nec scitum aliquod esse populorum; sed æternum quiddam, quod uniuersum mundum regeret imperandi prohibendiq; sapientia. Ita principem legem illam & ultimam mentem esse dicebant, omnia ratione aut cogentis aut uerantis Dei. Ex quo illa lex, quam dii humano generi dederunt, rectè est laudata: est enim ratio mensq; sapientis ad iubendum & ad detrahendum idonea. Et reliqua. Commendantur ergo nobis Dei leges iudiciales, non tam antiquitate, quàm authoritate diuina.

Cæterum Iudicare, ut clarè & distinctè de hac re differamus, actio est: & in *iudicare, iudex, iudicium & leges iudiciales, quid.* præſenti forensis quidem actio: significans uidelicet discernere inter litigantes, uel ius dicere, audita inquam cauſſa pronunciare ferreq; sententiam. Iudicare denique, est periclitantes asserere, oppressos releuare, afflictos tueri, & noxios scelerosq; punire ac coërcere. Proinde Iudicium non est confessus duntaxat iudicum, qui ad iudicandum conuenerunt: sed ipsa magis discussio diligens cauſſarū, pronuntiatio secundum æquum & iustum ex Dei legibus, item assertio & defensio

qua afferuntur boni, atq; supplicium quod sumitur de noxijs atq; maleficis. Iam uerò Iudices sunt præsides iudicij & iustitiæ, illi uidelicet qui iustè secundum leges inter litigantes pronunciant, qui afferunt atq; tuentur bonos, malos autē coercerent atq; puniunt. Itaq; leges Iudiciales istæ sunt, quæ iudices informant quid decernant in controuersijs & quæstionibus, quomodo iudicent iustè, quomodo puniant malos, & defendant bonos, ut apud omnes constet pax, honestas, iustitia & tranquillitas publica: qui sanè iudicis & omnium legum iudicialium unicus scopus est. Nam Deus legislator bonus dominus uult omnino bene esse homini, ipsumq; beatè, honestè, & tranquillè uiuere. Vnde hîc ne curam quidem & defensionem puræ religionis excludimus, sed inter prima collocamus.

*Iudiciales leges
pertinent ad
Decalogum.*

Quemadmodum uerò Ceremoniales leges, sic & Iudiciales à Deo adiectæ sunt Decalogo, ad explicandum & muniendum decalogum. Decalogi enim præcepta primaria sunt præcepta, ad quæ omnes oportet referre leges, ceu ad mentem Dei æternam. Non puto autem necessarium esse, ut multis ostendam. C. V. ad quas Decalogi leges singulæ iudicialium referantur. Clarum enim est id negotiū, & cuiuslibet conferre uolenti perspicuum. Nam quæ pronunciantur contra cædes & iniurias, pertinent ad mandatum, Non occides. Quæcunq; proferuntur cōtra adulteria, contra fornicationem & nephandas libidines, subiunguntur illi præcepto, Non mœchaberis. Quæcunq; dicuntur in legibus contra dolum malum, contra artes, imposturas usurasq;, pertinent sub legem, Non facies furtum. Quæ uerò differuntur de coercendis uis hæreticis & apostatis opprimēdis, illustrāt primum & secundum, adde & tertium & quartum mandatum tabulæ primæ. Quædam enim leges ad plura possunt aptari præcepta Decalogi. Verum hæc obuia & protrita sunt quibuslibet; unde nolo ijs inhærere diutius.

Leges de Iudicibus.

Quoniam autem leges iudiciales ante omnia requirunt Iudices, legum inquam conseruatores & exequutores (leges enim mortuæ uidentur sine exequutoribus, uiuæ sub iusto magistratu, qui eam ob rem appellatur lex uiua) præcedūt sanè omnes alias leges, iudiciales illæ quæ latæ sunt diuinitus de magistratu siue iudicibus eorumq; electione & officio. De Electione hæc legimus, Date ex uobis, ait Moses ad populum, sapientes, prudentes, & spectatæ probitatis uiros de tribus uestris, & cōstituam illos uobis in præsides. Item, Iudices & præfectos constitues tibi secundum tribus tuas in omnibus ciuitatibus tuis, quas Dominus Deus tuus dat tibi, qui iudicent populum. Et adhuc clarius, Ex omni populo (ait ad Mo- sen Iethro diuinitus inspiratus) prospice uiros uirtutis seu fortes & strenuos, timentes Deum, uiros ueraces ac fideles, odientes auaritiā, nimirum qui oderint accipere pecuniā & munera, & præfice illos tribunos, centuriones, quinquagenarios & decuriones; illi iudicent populum omni tempore. Id si feceris, seruabis tum instituta Dei, tum populi incolumitatem. Huc pertinet quod legimus in Numeris precatum dixisse Mo- sen, Præficiat dominus Deus spirituum uniuersæ carnis, uirum super hunc cœtum, qui egrediatur & ingrediatur ante eos: ut non sit cœtus domini ueluti oues quæ pastorem non habent. Reliquit autem nobis exemplum Moses orandi Deum in electionibus. Sape enim fallunt nos nostra iudicia de hominibus; Deus autē spiritus, animos & corda intuetur, & nouit qualis quisque sit intus & in cute. Is ergo orandus est ut nobis det uel ostendat non hypocrisis, sed uiros uirtutis & ueritatis. In eodem loco relinquit nobis Moses descriptionem ritus inaugurandi electos iudices. Nam statuebantur ante dominum, & imponebantur eis manus cum precationibus. Porro officium iudicum paucis quidem uerbis, sed sententijs efficacissimis & absolutissimis in hæc uerba dominus per

per Moſen deſcribit, Audite cauſſas fratrum ueſtrorum, & iudicate iuſtè inter ui-
rum & fratrem eius, & inter peregrinum eius. Non agnoſcetis facies, non recipie-
tis perſonas in iudicio: ut paruum ita & magnum audiat: nec quenquam morta-
lem formidetis. Iudicium enim hoc Dei eſt. Item, Iudicate populum iuſto iudicio:
ne flectas iudicium, neque agnoſcas perſonam, neque accipias munus: quoniam mu-
nus excæcat oculos ſapientum, & peruertit cauſſas iuſtas. Iuſtitiam iuſtitia perſe-
quaris, ut uiuas & poſſideas terram quam Dominus Deus tuus daturus eſt tibi.
Et iterum, Ne feceris iniquum quid in iudicio, ne ſuſcipias faciem pauperis, nec
reuerſaris faciem potentis, ſed iuſtè iudicabis proximo tuo. Rurſus, Ne receperis
rumorem falſum, ne ſequaris multos ad malefaciendum, neque reſpondeas in iudi-
cio declinando poſt multos ut peruerſum quid committas. Id eſt, ſi uideris inno-
xium damnari à multis, noli ideò & tu ipſum damnare, quia maior numerus illum
damnat, ſed iuſtè iudica, neque quicquam iniqui committas propter multitudinem
ſuffragiorum. Ne ornaueris pauperem in cauſſa ſua: neque inflexeris cauſſam pau-
peris tui. A uerbo mendaci longiſſimè abſis. Innocentem & iuſtum ne occideris.
Non enim iuſtificabo impium. Aduenæ ne uim inferas, neque opprimas eum. Fu-
iſtis enim & uos aduenæ in Ægypto.

Ac Deus quidem populo ſuo quem ex Ægypto à regum tyrannide liberauit, *inſtitutio regis
& principum.*
non iterum regibus ipſum ſubſtrauit, neque regalibus tributis impoſitis onerauit:
republicam ſiue ariſtocratiam, optimatum inquam ex plebe delectorum regi-
men optimum inſtituit: ſed quia non ignorauit populi ſui ſtultitiam, & quòd liber-
tatis pertaſus regem erat poſtulatorus, quam rem tum quoque multis & ualidis ra-
tionibus per Samuelem diſſuadebat, regi quoque dictauit leges, ut is intelligeret *1. Sam. 8.*
etiam ipſi uiuendum eſſe ſub legibus, & iudicandum ſecundum leges. Inſtitutio
regis eſt huiusmodi, Cùm ueneris in terrā quam Dominus Deus tuus daturus eſt
tibi, & dixeris, Conſtituam ſuper me regem, quemadmodum omnes gentes quæ
circum me ſunt. Omnino regē ſuper te pones quem elegerit Dominus Deus tuus:
de medio fratrum tuorum conſtitues ſuper te regem: non autem poteris tibi præ-
ficere hominem alienum, qui non eſt frater tuus. Veruntamen hic non parabit ſibi
equos multos: neque populum in Ægyptum reducat, quò equos multiplicet, id eſt,
fortem ſibi comparet equitatē. Nam Dominus dixit uobis, Ne ultra redeatis per
uiam iſtam. Deinde ne ſibi multas mulieres paret, ne deficiat cor eius: neque mul-
tiplicet ſibi multum auri & argenti. Cùm federit in ſolio regni ſui, deſcribet ſibi
exemplar huius legis ad exemplar libri ſacerdotum Leuitarum: eritque illud penes
eum, ut legat in eo cunctis diebus uitæ ſuæ, ut ſcilicet diſcat timere Dominū Deum
ſuum, & ſeruare omnia uerba legis huius, atque ſtatuta iſta, ut faciat ea. Et ne extol-
lat cor ſuum ſupra fratres ſuos, neque recedat à præcepto uel ad dextram, uel ad ſi-
niſtram, ut proroget dies in regno ſuo, ipſe & filij eius in medio Iſraelis. Hæc de
magiſtratu, iudiciis, & regibus hætenus. Puto autem in hac regia inſtitutione
comprehendi quæcunque ab alijs. authoribus de principis educatione & inſtitu-
tione profuſiſſimè proferuntur. In primis autem illud obſeruari decet, quòd reges
uerbo & legibus Dei non præficiuntur tanquam Domini & moderatores, ſed ſub-
ijciuntur ueluti à Deo per uerbum iudicandi, & qui omnia ad normam uerbi Dei
debent moderari.

Iam uerò recitandæ nobis ueniunt aliquot leges iudiciales, nō omnes quidem
& ſingulæ, ſed aliquot & potiores: ex quibus alias liceat æſtimare, & palam per-
ſpicere Iſraeliticum populum nulla lege neceſſaria & utili fuiſſe deſtitutum. Per
compendium autem illas enumerabo & ordine maxime naturali ac perſpicuo.

Res sacra.

De ædificiis sacris, & non alienandis rebus Deo consecratis, denique de tuenda & propaganda uera religione multus est sparsim in lege sermo. Nec puto operæpretium uerbotim omnes recitare leges aut proferre ea quæ de his præcipiuntur. Certè de Paganis eorumque templis & sacris subuertendis, breuibus hæc præcipiuntur à Domino, Cum eiecerit ante te Dominus Deus Gentes multas, exterminabis eas, nec ferias cum eis pactum, nec miserearis eorum, nec iungas cum eis affinitatem: quoniam filium tuum seducent, ut seruiat dijs alienis, & irascatur furor meus contra te, & deleam te. Sic autem facies eis, Aras eorum diruetis, statuas eorum confringetis, lucos eorum succidetis, & simulachra eorum comburetis. Nam populus sanctus es tu Domino Deo tuo, & te elegit Dominus Deus tuus, ut sis ei populus peculiaris. Eadem lex ponitur Exod. 23. & repetitur Deut. 12. Huc pertinent leges promulgatæ contra statuas & imagines. Leuit. 19. dicit Dominus, Ne respiciatis ad idola, neque deos fusiles uobis faciatis. Ego Dominus Deus uester. Item 26. cap. Ne feceritis uobis idolum aut sculptile, neque statuam erexeritis uobis, sed nec lapidem figuratum ponatis in terra uestra, ut adoretis ad eum: quia ego Dominus Deus uester. Item Deut. 16. Non plantabis tibi lucum ex ullis arboribus iuxta aram Domini Dei tui: neque eriges ibi statuam quā odit Dominus Deus tuus. Sunt autem huius generis leges plurimæ passim in scripturis expositæ.

Idololatria.

Pauperes.

De pauperibus, uiduis, pupillis, orphanis & peregrinis bene tractandis ita præcipit Dominus, Nullam uiduam nec pupillum affligetis. Si uerò omnino illos affligere perrexeritis, indubiè ad me clamabunt, & ego certissimè exaudiam eos, & irascar uobis, ac interficiam uos gladio, & erunt uxores uestre uiduæ, & filij uestri orbi. Huc pertinet bona pars cap. 15. in Deut. In 24. cap. Ne declines iudicium peregrini & pupilli atque uiduæ. Memineris quod & tu fueris peregrinus in terra Ægypti.

Testes & testimonia.

De testibus & testimoniis in iudicio recipiendis & repudiandis, pauca hæc traduntur in lege. Non stabit testis unus contra aliquem, quicquid illud peccati & facinoris fuerit: sed in ore duorum aut trium stabit omne uerbum. Quod si steterit testis mendax contra hominem accusans eum præuaricationis, iudices diligenter inquirent ac scrutabuntur, cumque deprehenderint testem dixisse mendacium, reddent ei sicuti fratri suo facere cogitauit, & auferes malum de medio tui. Cæterum iuramentum quod exigant iudices & præstent litigantes, uel testimonia dicentes, iubet fieri Dominus sub obtestatione et inuocatione diuini nominis, & solius quidem, Deut. 10. &c.

Appellatio.

Porro appellationis speciem habet, quod toties iubet Moses in causa dubia & difficili recurrere iudices ad summum sacerdotem, adeoque ad ipsum Deum uel diuinum oraculum: sicuti uidere licet Exodi 18. & Deut. 1. & 16. cap.

Nuptiæ.

De Nuptiis legitimis contra incestas & inutiles nuptias, item de gradibus consanguinitatis & affinitatis, diligentissimè præcipitur Leuit. 18. cap. tum & alijs in locis librorum Moysi. Certè ubi non sunt legitimæ nuptiæ, ibi nullum matrimonium: qui ergo nascuntur liberi, spurij censentur: nec ulla ibi hæreditas, nullæ dotes.

Parentes & liberi.

Præcipit Dominus parentibus multis in locis legis suæ, ut liberos suos honestè educent, & sanctè instituunt. Inter alia, Inculca, inquit, uerba ista quæ ego tibi præcipio hodie filiis tuis, & loqueris de eis cum domi tuæ resides, & cum ambulas in itinere, cum abis cubitum, & cum surgis. Ligabis denique ea in signum ad manum tuam, eruntque monimenta inter oculos tuos, scribes quoque ea super postes domus tuæ, & in portis tuis, &c.

Rursus de honorandis, colendis, alendisque parentibus, non modò in moralibus, sed etiam in iudicialibus legibus quædam proponuntur, quibus diligentissimè

commen-

commendantur. De quibus dicetur ubi uentum fuerit ad parricidium, sub quo & malam parentum tractationem comprehendimus.

Porrò quanta fuerit potestas patria, ex illis potissimum possumus colligere, *De patria potestate.* quòd Exodi 21. permittitur patri oppresso paupertate uendere filiam: item quòd alibi conceditur patri potestas constupratam filiam, ei qui compressit uel locandi in matrimonio, uel negandi: rursus quòd pater potuit uotum Deo nuncupatum, si inscio & non consentiente ipso fuisset nuncupatum, rescindere. Numeri 30. Cæ *Exheredare.* terum exheredationem liberorum non fuisse in arbitrio parentum, si liberi exheredationem non meruissent, sed parentes corruptus aliquis affectus transuersum raperet, ostendit lex promulgata Deut. 21. prohibens ne pro primogenito secundogenitum substituat pater.

De adeundis hereditatibus & successione bonorum, siue de legitima cognatorum successione, diligentissime præcipitur Numeri 27. Ponitur casus filiarum Zelphad postulantium ne nomen deleatur paternum, sed ipsis concedatur cum nomine paterna hereditas. Ex ea occasione fertur lex, decedentibus filiis ad filias hereditatem transferri, aut certè ad proximos quosque sanguine iunctos. Eò pertinet etiam lex de suscitando semine fratris, ac totum ferme caput Numeri 36. Locum hinc habet Adoptio. *Hereditas.*

Porrò de Stupris, adulteriis, & raptu uirginum multæ sunt leges utiles, honestæ & salutare. Deut. 13. dicitur, Non erit meretrix de filiabus Israel, nec scortator de filiis Israel. Ibidem repellit oblationes collectas ex prostibuli mercede. In Leuitico præcipitur, Ne prostituas filiam tuam ut scortari eam facias, ne contamine- *Stupra & adulteria.* tur terra & impleatur piaculo. Ergo Deut. 22. iubet uirgo quæ corrupta ad sponsum, mentita uirginitatem uenisset, lapidari proximè ante parentum fores: ut parentes tam diro facinore excitarentur ad accuratam custodiam liberorum. Exodi 22. ita præcipitur, Si quis seduxerit uirginem, dormieritque cum ea, dotabit eam, habebitque uxorem. Grauiissimæ leges latæ sunt contra stupra & adulteria. Deuter. 22. cap. Supplicio enim capitis affecti sunt adulteri. Eodem fuit affectus supplicio si quis uirginem rapuisset. Suspicionibus & Zelotypiæ cõsultur in Numeris cap. 5. Contra libidines nephandas illicitas & planè diabolicas, seuerissimæ sed iustissimæ leges sunt promulgatæ, uidelicet contra foedissimos incestus, contra Sodomiam abominabilem, contra horribilem & cum natura pugnantem bestialitatem, contra muta inquam & à Deo maledicta scelera, Leuitici cap. 18. & 20. cap.

Diuortia & repudia permittit lex Deut. 24. & permittit quidem propter duri- *Diuortium.* ciem cordis Iudaici populi, & ne quid grauius eueniret, nimirum ne quis eam quam odisset ueneno è medio tolleret, aut aliàs strangularet uel confoderet. Repudio autem separatis mittebantur alia ac noua quidem coniugia.

Porrò ut iustitia colatur inter homines & suum cuique cedat, diligenter in lege *Rerum diuisio.* præcipitur de rerum diuisione, de partienda terra promissa æquis spatiis, de diuidendis agris, de peculio, ut cuilibet tribui sorte distribuantur possessiones, & ne quis datas quouis modo alienet. Huc enim pertinent quæ dicuntur à Mose Numeri 32. 33. 34. & aliàs sæpe in alijs locis.

Interea non prohibebatur commutatio. Nam leges quoque promulgatæ sunt *Emptio, uenditio, &c.* multæ & æquissimæ de Emptione & uenditione, de Locatione & conductione, de Mutuo, accommodato, Vsuris & deposito. Loca si quis in lege requirat inueniet Leuit. 25. Exod. 22. Deut. 15. & 23. cap. Eò referendum puto, quod de Hypothecis seu pignoribus præcipitur, Si in pignus acceperis uestimentum proximi tui, sub *Pignus.* Occasum Solis id ei restitues. Hoc enim est tegumentum eius unicum: hoc est, uesti-

mentum eius quo carnem suam cōtegit, in quo dormit. Fiet autem, ut si ad me elau-
mauerit, audiam eum: quia misericors sum. Item, Ne acceperis loco pignoris infe-
riorem & superiorem molarem: quia ille id unde uiuit tibi oppignerauit.

Depositum.

De deposito siue rebus creditis & iureiurando mandans lex, iubet quemlibet
bona fide depositum alteri reddere. Si uero ei apud quem fuerat depositum sit fur-
to sublatum, purget se depositarius, interposito iureiurando, apud magistratum.
Eadem ratio iubetur seruari in alijs rebus mutuò acceptis, amissis item, aut con-
fractis Legatur cap. 22. Exodi.

Seruitus.

Et quoniam non minimam facultatum portionem ueteribus positam constat
in seruorum gregibus, lex diuina multis agit de Seruitute & seruis, de Mancipa-
tione & manumissione. Diligentissime interim iubet seruos humaniter & clemen-
ter tractare, sexennioq; finito dimittere liberos. Quod si seruo alicui sexennio ex-
acto placuisset manere in domo herili, concedebatur id quidem: sed ut confirma-

Mancipatio.

retur per mancipationis ceremoniam uoluntaria illa seruitus, nempe ut ductus
seruulus ad iudices, testaretur se seruiturum uoluntarie, deinde & auricula eius in
ferior foderetur affigereturq; ostio. Quod quidem obedientiæ & fidei erat symbo-
lum. Nam Dauid huc respiciens, dixit Dominum perfecisse ei aurem, id est, per
fidem obstrinxisse ad obedientiam. Iam uero & manumissionem istis circumscri-

Manumissio.

psit legibus, nimirum ne quid permetteretur auaritiæ aut crudelitati dominorum.
Quæ quidem omnia multis describuntur Exodi 21. Ad clementiam illud quoq;
referre oportet, quod Deut. 23. dicitur. Non trades seruū domino suo, si ad te con-
fugerit: sed habitet in loco aliquo ad quem confugerit. Simul tamen grauissime
prohibetur Plagium. Plagium committunt qui alienos sollicitant seruos, ut uel à
dominis suis aufugiant, uel qui abducunt seruos furto aut rapina, & hos sibi uel
seruant uel alijs diuendunt. Contra hos hæc lata legitur lex. Qui furatus fuerit ho-
minem, & uendiderit eum, & conuictus fuerit noxæ, morte moriatur. Ac repeti-
tur ea lex Deut. 24.

**Infames nata-
les.**

De Ingenuis pauca traduntur in lege: remouentur autem à publica admini-
stratione aut functione scorto nati & habentes obscuros natales. Excluduntur ex
administratione reipub. peregrini homines, Ammonitæ & Moabitæ, Deut. 23.

Furtū et fraus.

Omnis fraus, impostura, rapina, dolus malus & uersutia prohibetur in lege sub
furti uocabulo. Nam Leuit. 19. legitur, Non facietis furtum, non mentiemini, nec
decipiet quisq; proximū suum. Et Deut. 19. Non transferes terminos proximi tui.

Restitutio.

Furtum punit Dominus Exodi 22. quadruplici uel quintuplici restitutione: quam
nisi quis præstaret aut fecisset, uendebatur, in seruitutemq; coniciebatur extre-
mam. Quod si apud furem res furtiua fuisset deprehensa & recuperata, repende-
bat duplum. Sub hanc legem pertinent quæcunq; dicuntur contra sacrilegium,

Sacrilegium.

abigeatum & peculatum, item contra plagium, de quo iam pauca diximus.

**Mercēs labo-
ris.**

Huc pertinet æquissima & præstantissima hæc lex, Ne neges aut uī retineas mer-
cenario pauperi & inopi, siue sit de fratribus tuis, siue de peregrinis qui sunt in
terra tua, mercedem. Die suo dabis ei mercedē suam, & ante Solis Occasum qui-
dem, quia pauper est & sustentat ex eo uitam suam: ne clamet contra te ad Domi-
num, & cedat tibi in peccatum.

**Damnum datū
& acceptum.**

De damno dato aut accepto, & de restitutione in integrum multæ sunt in lege
Domini constitutiones. Si quis foderit cisternam, inquit lex, nec operuerit diligen-
ter, cecideritq; in eam iumentum aut pecus alterius, reseruet sibi dominus cisternæ
animal quod periit, animalis aut domino pretium annumeret animalis. Similis est
lex de boue cornupeta Exod. 21. In 22. cap. conceditur actio talionis, si pratu fuerit
depastum.

depastum, si seges aut uinea fuerit uastata. Iubet enim lex aliud pratum, aliam segetem uel uineam, nec uilem quidem illam, sed optimam restituere ei qui damnum accepit. Ita si quis immisisset ignem in spinas, & ignis per incuriam immittentis inuasisset fruges uel stantes uel congestas, absumpsissetque, cogebatur hic qui per incuriam suam alteri dederat damnum sarcire illatum. Repetitur hæc lex Leuitici 24. In Deut. 22. plurima ponuntur quæ sub hunc titulum referre oportet: cuius quidem generis est, quod iubemur bouem errantem reducere, inuentas res restituere ei qui perdiderat: probè munire ædificia tua, ne quid damni inde forte fortuna accipiat frater tuus. Ab his non est aliena lex illa quoque, Locus sit tibi extra castra ad quem foras egrediaris, lignumque præacutum in balteo, quo sedens fodias, conuersusque operias excrementum tuum. Etenim in iure ciuili tractatur etiam huiusmodi res: sed & ipsa necessitas requirit in repub. certæ sint leges de cloacis, de ædificijs, ne alter alteri excrementis egerendis, aut ædificijs nouis collocandis, molestus & oneri sit. Hoc loco licet & leges commemorare de leprosis separandis, nimirum ne contagium serpens damnum det uicinis. Multis tractantur leges de Lepra & leprosis in Leuit. 13. & 14. cap.

Pondera æqua & mensuras iustas hac lege constituit Dominus, Ne sint tibi in *Pondus & mensura.* sacco tuo diuersi lapides, magnus scilicet & paruus: ne sint tibi in domo tua diuersa epha, magnum scilicet & paruum. Quin pondus æquum & iustum sit tibi, & epha æquum & iustum sit tibi, ut prorogentur dies tui in terra quam Dominus Deus daturus est tibi. Nam abominatio est Deo tuo quisquis ista facit, & iniquitatem perpetrat. Hæc habentur Deut. 25. & repetuntur eadem Leuitici decimo nono capite.

De publicis iudicijs, de maleficijs & pœna fontium, habentur leges in libro Domini multiplices. Maleficos, ait Dominus, non patieris uiuere. Item, Non interficiuntur patres pro filijs, nec filij occiduntur pro patribus: sed quisque pro peccato suo interficietur. Nec tacet lex modum suppliciorum, gladium, lapides & ignem dans in manus iudicis. Alicubi relinquitur iudici decernenda pœna fontis ex circumstantia commissi sceleris, quomodo uidelicet puniatur, in corpore ne an in fortunis, in membris an in uita, uirgis ne cadatur an proscribatur. Leuitici 20. cap. omnia ferè scelera morte expianda commemorantur. Ita cap. 18. & 21.

De Maleficis & Mathematicis copiosè differitur Deut. 18. Per compendium in *Malefici et mathematici.* Leuit. 19. cap. dicitur, Non augurabimini, neque obseruabitis somnia. Non declinabitis ad magos, nec ab hariolis aliquid sciscitabimini, ut polluamini per eos. In hos mortis & extremi supplicij sententia profertur Leuit. 20. Exodi 22. pronuntiatur districta sententia, Malefica mulier ne uiuat.

Contra Hæreticos, schismaticos, & apostatas, siue pseudoprophetas, pronūciat *Hæretici & Apostatae.* lex Deut. 13. & 18. cap. docens significantissimè quomodo sint tractandi. Cognata his est lex de lapidandis blasphemis hominibus, quæ continetur Leuit. 24. cap. Itē lex de sabbati contemptoribus & uiolatoribus ex Num. 15. cap.

Contra Seditiosos & calumniatores multa in lege passim tradunt. Seditiosi erant *Seditiosi & calumniatores.* Chore, Dathan, & Abyrom. De quibus dicitur Num. 16. Si quis uxoris suæ pudicitiam aut famam bonam malitiosè læsisset, uel in pecunia, uel uerberibus incussis mulstabatur, sicut uidere licet Deut. 22. Leuit. 19. præcipitur, Non eris criminator aut susurro in populis: ne oderis fratrem tuum, sed palam argue eum. Item Exodi 22. dicitur, Dñs non detrahes, & principi populi tui non maledices.

Cæterum homicidij multa sunt genera, quorum alia alijs leuiora sunt, aut grauiora. Excellit in his dirum parricidium, sub quo comprehendimus & malam tra-

stationem parentum. Qui percusserit patrem aut matrem, aut eis maledixerit, ait lex, morte moriatur. Iubetur item cædi rebellis, qui ausus fuerit se opponere æquis Seniorum sententijs & iudicio sancto. Deuteron. 17. cap. Rursus Deut. 21. Si quispiam filium habuerit defectorem, contumacem, proteruum & rebellem, qui uocem patris sui & matris suæ audire noluerit, cumq; castigauerint eum, & noluerit obtemperare, apprehendent eum parentes eius, educentq; eum ad Seniores urbis illius, & ad portam eius loci, dicentq; ad Seniores ciuitatis illius, Filius hic noster defector est & rebellis, nec uult audire uocem nostram, comestator est & potator; & mox lapidibus eum obruent omnes ciues illius ciuitatis donec moriatur: & expurgabis malum de medio tui, ut omnes Israelitæ audientes timeant. Est præterea Homicidium aliud quidem inuoluntarium, aliud uoluntarium. Inuoluntarium quale sit, illustratur exemplo Deut. 19. cap. ubi talis proponitur casus, Eunt concordēs amici duo cæsum ligna in syluam, inter cædendum autem excutitur ferrum è manubrio illius, & impetu fertur in hunc, quem & ad necem uulnerat. Huiusmodi factum non imputat Deus actori, sed sibi, nec uult illi imputari. Concedit ergo refugium in asylum. Huiusmodi enim homicidis, non latronibus aut sicarijs, non ueneficis aut parricidis uoluit patere asyla. De quibus copiose agitur Numeri 35. cap. & Deut. 4. & 19. cap. Ad inuoluntarium homicidiū, nempe quod non destinata mente patratur, pertinet etiam illud, Pugnant inter se uiri, & inter pugnandum foeminam grauidam impellunt, ut uel ante tempus pariat, uel moriatur protinus. In eo casu quid fieri debeat exponitur Exodi 21. Vbi & lex Talionis proponitur, Oculum pro oculo, dentem pro dente, manum pro manu, &c. Ibidem ponitur & aliud homicidij genus quod fit per iumentum tuum, utpote taurū cornupetam, uel lupum, aut canem quem domi tuæ alis, uel per instrumentum quodpiam, aut ædificium quod est in tua potestate. Nesciuiſti autem, uel sciuiſti animalis ferociam, aut instrumenti, uel ædificij uitium. Si nesciuiſti, excusatus es. Si sciuiſti, nec prohibuiſti malum, occidaris iubet Dominus. Si uerò ex clementia concedatur redemptio uitæ, nullam quantumuis magnā recusabis annumerare summam pecuniæ. Porro cædes uoluntariæ, quæ fit uoluntate destinata per insidias aut maleuolentiam, nulla necessitate impellente, nullam in lege Dei ueniam meretur. Talem, inquit lex, auelles ab ara mea ut occidatur. Nulla hîc admittitur redemptio, sed districtè deposcitur sanguis homicidæ. Causæ huius seueritatis ostenduntur multæ; sicuti & alia quædam huc pertinentia non pauca leguntur Numeri cap. 35. & Exodi 2. cap. In 21. cap. Deut. describitur actio partim ceremonialis, partim iudicialis, de incerto authore cædis patrata in agro aliquo. Vbi etiam modus præscribitur cædis expiandæ; unde colligere licet, quàm horrendum peccatū sit cædes in oculis Dei & ecclesiæ catholicæ.

Asylum.

Lex talionis.

Res militaris.

Epilogus.

Postremò non transit intactam lex rem militarem. Nam præcepta dat de bello suscipiendo, gerendo, & deponendo. Leguntur ea Deut. 20. cap. Sed & exempla bellorum non leuium proponuntur in lege, in primis Amalechiticum Exodi 7. & Madianiticum Numeri 31. cap. ubi & de spolijs uel manubijs diuidendis sermo habetur.

Scio fratres me hac Legum commemoratione C. V. satis molestum fuisse: quoniam uerò Deus summus & sapientissimus nihil agit sine causis grauib; & sine luculenta utilitate hominum, nō potui intactam hanc legis partem transire, quam uideo tanta diligentia traditam esse ab ipso Deo, & quæ facit permultum ad moraliū legum & illustrationem & conseruationem. Nouit bonus & omniſcius Dominus ingenij humani tarditatem, inertiam & malitiam, quod ad bonum perficiendum

ciendum fugiendumque malum non raro uim requirit. Adhibuit ergo hominibus sanctam uim sanctus dominus per leges hasce iudiciales. Moralibus format mores, & docet quid faciamus, quid fugiamus. Ceremonialibus iuuat moralia, & mysteria regni Dei sub typis & imaginibus proponit oculis animi & corporis cōtemplanda. Iudicialibus uero & perpellit nos ad legum custodiam, & integritatem legum conseruat. Omnia uero & singula hæc huc unice spectant, ut seruetur homo, ut Deum recte colat, & uiuat secundum uoluntatem Dei. Hæc hæctenus differui, Deo iuuante de Lege Dei. Laudemus iam Dei bonitatem, qui nulla re necessaria populum suum destituit, sed & nos hodie istis omnibus erudit ad gloriam nominis sui, & animarum nostrarum salutem.

De Vsu uel effectu legis diuinæ, de impletione & abrogatione eiusdem: de similitudine & differentia utriusque, cum Veteris tum Noui testamenti & populi.

S E R M O V I I I.

QUANTUM uero Legem Dei cum suis partibus qua potui dilata, & copiosis Sermonibus hucusque enarrauerim, nondum tamen omnia necessaria dixisse & colophonem addidisse uideor, nisi iam adiiciam disputationem de Vsu, effectu, impletione, & abrogatione Legis diuinæ, licet alicubi in hisce nostris Semonibus idem argumenti attigerim. Ex ea uero dissertatione uel expositione intelliget C. V. unicum esse testamentum ueteris & nouæ Ecclesiæ Dei, & unicam esse rationem salutis ueræ, omnium quicumque saluati sunt, & saluantur in hoc seculo: intelliget quid nouum testamentum differat à ueteri. Ac necessaria quidem & ualde utilis erit hæc tractatio, cum ad intelligenda multa in scripturis sanctis loca, tum ad perspicuitatem quoque & saluberrimum usum eorum quæ hucusque disputata sunt à nobis de Lege. Dominus author & mens perfectioque Legis concedat nobis ea loqui, quæ illustrent gloriam nominis eius, & iuuant animarum nostrarum salutem.

Est autem uarius & multiplex Vsus diuinæ legis, sed patitur interim se astringi ad numerum ternarium: dicimus ergo usum legis diuinæ esse triplicem. Principio enim præcipuum & proprium legis officium est, conuincere omnes homines peccato obnoxios ac sua culpa propria filios esse mortis. Exponit enim nobis lex Dei uoluntatem Dei sanctissimam, exponendoque requirit à nobis iustitiā perfectissimam. Nam lex ea de causa appellari solet testimonium diuinæ uoluntatis, & perfectissimum exemplar diuinæ puritatis. Et huc quidem pertinet quod in euangelio recolligens dominus summam mandatorum Dei dicit, Primum omnium præceptorum est, Audi Israel, Dominus Deus uester, Deus unus est: & diliges Dominum Deum tuum ex toto corde tuo, ex tota anima tua, & ex tota mente tua, & ex totis uiribus tuis. Hoc est primum præceptum. Et secundum simile hoc est, Diliges proximum tuum ut teipsum. Maius his aliud præceptum non est. Ergo huc quoque pertinet illud Apostoli Pauli, Finis præcepti est charitas, ex puro corde & conscientia bona, & fide non simulata. Cum autem perfectissimam iustitiam ac dilectionem, adeoque corpus requirit à nobis lex, certe omnes homines condemnat peccati, iniustitiæ & mortis. Nam lege Dei etiam hoc disertè pronuntiatur, Maledictus omnis qui non manserit in omnibus quæ scripta sunt in libro legis ut faciat ea. At quotusquisque nostrum facit omnia legis? Quis oro hominum habuit uel habet etiam hodie cor mundum? Quis hominum ex toto corde, ex tota anima & mente semper dilexit aut diligit etiam nunc Deum? Quis hominum nihil

De usu & effectu legis Dei.

Summa perfectio lege requiritur à nobis,

Nullus mortalium perfectus.

*Lex palam fa-
cit peccatū, &
nostram mise-
riam profert.*

unquam mali concupiuit: aut quis non concupiscit quotidie? Imperfectio ergo & peccatum lege uel indicio legisprehenditur in homine, ut non dicam hic aliud grauius. Quid hic dicemus? Vbi oro apparet in homine diuina & perfectissima illa, quam lex requirit, iustitia? Iob clamat, Verè scio quòd non iustificabitur homo compositus Deo. Vel, Quomodo iustus inuenietur homo si cõferatur cum Deo? Si uoluerit contendere cum eo, non poterit ei respondere unum pro mille. Item, Si quidpiam iustum habuero, non respondebo, sed meum iudicem deprecabor, &c. Succinit huic Ioannes Apostolus, & ait, Si dixerimus, Peccatum non habemus, nos ipsos fallimus, & ueritas in nobis non est. Item, Si dixerimus, Non peccauimus, mendacem facimus eum, & sermo eius non est in nobis. Proinde hac ratione lex speculum quoddam est, in quo contemplamur nostram corruptionem, imbecillitatem, impotentiam, imperfectionem, iudicium nostrum, id est, iustā nostram condemnationem. Nam Apostolus disertè dicit, legem esse latam, ut palam faceret transgressiones, atq; eo modo cogeret homines ad agnitionem suæ imperfectionis suiq; reatus. Nemo enim nostrum sibi ipsi in sinum & in proprii pectoris sui latebras inspicit, sed indulgemus nobis omnes, nec arbitramur res nostras ita corruptas esse, ut reuera sunt: lex ergo subit & excutit animi & pectoris nostri omnes latebras, & profert peccatum & omnem nostram corruptionem. Ante legem, inquit Apostolus, etsi peccatū esset in mundo, non tamen imputabatur uel reputabatur. Idem quoq; Lex iram operatur, ait, Nam ubi non est lex, ibi nec prauaricatio. Et iterum, Per legem est agnitio peccati. Nam ad Rom. 7. idem Apostolus plenius dicit, Peccatum non cognoui nisi per legem. Nam & concupiscentiā non nouissem, nisi lex dixisset, Non concupisces. Sed occasione accepta peccatum per praeceptum genuit in me omnem cõcupiscentiam. Siquidem absq; lege peccatum erat mortuum: ego autem uiuebam sine lege quondam: ueniente autem mandato, peccatum reuixit: ego uerò mortuus sum. Et repertum est mādātum quod institutum erat ad uitam, mihi cedere ad mortem. Et reliqua. Nam bona pars huius capitis huc pertinet. Est itaq; hoc proprium Moysis officiū, legisq; usus & effectus primarius, ostendere hominī morbum siue peccatum.

Moses non tantum iugulat, neque lex duntaxat occidit.

Qui autem hic subsistunt, nec ullum præterea legis usum & effectum ostendunt, & non progrediuntur ulterius, quasi Moses nihil aliud quàm iugulet, & lex duntaxat occidat, non uno modo nec leuiter hallucinantur. Repetimus quidem & dicimus propriissimum legis opus esse peccatū proferre, item Moysis officium præcipuū esse docere quid agas, & minis execrationibusq; urgere, præsertim uerò in collatione, cum uidelicet lex confertur cum euangelio. Nam in 2. ad Corinth. cap. 3. Paulus legem appellat literam, mox & ministeriū mortis, deinde doctrinam literis & atramento exaratam, rursus insculptam tabulis lapideis, & nō perpetuam, sed caducam. Idem protinus & ex opposito euangelium uocat ministeriū & doctrinam spiritus, quæ maneat, non intercizat, quæ inscribatur cordibus & uiuificet. Vnde sanè libenter agnoscimus, legem propriè proferre morbum, sed euangelium adhibere medelam, desperatisq; remedium. Cæterum cogitandum est interim, sanctos patres nostros non tantum habuisse legem quæ peccati reuicerit, aut Mosen qui nihil aliud quàm iugularit laniaritq;, neq; hunc illò spectasse ut uulneraret, sed ut mederetur etiam: non sua quidem uirtute, sed per manuuctionem ad eum qui alligat contritos corde, & sanat omnes contritiones eorum. Is est Christus, qui etiam operatus est per ministerium Moysis. Neq; enim putandum est ab initio mundi aut à Mose ad Christum usq;, literam duntaxat fuisse prædicatam, gratiam uerò spiritumq; Dei otiosum in sanctorum animis nihil effecisse.

effecisse. Etenim cum lex nobis ostendit, imò & irrefragabiliter euincit, in nobis seu in carne nostra non esse illam perfectionem, quam à nobis requirit in lege sua sanctissimus dominus & perfectissimus, profectò reuocat & retrahit hominem (non sua quidem, sed spiritus Christi uiuificantis uirtute) ab omni carne, utpote in qua non est ulla salus, ulla perfectio: atq; ita per consequens occasionem nobis præbet diuertendi ad mediatorẽ Christum, qui solus est sanctificatio & perfectio nostra. Et iuxta hanc concomitantiam uel occasionem, lex quoq; uia & compendium est adeoq; & pædagogus quidam hominibus à Deo adhibitus, qui abducat nos ab omni uirium nostrarum fiducia, ab omni operum nostrorum respectu, deniq; ab omnibus creaturis, rectà per fidem ad Christum, qui factus est nobis, ut modò diximus, à Deo iustitia, sanctificatio & redemptio, extra quem non est ulla sub Sole salus. Proinde Moses non tantum legem urfit, sed & Christum annunciauit, & in ipso uitam. Nam dominus in Euangelio ad Iudæos dicit, Nolite putare quòd ego accusaturus sim uos apud patrem. Est qui accusat uos Moses, in quo speratis. Si enim credidissetis Mose, credidissetis utiq; mihi. De me enim ille scripsit. Et Paulus ad Galatas, Si data fuisset lex, inquit, quæ possit uiuificare, uerè ex lege esset iustitia: sed conclusit scriptura omnia sub peccatum, ut promissio ex fide Iesu Christi daretur credentibus. Cæterum, antequam uenisset fides, sub lege custodiebamur, conclusi in eam fidem quæ erat reuelanda. Itaq; lex pædagogus noster fuit ad Christum, ut ex fide iustificaremur. En quid poterat dici planius, quam legem omnes cõclusisse sub peccatum? Sed in quem finem? Ut promissio ex fide Iesu daretur credentibus. Et iterum, Antequam uenisset fides, id est ille in quem fides nostra dirigitur & incumbit, sub lege custodiebamur. Quomodo? Conclusi utiq; in eam fidem quæ erat reuelanda. Conclusi ergo erant patres lege necubi erumperent, & alibi quàm in Christo salutem & uitam quærent. Proinde ad Christum rectà per fidem adduxit lex. Et adhuc planius, Lex fuit, inquit, pædagogus noster ad Christum. En ducit lex ad Christum etiam. Et iterum subiungitur, Ut ex fide iustificaremur. Proinde lex promouet ueram doctrinam iustificationis, manifestè docens, fide in Christum nos, non operibus nostris iustificari. Qua parte miscetur apertissimè euangelio, euangelijq; officium sibi sumit: nec mirum, cum multis ipsum Euangelium ipsorum culpa fiat litera. Præterea idem Apostolus alibi dicit, in sacrificijs peccatorum factas esse commemorationes, in quibus & expiationem præfigurata esse scimus. Manuduxerunt ergo ad Christum & ceremoniales leges, demonstrantes testificantesq; illum solū nos repurgare ab omnibus peccatis. Iam ergo concludimus, Mosis legisq; officium fuisse & esse, aperire nobis peccatum & iudicium nostrum, sed interim quoq; & per occasionem adducere ad Christum, non tantum damnare.

Moses etiam adducit ad Christum.

Ex quibus illud quoq; discitur, legem nos docere non tyrocinia tantum iustitiæ, sed ipsam ueram & absolutam iustitiam. Nam Moses disertè dicit se tradidisse perfectissimū doctrinæ genus, utpote in qua sit uita & mors. Dicit præterea Apostolus quòd lex nos manuducat ad Christum, ut ex fide iustificemur. At fidei iustitia, perfectissima est iustitia. Ergo quòd legalia alicubi appellantur elementa mundi, duas potissimum fit ob causas. Prior, quòd legalia sint tanquam primaria institutiones & elementa, quæ succedente Euangelij doctrina perficiuntur & absolutiori cedunt. Posterior, quòd ceremoniæ traditæ sint sub rebus uel signis externis, cum interim sub externis figurent atque proponant interna, ipsum Christum & mysteria eius.

Lex docet per se sectam iustitiæ.

Elementa mundi.

Illud quoque discimus ex prædisputatis, ueteres sanctos qui sub ueteri testam.

*Que & qua-
lis iustitia uete-
ris populi.*

*Populus car-
nalis.*

*Lex uitam ho-
minum institu-
it & format.*

mento uixerunt homines, salutem & iustitiam quaesuisse non in operibus legis, sed in eo qui est perfectio & finis legis, nempe in Christo, ergo lege & ceremonijs usos esse tanquam manu ductione & paedagogia ad Christum. Nam quoties audierunt perfectam à se legis iustitiā requiri, fide donata ex gratia intellexerunt, Christum perfectissimam iustitiam proponi, ad quem pro iustitia consequenda omnes confugere debeant homines. Quoties in loco sacro conuenerunt ad contemplanda sacra illa diuinitus instituta, non nudas inspexerunt figuras, neque putauerunt se propter cultum illum placere Deo purgari à peccatis, sed oculos animi & fidei intenderunt in ipsum futurum Messiam, qui in omnibus ceremonijs & legalibus præfigurabatur. Proinde lege abutebatur, quicunque putabant se Deo gratos esse ac Deo cultum exhibere, quod opus illud facerent. Id quod & propheta in suis sermonibus grauissimè accusantes persecuti sunt. Atque eo nomine dictus est non raro populus Israelis, populus carnalis: non quod omnes ante natum Christum patriarchæ & patres fuerint carnales: sed quod adhuc uiuerent sub illis externis elementis & figuris, & fortè essent in populo qui non perspicerent ipsas res spirituales externis illis adumbratas, & fortè putarèt gratos & acceptos se esse propter opus externum operatum aut perfectum.

Secundus usus & alterum officium legis est docere, quid sequantur uel quid fugiant iustificati in fide per Christum, & quomodo propriè colant deum. Lex enim Dei continet doctrinam perfectissimam & fidei in Deum & omnium bonorum operum. In primo enim usu legis demonstrauius, quomodo lex & moralis & ceremonialis fidem doceat in Deum & Christum eius, & quomodo hominem in sui cognitionem ducat, ut intelligat in seipso, id est, in natura hominis, non esse bonum ullum aut uitam ullam, sed omnia dona uitæ, uirtutum & salutis esse ex unico omnium bonorum fonte Deo patre per Christum siue Messiam. In præsentī, id est, in consideratione secundi finis, usus, uel officij legis Dei, agnoscere debemus omnes formas uirtutum & omnium bonorum operum thesaurum lege Dei nobis proponi: & quod diuus Apostolus legis præcepta accommodat ad exhortationem & consolationem. Prima tabula in moralibus docet nos quid debeamus Deo, & quomodo colamus eundem. Secunda tabula informat officia uitæ, docens, quid debeamus proximo nostro. Et ceremoniarum quoque ad cultum pertinent. Iudicialia instruunt & œconomiam & politiam, ut uiuere possimus honestè & sanctè. Docet ergo lex omnem iustitiam, temperantiam, fortitudinem, prudentiam, instructumque pium in omni opere, in quo instructum esse oportet sanctum Dei cultorem. Unde quoties sancti propheta Dei, cultum Dei & religionem collapsam rursus erigere & restaurare, quoties uitia hominum erroresque accusare & corrigere, denique bona opera adeoque uerè bona opera docere uoluerunt, semper ac unicè respexerunt ad legem, & omnia sua ex lege protulerunt. Huius rei specimen exhibet nobis luculentissimus beatus Dauid in Psalmo decimoquinto, sanctus Isaias in capite 1. & 33. Diuus quoque Ezechiel in capite 18. Paulus ad Romanos 13. omnia officia uitæ refert ad legem charitatis. Nam & dominus ipse prior hoc fecit in euangelio. Præterea clamat diuinus uates Psalmo 94. Beatus uir ille quē tu in lege tua erudieris domine. Et in Psalmo 78. Ipse suscitauit testimonium in Iacob, & legem posuit in Israel, ut cognoscat atas postera, & ponat in Deo fiduciam suam, & non obliuiscatur operum Dei, sed mandata eius obseruet. Item Psal. 19. dicit Dauid, Lex domini immaculata conuertens animas: testimonium domini fidele sapientiam præstans paruulis. Iustitiæ domini rectæ, lætificantes corda: præceptum domini lucidum, illuminans oculos. Timor domini sanctus, permanens in seculum seculi:

seculi: iudicia domini uera, iustificata in semetipsa. Desiderabilia super aurum & lapidem preciosum, & dulciora super mel & fauū. Huc facit plurimum totus ille alphabetaris Psalmus numero 119.

Tertius usus diuinæ legis est coërcere petulantes, & quos nulla commouet *Lex coërcet*, ratio, eos iubet supplicijs constringere, ut conseruetur honestas & pax atq; tranquillitas publica. Sunt enim in populo non pauci, qui non amore uirtutis, sed formidine pœnæ se continent & uiuunt tolerabiliter. Hac uerò ratione cautū & prouisum uoluit diuina bonitas tranquillitati hominum. Huc uidetur spectasse Apostolus cum dixit, Scimus legem non positam iustis, sed iniustis & inobsequentibus, impijs & peccatoribus, irreuerentibus & prophanis, patricidis & matricidis, homicidis, scortatoribus, pæderastibus, plagiarijs, mendacibus, periuris, & si quid aliud est quod sanæ doctrinæ aduersetur, &c.

Post Vsum, finem & officium legis declaratum, restat iam explicandum quomodo impleatur lex Dei. Est autem impossibile hominem suis uiribus adimplere legem, diuināq; uoluntati satisfacere per omnia. Constat enim lege non tantum opus externum, sed intimorum affectuum puritatem, adeoq; diuinam quandam, sicut iam ostendimus, requiri perfectionem. Clamat enim aliās quoq; dominus, Perfecti estote uos, quemadmodū pater uester, qui est in cœlis, perfectus est. Huiusmodi autem perfectio donec in hac carne uiuimus, non inuenitur in nobis. Caro enim ad finem usq; uitæ nostræ retinet corruptum suum ingenium, & per spiritum antagonistam licet sapius repulsa, usq; tamen recurrit, ut nunquā in nobis inueniatur & ex nostris uiribus diuina illa deriuetur perfectio. Verū audiamus de hac re diuini Apostoli Pauli testimonium, clamantis, Scimus quod lex spiritualis est: at ego carnalis sum, uenditus sub peccatum. Quod enim ago, non probo. Non enim quod uolo hoc facio, sed quod odi, hoc ago. Et iterum, Noui quod non habitet in me, hoc est in carne mea, bonum. Nam uelle adest mihi, at ut faciam bonum, non reperio, Rursus, Delectat me lex Dei secundū internum hominem: sed uideo aliam legem in membris meis, rebellantem legi mentis meæ, & captiuum me reddentem legi peccati, quæ est in membris meis. Tandē uerò concludit & ait, Itaq; idem ego mente quidem serui legi Dei, carne uerò legi peccati. Cæterū putant nonnulli hæc Paulum non de sua, sed de aliorum, nempe carnalium & nondum regeneritorum hominum persona esse loquutū. At ipsa Apostoli uerba uolentem nolentē lectorem adigunt cōfiteri, uerba recitata maximē spiritualibus competere. Ac Augustinus in 1. lib. Retractat. cap. 23. recitat se quoq; fuisse aliquando in ea sententiā, quod Apostoli uerba exponi debeant de homine sub lege non sub gratia constituto: sed fatetur se compulsus aliorum scriptorum & tractatorū auctoritate, sentire iam Paulum loqui de hominibus maximē spiritualibus, & de sua ipsius persona. Id quod copiosius ostendit in libris contra Pelagianos. Cerrē beatus Hieronymus, qui dicitur horribile anathema contorsisse in docentes legem mandare impossibilia, disertē scribit ad Rusticum, Paulum hic de sua ipsius loqui persona. Si uerò remanet caro & carnis ingenium, secundum quod indefinenter reluctatur spiritui, profectō nunquam perficitur in nobis, quoad uiuimus, diuina illa perfectio: ergo donec uiuimus nemo nostrum implet legem.

Hic quoq; locum habet Paulina disputatio, de eo instituta, quod nemo mortalium iustificatur per opera legis: non legis quidem, sed corruptæ naturæ nostræ uitio, quæ nō præstat quod exigit lex Dei. Nam nō potest, ut idem ait Apostolus, Ac disertē quidem, Scimus non iustificari hominem, inquit, ex operibus legis, nisi per fidem Iesu Christi: & nos in Iesum Christum credimus, ut iustificaremur

Impossibile est uiribus nostris implere legem.

Paulus loquitur in 7. cap. ad Romanos in propria persona.

Nemo iustificatur per opera legis.

Opera legis
quid?

ex fide Christi, & non ex operibus legis: propterea quod nō iustificabitur ex operibus legis omnis caro. Nec est quod per opera legis intelligamus duntaxat ceremonialia. Hæc enim ut non iustificat, ita neq; moralia iustificat. De moralibus loquitur Apostolus, cum loquitur de operibus legis. Nam ad Rom. 3. cap. idē Apostolus, Ex operibus, inquit, non iustificabitur omnis caro in conspectu eius. Et rationem mox subiungit, Per legem enim agnitio peccati. At in 7. cap. ostendit atq; declarat per quam legem, utiq; moralē. Moralis enim lex est, Nō concupisces. Dicit autem Apostolus, Peccatum non cognoui, nisi per legem. Nam concupiscentiam non nouissem, nisi lex dixisset, Nō cōcupisces. In epistola ad Ephesios cum Gentibus loquens, opera simpliciter dicit non iustificare. Atqui cum Gentibus loquens non potuit ceremonialia opera intelligere, sed uirtutes ipsas morales, id est, omnis generis opera quæ uidebantur esse bona. Ad Galatas, Quotquot ex operibus legis sunt, execrationi sunt obnoxij. Id autem probans subiungit, Scriptum est enim, Execrabilis omnis qui non manserit in omnibus quæ scripta sunt in libro legis, ut faciat ea. Nisi autem per opera legis etiam moralia, non ceremonialia duntaxat, intelligamus, non uideo quomodo constet probatio. Ac disertē quoq; dicit, In omnibus quæ scripta sunt in libro legis huius, ut faciat ea. Cæterum quis nesciat non ceremonialia duntaxat esse scripta? Et S. Augustinus multis probat in libro de Spiritu & litera, præsertim cap. 8. Paulum per opera legis etiā moralia intelligere.

Iam ut locum hunc absoluamus, recitabimus Apostoli uerba ex 8. cap. epistolæ ad Romanos dicentis, Quod lex præstare nō poterat, ea parte qua imbecillis erat per carnem, hoc Deus proprio filio misso, sub specie carnis peccato obnoxia, præstitit, ac de peccato cōdemnauit peccatum, per carnem, ut iustificatio legis impleatur in nobis: qui nō secundum carnem uersamur, sed secundum spiritum. Duo autē docet hisce uerbis Apostolus. Principiō, legem non posse hodie nec potuisse unquam iustificare homines. Culpā huius impotentia non reijcit in ipsam legem, quæ per se bona & efficax est, perfestissimæq; iustitiæ doctrina: sed in corruptam carnem nostram. Caro nostra non potuit nec potest præstare, quod bona Dei lege requiritur à nobis. Vnde & S. Petrus in Cōcilio Hierosolymitano dixisse legitur, Nunc ergo quid tentatis Deum, ut imponatur iugum super ceruices discipulorū, quod neq; patres nostri, neq; nos portare potuimus? Posterius autem sequitur ex priore, nempe cum lex nos nec uiuificare potuit, neque nos præstare potuimus, quod lex requirebat à nobis, Deus qui diues est misericordia & bonitate, filium suum misit in mundum, ut hic incarnatus moreretur pro nobis, atq; ita peccatum imperfectionis nostræ tolleretur, & perfectionem suam nobis conferret in fide, qui est perfectio & plenitudo legis. Constat ergo ex his Christum impleuisse legem, & hunc esse perfectionem fidelium in orbe omnium.

Christus impleuit legē, & est fidelium perfectio.

Requirat autem hic locus pleniorē expositionem eius, quod Christus legem impleuit ac factus est perfectio nostra. Principiō quæcunq; promissa & præfigurata sunt in lege & prophetis impleuit dominus noster. Nam promissiones illas, Semen mulieris conculcabit caput serpentis; Benedicentur in te omnes cognationes terræ: & quæ his similes aliæ & innumerae sunt, impleuit dominus noster, cū natus in hunc mundum, perlitauit pro nobis, & uitam reduxit. Pari modo impleuit ceremonialia omnia, dum ipse sacerdos & sacrificiū se obtulit, at nunc & semper efficax & æternū duratura est hostia, pontifex quoq; æternus, semper in dextra patris interpellans pro fidelibus. Ipse etiam spiritualiter circumcidit credentes, & iisdem in locum circumcisionis substituit baptisum. Ipse est pascha nostrū, qui

qui pro agno paschali subrogauit coenam Domini siue Eucharistiam. Ipse denique est legis & prophetarum cōplementum, mens & perfectio. Deinde impleuit legē Dominus, quia uoluntati Dei absolutissime per omnia satisfecit, cum sit ipse sanctus sanctorum, in quo nulla est macula, concupiscentia praua nulla, peccatum nullum: in eo est dilectio Dei perfectissima, & iustitia per omnia absolutissima. Et hanc nobis imperfectissimis, communicat gratis, si credamus. Condonat enim nobis peccata, factus pro nobis expiatio, & communicat nobis suam iustitiam: quæ imputatiua uocatur. Quo iam pertinet testimonia Apostolica, Deus erat in Christo, ait Paulus, mundum reconcilians sibi, non imputans eis peccata sua. Eum enim qui non nouit peccatum, pro nobis peccatum fecit, ut nos efficeremur iustitia Dei per illum. Item, Abraham credidit Deo, & imputatū est ei ad iustitiam, certe absque operibus. Ita si nos quoque credimus in Deū, per Christū, imputabitur nobis quoque fides nostra pro iustitia. Fide enim comprehendimus Christum, quem credimus absolutissime pro nobis Deo satisfecisse, adeoque Deum nobis placatum esse propter Christum, & nobis Christi iustitiam gratis imputari tanquam nostram (& reuera ex donatione nostram) quia nos sumus iam filij Dei.

Expensis his diligenter, facile erit illis respondere qui interrogāt. Quando nullus mortalium exacte satisfacit legi per se, quomodo itaque promittitur iustitia, uita & salus seruantibus legem? Nimirum respicit ea promissio ipsam Christi perfectam iustitiam quæ imputatur nobis. Alioqui certum est diuinas scripturas inter se minime uel tantillum conflagere uel discrepare. Clare autem dicit Apostolus, Si data esset lex quæ posset uiuificare, uerē ex lege esset iustitia: nunc uerō conclusit scriptura omnia sub peccatum, ut promissio daretur ex fide credentibus. Proinde seruat siue implet legem etiam Decalogi, qui id facit propter quod lex potissimum est instituta. Sed lex potissimum est instituta (sicuti superius demonstraui) ut peccati & condemnationis nos conuincat, & ita a nobis ipsis releget, & ad Christum manuducat, qui est perfectio legis ad iustificationem omni credenti. Ideoque implet & seruat legem, qui non sibi ipsi & suis fidit operibus, sed ueræ Dei gratiæ se commendans, in Christi fide omnem iustitiam quærit. Vnde iam clarum est, istas Christi Domini sententias æquipollere: Qui credit in me, habet uitam æternam. Et, Si uis ingredi in uitam, serua mandata. Nam & Paulus in Actis cap. 13. Notum sit uobis fratres, ait, quod per Christum uobis remissio peccatorum annuncietur: & ab omnibus a quibus non potuistis per legem Moysi iustificari, per hunc omnis qui credit iustificatur. Et huc iam pertinet totum iustificationis negotium, De quo alias differuimus copiosius.

Ceterum fides illa qua credimus Christum satisfecisse legi, & ipsum esse iustitiam & perfectionē nostrā, neque ex natura neque ex nostris existit meritis, sed ex gratia Dei infunditur per spiritum sanctum, qui datur in corda nostra. Hic spiritus manens in cordibus nostris, incendit pectora nostra amore & studio diuinæ legis, ut conemur eam legitime factis exprimere præstareque. Quod studium, qui conatus, etsi ad plenum nunquam solutatur, propter carnis ingenium uel imbecillitatem humanam manentem in nobis ad extrema usque fata, Deo tamen ex gratia approbatur, sed duntaxat propter Christum: nec quisquam piorum confidit in hanc alteram impletionem, sed in priorem tantum, utpote solam perfectam. Exclamans enim Apostolus ad Rom. Miser ego homo, inquit, quis me eripiet ex hoc corpore morti obnoxio? Mox tamen respondet, Gratias ago Deo, nimirum quod a morte me redemit, per Iesum Christum Dominum nostrum. Itaque idem ego mente quidem seruius legi Dei, carne uerō legi peccati. Nulla igitur nunc est condem-

Seruantibus legem promittitur uita.

Quomodo seruamus legem?

Quomodo seruamus legem?

natio his qui insiti sunt in Christo Iesu, qui non secundum carnem uersantur, sed secundum spiritum, &c. Ergo quia in Christo sumus, in gratia sumus, ideoque placent Deo nostra opera, quæ ex fide & ex liberali spiritu donata nobis, denique ex pectore amante Deum proficiunt. Ioannes enim dixit, Hæc est charitas Dei, ut præcepta eius seruemus. Et præcepta eius grauiæ non sunt. Rationem quoque huius subiungit, Quoniam omne quod natum est ex Deo, uincit mundum. Natus est autem ex Deo quicumque credit: sicuti declaratur Ioan. cap. 1.

*Præcepta Dei
nō sunt grauiæ.* Ex quibus facile erit conciliare locos inter se in speciem discrepantes. Præcepta Dei grauiæ sunt, quæ neque nos neque patres nostri portare potuimus. Et, Præcepta Dei grauiæ non sunt. Nam grauiæ non sunt fidelibus insitis in Christo, & donatis spiritu Dei, hoc est, reconciliatis Deo per Christum. Sine Christo & fide in Christum quibusuis grauißima sunt. Ita fidelis sua sponte per spiritum Dei incitatus benefacit omnibus hominibus, quantum ipsius quidem permittit facultas, nocet nemini: non quia metuit poenas destinatas in lege inobedientibus, iniustis & uolentibus, sed quia amat Deum. Sic implet etiam legem iudicalem.

*De Abrogatione
legis Dei.* Hic sat scio obiicis mihi, Si impletur lex, & locum habet apud sanctos & fideles, quid obsecro opus fuit legis abrogatione? quid necesse erat tam multis disputare Paulum & optimos quosque theologos de Abrogatione legis? Dicam ergo paulula & de Abrogatione legis, ac primum quidem in genere, deinde uerò per partes siue in specie. Ante omnia autem inculpanda erunt animo pio hæc Domini uerba ex Euangelio, Ne existimetis, inquit, quod uenerim ad destruendam legem aut prophetas: imò non ueni ut destruam, sed ut cōpleam. Amen quippe dico uobis, donec prætereat cælum & terra, iota unum aut apex non præterierit ex lege, quoad omnia facta fuerint. Quisquis ergo soluerit unum ex mandatis hisce minimis, & docuerit sic homines, minimus uocabitur in regno cælorum. Quisquis autem fecerit & docuerit, hic magnus uocabitur in regno cælorum. Teneat ergo quisque firmissimo animo, legem Dei, quæ est optima & perfectissima Dei uoluntas, esse æternam, neque dissolui posse ullis unquam temporibus, ab ullis uel angelis uel hominibus. Teneat quisque legem quatenus est regula recte & bene uiuendi, quatenus est frenum quo in timore Dei retinemur, quatenus est stimulus datus ignauia carnis nostræ, item quatenus data est ad instituendum, corrigendum & redarguendum homines, eatenus uidelicet manere intactam, suamque utilitatem habere uel hodie in ecclesia Dei: & proinde negotium abrogationis legis ita habet.

Diximus præcepta Dei totum requirere hominem & perfectionem planè diuinam, quam nisi quis præstiterit, eum maledici & condemnari à lege. Nemo autem hominum eam præstat iustitiam. Omnes ergo maledicti sumus per legem. Catectum hæc maledictio sublata est, & confertur nobis perfectissima iustitia gratis per Christum. Nam Christus redemit nos ab execratione legis, dum factus est pro nobis maledictio, iustitia & sanctificatio. Hæc uerò ratione lex abrogata est, id est, execratio legis fidelibus per Christum sublata & iustitia nobis uera collata est. Ipse enim est benedictum illud semen, in quo benedicuntur omnes cognationes terræ. Ipse est iustitia nostra. Nam Paulus, Ab omnibus, inquit, à quibus non potuistis per legem Moïsis iustificari: per hunc omnis qui credit iustificatur. Ponitur ergo lex pro maledictione legis. Vel lex Dei id appellatur quod lege prodit & manifestatur, quod est peccatum. Per legem enim agnoscitur peccatum. Idcirco abrogatur lex, id est, peccatum tollitur, non ut non sit, aut nō exerat suas uires in nobis, sed ne imputetur nobis & nos condemnet. Nulla enim condemnatio inest ijs, qui insiti sunt in Christo Iesu. Præterea usurpatur lex pro ultione & poena, quæ

quæ secundum legem irrogatur transgressoribus. Abrogata est ergo lex, quia pœna sublata est credentibus. Nam lex iusto non est posita; Nam liberauit Christus fideles à supplicijs æternis, dum innoxius afflictus est pro sceleratis. Deinde Apostolus, Affectus carnis, inquit, inimicitia est aduersus Deū. Nam legi Dei non subditur, imò ne potest quidē. Hoc autem odium diuinæ legis eximitur per fidem ex animis piorum, inseritur autem amor diuinæ uoluntatis: ut etiam iuxta hanc rationem dicatur abrogata lex, quia legis odium est sublatum. Ideoq; Apostolus cōfert eos qui sub lege sunt seruis, liberatos à lege liberis siue filijs; quibus etiam tribuit spiritum, non seruitutis, sed adoptionis. Quoniam enim estis filij, ait, emisit Deus spiritum filij sui in corda uestra clamantem, Abba, pater, &c. His accedit quòd lex Dei typos habet & umbras, & quòd ceremoniæ satis alioqui onerosæ sunt, sicuti & tota lex iugum nominatur. Venit autē in hunc mundum Dei filius, & implens figuras, ipsam nobis ueritatem præstitit, umbras illas pepulit: ut iam nemo possit nos iudicare propter neglectas aut omīssas ceremonias uel figuras; & ea quidem ratione abrogata est rursus lex Dei, hoc est, genus illud regiminis, quod à Mose institutū est, ueniente Christo & docentibus Apostolis disparuit. Hi enim citra Moysi œconomiam ecclesiasticam, collegerunt ecclesias, nec genus illud regiminis ecclesiæ tradiderunt. Constanter enim neglexerunt cum sacerdotio Aaronico, sacramenta, sacrificia, delectus insuper dierum, uestium & ciborum à Mose institutos. Pro his omnibus unum prædicarunt Christum, & pauca sacramenta, &c.

Hæc in genere & breuiter quidem dixi hætenus de abrogata lege, iam idem negotij paulò fusius per partes atque species explicabo. Lex Dei tota diuiditur in *Moralia non abrogata sunt* Moralem, Ceremonialem & Iudicialem. Moralis autem continetur decalogo, cuius præceptum primum docet nos unum & solum Deum uenerari & colere, nullos ei alienos coniungere. Hoc autem Dominus Iesus in Euangelio ita inculcauit, ut uideamus nihil in hoc esse mutatum. Secundum prohibet idololatriam, id est, cultum & uenerationem imaginum, uel Dei ipsius uel creaturarū. Atqui Apostoli idololatriam modis omnibus in doctrina Euangelica insectati sunt. Clamat cum Paulo Ioannes, Fugite idololatriā. Cumq; Christus & Apostoli diligentissimè docent diuini nominis sanctificationem & glorificationem, profectò ratum uolunt mandatum prohibens prophanationem diuini nominis. Solum mandatum quartum de sanctificando sabbato appellat S. Augustinus ceremoniale in uniuerso decalogo. Verum id non intelligendum est simpliciter. Quatenus enim tempus certum requirit exterior Dei cultus & sacrificia legis externa habet, ceremoniale est præceptum: quatenus uerò cultum Dei, cœtum sacrum, preces, prædicationē & usum sacramentorum, deniq; spiritualia sacrificia tradit, perpetuum est. Id quod in expositione sabbati ostendimus. Quintum mandatum de honorandis parentibus ipse Dominus Matth. 15. cap. reparat. Sicuti & sextum contra cades & septimum contra adulteria diligenter explicat Matth. cap. 5. Octauum cōtra furta promulgatum, renouatur ab Apostolo iubente ne quis fraudet in negotio fratrem, ne quis furetur amplius, sed quisque laboret manibus, ut & ipse habeat necessaria, & alijs possit necessaria suppeditare. Nonum præceptum de cohibenda lingua & non mentiando, dicendoue falso testimonio, Christus & Apostoli cōfirmant, quoties linguam coërcent & ueritatem præcipiunt. Iidem malas affectiones & cupiditates damnant, ergo etiam legem prohibentem concupiscentiam reparant, non abrogant. Tota ergo decalogi abrogatio in illis, de quibus iam ante diximus, consistit, quòd scilicet Christus in fide est perfecta iustitia nostra, &c. Rursus Apostolo testante dicenteq; quod lex præstare non poterat, eò quòd imbecillis esset per car-

nem, hoc Deus p̄prio filio mīſſo ſub ſpecie carnis peccatricis, praeſtitit, ac per peccatum condemnauit peccatum per carnem, ut iuſtificationis legis impleteretur in nobis, qui non ſecundum carnem uerſamur, ſed ſecundum ſp̄ritum. Id quod extat ad Rom. 8. Et breuius quidem de his diſſerimus, quòd in tractatione Decalogi omnia iſta plenius ſumus proſequuti.

*Ceremonialia
quatenus abro-
gata.*

Venio iam ad Ceremonialia. Hae data ſunt ad tempus uſq; correctionis, uidelicet donec ueniret Meſſias. Venit autem, ergo omnes ceremoniae ad aduentum, ad mortem, & reſurrectionem, adde & aſcenſionem in coelos Chriſti Domini noſtri, diſparuerunt, neq; ullum porro locum habent in eccleſia Chriſtianorū. Hic tamen neceſſario diſtinguimus inter ſcripta, & res ipſas ceremoniarum. Nam ſcripta de ceremonijs, à ſp̄ritu Dei edita, non ſunt ſublata & abrogata, ne legantur, retineantur aut uſurpentur in eccleſia. Id quod & Sermo. 2. Decad. 1. indicauimus. Poſſunt enim nos erudire in Chriſto Ieſu, dum uidemus quibus modis Chriſtus praedicatus & praefiguratus ſit ueteri eccleſiae. Certè Paulus ſignificantiffimè Chriſtum ex ceremonijs praedicauit, quod nemo negabit qui Epistolam eius ad Hebraeos diligenter legerit. Mirificè enim in ipſa Chriſtum cum omnibus ſuis donis proponit eccleſiae. Ergo poſſunt & debent in eccleſia legi ceremonialia, ita tamen ut in eis quaeratur & inuentus aptè praedicetur Chriſtus. Ideoq; dum Sermone 5. & 6. huius Decad. tractarem Ceremonialia, ſignificationum notas ipſis appoſui, ut uiam aperirem ſtudioſis ſcripturarum & diligentibus Chriſtum, ulterius in hac materia progrediendi. Res autem ceremoniales, cuiusmodi eſt ſacerdotium, locus, tempus, ſacrificium, & ſi quid aliud eſt huius generis, abrogatae ſunt, ut porro nec fiant nec locum habeant in eccleſia Chriſti. Praedixit hoc Ieremias in cap. 3. & dixit, In diebus illis, dicit Dominus, non dicent amplius Arca foederis Domini, neq; in cor ueniet, neq; eius recordabuntur, neq; inuiſent, neq; fiet ultra. Per Arcam uerò intellexit propheta etiam alia legalia, quae per aduentum Chriſti ſunt abolita. S. Paulus in Epistola ad Hebraeos ex promiſſione Domini apud Ieremiā promittentis ſe nouum teſtamentum conditurum, colligit, Per hoc quod dixit nouum, antiquauit prius. Porro quod antiquatur & ſeneſcit, in propinquo eſt ut euaneſcat. Idē Apoſtolus ad Ephēſios, Chriſtus eſt pax noſtra, inquit, qui fecit ex utriſq; unum, & interſtitium maceriae diruit, ſimultatem per carnem ſuam, legem mandatorum in decretis ſitam abrogans, ut duos conderet in ſemetipſo, in unum nouum hominem, faciens pacem. Ephēſ. 2. Diremit quidem Deus à Iudaeis gentes, dum illos ceu peculiarem populum ſibi delegit & conſecrauit, non uocatione duntaxat uerbi, ſed & ſacramentis. Nam praſcriptae ſunt, dataeque ceremoniae, quae tanquam intermedius paries inter Iudaeos & gentes, haereditatem Dei includerent: adeò ut in Ceremonijs eſſet diſcriminis profeſſio, ac Iudaeis ceu iuſtis haeredibus addiceretur haereditas repulſis Gentilibus. At Chriſtus uenit in mundum, hoc conſilio, ut ex utroq; populo unam conſtitueret eccleſiam, diruit ergo interpoſitum parietem, hoc eſt, decreta ceremonialia ſuſtulit è medio. Fecit enim hoc loco Chriſtus, quod ſolet princeps aliquis, qui ut diſſidentes populos in ſuam redigat ditionem ſeu poteſtatem, diuerſas teſſeras, priſtinae ſimultatis inſignia, tollit, ut animis ſint concordēs. Sic enim & Chriſtus ſuſtulit Circumſiſionē cum ſacrificijs & omnibus legalibus, ut fieret una ex Iudaeis & Gentibus eccleſia. Ad Coloff. cōparat Paulus ceremonias chirographo, quo Deus nos uelut obſtriſtos tenet, ne poſſimus reatum inficiari. Dicit autem per Chriſtum à reatu ſic liberatos, ut chirographum fuerit diſruptum. At chirographi ſciſſione liberatur & abſoluitur debitor. Ideoq; legimus in morte Domini Velum templi ab imo ſurſum uſque fuiſſe diſruptum, nimirum

*Ceremoniae me-
dii paries.*

*Ceremoniae chi-
rographum.*

nimirum ut toti populo pateret & peccata iam esse dimissa, & liberatum esse Dei populum ab omni onere legalium. Certè cum pergeret impius, pertinax & perfidus Iudæorum populus, in templo, post mortem Christi, ceremonias completas & abrogatas exercere, prorogare, & omnibus pietatis ergo obtrudere, Christus sedens ad dexteram patris, Romanorum principum opera dissipauit urbem penitus, & templum excidit funditus. Id quod ante Danielem, Balaam prædixerat. Neque hucusque per annos 1500. & amplius, ullus eis locus restaurandi templi uel urbis concessus est. Legimus apud Theodoretum & Ruffinum, Iudæos sub Imperatore Iuliano, maxima spe & præsumptione nouum templum molitos, fundamenta quæsiisse in loco templi olim à Vespasiani filio Tito combusti: uerum conatus impios Dominum nostrum, qui in Euangelio ex Daniele desolationem prædicarat & inter alia dixerat, Et Hierusalem calcabitur à Gentibus, donec impleantur tempora Gentium, potenter repressisse. Comportatis enim gypsi & calcis multis modiorum millibus, derepente irruens uenti impetus, ac turbo cum fragore & procellis disperisit uniuersam materiam. Obortus est præterea ingens terramotus, per quem totius penè ædificia loci complanabantur. Denique cum magna turba, quæ operi uidebatur insistere, ea nocte sub porticu uicina somnum caperet aut commaneret, delapsum repente ædificium unà cum tecto totum, oppressit qui sub illa manebant uniuersos. Luce uerò orta, concurrunt ad inquirendum eos, qui ruina fuerant oppressi: & cum ne illis quidem plagis à proposito suo auerterentur, emicans exiit è fossis fundamentis & è uicinis ædibus ubi seruabantur ferramenta & alia operi necessaria, formidabilis ignis, plurimosque opus urgentes inflammauit, alios uerò ad fugam compulit. Nam sapius ea die recurrit, tandemque pertinacis populi temeritate coercuit. Et ne hæc casu fieri crederentur, illa ipsa nocte præcedente similiter & sequente, conspectum fuit in cælo signum fulgidum crucis, & ipsorum uestes Iudæorum crucibus replebantur, non ijs tamen fulgidis, sed nigris, quæ nulla ui aut arte poterant dilui atque deleri. Inuiti ergo & coacti magnis terroribus & iudicijs flagrisque Christi Domini, re infecta & deserta domum fugiunt, confitentes illum quem maiores ipsorum crucifixissent Iesum Christum, Deum esse potentissimum, licet cum Pharaone, & Iuliano & potior Iudæorum turba, in perfidia & blasphemia contra Christum perseuerarent. Vtunque uerò isti in sua pergant pertinacia uel hodie, aperte tamē satis declarauit è cælo Dominus, se non amplius delectari legalibus, uel ceremonialibus, quandoquidē omnia illa instrumenta cultus sacri, denique ipsam sacri cultus officinam, templum uidelicet & Hierosolymorum urbem, solo æquauit. De Templo dixit in Euangelio discipulis cum admiratione templum comonstrantibus, Nonne uidetis hæc omnia? Amen dico uobis, non relinquetur hic lapis super lapidem. Idem plorans super malè gratam urbem, Non relinquent, ait, in te lapidem super lapidem, eò quod non cognoueris tempus uisitationis tuæ. Et hæc quidem omnia ad uerbum completa esse, locupletissimus & oculatus quidē testis est Iosephus libro de Bello Iudaico 7. cap. 18. Diximus autem modò nullum Iudæis locum iam inde à mille quingentis annis restaurandi templi concessum esse: unde nisi insanirent, colligerent missum esse in mundum Messiam, & hunc abrogasse ceremonialia omnia.

Nihil his patrocínatur quod per frequenter in lege Dei post descriptos ritus sic adiectum legimus, Ritu sempiterno custodietis illud. Nam sempiternum in hac causa significat diuturnum & quantum attinet homines immutabile. Grauibuscum enim poenis interminatis prohibuit Dominus, ne sacros ritus temeritas humana uel mutaret uel abrogaret. Interim quia ritus illos ad tempus correctionis insti-

*Vrbs & Temp-
plum excin-
duntur.*

*Daniel. 9.
Num. 24.*

*Ritus quomodo
sint perpe-
tui.*

tuit, non peccat Deus neque inconstantiae crimen incurrit, quando sic mutat quem admodum mutare decreuerat ab initio. Præterea cum nihil perit rei quæ per ritum est significata, umbra tantum & quod temporarium est cadit & disparet, certissimum est ritum illum in substantia sua manere sempiternum. Viuit totus homo in sempiternum: sed quæ tamen in ipso sunt temporalia seu corruptibilia, intereunt in morte, & abolentur in clarificatione.

*Sacerdotium
abrogatum.*

Cæterum ut omnia sint luce clariora, perstringemus speciatim per partes ceremonias illustriores. Abrogatum esse sacerdotium Aaronicum in uniuersum, id maximè arguit quod Apostolus ex Dauide profert, Iurauit Dominus, & non poenitebit eum, tu es sacerdos in æternum, secundum ordinem Melchizedek. Christus ergo unus & solus summus est sacerdos, & perpetuus quidem, immutabile, & quod successione ad alium transire non potest, sacerdotium habens. Iam enim stans ad dexteram patris in cælo, in templo uero, cuius adumbratio fuit Tabernaculum & templum Hierosolymitanum, intercedit pro nobis, omniaque sacerdotis munia obit. De quo fusissimè agit S. Christi Apostolus Paulus, in Epistola ad Hebræos. Hic Pontifex noster Christus cōsecrauit sibi in reges & sacerdotes omnes Christi fideles. Interim ministros ecclesiæ quoque ordinat, qui doctrina & exemplo erudiant ecclesiam, qui sacramenta administrent, non uetera illa, sed quæ in ueterum locum Dominus substituit. Quid uerò doceant, disertè ostendit. Vestes illas mysticas & sacerdotales, nec Apostolis commendauit, nec suæ reliquit ecclesiæ, sed sustulit e medio cum alijs decretis interstitium maceris appellatis. Iustitia & honestate uestiri uult pastores populi, cū Apostolo Paulo ipse Dominus: qui disertè ecclesiarum ministros remouit à dominio, & à negotiis secularibus. Idem eis uectigalia constituit, sed non legalia illa, uerum maximè conuenientia statui & conditioni cuiusque ecclesiæ.

*1. Corinth. 9.
Matth. 10.
Locus liber.*

Locum cultus & religionis liberum fecit Dominus, cum in Euangelio Ioannis dixit, Veniet hora & nunc est, quando ueri adoratores, non in monte hoc, nec Hierosolymis, adorabunt patrem, sed spiritu & ueritate. Nam & pater tales quærit qui adorent ipsum. Spiritus est Deus, & eos qui adorant ipsum, spiritu & ueritate oportet adorare. Dominum sequutus est in hoc dogmate Apostolus, qui dixit, Volo uiros orare in omni loco, sustollentes puras manus absque ira. Nec frustra, sicut modò commemorauimus, excindi funditus templum passus est Dominus, qui moriens disciderat uelum templi. Interim tamen non damnantur Cœtus ecclesiastici. De quibus dictum est cum exponerem mandatum, Sabbatum sanctifices. Tabernaculum certè & Templum typum prætulere ecclesiæ Dei catholicæ, extra quam nullæ preces nullæque oblationes Deo gratæ sunt. At extenditur ecclesia ad fines usque orbis. Sed non ideo omnes sunt in ecclesia qui sunt in orbe terrarum: in ecclesia sunt, qui in societate sunt Christi per fidem catholicam, & in comunione sanctorum per doctrinæ consensionem, per charitatem & sacramentorum (nisi magna prohibeat necessitas) participationem. In excelsis autem adolent & sacrificant, quicumque aliud sacrificium quam Christi, per alium preces suas Deo quam per Christum, & alium in orando & sacrificando modum tenent, quam uerbo pastoris in ecclesia est traditum. Iam uerò ecclesiæ Dei nulla porro opus est Arca, nulla Mensa, nullis propositionum panibus, nullo candelabro aureo, nulla ara uel thymiamatis uel holocaustorum, nullo labro æneo: unus enim Christus hæc omnia solus est catholicæ ecclesiæ, quæ in Christo spiritualiter & efficaciter hæc omnia habet, nec quicquam in alijs quærere potest, adeo ut si quem uideat hæc eadem aut alia huius generis reducere in ecclesiam, eum redarguat & excreetur. Quid

*Sacrificare in
excelsis.*

Quid enim uel umbris uel signis opus habet Ecclesia, quæ ipsa re, Christo uidelicet domino, fruitur per fidem? Præterea satis signorum habet Ecclesia, quæ à Christo accepit duo signa sacramentalia, omnia complectentia, quæ uetus Ecclesia habuit in uarijs & multis signis.

Porro tempus sacrum liberum quoque fecit qui in Euangelio dixit, Sabbatum propter hominem factum est, non homo propter sabbatum: itaque dominus est filius hominis etiam sabbati. Et Paulus Apostolus, Ne quis igitur uos iudicet, inquit, in cibo aut potu, aut in parte diei festi, aut nouilunij, aut sabbatorum, quæ sunt umbrarum futurarum, corpus autem Christi. De sabbato Christianorum dictum est in expositione præcepti quarti. Neomenias uero non celebrat Ecclesia Christi, quæ per Christum docta, non tantum principia mensium, sed totum annum totiusque anni prouentum, Solis, lunæ & stellarum splendorem, Deo tribuit creatori. Christiani præterea pascha suam celebrant, & spiritualiter magis quam corporaliter: ita & Pentecosten. Ut enim spiritum misit discipulis, ita eundem donat quotidie fidelibus. Semper autem hic classicum canunt ad pugnam. Concupiscit enim caro aduersus spiritum, & impetitur homo pius à mundo & principe huius seculi diabolo. Iam uero Expiationis festum semel in cruce peractum durat perpetuo: nec amplius hircu peccati amandant sancti. Semel enim uenit, & oblatus est dominus noster, qui sustulit omnia peccata totius mundi. Denique cum per quotidie meditentur se hic nullum habere locum manentem, sed futurum inquirere, non est quod semel in anno celebrent festum tabernaculorum. Ita non agnoscunt fideles ullum porro annum iubileum. Semel enim uenit Christus, & annum acceptum nobis annunciauit, Euangelium, quo prædicatur remissa esse nobis omnia peccata. Hæc enim ad hunc modum ipse declarat Christus dominus Luca cap. 4. ex 61. cap. Isaia. Ita uero tempus sacrum & dies festi abrogati sunt per Christum in Ecclesia: quæ interim non destituitur ulla re sancta & necessaria.

Sed quoniam hic annus, quo hæc primū excuduntur typis, quinquagesimus est supra millesimum & quingentesimum, & secundum traditionem Romanam nuncupatur iubilæus, ipsa me quasi necessitas adigit aliquid saltem per digressiunculam dicere de Romano iubilæo. Romanum non Christianum ea de causa uoco, quod modò ostendi, Christi Ecclesiam post redemptionem Christi per Euangelium annunciatam, nullum alium annum iubilæum agnoscere. In ueteri anno iubilæo consideratur litera & spiritus. Iuxta literam concedebatur seruis libertas, reddebaturque patria, quæ uel mutata uel adempta fuerat iustis hæredibus, possessio. Is ritus ut citra rerum omnium conturbationem omnibus regnis hodie obtrudi non posset, ita oppressos non admodum curant beatissimi patres, qui iubilæum ut opibus suis plurimum accedat inuenerunt, & stulto mundo prædicant. Spiritus uero iubilæi ueteris, Christum & gratuitam eius remissionem omnium peccatorum, fide percipiendam commendat. Hæc autem gratia non potest citra contumeliam Christi aliter prædicari quam annuntiata est per Euangelium. Idcirco caruit Ecclesia anno iubilæo annis à Christo mille trecentis. Postea demum emerfit Bonifacius eius nominis 8. Roman. Pont. cuius nomine & Sextus Decret. prodijt, qui primus impiissimum hoc institutum inuenit. Nam Platina in uita eius, Iubilæum hic retulit, inquit anno 1300. quo plenam delictorum omnium remissionem his præstabat, qui limina Apostolorum uisitassent. Idem etiam centesimo quoque anno obseruari mandauit. Caruit ergo iubilæo hoc Ecclesia citra salutis iacturam annis 1300. Possumus ergo & nos illo citra detrimentum, imò magno cum emolumento nostro carere. Nam si isti perrexerint hunc obtrudere tanquam necessariū ad salutem, damnabunt uniuers-

Tempus liberum.

Iubilæus Romanus.

saalem Ecclesiam quæ primum præcessit iubileum. Caterum non tantum illo care-
re possumus, sed modis omnibus execrari debemus, ueluti impium & blasphemum
institutum, qui credimus iubileum omnino abrogatum esse per Christum, præ-
terea credentibus, ubicunq; in mundo uersentur, propter Christum condonari
gratis omnia peccata. Hic Bonifacius & suæ mendacissimæ promissioni & loco
impurissimo affigit peccatorum remissionem. Dubito autem si quid potuerit per
hunc fieri aliud horrendum & execrandum magis. Polluitur enim hic gloria uni-
geniti filij Dei, unici saluatoris mundi. Polluitur hic salus multarum animarum,
pro quibus mortuus est Christus. Polluitur gloria fidei Christianæ, per quam so-
lam efficimur salutis æternæ consortes. Sceleratissimus alioqui fuit Pontifex, de
quo tritum illud fertur, Intrauit ut uulpes, regnauit ut leo, moritur sicut canis.
Equidem merebatur institutio blasphema talem habere authorem. Merebatur &
populus stultus talem habere pastorem. Scribit enim Platina, eo anno tantam ue-
nisse hominum multitudinem Romam, ut uix incedere per urbem, quamuis am-
plissimam licuerit. Mundus enim uult decipi. Alioqui audiret dominum claman-
tem, O uos omnes qui sititis, uenite ad aquas, & quibus non est pecunia adeste.
Cur expenditis pecunias pro re nihili? &c. Isaia 55. & Ioan. 4. 7. Nec interim infa-
niente sic mundo dormiuit iustus Deus, dissimulans quantopere sibi hoc displi-
ceat factum. Nam hoc eodem anno excitauit Othomanum Turcici imperij pa-
triarcham & caput, quo egregie flagellat & Romanam Ecclesiam, & corruptos
Christianorum mores. Secuti sunt post annos aliquot Clemens 6. Paulus 2. & Si-
xtus 4. homines pessimi, sicut ipsorum historia testantur, qui mutarunt annum
centessimum in 50. & postremo in 25. quò uidelicet plus lucri caperent ex homi-
num stultitia. Sed redimus.

*Sacramenta et
sacrificia abro-
gata.*

Sacramenta quoq; ueterum planè sunt abrogata, & in eorum locum substitu-
ta populo noui testamenti noua. In Circumcisionis locum subiit Baptismus. Apo-
stoli in Concilio Hierosolymitano contendentibus, Circumcisionem necessariam
esse ad salutem sese opposuerunt, & Pauli dogma diuersum statuentis approba-
runt. Hic alibi, Ecce ego Paulus dico uobis ait, Quòd si circumcidamini, Christus
nihil uobis proderit. Contestor autem omnem hominem qui circumciditur, quòd
debitor est totius legis seruandæ. Christus uobis factus est otiosus: quicunq; per
legem iustificamini, à gratia excidistis. Neq; uerò æquum ac conueniens est ma-
nere in Ecclesia Christi signum sanguinolentum, qualis erat circūcisio, postquam
effusus erat in cruce sanguis ille, qui omnem sanguinem ueteris testamenti sistit
& tollit. In locum agni paschalis subiit Cœna domini, quæ & eucharistia appella-
tur. Sic enim Dominus apud Lucam exponit edere se iam pascha ultimum cum
discipulis, ubi etiam protinus instituit Sacramentum corporis & sanguinis sui,
quod celebrare iubet usq; dum redeat in iudicium. Cœnam ergo reliquit Ecclesiæ
dominus. sacramentum immutabile ad finem usq; mundi. Porro sacrificia omnis
generis legalia, esse antiquata, nemo negauerit qui saltem cogitarit & templum &
aram utranq; funditus esse cum instrumentis sacris excisa atq; dissipata. Diximus
illa fuisse commemorationes peccatorum, & expiationis futuræ typos siue figu-
ras. Vbi ergo uenit Christus & oblatus est pro peccatis totius mundi, certè finem
assecuta sunt suum omnia ueterum sacrificia. Nam ubi est plenaria omnium pec-
catorum remissio, ibi nullum est amplius sacrificium pro peccato. In nouo testa-
mento est omnium peccatorum plenaria remissio; ergo in nouo testamento nulla
est amplius oblatio pro peccato. Christus enim unus & solus est uice omnium sa-
crificiorum. Nam ipse semel oblatus est, & amplius non offertur. Vnica autem
oblatione

oblatione sui inuenit æternam redemptionem: ut quotquot sanctificentur non alia quàm semel facta in cruce Christi oblatione sanctificentur. Proinde Christus in cruce semel oblatus pro peccatis totius mundi, est holocaustum Ecclesiæ catholicæ: idem est oblatio cibaria, cibans nos carne in cruce oblata, si fide percipiatur à nobis, ad uitam æternam. Idem est libamen Ecclesiæ, qui sanguine suo potat fideles ad uitam æternam. Idem est piaculare & iuge sacrificium Ecclesiæ: quia ipse est agnus Dei qui tollit peccatum mundi. Ipsius passio & mors omnia expurgat uitia mortalium, omnes errores, omnia scelera. Idem est gratulatorium Ecclesiæ sacrificium: quia per Christum offerimus laudes Deo, & gratias agimus per Christum Deo patri. Breuiter, Vnica domini Cœna, quam appellamus eucharistiam, omnia in se continet sacrificiorum genera, quorum in summa duo sunt, nempe expiatorium, quod uidelicet offertur pro peccato, & Eucharisticū, quod gratias agit Deo & laudes offert. Cœna uerò est testimonium & sacramentum adeoq; memoria corporis Christi traditi, & sanguinis eius effusi pro nobis in remissionem peccatorum. Neq; enim corpus & sanguis domini, quæ non nisi semel in cruce oblata sunt pro peccatis, & amplius offerri nec possunt nec debent ab hominibus, iterum sacrificantur in celebratione Cœnæ: sed eius rei, oblationis inquam, quæ semel facta est & sufficit, peragitur frequens memoria. Rursus in Cœna agimus gratias pro redēptione nostra, & laudes offert Deo uniuersa Ecclesia. Proinde Cœna domini iam totum hoc comprehendit, quod figurarunt omnia ueterum sacrificia: ut Ecclesia hac parte non destituatur ulla re necessaria & bona, licet non habeat amplius ueterum sacrificia. Imò non debent illa porro celebrari in Ecclesia, quippe cum fuerint uenturi Christi figuræ, notæ & sacramenta, Ecclesia autem hodie credat, & rectè quidem credat uenisse Christum, & impleuisse absoluisseq; omnia, sicut ipse testatus legitur clamando in cruce, Consummatum est.

*Cœna domini
uice omnium sa-
crificiorum.*

Iam etiam uota disparuerunt omnia, quia sacrificia sublata sunt. Ita Nazaræorum disciplina abrogata est, quia templum cecidit unà cum suis ceremonijs. Disciplina quidem Christiana & moderata, manet in Ecclesia, sed non legalis illa. Ac sancti uota Deo præstant, quæ nō contra fidem & pietatem in Ecclesia uouerunt. Sunt autem in uouendo parci, cauti & ualde religiosi. Quid enim habemus quod reddamus Deo, quod non prius ab eodem acceperimus, & ad quod præstandum non prius in baptismo simus obligati?

Vota abrogata.

Mundum & immundum non eo modo distinguit Christus quo lex, Quicquid ingreditur in os, inquit, non contaminat hominem, sed quod egreditur ex ore. Et Apostolus dicit apertè, mundis munda esse omnia. Cuius generis plurima cōmemorat ad Rom. 14. & aliàs. In epistola ad Coloss. dicit idem, Si mortui estis cum Christo ab elementis mundi, quid quasi uiuentes in mūdo decretis tenemini? Ne tetigeris, ne gustaris, neq; contrectaris, quæ omnia ipso pereunt abusu. Et cætera. Audit etiam S. Petrus, Quod Deus sanctificauit, tu ne dixeris immundum. Ergo quod sanguis & suffocatum prohibetur & remouetur è cibo hominum in synodali epistola, edita ab Apostolis Actorum 15. cap. nō perpetuum fuit mandatum, sed temporarium. Vouerunt enim Apostoli id dari Iudaicæ genti aliàs pertinaci, ex charitate. Audiebant quotidie lectionē legis, quæ cum tanta obtestatione prohibeat esum sanguinis & suffocati, ac non ita pridem cœpisset Euangelij prædicatio feri inter Iudæos, non potuerunt non grauiter offendi, cum uiderunt Gentes tam procaciter uti prohibitis illis. Ad tempus ergo abstinere uoluerunt gentes à re maxime licita, si uel ea ratione lucrari uiceret Iudæos. Nam epistolæ Pauli scriptæ post annos aliquot à concilio illo Hierosolymitano, satis arguunt decretum

*Delectus cibo-
rum abrogatus.*

*Sanguis & suf-
focatum prohi-
bita ab Apo-
stolis.*

illud contra sanguinem & suffocatum non fuisse perpetuum. Decreta uerò contra idolothyta & fornicationem (quibus se gentes non admodum peccare arbitrabantur) pronuntiata, perpetua sunt, quia moralia sunt, siue è numero legum primarum atq; decalogi. Sed ea de re disputauimus aliàs.

Decretum concilij Hierosolymitani.

Et quoniam incidimus in mentionem decreti Synodalis constituti ab Apostolis & senioribus Concilij Hierosolymitani, placet hic auctarij & coronidis loco recitare C. V. totam synodalem Epistolam, quòd ea apertum, plenum, & summarium ferat testimonium legis, ad eum quem diximus modum abrogatæ. Sic habet epistola siue Decretum, Apostoli & presbyteri & fratres, his qui sunt Antiochiæ & in Syria, & in Cilicia fratribus, qui sunt ex Gentibus, Salutem. Quoniam audiimus, quòd quidam è nobis egressi, turbauerunt uos uerbis, labefactantes animas uestras, iubentes uos circuncidi & seruare legem, quibus non mandaueramus; uisum est nobis unanimiter congregatis, dilectos uiros mittere ad uos, cum dilectis nostris Barnaba & Paulo, hominibus qui exposuerunt animas suas pro nomine domini Iesu Christi. Misimus ergo Iudam & Silam, qui & ipsi uerbis uobis referant eadem. Visum est enim spiritui sancto ac nobis, ne quid amplius imposeremus uobis oneris, quàm hæc necessaria, uidelicet ut abstineatis ab his quæ sunt immolata simulachris, & sanguine, & suffocato, & scortatione: à quibus si conseruaueritis uos ipsos, bene facietis, Valete. Hæc est ad uerbum catholica, synodica, Apostolica, & Ecclesiastica Hierosolymitani Concilij epistola, breuis quidem illa & dilucidata: quia ut ueritatis oratio simplex est, sic uera religio & fides Christiana paucis & clarissimis uerbis exponi potest.

Pseudoapostolorum doctrina.

Principio post solitam subscriptionem & inscriptionem epistolarem, protinus perstringunt pseudoapostolos, quibus cum Paulo & Barnabæ intercesserat disceptatio, ac attingunt quale nam fuerit pseudoapostolorum doctrinæ genus, quod hætenus proposuerant Ecclesijs, ceu catholicum, orthodoxum, & Apostolicum, oportere uidelicet eos qui salui esse uelint, circuncidi & seruare legem Moysi. Neque enim existimauerunt fidem in Christum sine legis adminiculo ad iustificationem plenam sufficere. Illi ipsi iactabāt se missos ex urbe sancta ab Apostolis & discipulis domini, qui omnes concorditer sic doceant, solum Paulum cum suo Barnaba peculiare quoddam dogma ferere in Ecclesijs de fide iustificante absque operibus legis. Proinde mox ab initio quid de huiusmodi doctoribus & doctrina eorum sentiant proferunt, Fatemur sanè istos ex urbe Hierosolymorum prodixisse, inquiunt, sed addimus, per nos non fuisse missos aut instructos. Nihil enim talibus mandaueramus. Ita falsum esse attestantur, quod isti docuerant, Apostolos & discipulos domini docere, legem requiri ad plenam iustificationem. Imò clarius exponunt qualis fuerit ac sit eorum doctrina, Turbauerunt uos uerbis, aiunt, labefactantes animas uestras, iubentes uos circuncidi & seruare legem. Doctrinæ ergo summa erat, nisi quis circuncideretur & seruaret legem, saluum fieri non posse. Attribuebant ergo salutem legis obseruationi, siue merito operum. Ceterum huic doctrinæ tribuunt apostoli effectum duplicem. Prior est, Turbant uos uerbis, Verba sunt inquiunt, quæ profundunt, quæ animum non componunt, sedant, consolantur aut pacificant, sed perturbant, ut quid tandem credendum sit, aut in quo acquiescendum, ignoretis: sed & inter uos lites, dissidia, & rixas excitant. Ad hæc Apostolorum uerba alluisse uidetur Paulus cum Galatis scripsit, Miror quòd à Christo, qui uocauit uos per gratiam, adeò citò transferamini in aliud euangelium, quod nō est aliud, nisi quòd quidam sunt qui turbant uos & uolunt inuerrere Euangelium Christi. Posterior est, Labefactant animas uestras. Nam qui

qui legi & operibus innituntur, nihil stabile & firmum in mentibus habent. Nam cum lex perfectissimam exigat iustitiam, & per illud occidat, quia talis in nobis non reperitur, labefactantur certè & subuertuntur mentes, quæ docentur inniti operibus legis, quam nemo sic præstat ut decebat. Paulus ergo ad Romanos, Si ñ qui ad legem pertinent, inquit, hæredes sunt, inanis facta est fides, & irrita facta est promissio. Nam lex iram operatur. Et mox, Idcirco ex fide datur hæreditas, ut secundum gratiam, ut firma sit promissio uniuerso semini, &c. Subuertebat ergo pseudoapostoli animas, docentes lege parari salutem. Quod certè graue iudicium est aduersus docentes cum illis similia.

Deinde pari libertate ex opposito pronunciant, quid sentiant de Paulo & Barnaba, imò legatos illos suos ornant sanctissimo testimonio & elogio, quò plus auctoritatis habeant apud omnes, & ut omnes intelligant pulcherrimum esse inter ipsos doctrinæ consensum, Vnanimiter congregati, inquit, mittimus ad uos legatos. En de pseudoapostolis testati sunt, quòd ipsos non miserint, quòd ipsis nihil mandarin: hos autem mittunt, & unanimes cum mandatis mittunt. Sed qui nam sunt illi? Dilecti nostri Barnabas & Paulus, qui animas suas exposuerunt pro nomine Iesu Christi. Hi inquam sunt Apostoli selectissimi & martyres cõstantissimi, gloriosissimiq; dilecti & fratres nostri, eiusdem nobiscum religionis & doctrinæ, qui quales sint uita & doctrina, non semel uirtutibus editis, & periculis susceptis intrepide, declarauerunt. Quoniam uerò Barnabas & Paulus non exigua erant portio istius cõtrouersia & disceptationis, coniuncti sunt eis duo alij selecti uiri, Iudas & Silas, in hoc ut uerbis referrent eadem, nimirum quæ hactenus recensita sunt de partibus utrisq; & copiosius exponerent uerbis, quæ iam subiiciuntur in decreto generali.

Pauli doctrina
probatur &
commendatur
ecclesijs.

Iam enim paucis uerbis ipsum decretum uniuersalis synodi comprehendunt, in quo exponendo primo loco authorem nominant decreti, dicentes, Visum est spiritui sancto ac nobis. Spiritum sanctum præponunt, se subiiciunt, illum designantes authorem ueri, se uerò instrumenta per quæ ille operetur. Nam ille per homines operatur in Ecclesia. Hominum uerò autoritas sine instinctu spiritus sancti nulla est. Significantissimè ergo dicunt, Visum est spiritui sancto & nobis. Id est, Posteaquam conuenimus nos in concilium, de negotio iustificationis & legis (in quo Paulus cum suis pugnauit aduersarijs) tractaturi, non nostrum sequuti sumus arbitrium, non nostras sententias protulimus, sed spiritus sancti doctrinam inquirentes audientesq; hæc ex ipso iam proferimus. Secundo loco ipsius decreti summam collocant, dicentes, Ne quid amplius imposeremus uobis oneris, quàm hæc necessaria, uidelicet ut abstinere ab his quæ sunt immolata simulachris, & sanguine & suffocato, & scortatione. Proinde sufficit, inquit, ad salutem consequendam doctrina euangelij, quam nobiscum hucusq; prædicauit Paulus. Nolumus post doctrinam Euangelij, & post illa paucula tria capita, quicquam uobis oneris amplius imponere. Qua sententia nimirum respexerunt ad sententiam S. Petri quam exprimere uoluerunt. Sic autem pronunciarat in Concilio S. Petrus, Vos scitis me uocatum cœlitus, profectum esse ad Gentes, & his annun-

Decretum syno-
dale exponi-
tur.

Acto. 16.

Iniquè ab homi-
nibus ceremo-
niae multae im-
positae sunt Ec-
clesiae Dei.

S. Iacobus ap-
probat senten-
tiam S. Petri.

Abstinendū san-
ctis à quibusdā.

quemadmodum & illi. En iugum & onus appellauit S. Petrus legem: unde apo-
stoli dicentes se nolle quid amplius oneris imponere Ecclesiae, significant legē pla-
nè esse abrogatam. Liberant ergo Ecclesiam à legis onere: liberāt praeerea ab om-
nibus oneribus legi similibus. Colligimus nos ex illis apostolorum uerbis, Cere-
monias illas onerosas multiplices & innumeras, quas accepit à Concilijs Ecclesia
post Apostolorum tempora, iniuste & contra spiritum Apostolicū & tunc im-
positas esse & hodie retineri atq; defendi. Dixerunt enim disertis uerbis, Visum est
spiritui sancto, & nobis, ne quid amplius imposeremus uobis oneris. Quod si ali-
quis obijciat propter ruditatē populi, ceremonias illas esse iniectas, ceu paedago-
giam, respondeo, Paedagogiam illam ē medio esse sublatam, quam qui uult redu-
cā, nihil aliud cupit reductum quā Iudaismum. Non ignorauit Deus qualis fu-
tura erat Ecclesia collecta ex Iudaeis & Gentibus, & tamē is ē medio sustulit cere-
monias. Quis uerò melius nouit quid expediat, uel non expediat Ecclesiae, quā
Deus? Proinde nō expedit, quod iste sustulit, rectissimeq; pronunciarūt Apostoli
dicētes, Visum est spiritui sancto & nobis, ne quid amplius imposeremus uobis
oneris. Pudeat ergo istos tantum imponere oneris Ecclesiae humeris liberrimis.

Verū iam subiungitur quod absoluat sententiam, Quā hāc necessaria, ui-
delicet ut abstineatis ab idolothytis, &c. Respexerunt autem hisce uerbis ad sen-
tentiam S. Iacobi Apostoli & fratris domini; hic enim cōfirmaturus & approbatu-
rus sententiam prolatā à S. Petro de iustificante fide, & nō imponenda lege Gen-
tilibus, profert testimoniū scripturā ex Amos, qui praedixit Iudaeos excindendos
fore propter peccata, & in locū eorum surrogandas gentes, quae uidelicet futurae
sint uera Dei Ecclesia, quae per Tabernaculū Dauidis collapsum & reparatū signi-
ficabatur. Idem propheta praedixit rationē certam, & modū propter quē recipien-
dā sint Gentes in Ecclesiā, non utiq; propter circumcisionem & per adminiculum
legis, sed ex gratia per fidem. Dicit enim propheta, Requirent qui reliqui sunt ho-
mines dominum, & omnes gentes super quas inuocatum est nomen meum, dicit
dominus qui facit haec omnia. Nota sunt à seculo Deo omnia haec opera sua. En re-
quirent dominum, & in eius consortium recipientur, super quos inuocatū est no-
men domini. Locutionis genus est, significās filios Dei futuros qui sunt electi. Nā
super eos inuocatur nomē Domini, qui nominātur filij Dei, & sunt electi Dei. Ac
uniuersa scriptura id fidei tribuit. Per fidē ergo efficimur membra Ecclesiae & filij
adeoq; & haeredes Dei. Si uerò aliquis obmurmurare Dei cōsilio pergat, & dicat,
Quare ita agit Deus? is cogitet hoc opus, Dei esse opus, cui nō liceat cōtradicere,
& cuius opera nota sunt ab exordio mundi, quod omnia facta sunt in iudicio &
iustitia: unde cōsequens est, iustū & bonum esse etiam hoc concilium, quo gentes
sibi per fidem in Christum citra legis obseruationē coniungit & beatificat. Ex his
autem prophetae uerbis (subscribens S. Iacobus sententiā S. Petri) colligit atq; in-
fert, Propter quod ego censeo non obturbandum esse illis, qui ex gentibus cōuer-
tuntur ad deum: id est, censeo non addendā esse illis ex lege molestiā, neq; ipsis ex-
hibendum negotium. Porro ne Gentes audientes sublatam esse legem, protinus
putarent sibi licere quiduis, & sua illa libertate abuterētur, praeterea & Iudaeos fra-
tres contra charitatem & contemnerent & scandalizarent, addit Iacobus, Sed scri-
bendum ad eos censeo ut abstineant ab inquinamentis simulachrorū. Erant enim
illis temporibus cōuersi ex gentibus, qui arbitrabantur licere ingredi templa ido-
lorum, & participare de sacrificijs idolo oblati: eò quod idolū nihil sit, cum dun-
taxat unus sit deus uerus: unde & sacrificia illa nihil esse, nihil prodesse aut obesse,
ideoq; & licita esse Christianis colligebant. At beatus Iacobus, sicut & S. Paulus

1. Cor. 8. 9. & 10. prorsus uult abstinere conuersos gentiles à cultura idolorum, hoc est, ab ipsis idolis, & ab ijs quæ immolata fuerunt in templis idolorum dijs falsis & fictis. Adiungit etiam aliud, Caueant sibi à scortatione. Adulteria, stupra uirginum & matronarum prohibuerunt quidem bonis legibus gentes, & supplicijs coercuerunt uiolentos illos constupratores, sed leue & quasi nullum existimabant delictum, si quis sua sponte prostituisset pudicitiam: aut si solutus cum soluta mutuum haberet commercium. Iacobus ergo Apostolus sicut & Paulus 1. Cor. 6. & 1. Theff. 4. seueriter requirit sanctum & purum corporis usum, alienum ab omni pollutione. Ac idem in tertio loco prohiberi uult suffocatum & sanguinem. Causam subiungit. Moses enim ab ætatibus antiquis in singulis ciuitatibus habet, qui ipsum prædicant in synagogis, ubi per omne sabbatum legitur. De qua constitutione iam dixi priusquam digrederer. Quæ cum ita habeant, apparet omnino illos iniquiores esse Iacobo Apostolo, qui putant illum hæc præter rationem & iniquius decreuisse aut proposuisse, esseque perniciosum fructum Concilij, & minime sanum, sed cum libertate Christiana pugnans consilium. Certum enim est illum aliud non uoluisse, quam Apostolum Paulum, qui tamè optimè & cum laude omnium dixit, Quæ pacis sunt sectemur, & quæ edificationis, alius erga alium. Ne tibi causa destruas opus Dei. Omnia quidem pura, sed malum est homini qui per offendiculum uescitur. Bonum est non edere carnes, neque bibere uinum, neque quicquam per quod frater tuus impingit aut offenditur aut infirmatur, &c. Rom. 14. Certum est & illud, S. Paulum acerrimum libertatis Euangelicæ propugnatorem, qui quondam Petro Antiochiæ palam & in faciem restitit, planè non fuisse in S. Iacobo dissimulaturum, si putasset hanc constitutionem libertati Christianæ esse aut fore aduersam. Certè idem ille nec prædicasset neque cõmendasset hanc Apostolorum traditionem ecclesijs, nisi credidisset eam omnibus esse salutarem. Prædicauit autem & commendauit ecclesijs, ut extat Act. 16. cap. Ideò præter rationem propter suffocatum & sanguinem prohibitum, malè audit à nonnullis S. Iacobus.

S. Iacobus de
sensu.

Postremò concludunt Epistolam, & scribunt, A quibus si conseruaueritis uos ipsos, bene facietis. Valete. Laudant abstinentiam illam & prædicant tanquam opus bonum, quia eadem illa commendatur nobis in tota scriptura. Illa uerò per digressionem, non alienam opinor ab instituto nostro, attulimus hactenus super decreto Apostolorum. Et hæc quidem hucusque de Abrogatione legum ceremonialium.

Restat ut nonnihil dicamus etiam de iudicialium legum abrogatione. Hæ uerò hac ratione uidentur abrogatæ, quòd nulla respublica Christiana, nulla ciuitas, regnum nullum, cogitur alligatum esse & recipere illas leges, quæ à Mose pro illa gente, pro loco & tempore, & rerum qualitate tunc quidè promulgatæ sunt. Proinde conceditur libertas utendi legibus, pro cuiuslibet loci, temporis & personarum exigentia adaptatis. Ita tamen ut substantia legum diuinarum non calcetur, abijciatur, aut negligatur. Quæ enim congruunt cum lege naturæ & decalogo, & quæ Deus semper & apud omnes gentes punire iussit, ea minime sunt negligenda. Omnia autem ad illum uidentur destinanda esse finem, ut constet honestas, pax & tranquillitas publica, ut ualeat iudicium & iustitia. De qua re cum copiosius disseruerim in explanatione præcepti, Non occides, paucissimis hinc ero contentus.

De abrogatione
legum iudicialium.

D. Apostolus Paulus præcipit parere magistratui: approbat ius gladij, quod fatetur principes non frustra accepisse à Deo. Ergo nec electionem magistratus, neque administrationem gladij, aut executionem iudicij & iustitiæ, imò ne leges quidem ciuiles æquas improbauit.

Quòd si quis conferat leges uel constitutiones principum, regum uel impera-

torum uel magistratuum Christianorum ex ipso Codice, ex lib. Digestorum seu Pandectarum, atque ex Nouellarum constitutionum opere, aut ex alijs uariarum Gentium legum bonarum libris, cum hisce iudicialibus Dei legibus, fateatur oportet magnam esse omnium istarum similitudinem atque conuenientiam. Iustinianus Imp. prohibet, ne res Deo consecratę alienentur ab ecclesia. De Fide catholica syncre confitenda, & pure conseruanda, elegantissimam & sanctissimam legem tulere Imp. Gratia. Valent. & Theod. Constantinus magnus Tauro P. P. pręcipit ut gentium templa claudat, referantes autem & sacrificantes gladio sternat. Pauperibus prospectum fuisse legibus etiam cura regum & principum, non unus tantummodo locus in legibus Cæs. ostendit. Certę Cod. lib. 1. Tit. 2. plura eius rei argumenta inueneris. Iam uerò de honeste educandis liberis, & benigne alendis parentibus extant ethnicorum non damnabiles leges. De patria potestate multa sunt conscripta; ita de Coniugio, nempe de Incestis & inutilibus nuptijs non intolerandas leges promulgauerunt cum Arcadio & Honorio principes etiam multi alij; qui & de repudijs diuortioque scite pręceperunt. Quod si perrexero ex legibus principum Christianorum singulis capitibus in Sermonē de iudicialibus legibus annotatis, singulas leges opponere uel coniungere, molestissimus fuero C. V. Nam extendet se Sermo hic in immensum. Ergo satis nobis fuerit, his quasi notis & uestigijs indicatis, diligentioribus uiam aperuisse aut ostendisse, qua perueniant ad alia quoque quę nos hic non adduximus, tenereque in pręsentiarum substantiam legum iudicialium Dei, non esse sublatam aut antiquatam, modum autem limitatio nemque in libertate & arbitrio optimorum principum esse constituta, ut hi quod æquum & iustum est ordinent pro loci, temporis, & personarum exigentia, ita ut honestas & pax publica conseruetur in gente quauis, honoreturque Deus pater per unigenitum filium benedictum in secula. Videmus enim Apostolos Christi nulli genti negotium fecisse, aut postulasse ut in rebus politicis Mosis leges recipiant. Hoc ipsum decet omnibus conseruare temporibus. Beatus Petrus simpliciter pręcipiens dicit, Subditi estote cuius humanę creaturę propter Dominum, siue regi, tanquam pręcellenti, siue pręsidibus ut qui per eum mittantur, ad uindictam quidem nocentium, laudem uerò rectę agentium. Idem tamen Apostolus censet, Deo magis obediendum esse quam hominibus, cum uidelicet homines, leges contra religionem ueram, æquum & iustum promulgant. De qua re dictum est cum exponeremus locum de Magistratu. Tantum uerò dixi de Abrogatione legum Dei iudicialium.

De similitudine & differentia ueteris & noui testamenti & populi.

Si uerò ea quę hucusque protuli in medium de lege Dei, de partibus legis, de usu seu effectū, de impletionē & abrogatione eiusdem, diligenter quisque apud se expendit, haud operiosi fuerit operis constituere, quid sentiat de ultimo illo capite, quo de ultimū me in principio huius Sermonis dicturum pollicitus sum, ostensurum uidelicet unicum esse testamentum ueteris & nouę ecclesię Dei, & unicam esse rationem salutis uerę omnium quicunque saluati sunt & saluantur in hoc seculo, & quid differat nouum testamentum à ueteri. Cum enim apertissime ostenderim, omnia legis in Christum respicere & hunc patribus propositum esse saluatorem, in quo solo saluati sint, quis non uideat eandem fuisse illis salutis rationem quę hodie nobis est? Quò tamen omnia sint euidentiora, non grauabor rem illam, licet abunde satis hucusque declaratam, nihilominus maxime uulgari demonstratione omnium subiicere oculis.

Eandem ecclesiam, idem testamentum, esse, ueteri et nostro.

Idem certę populus, idem testamentum, eadem ecclesia, eademque salutis ratio illis est, apud quos eadem inuenitur doctrina, eadem fides, idem spiritus, eadem spes,

spes, hæreditas, & expectatio, eadem inuocatio, & eadem sacramenta. Si ergo ostendero ueteres commemorata illa omnia nobiscum communia habuisse, euici haud dubiè unicum modò, quod substantiam attinet, fuisse & esse testamentum, eundem ueteres nobiscum esse populum, in eadem ecclesia & societate agentem, neq; in alio quàm solo Christo Dei filio seruatum.

Eandem illis & nobis doctrinam fuisse & esse sic ostendo. Nostra quidem doctrina, Euangelij doctrina est. Atqui illa non caruisse ueteres, testis est Apostolus, dicens, Euangelium Dei, ante quidē promisit Deus per prophetas suos in scripturis sanctis, de filio suo, qui genitus fuit ex semine Dauid secundum carnē, qui declaratus fuit filius Dei cum potentia, &c. Quid poterat dici clarius? Euangelium quod prædicatur ecclesiæ, quondam per prophetas in scripturis sanctis promissum fuit, nempe uenturum in mundum filiū Dei, qui saluos faciat credentes. Præterea docet hoc Euangelium, non per opera legis, sed gratis per fidē iustificari credentes. Verum S. Paulus, Ex operibus legis, inquit non iustificabitur omnis caro in conspectu eius. Per legem enim agnitio peccati. Nunc uerò absque lege iustitia Dei manifestata est, dum comprobatur testimonio legis & prophetarū: iustitia uerò Dei per fidem Iesu Christi, in omnes, & super omnes, qui credunt. Succinit S. Paulo D. Petrus, dicens in Concilio Hierosolymitano, neq; nos, neq; patres nostros iugum legis portare potuisse, credere autem nos perinde ut illos, per gratiam Domini Iesu, saluos futuros. In reliquis substantialibus nihil discrepat doctrina.

Eadem doctrina ueteribus & nobis.

Quorum uerò eadem est doctrina, eorum nequit esse fides diuersa. Fides enim ex auditu, auditus autem per uerbum Dei. Quid quòd patres nostri Abraham & reliqui statuuntur nobis exempla fidei? Videre id licet in sacrosancto Domini Euangelio, & in Apostolorum literis. Quis uerò statuatur aliena exempla quæ imitemur? Paulus pluribus in locis, præsertim ad Rom. 4. cap. ostendit fidem nobis imputandam ad iustitiam, sicut ea legitur Abraham imputata fuisse; & fides quidem, non diuersa, sed ea quæ cum nostra innititur in promissionem Dei, ac in semen benedictum. Appellat enim illum patrem, non eorum duntaxat, qui genus ducunt ex circumciso, sed eorum quoq; qui ingrederentur uestigijs fidei, quæ fuit in præputio Abraham. His accedit quòd confirmatio regulæ Christianæ, quam alias appellamus Symbolum Apostolorum, aut Fidei articulos, ex scripturis patrum ueteris testamenti petitur. Quod sanè eiusdem nobiscum fidei clarissimum est testimonium Crediderunt isti in uenturum Messiam, quem nos uenisse credimus: qui etiam singula plenius & exactius perspicimus: sicuti mox dicemus, ubi uidelicet uentum fuerit ad declarationem discriminis utriusq; testamenti.

Eadem fides ueteribus & nobis.

De spiritu uerò uno atq; eodem gubernante patres nostros & noui testamenti populum, quis dubitet, postquam unus duntaxat Dei spiritus est, ac disertis uerbis S. Petrus testatur in prophetis fuisse spiritum Christi? Sed & S. Paulus, Cum habeamus, inquit, eundem spiritum fidei, iuxta illud quod scriptum est, Credidi & ideò loquutus sum, & nos credimus, quapropter & loquimur. Ergo quamuis idem ille Apostolus alibi dicat, fideles non accepisse spiritum seruitutis iterum ad timorem, sed spiritum adoptionis, per quem clament Abba pater: non negat tamen ueteres fideles habuisse eundem spiritum. Clamarunt enim & illi ad Deum tanquam patrem, quanquam id non ex lege (quæ terret) sint consequuti, sed ex gratia Messiae. Rursus idem Apostolus, Quicumq; spiritu Dei ducuntur, ait, hi sunt filij Dei. Conuertitur autē hoc ipsum, ut filij Dei ducantur à spiritu Dei. Cæterum filios dei fuisse ueteres, ac ab ipso Deo & Mose sic appellatos, nemo negauerit, nisi qui scripturas nunquam legit. Quid quòd patres nostri appellati sunt reges & sa-

Idem spiritus ueteribus & nobis.

Exodi 4. Deut. 14.

cērdotes, adeoq; regale sacerdotium, & sacerdotale regnum? Quod S. Petrus ac commodauit & Christi fidelibus. Nequit autem regnum & sacerdotium tale sine unctione spiritus constare. Dixit quidem in Euangelio suo beatus Ioannes Apostolus, Nondum erat spiritus sanctus, quia Iesus nondum erat glorificatus. Sed quemadmodum non loquutus est de substantia spiritus sancti, quæ est essentia patris & filij coæterna, ita non negauit in uniuersum ueteres accepisse spiritum sanctum. Loquitur enim de excellenti dono, quod post ascensionem Domini effusum est in omnes gentes credulas. Sic enim ipse Ioannes sese interpretans, præmittit, Hoc dixit (Qui credit in me, flumina de uentre eius fluent aquæ uiuæ) de spiritu quem accepturi erant credentes in ipsum. Donum ergo spiritus eo tempore, cum hæc diceret Dominus, non ita erat uulgare, & tanta in omnes effusum copia, quanta effundebatur post clarificationem Christi in credentes. Ac reuera non potuissent patres nostri & sancti propheta tam disertè omnia Christi & ecclesiæ mysteria prædicere, quæ Euangelistæ & Apostoli completa esse testantur ad uerbum, nisi eodem illo spiritu fuissent gubernati propheta, quo postea instructi sunt Apostoli. Neque enim cogitare phas est, prophetas & patres nostros uerba non intellecta profudisse insanientium furientiumq; instar. Vidit Abraham diem Christi, & gauisus est, capiens uidelicet & sentiens ex spirituali illa sua uisione spirituales uoluptates. Toties uerò testatur Dauid sibi sacra & cœtus ecclesiasticos longè gratissimos fuisse: quod haud dubiè non propter externas ceremonias, sed propter Christum maxime, quem spiritu & fide contemplabatur in ceremonijs siue ritibus sacris, pronunciauit. Cumq; constet patres nostros gratia Dei esse iustificatos, claret iustificationem illam non perfectam esse sine spiritu Dei nostri: per quem & nostra hodie iustificatio perficitur. Gubernati sunt ergo eodem nobiscum spiritu. De his non aliter iudicauit S. Augustinus, cuius uerba C. V. ex secundo libro de Peccato orig. contra Pelag. & Celest. ex capite 25. uerbatim recitabo, Eodem spiritu fidei, inquit, à prophetis illa futura uidebantur, quæ à nobis facta creduntur. Neque enim qui nobis ista fidei dilectione prophetare potuerunt, eorum ipsi participes non fuerunt. Et unde est, quod dicit Apostolus Petrus, Quid tentatis Deū imponere iugum supra collum discipulorum, quod neque patres nostri, neq; nos potuimus portare: sed per gratiam Domini Iesu credimus salui fieri quemadmodum & illi: nisi quia & illi per gratiam Domini Iesu Christi salui facti sunt, non per legem Moysi, per quam non sanatio, sed cognitio est facta peccati? Nunc autem siue lege iustitia Dei manifestata est, testificata per legem & prophetas. Si ergo nunc manifestata est, etiam tunc erat, sed occulta, Cuius occultationem significabat templi uelum, quod est ad eius significandam reuelationem Christo moriente conscissum. Et tunc ergo ista gratia unius mediatoris Dei & hominum hominis Christi Iesu erat in populo Dei, sed tanquam in uellere pluuiæ, quam non debitam sed uoluntariam segregat Deus hereditati suæ, inerat latens: nunc autem uelut siccato illo uellere, hoc est, Iudaico populo reprobato, in omnibus gentibus, tanquam in area cernitur patens, Hæc ille.

Eadem ueteribus spes & hereditas quæ nobis.

Iam uerò proposita est Israeli felicitas carnalis siue temporaria, sed non sola. Nam in peritura & externa illa felicitate, adumbrata est ei cœlestis illa ac æterna. Ostendit enim Apostolus in quarto & 11. cap. ad Hebræos, patres ex uisibili & temporaria hereditate sperasse inuisibilem ac æternam. Nec aliū in finem tam diligenter ipsis Christus promissus est, & in ipso benedictio & uita proposita, omnibus quoque & singulis propè ceremonijs præfiguratus, quàm ut spem haberent uitæ, non alienæ aut diuersæ utique ab ea uita, in quam & nos per Christum recipimur.

recipimur. Dominus enim in Euangelio dicit nos cum Abraham, Isaac & Iacobo in regno cœlorum congregandos, utiq; in eandem gloriam. At obiicitur mihi promissam illis duntaxat non præstitam esse uitam & salutem, sed reclusos in carcerem expectasse aduentum Christi. Ego uerò non lego in sacris literis quicquam de Carcere, in quem fuerint sancti patres reclusi. Petrus quidem Carceris meminit, sed in ipsum collocat spiritus inobedientes, non obedientes. Quòd si quis obiiciat Christum descendisse ad inferos; non id quidem negamus, dicimus autem ipsum descendisse ad demortuos sanctos, id est, collectum esse ad cœtum beatorum spirituum, qui sanè cœtus non fuit in loco supplicij, id est, in tormentis, sed in cœlesti gaudio, confirmante hoc ipsum ipso ad inferos descendente Domino, ac dicente ad latronem, Hodie mecum eris in paradiso. Potest & multis alijs scripturæ locis demonstrari, ueteres ab Adamo ad mortem usque Christi sanctos patres, ex hac uita migrantes, propter Christum, in uitam non in carcerem concessisse. Nam Dominus noster in Euangelio secundum Marcum, Deus, inquit, non est Deus mortuorum, sed uiuentium. Est autem Deus Abraham, Isaac & Iacobi: ergo Abraham Isaac & Iacob uiuunt: non corporaliter quidem. Corpora enim sepulta iam olim computruerant: ergo animæ ipsorum uiuunt in gaudio: corpora uerò & ipsa in iudicio resurgent. In Euangelio secundum Lucam meminit Dominus sinus Abraham, in quem colligantur beati spiritus, & de eo pronunciat quòd sit constitutus in edito, ac locus sit non cruciatus & supplicij, sed gaudij ac refrigerij. Ideoque frequenter legis in sacra historia de sanctis patribus, quòd collecti sint ad suum quicquidque populum, id est, recepti sint in consortium illud patrum, cum quibus in hoc seculo in eadem religione & fide perstiterunt. Nam de sepultura corporali id non posse exponi, manifestè reuincunt sequentia locorum istorum, & circumstantiæ. Rursus dicit in Euangelio secundum Matthæum Dominus, Dico uobis, quòd multi ab Oriente & Occidente uenturi sunt, & accumbent cum Abraham, Isaac & Iacob in regno cœlorum, filij uerò regni eiicientur in tenebras extremas, illic erit ploratus & stridor dentium. Quòd si gentes colligi debent in regnum cœlorum, si aggregandæ sunt patrum consortio, certè necesse est patres prius in cœlum receptos, tum quoq; sensisse gaudia, cum hæc loqueretur Dominus. Qui in Euangelio secundum Ioannem clarè dicit, Abraham exultauit, ut uideret diem meum, & uidit, atque gauisus est. Quod etsi de iustificatione & gaudio conscientie intelligamus, non tamen disiungimus gaudium uitæ æternæ, quòd certò hoc ex illo sequatur. Præterea expendenda uidetur occasio, ex qua illud Domini uerbum petiitum ac pronunciatum uidetur. Dixerat Dominus, Amen amen dico uobis, si quis sermonem meum seruauerit, mortem non uidebit in æternum. Eam uerò sententiam hisce uerbis exceperunt Iudæi, Abraham mortuus est, & propheta, & tu dicis, Si quis sermonem meum seruauerit, non gustabit mortem in æternum? Nunquid tu maior es patre nostro Abraham, qui mortuus est: & propheta mortui sunt? Quem te ipsum tu facis? Ad hæc ergo respondens Dominus, ostendit Abrahamum per fidem in sermone Christi uiuificatum esse, aut in uita & gaudio conseruatum; hic utcunque corpore mortuus sit, uiuat tamen & gaudio perfruatur anima iam apud Deum. His accedit quòd Dauid spem, expectationem & hæreditatem suam exponens in Psal. 16. inter alia dicit, Dominus mihi semper à dextris est. Propter hoc lætatum est cor meum, exultauit gloria mea, insuper & caro mea requiescet in spe. Quoniam non derelinques animam meam in inferno, neque dabis ut sanctus tuus uideat corruptionem. Notam mihi facies semitam uitæ, satietas gaudiorum in conspectu tuo est, & iucunditates in dextera tua in perpetuum. Et quanquam S. Petrus

*Præstitam non
tantum promissam
fuisse patribus salutem.*

& S. Paulus hoc Dauidis testimonium aptauerint Christo in Actis Apostolorum, nemo tamen negare potest idem & suo modo congruere Dauidi, qui in illo Psalmo profiretur fidem suam, spem exponit, ac Michram suam, id est, delicias suas, in signia, aureolum, aut cleynodium suum prædicat. Competunt ergo illa in primis Christo, deinde etiam Dauidi, & omnibus fidelibus. Nam uita & resurrectio Christi, fidelium est uita & resurrectio. Idem alibi, Credo inquit, uidere bona Domini, in terra uiuentium. Porro in terra uiuentium non est mors aut dolor, sed sarietas gaudiorum, & perpetua iucunditas. Hæc à Deo per Christum in fide expectauit, eadem migrans ex hoc seculo protinus recepit, licet post multos demum annos nasceretur ac adueniret Christus, qui & nos hodie saluat, licet uenerit ante annos mille quingentos quadraginta nouem. Quod uerò ad Hebræos 11. cap. Apostolus dicit, Atque omnes hi patres sancti testimonium promeriti per fidem, non acceperant promissionem, quòd Deus de nobis melius quiddam prouiderat, ne sine nobis consummarentur, simpliciter intelligendum putamus de consummata, ut ipse Paulus dicit, beatitudine seu felicitate, in qua patres sancti sine nobis non consummantur. Quia restat adhuc generalis resurrectio omnis carnis, quæ simul atque facta fuerit, consummata erit & omnium sanctorum perfecta beatitudo, quæ non animæ duntaxat, sed etiam corpori obuentura est. Certè S. Petrus quoque asseuerat salutem per Christum partam principio animabus, sanctorum nimirum, mox à morte corporea communicari, deinde uerò in fine seculi sanctorum sepulta resuscitari corpora, quemadmodum omnium hominum, ac iudicari. Iudicabit, inquit, Dominus uiuos & mortuos. Nam in hoc innotuit Euangelium mortuis, ut iudicentur quidem secundum homines carne, uiuant autem iuxta Deum spiritu. Id est, efficax fuit mors Christi, fide mortuis patribus: sic ut iam nunc uiuant animabus apud Deum, atque illi ipsi sicuti & reliqui homines omnes iudicandi sint carne siue in corporibus suis, tum uidelicet cum uenturus est Dominus iudicare uiuos & mortuos. Nondum itaque salus nostra perfecta siue consummata est, consummabitur in fine seculi.

Eadem ueteribus inuocatio quæ nobis.

Præterea non inuocarunt patres nostri alium quàm unicum Deum creatorem, credideruntque illum hominibus propitium esse propter semen benedictum. Et quamuis non adeò uulgaris fuerit illis sicuti nobis inuocatio nominis Dei per mediatorem & intercessorem Christum, quemadmodum & Dominus in Euangelio testatur, dicens, Hactenus non petistis quicquam sub nomine meo: petite, & accipietis: non tamen fuerunt prorsus ignari mediatoris propter quem exauditi sunt. Daniel in 9. cap. supplicans Deo postulat exaudiri à Deo, propter Dominum, nimirum propter Christum promissum. Quoties denique sancti orantes, dixerunt, Memento Abraham, Isaac & Iacobi, non utique respexerunt ad personas aut animas sanctorum patrum, sed ad promissionem patribus factam: quæ cum illa sit, Benedicentur in semine tuo omnes tribus terræ: & Paulus testetur semen illud, Christum esse: consequens est patres respexisse ad semen benedictum, orasseque Deum, ut exaudiat propter Christum. Nam & alibi promittit Ezechiae liberationem Deus, dicens, Protegam urbem istam propter me, & propter seruum meum Dauid. At Isaia 7. & 28. claret parum esse urbi propter Christum uirginis filium, qui est fundamentum in Zion collocatum, quem & Ezechiel 34. cap. Dauidem, & Euangelium appellat Dauidis filium.

Eadem ueteribus sacramenta quæ nobis.

Postremò eadem fuisse sacramenta ueteribus quæ nobis, ostendit Apostolus Paulus, qui aliàs quoque Circumcisionem & Pascha illorum sacramenta nobis communicat, ut Coloss. 2. & 1. Corinth. 5. In 10. cap. minatur Corinthiis graue supplicium

etiam a domino, nisi abstineant ab idolothytis & gentili lasciuiâ. Profert ergo exemplum Israelitarum, & suo instituto ad hunc modum accommodat, Nolo uos ignorare, patres nostros fuisse Dei Ecclesiam, & habuisse eadem nobiscum sacramenta. Nam omnes in Mose, scilicet est, per Moysen, siue per ministerium Moysi, baptizati sunt in nube & mari. Nubes enim & mare fuerunt symbola baptismi. Deinde omnes eandem escam spiritualem ederunt, & omnes eundem potum spirituale biberunt. Et mox per interpretationem subiungit, Bibebant enim de spiritali, quæ illos comitabatur petra. Petra uero fuit Christus. Certè Manna & Petra typum præferbant spiritualis epuli, quo nos & illos reficit Christus, qui est panis & potus uitæ. Quanquam uero illi corporaliter, externe siue uisibiliter participassent sacramentis, quia tamen fide & spiritu destituebantur, quia cultu idolorum, crapula & fornicatione polluti sunt, displicuerunt Deo, & prostrati sunt in deserto. Nisi ergo uos quoque abstineritis a cædis illis flagitijs, nihil proderit baptismus aut spirituale epulum, sed perdet uos Dominus.

Cum itaque clarissimis his scripturarum testimonijs demonstratum sit, eadem fuisse ueteribus sacramenta quæ nobis, eandem inuocationem Dei, eandem spem, expectationem & hæreditatem, eundem spiritum, eandem fidem & doctrinam, confectum esse spero id quod ostendere uolui, patres testamenti ueteris fideles & nos noui testamenti credentes, unam esse Ecclesiam, unum populum, qui omnes una sub congregatione, sub unico testamento, unica duntaxat ratione salui fiant, per fidem Iesu Christi.

Dixi ista hæcenus de similitudine & congruentia siue unitate ueteris & noui testamenti ac populi Dei, dicam iam paucula & de utriusque discrimine & differentia. In substantia quidem nullum reperias discrimen, in modo administrandi & accidentibus quibusdam circumstantijsque existit differentia. Promissioni enim siue doctrinæ fidei & primarijs legibus accesserunt externa quædam, addita ad tempus correctionis, ita ut regimen totum Ecclesiasticum, modus tradendi doctrinam pietatis, & cultus Dei exterior apud ueteres alius cernatur, alius apud nos. Verum poterunt discrimina utriusque potissima hisce pauculis numerari & exponi capitibus.

*De discrimine
seu differentia
ueteris & noui
testamenti &
populi.*

Principio clariora seu illustriora sunt omnia noui testamenti. Reuelatio uetus habuit semper ferè suboscuro aliquid, instar nubis, tectaque fuerunt pleraque & inuoluta umbris seu inuolucris. Porro prædicatio noui testamenti clara est, adeoque lux dicitur quæ nihil obscuritatis habet. Moyses imposuerat uelamen uultui suo, nec poterant filij Israel intendere oculos in faciem eius, nos autem non modò in faciem Moysi reiectam, sed in ipsius faciem Christi clarissimam & amœnissimam inspicientes, gaudemus nos ipsam salutem reuelatam coram cernere. Hoc nomine dominus discipulos suos prædicauit beatos, dicens, Beati oculi, qui uident quæ uos uidetis, Dico enim uobis quod multi prophetae & reges uoluerunt uidere quæ uos uidetis, & non uiderunt, & audire quæ auditis, & non audierunt. Certè beatus Simon iustus, se felicissimum hoc nomine prædicat, quocirca & sponte moriturum se promittit, dicens, Nunc dimittis seruum tuum domine, secundum uerbum tuum in pace. Quia uiderunt oculi mei salutare tuum: quod paraisti ante faciem omnium populorum, lumen ad reuelationem gentium, & gloriam plebis tuæ Israel. Quamuis autem ueteribus non tanta fuerit lux quanta nobis in Christo exhibito radiat, satis tamen fuit illis ea quam habuerunt ad salutem in Christo consequendam. Videmus & nos ipsi hodie in enigmate, licet patribus nostris longè splendidius. Nam aliquando, nempe in gloria, uidebimus de facie ad faciem, sufficit tamen hæc nostra uisio ad salutem. Perplacet ergo similitudo istorum, qui dicunt,

*Clariora omnia
in nouo testa-
mento & po-
pulo.*

Et si sub auroram non tantus sit fulgor quantus diffunditur circa meridiem, non tamen expectant uiatores plenum solis exortum, sed accinguntur ad iter, ac sufficit eis uidere uiam qua eant. Ita enim existimant & patribus nostris eam lucis portionē quæ fuit in aurora, satis fuisse, quippe quæ fide duce, per omnia impedimenta ad æternam beatitudinem perduxerit. Interim est quod nobis gratulemur, & propter quod æternas Deo nostro agamus gratias, quia exortus est nobis in nouo testamento post luciferum istum & stellas lucidissimas, ipse clarissimus sol iustitiæ Christus.

*Nouū testamen-
tum nullas ha-
bet figuras, sed
omniū est com-
plementum.*

*Tolluntur per
Christum om-
nia onera.*

*Seruitus lega-
lis in ueteri te-
stamento.*

*Populus testa-
menti noui no-
uus & amplif-
simus.*

Deinde habuerunt ueteres in testamento ueteri typos, umbras, atque figuras, nos rem ipsam accepimus figuratam siue adumbratam. Ergo quod illis promisit Deus, id præstitit exhibuitq; nobis. Illi quidem uenturum Christum, & liberaturū credentes crediderunt: nos credimus illum uenisse, redemisse nos, & impleuisse omnia. Ergo in Euāgelio dixit dominus noster, Lex & prophetæ usq; ad Ioannem, ab eo tempore regnum Dei annuntiatur, & qui uis in illud uim facit. Ex quibus iam illud quoq; deriuatur, ueniente aut præsentē re figurata, cadere & disparere ultrò omnes figuras & umbras prænunciantes res futuras. Proinde tollitur hic ab humeris nostris iugum & onus, quod sustinuerunt patres nostri. Cultus illis erat operosus & onerosus, quo loco numeramus sacerdotium Aaronicum, tabernaculum uel templum instructissimum rebus & instrumentis exquisitissimis, item sacrificia multifaria, & huius generis multa alia. Ab his autem sumptibus & oneribus sumus liberati qui sumus noui testamenti populus. Liberauit autem Christus, in quo uno & solo omnia uitæ & salutis habemus. Placuit enim Deo patri in hoc uno recapitulare, ut Paulus ait, ac uelut in summam redigere, omnia uitæ & salutis, ut quæ hætenus uelut dispersa uidebantur, iam nobis exhibeantur uniuersa plenissimè in Christo. Est enim Christus complementum omnium figurarum & ceremoniarum: per cuius spiritum cum rem ipsam possideamus, nihil porro opus fuerit figuris uel umbris. Christus paucula instituit externa, eaq; sine apparatu & sumptu. Magna ergo libertate gaudet noui testamenti populus. Huc pertinere arbitror elegantissimum S. Pauli locū, qui extat 4. cap. ad Galatas, ubi diligenter hoc negotiū tractans fingit duas matres, alteram quidem generantem in seruitutem, alteram uerò in libertatem, idq; sub typis Agar & Saræ. Quare significat doctrinam duplicem, legalem & euangelicam. Legalis in seruitutem generat, Euangelica in libertatem. Idcirco generabat lex sanctos patres & prophetas in seruitutem, non ut manerent serui, sed ut ipsos retineret sub disciplina, imò & ad Christum adduceret legis perfectionem. Libertas patrum ceremoniarum mole opprimebatur, aut abscondebatur, ut quanquam liberi essent animis coram Deo, externa tamen specie nihil differrent à seruis, hærentibus adhuc in humeris ipsorum oneribus legis. Quia enim lex nondum erat abrogata, cogeantur eam diligenter præstare. At cum aduenit Christus & omnibus satisfecit, ceciderūt umbræ, cecidit & iugum illud graue ex humeris Christianorum. Sic gignit nos mater Sara in libertatem. Hæc est mater omnium nostrum. Ex illa matre (quæ & mater sancta Ecclesiæ nuncupatur) habemus semen uitæ, eadem formauit & edidit nos in lucem, fouet nos in sinu suo, habens lac & cibum, ipsum inquam uerbum Dei, quo nos educat, alit & seruat.

Dirupta autem macerie & ruptis uinculis, Deus Ecclesiam suam regit liberalius, nec tenet amplius sub tam arcta custodia. Neq; enim continetur Dei populus intra terminos terræ promissæ. Nam expāditur ad fines terræ: neq; iam sunt illius populus circuncisi & seruantes legem, (quanquam tunc quoq; non dubium est quin

quā suos habuerit inter gentes, ut Iob & alios quos ipse nouit) sed qui Christum agnoscunt, licet nec circumcisi sint, nec lege occupentur. Nouus hic est populus, ex toto terrarum orbe collectus spiritu & fide. Idem nomen dedit testamento nouo: in quo Iudæi nullam hæreditatem habent, nisi legalibus desertis & Christo legis sine fide apprehenso. Sunt autem omnium prophetarum libri referti testimonijs de Vocatione Gentium in consortium populi Dei, item de repudio Iudæorū qui propter pertinax legis studium abdicantur.

Præterea ponit aliud discrimen Apostolus Paulus, ex uaticinio Ieremiæ in 8. cap. epistolæ ad Hebræos. Tribuit enim noui testamenti populo eximia aliquot dona, nempe plenariam peccatorum remissionem. Dicit enim, Quoniam propitius ero iniustitijs eorum, & peccatorum eorum & iniquitatum non recordabor amplius. Tribuit ei & exactissimam mentium reformationem & illuminationem absolutissimam. Dicit enim, Ponam leges meas in mētes ipsorum, & in cordibus eorum inscribam eas: & non docebit unusquisq; proximum suum, & unusquisque fratrem suum, dicendo, Cognosce dominum: quia omnes me scient à partu usq; ad magnum. De lege uerò scribitur quòd exarata sit in tabulas lapideas. Nemo tamen putauerit patres nostros nullam peccatorum ueniam consequutos fuisse. Vt enim & ipsi gratuitam peccatorum condonationem acceperunt per fidē, ita Deus eorum cordibus olim quoque legem inscripsit, & spiritum suum infudit. Quis enim hodie nostrum dicat, se superare scientia, fide, illuminatione ipsum Abrahamum, Moysen, Samuelem, Dauidem, Isaïam, Daniele, Zachariā? Discrimen ergo in hoc non est, quòd patres testamēti ueteris & remissione peccatorum & spiritus illuminatione caruerint, nos qui sumus noui testamenti populus illa soli cōsequuti simus, sed in doni magnitudine, amplitudine, copia & ubertate discrimen agnoscitur, nempe quòd liberalissimè profunduntur illa iam in plures. Vocatæ enim omnes gentes, plenīs uolis hauriunt aquam uitæ. Effundit Deus super omnem carnem spiritum suū. Olim notus in Iudæa Deus, iam uerò cum Christus orbi exhibitus est, egrediūtur discipuli in orbem terrarum, & cognitione Dei imbuunt omnia regna terræ. Olim potuerunt numerari heroes, uiri excellentes & prophætæ: quia sola terra promissa tales ferè profundeabat. Quis uerò iam numeret reges, principes, heroes, prophetas, episcopos, doctores, martyres, & omnis generis sextus & etatis insignes personas, quas nobis dedit & dat hodie quoq; non Iudæa sola, sed Arabia, Idumea, Phœnicia, Mesopotamia, Persia, Asia, Ægyptus, Aphrica, Græcia, Italia, Oriens, Meridies, Occidens & Septentrio? Omnibus regnis prædicata est gratuita peccatorū remissio. Omnes fideles ex omnibus regnis totius mundi in gratiam Dei per Christum sunt recepti. Omnes acceperūt spiritus donum amplissimum. Omnes prophetarunt. Omnes cognouerunt dominum. Et lex quidem perficiebat neminem, sed ducebat ad spem potiorem. Euangelium simpliciter perficit, rectā, sine ullo interuentu, ad Christum ducit, & in ipso acquiescere facit.

Postremo loco non dissimulabo & hoc discrimen, licet leuiculum sit, & alia eiusdem generis obseruari possint nō pauca, quòd lex ex parte intenta in terram certis metis distinctam, populo ueteri possessionem eius seruati legem, eiectionē ex ea præuaricanti legem, & promissit & minata est. Nobis uerò nulla certis terminis distincta terra promittitur. Domini enim est terra, & plenitudo eius, orbis terrarum, & quæcunq; sunt in ea. Quanquam uerò hic nihil certi, ut quondam, nobis designet, nuspiam tamen nos negligit: alit enim, benedicit & seruat in quauis terra. Proinde finem suum consequutæ sunt, & disparuerunt omnes promissio-

Noui testamēti dona amplissima & uberrima.

Nouum testamēti non habet conditionē certā & cōspiciat terræ.

nes factæ quondam de terra illa sancta patrum. Ut ante seculum unum & alterum insensisse uideantur, qui multas gentes commouerunt ad capienda arma pro recuperanda terra sancta. Christus aduentu suo in mundum totam terram sanctificauit. Nam sunt in omnibus terræ plagis aliquot filij Dei.

Paucioribus hæc de similitudine & congruentia, item de discrimine & differentia utriusq; tam ueteris quam noui populi & testamenti, perstrinxi, quod hoc negotij attigerim Sermone 1. Decad. 1. itē Sermone 6. Decad. 3. deniq; in negotio de abrogatione legis, & quod olim quoq; de Antiqua fide & de unico æternocq; Dei testamento tractatus ediderim, quos scio uobis esse familiarissimos.

Nolo per epilogū colligere potissima huius Sermonis capita, cum quod alias plus æquo prolixior fui, tum quod perspicuo maximè usum me ordine existimē, cōfidamq; singula cuiusq; memoriæ insculpta sic satis hære. Absolui autem his, per gratiā Dei, totum Legis diuinæ negotiū, quo de multis diebus sermonibusq; disserui. Deus & pater noster cœlestis sit benedictus in secula, & benedicat nobis per Iesum Christum dominum nostrum, Amen.

De libertate Christiana & Scandalo: de Bonis operibus & mercede sue præmio bonorum operum.

SERMO IX.

DISSERVI diu Sermonibus multis de Lege diuina, quoniam uerò ex Legis consideratione tractationeq; quædam non contemnenda prætereundæ capita existunt, & cum illa ceu conferta & concomitantia cohærent, cuius generis est Libertas Christiana, Bonum opus & merces, siue præmium boni operis, deniq; Peccatum & peccati præmium, uel supplicium, dicam & de his ordine, quæ dominus loqui dederit: quem modò orabimus ne quid de his, & de alijs dogmatibus sanctis, nos loqui contra eius sanctam uoluntatem patiatur.

De Libertate Christiana.

Ex abrogatione legis dependet Libertas Christiana, ueluti effectus legis abrogatæ, quæ libertas mox suppeditat occasionē dicendī de Scandalo. Ac de libertate Christiana diligēter & copiosè disputauit sanctissimus Christi Apostolus Paulus, unde colligere possumus cōsiderationem libertatis Christianæ, nec parui momenti, nec exigui esse fructus. Præcipuè uerò necessaria est eius tractatio nostro seculo, in quo non pauci libertatem Christianam, uel nō intelligunt, uel malitiosè ea abutūtur ad explenda desideria carnis. Dicam ergo quis sit liberator, qui in libertatem asserit, Quos liberet, A qua re uel quatenus liberet. Quibus perspectis facile erit uidere, quid sit libertas Christiana, quod ingenium libertorum, & quantopere hi caueant ne uspiam quenquam offendant, aut sua abutantur libertate.

Liberator quis.

Liberator non alius nobis promittitur, exhibetur & annūciatur quàm Christus Iesus Dei filius. Qui enim alios liberat, eum oportet liberū esse, nec hīs obnoxium, quibus constricti tenentur, qui expetunt & expectant liberationem. Nullus autem talis inuenitur in toto terrarum orbe, & in omnibus ætatibus, adde & in ipso cœlo, nisi unus Dei filius, qui eo nomine in Euangelio dixit, Si filius uos liberauerit, uerè liberi eritis.

Quos liberet.

Liberat autem seruos dominus, ergo liberat à seruitute asseritq; in libertatem filiorum Dei. Et omnes quidem seruos liberat, nullum excludit nisi eum qui seipsum sua culpa, sua incredulitate & inobedientia excludit. Venit enim Dei filius liberandis omnibus seruitute implicitis. Eatenus ergo liberat, quatenus serui sumus. Opponitur enim Libertati Seruitus, ut illa non possit nisi hac considerata plenè

plenè intelligi. Proinde dicendum erit hic quoque, quantum nostro seruiti proposito, de seruitute: quæ nihil aliud est, quam seruorum conditio. Serui autem uel nascuntur, uel fiunt. Nascuntur ex ancillis siue uernis. Fiunt, uel ex captiuitate, unde & nomē sortiti sunt. Pomponius enim, Serui ex eo appellati sunt, ait, quod captiuos uendi imperatores iuberent, ac per hoc seruare nec occidere: qui & Mancipia dicuntur, eo quod ab hostibus manu caperentur. Vel fiunt serui iure ciuili, cum homo liber, maior uiginti annis, ad precium participandum, sese uenundari passus est. Amiserunt ergo serui omnem libertatem, pendent toti ab imperio dominorum suorum, qui in ipsos habent potestatem necis & uitæ. Est autem seruitus duplex, politica siue ciuili, & spiritalis. Ciuilem gratia & prædicatione sua non sustulit dominus ex Ecclesia fidelium, ne uidelicet sint serui, uel ne faciant suum officium, neque debita sua persoluant. Nam Apostolus Christi Paulus, Vnusquisque inquit, ut uocauit eum dominus, ita ambulet. Et sic in Ecclesijs omnibus ordinato. Seruus uocatus es? Ne sit tibi curæ. Attamen si potes liber fieri, magis utere. Et iterum, Serui obedite ijs qui domini sunt iuxta carnem, cum timore & tremore, cum simplicitate cordis uestri, tanquam Christi: non ad oculum seruientes, uelut hominibus placere studentes, sed tanquam serui Christi, facientes quæ uult Deus, ex animo, cum beneuolentia, seruientes domino, & non hominibus: illud scientes quod unusquisque quod fecerit boni, hoc reportabit à Deo, siue seruus fuerit, siue liber. Et ad Timotheum idem, Quicumque sub iugo sunt serui, inquit, suos dominos omni honore dignos ducant, ne nomē Dei & doctrina malè audiat. Qui uerò fideles habent dominos, ne contemnant, quod fratres sint, sed magis inserviant quod fideles sint ac delecti, & qui beneficia rependere possunt. Habent tamen in hac seruitute fideles ex Euangelica prædicatione quod consoletur, nempe quod liberi sunt animis, licet seruiant corpore. Rursus enim dicit Apostolus, Qui in domino uocatus est seruus, libertus domini est. Similiter qui liber uocatus est, seruus est Christi. Extenditur hæc consolatio ad omnes fidelium hominum afflictiones, qui sciunt saluum & liberum esse spiritum suum, utcumque atrociter uel uinciantur uel excrucietur corpus. Liberrimi ergo sunt sancti, quanquam in arctissima constricti teneantur custodia: uictores & superiores sunt, licet uinciantur & opprimantur: denique fruuntur uoluptatibus selectissimis etiam tunc, cum torquentur infinitis malis acerbissimè. Scio à filiis huius seculi hanc libertatem & has uoluptates fidelium rideri, tanquam somnia stultorum. Verum dignas irrisio nis suæ poenas iusto iudici Deo persolunt, non tantum in futuro, sed etiam in hoc præsentis seculo: quippe cum illi sint maximè captiui & ter miseri, etiam tunc, cum se arbitrantur liberrimos & omnium felicissimos esse. Seruiunt enim seruitium foedum, & modis omnibus probrosum, addicti scortis foetidis, ebrietati insanæ, mammonæ iniquitatis, & alijs uoluptatibus turpissimis, in quibus cum ignominia conficiuntur & computrescunt. De sanctorum uerò seruitio & afflictionibus, libertate nihilominus fruuntium & exultantium in domino, loquens Apostolus, In omnibus premimur, inquit, at non anxij reddimur: laboramus, at non destituimur: persecutionem patimur, at non in ea deserimur: deijcimus, at non perimus: semper mortificationem domini Iesu in corpore circumferentes, ut & uita Iesu in nostra mortali carne manifestetur. Et iterum, In omnibus nitimur nos exhibere, ut decet ministros Christi, in tolerantia multa, in afflictionibus, in necessitatibus, in anxietatibus, in plagis, in carceribus, in seditionibus, in laboribus, in uigijs, in ieiunijs: per gloriam & ignominiam, per conuitia & laudes: quasi impostores, & tamen ueraces: quasi ignoti, & tamen noti: quasi morientes, & ecce uiuimus:

Seruitus quid.

Duplex seruitus.

Corporalis seruitus.

Paradoxon de libertate.

quasi correpti, & non occisi; quasi dolentes, semper tamen gaudentes: quasi pauperes, multos tamen ditantes; ut nihil habentes, omnia tamen possidentes. Habetis quomodo in extrema seruitute sancti consolationem suam habent, & sint liberrimi. Exempla infinita suppeditat Acta Apostolorum, & historia ecclesiastica. Descendimus iam ad alteram seruitutis partem.

Spiritualis seruitus.

Spiritualis seruitus similitudinem habet cum corporali seruitute. Nam factus est Adam seruus, & sua quidem culpa: nos nascimur ex seruo serui. Fuerat ille liber & habuerat dominum optimum & clementissimum, sed ab eo defecit perfide, asciuitque sibi dominum alium, crudelissimum inquam tyrannum satanam, qui propter peccatum ius in ipsum assecutus, miserum grauissime pressit. Nascimur autem ex corrupto patre corrupti & peccatores, ac propter peccatum subiicimur & nos dominio diaboli: subiicimur legi & legis execrationi. Sumus enim serui peccati. Subiicimur uarijs calamitatibus propter peccatum. Spiritualis ergo dicitur hac seruitus, non quod in animo hominis duntaxat locum habeat, sed propter oppositionem, quatenus uidelicet opponitur ciuili uel corporali seruituti. Alioqui enim peccatum subdidit & corpus nostrum maledictioni. Neque animo duntaxat, sed & corpore peccamus. Nam peccato omnes partes, & omnia membra corporis seruiunt, denique & peccato afficiuntur. Proinde seruimus seruitutem miserrimam, dum sub diaboli dominio uiuentes facimus quae carni libent, & quae suggerit affectus prauus, fructificantes aut abortientes potius domino illi terro nostro, diabolo. Hac uidelicet est grauissima seruitus nostra.

Spiritualis libertas, & quas tenus liberarit nos Christus.

Videamus iam ex opposito quae sit libertas Christiana, hoc est, a qua re, uel quatenus liberauerit nos Dominus noster. Et uno uerbo rem totam comprehendamus, liberauit nos Christus dominus a graui illa seruitute, quatenus uidelicet eramus serui, eatenus nos liberauit. Id copiosius modo ita exponimus. Venit filius Dei in hunc mundum, ac principio quidem oppresso per mortem tyranno satana, contritoque capite eius, in suum nos regnum transtulit, dominus & rex noster factus. Deinde adoptauit nos in filios Dei, legisque maledictionem sua benedictione sustulit. Nam omnia peccata sustulit, & fideles suos purgauit. Hinc contulit donum spiritus liberrimum, ut filij Dei sua sponte & ultro subiiciant se diuinae uoluntati, & faciant quod uult Deus. Non enim remanet legis odium, licet remaneat infirmitas carnis. Postremo tulit idem dominus & rex noster ex humeris suorum onera legis, typos seu figuras, cum omnibus sumptibus, liberatosque uenit rursus se subiugare legibus quibuslibet hominum. Ex quibus omnibus sic constituimus, Liberare est a seruitute in libertatem asserere. Liber uel libertus est, qui liberatus a seruitute, iam libertate gaudet. Libertas ergo aliud nihil est quam liberi conditio, fructus inquam quem liber ex liberatione percepit, & quo iam fruitur, nempe quod liberatus a dominio diaboli, a peccato, ab execratione legis, & a morte, filius Dei factus, haeres est uitae aeternae: item quod spiritum accepit libertatis, per quem totum se seruum statuit Deo, cui tota uita seruit: denique quod a lege Moisaica & ab omnibus hominum legibus assertus, ab unico iam pendet Euangelio, liberum habens usum rerum externarum, uelut cibi, potus, uestimenti, aliarumque similium indifferentium. Atque in his tribus iam secundum recensitis capitibus, potissimum continetur libertas Christiana.

Libertas Christiana.

Testimonia de libertate Christiana.

Illis porro subiicimus haec scripturarum testimonia, quae expositionem nostram & confirment melius, & illustrent splendidius. Collocabimus autem primo loco testimonia euangelica, secundo Apostolica. Zacharias sacerdos pater Ioannis Baptistae in hymno suo gratulatorio apud Lucam in i. cap. praedicat ueritatem & bonitatem

nitatem Dei, quod ea quæ patribus promissit, nobis præstitit, nimirum ut sine timore de manu inimicorum nostrorum liberati ipsi seruiamus, in sanctitate & iustitia coram ipso, omnibus diebus uitæ nostræ. Habemus in hoc testimonio ueram libertatem, illam uidelicet, qua liberati per Dominum ab omnibus hostibus nostris, tū inuisibilibus tum uisibilibus, his non seruiamus amplius in timore, sed citra timorem, cum gaudio, seruiamus iam ipsi Deo. Apponitur præterea seruiendi modus & ratio, In sanctitate & iustitia. Sanctitas refecat omnem impuritatem & intemperantiam. Iustitia tribuit unicuique suum illud, quod uidelicet debemus singulis, comprehenditque libertatem & beneficentiam. Hoc autem seruiendi genere seruiunt Deo liberati, non paucis diebus aut annis aliquot, sed omnibus diebus uitæ. Vera ergo libertas Christiana est perpetua seruitus, qua seruimus Deo.

Ioann. 8. cap. iactantibus Iudæis uanam & ampullosam suam libertatem acceptam à suis patribus, hæc obijcit Dominus, Amen amen dico uobis, quod omnis qui facit peccatum, seruus est peccati. Seruus autem non manet in domo in æternum: filius manet in æternum. Si ergo filius liberos reddiderit uos, uerè liberi estis. Meminit hisce uerbis Dominus seruitutis, meminit & libertatis. Seruit peccato tanquam crudeli Domino seu tyranno, qui facit peccatum. Obedit enim peccato. Tales serui sunt omnes filij hominum: id supplicij coniunctum, imò irrogatum habentes, quod in domo paterna, in cœlesti utique patria, nulla participant hereditate. Quos uerò filius Dei liberauerit, illi participant & consortes fiunt cohæredesque filij Dei. Liberat autem credentes, filij ergo Dei & cohæredes Christi propter Christum liberatorem fiunt liberi. Neque est in cœlo aut in terra alius, qui præter solum Christum, in libertatem asserere possit.

Paulus ad Roma. 6. cap. Ne regnet, inquit, peccatum in mortali uestro corpore, ut obediatis ei per cupiditates eius. Neque accommodetis membra uestra arma iniustitiæ peccato, sed accommodetis uosipsos Deo, uelut ex mortuis uiuentes, & membra uestra arma iustitiæ Deo. Peccatum enim uobis non dominabitur. Non enim estis sub lege, sed sub gratia. Hortatur autem purgatos & liberatos per Christum, ut uiuant in sua seruitute spiritali sanctæ. Non autem dicit, Ne sit peccatum in uobis, aut in mortali uestro corpore: sed ne regnet peccatum in uobis, aut in mortali uestro corpore. Quando autem regnat? Quando obediunt peccato per cupiditates eius, id est, cum non repugnamus, sed explemus cupiditates carnis. Non regnat ergo in mortali nostro corpore, quando sentitur quidem in corpore, sed non obeditur aut permittitur ei imperium, quin calcantur magis cupiditates. Hanc ipsam sententiam per aliam magis illustrem declarat, Nolo uos membra uestra peccato ceu tyranno permittere, quibus ceu instrumentis utatur ad perficiendam omnem iniustitiam. Hoc potius flagito, ut uosipsos Deo gubernandos regendosque offeratis. Quia enim is ex morte liberauit, & reuocauit in uitam, æquum est ut membra uestra ceu uitalia instrumenta detis Deo per quæ omnem perficiat iustitiam. Atque id quidem facile poteritis, quia sub gratia estis, non sub lege. Huc iam pertinent reliqua omnia, quæ in eo capite ad finem usque subiiciuntur. Quid igitur, inquit, peccabimus, quod non sumus sub lege, sed sub gratia? Absit. An nescitis quod cui accommodatis uosipsos seruos ad obediendum, eius serui estis cui obeditis, siue peccati ad mortem, siue obedientiæ ad iustitiam? Gratia autem Deo quod fuistis quidem serui peccati: sed obedistis ex animo, in eam in quam traducti estis formam doctrinæ. Cæterum liberati à peccato, serui facti estis iustitiæ. Demonstrat autem liberos Christi non abuti sua libertate, & sese regendos præbere Domino ueteri. Fingit enim duos dominos, Peccatum & Iustitiam. Apponit cuique

suum præmium aut stipendium, mortem & uitam. Sed & generalem ponit sententiam eius nos esse seruos, cui nosmetipsos ad obediendum tradimus. Inde sic colligit, Gratia Dei cum simus redempti à seruitute peccati & stipendio eius, morte certe, translati sumus in seruitutem iustitiæ ut uiuamus. Significantius enim subiungit, Humanum quiddam dico, propter infirmitatem carnis uestre, Quemadmodum enim præbuisitis membra uestra serua immunditiæ & iniquitati, ad iniquitatem: sic & nunc præbete membra uestra serua iustitiæ, ad sanctificationem. Cum enim serui essetis peccati, liberi eratis iustitiæ. Quem igitur fructum habebatis tunc in his, de quibus nunc erubescitis? Nam finis illorum mors. Nunc uerò manumissi à peccato, serui autem facti Deo, habetis fructum uestrum in sanctificationem, finem autem uitam æternam. Etenim stipendia peccati mors, donum autem Dei uita æterna, per Iesum Christum Dominum nostrum. Hæc autem omnia tam sunt clara & simplicia, ut nostra non indigeant explicatione fusiore.

Illa uerò omnia adhuc plenius exponit per collationem parabolicam in capite 7. Mulier, inquit, uiro subiecta & obnoxia est, quandiu uiuit uir. Si diuertat à uiro, ipso adhuc uiuente, iudicatur adultera. Si uerò moriatur uir licet alteri cui libet nubere. Sic inquam nos legi sumus mortui. Christus enim mortuus est pro nobis, oblati in expiationem peccatorum nostrorum corpore suo, ut porro ipsi copularemur, imprægnatiq; spiritu eius, pariamus pulcherrimam bonorum operum prolem uel sanctissimum fructum: qui dum peccato seruebamus, eiq; ceu Domino subiecti essemus, pariebamus tetram mortis sobolem, iniquitatem uidelicet & flagitia, quibus puniendis mors destinata est. Sed libet ipsa audire apostoli uerba. Itaq; fratres mei, uos quoq; mortificati estis legi per corpus Christi, ut iungeremur alteri, nimirum ei, qui ex mortuis surrexit, ut fructificemus Deo. Cum enim essemus in carne, effectus peccatorum, qui sunt per legem, uigebant in membris nostris, ad fructificandum morti: nunc autem liberati sumus à lege, mortui (ei) in qua detinebamur, ut seruiamus per nouitatem spiritus, & non per uetustatem literæ.

Notus est locus in 8. cap. Lex spiritus uitæ per Christum Iesum liberum me reddidit à lege peccati & mortis. Modum autem liberationis huius mox suppungit, Etenim quod lex præstare non poterat, hoc Deus proprio filio misso præstitit. Et quæ sequuntur. Nam uerba illa notissima sunt omnibus.

In 1. ad Corinth. 7. Pretio empti fuistis, nolite fieri serui hominum. Hortatur autem Apostolus ne seruitutis mundanæ uel ciuilis prætextu, serui aliquid designent in gratiam dominorum, quod pugnet cum synceritate & integritate religionis: ne uidelicet legibus hominum iniquis, quia serui uocati sunt, pareant. Ratio autem quæ hinc retrahat est, Quod pretio sanguinis Christi redempti & asserti sumus in libertatem. Indignissimum ergo foret, si contra libertatis ingenium, prauis legibus hominum obtemperemus. Hoc extenditur etiam ad leges humanas in negotio religionis conditas. Nam Matth. 15. dicit saluator, Frustra me colunt docentes doctrinas præcepta hominum. Et, Omittite illos, duces sunt cæci exorum. Et Paulus, Si mortui estis cum Christo ab elementis mundi, ait, quid quasi uiuentes in mundo decretis tenemini? Ne tetigeris, ne gustaris, ne contrectaueris: quæ sunt omnia in corruptionem ipso abusu, secundum præcepta & doctrinas hominum, quæ speciem quidem habent sapientiæ, in superstitione, & humilitate animi, & neglectu corporis, non in honore aliquo ad expletionem carnis. Principio ostendit Christi fidelibus nihil negotij esse cum decretis hominum, neq; eos ipsi teneri: quoniam decretis sint mortui cum Christo, id est, per mortem Christi redempti à decretis, quæ in morte Christi interierint, dum ipse nos suos fecit, & liberos quidem.

Liberi ab humanis constitutionibus.

quidem. Deinde qualia sint illa decreta commemorat per Mimesim, Ne tetigeris, ne gustaueris, neque prorsus contrectaueris. Latissime se hæc extendunt ad multas constitutiones. Quas & protinus refutat argumentis. Principio quia in rebus, quæ usu corrumpuntur, constituunt cultum Dei. At regnum Dei non est esca uel potus, sed uersatur in rebus spiritualibus. Et quæ ingrediuntur os, non coinquinant hominem. Deinde quia conditæ sunt non à Deo omnis boni authore, sed ab hominibus. At frustra me colunt, ait in Euangelio Dominus, docentes doctrinas præcepta hominum. Nec dissimulat aut præterit illa Apostolus, quæ decreta illa hominum maxime commendant. Commendantur primum specie sapientiæ. Videntur enim à sapientibus non insipienter constituta esse, quæ personis, tempori & loco inferuiant appositissime. Clamant propugnatores legum humanarum, Sanè non fuerunt stulti patres nostri, sed leges eorum sunt sapientissimæ. Verùm clamat Ieremias, Verbum Domini proiecerunt, quæ ergo illis sapientia reliqua esse poterit? Commendantur deinde *ἡθροδυσκεία*. Est is cultus electitius, quem nostro uidere & arbitrio ex nobis ipsis confinximus. Atqui hominibus ualde probantur humana commenta, quod consentanea sint ingenio humano. Sed & Christus dixit, Si de mundo fuissetis, mundus quod suum est diligeret; iam quoniam selegi uos de mundo, odit uos mundus. Atqui idem ille rursus in Euangelio dicit, Quod hominibus excelsum est, abominandum est coram Deo. Commendantur præterea humilitate: id autem duplici nomine, Principio enim humilitas esse dicitur, si quis promptè obediatur, nec difficulter recipiat quod à potentibus obtruditur. Deinde uidentur leges hominum exercere humilitatem, & retinere homines in humilitate. Cæterum sacrilega uerius dicitur illa esse obedientia & humilitas, quæ uerbo Dei non gubernatur, nec uerbum Dei unice obseruat, sed præterea auctoritatem Dei transfert ad homines. Postremo commendantur traditiones hominum ex neglectu carnis. Videtur enim illis tradi egregia corporis disciplina & castigatio, qua opprimatur carnis insolentia. Adhæc autem Apostolus, Non per honorem aliquem, inquit, ad expletionem carnis. Id est, quæ tametsi speciem habeant religionis & pietatis, reuera tamen nihil honoris habent, cum externa illa à Deo ordinata sint ad subleuandam hominis necessitatem. Imò uituperat Paulus decreta illa, quod honorem corpori nullum habent, pro corporis expletionem, id est, pro modo necessitatis. Corporis enim cura moderata non tantum est permessa, sed etiam mandata. ne uidelicet corrumpamus corpus inedia, aut inutile reddamus ad opera bona. Nec damnatur ullibi carnis sollicitudo simpliciter, nisi quatenus seruit cupiditatibus. Proinde Apostolus dicit, Ne habeatis carnis curam ad concupiscentias. Ad necessitatem ergo cõceditur homini à Deo cibus, potus, somnus, uestis, quies, licita uoluptas, & aliarum necessariarum rerum usus.

Quibus rebus commendamus humane traditiones.

Corporis cura.

Ad Galat. cap. 4. Vbi uenit, inquit Paulus, plenitudo temporis, emisit Deus filium suum, natum ex muliere, legi obnoxium, ut eos qui legi erant obnoxii, redimeret, ut adoptione ius filiorum acciperemus. Quoniam autem estis filij, emisit Deus spiritum filij sui in corda uestra, clamantem abba pater. Itaque iam non es seruus, sed filius: quod si filius, ergo hæres per Christum. Et mox, In libertate igitur qua Christus nos liberauit, stete, & ne rursus iugo seruitutis implicemini.

Ad Hebr. cap. 2. Christus, inquit, carnis & sanguinis nobiscum particeps factus est, ut per mortem aboleret eum, qui mortis habebat imperium; hoc est, diabolum: & liberos redderet eos, quicunque metu mortis per omnem uitam obnoxii erant seruituti. Illa scripturarum testimonia instituto nostro sufficiunt.

Libertorum ingenium.

Eadem probè expensa, docebunt clarè quale sit libertorum ingenium, nempe

religiosissimum sanctissimisq; deditissimū rebus, hoc est, per omnia addictum spiritui, sine quo nulla est libertas, & per quem reguntur omnes filij Dei. Cauent liberi diligentissimè, ne quenquam sua libertate offendant temerè, nec ubi abutuntur ipsa. Semper enim mentibus & oculis ipsorum obuersantur grauissimæ sanctissimorum Christi Apostolorum sententiæ. Petrus scriptum reliquit, Tanquam liberi, & non ueluti prætextum uel uelamen habentes malitiæ, libertatem, sed tanquā serui Dei. Paulus uerò dixit, Vos in libertatem uocati estis fratres, tantum ne libertatem in occasionem detis carni, sed per charitatem seruite inuicem. Etenim cum liber sim ab omnibus, omnibus me ipsum seruum feci, quò plures lucrifaciam.

Abusus libertatis Christianæ.

Abutuntur ergo Christiana libertate illi primū, qui carnalia sub prætextu spiritus & libertatis quærentes, iactitant se Euangelica prædicatione liberatos esse ab omnibus corporalibus debitis & officijs: ideoq; dominis suis, creditoribus, magistratibus & principibus debita negant officia, adeoq; & deficientes ab eis rebelant. Seditiosi hi sunt turbatores, non Euangelicæ prædicationis cultores. Paulus clamat, Reddite omnibus quod debetur, cui tributum tributum, cui uectigal uectigal, cui timorem timorem, cui honorem honorem. Nemini quicquam debeatis, nisi hoc ut inuicem diligatis. Deinde abutuntur illi quoq; libertate Christiana, qui cum nondum acceperunt spiritum libertatis & filiorum Dei, cum nondum à satana liberati, nec dum iustificati sunt, omnibus tamen libertatem promittunt, quiduis sibi propter libertatis opinionem licere putant, ac bonis legibus & disciplinæ seueriori contradicunt, clamantes, legibus irretiri, prodi & pessundari libertatem. Contra hos & inprimis contra doctores uanæ & perniciosæ libertatis destomachans S. Petrus, Isti sunt fontes, inquit, aqua carentes, nebulae quæ à procella feruntur, quibus caligo tenebrarum in æternum seruata est. Siquidem ubi uehementer fastuosa uerba sonuerint, inescant homines per concupiscentias carnis uoluptatibus, eos qui uerè aufugerant, ab his qui in errore conuersantur, dum illis libertatem pollicentur, cum ipsi serui sint corruptionis. Siquidem à quo quis superatus est, huic etiam in seruitutem est addictus. Et quæ sequuntur. Cum autem ad eum modum libertate homines abutuntur, ea quidem licentia seu libido est, indigna libertatis sancto uocabulo. Postremò abutuntur Christiana libertate, quicumque indifferentibus abutuntur, nec ullam infirmorum rationem habent, sed hos offendunt temerè. Obseruanda est itaque in præsentī negotio hæc nobilis S. Pauli sententia, Omnia mihi licent, sed non omnia conducunt: omnia mihi licent, sed non omnia ædificant. Plura ea de re petas licebit ex 14. capite Pauli ad Romanos.

Licentia.

De scandalo.

Atque hinc per occasionem, imò necessitate adactus, dicam paucula & quantum pijs nosse satis fuerit de Scandalo. Scandalum uox petita à Græcis, significat ruina & impactionem, item offendiculum, remoram, & impedimentum: cuiusmodi sunt in itinere eminentia saxa, uel pedicæ collocatæ aut absconditæ ex insidijs, ad intercipiendum prodeambulantes. Qui enim in has incidunt aut impingunt, concidunt uel detorquentur ab itineris rectitudine. Transfertur hoc ad res religionis & mores hominum. Scandalum enim dat, quisquis dictis uel factis prauis, ineptis aut intempestiuis, obijcit alteri unde peccandi occasionem accipit. Proinde scandalum est oblata ad peccandum præuaricandumq; occasio, sed & ipsa ad ruina uel in malum impulsio & impactio. Alij, Scandalum, inquit, est offensio coniuncta cum contemptu. Solet enim offensio post se trahere contemptum, aut exoriri ex contemptu. Ponitur ergo alicubi pro illata iniuria.

Quibus modis præbeatur scandalum.

Offendimus autem alios, uel dictis nostris, uel factis. Scandalum quod dictis datur

datur, partim est in doctrina praua, inepta & intempestiua, partim uerò in colloquijs quotidianis. Grauiſſimum ſcandalum eſt prauæ doctrinæ pugnantis cum uera Euangelij doctrina. Proximum eſt ſcandalum ineptæ & intempestiue doctrinæ: quæ quamuis deriuetur ex fontibus uerbi Dei, non applicatur tamen aut profertur commodè & prudenter: Velenim peccatur nimia licentia & lenitate: uel nimia mordacitate & morositate, ut audientes offenſi, reſiliant in uniuerſum ab omni doctrina Euangelica. Interim lucerna Euangelica non eſt abſcondenda, aut diſſimulanda ueritas, propter offendicula hominum, aduigilandum tamen ut uerbum Dei prudenter annuncietur, ſiue ut rectè ſecetur. Quæcunque pugnant cum legibus Dei, conſtanter ſunt accuſanda & refutanda intrepidè ac diligentiffimè, utcunque inſaniamus mundus. Colloquijs uerò quotidianis ſcandalizant fratres, qui linguæ fræna laxant, nec quid dicant expendunt, ſed pro libidine ſua quiduis effundunt: cuiuſmodi ſunt dicta obſcœna & ſpurca, in primis uerò blaſphemæ uoces eiaculae contra Deum, contra ſcripturas ſanctas, & contra fidei articulos. Corruptum enim mores bonos colloquia praua. Hic non excludimus literas uel ſcripta temerè offendentiæ fratres.

Iam obijciuntur etiam ſcandala hominibus per promiſſiones & minas: quoties uidelicet per promiſſionum illecebras, & minas terrificas horrendasq̃, homines à recto itinere auertuntur in auia & errores. Sic enim poſuit Pharaon ſcandalum regi Zedechiæ, quem pellexit in fœdus, cui plus fidebat, quàm potentiæ & liberationi diuinæ. Tyranni perfreſquenter ponunt inſirmis Chriſtianis ſcandala, quando per tormenta ipſos adigunt ad abnegationem nominis Chriſti.

Cæterum facta quibus offenduntur homines, uel licita ſunt ac libera, uel illicita & prohibita. Licita autem abuſu ſunt illicita. Nam licitum eſt pijs ueſci quibilibet. Omnia enim mundis munda. Fit tamen manducatio tua illicita, ſi edas cum offendiculo fratris. Non enim intelligit hic licere quibilibet ueſci: nec tu ignoras illum iri offenſum ſi edas, nihilominus tamen edis, & illum aſpernaris, ponis ergo offendiculum facti, & peccas non leuiter in fratrem tuum. Hic collocamus omnem intempeſtiuum uſum rerum liberarum aut indifferentium.

Attamen rectè hic monent doctores eccleſiaſtici, diſtinguendum eſſe diligenter inter Infirmos & Contumaces. Infirmi ſunt rerum imperiti, ſed tamen timen- Infirmi & Con-
tumaces. tes Deum & tractabiles, non malitia pertinaciter errantes, ſed imbecillitate quadam fidei & religione attracti, erudiri interim ſuſtinentes. De his ſcriptum reliquit Apoſtolus, Eum qui inſirmatur fide aſſumite, non ad diſiudicationes diſceptationum. Porro Contumaces ſunt, qui nec ueritatem nec libertatem ſanctorum ignorant, interim animi ſui pertinaciâ obſtinati, ſeſe ueritati & libertati opponunt, cupientes ſibi concedi multa, non ut aliquando locum cedant ueritati, ſed ut hac ſibi data occasione, aliquando & ueritatem & libertatem ſubuertant, ſuam autem ſuperſtitionem ſtabiliant. De huiuſmodi hominibus pronunciauit Dominus, Omittite eos, duces ſunt cæci cæcorum. Et Paulus ad Galatas 2. cap. Titus cùm Græcus eſſet, non tamen circumciſus fuit, propter obiter ingreſſos falſos fratres, qui ſubintroierant ad explorandum libertatem noſtram, quam habemus in Chriſto Ieſu, quò nos in ſeruitutem adigerent. Quibus ne ad tempus quidem ceſſimus, per ſubiectionem, ut ueritas Euangelij permaneret apud uos.

Præterea huc pertinet quod alij diſtinguunt prudenter inter ſcandalum da- Scandalum da-
tum & acce-
ptum. tum & acceptum. Scandalum datum eſt, quando tua culpa, tua inquam importunitate aut leuitate facis uel dicis, unde frater tuus meritò offenditur. Aliud uerò non eſt datum, ſed acceptum uel aſcitur, non tua quidem, ſed alterius malitia &

culpa: uidelicet cum tu nec dicto nec facto peccas, neque quicquam insolenter aut intempestiue dicis uel facis, sed id dicis uel agis quod dicere uel agere licitum & liberum est, alius tamen hac tua libertate offenditur. Perinde ac si quis in plano itinere, in quo nulla posita est offensus, impingat, existimans sibi obiectum esse scopulum.

Iam illicita & prohibita hominis facta, quibus offenduntur homines, tendunt contra Deum & leges eius, & fiunt contra decorum, contra æquum, contra phas & ius, alios quoque incitantia ad paria studia & scelera. Hic enim commemoro idololatriam, cædes, stupra, auaritiã, luxum & superbiam. Ita collocat uitulos aureos in scandalum toti genti Izraeliticæ impius Ieroboam. Sic multi suis perpotationibus & luxu uestium non tantum offendunt alios, sed & deteriores reddunt, cum eos exemplo suo in similia secum abripiunt scelera.

Grande est peccatum scandalum.

Porro peccatum scādali atrocissimum esse, uel unica Domini in Euangelio sententia confirmat. In Matthæo enim dicit, Ve mundo ab offendiculis. Necessè est ut ueniant offendicula: ueruntamen uæ homini, per quem ueniunt. Qui offenderit unum de pusillis illis, qui credunt in me, expedit ei ut suspendatur mola asinaria in collum eius, ac demergatur in profundum maris. Paulus quoque Apostolus ad scandalizantes fratres dicit, Per tuam offensionem perit frater tuus, pro quo Christus fuit mortuus. Et iterum, Sic autem peccantes in fratres, & uulnerantes eorum conscientias infirmas, in ipsum Christum peccatis. At hoc quid poterat uel cogitari atrocius? Caueamus ergo omnes, ne scandalum ullum, abutentes Christiana libertate, obijciamus infirmis; sed ea quæ charitatis sunt faciamus semper.

Non ex Euangelio, sed hostibus Euangelij scandala.

Ante omnia tamen obfirmandus est hic animus contra hostes Euangelij, congerentes in Euangelicæ doctrinæ & concionatores & studiosos, ingentes acruos scandalorum seu offensionum. Vobis debemus, inquiunt, omnes turbas, omnia dissidia, bella & mala, quibus hodie conturbatur orbis. Obfirmandus est, inquam, animus celeberrimo dicto Christi in Euangelio dicentis. Non ueni ad mittendum pacem, sed gladium. Nam ueni, ut dissidere faciam hominem aduersus patrem suum, & filiam aduersus matrem suam, & sponsam aduersus socrum suam: & inimici hominis erunt domestici eius. Reuocanda hic sunt ponendaq; ob oculos prophetarum & Apostolorum illustria exempla. Audit à rege Achab propheta Dei Helias, se esse conturbatorem ac pestem regni. Sed regerit in ipsum regem propheta malum. Obijciunt Iudæi rebelles Ieremiã, ab eo die quo relicto cultu deorum, uerbum Dei prædicari cœperit, nullum ulli felicitati fuisse locum, sed agminatim omnia in ipsos irruisse mala. Sed audiunt id esse ex peccatis, & præcipue ex ingratitudine ac rebellionem ipsorum. Contra Paulum & Silam clamant increduli Thessalonicae Iudæi, Hi qui terrarum orbem conturbarunt homines, huc quoque uenerunt. Cæterum Paulus contra calumniatores & persecutores suos Iudæos, loquens, Hi, inquit, ut Dominum Iesum occiderunt, & proprios prophetas, ita & nos persecuti sunt, & Deo non placent, & omnibus hominibus aduersantur, qui obsistunt nobis ne prædicemus gentibus Euangelium, ut saluæ fiant, ut expleant peccata sua semper, & tandem perueniat ira Dei super eos in finem. Hæc & similia cogitent & uersent secum pii, perseuerentq; patientes & constantes in propaganda doctrina Euangelica, ut ut fremit hic mundus & offendicula obijciat. Hæc autem hætenus de Scandalo.

De bonis operibus.

Restat modò, ut postremo huius Sermonis loco, sicuti initio promissimus, dicamus & de Bonis operibus. Didicimus enim libertatem Christianam non esse licentiam, sed adoptionem in numerum filiorum Dei, qui omnem uitam suam studio uirtutum

uirtutum impendunt. Didicimus legem Dei regulam & doctrinam esse bonorum operum. Ordine itaq; differendum est de bonis operibus.

De significatione certa operum, cōstituamus ante omnia, quod uariis sit usus uocabuli & pateat latissimè. Opera enim sunt labores & exercitia hominum, quibus uictum sibi parant. Præcipit enim Apostolus proprijs operari manibus. Verat lex ne ullum opus faciamus in sabbato. Et Izraelitæ opprimebantur in Ægypto operibus duris. Sunt & operarij quibus in Euangelio dominus iubet numerare mercedem. Opus est illud quoq; quod fit uel exprimitur ab artifice uel operante. De figulo enim loquens Ieremias, Faciebat opus, inquit, super rota. Significat opus officium. Nam Paulus, Opus perface, inquit, euangelistæ. Et spiritus sanctus loquens in ecclesia Antiochena, Segregate mihi, inquit, Paulum & Barnabam in opus ad quod delegi eos. Vocantur autem opera domini magnifica Dei facta, quibus suam potentiam & bonitatem declarat hominibus: adeoq; cælum, terra, & ipse homo dicitur esse opus manuum Dei. Opera sunt etiam beneficia Dei. In euangelio enim dicit, Opera bona multa ostendi uobis. Iam sunt opera mala, opera inquam, iniquitatis. Vnde appellantur operarij iniquitatis. Illis respondent opera carnis & tenebrarum. Rursus sunt opera bona, uirtutes, inquam, uariæ, fidei fructus, cuiusmodi est iustitia, charitas, temperantia, patientia, spes, &c. Dixit enim in Euangelio dominus, Sic luceat lux uestra coram hominibus, ut uideant uestra opera bona, & glorificent patrem in cœlis. Apostolus ait cōditos esse nos ad opera bona, ut in eis ambulemus. Eadem appellantur fructus pœnitentiæ, & opera pœnitentiæ digna. Appellantur opera lucis & fructus spiritus. Eadem sunt humanitatis beneficentiæ et charitatis opera, qualia commendantur in Tabitha illa, quæ legitur fuisse plena bonorum operum. Paulus, Operemur bonum, ait, dum habemus tempus, cū erga omnes, tum maxime erga fidei domesticos. Huiusmodi opus humanitatis & charitatis impendit Maria seruatori nostro, qui dixit, Bonum opus operata est in me. His ad hunc modum explicatis, describemus iam bona opera suis coloribus & attributis.

Operum in scripturis significatio.

Bona opera actiones sunt, quæ fiunt à renatis ex spiritu Dei bono, per fidem, & secundum uerbum Dei, ad gloriam Dei, uitæq; ornamentum & honestatē, deniq; ad utilitatem proximi. Hæc breuem descriptionem, per partes prosequentes, quantum gratiæ concesserit dominus, explicabimus.

Bona opera quid.

Principio fontem bonorum operum nō alium indicamus, quàm ipsum Deum omnium bonorum authorem. Propheta enim, Omnis homo mendax, ait, solus Deus uerax. Et dominus in Euangelio, Nemo, inquit, est bonus, nisi solus Deus. Oportet itaq; bona opera non oriri ab homine, qui mendax & corruptus est, sed ab ipso Deo omnium bonorū fonte. Regenerat autem hic omnes per spiritum suum, & per fidem in dominum Iesum, ut renati iam non sua propria, id est, carnis, sed spiritus, gratiæ, adeoq; Dei ipsius opera faciant. Opera enim renatorum enascuntur ex inhabitante Dei spiritu bono, qui ut succus uitalis plantas uegetat ad proferendos fructus, ita ille uarias ex homine progerminat uirtutes, attestante Domino & dicente in Euangelio, Ego sum uitis: uos palmites estis. Sicut palmes non potest ferre fructum à semetipso, nisi manserit in uite: sic nec uos nisi in me manseritis. Qui manet in me, & ego in eo, hic fert fructum multum: quia sine me nihil potestis facere. Ad eandem refertur causam, cum dicimus bonum opus fieri per fidem. Nam fides donum Dei est, qua Christum apprehendimus, per quam & iustificamur, & uiuificamur, dicente scriptura, Iustus ex fide sua uiuet. Et alibi Paulus, Per fidem inhabitat Christus in cordibus uestris. Et iterū idem ille, Viuo

Causa bonorum operum.

iam non ego, sed uiuit in me Christus. Et uitam quam nunc uiuo in carne, per fidem uiuo filij Dei, qui dilexit me & tradidit semetipsum pro me. Caterum uiuus uiua facit opera, per eum haud dubie, per quē uiuificatus est: & iustificatus operatur opera iustitiæ, nimirum per eum, per quem iustificatus est: id est, iustus per Christum facit iustitiā: ac iustitiā totum comprehendit chorum uirtutum. Ita solus Deus manet fons & origo bonorum operū. Sed uideamus testimonia, ex quibus liquidē discamus, ipsi Deo in renatis per spiritū & fidem operanti, renatorum opera tribui. Moses testatur & ait, Benedicet tibi dominus, & circumcidet dominus Deus tuus cor tuum, & cor seminis tui, ut diligas dominum Deum tuum ex toto corde tuo, & in tota anima tua, ac uiuas. En quod pī legitime Deum diligūt, ex circuncisione profluit. Circumcidit autem dominus. Isaías propheta clarius dicit, Domine tu ordinabis pacem: quoniam tu etiam operatus es in nobis omnia opera nostra. In Euangelio secundum Ioannē dicit ipse saluator, Qui operatur ueritatem, uenit ad lucem, ut conspicua fiant opera eius, quod per Deum facta sint. Et iterum, Qui manet in me, & ego in eo, hic fert fructum multum. Quia sine me nihil potestis facere, Apostolus quoque ad Philippen. Vobis, inquit, donatum est pro Christo, non solum ut in eum credatis, uerū etiam ut pro illo patiamini. Et adhuc illustrius, Deus est qui agit in uobis, & ut uelitis, & ut efficiatis pro bono animi proposito. Sic & S. Iacobus Apostolus, Omnis, ait, donatio bona & omne donum perfectū, ē supernis est, descendens à patre luminū. Sed & S. Petrus Apostolus omnes boni operis partes Deo transcribens, ait, Deus omnis gratiæ, qui uocauit uos ad æternam suam gloriam per Iesum Christum, instauret uos, fulciat, roborat atque stabiliat. Nam nos non sumus idonei, ut iterum dicit S. Paulus, ex nobis ipsis, cogitare quicquam, tanquam ex nobis ipsis, sed omnis idoneitas nostra ex Deo est. Proinde solus Deus manet unicus bonorum operū fons, profundens per sanctos opera uerē bona.

Dei opera im-
putamur ho-
mini.

Hoc tamen hic oportet additum, ipsa opera bona, tametsi reuera Dei & propriē loquendo spiritus & fidei fructus sint, dici nihilominus & esse etiam nostra, id est, hominum fidelium opera, partim quod per nos operatur Deus, nostroque ministerio in his conficiendis utitur, partim quod per fidem filij Dei facti, atque idcirco fratres & cohæredes Christi, effecti sumus. Ex hoc enim hæreditatis iure, omnia Dei opera donaque nostra, nō ueluti aliena, sed maxime propria esse incipiunt. Sed & scriptura illa nobis tribuit, tanquam filiis & ingenuis. Nam dominus in euangelio, Seruus non manet, inquit, in domo in æternum, filius manet in æternū. Quemadmodū ergo omnia quæ sunt in domo paterna, iure hæreditatis proprietatisque filio obueniunt, tametsi ipsa non sua pararit industria, sed acceperit liberalitate parentum: ita & opera Dei, quæ ille in nobis & per nos operatur, dona quæ ab ipso habemus, nostra dicuntur & sunt, quia sumus filij familiās, seu adoptati, & idcirco iusti hæredes. Interim ingratisimi animi foret indicium, si filius adoptatus, paternæ munificentiae & liberalitatis immemor, omnes illas facultates hæreditate acceptas, suo studio suaque uigilia partas gloriaretur. Vnde religiosissime dixit Apostolus, Quid habes quod nō accepisti? Quod si accepisti, quid gloriaris quasi nō acceperis? Religiosē sentiebat S. Dei martyr Cyprianus, qui dicere solebat, In nullo gloriandum, quando nostrum nihil sit. Huc pertinere uidetur quod apud Isaïam legitur, Nunquid gloriabitur securis contra eum qui secat cum ea? nunquid gloriabitur serra contra eum qui ipsam agit? Certē nos sumus organa Dei per quæ operatur. Nā Apostolus, Dei inquit, sumus cooperarij, Dei agricolatio, Dei ædificatio estis, iuxta gratiam Dei, quæ data est mihi. Ergo secundum scri-
pturæ

ptura Apostolica sensum pronunciauit S. Augustinus, cum lib. de Gratia & libero arb. in 6. cap. ita scribit, Cum data fuerit gratia, incipiunt esse etiam merita nostra bona, per gratiam tamen. Nam si illa sese subtraxerit, cadit homo, non erectus, sed precipitatus libero arbitrio. Quapropter quando coeperit homo habere merita bona, non debet sibi tribuere illa, sed Deo, cui dicitur in Psalmo, Adiutor meus esto, ne derelinquas me. Dicendo, Ne derelinquas me, ostendit, quia si derelictus fuerit, nihil boni ualet ipse per se. Proinde hisce uerbis euidenter satis ostendit S. Augustinus, opera bona ita esse nostra, ut interim Dei esse non desinant, imò debeantur nihilominus gratiae operantis Dei.

Ex his uerò quae iam de uera bonorum operum causa protulimus ex scripturis, facile erit intelligere quomodo tribuat scriptura operibus nostris iustitiam. Alibi enim euidenter satis demonstrauius (& adijciemus quaedam ubi uentum fuerit ad tractationem Euangelij) fidem, non opera nostra, iustificare. Id quod caput & fundamentum est euangelicae & apostolicae doctrinae. Opera nostra in uniuersum omnia, uel naturae aut carnis, uel legis aut legalia, uel fidei aut gratiae opera sunt. Naturae autem uel carnis opera damnant, non iustificant: Quia quod natum est ex carne, caro est. At affectus carnis mors est, & inimicitia contra Deum. De operibus legis quid pronunciarit Apostolus, copiose exposui proximo sermone. Ex operibus legis non iustificabitur, ait, ulla caro. Caterum si opera gratiae uel fidei excutiamus, inueniemus, ea fieri uel facta esse à fidelibus & iustis. Vnde manifestum est quod iustificatio praecessit opera iustitiae. Iustus enim operatur iustitiam, ut iustitia iusti sit fructus. Gratis quidem homo iustificatur, non per opera, quae iustificationem sequuntur. Quid quod scriptura aperte testatur, ne ipsum quidem Abrahamum, omnium credentium patrem, ex operibus gratiae uel fidei fuisse iustificatum? Vixit is ante legem annis 430. credidit Deo, & ex fide uera excellentissima opera fecit: uerum ex his suis fidei operibus minimè est iustificatus. Paulus enim manifestè sic argumentatur, Si Abraham ex operibus iustificatus est, habet quod gloriatur: at non apud Deum. Quid enim scriptura dicit? Credidit Abraham Deo, & imputatum est ei ad iustitiam. Ei uerò qui operatur, merces non imputatur secundum gratiam, sed secundum debitum. Porro ei qui non operatur, sed credit in eum qui iustificat impium, imputatur fides sua ad iustitiam. Quod autem concludimus & nos ad Abraham exemplum fore iustificandos, ex fide, non operibus, non ex nobis ipsis, sed apostolica doctrina concludimus. Dicit enim Paulus, Non scriptum est autem propter Abraham tantum imputatam illi fidem ad iustitiam, sed etiam propter nos, quibus imputabitur, si credamus in Christum. De hac re disputatum est etiam 6. Ser. Decad. I. Certè imò pectore recondendum censeo fidelibus hoc dogma apostolicum & euangelicum, Gratia Dei, non meritis nostris, per fidem in Christum, non per opera nos iustificari.

Cum autem hoc dogma urgemus & inculcamus, dicimur à multis patroni esse omnis nequitiae, & hostes omnium uirtutum aut bonorum operum. Nos uerò doctrina & assertione illa nostra de sola fide iustificante, non uituperamus bona opera, non putamus illa esse superuacua, non dicimus illa non esse bona: oppugnamus potius abusum bonorum operum, & doctrinam de operibus bonis corruptam uel uitiatam fermento pharisaico. Docemus enim facere bona opera, sed nolumus illa uenum exponi, & emi nescio quibus contractibus, nolumus illis fidere quenquam, nolumus de donis dei gloriari quenquam, nolumus illis simpliciter tribui uel uim iustificandi, uel promerendi uitam aeternam. Ita enim uilesceret & oppugnaretur Christus, qui solus morte sua promeruit nobis regnum coelorum. Neque

Nulla opera
iustificant.

Bona opera non
reijciuntur: sed
damnantur con-
trahunt abusus.

hoc modo, sicut multis uidetur, separamus opera à fide. Docemus illa ab hac minime auelli, sed coherere arctissime: ita tamen ut proprie tribuatur fidei iustificatio, non operibus. Hæc enim in nostram dignitatē incumbunt, fides innititur promissioni Dei, quæ nobis iustitiā & uitam in solo Dei filio proponit. Ac satis quidem per seipsum & suapte uirtute efficax est Christus ad iustificandum credentes, neque ullo nostro indiget operum supplemento.

Quomodo scriptura tribuat nostris operibus bonis iustitiam.

Simul autem agnoscimus scripturam passim bonis operibus in speciem tribuere uitam & iustitiam. Atqui scriptura secum non pugnat: inquirendum est ergo qua ratione aut quomodo & uita & iustitia nostris tribuatur operibus. S. Augustinus ita soluit, ut bona opera ad gratiam Dei referat. Nam in libro De Gratia & libero arbitrio cap. 8. hæc scribit, Si uita æterna bonis operibus redditur, sicut apertissime scriptura dicit, Quoniam Deus reddet unicuique secundum opera sua: quomodo gratia est uita æterna, cum gratia non operibus reddatur, sed gratis datur: ipso apostolo dicente, Ei qui operatur merces non imputatur secundum gratiam, sed secundum meritum. Et iterum, Reliquiæ, inquit, per electionem gratiæ saluæ factæ sunt. Et mox addit, Si autem gratia, iam non ex operibus: alioqui gratia iam non est gratia. Quomodo ergo gratia est uita æterna, quæ ex operibus sumitur? An forte uitam æternam non dixit Apostolus gratiam? Imò uerò sic dixit, ut negari omnino non possit: nec intellectorem acutum, sed tantummodo intentum desiderat auditorē. Cum enim dixisset, Stipendium peccati mors, continuo subdit, Gratia autē Dei uita æterna, in Christo Iesu domino nostro. Ista ergo quæstio nullo modo uidetur mihi posse dissolui, nisi intelligamus & ipsa bona opera nostra, quibus æterna redditur uita, ad Dei gratiam pertinere: propter illud quod ait dominus Iesus, Sine me nihil potestis facere. Et ipse Apostolus, cum dixisset, Gratia salui facti estis, per fidem addit, Et hoc non ex uobis: Dei donum est: non ex operibus, ne quis gloriatur. Hæc Augustinus hætenus. Et quamuis satis sit pia & clara hæc beati Augustini responsio, ueritatem simpliciter indaganti, non dubito tamen pluribus eā non fieri satis. Illi ipsi conabuntur, sat scio, ex Augustini uerbis colligere, etiā opera, non fidem duntaxat iustificare. Sic enim colligunt, Per gratiam iustificamur, & æternam uitam consequimur: at opera bona pertinent ad Dei gratiam: illa ergo iustificant. Libet autem cum his paululum conserre manus, ut hisce pauculis collique scat sophismata esse quæ isti uenditant pro solidis argumentis. Et principio norunt omnes non stupidi Paulinæ doctrinæ studiosi, non posse hæc propositiones simul consistere, Gratia iustificamur: & Operibus iustificamur. Sole enim clarior est illa Pauli sententia, Si ex gratia, iam non ex operibus: alioqui gratia non est gratia. Vtrancque propositionem fatemur ingenuè, uidelicet & gratiam iustificare, & Opera pertinere ad gratiam Dei. Cæterum consequentiam esse falsam deprehendimus. Similiter enim uerè diceretur, Homo quidem uidet: & manus pertinet ad hominem. Quis uerò inde colligat: ergo manus uidet? Omnes enim intelligunt hominem constare membris, & singula habere suas uires & sua officia. Rursus Gratiam Dei, indiuisam alioqui, distinguere secundum operationes, quis est qui ignoret? Est enim gratia in Deo ueluti generalis, qua cunctos condidit mortales, qua pluit super iustos & iniustos. Sed hæc non iustificat. Alioqui iustificarentur omnes impij. Deinde est gratia singularis illa, qua gratis nos propter filium unigenitum adoptat pro filijs: non omnes quidem, sed credentes duntaxat, quibus uidelicet peccata non reputat, iustitiam uerò filij sui unigeniti imputat. Et hæc uerè & sola iustificat. Rursus est gratia, quæ diffusa in animos nostros, opera bona per iustificatos profert. Hæc non iustificat, sed ex iustifica-

Paralogismi eorum qui operibus tribuunt iustificationem.

iustificatis iustitiæ fructus progignit. Concedimus ergo ad gratiam pertinere bona opera, sed sua ratione, suo modo & ordine.

Obijciunt iterum, Verum gratia uel fides & opera, item iustificatio & sanctificatio inseparabiliter coniuncta sunt: ergo quod uni congruit, competit alteri. Ac nullo quidem modo inficias eo fidem & opera inter se coherere: nego autem modis omnibus utraq; illa unum esse, ut quod uni attributum est, alteri quoq; congruere possit. Fides enim quanquam sit imbecillis & imperfecta in nobis, nititur tamen perfectione Christi, huiusq; solius, & eatenus iustificat. Opera uero nostra semper aliquid uitij, ut ne quid dicā acerbius aliud, habent aspersum, propter morbum nobis omnibus agnatum: sed inde non sequitur gratiam Dei ullo nostro pollui uitio. At hoc consequi oporteret, si propter coniunctionem arctissimā unius esset quod est alterius. Solis lumen quanquam nunquam separetur à calore, attamen calor non est. Nec sequitur, Sol orbem illuminat, ergo calor omnia illuminat. Quia in sole sunt calor & lumen indissociata. Quinimò Sol secundum lumen orbem illuminat, interim minimè illuminat secundum calorem. Et tamen Sol calefaciens illuminat etiam. Sic iustificamur gratuita Dei misericordia propter Christum donum gratis, non secundum gratiæ opera: licet hæc progignantur & prouehantur per illam. Ita uero oportet omnem gloriam in solidū gratiæ Dei tribuere, nec phas est ut inde nobis partiamur quicquam.

Rursus uero sophisticantur illi, Etiam si doceamus non solum propter fidem in Christum, sed etiam propter opera fidei, fidelibus reddi à Deo uitam æternam, Deo nihilominus omnis cedit gloria: præsertim cum fateamur opera illa per gratiam Dei fieri in nobis. Respondemus, Deo gloriam ita tribuendā prout ipse uult sibi tribui. Si Dei uoluntas aut cōsiliū esset, nos in suam amicitiam recipere propter opera quæ in nobis facit Dei spiritus & gratia, temerè unigenitū filium suum misisset in mundum, temerè destinasset illum morti acerbissimæ. Deus autem nihil in uniuersa creatura sua, nec in cœlo nec in terra, multò minus hac in causâ omnium maxîma, frustra fecit. Quare certissimum est, cōsiliū Dei nunquam fuisse, nos propter uirtutes & opera fidei redimere à diabolo & acceptare pro filiis, sed propter unicam Christi filij sui unigeniti domini nostri hostiam uel satisfactionem. Firmum enim & inuictum perstat hic Pauli iudiciū dicentis, Si ex operibus legis est iustitia, ergo Christus frustra fuit mortuus. Inuicta triumphat hæc S. Petri diuina sententia, Non est in alio quoquam salus.

Iam uero & scripturæ aliquot locos inter se committentes colligunt, Quamquam Paulus alicubi dicat, Gratia salui facti estis, per fidem, idem tamen alibi scribit, Spe seruati sumus. Quis autem nesciat spem patientia quasi uegetari? Christo etiam in Euangelio astipulante & dicente, In patientia uestra possidebitis animas uestras. Proinde non sola fides seruat, sed & spes ac patientia. Dicimus diuū Apostolum satis se explicare, si quis omnia eius legat ex integro, expendatq; quæquæ dicat consilio. Gratia, inquit, estis seruati, per fidem: idq; non ex uobis, Dei donum est: non ex operibus, ne quis gloriatur, &c. An non pauculis hisce uerbis quid de gratia uel fide & operibus sentiat exposuit clarissime? Quis planiora postulauerit? Nemo tam bardus, qui non intelligat gratiæ in solidum & merè tributorum salutis beneficium. Neq; enim partitur salutem uel iustitiam, operibus partim, partim fidei uel gratiæ, neq; potiores fidei, inferiores operibus tribuit. Excludit omnem gloriationem. Gratia per fidem, inquit, seruati estis: & addit mox, Idq; non ex uobis. Causam subiungit, Dei donum est. Et iterum, Non ex operibus, Causam subnectit, Ne quis gloriatur. Qui hæc non intelligit, nihil profectò intel-

ligit. Qui hæc torquet & calumniatur, expuit in solem, & dicit lucem esse tenebras. Quod uerò idem Apostolus alibi dicit, Spe seruati sumus, ex totius loci contextu colligitur ipsum tale quid enunciaſſe, Dixi eos qui credunt Christo, eſſe filios atq; hæredes Dei, eoq; uerè ſaluos atq; beatos: uerùm hoc uelim quemlibet intelligere ſpe & expectatione, nondum reiſſa aut præſenti perfruitione. Quis uerò hinc colligat, Ergo ſpes iuſtificat? Quinimò nos ſic colligimus, Patientia prorsus nulla eſt, niſi patiens uera fide prius iuſtificatus ſit; idcirco patientiæ laus & uirtus tota pendet ex fide: non autem fidei ex patientia, etſi declaretur & exerat ſe per patientiam.

Nam omnibus modis homine Chriſtiano indigna eſt ſententia, quæ aſſerit operibus noſtris perfici fidem, id eſt, per opera ſarciri quod fidei diminutum uidetur. Cum enim fidem dicimus, non qualitatem in animis noſtris hærentē dicimus, ſed ipſum cum iuſtitia & donis ſuis Chriſtum dominum: cui ut unico fundamento innititur fides noſtra. At uelle imperfectionem Chriſti ſupplere, quid aliud eſt, quàm filium Dei ſatanica deſœdare blaſphemia? Operibus quidem exerit & declarat ſe fides ſanctorum; ſed opera nequaquã perficiunt quod perfectioni Chriſti uidetur deeſſe. Nihil enim deſideratur in liberatione, redemptione & iuſtificatione Chriſti. Dixit ſanè Apostolus Iacobus, Vides quòd fides ex factis perfecta fuerit; uerùm non uoluit aliud dicere, quàm, Vides fidem inſequentibus operibus declaraffe, quòd uera & iuſta ſit, non hypocritica? Nam ante hæc uerba dixit, Vides quòd fides eius efficax fuerit per opera? Rurſus dixit Apostolus Paulus, Suppleo uel adimpleo ea quæ deſunt afflictionibus Chriſti, in carne mea, pro corpore eius. Cæterum *τὰ ὑστερήματα* rectius uerteris quæ ſuperſunt, quàm quæ deſunt afflictionibus Chriſti. Nam Græci *τὰ ὑστερήματα* appellant nō modò ea quæ deſunt, ſed ipſas quoq; reliquias (quo uerbo uſus eſt S. Ambroſius) quæ inquã ſuperſunt, & poſterius relictæ ſunt. At beatus Petrus, Chriſtus, inquit, paſſus eſt pro nobis, relinquens nobis exemplum, ut inſequeremur eius ueſtigia. Hæc ergo reliquias expleſſe patiēdo aſſeuerat Apostolus.

Poſthæc proferunt Apostoli Pauli uerba, Si habeam omnem fidem, adeò ut montes loco dimoueam, charitatem autem non habeam, nihil ſum. Hinc enim colligunt, Ergo non tantùm fides, ſed & charitas: imò magis charitas quàm fides iuſtificat. Nos uerò dicimus Paulum in præſenti nec negare fidem ſolam iuſtificare, nec charitati ſanctorum iuſtificationē tribuere. Nam cum fide nos iuſtificari aſſerimus, uel fidem iuſtitiaſſe cauſſam conſtituimus (id quod ſæpius repetendū adeoq; & inculcandum uidetur) non intelligimus fidem tanquam uirtutem in nobis efficere, & qualitate ſua nobis adhærente mereri iuſtitiam apud deum: ſed quoties fidem nominamus, intelligimus gratiam Dei in Chriſto exhibitam, quæ per fidem gratuito nobis applicatur, uelutiq; gratuitum donum Dei apprehenditur recipiturq;. Et eo modo uſurpat & Paulus fidei nomen, cum fidem iuſtificare contendit. At in loco ad Corinthios 13. cap. fidei uocabulum non ita uſurpat, ſed pro uirtute miracula deſignandi. Id quod ex his patet, quæ protinus ſequuntur, Ita ut montes transferam. Ea non apprehendit totum Chriſtum, ſed tantùm potentiam in edendis miraculis. Ideoq; interdum eſſe poteſt in homine iniuſto uel hypocrita qualiter erat in Iuda Iſcariota, cui nihil profuit fides ſignorum, cum careret fide iuſtificante, quæ protinus progignit ex ſe charitatem.

Rurſus cum obijciunt illud ex euangelio Ioannis, Qui habet præcepta mea & ſeruat ea, illè eſt qui diligit me: & pater meus diliget eum, & ad eum ueniemus, & mansionem apud eum faciemus: ergo propter obſeruationem præceptorū, id eſt, propter

propter opera coniungitur nobis Deus. Nos uicissim illud eiusdem Ioannis Apostoli & Euangelistæ obtendimus, Ex hoc cognoscimus quod in eo manemus, & ipse in nobis, quoniam de spiritu suo dedit nobis. Est autem is Dei spiritus, munus gratuitum, ergo obtingit nobis coniunctio illa cum Deo gratis. Sequitur in Ioanne, Et nos uidimus & testamur, quod pater misit filium seruatorem mundi. Audis opinor per quid seruetur mundus, & quis sit saluator mundi, Christus. Quis uerò nescit hunc à patre nobis missum esse mera Dei gratia? Sequitur quomodo illa gratia recipiatur, Quisquis confessus fuerit quod Iesus est filius Dei, Deus in eo manet, & ipse in Deo. Cæterum Ioan. 6. pro confiteri reponitur credere. Nec mirum, cum ex uera fide exoriatur confessio uera. Fide ergo recipimus salutem, fide coniungimur cum Deo. Sed præteritis rixatoribus, quibus nunquam de erunt sophismata, reuertimur ad institutum nostrum, ut ostendamus qua ratione operibus tribuatur uita & iustificatio.

Exercitati in literis diuinis ad reconciliandas in speciem dissidentes scripturæ sententias, docent fidem & opera non disiungi re ipsa. Nam idem spiritus sanctus, qui fidem largitur, simul regenerat intellectum & uoluntatem, ut fidelis ardentius cupiat & conetur Deo per omnia inseruire. Dicimus ergo propter inseparabilem illam coniunctionem fidei atque uirtutum, quæ comitantur & sequuntur fidem, illis aliquando minus propriè tribui, quod magis est proprium fidei, propriissimum autem Christi per fidem apprehensi, fidei quæ fundamenti. Hoc ipsum conabimur adhuc clarius exprimere. In fide uera spectantur duo, Reconciliatio & Obedientia. Reconciliatio quidem, quia fide intelligimus & firmiter tenemus Deum nobis reconciliatum esse, propter Christum, per quem adoptati sumus in numerum filiorum Dei. Obedientia autem, quia reconciliati sese totos ei dedicant, cui reconciliati sunt, cupientes facere uoluntatem eius. Iam ergo dicimus duplicem esse iustitiam, nempe iustificantem & obedientem. Iustificantis meminit Apostolus, cum dixit, Iustificati ex fide pacem habemus erga Deum, per Dominum Iesum Christum, per quem reconciliati sumus. Obedientis idem meminit cum dixit, An nescitis quod cui accommodatis uos ipsos seruos ad obediendum, eius serui estis, cui obeditis: siue peccati ad mortem, siue obedientiæ ad iustitiam? id est, quæ obedientia efficit ut faciatis ea quæ iusta sunt, sitis quæ serui iustitiæ, quod cedit uobis ad uitam: & non serui peccati, quod cedit ad mortem. Iam ergo iustitiæ reconciliatrici per Christum propriè tribuitur iustificatio, impropriè iustitiæ obedienti. Nam hæc ex illa existit, & sine illa non appellaretur iustitia. Quibus & hoc accedit, quod iustificati in hanc obedientiam prorsus nihil confidunt, utpote semper propter carnem nostram in hoc mundo contaminatam.

Conciliatur in specie pugnantibus loci de fide & operibus.

Huic non dissimilis est & hæc, quam addimus, explicatio, Fidei propriissimum opus est purificatio & sanctificatio. Nam S. Petrus disertè dicit, fide purificari corda. Cæterum in sanctificatione duo præcipua ostendunt sacræ literæ. Prius Iesu Christi sanguine purificari gratis omnes credentes. Iterum enim S. Petrus, Scitis uos redemptos esse, inquit, non caducis rebus uelut auro & argento, sed pretioso sanguine uelut agni immaculati. S. Paulus, Per uoluntatem, ait, Dei sanctificati sumus, per oblationem corporis Iesu Christi semel peractam. Vnica enim oblatione perfectos effecit in perpetuum eos, qui sanctificantur. S. Ioannes quoque, Sanguis, inquit, Iesu Christi filij Dei emundat nos ab omni peccato. Proinde propriissime loquendo sanctificat nos per fidem sanguis Christi, qui dixit, Ego sanctifico me pro ipsis, ut sint & ipsi sancti per ueritatem. Posterius est, sanctificatos Christi sanguine per fidem, indies se sanctificare & studere sanctimoniam. Ut autem hoc

faciant sancti, sedulo adhortantur Apostoli. Petrus enim, Quoniam is, inquit, qui uocauit uos sanctus est, ita ipsi quoque sancti in omni conuersatione reddamini, propterea quod scriptum est, Sancti estote: nam & ego sanctus sum. S. Paulus, Hæc, inquit, est uoluntas Dei, sanctificatio uestra, &c. 1. Thessal. 4. S. Ioannes, Nunc filij Dei sumus, nondum tamen quid futuri simus apparuit. Certò autem nouimus quòd cum ille apparuerit, similes ei erimus: quoniam uidebimus eum sicuti est. Et omnis qui habet hanc spem in eo, purificat se, sicuti & ille purus est. Hæc autem purificatio, quæ uidelicet nostra cura fit & industria, dicitur sanctificatio, non quia facta sit à nobis, sed quia à sanctificationis Christi sanguine sit facta. Nisi enim ea sanctificatio, quæ sola est uera, præcedat, nostra certè nulla est: sin uerò præcedat illa, hæc nostra imputatur pro sanctificatione, licet interim sordes peccatorum manentes in nobis hanc coinquinent, nec quicquam fiduciæ in ipsam collocemus. Quoties ergo operibus nostris bonis iustitiā in sacris literis ascribilegeris, eas ob causas, quas hæcenus exposui, factum putabis. Nequit enim spiritus Apostolicus sibi ipsi aduersari.

*Apostoli cōtra
iustitiam ope-
rum.*

*Apostoli cōtra
abutentes gra-
tia & fide.*

His permultum lucis accesserit, si cogitauerimus & hoc, Apostolis Christi certamen fuisse cum duobus hominum generibus, quorum alij contendebant se suis uiribus legi posse satisfacere, suisque meritis uel bonis operibus promereri uitam æternam: imò meritum Christi per se non esse sufficiens parandæ salutis, nisi & hominum accedat iustitia. Contra hos constanter & acriter pugnauit Paulus in omnibus epistolis. Nam isti & Christum & gratiam Dei euacuabant. Alij uerò doctrina gratiæ & fidei abutentes, uolubant se in sceleribus, putantes satis esse ad salutem, si dicerent se credere. Fidem autem suam nullis declarabant, etiam cum daretur occasio, bonis operibus. Contra hos constanter & acriter certauit S. Petrus 2. Epistola cap. 1. & S. Iacobus cap. 2. Contendit enim hic Abrahamum iustificatum esse non tantum fide, sed per opera: id est, non inani opinione esse iustificatum, sed per fidem bonorum operum feracem. Aliter enim uocabula Fidei & Iustificationis usurpat Iacobus, aliter Paulus. Huic fides est certa fiducia meriti Christi: Iustificatio, absolutio à peccatis, & adoptio in numerum filiorum Dei, adeoque & imputatio iustitiæ Christi. Illi autem fides significat inanem opinionem; iustificatio non imputationem iustitiæ, sed declarationem iustitiæ ac adoptionis. Nam in dubitatum est, fidelissimos Christi Apostolos S. Petrum & S. Iacobum noluisse scriptis illis suis, gratiam & meritum Christi euacuare, & merita hominum attollere: sed illorum potius impuritati obstare, qui fidem Christi magno cum offendiculo bonorum omnium iactabant, uiuentes interim in sceleribus, sine poenitentia, impurissime. Requirentes ergo opera bona à fidelibus Apostoli Christi, ueram fidem inprimis requirunt, & omnia ad gratiam Dei referunt.

*Fides absq; ope-
ribus iustificat.*

Retineamus ergo firmissimè, Apostolos improprie operibus bonis: fidei autem ueræ proprie: sed propriissime ipsi Christo quo fides fundatur, tribuere iustitiam, uitam, & salutem hominis. Quanquam enim communi lege fides non sit absq; operibus bonis, iustificat tamen absque operibus bonis, & sola quidem. Certissimum enim est ita nobis uitam & salutem communicari, quemadmodum concedebatur filiis Izrael in deserto dipsadum ueneno infectis, sanitas & uita. At non per opera ulla, sed sola inspectione aut contemplatione ænei serpentis restituebatur sanitas: ergo & nobis per solam fidem, quæ Christi uera inspectio & contemplatio est, participatur uita. Sicut Moses exaltauit serpentem in deserto, ait Saluator, ita exaltari oportet filium hominis, ut omnis qui credit in eum, non pereat, sed habeat uitam æternam. Et Apostolus Paulus, Gratia estis seruati per fidem, id est non ex uobis, Dei

Dei donum est: non ex operibus, ne quis gloriatur, &c. Congruunt cum Euangelica & Apostolica doctrina & doctorum quorundam ecclesiae testimonia. Quae C. V. recitabo, non quod diuina nobis non sufficiant, sed ne uideamur esse noui dogmatis authores. Quanquam nouum esse non possit, quod petitur ex doctrina Euangelica & Apostolica, tamen omnes ecclesiae doctores contradicerent: iam uero eximij quidam & ipsi disertè ostendunt, non tantum loquuntur aut scribunt, solam fidem iustificare.

Origenes in 3. cap. Epistolae Pauli ad Roma. scriptor peruetustus, scriptum reliquit, Dicit Paulus sufficere solius fidei iustificationem, ita ut credens quis tantummodò iustificetur, etiam si nihil ab eo operis fuerit expletum. Quod si exemplum requiramus, quis sine operibus, sola fide, iustificatus sit, sufficere arbitror illum latronem, qui cum Christo crucifixus, clamauit de cruce, Domine Iesu, memento mei, cum ueneris in regnum tuum. Nec aliud quicquam describitur boni operis eius in Euangelij, sed pro hac sola fide, ait ei Iesus, Amen dico tibi, hodie mecum eris in paradiso. Per fidem ergo iustificatus est hic latro, sine operibus legis. Quia super hoc Dominus non requisit quid prius operatus esset, nec expectauit quid operis cum credidisset expleret, sed sola confessione iustificatum comitemque sibi, paradysum ingressurus assumpsit. Sed & ad mulierem quae in Euangelio secundum Lucam refertur, ex nullo legis opere, sed pro sola fide, ad eam ait, Remittuntur tibi peccata tua. Et iterum, Fides tua te saluam fecit, uade in pace. Sed & in multis Euangelij locis hoc sermone usum legimus seruatore, ut credentis causam dicat esse salutis eius. Et paulò post idem Apostolus dicit, Mihi autem absit gloriari, nisi in cruce Domini nostri Iesu Christi, per quem mihi mundus crucifixus est, & ego mundo. Vides Apostolum non gloriantem super iustitia sua, neque super castitate, neque super sapientia, neque super ceteris uirtutibus aut actibus suis, sed apertissime pronunciantem & dicentem, Qui gloriatur, in Domino gloriatur: & sic exclusa est gloriatio. Et quae secuntur alia plurima in hanc sententiam.

Beatus Ambrosius in Enarratione Epistolae Pauli ad Romanos in cap 3. & 4. sic scripsit, Iustificati sunt, inquit Paulus, gratis, quia nihil operantes, neque uicem reddentes, sola fide, iustificati sunt dono Dei.

Secundum propositum gratiae Dei, sic decretum dicit Paulus à Deo, ut cessante lege, solam fidem gratiae Dei posceret ad salutem.

Hoc ipsum munit exemplo prophetæ beatitudinem hominis, cui Deus accepto fert iustitiam sine operibus, beatos dicit de quibus hoc sanxit Deus, ut sine labore, & aliqua obseruatione, sola fide iustificentur apud Deum.

S. Ioannes Chrysostomus de fide & lege naturae ac spiritu sancto disertis uerbis, Eum, inquit, qui operatur opera iustitiae sine fide, non possum probare uiuum fuisse. Fidelem autem absque operibus possum monstrare & uixisse, & regnum coelorum consequutum. Nullus sine fide uitam habuit. Latro autem credidit duntaxat, & iustificatus est à misericordissimo Deo. Atque hic ne mihi dixeris, defuisse ei tempus, quo iuste uiueret & honesta faceret opera. Neque enim de hoc contenderim ego: sed illud unum asseuerauerim, quod sola fides per se saluum fecerit. Nam si superuixisset, fideique & operum fuisset negligens à salute excidisset. Hoc autem nunc quaeritur & agitur, quod fides per seipsam saluum fecerit, opera autem per se nullos unquam operarios iustificauerunt. Id quod Chrysostomus pluribus ostendit exemplo Cornelij Centurionis. Sufficiunt haec testimonia minimè rixosis ingenijs. Alioquin plura possem proferre. Verum nolo C. V. onerosus esse, ac uideri spinosus in negotio planissimo.

De meritis uel
præmio bono-
rum operum.

Quoniam uerò huic tractationi de iustitia operum, confinis est quæstio de Bonorum operum meritis, adijciam istis paucula de Merito, imò potius de mercede & præmio bonorum operum. In hoc potissimum, ne quis perperam & irreligiosè de meritis bonorum operum sentiens, non iam bona, sed mala potius opera habere mereatur.

Merita bona
hominū nulla.

Vocabulum meriti extraneum seu alienum est à scripturis. In ea enim significatione, qua uerè usurpatur, nempe pro opere nostro meritorio, cui uidelicet meritò rependitur uita æterna aut gratia Dei, obscurat Dei gratiam, & reddit hominem superbum. Quid oro mereantur opera nostra, quæ nemo sanctorum protulerit in conspectum Dei? Clamat Iob, Si iustificare me uolueris, os meum condemnabit me; si innocentem ostendero, prauum me comprobabit. Si lotus fuero quasi aquis niuis, & fulserint uelut mundissimæ manus meæ, tamen sordibus intinges me, & abominabuntur me uestimenta mea. Clamat Dauid, Ne introieris in iudicium cum seruo tuo, quia non iustificabitur in conspectu tuo ullus uiuens. Clamat in Euangelio Christus Dominus. Cum feceritis omnia quæ præcepta sunt uobis, dicite, Serui inutiles sumus: quod debuimus facere fecimus. At paulò superius dixerat, Num Dominus gratiam habet seruo illi, qui fecit quæ imperata sunt? Clamat item Paulus, Non aspernor gratiam Dei. Nam si per legem est iustitia, igitur Christus frustra mortuus fuit. Rursus apud Lucam uituperatur grauius Phariseus, quòd nedum fideret suæ iustitiæ, sed & de suis gloriaretur meritis. Et Nabuchodonozor grauissimum sentit supplicium, quòd dixisset sua arte, industria, uirtute, & potentia paratum esse regnum Babylonicum. Quanto uerò grauiori supplicio dignos arbitrabimur illos, qui arbitrantur, adde & iactitant suis se meritis meruisse regnum cœlorum?

Premium uel
merces datur
bono operi.

Hæc autem non eò tendunt, ut præmium uel mercedem boni operis euacuemus, aut negemus præmium esse uirtutibus paratū. Nam Deus uerax est qui promissit, & quod promissit præstat. Promissit autem præmia operantibus iustitiam: sicuti pro iustitia & ueritate sua supplicia interminatus est sceleratis & impœnitentibus. Cæterum promissiones Dei duplices sunt, proponentes uidelicet præmia uel mercedem præsentis uitæ & futuræ. Nam Dominus in Euangelio secundum Marcum, Amen dico uobis, inquit, nullus est qui reliquit domum, aut fratres, aut agros, mea causa aut Euangelij, quin recipiet centupla nunc in tempore hoc, cum persecutionibus, ac in seculo uenturo uitam æternam. Sed & Paulus, Pietas, inquit, ad omnia utilis est, ut quæ promissiones habeat uitæ præsentis & futuræ. Indubitatus sermo dignusq; qui modis omnibus approbetur. Nam in hoc & laboramus & probris afficimur, quòd spem fixam habemus in Deo uiuente, &c. Ac profuerit quidem in promptu aut numerato habere testimonia scripturarum de mercede uel præmio boni operis. Paucula, sed euidentiā hic recitabo. Dominus apud Isaïam clamat, Dicite iusto quòd bene habebit, quia fructum studiorum suorum comedet. Væ item impio malo, quoniā retributio manuum suarum fiet ei. Apud Ieremiā legimus, Prohibe uocē tuam à fletu, quia merces est operi tuo. Et in Euangelio dicit Dominus, Beati estis cum dixerint homines omne malū uerbum aduersus uos, mentientes, propter me. Gaudete & exultate, quoniā merces uestra multa est in cœlis. Apostolus quoq; Paulus, Gloria, inquit, honor & pax omni operanti bonum, Iudeo simul & Græco. Item, Omnes nos manifestari oportet coram tribunali Christi, ut reportet unusquisque ea quæ fecit per corpus, iuxta id quod fecit, siue bonum, siue malum. Et iterum, Unusquisque suam mercedem accipiet, iuxta suum laborem.

Quibus sine
proposita præ-
mia.

Meminerimus autem strenuè laborantibus mercedem promitti, magnāq; ipsis parari

parari præmia. Inertibus & segnibus incumbunt mala præsentis & futuræ uitæ. Certantibus & legitime, debetur corona. Quod si præmium diu differatur, nec promissiones accipiant certantes, cogitent afflictæ ad utilitatem ipsorum afflictiones tendere, sed & ab ipso patre cœlesti imponi. Non ergo despondeant animum, sed fortes sint in pugna, inuocent auxilium Dei. Nam qui perseverauerit in finem usque hic saluus erit. Reuocet quisque exempla sanctorum patrum, quibus complures factæ sunt promissiones, quarum tamen fructum serò tandem multoq; cum certamine perceperunt. Clamat Apostolus Paulus. Certamen bonum decertavi, cursum consummaui, fidem seruauit: quod superest, reposita est mihi iustitiæ corona, quam reddet mihi Dominus in illo die, qui est iustus iudex: non solum autem mihi, sed & omnibus qui diligunt aduentum ipsius. Reuocanda est ob oculos ueritas Dei, dicentis, Cœlum & terra transibit: uerbum meum non transibit. Diu quidem in Ægypto captiui detinebantur Israelitæ: sed non obliuiscatur uerbi sui Dominus. Commodo enim & maxime opportuno tempore, & maxima quidem cum gloria illos in libertatem asseruit. Amalechitæ diu quidem exultabant in suis sceleribus, sicut & Chananæi. Verum ubi impleta esset mensura iniquitatis, meritas iusto iudici pœnas persoluerunt. Hortatur ergo scriptura ad spem, patientiam longanimum & constantiam perseverantissimam. De qua re dixi Sermone 3. Decad. 3. Huc pertinere maxime puto præclara illa S. Pauli uerba. Certus sermo, Nam si commortui sumus, & conuiuemus: si sufferimus, & conregnabimus: si negamus, & ille negabit nos: si increduli sumus, ille fidelis manet: negare seipsum non potest. Et iterum, Ne abieceritis fiduciam uestram, quæ magnam habet præmij retributionem. Nam patientia uobis opus est, ut ubi uoluntatem Dei peregeritis, reportetis promissionem. Adhuc enim perpusillum temporis, & qui uenturus est ueniet, & non tardabit. Iustus autem ex fide uicturus est, & si se subduxerit, non probabitur animo meo. At nos non sumus qui subducamus nos in perditionem, sed ad fidem pertinemus in acquisitionem animæ.

His tamen & similibus de mercede & præmio operum testimonijs, aut ipso etiam meriti uocabulo, quo utuntur S. Patres, non abutendum est contra prædicationem meriti Christi & meræ gratiæ. Cogitabimus regnum cœlorum & præcipua alia Dei dona non esse mercedem seruorum, sed hæreditatem filiorum Dei. Quanquam enim multa opera iudex in extremo iudicio enumeraturus sit, propter quæ uitam quasi rependere uidetur electis, præmittet tamen omnibus operibus, hæc, Venite benedicti patris mei, possidete regnum paratum uobis ab exordio mundi. Quod si rogas, Quare in iudicio Dei ultimo non fidem potius quam opera commemoret iudex? Respondeo ad legitimum iudicium pertinere non tantum ut sit iustum, sed ut intelligatur etiam ab hominibus esse iustum. Adde, Deum nobiscum agere humano more. Ideò non solum iudicat iuste, sed uult agnosci ab omnibus hominibus iudex æquus & iustus. Ceterum nos non possumus aliorum hominum fidem, quæ mentis est, intueri: sed ex dictis & factis iudicamus. Honestæ dicta & facta testimonium ferunt fidei cordi, inhonestæ produnt infidelitatem. Opera charitatis & humanitatis declarant nos credidisse uerè: contraria contrarium euincunt. Igitur scriptura monet, iudicium fore secundum opera. In hanc sententiam Matth. 12. dicitur, Ex dictis tuis iustificaberis, & ex iisdem condemnaberis. Sic audit sanè Abraham postquā Isaacum filium immolare statuisset, Quandoquidem fecisti hanc rem, nec pepercisti filio tuo unigenito, benedicam tibi, & multiplicabo te uehementer, &c. Verum constat Deum Abrahamo illam fecisse promissionem antequam nasceretur Isaac, imò simul atq; ipse Abraham educere

Mercede uel merito non abutendum.

Quomodo dica-
tur deus repen-
dere operibus
nostris bonis
mercedem.

tur ex patria sua: ergo non nunc primum operi tanquam merces rependitur, &c. Deus itaque pro sua indulgentia, non iure summo opera nostra examinat, sed quia ex fide in Christum proficiscuntur, licet sint propter inhabitans in nobis peccatum impura & immerita, infinitis beneficijs remunerat. Sic autem testatur se nostri & nostrorum operum habere rationem. Quia ad testandam dilectionis suae erga nos magnitudinem, non modò nos, sed & illa quae nobis largitus est dona, sic honorare dignatur. Imitatur hic Deus benignus, patres secundum carnem, uel in hoc seculo benignos. Donant enim hi quoque liberis suis munera ueluti laboris mercedē, & his ad ampliores uirtutes ipsos prouocant, cum tamen iure hereditatis ad filios omnia pertineant, & uera propriaque causa mercedis uel recompensationis non sit obedientia filij, sed magis mera parentis gratia. Insuper ueniunt in hac re duo obseruanda. Prius, Quamquam Deus humano more praemijs nos alliciat, mercede trahat & in opere bono retineat, praemium tamen & merces non debet in operante bona opera esse praecipuum, ut magis nostram spectemus utilitatem & gloriam, quam amorem & honorem diuinum. Gratis uult Deus coli, gratis amari. Nam ut hilarem datorem requirit: sic filialem amorem & spiritum spontaneum atque liberalem probat. Posterius, Opera nostra, quae alij merita dicunt, aliud nihil esse quam mera Dei dona. Eset autem longè ingratissimus, si qui ex aliena liberalitate frueretur usufructu agri alicuius, interim & proprietatē sibi in integrum usurparet. Verum ne prolixius hanc disputationem protraham, recitabo C. V. egregiam scripturarum collationem à S. Augustino factam, ex qua clarè intelligatis praemia bonorum operum, uel merita sanctorum, ipsissimam esse Dei gratiam.

Sententia S. Au-
gustini de Me-
ritis sanctorū.

Ergo lib. de Gratia & lib. arbitrio cap. 7. sic dicit, Ioannes praecursor Domini nostri ait, Non potest homo accipere quicquam, nisi ei datum fuerit de caelo. Si ergo Dei dona sunt bona merita tua, non Deus coronat merita tua, tanquam merita tua, sed tanquam dona sua. Consideremus itaque ipsa merita Apostoli Pauli, id est, ex ipso ei comparata, an dona sint Dei. Bonum, inquit, certamen certauī, cursum consummaui, fidem seruaui. Primò ista bona opera, si non praecessissent cogitationes bonae, nulla essent. Attende itaque quid de ipsis cogitationibus dicat, Non quia idonei sumus cogitare aliquid ex nobis, tanquam à nobismetipsis, sed sufficientia nostra ex Deo est. Deinde singula inspiciamus, Bonum, ait, certamen certauī. Quæro qua uirtute certauerit? Vtrum quæ illi ex semetipso fuerit, an quæ desuper data sit? Sed absit ut tantus doctor gentium ignorarit legem Dei: cuius uox est in Deuteronomio, Ne dicas in corde tuo, Fortitudo mea, & potentia manus meae fecit uirtutem magnam hanc, sed memoraberis Domini Dei tui: quia ipse tibi dat fortitudinem & facere uirtutem. Quid autem prodest bonum certamen, nisi sequatur uictoria? Et quis dat uictoriam, nisi ille de quo dicit ipse, Gratia Deo qui dat nobis uictoriam per Dominum nostrum Iesum Christum. Et alio loco cum commemorasset testimonium de Psalmo, Quoniam propter te mortificamur tota die, deputati sumus ut oues occisionis, subiecit atque dixit, Sed in his omnibus superamus per eum qui dilexit nos. Non ergo per nos, sed per eum qui dilexit nos uincimus. Deinde dixit, Cursum cōsummaui. Sed ille hoc dixit, qui alio loco dicit, Non uolentis neque currentis, sed miserentis est Dei. Quæ sententia nullo modo conuerti potest, ut dicatur, Non miserentis Dei, sed uolentis atque currentis est hominis. Quisquis enim hoc ausus fuerit dicere, aperte ostendit se Apostolo contradicere. Postremò dixit, Fidem seruaui: sed idem hoc dixit qui alibi ait, Misericordiam consequutus sum, ut essem fidelis. Non autem dixit, Misericordiam consequutus sum,

sum, quia fidelis eram, sed ut essem; hinc ostendens ipsam etiam fidem haberi, nisi deo miserante non posse, & esse donum Dei: quod apertissime docet dicens. Gratia salui facti estis per fidem; & hoc non ex uobis, sed dei donum est. Possent enim dicere, Ideo accepimus gratiam, quia credidimus: tanquam sibi fidem tribuentes, gratiam deo: propter hoc Apostolus cum dixisset, Per fidem, Et hoc, inquit, non ex uobis, sed dei donum est. Rursus ne dicerent se suis operibus donum tale meruisse, continuo subiicit, Non ex operibus, ne quis forte extollatur. Non quia negauit aut euacuauit bona opera, cum dicat deum unicuique reddere secundum opera sua: sed quia opera sunt ex fide, non ex operibus fides: ac per hoc ab illo sunt nobis opera iustitiae, a quo est ipsa fides, de qua dictum est, Iustus ex fide uiuit. Haec omnia uerbatim ex Augustino haecenus recensui. Quae quidem omnia, ea quae de merito bonorum operum dici possunt, satis probe complectuntur, & adeo solide scripturis munita proponunt, ut his nihil adicere uelim, & satis clarum esse existime, quomodo ueteres scripserint de hominum meritis. Quid enim breuius & synce- rius, adde & plenius dici potest, quam esse mercedem operibus paratam bonis: sed illam aliud non esse quam gratiam: sed & sanctorum merita gratiam esse Dei: quae merita cum coronat, sua ipsius munera coronat. In his omnibus firmum perpetuo manet dogma ecclesiasticum & Apostolicum, sola nos gratia dei per fidem, non per opera uel merita nostra iustificari & seruari.

Redimus iam ad opera bona & ad explicandam bonorum operum descriptionem siue consignationem, quam ab initio huius tractationis posuimus. Nisi uero opera nostra ex Deo per fidem nascantur, nequaquam bona dici possunt. Si uero a deo per fidem progignuntur, etiam secundum regulam uerbi Dei formantur. Ideo significanter expressi in descriptione, fieri ipsa a renatis ex spiritu dei bono, per fidem, & secundum uerbum Dei. Deo enim non placent opera, quae ex nobis ipsis confingimus propria nostra autoritate & intentione bona. Nam probat in nobis fidem & obedientiam: quod uel in exemplo patris nostri Adae incalescit maxime: electitia nostra opera & bonas nostras intentiones, in & ex nobis enatas improbat. Id quod hisce scripturarum testimonijs demonstramus. Deut 12. sic scriptum legimus, Non faciet unusquisque quod rectum est in oculis suis. Quicquid ego praecipio uobis, id obseruabitis ut faciatis: nec addes quicquam super ipsum: neque minues ab eo. Porro in historia Samuelis huius rei memorabile ponitur exemplum. Accipit enim praecipitum Saul rex Israelitarum, iubeturque cadere omnes Amalechitas & res ipsorum: ipse uero per bonam intentionem & electitiam religionem boues pinguiore sacrificio reseruauit: uerum a propheta audit, An tam uolupte & gratum sacrificium domino, quam est obedientia? Ecce melius est audire, quam sacrificare: & melior est auscultatio, quam adeps arietum. Quoniam peccatum magiae est, apostasia siue rebellio, & uanitas idololatriae, indurare animum, uel nolle obsequi. Habes in his pauculis uerbis egregium encomium electitiae religionis ac bonorum nostrorum operum ex bona nostra intentione natorum. Qui praecipitis dei neglectis suas intentiones sequuntur bonas, magi, apostatae & idololatrae a ueritate diuina appellantur. Sibi ipsis quidem uidentur egregij esse cultores dei, & obseruationum sanctorum patrum, episcoporum, regum & principum zelosi sectatores: sed qui mentiri nescit deus, disertè pronunciat, opera istorum nihil distare a magia, apostasia, & idololatria, quibus nihil potest uel fingi atrocius. Dominus ergo in euangelio ex uaticinio Isaiae prophetae semel damnat, abiicit & conculcat omnia illa electitia opera nata ex bonis nostris intentionibus, cum dicit, Frustra me colunt, docentes doctrinas praecepta hominum. Omnis plantatio,

Bona opera
fiant secundum
regulam uerbi
Dei.

quam non plantauit pater meus, eradicabitur. Omittite illos, cæci sunt, & duces cæcorum. Inde nimirum est quod S. Paulus tanta confidentia pronunciauit præcepta hominum ueritatem auersari esseq; mendacia. Alibi uerò idem ille, Quicquid, inquit, non est ex fide, peccatum est. Et iterum, Fides ex auditu est, auditus autem per uerbum Dei. Ex quibus colligere licet, opera quæ non sunt ex uerbo dei expresso formata, aut per certam consequentiam inde deducta, adeo non esse bona, ut etiam dicantur peccata. Ingere tu quæso alicui uel ingens beneficiū contra uoluntatem eius, & uide quam apud ipsum gratiam in eas. Requirit ergo bona opera ante omnia disertā & expressam dei uoluntatem. Ad Coloss. idem Apostolus manifestè damnat *ἡθελοντοκευ*, uoluntariā inquam, electitiā & sua sponte susceptam religionem. Et quæ obsecro necessitas est, alias nobis bonorum operum formas comminisci, cum nondum ea fecimus opera, quæ ipse deus iure a nobis requirit & disertis uerbis præscribit? Ex his colliquescit non damnare nos bona opera simpliciter, sed illa quæ relicto Dei uerbo, nostro nobis arbitrio confingimus; cuius generis multa sunt monachorum & sacrificorum. Quæ uerò modis omnibus cum uerbo Dei pugnant opera, nullo dignamur honore & loco.

Verè bona
opera.

Et ut rectius bonorum operum ingenium perspiciamus, obseruanda nobis censeo hæc Apostoli uerba, Conditum sumus in Christo Iesu ad opera bona, quæ præparauit Deus ut in eis ambulemus. Duas autem notas uerè bonorum operum ponit. Prior conditum sumus, inquit, in Christo Iesu ad opera bona. Necessè ergo est bonum opus ab eo fieri, qui est insitus uera fide in Christum. Nisi enim palmes in uite manserit, fructum proferre nequit. Omnia ergo fidelium opera utcunque splendeant iustitiæ titulo, reuera non sunt bona opera. Posterior, Quæ præparauit Deus, inquit, ut in eis ambulemus. Non ergo sunt hic commemoranda quæuis opera, quæ possunt facere homines: sed illa quæ ab antiquo præparauit Deus, ut ambulemus in eis. Quæ uerò illa sint, deus lege sua, quæ æterna est dei uoluntas, expressit. Inde est quod dominus in Euangelio rogatus de uita æterna, & ueris uirtutibus, ad legem remittit, & ait, In lege quid scriptum est? Et iterum, Si uis ad uitam ingredi, serua mandata. Proinde Decalogus certissima & absolutissima est formula bonorum operum. Quod ut plenius intelligatur, breuè id enumeratione ceu in tabula spectandum oculis uestris proponam.

Decalogus ple-
na bonorū ope-
rum forma.

Ad primum præceptum referes timorem Dei, fiduciam & dilectionem, spem deniq; in aduersis certissimam, patientiam, & constantiam infractam. Ad secundum pertinet uerus synceriorq; Deo placens cultus, omnis item superstitionis & cultus peruersi abnegatio. Ad tertium colliges reuerentiam numinis, confessionem ingenuam, inuocationem nominis Dei sanctam & perseverantem, & sanctificationem eiusdem. In quarto locum habebit moderata Ecclesiasticarū ceremoniarum conseruatio, prædicatio uerbi Dei, preces publicæ, & quæcunq; sunt exterioris cultus. Ad quintum referes pietatem in parentes, in patriam & affines, obedientiam iustam, quam debemus magistratui, & omnibus superioribus, item officia uitæ ciuilis. Annumerabis sexto iustitiam & iudiciū, defensionē uiduarum, pupillorum, afflictorumq; & oppressorum assertionem, beneficentiam, & innocentiam. Septimo adijcies fidem coniugalem & matrimonij officia, educationem liberorum liberalem & piā, studium item castitatis, temperantiæ & sobrietatis. Ad octauum referes iustitiam in contractibus, liberalitatem, munificentiam, hospitalitatem. Ad nonum adijcies ueritatis studium per omnem uitam, fidem in dictis & factis, sermonem compositum, honestum & utilem. Decimo loco recensebis bonos affectus & uota sancta, deniq; omnes cogitationes sanctas & honestas.

Hæc

Hæc scilicet est compendiosa bonorum operum formula. Quod si his aliquid breuius cupis, audi dominum omnia hæc in duo capita colligentem atque dicentem, Diliges dominum deum tuum ex toto corde tuo, & in tota anima tua, & in tota mente tua; & proximum sicut teipsum. Omnia itaq; quæcūq; uolueritis ut faciant uobis homines, sic & uos facite illis.

In hæc domini præcepta intendant oculos & mentem cuncti fideles bene operari cupientes, & hoc diligentius constantiusq; quo certius & perspicacius uident & intelligunt, deum & in lege & in prophetis nihil aliud & nulla alia opera à suis requirere electis seruis. Agitè uerò audiamus aliquot quæ cum lege consentiant sanctorum prophetarum de bonis operibus diserta testimonia. Moses in Deuter. suo, Et nunc Israel, inquit, quid dominus deus tuus petit à te? nisi ut timeas dominum deum tuum, & ambules in cunctis uis eius, diligas eum, & seruias domino Deo tuo, in toto corde tuo, & in tota anima tua, ut scilicet custodias præcepta domini & statuta eius, quæ ego præcipio tibi hodie. Dauid quoq; rex & uates interrogat Psalm. 15. Domine quis habitabit in tabernaculo tuo? Et mox respondet, Qui ambulat in integritate, & operatur iustitiam. Et reliqua quæ continentur in Decalogo. Iam & Isaias in 33. cap. mouet eandem quæstionem. Nec aliam eius adfert solutionem quam Dauid. Ieremias in cap. 22. hæc ingerit & urget, Sic dicit dominus, Facite iudicium & iustitiam, & liberate uis oppressum de manu calumniatoris: peregrinum quoq; pupillum & uiduam ne contristetis, neq; iniuriam faciat, & sanguinem innocentem ne fuderitis in hoc loco. Neq; alium catalogum, licet bene longum, bonorum operum contexit Ezechiel in cap. 18. Apud Oseam dicit dominus, Beneficentiam, pietatem seu misericordiam desidero, non sacrificium: & cognoscere deum magis quam holocausta. Micheas quoq; interrogat diligenter quid agat Dei cultor, ut deo placeat, placitaq; opera faciat: & protinus ex inspiratione diuina respondet, Indicabo tibi homo quid sit bonum, & quid perat à te dominus: nimirum facere iudicium, diligere beneficentiam, & reuerenter ambulare cum deo tuo. Ad eundem modum Zacharias propheta interrogantibus de uirtutibus & operibus bonis deo placētib; dicit, Sic ait dominus exercituum, Iudicate iudicium ueritatis, & facite pietatem atq; misericordias unusquisq; cum fratre suo. Viduam & pupillum, peregrinum & pauperem nolite calumniari: neque cogitet unusquisq; uestrum in corde suo malum contra fratrem suum: & iuramentum falsum ne diligatis: quoniā omnia ista sunt quæ odiui, dicit dominus.

A prophetica doctrina nihil discrepat doctrina euangelica & Apostolica, quæ ubiq; charitatem, iustitiam & innocentiam docet, scopum uidelicet & summam omnium bonorum operum. S. Iacobus Apostolus, Religio, inquit, pura & immaculata apud deum & patrem hæc est, inuisere orphanos & uiduas in afflictione sua, & immaculatum seipsum seruare à mundo.

Restat ut quod ad finem descriptionis bonorum operum adpendimus, scripturarum collatione robaremus atq; explicemus. Diximus autem uerè bona opera fieri à renatis ad gloriam Dei, ad ornamentum uitæ, & ad utilitatem proximi. Dominus enim in euangelio hunc finem præscribens bonis operibus dicit, Sic luceat lux uestra coram hominibus, ut uideant uestra bona opera, & glorificet patrem uestrum qui in cœlis est. Apostolus quoq; Paulus non semel adhortans ad bona opera, id tanquam ualidissimum, quod permoueat adiungit, ut suis illis operibus doctrinam seruatoris nostri Dei ornent. Iam uerò ut decens & honesta uestis hominem ornat, ita uerè bona opera uitam commendant hominum. Hinc enim Apostoli Christi toties suaserunt exuere ueterem hominem, & induere nouū, qui

Quæ uerè bona opera; prophetarum testimonia;

In quem finem fieri debeant bona opera.

secundum deum est conditus. Inde enim accedit nobis gloria & honor. Dicimur & sumus serui, imò filij Dei nostri, cuius ingenium & uirtus relucet in nobis ad gloriam & laudem nominis eius. Ac ut requirit ille à nobis opera bona, ita si faciamus ea, placent ipsi & honoramur ab ipso uicissim: id quod multis scripturæ testimonijs demonstrari posset. Verum hoc est extra omnem controuersiam. Certè is subinde magis ac magis auget nobis bene operantibus dona sua. Dicit enim in euangelio, Omni habenti dabitur, & abundabit. Qui uerò nihil habet, etiam id quod non habet, auferetur ab eo, & dabitur ei qui habet. Accedit huc quòd operantibus deus recta, propitius est, eosq; multis etiam temporalibus donis locupletat, tandem & perpetua uita donat. Disertè enim Apostolus Paulus, Deus, inquit, reddet unicuiq; iuxta facta sua, his inquam qui perseuerantes in benefaciendo gloriam & honorem & immortalitatem quærunt, uitam æternam. Et iterum, Gloria & honor & pax omni operanti bonum. Quanquam in omnibus bonis suis operibus pñ sibi non præcipuum quidem scopum (quemadmodum & superius quoq; monui) recompensationem & priuatum compendium, sed dei gloriam & uoluntatem, deniq; proximi utilitatem sibi proposuerunt. Paulus enim, Omnia, ait, in gloriam Dei facite. Et iterum, Nemo quod suum est quærat, sed quisq; quod alterius: quemadmodum ego per omnia omnibus placeo: non quarens meam ipsius utilitatem, sed multorum ut salui fiant. Pñ ergo omnes omnia sua studia & opera in hoc dirigunt, ut deo placeant, ut Deum glorificent, ut profint multis. In eo enim dei naturam, cuius filij sunt exprimunt. Nam is beneficia sua in omnes creaturas suas effundit: sunt itaq; & filij eius benefici.

Hæc habui in præsentia de natura uel ingenio, de causa, fine & effectu, hoc est, de uera & iusta ratione bonorum operum: ex quibus etiam illud perspicuè intelligi posse spero, quomodo operibus sanctorum bonis iustitiæ nomen & iustificationem tribuat, mercedemq; reddere dicatur dominus in scripturis sanctis, & quòd immotum nihilo minus ac firmum consistit orthodoxum & primum religionis nostræ dogma, Gratia Dei nos propter Christum per fidem, non per opera iustificari. Nunc ergo nihil aliud superest, quàm ut pro uera in dominum Iesum fide supplicemus domino, ac per eiusdem gratiam, disputationem hucusq; habitam de bonis operibus, in opus deducamus, id est, ut fidem quam uerbis profiteamur nos habere in dominum nostrum Iesum Christum, operibus uerè bonis exprimamus.

De peccato & eius speciebus, nempe de peccato originali, actuali, & de peccato in spiritum sanctum, certissimaq; & iustissima peccatorum pena. S E R M O X.



RESTAT ultimum, quod cum lege coherere diximus, Peccatum. De quo ut legitimè, religiosè, orthodoxè, & multo cum fructu omnium uestrum differere queam, oremus supplices dominum.

Peccatum plerique pro errore accipiunt, quo uidelicet aberramus, non tantum à uero, æquo, iusto & bono, sed etiam sequimur deteriora. Latini uocabulum hoc suum deriuant à pellicatu, quod uitium est corruptorum fornicationis spiritu maritorum, præferentium pellices legitimis uxoribus. Ac mirè hoc quidem nostro negotio seruit. Nam fideles fide copulati sumus deo nostro tanquam sponso, cui si præferamus alios deos, aut his seruiamus etiã, aut si ueris bonis præteritis sequamur umbratilia bona, uanas spes, & mundi perniciosas uoluptates, peccamus reuera. Peccatum autem ferè à delicto discriminant. Delictum enim appellant,

Peccati uocabulum.

pellant, cum nō fit, quod fieri debebat; peccatum, cum fit, quod fieri non debebat. S. Hieronymus uidetur delictum accepisse pro primo lapsu ad peccandum. S. Augustinus, Peccatum, inquit, à sciente, Delictum ab ignorante fit. Ego uideo uocabula illa alicubi confundi, alterumq; usurpari pro altero, alicubi errorem ac delictum mitius esse uocabulum, peccatum uerò grauius, crimen uerò, scelus, defectionem & impietatem multò grauius. Etenim & S. Augustinus, Neq; quia peccatum est omne crimen, inquit, ideo crimen est etiam omne peccatum. Itaque sanctorum hominū uitam quandiu in hac morte uiuitur, inueniri posse dicimus sine crimine; peccatum autem si dixerimus quia nō habemus, ut ait S. Apostolus, nosmetipsos seducimus, & ueritas in nobis non est. Apud Hebræos uarijs uocibus effertur peccatum, significantibus prauitatem & peruersitatem, delictū, errorem, defectum, infirmitatem, uitium, ignorantiam & prauaricationem; siue transgressionem. Nam prauaricari, est discedere à recto, & ab officio, nō ingredi rectā uel transgredi regulam præscriptam à Deo. Regula uerò illa, lex est, ab Hebræis ideo nuncupata Thora, deductio inquam uel directorium. Nam dirigit hominem in uis quæ Deo placent. Idcirco Græcè appellatur peccatum ἀνομία ἢ παρανομία. Rursus significat Hebræis peccatum auersionem, nimirum à bono ad malū; item defectionem, ueluti cum te eius subtrahis imperio cui obnoxius es ac seruus; denique & reatum siue crimen, quo nos ipsos pœnæ subdimus.

Certè S. Augustinus multum operæ impendit, ut propriè definiret Peccatum. *Peccati definitio.* De Consensu euangelistarum lib. 2. Peccatum, inquit, est legis transgressio. Ad Simplicianum lib. 1. Peccatum est inordinatio & hominis peruersitas, id est, à præstantiore conditore auersio, & ad condita inferiora conuersio. De Fide cōtra Manichæos cap. 8. Peccare quid aliud est, inquit, nisi in ueritatis præceptis, uel in ipsa ueritate errare? Et contra Faustum Manichæum lib. 22. cap. 27. Peccatum est factum, uel dictum, uel concupitum aliquid contra legem dei. Idem de duabus animabus contra Manichæos cap. 11. dicit, Peccatum est uoluntas retinendi uel consequendi quod iustitia uetat, & non liberum est abstinere. Et Retract. lib. 1. cap. 15. Voluntas illa est, ait, animi motus, cogente nullo, ad aliquid uel non amittendū uel adipiscendum. Quas finitiones omnes ut non prorsus repudiō, ita hanc expendendam propono, Peccatum est corruptio natia hominis, & quæ ex ea existit actio legi Dei repugnans, huius iram, mortem inquam, & supplicia uaria nobis concilians. Audis hanc peccati descriptionem suis constare partibus. Audis corruptionem natiam: iuxta quam non competit hæc definitio peccato primorum parentum, in quibus nulla fuit natia corruptio. De quo suo loco. Audis actionem quæ ex illa existit, pugnantem cum lege Dei, Audis peccatum nobis dei iram conciliare, hoc est, mortem & supplicia uaria ore dei peccato intentata. De quibus consequenter & ordine quantum dederit dominus, dicemus.

Videtur autem hæc differtatio commodissimè sumere initium à peccati origine, causa & authore. *De causa siue origine peccati.* Mali uel peccati originē, deriuant alij ex fato stellarū, dicentes, Peccaui, quia infausto sum sydere natus. Alij dum peccāt, & propter peccatū obiurgantur, respondent, Non ego sed diabolus in culpa est quod hoc admisi facinus. Aliquando dimissis omnibus excusationibus, directè in deum homines culpam conijcentes, aiunt, Deus ita uoluit. Nam si noluisset, non peccassem. Alius, Cum deus, inquit, prohibere potuisset, nec tamen prohibuit, ipse peccati mei author est. Cæterum nouum non est hominibus blasphemā acuire linguam contra omnium dominū. Primi enim parentes nostri dū peccassent, & peccati commissi accusarentur à deo, à seipsis commissum scelus transferūt in alios, nec ingenuè ueritatem

confitentur. Ea est hominum malitia abominabilis. Adam enim ueluti ex aduerso responsans Deo, criminis sui culpam non tam in uxorem sibi copulatam à Deo quam in ipsum Deum regerit. Mulier, inquit, illa quam tu dedisti mihi sociam, dedit mihi pomum, & comedi. Quasi dixisset, Nisi illam mihi coniunxisses, non peccassem. At non coniunxerat ei coniugē dominus ut esset occasio mali, sed ut uiro melius esset. Porro mulier simpliciter malū imputat diabolo, dicens, Serpens seduxit me, & comedi. En hæc sunt corruptissima nec non falsissima de origine peccati iudicia, impia & detestanda, quibus grauiter offenditur Dei iustitia & ueritas. Nam ne ipsa quidem natura hominis causa est peccati. Deus enim qui omnia, ipsam etiam naturam hominis creauit, bonam omnino creauit, ac erant omnia quæ condiderat ualde bona. Idcirco erat & hominis natura bona. Auentitia qualitas est, quæ accidit homini in lapsu aut post lapsum, non substantialis proprietas, mox ab initio talis qualis nunc est indita. Nunc quidem cum in peccato à peccatoribus nascimur, peccatum naturalis est hominum proprietas. Scribit enim S. Augustinus de Fide contra Manichæos cap. 9. Sed etsi quos naturaliter dicimus malos, propter originem ueteris peccati dicimus, in quo tota iam nostra mortalitas nascitur. Atqui requirunt hæc diligentiorē & copiosiorē declarationem.

Natura hominis non est causa peccati.

Diabolus solus non est causa mali.

Diabolum non unum esse peccati authorem, qui nobis quidem peccantibus, ipse peccati culpam sustineat solus, nos immunes simus à crimine, id maxime declarat, quod ille homini suadere & malum ingerere potest, cogere autem non potest. Deus enim suo diabolum imperio premit, ut non possit quod uelit. Sed hoc tantum, quod & quantum Deus permittit: imò ne in fœdissimos quosque porcos imperium habet, nedum in nobilissimas hominum animas. Habet sanè suadendi astutiam & maximas uires: at fortior est Deus, qui & ipse nunquam cessat homini suggerere bonum. Nec plus permittit satanæ, quam profit homini. Id uidere licet in exemplo sanctissimi uiri Iob: denique in exemplo Pauli 2. Cor. 12. & in uerbis eiusdē dicentis, Fidelis est Deus, qui non finet uos tentari supra id quod potestis. Ergo uani sunt qui culpam scelerum in humeros exonerant diaboli.

Fatum non esse causam mali.

Porro si roges illos qui fatum peccatis obtendunt, quid sit fatum? respondunt, uel seriem connexam per æternitatem se inuicem tenentem, ac catenā quandam & necessitatem perpetuam consiliorum operumque secundum consilia Dei: uel ipsas stellas malas. Si roges iterum quis fecerit stellas? nō habent quod respondeant, nisi Deus: restat ergo ut Deo rursus malum suum impingant. At fatū tale non asseruerunt uel seniores philosophi omnes, nedum Christiani. Præterea qui ex nostris, id est, ex ijs, qui Christiani uideri uolebant, fatum seu constellationem asseruerunt, huiusmodi fuerūt, ut pigeat authorum. Bardesanes fato ascripsit conuersationes hominum. Priscillianistæ uerò, in Toletano concilio primo damnati, docuerunt hominem stellis fatalibus alligatum, ipsum corpus habere secundum duodecim signa cœli compositum, constituentes arietem in capite, taurum in ceruice: & sic consequenter. S. Augustinus in opusculo Octoginta trium quaestionum, quæst. 45. grauiter confutans fatum stellarum, inter alia, Conceptus, inquit, geminorum, quoniam uno concubitu efficitur, attestantibus Medicis, quorum disciplina multo est certior atque manifestior disciplina astrologorum, tam paruo puncto temporis contingit, ut in duas minutas minutarum non tendatur. Vnde ergo in geminis tanta diuersitas actionum & euentuum & uoluntatum, quos necesse est eandem constellationem conceptionalem habere, & amborum unam constellationem dare mathematicos tanquam unius hominis? His S. Augustini uerbis lux quadam affulgebit si adhibueris exemplum Esau & Iacobi. Idem Augustinus contra

Contra fatum.

contra duas Pelagianorum Epistolas ad Bonifac. lib. 2. capite 6. Fatum, inquit, qui affirmant, de syderum positione, ad tempus quo concipitur quisque uel nascitur, quas constellationes uocant, non solum actus & euenta, uerum etiam ipsas nostras uoluntates pendere contendunt. Dei uero gratia non solum omnia sydera, & omnes coelos, uerum etiam omnes angelos supergreditur. Deinde fati assertores & bona & mala hominum fato tribuunt. Deus autem in malis hominum merita eorum debita retributione persequitur: bona uero per indebitam gratiam misericordiae uoluntate largitur: utrumque faciens non per stellarum temporale consortium, sed per suae seueritatis & bonitatis aeternum altumque consilium. Neutrum ergo pertinere uidemus ad fatum. Concluduntur haec uerbo Domini per Ieremiam in hanc sententiam pronunciato, Haec dicit Dominus, iuxta uias gentium nolite discere, & a signis coeli nolite metuere, quae timent gentes: quia leges populorum uanae sunt. Ergo quod sydus Saturni inclemens & asperum, uel crudele, Veneris benignum & mite ab astrologis appellatur, uanitas est uanitatum. Non enim astra ullam habent uim, uel benefaciendi, uel malefaciendi. Proinde culpa peccatorum nequaquam illis imputari debet.

Restat demonstrandum, ne Deum quidem esse causam peccati, uel authorem mali. Deus, inquiunt isti, ita uoluit. Si enim nolisset, non peccassem. Quis enim eius potentiae resistat? Item cum prohibere potuisset, nec tamen prohibuit, ipse utique author est peccati. Quasi uero hominum calumnias & sophismata non agnoscamus. Quis oro ignorat Deum non absoluta potentia, sed ex pacto & lege condita, nobiscum agere, per media inquam commoda & ordine legitimo? Posset sane Deus per absolutam suam potentiam prohibere malum: ceterum non potest nec uult interim, uel creaturam suam & ordinem iustum corrumpere, atque turbare. Agit ergo cum homine humano more: proponit ei leges, proponit praemia & supplicia: iubet amplecti bonum, refugere malum: ad quam rem conficiendam nec gratiam suam negat, sine qua nihil possumus: nec diligentiam & laborem nostrum aspernatur. Hic si cesset homo, negligentia & peccatum ipsi homini ascribitur, non Deo, licet hic prohibere potentia sua potuisset, nec tamen prohibuit: quia prohibere non debuit, ne turbaret ordinem, & suum opus destrueret. Proinde Deus non est author mali, uel peccati. De qua re subiungemus modo clara aliquot scripturae testimonia: deinde uero respondebimus ad obiectiones uarias: simul autem originem & fontem peccati aperiemus.

*Deum non est
author mali,
sive peccati.*

Testimonia docentia Deum non esse authorem mali siue peccati, plurima sunt, sed in his insigne est illud, quod Deus natura bonus esse dicitur: & omnia quae condidit ualde bona dicuntur. Vnde Sapiens ille dixit, Deus mortem non fecit, nec delectatur uiuorum interitu, Creauit enim ut essent omnia: & initia mundi salutifera sunt, nec inest in eis medicamentum perniciosum: nec orci regnum in terra, quippe iustitia immortalis est. Impii uero manibus ac uerbis accersuerunt illam ac contabuerunt. Et reliqua quae extant Sapientiae i. cap. pulcherrimeque congruunt cum primis capitibus excellentissimi prophetarum Moysis.

Deum bonum, omnia quae condidit, bona condidit.

Psal. 5. dicit Dauid, Quoniam non Deus uolens iniquitatem tu es: non habitabit tecum malitia: neque permanebunt iniusti ante oculos tuos. Odisti omnes qui operantur iniquitatem: perdes eos qui loquuntur mendacium: uirum sanguinum & dolosum abominatur Dominus. En nihil fingas alienius ab ingenio Dei, quam malum atque peccatum. Cuius generis plura legas & Iob cap. 34.

Ecclesiastici 7. dicit Sapiens, Deus hominem probum condidit, ipsi autem quaesierunt adinventiones multas. Ideoque Apostolus Paulus ad Roma. 5. cap. deriuat

peccatum, damnationem & mortem non à Deo, sed ab Adamo, à Deo autem per Christum gratiam, condonationem & uitam. Illustrior est is Pauli locus quam copiosioribus declarari debeat: inspiciatur modò & expendatur diligentius à lectoribus & auditoribus. RECITA, Quemadmodum per unum hominē peccatum in mundum introiit, & per peccatum mors. Et reliqua.

Idem ad Romanos 7. clarè ostendit legem esse sanctam, præceptum bonum & iustum, adeoq; in Deo & eius uoluntate nullam hære, aut ex lege, quæ Dei uoluntas est, existere uel exoriri, peccati labem. In nostra carne, inquit, malum latet, ex nobis erumpit enasciturq; malum, Noui, inquit, quòd non habitet in me, id est, in carne mea, bonum. Reperiuntur in eo capite plurima, quæ causam hanc nostram pulchrè illustrant.

Idem Apostolus ad Rom. 3. cap. Quòd si iniustitia nostra, inquit, commendat iustitiam Dei, quid dicemus, Num iniustus est Deus, qui inducit iram? (Humano more loquor, id est, hominum impiorum uerbis utor.) Absit. Nam quomodo iudicabit Deus mundum? Etenim si ueritas Dei per meum mendacium excelluit in gloriam ipsius, quid posthac & ego ueluti peccator iudicor? &c. Certè si Deus peccati & omnium malorum author esset, ac uellet tales esse sceleratos, quales sunt: quid oro iudicaret siue puniret illos tanquam transgressores, cum peccando fecerint uoluntatem eius?

Huc pertinet illud quoq; beati Ioannis Euangelistæ & Apostoli testimonium, in Canonica sua dicentis, Si quis diligit mundum, nō est charitas patris in eo. Quoniam omne quod est in mundo, ueluti concupiscentia carnis, & concupiscentia oculorum, & fastus uitæ, non ex patre, sed ex mundo est. Et mundus transit, & concupiscentia eius; qui autem facit uoluntatem Dei, manet in æternum. Et liberatur Deus penitus à malo: malum, inquit, non est ex patre, sed ex mundo. Et, Qui facit uoluntatem Dei, non facit quod uult mundus, sed quod uult Deus. Pugnant ergo inter se ex diametro, bonum & malum, peccatum & uoluntas Dei. Hæc scripturarum testimonia, licet pauca, non impio sufficere putamus auditori.

Ex his uerò concludimus, primū quidem catholicum illud dogma, quod ab Apostolorum temporibus semper multa cum diligentia contra impuram philosophiam (non totam interim damnamus: scimus aliquot eius partes oppidò utiles esse pijs & pietatis studijs) defensum est, Deum non esse mali authorem uel causam peccati. Deinde ex iisdem colligimus, originem mali siue peccati, ex ipso deriuari homine, & impulsore seu incentore satana: ita tamen ut dicamus, hunc initio quidem corruptum, corrupisse hominem, nihil tamen potuisse per se efficere, nisi sua sponte in malum consensisset homo. Atq; hic reuocandus est primus patris nostri Adæ lapsus ob oculos, ut rectius de origine mali iudicemus. Condidit Deus patrem omnium nostrum Adamū ad imaginem & similitudinem suam, hoc est, condidit ipsum optimum, integerrimum, sanctissimum, iustissimum & immortalem, instruxitq; ipsum donis & facultatibus præstantissimis quibusq; ut ad beatitudinem ipsi in Deo nō deesset quicquam. De hac imagine paulò post plura dicemus ex Paulo. Polluit ergo intellectu planè diuino, puro & acutissimo. Voluntas ipsi erat liberrima & sanctissima. Facultates habebat faciendi bonum & malum. Præterea data est ipsi à Deo lex, quæ quid ageret aut quid fugeret ostenderet. Dicens enim Dominus, Ne comederis ex fructu scientiæ ligni boni & mali, postulauit Deus simpliciter obedientiam ac fidem, & ut totus penderet à Deo, idq; totum, nō necessitate adactus, sed liberè faceret. Nam & Sapiens ille Ecclesiastici 15. cap. sanctè & uerè scripsit, Deus ab initio creauit hominem, & permisit eum in manu con-

silij

Origo mali
uera.

filij sui. Adiecit mandata & praecepta sua, Si uolueris, mandata seruabis, ipsaque te uicissima conseruabunt. Ergo dum serpens animum hominis tentaret, suaderetque gustare de arbore prohibita, homo quid ei obijceretur intellexit, nec ignorauit consilium serpentis pugnare cum mandato Domini. Non cogebat interim ipsum Dominus, non cogebat repugnantem satanas in serpente. Dixerat enim Deus, Ne comederitis ex illa arbore, neque attigeritis, alioqui moriemini; ergo liberum & in manu consilij sui erat edere, uel non edere. Imò declarauit ei Dominus suam sententiam disertè præcipiens ne edat: & periculo adiuncto retraxit ipsum ab esu dicens, Ne fortè moriaris. Satanas quoque ut non potuit, ita non adhibuit uim ullam, probabiliter autem suasit, tandem & persuasit. Nam declinante uoluntate mulieris in uerbum diaboli, recessit mens eius à uerbo Dei, reiectaque bona lege, malum opus ex peruersa uoluntate patrauit, denique maritum sponte sequentem traxit in mali consortium. Id quod scriptura hisce uerbis inculcat significantissime, Et uidit mulier quòd bonum esset lignum ad uescendum, & oculis desiderabile & concupiscibile ad contemplandum, tulit de fructu eius, & comedit, dedit denique & uiro suo secum, qui & ipse comedit. En habes mali initium, diabolus, habes quid commouerit mentem seu uoluntatem hominis, falsum uidelicet diaboli elogium, seu fructus arboris præconium, adeoque merum mendacium, & species delectabilis arboris. Sponte autem faciunt homines quod faciunt, spe ducti excellentioris uitæ sapientiæque consequendæ, quam promiserat mendaciter seductor. Concludimus ergo peccatum oriri non ex Deo odiente & prohibente malum, sed ex diabolo primorumque hominum libera electione, & deprauata per mendacium diaboli & falsam boni speciem, uoluntate. Ideò diabolus & obsequens deprauataque hominis uoluntas, causa sunt peccati seu mali uerissima.

Porro malum hoc dimanauit ex primis nostris parentibus in omnem posteritatem, ut peccatum uel hodie non aliunde quàm ex nobis ipsis, id est, ex corrupto iudicio & praua nostra uoluntate, denique diaboli suggestionem exoriat. Nam maliradix ex prima illa corruptione in nobis est, & progignit ex se ipsa germen suae conueniens naturæ, putridum: quod satanas nunc quoque sicuti ab initio rerum, suis artibus, dolis & mendacijs, ueluti plantans prolicit, prouehit & excolit: qui frustra alioqui laborat, nisi formandos nos ei præbeamus. Quò uerò in his minus sit dubij, & plus lucis, subiungemus confirmandi & declarandi gratia duo testimonia euidentissima, alterum quidem ex doctrina Euangelica, alterum ex doctrina Apostolica. Dominus in Euangelio dicit, Diabolus homicida erat ab initio, & in ueritate non stetit: quia non est ueritas in eo. Cum loquitur mendaciū ex proprijs loquitur, quia mēdax est, atque eius rei (mendacij inquā) pater. Ex hisce Domini uerbis disertissimis intelligimus malū referendū esse ad ipsum diabolum, qui in ueritate & bonitate conditus, in ueritate & bonitate non perstitit, sed defecit à sua natura, in qua bonus erat conditus, & desciiuit sua culpa in naturā aliam, nempe malā, ac ex se sparuit omne malū (sicut modò patuit ex historia primorum parentum) in mundum, nempe cædes & mendacia (cōprehenduntur aut sub his omnia mala) quorum dicitur disertè pater, id est, causa, author, fons & origo: non quia cōditus sit talis à Deo, sed quia in ueritate non stetit. Proinde obijcientibus hic nobis, A qua sit origine profectus satanas, an non & ipse cōditus à Deo? Respondemus, Deū cōdidisse omnes angelos, eos etiā qui postmodū facti sunt refugæ seu cacodæmones: cæterū ea de causa malū non reflectitur in Deum. Nam scimus Deum ab initio omnes angelos creasse bonos. Omnia enim quæ condidit erant bona. Præterea dicitur dæmon in uero non stetisse, id est, defecisse à uero: à quo utique deficere non potuisset,

Peccatum ex diaboli suggestionem & prauam nostram uoluntatem existit.

Ioan. 8.

nisi aliquando in ipso stetit. Stabilivit ergo omnes angelos Deus in uero ab initio. Requisiuit ab eis ueritatem, fidem seu fidelitatem & officium debitum: quod præstare si uoluissent, potuissent. Exciderunt autem perfidè à fide & peccarunt, ut Petrus Apostolus testatur, contra Dominum, ideoque culpa perfidiæ & omnis mali hæret non in Deo, sed in angelo refuga. Ex eo enim quo cecidit, nulla est in ipso ueritas, nulla fides, nulla integritas, nullus Dei timor, nulla lux aut bonitas. Verè itaque dixit beatus Ioannes in Canonica sua, Qui committit peccatum, ex diabolo est, quoniam ab initio diabolus peccat. Est enim primus peccator & peccatorum origo. Est in his omnibus illud quoque obseruabile, quod à Petro & Ioanne dicitur dæmon peccasse. Peccatum enim pugnat cum uoluntate Dei: ergo Deus noluit illum perire, unde cum perijt, sua non Dei culpa perijt.

Audiamus iam alterum testimoniū de praua hominis uoluntate, uera utique causa peccati. S. Iacobus Apostolus dicit, Nemo cum tentatur dicat se tentari à Deo. Nam Deus ut malis tentari non potest, ita nec ipse quenquam tentat: imò unusquisque tentatur, dum à propria concupiscētia abstrahitur & inescatur: deinde concupiscētia, posteaquā concepit, parit peccatū, peccatū uerò perfectū progignit mortem. Clarè satis opinor Deum S. Iacobus omni culpa peccati liberat, totū illud ex nobis deriuat, ostēdens interim genesim & progressum peccati. Nec cōtradicit Iacobus mox ab initio Mosi dicēti, Tentauit Deus Abrahamū. Tentare enim in Moysi significat periculum facere & experimentum capere. In præsentī uerò tentare significat sollicitare aut pertrahere ad malū adeoque & corrumpere. Deus ergo ut malis, inquit, tentari non potest, id est, sicut Deus natura bonus est & incorruptus, ita corrumpit, deprauat, & malo immergit neminem. Alienum enim hoc est à natura Dei. Vnde ergo exoritur malum? Respondet beatus Apostolus, & ait, Imò unusquisque tentatur siue corrumpitur, & in malum cōiicitur, dum abstrahitur & inescatur à propria concupiscētia. En exoritur peccatū ex nostra concupiscētia, præterea nostro opere proprio absoluitur perficiturque. Ac singula quidem hæc sancti Apostoli uerba sunt emphatica. Primum enim, Concupiscētia nobis propriam facit, quemadmodum & de fatana dixit Dominus, Cum mendacium loquitur diabolus, ex proprijs loquitur. Et quia concupiscētia nobis propria est, certè peccatum nobis quoque proprium est. Concupiscētia enim abstrahit, abstrahit autem à uero, iusto ac bono, nimirum ad falsum, iniustum & malum. Eadem inescat, id est, falsa spe facta aut proposita, decipit: ut solent aucupes esca allicere aues in retia, & deceptas capere & iugulare. Quid oro poterat dici clarius? Concupiscētia propria cōiicimur in malum. Hæc abstrahit à Deo, & hæc inescat ac decipit. Deinde collocato peccati fundamēto apertoque fonte, indicat peccati genesim, id est, ortum & progressum, idque allusione festiua per allegoriam. Concupiscētia, inquit, illa nobis propria ceu matrix concipit in nobis ipsis peccatum, ac idem mox progignit, cum uidelicet exit in opus, & id quod concupiuius cupide prosequimur, & consecuto contra legem fruimur: quod protinus ipsa sequitur mors. Stipēdium enim peccati mors est. Demonstrauimus, opinor, his lucidissimis scripturarum testimonijs clarè satis, causam peccati esse non Deum ipsum, sed corruptam nostram uoluntatem siue concupiscētia ac diabolum, quippe qui illam agit, excitat atque inflamat, utpote tentator & hostis omnis boni totiusque generis humani.

Operæpretium fuerit aut post illa audire quorundam contra hæc obiectiones, & quid secundum ueritatem ad ea responderi possit. Cum ex praua hominis uoluntate & suggestionē satanica non ex ipsa Dei natura peccatum deriuamus, obijciunt quidā, Deum cōdidisse Adamum, ergo & peccatū. Respondemus peccatum esse

Respondetur
ad obiecta.

esse corruptionem bonæ naturæ à Deo conditæ, non creaturam à Deo in homine aut cum homine conditam. Bonum condidit Deus hominem, qui relictus suo consilio, suatore satana, bonitatem à Deo conditam in se suo actu & uoluntate sua praua corrupit: ut iam peccatum proprium sit hominis, actio inquam praua contra legem Dei, non creatura creata in homine Dei. Regerunt, An uerò uoluntas & facultas quæ erant in Adamo aliunde quàm ab ipso Deo erant? Sanè non aliunde. Aiunt, Ergo & peccatum est ex Deo. Nego. Deus enim non dedit uoluntatem & facultatem operandi Adamo, ut malum faceret. Nam lege lata malum prohibuit. Ipse ergo Adam uoluntatem & facultatem acceptam à Deo, malè collocauit, malè ipsis utens. Accepit pecuniam filius prodigus à patre, non ut prodigeret luxuriosè uiuendo, uerùm ut haberet quantum satis esset necessitati. Proinde cum iste pecuniam malè collocat ac perit, sua, non patris culpa perit, tamen si pecuniam acceperit à patre. Præterea habere facultatem faciendi bonum & malum, quàm à Deo Adam habebat, omni culpa & uitio caret: perinde ut uenenum habere, gladium aut sicam gerere. Ac habent hæc uim & commodandi & incommodandi. Abusus uitio uertitur. Et qui tibi illa suppeditat, usum earum tibi relinquit. Quòd si iustus est, ad uerum ea tibi usum, non ad abusum concedit. Quapropter cum illis abuteris, culpa tibi abutenti non autem concedenti imputatur. Iam cum Deus, qui uoluntatem & facultatem Adamo dedit, iustissimus sit, nimirum illas ad bonum non ad malum patrandum dedit: cur ergo iustissimo impingitur quod homini peccatori non impingitur? Concludimus ergo, quandoquidem affectus in Adamo per sensum commotus, & à serpente instigatus suasit edere de pomo prohibito, cum interim intellectus adhuc teneret uerbum Dei prohibentis edere, cumq; ipsa eius uoluntas libera esset, ut in hanc uel illam inclinare posset partem, in peiorem autem inclinauit, & illud ipsum elegit ac uoluit quod prohibuit Deus, profecto peccatum est hominis propriè præuaricantis, & nō legislatoris præuaricationem prohibentis.

Hic rogant, Cur autem ita condidit Deus hominem, ut uoluntate sua in malum quoq; inclinare posset: quare non potius bonitatem naturæ in eo confirmauit, ut non posset cadere uel peccare? Respondet adhæc scriptura, & dicit, Quis tu, ut ex aduerso respondeas Deo? Væ ei qui contēdit cum factore suo. Væ qui dicit patri, Quid generas? & matri, Quid parturis? Nisi uerò labilem condidisset hominem Deus, nulla fuisset laus operis siue uirtutis. Nam necessitate fuisset bonus. Quid quòd labilem omnino oportebat condi hominem? Ita enim poscebat ipsum Dei ingenium. Deus gloriam suam non dat ulli rei conditæ. Adam homo erat, non Deus. Et ut Deus benignus & liberalis, sic etiam iustus est. Benefacit hominibus: sed idem uult, ut homines agnoscant Deum eiusq; beneficia, obediāt & grati sint. Innumera autem beneficia contulerat in Adamū, restabat ergo ut occasionem ipsi daret declarandæ gratitudinis & obedientiæ seu subiectionis. Eam uerò lege lata obtulit. Videmus ergo hīc Deum non fanciuisse legem, ut impingeret homo & ca-

Cur Deus contēdit hominem labilem.

Lex data Adamo cur.

ostendit tanquam symbolum eius, quod lege lata iniunxerat, nempe obediendum esse Domino soli, utpote sapiēti & benefico, optimo, maximo, Deo & creatori suo. Ac quid oro in his erat difficultatis aut obscuritatis? Nobiscum sentit S. Augustinus qui libro de natura boni aduersus Manichæos cap. 35. Ad hoc, inquit, prohibuerat, ut ostenderet naturam animę rationalis, non in sua potestate, sed Deo subditam esse debere, & ordinem suę salutis per obedientiam custodire, per inobedientiam corrumpere. Hinc & arborem quam tangi uetuit, sic appellauit dignoscen-
tiam boni & mali: qui cum eam contra uetitū tetigisset, experiretur pœnam peccati, & eo modo dignosceret, quid interesset inter obedientiam bonum, & inter inobedientiam malum. Iam uerò cum subrepsit serpens, & homini alias formas boni & mali suggessit, legi Dei ex diametro contrarias, homo autem eas recepit, perfide à Deo defecit, sua certè culpa inobediens interiit. Vnde iuste egit Deus ubique semper, iniustissimus apparet homo & ingratus utcunq; rem æstimes.

Nihil infirmitatis aut corruptionis in primo homine fuit.

Imago Dei.

Præsciuit lapsum hominis.

Cæterum cum labilem dicimus conditum hominem, id non ita intelligi uolumus, quasi uel tantillum infirmitatis in primo illo homine ante lapsum fuisse existimemus. Nam ut modis omnibus absolutissimus, sic nullo modo ut peccaret aut interiret creatus fuit. Nam Deus qui unus est substantia, trinus personis, dixit, Faciemus hominem in imagine nostra, secundum similitudinem nostram. Est autem Zælām effigies & imitamentum alterius, Demuth uerò est ipsum exemplar à quo effigies deformatur. Proinde est in ipso Deo exemplar, ad cuius imitationem formatur effigies uel similitudo. Porro nequit hæc esse ipsum corpus. Nam Deus spiritus est, alienissimus à natura luti: necesse est ergo imaginem Dei referre ad spiritualia, nimirum ad immortalitatem, ueritatem, iustitiam, & sanctimoniam. Ita enim scriptum reliquit beatissimus Apostolus Paulus Renouamini spiritu mentis, & induite nouum hominem, qui iuxta Deum conditus est in iustitia & sanctitate ueritatis. Proinde nihil ad absolutissimam perfectionem primo defuit homini: ut sic uel cæco appareat, hominem non ad mortem & interitum esse creatum, sed ad uitam & beatitudinem seu felicitatem plenam.

Verum, inquiunt, præsciuit Deus lapsum hominis, quem si uoluisset, impedire potuisset: iam cum non impediuisset, Dei culpa Adam peccauit. Egregia uerò censebitur disputatio, si Dei timore posito, quælibet in buccam uenientia, contra maiestatem Dei expuere licet. Responsum est mox ab initio huius disputationis ad hanc obiectionem. Præterea non sequitur ex præscientia Dei ulla necessitas, ut necessitate peccarit Adam, quod ipsum peccaturum præsciuit Deus. Præscit prudens aliquis pater ex signis aliquot funestis, aliquando filium suum perimendum gladio. Nec fallit præscientia. Confoditur enim propter fornicationem. Atqui non ideo confossus creditur, quia pater ipsum prænouit perimendum: sed quia adulter fuit. Ideoq; S. Ambrosius, siue quisquis tandem is author fuerit 2. lib. de Gentium uocatione cap. 4. de parricidio Caini loquens, Vtique præsciebat Deus, inquit, ad quem finem progressurus esset furor insanientis. Neque ex eo quod falli scientia diuina non poterat, necessitate peccandi urgebatur facinus uoluntatis, &c. Et Augustinus libro de Libero arbitrio, lib. 3. cap. 4. Sicut tu memoria tua non cogis facta esse, ait, quæ præterierunt, sic Deus præscientia sua non cogit facienda quæ futura sunt. Et sicut tu quædam quæ fecisti, meministi: nec tamen quæ meministi omnia fecisti: ita Deus omnia quorum ipse author est præscit, nec tamen omnium quæ præscit ipse author est, Quorum autem non est malus author, iustus est ultor. Et reliqua.

Proximæ obiectioni cognata est sequens, Deus ab æterno, inquiunt, decreuit genu

genus humanum liberare ex seruitute: ergo fieri non potuit quin prius seruituti implicaremur: oportuit ergo nos immergi peccato, ut per hoc elucesceret Dei gloria iuxta illud Apostoli, Vbi exuberauit delictum, ibi exuberauit & gratia. Mirum uero istos non illud magis apud se perpendere, deum sibi ex seipso etiam sine nobis ad beatitudinem felicitatemque esse satis, ac gloriam eius, etsi nulla unquam creatura prodisset in lucem, pertingere supra omnes coelos. An non ab aeterno Deus? At non ab aeterno creatura est. Est autem gloriosus Deus ab aeterno: ergo sine nobis gloriosus est. Quis uero ita ineptiat, ut existimet lucem illam aeternam aliquid gloriae accipere a nostris tenebris, a putore illo nostro atque peccatis? An sine nostris sceleribus nulla erat futura Dei gloria? Sapiens in Ecclesiastico, Ne dicas, Defeci, inquit, impulsu domini. Non enim debes quae odit facere. Ne dicas, ipse me in errorem impulit. Non enim ei uiro peccante opus est. Vel, Non enim necessarij sunt ei homines impij. Omne nephas odit dominus, nec probatur eiusdem cultoribus. Quare ergo non inuertimus ratiocinationem nostram, & ita, ut res habet, colligimus? Deus ex bonitate & liberalitate sua, qua distrahi quasi cupit ac se omnibus ad felicitatem impartiri, ab aeterno decreuit creare hominem ad suam imaginem & similitudinem: sed quoniam praeuidit illum ruiturum in foedam seruitutem, liberatorem ex eadem gratia & bonitate sua praedordinauit, ut se ita nobis impartiretur & nos laudaremus gratiam eius, ac gratias ageremus bonitati eius. Ita uero quod peccauimus homines, & in nostram conuertimus perniciem, Dominus rursus conuertit in bonum & ad salutem nostram. Sicuti quondam etiam in rebus Iosephi & fratrum eius, quae harum rerum typus quidam sunt, fecisse legitur dominus. Et nos omnino hoc negotium disputando totum huc conuertere debemus, ut soli Deo omnis cedat gloria, nobis aliud nihil quam confusio faciei.

Restant ultimò adhuc aliquot scripturarum loci perstringendo explicandi. Dixit sane Apostolus Paulus, Tradidit eos in reprobum sensum. Sed illud tradere, quod & Augustinus dicit, iudicij & iustitiae opus est. Digni enim erant qui traderentur in sensum reprobum. Causa praecessit in uerbis Apostoli. Nam Deus se illis manifestauit: illi uero non tantum ingrati fuerunt Deo, sed suae potius sapientiae innitentes, cultum nescio quem, deo uoluerunt obtrudere: ergo ut experirentur se stultos & impios esse, tradidit eos Deus in cupiditates foedas. Ita noluit audire dominum Amazias rex, quia dominus statuerat eius punire flagitia: sicut legitur 4. Reg. cap. 14. & 2. Paralip. 25. cap. Ita miscuit dominus pseudoprophetas spiritum erroris, & seduxerunt Aegyptum. Isaia 19. Ita exiuit spiritus seductor, uel cacodæmon a domino iudicij, & fuit spiritus mendax in ore omnium prophetarum, 3. Reg. ultimo. Facit autem ista omnia dominus æquo & sancto iudicio. Idem Occaecare dicitur quoties lucem ueritatis contemptam reuocat uel aufert, & tenebris gaudentes, in tenebris perplexos hædere sinit. Tunc enim ingratis & prophanis uerbum suum ad iudiciū annunciare permittit. Sic sane docet nos sentire euangelica & apostolica doctrina. Hæc, ait dominus, est cōdemnatio, uel hoc est iudiciū, quod filius Dei ipsa lux uera uenit in mundum, & mundus plus dilexit tenebras quam lucem. Et Apostolus Christi Paulus, Si adhuc uelatum est euangelium nostrum, ait, in his qui pereunt uelatum est: in quibus Deus huius seculi excæcauit sensus incredulorum, &c. Iuxta eandem rationem indurare dicitur Deus. Cum enim uocat hominem dominus, & is reluctatur & indignum se facit regno coelorum, permittit ipsum sibi ipsi: id quod aliud non est quam suae naturae corruptae hominem relinquere, iuxta quam homini est cor saxeum, quod sola Dei gratia molle uel tractabile redditur: ergo subtractio gratiae, induratio est: & cum

*Quomodo deus
tradit in sensum
reprobum.*

Iob 1. cap.

Excæcare.

Indurare.

*Induravit Deus
cor Pharaonis.*

*Malum quomo-
do faciat Deus.*

*Omnia ex ipso
& per ipsum
& in ipso.*

nobis ipsis relinquimur, induramur. Pharaon rex Aegypti infanticidio nephando, tyrannide & alijs peccatis multis, contra legem naturae commissis, offenderat oculos diuinæ & iustissimæ maiestatis: nihil ergo mirum quod induravit cor eius. Porro si quis hanc interpretationem non recipit, negare tamen non potest Deum in scripturis nostris uti loquutionibus. Nobis autem in usu est dicere, Hic pater filium indulgentia sua corrumpit & indurat (*macht in halßstarr.*) Pater autem non ideo indulget ut perdat, sed ut seruet: filius reuera abusu indulgentiæ paternæ se perdit & indurat. Idcirco propria sua non patris culpa induratur filius, qui tamen dicitur indurari à patre. Et reuera si diligenter inspicias historiam Pharaonis in Exodo, inuenies non semel repeti hanc sententiam. Et induravit Deus cor Pharaonis, cum præcessit beneficium aliquod & liberatio à malo. Quasi dicat scriptura, Hoc beneficio liberationis à malo induravit Deus cor Pharaonis, dū hic abute- retur Dei bonitate, arbitrareturque iam omnia fore extra periculum tuta, quod Deus præsens supplicium sustulisset, ac iam benefaceret. Interim fateor & ante benefi- cia, ante poenas illatas, imò mox ab initio uocationis Moysi, dixisse dominū, Ego scio quod rex Aegypti non sinet uos abire. Item, Vide tu ut coram Pharaone fa- cias omnia signa & prodigia quæ posui in manu tua: ego uero indurabo cor Pharaonis, ut non dimittat populum. Caterum hæc non dicuntur in hunc finem, ut faciamus Deum authorē omnis pertinaciæ, perfidiæ & rebellionis Pharaonicæ: sed magis ad cōsolationem & confirmationē Moysi, qui sic præmonetur, ut cum sedulo agit cum rege, nec tamen quicquam impetrat, nihilominus sciat se agere Dei negotium, deumque sua longanimitate in causa esse pertinaciæ illius, interim tamen omnia recte ad gloriam suam temperaturum. Perinde ac si pater familiās ablegat seruum suum ad debitores suos, dicens, Abi tu & repete debita: scio autem te nihil ab illis accepturum. Ego enim mea lenitate benignitateque difficiles reddā. Tu uero fac tuum officium: ego interim uidebo quid facto opus sit. His accedit quod in illis ipsis capitibus, in quibus toties repetitur, Induravit Deus cor Pharaonis, subinde & hoc repetitur, quod indurationis culpam regerit in ipsum Pharaonem, Induravit cor Pharaonis & non audiuit eos. In cap. 9. probè castigatus Pharaon dicit, Peccaui etiam nunc, Dominus iustus est, ego uero & populus meus iniusti uel impij. Et mox, Videns autem Pharaon quod pluuia cessasset, perrexit peccare & aggrauavit cor suum, & induratum est nimis. Hæc autem & similia conferenda sunt cum hisce uerbis, Ego induraui cor Pharaonis, colligendusque pius sensus, qui deum iustissimum non authorem mali faciat. Iam uero clarè satis dicit Amos cap. 3. Non est malum in ciuitate quod dominus non faciat. Verum Augustinus contra Adimantum cap. 26. orthodoxè scriptum reliquit, Malum hoc loco, non peccatum, sed poena intelligenda est. Dupliciter enim appellatur malum, Vnum quod homo facit: alterum quod patitur, poena. De poena autem loquitur propheta. Diuina enim prouidentia cuncta moderante & gubernante, ita homo malum facit, quod uult, ut malè patiatur quod non uult. Ita ergo Deus malum facit, quod non ipsi Deo malum est, sed eis in quos uindicat. Itaque ipse quantum ad se pertinet, bonum facit: quia omne iustum bonū est: & iusta est illa uindicta. Non aliter intelligendum est malū & in his Isaia uerbis cap. 45. Ego dominus, & nullus ultra, formans lucem, & creans tenebras: faciens pacem & creans malum: ego dominus faciens omnia ista. Nam malum, id est, bellum opponit paci. Rursus S. Augustinus de Natura boni contra Manichæos cap. 28. Cum audimus, inquit, omnia ex ipso & per ipsum & in ipso, omnes utique naturas intelligere debemus, quæ naturaliter sunt. Neque enim ex ipso sunt peccata, quæ naturam non seruant, sed

sed uitiant: quæ peccata ex uoluntate esse peccantium, multis modis sancta scriptura testatur. Hæc ille. Nec difficile est respondere ad illam Solomonis sententiam, Omnia propter se condidit dominus, impium quoque ad diem malum. Prou. 16. Credimus enim Deum iustissimum, certum diem afflictionis iudicii uel supplicii designasse impijs, in quem suo tempore impingent. Quod uero Apostolus dicit, Misereatur cuius uult, & quem uult indurat, non huc detorquebimus, quod quenquam necessitate adigat ad peccandum Deus, & ita fiat peccati causa. Voluntas enim dei bona est & iusta, nec uult aliud quam quod conueniens est, minimeque pugnat cum natura & uerbo Dei. Ideo enim propheta clamauit, Iustus dominus in omnibus uis suis, & sanctus in omnibus operibus suis. Psal. 145. Ista uero paucula ex multis de causa peccati hactenus C. V. expēdenda proposuimus.

Descendimus iam ad illustrandas primas in descriptione peccati, mox ab huius Sermonis initio propositas partes. Sunt autē duæ. Prior, Peccatum est corruptio natua hominis. Posterior, Et quæ ex ipsa existit actio repugnās legi Dei. Certe alij non inconsulti genera, uel species uel discrimina peccati ponentes dicunt, Peccatum aliud est Originale, aliud uero Actuale. De singulis quod dederit dominus, ordine dicemus, & primū de natua illa hominis corruptione, hoc est, de Peccato originali. Appellatur autem originale uel originis peccatum, quod à prima uenit origine, nempe à primo parente in omnes deriuatum propagine uel traduce. Hoc etenim ex utero materno in nostra natura nobiscum adferimus in hanc uitam.

Discrimina peccati.

De Originali peccato.

Huius peccati uariæ ponuntur definitiones, quæ tamen ut inter se non dissentiant, sic alia clarior & plenior est altera. Alij, Peccatum originale, est corruptio, inquit, uel naturæ à prima perfectione. Alij, Est naturæ hominis corruptio, quæ efficit ne uerè obediamus legi Dei, nec simus sine peccato. Alij defectum uocant: alij concupiscentiam: quæ tamen uideri poterat fructus esse originalis peccati, id est, corruptionis nostræ. Alij appellant appetitum inordinationem, quæ reliqua est in natura. Anselmus scriptor neotericus, Originale peccatum est carentia, inquit, originalis iustitiæ. Verū hoc satis accisè dixisse putatur. Vis enim peccati non uidetur satis exprimi. Nam natura nostra non tantū inops & uacua est boni, sed omnium malorum fertilissima. Melior ergo habetur Hugonis illa, Originale peccatum est ignorantia in mente, & concupiscentia in carne. At multo melior pleniorque hæc esse uidetur, Originale peccatum est uitium & deprauatio totius hominis, qua Deum & eius placita, nec nosse, nec animo persequi potest, sed ex peruerso de rebus iudicio, perperam agit perueritque omnia. Cum his autē finitionibus omnibus etiam hanc C. V. considerandā proponimus, Originale peccatum est hæreditaria naturæ nostræ prauitas atque corruptio, quæ primū nos facit reos ire diuinæ, deinde opera in nobis profert, quæ scriptura carnis appellat. Peccatum ergo hoc originis nec dictum nec factum nec cogitatum quidem est, sed morbus siue uitium, deprauatio, inquam, iudicii & concupiscentiæ, uel corruptio totius humanæ naturæ, id est, intellectus & uoluntatis omniumque uirium humanarum, unde demum cuncta prauè cogitata dicta & facta proueniunt.

Quid peccati originale.

Originem trahit ex protoplasto, ideo enim dicitur hæreditaria naturæ nostræ prauitas atque corruptio. De protoplasti corruptione & peccato, ex quo nascimur omnes peccatores, abundè satis dictum est in causa peccati, sed & paulò post sequentur paucula quædam, ut non sit hic necesse quicquam repetere: ad alia ergo conuertimur.

Origo peccati originalis.

Pelagiani negarunt hoc malum esse hæreditarium. Nam ipsius Pelagij uerba

Pelagiani.

hæc sunt, Vt sine uirtute, ita sine uitio procreamur. Atq; ante actionem propria uoluntatis, id solum in homine est, quod Deus condidit. Tectius hic quidem, at Cælestius Pelagij consors, apertius uirus hoc euomuit, ac dixit, In remissionem autem peccatorum baptisandos infantes non ideo diximus, ut peccatum ex traduce firmare uideamur, quod longe à catholico sensu alienum est. Quia peccatum non cum homine nascitur, quod postmodum exercetur ab homine: quia non naturæ delictum, sed uoluntatis esse demonstratur. Rursus Pelagius dixit, non tantū primo homini, sed etiam humano generi primum illud obfuisse peccatum: uerū mox adiicit, Non propagine, sed exemplo, id est, non quod ex illo aliquod traxerint uitium, qui ex illo propagati sunt, sed quod eum primum peccantē imitati sunt omnes qui postmodum peccauerunt. Hæc extant apud Aurel. August. de Peccato originali contra Pelagium & Cælestium lib. 2. cap. 6. 13. & 15.

Esse in homine
& nasci cum
ipso malum hæ
reditarium.

Demonstrandum ergo nobis ex sanctarum scripturarum testimonijs, esse in homine hæreditarium malum, & nasci nobiscum originis peccatū, id est, omnes homines peccatores in mundum nasci. Clamat ergo disertis uerbis Dauid Psalm. 51. Ecce in iniquitatibus conceptus sum, & in peccatis concepit me mater mea. Siue ut habet alia ex Hebræo uersio, Ecce in iniquitate formatus sum, & in peccato fouit uel calefecit me mater mea. Id est, tum protinus adhærescebat mihi peccatum & iniquitas, cum conciperer & alerem in utero materno. Id quod proculdubio non erat ex uitio matrimonij: sanctum enim & impollutum est cubile coniugum: sed ex traduce & propagine. Nam Iob in cap. 14. clarè dicit, Quis dabit aut proferet purum uel mundum ex immunda (nimirum massa) ne unus quidē, haud dubiè, proferri poterit. Eius generis sequuntur & alia quædam in Iobi cap. 15. & 25. Clarissimè uerò sanctus Christi Apostolos Paulus ad Romanos 5. Quemadmodum, ait, per unum hominem peccatum in mūdum introiit, ac per peccatū mors, & sic in omnes homines mors peruasit, quatenus omnes peccauerunt. Usque ad legem enim peccatum erat in mundo: porro peccatum non imputatur cum non est lex. Imò regnauit mors ab Adam usq; ad Moysen in eos quoq; qui non peccauerant ad similitudinem transgressionis Adam, &c. An non hisce uerbis propagationem peccati clarissimè ostēdit Apostolus, dicens, Per unum hominem intrauit peccatum in mundum. In omnes homines mors peruasit, quatenus scilicet omnes peccauerunt, nimirum quatenus omnes obnoxij sunt corruptioni. Imò ne ulli uel ante Moysen, uel post Moysen exciperentur homines, subiungit, Regnauit mors ad Adam usque ad Moysen, in eos quoq; qui non peccauerant ad similitudinem transgressionis Adam, id est, qui nondum sua & propria quidem uoluntate, sicut ille, peccauerant, sed ab ipso originis peccatum traxerant. S. Augustinus hæc plenius excutit & tractat libro de Peccatorum meritis & remissione primo, cap. 9. 10. 11. & sequentibus. Rursus uerò Paulus in 7. ad Rom. cap. hoc malum, inhabitans appellat peccatum, nimirum congenitum. Addit enim, Ego carnalis sum, uenditus sub peccatum. Et, Noui quod non habitat in me, id est, in carne mea, bonum. Ideoq; & beatus Apostolus & euāgelista Ioannes, Si dixerimus, inquit, peccatum non habemus, nosipsum fallimus, & ueritas in nobis non est. Significanter autem dixit habemus, non habuimus aut habebimus. Nam id ex natura corrupta proprium habemus. Proinde constat iam falsum esse quod Pelagiani finxerunt, nos procreari sine uitio: falsum est, uoluntariam duntaxat actionem non etiam corruptionem & deprauationem quæ nondum prorupit in opus prauum, esse peccatum. Et Augustinus alicubi originale uocat & ipsum uoluntarium peccatum, idq; ratione duplici, Principiò non per se quidē, sed respectu Adæ, quia ex primi hominis

Voluntariū esse
peccatum.

minis mala uoluntate factum, à nobis hæreditarium contrahitur. Deinde quòd cupiditas praua nuncupari possit uoluntas. Nam libro Retract. i. cap. 15. Si quisquam dicat, inquit, etiam ipsam cupiditatem nihil esse aliud, quàm uoluntatē, sed uitiosam tamen peccatoꝝ seruientem, non resistendum est: nec de uerbis, cum res constet, controuersia facienda. Sic enim ostenditur sine uoluntate nullum esse peccatum, siue in opere, siue in origine. Hæc ille, qui nonnulla huius generis affert etiam in 3. lib. contra Iulianum Pelagianum cap. 5. Nobis satis fuerit etiā sine illis, ex scripturarum testimonijs didicisse, peccatum esse non tantum actionem uoluntariam, sed etiam corruptionem hæreditariam.

His omnibus nihil repugnat quod in Ezechiele dominus dicit, Filius non portabit iniquitatem patris, sed quisq; in suo peccato morietur. Non enim noceret nobis lapsus Adæ, si non ex ipso omnibus nobis ea innasceretur peruersitas, quæ digna est dei iudicio. At uerò cum omnis propensio, omne ingenium & studium naturæ nostræ etiam in puero unius diei, pugnet cum diuina puritate & uoluntate, quæ sola bona est, profectò nemo propter patris, sed quisq; propter suum proprium punitur peccatū, inuaduntq; pueros omnes calamitates; quos his corripi uidemus sancto & iusto dei iudicio.

Nihil firmitus est quod obijcitur, liberos à sanctis parentibus nō posse ullam contrahere corruptionem. Nam descendunt ex generatione carnali, non ex re generatione spiritali. Et quod Apostolus dixit, Sanctificatus est uir infidelis in uxore, & sanctificata est uxor in uiro: alioqui liberi uestri immundi essent, nunc autem sancti sunt, his nostris non repugnat. Sancti enim appellantur non generis aut natiuitatis prerogatiua, quasi sic sine uitio nascantur pueri: sed quòd natura quidem corrupti geniti, fœderis & gratiæ uirtute puri sint, & impuritas eis non imputetur, propter Christum uel remissionem, quæ sic pronuntiata est, Ero Deus tuus & seminis tui post te. Quondam enim & isti liberi qui ex semine Abrahæ erant, sancti & benedicti erant, qui tamē nihilominus circuncidebantur. At quid oro opus erat circuncisione seu purgatione, si nihil erat ex natiuitate impuritatis?

Falsissimum itaque est illud quoq; quod Celestium Pelagianum dixisse audiuimus. In remissionem peccatorū baptisandos infantes non ideo diximus, ut peccatum ex traduce firmare uideamur: quod longe à catholico sensu alienum est. Nam catholicum illud est, quod circuncisi sunt liberi Iudæorū, non tam quòd fœderis erant consortes, quàm quòd omnis uetustas sanctorum patrum sic confitebatur in infantibus esse aliquid quod putatione opus haberet, hoc est, quod gratia Dei remitteret, nec imputaret ad mortem. Catholicum illud est, quod baptisantur infantes Christianorum, non tam quòd Dei sunt, gratuitò in fœdus Dei recepti, quàm quòd in eis est ex natiuitate quod gratia sua abluat dominus, ne inferat mortem. Imò non potest esse catholicum, quod pugnat tam aperte cum tot illustribus scripturæ testimonijs, approbantibus in infantibus ex propagatione esse peccatum. His accedit quod beatus Augustinus libro contra Iulianum Pelagianum primo, cap. 2. præstantissimorum in Ecclesia episcoporum doctorumq; testimonia congerit, quibus ostendit omnes Ecclesiarum ministros, ab Apostolorum temporibus, agnouisse & palam docuisse peccatum originale. Profert autem testimonia Irenæi, Cypriani, Retij, Olympij, Hilarij, Ambrosij patris & præcepto ris sui in Christo, Innocentij, Gregorij, Basilij, Ioannis Chrysostomi, Tandem, Antantam consensionem, inquit, sacerdotum catholicorum, conspersionem dicturus es perditorum; Nec sanctum Hieronymum, quia presbyter fuit, contemnens

Filius non portabit iniquitatem patris.

A sanctis nasci parentibus.

Catholicum dogma de peccato originali.

Omnes antiqui doctores consentiuntur peccatum originale.

dum arbitreris, qui Græco & Latino, insuper & Hebræo eruditus eloquio, ex occidentali in orientalem transiens ecclesiam, in locis sanctis atq; in literis sacris, usq; ad decrepitam uixit ætatem. Hic omnes uel penè omnes, qui ante illum ex utraq; parte orbis de doctrina Ecclesiastica scripserant, legit: nec aliam de hac re tenuit promptissimam sententiam. Et iterum idem libro de Peccatorum meritis & remissione tertio, cap. 7. sic scriptum reliquit, Hieronymus cum Ionam exponens ad eum uenisset locum, ubi commemorantur etiam paruuli ieiunio castigati, Maior inquit, ætas incipit & usq; ad minorem peruenit. Nullus enim absq; peccato, nec si unius quidem diei fuerit uita eius, & innumerabiles anni uitæ eius. Si enim stellæ mundæ non sunt in conspectu Dei, quanto magis uermis & putredo, & hi qui peccato offendentis Adam tenentur obnoxij? His addit Augustinus, Hunc doctissimum uirum si facile interrogare possemus, quàm multos utriusq; linguæ diuinarum literarum tractatores, & Christianarum disputationum scriptores commemoraret, qui non aliud ex quo Christi ecclesia est constituta, senserunt, nō aliud à maioribus acceperunt, non aliud posteris tradiderunt. Ego quidem quamuis longè pauciora legerim, non memini me aliud audisse à Christianis, qui utrunq; accipiunt testamentum, non solum in catholica Ecclesia, uerum etiam in qualibet hæresi uel schismate constitutis, non memini me aliud legisse apud eos, quos de his rebus aliquid scribentes legere potui, qui scripturas canonicas sequerentur, uel sequi se crederent, crediue uoluissent. Hæc Augst. docens mox ab initio concordie doctrinæ genere omnes sanctos originale peccatum in infantibus disertissime confessos esse. Mihi uidetur S. Hieronymus non in Ionam duntaxat, sed in Ezechielem longè apertius asseuerasse originale peccatum. Verba eius habentur in Comment. lib. 14. in cap. 47. ad Ezechielem, ac sunt huiusmodi, Quis hominum gloriari potest castum se habere cor: uel ad cuius mentem per oculorum fenestras, mors concupiscentiæ non introibit, & (ut parum dicam) animi titillatio? Mundus enim in maligno positus est: & à pueritia appositum est cor hominis ad malum: ut ne unius quidem diei à natiuitatis suæ exordio sine peccato sit humana conditio. Vnde & David confitetur in Psalmo, Ecce enim in iniquitatibus conceptus sum, & in peccatis concepit me mater mea. Non in iniquitatibus matris meæ, uel certè meis, sed in iniquitatibus humanæ conditionis. Vnde & Apostolus dicit Regnauit mors ab Adam usq; ad Moysen, etiam super eos qui non peccauerunt, in similitudinem prauaricationis Adæ. Tantum ille: & nos hæc omnia hætenus protulimus ut astrueremus peccatum originale esse corruptionem naturæ humanæ natiuam uel hæreditariam.

Qualis et quantitas deprauatio naturæ.

Videamus porro qualis & quanta sit ista naturæ nostræ hæreditaria prauitas atq; corruptio, & quid efficiat in homine. Natura quidē nostra, sicuti prius ostendimus, optima & præstantissima fuit in patre nostro ante lapsum, sed post lapsum facta est iusto dei iudicio pessima & corruptissima, quæ & talis in nos omnes propagata est. Id quod res ipsa & experiētia cum in infantibus seu paruulis, tum etiā in adultis liquidò claret. Nam specimina edunt paruuli luculentæ deprauationis, mox atq; aliquid agere etiam antequam loqui perfectè cœperint. Intellectus est nobis omnibus hebes, obtusus, crassus, adeoq; cæcus planè in rebus diuinis. Iudicium in rebus cœlestibus habemus peruersissimum. Horribiles enim & absurdissimæ cogitationes & opiniones exoriuntur in nobis ipsis de deo & iudicijs omnibusq; operibus Dei. Quid quod totus animus noster propendet & procliuus est ad errores, ad fabulas & ad nostram perniciem: cumq; iudicamus ineptissimè, nostra tamen iudicia longè anteferimus diuinis, quæ nobis præ humanis illis nostris stulta

stulta admodum uidentur. Neque enim mentitus est, qui dixit, Animalis homo non accipit ea quæ sunt spiritus Dei: stultitia siquidem illi sunt, nec potest cognoscere quod spiritualiter dijudicantur. Appellauit autem Paulus animale hominem, uitali anima uiuentem naturaliter, nondum renatū. Tales uerò cum adhuc sumus, toti certè regimur à philautia. Est ea amor & studiū sui nimium, quo nobis omnia nostra eximiè placent, nostrisq; commodis impensè studemus, omnibus alijs interim uel neglectis, uel etiam afflictis. Nec temerè Plato id uitij malorum omnium fontem existimauit. Præterea uoluntas tota nostra captiua ducitur à concupiscentia, quæ ueluti radix imbuta ueneno, omnia hominis inficit, hominemq; inclinât, trahit & impellit ad carnalia & uetita Deoq; contraria, ut ipsa persequatur cupidè, in eis omnem quærat delectationem ac conquiescat. Iam & facultates ad bonum sunt nobis nullæ. Segnes enim ignaui & torpidi sumus ad omne bonum, prompti uerò & alacres ad res pessimas quasq;. Et ut semel finiam, breuibusq; totam uim prauitatis corruptionisq; nostræ hæreditariæ exprimam, deprauatio illa nature nostræ aliud non est quàm imaginis Dei in nobis expunctio. Imago Dei erat ante lapsum in patre nostro Adamo, quæ fuit, iuxta interpretationem Apostolicam, conformitas & participatio diuinæ sapientiæ, iustitiæ, sanctitatis, ueritatis, integritatis & innocentiae, adde & immortalitatis felicitatisq; æternæ. Ergo quid aliud obliuio aut expunctio huius imaginis esse potest, quàm peccatum originis, uidelicet odium Dei, ignorantia Dei, stultitia, diffidentia, desperatio, *philautia*, iniustitia, immunditia, mendacium, hypocrisis, uanitas, corruptio, iniuria, & consceleratio, adde & mortalitas infelicitasq; æternæ. Hæc imago & similitudo propagata est in nos omnes, iuxta quod legimus 5. cap. Gen. Adam genuit in similitudine & imagine sua filium. Proinde qualis erat corruptus, deprauatus & calamitosissimus Adam pater noster, tales nos genuit filios: sic ut omnes nos qui ab impuro semine descendimus, peccati contagione nascamur infecti. A radice enim putrefacta, rami putridi prodeunt, qui suam putredinem transmittunt in alios ex se nascentes surculos.

Deprauatio nostra est imaginis Dei obliuio.

Et hoc quidem malum, hæc corruptio, hoc peccatum, quamuis in infantibus lateat, nondum per ætatem teneram erumpat in opus, propriè tamen peccatum, & huiusmodi quidem peccatum est, quod eos agit reos iræ diuinæ, separatq; à consortio Dei. Cum Deo enim sanctissimo & igne consumente nemo nisi immaculatus & purissimus habitare potest. Et Paulus, Omnes, inquit, peccauerunt, & destituuntur, siue egent gloria Dei. Gloria hæc Dei, ipsa est imago Dei: hac quia destituuntur originali peccato deprauati, repelluntur meritò à consortio Dei. Huc pertinet præterea tota illa disputatio quam habuimus Sermonem 4. Decadis 3. de Concupiscentia: ubi docui ipsam concupiscentiam nondum in opus productam, peccatum & huiusmodi peccatum esse, quod omnes homines maledictioni subdat diuinæ. Scriptum est enim, Maledictus omnis qui non manserit in omnibus quæ scripta sunt in libro legis huius. Proinde hic est primarius effectus peccati originalis, quod iram, mortem atque condemnationem inducit infantibus adeoq; & omnibus hominibus. Id quod, ne quid dubij in cuiusquam animo resideat, copiosioribus scripturarum testimonijs demonstrabo, ijs non repetitis iterum quæ superius in hoc Sermonem, & in quarto Sermonem Decadis tertiæ adduximus.

Originale peccatum damnat.

Dominus in Euangelio dicit ad Nicodemum, Amen dico tibi, nisi quis natus fuerit è supernis non potest uidere regnū Dei. Et iterum, Amen dico tibi, nisi quis natus fuerit ex aqua & spiritu, non potest introire in regnum Dei. Quod natum est ex carne, caro est, & quod natum est ex spiritu, spiritus est. Duo in his uerbis proponuntur memoranda & instituto nostro ualde congruentia. Prius, Non in-

grediuntur in regnum cœlorum, nisi renati è cœlo, per spiritum sanctum: ergo prima natiuitas ad mortem, nihil ad uitam facit. Prima enim natiuitate nascimur ad mortem. Posterius, Caro est quod ex carne gignitur: ergo prima natiuitate nostra omnes caro nascimur. De carnis uerò ingenio & uiribus eius Apostolus, Affectus carnis, inquit, inimicitia est aduersus Deum, Nam legi Dei non subditur: imò ne potest quidem. Proinde carnalis illa natiuitas generat nos non amicos & filios, sed hostes Dei: itaq; & reos iræ Dei.

Paulus ad Ephes. 2. cap. Eramus, inquit, natura filij iræ, sicut & cæteri. Quibus uerbis pronūciat uniuersos esse perditos. Nam perditos siue morte eterna dignos, & omnino tales quibus meritò irascatur Deus, appellat filios iræ idiotismo Hebraico. Significat enim ira Dei iudiciū & supplicium quod infertur hominibus iusto Dei iudicio. Et filius mortis dicitur, qui mortī adiudicatus seu destinatus est. Sic filius perditionis, &c. Obserua autem quod nos omnes nuncupat filios iræ, id est, pœnæ aut damnationi obnoxios, natura nimirum, ab ipsa natiuitate, ex utero matris. Quod autem naturaliter inest omnibus, id certè originale est: ergo originale peccatum efficit nos reos iræ diuinæ, id est, propter originalem deprauationem omnes sumus damnationi obnoxij. Hic locus Pauli in hac causā ualde est insignis.

Idem Apostolus ad Colos. 1. cap. Deus, inquit, eripuit nos à potestate tenebrarum, & transtulit in regnum filij sibi dilecti. Quod si translati sumus in regnum filij Dei, fuimus ergo in regno diaboli. Huc iam pertinent multiplicia eiusdem Apostoli testimonia in 5. cap. ad Romanos, Vnius, inquit, delicto multi mortui sunt. Item, Per unum qui peccauerat, uenit mors. Venit enim iudiciū ex uno ad condemnationem. Rursus, Per unius delictum mors regnauit per unum. Et iterum, per unius delictum propagatum est malum in omnes homines ad condemnationem. Breuiter, Originale peccatum à Dauide & Paulo appellatur disertè peccatū, ergo debetur originali peccato mors. Quia stipendium peccati mors est.

Originale peccatū, proprium

Concludimus ergo infantes damnationem in hanc lucem secum ex utero adferre materno: quia corruptam secum afferunt naturā; ideoq; nō alieno sed suo pe-reunt uitio. Tametsi enim Augustinus alicubi hoc peccatum uideatur appellare alienum (quo clarius ostendat propagine in nos deriuari) confitetur tamen idem unicuiq; nostrum uerè & maximè esse proprium. Et quamuis hic morbus suæ iniquitatis fructus nondum protulerit, est tamen tota ipsa natura corruptio foeda, & semen quoddam peccatorum siue scelerum, quæ non potest non Deo esse odibilis. Odit enim omnem impuritatem Dominus.

Vbi nō est lex, ibi nulla præuaricatio.

His nihil repugnat quod Paulus ait, Vbi non est lex, ibi nec transgressio. Et enim non absolutè negat Apostolus præuaricationem aut peccatum, quod reuera coram oculis Dei peccatum est, peccatum non esse; sed spectat hominum reputationem. Homines enim priusquam per legem ipsis appareat aut aperiatur peccatum, non reputant uel æstimant peccatum, ut reuera æstimandum erat. Paulus idem ille alibi dicit, Peccatum quondam sine lege erat mortuum. Et ego quondam sine lege uiuebam. Vbi uerò uenit lex, peccatum reuixit. Quod si iam reuixit, ergo & ante legem, priusquam per legem excitaretur, uixit, licet tunc non ita ut nūc uires suas exereret. Huc pertinet illud Apostoli, Vsq; ad legē peccatū erat in mundo: porro peccatum non imputatur cū non est lex. Ecce peccatum erat in mundo ante legem, sed non imputabatur: non quod Deus non imputaret, sed homines sibi non imputant. Latet in cinere ignis, qui reuera ignis est, quoniam uerò nullas de se flammās spargit, non putatur esse ignis. Ea de causā uir doctissimus pñssimusq; H. Zuinglius beatæ memoriæ, diligenter distinxit inter morbum & peccatum.

H. Zuinglius de Originali peccato.

tum, cum aliquando differeret de peccato originali, quod quidem morbum maluit quam peccatū appellare: nimirum quod per peccatum omnes intelligūt actionem prauam nostra propria admissam uoluntate cōtra legem latam: per morbum uerò naturæ bene conditæ corruptionem quandam & deprauationem, sed & conditionem seruitutis miserrimam. Sicut & Augustinum modò audiūimus, hoc peccatum appellare alienum, ut ita innueret esse hæreditarium: & tamen non negabat esse proprium. Ita Zuinglius non negauit peccatum originale: sicut quidam falsò de eo sparserunt: non sensit illud per se infantibus esse innocuum: nisi quatenus gratia Dei per sanguinem Iesu Christi redditur uirtute promissionis & fœderis Dei innoxium. Inter actuale & originale exactè uoluit discernere. Nam in ratione fidei suæ reddita in comitijs Augustanis anno Domini 1530. celebratis, Originale peccatum, inquit, per conditionem & contagionem agnasci omnibus, qui ex effectu maris & fœminæ gignuntur, agnosco: & nos esse natura filios iræ scio: Nec quicquam moror hunc morbum, & conditionem, iuxta Pauli morem, appellari peccatum: imò tale esse peccatum, ut quicumq; in eo nascuntur, hostes & aduersarij Dei sint. Huc enim trahit illos natiuitatis conditio, non sceleris perpetratio, nisi quantum hoc semel perpetravit primus parens. Vera igitur perduellionis & mortis causa est perpetratum ab Adam crimen ac nephas: atq; hoc uerè est peccatum: at peccatum istud quod nobis adhærescit, & uerè morbus & conditio, imò necessitas est moriendi. Et quæ sequuntur. Hactenus enim illius uerba recensui.

Restat alter peccati originalis effectus breuiter explicandus. Profert in nobis egeritq; opera quæ scriptura carnis appellat: non secus atq; incensa fornax flāmas & scintillas efflat, aut scaturigo aquam perenniter profundit. Nulla hic quies, Auaritia enim exurgit cum libidine, adhærescit ambitio, subit ira, inflat superbia, uinolentia inuitat, uexat & temetipsum & alios inuidia. Dominus ergo in Euangelio, Ex corde, inquit, exeunt cogitationes malæ, cædes, adulteria, stupra, furta, falsa testimonia, conuitia. Rursus Paulus ad Galatas cap. 5. opera carnis non breui catalogo enumerat: quemadmodum & ad Rom. 1. & 3. cap. In 4. cap. Epistolæ ad Ephes. graphicè describit opera illa carnis, quæ enascuntur ex corruptione natia in omnibus nondum regeneratis per spiritum sanctum, Hoc dico & testor per Dominū, ait, ne posthac ambuletis quemadmodum & reliquæ gentes ambulant in uanitate mentis suæ, dum mentem habent obtenebratam, abalienati à uita Dei, propter ignorantiam quæ est in illis, & excæcationem cordis eorum, qui posteaquam dolere desierint, semetipsos dediderunt lasciuiæ ad patranda immundiciem omnem cū auiditate. Sufficiunt hæc, licet breuiuscula sint. Copiosiora enim sequētur in tractatione peccati Actualis: ad quod explicandū trāsibimus, si illud prius admonuerimus, non sine causa graui me hactenus uerbosè satis causam originalis peccati, hoc est, humanæ deprauationis humanarumq; uirium corruptionis tractauisse.

Sicut enim in his aperiuntur uenæ purioris doctrinæ, ita in ijs & fundamenta fidei nostræ collocantur. Si enim nō est originale peccatum, nec gratia est: & si sit, nihil tamen habebit quod operetur in nobis. Si integræ sunt uires nostræ, nullo certè medico nobis opus erit. Frustra ergo missus Dei filius. uenit. Suis ergo uiribus saluabuntur homines. Sic autē dirutum dissoluetur fidei nostræ fundamentum. Idcirco uehementissimus est in hac causa beatus Aug. cuius aurea certè uerba non grauabor C. V. recitare ex 2. lib. de Originali peccato contra Pelagium & Celestium. Ex cap. 23. & 24. sic scriptū reliquit, Longe aliter se habent quæstiones istæ, quas esse præter fidē arbitratur, quam sunt illæ in quibus salua fide, qua Christiani sumus, aut ignoratur quid uerum sit, & sententia definitiua suspenditur, aut aliter

Originale peccatum profert opera carnis.

In his collocantur fundamenta fidei nostræ.

In causa duorum hominum fides Christiana consistit.

Extra Israel aliqui saluati, sed non sine Christo.

quàm est, humana & infirma suspitione conijcitur: ueluti cum quæritur qualis uel ubi sit paradísus, ubi constituit Deus hominē, quem formauit ex puluere, cum tamen esse illum paradísus, fides Christiana non dubitet. Et post aliquot similes recitatas quæstiones, Quis, inquit, non sentiat in his & huiusmodi uarijs & innumerabilibus quæstionibus, siue ad obscurissima opera Dei, siue ad scripturarum abditissimas latebras pertinentibus, quas certo aliquo genere cõplecti ac definire difficile est, & multa ignorari salua Christiana fide, & alicubi errari sine aliquo hæretici dogmatis crimine? Sed in causa **duorum hominum**: quorum per unū uenundati sumus sub peccato, per alterum **redimimur** à peccatis: per unū præcipitati sumus in mortem, per alterum liberamur **ad uitam**: quoniā ille nos in se perdidit faciendo uoluntatem suam, non eius à quo factus est, iste nos in se saluos fecit, non faciendo uoluntatem suā, sed eius à quo missus est. In horū ergo duorum hominū causa propriè fides Christiana cõsistit. Vnus est enim Deus & unus mediator Dei & hominum homo Christus Iesus. Quoniam non est aliud nomen sub cœlo datum hominibus, in quo oporteat nos saluos fieri: & in illo definiuit Deus fidem omnibus, suscitans illum à mortuis. Itaq; sine ista fide, hoc est, sine fide unius mediatoris Dei & hominum hominis Christi Iesu, sine fide inquam resurrectionis eius, quam Deus hominibus definiuit, quæ utiq; sine incarnatione eius & morte nō potest ueraciter credi: sine fide ergo incarnationis & mortis, & resurrectionis Christi nec antiquos iustos, ut iusti essent à peccatis, potuisse mundari, & Dei gratia iustificari, ueritas Christiana non dubitat: siue in eis iustis, quos sancta scriptura commemorat: siue in eis iustis, quos quidem illa non cõmemorat, sed tamen fuisse credendi sunt, uel ante diluuiū, uel inde usq; ad datam legem, uel ipsius legis tempore: nō solum in filijs Israel, sicut fuerunt prophetæ: sed etiam extra eundem populum, sicut fuit Iob. Et ipsorum enim corda eadem mundabantur fide mediatoris, & diffundebatur in eis charitas per spiritum sanctum, qui ubi uult spirat, non merita sequens, sed etiam ipsa merita faciens. Non enim Dei gratia erit ullo modo, nisi gratuita fuerit omni modo. Quamuis ergo mors regnauerit ab Adam usq; ad Moysen, quia non potuit eam uincere nec lex data per Moysen: non enim data est quæ posset uiuificare, sed quæ mortuos quibus uiuificandis esset gratia necessaria, non solum peccati propagatione & dominatione prostratos, uerum etiam ipsius legis addita præuaricatione conuictos, deberet ostendere, non ut periret quisquis hoc in Dei misericordia etiam tunc intelligeret, sed ut per regnum mortis ad supplicium destinatus, etiam sibi ipsi per præuaricationem legis manifestatus, Dei quæreretur adiutorium, ut ubi abundauit peccatum, superabundaret gratia, quæ sola liberat à corpore mortis huius. Quamuis ergo nec lex per Moysen data potuerit à quoquam homine regnum mortis auferre, erant tamen & legis tempore homines Dei, non sub lege terrente, conuincente, puniente, sed sub gratia delectante, sanante, liberante: erant qui dicerent, Ego in iniquitatibus conceptus sum, & in peccatis mater mea in utero aluit. Et reliqua. Hactenus enim S. August. uerba recensui.

Dixi de Originali peccato, de natīua inquam & hæreditaria corruptione naturæ nostræ, quæ prior est pars finitionis peccati, sequitur iam pars posterior, ipsa scilicet actio quæ ex illa existit, Actuale inquam peccatum, quod ab actu nomen habet. Quoniam enim deprauatio illa agnata & inharens nobis, non semper latitat, sed agit & exerit se euidenter, ac tandem sui generis & suæ naturæ fœtum progignit, hic sanè actuale est peccatum: quod proinde sic definimus, Actuale peccatum est actio uel opus uel fœtus uitiosæ & corruptæ nostræ naturæ, exprimens se in cogitationibus, dictis & factis contra legem Dei, ideoq; iram Dei promerens.

Ita

Ita uerò minimè obscura est caussa huius peccati, nempe ipsa hominis deprauatio, quæ exerit se per concupiscentiam aut affectiones, affectiones inescant uoluntatem, uoluntas autem alijs adiuta cooperantibusq; hominis facultatibus, perficit actuale peccatum. Et ut clarius, quod dixi, intelligatur, anima nostra duas potissimum partes habet, Intellectum siue mentem, siue iudicium: & uoluntatem seu appetitum. In mente sunt naturales leges, ad quas prædicatio uel lectio aut cognitio uerbi Dei accedat oportet. Sicut autem operis boni duæ sunt in homine potissimum caussæ, uidelicet integrum iudicium bene informatum uerbo Dei, & uoluntas consentiens atque obediens (requiritur autem in primis spiritus sanctus extrinsecus aut cœlitus accedens qui mentem illuminet & uoluntatem moueat) ita propriissimè peccatum actuale perficitur, quando & iudicio seu consulto & nostra uoluntate aliquid fit cōtra legem Dei. Interim accedunt sæpissimè extrinsecus aliæ quoq; caussæ uisibiles & inuisibiles. Mouent enim spiritus mali, mouēt homines, & quæ sunt in mundo exempla corruptionis infinita. Spes deniq; metus & imbecillitas. August. quæst. in Exodum 29. In uoluntate, inquit, hominis est origo uitiorum: mouentur autem caussis corda hominum, alia sic, alia uerò sic: etiam non diuersis caussis, sæpe diuerso modo, secundum proprias qualitates, quæ ex uoluntatibus ueniunt. Idem in Psal. 79. Omnia, ait, peccata duæ res faciunt in homine, Cupiditas & Timor. Cogitate, discutite, interrogate corda uestra, perscrutamini conscientias, uidete utrum possint esse peccata, nisi aut cupiendo, aut timendo. Proponitur tibi præmium ut pecces, id est, quod te delectet, facis propter quod cupis. Et fortè non ducere donis, terroris minis, facis propter quod times. Corrumperere te uult aliquis ut dicas (uerbi gratia) falsum testimonium. Attendisti tu Deū, & dixisti in animo tuo, Quid prodest homini si totum mundum lucretur, animæ autem suæ detrimentum patiatur? Non adducor præmio ut perdam animā meam pro lucro pecuniæ: conuertit ille se ad incutiendum metum, qui præmio corrumpere non ualuit, incipit minari damnum, expulsionem, cedes, fortassis & mortem. Ibi iam si cupiditas non ualuit, fortè timor ualebit, ut pecces. Idem rursus in libro de Sermonibus Domini in monte, Tria sunt, inquit, quibus impletur peccatum, Suggestio, Delectatio & Consensus. Suggestio, siue per memoriam fit, siue per corporis sensus: cum aliquid uidemus aut audimus, uel olfacimus, uel gustamus, uel tangimus. Quod si frui delectauerit, delectatio illicita refrænanda est: ueluti cum ieiunamus & uisus cibis, palati appetitus assurgit, non fit, nisi delectatione: sed huic tamen non consentimus, & eam dominantis rationis iure cohibemus. Si autem consensus facta fuerit, plenum peccatum erit. Tria hæc similia sunt gestæ rei, quæ in Genesi scribitur: ut quasi à serpente fiat suggestio & quædam suasio: in appetitu autem carnali, tanquam in Eua delectatio, in ratione uerò tanquam in uiro consensus. Quibus peractis tanquam de paradiso, hoc est de beatissima luce iustitiæ, in mortem homo expellitur. Hæc ille de caussa peccati.

Obseruanda uerò in primis in descriptione, peccati Actualis ipsa proprietas, siue differentia, qua hæc actio ab alijs actionibus discernitur, propriissimaq; nota peccati ostenditur. Hæc ergo actio sicut & omnia alia peccata rectà tendit contra legem Dei. Porro lex Dei quæ sit, superioribus concionibus multis est expositum. Certè non est hæc aliud, quàm ipsa Dei uoluntas. Vult autem Deus ut homo suæ id est, diuinæ respondeat imaginī, sanctus sit & innocens, & saluus fiat. Hanc suam uoluntatem expressit Deus, principiò per legem nature, deinde per legem scriptā in tabulas lapideas, postremò per prædicationem Euangelij. Habent illa omnia unum & eundem finem, ut scilicet homo sit sanctus, innocens, & saluus fiat. Quæ

Caussa huius
peccati.

Peccatum cum
lege Dei pugnat.

eunq; uerò cogitationibus, dictis aut factis, contra sanctam illam Dei legem fiunt ab hominibus, peccata sunt actualia. Proinde in iudicandis peccatis hominum, unicè spectanda est lex Dei. Nam quæ cum lege Dei non pugnant, peccata non sunt. Nec potestatem habet homo ullus leges condendi, quarum præuaricatione peccatores cōstituamur. Hæc gloria solius Dei est, ad quem Dauid, Tibi soli peccaui, inquit, & malum contra te feci. Nec nostrum est, nostro decernere iudicio, quæ leuia, quæue grauiā, sint peccata. Quis enim nostrum putaret peccatum esse dicere fratri suo, Fatue? At Dominus in Euangelio peccatum esse pronunciat: qui in eodem Euangelio asserit, nos de uerbo quolibet otioso rationem reddituros in die iudicii. Rectè ergo S. Augustinus libro de Bapt. contra Donatistas 2. capite 6. In æstimandis peccatis, inquit, non afferamus stateras dolosas, ubi appendamus quod uolumus, & quomodo uolumus, pro arbitrio nostro, dicentes, Hoc graue, hoc leue est; sed afferamus stateram diuinam, de scripturis sanctis, tanquam de thesauris Dominicis, & in illa quid sit grauius appendamus, imò non appendamus, sed à Domino appensa recognoscamus.

Genera uel species peccatorū.

Et quamuis hæc sufficere poterant, quippe quæ sic satis exposuerunt naturam peccati actualis, paulò copiosius tamen considerabimus peccatorum species, uel genera atque discrimina. Stoici existimarunt omnia peccata esse paria: quos fortassis Iouinianus (ut hæreticorum patriarchæ dicuntur à Tertulliano esse philosophi) sequutus, idem asseruisse scribitur, id quod extat apud S. Augustinum in catalogo hæreticorum. Scriptura docet Deum esse iustum: unde nos protinus colligimus, ergo peccata non sunt paria. Nam uidemus Deum, qui utiq; iudex est iustus, alia peccata alijs punire grauius. In Euangelio enim dicit Dominus, Væ uobis scribæ & pharisæi hypocritæ, qui comeditis domos uiduarū, dum sub prætextu precibus prolixis precamini, propter hoc plus accipietis damnationis. Et iterū, Tolerabilius erit, ait Dominus, terræ Sodomorū, in die iudicii, quàm ciuitati quæ repulerit prædicationē Euangelij. Similiter Matth. 11. dicit Dominus, Tyro & Sidoni tolerabilius erit in die iudicii, quàm uobis. Idē Dominus Pilato dicit, Qui me tibi tradidit, maius peccatum habet. Item, Seruus qui cognouit uoluntatem Domini sui, & non se parauit, nec fecit secundum uoluntatem eius, plagis uapulabit multis: qui autem non cognouit & fecit digna plagis, uapulabit paucis. Cæterum peccata assurgunt gradibus, & increscunt per circumstantias. Est enim latens adhuc peccatum aliquod, comprehensum in ipsa hominis affectione seu cupiditate. Diximus autem superius affectiones uel cupiditates esse duplices, naturales uidelicet diuinæ legi non repugnantes: quales sunt amare liberos, parentes & uxorem, item cupiditas cibi, potus & quietis: quamuis nec negem, nec nesciam, eas aliquoties contaminari originali labe. Sunt rursus carnales affectiones uel cupiditates in hominibus, quæ cum uoluntate Dei pugnant. Illæ nutriuntur & increscunt uanis cogitationibus & carnalibus delectationibus accumulatis in sinu tuo. Illæ deinde prorumpunt in peccatum oris, deinceps etiam in peccatum operis. Verbi gratia, Concupiscis uxorem alterius, idq; in animi tui penetralibus retines, interim oblectas te cogitationibus uanis, dum uidelicet sub animi tui obtutum reuocas illius formam præstantem, & imaginatione crebra ac uehementi & delectaris & inardescis. Nec his contentus sollicitas præterea adamatæ pudicitiam, scriptis aut dictis: quam & mox opere, si datur, corrumpis: sed & scelus, semel quidem patratum, repetis, & iam quasi pudore & timore posito, frequentas. Vides in hoc exemplo, quomodo unum atq; idem peccatum suis auctibus increscat, & atrociorē subinde pro magnitudine uel enormitate sua poenā deposcat? Certè Dominus in Euangelio

Peccata non esse paria.

Peccata gradibus assurgunt.

gelio secundum Matthæum hæc cōfirmans, Audistis inquit, quod dictum sit an-
 riquis, Non occides, Quisquis autem occiderit obnoxius erit iudicio. At ego dico
 uobis, quòd quisquis irascitur fratri suo, obnoxius erit iudicio. Quisquis uerò di-
 xerit fratri suo Raha, obnoxius erit consilio. Quisquis autem dixerit Fatue, obno-
 xius erit gehennæ incendio. Audis in his domini nostri uerbis primùm discrimi-
 na peccatorum, ueluti iram, significationem item animi irati uel concitati, item
 conuitia, quæ ferè exeunt in uerba. Deinde audis incrementi peccato subinde
 grauiorem atrociorēq; cōstitui pœnam. Proinde non ineptum planè discrimen
 posuerunt in peccato actuali, qui dixerunt aliud quidem peccatum cogitationis,
 aliud oris, aliud uerò operis esse peccatū, quod & ipsum in aliquot secuerunt par-
 tes siue species: ac eas rursus retulerunt ad scelera partim, partim ad delicta. *Scelera ex de-*
 ra sunt haud dubiè quæ destinata mente ac malitia concepta fiunt: cuius quidem *lieta.*
 generis sunt illa in primis, quæ appellantur peccata clamātia, cædes uidelicet, usu *clamentia*
 ra, oppressio pupillorum & uiduarum, sodomia, & merces detenta laboris. De cæ- *peccata.*
 de enim pronunciat uox domini in Genesi, Vox sanguinis fratris tui clamat ad
 me. Exodi uerò 22. dicit dominus, Si afflixeritis uiduas & pupillos, & illi ad me
 clamauerint, ego exaudiam eos & cōficiam uos. Usuram uerbū Dei infectatur di-
 ris conuitijs, & modis omnibus condemnat. Et peccatum Sodomorum ascendit
 in cœlum expetens uindictam. Iacobus quoq; Apostolus, Ecce merces operario-
 rum, inquit, qui messuerunt regiones uestras, quæ fraude non reddita est a uobis,
 clamat, & clamores eorum qui messuerant, in aures domini sabaoth introierunt.
 His alij annumerant septem uitia capitalia, superbiam uel inanem gloriam, iram *Septem capita-*
 inuidiam, accidiam uel tristitiam, auaritiā, gulam, & luxuriā. Imò hæc consti- *lia uitia.*
 tuunt ueluti seminarium & originem omnium malorū siue peccatorum, unde &
 capitalia uocant. Id quod uidere est in sententijs Lombardi. Porro delicta intelli-
 gunt ea quæ committuntur ex infirmitate & incogitantia, cum uidelicet deser-
 tur bonum, ac officium negligitur socordia quadam. Vbi fortè locum habet pec-
 catum ignorantia, peccatum alienum & peccatum inuoluntarium: quāquam &
 ipsa non rarò fiant scelera nephandaq; flagitia.

Ignorantia traditur esse duplex, naturalis ac uera, enascens ex peccato origi- *Peccatum igno-*
 nali: & affectata uel simulata, oriens ex destinata malitia. Naturalis ignorātia, mor- *rantia.*
 bus, delictum atq; peccatum est: quia existit ex origine uenenata & est opus tene-
 brarū: sicuti supra patuit ex testimonio Apostoli Pauli. Certè S. Augustinus libro
 de Libero arbitrio 3. cap. 19. Quod ignorans quisq; non rectè facit, inquit, & quod
 rectè uolens facere non potest, ideo dicuntur peccata, quia de peccato illo liberae
 uoluntatis originem ducunt. Illud enim præcedens meruit illa sequentia. Nam si-
 cut linguam dicimus nō solum membrum, quod mouemus in ore, dum loquimur:
 sed etiam illud quod huius membri motum sequitur, id est, formā tenoremq; uer-
 borum: secundum quem morem dicitur illa lingua Græca, alia Latina: Sic nō so-
 lum peccatum illud dicimus, quod propriè uocatur peccatum (libera enim uolun-
 tate a sciente committitur) sed etiam illud quod de huius supplicio cōsequitur. De
 qua re & superius dictū est. Prætexunt quidem alij ignorātiæ suæ illud ex euange-
 lio domini, Si nō uenissem & locutus fuisset eis, haberent quod prætexerent pec-
 cato suo, siue peccatum nō haberent. Hinc enim colligunt, Ergo quibus nihil an-
 nunciatum est, alieni sunt a culpa omni & crimine. Caterum hoc non dixit do-
 minus. Principiò enim de prætextu illorum, non innocentia loquitur. Nec om-
 nis prætextus iustus est. Dixit sanè, Peccatum non haberent: sed mox subiungit,
 Nunc non habent quod prætexant peccato suo. Deinde non uniuersaliter liberat

ignorantes ab omni peccato, sed à peccato rebellionis duntaxat. Nam & S. Augustinus in Ioannem, Habent excusationem, inquit, nō de omni peccato suo, sed de hoc quod in Christum non crediderunt, quod ad eos non uenit. Omnes enim qui non audierunt nec audiunt, possunt habere hanc excusationem, sed non possunt effugere condemnationem, Qui enim sine lege peccauerunt, sine lege peribunt. Sed & Paulus in 1. ad Timoth. 1. cap. Gratiam habeo, inquit, ei, quia fidelem me iudicauit, ponendo in ministerium, qui prius eram blasphemus & persecutor & uiolentus; sed & misericordiam adeptus sum, quod ignorans fecerim per incredulitatem. En dicit Apostolus misericordiam se consecutum quod per ignorantiam peccarit: interim uerò deriuat hanc ex incredulitate, & scetus ei tribuit planctus turpes. Porro ignorantia falsa & ficta est, quæ à pertinacibus ex malitia fingitur. Veluti si dicas te non intelligere id quod displicet, nec uis intelligere, cum possis. Huiusmodi ignorantia erat in Iudæis hostibus gratiæ Dei. Dicit enim Paulus, Testimonium illis perhibeo quod zelum dei habent, sed nō secundum scientiam. Nam ignorantes Dei iustitiam, & propriam quærentes constituere, iustitiæ Dei nō fuerunt subditi. Nam in Euangelio dixit dominus ad Phariseos, interrogantes num & ipsi sint cæci? Si cæci essetis, non haberetis peccatū: nunc uerò dicitis, uidemus: ideo peccatum uestrum manet.

Peccata aliena.

Peccata aliena non sunt ea quæ nos ipsi designamus, sed quæ alij faciunt, non tamē sine nobis, nimirum probantibus, iuuantibus, suadentibus, iubentibus, conuenientibus, aut occasionem præbentibus, uel non repugnantibus aut contradicentibus cum possemus. Verat Apostolus Paulus Timotheo ne cui citò manū imponat, nec communicet peccatis alienis. Proinde ordinare hominem parum idoneum præficereq; ministerio Ecclesiastico, est peccatū alienum. Tibi enim imputatur meritò quicquid inepti istius hominis, per te ordinati, inscitia, contra Deum & Ecclesiam committitur. Peccatum alienum peccant, qui uiolentiam inferunt, & tormentis uel minis homines adigunt ad abnegationem ueri, uel ad res nephandas perpetrandas. Equidem abnegatio ueritatis, est peccatum alienum ei qui cogit abnegantem abnegare, interim proprium eiusdem hominis peccatum est impietas, tyrannis, ac sacrilegium parricidiumq;.

*Voluntarium
& inuoluntarium.*

Vbi rectè quidem admonemur aliud esse peccatum uoluntarium, aliud uerò inuoluntarium, siue uiolentum. Inuoluntarium esse dicunt, quod fit uel per uim uel per ignorantiam. Ergo quod neq; ui fit, neq; ignoranter, uoluntariū esse concludunt. Violenti autem rursus species duas ponunt, Vnum quidem absolutum, alterum conditionale. Violentum absolutum fieri putant, quando in nobis nō est utrum agamus uel non agamus, sed extrinsecus prouenit, nihil, inquam, cōferente illo cui fit uis. Vt si uentus nos aliquo deferat, aut si ministri regij manus tuas, te reluctante & reclamante, adhibeant thurificationi idololatricæ. Quo casu liberant ab omni culpa, pœna, laude, & uituperatione coactum. Secundam uiolenti speciem arbitrantur mixtam habere causam. Verum ne nimis diu his inhæreamus, Nos simpliciter dicimus, Inuoluntarium aut uiolentum uel habet eius consensum qui cogitur, uel non habet. Si accedat consensus, uerbi gratia, in abnegatione ueritatis euangelicæ hætenus confessæ, aut in alijs nephandis facinoribus perpetrandis, culpa non uacat coactus. Neque enim hic errore mortis aut metu tormentorum excusatur. Elige mortem magis, quàm abnegare ueritatem, aut patrare res nephandas, aut patiens uim, consentire in rem sceleratam ac turpem. Si mori elegeris potius quàm facere res turpes, non coget te inuoluntarium tyrannus. Occidere quidem potest, inuoluntarium ad res impias patrandas cogere nō potest.

*Vide Augustinum de Menda-
cio ad Consen-
tium cap. 9. &
30. & 6.*

potest. Moriendo enim confiteris ueritatem, moriendo declaras te facere nolle quod à uiuente postulant. Ita uerò illi te nec uincunt, nec cogunt: sed uincuntur ipsi potius & coguntur uidere & experiri quod doleat. Annitebatur Antiochus Epiphanes prohibiti cibi usu polluere sancta Machabæorum corpora. Hi uerò mori magis quàm in prophanatione uiuere eligentes, moriendo uicerunt tyrannum, nec cogi potuerunt. Et re uera apud omnes probata religionis uiros receptum & comprobatum est, mortem & extrema omnia subeunda priusquam quicquam eorum quæ religioni aduersa & natura foeda sunt facere. Porro si non accedat consensus, sed pio homini mera irrefragabilisq; infertur uis (discernimus hic inter eum qui coactus malum facit, & qui patitur) non commaculat ea uis animum sanctum & incorruptum. Veluti si manibus & pedibus uinctis, pius aliquis deportetur in templum prophanum, ubi cogatur interesse sacris prophætiis: aut si uirgo sancta aut matrona honesta in bello irruptioneq; barbarica corumpatur, nec interim in scelus consentiat, nec pie mori potius concedatur, incorrupta certè manet coram Dei iudicio. Nō enim temere dixit beatus Augustinus, Non iniuste aliquid pati, sed iniuste aliquid facere, peccatum est, libro de Libero arbitrio 3. cap. 16. Idem de Mendacio ad Consentium cap. 7. Quod uiolenter, inquit, non præcedente libidine patitur corpus, uexatio potius, quàm corruptio nominanda est. Aut si omnis uexatio corruptio est, non omnis corruptio turpis est, sed quam libido procurauit, aut cui libido consenserit. Idem rursus de Ciuit. Dei lib. 1. cap. 18. Proposito animi permanente, inquit, per quod etiam corpus sanctificari meruit, nec ipsi corpori aufert sanctitatem uiolentia libidinis alienæ, quam seruat perseuerantia continentiae suæ. Plura huius generis eo loci disputat, item in cap. 16. 19. & 28. & c. Sic clementius quidem iudicandum est de nece inuoluntaria furiosorū semetipsos iugulantium. Alioquin in sanctis & canonicis libris nusquam nobis diuinitus præceptum permissumue reperiri potest, ut uel ipsius adipiscendæ immortalitatis, uel ullius carendi cauendiq; mali causa, nobismetipsis necem inferamus. Nam & prohibitos nos esse intelligendum est, cum lex dicit, Non occides: præsertim cum non addatur, proximum tuum: sicut in lege qua prohibetur falsum testimonium. Idcirco damnabilis est modis omnibus Senecæ doctrina, suadentis calamitate oppressis, sibiipsis, quò finiatur malum, inferre manum. Et Augustinus disputans contra eos qui necem sibi inferunt, ne alienæ subiiciantur libidini & peccent, Si detestabile, inquit, facinus & damnabile scelus est, etiam seipsum hominem occidere, sicut ueritas manifestè proclamat: quis ita desipiat, ut dicat, iam nunc peccemus, ne fortè postea peccemus: iam nunc perpetremus homicidium, ne forte postea incidamus in adulterium? Nōne si tantum dominatur iniquitas, ut non innocentia, sed potius peccata eligantur, satius est incertum de futuro adulterium, quàm certum de præsentis homicidium? Nōne satius est flagitium committere (quando calamitosa tempora id ferunt) quod pœnitendo sanetur, quàm tale facinus ubi locus salubris pœnitentiæ non relinquitur? Hoc dixi propter eos uel eas, quæ non alieni, sed proprii peccati deuitandi causa, ne sub alterius libidine etiam excitatæ suæ fortè consentiant, uim sibi qua moriantur inferendam putant. Cæterum absit à mente Christiana, quæ Deo suo fidit, in eoq; spe posita, eius adiutorio nititur: absit, inquam, ut mens talis quibuslibet carnis uoluptatibus ad consensum turpitudinis cedat. Quòd si illa concupiscentialis inobedientia, quæ adhuc in membris moribundis habitat, præter nostræ uoluntatis legem, quasi lege sua mouetur, quanto magis absq; culpa est in corpore non consentientis, si absq; culpa est in corpore dormientis? Hæc ille. Sed redimus,

*Nemo sibi ipsi
manum inferat
ut peccatu des
uitet.*

Peccata occultae et manifesta.

Rursus diuidunt peccata actualia in occulta siue priuata, & in manifesta siue publica. Illa quidem non sunt quæ latent homines, soli Deo cognita, qualis est hypocrisis & deprauatio humani ingenij, sed quæ testibus quidem minimè carent, nondum tamen innotuerunt omnibus quasi publicata. Hæc enim designantur cum notitia & offensione totius Ecclesiæ. Et hæc quidem sunt grauiora, illa autem leuiora, quod uidelicet attinet homines & multorum offensionem. De his Apostolus 1. Timoth. 5.

Peccatum Mortale et Veniale.

Porro maximè uulgaris & idonea actualis peccati distinctio, quæ ferè omnes alias species seu partes comprehendit, illa est, quòd aliud quidem Mortale, aliud autem Veniale peccatum dicitur. Mortale putant omne esse peccatum, quod ab infideli designatur homine: Veniale uerò omne quod fiat à fidei. Ego simpliciter & secundum scripturas arbitror omnia hominum peccata esse mortalia. Nam fiunt contra legem seu uoluntatem Dei. At peccatis ipsa debetur mors. Propheta enim clamat, Anima quæ peccauerit, ipsa morietur. Et Apostolus dixit, Stipendium peccati mors. Certè à morte, hæc mortalia esse dicuntur. Huc iam pertinent hæc apostolica testimonia, Hoc scitis quòd omnis scortator, aut immundus, aut auarus, qui est idololatra, non habet hæreditatem in regno Christi & Dei. Eadem sententia edita ad Ephesios 5. repetitur ad Galatas 5. & 1. Corinth. 5. & 6. capite. Caterum quæ sua natura sunt mortalia, per gratiam Dei in fide Iesu Christi fiunt uenialia: quia ueniam à misericorde Deo consequuntur. Ideoq; Apostolus ad Romanos 6. non dixit, Ne sit igitur peccatum in mortali corpore uestro: sed, Ne regnet peccatum in mortali corpore uestro, ut obediat ei per cupiditates eius. Et iterum, Nulla est igitur condemnatio his, qui insiti sunt Christo Iesu, qui non iuxta carnem uersantur, sed iuxta spiritum. Item, Fratres debitores sumus, non carni, ut secundum carnem uiuamus. Nam si secundum carnem uiueritis, moriemini: Quòd si spiritu facta corporis mortificetis, uiuetis. Proinde semper est in corpore nostro peccatum, quoad uiuerimus: uerum ex gratia non imputatur ad mortem, & ij quibus non imputatur, conantur modis omnibus secundum spiritum non secundum carnem ambulare: interim labuntur & impingunt frequentissimè, qui tamen lapsus & offensiones unà cum morbo illo fontico uenialia iam peccata reputantur, uenia utiq; digna, non in æternum punièda.

Peccatum à baptismo remanens in paruulis, an sit peccatum.

Porro ad peccatum mortale refertur in primis peccatum in spiritum sanctum: quod quidam non sine causa arbitrantur propriissimè appellari peccatum mortale. De quo dicemus, si prius ad quæstiones nonnullas huic causæ adnexas responderimus breuissimè. Principiò quæritur hic, An peccatum uel morbus post baptismum remanens in infantibus, reuera sit peccatum? Constat autem concupiscentiam remanere in baptisatis, & concupiscentiam esse peccatum: ideo in baptisatis remanere peccatum. Quod tamè per gratiam Dei in merito Iesu Christi, non imputatur. Sic dissecuit hunc nodum & beatus Augustinus libro de Peccatorum meritis & remissione 1. cap. 39. dicens, In paruulis certè gratia Dei per baptismum eius, qui uenit in similitudine carnis peccati, id agitur, ut euacuetur caro peccati. Euacuatur autem, non ut in ipsa uiuente carne concupiscentia conspersa & innata repente absumatur, & non sit, sed ne obsit mortuo, quæ inerat nato. Nam nec grandibus hoc præstatur in baptismo, ut lex peccati quæ inest in membris, repugnans legi mentis, penitus extinguatur & non sit, sed ut quicquid mali ab homine factum, dictum, cogitatum est, cum eidem concupiscentiæ subiecta mente seruiret, totum aboleatur, ac uelut factum non fuerit habeatur. Hæc ille.

An opera Gentium uirtuosa, sint peccata.

Deinde interrogatur, An opera quæ faciunt Gentiles, ac speciem habent probitatis

bitatis uel uirtutis, peccata sint an bona opera? Certū est deum & inter Gentes habuisse suos electos. Si qui tales fuerunt, non caruerunt spiritu sancto & fide. Idcirco opera ipsorum, facta ex fide, bona fuerunt, non peccata. Nam in Actis commemoratur, orationes & Eleemosynas Cornelij Centurionis ascendisse in memoriam coram Deo. Dicitur autē idem ille Cornelius uir religiosus & timens Dei, ergo & fidelis: cuius quidem fides postea ad plenum absoluitur, & cui donum spiritus uerius confertur.

Porro praeclara facta ethnicorum non sunt interim aspernanda & uituperanda. Etenim ut non prorsus sine deo facta fuerunt, ita plurimum contulerunt ad seruandam & reparandam tranquillitatem regnorum uel reipublicae. Idcirco excellentes aliquot uiros ac respublicas locupletauit iustus dominus praemijs temporalibus. Graecis enim & multis principibus Romanis contulit opes, uictorias, & gloriam maximam. Et certē fuit apud multos in magno pretio ciuilis iustitia, & publica tranquillitas. Alij ingentia acceperunt praemia, quod iudicia domini constanter & strenue exequerentur contra nebulones & hostes Dei. Nec dubium est dominum maximas uires concessisse Romano imperio sub Oct. Augusto & alijs principibus, ut per eorum potentiam frangeret inuictam Iudaicae gentis malitiam, uindicaretque per Romanos filij sui & omnium sanctorum prophetarum & Apostolorum sanguinē, à furiosis & blasphemis illis belluis effusum. Certē post subuersas Hierosolymas inclinare incipiebat Romanum imperium. Sed redimus.

Postremo quæri solet, An opera sanctorum uel fidelium bona, sint peccata? *An opera sanctorum bona, sine peccata?* Certē si deprauationem & infirmitatem nostram spectes, omnia opera nostra peccata sunt, quia à nobis fiunt qui labe non caremus, ideoque nec ipsa opera quae à nobis fiunt tam sunt perfecta quam esse in conspectu Dei oportuerat alioqui. Eadem tamen propter fidem in nobis, & quia sumus recepti in gratiam Dei, ideoque à nobis fiunt qui iam sumus filij Dei, bona sunt. Huc enim pertinet illud Apostoli, Idem ego mente quidem serui legi Dei, carne uero legi peccati. En unus & idem Apostolus, duplex retinet etiam renatus ingenium, ut operans ipsum eius opus secundum respectus diuersos, & peccatum sit & opus bonum. Quatenus enim mente legi Dei seruit, eatenus bonum opus facit: quatenus uero idem ille legi carnis seruit, eatenus opus eius labe non caret. Nam idem & superius in eodem loco ad Romanos septimo capite dixit, Volenti mihi facere bonum, reperio quod mihi malum *παράκειται*, id est insideat, uel adiaceat, aut inhæreat ac insitum sit: quod malum haud dubie exerens se semper in omnibus cogitationibus, dictis & factis, efficit, ne opus quod fit à nobis renatis, tam sit purum, quam diuina exigit iustitia: gratia ergo & misericordia Dei pro puro reputatur. Huc facit iam illa quoque ex sacrosancto euangelio Ioannis sententia domini, qui dixit, Qui lotus est, non opus habet, nisi ut pedes lauet, sed est mundus totus. Si enim totus mundus est, quid opus mundo lauare pedes? Si uero lauandi sunt pedes, quomodo totus mundus est? Hæc tamen inter se non pugnant, sicuti ne illa quidem, cum dicimus opera fidelium bona, esse peccata. Nam iuxta gratiae & misericordiae diuinæ ubertatem & reputationem toti sumus mundi, purgati ab omnibus peccatis ne illa nos condemnent: Quia tamen in nobis semper inhæret lex illa peccati, exerens sese in membris nostris quoad uixerimus, pedes certē, id est, affectio illa praua & cupiditates noxiae, & oppugnandae & opprimendae sunt: agnoscendum denique, nos ex nobis ipsis, ipsa quoque opera nostra, nunquam carere imperfectione: ergo semper & omnia nostra indigere Dei

gratia. His ad hunc modum explicatis, descendimus nunc ad explicandum peccatum in spiritum sanctum.

*De peccato in
spiritum san-
ctum.*

Peccatum in spiritum sanctum, est blasphemia perpetua reuelata & agnitæ ueritatis, nempe cum contra conscientiam nostram, perfidè deficientes à ueritate agnita, ipsi indefinenter & cōtradīcimus & maledīcimus. Nam blasphemia est maledictum uel conuītium, quo proscīdimus aliquem, execranda & detestanda in ipsum cōiicientes, unde existimatio eius uel læditur, uel proteritur. Blasphemamus ergo magistratum, parentes & uiros bonos, quando illis non tantum nō paremus debitumue honorem deferimus, sed insuper conuītīs proscīdimus, nuncupantes illos tyrannos, sanguinarios, sceleratos atq; execrandos: in primis uerò blasphemamus Deum, cum eius gloriæ detrahimus, gratiæ contradīcimus, & ueritatem eius nobis reuelatam, operaq; eius luculentissima, destinata malitia, criminantes pertinaciter uituperamus.

*Quid propriè
sit blasphemia.*

Non omne quidem peccatum blasphemia est, omnis autem blasphemia peccatum est. Quia enim hæc tendit contra Deum & uoluntatem eius, peccatum est: sed interim hoc proprium & singulare habet, quòd præterea Deum uituperat & conuītia iacit in opera domini. Multi peccant in doctrinam ueritatis, eò quòd ueritatem negligentes non recipiunt, aut receptam nec colunt, nec ornant: uerum hi etsi peccatores sint, nondum tamen blasphemī dīci merentur: quòd si præterea insectentur uituperiīs & conuītīs doctrinam, quam negligunt, appellantes hanc hæreticam, schismaticam, seditiosam, & dæmoniacam, iam etiā blasphemī iure cognominantur. Vnde proprium peccati in spiritum sanctū est, non tantum apostatare à uero, sed & contra conscientiam cōtradīcere uero, ipsumq; Dei opus, ipsam reuelationem Dei illustrissimam, cōuītīs incessanter adobruere. Conscientia enim euidentia reuelationis aut operis spiritus sancti conuicta, suggerit non tantum à conuītīs esse temperandum, sed aliud interim agendum, cedendū inquam ueritati, & Deo concedendam gloriam: iam uerò hanc inspirationē excludere, eijcere, & obruere contumaci perfidia aut apostasia impiaq; contradīctione & perpetua uituperatione, hoc inquam est peccare in spiritum sanctum. Id quòd originem quidem trahit ex originali peccato, fouetur autem & prouehitur suggestionibus satanicis & peruersis nostris affectionibus, indignatione item, inuidia, spe aut metu, imò destinata pertinaciq; malitia, contumacia, rebellioneq;.

*Origo huius
peccati.*

Verum exigit iam ipsa res ut audiamus quid dominus noster in euangelio de hoc peccato pronunciarit. Apud Matth. in 12. cap. dicit dominus, Omne peccatū & conuītium uel blasphemia remittetur hominibus: at blasphemia uel conuītium in spiritum non remittetur hominibus. Et quicumq; dixerit uerbum aduersus filium hominis, remittetur illi: qui autem dixerit aduersus spiritum sanctum, non remittetur ei, neq; in præsentī seculo, neq; in futuro. Apud Marcum in 3. cap. illa seruatoris sententia, his uerbis reddita legitur, Amen dico uobis, Omnia remittentur filiis hominum peccata atq; blasphemiae uel conuītia, quibuscunq; conuītiati fuerint. At qui blasphemiam uel conuītium dixerit in spiritum sanctum, non habet remissionem in æternum, sed obnoxius est æterno iudicio. Apud Lucā in 12. cap. eadem ferè uerba ita ponuntur, Quisquis loquitur dictum in filium hominis, remittetur illi: ei uerò qui in spiritum sanctum blasphemiam dixerit, non remittetur. Habemus in his domini uerbis blasphemiam in filium hominis, habemus item blasphemiam in spiritum sanctum: hæc dicitur esse irremissibilis, illa omnino remissibilis. Blasphemiam in filium hominis committitur ab ignorantibus necdum illuminatis, tenditq; in ipsum Christum, quem blasphemans arbitratur esse seductorem:

*Blasphemiam in
filium hominis.*

rem:

rem: quoniam non nouit eum. Huiusmodi blasphemus fuisse ipsum Paulum, ante conuersionem, & bonam Iudæorum partem, testatur manifestè uerbum Domini. Dominus enim à cruce orans clamauit, Pater ignosce illis: quia nesciunt quid agant. Et Apostolus Paulus, Si Dominum gloriæ, ait, cognouissent, non crucifixissent. Vnde & beatus Petrus in Actis loquens Iudæis, ait, Scio quod per ignorantiam fecistis: pœniteat uos igitur, & conuertimini, ut deleantur peccata uestra. Act. 3. At blasphemia in spiritum sanctum, dicitur criminatio perdurans, quæ fit contra ipsum spiritum Dei sanctum, id est, contra ipsius inspirationem aut illuminationem aut opera. Nam cum hic tam euidenter operatur in animis hominum, ut nec tergiuersari nec ignorantiam obtendere possint, interim uerò hi reuelationem aut operationem illam spiritus, quam agnouerunt optimam esse saluberrimamq; nedum uerissimam, contra conscientiam propriam oppugnant, irrident, aspernantur & perpetuò criminantur, certè ipsum spiritum Dei sanctum blasphemant. Verbi gratia, Pharisei apertissimis rationibus miraculisq; irrefragabilibus conuicti in suis ipsorum animis, non poterant negare doctrinam & opera Domini Iesu diuina esse: at nihilominus, & nequicquam reclamante ipsorum conscientia, urgente uerò inuidia rebellioneq; pertinaci ac perfida defectione conuitiabantur, Christum omnia agere præsidio & instinctu diaboli. Phariseis nihilò meliores sunt, qui cum hodie intellexerunt Euangelica doctrina in Christo certissimam salutem ipsissimamq; ueritatem quam simplicissimè purissimèq; proponi, hac tamen deserta, contradictoriam approbant doctrinam, & orthodoxam illam indubitatamq; contra animi sui sententiam damnant insectanturq;, imò & exhibant constanter pro hæretica. Hoc peccatum sicut est longè fœdissimum, ita nulla dignum uenia & irremissibile. Nam Dominus in Euangelio disertè dixit, Non remittetur ei neque in præsentī seculo neque in futuro. Quod apud S. Marcum in hæc uerba proferatur, Non habet remissionem in æternum, sed obnoxius est æterno iudicio. Causa in promptu est, Sine fide enim impossibile est placere Deo. Sine fide non conceditur peccatorum remissio. Sine fide non patet ingressus in regnum Dei. At peccatum in spiritum sanctum, est apostasia & rebellio perstans contra fidem ueram, quam illuminatione spiritus sanctus infundit in corda nostra. Cæterum hanc illuminationem isti auersi indefinenter appellant tenebras, seductionemq; esse criminantur aut blasphemant. Proinde nunquam ipsis remittitur peccatum. Nam gratiam Dei calcant, & uiam qua peruenitur ad gratiam contemnunt ostentuiq; habent. Ergo S. Paulus ad Hebræos cap. 10. Voluntariè, inquit, peccantibus nobis, post acceptam ueritatis notitiam, non amplius relinquitur pro peccatis hostia: sed terribilis expectatio iudicii, & zelus ignis, qui deuorabit aduersarios. Quid oro est uoluntariè peccare? Non utique per infirmitatem peccare, aut peccatum sæpius repetere, sed per pertinacissimum contemptum peccare: quod faciunt qui scientes & uolentes abijciunt & conculcant gratiam Dei, neque irridere cessant crucem & mortem Christi, quasi stultam & non efficacem satis ad expiationem omnium peccatorum nostrorum. His enim nulla alia parata est expiatoria hostia. Et tales uocat aduersarios, id est, hostes & contemptores Dei. Idcirco idem Apostolus in sexto capite scriptum reliquit, Impossibile est eos qui semel fuerunt illuminati, gustaueruntque donum cœlestē, & participes facti fuerunt spiritus sancti, ac gustauerunt bonum Dei uerbum, uirtutesq; futuri seculi, & prolapsi sunt, iterum renouari ad pœnitentiam rursus crucifigentes sibi ipsos filium Dei, & ostentui habentes. Non loquitur de lapsu fidelium quolibet: sed de pertinaci Apostasia. Lapsus enim Petrus restituitur per pœnitentiam: nec solus. Nam repa-

*Blasphemia in
spiritu sanctum*

*Non remittitur
peccatum in spi-
ritum sanctum.*

rantur per pœnitentiam quotidie omnes peccatores. Iudas autem non reparatur, quia fuit pertinax apostata: non renouantur per pœnitentiam irrisores & blasphemii, quia præfractè agunt contra agnitam ueritatem, uiamq̃ qua sola ad uitam deduci possent blasphemare non desinunt. Nihil ergo faciunt illi loci Pauli pro No- uatianis, sed explicant nobis naturam & uenenatas uires peccati in spiritum sanctum. De eodem differens beatus Ioannes Apostolus & Euangelista in Canonica sua, dicit, Si quis uiderit fratrem suum peccare peccatum non ad mortem, petet & dabit ei uitam, peccantibus non ad mortem. Est peccatum ad mortem, non pro illo dico ut roges. Omnis iniquitas peccatum est. Et est peccatum non ad mortem. Scimus quòd omnis qui natus est ex Deo, non peccat, sed qui genitus est ex Deo seruat seipsum, & malus ille non tangit eum. Recenset beatus Ioannes duo genera peccatorum. Alterum quidem ad mortem uel mortale irremissibile, pro quo non orandum sit, id est, quod ueniam non consequatur. Ea est contumelia spiritui sancto illata, apostasia perfida & indefinens irrisio criminatioq̃ Euangelij. Nam & in Euangelio secundum Ioannem legimus, Amen amen dico uobis, si quis sermonem meum seruauerit, mortem non uidebit in æternum. Et iterum, Si non credideritis quòd ego sum, moriemini in peccatis uestris. Et reuera iniquitas est, apostasia, scelus meditatum ac perpetuum. Nam quid est iniquius quàm cognite ueritati indefinenter reluctari mediumq̃ ostendere digitum? Alterum est peccatum ueniale, non ad mortem. Quod quidem quale sit exponit Ioannes cum subiungit, dicens, Scimus quòd omnis qui natus est Deo, non peccat. Verùm id non absolute intelligendum. Non peccat ad mortem. Alioqui enim & sancti peccatores sunt, sicut claret ex 1. cap. huius Epistolæ. Præterea sequitur in Ioanne protinus, quod præcedentia clarius exponat. Qui genitus est Deo, seruat seipsum: nimirum persistat in agnita ueritate, caueteq̃ ne malus ille ipsum tangat, id est, irretiat, contra Deum excitet & in rebellionem retineat. Hæc de peccato in spiritum sanctum hætenus dixi, quod appellauit S. Augustinus alicubi finalem impœnitentiam, quæ sanè consequitur ex apostasia criminationeq̃ & contemptu spiritus sancti, uel uerbi ueritatis reuelati per spiritum sanctum.

De pœna peccatorum certa & iusta.

Et quanquam in tractatione peccati originalis & peccati in spiritum sanctum attigerim effectus peccati, postremò tamen hoc loco breuibus indicabo nonnulla de pœna peccatorum certa & iusta. Nam in finitione peccati dixi, hoc conciliare nobis iram Dei, mortem & supplicia uaria. De quibus modò est dicendi locus. Deum punire peccata, imò peccatores propter peccata, tam est clarum ex scripturis diuinis, quàm quod clarissimum. Nam Deum irasci & offendi peccatis grauissimè, multæ in scripturis declarant sententiæ. Clamat Dauid, Dominus probat iustum: impium autem & uiolentum odit anima eius. Pluet super impios laqueos, ignem & sulphur, uentum tempestuosum, ardentem: hæc fors calicis eorum. Quoniam iustus Dominus iustitias diligit, rectum uultu suo intuetur. Ita etiam Paulus, Reuelatur, inquit, ira Dei de cœlo aduersus omnem impietatem & iniustitiam hominum, qui ueritatem in iniustitia detinent. Quid quod peccata mortalium nō potuerunt expiari, nisi per mortem filij Dei? Vbi sanè præstantia pretij redemptionis luculentissimè demonstrat peccati grauitatem atq̃ sceditatem. Cui & illud accedit, quòd bonus ille Dominus amator hominum, non tot pœnis calamitatibusq̃ adoperuisset genus humanum, nisi horribile in oculis Domini esset peccatum. Quis enim paucis & in transcurso omnes peccatorum pœnas enumerando explicet? Alienatur à nobis Dominus propter peccata. At absente à terris sole, quantæ obsecro sunt caligines & tenebræ? Deo alienato à nobis, quanti in animis hominum

Pœna peccatorum.

minum horrores? Hic ergo locum habet tyrannis fatanica, tormenta conscientiarum mille, mors animæ, terrores, desperationes, & infandi dolores, innumeræ denique calamitates corporis, & facultatum nostrarum, quas multis commemorat Moses seruus Dei, Leuit. 26. & Deutero. 28. cap. Iam cum nouis sceleribus in diem noua infligantur supplicia, quis oro poenarum finis, aut quis genera omnia commemoret?

Dubium uerò non est, quin iuste puniat Dominus peccatores. Est enim iustus iudex. Et quia de iustitia & omnipotentia sapientiæ Dei addubitare prorsus de-
mentis est, consequens est omnes homines religiosos pro certo, imò compertissi-
mo habere, Dei poenas hominibus illatas, iustissimo iudicio esse illatas. Qualis ue-
rò & quanta poena cuique præuaricationi aut culpæ debeatur, diuini iudicij est,
non humani. Vnde & Augustinus Tractatu in Ioan. 89. dixit, Tanta est Suppli-
ciorum, quanta peccatorum diuersitas, quæ quomodo se habeat, altius indicat di-
uina sapientia, quam scrutetur & effari possit coniectura humana. Certè qui in le-
ge sua hominibus data præcepit, Pro mensura peccati, erit & plagarum modus,
cùm sit æquissimus, modum ipse minimè excedit. Abraham in celebri illo collo-
quio cum Deo, quod describitur Genes. 18. cap. inter alia, Nunquid perdes ius-
tum cum impio? ait, Absit à te, ut rem istam facias, & occidas iustum cum impio,
fiatq; iustus sicut impius. Non est hoc tuum, qui iudicas omnem terram: nequa-
quam facies iudicium hoc. Huc pertinet & insignis demonstratio qua utitur Do-
minus erga Ionam prophetam irascentem Domino propter eius iudicia: ostendit
enim se iuste rationem habere infantium, adde & iumentorum. Notus est locus Io-
næ capite 4. Teneamus ergo firmiter, nulli creaturæ Dei ullam unquam, poena à
Domino inflicta, iniuriam fieri. Proinde cadunt hinc disputationes & quæstiones,
quare infantes maximis nonnunquam tormentis afficiat Dominus? aut cur tem-
porarijs delictis æterna rependat supplicia? Iustus est enim Dominus in omnibus
ujs suis, & sanctus in omnibus operibus suis. Id quod Dauid uerissimè testatus
est quia alibi quoque clamat, Iustus es Domine, & rectum est iudicium tuum. Bea-
tus qui hinc non impingit, nec Domino obmurmurat.

Quòd si aliquando diutius differat iudicium atque poenam, non putabimus
Deum esse iniustum qui parcat sceleratis, suos interim amicos & eorum uicia in-
fectetur acrius. Reuocemus potius ob oculos parabolam Euangelicam Diuitis e-
pulonis & pauperis Lazari. Hic enim cùm esset amicus Dei, nihilominus fame in-
terit. Ille licet esset hostis Dei, in delicijs & uoluptatibus uersatur, neq; quicquam
sentit mali. Verùm audi quale post hanc uitam illorum iudicium sit, Dicit Abra-
ham ad diuitem, Fili recordare, quòd receperis bona tua in uita tua; & Lazarus si-
militer mala: nunc autem hic solatio fruitur, tu uerò cruciaris. Proinde si quando
in hac uita affliguntur pii, abundè rependitur eis in futura uita: si uerò parcitur hic
impijs, grauius puniuntur in uenturo seculo. Deus enim iustus est, ergo cuiq; re-
pendit pro suo merito. Ideò si posthac uideris feliciter uiuere sceleratos, noli exi-
stimare Deum esse iniustū, noli putare Deum esse ficulneum, noli dicere Deū dor-
mire & illos non uidere. Certissima est enim uox illa prophetæ ab Apostolo Petro
etiam usurpata, Oculi Domini super iustos, & aures eius ad deprecationem illo-
rum, rursus, Oculi Domini super eos, qui faciunt mala. Comuniendus est animus
exemplis iudiciorum Dei iustis, & scriptura sancta collectis. Cogitemus diluui-
o u-
niuersali deletum esse mundum, cuius poenitentiam diu nequicquam expectarat
Dominus. Cogitemus cœlitus demisso igne urbes arsisse Sodomam, Gomorram,
ac socias. Cogitemus Ægyptum uarijs primū plagis percussam, deinde Ægy-

*Iuste punit do-
minus.*

*Certò punit
dominus.*

*Exempla Dei
iuste punientis.*

*Longanimitas
Dei.*

ptios in mari rubro esse submersos. Cogitemus quæ euenerint sancto & iusto Dei iudicio Amorrhæis & Chananæis, Amalechitis & ipsis Israelitis sub iudiciis primùm, deinde sub regibus. Impleta est tandē illorum mensura. Sed & hi nunquā impunē contempserūt Deum & uerbum eius. Nunquam peccarunt impunē diu. Innumera alia iusti iudicij Dei exēpla suppeditat nobis historia Pauli Orosij, imò uniuersalis totius mundi historia. Cogitemus præterea Deum non ideo approbare peccata, quòd tardius punit, sed longanimum pro immensa sua bonitate expectare peccatorum pœnitentiam siue conuersionem. Nam in Euāgelio ficum sterilem non iubet excindere Dominus, quòd ex ipsa fructum aliquem in annum futurum expectaret. Paulus Apostolus, An diuitias, inquit, bonitatis illius ac tolerantiae lenitatisq; contemnīs, ignorans quòd bonitas Dei ad pœnitentiam te inuitat. Sed iuxta duritiam tuam & cor pœnitere nescium colligis tibi ipsi iram in die iræ, quo patefiet iustum iudicium Dei: qui redditurus est unicuiq; iuxta facta sua: his quidem qui perseverantes in benefaciendo gloriam & honorem & immortalitatem quærunt, uitam æternam: his uerò qui sunt contentiosi, & qui ueritati quidem non obtemperant, sed obtemperant iniustitiæ, uentura est indignatio, & ira, afflictio & anxietas, aduersus omnem animam hominis perpetrantis malum. Hæc inquam teneamus firmiter, in his acquiescamus, ut cunq; diu felices sint impij, & non puniantur. Nouit sanctus, iustus, sapiens, & opt. max. Deus quid agat, quomodo agat, quare, & quando quælibet agat. Ipsi gloria in secula seculorum. Amen.

*Quare punian-
tur peccata tē-
poralibus pœ-
nis, quæ tamen
remissa sunt
per gratiā dei.*

Huc pertinet quòd bonus Dominus bonos affligit, non tantum peccatores uel sceleratos. De quare dixi copiosius huius Decadis Sermone 3. Venit autem hic in quæstionem, Cur Deus peccata quæ remisit hominibus, uarijs persequatur pœnis. Adamo enim remisit peccatum suum: sed eidem & mortem imponit & innumeras huius uitæ ærumnas. Dauidi dictum legitur à Nathan, Dominus transtulit peccatum tuum: sed idem propheta mox subiungit, Gladius non recedet ē domo tua, &c. Respondemus autem simpliciter pœnas ante peccatorum remissionem illatas supplicia esse, sed post remissionem peccatorum certamina siue exercitationes, quibus fideles non satisfaciunt pro peccatis, ex gratia pridem in morte filij Dei remissis, sed humiliantur & retinentur in officio, obijciunturq; occasio maioris gloriæ. Vbi non pigebit recitare C. V. S. Augustini iudicium, libro de Peccatorum meritis & remissione 2. cap. 33. & 34. dicentis, Res quarum reatum, ne post hanc uitam obfint, Deus soluit, & tamen eas ad certamen fidei sinit manere, ut per illas erudiantur & exerceantur, proficientes in agone iustitiæ. Et mox, Ante remissionē illa supplicia sunt peccatorū: post remissionem autem certamina exercitationesq; iustorū. Et iterum post aliquot uerba, Caro, inquit, quæ primò facta est, non erat caro peccati, in qua noluit homo inter delicias paradisi seruare iustitiam. Vnde statuit Deus, ut post eius peccatum propagata caro peccati ad recipiendam iustitiam laboribus & molestijs niteretur. Propter hoc etiam de paradiso eiectus Adam, contra Eden habitauit, id est, contra sedem deliciarum, ut significaret quòd in laboribus, qui sunt delictijs contrarij, erudienda esset caro peccati, quæ in delictijs obedientiam non seruauit antequam esset caro peccati. Sicuti ergo illi primi homines postea iustè uiuendo, unde meritò creduntur per Domini sanguinem ab extremo supplicio liberati, non tamen in illa uita meruerunt ad paradysum reuocari: sic & peccati caro etiamsi remissis peccatis homo in ea iustè uixerit, non contuò meretur eam mortem non perpeti, quam traxit de propagine peccati. Tale aliquid nobis insinuaturn est de patriarcha Dauid in lib. Regnorum, ad quem propheta cū missus esset, eiq; propter peccatum quod commiserat euentura mala ex iracun-

iracundia Dei comminaretur, confessione peccati ueniam meruit, respondente propheta, quod illud ei flagitium facinusque remissum sit; & tamen consequuta sunt quæ Deus fuerat comminatus, ut sic humiliaretur à filio. Quare & hic non dicitur, Si Deus propter peccatum illud fuerat comminatus, cur dimisso peccato, quod erat minatus, impleuit; nisi quia rectissime (si sic dictum fuerit) respondebitur remissionem illam peccati factam, ne homo à percipienda uita impediretur æterna; subsequutum uerò illius comminationis effectum, ut pietas hominis in illa humilitate exerceretur atque probaretur. Sic & mortem corporis propter peccatum Deus homini inflixit, & post peccatorum remissionem propter exercendam iustitiam non ademit. Hæc ille.

Iam quod attinet pœnas impiorum, si quas eis iustissimus Deus in hoc seculo infligit, sciamus illas esse argumentum iusti iudicii Dei, qui in hoc seculo punire incipit, & in alio æternum punire pergit. Pereunt quidem culpa propria impij. Deus enim hic affligere incipit, ut castigati sapere incipiant ac conuertantur: uerum non conuertuntur ad se percutientem; sed indurantur magis, obmurmurantque Dei iudicij, conuertentes id sibi ad interitum, quod institutum fuerat ad salutem. Nam ut diligentibus Deum omnia cooperantur in bonum, ita odientibus Deum omnia operantur ad perniciem. Hæc uerò patent adhuc latius, sed quoniam nos huius generis non pauca protulimus Sermone 3. Decadis huius tertiæ, quod reliquum est ex eo peti posse confido, & idcirco ad ipsum remitto. Et tantum usque huc de Peccato.

Prolixo quidem nimium sermone detinui hætenus plus quam per duas horas C. V. Ut ergo semel hæc finiam, humiles agnoscamus peccata nostra, supplicesque clamemus ad Dominum sedentem in throno gratiæ, dicentes, Miserere nostri Domine, quia tibi peccauimus, & peccata nostra agnoscimus. Debitores tui sumus. Remitte tu nobis debita nostra, sicut & nos remittimus debitoribus nostris. Et ne inducas nos in tentationem: sed libera nos à malo

Amen.

g 3

SERMONVM DECAS

QVARTA, AVTHORE HEINRY-

CHO BVLLINGERO.

De Euangelio gratiae Dei, qui filium mundo dedit, & in hoc uera salutis omnia, ut credentes in ipsum, vitam consequamur eternam.

SERMO I.



OST expositionem legis, eorumque capitum quae cum lege cognata sunt, aut legi utcumque adhærent, transeundum modò uidetur ad tractationem Euangelij, cuius in expositione legis & aliàs crebra incidit mentio. Quemadmodum autem hætenus charitatis uestrae precibus ad Deum adiutus sum, ita preces uestras iterum, & ardentissimas quidem illas, in præsentī causā, postulo.

Euangelij uox.

E V A N G E L I V M uox est Græca, sed à Latinis & Germanis recepta, hodieque ueluti propria usurpata. Componitur ab *eu*, quod bonum est, & *aggelion* nuncio. Significat enim Euangelium bonum nuncium seu felicem prædicationem: qualis sit cum fuis hostibus, uel urbem obsidione graui liberauimus, uel claram ab hostibus reportauimus uictoriam. Attribuitur cuilibet fausto nuncio de re quauis feliciter perfecta. Libenter ea uoce usi sunt Apostoli: non tam quòd prophete eam prius quoque usurparunt, quàm quòd salutis nostrae negotium per Christum perfectum, cui accommodarunt, mirifice & comprehendit, & oculis uelut spectandum proponit. Inducit Isaias Christum Dominum ita loquentem, beato Luca interprete, Spiritus Domini super me, propterea quod unxit me, *εὐαγγελίσασθαι*, id est, ad euangelizandum uel ad prædicandum Euangelium misit me, ut sanem contritos corde, ut prædicem captiuis remissionem, & cæcis uisum, ut emittam confractos per remissionem, ut prædicem annum Domini acceptum. En ipse Saluator apud prophetam & Euangelistam exponit nobis uocabulum Euangelij, quale sit, aut quid possit. Misit me pater, inquit, ut annunciem Euangelium pauperibus. Mox autem quinquam illi pauperes sint, subiungit, Qui sunt contrito corde, uel animo confracto, nimirum qui nihil integritatis aut sanitatis in seipsis reperiunt, totique de suis desperantes uiribus, à medico Christo pendent. Euangelium porrò quod afflictis his annunciat, tale est, uenisse cœlitus Dei filium sanandis morbidis. Quibus insuper & alia coniungit illustrandi gratia, uenisse Dei filium, ut prædicet captiuis remissionem & cæcis uisum, &c. Etenim tenentur captiui omnes mortales in uinculis damnationis: omnes seruiunt seruitutem grauissimam sub tyranno crudelissimo satana: omnes cæci detinentur in tenebris errorum. Atque his annunciat redemptio uel liberatio, uerus utique annus iubileus. Hæc uerò annuntiatio latissima appellatur Euangelium.

*Euangelium
quid sit.*

Euangelium ergo ab omnibus ferè definitur ad hunc modum. Euangelium est uerbum bonum & suaue, testimoniumque certissimum diuinæ erga nos gratiæ in Christo credentibus exhibitæ. Vel, Euangelium est clarissima æterni Dei cœlitus delata sententia, absoluentis omnes credentes ab omnibus peccatis, & id quidem gratis propter Christum, promittentisque uitam æternam. Colliguntur hæc ex testimonijs Euangelistarum & Apostolorum. Nam S. Lucas inducit angelum Domini loquentem ad pauidos attonitosque pastores, ac dicentem, Ne timeatis: ecce enim euangelizo uobis gaudium magnum, quod futurum est toti populo: quia
natus

natus est uobis hodie seruator, qui est Christus dominus in ciuitate Dauid. Exi-
mit pastoribus omnē pauorem euangelio, id est, annunciatione salutifera, quæ ple-
na est gaudiij. Ea est, quod natus est saluator mundi Christus dominus; & nobis
quidem, id est, in salutē hominum natus. S. Paulus dicit Euangelium esse à deo pro-
missum antè, per prophetas, in scripturis sanctis, de filio suo, qui genitus sit ex se-
mine Dauid, secundū carnem, qui declaratus sit filius Dei cum potētia, secundum
spiritum sanctificationis, ex eo quod resurrexit ex mortuis. Et iterum, Euangelium
est præconium Iesu Christi, iuxta reuelationē mysterij, temporibus æternis taciti,
manifestati uerò nunc, & per scripturas propheticas, iuxta delegationem æterni
Dei, in obedientiā fidei, in omnes gētes patefacti. Idem adhuc breuius, Euangelium
est potentia Dei, ait, ad salutē omni credenti. Id est, Euangelium est prædicatio diui-
næ potentia, per quam saluantur credentes. Potentia autem Dei Christus est. Hic
enim brachium dicitur patris, gloria eiusdem, uirtus & splendor. Cæterū credenti
salutaris est Christus, & omni quidem credenti. Omnium enim saluator est.

Ex his omnibus talem colligimus sancti euangelij descriptionem, Euange-
lium est cœlestis diuinæ erga nos gratiæ prædicatio, qua toti mundo in indigna-
tione Dei constituto, annuntiatur Deus & pater ille cœlestis placatus in filio suo
unigenito, domino nostro Iesu Christo, quem sicut patribus sanctis olim promise-
rat, nobis exhibuerit, & in ipso plenē omnia uitæ beatæ & salutis æternæ, utpote
qui pro nobis incarnatus, mortuus, ex mortuis iterum excitatus, & in cœlū subla-
tus, dominus & saluator solus cōstitutus sit noster, modò peccata nostra agnoscen-
tes, credamus in eum.

*Descriptio
Euangelij.*

Longa est descriptio, fateor: sed illud quoque apud te cogites uelim, negotium
quod hic describitur, & ipsum esse amplissimū copiosissimumque: quod idcirco &
definitione & descriptione, omnium oculis, qua potui luce, clarissimum exposui.
Paucioribus ergo uti, nec potui nec debui. Habet descriptio illa suas partes, qui-
bus sigillatim explicatis illustratisque, quisque spero perspiciet totam euangelij natu-
ram, causas, effectus, & quæcunque de ipso cognoscere conuenit.

Principiō Euangelium cœleste esse nuncium, non terrenum, illud maxime ar-
guit, quod ipse pater cœlestis primū annunciauit euangelium afflictis parentibus
nostris in paradiso, promittens filium suum, qui incarnandus caput serpentis sit
conculcaturus. Deinde Apostolus Paulus disertis uerbis, Deus, inquit, multifariā
multisque modis locutus est patribus, per prophetas, extremis uerò diebus hisce lo-
cutus est nobis per filium. Nam & Ioannes prior testificans dixisse legitur, Deum
nemo uidit unquam: unigenitus filius qui est in sinu patris, ipse enarrauit. Item,
Qui ē supernis uenit, supra omnes est. Qui ē terra profectus est, terrenus est, & ē
terra loquitur. Qui ē cœlo uenit, supra omnes est, & quod uidit & audiuit, hoc te-
statur. Huc pertinet quod propheta creduntur inspirati à sancto spiritu, pphetasse.
At hi prænunciarunt in scripturis sanctis euangelium: Cuius quidem potissima ca-
pita cœlitus descendentes angeli, hominibus annunciauerūt. Nam incarnatio fi-
lij Dei, ab archangelo Gabriele primū diuæ uirginis, deinde Iosepho putatio pa-
renti adeoque castissimæ uirginis tutori, annūciatur. Idē angelus pastoribus prædi-
cat natiuitatē filij Dei. Mulieribus uerò ad sepulchrum uenientibus, uolentibusque
pro more gentis, corpus domini inungere, angeli nunciāt dominum resurrexisse
ex mortuis. Idē apostolis ascendente domino, cōuertentibus defixisque suis in nu-
bes oculis, attestantur ipsum esse sublatum in cœlum, indeque uenturum iudicare
uiuos & mortuos. His omnibus accedit patris æterni ē cœlo super dominū nostrū
delata uox, Hic est filius meus dilectus, in quo placatus sum, ipsum audite. Et

*Euangelium esse
nuncium cœleste.*

Verbum euan-
gelij nihilomi-
nus dei est, licet
annūcietur per
homines.

hoc patris testimonium máximo spiritu prosequens repetit beatus Apostolus Pe-
trus in 2. epist. cap. 1. Proinde sermo Euangelij diuinus est sermo, cœlo delatus, ir-
refragabilisq̃, cui qui credunt, uerbo æterni Dei credunt: qui non credunt, uerbū
Dei uiuū contemnūt atq̃ abijciunt. Non enim desinit esse uerbū Dei, licet annun-
cietur per homines. Nam de Apostolis legimus dixisse dominū, Non uos estis lo-
quentes, sed spiritus patris mei qui in uobis est. Ideoq̃ non leguntur discessisse
Hierosolyma, nisi prius instructi ex alto, & accepto spiritu sancto. Nec est quod
uerbū Dei ad Apostolos duntaxat alligemus, quasi post Apostolos nemo prædi-
cet uerbum Dei. Nam dominus noster disertē dicit apud Ioannē, Amen dico uo-
bis, qui recipit quencunq̃ misero, me recipit: qui autem me recipit, recipit eum qui
mē misit. Mittit autē Dominus noster, summus ille pontifex Ecclesiæ suæ catho-
licæ, nō Apostolos tantū, sed omnes legitimē uocatos, afferentesq̃ uerbū Chri-
sti. Ergo de omnibus ministris Ecclesiæ legitimis intelligimus, quæ ore diuino in
hæc uerba pronunciata legimus, Quorumcunq̃ remiseritis peccata, remittuntur
eis: quorumcunq̃ retinueritis, retenta sunt eis. Et iterū, Quicquid solueris in ter-
ra, erit solutum in cœlis: & quicquid alligaueris in terra, erit alligatum & in cœlo.
Nam alibi quoq̃ dicit dominus, Amen dico uobis, Tolerabilius erit terræ Sodo-
morum & Gomorrheorum in die iudicij, quā ciuitati illi quæ uos non excipit,
neq̃ sermones uestros audit. Quis uerō ignorat quā nephario scelere se pollue-
rint defœdarintq̃ ciues Sodomæ: & quod dominus igni sulphure & pice cœlitus
demissis, sceleratissimos concremauerit? Quis ergo non colligat inde multo pec-
care grauius rebelles & blasphemos contra Christi Euangelij, eosdemq̃ iusto uin-
dici Deo multo grauiores pœnas uel hic uel in futuro seculo, uel utrobique datu-
ros? Credamus ergo euangelio filij Dei, mundo à patre primū, deinde à patriar-
chis, mox à prophetis, tandē & ab unigenito Dei filio & Apostolis eius annuncia-
to: quorum uox cœlestis uel hodie nobis personat in ore ministrorum euangelij
nobis syncerē prædicantium.

Euangelij an-
nunciat gratiā.

Gratia.

Deinde considerandum nobis quid annunciet mundo cœlestis illa prædicatio
euangelij, Gratiam utique patris nostri cœlestis. Nam Apostolus Paulus in Actis
cap. 20. dicit se accepisse ministerium à domino Iesu, ad testificandum euāgelium
gratiæ Dei. Dicendum ergo in præsentī de gratia Dei, quantum huic loco satis sit.
Variis est autem uocabuli Gratiæ usus in literis sacris, quemadmodum & in pro-
phanis literis. Significat in sacris gratiarum actionem: item beneficium & eleemo-
synam, ut 2. Corinth. 8. Significat & laudem & recompensationem, ueluti cum
Apostolus dicit, Si cum benefacitis, affligimini, suffertis: ea est gratia apud deum.
Significat & facultatem, ut cum dicimus aliquem habere gratiam docendi, & fun-
ctionem gerendi officij. Apostolus enim dicit se accepisse gratiam: ac mox per in-
terpretationē subiungit, muneris apostolici functionem. Præterea dona Dei gra-
tia appellantur: quia gratis conferuntur. Apostolus tamen ad Rom. 5. cap. distin-
guit donum à gratia. Etenim Gratia ferē significat fauorem & beneuolentiam nu-
minis erga nos. Donū uerō, ipsum munus quod datur à Deo ex beneuolentia, ut
est fides constantia, integritas. Gratiā apud Deum inuenisse dicuntur, quibus im-
pendio fauet Deus, & quos complectitur ex animo. Sic Noe inuenit gratiam in
oculis domini: Ioseph inuenit gratiam in oculis principis carceris. Et diua uirgo
legitur inuenisse gratiam apud dominum: nimirum quod esset Deo dilecta, in ma-
ximo apud Deum pretio, utpote quam singulariter delegerat.

Gratia Dei
quid sit.

Caterū hoc loco Gratia est Dei fauor beneuolentiæq̃ numinis æterni, qua pro
impressa sua bonitate homines gratis propter Christum complectitur, uocat, ius-
tificat,

stificat, & saluat. Videtur autem ante omnia indaganda esse caussa diuini erga nos amoris. Videmus enim quandam esse correlationē inter fauorem Dei, & nos quos fauore suo prosequitur. Nec difficile nec prolixū operis erit inuenire. Nam in nobis nihil est quod miretur deus, uel quo possit moueri uel excitari ad nos cōplectendos: imò quoniam omnes sumus peccatores impurissimi, & ille interim sanctus & iustus, scelerūq; uindex est, in nobis certē inuenit, propter quod irascatur iustaq; prosequatur uindicta. Causam ergo diuini erga nos amoris, non in nobis, non extra Deum in re ulla alia, quando homine nihil sit praestantius, sed in ipso deo eiusq; natura esse oportet. Porro scriptura ueracissima proponit nobis deī natura sua bonum, clementem, & ut Paulus dicit, philanthropon, amatorem inquam hominum, qui suae naturae filium unicum pro redemptione nostra miserit; unde iam consequens est, Deum gratis ex semetipso & propter filium, nō propter ullam aliam causam amare hominem. Vbi protinus omnia praeparamenta, incitamenta, aut merita hominum igne diuini amoris dissoluta abeunt in fumū. Nam gratia Dei prorsus est gratuita, ac nisi sit talis, non uideo quomodo appellari possit gratia. Sed praestat in re maximi momenti aperta scripturae sanctae testimonia proferre, quibus animi nostri confirmetur contra omnes nugas sophisticas & satanicas tentationes. Dominus noster in euangelio, Sic Deus, inquit, dilexit mundum, ut filium suum unigenitum daret pro mundo: ut omnis qui credit in eum, non pereat, sed habeat uitam aeternam. En dilectio dei, quae est fauor ille amorq; numinis nos cōplectentis, caussa est salutis nostrae. Nam Christus passus pro nobis salus nostra est. At hunc ex dilectione dedit nobis pater Deus. Neque cogitare possumus deum nostra dilectione commotum esse ad amorem mutuum, & ut pro nobis daret filium. Nam ante conditum mundum statuit nos redimere per filium. Sed & ipse Ioannes euangelista in Canonica sua, In hoc est charitas, inquit, non quod nos dilexerimus Deum: sed quod ipse dilexerit nos, & misit filiū suum propitiationem pro peccatis nostris.

His testimonijs licet clarissimis & firmissimis, subiungemus tamen aliquot S. Pauli testimonia, ut sic plus lucis causae nostrae affulgeat, & inclarescat maximus totius doctrinae euangelicae & apostolicae consensus, Paulus ergo ad Romanos, Omnes, ait, peccauerunt & destituuntur gloria Dei. Iustificantur autem gratis, per illius gratiam, per redemptionē quae est in Christo Iesu. Idem ad Ephesios scribit, Gratia estis seruati per fidem, idēq; non ex uobis: dei donum est, non ex operibus, ne quis glorietur. Item ad Titum, Bonitas & erga homines amor apparuit seruatoris nostri Dei: nō ex operibus iustitiae nostrae, quae faciebamus nos: sed secundum suam misericordiam saluos nos fecit. Ita in 2. ad Timoth. 1. cap. dicit, Deus saluos fecit nos & uocauit uocatione sancta, non secundum opera nostra, sed secundum suum propositum & gratiam, quae data est nobis per Christum. Non arbitror his pro causa nostra uel fingi potuisse aliud & appositum magis & euidentius. Claret iam omnino Dei gratiam prorsus esse gratuitam, utpote omnia nostra opera & merita excludentem. Et hic gratuitus Dei amor est unica euangelij causa origoq; uerissima. Vnde nimirum à Paulo euangelium appellatur gratiae praconium.

Porro etsi gratia Dei à nobis non pendeat, attamen nō manet uel haeret in Deo otiosa, quasi extra nos alienaq; à nobis, ut quae nec sentiatur nec operetur in nobis. Intelleximus enim ex citatis testimonijs, gratiam fauorē esse in Deo quo nos homines prosequatur. Intelleximus gratia saluari homines: Quia enim diligit homines Deus, perire noluit, idcirco ex gratia filiū misit, qui liberet ab interitu, & in

Causa gratiae diuinae.

Causa euangelij.

Operatio gratiae diuinae.

quo inclarescat toti mūdo & iustitia Dei & misericordia. Atqui liberantur solliciti
dentes. rursus ergo quod gratia operetur in homine habet. Effuso enim spiritu
sancto in corda nostra, intellectus & uoluntas in fide instruuntur. Breuiter, gra-
tia (quod & in finitione diximus) uocat, iustificat & saluat, siue glorificat creden-
tes: ut totum salutis nostræ negotium omnesq; uirtutes piorum unicæ Dei gratiæ
(cuius operationem ubiq; agnoscimus) seramus acceptum. Id rursus diuino adde
& humano ostenditur testimonio. Paulus ad Romanos. Quos, inquit, præsciuit,
eosdem & præfiniuit: & quos præfiniuit, eosdem & uocauit: & quos uocauit,
eosdem & iustificauit: quos autem iustificauit, hos & glorificauit. Quid igitur di-
cemus adhuc? Si Deus pro nobis, quis contra nos? Qui proprio filio nō pepercit,
sed pro nobis omnibus tradidit illum, qui fieri potest, ut non & cum eodem om-
nia nobis donet? Idem ad Ephesios primo capite, totum electionis & salutis nego-
tium cum omnibus suis partibus ad gratiā Dei retulit. Porro sancti patres in Con-
cilio Mileuentano, inter quos sedit & beatus Augustinus, de Gratia Dei sequens
cōdiderunt decretum, Si quis sine gratia Dei, credentibus, uolentibus, desideran-
tibus, conantibus, studentibus, petentibus, quærentibus, pulsantibus nobis, mise-
ricordiam dicit conferri diuinitus, non autem ut credamus, uelimus, uel hæc om-
nia, sicuti oportet omnia agere ualeamus, per infusionem & inspirationem sancti
spiritus in nobis fieri cōfiteretur: & aut humilitati aut obedientiæ humanæ, subiun-
git gratiæ adiutorium: nec ut obediētes & humiles simus ipsius gratiæ donum
esse consentit, resistit Apostolo dicenti, Quid enim habes quod non accepisti? Et
gratia Dei sum id quod sum. Hæc illi. Expensis autem his cum diuinis tum huma-
nis testimonijs, neminem porro futurum arbitror, qui nō intelligat id esse Dei gra-
tiam quod diximus, nempe fauorem beneuolentiæq; numinis æterni, qua pro-
immensa sua bonitate homines gratis propter Christum complectatur, uocet, ius-
tificet & saluet.

Pugna S. Augu-
stini & Pelagi-
j de Gratia
Dei.

D. Aurel. Augustino grauis fuit pugna cum Pelagio Brittone super negotio
gratiæ Dei. Hic enim per gratiam aliud nihil intelligebat quā beneficium crea-
tionis: quod ut ille non negabat esse gratiam, ita urgebat Apostolos maximè loqui
de gratia illa gratuita quæ gratis nullo nostro merito propter Christum seruamur.
Hoc eo constantius urgebat, quod uideret Pelagium hæreticum asserere huma-
nam naturam tibi sufficere, non solum ad faciēda, uerum etiam ad perficiēda
mandata domini per liberum arbitrium. Sed de his religiosissimè & copiosissimè
disputat S. August. epist. 95. ad Innocentium. Ex neotericis pleriq; gratiam partiti
sunt, docendi causa, in gratiam gratum facientem, & gratis datam. Item in gra-
tiam operantem & cooperantem. Deniq; in gratiam præeuntem uel præuenien-
tem, & subsequētem. Illi ipsi operationes seu effectus gratiæ hoc fermè modo an-
numerant, Gratia sanat animam, efficitq; eadem ut uelit bonum, deinde quod uo-
luit, efficaciter operetur: sed & in bono perseueret, & tandem ad gloriam perue-
niat sempiternam.

Cæterum nos non tam solliciti sumus in recensendis aliorum sententijs quid
quisq; senserit: quod præterea immensi laboris, nec meæ esset facultatis: quā in
proferenda sententia scripturæ sanctæ (quæ una & sola est rectè iudicandi senten-
tiæ regula) quid illa inquam nos sentire iubeat. Id quod in superiore nostra disser-
tatione de Gratia Dei, & breuiter & luculenter satis ostendisse spero. Sed & conse-
quens disputatio de Christo, in quo excellentissimam in nos gratiam cœlestem
transfudit pater, sarciet si quid illis deesse uidetur.

Gratia iustifi-
ficamur.

Priusquam autem hinc discedamus, admonendum existimaui, non inter se
oracula

oracula uerbi Dei configere, cum legimus uel audimus saluari homines gratia Dei uel gratis: saluari dilectione Dei: saluari per misericordiam Dei: saluari per Christum: saluari per sanguinem uel mortem, uel incarnationem Christi: saluari per fidem in Christum, uel in misericordiam aut gratiam Dei. Hæc enim omnia in idem recidunt, & omnem gloriam causamque salutis humanæ, ueræ Dei misericordiae, uel gratiae transcribunt. Gratiae pignus imò saluator est unigenitus Dei filius dominus noster in mortem traditus. Meram gratiam in Christo apprehendit sincera fides.

Ideoque expositis istis quæ in genere de gratia Dei dicere, pro mea exilitate potui, In Christo exhibitum suam nobis gratiam Deum. descendo iam ad singulare illud gratiae Dei opus tractandum, quod non est aliud, quam quod misericors pater nobis exhibuit filium, ad eum omnino modum, ad quem nobis in prophetis promisit, & in ipso omnia plenè beatæ uitæ æternæque salutis: cum ipse sit dominus & Messias, siue saluator unicus & uerus, qui pro nobis incarnatus, mortuus, exuscitatus & in cœlos receptus est. Nam Christus rex & pontifex, id est, saluator noster, scopus imò stella, ipseque sol est prædicationis euangelicæ. In istis autem sigillatim explicandis hoc utemur ordine. Principiò recitabimus eximias aliquot e lege & prophetis promissiones de Christo Ecclesiæ à Deo propositas, & eas maxime quas & ipsi attigerunt apostoli Christi. Deinde demonstrabimus deum præstitisse quod promisit, id est, ostendemus quod filiū suum unigenitum nobis exhibuit: & quod is sit uerus & expectatus ille dominus & Messias siue saluator. Postremò indicabimus in filio hoc, patrem mundo esse placatum, uel reconciliatum: in quo etiam dederit nobis plenè omnia uitæ beatæ & salutis æternæ. Ipse enim incarnatus est pro nobis, mortuus & ex mortuis excitatus, postremò & in cœlum receptus. Atque in his latent uiuæ euangelij uenæ, profundentes salutare aquas ad uitam æternam. In his enim est solida consolatio fidelium, & tranquillitas placidissima. Sine his non est ulla uita uel quies.

Promissiones de Christo à Deo in scriptura sancta editæ, triplices sunt. Ita uero perspicuitatis gratia unius & eiusdem generis promissiones iuxta tempora partior. Priores sunt factæ Patriarchis, uel primis illis patribus ante legem latam: & hæc rursus sunt duplicis generis. Aliæ enim planæ sunt, simplicibus sententijs, absque ulla figura uel typo enunciatae. Aliæ uero typicæ & figuratae sunt. Prima & clarissima promissionum fit ex ipso Dei ore ad patres nostros Adamū & Euam, morte & calamitatibus diroque pauore oppressos: quæ ueluti columna & fundamentum est totius religionis Christianæ & prædicationis euangelicæ: ex qua omnes ferè aliæ promissiones dependent. Sic autem dicit dominus. Inimicitias ponam inter te (serpentem intelligit ipsum satanam) & inter illam mulierem: inter sementuum & semen illius: ipsum conteret tibi caput: & tu conteres eius calcaneum. Semen promittit his uerbis Deus, & semen quidē non uiri, sed mulieris: & excellentissimæ quidem mulieris, nimirū beatissimæ uirginis Mariæ, benedictæ illius inter mulieres. Ea enim non ex semine uiri, sed ex spiritu sancto concepit, & uirgo peperit Christum dominum: qui moriendo & resurgendo caput, id est, regnum satanæ, ipsum inquam peccatum, mortem & condemnationem non tantum uexit uel uulnerauit, sed contriuit, omni satanica potestate seu tyrannide e medio sublata. Interim satanas calcaneum Christi contriuit: id est, id quod in Christo quasi infimum erat, carnem, exquisitissime per membra sua, Caiapham, Pontium Pilatum, per Iudæos & Gentes tormentis & morte atriuit atque confecit. Dicit enim in Psalmis dominus, Vermis sum & non homo. In puluerem redegerunt uitam meam. Verum resurrexit iterum ex mortuis. Alioqui enim caput serpentis

non contriuiſſet, factuſq; eſt ſaluator omnium credentium in ipſum. Ex hac promiſſione deriuatur ſingularis & celebris illa, quam patri noſtro Abraham hiſce uerbis angeluſ domini recitat, Benedicentur in ſemine tuo omneſ gentes orbis. At Pauluſ ad Galatas diſertis uerbis declarat, noſtrum illud eſſe ſemen benediſtum Abraham promiſſum. Semen autem appellatur dominuſ noſter propter primam illam promiſſionem Adamo & Euæ factam, & quoniam propter noſ incarnatuſ & ueruſ homo factuſ eſt. Nec pugnat hæc promiſſio cum prima. Licet enim ſemē uel filiuſ Abraham nunc nominetur Chriſtuſ dominuſ, non tamen alia ratione ad Abrahamuſ refertur, quā per uirginem, quæ erat filia Abraham & mater Chriſti domini. Quid autem confert nobiſ ſua incarnatione filiuſ Abraham? Benedicit. Benediſtio autem opponitur malediſtioni. Ergo quicquid contraximus ex Adam peccato malediſtionis, id ſanat in nobiſ Chriſtuſ, & benediſcit noſ omni benediſtione ſpirituali. Nec beneficiuſ hoc paucis confert, ſed omnibuſ totiuſ orbis gentibuſ, in ipſum credentibuſ.

Iacob patriarcha inſpiratuſ ſpiritu Dei, fata filioruſ & reſ futuras prædicenſ, ubi ad Iudam filiuſ ueniſſet, inter alia ait. Non recedet ſcepruſ de Iuda, & legiſlator (uel ſcriba) de pedibuſ eiſ, donec ueniat Schilo, & ad illū gentes confluant. En hiſ non tantū promittitur Meſſiaſ, ſed inſuper oſtenditur tempuſ, quando incarnanduſ ſit, oſtenditur item quiſ & quatenuſ ille futuruſ ſit. Regnuſ, inquit, permanebit ſub Iuda uſq; ad Chriſti aduentuſ. Et quamuiſ tribuſ Iuda regeſ non ſit ſemper habitura, nō deerunt tamen procereſ, duceſ, legiſlatoreſ, doſti ac præſideſ populi. Ideoq; fideſ euāgelicæ hiſtoriæ teſtatur Chriſtuſ ueniſſe tunc, cum omniſ poteſtaſ imperitandi translata eſſet ad Romanuſ, quoruſ Imperatori Auguſto cenſuſ Iudæi appenderunt. Schilo autem ſignificat felicitatem ſiue authorem felicitatiſ, copię cornu & abundantiam omnium reruſ optimaruſ. Theſauruſ enim omnium bonoruſ Chriſtuſ eſt. Et Chaldaeuſ interpreſ pro Schilo reſpoſuit Chriſtuſ. Cæteruſ confluent ad ipſum, ut ſaluatoreſ ſuū, omneſ gentes: quod & prophetaſ poſtea clariſſimē declarauerunt, Iſaiā in capite ſecundo & Michæā in 4.

Porro typi & figuræ Chriſti ſunt, Noe in arca ſeruatuſ. Nam ſeruantur fideleſ in Chriſto: ſicuti S. Petruſ teſtatur, 1. Pet. 3. Immolatur ab Abrahamo filiuſ unigenituſ Iſaac, & in iugo quodam eiſ montiſ, in quo poſt multoſ annuſ immolatur Dei filiuſ. Venditur ethnicis à fratribuſ ſuiſ Ioseph. Coniſcitur idem in carcerem: ſed liberatuſ ſaluator ſit, & ab omni populo conſeruator ſalutatur regni Ægyptiaci. Hæc omnia præfigurauit Chriſtuſ dominuſ.

Posterioſeſ promiſſioneſ & ipſæ ſunt duplices, reſectæ & uelatæ ſiue figuratæ. Continentur autem in lege & in prophetiſ ad tempora uſq; captiuitatiſ Babylo nicæ. Prophetiam, de uenturo propheta omnium maximo, Moſiſ, citat beatuſ Apoſtoluſ Petruſ in Act. cap. 3. Figuratæ promiſſioneſ Chriſti ſunt ſacrificia, quæ Pauluſ in epiſtola ad Hebræoſ enarrat miro cōpendio. Agnū paſchalem idem in 5. prioriſ ad Corinthioſ unā cum beato Petro in 1. capite prioriſ epiſtolæ accomodat Chriſto. Idem petram percuffam & aqua manantem, appellat Chriſtuſ. Ipſe Chriſtuſ dicit in euangelio Ioanniſ, ſe præfiguratuſ eſſe æneo ſerpente exaltato in deſerto: cuiuſ myſteriuſ alicubi pleniuſ enarraui. Sunt alia huiuſ generiſ plurima: quoruſ non minimam partem attingi cum diſſererem de Ceremoniſ & earuſ ſignificatione. Vnde qui uolet repetat. Non figuratæ promiſſioneſ ſerē ſunt innumeraſ in Pſalmiſ & prophetiſ. Sed & ipſe dominuſ in euangelio ſecunduſ Lucam, teſtatur totuſ ſuū negotiuſ deſcriptuſ contineri in lege, in prophetiſ,

prophetis, & in Psalmis. Cumq; S. Petrus Euangelium prædicasset, & in hoc Christum ac remissionem peccatorum promississet omnibus credentibus, subiungit protinus, Quin & omnes prophetae à Samuele ac deinceps quotquot locuti sunt, annunciauerunt dies istos. Certè Dauid Psalmo 2. 22. & 110. geminam Christi indolem, diuinam & humanam, clarè designauit. Idem prædicationem eius salutarem, sacerdotium æternum, redemptionem æternam, per mortem acerbissimam, tantum non inspectanda oculis omnium proposuit. Quid dicam de Isaia propheta: qui optimo iure non à postremo ecclesiæ Christianæ doctore appellatus est Euangelista, quasi historiam scripserit rerum gestarum non gerendarum per Christum. Hunc proponit ille nobis uerum Deum, & hominem uerum, natum secundum carnem de uirgine intemerata: qui prædicet uerbum uitæ, pascatq; tanquam bonus pastor trepidas ouiculas, qui sit lumen gentium usque ad extrema terræ, qui cæcos illuminet, claudos & uarijs morbis confectos sanet, qui à suis proditus conspuatur, alapis cadatur, & inter latrones suspensus, hostia pro delicto offeratur, denique & qui intercedat pro transgressoribus, ut ipse iustus omnes credentes iustificet. Legatur Isaïas in capite 7. 8. 9. 11. 28. 40. 49. 50. 53. & in postremis prophetiæ suæ capitibus omnibus, in quibus & ecclesiam Christianam plenissimè describit. Ionas manifestissimum mortis & resurrectionis Dominicæ typum prætulit. Michæas etiam locum Bethlehem designat, in quo Messias nascatur, cuius originem, diuinæ utique naturæ, mox refert ad æternitatem. Idem prædicat Euangelicam prædicationem ex urbe Hierosolymorum in totum terrarum orbem fore diffeminandam. Ieremias dicit Deum Dauidi excitaturum uerum semen siue germen, id est, expectatum Messiam. Allusit autem ad legem de excitando semine fratris latam. Virgo enim spiritu sancto fœcunda genuit: & eum quidem genuit, cuius nomen est Iehouah, Deus utique uerus & essentialis: quem Isaïas nominauit Emanuelem, & qui uera est iustitia credentium. Nam per Christum iustificantur credentes. Etenim idem propheta in capite 31. promittit in Christo & plenariam peccatorum remissionem, & spiritus sancti gratiam uberrimam: quam & Ioel propheta non obticuit. Hæc autem pauca ex multis delibauimus duntaxat. Toti enim prophetarum libri in negotio Christi exponendo uersantur.

Postremæ de Christo promissiones sub ipsa captiuitate Babylonica, & mox post captiuitatem, à Deo, prophetis reuelatæ, & ecclesiæ Dei sunt propositæ. Prophetat Ezechiel de pastore Dauide, & ouibus pastorem illum suscipientibus: quæ ipse Dominus in Euangelio secundum Ioannem de seipso exponit. Idem multa differit de gratia & plenaria gratuitaq; peccatorum remissione per Christum conferenda, in primis 34. 36. & 37. cap. Daniel habet quidem uisiones & somnia multa: sed in his ita nobis exhibet Christum, ut non posset melius, illustrius, elegantius. In 2. cap. commonstrat nobis regnum eius æternum, indicatq; Christum sub monarchia Romanorum uenturum, tum cum principes Romani affinitatibus sibi mutuò connexi, mutuïs sint interituri armis. Quod quidem impletum est imperitantibus Pompeio & Iulio, Antonio itè & Octauio Augusto. Iam cognitissimæ sunt septimanae Danielis in 9. cap. ubi Christum & tempora Christi repudiūq; gentis Iudaicæ propter incredulam perfidiam toti mundo tantum non digito monstrat. Haggeus templum extruit, sed uerum templum, Christianā utiq; ecclesiam. Zacharias multa Christi mysteria eleganter tradit. Proponit nobis Christum regem & pontificem. Commendat nobis unicum illud sacrificium, æternum, efficax satis expiandis omnibus totius mundi peccatis. Legatur cap. 3. 9. 14. imò totus Christum & regnum Christi nos docet. Malachias præmittit præcursores Do-

mino Christo, & non pauca Christi mysteria tractat. Vnde cernimus uerissime scripsisse Paulum, Deum ante promississe Euangelium per prophetas suos, in scripturis sanctis.

Euangelium patres nescit.

Ex his uero sanctis promissionibus colligimus & illud, non plura aut diuersa esse Euangelia (quanquam non negemus eandem historiam Euangelicam diuersis scriptam esse authoribus) sed unum duntaxat esse & quasi aeternum. Nam illud ipsum Euangelium quod nobis hodie annunciat, ab exordio mundi patribus annunciatum est. Certissimum enim est Euangelio seruatos esse ipsum Adamum, Euam, Abelem, omnes patriarchas & prophetas, sed & ueteris testamenti omnes fideles. Id quod alibi quoque satis copiose sumus prosequuti.

Deus pater per Christum praestitit nobis quod patribus promisit.

Descendimus nunc ad alterum caput, ostensuri Deum patrem fideliter quod promisit patribus, praestitisse nobis, exhibito unigenito suo filio; qui sit uerus & expectatus ille Messias benedictus in secula. In ea causa illustranda diligenter laborarunt Euangelistae & apostoli Domini, ut nemo fidelius & melius. Genus Christi ostendunt Dauidicum & ex Abrahae prosapia descendens; matrem uirginem, quae conceperit ex spiritu sancto, & uirgo pepererit. Tempus quoque consignat quo reuelatus est Christus, id quod omnibus punctis respondet uaticinijs prophetarum. Addunt & locum natiuitatis Christi congruere prophetiae Micheae. Iam apparet in Oriente stella, quae magos, uiros primarios & sapientissimos, inuitat ad salutandum nuper natum regem. Adsunt ergo, & in urbe Hierosolymorum regia, palam, & natum Messiam, & se adorandi eius gratia ex Oriente aduenisse profitentur. Verbis facta respondent. Nam indicio stellae repertum adorant, & muneribus ipsi oblatis quanti Christum faciant, minime obscure declarant. In ipsa urbe Hierosolymorum regia, uirorum iustissimus Simeon cum iubilo cordis maximo, & gratulatione piissima, in templo palam testatur Deum pro aeterna sua ueritate & constantia exhibuisse mundo filium unigenitum, quem patribus promiserat: simul profitens tranquillissimo iam se animo moriturum. Causam subiungit, Quia uiderunt oculi mei salutare tuum, nimirum illum Schilo, id est, felicitatorem salutoremque quem o Deus, statuisti proponere omnibus populis, lumen ad reuelationem gentium, & gloriam plebis tuae Israel: id est, ut tenebras discutens, gentibus lumen praeferat ueritatis & uitae, easque illuminet, & gloria uitaeque sit populi Israelitici. Huc pertinet etiam testimonium clarissimi uiri Zachariae sacratissimi sacerdotis Dei, testificantis atque dicentis, Benedictus Dominus Deus Israel, quia uisitauit & redemit populum suum. Et erexit cornu salutis nobis in domo Dauid pueri sui. Sicut loquutus est per os sanctorum qui a seculo fuerunt prophetarum suorum. Et reliqua quae leguntur Luc. cap. 1. Porro Zachariae huius filius beatissimus Ioannes, Baptista cognominatus, quo ex mulieribus non legitur natus sanctior alter, digito in Christum Iesum extento, demonstrat hunc illum esse expectatum Messiam, quem promiserint omnes prophetae, Deumque hoc exhibito liberasse fidem suam, & se totum cum omnibus bonis suis effudisse in credentes. Quinimo expectante populo, ut Lucas habet, & cogitantibus omnibus in cordibus suis de Ioanne num ipse esset ille Christus, respondit Ioannes, dicens uniuerfis, Ego quidem aqua baptizo uos, sed ueniet fortior me, cuius non sum dignus soluere corrigiam calciamentorum: ipse uos baptizabit spiritu sancto & igni. Et apud Ioannem legimus, Postero die uidit Ioannes Iesum uenientem ad se, & ait, Ecce angelus ille Dei, qui tollit peccatum mundi: Hic est de quo dicebam, Post me ueniet uir, qui me antecessit, quia prior me erat, & ego nesciebam eum: sed ut manifestus fiat Israeli, propterea ueni ego aqua baptizans. Et mox, Vidi spiritum descendantem specie columbae de caelo:

Iesus est Christus, id est, expectatus ille Messias.

& man-

& mansit super eum. Et ego non noueram eum: sed qui misit me, ut baptizarem aqua, is dixit mihi, Super quem uideris spiritum descendantem & manentem super eum, hic est qui baptizat spiritu sancto. Et ego uidi & testatus sum hunc esse filium Dei. Rursum cum discipuli Ioannis inuiderent Christo Domino felicem successum, dolerentque Ioannem præ Christo ueluti negligi, dixit discipulis suis Ioannes, Ipsi uos testes estis quod dixerim, non sum ego Christus, sed missus sum ante illum. Qui habet sponsam sponsus est: amicus autem sponsi qui stat & audit eum, gaudio gaudet propter uocem sponsi. Hoc ergo gaudium meum impletum est. Illum oportet crescere, me uero minui. Pater diligit filium, & omnia dedit illi in manu. Qui credit in filium, habet uitam æternam: qui non credit in filium, non uidebit uitam: sed ira Dei manet super eum. Firma, euidentia & clara sunt hæc testimonia, solaque pro hac poterant sufficere causa. Verum adiciamus adhuc pauca: la ex multis, declaratio Christum nobis esse exhibitum. Ipse ergo Dominus noster, quem Messiam esse credimus, prodit, diu multumque Ioannis commendatus testimonio, & ipse uerbum uitæ annunciat. Nullis autem unquam seculis alius fuisse legitur, qui tanta docuerit cum gratia. Simul autem opera edidit stupenda, quæ facile quis sit coarguunt, & uel renitentem auditorem attrahunt. Facilis & benignus erat peccatoribus, subinde repetens his se seruandis & ad poenitentiam uocandis aduenisse. Ergo cum aliquando ad ipsum discipuli Ioannis uenirent rogarentque, Tu ne ille es qui uenturus est, an alterum expectabimus? respondit, Ite & renunciate ea Ioanni, quæ uidetis & auditis. Cæci uisum recipiunt, & claudi ambulat, leprosi mundantur, & surdi audiunt, mortui excitantur, & pauperes lætum accipiunt Euangelij nuncium. His autem, doctrina inquam & operibus, uel uirtutibus suis, demonstrare uoluit se mundo exhibitum esse Messiam uerum nec alium expectandum. Nam & in schola Nazarethana lecto Isaia testimonio de uenturo Messia expositoque, ostendit scripturam eam esse impletam. Vbi protinus hoc subiungitur in historia, Et omnes testimonium illi dabant, & mirabantur super gratia sermonum qui procedebant ex ore ipsius. Rursum apud Ioannem in 10. cap. Circumdederunt Dominum Iudæi, & dixerunt, Quousque animam nostram suspendis? Si tu es Christus, dic nobis ingenuè. Respondit eis Iesus, Dixi uobis: uos autem non creditis. Opera quæ ego facio nomine patris mei, hæc testimonium reddunt de me. Sed uos non creditis, quia non estis de ouibus meis. Et mox, Vos dicitis me blasphemare quia dixerim, Filius Dei sum. Si non facio opera patris mei, nolite credere mihi: si facio, & si mihi non credatis, operibus credite: ut cognoscatis & credatis quod pater in me est, & ego in eo. Certe Ioan. 7. legimus, Qui crediderunt in eum, dixerunt, Christus cum uenerit, num signa plura edet ijs quæ hic edidit? Id est, ut maximè donemus alium esse Christum expectandum, hoc tamen certissimum est alium illum non posse plura & maiora designare miracula. Credamus ergo hunc uerum esse Messiam. Coram Caiapha summo pontifice & Concilio uniuersali Israeliticorum procerum: item coram Pontio Pilato in foro Romani imperij, disertis & minimè obscuris uerbis confessus est Dominus noster Christus, se esse uerum illum & expectatum Messiam. Equidem, sicuti de eo prædixerunt prophetae, mortuus est sponte pro peccatoribus, resurrexit deinde tertia die à mortuis, ascendit in cælum, sedetque ad dexteram Dei patris. Et Euangelistæ dicta & facta Christi fideliter recitantes, diligenter præcipuis subiungunt, Hoc totum factum aut dictum est, ut impleretur quod dictum erat à propheta. Proinde non uidetur operæpretium uaticinia prophetarum colligere & his antithesi committere dicta & facta Christi, atque ex consensione manifestissima concludere, Deum

præstitisse nobis, quod patribus promisit exhibito filio unigenito, qui sit uerus & expectatus Messias. Hoc enim fecerunt Euangelistæ, & id quidē tanta cum fide & diligentia ut nemo possit euidentius & melius. Huc referre licet omnia quæ dixi Sermonibus superioribus de significatione, uel mysterijs, impletione & abrogatione legis. Et ut nobis non tanta sit testimoniorum copia, an non unicum hoc quod apud Ioannem in 4. cap. legimus uice multorum millium esse poterat? Dicit mulier illa Samaritana ad Dominum, Scio quod Messias uenturus sit, qui dicitur Christus: cum ergo uenerit ille, nobis nuntiabit omnia. Respondit ei Iesus: Ego sum qui loquor tibi. En quid poterat dici clarius? Ego inquit sum Messias, ego inquam qui tibi loquor modò, qui ab initio dixi, Si scires donum Dei, & quis sit qui tibi dicit, Da mihi quod bibam, tu petisses ab eo, & dedisset tibi aquam uiuam. Quisquis enim biberit ex aqua quam ego dabo ei, non sitierit in æternum: sed aqua quam dabo ei, fiet in eo fons aquæ salientis in uitam æternam. Infelicissimi ergo omnium mortalium & aridissimi sunt, qui alium post Dominum nostrum Messiam expectant. Petrus bene longa oratione scripturis & firmis rationibus instructa, in Actis Apostolorum cap. 2. demonstrat, Iesum Dominum nostrum illum esse uerum Messiam. Hac enim sententia Sermonem suum concludit, Certò sciat ergo tota domus Israel, quod Dominum & Christum fecerit Deus hunc Iesum quem uos crucifixistis. Ad eundem scopum tendit & doctissima copiosissimaque oratio protomartyris Stephani, quæ exhibetur nobis Actor. 7. cap. In 8. cap. Philip pus Æthiopi ostendit ex uaticinio Isaia, Iesum esse Christum. S. Paulus in omnibus synagogis non aliam proponit propositionem, quam hanc demonstrandam, Iesus est Christus, id est, Iesus est rex, pontifex atq; saluator fidelium. In capite aut 13. copiosa oratione eandem illustrat atq; declarat. Hæc autem euidentissima & clarissima diuinæ scripturæ testimonia proculdubio satisfaciunt minimè rixosis nec pertinacibus. Nolo operosius & curiosius in præsentī disputare contra tergiversatores Iudæos, alium expectantes Messiam, nostrum autem illum Dominum, filiū Dei & Mariæ uirginis, negantes esse uerum Messiam. Sentiant miserissimi esse, quod in Euangelio prædixit ipsis Dominus, dicens, Cum uideritis abominationem desolationis, quæ dicta est à Daniele propheta, stantem in loco sancto, qui legit, intelligat. Tunc qui in Iudæa sunt fugiant ad montes. Væ autem pregnantibus & lactantibus in illis diebus. Erit enim afflictio magna. Et iterum de urbe loquens Hierosolymorum, Dies, inquit, uenient in te, & circundabunt te inimici tui uallo, & cingent & coangustabunt te undique, & solo æquabunt te, & filios tuos qui in te sunt. Et non relinquent in te lapidem super lapidem: eò quod non cognoueris tempus uisitationis tuæ. Et iterum, Erit ira in populo hoc: & cadent acie gladij, & captiui ducentur in omnes gentes. Et Hierusalem calcabitur à gentibus, donec impleantur tempora gentium. Hæc quia sentiunt ad uerbum ita esse impleta, sicut à Christo in Euangelio fuerunt prædicta, quare miseri non dant gloriam Deo, & in reliquis etiam credunt Euangelio agnoscentes Iesum Christum Dei & Mariæ uirginis filium, Dominum nostrum, uerum & expectatum uenisse Messiam? Quid habent quod pertinaci suæ incredulitati obtendant? Caruerunt hæcenus à mille quingentis annis & amplius patria sua, terra inquam illa patribus promissa, melle & lacte manante: caruerunt prophetis: caruerunt cultu celebri, & legitimo. Vbi enim est templum? Vbi est summus pontifex? Vbi est ara? Vbi sunt instrumenta sacra? Vbi sacrificia quæ offerantur secundum legem? Omnis gloria populi Dei translata est ad Christianos. Hi gaudent uocari filij Abraham: hi exultant in promissionibus patribus factis; hi celebrant & prædicant patres:

*Iudæi negantes
Iesum esse Christi-
sum.*

hire

hi rectè iudicant de lege, & de fœdere Domini: hi habent scripturas sanctas, & in his explicandis sunt felicissimi: hi habent templum uerum, summum pontificem, uerum altare thymiamatis & holocaustorum, Christum: hi habent uerum cultum, olim in externis præfiguratum ceremonijs. Sicuti demonstraui cùm tractarem Ceremonias Iudaicas. Vocatæ sunt gentes ex omnibus mundi plagis ad Christum. Omnes & singulæ promissiones de uocatione gentium abundantissimè sunt impletæ, & implentur etiam hodie. Nos iam sumus genus electum, iuxta S. Petri doctrinam, regale sacerdotium, gens sancta, populus peculiaris, in hoc uocati, ut prædicemus uires illius, qui è tenebris nos uocauit in admirabilem lucem suam. Nisi ergo malint infelices Iudæi in diem crassioribus implicari erroribus, & calamitatibus torqueri innumeris, tandem uerò perire in æternum. iuxta Christi Domini comminationem, conuertantur ad Christum fide, & adorent illum nobiscum, in quo sperauerunt patres ipsorum, & in quo solo est salus & uita. Nam ut uerbis Apostoli hunc locum concludam, Deus manifestatus est in carne, iustificatus est in spiritu, uisus est angelis, prædicatus est gentibus, fides illi habita est in mundo, receptus est in gloria. Qui autem illi crediderit, in æternum uiuet, neque confundetur unquam.

Restat exponenda pars postrema, comprehendens patrem cœlestem in filio suo unigenito Domino nostro Iesu Christo esse placatum, qui prius mundo fuerat iratus. Ostendendum ergo in primis Deum uniuerso mûdo iratum fuisse. Id quod non erit difficile. Nam peccatis irascitur Deus. Totus autem mundus peccato tenetur obnoxius, idcirco necesse est iustissimum Deum uniuerso mundo ualde irasci. Et Paulus, Palàm fit ira Dei, inquit, de cœlo, aduersus omnem impietatem & in iustitiam hominũ. Idem dicit omnes homines peccato esse obnoxios: ad quod confirmandum has copias ex scripturis producit, dicens, Non est iustus, ne unus quidem; non est qui intelligat, non est qui requirat Deum. Omnes deflexerunt simul, inutiles facti sunt: non est qui exerceat bonitatem, non est usque ad unum. Sepulchrum apertum guttur eorum: linguis suis ad dolum usi sunt, uenenum aspidum sub labijs eorum. Quorum os execratione & amarulentia plenum est: ueloces pedes eorum ad effundendum sanguinem. Contritio & calamitas in uijs eorum, & uiam pacis non cognouerunt. Non est timor Dei coram oculis eorum. Iam ne Israelitæ responderent, hæc nihil pertinere ad populum Dei, sed ad impios & ethnicos, subiungit, Scimus autem quòd quæcunq; lex dicit, his qui sub lege sunt dicat, ut omne os obturetur, & obnoxius fiat totus mundus Deo. Nemo hic excipitur. Nam ad Galatas quoq; idem Apostolus dixit, Concluserunt omnes sub peccatum, ut omnium misereatur. Proinde consequitur, totum mundum fuisse indignationi Dei iustissimi subiectum. De quo dicitur & ad Ephes. 2. cap. & 4. & 5.

Huic autem impio mundo placatus uel reconciliatus est pater cœlestis, per filium unigenitum Dominum nostrum Iesum Christum. Quod unico ipsius patris testimonio abundè satis demonstraturum me confido. Principiò enim pater uoce cœlitus in terram, & super Christum iam à baptismo ascendentem, deinde etiam transfigurantem se in conspectu dilectorum discipulorum suorum, delata, disertè testificans, dicit, Hic est filius meus dilectus, in quo placata, reconciliata uel propitiata est anima mea. Ipsum audite. Legitur hoc testimonium & ab Isaia in 42. capite, prænunciatum esse. Repetijt hoc beatus Apostolus Petrus in 2. Episto. cap. 1. Paulus uerò hoc ipsum quasi illustrauit, & dixit, In filio complacitum est patri uniuersam plenitudinem inhabitare, & per eum cuncta reconciliare erga se, pacificatis per sanguinem crucis eius per eundem, siue quæ in terra sunt, siue quæ in cœ-

Pater Deus mûdo iratus, placatus est in filio.

lis. In cœlis autem pater est, in terra homines sumus. Mediator Christus est, qui medius intercedit, ac nos patri suo reconciliat, ut iam simus dilecti patris, in dilecto suo filio. Nam in Epistola ad Ephesios dicit idem Apostolus, Charos nos reddidit per dilectum; per quem habemus redemptionem, per sanguinem ipsius, remissionem peccatorum, iuxta diuitias gratiæ suæ. Omnia hæc plenius intelligentur ex sequentibus.

Omnia uita & salutis plenè in Christo nobis data esse.

Nunc enim demonstro Deum patrem in filio suo dedisse nobis plenè omnia uitæ beatæ & salutis æternæ. Duo commemoro, uitam beatam & salutem æternam. Beatam uitam intelligo uitam sanctam & piam, quam uiuimus tranquillè & honestè in hoc seculo. Salus æterna, est felicitas illa seculi futuri, quam expectamus firma spe. Habemus autem in Christo plenissimam beatæ uitæ doctrinam traditam nobis per Euangelium, in quo & exemplum uitæ Christi comprehendimus. Certe pater cœlestis hunc nobis doctorem proposuit, & dixit, Hunc audite. Et ipse in Euangelio secundum Matthæum, Ne uocemini magistri, inquit: unus enim noster est magister, nempe Christus, qui in Euangelio Ioannis appellatur Lux mundi. Hic alibi quoque testatur doctrinam suam contineri in scriptura sancta: unde & discipulos suos relegat ad scripturas sanctas diligenter legendas. At de his Gentium adeoq; uniuersæ ecclesiæ doctor Paulus, Omnis scriptura, inquit, diuinitus inspirata, est utilis ad doctrinam, ad redargutionem, ad correctionem, ad institutionem, quæ est in iustitia, ut integer sit Dei homo ad omne opus bonum apparatus. Proinde licet totus mundus insanat, traditionumq; uiuarum non scripturarum assertores dentibus frendant, firmum tamen stat stabitq; uerbum Apostoli testificantis doctrinam scripturarum siue Christianam, esse per omnia absolutissimam. De qua re cùm in Decad. 1, primis Sermonibus disputauerim, hic certè sum succinctor. Quod autem attinet ad salutem æternam per Christum nobis plenè paratam siue partam, ita habet res. Salus æterna, est æterni Dei uisio uel perfructio, ergo & cum eodem indissociata coniunctio. Nam Dauid dicit, Satietas gaudiorum in conspectu tuo est, & iucunditates in dextera tua in perpetuum. Et beatus Ioannes, Nunc quidem filij Dei sumus, ait, & nondū apparuit quod futuri sumus. Scimus autem quoniam si apparuerit, similes ei erimus: quoniam uidebimus eum sicuti est. Ceterum in Euangelio dicit Dominus Beati mundo corde: quoniam ipsi Deum uidebunt. Omnes autem homines cordibus præditi sunt impuris: nullus ergo Deum uidebit. Quia nulla impuritas permanet apud ignem consumentem. Salus ergo nobis nisi purgatis communicari non potuit. Atqui sine sanguinis effusione non fit purgatio uel peccatorum remissio: non arietum quidem uel hircorum, sed filij Dei sanguinem puto. Assumpsit itaq; carnem & sanguinem nostrum Dei filius, uenit in mundum, mortem uolens propter nos subire, & sanguinem suum in remissionem peccatorum nostrorum effudit: atq; eo modo credentes purgauit, ut iam mundi queant habitare cum Deo sanctissimo, qui est ignis consumens. Hic uerò locum habent incarnatio Domini nostri Iesu Christi, mors, resurrectio ex mortuis, & ascensio in cœlos, quorum meminimus superius in descriptione Euangelij. His enim constat totum reconciliationis mysterium. De his in præsentia ea de causa fusius non differimus, quòd symbolum Apostolorum exponentes, ea quantum satis esse uidebatur, tractauimus: unde iam repeti & huic negotio applicari possunt.

Solus Christus est uita & salus nostra.

Quòd autem unus uel solus Christus uita & salus nostra sit, & absolutissima quidem salus & uita, potest colligi ex superioribus, nihilo minus adferam testimonia aliquot, quò & firmior & perspicacior fiat Euangelicæ ueritatis sinceritas & ueritas.

ueritas. In solo Christo esse uitam & salutem nostram, ita ut extra Christū nullibi prorsus uel uita uel salus sit, testatur ipse dominus in euangelio dicens, Amen amen dico uobis, qui non intrat per ostium in stabulum ouium, sed ascendit aliunde, ille fur est & latro. Amen amen dico uobis, ego sum ostiū ouium: omnes quot quot ante me uenerunt, fures sunt & latrones. Ecce unicum modò ostium est, quo patet ad uitam aditus. Christus autem hoc ostium est. Qui ergo per alia media quàm per Christum eluctantur ad uitam & salutem æternam, fures sunt & latrones. Christo enim suam suffuratur gloriam, qui solus est & manet saluator: & suas ipsorum animas trucidant. Idem saluator in euangelio dicit, Ego sum uia, ueritas & uita. Nemo uenit ad patrem, nisi per me. An non pauculis his uerbis omnia salutis media exclusit ac repulit, se solum uitam & salutem constituens? Certè locutionis genus, Nemo uenit ad patrem nisi per me, id omnino pollet quod hoc, Per solum Christum peruenitur ad patrem. Iam & Apostoli Christi, Christum solum ita nobis proposuerunt, ut nemo non possit intelligere, extra Christum nullibi inueniri uitam. S. Petrus Apostolus in Actis, Nec est in alio quoquam salus (inquit.) Nec enim aliud nomen est sub cœlo datū inter homines, in quo oporteat nos saluos fieri. Paulus quoque ad Romanos 5. cap. subinde repetit, per unius hominis Iesu Christi iustitiam iustificatos esse omnes credentes. Idem, Per hunc, inquit, annuntiatur uobis peccatorum remissio: & ab omnibus à quibus non potuistis per legem Moysi iustificari, per hunc omnis qui credit iustificatur. Cuius quidem generis & alia profert in 2. cap. ad Galatas. Cōstat ergo per solum Christum credentibus conferri peccatorum remissionem & uitam æternam: quæ sicut extra Christum non sunt, ita per nulla media conferuntur extra Christum. Et nos de Remissione peccatorum, qui præcipuus est Euangelij locus, differuimus copiosius Sermonem 9. Decad. 1. sed & alibi quoq̃.

Iam quòd dominus noster plenè absoluat à peccatis, plenè peccata remittat, *Christus plenè saluat.* plenè saluet, ita ut nihil desiderari possit amplius, adeoq̃ quòd ipse dominus sit plenitudo absolutissima credentium, extra quem credentes nihil uel cupiunt amplius ad uitam & salutem, uel desiderare possunt, ipse rursus in euangelio tradit cum dicit, Omnis qui bibit ex aqua hac, sitiet iterum: quisquis autem biberit ex aqua quam ego dederò ei, uiuet æternū. Et iterum, Ego sum panis uitæ. Qui uenit ad me non esuriet: & qui credit in me non sitiet unquam. Apostoli ergo cum edissent hunc panem cœlestem, id est, cum credidissent in Christū dei filium, multis discedentibus relinquentibusq̃ Christum, rogati num & ipsi abire statuant, respondent, Domine ad quem ibimus? Verba uitæ æternæ habes, & nos credimus & cognouimus quòd tu es Christus filius dei uiuī. En nec uolunt nec possunt deferere dominum. Quia nullus alius est cui se coniungere queant. Solus enim hic uita est & salus credentium, & adeò plenè absoluta, ut in solo acquiescant. Cum doctrina euangelica cōgruit doctrina Apostolica. Paulus enim ad Coloss. In filio, inquit, complacitum est patri uniuersam plenitudinē inhabitare. Et iterum, In filio inhabitat omnis plenitudo deitatis corporaliter, & estis in illo completi. Et in epistola ad Hebr. asserit credentes plenariam habere peccatorum remissionem: quia cessent sacrificia offerri pro peccatis, deumq̃ promittere per Ieremiam prophetam tam perfectam remissionem peccatorum, ut nolit horum uel meminisse unquam. Proinde quicunq̃ Christum fide possident, plenissimè omnia uitæ & salutis possident. Huc pertinet tota ad Hebræos epistola. Huc pertinet epilogus 8. Sermonis Decad. 1. quo recensemus quos nobis in Christo thesauros dederit pater cœlestis.

*In syncera euā-
gelij prædica-
tio.*

Ex his ultro consequitur, illos nondū intellexisse uerum Christi euangelium, neq̃ syncerè prædicare euangelium, quicunq̃ uel non soli uel non plenè omnia salutis & uitæ uni tribuūt Christo domino uero Messia. Impium & blasphemum est, hominibus & rebus homine inferioribus deterioribusq̃ gloriam attribuere Christi. Præcipua Christianæ religionis exercitia huius nihil sibi uendicant. Nam doctrina syncera rectà ad Christum ducit. Oratio in nomine Christi inuocat, laudat & agit gratias. Sacramenta obsignant & figurant Christi mysteria. Opera uero fidei, ex debito, licet interim sponte, fiunt: quia sumus conditi ad opera bona. Imò tantummodo propter Christum Deo placent. Ipse enim uitis est, nos sumus palmites. Ita omnis gloria Christo illibata seruetur: quæ certissima ueri euangelij nota est.

*Summa euā-
gelij.*

Haftenus uerò audiuius, Deum patrem misericordiarum gratuita sua misericordia humani generis misertum, cum luto tartareo infixum, imò immersum prorsus inhæreret, filium suum unigenitum, ita ut in prophetis promiserat, misisse in mundum, qui è luto extraheret nos, nobisq̃ omnia uitæ & salutis plenè exhiberet. In eo enim reconciliatus est, qui pro nobis incarnatus, mortuus, ex mortuis iterum excitatus, & in cœlum receptus est.

*Omnium esse
salutem euā-
gelicam.*

Et quamuis ex his omnibus utcūq̃ colligi possit, quorū sit illa salus, & quibus annuncianda uideatur gratia, res tamen ipsa postulat ut expressè & disertè ostendamus, Christum & Christi gratiam euangelio allatam uel annunciatam pertinere ad omnes. Minimè enim fingere oportet, duos esse in cœlis positos libros, in quorum altero inscripti legantur saluandi, ac necessitate quadā irrefragabili quidam saluandi, utcūq̃ reluctentur uerbo Christi & atrocita designent flagitia: in altero autem consignatos contineri damnandos, qui non possint non, quantumuis religiosè uiuant, damnari. Teneamus potius sanctum Christi euangelium generaliter uniuerso mundo prædicare gratiam Dei, remissionem peccatorū, & uitam æternam. In hac uerò sententia oportet confirmare mentes uerbo dei, collectis aliquot scripturæ sanctæ locis claris, & minimè dubijs aut obscuris. Cuius quidam generis sunt illæ sententiæ, Benedicentur in semine tuo omnes gentes orbis. Gene. 22. Omnis qui inuocarit nomen domini, saluus erit Ioelis 2. Omnes nos quasi oues errauimus: & posuit deus in eo iniquitatem omnium nostrum. Isaia 53. Omnes sitientes uenite ad aquas. Isaia 55. Innumera sunt huius generis in ueteri testamento testimonia. In euāgelio dicit dominus, Omnis qui petit accipit, & quicunq̃ querit inuenit, &c. Matthæi 7. Venite ad me omnes, qui laboratis & onerati estis, & ego refocillabo uos. Matth. 11. Docete omnes gentes, baptisantes eos in nomen patris, &c. Matthæi 28. Ite in mundum uniuersum & prædicate euangelium omni creaturæ. Qui crediderit & baptisatus fuerit, saluus erit. Marci 16. Sic Deus dilexit mundum, ut filium suum unigenitum daret, ut omnis qui credit in eum non pereat, sed habeat uitam æternam. Ioan. 3. In Actis Apostolorum dicit beatus Petrus, Reipsa comperio, quod non sit respectus personarum apud deum, sed in quauis gente, qui timet ipsum, & operatur iustitiam, is acceptus est illi. Acto. 10. Paulus quoq̃ ad Romanos 3. Iustitia, inquit, dei per fidem Iesu Christi in omnes, & super omnes qui credunt. Et 10. cap. Idem dominus omnium est, ait, diues in omnes inuocantes se. In epistola ad Titum dicit, Apparuit gratia Dei saluifica omnibus hominibus. Et in prima ad Timoth. 2. cap. Deus cunctos homines uult saluos fieri, & ad agnitionem ueritatis uenire. Hac & alia his similia certè clara sunt testimonia, quibus tutò nituntur omnes p̃ij.

*Quare nō sal-
uentur omnes
homines.*

Si uerò rogas qui fiat quod non omnes salui fiant, cum dominus uelit omnes homines

homines saluos fieri, & ad agnitionem ueritatis uenire? Respondet dominus in euangelio & ait, Multi quidem sunt uocati, pauci uerò electi. Id quod adhuc clarius & plenius exponit Luc. 14. ubi reddit causas in parabola quare bona hominum pars salutem æternam non consequatur, quia terrena perituraque præfert cœlestibus. Alius enim aliud suæ prætexebat inobedientiæ, Hic uillam emerat: ille iuga bouum: erat qui uxorem duxisset. Ita in euangelio secundum Ioannem dicit dominus, Hæc est condemnatio, quòd lux uenit in mundum, & homines magis dilexerunt tenebras quàm lucem. Congruit cum doctrina euangelica sermo apostolicus 2. Cor. 4. cap. Et in 1. ad Tim. 4. cap. dicit, Apostolus, Deus est seruator omnium hominum, maximè fidelium. Vnde colligimus deum in prædicatione euangelij sui abs quolibet nostrum requirere fidem: cum aliàs constet fide participes nos fieri omnium bonorum Christi. Et certè correlatio est inter fidem & euangelium. Dominus enim in euangelio secundum Marcum prædicationi euangelij fidem coniungit. Et Paulus dicit sibi ministerium euangelij commissum in obedientiam fidei. Idem, Euangelium, inquit, est uirtus dei ad salutem omni credenti. Idem ad Rom. 10. gradatione quadam ostendit euangelium fide percipi. Vt autem fides possit in animis hominum legitimè plantari, necesse est præire prædicationem poenitentiae. Vnde in descriptione euangelij sub finem dixi, modò peccata nostra agnoscere credamus in Christum: id est, dominus erit saluator noster conferens nobis uitam, si agnouerimus peccata, crediderimusque in eum. Ideoque hic locum habent poenitentia & fides. De Fide disputauit Sermone 4. 5. & 6. Decad. 1. De Poenitentia postea differam Sermone peculiari: hic summam duntaxat rerum, & quantum illustrando euangelio satis esse putauero, perstringam.

Saluantur fideles.

Ipse dominus noster requirit in prædicatione euangelica, poenitentiam & fidem: nec alia uia, cum ipse euangelium prædicaret, processit. Marcus enim, Venit Iesus in Galilæam, inquit, prædicans euangelium regni dei, & dicens, Impletum est tempus, instatque regnum Dei, resipiscite & credite euangelio: nec aliter discipulos suos instruxit, cum eos ad prædicandum euangelium nationibus amandaret. Lucas enim habet, Christus discipulis suis dixit, Sic scriptum est, & sic oportebat Christum pati & resurgere à mortuis tertio die, & prædicari in nomine eius poenitentiam & remissionem peccatorum in omnes gentes. Magistrum sequutus discipulus Paulus in Actis, Scitis, inquit, ut nihil suffugerim eorum, quæ essent in rem uestram, quin annunciarer uobis & docerem uos publice & domesticè, testificans Iudæis simul & Græcis, eam quæ erga deum est poenitentia, ac fidem quæ est erga dominum nostrum Iesum. Certè in epistola sua ad Romanos, qua methodicè tractat euangelium, auspicatur euangelij prædicationem à peccato, Iudæos & Gentes peccati conuincens. Hoc autem facit hoc consilio & in hunc finem, ut quisque in semetipsum descendens agnoscat se nihil habere iustitiæ, sed ex sua natura filium esse iræ, mortis uel condemnationis, non quòd talis peccatorum agnitio per se nos efficiat deo gratos, aut mereatur remissionem peccatorum ac uitam æternam, sed quòd hominis animum suo modo præparet ad percipiendam fidem in Christum, adeoque ad ipsum Christum amplectendum, qui est iustitia nostra. Nam ualidi non opus habent medico, sed languidi. Ergo qui arbitrantur se sine peccatis mundos, uel iustos esse, Christum aspernantur: contra qui animi morbos sentiunt, & ex animo fatentur se esse peccatores & iniustos, diffidentes suis meritis & uiribus, anhelant festinant ad Christum. Quod cum fit, offert se Christus in euangelio, promittens eis peccatorum remissionem & uitam æternam: quippe cum uenerit sanandis agris saluandisque peccatoribus. Cæterum promissio fide non operibus

Euangelium docet poenitentiam & fidem.

Quomodo recipiatur Christus.

recipitur, ideoq; euangelium & in euangelio Christus fide recipitur. Etenim distinguendum erit diligenter inter praecepta & promissiones. Nam hæ recipiuntur fide; illa perficiuntur operibus. Vnde Paulus dixisse legitur, Si ex lege est hæreditas, nõ iam est ex promissione. Atqui Abraham per promissionem donauit Deus. Idem Apostolus ad Romanos cõferens inter se legem & euangelium, Iustitia, inquit, quæ est ex lege sic habet, Qui fecerit ea, uiuet in eis. Fidei autem iustitia sic habet, Si credideris, saluus eris. Lex itaq; nititur operibus, quibus iustitiam tribuere uidetur. Sed quia nemo factis præstat legem, nemo certè per facta uel legem iustificatur. Euangelium non innititur operibus. Nam peccatores nihil in seipsis agnoscunt quàm peccatum. Totos enim corruptos se esse sentiunt: idcirco confugiunt ad misericordiam Dei, cuius promissis fidunt, sperantes se gratis consequuturos ueniam, & propter Christum receptos esse in numerum filiorum Dei. Plura hic dicere de fide in dominum Iesum, de remissione peccatorum hæreditateq; uitæ æternæ, nisi in i. Decad. id fusè proposuissem. Hinc obiter colligimus, Euangelium non syncere prædicari, quando docetur propter opera uel merita nostra Christi uitam nobis communicari. Nam gratis sine omni respectu operum nostrorū, siue præcedentium, siue sequentium, per fidem saluamur.

Fide non operibus recipi Christum.

Et quamuis hoc argumentum tractauerim semel & iterum in hisce nostris sermonibus, quia tamen in eo uoluitur cardo doctrinæ euangelicæ, & hoc dogma (nempe fide non operibus recipi Christum) à multis acerrimè oppugnatur, duos tantum locos, sed maximè illustres, pro eius declaratione & confirmatione adducam, alterum quidem ex euangelio Christi domini, alterum ex epistolis sancti Pauli.

Euangelium quo modo prædicauit Christus.

Dominus noster Iesus Christus compendium ueræ salutis traditurus, id est, euangelium uitæ prædicaturus Nicodemo, in euangelio Ioannis, auspicatur à penitentia, totumq; sibi ipsum eripit Nicodemum, nullis relictis ei meritis quibus fidere possit. Dum enim primam hominis natiuitatem prorsus damnat, ut quæ ad uitam æternam nihil conferat consequendam, quid quæso reliquit Nicodemo, in quo gloriari queat? Disertè enim dicit, Amen amē dico tibi, nisi quis natus fuerit ex supernis, non potest uidere regnum Dei. Si prima natiuitas & eius facultates ad regnum Dei possent prouehere, quid quæso opus erat natiuitate secunda? Secunda natiuitas fit opera spiritus sancti, qui cœlitus in corda nostra transfusus, inducit nos in cognitionem nostri, ut faciliè perspiciamus firmiterq; teneamus, adde & sentiamus in carne nostra non esse uitam aut iustitiam ullam: & proinde neminem suis uiribus aut meritis seruari. Quid ergo? Pergit spiritus & docet, sicuti & uox euangelij foris personat, fide nos per meritum filij dei seruari. Nam in euangelio ait dominus, Nemo ascendit in cœlum, nisi qui descendit de cœlo, filius hominis qui est in cœlo. Clariùs enim alibi dicit, Nemo uenit ad patrem nisi per me. Et iterum ad Nicodemum, Sicut moyses exaltauit serpentem in deserto, ita exaltari oportet filium hominis, ut omnis qui credit in eum non pereat, sed habeat uitam æternam. Moyses autem suspendit serpentem in deserto ad salutem morientium è ueneno uel ex morfu serpentium. Moriebantur enim euestigio quos pupugissent dipsades. Quòd si quis ueneno infectus æneum aspexisset serpentem, innoxia reddebatur ueneni uis, neque moriebatur afflictus. Nec erat in castris Israelitarum ullum remedium aliud, quàm hoc unicum: hoc qui spreuit, interijt. Non depellebatur enim uis ueneni, non seruabatur uita morientis, uel precibus ullis, uel sacrificijs multis, uel herbis salutaribus, uel ullo alio medicamine, uel ulla alia ratione. Si quis uoluisset euadere mortis periculum, serpentem æneum suspensum inspicere

De regeneratione copiosius dicitur in Sermonem de Penitentia.

inspicere oportebat. Porro serpens ille aneus Christum dominum nostrum praefiguravit: qui sublatus in crucem salus unica constituitur à Deo. Sed quibus obtinuit illa salus? Aspicientibus exaltatum. Aspicere interpretatur dominus, & reponit pro eo credere. Proinde nulla opera, nulla media alia, nulla merita seruant nos à morte aeterna, à uis peccati seu ueneni ab antiquo serpente nobis omnibus afflati; Sola fides, quae Christum credit propter peccata nostra exaltatum, in quo una uita sit ac salus certissima, uiuificat. Audi quid his praeterea subiungat dominus, Nicodemum in uera fide adhuc plenius erudiens, & causam salutis nostrae meram Dei gratiam constituens, quae fide percipiatur. Sic enim Deus dilexit mundum, inquit, ut filium suum unigenitum daret: ut omnis qui credit in eum non pereat, sed habeat uitam aeternam. Non enim misit Deus filium suum in mundum, ut condemnaret mundum, sed ut seruetur mundus per eum. Qui credit in eum, non condemnatur: qui uero non credit, iam condemnatus est: quia non credit in nomen unigeniti filij Dei. En quid poterat dici clarius? Fide Christi participes efficimur. Fidem toties repetendo inculcauit, ne quis de tam illustri doctrina uel tantillum addubitaret. Si uero hic parum apud te ualet Christi autoritas, cuius quæso ualebit? Sed ualet, sat scio. Audi tamen adhuc dilectum domino discipulum in epistola sua hæc domini uerba ueluti declarantem declarandoque reperentem & toti mundo ualidissime inculcantem atque clamantem, Si testimonium hominum accipimus, 1. Ioan. 3. testimonium Dei maius est: quoniam hoc est testimonium dei, quod testificatus est de filio suo, Qui credit in filium, habet testimonium in seipso. Qui non credit deo, mendacem facit eum: quia non credidit in testimonium quod Deus testatus est de filio. Et hoc est testimonium, quod uitam aeternam dedit nobis deus, & hæc uita in filio eius est. Qui habet filium, habet uitam: qui non habet filium dei, uitam non habet. Habere autem filium dei quid aliud est quam credere? Nam hic sensus colligitur ex præcedentibus, quæ tam sunt clara, ut his aliquid addere, non sit agere aliud, quam exorientem solem iuuare aut illustrare uelle candela aliqua sebacea.

Iam ad locum Pauli descendimus. Extat is in 3. & 4. cap. ad Romanos, Absque Euangelium quod
modo prædicauit
uerit Paulus. lege, ait, iustitia dei manifestata est, dum comprobatur testimonio legis & prophetarum. Prædicat hoc loco Paulus euangelium luculentissime. Non enim scio si ullibi hoc fecerit clarius. Docet autem quomodo iustificemur apud deum, quæ sit uera iustitia & salus hominum, & per quid obueniat nobis. Dicit iustitiam dei, id est, quam confert deus, uel quæ consistit & ualet coram deo, reuelari absque lege, id est, obtingere nobis nullo legis adminiculo, nimirum nullo præsidio uel merito operum legis. Quod enim attinet testimonium legis, adde & prophetarum, testificantur concorditer, dei iustitia iustificari credentes. Porro quæ nam sit dei iustitia mox sequitur, Iustitia uero dei per fidem Iesu Christi in omnes & super omnes qui credunt. Iustitia, inquit, qua de loquimur, quæ iustificat & saluat, non est hominis uel humana, sed dei uel diuina iustitia. Vt enim solus deus iustus est, ita iustitia dei uera & sola est iustitia saluans. Comunicat is eam per fidem Iesu Christi, nempe si credamus in Christum. Nec hic excluditur à iustitia uel salute ullus. Diserte enim dicit Paulus, In omnes & super omnes, qui credunt. Proinde omnes credentes in Christum Dei filium pro iustis reputat deus. Causam autem cur dei non hominis iustitiæ salutem tribuat, uel cur euangelium dei nobis iustitiam commendat, subiungit, & ait, Non enim est distinctio: omnes peccauerunt ac destituuntur gloria Dei. Quia enim omnes homines natura sua gloria dei destituuntur, carentes utique uera imagine dei ad quam erant conditi ab initio, certe omnes iniusti sunt ac peccatores: proinde nulla est in eis iustitia, nihil habent quo apud

Deum glorientur. Peccatores enim à tribunali Dei quid obsecro reportant aliud, quàm confusionem & ignominiam? Et quia omnes homines tales sunt, non temere subdit Apostolus, Iustificantur gratis per illius gratiam, per redemptionem in Christo Iesu: quem proposuit Deus propitiationem uel reconciliationem per fidem in eius sanguine. Quod perinde est ac si dixisset, Mera dei gratia uel misericordia, & nullo merito planè, propter Christum iustificantur homines: si uidelicet credant quòd deus filium dederit mundo, ut sanguinem suum funderet, & peccatores purgatos reconciliaret Deo. Quibus uerbis significantissimè modus & ratio tota sanctificandi, purificandi, uel iustificandi plenissimè est exposita. Sed præstat Apostoli uerba repetere, & penitius considerare. Iustificantur gratis, ait. Quare uero gratis? Quia per meram dei gratiã, nullo se nostro merito aut opere admiscen- te. Omnes enim homines peccatores sunt: unde nihil quod adferat habent: ideoq; gratuito iustificatur. Nam idem Apostolus in 11. ad Romanos cap. Si per gratiam, ait, saluamur, non iam ex operibus: quandoquidem gratia, iam non est gratia: sin ex operibus, iam non est gratia. Verùm sequitur mox in Paulo, quod clarissimè alioqui negotium adhuc illustret magis, Per redemptionem, quæ est in Christo. Gratia meræ opus est salus & iustitia nostra: quia redempti sumus. Quod enim nos nostrasq; uires & opera nostra attinet, serui eramus diaboli & mortis, quia peccatores. Deus autem misso filio redemit nos, cum adhuc dei hostes uincti tene- remur. Ergo gratis redemit: quod & Isaias propheta in 52. cap. non obscuris uer- bis futurum prædixit. Cæterum, non est in alio quoquam, quàm in Christo domi- no nostro, salus uera. Proposuit enim æterno suo consilio cœlestis pater filium suum dominum nostrum Iesum Christum propitiationem, nimirum ut is esset re- conciliatio nostra, propter quem placatus nos adoptat in filios dei. Verùm non alia ratione, quàm per fidem in eius sanguinem, id est, si credamus missum à pa- tre filium effudisse sanguinem, quo purgatos nos iustos & sanctos statuatur deo pa- tri. Vbi iterum uidemus, fide in Christum gratis constare salutem nostram.

His ad hunc modum expositis, protinus quàm latè pateat redemptionis, iusti- ficationisue beneficium indicans, subdit, Ad ostensionem iustitiæ suæ propter re- missionem præteritorum peccatorum quæ deus tolerauit: ad ostendendam iusti- tiam suam in præsentis tempore. Proposuit deus Christum, inquit, unicam propi- tiationem, ut ostenderet unicam esse omnium seculorum iustitiam, ipsum inquã, Christum, & eorum quidem iustitiam qui credunt. Duo autem tempora com- morat, Vetus illud patrum, & nostrum quo hodie uiuimus. Vetus præcedit ad- uentum Christi, nostrum sequitur extenditurq; usque in finem seculi. Et ueteris quidem seculi peccata tolerauit deus sua illa longanimitate propter Christum, per quem condonauit. Nec nobis hodie aliam proponit iustitiã quàm Christum fide percipiendum. Nam minimè obscuris uerbis ab Apostolo subiungitur, In hoc ut ipse sit iustus, & iustificans eum qui est ex fide Iesu. Quasi dicat, Hæc aut huc ten- dunt, ut intelligamus omnes homines esse iniustos & peccatores, solum autem deum esse iustum, extra quem nulla sit iustitia: iustitiam uero suam omnibus com- municare quotquot credunt in Christum, nimirum quòd propter ipsum nobis placatus sit pater, & quòd propter ipsum reputemur iusti & sancti.

His Apostoli uerbis refutantur duo ualde impij & blasphemij errores quorun- dam. Alter eorum est qui aiunt patres nostros non fide in Christum, sed per legem & merita propria esse iustificatos. Christum enim passum esse non pro illis, sed duntaxat pro sui seculi hominibus & insequentibus. Alter est dicentium Christum pro ueteribus, pro originali duntaxat peccato, non pro nobis aut pro nostris om- nibus

nibus peccatis perlitasse, ideoque nos pro nostris oportere satisfacere. Apostolus autem Paulus hoc loco condemnat utranque sententiam. Nam & beatus Ioannes Euangelista S. Paulo accinens, Sanguis, inquit, filij Dei emundat nos ab omni peccato. Ipse enim est propitiatio pro peccatis nostris: non pro nostris autem tantum, sed etiam pro totius mundi. Itaque meritum redemptionis Christi extendit se ad omnes utriusque testamenti fideles.

Pergit Apostolus Paulus & ijs quæ proposuit infert, Vbi igitur gloriatio? Exclusa est. Per quam legem? Operum? Non, imò per legem fidei. Colligit doctrina Euangelica hæcenus proposita de fide iustificante, omnem propriæ iustitiæ gloriationem, omnem de meritis iactationem sublatam euanuisse. Non per legem operum, id est, per doctrinam de operibus, quæ nos ferè inflare solet: sed per legem fidei, id est, per doctrinam fidei, quæ euacuat nobis nihil nisi humilem inopiæ confessionem relinquit, gratiaque in Christo omnia tribuit. Tandem uerò principalem propositionem colligens infert, Constituimus ergo, fide iustificari hominem absque operibus legis. Hæc summa est & breuissima totius Euangelij, iustificari nos, id est, absolui à peccatis, à lata mortis uel condemnationis sententia, sanctificari autem & adoptari in numerum filiorum Dei, fide, id est, fiducia in nomen Christi, qui datus est nobis saluator à patre unicus. Et hæc nominatim excluduntur opera, ne ulla nobis suppeditetur occasio implicandi fidem operibus, aut operibus eam tribuendi gloriam, quæ uni fidei uel potius Christo Domino, cui fides innititur, debetur.

Propositionem autem propositam confirmat mox argumentis, simul indicans, hanc salutem communem esse Iudæis & Gentibus, dicens, An Iudæorum Deus tantum? An non & Gentium? Certè & Gentium. Quandoquidem unus Deus qui iustificabit circumcisionem ex fide: & præputium per fidem. A natura Dei quod dixit confirmat. Vnus est duntaxat Deus natura sua, uita & iustitia. Et hic est Iudæorum & Gentium Deus: ergo utriusque gentis uita est & iustitia: quam fide confert: fides ergo iustificat. Hoc declaratur Cornelij Centurionis exemplo. Iustificatur enim, imò iustificatus uisibiliter demisso spiritu sancto comprobatur, cum nec circumcissus esset, nec seruasset legem, sed audisset modò Euangelij prædicationem ac credidisset in Christum. Cæterum non solum Cornelium Deus sic iustificauit, sed omnes alias gentes iustificabit fide: neque aliter quàm per fidem Iudæos quoque purgabit. Sequitur in Paulo, Legem igitur irritam facimus per fidem? Absit. Imò legem stabilimus. Solent enim operum uel potius iustificationis operum assertores obijcere, Si fides in Christum iustificat sola, inutilis est ergo lex uel legis doctrina. Quorsum enim præcipitur ut bona faciamus opera, si non iustificat? Respondet Apostolus, Fide non aboleri legem, imò stabiliri magis. Cum enim fides in Christum rectà tendit, in quo omnem plenitudinem querit & inuenit: ac lex ipsa pædagogus est ad Christum, omniaque sub peccatum concludit, ut iustificatio ex fide detur credentibus, clarum est fidei doctrina legem minimè destrui aut obscurari, sed confirmari, illustrarique.

Pergit Apostolus in cōfirmatione sua, & dicit, Quid igitur dicemus Abraham patrem nostrum inuenisse secundum carnem? Nam si Abraham ex operibus iustificatus fuit, habet quod gloriatur: at non apud Deum. Quid enim scriptura dicit? Credidit Abraham Deo, & imputatum est ei ad iusticiam. Multa quidem sunt sanctorum patrum exempla: uerum Apostolus sibi ex omnibus Abrahæ solius proposuit tractandum. Nam in scripturis appellatur pater credentium. Vnde certum est, liberos ad eum modum fore iustificandos, ad quem modum pater iustificatus

Quomodo Abraham pater
fidelium sit iu-
stificatus.

docetur. Id quod Apostolus disertis uerbis expressit in fine capituli 4. Deinde Abraham multis clarus fuit operibus bonis, præ ceteris sanctis patribus; ergo si quis alius potuisset iustificari suis operibus uel meritis, potuisset præ ceteris Abraham. Sed quia fide non operibus iustificatus est, constat omnes sanctos fide non operibus & iustificatos esse, & iustificari. Præterea uixit ante legem per Moysen reuelatam annis 430. unde opera eius nequaquam possunt à contentiosis oppugnationibus iustificationis fidei, appellari opera legis. Ergo quæ fecit opera, ex fide fecit, & opera eius fuerunt opera fidei, nec tamen ipsi est iustificatus, sed fide. Manet ergo omnis iustificationis gloria fidei, & illibata quidem ac impermixta. Quid, inquit, dicemus Abrahamum patrem nostrum inuenisse secundum carnem, quatenus uidelicet homo est & nos ex ipso? Quid inquam dicemus illum meruisse? Ad hanc interrogationem reponenda est responsio, Nihil inuenit, nihil operibus suis meruit. Sequitur enim probatio, Si operibus meruit aliquid uel iustificatus est Abraham, habet quod gloriatur. Atqui non habet quod gloriatur: ergo operibus non est iustificatus. Deus enim solus iustus est, & hanc suam gloriam sibi incommunicatam alijs soli retinet, iustificans gratis eos qui sunt ex fide Iesu Christi, ut laudetur gratia eius. Cæterum ipse Paulus adducto scripturæ loco, ostendit Abrahamum non habuisse unde gloriaretur. Quid enim, inquit, scriptura dicit? Credit Abraham Deo, & imputatum est ei ad iustitiam. En clarissime dicit scriptura Abrahamum fide esse iustificatum, imò fidem imputatam esse pro iustitia, adeoque Abrahamum propter fidem iustum fuisse reputatum à iustissimo Deo. Sed audiamus ipsum Paulum instituto suo locum scripturæ applicantem. Sequitur ergo, Ei uerò qui operatur, merces non imputatur secundum gratiam, sed secundum debitum. Porro ei qui non operatur, sed credit in eum qui iustificat impium, imputatur fides sua ad iustitiam. Quæ sanè uerba in huiusmodi ratiocinationes breues concludi possunt, Quisquis opere suo aliquid promeretur, ei certè merces ut debita redditur, non gratis imputatur. Imputatur autem Abrahamæ fides ad iustitiam: ergo iustitiam non ut mercedem debitam, sed gratuito accepit. Et iterum, Ei qui non operatur, sed credit in eum qui iustificat impium, imputatur fides ad iustitiam. Abrahamæ autem imputata est fides ad iustitiam: ergo fide consequutus est iustitiam, non operibus. Habet autem emphasim quod dicit, Sed credit in eum qui iustificat impium. Significatur enim iustificandum nihil afferre, nisi miseriam, imò impietatis propriæ agnitionem, quæ misericordiam quærat. Intelligit enim se destitui operibus perfectis, & coram iudicio Dei subsistere potentibus. Confugit ergo ad misericordiam Dei, pro certo præsumens, fidei iustitiam esse præsidium peccatoris gratuito saluandi. Obseruandum hinc iustitiam Christianam dici & esse imputatiuam. Quod sanè omnem nostram gloriationem confringit. Opponitur enim debito imputatio. Nullo nobis debito obstringitur Deus propter nos aut propter nostra opera, nisi quatenus ipse se nobis obstrinxit ex misericordia. Et multa sunt in nobis quæ iustitiæ perfectionem impediunt. Vnde Dauid clamauit, Ne intres in iudicium cum seruo tuo: quia non iustificabitur in conspectu tuo ullus uiuens. Deus ergo gratuito nobis imputat iustitiam fidei, id est, reputat nos pro iustis, quia credimus ipsi per filium. Sic in Euangelica parabola legimus Dominum dixisse, Cum autem debitores non essent soluendo, condonauit utrisque debitum. Condonat enim & nobis debita siue peccata Deus: non reputans illa nobis: sed nos pro iustis habens propter Christum.

*Christianorum
iustitia imputatiua.*

Clarissime etenim testificans in Epistola ad Corinthios secunda idem hic Apostolus, dicit, Erat Deus in Christo mundum sibi reconcilians, non imputando homini-

hominibus peccata. Deinde continuo post adiicit, Eum qui peccatum non nouerat, pro nobis peccatum fecit, ut essemus iustitia Dei in illo. Quid apertius requiras, quam nos coram Deo iustos censerí, quia Christi sacrificio expiata sint peccata nostra, ne amplius sub reatu nos teneant?

Pergimus & alia S. Pauli argumenta, non minus firma quam hæc hætenus fuerunt, recensere. Sequitur, Quemadmodum & Dauid explicat beatificationem hominis, cui Deus imputat iustitiam absque operibus. Beati quorum remissæ sunt iniquitates: & quorum obiecta sunt peccata. Beatus uir, cui non imputauerit Dominus peccatum. Principio claris & disertis uerbis quid intendat adserere uel confirmare, exprimens constituit, nempe sanctis Deum imputare iustitiam absque operibus. Quid poterat dici clarius? Id ut commonstret testimonium Dauidis profert, quod membra ferè tria habet. Principio, Beati, inquit, quorum remissæ sunt iniquitates. Deinde, Beati quorum obiecta sunt peccata. Postremo, Beatus uir cui non imputauerit Deus peccatum. Vis autem argumentationis seu demonstrationis est in uerbis Remittere, Obtegere & Non imputare. Remittit creditor debitori quod non numerauit, siue uerò numerare possit siue non possit. Nos Deo hinc annuere nihil possumus. Remissio ergo meræ liberalitatis & gratiæ munus est. Non enim potest creditor remittere quod annumeratum est. Cum hoc facit uocabulum Donare, & donum in scripturis, in hac eadem causa eodem modo usurpatum. Vnde Paulus, Deus Abraham donauit, ait, hæreditatem: ergo non meruit operibus. Obtegitur autem res aliqua foeda oculos offendens hominum, interim uerò res foeda latet adhuc sub tectorio, licet oculis hominum non appareat. Et peccata nostra contegit misericors Dominus, non ut non sint, sed ne appareant aut iudicentur. Id quod gratiæ est munus, non meriti. Tectoriū enim aliud non est quam sanguis filij Dei: propter hunc enim non dānamur peccatores. Iam uerò iure posset nobis dominus imputare peccatū: sed ex gratia non imputat. Omnia hæc euidenter confirmant atque demonstrant iustitiā gratuitā per fidē absque operibus imputari nobis.

*Quid Dauid
censere de iu-
stificatione.*

Idem hic Pauli ex Dauid sumptus locus & alia nobis controuersa dogmata discutit & illustrat. Discimus enim quod iustificatio aliud nihil sit, quam beatificatio, peccatorū remissio, & adoptio in numerum filiorum Dei. Discimus Paulum loqui non tantum de operibus legis ceremonialibus, sed de omnis generis sanctorum bonis operibus. Discimus item remitti & condonari & peccata & iniquitates, id est, omnia omnis generis peccata fidelium. Discimus præterea plenè remitti peccata, non culpam duntaxat sed etiam poenam: quam quidam aiunt retineri: non enim imputat peccata. Alibi dicit se peccatorum nullam prorsus memoriam habiturum. Postremo discimus satisfactiones pro peccatis ab hominibus inuentas, uanissimum esse commentum, ex diametro pugnant cum doctrina Apostolica.

Adduxi hucusque locos maximè illustres, alterum quidem ex Euangelio Christi, alterum ex Epist. ad Roma. Pauli, quibus demonstrare uolui, Christum per Euangelium nobis annunciatum, non operibus sed fide recipi: ac spero me diuinis testimonijs rem maximi momenti sic declarasse, ut nemo sit porro qui anceps & dubius hereat. His illud maximè certè necessarium adiicio, omnibus in ecclesia Christi sanctis & bonis uiris modis omnibus annitendum, ut impolluta & sincera hæc Euangelij doctrina maneat. Nullo enim modo admittendum est, ut iustificationis portio fidei & misericordiæ Dei, portio operibus fidei & meritis nostris transcribatur. Id enim si fiat, actum est de Euangelio. Vrgendum ergo unice & incessanter omnibus nobis censeo, fide absque operibus, gratia, inquam, & misericordia Dei per solum Christum iustificari, saluari uel beari credentes. Ac multas

quidem ob causas hoc dogma Euangelij syncerum & incommixtum seruari oportere in ecclesia arbitror, maxime uero propter has sequentes.

*Quare dogma
de fide absque
operibus iusti-
ficante, synce-
rum in ecclesia
retinendum.*

Principio constat iam saepe repetitam doctrinam de gratia Dei in filio suo unico per solam fidem iustificante, tot inde à mundi exordio diuinis testimonijs, demonstrationibus, determinationibusque, etiam irrefragabilium conciliorum, & propositam & inculcatam esse, ut ipse omnium seculorum in ueritate coelitus reuelata consensus, sanctissimorumque in toto mundo hominum autoritas nos inuitet ad retinendum dogma illud impollutum. Habemus beati patris nostri Abraham iustificationem non ab obscuro aliquo auctore, sed à doctore gentium organoque Dei selectissimo Paulo, paucis ante expositam. Habemus gloriosissimi regis Dauidis, uiri parati secundum cor Dei, proauis Christi Domini nostri, doctrinam de iustificatione ab eodem enarratam Apostolo Paulo. Fuerunt autem in ecclesia Dei semper primae autoritatis Abraham atque Dauid. Quibus accedit totum omnium prophetarum collegium. Petrus enim Apostolus, Christo omnes prophetas, ait, testimonium ferunt, quod remissionem peccatorum accepturus sit per nomen eius quisquis crediderit in eum. Sed & modo ex ore Pauli audiuius, iustitiam Dei gratis per fidem absque lege collatam, comprobari testimonio legis & prophetarum. Habemus ipsum quoque Dei filium Iesum Christum Dominum nostrum, autoritate omnes in mundo praestantissimos longe excellentem. Is ueluti Concilijs quibusdam celebratis definit, quod modis omnibus retinendum suademus. Collectis enim discipulis suis apud Caesaream Philippicam, interrogauit quid de ipso sentiant. Respondentibus autem uariè, ex diuersis uulgi opinionibus, certam ex ipsis confessionem requirit. Hic Petrus omnium nomine, Tu es, inquit, Christus ille filius Dei uiuentis. Ad quem Dominus dixit, Beatus es Simon Bar Iona, quia caro & sanguis non reuelauit tibi, sed pater meus qui est in coelis. Duo his determinat. Prius, Veram fidem beatificare. Nec dubium quin beatificandi uerbo utatur sicuti modo in Paulo usurpatum ex Dauide audiuius. Posterius, Fidem beatificantem non esse opus nostrae naturae, sed donum Dei coeleste. Deinde uero Simoni Petro ex memorabili illa uerae fidei confessione nomen imponit, ad aeternam rei memoriam, & ad mysterij huius significationem in omnium animis retinendam. Petrus Christum petram erat confessus. A petra ergo Petrum denominat, quasi tu dicas uiuo lapidi uiuum impositum, & à Christo Christianum. Imò ne quis uniuersale negotium ad catholicam ecclesiam pertinens, ad unum Petrum astringeret, ipse Dominus uniuersali ecclesiae ista adaptat, & dicit, Et super hanc petram aedificabo ecclesiam meam: & portae inferorum non praeualebunt aduersus eam. Quasi dicat, Quod modo in te factum est Petre, posthac fiet in omnibus fidelibus. Tu per fidem mihi petrae impositus & membrum ecclesiae factus es. Constituo ergo, ut quisquis me petram confitetur, sit membrum ecclesiae, beatus, iustus, à diabolo & ui mortis liberatus. Erit confessio tua, id est, ego Christus Dei filius, quem confessus es, fundamentum ecclesiae: cui qui fide imponuntur, salui & beati futuri sunt. Nam & Paulus dixit, Fundamentum aliud non potest poni, quam quod positum est, quod est Iesus Christus. Et Ioannes Apostolus, Haec est uictoria, ait, quae uicit mundum, fides uestra. Iam ne Petrus cum alijs condiscipulis nesciret qua uia alij homines in consortium ecclesiae & communionem cum Christo admitterentur, subiungit protinus, Et dabo tibi clauces regni coelorum: & quicquid solueris in terra, erit solutum in coelis, &c. Clauces autem dedit cum Apostolos ad praedicandum Euangelium amandauit. Praedicatione ergo Euangelij (quae clavis est regni coelorum) aperitur coelum, & indicatur uia quomodo Christo & ecclesiae

ecclēsiæ inserti hæredes fiamus uitæ æternæ, nimirum per fidem in Christum, quam docet nos Christi Euangelium. Hæc de Cæsarien. Concilio hæctenus. Extat apud Ioannem aliud, Capernaïticum, frequens & celebre. In magna enim discipulorum & hominum frequentia determinat, fide in Christum uitam parari æternam; nec aliam esse uiam ad uitam perueniendi, nisi edamus eius carnem, & bibamus eius sanguinem: id est, nisi in ipsum credamus. Cumq; inter auditores schisma fieret multis à Christo deficientibus, rogat discipulos suos intimos, num & ipsi uelint apostatare, respondit Petrus omnium nomine, Cum in te Christe salus sit & uita, non possumus uita participare cupientes à te diuertere, ideoq; per fidem tibi firmiter & æternum adhærebimus. Porro Concilia hæc commemoranda ueniunt Apostolica duo. Alterum quidem nemo negauerit fuisse uerè œcumenicum. Erant in eo uiri religiosi ex omni natione earum quæ sub cœlo sunt. In eo disertissimis uerbis docuit Petrus, Christum esse saluatorem mundi, cui qui credit habeat uitam æternam. Notus est locus Actorum cap. 2. Apud principes Iudæorum idem Apostolus demonstrat non in alio quàm in Christo esse salutem. Extat locus in Actis Apostolorum capite 3. Idem facit apud Gentium primitias, apud Cornelium & suos cap. 10. Alterum Concilium & ipsum fuit celeberrimum, & omnibus

*Vide Seriem in
Acta Apost. Et
Sermonem ter-
tiæ Decadis
octauum.*

dotibus maximis instructissimum, & describitur Actor. 15. in eo obtinuit hæc propositio, fidem absque operibus gratis iustificare. De qua re alias copiose differui. His uerò omnibus ostensum uolo, ideo dogma de iustificante absq; operibus fide, in ecclesia impermixtum & syncerum retineri oportere, quia, ut sic dicam, catholicissimum & irrefragabile est: cui hic quoque ab Apostolo Paulo anathematismus accessit, Etiam si nos aut angelus e cœlo prædicarit uobis Euangelium, præter id quod prædicauimus uobis, anathema sit.

Secunda caussa cur præstet hoc dogma syncerum retinere in ecclesia, illa est, quod hoc uel luxato periclitabitur gloria Christi. Hæc enim & obscuratur & corrumpitur in animis hominum (in seipsa manet alioqui integerrima & illustrissima semper) si iustitiam qua coram Deo consistimus, cœperimus etiam partiri nostris operibus ac meritis. Hæc enim est gloria filij Dei, quod aliud nomen sub cœlo non est datum hominibus in quo oporteat saluos fieri. Hinc dixit Paulus, Christus uobis factus est otiosus, quicunque per legem iustificamini à gratia excidistis. Et iterum, Non aspernor gratiam Dei. Nam si per legem est iustitia: igitur Christus frustra mortuus est. Si frustra mortuus est, perijt gloria crucis Christi.

Tertia caussa est, nostræ salutis certa & constantissima ratio. Incertissima esset salus nostra, si à nostris penderet meritis atque operibus, qui propter agnatam nobis corruptionem, nisi insaniamus prorsus, cum Iobo dicimus, Si habuero quippiam iustum non respondebo, sed meum iudicem deprecabor. Paulus ergo rectè pronunciauit, Si ex lege hæreditas est, inanis facta est fides, irrita facta est promissio. Propterea ex fide, ut secundum gratiam, quò firma sit promissio uniuerso semini.

Quarta caussa est, quod hac doctrina maximè reparatur in nobis imago Dei, ad quam initio sumus conditi. Fide enim in nobis habitat & uiuit Christus, qui humilitate nostra delectatur. Excitatur autem in nobis imago diaboli, cum in nobis ipsis superbire & gloriam Dei usurpare incipimus. Hoc sit proculdubio cum nobis ipsis iustitiam & salutem attribuimus: quasi nostris operibus & meritis regnum Dei promereamur. Diabolus superbit conaturq; ad se gloriam Dei rapere. Sancti agnoscunt se uera Dei gratia misericordiaq; saluari: unde omnem Deo gloriam tribuunt, sibi confusionem & ignominiam. Quo haud dubie pertinet para-

bola Evangelica de Phariseo gloriante in suis bonis operibus, & de Publicano clama-
mante, Deus propitius esto mihi peccatori: quorum hic magis quam ille iustifica-
tus in domum suam descendisse legitur.

Quinta causa est, peccati aestimatio. Certè non grandis uidetur culpa, quam co-
ram Deo diluere possunt humana opera. Verùm scriptura sancta demonstrat pec-
cata non potuisse expiari, nisi ipsius filij Dei morte & sanguine innoxio. Inde uerò
cordatus quisque colligit, peccatum in oculis Dei rem esse longè deterrimam atq[ue]
prorsus horribilem. Vnde mox exoritur in sanctis diligens contra peccatum uigi-
lia, & perpetua sortis nostræ, profectò miserrimæ, deploratio & humilitas mode-
stiaq[ue] exquisitissima. Possem his adhuc plures attexere causas, cur modis omni-
bus omnes adniti & laborare deceat, ut dogma hoc, Gratia Dei, in unigenito Dei
filio, per fidem, non per opera iustificari ecclesiam catholicam, syncerum & imper-
mixtum retineatur in ecclesia: sed has minimè contentiosis sufficere spero. Nul-
lum hic periculum est ne uilescant opera bona. De quibus dixi suo loco. Si qui uerò
contra manifestam ueritatem Evangelicam rixari perrexerint, ipsi illud Pauli obij-
cio, neq[ue] nos neq[ue] ecclesias Dei in huiusmodi aperta luce altercari.

Summa.

Summa uerò omnium eorum quæ hætenus de Euangelio disserui, hæc est,
Omnes quotquot in mundo sunt homines, sua natura seruos esse peccati, diaboli
mortisq[ue] æternæ, nec solui, nec liberari posse ulla re alia quam gratuita Dei gratia
& redemptione quæ est in unigenito Dei filio Domino nostro Iesu Christo. Cuius
quidem redemptionis fiant participes soli credentes. Nam qui per ueram fidem
filium Dei Euangelio annunciatum recipiunt, simul iustificantur, id est, absoluun-
tur à peccatis suis, sanctificantur, fiuntq[ue] hæredes uitæ æternæ. Qui uerò per incre-
dulitatem cordisq[ue] duritiem, Christum non recipiunt, æternis pœnis & uinculis
sunt addicti. Nam ira Dei manet super eos. Agamus ergo gratias redemptori no-
stro Deo, obsecrantes ut nos in uera fide retineat, prouehat, & in uitam æternam
perducat. Amen.

*De pœnitentia & causis eius, de Confessione & remissione peccatorum, de Satisfactione
& Indulgentijs, de Vetere & Nouo homine, hominisq[ue] uiribus, & reliquis
ad pœnitentiam pertinentibus. SERMO II.*

PROMISI proximo Sermone habito de Euangelio Iesu Christi, disserta-
tionem de Pœnitentia, quam hodierno Sermone, Deo & uestris preci-
bus adiuuantibus, proferam in medium.

Pœnitere.

Pœnitere dicuntur Latini, quos tædet atque pudet rei commissæ. Beneficium
contulisti, arbitraris te contulisse indigno, ideòque doles: is dolor est pœnitentia.
Germani appellamus *den rüwen*. Græci nominant *Metanœam*. Tradunt au-
tem eius linguæ peritiores *Metanoëu* à posterius intelligendo dici: ut metanœa ibi
propriè locum habeat, ubi homo lapsus, re perperam peracta, demùm in se redit, &
de errore sarciendo cogitat. Refertur ergo non ad mentem tantùm, sed & ad opus.
Qui enim intelligit se deliquisse, de emendatione consultat. Ita iam displicere inci-
pit, quod olim placuit: ita fugis modò, quod sectabar is aliquando cupidissimè. Por-
rò Hebræi uocant pœnitentiam *Theschuah*, nimirum conuersionem, uel reditio-
nem, aut reuersionem in uiam & ad mentem. Videtur metaphora sumpta ab illis
qui aberrarunt ab itinere, sed redeunt in uiam tandem. Id quod ad mentem & ad
mores factæ uel hominum transfertur.

Ufus uocabuli.

Est autem uarius huius uocabuli usus. Significat enim mutationem consilij
concepti

concepti aut rei alicuius. Nam per Ieremiam dicit dominus, Si conuersi fuerint à malo, poenitebit & me mali quod eis irrogaturus eram. Poenitet ergo deum, cum institutum mutat: non poenitet, cum non mutat. Paulus, Sine poenitentia, ait, sunt dona & uocatio Dei. Et Dauid, Iurauit dominus, & non poenitebit eum. Alicubi poenitentia deo tropicè tribuitur secundum affectum humanum: ut cum dicit, Poenitet me fecisse hominem. Alioqui sua natura deum non poenitet, more humano, ut uidelicet dolore tangatur, & ei displiceat modò quod placuerat prius, sed mutat factum. Apud scriptores ecclesiasticos poenitere dicuntur, qui peccata commissa, præscepta per formulam poenitendi poena, luunt. Scriptura alicubi usurpat pro toto euangelij negotio. Sic in Actis legimus Gentibus deum concessisse poenitentiam ad uitam. Sed in hac disputatione nostra usurpabimus pro conuersione ad dominum, pro agnitione peccatorum, pro dolore propter peccata commissa concepto, pro mortificatione & innouatione uitæ, breuiter pro mutatione, emendatione uel correctione uitæ in melius: id quod Germanicè uocamus *Be- keerung/ Vnderung oder Besserung*.

Nec minus uariè definita est à scriptoribus Poenitentia: cōsentiant tamen omnes esse conuersionē ad deum, pristinaeque uitæ & sententiæ immutationem. Dicimus itaque poenitentiam esse ueram ad deū conuersionē, qua ex timore dei sincero humiliati, peccata nostra agnoscimus, ueteremque hominem mortificantes, spiritua- liter innouamur. Habet hæc definitio capita, quæ paulò fusius sparsa explicataque diligentius, totam nobis naturam poenitentiae exponunt oculisque subiiciunt.

Principiò dicimus poenitentiam ueram esse ad Deum conuersionē. Nam paulò post ostendemus duplicem esse poenitentiam, uerā & falsam. Et Petrus Aposto- lus, Poenitemini, inquit, & conuertimini, ut deleantur peccata uestra, cōsequentē ueluti interpretans, quid intellexerit per præcedens, per poenitentiam utique con- uersionem, certè ad eum à quo erant auersi. Nam aliquis est respectus inter con- uersionem & auersionem. Si nunquā auersus fuisset, nulla certè opus esset cōuer- sione. Aueri autē sumus omnes à deo uero, iusto & bono, & à sancta eius uolun- tate, ad diabolum & ad prauam uoluntatem nostram. Oportet itaque rursus con- uerti nos à diabolo, & à uita menteque pristina praua, ad deum uiuentem, & ad san- ctam eius uoluntatem. Significanter uerò dicimus ad deum, non ad creaturas, nō ad ulla præsidia humana. Dicit enim apud Ieremiam dominus, Si reuerti uolue- ris Israel, ad me reuertere. Proinde qui non conuertuntur ad deum, nec eius uo- luntati sanctæ se cōformant, utcumque ad creaturas, & ad alia ab hominibus inuen- ta media conuertantur, reuera inter poenitentes habendi non sunt.

Porro nemo est qui hic non uideat ad poenitentiam in nobis excitādam, opus esse prædicatione uel doctrina ueritatis, quæ nos doceat quis sit deus ad quem conuertamur: quid bonum & sanctum, ad quod conuertamur: quis diabolus, & quid malum & falsum, à quo auertamur: denique quid in mente & uita nostra emen- dandum sit, & quomodo. Certè prophetæ & Apostoli domini ad poenitentiam ad- hortantes homines, multum & diu hærent atque laborant in describenda dei natu- ra, bonitate, iustitia, ueritate & misericordia, in describendis uitæ legibus officiisque hominum: item in accusandis & exaggerandis peccatis hominum, quibus mi- nas graues & horrendas diuini iudicii hypotyposes coniungunt: id quod in pro- phetis ubique obuium legitur. Ideoque non desunt qui in præsentī iubeant homini- bus, quos ad poenitentiam pertrahere uolumus, legē prædicare: quod ut non oppu- gno, sed maxime approbo, ita simul admoneo prædicationem quoque euangelicam obijcere hominibus peccata, & accusare grauiter. Dñs enim in euangelio dicit,

Cum uenerit spiritus sanctus, arguet mundum de peccato, quia non crediderunt in me. Vnde S. Petrus in Actis Apostolorum, Peccata Iudæis commissæ exprobrans simul & Christum fidemq; in Christum prædicans, adhortatur Iudæos ad pœnitentiam. Notissimi sunt loci in cap. Acto. 2. & 3. S. Paulus Athenienses pertracturus ad pœnitentiam, dicit, Tempora huius ignorantia, cum Deus hucusq; dissimulauerit, nunc annunciat hominibus, ut omnes ubiq; resipiscant, eo quod statuit diem, in quo iudicaturus est orbem terrarum, cum iustitia per Christum. Discant hic quibus commissum est homines doctrina pertrahere ad pœnitentiam, multa libertate & prudentia uti ut omnes peccatum suum & peccati grauitatem agnoscant. Præterea excitat deus homines ad pœnitentiam, non tantum uerbo suo, sed etiam uarijs afflictionibus & pœnis. Imò omnes mundi calamitates sunt conciones quædam inuitantes ad pœnitentiam. Vt enim nihil ex prophetarum scriptis adducam, an non dominus noster in euangelio, audita strage, quam ediderat Pontius Pilatus, cæsis Galilæis, calamitateq; decem & octo hominum, quos ruina turris in Siloe oppresserat, protinus ita pronūciat, An arbitramini illos præ cæteris fuisse peccatores? Non certè: imò nisi resipueritis, omnes simul peribitis. Certum est itaq; bella, famem & pestes semper omnes nos inuitare ad pœnitentiam, hortari inquam ut sceleribus calcatis ad Deum conuertamur siudeamusq; integritati.

*Timor Dei in
pœnitentibus.*

Porrò frustra prædicatur nobis pœnitentia, nisi timore in animis nostris concepto, iudicium uel iram dei propter commissæ peccata, reuereamur. Excitat hunc quidem foris doctrina & disciplina exterior, sicuti modò commemorauimus, uerum nihil efficit sola, nisi intus, id est, in animis nostris commoueamur à spiritu dei sancto. Ideoq; in Threnis clamat propheta Ieremias, Cōuerte nos domine, & conuertemur. Et 31. cap. Conuerte me domine, & conuertar: quoniam tu es dominus Deus meus. Et postquam conuersus sum, pœnituit me mali. S. Petrum legimus ostiaria & militum uocibus impulsus, turpiter abnegasse Christum: galli uerò cantu reuocatum rediisse ad pœnitentiam. Sed cantus galli commouit, non per se quidem, sed coniunctus cum uerbo Christi, dicentis, Amen dico tibi, non canet gallus, donec ter me negaueris. Vnde Matthæus dicit, Et recordatus est Petrus uerbi Iesu, qui dixerat ei, Priusquā gallus cantet ter me negabis, &c. Cum his concurrat occultior animi tractus. Tetigit enim cor Petri bonus dominus, testante euangelista, & dicente, Et conuersus dominus, intuitus est Petrum Respectus ille domini emolliuit & retraxit in perniciem ruentis cor Petri. Proinde si aures nostræ perstringantur uerbo domini, & corda nostra eiusdem spiritu imbuantur uel tangantur, Deum pœnitentes seriò reuerebimur.

*Humiliatio &
agnitio peccatorum.*

Simul autem humiliati coram iustissimo & sanctissimo deo, quem tantopere & offendimus & irritauimus peccatis nostris, iudicium eius iustum esse contra nos fatemur, imò & omnia peccata quæ uerbo dei nobis obijciuntur ingenuè agnoscimus confitemur, dicentes cum prophetis, Tu quidem domine iustus es, uerax es, & iusta sunt iudicia tua: nos uerò sumus iniustissimi, mendacissimi, sceleratissimiq; & nephandis flagitijs adoperti. Nihil est sani uel integri in nobis. Omnia nostra sunt corruptissima, deploratissimaq;. Peccauimus, iniqui fuimus, impiè egimus, desciuimus à te. Seruis tuis prophetis cōtradiximus, uerbis ueracissimi oris tui non obediuimus. Tibi ergo ô Deus iustitia debetur, nobis autem pudor. Hanc humiliationem liberamq; confessionem peccatorum requirit Deus à pœnitentibus De qua paulò post plura dicemus, iam enim redimus ad copiosorem Timoris Dei explanationem.

Loquitur

Loquimur autem in presenti de sincero Dei timore. Fatemur enim duplicem esse Dei timorem, Syncerum & Insyncerum. Syncerus dei timor conspicitur in fidelibus, estque pia reuerentia, constans amore & honore numinis. Propheta enim deum loquentem inducens, Filius honorat patrem, inquit, & seruus dominum. Si ergo pater, ubi honor? Si dominus, ubi timor? Et Paulus, Non accepistis, ait, spiritum seruitutis iterum ad timorem, sed accepistis spiritum adoptionis per quem clamamus abba pater. Timor ergo Dei syncerus in poenitentibus non est metus seruilis poenae, sed sollicitum studium amore & honore dei mixtum. Honestam matrona metuit maritum: timet filia ingenua parentem, sed amat interim parentem uel maritum quatenus suum, studioque sancto nititur eius retinere gratiam, amittere metuit. Ideoque poenitentes deum non tantum metuunt, quia sciunt, spiritu dei docti, se designasse ea ob quae abdicari meruerant: sed etiam ipsum diligunt ut patrem, ideoque dolent ex animo propter commissa peccata, & reconciliari deo patri benignissimo ante omnia cupiunt.

Duplex Dei timor.

Nam cum timore hoc dei sincero coniunctus est dolor, ex spiritu dei propter peccata commissa conceptus. S. Paulus duplicis meminit Doloris. Qui secundum deum est dolor, inquit, is poenitentiam ad salutem haud poenitendam parit, contra mundi dolor mortem affert. Secundum deum doluit rex & propheta Dauid, clamans, Sagittae tuae in me defixae sunt, & depressa est super me manus tua. Nihil integrum est in carne mea, propter indignationem tuam: non est pax ossibus meis, propter peccatum meum. Et quae sequuntur Psal. 38. Qui tametsi de morbo graui sit conscriptus, adumbrat interim quantus sit dolor in sanctis propter offensum peccatis patrem benignissimum. Secundum deum doluit peccatrix illa, apud Lucam, quae a tergo domini pedibus prouoluta, hos lachrymis rigauit & terxit rursum capillis. Secundum deum doluit beatus Petrus Apostolus, qui & ipse amarissime fleuisse legitur. Dolet prius quod tam benignum patrem usque adeo offenderint turpiter. Neque arbitror ulla uerba doloris acerbiter affequi. Contrarium in impoenitentibus studium Ieremias describens, dicit, Nunquid sic cadunt homines, ut non resurgant? Num sic aliquis defleat, ut non redeat? Qui fit igitur, ut populus iste Hierosolymitanus auertatur auersione tam pertinaci? Attendi & auscultauit, non loquebantur rectum: nemo erat quem poeniteret mali sui, ut diceret, Quid feci? Quisque illorum ad suum cursum tendit, perinde ut equus in praelium effusus.

Dolor secundum Deum.

Mundi dolor hominum est ignorantium Deum, carentiumque fide & dilectione dei uera, imò succumbentium sub onere mœroris uel aduersitatum adeoque & peccatorum. Eadem ferè ratio est & Insynceri timoris Dei. Nam impij cum suo capite diabolo deum timent, non ut patrem, quem offendisse doleat, cui reconciliari cupiant tanquam patri, sed tanquam tortorem, quia uindictam esse iustum intelligunt. Cum Iuda itaque Iscariotha recurrunt tandem ad laqueum. Nullus in his amor dei, nullus honor, nullum studium, nulla reuerentia, sed odium dei, horror & desperatio. Talem uerò timorē negauit beatus Ioannes Apostolus & euangelista esse in charitate, sed dicit perfectam charitatem eijcere timorem: non illud utique qui est initium sapientiae domini, sed illum de quo haec haec.

Dolor mundanus.

Hinc uerò colligimus poenitentibus in primis necessariam esse fidem in deum & in meritum Christi. Quo nomine arbitror multos fidem constituisse partem poenitentiae. Quod ut non ualde oppugno, sic uideo S. Paulum, ueluti distincta collocasse poenitentiam & fidem, cum in Actis 20. cap. dicit, se Iudaeis & Gentibus testificatum in deum poenitentiam & fidem in Iesum Christum. Videntur itaque di-

Poenitentibus necessaria fides.

uerſa eſſe pœnitentia & fides; non quòd uera pœnitentia ſine fide eſſe poſſit, ſed quòd illa diſtingui, non confundi debeant. Fidem ueram ſcimus omnes non eſſe ſine operibus (lege utiq; comuni) ſed diſtinguimus tamen inter fidem & opera, ut interim illa non ſeparemus aut laceremus: ita agnoſcimus cohærere pœnitentia ueræ fidem ueram. Contendere nolo pars ne ſit an aliàs adhæreat. Stultiſſimū mihi eſſe uidetur, res diuinas ubiq; ad præcepta dialectica aſtringere uelle. Neq; hoc ab Apoſtoliſ domini didicimus. Monuimus in Sermone de Euangelio (quod modò repetimus) agnitionem peccatorum per ſe non impetrare gratiam uel peccatorum remiſſionem: ſicut nec morbi agnitio remedium eſt morbi. Et damnati peccata ſua agnoſcunt, ſed non ideo ſanantur. Agnitio peccati quædam eſt præparatio ad fidem. Agnitio morbi, occaſionem ſuppeditat cogitandi de medicina. Addimus hiſ in præſenti, ne ipſum quidem dei timorem quantumuis ſyncerum, non ipſum dolorem propter peccata conceptum, licet maximum, non humiliatorem quamuis ſubiectiſſimam, per ſe ipſam, pœnitētes deo acceptos facere, ſed magis ingreſſum ad cognitionem Chriſti præſtruere, adeoq; ad ipſum Chriſtum incarnatum & crucifixum pro nobis, adducere, & huic uni nos uiuificandos & purgandos imponere. Qui enim uerè cōuertitur ad deum, certè à ſemetipſo & ab omnibus præſidijs auertitur. Qui uerè timet deum, & ex animo dolet, propter peccata commiſſa, timet & dolet, nec hoc tantum, ſed quia deprehendit ſe totum corruptum, nihil habere ſani uel integri: imò quia reueretur deum ut patrem, detegit ei ut medico uulnera, & eidem ut amantiſſimo reconciliari cupit. Et cum hic uera pietas clamet, neminem poſſe reconciliari deo patri, niſi per unigenitum filium, hunc fide apprehendit pœnitens. Fides in ſolam Dei gratiam uel miſericordiam, in Chriſto nobis exhibitam, fundatur, creditq; pœnitens ſe deo gratum eſſe propter Chriſtum. Deo ergo ſupplicat, & totum ſe deo committit, ſicut Dauid ſeciſſe legitur, & filius ille prodigus Lucæ 15. capite. Habet hic locum doctrina de Euangelio, & de Fide in Ieſum Chriſtum, item de Remiſſione peccatorum, de quibus dixi ſuperius.

Certò ex plenè
remittuntur
pœnitentibus
peccata.

Interim modis omnibus mentes pœnitentium confirmandas eſſe cenſeo multis & diſertis ſcripturæ testimonijs editis de remiſſione peccatorum plenaria, ne quid ambigamus in tentationibus noſtris. Vbi tamen perpetuò pro aſſertione gloriæ unigeniti filij dei repetens inculco, remitti pœnitentibus peccata, nō propter pœnitentiam, quatenus ea noſtrum opus eſt, ſed quatenus pœnitentia complectitur renouationem hominis per ſpiritum ſanctum & fidem ueram, quæ medico nos tradit Chriſto, qui ſanat omnes morbos noſtros, & colligat omnes contritiones noſtras. Et quamuis hæc tractatio propriè ad fidei & euangelij locum pertineat, de quibus quantum per compendium fieri potuit antè diſſerui, recitabo tamen hic claras aliquot de gratia Dei & remiſſione peccatorum ſententias.

Dauid Pſal. 103. canit, Benedic anima mea dominum, & noli obuiſci eorum quæ in te contulit. Qui condonat omnes iniquitates tuas: qui ſanat omnes morbos tuos. Qui uindicat ab interitu uitam tuam, & undiq; te cumulat benignitate & miſericordia. Non rependit nobis pro peccatis noſtris, neq; retribuit nobis ſecundum iniquitates noſtras. Nam quanto interuallo cœlum altius eſt terra, tantum præualet benignitas eius erga timentes ipſum. Et quàm longè diſtat ortus ſolis ab occaſu, tam longè remouit à nobis ſcelera noſtra. Vtq; pater miſeretur liberorum, ita dominus miſeretur timentium eum. Ipſe enim nouit nos fragiles eſſe (ad peccandum propenſos) recordans quòd ſumus puluis.

Iſaias in 1. cap. dicit, Sic dicit dominus, Si peccata ueſtra fuerint ut coccus,
niue

nitue reddentur albiora; si rubuerint instar purpuræ, sicut natia lana fient. Idem in quadagesimo tertio capite inducit loquentē deum, ac dicentem, Ego ego ille ipse sum, qui deleo transgressiones tuas, idē propter me, & peccatorum tuorum non recordabor.

Apud Ieremiam in 31. cap. quod & Paulus repetit in 8. & 10. cap. ad Hebr. dicit dominus, Hoc est fœdus meum quod feriam cum eis post dies istos. Propitius ero iniquitatibus eorum, & peccati eorum non recordabor amplius.

Ezechielis 36. ait dominus, Spargam super uos aquas mundas, & mundabimini ab omnibus inquinamentis uestris. Et dabo uobis cor nouū & spiritum nouum: auferam cor lapideum de carne uestra, & dabo uobis carneum. Ego uos liberabo ab omnibus immunditijs uestris. Nō propter uos ego facio, dicit dominus deus; hoc notum sit uobis, &c.

Daniel in 9. cap. manifestum confessionis peccatorum exemplum relinquit nobis, præterea disertis uerbis dicit, per Messiam condonata esse peccata, expiata iniquitatem, & adductam iustitiam sempiternam. Sic Zacharias propheta in cap. 3. asserit, iniquitatem terræ unico Christi sacrificio esse expiatam.

Dominus in euangelio secundum Matthæum dicit, Non opus habent qui ualidi sunt medico, sed qui male habent. Nec ueniat uocandum iustos, sed peccatores ad pœnitentiam. Ideoq; Iesus est appellatus. Angelus enim, Is saluum faciet, inquit, populum suum à peccatis suis. Et S. Paulus ad Timoth. dixit, Certus sermo & dignus quem modis omnibus amplectamur, quod Christus Iesus uenit in mundum, ut peccatores saluos faceret.

In eodem euangelio dicit dominus, Omne peccatum & conuitium remittetur hominibus: at conuitium in spiritum sanctum non remittetur hominibus. Et quicumq; dixerit uerbum aduersus filium hominis, remittetur: qui autem dixerit aduersus spiritum sanctum, non remittetur ei, neq; in præsentī seculo, neq; in futuro. De peccato in spiritum sanctum dixi aliàs. Huc pertinent omnia exempla liberalissimæ condonationis peccatorum quæ commemorantur in historia euangelica, ueluti mulieris peccatricis, Luc. 7. item Ioan. 4. & 8. Matthæi, Zachæi, S. Petri, Latronis in cruce. Quis uerò commemoret paucis omnia? Huc pertinent parabolæ tres ex 15. cap. Euangelij secundum Lucam.

In euangelio Ioannis clamat præcursor domini, & ait, Ecce agnus Dei qui tollit peccatum mundi. Item ad discipulos suos ait dominus, Quorumcunq; remiseritis peccata, remittuntur eis, &c.

Petrus Apostolus in Actis clamat, Christo omnes prophetae testimoniū ferunt, quod remissionem peccatorū accepturus sit per nomē eius quisquis crediderit in eum. Idem in sua epist. Christus peccata nostra ipse pertulit in corpore suo super lignū, quò peccatis mortui, iustitiæ uiueremus: cuius eiusdem uibice sanati fuistis.

Paulus Apost. in 2. ad Cor. 5. cap. ait, Deus erat in Christo mundū reconcilians sibi, nō imputans eis peccata sua. Eum enim qui non nouit peccatū, pro nobis peccatum fecit, ut nos efficeremur iustitia dei per illū. Et in 10. cap. ad Heb. dicit idem, Christus una pro peccatis oblata uictima, perpetuò sedet ad dextrā Dei, id quod superest expectans, donec reddantur inimici ipsius scabellum pedum eius. Vniuersa enim oblatione perfectos effecit in perpetuum eos qui sanctificantur.

Porrò beatus Ioannes Apostolus & euangelista nō minus clarè quàm euidenter testatur, dicens, Sanguis Iesu Christi filij dei emundat nos ab omni peccato. Et iterum, Et ipse est propitiatio pro peccatis nostris: non pro nostris autem tantum, sed etiam pro totius mundi.

*Contra Noua-
tianos & Ana-
baptistas.*

Cæterum uanissimi & ipsius satanæ nuncij sunt, Nouatiani & Anabaptistæ, fingentes baptismo purgari nos in uitam angelicam, quæ nullis porro sordibus polluat: si autem polluat, nullam polluto expectandam esse ueniam. Nam ut multa alia transeam scripturæ loca, nonne S. Petrus baptismo consecratus fuit deo: an non bonam dei gratiam gustauerat? Certè cum præclarā fecisset confessionem audit à domino, Beatus es Simon Bar Iona. Caro & sanguis non reuelauit tibi, sed pater meus qui est in cœlis. Idem roganti domino, Num & uos uultis abire? omnium nomine respondens, dixit, Domine ad quem ibimus? Verba uitæ æternæ habes: & nos credimus & cognouimus quod tu es Christus filius dei uiui. At idē hic Petrus, post baptismum & gustatam dei gratiam, peccat, nec leuiter quidem peccat, sed grauissimè, ipsum abnegans & abiurans dominum. An uerò propter peccatū eius omni uenia excidit? an præclusus est ipsi ad deum reditus? Minimè gentium. Audito enim galli gallinacei cantu, uerborum domini recordatur, in se descendit, & quid egerit expendit, flet amarè, & in grauem se luctum tradit. Non tamen diu in ipso conficiebatur sine cōsolatione. Tertia enim mox insequenti die, angeli mulierculis ad sepulchrum domini uenientibus dicunt, Dicite discipulis eius & Petro, quod resurrexerit, & præcedat uos in Galilæam. En singulariter uult dominus innotescere Petro quod resurrexerit. Cui autē singulariter Petro? Quia reliquis peccarat grauius: non quod peccatum Petri probaret dominus, sed quod nobis declarare uellet ueniam cōsequi poenitentes, quoties conuertuntur ad gratiam dei cœlestem. Nec uerò multos post dies restituit Petrum ministerio, commendatis ipsi ouibus suis. Præterea dicit dominus apud Ieremiam ad populum Israelis, Si quisquam uxorem suam dimittat, & illa ab ipso diuertens alteri nupsierit, nunquid ille ad ipsam reuertetur? An uerò non est polluta terra illa? An non cum multis fornicata es? Sed reuertere ad me, dicit dominus. Et Galatæ rectè instituti ab Apostolo Paulo, per pseudoapostolos seducti, defecerant à ueritate euangelica: & tamen ueniam consequuntur. Corinthij quoque in multis scientes & uolentes post acceptam gratiam peccauerunt: sed resipiscentibus promittit nihilo minus S. Apostolus condonationem delictorum à domino. Quid uerò manifestius est, quàm quod omnes sancti quotidie & seriò uereque, non hypocritice uel mendaciter, orant, Dimitte nobis debita nostra? Hoc qui orant, fatentur se esse peccatores. Interim promittit dominus se exauditurum orantes fide, remittuntur ergo etiam illa peccata orantibus, quæ homines post cognitam uel indeptam patrarunt gratiam. Loca uerò ex epistola ad Hebræos, quæ pro suo dogmate confirmando produciunt Nouatiani, aliàs excusimus, ut hic nihil sit necesse ijs inhzere operosius.

Sūma uera doctrina de Poenitentia.

Iam uerò, ut summam colligamus eorum quæ hætenus disputauimus de Poenitentia, teneamus poenitentiam esse cōuersionem ad Deum, quam etsi uerbo suo & alijs rationibus excitet, præcipuè tamen spiritu suo efficit ut reuereamur ipsum, Deum, inquam, iustum, à quo auersi fuimus, dolentes ex animo patrè optimum peccatis nostris esse offensum. Nam humiliati coram æterna sanctissimaque maiestate eius, agnoscimus quæ nobis obijciuntur per uerbum dei peccata: agnoscimus nihil esse in nobis integri. Cupimus autem recōciliari cum Deo: quod cum non possit fieri, nisi per solum mediatorem Christum dominum, hunc fide apprehendimus, per quē ab omnibus peccatis absoluti, sancti & iusti à deo reputamur. Hoc beneficium quicumque synceriter agnoscunt, non possunt non odisse peccatum, ueteremque mortificare hominem. Subiungerem ergo nunc alia membra ad poenitentiam pertinentia, uidelicet mortificationem ueteris hominis & innouationem

tionem spiritus, nisi res ipsa postulare aliquid dicere de Confessione peccatorum & de Satisfactione pro peccatis. De his enim nonnulli aliena à ueritate docent, qui de Pœnitentia differunt. Ne ergo nesciat C. V. quid de his sentiat secundum ueritatem, non grauabor his explicandis immorari nonnihil. Spero autem ex his fructum ad C. V. non pœnitendum rediturum.

Confiteri uel Confessio uariè usurpatur in scripturis sanctis. Significat enim laudare Dominum & gratias agere pro acceptis beneficijs. Vnde confessio ponitur pro laude & gratiarum actione. Propheta enim canit, Confitemini Domino, quoniam bonus, quoniam in æternum misericordia eius. Paulus ad Titum, loquens de hypocritis, ait, Confitentur se nosse Deum, factis autem negant: ubi Confiteri significat dicere, profiteri uel iactare. Alicubi est confidere & niti diuinæ bonitati, sed & hanc fiduciam cum dictis tum factis testari. Sic usurpauit S. Ioannes i. Ioannis 4. & Paulus ad Roma. 10. Est præterea confiteri, Deo dare gloriam & agnoscere ingenuè peccatum & iudicium quod tibi obijcitur. Solomon in Prou. cap. 28. dicit, Qui celat iniquitates suas (imò & has ueluti defendit) nihil prosperum habebit: qui autem confitetur & deserit, huic fit misericordia. Usurpat Hebræus sermo in hac sententia uerbum Iadah, pro quo nostri reponunt confiteri. Est autem Iadah proijcere uel dimittere, ueluti cum arcus intentus remittit. Et Modah perinde est ac si tu dicas, confitens, uel cedens, ueluti quæ herbam præbens. Deus enim accusat nos, & criminis pœnæque reos agit. Id non protinus agnoscit caro, sed ueluti intentus arcus manet, tandem uerò remissa pertinacia agnoscit, quod Deus obijcit: hæc agnitio Modah, id est, confessio est. Sed & Germanicè dicimus, *Es hat gelassen* / *Er hat geschneilt* / cum significamus uel rem aliquam cessisse loco, uel hominem confessum esse quod aliquandiu uel negauit, uel dissimulauit.

De confessione peccatorum.

Cæterum non est unius generis Confessio peccatorum. Est enim diuina, est & Humana. Primum dicemus de Diuina, deinde de Humana. Diuinam appellamus, quæ clara in scripturis sanctis testimonia uel exempla habet, & ab ipso Deo instituta est. Ea est peccati, quod obijcitur nobis, ingenua agnitio professioque, qua omnem Deo gloriam, nobis autem confusionem tribuimus, Deumque & proximum, contra quem peccauimus, deprecamur. Obijcitur autem nobis peccatum ab ipso Deo, qui foris per uerbum uel per ministerium hominum, aliquando & per signa atque portenta, intus autem spiritus sui arcano afflatu, & peccati & pœnæ reos agit, liberam & ingenuam à nobis deposcens peccatorum confessionem. Spontaneam enim & ingenuam, non simulatam aut extortam approbat. Certè ciues Hierosolymitani & populus Iudaicæ religionis sua sponte ad Ioannis baptismum ueniunt, confitentes peccata sua, quæ ipsis beatus Ioannes prædicatione sua obiecerat. Et post ascensionem Christi in cœlos, accusat peccatū populi Iudaici beatus Petrus: accusationem uerò mox sequitur in historia, His auditis compuncti sunt corde, & dixerunt ad Petrum, & reliquos Apostolos, Quid faciemus uiri fratres? Et quæ sequuntur Actor. cap. 2. Magister quoque carceris Philippici, postquam terræ motum sensisset, exiit, & uerbis Apostolicis instructus peccata sua confitetur. Sic etiā uiri Ephesij, artibus dediti magicis, audita calamitate, quam dæmon intulerat filiis Sceuæ eiusdem artis consortibus timent, uenientesque confitentur peccata sua. His causis potissimum ferè exoritur peccatorum confessio.

Porro diuinitus institutæ confessionis alia quidem Deo fit, alia proximo. Quæ Deo fit, uel priuata est, uel publica. Priuatim confitemur Deo, quando excutimus corda nostra coram Deo, soli que abscondita pectoris nostri recludimus, agnoscen-
tes quæ in nobis sunt peccata, precamurque ut nostri misereatur. Hæc confessio ad

Confessio que priuatim fit Deo.

remissionem peccatorum consequendam necessaria est. Nisi enim corruptionem & iniustitiam nostram agnoscamus, nunquam fide uera apprehendemus Christum, per quem solum iustificamur. Non autem arbitramur poenitentibus prope-
randum esse ad ullum alium confessorem, cui peccata confiteantur quam ad Deum. Hic enim solus peccata remittit & delet. Hic medicus est, cui uni oportet retere-
re uel aperire uulnera. Hic offensus est à nobis, ab eo ergo petenda pax & reconcilia-
tio. Hic solus inspicit corda & scrutatur renes, soli ergo aperienda sunt pectora. Hic peccatores ad se uocat: ad ipsum ergo festinemus, procidamus, confiteamur
& ueniam petamus. Hac confessio, si animo in Deum intento fiat, licet ore fieri ne-
queat, recipitur à Deo cordium inspectore. Rursus si confiteamur ore, corde uero
in Deum intenti non simus, licet ipsi Deo uel pontifici confiteamur, non curat con-
fessionem uanam Dominus. De uera illa quæ Deo fit confessione loquutus sum,
cùm in definitione Poenitentiae dixi poenitentes peccata sua agnoscere. De hac lo-
quitur multis in locis scriptura. Dauid in Psalmis orat & confitetur, dicens, Mife-
rere mei Deus, secundum magnam misericordiam tuam, Quoniam peccata mea
agnosco, & peccatum meum coram me semper. Tibi soli peccaui, & malum co-
ram te feci. Et reliqua. Et in alio Psalmo, Delictum cognitum tibi feci, & iniustitiam
meam non abscondi. Dixi, Confitebor aduersus me iniustitiam meam Domino,
& tu remisisti impietatem peccati mei. In Euangelio docet Dominus noster orare,
& inter orandū cōfiteri & dicere, Remitte nobis debita nostra, sicut & nos remit-
timus debitoribus nostris. Sic autem orantes confitentesq; iussit secedere in cubi-
culum, ut patri coelesti soli cor nostrum cordisq; nostri pateat deuotio. Filius pro-
digus priuatim in campo apud porcos confessionem sui peccati componit & soli
patri offert. Et publicanus ille in Euangelio, qui confertur cum pharisæo, tundit pe-
ctus & querula uoce apud semetipsum confitens, dicit, Deus propitius esto mihi
peccatori. Audiamus iam & Ioannem Apostolum & Euangelistam, totum hoc
quod dici uerè potest de hac confessione comprehendentem & dicentem, Si dix-
erimus peccatum non habemus, nos ipsos fallimus, & ueritas in nobis non est. Si
confiteamur peccata nostra, fidelis est & iustus, ut remittat nobis peccata nostra,
& emundet nos ab omni iniquitate. Hanc priuatam confessionem quæ fit Deo, se-
quitur confessio uoluntaria apud homines. Humiliantur enim poenitentes, quo-
ties ipsa res, gloria Dei & incolumitas proximi poscit, & corā hominibus etiam tes-
tantur se peccasse Deo. Sic enim Dauid Nathano obijcienti peccatum, clamauit,
Peccaui Domino. Sic Zachæus intelligens calumnijs peti Dominum, confitetur
palam peccatum suum, & emendationem promittit.

*Confessio
publica.*

Leuit. 10.

Publicè quidem ita Deo confitemur, sicut modò diximus, sed magis tamen
cum audito uerbo ueritatis, publica illa forma solenni, uel in templo uel aliàs in
cœtu aliquo coram hominibus, recitantes peccata admissa, imploramus à miseri-
corde Deo ueniam. Quondā certè in ueteri populo instituit Dominus, ut præeun-
te sacerdote, uerbis conceptis, totus populus sequens, peccata sua palam confite-
retur in templo. Vnde haud dubiè etiam hodie receptum est in ecclesia Christia-
norum, præeunte conceptis uerbis pastore uel doctore ecclesiastico, post finitam
scripturarum expositionem & paulò antequam dimittatur cōcio, confiteri palam
in templo omnia contra Deum commissa delicta, & implorare diuinam misericor-
diam. Notæ sunt confessiones peccatorum publicæ ab Esdra, Daniele, & Nehemia
factæ. Publicam confessionem peccatorum illam fuisse interpretor, quam fecisse
Iudæos author est S. Matthæus in cap. 3. Tota enim Iudæa egressa est ad Ioannem
præcursores Domini, ac baptizabantur ab eo in Iordane, confitentes peccata sua.

Nam

Nam cum baptismum publicè reciperent, ea ipsa re confitebantur palàm peccata sua. Baptismus enim est signaculum expurgationis peccatorum: ergo qui baptizantur, confitentur se esse peccatores. Qui non baptizabantur, arbitrabantur se alias purgatos esse, neque ulla indigere sanctificatione. Publicè peccata sua confitebantur Ephesij, qui magicos libros comportatos igne concremarunt, concremando enim confitebantur se scelus igne piandum admisisse. *Actor. 19.*

Iam quæ proximo fit confessio talis est, Offendisti proximum tuum, uel is te iniuria affecit, idcirco dissidetis odiæque exercetis mutua: hinc certè cogitandum est de reconciliatione, alter ergo alterum accedens, culpam uel errorem admissum, & fateatur & deprecetur, alter confitenti benignè peccatum condonet & cum ipso in gratiam redeat. De hac confessione loquutus beatus Iacobus Apostolus, dixit, Confitemini alterutrum peccata uestra, & orate pro uobis inuicem, ut saluemini. Quia Dominus & saluator noster prior in hæc uerba nos docuit, Si obtuleris munus tuum ad altare (loquitur autem illis quibus adhuc in usu erant sacrificia legalia) & ibi recordatus fueris, quòd frater tuus aliquid habet contra te, relinque illic munus tuum coram altari, & abi, prius reconcilieris fratri tuo: & tunc uenies & offeres tuum munus. Huc pertinet & Parabola Domini exposita Matthæi 18. capite, de coniecto in perpetuos carceres, qui gratiam expertus Domini, sauebat in conseruum suum, cui nihil condonare uolebat. Nam in Matthæo 6. capite, dicit Dominus, Si remiseritis hominibus errata sua, remittet uobis & pater cœlestis. Si uerò non remiseritis, non remittet uobis pater cœlestis. Non quòd propter remissionem nostram condonentur nobis peccata. Sic enim remissio non esset gratuita, sed ex merito & recompensatione. Iam uerò cum gratis condonantur per fidem, certè animus ille irreconciliabilis ac durus, certum est argumentum, nullam esse fidem in homine duro, pertinace, implacabiliq. At ubi non est fides, ibi nulla remissio. Spontanea ergo remissio, signum est euident, & natius fructus fidei ueræ & gratiæ diuinæ in nobis. *Confessio quæ proximo fit.*

His duobus generibus confessionis adijciunt quidam illam, qua pressi scelere aliquo graui consilium petunt, uel à pastore gregis Domini, uel ab alio legis Dei perito. Caterum illa potius est Consultatio quàm Confessio. Hæc autem nullibi uel præcepta est uel prohibita, ideòque libera. Proinde nemo cogi debet ad istam consultationem. Si uerò frater aliquis, uel à ministro ecclesiæ, uel à priuato aliquo fratre consilium petat, charitas iubet, si possis, inseruire fratri. Imò si non petat, uideas autem periclitari fratrem, charitas iterum iubet te periclitantem admonere, & tractare ut fratrem. Nam Paulus ad Galatas, Fratres, inquit, etiamsi præoccupatus fuerit homo in aliquo lapsu, uos qui spirituales estis instaurate eiusmodi hominē spiritu lenitatis: considerans teipsum, ne tu quoque tenteris. Alij aliorum onera portate: & sic adimplere legem Christi. Sed hæc nihil ad Confessionem peccatorum, redimus ergo ad institutum. *Consultatio.*

Illa diximus hætenus de diuinitus instituta confessione peccatorum, subiungemus iam quædam de Confessione peccatorum instituta ab hominibus. Ea est duplicis generis, uidelicet Publica & ritualis uel ceremonialis, quam ferè appellantur Exhomologesim: & Priuata uel arcana, dicta Auricularis. Publicam uoco ritualement, quia non tam cognitio & confessio est peccati, quam actus poenitentialis. Isidorus enim Hispaleñ. episcopus libro Etymol. 6. cap. 18. Exhomologesis, inquit, prosternendi & humiliandi homines disciplina est, habitu atq. uictu sacco & cinere incubare, corpus sordibus obscurare, animum mœroribus deicere, illa quæ peccauit, tristi tractatione mutare. Hæc Isidori Episcopi uerba non recitarem *Confessio ab hominibus instituta.* *Exhomologesis*

C. V. utpote authoris non admodum illustris, nisi eadem ferè legerentur in libro Tertulliani scripto de Poenitentia: nisi & exemplum suppeditaret Eusebius, qui Eccles. hist. lib. 5. cap. ultimo, Natalis, inquit, martyr deceptus ab hereticis, tandem errorem intelligens, mane confurgit, cilicio se induit, & cinere conspergit ac multis lachrymis errorem suum deflens, ante pedes se Zephyrini Episcopi prosternit, & uestigijs omnium, non modò clericorum, sed etiam laicorum, multa cum lamentatione prouolutus in lachrymas omnem prouocauit ecclesiam, ut indulgentiam sibi à Christo continuis & iugibus pro ipso precibus implorarent. De ritibus poenitentiae paulò post dicemus. Non autem uidetur hæc ritualis poenitentia, sicut ueteribus in usu fuit, diuinitus esse præcepta, ut uel hodie quicunq; scelus aliquod patrauit, cogatur mox palàm poenitere, ad eum què isti usurparunt modum. Vbi enim

Luc. 7. legitur peccatrici uel adulteræ mulieri talis in Euangelio iniuncta esse poenitentia?

Ioan. 8. Recipiuntur alij multi peccatores per Christum in gratiâ Dei sine huiusmodi poenitentia. Notissimum est enim quid egerit Christus dominus cum Matthæo, cum Zachæo, cum Petro negatore & alijs multis. Proinde non temerè credimus Episcopos ac sacerdotes ueteres, disciplinæ gratia, & quò minor esset peccandi licentia, inuenisse publicam illam poenitendi rationem. Certè Hermius Sozomenus Sallaminius historiæ Ecclesiasticæ scriptor egregius, lib. hist. 7. cap. 16. Ab initio, inquit sacerdotibus placuit, ut uelut in theatro, teste multitudine Ecclesiæ peccata manifestarentur. En sacerdotibus placuit, ait. Addit institutum fuisse presbyterum ad quem qui deliquissent accedentes peccata confiterentur, deinde etiam audirèt multam, quid uidelicet faciendum esset luendumue. Idem mox describit & Romanæ ecclesiæ morem poenitendi. Deinde subdit, in Constantinopolitana ecclesia presbyter poenitentibus deputatus, hoc munere functus est donec mulier quadam nobilis propter peccata quæ confessa fuerat, ab huiusmodi presbytero ieiunare Deoq; supplicare iussa, & eam ob causam ecclesiæ immorata, à diacono scortationis scelere polluta fuisse proderetur. Ob quâ causam sacerdotibus plurimū detrahebatur. Nectarius uerò Episcopus perplexus quid commisso facinori cōpeteret, diaconum illum qui scelus hoc ausus fuerat, diaconatu priuauit. Et quoniam non nulli suadebant ut unicuiq; liberum permitteret, secundum quod sibi ipsi bene conscius esset & bona fiducia esse posset, ad communionem mysteriorum accedere, munus illud presbyterij poenitentiarij sustulit: & ex eo inualuit cōsiliū illud Nectario datum, & iam quoq; permanet. Et cætera. Idē in capitis initio, Primus Nectarius Constantinopolitanus Episcopus, inquit, presbyterum qui poenitentibus deputatus erat sustulit ex ecclesia: quem ferè omnes Episcopi sunt secuti. Hæc ille. Non abrogasset autem Exhomologesim sanctus alioqui Episcopus Nectarius, si intellexisset diuinitus esse institutam: nec licuisset etiam abrogare. Sciuit ergo, sicuti & Sozomenus confitetur, Episcoporum consilio formam illam usurpatam esse in ecclesia. Nec legimus Ioannem Chrysostr. qui proximè Nectario successit, & diligentissimus seuerissimusq; Episcopus fuit, ritualementem illam abrogatā restituisse poenitentiam. Scribit enim Homilia 31. in Epistola Pauli ad Hebr. Non dico tibi ut te prodas in publicum, neq; ut te apud alios accuses: sed obedire te uolo prophete dicenti, Reuela Domino uiam tuam. Ante Deum ergo confitere peccata tua, apud uerum iudicem, cum oratione delicta pro iniuria: non lingua, sed conscientie tuæ memoria. Et tunc demum crede te misericordiā posse consequi, si habueris in mente tua continuè &c. Rursus in Psal. 56. Si cōfunderis alicui dicere quia peccasti, dicito ea quotidie in anima tua. Nō dico ut cōfitearis ea cōseruo tuo ut exprobrer, dic deo tuo qui curat ea. Si nō dixeris, nō ignorat ea deus, qui p̄stō erat cum ea fa-

Ioan. Chrysostr.
doctrina de
Confessione.

ea faceres Et idem iterum alicubi, Non te in conseruorum tuorum theatrum deduco: non hominibus peccata tua detegere cogo. Repete corā Deo conscientiam tuam, & explica. Ostende Domino praestantissimo medico tua uulnera, & pete ab eo medicinam Item, Caue homini dixeris, ne tibi opprobret Neque enim conseruo est confitendum, qui in publicum proferat, sed Domino, qui tui curam gerit, qui & humanus est medicus: ei ergo ostendes uulnera. Sed & Dominum idem ille loquentem inducit, Non cogo te in medium prodire theatrum, ac multos adhibere testes: mihi soli dic peccatum tuum priuatim, ut sanem ulcus. Hæc Chrysoſt. Omnia arguunt clarè satis ritualement illam poenitentiam (sicuti aliquando usurpata est in ecclesia) non à Deo institutam, denique nulla iniuria ex ecclesia submotam, neque mox à sanctis Episcopis restitutam fuisse. In Romana ecclesia multas remansisse reliquias illius non omnino uanè perhibent. Sed quid ad nos quid ecclesia qualibet sibi sumpserit uel seruandum uel deponendum? Hoc magis inquiramus, quid tradiderit nobis Christus, quidue docuerint Apostoli. De quorum doctrina iam satis dictum arbitror.

Priuata uel arcana confessio peccatorum fieri consuevit remotis arbitris, solis *De Auriculari confessione.* sacerdotibus. Insufurrat enim aliquis clanculum peccata sua in aurem sacerdotis, confessionibus clanculariis deputati, absolutusque ab hoc, conceptis uerbis existimat se purgatum esse ab omnibus peccatis. Ideoque Auricularem appellauit. Hanc ignorauerunt tempora Apostolica, & quanquam olim radices agere coeperit, libera tamen ab initio fuit. Præcepta demum & rigidè extorta legitur à Roman. Pont. in longè corruptissimo ecclesiæ statu, nempe cùm numeraretur annus Domini millesimus ducentessimus decimus quintus, aut circiter. Disputatum est tamen per 80. annos aut plures, priusquam lege certa imponeretur omnibus, Deo ne confiteri satis sit an sacerdoti quoque confiteri oporteat ad repurganda peccata? Hugo in libro de Ecclesiastica potestate ligandi & soluendi sic reliquit scriptum, Audacter dico, si ante sacerdotis absolutionem ad communionem corporis & sanguinis Domini quis accesserit, pro certo sibi manducat & bibit iudiciū, etiamsi eum multum poeniteat, & uehementer doleat & ingemiscat. Hæc Hugo certè audacter dixit, nisi falsum nos doceat uerbum Dei. Floruit hic author circa annum Domini 1130. Secutus est hunc non ita longo interuallo Petrus Lombardus, uulgò Magister sententiarum appellatus, nimirum quod sententias patrum collegerit, & Doctrinam patrum ueluti per compendium mundo proposuerit: de cuius opere quale sit nunc non pronuncio. Floruisse putatur circa annum Domini 1150. Is Sententiarum lib. 4. distinct. 17. & 18. ex patrum autoritate primū indicat sufficere confessionem peccatorum soli Deo factam. Deinde alias subiicit sententias contrariū docentes. Postremo sua etiam interposita sententia concludit. Ex his iudubitanter ostenditur, oportere Deo primū, & deinde sacerdoti offerre confessionem, nec aliter posse perueniri ad ingressum paradisi, si adsit facultas. Item, Certificatum est, quod non sufficit confiteri Deo sine sacerdote: nec est uerè humilis & poenitens, si non desiderat & requirit sacerdotis iudiciū. Petro Lombardo fuit magis ingenuus Gratianus Decretorum confarcinator, qui eodem cum Lombardo claruit tempore. Nihil is certi definit, sed propositis in utranque partem sententijs, & quod peccata oporteat confiteri sacerdoti, & quod non oporteat, iudiciū lectori liberum permittit. Sic enim concludit, Quibus autoritatibus uel rationibus utraque sententia confessionis & satisfactionis innitatur, in medium breuiter exposuimus. Cui autem horum potius adhærendum sit, lectoris iudicio reseruetur. Vtraque enim fautores habet sapientes & religiosos uiros. Hæc Gratianus

nus propè finem Distinct. primæ de Pœnitentia.

Legelata præ-
cipitur Confes-
sio auricularis.

Post quinquaginta annos secutus est Lotharius Leuita doctor Parisien. diligens Lombardi sectator. Hic creatus Pontifex Romanus, & Innocentius tertius uocatus, Romæ Concilium coegit generale, quod appellatur Lateranen. in quo legem tulit, quam recitat Gregor. IX. in Decretali sua de Pœnitentijs & Remissionibus lib. 5. cap. 12. in hæc propè uerba, *Omnis utriusque sexus fidelis*, postquam ad annos discretionis peruenierit, omnia sua, solus, peccata, saltem semel in animo fideliter confiteatur proprio sacerdoti: & iniunctam sibi pœnitentiam proprijs uiribus studeat adimplere: suscipiens reuerenter ad minus in pascha Eucharistiæ sacramentum. Nisi fortè de proprii sacerdotis consilio, ob aliquam rationabilem causam, ad tempus ab huiusmodi perceptione duxerit abstinendum. Alioqui & uiuens ab ingressu ecclesiæ arceatur, & moriens Christiana careat sepultura. Hæc illa est lex noua, quæ plurima habet absurda & impia. Et ut pleraque non commemorem, sed unum duntaxat & alterum. An non impium est ad proprium nescio quæ sacerdotem relegare peccatorem, cum Dominus Christus ecclesiæ ministros tantum & præcones dederit, ipse solus maneat sacerdos uniuersalis & cuiusque proprius in ecclesia ad finem usque seculi: ad quem unum fideles ministri à semetipsis omnes confitendum relegant peccatores: Ioannes enim dixit, Non sum ego Christus, sed missus ante illum, ut testimonium ei feram. Quid quod impiissimum est confessioni nostræ & absolutioni sacerdotis, ueluti operi humano, attribuire peccatorum remissionem: Et quis obsecro omnia sua peccata homini sacerdoti confiteri possit: An non Ieremias clamat, Prauum est cor hominis & inscrutabile: An non Dauid canit, Delicta quis intelligit: Ab occultis meis munda me. Impossibile est homini omnia sua confiteri peccata. Ergo dum huic, lege adactus, animum rationi applicat, non poterit non altissime in desperationis immergi barathrum. Et tantum onus, ueluti ad salutem consequendam necessarium, imponitur liberis Christi fidelium collis: idque contra decretum Apostolicum scriptum Actorum 15. Quid autem proprijs suis uiribus perficiat peccator: Quæ obsecro nobis ad bonum sunt uires?

Nullis scripturis
suffulta au-
ricularis Con-
fessio.

Pudet autem & piget me impudentiæ istorum hominum, cum confessionem illam suam auricularem, ueluti à Domino institutam, iam quoque ex scripturis ornare & confirmare uolentes, illud Domini dictum Leproso proferunt, Vade ostende te sacerdoti. Non autem hunc locum solum torquent impudentissime contra natium sensum, sed omnia alia scripturæ, quæ citare solent, testimonia corrumpunt. Vnum ex multis proferam. Bonauentura in Commentarijs suis ad sententias Magistri lib. 4. distinct. 17. quæst. 3. fingit duo esse in confessione: Vnum formale, nempe absolutionem, uel medicandi potestatem: & hanc ait subministratis clauibus institutam esse à Domino. Alterum uerò materiale, nimirum detectionem peccati: & hanc dicit Dominum non instituisse per se sed tantum insinuasse. Mox enim hæc subiicit uerba, Et ideo confessio fuit à Domino insinuata, ab Apostolis instituta, ab Episcopo Hierosolymitano Iacobo uidelicet promulgata. Sicut enim sententiam de non seruandis legalibus promulgauit, Actor. 15. sic & confessionem omnibus peccantibus imposuit dicens, Confitemini alterutrum peccata uestra. Hæc ille. Quis uerò non miretur cæcitatem illius seculi: Agnoscit scriptor non institutam esse à Domino confessionem auricularem, nisi implicite & ueluti ex quadam consequentia: Apostolos autem explicasse mentem Christi & instituisse illam: porro S. Iacobum omnium Apostolorum nomine, lata sententia, promulgasse. Promulgationis uerba subiicit hæc, Confitemini alterutrum peccata uestra. Quid est autem

autem torquere scripturas, si hoc non est? Cernit uel cecissimus inermes esse istos pugiles in hac palæstra, qui telum huiusmodi præferunt, non utiq; fraxineum, sed prorsus betaceum, quod interim ipsi ueluti Hectoream aut Achilleam hastam uibrant. Planissimum est, apostolum non loqui de confessione arcana auriculari, sed de ea quæ reciprocatione quadam ab illis fit, qui se mutuū offenderunt: modò autem liberè & alternis peccata sua inuicem confitentes, mutuū rursus reconciliantur & orant pro inuicem. De qua nonnihil dixi paulò superius. Non uident duo esse in uerbis Apostoli, quæ diligentius perpensa, ipsos planè ridiculos reddunt. Principiò enim utitur apostolus dictione ἀλλήλοις, quod significat mutuò, inuicem, uicissim, alterutrum & quasi reciprocè. Inde sic colligimus, Si iuxta præceptum Apostoli inuicem confiteri oportet, & ἀλλήλοις significat alterutrū, uel uicissim, id est, confiteatur peccata alius alij, uel per uices, ut reuera significat: necesse est ut postquam laici sacerdotibus confessi sunt, sacerdotes uicissim confiteantur laicis. Id enim est alterutrum confiteri. Dicimus enim φιλοσυν ἀλλήλους, id est, amant se inuicem, hoc est, alter alterum, uel reciprocè. Quòd si hoc graue est presbyteris, agnoscant hunc locum Apostoli nihil facere pro arcana & auriculari illa confessione quam ipsi ad commodum suum finxerunt. Deinde subdit Iacobus, Et orate pro uobis inuicem, ut salui sitis. Sociat ergo, & ueluti sub unum iugum connectit, confessionem & orationem. Inde rursus ita colligimus, Si solis sacerdotibus confitendum est, pro solis orandum est sacerdotibus. Sed non orandum est pro solis sacerdotibus, ergo non confitendū solis sacerdotibus, sed alterutrum. Idem locus Iacobi non intelligi debet de confessione auriculari occulta, sed de publica illa, qua in concordiam per mutuam delicti confessionem redeunt illi, qui mutuis sese offenderant iniurijs, & iam reconciliati orant pro se inuicem, ut saluentur. Relinquimus ergo indubitatum, auricularis confessionis defensores non probasse, neq; probare posse, illam à Deo esse institutam.

Ruentem uerò quibusdam fulcris sustentare firmareq; cupientes, subiiciunt confessionem illam suam in Ecclesia retinendam saltem propter disciplinam uel erubescerentiam, ob quam pleriq; peccent minus. Deinde etiam propter priuatam absolutionem consolationemq; euangelij peculiarem uel singularem. Si uerò confessio auricularis tam est utilis Ecclesiae, quàm isti uolunt uideri, quàm factum est quòd ea caruerit ecclesia annis à temporibus Apostolorū amplius mille? Mirum est ipsam nullibi ab Apostolis uel usurpatam uel præceptam. At cōstat interim uetera tempora Christi aduentum præcedentia, nihil de hac confessione uel somniasse: & apostolos nulla re necessaria destituisse Dei ecclesiam. Iam qualem disciplinam plantarit in ecclesia Dei, probant impura flagitia & actus nepharij. Didicerunt cum confitens tum confessor horrenda ex circumstantiarum discussione scelera. Causæ uel occasiones suppeditatæ sunt stupris & adulterijs. Tentata est in Confessionibus, imò & corrupta sæpius quàm profit, aut referre conueniat, uirginum matronarumq; pudicitia. Omnia hominum secreta expiscati sunt confessores illi. Id quod non parum profuit ad stabiliendam ipsorum tyrannidem. Profectò potuerunt confessores illi singulos, quos uocant confessionis filios, commodius deprædari & deglubere: quia non ignorauerunt quas quisque haberet, aut quomodo parasset facultates. Et cum primores reipub. scirent sacerdotes probè scelerum suorum esse conscios, non potuerunt non metuere sacerdotes. Ita fiebat ut minus strenuè se opponerēt sacerdotum extremæ corruptioni & libidini, alioqui minimè in populo dei ferendæ. Audita sunt uoces, Ego ad unguem ex Confessionibus quales in hac urbe sint uiri, mulieres, & uirgines, didici & teneo co-

An confessio auricularis retinenda sit propter disciplinam.

gnitissimum. Ego quenque pro suo ingenio tractare noui. Omnes me metuunt & reuerentur: quia intelligunt me ipsis perspexisse in animi ipsorum penitissima penetralia. Effutita sunt nonnunquam confessionis secreta cum periculo capitis confitentium. Proditiones concinnatae sunt ex confessionibus, nec paucae nec exiguae. Egregie uero profectum est, si unius hominis, confessoris inquam, pudore uerecundiaque carnali, non timore Dei sincero desinimus peccare, cum Deum non ueremur habere testem conscientiae nostrae, neque ad iudicium eius expauescimus. Quid quod confessione hac auriculari stabilita in Ecclesia, nihil efficitur aliud, quam ut praeceptum Dei uilescat propter traditionem nostram, rariusque ipsi Deo confiteamur? Quoties enim in memoriam ueniunt peccata, securi illa expectoramus, donec confitendi tempus adueniat. At cum aduenit, quis oro ad confessionem alacri mente accedit? Iudicent ergo prudentes auditores, qualis haec disciplina sit, & quam Deo placere possit.

An propter priuatam absolutionem retinenda auricularis confessio.

Quod de absolutione priuata affertur, commentum est humanum plane, quod nullum in sacris literis uel praeceptum uel exemplum habet. Reuera à peccatis, à poena & culpa nemo absoluit, nisi solus Deus, cuius solius est haec gloria. Minister euangelica praedicatione uel consolatione annunciat, & testificatur credenti peccata esse remissa. Haec ergo condonationis praedicatio ex ore uel uerbo Dei petita, absolutio est, qua minister absoluit. Nec redditur haec efficacior, si eam priuatim insusurret minister peccatori in aurem. Publica euangelij praedicatio, ab ipso Christo domino sic instituta, satisfacit animo fidei, qui non tam respicit ad ministri gestum, quam ad ueritatem eius cuius nomine minister agit. Verum, Si peccator, inquit, priuatim ad se dici audiat, Ego te absoluo à peccatis tuis, idque clauis uirtute, rectius intelligit sibi remissa esse peccata, quam cum in genere praedicatur remissio. Nos uero Apostolorum exemplum opponimus, quos cum audissent Hierosolymitani, compuncti corde dixerunt, Quid faciemus uiri fratres? Respondit Petrus, Resipiscite, & baptizetur unusquisque uestrum sub nomine Iesu Christi in remissionem peccatorum, &c. Et accesserunt illo die animae circiter ter millae. At quis non intelligit tantae multitudini simul & baptismum esse collatum & uniuersaliter praedicatam remissionem peccatorum, non autem singulis in aurem insusurratum, Remittuntur tibi frater peccata tua? Ac reuera potest uir religiosus ueram in Christum fidem, per quam remissio peccatorum confertur, non minus solide discere ex publica praedicatione euangelij, quam ex huiusmodi susurris. Praesertim cum praedicatio publica praeceptum Dei habeat: susurri contra non item: denique cum euangelium dei uel publice praedicatum gratiam singulis applicet, sed & sacramenta testificantur remissionem peccatorum & dona coelestia esse singulorum credentium in Christum. Haec non dico, quod iniquum putem, si ita casus ferat, priuatim uni aut alteri praedicare euangelium, aut uerbis Christi promittere remissionem peccatorum credenti: sed contra illos disputo, qui arbitrantur publicam & generalem (ita ut ab Apostolis usurpata est) praedicationem, omnibus singulisque annunciantem fidelibus peccatorum remissionem, minime sufficere, nisi peccator accedens ad sacerdotem, peccata sua confiteatur, & ab eodem priuatim & petat & accipiat singularem absolutionem. Nam propter illam priuatam absolutionem, censent retinendam confessionem priuatam uel auricularem.

Sed nolumus aiunt, ut omnia uel singula recitentur peccata cum suis circumstantiis. Quid tum postea? Quis obsecro iussit uel aliqua in aurem sacerdotis peccata insusurrare? Primitiua ecclesia, nec pauca, nec plura delicta confiteri solebat sacerdotibus. Bonauentura testatur ante Innocentium eius nominis tertium, non

non habitos pro hæreticis, qui affirmarunt confessionem soli Deo, sacerdotibus præteritis, factam, sufficere fidelibus: cæterum post decretum ab illo editum de confessione, etiã proprio sacerdoti faciendâ, hæreticos iudicari, docentes soli Deo confiteri. Quasi uerò Innocentius potuerit nouum condere fidei dogma, quo caruit Ecclesia annis à Christo 1200. & amplius. Si itaq; isti qui ante Innocentium uixerunt omnes subterfugerunt hæreseos iudicium: si Nestarius cum Constanti-
nopolitana ecclesia non damnatus legitur, propter Exhomologesim abrogatâ ele-
ctamq; ex ecclesia, quæ tamen auriculari confessione uidetur fuisse præstantior
multo: nemo pius haud dubiè condemnabit nos, qui fatemur diuinitus institutam
confessionem, quæ fieri solet Deo & proximo: duntaxat autem explodimus arca-
nam illam auricularemq; confessionem, utpote plus incommodorum ecclesiæ dei
afferentem quàm honestæ commoditatis.

Et quia hætenus de Confessione auriculari arcana hæc diximus, cui tractatio *De satisfactio-
ne operum.*
de Satisfactione adhæret, dicerem nonnihil & de hac uel ex necessitate, nisi de ea,
quantum satis est, differuissem in alijs Sermonibus huius operis, uelut Decad. 1.
Ser. 6. & 9. item in Decad. 3. ubi disputo de afflictionibus sanctorum, item eiusdem
Decad. Ser. 10. & Decad. 4. ubi tracto euangelium. Docent Sacerdotes & Mona-
chi, non satis esse ad expiationem peccati pœnitentiam & fidem in Christum, nisi ac-
cedat & satisfactio nostrorum operum: quæ cōmemorant, saccum, ieiunia, lachry-
mas, preces, eleemosynas, oblationes, corporis afflictiones uarias, passagia, & his
similia permulta. Nam his, pœnâ peccatis (quorum culpam duntaxat condonatam
aiunt) debitâ, ceu nimbo effuso deleri affirmât. At nos docuimus ex scripturis ca-
nonicis deum nō tantum culpam peccatorum, sed & pœnam condonare gratis. Do-
cuius homines nō per opera & merita sua iustificari, sed mera dei gratia per fidem
Iesu Christi. Alioqui enim frustra carnem induisset, & in mortem crucis acerbissimam
sele tradidisset Christus. Iam addimus, Si nō per opera iustificamur: ergo nec ope-
ribus nostris satisfacimus pro peccatis. Nam quod summam attinet (discrimen in-
terim aliquod agnosco, non utranq; confundo) in idem recidunt iustificatio & sa-
tisfactio. Iustificatione Christi absoluihur. Satisfactione Christi absoluihur, uel
potius propter ipsam absoluihur. Christus est iustitia nostra: ergo & satisfactio.
In Christo est redemptionis pretium, non in nobis. Si pro nobis ipsis satisfacimus,
pretium redemptionis est in nobis ipsis. Sumus ergo ipsi nobis ipsis Christi & salua-
tores. Id quod Christum abolet, & idcirco extreme blasphemum est. Moses in sua
legē nullo negotio omnia de satisfactione operum nostrorum argumenta dissoluit.
Describens enim formam expiandi peccata, nihil in hominum operibus consti-
tuit, sed totum in sacrificijs. Atqui his unicum Christi sacrificium præfiguratum
esse, concordēs fatemur omnes. Huic accedit quod unica noui testamenti prædi-
catio & promissio illa est, Placatus ero super iniustitijs eorum & peccatis, ac ini-
quitatum eorum non recordabor amplius. Vbi autem talis est remissio, ibi nulla
est oblatio uel satisfactio pro peccato. His adde, quod credimus remissionem pec-
catorum. Si uerò debitor creditori satisfacit, quid hic oro remittit? Articulus ergo
hic fidei & primaria promissio & prædicatio testamenti noui, subruitur doctrina
de Satisfactionibus nostrorum pro peccatis operum.

Agnoscamus lachrymas, ieiunia, saccum, eleemosynas, & alia pietatis, humilia *Deus affligit
eos quibus pec-
cata remisit.*
tionis, charitatisq; opera suum locum habere in pœnitentia. De qua re dicetur suo lo-
co: sed his satisfieri pro peccatis negamus modis omnibus, ne pretium redemptio-
nis Christi euacuemus. Agnoscamus alicubi dñm de nris sumpsisse supplicium uel pœ-
nam quibus peccatum condonarat, ut de Adamo & Eua parentibus nostris, ac de

Dauide rege adultero & parricida. Sed demonstrauimus afflictiones illas non fuisse satisfactiones pro peccatis, quæ condonaret deus, sed exercitia disciplinæ & humiliationis dei, retinentis sic suos in officio, declarantisque omnibus quam odiat scelera, licet ipsa condonet gratis. Ergo ne propter gratuitam remissionem ad peccandum faciles simus, supplicia irrogat eis quos nobis statuit exempla. Neque legimus sanctos afflictionibus suis simpliciter tribuisse iustificationis aut satisfactionis beneficium. Consilium quidem dat propheta Daniel potentissimo regi Nabuchodonosori, & ait, Peccata tua in iustitia redimantur, & iniquitates tuæ in misericordia pauperum. Sed ita futurae regis uitæ, & administrationi regni, præceptum datur. Oppresserat hætenus multas gentes rex, & peccarat immiserordia: suadet ergo ut uitæ genus pristinum mutet, & iustitiam colat, beneficentiamque præstet omnibus. Proinde non loquitur de satisfactione pro peccatis apud deum, sed apud homines. Non enim est in alio quoquam salus quam in Christo. Quod si quis pertinaciter inhæreat literæ, dicimus Iustitiam Christianorum esse fidem, qua propriè expiantur peccata: fidem autem non esse sine beneficentia uel charitate, cui impropiè tribuitur iustificatio. De qua re dixi cum disputarem de Bonis operibus.

Ergo cum S. Petrus ex Solomone pronunciat, Charitas operit multitudinem peccatorum, Operiendi uerbum, non pro expiandi usurpatur: solo enim Christi sanguine expiantur & purgantur peccata, sed pro auertendi. Vt enim sui amor omnium ferè scelerum origo est: ita charitas omnium penè scelerum propulsatrix creditur. Dilectio enim proximo malum non operatur. Iam quod sententiam euangelicam, ipsa, inquam saluatoris uerba obijciunt, Remittantur peccata eius multa, quoniam dilexit multum: non intelligunt quod ferè redditur per quia, uel quoniam, hic illationis esse notam, nec alium colligi sensum, quam hunc ipsum, Remittantur peccata eius multa, idcirco dilexit multum; uel unde factum est quod diligat multum. Nec torquemus hic uerba euangelica ad sententiam repugnantem. Præcedit enim in historia euangelica, Principio, Cum non essent soluendo, donauit utrisque. Si donauit, Si non erant soluendo: ergo non remisit propter dilectionem. Alioqui soluissent, nec donasset quicquam. Deinde præcedit, Vter horum plus diligit? Ait Simon, Is cui plus condonauit. Respondere ergo dominus aliud nihil potuit, quam hoc, Plurimum huic mulieri condonauit, ideo dilexit plurimum. Sic, inquam, dilectio est ex remissione, & remissio nequaquam ex dilectione. Imò sequitur protinus, Dixit autem ad mulierem, Fides tua saluam te fecit, uade cum pace. Concludimus ergo, unicam modò esse satisfactionem pro peccatis totius mundi, Christum utique oblatum pro nobis, qui fide eius efficimur participes.

*Remittantur
peccata eius
multa, quoniam
dilexit multum.*

De Indulgentijs.

Quemadmodum uerò Satisfactiones sacerdotum & monachorum doctrina nobis obtrusas non agnoscimus, ita Indulgentias pontificias modis omnibus detestamur. Appellarunt isti Indulgentias beneficam criminum condonationem & remissionem uel culpæ, uel pœnæ, uel utriusque: nimirum ex potestate clauium collata à domino: & propter meritum sanguinis martyrum (ita enim loquuntur) concedenda ritè contritis & confessis. Solent enim indulgentes patres rigorem & seueritatem satisfactionis suo impositam arbitrio, suis illis indulgentijs rursus remittere. Reuera sicut ille dixit, Blanda patrum segnes reddit indulgentia natos: ita indulgentiarum ueram poenitentiam corruerunt. Nullibi uerò legas pontificibus talem clauium potestatem esse collatam, qualem isti fingunt. Legimus quidem Apostolis clauis datas esse à domino: sed hæc aliud nihil sunt quam ministerium prædicandi euangelij. Quod suo loco demonstrabimus. Euangelium autem promittit nobis remissionem pœnæ & culpæ propter Christum fidemque in ipsum. Hoc ipsum admonet

monet, uenturos in fine seculi homines qui dicturi sunt, Nos sumus Christi, id est, qui ea sibi ipsis tribuant quæ solius sunt Christi, qualis præcipue est peccatorum remissio. At ab his fugere, eosque ueluti seductores modis omnibus cauere præcipit. Eadem ueritas euangelica docet fideles solo sanguine filij Dei mundari. Indulgentiæ illorum promittunt hominibus emundationem per sanguinem S. Petri & Pauli beatorumque martyrum. Sunt ergo prophanatio sanguinis filij Dei. Sancti lauant stolas suas in sanguine agni, non in bulla uel area indulgentiarum, non in sanguine martyrum. Imò negat ipse Paulus, nec se, nec Petrum, nec ullum alium sanctorum pro ecclesia dei crucifixum. Indulgentiæ uero ita proponuntur nobis, ut uideatur Deus nobis propter sanguinem martyrum placatus esse. Pugnant ergo indulgentiæ cum scriptura apostolica. Monui autem in sermone de Bonis operibus, in his Pauli uerbis, Suppleo in corpore meo, ea quæ supersunt passionibus Christi, pro corpore eius, quod est ecclesia, supplementum illud non referri ad opus expiationis Christi, quod consummatum est, nisi falsum testificatus sit ultimum exhalans spiritum, dicens, Consummatum est, sed ad eas afflictiones quibus Christi membra, id est, fideles, exercantur cruce, quoad uiuunt in hac carne. Certè dominus afflictiones illatas fidelibus habet pro suis. Dixit enim Paulo, Saule Saule, quid me persequeris? Præterea cum dicit, Pro ecclesia non intelligit pro expiatione ecclesiæ, sed pro ædificatione atque profectu. Et graues à Iudæis persecutiones sustinuit Paulus, quod Gentibus prædicaret euangelium. Sed & exemplum rarissimæ patientiæ in ipso ecclesiæ exhiberi oportuit. Quid quod iam dudum ab alijs obiecta est Indulgentiarum assertoribus pia hæc beati Leonis Papæ sententia ex Epist. 81. Quamuis multorum sanctorum in conspectu domini mors pretiosa fuerit, nullius tamen fontis occisio pro peccatis mundi. Item, Accepere iusti, non dederunt coronas: & de fortitudine fidelium nata sunt exempla patientiæ, non dona iustitiæ. Singulares quippe eorum mortes fuere: nec alterius quispiam debitum suo fine persoluit, cum unus extiterit Dominus Christus, in quo omnes crucifixi, omnes mortui, sepulti, suscitati. Hæc ille. Diuino ergo & humano testimonio euicimus euidentissimè, indulgentias collatas peccatoribus ex merito uel thesauro sanguinis martyrum, meras esse in Deum blasphemias & apertas in beatos martyres iniurias.

Sanctorum martyrum passio non est nostra redemptionis.

Dixi hæc de Indulgentiis gratis quondam collatis à pontificibus, quamuis hæc sint hodie raræ & prætenues: dicam modò pauca de Indulgentiis quas longè maiore partem diuendunt. Vendere indulgentias nepharium est in ecclesia dei facinus, quod non multa inuenias atrociora. Atqui hoc uulgare est, & fuit iam annis multis Romanis Pontificibus & ipsorum nunciis, quos appellarunt Apostolicos. Nec habent ex scripturis sanctis uerbum quod prætexant facinori nephandissimo. Et ut iam non commemorem quod Indulgentiæ nihil sunt nisi nomen sine re, quodque eo nomine scedè imponitur miseris mortalibus: certè Christus summus & unicus ecclesiæ suæ catholicæ sanctæque pontifex, in diebus carnis suæ, uendentes & ementes flagello, ceu impudentes è templo dei canes, exturbauit. Idque fecit bis. Semel in principio concionis uel prædicationis suæ: iterum autem sub finem ferè. Principio hæc addidit uerba, Auferte ista hinc, nec facite domum patris mei, domum mercatus. Posterius adiecit hæc, Scriptum est, Domus mea domus orationis uocabitur: at uos fecistis illam speluncam latronum. Iam uero Simon magus in Actis apost. uidens quod per impositionem manuum Apostolorum daretur spiritus sanctus, obtulit eis pecunias, dicens, Date & mihi potestatem istam, ut cuiuscunque imposuero manus, accipiat spiritum sanctum. Audi uero quomodo hanc petitionem ab ipso exceperit Petrus, Pecunia tua, inquit, tecum sit in perditionem: quoniam

Nundinatio scedæ.

donum Dei existimasti pecunijs parari. Non est tibi pars neq; fors in ratione hac, Cor enim tuum non est rectum coram deo. En dona Dei non parantur pecunijs. En cor eorum non est rectum, qui negotiationē exercent in rebus religionis. En non habent sortem ullam in regni cœlorum hæreditate, uel in euangelica ratione. Quid ergo iam dicemus de Indulgentijs, quas redemptū uenales exponunt nuncij apostolici? Quid dicemus de ipsis nuncijs, & nuncios mittente Papa? Socios uidelicet esse Simonis, non Petri, sed magi. Petrus enim, ex iusta dei sententia, talibus maledixit. Pecunia, inquit, uestra uobiscum sit in perditionem. Grauiissimū & horrendum, sed iustissimum est hoc Dei iudicium. Idem Apostolus Petrus præuidens tales in Ecclesia aliquādo futuros mercatores, in epist. sua posteriore. Fuerunt, inquit, & pseudoprophetæ in populo, quemadmodum & inter uos erunt falsi doctores, qui clam inducent sectas perniciosas, etiam dominum qui illos mercatus est, abnegantes, accersentes sibi celerem interitum, & plerique sequentur illorum exitia, per quos uia ueritatis blasphemabitur: & per auaritiā sacrijs sermonibus de uobis negotiabuntur. Quid enim est sacrijs sermonibus per auaritiā negotiari, lucrumq; facere ex misera plebecula, si hoc non est, quod aiunt isti se plenariam peccatorum remissionē conferre confessis & contritis? Si enim quis agnoscat peccata sua & uera fide conuertatur ad deum per Christum, etiam sine istorum indulgentijs consequitur plenariam peccatorum condonationē. Fucum ergo faciunt simplicibus uersutissimi, & pro pecunia diuendunt quod nunquam habuerunt, neq; ulla pecunia unquam comparari potest. Et hæc de Indulgentijs illis hucusque. De quibus alij disputarunt copiosius. Ego ex paucis illis arbitror quemuis nullo negotio intellecturum quid de eis iudicet.

Vetus & nouus homo.

Caro.

Enauigauimus tandem ex cautibus illis scopulisq; quos eam ob causam accessimus, ut omnia perlustrantes loca periculosiora, admoneremus imperitiores ne impingant alicubi, faciantq; naufragium, existimantes in illis esse neruos poenitentiae ueros, in quibus plurimum est diuinæ offensionis. Relictis ergo illis, redimus ad illustrandum postremum poenitentiae membrum, quo cōmemorauimus poenitentes ueterem hominem mortificare, spiritualiter autē innouari. Ante omnia ergo dicendum esse uidetur, quis sit uetus homo, quis homo nouus uel regeneratus, quæ sint hominis uires. Deinceps enim rectius intelligemus quid sit mortificare ueterem hominem, quid renouari spiritu. Veterem hominem totum hoc esse dicimus, quod habemus ex natura, uel ab ipso primo parente nostro, non corpus duntaxat intelligentes, uel carnem corporis crassiore parte, sed ipsam animam, cum suis uiribus, potentijs uel facultatibus. Ergo dum alicubi in sacris literis Caro ponitur pro homine, non intelligere licet tantum corporis partem crassiorem, sed iunctam simul cum anima, eiusq; facultatibus, hoc est, totum nondum regeneratum hominem. Dominus enim in euangelio, Quod natum est, inquit, ex carne caro est: & quod nascitur ex spiritu spiritus est. Atq; hæc quidem profert de hominis renascentia, quæ non fit secundum carnem (uti falsò imaginabatur Nicodemus) sed secundum spiritum. Caro ergo comprehendit naturales animæ uires siue potentias, adeoq; totum illud quod ab Adamo parente omnium nostrum habemus. Nouus homo dicitur regeneratus per spiritum dei in Christo, uel reformatus ad imaginē Christi, cum omnibus spiritus diuini donis & uirtutibus. Alicubi & ferè in antithesi significatur idem per uocabulum Spiritus. Atq; hic locus requirit dissertationem de Viribus hominis. De quibus etiā si disputarim non nihil in Sermone de Libertate & Seruitute, item de Peccato, proferam tamen hic quæ præsentī causæ putauero sufficere.

Sunt

Sunt duæ animæ nostræ partes, uel facultates, Intellectus & Voluntas. Intellectus discernit inter obiecta, quid recipiendum, quidue repellendum sit: & est *De uiribus hominis.* quasi animæ lumen & dux. Voluntas eligit. Habet enim uelle & nolle: quæ rursus ab alijs impelluntur facultatibus uel uiribus. Porro intellectus duplex est. Vel enim intelligimus terrena uel cœlestia. Terrena uoco quæ non ad futuram, sed præsentem uitam pertinent: quo referimus artes liberales & mechanicas, politiam & œconomiam. Per res cœlestes intelligo ipsum Deum, felicitatem & uitam æternā, Dei cognitionem & omnis generis uirtutes, fidem, spem, dilectionem, iustitiam, sanctimoniam, innocentiam. Iam uideamus quid possit intellectus hominis. Rerum terrenarum iudicium uel intelligentia non omnino nulla est in homine, sed ea tamen ualde imbecillis ac infirmata. Quæ ergo est in homine, à Deo est: quod imbecillis est, ex hominum uitio & corruptione est. Auget autem dona sua hominibus beneficus Dominus, quo sit ut admiranda efficiat hominis ingenium. Ob quam rem legimus in sacris literis & artes & ingenia hominum subijci Deo. In rebus autem cœlestibus cognoscendis prorsus caligat per se humanum ingenium, acutissimum quidem à Deo conditum ab initio, sed parentis nostri culpa prorsus uitiatum. Ideo enim dixit in Euangelio Christus, Nemo uenit ad me, nisi pater meus traxerit eum. Est scriptum in prophetis, Erūt omnes docti à Deo. Et Paulus, Animalis homo, ait, nō accipit ea quæ sunt spiritus Dei: stultitia siquidem illi sunt: nec potest cognoscere, quod spiritualiter dijudicantur, Animalis, id est, uetus ille homo nondum spiritu Dei regeneritus, non est truncus carens omni sensu. Nam si omni careret rationis discursu, quomodo stultitia uideretur doctrina Euangelica? Audit ergo & intelligit ex dono Dei uerba & sensum scripturæ diuinæ: sed propter corruptionem non afficitur ijs, non rectè iudicat de ijs, stultitia ipsi uidentur: nec dum percipit illa spiritualiter dijudicari oportere, quia nondum regeneritus est, spirituq; Dei uero lumine adhuc destituitur. Alibi idem Apostolus, Non idonei sumus, ait, ex nobis ipsis cogitare quicquam, tanquam ex nobis ipsis, sed omnis idoneitas nostra ex Deo est. Ideoq; tam frequens est in scripturis mentio illuminationis: id quod sine causa fieret, si per se lucidus & non tenebris obscuratus esset hominis intellectus. Proinde congenita est omnibus hominibus cæcitas cordis, uel mentis, dubitatio in promissis Dei, incredulitas & peruersissimum in omnibus cœlestibus rebus iudicium. Licet enim intellectū acceperit homo à Deo, propter corruptionem tamen ignorantia hominis peculiare ac proprium est. In suo enim regno uersatur cū cæcutit, errat, dubitat, nec credit, nec donis à Deo concessis bene, hoc est, ad salutem suam & gloriam Dei utitur.

Videamus iam quid possit Veteris hominis uoluntas. Ea cū sequatur *Voluntas.* ducem cæcum, hoc est, intellectum corruptissimum, nemini obscurum est quid eligat, aut quo perueniat. Et ut maximè uerum & bonum intelligat, attamen uoluntas nauiculæ instar, ui procellarum, id est affectuum, agitur. Raptatur enim sursum & deorsum, spe, metu, libidine, dolore, indignatione, ut non nisi pessima quæque & deligat & sectetur. De se enim ipso S. Apostolus loquēs, Noui, inquit, quod non habitat in me, hoc est, in carne mea, bonum. Nam uelle adest mihi, at ut faciam bonum non reperio. Non enim quod uolo, facio bonum, sed quod nolo malum, hoc ago. Si uerò hæc de se ipso iam utiq; regenerito prædicat Apostolus Paulus, quid obsecro dicemus de Volūtate ueteris hominis? Vult is omnia quæ Deus nō uult, perq; omnia scelerum genera grassans, fœdam suam explet libidinem: hoc est, præbet membra sua serua immunditiæ & iniquitati, ad aliam atq; aliam iniquitatē. Exempla plurima exhibent nobis cū sacræ literæ, tum experientia quotidiana.

De Nouo homi-
ne & regenera-
tione.

Opponamus his modò nouum hominem. Hic est spiritu Dei per fidem Iesu Christi regeneratus. Est autem regeneratio, innouatio hominis, qua per spiritum sanctum in fide Iesu Christi, qui fuimus filij Adæ & iræ, renascimur filij Dei, & proinde deponimus in diem ueterem hominem, nouumq; induimus, qui intellectu & uoluntate Deo liberè seruit. Regeneratio hæc animi non corporis renouatio est: quemadmodum alibi audiuius ex 3. cap. Ioannis. Author regenerationis est spiritus sanctus cœlitus homini donatus: Homini autem fidei. Datur enim donum spiritus sancti propter Christum, & credentibus in Christum. Hic Dei spiritus testatur unà cum spiritu nostro, quòd simus filij Dei, & idcirco heredes. Sumus ergo noua creatura, reparati iam ad imaginem Dei, præditi nouo ingenio: quo fit ut in diem ueterem illum hominem deponamus, nouum uerò induamus: quod fit dum ambulamus, non pro ingenio carnali in concupiscentijs carnis, sed in nouitate sensus pro ingenio sancti spiritus, per quem sumus regeneriti. Manet eadem quidem in nobis corporis substantia & forma, animus mutatur, innouatur intellectus & uoluntas. Nam per spiritum Dei illuminatur intellectus, confertur fides simul & cognitio uera Dei, omniumq; rerum cœlestium, pelluntur autem incredulitas, ignorantia, hoc est, tenebræ ueteris hominis, iuxta illud Apostoli, Per Christum estis in omnibus ditati, in omni sermone & cognitione. Item, Nos non spiritum mundi accepimus, sed spiritum qui est ex Deo, ut sciamus quæ à Christo donata sunt nobis. Et iterum, Nos mentem Christi tenemus. Rursus, Non necesse habetis ut quisquam doceat uos: sed sicut ipsa unctio docet uos de omnibus & uerax est, manete in ea. In hac hominis regeneratione accipit & uoluntas uirtutem cœlestem efficiendi bonum quod intellexit per spiritum sanctum, ut uelit & eligat opereturq; bonum quod Deus ostendit: nolit, odiat & repellat malum, quod Deus prohibuit. Paulus enim, Noui humiliari, ait, noui & excellere. Omnia possum per Christum, qui me corroboret. Et iterum ad Phil. Vobis donatum est, ait, pro Christo non solum ut in eum credatis, uerum etiam ut pro illo patiamini. Rursus & multò clarius, Deus est is qui agit in uobis, & ut uelitis & ut efficiatis, pro bono animi proposito. Caterum quod faciunt spiritu Dei renati, liberè non coactè, non inuitè faciunt. Nam sicut hilarem datorem requirit Deus: ita ubi spiritus Domini est, ibi libertas est. Et Zacharias pater diui Baptistæ, Vt sine timore, inquit, de manu inimicorum liberati seruiremus ipsi, in sanctitate & iustitia coram ipso, cunctis diebus uitæ nostræ. Quin ipse in Euangelio Dominus noster dicit, Si manseritis in sermone meo, uerè discipuli mei estis, & cognoscetis ueritatem, & ueritas liberis reddet uos. Item, Si uos filius liberauerit, uel liberos reddiderit, uerè liberi eritis. De hac filiorum Dei libertate disserui Sermo. 9. Decad. 3.

Quæ & quæ-
lus sit in homi-
ne libertas.

Hanc libertatem filiorum Dei libenter agnoscimus: superbas quorundam disputationes de libero arbitrio, quasi rerum cœlestium aliquid ex nobis ipsis possumus, non agnoscimus. Interim hominem non subiicimus fatali necessitati, neque culpam mali retorquemus in Deum. Sicuti alicubi declarauimus copiosius. Et S. Augustinus in certamine contra Pelagianos disputationem suam sic temperauit, ut gratiæ diuinæ bonum tribuerit, malum uerò nostræ naturæ: adeò ut liberum arbitrium, quod nobis (sensu non abrupto, sed expenso & sano) concedit, gratiæ in nobis operanti, imò regenerationi spiritus magis, quàm nobis ipsis tribuerit. Proferam ac recitabo hic C. V. unicum modò ex libris eius testimonium. Id est tale, De Correptione & gratia cap. 1. dicit, Liberum arbitrium & ad malum & ad bonum faciendum, confitendum est nos habere: sed in malo faciendo liber est quisq; iustitiæ seruusq; peccati; in bono autem liber esse nullus potest, nisi fuerit liberatus ab eo

eo qui dixit, Si uos filius liberauerit, tunc uerè liberi eritis. Nec ita ut cū quisque fuerit à peccati damnatione liberatus, iam non indigeat sui liberatoris auxilio: sed ita potius ut ab illo audiens, Sine me nihil potestis facere, dicat ei & ipse, Adiutor meus esto: ne derelinquas me. Hanc F I D E M quæ sine dubio V E R A & prophetica & Apostolica fides est, etiā in fratre nostro Floro inuenisse me gaudeo. Intellegenda est enim gratia Dei per Iesum Christum Dominum nostrū: qua sola homines liberantur à malo, & sine qua nullum prorsus siue cogitando, siue uolendo & amando, siue agendo faciunt bonum. Non solum ut monstrante ipsa quid faciendum sit sciunt: uerum etiam ut præstante ipsa, faciant cum dilectione quod sciunt. Et quæ sequuntur. Hactenus enim recitauimus S. Augustini sententiam de Libero hominis arbitrio, de quo hæc obiter dixisse satis est: redeo iam ad institutū nostrū.

Audiuius quis sit uetus homo, quis nouus, & quomodo renouamur per spiritum: iam ergo cū dicimus pœnitentes ueterem hominem mortificare, & spiritum uel spiritualiter innouari, nihil aliud dicimus quàm pœnitentes omnes, affectus, sensus uel cupiditates carnis, ipsum, inquam intellectum quem habemus ex ueteri Adamo, unā cum uoluntate, non tantū suspectum habere impietatis, sed conuictum quoque, ideoque in gerendis rebus, in omnibus cogitationibus, dictis & factis, nusquam admittere in consilium, sed oppugnare & iugulare studio perpetuo: è diuerso omnibus consilijs, dictis & factis nostris adhibere uel admittere, precibusque uocare magistrum illum cœlestem Christi spiritum, cuius magisterio & ductu, sentiamus, iudicemus, loquamur, operemur, id est, uel omittamus uel faciamus, quod in archetypo nostro, ad cuius imaginem reformari oportet, didicimus, ut porro studeamus sanctimoniam, iustitiam, beneficentiamque. Sed hoc totum intelligemus adhuc rectius & clarius ex uerbis Apostoli dicentis, Hoc dico & testor per Dominum, ne posthac ambuletis, quemadmodū & reliquæ gentes ambulant in uanitate mentis sue, dum mentem habent obtenebratam, abalienati à uita Dei, propter ignorantiam quæ est in illis, & excacationem cordis eorum, qui posteaquàm peruenerūt eò ut dolere desierint, semetipsos dediderunt lasciuiæ, ad patrandum immundiciam omnem cum auaritate. Vos autem non sic didicistis Christum, siquidem illū audistis, & in eo docti fuistis, quemadmodum est ueritas in Iesu, deponere iuxta priorem conuersationem ueterem hominem, qui corrumpitur iuxta concupiscentias erroris: renouari uerò spiritu mentis uestræ, & induere nouum hominem, qui iuxta Deum conditus est per iustitiam & sanctitatem ueritatis. Et reliqua quæ leguntur ad Ephes. 4. cap. Idem Apostolus ad Colos. 3. cap. Mortificate, inquit, membra uestra terrestria, stuprum, immunditiam, mollitiem, concupiscentiam malam & auaritiam, quæ est idololatria, ob quæ uenire solet ira Dei in filios intractabiles: inter quos ambulabatis quondam cū uiueretis in his. Nunc autem deponite & uos omnia, iram, indignationem, malitiam, maledicentiam, turpiloquentiam ab ore uestro: ne mentiamini alijs aduersus alios, posteaquàm exuistis ueterem hominem cum factis suis, & induistis nouum, qui renouatur ad agnitionem & imaginem eius qui condidit illum. Sitis igitur induti tanquam electi Dei, sancti ac dilecti uiscera miserationum, comitatem, modestiam, mansuetudinem, lenitatem, sufferentes uos inuicem, & condonantes uobis mutuò, si quis aduersus aliquem habuerit querelam. Et reliqua. Quibus si adijcias eiusdem Apostoli disputata de eadem causa in 6. cap. ad Romanos, uiuidiora erunt singula.

Hæc uerò Apostoli uerba erudiunt nos non tantū quis sit homo uetus, quis nouus, quid sit mortificare ueterem hominem, & quomodo pœnitentes reparentur nouitate spiritus seu mentis: sed etiam qui nam sint digni pœnitentia fructus,

Quomodo mortificetur homo uetus, repareturque spiritu.

De dignis pœnitentia fructibus.

nimirum recitatae uirtutes illae, uel officia illa uitae erga Deum & erga proximum. Debemus Deo timorem siue reuerentiam, humiliationem, agnitionem nostri, fidem, spem, odium peccati & iustitiae studium, proximo charitatem seu beneficentiam innocentiamque. Huiusmodi fructus à gente Iudaica postulauit beatus Ioannes Baptista, cum dixit, Facite fructus qui poenitentiam deceant. Nam apud Lucam rogatus à plebe, à publicanis, & à satellitibus uel stipendiariis, praesidiariisue militibus, quid ipsi poenitentia dignum faciant, non aliud quam quod modò diximus praescribit. Nam Dominus ipse per Isaiam in 5. capite, non alios commemorauit fructus. Et in reuelatione sua S. Ioanni facta, Memor esto (loquitur autem ministro ecclesiae Ephesinae) unde excideris, & age poenitentiam, & prima opera fac. Cum quibus congruunt haec Pauli Apostoli uerba coram Agrippa dicentis, Praedicaui Iudaeis & gentibus, adhortans ut poenitentiam agerent & conuerterentur ad Deum, opera facientes digna iis qui resipuerant. Ac idem in 2. ad Corinth. 7. cap. Tristitia, inquit, quae secundum Deum est, poenitentiam ad salutem non poenitendam efficit. Ecce enim hoc ipsum quod secundum Deum contristati estis, quantum produxit uobis studium? Imò defensionem, imò indignationem, imò timorem, imò desiderium, imò zelum, imò uindictam? Est autem studium diligentia accuratissima corrigendi quod peccatum est. Certè ex incuria & socordia exoritur peccandi assuetudo & securitas. Defendunt poenitentes non sua peccata, sed Apologia utuntur erga Deum deprecatoria. Hypocritae se excusant & tergi uersantur, neque peccata ingenuè agnoscentes, neque culpam deprecantes. Quem uerè poenitet, excandescit in semetipsum propter consceleratos mores uitamque turpiter transactam. Vindicta quam in se exercet affligendo semetipsum, praeruit imminens Dei iram. Porro timore cauet sibi ne peccet in posterum. Nam contemptus numinis, est origo omnium scelerum, & uinculum uitae impoenitentis. Dei quoque coelestiumque rerum desiderio rapitur qui uerè poenitet: inardescit zelo, quo fit ut nec cunctetur, nec frigide aut segniter agat, quod agendum sibi ex uerbo Dei didicit. Breuiter quod agit, ex animo intimisque uisceribus agit. Sic enim dicit magnus Dei propheta Moses, Si conuersus fueris ad Dominum Deum tuum, & uoci eius obedieris toto corde tuo & tota anima tua: conuertet quoque Dominus Deus tuus captiuitatem tuam, & intimis uisceribus miserationis afficietur erga te. Haec de poenitentiae fructibus.

Poenitentia totius uitae & omnium temporum opus est.

Ex illis omnibus hoc quoque colligimus, poenitentiam (cuius unicus scopus est, imaginis Dei, olim per Adamum defoedatae, noua per spiritum Christi reparatio in nobis) non paucorum dierum aut certi temporis opus esse, sed totius uitae nostrae custodiam perpetuam, adeoque inuolutionem quotidianam. Nam regenerati sancto Dei spiritu, nunquam sic purgantur, ut nihil carnis uel peccati affectuum que sentiant. Semper obuersatur oculis sanctorum haec nunquam expectoranda beatissimi Pauli sententia, Noui quod non habiter in me, hoc est, in carne mea bonum. Nam uelle adest mihi, at ut faciam bonum non reperio. Non enim quod uolo facio bonum, sed quod nolo malum, hoc ago. Circumferimus enim reliquias carnis per omnem uitam. Vnde est in sanctis bellum perpetuum, insensissimumque. Partim enim obtemperant spiritui, partim labefactantur à carne. Spiritu eriguntur sursum in contemplationem & desiderium rerum coelestium. Carne uerò deprimuntur in terrena, sollicitanturque illecebris huius seculi. Ideò enim Apostolus dixit, Caro concupiscit aduersus spiritum, & spiritus aduersus carnem. Haec autem inter se mutuò aduersantur, ut non quaecumque uolueritis faciatis. Nam & alibi, Idem ego mente quidem, inquit, seruo legi Dei, carne uerò legi peccati, Equidem accedunt

his

his artes, doli, & incessabiles mille artificis satanæ tentationes. Labor itaque & periculum uerè poenitentis, hoc est, Christiani hominis, sic increfcit, ut oratio nostra uix consequatur.

Quis autem non uideat hîc quanta opus sit poenitentibus uigilantia, abstinentia, assiduitate, fortitudine & patientia? Quantis sit opus precibus, & his quidem ardentissimis & perpetuis? Proponamus nobis in hac difficili pugna strenuissimi pugilis institutionem S. Pauli Apostoli. Nam hæc esse poterit uice prolixissimi commentarij. Etenim abundè quomodo nos geramus in pugna, & quomodo uincamus, imò & triumphemus, docebit. Sic dicit ad Ephesios, Sitis fortes per Dominum fratres, perq; potentiam roboris illius. Induite totam armaturam Dei, ut possitis stare aduersus assaultus diaboli. Quoniam non est nobis lucta (duntaxat) aduersus carnem & sanguinem, sed aduersus principatus, aduersus potestates, aduersus mundi dominos, rectores tenebrarum seculi huius, aduersus spirituales astutias in coelestibus. Quapropter assumite uniuersam armaturam Dei, ut possitis resistere in die malo, & omnibus peractis stare. State igitur succincti lumbos ueritate, induti thoracem iustitiæ, calceati pedes præparatione Euangelij pacis, in omnibus, assumpto scuto fidei: quo possitis omnia tela maligni ignita extinguere: & galeam salutis accipite, & gladium spiritus, qui est uerbum Dei. Per omnem precationem & orationem omni tempore precantes in spiritu, & in hoc ipsum uigilantes cum omni assiduitate. Et reliqua Ephes. 6.

Que necessaria poenitentibus.

Veniunt ergo hîc quoque commemoranda externa poenitentiae exercitia siue ritus poenitentiales, quibus sese exercent sancti in domanda uel humilianda carne, deinde ad testificandum ecclesiæ poenitentiam. Hi sunt squalor, lachrymæ, gemitus, saccus, ieiunium, clamor, deploratio, neglectus & odium splendoris, apparatus, & etiã concessa uoluptatis: quæ etsi fiant, non tamen ex animo & ex uera fide fiant, prorsus nihil profunt. Verùm præstat hæc discere & quasi in tabula depicta contueri in uerbo Dei sincero. Sic dicit Ioel propheta, Couertimini ad me, inquit Dominus, in toto corde uestro, ieiunio, fletu & lamento: & scindite cor uestrum, & non uestimenta uestra. Conuertimini autem ad Dominum Deum uestrum: quia beneficus est, propensus ad misericordiam, longanimis & multæ bonitatis, & qui poenitentia ducitur super malo. Quis scit si conuertatur ac poeniteat, & relinquat post se benedictionem? Clangite tuba in Zion, sanctificate ieiunium, indite cœtum, congregate populum, sanctificate cœtum, congregate senes, colligite puerulos & lactentes ubera. Egredietur sponsus de cubiculo suo, & sponsa de uolo suo. Inter uestibulum & altare plorent sacerdotes ministri Domini, dicentque: Parce Domine populo tuo, & ne permittas ut hæreditas tua probrum fiat, aut ut eis imperitent gentes. Cur diceret in populis, Vbi est Deus eorum? Hisce diuinis, & clarissimis præceptionibus adiiciemus modò egregiū ex iisdem scripturis Niniuitarum uerè poenitentium exemplum. De ijs sic reliquit scriptum beatus propheta Ionas, Crediderunt Niniuitæ Deo, & ieiunio indicto à magno ad paruum usq; saccos induerunt. Peruenit ea res ad regem Niniuiticum, qui de solio suo consurgens paludamento suo à se posito, saccum induit & in puluere sedit. Ad hæc in tota urbe ex mandato regis publico edicto proclamatum est, Neq; homo neq; iumenta neq; greges quicquam gustent, neque pascantur neq; bibant: quin saccis operiantur & homines & iumenta strenueq; clament ad Deum. Conuertatur denique quisque à uia sua mala, & à uiolentia & iniuria quæ est in manibus eorum. Quis scit an conuertatur Deus & poeniteat auersus à furore iræ suæ, ut non pereamus? Caterum præstat audire quam efficax sit uera poenitentia. Sequitur ergo in

Externa poenitentium exercitia, & ritus.

Iona. Vidit itaq; Deus opera eorū, quod à uīs suis malis auersi essent, & ipse quoq; ductus est poenitentia super malo quod eis inferre decreuerat. Non enim intulit.

Priuatā & publica poenitentia.

Observandum est hīc quoq; C. V. duplicem esse poenitentiam, nempe Priuatā uel occultam, & Publicam uel solennem. Priuatam quisq; apud semetipsum in occulto agit, quoties cōtra Deum peccauit, sed in se interim descēdit, lumīneq; uerbi Dei omnes pectoris sui recessus perlustrat, ac Deo confitetur peccata, hunc offensum esse dolet, ad hunc conuertitur, hunc sibi in Christo placatum credit, propter hunc odit peccatum, & studet iustitiæ & innocentia. Publica uel solennis locū habet in magnis calamitatibus, in fame, lue, uel bello; ac de hac in primis intelligenda sunt uerba Ioelis propheta. Habet tamen priuata poenitentia multa cōmunia cum solenni. Petrus enim amarē flet; ieiunant priuatim poenitentes, & abstinentes. seueriter ab omnibus concessis uoluptatibus nedum ab illecebris carnis ac mundi. Ceterum oderunt in primis fucum, hypocrisim & ostentationē uanam, quoscunq; uel

Spontanea non extorta sit poenitentia.

priuatim, uel publicē poenitet. Est præterea libera utraq; & sponte quidem suscepta, non extorta uel uiolenta, sed alacri ultroneoq; profecta spiritu. Urget quidem seueriter doctor ueritatis pastorq; ecclesiasticus omnes peccatores ut incunctanter ueram agant super peccatis suis poenitentiam, sed nemini tamē lege lata imponit certam formulam præscribentem tempus, modum, locum, numerum, sed cuiq; libera hac relinquit, modò secundū præsriptū scripturæ quisq; quod decet faciat. Publica uerò poenitētia ferē indici solet & recipi ab ecclesia, cū pietas poscit ipsā que cogit necessitas; ac quid & quomodo agenda sint omnia unā cum uerbo Dei ostendit. Rursus constat duplicem esse poenitentiam. Est enim poenitentia uera, est & poenitentia falsa. Veram exercet homo regeneratus per spiritum S. in fide Iesu Christi, eaq; fūco caret, & habet omnia de quibus hactenus differui. Exempla uerę poenitentię plurima suppeditant literę sanctę cū noui tum ueteris Testamenti, quę & pulcherrimē superiora omnia declarant. Præclara sunt patris nostri Adami & Eua, Populi Israelitici Exodi 33. item in libris Iudicū, & in libris Reg. Excel lunt tamen in his Dauidis 2. Sam. 12. & 1. Par. 21. Manassis item & Iosia 2. Reg. 33. & 34. In Euangelio offerunt se exempla Matthæi, Zachæi, Peccatrici, & Petri, ut multa alia taceam. Porro falsa poenitentia ficto proficiscitur pectore: & quamuis in speciem uideatur habere uera poenitentię attributa, quia tamen caret conuersione ad Deum & bona in eundem fiducia, insincera imò falsa est. Iudæ enim Ischariotis poenitentiam falsam fuisse longē est certissimum; attamen confitebatur peccatum, testimonium præbebat ueritati, deniq; pretium sanguinis acceptum à sacerdotibus, ipsdem multa cum indignatione doloreq; restituit: ceterum quando ad Christum se nō conuertit, omni fiducia in eius coniecta misericordiam, nullo cum fructu poenitentiam egit. Et nullo quidem cum fructu sese excruciant & poenitentiam agunt omnes hypocritæ & fide carentes Euangelica.

Felices sunt poenitentes.

Felicissimi autem sunt, qui uerē ex animo & ex fide uera agunt poenitentiam. Infinita enim bona accipiunt à Deo munificentissimo: qui redit in gratiā cum poenitentibus, amans iam quos prius propter uitam conscleratā oderat infensissimē sed iustissimē. Supplicia quoq; quę inferre statuerat, conuertit in munera. Poenitentes enim bonis omnigenis temporalibus & æternis implet. Intellexit aut ex alijs Sermonibus C. V. tanta à Deo beneficia nobis conferri, non propter nostra opera poenitentię, sed propter Christum, cui soli fidunt sancti, non operibus poenitentię, licet sanctissimis. Hunc enim quia diligit pater, nosq; fide Christo sumus infiti, & nos amat & opera nostra Deo placent, quę cū remunerat, gratiam suam in nobis coronat. Rursus infelicissimos esse necesse est impoenitentes, Audiunt quibus deum

Infelices sunt impoenitentes.

bus Deum delictis & facinoribus offenderunt adq̃ uindictam prouocarunt, sed interim non cogitant quomodo iam iam ad supplicium de fontibus sumendum prodeunti deo occurrant, gratiamq̃ eius impetrent. Quid ergo his restat aliud quam certissimum & atrocissimum excidium, cum animæ tum corporis, adde & fortunarum, deniq̃ rerum omnium quas in hoc amarunt seculo. Recordari hic conuenit grauissimæ sententiæ domini Iesu, in hæc uerba in euangelio pronunciata, Væ tibi Chorazin, uæ tibi Bethsaida: quoniã si in urbe Tyri aut Sidonis factæ fuissent uirtutes, quæ factæ sunt in uobis, olim in sacco & in cinere pœnituiissent. Attamen dico uobis, Tyro, Sidoni & Sodomæ tolerabilius erit in die iudicii quam uobis. Notissima est omnibus arbor ficus infrugifera, cuius mentio fit in euangelio, quæ iudicio Dei exaruit, nimirum in exemplum & terrorem omnium impœnitentium. Quid futurum putamus nostri seculi hominibus, tanta cum audaciâ pœnitentiam tot annis prædicatam contemnentibus? Sunt alij quidem euangelicæ ueritatis, ut uideri uolunt, studiosi: sunt alij hostes contemptores & persecutores euangelij: inuenias item ingentem turbam Lucianicorū, Epicureorū & Atheorum: cumq̃ omnes ex æquo fere pœnitentiam suauiter, imò petulanter irrideant, nō possumus aliud quam horrendum dei iudicium contra huiusmodi impœnitentes expectare. Qui sibi consultū uolunt, maturè conuertantur ad dñm, reputentq̃ secum non semel, nec leuiter, quanta sit iactura retinere hæc fluxa huius mundi gaudia, & interim amittere æterna. Maturè faciat quisq̃ quod uidet fieri eo melius, quo fit citius.

Nolo tamen quenquam desperare in suis peccatis, modò pœnitentiæ medelâ non aspernetur pertinaciter, neq̃ propter facilitatem benignitatemq̃ patris cœlestis, malitiosè & per contemptum pœnitentiam differat in finem usq̃. Si uerò carne mundo & satana præpeditus aliquis, serius mentem pœnitentiæ applicarit, nolo & hunc desperare. Et quoniã dissertationē de pœnitentia prolixius, quam putaram, produxi, ut finem sermoni imponam, recitabo iam epilogi uice aurea plane uerba sancti martyris Christi & episcopi Carthaginensis beati Cypriani, sic contra Demetrianum scribentis, Credite & uiuite, & qui nos ad tempus persequimini, in æternum gaudete nobiscum. Quando isthinc excessum fuerit, nullus iam locus pœnitentiæ est, nullus satisfactionis effectus. Hic uita aut amittitur, aut tenetur. Hic salutis æternæ cultui dei & fructu fidei prouidetur. Nec quisquā aut peccatis retardetur aut annis, quo minus ueniat ad consequendam salutem. In isto adhuc mundo manenti pœnitentia nulla sera est. Patet ad indulgentiam aditus: & quærentibus atq̃ intelligentibus ueritatem facilis accessus est. Tu sub ipso licet exitu & uitæ temporalis occasu pro delictis roges deum, qui unus & uerus est, confessionem & fidem eius agnitionis implores: uenia cōfidenti datur, & credenti indulgentia salutaris de diuina pietate conceditur, & ad immortalitatem sub ipsa morte transitur. Hanc gratiam Christus impartit: hoc munus misericordiæ suæ tribuit subigendo mortem tropheo crucis, redimendo credentem pretio sanguinis sui, reconciliando hominē deo patri, uiuificando mortalem regeneratione cœlesti. Hunc si fieri potest sequamur omnes, huius sacramento & signo censeamur. Hic nobis uiam uitæ aperit. Hic ad paradysum reduces facit. Hic ad cœlorum regna perducit. Cum ipso semper uiuemus, & facti per ipsum filij dei, cum ipso semper exultabimus, ipsius cruore reparati. Erimus Christiani cum Christo simul gloriosi, de deo patre beati, de perpetua uoluptate lætantes semper in conspectu dei, & agentes deo gratias semper. Neq̃ enim poterit nisi & latus semper esse & gratus, qui cum morti fuisset obnoxius, factus est immortalitate securus.

SERENISSIMO ANGLIAE ET FRANCIAE REGI. HYBERNIAE DOMINO,

NO, VALLIAE ET CORNVBIAE PRINCIPI, CHRISTIANA

fidei defensori, Eduardo eius nominis Sexto, Gratiam
& pacem à Deo patre, per dominum nostrum
Iesum Christum.



QUOD non ita pridem R. T. M. pollicitus sum, in praesentiarum praesto, offerens Sermones Decadis quartae reliquos octo, quos R. T. M. dedico, ut habeat ex me Decades Sermonum integras duas. Misi mense Martio Sermones XII. Eos per benignè acceptos esse à R. T. M. scribit spectatis. pietatis & eruditionis vir D. Ioan. Hopperus, vigilantiss. Glocestriae episcopus, frater & cōpater meus in Christo colendissimus. Qui & cōmendatione R. T. M. erga me beneuolentia effecit, ut modò maiore fiducia & libertate quàm ante, reliquam hanc operis partē, de rebus lōgè maximis & sanctissimis scriptam, submittam. Dedicatione hac mea nihil aliud specto, quàm quod exposui epistola priore, ut iuueni, pro meo mihi dono à domino cōcesso, pietatis Christianae negotiū, feliciter iam in inclyto Angliae regno, R. T. M. auspicijs optimorumq; principū consilijs renascens. Gratulantur ob renascentiā illam & R. T. M. & florētissimo regno tuo omnes omnium in toto orbe Christiano nationū verè Christo credētes, orantq; Christū dominū, ut ipse feliciter in eius timore cōcepta, ad felicissimū perducatur finem.

An reformare ecclesias uolentibus expectanda sit determinatio Concilij.
Matth. 28.

Ierem. 3.

Luc. 9.

Qualia aliquot seculis celebrata Concilia.

Aggressa est sanè R. T. M. opus & ingens & laboribus molestijsq; refertissimum: sed non deerit interim pijs conatibus, qui dixit: Ecce ego vobiscū sum omnibus diebus vsq; ad consummationē seculi. Obijciūt se nunc quoq; ut ab ecclesia initio semper, sanctissimis & saluberrimis institutis remota permulta & impedimēta grauiā, cōceptā interturbare sat agentes religionis repurgationē, & istud in primis, quod & prudentioribus non paucis in ore est, non ita accelerandū auctoritate priuata, sed omnino expectandā esse generalis Concilij in controuersa religione determinationē, absq; cuius iudicio non liceat ne regno quidē, nedū reipublica alicui uel tantillū in semel recepta & hactenus usurpata religione immutare. Ceterum propheta & apostoli, nō ad Concilia seniorū aut sacerdotum, sed ad verbū dei nos remittunt, imò legimus apud Ieremiā: Quomodo dicitis, Sapientes sumus, & lex dñi apud nos est? Verè mendaciū operatus est stilus mēdax scribarū. Pudescit sunt sapientes, expauerūt & capti sunt. Ecce uerbū dñi proiecerūt, quā ergo in illis potest esse sapientia? Rursus legimus in euāgelio: Nemo qui manu sua admota aratro respexit à tergo, aptus est regno dei. Proinde suadet prophetica & euāgelica auctoritas, semel cōceptā cū timore dei ex verbo dei reformationē religionis, iustis absoluerē incrementis, nec respectare ad Cōcilia, quā affectibus hominū nō uerbo dei dirigūt.

Nam quid expectemus ex generaliū Conciliorum determinationibus, docent nos proxima aliquot seculorū exēpla iam inde ab annis quadringentis aut amplius. Causa Conciliorū fuisse quondam morbi uel doctrinae uel docentiū, aut collapsa disciplina ecclesiastica. Et clamatū est quidem acriter ab optimis religiosissimis quibusq; annis iam quingentis & amplius, irrepsisse in ecclesiam superstitiones, errores, atq; abusus, sal terrae esse infatuatū, hoc est, ministros ecclesiarū ignauia, inscitia, & sceleribus cōputruisse, omnemq; in ecclesia disciplinā cecidisse. Vnus inter multos Bernardus Clareuallensis, huius rei locupletissimus est testis. Ideoq; celebrata sunt non rarò Concilia sacerdotum, conuocante eos pontifice Rom. operamq; suam mutuam collocantibus nō paucis principibus. Verū quid effectū, & quā emendatio doctrinae, docentiū & disciplinae obtenta sit, ipsa loquitur, pro dolor, res. Quò enim crebriora coiere Concilia, tātò magis inualuit superstitio & error in doctrina, abusus in ritibus, superbia, luxus, auaritia, omnisq; corruptio in docentibus uel sacerdotibus, deniq; fœdissima omnis disciplinae oblitteratio. Praesuerūt enim Cōcilijs isti, quos aut primū in ordinē redigi, aut protinus ē sanctorū cœtu proscribi oportuerat, sed & causas in Concilijs nō legitimas neq; legitime tractauerunt.

tractauerunt. Nam verbum dei nec autoritatē nec dignitatem suam apud eos habuit, neq; admitterunt ad causarum discussionem quos in primis admittere decebat, sed quos ipsi voluerunt, neq; his dei gloriam & ecclesiae incolumitatem, sed semetipsos, id est, gloriam & voluptates mundi quaesierunt. Itaq; tot celebratis Concilijs nihil adhuc obtentum videmus emendationis aut reformationis in ecclesia, quin potius errores, abusus, & sacerdotū regnū imò tyrannidē esse confirmatā & auctam.

Et hodie quid nobis ex Concilio polliceamur, etsi cecis esse libeat, non tamen palpare manib. non poterimus. Non habebit hodie vllā autoritatem Conciliū vllum, quod non erit legitimē (vt istis videtur) cōuocatum. Nō videtur legitimē cōuocatum, nisi quod pontifex Romanus cōuocarit, quodq; more hucusq; cōsuetō & legibus receptis fuerit celebratū, nempe in quo sedeant, vocesq; decisivas, vt aiunt, habeant soli illi, quibus residendi & sententias in eo dicēdi permissa potestas est, qui busq; reputabitur infame & cum exhibito pugnare sacramēto, aliquid vel cogitasse nedum dixisse contra pont. & sedem Romanam, contra decreta patrū & cōstitutiones Conciliorum. Quid ergo expectes ab huiusmodi Concilio? Id nimirum, quod iā ab annis quadringentis & amplius maximo cum pietatis detrimento miserā dei ecclesiā sensisse diximus, nempe quod calcata synceriores Christi doctrina, & oppressa disciplina sancta, magis magisque in diem increfcere & cōfirmari cernimus cū grauiissima imò intoleranda tyrānide sedis seu ecclesiae Rom. falsam putidamq; doctrinā, abusus foedissimos, plus quā nimiam licentiam & sceleratissimā vitam sacerdotum. Enimvero clamāt isti haereticum esse erroris accusare pontificē, qui in scrinio pectoris sui omnē caelestē doctrinā habeat reconditā. Clamant isti oēs sanctiones apostolicā sedis accipiendas tanq; ipsius diuina voce Petri firmatas. Clamant isti, iniquissimum esse de dogmatis & ritibus receptis à Rom. ecclesia, praesertim autē de sacramentis, quae in nundinationē foedissimā conuerterunt, litē mouere, aut illa vocare in dubiū. Clamant isti, Rom. ecclesiā ius habere iudicādi de omnibus, nulli autē hominū licere de eius iudicare iudicio. Extant in decretis Canones apertissimi, hac ad hunc modum proponētes & vrgētes. Quā verò putabimus admissuros reformationē talia mordicus retinētes? Mallent profectō totū interire Christum cum suo euangelio & ecclesia vera Christi sponsa, quā vel tantillum suis decedere decretis, ritibus, potestatibus, dignitatibus, opib. & voluptatib. Hi profectō nō venient in Conciliū vt iudicentur ab alijs, vt emendent ea quae ipsorum & conscientia adeoq; totus mundus emendāda esse clamat, sed oēs alios iudicare & subiugare, suā illam potentiā retinere, & quicquid ipsorum obstat libidini concutere, ē medio tollere, conabuntur. Nā praecesserunt tonitrua multo cum fragore edita cōtra accusatores seu aduersarios sedis apostolicā, id est, corruptionis papisticae, insequuta sunt & fulmina excommunicationis latae sententiae: inuocatū est iam per annos triginta & amplius brachiūulare, & seuitum est passim in homines innoxios, non scelera quidē patrantes & nequitia defendentes, sed inuehentes in scelera ac sceleratos, reformationēq; ecclesiae postulantē: necdum hodie silent edicta crudelissima, seuitur in diem magis magisque in nominis Christi cōfessores: praeterea, qua sunt impudentia & audacia, nō dissimulant Conciliū, si quod institui debeat, ad extirpandas haereseis fore congregandū, imò quod semel Tridēti instituerūt, in hunc finē institutū esse nō obscure profitetur. Quae cū sole clarius verissima esse cernatur, prudētissimē imò & religiosissimē feceris o rex piissime, si non expectata Concilij generalis determinatione perrexeris ecclesias in regno tuo reformare ad regulā librorū vtriusq; Testamenti, quos rectē credimus inspiratos à spiritu sancto, ipsissimū esse verbū dei.

Porrò licere cuilibet ecclesiae Christianae, nedum Christiano regno inclito, incōsulata Romana ecclesia eiusq; membris, religionis negotium per illos deprauatum ex integro ad normam verbi diuini reformare, inde claret, quod Christiani, regis sui Christi caetus, ecclesia, vel subditi sunt, cui & obedientiam debent modis omnib. perfectissimam. Praecepit autē dominus ecclesiae suae reformationem: sanam & euangelicam doctrinam commendauit vnā cum legitimo sacramentorum vsu: idem condemnauit doctrinā falsam, id est, pugnantem cum euangelio, damnauit abusum & prophanationem sacramentorum: praeterea verum cultum tradidit, falsum proscripsit: idcirco Christiani legib. & imperijs principis sui obtemperantes omnem superstitionem tollunt, & ueram religionem, ad eū modū quem Christus princeps ordinauit, instaurant atq; conseruant. Stultus profectō & amens est,

Quid hodie expectent Christiani ex Concilio.

Licere cuilibet ecclesiae Christianae reformare.

quisquis negat Christianæ ecclesiæ ius nō esse errores, vitia, & abusus corrigere. Interim plerisq; oculos suos ita fascinauit Romana tyrannis, vt putarint nihil hic sibi nisi Roma cōcedente licere. Historia ecclesiast. cōmemorant diuersis in prouincijs synodos esse celebratas, in quibus tractatum sit de fide & ecclesiarum reformatione, nulla interim mentione habita pontificis Romani. Quid quod in quibusdam synodis, non hæreticis sed orthodoxis catholicisq;, illos inuenias esse excommunicatos, qui appellassent à suis Ecclesijs Romam? Certè S. Cyprianus scribens Romano episcopo beato Cornelio: Cum statutū sit, ait, ab omnibus nobis, & æquū sit pariter & iustum, vt uniuscuiusq; causa illic audiatur vbi crimen est admissum, & singulis pastoribus portio gregis sit ascripta, quam unusquisq; & gubernet, rationē sui actus domino redditurus, oportet vtiq; eos quibus præsumus, non circumcursare, neq; episcoporum concordia cohærentē sua subdola & fallaci temeritate collidere, sed agere illic causam suā vbi & accusatores habere & testes sui criminis possint. Sed omīssis humanis testimonijs ad diuina descēdimus. Sanctissimus rex Iosias te in hac causa, rex pijsime, quid agas & iure quidē diuino agas, vnus, docere potest. Intellexit hic ex lectione diligenti libri sacri, & ex cōtemplatione rerum præsentium cultusq; diuini qui tunc in vsu erat, grauitè & longissimè à suis maioribus à simplici veritate aberratū esse, protinus ergo conuocat principes & oēs ordines regni sui, vnā cū omnib; sacerdotib; comitia celebraturus sacra. In his nō diu disputat maiorū ne exēpla potius sint sequenda q̃ præceptio diuina simpliciter recipienda: an scripturæ sacræ magis credendū an ecclesiæ? an summo pontifici omne sit de religione iudiciū deferendū? Nā proposito in mediū libro legis, scripturæ sacræ sese & oēs suos subijcit, ex libro legis ipse discit & alios suos omnes discere iubet quid Deo placeat, id nimirū quod præcipiebatur & discebatur lectione diuinæ legis. Extemplo autē id ipsum oēs facere siue exequi iussit, nulla ratiōe habita vetustæ cōsuetudinis, aut ipsius etiā ecclesiæ quæ tūc erat: vniuersos verbo dei subiecit. Quod factū eius ita laudatur, ut post Dauidē oib; p̃feratur regib; Iuda et Israel.

Iosias rex.

Non posse fidem nisi ex verbo Dei reformari.

Rom. 10.

2. Cor. 3.

Scripturæ plenā sufficiunt reformationē ecclesiæ formam.

Non potest autem R. T. M. aliud sequi consilium melius & tutius, cum hoc sit à deo profectum, & causæ qua de agitur accomodatissimum. Agitur de religionis reformatione & fide Christi vera. Eam scis oriri cælo, nempe doceri verbo Dei & infundi cordibus nostris per spiritum sanctum. Paulus enim: Fides, inquit, ex auditu est, auditus autem per verbum Christi. Proinde vera fides, vt non innititur verbo hominum, ita eodē non docetur aut plantatur. Alibi enim rursum dicit Apostolus: Predicatio mea non erat in persuasorijs humanæ sapientiæ verbis, sed in ostentatione spiritus & potentiæ, vt fides vestra non sit in sapientia hominum, sed in potentia dei. Proinde meritō repudiamus omnes humanas traditiones, & conuertimur duntaxat ad doctrinam verbi domini, extra quam certissimè iam constat nullam esse veræ fidei doctrinā, nullum veræ fidei fundamentū.

Neq; verò vllo modo audiendi sunt, quib; videtur scripturas canonicas nec satis claras nec satis plenas, sufficētes aut instructas esse, quæ iustā possint suppeditare reformationis formā. Blasphemant spiritum dei, impingentes ei obscuritatē & imperfectionem, quæ vitia nullus scriptor prophæticus æquo fert animo. S. Paulus veritatem vindicans: Omnis scriptura inquit, diuinitus inspirata, utilis est ad doctrinā, ad redargutionē, ad correctionē, ad institutionē, quæ est in iustitia, ut integer sit dei homo ad omne opus bonū apparatus. Quid in his oro verbis omittitur, quod modò ad perfectissimā reformationem pertinere videatur? Quid habent obsecro impudentes illi, quod his opponant? Perge, ergo, perge, rex pijsime, imitari reges sanctissimos, & infallibilē scripturæ sanctæ regulā, hoc est, perge, nulla hominū autoritate expectata, ex veracissimo & absolutissimo veritatis diuini verbi organo reformare ecclesias Christi Anglicanas. Dñs Iesus, ecclesiæ suæ caput et princeps, optimus, maximus, seruet & deducat te cultorē eius fidelissimū in veritate sua, in finē vsq;, ad gloriā nominis eius, & totius ecclesiæ Christianæ incolumitatē. Tiguri, Mense Augusto, Anno domini 1550.

R. T. M.

deditissimus Heinrychus Bullingerus, Tigurina Ecclesiæ in Heluetia minister.

DECADIS IIII. SER-

MONES RELIQVI OCTO: AV

THORE HEINRYCHO BVLLINGERO.

*De Deo & eius cognitione uera, modisq; cognoscendi ipsum varijs: Quod vnus sit Deus
substantia, personis trinus. S E R M O IIII.*

DISPVTAVI hactenus per Sermones XXXII. de Verbo Dei, eiusq; expositione legitima, de Fide Christiana, de Dilectione Dei ac proximi, itē de Lege naturæ, humana & diuina, deq; diuinæ legis partibus, nempe de Lege morali, ceremoniali & iudiciali: de Vsu legis, eius impletione & abrogatione, de Similitudine & differentia testamenti, populiq; cū ueteris tum noui, de Libertate Christiana, de Scandalo, de Bonorum operum ratione ac meritis: de Peccato & peccati speciebus uarijs: item de Gratia Dei, siue euangelio Iesu Christi, in quo nobis pater cœlestis omnia cū uitæ tum salutis æternæ dedit: deniq; de Pœnitentia & ijs quæ uidentur pertinere ad pœnitentiam. Et quoniam instituimus de potissimis religionis nostræ capitibus sobriè disputare, præterea in prædisputatis frequentissima incidit mentio Dei, cognitionis eius ac cultus, item Christi Iesu, & Spiritus sancti, rursus spirituum & bonorum & malorum, Ecclesiæ quoq; Orationis, Sacramentorum & similium rerum sacrarum, absolutis illis, poscit ipsa necessitas ut iam etiam dicamus de his omnibus & singulis ex scripturis sanctis, quod loqui dederit Dominus.

De Deo multæ fuerunt quondam opiniones erroneæ, non in uulgo duntaxat, *Varie opinio- nes de Deo.* sed & in philosophorum grege & pseudochristianorum cōuenticulis. De illis dicere solebat uetustissimus & eruditissimus scriptor Tertullianus, philosophos hæreticorum esse patriarchas: de his dixit beatus Ioannes Apostolus: Exierūt ex nobis, sed non erant ex nobis. Nam si fuissent ex nobis, permanissent utique nobiscum. *1. Ioan. 2.* Nec uideo quem fructum inde consequamini, si pergam singulorum recensere sententias. Præstat fortè audire qua in re errarint alij, ne in eundem scopulum & ipsi impingamus. Proinde si qui exercitiores exterorum & hæreticorum sententias de Deo cognoscere uelint, uel ex Plutarchi Placitis phil. lib. i. cap. 7. uel ex alijs gentilibus, aut etiam 1. lib. Cyrilli cōtra Iulianum, deniq; ex 4. cap. dogmatum uel definitionum ecclesiast. colligant. Nolo in præsentī pias aures & mentes hac molestia onerare. Diuersitas illa opinionum non alio fonte deriuatur, quàm ex audacia & inscitia hominum, quos non pudet suo arbitrio, & ex suo cerebro ea affingere Deo, à quibus omīno liberrimus & alienissimus est. *Vnde uarietas opinionum, & unde petenda uera dei cognitio.* Ut iam non commemorem humani ingenij angustiam ac tenebras. Quis uerò essentiam Dei intellectu suo capiat, cum nemo adhuc plenè perspexerit qualis sit anima hominis, qualia multa in corpore hominis, qualis substantia solis & lunæ? Adferuntur quidem multæ rationes physicæ: sed maius & mirabilius perpetuò manet opus Dei, quàm assequatur cerebrum & eloquutio hominis. Nullus ergo hominum certum aliquid de deo habere cupiens, in semetipsum descendat, aut humano innitatur iudicio. Alioquin semper colet figmentū cordis sui, stultitiam, nugas & deliria. Contra uerò non potest non rectissimè de Deo sentire, iudicare & loqui, qui nihil sibi tribuit, nihil ex suo fingit cerebro, aut confictum ex capite alterius, sibi sequendū

deligit, sed in omnibus os Dei obseruat, reuelationemq; Dei sequitur. Proinde uelut lege certa constitutum sit, non posse deum rectè cognosci nisi ex uerbo Dei; & Deum talem esse credendum uel recipiendum, qualè se ipse nobis in uerbo suo reuelat. Nemo certè melius quid & qualis sit Deus dixerit, quàm ipse Deus.

Esse Deum.

Psalm. 14.

Hic deus cum in uerbo suo, & per ipsam mundi machinam, per scripturas sacras, & per oracula ex ore patriarcharum, prophetarum & Apostolorum pronunciata, in animis denique seu conscientijs hominum testetur se esse, meritò regius propheta Dauid cecinit, Dixit insipiens in corde suo nō est Deus. Amentē enim esse necesse est eum, qui negat quod omnibus in mundo non destitutis sana ratione est perspicuum, esse uidelicet deum: cum & Cicero author ethnicus lib. de Natura deorum, inter alia dicat, Omnibus innatum & in animis quasi insculptum est esse Deum. Certè qui negant Deum esse, quem negant nihilominus metuunt, metuendo ergo confitentur, ac se ipsos ueluti redarguunt mendacij & perfidiæ.

Modum seruandum esse in perquisitione, quid sit Deus.
Proverb. 25.

Exodi 19.

Rursus sciendum est, in quæstione, Quid uel quis sit Deus, licet hæc instituat ex scripturarum discussione, modum omnino esse seruandum. Etenim curiosus uelle inquirere, scrutari aut inspicere ipsam Dei æternam essentiam, non modò periculosum, sed & modis omnibus est prohibitum. Solomon clamat, Quemadmodum multum mellis edere nō est bonum: sic qui scrutator est maiestatis, opprimetur à gloria. Ante colloquium illud singulare & excellentissimū, quo Deus noster in monte Sina cōgreditur cum uniuerso populo Israelis, audit Moses, Circumscribe terminum populo circum montem dicens, Cauete uobis ne ascendatis in montem, neq; extremitatē eius attingatis. Quicumq; montem attigerit, morte moriatur, &c. En capitale erat præscriptos transcendere limites uel terminos. Sunt ergo definita studia nostra. Certè legimus passim in sacris literis excellentissimos dei amicos trepidasse planè consternatos, quoties ipse deus spectro aliquo se ipsorum oculis sua sponte ingessit. Exempla non est quòd copiosius tractē. Notis quomodo se gesserit Abrahā in colloquio suo cum Deo habito Gene. 18. Quid dixerint parētes Gedeonis, in libro Iudicum. Quid Helias 3. Reg. 19. Petrus post quā ex miraculosa piscium captura intellexisset Christum amplius quiddam esse quàm hominē, exclamauit, Exi à me domine, quia homo peccator sum. Proinde sancti sicubi aliās in Dei negotijs, hic maximè sunt humiles, modesti & religiosi, intelligentes æternam & immensam potentiam maiestatemq; ineffabilem, nulla posse definitione circumscribi, nullo comprehendī nomine.

Luce 5.

Nomen Dei ineffabile.

Eleganter, piè & uerè Tertullianus in libro suo de Trinitate, Nomen Dei proprium, inquit, edici non potest, quia concipi non potest. Id enim nomine continetur quicquid etiam ex naturæ suæ conditione comprehenditur. Nomen enim significantia est eius rei, quæ comprehendī potuit ex nomine. At quādo id de quo agitur tale est, ut condignè nec ipsis intellectibus colligatur, quomodo appellationis dignè uocabulo pronunciabitur? Quod dum extra intellectum est, etiam supra appellationis significantiam sit necesse est; ut meritò quando nomen suum deus ex quibusdam rationibus aut occasionibus aut adiicit & præfert, non tam legitimam proprietatem appellationis sciamus esse depromptam, quàm significantiam quandam constitutam, ad quam dum homines decurrunt, Dei misericordiā per ipsam impetrare posse uideantur. Et idem iterum, De Deo & ijs quæ sunt ipsius & in eo sunt, nec mens hominis quæ sint, quanta sint, & qualia sint, dignè concipere potest: nec eloquentia sermonis humani æquabilem maiestati eius uirtutem sermonis expromit. Ad cogitandam enim & ad eloquēdam eius maiestatem, & eloquentia oranis meritò muta est, & mens omnis exigua est. Maior est enim mente

mente ipsa: nec cogitari possit quantus sit: quia si cogitari poterit, mente humana minor sit oportet, qua concipi possit. Maior est quoque omni sermone, nec dici possit. Quia si potuerit edici, humano sermone minor sit oportet, quo cum dicitur circumiri & colligi posset. Quicquid autem de illo cogitatum fuerit, minus ipso erit: & quicquid enunciatum fuerit, minus illi comparatum circum ipsum erit. Sentire enim illum taciti aliquatenus possumus; ut autem ipse est, sermone explicare non possumus. Siue enim illum dixeris lucem, creaturam ipsius magis, quam ipsum dixeris, ipsum non expresseris. Siue illum dixeris uirtutem, potentiam ipsius magis, quam ipsum dixeris & deprompseris. Siue dixeris maiestatem, honorem ipsius magis quam illum ipsum descripseris. Et quid per singula quaque percurrere longum facio? Semel totum explicabo. Quicquid omnino de illo retuleris, rem aliquam illius magis, quam ipsum explicaueris. Quid enim de eo condigne dicas aut sentias, qui omnibus & sermonibus & sensibus maior est? nisi quod uno modo & hoc ipsum, quomodo possumus, quomodo capimus, quomodo intelligere licet, quid sit Deus mente capiemus, si cogitauerimus id illum esse, quod quale & quantum sit non possit intelligi, nec in ipsam quidem cogitationem possit uenire. Nam si ad solis aspectum oculorum nostrorum acies hebescit, ne orbem ipsum obtutus inspicat, obuiorum sibi superatus fulgore radiorum: hoc idem mentis acies patitur in cogitatione omni de Deo: & quanto ad considerandum Deum plus intenditur, tanto magis ipsa cogitationis suae luce caecatur. Quid enim de eo (ut iterum repetam) condigne dicas, qui est sublimitate omni sublimior, & altitudine omni altior, & profundo omni profundior, & omni luce lucidior, & omni claritate clarior, omni splendore splendidior, omni robore robustior, omni uirtute uirtutior, omni pulchritudine pulchrior, ueritate omni uerior, & fortitudine omni fortior, & maiestate omni maior, & omni potentia potentior, & omnibus diuitijs ditior, omni prudentia prudentior, & omni benignitate benignior, omni bonitate melior, omni iustitia iustior, omni clementia clementior. Munera enim sunt necesse est omnium genera uirtutum eo ipso qui uirtutum omnium & Deus & parens est: ut uere dici possit id Deus esse quoddam eiusmodi esse cui comparari nihil potest. Super omne est enim quod dici potest. Haecenus Tertulliani uerba recensui.

Quamuis autem haec se omnino sic habeant, nec ulla uel angelorum uel hominum lingua plenè explicauerit quid, quis, uel qualis sit Deus, cum eius maiestas sit immensa & ineffabilis, scriptura tamen, quae uerbum Dei est, attemperans se nostrae imbecillitati, modos, formas uel rationes aliquot nobis suppeditat, per quas saltem in aliquam Dei cognitionem, quae interim nobis sufficiat donec hic in terris uiuimus, inducamur: ita tamen ut cogitemus perpetuò immensum definiri non posse, sed occasionem duntaxat aliquam praebere, qua ad maiora per spiritus illuminationem efferamur: semperque in hac disputatione ob oculos nobis praefixum teneamus hoc uerissimum aeterni Dei dictum, ad Mosen prolatum, Non poteris uidere faciem meam. Non enim uidebit me homo & uiuet. Vbi enim hinc migrauerimus exuti mortalitate & infirmitate humana, diuinam uidebimus maiestatem. Nam Ioannes Apostolus dixit, Scimus quoniam si apparuerit, similes erimus: quoniam uidebimus eum sicuti est. Cum his meminerimus & uerborum Pauli Apostoli dicentis, Cernimus nunc per speculum in aenigmate, tunc autem facie ad faciem. Proinde nemo praescriptos terminos transire, aut tempus destinatum praertere, & Dei faciem, ipsam inquam Dei essentiam, intueri in hac carne & in hoc seculo uiuens, impia curiositate audaciaque praesumat. Sufficiat cuique illa Dei reuelatio, quam ipse nobis in uerbo suo dignatur aperire, nimirum pro bona

Formae & rationes cognoscendi Dei.

Exodi 33.

1. Ioan. 3.

sua uoluntate quantum nobis & necessarium & utile est scire. Ac ueram utiq; sapientiam esse dicemus meritò quæ in hac re non uolet plus scire aut sapere, quam æterna sapientia sapere docet.

Nomina Dei.

Prima ratio cognoscendi Dei petitur ex ipsis Dei nominibus in scriptura ipsi attributis. Ea sunt multa & uaria, quia uirtus, sapientia inquā, bonitas & iustitia, ac que potestas eius infinita est. Recensebo & explicabo pro mea uirili duntaxat excellentiora maximeq; uulgaria.

Iehouah.

Inter nomina Dei excellit illud maximè quod uocant tetragrammaton, id est (si quidem sic loqui licet) quadrilaterum: componitur enim ex quatuor spiratilibus literis, ac dicitur Iehouah. Deriuatur hoc ab Houah uerbo substantiuo, cui præponitur Iod, ac fit Iehouah, id est, ens siue existo, qui uidelicet est αὐτοῦσία existentia ex semetipso, uitam & esse, non ab alio, sed ex seipso habens, nullius indigens ut sit, sed omnibus esse conferens, Deus utiq; æternus, sine principio & fine, in quo uiuimus, mouemur & sumus. Huc maximè pertinet quod in hac uerba legimus Exodi 3. cap. Et dixit Moses ad Deum: Si ueniens ad filios Israel (ad quos nunc me mittis) & dixerò eis, Deus patrum uestrorum misit me ad uos, ipsi interrogauerint me, Quod est nomen eius? Quid respondebo eis? Et respondit Deus Mosi, Sum qui sum. Vel, Ero qui ero. Et ait, Sic dices filiis Israel, Sum, uel, Existo, aut Ens, uel, Ero, misit me ad uos. Id est, Deus sum qui ero, & is misit me, qui utiq; est ens siue essentia & Deus æternus. Futurum enim tria comprehendit tempora,

Apocal. 1.

Qui est, qui fuit, qui erit, misit me. Certè beatus Ioannes Apostolus & Euangelista uidetur respexisse ad hoc uerbū Domini, quod & interpretari uoluit, dicens, in persona Dei, Ego sum Α & Ω, principum & finis: dicit Dominus, qui est, & qui erat, & qui erit siue uenturus est, omnipotens. Obseruarunt alij in omnibus ferè linguis, etiam barbaris, nomen Dei esse tetragrammaton. Certè de Hebraica non est dubium. De Græca, Latina & Germanica non minus certum est. Græcè enim Deus dicitur θεός, Latine Deus, Germanicè Gott. Addunt ex Persarum lingua *دئوس*, ex Ægyptiaca *دئوس* uel *دئوس*, & per contractionem *دئوس*. Porro ex quatuor literis mysteria planè mirifica proferunt Cabalistsæ. De quibus ut alij diligentius scripserunt, ita ego malo his subtilitatibus C. V. non implicari. Huic finitima sunt & hæc Dei nomina, Iah & Hu. Illud in Psalmis non semel occurrit. Dicit enim Dauid Halleluia, id est, laudate Dominum. Huius meminit idem Dauid, dicens Hu, ipse inquam Deus omnia essentia & creator, dixit & factum est: Hu, ipse præcepit & extitit. Apud Isaiam dicit, Ego Dominus, Hu est nomen meum, & gloriam meam alteri non dabo. Deriuantur autem & illa uocabula ab essentia, & docent Deum semper sui esse similem, essentiam ex seipsa ab æterno existentem, omnibusq; existentibus esse conferentem: utpote per quem, in quo, ad quem, sunt omnia, cum sit ipse perpetua & perfectissima *ἡ τελειότητα* seu perfecti habia.

Iah & Hu.

Adonai.

Nomen uerò Dei tetragrammaton Iehouah, non ita legunt uel exprimunt Hebræi, sed pro ipso reponunt Adonai. Illud enim dicunt esse ineffabile. Pro hoc reposerunt omnes interpretes uocabulum Domini. Est enim Deus Dominus omnium rerum, tam uisibilem quam inuisibilem. Nec est alius in toto mundo Dominus, nisi hic unus uel solus, cui omnia in mundo subiecta seruiunt. Nam ipse merum obtinet imperium, & monarchiam absolutissimam. Hinc Dei uocabulo ad euidentiam aliquādo coniungitur uox Sabaoth. Dicitur enim Dominus Sabaoth. Id quod alij exponunt Dominus uirtutum, alij Dominus exercituum. Deus enim cum sit omnipotens, uirtute seu robore præstat, imò & in exercitu suo, quid possit & quanta sit eius uirtus declarat. Cum enim Deus sit uniuersæ creaturæ, & his ut

Dominus Sabaoth uel exercituum.

imperator

Imperator aliquis suis militibus utatur, maximaq; & stupenda efficiat, uel per minima, quantus & quanta eius uirtus sit declarat. In exercitu Dei sunt omnes angeli, de quibus dixit Daniel, Millena millia & centena millia ministrabant ei. Ex his unus angelus cecidit una nocte militum, in castris Assyriorum, sub signis regis potentissimi Senacheribi, centena & octoginta quinque millia. In exercitu Dei sunt omnes stellæ, omnes uenti, omnes impressiones igneæ, aereæ & aqueæ. In exercitu Dei sunt omnes cacodæmones, omnes homines, reges & principes, tota omnium regnorum militiæ, omnes denique creaturæ, uisibiles & inuisibiles. His omnibus ipse pro suo arbitrio, imò pro bona & iusta sua uoluntate utitur, quando, quantum, & quandiu uult, ad efficiendum eius iudiciũ & uoluntatem. In puniendo primo seculo usus est aquis, in excindenda Sodoma & uicinis urbibus igni, in perdendis Chananæis & Iudæis hominum uel militum opera. Aliquando additur uocabulo Domini Æleon, & dicitur Dominus æleon, id est, excelsus. Nam Psalmo 113. legimus, Excelsus super omnes gentes Dominus, & super cœlos gloria eius. Quis sicut Dominus Deus noster, qui ita se sublimat in habitatione? Et Psalmo 97. Excelsior es Domine omnibus quæ sunt in terra, nimis exaltatus es supra omnes Deos.

Daniel. 7.

Dominus excelsus.

Rursus nuncupatur Deus El, nimirum à robore. Nam quod uult potest efficere, ideòque dicitur Deus fortis, heros uel gigas. Ieremias enim, Dominus est mecum, inquit, ceu gigas robustus. Isaias dicit, Dominus gigantis instar prodibit, & sicut miles excitabit zelum, clamabit & super hostes suos roborabitur. Huic confine est uocabulum Eloah, cuius plurale est Elohim. Illa appellatio innuit Dei præsentiam, qui nusquam deest suo opificio, & suis cultoribus. Ieremias clamat, Deum inducens loquentem, An non Deus de propinquo ego, & non Deus de longinquo? Num abscondet se quisquam in latebras, ut eum uidere nequeam, ait Dominus? An nõ cœlum & terram ego impleo? Nam prior dixit Dauid, Quò ibo à spiritu tuo, & quò à facie tua fugiam? Si ascendero in cœlum, tu illic es; si descendero in infernum, ades. Si sumam pennas auroræ & habitem in extrema parte maris, etiam ibi manus tua reget me, & tenebit me dextera tua. Ergo Paulus Apostolus, Non procul abest, inquit ab unoquoque nostrum Deus. Per ipsum enim uiuimus, mouemur & sumus. Ea de caussa Deus fortassis à Græcis appellatus est θεός, nimirum à προθεῖν à promptitudine & accurrendo, quòd ipse nunquam desit mortalibus, sed semper & ubique opem ferat. Similiter Plato in Cratylo & eius interpres Proclus, θεῶν, & προθεῖν, hoc est à currendo deduci arbitrantur: ceterum cursum illum non refert ad præsentiam & auxilium Dei: sed ad aliud. Nam cùm homines uiderent Solem, Lunam, Astra, cœlum ipsum currendo semper circumuolui, deos esse arbitrati sunt. Sunt qui θεῶν τῶν δεισῶν, hoc est, à metu & timore inflexum uelint. Timor enim uel religio credit & suadet esse Deum. Fortè à Græco uocabulo θεός formarunt Latini suum uocabulum Deus. Sed sunt qui putent uocabulum Deus deductum esse à dando, quòd scilicet omnia omnibus det. Ita enim Hebræis Dai (quod mox dicemus) uel schaddai nuncupatur, qui uidelicet sibi sufficit, nulla re indiget, sed omnibus omnia sufficit bona & necessaria. Alij Deum Latinis dictum uolunt, quòd ipsi nihil desit prorsus.

El.

Ierem. 20.
Isaiæ 42.Eloah.
Ierem. 23.

Psal. 138.

Act. 17.
Deus.

Deus.

Porro pluratiuam uocem Elohim scriptura non tantum Deo tribuit, sed & angelis & iudicibus, seu primarijs uiris: utpote quibus in officio ab ipso instituto laborantibus præsens adlit, & per ipsos operetur quæ uult, hominibusque salutaria sunt. Hæc uox coniungitur uerbis singularibus, ut Genes. cap. 1. In principio creauit dii (bara enim creauit singulare est) cœlum & terram. Ea re proponitur nobis

Elohim.

adorandæ Trinitatis mysterium. Tale enim quiddam dixisse uidetur Moses, in principio creauit Deus ille trinus cœlum & terram. 2. Samuelis 7. capite, coniungitur plurale cum uerbis pluralis numeri, rursus ad demonstrandam suprabenedictæ trinitatis perspicuam distinctionem.

Schaddai. Porro in fœdere quod pangit Deus cum Abraham patre nostro, iterum aliud *Genes. 17.* sibi nomen indit. Nam dicit, Ego Deus Schaddai, id est, sufficiens uel sufficientia. Deus ergo Schaddai appellatur. Id alijs uertunt uastatorem: quasi se iustum appellauerit uindicem & ultorem. Verum Moses ille Ægyptius, Nomen Schaddai compositum est, ait, ex uerbo Daij, quod est sufficit, & ex litera W, quæ idem pollet quod ascher, id est, qui, ut Schaddai sit idem, qui sufficit sibi omniumque suffi-

Saturnus. cientia est. Fortassis Ethnici uocabulum Saturni hinc illis attribuerunt, quos impiè putauerunt esse deos. Nam ut à die deducitur diurnus, sic à saturando nomen trahitur Saturnus. Deus ergo est cui nihil deest, qui sibi in omnibus & ad omnia satis est, qui nullius ope indiget, imò qui solus omnia habet, quæ pertinent ad perfectam huius & futuri seculi felicitatem, solusq; exaturare potest. Hac de causa

Gott. appellant Deum Germani Gott/quasi tu dicas bonum siue optimum maximum, das höchste oberste gut. Quia ut plenitudo est omnis boni, ita hominibus omnia bona liberalissimè impartitur. Germanica uox non multum ab antiquissima Ægyptiorum Dei nuncupatione. Vocant enim Deum *ḏw* uel *ḏw*. Si enim reponas pro *l* ipsum *y*, leges *yw*. Dominus ipse Exodi 6. capite hæc duo uocabula sua Schaddai & Iehouah, ceu excellentissima, coniungit ac dicit, Ego Iehouah. Et apparui Abraham, Isaac & Iacob in Deo Schaddai: & in nomine meo Iehouah non sum eis notus factus. Non quod patriarchæ non audierint aut sciuerint

Genes. 4. nomen Dei Iehouah. Hoc enim temporibus Seth mox ab exordio mundi cœpit inuocari. Tale ergo quidpiam uidetur dicere Dominus: Ego me patribus aperui, ueluti Deum Schaddai, qui in omnibus possim ipsos exaturare bonis, ideòque terram lacte & melle manantem promisi. Cæterum in nomine meo Iehouah eis nondum factus sum notus, id est, nondum præstiti quod promisi. Audiuius enim Iehouah dictum esse ab eo, quod ipse esse facit, ideòq; & promissionem in opus producit: iam ergo opere complebo, inquit, declaraboq; me non modò Deum esse Schaddai, sed & Iehouah, essentiam æternam, constantem, ueracem & mei per omnia similem.

Deus Abraham, Isaac & Iacob. Postremò legimus Exodi 3. Deum dixisse ad Mosen, Sic dices ad filios Israel, Dominus Deus patrum uestrorum Deus Abraham, Deus Isaac, & Deus Iacob misit me ad uos. Hoc est nomen meum in perpetuum, & hoc memoriale meum in generationem & generationem. Proinde aliud iam nomen Dei habemus. Vult enim appellari Deus Abraham, Isaac & Iacob. Hoc, inquit, memoriale meum erit in generationem & generationem, in quo uidelicet refricabo mea beneficia patribus illis exhibita, ut ex illis posterius me norint, meiq; meminerint. Quando enim audiuius nomina patriarcharum, simul ingerunt se omnia à Deo ipsis collata beneficia cum præstantissima tum innumera: quæ non frustra tanta diligentia & sigillatim exponuntur à Mose per primum librum, quem dicimus Genesim. Vult enim noster Deus esse perinde ut illorum Deus fuit: nisi non illi credamus, sicut ipsi crediderunt. Erit enim & nobis credentibus Iehouah & Schaddai, constans & æterna ueritas, esse & uita, confertissimusq; omnium bonorum cumulus. Interim non caret mysterio, quod cum patrum quoque aliorum Deus fuerit, utpote Adami, Seth, Enos, in primis autem Enoch & Noe, ex omnibus tamen delegerit triadem illam Abraham, Isaaci & Iacobi, singulisq; nominibus suum, id est, Dei nomen singulas

singulariter præfixit, dicens, Ego sum Deus Abraham, Deus Isaac, & Deus Iacob. Ita enim manifestè mysterium trinitatis in unitate diuinæ essentia docuit, & quod personarum quælibet eiusdem est diuinitatis, gloria, & maiestatis, id est, quòd uerus Deus est pater, uerus Deus filius, & uerus Deus spiritus sanctus: & quòd hi tres sunt unus Deus. Dicit enim, Ego sum Deus, &c. De qua re suo dicetur loco. Hæc de nominibus Dei hætenus, ex quibus qualiscunq; dei cognitio decerpi potest. Scio Dionysium quendam operosum de diuinis nominibus scripsisse commentarium: uerum intelligunt, opinor, p̃j & Apostolicæ doctrinæ studiosi omnes, Apostolorum discipulos res diuinas longè simplicius tractauisse. Scio alios recensere LXXII. Dei nomina ex scripturis & ex Cabalisticis libris, quæ ut alibi commemorauī, sic paulò post ex Exodi 34. cap. potiora ex illis recensere.

Dionysius de diuinis nominibus.

Secundò proponitur nobis in uerbo Dei spectandus, contemplandus, siue cognoscendus Deus per uisiones spectraq; diuina, ueluti in quadam parabola, dum per prosopographias & prosopopœias aut Icones nobis quasi ob oculos statuitur. Admonemur interim, ne hæreamus in uisibilibus illis, sed eleuemus mentem à uisibilibus ad inuisibilia & spiritualia. Neq; enim Deus corporeus est in sua substantia, quòd specie humana nobis exhibetur in uisionibus. Neq; quisquam sanctorum apud ueteres ante natum Christum humana imagine expressit Deum, quòd se humana specie uisendum exhibuisset patribus & prophetis. Anthropomorphitarum delirium est, Deum esse corporeum & instar hominum humana habere membra.

Spectra & prosopographia Dei uel icones.

Anthropomorphite.

Ac ne quis sibi imponat hac in causa, affingēs & ipse Deo rem aliquam indignā, antidoti uice recitabo C. V. S. Augustini uerba, quæ is ex scripturarum pura intelligentia aliorumq; orthodoxorum doctorum testimonijs ad Fortunatum de Vindendo deo contra Anthropomorphitas scripsit. De membris Dei, ait, quæ assidue scriptura commemorat, ne quisquam secundum carnis huius formam & figuram nos esse crederet similes Deo, propterea & eadem scriptura & alas habere Deum dixit, quas nos utiq; non habemus. Sicut ergo cum alas audimus, protectionem intelligimus: sic & cum audimus manus, operationem intelligere debemus. Et cum audimus pedes, præsentationem. Et cum audimus oculos, uisionem qua cognoscit. Et cum audimus faciem, iustitiam qua innotescit. Et si quid aliud eadem scriptura tale commemorat, puto spiritualiter intelligendum. Neq; ego hoc tantum, aut ego prior sic sentio: sed omnes qui qualicunque spiritali intelligentia obfistunt illis qui ob hoc Anthropomorphitæ nominantur. Ex quorum literis ne multa commemorando maiores moras faciam, unum S. Hieronymi testimonium interpono.

Deo incorporato membra attribuantur quomodo?

Psalm. 93.

Cum enim ille uir in scripturis doctissimus, Psalmum exponeret ubi dictum est, Intelligite igitur qui insipientes estis in populo, & stulti aliquando sapite, Qui plantauit aurem non audiet: aut qui finxit oculum non considerat? Inter cetera iste locus, inquit, aduersus eos maximè facit, qui Anthropomorphitæ sunt, qui dicunt Deum habere membra quæ etiam nos habemus. Verbi causa, dicitur habere oculos. Oculi domini aspiciunt omnia: manus Domini facit omnia. Et audiuit, inquit, Adam sonum pedum domini dambulantis in paradiso. Hæc simpliciter audiunt, & humanas imbecillitates ad dei magnificentiam referunt. Ego autem dico quòd deus totus oculus est, totus manus est, totus pes est. Totus oculus est, quia omnia uidet. Totus manus est, quia omnia operatur. Totus pes est, quia ubique est. Ergo uidete quid dicat, Qui plantauit aurem non audiet: aut qui finxit oculos non considerat? Et non dixit, Qui plantauit aurem, ergo ipse aurem non habet? Non dixit, Ergo ipse oculos non habet? Sed quid dixit? Qui plantauit aurem non audiet? Qui finxit oculos non considerat? Membra tulit, efficientias dedit. Et paulò post

Sumpta sunt hæc Hieronymi ex Tertulliano.

idem D. Augustinus, In his omnibus quæ de opusculis sanctorum atq; doctorum commemoravi, Ambrosij, Hieronymi, Athanasij, Gregorij (Nazianzeni) & si quæ aliorum talia legere potui, quæ commemorare longum putavi, deum non esse corpus, nec formæ humanæ habere membra, nec eum esse per locorum spatia diuisibilem, & esse natura incommutabiliter inuisibilem. Nec per eandem naturam atq; substantiam, sed assumpta uisibili specie, sicut uoluit apparuisse quibus apparuit, quando per corporis oculos in scripturis sanctis uisus esse narratur, in adiutorio Dei inconcussè credo, & quantum ipse donat intelligo. Hec Augustinus. Subijciam his & Tertulliani uetustissimi scriptoris ecclesiastici uerba ex libro eius elegantissimo de Trinitate, Efficaciæ, inquit, diuinæ per membra monstrantur, non habitus Dei, nec corporalia lineamenta ponuntur. Nam & cùm Oculi describuntur, quòd omnia uideat exprimitur. Et quando Auris, quòd omnes audiat proponitur. Et cùm Digitus, significantia quædam uoluntatis aperitur. Et cùm Nares, precum quasi odorum perceptio ostenditur. Et cùm Manus, quòd creaturæ sit omnis author probatur. Et quādo Brachium, quòd nulla natura contra robur ipsius repugnare possit edicitur. Et quando Pedes, quòd impleat omnia, nec sit quicquam ubi non sit Deus explicatur. Neque enim sunt ei aut membra aut membrorum officia necessaria, ad cuius solum etiam tacitum arbitrium & seruiunt & ad sunt omnia. Cur enim requirat oculos qui lux est? aut cur quærat pedes qui ubique est? aut cur ingredi uelit cùm non sit quò extra se progredi possit? aut cur manus expetat cuius ad omnia instituenda artifex est & silens uoluntas? Nec auribus eget qui etiam tacitas nouit uoluntates. Aut propter quam causam linguam quærat, cui cogitare iussisse est? Necessaria enim hæc membra hominibus fuerunt, non Deo. Quia inefficax hominis consilium fuisset, nisi cogitamen corpus impleffet, deo autem nec necessaria, cuius uoluntatem non tantum sine aliqua molitione opera subsequuntur, sed ipsa statim opera cum uoluntate procedunt. Cæterum ipse totus oculus, quia totus uidet: & totus auris, quia totus audit: & totus manus, quia totus operatur: & totus pes, quia totus ubique est. Non enim habet in se diuersitatem sui quicquid est simplex. Ea enim demum in diuersitatem membrorum recidunt, quæ ueniunt ex natiuitate in dissolutionem: sed hæc quæ concreta non sunt, sentire non possunt. Et quæ sequuntur. Illa enim omnia Tertulliani sunt.

Quomodo uiderint patres deū

Ioan. 1.
1. Tim. 6.
Exodi 33.

Deus per filium
egit omnia cum
patribus.

Ergo cùm Moses legitur uidisse deum de facie ad faciem, cùm leguntur Iacob Israel & prophætæ uidisse deum clarè, non in ænigmate, significatur exhibitam esse eius uisionem omnium manifestissimam, efficacem & maximè familiarem. Verè enim dixit Theodoretus Cyri Episcopus, Dicimus patres non uidisse diuinam naturam aut substantiam, quæ nec circumscribi, nec comprehendi, nec mente percipi potest, & quæ uniuersa comprehendit, sed quandam gloriam & quasdam uisiones, quæ eorum facultatibus responderent, nec eius modum excederent. Verissimæ enim semper permanent illæ certissimæ sanctarum scripturarum sententiæ, Deum nemo uidit unquam, Deus habitat lucem inaccessam, quem nemo hominū uidit nec uidere potest. Item, Nemo uidebit faciem meam & uiuet, id est, dum hic in terris in hac carnis nostræ corruptione & imperfectione uiuitur, nemo Dei essentiam, quæ est æterna & inuisibilis lux, intuebitur. Etenim hac corruptione liberati & clarificati uidebimus eum sicuti est. Proinde uisus legitur Deus à patribus non secundum plenitudinem diuinitatis, sed secundum capacitatem hominum. Tertullianus arbitratur omnia Testamenti ueteris à Deo patre acta esse per filium, qui assumpta specie competenti hominibus apparuerit & patribus loquutus sit. Paulus in principio Epistolæ ad Hebræos significanter loquitur de filio dei incarnato.

incarnato, non absolute negans nunquam quicquam per filium egisse patrem. Tertullianus, Filio data est, inquit, omnis potestas in caelo & in terra. Omnia autem non erunt nisi omnis temporis fuerint. Filius itaque est qui ad humana semper colloquia descendit ab Adam usque ad patriarchas & prophetas, in uisione, in somno, in speculo, in ænigmate. Sic semper ediscebat deus in terris cum hominibus conuersari, non alius quam sermo qui caro erat futurus. Ediscebat autem ut nobis fidem strueret, ut facilius crederemus filium Dei descendisse in seculum, & retro tale quid gestum cognosceremus. Et cætera. Hæc enim omnia Tertulliani sunt. Post hanc præmonitionem, subiiciemus iam uisiones diuinæ maiestatis exhibitæ hominibus sanctis.

Visiones Deus seruis suis uarias & multas exhibuit, quibus maiestatem suam utcumque adumbravit: quas omnes sigillatim quoque referre ac exponere immensi esset operis. Celebriores inuenias, Exodi 19. Isaia 6. Ezech. 1. Daniel. 7. & in Apocalypsi beati Ioannis euangelistæ & Apostoli. Eas indicasse sufficit. Porro celeberrimam & absolutissimam omnium tractabo iam paulò fufius. Ea extat Exodi 33. & 34. cap. Experiebatur Moses facilitatem bonitatemque dei, & quod ab ipso nihil non impetraret, audet ergo illud à deo postulare, quod omnibus seculis omnes uerè sapientes unicè in uotis habuere, deum in sua substantia gloria & maiestate inspicere. Dicit enim Moses, Quandoquidem intelligo te mihi uelle peroptime, neque quicquam denegare posse, agè obsecro ostende mihi gloriam tuam, id est, si ne oro ut te talem inspiciam, qualis es reuera in tua gloriosa essentia & maiestate. Ad hanc postulationem omnium maximam deus respondens, Ego, inquit, efficiam ut coram te transeat omne bonum meum: & clamabo nomen domini, uel in nomine domini, coram te. Quibus uerbis duo pollicetur Mosi, Alterum, Omne bonum meum transibit coram te. Cæterum supremum hoc dei bonum aliud esse nequit, quam ipse deus optimus maximus, uel potius sermo dei, ipse inquam dilectissimus dei filius, in quo reconditos credimus omnes thesauros sapientiæ, diuinitatis, bonitatis & perfectionis. Huius enim spectrum uel speciem, quandam humanam uisibilem (quando incarnandus erat in fine seculorum) obiecit oculis Moysi. Alterum est, Clamabo nomen domini uel in nomine domini coram te, id est, proclamabo nomenclaturam meæ gloriæ, ex qua quis sim intelligas, uideasque animo. Porro ne quis merito Moysi attribueret uisionem tam excellentem, interponitur hæc à domino sententia, Visio illa tibi non obtingit propter tuum meritum. Nam citra meritum humanum reuelo me cuicumque uolo, citraque respectum personæ in quemlibet sum beneficus. Quæ consideratio gratuita gratiæ & bonitatis liberalissimæ dei, admodum pertinet ad ueram dei cognitionem. Deinde redit dominus & significantius declarat Mosi quomodo se sit ei exhibiturus. Non conceditur tibi, inquit, in hac adhuc uita agenti uidere faciem meam, id est, ad plenè uidere meipsum in mea substantia. Hoc enim reseruatur beatis spiritibus & clarificatis corporibus in futuro seculo. Sic ergo me tibi ostendam, Tu ascendes in montem: tibi commonstrabo tibi in saxo cauernam, in eam te statues: ego uerò ponam super te manum meam, nubem inquam uel tale quippiam, ne in accedentis uultum rectè intuearis. Loquutione enim hac imitatur deus homines, quibus receptum est manus in uultum eius expansas ingerere, quem nolunt propius contueri uel inspicere res. Addit dominus, Interim uerò transibo, id est, spectrum assumptum, nimirum species humana in qua me uisendum exhibebo, transibit. Vbi autem transiero tuque rectè in uultum meum aspicere amplius nequiueris, remouebo manum, qua uultum tuum contexeram, tum uerò licebit inspicere tergum

Visionibus adumbratur.

Moses desiderat uidere gloriam Dei.

Deus gratuito bona confert.

spectri, uel posteriora mea. Cæterum posteriora Dei sunt dicta & facta Dei, quæ post se relinquit, ut ex ipsis eum æstimemus. Rursus contemplatio faciei sumitur pro exactissima cognitione. Qui autem in tergum duntaxat aspiciunt, minus exactè cognoscunt. Præterea posterioribus temporibus misit deus filiū suum in mundum, natum ex muliere. Quem qui fide contemplantur, diuinitatem quidē in humanitate non uident, ex dictis tamen & factis cognoscunt quis sit deus, adeoq̃ patrem cernunt in filio. Discunt enim quòd Deus summum bonum est, & quòd filius Dei Deus est, patri coæqualis & consubstantialis.

*Quomodo deus
se Mosi uiden-
dū exhibuerit.*

Videamus iam quomodo se exhibuerit Deus Mosi (iuxta promissionem auditam hætenus) uisendum. Diluculo surgens Moses ascendit in montem alacris ad petram, quam indicauerat dominus, & recipit se in cauernam, cupideq̃ uisionem siue reuelationem dei expectat. Dominus uerò descendit in nube, uenitq̃ in montem ad cauernam petræ, in qua expectabat Moses. Mox uerò oblecta facie Mosi, transijt spectrum dei, id est, species illa humana à deo assumpta: cumq̃ iam tergum Mosi obuenteret spectrum, nec in uultum aspicere amplius posset Moses, remouit dominus manum, ac Moses aspiciebat in posteriora domini. Vnde colligebat deum aliquando, hoc est, posterioribus seculis, fore incarnandum atq̃ ita reuelandum orbi. De qua reuelatione dicemus paulò post plura. Simule etiam clamauit dominus, & catalogo quodam uti promiserat, nomina sua recensuit, quibus naturam suam ueluti adumbrauit. Dixit enim, Iehouah Iehouah, deus misericors, & beneficus, longanimis, immensa bonitatis & ueritatis, custodiens beneficentiam in mille, auferens uel condonans iniquitatem, transgressionem & peccatum: attamen sceleratum non dimittens impunitum, uisitans iniquitatem patrum in filiis & nepotibus in tertiam & quartam generationem. Hoc quid aliud est quàm

Quid sit Deus.

si dixisset: Ego sum essentia illa increata, ex meipso ab æterno existens, quæ omni bus esse confert, quæ omnia in esse conseruat. Ego sum deus fortis & omnipotens. Non abutor mea potentia. Sum enim clemens & misericors, qui meas amo creaturas, hominem in primis, in quem totis incalesco uisceribus. Sum diues & beneficus creaturisq̃ meis iuuandis promptissimus. Gratis omnia confero. Sum longanimis minimeq̃ hominum more irritabilis, præceptsq̃ ad uindictam. Neq̃ uerò parcus aut malignus sum, ut solet uulgus diuitum in hoc seculo. Sum liberalissimus & beneficentissimus, gaudens distrahi & beneficijs adoperire fideles. Sum præterea fidelis & uerax. Nec fallo quenquam, nec mētor quicquam: quod promitto, fideliter præsto. Neq̃ uerò opes meas prodigo, aut has spargens in homines, deficio tandem exhaustus. Custodio enim beneficentiam in mille generationes: ut quanquam prius seculum ex meis opibus splendide uixerit, posteri tamen ad finem usq̃ seculi nihilominus in me inueniant quod ad iucundam satietatem exaturet. Sum enim fons bonorum inexhaustus. Si quis uerò in me peccarit, ipsumq̃ sceleris pigeat, non sum implacabilis. Sponte enim condono errores peccata ac scelera. Ideo tamen nemo existimet me peccatis oblectari aut patronum esse sceleratorum. Idem enim sceleratos & impœnitentes punio: meos item, ut retineam in officio, castigo. Nemo autem putet se impunè peccaturum, quòd uidet maiores suos impunè peccasse, hoc est, non protinus esse deletos. Reseruo enim uindictam in tempus iustum, modisq̃ omnibus ita me gero, ut omnes fateri cogantur me esse deum iudicij. Hæc cum audisset ac uidisset seruus dei Moses, festinauit prociditq̃ in terram ac adorauit. Idem faciamus & nos, certi quòd dominus non dignabitur se & gloriam suam, quoad in hisce terris uixerimus, plenius nisi in exhibito Christo reuelare. Quæ itaq̃ sufficiebant Mosi, sufficiant & nobis, sufficiat cognitio Christi.

Omnium

Omnium enim clarissima & præstantissima cognoscendi Dei ratio uel forma, *Per Christum*
 in Iesu Christo Dei filio incarnato nobis proponitur. Ideo enim modò audiuius *aperit se deus*
 & Moysi obiectam esse Christi umbram, cum deus semetipsum ei uoluisset reuela- *euidenissime.*
 re quàm familiarissimè. Et Apostolus Paulus illuminationem cognitionis gloriæ *2. Cor. 4.*
 dei in facie Iesu Christi reponit. Idem alibi eundem appellat paternæ gloriæ splen- *Hebr. 1.*
 dorem & expressam ipsius substantiæ imaginem. Certè ipse in euangelio clariss- *Ioan. 6.*
 mè dicit, Nemo nouit patrem nisi filius, & cui uoluerit filius reuelare. Nam ipse *Matth. 11.*
 est uia ad patrem: in ipso uidetur pater. Rursus enim in euangelio legimus, Deum *Ioan. 14.*
 nemo uidit unquam, unigenitus qui est in sinu patris, ipse reuelauit nobis. Iterum *Ioan. 1.*
 uerò Apostolus, Postquam, inquit, in sapientia Dei nō cognouit mundus per sa- *1. Cor. 1.*
 pientiam deum, uisum est Deo per stultitiam prædicationis saluos facere creden-
 tes. Sapientiam Dei appellat ipsam creationem seu opificium mundi, & admiran-
 da dei opera, quibus deus mundo innotescere uoluit: & in quibus excutiendis &
 considerandis uniuersa omnium sapientū sapientia hætenus incubuit. Sed quo- *Rom. 1.*
 niam hac in parte nihil profecit, mundana sapientia, rerum ferè omnium causas
 aliò referente quàm ad unicum & uerum scopum, deum, dumq; se arbitrantur
 sapientes esse, ut idem doctor gentium ait, in sua ipsorum ratiocinatione stulti fa-
 cti sunt, placuit Deo per aliam rationem mundo innotescere, haud dubiè per stul-
 tam prædicationem euangelij: nimirum quæ reuera absolutissima est sapientia, ue-
 rum humanæ sapientiæ uidetur esse stultitia. Stultum enim apparet hominibus hu-
 ius seculi, deum uerum incarnatum, conuersari nobiscum in terris, egere, esuri-
 re, pati ac mori. At hac ipsa ratione quàm illustrissimè innotescit mundo deus, e-
 iusq; sapientia, bonitas, ueritas, iustitia & potentia. Ineffabilis enim dei sapientia
 in toto Christi negotio & dispensatione mirifica singulariter elucet, maximè si
 causas (de quibus aliàs) excutiamus, si item doctrinam Christi expēdamus. In in-
 carnatione filij dei inclarescit quàm bene uelit peccatis immerso mundo, utpote
 cui connectitur fœdere indissolubili, mortisq; & satanæ filios adoptat per Chri-
 stum in filios hæredesq; uitæ æternæ. Quod uerò Christus singula quæ de ipso ex
 reuelatione dei prædixerat propheta, tam exactè implet, quod ea quæ in ipso deus
 pater promiserat tam liberaliter præstat, declarat quàm sit immotus & uerax deus
 æternus. In factis seu miraculis Christi domini, in resurrectione eius, in gloriosa
 eius ascensione ad cœlos, uberrimaq; effusione in discipulos sancti spiritus, in pri-
 mis uerò in conuersione totius orbis ad ueritatem euangelicam ex paganismo &
 Iudaismo, aperit se potentia Dei, longanimitas, maiestas & beneficentia ineffabi-
 lis. In morte filij relucet maxima dei iustitia, utpote quæ peccatis nostris offensa
 placari non potuit, nisi uictima tanta. Interim in eo quod non pepercit filio unige-
 nito, sed hunc pro nobis hostibus suis & impijs tradidit, elucescit misericordia illa
 quæ meritò supra omnia dei opera commendatur. In filio itaq; & per filium ma-
 nifestat se deus orbī manifestissimè, adeo ut quicquid de deo & eius uoluntate sci-
 re opus est, quicquid cœlestis & salutaris sapientiæ est, id totum aperitur & perui-
 detur in filio. Idcirco roganti Philippo, Domine ostende nobis patrem, & sufficit *Ioan. 14.*
 nobis, respondisse legimus dominum, Tanto tempore uobiscum sum, & non co-
 gnouistis me? Philippe, qui uidit me, uidit patrem. Et quomodo dicis tu, ostēde no-
 bis patrem? Non credis quod ego in patre sum, & pater in me? Reuocat autem
 omnes fideles à perquisitione dei curiosiore, proponens mysterium dispensatio-
 nis, in quo nos uult acquiescere, in eo nempe quod deus homo factus est. Ergo
 quicumque cupiunt deum uerè uidere & cognoscere, oculos animi in Christum
 conuertant, & huius mysterio uerbis ac factis credant: ex his discantes quid &

104. 17.

quis sit deus. Talis enim est deus, qualem se nobis in Christo exhibet cognoscendum: atque in hoc ipso alibi constituit uitam æternam, dicens, Hæc est autem uita æterna, ut cognoscant te solum deum uerum, & quem misisti Iesum Christum. Certeat qui sibi consultum cupit, ne quid amplius scire uelit, quam in Christo ab ipso deo nobis traditum est. Quisquis autem Christo neglecto, dictamē & subtilitates ingenij humani sequitur, euanesceat certē & perit in suis cogitationibus.

Cognoscitur
Deus ex suis
operibus.
Psalm. 19.
Rom. 1.

Opera Dei bis
fariam consi-
deramus.

Psalm. 104.

Isaie 40.

Ierem. 10.

Quarta cognoscendi dei ratio petitur ex contemplatione operum eius. Nam David canit, Cœli enarrant gloriam Dei, & opera manuum eius annunciat firmiter. Sed & Paulus Apostolus, Quæ sunt inuisibilia dei, inquit, ex creatione mundi dum per opera intelliguntur, peruiidentur, ipsa nempe æterna eius potentia ac diuinitas. En æterna Dei potentia & diuinitas, inuisibilia illa dei sunt, sed ea intelliguntur ex consideratione operum dei: ex operibus ergo Dei deus ipse cognoscitur. Considerantur autem opera dei bifariam. Vel enim proponuntur nobis contemplanda in rebus propter hominem conditis, ut in cœlo & in terra, & in ijs quæ sunt in cœlo & in terra, prouidentiaque dei & gubernantur & conseruantur, cuius generis sunt astra astrorumque motus siue cursus, influentia cœlestes, temporis uicissitudo, animantia omnis generis, arbores, plantæ, fructus terræ, mare & quæ in mari sunt, lapides, & quæ in terris latitant effodiunturque ad hominū usum. De his scripserunt doctissime & piissime S. Basilii & S. Ambrosii in opere sex dierum, quod appellarunt Hexaëmeron. Hic habet locū historia illa naturalis, quā gloria excellentissimus rex David in Psalmis, maximē post centesimum, appositisimē accommodat instituto nostro. Verū ne inuolamus res, dicemus quædam paulō post de Creatione mundi, diuinæque gubernatione & prouidentia. In præsentis satis fuerit agnoscere cœlum ac terram, & ea quæ in his sunt, nobis enarrare & quasi ob oculos statuere deum ut sapientissimum ita potentissimū esse, admirandum, infinitæ maiestatis, gloriæ immensæ, iustissimum, beneficentissimum, optimum, maximum. Optimē ergo rebus humanis consulens Isaïas fidelissimus ecclesiæ doctor, Attollite, inquit, in sublime oculos uestros, & cōtemplamini quis creauerit ista, producens in numero exercitum eorū, singula suis nominibus uocans, cuius tanta est uirtus, ut nullum quidem illorum desit. Quanquam enim ab exordio astra mundo illuxerint, & suo cursu ad quod creata sunt perfecerint, usu tamen neque contrita, neque uetustate cōsumpta aut obscurata sunt. Nam uirtute creatoris conseruantur integra. Ieremias quoque clamat, Domine nemo est sicut tu. Magnus es tu, & magnum est nomen tuum cum potentia. Quis te non metuat, o rex gentium? Quia tibi est decor: quia inter omnes gentium sapientes, & in omni regno eorum nemo est tibi similis. Et mox, Dominus deus uerus deus & uiuus est, deus & rex sempiternus: ab ira eius contremiscit terra, nec possunt gentes sustinere indignationem illius. Qui terram condit sua uirtute, sapientia sua orbem disponit, prudentia sua cœlos extendit. Cum ille uocem dat, ingens aquarum uis in aere coit, & eleuat nubes ab extremitate terræ, fulgura in pluuiam uertit, atque educit uentos de receptaculis suis. Vel proponuntur nobis opera Dei contemplanda in ipso omnium creaturarum domino, homine: non tam in opificio eius quod spectandum pulcherrimē depinxit Lactantiū & Andreas Vuesalius, quā in operibus, quæ erga hominem uel in homine aut per hominem fiunt ab ipso domino. Alios enim iuste punit deus homines, puniendoque declarat se nouisse res mortalium, & odisse omnem iniuriā & iniustitiā. Alios cumulat beneficijs maximis, benefaciendoque demonstrat se esse diuitem, imō fontem bonorū inexhaustum, beneficū, bonum & misericordem, clementem & longanimum. Huius generis

neris innumera sunt in historia diuina. Cain propter patratum parricidium uiram uiuit in terra longè miserrimam. Vindicat enim innoxium sanguinem iustus dominus. Primum illud seculum diluuiò immisso cœlitus, contempti numinis poenas dat. Noe uerò cum suis seruatur in arca per dei misericordiam. Abrahamum educit deus ex Vra Chaldaeorum, & reponit in terrā Chanaā, benedicensq; ei omnibus bonis adobruit. Iacobum quoque in uaria coniectum discrimina, misericordè seruat. Iosephum per afflictiones graues ad thronum euehit Ægypti. Ægyptios grauius affligit propter tyrannidem exercitam in miserum Israelis populū, & propter cōtemptum uerbi Dei. Sed longum & laboriosum esset commemorare singula. Discimus autem ex his & similibus dei operibus, quis & quantus sit deus noster, quā sit sapiens, bonus, potens, munificus, iustus & æquus, & quòd huic oporteat nos credere & obedire. Asaph enim canit, Quæ audiuius & cognouimus, & patres nostri narrauerunt nobis, ea non celabimus filios nostros, & tibus posteris narrabimus laudes domini, robur eius, & stupenda opera quæ fecit: ut filij qui nati sunt cum adoleuerint, narrent filiis suis, & ponant in deo fiduciam, nec obliuiscantur operū dei, mandataq; eius obseruent. Et quæ sequuntur Psalmo 78.

Psal. 78.

Huic rationi contermina est quæ colligitur ex comparatione quadam. Scriptura enim omnes in mundo præstantissimas res confert cum deo, quem mox omnibus præfert, ut inde colligamus deum summum esse bonum, & maiestatem eius esse immensam. Vnus Isaia locus esse poterit pro multis, qui in hæc uerba legitur cap. 40 Quis mensus est uola sua aquas, & cœlos palmo quis æstimauit? Quis apprehendit tribus digitis puluerem terræ, & appendit montes in statera & colles in bilance? Quis direxit spiritum domini? Quis à consilijs ei fuit? Quis eum docuit? Cum quo inijt consilium, qui eum erudiret? Ecce gentes deo collatæ tanquā gutta situlæ, & reputantur tanquam momentum quod bilancem mouet, uel propendet. Ecce insulas quasi minutissimum puluerem proijciat. Libanus non satis esset ad incendendum ei ignem, neq; feræ eius sufficerent holocausto. Omnes gentes coram eo tanquam nihil sunt, & ipsi comparatæ tanquam res friuolæ reputantur. An hæc non intelligitis? an non à rerum primordio hoc nunciatum est uobis? an nō docti estis à iactis terræ fundamentis? Qui sedet supra globum terræ, & qui habitant in ea sunt ueluti locustæ. Qui extendit cœlos ut cortinam, & expandit eos instar tentorij. Qui redigit potentes ad nihilum, & reddit iudices terræ ut sint inanes. Et reliqua. Huc pertinent dei prosopopœiæ, quarum inuenias aliquot præter uisiones quas posuimus in ratione secunda, excellentiores autem Psal. 18. & Cant. cap. 5. Eas inexplicatas transeo, ne nimis diu his uidear immoratus. Est enim & ad alia transeundum.

Deus adumbratur nobis per collationem.

Postremò cognoscitur deus ex sententijs ore prophetarum & Apostolorum pronunciatis. Cuius generis est illa eximia beati Ieremiæ, dicentis. Ne gloriatur sapiens in sapientia sua, neq; gloriatur robustus in robore suo, neq; gloriatur diues in diuitijs suis; sed in hoc gloriatur qui gloriatur, quòd intelligat & cognoscat me, quoniam ego sum dominus, qui misericordiam, iudicium & iustitiam facio in terra: quapropter ijs unice delector, dicit dominus. Seruamur autem misericordia dei, uarijsq; ornatur muneribus. Iudicio impijs & inobsequentibus poenas irrogat, & seruatur æquitatem. Sicuti & iustitia quæ promissit, præstat ueraciter. Dicimus ergo deum esse saluatorem & liberalem omnium bonorum datorem, æquissimum iudicem, & in promissis præstandis ueritatem ueracissimam. Huc referenda est doctrina prophetarū & Apostolorū, quæ tradit eam esse ueram

Deus discitur ex sententijs uel pronunciatis. Ierem. 9.

Vnus est essentia Deus.

Dei cognitionem, quæ agnoscit deum in essentia unum, in personis autem esse trinum. De unitate diuinæ essentia (qua asserta reijcitur & condemnatur pluralitas deorum gentilium) hæc subiicimus ex diuinis literis testimonia, & excellentiora quidem illa: quis enim singula enumeret? Clarissimum illud est quod prophetica & euangelica autoritate subnixum, ex Deut. 6. cap. petiit, apud Marcum in 12. cap. totidem uerbis explanatur, Dixit Iesus, Primum omnium præceptum est, Audi Israel, dominus deus noster, dominus unus est. Et diliges dominum deum tuum ex toto corde tuo, & ex tota anima tua, & ex tota mente tua, & ex totis uiribus tuis: Hoc est primum præceptum. Et secundum simile hoc est, Diliges proximum tuum ut teipsum. Maius his aliud præceptum non est. Sequitur in euangelio, Et dixit Scriba, Bene præceptor cum ueritate dixisti, quod unus sit deus, & nō sit alius præter illum, quodq; diligere eum ex toto corde, & ex tota intelligentia, & ex tota anima, & ex totis uiribus, ac diligere proximum ut seipsum, plus sit quàm uniuersa holocaustomata & uictimæ. Cum hoc testimonio faciunt & alia in lege insigniora. Legimus enim Exodi 20. ipsum dominum in monte Sina ore proprio enunciaffe, Ego dominus Deus tuus, qui eduxi te ex terra Ægypti, de domo seruitutis: non sint tibi dī alij coram me. Rursus canit Moses in Carmine suo extremo, deum inducens loquentem, Videte quod ego, ego inquam, ipse sum dominus, & non est deus præter me. Ego occido, & rursus uiuifico: ego uulnus infli-go, & ego medeor, nec est qui ē manibus meis eripere possit. Cum testimonijs legis consentiunt prophetarum testimonia. Nam Dauid Psalm. 18. Via dei integra est, ait, eloquium dei repurgatum, scutum est omnium in se sperantiū. Quis enim deus præter dominum? aut quis est petra præter deum nostrum? Plurima huius generis alia passim occurrunt in Psalmis. Dominus apud Isaiam & per Isaiam clamat & dicit, Ego dominus, Hu est nomen meū, & gloriam meam alteri non dabo, nec laudem meam sculptilibus. Ego sum primus, & ego sum nouissimus, & præter me non est deus. Et quis mei similis? Vocet & annunciet illud atq; hoc disponat mihi ab eo quo posui populū seculi, & imminetia ac futura annuncient eis. Ego dominus faciens omnia, celos extendo solus, & mea uirtute terram expando. Irrita facio signa mendacium, & stultos & insanos reddo diuinos, auerto sapientes retrorsum, & scientiam eorum stultam reddo. Excito uerbum serui mei, & consilium nunciorum meorum perficio. Ego dominus, & nullus ultra: præter me non est deus. Ego dominus & nullus ultra, formans lucem & creans tenebras, faciens pacem & creans malum: ego dominus facio omnia ista. His prophetiis subiungemus iam unum & alterum S. Pauli doctoris gentium testimonium. Is ad Timotheum scribit: Vnus est deus, unus etiam mediator dei & hominum, homo Christus Iesus. Et iterum, Vnus dominus, inquit, una fides, unum baptisma, unus Deus & pater omnium, qui est super omnia, & per omnia, & in omnibus uobis. Rursus ad Corinthios dicit idem apostolus, Nullus est deus alius nisi unus. Nam etsi sint qui dicantur dī, siue in cœlo siue in terra (quemadmodum sunt dī multi & domini multi) nobis tamen unus est deus, Pater ille, ex quo omnia, & nos in illum: & unus dominus Iesus Christus, per quem omnia & nos per illum. Arbitror autem hæc testimonia diuina satis esse clara & sufficere ad demonstrandum, quod Deus substantia unus sit, essentia inquam immensæ, æternæ, spiritualis.

Cæterum sub una diuinitatis essentia, demonstrat nobis scriptura sancta distinctionem patris, & filij, & spiritus sancti. Distinctionem autem dico, non diuisionem aut separationem. Neq; enim plures adoramus & colimus deos, sed unū: ita tamen ut nec confundamus, nec negantes auferamus essentia diuinæ substantias

Isaie 42.

Isaie 44.

Isaie 45.

1. Tim. 2.

Ephes. 4.

1. Cor. 8.

Sub una Dei
essentia est
distinctio.

stentias siue personas tres, harumque proprietates. Noëtus reuera ἀνόητος, & Liby-
 cus ille Sabellius, homo impius, audax ac stupidus (à quibus nata est crassa Pa- *Error crassus*
 trispassianorum hæresis) docuere patrem & filium & spiritum sanctum nihil in *Patrispassianorum.*
 deo distinctum sonare, sed diuersa esse dei attributa. Deum enim non aliter appel-
 lari patrem aut filium aut spiritum sanctum, quàm bonum, iustum, clementem,
 omnipotentem, sapientem, &c. Illi ipsi, Pater, inquit, mundum condidit, idem
 filij nomine carnem assumpsit & passus est, idem ipse commutato nomine iam e-
 tiam spiritus sanctus uenit in discipulos. Veritas autem orthodoxa prophetica &
 Apostolica disertè tradit nomina patris & filij & spiritus sancti, indicare nobis qua-
 lis sit deus in sua natura. Nam deus naturaliter & ab æterno pater est, quia ab æter-
 no filium ineffabiliter genuit. Idem Deus naturaliter filius est, quia ab æterno à pa-
 tre genitus est. Idem deus naturaliter est spiritus sanctus, quia æternus amborum
 spiritus est ex utroque procedens, unus cum ipsis Deus: qui cum in scripturis appel-
 latur deus clemens, bonus, sapiens, misericors, iustus, non tam quid in seipso sit si-
 gnificatur, quàm qualem se nobis exhibeat. Eadem scriptura apertè dicit patrem
 per filium condidisse omnia: neque uerò patrem in terram descendisse, nec carnem
 nostram assumpsisse, nec pro nobis esse passum. Filius enim, Exiui à patre, inquit, *Ioan. 16.*
 & ueni in mundum: iterum relinquo mundum & uado ad patrem. In monte oliua-
 rum idem filius prostratus orat, Pater, si possibile est, transeat à me calix iste. Idem *Matth. 27.*
 iterum in Euangelio ait, Ego rogabo patrem, & alium paracletum uel consolato- *Ioan. 14.*
 rem dabit uobis. En alium, inquit, consolatorem dabit pater. Iterum tamen ne pro-
 pter personas illas, personarumque proprietates, disiungeremus diuinam naturam,
 rursus in Euangelio dicit, Ego & pater unum sumus. Cum enim dicit Vnum, eli- *Ioan. 10.*
 dit substantiam uel naturam diuinam separantes aut lacerantes: cum uerò dicit
 Sumus, & non sum, eos confutat qui subsistentias uel personas confundunt. Pro-
 inde Apostolica & catholica doctrina tradit, & confitetur tres esse distinctos pro-
 prietatibus, sed trium eandem esse essentiam siue naturam, eandem omnipoten-
 tiam, maiestatem, bonitatem, sapientiam. Quamuis enim ordo sit in Trinitate, inæ-
 qualitas tamen in ipsa nulla est prorsus: nullus est alio tempore prior uel dignita-
 te potior: sed trium est una deitas, & hi tres sunt unus & æternus deus. Ac primis *Disputatio ex-*
 tiua quidem ecclesia, temporibus Apostolorum & proximè insequentibus simpli *orta de Deo.*
 citer sic credidit, spretis & repudiatis quæstionibus curiosis, superuacaneisque di-
 sputationibus. Simul autem exorti sunt in ecclesia Dei uiri pestilentes, loquentes
 peruerfa, quos Apostolus meritò appellauit lupos graues, gregi non parcentes. Hi *Act. 20.*
 noxias & peregrinas contexuerunt quæstiones, blasphemias linguas in ipsum coe-
 lum exacuentes. Contenderunt enim tres personas non posse unam esse naturam
 uel essentiam, ideoque asserta Trinitate plures à Christianis cum ethnicis deos ado-
 rari. Rursus cum non possit esse nisi unus deus, consequens esse eundem sibi esse
 patrem, filium & spiritum sanctum. Ita enim eos ineptire oportebat, quos non di-
 rigebat uerbum dei, sed crassa carnis humanæ imaginatio. Ac puniebat Deus hoc
 modò giganteam istorum hominum audaciam, quorum animi omni reuerentia
 & timore dei uacui contendebant impiè in ipsam dei faciem aciem oculorum car-
 nis defigere. Cæterum cogeantur fideles & uigilantes ecclesiarum antistites atque
 pastores, à caulis ouium Christi huiusmodi lupos abigere, & pro ueritate orthodo-
 xa, hoc est, pro Vnitate & Trinitate, pro monarchia & mysterio dispensationis stre-
 nuè certare. Certamen uaria peperit uocabula, quibus oportuit lubricos homi-
 nes tenere uel circumscribere. Nata sunt itaque mox ab initio uocabula Vnitatis, *Voces in hac di-*
 Triadis uel Trinitatis, Essentiæ, substantiæ, Personæ. A Græcis ferè usurpata sunt *sputatione usur-*
 patæ quales.

Essentia ex sub-
stantia, uel sub-
sistentia.

ὁσία, ὑπόστασις, πρόσωπον: nos dicimus essentiam, subsistentiam, & personam. Ex his rursus exortæ sunt posterioribus annis in ecclesia nouæ & recentes altercationes. Disputarunt acutè de Essentia & subsistentia, eadem ne an diuersa sint. Ruffinus enim Aquileien. Eccles. histor. lib. i. cap. 29. De differentia, inquit substantiarum & subsistentiarum, quas Græci ὁσίας & ὑποστάσεις uocant, mora est quæstio. Quidam enim dicebant substantiam & subsistentiam unum uideri: & quia tres substantias non dicimus in deo, nec tres subsistentias dicere debeamus. Alij uerò, quibus longè aliud substantia quàm subsistentia significare uidebatur, dicebant, quia substantia ipsa rei alicuius naturam rationemq̃ qua constat, designet: subsistentia autem unicuiusque personæ, hoc ipsum quod extat & subsistit, ostendat. Scripsit & Basilii magnus doctam Epistolam de Discrimine essentiæ & substantiæ ad Gregorium fratrem. Porro Hermius Sozomenus Historiarum lib. 5. cap. 12. Multarum, inquit, ciuitatum Episcopî Alexandriam conuenientes, Nicæna dogmata cum Athanasio & Eusebio (Vuercellen.) confirmant, & spiritum sanctum & patri & filio coessentialem esse confitentur, ac triadem nominant, & hominem quem Deus uerbum assumpsit, non corpore tantum sed & anima perfectum censendum esse docent: sicut & priscis ecclesiæ doctoribus uisum est. Quoniam uerò quæstio de ὁσία & ὑπόστασις ecclesias turbabat, deq̃ illis crebræ contentiones ac disputationes motæ fuerant, admodum sapienter mihi determinasse uidentur, haud esse nomini- bus illis statim initio de Deo utendum; nisi quis Sabellij opinionem retundere conetur, ne penuria nominum eundem tribus appellationibus uocare uideatur, sed singulos peculiariter trifaria distinctione intelligat. Addit Socrates in Histo. lib. 3. cap. 7. Non autem nouam quandam religionem à se excogitatam in ecclesiam induxerunt, sed quæ inde ab initio & ecclesiastica traditio habuit, & Christianorum sapientes euidenter demonstrarunt. Et reliqua.

Omnia quæ de
Deo credenda
sunt, plenè con-
tineri in scri-
pturis cano-
nicis.

Abeant ergo quò digni sunt Papæ propugnatores, qui docentibus nobis omnia ueræ pietatis & salutis plenè comprehendî & tradi scripturis canonicis, obijciunt quo scripturæ loco contineantur uocabula trinitatis, personæ, essentiæ, substantiæ, denique Christum habere animam rationalem? Tametsi enim illa uocabula totidem literis scripta non legantur in canonicis libris, (utpote alia quàm Latina lingua ab ipsis prophetis & Apostolis scriptis) res tamen, quas uocabula illa significant, manifestissimè in his comprehenduntur atque docentur, quas deinceps omnes & singulæ gentes sua lingua enunciare, pròque sua utilitate & necessitate pronunciare possunt. Abeant cum his & Sophistæ omnes, quibus doctum uidetur, adorandum Trinitatis mysterium peregrinis, curiosis, imò & perniciosis inuoluerè quæstionibus. Pñs satis est simpliciter & secundum scripturas, symbolumq̃ Apostolorum, credere & confiteri unam esse diuinam naturam siue essentiam, in qua sunt pater, filius, & spiritus sanctus. Neque hîc admodum solliciti sumus, siue substantias aut subsistentias aut personas nomines, modò distinctionem & cuiusque proprietates distinctè exprimas, unitatemq̃ sic confitearis, ut interim Trinitatem non confundas, nec suis personas spolijs proprietatibus.

Testimonia a-
dorandæ trinita-
tis euangelica.
Matth. 28.

Verum præstat iam ex scripturis clara proferre testimonia, quibus Trinitatis mysterium & personarum distinctionem proprietatemq̃ euidenter demonstramus. Dicit in Euangelio secundum Mattheum Dominus, Data est mihi omnis potestas in cœlo & in terra: euntes ergo docete omnes gentes, baptizantes eos in nomē patris, & filij, & spiritus sancti; docentes eos seruare omnia quæ præcepî uobis. Ea uerba allegans, Tertullianus cōtra Praxeam, Nouissimè mandauit, inquit, discipulis, ut tingerent in patrem, & filium, & spiritum sanctum. Non in unum: nam

nam nec semel, sed ter ad singula nomina, in personas singulas, tingimur. Hæc ille. Vt autem singulæ personæ singulariter exprimuntur, ita diuinitas omnium eadem & communis singulariter in eo docetur, quod iubet baptizare non tantum in nomen patris, sed & filij & spiritus sancti. Negat enim & pernegat Apostolus Paulus electionis uas, quenquam in ullius hominis, qui nihil aliud quam homo est, nomē esse baptizandum, aut ab Apostolis baptizatum. An, ait, in nomine Pauli baptizati fuistis? Deus est itaque pater, filius, & spiritus sanctus, in quorum nomine baptizamur. *2. Corin. 1.*

Idem Dominus in Euangelio secundum Ioannem dicit: Cum uenerit paracl^{us} *Io. 14. & 16.* cletus, quem ego mittam uobis à patre, spiritus ueritatis, is inducet uos in omnem ueritatem. Non à semetipso loquetur, sed quacunque audierit loquetur. Ille me glorificabit, quia de meo accipiet, & annuntiabit uobis. Omnia quacunque habet pater, mea sunt, propterea dixi quod de meo accipiet, & annuntiabit uobis. Habes in his Domini uerbis personam patris à quo mittitur spiritus, personam filij qui mittit, & personam spiritus sancti qui uenit: habes item communionem diuinitatis & omnium bonorum inter se mutuam & æqualem. Spiritus enim non à semetipso loquitur, sed quod audierit. De meo, inquit filius, accipiet. Et iterum, Omnia quacunque habet pater, mea sunt: ergo & quæ filius habet, patris sunt: estque coequalis omnium diuinitas, gloria, & maiestas.

Congruit cum his apertissimis elogijs, testimonium etidentissimum beatissimi Ioannis Baptistæ, & hoc quidem duplex. Principio, Quem misit Deus, inquit, is uerba Dei loquitur. Non enim ad mensuram huic dat Deus spiritum. Pater diligit filium, & omnia dedit ei in manum. Qui credit in filium, habet uitam æternam, &c. Iterum habes in una diuinitate tres personas distinctas proprietatibus. Pater enim diligit, mittitque filium, & omnia dat ei in manum. Filius mittitur, accipit omnia, sed spiritus sanctus datur à patre, & accipitur à filio iuxta plenitudinem. Deinde clamat idem ille Baptista, & ait, Vidi spiritum descendentem specie columbæ de coelo, & mansit super eum. Ego non noueram eum: sed qui misit me, ut baptizarem aqua, is mihi dixit: Super quem uideris spiritum descendentem & manentem super eum, hic est qui baptizat spiritu sancto. Et ego uidi, & testatus sum hunc esse filium Dei. Rursus demonstrantur nobis luce clarius tres personæ distinctæ, non confusæ. Est enim qui Ioannem mittit pater. Spiritus sanctus non est pater uel filius, sed apparet super capite Christi, sub specie columbæ. Filius autem, filius, non pater, & patris quidem filius est, cuius capiti insidet spiritus sanctus. Huc iam pertinet ipsum patris coelitus super Christum delatum testimonium. Dicit enim, Hic est filius meus dilectus, in quo placata est anima mea. Non potest autem idem sibi esse pater & filius: sed alius est pater, alius est filius: uerum non aliud, sed idem Deus, eiusdem naturæ. Filius enim alibi clarissime dicit, Ego & pater unum sumus. *Math. 3. & 17. Ioan. 10.*

Porro quid clarius dici poterat pro personarum in adoranda Trinitate expressa distinctione proprietateque, quam quod archangelus Gabriel apud S. Lucā Dominicæ incarnationis sacramentum explanans, manifestè uirgini Deiparæ dicit, Spiritus sanctus superueniet in te, & uirtus altissimi obumbrabit tibi: Quapropter & quod nascetur sanctum, uocabitur filius Dei: His quid obsecro poterat uel fingi manifestius & euidentius? Habes altissimi personam, nimirum patris. Nam præcessit in uerbis angeli, Is erit magnus, & filius altissimi uocabitur. Est autem filius patris filius. Habemus & filij & sancti spiritus expressas personas, cum suis proprietatibus, nec immixtas nec confusas. Pater non incarnatur nec spiritus sanctus,

sed filius. Patri nascitur è uirgine filius, is qui erat æterna & ineffabili generatione filius. Spiritus sanctus autem, qui est uirtus altissimi, obumbrat uirginem, redditq; fecundam. Ita uerò distinctas non diuisas uidere licet personas, proprietatibus, non essentia diuinitatis uel natura distantes.

*Apostolica de
Trinitate te-
stimonia.
Actor. 2.*

Subijciam alia quoque (quamuis hæc abundè satis facere poterant) sanctorum Apostolorum testimonia, & trium quidem in toto choro præclarissimorum. Beatus Petrus coram ecclesia Israelis prædicans uerbum Euangelij, sicuti testatur Lucas in Actis, inter alia dicit, Iesum hunc excitauit Deus, exaltauitq; ad dexteram, ac promissione spiritus sancti accepta à patre, effudit hoc quod uos iam cernitis & auditis. En Deus pater excitat filium & exaltat. Filius excitatur & exaltatur: sedet ad dexteram patris. Ab hoc filius accepto spiritu sancto donat hunc Aposto-

Actor. 10.

lis. Spiritus ergo procedit à patre & filio, in propria subsistens persona, sed unus amborum spiritus. Porro in sermone habito Casarea in ecclesia gentium, hoc est, in domo familiaq; Cornelij Centurionis, idem Apostolus non minus obscure patris, filij, & spiritus sancti personam exprimit, ac trinitatem in unam diuinæ nature essentiam connectit.

Rom. 1.

Sanctus Paulus Apostolus in principio Epistolæ ad Romanos dicit se ordinatum ad prædicandum Euangelium Dei, quod promiserit per prophetas suos in scripturis sanctis de filio suo, qui sit genitus ex semine David, secundum carnem, declaratus autem Dei filius per potentiam & spiritum sanctificantem. Idem in Epistola ad Galatas, Deus, inquit, misit filium suum, factum ex muliere: ut adoptione ius filiorum acciperemus. Quoniam autem filij estis, emisit Deus spiritum filij sui in

Galat. 4.

Tit. 3.

corda uestra clamantem, Abba pater. Et iterum ad Titum, Deus secundum suam misericordiam, inquit, saluos nos fecit per lauacrū regenerationis ac renouationis spiritus sancti, quem effudit in nos opulenter per Iesum Christum seruatorem nostrum. Verissime ergo de S. Paulo loquens beatus Cyrillus libro in Ioan. 9. cap. 45. scribit, Cognouit rectissime diuinus ille uir sanctæ Trinitatis enumerationem: ac ideò singulas personas propriè atq; distinctè subsistere docet: & tamen incommutabilem identitatem Trinitatis apertè prædicat. Testimonia eius rei si quis omnia colligere enumerareq; uellet, omnes Pauli Epistolas haud dubiè recitaret.

1. Ioan. 2.

Beatus Ioannes Apostolus & Euangelista mysterium Trinitatis & distinctionem personarum præ cæteris fortissime & euidentissime asserens proponit: cum in Euangelica historia, tum in sua Epistola. Vnum ex multis proferam testimonium. In canonica sua dicit: Quis est mendax, nisi is qui negat Iesum esse Christum? Hic est Antichristus, qui negat patrem & filium. Quisquis negat filium, is ne patrem quidem habet. Vos igitur quod audistis ab initio, in uobis permaneat. Et mox, Non necesse habetis ut quisquam doceat uos: sed sicut ipsa unctio docet uos de omnibus, & uerax est, & non mendacium: Audis in his patrem, audis filium, audis unctionem, id est, spiritum sanctum. Pater non est filius, nec hic pater, nec spiritus sanctus pater uel filius: sed pater filij pater est, & filius patris filius, unctio autem proficiscitur ab utroque. Sunt autem illæ personæ sic coniunctæ & unitæ, ut qui unam ex eis neget, nullas habeat. Imò quisquis negat hanc Trinitatem, Antichristus esse pronuntiatur. Deum enim, qui unus est in Trinitate, & trinus in unitate, negat, adeoq; proprietates Dei confundens aut auferens, ipsum Deum talem qualis est negat.

*Similitudinibus
adumbratur tri-
nitatis myste-
rium.*

Hæc autem testimonia & multiplicia & clarissima arbitror satisfacere pñs. Credunt enim scripturis, nec curiosius in diuinam inquirunt maiestatem, his solis contenti quibus bonitati Dei uisum est illucescere hominibus. Sunt qui hanc rem, quomodo

quomodo uidelicet tres personæ distinctæ dicantur, & sint tamen unus Deus, parabolis uel similibus quibusdam adumbrare contendant. Verum nihil est in rebus creatis (quod & ab initio huius negotij admonui) quod propriè dici possit simile diuinæ naturæ: nec ullæ sunt hominum uoces, quibus propriè loquamur de ea: nec ullæ sunt humanæ mentis imagines, quæ adamussim diuinæ congruant essentiæ. Et S. Basilus differens de Vñā & hypostasi dicit, Fieri nequit ut exemplorum collationes per omnia ad ea quadrent, quorum usui exempla seruiunt. Iniuriā ferè adorandæ maiestati dicas fieri, si conferatur cum rebus humanis. Sed quoniam infirmitati nostræ scriptura sancta non parum condescendit, dabo simile, quamuis multum dissimile, quod uulgò profertur. Contemplare solem, & ab hoc manantes radios, tum ex utroque profectum calorem. Vt sol est fons luminis & caloris: ita pater fons est filij, qui est lumen de lumine. Et ut à sole simul & radijs manet calor, ita à patre & filio procedit spiritus sanctus. Iam uerò imaginare solem, qui nunquam cœperit esse, nec esse desiturus sit, nōne ab hoc sempiterno sempiterni nascentur radij, & utrinque proficiscetur calor æquè sempiternus, denique an non unus essentia uel substantia sol cernatur, trinus autem idem ille propter tres subsistentias uel personas? Vñus est parabola hac Solis Tertullianus, cuius uerba quæ & alia continent similia non pigebit recitare. Non dubitauerim, ait, filium dicere & radicis fruticem, & fontis fluuium, & Solis radium: quia omnis origo parens est, & omne quod ex origine profertur, progenies est: multò magis sermo Dei, qui etiam propriè nomen filij accepit, nec frutex tamen à radice, nec fluuius à fonte, nec radius à sole discernitur (separatur) sicut nec à Deo sermo. Igitur secundum horum exemplorum formam, profiteor me duos dicere, Deum & sermonem eius, patrem & filium ipsius. Nam & radix & frutex duæ res sunt, sed coniunctæ. Et fons & flumen duæ species sunt, sed indiuisæ. Et sol & radius duæ formæ sunt, sed coherentes. Omne quod prodit ex aliquo, secundum sit eius necesse est de quo prodit, non idè tamen est separatum. Secundus autem ubi est duo sunt, & tertius ubi est tres sunt. Tertius enim est spiritus à Deo & filio, sicut tertius ex radice fructus ex frutice: & tertius à fonte riuus ex flumine: & tertius à sole apex (uel calor) ex radio: nihil tamen à matrice alienatur, à qua proprietates suas ducit. Ita trinitas per consortes & connexos gradus à patre decurrens, & monarchiæ nihil obstrepit, & *οικονομία* statum (id est, dispensationis mysterium) protegit. Hanc me regulam professum, qua inseparatos ab alterutro patrem & filium & spiritum testor, tene ubique, & ita quid quomodo dicatur agnosces. Et reliqua. Hæc enim omnia Tertulliani sunt: qui non ita multò ab Apostolorum seculo floruit in Aphrica.

Contra Praxeam.

Verum omiſſis idolis humanis siue parabolis aut similitudinibus, credamus firmiter claro Dei uerbo. Quod non assequitur humana ratio, teneat fides. Quod tradunt sacræ literæ, quod in carne docuit Christus, quod tot miraculis confirmatum est, quod per orthodoxam ecclesiam docet spiritus Dei, id multò certius habendum quàm quod mille demonstrationibus probatum sit, aut quod omnibus sensibus percipere possis. Paulus negat se angelum auditurum, si quid diuersum ab Euangelio Christi adferret. Quin potius arrogantis stultitiæ est, dubitare de his quæ nobis in scripturis & tanta quidem cum authoritate tradita sunt. Maior infamia est, nolle diuinis credere oraculis, nō alia causa, nisi quod noster intellectus nō omnia assequatur, quem tamen scimus ex ingenio & obtenebratum esse & odisse Deum. Apud philosophos impudens habetur, si quis reiiciat authoritatem scriptoris alicuius præclari atq; probati. Pythagoricis certè ad persuasionem satis erat,

Certitudo doctrinæ de Trinitate.

αὐτὸς εἶπεν, Ipse dixit. Et Christianus tergiuersari & quæstiones curiosas necesse & implicare audet, cum audit, Deus hoc dixit & ita credere docuit: De regis diplomate nemo dubitat, si modò sigillum agnoscat: quanta ergo temeritas est de diuinis addubitare testimonijs, quæ tam clara & spiritu Dei firmissimè obsignata sunt?

Summa credendorum de Trinitate.

Proinde ut in breuem summam colligamus id quod huius nostræ expositionis præcipuum est, beati patris Cyrilli uerba C. V. commemorabo, quæ leguntur Libro in Ioan. 9. capite 30. in hæc uerba, Recta fides in Deum patrem est, & in filium, non simpliciter, sed incarnatum, & in spiritum sanctum. Sancta enim consubstantialisq; trinitas nominum differentijs, id est, personarum proprietatibus, distinguitur. Pater enim pater est, & non filius: filius quoque filius est, & non pater: & spiritus sanctus, spiritus sanctus est patris atque filij proprius. Eadem enim substantia deitatis est: quare non tres, sed unum Deum prædicamus. Oportet igitur in Deum nos credere: sed distinctè latiusq; fidem exponentes, ut unicuique personæ eandem glorificationem referamus. Nulla enim fidei differentia est. Non enim maior debet esse in patrem, quàm in filium aut in spiritum sanctum, sed una & eadem ratio eius & modus est, in tribus æquali mensura personis consistens: ut etiam hoc pacto unitatem naturæ in trinitate fateamur. Hæc firmiter in animis nostris splendere fides debet, quæ in patrem & in filium est, & in filium dico etiam posteaquam factus homo, & in spiritum sanctum. Tantum ille. Hæc omnia plenioribus firmabuntur testimonijs, ubi uentum fuerit ad assertionem diuinitatis filij Dei & spiritus sancti. Id quod suo loco referuamus.

Trinitatis mysteriū patriarchis & prophetis cognitissimum.

Nemo autem existimabit hanc unitatis & Trinitatis Dei fidem uel à patribus ecclesiarumq; Episcopis esse inuentam, uel Christi demum seculo ab Apostolis primum prædicatam. Ad eum enim modum, ad quem exposuimus hucusq; ab exordio mundi crediderunt sancti patriarchæ, prophetæ & omnes electi Dei. Quamuis non negem trinitatis mysterium per Christum mundo clarius esse expositum, certè patriarchis & prophetis cognitissimum fuisse trinitatis mysterium inclarescet ex testimonijs aliquot minime dubijs, quæ mox subiiciemus: ubi illud prius admonuerimus, sanctos Dei patriarchas & prophetas simplici reuelatione & uerbo Dei acquieuisse, & ideo nullas de Unitate & Trinitate Dei quæstiones curiosas contexuisse. Clarè intellexerunt unum esse Deum patrem omnium, saluatorem unicum, & omnium bonorum authorem, nec alium esse extra uel præter hunc Deum. Illi ipsi clarissimè perspexerunt Dei filium, semen illud promissum, omnia cum patre communia habere: manifestissimè enim saluatorem dici, & redemptorem esse, à quo proficiantur & conferantur omnia bona credentibus, audierunt: unde iam nullo negotio potuerunt colligere patrem & filium unum esse Deum, licet distent proprietatibus. Quia enim satis certi erant doctrinam de pluralitate deorum damnatissimam ex diabolo pullulasse, coluerūt illi non plures, sed unum Deum, quem tamē crediderunt esse trinum. Moses enim eximius Dei seruus mox ab initio libri sui primi dicit: In principio creauit dñs cælum & terram. Coniungit autem uerbo singularis numeri Creauit, nomen plurale Dñs, non ut solœcismum committat, sed ut mysterium trinitatis denotet. Sensus enim est, Deus ille trinus, creauit cælum & terram. Nam paulò post secum consultans Deus de producendo uel condendo homine, dicit, Faciamus hominē in imagine nostra. Et faciamus, ait, non faciam. Et, In imagine nostra, non mea. Verum ne quis arbitretur consultationem cum angelis esse factam, audiat ipsum Deum apud Isaiam dicentē: Ego Dominus faciens omnia, extendens cælum solus à me (id est, ex mea uirtute absq; admini-

Genes. 1.

adminiculo aut socio) firmans terram. Ergo cum filio consultauit pater, per quem & secula condidit. Rursus ne quis existimet, quod Iudæi obtendunt, numero plurius ista de deo honoris gratia ad morem humanum dici, audias licet quod mox in fine cap. 3. sequitur, Ecce Adam ille factus est sicut unus ex nobis, ut sciat bonum & malum. Posuit autem, Factus est, per enallagen, pro fiet aut eueniet: ut sit sententia, Ecce hoc ipsum eueniet Adamo, quod uni ex nobis, nempe filio: nimirum ut experiatur bonum & malum, id est, fortunam uariam, morbos uidelicet, calamitates & mortem, suauia (ut dici solet) & amara. Hæc est enim sors hominis. At filius incarnatus pro nobis, non pater, non spiritus sanctus, in similitudine ut homo repertus, & uariam fortunam etiam mortis expertus est. Id quod Adamo consolationis (non illusionis) gratia dictum claret. Sicut enim corpus protoplastorum uestimento contra iniuriam cœli munierat bonus dominus, qui peccatorem in exilium eijcere statuerat: ita animum mœstum solatur consolationis plenissimo incarnandi passionisq; exemplo. Sic autem corpore & anima instructos demum eijcit ex horto felicitatis in calamitosissimum exilium. Huius generis testimonia ubiq; plurima occurrunt. Nam Abraham tres uidit, sed cum tribus uelut cum uno colloquitur, & unum adorat. Et, Pluit dominus super Sodomam & Gomorram sulphure & igni à domino de cœlis, & subuertit ciuitates illas. Caterum ne quis interpretaretur, Pluit dominus à domino, id est à cœlo, ipse subiūgit mox, De cœlis. Ut enim pater per filium omnia condidit: ita per eundem conseruat omnia: per eundem operatur adhuc. Post Mosen uero prophetarum celeberrimus Dauid in Psalmis, Verbo domini, ait, cœli facti sunt, & spiritu oris eius omnis exercitus eorum. Audis autem unum esse dominum, in quo interim uerbum est & spiritus, utraq; distincta, licet non separata. Dominus enim cœlos facit, sed per uerbum: ceterum omnis cœlorum ornatus constat spiritu oris domini. Idem Dauid canit: Dixit dominus domino meo sede à dextris meis: donec ponam inimicos tuos scabellum pedum tuorum. Alibi uero idem hic Dauid fatetur disertè præter dominum non esse alium. Hic interim non minus clarè canit, Dixit dominus domino meo, patrem utiq; intelligens, qui filium Dauidis dominum collocarit ad dextram in cœlestibus. Ex Isaia colligi possunt plurima testimonia. Excellens uero illud est, quod citauit Matthæus Apostolus hisce uerbis: Ecce filius meus quem elegi, dilectus meus, in quo placata est anima mea: ponam spiritum meum super illum, &c. Cum hoc congruit quod & Lucas citauit: Spiritus domini super me, eo quod unxit me, ad euangelisandum pauperibus misit me, &c. Habes in his testimonijs patrem, filium, & spiritum sanctum. Hæc pauca ex multis. Nec enim affectamus uniuersas scripturas ueteris Testamenti euoluere.

Gene. 18.

Gene. 19.

Psal. 34.

Psal. 110.

Isaie 42.

Matth. 12.

Isaie 61.

Luce 4.

Hanc ergo fidem qua credimus in deum patrem, filium, & spiritum sanctum, accepimus ab ipso deo, traditam nobis per patriarchas & prophetas, omnium clarissimè uero declaratam per ipsum dei filium, dominum nostrum Iesum Christum, & sanctos eius apostolos: unde iam nullo negotio colligimus, cur omnes ecclesiarum synceriores antistites, uel ministri totaq; Christi ecclesia hanc fidem tanto conluerint defenderintq; consensu, inde ab Apostolorum morte. Impiissimum certè fuisset, hac catholica & orthodoxa fidei forma relicta, eligere & sequi nouam. Extant etiam hodie multorum ecclesiasticorum scriptorum pijsimi & doctissimi libri, quibus orthodoxam hanc catholicamq; fidem ex scripturis sanctis, & declararunt & defenderunt contra impios hæreticos. Extant uaria, sed omnia eiusdè generis, Symbola fidei, in multis edita episcoporum synodis. Extat, discitur, & recitatur hodie ab uniuersali ecclesia, & singulis eius membris doctis & idiotis, om-

Mysteriū trinitatis non esse ueniendum di sputationibus curiosis.

Symbolum.

Exod. 19.

nisq; sexus & ætatis hominibus symbolum, quod Apostolorum dicitur: quo nihil aliud quàm quod hactenus declarauimus, profiteamur, nos uidelicet credere in unum deum, nempe in patrem, filium, & spiritum sanctum. Cumq; tanta semper fuerit ab ipso mundi exordio omnium sanctorum in fide ista uera consensus, p̄fissimè ab antiquis principibus regibusq; cautum est, ne quis porro audeat fidem hanc de sancta dei unitate & trinitate, uel in dubium uertere, uel curiosis quæstionibus disputationibusq; inuoluere. Configebatur olim in populo Israelitico, quisquis limitē præfixum fuisset prætergressus. Sunt & nobis præscripti circa cognitionē dei termini, quos præterisse nocet, imò quod præsentissima morte punitur.

Faxit dominus, ut ipsum, qualis est, deum summum, optimum, maximum, cognoscamus uerè, & colamus religiosè. Hactenus enim de modis & formis cognoscendi deum, qui substantia unus, personis trinus est, differuimus qua potuimus simplicitate, synceritate, ac breuitate. Agnoscimus interim & fatemur liberè, nihil hactenus & istis quidem omnibus tanta dignum maiestate esse prolatum. Maior est enim deus æternus, optimus, maximus, omni maiestate, omni eloquentia omnium hominum, tantum abest, ut existimem me mea infantia hic præstitisse tantillum. Quinimò supplex dominum clementissimum oro, quò nobis omnibus, pro sua misericordia & liberalitate, intellectum mentis nostræ illuminet se digna cognitione, per Christum dominum nostrum.

Deum esse creatorem omnium, omniaq; sua gubernare prouidentia: ubi & de bona Dei erga nos voluntate, ac prædestinatione differitur. SERMO IIII.

RESTAT, fratres, ut his quæ de deo protulimus, iam coronidis uice quædam non admodum proluxa de ea Dei Creatione subiiciamus hodierno sermone, qua ipse conditor omnium, omnia ad utilitatem hominum, saluberrimè condidit, cum uisibilia tum inuisibilia, eademq; nunc ut semper gubernat uel moderatur sapientissimè. Inde enim non mediocris dei cognitio nobis obtinget, & illustrabuntur multa, quæ in superiore tractatione parcius delibauimus. In indaganda, considerata, excolendaq; creatione uniuersi partiumq; eius, laborauit omnis externorum domesticorumq; sapientum diligentia, & laborat adhuc laborabitq; donec hic mundus durauerit. Quis enim hucusq; uel sapientissimus peritissimusq;, uel diligentissimus scriptor naturalis historiarum, non plurima posteris elaboranda reliquit? Quis uel hodie, licet utatur doctissimorum scriptorum opera industriaq;, non cogitur adhuc plura & maiora mirari, quàm uelisset assequuti, uel ipse assequatur? Vult sapientissimus dominus perpetuò homines ingeniosos donisq; cœlestibus locupletatos occupari, exerceriq; in indagandis proferendisq; creationis & naturæ arcanis. Cæterum nos simpliciter comprehendimus fide condita esse secula ex nihilo nullaq; præiacente materia, per uerbum dei à Deo, subsistereq; in uirtute spiritus diuini. Sic enim crediderunt & docuerunt Dauid rex, & Paulus doctor gentium.

Psal. 54.
Heb. 11.

Historia creationis breuiter comprehensa.

Tametsi uerò uniuersi ratio, & creationis modus paucis nec comprehendi, nec proponi queat, conabor tamen quædam proferre in mediū, ex quibus utcumque rerum summa diligenter contemplanti elucescat. Ac malo hic alienis uti uerbis, quàm meis, maximè cum existimem hoc negotium uix posse uiuidius exponi, quàm enarrarit Tertullianus in libro de Trinitate huiusmodi uerbis, Deus cœlum alta sublimitate suspendit, terram deiecta mole solidauit, maria soluto liquore diffudit, & hæc omnia proprijs & condignis instrumentis & ornata & plena digessit.

digessit. Nam & in solidamento (firmamento) cœli luciferos solis ortus excitauit, *Cœlum & sy-*
 lunæ candentis globum ad solatium noctis menstruis incrementis orbis impleuit, *dera.*
 astrorum etiam radios uarijs fulgoribus micantis lucis (noctem) accendit: & hæc
 omnia legitimis meatibus circumire totum mundi ambitum uoluit: humano ge-
 neri dies, menses, annos, signa, tempora, utilitatesq; factura. In terris quoq; altis- *Terra.*
 simos montes in uerticem sustulit, ualles in ima deiecit, campos æqualiter strauit,
 animalium greges ad uarias hominum seruitutes utiliter instituit. Syluarū quoq;
 robora humanis usibus profutura solidauit, fruges in cibum elicuit, fontium ora
 referauit, & lapsuris fluminibus infudit. Post quæ ne non etiam ipsis quoq; deli-
 cijs procurasset oculorum, uarijs florum coloribus ad uoluptatem spectantium
 cuncta uestiuit. In ipso quoq; mari, quamuis esset & magnitudine & utilitate mi-
 rabile, multimoda animalia, nunc mediocris, nunc uasti corporis finxit, ingeniu
 artificis de institutionis uarietate testantia. Quibus non contentus, ne forte fremi- *Mare.*
 tus & cursus aquarum cum dispendio possessoris humani, alienum occuparet ele-
 mentum, fines littoribus inclusit, quo cum fremens fluctus, & ex alto sinu spu-
 mans unda uenisset, rursus in se rediret, nec terminos concessos excederet, ser-
 uans iura præscripta, ut diuinas leges tanto magis homo custodiret, quanto illas
 etiam elementa seruassent. Post quæ hominem quoq; mundo præposuit, & qui- *Homo.*
 dem ad imaginem dei factum: cui mentem & rationem indidit & prudentiam, ut
 deum posset imitari: cuius etsi corporis terrena primordia, cœlestis tamen & di-
 uini halitus inspirata substantia. Quæ cum omnia illi in seruitutem dedisset, solum
 liberum esse uoluit. Et ne in periculum caderet rursus soluta libertas, mandatum
 posuit, quo tamen non inesse malum in fructu arboris diceretur, sed futurum, si
 forte in uoluntate hominis de contemptu datæ legis admoneretur. Nam & liber
 esse debuerat, ne incogruenter dei imago seruiret: & lex addenda, ne usq; ad con-
 temptum dantis libertas effrænata prorumperet: ut & præmia condigna & meri-
 ta pœnarum consequenter exciperet, suum iam habens illud, quod motu mentis
 in alterutram partem agitare uoluisset: ex quo mortalitatis inuidia utiq; in ipsum
 redit, qui cum illam de obedientia posset euadere, in eandem incurrit, cum ex con-
 silio peruerso deus esse festinat, &c. Idem addit super solidamentum partibus, *Angeli.*
 quæ hodie non sunt nostris contemplabiles oculis, angelos prius institutos, spiri-
 tuales uirtutes digestas, thronos potestatesq; præfectas, & alia multa cœlorū spa-
 cia immensa, & sacramentorum infinita opera esse condita, &c. Hæc ille. Quorū
 quidem omnium summa hæc est, Deus ex nihilo, potentia sua, cœlū condidit, ma-
 re, & terram, quæ mox ornauit, ditauitq; omnium bonorum genere. In mundum
 autem hunc qui meritò appellationem accepit ab ornatu, ceu in magnificentissi-
 mum palatium, omni suppellectile splendidissima instructum, induxit hominem,
 cui & omnia subiecit. Id quod Dauid multa cū admiratione celebrans canit: Do- *Dauid celebrat*
 mine dominus noster, quam admirabile est nomen tuum in uniuersa terra? Quo- *creationis bene-*
 niam eleuata est magnificentia tua super cœlos. Ex ore infantium & lactentium *fictum.*
 perfecisti laudem, propter inimicos tuos ut destruas inimicum & ultorem. Equi-
 dem suspiciam cœlos tuos, opus digitorum tuorum, lunam & stellas quæ tu præ-
 parasti. Quid est homo, quod memor es eius, aut filius hominis, ut rationem eius
 habeas? Minuisti eum paulò minus ab angelis (uel à deo) gloria & honore coro-
 nasti eum, & cōstituisti eum super opera manuum tuarum. Omnia subiecisti sub
 pedibus eius, oues & boues, in super & pecora campi, uolucres cœli, & pisces ma-
 ris, qui perambulāt semitas maris. Domine dominus noster, quam admirabile est
 nomen tuum in uniuersa terra. Psalm. 8. Idem alibi canit: Tui sunt cœli, ô deus, & *Psalm. 89.*

tua est terra, orbem & plenitudinem eius tu fundasti ea. Tibi dies, tibi etiam nox, tu ordinasti luminaria & solem: tu statuisti omnes terminos terræ, æstatem & hyemem tu formasti ea. Quis autem tam stupidus, qui non ex his nullo negotio colligat, quantus sit deus noster, quanta uirtus dei, quàm bonus, diues, & munificus in hominem nihil tale meritum, deus, qui tantas opes, exquisitissimasq; delicias, & ornatum nunquam satis laudandum, propter hominem condidit, & ea omnia quæ condidit homini subdidit, seruireq; uoluit?

Deus cuncta gubernat.

Ioan. 5.

Hebr. 1.

Acto. 17.

Acto. 14.

Providentia Dei.

Porro in creatione mundi considerata uenit & uniuersi per eundem deum conseruatio & gubernatio. Neq; enim mūdus sua uirtute subsistit aut permanet, neque suo arbitrio uel temerè mouentur & agunt, quæcunq; mouentur & agunt. Dominus enim in euangelio dicit: Pater meus ad hoc usq; temporis operatur, & ego operor. Nam & Paulus: Deus per filium, inquit, etiam secula condidit, moderaturq; & portat omnia uerbo potentiæ suæ. Item, Per Deum uiuimus, mouemur & sumus. Et rursus, Deus non expertem testimoniij se hætenus sinebat dum beneficia conferret, de cælo nobis dans pluuias & tempora fructifera, implens cibo & lætitia corda nostra. Et Theodoretus de Providentia: Longe absurdissimum, inquit, est dicere, deum creasse omnia, eorum autem quæ fecit nullam habere curam, & creaturam ueluti cymbam aliquam & clauo gubernatore destitutam à contrarijs uentis huc & illuc impelli, scopulisq; & rupibus allisam confringi. Proinde hoc loco commemoranda uenit diuina gubernatio & providentia: quam cū Epicureis negant etiam hodie omnes impij, dicentes in animis suis, An curaret res terrestres qui cælos inhabitat? An obseruaret dicta & facta nostra minutissima omnipotens? Contulit ille omnibus creaturis suum ingenium & suam naturam, relinquens modò in manu consilij sui, ut pro suo ingenio moueantur, crescant, pereant, breuiter agant quod libet. Nescit hæc deus, neq; admodum de his est sollicitus. Sic impij quidem impiè ratiocinantur: scriptura autem disertè & multis pronunciat imò demonstrat, deum providentia sua curare res mortalium, omniumq; propter hominem conditarum rerum. Ac utilissimum imò necessarium fuerit aliquot proferre super his ex uerbo Dei testimonia.

Psalmt. 45.

Psalmt. 139.

Prouerb. 21.

Matth. 10.

Daniel. 2.

Dauid in sacris carminibus, Regnabit, ait, dominus in æternum: & regnum eius, regnum omnium seculorum est, & dominatio eius in generatione & generatione. En regnum Dei, inquit, regnum est omniū seculorum, & dominatio eius in sempiternas generationes. Proinde mundum & omnia quæ in mundo sunt, nō tantum creauit Deus, sed moderatur & conseruat adhuc, gubernabitq; ac conseruabit in finem usq;. Nam idem rex & uates Dauid providentiam Dei circa hominem celebrans canit: Tu domine cognouisti siue sedeam siue surgam: omnes uias meas exploratas habes. Quia non est uerbum in lingua mea, quod nō uniuersum noueris domine. A tergo & à fronte formasti me, & posuisti super me manum tuam. Et quæ sequuntur in Psalmo 138. qui totus huc pertinet. Congruit cum doctrina Dauidis testimonium Solomonis dicentis: Cor regis in manu dei est sicut fluctus aquarum, quorsum uolet inclinabit. Sua cuiq; uia placet, dominus uerò corda impellit. Nam & in euangelio dixit dominus: Nōne duo passeruli minuto asse uaneunt: & unus ex illis non cadet super terram sine patre uestro? Vestri uerò etiam pilī capitis omnes numerati sunt.

Sunt præterea alia in scripturis de diuina providentia testimonia euidentia. Daniel sapientissimus Orientis, & propheta Dei excellentissimus: Domini est sapientia, inquit, & fortitudo: ipse est qui mutat tempora, & quæ fiunt in tempore: abijcit reges & instituit reges: dat sapientiam sapientibus, & scientiam ijs qui pol-

lent in-

lent intelligentia: ipse reuelat profunda & abscondita: nouit quid sit in tenebris, & habitat lux cum eo. Porro Ethan Ezrahita canit: Tu domine, dominaris mari *Psalm. 88.* procelloso: cum attollit fluctus suos, tu compescis eos. Tu brachium habes omni- potentia præditum, roboras manum tuam, attollis dexteram tuam. Iustitia & æ- quitate stabilitum est regale solium tuum, bonitas & fides antecedunt faciem tuam. Dauid uerò, De fructu operum tuorū, ait, ô deus, saturabitur terra. Et pro- *Psalm. 104.* ducit fœnum pecori, & herbam ad usum hominis, & panē qui confirmet cor ho- minis, uinum autem ut exhilaret. Et mox in eodem Psalmo: Vniuersa ex te pen- dent, ut des eis cibum suum suo tempore: teq̃ dante colligunt, & te manum ape- riente satiantur bonis. Si autem abscondas faciem tuam, turbantur: siq̃ spiritū eis eripias, expirant & redeunt in suum puluerem. Item, Sustentat dominus omnes *Psalm. 123.* cadentes: & erigit omnes collapsos. Dominus soluit compeditos: dominus illumi- nat cæcos. Dominus custodit aduenas, orphanum & uiduam subleuabit, & uiam *Psalm. 146.* impiorum exterminabit. Magnus dominus noster, & magna uirtus eius, & intel- *Psalm. 147.* ligentiæ eius non est numerus. Hic enumerat stellas, & omnes suis uocat nomi- nibus. Ipse operit cœlum nubibus, & parat terræ pluuiam. Dat iumento pabulum suum & pullis coruorum crocitantibus. Dat niuem sicut lanam, pruina sicut ci- nerem spargit. Projicit glaciem suam sicut buccellas, ante faciem frigoris eius quis sustinebit: Mittet uerbum suum & liquefaciet ea, flabit spiritu suo & stillabunt a- quæ. Et iterum: Scio quod magnus est dominus, & antecellit omnes deos. Qui *Psalm. 133.* fecit quæcunq̃ uoluit in cœlo & in terra, in mari & omnibus abyssis. Qui eleuat nubes ab extremitate terræ, & fulgura cōuertit in pluuiam. Qui producit uentos de thesauris suis. Recitantur huius generis plurima in libro Iob cap. 38. & 39. ac passim in Psalmis librisq̃ sanctorum prophetarum: uerū sufficiunt hæc quæ hæ- ctenus recitauimus testimonia, abunde satis testificantia, deum prouidentia sua gubernare hunc mundum, & omnia quæ sunt in mundo, hominē inprimis ipsum mundi possessorem, propter quem condita sunt omnia.

Nihil hic tribuimus fato, uel Stoico, uel astrologico, neq̃ quicquam nobis ne- *Contra geniz- lismum.* gotij est cum ethnica illa bona uel mala fortuna. Abhorremus in uniuersum à phi- losophicis in hac caussa disputationibus, à scripturarum propheticarum Aposto- licarumq̃ ueritate alienis. In solo uerbo dei acquiescimus, ideoq̃ simpliciter & credimus & docemus, deum omnia sua prouidentia gubernare, idq̃ pro bona sua uoluntate, iudicio iusto, ordineq̃ pulcherrimo, per media iustissima æquissimaq̃: quæ si quis aspernetur & solum iactitet prouidentia uocabulum, fieri non potest ut recte intelligat prouidentia negotium. Obstreperunt, Quandoquidem dei pro- uidentia geruntur in mundo omnia, non est quod nos interponamus nostram in- dustriam: licet otiosis stertere: satis fuerit tātū dei expectare impulsū. Si enim indiguerit nostra opera, uel nolentes adiget ad opus quod per nos fieri uolet. Cæ- *Sancti media non negligunt. Gene. 19.* terum sancti in scripturis proponuntur nobis, longē syncerius & sentire & loqui iudicareq̃ de prouidentia. Angelus dicit disertis ad Lotum uerbis: Festina in Zoar, & illic seruare: neq̃ enim facere possum quicquam, donec tu illuc uenias. En prouidentia Dei seruatur cum suis Lot, perduntur ciues Sodomæ, & uicina- rum urbium. In ipso tamen opere conseruationis requiritur Labor Loti, & spon- taneus quidem ille. Imò, Non possum facere quicquam, ait dominus, donec tu ue- nias Zoar. Dauid propheta & rex clarè dicit: Ego in te speraui domine, dixi deus *Psalm. 31.* meus es tu: in manu tua sunt tempora mea. Idem tamē ille qui se totum in diuinam coniecerat prouidentiam, sedulo deliberauit quomodo sua diligentia & industria eludat subterfugiatq̃ Saulis soceri sui inuidias. Neq̃ aspernatur auxilium & ar- *1. Sam. 19.*

tes Michol dilectæ coniugis. Nō regerit dicens, Omnia aguntur dei prouidentia, artibus ergo nullis opus erit. Poterit me eripere ex militū patris nostri manibus, qui omnipotēs est, aut alio modo seruare miraculoso: quiescamus nos, & sinamus deum operari in nobis. Intellexit autem prouidentiam, ut per media certoq; ordine procedere, ita sui esse officij, in timore dei se medijs applicare, omnemq; mouere lapidē. Audit S. Paulus sibi manifestē dici à domino: Sicut Hierosolymis de me testificatus es, ita oportebit te & Romæ testificari. Et quanquam nihil de ueritate promissionum dei addubitaret, nec ignoraret diuinæ prouidentia uirtutem, nihilominus nepotem ex sorore sua nunciantem Iudæos conspirasse in Pauli necem, clanculum dimittit ad Tribunal, petitem, ne producat ad postulationem Iudæorum. Nec difficilem se præbet militibus Romanis deducētib; ipsum Antipatrida, inde uerò comitantibus ipsum equitibus. Cæsaream usque. Idem rursus nauigans in mari Adriatico, & uicinus periculossimo naufragio, perculsis in nauis alijs cōmilitonibus, dicit: Hortor uos ut bono animo sitis: lactura enim animæ nulla erit ex uobis, sed tantum nauis: Astitit enim mihi hac nocte angelus dei, cuius sum ego, quem & colo, dicens: Ne timeas Paule, Cæsari te oportet sisti. Et ecce donauit tibi Deus omnes qui nauigant tecum. Propter quod bono animo estote uiri. Credo enim Deo, quod sic erit quemadmodum dictum est mihi. Cæterū paulo post nautis ē nauis fugere quærentibus, dixit idem Paulus Centurioni & militibus: Nisi hi in nauis manserint, uos salui fieri non potestis. Pertinent itaq; & media per quæ operatur Deus ad prouidentiam: unde minimē sunt negligenda. Sunt sane ex diuina gubernatione uel prouidentia diuina omnis generis impressiones, igneæ, aereæ, & aqueæ. Dei enim uirtute, nō sua ipsius, neq; temerē fecundat terram æther, fluunt aquæ & refluunt, terra fructus suos profert. Et quanquam sancti nihil hic fieri existiment propter sua merita, dicente apud Matthæum saluatore: Pluit pater super iustos & iniustos: nunquam tamen obliuiscuntur uerborum prophetae dicentis: Si uolueritis & audieritis, bona terræ comedetis. Si uerò contumaces fueritis, gladio deuorabimini. Quoniam os domini loquutum est. Propheta enim ille magnus Moses prior dixit: Si diligenter audieris uocem domini Dei tui, ut facias & custodias mandata eius, uenient super te omnes benedictiones. Benedictus eris in ciuitate: benedictus eris in agro. Benedictus erit fructus uentris tui, benedictus erit & fructus terræ. Aperiet tibi dominus ipsum cœlum, ut det pluuiam terræ tuæ tempore suo. Quod si uocem domini dei tui non audieris, ut custodias atq; facias, uenient super te omnes maledictiones. Maledictus eris in urbe, maledictus eris in agro: & cœli super caput tuum erunt ærei: ac plagis multis percutiet te dominus, &c. Ac historiae testantur illa dei populo cuncta sic euenisse, certē non sine dei prouidentia. Successus omnis dei benedictio est: calamitas & aduersitas eius maledictio. Hinc ergo colligunt sancti, prouidentia Dei moderari res hominum, sed ideo sibi minimē esse stertendum & media aspernanda, quinimō sedulō ambulandum per gratiam dei in uijs & medijs siue in preceptis ac institutis diuinis. Nam prouidentia dei ordinem rerum non turbat, officia uitæ, laborem & industriam non abrogat, nec tollit ē medio iustam œconomia ac obedientiam, sed per hæc operatur salutem hominum accommodantiū se religiose per auxilium diuinū decretis seu instituto & operationi diuinæ: cui meritō acceptum ferunt quicquid bene fit, contra corruptioni humanæ & nostræ inscitia ac peccatis quicquid male fit. Bella ergo, pestes, & uarias calamitates, etsi per dei prouidentiam mortales affligere norunt sancti, illa tamen omnium hominum peccatis ferunt accepta. Nam Deus bonus est, qui mallet nobis bene quàm male esse.

Imò

Imò ipse non raro pro bonitate sua, pessima consilia nostra in bonum nostrum conuertit: ut uidere est in historia Iosephi in Genesi.

Certè ex accurata diuinæ prouidentiae consideratione colligunt omnes p̃ij, Deum optimum optimè uelle hominibus. Nam maxima illi de nobis cura est, non in magnis duntaxat rebus, sed etiam in minimis. Tenet ille numeratos dies uitæ nostræ. In conspectu eius sunt omnia & singula membra nostra, tã interiora, quàm exteriora. Nam clarè dicit in Euangelio Dominus, omnes capitis nostri pilos esse numeratos. Tuetur nos sua prouidentia contra omnes morbos & omnia pericula. Alit nos, reparat, conseruat. Omnes enim creaturas ut ad salutem hominum condidit, ita conseruat & bono hominis applicat easdem.

Bona Dei uoluntas dicitur ex Dei prouidentia.

Non minus consolatur pios Dei cultores, doctrina de Præscientia & Prædestinatione Dei, quæ cum Prouidentia cognitionem quandam habent. Præscientiam uocant illam in Deo cognitionem, qua cuncta priusquam fiât, nouit, omniaq; quæ sunt, fuerunt, & erunt, tenet ob oculos præsentia. Cognitioni enim Dei omnia sunt præsentia, nihil præteritum, nihil futurum. Prædestinatio autem decretum Dei æternum est, quo destinauit homines uel saluare uel perdere, certissimo uitæ & mortis termino præfixo. Vnde & præfinitio alicubi eadem appellatur. De his disputatur uariè, & à multis quidem satis curiosè & spinosè, ac itaque, ut non solum animarum salus sed & gloria Dei apud simplices ueniat in periculum. Religiosi scripturarum scrutatores uel interpretes agnoscunt hîc nihil permittendum esse humano ingenio, sed à pronuntiatis scripturæ simpliciter pendendum: agnoscunt modum, ut in rebus omnibus, ita in his in primis seruandum. Perpetuoq; itaque hæc S. Pauli uerba, oculis & mentibus ipsorum obuersantur: O altitudo diuitiarum sapientiæ & scientiæ Dei, quàm incomprehensibilia sunt iudicia eius, & inuestigabiles uia eius. Quis enim cognouit sensum Domini? aut quis consiliarius eius fuit? aut quis prior dedit ei, & reddetur? Illi ipsi nunquam obliuiscuntur admonitionis sapientissimi uiri Iesu Syrach, dicentis: Altiora te ne quæsieris, & fortiora te ne scrutatus fueris: sed quæ præcepit tibi Deus, illa cogita semper, & in pluribus operibus eius ne fueris curiosus. Non est enim tibi necessarium, ea quæ abscondita sunt uidere oculis tuis. Interim uerò nec contemnunt, nec negligunt ea quæ de hoc negotio Deus seruis suis per apertas scripturas reuelare dignatus est. Præscientiæ dei multa extant, præsertim in prophetia Isaia cap. 41. & sequentibus, testimonia, quibus etiam Dominus demonstrat se uerum esse Deum. Cæterum ab æterno immutabili consilio præfinit uel præfinit Deus, qui saluari, quiue damnari debeant. Finis autem, siue decretum uitæ & mortis breue est & omnibus p̃ijs perspicuum. Finis prædestinationis uel præfinitionis, Christus est Dei patris filius. Deceuit enim Deus seruare omnes quotquot communionem habent cum Christo unigenito filio suo, perdere autem omnes quotquot à Christi filij sui unici communione alieni sunt. Communionem uerò cum Christo habent fideles, alieni à Christo sunt infideles. Nam Paulus in Epistola ad Ephesios: Elegit nos Deus, inquit, in Christo, antequam iacerentur fundamenta mundi, ut essemus sancti & irreprehensibiles coram illo, per charitatem: qui prædestinauit nos, ut adoptaret in filios, per Iesum Christum in sese, iuxta beneplacitum uoluntatis suæ, ut laudetur gloria gratiæ suæ, qua placatus est nobis in dilecto. En elegit nos deus, & elegit ante iacta mundi fundamenta, elegit autem ut essemus irreprehensibiles, hoc est, æternæ uitæ hæredes. Cæterum in Christo, per uel propter Christum nos elegit. Et adhuc clarius: Prædestinauit nos, inquit, ut adoptar. in filios, sed per Christum, idq; gratis fecit, ut gloria detur gratiæ diuinæ. Proinde quicumq; in Christo sunt, electi sunt.

De prædestinatione Dei.

Rom. 11.

Eccles. 3.

Ephes. 1.

1. Ioan. 5.

Ioan. 6.

Ioan. 3.

Quis electus,
& praedestina-
tus sit ad uitā.

Tentatio gra-
uis in hac causa

Roma. 9.
2. Tim. 1.

Psalm. 103.

Isaia 51.

Roma. 8.

Nam & Ioannes Apostolus dixit: Qui habet filium, uitam habet: qui non habet filium Dei, uitam non habet. Cum Apostolica doctrina congruit Euangelica. Nam in Euangelio dicit Dominus: Hæc est uoluntas eius qui misit me patris, ut omnis qui uidet filium & credit in eum, habeat uitam: & ego suscitabo eum in nouissimo die. En hæc est uoluntas siue decretum Dei æternum, ait, ut in filio per fidem salui fiamus. Rursus & ex contrario de prædestinatis ad mortem, dicit Dominus: Qui non credit, iam condemnatus est, quia non credidit in nomen unigeniti filij Dei. Hæc est autem condemnatio, quod lux uenit in mundum, & dilexerunt homines magis tenebras quam lucem. Proinde si me roges, an electus sis ad uitam, an prædestinatus ad mortem, hoc est, an sis de damnandorum, an saluandorum numero, simpliciter ex scriptura Euangelica & Apostolica respondeo: Si communionem cum Christo habes, prædestinatus es ad uitam, & es de numero electorum: si uero alienus es à Christo, utcunque uidearis pollere uirtutibus, prædestinatus es ad mortem, ac præscitus, ut aiunt, ad damnationem. Altius & penitius in confessum diuini consilij subrepere nolo. Atque hinc repeto superiora scripturæ testimonia: Deus prædestinauit nos, ut adoptaret in filios per Iesum Christum. Hæc est uoluntas Dei, ut qui credit in filium, uiuat: qui uero non credit, moriatur. Fides ergo certissimum signum est quod electus sis, dumque uocaris ad communionem Christi, & fidem doceris, electionem & beneuolentiam suam erga te declarat benignus Deus.

Sanè per quam grauiter tentantur & exagitantur quaestione Electionis simpliciores. Conatur enim diabolus congerere ipsorum mentibus odium Dei, quasi inuideat nobis salutem, destinarique morti. Hoc ut facilius persuadeat nobis, improbe fidem nostram labefactare contendit, quasi dubia sit nostra salus, quæ incertæ Dei, electioni innitatur. Contra ignita hæc tela muniant serui Dei pectora, huiusmodi ex scriptura petitis cogitationibus, adeoque consolationibus. Prædestinatio Dei nulla innittitur aut mouetur uel dignitate uel indignitate nostra: sed ex mera gratia & misericordia Dei patris, in solum respicit Christum. Et quoniam in hunc innittitur salus nostra tantum, non potest non esse certissima. Nam hallucinantur qui existimant prædestinari à Deo ad uitam saluandos, propter merita uel bona opera quæ in ipsis præuidet Deus. Nam Apostolus Paulus disertè dicit: Elegit nos in Christo, in sese, iuxta beneplacitum uoluntatis suæ, ut laudetur gloria gratiæ suæ. Et iterum: Non est uolentis neque currentis, sed misereantis Dei. Rursus, Deus saluos nos fecit, & uocauit uocatione sancta, non secundum opera nostra, sed secundum suum propositum & gratiam, quæ data est nobis per Christum Iesum, ante tempora æterna, sed reuelata est modò per apparitionem Domini nostri Iesu Christi. Gratis ergo nos ex mera sua misericordia, non propter merita nostra, sed propter Christum, & non nisi in Christo elegit, & propter Christum complectitur. Quia pater est, & hominū amator. De quo & propheta Dauid cecinit: Misericors & clemens est Dominus, longanimis & multæ pietatis. Et quemadmodum misereretur pater filiorum, ita misertus est Dominus timentibus se. Ipse enim nouit figmentum nostrum, recordaturque quod puluis sumus. Quinimò apud Isaiam legimus: Nunquid obliuiscetur mulier infantis sui, ut non misereatur filij uteri sui? Vtuncque uero illa obliuiscatur, ego tamen tui non obliuiscar. Certè in Christo filio Dei unigenito nobis exhibito, declarauit Deus pater quanti nos faciat. Inde colligit Apostolus. Qui proprio filio suo non pepercit, sed pro nobis omnibus dedit illum, qui fieri potest, ut non & cum eodem omnia donet? Quid ergo non polliceamur nobis de tam benefico patre? Neque enim conqueri poteris tibi non esse

esse daturum filium, uel tuum non esse, quem dicit Apostolus datum pro nobis omnibus. Quinimò ipse Dominus in Euangelio clamans, dicit: Venite ad me omnes qui laboratis & onerati estis, & ego reficiam uos. Et iterum ad discipulos: Ite in mundum uniuersum, & prædicate Euangelium omni creaturæ, qui crediderit & baptizatus fuerit, saluus erit. Vnde & Paulus dixit: Seruator noster Deus uult omnes homines saluos fieri, & ad agnitionem ueritatis uenire. Vetusissimis enim retro temporibus dictum est Abraham: Benedicentur in semine tuo omnes tribus terræ. Et Ioel dixit: Erit, ut quicumque inuocauerit nomen Domini, saluus fiat. Id quod & Petrus repetijt Actor. capite 2. & Paulus Roman. capite 10. Isaias quoque dixit: Omnes nos quasi ouis errauimus, unusquisque ad uiam suam respexit: & Dominus fecit incurrere in ipsum omnium nostrum iniquitates. Idcirco & S. Paulus dicere audebat: Sicut per unius delictum propagatum est malum in omnes homines ad condemnationem: ita & per unius iustificationem propagatur bonum in omnes homines ad iustificationem uitæ. Proinde Dominus obuijs uinis peccatores & publicanos in Euangelio recepisse legitur, his insuper uerbis adiectis: Veni quærere quod perierat. Nec ueni uocatũ iustos, sed peccatores ad poenitentiam. Quæ quidem omnia huc pertinent, ut propius expensa, confirment nos de bona ergo nos uoluntate Dei, qui in Christo nos elegit ad salutem: quæ quidem salus non potest non esse certissima, modisq; omnibus indubitata: præsertim cum ipse quoque in Euangelio dicat Dominus: Oues meæ uocem meam audiunt, & ego cognosco eas, & sequuntur me: & uitam æternam do eis, nec peribunt in æternum, neque rapiet eas quisquam de manu mea, &c.

Matth. 11.

Marci 16.

1. Tim. 2.

Genes. 22.

Ioel. 2.

Isaia 53.

Rom. 5.

Matth. 9.

Lucæ 19.

Ioan. 10.

Scio quid hic denuò angat multorum mentes, Oues, inquiunt, Christi electæ agnoscunt uocem Christi, firmatq; fide præditi indiuulse inhaerent Christo, utpote qui tractum illum senserunt diuinum, de quo Dominus in Euangelio ait: Nemo uenit ad me, nisi pater meus traxerit eum: ego uerò ut huiusmodi tractum nō sentio, sic plena fide filio Dei non inhæreo. Sanè requiritur in primis uera fides ab electis. Electi enim uocantur, uocati uerò fide uocationem recipiunt, ac se accommodant uocanti. Qui non credit condemnatus iam est. Vnde & Paulus, Deus, inquit, est seruator omnium hominum, maxime fidelium. Porro nisi trahamur à patre cœlesti, credere non possumus. Curandum autem etiam atque etiam, ne uanas opiniones de tractu illo diuino concipientes, ipsum negligamus tractum. Equidem uolenter traxit Paulum, sed non omnes crinibus ad se trahit. Sunt & alij modi, quibus hominem ad se ducit, non autem ut truncum attrahit. Apostolus Paulus: Fides, ait, ex auditu est, auditus autem per uerbum Dei. Trahit ergo Deus, cum annuntiat tibi per seruos suos Euangelium, cum tangit cor, cum ad preces te excitat, quibus illius gratiam & auxilium, illuminationem & tractum implores. Hæc cum in animo sentis, noli alium expectare tractum, noli contemnere oblatam gratiam, sed utere presenti, & ora pro gratiæ augmento. Pie etenim ad maiora & perfectiora subinde aspiras, interim tamen minora non est quod asperneris. In Euangelio secundum Matthæum ampliores opes recipiunt, qui pauculis talentis acceptis, fideliter negotiati fuerant. Qui uerò spreuerat talentum creditum, & ignauitæ suæ nescio quid curæ prætexebat, grauiter accusatur, imò pecunia semel data iterum spoliatur, & conijcitur in æterna tormenta, uinculis constrictus condemnationis. Quinimò in genere pronunciat Dominus: Omni habenti dabitur & abundabit. Qui uerò non habet, etiam id quod habet auferetur ab eo. Habet autem qui gratiam Dei agnoscit, magnificat & excolit. Ei additur ad cumulum gratiarum, ac redditur abundantiôr. Non habet, qui dona Dei non agnoscit, & subinde

De tractu prædestinatorum ad uitam. Ioan. 6.

1. Tim. 4.

Actor. 9.

Rom. 10.

Matth. 25.

Matth. 13.

alia nescio qualia imaginatur, interim gratiam acceptam & praesentem non excusat. Et hi ferè prætendere solent, tractum sibi nondum obtigisse; ac periculosissimum esse cum donis Dei negotiari. Multò autem aliter S. Paulus iudicans, dicit: *Quin & adiuuantes obsecramus, ne in uacuum gratiam Dei receperitis.* Et ad Timotheum: *Commonefacio te, ut suscites donum Dei quod est in te. Non quòd sine Deo aliquid ex nobis ipsis possimus: sed quòd nostram operam requirit Dominus, quæ tamen non est extra & sine eius auxilio & gratia.* Verè enim idem Apostolus dixit: *Deus operatur in nobis uelle & perficere, pro bona animi sui uoluntate.* Item: *Non quòd idonei simus ex nobis ipsis, tanquam ex nobis ipsis cogitare quicquam, sed omnis idoneitas nostra ex Deo est.*

Porro nolo desperare quenquam, si non perfectissimam protinus experietur in animo fidem. Scriptura Euangelica ait: *Vltro terra fructificat, primùm herbam, deinde spicam, deinde plenum frumentum in spica.* Sic enim & augmenta habet fides. Ideoq; orarunt ipsi Apostoli Domini: *Adauge nobis fidem Domine.* Præterea apud Marcum acclamat miser quidem saluatori: *Agè si quid potes Domine, subueni misertus nobis; sed audit protinus Dominum dicentem: Illud si potes credere. Omnia possibilìa credenti.* Hic uerò exclamauit miser: *Credo Domine, succurre incredulitati meæ.* En credit hic miser, sentiens utiq; fidem in animo à Deo donatam: quam tamen intelligit usque adeò infirmam esse, ut Dei praesidio indigeat. Orat ergo: *Succurre incredulitati, id est fidei meæ: quæ si conferatur cum absoluta fide, incredulitas uideri poterat.* Verùm audite, quæso, quid hæc quantumuis exigua effecerit fides, quid potuerit animus humilis, & à sola Dei misericordia dependens. Protinus enim sanat miserum puerum, & incolumitati restitutum ueluti ex mortuis excitatum, patri fidei reddit. Si quis ergo fidem in animo sentit, ne desperet, licet intelligat hanc satis esse tenuem & exilem: coniiciat se totum in dei misericordiam, minimum aut nihil prorsus de suis præsumat uiribus, pro augmento fidei indefinenter oret. In quo instituto certè saluberrimè confirmare possunt quemlibet hæc consolatione plenissima Saluatoris ex sancto Euangelio uerba: *Petite & dabitur uobis: quærite & inuenietis: pulsate & aperietur uobis.* Quisquis enim petit, accipit: & quicumq; quærit, inuenit: & pulsanti aperietur. An quisquam est uestrum homo, qui si filius eius petierit panem, lapidem daturus sit illi? Aut si piscem petierit, num serpentem addet illi? Si uos igitur, cum sitis mali, nostis bona dare filiis uestris, quantò magis pater uester qui est in cœlis, dabit bona, ipsum spiritum sanctum, si postulaueritis ab eo. Hæc & similia in sacrosancto Euangelio nobis proposita ad consolationem, plus mouere & confirmare debent animos nostros de bona imò optima erga nos Dei uoluntate, quàm diaboli suggestiones, quibus non tantum spem electionis nostræ subuertere, sed & Deum suspectum nobis reddere conatur, quasi odio habeat creaturam suam, quam perditam malit, quàm seruata. Atqui probè notus est sanctis ex suis artibus. Sic enim & primis nostris parentibus imposuit. Teneamus nos firmiter pectoribus nostris impressum, Deum nos elegisse in Christo, & propter Christum prædestinasse ad uitam, ideòque fidem in Christum & donare & augere perentibus, eundemque ut petamus inspirare. Omnia enim salutis nostræ, gratiæ sunt diuinæ, nihil nostrum est præter opprobrium. Hæc hæcenus in medium attuli fratres, de mirifico admirandòque opere creationis ab æterno, uero & uiuo Deo, nulla profecto molestia nullòque negotio. Dixit enim, & facta sunt: ipse mandauit, & creata sunt. Adiecit paucula de gubernatione rerum omnium sapientissima & optima, per diuinam eius prouidentiam semper iustam æquissimamque: Item de bona Dei erga nos

nos uoluntate, de Prædestinatione & alijs quibusdam his agnatis. Omnia uerò hæc recitauimus ad ornandam gloriam cognitionemque Dei creatoris nostri. Cui testimonium reddit tam inuisibilem quam etiam uisibilem, & semper & tota natura. Quem angeli adorant, astra mirantur, maria benedicunt, terræ uerentur, inferna quæque suspiciunt. Quem mens omnis humana sentit, etiam si non exprimit. Cuius imperio omnia commouentur, fontes scaturiunt, amnes labuntur, fluctus assurgunt, foetus suos cuncta parturiunt, uenti spirare coguntur, imbres ueniunt, maria commouentur, fecunditates suas cuncta ubique diffundunt. Qui peculiarem protoplastis nostris felicitatis hortum plantauit, mandatum dedit, sententiamque contra delictum statuit. Noe iustissimum de diluuij periculis liberauit, Enoch transtulit in amicitiae societatem, Abrahamum adlegit, Isaac protexit, Iacobum auxit, Moſen populo ducem præfecit, ingemiscientes filios Israelis è iugo seruitutis eripuit, legem scripsit, patrum sobolem in terram promissionis induxit, prophetas spiritu intruxit, & per hos omnes filium suum unigenitum repromisit, & eo puncto quo sese daturum sponderat misit, per quem etiam nobis in notitiam uenire uoluit, & in nos omnia bona sua cœlestia effudit. Et quia ultrò largus & bonus est, ne totus hic orbis auersus gratiæ eius fluminibus areſceret, Apostolos doctores in totum orbem per filium suum mitti uoluit, ut conditio generis humani agnosceret institutorem, & siquidem sequeretur, haberet quem pro Deo in suis iam postulationibus, patrem diceret. Cuius modò prouidentia non tantum sigillatim per homines cucurrit aut currit, sed etiam per ipsas urbes & ciuitates, quarum exitus prophetarum uocibus cecinit, imò etiam per totum orbem. Cuius propter incredulitatem exitus, plagas, diminutiones poenasque descripsit. Et ne quis non etiam ad minima quæque, Dei putaret istam infatigabilem prouidentiam peruenire, Ex duobus, ait Dominus. passeribus unus non cadit sine patris uoluntate: sed & capilli capitis uestri omnes numerati sunt. Cuius etiam cura & prouidentia, Israelitarum non finit nec uestes consumi, nec uilissima in pedibus calceamenta deteri. Nec immerito. Nam si hic omnia complexus est continens, omnia autem & totum ex singulis constant, pertinget consequenter eius ad usque singula quæque cura, cuius ad totum quicquid est peruenit prouidentia. Huic soli gloria.

De solo Deo uiuo, uero & æterno adorando, inuocando & colendo, deq; uera & falsa religione. S E R M O V.

DIXI de Deo, quis, qualis & quantus sit, non equidem quod debui, sed quod potui: adumbraui item quam bona propensaque sit eius erga hominem uoluntas, quem in filio unigenito æternæ destinauit saluti, quem & in præſenti ſeculo uniuerſorum conſtituit Dominum, ſubiectis ei omnibus: iam uerò ne ignoret homo quid debeat Deo tam potenti, & patri tam benigno ac munifico, ſubiungam modò diſſertationem de Deo hoc uiuo, uero & æterno, ab homine adorando, inuocando & colendo. Homo enim nec conditus nec natus eſt, ut aſtra, ſicuti philoſophus ille deſipiebat, contempletur, ſed ut ſit imago & templum Dei in quo inhabitet regnetque Deus, ideoque Deum agnoſcat, reueretur, adoret, inuocet ac colat, adeoque & Deo coniungatur, & uiuat cum cum ipſo æternum. Dicam uerò de adorando Deo primùm, deinde de inuocando, poſtremò de colendo. Vnde nullo negotio intelligemus, quæ uera, quæue falſa ſit religio. Vberimiquidem ſunt loci propoſiti, ſed comprehendam breuibus quæ ſcriptura ſancta de illis nos docet, non ſingula quidem, ſed potiſſima, & quantum ſaluti noſtræ

sobrietasque cognitioni sufficere uidetur.

Adorare quid.

Adorare in scripturis diuinis, significat honoris causa caput aperire, incuruare se, inclinare uel flectere genua, aut toto etiam corpore procumbere in terram, procidere in faciem ad pedes alicuius, more supplicum, in signum humiliationis, subiectionis deditioisque, ac refertur maxime ad corporis habitum. Hebraei subinde unico utuntur uocabulo Schahah, quod omnes interpretes uerterunt per uocabulum adorare, inclinare, incuruare & procumbere. Greci reddiderunt per uerbum προσκύνω, id est, genua flecto, caput detego, supplico uel adoro. Est autem προσκύνω adoratio, uel ab osculando sic dicta, uel à moto galero. Nam κύνω significat osculor. Ac osculum quondam cultus, uenerationis aut adorationis fuisse symbolum colligitur ex 31. cap. Iob. Quid quod uel hodie receptissimum est honoris uenerationisque gratia manum osculari? Rursus κύνω significat galero, biretum uel pileum: ut adorare sit nudare uel aperire caput uenerationis ergò. Respexerunt fortassis & Latini ad corporis habitum. Nam orare utrumque significat & petere aliquid & dicere. Adorat itaque, qui coniecto in aliquem uultu suppliciter aliquid petit. Verisimile est & Germanos huc respexisse. Nam adorare reddunt per anbatan. Quod præterea uerti poterit zu füssen fallen. Matth. 9. legis: Ecce primas quidam uenit ad Iesum, & adorauit eum. At Marcus eandem contexens historiam, Et ecce uenit quidam, inquit, principum synagogæ, nomine Iairus, & cum uidisset eum, procidit ad pedes eius, & deprecabatur eum multum: utique exponens nobis quid sit adorare, nimirum procidere ad pedes alicuius, & supplicem se subternere deprecarique. Ita enim legimus & in ueteri scriptura de Iacobo Israele patre nostro: Et ipse progrediens, adorauit pronus in terram septies, donec appropinquaret frater eius Esau. De Dauide & Abigaele sic legimus in Samuele: Cum uidisset Abigael Dauid, festinauit, & descendit de asino, & procidit coram Dauid super faciem suam, & adorauit super terram, & cecidit ad pedes eius, dicens: Mihi Domine illa imputetur iniquitas, &c. Similiter scriptum legitur de Nathan propheta: Et cum ad Dauidem ingrederetur, adorauit pronus in terram. Hoc etenim honoris communicans concedi. Dominus hominibus, uel senio uel autoritate dignitateque conspicuis. Homo enim imago Dei uiua est. Et Deus ipse homines autoritate præcellentes deos appellare dignatur. Vnde Apostoli Christi Petrus & Paulus populum Dei instruentes docuerunt, ille quidem, Deum timete, regem honorate: hic autem, Magistratus Dei minister est: reddite ergo omnibus, cui honorem, honorem: cui timorem, timorem. In lege dicit Dominus, Coram cano capite assurge, & Honora parentes. Propter hoc Dei præceptum reuerentur pii, senes, parentes, & magistratus, obedientiaque fidei Deo placent. Cæterum adorare uel honorare simulachra, cuiuscunque tandem speciei aut formæ sint, nusquam concedit Dominus. In lege enim dicit: Non adorabis, non coles. Et per prophetam Isaiam: Nullusne, inquit, apud se expendit hoc negotium, & ait: Ligni partem combusta igni, coxi panem, assaui carnem & comedi, & ex residuo abominatione facerem, & ante truncum ligneum adorarem? Apud eundem prophetam multa cum indignatione pronunciatum legis, Repleta est terra eius idolis, opus manu suarum adorauerunt, quod fecerunt digiti eorum. Et incuruauit se homo, & humiliatus est uir: ne ergo remittas eis. Proinde spiritu prophetico inspiratus uetus scriptor Lactantius contra Gentes disputans, sic scriptum reliquit, Simulachra ipsa quæ coluntur, effigies sunt hominum mortuorum. Est autem peruersum & incongruens, ut simulachrum hominis, à simulachro Dei (homine) colatur. Colit enim quod est deterius & imbecillius. Deinde ipsæ imagines sacræ, quibus

uanissimi

Genes. 33.

2. Sam. 25.

3. Reg. 1.
Adorare homines.
Psalm. 82.
Ioan. 20.
1. Pet. 2.
Roma. 13.

Exodi 20.
Isais 44.

Esais 2.

Lib. 2. cap. 18.

uaniſſimi homines ſeruiunt, omni ſenſu carent, quoniam terra ſunt. Quis autem non intelligat nefas eſſe rectum animal curuari, ut adoret terram? Quæ ideo pedibus noſtris ſubiecta eſt, ut calcanda nobis non adoranda ſit, qui ſumus ideo excitati, ut non reuoluamur deorſum, ne hunc cœleſtem uultum proſciamus ad terram, ſed oculos eò dirigamus, quò illos naturæ ſuæ conditio direxit. Quicumque ergo ſacramentum hominis tueri, rationemq; naturæ ſuæ nititur obtinere, ipſe ſe ab humo ſuſcitet, & erecta mente oculos ſuos tendat in cœlum: non ſub pedibus quærat deum, nec à ueſtigijs ſuis eruat, quod adoret. Quia quicquid homini ſubiacet, infra hominem ſit neceſſe eſt: ſed quærat in ſublîmi, quærat in ſummo: quia nihil poteſt homine maius eſſe, niſi quod fuerit ſupra hominem. Deus autem maior eſt homine: ſupra ergo non infra eſt: nec in ima potius, ſed in ſumma regione quærendus eſt. Quare non eſt dubium, quin religio nulla ſit ubicunq; ſimulachrū eſt. Nam ſi religio ex diuinis rebus eſt, diuini autem nihil eſt, niſi in cœleſtibus rebus: carent ergo religione ſimulachra. Quia nihil poteſt eſſe cœleſte in ea re, quæ fit ex terra. Quod quidem de nomine ipſo ſapienti apparere poteſt. Quicquid enim ſimulatur id falſum ſit neceſſe eſt: nec poteſt unquam uerū nomen accipere, quod ueritatem fuco & imitatione mentitur. Si autem non omnis imitatio nō reſ ſeria, ſed quaſi ludus ac iocus eſt, non religio in ſimulachris, ſed minus religionis eſt. Præferendum eſt igitur uerum omnibus falſis. Calcanda terrena, ut cœleſtia conſequamur. Hæc non temere recitauimus hætenus ex Lactantio: redimus modo ad inſtitutum noſtrum.

Quoniam uerò exterior corporis habitus formatur ferè ſecundum interiorem animi qualitatem, & exterior corporis adorantis habitus, adorantem ſubijcit, dicat atq; addicit ei qui adoratur. transfertur adoratio ad interiorem quoq; hominem, ut adorare ſit deum reuereri & reſpicere, huic ſe deuouere, & ipſi indiuiſe adhærere, ab hoc uno pendere in omnibus, & ad hunc recurrere in quibuſlibet noſtris neceſſitatibus. Porro animum uera fide & ſancto timore dei ſic rectè imbutum, ſequitur mox, cum neceſſe eſt & facultas conceditur, exterior adoratio. Eſt enim adoratio duplex, alia animi uel ſpiritus, interior, ſyncera ac uera: alia corporis, exterior, inſyncera, fucata, ac falſa, ſi quis nulla ſit religione imbutus. Vera adoratio eſt ueræ fidei & ſancti timoris dei fructus, nempe addictio ſupplex & humilis confeſſatio, qua nos dedicamus, addicimus ſubijcimusq; deo noſtro, quem intelligimus ut optimum clementiſſimumq; patrem, ita ſummum & omnipotentem eſſe deum: toti ergo ab ipſo ſolo pendemus, & in ipſum ſolum reſpicimus: quod & externa adoratione, protinus atque occasio nobis datur, exprimimus atq; teſtificamur. Totum hoc rectius intelligemus ex ſubiectis hiſ ſcripturæ ſanctæ teſtimonijs. Canit Dauid: Venite exultemus domino, iubilemus deo ſalutari noſtro. Præoccupemus faciem eius in confeſſione, & in Pſalmis iubilemus ei. Quoniam deus magnus dominus, & rex magnus ſuper omnes deos: quia in manu eius ſunt fines terræ, & altitudines montium ipſius ſunt. Quoniam ipſius eſt mare, & ipſe fecit illud, & aridam manus eius firmauerunt. Venite adoremus & procidamus & ploremus ante dominū, qui fecit nos: quia ipſe eſt dominus Deus noſter, & nos populus pascuæ eius & oues manus eius. Intelligis ideo nobis adorandum eſſe deum, & ipſi adhærendum laudesq; canendas, quia deus eſt potentiſſimus creator omnium, etiam noſter creator, pater & paſtor noſter. Similiter in euangelio ſecundum Matthæum fidem ſequitur adoratio, & quaſi ex illa naſcitur atque fouetur. Poſtquam enim edocti miraculo diſcipuli credidiſſent Ieſum eſſe Chriſtum, Acceſſerunt, ait Matthæus, & adorauerunt eum, dicentes: Verè Dei

Cap. 19.

Adoratio ſpiri-
tualis.Adoratio diſ-
plex.

Pſalm. 94.

Matth. 14.

Ioan. 9.

filius es. Rursus in Ioanne legis dominum interrogasse eiectum ē synagoga cæcū illuminatum ac dixisse: Credis ne in filium Dei? Cæcum autem respondisse. Quis est domine ut credam in eum? Respōdisse autem Iesum & dixisse: Et uidisti eum, & qui loquitur tecum, ipse est. Ad hæc protinus sequitur in historia, At ille ait:

Ioan. 4.

Credo domine & adorauit eum. Huc iam pertinet quod dominus in euangelio ad Samaritanam dicit: Veri adoratores adorabunt patrem spiritu & ueritate. Ap-

In historia Re-
gum.

probat enim dominus spirituales & internam adorationem, non externam & fuc-
catam uel hypocriticam, sed quæ proficiscitur ex animo regenerato fide per spiri-
tum sanctum, & syncerè in unum Deum tendentem. Nam legimus in ueteri histo-
ria, in ueritate adorasse eos principes, qui toto corde uni deo se consecrarunt, & à
solo pependerit: rursus non integro corde adorasse dominum, qui syncera fide
destituti, simul à creaturis pependerit. Rationem autem huius adorationis subi-
cit in euangelio dominus. Adoratio, inquit, adorato per omnia respondere debet,
Deus autem qui adoratur spiritus est & ueritas, delectaturq; spirituali cultu & ue-
ra fide: spiritu ergo & ueritate adorari debet.

Vere adorare
Deum quid sit.

Proinde sanctis maxima cura est, ut interior mentis adoratio integra sit, ado-
rentq; in primis animo & uerè, syncera fide & numinis reuerentia: interim foris
supplices quoq; procidunt & adorant coram domino. Sequitur enim interiorem
adorationem exterior. Adorant & hypocritæ deum corpore satis suppliciter, sed
quia animus peregrinatur nec adhæret fide & reuerentia domino, audiunt à do-
mino per prophetam: Populus hic labijs suis me honorat, cor autem eorum longè
abest à me: sed frustra me colunt docentes doctrinas, præcepta hominum. Et hæc
quidem est fucata & falsa adoratio. Falsa est & illa imò scelerata & abominanda,
qua adorantur uel cum deo, uel pro aut sine deo creaturæ. Quinimò in uniuersum
non adorant deum, qui deum nec metuunt, nec in deum credunt, nec pendent à
solo Deo.

Solū deum ado-
randum esse.

Equidem fatentur omnes deum adorari oportere, sed non omnes syncerè ag-
noscunt & confitentur solum deum esse adorandum, restat ergo demonstrandū,
quod solus deus sit adorandus ab hominibus. Adoratio coniuncta est cum uera
fide, & syncera numinis obseruantia: quæ cum soli deo debeatur, solus certè deus
adorandus est. Toties itaq; in lege & prophetis repetitur & inculcatur, Dominum
deum tuum adorabis, & deum alienum non adorabis. Est autē deus alienus, quic-

Matth. 4.

quid tibi extra & præter deum unicum, uiuum, uerum & æternum deligis ado-
randum: solus itaq; uerus uiuus & æternus deus est adorandus. In euangelica hi-
storia legimus diabolū tentasse dominū nostrū Christum, subductūq; in mon-
tem excelsum, inde illi commonstrasse omnia regna mundi eorumq; gloriam, ac
dixisse: Hæc omnia tibi dabo, si prostratus adoraueris me: dominum uerò respon-
disse: Abi satana, scriptum est: Dominum deum tuum adorabis, & illum solum
coles. Cohærent autem inter se mutuū, ut disiungi non possint, adoratio & cul-
tus: unde cum solus colī postulet, certè solus uult adorari. Et magnus dei prophe-

3. Reg. 18.

ta Helias docens deum consortis in cultu impatientissimum esse, ad populū cum
deo simul & deum Baal adorantem, clamat: Quousq; tandem uos claudicatis in
duas partes? Si dominus est deus, sequimini eum: si Baal, ite post ipsum. Quasi di-

Matth. 6.

Deut. 6.

Hebr. 1.

xerit, non potestis simul deum adorare & Baal. Nemo potest duobus dominis ser-
uire. Dominus enim deus noster totum requirit cor nostrum, totam mentē & ani-
mam: nihil ergo relinquit nobis quod ulli alijs impendamus. In epist. ad Hebræos
ostendit Paulus Christum angelis excellentiorem esse, quia Christum adorant an-
geli, nec uicissim adorantur. Si autem angeli non adorantur, quē dabimus præter
Deum

deum uiuum uerum & æternum, qui mereatur adorari: Solus ergo deus adorandus est. Nam in reuelatione Iesu Christi facta beato Ioanni apostolo & euangelista, sic legimus scriptum: Et uidi alterum angelum uolantem per mediū cœli, habentem euangelium æternum: ut euangelisaret habitantibus super terrā, & omni genti & tribui & lingnæ & populo, dicentem magna uoce: Timete deum, & date illi honorem: quia uenit hora iudicii eius, & adorete eum, qui fecit cœlum & terram, mare & fontes aquarum. Et iterū in eodem libro legimus: Et cecidi ante pedes angeli, ut adorarem eum, Et dicit mihi: Vide ne feceris, Conseruus tuus suum & fratrum tuorū habentium testimonium Iesu, deum adora. **Rurſus** in fine libri eiusdem legis: Et postquam audiſſem & uidiſſem, cecidi ut adorarem ante pedes angeli, qui mihi hæc ostēdebat. Et dicit mihi: Vide ne feceris: cōseruus enim tuus sum, & fratrum tuorum prophetarum, & eorum qui seruant uerba libri huius. Nec multum ab hac re abhūdit S. Petri factum dictūq̃, cuius ad pedes cum procidisset Cornelius Centurio, & adorasset, dixit Petrus: Surge, & ego ipse hominem, simul autem iniecta manu procumbentem erigebat. Religiosissime ergo scripsit de Vera religione Augustinus, dicens: Non sit nobis religio humanorū operum cultus. Meliores enim sunt ipsi artifices, qui talia fabricantur, quos tamen colere nō debemus. Non sit nobis religio cultus hominum mortalium. Quia si piē uixerint, non sic habentur, ut tales quærant honores: sed illum à nobis colī uolūt, quo illuminante latantur meriti sui nos esse cōseruos. Honorandi ergo sunt propter imitationem: non adorandi propter religionem. Si autem male uixerint, ubi cūq̃ sint, non sunt colendi. Idem Augustinus libro de Consensu euangelistarum primo, cap. 18. disputat: Quare Romani nunquam receperint & deum, & dei cultum Hebræorum, cum tamen omnium ferme Gentiū deos receperint colendos: & respondet nulla id alia factum causa, quā quod Hebræorum deus solus uoluerit colī absq̃ consorte. Verba eius si quis requirat, hæc sunt: Nihil restat ut dicant cur huius dei sacra non receperint: nisi quia se solum colī uoluerit: illos autē deos gentium, quos isti iam colebant, colī prohibuerit. Socratis enim (quem sapientissimum omnium hominum etiam oraculo fuisse firmarunt) sententia est, unumquēq̃ deum sic colī oportere, quomodo se ipse colendū præceperit. Proinde Romanis summa necessitas facta est, non colendi deum Hebræorum. Quia si alio modo eum colere uellent, quā se colendum ipse dixisset, non utiq̃ illū colerent, sed quod ipsi finxissent. Si autem illo modo uellent, quo ipse diceret, alios sibi colendos non esse cernebant quos ille colī prohibebat: ac per hoc respuerunt unius uerī dei cultum, ne multos falsos offenderent: magis arbitantes sibi obfuturam fuisse istorum iracundiam, quā illius beneuolentiam profuturam. Hæc Augustinus. Et quanquam hæc de cultu dei scripta sunt, nos autē disputemus de adoratione numinis, non tamen aliena sunt à proposito. Nam cohærent inter se diuulse adoratio & cultus dei. De hoc paulo post plura. Ex illis autem colligimus, solum adorandum esse deum uerum, uiuum & æternum, iuxta illam legis decantatissimam sententiam: Dominum Deum tuum adorabis, timebis, ei q̃ soli seruies: ipsi adhærebis, iurabisq̃ in nomine eius.

Cæterum magna præmia ueris suis adoratoribus promisit & præstitit deus ab initio, præstabitq̃ quoad hic mundus steterit. Contra uerò ingentia credimus mala illis parata esse, qui uel deū non adorant, uel pro deo uero alienos adorant deos. Dominus in reuelatione sua Ioanni apostolo facta: Timidis, inquit, & incredulis, & execratis & homicidis, & scortatoribus & ueneficis, & idololatrīs & omnibus mendacibus, pars illorum erit in stagno ardenti igne & sulphure, quod est mors secunda.

Apoc. 14.

Apoc. 19.

Apoc. 22.

Acto. 10.

De uera religione cap. 59.

Quare Romani nunquam receperunt Deum Iudæorum colendum.

Deut. 10.

Bona & mala adorantium & non adorantium Apoc. 21.

Inuocare quid.
Deut. 32.

Gene. 48.

Isaie 4.

2. Reg. 12.

Daniel. 9.

Acto. 9.

2. Tim. 2.

Inuocatio Dei
quid.

Deum esse inuo-
candum.

3. Reg. 8.

Hæc diximus hætenus de adorando Deo, dicemus porrò de inuocando Deo, secundo utique loco de quo me dicturum promisi. Inuocare & inuocatio in scripturis variè usurpatur. Significat enim in testem vel testimonium dicendum producere. Sic inuocat Moyses in testimonium contra filios Israelis cælum & terram, per prosopopœiam. Rursus inuocari nomen alicuius super aliquo, est eius nomine appellari. Inuocetur nomen meum, inquit Iacob, super eos, id est, super Ephraim & Manasse, hoc est, appellentur meo nomine, perinde ac si mei filij sint, dicanturque non filij quidem Iosephi, sed filij Iacobi Israelis. Sic mulieres dicunt ad maritum: Inuocetur nomen tuum super nos, id est, sine ut appellemur tuo nomine, tuæque fiamus uxores. Hæ enim per coniugij copulam maritorum indispiscuntur nomina. Ad eundem modum sæpe legimus in prophetis & sacra historia: Domus super quam inuocatum est nomen tuum, id est, domus quæ tuo nomine appellatur diciturque domus domini. Ioab quoque militiæ princeps Dauidi dicit: Turpe urbem (Rabbam, Ammonitarum regiam) ne ego capiam, & inuocetur nomen meum super eam: id est, ne ego dicar Rabbæ domitor. Scripturarum itaque & loquutionum scripturæ imperitissimi sunt, qui illam Iacobi sententiam, quam iam produximus, citant pro asserendo patrociniò & inuocatione sanctorum, quasi Iacob uoluerit nomen suum inuocari à nepotibus. In Daniele legis: Populus super quem inuocatum est nomen Dei: sed nihil aliud significat quam populus qui dicitur dei populus. Nulla hic mentio inuocationis petitoria. Præterea usurpatur inuocatio pro religione. Lucas enim in Actis dixit: Habuit Saulus potestatem uinciendi omnes qui inuocant nomen domini. Et Paulus: Discedat ab iniquitate omnis qui inuocat nomen domini. Item, Sectare pacem cum omnibus qui inuocant nomen domini, id est, qui sunt ueræ religionis Christianæ. Postremo inuocare significat in auxilium euocare, clamoribusque perpetuis aliquid postulare. Est ergo inuocatio Dei, de qua in præsentì differimus, humani animi in summa necessitate aut in desiderio aliquo ad deum eleuatio, & auxilij consilijue ardentissima per fidem postulatio, adeoque in fidem dei deditio, ac ueluti receptus quidam tanquam ad asylum & unicum præsidium. In inuocatione ergo uera requiritur in primis animus fidelis, qui agnoscat deum esse omnium bonorum auctorem ac datorem unicum, qui uelit inuocantes audire, & possit omnia nobis uota desideriaque largiri. Requiritur indefinens & ardens petitio. Verùm de his plura dicentur, cum dominus dederit loqui de Oratione fidelium. Nam inuocatio est orationis species.

Iam uerò ostendam deum in omnibus nostris uotis inuocandum, adeoque solum inuocandum esse. Certè sunt diserta dei mandata præcipientia inuocare nomen domini promittentis se uota nostra pro sua in nos bona uoluntate exaudiat, largiturumque nobis salutaria. Ex multis unum & alterum profero testimonium. Solomon omnium mortalium sapientissimus, docet deum inuocare in omnibus singulisque necessitatibus, commemoratis speciatim potissimis hominum uotis. Idem argumentum tractat pater Solomonis sanctissimus rex Dauid, per integrum Psalmum 107. Commemorat ergo uarios hominum casus & labores, afflictionem siue oppressionem, errores periculæ itineris, carceres seu uincula, morbos mortisque metum morte nonnunquam atrociorē, discrimina in mari ac fluminibus, sterilitates, inopiam, calamitates atque contemptum ignominiamque. Illa, inquit, si cui obueniant, non accepta ferat uel deo tutelari, uel fortunæ, uel constellationi, sed deo omniscio & omnipotenti, eumque fide sedulo inuocet. Nam sapius repetit hæc uerba uates: Et cum clamassent ad dominum in tribulatione sua, eripuit

eripuit eos ex angustiis suis. Ea uero de causa repetit toties, ut fiducia concepta discamus in omnibus casibus inuocare nomen domini. Solomon enim in prouerbijs iterum dicit: Turris fortissima est nomē domini, ad ipsam currit iustus, & exaltabitur siue extra periculum erit. Asaph quoque in sanctis carminibus canit: Sacrifica deo sacrificium laudis, & persolue altissimo uota tua, & inuoca me in die tribulationis, & eruiam te, & honorificabis me. Inducit autem ipsum deum loquentem & postulantem sacrificia, non pecuina, aurea uel argentea, sed laudem & inuocationem. Simul pollicetur auxilium, & testificatur quod inuocando & laudando honoretur. Vnde Dauid dixit: In tribulatione mea inuocabo dominum, & ad deum meum clamabo, & exaudiet de templo suo uocem meam, & clamor meus perueniet in aures eius. Ioel quoque dixit: Omnis qui inuocarit nomen domini, saluus erit. Et dominus apud Ieremiam: Inuocabitis me, & uiuetis: orabitis me, & exaudiam uos; quæretis me & inuenietis: siquidem ex toto corde uestro quæseritis. Præterea non legimus beatos patres nostros, quenquam in omnibus suis uotis siue paruis siue magnis inuocasse alium quam Deum uiuentem in secula. Nam ipse dominus apud Asaph dicit: In angustiis inuocabas me (Israel) & eripiebam te. Dauid quoque, In te sperauerunt, ait, patres nostri, sperauerunt & liberaasti eos. Ad te clamauerunt, & salui facti sunt: in te sperauerunt, & non sunt confusi. His omnibus subiunge iam præceptum Christi domini, Cum oratis dicite: Pater noster, &c. Subiunge quæ sequuntur Lucæ 11. & Matth. 7. Petite & dabitur uobis, & reliqua. Concludimus ergo deum uerum uiuum & æternum, ab omnibus hominibus in omnibus necessitatibus inuocari oportere.

Sed frustra fortassis laboro in his, cum pauci aut nulli negent deum inuocandum esse, hoc diligentius demonstrandum uidetur, quod solus sit inuocandus. Nam multi deum quidem inuocant, sed simul cum deo aut pro deo delectos etiam patronos, unde non solum deum inuocant. Solum autem inuocari oportere sic ostendimus, Inuocatione postulamus auxilium, uel ut bona nobis dentur, uel ut auertantur à nobis mala. Id quod nulla copiosiore indiget probatione, cum non possit negari à quoquam ratione sana utente. Iam uero solus deus auxiliator est, qui unus bona confert, & mala auferit. Nam in euangelio dicit dominus: Nemo bonus nisi unus, nempe Deus. Vsurpauit autē unus pro solus. Rursus in lege per Moysen dicit dominus: Videte quod ego sum solus, & non sit alius deus præter me. Et iterum per Isaiam: Nunquid non ego dominus & non est amplius Deus præter me? Deus iustus & saluans non est præter me. Et Dauid: Quis, inquit, est deus præter dominum, & quis petra præter deum nostrum? Indignissime itaque tulerunt cultores dei, quoties ab ipsis postularunt homines ea quæ dominus confert. Dicebat Rahel ad Iacobum: Da mihi filios, alioqui morior. Sed scriptura protinus addit: Et iratus Iacob, dixit: Num pro deo ego sum, qui tibi denegauit fructum uentris? Quinimò dum rex Syriæ à rege Israelis Ioram, non admodum pio, postularet ut Naamanum curaret lepra infectum, ait Ioram: Nunquid ego sum Deus, ut possim uiuificare & mortificare? Nam is mittit ad me, ut curē hominem à lepra. Proinde certissimum est, solius esse Dei dare bona, & mala auertere. Vnde iam consequens est solum deum inuocari oportere. Nam si patroni, quos inuocant tanquam auxiliares, qui non solum deum inuocant, bona dare aut mala auertere possent, profecto non unus tantum deus esset. Nam & hi dii essent. Non autem sunt dii, quia unus est deus, qui solus confert bona, mala auferit: solus ergo deus inuocandus est, patroni non sunt inuocandi, ut qui nec bene nec male facere possunt, Nam quod quidam hic ex suis capitibus opponunt, patronos quidem

Prouerb. 18.

Psalm. 50.

Psalm. 17.

Ioelis 2.

Ierem. 29.

Psalm. 80.

Psalm. 22.

Solum deū esse

inuocandum.

Matth. 18.

Deut. 32.

Isaiæ 45.

Psalm. 18.

Genes. 30.

4. Reg. 5.

Isaie 42. non ex seipsis, sed ex deo bene uel male facere, dubium imò falsissimum est. Dicit enim per prophetam ipse dominus, Ego dominus, Hu (ipse uel essentia) est nomen meum, & gloriam meam alteri non dabo, & laudem meam sculptilibus. Ceterum gloria Dei est, quòd solus & unus omnium bonorum nò modò fons inexhaustus, sed & distributor æquissimus est, eoq; nomine inuocatur & colitur ab hominibus. *Psal. 50.*

Exodi 20. Præterea cum nemini, nisi uni deo sit sacrificandum, certè solus deus est adorandus. Clamat in lege dominus: Qui immolat dijs, præterquam domino soli, exterminetur. Ideoq; Paulus & Barnabas Lystrensib. sacrificia parantibus, quæ ipse offerrent apostolis, tanquam ad intolerandam blasphemiam uestes suas sciderunt. Rursus enim in lege domini legimus: Quicumq; suffimentum incensi sibi fecerit, ut id olfaciat, excindetur è populo suo. Atqui sacrificia piorum sunt preces, gratiarum actiones, & inuocationes diuini nominis. *David enim, Tibi, inquit, sacrificabo sacrificium laudis, & nomen domini inuocabo.* Et iterum: Disponatur oratio mea incensum in conspectu tuo, & eleuatio manuum mearum, sacrificium uespertinum. *Paulus quoq; Per Christum, inquit, offerimus hostiam laudis semper deo, hoc est, fructum labiorum confitentium nomini eius.* Nam & propheta *Oseas iussit nos immolare uitulos labiorum.* Quoniam itaq; soli deo est sacrificandum, utiq; solus deus est inuocandus. Nec possibile est patronos illos cœlites, quos uocant, non solum deum inuocantes, si beati sunt, huiusmodi inuocationes postulare ab hominibus: imò hi & in deum & in diuos peccant, tribuentes his, quod nulli agnoscunt beati spiritus. Dixit beatus Augustinus, nò boni dei angelos, sed cacodæmones esse, qui non unum solum ac summum Deum, sed seipsos sacrificijs coli uolunt. Ceterum beati spiritus dum adhuc corporibus fuerunt connexi, orauerunt: Fiat uoluntas tua, sicut in cœlo & in terra, idcirco liberati modò ab omni corruptione, multò plenius imò perfectissimè consentiunt in uoluntatem dei, quæ iubet omnes solum adorare & inuocare deum.

3. Reg. 8. Rursus inuocatur is demum legitime & cum fructu, qui corda inspicit uocantium, uota audit & desideria explere potest omnium uiuentium. Eum uerò omniscium & omnipotentem cordiumq; scrutatorem esse necesse est. Porro cum solus deus is sit, proculdubio solus inuocari debet. Nam Deum solum cordiū esse scrutatorem, nulli conclusum loco, sed ubiq; præsentem ac omnipotentem, Solomon hisce uerbis testatur: Ecce cœli & cœli cœlorum non capiunt te, & quomodo domus ista quam ædificauī? Tu itaq; exaudies in cœlo, in habitaculo mansionis tuæ, & propitius eris. Facies & dabis unicuiq; iuxta omnes uias suas, qui cognoscis cor eius. Tu enim solus nouisti corda filiorum hominum. Patroni uerò cœlites quos isti uocant, nec hominum cogitationes norunt, neq; per cœlum, per terras & per maria diffusi, omniscij, præsentés ubiq; & omnipotentes sunt. Alioqui enim in diuinam transmutati essent naturam, desinerentq; esse creaturæ: uerum, licet per Christum fruantur æterna beatitudine, creaturæ tamen manent, nec omniscij nec omnipotentes sunt, ergo minimè inuocandi sunt. Certè in eodem puncto atq; momento innumeræ mortalium myriades uota sua offerunt: ubi sane oportet eum qui exaudiat, in puncto & in momento, & non per interualla nouisse & posse omnia, adeoq; & in momento manum auxiliarem præbere omnibus. Quod ut nulla, quantumuis excellens creatura potest, ita solus deus omniscius & omnipotens, omnia potest, ideoq; solus inuocandus est. Scio quid his opponant patronorum cœlitū patroni, illos ex sua natura nec uidere nec audire quæ à nobis fiunt in terris, sed in uultu dei ceu lucidissimo speculo cernere omnia quæ
Deus

Deus dignatur reuelare, atque ita rescire res nostras & opitulari. Sed hoc figmentum per omnia dubium, nullis potest scripturis sanctis comprobari. Quin potius contrarium asserit scriptura de diuis coelitis. Nam in Isaia clamat Dei populus: *Isaia 63.* Tu es pater noster o Deus: siquidem Abraham non cognouit nos, neque Israel agnouit nos, Tu uero Domine & pater noster & redemptor noster. Si uero patriarchae populi sui tam studiosi ignorauerunt quid ageret, quem obsecro beatorum dabimus, qui quid faciamus norit, uiuentiumque rebus misceatur? Profecto, quod sacer Psalmus personat, uerum est, Quoniam pater meus & mater mea dereliquerunt me, Dominus autem suscepit me. Si derelinquunt nos parentes nostri, quomodo obsecro res nostras uel norunt uel curant? Sufficiat nobis quod Dauid ait: *4. Reg. 22.* bunde satis fuit, dicenti: Dominus mei curam suscepit. Iosiam legimus ex hac uita translatus in aliam, ne mala uideret, quae Dominus inferre statuerat populo Israelitico propter consceleratissimam uitam. Beatae ergo animae Dei conspectu fruuntur, ex hoc participant luce & gaudio sempiterno, nullas res nostras norunt, neque nosse necesse est, Domino solo gubernante omnia.

Iam & illud constat, inuocationem ex fide uelut fructum ex radice oriri, Paulus enim illud prophetae adducens: Quisquis inuocarit nomen Domini, saluus erit, mox adijcit: Quomodo autem inuocabunt eum, in quem non crediderunt? En ut alterum duxerit ex altero Apostolus: Non inuocatur in quem non creditur. Proinde in quem credimus, eundem & inuocamus. In solum autem Deum credimus, ideo circo eundem solum inuocamus. Nam ubicunque fides uera est, ibi est etiam donum sancti spiritus. Nam Apostolus ait, Quod si quis spiritum Christi non habet, hic non est eius. Et iterum, Non accepistis iterum spiritum seruitutis ad timorem, sed accepistis spiritum adoptionis, per quem clamamus, Abba pater. Vera ergo fiducia in Deum praediti, Deum quem solum patrem omnium agnoscunt, inuocant. Nec poterit uel minima particula in illa solenni inuocationis formula, tradita nobis a filio Dei, ullo pacto attribui patronis. Proinde solus Deus inuocandus est. *Rom. 10.* *Rom. 8.* *Matth. 6.*

Horret sane animus hominis peccatoris tantam accedere maiestatem. Quis enim sibi dignus uideatur, qui in conspectum prodeat sanctissimi, iustissimi & terribilissimi Dei? Hic ergo suggerunt quidam patrocinium uel intercessionem coelitarum diuorum, per quorum interuentum aditus nobis pateat ad Deum. Sed hoc contra testimonium scripturae proferunt. Scriptura sicut legem nobis proposuit de inuocando Deo, promissionesque adiecit amplissimas: sic praeceptum proponit per quem inuocemus Deum, addita promissione praestantissima, per unicum Christum Iesum aperiens nobis aditum ad patrem. In Euangelio enim dicit Dominus: Amen amen dico uobis, quaecunque petieritis patrem sub nomine meo, dabit uobis. Haecenus non petistis quicquam sub nomine meo, Petite & accipietis, ut gaudium uestrum sit perfectum. Et quicquid petieritis nomine meo, hoc faciam, ut glorificetur pater per filium. Si quid petieritis per nomen meum, ego faciam. His quid poterat dici plenius & clarius? Iubet Christus per nomen suum inuocare Deum patrem, & promittit se confectum fidelibus daturum, quicquid postulent in nomine Christi. Quis autem dubitet uel tantillum de ueritate & constantia promittentis? Quid ergo opus posthac fuerit intermissione diuorum? De his inuocandis, aut per interuentum ipsorum perueniendi ad Deum, nullum habemus testimonium scripturae, nullam promissionem. Quibus addo, contemnere mandatum & praeceptum Dei, quicunque contendit per alios, quam per Christum & eius intercessionem perueniri ad patrem. Qui obtemperat Christi mandato, & per nomen Christi inuocat, ei nihil opus est diuorum interuentu. An non omnia plene

Solus Christus
intercessor &
aduocatus apud
patrem.
Mediator redemptionis &
intercessionis.

in Christo habet. Dicimus itaque & asserimus solum Christum esse mediatorem, intercessorem, & aduocatum apud patrem in cœlis omnium qui sunt in terris hominum, atque ita solum, ut post ipsum non sit opus aduocatis alijs. Fatentur plerique Christum esse nobis datum intercessorem apud Deum, sed quia multos ei alios coniungunt, certè non ad solum relegant omnes, nec unicum mediatorem prædicant. Comminiscuntur Christum esse mediatorem redemptionis & unicum quidem, cæterum non unicum intercessionis, sed plures simul cum ipso. Scriptura autem ut nobis Christum proponit unicum mediatorem redemptionis, ita & intercessionis. Vnum atq; idem est officium mediatoris, redemptionis, & intercessionis. Mediator medium sese interponit inter dissidentes, & utrisq; coniungitur ingenio & natura. Et intercessor ingerit se mediũ inter discordes, ac nisi partibus utrisq; communis sit, intercessor esse non potest. Vtrobique spectatur reconciliatio dissidentium. Necesse est ergo certam esse discordiæ causam, qua sublata dissipareat & dissidium. Causa dissidij peccatum est. Intercessoris ergo uel mediatoris est expungere peccatum, ut è medio tollatur dissidium. Hoc non expiatur uerbis siue precibus, sed morte & sanguine. Hebr. 9. Inde necessariò colligimus, solum Christum esse mediatorem uel intercessorem apud patrem. Principiò enim solus Christus medium sese ingerere potest inter Deum & homines: quia solus utriusq; naturæ particeps est. Diuina altera tantum participant. Nam homines sunt, Christus uerò Deus & homo est. Deinde qui intercessor est, idem reconciliator sit oportet. Est enim finis intercedentis reconciliatio. Solus autem Christus hominum est reconciliator, ergo & unicus intercessor. Nam intercessoris est, causam discordiæ dissoluere, id est, peccatum tollere. Solus autem Christus, nulla creatura tollit peccatum. Relinquitur ergo Christum solum esse intercessorem. Huc iam pertinent scripturæ testimonia. Paulus, Vnus, inquit, est Deus, unus etiam conciliator Dei & hominum, homo Christus Iesus, qui dedit semetipsum pretium redemptionis pro omnibus. Et quamuis loquatur disertè Apostolus de redemptione, media tamen hæc uerba collocantur inter dissertationem de inuocatione Dei, utique per Christum, qui unus est mediator redemptionis & intercessionis. Ut enim unus nos redemit, ita redemptos iam unus commendat nos patri. De hoc audiat iterum Apostolus dicens ad Romanos: Christus cum adhuc peccatores essemus pro nobis mortuus fuit; multò igitur magis nunc iustificati sanguine eius seruabimur per eum ab ira. Et adhuc planius, Nam si cum inimici essemus, reconciliati fuimus Deo per mortem filij eius, multò magis reconciliati, seruabimur per uitam ipsius. Alibi enim idem ait: Semper uiuit Christus, ad hoc ut interpellat pro nobis. Et iterum: Deus est qui iustificat, quis ille qui condemnet: Christus est qui mortuus est, imò qui & suscitatus est, qui etiam est ad dexteram Dei, qui & intercedit pro nobis. Idem rursus aditum nobis ad patrem aperit per Christum in Epistola ad Heb. 4. & ad Ephes. 2. cap. Quia ipse Dominus Iesus in Euangelio non plura ostendit ostia, sed unum ostium tantum: Ego uerò, inquit, sum ostium. Et iterum: Ego, ait, sum uia & ueritas & uita. Nemo uenit ad patrem, nisi per me. An non omnia alia media, omnes alias uias & patronos alios omnes exclusit qui dicit, Ego sum uita, ueritas & uia, & talis uia, ut non pateat alia aggressus ad patrem, nisi per me: id est, per me unum & solum? Alibi uerò in Euangelio, ne quis retardaretur pudore & indignitatis suæ peccatorumq; conscientia, aut Christi filij Dei gloria, quò minus per nomen Christi inuocet & eius se credat patrociniò, ipse idem clarè & benignè omnes ad se suumq; patrociniũ inuitans clamat: Venite ad me omnes qui laboratis & onerati estis, & ego requiem præstabo uobis.

Hic

His non minus euidencia eaq̃ plurima poterunt ex Epistola ad Hebræos col. *Hebr. 7.* ligi testimonia. Inter alia excellit hoc: Christus cum maneat in æternum, ait Apostolus, perpetuum habet sacerdotium. Vnde & saluos facere ad plenum potest, qui per ipsum adeunt Deum: semper uiuens ad hoc ut interpellat pro illis. Talis enim decebat ut esset nobis pontifex, sanctus, innocens, impollutus, segregatus à peccatoribus, & sublimior cœlis factus, &c. Vide obsecro quot in hoc Pauli testimonio habeamus argumenta probantia Christum, solum in cœlis apud patrem esse fidelium intercessorem. Sacerdotis proprium officium est intercedere. Solus Christus autem sacerdos est coram Deo: solus ergo intercessor est. Iam & sacerdotium Christi perpetuum uel immutabile est: non itaque nos semel immolando redemit tantum unus effectus mediator redemptionis, sed perpetuus etiam mediator intercessionis interpellat pro nobis in finem usque. Licet enim & iudex sit Dominus noster, infidelium tamen iudex est. patronus fidelium, uniuersorum autem iudex tandem in fine seculi. Et si perpetuum habet sacerdotium (*ἀπαράβατον*) immigrabile inquam, quod ad alium successionē uel communicatione transire non potest, solus utique manet Christus intercessor fidelium. Præterea non est ulla causa, ob quam alios post Christum, uel cum Christo intercessores nobis asciscamus. Christus enim ad plenum nos saluos facere potest: nihil alijs quod ipsi agant relinquens. Obseruemus autem illud in primis, quod disertè addit: Qui per ipsum adeunt Deum. Per ipsum inquam, mediatorem, sacerdotem, & intercessorem Christum. Per hunc enim solum patet accessus ad patrem. Quibus accedit, quod hic uiuit, & in hoc uiuit, ut interpellat pro nobis. Viuunt & diui cœlites in regno Dei cum Christo: sed sibi non nobis uiuunt. Christus nobis uiuit, & intercedit pro nobis: solus ergo intercedit, non diui intercedunt. Manifestissimè hæc euincunt, opinor, quod de intercessionis mediatione non redemptionis loquitur Apostolus. Postremo tales requirit in intercessore notas, quales non reperias, nisi in uno & solo Christo Domino. Licet enim angeli innocentes sint, tamen non sunt sublimiores cœlis. Diui cœlites tametsi iam purgati sint à peccatis, natura tamen à peccatoribus non sunt segregati, nec cœlis sublimiores facti, Domini uidelicet angelorum & uniuersæ creaturæ. Solus filius talis est, & huic hæc reseruatur gloria: solus ergo apud patrem est intercessor fidelium.

Istis Paulinis testimonijs adiiciemus adhuc unum S. Petri, & alterum beatissimi Apostoli & Euangelistæ Ioannis. Sanctus Petrus docet sanctos, id est, nos *1. Petri 3.* fideles, in hoc seculo, Christo uiuo lapidi uiuos lapides esse impositos per fidem, factosq̃ domum spiritualem & sacerdotium sanctum, ad offerendum spirituales hostias acceptabiles Deo per Iesum Christum. En sumus impositi non diuis, sed Christo lapidi uiuo: ex quo & uiuificamur, & in ædificio conseruamur. Constituti sumus domus spiritualis & sacerdotium sanctum, in hoc ut spirituales non pecuinas offeramus hostias, nimirum nosmetipsos & preces nostras Deo, per Iesum Christum, non per diuos. Sunt enim & hi nobiscum domus spiritualis, uiui lapides, Christo impositi, & propter Christum uiuentes. Porro beatus Ioannes scribit: *1. Ion. 2.* Filii mei, hæc scribo uobis ne peccetis: si quis autem peccauerit, aduocatum habemus apud patrem Iesum Christum iustum. Et ipse est propitiatio pro peccatis nostris: non pro nostris autē tantum, sed etiam pro totius mundi. Non arbitror quicquam nostro proposito congruentius, euidētius & firmitus meliusue uel cōfingi posse. Audimus Christum Iesum constitutum nobis à Deo, non tantum redemptionis mediatorem, qui semel redimat, sed qui sit sempiternus mediator etiam intercessionis, qui toties astet apud Deum patrem aduocatus, quoties homo peccator

delinquit & patrocínio opus habet: quem & rei confidenter accedant, eique causas coram Deo peragendas commendent. Si quis, inquit Ioannes, peccauerit, habemus aduocatum apud patrem. En aduocatum appellat Ioannes, quem defensores patrocínij diuorum nuncupant mediatorem intercessionis. Nam aduocatus, παρακλητος, significat tutorem, fautorem, consolatorem, patronum, uel procuratorem, qui causam nostram agit. Ac obserua quem nobis definiat atque proponat aduocatum, non diuam uirginem, non Petrum uel Paulum, non seipsum uel Stephanum, sed Iesum Christum. Si credidisset hominibus necessarium & salutare esse præterea diuorum cœlitum patrocínium, coniunxisset & hos Christo Domino, nunc Christum solum nobis proponit. Addit: Iustum, quod perinde est, ac si dixisset: Non est quòd quis eius diffidat patrocínio, aut patronum patri minus existimet esse gratum. Filius est, Christus est, iustus est, ergo patri gratissimus est: qui in conspectu iustissimi Dei pro nobis iniustis comparere potest. Talis iustitia non inuenitur in ullo Adæ filio. At requiritur in intercessore. Communicat quidem sanctis iustitiam suam, per fidem, sed ea sanctis imputatur & imputatiua est: in Christo naturalis ac uelut innata est propriâque iustitia. Nam Christus Iesus unus ille in cœlo & in terra iustus est, cui non necesse est prius uel precari uel offerre pro proprijs peccatis, deinde pro populi sceleribus. Solus enim peccatum non habet, & iustitia est uniuersorum: solus itaque apud patrem intercedit, quia nemo naturaliter & propriè iustus est, nisi Christus solus. Ac præstat hic inprimis obseruare, quòd Christus appellatur propitiatio uel expiatio, non e quidem peccatorum aut hominum unius aut alterius seculi, sed omnium peccatorum hominûmque totius mundi fidelium. Vnus ergo omnibus sufficit Christus: unus omnibus proponitur intercessor apud patrem. Quoties enim peccas, toties paratum habes apud patrem iustum intercessorem. Non quòd imaginemur in cœlo tanquam in foro, patrem in throno, ueluti iudicem considerare, filium uerò patronum nostrum toties procidere in genua, & patrocinari nobis, quoties peccamus: sed cum Apostolo intelligimus Christum aduocatum & sacerdotem ecclesiæ uniuersalem & unicum semper apparere in conspectu patris: quoniam ut uis mortis eius, (tametsi nō moriatur quotidie) sic uirtus intercessionis semper efficax est. Accedamus ergo ad Deum per Christum, redemptionis & intercessionis unicum mediatorem, intercessorem & aduocatum. Non poterimus non placere Deo patri, si commendemur ipsi per filium unigenitum.

*Intercessio
Christi qualis.*

*Responsio ad
quædam aduer-
sarium argu-
menta.
Rom. 8.*

*Angelorum
oratio.
Hebr. 1.*

Porro infirma sunt argumenta, quibus patroni patronorum cœlitum ipsorum conantur confirmare patrocínium uel intercessionem. Spiritus, inquit, intercedit pro nobis, iuxta doctrinam Apostolicam, ergo solus Christus non intercedit. Respondeo, Paulum non loqui de alio intercessore in cœlis, sed de spiritu hominis precantis in hoc seculo, qui incensus & illustratus Dei spiritu ingemiscit & intercedit pro sanctis. Aperta sunt Apostoli uerba. Addunt isti, Legimus de angelorum precibus in scriptura, & quòd preces fidelium conspectui Dei offerunt: ergo non solus Christus in cœlis orat uel intercedit pro nobis, sed & sancti. Nos uerò negamus hoc consequi: quia scriptura docet angelos esse ministratorios spiritus: ac pro ipsorum officio offerre preces tantum uelut ministros in conspectum Dei, sed non intercedere, aut homines exaudiri propter angelos, sed propter Christum, qui intercedit, & propter quem oratio allata ad Deum, ipsi grata est. Quòd si isti tale quiddam & de animabus sanctorum beatissimis proferre & à simili argumentari uolunt, doceant primum animas constitutas esse spiritus ministratorios. Sed non poterunt: & si possint, nondum tamen approbauissent diuos cœlites esse

esse intercessores. Nam ne angeli quidem propterea intercessores sunt, quod preces hominum Deo offerunt. Eadem nobiscum, inquiunt, charitate coherant, & quia spiritus beatorum in cœlis agentes, nos in terris amant, pro charitatis huius ingenio & pro nobis orant. Respondemus illos citra scripturas sic colligere. Ut enim libenter concedamus diuos in cœlis non esse sine proximi charitate: addimus tamen hanc in sanctis cœlitibus minimè habere nunc hoc ingenium & hæc officia, quæ olim habuit in terra. Alioquin plurima alia absurda diuis tribueremus, quasi ea faciant aut patiantur, quæ tamen nec faciunt nec patiuntur. Dum in terris uixerunt, pro charitatis ingenio indoluerunt & exultauerunt oraruntque nobiscum, imò & interpellarunt pro nobis: nunc cum exuerunt hanc corruptionem, & deseruerunt nos, in cœlis agentes cum Domino, neque norunt res nostras neque mouentur ullis affectibus terrenis. Sentiunt nobis abundè consultum esse absque ipsorum opera. Sentiunt item constitutum esse salutis negotium, ut ipsi quiescant à laboribus suis, letenturque in Christo, hic uerò intercessor sit unicus apud patrem omnium in miseria uiuentium hominum, quia omniscius & omnipotens est, neque commouetur, neque delassatur aut ignorat quicquam: sed omnia intercessoris perfectissimè obit & perficit. Sciunt hanc gloriam solo Dei filio competere: ideoque hanc ambiunt minimè, ut ipsi se intercessores statuunt pro Christo. Antecellit enim hic charitas Dei charitatem proximi. Obijciunt isti, diuos non intercessoris illius unici ritu orare in cœlis, sed eo modo quo in terris orarunt pro confratribus. Diximus autem modò non consequi, Hoc fecerunt in terris, idem ergo faciunt in cœlis. Nec probari potest scripturis disertis, quòd diui in cœlis pro nobis orent. Cur ergo subinde dubia uelut certa nobis dogmata proponunt? Et ut donec mus illos orare in cœlis, id quod patrum non pauci scripserunt, ideò tamen non sequitur diuos esse inuocandos. Notissima est enim illa S. Augustini sententia quæ legitur exarata libro de Ciuitate Dei 22. cap. 10. Gentes dijs suis & templa ædificauerunt, & statuerunt aras, & sacerdotes instituerunt, & sacrificia fecerunt. Nos autem martyribus nostris non templa sicut dijs, sed memorias, sicut hominibus mortuis, quorum apud Deum uiuunt spiritus, fabricamus. Nec ibi erigimus altaria, in quibus sacrificemus martyribus, sed uni Deo & martyrum & nostro sacrificio immolamus: ad quod sacrificium, sicut homines Dei, qui mundum in eius confessione uicerunt, suo loco & ordine nominantur. Non tamen à sacerdote qui sacrificat inuocantur. Quia Dei sacerdos est, non illorum. Ipsum uerò sacrificium est corpus Christi, quod non offertur ipsis: quia hoc sunt & ipsi. Hæc ille. Satis clarè testificans sanctos non inuocari uel inuocandos esse, quòd Deo competat sacrificium, non sanctis. Proinde cum adiiciunt aduersarij, Ecclesiam à multis annis inuocasse sanctos, ecclesiam non errare, idcirco inuocantes sanctos non errare. Respondemus ecclesiam non errare quando audit uocem sponsi & pastoris sui: errare autem quando neglecta uoce pastoris, sua sequitur decreta. Errauit tota Israelitica ecclesia unà cum summo pontifice Aarone senioribusque populi, cum præterita lege Dei, imagine Deum representatum choris & concentibus coluit, secus quàm ipse instituerat. Nec absoluuntur ab errore & peccato Israelitæ, quòd multis annis excelsa non sustulerunt. Regerunt, luuerunt inuocati, ergo inuocandi sunt diui. Non rarò feliciter cedit quod contra uerbum dei instituitur. Quis autem inde colligat bonum esse quod instituitur contra uerbum Dei? ueluti bello depradandos innoxios, quia bellis uidemus milites truculentos ditescere. Videbantur & gentium dij exaudire uota supplicum, sed nunquid ideò inuocandi sunt dij gentium? Verum non instituimus ad singula istorum argumenta respondere, quod aliàs

Ecclesia inuocans sanctos.

pro nostro dono fecimus. Concludimus ergo uerbum ueritatis ex ore Dei pronunciatum, docere nos inuocationem nominis Dei per interuentum Iesu Christi; neque legimus ullum ueteris uel noui Testamenti sanctum (cuius meminerit quidem scriptura) ullum inuocasse, quantumuis excellentem patriarcham aut prophetam demortuum, neque ullum Apostolum Apostolorumque discipulum inuocasse aliter quam per nomen Iesu Christi: teneamus ergo firmiter, perfectissimam & tutissimam esse doctrinam, quæ iubet nos omnes Deum solum per unicum filium inuocare, atque ipsum Deum hoc à singulis nobis postulare: & cum obedimus, Deo placere.

Colere quid.

Restat locus ultimus de Colendo Deo. Vocabulum colere Latinis latè patet. Colimus enim amicitiam, literarum studia, arua & senes. Nos in præsentī usurpamus colere pro seruire, hoc est, in omnibus se seruuli instar morigerum & obsequentem præbere, reuereri uel uenerari cultumque exhibere. Hebræi utuntur suo Abad, quod Latinus interpretis uertit Seruiuit, coluit, uel sacrificauit. In libro Regum legis: Et Achab seruiuit ipsi Baal ipsumque adorauit. Græcis cultus hic uel *λατρεία* uel *δουλαία* appellatur. Sumitur alterum pro altero. Quanquam reuera seruire maius sit quam colere. Sustineas enim nulla difficultate colere aliquem, sed eidem non item seruire. Dicimus ergo cultum Dei esse seruitutem, qua se homines Deo reuerenter subiiciunt & obediunt, ipsumque iuxta uoluntatem eius uenerantur. Colunt itaque Deum qui ipsum serio timent, ei se morigeros obediendo præbent, colentes ipsum internè & externè, sicut constituit.

Duplex est
Dei cultus.

Cultus enim Dei duplex est, Verus & Falsus. Verus appellatur uera religio, uera fides, & pietas. Falsus nuncupatur superstitio, idololatria & impietas. Nā uerus cultus is est, qui oritur ex uero timore Dei, ex fide sincera, soli se Deo subdit, & ad uoluntatem Dei in omnibus se accommodat. Falsus cultus cōstat rebus contrarijs. De quo plura dicemus ubi uentum fuerit ad superstitionem. Verus Dei cultus rursus diuiditur perspicuitatis gratia in cultum Dei internum & externum. Internus cultus soli Deo cordiū scrutatori cognitus est. Versatur enim in timore dei & iusta obedientia, in fide, spe & charitate: unde oriuntur adoratio Dei, inuocatio, gratiarum actio, patientia, perseuerantia, pudicitia, innocentia, beneficentia, ac reliqui fructus spiritus. His enim donis Dei & rebus spiritualibus, Deus, qui spiritus est, colitur uerè. Sine his nullus Deo cultus probatur, utcumque in conspectu hominum splendidus & sumptuosus purusque esse uideatur. Hic cultus Dei testimonia habet diuina & humana, in primis uerò legis, prophetarum, & Apostolorum. In le-

Internus Dei
cultus.

Deut. 10.

ge enim dicit Moyses: Et nunc Israel quid Dominus Deus tuus petit à te, nisi ut timeas Dominum Deum tuum, & incedas in cunctis uisibus eius, diligas eum, & seruias domino Deo tuo, toto corde tuo, & tota anima tua, ut scilicet custodias præcepta &

Mich. 6.

statuta eius, quæ ego præcipio tibi hodie in bonum. Micheas propheta inducit de uero Dei cultu interrogantes, quibus hic in rebus consistat, & respondet: Indicabo tibi o homo, quid sit bonum, & quid à te requirat Dominus, nempe facere iudicium, diligere misericordiam, & sollicitum uel submissum ambulare cum Deo tuo,

Rom. 12.

S. Apostolus Paulus: Obsecro, inquit, uos fratres per miserationes Dei, ut præbeatis corpora uestra hostiam uiuentem, sanctam, acceptam Deo, rationalem cultum uestrum. Et ne accommodetis uos ad figuram huius seculi, sed transformemini per renouationem mentis uestre, ut probetis quæ sit uoluntas Dei, quod bonum

1. Thes. 1.

atque acceptum & perfectum. Idem Apostolus paucis uerbis uerum cultum Dei in conuersionem ab idolis ad deum fidemque Iesu Christi concludens ait, Macedones & alia gentes de uobis annunciant, quomodo conuersi fueritis ad Deum à simulachris,

lachris, ut seruiretis Deo uiuenti & ueraci, & expectaretis filium eius de cœlis, quem excitauit à mortuis Iesum, qui liberat nos ab ira uentura. Porro S. Iacobus Apostolus: Religio pura & immaculata, inquit, apud deum & patrem, hæc est, in- uisere orphanos & uiduas in afflictione sua, & immaculatum seipsum seruare à mundo. Hæc diuina & perspicacia sanctæ scripturæ testimonia abundè satis declarunt c. v. quānam sit uerus dei internus cultus. Humana testimonia nihil tamen à diuinis discrepantia, plurima ubiq; occurrunt in scriptoribus ecclesiasticis. La- ctantius lib. Instit. 6. cap. 9. In dei agnitione, ait, & cultu summa uersatur: in hoc est spes omnis & salus hominis, hic est sapiētiae gradus primus, ut sciamus quis sit no- bis uerus pater, eumq; solū pietate debita prosequamur, huic pareamus, huic de- uotissimè seruiamus, in eo promerendo actus omnis & cura & opera collocetur. Huius generis alia quoq; idem ille copiosè recitat eiusdem libri cap. 10. & luculen- tissima de Vero dei cultu cap. 1. Placet autem pro multis unum Romani marty- ris, ad tribunal Rom. apud Iudicem Asclepiadem liberè pronuntiātum, recitare de Vero Dei cultu testimonium. Postquam enim de deo animosè & religiosè di- xisset quis & quantus sit, subiungit.

Iacobi 1.

De uero dei cul-
tu, testimonium
Romani mar-
tyris.

*Cognoscis ipsum, nunc colendi agnoscite
Ritum modumq;, quale sit Templi genus,
Quæ dedicari sanxerit Donaria,
Quæ Vota poscat, quos sacerdotes velit,
Quod mandet illic Nectar immolarier.*

*Eadem sibi ipse mente in hominis condidit:
Viuiam, serenam, sensualem, stabilem,
Solui incapacem posse, nec destructilem,
Pulchram, venustam, præminentem culmine,
Discriminatis inlitam coloribus.*

Templum.

*Illic sacerdos stat sacro in limine,
Foresq; primas virgo custodit fides,
Innexa crines uinculis regalibus,
Poscit litari victimas Christo & patri,
Quas scit placere candidatas, simplices.*

Sacerdos.

*Frontis pudorem, cordis innocentiam,
Pacis quietem, castitatem corporis,
Dei timorem, regulam scientiæ,
Ieiuniorum parcitatem sobriam,
Spem non iacentem, semper & largam manum.*

Sacrificia.

*Ex his amœnus hostijs surgit vapor,
Vincens odorem balsami, thuris, croci,
Auras madentes Persicorum aromatum,
Sublatus inde cælum ad usq; tollitur.*

Et prosperatum dulce delectat Deum.

Et quæ in hanc sententiam ibi sequuntur. Sufficere hæc puto de interno Dei cul- tu: interim agnosco quædam in illis referri posse & ad externum Dei cultum.

Externus Dei cultus ex interno nascitur, nec Deo soli, ut hic cognitus est, sed etiam uenit sub sensum hominis, estq; obseruatio uel exercitatio rituum ab ipso deo institutorum, quibus internum cultum & testificamur apud homines, & ex- ercemus, ad gloriam Dei nostramq; utilitatem. Huius generis erant in ueteri po- pulo Templum, sacerdotiumq;, cum omnibus ceremonijs à Deo institutis, quæ

Externus dei
cultus.

frequentissimè appellatur cultus Dei. Ac erat hic certis limitibus circumscriptus. Non enim licebat cuilibet pro suo arbitrio cultum dei fingere : quemadmodum fuscè ostenditur in lege & in historia sacra. Seruiebat autè externus ille cultus gloriæ dei fideliumq; utilitati. Id quod plenius exposui cum differerem de Ceremonijs Israeliticis. Porro sicut Christus ueteres illos ritus abrogauit, ita pro eis oppidò pauculos reposuit. Cœtum enim sacrum instituit : in quo uult ad gloriam suam nostramq; utilitatem prædicari uel enarrari uerbum dei ex scriptura sancta, orari in commune, & percipi dispensariue sacramenta. Ad quæ necessarius est locus ac commodus, idoneum tempus, ratio iusta, cum instrumētis sanctis. Vbi pñ rursus nihil permittunt suo arbitrio. Nam ex uerbo Dei, quem colunt, colendū modum totamq; rationem petunt. De quo nonnihil dictum est in quarto primæ tabulæ præcepto, diceturq; copiosius loco & ordine suo. Breuiter, Colunt deum externo cultu, qui ex fide & obedientia statis temporibus in sacrum cœtum coeunt, qui disciplinam seruant ecclesiasticam ex uerbo domini depromptam, qui audiunt uerbum Dei, uel diuinarum scripturarum sanctam enarrationem, qui publicè orant cum Ecclesia, qui sacramentis religiosè participant, aliosq; legitimos & salutes ritus obseruant. Hoc autem cultu suo Deum glorificant apud homines, & utilitatem non exiguam à deo percipiunt, nempe benedictionem augmentumq; donorum cœlestium. Nullis, opinor, hic opus esse testimonijs scripturarum, approbantibus hæc quæ hætenus diximus de externo Dei cultu. Vbiq; enim in euangelica historia, in Actis & epistolis Apostolorum obuia sunt plurima. Nam dominus Iesus ubiq; sacros cœtus colligit in quibus prædicat euangelium precesq; commendat. De Maria sedente ad pedes eius audienteq; prædicationem eius pronunciat: **Luce 11.** Vnum hoc necessarium, Maria bonam partem delegit, quæ non auferetur ab ea. Et alibi: Beati, inquit, qui audiunt uerbum dei & custodiunt illud. Certè sacramenta ipse dominus instituit & usurpauit. Refraganti enim Ioanni, à quo postulabat baptismum dicentiq;: Mihi opus est ut abs te baptizer, & tu uenis ad me? respondit: Omitte nunc. Sic enim decet nos ut compleamus omnem iustitiam. Vnde & Apostolus Paulus disciplinam ecclesiasticam diligenter cōmendans ecclesijs, cœtus sacros instituit pulcherrimè. Loci omnibus sunt cognitissimi 1. Cor. 11. 14. & 16. item 1. Timoth. 2. & alibi.

*Solum deum
esse colendum.*

Deute. 10.

Matth. 4.

Priusquam uerò hunc locum concludam, demonstrabo solum deum esse colendum. Et certè cultus ipse, quo de hætenus differuimus, nō potest impendi ulli creaturæ, neq; angelis neq; diuis cœlitibus, soli deo competit: unde nemo tam cæcus est, qui non uideat deum his solum coli oportere. Et cum dominus cultum suum uel seruitutem à nobis requirit, totum cor nostrum requirit, nihil ergo relinquitur quod impendamus aījs. In lege sua dicit spiritu Dei plenus Moses: Post dominum deum uestrum incedetis, atq; eum timebitis, præcepta eius custodietis, & uocem eius audietis, ipsi seruietis atq; adhærebitis. Nec refert quod hic uocabulum Solus nō apponitur, cum emphasi insinuetur. Cum enim dicit: Ipsi seruietis, & ei adhærebitis, quid aliud intelligemus, quàm ipsi & non alij, ergo soli? Præterea in 6. cap. Deut. non legis: Dominum Deum tuum timebis, & illum solum coles, iurabisq; in nomine eius: sed, Dominū Deum tuum timebis, & illum (emphaticè) coles, iurabisq; in nomine eius. Cæterum dominus in euangelio hæc Legis uerba adducens contra tentatorem, & emphasim explicans: Scriptum est, inquit, Dominum deum tuum adorabis, & illum solum coles. Quod quidē testimonium sanè luculentissimum, solum sufficit demonstrationi nostræ, quod solus Deus sit colendus. Adijciam his humanum præterea testimonium, sed diuino suffultum, quod

quod & alibi in libris nostris posuimus. S. August. de Quantitate animæ sic ostendit solum Deum esse colendū. Quicquid anima colit ut Deum, necesse est ut melius esse, quàm seipsam putet. Animæ autem natura, nec terra, nec maria, nec sydera, nec luna, nec sol, nec quicquam omnino quod tangi aut his oculis uideri potest, non deniq; ipsum, quod uideri à nobis non potest, cœlum, melius esse credendum. Imò hæc omnia longè deteriora esse, quàm est qualibet anima, ratio certa conuincit. Et mox: Si quid ergo aliud est eorum quæ Deus creauit, quiddam est deterius, quiddam par: deterius, ut anima pecoris: par, ut angeli: melius autem nihil. Et si quando est aliquid horum melius, hoc peccato eius fit, nō natura: quo tamen non usque adeo fit deterior, ut ei pecoris anima uel præferenda aut conferenda sit. Deus igitur solus ei colendus est, qui solus eius est author. Homo autem quilibet alius, quanquam sapientissimus & perfectissimus, uel prorsus qualibet anima rationis compos & beatissima, amanda tantummodo & imitanda est, eiq; pro merito atq; ordine, quod ei congruit, deferendum. Nam scriptum est: Dominum deum tuum adorabis, & illi soli seruiēs. Hæc Augustini sunt. Et illa hæcenus de uno solo uiuo uero & æterno Deo colendo disputauimus.

Cæterum quicunq; syncera fide Deo adhærent, & unum adorant, inuocant & colunt legitime, religiosi rectè nuncupantur: studium & actio ipsorum uera est religio. Hanc alij dictam uolunt à relinquendo, propterea quod per ipsam relinquamus falsos deos, errores omnes, & cupiditates terrenas, sectemur autem uerum deum, ueritatē & cœlestia. Massurius Sabinus, Religiosum est, inquit, quod propter sanctitatem aliquam remotum ac sepositum à nobis est. Dictum est uerbum à relinquendo, tanquam ceremoniæ à carendo. At M. Cicerō religionem dictā arbitrat̃ur à relegendo, quod qui religiosi sunt, cuncta sollicitè relegant, quæ ad deorum cultum pertinere uidentur. Cæterum confutatur hic multis à Lactantio Firmiano, antiquo ecclesiæ scriptore, lib. Instit. 4. cap. 28. ubi inter alia, Hac conditio ne gignimur, inquit, ut generati nos Deo iusta & debita obsequia præbeamus, hunc solum nouerimus, hunc sequamur. Hoc uinculo pietatis obstricti deo & religati sumus, unde ipsa religio nomen accepit. Et mox, Diximus nomen religionis à uinculo pietatis esse deductum, quod hominem sibi deus religarit, & pietate constrinxerit: quia nos seruire ei ut domino, & obsequi ut patri, necesse est. Hunc sequuti & alij scriptores ecclesiastici, Hieronymus & Augustinus, & ipsi religionem deduxerunt à religando. Ille enim in Comment. ad 9. cap. Amos, iste, inquit, fasciculus una domini religione constrictus est. Religio ergo à religando, & in fascem domini uinciendo, nomen accepit. Hic autem de Quant. animæ cap. 36. Vera religio est, ait, qua se uni deo anima, unde se uelut peccato abruperat, reconciliatione religat. Idem de Vera religione cap. ult. dicit: Religet nos religio uni deo omnipotenti, unde dicta creditur religio. Dicimus ergo religionem ueram aliud non esse, quàm amicitiam, connexionem & confederationem cum Deo uero uiuo & æterno, cui uera fide connexi, solū adoramus, inuocamus, & colimus, à quo toti pendemus, uiuentes in omnibus ad uoluntatem uel secundum præscriptum legemq; uerbi eius. Proinde rectissimè totum salutis fideiq; negotiū comprehenditur uno religionis uocabulo: quod alibi fœdus & pactum, alibi uerò coniugium in scripturis appellatur. Sicut enim fœdere uniuntur confederati: sic deus & homo connectuntur religione: & ut coniugio in unum corpus rediguntur maritus & uxor, ita religione in corpus spirituale connectimur cum deo ueluti marito, & cum ipso dei filio, ueluti sponso & capite nostro. Huc ergo pertinent quæcunque in scripturis proferuntur de seruando fœdere & fide coniugij. Fœdifragi, perfidi,

Quomodo colendi sunt sancti.

De uera religione.

Vera religio quid?

& adulterio infames sunt, quicunque non uni Deo per fidem connexi, solum adorant, inuocant per Christum, & colunt prout ipse in uerbo suo coli uoluit. Illi ipsi nuncupantur etiam superstitiosi.

De superstitio-
ne.

Superstitio enim falsa est religio, quæ Deum non colit, sed aliud pro Deo, uel non solum, uel non ritè aut legitime colit. Extendit se superstitionis uocabulum ad aniles usque fabulas & deliros errores. Germanicè enim nuncupamus superstitionem aberglouben/missglouben/vnd mißbrüch. Exactissimè uerò de uocabulo hoc disputans Lactantius lib. Instit. 4. cap. 28. sic scribit: Religio ueri Dei cultus est; superstitio falsi. Superstitiosi uocantur, non qui filios suos superstites optant: omnes enim optamus: sed aut ii qui superstitem memoriam defunctorum colunt: aut qui parentibus suis superstitibus, colebant imagines eorum domi, tanquam deos penates. Nam qui nouos sibi ritus assumebant, ut in deorum uicem mortuos honorarent, quos ex hominibus in cælum receptos putabāt, hos superstitiosos uocabant: eos uerò qui publicos & antiquos deos colerent, religiosos nominabant. Vnde Vergilius: *Vana superstitio veterumque ignara deorum.* Sed cum ueteres quoque deos inueniamus, eodem modo cōsecratos esse post obitum, superstitiosi ergo qui multos & falsos deos colunt: nos autem religiosi, qui uni & uero Deo supplicamus, &c.

Deos alienos
de uero reli-
gio colere.

Jerem. 2.

Versatur superstitio in his maxime capitibus, Vel cum non colitur dominus, sed alij dii pro ipso, relicto uno uero & uiuo Deo: uel cum colitur quidem dominus, sed non solus, uerum alij simul cum ipso: uel cum ipse quidem colitur, sed non legitimo cultu. Primo superstitionis genere peccauerunt ferè gentes, quæ deū uerum ignorauerunt, adeoque & pro deo uero falsos & confictos siue alienos coluerunt deos. Eadem insania laborasse & Israelitas Dei populum testis est sanctissimus propheta Ieremias, expositulans cum populo ac dicens: Audite uerbum domini omnes tribus & familiae Israelis, sic dicit dominus: Quidnam iniquitatisprehenderunt patres uestri in me, ut tam longè à me recederent, & sectarentur uanitatem, fierentque uani: neque dixerunt: Vbi dominus, qui eduxit nos de terra Aegypti, qui traduxit nos per desertum, per terram uastam & inuiam, per terram siti culosam & umbram mortis, per terram per quam nemo transibat, in qua nec homines habitabant: Et induxi uos in terram cultam & fertilem, ut comederetis bona & fructum eius. Ingressi autem contaminastis terram meam, & hereditatem meam reddidistis abominandam. Sacerdotes non dixerunt: Vbi est dominus: & qui tenere debebant legem non cognouerunt me, & pastores prauaricati sunt in me, prophetae prophetauerunt in Baal, & idola sequuti sunt. Propterea ultra iudicio contendam uobiscum, ait dominus, & disceptabo cum filiis uestris. Transite enim ad insulas Chittim & uidete, & in Kedar mittite, & considerate diligenter, ac inspicite num simile quid factum sit, num ulla gens mutarit deos qui tamen dii non sunt: populus autem meus mutauit gloriam suam in idolum. Obstupefcite cœli super hoc, exhorrescite uehementer, ait dominus. Quoniam duo mala fecit populus meus: me dereliquerunt fontem aquæ uiuæ, & foderunt sibi cisternas, cisternas, inquam, pertusas, quæ continere non ualent aquas. Audis populum Israelis inexprabili scelere deseruisse deum uenam uitæ, ac puteos sibi effodisse pertusos. Aquæ significant bonum absolutum, quo desiderium & animæ & corporis satiari potest. Scaturigo talis solus deus est supremum & consummatissimum bonum. Hoc deserto foderunt, id est, maximis laboribus & impensis pararunt sibi lacunas, nimirum conuerterunt se ad creaturas, ad eos qui non sunt dii, neque desideria eorum exaturare potuerunt. Hoc malum & hodie uulgare est, dum relicto Deo

deo multi conuertuntur ad diuos cœlites, à quibus postulant, quod petendū erat à Deo, neq; dari potest nisi à solo Deo. Hic locum habet idololatria, id est, cultus simulachrorum: superstitiosi enim sunt non tantum qui fingunt sibi deos falsos, relicto deo uero, aut fiduciam figunt in res nihili, sed etiam qui uenerantur simulachra uel Dei uel deorum. Nam imagines uel simulachra statuuntur uel ipsi deo uero, uel dijs falsis, ipsis inquam creaturis. Non licet autem ulla imagine repræsentare deum immensum, æternum & uiuentem in secula: nec licet imagine expressum uel adorare uel colere: ergo multo minus licet creaturis statuas uel simulachra consecrare ad cultum. Plurima extant scripturæ testimonia contra idololatriam, ut Exodi 20. Isaia 40. 44. Psal. 113. 1. Cor. 5. 10. Rom. 1. Galat. 5. 1. Theff. 1. 1. Petri 4. 1. Ioan. 5. Ieremiæ 10. cap. Porro diligenter hic admoneo simplices ne sibi patiantur imponi. Nam idololatræ nomen subterfugere non potest qui simulachra ueneratur, metuit, illis non nihil confidit, ante ipsa procumbit, dona eis offert, in loco celebri & honorato retinet, cæreos & incensa eis affigit, amat, ornat, tuetur, excolit, & sacris qualibuscunq; colit. Verum de idololatria diximus aliàs copiosissimè.

Idololatria.

Porro coluerunt quidem deum Israelis, sed non solum, uerum alios quoque deos cum uero deo illi de quibus in historia Regum legimus, Et nihilominus colebant dominum. fecerunt autem sibi de nouissimis sacerdotes excelsorum, & ponebant eos in phanis sublimibus: & cum dominum colerent, dijs quoq; suis seruiebant iuxta ritum gentium, de quibus translati fuerant Samaritam. Et iterum, Gentes itaq; illæ timuerunt dominum, & simul seruierunt sculptilibus suis: nec aliter fecerunt filij & nepotes eorum, quam patres ipsorum, usque in præsentem diem. Hoc autem malum hodie uulgare est prorsus. Inuenias enim cultores Dei, quibus minimè persuadeas solum deum esse colendum, imò asseuerâtes hæresim esse execrabilem negare cum Deo diuos & inuocandos & colendos. Contra quos satis disputatum est aliàs, & in hoc nostro Sermonè.

Non solū deum uerū, sed alios simul cum deo colere.
4. Reg. 17.

Hic quoq; obseruandus uenit modus & ratio uaria superstitiosè colendi Deū. Neq; enim ille duntaxat superstitiosè colit deum, qui in animo fingit primū quidē deum, deinde eundem simulachro exprimit, cui mox sacrificia & incensa offert prostratusq; coram illo adorat, & suppliciter ueneratur: sed ille in primis, qui incommunicabiles dei proprietates creaturis cōmunicat, licet nullo exprimat simulachro: uel qui munera diuinitus accepta arbitratur à diuis cœlitibus esse colata. Porro incommunicabiles dei proprietates sunt, omnia posse, omnia scire, ubiq; præsentem esse, omnia audire, auxilium ferre, benignum, iustum, & misericordē esse. Certè Isaías prophetarum eruditissimus & authoritatis maximæ, hisce ueluti firmissimis argumētis euincit deos Babyloniorū & Gentium non esse deos: quia non possunt prædicere aut scire uentura: nec possunt bene uel male facere. Proinde posse omnigenis bonis locupletare, & iustis pœnis coercere, ita omniscium & omnipotentem esse, proprietates dei sunt, nulli creaturæ communicabiles: superstitiosus ergo est, qui has diuis cœlitibus tribuit, & ideo eos colit & inuocat. Oseas propheta grauiter inuehitur in Iudæos, attribuentes dijs alienis munera dei, adeoq; synagogam talium nuncupat scortum uel meretricem. Filiorum, inquit, eius non miserebor, quoniam filij sunt ex scortatione suscepti. Siquidem mater eorum scortata est, quia dixit, Ibo, sequar amatores meos, qui dāt mihi aquam meam, panem meum, lanam meam, & linum meum, oleum meum & pocula mea. Et mox: Nec agnouit quod ego dedi ei frumentum uinum & oleum, quodq; ei multum argenti & auri contuli, quæ fecerunt ipsi Baal. Nec hodie infrequens est

Proprietates dei non tribuendæ sunt alienis.
Isaie 41.
42. & c.

Dona dei nō tribuēda sunt dijs alienis.
Osee 2.

diuis cœlitibus, non Deo soli, prouentum terræ & tempestates uel temperatas uel sæuas ferre acceptas. Verum ea superstitio est non pietas.

Colere deū sed
non legitime.

Deut. 12.

Leuit. 10.

2. Reg. 6.

Iudic. 17.

3. Reg. 12. 13.

3. Reg. 15.

Isaie 66.

Isaie 29.

Matth. 15.

Præterea superstitiosè colitur deus, quando solus quidem, sed tamen non modo legitimo colitur. Illegitimus cultus proficiscitur ex arbitrio hominū, alienusq; est à uerbo & institutis Dei. Legitimè enim Deus colitur, quādo secundum ipsius uoluntatem & uerbum colitur. In lege sic præcepit dominus: Caue tibi ne requiras deos gentium, dicens: Quomodo coluerunt gētes illæ deos suos: sic ego faciā. Non facies sic domino deo tuo, &c. Quicquid ego præcipio uobis, id obseruabitis ut faciatis: non addes quicquam super ipsum, nec minues ab eo. Nadab & Abihu offerunt domino ignem alienum: ergo concremantur coram domino flamma cœlesti. Perit etiam Oza, quod aliter contrectauisset arcam dei, quā mandarat in lege sua dominus. Micha in libris Iudicum uero Deo, qui appellatur Iehouah, imaginem, aram, facellum & cultum instituit. Sed reprobatur à scriptura sancta, quia is non tantum ex scriptura diuina non erat petitus, sed modis omnibus legi diuinæ aduersabatur. Sed & Ieroboam deo Israelis cultum magnificū, cathedra-
lia templa, & statuas aureas posuit: uerum cum non congruerent cum uerbo domini, damnantur in uniuersum omnia pro execrandis sacrilegijs. Imò quid in uniuersum sentiamus de omnibus cultibus à deo nec institutis nec cum uerbo dei congruentibus, sed ex nostra bona intentione confictis, declarat nobis unicum præstantissimi prophetæ Samuelis testimonium, contra Saulem & eius sacrificia his pronunciatum uerbis: Nunquid uult dominus holocausta & uictimas, & non potius ut obediatur uoci domini? Melior est enim obedientia quā uictimæ, & auscultare præstat arietum pinguedini. Quoniam quasi peccatum ariolandi est, repugnare: & quasi scelus idololatriæ, nolle acquiescere. Huc facit quod apud Isaia legimus: Qui bouem immolat, quasi qui interficiat uirum: qui pecudem cædit, est uelut is qui iugulat canem: qui offert oblationem, quasi qui sanguinem suillum offerat: qui recordatur thuris, benedicit iniquitatem. Hæc omnia elegerunt in uis suis, & in abominationibus suis anima eorum oblectata est. Vani itaq; & abominabiles cultus sunt, qui non reducuntur ad purum dei uerbum. Nam idem propheta, Frustra, inquit, colunt me docentes doctrinas hominum.

Deus uiuus, uerus & æternus, qui solus uult ac debet adorari, inuocari & coli, uera omnes homines religione donet, & ab omni superstitione uana liberet: per Iesum Christum dominum nostrum.

Filium Dei ex patre ineffabiliter genitum, consubstantialē esse patri, ideoq; Deum uerum: eundem esse hominem uerum, nobis consubstantialē, ideoq; uerum Deum & hominem manentem in duabus inconfusis naturis, & in una persona indiuisa. S E R M O V I.

QUÆ ipsæ rerumq; ordo flagitant, ut postquam in genere dixi de Deo, eiusq; unitate & trinitate, porrò differam sigillatim de personis adorandæ trinitatis, in primis autem de domino nostro Iesu Christo uero Deo & homine, deinde de spiritu sancto: quo si imbuti fuerint animi nostri, cedent omnia quæcunq; dixerimus audierimusq; ad gloriam nominis Dei animarumq; nostrarum salutem. Oremus itaq; &c.

Filius ex patre
ab æterno genitus
ineffabilis
ter.

Pater ille æternus origo & author rerum omnium, æterna & ineffabili generatione filium genuit. Vniuersa enim scriptura concorditer deum appellat patrem, & patrem quidem æternum. Nullus autē pater sui ipsius, sed filij pater est: & quia pater hic æternus est, necessariò filium æternum habeat oportet, æqualem sibi per omnia,

omnia, coæternum & consubstantialiæ. Certè S. Paulus ad confirmationem huius ueritatis catholicæ profert ex ueteri scriptura duo testimonia. Cui, inquit, angelorum dixit unquam Deus, Filius meus es tu, ego hodie genui te? Et iterum, Ego ero ei pater, & ille erit mihi filius: quæ omnia Christo Iesu filio Dei accomodat: de quo & Micheas testatus est, Et tu Bethlehem Ephrata, paruula quidem es in millibus Iuda: ex te prodibit mihi dominator in Israele: & exitus eius (siue emanationes eius) à seculo, à diebus æternitatis. Vnde ipse in Euangelio secundum Ioannem dicit filius Dei: Amen dico uobis, antequam Abraham fieret ego sum. Et Ioannes, In principio, inquit, erat uerbum, & uerbum erat apud Deum, & Deus erat uerbum. Intelligit autem per uerbum non uocale illud transiens, non consiliū Dei, sed filij personam. Mox enim subiungit: Et uerbum caro factum est. Scimus autem filium Dei non cogitationem aut propositum Dei (sicut nugantur hæretici) esse incarnatum. Atqui is qui in tempore incarnatus, ante æterna tempora erat apud patrem, adeoq; Deus uerus cum Deo uero. Nam uerbum erat apud Deum inquit, & Deus erat uerbum. Quia in principio, nimirum ab æterno, erat apud Deum. Hæc simplicia scripturis tradita, ideoq; uerissima, de generatione filij ex patre sempiterna, minimè curiosis sufficere arbitror. Scriptura enim non explet hic curiosorum uana desideria, neque subtiliter de his differit, imò pauca quæ credamus tradit. Quod autem illa uel non tradit uel pauculis adumbrat, salubriter uel ignoramus, uel traditis inhærentes plura non inquirimus. Sanctus pater Cyrillus illud Ioannis Euangelistæ exponens: In principio erat uerbum, Ne infinita, inquit, quærentes, inexplicabilis nobis fiat consideratio, quæ nunquam possit in exitum peruenire, nec principium principij dabimus, nec filium in tempore à patre genitum concedemus, sed æternaliter cum patre ipsum esse confitebimur. Si enim in principio erat, quæ mens poterit unquam ultra illud Erat conuolare? aut quando illud Erat mente ita tenebimus ut cogitationes nostras non antecedit: Merito igitur stupore perculsus clamat Isaïas: Generationem autem eius quis enarrabit: Omnem enim mentem excedens, omnemq; rationem humanam superans, ineffabilis est. Et mox: Quoniam, inquit, ante secula filius est, in tempore genitus esse non potest: sed est semper in patre quasi in fonte: sicuti ab ipso dictum est: Ego ex patre exiui & ueni. Quasi enim fontem patrem intelligimus: in quo uerbum est sapientia, uirtus, character, splendor, & imago eius existens. Quare si nullum unquam erat tempus quando absq; sapientia, uirtute, caractere, splendore ac deniq; imagine sua erat pater, fateri necesse est coæternum & esse filium, qui sapientia, uirtus, &c. patris æterni est. Quomodo enim character, aut quomodo imago exquisitissima patris est, nisi pulchritudinem illius perfectè consequutus sit cuius imago est? Non est autem absurdum quod diximus in patre filium tanquam in fonte intelligendum esse. Nihil enim aliud nobis nomen fontis significat quàm ut ex quo: filius uerò in patre & ex patre est, non profluens foras, sed aut quasi à sole splendor, aut quasi ab igne insita sibi caliditas. In his enim exemplis unum ab uno produci & ambo consempiterna sic esse conspiciamus, ut aliud absque alio nec esse possit nec naturæ suæ rationem retinere. Quomodo enim erit Sol splendore priuatus? uel quomodo erit splendor, nisi sol sit à quo defluat? ignis uerò quomodo erit calore carens? uel calor unde prodeat, nisi ex igne, aut ab alio forsitan non procul à substantiali qualitate ignis disiecto? Sicut igitur quæ ab istis profluunt simul cum illis sunt unde profluunt, ac semper unde fluant ostendunt: sic in unigenito intelligendum est. Ex patre enim esse intelligitur, sed in patre etiā esse creditur: non alienus à natura, neq; post patrem natura secundus: sed in ipso

patre semper & cum ipso, & ex ipso, secundum ineffabilis generationis modum. Hactenus Cyrillus. Et illa quidem de patre & de inenarrabili generatione filij dei firmiter secundum scripturas sunt credenda.

Confessio de fili-
lio Dei Iesu
Christo Domi-
no nostro.

Porro de filio Dei teneamus & indubitanter credamus, quod patri consubstantialis atque ideo Deus uerus sit, quod idem ille incarnatus pro nobis & homo factus, in utraque tam diuina quam humana subsistat natura, ita tamen ut naturæ hæ neque confundantur inter se neque diuidantur. Credimus enim unum atque eundem Dominum nostrum Iesum Christum uerum esse Deum & hominem uerum. Quæ quidem singula per suas partes dilucidè, & quantum Dominus gratiæ dederit, demonstrabimus.

Filium patri
esse consub-
stantialem.

De uocabulo Homoousij, quod concorditer Latini uerterunt Consubstantiale, diu & multum apud ueteres altercatum esse testatur Ecclesiastica historia. Quid significet & quomodo usurpatum fuerit à celeberrima Synodo Nicæna, breuibus & significatissimè sic exposuit doctissimus & piissimus Eusebius Pamphili Cæsariensis antistes. Quod patri filius consubstantialis dicitur, expressam habet significationem, quod nihil similitudinis cum factis creaturis filius Dei habet, sed soli patri, qui ipsum genuit assimulatur, nec ex alia est substantia aut essentia, nisi patris. Et mox idem, Cui sententiæ ad hunc modum expositæ, rectè subscribi posse uisum est: quando ex ueteribus doctos ac illustres Episcopos ac commentatores de patris & filij diuinitate differentes, Homoousij dictione usos esse cognouimus. Hæc Socrates Historiarum lib. 1. cap. 8. Certè sancti ecclesiarum præsides hæreticorum hypocrisis, lubricitate & malitia adacti, uocabula maximè significantia & minimè ancipitia, & ipsi usurparunt & alijs usurpanda imposuerunt, quibus partim ueritatem orthodoxam disertè exprimerent, partim dolos & artes malitiosas hæreticorum redarguerent atque retegerent, imò & excluderent. Confitebatur Arius, filium Dei Deum esse, sed consubstantialem interim patri negabat, quare declarabat se non syncerè confiteri ueram filij diuinitatem. Nec refert admodum si uocabulum aliquod commodum & rei explicandæ idoneum in scriptura sacra tot literis quot in aliena lingua scribitur non extet, modò illud disertè scripturis expressum legatur, quod uocabulo significatur. Proinde si ostenderimus filium eiusdem esse substantiæ aut naturæ cum patre, adeoque æqualem Deo & similem, unumque cum ipso, abundè demonstrauimus filium patri esse Homoousion siue consubstantialem. Zacharias propheta Deum inducens loquentem, dicit: Excitare, ô gladiè, super pastorem meum, & super uirum coæqualem mihi, percutere pastorem, & dispergentur oues gregis. En pastorem percussus appellat Deus coæqualem suum. Quis autem sit pastor ille percussus, declarat historia Euangelica, ipsum nobis Dei filium Dominum Iesum Christum exhibens. Nec obest sed prodest causæ nostræ quod Hieronymus non legit Virum coæqualem mihi, sed Virum cohærentem mihi. Nam ut ille non negat amith significare coæqualem, ita aliud reponit æquè efficax. Cum enim uertit uirum cohærentem mihi, intimam ipsamque substantialem, ut sic dicam, inherentiæ siue coæqualitatem patris & filij, exprimere uoluit. Nam in Commentarijs addit: Et uir cohærens Deo quis est nisi qui ait: Ego in patre & pater in me.

Zach. 13.

Matth. 26.
Ioan. 10.

עמי

Ioan. 5.

Rursus legimus in Euangelio Ioannis: Propterea quærebant Iudæi Iesum interficere, quia non solum soluisset sabbatum, (ἀλλὰ καὶ πατέρα ἰδίου ἔλεγε τὸν θεόν) sed & patrem suum (propriū utique) dixisset Deum: æqualem (ἴσον) se faciens Deo. Cæterum Græci ἴσος exponunt per ὁμοιος. Nec potest illa æqualitas ullibi consistere, nisi in substantia. Intelligunt enim Iudæi, quod Ariani uidere nolunt, Dominum singulari quodam modo deum appellasse patrē suum, utique ἰδίου propriū, nativū seu

seu genuinum, ex quo naturaliter naturalis & consubstantialis filius genitus sit. Sequitur enim: *Æqualem se faciens Deo*, nimirum uirtute siue potentia, æternitate & essentia. Nam idem Dominus apud eundem Euangelistam dicit: *Ego ex Deo processi & ueni*. Non tantum *Veni* dixit: sed *Processi*. Processit talis ex patre qualis est pater substantia, certè lumen de lumine, Deus uerus ex Deo uero, *Ioan. 8.* Nam iterum Iudæis dicit: *Amen dico uobis, antequam Abraham fieret, ego sum*. Non dicit *Fui* uel *ero*, sed *Sum*, alludens ad nomen Domini Iehouah, & explicans suam substantiam diuinitatis eandem esse cum substantia patris, & idcirco se esse patri consubstantialem. *Ioan. 8.* Adhuc enim clarius: *Ego, inquit, & pater unum sumus*. *Ioan. 10.* Vnum, inquam, non concordia, sed identitate & essentia. Agitur enim eo loci de potentia & maiestate Dei. Cumq; protinus Iudæi lapidibus Dominum ista loquutum adobruere uellent, clarè satis declarauerunt quomodo intellexerint uerbacius. Lapidabant enim blasphemos, gloriam Dei uel conuictijs impetētes, uel si bi ipsis arrogantes.

Huc pertinet quod Paulus de filio Dei loquens, ait, *Qui est imago Dei inconspicui, primogenitus uniuersæ creaturæ, quod per illum creata sint omnia*. Si enim imago est Dei inconspicui, coequalis sit Deo oportet. Nam alibi appellat eundem characterem Dei, expressam (& per omnia probissimè respondentem archetypo) imaginem. Certè imago & similitudo est rerum non disparium, sed æqualium. Primogenitus autem dicitur, quia princeps & dominus est, non quod & ipse accensetur creaturis. Omnia enim quæ condita sunt, per ipsum condita sunt: ergo ipse non est creatura, sed Deus uerus, naturæ utiq; & substantiæ diuinæ, unus cum patre. Ad Philipenses idem Apostolus dicit filium esse in forma Dei. At in forma Dei esse, nihil aliud est, quàm Deo per omnia æqualem, consubstantialem adeoq; Deum ipsum esse. Nam quid sit esse in forma Dei, clarissimè per oppositum membrum illustratur. Sequitur enim: *Formam serui assumpsit*. Id quod rursus exponitur per consequens: *In similitudine hominum constitutus, id est, uerus homo factus, ceteris hominibus nulla dissimilis in re, excepto peccato: quod alibi dilucidè exprimitur*. Et hic rursus addit: *Et figura repertus ut homo*. Ideoq; in forma Dei esse, est Deo coequalis & consubstantialem esse. Adhuc enim: *Non rapinam arbitratus est, ut esset æqualis Deo*. Rapina enim est res aliena: nam possidetur per iniuriam. Natura ergo & propriissimo modo coequalis est patri filius. Deus uerus. Et sensus uerborum Pauli hic est: *Tamet si esset filius eiusdem gloriæ & maiestatis cum patre, potuissetq; extra humiliationem manere in gloria, maluit se tamen exinanire, id est hominis naturam assumere, & sese in pericula & ipsam mortem conſpicere*. Alioqui enim iuxta diuinitatem nihil sensit mutationis. Deus etenim est immutabilis, & uiciissitudinis expers. *Philip. 2.*

Ista cum ita habeant, piè S. Ambrosius libro de Fide contra Arianos capite 5. *Ambrosius.* Cum ergo hanc unitatem substantiæ, inquit, in patre & filio non solum prophetica, sed & Euangelica autoritate cognoscas, quomodo dicis in scripturis diuinis homoousion non inueniri? quasi aliud sit homoousion, quàm quod dicit: *Ego de Deo patre exiui, Et, Ego & pater unum sumus, &c.* Præceptorem Ambrosium sequutus discipulus beatus Augustinus in Altercatione cum Pascenio, homoousiō *Augustinus.* scripturæ locis confirmans, demonstrat hoc sanctè in fide & religione nostra usurpari. Id ipsum facit libro contra Maximinum Arianorum Episcopum tertio, capite 14. Sed quid necesse est plura coaceruare? Spero enim dilucidis scripturæ sanctæ locis clarè satis demonstratum esse, filium patri esse consubstantialem, atq; ita credi oportere. Hoc ipsum consequenti tractatione iterum per scripturarum testi-

monia non parum illustrandum fore speramus.

Filius Dei uerum esse Deum

Deum uerum esse Dei filium Dominum nostrum Iesum Christum negauit Arius cum suis complicibus. Scriptura uero ueracissima tam manifeste approbat, ut nihil possit addubitare cui ueritas cordi est. Recitabimus in presenti testimonia & argumenta aliquot maxime perspicua, quibus interueniente spiritu sancto confirmetur fides nostra, ipsa quoque ueritas catholica & orthodoxa illustretur.

Apud Mattheum in 3. ca. baptizato Domino nostro per Ioannem Baptistam, aperti sunt caeli, descenditque spiritus sanctus specie columbae super caput Domini nostri Iesu Christi, protinus etiam audita est uox e nubibus a diuina gloria sic pronuntiata: Hic est filius meus dilectus, in quo placata est anima mea. Et Ioannes Baptista apud Ioannem Euangelistam: Vidi spiritum, inquit, descendantem specie columbae de caelo, & mansit super eum; & ego non noueram eum, sed qui misit me ut baptizarem aqua, is mihi dixit: Super quem uideris spiritum descendantem ac manentem super eum, hic est qui baptizat spiritu sancto. Et ego uidi & testatus

sum hunc esse filium Dei. Huc pertinet quod beatus Petrus rogatus a Domino: At uos quem me esse dicitis? omnium nomine respondit: Tu es Christus ille filius

Dei uiuentis. Et iterum obijciente Domino: Num & uos uultis abire? Respondit rursus omnium nomine S. Petrus: Domine ad quem ibimus? Verba uitae aeternae

Christus naturalis est Dei filius.

habes, & nos credimus & cognouimus quod tu es Christus filius Dei uiui. Dicimur quidem & nos filij Dei, sed per adoptionem, Christus autem non per adoptionem neque per imputationem, sed per naturam. Nam Marci 14. cap. dicit summus sacerdos Domino nostro. Tu es Christus ille filius benedicti? Apud Matthaeum idem ait: Adiuro te per Deum uiuum, ut dicas nobis, an tu sis Christus filius Dei uiui? Respondit Iesus: Ego sum. Nam uidebitis filium hominis sedentem a dextris uirtutis, & uenientem in nubibus caeli, id quod repetitum apparet ex 7. Danielis cap. Ceterum hanc confessionem Domini coram Pilato ueluti blasphemiam mortisque

Ioan. 19.

Leuit. 24.

Ioan. 8.

expiandam adducunt, clamantes: Nos habemus legem, & secundum legem nostram debet mori: quia filium Dei se fecit. At illi ipsi in Euangelica historia contra Dominum intonant: Nos est stupro non sumus nati; unum patrem habemus Deum. Certum ergo est, Iudaeos non aliam ob causam accusasse saluatorem nostrum crimine maiestatis diuinae laesae, quam quod dixisset se naturalem non adoptiuum esse Dei filium. Hoc enim non erat capitale, illud erat capitale. Nam & Ioan. 5. legimus, Propterea quarebant Iudaei magis interficere Iesum, quia non solum soluisset sabbatum, sed & patrem suum dixisset Deum, aequalem se Deo faciens. En habes modum quomodo appellarit se Dei filium, non per adoptionem aut reputationem, sed per naturam atque substantiam. Nam iterum uolentibus lapidare Dominum, ipse opponit, Multa bona opera ostendi uobis ex patre meo, propter quod eorum bonorum operum me lapidatis? Responderunt iterum Iudaei, dicentes: Ob bonum opus non lapidamus te, sed ob blasphemiam, nimirum quia tu homo cum sis, facis te ipsum Deum. En quid poterat dici clarius? Facis te ipsum Deum. Et quid oro dixerat? unde haec colligebant? Ego ouibus meis do uitam aeternam, nec peribunt in aeternum, neque rapiet eas quisquam de manu mea. Pater meus, qui dedit mihi, maior omnibus est; & nemo potest rapere de manu patris mei. Ego & pater unum sumus. Dare uitam aeternam, est uirtutis diuinae: seruare & ita seruare ut nemo de manibus possit rapere, eiusdem est uirtutis. Probat autem suam assertionem Dominus tali argumentatione. Nemo potest oues rapere ex manibus patris mei: ergo nemo potest rapere ex manibus meis. Probatio antecedentis; quia pater maior omnibus est; id est, maximus omnium est; cuius uirtus diuina superat omnia.

Probatio

Probatio consequentiæ, quia ego & pater unum sumus, nimirum non uoluntate duntaxat concordi, sed potentia & maiestate, de qua agitur in præsentī, non de concordia, sed pari potestate uiuificandi & conseruandi. De qua copiosissimè ipse Dominus disputat per integrum cap. 5. Euangelij Ioannis, demonstrans se remittere peccata, uiuificare atq; excitare ex mortuis sua uirtute, perinde atque patrem, ergo ipsum esse eiusdem potestatis & maiestatis diuinæ cum Deo patre. Hæc sunt tam euidētia & illustra, ut si nulla alia haberemus testimonia, sola hæc abundè sufficerent pro assertione ueræ filij Dei diuinitatis, quod scilicet filius est Deus uerus.

Rursus idem Dominus & saluator noster magna libertate, & uerborum luce, absque omni ænigmate & uerborum obscuritate, palam & disertè ad discipulos dicit: Ne turbetur cor uestrum, Creditis in Deum, & in me credite. Ego sum uia, Ioan. 14. ueritas & uita, qui uidit me, uidit patrem. Non creditis quod ego in patre sum, & pater in me? Certum est autem Christum Dominum doctorem esse cœlestem, ueritatis constantissimum assertorem, qui neminem nec seduxit nec potuit seducere. Sed iubet nos credere in ipsum ut Deum uerum. Est itaq; Dominus noster Deus uerus. Nam & alibi clarissimè dicit: Ego sum panis uiuus, qui de cœlo descendī, Ioan. 6. qui confidit mihi, habet uitam æternam.

Idem iterum in Euangelio perspicuè pronunciat, & ait. Pater uenit hora, gloria filium tuum, ut & filius tuus glorificet te. Ioan. 17. Sicut dedisti ei potestatem omnis carnis, ut quotquot dedisti ei, det eis uitam æternam. Hæc est autem uita æterna, ut cognoscant te solum uerum Deum, & quem misisti Iesum Christum. Quibus uerbis & unitatem Dei contra ethnicos, plures deos colentes, asseruit, & personarum distinctionem pulchrè insinuauit, interim etiam se uerum Deum esse cum patre prædicauit. Mox enim subiungit: Glorifica me tu pater apud te ipsum gloria, quam habui priusquam hic mundus esset apud te. Non puto hic mihi prætereundam Tertulliani argumentationem, quo minus C. V. recitem ex libro de Trinitate, in quo plurima colligit diuinitatis Christi solidissima argumenta: Si homo tantummodo Christus, inquit, quare credendū nobis regulam talem posuit, qua diceret: Hæc est autem uita æterna, ut sciant te unum & uerum Deum, & quem misisti Iesum Christum? Si nolisset se etiam Deum intelligi, cur addidit: Et quem misisti Iesum Christum, nisi quoniam & Deum accipi uoluit? quoniam si Deum nollet intelligi, addidisset: Et quem misisti hominem Iesum Christum: nunc autem neque addidit, nec se hominem nobis tantummodo Christus tradidit, sed Deo iunxit: ut & Deum per hanc coniunctionem sicut est intelligi uellet. Est ergo credendum secundum præscriptam regulam in Dominum unum uerū Deum, & in eum quem misit Iesum Christum consequenter: qui se nequaquam patri, ut diximus, iunxisset, nisi Deum quoq; intelligi uellet. Separasset enim ab eo, si Deum intelligi se nolisset. Inter homines enim tantummodo se collocasset, si hominem se esse tantummodo sciret: nec cum Deo iunxisset, si se non & Deum nosset: nunc & de homine tacet, quoniam hominem illum esse nemo dubitat, & Deo se iungit meritò, ut credituris diuinitatis suæ formulam poneret. Si homo tantummodo Christus, quomodo dicit: Et nunc honorifica me gloria quam habebam apud te priusquam mundus erat: Si antequam mundus esset gloriam habuit apud Deum, & claritatem tenuit apud patrem, ante mundum fuit. Neq; enim habuisset gloriam, nisi prius fuisset qui gloriam posset tenere. Nemo enim habere aliquid poterit, nisi ipse ante fuerit qui aliquid tenet. Sed enim Christus habet gloriam ante mundi institutionem: ergo ante mundi institutionem fuit. Nisi enim ante mundi institutionem esset, ante mundi institutionem gloriam habere non posset, cum ipse non esset. Sed

enim homo gloriam ante mundi institutionem habere non potuit, qui post mundum fuit. Christus autem habuit; ante mundum igitur fuit: non igitur homo tantummodo fuit, qui ante mundum fuit. Deus est igitur, quoniam ante mundum fuit, & gloriam ante mundum tenuit. Post hæc ostendit Tertul. hæc non interpretanda esse de prædestinatione, sed de substantia Christi. Sed hæc hæcenus.

Sanctus Apostolus Paulus in Epistola ad Romanos semel & iterum ostendit uerbis minimè obscuris, Dominum nostrum Iesum Christum uerum esse Deum. Nam in 9. cap. de Christo loquens, dicit: Qui est in omnibus Deus laudandus in secula. Notissima sunt quæ idem ille scribit in 1. ad Corint. 8. cap. Diuus Apostolus & Eangelista Ioannes in sua canonica diuinitatem filij tam manifestè demonstrat, ut qui non uideat, corpore & animo cecus sit. In fine Epistolæ: Scimus, inquit, quod filius Dei uenit, & dedit nobis mentem, ut cognoscamus illum, qui uerus est: & sumus in uero, in filio eius Iesu Christo. Hic est uerus Deus & uita æterna.

Iam Deus est per quem uiuimus, mouemur & sumus, teste Paulo: per Christum autem Dominum nostrum uiuimus, mouemur & sumus: sicut ipse clarè docuit in Euangelio secundum Ioannem: Christus ergo Deus est uerus.

Apud Isaiam in cap. 43. & 45. dicit Dominus. Ego sum, ego sum Dominus, & non est absque me Saluator. Deus iustus & saluans non est præter me. At Ieremias in 23. capite, Christum Dauidis filium appellat Iehouah & iustitiam nostram. Item apud Isaiam de filio loquens pater: Dedi te in lucem gentium, inquit, ut sis salus mea usque ad extremum terræ. Cæterum cum non sit ullus Deus alius, præter unum, nulla alia uera salus & iustitia, nisi unica illa diuina: consequens profectò est, Christum uerum esse Deum patri coæqualem per omnia.

Apud eundem Isaiam dicit Dominus: Per me ipsum iurauit, exhibet de ore meo iustitiæ uerbum, & non retractabitur: quia mihi flectetur omne genu, & iurabit

omnis lingua. Atqui Paulus dixit: Donatum est Christo nomen quod est supra omne nomen, ut in nomine Iesu se flectat omne genu cœlestium ac terrestrium, & infernorum, omnisq; lingua confiteatur quod Dominus sit Iesus Christus, ad gloriam Dei patris. Proinde necesse est Christum uerum esse Deum. Nam cum adoratur coliturq; cum confitemur ipsum esse Dominum, id quidem non cedit ad ignominiam, sed ad gloriam Dei patris. Siquidem in Euangelio secundum Ioannem sic dicit Dominus: Pater omne iudicium (nimirum omnia iura & omnem administrationem, gloriam ac potestatem) dedit filio, ut omnes honorēt filium sicut honorant patrem. Qui non honorat filium, non honorat patrem, qui misit illum. Huc ergo iam pertinet quod apud Isaiam prophetam iterum legimus: Ego Dominus, Hu-

(uel ipse) est nomen meum, & gloriam meam alteri uel alieno non dabo, &c. Dat autem gloriam suam filio: hic ergo substantia sua, secundum diuinitatem, non est alienus à patre, licet in propria persona agnoscatur. Quid quod in Euangelio secundum Ioannem Dominus non dicit: Et nunc glorifica tu me pater apud te ipsum gloria, quam dedisti priusquam hic mundus esset apud te: sed quam habui priusquam hic mundus esset apud te. Habui, inquā, dicit, non accepi. Quanquam scriptura & hoc uocabulo utitur non rarò propter dispensationis mysterium.

Apud Michæam dicunt Christiani, Omnes gentes ambulant unaquaq; in nomine Dei sui, nos autem ambulabimus in nomine Dei nostri. Cæterum ambulant in nomine & uia Iesu Christi, dicentis in Euangelio: Ego sum uia & ostium, Ego sum lux mundi, qui sequitur me, non ambulat in tenebris. Deum ergo esse Christum quis est qui ignoret? Nam apud Ezechielē dicit Dominus: Solus ego pascam gregem meum. Et mox subiungit: Pascet eum seruus meus. Dauid, nimirum Christus,

Ioan. 10. 14. 8.
Ezech. 34.

stus, Davidis filius, pastor ille uniuersalis ecclesie unicus, atq; idcirco Deus uerus. Oportet enim uniuersalem pastorem, regem & sacerdotem, æternum, omniscium & omnipotentem esse, omnibus hominibus in omnibus locis præsentem. Proinde uerus Deus est filius Dei, quia Messias est.

Præterea quid oro clarius & minus controuersum est, quàm quòd solus Deus peccata remittit? Necessè est ergo nihil esse clarius & minus dubium, quàm quòd credimus Christum esse uerum Deum. Quia est agnus Dei, qui tollit peccatum mundi. Marci 2.
Ioan. 1.

Rursus cum Christum rectè appellet Paulus spem nostram: nam Isaias prædixit: In illo gentes sperabunt, Ieremias uerò clamer: Maledictus omnis qui spem suam collocat in homine, beatus uerò qui deo fidit: necessariò Christum deū confiteri oportet. Nam sæpe apud Ioannem ingeminat: Amen dico uobis, qui fidit mihi, habet uitam æternam. Possem huius generis innumera ex scripturis proferre argumenta, attestantia filium Dei dominū nostrum Iesum Christum unius & eiusdem esse cum patre naturæ, ideoq; Deum uerum ex Deo uero: uerū spero sanctis & minimè contentiosis auditoribus illa quæ produximus, satisfacere. 1. Tim. 1.
Isaie 11.
Ierem. 17.

Restat ut demonstremus dei filium incarnatum pro nobis, & ex Maria uirgine, uerum hominē, nobis per omnia, peccato excepto, consubstantialē, esse natum. Lex, prophetæ & apostoli manifestissima nobis exhibent ueræ carnis uel humanitatis filij dei argumenta. In Lege enim dicit dominus: Semen mulieris conculcabit caput serpentis. Cæterum caput serpentis, quis nesciat esse diaboli regnum, uim uel potentiam? Hanc autem fregisse Iesum Christū, tota attestatur scriptura. Atqui hic nuncupatur semen mulieris. Et semen quidem propter ueritatem humanæ naturæ; semen autem mulieris, non uiri, propter conceptionem ex spiritu sancto & natiuitatem ex Maria uirgine factam. Et quoniam hæc fuit filia Davidis, Abrahamæ & Adam, consequens est filium Mariæ uerum esse hominem. Quemadmodum enim Adamo dictum audiuius: Semen mulieris conculcabit caput serpentis: ita eandem promissionem Abrahamæ renouatam & inculcatam legimus hisce uerbis: In semine tuo benedicentur omnes gentes orbis. Paulus uerò ad Galat. manifestè dicit, semen hoc Abrahamæ, in quo benedictionem cōsequimur, Christum esse Iesum. Idem Apostolus: Nuspiam, inquit, angelos assumit, sed semē Abrahamæ assumit: per angelos utiq; excludens quasuis substantias spirituales, per semen Abrahamæ ipsissimam intelligens humanæ carnis substantiam. Nam subiungit: Vnde debuit per omnia similis fratribus esse. Et quoniam hi communicant carne & sanguine, & ipse similiter particeps factus est eorundem. Certè scriptura lineam prosapiæ Christi diligentissimè deducit ex lumbis Abrahamæ in Iacobum, & ex hoc rursus in Iudam, inde rursus in Dauidem. Huic renouantur iterum promissiones de incarnando dei filio. Nathan enim Dauidi dicit: Sic dicit dominus: Cum completi fuerint dies tui, dormierisq; cum patribus tuis, excitabo semen tuum post te, quod egredietur de utero tuo, regnumq; eius firmabo. Is extruet domum nomini meo: & ego confirmabo regni eius solium in æternū. Neq; est quod hæc quisquam interpretetur de Solomone. Hic enim uiuente patre Dauide natus, regnumq; eius citò dilapsum est. Cæterū Nathan loquitur de filio qui sit Dauidi nascendus post mortem. Cum dormieris, inquit, cum patribus tuis, excitabo semen tuum post te. Et quale hoc futurū sit, manifestissimè declarat, & ait, Quod egredietur de utero tuo. Nam & Psalm. 132. legimus, De fructu uentris tui ponam super sedem tuam. Porrò uirgo Maria Dauidici fuit seminis propago, ex qua genitus est Christus dominus, de quo loquens angelus, & uetusta illa exponens uerba

Luce 1. ticia, ad uirginem dicit: Et dabit illi dominus deus sedem Dauid patris ipsius, regnabitque super domum Iacob in æternum: & regni eius non erit finis. Huc quoque pertinet quod Elisabetha dicit ad uirginem ex Galilæa in montana Iudææ uenientem: Et unde hoc mihi ut ueniat mater domini mei ad me? Benedicta tu inter mulieres, & benedictus fructus uentris tui. Certè Matthæus & Lucas ex profapia & ueluti lumbis Dauidis lineam Christi deducunt in ipsam usque uirginem Mariam, quæ concipit ex spiritu sancto, id est, fecundante ipsam spiritu sancto. Eadem mensibus completis, quibus absoluitur foetus, peperit: qui uerò natus est, modis omnibus apparet homo uerus: collocatur in præsepio fasciis inuolutus, creascit & adolefcit pro ratione corporis humani, fatigatur, recreatur, gaudet, dolet, esurit, sitit, edit, bibit, metuit, denique moritur. Id quod multis approbat ueritas euangelicæ historiæ. Nec ipsa erubescit scriptura Mariam appellare matrem domini, non utique putatiuam, sed ueram & naturalem, utpote quæ de proprii corporis substantia ueram carnem & humanam substantiam dedit filio Dei, attestante cum Isaia angelo dei, ac dicente: In utero concipiet uirgo & pariet filium. En in utero dicit. Et rursus apud Matthæum dicit angelus idem: Quod in illa conceptum est, à spiritu sancto profectum est. Vnde Apostolus ad Galatas dicit filium dei factum esse ex muliere, nimirum secundum naturam humanam. Est enim Christus fructus uentris Dauidis, & uirginis Mariæ, genitæ ex lumbis Dauidis, sed & Ioannes Apostolus & euangelista, Verbum, inquit, caro factum est, & habitauit in nobis. Carnem nuncupans deum, uerum utique hominem appellat. Nam idem apostolus alibi: Omnis spiritus, ait, qui confitetur Iesum Christum in carne uenisse, ex deo est: & omnis spiritus qui non confitetur Iesum Christum in carne uenisse, ex deo non est. Libere ergo pronunciamus, Valentinum, Marcionem, Appellem & Manicheum, negantes ueram Christi carnem, esse ex diabolo, & ideo modis omnibus unâ cum omnibus ipsorum sectatoribus fugiendos. Locum autem de uera Christi carne hisce dilucidissimis Pauli uerbis concludimus: Cum Christus esset in forma dei, semetipsum exinaniuit, formam serui accipiens, in similitudine hominum constitutus, & figura repertus ut homo: humiliavit semetipsum, factus obediens usque ad mortem, mortem autem crucis. Proinde indubitatum est, dei filium ueram & humanam assumpsisse carnem, & in ea nobis per omnia, peccato excepto, esse consubstantialem.

Philip. 2. Neque uerò resuscitatus ex mortuis dominus noster, tametsi clarificatus, ueritatem corporis sui semel assumpti deposuit. Et clarificatio ueritatem naturæ non abolet. Dicit enim discipulis: Spiritus carnem & ossa non habet, sicut uidetis me habere. Proinde ueram illam suam carnem secum uexit in cælum, in uera carne apparet pro nobis semper in conspectu Dei patris, in uera carne uenturus est iudicare uiuos & mortuos, in uera carne uidebunt eum qui confixerunt ipsum. Secundum hanc naturam Christus (qui iuxta diuinitatem non creatura, sed creator est) creatura est. Habet enim caro Christi initium, descenditque ex Adamo, qui est creatura dei uiuentis. Et quamuis hæc satis communita sint robore scripturarum, non pigebit tamen c. v. recitare sententiam beati patris Cyrilli, quam eadem de re hisce uerbis in epistola ad Successum episcopum Isauriæ Diocæsariensem. scriptam reliquit, Quia in tuo Commonitorio tale quippiam reperi, quasi post resurrectionem, sancta caro Christi saluatoris omnium nostrum, in deitatis sit conuersa naturam, ita ut iam tota diuinitas sola esse uideatur oportere, credidimus etiam ad hoc dare responsum. Et post aliquot uerba, Post resurrectionem erat quidem corpus ipsum, quod passum fuerat, ueruntamen iam non habens in se infirmitates humanas,

Resuscitatus ueritatem corporis non deposuit dominus.

nas. Nō enim illam patientem famis laboris uel similis alicuius asserimus, sed iam incorruptibile confitemur: nec hoc solum, sed & uiuificum. Vtē enim corpus est, id est, unigeniti filij Dei, glorificatū est claritate deo dignissima, & intelligitur Dei corpus. Idcirco si quis illud diuinum dicat, sicut & hominis humanum, a decentissima ratione non deuiat. Vnde puto beatissimum quoq; Paulum dicere: Etsi co- 2. Cor. 5. gnouimus secundum carnem Christum, nunc tamen non nouimus. Dei enim, ut dixi, proprium corpus existens, omnia humana transcendit. Conuersionem autē in deitatis naturam, corpus ē terra nō potuit sustinere. Hoc enim impossibile est: alioqui deitati derogamus tanquā factę, & uelut assumpto aliquid in se, quod eius iuxta naturam proprium non sit. Dehinc æqualis probatur ineptiā dicere conuer- sum esse corpus in deitatis naturam, & illud quod uerbum sit in carnis substantiā commutatum. Sicut enim hoc impossibile est: quia inconuertibile & incommu- tabile comprobatur: ita etiam illud non est possibile in deitatis essentiam uel natu- ram aliquid creaturarum posse conuerti. Est autem creata etiam caro. Ideoq; diui- num quidem dicimus corpus Christi, quia corpus est dei & ineffabili gloria illu- stratum, incorruptibile & iam sanctum atq; uiuificum confiteamur: quod autem in naturam deitatis sit immutatum, neq; sanctorum patrum quisquam sensit aut docuit, neq; nos ita sentimus. Hæc Cyrillus. Theodoretus uerò Cyri episcopus, dialogo 2. Eranist. Ostendam, inquit, corpus domini etiam post ascensionem cor- pus uocari. Audi ergo Paulum dicentem: Nostra conuersatio in cœlis est, ex quo expectamus Seruatorem dominum Iesum, qui transformabit corpus humilitatis nostræ, ut sit conforme corpori gloriæ ipsius. Non est ergo mutatum in aliam na- turam, sed mansit quidem corpus uerum diuina gloria impletum, & lucis emit- tens radios. Sin autem illud in aliam naturam mutatum est, eorum quoq; corpo- ra similiter mutabuntur. Fient enim illi conformia. Sin autem corpora sanctorum seruant suæ naturæ characterem, corpus quoq; domini similiter habet suam sub- stantiam immutabilem. Tantum Theodoretus ille.

Porro quando profitemur Christum ueram habere carnem, non intelligi- mus inanimatam carnem. Confitendum est enim Christum habere animam ra- tionalem siue humanam, non expertem mentis. Arius docebat dei filium solam assumpsisse carnem absq; anima, uerbum autem fuisse animæ loco. Et Apollinā- rius animam Christo tribuebat, sed adimebat mentem, rationalem esse negans. Scriptura & animā Christo tribuit, & animæ non adimit mentem. Ipse dominus dicit in euangelio: Filius hominis uenit, non ut sibi ministretur, sed ut ipse mini- stret, utq; det animam suam redemptionem pro multis. Idem Matthæus de ipso scriptum reliquit: Cœpit affici dolore & mœstitudine. Et dixit Iesus: Tristis est ani- ma mea usq; ad mortem. Et alibi ipse dominus: Nunc anima mea turbata est, ait. Quod si hæc anima Christi mente destituta fuit, quæ potissima animæ portio est, quomodo animā habuit: quomodo tristari & intelligere, desiderare & meminisse potuit? Desiderio, inquit dñs, desiderauī hoc pascha manducare uobiscum antequam patiar. Desiderium uerò ex deitate non existit, neq; ex sola carne, neq; ex anima mentis exorte, sed ex perfecta humanitate corporis & mentis. Præterea le- gimus in euangelio dixisse dominum: Filius hominis non uenit ad perdendum animas hominum, sed ad seruandum. Idcirco non solam carnem, sed & rationālē assumpsit animam. Homo enim & anima & corpore perierat: ut ergo anima & corpore seruaretur, uerē humanum corpus & rationalem animam assumpsit ser- uator Christus, hoc est perfectissimum hominem. Secundum scripturas itaq; con- fiteri ueram fidem docens beatus Athanasius, dixit, Christus deus est, ex substan-

Christum habere rationalem animam.

Matth. 26.

Matth. 26.

Ioan. 12.

Luce 22.

Luce 9.

DE VTRAQUE IN CHRISTO NATURA

tia patris, ante secula genitus; & homo ex substantia matris in seculo natus. Perfectus Deus, perfectus homo, ex anima rationali & humana carne subsistens.

Hereticus error & ueritas orthodoxa circa mysterium incarnationis.

His usque huc demonstrauius Christum Iesum dominum nostrum esse Deum uerum & hominem uerum, consubstantialem patri secundum diuinitatem, nobis autem consubstantialem secundum humanitatem: nam animam rationalem & carnem habet uere humanam. Dicemus porro de coniunctione uel unione harum naturarum in unam personam; qua in re turpiter à quibusdam ueteribus quondam aberratum esse tradunt historiae. Eutyches enim constituebat in Christo unam tantum naturam, eamque ex diuina & humana compositam, id est, confusam: à quonon longe recesserunt Monothelitae, unam duntaxat in Christo uoluntatem agnoscentes. Illam carbonariam uitare uolens Nestorius, incidit in calcariam. Confitens enim duas naturas, totidem personas asseruisse uidetur, docens uerbum carni non unitum esse in eandem personam, sed inhabitasse duntaxat: unde & diuam uirginem deiparam appellari uetabat. Contra quos communis totius ecclesiae secundum scripturas sentientis assertio tradidit, duas in Christo naturas, naturarumque proprietates esse confitendas, quae ita coierint in unam personam indiuisam, ut nec diuina natura mutata sit in humanam, neque haec in illam, sed utraque suum retineat ingenium, subsistant autem utraque in unitate personae. Unus enim atque idem Christus secundum ingenium diuinæ naturae, immortalis, secundum ingenium humanæ naturae mortalis, atque idem ille deus immortalis & homo mortalis, unicus est saluator mundi. De qua re dicemus modò, Deo aspirante, paulò plura & explicatiora.

De unione diuinitatis & humanitatis.
Ioan. 1.
2. Tim. 3.
Hebr. 2.

De ipsa coniunctione diuinitatis & humanitatis ueræ in Christo, non spinose neque subtiliter disputarunt prophetae & Apostoli. Simpliciter enim loquentes dixerunt: Deus homo factus est. Vel, Deus hominem assumpsit. Nam Ioannes apostolus & euangelista, Verbum, inquit, caro factum est. Id est, deus homo factus est: uel dei uerbum incarnatum est. S. Paulus, Deus, ait, manifestatus est in carne. Et iterum, Filius Dei nupiam angelos assumit, sed semen Abraham assumit. Secundum apostolorum ergo doctrinam explicantes coniunctionis diuinæ & humanæ naturæ in Christo mysterium, dicimus, Deus incarnatus uel homo factus est. Deus hominem assumpsit. Deus in carne humana apparuit uel manifestatus est. Subtiliora his rimari uelle, est se in ingentia conijcere pericula. Sunt qui in his plenius exponendis utuntur uocabulis societatis, participationis & communionis, nec citra auctoritatem scripturarum, Paulo dicente, Quia pueri communionem habent cum carne & sanguine, & ipse similiter particeps factus est eorundem.

Hebr. 2.

Christum utraque naturas retinere impermixtas.

Cauendum hic tamen in primis, ne coniunctas naturas in una persona confundamus, aut proprietatibus suis spoliemus. Nam Deus natura sua est æternus & immutabilis, deus itaque idem semper manens, non commutatur in humanam uel in ullam aliam naturam, sed humanam sibi coniungit, sociat, assumit, adeoque unit. Rursus nisi humana natura creatura maneat, & hoc ipsum sit, quod dicitur, humana non est, manens ergo haec in sua substantia assumitur à diuina. Proinde manent in una Christi persona duæ naturæ, diuina & humana, & utraque retinet suum ingenium suamque proprietatem. Id quod aliquot scripturae locis iam ostendimus. Isaias in cap. 7. Virgo, inquit, concipiet & pariet filium, & uocabitur nomen eius Immanuel. Vtranque in Christo agnoscit naturam, nam secundum diuinam appellatur Immanuel, id est, nobiscum deus: secundum humanam naturam concipitur & nascitur. Idem propheta, Puer natus est nobis, inquit, & filius datus est nobis, &c. Datur enim qui ab æterno est: nascitur autem qui in seculo esse incipit.

Isaie 9.

cepit. Proinde unus atq; idem & diuinam & humanam retinet naturam. Nam & Micheas dicit: Et tu Bethlehem Ephrata, paruula quidem es in millibus Iuda, ex te mihi egredietur qui dominator sit in Israele: & exitus eius à seculo, à diebus æternitatis. En quid poterat dici clarius? Unus atq; idem duplices habet natales, quatenus enim Deus est, generatio eius est à diebus æternitatis: quatenus uero homo est, nascitur in Bethlehem. Proinde unus atq; idem Christus deus uerus atque homo uerus est. Rursus interrogat in euangelio secundum Matthæum dominus phariseos, & ait, Quid uobis uidetur de Christo, cuius filius est? Dicunt ei: Dauidis. Ait illis: Quomodo ergo Dauid in spiritu uocat eum dominum, dicens: Dixit dominus domino meo: sede à dextris meis, donec ponam inimicos tuos scabellum pedum tuorum? Si ergo Dauid uocat eum dominum, quomodo filius eius est? Quasi dicat: Cum Christus extra controuersiam sit filius Dauidis, & hic eundem, non ex affectu humano, sed ex spiritu sancto appellet dominum, nimirum Deum uerum eiusdem potestatis cum patre, consequens est Christum & hominem uerum & deum esse uerum. Angelus Gabriel utranq; hanc naturam non minus clare designans, uirgini Mariæ dicit: Quod nascetur sanctum, uocabitur filius Dei. Nascitur enim ex uirgine homo uerus, ex homine uero: atqui hic est filius Dei. Nam & Elisabet ha appellat uirginem matrem domini, nimirum Dei. Præterea in euangelio Ioannis legas plurima huius generis, quæ utranq; in eodem Christo naturam, ueluti digito demonstrent. Creditis, inquit dominus, in deum, & in me credite. Et iterum, Pater maior me est. Item, Exiui à patre, & ueni in mundum: iterum relinquo mundum, & uado ad patrem. Rursus alibi, Pauperes semper habebitis uobiscum, me non semper habebitis. Et iterum, Ecce ego uobiscum sum omnibus diebus usque ad consummationem seculi. Quæ quidem sententiæ ueluti contrariæ nō possunt simul esse ueræ, nisi agnoscamus Christum retinere naturarum proprietates inconfusas uel impermixtas. Paulus ad Romanos manifestè dicit se uocatum apostolum ad annunciandū euangelium Dei, quod antea promiserit per prophetas suos, in scripturis sanctis, de filio suo, qui genitus sit ex semine Dauidis, secundū carnem, declaratus autem sit filius Dei, per potentiam, spiritum sanctificationis & resurrectionem ex mortuis. Agnoscit ergo utranque naturam in Christo apostolus. Nam secundum carnem, inquit, Christus est Dauidis filius: si uero spectemus potentiam miraculorum, uiuificam ex mortuis resurrectionem, & quod Christus spiritum sanctum mittit, & omnes fideles sanctificat, apparet eum qui Dauidis filius est, secundum carnem, Dei quoq; esse filium, secundum diuinam potentiam. Idem Apostolus pari euidentia & luce in secundo capite ad Philippenses utranq; in Christo naturam asserit. Quoniam uero is locus iam sæpius adductus est, ad alia transeo citanda.

Sanctus Augustinus non suam duntaxat, sed totius ecclesiæ in toto orbe suo seculo florentis, confessionem fidei exponens, epistola ad Dardanum 57. sic scriptum reliquit: Noli dubitare ibi nunc esse hominem Christum Iesum unde uenturus est, memoriterq; recale, & fideliter tene Christianam confessionem: quoniam resurrexit à mortuis, ascendit in cælum, sedet ad dextram patris, nec aliunde quam inde uenturus est iudicare uiuos & mortuos: & sic uenturus est illa angelica uoce testante, quemadmodum ire uisus est in cælum, id est, in eadem carnis forma atq; substantia, cui profectō immortalitatem dedit, naturam non abstulit. Secundum hanc formam non est putandus ubiq; diffusus. Cauendum est enim ne ita diuinitatem astruamus hominis, ut ueritatem corporis auferamus. Non est autem consequens ut quod in deo est, ita sit ubiq; ut Deus. Nam & de nobis ueræ

Mich. 5.

Matth. 22.

Psalm. 110.

Lucæ 1.

Ioan. 14.

Marc. 14.

Matth. 23.

Rom. 1.

Non miscentur
uel confundun-
tur nature in
Christo.

cissima scriptura dicit, quod in illo uiuimus, mouemur & sumus: nec tamen sicut ille ubiq; sumus: sed aliter homo ille in deo, quoniam aliter & deus ille in homine proprio quodā & singulari modo. Vna enim persona deus & homo est, & utrumque est unus Iesus Christus, ubiq; per id quod deus est, in cœlo autem per id quod homo. Idem enim author paulò post: Spatia, inquit, locorū tolle corporibus, nusquam erunt, & quia nusquam erunt, nec erunt. Tolle ipsa corpora qualitatibus corporum, non erit ubi sint, & ideo necesse est ut non sint. Et in fine epistolæ idem ille dicit: Christum dominum nostrum unigenitum dei filium, patri coæqualem, eundemq; hominis filium, quo maior est pater, & ubiq; totum præsentem esse non dubites tanquā Deū, & in eodem templo Dei esse tanquam inhabitantem Deū, & in loco aliquo cœli propter uerī corporis modum. Hoc ipsum adhuc fusius idē ille exponit Tractatu in Ioan. 50. & contra Felicianum Arianum cap. 9. 10. & 11. item de Agone Christ. cap. 24. usq; ad 27. Quibus coniungemus & S. martyris Vigilij episcopi Tridentini testimonium. Is enim contra Eutychē pro assertionē utriusq; in Christo naturæ disputans, dicit: Si uerbi & carnis una natura est, quomodo cum uerbum ubiq; sit, non ubiq; inueniatur & caro? Nam quando in terra fuit, non erat utiq; in cœlo: & nunc quia in cœlo est, non est utiq; in terra: & in tantum non est, ut secundum ipsam Christum speciemus uenturum de cœlo, quem secundum uerbum nobiscum esse credimus in terra. Igitur secundum uos aut uerbum cum carne sua loco continetur, aut caro cum uerbo ubiq; est. Quando una natura contrarium quid & diuersum non recipit in seipsa. Diuersum est autem & longē dissimile circumscribi loco & ubiq; esse: & quia uerbum ubique est, caro autem eius ubiq; non est, apparet unum eundemq; Christum utriusq; esse naturæ: & esse quidem ubiq; secundum naturam diuinitatis suæ, & loco contineri secundum naturam humanitatis suæ: creatum esse & initium non habere: morti subiacere & mori non posse: quod unum illi ex natura uerbi, qua deus est: aliud ex natura carnis, qua idem deus homo est. Igitur unus dei filius idemq; hominis factus filius, habet initium ex natura carnis suæ, & non habet initium ex natura diuinitatis suæ: creatus est per naturam carnis suæ, & non est creatus per naturam diuinitatis suæ: circumscribitur loco per naturam carnis suæ, & loco non capitur per naturam diuinitatis suæ: minor est etiam angelis per naturam carnis suæ, & æqualis est patri secundum naturam diuinitatis suæ: mortuus est natura carnis suæ, & non est mortuus natura diuinitatis suæ. Hæc est fides & confessio catholica, quam apostoli tradiderunt, martyres roborauerunt, & fideles nunc usq; custodiunt. Hactenus Vigilij martyris & episcopi uerba recitauimus, in hoc ut pulcherrimus intelligatur consensus scripturæ sanctæ, ecclesiæ uniuersalis & pijsimorum patrum atq; doctorum in hoc dogmate, quo confitemur in Christo utriusq; naturæ proprietates inconfusas manere.

*Christū in una
persona manere
indiuisum.*

Rursus modis omnibus cauendum est, ne propter naturarū proprietates asserendas retinendasq;, discerpamus unitatem personæ: quasi duo sint Christi, quorum alter passibilis & mortalis, alter sit impassibilis & immortalis. Nam unus & idem est Christus, qui secundum diuinitatem immortalis, secundum humanitatē mortalis agnoscitur. Nestorius negabat diuam uirginem Mariam esse dei genitricem. Dicebat enim deum immutabilem, & idcirco innascibilem esse matremq; carere. Vnde orta suspicio quod dominum nudum esse hominem diceret, & dogma Pauli Samosatēni & Photini tueretur. De qua re multis agit Socrates Historiarū lib. 7. cap. 32. Peccauit aut contra scripturam & ueram fidem Nestorius. Elisabeth enim Zachariæ uxor, & mater beati Ioānis Baptiste, spiritu sancto plena, disertis uerbis

uerbis diuam uirginem salutat & prædicat matrem Domini, id est, matrem Dei. Et quamuis diuina natura generationis & corruptionis exors sit, certissimum est tamen eum quem Maria peperit, reuera deum esse. Nam quod ex ipsa natum est (ait angelus) filius Dei est: peperit ergo Deum: ac meritò appellatur Dei genitrix. Si enim Deum non genuit, nudum hominē peperit, nec Dei filius hominē inseparabiliter sibi sociauit. Ad eundem modum cū Deus natura sua sit immortalis, mori certè non potest: si uerò quis ea de causa absolutè negaret Deum pro nobis crucifixum & oblatum, adeoq̃ mortuum esse, contradiceret Paulo dicenti: Si ipsum cognouissent, haudquaquam Dominum gloriæ crucifixissent. Quis uerò nesciat Deum gloriæ uel Deum gloriosum non posse crucifigi: interim cū ille qui secundum carnem patiebatur & cruci affigebatur, Deus erat, non nudus duntaxat homo, rectè dicimus Deum pro nobis passum & cruci esse affixum: licet is qui passus sit, secundum id solum passus sit, quod pati potuit. Nam Petrus Apostolus, Christus, inquit, passus est pro nobis carne, Eundem sequuta synodus Toletana prima, in hæc uerba decreuit, Si quis dixerit aut crediderit deitatem nascibilem esse, anathema sit. Si quis dixerit uel crediderit deitatem Christi conuertibilem fuisse uel passibilem, anathema sit. Si quis dixerit uel crediderit deitatis & carnis unam in Christo esse naturam, anathema sit. Et Damasus Episcopus Roman. Si quis dixerit, inquit, quòd in passione crucis dolorem sustinuerit filius Dei & Deus, & non caro cum anima, quā induit forma serui, quam sumpsit, sicut dixit scriptura, anathema sit. Ergo cū Paulus dicit Deum sibi acquisiuisse ecclesiam suo sanguine, quis tam infans ut credat diuinam naturam habere, uel unquam habuisse sanguinem: interim quis tam stupidus ut non uideat carnem quam Deus assumpsit habere sanguinem, cumq̃ Deus id quod assumpsit non reputet uelut alienum, sed proprium, rectissime dicimus Deum proprio suo sanguine redemisse mundum. Unde & Theodoretus Cyri Episcopus dialog. Eran. 3. sub finem dixit: Si Christus est & Deus & homo, ut & sacra docet scriptura & beatissimi patres perpetuò prædicarunt, ut homo ergo passus est, ut Deus autem mansit impassibilis. Quando uerò corpus uel carnem uel humanitatem passam esse dicimus, diuinam naturam nō separamus. Sicut enim unita erat & esurienti & sitenti & defatigatæ, quin etiam dormienti & de passione subeunda, tristitia & mœrore confectæ, nihil horū quidem suscipiens, sed ei permittens ut naturæ affectiones & passionem susciperet: ita etiam ei coniuncta erat dum crucifigeretur, & concessit ut perageretur passio, ut passione mortem solueret, dolorem quidem ex passione nō suscipiens, passionem autem sibi adaptans & accommodans, utpote templi sui & carnis coniunctæ, per quam etiam membra Christi appellantur qui crediderunt: & eorum qui crediderunt ipse caput appellatus est. Hæc ille.

Hæc figura loquendi appellatur ab alijs *ἀλλοίωσις* alteratio uel mutatio, à Ioan. De communicatione idiomatum. Damasceno *ἀντίδοσις* mutua largitio uel alternata attributio. Vulgò nominari solet idiomatum cōmunicatio, nempe cū alteri naturæ ea proprietas communicatur, quæ propria est alterius. Verbi gratia, Nemo ascendit in cœlum, ait Dominus, Ioan. 3. nisi qui descendit de cœlo, filius hominis qui est in cœlo. Certè non erat tunc humana natura in cœlo, cū hæc loqueretur Dominus, sed in terra: quia tamen assumpta est caro in societatem diuinitatis, huius proprium, humanitati communicatur. Et Fulgentius Episcopus hanc interpretationem agnoscens libro ad Thrasimundum regem secundo, sic reliquit scriptum. Non (hoc dixit) quia humana Christi substantia fuerit ubiq̃ diffusa, sed quoniā unus idemq̃ filius dei atq̃ hominis filius, uerus Deus ex patre, sicut homo uerus ex homine, licet secundum ueram

humanitatem suam, localiter tūc esset in terra, secundum diuinitatem tamen (quæ loco nullatenus continetur) cœlum totus impletet & terram. Hæc ille. Proinde diligenter obseruandæ sunt sententiæ de Christo in Euāgelicis & Apostolicis scriptis testantes. Quædam enim peculiariter referuntur ad diuinam eius naturam, quales illæ sunt, Ego & pater unum sumus: Antequam Abraham fieret ego sum, In principio erat uerbum, & uerbum erat apud Deum, & Deus erat uerbum: Ipse est ante omnia, imago Dei inconspicui, per quem condita sunt omnia. Quædam uerò referuntur singulariter ad humanam eius naturam: siue ad missionem dispensationisq; mysterium: cuius generis illæ sunt: Pater maior me est: Minuisti eum paulò minus ab angelis: Tristis est anima mea usque ad mortem. Sunt rursus testimonia quæ ad utranque respiciunt naturam, neutri uerò seorsim satis congruunt. Talia sunt hæc: Caro mea uerus est cibus, & sanguis meus uerus est potus: Potestatem habeo remittendi peccata, excitandi in uitam quos uolo, iustitiam & sanctitatem conferendi: Ego sum pastor, ostium, lux, uia, ueritas & uita: Nemo uenit ad patrem, nisi per me. Hæc enim ueram Christi substantiam nobis proponunt atque commendant, ueri, inquam, saluatoris & mediatoris Dei & hominis personam. Nam nemo remittit peccata, nisi solus Deus. Rursus non remittuntur hæc sine morte & sanguinis effusione: sicut testatur Apostolus in 9. cap. ad Hebræos. Rursus sunt testimonia quæ non possunt expediri commodè nisi per communicationem idiomatum. De qua hæc sufficere spero.

Hebr. 3.

Ioan. 6.

Ioan. 20.

Non discerpitur
persona
Christi.
Matth. 8.

Marci 16.

Actor. 3.

Rursus personam mediatoris Dei & hominis minimè lacerat, quisquis propter unionem naturarum non tam latè extendit humanitatem, quàm latè diffunditur (ut sic dicam) diuinitas. Nam in Euangelio secundum Matthæum non ingreditur corpore suo domum Centurionis dominus, cū tamen dubium non sit, diuinitate præsentem non absente, curatum esse morbum famuli centurionis. Quis autem dixerit ideò dissolutam esse personam à beato Matthæo, quòd humanitatem Christi non extenderit ad diuinitatem usque? Angeli de corpore Christi resuscitato ex mortuis & iam glorificato, mulieribus loquentes, dicunt: Non est hic, Surrexit. At non ignoramus ubique esse diuinitatem. Et tamen non dissuerunt indissolubilem personam angeli, quòd humanum Christi corpus diuinitati non æquarunt per omnia. Illi ipsi angeli non lacerant personam Christi, cum sublato ex monte oliuarum eius corpore in cœlos, ipsi astantes in terris testificantur, ad eum modum rediturum ad quem modum recedentem uiderunt. At quis Dominum tunc quoque eis præsentem fuisse negare audeat? In cœlis ergo est non in terris, secundum ueri corporis modum, ubiq; autem in cœlis & in terris Dominus noster secundum infinitam ipsius diuinitatem. Homo constat anima & corpore, & hæc naturis inter se diuersissima, unam personam non duas constituunt. Quisquis autem cuique suum proprium attribuit & defendit, personam minimè discindit. Dormit corpus, anima non dormit: hæc propria partium, non efficiunt duas personas. Huc pertinere uidetur quod Theodoretus in 3. Dialogo scriptum reliquit, dicens: Naturalem animæ & corporis unionem non soluimus, sed nec à proprijs corporibus animas separamus: sed ea quæ sunt naturarum propria consideramus. Quando ergo dicit scriptura. Extulerunt autem Stephanum uiripij, & fecerunt planctum magnum super ipsum, dicēsne animam cum corpore esse sepultam? Non opinor. Et quando audieris Iacob patriarcham dicentem: Sepelite me cum patribus meis, intelligis id de corpore non anima esse dictum: interim legis: Illic sepelierunt Abraham & Saram uxorem eius, &c. In quibus corporis non meminit scriptura, sed per omnia animam simul & corpus significauit. Nos autem rectè diuidimus & dici-

& dicimus animas esse immortales, sola autem corpora patriarcharum sepulta esse in spelunca duplici. Ita nos quoque dicere consueuimus, in hoc uel illo loco, hic uel ille sepultus est: & non dicimus corpus huius uel illius, sed hic uel ille. Quicumque autem sanæ mentis est, scit nos loqui de corpore. Ita cum Euangelistæ toties meminissent corporis Christi sepulti, tandem personæ nomen posuerunt, & dixerunt Iesum positum esse in monumento, &c. Hæc Theodoretus.

Cum uerò extra controuersiam sit, hanc fidē & doctrinam à temporibus Christi ad nostram usque ætatem, in sancta Dei ecclesia floruisse, & contra innumeros satanæ & hæreticorum assultus firmissimam perstitisse, atque illa ipsa scripturarum testimonijs & sanctarum synodorum symbolis tradita & confirmata sit, hortor C. V. ut inuocato Christi nomine, in ea perseueretis, & Christo uero Deo & homini uera agglutinati fide & obedientia, perpetuas agatis gratias, adorantes regnantem in secula seculorum.

*De Christo rege & sacerdote, de Regno & sacerdotio eius unico & aeterno, & de
Nomine Christiano. SERMO VII.*

DEMONSTRAVI C. V. Christum Iesum Dominum nostrum uerum esse Deum & hominem, id quod luculentiorē habebit utilitatem, si intelligamus quis eius rei fructus sit. Is uerò potissimum cognoscitur ex officijs Christi Domini. Hic rex est & sacerdos populi Dei, regnum ergo habet & sacerdotium: quæ si paulò diligentius expendimus, aperient nobis maximum diuinitatis & humanitatis Christi fructum.

Rex est Christus Iesus, ergo & Dominus est uniuersorum, rector & gubernator omnium quæ in cœlo sunt & in terra, in primis ipsius ecclesiæ catholicæ, quæ est communio sanctorum: & quia rex est ac Dominus, certè pro regali munere liberator siue assertor, uindex ac defensor, denique & legislator est electorum. Hic enim contriuit caput serpentis, fortem illum, populi Dei saeuissimum hostem, alligauit superatum, & diripuit spolia. Eripuit electos è potestate tenebrarum, & reposuit in libertatem filiorum dei, ut simus eius peculium, sanguine regis nostri sanctificati, populus acquisitionis, qui seruiamus ei in iustitia & sanctitate. Ipse humilis benignus & clemens est, quod de eo etiam Euangelica historia ex Zacharia repetit Matth. 21. cap. Ipse pro nobis uigilat, ipse defendit & tuetur nos, ipse omni bonorum genere nos ditat, instruitq; contra hostes armis spiritalibus, & uires resistendi & uincendi liberaliter confert. Ipse templū Dei eiectis Chananæis repurgauit, iniquas leges scidit, ab illis nos liberauit, nunc uerò sceptro oris sui nos moderatur & regit, legibus æquissimis & optimis promulgatis. Nam Deus est & homo, ideoq; solus est monarcha, rex regum, & dominus dominantium. Nam subditos sibi habet reges & dominos in orbe uniuersos. Hos quidem sua sponte per fidem obedientes: illos autem uel reluctantes potentia sua subiectos. Ideoq; propheta Dauid, Sapite, inquit, o reges, erudimini iudices terræ, seruite Domino in timore, & exultate cum timore, Osculamini filium ne irascatur, & pereatis in uia. Alibi enim idem propheta, Dixit Dominus Domino meo, ait, sede à dextris meis, donec ponam inimicos tuos, scabellum pedum tuorum. Dominus emittet uirgam suæ potentiae è Zion, dominare in medio inimicorum tuorum. Isaias quoque Dominum loquentem inducens; Leuabo manum meam super gentes, & inter populos exaltabo signum meum, & apportabunt filios suos in humeris, eruntque reges alumni tui, & reginæ nutrices eorum. Id quod copiosius exponunt histo-

*Christus est
rex uniuersorum.*

Genes. 3.

Lucæ 12.

Coloss. 1.

1. Pet. 2.

Lucæ 1.

Matth. 21.

*Christus est
monarcha.*

Psal. 2.

Psal. 110.

Isaie 49.

Isaie 16. ria Ecclesiastica. De hoc rege Christo uaticinantes prophete, dixerunt: Et praeparabitur in misericordia solium, sedebitque super eo in ueritate, in tentorio Dauidis, iudicans & uelociter reddens quod iustum est. Et iterum, Ecce dies uenient, dicit dominus, & suscitabo Dauid germen iustum, & regnabit rex & sapiens erit, & faciet iudicium & iustitiam in terra. In diebus eius saluabitur Iuda, & Israel habitabit tuto: & hoc nomen eius quo uocabunt eum, Deus iustitia nostra.

De regno Dei.

Quoniam uero Rex est dominus noster, idcirco regnum habeat oportet. Regnum appellatur tam ipsa regio ditioque regi subiecta, quam ipse dominatus, imperium, potestas & administrandi ratio. Proinde ecclesia sanctorum, communio, obediens subiectaque regi Christo, appellatur regnum Dei. Dicit enim Micheas: Et regnabit dominus super eos in monte Zion: ergo Zion (quae significat ecclesiam) est regnum Dei. Ac regnare dicitur Deus, cum suos illos in ecclesia regit, gubernat, seruat & asserit, denique uarijs charismatibus donat atque fecundat. Paulus enim dicit: Regnum Dei non est cibus & potus, sed iustitia & pax & gaudium in spiritu sancto. Preterea regnum Dei est eterna illa gloria & felicitas, quam Deus electis suis communicat. Dicit enim in Euangelio Dominus: Venite benedicti patris mei, possidete regnum, quod paratum est uobis ab exordio mundi. Et Latro moriturus mox morienti Domino in cruce supplicans, & consors huius regni fieri cupiens: Domine memento mei, ait, cum ueneris in regnum tuum. Rursus cum Euangelium nos doceat quomodo regnet in nobis Deus in hoc seculo, in aliud uero illud nos aliquando ad se transferat, hoc est, cum Euangelium illud sit per quod dominium suum erigit Dominus, non temere appellauit regnum dei apud Matth. in 13. cap. Alibi uocatur ea de causa sermo regni. In summa, nos in praesenti per regnum Dei intelligimus ipsum coetum sanctorum, ecclesiam, inquam, catholicam, uirtutemque seu administrationem regnantis in ipsa Dei, hoc est, conseruantis, gubernantis & glorificantis eam.

Unum Dei regnum consideratur dupliciter.

Et hoc quidem regnum Dei unicum est. Nam unus modo Deus, unus duntaxat rex Christus, una ecclesia & uita aeterna est. Caterum unum hoc Dei regnum secundum dispensationem consideratur dupliciter. Principio iuxta omnipotentiam dei. Hic enim cum sit summus & omnipotens, regnum & potestatem iustam aequissimamque habet & exercet in omnes creaturas uisibiles & inuisibiles, siue haec uelint siue nolint subesse. Deinde iuxta suum spiritum, quo regnat in suis electis. Ita uero dupliciter rursus consideratur regnum Dei, uel enim terrenum est, & dicitur regnum gratiae: uel coeleste est, & appellatur regnum gloriae.

Regnum dei in terris gratiae.

Regnum gratiae terrenum, non ideo appellatur terrenum, quod carnale terrenumque sit, instar regni Babylonici, Persici, Alexandrini uel Romani: sed quod in terris sit. Sancta enim ecclesia Dei bona ex parte uersatur in hisce terris, carne & sanguine participans, donec uiuit in terris; licet non secundum carnem uitam uiuat terrenam. Nam secundum spiritum, per quem regitur, uiuit uitam coelestem. Non quod non peccent consortes regni dei. Septies enim cadit iustus, & resurgit. Vnde & gratiae regnum nuncupatur. Donec enim uiuimus in hoc seculo, gratiam & misericordiam suam nunquam negat rex & dominus noster, ueniam nobis postulantibus. Ac pendent toti a gratia regis sui fideles, perpetuam agunt poenitentiam, & ad perfectiora subnituntur. Nam omnia sua componunt ad leges sui regis & principis. Etenim regnat hic in electis suis per uerbum ueritatis & per spiritum sanctum. Verbo ueritatis quid faciant aut fugiant sancti docet. Spiritu suo sancto commouet corda, & uires sufficit fugiendi prauum & persequendi bonum. Siquidem non tam sibi regnat rex noster quam nobis. Facit enim & nos reges, ut liberati

*Prouerb. 24.
2. Sam. 7.
Quomodo regnet Christus in terris in regno suo.*

*Apocal. 1.
Regnum Dei spirituale.*

liberati à diabolo, damnatione, peccato & maledictione, diaboli, damnationis, peccati & maledictionis, adeoque rerum omnium simus Domini, & ipsius filij Dei coheredes. His de causis regnum Dei, spirituale regnum dicitur. Nam consortes regni Dei, spiritu Dei imbuti, fructus proferunt spiritus, non opera carnis, denique gubernantur spiritu Dei. Neque uero more regum huius seculi regnat Dominus non Ioan. 18. sicut, dicens Pilato: Regnum meum non est ex hoc mundo. Qua sententia abutuntur nonnulli, colligentes nihil externi fore in ecclesia dei, quo nomine & magistratum remouent, & tam subtiliter de regno Dei loquuntur, ut nescias ubi sit, aut qui huius regni sint consortes. Non uident ex materia dicti colligendum esse sensum. Iudaei accusantes Dominum apud Pilatum, impingunt ei crimen affectati regni. Hoc diluens dominus, Pilato ostendit regnum suum non tale futurum, quod eiectio Tiberio Caesare parandum sit & retinendum armis, moreque huius seculi administrandum. Id demonstrans subiungit: Si ex hoc mundo esset regnum meum, ministri mei utique pugnarent ne traderer Iudaeis. Infert ergo: Nunc autem regnum meum non est hinc: ideoque non pugnant pro me, ut eiectio Tiberio me collocent in solium regni. Et mox: Ego in hoc natus sum, inquit, & ad hoc ueni in mundum, ut testimonium feram ueritati. Omnis qui est ex ueritate, audit uocem meam. Quemadmodum ergo ueritate (non mendacio, dolis & artibus instar principum huius seculi) parat sibi regnum, ita ueritate & retinet & administrat regnum suum Christus: & quicumque amplectuntur ueritatem, consortes sunt regni Christi, siue principes sint siue populares: omnes hi obtemperant uoci regis seruiuntque principi summo. Hic tamen diserte addimus, non posse reges aliter seruire Domino & regi suo, quam reges, id est, faciendo ea quae debent facere reges, exercere uidelicet iudicium & iustitiam. Licet enim hi in mundo sint, non regnant tamen iuxta mundum: quia gubernantur iam à spiritu regis sui Christi, omniaque dirigunt ad praescriptum uerbi Dei, & in omnibus ducendos sese praebent spiritui Dei: & eatenus ne horum quidem regnum est ex hoc mundo. De his alibi multa secundum scripturas ex beato Augustino citauimus. Ac tuetur aliquando rex noster Christus opera principum ecclesiam ac ministros. Aliquando expositam persecutionibus per infirmitatem eandem seruat & propagat. Premittitur enim, sed non opprimitur, regnante semper & uincente in suis Christo principe maximo. Iam termini huius terreni regni Christi porriguntur ad extremos terrae fines. Pertinent enim ad regnum Christi omnia regna mundi & omnes gentes. Pertinent huc omnia prophetarum testimonia de Vocatione omnium gentium, quorum plurima inuenias in Isaia & Zacharia, qui regnum Christi in terris magnifice describunt. Vnde occasionem acceperunt Iudaei fingendi nescio quam amplifica de maiestate & uictorijs Messiae: quae tamen abunde in Christo iamdudum completa sunt, sed spiritualiter magis quam carnaliter. Illi uero dum carnalia somniant & expectant, spiritualia fastidiunt, destituuntur utrisque. Fideles autem munificentia & liberalitate Christi regis abundantissime consequuntur quae promiserunt prophetae bona, nempe pacem cum Deo & hominibus amplissimam, omnigenamque felicitatem, ut semper sint beati, semper sint tuti (licet pugnent perpetuo) ab omnibus hostibus cum uisibilibus tum inuisibilibus, gaudeantque incolumitate sempiterna. Quae quidem amplissimo dicendi genere proposuerunt in scriptis suis prophetae, nihil tamen intelligentes aliud, quam quod modo diximus, fideles felicissimos futuros ac in Christo possessuros omnia bona cum animae tum corporis, quantum uidelicet sanctis est necessarium & salutare. Et hoc est illud regnum (utrumque iam intelligimus tam gratiae quam glorie) quod expectauerunt Ioseph ille Ramathensis,

*Termini regni
Christi in ter-
ris.*

*Propheta de
regno Dei.*

*Sedes uel solium
regis Christi.*

Simeon iussus, & Anna prophetissa cum alijs sanctis. Hoc ipsum regnum annunti-
ciauit Samaritis Philippus diaconus, & Romanis beatus Apostolus Paulus, quod
testatur Lucas in Actis Apostolicis cap. 8. & 28. Sedes uero uel solium adeoq; pa-
latium regis nostri cœlum est. Ascendit enim uictor in cœlos, & consedit ad dexte-
ram Dei patris omnipotentis. Inde ueluti sol iustitiæ illucescit omnibus in ecclesia
uel in regno eius agentibus; imò fidelium quoque corda sibi delegit in quibus ha-
bitet. Alioqui nullam in terris sedem uel palatium regni habet. Quinimò ut intel-
ligamus regem etsi corporaliter non præsentem in terris, sed cœlo illatum esse,
propterea non abesse regno suo, se quidem in uerbo suo capiti, nos autem corpo-
ri uel membris comparat. Iam ergo sicut corpori suo nunquam deest caput, ita re-
gnum Dei non est sine principe Christo. Et sicut uitalis spiritus ex corde, ex capi-
te autem uirtus sentiendi mouendiq; corpori infunditur; Sic ex principe Christo
uiuificamur; illo nos iustificante, conseruante, consolante, confirmante, & ab o-
mnibus malis defendente. Sicut omnia membra reguntur à capite, sic omnes fide-
les in regno Christi à rege Christo gubernantur. Paulus ergo, Deus, inquit, susci-
tauit Christum ex mortuis, & sedere fecit ad dexteram suam in cœlestibus, supra
omnem principatum ac potestatem, & uirtutem, & dominiũ, & omne nomen
quod nominatur, non solum in seculo hoc, sed & in futuro, & omnia subiecit sub
pedes illius, & eum dedit caput super omnia ipsi ecclesiæ, quæ est corpus illius,
complementum eius, qui omnia in omnibus adimplet. Cuius quidem generis alia
complurima inuenire licet in literis Apostolicis; in primis illud: Christus est caput
ecclesiæ, & idem est qui salutem dat corpori. Nam exposuit semetipsum pro eccle-
sia, ut illam sanctificaret mundatam lauacro aque per uerbum, ut adhiberet eam si-
bi gloriosam, &c. Et hæc hæctenus de regno Christi in terris, quod & gratiæ regnũ
& militans ecclesia appellatur.

Ephes. 1.

Ephes. 5.

*Regnum dei in
cœlis gloriæ.*

Porro regnum Dei, cœleste & gloriæ regnum nuncupatur, ea de causa, quod
dominus & rex noster eos quos in terris sanctificauit & direxit spiritu suo adeoq;
& iustificauit, liberatos carne & ereptos ex hoc seculo, in cœlis glorificat, inq; suũ
& omnium sanctorum cōsortium gaudiumq; recipit. Animæ enim fidelium simul
atq; migrant ex corporibus, protinus recipiuntur in cœlum, ut regnent cum Chri-
sto rege æterno, & latentur sine fine cum omnibus sanctis. In iudicio uero ultimo,
quo credimus per Christum regem uiuos & mortuos iudicandos, excitabuntur
sanctorum corpora, clarificabuntur, animabus suis rursus coniungentur, & uni-
uersi, quotquot ab exordio mundi adhæserunt regi Christo, unâ cum Christo rege
& principe æternũ uiuent & regnabunt in gloria. De hoc regno sanctorum mul-
ta prædicauerunt prophætæ & Apostoli, in primis autem beatus Ioannes Aposto-
lus in sua Apocalypsi. Hoc appellarunt alij triumphantem ecclesiam.

*Apoc. 21. & 22.
Regnum Chri-
sti est regnum
æternum.
Matth. 16.
Matth. 24.*

Regnum hoc Dei uel Christi, æternum est regnum. Sicut enim in finem usque
mundi futura est ecclesia in terris, utcunque insanat hic mundus & mundi prin-
ceps: sic post iudiciũ corporibus & animabus felices & æternũ cum Christo
regnabunt siue uiuent fideles. Nam in Euangelio dixit dominus: Portæ inferorũ
non præualebunt aduersus ecclesiam. Erunt item nouissima tempora sicuti fuit
seculum Noe, in quo licet multis partibus superarent fidelium ecclesiam impij,
seruatus est tamen Noe cum suis in arca, impij uero extincti sunt diluuió. Sic præ-
ualebit quidem modis omnibus iniquitas in fine seculi, sed seruabuntur interim
electi in regno Christi, per Christum, quem illi iudicem expectabunt, uidebuntq;
redemptorem uenientem in nubibus cœli. Sed & Daniel in prophetia sua omniũ
regnorum ortum & interitum etiam Antichristi describit, regno autẽ populi san-
ctorum

Daniel. 7.

etorum nullum finem tribuit, sed æternū fore testatur. Idem facit Zacharias propheta in capite duodecimo. Nam sancti in terris regnant per Christum, & e terris in cœlum translati conregnabunt cum rege Christo in secula seculorum. Et scriptura frequenter de altero tantum loqui solet. De utroq; regno intelligimus multos scripturæ locos, in primis illud quod dictum est à Salvatore, Cum oraueritis dicite: Pater noster qui es in cœlis; Sanctificetur nomen tuum; Adueniat regnum tuum. Oramus enim, ut ipse dum in terris uiuimus in nobis regnet, quò ipsi quoq; regnemus super mundum & principem mundi, adeoq; ne regamur à satana, neue regnet in nobis peccatum, quin potius ut hic ab ipso gubernati regnemus aliquando cum Christo in cœlis. Matth. 6.

Ex aduerso regnum mundi quale sit, claret ex consideratione capitis seu regis & principis eius, qui est diabolus, author peccati, impuritatis ac mortis. Regnat hic in mundo, princeps utiq; regni tenebrarum. Non quòd Deus & Christus eius non sit rex uniuersorum: sed quòd perfidi apostata sua propria malitia, à Deo ad diabolum deficientes, hunc sibi constituent principē, cui & sponte sese subiiciunt & regēdos præbent, uiuentes in omni impietate, iniustitia & immunditia, cōformantes se suo capiti diabolo: cum quo æternū in futuro seculo punientur, quem admodum in præsentī seculo passi sunt sese gubernari ab ipso, facientes uoluntatem eius. Hunc principem huius seculi, alibi etiā deum huius seculi cognominatū, superauit Christus uerus rex & monarcha orbis, regnumq; eius destruxit: non ut non sit, donec hoc seculum manet: sed ne electis noceat. Viuit & æternū uiuet (licet in miseria, quæ uita reuera mors est) satanas: sed nulla ei uirtus est contra redemptos Christi principis. Regnum habet & habebit ad finem usq; mundi, sed in filiis diffidentia: sed & perituum in hoc seculo & quasi momentaneū est hoc regnum. Nam mundus transit, & omnia pereunt mundana: uerū alienissimī ab hoc regno, imò hostes quasi iurati huius regni sunt electi dei omnes. Nec potest sua uirtute princeps tenebrarum consortes regni Christi abripere in regnum iniquitatis. Conatur hoc quidem sedulo, & uarijs tentationibus uexat electos: sed hi uincunt per eum qui olim pseudo regem illum latronumq; principem superauit, docuitq; ut spreto principe hoc fœdo, & mundo mundanisq; concupiscentijs, innocentia studentes, spiritui bono nos regēdos permittamus. Hæc de rege Christo & regno eius unico & æterno, qua potui breuitate exposui hætenus. Ioh. 12.
2. Cor. 4.
1. Ioh. 3.

Iam uerò Christus dominus noster sacerdos est, adeoq; pontifex ille maximus unicus & æternus, quem summi pontifices populi ueteris præfigurarunt. Dauid enim in carmine suo planè diuino cecinit: Iurauit dominus, & non poenitebit eū, tu es sacerdos in æternum secundum ordinem Melchizedek. Quæ uerba beatus Apostolus adducens & illustrās in epistola ad Hebræos hæc reliquit scripta: In cœlum præcursor pro nobis ingressus est, iuxta ordinem Melchizedek, pontifex factus in æternū. Nam hic erat Melchizedek rex Salem, pontifex Dei altissimī, qui occurrit Abraham reuertenti à cæde regum, & benedixit illi: cui & decimas ex omnibus impertitus est Abraham. Qui primū quidem ex interpretatione dicitur rex iustitiæ, deinde uerò etiam rex Salem, quod est pacis, ignoti patris, ignotæ matris, ignoti generis, nec initium dierum neq; uitæ finem habens, sed assimilatus filio Dei, manet sacerdos in perpetuum. Equidem dominus noster Iesus Christus & rex iustus pacificusq; iustitia atq; pax fidelium, & sacerdos ille est perpetuus, qui iuxta humanitatē ex uirgine absq; uiri semine editus creditur, & idcirco ignoti patris, iuxta diuinitatē autem ex patre genitus, & ideo ignotæ matris, & genitus quidem ineffabiliter ab æterno, ac propterea generis ignoti, neq; principium neq; finē

Hebr. 5.

Psalm. 2.

Christus unctus

Psalm. 45.

Isaie 61.

Quomodo Chri-
stus sacerdos,
obeat sacerdo-
tis munera.
Christus do-
ctor est Eccle-
siae.

Christus inter-
cedit.

Christus bene-
dicit.

Christus sacri-
ficat.

Christus san-
ctificat.

uitae habens. Licet enim iuxta humanitatem mortuus sit & sepultus, iuxta diuinitatem tamen manet immortalis & sempiternus Deus. Idem ille qui rex est, etiam sacerdos agnoscitur, non secundum ordinem Aaronis, sed secundum ordinem Melchizedek. Sicut enim scriptura hunc unum commemorat sacerdotem; ita unus Christus sacerdos manet in perpetuum, sacerdotium habens sempiternum. Vocantur autem & inungebantur quondam summi sacerdotes, non ingerebant se ui aut artibus tanto muneris. Vnde Apostolus dixit: Nemo sibi ipsi usurpat honorem, sed qui uocatur etiam a Deo, quemadmodum & Aaron. Ita & Christus non sibi ipsi usurpauit gloriam, ut fieret pontifex; sed ab eo constitutus est, qui dixit illi: Filius meus es tu, ego hodie genui te. Sicut & alibi dicit: Tu es sacerdos in aeternum secundum ordinem Melchizedek. Nullibi uero legis nostrum illum oleo delibutum esse uisibili: nam unctus est chrismate inuisibili, spiritus sancti uidelicet plenitudine, propheta testante: Unxit te Deus, Deus tuus oleo laetitiae praefortibus tuis: Et iterum, Spiritus domini super me, propterea quod unxit me, ad euangelizandum pauperibus misit me. Caterum quando officium sacerdotum quondam fuisse legimus seruire tabernaculo, docere populum, intercedere inter deum & homines, orare pro populo & huic benedicere, item sacrificare, & consecrare uel sanctificare, & iam constet Iesum Christum legitimum esse sacerdotem, certum est eundem illis ipsis obstrictum esse officiis, sed his quidem tanto praestantioribus, quanto sacerdotium consequutus est excellentius. Seruiebant Aaronici isti tabernaculo corruptibili & significatiuo: at dominus noster sublatus in uerum tabernaculum, ipsum coelum, ministrat sanctis dei omnibus. Nam coelum & Ecclesia sanctorum est uerum summi nostri sacerdotis & tabernaculum & templum. Christus sacerdos noster doctor est & magister unicus & aeternus uniuersalis ecclesiae suae. Etenim docuit non illud duntaxat seculum, quod uixit in diebus carnis suae, sed spiritus Christi fuit in prophetis, per quem & nunc regit omnes catholicae ecclesiae cathedras. Ipse Christus loquitur nobis adhuc, & loquetur in finem usque seculi, per os siue scripta sanctorum apostolorum omniumque doctorum annunciantium doctrinam Apostolorum. Ac sufficit doctrina haec Catholicae Ecclesiae. Nam omnia ea plene comprehendit, quae pertinent ad uitam sanctam & felicem. Christus pontifex noster intercedit pro omnibus sanctis in templo suo. Orat enim pro nobis apud patrem in dextra dei unicus omnium fidelium aduocatus & patronus. Nam ascendit ad dexteram dei patris, ut ibi semper appareat in conspectu dei, & omnia nostra negotia fideliter exequatur. Qua de re dixi copiosius Sermo ne proximo, ubi disserui de inuocatione & intercessione. Idem dominus noster benedicit nobis solus. Ipse enim factus est execratio & maledictio pro nobis, ut nobis benediceretur in ipso; iuxta singulare & antiquum illud uaticinium: In semine tuo benedicentur omnes nationes terrae. Praeterea sacrificat pro nobis Christus dominus noster. Nam thymiama adolet, cum pro nobis supplicat & apparet in dextera Dei. Hostiam uero pro peccatis non pecuinam, sed semetipsum obtulit deo uiuenti, hostiam semper efficacem ad expianda omnia populi peccata. De qua cum copiose disseruerim in tractatione Ceremoniarum, hic data opera breuior sum. Rursus cum dominus noster Iesus Christus sit sanctus sanctorum, sanctificat utique catholicam ecclesiam & consecrat, inungens ipsam oleo sancti spiritus, ut efficiamur & sancti & sacerdotes qui offeramus Deo spirituales hostias. Legimus enim unguentum illud sacrum in caput effusum Aaronis, descendisse in barbam, & extremas uestimenti eius fimbrias. Nam Christus summus pontifex uniuersalis Ecclesiae suae, spiritum suum effundit tam in remotissimos quam in propinquos.

Clamat

Clamat enim in euangelio: Si quis sitit, ueniat ad me & bibat. Qui credit in me, sicut dicit scriptura, flumina de uentre eius fluent aquae uiuae: Et iterum: Ego me pro eis sanctifico, ut sint & ipsi sanctificati in ueritate. In summa, cum dicimus & confitemur Iesum Christum esse sacerdotem siue summum pontificem populi fideles, hoc dicimus, Christum esse electum & propositum nobis doctorem & magistrum, qui uniuersalem ecclesiam regat & doceat, qui intercedat & omnia nostra negotia fideliter agat apud patrem in coelis, qui sit patronus, intercessor & aduocatus fidelium solus apud deum, qui hostia corporis sui, sit perpetua omnium peccatorum totius mundi unica expiatio, absolutio, iustificatioque, qui credentes consecret in sacerdotes, ut & ipsi Deo patri per Iesum Christum acceptas offerant oblationes ac sint domus & tabernaculum Dei.

Ex his facile erit estimare quale sit sacerdotium Christi sacerdotis & pontificis nostri. Sacerdotium est ipsum officium uel ipsa functio & operatio sacerdotis, quae ipse sacerdos Christus in coelis ac in catholica Ecclesia omnia agit quae sunt munus sacerdotalis. Proinde necesse est sacerdotium hoc Christi pontificis nostri non uisibile & corporale, sed omnino esse spirituale. Recte enim Paulus, Si esset in terra Christus, inquit, non posset esse sacerdos: ubi ministrant tabernaculo uel templo qui sunt de tribu Leuitica: ubi est templum uel tabernaculum cum uestibus & uasis multiplicibus sanctis. Ceterum Christus dominus noster est de tribu Iuda, regia inquam tribu natus: quamuis interim non ignoremus tribum regiam & pontificiam fuisse commixtas. Nam legimus Elisabetham, quae erat ex filiabus Aaron, fuisse cognatam uirginis deiparae Dauidicae. Nec templo aut uasis sacris unquam legitur usus dominus noster in ministerio suo. Tametsi enim aliquoties docuerit in templo, tamen non in eo solo docuit. Nunquam in eo ad aras sacras, uel thymiamatis uel holocaustorum sacrificauit: nullis unquam usus est uestibus sacerdotalibus significatiuis. De quibus dixi dum exposui ceremoniales leges. Ergo cum pro expiatione peccatorum uniuersi huius mundi sacrificare uellet, extra portam passus est, & semetipsum uiuam & sanctissimam obtulit hostiam: iuxta quod typi & uaticinia atque figurae praecesserant in lege Moysi, de quibus rursus differui in tractatione Legum ceremonialium. Oblata uero corporis sui hostia ascendit in coelum, & consedit ad dextram patris, ut inde illucescat suae ecclesiae, & ibi semper pro nobis appareat in conspectu Dei patris. Ideoque corporaliter iam non fungitur officio sacerdotali in terris, ita nos nunc erudiens sicut in diebus carnis suae sui seculi homines docuit. Nunc enim spiritu mentes suorum illustrat, doctrinamque apostolorum euangelicam reparat quotidie, adeoque ipse nihilominus loquitur per ora docentium & praedicantium euangelium. Benedicit nobis coelitus, hoc est, omni benedictione coelesti nos locupletat. De illo loquens Apostolus: Et unctio, ait, quam accepistis ab eo, manet in uobis. Et non necesse habetis, ut quisquam doceat uos, sed sicut ipsa unctio docet uos de omnibus, & uerax est & non mendacium. Et sicut docuit uos, manete in ea. De hoc loquens diuinus uates dixit: Effundam aquas super sitientem, & fluenta super aridam: effundam spiritum meum super semen tuum, & benedictionem meam super stirpem tuam. Et germinabunt inter herbas quasi salices iuxta praeterfluentes aquas. Ex quibus discimus, Pontifici nostro Christo nullo opus esse suffraganeo episcopo aut uicario in ecclesia. Ipse enim adest ecclesiae, & regit eam per spiritum suum. Idem ille in coelis ad dextram patris, non toties supplex pro nobis procumbens in genua intercedit quoties peccamus. Semel exauditus est a patre pro reuerentia, cum in diebus carnis suae pro nobis preces obtulisset cum clamore ualido & lachrymis. Nunc enim

Ioan. 7.
Ioan. 17.De sacerdotio
Christi.

Hebr. 8.

Hebr. 13.

1. Ioan. 2.

Isaie 44.

Hebr. 5.

semper apparet pro nobis in conspectu Dei. Omnia nostra relucet in conspectu eius, ac pater respicit in faciem Christi sui, propter quem omnibus eius membris est placatus, audiens eos & tribuens eis quaecumque postulant salutaria: iuxta illud *Ioan. 16.* saluatoris dictum: Amen amen dico uobis, quaecumque petieritis patrem in nomine meo dabit uobis. Nullae ergo hic nobis turbæ, nulla molestia, nullus labor imaginandus est, quo defatigetur qui omnium est in cœlis apud deum patrem intercessor, aduocatus & sacerdos. Id quod & proximo Sermone ubi disserui de inuocatione & intercessionem, monui. Proinde Sacerdoti nostro fungenti munere suo in cœlis coram Deo, nulla opus est ara thymiamatis, nullo thuribulo, nullis uasis aut uestibus sacris: multò minus opus habet ara holocaustorum. Nam in cruce, quæ ipsius ara fuit, ipse semetipsum semel tantum obtulit. Neque enim quisquam mortaliū dignus erat offerre deo uiuo dei uiuentem filium. Vnica autē hostia illa semper efficax est ad expianda omnia omnium hominum totius mundi peccata.

Et quamuis in tractatione legum Ceremonialium de his testimonia plura adduxerim, non possum tamen hic mihi temperare quin singularia aliquot repetā. Nequit enim hoc negotium dignè & diligenter satis hominum imprimi pectoribus, in quo est fructus diuinitatis & humanitatis Christi, denique uniuersa salus nostra. Paulus ad Hebræos de ueteris Testamenti sacerdotibus uel pontificibus loquens, & cum his Christum summum pontificem conferens, imò omnibus modis præferens, dicit: Et illi quidem plures facti sunt sacerdotes, propterea quod per mortem non sinerentur permanere. At Christus quod maneat in æternum, perpetuum uel immigrabile (quod successione ad alium non transit) habet sacerdotium. Vnde & saluos facere ad plenum potest qui per ipsum adeunt Deum, semper uiuens ad hoc ut interpellet pro illis. Talis enim decebat ut esset nobis pontifex pius, innocens, impollutus, segregatus à peccatoribus & sublimior cœlis factus: cui non sit quotidie necesse quemadmodum illis pontificibus, prius pro proprijs peccatis uictimas offerre, deinde pro peccatis populi. Nam id fecit semel cū

Hebr. 9. seipsum obtulit. Et idem iterum, Non in manu facta sancta, inquit, ingressus est Christus exemplaria uerorum: sed in ipsum cœlum, ut appareat nunc in conspectu dei pro nobis. Nō ut sapius offerat semetipsum, quemadmodum pontifex ingreditur in sancta singulis annis per sanguinem alienum. Alioqui oportuisset illū sapius passum fuisse à condito mundo. Nunc autem semel sub consummationem seculorum, ad profligationem peccati per immolationem suū ipsius apparuit. Et quatenus illud manet omnes homines, ut semel moriantur, post hoc autem iudicium: ita & Christus semel oblatus est, ut multorum peccata tolleret, rursus absque

Hebr. 10. peccato conspicietur his qui illum expectant in salutē. Rursus idem Paulus: Omnis quidem sacerdos assistit quotidie, inquit, sacra peragens & eisdem sapius offerens hostias, quæ nunquam possint auferre peccata. Hic uerò una pro peccatis oblata uictima perpetuò sedet ad dexteram dei, id quod superest expectans: donec reddantur inimici ipsius scabellum pedum eius. Vnica enim oblatione perfectos effecit in perpetuum eos qui sanctificantur. Hæc hætenus omnia Pauli sunt apostoli. Non existimo autem ista testimonia copiosiore illustranda esse interpretatione & proposito nostro aptāda. Omnia enim sine ulla nostra expositione sunt illustrissima, causæque quam agimus quā apertissimè congruunt. Nam totum sacerdotium Christi, præsertim quod intercessionē ac hostiam uel ex expiationem unicam & æternā attinet, planè sistunt atque exponunt oculis contemplandum. Eiusdem sacerdotij est etiam fideles omnes deo sacerdotes cōsecrare: non ut offeramus pro expiatione peccatorum, sed ut singulis quasi momētis preces nostras, gratia-

gratiarū actiones, & nosmetipsos pietatisq; officia offeramus. Ioannes enim apostolus & euangelista, Iesus Christus princeps regum terrarū, inquit, dilexit nos, & lauit nos à peccatis nostris per sanguinem ipsius: & fecit nos reges & sacerdotes Deo & patri suo. Eandem sententiā inuenire est & in epistola beati Petri. In omnibus uerò his cernere licet, quis fructus nobis existat defluatq; ex diuinitate & humanitate Christi regis & pontificis nostri. Neq; enim posset is esse regum princeps & pontifex summus, nisi Deus esset & homo.

Atq; hic locus postulat modò ut dicamus aliquid de nomine Christiano & officijs hominis Christiani. Christiani nomen habemus à Christo, cui indiuulsè con- nexi membra sumus corporis eius, cuius ipse caput est. Christus autem non proprium (Iesus enim appellatur) sed officij nomen est à chrismate deductū, ut Christus idem sit ut unctus. Ideoq; Tertullianus appellationem esse ait non nomen. Ac addit, Vnctus non magis nomen est quàm uestitus, accidens nominis res. Cæterum ungebantur chrismate reges & summi pontifices, idcirco Christus significat nobis eum qui est rex & sacerdos uel pontifex summus. Quoniam uerò Christiani nuncupamur à Christo qui unxit nos spiritu sancto, certè sumus & nos reges & sacerdotes. Vbi cernere licet quantum beneficium ex Christo deo & homine acceperimus, fecit enim nos reges & sacerdotes. Cernimus quodnam sit officium Christianorum, hanc dignitatem ad extremum usq; tueri spiritum, ne rursum à satana nobis eripiat. Cæterum si reges sumus, certè rerum domini & liberi sumus, regentes utiq; non recti non subiecti. Liberi, inquam, à peccato & à morte æterna, & ab omni impuritate: domini autem satanæ, principis mundi, & ipsius mundi. Regimus enim mundum & carnem: non ab his regimur. Huc pertinent illa Apostoli uerba, Ne regnet peccatū in mortali uestro corpore, ut obediatis illi per cupiditates eius: neq; accommodetis membra uestra arma iniustitiæ peccato, sed accommodetis uosmetipsos deo uelut ex mortuis uiuentes, & membra uestra arma iustitiæ deo: Peccatū enim uobis non dominabitur. Ideoq; quando princeps mundi adeoq; ipse mundus & caro, eiusq; affectio praua peccatum, in seruitutem ex libertate retrahere satagit, nos quia reges sumus strenuè omnino repugnemus oportet, ac perseverantes in pugna uincamus per uirtutē Christi regnantis in nobis. Etenim S. Ioannes Apostolus, Omne, inquit, quod natum est ex deo, uincit mundum, Et hæc est uictoria quæ uicit mundum fides nostra. Huc pertinet doctrina de Libertate & seruitute, de qua Decade proxima disserui. Colligimus ex istis omnibus primarium Christianorū officium esse semper stare in acie, locum suum tueri, uigilare & adniti uiribus & modis omnibus, necubi ab hoste satana superati, regia dignitate spoliemur, detrahamurq; in seruitutem infernalem. Certè si in Christo & cum eodem superauerimus, conregnabimus, id est, uiuemus cum ipso & omnibus sanctis in gloria in secula seculorum. Sic autem reges in Christo, sic Christiani sumus.

Rursus quia Christiani, hoc est, uncti sumus, sacerdotes certè sumus, & proinde pro officio sacerdotali docemus, admonemus, adhortamur, & consolamur omnes fratres nostros & nostræ fidei commissos homines. Vbi tamen necessario distinguimus inter sacerdotium Christianum & ministerium ecclesiasticū. Omnes quidem Christiani tam mares quàm fœminæ sacerdotes, sed non omnes ministri ecclesiæ sumus. Neq; enim omnes promiscuè concionari publicè, sacramenta administrare, aliq; pastorum officia facere, nisi legitimè ad hoc uocati ordinatiq; possumus. Sacerdotium hoc nostrum commune, est spirituale, uersaturq; in communibus officijs pietatis, non in publicis & legitimis Ecclesiæ ministerijs. Vnde

Hebr. 4.

priuatim alius alium erudire & admonere potest & debet, dumq; hoc facit, sacerdotali fungitur munere: ueluti cum paterfamiliâs liberos suos instituit domi suæ in pietate, cum materfamiliâs castigat & erudit filias: deniq; cum quisq; nostrum proximum quencq; hortatur ad studium pietatis. Nam Apostolus Paulus, Exhortemini uos inuicem, inquit, quotidie, quoad appellatur dies hodiernus, ne quis ex uobis induretur seductione peccati. Præterea cum simus sacerdotes, Deo nostro dignas hostias offeramus oportet. Satis autem testati sumus, post Christum summum & unicum sacerdotem seu pontificem nostrum omnibus seculis & toto in orbe, neminē offerre sacrificium expiatorium. Is enim semel, sed semper & omnibus efficacem purgandis peccatis omnium hostiam obtulit, cum semetipsum obtulit. Nos ergo offerimus illi gratiarum actiones laudesq;, memoriam sacrificij illius unici celebrantes: offerimus preces, offerimus nosmetipsos, hoc est, corpora nostra, hostiam deo uiuentem ac rationalem, unā cum pietate omnifaria ac beneficentia. Paulus enim, Per Christum, inquit, offerimus hostiā laudis semper Deo, hoc est, fructum labiorum confitentium nomini eius. Ac beneficentiæ & communionis ne obliuiscamini. Talibus enim hostijs delectatur deus. Verum plura de his sacrificijs dixi Sermone proximo, in quo tractauī quis sit uerus Dei cultus. Quando uerò omnis sanctificatio est & existit ex uno pontifice summo Iesu Christo, non possumus nos aliter sanctificare, nisi honesta & pura conuersatione uitæ: quæ à nobis requiritur, nimirum ut simus sancti, & innocenti uita sanctificemus nomen dei nostri, ne propter nos malè audiat inter homines, quin potius uideant fidelium bona opera, & glorificent patrem in cœlis. In his autem nemo est qui non uideat comprehendī omnia Christiani hominis officia, in quibus nisi nos exerceamus strenuè, non uideo nos tanto nomine dignos.

Hebr. 13.

Nomen Christianum uetustissimum.

Nomen autem hoc sacratissimum Lucas author est fidelibus primū esse inditum Antiochiæ in Syria: id quod tamen nemo sic intelligat quasi antea fuerit omnibus omnino incognitum. Nunc enim factum est uulgatissimum, quondam fuit tantum excellentissimorum sanctissimorumq; hominum, & re magis quam nomine, quamuis & nomine utcunq; cognitum. Nam Eusebius in Ecclesiast. hist. commemorat antiquos patres Adamum, Seth, Noe, Abrahamum & his alios similes, omnes fuisse Christianos, ideoq; religionem Christianam longè integerriam esse uetustissimamq;. Verba Eusebij si quis requirat hæc sunt, Non noua sed coram omnibus hominibus uetustate celebris ac cunctis nota gens Hebræorum est. Huius libri ac literæ uetustos uiros continent, raros quidem & paucos numero, pietate uerò & iustitia omniq; uirtutum genere præstantes, ante diluuium differentes, postea alios ex filijs ac nepotibus Noe, utpote Tharam & Abrahamum, de quo tanquam duce & progenitore ipsi Hebræorum posterij gloriantur. Quod si quis hos omnes iustitiæ testimonio decoratos, ab ipso Abrahamo ad primum usq; hominem, ipsis operibus, etsi non nomine, Christianos fuisse dixerit, à ueritate certè non aberrauerit. Christianum quippe nomen uirum significat, qui per Christi cognitionem & doctrinam, animi moderatione & iustitia, continentiaq; uitæ & uirtutis fortitudine ac pietatis confessione erga unum ac solum omnium deum excellit. Hoc autem præcis illis non minus curæ fuit quam nobis. Nec corporalis itaq; circumcisionis rationem habuerunt, sicuti nec nos: nec sabbatorum obseruantia, quemadmodum neq; nos, neq; abstinentia ciborum, neq; discriminum aliorum: quæ postea Moses primus omnium instituit, ac symbolicè perficienda tradidit: sicuti talia & nunc quoq; Christianorum non sunt. Sed ipsum etiam Christum Dei perspicuè uiderunt. Siquidem illum & Abrahæ apparuisse, & res
sponsa

sponsa dedisse Isaaco & Israeli, Moysi & prophetis post ipsum loquutum esse, iam antea declaratum est. Vnde & pios istos Christi nomen sortitos esse inuenies: iuxta uocem de illis dictam, nempe, Ne attingatis Christos meos, & contra prophetas meos ne malitiose agatis. Manifestum itaque est hanc pietatis inuentionem uirorum illorum qui temporibus Abraham pie uixerunt, quæ nuper per Christi doctrinam cunctis est gentibus annunciata, primam esse omniumque antiquissimam & uetustissimam. Hæc Eusebius.

Porro si in hoc speculo nominis Christiani contemplemur nos, uidebimus paucissimos esse hodie hoc sacro nomine dignos. Omnes quidem uulgo sic appellamur, & omnes Christiani uolumus appellari, sed pauci uitam professione nostra dignam uiuimus. A chrismate sacro nuncupamur Christiani. Chrisma sacrum est ipse spiritus sanctus. Super quo autem requiescet spiritus meus, ait Dominus, nisi super humili & quieto & tremante ad sermones meos? Nos uero uerbum Dei floccifacimus, turbulentissimis sumus mentibus, affectibus prauis corrupti, tumemus superbia, ideoque chrismate caremus sancto. Quis ergo Christianos nos esse dicat? Regimur plerique affectibus prauis, carne, mundo, & à principe huius seculi, pauci regimus mundum ac carnem & quæ in eis sunt. Imperium ergo in nobis, non spiritus Dei, sed spiritus mundi ac carnis obtinet. Dominatur nobis satan, caro & mundus, uiuimus enim in illis & obedimus eis, unde liberi ab omni iustitia & sanctitate, serui sumus, seruitutem seruientes turpissimam. Neque enim liberari cupientes, uel redemptorem quærimus, uel impatientes tyrannidis rebelamus, sed ignaui & molles, subigendos & sub tyrannide retinendos nos substerimus: imò piget & tædet nos laborum, uigiliarum, precum, omniumque officiorum pietatis, securique delitescimus ueluti in ganea. Quis autem tales porcos sacro sancto nomine Christiano dignaretur, nisi ineptissimus & foedissimus quisque? Nihil ergo mirum si tales æternum arsurum detrudantur ad tartara, ut ibi æternum ei coniungantur, quem hic sibi sequendum iniquissime elegerunt. Iam uero quotusquisque nostrum docet, monet, & hortatur eodem Christiano nomine gloriantes? Nihil hic dico de doctoribus ecclesiasticis, sed de officio Christiani hominis mihi sermo est. At segnes sumus plerique in erudiendis nostris & confratribus. Vel enim piget laboris, uel timemus periculum. Reijcimus ergo monendi instituendique officium ad publicos ecclesie ministros: quasi huius à nobis planè nihil requiratur. Audiuntur idcirco uoces ab hominibus ferè indignissimæ, Non habeo sacerdotium, non sum Pfaff/cur ergo docerem, cur monerem? Atque his non est cura, ut cunque blasphema & spurca dicantur uel domi uel foris. Sibi enim uiuunt, & gloriam dei ac proximi salutem nihil ad se pertinere putant. Quas uero hostias deo nomineque nostro dignas offerimus? Vbi sunt preces & gratiarum actiones? Vbi est mortificatio carnis nostræ ac abnegatio huius seculi? Vbi est misericordia seu beneficentia? Vbi est uita innocens & sancta? Contraria possem, siquidem necesse esset, longo recensere catalogo, sed quorsum attinet manifesta omnibus hominibus copiosa expositione repetere? Nam quis oro negat uitam presentis seculi, hominum, inquam, qui Christiano gloriatur nomine, foedam, foetentem, ac pestiferam esse? Quæ cum compertissima sint, nihil peccaui qui paulò ante dixi paucos hodie esse Christianos. Qui sapiunt & suo nomine cupiunt respondere, audiant saluatorem nostrum dicentem in Euangelio Matthæi, Contendite intrare per arctam portam: quoniã lata est porta & spaciøsa uia quæ abducit in exitium, multi sunt qui ingrediuntur per illam. Quoniam angusta est porta & stricta uia quæ abducit ad uitam: & pauci sunt qui inueniunt eam. Ceterum quod in primis dictum oportuerat, *Pauci sunt Christiani.* *Isaiæ 66.* *Matth. 7.* *in pseudochristianos.*

peccant in religionem professionemque Christianam grauissimè, qui ut sacerdotium & regnum Christi non syncerè agnoscunt, ita se in primis commendabiles & catholicos esse gloriantur, quòd ea designant quæ modis omnibus regnum & sacerdotium Christi obscurant. Christiani solo hoc titulo & nomine contenti, nullam aliam ambiunt uel admittunt appellationem. Isti uerò quasi leuis sit Christiani appellatio, non quiescunt donec alijs quoque uocentur nominibus, quasi in nomen Brunonis, Benedicti, Roberti aut Francisci sint baptizati. Christiani soli legislatori magistro & doctori Christo adherentes, alienorum uocem non agnoscunt, diuinisque à scripturis non recedunt uel latum culmum. Isti autem hæreticum esse criminantur, nisi quasuis Romanæ ecclesiæ constitutiones, licet ex diametro cum uerbis doctrinæ Christi pugnantes, recipias & pro diuinis adores. Christiani agnoscunt se habere unum regem, liberatorem, saluatorem & caput in cœlis. Isti uicarium in terris adorant, & salutem tribuunt rebus nedum leuiculis, sed putidissimis. Christiani omnē fiduciam in Deum figunt, cui uota & omnes preces offerunt per Iesum Christum, quem solum credunt pontificem summum & patronum uel aduocatum fidelissimum esse omnium credentium. Isti creaturis fragmentisq; hominum supplicant, ac tot sibi deligunt patronos & intercessores, quot in cœlis uiuunt sancti. Christiani sciunt hostiam Christi semel immolatā, semper esse efficacem ad expianda omnia omnium in toto orbe terrarum omniumq; seculorum hominum peccata. Isti uerò ter & quater hæreticum esse clamitant, non agnoscere Christum quotidie immolari à sacrificis ad hoc consecratis. Itaque omnibus commune est nomen Christianum, sed res nomine designata, duntaxat fidelium unī Christo adherentium.

Conclusio.

Concludimus iam totam de Rege & sacerdote Christo dissertationem hisce S. Augustini uerbis, Filius Dei qui fecit nos, factus est inter nos, & rex noster regit nos; & ideo sumus Christiani, quia ille Christus. Christus à chrismate dictus est, id est, ab unctione. Reges autem ungebantur & sacerdotes, ille uerò unctus est rex & sacerdos. Rex pugnauit pro nobis. Sacerdos obtulit sese pro nobis. Quando pugnauit pro nobis, quasi uictus est, iure autem uerè uicit. Crucifixus est enim, & de cruce sua in qua erat fixus diabolus occidit, & deinde rex noster. Vnde autem sacerdos? quia se pro nobis obtulit. Date sacerdoti quod offerat. Quid inueniret homo quod daret? Mundam uictimam? Quam uictimam? Quid mundum potest offerre peccator? O inique, ô impie, quicquid attuleris immundum est. Quære apud te quid offeras, non inuenies. Quære ex te quid offeras, non delectatur uel arietibus, uel hircis, uel tauris. Omnia ipsius sunt etsi non offeras. Nihil mundum inuenit in hominibus quod offerret pro hominibus: seipsum ergo obtulit mundam uictimam, hostiam immaculatam. Non ergo obtulit quod nos illi dedimus, sed quod accepit à nobis, & id mundum obtulit. Carnem ex utero uirginis accepit, ut mundam offerret pro immundis. Ipse rex, ipse sacerdos: in eo lætemur. Ipsi gloria in secula seculorum.

*De Spiritu sancto tertia in adoranda Trinitate persona, eiusq; diuina
virtute.* S E R M O VIII.

RESTAT ut post exposita mysteria filij Dei Domini nostri Iesu Christi, consequenter dicamus de Spiritu sancto, eiusq; potentia & operatione diuina. Nisi autem is inspiraret mentes & regat linguam, nunquam poterimus quicquam de ipso uel dicere uel audire ulla cum dignitate aut utilitate. Sicut enim

cut enim ea quæ dei sunt nemo nouit nisi spiritus dei, ita homines scientiam rerum diuinarum & cognitionem sancti spiritus non aliunde hauriunt, quàm ex eo dem hoc Dei spiritu. Oremus ergo Deum patrem, ut per filium Dominum nostrum Iesum Christum, misso in corda nostra hoc spiritu suo sancto, dignetur illustrare tenebrosas mentes nostras, & dirigere nos secundum scripturas sanctas in uia ueritatis sincera.

Initio autem uidetur nobis non inutiliter explicandum Spiritus uocabulum, quòd id in scripturis uariè & frequentissimè usurpetur: unde non rarò impinget grauius quisquis uim eius uocis ignorauerit. Spiritus propriè nota est elementi, significans aerem, uentum, halitum. Ea significatione dictum legimus à saluatore, Spiritus ubi uult spirat, & uocem eius audis, sed nescis unde ueniat, aut quò uadat. Et Paulus, Si orem lingua, inquit, spiritus meus orat, at mens mea fructu uacat. En spiritum usurpat Apostolus pro flatu uel uoce. Nam linguæ subiungit & menti opponit. Per metaphoram transfertur ad omnem incorpoream substantiam, opponiturq; corpori. Spiritus ergo significat angelum siue bonum siue malum. Propheta enim, quod & Paulus repetijt, dixit: Qui facit angelos suos spiritus, & ministros suos flammam ignis. Item, Nōne sunt omnes administratorij spiritus? Hæc testimonia de bonis intelliguntur: quando de malis loquitur scriptura, ferè addit aliquid, ut spiritus malus, uel spiritus immundus. Appellamus & spectra, uel species, assumpta aliqua forma obscuriore, spiritus. Sic Apostoli non credentes resurrexisse uero suo corpore Dominum, ipsum quidem uidentes, existimarunt se uidere spiritum. Quibus ille pedes & manus ostendens, addit, Spiritus carnem & ossa non habet, sicut uidetis me habere. Rursus usurpatur Spiritus pro animali uita, sicut & Latinis spirare uiuere, expirare mori est. Dauid, Cum dederis colligunt, inquit: & cum aperis manum tuam, satiantur bonis: cum uerò abscondis faciem tuam conturbantur, cum colligis spiritum eorum deficiunt, & in puluerem suum reuertuntur. Et Dominus apud Mosen, Perdam, inquit, uniuersam carnem, in qua est spiritus uitæ. Peculiariter item rationalis anima hominis nuncupatur spiritus, adeoque spiritus sapissimè ponitur in sacris literis pro anima rationali hominis. In Euangelio enim legis: Iesus inclinato capite tradidit spiritum. Et de sancto martyre Stephano legis: Et lapidabant Stephanum inuocantem & dicentem: Domine Iesu suscipe spiritum meum. Solomon enim prior dixit: Reuertetur puluis in terram sicut fuit, & spiritus redibit ad Deum, qui dedit illum. Iam uerò significat Spiritus affectum, agitationem animi, propensionem atque impulsus. Solomon enim, Vrbi dissipata similis est, inquit, cuius spiritus caret retinaculo. Sæpe reperiuntur in scripturis spiritum superbiam, iram, libidinis aut inuidiam, pro affectione superba, iracunda, libidinosa aut inuida. Dicitur & spiritus infirmitatis Luca 13. cap. ipsa, inquam, affectio ægra & morbi uis. Significat spiritus & spirituales motus, quos excitat in cordibus sanctorum sanctus spiritus, adeoque ipsa dona per spiritum in corda hominum transfusa, Id quod in Paulo ubiq; obuium est. Alicubi opponitur spiritus literæ, corpori, figuræ, typo uel umbræ, usurpaturq; pro altiore seu mystico sensu ipsoq; rei nucleo: ut cum Paulus dicit: Circuncisio cordis, circuncisio est quæ spiritu constat non litera. Et iterum: Dominus fecit nos idoneos ministros noui Testamenti, non literæ, sed spiritus. Nam litera occidit, spiritus uiuificat. Ergo inuenias spiritum poni pro inspiratione, reuelatione atque doctrina. Ioannes enim, Ne credatis, inquit, cuius spiritui, sed probate spiritus an ex Deo sint. Item, Spiritum ne extinguatis, prophetias ne aspernemini. Postremo appellatur Deus, immensa & ineffabilis illa uirtus spiritus. Deus, inquit, Dominus noster, est

Exponitur spiritus uocabulum.
Spiritus aer uel uentus.
Ioan. 3.

1. Corin. 14.

Spiritus angelus.
Psal. 104.
Hebr. 1.
Spiritus spectrum.
Lucæ 24.

Spiritus uita.
Psal. 145.
Psal. 104.

Genes. 6.
Spiritus anima hominis.
Lucæ 22.
Act. 7.
Eccles. ultimo.
Spiritus animi affectio.
Prouer. 25.

Spiritus motus spirituales.
Spiritus mysticus sensus.
Rom. 2.
2. Cor. 3.
Spiritus reuelatio.
1. Ioan. 4.
1. Thess. 5.
Spiritus deus.
Ioan. 4.

spiritus, & eos qui adorant eum, spiritu & ueritate oportet adorare. Hac ratione uocabulum spiritus commune est omnibus personis adorandæ trinitatis: peculiariter tamen tertiæ personæ trinitatis accommodatur, de qua Sermonem hunc instituimus.

Spiritus sanctus quid.

Et quamuis spiritus sanctus, eò quòd Deus sit, nullis possit circumscribi limitibus: est enim natura sua ineffabilis, immensus, incomprehensibilis, æternus: ut tamen certo ordine de eo aliquid dicam, adumbrabo saltem id quod de ipso fuisse me tradit scriptura, ipsius sancti spiritus inspiratio. Spiritus sanctus est tertia in adoranda trinitate persona, Deus uerus, ex patre & filio procedens, qui fideles illuminat, regenerat, sanctificat, & omnibus bonis adimplet. Cæterum spiritum sanctum tertiam esse in adoranda trinitate personam, demonstratum opinor abunde satis in Sermone huius Decadis 3. Equidem unica hæc Saluatoris nostri sententia, Baptizate eos in nomen patris, & filij, & spiritus sancti, abunde confirmat pijs mentibus, quòd spiritus sanctus est tertia in trinitate persona.

Spiritum sanctum esse uerum deum.

Porro Deum esse uerum, eiusdem potestatis, gloriæ, maiestatis & essentiæ cū patre & filio, illud in primis arguit quòd tertia est in sancta trinitate persona. Neque cogitandum est hunc illis minorem esse, quòd tertio loco numeratur. Nam licet ordine commemoretur à nobis trinitas beata, nullus tamen gradus, nullum tempus, nullus locus aut numerus est in benedicta trinitate. Nam secundum scripturam confessus est beatus Athanasius, & dixit Fides catholica hæc est, ut unum Deum in trinitate, & trinitatem in unitate, ueneremur: neque confundentes personas, neque substantiam separantes. Alia est enim persona patris, alia filij, alia spiritus sancti: sed patris & filij & spiritus sancti una est diuinitas, æqualis gloria, cœterna maiestas. Qualis pater, talis filius, talis spiritus sanctus. Increatus pater, increatus filius, increatus spiritus sanctus. Immensus pater, immensus filius, immensus spiritus sanctus. Æternus pater, æternus filius, æternus spiritus sanctus: & tamen non tres æterni, sed unus æternus, &c. Sed & S. Augustinus libro de Trinitate 15. cap. 26. In illa summa trinitate, ait, quæ est Deus, interualla temporum nulla sunt, per quæ possit ostendi aut saltem requiri, Vtrum prius de patre natus sit filius, & postea de ambobus processerit spiritus sanctus. Et reliqua. Certè confitemur unum esse Deum patrem, filium & spiritum sanctum, & hunc esse æternum. Neminem ergo conturbet quòd ultimo loco ponitur spiritus. Nam cū Apostolus in Epistola ad Corinthios benedictionem contexat: Gratia Domini nostri Iesu Christi, inquit, & dilectio Dei & communicatio sancti spiritus sit cum omnibus uobis. Ultimo quidem loco commemorat spiritum: uerum idem Paulus, Diuisiones donorum sunt, ait sed idem spiritus: & diuisiones ministeriorum sunt, sed idem Dominus: & diuisiones operationum sunt, sed idem est Deus, efficiens omnia in omnibus: primo utique loco constituens spiritum, docens ordinem nominum non facere dignitatum differentiam. Hac ratione etiam in priore testimonio patri filium preposuit, non euertens ordinem, quem posuit apud Matthæum Dominus: sed trinitatis in honore æqualitatem ostendens. Quid enim clarius dicas, quàm quòd scriptura dicit spiritum sanctum sanctificare, renouare, regenerare, uiuificare ac saluare? Hæ autem sunt operationes soli deo congruentes. Ex operationibus itaq; manifestè agnoscimus spiritum sanctum esse Deum, eiusdem essentiæ & potentiæ cum patre & filio. Est enim spiritus sanctus ab æterno ante omnes creaturas uisibilis & inuisibilis creator non creatura, testificante Iob, Spiritus eius ornauit cœlos. Item Spiritus Dei condidit me, & afflatus omnipotentis indidit mihi uitam. Zacharias sacerdos pater Ioan. Baptiste, Benedictus, inquit, Dominus Deus Israel, quia

1. Cor. 13.

1. Corin. 12.

Matth. 28.

Iob. 26.
Lucæ 1.

quia fecit redemptionem populo suo: sicut loquutus est per os sanctorum, qui à seculo sunt, prophetarum suorum. At S. Petrus, Non uoluntate hominis, inquit al- ^{2. Pet. 1.} lata est prophetia, sed à spiritu sancto impulsus, loquuti sunt sancti Dei homines. Ex his obsecro quis non colligat spiritum sanctum esse Deum? Deus enim loquutus est per os prophetarum: & spiritus sanctus loquutus est per os prophetarum. Spiritus sanctus ergo Deus est. Idem Petrus spiritum sanctum disertis uerbis appellauit Deum, Ananiam accusans furti imò & sacrilegij. Cum enim dixisset: Cur se- ^{Act. 5.} duxit Satanas cor tuum, ut tu mentireris spiritui sancto? subiunxit protinus: Non es mentitus hominibus, sed Deo. Doctrinae S. Petri per omnia conueniunt quae docuit doctor gentium S. Paulus. Credentes enim nuncupauit templa Dei. Nescitis, inquit, quòd templum Dei estis, & spiritus Dei habitat in uobis? Et iterum, ^{1. Corin. 3.} Nescitis quòd corpora uestra sunt templum sancti spiritus quem habetis à Deo, & ^{1. Corin. 6.} non estis ipsi uestri iuris? Pro eodem usurpat Paulus, templum esse Dei, & templum esse sancti spiritus: consequitur ergo quòd spiritus sanctus sit Deus. Nam in Epistola ad Corinthios disertè spiritum sanctum nominat Deum. Posteaquam enim dixisset, Diuisiones gratiarum sunt, idem autem spiritus, genera quoque gratiarum ^{1. Corin. 12.} recensuisset, mox subiungit: Omnia autem haec operatur unus & idem spiritus, diuidens peculiariter unicuique sicut uult. At idem paulò ante dixerat, Diuisiones operationum sunt, sed idem est Deus, omnia efficiens in omnibus. Euidētissimum uerò diuinitatis spiritus sancti argumentum construit insignis eruditionis uir, Didymus Alexandrinus ille, ostendens item naturam eius alienam prorsus esse ab angelica. Nam i. lib. de Spiritu sancto sic interprete beato Hieronymo scriptum reliquit, Si spiritus sanctus unus de creaturis esset, saltem circumscriptam haberet substantiam, sicut uniuersa quae facta sunt. Nam etsi non circumscribantur loco & finibus inuisibiles creaturae, tamen proprietate substantiae finiuntur: spiritus autem sanctus cum in pluribus sit, non habet substantiam circumscriptam. Mittens quippe Iesus praedicatores doctrinae suae, repleuit eos spiritu. Neque uerò omnes Apostoli ad omnes gentes pariter sunt profecti, sed quidam in Asiam, quidam in Scythiam, & alij in alias dispersi nationes, secundum dispensationem illius quem secum habebant spiritus sancti, quomodo & Dominum dicentem: Vobiscum sum omnibus diebus usque ad consummationem seculi. His & illud congruit, Eritis mihi testes usque ad extremum terrae. Si ergo hi in extremis finibus terrae, ob testimonium Domini constituti, distabant inter se longissimis spatijs, aderat autem eis inhabitator spiritus sanctus, incircumscriptam habens substantiam, demonstratur angelica uirtus ab hoc prorsus aliena. Angelus quippe qui aderat, uerbi gratia, Apostolo in Asia oranti, non poterat simul eodem tempore adesse alijs in ceteris mundi partibus constitutis. Spiritus autem sanctus non solum seiunctis à se hominibus praesto est, sed & singulis quibusque angelis, principatibus, thronis, dominationibus inhabitator assistit, &c. Quis autem hic non colligat spiritum sanctum uerum esse Deum? Plurima alia diuinitatis uerae spiritus sancti argumenta collegit idem ille author, deinde S. pater Cyrillus, & absolute disputauit de ea S. Athanasius ad Theophilum lib. de Trinitate II. nos pauca haec haecenus recitata, obsequentibus ueritatemque amantibus satis fore credimus.

Haec qui firmiter credunt non mouentur ullis opinionibus & quaestionibus peregrinis, circa hoc negotium curiose imò impiè à malè feriatibus quibusdam indutis. Nam negasse quidam feruntur spiritum sanctum esse Dominum. Ministrum enim ac ueluti instrumentum quoddam patris & filij esse tradiderunt. Ceterum Christus Dominus spiritum sanctum sibi & patri coniunxit, tradens baptismi for-

Spiritus sanctus non est minister nec instrumentum.

nam. Dicit enim, Baptizantes eos in nomen patris, & filij, & spiritus sancti. Atque manifestum est creatori non coniungi in Baptismo creaturam, neque subseruiens esse quicquam in diuinitate. Itaque Synodus Constantinopolitana in Symbolo suo uoces aliquot spiritui sancto addidit, quibus errores aliquot elideret, Dominum & uiuificantem ipsum appellans. Nam cum Dominum uocat, filio aequat & excludit seruilem uel ministerialem conditionem, praeterea negat illum istorum esse instrumentum. Vnus est enim Dominus; non sunt plures domini. Et filius non est spiritus sancti Dominus; sed dominium est commune trium personarum, quae sunt unus tantum Dominus. Cum autem Dominus sit spiritus sanctus, certe non est ministerio serui addictus, sed dominica authoritate praeditus; nec ad opus exequendum subseruit, sed cooperatur patri & filio, adeoque ipse ut Dominus operatur.

Spiritus sanctus substantia est, non accidens.

*Rom. 8.
Galat. 5.*

Feruntur rursus alij quidam docuisse spiritum sanctum non esse substantiam uel personam, sed ueluti accidens, hoc est, concitationem uel agitationem aut motum pia ac renouata mentis. Ac reuera appellatur non raro mens nostra spiritu sancto illuminata spiritus: sed probè nobis distinguenda est creatura à creatore, & à substantia accidens. Distinxit beatus Apostolus nostrum spiritum à spiritu Dei sancto, cum dixit: Qui spiritu Dei ducuntur, hi sunt filij Dei. Idem spiritus testimonium reddit spiritui nostro, quod simus filij Dei. Ac idem Apostolus: Caro concupiscit aduersus spiritum, spiritus autem aduersus carnem. Quis autem non intelligat hominis mentem à spiritu sancto instructam hic appellari spiritum, non ipsam tertiam in adoranda triade personam? Et mens illa, quod illuminationem attinet, non ex semetipsa existit, sed proficiscitur à spiritu sancto illuminante, nec ab alio, quam qui est tertia persona in trinitate, sed non est ipsa persona spiritus sancti; sicut imaginatio proficiscitur ab anima, nec tamen est ipsa anima. Concitatio illa spiritus in nobis est accidens: Deus autem non est accidens neque accidenti permiscetur. Confitendum est itaque secundum scripturas, spiritum sanctum esse personam subsistentem, natura aut essentia patri & filio coaequalem, & idcirco adorandum nobis & glorificandum uti Deum uerum & creatorem: rursus pium uel sanctum motum in animis sanctorum per eundem spiritum sanctum excitatum, esse effectum & creaturam huius spiritus sancti, dicique spiritum sanctum, sed suo modo. Alioqui non negamus ipsum nobis sanctum spiritum promissum communicari: uerum pro modulo nostro & sicut ille uult. Quis enim hominum comprehendat plenitudinem aeterni & immensi Dei?

De processione spiritus sancti.

Porro de processione sancti spiritus ex patre & filio subtiliter & grauiter disputatum est à theologis. Quæritur enim an à patre solo, an & à filio procedat? In qua quaestione Latini à Gracis plurimum dissentire uidentur, Quæritur item qualis sit illa processio? Nos omissis pluribus curiosis quaestionibus, ea breuiter proferemus in medium, quae salutaria & scripturis sanctis sunt conuenientia. Quis enim curiosorum hominum quaestiones omnes, ociosorumque cogitationes & audaces & immundas, citra offensionem optimorum uirorum, & maxime simplicium auditorum excusserit? Spiritum sanctum à patre & à filio procedere, scriptura manifestè docet, quae apertissime ostendit illum utriusque uel amborum esse spiritum. Ille enim est de quo dicit Apostolus: Quoniam autem estis filij, misit Deus spiritum filij sui in corda uestra. At de eodem spiritu loquens filius, ait. Non enim uos estis qui loquimini, sed spiritus patris uestri loquitur in uobis. Rursus idem filius de spiritu sancto dicit: Quem ego mittam uobis à patre. Et iterum alibi, Quem mittet pater in nomine meo. Procedit ergo de utroque tam de patre quam de filio. Tamen enim alicubi legatur dictum esse de spiritu sancto, Qui à patre procedit, non negatur

*Spiritus sanctus procedit à patre & filio.
Galat. 4.
Lucæ 21.*

*Ioan. 15.
Ioan. 14.
Ioan. 15.*

gatur tamen & ex filij substantia procedere. Quinimò Cyrillus scriptor Græcus S. Ioan. Euangelium interpretans, & hunc ipsum locum enarrans lib. 10. cap. 33. Cum spiritum ueritatis, inquit, id est, suum (ipse enim ueritas est) paracletum appellauerit, ex patre ipsum procedere ait. Nam sicut filij spiritus est naturaliter, in ipso manens & per ipsum procedens, sic certè patris quoque spiritus est. Quibus autem spiritus communis est, ij profectò substantialiter disseparari non possunt. Rursus S. Augustinus in 15. de Trinitate lib. cap. 26. Qui potest intelligere, inquit, in eo quod filius dicit, Sicut habet pater uitam in semetipso, non sine uita existens *Ioan. 9.* tiam filio, uitam dedisse, sed ita eum sine tempore genuisse, ut uita quam pater filio gignendo dedit, coæterna sit uitæ patris, qui dedit, intelligat, sicut habet pater in semetipso, ut de illo procedat spiritus sanctus, sic dedisse filio, ut de illo procedat idē spiritus sanctus: & utrumque sine tempore, atque ita dictum spiritū sanctum de patre procedere, ut intelligatur quod etiam procedit de filio, de patre esse & filio. Si enim quicquid habet, de patre habet filius, de patre habet utique ut de illo procedat spiritus sanctus. Hæc ille. Ex istis omnibus colligimus, spiritum sanctum procedere tam à patre quam filio.

Iam quod modum processiois attinet, duplicem uidemus esse spiritus sancti processioem, temporariam & æternam. Temporaria processio ea est, qua sanctus spiritus procedit ad sanctificandos homines. Æterna uerò processio ea est, qua ab æterno ex deo emanat. Vtrobique ab utroque, tam patre quam filio procedit spiritus. Nec diuisim à patre in filium, & ex filio in creaturas procedit. Nam una eademque, indiuisa, inquam, est natura & substantia patris & filij, adde & coæterna. Temporaria processio ferè appellatur missio ac donum. Mittitur autem spiritus sanctus hominibus dupliciter, uisibiliter, uidelicet sub specie aliqua uisibili, utpote columbæ, & linguarum ignearum: sicuti datus legitur in euangelio & Actis Apostolorum Christo & Apostolis: inuisibiliter quotidie & singulis quasi momentis donatur fidelibus, irrigante gratia sua nos spiritu Christi & conferente nobis fidem, spem, & charitatem. Porro æterna processio spiritus sancti qua est substantia patris & filij procedit, perinde ut filij generatio ex patre, ineffabilis est. Vnde in euangelio non dicitur processit aut procedet, sed procedit. Ita enim ostendit dominus procedendi æternitatem ac coæternam & insectilem minimeque differentem esse substantiam patris, & filij, & spiritus sancti. S. Augustinus libro de Trinitate 15. cap. 26. Qui potest intelligere sine tempore generationem filij de patre, intelligat sine tempore processioem spiritus sancti de utroque. Si uerò quis roget, Cum spiritus sanctus ex substantia patris & filij procedat, qui fiat quod non dicatur filius? Respondeo, scripturam secundam personam appellare filium, ac testificari hunc unigenitum esse patris: eandem nuspian memorare spiritum sanctum generari uel filium dici. Nec aliud ad hanc quæstionem responderunt ueteres. Placet autē similitudo quæ hic profertur, si è duobus fontibus emanaret unus fluuius, rectè diceretur ab utroque profluere, neutrius tamen filius diceretur. His non sine fructu nec extra propositum coniungere uidebor Didymi disputata de Missione, ne quis perperam & secundum carnem intelligat quod interpretandum est ex fide spiritualiter. Spiritus sanctus consolator à filio mittitur, inquit, non secundum angelorum, aut prophetarū, aut apostolorum ministerium, sed ut mitti decet à sapientia & ueritate spiritum dei, indiuisam habentem cum eadem sapientia & ueritate naturam. Etenim filius missus à patre non separatur nec disiungitur ab eo manens in eo & habens illum in semetipso. Quin spiritus ueritatis supradictō modo missus à filio de patre egreditur, non aliunde ad alia transmigrans. Im-

Duplex est processio sancti spiritus.

Temporaria missio.

Æterna processio.

Vide Sermo. 3. huius Decadis circa initium.

possibile quippe hoc pariter & blasphemum est. Si enim hic spiritus ueritatis iuxta naturas corporum certo spatio circumscriptus est, alium deferens locum ad alium commigrauit: sed quomodo pater non consistens in loco ultra omnem corporum est naturam: ita & spiritus ueritatis nequaquam locorum sine clauditur, cum sit incorporealis, & ut uerius dicam excellens uniuersam rationalem creaturam. Quia ergo impossibile est & impium, ista quæ diximus in corporalibus credere, exire de patre spiritum sanctum sic intelligendum, ut se saluator de eo exisse testatur, dicens: Ego ex deo exiui & ueni. Et sicut loca & commutationes locorum ab incorporalibus separamus, sic & prolationes intus dico & foris ab intellectu alium natura discernimus: quia ista corporum sunt recipientium tactum & habentium uastitates. Ineffabili itaq; & sola fide noto sermone credendum est, saluatorem dictum esse exisse à deo, & spiritum ueritatis à patre egredi, &c. Alias quæstiones & intricatas & plurimas transeo intactas: religiosam & minimè curiosam, fidelem & non argutulam mentem in his requiro.

Vnus est spiritus sanctus.

1. Pet. 1.
2. Cor. 4.

Vnus est autem spiritus, quia unus atque idem est perpetuò Deus. Idem ergo spiritus est qui loquutus est patriarchis, prophetis, apostolis, & qui hodie loquitur nobis in ecclesia. Ideo enim Synodus Constantinopolitana sic confessa fidem legitur. Credo in spiritum sanctum dominum. Et mox, Qui loquutus est per prophetas in unam catholicam & apostolicam ecclesiam. Sumpta sunt hæc ex sancta scriptura. Nam S. Petrus disertis uerbis testificatur in prophetis fuisse spiritum Christi. Non autem alius fuit in Apostolis, quàm spiritus Christi. Et Paulus Apostolus, Habentes, inquit, eundem spiritum, sicut scriptum est, Credidi, propter quod loquutus sum: & nos credimus, ideo loquimur. Ex quo testimonio Tertull. infert, & orthodoxè quidem, Vnus ergo & idem spiritus est qui fuit in prophetis & apostolis. Eundem promittit in ecclesia semper futurum. Errauerunt ergo, & turpissimè quidem, quicunq; apud ueteres finxerunt alium deum & spiritum ueteris, alium uerò esse noui Testamenti. Didymus ille Alexandrinus, illustre ecclesiarum Græcia suo seculo lumen, libro de Spiritu sancto primo: Nec existimare, inquit, debemus spiritum sanctum secundum substantias esse diuisum, quia multitudo bonorum dicitur. Impassibilis enim & indiuisibilis atque immutabilis est, sed iuxta differentes efficientias & intellectus, multis bonorum uocabulis nuncupatur: quia participes suos non iuxta unam eandemq; uirtutem communionem sui donat, &c.

Incrementa spiritus.

4. Reg. 2.
Ioan. 3.
Matth. 13.
1. Sam. 16.

Cæterum incrementum uel augmentum, adde & diminutionem atque defectum habet in homine spiritus sanctus: non quòd in Deum (qui, sicut uulgò & rectè dicitur, nec maius nec minus recipit) cadat ulla mutatio, sed quòd homo pro modulo suo, prout spiritui sancto uisum est, spiritum copiosè & liberaliter, uel modicè aut parcè accipiat. Dabatur cœlitus duplex portio spiritus Helia Helisæo. Et de Salvatore nostro dicitur, quòd pater ei spiritum dederit, non ad mensuram. Nam alibi dicit ipse dominus, Quisquis habet, dabitur illi, & reddetur abundantior. Quisquis autem nō habet, etiam illud quod habet tolletur ab eo. Saul egregia acceperat charismata, quoniam uerò ea non excolebat, recessit ab eo spiritus dei bonus & successit ipsum affligens spiritus malus. Recedit autem spiritus dei sicut & accedit, non per interualla. Cum enim deserimur à domino, recedit à nobis spiritus Dei. Vnde orasse Dauidem legimus: Ne proicias me à facie tua, & spiritum sanctum tuum ne auferas à me. Et iterum, Spiritu principali confirma me.

De effectu & uirtute sancti spiritus.

Post ista inuestigandum uidetur, quis sit effectus, quæ uirtus sancti spiritus. Ineffabilis est autem uirtus omnipotentis & æterni dei, nemo ergo ad plenum exposuerit quæ sit uirtus sancti spiritus. Dicam tamen aliquid, ea proferens in medium,

diū, quæ in hominibus maximè operatur. Alioqui enim per spiritum pater operatur omnia, per ipsum creat, sustinet, mouet, uiuificat, uegetat & conseruat omnia: per eundem fideles suos regenerat, sanctificat & varijs charismatibus donat. Vnde in descriptione eius superius posita, quatuor membrjs præcipuas eius uirtutes in hominibus sese exerentes cõplexus, dixi illum fideles illuminare, regenerare, sanctificare & adimplere bonis omnibus. Quæ ut intelligantur rectius, proderit in primis spiritus sancti nomina uel appellationes, quas ipsi sancta tribuit scriptura, utcunque exponere: deinde unum & alterum ueteris & noui Testamenti locum de uirtute sancti spiritus editum recitare. Principiò nuncupatur spiritus dei sanctus, quia sanctificantur omnes per hunc quotquot sanctificantur creaturæ. Sanctificat gratia sua pater cœlestis, sed per sanguinem dilecti filij sui, sanctificatio autem per spiritum in nos deriuatur & obsignatur. Sanctificat ergo nos sancta trinitas unus Deus. Impium est ergo sanctificationem rebus tribuere alienis aut peregrinis. Impium est purificationem & iustificationem à creatore ad creaturas transferre. Dicitur præterea sanctus ad discretionem aliorum spirituum. Legimus enim in scripturis fuisse & esse spiritum mundi, spiritum uertiginis, spiritum fornicationis & immunditiæ, spiritum superbiam. Ab his omnibus secernitur spiritus sanctus, qui inspirat huius mundi contemptum, qui aperit scripturas & confirmat in ueritate, qui purificat corda, & castas reddit conseruatq; mentes, qui denique humiles & mites efficit, & omnem à nobis malitiam dispellit. Idem spiritus sanctus appellatur Dei & filij spiritus. Dei quidem, ad differentiam spiritus sathanæ. Filij autem, quia filij proprius & naturalis est: quem nobis quoque communicat, ut simus etiam nos filij Dei. Paulus enim, Templum Dei uos estis, inquit, & spiritus Dei habitat in uobis. Item, Si quis spiritum Christi non habet, hic non est eius. Et iterum: Quoniam estis filij, emisit Deus spiritum filij sui in corda uestra, clamantem. Abba pater.

Spiritus sanctus.

Spiritus sanctus Dei & filij spiritus.

*1. Cor. 3.
Rom. 8.*

Porro Paracletum nuncupauit ipse dominus noster spiritum sanctum in historia euangelica, dicens: Ego rogabo patrem & alium paracletum dabit uobis, ut maneat uobiscum in æternum, spiritum ueritatis, quem mundus non potest accipere: quia non uidet eum, nec nouit eum. Vos autem cognoscitis eum, quia apud uos manet, & in uobis erit. Significat autem *παράκλητος* & consolatorem, impulsorem, exhortatorem, aduocatum siue patronum, qui clientis causam agit. Est enim spiritus sanctus omnium fidelium os, oculus, cor, consilium, manus & pes. Didymus in opere suo de Spiritu sancto, Ab operatione spiritui sancto, inquit, nomen imponens, Consolatorem uocat. Quia non solū consolatur eos quos se dignos repperit, & ab omni tristitia & perturbatione reddit alienos, uerū incredibile quoddam gaudium & hilaritatem eis tribuit, in tantū ut possit quis Deo gratias referens quod tali hospite dignus habeatur, dicere: Dedisti latitiam in corde meo. Sempiterna quippe latitia in eorum corde uersatur, quorum spiritus sanctus habitator est. Certè solus spiritus sanctus securas & tranquillas reddit hominum cõscientias coram deo in iustificationis negotio, & in omnibus mundi tentationibus. Paulus, Hoc solum cupio discere à uobis, ait, an ex operibus legis accepistis spiritum, an ex prædicatione fidei? Apostoli uirgis cæsi, cum donati essent spiritu sancto, & consolatorem illum præsentem haberent in animis, ibant gaudentes à conspectu concilij, quod digni habiti essent, ut pro nomine Christi afficerentur contumelia. Ita legimus in historia ecclesiastica, martyres Christi spiritu sancto plenos in ipsis tormentis & mortibus acerbissimis, patientissimos fuisse ac deo cecinisse hymnos & egisse gratias. Præterea audiuius spiritum sanctum à domino nuncupari spiritum

Spiritus sanctus paracletus.
Ioan. 14.

Consolator & gaudium spiritus sanctus.

*Spiritus sanctus
est spiritus ueritatis.
Ioan. 16.*

Ioan. 14.

Spiritus promissionis.

Galat. 3.

*Spiritus sanctus
est digitus dei.
Lucæ 11.
Matth. 12.*

Exod. 8.

*Vide quæ dicta
sunt contra Anthropomorphi-
tas Ser. 3. huius
Decadis.*

*Spiritus aqua
et fons uiuus.
Isaie 44.*

Ioan. 7.

tum ueritatis. Nam & alibi eundem eodem ornat nomine, dicit enim: Cum uenerit paracletus, quem mittam ego uobis à patre, spiritus ueritatis, qui à patre procedit, ille testimonium perhibebit de me. Veritatis autem spiritus dicitur, quia est alius spiritus hypocriticus, spiritus impostor, erroneus & mendax in ore omnium pseudoprophetarum. Hic spiritus noster synceritatem, candorem & integritatem operatur in suis cultoribus. Hos docet omnem ueritatem: nam dominus noster a libi in euangelio, Paracletus ille, dicit, qui est spiritus sanctus, quē mittet pater nomine meo, ille uos docebit omnia, & suggeret uobis omnia quaecumque dixi uobis. Omnem itaque ueritatem credendam, omnemque pietatem Apostolos docuit spiritus ueritatis: & illi eandem plenè tradiderunt ecclesiæ. Nam spiritus sanctus omnes discutit errores, omnes extinguit hæreses, omnem idololatriam & impietatem profligat, & ueram fidem cordibus infundit, & ueram religionem in ecclesia confirmat. Exempla plurima suppeditant Acta apostolorum. Ex hoc Dei spiritu futura prædixerunt Apostoli, inter alia Antichristum & corruptionem postremi seculi nostri adumbrantes, admonentesque ecclesiam, ne electi erroribus & impietatibus blasphemis implicentur.

Spiritus autem promissionis ideo uocatur, quia patribus à deo per prophetas apostolis, omnibusque doctrinæ apostolorum credentibus per Christum promissus, tandem & plenissimè per eundem est exhibitus. Admonet hoc uocabulum pios, ne suis meritis ingens ac salutare hoc donum acceptum sed meræ dei gratiæ ferant. Et promissione diuina conceditur imò donatur nobis spiritus sanctus: unde consequens est omnia dona esse gratuita: id quod Apostolus Paulus unicè in suis epistolis urget & inculcat, ad Romanos maximè & Galatas.

Apud Lucam dicit dominus: Si digito Dei eicio dæmonia, profectò peruenit ad uos regnum Dei. Eadem uerba reddens beatus Matthæus: Quod si spiritu dei, inquit, eicio dæmonia, ergo peruenit ad uos regnū Dei. Proinde spiritus sanctus appellatur digitus Dei, nimirū uirtus & potentia Dei. Digitis operantur opifices, diuina uirtute per spiritum, inquam, suum operatur opera sua Deus: cuius potentia tanta est, ut uel minimus (liceat sic loqui) eius digitus omnem in mundo excelsat uirtutem. Id apparuit in magis illis Ægyptiacis. Didymus parabolam refert ad unitatem substantiæ diuinæ, & diligenter ac in loco admonet, ne propter corporalia corporalem rerum spiritualium sensum nobis confingamus. Dicit enim, Verum caue ne ad humilia deiectus, depingas in animo tuo corporalium actuum diuersitates, & incipias tibi magnitudines & inæqualitates & cætera corporum maiora & minora membra confingere, dicens digitum à manu, & manum ab eo cuius est manus, multis inæqualitatibus discrepare, quia de incorporalibus nunc scriptura loquitur, unitatem tantum uolens non etiam mensuram substantiæ demonstrare. Sicut enim manus non diuiditur à corpore, per quam cuncta perficit & operatur, & in eo est cuius est manus: sic & digitus non separatur à manu cuius est digitus. Itaque reijce inæqualitates & mensuras cum de deo cogitas, & intellige digiti & manus & totius substantiæ unitatem: quo digito lex in tabulis lapideis scripta est. Hæc ille.

Iam per aquam & fontem uiuum siue perennem spiritus sanctus adumbratus legitur, cum in prophetis, tum in apostolicis literis. Effundā, inquit apud Isaïam dominus, aquas super sitientem, & flumina super aridam. Et per interpretationem mox addit: Effundam spiritum meum super semen tuum, & benedictionem meam super stirpem tuam. Et in euangelio dicit dñs: Si quis sitit, ueniat ad me, & bibat. Qui credit in me, sicut dicit scriptura, flumina de uentre eius fluēt aquæ uiuæ. Quibus

Quibus per expositionem subiungit historicus sacer: Hoc aut dixit de spiritu, quē accepturi erant credentes in eum. Aqua certē fecundat steriles agros, purificat coinquinata, sitientes potat, & æstuantē refrigerat. Fecundat & gratia sancti spiritus steriles mentes ad fructificandum deo uiuenti. Purificantur corda nostra ab omni immunditia per eandē gratiam, eadem sitim extinguit animæ, afflictamq; refocillat, & omne eius explet desiderium.

Ignis simplex est & purus, & alia quidem corpora consumit, alia uerò purgatio ra mundioraq; reddit, calefacit item, & multas in homine operationes habet utiles & necessarias. Rectē ergo per ignem adumbratur nobis spiritus sanctus. Nam purus est & simplex, impios consumit, fideles à sordibus peccatorum expurgat, redditq; amore Dei & proximi flagrantē, sui nimirum amoris igne accendens. Cum hic apostolis dabatur in die Pentecostes, audiebatur sonitus, tanquam impetu uenientis flatus uehementis: qua re significabatur pietatis doctrinam diuinā uirtute & mirabili successu per totum orbem fore propagandam, nequicquam renitente toto mundo. Ventus enim nemine obsistente totum perflat orbem, omnia penetrat, à nemine excludi potest: miros item habet in corporibus effectus mutandi. Et spiritus sanctus penetrat omnia, corda emollit, & ex intractabilibus ferocibusq; facit obsequentissimos modestissimosq;. Apparent supra capita apostolorum discipulorumq; donatorum spiritu sancto, igneæ linguæ, significantes utiq; operationem eius, cuius erant symbola sancti spiritus. Nam erudit hic, exhortatur & consolatur fideles; neq; frigidis sed igneis linguis instruit fideles. Fulminare enim & tonare uisi sunt apostoli, non loqui cum prædicarūt euangelium: quo nomine & quidam illorum nuncupati sunt ab ipso saluatore Filiū tonitrui. Præterea apparet sanctus spiritus super dei filio, iam à Baptista Ioanne tincto, sub specie columbæ. Nam hæc mitis ac mansueta est, felle carens. Quæ locum dedit prouerbio, Columbini mores: item Columbina simplicitas, & Māsuētiō columba. Est enim columba in auibus, quod ouis in quadrupedibus, quæ nulli animalium meditatatur noxam: unde & Christus appellatus est Ouis uel Agnus. De spiritu itaq; dei, Sapiens ille rectissimē, Spiritus sapientiæ, inquit, sanctus est, unicus, multiplex, subtilis, disertus, illustris, incontaminatus, certus, suauis, boni studiosus, acutus, prohiberi nescius, beneficus, benignus, stabilis, securus, omnipotens, perspicuus omnia, omnesq; spiritus rationales & mundos, etiā subtilissimos penetrans.

Rursus appellantur spiritu sancto donati uncti à domino. Nam spiritus sanctus dicitur & oleum & unctio. Nisi enim à spiritu sancto irrigati fuerimus, steriles contabescimus. Destituimur enim humore uitali cœlestiq;, & natura nostra semper arescimus. Vnctionis autem huius celebris typus præcessit in unctione ceremoniali regum & sacerdotum. Beatus Ioannes, Et unctio, inquit, quam uos accepistis ab eo, manet in uobis: & non necesse habetis ut quisquam doceat uos, sed sicut ipsa unctio docet uos de omnibus, & uerax est, & non mendacium. Et sicut docuit uos, manete in ea. Nam & apud Ieremiam dicit dominus: Hoc est testamentum quod disponam domui Israel post dies istos, dabo leges meas in mentem illorum, & in corde illorum inscribam eas, & ero illis Deus, & ipsi erunt mihi populus. Et non docebit quisq; proximum suum, & unusquisq; fratrem suum, dicens: Cognosce dominum. Nam omnes cognoscent me à minimo ad maximum. Quoniam placatus ero super iniustitijs eorum & peccatis eorum, & iniquitatum illorum non recordabor amplius. Verum ostendimus paulò ante, spiritum sanctum esse uniuersalem omnis ueritatis doctorem. Huc pertinere uidetur quod S.

Spiritus sanctus ignis.

Spiritus sanctus flatus uehementis. Act. 2.

Spiritus sanctus lingua ignea.

Spiritus sanctus columba. Matth. 3. Isaia 52. Ioan. 1. Act. 8. Sapient. 7.

Spiritus sanctus oleum & unctio.

1. Ioan. 2.

Ierem. 31. Hebr. 8.

2. Cor. 1.
Spiritus sanctus
arrhabeo
hereditatis
nostrae.

1. Ioan. 4.
1. Ioan. 2.

Spiritus sanctus
charitas.

Rom. 5.

Operationes S.
spiritus.
Isaie 11.

Sapientia.
Intelligentia.
Consilium.
Fortitudo.

Scientia.
Timor.

Rom. 8.
Spiritus mortificat
et uiuificat.

Paulus, Deus est, inquit, qui unxit nos, qui etiam obsignauit nos, deditque arrham spiritus in cordibus nostris. Nunc enim non tantum unctio nuncupatur spiritus sanctus, sed & obsignatio uel arrhabeo salutis nostrae. *Ἀρρα* enim siue *ἀρραβών* pars est solutionis, quae fidem facit totius summæ persoluentæ, pignus scilicet. Et spiritus quidem sanctus testificatur nunc, imò & obsignat certificatque quod simus filij dei, aliquando autem recipiendi in æternam hereditatem. Paulus enim rursus, Obsignati estis, inquit, spiritu promissionis sancto, qui est arrhabeo hereditatis nostrae, in redemptionem acquisitæ possessionis, in laudem gloriæ ipsius. Ephes. 1. cap. Ea certificatio mirum in modum confirmat mētes fidelium in tentationibus consolaturque, animat præterea ad patientiam in aduersis, & ad sanctimoniam uitæ. Hinc enim dixit beatus Ioannes, Vos ex deo estis filioli, & uicistis eos, quoniam maior est qui in uobis est, quam qui in mundo. Et iterum, Nunc filij dei sumus, & nondum apparuit quod futuri sumus: scimus autem, quoniam si apparuerit, similes ei erimus: quoniam uidebimus eum sicuti est. Et omnis qui habet hanc spem in eo, purificat se, sicut & ille purus est.

Quemadmodum uero spiritus sanctus nexus est ineffabilis, quo æterna concordia inseparabiliter sibi iunctæ sunt tres personæ: Ita idem indissolubili uinculo sponsam Christi coniungit sponso suo, omniaque mystici corporis membra sempiterno fœdere inter sese copulat. Nam sicut membra corporis nostri coherent integra, beneficio spiritus, ita corpus Christi mysticum conglutinatur per spiritum sanctum. Nihil itaque mirum est, quod hic charitatis nomine insignitur, qui & cordibus nostris charitatem infundit.

Vtuncque uero ex his nominibus sancti spiritus intelligi possit operatio eius, subiiciam tamen testimonia scripturæ aliquot, ex quibus plenius intelligatur uirtus siue effectus eius, in nobis maximè. Isaïas in principio ferè libri sui describens personam regis Messiae, inter alia dicit: Super quo spiritus domini requiescet, spiritus sapientiæ & intelligentiæ, spiritus consilij & fortitudinis, spiritus scientiæ & timoris domini, & faciet eum spirare timorem domini. Multis quidem membris expositis, nondum omnes spiritus uires enarrauit. Proinde non est quod in archu septenarijque angustias cum uulgo concludamus uires uel dona spiritus. Audiuius enim hætenus esse spiritum promissionis, doctrinæ, humilitatis & mansuetudinis, &c. Quibus insuper hæc quoque plurima connumerantur. Est enim spiritus sapientiæ. Hæc uero quanta sit & quam latè pateat, claret uel in rebus Solomonis. Sapientiæ coniungitur intelligentia, quæ dicitur esse praxis & applicatio sapientiæ, rebus, locis, temporibus & personis attemperata. Consilium autem requiritur & datur in rebus dubijs, & quid commodissimè agamus ostendit. Fortitudo uires ac constantiam sufficit exequendi perficiendique, adde & patienter perferendi, quæ consilio uel facienda uel patienda esse didicimus. Iam uero Scientia experientia est, longo usu & tempore conquisita. Accedit his Timor, id est, pietas & uera religio, ad quam nisi referamus omnia nostra dicta & facta, nihil proderit sapientia, intelligentia, consilium, fortitudo & scientia. Breuiter, quisquis spiritu dei fuerit donatus, spirabit timorē Dei quicquid uel dicet uel faciet, denique omnia dicet & faciet ad gloriam Dei: & omnia quidem hæc ex unico spiritus sancti fonte gratis & plenè hauriuntur.

Paulus Apostolus in epistola ad Romanos mirificam sancti spiritus uim in nobis operantē renatis describens, dicit: Qui in carne sunt, deo placere non possunt. Vos autem non estis in carne, sed in spiritu, siquidem spiritus dei habitat in uobis. Quod si quis spiritum Christi non habet, hic non est eius. Porro si Christus in uobis

uobis est, corpus quidem mortuum est propter peccatum, spiritus autem uita est propter iustificationem. Quod si spiritus eius qui excitauit Iesum à mortuis, habitat in uobis, is qui excitauit Christum ex mortuis, uiuificabit & mortalia corpora uestra propter ipsius spiritum inhabitantem in uobis.

Idem Apostolus in Epistola ad Corinthios docet per reuelationem sancti spiritus, mysterium regni Dei nobis quàm manifestissimè esse reclusum. Nobis Deus reuelauit, inquit, per spiritum suum. Spiritus enim omnia scrutatur, etiam profunditates Dei. Quis enim hominum nouit ea quæ sunt hominis, nisi spiritus hominis qui est in eo? Sic & ea quæ sunt Dei, nemo nouit, nisi spiritus Dei. Nos uerò non spiritum mundi accepimus, sed spiritum qui est ex Deo, ut sciamus quæ à Christo donata sunt nobis. Huc pertinent hæc Domini saluatoris ex sacrosancto Euangelio uerba: Veritatem dico uobis, expedit uobis ut ego uadam. Nisi enim abiero, consolator ille non ueniet ad uos: sin autem abiero, mittam illum ad uos. Et cum uenerit ille, arguet mundum de peccato, & de iustitia, & de iudicio. De peccato quidem, quia non credunt in me. De iustitia uerò, quia ad patrem uado, & post hæc non uidebitis me. De iudicio autem, quia princeps huius mundi iam iudicatus est. Manifestum est autem omnibus hisce capitibus comprehendere totam ueræ religionis summam, quam plenissimè tradidit ecclesiæ sanctus spiritus. Quod & in expositione nominum sancti spiritus attigimus. Sequitur in Euangelio: Ad hæc, multa habeo quæ uobis dicam, sed non potestis portare nunc. Cum autem uenerit ille qui est spiritus ueritatis, ducet uos in omnem ueritatem. Non enim loquetur à semetipso, sed quæcunq; audierit loquetur, & quæ futura sunt annuntiabit uobis. Ille me glorificabit: quia de meo accipiet & annuntiabit uobis. Cum autem constet uenisse spiritum sanctum, claret eundem Apostolos in omnem induxisse ueritatem: adeo ut quod cum horum scriptis non congruit, meritò suspectum sit de mendacio. Alioqui non dubito quin hodie loquatur per suos in ecclesia: cæterum absque controuersia est, spiritum sanctum sibi ipsi minimè contradicere. Ac futura per spiritum reuelata esse Apostolis, in explicatione nominum sancti spiritus attigimus. Nec dubium est quin adhuc multa sanctis in ecclesia reuelet, quæ uidelicet pertinent ad conseruationem ueritatis Christianæ & sanctorum.

Rursus legimus in Epistola Pauli ad Corinthios: Vnicuique datur manifestatio spiritus ad id quod expedit. Huic quidem per spiritum datur sermo sapientiæ, alij uerò sermo scientiæ secundum eundem spiritum, alij fides in eodem spiritu, alij dona sanationum per eundem spiritum, alij facultates potentiarum, alij autem prophetia, alij uerò discretionum spirituum, alij genera linguarum, alij uerò interpretatio linguarum. Sed omnia hæc efficit unus & idem spiritus, distribuens singula cuique pro ut uult. Clara sunt hæc omnia, nec ulla prolixiore indigent expositione. Magna uerò & euidentia sunt hæc dona sancti spiritus, quibus si ea quoque subiiciamus quæ idem Apostolus de eodem Dei spiritu contexit, uela colligemus. Fructus spiritus est, ait, charitas, gaudium, pax, tolerantia, comitas, benignitas, fides, mansuetudo, temperantia. Hæc, inquam, & omnes alias uirtutes inserit animis piorum, plantat, conseruat, tueturq;, & ad iustam frugem producit spiritus sanctus, qui operatur omnia bona in omnibus.

His omnibus epilogi uice subiiciemus modò elegantissimam Tertulliani de Spiritu sancto disputationem. Ea talis est, Quoniam Dominus in cælum esset abiturus, paracletum discipulis necessariò dabat, ne illos quodammodo pupillos, quod minimè decebat, relinqueret, & sine aduocato & quodam tutore defereret. Hic est enim qui ipsorum animos mētesq; firmauit, qui Euangelica sacramenta distin-

1. Cor. 2.

spiritus plenè
reuelat mysteria
regni Dei.

Ioan. 16.

spiritus ex sua
tura prædicat.

Act. 11.

1. Cor. 12.

Varia dona &
munera spiritus
sancti.

Galat. 5.

Elegans disputa-
tio Tertul. de
spiritu sancto.

xit, qui in ipsis illuminator rerum diuinarum fuit, quo confirmati, pro nomine Domini nec carceres nec uincula timuerunt, quinimò ipsas seculi potestates & tormenta calcauerunt, armati iam scilicet per ipsum atque firmati, habentes in se dona quæ hic idem spiritus ecclesiæ Christi sponsæ quasi quædam ornamenta distribuit & dirigit. Hic est enim qui prophetas in ecclesiâ constituit, magistros erudit, linguas dirigit, uirtutes & sanitates facit, opera mirabilia gerit, discretionem spirituum porrigit, gubernationes contribuit, consilia suggerit, quæque alia sunt charismatum dona componit & digerit: & ideo ecclesiâ Domini undique & in omnibus perfectam & consummatam facit. Hic est qui in modum columbæ, posteaquàm Dominus baptizatus est, super eum uenit & mansit, habitans in solo Christo plenus & totus, nec in aliqua mensura aut portione mutilatus, sed cum tota sua redundantia cumulatè admissus, ut ex illo delibationem quandam gratiarum ceteri consequi possint, totius sancti spiritus in Christo fonte remanente, ut ex illo donorum atque operum uenæ ducerentur, spiritu sancto in Christo affluenter habitante. Hoc etenim prophetans Isaias aiebat: Et requiescit, inquit, super eum spiritus sapientiæ & intellectus, spiritus consilij & uirtutis, spiritus scientiæ & pietatis, & impleuit eum spiritus timoris Dei. Hoc idem atque ipsum & alio in loco ex persona ipsius Domini: Spiritus Domini super me, propter quod unxit me, euangelizare pauperibus misit me. Similiter Dauid: Propterea unxit te Deus tuus oleo lætitiæ à consortibus tuis. De hoc Apostolus Paulus: Qui enim spiritum Christi non habet, hic non est eius. Et, Vbi spiritus Domini, ibi libertas. Hic est qui operatur ex aquis secundam natiuitatem, semen quoddam diuini generis, & consecrator cœlestis natiuitatis, pignus promissæ hereditatis, & quasi chirographum quoddam æternæ salutis, qui nos Dei faciat templum, & nos eius efficiat domum: qui interpellat diuinas aures gemitibus ineloquacibus, aduocationis implens officia, & defensionis exhibens munera, inhabitator corporibus nostris datus, & sanctitatis effector, qui id agens in nobis ad æternitatem & ad resurrectionem immortalitatis corpora nostra producat, dum illa in se assuefacit cum cœlesti uirtute misceri, & cum spiritus sancti diuina æternitate sociari. Erudiuntur enim in illo & per ipsum corpora nostra ad immortalitatem proficere, dum ad decreta ipsius discunt se moderanter temperare. Hic est enim qui contra carnem desiderat, quia caro contra eum repugnat. Hic est qui inexplebiles cupiditates coercet, immoderatas libidines frangit, illicitos ardores extinguit, flagrantem impetum uincit, ebrietates reijcit, auaritias repellit, luxuriosas comestationes fugit, charitates necit, affectiones constringit, sectas repellit, regulam ueritatis expedit, hæreticos reuincit, improbos foras expuit, Euangelia custodit. De hoc item Apostolus: Non enim spiritum mundi accepimus, sed spiritum qui ex Deo est. De hoc exultat, & dicit: Puto autem quia & ego spiritum Dei habeo. De hoc dicit: Et spiritus prophetarum prophetis subiectus est. De hoc refert, Spiritus autem manifestè dicit quia in nouissimis temporibus recedent quidam à fide, attendentes spiritibus seductoribus, doctrinis demoniorum in hypocrisi loquentium mendacia, cauteriatam habentium cōscientiam suam. In hoc spiritu positus nemo unquam dicit anathema Iesum, nemo negauit Christum Dei filium, aut repudiavit creatorem Deum, nemo contra scripturas ulla uerba sua depromit, nemo alia & sacrilega decreta constituit, nemo diuersa iura conscribit. In hunc quisquis blasphemauerit, remissionem non habet non tantum in isto seculo, uerumetiam nec in futuro. Hic in Apostolis Christo testimonium reddit, in martyribus constantem fidem religionis ostendit, in uirginibus admirabilem continentiam signatæ charitatis includit, in cæteris incorrupta & inconta-

Isaie 11.

Isaie 61.

Psalm. 45.

Rom. 8.

2. Cor. 3.

Rom. 8.

1. Cor. 7.

1. Cor. 14.

1. Tim. 4.

1. Cor. 12.

Marci 3.

incontaminata doctrinæ Dominicæ iura custodit, hæreticos destruit, peruersos corrigit, infideles arguit, simulatores ostendit, improbos quoque corrigit, ecclesiam incorruptam, & inuiolatam perpetuæ uirginitatis & ueritatis sanctitate custodit. Hactenus Tertullianus.

Vsq̃ue huc uerò non sine tremore differuimus de adorandæ trinitatis sacro-
sancto mysterio, de patre, filio, & spiritu sancto, quod ex scripturis didicimus: ac
subsistimus hic tandem, unitatem hanc in trinitate & trinitatem in unitate suppli-
ces adorantes. Retineamus autem in animis, & confiteamur distinctionem scri-
pturis manifestissimè notatam, & unitatem summa nobis commendatam diligen-
tia. Nam in scriptura patri principium agendi rerumq̃ omnium fons & scaturi-
go tribuitur: filio sapientia, consilium, ipsaq̃ in rebus agendis dispensatio: spiritui
autem assignatur uirtus & efficacia actionis. Caueamus tamen ne propter distin-
ctionem dissociemus unitatem substantiæ diuinæ. Vnus eim Deus est, in quo sunt
illæ proprietates. Vnus est ignis, licet in eo tria cernantur, lumen, splendor & ca-
lor. Simul enim hæc exurgunt, simul consistunt: non præit lumen splendorem,
neque hic calorem. Et quanquam aliud tribuatur lumini, aliud splendori, aliud ca-
lori, inseparabiliter tamen operantur. Itaq̃ cum legimus Deum creasse mundum,
intelligimus patrem ex quo omnia, per filium, per quem omnia, in spiritu sancto,
in quo omnia, condidisse mundum. Et cum legimus filium pro salute nostra in-
carnatum, passum, mortuum & resuscitatum esse, credimus patrem, & spiritum
sanctum (etsi exortes fuerint incarnationis & passionis) salutem tamen illam no-
stram operatos per filium, quem credimus ab illis nunquam fuisse separatum.
Cumq̃ peccata remitti dicuntur in spiritu sancto, credimus hoc beneficium & o-
mnia alia beatitudinis nostræ beneficia inseparabiliter conferri ab uno, solo, uero,
uiuo & æterno Deo, qui est pater, filius, & spiritus sanctus. Cui laus & gratiaruma-
ctio in secula seculorum, Amen.

*De bonis & malis spiritibus, hoc est, de Angelis Dei sanctis, & Diabolis siue cacodæ-
monibus eorumq̃ operationibus.* SERMO IX.

VBI VNGAM Sermoni de Spiritu sancto, disputationem de Bonis &
malis spiritibus, hoc est, de Angelis Dei sanctis, & diabolis siue cacodæmo-
nibus, eorumq̃ operationibus. De quibus cum scriptura sancta certam
utilemq̃ modis omnibus doctrinā nobis tradat, minimè uidetur ea nobis negligen-
da, sed qua possumus fide & diligentia proferenda in lucem. Turpe foret pietatis
studioso, angelorum bonorum & malorum ingenia ignorare, quorum tam fre-
quens fit mentio in sacris literis: imò perniciosum esset nescire quales sint diaboli,
qui eo nomine nos depredarentur, nobisq̃ imponerent facilius. Dicemus autem
primùm de beatis angelis, deinde de cacodæmonibus.

Angeli uocabulum dicunt officij non naturæ, ac commune esse Latinis & Angelis.
Græcis à quibus mutuatum est, significare autem nuncium, missum uel legatum:
ideoq̃ latius patere. Dicuntur enim angeli prædicatores ueritatis, ut apud Mala-
chiam & Apostolum Paulum. Sunt enim legati Domini exercituum. Sanctus
Petrus cacodæmones quoque uocauit angelos: sicut & Paulus, dicens fideles iu-
dicaturos aliquando angelos, & sibi immisum esse angelum satanæ: peculiari-
ter tamen appellat scriptura beatos Dei spiritus, ministros, cursores & satellites,
angelos.

Et esse quidem angelos negarūt Sadducei, Lucas enim in Actis Apostolorum, Angelos esse.

Matth. 12.

A. Steuch. de
perenni philo-
sophia lib. 8.
cap. 6. & 8.Quid sint an-
geli.Creatos esse
angelos.
Hebr. 1.
Colos. 1.Quando crea-
ti angeli.Angelos esse
substantias.Hebr. 1.
Matth. 22.

Sadducæi, inquit, dicunt non esse resurrectionem, neque angelum, neque spiritum: Pharisei utraque confitentur. Ac reuera angelos esse testatur uniuersa scriptura, quæ pluribus in locis commemorat ipsos apparuisse hominibus, eisq; annunciasse uoluntatem Dei, uel perfecisse alias opus eiusdem. Certè Dominus Iesus contra Sadducæos disputans in Euangelio: Erratis, inquit, nescientes scripturas, neque uirtutem Dei. In resurrectione enim neque matrimonium contrahunt, neque elocantur, sed sunt sicut angeli Dei in cælo. Credamus ergo angelos esse. Meritò enim plus fidei apud nos inuenire debet filij Dei autoritas, & scripturarum sanctarum ueritas irrefragabilis, quàm omnium Sadducæorum impiorumque hominum nugæ. Quid quod gentiliū poetæ & philosophi angelos, quos ipsi deos appellant, confessi sunt? Fingentes enim deos à iustis hominibus in specie hominum hospitio exceptos esse, nihil aliud doctissimis quibusque sensisse uidentur, quàm quod sacrae literæ commemorant, Abrahamum & Loth angelos referentes homines peregrinos excepisse hospitio. Vt cunque uerò hoc habeat, certissimum est ex scriptura sancta & ex uaria experientia esse beatos Dei spiritus, hoc est, angelos bonos.

Qualis autem sit natura angelorum, exactè non potest ab ullo mortalium explicari. Plurima enim sunt in ordine creaturarum, quarum natura non potest ad amissim & perfectissimè exponi: possunt tamen ut cunque ad captum nostrum ad umbrari. Sunt ergo qui dicunt angelos esse spiritus bonos, ministros, ignitæ naturæ, in ministerium Dei & bonorum conditos. Alij, Angeli sunt, inquit, cœlestes spiritus, quorum ministerio & obsequio utitur Deus ad exequenda omnia quæ decreuit. Proinde non uidebimur toto aberrare cælo, si dicamus: Angelos esse spiritus bonos, cœlestes, substantias inquam incorruptibiles, in ministerium Dei & hominum conditos.

Creatos esse angelos à Deo, testatur scripturæ propheticae & Apostolicae. Nam Paulus illud citat Davidis: Qui creat angelos suos spiritus, & ministros suos flammam ignis. Idem Apostolus, per Christum, inquit, creata sunt omnia, quæ in cœlis sunt & in terra, uisibilia & inuisibilia, siue throni, siue dominationes, siue principatus, siue potestates. Proinde nugas protulerunt hæretici, dicentes angelos creationis effectores & coæternos esse Deo uniuersorum. Deus enim in tempore & angelos & omnes alias creaturas condidit per filium.

De tempore autem quando creati sunt, cum luce ne ante hominem, an post hominem uniuersaque Dei opera, dicat qui potest tacente scriptura certum aliquid pronunciare. Veteres scripturarum interpretes Epiphanius & Augustinus, disertè & uerè fatètur de illo nihil in scripturis esse traditum. Quod autem scripturis non est traditum, non sine periculo quidem inquiritur, at sine periculo ignoratur. Satis est agnoscere angelos esse conditos, quando cunque demum constet conditos. Agamus Deo potius gratias, quòd humano generi tam præstantes creauit ministros. Viuamus in conspectu sanctorum Dei angelorum uitam sanctam & angelicam. Vigilemus ne sub bona specie nobis imponat, qui se transfigurat in angelum lucis.

Iam quales creaturæ sint angeli porrò uidendum erit: Sunt cœlestes spiritus substantiæq; incorruptibiles expeditissimæq;. Significanter dicimus angelos esse substantias, hoc est, creaturas essentia præditas. Quidam enim negant eos esse substantias, in propria essentia subsistentes: fingunt enim angelos nihil aliud esse quàm qualitates, motus seu inspirationes bonarum mentium. Sed scriptura canonica appellat eos ministros. Saluator noster dicit resuscitados similes futuros angelis

angelis Dei. S. Paulus demonstrat filium Dei angelis esse excellentiorem, ut qui adorent ipsum ueluti Deum creatorem. Idem Apostolus, Nuspiam, inquit, legas si *Hebr. 2.* lium angelos assumere, sed semen Abrahamæ assumpsit. Quæ testimonia manifestissime docent angelos esse substantias, non qualitates aut motus in mentibus hominū. Vt iam non commemorem quod toties sub specie uel imagine hominum hominibus apparuerunt. Teneamus ergo & confiteamur angelos esse substantias.

Porro quales sint substantiæ alij fortè melius explicarint: quod nemini inuideo. Ego fateor spiritus esse bonos, ad differentiam malorum. De quibus postea dicetur. Bonos autem fateor, non tam bonitate naturæ in qua perstiterunt, quam operatione, semper enim ad bona instigant. Fateor item angelos esse spiritus, id est, substantias spirituales, cœlestes, incorruptibiles & expeditissimas. Scriptura enim testatur, & ait: Qui creat angelos suos spiritus, & ministros suos flammam ignis. *Psalm. 104.* Spiritus, inquam, nominat scriptura angelos, & flammam ignis: non quod angelī natura & substantia sua sint ignis corporalis: sed quod ignis eos utcumque referat qui diaphania, pulchritudine, incorruptibilitatēque, agilitate item, celeritate, puritateque sunt ornatissimæ & præstantissimæ creaturæ. Definitiones ecclesiasticæ satis crasse tradunt angelos esse substantias corporeas, sed sui generis. Nam solus *Substantiæ corporeæ.* Deus est incorporeus. Istæ ergo in hæc uerba statuerunt, Creatura omnis corporea est: angeli & omnes cœlestes uirtutes, corporeæ: licet non carne subsistant. Ex eo autem credimus corporeas, quod localiter (hodie fortè commodius dicuntur angeli non circumscripti uel sed definiti uel esse in loco) circumscribuntur, sicut & anima quæ carne clauditur. Nihil incorporeum & inuisibile natura credendum, nisi solum Deum, id est, patrem & filium & spiritum sanctum. Qui ideo rectè incorporeus creditur, quia ubique est, & omnia implet atque constringit: ideo & inuisibilis omnibus creaturis, quia incorporeus est. Hæc ibi. Cæterum corpora illa uel iuuenum uel senum, in quibus apparuerunt non rarò angeli patribus, non fuerunt his propria uel naturalia, sed assumpta & aliunde ueluti mutuò accepta, ad tempus, & ad captum imbecillitatis nostræ. Qualia aut illa ipsa assumpta corpora fuerint, aut unde assumpta, aut quo post dispensationem deposita sint, difficillimum est explicatu. S. Augustinus in Enchiridio suo ad Laurent. cap. 59. Quis explicet, inquit, cum qualibus corporibus apparuerint hominibus, ut non solum cernerentur uerum etiam tangerentur, & rursus non solida corpulentia, sed spiritali potentia quasdam uisiones non oculis corporeis, sed spiritalibus uel mentibus ingerant, uel dicant aliquid non ad aurem forinsecus, sed intus in animo hominis, etiam ibidem ipsi constituti: sicut scriptum est in prophetarum libro: Et dixit mihi angelus, qui loquebatur in me. Non enim ait: Qui loquebatur ad me: sed, In me. Vel appareant & in somnis, & colloquantur more somniorum. Habemus quippe in Euangelio: Ecce angelus Domini apparuit illi in somnis, dicens, &c. His enim modis uelut indicant se angeli contrectabilia corpora non habere: faciuntque difficillimam quæstionem, quomodo patres eis pedes lauerint: quomodo Iacob cum angelo tam solida contrectatione luctatus sit? Cum ista quærentur, & ea sicut potest quisque coniectat, non inutiliter exercentur ingenia, si adhibeatur disceptatio moderata, & absit error opinantium se scire quod nesciunt. Quid enim opus est ut hæc atque huiusmodi affirmantur, uel negentur, uel definiantur cum discrimine, quando sine crimine nesciuntur? Hæc Augustinus. Agnoscamus in his & similibus causis omnipotentiam & admirandam dispensationem eius, qui quæ uult facit, cui sanè non difficile est substantias creare suo instituto idoneas congruasque: cum ex nihilo condiderit omnes uisibiles & inuisibiles creaturas.

Angeli incorruptibiles.

Matth. 22.
1. Cor. 15.

Expeditiſſimi
ſunt angeli.
Act. 5.

Act. 12.

Porro ex gratia uirtuteq; diuina aſſerimus angelos eſſe ſubſtantias incorruptibiles, adeoq; & immutabiles in ſua felicitate, ſine onere & impedimentis. Nam & beatus Auguſtinus dixit de Fide ad Pet. diacono. cap. 23. angelis non à natura inſitam eſſe immutabilitatem, ſed de gratia Dei collatam. Idem de uera Religione capite 13. Fatendum eſt, inquit, angelos natura eſſe mutabiles (ſi ſolus Deus eſt immutabilis) ſed ea uoluntate qua magis Deum quam ſe diligunt, firmi & ſtabiles manent in eo, & fruuntur maiestate eius, ei uni libentiſſimè ſubditi. Congruunt cum hiſ quæ in hæc uerba leguntur in Definitione, eccleſiaſt. cap. 61. Virtutes angelicæ, quæ in diuino amore fixæ perſiterunt, lapſis ſuperbientibus angelis, hoc munere retributionis acceperunt, ut nulla iam rubigine ſurripientis culpæ mordeantur, ut & in contemplatione conditoris ſine felicitatis ſine permaneant, & in hoc ſic conditæ æterna ſtabilitate ſubſiſtant. Hæc ille. Certè ſcriptura incorruptibilitatē angelorum oſtendens, aſſerit nos in reſurrectione futuros angelis ſimiles. Reſurgemus autem incorruptibiles: ſunt itaq; angeli incorruptibiles. Sic enim dicit Saluator: Filij huius ſeculi ducunt uxores, & nuptum dāt: Illi uerò qui digni habebuntur ſeculo illo & reſurrectione ex mortuis, neq; ducunt uxores, neque nuptum dant: neq; enim ultra mori poſſunt. Equales enim angelis ſunt, & filij Dei ſunt, cum ſint filij reſurrectionis. Ex quibus intulit in diuinis decretis beatus Theodoretus: Angelos ergo nec, ut Græcorum poetæ & philoſophi, in deos referimus, nec in maſculinum & foemininum ſexum incorpoream naturam diſtinguimus. Immortali enim naturæ ſuperuacanea eſt generis diuiſio: neq; enim incremento opus habent cum non diminuantur, &c. At expediſſimos ſine impedimento & onere eſſe angelos, multis in locis ſignificat ſcriptura. In Actis Apoſt. ita legimus, Sacerdotes poſuerunt Apoſtolos in cuſtodia publica. Sed angelus Domini per noctem aperuit ianuas carceris, eductisq; illis dixit: Ite & ſtantes loquamini in templo populo omnia uerba uitæ huius. Cum autem ueniſſent miniſtri, nec reperiſſent illos in carcere, reuerſi nunciauerunt, dicentes: Carcerem quidem inuenimus clauſum cum omni diligentia, & cuſtodes foris ſtantes ante ianuas. In eodem libro ſic ſcriptum iterum legimus: Herodes Petrum poſuerat in carcerem, ac dormiebat Petrus inter duos milites, uinctus catenis duabus, & cuſtodes ante oſtium cuſtodiebant carcerem. Et ecce angelus Domini aſtitit, & lumen refulſit in habitaculo, percuſſoq; latere Petri, excitauit eum, dicens: Surge uelociter. Et exciderunt catenæ de manibus eius. Et mox, Cum autem præteriſſent primam ac ſecundam cuſtodiam, uenerunt ad portam ferream, quæ ducit ad ciuitatē, quæ ultrò aperta eſt eis. En nulla quantumuis magna & fortia impedimenta angelū Domini impediunt, quò minus exequatur expediſſimè commiſſum ſibi à Domino. Cedunt omnia & legato Domini adiutum præbent. Decidit ſua ſponte ferrum ex manibus Petri. Hic tutus ambulat, præeunte angelo, per confertas militum turmas. Sera portæ nullo homine aperiēte reſeratur, & ſeruis Dei egreſſis rurfus clauditur. Angeli, hoc eſt, legati iſti coeleſtes, natura ſua ſpiritus expediſſimi celerrimiq; diuina uolente & operante uirtute iam quidem uerſantur in coelis, ſimul autem atque uniuerſorum Domino uiſum eſt, euēſtigio adſunt hominibus in terris, ad quos coelitus à Deo mittuntur. Ac in terris modò apud hos, modò apud illos conſiſtunt. Non quòd loco ſuo modò non contineantur. Etenim cum angelus mulieribus annunciet Chriſti reſurrectionem, ac uerſaretur apud ſepulchrum, non erat ſimul eodem momento in coelis Solus enim Deus loco non concluditur. Nam eſt præſens ubique: ſed more corporum corruptibilium angeli lentè nec procedunt neque cum labore aut moleſtia mouentur. Interim diſerte in ſcripturis in coelos aſcendere & inde ad nos deſcendere

dere commemorantur. Rectè omnino credimus, animas nostras simul atq; excedunt è corporibus, protinus ingredi regiam cœlorum. Dominus enim in euangelio dixit: A morte transiit in uitam. Et, Hodie mecum eris in paradiso. Atqui de mendico Lazaro legis: Accidit autem ut moreretur mendicus, & deportaretur ab angelis in sinum Abraham. Huc iam & illud Danielis pertinere uidetur, dicentis: Adhuc autem me loquente & supplicante & confitente peccatum meum & peccatum mei populi Israel, & fundente meas preces ante dominum deum meum, pro monte sancto dei mei, me, inquam, adhuc deprecante, uir ille Gabriel quem uideram in uisione à principio, citò uolans ad me peruenit. En animæ nostræ ab angelis subuehantur in cœlos, quæ tamen alibi dicuntur euestigio rapì in cœlum. Deinde simul atq; orat dominum Daniel, nulla mora diuturniore interposita, celerimè aduolans (ita enim pro captu nostro scriptura loquitur) angelus oranti adest, exauditumq; à deo esse annunciat. Sunt itaq; angeli celeres & expeditissimi, nullo onere depressi, neq; ullo impedimento exclusi aut impediti ab his, ad quæ mittuntur cœlitus, tametsi ut creaturæ loco contineantur (licet non circumscribantur) & moueantur ratione certa & modo ei naturæ spiritali congruo. Exigít hæc fortassis tractatio, ut non nihil dicatur & de robore potentia seu fortitudine angelorum. Sed quorsum attinet in re manifesta multa fundere uerba? Cum enim dominus angelos mittens sit omnipotens, nihil est quod angeli in suis illis legationibus & ministerijs non possint, nihil est in uniuersa rerum natura, quod se obijciat ministris dei omnipotentis. Neque enim frustra appellantur angeli Potentiæ & Virtutes. Vnum ex multis, neque hoc quidem maximum referam. Vnus angelus una nocte, nullo apparatu aut negotio, in castris Assyriorum ad mœnia Hierusalem, cecidit centena & octoginta quinque millia militum strenuissimorum. In Daniele talem habemus Angeli descriptionem, ex qua & robur & præstantia angelorum colligi potest. Corpus eius sicut tharsis uel chrysolitus, & facies eius sicut fulgur, & oculi eius uelut lampades ignis, & brachia eius & pedes eius ceu species æris candentis, & uox uerborum eius ut uox multitudinis. Ita non est quod pluribus disputemus de cognitione & sapientia angelorum. Nam hæc non est im-
Angelorum cognitio.

mensa, cum sint creaturæ. Quantum uerò attinet legationes & ministeria ipsorum, sapientissimi certè, instructissimi, & nulla parte diminuti sunt. Qui enim ipsos mittit, ipsa est æterna sapientia, legatosq; suos instruit perfectissimè. Cæterum de multitudine ordinèq; angelorum disputatum est à theologis quibusdā acriter & subtiliter satis. Scriptura simpliciter tradit innumerabiles esse angelos. Daniel enim: Mille millia ministrabant ei, & decies mille myriades stabant ante illum. Christus quoq; ad Petrum dixisse legitur, An non putas quòd possum nunc rogare patrem meum, & mittet mihi plus quàm duodecim legiones angelorum? Sed & Paulus, Accessistis, inquit, ad ciuitatem dei uiuentis, Hierusalem cœlestem, & ad innumerabilem angelorum cœtum. Pleriq; innumeram illam multitudinem distinguunt in nouē choros, & hos rursus redigunt in tres hierarchias, quarum singulas tres ordines habere affirmant, nempe primam Seraphim; Cherubim, Thronos: secundam Dominationes, Virtutes, Potestates: tertiam Principatus, Archangelos, Angelos. Addunt quid inter se distent, & quodnā cuiq; proprium sit. Cæterum beatus Augustinus in Enchir. cap. 58. Quid inter se distent, inquit, dominationes, principatus, potestatesq;, dicat qui possunt: si tamē possunt probare quod dicunt. Ego me ista ignorare confiteor. Et contra Luscillianistas ad Orosium idē ille: Certè dicit Apostolus, inquit, siue sedes (throni) siue dominationes, siue principatus, siue potestates. Et esse itaq; sedes, dominationes, principa-
De multitudine & ordine angelorum. Daniel. 7. Matth. 26. Hebr. 12. Nouem chori angelorum.

tus & potestates in cœlestibus apparatibus firmissimè credo, & differre inter se aliquid indubitata fide teneo: sed quæ nam ista sint & quid inter se differant nescio. Nec ea sane ignorantia periclitari me puto, sicuti inobedientia si domini præcepta neglexero. Et mox idem ibidem indicat, in hæc operosius & curiosius minime esse inquirendum. Cuius quidē consilio libenter obsequimur, cernentes scripturas omnia nobis necessaria & salutaria suppeditantes de illis nihil tradere.

Expositio uocabulorum angelis attributorū.
Angeli.
Archangeli.
1. Theſſ. 4.

Hoc tamen negare non possumus uocabula illa (siue ordines appellare malis angelorum) sacris exprimi literis: unde pro nostra tenuitate utcunq; explicare cōuenit. Beati illi spiritus cœlestes, angeli in genere & simpliciter nuncupari uidentur, quòd sint dei summi cursores & legati. Quos dici Archangelos apparet, quando in rebus Dei maximis ablegantur, nunciaturi aut facturi res omnino arduas & diuinas. Ita enim legimus in Paulo, dominum cum hortatu & uoce archangelī ac tuba dei descēsurum de cœlo. Nam ut magnis liceat componere parua, uidemus reges ac principes negotijs grauib; non nisi principes uiros destinare legatos, Thronos dici apparet, uel quòd throno dei semper asistunt, uel quòd deus in angelis suam ueluti sedem collocasse legitur in prophetis, & ab his ceu in lectica regia uehi, Dauide canente, Inclinauit cœlos & descendit, & caligo sub pedibus eius. Et ascendit super cherubim, Vel, Vehabatur super cherubim, & uolabat: uolabat super pennas uentorū. Nota est præterea descriptio currus & solij Dei apud Ezechielem. Dominationes, Principatus & Potestates nuncupari uidentur, quòd deus imperium suum per angelorum ministerium in mundo administrat, suamq; potentiam exercet. Sic enim & uirtutes & Exercitus siue Cœlestis militia dicuntur. Dominum enim ceu stipatores cingunt, & his ille utitur ceu militibus suis, dictus deus Zabaoth, uel exercituum, dominus inquam, omnium angelorum, spirituum & creaturarum, quarum ministerio quando, ubi, quomodo & quantū uult, utitur. Cherubim dictos arbitratur à multitudine scientiæ beatus Hierony. Alij celeres exponunt. Seraphim ab ardore nomen habent. Vel quòd igni purissimo & clarissimo comparantur: uel quòd amore flagrant.

Throni uel se-
des.
Psalm. 18.

Dominationes.
Principatus.
Potestates.
Virtutes.
Exercitus.

Cherubim.
Seraphim.

Deus utitur o-
pera angelorū.

Istis interim uocabulis adumbrantur multiplicia angelorum officia, operationesue uariæ, quas nos paucis comprehendere uolentes, diximus creatos esse angelos à deo in ipsius Dei & hominum ministerium. Nam Dauid cecinit, Qui creat angelos suos spiritus, & ministros suos flammam ignis. Et iterum alibi, Benedicite domino omnes angeli eius, potentes uirtute, facientes uerbum illius, ad audiendam uocem sermonum eius. Benedicite domino omnes uirtutes eius, ministri eius qui facitis uoluntatem eius. Dixit & S. Paulus de angelis: Nonne omnes sunt administratores spiritus, qui in ministerium emittuntur propter eos qui hæredes erunt salutis? Cæterum utitur deus angelorum ministerio nulla necessitate, sed bona sua uoluntate. Nam illis carere posset: cum nutu suo perficiat quod uult. Dixit enim & facta sunt, ipse mandauit & creata sunt, nullo sibi angelorum cooperante: ita hodie quoque quod uult etiam absque angelis perficere posset. Quoniam uero ex optima sua uoluntate illos condidit ad participatum uitæ & salutis æternæ, ipsorum erga nos sicuti & aliarum creaturarum opera utitur: quibus ipsi suam declarant fidem erga deum obedientiamque, ac deus ineffabilem suam exercet beneuolentiam cum erga ipsos quos æterni gaudij participes fecit ex gratia, tum erga nos, quos dignatus est honorare tam præclaro famulatio. Inter alia enim innumera & maxima dei beneficia, ad quæ non immerito obstupescimus, non postremo loco numerandum uenit, quod angelos nobis famulos dedit. Equidem maximum hoc est paternæ erga nos sollicitudinis & curæ argumentum, in primis quod tam pulchrè

pulchrè se nobis nostro attemperat captui & ingenio. Loquebatur quondam ipse dominus ore proprio in monte Sina cum ecclesia Israelitarum, sed cum intellexisset malle illam ipsum loqui per interpretem Moſen, accepit cōditionem, & postea loquebatur per Moſen huius erga illam ministeriū usurpās. Posset sanè deus perfectissimam fidem animis nostris infundere per spiritum sanctum, absq; ulla cooperatione hominum: uerū quia sic nobis utile fore nouit, ministerium uerbi instituit, & per prædicationem euangelij apostolicam plantat fidem. Ac illam ordinationem semel institutam tam arctè custodit, ut cum per angelos idem facere potuisset, per ipsos tamen angelos releget fide instruendos ad Apostolos. Manifestū est enim quid angelus domini in Actis apostolorū egerit cum Cornelio, quem ad Petri prædicationem relegat. Ergo cum deus angelorum ministerium nobis congruum esse uidit, bona iam uoluntate, nulla necessitate eorum erga homines opera utitur. Et angeli quidem homines impensè amant, & spontè non coactè nec inuitè faciunt quod faciunt. Etenim eos non possunt nō amare impensissimè, quos uident creatori suo tam esse charos, ut ipsorum caussa unigenito suo non pepercerit, sed pro omnibus tradiderit in mortem acerbissimam. Vt hic non cōmemorem paratissimam obedientiam, quam deo suo præstant, qui uult & iubet eos inſeruire sibi & hominibus. Dominus in euangelio testatur angelos in cœlis gaudere de conuersione peccatorum hominum. Apud Zachariam inducitur angelus domini ualde sollicitus de miseria captiuorum in Babylone & liberatione ex captiuitate. Quæ omnia commendant nobis angelorum studia & amorem erga genus mortaliū. Alioqui enim non commouentur beati illi spiritus affectionibus, solitudine, tristitia, perinde ut nos in carne afficimur. Gaudent autè & exultant uti possunt gaudere beati spiritus, in quibus nihil est humanæ affectionis: quæ tamen non ipsis modò sed ipsi deo attribuitur per tropum, & sicut dicunt *ἀνθρῶπων παθήσας*: quò animi nostri res spirituales & diuinas ueluti per parabolas rectius & facilius intelligant: cogitemus tamen perpetuò parabolas nō omnia assequi, ideoq; mentes ad altiora esse exaltandas, spiritualiaq; iudicanda spiritualiter.

Patet autem angelorum ministerium latissimè, id quod recensitis aliquot speciebus quàm possum breuibus & perspicuis explicabo. Principiò seruiunt ipsi deo, quod iam satis declaratum arbitror præcedentibus, in omnibus. Eundè celebrant laudibus sempiternis, adorātes, glorificātes & exultantes in ipso. Theodoretus enim super hac re scripturarum aliquot recitans testimonia, Angelorum ministerium, inquit, est dei laudatio, & hymnorū decantatio. De Seraphim enim dicit beatus Isaias quòd clamabant & dicebant: Sanctus, sanctus, sanctus dominus deus Sabaoth: pleni sunt cœli & terra gloria eius. De Cherubim autem dixit diuinus Ezechiel, quòd audiuit dicentes: Beata est gloria domini ex loco eius. Canit item tota militiā cœlestis Christo nato principi Carmen natalitium apud sanctum Lucam, dicendo: Gloria in excelsis deo, & in terra pax, hominibus bona uoluntas. Simul autem mortalibus exemplo præeunt, docentes quid & ipsi faciant, laudes & hymnos deo excelso offerant, quem & angeli nobiscum colunt & uenerantur.

Deinde amant ueritatem angeli, eamq; propagatam, & gloriam dei modis omnibus promotam cupiunt, ideoq; & pseudoprophetas cum execrabili doctrina ac antichristo odientes, impediunt. Nam S. Petrus commemorat euangelij filij Dei admodum iucundum gratumq; spectaculum esse angelis. In Reuelatione Iesu Christi facta Apostolo Ioanni, alligat satanam angelus domini: & angeli ubique sese antichristianis & pseudodoctoribus opponunt, promouētes ueritatem Chri-

Exodi 19.
Deut. 5.

Actor. 10.

Luce 19.
Zach. 1.

Quæ sint angelorum ministeria.

Isaie 6.

Ezech. 1.

Luce 2.

1. Pet. 1.

Matth. 13. stianam. Nam & in fine seculi mittet filius hominis angelos suos, & colligent e regno illius omnia offendicula & eos qui patrant iniquitatem, ac mittent illos in caminum ignis.

Luce 1. Illi ipsi astant in conspectu Dei omnipotentis, expectantes mandatum eius, qui simul atque iusserit prodire & mandata ipsius exequi, euestigio expediuerunt. Veniunt ergo ad homines nunciatum uoluntatē ac iussa Dei. Sic uenit Gabriel angelus primum quidem ad Zachariam patrem Baptistæ, deinde ad diuam uirginem, annunciatum incarnationē filij Dei. Innumera huius generis exempla ubique in scripturis sanctis occurrunt.

Matth. 2. Excubant pro salute nostra, solliciti pro nobis, sine conturbatione tamen, quod & prius admonuimus, admonent fideles maturē satis, futura prædicentes pericula, & consolantur afflictos. Nam Magi admoniti per angelum Hierosolymam ad Herodem non redeunt, ingens discrimen declinant. Ioseph quoque iussus ab angelo, fugit in Ægyptum, liberans Christum domini ex cruentis manibus Herodis. Sed & Christus ad montem oliuarum sanguineum profundens sudorem, confortatur ab angelo. Et Hagar ancilla Saræ in summo constituta discrimine, angelica cōsolatione refocillatur; sicut & Paulus apostolus naufragio proximus audit ab angelo domini: Ne timeas Paule, Cæsari te oportet sisti, Et ecce donauit tibi Deus omnes qui nauigant tecum.

Exod. 12. Rursus mittuntur angeli ad uindictam nocentium, ad sumendum, inquam, supplicium de sceleratis & impoenitentibus. Nam primogeniti Ægyptiorū percutiuntur ab angelo. Herodem Agrippam percutit angelus domini in Actis apostolorum. Castra Assyriorum referuntur cæsa cecidisse ab uno angelo. Et Dauid uidit angelum euaginato gladio inter cælum & terram hærentem, grauissima peste affligere populum. Ita credimus cum filio hominis in iudicium uenturos sanctos dei angelos, attestante Paulo, & dicente: Reuelabitur dominus Iesus de cælo cum angelis potentiae suæ, cum incendio flammæ, qui infligit ultionem ijs qui non nouerunt deum & qui non obediunt euangelio domini nostri Iesu Christi. Nam & in Reuelatione Iesu Christi effundunt angeli plenas ira dei phialas in capita antichristianorum.

Psal. 34. Præterea iubente Deo defensionem nostri suscipiunt, adsunt custodes nostri, aduigilantes ne quid nobis accidat aduersi, ac uias nostras dirigunt. Huc enim pertinent Psalmorum testimonia, complurima scripturæ exempla. Dauid, Afflictus iste, inquit, inuocauit, & dominus exaudiuit eum, & ex omnibus angustiis eius seruauit eum. Castra figit angelus domini circum eos qui ipsum timēt, & eripit eos. Et in alio Psalmo idem, Non accedet ad te malum, inquit, & flagellum non appropinquabit tabernaculo tuo. Quoniam angelis suis mandauit de te, ut custodiant te in omnibus uis tuis. In manibus portabunt te, ne forte offendas ad lapidem pedem tuum. Super aspidem & basiliscum ambulabis, & conculcabis leonem & draconem. Et in euāgelio clarē dicit dominus, puellis additos esse dei angelos, haud dubiē custodes. Iacob patriarcha ualde metuens fratrem Esau, angelos sibi obuiam uenientes cernit, & intelligit angelos sibi additos esse uiae duces & custodes, contra ferociam fratris. In rebus Helisæi legimus regem Syriæ graui exercitu obsedisse urbem Dothan, in qua tum agebat Helisæus, quē ille instituerat capere: id cum sensisset minister Helisæi, & angeretur deploraretque magistri sortem, dixisse hunc: Ne timueris, eorum enim qui nobiscum sunt, plures sunt, quā qui cum illis sunt: orasse item prophetam, ac dixisse: Aperi quæso domine oculos pueri ut uideat; aperuisseque dominum oculos ministri, qui uiderit montem plenum

plenum currubus igneis, uidelicet Helisæum instructum esse, & munitum custodia angelici exercitus. Abraham quoque dicit seruo suo: Dominus Deus cœli qui *Gene. 24.* dixit: Semini tuo dabo terram istam, ipse mittet angelum suum ante te, nimirum qui dirigat uiam tuam, tueatur te, faciatque uoti compotem. Nam ipse dominus in *Exo. 34.* Exodo Mosi dixit: Ecce ego mitto angelum meum ante faciem tuam, ut custodiat te in uia, & introducat te in locum quem præparauī. In Actis Apostolorum sæpe legimus angelos inseruisse Apostolis, ac institutum ipsorum promouisse defendisseque contra aduersarios.

Apud Daniele inducuntur angeli regnorum principes aut præsides, ut *Daniel. 10.* Michael cum Gabriele, regni Israelitici, alius autem quidam regni Persici, & alius quidam regni Græcorum, & horum quilibet sui regni causam agere, ac pro ipso decertare. Non quod in cœlo ullum sit dissidium, ubi sanè summa pax & æterna est concordia ac quies, nec quod bella gerantur inter angelos, ceu Deos Homericos: sed propter imbecillitatem captus humani confertur cœlum per parabolam allusionemque, aulæ principis alicuius potentissimi, in qua ex diuersis regionibus legati diuersas agunt causas. Sic enim animo concipere debemus, deum uniuersorum regnorum unicum dominum, omnium audire causas, omnium res agere: angelos autem pro nutu & uoluntate dei deo ministrare, quando his utatur dispensatoribus. Sic enim & Vigilem Nabuchodonosor in uisione cernit descendere cœlitus: & fata arboris excindendæ prædicere. *Daniel. 4.*

Cauendum hic tamen modis omnibus, ne nimium angelis contra ueræ religionis ingenium tribuamus, ne adoremus, inuocemus, aut colamus eos. Certè cum *Angelis non est nimium tribuendum.* homines audiunt angelos sibi datos esse à deo ministros, & per hos nobis deum benefacere, protinus arbitrantur nihil non honoris ipsis esse deferendum. Cæterum sincera pietas docet nos agnoscere deum esse omnium bonorum authorem, angelos esse Dei ministros, & ceu instrumenta per quæ is operatur, sicuti uidemus esse solem, lunam, astra, patriarchas, prophetas, apostolos. Quis uerò mentis sanæ solem aut astra quantumuis sint illustra & utilia hominibus, adorauit, inuocauit, aut coluit? Et quis obsecro ueræ fidei particeps, patriarchas, prophetas & apostolos, licet maximis instructos donis, & miraculis admirandos, adorauit aut coluit? Deum adoramus & colimus omnes, agnoscimusque deum operari per sanctos: qui unà cum sanctis dei angelis nihil minus postulant quam adorari & coli à nobis. Verè enim Lactantius libro Institut. 2. cap. 17. Angeli cum sint immortales, inquit, *Sancti nolunt à nobis coli.* haud dici se deos aut patiuntur aut uolunt: quorum unum solumque officium est seruire nutibus dei, nec omnino quicquam nisi iussu eius facere. Sic enim mundum à deo regi dicimus, ut à rectore prouinciā, cuius apparitores nemo socios esse in regēda prouincia dixerit, quamuis illorum ministerio res geratur. Ideoque legimus & sanctum Augustinum dixisse, Cum exaudiunt angeli dei, ipse in eis exaudit, tanquam in uero nec manufacto templo suo. Certè si scripturam sanctā propius inspiciamus & expendamus, deprehendemus non uno loco dei & angelorum nomina indiscriminatim poni. Angeli enim causæ sunt remotiores & instrumentales, ut uocant, deus autem causa est propriissima & principalissima. Nam in Actis apostolorum legimus dixisse Stephanum: Expletis annis quadraginta apparuit angelus domini in deserto, in monte Sina. Et mox idem subiungit. Et facta est uox domini ad eum, Ego sum Deus patris tui, &c. Eundem appellat dominum, quem paulò ante dixerat angelum: nimirum quod crederet angelum omnia iussu diuino dicere & facere: ut sermo & opus sit dei proprium, angeli uerò ceu instrumenta. Similiter dominus appellatur libro Iudicum cap. 6, qui iam dictus fuerat

Gen. 16. angelus. Hagar ancilla Saræ accepit ab angelo domini beneficium ingens in deserto, sed eadem huic non fert acceptum, sed domino. Eadem angelo non agit gratias, neque angelo consecrat memoraculum, multo minus angelum adorat & inuocat, imò colloquium quoque ad deum refert. Sic enim testatur scriptura sancta: Vocauit autem Hagar nomen domini loquentis ad eam: Tu Deus qui uides me, &c. Filij Israelis, quos præcessit angelus domini in deserto, nunquam duci suo immolarunt, nuquam illum adorarunt uel coluerunt. Ita nec seruus Abrahamæ angelo commendatus, eidem supplicat, petens ut institutum suum bene fortunet: sed deum adorat, & ab hoc postulat ut misericordiam suam exerceat erga herum suum Abrahamum. In Daniele apparet angelus domini, ambulans inter coniectos Danielis sodales in fornacem ardentem; sed liberati à flammaram uiolentia, non laudant angelum, nec huic liberationis beneficium ferunt acceptum, sed soli deo. Carrant etenim: Benedictus es domine Deus patrum nostrorum, & laudabilis & gloriosus & superexaltatus in secula, &c. Ita & Paulus disertis uerbis Deum fatetur esse, cuius sit ipse, & quem colat, licet interim & angeli mentionem fecisset. Sic enim dicit in Actis: Astitit mihi hac nocte angelus dei, cuius sum ego, quem & colo, Deum nimirum. Nam alibi Ioanne uolente adorare ante pedes angeli, clamat angelus: Vide ne feceris. Conseruus enim tuus sum & fratrum tuorum prophetarum, & eorum qui seruant uerba libri huius. Hæc clara sanctæ scripturæ testimonia euidenter nos docent, tametsi deus opera utatur angelorum erga nos, hostamen agnoscendos esse à nobis pro ministris & cōseruis dei, ideoque nec adorandos nec inuocandos, sed deum solum adorari, inuocari, & coli oportere.

Ab hac sancta scripturæ doctrina nihil discesserunt quidam Ecclesiæ ueteris ministri & scriptores ecclesiastici. Lactantius enim in eo libro quem paulò ante citauimus: Angeli nullum honorem sibi tribui uolunt, ait, quorum honor in Deo est, Illi autem qui descuerunt à Dei ministerio, quia sunt ueritatis inimici & prauaricadores, Dei nomen sibi & cultum deorum uendicare conantur. Iam uerò non aliter de hoc negotio iudicās beatus Augustinus, sic scriptum reliquit, Quem inuenirem qui me tibi (alloquitur autem deum) reconciliaret? An eundem mihi fuit ad angelos? qua prece, quibus sacramentis? Multi conantes ad te redire, neque per seipso ualentes, sic, ut audio, tentauerunt hæc, & inciderunt in desiderium curiosarum uisionum, & digni habitū sunt illusionibus. Hæc extant Confess. lib. ii. cap. 42. Post quæ multis ostendit Iesum Christum esse mediatorem & intercessorem unicum omnium fidelium. Idem libro de Ciuitate dei 10. cap. 16. declarat multis optimos dei angelos deo non sibiipsis expetere sacrificia. De uera religione libro, ultimo cap. Optimos angelos, inquit, & excellentissima dei ministeria uelle credamus, ut unum cum ipsis colamus Deum, cuius contemplatione beati sunt. Neque enim & nos uidendo angelos beati sumus, sed uidendo ueritatem, qua etiam ipsos diligimus angelos, & his congratulamur. Quare honoramus eos charitate non seruitute. Nec eis templa construimus. Nolunt enim sic se honorari à nobis. Quia nos ipsos cum boni sumus, templa summi Dei esse nouerunt. Rectè ergo scribitur hominem ab angelo prohibitum ne se adoraret, sed unum Deum, sub quo ei esset & ille conseruus. Ergo idem ille in Catalogo hæreticorum inter hæreticos numerat angelorum cultores, nuncupans Angelicos. Nam in disputatione sua contra Maximinum Arianorum episcopum lib. i. probans spiritum sanctum esse deum, cultores angelorum manifestè appellat sacrilegos, & anathemate à Christo eiusque ecclesia percussos. Verba authoris si quis requirat, hæc sunt: Nonne si templum sancto angelo excellentissimo de lignis & lapidibus faceremus, anathematifaremur

Cultus angelorum grauiter damnatus.

Vide quid sentias de templo exstructo S. Michaeli in monte Gargano.

mur à ueritate Christi, & ab ecclesia Dei? Quoniam creaturæ exhiberemus eam seruitutem quæ uni tantum debetur Deo. Si ergo sacrilegi essemus faciendo templum cuiusque creaturæ: quomodo non est Deus uerus, cui non templum facimus, sed nos ipsi templum sumus? Hæc ille.

Ista de sanctis uel bonis Dei angelis dixi hætenus per compendium, transeo iam ad dissertationem de spiritibus malis, de angelis, inquam, nequam & refugis, id est, de cacodæmonibus uel diabolis, dicturus de his breuibus & perspicue quod scripturæ nobis sanctæ suppeditant. Esse diabolos negarunt quondam Sadducæi, & negant etiam hodie parum religiosi imò Epicurei quidam. Qui nisi resipiscant, sentient aliquando maximo suo malo & dæmones esse, & omnium impiorum, & Epicureorum esse tortores atque carnifices. Nam tota scriptura & omnes uiri pii & sapientes, quotquot uixerunt ab exordio mundi in hanc usque diem, confessi sunt esse cacodæmones siue diabolos.

Quid uerò sint diaboli, nō minus difficile est exactissima ratione definire, quam dixi angelorum naturam plenè describi posse: adumbrabo tamen illos descriptione nequalicunque, quò & ordine certo de eis possim differere. Angeli mali, sunt spiritus deprauati, & ob defectionem æternum condemnati, subiecti quidem Deo, sed nihilominus Deo & hominibus aduersi, utpote qui omnia sua studia ad despectum Dei hominumque deceptionem ac perniciem conuertunt.

Principio diabolus esse creaturam inde claret, quod unus duntaxat est creator, Deus uidelicet ille trinus & unus. Hic omnes condidit spiritus: at sub censum spirituum uenit & diabolus. Tempus creationis prius diximus in scriptura non definiri, quando ostendimus nullibi exprimi quo tempore ante hominem uel post hominem angeli sint creati. Istis iam subiungimus, angelos malos, non ex creatione factos esse malos, sed ex defectione propria. Omnia enim quæ condidit Deus, erant & sunt ualde bona: omnes ergo angeli, sicuti & homines, natura boni sunt creati. Caterum ipsi in bonitate hac sibi diuinitus insita concessa non perstiterunt, sed propria deprauati malitia, sicut & homines, prolapsi & cælo seu felicitate donata deturbati sunt à iustissimo Deo. Quando autem hoc factum sit, rursus non exprimit scriptura: apparet tamen id factum esse ante hominis lapsum. Etenim dæmon parentis nostros per serpentem sollicitauit ad peccandum, pertraxitque in miseriam & mortem. Eadem scriptura nec peccatum diaboli quale fuerit peculiariter definit, nec modum defectionis e cælo disertè & singulariter refert: in genere dicit reprobam esse in angelis prauitatem, ideoque præcipitatos in tartara. Nam in libro Iob legimus: Ecce qui seruiunt ei non sunt stabiles, & in angelis suis reperit prauitatem. Ab his nihil abludens sanctus Petrus, dixit Deum angelis qui peccauerunt non pepercisse, sed catenis caliginis septos aut uinctos, præcipitasse in tartarum, seruandos in iudicium. Sed & Iudas frater Iacobi, apostolus Domini, Thaddæus cognominatus, eandem ferè repetens sententiam, dixit: Dominus angelos qui non seruauerant suam originem (suam nimirum naturam in qua erant conditi) sed reliquerant suum domicilium (suam nimirum stationem & suum officium suamque fidem) ad iudicium magni illius diei uinculis æternis sub caligine seruauit. Quid quod Dominus & seruator noster Christus de diabolo loquens: Ille homicida erat ab initio, inquit, & in ueritate non stetit. Hinc enim colligere possumus, diabolus aliquando stetisse uel fuisse in uero, sed descuiisse per defectionem perfidam. Ea testimonia, testificantia uidelicet peccasse angelum refugam, & præcipitem esse datum in tartara, satisfaciunt pijs & minimè curiosis mentibus. Citantur præterea ab alijs ex Isaia & Ezechiele testimonia eadem approbantia: quæ ut non reijcimus,

De cacodæmonibus.

Esse diabolos.

Quid sit diabolus.

Diabolus esse creaturam.

Diabolus non esse creatum malum.

De lapsu angelorum e cælo.

Iob 4.

2. Pet. 2.

Ioh. 8.

Isaia 14.

Ezech. 28.

Luce 10.

ita his nostris per allegoriam applicari non dubitamus. Quod ex Luca produci-
tur: Videbam satanam sicut fulgur de cœlo cadentem, minus propriè de primo
angelorum lapsu exponitur. Est enim aliud diaboli lapsus, nimirum quo excidit
ex sua tyrannide (qua animos hominum occuparat implicarâque erroribus & ui-
tijs) per aduentum Christi in mundum & per prædicationem Euangelij synceram.
Dubium autem non est, angelos omnes, bonos esse conditos, descivisse autem ma-
los sua non Dei culpa. De quo dixi nonnihil & Decad. 3. Serm. 10. ubi de Origine
peccati disputaui. Quibus iam adiunctio elegantissimam eidentissimamq; & ex a-
dytis scripturarum petitam Theodoretî Cyri Episcopi demonstrationem, qui in
Epit. diuin. decret. Consideremus, inquit, an diaboli iuste patiantur, cum talem na-
turam ab eo qui illos fecit acceperint? Quomodo autem bonus uocari posset crea-
tor uitij? Quomodo autem iustus, qui punit naturam, quæ nihil potest boni facere,
sed uitij uinculis constricta est & alligata? Atqui iustum esse scimus Deum uniuers-
orum & fontem iustitiæ. Non ergo iniuste punit dæmones. Et illorum ducem
& bonorum opificem esse scimus Deum, qui ab omnibus rectè sentientibus bonus
uocatur. Non ergo fabricatus est naturam quæ nihil quidem posset boni facere,
solum autem uitium, præter suam sententiam, inuita pariat. Si autem nec malam
naturam Deus est fabricatus: bonorum enim est, sicut & bonus est, effector: neque
iniuste punire in animam inducit: iustus enim est & iustitiæ legislator, punit aut
diabolum & qui ei subsunt: suapte ergo sententia & sponte malus est dæmon, &
qui sunt ab eius partibus. Sicut enim hominem bonum ab initio Deus fabricatus
est: libero autem mentis arbitrio, hi quidem (angeli boni) seruauerunt incorruptam
& integram quam acceperunt naturam, illi uerò (homines) in peius declinarunt, &
diuinos characteres corruerunt, & qui erant Deo similes, ferinos reddiderunt:
& ita diabolus & dæmonum caterua, qui erant cum alijs incorporeis, illorum qui-
dem in Dominum Deum beneuolentiam non sunt imitati: insolentiæ autem & ar-
rogantiæ morbo suscepto, ad id quod est deterius, conuersi sunt, & à priore sorte
exciderunt. Hæc, ille. Cum Theodoro consentit & beatus Augustinus, qui li-
bro de Vera religio. cap. 13. Diabolus in quantum angelus est, inquit, non est ma-
lus, sed in quantum peruersus propria uoluntate. Magis enim seipsum quam Deū
diligendo, subditus ei esse noluit, & intumuit per superbiam, & à summa essentia
defecit. Et iterum Tractat. in Ioan. 42. Quæris, unde diabolus? Inde utique unde
& cæteri angeli. Sed cæteri angeli in sua obedientia perstiterunt: ille inobedi-
do & superbiendo lapsus est angelus, & factus est diabolus.

Diabolus eter-
num est con-
demnatus.

Matth. 25.

Marc. 9.
Ioan. 5.

Daniel. 12.

Iam quod asserui spiritus illos deprauatos ob defectionem æternæ addictos
esse condemnationi, uideo à nonnullis negari, pollicentibus damnatis spiritibus
sub diem iudicij, redemptionem à pœnis. Sed contra hos disputarunt plerique do-
ctores ecclesiastici, damnantes uno ore omnes dogma scripturis iam olim condem-
natum. Nam iudex in fine seculi, finalem contra satanam & omnes impios sen-
tentiam pronunciaturus, dicet: Discedite à me maledicti in ignem æternum, qui
paratus est diabolo & angelis eius. Et mox subiungit testis ueritatis Apostolus &
sacer historicus: Et ibunt hi in supplicium æternum: iusti uerò in uitam æternam.
Nam apud Marcum quoq; dixit Dominus: In gehenna uermis eorum non mori-
tur, & ignis non extinguatur. Et apud Ioannem longè significantius: Qui bona fe-
cerunt, prodibunt, ait, in resurrectionem uitæ, qui uerò mala egerunt, in resurre-
ctionem condemnationis. Non dicit: Ibunt uel in uitam uel in condemnationem:
sed in resurrectionem uel uitæ uel condemnationis, id est, in sempiternam perma-
nentiam uitæ uel mortis. Daniel enim, ex quo dominus hæc uerba mutuò sumpsit,
dixit:

dixit: Multitudo dormientium in puluere terræ resurgent, hi in uitam æternam, illi uerò ad probra & contemptum æternum. Nam Ioannes Apostolus dixit futurum ex condemnatis & præcipitatis in tartara ascensurum in secula seculorum. Certum est itaque damnationem impiorum omnino sine carituram futuramque sempiternam.

Porro angelos desertores appellantes spiritus, non utique intelligimus per spiritum affectionem animi prauam, qualitatem seu mentis perturbationem aut corruptionem atque peccatum. Non enim desunt quibus uisum est diabolus non aliud esse quàm hominem sceleratum, uel commotionem animi sceleratam & peccatricem. Intelligimus itaque per spiritus substantias spirituales, præditas sensu & intelligentia. Comparet enim satanas inter ministros Dei, colloquens cum Domino, apud Iob in cap. 1. Euangelium quoque refert nobis dæmonas eiectiones ex homine, inuasisse gregem porcorum, ac demersisse in profundum plaudis uel lacus Gadareni. Refert præterea Euangelium diabolus peccasse ab initio, non persistisse in ueritate, mendacem esse ac homicidam. Iudas commemorat angelum perignare cum diabolo. Apud Marcum clamant & dicunt: Quid rei nobis tecum Iesu Nazarene? Venisti ad perdendum nos? Quinimò dicet ad diabolos Saluator iam iudex constitutus: Ite in ignem æternum. Quæ omnia congruunt substantiis per se subsistentibus, non qualitatibus. Sunt ergo diaboli substantiæ spirituales. Qualia uerò sint corpora quæ sæpe assumunt, & in quibus apparent hominibus, nemo opinor exactè dixerit: quod & paulò superius admonuimus cum disputauimus de assumptis à bonis angelis corporibus. Etenim corpora & alienam quidem speciem à propria diaboli induere, euincit historia excitati per ueneficam Samuelis. Non excitabatur ex mortuis Samuel, sed Samuelem mentiens mendaciorum architectus, regi Saul imponebat. Et Paulus testatur satanam sese transfigurare in angelum lucis. Sed & historia testatur mirificum esse præstigiatores diaboli in assumendis varijs formis atque speciebus.

Sicut autem dixi de bonis angelis expeditissimos esse in ministerio suo, sine onere & impedimentis, ita dubium non est in suo genere & opere dæmonas esse instructissimos. Tradunt enim scripturæ artes his esse mille, calliditatem & astutiam mirificam, cognitionem acutissimam latissimamque, ad omnia denique subeunda & perficienda promptissimos esse & infatigabiles. Pererrant totum orbem terrarum celerrimè, omnia sua instituunt uersutissimè, ideoque sortiuntur appellationes miras, ipsorum uires adumbrantes. Appellatur enim dæmon uel dæmonium, serpens uetus, impostor, princeps huius seculi, princeps tenebrarum, cui potestas est aeris, leo rugiens. De quibus & alijs non dissimilibus, mox dicam copiosius, ubi hoc prius admonuero, infinitam esse dæmonum turbam. Nam à Magdalena eijciuntur dæmonia septem. Septem alios se nequiores spiritus assumit diabolus ille, qui apud Matthæum semel eiectiones cogitat atque consultat de restitutione in integrum. Fit præterea in Euangelio secundum Marcum legionis mentio. Nam spiritus immundus rogatus à Domino, quodnam sibi nomen esset? Respondit: Legio mihi nomen est, quia multi sumus. Ergo cum alicubi mentio fit in sacris literis satanæ, non ita accipiendum est, quasi non sit nisi una uel substantia uel persona diaboli. Nam sub capite membra & ueluti species sub genere comprehenduntur. Meminit quidem alicubi scriptura principis dæmoniorum. Hostes enim Christi clamitant: In principe dæmoniorum eijcit dæmonia: sed eadem tamen non exprimit qualis sit principatus ille, & an ordine à se inuicem distincti sint maligni illi spiritus. Constat autem omnes impios esse sub uno capite, sicut omnes pii sunt

Diaboli sunt spiritus ac substantiæ.

Iob 1.
Matth. 8.

Ioan. 8.

Marc. 1.

Matth. 25.

Qualia diabolorum assumpta corpora.

1. Sam. 28.

2. Cor. 11.

Diabolus expeditus, uaser & potens.

Dæmonum infinita turba.

Marc. 16.

Matth. 12.

Marc. 5.

Marc. 3.

sub uno Christo Domino. Constat daemones omnes esse eiusdem uoluntatis deprauatae, in hoc unice omnia sua intendentes, ut Deo aduersentur, & hominibus incommodent. Sed de operationibus, actis seu effectis daemonum dicam, ubi nomina seu epitheta eorum obiter explanauero.

Diabolus.

Diaboli generaliter appellantur deprauati spiritus, quod perinde est ac si tu dicas, Calumniatores. Nam *diabolos* Græcis significat calumniam: at uocabulum diabolus petiitum est à Græcis. Struit autem calumnias, deferendo homines Deo, & homines inter se committendo, ut iam non commemorem quod Deum & opera eius suspecta reddere conatur hominibus. Ideoque mendax alicubi appellatur, & mendacij author, omniumque hypocritarum pater, proinde & omnium errorum, hæresum, & impietatum scaturigo. Quoniam uero Iudas hypocrita erat, mendax & calumniator atque proditor, recte nomen diaboli accepit à Domino.

Mendax.

Ioan. 6.

Satan uel aduersarius.

1. Pet. 5.

Matth. 13.

Matth. 4.

Matth. 16.

1. Sam. 19.

Aduersarium nuncupauit Petrus Apostolus diabolum. Nam & Dominus ipse appellauit inimicum hominem, seminantem zizania in agrum Dominicum. Est enim hostis Dei & hominum, opponens se uoluntati Dei, cui & gloriam suam præripere studet, impediensque salutem hominum, ac ferens infinita in ecclesia Dei scandala. Et satanam quidem Hebrei nominant, quem nos aduersarium dicimus. Transfertur uocabulum ad homines. Quia enim Petrus diuino se obiecit consilio, audit à Domino: Vade retro satana. Sed & Dauid ad nepotem ex sorore Zerua Abisaum: Quid mihi, inquit, & uobis filij Zerua, cur efficiamini mihi hodie in satanam? Contradicebat enim Abisaus consilio & decreto Davidis.

Demon.

Demon appellatur, nimirum sciens, callidus, & multarum rerum peritus, & *δαίμων* scio. Etenim Plato in Cratylo arbitratur ex Hesiodi sententia daemones quasi *δαίμονες* dici, hoc est, prudentes & scientes. Huc referre oportet uocabulum serpentis: Serpens, inquit, scriptura, callidior erat cunctis terræ animantibus. Serpentem ergo demon delegit sibi domicilium, ex quo artes suas exerceret & primis parentibus nostris imponeret. Hic enim est impostor, deceptor & seductor orbis, uetus serpens & draco dictus. Quicquid enim in mundo est seductionis, artium malorum & fallaciarum, ex hoc uno omnium malorum fonte deriuatur. In prophetis literis uocabulum hoc longè diuersissima usurpatur ratione. Socrates enim apud Platonem: Ipse assero, inquit, demona, id est, sapientem omnem esse hominem quicumque sit bonus, eumque daemonicum esse, id est, sapientem & felicem uiuentem atque defunctum. Proinde apud Homerum frequentissimum est heroes hoc insigniri uocabulo. In Euangelica autem historia demoniaci dicuntur obsessi à demonio. Paulus in prima ad Timotheum, ad hoc uelut caput redigit omne corpus imposturarum falsaque sapientia fucatarum doctrinarum.

Serpens & Draco.

1. Tim. 4.

Leo rugiens.

Homicida.

Tentator.

Spiritus malus & immundus.

Sanctus Petrus, Sobrii estote & uigilate, inquit, quoniam aduersarius uester diabolus tanquam leo rugiens obambulat, quærens quem deuoret: cui resistite solidi fide. Per leonem adumbrat nobis diaboli ingenium. Est enim demoni robur maximum, improbitas peruicacissima, truculentissima ferocia: unde & à quibusdam nominatur truculenta bestia. Dominus nuncupauit homicidam. Hic enim & Caino & omnibus parricidis infandas cædes inspirauit, & hodie quoque classicum ad omnia bella & ad omnes cædes ac seditiones canit, iram denique incendit, odia ferit, inuidiamque nutrit. Tentator cognominatur. Nunquam enim non ad malum sollicitat, obijciens omnia quaecumque putat allicere aut trahere posse ad res pessimas. In Euangelica historia & in scriptis Apostolorum, diabolus obtinet ferè nomen spiritus immundi, mali uel maligni, impuri & nequam. Etenim non tantum decidit sua culpa à puritate, in qua primum à Deo purissimo conditus fuit,

fuit, sed nunc quoque impuritate delectatur & ad immundiciam pellicit omnes. Ex hoc authore proficiscuntur omnes libidines scdæ, omnia stupra, adulteria, omnis luxus, ebrietas & crapula, omnis obscenitas & uanitas, superbia & arrogantia, &c.

Iam & Beelzebub uocatur diabolus in Euangelio, eò quòd aliquando Acca-^{Beelzebub.} ronitæ in Palæstina putantes se uenerari Deum, diabolum reuera coluerunt. S. Paulus: Quis consensus, inquit, Christi & Belial? Belialem opposuit Christo, Deo^{1. Cor. 6.} utique diabolum. At Moses posuit cogitationem Belial pro nepharia & impia. Dia-^{Belial.} bolus ergo nepharius est & impius, rebellis Deo & contumax. Belial enim omni- no aiunt idem pollere, quasi tu dicas irregularis, sine iugo & sine disciplina. Nec desunt quibus uisum est diabolum figurari seu significari apud Iob per Behemoth & Leuiathan, Iob 40. & 41. cap.

Sanctus Paulus dæmonas uarijs donat nominibus, dicens bellum pñs esse ad-^{Principatus} uersus principatus & potestates, aduersus principes mundi & tenebrarum seculi^{potestates.} huius, aduersus spirituales nequitias in cœlestibus, aduersus principem cui pote-^{Ephes. 2. & 3.} stas aeris, contra spiritum qui operatur in filijs inobedientiæ: quem alibi & Deum huius seculi appellat. Quemadmodum uerò Deus potentiam suam exercet in mundo, & in bonis ferè per angelos bonos, quos ea de causa dixi nuncupari prin- cipatus & dominationes: Ita quia idem ille iusto suo iudicio imperium permittit diabolo in impios, principatus & potestates rectè dicuntur. Non quòd merum & summum imperium Deus illi tradat: Omnis enim potestas est solius Dei: sed quòd ei permittit tyrannidem. Significanter enim dicit principem esse mundi, nimirum impiorum. Nam per interpretationem sequitur: Princeps est tenebrarum seculi huius. Quis autem ignorat tenebras in scripturis significare ignorantiam, cæcitate, incredulitatem, impietatem & scelera, deniq; his immerfos impios homines? Et rursum subiungitur quod ueram explicet sententiam, Qui operatur in filijs ino- bedientiæ. Eximuntur ergo eius imperio fideles & obedientes, qui in regno Chri- sti non in regno diaboli sunt. Nec alia ratione satanas nuncupatur Deus. Nam ad-^{Deus huius} iungitur Huius seculi. Reuera enim Deus nō est diabolus, sed quia infani quidem^{seculi.} in mundo inueniuntur qui hunc pro Deo habent, Dei nomen accepit. Non aliter exposuit hæc beatus pater Augustinus. Nam Tractatu in Ioan. 25. dicit: Absit ut diabolum mundi principem ita dictum existimemus, ut eum cœlo & terræ domi- nari posse credamus: sed mundus (dicitur enim princeps mundi huius) appellatur in malis hominibus qui toto terrarum orbe diffusi sunt. Et idem iterum de Agone Christiano cap. 1. Princeps huius mundi, ait, missus est foras: non quia extra mun- dum missus est: sed foras ab animis eorum qui coherent uerbo Dei, & non diligunt^{Princeps mun-} mundum cuius ille princeps est: quia dominatur eis qui diligunt temporalia bo-^{di eiectus foras} na, quæ hoc uisibili mundo continentur. Non quia ipse Dominus est huius mun- di, sed princeps cupiditatum earum, quibus concupiscitur omne quod transit. Per hanc cupiditatem regnat in homine diabolus & cor eius tenet. Interrogat idem il- le doctor Tractatu in Ioan. 52. an ex animis prophetarum & patriarcharum non sit eiectus satanas, quando referatur in Euangelio per Christum esse foras pulsus? ac responder: Eiectus est planè. Quomodo ergo dictum est: Nunc eijcietur foras? Quomodo putamus, nisi quia tunc quod in hominibus paucissimis factum est, nunc in multis magnisq; populis iam mox futurum esse prædictum est? Sicut illud quod dictum est: Spiritus autem nondum erat datus, quia Iesus nondum fuerat glorificatus, potest similem habere quæstionem, & similem solutionē. Nondum e-^{Principes} nim erat illa abundantia gratiæ spiritualis data quæ dabatur postea. Hæc ille. Porro^{aeris.}

cum Apostolus dicit: Pugnam esse nobis aduersus spirituales nequitas in coelestibus. per coelestia non intelligit gaudia coelestia, collocans iterum daemones in coelos, sed aerem, id est, inferiorem mundi partem adeoque ipsum mundum. Nam alibi dicit: Secundum spiritum, cui potestas est aeris. Et uersantur quidem principes huius mundi in aere, circa, infra, supra nos, undique nos impetentes. Alioquin nec coelum siue inferior regio aeris diabolorum subiaceret imperio, ut quod in eo uelint possint, aut illis abutantur pro sua libidine, nisi quantum Deus permiserit iudicio suo iusto. Nam in hac disputatione semper pro confessa & indubitata ueritate tenendum est, Dominum Deum nostrum regem & gubernatorem esse omnium creaturarum, dominiumque suum in omnes retinere creaturas, exercereque ratione aequissima.

Operationes
diaboli.

Luce 22.
Matth. 26.
1. Pet. 5.

Genes. 3.

Luce 13.

Marci 9.

Quaquam uero ex his omnibus colligi possit, quanta & qualis sit operatio diabolica, pluscula tamen illis adijciam ne quid hac in re desideretur. Contraxi in descriptione diaboli omnes illius effectus, actus uel operationes in duo capita. Sunt enim daemones Deo & hominibus aduersi, ut qui omnia sua studia ad despectum Dei hominumque deceptionem & perniciem conuertunt. Summa igitur est, omnia sua dirigunt ad contemptum Dei hominisque perniciem. Ac potentiam eis esse non exiguum nocendi, perspicacem item intelligentiam producendi omnia in effectum, iam semel & iterum audiuius. De uoluntate nocendi non est quod quisquam dubitet. Dixit enim ad suos in Euangelio Dominus: Ecce satanas expetuit uos ut cribraret sicuti triticum. Et iterum, Vigilate & orate ne intretis in tentationem. Sed & S. Petrus: Obambulat, inquit, aduersarius uester tanquam leo rugiens, quærens quem deuoret. Refragari autem illum Deo & perpetuo studio contradicere, omnesque creaturas in eius odium & despectum excitare, ubique testatur scriptura. Primorum certe parentum nostrorum animis improbe inspirabat opinionem de Deo longè indignissimam, quasi eis felicitatem malignè inuideret. Dicebat enim per Serpentem: Dixit ne Deus non manducandum esse de arbore illa? Et mox, Haudquaquam moriemini, uerum Dominus nouit quod eo die quo ederitis ex ipsa, aperientur oculi uestri, eritisque sicut dii, scientes bonum & malum. Quibus fallacissimis uerbis cum crederent, perierunt ipsi, & totum mundum secum pertraxerunt in ruinam & interitum. Nec hodie quidem desinit calumniari cum Deum ipsum tum eius opera, ut pariter secum nos abripiat in odium Dei, in diffidentiam ac desperationem & ad interitum sempiternum. Inuidet enim nobis salutem, ad quam destinati sumus per Christum. Verum præstat paulò distinctius hac de re loqui. Nocet satanas hominum animis, corporibus & facultatibus. Animos enim perpellit aut sollicitat ad peccandum. Præterea perturbat mentes hominum inque furorem adigit, mox etiam furore tumultuantes miserè diuexat atque conficit. Inde legas medicos aliquot maniam seu furorem appellare daemonium malum. Corpora uero uariè affligit morbis potissimum. Exemplum habemus sanctissimum Iob. In Euangelio secundum Lucam dicitur mulierem illam contractam, à satana alligatam fuisse annis decem & octo. Rursus in Euangelio secundum Marcum legimus de puero habente spiritum mutum. Quodcumque corripuerit, lacerat eum, ac spumans hic stridet dentibus suis & arescit, inque terram prolapsus prouoluitur. Idem spiritus ille malus opes & facultates terrenas homini eripit, uastat ac minuit, Id quod iterum claret in historia Iobi & Euangelij. Iob enim omni sua substantia exuitur, sic disponente res per milites & prædones satana Grex quoque porcorum immersus paludi & suffocatus, ingens dedit Gergesenis damnum. Atqui raptus à daemonibus per præceptum in paludem deuoluebatur. Cæterum

terum in his perficiendis sceleratus, quædam per se agit sociosque suos angelos nequam, quædam autem per alias creaturas. Per se agit exterius & interius hominem tentando commouendoque. Obijcit enim species fallaces, transformans se in angelum lucis, insinuat se animis hominum. Alloquitur splendida proponens promissiones & minas grauissimas, omnia tamen hæc adulterata dolis & mendacijs. Adducit enim non raro rationes apparentes quidem, adeoque & scripturæ loca in speciem ualde congrua, sed tamen ad institutum suum malitiosè detorta. Hæc autem ratione fidem ueram in animis hominum uel impedit luxatque, uel eripit & subuertit prorsus, mox occupat totos & in certissimam propellit perniciem. Ita refertur ingressus cor Iudæ, totum præcipitem dedisse in exitium sempiternum. Soli quidem Deo patet cor hominis. Is enim solus est cordis & renum scrutator. Sed diabolus artibus hominem circumueniendo & immittendo cordibus prauas persuasiones, corda hominum intrare dicitur. Per alias uero creaturas contra hominem idem ille agit, ueluti per elementa, cum contra nos excitat ignes, uentos, maria, grandines similesque calamitates. Excitat præterea homines contra nos, amicos, qui nos diuexent ac prodant, & inimicos qui cadibus bellis & persecutionibus nos atterant atque conficiant. Testimonium his iterum perhibet historia Iob, cui annumeres persecutiones cultoribus dei illatas. Iam & pseudoprophetas & incantatores idem ille contra nos incitat: quo pertinent præstigia & magiæ species omnes, quas efficaces esse testantur magorum Ægyptiacorum & Simonis opera, & locus Moysis Deut. 13. Pertinent huc in primis miracula falsa, & responsa uel oracula deprauata. Olim quidem his permultum nocuit ecclesiæ Dei, sicut testantur historiae, neque hodie nocere desinit, id quod nos docet ipsa experientia.

Quamuis enim certum sit satanam non ejici uirtute satanæ, cedit tamen alter alteri ad tempus, in hoc ut facilius hominibus imponant, regnumque obtineant. Christus certe cum Apostolo Paulo prædixit postrema quoque secula fallacibus signis & uirtutibus mirum in modum fore dementanda. Extant ea de re loci clarissimi apud Matth. in cap. 24. & in 2. Thess. 2. cap. Plura de operationibus diaboli, & fusius quidem c. v. recitari poterant, sed speramus hæc in compendium re collecta sufficere, ut quæ occasionem suppeditant cogitandi ampliora.

Ista autem nemo sic intelligat quasi diabolus omnium sit potens & quæ uelit mox etiam possit. Nam determinata uel definita contractaque est eius potentia, ut non tantum possit, quantum uelit. Alioquin dudum subuersa perijissent omnia. Proinde non præter rationem adieci in descriptione diabolum esse deo subiectum. Nam nihil hic nisi permittente deo potest facere. Permittit autem deus, uel ut suorum exerceat patientiam, acceleretque salutem: sicuti claret in historia Iob & uerbis Pauli ad Corinthios, dicentis: Ne excellentia reuelationum supra modum efferrer, datus mihi fuit stimulus in carne, nuncius satanæ, ut me colaphis caderet. Nec dubium est quin grauissimis persecutionum tormentis multos martyres egregios prouehat, uel hodie & olim promouerit ad gloriam & requiem sempiternam. Vel certe permittit diabolo potestatem sæuiendi aut irruendi in homines, ut eo pacto ipsorum castiget improbitatem, uel incredulitatē puniat. Etenim diaboli sunt instrumenta iræ diuinæ, quæ ipsius exequuntur uindictā. Paulus enim: Antichristi aduentus, inquit, est secundum operationem satanæ, cum omni potentia ac signis & prodigijs mendacibus, & cum omni deceptione iniustitiæ, in ijs qui pereunt: pro eo quod dilectionem ueritatis non receperunt ut salui fierent. Et propterea mittet illis deus efficacem illusionem, ut credant mendacio, ut iudicentur omnes qui non crediderunt ueritati, sed approbauerunt iniustitiam. Atque

DE ANIMA HOMINIS RATIONALI.

Pugnandū for-
titer cōtra dia-
bolum, non me-
tuendum.

Matth. 4.

1. Ioan. 5.

1. Pet. 5.

Ephes. 6.

1. Cor. 10.

hic ferè est neruus & uirtus magiæ uel incantationis, quæ in fidelibus elumbis est. Proinde non est quod quis sibi miserè metuat à diabolo. Quin potius dominū exercituum ipsum, ait Isaïas, sanctificate, is sit timor uester & pavor uester. Aiunt gentes aliquot orientales uenerari cacodæmonem, nimirum ne ipsis noceat. Sed hi cum ratione insaniunt prorsus. Deo enim nolente, quod modò dicere cœperā, aut non annuente, non potest tibi satan uel pilum attingere. Non enim potuit gregem porcorum prope paludem Gadarenam apud Gadaram pascentem corripere & perdere, nisi permissu domini. Sed & S. Augustinus enarrans Psalm. 32. his uerbis historiam Iob adducit: Quid ipse diabolus? Nunquid ausus est uel unicam ouiculam tollere uiro sancto Iob, nisi prius diceret: Mitte manum tuam, id est, da potestatem; Ille uolebat, sed deus non sinebat. Quando hic permisit, ille potuit: non ergo ille potuit, sed qui permisit. Ideo bene eruditus ipse Iob, non ait sicut modò commemorare solemus, Dominus dedit & diabolus abstulit: sed Dominus dedit, & dominus abstulit. Hæc autem in tentationibus non mediocriter consolantur pios, qui intelligunt sibi extra dei permissionem nihil euenire posse: nec illum quicquam nisi quod ad emendationem & salutē conferat permittere, ideoq; se semper in diuina conseruari prouidentia beneuolentiāq;. Nam omnia quæ hæcenus de potestate & operationibus dæmonum dicta sunt, non huc pertinent ut nos deiciant, sed ut uigilantiores reddāt. Vigilare iussit nos dominus, qui dæmonem uicit, & uincendi rationem tradidit. Ideo enim cum satana congressus est semel, iterum, & tertio, ut nos instrueret quomodo pugnaremus contra hostem humani generis. Vicit hunc nobis, ne diffideremus iam fractum à nobis superari posse facilius. Vincemus proculdubiō per fidem. Fide enim Christo cōnectimur, & fide spiritum Christi haurimus, cuius uirtute triumphabimus. Certè Petrus ea de caussa iussit nos fide resistere. Sanctus Paulus ad hanc pugnam nos adhortans, ac panoplia præstantissima nos muniens, dicit: Assumite uniuersam armaturam Dei, ut possitis resistere in die malo, & omnibus peractis stare. State igitur lumbis circuncinctis per ueritatem, & induti thoracem iustitiæ, & calceati pedibus ut parati sitis ad euangelium pacis. Super omnia assumpto scuto fidei, quo possitis omnia iacula mali illius ignita extinguere, galeamq; salutaris accipite, & gladium spiritus qui est uerbum Dei, in omni deprecatione & obsecratione orantes in omni tempore, in spiritu, &c. Quibus & illud accedit, quod eodem Apostolo teste, deus non finit nos tentari supra id quod ferre possumus, simulq; tentationibus felicem concedit exitum. Hunc igitur deum reuereamur, hunc oremus, ut ipsius uirtute uincamus. Amen.

De anima hominis rationali, & certissima eius post mortem corpoream salute.

S E R M O X.

COGNATIONEM cum spiritibus habere animam hominis rationalem fatentur omnes, neque est, opinor, sapientum ullus qui neget saluberrimam & omnibus pñs necessariam esse cognitionem rationalis animæ hominis, de qua tam multa & diligenter præcipit scriptura sancta. Proinde ordo rerum, utilitas, atque ipsa necessitas requirit, ut etiam de anima hominis rationali dicam. Sequar autem scripturæ eiusq; interpretum simplicitatem, physica illis explicanda reliquens, quorum officium & professio est, nisi quatenus physicis in nostra disputatione carere non possumus. Scriptura sancta & eius interpretes de anima hominis nec curiosas quæstiones mouent, nec curiosis hominibus

nibus satisfaciunt, cum ea desiderant scire quæ exponi non possunt, aut si possint, his tamen nihil dum aptè dictum esse perpetuò uideatur. Semper enim hærent, semper discendo dubitant, nunquam ad cognitionem ueritatis tranquillo animo perueniunt, nunquam in simplici ueritate reperta consistunt, alia & multò plura & acutiora quàm intellexerunt, indagant. Nos uerò scripturis sanctis nouimus omnia simpliciter & clarè tradi, quæ sunt necessaria & salutaria, atque his simpliciter, piè uel religiose acquiescendum esse: ergo quæ his tradita non sunt (in negotio salutis nostræ) scimus neq; inquirenda esse nobis, neq; salutem interturbare si nesciamus.

Vocabulum Animæ, uariè usurpatur in sancta scriptura. Principiò accipitur anima pro uiuente quolibet. Moses enim inducit deum loquentem: Producat terra animam uiuentem secundum speciem suam, iumentum reptile, & bestiam terræ. Quis enim ignorat animæ tres species uel partes (liceat interim sic loqui docendi gratia) (aut facultates principales recenseri: Est enim anima uegetatiua, quæ in plantis agit. Est anima sensitiua, quæ non est sine uegetatiua, animatq; animantia bruta. Est item anima rationalis potentijs pluribus instructa, & utramq; illam comprehendens, qua donati sunt homines. Hinc anima in scripturis ponitur pro flatu quo spirant & respirant homines, adeoq; pro uita hominis aut animantis. Ita legimus: Anima eius in ipso est. Et iterum, Non persequar te ultra (inquit ad Dauidem Saul) (eò quod anima mea pretiosa hodie fuerit in oculis tuis. Græci animam appellant *ψυχή* quasi *ἀναψυχή*, quòd respirando refrigeret. Hebræi Næphæsch appellitant à refocillando. Rursus ponitur anima in scripturis pro ipso animato adeoq; quouis uel potius toto homine. In lege enim dicitur: Anima quæ declinauerit ad magos & ariolos, ipsa morietur. Item in Paulo legimus: Omnis anima potestati supereminenti sit subdita. Et iterum in Genesi dicit rex Sodomæ ad Abram: Da mihi animas, & substantiam ipsam uel facultates accipe tu. Solet enim scriptura à parte totum denominare. Sicut enim per animam totum significat hominem, nobiliorem recensens partem, ita & per carnem inferiorem totum denotat. Præterea cū homini sicut & reliquis animantibus sit anima appetitiua, usurpatur anima in scripturis pro affectu, uoluntate & desiderio, uel cupiditate. Ezechiel enim dicit: Animam suam non saturabunt (Germanicè, *Sy werdend iren glust nit büssen*) uentres eorum non implebuntur. Postremò significat anima spiritum hominis rationalem. De qua differemus, deo inspirante, in præsentī. Dissimulare tamen hic non possum, apud scriptores præclaros controuerti de anima & animo, idem ne an diuersa sint, & esse quidem rationes in utraq; partem. Qui distinguunt, aiunt nos anima uiuere, animo autem sapere: id quod Lactantius dicit de Opificio dei cap. 18. Ego uideo probatissimos quosq; scriptores permixtim uti utroq; & alterum ponere pro altero.

Neque enim putandum est in homine duas esse animas. Rectissime enim definierunt Definitiones ecclesiasticæ, pronūciantes capite decimoquinto: Non dicimus duas esse animas in uno homine: sicut Iacobus & quidam Syrorum scribunt, unam animalem, qua animetur corpus & immixta sit sanguini, & alteram spirituales quæ rationem ministret: sed dicimus unam eandemq; esse animam in homine, quæ & corpus sua societate uiuificet, & semetipsam sua ratione disponat. Itaq; non putamus ullam eorum rationem esse habendam, qui in uniuersum negant esse animam. Hi enim perinde insaniunt, ut qui solem lucere negant. Omnes enim solem & uidemus & sentimus: sicut & animæ beneficio uiuimus.

Porro quid sit rationalis anima hominis, nondum potuere concorditer defini-

Animæ uocabulum uariè usurpatum.
Gen. 1.

Anima flatus & uita.
Act. 20.
1. Sam. 16.

Anima pro homine.
Leuit. 20.
Rom. 13.
Gen. 14.

Anima desiderium.
Ezech. 7.
Anima spiritus hominis.

Anima & animus.

Unam esse animam.

Esse animam.

Anima quid sit.

nire sapientes huius seculi, quippe adeo dissentientes, ut uix duos inuenias qui idem dicant. Sunt autem sententiæ inter se discordes non paucae. Quid quod ueteres scripturarum interpretes in definienda anima cunctantius progressi sunt? Lactantius de Opificio Dei, negat animæ rationem & naturam assequi posse homines. Idcirco nihil prorsus aberrarunt à uero, quibus uisum est animam nulla finitione absoluta concludi posse, qua uidelicet eius natura exactissimè exprimatur; interim posse eius ingenium utcunq; adumbrari, idq; ex operibus seu actis eius attributisq; scripturæ. Sunt ergo qui dixerunt animam esse spiritum uitæ, ad imaginem Dei creatum, & corpori humano inspiratum. Est qui sic describat: Anima est spiritus, per quē corpus, cui est connexus, uiuit, aptus cognitioni dei propter amorem, atq; hinc coniunctioni cum eo ad beatitudinem æternam. Alius sic definit: Anima rationalis, est spiritus intelligens: altera pars substantiæ hominis: nec extinguitur cum à corpore discessit, sed immortalis est. Cassiodorus sic definit: Anima hominis est à Deo creata, spiritalis propriaq; substantia, sui corporis uiuificatrix, rationalis quidem & immortalis. Nos descriptionem petitam ex scripturis expendendam pñs, & quæ totam hanc dissertationem nostram dirigat, proponimus: Anima est substantia spiritalis, corpori humano à deo infusa, ut ei coniuncta ipsum animet & dirigat, separata autem à corpore non intereat, sed immortalis æternū uiuat.

*Animas esse
substantias.
Matth. 10.*

Luce 16.

Luce 23.

Apoc. 6.

*Corporeæ an
incorporeæ sub
stantiæ animæ?*

Negant nonnulli animam esse substantiam. Nam contendunt nihil aliud esse quam uim uitalem in homine adeoq; qualitatem quandam. Scriptura uerò sancta agnoscit animam subsistentem esse essentiam. Dominus enim in euangelio testatur animam in gehenna torqueri posse. Id quod protinus eadem euangelica auctoritate in anima diuitis epulonis quasi oculis contemplandum demonstratur. Latroni dixit idem dominus, qui mentiri non potest: Hodie mecum eris in paradiso. Id quod nō potest de ulla latronis parte quam anima exponi. Corpore enim affixus cruci hærebat. Vnde & Ioannes Apostolus & euangelista uidit subter altare animas interfectorum propter uerbum Dei. Audiuit easdem clamantes uoce magna, ac dicentes: Usquequo domine, qui es sanctus & uerax, non iudicas & uindicas sanguinem nostrum de his qui habitant in terra? Idem uidit animabus singulis singulas dari stolas, his insuper additis uerbis, à domino: Requiescite adhuc tempus modicum, donec compleantur cōserui uestri & fratres uestri, qui interficiendi sunt, sicuti & uos. Quæ quidem omnia non qualitatibus, sed essentijs subsistentibus competunt. Sunt ergo animæ hominum substantiæ. Quod ut exprimerent significantissimè, arbitror nonnullos scriptores ecclesiasticos quondam tradidisse, rationales animas hominum esse corporeas, hoc est, sui generis substantias propriè existentes. Nec puto me c. v. molestum futurum, si recitauero ad uerbum quæ de hac caussa in utranque partem disputauit D. Augustinus epist. ad S. Hierony. quæ ordine est 28. Incorpoream esse animam, inquit, etsi difficile tardioribus persuaderi potest, mihi tamen fateor esse persuasum. Sed ne uerbi controuersiam uel superfluò faciam, uel meritò patiar: quoniam cum de re constat, non est opus certare de nomine: si corpus est omnis substantia uel essentia, uel si quid aptius nuncupatur id quod aliquo modo est in seipso, corpus est anima. Item si eam solam incorpoream placet appellare naturam quæ summè incommutabilis & ubiq; tota est, corpus est anima, quoniam tale aliquid ipsa non est. Porro si corpus non est nisi quod per loci spacium aliqua longitudine, latitudine, altitudine ita sistitur uel mouetur, ut maiore sui parte maiorem locum occupet, & breuiore breuiorem, minusq; sit in parte quam in toto, non est corpus anima. Per totum

totum quippe corpus quod animat non locali diffusione, sed quadam uitali intentione porrigitur. Nā per omnes eius particulas tota simul adest, nec minor in minoribus, & in maioribus maior, sed alicubi intensius, alicubi remissius, & in omnibus tota, & in singulis tota est. Neque enim aliter quod in corpore etiam non toto sentit, tamen tota sentit. Nam cum exiguo puncto in carne uiua aliquid tangitur, quamuis locus ille non solum totius corporis nō sit, sed uix in corpore uideatur, animam tantum totam non latet: neque id quod sentitur per corporis cuncta discurret, sed id tamen sentitur ubi sit. Vnde ergo ad totam mox peruenit, quod non in toto sit, nisi quia & ibi tota est ubi sit, nec ut tota ibi sit cætera deserit. Viuunt enim & illa ea præsentē ubi nihil tale factum est. Quod si fieret, & utrunque simul fieret, simul utrunque totam pariter non lateret. Proinde & in omnibus simul & in singulis particulis corporis sui tota simul esse non posset, si per illas ita diffunderetur, ut uideremus corpora diffusa per spacia locorum minoribus suis partibus minora occupare, & amplioribus ampliora. Quapropter si anima corpus esse dicenda est, non est certe corpus, quale terrenum est, nec quale humidum aut æreum aut æthereum. Omnia quippe talia maiora sunt in maioribus locis, & minora in minoribus, & nihil eorum in aliqua sui parte totum adest, sed ut sunt partes locorum ita occupantur partibus corporum. Vnde intelligitur anima, siue corpus siue incorporea dicenda sit, propriam quandam habere naturam, omnibus his mundanæ molis elementis excellentiore substantia creatam: quæ ueraciter non possit in aliqua phantasia corporalium imaginum quas per carnis sensus percipimus cogitari, sed mente intelligi uitæque sentiri. Hactenus Augustini uerba recensui. Scriptura quoque huc maximè inclinât ut incorpoream esse animam doceat. Diligenter enim & disertè spiritum appellat. Nam dominus in euangelio secundum Ioan-

Anima est incorporea siue spiritus.
Ioan. 10.
Ioan. 19.

nem: Ego ponam animam meam, inquit, & iterum sumam eam. Nemo tollit eam à me, sed ego ponam eam à meipso. At apud eundem euangelistam legis, Dixit autem Iesus: Consummatum est, & inclinato capite tradidit spiritum. Nam apud aliū euangelistam exclamat: Pater in manus tuas trado spiritum meum. Et Matthæus: Iesus autem cum iterum clamasset, inquit, uoce magna, emisit spiritum. Quo re-

*Lucæ 23.
Matth. 27.
Acto. 7.*

ferri potest proculdubio quod in Actis de Stephano protomartyre legimus: Et lapidabant Stephanum inuocantem & dicentem: Domine Iesu suscipe spiritum meum. His uerò significantius exprimere non possum qualis sit substantia animæ hominis, quam spiritum esse credo, propriam utique ac singularem suam habentem substantiam à Deo creatam. Nam Augustinus, cuius uerba paulò ante adduxi, de nouo in 1. cap. de Quantitate animæ dicit: Substantiam animæ nominare non possum: non enim eam puto esse ex his uisitaris notisque naturis quas istis corporis sensibus tangimus. Nam neque ex terra, neque ex aqua, neque ex aere, neque ex igni, neque ex his omnibus aut aliquibus horum coniunctis animam constare puto. Simplex animæ natura dici potest, quia ex alijs naturis non est. Quæ Augustini uerba imitando referre exprimereque uolēs Cassiodorus dixit: Anima hominis à deo creata spiritalis propriaque substantia est. Ergo simpliciter assero, singularem, imò excellentem quandam & ab alijs spiritibus differentem substantiam habere animam, uerè quidem existentem & à creatione sua semper agentem, sed quam nos nostro eloquio circumscribere & eloqui non possumus.

Interim non probamus eos, qui exprimere uolentes qualis nam sit animæ substantia, ac dixerunt animam esse deum, uel certè partem portionemue dei. Nam utrunque reprobatur scriptura. Etenim anima creatura & uicissitudinē atque peccatis immersa est, creator autē & munda ex semetipsa non est. Et quoniam creator

Anima nec Deus nec pars Dei est.

incommutabilis & indiuisibilis est, anima dei portio esse nō potest. Eleganter ergo & uerè Aurelius Prudentius in sua Apotheosi, cū multis fœdos hos errores confutasset, recolligens tandem ueritatis sententiam, canit:

*Absurdè fertur Deus aut pars esse Dei, quæ
Diuinum summumq; bonum de fonte perenni
Nunc bibit, obsequio nunc culpa aut crimine perdit,
Et modò supplicium recipit, modò libera calcat, &c.*

Hunc errorem ut elideremus & animam discerneremus ab alijs spiritibus substantijsue spiritalibus, adiecimus in nostra descriptione, animam humanam à deo corpori humano infusam: unde creatam esse quilibet iam nullo intelligit negotio, sed & spiritum esse, non angelicum, sed humanum, id est à Deo humano corpori infusum, suæ essentia atq; naturæ.

De origine
animæ.

Vbi rursus noua se nobis offert explicanda quæstio de Animarum origine. Quæri enim solet, unde ueniant animæ, quando aut quomodo ingrediantur corpora sua: S. Hieronymus author est, plurimas easq; inter se diuersissimas fuisse quondam de origine animarum sententias. Scribens enim Marcellino & Anaplychia: Super animæ statu, inquit, memini uestra quæstiunculæ imò maxime ecclesiasticæ quæstionis: Vtrum lapsa de cœlo sit, ut Pythagoras philosophus omnesq; Platonici & Origenes putant. An à propria Dei substantia, ut Stoici, Manichæus, & Hispaniæ Priscilliani hæreses suspicantur. An in thesauro habeantur dei, olim conditæ, ut quidam ecclesiastici stulta persuasione confidunt. An quotidie à Deo fiant & mittantur in corpora: secundum illud quod in euangelio scriptum est: Pater meus usque modo operatur & ego operor. An certè ex traduce, ut Tertullianus, Apollinarius & maxima pars Occidentaliū autumant, ut quomodo corpus ex corpore, sic anima nascatur ex anima, & simili cum brutis animantibus conditione subsistat. Cæterum refutatae sunt omnes illæ opiniones solidis argumentis à scriptoribus ecclesiasticis, pro uerissima autem recepta & asserta est, quæ tradit animam ex nihilo creati & corpori infundi à deo, quando fœtus in utero materno sua forma suisq; partibus perfectus est. Definitiones enim ecclesiasticæ sic pronunciant: Dicimus creationē animæ solum creatorem omnium nosse, & corpus tantum per coniugij copulam seminari, Dei uero iudicio coagulari in matrice & compingi atq; formari, ac formato iam corpore animam creati & infundi. Vnde & beatus Hieronymus aduersus errores Ioan. Hierosolymitani episcopi disputans ad Pammachiū, post recitatas uarias de origine animæ sententias, ait, An certè (quod ecclesiasticum est secundum eloquia saluatoris: Pater usq; modo operatur, & ego operor, Et illud Isaia: Qui format spiritum hominis in ipso, Et in Psalmis: Qui fingit per singulos corda eorum) quotidie fabricatur deus animas, cuius uelle fecisse est, & conditor esse non cessat: Hæc ille. Certè scriptura disertis uerbis docet animam non oriri ex terra, neq; esse ante corpus conditam, sed proficisci ex creatoris ore, nimirum ex uirtute Dei secreta, infundiq; formato corpori. Formationem enim patris nostri describens Moses, prius cōmemorat Adami formatum esse corpus, deinde in formatum & absolutum corpus inspiratam animam uitæ: Formauit, inquit, dominus deus hominem de limo terræ, & inspirauit in faciem uel nares eius spiritum uitæ, factusq; est homo in animam uiuentem. Significat enim spiritus uitæ animalem rationalemq; id est, humanam animam, quam uides corpori formato inspiratam siue infusam esse. Cumq; mulierem ex costa idem crearet dominus, animam certè nō ex Adamo eiusq; anima traduxit in Euam, sed creatam formato corpori sua infudit bonitate & potentia. Neq; hodie aliter nos
creari

Gene. 2.

creari à Domino quàm ut corpori formato infundatur anima, locupletissimus testis est Iob, dicens: Manus tuæ (ô Deus) fecerunt me & plasmauerunt totum. Nonne sicut lac mulisti me, & sicut caseum me coagulasti: Cute & carne uestiuiisti me, ossibus etiam & nervis compegisti me. En habes his elegantissimè descriptam, & conceptionem & formationem in utero materno corporis humani. Sequitur iam deinceps in Iob de anima: Vitam & misericordiam tribuisti mihi, & uisitatio tua custodiuit spiritum meum. En uita, id est, animâ corpori iam formato est à Deo infusa. Vitam, ait, & misericordiam tribuisti mihi. Adiecit uitæ misericordiam. Est enim mirum, in utero materno foetum uiuere, tot uidelicet membranâ inuolutum, exierit ergo se in eo misericordiæ diuinæ beneficium ingens. Sequitur autem per interpretationem: Et uisitatio tua, id est, prouidentia & conseruatio tua, custodiuit seu conseruauit spiritum meum. Nunc enim spiritum uocat id quod appellarat prius uitam, id est, animam. Proinde rectè & secundum scripturas tenemus, animas hominum creari à Deo & infundi absolutis iam in utero corporibus, utcunque non attingamus acu, quod dici solet, singula huius causæ puncta atque momenta.

Iob 10.

Inspiciendum modò quid operetur in corpore hominis anima: breuibus id in descriptione complexi sumus, dicentes coniunctam corpori hominem animare & dirigere. Etenim complectitur anima rationalis uim uegetatiuam & sensitiuam, & eatenus corpus animat: præterea partes habet duas, officijs, non essentia distinctas, Intellectum & Voluntatem, & eatenus hominem dirigit. Intellectu enim qui & mens & ratio dicitur, percipit, diiudicat, & cognoscit intelligibilia, cernitque quid persequatur aut quid fugiat. Voluntate autem seu appetitu cognitum eligit, hoc amplectens, illud uerò repellens. Quæ rursus patent latissimè. Proinde singula persequar paulò copiosius. Principio anima corpus hoc mortale & terrenum præsentia sua uiuificat, colligit in unum atque complexu miro retinet, nec disflueri neque contabescere finit: alimenta per membra æqualiter, suis quibusque reditis distribuit, congruentiam eius modumque conseruat, non tantum in pulchritudine, sed etiam in crescendo atque gignendo. Sed hæc omnia homini etiam cum arbutis communia uideri queunt. Hæc enim etiam uiuere, in suo item quidque illorum genere custodiri, ali, crescere, gignere uidemus atque fatemur. Videamus itaque quid anima possit & operetur in sensibus, ubi euidentior uita intelligitur. Intendit se anima in tactum, & eo calida, frigida, aspera, lenia, dura, mollia, leuia, grauiâ, sentit atque discernit. Deinde innumerabiles differentias saporum, odorum, sonorum, formarum, gustando, olfaciendo, audiendo, uidendoque diiudicat. Atque in his omnibus ea quæ secundum naturam sui corporis sunt, asciscit atque appetit, reijcit fugitque contraria: foetibus quoque non iam gignendis tantummodo, sed etiam fouendis, tuendis, alendis atque conseruandis conspirat. Sed hæc rursus omnia animam etiam in bestijs posse nemo negat. Consideremus ergo quæ sit uis animæ hominis propria: & hic expende mihi mirabilem intelligendi & ratiocinandi facultatem, nec uulgarem, qualis est in brutis memoriâ, sed reminiscen-tiam animaduersione atque signis commendatarum ac retentorum rerum innumerabilium: considera mihi tot artes opificum, agrorum cultus, extructiones urbium, uariarum ædificiorum ac moliminum multimoda miracula: inuentiones tot signorum in literis, in uerbis, in gestu, in sono, in picturis atque figmentis: tot gentium linguas, tot instituta, tot noua, tot instaurata, tantum librorum numerum, & huscemodimonimentorum ad custodiendam memoriâ, tanquam curâ posteritatis: officiorum, potestatum, honorum, dignitatumque ordines, siue in familijs, siue domi militiarumque

Operationes
et uires animæ.Ex 33. cap. Aug.
gusti. de Quantitate animæ.

in republica, siue in prophanis, siue in sacris apparatibus: considera mihi uim uere admirabilem excogitandi fluuios eloquentiæ, carminum uarietates, ludendi ac iocandi causa milleformes simulationes, modulandi peritiam, dimetiendi subtilitatem, numerandi disciplinam, præteritorum ac futurorum ex præsentibus coniecturam. Magnæ quidem hæ in hominis anima uirtutes seu operationes sunt, sed bonis & malis communes. Sequuntur ergo ex quibus uera bonitas atque laus homini ex uiribus animæ existit, & quæ in solis inueniuntur pijs. Audet se anima uerso corpori præponere, bonæque eius bona sua non putare, imò & contemnere: & inde quò magis se delectat, eò magis sese abstrahere à sordibus, totamque se purgare per fidem & spiritum sanctum, roborare item se aduersus omnia quæ de bono proposito dimouere moluntur: societatem præterea magni pendere, homines charitate prosequi, nihilq; uelle alteri, quod sibi nolit accidere. Nam sequitur doctrinam diuinam, & credit per hanc sibi Deum loqui: coniungitur per spiritum & fidem cum ipso Deo, in quo delectatur uereq; feliciter uiuit, omnis generis uirtutes proferens. In hoc tam præclaro animæ studio magnus adhuc labor est. Acerimè enim cum carne & mundo confligit: neque uspiam tuta ab infestationibus incursionibusq; satanæ conquiescit. Verùm hic quoque à Domino confirmata pulcherrimas reportat uictorias ac triumphos. Operatur ergo sanctissima quæque opera anima, sed sanctorum: animæ enim impiorum omnis generis scelera perpetrant. Sunt aliæ operationes animarum multæ, quas ne sim æquo prolixior, recitare desino. Hactenus uerò de anima hominis corpori adhuc coniuncta differui: in qua dissertatione mira relucet Dei bonitas, animæ imò totius hominis munificentissimi creatoris, cuius gratiæ meritò acceptum ferimus, quicquid laudis animæ tribuitur. Dicam porrò de anima à corpore dissociata.

De anima à corpore separata.

Separata à corpore non desinit esse quod fuit, sed extincto iam corpore ipsa in sua permanet essentia superstes, immortalis omnino, & omnis corruptionis expers. Mors enim hominis non est animæ extinctio aut pernicies, sed disiunctio duntaxat aut discessus à corpore. Tollis ex laterna lucernam, lumen abstulisti laternæ, lucernam uerò non extinxisti: laterna propter ablatam lucernam tenebris squalet quidem, sed lucerna adeò nihil damni sensit ex translatione, ut exempta ex laterna iam clarius luceat & latius spargat radios sui luminis. Ita certè anima separata à corpore suo terreo luteoq; adeò non sentit ullum incommodum, ut molestia corporis liberata, liberius iam & efficacius uiuat & agat. Cæterum uulgus hoc non uidet, corpus duntaxat in extinctis anima spoliatum uidet, & quia hoc omni sensu & motu caret imò & putrescit, putat totum interisse hominem. Nec desunt audaces & impij nequam, quibus in ore est neminem unquam à morte siue ex inferis redisse, qui reditu suo approbarit extincto corpore superstites remanere animas. Sed malitiosè mentiuntur, simulantes se nescire quod certò nouerunt. Quis enim nesciat Christum Dei filium mortuum & sepultum quidem, sed tertia die à mortuis esse exuscitatum, rediente in corpus illa ipsa anima, quæ ante mortem animarat & rexerat corpus? Quis nesciat Christum uero corpore & sua ipsius rationali & genuina anima ascendisse in cælos, ac consedisse in dextera patris, ut illuc quasi deposito pignore certissimo, toti orbi attestaretur, & animas nostras proprias & corpora nostra propria aliquando illuc fore transferenda? Quis nesciat tot mortuos ex mortuis in uitam reuocatos recepisse non nouas, sed ueteres illas suas animas? quod minimè factum esset, si morte corporea extinguerentur animæ hominum.

De morte animarum.

Obijciunt scripturam ipsam meminisse mortis animæ. Fateor id quidem. Anima enim

ma enim hominis & mortalis & immortalis est, secundum quendam modum suū. Non enim omnimodo immortalis est, sicut Deus, de quo dictum est, quia solus habet immortalitatem. Et quidem memorabilis est mors animæ in scriptura sancta, sed ea refertur ad conditionem non ad substantiam animæ. Nam si uita animæ Deus est, certè mors animæ est Deo destitui & sibi ipsi relinqui. Siquidem uiuit nihilominus in essentia sua rationalis anima, sed cum misere uiuit, misera uita mors uerè appellatur. Sed & desperatio ipsissima animæ mors est. Nam spe uiuimus. Et Paulus: Viuo non iam ego, ait, sed uiuit in me Christus: ac uitam quam nunc uiuo in carne, per fidem uiuo filij Dei: ergo fide destituti mortui sunt, fide donati uiuentes. S. Augustinus de Fide & Symbolo cap. 10. Potest & anima, ait, sicut corruptibilis propter morum uitia, ita etiam mortalis dici. Mors quippe animæ est apostatare à Deo, quod primum eius peccatum in paradiso sacris literis continetur. Et idem iterum lib. De Trinit. 14. cap. 4. Habet & anima suam mortem, inquit, cum uita beata caret, quæ uera animæ uita dicenda est. Sed immortalis ideò nuncupatur, quoniam qualicunque uita etiam si miserrima uiuit, nunquam desinit uiuere. Profitemur ergo ore libero animas hominum à corporibus separatas seu exemptas non interire, sed immortales æternum uiuere, fideles quidem in æterna felicitate, infideles autem in æterna condemnatione.

1. Tim. 1. & 6.

Galat. 2.

Id quod solidis aliquot scripturæ testimonijs comprobare pergamus, si illud monero prius, testimonia scripturarum in hac causa longè esse uiuidiora, quam rationes humanas è philosophia contextas. Petuntur enim testimonia ex ore ipsius uiui, & in uita conseruantis Dei, qui cum uerax sit, mentiri nescit, qui cum uitā largiatur & uita sit, de uita omnium certissime testari potest. Neque dubium est cooperari uerbo Dei spiritum Dei, à quo nisi tangantur corda hominum, nihil efficient in mortis periculo maxime & in alijs tentationibus, quantumuis euidentes philosophicæ rationes. Carnei ergo & animales sunt prorsus, qui nō erubescunt dicere, scripturis duntaxat sibi non posse persuaderi animarum immortalitatem. Imò firmum ac stabile in tentationibus nunquam erit, quod ex carne & sanguine profectum fuerit. Subijciemus itaque aliquot certa testimonia & ea maxime clara.

Testimonia in mortalitatis animarum.

Dauid rex in orbe potentissimus & felicissimus, unico uersu & animarum immortalitatem & corporum resurrectionem complexus dixit: Non derelinques, Domine, in inferno animam meam, neque dabis sanctum tuum uidere corruptionem. Constat homo corpore & anima. Corpus corrumpitur morte, & redigitur in puluerem: sed ideò non peribit. Sicut enim corpus Christi sepultum non computruit, sed tertia die resurrexit, ita in die iudicij excitabuntur & corpora nostra & uindicabuntur per Christum à corruptione. Anima uerò nostra non demergitur ad inferos. Sed sicut anima Christi ad corpus ex inferis redijt, & in resumpto corpore in cœlos ascendit: ita & animæ nostræ uiuent per Christum, non morientur.

Psalm. 16.

Solomon filius Dauidis, regum & omnium mortalium sapientissimus, uno & ipse uersu fata & corporis & animæ exponens, dicit: Reuertetur puluis in terram sicut fuit, & spiritus redibit ad Deum, qui dedit illum. Puluis appellatur à Solomone corpus humanum, quia à Deo factum refertur in Mose, ex puluere terræ. Corpus ergo redit in puluerem, computrescit enim & resoluitur in id quod ante fuerat in diem usque iudicij, pronunciante Domino: Puluis es & in puluerem reuertaris. Verum spiritus, id est, anima rationalis non interit cum corpore, non resoluitur in puluerem, quia non est sumpta de puluere, nec dissipatur in aerem, quia aere non constat, sed redit ad Deum superstes à morte. Ideò autem ad Deum redit, quia Deus dedit animam, & singulari modo hominem condidit ad similitudinem

Eccles. 12.

& imaginem suam, inspirans in faciem eius spiritum uitæ, uitæ inquam, id est, uitæ talis potentia, non spiritum mortis. Non potest ergo interire, quia immortalitatem accepit à Deo, qui cum uita sit, uitalem spiritum quem condidit conseruare potest.

Domínus Iesus, uerus Dei filius, uita & resurrectio fidelium, in Euangelio clare dicit: Ne metuatis uobis ab his qui occidunt corpus, animam autem non possunt occidere: sed metuite magis illum, qui potest & animam & corpus perdere in gehenna. Si caso corpore à tyrannís, anima non ceditur, manet ergo superstes ab extincto corpore, atque ita certò manet, ut exuta corpore, propter perfidiam æternum arsurus à iustissimo Deo cónficiatur in gehennam. Nam in eodem Euangelio iterum dicit Domínus: Qui uoluerit animam suam seruare, perdet eam, & qui eam mea causa perdidit, inueniet eam. Perdit autem animam suam, non is duntaxat, qui uoluptatibus mundi ipsam defraudat & temperantissimè uiuit, sed is quoque, qui se propter confessionem fidei trucidandum offert tyrannorum truculentissimis manibus. Hic autem inuenit perditam animam, manent ergo superstes & immortales animæ hominum etiam post mortem corpoream.

In Euangelio secundum Ioannem dicit Domínus: Amen amen dico uobis, qui sermonem meum audit & credit ei qui misit me, habet uitam æternam, & in iudicium nõ ueniet, sed transiit à morte in uitam. Habes in hisce Domini uerbis mortem corpoream. At protinus ab hac testatur nos transire in uitam: superstes ergo manent à morte hominum animæ. Nunc enim nihil loquitur de corporis resurrectione & salute, sed de animæ uita post mortem.

In eodem Euangelio rursus dicit Domínus: Amen amen dico uobis, si quis sermonem meum seruauerit, mortem non uidebit in æternum. Cæterum cõstat omnibus hominibus constitutum esse semel mori, nimirum morte corporali: uiuit ergo anima à morte corporali. Necessè est enim hominem fidelem non uidere uel non experiri mortem: nisi is falsum dixerit qui sacramento quod dixit, affirmauit. Vtrobique enim iusiurandum adhibuit, dicens: Amen dico uobis, quò minus dubitemus de animarum immortalitate. Plurima extant eaque euidentissima in eodẽ Euangelio testimonia Christi filij Dei, ut cap. 6. & 11. quibus coniungemus modò unum & alterum ex scriptis beatissimorum Christi Apostolorum.

Sanctus Petrus loquens de animabus patrum iam olim defunctorum, dicit mortuis prædicatum esse Euangelium, ut iudicentur quidem sicuti alij homines carne, uiuant autem iuxta Deum spiritu. Spiritus sunt animæ beatorum patrum, quorum corpora iamdudum sepulta expectant uniuersalem generalis illius finalis iudicij sententiam, id est, ut caro eorum resuscitetur, & simul cum alijs hominibus iudicetur in ultima illa die: interea uerò animæ uiuunt apud Deum. Superstes ergo sunt animæ hominum, etiam iamdudum putrefactis corporibus ipsorum.

S. Paulus in Epistola ad Timotheum, dicit manifestè uitam & immortalitatem per Christum esse reparatam. Idem ubique animarum immortalitatem tam clare asseuerat, ut cæcus sit qui non uideat.

S. Ioannes Apostolus & Euangelista uidet in coelis sub ara, id est, sub patrocínio Christi, qui est hostia & propitiatio pro peccatis mundi, latitantes animas uiuentes atque clamantes: Usquequo Domine non uindicas sanguinem nostrum? Videt easdem indui uestibus candidis, donarique requie sempiterna. Aterant istæ animæ martyrum Christi animæ, quorum corpora cæsa interierant in terra sub tyrannis & persecutoribus fidei Christianæ: immortales sunt itaque animæ hominum. Ideoque uerissima adeoque indubitata sunt quæ leguntur in libro Sapientia hæc prodita

prodita uerbis: Iustorum animæ in manu Dei sunt, & non tanget illos tormentum *Sap. 3.* mortis. Insipientium iudicio mori uidentur: calamitosus existimatur exitus eorum & discessus à nobis exitialis, cum illi fruuntur felicitate. Etenim dum cruciantur in conspectu hominum, spem alunt plenam immortalitatis, & leuiter uexati ampla beneficia consequentur. Quoniam Deus tentauit eos & se dignos comperit. Tanquam aurum in fornace probauit eos, & ut solidum sacrificium excepit. Ita que tempore uisitationis suæ effulgebunt, & ut in stipulis scintillæ discurrent. Iudicabunt gentes, dominabunturque populis, & regnabit in eis Dominus in perpetuum. Verissime ergo & secundum scripturam canonicam pronunciant Definitiones ecclesiasticæ 16. cap. Solum hominem credimus habere animam substantiuam, quæ exuta corpore uiuit, & sensus suos atque ingenium uiuaciter tenet. Non cum corpore moritur, sicut Aratus asserit: neque post modicum interuallum, sicut Zenon dicit: quia substantialiter uiuit. Animalium uero animæ non sunt substantiæ, sed cum carne ipsa carnis uiuacitate nascuntur, & cum carnis morte finiuntur moriunturque.

Veritas porro illa de animarum immortalitate, ueluti lege naturæ inscripta est *Omnes sapientes docuerunt animas esse immortales.* mentibus omnium hominum. Vnde nihil mirum, quod sapientissimi quique inter gentes nunquam sustinuerunt animam appellari mortalem. Consensus enim omnium, qui naturæ uox putatur, præcipue maiorum, declarat animas immortales. Idque etiam asserit M. Tullius: Ut, inquit, deos esse natura opinamur, qualesque sint ratione cognoscimus, sic permanere animos arbitramur, consensu nationum omnium. Omnes itaque præci, & omnes qui eos insequuti sunt, animos æternos dixerunt, Trismegistus, Musæus, Orpheus, Homerus, Pindarus, Pherecydesque Syrus Pythagoræ præceptor, & huius discipulus Socrates. Ipse Plato, qui ut Pythagorea disceret, in Italiam nauigauit, de animarum immortalitate non sensit idem modò quod Pythagoras, sed rationes etiam attulit. Hæ rationes, teste Tullio, plures sunt, ut qui legat librum eius, non uideatur aliquid desiderare amplius. Seneca tam clarè animorum immortalitatem asserit, ut nihil clarius. Nam idem fecit Epictetus insignis philosophus, Senecæ synchronos. Si qui ergo supersunt homines leues, quibus dubia esse uidetur animarum immortalitas, aut qui hanc prorsus negant, hi certè hominum nomine indigni sunt. Nam pestes sunt reipublicæ & bestię, digni qui hominum explodantur abdicanturque consortio. Freno enim caret, pudoremque omnem abstergit, & ad omne nephas patrandum instructissimus est, quisquis credit animam hominis esse mortalem.

Demonstrauit separatas per mortem à corporibus animas hominum non interire sed uiuere superstites, restat ut porro doceam ubinam destitutæ corporis domicilio agant aut uersentur. Dum coniunctæ essent corporibus, his ceu domicilijs suis utebantur, ita ut quamuis dicantur loco non circumscribi, non errarint tamen extra corpora sua, uerum in ipsis ceu ergastulis ad dissolutionem usque fuerint uelut conclusæ. Illæ ipsæ ergo à corporibus iam dissociatæ, cum sensus suos, ingenium suum, totamque substantiam suam uiuaciter retineant, etsi ne nunc quidem loco circumscribi dicantur, non diffluunt tamen aut dissoluuntur, nusquam existentes, sed compactæ in sua essentia alicubi sunt iterum, habentes non noua quidem corpora (liberæ enim sunt ad iudicium usque, quo denuo corporibus coniungentur) sed tamen certa sibi à Deo parata in quibus degant domicilia. Per me sane licet alij perquam acutè & subtiliter disputent, quomodo spiritus loco contineantur, uel non contineantur: ego simpliciter cum scriptura assero, animas à corporibus separatas colligi uel in ipsum cælum, uel demergi in tartara, atque eas ibi sic

Ubinam agant animæ separatæ à corporibus.

Luce 16. uersari, ut cum hic sint alibi non sint. Nam Dominus in Euangelio dicit significan-
tissime Lazari mendici animam delatam esse in sinum Abrahamæ, diuitis autem epu-
lonis deiectam in tartara. Quinimò sequitur protinus in historia, Inter nos & uos
(colloquuntur autem animæ beatæ & infelices) hiatus ingens firmatus est, ut hi
Phil. 1. qui uolunt hinc transire ad uos, non possint, neque inde huc transcendere. Iam &
S. Paulus dissolui cupit & esse cum Christo. Dissoluimur morte: migrante enim
anima dissoluitur & concidit corpus, anima ad Christum euolat, Christum uerò
Ioan. 14. indicat nobis scriptura in cœlis ad dexteram patris. Cœlum autem ubi sit, nemo
nescit. Et nos aliàs ea de re copiosius disputauimus. In Euangelio secundum Ioan-
nem ipse Dominus animarum contubernium animabus à corporibus separatis pa-
ratum, & locum appellat & mansionem seu habitationem; his insuper adiectis uer-
bis: Assumam uos ad me ipsum, ut ubi sum ego, & uos sitis. Ideo quæ uidet beatus Io-
Apoc. 6. annes in cœlo animas sub ara uel patrocínio Christi degentes atque conquescent-
es. Illuc enim excedentes ex corporibus ad semetipsum collegerat. Huc pertinet
elegant & mirè huic negotio accommodus beati Pauli Apostoli locus, his uerbis
1. Cor. 5. in 2. ad Corinth. conscriptus: Scimus quòd si terrenum nostrum domicilium ta-
bernaculi destruat, ædificationem ex Deo habemus, domum non manufactam
æternam in cœlis. Et reliqua. En dum corporibus nostris fuerunt coniunctæ ani-
mæ nostræ, hæc ceu domos suas inhabitauerunt, deiecta autem domo corruptibili,
aliam animæ meliorem & diuturniorem extruxit Deus, ipsum, inquam, cœlum, in
quod excedentes ex corporibus benignè recipit. Nā corpus ipsum quale nunc ha-
bemus, appellat domicilium tabernaculi. Sicut enim tabernacula leui materia nec
solido fundamento ad breue tempus extruuntur, deinde paulò post diruuntur aut
sponte cadunt: ita corpus mortale datum est hominibus uelut caducum tugu-
rium, quod paucis diebus incolant, mox autem migrent. Simili allegoria usus est
& S. Petrus 2. Petri 1. Huic opponit ædificium durationis perpetuæ, ipsum, in-
quam, cœlum. Cùm enim dixisset nos habere ædificationem ex Deo, per inter-
pretationem subiungit: Domum non manufactam. Et adhuc clarius: Æternam in
cœlis. Nec impedit aut alium sensum suppetit quod mox sequitur: Desideramus
domicilium nostrum quod è cœlis est superinduere. Nam è cœlis perinde sonat ac
si tu dicas cœleste: domicilium ergo animæ cœleste uel ipsum cœlum est, locus, in-
quam deputatus beatis spiritibus. Enimvero habitabit in cœlis anima fidelis ad
eum usque diem, quo iudicabit Dominus totum orbem iudicio illo suo uniuersali;
tunc demum redibit ad corpus resuscitatum, ut post iudicium totus homo corpo-
re & anima apud Deum æternum uiuat. Sic enim testatur Paulus, Ipse Dominus
cum hortatu ac uoce archangeli ac tuba Dei descendet de cœlo, & mortui in Chri-
sto resurgent primùm: deinde nos qui uiuimus, qui reliqui erimus, simul cum il-
lis rapiemur in nubibus in occursum Domini in aera, & sic semper cum Domino
erimus, in cœlis nimirum quæ supra nos sunt, ubi nubes conspiciuntur. Proinde
omissis uanis speculationibus disputationibusque curiosis, credamus domicilium
paratum à Domino separatis à corporibus animis in cœlo, in quod recipiantur fi-
deles, rursus paratum esse ignem æternum, in quem conijciantur omnium infide-
lium animæ.

*Quomodo ani-
mæ transferan-
tur ad locum si-
bi destinatum.*

Docuimus cœlum esse sedem uel habitationem separatis à corporibus anima-
bus recipiendis à Deo paratam, reliquum est ut ostendamus quomodo & quando
illuc à morte transferantur. De modo non possum aliud dicere quàm ipsum esse
Deo plenè cognitum, nobis uerò quantum satis uidebatur in scripturis adumbra-
tum, nempe quòd per angelos animas subducentes motu fiat celerrimo. In euan-
gelio

gelio enim dixit Dominus animam Lazari ab angelis deportatam in sinum Abrahae. De quare & superius diximus, cum concionaremur de Angelis bonis. Qualis uero motus ille sit, naturalis an supernaturalis, scrutari nolo. Credo Deum perficere ac præstare quod promisit. Promittens autem, dixit: De morte transiuit ad uitam. Rursus Latroni dixit: Hodie eris mecum in paradiso: ueluti momento totam illam delationem comprehendens. Hic illud quoque necessario adiungimus, beneficio Christi deferendum esse quod in coelos rapimur. Ipse enim est ostium & uia.

Ioan. 5.

Lucæ 23.

Quando autem transferantur animæ in coelos uel deiciantur in inferos, quæstio uidetur hodie non tantum utilis, sed etiam modis omnibus necessaria quæ excutiat. Etenim sunt nostro seculo male feriat homines, qui puram huius causæ simplicitatem corruerunt. Inuenias enim dicentes animas e corpore migrantes non rectè tendere in coelum, sed ueluti lethargo correptas, in ultimum usque diem iudicii dormire. Inuenias alios contendentes animas non nisi exactissime purgatas igne lustratorio, quem ipsi appellant purgatorium, euolare in sedes beatas. Quasi intercipientur à piratis & prædonibus medio in itinere, conijcianturque in tormenta, donec uel ipsæ satisfaciant, uel alij pro eis uelut æs alienum contractum exoluant. Ego utrunque nego & pernego: assero autem animas non dormire, nec à morte corporea tormentis lustrari ullis, sed uigilantes, uiuentes, & à supplicijs quibusuis liberatas, à morte corporea protinus & in puncto quidem, uel in coelos deportari, uel demergi in tartara.

Quando transferantur animæ in coelum.

Dormitantij uero nihil quod pro lethargo suo afferant, habent, nisi quod scriptura non raro fatà describens sanctorum meminit somni & obdormitionis. Obdormiuit & additus est ad patres suos. Et Paulus dixit: Nolo uos ignorare de dormientibus, cum loqueretur de morientibus. Cæterum sicut animæ coniunctæ adhuc caduco huic corpori nunquam dormierunt neque dormire potuerunt: ita liberatæ ab onere corporis multò minus dormire credendæ sunt. Ad corpus itaque referatur obdormitio. Nam obdormit in Domino quicumque in uera fide moritur. Sicut autem dormientes recreatis somno artubus mox euigilant, surgunt & operantur: Ita morte non extinguitur corpus prorsus ne aliquando reuiuiscat, sed recipitur nunc quidem in quietem, ad iudicii uero diem rursus resurgit, & uiuit: ac propterea obdormire non mori dicuntur in scripturis sancti, ut mysterium resurrectionis carnis nostræ significetur. Id quod non uident crassi isti homines, unde animæ tribuunt quod corporis proprium est. Alia argumenta quæ ad stabiliendam ueritatem suam proferunt, indigna sunt quæ recenseantur. Vel enim scripturas uiolenter à natiuo sensu detorquent, uel corrupta ratiocinatione falsa ex falsis colligunt.

Animæ separatæ à corporibus non dormiunt.

Qui uero opinantur animas à corpore migrantes non rectè & euestigio tendere in coelum, sed abripi itinere medio in ignem illum purgatorium, in quo lustrentur à sordibus peccatorum in carne contractis, deinde purificatas in conspectum sanctissimi Dei ab angelis deferri, dormitantij nihil tolerabilius hallucinantur. Vel enim purgantur animæ igne illo purgatorio à peccatorum sordibus, uel abluuntur aut lustrantur dolore aut cruciatu tormentorum quæ ibi perferunt. Si uirtute illius ignis purgantur peccata, consequens est, non solo filij Dei sanguine peccatores sanctificari. Quibus uero scripturis approbarunt nobis uim illam purgandi datam esse igni? An uero mutauit Deus consilium suum & ignem hunc pro Christo sanctificatorem instituit? Proh pudor. Si uero propter nostra tormenta remittuntur peccata, ergo non propter crucem & passionem Christi duntaxat purificamur. Doceant illi nos ex scriptura id meriti concessum esse à Deo nostræ passioni, Cæterum solo Christi sanguine & passione sanctificantur omnes quotquot

Animæ separatæ à corporibus non deferuntur in purgatorium.

DE ANIMA HOMINIS RATIONALI.

Solo Christi san-
guine purgan-
tur animæ.
Ioan. 3.

Actor. 4.

2. Pet. 1.

1. Ioan. 1.

Apoc. 1.

Ephes. 5.

Tit. 3.

Hebr. 1.

Galat. 2.

sanctificantur, ergo purgatorium est commentum diaboli impium, quod Christi crucem ac meritum obscurat, imò & euacuat. Quid enim illis est purgatorium, nisi satisfactio pro peccatis, facta ab animabus separatis à corporibus? Mouetur in Euangelio Ioannis quæstio à discipulis beati Baptiste de purificatione animarum. Ac Baptista demonstrat fideles fide per Christum purificari: id quod & sancto baptismo attestatus creditur. Præstantissimi denique Apostoli disertè testificantur solo Christi sanguine & passione unica, & merito eius absolutissimo omnes fideles mundari. Nam Petrus qui in Actis dixit: Non est in alio quoquam salus: Nec enim aliud nomen est datum inter homines in quo oporteat nos saluos fieri: idem, inquam, scripsit in canonica sua priore: Scitis uos redemptos esse non caducis rebus, uelut argento & auro, sed pretioso sanguine agni immaculati. Ioannes quoque Apostolus, Et sanguis, inquit, Iesu Christi filij Dei emundat nos ab omni peccato. Et idem iterum: Christus dilexit nos, & lauit nos à peccatis nostris per sanguinem eius. Paulus uerò ad Ephesios & ad Titum demonstrat nos solo filij Dei sanguine purificari. Ad Hebræos: Per semetipsum, ait, purgauit peccata nostra, & consedit in dextra Dei in excelsis. Per semetipsum significanter dixit, ut alia omnia excluderet. Nam alibi sic pronunciauit: Si ex lege est iustitia, ergo Christus frustra mortuus est. Ad eundem enim modum argumentamur & nos: Si igne purgatorio mundamur, ergo Christus frustra fudit sanguinem purificandis nobis. Quid enim opus erat ipsum supplicio affici grauissimo, si igne potuimus lustrari purgatorio? Præterea uniuersa scriptura docet nos, Christum esse satisfactionem & propitiationem nostram unicam. Id quod alijs in locis copiose ostendimus. Idcirco animæ non satisfaciunt in purgatorio, nisi Christum superuacaneum hominibus esse fateri uelimus.

Ioan. 9.

Galat. 6.

Eccles. 11.

Suppingunt isti uim purgadi purgatorio igni datam esse ex gratia uel sanguine & merito Christi, purgareque hunc non sua uirtute, sed filij Dei potentia. Cæterum confinxerunt hoc quoque nequissimè. Nam scriptura ubique remittit (quod & modò diximus) ad filium Dei & pretium sanguinis & emundationis eius, cuius participes nos fieri docet in hoc seculo uiuentes per fidem & spiritum sanctum: purgatorij autem ne uerbo quidem uspiam meminit: nuspiam dicit in alio seculo nos purgari gratia Dei. Suffurantur ergo isti gloriam filio Dei propriam, & communicant igni prorsus fictitio & blasphemo, denique aliud tempus gratiæ constituunt extra hoc seculum, quod à scripturis alienum est prorsus. Clamauit enim in Euangelio Dominus noster: Me oportet operari opera eius qui me misit, donec dies est. Venit nox quando nemo potest operari. Et Paulus: Operemur bonum, inquit, id est, benefici & liberales simus in pauperes, dum tempus habemus. Id quod sumplisse uidetur ex Ecclesiasta Solomonis, dicentis: Cum nubes impletæ fuerint, pluuiam effundunt in terram: & cum arbor ceciderit uel ad Austrum, uel ad Aquilonem, in quemcunque locum ceciderit, in eo permanebit. Allegorijs enim utitur duabus, quibus diuites liberalitatem docet. Prima sumitur à nubibus. Nubes ex terra colligunt uapores, qui condensati mox ceu è spongia exprimuntur effundunturque in terram, ipsam rigantes. Id ipsum faciant diuites, conquisitas ex hominibus opes in homines iterum spargentes. Secunda sumitur ab arboribus, quæ excisæ in ijs locis manent in quos cadunt. Monet ergo sapiens, opportune faciamus quod faciuri sumus, ubi enim hinc excefferimus nullum esse locum poenitentiae. Et in Euangelio arbor non rarò ponitur pro homine, ubi & dextrum ponitur pro loco beato, sinistrum pro loco damnationis. Dicit ergo: Vbi mortuus fueris, in damnatione uel beatitudine semper manebis. Diuinis consonant humana. S. Cyprianus

nus enim contra Demetrianum dixit: Quando isthinc excessum fuerit, nullus iam locus poenitentiae est, nullus satisfactionis effectus. Hic uita aut amittitur aut teneatur. Hic saluti aeternae, cultu dei, & fructu fidei prouidetur.

Obijciunt rursus purgari quidem animas à corpore decedentes sanguine filij Dei, sed non plenè, remanere enim aliquid sordium in purgatorio eluendarum. Discedere enim illas non plena fide ex hoc seculo, & idcirco non prorsus bonas: rursus cum aliquid eis sit fidei, non esse prorsus malas: & quoniam non sint bonae prorsus, in coelum ingredi non posse: rursus cum non omnino pessimae sint, non posse ipsas damnari, itaq; relinqui locum medium in quo ad plenum excoquantur, & demum purificatae sistantur conspectui dei. Ceterum fingunt isti pro more suo quod uolunt. Nos uerò scripturis sanctis demonstrauius, solo sanguine filij dei per fidem non per purgatoriū purgari animas fidelium: ostendam porrò consequentibus etiam, ad plenum, id est, absolutissimè unica Christi hostia purificata esse omnium hominum peccata, praeterea gratia dei in sanguine Christi condonari in articulo mortis, quicquid infirmitatis & reliquiarū peccati remanet in decedentibus à corpore fidelium animabus. Dominus enim in euangelio dicit: Qui lotus est non opus habet nisi ut pedes lauret, sed est mundus totus. En totus, inquit, mundus est, qui lotus est gratia Christi, sic ut coinquinatio pedum, infirmitas, inquam, & imperfectio remanens post regenerationem, non possit eum redigere in numerum impurorum. Nam dominus iterum in euangelio dicit: Ego sanctifico meipsum pro eis, ut sint & ipsi sanctificati per ueritatē. Tradidit semetipsum dominus in hostiam pro peccatis nostris, ut nos sanctificaremur, id est, purgaremur à peccatis uerè, id est, plenè & perfectissimè. Paulus enim dixit: Vnica oblatione perfectos effecit in perpetuum eos qui sanctificantur. Obseruate quaeso apostolica uerba: Christus unica, en unica dicit oblatione, perfectè sanctificauit omnes quotquot sanctificantur, haeredesq; fiunt uitae aeternae. Hinc nos colligimus: Si unica Christi hostia semel pro nobis oblata, purificantur omnes animae, & perfectè quidè purificantur, ita ut nihil desit purificationi, quid obsecro inuenit purgatorium quod purificet? Figmentum est ergo impudens diraq; blasphemia contra meritum purificationis Christi Iesu filij dei. Refarcit hic in hoc adhuc seculo sua gratia, si quid iam decedenti animae diminutum aut deesse uidetur. Impia uox est & indigna quae audiat inter Christianos populos, nostra passione in purgatorio expleri quod nondum plenè expiatum est sanguine & passione Christi. Quasi uerò passio nostra, filij dei passione praestantior sit efficaciorq;. Obijciunt isti nobis fidei imbecillitatē in morientibus: nos uicissim illis opponimus dei misericordiam suos fideles plenissimè absoluentem. Pater lunatici euangelicus auxilium postulans à domino, audit: Si potes credere (me uidelicet filium tuum sanare posse) omnia possibilia sunt credenti. Et quamuis sentiret hic fidem suam non esse omnino absolutissimam, sed plurimum superesse imbecillitatis, diuinum tamen auxilium infirmitate eius non impediabatur. Quia enim supplex se totum conijciebat in misericordiam domini, obsecrans & dicens, Credo domine, succurre incredulitati meae, succurrit dominus illico, & citra dilationem sanauit puerum eius. Ita dubium non est, dominum clementissimum fidelibus suis quibus ueniam promisit plenissimam, in hora mortis agnoscentibus infirmitatem, ideoq; & implorantibus misericordiam & ueniam, non deesse, sed egredientem iam animam mox perfectè spiritu suo propter Christum sanctificare, & omni genere charismatum ornare, ut uerè purgata ab omnibus peccatorum sordibus euolet, mereaturq; in conspectu dei apparere. Hoc uerò morientibus inculcandū fuerat.

Plene purgari animas sanguine Christi.

Ioan. 13.

Ioan. 17.

Hebr. 10.

Marci 9.

Extant enim amplissima dei promissiones. Extant multorum sanctorum morientium & inuocantium exempla. Constat præterea ex his quæ iam attulimus, per Christi mortem plenè expiata esse peccata: ut iam nihil amplius relinquatur purgatorio igni expurgandum. Euolant animæ rectæ à morte corporea in cælum, nihil secum auferentes expurgatione dignū. Ergo ignis ille purgatorius nihil aliud est reuera, quàm auarissimorum hominum negotiatio, qua loculos, non animas, pauperum & diuitum artificiosè expurgant.

De orationibus
pro defunctis.

Hi ipsi ruenti structuræ purgatorianæ protinus subiiciunt fulcra duo. Prius, Veteres, inquiunt, orant pro salute animarum à corpore separatarum, est ergo purgatorium. Nam cum in cælis non opus habeant precibus, in inferno preces nihil profint, cum ex inferis nulla sit redemptio: relinquitur certè locus medius, in quo retineantur animæ, quibus prosunt orationes uiuentium, is est purgatorium. Sic illi quidem argumentantur, sed ex seipsis sine autoritate scripturarum confingentes omnia. Verū sanè illud est quod aiunt ueteres orasse pro defunctis. Scio quid doctor ecclesiæ insignis Augustinus, quid eloquentissimus Chrysostomus aliq̃ uiri uetusti ac clari hac de re scriptū reliquerint. Sed quæro num hi rectè fecerint quod fecerunt? Non enim omnia quæ dixerunt & fecerunt sancti patres, qui non rarò nonnihil humani passi sunt, absolute sunt probanda uel imitanda. Probanda & imitanda non sunt quæ proferuntur ab eis (id quod ipsi etiam fatentur ingenuè) contra scripturarum decreta, sed illa duntaxat quæ sunt scripturarum sanctarum autoritate confirmata atq; prodita. Illæ copiosè & apertè quicquid in doctrina pietatis cognitu est necessarium, complectuntur. Verū nihil inuenias in eis de oratione pro defunctis. Quod enim quidam adferunt ex secundo Machabæorum libro, nihil probat. Liber enim ille non est canonicus. Id quod uel ex Hieronymo dudum didicisse oportuerat. Adijciunt orationem pro defunctis traditionem esse Apostolorum non scriptam. Audio. Verū sat scio traditiones non scriptas non pugnare cum scriptis Apostolorū. Sat scio scripta Apostolorum nullibi præcipere orationes pro mortuis, nullibi his suffragari. Cum Apostolus Paulus Thessaloniceñ. hortaretur ut mortem suorum æquanimitè tolerarēt, ac tum maximè opportunum fuisset præcipere de orationibus pro mortuorū spiritibus offerendis, si modò illas utiles & necessarias putauisset, nullam tamen earum facit mentionem, imò simpliciter docet quid credant de separatis à corporibus fidelium animabus, nempe quòd agant in beatitudine æterna apud Christū, expectantes corporum suorum resurrectionem. Quis autem non uideat hanc firmitatem simplicitatemq; doctrinæ apostolicæ, traditione illa apostolica ficta conculci & implicari periculosissimè? Si enim in Christum credimus, fidem uerbis ac promissis eius habeamus. Dixit hic se esse fidelium resurrectionem & uitam, animasq; credentium iam inde à morte corporea transiisse in uitam. His, inquam, ueracissimis domini uerbis si credimus, quid adhuc solliciti pro mortuorum spirituum salute, quasi nondum salutem consequuti sint, deprecamur? Apertum sanè precibus his nostris argumentū edimus, de nostra nos fide addubitare, & de animarum salute non id sperare quod & uerbis profiteamur & sperare iubent uerba Christi & Apostolorum. Fides certè & spes firma credentium & innitentiū Christi promissionibus, prohibent hic atras in oblationibus pro defunctis uestes sumere, quorum animas indumenta alba iam sumpsisse credimus: prohibent occasionem dare uel incredulis uel imbecillibus in fide, meritò nos reprehendendi, quòd eos quos apud deum uiuere dicimus, ut in ignem coniectos lugeamus, deoq; supplicantes miseros ex tormentis liberare satagamus, id est, fidem quam sermone &

uoce

3. Thess. 4.

uoce depromimus, cordis & pectoris imò & externorum operum testimonio reprobemus. Si ita pergamus, spei profectò fideiꝫ nostræ prauaricatores sumus. Simulata, ficta, fucata uidetur esse quæ dicimus. Nihil autem prodest uerbis proferre uirtutem, & factis destruere ueritatem. Recipiat ergo traditionē illam apostolicam, ut uocant, de orationibus offerendis pro fidelibus defunctis, qui uelit, ego nihil pugnans cum uera fide & doctrina apostolorum recipio, nec id cuiquā recipiendum suadeo. Illud quoq; dissimulare non possum, id quod isti Traditionem Apostolorum appellant, S. Augustinum nuncupare traditionem patrum ab ecclesia receptam. Nam sermone de Verbis Apostoli 32. Hoc à patribus inquit, traditum uniuersa obseruat ecclesia, ut pro eis qui in corporis & sanguinis Christi communione defuncti sunt, cum ad ipsum sacrificium loco suo commemoratur, oretur, ac pro illis quoq; id offerri commemoretur. Et iterum de Cura pro mortuis gerenda, cap. 4. Non sunt prætermittendæ, ait, supplicationes pro spiritibus mortuorum, quas faciendas pro omnibus in Christiana societate defunctis, etiam tacitis nominibus quorumq; sub generali commemoratione, suscepit ecclesia. Hæc ille. Qui tamen alicubi Traditiones Apostolorum latius extendat, his tamē significantius innuere uidetur hunc ritum orandi pro defunctis ecclesiæ à patribus traditum, & haud dubiè post longa interualla à temporibus Apostolorum ab ecclesia esse receptum. Idem ille Augustinus contendit non uno loco eucharistiæ perceptionem, perinde ut baptismum, infantibus iam iam ex utero materno effusis ad salutem consequendam esse necessariam. Loci insigniores quibus id agit sunt lib. 1. contra Iulianum Pelagianum, & c. 1. lib. de Peccatorum meritis & remissione contra Pelagianos. Nec segniore studio id dogmatis quàm traditionem urget, quòd id eo seculo in ecclesia esset receptissimum. Quis uerò eum ritum hodie recipit ut apostolicū? Quis non uidet optimos illos patres & fidelissimos alioqui pastores ea in re humani aliquid passos esse? Pluris meritò fit hodie scriptum Apostoli Pauli, quàm antiqua illa ecclesiæ traditio. Scribit Paulus: Probet seipsum 1. Cor. 11, homo, & sic de pane edat & de calice bibat. Inde intelligunt omnes, adultorum, non infantium esse eucharistiā. Ea de causa licuit maioribus nostris traditionem illam deferere, & propius accedere ad scripturam. Permittant itaq; nobis quoque hac in caussa discedere à patrum traditione incerta, & inhærere fidei certissimæ, scripturæq; apostolicæ.

Verum damnatus est, inquit, hoc nomine Aërius, quòd inutiles crederet Damnati Aeri orationes pro defunctis. Scio equidem damnatum esse Aërium, nec illū mihi de riani. fendendum sumpsī, quem Ariānū fuisse Phylastrius, Epiphanius & Augustinus commemorant, alijsq; foedis pollutum erroribus. Quod autem preces pro defunctis attinet, utiles ne an inutiles sint, dubium non est catholicos non hereticos esse qui credunt quod traditum est symbolo apostolorum. Credimus autem iuxta huius traditionem, Remissionem peccatorum, Huius carnis resurrectionem, Et uitā æternam. Hæc qui credunt, assequuntur ea proculdubio quæ credunt. Dixit enim Centurioni dominus: Abi, & quemadmodum credis, ita fiat tibi. Ergo quis Matth. 8, quis crediderit remissionem peccatorum & uitā æternam, remissionem peccatorum consequutus est, ac uiuet certò uita æterna. Id si uerum est, ut falsum esse non potest, quod symbolo apostolorum nobis traditum est, quis oro locus erit orationibus pro defunctis? Nam defunctis remissa sunt peccata, ergo remoræ ad uitā sublatae sunt omnes, itaq; uiuunt apud deum. Qui uerò non crediderunt, sua retinuerunt peccata, & demersi ad tartara hærent in luto inferni. Quæ cum indubitanter ita habeant, certè non habent ullum usum neq; apud deum neq; apud fideles,

orationes pro defunctis. His accedunt tot sanctorum utriusque testamenti exempla, præferenda & traditionibus & condemnationibus hominum. Quis oro sanctorum patrum unquam orauit pro suis defunctis? nunquid Adam pro Abele suo? nunquid filij pro patre suo Adamo? Quas preces obtulit deo pro anima defuncti patris Thare, p. anima uxoris suæ chariss. Saræ Abrahæ? Quas preces fuderunt pro patre mortuo Isaaco Esau & Iacob? pro Iacobo duodecim filij Israelis? pro Dauide Solomon? In nouo Testamento decollatur ab Herode Ioannes Baptista, lapidatur à Iudæis Stephanus, truncatur ab Agrippa capite Iacobus, sepeliunt eorum corpora discipuli ipsorum, iustaque peragunt religiose, sed in tot funeribus nulla fit mentio orationis pro animabus defunctis. Crediderunt enim eas à morte protinus delatas esse in uitam æternam. Quis ergo imponat nobis post tot celebria sanctorum exempla, & post tam claram catholicæ & orthodoxæ fidei professionem, necessitatem orandi pro animabus defunctorum? Quis uerò hæreticos esse post hac dixerit, qui opere complemus quod professione fidei uel oris confessione profitemur, imò qui nihil aliud facimus, quàm quod ante nos fecerunt celeberrimi utriusque Testamenti cultores Dei?

Apparitio spirituum.

*Deut. 18.
Isaia 8.*

Luca 16.

Posterius fulcrum, quod substituunt ruinæ purgatoriij sui, est apparitio spirituum. Rabanus enim episcopus ex Gregorij Papæ & uenerabilis Bedæ testimonijs ostendit, per frequenter apparuisse mortuorum animas, ac edocuisse, oblationes & preces permultum ipsis prodesse. Cæterum miror uiros nonnullæ eruditionis, negotium suum tam ruinosis imposuisse fundamentis. Prohibet enim dominus in lege sua ueritatem sciscitari, ex mortuorum spiritibus. In prophetis ab huiusmodi oraculis relegamur ad legem & testimoniũ. Apud Lucam clamat in tormentis diues epulo, & ait: Rogo te pater Abraham, ut mittas Lazarum in domũ patris mei. Habeo enim quinque fratres, ut testetur illis, ne & ipsi ueniant in locum hunc cruciatus. Sed audit: Habent Mosen & prophetas, audiant illos. Cumque diues respondisset: Non pater Abraham, sed si quis ex mortuis ierit ad eos, respiciant. Iterum audit: Si Mosen & prophetas non audiunt, neque si quis ex mortuis resurrexerit credent. Certissimum est ergo & euangelica autoritate confirmatum, ne beatas quidem animas nobis mitti à deo quæ nos aliquid doceant. Impias & condemnatas quis oro audiat? Relegat nos omnes ad scripturam canonicam Christi euangelium. Vnde iam consequens est, nullius momenti imò fallacissima & mendacissima esse testimonia, quæ petuntur ex oraculis aut apparitionibus spirituum mortuorum.

Animas à corporibus separatas non oberrare in his regionibus.

Diuinis testimonijs accedunt etiam humana, quæ interim nos erudiunt, non posse animas à corpore separatas in hisce oberrare regionibus. Nimis longa sunt quæ hac de re doctè disputat Tertullianus in fine propemodum libri sui de Anima, huc tamen tendunt omnia, ut ostendat animas à corporibus suis separatas, & suis locis destinatas, non redire iterum in hoc seculum. Obiectioni quorundam instantium artem magicam, sed & uirtute diuina multos ex mortuis in hanc uitam rediisse, respondet: Sed etsi quasdam reuocauit in corpora dei uirtus, in documenta iuris sui, non idcirco communicabitur fidei & audaciæ magorum, & fallaciæ somniorum, & licentiæ poetarum: atquin in resurrectionis exemplis, cum dei uirtus siue per prophetas, siue per Christum, siue per apostolos in corpora animas re præsentat, solida & contrectabili & satiata ueritate præindicatum est hanc esse formam ueritatis, ut omnem mortuorum exhibitionem incorporalem præstigas iudices. Chrysostomus ergo Homelia in Matth. 29. interrogans: Quid ergo respondimus ad illas uoces. Anima talis ego sum? excipit, Non anima defuncti est quæ ista di-

ista dicit, sed dæmon qui hæc ut audientes decipiat effingit. Et mox: Quare uetularum hæc uerba imò desipientium ducenda sunt & puerorum ludibria. Et iterū: Non potest anima à corpore separata in his regionibus errare. Iustorum animæ e- *Sapient. 3.* nim in manu dei sunt, infantium quoque similiter: non enim peccarunt. Peccatorū uerò post hunc exitum CONTINVO abducuntur: quod à Lazaro & diuite planum efficitur. Sed alibi quoque dominus ait: Hodie animam tuam abs te repetent. *Luce 12.* Non igitur potest anima cum à corpore abscesserit apud nos hic errare: nec id iniuria. Nam si qui iter faciunt cum in ignotas regiones inciderint, nesciunt quo ituri sint nisi ducem habeant: quanto magis anima relicto corpore cum nouā sibi omnino uitam & uiam ingrediatur, quo itura sit ignorabit nisi ducem consequatur. Multis è locis scripturæ comprobari potest, non errare hic post mortem iustorum hominum animas. Nam Stephanus ait: Suscipe spiritum meum. Et Paulus *Actor. 7.* resolui ac cum Christo esse desiderabat. De Patriarcha quoque scriptura dicit: Et ap *Philip. 1.* positus est ad patres suos, mortuus in senectute bona. Quod uerò nec peccatorū *Gene. 25.* animæ hic commorari possunt, diuitem audias quid dicat, perpendasque quid pe- *Luce 16.* tat & non impetret. Quod si possent animæ hominum hic cōuersari, uenisset ipse ut cupiebat, & suos de tormentis inferni fecisset certiores. Quo ex loco scripturæ illud etiam patet aperte, quod post exitum à corpore in locum quendam certum animæ deducuntur, unde redire sponte sua non possunt, sed terribilem illum iudicij diem ibi expectant. Hæc hætenus ex Chrysostomo.

His opponunt Samuelis apparitionem petitam ex scripturis sanctis, qua pro- *Samuel à mor- te sua Saul non apparet. 2. Sam. 28.* bare contendunt animas post fata redire, & homines erudire de interrogatis. Respondemus paucis: Samuelem per tropum appellari personatum illum qui uidebatur quidem esse, reuera autem non erat Samuel. Reuera enim erat spectrum præstigiū uæ ac illusio satanica. Nam magia districtè prohibetur in lege domini: non ergo obtemperant prohibitis nequandisque artibus beati spiritus: qui carni adhuc coniuncti illas modis omnibus oppugnantes exhorruerunt: damnati autem spiritus in illis sese exercent. At quis credat horum oraculis? Sed prædixit Samuel ille, inquit, quod postridie euenit: Quid tum postea? Non difficile hoc erat dæmoni, quippe cum dudum pleraque prædixisset uiuens & uerus Samuel, sed & ex repræsentanti castrorumque trepidatione solers ille iudicium dei futurum prænosceret. Tertullianus in libro de Anima: Absit, inquit, ut animam cuiuslibet sancti, nedum prophetæ, à dæmonio credamus extractā, edocti quod ipse satanas transfiguretur in angelum lucis, nedum in hominem lucis, etiam deum se asseueraturus signaque portentosiora editurus ad euertendos si fieri posset electos, &c. Idem de eadem apparitione iudicat & beatus Augustinus libro ad Simplicianum 2. quæst. 3. & ad Dulcitij quæst. &c.

Istis uerò abundè demonstratum spero, animas hominum separatas à corporibus non errare aut apparere post mortem in hisce regionibus. Nam ad iudicium usque manent in destinatis sibi dei sententia locis. Proinde à domino nec mittuntur, nec ipse possunt ingredi ad homines erudiendi aut monendi gratia, uel de præsentibus uel de futuris rebus. Vnde iam consequens est, animarum apparitiones, reuelationes oraculaque, meras esse illusiones satanæ, institutas contra synceritatem & puritatem religionis ueræ. Et quoniam horum præsidio utuntur qui purgatorium nobis approbare contendunt, indubitatum est illos falsum probare per fallaciam, & incertum per longè incertius: indubitatum præterea relinquitur, scripturis non posse ostendi esse purgatorium, in quo animæ corpore suo exuta purgentur ad uitam sempiternam.

*Animas certè
& mox à morte
corporea
beati.*

Ioan. 3.

*Nouissima dies
hominis.*

Ioan. 5.

Et quoniā remoras expeditissimo iniectas itineri amouimus, redimus ad institutum nostrum, quo proposuimus demonstrare animas fidelium per mortem se paratas à corpore, rectā & euestigio à morte corporea transire in cœlum, atque ita certissimè & derepente saluari. Similiter intelligimus animas infidelium rectā demergi ad inferos, & protinus à morte corporea, certissima & repentina damnatione perire. Dominus enim in euangelio disertè dicit: Qui credit in filium dei, non iudicatur; qui uerò non credit, iam iudicatus est, quia non credit in nomen unigeniti filij Dei. Item, Qui credit in filium Dei, habet uitam æternam; qui autem incredulus est filio, non uidebit uitam, sed ira dei manet super eum. Et iterum, Hæc est uoluntas eius qui misit me, ut omnis qui uidet filium & credit in eum, habeat uitam æternam: & ego suscitabo eum in nouissima die. Hominis autem nouissima dies, est articulus mortis; in eo seruat nos uirtute sua Christus, ne anima nostra uel pereat uel tormenta ulla sentiat, sed uiuat & beatitudine fruatur. Est præterea dies nouissima, ultima illa iudicij dies, qua Christus resuscitabit & iudicabit omnem carnem, corpora fidelium suorum glorificans ad uitam sempiternam.

Rursus dicit in euangelio dominus: Amen amen dico uobis, qui sermonem meum audit, & credit ei qui me misit, habet uitam æternam, & in iudiciū non ueniet, sed transiit à morte in uitam. Sola hæc domini uerba irrefragabiliter sententiam nostram de certissima & repentina animarum salute, abunde satis & proponere, & declarare, & probare confirmareque possunt. Principiò enim, ne quis addubitaret de rei proponendæ certissima ueritate, ab initio protinus sanctissimè iurat, id est, ueritatem interposito iurisiurandi sacramento attestando confirmat. Deinde subiungit totam salutis nostræ rationem: quæ uersatur in auscultatione uerbi diuini, & in uera fide recipiente diuini uerbi ueritatem. Neque enim satis est audiuisse uerbum euangelij, nisi eidem uera fide inhæserimus. Iam uerò obserua mihi quanta certitudine Christo credentibus uitam & salutem promittat: Habet, inquit, uitam æternam. Habet dixit, non Habebit. Non ergo relinquit uel dubitationi uel interuallo locum ullum. Imo adhuc clarius per interpretationem, quando & quomodo fideles habeant aut consequantur uitam explicans, dicit: In iudiciū nō ueniet, sed transiit à morte in uitam. In iudiciū ueniunt, qui causam apud iudicem discutendam habent. In iudiciū item ueniunt, qui ex sententia iudicis propter causam suam malam puniuntur. Sed fideles nullam habent causam discutendam apud iudicem. Nam remissa sunt eis peccata plenissimè. Deus est qui iustificat & absoluit, quis ille qui condemnet? Ergo non subiiciuntur ullis supplicijs. Christus enim subiit crucis supplicium, ut fideles ipsius ab omnibus tormentis liberati essent indemnes. Quin potius ne quis remoram aut interuallum inter mortem corpoream & uitam uenturi seculi interponeret, dixit: Sed transiit à morte in uitam. Rursus Transiit dixit, non Transibit, ut per uerbum præteriti temporis certitudinem significaret, ostenderetque protinus à corporea morte animas credentium rapi in uitam æternam. Ac sat scio aduersarios nihil hic habere solidi, quod opponant tam claræ & inuictæ ueritati. Verbis quidem & sophismatibus pugnare possunt, ueritatem subuertere non possunt. Anima enim fidelis ab ipso ore (quod dici solet: von mund uff zu himmel faren) derepente ingreditur sedes beatas, fruaturque per fidem felicitate æterna.

Apo. 14.

Rursus legimus in Reuelatione domini nostri Iesu Christi facta Ioanni apostolo, dictum esse: Et audiui uocem de cœlo dicentem mihi: Scribe, Beati mortui qui in domino moriuntur, amodo. Etiam dicit spiritus ut requiescant à laboribus suis. Sed opera illorum sequuntur illos. Contextitur his oraculum cœleste, & indubi-

Indubitatum de beatitudine hominum in fide morientium: ac iubetur beatus Iohannes cœlitus oraculum scribere, quod extet omnibus temporibus, & legatur ab omnibus hominibus. Eius oraculi summa hæc est: Beati mortui qui in domino moriuntur, amodo. Moriuntur autem in domino, quicumque in fide Iesu Christi excedunt ex hac uita. Ita enim hoc loquutionis genus usurpat Apostolus 1. Corinth. 15. & 1. Theff. 4. Cæterum qui in fide Iesu Christi excedunt ex hac uita, simpliciter & uerè pronunciantur beati, nimirum felices & alieni ab omni miseria. Imò adijcitur temporis notatio, quando beatitudinem illam consequantur. Amodo (*ἀρᾱν*) id est, ab instanti, confestim, nimirum, ut in euangelio dixit dominus, protinus à morte corporea. Subiungitur & aliud quo rursus exprimitur felicitatis certitudo, adde & non procrastinata perfectio. Etiam dicit spiritus: Vt requiescant à laboribus suis, Spiritus, inquam, ueritatis, qui mentiri nescit, dicit *uè*, id est, amen, etiam, certè uerè beati, & ab instanti quidem beati sunt fideles, & ita beati, ut à laboribus suis requiescant. Labores fidelium sunt ærumnæ, calamitates, afflictiones, dolores, terrores, & alia huius generis mala, quibus in hoc seculo sunt diuexati, imò exercitati potius in fide. Ab his liberantur animæ fidelium decedentes à corpore, ergo non purgantur per tormenta & molestias, non torrentur in medio itinere, sed felices & beatæ protinus omni liberantur molestia. Quod si quid passi sunt uiuētes adhuc in corpore, si quæ ex fide bona fecerūt opera, ea sequuntur ipsos. Nemo existimet ea, quia nunc cessant, fuisse & esse uana. Rependitur enim eis in beata illa uita. Id enim est, opera ipsorum sequi eos. Obseruemus autē quod non dicit: Opera aliorum sequuntur illos, ut liberent uidelicet eos ex purgatorio: sed, Opera illorum sequuntur illos. Etenim in euangelio quoque ingrediuntur cum sponso ad nuptias uirgines prudentes, quibus oleum in lampadibus erat paratum: excluduntur à gaudio uirgines fatuæ, quæ nullum sibi in uita paraauerant oleum, sed aliunde id sibi sufficiens sperabant.

D E O autem omnipotenti, patri nostro clementissimo, omniumque bonorum fonti perenni & inexhausto, qui corpus nostrum in utero materno formauit, eisdemque animam rationalem inspirauit uel infudit, quæ nos, dum corpori coniuncta est, animaret dirigeretque, separata autem à corpore, protinus à morte corporea transferretur in cœlum, ibique feliciter uiueret, donec in iudicio extremo ad corpus excitatum à mortuis rursus rediret, cum quo æternum & sine fine lætetur & exultet: ei, inquam, per Iesum Christum, propter quem tantum nobis obtigit beneficium, sit gloria, laus & gratiarum actio in secula seculorum. Amen.

T O M I S E C V N D I F I N I S.

267
SERMONVM DECAS

quinta, ad Illustrissimum principem
Heinrychum Grayum marchionem
Dorcestriæ, &c.

authore Heinrycho
Bullingero.

TOMVS TERTIVS.

I E S V S.

H I C est filius meus dilectus, in quo placata est anima
mea. Ipsum audite. Matth. 17.

Y

ILLVSTRISSIMO PRINCIPI AC DOMINO. D. HEINRYCHO GRAYO,

MARCHIONI DORCESTRIAE, DOMINO FERRERS, DE

Grouby, Herington, Bonuuyll & Aschle, Serenissimæ R. M. & incly-

ti regni Angliæ à consilijs, Heinrychus Bullingerus Gra-

tiam & pacem optat à Deo patre, per Domi-

num nostrum Iesum Christum.



ON EXISTIMO me posse vlllo de negotio conuenientiore, apud te, illustris-
sime Princeps, differere, quàm de salute ecclesiæ Anglicanæ, adeoq; de incolumita-
te regni inclyti totius conseruanda: cum Deo opt. max. sic disponente factum sit, vt
in serenissimæ maiestatis regiæ & inclyti regni Angliæ sanctissimum consilium sis
allectus: atq; ea de causa maximè ad te pertineat & nosse & procurare salutem re-
gni publicam. Optimam verò incolumitatis partē haud dubiè tener, qui vnde sit regnorum perniciēs
intelligit. Non existit autē perniciosior regnorum pestis, quàm ex corruptione religionis ueræ. Nam
splendidius bonum non consequitur regna, quàm ex religione sincera, aut si corrupta fuerat, rursus
repurgata. Hoc bono fruitur iam ex parte inclytum Angliæ regnū, dum ecclesiam reformans, & ve-
terem religionis puritatē reuocat reparatq; & novos illos abusūs, errores ac superstitiones, quas iam
seculis aliquot inoleuisse vidimus, excutit tollitq; è medio. Vnde dubiū non est tantæ felicitatis per-
turbatorem futurū, & inestimabile damnum vniuerso regno daturū, quisquis remoram sanctissimo fe-
licissimoq; illi instituto vestro iniiceret. At prodijt nuper Bulla indictionis Cōcilij œcumenici, vt vo-
cant, Tridenti ad Calendas Maij celebrandi: ex quo cum à multis seriò expectetur ecclesiæ refor-
matio, erunt fortassis apud vos, sicuti reperiuntur vbiq; quibus videbitur ea esse expectanda, & ha-
tēnus à cæpta reformatione cessandum. Hac indictio Concilij & expectatio reformationis, vestram
poterat turbare felicitatem, ac rem bene cæptam remorari aut impedire. Tuum ergo, illustrissimè
princeps, & omnium aliorū regni sanctissimorū procerum, erit diligenter inspicere & inuigilare, ne-
quid hinc damni accipiat cum sancta Christi ecclesia regnum amplissimum. Ego solidis argumentis
etiam ad oculum, quod dici solet, demonstrabo vanissimam esse illam reformationis expectationem,
Concilium enim non in alium finem à pontifice esse institutum, quàm ad confirmationem veteris er-
roris superstitionisq; & ad euerſionem cæptarum per Germaniam, Angliam, Daniam, aliasq; natio-
nes Christiani orbis, reformationum, imò ad puræ vel sinceræ veritatis Euangelicæ oppressionem.
Ea re deprehensa, intelligent omnes pij in ecclesia Christi sibi progrediundum esse, & in cæptis refor-
mationibus, & in omnibus alijs pietatis officijs, non expectata reformatione illa, quā omnes pij bre-
ui experientur nullam, aut si aliquam, certè non legitimam futuram. Equidem indicitur Concilium
ab istis hominibus non generale & liberū, sed olim quidem cæptū Tridenti, nunc autē ibidem conti-
nuandum, & in eo statu quo viuente adhuc Paulo III. eius nominis pontifice erat, reassumendum: cu-
ius etiam placita decretaque omnia in huius Concilij negotio edita confirmantur. Caterum in publicis
sub Paulo illo editis scriptis non semel disertis exprimitur verbis, Conciliū ad extirpandas hæreses
esse institutū. Idem Paulus omnes nos profitētes Euangelium & postulantes ex verbo dei reformatio-
nem, docentesq; Christum Iesum, non Papā, & quidē Christum Iesum solum esse caput, pastorem &
pontificē summū ecclesiæ catholicæ, accusauit dānauitq; hæreseos. Ergo cum Conciliū institutū sit ad
excindendas hæreses, ac hæretici habeantur qui reformationē ex verbo dei postulant vel auspiciantur,
quis non videat Concilium indictum esse non pro reformandis ecclesijs, sed pro excindendis cæptis re-
formationibus? Quibus accedit quòd ad Conciliū illud non vocantur docti & pij, prudentes & san-
cti ex omni natione quæ sub cælo est, sed duntaxat iuramento obstricti pontifici. Ita enim habent
indictionis verba, Conuocamus omnes omnibus ex locis, tam venerabiles fratres nostros patriarchas

Concilium institu-
tum ad extirpan-
das hæreses.

chas, archiepiscopos, episcopos & dilectos filios abbates, quàm alios quoscūq, quibus iure aut priuilegio in Concilijs generalibus residendi & sententias in eis dicendi permissa potestas est, mandantes in vi iurandi, quod nobis & huic sanctæ sedi præstiterūt, ac in virtute sanctæ obedientiæ, ut ipsimet adfuerint. Claret ergo quinā vocati in conciliū, atq, huius veluti patres assessores & iudices sint. Quid vero expectes ab illis qui iureiurando & Papæ & Romanæ ecclesiæ sic obstricti sunt, ut nō possint aliud, nisi quod ille vult, & quod ad huius incolumitatē pertinet? In hac enim verba iurāt Episcopi & Romanæ ecclesiæ proceres, Papæ sese obstringētes, Papatū Romanū & regalia S. Petri adiutor eis ero ad retinendū & defendendū contra omnē hominē. Iura, honores, priuilegia & auctoritatē Romanæ ecclesiæ, domini nostri Papæ & successorum eius conseruare, defendere, augere & promouere curabo: nec ero in cōsilio, aut facto, aut tractatu, in quibus contra dominū nostrū vel Rom. ecclesiā aliqua sinistra vel præiudicialia personarū, iuris, honoris, status & potestatis eorū machinentur. Et si talia à quibusdā tractari cognouero, impediri pro posse. Regulas sanctorū patrū, decreta, ordinationes, sententias, dispositiones, reseruationes, prouisiones & mandata Apostolica totis uiribus obseruabo, & faciam ab alijs obseruari. Hereticos, schismaticos & rebelles domino nostro, pro posse persequar & impugnabo. Sic inquā iurarunt illi. At qui huiusmodi iuramento obstricti ueniunt ad Conciliū, quid obsecro de negotio religionis cōtrouerso pronunciāturos speramus? Stulti nedum impij fuerimus, profecto, si horū determinationi ecclesias sanguine Christi redēptas subdiderimus. Iā enim quid pronunciāturi sint scimus, & veluti in manibus retinemus, id videlicet quod faciat pro propagatione, assertionē conseruationeq, papatus, & pro subuersione religionis nostræ innitenti verbo Christi filij dei.

Procerum ecclesiæ
sive iuramentum
Papæ præstitum;

Porro si rata esse debent omnia Pauli papæ decreta & quæ hactenus ille definiuit in negotijs Concilij, rata utiq, erunt & sessiones ille septem sessionūque decreta iamdudum vulgata: quæ quidē plurima nobis suggerunt argumēta, testantia Conciliū illud nō esse institutū ad inquirendā illustrandāq, ex scripturis veritatē, aut ad legitimā ecclesiæ reformationē faciendā, sed ad confirmationē erroris, abusuum superstitionisq, Romanæ ecclesiæ, imò ad impediēdas reformationes iustas & sanctas. Nam ut ex multis paucula modò commemorē, Sessione 4. Decreto primo sic pronūciant, Sacrosancta œcumenica & generalis Tridentina Synodus in spiritu sancto legitime congregata, orthodoxorū patrū exempla sequuta, omnes libros tam veteris quàm noui Testamenti, nec non traditiones (non scriptas) cum ad fidem tum ad mores pertinentes, tanquā vel ore tenus à Christo, vel à spiritu sancto dictatas, & cōtinua successione in ecclesia catholica cōseruatas, pari pietatis affectu ac reuerentia suscipit & veneratur. His mox attexerunt catalogum librorū Canonicorum, quibus tamen cōmiscet ecclesiasticos nō canonicos. Deinde anathemate percutiūt omnes traditiones aspernātes, & nō omnes illos libros pro canonicis recipientes: ac testantur Conciliū illis potissimum testimonijs ac præsidijs in confirmandis dogmatibus, & instaurandis in ecclesia moribus vsurum. In eadē sessione obtrudunt ecclesiæ, reiectis omnibus alijs versionibus, pro libro authentico versionem receptam Bibliorum Latinam. Et quantum attinet ad sensum sanctæ scripturæ, palam condemnant omnem expositionem non congruentem sensui, quem tenuit & tenet sancta mater ecclesia, unanimiq, consensui patrum. Ad ecclesiam enim pertinere asseuerant, iudicare de vero sensu & interpretatione scripturarum.

Qualia decreta
Concilij Tridentini.

In his quatuor præcipuè obseruanda moneo, & diligenter excutienda. Primum, quod non solas scripturas canonicas recipiunt, ex quibus statuant de religionis veritate vel falsitate, sed his præterea adiungunt ἄγγραφα, siue traditiones continua in ecclesia successione seruatas & non scriptas. Secundum, quod canonicis libris miscet non canonicos libros, imò hos non recipientes pro canonicis anathemate percutiunt. Tertium, quod editionem Bibliorum vulgarem Latinam pro libro illo authentico ecclesiæ obtrudunt. Quartum, quod nullum alium scripturæ sensum, quàm sanctæ matris ecclesiæ admittunt. Ex his enim liquidò quid indicto Concilio quærant, apparet.

Si solis scripturis negotium religionis cōtrouersum legitime decidi vellent patres isti, quid opus erat adiungere traditiones non scriptas? Quasi verò scripturæ diuinæ sine nō scriptis traditionibus ad plenam reformationē parandā non sufficiant. Verū nō ignorāt pleraq, papismi nullis scripturis disertis, vel rationibus è scriptura deductis, demonstrari posse: confingunt ergo ἄγγραφα, vel tradi-

De Traditionibus non scriptis.

triones non scriptas, quibus sarciant commodè quod scripturis deesse, vel scripturis demonstrare non posse vident. His enim traditionibus saluis incolumia erunt vel absurdissima illorum. Quoties enim scripturarum autoritate destituentur, recurrent ad figmentum traditionis. Traditio erit Oratio pro defunctis. Traditio erit Cœlibatus ministrorum ecclesiæ. Traditio erit Missa. Traditio erit *Vsus* imaginum in templis. Breuiter traditio erit quicquid hætenus tota obseruauit concorditer ecclesia Romana, tamen nullibi nec pictum nec scriptum inueniatur in libris canonicis, imò cum his pugnet ex diametro. Hoc est, traditio erit quicquid voluerint.

Traditiones
Iudæorum.

Iactarunt quondam & Iudæi suas Traditiones quas appellarunt patrum: verum audierunt à saluatore nostro, Quare transgredimini præceptum Dei propter traditionem vestram? Deinde exemplo è traditionibus prolato & per antithesim composito cum verbo Dei, ostendit illas cum hoc pugnare, deinde subiungit, Irritum fecistis præceptum Dei propter traditionem vestram. Hypocritæ, rectè de vobis prædixit Isaias, dicens, Appropinquat mihi populus hic, ore & labijs suis me honorat: ceterum cor eorum procul abest à me: sed frustra me colunt, docentes doctrinas hominum. Cum ergo etiam nos ostendere possumus traditiones illorum, quas viuas vocant, pugnare cum scripto verbo Dei, quis obsecro negabit etiam ipsas cum Iudæorum traditionibus à Christo esse reiectas atque condemnatas? Edant ergo suas illas traditiones, quas æquali cum scripturis reuerentia suscipiunt. Facile enim ex similitudine vel contrarietate apparebit quid sit Apostolicum, quid supposititium. Certissimum est enim Apostolos Dei non diuersa voce viuæ & scriptis suis ad posteros transmissis tradidisse. Vnde Apostolicum omnino esse non potest, quod pugnat cum scriptis Apostolicis.

Traditiones
Apostolicæ.

Obijciunt defensores traditionum non scriptarum, ipsos etiam Apostolos meminisse in scriptis suis traditionum non scriptarum. Ceterum nos negamus Apostolos de illis loquutos esse traditionibus, de quibus illi sentiunt. Testatur S. Lucas ea se scripta historia Euangelica comprehendisse, quæ tradiderunt (en quæ tradiderunt) hi qui suis viderat oculis. Proinde quæ olim fuerat viuæ Apostolorum traditio, iam in literas & scripturam relata est per S. Lucam. Sed & Paulus summam doctrinam Christianam comprehendens, Tradidi vobis imprimis, ait, quod & acceperam, quod Christus dominus mortuus fuerit pro peccatis nostris, secundum scripturam, &c. En coniungit Apostolus traditionem viuam cum scriptura, præterea nunc quoque scriptura comprehendit qualis fuerat eius traditio. Idem rursus traditionis de Cæna domini mentionem faciens in Epistola ad Corinthios, protinus qualis ea traditio fuerit, scripto colligit & explicat. Et quamuis idem mox subiungat, Cetera cum venero disponam, id tamen dixit de disciplina & decoro in cætibus ecclesiasticis formando atque cõseruando. Neque enim alia potuisset de Cæna domini tradere, quam ea quæ iam tradiderat: nisi sibi ipsi cõtradicere voluisset. Ad Thessal. idem Apostolus, Itaque fratres state, inquit, & tenete traditiones quas didicistis. Sed idem mox addit per interpretationem, Siue per sermonem, siue per epistolam nostram. Ergo traditio Apostolica comprehenditur in sermone & in Epistolis Pauli. Sermo Pauli est viuæ Euangelij prædicatio: quæ epistolis repetijt & reparaui. Præterea ab alijs quoque apostolis copiosissime descriptus legitur sermo Pauli euangelicus. Non enim aliud prædicauit euangelium Paulus, quam ceteri apostoli Christi. Quibus accedit quod ipse Paulus testatur se Euangelium Christi prædicasse, prædicandoque nihil extra illud quod lex & prophetæ docet tradidisse. Quis autem negat Mosis & prophetarum scripta absoluta esse? Sufficiunt ergo nobis scriptura canonica, quæ ut viuas traditiones comprehendunt pietati necessarias, ita satis instructæ sunt ad docendum, ad redarguendum, ad corrigendum vel ad reformandum, denique ad instituendum quo cultor Dei integer sit, ad omne opus bonum apparatus. Id quod ipse in hæc verba quæ modò recitauimus, pronuntiat Paulus. Ergo cum patres Tridentinæ Synodi non patiantur ad solas se canonicas scripturas reijci, ut inde omnia probent vel improbent, sed insuper comminiscuntur traditiones quas summa iniquitate imò impietate scripturis, diuinis inquam humana æquiparant, manifestè quid indicto Concilio querant, produnt, non ut ex canonicis scripturis sincera eruatur & asseratur veritas, sed ut inoliti errores defendantur confirmenturque: ad quæ rem conficiendam mirè adiuuat fide illæ Traditiones.

Apor. 26.

De traditionibus
patrum.

Sufficiunt hæc quidē de Traditionibus veritatē agnoscentibus: verum ut & illis consulatur qui traditionibus plus nimium tribuunt, & iniquissimum esse clamitant omnes in vniuersum despicere patrum traditiones

traditiones, distinguimus inter traditiones patrū antiquas. Principiō enim video Irenaeum et Tertullianū contra haereticos disputantes, cōpendiū suae regulā doctrinae apostolicae adeoq; ipsum symbolum quod hodie apostolorū vocamus, licet non iisdem verbis, iisdē tamen sententijs redditū, appellare traditionē apostolicā. Quis verò nesciat illā traditionem ex mediotulio scripturarū petita, & infinitis scripturarū testimonijs comprobari posse? Talem ergo traditionē nemo nostrū rejicit: quia nemo scripturarū auctoritatē cōtemnit, manifestissimē & copiosissimē docentē nos credere sicuti traditio illa vniuersalis cōtra omnes haereses & haereticos asseruit. Deinde habent veteres alicubi traditiones historicas, qualis alicubi rexitur de Ioāne apostolo fugiēte ē balneo quod Cerinthus subintrarat. At cum haec & aliae eius generis nec pugnet cū pietate, nec superstitionis quicquā serāt, pij ab eis nō abhorrent, interim parē his cū euangelica historia auctoritatē minimē tribuūt. Præterea sunt traditiones non de regula illa fidei vniuersali, alijsue ad ipsam pertinetibus capitib. editæ, nec merē historicae, sed prolatae de dogmatib. quibusdā & ritibus: cuius generis sunt quas inter alias cōmemorat, Orādū esse pro defunctis: & virgines esse velandas, vel consecrādas virginitati perpetuae, includēdasq; monasterijs, &c. Cæterum q̄ illa non congruant cum scriptura apostolica, alibi abunde est demonstratum.

Proferam & alias quasdā traditiones, vt ex ipsarū discussione omnibus appareat, quā non sit tuum traditiones etiā illas quas vetustissimi scriptores magni faciūt & ecclesiae seriō cōmendāt recipere. Irenaeus cōtra Valentinianos lib. 2. cap. 40. de dño nostro loquēs, Nō ergo multū aberat, inquit, à quinquaginta annis. Et ideō dicebāt ei, Quinquaginta annorū nondū es, & Abraham vidisti? Et hanc suā opinionē astruit per traditionē apostolicā præcedente cap. dicens, A quadragésimo aut quinquagésimo anno declinat iam in atātē seniorē, quā habens dñs noster docebat. Sicut Euangelium & omnes seniores testatur, qui in Asia apud Ioannē discipulū domini conuenerūt, id ipsum tradidisse eis Ioannē. Permansit autē cum eis vsq; ad Traiani tēpora. Quidā autē eorum nō solū Ioannē, sed & alios apostolos viderunt, & hac eadē ab ipsis audierunt, & testantur de huiusmodi relatione. Hæc ad verbum reliquit scriptor ille, qui inter vetustissimos numeratur. Verū si eam traditionē recipiamus, consequetur mira confusio, vt nihil aliud dicam, temporū. Si enim dominus ferē attigit annum ætatis 50. (ponamus nos 48.) consequetur Christum prædicasse annos 18. quando satis cōstat prædicatio nem capisse circa 15. Tyberij Cæs. annum, qui ipsi domino erat annus vitæ 30. Neq; aliam supputationem sequuntur quotquot tempora Christi reuocarunt ad calculum. Proinde iuxta traditionē viuam apostolorum, quam mordicus retinet & sequitur Irenaeus, mortuus esset Christus, resurrexisset ex mortuis, ascendissetq; in cælos, misso in discipulos spiritu sancto, imperij Claudij Cæsaris anno 7. vel 8. Verū huic supputationi reclamationē series historiae euangelicae & Acta Apostolorum, quæ minerunt Claudij in rebus Apostoli Pauli, conficiente totū orbem fama admodum dira. Vnde indubitatum est traditionē illam beati Irenaei quā tamen pleno ore refert ad apostolos Christi domini, turpiter fallere. Quis autē post tam fædum errorē deprehensum, credat posthac traditionibus illis viuīs etiā apud antiquissimos scriptores testimoniū habentibus? Ex Papiæ Hieropolitano apostolorum discipulo fortē huiusmodi traditionē hausit. Nam vt Papias permultū tribuit viuīs traditionibus, quibus & mirū in modum delectatū aiunt: Ita Irenaeum, Appollinariū, Lactantiū, propter vetustatis reuerentiam, etiā in errore Chiliasico, cui prima fundamenta iecit, habuit sequaces. Interim non multum eius iudicio tribuit doctissimus vir & ecclesiae Cæsariē. Episcopus Euseb. Ecclesiastica hist. lib. 3. cap. 39. qui & disertis verbis scribit illum fabulosa nonnulla tradidisse. Cur ergo vitio nobis verteretur, si difficulter aut prorsus non recipiamus viuas illas traditiones?

His accedit quod ex viuīs illis traditionibus memorabilis illa de paschate celebrādo inter Orientis & Occidentis ecclesias concertatio efferbuit: vt nō frustra nobis suspecta esse possint. Etenim cum sacerdotes Occidentales haud negligendā putarent Petri & Pauli Apostolorum traditionē in celebrando Paschate, Asiani verò se traditionem S. Ioannis sequi affirmarent, exarsit acris admodum inter Orientem & Occidentē cōtentio: ita vt Victor, Romanae ecclesiae minister, non metueret Asia nos anathemate percutere. Quā in re vicissim à beato martyre Irenaeo grauiter correptus est. Quid quod Socrates nobilis historicus inuentus est, qui vtriq; traditioni tam Orientali quā Occidentali,

Sozomenus lib.
7. cap. 19.

palam ausus fuit contradicere. Nam post adductos aliquot scripturae sanctae locos, subiungit tandem nihil tradidisse Apostolos de paschate celebrando. Verba eius si quis requirat haec sunt, Nusquam Apostolus, nec ipsa Euangelia iugum seruitutis illis imponunt, qui ad praedicationem accedunt: sed paschatis festum & alios dies festos ipsi homines suis quique locis propter remissionem laborum & memoriam salutiferæ passionis, sicut voluerunt, ex consuetudine quadam celebrarunt. Neque seruator hoc aut apostoli nobis lege aliqua obseruandum esse mandarunt, neque pœnam nobis aut supplicium euangelium vel apostoli, sicut Iudæis lex Mosi, comminantur. Et mox, Mihi videtur quod quemadmodum alia multa singulis locis in consuetudinem abierunt, ad eum modum & paschatis festum: propterea quod nemo apostolorum, sicut dixi, quicquam de illo sanciuit. Et reliqua quæ extant Historiarum lib. 5. cap. 22. Palam ergo hic traditionibus contradixit, & citra crimen quidem sacrilegij aut hæreseos. Quid ergo vetaret hodie quoque contradicere traditionibus cum scriptura discrepantibus? Hac cum ita habeant, & ita manifesta sint, ut non possint negari à nostris aduersarijs, non patiemur illo modo nos abstrahi à certissimis scripturis ad incertas illas nescio quas traditiones. Certe si patres illi synodi Tridentinae sinceri essent arderentque veritatis illustrandæ & ecclesiam iuuandi studio, sustinerent haud dubie se & omnia sua iudicari ab ipso optimo maximo Deo & veracissimo eius verbo. Hoc quoniam subterfugiunt, & fabulosas quasdam traditiones obtendunt, quid causa sua ex scripturis sperent roboris accessurum, liquidò toti orbi declarant.

De libris canonicis & ecclesiasticis.

De authoritate 2. libri Machab.

Iam quod miscet canonicis libris non canonicos, uti libros Machabæorum, Thobie, & alios, ab alijs ecclesiasticos vel etiam non canonicos appellatos, eodem faciunt consilio, quo traditiones diuinae æquant scripturis. Sperant enim ex illis se posse sarcire, quod verè canonicis videt diminutū. Ut enim de alijs nihil dicam, ex secundo Machabæorū libro sperant se ostensuros salubre esse orare & offerre pro mortuis, ut à peccatis seluantur. Sperant se diuorū in cælis agentium preces deo pro viuentibus in terris oblatas, cōmonstraturos. Cum interim in veteri ecclesia apud fidelissimos & sanctissimos ecclesiarū ministros nunquā fuerint 2. Machab. & alij eius similes libri recensiti inter canonicos. Non ignoro hic ipsos ad beati Augustini patrociniū confugere, qui lib. de Doct. Christ. 2. cap. 8. inter canonicos numerat non solū ecclesiasticos illos, sed & Machabæorū secundū librū. Cæterum si historias aliaque veterū monumenta cōsulamus, apparebit Augustini demū seculo in Carthaginensi Concilio III, quod celebratum aiunt Coss. Casario & Attico, imperantibus Honorio & Arcadio, circa annū dñi 400. aut 399. in numerum canonicorū, imò ecclesiasticorū magis esse receptum. Nec dissimulat hoc beatus Augustinus. Nā lib. de Ciuit. dei 18. cap. 36. & lib. 2. contra Gaudentij epistolā cap. 23. admonet libros Machabæorū non fuisse apud veteres numeratos in canone: addit tamē ipsos non inutiliter esse receptos, si modò sobriè legantur. En si sobriè legantur, ait. Qui & alibi dicit. Pro canonicis habet propter quorundā martyrum passionē vehementes & mirabiles. Quæ omnia superiorē meam sententiā confirmant: illud imprimis quod idem addit, non quiduis esse recipiendum quod in eo libro proponitur, nisi probè examinatum & cum alijs collatum sit scripturis. Nam alibi quoque admonet, eos libros qui ab omnibus accipiuntur ecclesijs, præponendos esse eis qui ab aliquibus non recipiuntur. At cōmonstrare possumus à vetustissimis clarissimisque Orientis ecclesijs nunquā receptos esse Machabæorum libros pro canonicis. Meliton Sarden. episcopus, qui floruit non multis annis ab apostolorum morte, circa annum domini 173. sub Imperatore Antonino Vero, cui & Apologeticū obiculi pro fide nostra, non nisi eos quos in Galeato recenset Hieronymus libros veteris testamenti recitat canonicos, omisis omnibus ecclesiasticis appellatis. Dicit autem se usque in Orientem profectum, ubi praedicationis nostræ initium cepit, & ubi omnia sunt gesta quæ scripta leguntur, ut ibi diligenter exploraret omnia quæ ad veritatem & certitudinem librorum canonicorum pertinent, ac ibi certum illum inuenisse numerum. Post Melitonem Origenes & ipse non plures recitat veteris testamenti libros, quàm XXII. Sic & beatus Hieronymus non tamen in Galeato prologo, quàm in epistola sua de omnibus scripturae libris ad Paulinū, pro canonicis agnoscit XXII. illos libros, reliquos extra canonem ait esse ponendos. Idem in prologo ad Prouerbia Solomonis, postquā dixisset de Sapientia quæ Solomonis dicitur, & de Ecclesiastico, subdit, Sicut ergo Iudith & Thobie & Machabæorū libros legis

legit quidem Ecclesia, sed eos inter canonicas scripturas non recipit: sic & hæc duo volumina legit ad ædificationem plebis, non ad auctoritatem ecclesiasticorum dogmatum confirmandam. Eadem ratione existimamus beatum August. 2. lib. Machab. inter canonicos numerasse quidem, sed intellexisse ecclesiasticum esse librum, non tanta pollentem auctoritate, quanta valent qui reuera & ab antiquo canonici sunt. Nec potuit ignorare beatus Hieron. Carthaginen. synodi decretum, quippe qui à multis scribatur excessisse è viuis circa annū dñi 422. Huc pertinet quod Ruffinus Aquilegien. in enarratione symboli apostolici, nō plures nec alios recitat veteris testamenti libros, quam nos supra commemorauimus. Ac inter alia, Hæc sunt, inquit, veteris instrumenti volumina, quæ secundum maiorum traditionem per ipsum spiritum sanctum inspirata creduntur, & Ecclesijs Christi tradita sunt. Et mox idem ille, Sciendum tamen est, quod & alij libri sunt, qui non canonici, sed ecclesiastici à maiorib. sunt appellati, ut est Sapiencia Solomonis, Ecclesiasticus, Thobia, & Iudith, & Machabeorum libri. Quæ oīa quidem in ecclesijs legi voluerunt, non tamen proferri ad auctoritatem ex his fidei confirmandam. Hæc ille. Proinde habemus à partib. nostris primitiuam ecclesiam omnemq. vetustatem, quam anathemate feriunt Tridentina synodi patres, siquidem nos anathemate percutiunt. Nā ut ecclesiasticos libros non reijcimus, ita ex solis canonicis religionis nostræ vel veritatē vel falsitatē cū veteri ecclesia probari vel improbari cōtendimus, atq. ad solas canonicas scripturas prouocamus. Quib. cū aduersarij oīa sua subijcere detrectat, & subinde ad alia vmbatilia præsidia respectant, clarū est qualis sit ipsorum causa, & quid indicto huiusmodi cōditionib. cōcilio querant.

Porro vulgarem illā Bibliorum Latinam editionem nemo sanus damnat & reijcit in vniuersum: sed clamamus omnes, in dubijs locis, aut controuersis, aut obscure redditis, corruptisue, recurrentiū esse ad fontes Hebraicos & Græcos. Authenticum enim librū esse, qui Hebraicē & Græcē scriptus est. Neq. enim prophetae aut Apostoli scripserunt Latine, sed hi Græcē, illi verò Hebraicē. Nihil hic iniqui postulamus, & quod non prius ipsi nobis pontificij dederint. Legitur enim huiusmodi Canon in Decretis Distinct. 9. Veterum librorū fides de Hebraeis voluminib. examinanda est: ita nouorum veritas Græci sermonis normā desiderat. Ceterum mutuata sunt hæc verba ex epistola beati Augustini, scripta ad S. Hieronymum. Idem ille Augustinus lib. 11. contra Faustum Manicheum cap. 2. Si de fide exemplariū, inquit, quæstio verteretur, sicut in nonnullis quæ & pauca sunt & sacrarū literarum studiosis notissimæ sententiarum varietates, vel ex aliarū regionū codicibus, vnde ipsa doctrina cōmeauit, nostra dubitatio dijudicaretur. Vel si ipsi quoq. codices variarent, plures paucioribus, aut vetustiores recentiorib. præferrentur. Et si adhuc incerta esset varietas, præcedens lingua, vnde illud interpretatū est, cōsuleretur, &c. Idē rursus lib. de Doct. Christ. 2. ca. 11. Latini homines, inquit, & duab. alijs linguis ad scripturarū diuinarum cognitionē opus habent, Hebraea scilicet & Græca: ut ad exemplaria præcedentia recurrant, si quā dubitationē attulerit Latinorum infinita varietas. Item, qui scripturas ex Hebraea lingua in Græcam verterunt linguam numerari possunt, Latini autē interpretes nullo modo. Ut enim cuiq. primis fidei temporib. in manus venit Græcus codex, & aliquantulum facultatis sibi met vtriusq. linguæ habere videbatur, ausus est interpretari. Et in cap. 12. eiusdē libri, loquēs de interpretationū varietate, addit, Quæ quidē res plus adiunxit intelligentiā quā impediuit, si modò legentes nō sint negligentes. Nam nonnullas obscuriores sententias pluriū codicū sæpe manifestauit inspectio. Hæc omnia cum vno decreto patres Tridentina synodi abrogent, & contra omnē vetustatē & rationem sanā, Latinā versionem pro libro autentico nobis obijciant, rursus quid ab eis expectemus, nisi cecitate percussi simus, cernimus palam. Quartus autem canō de Expositione scripturarum ab istis editus, ut ex superiorib. nihil collegerimus, vnus tamen abundē testari poterit, istos summa iniquitate ante congressum sibi certissimā voluisse præoccupare victoriam, adde & securitatem summā, ne quid vnquā rerum suarū mutare vel tantillum à scopo aberrasse videri possint. Damnant enim omnes expositiones, quæ non congruunt cum sententia quā tenuit & tenet sancta mater ecclesia, item quæ pugnat cū cōcordi patrum explicatione. Nam hoc decreto saluo, nihil ex scripturis contra papistica dogmata & ritus superstitiosos tam euidenter proferetur, quod ipsi non eluserint vno verbo, dicentes, Ecclesiam non sic

De Libro Bibliorum Authentico,

De interpretatione scripturarum.

intelligere. Rursus nullum scripturae locum ipsi tam fœdè detorquebunt & corrumpent, cui non queant protinus hoc mederi malagmate, dicentes, & ecclesiam sic intelligere, & patres aliquot ad hunc modū enarrauisse. Proferent ergo pro monarchia pontificis, Tu es Petrus, & super hanc petram edificabo ecclesiam meam, Tu vocaberis Cephass, Pasce agnos meos. Quæ loca si quis cupiat legitimè per scripturarum sobriam collationem excutere & genuinum eorum sensum inuestigare, audiet protinus Ecclesiam & patres exponere de Papa; ergo de Papa & eius principalitate (ut vocant) intelligere oportere. Plurima huius rei exempla proferrem si necessarium putarem.

Ex his verò quæ hætenus adduximus ex Decretis Conc. Trident. luce clarius apparere confido, in quem maximè finē inductum sit à pontifice Concilium, non ut ex scripturis eruatur & illustretur veritas, sed ut ipsa scriptura redigatur in ordinem, seruiatq; istorum hominū dignitati, honoribus, opibus, & superstitioni conseruanda & confirmanda: nō ut reformentur ecclesie, sed ut retrahantur in deformationem veterem, quæ ex hac emergere cæperunt.

Proinde cum per eximiam dei gratiam lux Christi inclyto Angliæ regno illuxerit, ne dimoueatis oculos ab illa luce, quam qui sequitur non ambulat in tenebris, sed habet lumen vitæ. Pergite pergitte duce Christo reformare quæ reformanda sunt. Nihil peccabitis, etsi nunquam redeatis cum nupera illa Romana ecclesia in gratiam. Nihil hic indulgeo prauo affectui. Nam in quintæ huius meæ Decadis initio solidis argumentis commonstravi necessarium esse prorsus recedere ab ista, & vni se Christo ecclesiæq; Christi veræ consecrare.

Hanc autē Decadem tuæ pietati inscribo & dedico, Princeps illustriss. utpote strenuo veræ pietatis assertori: nil dubius, quin fidele sis suscepturus huius meæ lucubrationis patrocinium, præsertim ubi diligenter legeris intellexerisq; nihil sine scripturis contra verā pietatē, sed omnia ex scripturis diuinis pro tuenda verâ religione esse prolata. Neq; enim cupio mihi & meis scriptis vel tantillum tribui, nisi omnia mea disertis scripturis & solidis rationibus ex scriptura deductis approbaue-ro. Et quamuis tua pietas mea instructione nō indigeat, ut quæ satis est instituta in religione verâ, habeatq; vnde quaq; doctissimos & piissimos viros, inter quos non postremi sunt D. Robertus Scinnerus, & D. Andreas Vullokus, viri præstantiss. speravi tamen hos meos labores tibi acceptos futuros, meamq; dedicationē bono profectam animo, te boni consulturū, utpote qua nihil ambio, nisi salutem publicam: videlicet ut regnum filij dei, quod nostro tempore (imminente, & ante fores nostras iam pulsante illo tremendo filij dei iudicio) reflorescere cæpit, cum apud vos in inclyto Angliæ regno, tum alibi terrarum, longè lateq; propagetur. Et alij quidem in dedicatorijs suis epistolis eius laudes celebrant, cui libros inscribunt: ego verò cum sciam te huiusmodi applausus nihil morari, neq; indigere huiusmodi præconijs, quod virtus tua alioqui satis sit celebris, quā tu quoq; in diem modestia & humilitate augere cōtendis, magis huc mea defleto epistola, ut tuam pietatem quā possum diligenter inhorter, quò pergas temetipsum pulcherrimo virtutū studio & incremento superare. Domini Dei nostri dona sunt, quæcunq; sunt in hominib. laude digna. Dominus mentē tibi dedit, ut intelligas magnum quidem meritò videri beneficium regia satum esse prosapia, sed longè maius præstantiusq; esse, appellari ac reuera esse dei filium, & Christi Iesu filij dei coheredem. Hanc nobilitatē summam cum per gratiam dei sis consecutus, vide ut eam sedulo pietatis studio retineas in finem vsq;: vide ut constanter Christo redemptori adhæreas, & eius gloriam promoueas: vide ut ex fide, quæ regi æternæ gloriæ seruas, etiam serenissimæ regie maiestati, totiq; inclyto regno Angliæ dulcissimæ patriæ tuæ fidelis esse pergas. Hætenus peregrinorum (quos nobis imprimis cōmendauit dominus) præsidium & refugium fuisti, deniq; studiosorum, & doctorum hominum arx atq; mecænas, talis esse perge. Sic autem non perituram, sed perennem gloriam in præsentī & futuro seculo consequēris. Comēdare me digneris obsecro magnanimo heroi D. Ioanni Dudlæo Vuaruicē. Comiti, magnati modis omnibus præstantiss. cui omnia felicia imprecor, omniaq; mea offero officia. Dñs Iesus monarcha orbis summus & vnicus, rex regum, & dominus dominorum, seruet incolumem Sereniss. regem, totumq; Angliæ regnum inclytum, fidelissimos item prudentissimosq; regni consiliarios, & te quoq; princeps clementissime. Tiguri in Helueticis Mense Martio, Anno M. D. LI.

SERMO.

SERMONVM DECAS

QVINTA, AVTHORE HEINRY-

CHO BVLLINGERO.

De sancta catholica Ecclesia, quid sit, quàm latè pateat, quibus agnoscatur notis, unde oriatur, quomodo conseruetur, An errare possit? Item de potestate & studijs Ecclesiae.

S E R M O I.



RDINE rerumq; cohærentium filo ducente, consequenter ab artifice & authore omnium Deo, progredimur ad ipsius opus excellentissimū, Ecclesiam. Tanta est enim Dei optimi patrisq; benignissimi bonitas, ut non sibi soli feliciter & beatè uiuere, sed & omnem felicitatem, & bona sua omnia in nos homines adamas creaturas suas effundere, bonisq; suis nos frui modis omnibus cupiat. Ideoq; homines in hoc mundo uiuentes sibi deligit, quos aliquando ad se transferat, in quibus interim, dū hic uiuunt, habitet, quos omnibus bonis suis locupletet, in quibus regnet, ipsiq; eius appellentur nomine, populus inquam, domus, regnum, hæreditas, peculium, cœtus uel Ecclesia Dei uiuentis. De qua dicam, uestris adiutus precibus, quod ipse dominus Ecclesiae loqui dederit.

Ecclesia est uox Græca, sed usurpata & recepta à Latinis, significans cœtum, *Ecclesia*, communionem uel concionem (Germanicè ein Gemeind) populum inquam conuocatum ad audiendum de reipub. negotijs. Sic enim & Lucas hoc uocabulo usus legitur in Actis cap. 19. Translatum est autem ad usum sacrum, diciq; ecclesia cœpit cœtus uel communio fidelium inuocantium nomen domini. Paulus enim dicit se persecutum ecclesiam Dei: qui alibi, Potestatē, inquit, accepi à principibus sacerdotū uinciendi omnes qui inuocant nomen Christi. *1. Cor. 15, Acto. 22.* Iam enim Christi nomen inuocantes uel Christianos appellat, quos ante nuncuparat ecclesiam. Vel ecclesia dicitur ab euocando. Græcè enim ἐκκλησιᾷ euoco est. Nam deus ex toto terrarum orbe uniuersaliq; hominum congregatione omnes credentes unā cū ipsorum semine euocat ex hoc mundo, ut sint eius peculiaris populus, cuius ipse sit uicissim deus: id est, ut sint ecclesia dei uiuentis. Olīm cœtus uel ecclesia populi Iudaici peculium dei, dicebatur Synagoga. Idem enim significat Synagoga quod *Synagoga*. Ecclesia: sed propter Iudæorum pertinaciam implacabileq; in Christianam religionem odium, uiluit uox Synagogæ ac fermè in usu esse desiit. Non differemus autem iusta methodo de Iudæorum, uel Turcarum, uel aliarum exterarum Gentium Ecclesijs, quarum plures esse nouimus. De Ecclesia Christiana fideliumue dicemus: quam Germani appellant die kirch: alludentes fortassis ad Græcorum κυρίκη. Vocant enim hi κυρίκη dominicam, nimirum domum uel plebem: sicut & Germani die kirchen nuncupant & ipsum dei populum & locum, in quo hic congregatur ad cultum Dei. Ante omnia autem describemus Ecclesiam paulò rudius.

ECCLÉSIA est uniuersalis fidelium cœtus uel multitudo, partim in ipso cœlo iam agens, partim adhuc in terris uersans: ubi palàm in unitate fidei uel doctrinæ ueræ sacramentorumq; legitima communione consentit, non discinditur, sed in una ueluti domo societateq; continetur. *Ecclesia quid.*

Hæc solet appellari Catholica, id est, uniuersalis. Profert enim palmites suos *Catholica Ecclesia.*

Galat. 3.

in omnia uniuersi mundi loca, & in omnia omnium ætatum tempora, comprehenditq; in uniuersum omnes totius mundi fideles. Etenim ecclesia Dei nō est affixa regioni, genti, aut familiæ, conditioni, ætati, aut sexui: omnes fideles & singuli ubi ubi sint, huius ecclesiæ ciues & membra sunt. S. Paulus Apostolus, Nō est Iudæus neq; Græcus, inquit, non est seruus neq; liber, non est masculus aut fœmina. Omnes enim uos unus estis in Christo Iesu.

Ecclesiæ distinctio.

Ecclesiæ triumphantis.

Apocal. 7.

Vide unde sit perfectior sanitas.

Hebr. 11.

Ecclesiæ militantis.

Distinguitur Ecclesia in triumphantē & militantem. Triumphans est magna illa concio sanctorum in cœlo spirituum, triumphantium modò de uictō mundo, peccato & diabolo, fruuentium Dei conspectu, in quo est iucunditas gaudiorumq; satietas omnium. Vnde & in æternum gloriam Dei celebrant, & bonitatem eius laudāt. Hanc describit graphicè beatus Ioannes Apostolus in Apocalypsi dicens, Post hæc uidi, & ecce turba multa, quam dinumerare nemo poterat, ex omnibus gentibus, populis & linguis, stantes ante thronum & in cōspectu agni amicti stolis albis, & palmæ in manibus eorum: & clamabant uoce magna, dicentes, Salus ei qui sedet super thronum Dei nostri & agno. Et paulò post, Respondit unus de senioribus, & dixit mihi, Hi qui sunt amicti stolis albis, qui sunt & unde uenerunt? Et dixi illi, Domine tu scis. Et dixit mihi, Hi sunt qui uenerunt ex afflictione magna, & dilatauerunt stolas suas, & dealbauerunt eas in sanguine agni: ideo sunt ante thronū Dei, & seruiunt ei die & nocte in tēplo eius. Et qui sedet in throno habitabit super eos. Nō esurient, neq; sitient amplius: neq; cadet super eos sol, neque ullus æstus: quoniam agnus qui in medio throni est reget eos, & deducet eos ad uiuos fontes aquarum. Et abstersurus est deus omnem lachrymam ab oculis eorum. Habetis fratres descriptionem elegantissimam triumphantis in cœlo ecclesiæ, & triumphantis quidem per sanguinem Iesu Christi, per quem uicerunt, & iam regnant. Christus enim est agnus ille Dei qui tollit peccatum mundi: per quem omnes qui sanctificati sunt sanctificātur & sanctificabuntur, uiuunt, à principio mundi ad finem usque seculi. S. Paulus alicubi egregiam nobis huius quoque ecclesiæ descriptionē exhibens, docet interim nos qui uersamur adhuc in militanti ecclesia, aliquādo ad illam transferendos, associandosq; sanctis dei angelis, cooptandos item in ordinem patriarcharū, collocandosq; inter ipsos beatos spiritus, apud ipsum deum summum mediatoremq; dominum nostrum Iesum Christum. Prædicans enim magnitudinem diuinę gratiæ per euangelium delatæ ad nos, adhortansq; ut eam uera fide recipiamus, Non accessistis, inquit, ad montem Sina, ad ignem, ad turbinem, procellam & caliginem, sed ad montem Zion, ad ciuitatem dei uiuentis, ad Hierusalem cœlestem, & ad cœtum innumerabilium angelorum, & ad Ecclesiam primogenitorum, qui scripti sunt in cœlis, & ad iudicem omnium Deum, & spiritus iustorum perfectorum, & mediatorem noui testamenti Iesum Christum, meliora loquentem quàm loquebatur sanguis Abel. Proinde omnes sancti in cœlis pertinent ad nostrum consortium, imò nos pertinemus ad ipsorum societatem. Sumus enim socij & cohæredes sanctorum ab Adamo ad finem usq; seculi omnium, ac domestici Dei. Id quod maximam habet in omni uita hominum consolationem aculeosq; ad studium uirtutis acutiss. Quid enim est præstantius quàm domesticum esse Dei? Quid obsecro iucundius uel cogitari potest, quàm nos esse socios patriarcharum, prophetarum, apostolorum, martyrum, omnium angelorum, beatorumq; spirituum? Hoc beneficium Christus contulit. Huic sit laus, gloria, & gratiarum actio in secula seculorum, Amen.

Militans ecclesia cœtus est hominum in terris, nomen & religionem Christi profitemen-

profitentium, & adhuc militantium in mundo, contra diabolum, peccatum, carnem, & mundum, in castris & sub signis Christi domini. Ea rursus consideratur dupliciter. Velenim strictius considerata eos duntaxat comprehendit, qui non tantum dicuntur, sed etiam reuera sunt Ecclesia, fideles & electi Dei, uiua membra, Christo connexa, non modo uinculis aut notis externis, sed spiritu & fide, & aliquando his duntaxat, sine illis. De qua re dicemus postea. Ista interna & inuisibilis Dei Ecclesia, electa Christi sponsa dici poterat, soli Deo cognita, ut qui solus nouit qui sint eius. Hanc in primis confitentes symbolo edocti apostolico dicimus, Credo sanctam Ecclesiam Catholicam, sanctorum communionem. Ac paucis quidem his uerbis comprehendimus quod sit Ecclesia, quid item & qualis sit. Principio enim confitemur fuisse, esse, & manere semper Ecclesiam Dei. Deinde quid sit profitentes subiicimus, Sanctorum communionem: id est, credimus Ecclesiam aliud non esse quam coetum omnium qui sunt, fuerunt, eruntque tam in praesenti quam futuro seculo, sanctorum, qui communia inter se habeant omnia a deo sibi concessa bona. Simul etiam exprimimus qualis sit ecclesia, nimirum sancta, sponsa inquam Christi purgata & beata. Nam Apostolus Paulus sanctos appellauit mundatos spiritu & sanguine dei nostri: quorum bona pars coronas accepit: reliqua easdem in terris certans sibi in caelis imponendas expectat. Et praecipuum quidem in consideratione ecclesiae caput illud est, quod per gratiam Dei membra corporis Christi effecti, omniumque cum sanctis omnibus bonorum coelestium participes facti sumus. Etenim non alios magis quam nos ipsos confitemur esse sanctos.

Sancta Ecclesia

Credo sanctam Ecclesiam Catholicam.

1. Cor. 6.

Vel certe latius considerata ecclesia, non modo uere fideles & sanctos, sed illos quoque complectitur, qui tametsi nec uere credant, nec mundi uel sancti sint conuersatione uitae, ueram tamen religionem cum uere credentibus & sanctis Dei agnoscunt & profitentur, uirtutes denique palam approbant, scelera reprobant, neque adhuc se separant ab unitate huius sanctae militantis Ecclesiae. Quae quidem consideratione ne mali quidem uel hypocritae (quales Christi & Apostolorum temporibus in Ecclesia fuisse dicuntur Iudas, Ananias & Saphira, Simon Magus, Demas item, Hymenaeus, Alexander, & alij multi) excluduntur ex Ecclesia, quae uisibilis & externa dici potest. Aestimatur autem haec rursus uel ex aliqua sui parte, uel ex seipsa tota. Consideratur enim Particulariter, & Vniuersaliter. Et particularis quidem Ecclesia certo est definita numero, certoque ex loco cognosci potest. Ex loco enim indispiscitur nomen, dicta ciuitatum nominibus, ut Ecclesiae Tigurinorum uel Bernatium, &c. Graeci particulares illas appellauerunt *παροικίας*. Vulgus dicit parochias, alij & rectius dixere parœcias. Parœciam uocant incolatum aut habitaculum adeoque uiciniam, domibus conuicinis comprehensam. At solet in ciuitatibus & in agro designatae aedium portioni & templum & parochus dari, totaque illa area appellari parochia, Germanice *ein Barchi / oder psarfirch / oder ein kirchhory*. Ac ueteribus parochus erat praebitor. Hospitibus enim suppeditabat necessaria, sal in primis & ligna. Alij nuncuparunt exhibitorem conuiuij: alij paranympum. Quia ergo Ecclesiarum pastores sunt ueluti paranymphe redemptoris capitisque Ecclesiae Christi, adducentes ei uirginem castam: quia denique illi ipsi maxime necessaria populo Dei procurant coelestesque dapes uel epulas instruunt, rectissime pastores gregis dominici parochi uel curatores animarum appellantur. De particulari Ecclesia loquutus dominus in euangelio dixit, Si scandalizans Ecclesiam montes non audierit, dic Ecclesiae. Non potest autem uniuersalis Ecclesia conue-

Ecclesia et malos complexa.

Ecclesia particularis.

Parochia et parochi.

Matt. 18.

nire unquam ex toto terrarum orbe, ut ei deferantur rebelles: particularibus ergo defertur iudicium de contumacibus. Porro Vniuersalis ecclesia ex omnibus colligitur particularibus in uniuerso mundo ecclesijs, omnibusq; membris suis uisibilibus. Hæc illa ipsa est quam modò adumbrauimus, cum latius consideratam attingeremus.

*Ecclesia Dei
semper fuit
eritq;.*

Cæterum Ecclesia Dei Catholica continuo seculorum ordine (quod & paulò ante dicere cœperam (ad nos usq; decurrit, & hodie diffusa est per totum terrarum orbem, uisibiliter quidem & inuisibiliter, eritq; populus domini & domus Dei in terris in finem usq; seculi. Etenim nullum unquam seculum fuit, neque ulla unquam ætas erit, in qua sibi non aliquos saltem sanctificari sanctificetq; deus, in quibus habitet, qui sint eius peculium & domus sancta. Nam perpetuam esse ecclesiam testantur etiam ueterum uatum testimonia. Etenim sic legimus scriptum Psalmo 132. Dominus elegit Zion, elegit eam in habitationem sibi. Hæc requies mea in seculum seculi; hic habitabo, quoniam elegi eam. Et iterum, Iuraui Dauidi in sancto meo, semen eius in æternum manebit, & solium eius coram me perstabit ut sol. Quis autem ignorat ista omnia intelligenda esse de Christo Dauidis filio & throno eius spiritualiq; Zione, quæ est ecclesia? Ipse quoq; perpetuitatem ecclesiæ significans in euangelio dicit, Ero uobiscum omnibus diebus usque ad consummationem seculi. Et iterum, Ego rogabo patrem, & alium consolatorem dabit uobis, spiritum ueritatis, ut maneat uobiscum in æternum. Huc nimirum & illud ex euangelio pertinet, Et portæ inferorum non præualebunt contra Ecclesiam. Quæ sanè maxima est consolatio fidelium in tot & tam grauib; persecutionibus ad oppressionem excidiūq; ecclesiæ institutis.

*Matth. 28.
Ioan. 14.*

Matth. 16.

*Ecclesia diaboli
& antichristi.*

Sicut autem Christus suam in terris semper habuit, habet, habebitq; ecclesiam, ita diabolo quoque, donec hic mundus finiatur, nunquam deerit suus populus, in quo regnet. Hæc diaboli Ecclesia initium accepit à Caino, progredieturq; ad ultimum usque impium, medios comprehendens omnes totius mundi impios. Communionem autem in terris uiuentes, cum his qui apud inferos torquentur habent. Sicut enim omnes pii unum sub capite Christo corpus constituunt: sic omnes impij sub uno capite satana unum corpus sunt. Hæc merito appellatur Ecclesia malignantium, Sodoma & Gomorra, Babylon, Congregatio Chore, Dathan & Abyrom, synagoga & schola & prostibulum diaboli, Antichristi regnum, & si quid aliud his est simile. In hac Ecclesia recensentur omnes impij & infideles, segregantes se à consortio sanctæ matris Ecclesiæ, aut respuentes eius communionē, quales imprimis sunt illusores Dei & uerbi eius, blasphemæ & persecutores Christi & Ecclesiæ. Tales sunt hodie gentiles, Turcæ, Iudæi, hæretici, scismatici & omnes in uniuersum professi hostes religionis Christianæ. Adde his & hypocritas. Neq; enim leue crimen est, quod ipse dominus noster ubique in sancto euangelio tam ardentè accusat & persequitur. Inter alia dicit, Veniet dominus serui illius, in die quo non expectat, & horâ quâ ignorat, & dissecat eum, partemq; eius ponet cum hypocritis, illic erit ploratus & stridor dentium. Enormitatem sceleris atrocitate supplicij significauit haud dubiè. Hæc Ecclesia sequitur diaboli instinctum & proprij cordis figmenta, exerceturq; in omnipharia blasphemia & impietate, in quibus semetipsam superat, tandem & ad tartara demergitur, ne uspiam separetur ab eo capite, cui se semper tam studiosè, imò pertinaciter conglutinauit.

*Matth. 5. 6. 23.
Matth. 24.*

*Quomodo hy-
pocrite sint
aut recensentur
in Ecclesia
Dei.*

Obijcis, fat scio, hypocritas me numerasse in externa militantis Ecclesiæ communionē, iam eosdem recensere in consortio diabolicæ Ecclesiæ. Addis, Impos-

sibile

sibile esse eundem communicare posse diuersissimis inter se ecclesijs; Domino docente, Aut facite arborem bonam & fructum eius bonum: aut facite arborem uitiosam & fructum eius uitiosum: Paulo item docente nullum esse consortium inter Christum & Belial, inter lucem & tenebras, inter ueritatem & mendacium; hypocrisis uerò esse mendacium & tenebras. Video ergo hic mihi commodum offerri locum declarandi, qua ratione uel quatenus numerauerim in ecclesijs consortio hypocritas. Principiò distinguimus inter hypocritas. Sunt enim hypocritæ confidentes humanæ suæ iustitiæ, omniâque sua opera facientes ut uideantur ab hominibus, innitentes pertinaciter humanis traditionibus. His proprium est non modò ecclesiam, iustitiam Christi docentem fugere, sed execrari item & persequi sæuissimè. Huiusmodi fuerunt Iudæi & Iudaici pharisæi, quibus cum certamen fuit Domino nostro Iesu Christo, & quibus cum hodie belligeratur ecclesia. Hi palàm sunt membra diaboliæ ecclesiæ, nec ueniunt in censum uel exterioris ecclesiæ, imò non sustinerent in ecclesia Christi nominari. Sunt rursus hypocritæ quidam simulatores, nec suæ fidentes iustitiæ, nec admodum curantes traditiones humanas. Hi nec ecclesiam Dei odiunt uel fugiunt, nec persequuntur, sed foris quidem consentiunt cum ipsa, eandem profitentes fidem, iisdemque sacramentis participantes; intus uerò & in animo nec sincere credunt, nec sanctè uiuunt. Ex his alij quidem ad tempus in ecclesiæ consortio hærent, oblata autem occasione ab ipsa recedunt: ut solent hæretici & schismatici, & qui ex amicis fiunt inimici. Alij uerò ex ipsa nunquam recedunt, sed quoad uiuunt continent se in ecclesiæ contubernio, foris quidem simulantes religionem, intus autem suis erroribus & uitijs atque sceleribus indulgentes: quibus proculdubio externum illud consortium nihil prodest. Oportet enim æternum uiuere omnibusque bonis celestibus participare desiderantibus, communicare cum ecclesia Dei, non externa tantum uisibiliq; societate, sed communione interna, ex qua existit uita salusque. De qua suo dicetur loco. Huiusmodi uerò hypocritæ uel simulatores inhærentes adhuc ecclesiastico corpori, membra appellantur corporis, dicunturq; esse in ecclesia. Quod ut plenius intelligatur ab omnibus uobis, parabolis aliquot adumbrabimus rem.

Dicimus malos uel hypocritas perinde in ecclesia esse, sicut sunt in frumento paleæ, quæ reuera alterius naturæ sunt, & frumentum non sunt. Sicut ergo humano corpori nonnunquam adhærent membra aut arida, aut putrida, aut languentia, quæ tamen uiuis membris spiritu uitali non communiceant, connexionem tamen & uinculis quibusdam, uiuis membris adhærent, unde & corporis membra partésque appellantur ab hominibus, qui illa ipsa aliquando, ne cætera contagione inficiant, resecant, nonnunquam tolerant, ne dum hæc resecant, totum corpus adducatur in discrimen uitæ: Ita ratione certa & suo quodam modo dicimus hypocritas esse in ecclesia Christi, licet uinculo spiritus, fidei & charitatis non sint copulati ecclesiæ, neque uiua censeantur membra: tolerantur tamen ne quid corpori ecclesiastico deterius obtingat: ac resecantur nonnunquam quò melius habeat ecclesiastici corporis sanitas. Sed audiamus Euangelica & Apostolica testimonia. Dominus in Euangelio disertè dicit, in agro Dominico seminata ab homine malo succrescere zizania: quæ & eradicari prohibet, ne simul eradicetur & frumentum. En zizania ab homine malo, ab ipso inquam damone seminata, quæ non sunt frumentum, proueniunt tamen & sunt in agro dominico. Rursus dicit in Euangelio Dominus, Simile est regnum cælorum uerriculo iacto in mare, & ex omni genere contrahenti: quod cùm impletum fuisset, sub-

- duxerunt in littus, & sedentes, quæ bona erant in uasa, quæ uerò mala, foras eiecerunt. En rursus cernis in eadem sarena trahi bonos & malos, ideòque in eodem regno numerari bonos & malos. In alia quoque parabola comparat inter conuiuas quidam non tectus ueste nuptiali, qui ad tempus fertur, tandem à Domino conuiuij eiicitur. Idem alibi dicitur habere uanum aut uentilabrum in manu sua, areamque purgare & paleam comburere igni inextinguibili. Proinde
- Matth. 22.** S. Paulus in epistola ad Corinthios discrimen aliquod constituit inter professes ecclesiæ Christi hostes, & inter impuros quidem homines, sed nondum tamen ecclesiæ ac Christi nomen auersantes. Si quis, inquit, cum frater appellatur fur sit, aut scortator, aut auarus, &c. cum eo ne cibum quidem capiat. Quid enim ad me atinet de his qui foris sunt iudicare? Eos qui foris sunt Deus iudicat. Foris, id est, extra ecclesiæ septa collocat non appellatos fratres, id est, non agnoscentes nomen Christi uel ecclesiæ. Intus, id est, in societate ecclesiæ (nimirum exterioris) recenset agnoscentes adhuc nomen Christianum, neque opposcentes se ecclesiasticæ disciplinæ, quamuis interim contaminati sint sceleribus. Omnium autem significantissimè beatus Ioannes Apostolus dixit, Exierunt ex nobis, sed non erant ex nobis. Nam si fuissent ex nobis, permansissent utique nobiscum. Nouum uidetur hoc loquutionis genus. Si enim exeuntes de ecclesia, in societate ecclesiæ non fuerunt, quomodo exire ex ecclesia potuerunt? Potest ne aliquis prodire ex loco, in quem nunquam peruenit, aut in quo nunquam fuit? Proinde si hypocritæ & mali exierunt ex ecclesia, fuerunt certè aliquando in ecclesia, tunc uidelicet, quando ex ipsa nondum exiuerunt & quales reuera fuerant declarauerunt. Rursus quandoquidem exierunt ex ecclesia, apertissimè ostenderunt nunquam se reuera fuisse uiua & uera Christi & ecclesiæ membra, tamen si ad tempus ecclesiæ membris connumerati sint. Rationem subiungit Apostolus, Verorum Christi membrorum ingenium est, nuspiam Christum & ecclesiam deserere, sed perseverare, adeòque de die in diem magis magisque proficere. Labuntur quidem sancti, sed non deserunt Christum prorsus. Clamat Dauid prolapsus in adulterium & parricidium, Cor mundum crea in me Deus, & spiritum rectum renoua in uisceribus meis. Ne proijcias me à facie tua, & spiritum sanctum tuum ne auferas à me. Redde mihi letitiam salutaris tui, & spiritu principali confirma me.
- Matth. 3.** S. Petrus negauit Dominum, uicique spiritum bonum caro infirma, sed continuo (Domino commouente cor eius) resipuit, & exiens de consortio prauo coniunxit se sodalitiis bono Domini, qui & hunc lapsum grauem ei prædixerat, & hæc insuper uerba adiunxerat, Oraui pro te, ne deficiat fides tua: Et tu aliquando conuersus confirma fratres tuos. Idem Petrus alicubi, pluribus à Christo deficientibus, rogatus num & ipse discessionem paret? Respondit, Domine ad quem ibimus? Verba uitæ æternæ habes. Et nos credimus & cognouimus quòd tu es Christus filius Dei uiui. Rectè ergo dixit beatus Ioannes, Exierunt ex nobis, sed non erant ex nobis. Rationem suppingit, Si fuissent ex nobis, permansissent utique nobiscum. Quoniam ergo non permanserunt nobiscum in societate Christi & ecclesiæ, defectione sua à nobis declarauerunt quales hactenus fuerint: nos pro membris ecclesiæ numerauimus, ipsi uerò defectione illa sua ostendunt se fuisse paleas in frumento dominico. Sicut enim palea nondum commota & uentilata uidetur grano tritici grauis, uentilata autem uacua & leuis apparet separaturq; à frumento: ita hypocritæ leui sua defectione approbant se nunquam fuisse semine uerbi Dei graues & uerum Christi frumentum.
- 1. Cor. 5.**
- 1. Ioan. 2.**
- Psalm. 52.**
- Luce 22.**
- Ioan. 6.**

Ex his colligitur doctrina generalis & orthodoxa, non omnes qui dicuntur ecclesia & ornant se titulo ecclesiae, protinus esse ecclesiam. Diserte enim subiungit Ioannes, Sed ut manifesti fiant, quod non omnes sint ex nobis. Vnde & Paulus ad Romanos dixisse legitur, Non omnes qui sunt ex Israel, neque quia sunt semen Abraham, mox omnes filij sunt: sed in Isaac uocabitur tibi semen. Proinde fideles uera & uiua sunt Christi & sanctorum membra. Interim uero quandiu hypocritae uel mali, necdum deterso fuco, quales sint dictis uel factis produnt, ut iure excindi queant ex ecclesia, necdum ipsi sua sponte erumpentes Christi castra deserunt, & in Antichristi uel diaboli tabernacula refugiunt, agnoscuntur utique pro inquilinis Ecclesiae, appellanturque Ecclesia & Ecclesiae membra, aliud interim de ipsis iudicante omnium corda inspiciente Deo. Exemplo rursus haec illustrabo. Quandiu Iudas Christi proditor & parricida subdolum, imò confcleratissimum suum ingenium nullo facto aut dicto publico prodebat, nec congregationem Christi & Apostolorum deserebat, sed concionabatur & rem Christi familiarem curabat, habebatur utique pro Apostolo & oeconomo Christi, pro membro Ecclesiae Apostolicae. Eundem tamen Dominus & diabolus appellabat, & excludebat manifestissime cum loqueretur de electis & de ueris ac uiuis suis membris: ut iam nihil addubitare possimus Iudam non fuisse membrum internae & sanctae Dei ecclesiae, licet esset membrum exterioris Ecclesiae in numero recensitus sanctorum. Ideoque non sine causa graui dixerunt alij, Ecclesiam Dei aliam quidem esse uisibilem & externam, aliam uero inuisibilem & internam. Visibilis & externa Ecclesia illa est, quae foris ab hominibus ex auscultatione uerbi Domini, & sacramentorum eiusdem participatione, publicaque fidei confessione, pro Ecclesia agnoscitur. Inuisibilis & interna dicitur, non quod homines sint inuisibiles, sed quod hominum oculis non appareat, soliusque Dei oculis pateat qui uere & fide credant. Verè enim credentes, membra uera & uiua sunt huius interioris Ecclesiae: quam superius appellauì Ecclesiam militantem strictius consideratam, aliam uero uisibilem illam bonos & malos comprehendentem latius consideratam.

Nunc quoniam dixi Ecclesiam in terris militantem, à Deo notis insigniri, ex quibus agnosci possit in hoc seculo, consequenter de his Ecclesiae Dei externis notis dicam. Sunt autem primariae ac potissimae duae. Praedicatio sincera uerbi Dei, & legitima sacramentorum Christi participatio. Quod alij adijciunt studium pietatis & unitatis, patientiam in cruce, & inuocationem nominis Dei per Christum, ea in his duobus nostris comprehendimus. Paulus ad Ephesios, Christus semetipsum exposuit, inquit, pro Ecclesia, ut illam sanctificaret mundatam lauacro aquae, per uerbum. Habetis in hoc Apostoli testimonio notas Ecclesiae Verbum & Sacramentum, per quae sibi Christus parat Ecclesiam. Nam gratia sua uocat, sanguine Christi purificat: id quod uerbo annunciat ut fide recipiatur, sacramentisque obsignat, ne quid ambigant fideles de salute per Christum parta. Et fidelibus quidem sanctisque membris haec propriè conueniunt. Quod hypocritae non purgantur, culpa in ipsis, non in Deo aut in ministerio sacro haeret: uisibiliter certè sanctificantur, unde & pro sanctis habentur ab hominibus, istaque eis impropriè competunt. Non dissidet à Paulo Petrus, qui cum praedicasset Hierosolymitanis uerbum Dei, atque hi quid facerent rogarent, respondit Petrus, Resipiscite, & baptizetur unusquisque uestrum in nomine Iesu Christi, in remissionem peccatorum. Baptismum ergo coniunxit doctrinae Petrus, Sacramentum uerbo. Id quod didicerat ab ipso saluatore in Euangelio, secun-

Non omnes qui sunt in ecclesia sunt ecclesia. Rom. 9.

Ioan. 13.

Ioan. 6.

Ioan. 13.

Visibilis & inuisibilis, Externa & interna ecclesia.

De externis ecclesiae Dei notis.

Ephes. 5.

Act. 2.

Matth. 28. dum Matthæum, dicente, Docete omnes gentes, baptizantes eos in nomen patris & filij & spiritus sancti. Vnde non alia quàm hæc ipsa uerbi & sacramentorum symbola Ecclesiæ, recensita legis in Actis hisce uerbis, Erant perseverantes in doctrina Apostolorum, & beneficentia, & fractione panis, ac precationibus. Vbi cœnam Domini alterum sacramentum, baptismi sacramento adiectum uidetis, unitatis quoque & charitatis studium, item inuocationem nominis diuini. His apertis alioqui & firmis satis, adiiciam nihilominus & alia ex scripturis sanctis testimonia. De symbolo uerbi Dei uel prædicationis Euangelij, ipse apud Isaiam Dominus dicit, Fœdus meum pangam cum eis. Spiritus meus qui super te est (Ecclesia) & uerba mea quæ inseruiori tuo, nunquam excident de ore tuo, neque de ore seminis tui, neque de ore nepotum & pronepotum tuorum, dicit Dominus à modo & usque in sempiternum. Nam in Euangelio quoque dicit Dominus Iesus, Qui ex Deo est, uerba Dei audit. Item, Oues meæ uocem meam audiunt, & ego cognosco eas, & sequuntur me, & ego uitam æternam do eis: nec peribunt in æternum. Et iterum, Qui diligit me, sermonem meum seruabit. Qui non diligit me, sermones meos non seruat. Rursus, Omnis qui est ex ueritate audit uocem meam. Iam quod attinet sacramentorum notas, S. Paulus loquens de baptismo sancto, dicit, Per unum spiritum nos omnes in unum corpus baptizati sumus. Ac idem ille de Cœna Domini, Vnus panis, inquit, unum corpus multi sumus. Nam omnes de eodem pane participamus. Sed & poculum quo benedicimus, annon est communio sanguinis Christi? Certissimum est itaque, quia diuinis traditum testimonijs, externas ecclesiæ notas esse Verbum & Sacramentum. Hæc enim colligunt nos in societatem unius corporis Ecclesiastici, & in eadem nos retinent.

Quomodo nota hæc ecclesiæ insigniantur.

Hæc testimonia omnia propriè quidem (quod & paulò ante monui) electis Dei membris fide & iusta obedientia donatis, hypocritis fide & iusta obedientia destitutis, impropriè congruunt: quia tamen & hi uocem pastoris externè audiunt, uirtuti operam dant, & palàm uel foris conglutinantur sacramentorum participatione electis & uerè credentibus, corpori inquam Christi uero, propter externa illa signa numerantur in Ecclesia, quandiu ex ipsa non recedunt. Vbi & hoc declarandi gratia disputatis de Ecclesiæ notis adiungere oportet, lege communi has membra Ecclesiæ insignire. Sunt enim singularia quædam membra, quæ licet his careant notis, communionem tamen ueræ Christi ecclesiæ non excluduntur. Certissimum est enim plurimos in orbe terrarum non audire prædicationem uerbi Dei ordinariam, nec ingredi cœtum inuocantium Deum, aut participare sacramentis: non quòd ea contemnant, aut à concione abesse uolupte sit, sed quòd necessitate aliqua, ueluti uinculorum, morborum, aut aliorum malorum uel impliciti, quod alioqui desiderant, consequi non possunt, & tamen illos ipsos nihilominus uera & uiua esse Christi & catholicæ Ecclesiæ membra. Olim instituerat Dominus in populo Israelis uisibilem Ecclesiam, quam lege certa colligarat, signisq; uisibilibus insigniuerat. Eam si quis spreuisset, aut cum potuisset audire doctrinam Ecclesiasticam, & ingredi sacrum cœtum sacrificareque, subterfugisset, aut etiam conuiuijs proscidisset, aut pro diuinitus tradito cultu, alienum fuisset amplexus, profectò minime fuisset recensitus in ordine & numero populi Dei. At erant interim apud gentes per orbem terræ dispersi homines innumeri, qui non communicabant, neque communicare poterant cum hoc uisibili cœtu populi Dei, ac nihilo minus tamen erant & huius cœtus sancti membra & amici Dei omnipotentis. Erant cum rege Ioachim, Iechonia plures filij Dei in Babylo-

nem

nem captiui per Nabuchodonosorem abducti, quibus tamen nihil nocuit separatio à populo Dei, Hierosolymis sub Sedechia templum & cultum uisibilem retinente: sicut multis non profuit uisibilis congregatio cum populo Dei in templo Domini, quando ipsorum mentes non essent integræ. Reperias hodie quoque innumeros per maria dispersos fideles, ad triremes propter confessionem ueræ fidei damnatos: reperias multos Antichristiana captiuitate impeditos, de quibus dicemus Sermonem sequente: reperias item innumeros in Græcia, Nætolia, Persia, Arabia, uel in Africa Iesu Christi seruos, præstantissima catholicæ Ecclesiæ Christi membra, exclusos quidem Machometana impietate & crudelitate à Christianorum sacris, nihilominus tamen coniunctissimos eodem spiritu & eadem fide cum omnibus ecclesiæ membris, uisibilibus etiam signis insignitis. Proinde Verbum & Sacramentum notæ sunt Ecclesiæ ex lege communi, non submouentes à communione fidelium fideles, necessitate aliqua exclusos uisibili coetu fidelium.

Porro ad plenam signorum Ecclesiæ cognitionem pertinet & illud, & quidem imprimis, non satis esse Verbum Dei uel scripturam iactare, nisi sensum quoque natium & fidei articulis congruum simul amplectamur, retineamus & tueamur. Etenim si corrumpas sensum scripturæ, & hunc urgeas in Ecclesia, iam non ipsam profers scripturam synceram, sed tuam opinionem, & tua figmenta, quæ tuo ipsius arbitrio excogitasti. Non repudiabat uerbum Domini Ariæ norum Ecclesia, imò blasphemus errores suos scripturarum testimonijs & ornare & tueri contendebat. Negabat Dominum nostrum Iesum Christum consubstantialem esse Deo patri, quod cum scripturæ & orthodoxæ fidei sensus inter prima fidei capita & asserat & urgeat, profectò non uerbum Dei syncerum, utcunque id iactaret, sed adulteratum, adeoque hæreticam suam opinionem pro orthodoxa scripturæ diuinæ sententia subiiciebat & tuebatur: ideoque non habebat uerum Ecclesiæ signum, nec erat uera Dei Ecclesia. Ex unico hoc exemplo infelici æstimare licet omnium aliorum hæreticorum ecclesias: quæ tametsi uerbi Dei testimonio non uideantur destitui, reuera tamen uerbi Dei puri nihil habent reliquum.

Quod de uerbo Dei diximus, etiam de Sacramentorum usu intelligere necesse est: nisi enim usurpentur legitime, eo inquam modo, quo instituit ipse Dominus, non sunt Ecclesiæ Dei signa. Sacrificabat quidem Ieroboam & Deo quidem sacrificabat, sed quia non legitime sacrificabat, alienus & defector à uera Dei Ecclesia appellatur. Quid quod ipse Dauid arcam Domini exercituum summa cum deuotione & maximo cum iubilo deducebat: quoniam uerò non legitime portabatur in humeris sacerdotum, protinus pro latitia magna ingens luctus obortus, coarguit non satis esse usurpare sacramenta & instituta Domini, nisi usurpes legitime. Hoc enim si fiat, agnoscit te Deus pro suo. Porro baptizatos quondam ab hæreticis, ea de causa non rebaptizarunt ueteres catholici, quod hæretici non in nomen hominis alicuius, aut in consortium suæ ignorantiae uel hæreseos, sed in nomen patris & filij & spiritus sancti tinxerunt, nec suum uel hæresiarcharum, sed nomen Christi Iesu inuocarunt. Ergo baptismum non hæreticorum quidem, sed Ecclesiæ baptismum, collatum autem ab hæreticis, non reprobantes, Ecclesias hæreticorum non approbauerunt, ueluti ex uero signo ueras declaratas: sed agnouerunt hæreticos rebus peculiariter ad ecclesiam ueram pertinentibus uti: neque rei bonæ derogari tantillum, si ipsam malus aliquis administret. Non agnoscimus hodie Ecclesiam Papæ Romanensem

4. Reg. 24.
Daniel. 1.

Qualis oportet
esse uerbum
Dei quod nota
sit ecclesiæ.

Qualis esse de-
beat sacramen-
torum usus, &c.
3. Reg. 12.
2. Reg. 6.

Baptizati ab
hæreticis, non
rebaptizati.

neotericam (de ueteri illa Apostolica nihil iam dicimus) ueram esse Christi ecclesiam, attamen non retinimus baptizatos à sacerdotibus Romana imbutis corruptione. Scimus enim illos baptismo Ecclesiae Christi, non Papae, in nomen sanctae Trinitatis, ad articulos fidei catholicae, non ad errores, non ad superstitiones & impietates Papisticas esse tinctos. Denique fatemur ne hodie quidem rei diuinæ derogare quicquam indignitatem ministri. Ita non repudiamus Orationem Dominicam, aut Symbolum Apostolorum, aut ipsam denique scripturam Canonicam, quod his quoque utatur Romana Ecclesia. Habet enim illa non ex semetipsa, sed accepit à uera Dei Ecclesia. Vnde cum illis in commune utimur cum ipsa, non propter ipsam Romanam Ecclesiam, sed quia profecta sunt ab ipsa uera Christi Ecclesia, utimur.

De notis ecclesiae Dei interioribus.

Præter illas exteriores Ecclesiae notas, quas uerè credentes communes habent cum hypocritis, sunt interiores quædam singularesque pijs duntaxat: siue illas uincula & dona peculiaria appellare malis. Hæc exteriores notas frugiferas reddunt, & sine externis notis, necessitate aliqua absentibus, acceptos uel gratos Deo efficiunt. Nam sine his nemo placet Deo: in his ergo est uerus typus filiorum Dei. Sunt autem communio spiritus Domini, fides sincera, & charitas gemina. His enim fideles uera & uiua Christi membra, primum quidem capiti Christo, deinde omnibus membris corporis Ecclesiastici coniunguntur. Ac pertinet hæc consideratio imprimis ad cognitionem ueræ Dei Ecclesiae, quæ licet putrida toleret membra, ab his tamen per coniunctionem externam non polluitur. Perpetuo enim studio se incontaminatam Deo seruare contendit. Ac principiò Christum nobis coniungi spiritu suo, nos illi connecti animo uel spiritu per fidem, ut ipse uiuat in nobis, nos in ipso, docet nos Euangelica & Apostolica doctrina. In Euangelio enim clamat Dominus, Si quis sitit, ueniat ad me & bibat. Qui credit in me, sicut dicit scriptura, flumina de uentre eius fluent aquæ uiuæ. Quibus mox subiungit Euangelista, Hoc autem dixit de spiritu, quem accepturi erant credentes in ipsum. Rursus in Euangelio spiritum suum promittens discipulis, imò omnibus fidelibus suis, qui semper cum ipsis maneat, In illo die cognoscetis, inquit, quod ego sum in patre, & uos in me, & ego in uobis, nimirum per spiritum sanctum: Ioanne Apostolo interpretante & dicente, Per hoc scimus quod manet in nobis, per spiritum quem dedit nobis. Et iterum, Ex hoc cognoscimus quod in eo manemus & ipse in nobis: quoniam de spiritu suo dedit nobis. Non discrepat à beato Ioanne uas electionis Paulus, Romanis scribens & dicens, Si quis spiritum Christi non habet, hic non est eius. Et quicumque spiritu Dei ducuntur, hi sunt filij Dei. Iam quod attinet ad fidem ueram connectentem nos Domino, Paulus, Viuo iam non ego, inquit, sed uiuit in me Christus. Vitam autem quam nunc uiuo in carne, per fidem uiuo filij Dei: qui dilexit me, & tradidit semetipsum pro me. Et iterum idem, Christus, inquit, inhabitat per fidem in cordibus nostris. Cum quibus sententijs consentiens rursus Apostolus Ioannes, Quisquis, inquit, confessus fuerit quod Iesus est filius Dei, Deus in eo manet & ipse in Deo. Nam ipse Dominus prior in Euangelio dixit, Qui edidit meam carnem & bibit meum sanguinem, in me manet & ego in illo. Edidit autem & bibit sanguinem Christi qui credit. Proinde spiritu coniungitur nobis Christus Dominus, nos animo & fide ei connectimur, ueluti corpus capiti: quo nexu & uinculo carentes, id est, non habentes spiritum Christi neque ueram in Christum fidem, uera & uiua Christi membra non sunt: ipso rursus domino

domino in euangelio testante & dicente, Si quis in me non manserit, electus est ^{ioan. 13.} foras sicut palmes, & exaruit, & colligunt eos, & in ignem conijciunt, & ardent. Quæ uerba saluatoris imitatus Apostolus (quod & modò adduximus) dixit, Qui spiritum Christi non habet, hic non est eius. Cæterum non destituti Christi spiritu, dilectione Dei ardent. Neque enim à fide separamus dilectionem, ipso nos iterum Ioanē docente & dicente, Deus charitas est, & qui manet in charitate, in Deo ma- ^{1. ioan. 4.} net, & Deus in eo. Etenim in euangelio dixit dominus, Si quis diligit me, sermo- nem meum seruabit, & pater meus diliget eum, & ad eum ueniemus, & mansio- nem apud eum faciemus.

Tametsi uerò fides propriè Christo capiti nos coniungat, eadem tamen con- nectit nos omnibus etiam membris Christi in terris. Cum enim omnium eadem sit fides, & idcirco spiritus idem, non potest non idem os, eadem mens atq; sen- tentia esse omnibus: quamuis fides nunc non usurpetur pro fiducia tantum in misericordiam Dei per Iesum Christum, sed & pro confessione fidei externa. Ean- dem enim fidem, & unum atque idem caput, uno spiritu & ore confluentes uni- uersi, simul etiam profiteamur nos omnes unius atq; eiusdem corporis esse mem- bra. Nec est in mundo ulla res alia, quæ animos hominum dissociet implacabi- lius, quàm fidei uel religionis diuersitas: idcirco nihil est quod nos compingat arctius, quàm fidei unitas. Descendimus modò ad charitatem, quam dixi mem- bra corporis ecclesiastici mutuò inter se connectere. Dicit in euangelio domi- nus, Præceptum nouum do uobis, ut diligatis inuicem, sicut dilexi uos, ut & ^{ioan. 17.} uos diligatis inuicem. In hoc cognoscent omnes, quòd discipuli mei sitis, si cha- ritatem habueritis inter uos mutuam. Indubitatum ergo est, unicam post fidem Ecclesiæ tesseram esse charitatem, uinculum omnia membra quam arctissime connectens. Nascitur ipsa ex communione Christi unitateq; spiritus. Quia enim Christus rex caput & pontifex Ecclesiæ catholicæ, omnes nos uno & eodem spi- ritu donans, omnes sibi adaptauit in membra, filios Dei, fratres & cohæredes, quos haud dubiè diligit impensissimè, non potest non fidelis quilibet summo amore complecti regis, capitis & pontificis summi membra & cohæredes. Ioan- nes enim Apostolus, Omnis, inquit, qui diligit eum qui genuit, diligit & eum ^{1. ioan. 4.} qui natus est ex eo. Si quis dixerit, diligo eum, & fratrem suum oderit, men- dax est. Qui enim non diligit fratrem suum quem uidet, Deum quem non ui- det quomodo potest diligere? Paulus ut hanc unitatem & consensionem mem- brorum quàm propriissimè exprimeret & oculis nostris ceu contemplandam proponeret, parabola utitur, sumpta à membris humani corporis, & dicit, Quem- ^{Rom. 12.} admodum in uno corpore membra multa habemus, membra uerò omnia non eundem actum habent: sic multi unum corpus in Christo sumus, sigillatim au- tem alij aliorum membra. Idem in 12. prioris ad Corinthios capite, copiosius si- gnificantiusq; eandem capitis ac membrorum & horum præcipuè parabolam exponens elegantissimeq; expoliens, testificatur inter ima & summa Ecclesiæ membra summum & congruentissimum esse consensum, præterea sedulam soli- citudinem & auxilium tum perpetuum tum fidelissimum. Ex quibus quidem omnibus confit, notas ueræ & uiuæ Christi ecclesiæ esse communionem spiri- tus Christi, synceram fidem & charitatem Christianam: sine quibus nemo com- municat hoc spiritali corpore. Ex his quoq; facillimum erit iudicare, sis ne in consortio Ecclesiæ an non sis.

Præterea colligimus ex illis quæ differuimus hucusq; de signis ecclesiæ Chri- ^{De origine} sti, unde sit origo eius, quomodo item plantetur, propageretur & conseruetur ^{Ecclesiæ.}

- Galat. 4.* Ecclesia. Origo eius cœlestis est. Paulus enim, Quæ sursum est Hierusalem (inquit loquens de Ecclesia) libera est, quæ est mater omnium nostrum. Ergo cœlestem uocat ecclesiam, non quòd uniuersa habitet in cœlis, sed quòd agens adhuc in terris originem habeat cœlestem. Etenim filij Dei non nascuntur ex carne & sanguine, sed ex cœlo, per renouationem sancti spiritus, qui per prædicationem uerbi diuini plantat fidem in cordibus nostris, per quam fidem efficiamur uera Christi & ecclesiæ membra. Petrus enim dicit, Renati estis non ex semine mortali, sed immortalì, per sermonem uiuentis Dei & manentis in æternum. Et Paulus, In Christo Iesu per euangelium, inquit, ego uos genui. Idem enim Apostolus alibi dicit, Fides ex auditu est, auditus autem per uerbum Dei.
- 1. Pet. 1.* Cum autem fides ex auditu sit, auditus autem per uerbum Dei, & significanter quidem per uerbum Dei, nequit profectò ecclesia oriri aut ædificari decretis & doctrinis hominum. Ergo solum Dei uerbum ad ædificationem ecclesiæ congruere asseueramus. Doctrinæ humanæ humanam excitant ecclesiam; uerbum Christi Christianam extruit. Nam ex carne & sanguine sunt doctrinæ humanæ. Petrus autem uera fide Christum confitens, ideoq; impositus fundamento Ecclesiæ Christo, ab ipso audit Christo, Caro & sanguis non reuelauit tibi, sed pater meus qui in cœlis est. Ergo & Paulus, Vbi Deo uisum est, inquit, ut prædicarem filium eius inter gentes, non contuli cum carne & sanguine. Et reliqua. Idem ab ædificatione fidei ac Ecclesiæ quàm manifestissimè remouens humanas doctrinas, & solum Dei uerbum commendans, dicit ad Corinthios, Prædicatio mea non erat in persuasorijs humanæ sapientiæ uerbis, ut fides uestra non sit in sapientiâ hominum, sed in potentia Dei. Huc iam pertinent hæc Christi testimonia, Qui ex Deo est, uerbum Dei audit. Item, Omnis qui ex ueritate est, audit uocem meam. Et adhuc clarius, Oues pastorem sequuntur, quia nouerunt uocem eius. Alienum autem non sequuntur, sed effugient ab eo: quia non nouerunt uocem alienorum. Atqui sub uocem alienorum referimus omnia decreta hominum aliena à doctrina Christi: quibus Apostolus Paulus tribuit quidam sapientiæ speciem, sed adimit ueritatem, superstitiosaq; appellat. Nam ipse dominus noster in euangelio ex propheta Isaia irrefragabile illud profert in medium, Frustra me colunt, docentes doctrinas, præcepta hominum. Teneamus ergo ueram Dei ecclesiam non extrui humanis decretis, sed eam solo Christi uerbo fundari, plantari, colligi & extrui.
- Matth. 16.*
Galat. 1.
- 1. Cor. 2.*
- Ioan. 8.*
Ioan. 18.
Ioan. 10.
- Coloss. 2.*
Titum. 1.
Matth. 15.
- Verbo dei conseruari ecclesiam.*
Ephes. 4.
- Addimus indubitatum esse, eodem Dei uerbo ecclesiam Dei, ne uel seducatur uel dilabatur & pereat, conseruari, nec aliter unquam ullo pacto conseruari posse, Paulo iterum testante, & dicente, Christus dedit alios quidem Apostolos alios uerò prophetas, alios autem euangelistas, alios autem pastores & doctores, ad administrationem sanctorum in opus dispensationis (id est ad docendum & dispensandum uerbum) in ædificationem corporis Christi, donec perueniamus omnes in unitatem fidei & agnitionis filij Dei, in uirum perfectum, in mensuram ætatis plenè adultæ Christi, ut non amplius simus pueri, qui fluctuamus & circunferamur quouis uento doctrinæ, per uersutiam hominum (en damnantur iterum graui & irrefragabili autoritate hominum doctrinæ) per astutiam qua adoriuntur nos ut seducant nos: sed ueritatem sectantes in charitate, adulescamus in illum per omnia, qui est caput, nempe Christus: ex quo totum corpus si coagmentetur & compingatur per omnem commissuram administrationis, iuxta actum in mensura uniuscuiusque partis, incrementum corporis facit, in ædificationem suipsius per charitatem. Hæc Apostoli uerba clariora sunt quàm

quàm ulla indigeant interpretatione copiosiore. Locum autem hic haberet Ordo gubernandi Ecclesiam per prædicationem uerbi Dei, quam plerique appellant ministerium uerbi uel Ecclesiæ. De quo dicemus, Deo uolente, Sermonem III. Satis fuerit hic tenere, Dominum Deum nostrum, datis ecclesiæ doctoribus, ecclesiam suam per Verbum, & quidem per solum uerbum suum, fundare, extruere & conseruare propagareque.

Veniunt autem in præsentem consideranda duo. Prius, Ecclesiam Dei propter perpetuum ac constans uerbi Dei studium appellari Propheticam & Apostolicam, denique & orthodoxam. Prophetica enim & Apostolica dicitur, quod opera prophetarum & Apostolorum primum sit extructa, ac per eorundem doctrinam conseruetur uel hodie, propageturque in finem usque seculi. Orthodoxa dicitur, quod rectæ sententiæ opinionis ac fidei sit. Extra Ecclesiam enim non est uera fides, neque ulla de uera uirtute & felicitate doctrina absoluta. Ecclesiæ fides & doctrina cœlitus ab ipso Deo reuelata est per Adamum & patriarchas, per Moysen & prophetas, per Christum & Apostolos. Vnde & mater alibi dicitur. De quo dicemus Sermonem proximo.

Ecclesia prophetica & apostolica.
Orthodoxa.

Posteriorius, successionem doctorum uel pastorum Ecclesiæ sine uerbo Dei per se nihil probare. Iactant Papisticæ Ecclesiæ propugnatores, se certissimum habere signum Apostolicæ Ecclesiæ, nimirum in perpetua illa Episcoporum successionem, à sancto Petro per Clementem primum ad Clementem usque VII. ad Paulum item III. nuper mortuum, & ad Iulium usque III. non ita pridem creatum, decurrente. Adijciunt resecta esse membra quotquot ab illa se separent Ecclesia, in qua sola reperiatur successio illa apostolica. Nos uero non negamus successionem pastorum certam in primitiua Ecclesia magni fuisse momenti. Qui enim tunc appellabantur, erant pastores, & munia pastorum obibant. Quales autem fuerint pastores à seculis multis, quos Romanæ ecclesiæ pastores appellauit Cardinalium, episcoporum mitratorum & sophistarum uulgus, nemo nescit nisi sensu communi carens. Audit Zacharias propheta sibi suggeri à domino, Adhuc sume tibi uasa pastoris stulti. Quia ecce ego suscitabo pastorem in terra, qui derelicta non uisitat, dispersum non quaeret, & contritum non sanabit, & id quod stat non enutriet, & carnes pinguium comedet, & ungulas eorum dissoluet. Væ pastori idolo, qui deserit gregem. Et cætera. Proinde nihil plus probant isti continua serie episcoporum, uerbum Dei non docentium syncerè, neque fungentium pastorum munere, quàm si mundo ab oculis statuatur magnam idolorum copiam. Quis enim negare audeat bonam, imò maximam partem Romanorum pontificum, post Gregorium magnum, huiusmodi fuisse idola, huiusmodi lupos & depastores, quales descripsit propheta Zacharias? Quid ergo talium pseudopastorum probaret continua successio? Quid quod postremi uniuersam propè ecclesiam traditionibus hominum oppleuerunt, & uerbum Dei partim oppresserunt, partim persecuti sunt? In ueteri Israelis ecclesia erat continuus ordo pontificum, non interrupta serie, ab ipso Aarone ad Uriam usque sub Achaz uiuentem, & ad alios usque impios pontifices, à uerbo Dei ad traditiones hominum, imò & ad idololatriam deficientes. At successio illa non probabat idololatrias pontifices, cum ecclesia ipsis adhærente, ueros dei pontifices, ueramque dei esse ecclesiam. Certè prophetae dei ueri, orthodoxi & catholici uiri, solumque dei uerbum sine traditionibus, imò contra traditiones prædicantes, non potuerunt ullam recensere antecessorum sacerdotum non interruptam seriem, in qua succederent ipsi, & tamen erant illustrissima ecclesiæ

De successione episcoporum continua.

Zach. II.

luminaria, & præclarissima Ecclesiæ Dei membra, credentesq; prædicationi ipsorum, nec schismatici, nec hæretici, sed uera Christi ecclesia uel hodie agnoscitur. Cum Christus dominus noster, benedictus Dei filius, doceret in terris, colligeretq; Ecclesiam, successio pontificum erat apud aduersarios. At illi ea de causa non præsidebant ueræ Dei Ecclesiæ, Christus hæreticæ. Sed & Apostoli Domini nostri non potuerunt pro se & sua doctrina pontificum non interruptam seriem proferre. Nam ordinati erant à Domino, qui & ipse extra successionem ordinis Leuitici, iuxta nouum ordinem Melchizedechicum, à Deo creatus erat pontifex in æternum, & tamen Ecclesia ab ipsis collecta, agnoscitur ab omnibus uera & sancta esse Ecclesia. Illi ipsi Apostoli pro ueris suis imitatoribus & successoribus non alios, quàm rectà ambulantes in doctrina ac uia Christi, agnosci uoluerunt. Notissima est enim illa uulgaris Paulina sententia, Imitatores mei esto-
 1. Cor. 11. te, sicut & ego Christi. Et quamuis hæc ad omnes fideles dicat, non ad ministros uerbi Dei duntaxat, hos tamen in primis tales uult esse imitatores suos, quales
 Act. 20. reliquum Christianorum uulgus, quemlibet utiq; in sua uocatione. Idem Apostolus loquens Mileti cum episcopis Asianis, inter alia, Ego noui hoc, inquit, quòd ingressuri sint post discessum meum lupi graues in uos, non parcentes gregi. Et ex uobis ipsis exorientur uiri, loquentes peruersa, ut abducant discipulos post se. Paulus Apostolus non aliunde quàm ex ipsa Apostolica Ecclesia, imò ex cœtu uel choro episcoporum & pastorum Apostolicorum, deriuat lupos & depastores Ecclesiæ. An uerò hi non potuissent pro se & pro causa sua corruptissima adducere seriem Apostolicam, se uidelicet ex Apostolis descendere pastoribus? Caterum quoniam perfidi defecerunt à fide & à doctrina Apostolica, nihil pro ipsis faciebat origo & successio apostolica. Concludimus ergo, successionem continuam episcoporum per se nihil probare, imò non esse successionem iustam, puritate doctrinæ euangelicæ & apostolicæ carentem.

Tertull. de suc-
 cessione pasto-
 rum continua.

Ideoq; Tertullianus magni faciens, & meritò quidem, successionem pastorum in Ecclesia continuam, flagitat tamen ipsam doctrinæ Apostolicæ sinceritate approbari: imò Ecclesias doctrina pura instructas, nec interim episcoporum successionem recensere ualentes, pro apostolicis agnoscit. Verba auctoris si quis requirat, hæc sunt. Caterum si quæ audent interfere se auctori Apostolicæ, ut ideo uideantur ab Apostolis traditæ, quia sub Apostolis fuerunt, possumus dicere, Edant igitur origines Ecclesiarum suarum, euoluant ordinem episcoporum suorum, ita per successiones ab initio decurrentem, ut primus ille episcopus aliquem ex Apostolis uel Apostolicis uiris, qui tamen cum Apostolis perseverarit, habuerit authorem & antecessorem. Hoc enim modo Apostolicæ Ecclesiæ census suos deferunt. Sicut Smyrneorum Ecclesia habens Polycarpum, ab Ioanne collocatum refert. Sicut Romanorū Clementem à Petro ordinatum edit: proinde utique & cæteræ exhibent, quos ab Apostolis in episcopatum constitutos Apostolici seminis traduces habeant. Constringant tale aliquid hæretici (quid enim illis post blasphemiam illicitum est?) sed etsi confinxerint, nihil promouebunt. Ipsa enim doctrina eorum cum Apostolica comparata, ex diuersitate & contrarietate sua pronuntiabit, neque Apostoli alicuius auctoris esse, neque apostolici. Quia sicut Apostoli non diuersa inter se docuissent: ita & Apostolici non contraria Apostolis edidissent: nisi illi qui ab Apostolis descenderunt, & aliter prædicauerunt. Ad hanc itaque formam prouocabitur ab illis Ecclesijs, quæ licet nullum ex Apostolis aut apostolicis authorem suum proferant, ut multò posteriores, quæ denique quotidie instituuntur, tamen in eadem fide

fide conspirantes, non minus apostolicæ deputantur pro consanguinitate doctrinæ.

Idem author loquens de antiqua Romana Ecclesia, summamq; contexens quid docuerit aut didicerit, dicit, Felix ecclesia, cui totam doctrinam apostoli cum sanguine suo profuderunt: ubi Petrus passioni dominicæ adæquatur: ubi Paulus Ioannis exitu coronatur: ubi Apostolus Ioannes, posteaquam in oleum igneum demersus, nihil passus est, in insulam relegatur. Videamus quid didicerit, quid docuerit, cum Africanis quoq; ecclesijs contesserarit, Vnum deum nouit creatorem uniuersitatis: & Christum Iesum ex uirgine Maria filium Dei creatoris: & carnis resurrectionem: legem & prophetas cum euangelicis & apostolicis literis miscet: & inde potat fidem eam: aqua signat: sancto spiritu uestit: eucharistia pascit: martyrio exhortatur: & ita aduersus hanc institutionem neminem recipit. Hæc est institutio. Tantum Tertull. in libro quem inscripsit De præscriptionibus hæreticorum.

*Veteris Rom.
ecclesiæ doctri-
na.*

Postremum quod obseruemus illud est, Dominum non tantum olim & usque huc dedisse, sed hodie quoque dare doctores & pastores Ecclesiæ: & doctores quidem non ductores uel imperatores exercituum, non principes, non milites, non homines uafros, dolosis utentes artibus, quas hodie dicunt practicas. Nulla enim ratione alia, nullo modo, nulloue instrumento alio, quam doctrina ueritatis & pietatis syncera & simplici extruitur, munitur, & conseruatur catholica & sancta Dei ecclesia, quam ab initio homines simplices & Apostoli Christi prædicatione euangelij fundauerunt. Remouet ergo omnem secularem sapientiam Paulus, & ait, Ego per infirmitatem & cum timore ac in tremore multo apud uos (Corinthi) uersatus sum, & sermo meus & prædicationis mea non erat in persasorij humanæ sapientiæ uerbis, sed in ostentatione spiritus & potentia, ut fides uestra non sit in sapientia hominum, sed in potentia Dei. Remouet idem Apostolus omnia consilia dolosa cum omnis generis imposturis, cum ad Thessalonicen. scribens dicit, Exhortatio nostra non fuit ex impostura, neque ex imunditia, neque cum dolo: sed quemadmodum probati fuimus à Deo, ut nobis committeretur euangelium, ita loquimur: non hominibus placentes, sed Deo, qui probat corda nostra. Neque enim unquam per sermonem adulationis uersati sumus: quemadmodum noster: nec per occasionem auaritiæ: Deus est testis: neque quærentes ex hominibus gloriam. Et reliqua. Quapropter desipit insanitq; existimans practicis, id est, uafrijs hominum consilijs insidijsq;, uel colligi uel collectam conseruari posse Ecclesiam. Verè dicitur à uulgo, humana prudentia subuertere iterum, quod extructum sit humana prudentia. Præterea remouet uim & arma ab ædificatione ecclesiæ ipse dominus, cum usum gladij discipulis suis prohibet, ac Petro pugnantiam, dicit, Conuerte gladium in locum suum. Neque uerò ullos unquam missos legimus milites à domino, qui armata ui mundum subigant. Quinimò scriptura testatur ipsum hostem Dei magnum, antichristum, spiritu oris dominici conficiendum. Vnde dubium non est, figuratè exponi oportere omnia ea quæ passim in prophetis & apud Zachariam potissimum 12. capite leguntur de bello omnibus gentibus ab Apostolis apostolicisq; uiris inferendo. Etenim Apostoli suo more pugnant ut Apostoli, non hasta, gladio & arcu militiæ carnalis, sed spiritualis. Gladius Apostolicus est uerbum Dei. Interim uerò nemo negat, profuisse aliquando arma corporalis militiæ Apostolicis uiris & Ecclesiæ, & prodesse uel hodie: nemo negat Deum usurpare opera militum & magistratus frequentissimè ad defendendam Ecclesiam

*Ecclesia bellis
& malis artibus
non ædificatur.*

1. Thess. 2.

Matth. 26.

Luce 22.

2. Thess. 2.

Isaie 49.
Act. 21.

Act. 23.

contra impios & tyrannos. Imò fatentur omnes, bonū & pium magistratum operam suam debere Dei Ecclesiæ. Neque enim sine causa clarissimus Dei propheta Isaías, reges appellat Ecclesiæ nutritios & reginas nutrices. Paulus certè oppressus à Iudæis in templo Hierosolymitano, propter prædicationē euangelij in gentes, armata Cl. Lysia tribuni Rom. manu eripitur & asseritur: mox additis eidem Apostolo per eundem tribunum militibus non paucis, nempe equitum turma & cohortibus aliquot peditum, incolumis Antipatrida & Cæsaream usq; ad Iudææ Procos. Felicem deducitur. Id quod nō temere tanta diligentia & copia in Actis Apostolorum à Luca commemoratur. Ecclesiastica historia nō pauca nobis exempla sanctissimorum principum asserentium & iuuantium Ecclesiam Dei recitat. Sed hæc alibi à nobis utcunq; sunt tractata, Decadis, ni fallor, secundæ, Serm. 7. & 8. Hæc autem hæcenus de Origine Ecclesiæ Dei, deq; propagatione & conseruatione eiusdem diximus.

An ecclesia dei
errare possit.

Hoc loco uideor mihi non admodum incommodè quæstionem illam celebrem tractare uel paucis explicare posse, Num ecclesia Dei errare possit? Quod ut intelligatur perspicacius, excutiam breuibus ipsius quæstionis terminos. Ecclesiam Dei Catholicam docui comprehendere primū quidem beatos in cœlo spiritus, deinde in terris omnes fideles Christi, quibus adhærere dixi malos uel hypocritas ad tempus fidem simulantes. Iam ergo si intelligamus Ecclesiam beatorum spirituum, non errat ea unquam. Si uerò intelligamus admixtos bonis malos uel hypocritas, & hos quidem solos, per se quidem nihil aliud quàm errant: quatenus uerò bonis aut fidelibus coniuncti sunt ac eos sequuntur, uel errant uel non errant. Bonorum enim fidelium Ecclesia in terris errat & non errat. Id quod errorum diuersitate expensa, integroq; in censum numero collecto explicabimus. Errorum alij sunt doctrinæ & fidei: alij uerò uitæ & morum. Quales utrique sint, nemo ignorat opinor. Videamus ergo, erretne fidelis Ecclesia in terris, & si errat qua in re uel quatenus erret. Quod ad mores & uitam Ecclesiæ attinet, non potest se in uniuersum liberare ab erroribus, id est à peccatis. Semper enim dum in terris uiuit seriò orat, Et remitte nobis debita nostra, sicut & nos remittimus debitoribus nostris. Et deus pro sua misericordia semper expurgat in sanctis reliquias & infirmitates, quandiu in hoc seculo uiuunt, subinde recurrentes & polluentes electos. Non ignoro quid te hic impediatur auditor fidelis. Si non est sancta & pura Ecclesia, ais, quomodo appellatur ab Apostolo sancta sine macula & ruga? Respondeo, si nolis in terris agnoscere Ecclesiam, nisi quæ in uniuersum omni nœuo careat, nullam omnino cogaris agnoscere. Nulla enim talis superstes erit in terris ecclesia, ubi iustissimus deus, scriptura testificante, omnia conclusit sub peccatum, ut omnium misereatur. Paulus ergo appellat ecclesiam puram, macula & ruga carentem, propter Christi beneficium & sanctificationem: non quòd per se, dum in carne agit, nullas habeat maculas, sed quòd illæ maculæ reuera alioqui adhærentes, propter Christi innocentiam, fide Christum amplexantibus, non imputentur: denique quòd illa eadem in futuro seculo nullas sit habitura maculas uel rugas. Nam exuta carne, omnibus abiectis miserijs, tandem perficietur, ut ei desit nihil. Præterea dicitur Ecclesiam esse sine macula, propter assiduum studium ecclesiæ, quo contendit & annititur modis omnibus, ut quantum possibile est, quàm minimum habeat macularum. Et ea quidem ratione, & maximè imputationis beneficio, non errat & uelut impeccabilis & purgatissima est ecclesia. Porro quod ad doctrinam & fidem attinet, non errat Ecclesia Christi. Nam solius pastoris uocem audit, alienorum autem

Ioan. 13, 15.
Rom. 7.

Quomodo ecclesia sancta
sine macula &
ruga.

autem non agnoscit: Christum enim unicum pastorem suum sequitur dicentem, Ego sum lux mundi: qui sequitur me, non ambulabit in tenebris, sed habebit lumen uitæ. Paulus quoque ad Timotheum, Hæc ad te hæcenus dedi, inquit, ut no-
 ris quomodo oporteat te in domo Dei uersari, quæ est Ecclesia Dei uiuentis, co-
 lumna & basis ueritatis. Est autem Ecclesia columna & basis ueritatis, quod im-
 posita fundamento prophetarum & Apostolorum, ipsi Christo, qui est æterna Dei
 ueritas & robur Ecclesiæ unicum, ab ipsius communione accipiat, ut & ipsa sit co-
 lumna & basis ueritatis. Est enim ueritas Dei in Ecclesia, eadẽque per mini-
 sterium Ecclesiæ propagatur, impetitaque ab hostibus & oppugnata, firma ma-
 nens, non expugnatur: quatenus scilicet cum Christo concorporata in commu-
 nione Christi perseuerat, sine quo nihil potest. Rursus autem errat eadem illa Ec-
 clesia in doctrina & fide, quoties uidelicet à Christo & à uerbo eius auersa, homi-
 nes carnisq; consilia & decreta seclatur. Illud enim deserit, quod obstitit hæcenus
 ne aberraret, uerbum Dei & Christum. Nemo negat, opinor, eximiam Dei fuisse
 Ecclesiam, cœtum illum magnum populi Israelitici in deserto, cum quo fœdus
 pepigerat sacramentisque & institutis ipsum sibi deuinxerat Dominus. At quàm
 turpiter illa errauerit, dum uerbo Dei præterito, nec constanter & seriò religio-
 nis antistite resistente Aarone, uitulum & fudit & diuinis prosequutus est hono-
 ribus, nemo ignorat. Vbi certè opportunum erit totum quoque Ecclesiæ nu-
 merum diligentius inspicere atque recensere. Pluribus enim in Ecclesia errantia-
 bus, non consequens est neminem ab errore excipi prorsus. Nam ut in Israelis Ec-
 clesia reliquias sibi reseruauit Dominus, ipsum inquã Mosen, Iosue, & haud dubiè
 nonnullos alios, & in hoc ipso cœtu, & extra hunc cœtum alicubi, uitulum
 non adorantes: ita dubium non est, errantibus pluribus in Ecclesia, Deum sibi
 misericordia sua certum præseruare numerum, qui & rectè sapiat, & quorum fide
 & diligentia errores destruantur, & errans Domini grex reducatur in ouile san-
 ctum. Errare ergo dicitur Ecclesia, quando pars eius, relicto uerbo Dei, errat: ea-
 dem non errat in uniuersum tota, quatenus gratia Dei reseruantur reliquiae, ex qui-
 bus ueritas refloreat & iterum quàm latissimè propagetur. S. Paulus appellauit
 Ecclesias Corinthiorum & Galatarum sanctas Dei Ecclesias. Cæterum aberrau-
 erunt hæc grauiter in doctrina, in fide, & in moribus. Quis autem dubitet pluri-
 mos in ijs fuisse syncerissimos puræ doctrinæ à Paulo traditæ cultores? Errauit er-
 go sancta illa Ecclesia, quatenus non perstitit in uera doctrina: non errauit, qua-
 tenus non recessit à ueritate per Apostolum tradita. Hinc toti mundo inclares-
 cit, uanissimos mendacissimosq; esse homines, laudantes nobis ecclesias non pro-
 phetarum & Apostolorum fundamento impositas, sed super hominum decreta
 collocatas, quas non uerentur commendare nobis pro uerissimis, quæ errare non
 possint. Clamat Dauid, Solus Deus uerax: omnis homo mendax. Clamat Ieremias,
 Verbum Domini reprobarunt, quæ ergo sapientia illis reliqua esse poterit? Pro-
 inde errant illæ Ecclesiæ, nec sunt ueræ Dei ecclesiæ. Vera ecclesia innititur Chri-
 sto Iesu, & huius solius uerbo regitur.

Ioan. 8.

1. Tim. 2.

Ecclesia colum-
na & basis ue-
ritatis.

Exod. 32.

De potestate
ecclesiæ.

Huic tractationi de uerbo Dei, unica omnium in ecclesia gerendarum rerum
 regula, affinis est disputatio de potestate Ecclesiæ Dei in terris, & de studiis eius
 quæ & ipsa diriguntur ad præscriptum uerbi Dei. Priusquam tamen nostram,
 id est, scripturis traditam sententiam proferam, recitabo paucis summam eorum
 quæ pontificij de hac ipsa re scripta reliquerunt, ac tuentur haud dubiè pro or-
 thodoxa doctrina. Ioan. Gerson (non admodum ineptè, nisi accedat malignus
 interpres) finiuit potestatem ecclesiasticam, facultatem esse supernaturaliter &

spiritualiter collatam à Domino discipulis, eorumque successoribus legitimis, usque in finem seculi, ad ædificationem ecclesiæ militantis, secundum leges Evangelicas, pro consecutione felicitatis æternæ. Petrus autem De Aliaco Card. hanc potestatem dixit esse sextuplicem, nempe potestatem consecrationis: sacramentorum administrationis: dispositionis ministrorum ecclesiæ: prædicationis: iudiciariæ correctionis, accipiendi que uitæ necessaria.

Potestas consecrationis.

Potestas clauium.

Potestas iurisdictionis.

Potestas prædicationis.

Potestas iudiciaria.

Potestas accipiendi.

Potestatem consecrationis illam dicunt, qua sacerdos ritè ordinatus conficere potest corpus & sanguinem Christi in ara. Eam collatam aiunt discipulis à Domino hisce uerbis, Hoc facite in mei memoriam. Cæterum sacerdotibus hodie conferri arbitrantur ab Episcopo offerente cum pane calicem, & dicente, Accipite potestatem offerendi & conficiendi corpus Christi pro uiuis & mortuis. Hanc præterea appellant potestatem ordinis & characterem indelebilem. Potestatem administrationis sacramentorum, & maximè sacramentū poenitentiae, nuncupant Potestatem clauium. Clauēs faciunt duplices, clauēs scientiæ, auctoritatem scilicet cognoscendi, in causa peccatoris confitentis, & clauēs sententiandi, siue aperiri & claudendi cælum, remittendi uel retinendi peccata. Hanc promissam dicunt Petro potestatem, in Matthæo, dicente Domino, Tibi dabo clauēs regni cælorum: collatam autem discipulis omnibus, apud Ioannem Christo dicente: Quorumcunque remiseritis peccata, remittuntur eis. Sacerdotibus porro hodie conferri ab Episcopo in consecratione impositis manibus in sacerdotum ordinandorum capita, dicente, Accipite spiritum sanctum; quorumcunque remiseritis peccata, remittuntur eis. Potestatem dispositionis ministrorum ecclesiæ uocant Iurisdictionem Ecclesiasticam, & consistere in quadam prælatione, adeoque in sua plenitudine residere in summo pontifice, quo ad totam ecclesiam uniuersalem. Solius enim pontificis esse instituere rectores & prælatos in Ecclesiastica hierarchia: eò quod ipsi dictum sit, Pasce oues meas. Addunt à pontifice omnem iurisdictionem Ecclesiasticam descendere, uel mediatè uel immediatè, in inferiores prædicates: in quibus limitata sit potestas, pro arbitrio eius qui plenitudinem habeat potestatis. Nam Episcopum duntaxat potestatem habere in sua diocesi, curatum autem in sua parochia, &c. Potestatem apostolatus uel prædicationis uerbi Dei dicunt esse auctoritatem prædicandi, quam tradiderit Dominus discipulis suis, dicendo, Exeuntes in orbem uniuersum, prædicate Euangelium omni creaturæ. Asseuerant autem doctores hodie mitti oportere ad prædicandum, non aliunde quàm ab ipso Petro, id est, eius successore, uel mediatè uel immediatè, &c. Potestatem iudiciariæ correctionis collatam aiunt à Domino ipsi Petro, cui ille dixerit, Si peccarit inter frater tuus. Et cætera. Nam notissima sunt uerba Domini apud Matth. in cap. 18. Aiunt ergo Dominum sacerdotibus contulisse potestatem, non tantum excommunicandi, sed etiam definiendi, discernendi, & statuendi præcepta, leges & canones: eò quod ibidem dictum sit. Quaecunque ligaueritis super terram, ligata erunt & in cælo. Porro potestatem accipiendi uitæ necessaria pro laboribus spiritualibus, exhibita aiunt hisce Domini uerbis, Edentes & bibentes quæ apud illos sunt.

Hæc isti docent de potestate Ecclesiastica, non modò ineptè, sed & falsè. De potestate consecrationis & sacrificandi quàm uana & inanis sit, diximus alias sæpe, & dicemus fortè amplius, si uitam prorogarit Dominus, suo loco & tempore. De potestate clauium disputabimus, Deo uolente, sub finem consequentis sermonis. Attulimus quædam denique cum differeremus de Poenitentia & Confessione auriculari. Nugæ autem sunt putidæ & impudentes, quæ garriunt de Iurisdictione Ecclesiastica, de plenitudine potestatis summi, id est, Romani pontificis.

Id quod

Id quod dudum toti mūdo innotuisse arbitror: ac sequentur nonnulla in hisce nostris Sermonibus confutationis argumenta. Quod sibi usurpant docendi munus, nec ullos legitimè prædicare posse, nisi ab ipsis ordinatos clamitant, oppressionem uerbi Dei suorumque errorum patrocinium & assertionem quærunt. Id quod etiam suo loco tractabitur. Potestate excommunicandi tam fœdè & impudenter abusi sunt, ut non modò ueram disciplinam per eorum negligentiam & impiam audaciam amiserit ecclesia uerum etiam ipsa excōmunicatio seculis aliquot nihil aliud fuerit in manibus pontificum, quàm ignis & gladius, quibus contra ueros Christi confessores ferè sæuierunt, ac innoxios Christi cultores persecuti sunt. Porro nullam potestatem ministris ecclesiæ datam esse à Domino nouas condendi leges, demonstrabimus suo loco. Potestatem accipiendi necessaria uitæ exercuerunt quidam strenuè, sed spiritualia interim (in recompensationem temporalis messis) non seminarunt, imò dormitantes permiserunt inimico homini zizania serere in agrum dominicum, idque non aliena, sed sua ipsorum opera. Quid quod uitæ necessarijs non contenti, regna quoque sobdolè inuaserunt, & impudenter ac truculenter obtinuerunt? Qui ergo non uidet ecclesiasticam potestatem, ita ut apud istos homines de ea differitur, & ab ipsis usurpatur, meram esse in miseras animas tyrannidem, nihil planè uidet.

Subiungemus iam ueram, puram, simplicem & perspicuam de Potestate ecclesiastica doctrinam. Potestas definitur esse ius aliquid faciendi. Gracè appellatur & ἐξουσία, & δυνάμις, quorum prius ius & potestatem, posterius iuris uel potestatis exequendi facultatem significat. Sæpe enim fit, ut aliquis habeat potestatem faciendi rem aliquam, destituatur autem perficiendi facultate. Deus utrunque potest, & utrunque concessit Apostolis contra demonia, Luca testante & dicente, *ἔδωκεν αὐτοῖς δυνάμει καὶ ἐξουσίαν*, dedit eis facultatem & potestatem super omnia demonia, &c. Est autem potestas alia quidem libera & absoluta, alia uerò limitata, quam & ministerialem uocant. Absoluta est, quæ libera prorsus nullius alterius arbitrio uel lege regitur aut constringitur. Qualis est potestas Christi dicentis in Euangelio, Data est mihi omnis potestas in cœlo & in terra. Euntes ergo docete omnes gentes, baptizantes eos, &c. De hac potestate loquens iterum in Reuelatione sua beato Ioanni Apostolo facta, Noli timere, inquit, ego sum primus & nouissimus, ego uiuus, & fui mortuus, & ecce sum uiuens in secula seculorum: & habeo clauēs inferorū & mortis. Et iterum, Hæc dicit sanctus & uerax, qui habet clauem David, qui aperit, & nemo claudit, claudit & nemo aperit. Limitata potestas non est libera, sed absolutæ uel alterius maiori potestati subiecta, quæ non quiduis, sed illud dūtaxat potest, quod potestas absoluta uel maiore præditus potestate permittit, & certa quidem cum conditione permittit. Qualis certè est ecclesiastica potestas, rectè appellata ministerialis. Exercet enim ecclesia Dei potestatem suam sibi ab hoc traditam, per ministros suos. Augustinus distinctionem hanc agnoscens, & de baptismo loquens, Tractatu in Ioan. 5. Baptizauit Paulus, tanquam minister, inquit, non tanquam ipsa potestas: baptizauit autem dominus tanquam potestas. Intendite, potuisset hanc potestatem seruis dare, sed noluit. Si enim daret hanc potestatem seruis, id est, ut & ipsorum esset quod Domini erat, tot essent baptismata quot serui, &c. In ecclesia absolutam potestatem ipse sibi Christus retinet. Nam manet caput, rex & pontifex ecclesiæ in æternum, nec separatur à corpore suo unquā caput illud uiuificum. Potestatem autem limitatam ecclesiæ dedit. Id quod agnoscere oportet: potestatem, inquam, ecclesiasticā certis legibus circūscriptam proficisci à Deo, ac ea de causa efficacē esse, ideoque Deū in omnibus in primis respici

Potestas quidē

Lucæ 9.

Duplex potestas.

Apocal. 1.

Apocal. 3.

oportet: item in hoc esse datam ecclesiæ potestatem, ut exerceatur in ecclesiæ salutem. Etenim S. Paulus, Dedit nobis Dominus potestatem, inquit, in ædificationem, & non in destructionem ecclesiæ. Ergo quæ in detrimentum & perditionem uergit, tyrannis est satanica, non potestas à Deo proficiscens ecclesiastica, Ac præstat hunc finem potestatis ecclesiasticæ diligenter tenere.

In quibus constat potestas ecclesiastica.

Ordinare ministros ecclesiæ. Act. 1.

Act. 6.

Act. 13.

1. Tim. 3.

Docere.

Matth. 28.

Marci 16.

Rom. 1.

Potestas

clauium,

Math. 10.

Luce 9.

2. Tim. 4.

Luce 9.

Cæterum potestas illa limitata ecclesiæ ferè in hisce uersatur capitibus, in ordinandis ecclesiarum ministris, in doctrina, & in diiudicatione doctrinarum, denique in dispositione rerum ecclesiasticarum. De singulis ordine pauca dicemus, explicantes qualis sit ecclesiæ potestas, & quomodo limitetur in singulis capitibus. Dominus ipse quidem primos ecclesiæ doctores Apostolos ordinauit, ut omnes homines intelligerent ministerium ecclesiasticum ipsius Dei diuinam esse institutionem, & non ab hominibus inuentam traditionem. Ergo postquam assumptus esset in cælos Dominus, S. Petrus conuocata ecclesia loquitur ex scripturis de alio surrogando Apostolo in locum proditoris Iudæ, eo ipso facto declarans ecclesiæ à Deo datam esse eligendi ministros uel doctores potestatem. Eadem ecclesia mox & diaconos septem, ita suadente Petro & Apostolis, nimirum spiritu sancto inspiratis, elegit. Antiochena ecclesia manifestè instructa à spiritu sancto, Paulum & Barnabam, licet iam olim ad ministerium designatos, ordinat & mittit. Leguntur præterea in Actis Apostolorum ecclesiæ, Apostolis ita iubentibus, doctores ad ministerium sacrum quoties res postulabat ordinasse. At non ordinabant interim quoslibet, sed idoneos, id est, tales, quales legibus expressis postea descripserunt. Si quis esset inculpabilis, unius uxoris maritus, uigilans, sobrius, &c. Notus est enim Canon apostolicus editus 1. Tim. 3. cap. Sed dicemus, Deo uolente, de Ordinatione ministrorum Sermonem huius Decad. 3. Si uerò accepit ecclesia potestatem ponendi ministros ecclesiarum idoneos, certè nemo negabit ecclesiam facultate destitutam esse deponendi indignos & impios seductores: corrigendi denique ea quæ huic uidentur deesse ordini necessaria.

Quoniam uerò ministri præcipuè ad docendum deliguntur, ecclesia potestatem habet docendi, adhortandi, consolandi, &c. per ministros suos legitimos: docendi autem non quidlibet, sed quod traditum accepit à Domino, per doctrinam prophetarum & Apostolorum. Docete eos, ait Dominus, quæ ego præcepi uobis. Ite, prædicare Euangelium omni creaturæ. Et Paulus, Segregatus sum ad prædicandum Euangelium, quod ante promisit per prophetas suos in scripturis sanctis. Est autem hoc docendi ministerium aliud nihil quam potestas clauium, quas accepit ecclesia: officium, inquam, ligandi & soluendi, aperiendi atque claudendi cælum. Acceperunt alibi quoque à Domino Apostoli potestatem super omnia: super omnia, inquam, non absolutè, sed super omnia dæmonia, & non super omnes angelos & homines: & quam in dæmones potestatem acceperunt, ne ipsam quidem absolutam acceperunt. Additur enim, Vt expellerent eos. Proinde non potuerunt pro suo arbitrio cum dæmonibus agere quod uoluerunt, sed quod & quantum ille uoluit cui absoluta est in dæmonas potestas. Et ut dæmonas expellere ex hominibus non immittere, etsi uoluissent maximè, potuerunt: ita de morbis non potuerunt agere quod uoluerunt. Alioqui enim non reliquisset S. Paulus Trophimum Mileti languentem, tantopere ipsi in ministerio sacro utilem. Euocassent, si quid uis potuissent, duo in Samaritania discipuli, ignem cælitus, atque ita supplicium sumpsisent de Samaritanis inhumanis & barbaris hominibus, Christo Domino negantibus hospitium. Pari modo illi ipsi Apostoli clauas, id est, potestatem acceperunt ligandi & soluendi, aperiendi & claudendi cælum, remittendi & retinendi peccata.

di peccata, sed limitatam planè. Non enim potuerunt soluere quæ erant ligata apud inferos, neque ligare eos qui uiuebant in cœlis. Neque enim dixit, Quæ ligaueritis in cœlo, sed quæcunque ligaueritis super terram. Nec dixit, Quæcunque solueritis in inferno, sed quæcunque solueritis super terram. Rursus super ipsam quoque terram non potuerunt quos ipsi uoluerunt uel ligare uel soluere. Nam si de destitutum hominem non potuerunt soluere, id est, à peccatis liberatum denunciare. Rursus illuminatum fide & seriò pœnitentem, nequaquam ligare, id est, damnationi adiudicare potuerunt. Decipiunt totum terræ orbem qui aliter docent homines de potestate clauium. Id quod copiosius suo loco tractabimus. Similiter accepit ecclesia à Christo potestatem administrandi sacramenta per ministros, sed non pro suo arbitrio, sed secundum uoluntatem Dei & ritum ac rationem ab ipso Domino traditam. Non potest ecclesia sacramenta instituire, neque immutare fines & usum sacramentorum.

Sacramenta ad ministrare.

Porrò ecclesiam dñjudicare posse doctrinas, uel ex una hac Pauli Apostoli sententia claret, Prophetæ duo aut tres loquantur in ecclesia, & cæteri dñjudicent. Alibi idem, Omnia probate, inquit, quod bonum est tenete. Nam & beatus Ioannes dixit, Charissimi, ne cuius spiritui credatis, sed probate spiritus an ex Deo sint. Cæterum est certa huius quoque dñjudicationis ratio. Non enim pro suo arbitrio iudicat ecclesia, sed ex spiritus sancti sententia ad normam regulamq; sacri canonis. Seruatur hic quoq; ordo, moderatio, & charitas. Ergo si quando ecclesia Dei pro potestate accepta à Domino Synodum conuocat, sicuti Apostolos Domini conuocasse legimus in Actis Apostolorum, grauissimam ob causam, non indulget hic rursus carnali ingenio, spiritui sese regendam exhibet, omniaq; sua ad regulam uerbi Dei & charitatis gemine probat. Ergo nouas leges non condit: sicuti & Hierosolymitana imò Apostolica ecclesia dicit, & spiritui sancto & ecclesiæ placere ne quid oneris imponatur Christi fidelibus, nisi paucula quædam eaq; necessaria, nec citra nec contra scripturas sanctas. Iam sunt res ecclesiasticæ multiplicæ, quas bene ordinandi disponendiq; pro hominum utilitate facultatem habet ecclesia: cuius generis ea sunt quæ uersantur circa externum cultum in loco & in tempore: qualis est prophetia uel linguarum interpretatio, & scholæ. Habet item ecclesia quod iudicet in causis matrimonij: in primis uerò censuram habet morum, admonitiones, supplicia, deniq; & excommunicationem uel excidium ex corpore ecclesiastico. Nam & hanc sibi datam, ait Apostolus, in extructionem tamen, non in destructionem. Omnia enim hæc quæ commemorauimus & similia, limitata sunt regula uerbi & charitatis, exemplis item sacris & rationibus deductis ex scriptura sacra. De quibus omnibus fortè dicam suo loco copiosius.

Dijudicare doctrinas.

1. Cor. 14.

1. Thess. 3.

1. Ioan. 4.

Synodum conuocare.

Act. 15.

Res ecclesiæ disponere.

2. Cor. 13.

Hæc dixi hætenus de Ecclesiastica potestate, de qua ostendi aduersarios contra hanc largo quidē ore prædicare, sed tam crassè proponere, ut uel pueris appareat quid quærant qui due tueantur, non ecclesiasticā potestatem, sed suam auaritiam, libidinem, & tyrannidē. Veritas canonica docet Christum in ecclesia absolutā uel plenariā obtinere & exercere potestatē, ministerialem dedisse ecclesiæ, quæ ipsam ferè per ministros exercet, & religiose quidem hanc ad normā uerbi Dei exercet.

His ad hunc modum expensis, minimè laboriosum erit studia sanctæ Dei ecclesiæ agnoscere. Exercet enim sicut iamiam cōmemorauī potestatē à Domino acceptam religiosissimè & fidelissimè, in hoc ut Deo seruiat, sancta sit, & ipsi placeat. Et ut per enumerationem saltem aliquid studiorum eius singulariter commemorem, Ante omnia Deum unum & trinum adorat, inuocat, amat & colit: inconsulto huius Dei uerbi uerbo nihil agit. Etenim ad normam uerbi Dei omnia sua com-

De studiis ecclesiæ.

ponit, ex uerbo Dei iudicat, eodem omnia sua ædificia extruit, extructa conseruat, collapsaque reparat siue restaurat. Cœtus & congregationes sanctorum interis ardentem prouehit & diligit. In his diligenter auscultat prædicationi uerbi Dei, sacramentis religiose & cum gaudio quidem magnoque rerum cœlestium desiderio participat. Orat Deum per intercessorem unicum Christum, firma cum fide, ardentem, assidue & intentissime. Laudat Dei bonitatem & maiestatem perpetuò, summoque cum iubilo diuinis beneficijs gratias agit. Instituta Christi omnia & singula plurimi facit, neque negligit ulla. Agnoscit autem in primis omnia uitæ, salutis, iustitiæ & felicitatis suæ ab unico se habere Dei filio, Domino nostro Iesu Christo; utpote qui unus ipsam elegerit, deinde per spiritum & sanguinem suum sanctificauerit, feceritque ecclesiam, id est populum dilectum, cuius ipse sit unicus rex, redemptor, pontifex & conseruator, extra quem nulla sit salus. Ergo in solo Deo per Dominum nostrum Iesum Christum tota acquiescit, hunc unice desiderat & diligit, propter hunc omnia huius mundi amittere adeoque & uitam cum sanguine profundere gaudet. Indiuulse ergo per fidem Christo inhæret, neque aliud odit acerbius, quam defectionem à Christo ac desperationem. Nam sine Christo nihil in uniuersa uita iucundum uidetur. Cum satana ueluti cum hoste capitali inimicitias exercet implacabiles. Hæresibus & erroribus constanter & prudenter repugnat. Simpliciter fidei Christianæ, & doctrinæ apostolicæ sinceritatem diligentissime custodit. Illibatam se, quantum fieri potest, à mundo & carne omniq; carnali & spiritali contagione seruat. Ergo cœtus illegitimos & prophana sacra cum nepharijs hominibus fugit & modis omnibus execratur, Christum sponte & discretè etiam in uitæ periculo dictis & factis confitetur. Afflictionibus quidem exercetur, sed non frangitur. Vnitatem & concordiam sedulo custodit. Omnia & singula corporis sui membra, charitate summa prosequitur. Benefacit omnibus, quantum permittunt uires & facultates. Nemini nocet. Condonat libenter. Tolerat infirmos fraternè, donec prouehantur ad perfectiora. Per superbiam non effertur, sed humilitate retinetur in obedientia, in moderatione & in omnibus officijs pietatis. Sed quis obsecro uel copiosissima alioqui ne dum breui hac enumeratione, omnia & singula sanctæ ecclesiæ studia recitet? Quis uerò non cupiat membrum esse congregationis tam diuinæ & planè cœlestis?

Subiungerè his protinus quæ residua sunt de Vnitate ecclesiæ catholicæ, de diuisione eiusdem, alijsq; ad hanc considerationem pertinentibus, nisi cernerem uos audiendo fessos, finem sermonis cupide expectare. Differemus ergo reliqua in crastinum. Iam uerò sublati in cœlum mentibus nostris, Domino Deo nostro gratias agamus, qui per dilectum filium suum purificauit & aggregauit nos in populum sibi selectissimum, & omnium cœlestium bonorum hæredem. Ipsi sit laus & gloria in secula seculorum, Amen.

Vnam esse ecclesiam catholicam. Extra ecclesiam non esse lucem vel salutem. Contra schismaticos. Quare discessum sit à nupera Romana ecclesia. Dei ecclesiam esse domum, vineam, & regnum Dei: item corpus, ouile, & sponsam Christi, matrem & virginem.

S E R M O I I.

Vna est sancta
Dei ecclesia.

Cant. 4.
Ephes. 4.

V I D E O adesse uos fratres animis intentis ad expositionem eorum quæ restant dicenda de Ecclesia Dei catholica, quam unam & indiuisam esse asserimus, iuxta sancta sanctæ scripturæ oracula. Solomon enim in Canticis suis dicit, Vna est columba mea & perfecta mea. Quò haud dubiè respexit doctor gentium, cum dixit, Vnum corpus & unus spiritus; quemadmodum & uocati

tati estis in una spe uocationis uestre. Vnus Dominus, una fides, unum baptisma, unus Deus & pater omnium: qui est super omnia, & per omnia, & in omnibus uobis. Diuinis testimonijs consentiunt humana. Cyprianus enim Episcopus & martyr de Simplicitate clericorum, Ecclesia una est, inquit, quæ in latitudinem latius incremento fecunditatis extenditur. Quomodo Solis multi radij, sed unum lumen: & rami arboris multi, sed robur unum tenaci radice fundatum: & cum de fonte uno riui plurimi defluunt, numerositas licet diffusa uideatur exundantis copiae largitate, unitas tamen seruat in origine. Auellere radium Solis à corpore, diuisionem lucis unitas non capit. Ab arbore frange ramum, fractus germinare non poterit. A fonte præscinde riuum, præscissus arefcet. Sic & Ecclesia Domini luce perfusa, per orbem totum radios suos porrigit, unum tamen lumen est, quod ubique diffunditur, nec unitas corporis separatur: ramos suos in uniuersam terram copia ubertatis extendit, profluentes largiter riuos latius expandit: unum tamen caput est & origo una, & una mater fecunditatis successibus copiosa. Et reliqua.

Proinde cum uaria Ecclesie nomina leguntur indita, minime imaginandum est plures in orbe esse Ecclesias, neque discerpendum corpus, quod non recipit aut patitur ullam diuisionem. Scriptores Ecclesiam Catholicam dicunt, uniuersalem haud dubie, quod una sit, nec plures esse possint. Tametsi enim hæc distinguatur in triumphantem & militantem, in ueterum patrum Ecclesiam, & noui populi cœtum, manent tamen perpetuo omnia hæc membra in uno corpore unita sub uno capite Christo. Et quemadmodum seruorum & liberorum discretæ conditiones, regnum uel rempublicam non dissecant in partes: ita neque sabatismus uel felicitas beatorum spirituum in cœlis triumphantium, & labores ac ærumnæ quibus militantes adhuc in hoc seculo sub signis Christi exercemur, duas efficiunt Ecclesias. Dicit beatus angelus ad sanctum Ioannem in Apoc. 22. calypsi, Conseruus tuus sum, & fratrum tuorum prophetarum. Agnoscit ergo & prophetas & Apostolos unius Dei filios & domesticos esse. Vnde legimus in Matth. 23. Euangelio unam tantum uineam, non duas aut diuersas collocari colonis, licet alijs atq; alijs. Sic enim una duntaxat est ecclesia ueterum Christi aduentum præcedentium, & nostra siue noui post Christi aduentum populi assumpti ex gentibus. Dictum est autem quid illi à nobis, uel nos ab illis discrepemus Decad. 3. Serm. 8. Rursus admixti sunt ecclesie sanctæ mali & hypocritæ, uerum non discinditur propter malos Ecclesia. Sicut enim proditores ciuibz permixti, necdum reuelati, non constituunt duas respub. ita tametsi bonis mali cohæreant, in una tamen Ecclesia aggregantur. Cumq; hypocritæ ab Ecclesie unitate deficiunt, non scinditur in partes Ecclesia, sed redditur purgatio. Eleganter enim dicit beatus Augustinus, malos uel hypocritas id esse in Ecclesia, quod sunt paleæ in tritico, zizania in segete, proditores in ciuitate, & profugi inter milites. Manifestum est autem frumentum reddi purius, segetem letiorem, ciues tutiores, fortioresq; milites cum ab eis recedunt profugi, proditores, zizania & paleæ. Imò nisi refecentur nonnunquam putrida Ecclesie membra à corpore Ecclesiastico, non potest incolumis esse Ecclesia. Porro particulares uel singulares Ecclesie sunt uelut oppida uel urbes in regno aliquo. Copia urbium non scindit regnum. Ex particularibus per totum orbem dispersis Ecclesijs, ceu ex pluribus membris corpus catholica uel uniuersalis colligitur ac compingitur ecclesia, quæ est omnium sanctorum communio. Proinde certissimum est, unam esse duntaxat Ecclesiam Dei, nō plures, cui unicus monarcha præsidet Iesus Christus. Cui gloria.

Extra ecclesiā
non est ulla lux
uel salus.

De simplicitate
prelatorum.

Instit. lib. 5.
cap. 30.

In schismaticos
quosdam.

Propter doctri-
nae diuersitatē
non faciendum
schisma.

Huius Ecclesiæ Dei unitas, unitaq; societas tanta est, ut extra eius consortium non inueniatur ullus Deo gratus populus, ulla uera salus & incolumitas, ulla lux & ueritas. Nam extra Ecclesiæ Dei septa, nulla inueniuntur salubria pascua, omnia ueneno sunt infecta. Nullus extra Dei ecclesiam cultus Deo placet. Si quis olim sacrificasset ipsi etiam Deo, extra tabernaculum uel templum, in excelsis, is omnino diabolis sacrificasse, & innoxium sanguinem effudisse uidebatur. Recte ergo scriptum reliquit beatus martyr & episcopus Carthaginensis Cyprianus, Quisquis ab ecclesia segregatus, iungitur adulteræ, à promissis ecclesiæ separatur: nec pertinet ad Christi præmia qui reliquerit ecclesiam Christi. Alienus est, prophanus est, hostis est. Habere iam non potest deum patrem, qui ecclesiam non habet matrem. Si potuit euadere qui extra arcam Noe fuit, & qui extra Ecclesiam foris fuerit, euadit. Sceleratissimus sit oportet, quisquis patriam suam optimorumq; uirorum consortium deserit, ac ad hostes deficit. Lactantius ergo uerissimè dixit, Sola catholica ecclesia est, quæ uerum cultum retinet. Hic est fons ueritatis: hoc domicilium fidei: hoc templum Dei: quo si quis non intrauerit, uel à quo si quis exiuerit, à spe uitæ ac salutis æternæ alienus est. Saluator enim noster prior dixit extra ouile non inueniri uitam.

Quo circa satis mirari non possum corruptos & schismaticos quorundam mores, separantiū se qualibet leui de causa à saluberrima iucundissimāq; illa sanctæ Ecclesiæ congregatione uel societate. Inuenias enim hodie capitosos & phanaticos homines non paucos, qui annis multis cum nulla communicarunt ecclesia, necdum cum ulla communicant. In omnibus enim desiderant aliquid, in semet ipsis solis nihil prorsus quod accusent inueniunt. Ergo mirificam ecclesiæ formam apud se concipiunt, quam nisi alicubi ad eum modum, quē ipsi conceperunt, constitutā cernunt, nullam adhuc in orbe ueram Christi ecclesiam (proh pudor) esse contendunt. Digni profectò qui architectonicam illam suam exerceant in Vtopia aut Cyribiria, ubi se dignum collocent ædificium. Sed uidentur sibi iustas habere causas schismatis. Nolunt enim cum nostra communicare ecclesia, quod doctrina ministrorum in ecclesia nondum uideatur satis esse extensa, polita, sublimis (ut ipsi aiunt, hoc gnuß gericht) subtilis & spiritualis. Alicubi queruntur in ecclesijs nostris diuersissimos usurpari ritus. Præterea desiderant disciplinæ rigorem & seueritatem, deniq; uitæ puritatē exactissimā. Etenim impuro se quorundam consortio polluendos metuunt. Multi propter ministrorum quorundam delicta & uitia, congregationem ecclesiæ uel deserunt uel fugiunt: quales hodie sunt Anabaptistæ. Cæterum nulla adhuc causa idonea ab istis est recensita, propter quam iure uel nobis coniungi non debeant, uel à nobis disiungi possint. Agnoscimus iustas esse causas, ob quas p̄ se possint & debeant seiungere ab impijs cœtibus: in quibus non tantum corruptus est sacramentorum usus legitimus & conuersus in idololatriam, sed & sincera doctrina prorsus est adulterata, doctoresq; uel pastores iam non sunt prophetae, sed pseudoprophetae, qui uidelicet ueritatem Dei persequuntur, deniq; pro cibo uitæ administrant sedentibus uenenum. Nihil autem huius isti (Deo gratia) nobis obijcere possunt.

Quod enim attinet ad doctrinam, uersatur hæc partim in dogmatis certis, & quasi numeratis, fixis, immutabilibusq;: cuius quidem generis sunt articuli fidei, & hi quidem citra additionem & corruptionem legitimè & sincere intellecti: eiusdem generis sunt & illa, Homines omnes esse peccatores, in peccato conceptos & natos. Homines nō nisi regenitos ingredi regnū Dei. Homines non suis meritis, sed gratia Dei per Christi solius meritum in fide iustificari. Christum semel

semel immolatum pro peccatis, amplius non immolari, & esse sacerdotē unicum & perpetuum. Opera bona fieri à iustificatis: & ea quidem uerè bona esse, quæ præparauit dominus ut in eis ambulemus. Sacramenta domini & ecclesiæ recipienda, non aspernanda esse. Orandum esse iugiter, & ad eum modum quem tradidit nobis Dominus. Et si quæ alia sunt huius generis. Cæterum satis est, si hæc & alia similia capita concorditer, purè & simpliciter doceantur in ecclesia, secundum scripturas, licet nulla accedant emblemata, nullæue audiatur leptologia. Eleganter enim beatus martyr Irenæus, post expositam fidei regulam, libro Contra hæreses I. Cum una & eadem fides sit, inquit, neq; is qui multum de ipsa dicere potest, plus quam oportet dicit: neq; qui parum, ipsam imminuit. Proinde cum ministrorū doctrina in ecclesia ea exponit, quæ ueræ & synceræ sunt fidei, quam & minimè corrumpit, quid habent isti capitosuli rhetorculi & erudituli quod requirant, etsi eloquentia & uaria desideretur in docentibus eruditio? An non fuit simplicissima, & ab omni subtilitate alienissima apostolorum & prophetarum doctrina? ut rectè hoc tutior quo simplicior esse uideatur? Interim uerò iustam eloquentiam (utpote eximiū Dei donū) non aspernor: id quod aliàs sæpè testatus sum. Partim uerò uersatur doctrina in expositione scripturarum quotidiana, & in accommodatione eius ad nostra tempora, loca & negotia. In ea semper fuit mira uarietas diuersitasq; ob quam tamen nemo cordatus se abdicauit consortio ecclesiæ. Fit enim frequentissimè, ut eundem locum duo uel tres, aut etiam plures non eadem ratione, sed longè diuersissimis modis exponant. Est qui reddit obscurius, alius apertius uertit. Attingit hic quidem scopum: ille non attingit. Et hic quidem accommodat locū quem tractat appositissimè: alius aliquis nō eadem utitur applicandi simplicitate; interim tamen nihil dicit ueritati fidei & dilectioni Dei & proximi contrariū, omnia autem profert ad ædificationē. Ex hac, inquam, diuersitate nemo sumit occasionem diuertēdi ab ecclesia. Omnes enim pī omnia probant, quod bonum est retinent: & in omnibus concionibus aut auscultationibus sacris, omne studium suum unicè ad ædificationem referunt. Quinimō doctores ipsi pulchrè inter se consentiunt, & huc quoq; omnia dirigunt, ut meliores reddantur, cū ipsi tum auditores: non ut ipsi uideantur doctiores, aut protulisse, quod nemo uidit hætenus. Doctiores non fastidiunt indoctorum conciones. Quanquam enim hi scopum non omnino attigisse uideantur, quia tamen salutaria dixerunt, laudantur, non condemnantur: etsi alicubi in loco & tempore amicè admoneantur. Imperitiores rursus non inuident eruditioribus sua dona, nec perfectiora discere recusant, nec fastidiunt & damnant eruditas peritiorum conciones: sed Deum laudant, & admoniti, imitari contendunt perfectiora. Prudenter enim S. Aurel. August. lib. de Doct. Christ. I. cap. 26. Quisquis, inquit, scripturas diuinas uel quamlibet earum partem intellexisse sibi uidetur, ita ut eo intellectu nō ædificet geminam charitatem, Dei & proximi, nondū intellexit. Quisquis uerò talem inde sententiam duxerit, ut huic ædificandæ charitati sit utilis, nec tamen hoc dixerit, quod ille quem legit eo loco sensisse probabitur, non perniciose fallitur, nec omnino mentitur. Idem mox, Corrigendus est tamen, & quàm sit utilius uiam non deferere, demonstrandum est, ne consuetudine deuiandi, etiam in transuersum aut puerum ire cogatur. Hæc ille. Ergo sicubi crassius fuerit ab ecclesiastico interprete aberratum, errantē peritiori fraternè admonere licet, schisma autem facere minimè licet. Schismatū authores ferè superbi & arrogantes sunt, tabescūtq; inuidia, ideoq; omni charitate & moderatione destituti, nihil nisi ex seipsis natum approbāt, nec quicquā cū alijs cōmune sustinent

2. Cor. 8.

habere, perpetuò sublime aliquid & nihil uulgare aut simplex meditantes. In hos ipsos quadrat illud Apostoli Pauli dictum, Scientia inflat, charitas ædificat. Religiosi ergo in ecclesia doctores & discipuli propter doctrinam non ineptam, licet crassiore, piā tamen & ædificantē, neq; ecclesiæ consortium deserunt aut fugiunt, neq; altercantur aut contendunt, charitatem potius colunt in omnibus.

Propter uitia
ministorū non
faciendū schis-
ma.
Matth. 22.

Porro si ministri uitij aut morbis laborant scdīs, interim uerò in docendo, admonendo, adhortando, accusando & consolando fideles sunt, si legitima sacramenta dispensant legitimè, nemo habet iustam deserendæ Ecclesiæ occasionem. Dominus in euangelio disertè dicit, In cathedra Moſis sedent scribæ & pharisei. Omnia ergo quæcunq; iusserint uos seruire, seruate & facite: secundum opera uerò eorum nolite facere. Dicunt enim & non faciunt. En dicunt & non faciunt, dicit dominus: ergo doctrinæ non respondebat docentium uita: quia tamen stabant in cathedra Moſis, id est, quoniam legitimè & sincerè uerbum Dei prædicabant, doctrinam sinceram recipere, uitam uerò doctrinæ non respondentem respuere iubet: ideoq; schisma facere propter doctoris uitia prohibet dominus. Certè pseudopphetas fugere præcepit. At pseudopphetam non facit mala uita, sed praua doctrina. Magnum hac in re certamen fuit beato patri Augustino cum Donatistis, contendentibus ministerium propter ministro- rum imperfectionem minus esse efficax. Id quod alterius est considerationis.

Propter ritū
diuersitatē non
faciendū schis-
ma.

Iam uerò quid attinet nostras ecclesias propter rituum dissimilitudinē uel uarietatem auersari & relinquere? In Baptismo, inquiunt, paruulorū non eadem uti- mini forma: ita & in celebratione eucharistiæ. Quidā sedentes panem dominicum sumunt in manus: quidā accedentes de manibus sumunt præſidentium, qui & in ora inserūt percipientiū. Quidā celebrant Cœnā domini frequentius: quidam uerò rarius, nec nisi diebus statis. Sed & precibus iisdem non utimini. Cœtus quoq; uestri nec eandem omnes formam habent, nec eodem tempore coeunt. Quomodo uerò credemus in uobis esse spiritum unionis & pacis, in quibus tanta inuenitur diuersitas? Iustis ergo de causis uobiscum nō communicamus. Caterum de ritibus istis suo loco dicetur opportunius. Mirum est autem uiros non prorsus rudes & imperitos rerum ecclesiasticarum, nulla alia pro nephando suo schismate tuendo argumenta proferre. An ignorant miseri, quanta semper fuerit in ritibus diuersitas, nihilo minus tamen semper permanente indiuisa unitate in Ecclesia Christi catholica? Socrates historiæ Ecclesiasticæ scriptor illustris lib. historiarum 5. cap. 22. multis exponit rituum in ecclesia Dei diuersitatem. Inter alia, Nulla religio, inquit, eosdem ritus custodit: etiam si eandem de illis doctrinam amplectatur. Etenim qui eiusdem sunt fidei, de ritibus inter se dissentiant. Et iterum, Operosum & molestum fuerit, imò impossibile, omnium ecclesiarū quæ per ciuitates & regiones sunt, ritus omnes conscribere. Beatus martyr Irenæus ad Victorem Romanæ urbis episcopum scribens, cōmemorat magnam ecclesiarum in Ieiunio, deniq; in celebrando paschate diuersitatem: deinde subiungit, Et tamen nihilo minus omnes isti, etiam cum in obseruantia uariarent, inter semetipsos & pacifici fuerunt semper nobiscū, & sunt, nec dissonantia Ieiunij, fidei consonantiā rupit. Et iterum, Beatus, inquit, Polycarpus cum ad urbem Romam uenisset sub Aniceto, cumq; de alijs nonnullis parum quid habuissent inter se controuersia, mox reconciliati sunt: de hoc uerò capite nihil inter se contenderunt. Neq; enim Anicetus Polycarpo persuadere poterat ne seruaret quæ cum Ioāne discipulo domini nostri ac reliquis Apostolis, quibus cum fuerat conuersatus, semper seruaret: nec Polycarpus Aniceto suadet ut seruaret, qui sibi presbyterorum, quibus successerat,

serat, consuetudinem seruandā esse dicebat. Et cum ista sic haberēt, cōmunionem inter se habuerunt. Hæc ille. Proinde uetus illa ecclesia usa est libertate magna in ritibus usurpandis, ut tamen non dissolueret uinculū unitatis. Sed & S. Augustinus, Ianuario quid in hac rituum diuersitate sequeretur aut faceret præscribēs, nō iubet schisma facere, sed moderatē & prudenter iudicans, Nulla disciplina est in his melior, inquit, graui prudentiq; Christiano, qui eo modo agat quo agere uiderit ecclesiam ad quamcunq; fortē deuenerit. Quod enim neq; contra fidem, neq; contra bonos mores iniungitur, indifferenter est habendum, & pro eorum inter quos uiuitur societate seruandum. Rursus ne huius canonis & consilij prætextu aliquis quosuis ritus quibuslibet obtruderet, subiungit, Ecclesia Dei inter multam paleam multaq; zizania constituta, multa tolerat: & tamen quæ sunt contra fidem & bonam uitam, non approbat, nec tacet, nec facit. Hæc hæcenus.

Postremò cum isti arbitrantur nullam ibi esse ecclesiam ueram, ubi adhuc morum uitia in hominibus in ecclesia conuersantibus apparent, quorum se consortio pollui, nisi uel non accedant ad eam, uel protinus ab ea recedant, in Catharorum incidūt insaniam, qui & ipsi falsa exactissimæ sanctimonix imaginatione decepti, seueramq; exercentes rigiditatem fugiebant ecclesias, in quibus fructus euangelicæ doctrinæ liquidè non apparebat. His opponimus & propheticas & apostolicas, nimirum sanctissimas Ecclesias. Etenim Isaïas & Ieremias sui seculi mores accusantes, grauiter inuehuntur in corruptionem doctrinæ & morum. Nec leuia aut uulgaria illis impingunt scelera, sed capitalia. Clamat Isaïas, à uertice capitis ad calcaneum usq; pedis, non esse sanī quidpiam: & tamen non deficiebat ab Ecclesia & nouam sibi constituebat, licet ab omni impietate & corruptione sibi cauere quā diligentissimè. Quot obsecro erant in ipsorum Christi apostolorum choro uitia, quot errores? Nunquid uerò ab eis deficiebat dominus? Ecclesiam Corinthiacam occuparat corruptio non morum tantum, sed & doctrinæ. Erant in ea contentiones, factiones & iurgia. Scortatio, & coniugij prophana- tio nimirum erat uulgaris. Quid quod multi sacris communicabant prophanis? Baptismum certè non uulgari errore referebant ad homines. Cœnam Domini priuatis adeoq; luxuriosis suis conuiujs polluerant: sed & de mortuorum resurrectione non bene sentiebant. An uerò ea de causa uel ipse ab illa recessit Apostolus, uel alios ab ea recedere iubet? Imò talem Ecclesiam sanctam esse prædicat, dissidiāq; grauiter obiurgans, omnes hortatur ad unitatem Ecclesiæ in syn- cera ueritate colendam. Indubitatum est ergo, grauiter peccare abstinentes à consortio nostræ imò catholicæ ecclesiæ, in qua etsi sint non uulgares corruptæ uitæ errores, doctrina tamen sincera & sacramentorum celebratio pura est.

At obijciunt isti, Omnes promiscuè ad dominicæ cœnæ communionē admittitis, impuros, ebrios, auaros, milites, & alios huius notæ homines, cum quibus diuinus Apostolus uel communem uetat edere panem, tantum abest ut concedat cum talibus dominicū frangere panē. Nisi ergo pollui libeat prauorum cōmercio, necesse est uel non accedere ad hanc societatem, uel protinus ab ipsa refugere. Atqui de Cœna domini & participatione eius, si uixerimus, alio ac suo quidem loco dicemus. In præsentī hoc tantum contra illos proferimus, Paulum seruum Iesu Christi fidelissimum domino suo nō fuisse rigidiorē. Hunc autē constat ad mensam sacram admisisse Iudam, quem cognoscebat intus, quod dici solet, & incute, nec tamen repellebat. Repulisset autem si sciisset discipulos reliquos eius consortio polluendos. Ipse quidem Iudas pollutus erat. Corrupta enim fuit mens eius ac conscientia: at non potuerant per alienam perfidiam contaminari

*Propter impu-
riorem uitam
hominū in Ec-
clesia conuer-
santiū, non fa-
ciendū schisma.*

*Propter indi-
gnos cœnæ do-
mini partici-
pantes, non fa-
ciendū schisma.*

2. Cor. 11.

Apostoli ceteri, quorum animi erant per fidem ueram synceri. Proinde Paulus Apostolus, Probet seipsum homo, ait, & sic de pane edat & de poculo bibat. Semetipsum iubet probare quemlibet, non alienum iudicare famulum, qui suo stat uel cadit Domino. Si fide instructus sis, & legitime participes mensae domini, non commacularis aliena malitia. Proinde non est quod pollutionis uitandae gratia, seiungaris ab ecclesia, in qua cernis malos bonis commixtos de Coena domini participare. Si autem seiungeris, liquidò declaras te arrogantia fractum participare cum illis, quos S. Augustinus libro contra Parmenianum 3. cap. 1. hisce pingit certè uiuis proprijsq; coloribus. Illi filij mali, qui non odio iniquitatum alienarum, sed studio contentionum suarum, infirmas plebes iactantia sui nominis irretitas, uel totas trahere uel certè diuidere affectant, superbia tumidi, peruicacia uasani, calumnijs insidiosi, seditionibus turbulenti: ne luce ueritatis carere ostendantur, umbram rigidæ seueritatis obtendunt: & quæ in scripturis sanctis salua dilectionis synceritate, & custodita pacis unitate, ad corrigenda fraternalia uitia moderatiori curatione fieri præcepta sunt, ad sacrilegium schismatis & occasionem præcisionis usurpant. Idem author inter alia piè & prudenter disputata, consequentibus 2. cap. hoc consilij placidis dat ingenijs, ut moderatè quod possunt corrigant, quod non possunt patienter ferant, & cum dilectione ingemiscant, donec ipse Deus uel corrigat uel in die iudicij paleas uentilet.

Vnitas seruanda, fugiendum esse schisma.

Proinde concludentes hunc locum, uerba beati martyris Cypriani uobis recitabimus. Is lib. 3. epist. 3. sic reliquit scriptum, Si uidentur in Ecclesia esse zizania, non tamen impediri debet aut fides aut charitas nostra, ut quoniam zizania in ecclesia esse cernimus, ipsi de ecclesia recedamus: nobis potius laborandum est, ut frumentum esse possimus, ut cum cœperit frumentum dominicis horreis condi, fructum pro opere nostro & labore capiamus. Apostolus in epistola sua dicit, In domo autem magna non solum sunt uasa aurea & argentea, sed & lignea & fictilia: & quædam quidem honorata, quædam autem inhonorata, nos operam demus, & quantum possumus laboremus, ut uas aureum uel argenteum simus. Ceterum fictilia uasa confringere domino soli concessum est, cui & uirga ferrea data est. Esse non potest maior Domino suo seruus. Nec quisquam sibi quod soli filio pater tribuit uendicare se putet, ut aream uentilandam & purgandam paleam iam ferre se posse, aut à frumento uniuersa zizania humano iudicio segregare. Superba est ista obstinatio & sacrilega præsumptio, quam sibi furor prauus assumit. Et dum dominium sibi semper quidam plus quam mitis iustitia deposcit assumunt, de ecclesia pereunt: & dum se extollunt insolenter, ipso suo tumore excacati ueritatis lumen amittunt. Dominus Iesus errantes oues in unitatem catholicæ reducat ecclesiæ, & uiuētes in unitate seruet & prouehat. Amen.

De secessione à Romana ecclesia.

His autem aduersarijs nostris repressis, exurgunt hostes noui & acres, Romanæ uidelicet monarchiæ sedisq; ut uocant Apostolicæ, Ecclesiæ uetustissimæ propugnatores. Ad rauim enim usq; clamitant eodem nos crimine conuictos teneri, quo Anabaptistas & phanaticos quosdam condemnauimus. Nos enim sacrilego quodam schismate, & nulla adactos necessitate, ueterem deseruisse Romanam Ecclesiam, & nouas atq; hæreticas nobis extruxisse synagogas. Etenim in Romana ecclesia habere adhuc suam authoritatem diuinam scripturam, recitari illam adhuc in omnibus templis, disputari deniq; ex ea in omnibus scholis, sed & suum locum habere atq; ualere sacramentorum usum: ideoq; schismaticos esse nepharios, qui defectione non necessaria desciiuerimus ab ecclesia catholica, maxime propter uitia quædam cleri & episcoporum. Video ergo mihi digrediendum paululum,

paululum, & certandum esse cum papistica ecclesiæ defensoribus, demonstrandumque nunquam nos recessisse ab ecclesia Christi catholica. Ac quoniam inprimis in hac causa scire refert, quis hæreticus, quisue schismaticus uerè dicatur, de his pauca hæc prælibo. S. Augustinus hoc interesse putat inter hæreticum & schismaticum, quòd ille prauis doctrinis synceritatem fidei & Apostolicæ doctrinæ adulterat: hic uerò tametsi in doctrinam puram & fidem synceram nihil peccet, ab ecclesia tamen temerè se separat, uinculum unitatis dissocians. Et certè hæreticus est propriè, quisquis contra scripturam, quæ uerbum Dei est, contra fidei articulos, uel contra ecclesiæ uerbo Dei natæ dogmata sana, spe temporalis aliquis commodi, ex suo arbitrio humanæque electione, aliena deligit, recipit, tradit, sectatur, pertinaciterque retinens, tuetur & propagat. Edicto imperatorio August. Cæs. Gratiani, Valentiniani, & Theodosij definiuntur Catholici uel Christiani esse, in ea uersantes religione, quam beatus Petrus Romanæ ecclesiæ tradidit, quàmque doceant beatus Damasus, & S. Petrus Alexandrinus Episcopus, confitentes uidelicet secundum Apostolicam disciplinam, & Euangelicam doctrinam, patris, & filij, & spiritus sancti, unam deitatem sub pari maiestate, & sub pia trinitate. Rursus, Hæretici declarantur ab iisdem, contraria sequentes, quos & dementes, & infames, supplicijsq; dignos iudicant. Porro Schismaticus est, quisquis ab unitate ecclesiæ Dei ueræ se separat, nouosque cœtus uel ipse instituit, uel ab alijs institutis adhæret, licet in doctrina parum aberret. Non arbitror autem quenquam quicquam in his desiderare aut oppugnare descriptionibus. Proinde grauiter in nos peccant monarchiæ Romanæ propugnatores, nunquam non in ore contra nos habentes hæreseos & schismatis crimina atrocissima. Etenim nihil docemus contra sanctarum scripturarum synceritatem & ueritatem, uel contra fidei articulos, aut contra sana & scripturis canonicis stabilita dogmata ecclesiæ catholicæ. Si commoda terrena querere libuisset, mansissemus utique in Papistica doctrina, in qua omnia sunt lucrosa. At propter Christi doctrinam receptam direptioni patemur omnium. Id quod non ignorauimus, cum à Papæ doctrina recederemus. Nulla ergo spe temporalis commodi doctrinam Christi sectamur. Præterea nihil asserimus pertinaciter. Si quis enim ex uerbo Dei meliora docuerit, non refragabimur meliora amplecti. Quinimò libera uoce & sincero corde damnamus omnes hæreses & hæreticos, quoscunq; tandem uetus illa ecclesia, uel synodis, uel extra synodos, gladio uerbi Dei iugulauit. Oppugnamus autem falsam Papæ doctrinam, noua eius decreta cum uerbo Dei pugnantia, abusus & corruptionem in ecclesia longè fœdissimam. Sumperunt sibi Romani Episcopi, cum coniuratis suis, tyrannidem in ecclesiam, exercentes uerum in templo Dei Antichristianismum: tyrannidem ergo & Antichristianismum fugimus & recusamus, Christum & iugum eius nō recusamus, societatem sanctorum non fugimus: imò ut in hac manere, ueraq; Christi & sanctorum membra esse possimus, ex Papistica ecclesia refugientes, in unam sanctam catholicam & Apostolicam Ecclesiam recolligimur. Hanc enim agnoscimus ueram esse dei domum, & ipsissimum seruatoris Christi Domini ouile, cuius ipse pastor est.

Liberè enim fatemur, & magno cum gaudio gratias Deo liberatori agentes, Libera defensionis confessionis. prædicamus nos recessisse à Romana ecclesia, eandemq; etiam hodie abominari. Cæterum distinguimus ante omnia inter Romanam ecclesiam ueterem & nuperam. Fuit enim quondam Romæ sancta & fidelis ecclesia, quam uiri Apostolici, & ipsi Apostoli Christi uerbo Dei fundarunt atq; conseruarunt. Ea non modò caruit ritibus hodie receptis & usitatis, sed si uidisset eos, anathemate percussisset.

Caruit decretis, quibus innititur hodie Romana ecclesia. Ignorauit monarchiam & totam illam curiam. Igitur ab antiqua illa Romana & Apostolica ecclesia nec recessimus, nec recedemus unquam. Agnoscimus præterea omnes Romæ hodie Christum adorantes, & seruantes se ab omni Papistica pollutione, quales non paucos Romam habere non dubitamus, pro dilectis fratribus. Porro ecclesiam nuperam Romanam illam, Papam Christi uicarium in terris agnoscentem, & adorantem, obediensq; legibus eius, ecclesiam Christi ueram esse non agnoscimus. Vnde schismatici esse non possumus, qui Romanam ecclesiam relinquentes, à uera Dei ecclesia non recessimus.

Nupera Rom.
Ecclesiam non
esse ecclesiam.

Internas eccle-
siae Dei notas
Romana eccle-
sia non habet.

2. Pet. 2. & in
Iuda Epistola.

Externas eccle-
siae Dei notas
Romana eccle-
sia non habet.

Ecclesia enim sancta catholica Christo unico pastori adhæret, illius uerbo credit, & sanctè uiuit. Contraria omnia inuenias in Romana ecclesia, ut uenire non possit, neq; in externæ & uisibilis, neque in internæ & inuisibilis ecclesiae Dei censum. Tolerant multa p̃i in ecclesia, in membris, inquam, & ministris eius (quod modò cùm contra schismaticos agerem, ostendi) uerùm in nupera illa Romana ecclesia, non inuenias leuia & tolerabilia uel doctrinæ uel uitæ uel errorum uitia: enormia, desperata & abominabilia in ipsa sunt oia. Quæ ergo dilectio de pertinacissimis deploratissimisque rebus meliora speret? Adnumerantur ecclesiae Dei externæ & tolerantur hypocritæ & mali. Romanenses autem illi nec mali sunt, nec hypocritæ, sed pessimi prorsus & atrocissimi ueritatis Christi hostes, palam blasphemantes Euangelium, & persequentes credentes in Christum. Ideoque ecclesiae Dei notas non habent, neq; internas, neq; externas. Spiritus Domini requiescit super eos qui contremiscunt ad sermonem Dei; isti incandescunt, si quis seriò reueatur uerbum Dei. Vera fides omnia uitæ uni tribuit Christo: isti fideles persequuntur, quòd uni Christo omnia tribuunt uitæ, nec figmentis Papisticis salutem partiuntur. Pro charitate exercent truculentiam contra fratres & proximos. Quid quòd publicis ecclesiae bonis ipsi abutuntur ad priuatas suas libidines? Quod enim fideles olim ex charitate contulerunt ad usum ecclesiasticum, & ad subuentionem pauperum, isti prodigunt uiuendo luxuriosissimè ac sceleratissimè. Id quod de eis ante annūciauerunt ecclesiae Dei electi Apostoli Domini, Petrus atq; Thaddæus.

Ac de externis ecclesiae notis quid dicam? Aiunt isti scripturam canonicam suam habere authoritatem in Romana ecclesia, illam & in templis & in scholis recitari, ac sacramenta suum locū habere, & efficacia esse. Ego uerò diuersum ostendere possum. Principiò subiiciunt scripturarum interpretationem sedi suæ, & ius iudicandi de omnibus attribuunt suo idolo Pontifici Romano. Notissimus est enim canon ille, Ab omnibus quicquid statuit, quicquid ordinat, perpetuò quidem & irrefragabiliter obseruandum est. Item, Cuncta per mundū nouit ecclesia, quòd sacrosancta Romana ecclesia phas de omnibus habeat iudicandi, neque cuiquam de eius liceat iudicare iudicio. Ergo & scripturas iudicat, exponit, ac pro suo arbitrio flectit & reflectit. Iam non cōmemorabo, quod disertis uerbis sedis illius promachi scribunt, scripturam canonicam authoritatem suam accipere ab ecclesia, hac Augustini abutentes sententia, Euangelio non crederem, nisi me commoueret sanctæ ecclesiae authoritas. Hoc dicam quod nemini non perspicuum esse potest, Romanam ecclesiam aut huius præsides ecclesiae, natium scripturæ sensum tollere è medio, substituere autem alienum, quem, ut sit plausibilior, sensum appellant sanctæ matris ecclesiae, quem & tanta urgent improbitate, ut si opponas sensum natium, auditurus sis hæretici probrum. Breuiter, nisi totam scripturam ad ipsorum sententiam & commodum detortam, hoc est, ipsorum decretis seu ueneno temperatam proferas, non ipsas scripturas protulisse, sed hæresim docuisse dicaris.

cēris. Exemplis res fiet illustrior. Scriptura docet Iesum Christum esse unicum caput ecclesiæ: uerū nisi adiungas etiam Papam in terris esse caput militantis ecclesiæ, hæreticus appellaberis. Scriptura docet Iesum Christum unicum esse intercessorem uel mediatorem, sacerdotem, & unicam hostiam expiatoriam fidelium: uerū nisi adiungas Christum mediatorem quidem esse redemptionis, diuos autem cum Christo mediatores esse intercessionis, sacrificos item quotidie incruentam offerre hostiam, ita ut cum Christo simul etiam sancti agnoscantur esse in cœlis intercessores, & sacerdotes in terris quotidie offerre in Missa pro uiuis & mortuis, hæreticus appellaberis. Scriptura docet, Iesum Christum esse iustitiam fidelium, quæ fide recipiatur à nobis: uerū nisi iustitiam operibus & meritis hominū partiaris, appellaberis hæreticus. Scriptura docet, Christum ascendisse in cœlos, misisse uicariam uirtutem spiritum sanctum, neq; uenturum porro in mundum corporaliter, nisi ad diem iudicii: uerū nisi agnoscas eundem Christum corporaliter quoq; præsentem esse in pane Eucharistiæ, ac eundem ibidem adores, hæreticus appellaberis. Christus Dominus dixit in ultima cœna, poculum exhibens discipulis, Bibite ex hoc omnes: cæterū si tu contendas utramq; sacramenti speciem dari oportere fidelibus omnibus, appellaberis hæreticus. Dixit in lege sua Dominus, Non facies idolum, non adorabis, non coles: uerū nisi tu intelligas per idolum gentilitium idolum, Saturni aut Mercurij, non Dei ueri, aut diui alius, hæreticus appellaberis. Plura huius generis alia proferre possem, si loquerer ignorantibus. Quam itaque authoritatem, quem locum dicemus uerbum Dei obtinuisse in sede illa? Quis non uideat fœdissimos istos homines captiuum conculare sanctissimum Dei uerbum, figere atq; refigere leges Dei pro sua gigantea audacia? Destitui ergo Romanam ecclesiam uerbo Dei sancto, tam clarum est, quàm quod clarissimum. Demonstravi huius Decadis Sermone i. satis non esse uerba iactare scripturæ sanctæ, nisi eadem sensum natium retineant incorruptū. Ecclesia Romana corripit sensum, & dogmata scripturis contraria simplicioribus obtrudit. Proinde non est uera Christi ecclesia.

Baptismi sacramentum à Papisticis ministris collatum, tametsi non iteremus: baptizarunt enim in nomen patris, & filij, & spiritus sancti: sicuti Sermone i. huius Decadis exposui: fractionem tamen panis seu Cœnam Dominicam, ita contaminarunt, fideiq; orthodoxæ contrarijs doctrinis corruerunt, & in tam fœdam conuerterunt nundinationem, ut nemo sanæ mentis religione salua & sana conscientia cum eis communicare possit. De longè corruptissima ministrorum Romanæ ecclesiæ uita moribusq; scelestissimis, nihil nunc dico. Iam enim uel cæcis apparere puto Romanam illam sedem non habere externas ueræ Dei ecclesiæ notas, cum uerbo Dei sincero, sanaq; Euāgelij prædicatione, ministerio inquam diuino, & ministris ecclesiæ legitimis, nec non salubri usu Cœnæ Domini careat: ideoq; non esse ueram Dei ecclesiam, à qua nemo citra schismatis crimen deficere possit.

Hac ratione, inquis, nulla relinquetur in terris Christo ecclesia. Ecclesiæ enim gubernatoribus aberrantibus & uerbum Dei corrumpentibus deferentibusq; quæ obsecro spes reliqua est de ecclesiâ? Aut signis non comparentibus ecclesiæ, ubi quæso est ecclesiâ? Respondemus Deum optimum maximum in calamitatibus ecclesiæ, in quibus gubernatores à uerbo & uero cultu Dei deficiunt, ac nouas leges & nouos ritus amplectuntur & in ecclesiâ inducunt, ueris ecclesiæ notis externis ad tempus obscuratis aut obsoletis, nihilominus sibi in terris reseruare ecclesiam, quam & ueris doctoribus submissis fulcit & reparat, licet hi ab illis qui ueri & ordinarij Ecclesiæ gubernatores uideri uolunt, non agnoscantur

*Deus reseruat
sibi ecclesiam,
etiam aberran-
tibus governa-
toribus.*

4. Reg. 16.
2. Paral. 28.

4. Reg. 21.
2. Paral. 33.
2. Paral. 24.

3. Reg. 13.
2. Paral. 11.

Amos 2.
7. cap.

3. Reg. 19.

Rom. 11.

pro ueris Dei ecclesiae ministris aut doctoribus, sed condemnentur pro seditionis ecclesiae turbatoribus & haeticis execrabilibus. Exemplis e scriptura petitis res fiet illustrior. Temporibus Achaz regis Iuda, Vria Pontifice summo conuiiente, nec resistantibus regni principibus & sacerdotibus, rex templum Domini clausit, & cathedram sacram sustulit: id quod scriptura disertè testatur, ideoq; cessauerat & ministerium uerbi & sacrificiorum legitimum seu ordinarium: sed nihilominus erat sancta in regno Iudae ecclesia: in qua Isaiam docuisse cum alijs quibusdā ueluti extraordinarie (ut sic dicam) nulli est dubium. Sub Manasse Achaz regis nepote exulabat sincera doctrina & sacramentorum celebratio (circumcisione dempta:) ac durauit ea defectio donec reformaretur à Iosia pijsimo rege ecclesia: interea uerò missi sunt prophetae & fuit in Iuda Dei ecclesia, licet maior pars populi cum gubernatoribus sequeretur & tueretur impietatem & defectionem Manasseam. In regno Israelis Ieroboam rex Leuitas doctores legis Domini & praedicatores ueritatis syncerae officio suo deturbauit, & prophanos & indoctos populo sacerdotes uel gubernatores dedit, noua insuper templa, eaq; cathedralia, fundauit, idola uel uitulos, nouum cultum, nouas aras & festa noua instituit, atque hoc modo uerum Dei cultum abrogauit, ita ut in Israele porro nulla apparerent ecclesiae Dei externa symbola, & tamen dubium non est insignem in Israele Dei ecclesiam fuisse, ad quam conseruandam & reparandam subinde à Domino mittebantur prophetae, licet à pseudoecclesia & pseudoprophetis pro ueris Dei prophetis minime agnoscerentur. Docuit sub Ieroboamo, eius nominis 11. Amos propheta, pastor uel armentarius de Tecoa, ueramq; Dei doctrinam tradidit: sed audit ab Amasia summo pontifice regni, Vade protinus, & recipe te in terram Iuda, illicq; propheta uel praedica. In Bethel autem ne posthac praedicaueris: quoniam fundatio & templum regium est. Quinimò cum Achab impietate omnia ante se reges uicisset, insuper & abominandum Baalis cultum impietati defectionisq; Ieroboamicae superaddidisset, omniaq; in regno Israelis oppleuisset superstitionibus, idololatria, augurijs & sacrilegijs, praeterea & Dei synceram doctrinam persequeretur in prophetis atrocissime, inuenta est tamen in Israele praeclarissima Dei ecclesia. Helias quidem ille magnus & excellentissimus Dei propheta, ob scdam illam defectionem à Deo, fastidioq; populi longè miserrimi, in quo nulla apparebant uerae Dei ecclesiae signa, fugiens in desertum abstruxit se in latebras, ac rogatus à Domino quid ibi ageret, respondit, Zelo quodam zelatus sum pro Domino Deo exercituum, quod filij Israel foedus tuum dereliquerunt, aras tuas diruerunt, & prophetas tuos gladio occiderunt, & ego solus relictus sum, quaruntq; animam meam, ut tollant eam. Verum protinus remittitur in terram Israelis unde profugerat, his insuper uerbis additis: Dereliqui mihi in Israele septem millia uirorum, quorum omnium neq; genua curuata sunt ante Baal, neq; os osculatum est eum. En propheta tantus putauit se solum in Israele e fidelium numero esse relictum: sed audit septem millia à Deo reseruata hominum sanctorum, qui genua sua non flexerint, id est, ne externo quidem cultu unquam inseruierint Baal. Quis autem nesciat prophetam per septenarium numerum intellexisse uerorum Dei cultorum turbam numerosissimam: qui haud dubie circumcisi fuerunt, non in Baalis, sed in aeterni Dei foedus. Illi ipsi non caruerunt fide, ergo neq; doctrina, licet haec non ita uulgaris esset, neq; ordinaria & catholica uideretur apud Baalistas. Caruerunt autem sacrificijs procul dubio: quia cum legitima non exhiberentur, illegitimis participare nolebant: rebus interim per symbola uel sacramenta significatis, minime destituebantur, fide communicantes omnibus Dei donis.

Ad

Ad eundem omnino modum postquam pontifex Romanus instar Ieroboam regis, deserta Euangelij pura prædicatione, corrupta item prima & simplici institutione Cœnæ Dominicæ alijsq; Dei institutis deprauatis & ad suum commodum detortis, sese collocavit in solium, imò in ipsum Dei templum uel ecclesiam, ostentans seipsum Deum terrestrem, graui sanè tyrannide oppressa Dei ecclesia, notis externis haud facile hucusq; interstingui potuit. Pro syncera enim prædicatione Euangelij, mixtum & corruptum humanis decretis doctrinæ genus propositum, ac pro Cœna Domini, Missa Papalis celebrata est: in locum aliorum institutorum Dei, subiit immensa ineptissimarum & superstitiosarum ceremoniarum turba, quibus bona pars hominum obnoxia, sedi sese subdidit Romanæ. Interea uerò non fuit in toto terrarum orbe extincta Dei ecclesia, neque cecidit apud omnes sanctum uerbi Dei ministerium, & cultus Dei uerus. Vbiq; enim terrarum dispersi, reperti sunt non pauci homines, qui nec Papam & coniuratos eius, nec corruptionem eius in rebus ecclesiæ approbauerunt. Adorauerunt autem Christum Dominum, quem agnouerunt unicum esse salutis authorem, atq; ideo mundos se seruauerunt à Papisticis contaminationibus. Ac misit Deus singulis propè seculis iam inde à Papismi exordio uiros graues, pios & doctos, qui Papæ regnum tyrannidemq; (sicut olim propheta Ieroboami corruptelam idololatricam) grauius accusarunt, postulantes constanter ecclesiæ repurgationem à corruptelis Papisticis, docentes etiam ueram salutis doctrinam, uerumq; usum sacramentorum. Vbi uerò repurgatio pura puta impetrari non potuit per Antichristi tyrannidem, ibi tamen repertum est indefectum puritatis studium, piumq; legitimum sacramentorum usus desiderium: quale diximus fuisse in electis ueræ Dei ecclesiæ membris, temporibus Ieroboami, Achab, Achas, Manassis & Captiuitatis Babylonicæ. Sicut autem his quoq; temporibus ueri prophetae Dei pro ueris à Baalitis sacerdotibus minime agnoscebantur, sed damnabantur pro schismaticis & hæreticis: ita seculis aliquot Romani Pont. cum suis coniuratis, uiros pios & doctos, uerbum Dei prædicantes & reformationem ecclesiæ postulantes, excommunicarunt, persecuti sunt, plurimosq; eorum ferro & igne exciderunt. Id quod ipse Dominus noster cum prophetis & Apostolis futurum prædixit.

Præterea potuit sibi haud dubie copiosam retinere ecclesiam Dominus sub Papismo: sicuti non dubitamus sub Machometismo seruata esse maximam. Quis enim existimet nulla superesse Ecclesiæ Dei membra per totam Asiam & Africam? An non potuit sibi Deus misericors potenti manu sua, in illa postrema ecclesiæ Dei calamitate & ruina, rursus retinere septem (ut quondam) uirorum millia, quorum nullus adorauerit bestiam aut bestiae characterem acceperit? Quid factum sit in Turcia, aut quid hodie fiat, dicant qui rectius & melius possunt. Quid apud nos factum sit in seculis iam ultimis, negare nemo potest. Insigni bonitate Dei uidemus accidisse, ut quemadmodum Circuncisio signum fœderis Dei quondam in media defectione dabatur populo Dei, ita hodie quoque in profundissimis Antichristi tenebris, sacrosanctum baptisma datum sit Christianis in obsignationem remissionis peccatorum hæreditatisq; filiorum Dei. Sanè doctrinæ puritas infinitis & crassissimis traditionibus à cōiuratis Papæ est prophanata, interim tamen non fuit nulla prorsus. Vt enim nihil eorum repetam quæ modò dixi de missis à Deo uiris pijs & doctis reformationē Ecclesiæ postulantibus, & plurimum proficientibus apud omnes Dei filios, an non consensu quodam uniuersali pro certissimo indubitatoq; receptum fuit, Decalogo omnium præceptorum Dei absolutissimum compendium suppeditari? Oratione Dominica plenissimā tradi precandi Deum

formulam? Symbolo autem Apostolico contineri perfectissimā credendorum uel fidei regulam? Certē excedentibus ex hoc seculo fermē omnibus, ac in ipso agone iam laborantibus, recitari consuevit symbolum uelut perfectissima saluantis fidei regula. Nec dubitamus misericordem Deum & patrem misericordiarum (qui & Latronem illum in cruce sub extremo uitæ exitu seruauit) oppressorum tyrannide Antichristi misertum, immensa sua gratia tetigisse & uiuentium & morientium corda, ac per spiritum sanctum docuisse, confitentesq; unum Deum patrem conditorem omnium, & unum Iesum Christum Dei filium mundi redemptorem passum & resuscitatum, & unum spiritum sanctum, deniq; sanctam ecclesiam catholicam, sanctificasse cōdonatis peccatis omnibus, animasq; fidelium in uitam æternam (sicuti crediderunt) transtulisse, quo & in fine seculi resuscitandam carnem nostram credimus transferendam. Habent hic quoq; responsionem interrogātes, An ne omnes maiores nostri ante hæc ultima reuelati Euangelij tempora mortui, sint damnati? Dispiciant uiuentes potius, ne propter uerbi Dei contemptum, atq; propter contentiones contra uerbum Dei susceptas, disparem à maioribus suis finem fortiantur. Quanquam ergo Papisticam ecclesiam non agnoscamus ueram esse ecclesiam, inde tamen non sequitur nullā omnino esse aut fuisse in terris Dei ecclesiam. Illam enim ueram Dei ecclesiam esse dicimus, quæ in Christum credidit & uerbum eius non deseruit, quam & fusè satis descripsimus. Scimus præterea, nos ipsos qui hodie Christo credimus, ueram esse Christi Domini ecclesiam. Nam in fide unico capiti Christo omnibusq; catholicæ ecclesiæ membris coharemus, ita ueris ueræ Dei ecclesiæ signis non destituimur.

Caterum non legimus, inquiunt, sub Iudaicæ ecclesiæ pontificibus, sacerdotibus & principibus, uel prophetas, id est, fideiū ductores, uel ipsos fideles descendiisse à Pontifice, à rege, uel ab uniuersali ecclesia, ac noua sibi separataq; sacrificia instituisse, sicuti uos hodie facitis. Deficientes enim à Romano pontifice, à regibus, principibus, & ab uniuersali ecclesia, ecclesiam uobis ipsis congregatis, & prædicatione & sacramentorum celebratione ab illa diuersissimam. Respondeo, ueteres ante Christi Domini aduentū præscripta de caussa, templo idololatria occupato & prophanato, non noua sacrificijs quæsiuisse loca. Nephas enim erat extra tēpli septa immolare. Id quod uidere est Leuit. 17. & Deut. 12. cap. Nec alia de caussa populus Babylonica captiuitate per annos 70. detentus, nulla obtulit sacrificia. Certissimū est tamen & prophetas Dei, & sanctos & ueros Dei cultores separasse se à cultu & sacrificijs contra uerbum Dei usurpatis. Certē sermonibus prophetarum omnibus, & sacrificia illa & ecclesiam legimus esse damnatam. Quo nomine & ipsi uicissim damnabantur à Pontificibus & sacerdotibus Baal, tanquam hæretici & schismatici execrabiles; quemadmodum hodie quoq; anathematis telo confodimur, quòd cum Papistica ecclesia & sacris eius communicare nolumus, sacraq; ipsa reijcimus. His accedit quòd impletis per Dominum & iam abrogatis legalibus, Apostoli manifesta defectione descuerunt non modò à Pontificibus et Hierosolymitana ecclesia, sed insuper nouam Christo per prædicationem Euangelij, & sacramentorum contesserationem collegerunt ecclesiam: quam in Actis Apostolorum habemus descriptam: & ad cuius formam meritò reformari debent omnes ecclesiæ, quotquot Apostolicæ uolunt appellari. Quid ergo hodie peccauimus reformantes ecclesias ad Apostolicæ imaginem ecclesiæ, prophanatas iam olim à sede illa Romana ac membris eius? Sæpe legimus ecclesiā Dei ante aduentum Christi in carnem, deturpatam fœdis pollutionibus à corruptis hominibus, eandemq; repurgatam renouatamq; esse ad ueteris ecclesiæ imaginem, secundum uerbum

Apostolica
ecclesia.

uerbum Dei. Cur autem illud ipsum eadē in caussa nostro seculo nō imitemur?

Extant præterea uaticinia Christi seruatoris, sanctorum apostolorum & prophetarum, graphicè depingentiā grauem hanc ecclesiæ Christi sub antichristi tyrannide, extremo hoc nostro seculo, fauientis oppressiōe: extant præcepta grauissima, iubentiā fugere antichristum, idololatriam, & pseudoprophetas. Dominus enim dixit in euangelio secundum Matthæum, Surgent pseudochristi & pseudoprophetæ, & dabunt signa magna & prodigia, ita ut in errorem inducantur, si fieri possit, etiam electi. Ecce prædixi uobis. Si ergo dixerint uobis, Ecce in deserto est, nolite exire, Ecce in penetralibus, nolite credere. Et iterum, Cauete uobis à pseudoprophetis, qui ueniunt ad uos in uestitu ouium, sed intrinsecus sunt lupi rapaces. Item, Nunquid potest cæcus cæcum ducere? Nōne ambo in foueam cadūt? S. Petrus magna cum grauitate, Seruemini, ait, à generatione ista praua. Copiosissima idem hac de re tradit in secunda sua epistola, capite 2. & 3. Sed & S. Paulus per omnia cum sancto euangelio, & beato Petro congruens, & antichristum & postrema illa antichristi tempora, hominesq; corruptissimos, non lumina, sed faces ecclesiæ depingens, iubet sanctos ab his recedere, & ad Christū ac ueritatem eius synceram aggregari. Loca si quis requirat, inueniet 1. Thes. 2. 1. Timoth. 4. 2. Timoth. 3. & 4. cap. Idem alibi, quemadmodum & beatus apostolus Ioannes dixit, Fugite idololatriam. Et in 2. ad Corinth. 6. cap. disertis uerbis, & luculentissima oppositione demonstrat, non posse constare ullum consensum inter Christum & Belial, inter tenebras & lucem, inter idola & templum Dei. Ac subiungit mox, Quapropter exite de medio illorum, & separemini ab illis, dicit dominus, & immundum ne tetigeritis: & ego suscipiam uos. Huc pertinet quod beatus Ioannes apostolus reuelatione sibi à domino Christo facta, uidens fata Babylonis, simul etiam uocem cœlo delatam audit in hanc sententiā præcipientem, Exite de illa populus meus, ne participes sitis delictorum eius, & de plagis eius ne accipiatis. Idem non semel minatur æternum exitium bestiam adorantibus: uitam autem & gloriam, aspernantibus fugientibusq; bestiam, adherentibus autem unicè unico mundi seruatori Iesu Christo. Proinde discessus ille noster à sede uel ab ecclesia Romana non modò licitus, sed & necessarius est, quippe mādatus nobis ab ipso domino per sanctos Apostolos, quibus nisi obediamus, saluari nequaquam poterimus.

Alioqui non ignoramus abominandas ac culpabiles prorsus esse defectiones, inter quas tamen nisi distinguamus, non apparebit luculenter quid uel probemus uel improbemus, quidue sequamur aut fugiamus. Est defectio apostasiæ, qua fidei uel religionis odio, ex mera impietate & contemptu numinis athei cum Luciano suo impio, ac Iuliano apostata, à fide orthodoxa & catholica, denique à communione fidelium deficiunt, & ueritatem præterea Christianam conuictis blasphemisq; impetūt, ac ipsam Dei ecclesiam uel irident uel persequuntur. Est rursus defectio hæretica, qua uidelicet cum Valentino, Marcione, Ario, Manichæo, Artemone, similibusq; monstris superbi & confidētes pertinacesq; nequā, uel ipsam scripturam repudiantes uel interpolantes contemnunt & calcant, uel certos fidei articulos, sanaq; ecclesiæ Dei dogmata negant, subuertunt ac oppugnant, contraria astruunt, atq; ita ecclesias sibi hæreticas construunt, à uera autem orthodoxa & catholica recedunt. Est præterea discessus schismaticus, qualis erat Donatistarum separantium se ab ecclesia Dei uera, prætextu absolutioris consequendæ sanctificationis. De quo abūde satis diximus paulò ante hæc. Et superiores quidem defectiones duæ prorsus sunt abominabiles & nephariæ: quem-

admodum & tertia nullo modo defendi potest. At nulla quidem istarum nobis hodie à Romana ecclesia deficientibus imputari potest. Vacat enim omni crimine illa secessio, quæ fit non à uera, sed falsa ecclesia: non à populo Dei, sed à persecutoribus populi Dei; non ab articulis fidei & sanis dogmatibus ecclesiæ, sed ab erroribus fidei articulos obscurantibus, & à prauis hominū traditionibus & corruptelis: quæ denique fit non leuitate aliqua, sed necessitate: non nouandi, sed ueræ religionis studio, propter ueram fidem recuperandam, secundū testimonia æternæ ueritatis, ut relicto tenebrarum consortio, recolligamur cum Christo uera luce, & omnibus membris eius. Ita uerò hodie deseruimus Romanam illam sedem, falsa doctrina, idololatria, & innoxio martyrum sanguine redundantem: amplexi sumus autem doctrinam euangelicam & apostolicam, ideoque Christum ipsum caput Ecclesiæ, quæ est communio omnium sanctorum Christo credentium. Et hæc quidem per digressionem hætenus dixi, redeo ad tractationem Ecclesiæ catholicæ, ut absoluiam quæ dicenda supersunt.

Ecclesia est domus Dei.

Etenim quò plus lucis roborisque his accedat, quæ diximus hucusque de Ecclesia, proferam nunc parabolas aliquot ex scripturis sanctis, quibus illa ueluti depicta ob oculos statuitur. Ac facile erit cuilibet interstinguere inter internam & externam ecclesiam, agnoscereque quæ cuique sint uel propria, uel minus propria. Primū depingitur nobis ecclesia sub specie & imagine domus. Domus construitur in hunc finem, ut inhabitetur ab hominibus; & construitur quidem ab architectis, ex omnigena materia, ex lignis, lapidibus, cœmento, fundamento primū collocato: cui deinde imponuntur muri uel parietes, qui angulari compinguntur lapide: postremo additur uel superinducitur tectū, sine quo totum ædificiū paulatim corruptum collaberetur atque periret. Domum Dei diximus esse Ecclesiam, cuius architectus summus ipse Deus est, qui in typo nempe in Tabernaculo Moysi, & templo Solomonis, & Moysi & Dauidi formam templi exhibuit, ad quam ipsum extruant. Deus enim ab initio angelos ne laberentur, retinuit, hominē uerò in peccatum & mortem prolapsū, reparauit, ab ipso rerum exordio protinus Ecclesiam sibi sanctificans, quam & uerbo suo circumscribens, designauit. Hanc autem formam Ecclesiæ omnino oportet tenere, non recipere aliam, uel ab Imperatore, uel à Papa, aut ab alio quouis homine traditam. Verus hic ueri domus Dei architectus in euangelio dicit, Super hanc petram ædificabo Ecclesiam meam. Ipse enim dei filius facit nos regno suo dignos, ipse fidē inspirat, per quam fiamus ecclesiæ dei uera membra. Quamuis autem ipse dominus sit unicus & summus Ecclesiæ suæ architectus, operam tamen hominū in extruendo non aspernatur, imò adiungit sibi in extruenda ecclesia homines, quos & architectos appellare dignatur. Paulus enim, Vt sapiens architectus, inquit, fundamentum posui. Et iterum, Quis est Paulus, quis Apollos, nisi ministri, per quos credidistis: & ut cuique dominus dedit? Ego plantaui, Apollos rigauit, sed Deus dedit incrementum. Itaque non qui plantat est aliquid, neque qui rigat, sed qui dat incrementum Deus. Rursus, Deifumus cooperarij, dei agricolatio, dei ædificatio estis. Exemplo rem proponemus, Cū Deus inter gentes sibi domum excitare uellet, primū gratia sua perfudit Cornelium legionis Italicæ apud Cæsaream præsidem, uel ducem ac centurionem, mox misso apostolo Petro, domum illam sibi præparat & adoptat. Petrus enim docet & baptizat, Cornelius cum suis auscultat, credit, baptizatur, & fit domus Dei, ecclesia uera, quam & dominus per spiritum suum inhabitat. Sicut enim domus inhabitatur ab hominibus, ita ecclesiam inhabitat Deus, Paulo testante & dicente, Templum Dei sanctum est, quod estis uos. Item, An nescitis quòd corpora uestra sint

sint templum eius qui est in uobis spiritus sanctus &c. Huius domus fundamentum est Christus. Dominus enim apud Isaiam dicit, Ecce ego fundo, seu mitto in Zion (nimirum in Ecclesia) lapidem, lapidem probatum, angularem, pretiosum, solidissimum fundamentum. Qui crediderit non festinabit. Id uaticinii exponens in euangelio secundum Matthaeum dominus, & sibi ipsi ceu ecclesiae fundamento applicans, ad Petrum confitentem Iesum esse uerum ueri Dei filium, Messiam expectatum, dicit, Et super hanc petram aedificabo Ecclesiam meam. Et portae inferorum non praeualebunt aduersus eam. Accedit his & beati Petri Apostoli expositio, qui citans haec ipsa Isaiæ prophetæ uerba, & alludens ad illa Dauidis, Lapidem quem reprobauerunt aedificantes, hic factus est in caput anguli, disertè dicit, Christum Iesum esse lapidem illum, uiuum, ab hominibus quidem reprobatum, à Deo uero electum, fundamentum firmum, cui qui innitantur, minimè confundantur. Consentit Petro etiam Paulus Apostolus. Dicit enim, Petra autem erat Christus. Et iterum, Fundamentum aliud poni non potest, quàm quod positum est, quod est Iesus Christus. Ergo cum idem ille alibi hoc ipsum fundamentum nominat fundamentum apostolorum & prophetarum, non ita accipiendum est, quasi apostoli & prophetæ sint fundamentum ecclesiae, sed quod hi Iesum Christum pro fundamento ecclesiae collocarunt, & totam structuram huic fundamento imposuerunt, etiam semetipsos. Nequeunt enim homines mortales obiectum esse fidei, & fundamentum ecclesiae, cui innitantur fideles. Clamat Dauid, Dei uia immaculata est, & eloquium domini est examinatum, protector est ipse omnium in se sperantium. Quis enim est Deus præter dominum, aut quis PETRA præter Deum nostrum? Nam & Ieremias, Sic dicit dominus, inquit, Maledictus uir, qui confidit in homine, & ponit carnem brachium suum, & cuius cor recedit à domino. Benedictus uir qui confidit in domino, & cuius fiducia est Dominus. Ita scriptura prophetica & Apostolica concorditer ostendit nobis petram, id est, fundamentum Ecclesiae Christum & hunc quidem solum.

Turpiter ergo errant, quicunque diuinæ hoc laudis, uirtutis, ac prærogatiuæ, quod soli dei filio competit, tribuunt Romano pontifici. Quod si obiecerint, complures ex Græcis & Latinis interpretibus per Petram ipsum Petrum intellexisse, repudiamus humanam auctoritatem, præferimus & asserimus diuinam. Christus non dixit, Aedificabo ecclesiam meam super te, sed super Petram, & hanc quidem petram, quam confessus es. Sed & Petrus nomē habet à petra: sicut Christianus à Christo. Quid quod ipse Petrus per petram intellexit Christum? Accedit his Pauli auctoritas dicentis, Petra erat Christus. Et, Fundamentum aliud nemo potest ponere, præter hoc quod positum est, quod est Iesus Christus. Nam Dauid prior dixit, Quis est Deus præter dominum, aut quis est petra præter Deum nostrum? Hæc testimonia non temere repeto: his enim longè clarissimis solum Christum petram & fundamentum ecclesiae attestantibus & collocantibus, magis credendum fatebuntur omnes non omnino insani, quàm docentibus cum Christo & Petro & Romano pontificem petras & fundamina esse ecclesiae. Nihil nunc contra hos dicam atrocius, quod omnibus notissimum sit, quales sint, indignissimi qui Petro accenseantur, dignissimi autē qui Simoniacis annumerentur. Præuidit Petrus quales isti erant futuri, ergo ne cui imponerent depinxit eos suis coloribus 2. Pet. 2. Nos illis relictis, redimus ad expositionem assumptæ parabolæ.

Materia domus, parietes & reliquæ partes sunt ipsi fideles homines, extructi super fundamento Christo. Id quod admirandi & præcipui huius structuræ artifices Petrus & Paulus hisce testantur & illustrent uerbis. Petrus, Ad Christum ac-

Matth. 16.

Psalm. 117.

1. Pet. 2.

Acto. 4.

1. Cor. 10.

1. Cor. 3.

Ephes. 2.

Psalm. 18.

Ierem. 17.

Petrus uel Roman. Pont. non est fundamentum ecclesiae. Matth. 16.

1. Cor. 10.

Domus dei qui sine.

1. Pet. 2.

Ephes. 2.

Angularis lapis
Christus.Tabernaculum
& templum
typus Ecclesie.

Apoc. 3.

Ecclesia est ui-
nea domini.

Ioan. 15.

cedentes, inquit, qui lapis est uiuus, ab hominibus quidem reprobatus, apud Deū uerò electus ac preciosus, ipsi quoque ueluti uiui lapides edificemini, domus spiritalis, sacerdotium sanctum ad offerendum spirituales hostias, acceptabiles Deo, per Iesum Christum. Paulus uerò, Iam non estis hospites & incolæ, ait, sed conciuēs sanctorum & domestici Dei, superstructi super fundamentū apostolorum & prophetarum, summo angulari lapide ipso Iesu Christo, in quo totum ædificium coagmentatum crescit in templum sanctum domino, in quo & uos superædificamini in habitaculum Dei in spiritu. Authoritate ergo apostolica discimus Christum esse angularem in domo dei lapidem, qui ne dilabantur parietes, eos cōpungit & retinet totam structuram. Idem est rectum ecclesie, defensor utique & princeps, sub cuius præsidio tuta, felix & beata uiuit ecclesia. Huc pertinet consideratio Tabernaculi Moysi & Templi Solomonis. Nam utrunque appellatur Domus Dei. Distinguebatur hæc in Sanctum sanctorum, in Sanctum, & in Atrium: & quamuis distinctæ hæc partes commemorentur, una tamen domus domini nuncupatur, quia est una duntaxat ecclesia uniuersalis, quæ interim suas ueluti partes habet. Sanctum sanctorum figurat Ecclesiam triumphantē in cœlis, ubi sunt conserui Dei & fratres nostri patriarchæ, prophetæ, apostoli, martyres & omnes spiritus beati. Ibi apparet semper in conspectu Dei Christus dominus noster, arca nostra, in quo thesauri ecclesie, qui est perfectio legis, fœderis firmitudo, & propitiatio nostra. Inde redduntur nobis oracula. In hac parte templi omnia sunt magnifica, aurea & gemmea. Absolutum enim in cœlis gaudiū percipitur. Sunt in templo formæ angelicæ, palmæ & flores. Quia in futura uita electi erunt sicuti angeli Dei. Hic uictores perpetuò uiuent. Vincenti, inquit dominus, dabo edere de ligno uitæ, quod est in medio paradisi Dei. Hic omnia splendida sunt: quia in Christo & in futura uita clarificabimur. Sanctum representat nobis militantem ecclesiam, & interiorē quidem, sanctificatam sanguine Christi, quæ non habet speciem pietatis, sed ipsam pietatem. Fide enim adhærent Deo, charitate connectuntur inter se mutuò, seruiunt Deo spiritu, auscultantes uerbo Dei & participantēs sacramentis. In sancto ergo collocauit Solomon decem candelabra, decem mensas, & luterēs decem. In ecclesia enim sanctorum est illuminatio, alimentū & purgatio quotidiana per pœnitentiam. Porro Atrium recipiebat totum cœtum populi. Ecclesia enim cœtus est omnium fidem profitentium, admixtos habens hypocritas. Inter sanctum & atrium siue uestibulum occurrunt duæ columnæ in templo Solomonis, inscriptæ Dauidico generi. Christus enim est qui sustinet ecclesiam, per quem patet ingressus in ecclesiam. Ex Christi beneficio & uirtute habet ecclesia, si in Christo maneat, ut & ipsa sit columna & basis ueritatis. Non est autem ullus extra tabernaculum & templum domini locus, in quo Deus cultum sibi exhibitum, quàm in ecclesia, recipiat. In sola ecclesia sanctorum propitiū est dominus. Faciant ergo Iudæi, Turcæ & Sarraceni præstantissima in speciem licet opera, extra Christum eiusque consortium nemo Deo placet.

Rursus confertur ecclesia Dei Vineæ præstantissimæ apud Isaiam, qui disertis uerbis dicit, Vineam domini exercituum est domus Israel, & palmes eius delectabilis uir Iuda. Nam & in euāgelio dominus noster in parabola uineæ clarè exponit homines esse huius uineæ palmites. Imò apud Ioannē idem, Ego sum uitis illa uera, inquit, & pater meus agricola est. Omnem palmitem in me non ferentem fructum, tollit: & omnem qui fert fructum, purgat, ut fructum copiosorem proferat. Sicut palmes non potest ferre fructum à semetipso, nisi manserit in uite: sic nec uos nisi in me manseritis, Ego sum uitis, uos palmites. Qui manserit in me, & ego

ego in eo, hic fert fructum multum: quia sine me nihil potestis facere. Si quis in me non manserit, eiectus est foras, sicut palmes, & exaruit, & colligunt eos, & in ignem conijciunt & ardent. Vna itaq; est ecclesia, quia uitis una est. Ex illa existunt propagines frugiferae partim, partim infrugiferae. Etenim boni siue pii ueri Dei cultores, & mali siue hypocritae recensentur in ecclesia. Hypocritae tamē suo tempore refecantur & in aeternum conijciuntur incendium. Quod boni manent in uite, nec refecantur, sed fructum proferunt, id quidē Christo ecclesiae fundamentum, capiti & conseruatori debent, qui succo suo spiritali & uitali eos reddit bonorum operum feraces. Apparet hic illustrissimē capitis & membrorum, Christi & fidelium connexio: de qua prius diximus, de qua item in euangelio Dominus subiicit, Si manseritis in me, & uerba mea in uobis manserint, quicquid uolueritis petetis & fiet uobis.

Præterea appellatur ecclesia fidelium Regnum Dei. Rex enim ecclesiae, id est, *Ecclesia regni* omnium fidelium, est ipse Dei filius Christus Iesus, qui spiritu & uerbo suo guber *Dei.* nat ecclesiam, & hæc se ipsi gubernandam sponte subiicit. Nec plura inueniuntur regna in orbe: quia unus duntaxat est rex gloriae Christus. De hoc rege & regno differui Decad. 4. Ser. 7.

Iam & Corpori humano assimilari ecclesiam saepe diximus. In corpore pri- *Ecclesia aduma-* mas tenet caput, quod nusquam abest à corpore. Decussum, relinquit exanime *bratur per cor-* & sine sensu corpus. Huic licet sint membra plurima, omnium tamen est inter ipsa *pus humanum.* consensio pulcherrima. Congruunt & conspirant inter se omnia, condolent sibi inuicem, iuuant se mutuò. Hoc uidelicet sibi inuicē præstant omnes fideles, quod membris membra. Vniuntur capiti Christo per fidem, ipsum caput coniungitur membris per gratiam & spiritum. Nunquam separatur ab Ecclesia Christus: neq; hæc aliunde uiuit quàm ex Christo. Qui tamen corpore absens sit ecclesiae militanti, præsentissimus adest tamē ei spiritu & operatione, atq; gubernatione: ita ut nullo indigeat in terris uicario, cum solus præsideat, & unicum caput, unicus rex, unicus pontifex & saluator ecclesiae suae maneat in aeternū. Dominus enim apud Ezechielē dicit, Suscitabo super oues meas pastorem unū, qui pascat eas, scilicet *Ezech. 34.* seruum meum Dauid: ipse pascet eas, atq; ipse erit eis in pastorem. Ego autem dominus ero eis in deū, & seruus meus Dauid princeps in medio eorum. Ego dominus loquutus sum. Hoc postremum adiecit ne quis dubitaret de fide & certitudine eorū, quæ dicta sunt. Deus est æterna ueritas: & is loquutus est: quod ergo loquutus est, non potest non esse uerissimū. Quid autem loquutus est? Vnū fore & esse ecclesiae pastorem & principem. En Vnum dixit significanter. Quis uerò ille unus? Id exponit & ait, Seruus meus Dauid, nimirum Christus Iesus (germē illud Dauidicum) quem euangelica authoritas ubiq; appellat filium Dauidis. Hic non erit pastor nomine duntaxat seu titulo, sed re ipsa. Pascet enim oues, adeoq; erit in medio eorum. Nam in euangelio disertè dixit, Vbicunq; duo uel tres fuerint congregati in nomine meo, ibi sum in medio eorū. Et iterum, Ecce ego uobiscū sum *Matth. 18.* omnibus diebus, usq; ad consummationem seculi. Iam si præsens adest suae ecclesiae, nullo hæc indiget Vicario. Vicarius enim absentis uicem gerit. Vbicunq; ergo uicarius Christi agnoscitur, ibi nullus est Christus, ibidē ergo regnat antichristus. Id fiet multo adhuc clarius & firmitus, si expendimus quid illud sit quod Christus dicitur esse caput ecclesiae. Caput est, uita, salus, & lux, siue illuminatio ecclesiae, princeps supremus fidelium, qui toti sanctorum cœtui, omnium temporum, & per totum orbē disperso, possit, & uelit semper adesse, preces & uota eius audire, auxilium deniq; ferre in rebus quibuslibet: breuiter, qui uniuersam eccle-

*Matth. 18.**Matth. 28.**Ecclesia dei nullum habet uicarium.**Caput ecclesiae.*

Papa non est ca-
put Ecclesiae.

Ephes. 1.

Ephes. 5.

Luce 22.

Hierony. in Co-
ment. ad Titu,
& in epist. ad
Euagrium.

fiam perfectissimè gubernare, & omnia eius sarcire, & in omnibus perficere pos-
sit. Hanc autem prerogatiuam non tribues ulli, opinor, creaturae citra blasphe-
miam & sacrilegium: solus ergo Christus Deus & homo uerus, est & manet ca-
put Ecclesiae unicum. Qui Papam Romanum agnoscunt caput esse militantis
Ecclesiae, uel quid agant & dicant nesciunt, uel scientes & uolentes filium Dei
blasphemant, quem nolunt solum regnare super Ecclesiam suam. Sed audiamus
modò diuini Apostoli Pauli de hac re testimonia. Deus, inquit, excitauit Christum
ex mortuis, & sedere fecit ad dexteram suam in coelestibus, super omnem princi-
patum & potestatem, & uirtutem, & dominium, & omne nomen quod nomina-
tur, tam in praesenti quam in futuro seculo: & omnia subiecit sub pedes eius, &
eum dedit caput super omnia ipsi Ecclesiae, quae est corpus illius, complementum
eius, qui omnia in omnibus adimplet. En caput est Christus, quia omnibus in coe-
lo & in terra praesidet, omnia gubernat, omnia sibi subiecta habet, ipsamque perfici-
cit ecclesiam corpus suum, complens ea quae ipsi desunt, omniaque adimplens desi-
deria eius. Rursus idem Apostolus, Christus caput est ecclesiae, inquit & idem dat
corpori salutem. Capitis est incolumitatem dare corpori, & praesidere. Id nemo
praestat nisi solus Christus, solus ergo Ecclesiae suae caput manet: praesertim cum Ec-
clesia corpus sit Christi spirituale, & ea de causa non possit habere caput carna-
le, nisi libeat ex Ecclesia monstrum facere poeticum. Etenim Christus ecclesiae ca-
put est, non quia homo est, sed quia Deus & homo est. Caterum si Romani idoli
defensores, propugnatoresque Romanae monarchiae, per caput intelligunt princi-
pem in terris, sicut Saul nuncupatur in scriptura caput Israelis, adeoque intelligunt
primum episcopum in prima sede praesidentem, audiant rursus ipsam scripturam,
foedissimum ipsorum errorem confutantem atque dicentem, Facta est autem con-
tentio inter Apostolos, quis eorum uideretur esse maior. Dixit autem eis Iesus, Re-
ges gentium dominantur eis: & qui potestatem habent super eas, benefici uocan-
tur: uos autem non sic: Sed qui maior est in uobis, fiat sicut iunior: & qui princeps
est, sicut qui ministrat. Nam uter maior est, qui accumbit an qui ministrat? Non-
ne qui accumbit? At ego in medio uestrum sum, ut qui ministrat.

Primatus ergo ille Romanae Ecclesiae ex hominibus est, non ex doctrina aut
ex traditione Christi, imò pugnat ex diametro cum institutione, cum doctrina, &
cum exemplo Christi: qui non uult apostolos & apostolicos uiros regnare instar
principum huius seculi. Ministros instituit ecclesiae, qui seruiant ecclesiae. Hac ac-
cumbit ad mensam, ministri cibum à domino acceptum apponunt, & rectè secant
uerbum domini. Quid quod ipse Christus coronam in terris fugit, ipseque, qui do-
minus omnium est, ministravit? Quid quod non uult ministros uel propter senium
prerogatiuam sibi sumere? Qui maior est in uobis, inquit, fiat sicut iunior. Iubet
ergo omnes esse aequales. Proinde rectè iudicat beatus Hieronymus, dicens, hu-
mana consuetudine, non autoritate diuina, unum aliquem presbyteris esse prae-
latum, qui dicatur episcopus, cum ab antiquo presbyter & episcopus eiusdem fue-
rint honoris, dignitatis & potestatis. Obseruandum est autem beatum Hieronymum
non loqui de Romana monarchia, sed de episcopis singulis, in urbibus singulis
super presbyteros constitutis. Id quod non ideo proferimus, ut humanae autori-
tati innitamur, sed ut ostendamus uel humano testimonio euinci posse maiori-
tatem illam, ut uocant, non ab ipso Dei filio & ex uerbo Dei oriri, sed ex arbitrio ho-
minum: ideoque & Christum manere unicum Ecclesiae suae caput, & Romanum
episcopum nihil minus esse quam caput militantis Ecclesiae. Simul autem firmis-
simè inhaeremus sacrosancto Euangelio & indubitatae Apostolorum doctrinae,
quae

quæ tollit omnem primatus superbiam, fideleq; nobis ministerium & ministerij æqualitatem humilitatemq; commendat: Apostolo rursus attestante, ac dicente, *1. Cor. 4.* Sic nos æstimet homo, ut ministros Christi, & dispensatores mysteriorum Dei.

Huc pertinet totum ferè caput Ioan. 10. in quo Dominus se statuit uerum uni- *Ecclesia ouile est Christi.* uersalis ecclesiæ pastorem, & unicum quidem. Ouile huius pastoris unicum est, ipsa ecclesia catholica, collecta per uerbum ex Iudæis & Gentibus. Proinde oues huius caulæ sunt omnes in toto orbe fideles, audientes & sese totos regendos præbentes summo pastori Christo: qui tametsi ministris ad ministerium ecclesiæ deputatis, nomen quoq; pastoris communicet, ipse tamen soli sibi curam pastorem summam, potestatemq; & dignitatem primam retinet. Pastores Ecclesiarum homines, omnes sunt æquales & ministri: Christus Dominus uniuersalis pastor, pastorumq; princeps ac Dominus est. Pastores diligentia & fides præstantior excellentiores facit. Ergo cum Petro dixit Dominus, Pasce oues meas; nõ commisit Petro imperium, uel in orbem, uel in ecclesiam, sed ministerium in eius redemptos. Doce, inquit, & governa uerbo meo meas oues, meas inquã, quas sanguine meo redemi. Paulus enim, Attendite uobis, inquit, & cuncto gregi, in quo uos spiritus *Acto. 20.* sanctus posuit Episcopos, ad regendum ecclesiam Dei, quam acquisiuit sanguine suo. Fallitur itaq; Rom. pontifex, qui uerbis Domini ad Petrum dictis, arbitratur sibi plenam omnium in ecclesia potestatem esse traditam. Audiatur ipse Aposto- *1. Pet. 5.* lus Petrus cum presbyteris colloquens, & ueluti enarrans illa Domini ad se dicta uerba, Presbyteros qui inter uos sunt obsecro, ait, qui sum & ipse presbyter ac testis afflictionum Christi, atq; idem consors gloriæ quæ reuelabitur, pascite quantum in uobis est gregem Christi, curam illius agentes, non coactè, sed uolentes, non turpiter affectantes lucrum, sed propenso animo, neque ceu dominium exercentes aduersus cleros, sed sic ut sitis exemplaria gregis. Non meminit Petrus u- *Pastorale munus non est dominium.* lius imperij & domini, imò disertis uerbis prohibet dominium. Sicut enim ipse à Domino constitutus est minister ac presbyter, non princeps & summus pontifex: ita ipse nullos principes constituit in ecclesia, sed ministros & presbyteros, qui uerbo Christi pascant gregem Christi, idq; sponte & legitime, artibus prauis semel sepositis omnibus. Huc pertinet integrum caput Ezech. 34. quod paulò ante citauimus. Nisi autem incrassatum esset cor, oculiq; obriguissent Rom. Pont. & suis, uidissent iam dudum se nulla in parte, aut modo ullo inter pastores ecclesiæ Petriq; discipulos numerari posse: obseruassent saltē illam sui illius Gregorij sententiam, quam hisce propemodum uerbis recitat apud Imp. Mauriciū, Ego fidenter dico, quia quisquis se uniuersalem sacerdotem uocat, Antichristū præcurrit. Et mox, Sed quoniam ueritas dicit, Omnis qui se exaltat, humiliabitur, scio quia quælibet elatio tantò citius rumpitur quò inflatur amplius. Hæc ille.

Postremò adumbratur negotium Christi & ecclesiæ per parabolam Coniugij mariti & uxoris. Christus enim ecclesiæ sponsus: ecclesia Christi sponsa appellatur. Beatus Ioannes ad discipulos suos dicit, Ipsi uos testes estis quòd dixerim, non sum ego Christus, sed missus sum ante illum. Qui habet sponsam sponsus est: amicus autem sponsi, qui stat & audit eum, gaudio gaudet propter uocem sponsi. Hoc ergo gaudium meum impletum est: illum oportet crescere, me uerò minui. Et in prophetis frequentissima est hæc allegoria. Alicubi fingitur puella neglecta *Ezech. 16.* & foeda iacere in sordibus: appropere autem principem uirum, qui è cœno extractam purgatamq; à sordibus, nec non splendide ornatam, sibi in uxorem delegit. Quanquam uerò hæc allegoria explicet diuinum illud beneficium, quod Deus populo suo in Ægypto capto, per mirabilem liberationem & adoptionem

in populum peculiarem, exhibuit: quis interim non uideat totum genus humanum ex prima sua origine peccatis sceleribusque esse defœdatum, cœnoque infixum inferni: Quis ignoret filium Dei cœlo descendisse, totumque genus humanum lauisse sanguine suo, purgatamque sibi adiunxisse ecclesiā gloriosam, nec maculam, nec rugam, nec tale quippiam habentem: Certè per connubium fit mutua inter contrahentes omnium bonorum communicatio, & quædam ueluti concorporatio indissolubilis. Ergo cum Christus nostram assumpsit carnem, & noster factus est per omnia, & nos quoque sumus membra corporis eiusdem, ex carne eius, & ex ossibus eius. In nobis est infirmitas, peccatum & mors: ea in se quoque recepit sponsus noster, ut ipsa nobis redderet innoxia. In Christo sponso nostro est iustificatio, sanctificatio & uita, eadem nobis sponsæ suæ communicat, ut in ipso simus iusti & sancti, uiuamusque per ipsum.

Ephes. 5.

Ecclesia mater
generat filios.
Galat. 4.2. Corinth. 3.
Ephes. 4.Ecclesia uirgo.
2. Corinth. 11.Adulterium &
fornicatio.

Ex coniunctione illa Domini & ecclesiæ legitima, nascuntur legitimi filij Deo. Vnde ecclesia mater & libera, id est, matrona & domina appellatur. Nam beatus Paulus, Quæ sursum est Hierusalem, inquit, libera est, quæ est mater omnium nostrum. Etenim sicuti ex coniunctione uiri & mulieris, per seminis propagationem, nascuntur liberi: ita adiunxit sibi Christus ecclesiam, in quam deposuit semen uerbi sui. Per uerbum generat mater ecclesia liberos (quod & supra monui, cum de origine dicerem ecclesiæ) dum uidelicet ipsa semen uerbi retinens, per uerbi prædicationem nos format & fouet in utero, deinde & in lucem edit quos postea lacte nutrit, & cibo solidiore alit, donec crescamus in uirum perfectum. Quemadmodum uerò sine sponso, sine fide & semine, nulla mater est: ita ecclesia sine Christo, sine sincera fide & semine uerbi Dei, non est mater libera & domina illa nostra. Didicimus autem ex his obiter, cur ecclesia Dei, mater dicatur. Eadem nihilominus & Virgo appellatur. Ab hac enim sancta matre ecclesia requirit Dominus ante omnia fidem & integritatem. Nam Apostolus Paulus, Adiunxi uos uni uiro, inquit, ad exhibendum uirginem castam Christo. Ergo sponsæ est uirginitatem in dotem afferre sponso eandemque seruare illibatam. Qualis uerò illa uirginitas: sincera in Christum fides, quæ uni integra uel tota mente æternū adhæreat: quod fit cum solum sponsum audimus, neque alium quam ipsum solum amamus, breuiter cum in simplicitate Euangelij perseueramus. Sequitur enim in uerbis Apostoli, Sed metuo ne qua fiat, ut quemadmodum serpens Euam decepit uersutia sua, ita corrumpantur sensus uestri à simplicitate quæ est in Christo. Simplicitas illa Christum agnoscit compendium salutis, recapitulationem uitæ, omniumque bonorum cœlestium: extra quem nulla sit salus, nullū bonum. Quis uerò castam dicat matronam, quæ lenonibus aures præbeat, & cor suum alijs quoque adamandis dispertiatur, nec in unico marito suo acquiescat? An non omnes scortum & adulteram esse clamabunt, concumbentem cum alieno, parientemque ex alieno semine liberos? Et mulius quidem usus est in scripturis sanctis adulterij & fornicationis spiritalis. Omnes prophetarum sermones huiusmodi scatent allegorijs. Adulteros, scorta, & fornicarios appellant isti ecclesias, uel homines alienum semen, id est, alienam à Dei uerbo doctrinam suscipientes. Tales enim fornicantes à Deo, non soli Deo adhærent, non solum ex toto corde amant, non solum adorant, colunt & inuocant, imò alios sibi deligunt, quos uel pro Deo, uel cum Deo uenerentur & inuocent. Huc pertinet bona pars cap. 5. Ieremiæ, & integrum cap. 2. Osee. Inter alia dicit Dominus, Filiorum eius non miserebor, quoniam filij sunt ex scortatione suscepti. Siquidem mater eorum scortata est: quia dixit, Ibo, sequar amatores meos. Et reliqua.

Hæc

Hæc cum ita habeant, fratres, non est quod hodie quisquam Romanam eccle- Rom. ecclesia
non est sancta
mater ecclesia.
siam, sanctæ matris ecclesiæ titulo & decore ornantis se, reuereatur. Etenim hæc
sancta mater ecclesia non est, hæc matrona & incorrupta uirgo non est. Vbi enim
est sponsus, qui sit huic matronæ castæ omnia solus? Vbi est fides seruata sponso
& integritas? An non alieno se commaculauit semine? An non nouam & alienam
à uerbo Dei doctrinam recepit & tradit? atque eo modo non Christo, sed Antichristo
generat liberos plurimos? Beatus Ioannes iusto titulo hanc ornans ecclesiam, ap- Apocal. 17.
pellauit Babylonem magnam, matrem scortationum & abominationum terræ;
item mulierem ebriam de sanguine sanctorum, & de sanguine martyrum Iesu Chri-
sti. Sancta mater ecclesia incorrupta uirgo est, solius unicæ adamati sponsi sui uo-
cem uel doctrinam audiens, in ipso solo omnia uitæ & salutis collocans, & ab hoc
uno duntaxat dependens in omnibus. Multis quidem allegorijs alijs depingit scri-
ptura mysterium Christi & ecclesiæ: sed de ea hæc hæc hactenus dixisse sufficiat. Do-
minus Iesus uerus & unicus ecclesiæ suæ pastor, errantes ouiculas placidè in cau-
lam suam reducat, & in ecclesia congregatas æternum conseruet. Amen.

*De Ministerio & ministris uerbi Dei; quare & in quem finem à Deo sint instituti. Ordines à
Christo ecclesiæ traditos, olim fuisse æquales. Vnde & quomodo exorta sit ministrorum
prærogatiua, ac de Rom. Pont. primatu.* S E R M O I I I.

EX P O S I T I O de Ecclesia Dei rectius intelligetur, fratres, ex his quæ
de Ministerio & ministris Ecclesiæ, ex uerbo Domini, dicenda restant.
Dixi enim Ecclesiam Dei uerbo Dei extrui atque conseruari, idque per mi-
nistros ad hoc per Dominum deputatos: unde consequens est ut nunc dicamus
de Ministris ecclesiæ eorumque ministerio, id est, de Ordine quo suam ecclesiam
Deus gubernat.

Et ministerium quidem ecclesiasticum extenditur ad preces publicas & exci-
tandas & fouendas, & ad sacramentorum administrationem, præcipue autem uer-
satur in prædicatione uerbi Dei. De prioribus dicetur suo loco & tempore: de mi-
nisterio uerbi differemus in præsentī. In eius consideratione in primis inspicere
conuenit, quare Deus in erudiendis hominibus opera uel ministerio hominum uta-
tur, & quid in ipso ministerio homines præstent & efficiant, quid Deus. Hic certè Quare Deus
ministerio ho-
minum utatur
in extruenda
ecclesia.
pro immensa sua in nos bonitate & misericordia cupit se totum effundere in nos (id
quod sæpe repetendum censeo, quod altius nostris infigatur animis, & nos quoque
quid Deo debeamus cogitemus) ut & ipso firmemur beatique simus, & uoluntatem
eius erga nos, denique officium nostrum, quo ipsi sumus obstricti, plenissime intelli-
gamus. Sicut ergo in omnibus diligentissime salutem nostram promouet, ita ne
quid doctrinæ ueræ desit, ipse ad erudiendum homines prodit. Caterum quæ no-
stra est imbecillitas & corruptio ex peccato, non sustinemus congressum æternæ
& immensæ illius maiestatis. Id quod ex multis quidem colloquijs Dei, cum pa- Exod. 19. 30.
Deut. 5.
tribus nostris habitis, tum maxime ex congressu eius cum uniuerfa Israelis eccle-
sia in Sinai monte apparet. Cum enim non sine gloria & maiestate diuina descen-
disset in montem, & ore proprio recitasset totius religionis omniumque legum com-
pendium (quod Decalogum appellamus) territus diuina maiestate populus, di-
xit ad Moysen, Loquere tu nobiscum, & audiemus: & ne loquatur nobiscum Deus,
ne forte moriamur. Deus autem conditionem hanc recipiens, dixit, Audiui uo-
cem uerborum populi huius, quæ sunt ad te loquuti, rectè & probè loquuti sunt,
quæ dixerunt. Utinam sit tale cor in eis, quod me timeat, &c. Porro hunc modum

docendi per homines, quem sibi ipsimet homines elegerunt, Deus quoque perpetuum & inuiolabilem esse uoluit: adeò, ut cum filium in orbem mitteret, carne indueret, & sic loqueretur nobis per ipsum.

Per ministeriū
uerbi agit Do-
minus in eccle-
sia salutem.

Acto. 8.

Galat. 1.

Acto. 10.

Acto. 9.

Acto. 26.

Luce 1.

1. Theff. 2.

2. Theff. 4.

Luce 10.

Matth. 16.

Ioan. 20.

Suum cuique
Deo inquam
& ministro,
tribuat.

Possent sanè Deus per spiritus sui arcanam illuminationem absq; hominum opera (sicuti eius potestas nulli creaturæ alligata est) totum mundum regenerare, & ipsam gubernare ecclesiam; sed sicut creaturas suas non reijcit, nec opus suum destruit, atq; ordine omnia agit, ita à rerum initio protinus loquutus est mundo per patriarchas, deinde per prophetas, hinc per Apostolos, nec hodie cessat dare mundo doctores & pastores. Ita uerò decet nos non tentare Deū, id est, non expectare occultam inspirationem cum Enthusiastis, sed agnoscere iustum ordinē, ipsumq; nobis Dominum loqui per homines, à quibus nos uult discere religionem. Scripturas sacras legebat Candaces reginæ Æthiopum eunuchus, ac potuisset ipsum occulta inspiratione docere Dominus fidei negotium, sed datur ei doctor & interpret Philippus. Similiter Paulus doctor gentium, raptus in cœlum tertium, & ab ipso Christo, non ab hominibus institutus de omnibus religionis nostræ capitibus, nihilominus reijcitur ad Ananiam hominem. Mittitur ad Cornelium legionis Italicæ centurionem & Cæsareæ agentem angelus Domini, qui potuisset de omnibus religionis ueræ negotiis ipsum erudire, sed iubet accersere Petrū Apostolum. Is, inquit, dicet tibi quid te oporteat facere. Ea de causâ appellantur ministri saluatores: dicuntur conuertere homines: uerbum ipsorum non hominum, sed Dei uerbum nuncupatur: qui hos contempsit, Deum ipsum contempsisse uidetur: illi ipsi ligare & soluere, peccata item tenere & remittere prædicantur. Abdias enim propheta commemorat seruatores ascensuros in montem Zion: id quod de Apostolis nemo non interpretatur. Paulus apud regē Agrippam uerba faciens, uerbaq; Dei ad ipsum delata recitans, dicit, Mitto te ad gentes, ut aperias oculos eorum, ut conuertantur à tenebris ad lucē, &c. Etenim archangelus Gabriel prior dixit, loquens de Ioanne. Præcedet Dominum in spiritu Helia, ut conuertat corda patrum in filios, & inobedientes ad prudentiam iustorum. Præterea Apostolus ad Thessal. Gratias agimus Deo, inquit, quod cum acciperetis sermonem à nobis, quo Deum disceratis, accepistis non sermonem hominum, sed sicut erat uerè, sermonem Dei, qui & agit in uobis credentibus. Item, Qui reijcit nos, non hominem reijcit, sed Deum qui dedit spiritum suum sanctum in nos. Nam & in Euangelio dixit Dominus, Qui uos audit, me audit. Qui uos spernit, me spernit. Et iterum, Quicquid solueritis in terra, erit solutum in cœlis: & quicquid alligaueritis in terra, erit alligatum & in cœlis. Item, Quorumcunq; remiseritis peccata, remittuntur eis: quorumcunq; retinueritis, retenta sunt.

Detorquentes autem hæc scripturæ sanctæ loca contra natium sensum, ministris propemodum æquam cum Christo potestatem partiuntur, ac quod huius solius est, etiam illis cōmunicant. Addunt autem, Ita ornari oportere ministerium, ne inter prophanos uilescat homines. Alij rursus sic loquuntur de occulto spiritus tractu, ut externum illud ministerium ueluti euacuare aut abolere ac ei prorsus nihil tribuere uideantur. Circūscribi itaq; suis oportet terminis ministerium, ne hominum affectibus cupiditatibûsue huc aut illuc rapiatur, eiq; nimium uel minimum tribuatur. Ornetur sanè ministerium & retineatur in authoritate, sed citra Dei ignominiam. Neq; enim decet ministerij prætextu operi humano tribuere quod solius Dei est, à quo solo dependere, & in quem solum respicere ceu unicū omnis boni fontem & datorem, omnes debent homines. Fideles ergo ministri Domini Iesu id unicè curāt, ut Christo suam gloriam & authoritatē illibatam, suam

suum sacerdotium omni parte integrum cōseruent. Ipse enim Dominus Iesus sedens ad dexteram patris, in tabernaculo uero, quod Deus fixit & non homo, manet sacerdos, imò summus Pontifex ecclesiae suae unicus in aeternum, obiens adhuc in ecclesia omnia sacerdotis munia. Docet enim unicus in ecclesia doctor & magister discipulos suos, hoc est, fidelium ecclesiam: donans ipsam spiritu sancto, regenerans & trahens, sanctificans & absoluens. Id quod scriptura disertè ubique docet. Hanc gloriam, hanc potestatem nemini contulit, nec quisquam ministro- Ad ministeriū
pertinet locus.
2. Corinth. 5.
rum, nisi diabolica cæcatus superbia, illam sibi arrogat, quasi ipse pro Christo, aut Christi loco, aut simul cum Christo, Christi propria operetur opera. Apostoli Christi fidelissimi ministri & organa Dei selectissima, non contulerunt spiritum sanctum, non attraxerunt corda, non inunxerunt mentes, non regenerarunt animas, non ipsi à peccato, morte, diabolo & inferis liberauerunt. Hæc enim omnia Dei sunt opera incommunicabilia. Vnde sanctissimus Baptista disertis uerbis negauit se Christum esse, negauit se spiritu baptizare, Ego, inquit, baptizo aqua, ille bapti- Ioan. 1.
zat spiritu sancto, Ego sum uox clamans in deserto, parate uiam Domino. Et Paulus coram Agrippa causam suam agens, optat à Deo, ut talis sit Agrippa rex, qua Acto. 26.
lis erat ipse Paulus uinculis exceptis. At huiusmodi uoto nihil fuisset opus, si ipse potuisset trahere, sanctificare & absoluere. Infinita sunt alia huius generis in scripturis obuia.

Interim tamen non est inane ministerium ecclesiae. Senatores & ministri re- Non inane mi-
nisterium.
gis non habent æquam cum rege potestatem, neque cum rege aut pro rege reges sunt, sed ea de causa non est inane ipsorum ministerium. Ergo quod Christus Dei filius summus, optimus & maximus ecclesiae suae Pontifex, in ecclesia catholica intus ac in animis, utpote unicus cordium scrutator, operatur, id foris annunciat ac testificatur per suos ministros, quos scriptura ideò testes, præcones, siue nuncios appellat. Vos, inquit Dominus ad Apostolos, eritis testes, quia ab initio me, Ioan. 15. 27
cum estis. Et Paulus, Positus sum ego præco Euangelij, ait, & Apostolus & doctor Acto. 1.
gentium. Ergo idem alibi ipsum Euangelium, & testimonium & præconium ap- 1. Tim. 1.
pellat Domini nostri Iesu Christi. Et Ioannes Apostolus asseuerat se relegatum esse Apocal. 1.
in Pathmos insulam propter uerbum Dei & testimoniū Iesu Christi. Ideoq; cum ministri testimoniū reddunt Dei filio, & ex ipsius uerbo promittunt uitam æternam, sermo eorum non hominū, sed Dei sermo appellatur, ipsiq; seruare, & à peccatis soluere dicuntur. Sunt enim nuncij & præcones regis liberatoris ueri, qui ipsos misit nunciatum remissionem: unde etiam omnia uitæ salutis & liberationis unico attribuunt liberatori Christo. Paulus alibi ministros dicit esse cooperarios 1. Cor. 4.
Dei: & mox, dispensatores mysteriorū Dei. Nam salutem quam operatus est Dei filius, quam & largitur solus, ministri prædicant siue dispensant, atq; ita cooperarij sunt. Idem Apostolus ex doctrina Euangelica, quæ doctorem Ecclesiasticum assli- Matth. 13.
milat seminanti, ministros confert hortulanis & arborum plantatoribus, quibus cultum tribuit externum, Christo Domino reseruans operationem interiorē. Quis, inquit, est Paulus? Quis autē Apollos, nisi ministri per quos credidistis, & ut cuiq; Dominus dedit: Ego plantaui, Apollos rigauit, sed Deus dedit incrementum. Itaq; non qui plantat est aliquid, neq; qui rigat, sed qui dat incrementū, Deus. Quo scripturæ testimonio instructus Augustinus de ministerio ecclesiae sic loqui & scribere didicit, ut nihil decederet gloriæ intus cōmonentis & docentis Dei, interim & ministerium non tolleretur aut contemni posset tanquam inutile. Ad Circenses enim Epistola, quæ ordine numeratur 130. loquens de tractu numinis occulto ac externo hominum ministerio, Nō sunt hæc opera nostra, sed Dei (inquit)

non hæc humanis operibus omnino tribuerem, nec si cùm apud uos essemus, tanta conuersio multitudinis nobis loquentibus & hortantibus proueniret. Hoc agit ille & efficit, qui per ministros suos rerum signis extrinsecus admonet, rebus autem ipsis per seipsum intrinsecus docet. Hæc ille. Porro ne cui uideretur nimis accise & parcè, nec satis dignè loquutus esse de ministerio Ecclesiæ, subiicit mox idem ille, & ait. Nec ideo pigrius nos moueri oportet ad uisendos uos, quoniam quicquid in uobis laudabile est factum, non à nobis, sed ab illo factum est, qui facit mirabilia solus. Multò enim alacrius debemus accurrere ad spectanda opera diuina quàm nostra. Quia & nos, si quid boni sumus, opus illius non hominum sumus. Vnde Apostolus dixit, Neq; qui plantat est aliquid, neq; qui rigat, sed qui incrementum dat Deus. Idem scriptor de eadem re loquens Tractatu in Ioan. 26. Omnes regni illius homines, inquit, docibiles Dei erunt, non ab hominibus audient: etsi ab hominibus audiunt, tamen quod intelligunt intus datur, intus coruscet, intus reuelatur. Quid faciunt homines forinsecus annunciantes? Quid facio ego modò cùm loquor? Strepitum uerborum ingero auribus uestris: nisi ergo reuelet ille qui intus est, quid dico, aut quid loquor? Exterior cultor arboris, interior est creator. Qui plantat & qui rigat, exterius operatur: hoc facimus nos. Sed neq; qui plantat est aliquid, neq; qui rigat, sed qui incrementum dat Deus. Hoc est, Erunt omnes docti à Deo. Hæc Augustinus.

2. Corinth. 3.

Proinde cùm alibi S. Paulus dicit, Estis epistola Christi, subministrata à nobis, inscripta non atramento, sed spiritu Dei uiuentis, non in tabulis lapideis, sed in tabulis cordis carnis &c. diligenter discriminare oportet inter opus spiritus & opus hominis uel ministri. Hic non arrogat sibi honorem Dei & opus spiritus, sed opus suum, id est ministerium. Prædicat Paulus, scribit atramento, sed spiritus Dei commouet cor, & scribit in ipsum cor gratia uel unctione sua: ita cooperatur Deo, Paulo suum, spiritu quoq; suum opus agente. Ministri sunt Apostoli, & prædicatores Euangelij, non literæ, sed spiritus: non quòd ipsi dent spiritum sanctum, sed quòd prædicatores sint Euangelij, id est, Christi spiritum conferentis, imò effundentis in credentes: non autem prædicatores literæ legis non conferentis gratiam & peccatorum remissionem, sed operantis iram & proferentis peccata. De clauibus & potestate clauium alibi erit opportunior dicendi locus. Præterea uidentur hic quoque locum habere congruum ea, quæ disputata sunt primo huius Decadis Sermone De potestate & ministerio ecclesiæ.

2. Corinth. 4.

Rursus cùm hominum utitur opera Dominus in docenda ecclesia, nobisq; cooperarijs in perficienda salute, luculentissimè ostendit quàm amet & quanti nos faciat, qui tantum thesaurum in argillacea deponit uascula, ac in nobis ipsis præstantissima quæq; operatur, ac uincit omnem mundi potentem excellentiam. Vnde iterum discimus omnem Christo tribuere gloriam, Paulo rursus docente nos, & dicente. Non nos ipsos prædicamus, sed Christum Iesum Dominum, nos autem seruos uestros propter Iesum. Quoniam Deus est qui iussit è tenebris lucem illucescere, qui luxit in cordibus nostris ad illuminationem cognitionis gloriæ Dei, in facie Iesu Christi. Habemus autem thesaurum hunc in testaceis uasculis, ut uirtutis eminentia sit Dei, & non ex nobis, dum in omnibus premimur, at non anxij redimur, &c.

Præterea conglutinantur mirificè omnia corporis ecclesiastici membra ministerio ecclesiastico. Nam ad concordiam faciendam unitatemq; retinendam, hoc imprimis conducit, quòd mutua egemus institutione, & ecclesiæ cuiq; peculiaris & unus præsidet pastor, ueluti fidus aliquis paterfamiliàs, uniuersam regens & conser-

conseruans familiam. Certè negari non potest, quondam totum illum tabernacu-
 li & templi instructissimum cultum, & tribum Leui consecratam sacerdotio, in
 hunc finem esse à Deo instituta: quæ simul atq; deseruisset per nephariam audaciã
 Ieroboam rex impius, regnum in partes discerpsit, ac domum suam atq; uniuer-
 sum regnum funditus demum evertit. Sed & S. Paulus de finibus sacri ministe- *Finis minist-*
 rij à Deo instituti loquens, non tacet unitatē corporis ecclesiastici, cui & alia præ- *sterij.*
 clara coniungit bona. Verba eius si quis requirat, hæc sunt. Instituit ministros ad *Ephes. 4.*
 instaurationem sanctorum, in opus dispensationis, in ædificationē corporis Chri-
 sti, donec perueniamus omnes in unitatem fidei & agnitionis filij Dei, in uirum
 perfectum, in mensuram ætatis plenē adultæ Christi, ut non amplius simus pueri,
 qui fluctuemus & circumferamur quouis uento doctrinæ, per uersutiam homi-
 num, per astutiam, qua nos adoriuntur ut imponant nobis, sed ueritatem sectan-
 tes in charitate adolescamus in illum per omnia, qui est caput, nempe Christus.
 Et reliqua. Perspicui sunt hi fines ministerij ecclesiastici in uerbi Dei prædicatio-
 ne. Instituit deus ministerium in ecclesia, ut omnia membra reducantur ad unita-
 tem corporis, & subiiciantur adhæreantq; capiti Christo, ut in hoc adolescamus,
 euadamusq; in uiros perfectos, ne semper simus pueri, ne pateamus omnium im-
 posturis & hæreticorum fascinationibus, sed in uera fide & charitate conglutina-
 ti ueritatem retineamus Christianam, puram & simplicem, Christoq; seruientes
 syncerè in hoc seculo, mortui regnemus cum ipso in coelis.

Ex his illud quoq; deriuamus, ministerium ecclesiasticum, licet administretur *Origo ministe-*
 ad hominibus, humanum tamen, id est, ab hominibus inuentum non esse. Origo *rij, & dignitas.*
 enim eius è cœlo est, ac authorem seu institutorem habet ipsum deum: ideoq; di-
 gnitas eius maximè excellit. Primus concionator in paradiso fuit ipse Deus, imò
 ipse Dei filius, qui intercedente spiritu sancto semper locutus est patribus, sicuti
 & incarnatus postea totum mundo à patre magister & doctor datus est. Hic Adæ &
 Eux parentibus nostris prædicauit peccatorum remissionem & poenitentiam, in-
 stituit & reuelauit sacrificium sacramenti uice, in quo repræsenteretur ac obli-
 garetur ipsis pretium redemptionis per semen promissum, aliquando exoluen-
 dum, &c. Successit in ministerio Adā cum filijs & nepotibus Seth, Enos, Enoch,
 Noe, Sem, Abraham cum suis filijs & nepotibus, usq; ad Moysen: quo gubernante
 Ecclesiam & post ipsum dati sunt prophetae & sacerdotes ad tempora usq; Ioan.
 Baptistæ & Iesu seminis promissi, Christi inquam, regis & pontificis nostri. Hic
 rursus misit in mundum discipulos suos, apostolos uidelicet, qui successores ordi-
 narunt episcopos & doctores. De qua re aliàs dictū est prolixius. Deus ergo ipse
 auditur in uoce uel doctrina ministrorum suorum. Vnde & iubemur ministros
 euangelium prædicantes tanquam ipsos dei angelos, adeoq; ueluti ipsum domi-
 num audire. Laudantur enim Galatæ hoc nomine, Paulo dicēte, Non respuestis *Galat. 4.*
 infirmitatem meam in carne, sed me ueluti angelū suscepistis, uelut Christum Ie-
 sum. Vnde & S. August. Tract. in Ioan. 3. Nos audiamus, inquit, euangelium tan- *Quomodo au-*
 quam præsentem dominum, nec dicamus, O felices qui illum audire potuerunt. *diendi ministri.*
 Quia multi in eis qui uiderunt & etiam occiderunt, multi etiam in nobis qui non
 uiderunt, & tamen crediderunt. Quod etiam pretiosum sonabat de ore domini,
 & propter nos scriptum est, & nobis seruatum est, & propter nos recitatur, & pro-
 pter posteros recitabitur, donec seculum finiatur. Sursum est dominus, sed etiam
 hic est ueritas dominus. Corpus enim domini in quo resurrexit, uno loco esse po-
 test, ueritas eius ubiq; diffusa est. Dominum argo audiamus & quod ipse donaue-
 rit de uerbis eius. Hæc August. Loquitur ergo nobis etiam hodie dominus no-

ster pontifex summus per ministros uerbum ipsius prædicantes. Imò habemus omnia quæcunq; locutus est Deus per patriarchas, prophetas & Apostolos in sacris literis exposita, quæ nobis prælegunt & enarrant ecclesiarum ministri. Quis ergo spernat posthac ministerium ac ministros Christi fideles, in primis cum ipse dominus & seruator noster ministerium subierit, ac factus sit apostolus & minister ecclesiæ Iudaicæ? Quid quod primi illi ministri tales fuerunt, ut nulla secula, nulla religionis doctrina, sanctimonia & excellentia, habuerint pares, necdum superiores? Hodie quia sunt extrema tempora, in quibus illusores & Epicurei late imperitant, uile est uerbi Dei ministerium. Verum si omnia secula ad exordium usq; mundi percurras & excutias, inuenies sapientissimos, iustissimos & optimos in toto orbe homines nihil antiquius habuisse uerbo Dei & prophetis ac apostolis Dei sanctis.

Rom. 15.
Hebr. 3.

Ministeriū uerbi Dei manere in ecclesia.
Ierem. 31.

Quomodo omnes possint docere.

Deut. 6.

Priusquam uerò ad alia huius negotij progrediamur, respondebimus nonnullis etiam sanctarum scripturarum prætextu ministerium uerbi subuerrere an nitentibus. Nam citant illud Ieremiæ, Non docebit quisq; proximum suum; omnes enim cognoscent me. Nos autem non negamus Ieremiæ sic scriptum reliquisse; sed addimus eo loquutionis genere & dicendi figura aliud nihil insinuas se, quàm maximè uulgarem fore in uniuerso mundo Dei & rerum diuinarum cognitionem. Id quod & Ioel futurum prædixit, quod & Petrus adduxit in Actis cap. 2. Interim duo illi prophetae, sicuti & alij omnes per frequenter mentionē faciunt doctorum ecclesiæ, quos dominus missurus sit populo suo: quod non fecissent, si intellexissent omnes e medio prædicatores fore tollendos. Quod alij obijciunt omnibus ex æquo docendi officium esse impositum, uidelicet ut parētes liberos suos erudiant & quisq; proximum suū admoneat: ergo nihil opus esse uerbi dei ministerio in ecclesia, sophisticum est. Priuatim enim omnes docere & admonere possumus ac debemus liberos & proximos nostros: sed ideo superuacaneum nō est publicum uerbi Dei ministerium. Idem enim Deus qui præcepit parentibus & nobis omnibus, ut illi liberos in pietate instituant, nos autem omnes proximos nostros doceamus & admoneamus, ministros publicos ecclesiæ dedit. Horum est palam seu publicè docere in ecclesia, nec hoc permissum est quibuslibet, sed tantum legitimè ordinatis: nisi fortè docentes, non rectè ingrediantur. Tunc enim cuilibet spiritu Dei instructo, licet suo loco, tempore, & sobriè contradicere, ueritatemq; asserere. Manet ergo nihilominus & quidem perpetuò in Ecclesia publicum uerbi ministerium.

Quos ordines in ecclesia instituerit dominus

Hæc in genere diximus de ministerio & ministris uerbi Dei, porrò per species atq; partes, quod reliquum huius est negotij, excutiemus, ac principiò indicabimus quos ordines, aut quæ munia ipse dominus ab initio instituerit, uel quosnam ministerio ecclesiæ sacro præfecerit: deinde quales & quomodo nobis ministros conueniat ordinare: postremò quale nam sit ordinatorum ecclesiæ officium. Et ne longè repetito exordio iam inde à patriarchis deducto, uobis molesti simus, ab ipso domino nostro Christo exordiemur: de quo loquens Paulus Apostolus. Qui descendit, inquit, idem ille est qui ascendit supra omnes cœlos, ut impleret omnia. Et idem dedit, alios quidem Apostolos, alios uerò prophetas, alios autem euangelistas, alios autem pastores & doctores, ad instaurationem sanctorum, in opus dispensationis, in ædificationem corporis Christi. Et reliqua, quæ leguntur ad Ephes. cap. 4. Ergo dominus noster ordinauit Apostolos, prophetas, euangelistas, pastores & doctores, quorum opera ecclesiam & ædificare & conseruare atq; gubernare instituit.

Videamus

Videamus iam quid scriptura de illis nos doceat. Apostolus nouum est uocabulum, ab ipso domino duodecim illis inditum, quos ipse peculiariter elegerat, destinatusque nationibus doctores ac magistros. Nam Luca 6. sic legimus, Dominus uocauit discipulos suos, & elegit duodecim ex ipsis, quos & apostolos nominauit. Significat autem Apostolus missum, nuncium, legatum uel oratorem. Nam in euangelio secundum Ioannem legimus, Non est apostolus maior eo qui misit ipsum. Et missionis quidem per frequens est mentio in prophetis, & in antiqua historia: unde uidetur dominus id uocabuli mutuassee. Apostolis nulli certi fines dati leguntur. Dicit enim dominus in euangelio, Ite in orbem uniuersum, & predicare euangelium omni creaturæ. Hi sunt primæ dei ecclesiæ architecti, à quibus apud ueteres nomen acceperunt Apostolica ecclesiæ, illæ inquam, quas primum fundarunt Apostoli: qualis Antiochia fuit, Ephesus, Corinthus, & alia multa, quarum mentio fit in Actis Apostolorum.

Prophetæ uocabulum patet latissimè. De qua re dictum est aliàs. Prophetæ in præsentia sunt qui singulari excellunt reuelatione, ac per quos futura ecclesiæ prædicit dominus: qualis fuisse legitur Agabus ille, qui & futuram famem, & uincula S. Paulo prædixit. Dicebantur quondam prophetæ uiri sapientes & diuini, singulari dono scripturæ interpretandæ præditi: sicut claret ex uerbis Apostoli 1. Corinth. 14. cap.

Euangelista, est euangelij Iesu Christi prædicator cum apostolica missus auctoritate. Talem fuisse legimus Philippum & Timotheum, &c. Pastores gregi dominico inuigilant, curam gerentes populi Dei, pascentes ecclesiam uerbo ueritatis, luposque ab ouilibus depellentes. Horum princeps est bonus ille pastor Christus ad Petrum dicens, Pasce oues meas. Vnde is se quoque aggregat pastoribus. Doctores nomen habent à docendo. Nec uideo quid differant à pastoribus, nisi illi docuerint duntaxat, & cura interim pastoralis non fuerint onerati: quales ferè sunt interpretes scripturarum, & moderatores scholarum Christianarum.

Occurrunt & alia in scripturis gubernatorum ecclesiæ uocabula. Ad Pastores in concilio Milevano collectos dicit apostolus Paulus, Attendite uobis & cuncto gregi, in quo uos spiritus sanctus posuit episcopos ad pascendum ecclesiam dei. Appellantur autem episcopi superintendentes, speculatores, custodes, uigiles & præfecti. Athenienses quos ad stipendiarias subditasque urbes mitterent, ut quid in quaque ageretur diligenter inspicerent obseruarentque, episcopos dixere ac *κυβητῆρας*. Apostoli episcopos appellarunt uigiles & custodes gregis dominici, ac œconomos Christi, uel dispensatores mysteriorum dei in Ecclesia. Porro Presbyter ab ætate uel senio nomen habet. Olim senioribus, utpote multijuga experientia diutinoque rerum usu exercitatis, committebatur cura reipub. Gubernatores enim urbium, & seniores & senatores nuncupati sunt. Sicut autem respublicæ habent suos senatores, ita ecclesia habet suos presbyteros: quemadmodum claret in Actis cap. 14. 15. 20. & 21. Videtur autem constitutio presbyterorum ex synagoga defluxisse in ecclesiam. Etenim ita legimus in libro Numerorum, Congrega mihi septuaginta uiros de senioribus Israel, quos tu nosti quod senes populi & præfecti eius sint: & segregabo de spiritu tuo, & ponam super eos, & portabunt tecum onus populi, ne tu solus ferre cogaris. Proinde Presbyteri in Ecclesia Christi uel episcopi sunt, uel alioqui prudentes & docti homines, episcopis additi, quod onus impositum episcopi portent facilius, & melius commodiusque regatur ecclesia Dei. Nam Paulus, Qui bene præfunt presbyteri, inquit, duplici honore digni habeantur: maxime illi qui laborant sermone & doctrina. Erant ergo alij quidam in munere eccle-

1. Cor. 12.

fiastico, qui tametsi non docerent continuè sicut episcopi, docentibus tamen aderant in omnibus negotiis. Fortassis appellantur alicubi ab eodem Apostolo Gubernatores, præfecti uidelicet disciplinæ & alijs ecclesiæ negotiis.

Diaconi.

Diaconissæ.

Rom. 16.

1. Cor. 14.

1. Tim. 2.

Et quoniam huc præsentis dissertationis sumus delati, explicabimus & alia functionis ecclesiasticæ uocabula. Multus fit in sacris Diaconorum sermo, & apud scriptores ecclesiasticos Sacerdotum. Diaconis commendata erat in primitiua ecclesia pauperum cura. Sicuti clarè colligitur ex 6. cap. Actuum Apostolorum. Extant præterea leges his præscriptæ ab Apostolo in priore ad Timoth. epistola capite 3. Diaconorum functio segregata erat à munere pastorum, idcirco non recensemus eos in ordine pastorum. Veteres ad ministerium non sacerdotium res tulerunt. Iam & mulieres, non maritatae, sed uiduæ leguntur primitiua ministrasse Ecclesiæ. Inter alias famigerata extitit Phœbe illa Cenchreeñ. Apostoli celebrata encomio. At hic uetat mulieres docere in ecclesia & publica obire munia. Quomodo ergo aut qua in re ministrarunt mulieres ecclesiæ? Haud dubiè pauperibus officiis inseruierunt muliebribus. Ministrarunt ægrotantibus, & cū Martha Christi hospita, Christi membra summa fide & diligentia fouerunt. Quæ enim alioqui officia obire potuerunt?

Sacerdotes.

2. Pet. 2.

2. Sam. 8.

Porro Sacerdotis uocabulum uidetur ex synagoga deriuatum esse in ecclesiam. Alioqui enim non reperiesset in nouo testamento uerbi dei ecclesiarumque ministros appellari sacerdotes, nisi ea ratione qua omnes Christiani sacerdotes esse dicuntur ab Apostolo Petro. Apparet autem noui testamenti ministros ob similitudinem quandam, quam cum ueteris testamenti ministris habent, dictos esse sacerdotes ab ecclesiasticis scriptoribus. Sicuti enim isti suo cultu tabernaculo inseruierunt, ita hi quoque suo modo & sua ratione Dei ecclesiæ ministrant. Alioqui ipsa uox Latina est deriuata à sacris: & significat ministerium sacrorum, hominem inquam deo dicatum & consecratum ad facienda sacra. Sacra autem sunt non tantum sacrificia, sed quæcunque ueniunt sub religionis censum, unde non excludimus ipsas leges & doctrinam sanctam. In historia ueteri legimus filios Dauidis dictos esse sacerdotes, non quod ministri essent sacrorum: (non enim licebat de tribu Iuda descendentibus inseruire tabernaculo, sed Leuitis duntaxat:) uerum quod sub magisterio & disciplina sacerdotum uiuentes, bonas artes & sanctam theologiam discerent.

Communicatio
fit inter illas uoces.

Hic minimè dissimulandum uidetur, quod inter uocabula illa enumerata frequens fit in scripturis cōmunicatio. Petrus enim Christi domini apostolus semetipsum appellat presbyterum. Idem in Actis Apostolorum, apostolatū uocat episcopatum. Nam & S. Paulus Miletum conuocans presbyteros, & cum his ipsis colloquens, episcopos esse dicit. Et in epistola ad Titum mandat oppidatim constituere presbyteros, quos protinus nuncupat episcopos. Eosdem & doctores & pastores appellari, nemo tam crassus est ut neget.

Qualis ordo
manserit in ecclesia.

Ex his autem omnibus cōstare puto, quos ab initio ordines ipse dominus instituerit, & quos ecclesiæ ministerio sacro ad gubernandam ecclesiam suam consecrauerit. Fundauit ecclesiam ab initio per Apostolos, euāgelistas & prophetas, eandem prouexit & cōseruauit per pastores doctoresque. His adminiculo fuere presbyteri atque diaconi. Hi quidem in curandis pauperibus: illi uerò in doctrina, in disciplina & in alijs grauioribus ecclesiæ negotiis sustinendis administrandisque. Apparet tamen ordinem apostolicum, adde & euangelisticum & propheticum ab initio Ecclesiæ à domino ad tempus, pro ratione rei, personarum & locorum, fuisse institutum. Nam seculis iam multis, & mox à fundato Christi regno in terris defierunt

runt apostoli, euangelistae & prophetae, subierunt autem in locum eorum episcopi, pastores, doctores atque presbyteri: quorum ordo in ecclesia constantissime perdurauit: ut iam nihil dubitare possimus plenum ecclesiae ordinem, & absolutam fore gubernationem, si hodie quoque maneant in ecclesia Dei episcopi siue pastores, doctores item siue presbyteri. Interim uero non diffitemur ab apostolorum morte saepius excitatos esse à deo apostolos, qui gentibus barbaris & impijs euangelium praedicarent: fatemur Deum etiam hodie excitare posse apostolos, euangelistas, & prophetas, quorum opera utatur ad salutem hominum. Agnoscimus enim apostolos & euangelistas appellari posse uiros sanctos & fideles, qui primum ueritatem euangelicam praedicant infideli alicui populo. Agnoscimus uiros singulari afflatus gratia spiritus, futura prauidentes atque praedicentes, excellentesque scripturarum interpretes uel theologos illuminatos, appellari posse prophetas. Sicuti & alias copiosius ostendi.

Ceterum in ordine episcoporum atque presbyterorum ab initio summa fuit humilitas, charitas atque concordia, nulla lis aut concertatio de praerogatiua aut titulis dignitatibusue. Omnes enim agnoscebant se esse unius domini ministros, coequales per omnia in munere. Inaequales faciebat, non in munere, sed in donis donorum excellentia. Interim tamen excellentiora consecuti non aspernabantur mediocres, neque hi illis sua inuidebant dona. S. Paulus, Sic nos homo aestimet, inquit, ut ministros Christi, & dispensatores mysteriorum dei. Idem praedicationem euangelicam non uno loco appellat ministerium. Altissimis nimirum fixum radicibus inharebat antiquis illis episcopis, quod dominus contenditibus discipulis de excellentia, & ut aiunt de maiestate, producto in medium ipsorum puero dixit, Amen dico uobis, nisi conuersi fueritis, & efficiamini sicut pueri, non ingrediemini in regnum coelorum. Certè S. Dei martyr Cyprianus in Synodo episcoporum Carthagini stans, disertis uerbis dixit, Neque quisquam nostrum episcopum se esse episcoporum constituit, aut tyrannico terrore ad obsequendi necessitate collegas suos adegit: quando habeat omnis episcopus pro licentia libertatis & potestatis suae, arbitrium proprium, tanquam iudicari ab alio non possit, cum nec ipse possit alterum iudicare: sed expectemus uniuersi iudiciu domini nostri Iesu Christi, qui unus & solus habet potestatem, & praepo-
Aequalitas inter episcopos, et presbyteros.
1. Cor. 4.
Matth 18.

At processu temporis omnia synceritatis, humilitatis, & simplicitatis antiquae euauerunt, dum alia quidem inuertuntur, alia uel sponte obsolescunt uel arte abrogantur, alia adijciuntur. Certè non ita multis post mortem apostolorum seculis uisa est in ecclesia longe alia hierarchia, quam fuerat ab initio. Quamuis principia illa uideantur tolerabiliora fuisse, quam sint hodie istius ordinis omnia. Sanctus Hieronymus, Quondam, inquit, communi presbyterorum consilio ecclesiae gubernabantur, postea decretum est, ut unus de presbyteris electus, super poneretur ceteris, ad quem omnis ecclesiae cura pertineret, & schismatum semina

Prerogatiua episcoporum quando coeperit & quomodo.

tollerentur. Hæc ille. In qualibet itaq; urbe & regione præstantissimus quisq; cæteris præponebatur. Eius functio erat superintendere presbyteris & uniuerso gregi. Non habebat (quod modò ex S. Cypriani uerbis intelleximus) in collegas uel presbyteros dominium: sed sicut consul in senatu partes habet interrogandi colligendiq; suffragia, leges item & iura tuendi, ac curandi ne subnascantur inter senatores factiones: ita non aliud in ecclesia episcopo officiũ fuit: per cætera, communia omnia habuit cum sacerdotibus. Nisi uerò longius processisset cõsequen-
tibus temporibus sacerdotum audacia, & episcoporum ambitio, ue uerbo quidem reclamaremus. Commemorat autem beatus Hieronymus illam prælaturam episcoporum, non diuina, sed humana esse exortam ordinatione. Hæc commemorauimus, inquit, ut ostenderemus apud ueteres eosdem esse episcopos, quos & presbyteros: paulatim uerò, ut dissensionum plantaria euellerentur, ad unum omnem sollicitudinem esse delatam. Sicut ergo presbyteri sciunt se ex ecclesiæ consuetudine ei qui sibi præpositus fuerit esse subiectos: ita episcopi se nouerint magis consuetudine quàm dispositionis dominicæ ueritate presbyteris esse maiores, & in commune debere Ecclesias regere, imitantes Moysen, qui cum haberet in potestate solus præesse populo Israel, septuaginta elegit, cum quibus populum iudicaret. Hæc ille in comment, ad epistolam Pauli ad Titum. 3.

Episcoporum dignitas & prærogatiua creuit.

At ne in his quidem substituerunt ueteres. Designati sunt etiã Patriarchæ Antiochiæ, Alexandria, Constantinopoli & Romæ. Designati sunt archiepiscopi, uel metropolitani, præsidēs uidelicet episcoporum per prouincias. Ac episcopis urbanis uel inferioribus additi sunt Chorepiscopi, quando uidelicet latior erat ager aut regio, quàm sufficeret urbani episcopi cura ac inspectio. Addebantur enim ceu uicarij ac suffraganei, qui munia episcopi per regionem obirent. At longè aliam functionem seculis aliquot hisce postremis, suffraganeorum uel uicariorum in episcoporum curijs & diocesibus fuisse nouimus. Sed & Diaconis subditi sunt Hypodiaconi: & cum opes augerentur, creati sunt etiam Archidiaconi, omnium uidelicet bonorum ecclesiasticorum curatores. Hi nondum miscebantur sacerdotum aut episcoporum docentiumq; ordini, sed œconomi uel procuratores manebant opum ecclesiasticarum. Sicut ne monachi quidem ab initio sacerdotio ecclesiæ uel ministerio fungebantur. Pro laicis enim non clericis habiti, pastorum curæ erant subiecti. At non quieuerunt inauspicatæ illæ aues, donec postremis illis seculis in summum euolarunt templi fastigium, capitibusq; episcoporum ac pastorum infederunt. Monachi enim fuerunt ac sunt & pontifices, & archiepiscopi, & episcopi, & quid non? Citatur ex Registro Gregorij, quòd is qui tamen monachis admodum propitijs fuit, eum se uoluerit clericatu abdicare, qui suscepisset officium abbatis, quòd alterum impediatur alterum.

Monachi.

Clerici.

Iam uerò Clerici (qui sunt de sorte & hæreditas domini, uel quorum fors est dominus) appellabantur quondam studiosi & candidati theologiæ, seminarium uidelicet pastorum ecclesiæ, & successioni in ministerio ecclesiastico ueluti consecrati: qui uidelicet in disciplina uiuebant, & sub doctorum atq; presbyterorũ magisterio bonas artes & sanctas literas discebant. Vetus est illa non noua nec hominum institutio. Quondã enim in populo ueteri Nazarej uocabantur. Sed & scholas illustres semper habuisse præstantiores ecclesias, iam inde ab apostolorum tempore locuples testis est Eusebius. Studiosis autem illis, rebus ecclesiæ iam aliquo usq; progressis, uidetur mandata cura aperiendi & claudēdi templũ, parandi omnia in templo, prælegendi deniq; loca sanctæ scripturæ in populo, quæ indicasset episcopus. Vnde fortassis exorta sunt uocabula. Ostiariorum & Lectorum, quæ

Horum mentio fit in Carthagin. Concilio 1111.

comme

commemorantur hodie inter ordines ecclesiasticos. Qui uerò Episcopis aderant familiarius, eosq; comitabantur, ac habebantur pro ijs qui Episcopis decedentibus succedere possent, appellabantur Acoluthi, quasi tu dicas Consequentes. Est enim uocabulum Græcum. Vt autem tempore omnia ferè deteriora fiunt, ita & hæc longius à prima institutione turpiter deflexa sunt. In quibusdam nihil uideas relictum præter inane nomen: quædam penitus amissa, quædam conuersa sunt in usum prorsus alium. Testes hic cito Isidorum, Rabanum, Innocentium, Durandum, & huius generis scriptores alios. Faciunt ecclesiasticarum personarum duo genera: aliud quidem dignitatis, aliud ordinis. Dignitatis, ut Papa, Patriarcha, Primas, Archiepiscopus, Archipresbyter, Archidiaconus, Præpositus. Ordinis, ut presbyter uel sacerdos, diaconus, &c. Ordines uerò numerant alij sex, alij octo. Omnes concorditer recensent Ostiarios uel Ianitores, Lectores uel Psalmistas, Exorcistas, Acolytos, Subdiaconos, Diaconos, Presbyteros uel Sacerdotes. Hos deinde distinguunt in maiores & minores ordines. Inter maiores sunt Sacerdos siue presbyter, diaconus & subdiaconus. Reliqui appellantur minores. Ex quibus ferè nihil superest præter inane nomen. Ianitorum officium deuolutum est ad ædituos, quos uocant Sacristas. Lectores nulli sunt. Lectio enim antiqua illa obsoleuit. Psalmistæ nihil minus quàm quod recitant aut canunt intelligunt. De exorcistis hæc commemorant. Refert Iosephus regem Solomonem mo- dos exorcismi, id est, coniurationis, inuenisse, quibus immundi spiritus ab homine obfesso, per Eleazarum exorcistam pellebantur, ita ut reuerti ulterius non auderent. Huic officio nuncupati Exorcistæ uocati sunt. De quibus in Euangelio legitur, Si ego in Beelzebub eijscio dæmonia, filij uestri, exorcistæ uidelicet, in quo eijsciunt. Hæc illi: quæ in hoc commemoro, ut omnibus appareat istos homines, illos ipsos esse de quibus Apostolus prædixit, fore ut sanam doctrinam non sustineant, sed conuertantur ad fabulas. Quis enim nesciat fabulosissimum esse quod de Solomone refertur: Quis nesciat Apostolos Domini non fuisse exorcistas, nec ullis unquam usos excantationum aut coniurationum modis? Nam spiritus immundos eiecerunt uerbo, id est, inuocatione & uirtute nominis Christi. Ea gratia cessauit iam dudum in ecclesia Dei. Exorcistæ fuisse dicuntur in Actis Apostolorum filij illi Sceuæ sacerdotis, quos dæmon malus etiam Iesu & Pauli nomina uocantes, inuadit, discepit, & ita, uolente Deo, omnibus patefacit quàm placeant aeterno numini exorcistæ. Et hos tamen isti nobis obtrudunt adhuc. De Acolytis uerò (sic illi scribunt) audite obsecro, quàm eleganter differant. Acolyti cerroserarij sunt, inquiunt, à deportandis cereis. Quando enim legendum est Euangelium aut sacrificandum, accenduntur cerei ad significandam animi lætitiā. Quis hæc audiens dicat istos parum eruditè nulla tractare mysteria? Subdiaconi & Diaconi non iam amplius sunt pauperum curatores, sed facti ministri superstitionis, Missæ seruiunt Papisticæ. Huius partes sunt Euangelium, illius uerò Epistolam accinere. Paucis non possum comprehendere, quæ de his ineptissimè ineptissimi homines cornicantur. His imposuere Archidiaconum, quod dignitatis & eminentiæ uocabulum est.

Corruptio omnis uetustatis.

Ordines minores et maiores.

Exorcistæ.

Matth. 12.

2. Tim. 4.

Acto. 19.

Sacerdotes qui & presbyteri uocantur, distinguuntur uariè. Sunt enim sacerdotes Religiosi & Seculares. Per Religiosos monachos intelligunt: cùm hi nihil minus sint, quàm quod esse dicuntur. Certè ueteres monachos nulla sui parte referunt. Bona pars istorum sibiipsis regula sunt & lex. Ex his alij doctores sunt, destinati quidē prædicationis muneri, sed magis tamen horis dicendis, aut canendis, & Missis celebrandis. Atq; hi superstitionem serunt & tuentur pertinacissimè,

Sacerdotes Papistici religiosi.

Sacerdotes Pa-
pistici secular-
es.

& ueram religionem persequuntur acerrimè. Alij & potior quidem monasticorum sacerdotum turba nihil aliud quàm canit in templis & missat, idèp uilissimo pretio. Libycas enim harenas citius numeraueris, quàm istos. Sed & Deo, & ecclesiæ, deniq; sibijs suis sunt inutiles, homines planè indocti, ac uentres pigri, implacabiles interim Euangelicæ ueritatis hostes.

Archipresby-
teri.

Inter seculares sacerdotes primas tenent Canonici, qui ferè sunt homines ociosi, uoluptuarij, epulones, ac reuera seculares. Hi existimant se suo functos esse officio, si Horas quas Canonicas uocant, absoluant, & spectatores missæ assistant, cultumq; diuinum (ut uocant) sua honorent ornentq; præsentia. Seueriores & minime seculares esse uidentur, qui etiam Missas pro uiuis & defunctis celebrant. Numerantur in secularium sacerdotum turba & Parochi, quos Plebanos nuncupant, nimirum plebi destinatos sacerdotes, qui soli umbrâ aliquam ueteris instituti referunt, in hoc, quòd prædicant & sacramenta administrant: quæ tamen ipsa probare non queas, quòd hæc iuxta traditiones Papisticas, non secundum doctrinam Apostolicam administrent. Plurima & alia ex suo faciunt officio, quæ pietas modis omnibus improbat. Adduntur istis Mercenarij, Adiutores uel Vicarij. Accedunt his & Sacellani, quos Capellanos uocant, quorum immensus est numerus. Hi sicut & monastici sacerdotes potissimas officij sui partes collocant in recitandis horis, præcipuè autem in missando, doctrinæ nihil tribuunt. Ex hoc enim grege inuenias, qui omni sua uita nunquam sint concionati. Nam concionandi munus ad solos parochos & uicarios eorum reijciunt, ipsi Dñs, quibus ara uel sacellum eorum consecratum est, serunt, &c. Ex quibus omnibus uel cæcis apparet luculentissimè, quàm foedè corrupta & inuersa sit presbyterorum uel pastorum prima institutio: Presbyteris archipresbyteros præficiunt. Eo uocabulo usus sum in præliminari Epistola Decadis primæ: ac audio fratres aliquos eo esse offensos, quasi Papistici fermenti aliquid adhuc apud nos hæreat, quasi dignitatis indignæ aliquid in ecclesiam reducere cogitemus. Verùm securos iubeo esse fratres illos. Nulli sunt apud nos archipresbyteri Papistici: nec dignitatem ullam Papæ eo uocabulo intellexi, sed munus inspectionis, quod uisitationis alijs nuncupant. Curam enim higerunt omnium in agro nostro classium, in admonendo & corrigendo: nullam gerunt prælaturam, nulla inde consequuntur præmia, &c.

Episcoporum
genera.

Sed redimus ad nostrum institutum. Presbyteros uel Sacerdotes deriuant à LXX. discipulis, quos Dominus in Euangelio elegisse legitur, Episcopalem ordinem ab ipso Petro & reliquis Apostolis. Et ordinem Episcoporum mox distinguunt in tres partes. Numerant enim Patriarchas, Archiepiscopos & Episcopos. Patriarchas intelligunt patres principum seu summos patres. Eosdem & Primates nuncupant. Ac primates, inquiunt, tribus archiepiscopis præsent, sicut & rex tribus præsidet ducibus. Hic locum habent opinor Cardinales, in quibus ecclesia Romana ceu in cardinibus ianua uoluitur. Nam in Decretal. Greg. de officio archiep. sic legitur, Cardinales dicuntur à cardine: quia sicut in cardine regitur ostium, ita per Cardinales regitur uniuersalis ecclesia. Archiepiscopi sunt ueluti principes Episcoporum: Metropolitani quoq; cognominati, quòd præsideant in urbibus primarijs. Reuera metropolis ueluti matrix quædam urbs dicitur Græcis, ex qua coloniæ deductæ. Vnde metropolitanus Episcopus nominatur, qui prouinciæ alicui præest, aliosq; sibi subiectos habet Episcopos. Hi uerò & Pontifices & antistites & præfules appellantur. Si uerò hæc omnia conferas cum ijs quæ antea dixi de primitiuæ ecclesiæ Episcopis & gubernatoribus, diuersissima inter se esse dices.

Illud

Illud uerò quod de Papa seu summo pontifice tradunt, à scriptura Euangelica Apostolicaq; & à prima ministrorum ordinatione ab ipso saluatore nostro facta, *papa uel summus pontifex.* quam alienissimum est. Illos omnes, inquit, dignitate & potestate antecellit sanctissimus Dominus noster Papa: qui Papa, id est, pater patrum, uocatur: & Uniuersalis, quia uniuersae ecclesiae princeps est: & Apostolicus, quia principis Apostolorum uice fungitur, & summus Pontifex. Hic est enim Melchizedek, cuius sacerdotium non est cæteris comparatum: quia ipse est caput omnium pontificum, à quo illi tanquam à capite membra descendunt: & de cuius potestate omnes accipiunt, quos ipse uocat in partem solitudinis, non in plenitudinē potestatis. Definiunt ergo Papam, esse summum in terris ecclesiae caput, & uniuersalem totius orbis pastorem unicum, qui errare non possit, neque ab ullo homine iudicari debeat. Ipsum enim iudicem esse omnium cum potestate plenaria. Nam Innocentius Papa 9. quæst. 3. Neq; ab Augusto, inquit, neq; ab omni clero, neq; à regibus, neq; à populo iudex iudicabitur. In quem locum Glossarius sic scribit, Concilium non potest Papam iudicare: ut Extrau. de Elect. Significasti. Vnde si totus mundus sententiaret in aliquo negotio contra Papam, uideretur quòd sententiæ Papæ standum sit. Huc pertinent uulgata illa iurisperitorum parasitastorum Papæ axiomata in Curia, admodum plausibilia & authentica, Omnes leges pontificis perinde ut ipsius Petri ore profectas, esse recipiendas ab omnibus. Maiorem esse auctoritatem Papæ quam sanctorum, Papam esse omnia & super omnia, Dei & Papæ esse unum consistorium. Id quod Hostien. affirmat in C. Quanto de Transl. præl. A nemine cogi Papam, etiamsi dicatur hæreticus. Apud ipsum esse supremam potestatem, nec habere parem. Ibi uniuersalem esse Synodum, ubi sit Papa. Habere illum omnia iura in pectore. Habere utrunq; gladium: unde rectè dici Imperatorem, imò imperatore esse maiorem. Solum deponere imperatorem: & sententiam imperatoris declarare nullam. Solius esse parcere cui uelit, ius item unius auferre & alteri conferre, denique priuilegia auferre. Breuiter, Dominus est, inquit, dominantium, & habet ius regis regum in subditos, & plenitudinem potestatis etiam in temporalibus in terris. Sed & totus mundus est Papæ diocesis, in qua ipse est ordinarius cunctorum: estq; de necessitate salutis omnem hominem subesse Romano pontifici. His corollarij uice adijciam Glossatoris uerba, qui in Ca. Quanto de Transl. episcopi Tit. 7. Papa, ait, dicitur habere cœleste arbitrium: & ideo etiam naturam rerum immutat, substantialia unius rei applicando alteri. Et de nihilo potest aliquid facere: & sententiam quæ nulla est aliquam facere. Quia in his ei quæ uult est pro ratione uoluntas. Nec est qui ei dicat, Cur ita facis? Ipse enim potest supra ius dispensare, & de iniustitia facere iustitiam corrigendo iura & mutando. Nam plenitudinem obtinet potestatis. Hæc ille.

Quis autem ista absq; totius & corporis & animi horrore audiat? Quis non intelligat illud Danielis impletum esse, Putabit se tempora & leges mutare posse? *Daniel. 7. 8.* Quis non intelligat illud quoq; Pauli impletum esse, dicentis, Ego noui hoc, quòd *Acto. 10.* ingressuri sint post discessum meum lupi graues in uos, nō parcentes gregi: Et ex uobis ipsis exorientur uiri loquentes peruersa, ut abducant discipulos post se: Ex Episcopis enim & promouentibus Episcopos prodijt hic homo peccati, qui se collocat in sedem agni, eaq; sibi usurpat quæ unice agni propria sunt, quale est summum in ecclesia magisterium, sacerdotium, dominiū, ac potestas plenaria. De quibus satis dixi in superioribus. Quis iam nō rangat illud Pauli esse impletū, Reuelabitur aduersarius uel Christi æmulus, & efferetur aduersus omnem qui dicit Deus aut numen: adeò ut ipse in tēplo Dei ceu Deus sedeat, ostentans se ipsum esse Deū.

An utile sit &
necessarium u-
num aliquem
præminere
Episcopis?

Luce 22.

2. Corinth. 1.
1. Pet. 5.

Petrus Aposto-
lorum princeps.

De Donatione
Constantini.

Porro disputant Papæ satellites, è re & ex salute imò necessarium esse ecclesiæ, ut unus aliquis Episcoporum & dignitate & potestate præmineat. Disputent autem & ornent hoc suum idolum ut libet: qui ueritatem simpliciter fateri uolent, ingenuè confitebuntur Papam esse Antichristum. Quod enim isti garrunt de primatu Papæ, doctrinæ euāgelicæ & Apostolicæ ex diametro repugnat. Quid enim euidentius cōtra illorū disputationes proferri potest, quàm quod Dominus dixit ad discipulos de primatu contententes, Reges gentiū dominantur eis, & qui potestatem habent super eas, benefici uocantur. Vos autem non sic: sed qui maior est in uobis, fiat sicut minor: & qui dux est, sicut qui ministrat. Nā uter maior est, qui accumbit, an qui ministrat? Nōne qui accumbit? At ego in medio uestrum sum ut qui ministrat. Hunc locum adduxi & excussi obiter etiam proximo Sermonē. Hæc ueritas simplex & perspicua perstabit inuicta aduersus omnes istarum harpyiarum disputationes. Sanctissimi Apostoli Domini nostri Iesu Christi nolunt cuiquam dominari prætextu fidei, imò S. Petrus disertis uerbis prohibet dominium in hæreditatem Christi, iubet autem Episcopos exemplaria esse gregis.

Quod obijciunt Christum sancto Petro dixisse, Tu es Petrus: & super hanc Petram ædificabo ecclesiam meam: & tibi dabo clauēs regni cœlorum. Et reliqua. Item pasce oues meas: ideoq; sanctum Petrum designatum fuisse omnium Apostolorum, & in his omnium sacerdotum, presbyterorum, Episcoporumq; apicem seu principem, adeoq; totius orbis monarcham, nihil prorsus facit ad dominationem eorum stabiliendam. Libenter concedimus S. Petrum esse Apostolorum principem, libenter ipsi quoq; appellamus beatum Petrum Apostolorum principem, sed eo sensu quo appellamus Moysen, Dauidem, Heliam uel Isaiam prophetarum principes, nimirum præstantiora cæteris dona consecutos. At principem fuisse Petrum ea ratione qua isti uolunt, negamus & pernegamus constantissimè. Simul autem tuemur S. Petrum, & repurgamus ab asperginibus, quibus isti uel mortuum contaminare contendunt. Non permansisset Domino suo fidelis, si imperium aut dominium ad se rapuisset. Par autem ubiq; Petrus alijs discipulis, nullibi in sacris eorum Dominus fuisse legitur. Et S. Paulus in principio Epistolæ ad Galatas multis ostendit in Apostolatu se nihilo inferiorem esse Petro. Neq; dum Hierosolymam uenit, ea de causa uenit, ut pedes oscularetur, aut subiectionem profiteretur, sed ut ex congressu & collatione amica omnes in omnibus ecclesijs intelligerent inter Petrum & Paulum in dogmatibus summum esse consensum & parum Apostolatum. Ibidem Iacobum, Petrum, & Ioannem, columnas appellat Paulus, non uni Petro id prærogatiuæ tribuit: quod tamen fecisset meritò, si primatum, ut isti asseuerant, accepisset à Domino. Quid quòd ipse Petrus nihil suo agit arbitrio, sed negotia ecclesiastica ad reliquos discipulos, ueluti collegas refert: id quod in Actis Apostolorum uidere licet. Alibi se appellat compresbyterum, non principem sacerdotum. Missus ab Apostolis cum Ioanne in Samariam, non postulat alium mitti, ne primatus eius uideatur diminutus, sed sponte obedit. Ut uerò donemus Petrum ita fuisse Apostolorum principem, sicuti cōtendunt isti: an ideo consequeretur Papam esse principem totius ecclesiæ, imò uniuersi orbis? Nam ut Papa non est Petrus: ita duodecim aut undecim Apostoli non sunt totus orbis. Præterea non potuit dare Petrus quod non habuit. Non habuit imperium in totum orbem, ergo non dedit.

Sed Constantinus Syluestro dedit, inquiunt. Ut maximè donemus ueram esse, non fictam & eumentam (quod tamen doctissimi quique contendunt) Constantini donationem, attamen Syluester ille oblatum imperium non accepisset. Plus ualuisse

ualuisset apud eum Christi principis summi & cœlestis uox, Reges gentium dominantur eis, Vos autem non sic, quàm terreni imperatoris stolidi affectio. An credimus Petrum Apostolum accepturum fuisse cum imperio secularem potestatem, si eam obtulisset Nero Cæsar? Minime gentium. Imis enim uisceribus infixum hæsit Domini uerbum, Vos autem non sic. Priusquàm accepisset spiritum sanctum, cum reliqua Iudæorum turba cæcutiens, imaginabatur regnum Christi in terris terrestre futurum: postquàm spiritum sanctum accepit, intellexit Christi regis & summi imperatoris sedem non esse in terris, sed in cœlo collocatam, ac regnum eius non esse ex hoc mundo. Sciebat Christum Dominum aufugisse in desertum, cum populus cogitaret ipsum creare regem. Sciebat Helisæum saluberrimo consilio donationem Naamani principis repulisse. Giesi autem ministrum in æternum probrum ac subuersionem incolumitatis propriæ, repetisse. Noluit beatus Petrus curam in se pauperum recipere, ne minus expeditè & oraret & prædicationi uerbi inuigilaret, id quod Acta Apostolorum testantur: cui ergo uerissimile uideatur eundem abiecto Apostolatu etiam orbis imperium suscepisse? Negat eundem & uerbi ministerio feliciter præesse, & mensis ministrare posse. Quem uerò illi nobis Papam dabunt, qui Petro ampliorem habeat spiritum: qui id possit præstare quod non potuit Petrus: qui nō iam mensis, sed toti orbi præesse possit? Nugæ ergo sunt, quas isti nobis recitant de Donatione Constantini. Integrrior fuit Constantinus quàm qui talem donationem instituerit, quam non nesciebat cum Christi doctrina pugnare. Integrrior fuit Syluester quàm qui receperit quod citra ministerij uerbi subuersionem recipi non posse intellexit. Quod si Constantinus donauit omnino quod donasse dicitur, & Syluester donationem non repulit, peccauit uterque. Quia contra uerbum Dei egit uterq̃.

Vidi quæ superioribus annis pro donatione Constantini contra Laurentium Vallam scripsit doctus alioqui & multæ lectionis uir, August. Steuchus: uerum nulla profert argumenta solida, tamen si mirificè ringatur, & omnes uires eloquentiæ exerat, deniq̃ undiquaq̃ omnia quæ aliquo modo hanc causam iuuare uidebantur operosè congerat. Ac dignior quidem uidetur is liber qui proculcetur pedibus, quàm qui honorum hominum manibus teratur. Vt enim non commemorem, quod regnum illud ecclesiasticum Romanense æternum subinde uocat: cum regnum Christi & sanctorum solum sit æternum: an non manifestissimè Papam collocat in sedem Christi Domini? Postquàm enim cuiusdam Nicolai pontificis testimonium recitasset, subiungit protinus, Audis summum pontificē à Constantino Deum appellatum, habitum pro Deo? Hoc uidelicet factum est, cum illū præclaro illo edicto decorauit, adorauit uti Deum, uti Christi & Petri successorem. Diuinos honores ei, quoad eius potuit, contulit, uelut uiuam Christi imaginem ueneratus est. Hæc ille sectione libri 67. Nec his disparia scripsit Sectione 28. Commemorans enim imaginationem quandam suam de Papa conceptam, fingit nescio quem fructum inde exoriturum, si apud extremos Indos referatur, omnia regna mundi nutibus Papæ regi, illum adorare reges, ut quibus perspectissimum sit hunc esse successorem Christi, ideoq̃ hos illum suspicere non tam mortalem hominem, quàm in eo Deum ipsum, qui eum sibi suffecerit in terris, ideoq̃ & à maledictis abstinere, si quid is ut homo peccet, propterea quod in eo uenerentur filiū Dei. Hos applausus impios, & has uoces adulatrices, imò sacrilegas tulisset Petrus, scilicet, qui Cornelium procumbentem, & adorare uolentem, erexit, & dixit, Surge, & ego ipse homo sum. Nam & ad Ioannem ad pedes angeli adorantem, le- Acto. 10.
gimus ipsum dixisse angelum, Vide nefeceris: conseruus enim tuus sum, & fra- Apocal. 22.

trum tuorum prophetarum. De Herode autem Agrippa scriptum est, quod adu-
latrices populi uoces acclamantis cōcionanti, Vox Dei & non hominis, non com-
pescuerit, ideoq; percussus sit ab angelo Dei, ac computruerit, erosus à uermibus.
Nos ergo cū sciamus ipsum Christum Dei filium adhuc regnare in ecclesia, ut
pote cui soli data sit omnis gloria & potestas, neq; hic sibi quenquam suffecerit in
terris, in quo colatur & adoretur, Christum Iesum Dei filium solū colimus & ado-
ramus, Papam ut Antichristum & deum Stercutium, siue malis Cloacinum, unā
cum sacrilegis suis encomiastis & assentatoribus blasphemis execramur.

Tu es Petrus,
Ec.

Dixit sanē Dominus ad beatum Petrum, Tu es Petrus: & super hanc petram
ædificabo ecclesiam meam: & tibi dabo clauēs regni cœlorū. Et cætera. Sed quid
hæc faciunt ad stabiliendam Papæ monarchiam, prærogatiuam, & sublimitatem?
Petrus à Domino laudatur à fidei constantia; unde & nomen accipit, Petrus à pe-
tra dictus, in quam se uera fide collocauerat. Christus petra est, cui innitebatur Pe-
trus. Audit is hoc perpetuum ecclesiæ fundamentum futurum, omnes inquam in
ecclesiæ cōsortium recipiendos, qui uera fide cum Petro confitentur Iesum Chri-
stum esse uerum Dei filium, ipsiq; ut unicæ petreæ & saluti innituntur. Promittun-
tur præterea Petro clauēs regni Dei: sed cū præstantur, non uni Petro, sed omni-
bus Apostolis dantur. Sunt autem Clauēs non dominatio & iurisdictio quædam
(sicuti isti nugantur) sed ministerium aperiendi & claudendi regnū cœlorum, in-
tromittendi in ecclesiam & excludendi, quod fit prædicatione Euangelij: uti mox
copiosius dicitur. Ad eundem modum cum Petro Dominus dixit, Pasce oues
meas, non monarchiam orbis & dominium in omnes creaturas tradidit Petro, sed
curam commisit pastorem. Qua de re dixi Sermone proximo: ut & aliàs sæpe
& fusius contra primatum Rom. pont. Ad ueteres ecclesiæ scriptores quos illi no-
bis obijciunt, nescio quid de primatu Petri testificantes, uno uerbo respondemus,
non perinde nos curare quid hic senserint ueteres, quā quid instituerit Christus
Dei filius, quid item Apostoli (quorum authoritas ueterum illorum scriptorum au-
thoritatem multò excellit) usurparint, & scriptis atq; exemplis suis sentiendum,
imitandumq; nobis reliquerint. De qua re dixi etiam Sermone huius Decadis 2.
Lōgius ferè sumus progressi quā institueramus: ut ergo receptui canamus, dixi-
mus de ordine siue munere quod in ecclesia sua instituit Dominus, & quos huic
præfecerit, quorum opera ecclesiam fundare, gubernare, prouehere & conserua-
re uoluerit. Quæ supersunt dicenda, differemus in crastinū. Prolixiora enim sunt
quā quæ hac hora absolui queant, digniora autem & præstantiora quā quæ
paucis perstringi debeant, &c.

Veteres de pri-
matu Petri &
Rom. Pont.

*De Vocatione ad ministerium uerbi Dei. Quales & quomodo oporteat in ecclesia uerbi
ministros ordinare. De Clauibus ecclesiæ: quodnam sit ordinatorum officium. De ra-
tione docendi ecclesiam, & uita pastorum sancta. S E R M O I I I I.*

S E R M O N E præsentī, Deo iuuante, qua possumus breuitate & perspi-
cuitate exponemus c. v. quales & quomodo hodie ministros nobis con-
ueniat ordinare, non iterum loquentes de munere, sed de personis mune-
ri idoneis. Neque enim arbitror aut necesse aut operæpretium esse multis demon-
strare, ordinem seu functionem in ecclesia à Christo institutam, etiam sine ordina-
bus illis quos posterioribus seculis instituit noua adinuentio, sufficere uel hodie
ad excitandam, gubernandam, conseruandamq; Dei ecclesiam in terris. Nam
id res ipsa clamat, euincitq; primitiue ecclesiæ absoluta perfectio. Ut autem per-
spiciat

spicue intelligatur ab omnibus, quos ecclesie ministros hodie ordinare conueniat, dicemus paulo copiosius de Vocatione ministrorum ecclesie. Vocatio aliud non est, quam idonei ministri legitima constitutio. Eadem & ordinatio & electio dici poterat: quanquam alia uox alia latius pateat. Electio praeit natura. Nam quos eligimus, eos uocamus. Ordinatio comprehendit utrumque. Numerantur autem ab omnibus fere quatuor uocationis genera. Priora duo sunt legitima, posteriora illegitima. Et primum quidem est, quo ministri neque ab hominibus, neque per hominem, sed per Deum uocantur. Sicuti uocati leguntur Isaias propheta, & apostolus Paulus. Haec fere signis aut miraculis confirmatur, & diuina arcanaque appellatur. Secundum uocationis genus fit a deo quidem, sed per hominum ordinationem. Quo genere creati leguntur ministri ecclesie beatus Matthias, Lucas, atque Timotheus. Hoc ordinarium, publicum, humanum & hodie uulgare est: in quo deus quidem uocat, dona ministris necessaria conferens, & leges suppeditans ijs qui eligunt: hi uero leges illas sequentes, ordinarie eum deligunt, quem ex signis a Deo prius uocatum esse conijciunt. Per signa intelligo dona ministris necessaria.

De Vocatione
ad ministerium,
& uocationis
generibus.

Tertium uero uocationis genus quod inter illegitima primum est, proficisci-
tur quidem ad hominibus, sed non a Deo: quando uidelicet ex fauore & propter
munera indignus aliquis ordinatur. Peccatur hic tam ab ordinandis, quam ab
ipsis ordinationi praefectis. Ab ordinandis, cum se ministerio praefici cupiunt, cui se
parum idoneos, quippe donis necessarijs destitutos, uel non intelligunt uel intel-
ligere nolunt. Vel cum satis quidem instructi sunt scripturarum rerumque peritia,
sed non recto pede ad hanc functionem accedunt, quando uidelicet non spectant
Dei gloriam, sed lucrum. Requiritur enim ab ordinandis conscientiae propriae tes-
timonium, & uocatio arcana, nimirum qua nobis probe sumus conscijs excitatos
nos esse ad hoc muneris capeffendum non ambitione, non auaritia, non pascendi
uentris gratia, non alio aliquo affectu prauo, sed sincero dei timore atque amore,
& edificandae ecclesiae Dei studio. De qua re elegantissime & sanctissime scripsit
beatus Paulus in 1. ad Thessal. cap. 2. Requiritur praeterea testimonium aliorum
eruditionis iustae peritiaeque rerum. Omnes enim nobis ipsis placemus & iudica-
mus nos dignos esse, quibus committatur gubernanda ecclesia, cum nosmetipsos
decipiamus foedissime. Peccant autem praefecti ordinationi, cum in ordinandis
ministris non spectant quid deus legibus editis hic fieri uoluerit, & quid ratio in-
columitasque ecclesiae postulet, sed quid e re sit ordinandi. Frequenter ergo ordina-
tur indigni. Vel qui sunt indocti & paru synceri. Vel qui satis quidem docti sunt,
sed non admodum integri. Vel qui simplices & boni Christiani sunt, sed mali &
parum prudentes pastores. Huc autem perpelluntur fauore, uel muneribus. Qua-
re grauissimam in se omnipotentis Dei iram prouocant, omniumque peccatorum
sefe reddunt participes, quorum auctores sunt parum dextre administrantes de
mandatam sibi prouinciam. Vetustas hoc scelus appellauit Simoniam, nunquam
delendo probro & morte sempiterna piandum. Anthemius imperator Armasio
scribens inter alia, Nemo gradum sacerdotij uenalitate pretij mercetur. Quantum
quisque meretur: non quantum dare sufficit, aestimetur. Cesset altaribus imminere
prophanus ardor auaritiae, & a sacris adytis repellatur piaculare flagitium. Ita ca-
stus & humilis nostris temporibus eligatur episcopus, ut quocumque locorum per-
uenerit, omnia uitae propriae integritate purificet: non pretio, sed precibus ordine-
tur antistes. Tantum ab ambitu debet esse sepositus, ut quæratur cogendus, roga-
tus recedat, inuitatus effugiat, sola illi suffragetur necessitas excusandi. Profecto

Vocatio ex fa-
uore & largi-
tione.

Simoniam.

enim indignus est sacerdotio, nisi fuerit ordinatus inuitus. Hæc ille, qui si hodie Romam ueniret, putaret se haud dubiè in alienum uenisse mundum, imò inemporium Simonis, non Petri, sed Magi & Samaritæ & Giesi Israelitæ.

Jerem. 23.

Opus uocationis
in ecclesia.

Actor. 13.

Hebr. 5.

Rom. 10.

Quartum uocationis genus illud est, quo quisque priuato suo arbitrio se implicat ministerio, non à Deo ordinatus, neque per hominem. De his dixit apud Ieremiam dominus, *Ipsi currebant, & ego non mittebam eos.* Cyprianus ad Antonianum, tales episcopatus uidelicet sibi usurpantes, nemine dante, nominat schismaticos. Et hoc uocationis genus improprie dicitur uocatio. Proinde uocatione eaque publica & legitima in ecclesia opus esse constat, cum propter multas alias causas, tum propter has potissimum, ut institutum dei non negligatur, utque retineatur disciplina ecclesiastica & omnes in ecclesia norint, qui sint ministerio præfecti ecclesiastico. Tamen si ergo apostolus & doctor gentium Paulus ab initio non ab hominibus, neque per homines, sed à solo Deo missus esset, idem tamen iubente spiritu sancto ab Antiochena ecclesia in ministerium gentium segregatur una cum Barnaba. Ad eundem modum missi uel uocati à Deo fuerunt multi alij, quos tamen etiam per homines ordinari oportuit. Nam Paulus alibi, *Nemo hoc sibi ipsi honoris usurpat, inquit, sed qui uocatur à Deo, sicuti Aaron.* Et iterum, *Quomodo audient absque prædicante?* Quomodo autem prædicabunt, nisi missi fuerint? Et reliqua.

Circa secundam illam uulgarem & in ecclesia hodie receptam, à domino autem traditam uocationem, tria consideranda uidentur, Quinam uocent, id est, qui nam habeant uocandi uel ordinandi ministros ius & potestatem. Deinde qui uel quales sint ordinandi. Postremo quomodo uocati sint initiandi.

Qui eligant in
ecclesia mini-
stros.

Actor. 14.

Ac principio dominum dedisse potestatem ecclesie suæ ius & potestatem eligendi & ordinandi idoneos ministros, superius in secundo huius Decadis Sermone ostendimus, exemplo uetustissimarum in mundo ecclesiarum Hierosolymitanæ & Antiochenæ: quarum illa non modò diaconos septem, sed apostolum Matthiam ordinauit; hæc autem apostolos Christi insignes, Paulum & Barnabam in ministerium segregauit. Quibus accedit, quòd ecclesie gentium instructæ à Paulo & Barnaba collatis suffragijs presbyteros, seu gubernatores ecclesiarum delegerunt. Primas in hac partes habuerunt pastores ipsi. Præeunte enim Petro creatur ab ecclesia Matthias apostolus. Hunc ritum annis multis diligenter custodiuit uetus ecclesia. Nam Cyprianus Epist. lib. I. epist. 4. Ipsa plebs maximè potestatem habet, inquit, uel eligendi dignos sacerdotes, uel indignos recusandi. Quod & ipsum uidemus de diuina authoritate descendere, ut sacerdos plebe præsentis sub omnium oculis deligatur, & dignus atque idoneus publico iudicio ac testimonio comprobetur. Sicut in Numeris præcepit dominus Mosi & dixit, *Prehende Aaron fratrem tuum, & Eleazarum filium eius, & impones eos in montem coram omni synagoga.* Coram omni synagoga iubet deus constitui sacerdotem. Id est, instruit & ostendit ordinationes sacerdotales non nisi sub populi assistentis conscientia fieri oportere, ut plebe præsentis uel detegantur malorum crimina, uel bonorum prædicentur merita, & sit ordinatio iusta & legitima, quæ omnium suffragio & iudicio fuerit examinata. Hæc ille. Hic mos durauit adhuc S. Augustini seculo. Extat enim epistola quæ ordine numeratur 110. quæ attestatur acclamante populo, Augustinum sibi Eradium ordinasse successorem. Posterioribus seculis, cum populus tumultuaretur frequentius in electionibus pastorum, ordinatio relata est ad delectos ex pastoribus magistratu & plebe. Hi tres uiros egregios proponebant uel nominabant, ex quibus qui uidebatur optimus deligebatur. Extat huius ali-

quid

quid in Iustiniani Imperat. Nouell. Constitut. 123.

Quibus autem uidetur omnem ordinandi ministros potestatem esse penes episcopos dioecesanos, uel archiepiscopos, his utuntur locis scripturæ, Ideo reliquit in Creta, ait ad Titum Paulus, ut constituas oppidatim presbyteros. Et iterum, Vide ne cui citò manum imposueris. Nos uerò dicimus apostolos in ecclesijs non exercuisse tyrannidē, & electionis uel ordinationis omnia solos peregrisse, exclusis alijs in ecclesia hominibus. Crearunt enim apostoli Christi episcopos uel presbyteros in ecclesia, sed communicato cum ecclesijs cōsilio, adeoque ex populi consensu & approbatione. Id quod claret ex electione seu ordinatione Matthiæ, quam iam semel & iterum citauimus. Dixit sanè in lege Mosi dominus, Iudices cōstitues tibi. Verùm alibi idem, Prouidebis ex omni populo, ait, quos præficias. Et rursus Moses ad ipsum populum, Date ex uobis, inquit, sapientes, qui præficiantur, &c. Quemadmodum ergo Moses proprio arbitrio nihil egit in electione magistratus, licet audisset, Iudices constitues tibi: sed omnia communicato cum plebe cōsilio; Ita haud dubiè beatus Titus, quamuis audisset, Constitues oppidatim presbyteros, intellexit tamen sibi hic nihil permissum inconsultis ecclesijs, quod ipsi priuatim uisum esset agere. Proinde nihil peccant, qui excusso iugo & tyrannide Romanensium episcoporum, ius illud pristinum à Christo concessum, ecclesijs, rationibus iustis & æquis recuperant. Neque admodum refert, ordinent idoneos ministros, uel delecti uiri graues ab ecclesia, uel ipsa ecclesia tota, idque uel per suffragia, uel per sortes, uel alia aliqua ratione commoda & sancta. In his enim non rixatur pietas, modò omnia sanctè & secundum ordinem fiant. Nolo autem hic commemorare artes, insidias, & grauià bella propter hoc ordinandi ius gesta multo cum sanguine, & regionū direptione, ac incendijs funestissimis. Historiæ de rebus Heinrychi 4. & 5. item de rebus Friderychorū satis apertè testantur, quàm impudenter & nephariè se cum coniuratis suis episcopis gesserint Romani præsules. Fortassis dabitur occasio hac de re alibi copiosius dicendi.

Nunc commemorabimus quales oporteat ordinare, utique non quoslibet, sed selectissimos, uiros religiosos, facultatibus omnigenis instructos, exercitatos in scripturis, tenentes mysterium fidei, fortes & constantes, sedulos, laboriosos, diligentes, fideles, uigiles, moderatos, uitæque sanctæ & probatæ, ne propter corruptelam uitæ & famam parum integram totum uilescat ministerium, & quod sana doctrina extruxerunt, praua uita rursus subruant. Canonem apostolicum recitabimus, omnia huius negotij plenissimè complectentem. Constitues presbyteros siue episcopos, inquit, si quis est inculpatus, unius uxoris uir, liberos habens fideles, non obnoxios crimini luxus, aut qui non sint intractabiles. Quòd si quis propriæ domui præesse non nouit, quomodo ecclesiam dei curabit? Oportet enim episcopum inculpatum esse, tanquam Dei dispensatorem (illud autem requiritur in dispensatoribus, ut fidus aliquis reperiatur) non præfractum, non iracundum, non percussorem, sed æquum, alienum à pugnis, non uinosum, alienum ab auaritia, non turpi lucro deditum, sed hospitalem, bonarum rerum studiosum, uigilantem, sobrium, iustum, pium, temperantem, modestum, aptum ad docendum, & tenacem eius qui secundum doctrinam est, fidelis sermonis, ut potens sit etiam exhortari per doctrinam sanam & contradicentes conuincere, ac ipsi obturare os. Non nouitium, ne inflatus in condemnationem incidat calumniatoris. Oportet autem illum & bonum habere testimonium ab extraneis, ne in probrum incidat & laqueum calumniatoris. Hæc omnia sunt Apostoli uerba ex epist. priore ad Timoth., & ea quæ ad Titum scripta est, recitata.

Episcopos solos non habere potestatem ordinandi.

Titum 1. 1. Tim. 5.

Deut. 16. Exod. 18. Deut. 1.

Quales sint ordinandi ministri.

Titum 1. 1. Tim. 3.

1. Cor. 4.

*Censura & exam-
men.*

*Quale fuerit
examen ueterū
episcoporum.*

Proinde iudicio hic erit opus exacto, & diligentia magna, quæ omnes doctrinæ & uitæ partes excutiat. Opus, inquam, erit seuera uitæ censura & examine eruditionis accurato. Neque enim hæc res parui est momenti. Omnis ecclesiæ incolumitas hinc dependet. Si ordinetur indignus & indoctus aliquis, tota ferè negligitur, imò peruertitur, subuertiturque ecclesia. Examē autem intelligimus nō puerile & scholasticum, sed graue & exactū, de scriptura & eius interpretatione uera, de cura pastoralī, de fidei sanæ mysterijs, deque alijs id genus capitibus. Ac ueteres quondā in his diligentissimos fuisse, uel inde claret, quod Aelius Lampridius in uita Alexandri Seueri cōmemorat, Christianis moris fuisse suorum episcoporum nomina toti proponere ecclesiæ priusquam fuerint recepti, si fortè aliquis e plebe indicare uoluisset indignum hunc esse qui tali præesset officio. Vnde & Iustinianus Imp. Constit. 123. Si tempore ordinationis, inquit, accusator aliquis exortus fuerit, qui dicat indignum esse ordinatione, differantur omnia, & præcedat examinatio ac censura. Nec grauabor in præsentī recitare Decretum super hac re Carthaginensis Concilij IIII. quod ita habet, Cum episcopus ordinandus est, antea examinetur, si natura sit prudens, si docibilis, si moribus temperatus, si uita castus, si sobrius, si semper sui negotij cauens, si humilis, si affabilis, si misericors, si literatus, si in lege domini iustructus, si in scripturarum sensibus cautus, si in dogmatibus ecclesiasticis exercitatus: & ante omnia si fidei documēta uerbis duplicibus (simplicibus fortè) asserat, id est patrem & filium, & spiritum sanctum unum deum esse confirmans, totamque trinitatis deitatem coessentialē & consubstantialē, & coeternalem, & coomnipotentem prædicans, si singulas quasque in trinitate personas plenum Deum, & totas tres personas unum Deum, si incarnationem diuinam non in patre, neque in spiritu sancto factam, sed in filio tantum credat: ut qui erat in diuinitate Dei patris filius, ipse fieret in homine hominis matris filius, Deus uerus ex patre, homo uerus ex matre, carnem ex matris uisceribus habens, & animam humanam rationalem simul in eo utriusque naturæ, id est deus & homo una persona, unus filius, unus Christus, unus dominus creator omnium quæ sunt, & author, dominus & rector cum patre & spiritu sancto omnium creaturarum; qui passus sit uera carnis passione, mortuus uera corporis sui morte: resurrexit uera carnis suæ receptione, & uera animæ resumptione, in qua ueniet iudicare uiuos & mortuos. Quærendum etiam ab eo si noui & ueteris testamenti, id est, legis & prophetarum & apostolorum unum eundemque credat authorem & dominum, si diabolus non per conditionem, sed per arbitrium factus sit malus. Quærendum etiam ab eo si credat huius quam gestamus, & non alterius carnis resurrectionem, si credat iudicium futurum, & recepturos singulos pro his quæ in carne gesserūt, uel pœnas, uel præmia, si nuptias non prohibeat, si secunda matrimonia non damnet, si carniū perceptionem non culpet, si pœnitentibus reconciliatis communice, si in baptismo omnia peccata, id est, tam illud originale contractum, quam illa quæ uoluntariè admissa sunt dimittantur: si extra ecclesiam catholicam nullus saluetur. Cum in his omnibus examinatus fuerit, & inuentus plenè instructus, tunc cum consensu clericorum & laicorum & conuentu totius prouinciæ episcoporum, maximeque metropolitani, ordinetur episcopus. Concilium hoc celebratum dicitur anno domini 400. Ista autem non ideo cōmemoro, quasi Conciliorū hominumque decretis innitar, aut existimem non omnia quæ ueræ salutis & perfectionis sunt, tradita esse sacris literis, sed ut admoneam aduersarios nostros, mores & facta ipsorum hodie non modò cū apostolicis doctrinis & exemplis, sed ne cum ueterum quidem decretis congruere, si fortè in semetipsos descendant, ac re-

licis

licitis hominum uarijs doctrinis, recipiant omnium uetustissimam traditionem & doctrinam certissimam sanctorum Apostolorum.

Venio iam ad postremum caput explicandū, quomodo uidelicet uocati sint *Quomodo uocati sint ini-*
 initiandi. Apostoli in ordinationibus suis adhortabantur ecclesiam ad ieiunia ac *tiandi.*
 preces: uocatos autem ipsos statuerunt in conspectum ecclesiae, impositisq; mani- *Actor. 13.*
 bus in capita ordinatorum committebant ipsis ecclesias. De Impositione manuū *Actor. 1.*
 dictum est aliās. Symbolum erat delegati muneris. Nec legitur ulla alia apud ue- *1. Tim. 4.*
 teres fuisse pastorum consecratio. Sicut & omnia alia simplicia & minimē sump- *2. Tim. 1.*
 tuosa fuerunt in primitiua apostolicaq; ecclesia. Sequentibus temporibus creue-
 runt ritus, sed ita tamen ut per initia quibusdam modum non omnino excessisse
 uiderentur. Mihi autem nimium esse uidetur, quod diuinæ institutioni humano
 adiicitur arbitrio. Et quid obsecro necesse est institutis apostolicis assuere sentia-
 menta & consuetudines humanas? Cur non sufficit tibi manuum impositio, quæ
 sufficebat beatis apostolis te longè sanctioribus & rerum diuinarū peritioribus?
 Accessit postea oleum, accessit liber euāgelicus. Sic enim decernit Carthagineñ.
 Synodus I I I I. Episcopus cum ordinatur, duo episcopi ponant & teneant euan-
 geliorum codicem super caput & ceruicem eius, & uno super eum fundente be-
 nedictionem, reliqui omnes episcopi qui adsunt manibus suis caput eius tangant,
 Posteriores his & pallium addiderunt. Cæterum hodie nullus est ceremoniarum, imò *Pallium,*
 ineptiarum finis. Si quis horum ritus conferat diligenter cum Aaronis & Iudai-
 corum sacerdotum cultu, iurabit totum Aaronismum esse ab illis reductum in ec-
 clesiam, imò hunc illo multò esse instructiorem & onerosiorem, idq; contra doctri-
 nam euangelicam. Vt iam non commemorem consecrationem illorum luxu, su-
 perbia & offensione planè esse & infamem & refertissimam, ideoq; intolerabilem.
 Accedit his aliud, quòd apud ueteres consecratio licet creuisset ritibus adiectis,
 gratis tamen conferebatur, neq; erat aliquid in ipsa uel in toto Christi templo ue-
 nale. Quanti uerò hodie à Rom. Chananæo diuendantur pallia, & quantis sum-
 ptibus fiant consecrationes, turpe est uel dicere. Gregorius in Synodo Romana *Gratis olim col-*
 sub Mauritio & Theodosio celebrata, inter alia sic decernit, Antiquam patrū re- *latum pallium.*
 gulam sequens, nihil unquam de ordinationibus accipiendum esse constituo,
 neq; ex datione pallij, neq; ex traditione chartarum. Quia enim ordinādo episco-
 po pontifex manum imponit, euangelicam uerò lectionem minister legit, confir-
 mationis uerò huius epistolam notarius scribit: sicut pontificem manum quā im-
 ponit, non decet uendere: ita minister uel notarius non debet in ordinatione uo-
 cem suam aut calamum suum uenundare. Quòd si quis aliquid commodi inde
 petere præsumperit, in dictiōis omnipotentis Dei examine reatui subiaceat. Ad-
 dit tamen protinus. Cæterum si ordinatus, non exactus, sed sua sponte, gratiæ tan-
 tummodo causa, aliquid offerre uoluerit, concedimus.

Expofui hactenus quales & quomodo oporteat in ecclesia Dei ordinare epi- *Cur ordines nō*
 scopos siue pastores: & quamuis ex ijs nullo possit colligi negotio, cur hodie non *recipiantur ab*
 sustineamus ordinari ab illis qui uocantur & soli uidentur sibi esse legitimi ordi- *episcopis Papi-*
 narij, utpote in Romana ecclesia, successione perpetua descendentes ab aposto- *sticis.*
 lis, dicā tamē aliquando, si possum, significantius. De successione episcoporum siue
 pastorum continua, & de ecclesia dictum est aliās, ut superuacuum sit hic repete-
 re & inculcare eadem. Euicimus etiam nostras ecclesias ueras esse Dei ecclesias,
 tametsi cum Romana nupera non consentiant. Ac ecclesias ueras constat ius ha-
 bere ordinandi pastores, siue hoc fiat totius ecclesiæ suffragijs, siue delectorum ab
 ecclesia iudicio legitimo. Vnde consequens est, legitimè esse ordinatos, quos no-

Galat. 1.

Iuramentum
episcoporum.

stræ imò Christi ordinarunt ecclesiæ. Ac graues sunt causæ cur ab ordinarijs papisticis suos ministros ordinari detrectent sanctæ Dei ecclesiæ. Etenim S. Paulus, Etiam si nos, ait, aut angelus è cœlo prædicauerit uobis euangelium, præter id quod prædicauimus uobis, anathema sit. Prædicant autem isti euangelium præter id quod à Paulo prædicatum est: id quod de sensu (in quo plus est periculi) non de uerbis intellectum uolumus. Proinde cœlitus percussis sunt isti anathemate. Quis uerò sustineat ordinari ab anathemate percussis? Præterea præcipuum in ordinatione est doctrina euangelica. Cum in hoc maximè ordinentur ministri ecclesiæ, ut purum Christi euangelium syncerè & citra admixtionem traditionum humanarum populo annuncient. Hoc autem ipsum isti ordinandis non modò prohibent seuerissimè, sed & iuramenti formula exhibita abiurare compellunt. Sunt enim ipsi non Christo, sed Papæ contra Christum iuramento impijssimo obstricti. Inter alia enim sic iurant episcopi delecti, Ego N. electus N. episcopus ab hac hora in antea fidelis ero & obediens beato Petro sanctæq; apostolicæ Rom. ecclesiæ & domino nostro N. Papæ suisq; successoribus canonicè intransibus. Confiliū quod mihi credituri sunt, per se, aut nuncios, seu literas, ad eorum damnum, me sciente, nemini pandam. Papatū Romanum & regalia S. Petri adiutor eis ero ad retinendum & defendendum contra omnem hominem. Iura, honores, priuilegia & auctoritatem Romanæ ecclesiæ domini nostri Papæ & successorum prædictorum conseruare, defendere, augere & promouere curabo. Nec ero in consilio, in facto seu in tractatu, in quibus contra ipsum dominum nostrum uel eandem Romanam ecclesiam aliqua sinistra uel præiudicialia personarum, iuris, honoris, status & potestatis eorum machinentur. Et si talia à quibusdam machinari cognouero uel procurari, impediam hoc pro posse, & quantocyus potero commodè significabo eidem domino nostro, uel alteri per quem ad ipsius notitiā possit peruenire. Regulas sanctorum patrum, decreta, ordinationes, sententias, dispositiones, reseruaciones, prouisiones & mandata apostolica totis uiribus obseruabo, & faciā ab alijs obseruari. Hæreticos & schismaticos & rebelles domino nostro, pro posse persequar & impugnabo. Hæc illi cum ad hunc modum iurent, quis obsecro Iesu Christi, ecclesiæ eius, ueræq; fidei, adde & reipub. fidelis amans, à talibus ordinari sustineat? Euangelij & ipsius domini nostri Iesu Christi in iuramento nullus fit sermo. Scripturarum sanctarum nulla, sed regularum & ordinationum paternarum diligentissima fit mentio. Nominatur Petrus, sed non apostolus ille Christi dicens, Aurum & argentum non habeo, uerum alius nescio quis regalia habēs. Nominatur quidem apostolica ecclesia, uerum mox per interpretationem qualem intelligi uelint subiiciunt, & papatum appellant. Papatum hunc, non ecclesiam Dei, papatum inquam & papatus honores, priuilegia & iura contra omnem hominem, en contra omnem hominem promittunt se defensuros. Papam enim agnoscūt esse dominum suum, contra quem nolint unquam machinari quicquam, imò si intelligant alios aliquid contra Papam & papatum moliri, indicium & auxilium fidum stipulantur. Non arbitror autem quenquam se ulli arctius obstringere posse. Nec obscurum est quos isti appellent hæreticos, non hostes fidei Christianæ, non doctores alienorum à scripturis dogmatum, sed rebelles Papæ: eos inquam, qui ut iura & decreta Papæ negligunt, solas scripturas prædicant, ita Christo omnem gloriā tribuunt, tanquam unico capiti & summo Sacerdoti ecclesiæ, atq; idcirco Papam docent nec caput, nec summum esse ecclesiæ sacerdotem. Quis autem ueræ pietatis amans tali se obstringat iuramento? Quis amicitia renunciet Christo, mancipium autem & suppedaneum sese subternat Pontifici Romano?

Romano: Quis denique ab illis qui hoc fecerunt, Christi atque Christianæ ecclesiæ minister ordinari postulet?

Hic accedit, quod in consistorio Romano, omnia ordinis sacri sint corruptissima, adeo ut uix aliqua institutionis Christi indicia appareant. Non commemorabo in præsentiquod constitutiones hominum nouæ accesserunt plures, quod nulum ferè restat ecclesiæ in ordinandis pastoribus suffragium, nullus deputatorum ecclesiæ delectus. Ius enim præsentationis, collationis & confirmationis ad plurimos dispersum, apud quosdam factum est etiam hæreditarium, ut et fatui aut semimoriones fieri possint Episcopi: illud autem præterire nõ possum, perijisse apud illos iustum examen & pastorem seu ueritatem disciplinam. Equidem restat examen, sed puerile prorsus, in quo ferè ordinandi rogantur quod in ludo triuali solent scholastici, an quis possit bene legere, construere, canere atque computare? Negare hoc non possunt, ut ne illud quoque, quod sacerdotes magis ordinantur ad legendum, psallendum & missandum, quam ad gubernandam uerbo Dei ecclesiam. Vnde potior ferè uocis ad canendum idonea ratio habetur, quam peritiæ seu experientiæ in sacris literis. Egregie uerò rem existimant confectam, si muneri pastoralis præficiatur non ineptus aliquis iurisperitus. Nam feliciter litigare in foro pro augendis & conseruandis opibus, utilius propemodum esse uidetur, quam bene concionari in templo pro lucrandis animabus. Quid quod ex curia, ex regum & principum aulis uidemus ad occupandas ecclesias missos homines, ad quiduis potius quam ad regendas Dei ecclesias aptiores? Munia enim ecclesiastica coeperunt haberi ceu principum donatiua: unde & beneficia sunt appellata. Ipsi Rom. pontifices coquis suis, cupediarijs militibus, tonsoribus & mulionibus contulerunt sacerdotia, & honestius quidem hoc quam cum contulerunt lenonibus. Bona pars sacerdotum ad ministerium sanctum uiolentia & per Simoniam pene trauit, in quo tamen bene ministrare nec potuit, nec uoluit. Qui uerò honestiore titulo recipiuntur, per commendationem & fauorem recipiuntur. Valet hic plurimum uel affinitas, uel agnatio & consanguinitas. In his omnibus maior habetur uentris quam ministerij ratio, magis prospicitur ipsis sacerdotibus non sacerdotibus, quam ecclesiæ Dei & salutis animarum. Hoc autem modo corruunt omnia in ecclesia, & opprimitur grex Dei pondere & ruina pastorum.

Huc pertinet pluralitas, ut uocant, beneficiorum. Vnus aliquis uel miles uel ^{pluralitas bene} curtisanus, sex aut plura non raro beneficia ad se, Papa ipsi obijciente, rapit, quos ^{ficiorum.} rum curam non habet ullam, nisi in recipiendo. Nunquam enim docet, imò rarissime adest gregi, nisi dum tondet. Interea grex Domini negligitur & perit. Nam qui præficiuntur uicarij ab illis, indocti ferè & mercenarij sunt. Qui minimum accipit, præficatur gregi qualis qualis sit. Et satis quidem doctus esse uidetur, si possit legere, canere, missare, confessiones audire, inungere, & Euangelium ex codice die Dominico recitare. Quæ restant præterea, illis leuicula esse uidentur.

Pudet autem ac piget commemorare, qualis in ecclesia morum remanserit censura. Res clamat, & experientia testatur, indignos non esse exclusos ab hoc ministerio sancto. Admissi enim sunt promiscue omnes, & tolerantur adhuc fornicarij, ebrii, aleatores, & uarijs flagitijs coinquinati, imò cooperti homines. Sed ne hic nihil facere uiderentur, rogauit in ordinatione Episcopus, Qui digni sint honore? Ac respondit protinus is Episcopo qui antea non uidit aut non nouit quales sint de quibus testificatur, Digni sunt. Præterea tot & tales in consecratione ceremonias usurpant, ut Euangelicæ ueritatis studiosus illas recipere incolumi conscientia non possit. Hæ & aliæ his non dissimiles causæ faciunt,

Ec

quò minus sustineamus ordinari à Romanæ ecclesiæ ordinarijs uel Episcopis.

*Quodnam sit
officium ordi-
natorum in ec-
clesia.*

Restat ultimum quod initio huius tractationis explicandum proposuimus, quodnam sit ordinatorum in ecclesia ministrorum officium. Id uno uerbo efferre possumus, Gubernare Dei ecclesiam, uel pascere gregem Christi. Paulus enim Apostolus sermonem habens ad pastores Asianos, Attendite uobis, inquit, & cuncto gregi, in quo uos spiritus sanctus posuit Episcopos, ad regendum seu pascendum ecclesiam Dei, quam acquisiuit sanguine suo. Regunt autem ecclesiam Dei pastores uerbo Dei, uel doctrina sana, & sancto uitæ exēplo. Rursus enim S. Paulus ad Timotheum, Esto forma fidelium in sermone, in conuersatione, in dilectione, in spiritu, in fide, in puritate. Eadem scribit & ad Titum cap. 2. Quoniam uerò Pontificij de officio uel munere Episcoporum longè alia comminiscuntur, eaq̃ sicut & alias nugas suas confirmant clauium authoritate seu potestate, sicut commemorauī cū differerem de potestate ecclesiastica, dicam ante omnia nona, & quantum huic negotio satis esse putauero, de Clauibus.

*De Clauibus
ecclesie.
Luce 11.*

Clauis instrumentum est omnibus cognitissimum, quo portæ, ostia & arca uel clauduntur uel recluduntur. Transfertur à rebus corporeis ad spirituales, diciturq̃ Clauis scientiæ & regni cœlorum. Dominus enim in Euangelio Lucæ, Væ uobis legisperitis, inquit, qui tulistis clauem scientiæ: ipsi non introistis, & eos qui introibant uetulistis. Eandem sententiam beatus Matthæus sic effert, Væ uobis scribæ & pharisæi, quia clauditis regnum cœlorum ante homines. Vos enim non intratis, nec aduenientes finitis intrare. En quod Lucas dixit auferre clauē scientiæ, id Matthæus exponit per Cœlum claudere. Est ergo clauis scientiæ, ipsa institutio de uita beata, quomodo eius participes fiamus. Aufert clauem, qui populum non instituit de uera beatitudine, uel obstat quò minus alijs rectè instituant. Proinde Clauēs regni cœlorum, aliud nihil sunt quàm ministerium prædicationis Euangelij seu uerbi Dei, à Deo ministris suis commissum, ut omnes erudiantur qua uia tendatur in cœlum, qua descendatur in tartara. Has Clauēs promisit Petro &

Matth. 16.

in ipso omnibus alijs Apostolis Dominus, cū dixit, Tibi dabo clauēs regni cœlorū. Et quicquid alligaueris in terra, erit alligatum in cœlis: & quicquid solueris in terra, erit solutum & in cœlis. Inquiramus ergo ubi Petro & alijs traditæ sint clauēs. Et concors quidem omnium consensus est datas esse in die resurrectionis. Constat autē eo die commissum esse Apostolis ministerium seu functionem prædicandi Euangelij: unde cōsequens est, Clauēs nihil aliud esse quàm ministerium prædicandi in omnes gentes Euangelij. Hoc enim mundo annunciat, partam per Christum salutem communicari credentibus, incredulis patere tartara. Sed audiamus iam sanctorum Euangelistarum testimonia. Ioānes Apostolus & Euangelista, Venit, ait, ad discipulos suos Dominus, & dicit illis, Pax uobis. Sicut misit pater, ita ego mitto uos. Hæc cū dixisset, flauit in eos, & dixit, Accipite spiritum sanctum. Quorumcunq̃ remiseritis peccata, remittuntur eis: quorumcunq̃ retinueritis, retenta sunt. Congruunt hæc cum uerbis quibus clauēs promisit. Ibi enim dixit, Quicquid alligaueris in terra, erit alligatum in cœlis. Hic dicit, Quorumcunq̃ retinueritis peccata, retenta sunt. Ibi dixit, Et quicquid solueris in terra, erit solutum in cœlis. Hic dicit, Quorumcunq̃ remiseritis peccata, remittuntur eis. Proinde ligare est peccata retinere, soluere est peccata remittere. Dicis, Quomodo remittunt homines peccata, cū scriptum sit solum Deum remittere peccata? Adhibeantur ergo alia aliorum Euangelistarum testimonia, eandem historiam in die resurrectionis factam contextentia. Lucas, Tunc aperuit mentem illorum Dominus, inquit, ut intelligerēt scripturas, & dixit eis, Sic scriptum est, & sic oportebat

Ioan. 20.

Luce 24.

tebat Christum pati & resurgere à mortuis tertio die: & prædicari in nomine eius pœnitentiam & remissionem peccatorum in omnes gentes. Marcus uerò, Discumbentibus apparuit, ait, & exprobrauit incredulitatem eorum, & dicebat illis, Ite in mundum uniuersum, & prædicate Euangelium omni creaturæ. Qui crediderit & baptizatus fuerit, saluus erit: qui non crediderit, condemnabitur. Solus ergo Deus condonat peccata credentibus in nomine Christi, id est, propter meritum & propitiationem Christi: sed peccata remissa esse certò annunciant ministri prædicatione Euangelij, ac ea prædicatione ligant & soluunt, remittunt & retinent peccata. Exemplo uno aut altero res fiet illustrior. S. Petrus ad Hierosolymitanos ciues uerba faciens, Resipiscite, inquit, & baptizetur unusquisque uestrum sub nomine Iesu Christi in remissionem peccatorum, & accipietis donum spiritus sancti. Sic autem Petrus Apostolus clauibus sibi creditis usus est: sic soluit in terris, hominibusque peccata remisit, promittens uidelicet certam peccatorum remissionem per Christum credentibus. Quod nuncium ratum habuit Deus, conferens fidelibus peccatorum remissionem, sicuti crediderunt. Præterea custos carceris Philippici, Silæ & Paulo perculsus dicit, Domini, quid me oportet facere ut saluus fiam? Responderunt Apostoli, Crede in Dominum Iesum: & saluus eris tu & tota domus tua. Absoluerunt ligatum Apostoli, & remiserunt ei peccata, per clauis, id est, per prædicationem Euangelij, cui cum credidisset in terris, absolutum iudicauit Dominus in cœlis. Hæc petita sunt ex Actis Apostolorum. In iisdem legimus exempla contraria huiusmodi, Iudæi repleti zelo, contradicebant his quæ dicebantur à Paulo, ac conuiciabantur. Paulus autem & Barnabas sumpta fiducia, dixerunt, Vobis oportebat primum loqui sermonem Dei, sed quoniam repelitis illum, & indignos uos iudicatis uita æterna, ecce conuertimur ad gentes. Rursum cum idem Paulus Corinthijs Iudæis Christum prædicasset, & hi reclamantes conuiciarentur, Apostolus uestibus excussis, Sanguis, inquit, uester super caput uestrum. Mundus ego posthac ad gentes uadam. Sic autem ligauit incredulos. Et Deus prædicationem Pauli ratam habuit: quia ab ipso Deo erat profecta. Ac nisi propriam ueramque seræ clauem inferas, nequiquam aperies. Vera & genuina clauis est purum uerbum Dei: adulterina & furtiua clauis est doctrina à uerbo Dei aliena traditioque humana. Satis claris opinor scripturæ testimonijs euici, clauis Apostolis & pastoribus ecclesiæ adeoque ipsi ecclesiæ datas, aliud nihil esse quàm ministerium docendi ecclesiam. Doctrina enim Euangelica ueluti clauibus quibusdam aperitur regni cœlorum ianua, cum certa & expedita ostenditur ratio & uia per fidem ueram perueniendi in participatum Christi & gaudia uitæ æternæ. Diuino testimonio humanum accedit. Nam beatus Ioannes Chrysostomus in Matth. cap. 23. Clauis, inquit, est uerbum scientiæ scripturarum, per quam aperitur hominibus ianua ueritatis. Clauicularij autem sunt sacerdotes, quibus creditur est uerbum docendi & interpretandi scripturas. Alia ueterum scripturæ interpretum testimonia, ab his nostris nihil discrepantia, studio & breuitatis causa non adduco.

Hæc cum ita habeant fratres, & disertis tradita sint nobis scripturis, non magnopere curabimus porro quid garriant Pontificij de potestate clauium, & quæ inde deriuent officia, dignitates, prælaturas, & nescio quid aliud & quam potestatem sacerdotum. Nos didicimus, non ex hominum sermonibus aut opinionibus, sed ex ipso uerbo Dei aperto, Clauis esse ministerium uerbi Dei prædicandi, & Clauis datas esse Apostolis & eorum successoribus, id est, prædicandi functionem de remissione peccatorum, de pœnitentia ac uita beata commissam.

Vnde petenda
sit doctrina.

Malach. 2.

Ezech. 3.
Jerem. 23.

Matth. 28.
Marc. 16.
Rom. 1.

1. Pet.

Nō permissum
est episcopis no-
uas condere le-
ges.

Vnde illud iam concludimus, præcipuum pastoris ecclesiastici officium esse, illas ipsas claves, quas Dominus Apostolis tradidit, & non alienas usurpare: hoc est, solum & purum uerbum Dei prædicare, neque aliunde quam ex ipso uerbo Dei doctrinam petere. Est enim perpetua inuiolabilisque lex hodie nostris quoque imposita pastoribus, quæ legitur imposita fuisse etiam uetustissimis ecclesiæ gubernatoribus, ipso Domino attestante apud Malachiam, ac dicente, Fœdus meum fuit cum Leui uitæ & pacis, & dedi ei timorem, & timuit me, & à facie nominis mei expauit. Lex ueritatis fuit in ore eius, & iniquitas non est inuenta in labijs eius. In pace & rectitudine ambulauit mecum, multosque ab iniquitate auertit. Labia enim sacerdotis custodient scientiam, & legem requirent ex ore eius: quia angelus Domini exercituum est. Rursus Ezechiel dicit Dominus, Audies ex ore meo uerbum, & annuntiabis eis. Apud Ieremiam dicit Dominus, Propheta apud quem est somnium, narret somnium: & qui habet uerbum meum, loquatur uerbum meum. Distinguit disertè inter diuina & humana, inter ea quæ ex Dei uerbo sunt, & ea quæ hominum electione finguntur, quæ uti incerta & somnia omittere iubet, Mox enim subiungit, An non uerbum meum est sicut ignis, dicit Dominus, & sicut maleus conterens petram? Et iterum, Ne audieritis uerba prophetarum qui uobis prophetant: decipiunt uos, uisionem cordis sui loquuntur, non ex ore Domini. Omnes itaque ueri Dei prophetae id continuo in ore habent, Hæc dicit Dominus. Os Domini locutum est. Proinde nihil alienum à uerbo Dei tradiderunt populo. Erat scriptura quoque populo ueteri. Et prophetae nihil aliud erant quam interpretes legis, applicantes hanc loco, tempori, rebus & personis. Sed & Dominus noster Iesus Christus non semel dicit doctrinam suam non esse suam, sed patris. Id si ad uerbum intelligas, haud scio an aliquid magis absurdum dici possit. Intelligit ergo Dominus doctrinam suam non esse humanam, sed diuinam. Quid quod ipse ubique ad scripturam legis & prophetarum relegat, & sua ex illis confirmat? Est autem Christus unicus religionis doctor, & uitæ magister uniuersæ à Deo patre propositus ecclesiæ. Huic & ipse doctores mittens, & quid ipsi ecclesiæ tradant, ostendens, dicit, Docete eos seruire ea quæ ego præcepi uobis. Item, Ite in orbem uniuersum, & prædicate Euangelium omni creaturæ. At Paulus Apostolus testatur Euangelium promissum esse per prophetas Dei in scripturis sanctis. Hanc autem doctrinam à Christo acceptam, nationibus tradiderunt Apostoli, nihil ei adijcientes, nihil detrahentes: simul autem exposuerunt scripturas prophetarum ueteres: sed ne hic quidē suo aliquid indulgentes ingenio, aut suo permittentes arbitrio. Nam Apostolus Petrus, Ut quisque accepit donum, inquit, alius in alium illud ministrantes, ut boni dispensatores uariæ gratiæ Dei. Si quis loquitur, loquatur ut sermones Dei. Sed & Tertullianus in Præscript. hæret. (quod alibi quoque citauimus) disertè dicit, Nobis nihil ex nostro arbitrio indulgere licet, sed nec negligere quod aliquis de arbitrio suo induxerit. Apostolos Domini habemus authores, qui nec ipsi quicquam ex suo arbitrio quod inducerent elegerunt, sed acceptam à Christo disciplinam fideliter nationibus assignauerunt. Itaque si etiam angelus de cœlis aliter euangelizaret, anathema diceretur à nobis. Hæc ille. Præterea demonstrauimus in Sermonibus de Fide & de Ecclesia, à solo Dei uerbo pendere fidē, & unico Dei uerbo unice inniti fidem: uerbo item Dei non doctrinis hominum construi & conseruari ecclesias Dei: quæ omnia huc pertinere uidentur.

Nec enim permissum est Episcopis ecclesiæ Christi, sicuti falsò gloriatur Papistici pastores, nouas statuere leges, ac noua proferre dogmata. Doctrina enim Christi Apostolis tradita, simpliciter est recipiēda ab ecclesia, & simpliciter ac pure tradenda

tradenda à pastoribus ecclesiæ, quæ est cœtus Christi uerbo credentium. Quis autem nesciat pronunciatum esse à propheta, Omnis homo mendax, solus Deus uerax: Et ecclesia est columna & basis ueritatis, quia ut ueritati scripturarum innititur, ita non aliam quàm scripturis traditam profert, aut prolatam recipit doctrinam. Quis uerò gloriam soli Deo debitam, sibi etiam usurpet? Solus Deus totius generis humani, in ijs maximè quæ attinent ad religionem & uitam beatam, legislator est. Isaïas enim, Dominus, inquit, est iudex noster: Dominus legislator noster: Dominus rex noster, ipse seruabit nos. S. Iacobus item, Unus, inquit, est legislator qui potest seruare & perdere. Deus hoc sibi uelut proprium asserit, ut legibus uerbi sui regat suos, in quos solus habet ius uitæ & necis. Quinimò non possunt piæ leges esse, quæ suo arbitrio fidem docere & cultum Dei præscribere præsumunt. Doctrina fidei & cultus Dei, nisi diuina sit, nihil minus est quàm quod esse dicitur. Solus Deus docet nos quæ sit uera fides, quis ei placeat cultus. Ideoq; apud Matthæum ex Isaïa filius Dei pronunciauit, Frustra me colunt, docentes doctrinas præcepta hominum. His accedit & illud, quòd ex nouis hominum constitutionibus semper enascitur mirus uerbi Dei legumq; diuinarum neglectus, adde & contemptus. Nam propter traditiones nostras, quod & in Euangelio dixit Dominus, præuaricamur & paruipendimus præcepta Dei.

Isaie 33.

Iacobi 4.

Matth. 15.

Postquam autem constat unde sit pastori seu doctori petenda doctrina, non aliunde quàm ex scriptura noui & ueteris testamenti, quæ est certissimum & ueracissimum uerbum Dei, ideoq; hanc doctrinam esse certam & definitam, dicendum porro erit nonnihil et de ratione docendi, quam sequatur doctor siue pastor ecclesiasticus. Atq; hic summas duntaxat rerum perstringam. Ante omnia autem requiritur à pastoribus, ut perpetuò id sibi dictum existiment, quod Archippo inculcare iussit Apostolus, Vide ministerium quod accepisti à Domino, ut illud impleas: deniq; ne unquam oculos detrahât à uiua illa boni & mali pastoris pictura, quam Ezechiel illustris propheta ad hunc modum proposuit, Sic dicit Dominus Deus, Væ pastoribus Israel qui pauerunt seipsos. Nonne pastorum est pascere gregem ipsum? Pinguedinem comeditis, & lana induimini, & quod crassum est mactatis, oues autem ipsas non pascitis. Doloze correptam non consolidastis, ægrotam non sanastis, contractam non ligastis, propulsatam non reduxistis, & perditam non quaesistis: quin & cum duritia & sauitia dominati estis eis. Et iterum, Ego pascam oues meas, dicit Dominus Deus. Perditam requiram, propulsatam reducam, contractam sanabo, infirmam roborabo, pinguem uerò & firmam coërcebo, & pascam in iudicio. Hinc colligimus boni pastoris esse pascere non deuorare gregem, ministrare non dominari, salutem ouium non priuatam rem querere. Perditam item ouem requirere, id est, eos qui abhorrent à ueritate & uersantur in tenebris errorum in ecclesiam & lucem ueritatis pertrahere: propulsatam, nimirum separatam à consortio sanctorum, priuati alicuius affectus gratia, restituere & reducere: contractam sanare siue obligare: uulnera enim peccatorum notat, quæ & Ieremias curare præcipit: deniq; infirmam & languentem roborare non prorsus contere: ac firmam, id est, homines in uirtutibus florentes coërce, ne superbiant in donis Dei, ac excidant. Cogitet autem hæc non posse perfici nisi sana & perpetua doctrina deriuata ex uerbo Dei.

Scopus pastorum

ecclesiæ.

Coloss. 4.

Ezech. 34.

Iere. 8. & 30.

Isaie 42.

Matth. 12.

Docendi ratio extendit se ad publicas doctrinas & priuatas. Publica doctrina instituit pastor publicè uel Catechumenos uel Perfectiores. Catechumenis quidem tradit elementa ueræ religionis. Comprehendit enim Catechesis rudimenta fidei doctrinæ Christianæ, nempe capita fœderis, decalogum, symbolum Apo-

De ratione docendi ecclesiæ.

*Interpretatio
scripturæ.*

2. Pet. 1.

Applicatio.

2. Timoth. 2.

Matth. 5.

Titum 1.

stolorum, Orationem Dominicam, & breuem sacramentorum explicationē. Vete-
res ecclesiæ Catechistas habuere peculiariter huic muneri consecratos. Cōmen-
dauit autem nobis Dominus in utroq; testamento miris obtestationibus pubem,
præcipiens ut ipsam tempestiuè & diligenter in uera religione instituamus. Ma-
gna insuper præmia & grauissimas pœnas proponit. Nullus certè fructus ab au-
ditoribus catechesi non probè instructis expectari potest in ecclesia. Nesciunt e-
nim qua de re loquatur doctor ecclesiæ, cū audiunt nominari Fœdus, Præce-
ptum, Legem, Gratiā, Fidē, Orationē, Sacramenta. Proinde maximam hīc,
sicubi aliās, adhibere decet diligentiam. Perfectiorum doctrina uersatur præcipuè
in expositione scripturæ sanctæ. Ex ueterum Episcoporum scriptis constat in pri-
mitiua illa felici & sanctissima ecclesia moris fuisse, non partes aliquot librorum
canonicorum, neque locos aliquot delectos ex his, sed libros integros tam noui
quàm ueteris testamēti enarrare ecclesijs. Neq; hinc modicus ad ecclesias redibat
fructus. Sicuti hodie quoque experimur ecclesias non posse erudiri melius, & has
non posse affici uehementius, quàm ipsis Dei uerbis, fidelicq; interpretatione libro-
rum Euangelij, legis, prophetarum & Apostolorum. Vbi obiter monemus inter-
pretationem scripturarum non esse quiduis confingendi & quolibet detorquen-
di scripturas libidinem, sed scripturarum religiosam collationem & donum sin-
gulare sancti spiritus. Nam S. Petrus, Scriptura prophetica non est, ait, priuatæ in-
terpretationis. Proinde nemo habet potestatem scripturas exponendi pro suo ar-
bitrio. Neq; alligatur maiori parti melior expositio, quasi melior sit interpretatio
quæ plures habet consentientes. Ita enim Christianismum multis parafangis præ-
cederet Arianismus et Turcismus. Melior expositio est, quæ non pugnat cum fide
& dilectione, nec detorquetur ad defendendam ac propagandam hominum glo-
riam & auaritiā. Verū dixi de Interpretandis scripturis Sermonē 2. Decad. 1.
Nisi uerò commodè applicetur scriptura pro ratione locorum, temporum, rerum
& personarum cuiuslibet ecclesiæ, & in hunc finem (quod & 3. Sermonē huius
Decadis inculcaui) ut ædificetur ecclesia, nō ut doctior aut eloquentior uideatur
doctor ecclesiasticus, nullo sanè cum fructu enarrauerit plebi libros scripturæ ca-
nonicos. Cōmendat nobis Dominus prudentem dispensatorem, & ait, Quis nam
est fidelis dispensator & prudens, quem constituet Dominus super famulitium
suum, ut det illis in tempore demensum cibum? Et quæ sequuntur Lucæ 12. Pau-
lus quoq; scribens Timotheo Episcopo dicit, Stude teipsum probatum exhibere
Deo, operarium non erubescens, rectè secantem sermonē ueritatis. Cibus inu-
tilis est, nisi disseccetur in partes. At hīc nouit paterfamiliās quas partes ministret
singulis in sua familia, non illud spectans quid quemuis delectet, sed quid cuique
maximè profit. Idem Apostolus omnia doctoris ecclesiastici ad ædificationē diri-
genda esse docens, dicit, Qui prophetat hominibus, loquitur ædificationē & ex-
hortationem & consolationē. Ergo ad perfectiorum doctrinam pertinet non tan-
tū scripturæ sanctæ expositio, sed & dilucida uel maximè perspicua dogmatum
uel rerum Christianarum demonstratio, in primis autem clara de Pœnitentia &
Remissione peccatorum in nomine Christi doctrina: item obiurgatio opportuna
& acris, uel grauis sed prudens scelerum accusatio. Nam Dominus Apostolis lo-
quens, Vos estis sal terræ, ait, si sal infatuatus fuerit, quo salietur? Huc pertinet cō-
futatio quoq; errorū & hæresum oppressio, assertioq; doctrinæ orthodoxæ. Pau-
lus enim ait, Oportet uaniloquis & mentium seductoribus obturare os, & redare-
guere seueriter. Neq; enim satis est simpliciter docere religionem ueram, nisi ean-
dem quoq; constanter inculcando urgeat, defendat atq; conseruet doctor eccle-
siasticus

fiasticus. Huc maximè pertinent hæc Pauli uerba, Obtestor te coram Deo & domino Iesu Christo, qui iudicaturus est uiuos & mortuos in apparitione sua & in regno suo. Prædica sermonem, in sta tempestiue, intempestiue: argue, increpa, exhortare cum omni lenitate & doctrina. Nam erit tempus cum sanam doctrinam non sustinebunt, sed iuxta concupiscentias suas coaceruabunt sibi doctores ij quibus pruriunt aures, & à ueritate quidem aures auertent, ad fabulas uerò conuertentur. At tu uigila in omnibus, obdura in afflictionibus, opus perage euangelistæ, ministerium tuum ad plenum probatum reddito. Opus est itaq; adhortationibus creberrimis, ut quod ecclesia per doctrinam frequentem & perspicuam intellexit uel prosequendum esse, uel fugiendum, adhortatione feruenti accensa & impulsæ constanter prosequatur uel refugiat. Ac longanimitate hic opus erit episcopo, ne statim omnem abijciat spem si uideat res non protinus ad uora succedere, & fortes aliquot aut impudētes etiam aduersarios pertinaciter reluctari. Paulus enim, Seruum domini, inquit, non oportet pugnare, sed placidum esse erga omnes, propensum ad docendum, tolerantem malos cū mansuetudine, erudientem eos qui obstitunt, si quando det illis deus pœnitentiam ad agnoscendum ueritatem, ut resipiscant è diaboli laqueo, capti ab eo ad ipsius uoluntatem. Opus est præterea consolatione blanda ac uiuida. Sunt enim afflictī multi, uarijs exercitiis tentationibus, quos nisi fideliter consoleris, superantur à satana. Hæc & his similia alia pertinent ad doctrinam perfectiorum.

Hic commemorare licet etiam Curam pauperum. Pertinet enim hæc maximè ad episcopum, & ad publicam episcopi doctrinam, qua ditiores perpetuò urgeat ad misericordiam, ut faciles sint ad impartendum. Egregia huius rei exempla reliquit nobis Apostolus Paulus in omnibus suis ferè epistolis, præsertim autē in 16. cap. ad Rom. & prioris ad Corinth. deniq; in 8. & 9. cap. posterioris epistolæ, S. Petrus, Iacobus & Ioannes curam pauperum S. Paulo diligentissimè commendarunt, quem admodum ipse Paulus cōmemorat in 2. cap. ad Galat. Et quauis Petrus dispensationem alicubi recusat, in hoc tamen est totus ut pauperibus dentur dispensatores pī & fideles. Idcirco pertinet ad pastores maximè cura pauperum ne negligantur, sed ueluti Christi membra foueantur humanissimè.

Priuatam doctrinæ genus nihil differt re ipsa à publico illo, sed priuatum appellatur propter discentes. Accedit enim aliquis pastorem Nicodemi instar, & cupit ab ipso maximè familiariter de rebus ipsum peculiariter urgentibus erudiri. Deniq; iste pastor priuatim addit & instruit eos quos certis indicijis didicit priuatis colloquijs facilius posse lucrari Christo, quàm publicis concionibus. Præterea admonet priuatim: & in tempore cauet, ne imprudentiores profundius malis immergantur. Huc pertinet uisitatio ægrotorum & captiuorum, quos omnes fidelis pastor non negligit, sed inuisit hoc diligentius, quo grauius ipsos tentari intelligit. Vigilat enim pastor bonus super uniuersum Christi gregem, cui insidias struit satanas circumcursitando, quærens quos deuoret. Huic obstitit orando, admonendo, docendo & adhortando. Quod si quælibet ecclesia pastorem talem habeat, qui gregem non deserat facile, quantum obsecro sperabimus fructum? Proinde non immeritò iubemur indefinenter & ardentè orare dominum, ut is ecclesiæ suæ det pastores fideles, prudentes, pios & sedulos.

Hæc hæcenus dixi de doctrina episcoporum in ecclesia dei. Nisi uerò doceat ad hunc modum episcopus, & ea faciat quæ doctrinæ coniuncta sunt, episcopi aut pastoris aut doctoris nomine indignus est, ut cunq; prætexat apostolici titulum. Adhærent autem doctrinæ ecclesiasticæ quædam, quæ & ipsa requiruntur à pa-

store euangelico ac sunt officij eius, cuiusmodi sunt congregare cœtum sacrum in quo prædicetur & oretur, & administrare sacramēta. Sed de his suo loco dicitur.

*De uita sancta
& inculcata
episcoporum.
Matth. 5.*

Porro inspiciendum uidetur quomodo episcopi sancto uitæ exemplo regant ecclesiam Christi. Dominus in euangelio ad apostolos suos dicit, Vos estis lux mundi. Non potest oppidum abscondi supra montem situm, neq; accendunt lucernam & ponunt illam subter modium, sed super candelabrum, & lucet omnibus qui sunt in domo. Sic luceat lux uestra coram hominibus, ut uideant uestra bona opera, glorificentq; patrem uestrum, qui est in cœlis. Proinde pastores non tantum doctrina, sed & uita sancta prælucent ecclesiæ: quæ uidens uitam congrue re doctrinæ, commouetur & ipsa ad innocentiam uitæ colendam. Plurimum enim potest exemplum uiri boni sanctum ad propaganda studia uirtutū. In contrarium testatur scriptura plurimum potuisse corruptum filiorum Heli antistitem religionis exemplum, ad corrumpendum uidelicet populum. Scriptura enim dicit, Erat autem peccatum filiorum Heli grande nimis coram domino, quod homines abhorre inciperent à sacrificijs domini. Videntes enim homines corruptam ministrorum ecclesiæ uitam, subdubitare incipiūt de tota doctrina, clamantes, Si uera esse crederet pastor quæ nos docet, nō ipse ita dissolutè uiueret. Huiusmodi ergo doctores uita praua subuertere dicuntur quod sana doctrina ædificauit. Proinde Paulus requirit episcopum uel populi pastorem, qui sit irreprehensibilis, id est qui iure & meritò à fidelibus reprehendi non possit. Alioqui enim quo quisq; syncrior & integrior fuerit episcopus, hoc magis erit impiorum calumnijs & contumelijs obiectus, domino hoc ipsum prædicente in euangelio, Si ipsum patrem familiās uocauerunt Beelzebub, quanto magis domesticos illius? Item, Si me persequuti sunt, & uos persequentur. Et iterum, Beati estis cum probra in uos iecerint homines, & insectati fuerint, & dixerint omne malum uerbū aduersus uos, mentientes propter me. Gaudete & exultate: quoniam merces uestra multa est in cœlis. Curabit ergo pastor summo studio, & quantum in ipso est, ut domi & foris uitam se & sua uocatione dignam uiuat. Castè uiuat tam extra quàm in ipso coniugio. Floreat in episcopo temperantia, sobrietas, parsimonia uel frugalitas, hospitalitas, & reliquæ uirtutes quas superius ex Apostolo commemorauimus. Familiam suam prudenter gubernet, & sanctè instituat, ac ita coërceat, ne crimine luxus aut alijs sceleribus offensionē ecclesiæ obijciat. Sic enim & apostolus Paulus præcepit (qui rursus formans studia episcopi) Donec uenero, inquit, attende lectioni, exhortationi, doctrinæ. Requirit diligentem à Timotheo lectionem, id est, studiū assiduum, quò possit euidentius exhortari & docere. At studiū assiduum ab eo requirit Paulus, de quo alibi scribit, ipsum à puero sacras nouisse literas. Quantam ergo diligentiam requirit Apostolus ab illis, qui ut tantam spiritus gratiā affecti non sunt, quantam affectus fuerat Timotheus, ita non à pueris in sacris sunt exercitati literis? Pudeat ergo multos suæ inertiae, pudeat illiterati otij, & negotiosi otij. Vt enim multi nunquam quicquam legunt, sed otiantur perpetuò, otioq; ueluti computrescunt: ita innumeri alij in ijs occupantur quæ episcopos minime decent. Rursus itaq; Apostolus, Nemo qui militat implicatur uitæ negotijs, ut ei qui se in militiam delegit, placeat. Esset hic locus dicendi de stipendio pastoribus debito: sed differemus in locum alium. Foris autem apud populum, si quando ob negotia prodeant episcopi, cœtibusq; hominum honestis intersint, non segnore opera anniti debent, ne dicto aut facto ullo, ne amictu, ne sodalizio, aut uniuersa deniq; conuersatione uitæ iustum ecclesiæ præbeant offendiculum. Conspiciatur in pastoribus ubiq; & semper sancta integritas, maturitas iusta, honestas decens, pruden-

1. Sam. 3.

Matth. 10.

Ioan. 15.

Matth. 5.

1. Tim. 4.

prudētia, modestia, humanitas, humilitas & authoritas Dei ministris digna. Absint autem his contraria uitia siue flagitia. His pauculis comprehensa puto, quæ alij fuscè tractarunt differentes de disciplina & honestate clericorum. Omnia enim secula intellexerunt, in omni gradu & hominum genere malam esse uitam dissolutam, in ministris autem ecclesiarum pessimam & intolerabilem. Quid enim efficiat in ecclesia ecclesiæ minister, cuius omnis intercidit authoritas? Requiritur ergo in pastoribus authoritas.

Hanc concidisse queruntur multi, & collapsam fulcris nescio quibus, titulis *Authoritas pastorum.* inquam, ceremonijsq; subleuare contendunt. Verum non paratur authoritas rebus huiusmodi leuiculis & uulgaribus. Paratur potius Dei gratia, ueritatis & integritatis studio: si uidelicet deus corda tangat hominū, si hi intelligant deum per ministros tanquam per organa sua operari opera sua in medio ecclesiæ: si sentiant spiritus feruore nō frigidè ministros negotia domini agere, nihil metuere in causa bona, nihil timere impios & potentes huius seculi, sed his obistere: nihil tamen hic indulgere odio, sed animo paterno, forti, constanti & prudenti agere omnia. Quibus si iam accedat non hypocritica, sed uerè sancta & integra uita, mores integri, suauēs, & iucundi, satis authoritatis paratum sentient fideli ministro omnes uiri prudentiores.

Nollem tamen his uel tantillum Donatistis & Anabaptistis patrocinarum. *Propter uitam non bonam doctoris, non reijcienda doctrina bona. Matth. 23.* Contendunt uerbi & sacramentorum ministerium, à ministro impuriore uita administratum, esse inefficax. Tametsi enim uita à ministro sancta requiritur, non inefficax tamen redditur ministerium, ministri uita existente impura, modò doctrina sit integra atq; syncera. Dominus enim in euangelio iubet audire docentes in cathedra Moſis, uerat autem imitari ipsorum opera. Docere enim bona, sed non facere. Dixi hac de re Sermonē huius Decad. 2. Nazianzenus pulchrè ait eundē esse sigilli typum, siue ferro insculpatur siue auro. Vnum atq; idem est euangeliū, unus atq; idem est cœlestis à patre missus thesaurus, siue hic à bono siue à malo afferatur nuncio. Interim uerò impura ministrorum ecclesiæ uita non dissimulari, sed coerceri, incurabilesq; e gradu suo deijci debent, ne perpetuo offendiculo infame reddant sanctum ministerium.

Cæterum cur hæc tractas, aiunt multi, pro concione publica: priuatim hæc dicenda fuerant sacerdotibus. Respondeo ipsas leges ad sacerdotes præcipuè pertinentes, quondam principibus populi esse communicatas & prælectas ipsi populo. Præterea constat Christum dominum nostrū ea quæ peculiariter pertinebant ad doctores pastoresq; populi, in publicis tractasse concionibus. His accedit quòd S. Paulus loquens de presbyteris, Peccantes coram omnibus, arguē, inquit, ut & ceteri timorem habeant. *1. Tim. 5.*

Scriptura sancta, quæ summa diligentia bonos & fidos pastores doctoresq; describit, non minore fide & sedulitate etiam pseudoctores & depastores depingit, in hoc ut agnoscantur ab omnibus sanctis, & caueantur. Obuia ueniunt hæc ubiq; in scriptis prophetarum & apostolorum. Singulares tamen locos si qui uelint cognoscere, extant Deut. 13. & 18. Isaia 56. Iere. 23. Ezech. 34. Dan. 11. Matth. 7. & 23. Paulinæ epistolæ in his describendis & confutandis sunt densissimæ. Et S. Petrus in his conuellendis bonam partem epistolæ posterioris insumit.

Eorundem prophetarum & apostolorum testimonia atque exempla, tradunt ministros sanctos & fidos pastores omnigenis diuexandos fore afflictionibus persecutionibusq;. Illa ipsa interim manifestè testantur, ministeriū nunquam opprimendū fore, sed ministros perpetuò triūphaturos uel morientes. Semper enim

dat dominus ecclesiae suae ministros, qui etsi ut aurum igni probantur, uincunt tamen per illum qui mundum & principem mundi superauit. Postrema secula corruptissima erunt, sicuti fuisse leguntur tempora Noe & Loth: uerum sicuti tunc quoque in extrema illa deprauatione, hi duo uiri excellentissimi cum nonnullis praestantissimis in omni pietate uiris uerisque Dei cultoribus floruisse, & suum officium fecisse leguntur, ita in finem usque seculi durabit & ministerium uerbi, & florebut doctores pastoresque egregii, oppugnantes & persequentes omnem impietatem & luxuriam. Cessent hostes ueritatis sperare excidium & ministerii & ministrorum uerbi Dei. Ero, inquit dominus in euangelio, uobiscum omnibus diebus, usque ad consummationem seculi. Mentiri nescit qui haec dixit. Idem spiritu oris sui antichristum conficiet, inquit Apostolus, quem mox abolebit glorioso suo aduentu in iudicium. Erunt itaque, uel ipsis portis inferorum inuitis & insanientibus, ministri ecclesiae, & praedicatores ad finem usque seculi.

Ista autem de ministerio uerbi & ministris ecclesiarum Christi, qua potui breuitate complexus sum hactenus. Nostrum uero non est tales formare uel dare pastores. Dei gratia & beneficio dantur boni pastores, & auferuntur e medio mali. Deum ergo inuocemus omnes, orantes ut ipse nobis fideles & sanctos det episcopos, quod nomen eius sanctificetur semper, & ecclesia Dei feliciter gubernetur ad salutem omnium credentium.

De modo & ratione orandi Deum, hoc est, de inuocatione nominis domini, ubi & Oratio dominica exponitur, & de cantu, de gratiarum actione ac uirtute orationis dicitur.

S E R M O V.

POST tractationem ministerii uerbi Dei in Ecclesia Christi, commodissime dicturus uideor de Oratione fidelium, ad quam ministri fideles Ecclesiam nunquam adhortari desinunt.

Oratio quid sit.

Orationis partes.

Coloss. 4.
Philip. 4.

Vocabulum Oratio patet latissime apud scriptores, & in usu quotidiano: in praesenti usurpamus ad eum modum, ad quem usurpauit propheta Dauid, dicens, Exaudi Deus orationem meam, & clamor meus ad te ueniat. Est enim oratio supplex & ardens fidelis animi expositio, qua a Deo uel bona petimus, uel pro acceptis gratias agimus. Etenim duae sunt potissimum partes Orationis, Inuocatio uel Petitio, & Gratiarum actio. Petitione cordis nostri uota & desideria Deo exponimus, postulantes ut det nobis bona, & auertat a nobis mala, pro gloria & bona uoluntate sua, & pro necessitate nostra. Comprehendimus in inuocatione uel petitione Obsecrationem, quae uehementior est oratio, & Interpellationem, qua aliorum negotia commendamus domino. Preces enim offerimus domino Deo nostro, non pro nobis ipsis duntaxat, sed & pro fratribus nostris, & pro fratrum uariis necessitatibus, pro laborantibus in periculis, pro aegrotantibus, pro persecutionem sustinentibus, aut alijs calamitatibus ac tentationibus ferè oppressis. Ergo nec Deprecationem excludimus, qua mala a nobis uel ab alijs auerti postulamus. Sunt etiam querelae quibus cum Deo sancti in precibus suis sanctè exposulant. Gratiarum actio & laudes diuinas continet, & uirtutes Dei eximias, beneficiaque a Deo accepta alacri spiritu celebrat. Huc refertur bona pars Psalmorum, quorum alia ad inuocationem pertinet. Et sunt quidam didactici, quidam exegetici. De quibus iam non est dicendi locus. Has uero orationis partes agnoscens beatus Christi Apostolus Paulus, scribens Colossensibus, Orationi instate, inquit, uigilantes in ea, cum gratiarum actione, Et ad Philip. In omni prece & obsecratione

oratione cum gratiarum actione petitiones uestrae innotescant apud deum. Et rursum ad Timotheum, Adhortor ut ante omnia fiant deprecationes, obsecrationes, interpellationes, & gratiarum actiones pro omnibus hominibus.

Species orationis haec sunt. Est oratio priuata cuiuscunque fidelis, est & publica totius ecclesiae. Priuata oratio fit ad deum à quouis fidei homine, quouis in loco, siue domi siue foris, in conclaui cordis & proprii corporis templo. Nam S. Petrus ascendens ad superiores domus partes orat. S. Paulus, Volo, inquit, in omni loco orare uiros, sustollentes puras manus. Ipse quoque Christus dominus frequentius ex ipso templo in montem orandi causa secessit, & in euangelio dixit, Tu cum oras, introito in conclaue tuam, & occluso ostio tuo, ora patrem tuum qui est in occulto, &c. Publica oratio est ecclesiastica, quae fit ad deum in coetu sacro, iuxta receptum cuiusque ecclesiae ritum. Porro pastorum est, quod & Paulus monuit 1. Timoth. 2. ac nos in Sermone praeterito proximè diximus, conuocare, instruere & conseruare coetus, in quibus supplicationes uel preces publicae fiant. Et culpani sunt ualde, qui hac parte negligentiores sunt, nec ferèdè planè qui rarò aut nunquam seriò docent, & precandi studium frigidius urgent. Homines natura ignaui & ad studium religionis segnes sunt: unde stimulo acuto indigemus. Datū est autem officium excitandi & urgendi pastoribus ecclesiarum. Clamant alicubi prophetae, Clangite tuba in Zion, indicite coetum. Etenim in coetu sacro tria potissimum exercentur, doctrina euangelij, oratio fidelis, & religiosa sacramentorum celebratio uel administratio. Fit nonnunquam & collatio in sustentationem pauperum & ecclesiae. Haec non hominum beneplacito, sed diuina autoritate, & ab ipsa mox origine rerum instituta & à sanctissimis Dei cultoribus usurpata esse testatur scriptura sacra. De Patriarchis illis longè uetustissimis & primis diluuium praecedentibus & mox consequentibus nihil restat dubij: cum de ipso Iacobo nepote Abrahami scriptura manifestè commemoret quòd aram erexerit in Bethel ad quam collegerit uniuersam domum suam, copiosissimam alioqui, ibidemque cultum exhibuerit deo. Sub Mose per legem significantissimis praecipis coetus sacros instituit. Imò in decalogo diligentissime praecipit sanctificare sabbatum: id quod & coetus sacros comprehendit. Sancti Dei prophetae, ubique ornarunt & commendarunt coetus populi Dei ecclesiasticos. Nec hos improbauit in carnem ueniens Christus dominus. Sicut enim in coetibus frequentissimis festisque singulari docuit diligentia, ita ipse in coetum recollegit & populum & discipulos suos: quibus singulariter madauit ne discederent Hierosolyma, sed ut expectarent promissum patris: id quod in coetu collectis & precantibus praestitum legimus in Actis cap. 2. Ibidem & coetus populi fidelis commendatur nobis, sicut & in 11. & 14. cap. prioris epistolae Pauli ad Corinthios. Supplicationes quas idem fieri mandat pro omnibus in eminentia constitutis, in coetibus maximè sacris fiunt. Certè Plinius, author ethnicus, non obscuram facit sacrorum coetuum mentionem Traiano imperatori scribens. Olim habuerunt Coetus sacri promissiones praestantissimas, sicut uidere licet in oratione Solomonis, quam descriptam tibi exhibet prior liber Regum cap. 8. Hodie uerò nihilo minores promissiones habet Christi ecclesia, dicente Christo domino, Dico uobis, quòd si duo ex uobis consenserint super terram, de omni re quamcunque petierint, fiet illis à patre meo qui in caelis est. Vbi enim sunt duo uel tres congregati in nomine meo, ibi sum in medio eorum. En ipse dominus est in medio coetus sanctorum. Vbi autem dominus est, ibi & plenitudo & thesaurus bonorum omnium est. Ideoque ipsa rerum experientia docet efficaces esse supplicationes ecclesiae. Exaudit enim preces ecclesiae dominus, & liberat à

Species orationis.

Act. 1.

1. Tim. 2.

Matth. 6.

De Coetibus sacris.

Gene. 39.

Exod. 16.

Luce 24.

Act. 1.

Matth. 18.

malis illos quorum salutem ecclesia domino commendat. Sape experti sumus ea ipsa hora præsentissimum sensisse auxilium in discrimine positos, qua preces suas domino obtulit cœtus. Præterea permouet exemplum plurimos, alioqui du-
 1. Cor. 14. ros & barbaros. Cernunt enim Cœtus sacri religiosam pietatem fideliumq; in cœ-
 tibus ardorem, & commouentur, ut in seipsos descendentes agnoscant se miseros
 esse, cupiantq; huius cœtus esse consortes. S. Paulus, Si conuenerit tota ecclesia
 in idem, & omnes linguis loquantur, ingrediantur autem indocti aut increduli,
 nonne dicent uos insanire? Quod si omnes prophetetis, ingrediat autem incre-
 dulus, aut indoctus, coarguitur ab omnibus, dijudicatur ab omnibus: & sic ocula
 cordis eius manifesta fiunt, ac procidens in faciem adorabit, renunciens quod
 Deus reuera in uobis sit. Qua ergo confidentia quoue pudore audent nonnulli
 Cœtus sacros negligere & neglectos suggillare, quasi sine fructu colligantur? Da-
 uid actus in exilium, de nulla re perinde dolet, quàm quod cœtibus sacris exclu-
 sus, per deserta oberrare cogeretur. Promittit autem domino se in cœtum sacrum
 ingressurum, siquidem restituatur. Certè cum dominus in euangelio dicat, Qui
 ex Deo est, uerbum Dei audit, consequens est diligentes cœtum in quo annuncia-
 tur uerbum Dei, genuinam habere filiorum Dei notam.

Orandum esse. Quoniam uerò multi non tantum sacros cœtus fastidiunt, sed & preces in uni-
 uersum aiunt esse superuacuas, inanes & inefficaces, priusquam progrediamur,
 demonstrabimus orandum esse sanctis, orationesq; sanctorum & efficaces esse &
 utiles, adeoq; necessarias. Providentia Dei omnia fiunt, inquit, ergo preces sunt
 inutiles. Quod enim præsciuit Deus, id omnino eo modo in effectum deducit, sicut
 præsciuit, nec impediri potest precibus. Caterum isti abutuntur Dei providentia,
 utpote ex qua colligunt quod non docent colligere eloquia sacra. Nam in Deut.
 Deut. 9. disertis uerbis Moses scriptum reliquit, Decreuerat uos dominus delere, Oraui
 Iona 3. 4. igitur ad dominum, & inueni gratiam. Ionas Niniuitis denunciauit excidium
 adeo certum à domino, ut etiam dierum numerum ediceret. Sed cum uiri Niniui-
 tæ crederent domino, & poenitentiam agerent, rediit cum ipsis in gratiam domi-
 nus, nec poenitentes excidit. Dixerat præterea Isaias Ezechia ex ore domini, Mo-
 rieris tu, & non uiues. Cum uerò ex imis præcordijs domino preces funderet rex,
 Isaiæ 38. mutauit Deus latam sententiam. Nam dominus ipse apud Ieremiam, Repente lo-
 queris aduersus gentem & regnum, inquit, ut excindam illud: Si poenitentiam ege-
 rit gens illa, contra quam loquutus eram, à malitia sua, iam & me mali poenitebit
 quod ei facere constitueram. Et cætera. Proinde efficaces sunt fidelium preces,
 irata Dei iudicia retardantes, adde & è medio sustollentes. Nam quod rursus obij-
 ciunt, orationem esse expositionem rerum, quas postulamus à domino, Dominum
 autem omnia præscire, eidem ergo inutiliter & superuacue ea quæ nouit exponi,
 ideoq; inutilem esse orationem, ab ipso diluitur Christo domino, qui cum dis-
 Matthe. 6. crete dixisset, Nouit pater uester cœlestis, quibus rebus opus sit uobis, priusquàm pe-
 tatis ab eo, nihilominus tamen formulam precandi subiiciens docet nos orare. Alibi
 præcipit & urget ut frequenter oremus. Vigilate & orate, ait, ne intretis in tenta-
 tionem. Et Paulus, Semper gaudete, inquit, incessanter orate. Huius generis ubi-
 que multa occurrunt præcepta. Neq; uerò res nostras ut nescienti exponimus,
 sed uota cordis nostri scienti proponimus, & nos ad pedes maiestatis eius humi-
 liamus. Petimus ab illo, quod scimus nobis deesse, sed ab ipso, utpote omnium bo-
 norum authore, certò dandum. Credimus enim certis & ineffabilibus eius pro-
 missis: interim preces non sunt superuacaneæ, quia dominus certò daturus erat
 Ierem. 29. quod petebamus. Promisit deus liberationem populi sui, de qua sancti nihil dubi-
 tarunt

tarunt prorsus, attamen indefessis precibus supplicarunt Domino, clamantes, Libera nos Domine Deus noster: nec existimarunt se inutilem nauare operam. Anabaptistis prætexitur purificationem plenam, & ideo puros non posse nec debere orare, Remitte nobis debita nostra, cum nulla restent debita: respondet sanctissimus Euangelista & Apostolus Ioannes, ac dicit, Si dixerimus peccatum non habemus, nos ipsos fallimus, & ueritas in nobis non est. Si confiteamur peccata nostra, fidelis est & iustus, ut remittat nobis peccata nostra, & emundet nos ab omni iniquitate. Si dixerimus non peccauimus, mendacem facimus eum, & sermo eius non est in nobis. Donec enim in hoc seculo uixerimus, remanent reliquiae peccati, omnibus & singulis momentis eluendae per gratiam Christi. Porro obiectionibus, Scriptum est, Scimus quod peccatores Deus non audit: Sumus autem omnes peccatores: neminem ergo nostrum audit Deus, atque ita inutiles inueniuntur hominum preces: respondemus peccatores quidem alios esse prorsus impios & contemptores numinis, hos non audit Deus: Sunt rursus poenitentes & timentes Dei homines, qui tamen peccatores sunt & recte sic uocantur, propter peccati reliquias: hos audit Deus. Id quod ostendi poterat exemplis Dauidis, Manassis, Petri, Latronis cum Christo crucifixi, & multorum aliorum, qui simul & peccatores fuerunt, & orantes exauditi sunt. 1. Ioan. 1.

Ideoque dicimus preces fidelium non modo utiles & efficaces esse, sed etiam necessarias hominibus. Homines enim peccato corrupti, omnis boni egeni & inanes sumus, Omnis donatio bona & omne donum perfectum, est supernis est descendens a patre luminum. Is iussit orare, & promissiones amplissimas orantibus proposuit. Vnde & patres nostri frequentissimi & ardentissimi fuerunt in precibus, suo nos exemplo docentes necessarias esse preces. Scriptura item diligenter & copiose commemorat, quanta suis precibus in rebus & discriminibus maximis, in rebus utique maxime necessarijs, impetrauerint a ueracissimo & benignissimo Domino & Deo nostro. Postulant spiritum sanctum, fidem & fidei augmentum Apostoli, & accipiunt postulata non parce sed liberaliter, participantes omnigena Christi gratia. Clamat in templo apud Euangelistam publicanus, & ait, Deus propitius esto mihi peccatori: ac sentit protinus clementem Dominum. Quid & quanta precibus suis impetrarit a Domino Helias, commemorat historia sacra. Porro exemplum eius nobis quoque accommodauit beatus Iacobus Apostolus, ut & nos fide inuocemus Dominum. Id quod commemoro ne quis illud nihil ad nos pertinere existimet. Rursus quantum potuerint fideles preces Moysi, Dauidis, Iosaphat, Ezechiae & aliorum heroum in bellis, in fame, in morbis, & in alijs, discriminibus summis, longum esset recitare. Probant autem haec exempla orationem & necessariam esse semper hominibus, et maxime efficacem, Nam palam cernimus moueri Deum precibus suorū fidelium. Etenim bonus est & misericors: diligit nos; incarnatus est, ut posset sensu infirmitatū nostrarum affici: ne abhorreremus ab ipso: uerax & fidelis est, fideliter quae promissit seruans. Quid quod ubique liberaliter & bonigne omnes homines ad se uocat, totum se offerens in fide inuocantibus? Necessarias esse preces. Iacobi 1.

Cæterum quod orantes non semper accipiunt petita, non euincit orationem prorsus esse inanem. Prodest enim non raro oranti postulata non accipere. Sunt præterea causae plures cur Deus petita uel differat, uel non concedat. Est genus hominum precantium, de quibus scriptum legitur, Qui obturat aurem suam ad clamorem pauperum, clamabit & ipse, & non exaudietur. Item, Cum multiplicaueritis orationes uestras, non exaudiam. Quia manus uestrae plenae sunt sanguine. Ita in Solomone rursus clamat Sapientia, testificans se inuocantes non auditurum, eò Mouetur Deus precibus nostris. Quare orantes non semper petita accipiant. Prouerb. 21. Isaie 1. Prouerb. 1.

quod & ipsi prius audire noluerint in tempore admonentem. Hæc ferè ex perso-
Iacob. 4. na orantiū petita sunt. Ex re illud deriuatur quod sequitur, Dicit beatus Iacobus,
Matth. 20. Petitis & non accipitis, eò quod male petatis, ut in concupiscentias uestras insu-
 matis. Nam & Dominus duobus alioqui selectis discipulis postulantibus prima-
 tum in regno Christi, respondens dicit, Nescitis quid petatis. Præterea cū sancti
 res petunt sanctas & necessarias, aut certè non iniquas, aut malas, quas tamen ni-
 hilo minus non accipiunt à Domino, cogitant protinus Deum iudicij & iustitiæ
Prouerb. 3. esse Deum, ideoq; non protinus liberare posse ex afflictionibus, liberationem con-
Hebr. 12. tinuis petentes precibus. Quos diligit corripit: & quos corripit non ideo ut per-
Psal. 38. dat, sed ne cum impio mundo condemnet, corripit. Licet autem in talibus difficul-
 tatibus orare cū Dauide, Domine, ne in furore tuo arguas me, neq; in ira tua cor-
 ripias me: & cum Ieremia, Domine, corripe me in iudicio, non in furore: & cum
 Abakuk, Cū irasceris recordare misericordiæ tuæ. Nihil dubitant sancti de po-
 tentia & bonitate Dei erga homines. Quod uult Deus, & prodest filijs Dei, Deus
 potest facere. Exempla huius rei innumera suppeditat nobis historia uetus & E-
 uangelica. Proinde cū non liberamur, cū non accipimus uota nostra, certissi-
 mum est hoc sic uelle Deum, & sic conuenire nobis. Hæc ratione exaudit uota no-
 stra cū nos exaudit. Vota enim nostra huc unicè tēdunt, ut bene sit nobis. Deus
 autem cū solus sapiens norit quid prodesse, quid obesse queat, & non largitur
 nobis quod petimus, non largiendo reuera concedit, ut bene sit nobis. Semper
 itaq; efficax est legitima fidelium oratio, ac semper finem suum assequitur, Domi-
 no suis concedente quod bonum esse nouit.

Quare deus dif- Porro differt præstare Dominus quod rogatur, adeoq; et preces nostras aliquo
ferat dare quæ ties prorsus negligere uidetur: sed id facit ut differendo suos probet: ut fidem fla-
daturus est. grantiorem reddat, dona quoq; sua iucundiora faciat, quæ tanto maiore suauitate
Isaie 51. percipiuntur, quanto ardentiori desiderio expectata sunt. In hac tentatione cōso-
 letur illud prophetæ, Nunquid obliuiscetur mulier infantis sui, ut non misereatur
 filij uteri sui? Et si illa poterit ipsius obliuisci, ego tamen tui nunquam obliuiscar.
 Dixerat enim ecclesia, Dereliquit me Dominus, & Deus oblitus est mei.

Quis inuocan- Consideremus iam qualis esse debeat oratio inuocantis Dominum. Non po-
du sit oranti- terit ea quæstio explicari commodius, quàm circumstantiarum præcipuarū pen-
bis. sitatione. Videamus ergo primū quis inuocandus sit orantibus: nemo utiq; ni-
 si unus & solus Deus. Nam tria requiruntur ab eo qui inuocatur. Primum, Ut au-
 diat omnium hominum in toto terrarum orbe preces, ut eorum corda penetret &
 exactè teneat, adde & rectius & melius omnia hominis uota norit quàm ipsi ho-
 mines explicare possint. Secundum, ut sit ubiq; præsens, & omnium in cælo, in
 terra, & in inferis potens, qui teneat omnes uias & omnes modos iuuandī. Ter-
 tium, ut eximiè bona, prompta, & parata sit eius uoluntas, ut quod potest uelit e-
 tiam. Cæterum in solo Deo inueniuntur hæ conditiones. Solus enim scrutatur re-
 nes & corda Deus: solus omnia audit & uidet: solus plenius nouit ea quæ intra &
 extra hominem sunt, quàm ipse homo: solus ubiq; præsens est: solus omnipotens
 est: solus sapiens: solius Dei uoluntas perfectissima bonitate hominem complecti-
 tur, & semper parata est, & sola quod hominī utile est fidelissimè procurat: solus
 ergo Deus inuocari debet. Quis autem illas conditiones etiam selectissimis in cœ-
 lo animabus citra blasphemiam & sacrilegium tribuerit? Proinde animæ in cœlis
Isa. 63. cum Deo uiuentes non sunt inuocandæ. Præsertim cū scriptura uerbis disertis
 testetur Abraham & Iacobum ignorare nos, & præcipiat Deum inuocare, prohi-
 beat autem ea quæ Dei sunt communicare creaturis. Et ut nihil præterea comme-
 moremus,

moremus, cui obsecro sanctorum & diuorum in cœlo agentium, dicere poterimus absq; pudore, Pater noster qui es in cœlis, & ea quæ sequuntur in oratione Dominica: Inuocemus ergo Deum solum patrem illum cœlestem, quem solū inuocarunt omnes quotquot fuerunt in ecclesia sancti.

Quando uerò nemo mortalium, quantumuis bonus & sanctus esse uideatur, dignus est prodire in conspectum æterni & sanctissimi Dei: id quod omnes homines uno ore confitentur, multi quidem & uarij patroni, intercessores & aduocati, delecti & recepti sunt ab orantibus, per quorum interuentum uel ipsi ad Deum perducerentur, uel ipsorum preces Deo offerrentur. Proinde alij delegerunt sibi angelos, alij Apostolos, alij sanctissimam & inter omnes mulieres benedictā illam uirginem matrem, alij alios, prout spem bonam in hos uel illos defixerant. Atqui confinxerunt hæc sibi ex proprij cordis arbitrio, non didicerunt ex ore Domini. Scriptura unica ueritatis regula, unicum nobis proponit mediatorem, intercessorem, patronum & aduocatum, per quem accedamus Deum, & per quem offeramus preces nostras Domino. Ingratæ & abominabiles sunt omnes omnium hominum orationes, quæ non fiunt per Iesum Christum. Nec patitur uera fides ut aliū aduocatum pro Christo, uel aliquem altum cum Christo in conspectu Dei fingamus, aut ut ipsi soli sine aduocato Christo in conspectum Dei patris prorumpamus. Secernuntur hinc ueri Christiani à Iudæis, à Mahumeticis, adde & à Papistis. Isti enim filium Dei contemnentes, patrem solum inuocant sine interuentu Iesu Christi. Sed pronunciat contra ipsos uox Dei per Euangelium, & per Apostolos. In Euangelio legimus dixisse Dominum, Pater omne iudicium dedit filio, ut omnes honorent filium sicut honorant patrem. Qui non honorat filium, non honorat patrem qui misit illum. Et iterum, Ego sum uia, & ueritas, & uita. Nemo uenit ad patrem nisi per me. Porro Ioānes Apostolus & Euangelista dicit, Quisquis negat filium, is ne patrem quidem habet. Hi uerò non solum agnoscunt Christum esse intercessorem, sed pro ipso uel cum ipso diuos, uti patronos, apud Deum inuocandos docent. Cæterum idem ille Ioannes Apostolus aduocatum ostendens Christianis hominibus, non se statuit, non diuos pro Christo, aut illos cum Christo proponit, sed Aduocatum, inquit, habemus apud patrem Iesum Christum iustum. Nec aliū ostendit Paulus in 1. ad Timoth. 2. & ad Hebr. 7. cap. Ad Ephes. Per Christum, ait, audemus accedere cum fiducia per fidem in ipsum, &c. Sufficit Christus credentibus, utpote in quo uno reposuit pater omnia bona, iubens illa in ipso & per ipsum precibus postulare. Sufficiunt hæc minimè rixosis mentibus. Plura qui uelint, requirant ex 5. Sermonem Decad. 4.

Dixi quis orandus uel inuocandus sit pijs Dei cultoribus, & per quem, solus Deus per unicum Dei filium Dominum nostrum Iesum Christū: inspiciamus modo quæ commoueant hominem ad inuocandum Deum: præcipuè quidem spiritus Dei nostri. Oratio enim rectè inter gratiæ munera deputatur. Neq; enim possemus seriò & ex animo Deum nostrū inuocare, nisi spiritu Dei excitati atq; impulsī. Tametsi enim præceptum Dei orare iubeat, & præsens necessitas periculumq; impellat, & exemplum aliorum inuitet ad orandum, nihil tamen illa omnia efficerent, nisi spiritus animos nostros ad suum raperet arbitrium, & in oratione moderaretur ac retineret. Licet itaq; plures sint concurrentes causæ ad orandum commouentes hominem, præcipua tamen est origo orationis spiritus sanctus. Cuius impulsus & moderationem ante omnes preces præfatione sancta postulant, quicumq; cum aliquo fructu orant. Huc pertinent hæc S. Apostoli uerba, Spiritus etiā opitulatur infirmitatibus nostris. Non enim quid oraturi simus quemadmodum

Per quem inuocetur Deus pater.

Ioan. 5.

Ioan. 14.

1. Ioan. 1.

Quæ commoueat hominē ad inuocandū Deum.

Rom. 8.

oportet, nouimus. Verum spiritus ipse intercedit pro nobis gemitibus inenarrabilibus. Qui uero scrutatur corda, nouit cogitationem spiritus, quod secundum Deum intercedit pro sanctis. Equidem interpellare dicitur spiritus Dei, non quod ipse reuera precetur & ingemiscat, sed quod animos nostros excitet ad precandum & ingemiscendum, efficiatque ut secundum mentem Dei pro sanctis, id est, pro nobismetipsis intercedamus uel oremus.

Quibus oportet instructum esse facultatibus orantem.
Daniel. 9.

Luce 18.

Matth. 9.

Fide inprimis opus est orantibus.
Iacobi 1.

Psal. 50.

Psal. 154.

Isa. 65.

Consideremus porro quibus debeat instructus esse facultatibus qui orator ad Deum accedit. Inprimis exuat necesse est omnem propriæ dignitatis & iustitiæ opinionem: agnoscat se peccatorem esse & omnium bonorum indigum, atque ita coniiciat se in meram Dei misericordiam, ab hac cupiens omnibus impleri bonis. Magnus enim propheta Dei Daniel, Non in iustitijs nostris, inquit, effundimus deprecationes nostras in conspectu tuo, sed in miserationibus tuis multis. Sed & pares preces Deo oblatas legis Psal. 79. Clamat enim populus Domini, Adiua nos Deus salutaris noster: propter gloriâ nominis tui libera nos: & propitius esto peccatis nostris propter nomen tuum. Ne recorderis iniquitatum nostrarum antiquarum, festina & præueniant nos misericordiæ tuæ. In nouo testamento apud Lucam phariseus confidens suæ iustitiæ, repellitur & abiicitur à Domino: publicanus uero ingenuè confitens peccata, & misericordiam implorans Dei, auditur & iustificatur. Nisi uero agnoscamus nuditatem, infirmitatem, & paupertatem nostram, quis oro orabit ad Dominum? Non ualidi, sed infirmi opus habent medico. Et Dominus in Euangelio, Petite ait & accipietis: pulsate, & aperietur uobis: quærite, & inuenietis. Qui uero petere iubetur ut accipiat, non habet utique quod petit. Qui pulsat, pulsando se foris stare significat. Qui uero quærit, amisit utique quod quærit. Exclufi ergo gaudijs paradisi, quod amisimus & non habemus, quærimus & petimus orando. Ergo cum Dauid & Ezechias & alij sancti Dei suam allegant orantes iustitiam, ob quam uidentur iure exauditionem postulare, non propriam quidem dignitatem, sed magis Dei ueritatē respiciunt. Promisit hic se exauditurum suos cultores. Dicunt ergo sancti, En tui sumus cultores, æquum est itaque ne nos negligas, sed asseras. Interim alijs locis de sua iustitia ita loquuntur, ut dubitare non possimus in suis precibus cum moderatione quadam & limitatione mentionem suæ fecisse iustitiæ. Non intres in iudicium cum seruo tuo, ait Dauid, non enim iustificabitur in conspectu tuo ullus uiuens, &c.

Deinde & quod primum omnium est, fide uera & ardenti opus est orantibus. Doctrina ergo fidei in negotio orationis ueluti matutina stella præluceat, & certa obtinendi spe à Deo petat orator quod petit. Postulet cum fiducia, ait beatus Iacobus Apostolus, nihil hæsitans. Qui enim hæsitat, is similis est fluctui maris, qui uentis agitur & impetu rapitur. Neque enim existimet homo ille se quicquam accepturum à Domino. Nam & Paulus dixit, Quomodo iuuocabunt eum, in quem non crediderunt. Dixi de Fide Sermonem 4. Decad. 1. Ut autē fides iustis grandescat auctibus & floreat firmaque persistat, promissionibus & exemplis undique collectis elaborandum est. Nos pauca recitabimus. In libro Psalmorum legimus, Sacrifica Deo laudē, & redde altissimo uota tua: & inuoca me in die tribulationis, eruam te & glorificabis me. Item, Prope adest Dominus omnibus inuocantibus eum, omnibus inquam inuocantibus eum in ueritate. Voluntatem timentium se faciet, & clamorem eorum exaudiet, atque saluabit eos. Rursus apud Isaiā dicit Dominus, Erit ut antequam clament ego exaudiam: & adhuc illis loquentibus audiā eos. Apud Matthæum dicit Dominus, Petite & dabitur uobis, Quærite & inuenietis, Pulsate & aperietur uobis. Quisquis enim petit accipit, & quicumque quærit inuenit, & pulsant

& pulsanti aperiatur, &c. In eodem Euangelio dicit Dominus, Omnia quæ petieritis in deprecatione credentes, accipietis. Matth. cap. 21. Apud Marcum in 11. cap. eadem sententia sic effertur, Quæcunque orantes petitis, credite, & erunt uobis. Rursus in Euangelio secundum Ioannem ait Dominus, Si quid petieritis per nomen meum, ego faciam. Item, Amen amen dico uobis, quæcunque petieritis patrem in nomine meo, dabit uobis. Petite & accipietis. Ab exemplo patrum argumentatur Dauid, & ait, In te sperauerunt patres nostri, sperauerunt & tu liberaasti eos. Ad te clamauerunt, & liberati sunt; in te sperauerunt, & non sunt confusi. Inde enim colligit & se non deserendum à Domino. In Euangelica historia extant exempla plurima quæ mirum in modum fidem suffulciunt & confirmant fidelium.

Cum uerò fides non sit opinio inanis, sed uirtus efficax, operans per spiritum sanctum omnis generis bona opera (quamuis his nec fidant neque propter ipsa se exaudiri putent) non impudenter & sine poenitentia tamen ingenio indulgent fideles precatores, uerbis tantum agentes cum Domino, sed uitam sanctam coniungunt cum precibus. Solomon enim dicit, Qui subducit aurem suam ne audiat legem, etiam oratio eius erit abominabilis. Et Dominus apud Isaiam, Cum multiplicaueritis, inquit, orationes uestras, non exaudiam uos: quia manus uestræ plenæ sunt sanguinæ. De huiusmodi impoenitentibus hominibus illud in Euangelio intelligimus, Deus peccatores non audit. Quinimò nihil impetrabunt sancti, si pro talibus intercedere pergant. Nam Ieremias diligenter orans pro populo suo, alioqui pertinaciter impio, audit, Tu ne oraueris pro populo isto, neque attollas pro illis clamorem & deprecationem, neque interuenias apud me: quoniam nequaquam te exaudiam. An tu non uides quid isti faciant in ciuitatibus Iuda? Filij colligunt ligna, & patres incendunt ignem, uxores autem farinam aqua conspersam subigunt, ut placentas faciant reginæ cœli, & ut dijs alijs libent libamina, me uerò ad iram prouocent. Ad eundem modum apud Ezechielem dicit Dominus, Si malum immisero in populum hunc, & steterint tres uiri in medio eius, Noe, Daniel & Iob; uiuo ego dicit Dominus Deus, non liberabunt filium aut filiam, sed ipsi in iustitia sua liberabunt animam suam. Iccirco consequens est, supplicationes impoenitentium hominum, impudenterque in sceleribus perseverantium, tametsi sine intermissione clament, Adiuua nos Deus salutaris noster, Libera nos Domine, Te rogamus audi nos, planè inanes esse. Seruari enim cupiunt ad uoluptates, & ad scelera patranda. Et quamuis gratis quæ petimus donet Deus, necesse est tamen affectum bene uiuendi tanta Dei beneficia concomitari. Diligentissimè enim hic est cauendum, ne existimemus nos exaudiri propter nostras uirtutes, sed propter meram Dei misericordiam in Christo Iesu.

Præterea eleuetur terrenis ad cœlestia mentem, quisquis cupit preces suas Deo esse gratas. Ea de re eleganter et sanctè differens beatus Christi martyr Cyprianus, Quando stamus, inquit, ad orationem, uigilare & incumbere ad preces toto corde debemus. Cogitatio omnis secularis & carnalis abscedat, nec quicquam tunc animus, quàm id solum cogitet quod precatur. Claudatur contra aduersarium peccatus, & soli Deo pateat, nec ad se hostem Dei tempore orationis adire patiat. Obrepat enim frequenter & penetrat, et subtiliter fallens preces nostras à Deo auocat, ut aliud habeamus in corde, aliud in uoce: cum intentione sincera Dominum debeat, non uocis sonus, sed animus & sensus orare. Hæc ille. Caterum ut ex terrenis in cœlestia eleuetur mens orantis, efficit maximè spiritus ueræ fidei, spei firmitas, & Dei ardens charitas: si item cogitemus tremendam Dei maiestatem coram cuius oculis orantes stamus, Adorant hunc & reuerentur omnes creaturæ in cœ-

*Vita orantium
respondet fi-
dei.*

*Proverb. 28.
Isais.*

*Ioan. 9.
Iere. 7. 11.*

Ezech. 14.

*Eleuanda est
mens ad cœ-
lestia.*

lo & in terra: seruiunt ei millena angelorū millia. Cogitemus quā utiles & necessarias res à Deo petamus; sine quibus felices esse nō possumus. Remoueamus præterea omnia ea quæ uel retinent in hoc seculo, uel detrahunt ad terrena, cuiusmodi sunt accidia, auaritia & crapula, deniq; his alia similia crimina. Contra uerò studemus uigiliæ, sobrietati, benignitati, liberalitatiq;. Certè scriptura ubiq; ferè coniungit orationi ieiunium & misericordiam. Hæ enim uirtutes alacriores & expeditiores ad orandum efficiunt per fidem. Daniel, Posui faciem meam, inquit, ad Dominum Deum, ut rogarem eum oratione & obsecrationibus, in ieiunio, & sacco, & cinere. Nec his dissimilia tradunt Ionas & Ioel. Imò in Euāgelio & Apostolorum literis ubiq; obuium habemus, Vigilate, orationi instate, sobrii est. Nam pleno uentre, uel nullæ, uel pingues funduntur orationes. Vnde Augustinus dixisse legitur, Vis orationem tuam uolare ad Deum? Fac illi duas alas, ieiunium & eleemosynam. Nam in Actis Apostolorū dicit Cornelio Centurioni angelus Domini, Orationes tuæ & eleemosynæ tuæ ascenderunt in memoriam coram Deo.

Acto. 10.

Oratio proficitur ex
charitate.
Marci 11.
Matth. 6.

Et sanè requirit à nobis orationem ardentem; at non frigere non potest quæ charitate non inflammatur. Crudeles ergo, & fratribus sua delicta condonare nolentes, odijq; fraterni retinentes, non possunt orare coram Domino, dicente, Et cum steteritis orantes, remittite si quid habetis aduersus aliquem, ut & pater uester qui in cœlis est remittat uobis delicta uestra. Et iterum, Si remiseritis hominibus errata sua, remittet & uobis pater uester cœlestis. Quòd si non remiseritis hominibus errata sua, nec pater remittet uobis errata uestra. Nam & alibi, Itaq; si obtuleris munus tuum ad altare, inquit, & illic recordatus fueris quòd frater tuus habet aliquid aduersum te, relinque illic munus tuum coram altari, & abi prius & reconcilieris fratri tuo, & tunc ueniens offer munus tuum. Alioqui enim ingrata erunt omnia tua munera Deo. Condonemus ergo libenter, amemus & beneficijs prosequamur proximos nostros, sic oratio nostra penetrabit cœlos.

Matth. 5.

Non ore tantum
sed ex corde
orandū est.

His confine est, ne ore duntaxat aut uoce, sed mente & cordis intimo affectu, spiritu ac desiderio oremus. Nulla exaudiebatur Moysis & Annæ matris Samuelis uox orantium, sed fortissimè uociferabantur spiritu ad Deum, qui & exaudiuit: & illum incolumem cum uniuerso populo Israelis per mare rubrum ex cruentissimis Ægyptiorum manibus deduxit, & hanc sterilem quidem, fecundam fecit. Contra uerò legimus Dominū in Euangelio ex Isaia hæc contra phariseos protulisse uerba, Appropinquat mihi populus hic ore suo, & labijs suis me honorat, cæterum cor eorum procul abest à me: sed frustra me colunt docentes doctrinas, præcepta hominū. Rectè ergo Paulus, Orabo spiritu, inquit, sed orabo & mente: spiritum uocans flatum animale & uocem illam humanam. Condemnantur his diuinis testimonijs eorū preces, qui mirabili linguæ uolubilitate & celeritate, breuimomēto multa uerba eaq; fracta & detruncata deblaterant, uoces profundentes sine sensu. Animus enim eorum interea peregrinatur. Nullum præterea ab his sentitur desiderium, nisi hoc fortè desiderium uideatur, quòd accelerando finem orationi imponere cupidè anhelant. In quo genere primas obtinent monachi & sacerdotes, pretio & mercede precantes, id est, rem nihili magno uenditantes in sano populo: non quòd preces inanes sint per se, sed quòd ad eum modum usurpatae, inanes sint. De his pronunciauit Dominus in Euāgelio, Væ uobis scribæ & pharisei hypocritæ, quia comeditis domos uiduarum, dum sub prætextu precibus prolixis precamini: propter hoc plus accipietis cōdemnationis. Scio quæ hic logodadali isti pro mercede conductis precationibus afferant, atq; obtendant: sed paucis hunc illis nodum explicandum propono, Precatores isti fidem & charita-

Matth. 15.

1. Corinth. 14.

Matth. 23.

tem

tem habent, uel non habent: si habent, gratis ex charitate orant; si non habent, inanes sunt ipsorum preces, ideoque falsa specie decipiunt stolidam plebem, pecuniam expendentem pro orationibus iustis, cum isti persoluât iniustas. Et si iustæ erant, minimè tamen uel uendendæ, uel emendæ fuerant.

Requiritur & illud ab orante, ne indigna Deo postulet, aut legibus Dei contra ria petat. Nam beatus Ioannes apostolus, Si quid petierimus, inquit, secundum uoluntatem eius, audit nos: ergo cum indigna Deo petimus, non audit nos. Præterea semper & in omnibus orationibus nostris nostra uoluntas & uota nostra, Deo & uoluntati eius subiicienda sunt. Itaque nemo conetur certis circumstantiis impie alligare Deum; nemo præscribat Deo, quo quid tempore, quo loco, aut qua ratione faciat quod est factururus. Deus solus sapiens opportunitatem iuuandi nouit. Sed & fidelis & omnipotens est, ampliora utique facere potens, quam uel ipsi petamus, aut intelligamus. Id quod & Paulus dixisse legitur. Ergo non præter rationem grauiter irascitur uidua honestissima Iudith Osias sacerdoti, certum statuenti dierum numerum domino, quo absoluto liberet, alioqui facturos deditiorem. Dicit autem Iudith, Quod est hoc uerbum in quo consensit Osias ut tradat ciuitatem Assyrijs, si intra quinque dies non uenerit adiutorium uobis? Er qui estis qui tentatis dominum? Non est iste sermo qui misericordiam impetret, sed magis qui iram prouocet, & furorem accendat. Posuistis uos tempus miserationis domini, & pro arbitrio uestro diem constituistis ei: sed quia patiens dominus est, in hoc ipso poeniteamus, & indulgentiam eius fuis lachrimis postulemus. Religiosissime ergo Dauid dixisse legitur in summo discrimine, Si inuenero gratiam in oculis domini, reducet me: sin autem dixerit mihi, Non places, præstò sum. Faciat quod bonum est in oculis ipsius.

Ne quid deo indignum & legibus aduersum petamus.

Iudith 8.

2. Sam. 15.

Iam etiam perseuerantia multa opus est in precibus. Petite, ait dominus in euangelio, & dabitur: quærite, & inuenietis: pulsate, & aperietur uobis. Hac autem uerborum congerie inculcauit orandi perseuerantiam. Petite, inquit, serio & constanter, quemadmodum faciunt qui necessaria petunt: quærite, ut solent qui abstrusa & pretiosa scrutantur: pulsate, ut solent qui summo desiderio ad amicum ingredi cupiunt. Hæc enim omnia non modò desiderium, sed & pertinax studium consequendi petita significant. In euangelio secundum Lucam proposuit dominus parabolam huc pertinentem, quod oporteat semper orare, neque defatigari unquam. Nam & Paulus dixit, Semper gaudete, indefinenter orate, in omnibus gratias agite. Nemo autem arbitretur his uerbis domini & Apostoli Psallinorum uel Euchitarum errorè confirmari. Illi nihil aliud quam precabantur. Semper orare iussit dominus, id est, quanta fieri potest assiduitate, omni tempore & loco, omnibus in rebus erecto esse ad Deum corde, quod semper expectet à Deo bona & pro acceptis beneficijs agat gratias: quod item postulet assidue gratiam. Tale studium commendatur nobis in Anna illa Phanuelis filia, de qua commemorat Lucas, quod à templo non discesserit, sed die & nocte ieiunijs & precationibus seruierit domino: non quod nihil aliud fecerit, nunquam curauerit corpus, nunquam ederit, biberit aut dormierit, sed quod illud assidue & potissimum fecerit. Hodie enim sic loquentes dicimus rusticum sine intermissione laborare, & studiosum dies & noctes legere: cum interim omnes intelligant hoc locutionis genere significari assiduitatem & diligentiam excellentissimam operis & lectionis. Egregium infessæ precationis aut inuocationis exemplum exhibet nobis Syrophœnissa apud Matthæum in cap. 15. Quod si diutius æquo negligere nos uel postulata differre uidetur Deus, cogitemus perpetuò prophetam dixisse, Adhuc pusillum temporis,

Perseuerantiam esse in precibus.

1. Thess. 5.

Lucæ 1.

& qui uenturus est ueniet, & non tardabit. Iustus autē ex fide uiuet, &c. Hebr. 10.

Quando orandū sit.

Ex his facillimum erit explicare tempus orationis, de quo etiam inquiritur, quando oporteat orare. Priuatim enim semper orare oportet. Semper enim dum uiuimus, uaria & multiplex offertur orandi materia. Ora ergo quoties impellit spiritus, & quoties ipsa necessitas aut res te orare compellit. Nihil tamen hic coactū sit: omnia hilari & libero prodeant spiritu. Publicæ uerò preces temporis sunt astrictæ. Sunt enim horæ precandi statæ, sunt conceptiue. Statæ sunt certæ illæ ab ecclesia receptæ, quibus mane uel uespere tota coit ecclesia ad audiendum uerbum Dei, ad orandum, & ad participationem sacramentorum. Non eodem tempore, & iisdem horis in sacrum cœtum quondam coisse ueteres ecclesias, testis est Socrates in historia. Et in hac quidem diuersitate nullum est periculum. Conueniant ad cultum sacrum ecclesiæ, cum maximè ipsis opportunum, honestum, dignum & utile uidetur. Porro conceptiue precandi horæ sunt, quæ pro præsentī necessitate ad certum tempus suscipiuntur aut indicuntur ab ecclesia. Temporibus difficilibus, & in rebus grauioribus indixerunt sancti apostoli preces & ieiunia. Quod hodie quoque sine superstitione & cum iusta moderatione licet. Et antiquissimum quidem hoc esse institutū liquet ex his Ioelis prophetae uerbis, Clangite tuba in Zion, sanctificate ieiunium, indicite cœtum, congregate populum, 1. Cor. 7. Quid quod priuatim Apostolus iubet secubare coniuges ad tempus, & à licitis sibi temperare uoluptatibus, ut oratio in necessitate sit ardentior?

Ioelis 2.

1. Cor. 7.

De loco orationis.

Iam & de loco orationis nō difficile erit iudicare. Nam ut priuatim omnitempore, ita ubique orare posse sanctos dixi in principio huius Sermonis. Nulli enim loco alligatur uera sanctorum oratio, neque in hoc loco quàm illo melior esse iudicatur. Bonitas enim siue præstantia orationis non ex loco, sed ex mente orantis æstimatur. Nam dominus in euangelio ait, Veniet hora, & nunc est, quando ueri adoratores adorabunt patrem spiritu & ueritate, &c. Ioan. 4. cap. Minimè autem hic prætereundi uidetur, quibus persuasum est pios nullibi orare posse nisi domi in cubiculo. Quò detorquent illa saluatoris nostri uerba, Tu cum oras, introito in conclaue tuum, & occluso ostio tuo ora patrem tuū qui est in occulto, & is qui est in occulto, persoluet tibi in propatulo. Cæterum habent hæc antithesin ad superiora. Nam præcessit, Cum oraueritis non eritis sicuti hypocritæ: solent enim in conciliabulis & in angulis platearum stantes orare, quò cōspicui sint hominibus. His enim modò opponit, Tu uerò cum oraueris introito in conclaue tuum. Quoniam autem in taxando orationis uitio non locum propriè damnauit, sed figuratè hoc potius dixit, Pharisei precibus suis in plateis factis uenantur laudem & assentionem populi: ita ex contrario cubiculi mentionem faciens, non locum propriè orationem uel meliorem, uel peiorem facere sensit, sed figurato sermone docuit sincero animo & alienissimo à captandis hominum laudibus esse orandum. Nam qui mente ab affectibus tranquilla solum Deum respiciens orat, in cubiculo suo orat, siue in templo siue in platea oret. Alioqui enim dominus cum discipulis in templo, in urbe, in agro, & ubicunque res postulabat, orauit. Sequitur item, Pater qui uidet in occulto, reddet tibi in propatulo. Id est, pater cui probatur animus non superbus, sed humilis & ab ambitione alienus, rependet tibi palam. Publicæ autem preces fiunt in templo aut in cœtu sanctorum: quem si quis contemnat, clauitans orationē nulli loco alligari oportere, nescio an Christiano nomine dignus sit, cum libertate Christiana foedè abutatur. Porro de Cœtibus dixi paulò superius. Dicemus plura fortassis ultimo huius Decadis Sermonē.

Habitus orantium.

Attingendus hic quoque uenit orantium habitus. Absit autem omnis luxur, omnis

omnis superbia, omnis immoderatus corporis cultus ab ijs qui oraturi in templū Christi ueniunt. Turpiter uideretur sancto magistratui illuisse, quisquis ueniam delicti postulaturus, positis pullis uestibus, candidis autem sumptis, in confessum sancti senatus prodiret superbus. Dignus hic iudicaretur qui non modò repulsam pateretur, sed & concluderetur in carcerē. Quis uerò neget Deo illudere turpius uenientes in templum oratū ueniam, cum sint peccatorū pondere oppressi, hic tamen adeò non humiliari, sed huiusmodi corporis cultu in conspectū Dei & sanctorū prodire, ut & iram Dei in se de nouo prouocet, & optimos quosq; in Ecclesia offendat grauissimè: Proinde Paulus multis docet modestiam, honestatē & humilitatem in templo esse seruandā. Locus extat 1. Cor. 11. cap. Quod reliquū est huius negotij, beatus Christi martyr Cyprianus, cōprehendens sic scribit, Sit orantibus sermo & precatio cum disciplina, quietem continens & pudorē. Cogitemus nos sub cōspectu Dei stare. Placendū est diuinis oculis & habitu corporis & modo uocis. Nam ut impudentis est clamoribus streperē, ita cōtra cōgruit uerecundō modestis precibus orare. Quidam ineptē ex corporis constitutione orationem uel meliorem uel peiorem iudicant. Audiant ergo beatum August. lib. 2. ad Simplicianum. Quæst. 4. dicentē, Non refert quomodo corpus constituatur, dummodo animus Deo præsens peragat intentionē suā. Nā & stantes oramus, sicut scriptum est, Publicanus de longinquo stabat: & fixis gentibus, sicut in Actis Apost. legimus: & sedentes, sicut Dauid & Helias. Nisi autem & iacentes oraremus, non scriptū esset in Psalmis, Lauabo per singulas noctes lectum meū. Cum enim quisq; orationem quærit, collocat membra sicut ei occurrerit accommodata pro tempore positi corporis ad mouendum affectum. Cum autem nō quæritur, sed infertur appetitus orandi, cum aliquid repente uenit in mentē, quo supplicandī moueatur affectus gemitibus inenarrabilibus, quocunq; modo inuenerit hominem, non est utiq; differenda oratio, ut quæramus quo sedeamus, aut ubi stemus, aut proster-namur. Tertullianus commemorans habitum suæ ætatis Christianorum orantiū in Apologetico contra Gentes, Ad cœlum suspicientes Christiani, inquit, manibus expansis, quia innocuis: capite nudo, quia non erubescimus: deniq; sine monitore, quia de pectore oramus, precantes sumus omnes semper pro omnibus. Vbi tamen in primis recenti memoria tenere oportet doctrinā saluatoris in euangelio dicentis, Cum oraueris, non eris quemadmodum hypocritæ. Nam illi solent in conciliabulis & in angulis platearum stantes orare, quò conspicui sint hominibus. Amen dico uobis, habent mercedem suam. Cauendum enim nobis ante omnia, ne in hunc finem uel priuatim uel publicè oremus, habitumq; corporis componamus, ut auram hauriamus popularem, ut magni & sancti uideamur esse apud homines. Sat est placere Deo, ac eius iudicio approbari.

Corporis cōstitutione nec peiorem nec meliorem reddit orationem.

In consideratione orationis nemo dixerit esse postremū scire quid ores, quam rem à Deo petas, uel pro quibus preceris. Considerandæ hic ueniunt personæ & res. Personæ uel publicæ sunt, uel priuatæ. Publicæ sunt, episcopi, doctores, magistratus, & omnes in eminentia constituti. Pro his orare iubet prophetica, euangelica & apostolica scriptura. Paulus non semel postulat intercessionem ab ecclesia ad dominum, ut liberetur ab absurdis & proteruis hominibus, & ut liberè loqui possit euangelium, sicut loqui deceat. Pro omnibus in eminentia constitutis intercedere idem ille mandat, ut placidam ac quietam uitam degamus, cum omni pietate & honestate. Priuatæ personæ sunt, parentes, uxor, liberi, consanguinei, affines, uicini, ciues, amici, inimici, ægroti, captiui, afflictī, deniq; proximi quicq; quo rum salutem & incolumitatem Deo precibus cōmendare iubet natura & charitas

Quid orandum uel petendum à Deo.

Ephes. 6.

2. Thess. 3.

1. Tim. 2.

Christiana, quibus accedunt & testimonia ac exempla scripturae. Ceterum res sunt ipsa bona expetibilia, quorum alia coelestia, spiritualia, siue aeterna: alia uero terrena, corporalia, siue temporalia: praeterea alia quidem communia, alia rursus priuata sunt. Communia ad communem ecclesiam & rempublicam pertinent, nec paucorum sunt sicuti priuata. Spiritualia autem numerantur haec maximè, fides, spes, charitas, perseuerantia, & chorus ille uirtutum omnium, ecclesiae profectus & incolumitas, peccatorum remissio, & uita aeterna. Inter quae non ineptè recensentur dona ingenij, artes ingenuae, scholae bene institutae, fidei doctores, magistratus sanctus, leges aquae. Corporalia sunt, respub. tranquilla, robusti in bello exercitus, bona ualetudo, robur & forma corporis, amplae uel sufficientes facultates, incolumitas & felicitas uxoris, liberorum, amicorum & ciuium defensio, pax, integra fama, & quae huius generis sunt alia. Nemo autem nescit potiore haberi oportere rationem spiritualium, quam corporalium: & ante omnia petenda esse coelestia. Ac in corporalibus quoque habendus est delectus, ut priuatis bonis communia anteponantur. Salua enim republia, salui esse possunt ciues. Scholis integris, spes est nunquam defore prudentes & aequos gubernatores reipublicae. Sunt praeterea in bonis temporalibus alia alijs praestantiora. Haec ergo sancti ante alia postulant à domino, sed minus praestantia tamen & ipsa à domino dari intelligunt, ideoque & à domino petunt. Parum exercitati in scripturis contendunt, non licere à Deo precibus postulare bona corporalia. Verum confutantur multis scripturae exemplis. Non enim patriarchae prophetaeque, sed & Apostoli Christi à Deo postularunt bona temporalia, defensionem ab hostibus, integram famam, & alia corpori necessaria. Id quod mox discemus ex forma orandi, quam nobis tradidit ipse dominus, diligenter quid petamus exponens.

Licet petere à Deo bona corporalia.

Qua lingua orandum sit.

Venit & hoc in quaestionem, qua lingua sit orandum. Qui contendunt Latina priuatim & publice esse orandum, mihi insanire uidentur, nisi loquantur de Latinae linguae doctis. Quando enim non ore tantum ac uoce sed corde & mente orandum est, quomodo obsecro corde & mente orabit, qui lingua utitur non intellecta? Sancta quidem uerba pronunciat, uerum quid dicat ignorat. Nihil aut nunquam orare, & uerba non intellecta profundere oratio, in idem omnino recidunt. Oret itaque gens quaelibet ea lingua, quam maximè & familiarissimè intelligit. Non minor insania est, in publicis coetibus uti lingua peregrina: atque haec quidem res maximorum in ecclesia malorum seges fuit. Quaecumque egerunt & recitarunt ueteri populo in ecclesia à Deo ordinati sacerdotes, & diuinitus missi prophetae, non Chaldaica, non Indiana, aut Persica, sed Hebraica, id est uulgari & materna egerunt & recitarunt. Sed & libros uulgari lingua scripserunt. Christus dominus una cum suis apostolis usus est uulgari lingua Apostolos dono linguarum instruxit, ut cuique genti loqui possent. Et quoniam eo seculo lingua Graeca omnium fuit copiosissima uulgatissimaque, apostoli non Hebraica, sed populari Graeca lingua scripserunt. Sanè decet ea quae in communi templo pro coetu sacro fiunt, intelligi ab omnibus. Alioqui enim frustra coirent tot homines in coetum. Vnde luce meridiana clarius est, eos qui peregrinas linguas in templum dei induxerunt, omnia conturbasse, ipsum ardorem mentium extinxisse, adeoque orationem ipsam & usum orationis, adde & omnem fructum actionum ecclesiasticarum sustulisse ex ecclesia. Et Latinus quidem princeps Latinam hanc abominationem in templum Dei induxit. Clamat hic impijssimè factum, si Germania, Anglia, Gallia, Polonia, Pannonia, & oret, & omnia ecclesiastica officia peragat lingua non Romana uel Latina, sed Germanica, Anglicana, Gallica, Polonica, Pannonica. S. Paulus semel hanc contro-

uersam

uersā dirimens, disertis uerbis, Si orem lingua, inquit, spiritus (flatus) meus orat, at mens mea fructu uacat. Quid ergo est? Orabo spiritu, sed orabo & mente. Canam spiritu, sed canam & mente. Alioqui si benedixeris spiritu, is qui implet locum indocti, quomodo dicturus est Amen ad tuam gratiarum actionem? Quandoquidem quid dicas nescit. Tu quidem gratias agis, uerum alius non ædificatur. Ego quidē, deo gratia, magis quā uos omnes linguis loquor: malo tamen quinq; uerba mente loqui in ecclesia, ut & alios instituam, potius quā decem millia uerborum lingua. Et hunc quidem locum citauit Iustinianus Imperator in Nouell. Const. 123. ubi districtē episcopis & presbyteris præcipit, nō tacito modo, sed clara uoce, quā à populo exaudiat, sacram oblationem & preces in sancto baptis-
mate adhibitas, recitare, quō maiore exinde deuotione in depromendis Dei laudibus audientium animi efferantur. Constat præterea ipsum Gregorium magnum lingua patria, suis in urbe Romanis ciuib; esse loquutum: id quod ipse testatur in Præfatione Comment. Ezech. ad Marianum episcopum. De Græcis episcopis nemo nescit, omnia in ecclesijs suis sacra, patria peregisse lingua, ac in eadem nobis sua reliquisse scripta. Insani ergo & amentes meritō iudicabimur, nisi nostra quoq; in templo sacra peragentes utamur lingua, cum tot & tanta præcedant & ecclesiarum præstantissimarum & clarissimorum ecclesiæ antistitum exempla, ut iam non repetam disertissimam S. Pauli apostoli doctrinam.

Postulat hic locus ut non nihil dicam de cantu ecclesiastico, & Horis canonicis. Nemo autē existimet preces uoce humana decātas deo gratiores esse, quā simpliciter recitatas. Deus enim nec uocis humanæ suauitate flectitur, nec rauca recitatione precum offenditur. Fide & pietate mentis, non ulla specie externa, cōmendatur oratio. Externa illa propter nos ipsos excitandos magis adhibentur: quanquam & ipsa parum efficiant, nisi spiritus domini corda nostra inflammet. Et Canendi quidem ritum longē uetustissimum esse nemo potest negare. Leuitas enim in ueteri ecclesia diu ante Christi tempora cecinisse, & iubēte quidem Deo cecinisse, testantur sacræ historiæ. Rursus neminem negare opinor operosam illā per Dauidem in templum dei illatam musicam, & ceremonijs accenseri, & eandem unā cum templo & ceremonijs disparuisse. De domino nostro Iesu Christo, qui est Messias uerus & consummata legis perfectio, non legimus quōd uspiam cantarit, uel in templo, uel extra templum, aut quōd uspiā discipulos suos docuerit cantare, uel præceperit cantum ecclesijs tradere. Quod enim apud Matthæum & Marcum legitur, καὶ ὑμνήσαντες ᾄδοντες εἰς τὸ ὄριον τῆς ἑλαιοῦ, huiusmodi est, ut non cogat necessariō intelligere dominū cum discipulis suis cantauisse. Potest enim hymnus, qui est laus Deo debita, sine modulatione uocis suppliciter recitari. Certe uetus interpret utrobic; tum apud Matthæum, tum apud Marcum constanter uertit, Et hymno dicto, exierunt in montem oliuarum. Erasmus in Matth. reddidit. Et cum hymnum cecinissent: at Marcum uertens dixit, Et cum hymnum dixissent, &c. Vtrobic; uerō legitur ὑμνήσαντες. Significat autē ὑμνεῖν laudo, aut laudes celebros, quod cantu quidem, sed & citra cantum fieri solet.

Quanquam uerō nec ipse dominus cantum præcepisse discipulis, nec hos ecclesiæ tantum tradidisse, aut ipsos in Actis Apostolorū in cœtibus sacris cecinisse legimus, Corinthiorum tamen ecclesiam uel sua sponte, uel imitatione quadam ecclesiæ ueteris psallere incipientē non coërcuit Paulus, quōd hunc à ueteri plurimū differre uideret. Permisit ergo psalmodiam, sed prætulit interim prophetiam seu concionandi munus: requisitū itē modum & mentem à psallentibus, sine quibus proculdubio & oratio & cantus non modō inutilis, sed & noxius est. Ora-

1. Cor. 14.

De Cantu ecclesiastico.

2. Par. 29.

Matth. 26.

Marc. 14.

Paulus canētes non coërcet.

1. Cor. 14.

Ephes. 5.

*Ecclesiasticus
canticus uetus.*

*Qualis fuerit
ueterum canticus.*

*Canticus liber
fuit, nunquam
uniuersalis.
Sozomenus
lib. 7. cap. 19.*

bo spiritu, inquit Apostolus, orabo & mente: psallam spiritu, psallā & mente. Nec scio si uspiam aliās cantus in cœtibus sacris meminerit Apostolus, nisi huc referre libeat quod Paulus scriptum reliquit in 3. cap. ad Coloss. quanquā & priuata poterat uideri institutio. Nam quod in epist. ad Ephesios his uerbis scriptū reliquit, Ne inebriemini uino, in quo luxur est, sed impleamini spiritu, loquentes uobis ipsis per psalmos & hymnos, & cantiones spirituales, canētes & psallentes in corde uestro domino, gratias agentes semper de omnibus, in nomine domini nostri Iesu Christi, Deo & patri, quale sit ex occasione & contextu uerborū facile iudicatur. Nihil enim dicit de cantu publico in templis fieri solito, sed de priuata ratione cantandi. Respexit enim ad cōuiuia luxuriosa, in quibus ferē solent à bene potis cantillari carmina parum uerecunda. Vos ergo ne inebriemini uino, inquit Apostolus, ne cantaueritis parum pudicas cantilenas, quin potius si cantare libet, psalmos spiritualesq; cantiones cantate. Quibus & illud accedit, quod in his quoq; magis cordis iubilum quā uocis modulationem requirit, tantum abest ut unquā inconcinnos uel publicos uel priuatos clamores probauerit. Quanquam simplicior sensus fuerit, si intellexerimus, In corde, dictū esse pro Ex animo. Proinde nemo potest uel debet moderatam & religiosam psalmodiam siue publicē in cœtib, sacris, siue priuatim domi usurpetur, improbare. Ac plurima quidem testimonia inuenias in historia Ecclesiastica, per Eusebium & Sozomenum edita, perhibentia, orientales Ecclesias, iam inde ab Apostolorum ætate psalmos & hymnos cantauisse Christo domino. Inuenias & illud, decretis aliquot in Concilijs constitutū esse, ne quid in cœtibus sacris aliud uel legatur, uel canatur præter scripturam canonicam. Mature enim in ecclesia nec modus seruabatur, nec sola legebatur scriptura canonica, nonnullis uidelicet sua subiicientibus carmina.

Hic tamen duarum in hoc negotio excellentium rerum admonendam duxi c. v. Prioris, Cantum ueteris ecclesiæ longē alium fuisse, quā is sit qui hodie est in usu. Rectē enim Erasmus Roterod. iudicat ueterum cantum aliud non fuisse, quā distinctam & modulatam pronunciationem, cuiusmodi hodie quoq; super sit modulatio Psalmorum, Euangelij, & Orationis dominicæ. Certē Plinius Asiæ Procos. didicerat ex diligentirerum peruestigatione, uel examine, Christianos stato die ante lucem conuenire, carmenq; Christo quasi Deo dicere secum inuicē. Locus Plinij extat in epistola eius ad Traianū epist. lib. 10. Sed & Rabanus Maurus lib. Instit. cler. 2. cap. 48. Primitiua ecclesia, inquit, ita psallebat, ut modico flexu uocis faceret resonare psallentem, ita ut pronuncianti uicinior esset quā canenti. Hæc mutuauit ille ex 33. cap. lib. 10. Confes. S. Augustini, qui ibidem disertē fatetur se peccare si magis capiatur uocū dulcedine quā sensu uerborum, ideoq; desiderare ut omne melos cantilenarum suauium, quibus Dauidicum frequentatur psalterium, ab auribus suis ipsiusq; ecclesiæ remoueatur. Tutius enim uideri quod recordetur sibi sæpe dictum de Alexandrino episcopo Athanasio, qui tam modico flexu uocis fecerit sonare lectorem psalmi, ut pronuncianti uicinior esset quā canenti. Posterioris, cantum, ut cuncq; uetus sit institutum, nunquam tamen fuisse uniuersalem & necessitate impositum ecclesijs, sed liberum, nec in omnib. ecclesijs semper usurpatum. Quibus accedit, quod & Sozomenus testatur eos qui cantarunt, non iisdem precibus, uel psalmodijs, aut lectionibus, aut eodē tempore esse usos. Socrates historiarum lib. 5. cap. 22. In summa, in omnibus ubiq; regionibus, inquit, non poteris inuenire duas quæ omnino consentiant orando. Et occidentales quidem ecclesias serō recepisse Psalmodiam aut canendi ritum, liquet uel ex ipso Augustini testimonio, qui libro Confess. 9. capite 7. commemo-

rat

rat Ambrosium pressum Iustinæ imperatricis Arianae insidijs & persecutione, secundum morem Orientalium partium, instituisse, ut hymni & Psalmi canerentur, ex quo retenta sit psallendi consuetudo, & recepta ab alijs quoque orbis partibus. Priusquam tamen canendi ritum Occidentales ecclesiae recepissent, habebantur ab omnibus Orientalibus pro ueris ecclesijs, nec cuiquam ueniebat in mentem, ideo hæreticas & schismaticas, aut non recte institutas esse, quod cantu uel psalmodia destituerentur. Nemo colligebat, Orientis ecclesiae cantant, Occidentis non item: ergo non sunt ecclesiae.

Hæc integritas & libertas si mansisset incolumis & intemerata, hoc est, si ueteri illa modulatione nihil extra canonicas scripturas esset cantatum, si libertas mansisset ecclesijs canendi uel non canendi, profecto nullum hodie in ecclesia esset certamen de cantu ecclesiastico. Quæ enim cantarent ecclesiae, ueteri modulatione uerbum Dei & solius quidem Dei laudes cantarent, nec hac parte se alias excellere existimarent, neque nihil canentes condemnarent: cum hæ quoque non despicerent sobrie & pie cantantes. Si enim pii in studio pietatis, inque assidujs precationibus perseverent, licet non canant, filij Dei nihilominus manent. Neque uero omnis & ubique cantus ædificat: neque omnes ecclesiae ad canendum sunt idoneæ. Quid quod Rabanus eodem loco, quem modò citauimus, Propter carnales, inquit, non propter spirituales, in ecclesia consuetudo cantandi instituta est, ut qui uerbis non compunguntur, suauitate modulaminis moueantur, &c.

Concordia in
cantu ecclesiastico.

Cæterum cantus de quo hodie contenditur, non est uetus ille cantus, quinimò ueteri, & materia ferè & modulatione per omnia contrarius. Vulgus Gregorianum uocat, non utique à magno illo Gregorio, qui cantui non admodum propitius fuisse uidetur, uti claret ex eius constitutione, quæ legitur in Registr. eius parte 5. cap. 44. Rectius ergo sentire uidebimur, si referamus ad Gregorium V. qui sedisse dicitur circa annum Domini 995. & opera præterea usus, nescio cuius Roberti Carnotensis. Sunt tamen qui Vitaliano, sunt qui Gelasio ascribunt. Piget commemorare quæ hic contexi Durandus in Rat. diuin. lib. 5. Nam hæc parum moror.

Cantus Gregorianus.

Plurima in hoc ueniunt uituperanda. Principio enim multa, imò plerumque cantantur contra ueram pietatem, nec cantantur ex scripturis sanctis omnia, sed ex legendis, nescio qualibus, & ex hominum traditionibus. Et quæ cantantur ex scripturis, ita ferè detorquentur & corrumpuntur, ut nihil generis diuini maneat reliquum. Inuocantur creaturæ ac homines mortui. Deinde præcipitur hic cantus, cantaturque non sponte & liberali spiritu, sed coacte: imò cantatur pro pretio, & ut beneficium ecclesiasticum, quod uocant, recipiatur. Cantatur duntaxat à clericis ad hoc conductis, non à tota, ut quondam, ecclesia Christi. Nec ullus est cantandi finis aut modus. Cantatur dies atque noctes. Huic inepto & etià impio cantui tanquam operi diuino meritorioque, tribuitur plus quam uera fides admittat. Multiloquium esse dicas, quod Dominus apud Matth. prohibuit atque condemnauit ceu ethnicam superstitionem. Cantatur præterea lingua peregrina, & paucis nota, ideoque sine omni fructu ecclesiae. Auditur diu sonus sine uerbis significantibus, suspensus, & sursum deorsumque deflexus. Certant non raro inter se cantores uocibus, ita fit ut totum templum rauco detonent boatu, ac per uocum contentiones auditores quid canatur parum intelligant. Nihil nunc dico de musica, quam figuratiuam uocant, & de musicis instrumentis, quæ omnia penè Organo ut uocant continentur. Nihil nunc dico de nanijs, siue orationibus pro defunctis. De quibus etià alibi disputauius. Hæc autem & his similia ita occuparunt totum ecclesiastici cultus tempus, ut minimè aut nihil cedere possit ueris precibus & sanctæ diuinæque prædicationi

Quæ uituperanda in cantu ecclesiastico.

uerbi Dei. Idcirco iustissimis de causis Euāgelio credentes, huiusmodi cantū nec usurpant, nec in templo Dei ferunt: religiosissime autem, simul & prudentissime agere uidentur, qui optimam temporis partem, aut ipsum etiam tempus totum cœtuum ecclesiasticorum ardentibus tranquillisque precibus & sanæ annunciationi uerbi Dei, intermisso illo cantu, impendunt: præsertim cū difficile sit cantum tolerabilē alioqui sic circūscribere ac cohibere, ne aliquādo iustas excedat metas.

De Horis cano-
nicis.

Daniel. 6.

Leuit. 26.

Proverb. 24.

Luce 17.

Acto. 3.

Acto. 2.

Acto. 10.

Trip. lib. 9.
cap. 39.

Porro fuisse ueteribus certas & constitutas horas, quibus priuatim & publice orarunt domi & in cœtibus, testatur multis locis tota scriptura sancta. Dauid non semel in Psalmis suis dicit, se accessurum Dominum mane & uespere. Daniel tribus in die horis adorabat Dominum. Rursus Dauid, Septies in die laudem dixisti mihi. At per septies intellexit multoties. Sic enim alibi quoque legimus scriptum, Percutiam uos septies, propter peccata. Et iterum, Septies cadit iustus, & resurgit. Item, Si septies in die peccarit frater tuus, & conuersus fuerit, &c. Septies ergo certis locis etiam in hoc Dauidis ponitur pro multoties. Christus autem Dominus priuatas fidelium preces, quod superius quoque diximus, neque loco neque tempori alligauit: publicas non sustulit. Non enim confusionis, sed ordinis est Dominus. Sed & discipuli eius cū agerent in gente Iudaica, obseruabāt & ipsi, libertate nō necessitate, & propter cœtus maximē, consuetas gentis horas precandi. Nam Petrus & Ioannes ascendunt in templum ad horam precationis nonam. In die Pentecostes erant omnes sancti unanimiter congregati, ac spiritum sanctum acceperunt ad horam diei tertiam. Legitur & Petrus priuatim in superiorem domus partem circa horam sextam ascendisse. Sublato templo & dispersis Iudæis, ecclesiæ ex Gentibus collectæ horas collectarum uel cœtuum non obseruarunt pares, sed pro libertate prout cuique ecclesiæ uidebatur maximē opportunū. Cuius quidē diuersitatis meminit & Ecclesiast. historia. Ferē tamē usurpatæ sunt ad cœtus horæ matutinæ & uespertinæ. S. Hierony. exponens nō ritū uniuersalis ecclesiæ quid faciat in cœtibus sacris, sed quid sua spōte chori solitariarū uirginū soleant, in Epitaphio Paulæ, Mane, inquit, hora tertia, sexta, nona, uespere, noctis mediō per ordinem Psalmeterium cantabant. Die tantum Dominico ad ecclesiam procedebant, ex cuius habitabant latere, &c. Ita ad priuatam institutionem pertinet, quod eiusdem generis legitur ad Latam de Instit. filia, & ad Demetriadem de Custodienda uirginitate. Ac maiores uel celebriores quidem ecclesiæ (quas hodie appellant Cathedrales, nimirum à cathedra, uel ab ordine prophetarum ibi docentium aut profitentium, qualis quondam fuisse uidetur ecclesia Antiochena, Corinthiaca, Alexandrina & similes) certis horis, nimirum matutinis ac diurnis uel etiam uespertinis, ad tractationem seu excussionem sanctarum canonicarum scripturarū conuenerunt. Fundamenta eius obseruationis collocata uidentur in ecclesia Corinthiorum. De qua Apost. 1. Cor. 14. cap. abundē testatur. Euseb. Ecclesia. hist. lib. 5. cap. 9. scholæ ecclesiasticæ Alexandrinæ mentionē faciens, Ab antiquo, inquit, sacrarū literarum doctrina & exercitium apud eos uigebat: quæ consuetudo etiā ad nos usque perdurat, quam & à uiris eloquentia diuinarumque literarum studio potentibus institutā esse accepimus, &c. nimirum ad exemplum Corinthiæ ecclesiæ. Vestigia huius saluberrimi ritus nonnulla apparebant aliquando in Occidentali ecclesia, sicuti colligere est ex S. Ambrosij & August. scriptis. At his quidem ipsis & mox insequentibus temporibus, cū perpetuis bellis omnes prope gentes colliderentur, ac in ultimam sanguinis Christi, sanctorū Apostolorū & martyrum, iuxta uaticiniū Danielis & beati Ioan. Apostoli & Euang. Romanū imperiū discerperetur, & præda fieret omnibus populis: hinc irruentibus Gotthis uel Germanis, illinc in ceruicem Ro-

mæ in-

ma inuolantibus Hunnis alijsq; barbaris militibus, dissipatae sunt optimae scholae, arserunt nobiles bibliothecae, perierunt honesta & bona studia, unde & ecclesijs dati sunt doctores, ueteribus illis maxime dissimiles, qui ea non erant instructi facultate ut possent sacras tractare literas, felicitate tanta quanta tractauerant priores. In hac dissipatione, ne nihil remaneret tractationis canonicarum scripturarum, apparet emeruisse uiros doctrinae canonicae non omnino negligentes, qui totam scripturam canonicam ita in partes & per totum anni spatium distribuerunt, ut liceret semel in anno Biblia uniuersa, Psalterium autem crebrius, imo singulis septimanis absolueret. Psalmi orationis locum obtinebant: quibus succedentibus temporibus & aliae multae preces coniunctae, ac ne lectio ipsa scripturarum uideretur omni expositione carere, patrum lectiones & homiliae postremo adiectae sunt: non ut soli sacerdotes haec sibi secreto legerent (sicut hodie ferè fieri solet) aut ut haec precum loco festinantissima lectione immurmurarent: sed ut palam in templo apud populum, & ad aedificationem ecclesiae exercendo peragerent. Vt iam non comemorem hunc ritum non fuisse receptum ab omnibus, tantum abest ut fuerit districte praecipus. Cuius quidem rei nonnulla insunt uestigia Distinct. 15. Sancta Rom. Caterum a lectione Canonicarum scripturarum, horae, quibus legebatur illae, canonicae uidentur appellatae: sicuti & canonici a studio & lectione canonicarum scripturarum. Quo autem tempore hoc, & a quibus primum authoribus factum sit, liquidò non constat. Tribuunt huius quiddam alij Hierony. alij Damaso, alij uerò Pelagio eius nominis secundo, alij Gelasio & Gregorio. Quoniam uerò Homiliae & lectiones non paucae Bedae, & alijs posterioris seculi doctoribus ascribuntur, denique multa alia in his precibus horarijs leguntur quae nullam planè uetustatem respiciunt: certè longè, ut uariè diuersisq; contextum temporibus, ita recentius est institutum quam Pa-pistae existiment. Nec desunt qui tradant rogante Carolo magno Paulum diaconum, uel monachum Cassinensem. & Isuardum monachum, Lectiones, illas maxime quae de diuinis sunt, in horis istis legi consuetas, selectas tradidisse. Vt cumq; uerò haec habeant, certissimum est horas illas hodie praecipuas & canonicas appellatas, non diuinum, sed humanum esse inuentum, & laceras corruptasq; ueteris prophetiae reliquias uel umbras: quibus praeterea multas fabulas & ineptias esse attexas negari non potest. Certè talis hodie mixtura apparet, ut uideatur indignissima planè quae in ecclesia Christi porro uel usurpetur uel toleretur, nisi magis uelimus uentribus quibusdam quam toti ecclesiae consultum. De quibus haec haecenus.

Postremo loco excutiendum restat quomodo orandum sit, quibus uerbis, aut *Quomodo sit qua sit utendum orandi formula.* Formae quidem orandi plures sunt, sed nulla melior ea quam tradidit Dominus noster unice charus Deo patri filius. Nec ulla certior est quae omnia breuibus comprehendit. Hac summa praescripsit quid se dignum, quid sibi acceptum, quid necessarium nobis sit, quid deniq; concedere ipse uelit. Vnde beatus Cyprianus orationem Dominicam explicans inter alia, Qui fecit uiuere, inquit, idem docuit & orare, benignitate scilicet qua & cetera dare & conferre dignatus est, ut cum prece & oratione quam filius docuit apud patrem loquimur, facilius exaudiamur, uereq; & spiritualiter adoremus. Quae enim potest magis spiritalis esse oratio, quam quae a Christo nobis data est, a quo nobis & spiritus sanctus missus est: Quae uera magis apud patrem precatio, quam quae a filio, qui est ueritas, de eius ore prolata est: Vt aliter orare quam docuit, non ignorantia sola sit, sed & culpa: quando ipse posuerit & dixerit, Reijcitis mandatum Dei ut traditionem uestram statuatis. Oremus itaq; fratres dilectissimi, sicut magister Deus docuit. Amica et familiaris oratio est, Deum de suo rogare, ad aures eius ascen-

dere Christi orationem. Agnoscat pater filij sui uerba cū precem facimus. Quod habitat intus in pectore, ipse sit & in uoce. Et cū ipsum habeamus aduocatum apud patrem pro peccatis nostris, quādo peccatores pro delictis nostris petimus, aduocati nostri uerba promamus. Nam cū dicat, Quaecunque petieritis patrem in nomine meo, dabit uobis: quanto efficacius impetramus, quod petimus in Christi nomine, si petamus ipsius oratione? Hæc ille.

An ad uerba
orationis Domini
simus
alligati.

Ex his contextitur quæstio, An ita uerbis orationis Dominicæ alligati simus ut alijs omnino uerbis orare non possimus? Respondeo noluisse Dominum ita nos conceptis astringere uerbis, quasi alijs uerbis aut forma alia uti nō liceat: sed proposuit uniuersalia quædam, ad quæ omnes nostras preces referamus. Nam & Augustinus ad Probam de Orando Deo, ostendit nihil uspiā in sacris literis esse oratum, quod non cōprehendatur oratione Dominica. Nam si per omnia precatōnū sacrarū uerba discurras, inquit, nihil inuenies, quod non ista Dominica concludat & contineat oratio. Quibus mox subiicit, Vnde liberū est alijs atq; alijs uerbis eadem tamen in orando dicere, sed nō debet esse liberum alia dicere. Consultissime ergo faciunt, qui omnes suas orationes ad orationē referunt Dominicā, cui & primas tribuunt, & hanc perpetuō in animo retinentes meditantur atq; exercent.

Quid necesse
sit Deo uota
nostra uerbis
exponere.

Quæri solet & aliud, Quid necesse sit Deo uerbis exponere uota nostra cū omnia prius norit? Diximus mox ab initio huius Sermonis, orationem nostram esse humiliationem coram maiestate diuina, quibus insuper hæc adiicimus. Non exponimus Deo uota nostra uelut nescienti, aut ut ignorantem doceamus, aut ut operosa & elegantiorationē Deū flectamus, sed propter nos ipsos uerbis utimur quibus nos excitemus. Et in hunc finē sanctissimi quicq; uiri Dei prolixè uota sua Domino exposuisse leguntur in Psalmis & in historijs. S. Hieronymus, Nos non sumus narratores, inquit, sed oratores. Aliud est enim narrare ignorantī, aliud scientem petere. In illo indicium est, in hoc obsequium. Ibi fideliter indicamus, hic miserabiliter obsecramus. Et beatus Augustinus, Nobis uerba necessaria sunt, inquit, quibus cōmoueamur, & inspiciamus quid petamus: non quibus Dominum seu docendum, seu flectendum esse credamus.

Quomodo pro-
hibitum multi-
loquium.

Proinde cū Dominus multiloquium uel battologiam in oratione prohibuit, non ad modica & succincta uerba orationē fidelium simpliciter astringit, sed prohibuit ne ethnicorum more multa uerba sine sensu & mente profundamus, & deinde existimemus nos exaudiri propter multiloquium precumq; frequentem iterationem: quod hodie arbitrantur falsō ad numerum orantes, & rosaria contexentes. Subiungit enim Dominus, Putant fore ut ob multiloquium exaudiantur. S. Augustinus distinguit inter multum loqui & multum precari. Multum loqui, inquit, est in orando rem necessariam superfluis agere uerbis. Multum precari autem est, ad eum quem precamur diuturna & pia cordis excitatione pulsare. Nam plerunq; hoc negotium, plus gemitibus quā sermonibus peragitur. Et mox, Nō est improbum uel inutile cū uacat orare prolixius. Nam de ipso Domino nostro scriptum est, quod pernoctarit in orando, quod prolixius orauerit. Vbi quid aliud quā nobis præbuit exemplū? Hæc ille. Quod si cui difficile est prolixius & continue orare, interrumpat orationem licet, sed eandem crebrius reparandam recurrat. Talis enim breuiloquentia in orando laudem meretur. Et ut hunc locum finiamus, nemo existimet se orando nescienti Deo narrare res nostras: nemo existimet se exaudiri propter expositionem & propter operosam quidem & exactam expositionē sapiusq; repetitam, & intensissimis clamoribus auribus diuinis inculcatam: nemo existimet ad numerum certum esse orandum, hoc est, orationes Domini

minicas Deo nostro tanquam nō bene memori & male fidei Domino baccis globulisq; collectis, & quasi ad calculum reuocatis, esse annumerandas. Etenim talia non citra fœdissimam superstitionem fiunt.

Quoniam uerò dixi, quod & omnes p̄j per totum terrarum orbem confitentur, absolutissimam orandi formulam nobis esse traditam Oratione Dominica ab ipso Domino nostro Iesu Christo, restat ut sanctissimam illam diuinissimisq; uerbis compositam uerbotim ex ore Domini, sicut eam nobis Matthæus Apostolus retulit, recitemus, deinde eandem, qua fieri potest breuitate & perspicuitate, exponamus, quò rectius quisq; quod orat intelligat, afficiaturq; penitius. Orationis diuinissimæ formula hæc est:

Orationis Dominicae expositio.

Pater noster, qui es in cœlis, Sanctificetur nomen tuum. Adueniat regnum tuum. Fiat uoluntas tua, sicut in cœlo, ita & in terra. Panem nostrum quotidianum da nobis hodie. Et remitte nobis debita nostra: sicut & nos remittimus debitoribus nostris. Et ne inducas nos in tentationem; sed libera nos à malo, Amen.

Sacrosancta hæc Domini Iesu Christi seruatoris, doctoris & summi Pontificis nostri oratio catholicae ecclesiae tradita, ut sit catholica orandi Deū formula, distinguī solet in Præfatiunculam & petitiones sex. Alij septem numerant. Tradunt quidam priores tres petitiones seruire præcipuè gloriæ Dei, ppagandæ, posteriores nostri curam gerere, & ea quæ nobis necessaria sunt postulare. Videntur autem pleræque utrunque continere. Præfatiuncula hæc est, Pater noster qui es in cœlis. Hac inuocamus & consecrantes nos Deo totos conijcimus in eius curam & misericordiam. Ac singula uerba ingentia habēt mysteria. Voluit enim Dominus orare nos sensu magis quàm uerbis. Hæc ergo admonent & cogitanda sufficiunt, mens uerò instructa spiritu sancto, quem ante omnia orantibus necessarium diximus, eleuataq; in contemplationem Dei rerumq; diuinarum, hæc deuotè & ardentè meditatur. Et Patris, quidē uocabulum multarum simul rerum nos admonet. Principiō enim docet nos, omnes preces nostras, non alijs offerendas esse, quàm ei qui pater sit, hoc est, solum Deum esse inuocandum, nec aliū pro hoc, aut aliū cum hoc. Vnus est enim Deus & pater noster, plenitudo & sufficientia bonorum omnium, in quo solo fideles acquiescunt, & extra quem nihil uerorum bonorum quærunt. Et certè non potest hæc oratio ulli creaturæ offerri. Cui enim angelorum, aut sanctorum, uel diuorum dixeris absque sacrilegio, Pater noster qui es in cœlis: &c. Deinde docet nos Patris uocabulum, per quem, patrem hunc inuocemus, non per interuentum & ora diuorum, sed per Iesum Christum Dominum nostrum, per quem solum facti sumus filij Dei, qui alioqui nascimur & eramus natura filij iræ. Quis obsecro auderet prodire in conspectum Dei summi & æterni, & hunc appellare patrem, se filium, nisi in dilecto & naturali suo filio nos adoptasset in filios gratiæ pater? Dicentes ergo Pater, loquimur ex ore filij, qui ita nos orare docuit, & per quem euecti sumus in hanc dignitatem: ut nihil sit necesse adijcere nomen Christi, ac dicere: Oramus te pater cœlestis per Christum: cū in prima uoce Pater, totum mysterium filij Dei redemptionisq; cōprehendamus. Quia enim pater est, nos filij sumus, idq; per meritum Christi: patrem ergo inuocamus & appellamus per Christum: ut iam non repetam quòd sic oramus ex ore Christi. Præterea eximit nobis blandum patris uocabulum omnem cordis diffidentiam. Patrem enim appellamus non tam creationis uniuersi ratione, quàm erga nos singularis paternæq; beneuolentiæ. Vnde licet Dominus sit

Orationis Dominicae distinctio.

Pater.

Oratio Dominica patri per Christum offertur.

Psalm. 103.

Luce 15.

Noster.

Qui es in cœlis.

3. Reg. 8.

Acto. 7.

Deus, & magnus quidem Dominus & Deus omnipotens, nullā tamen ei harum appellationum orantes tribuimus, sed patrem uocamus, qui uidelicet bene nobis uelit, nos amet, in tutelam & curam suscipiat, nostriq; misertus, omnibus bonis cumulare, & sponte quidem bonaq; sua erga nos uoluntate cumulare desideret. Huc pertinent prophetarum testimonia, Dauidis maxime illud, Misericors & clemens est Dominus, patiens & multæ miserationis. Non in æternum irascitur, neque perpetuò comminabitur. Non secundum peccata nostra reppendit nobis, neq; secundum iniquitates nostras retribuit nobis. Nam quanto interuallo distat cœlum à terra, tantum præualet misericordia eius super timentes eum. Et quantum distat Ortus ab Occasu, tantum remouit Dominus à nobis scelera nostra. Et sicut miseretur pater liberorum suorum, ita miseretur Dominus timentium eum. Ipse enim nouit conditionem nostram, recordans quòd puluis sumus. Huius rei præelegans exemplum uidere est in Euangelio secundum Lucam, ubi miris affectibus depingitur benignus pater in gratiam recipiens concoctorem & prodigum illum filium.

His accedit dictio Noster. Id quod duorum admonet. Principiò enim parum est Deum agnoscere Deum esse ac patrem omnium, aut aliorum, nisi etiam credamus eum esse patrem nostrum, nisi nos totos eius fidei & tutelæ consecremus, tanquam patris nostri, qui bene nobis uelit, nos amet, nos curet, nullibi nos negligat. Nisi enim sic credamus, nec fide nec dilectione Dei commendabilis est nostra oratio, ideoq; parum grata Deo. Atqui Deum illū opt. max. nostrum esse Deum, cum ex beneficijs multis, tum maxime ex mysterio redemptionis per Christum intelligimus. De qua re alibi diximus. Deinde cum orare iussit Pater noster, & non Pater meus, protinus ab initio requirit à nobis charitatem. Vult enim nobis curæ esse non nostram duntaxat, sed omnium hominum salutem. Sumus enim omnes unius corporis membra: unde singula non pro seipsis seorsim orant, sed singula pro omnium membrorum totiusq; corporis incolumitate. Ea de re dixi superius cum differerem de modo orandi Deum.

Adiicitur mox, Qui es in cœlis: non quòd Deus cœlis concludatur ceu carceribus. Eum errorem dudum confutans felicissimus & sapientissimus regum Solomon dixit, Si cœli cœlorum te non cupiunt, quanto minus domus hæc? Quibus coniungenda arbitror quæ Stephanus eadē de re ex Isaia adduxit in Actis Apostolorū. Ergo in cœlis esse dicitur, quòd diuina eius maiestas ac potentia gloriaq; in cœlis maxime relucet. Cœlis enim in rerū natura nihil est augustius; nihil pulchrius. Præterea in cœlis se nobis exhibet fruendum pater. Cœlum est communis patria nostra, ubi Deum & patrem nostrum habitare credimus, & ubi Deum & patrem nostrum adoramus: licet ipsum credamus ubique & omnibus semper esse præsentem. Sicut enim cœlum omnia ambit & contegit, æqualibusq; ubique spatijs distat à terra: ita præsentia nos numinis nullibi destituit. Ubique habemus in conspectu cœlum: ubiq; sumus in conspectu Dei. Cæterum admonemur præterea cœlorum mentione, nostri officij & nostræ miseriæ. Nostri officij est, animis orando eleuari in cœlos, terrenorumq; obliuisci, ac magis patre & patria cœlesti, quàm exilio hoc & carcere delectari terreno. Miseriæ est, quòd propter peccatū eiecti ex patria, in hisce terris reptantes uarijs obnoxij sumus calamitatibus, ideoq; necessitate adacti nunquam clamare ad patrem desinimus. In primis uerò dicentes, Qui es in cœlis, secernimus patrem quem inuocamus nostrum, à patre terreno, tribuentes illi omnipotentiam. Certè qui inuocatur & exaudire debet, omnia sciat, uideat & audiat, adde & uelit ac possit, oportet. Proinde bonæ uoluntati

tati erga nos, quam in uocibus Pater noster expressimus, coniungimus iam omniscientiam & omnipotentiam, subiicientes, Qui es in cœlis. His excitatur & confirmatur fides orantium.

Sequuntur modò petitiones ordine sex. Prima est, Sanctificetur nomē tuum. *Sanctificetur nomen tuum.* Vocauimus deum patrem nostrum, nos filios eius. At filiorum est honorare uel glorificare patrem, idcirco mox ab initio petimus ut nomen domini Dei & patris nostri sanctificetur. Id sanè sanctum & impollutum est semper in semetipso, nec illi quicquam ex nobis uel accedit uel decedit. Vnde postulamus, ut quod in se ipso sanctum est & manet, tale agnoscatur à nobis, & semper sanctificetur à nobis. Nomen est cuiuscunq; rei definitio, & nomina sunt inuenta ut res inter se distinguant. Cæterū Deus infinitus est & immensus, præterea unus est, ergo nomen non habet quo definiatur, nomine non indiget ut ab alijs dijs discernatur. Quæ ergo nomina in scripturis ei tribuuntur, propter nostram infirmitatem tribuuntur, quò ratione & comparatione aliqua intelligamus dicta de immenso & infinito. Ergo nomē Dei reuera ipse Deus est cum uniuersa sua maiestate & gloria. *Sanctificare.* Sanctificare significat aliquoties res ab usu prophano ad usum sacrum separare. In præsentī significat celebrare, laudare, glorificare. Petimus itaq; ut ipse Deus, qui natura sua bonus, sanctus, & in æternum benedictus, clemens, benignus & misericors pater est, qualis in se est, à nobis omnibus agnoscatur & celebretur: ut omnes gentes relictis erroribus & hæresibus, consecrent se uni huic patri ac Deo in ueritate: ut omnia quæ polluant nomen domini, cuiusmodi sunt malæ artes, impietas, Epicureismus, uita spurca, & in primis doctrina corrupta & antichristiana tollatur, ut illuminati sanctificemus nomē domini. Proinde hac petitione postulamus spiritum sanctum, ipsissimum omnis ueræ sanctificationis authorē unicū. Postulamus ueram fidem in Deum per Christum in toto orbe terrarum. Postulamus sanctas cogitationes, & uitam puram, qua glorificemus nomen domini: quod fit dum quisq; suum facit officium, dum eiicitur satanas omnis impuritatis author, dum tollitur doctrina corrupta, & cessat impostura, dum impuritas mundi exulat. Hanc petitionem præstantissimus rex & propheta Dauid his illustrat uerbis, Deus misereatur nostri, & benedicat nobis; illuminet uultum suum super nos, & benedicat nobis. Ut cognoscamus in terra uiam tuam, in omnibus gentibus salutare tuum. Confiteantur tibi populi Deus, confiteantur tibi populi omnes. Et quæ sequuntur Psalm. 67. Huc pertinet tota saluatoris oratio descripta à Ioanne cap. 17.

Secunda petitio est, Adueniat regnum tuum. Etenim nomen Dei & patris nostri nequit sanctificari, nisi ipse in nobis regnet. Regnum aliud quidem Dei: aliud dæmonis est. Porro regnum Dei aliud gloriæ, aliud rectè dicitur esse gratiæ. Gloriæ regnum, non huius, sed alterius est seculi. Gratiæ regnum, Christi regnum est in hoc seculo, quo per spiritum sanctum regnat Christus in suis fidelibus, qui se ei gubernandos sponte subiiciunt, dicentes & facientes quæ Christianos decent ac ornant. Diabolus uerò regnat in filijs diffidentiae, qui se ei substernunt gubernandos pro impietate & nequitia eius, facientes quæ non tantum carni libent, sed quæ in diuinæ maiestatis contumeliam uergunt: quos post hanc uitam, iusto Dei iudicio dæmon rex impiorum rapit ad tartara, in regnum mortis & iudicii, ut ardeant semper. Porro regnum terrenum quod regunt principes huius seculi, uel Dei uel diaboli regnum dicitur, prout alteri istorum se applicuerit. Hæc omnia breuissimis perstringimus, quòd alicubi de hisdē differuimus copiosius. Proinde postulamus petitione hac secunda, ut regnet & uiuat in nobis Christus, nos

Adueniat regnum tuum.

in ipso, ut regnum Christi propagetur & inualeat in orbe terrarum, ut doctores & magistratus ecclesiastici, denique principes, adde & scholæ, & quicunque promouere possunt regnum Christi, charismatibus inuncti & irrigati floreant, superent, triumphent: præterea petimus ut diaboli & antichristi regnum frangatur & dissipetur, ne noceat sanctis, ut cum regno diaboli superetur & calcetur omnis impietas, atterantur denique & perdantur omnia instrumenta seu arma antichristianismi. Postremo oramus ut postquam ex procelloso huius seculi euripo enauigauerimus, recipiamur ac congregemur ad Christum & ad omnes sanctos in regnum gloriæ æternum. Sicut enim regnum Dei uenire ad nos, & deum in nobis regnare cupimus, ita nos in regnum eius uenire uel recipi, & æternum cum ipso uiuere sanctissime postulamus.

Fiat uoluntas tua.

Psalm. 113.

Tertia petitio est, Fiat uoluntas tua, sicut in cœlo, ita in terra. Non regnat in nobis deus, nisi ipsi obediamus: petimus ergo post regnum, obedientiæ absolutæ gratiam. Etenim non postulamus ut faciat deus quod uult. Semper enim fit Dei uoluntas etiam si id nunquam petamus, & omnibus uiribus nostris reluctemur. Nam propheta dicit, Deus noster in cœlo est, omnia quæcunque uoluit fecit in cœlo & in terra. Petimus ergo ut quod ipse uult, idem nos semper & uelle & facere efficiat. Semper enim illius uoluntas bona est, nostra uero propter corruptionem peccati mala est. Oramus ergo gratia sua nobis adsit, quò nostra uoluntas regeneretur, & conformis fiat diuinæ bonæ uoluntati, ut se formandam sponte præbeat spiritui sancto: ut uelit eius gratia quod ipse inspirat: ut quod bene in nobis cœpit, perficiat, uires ad hoc & patientiam conferat: ut in omnibus cum prosperis tum aduersis bonam Dei uoluntatem agnoscamus, ne quid hic ex nobis ipsis uelimus, ac prosperis efferamur, aduersis demergamur, sed ut accommodemus nos eius uoluntati gubernandos in omnibus & per omnia, ad hunc modum scilicet subiicientes nostram uoluntatem eius uoluntati. Præterea si quid petimus uoluntati eius contrarium, ne concedat, sed stultitiam potius nostram nobis condonet, nostramque uoluntatem non bonam nobis infringat, in uoluntate sua bona nos erudiat, quò nihil dubitemus hanc semper esse sequendam, & semper esse bonam, omniaque in nostrum fieri ab illa profectum.

Sicut in cœlo & in terra.

Velle quod uult deus. bona felicitatis pars.

Maximum hac in parte certamen sentiunt in semetipsis fideles, Paulo testante & dicente, Caro concupiscit aduersus spiritum, & spiritus aduersus carnem. Hac autem inter se mutuò aduersantur, ut non quæcunque uolueritis, eadem & faciatis. Idcirco non qualemque conformitatem uoluntatis nostræ cum uoluntate diuinæ postulamus, sed subiungimus, Sicut in cœlo ita etiam in terra. Id est, concede pater, ut in nobis terrenis hominibus ita fiat tua uoluntas, uti fit in cœlitibus tuis beatis spiritibus. Hi non reluctantur in cœlo sanctissimæ tuæ uoluntati, sed unanimes hoc duntaxat uolunt quod tu uis, imò in hoc uno beati sunt ac felices, quò in tua uoluntate consentiunt atque acquiescunt. Certè in terris non minima felicitatis pars est, uelle quod uult Deus: extrema infelicitas est, nolle quod uult Deus. Atque hoc quidem infinitis exemplis poterat demonstrari, uulgare duntaxat & unicuique proferam. Ægrotat aliquis grauiter, & dolores tormentaque sentit uix tolerabilia homini, at hic interim agnoscit se hæc pati sic iubente & uolente Deo patre optimo, benignissimo, & iustissimo, qui ipsi bene uelit, & hanc calamitatem grandem immiserit in salutem & gloriam ipsius: an non hic in medijs tormentis subiiciendo se uoluntati diuinæ refrigeriū sentit? & quod homini uidebatur acerbissimū amarissimumque, deditiōe hac uoluntaria, & spontanea reddit suauē & dulcissimū? Rursus ægrotat alius non admodum graui morbo oppressus, sed hic non

non agnoscit morbum bona dei uoluntate sibi immissum esse, imò arbitratur Deum ignorare morbum, Deum non curare morbum, hunc ergo in alias atq; alias reijcit causas, modosq; comminiscitur & quærit medendi uarios, ac in his mirifice exercetur & affligitur, nec tamen sic reluctando diuinæ uoluntati, quicquam inde sentit refrigerij aut consolationis: quid ergo hic aliud facit nolens quod uult Deus, quàm quod solent malum male uitando conduplicare: Proinde fundamentum omnis felicitatis est fidelis obedientia, qua nos & nostra omnia plenè subiicimus bonæ Dei uoluntati: ideoq; maxima hac petitione nobis concedi à patre oramus, regenerationem uel innouationem mentis, obedientiam ueram, patientiam perseverantem, mentemq; Deo in omnibus & semper consentientem atque subiectam.

Quarta petitio talis est, Panem nostrum quotidianum da nobis hodie. Nam diuina uoluntas non potest in nobis fieri, nisi alamur & cōfortemur pane Dei. Panis significat Hebræis omne ciborum genus & conseruationem seu sustentamentum humanæ substantiæ. Vnde in prophetis dictum legimus, Frangam baculum panis. Constat autem homo substantia duplici, anima & corpore. Anima spiritus est: corpus ex terra & elementis alijs confectum est. Duplici ergo conseruatur pane, spiritali & corporali. Spiritalis animæ cibus, quo in uita conseruatur, est ipsum Dei uerbum, ex ore diuino prolatum: in euangelio ex lege repetente domino, & dicente, Nō solo pane uiuit homo, sed omni uerbo quod egreditur ex ore Dei. Et quoniam hoc unice proponit fidelibus uerbum Dei æternum & incarnatum, ipsum inquam Dei filium, rectè hunc agnoscimus cibum esse animæ, imò totius hominis fidelis. Ipse enim testatur se esse panem qui è cœlo descenderit, ex quo manducantes non moriantur, sed habeant uitam æternam. Corporalis panis constat elementis & terrenus est, ac comprehendit cibum, potum, uestitum, sanitatē corporis prosperam, defensionem, breuiter incolumitatem & saluum uitæ humanæ statum. Et hunc quidem panem appellamus nostrum: non quod non sit munus & beneficium Dei, sed quod nobis destinatus, ad conseruationem nostri pertineat, nobisq; necessarius sit. Interim tamen & quotidianum siue *ἡμετέριον* appellantes, omnium præstantissimum significamus, qui solus possit substantiam nostram, quantum satis, & quàm diu oportet, & eo prorsus modo & ea ratione qua necesse est, sustentare uel conseruare. Diximus enim superius, nostrum non esse Deo modum agendi uel dandi præscribere. Huc pertinet & illa cōsequentia uerba, Da nobis hodie: Solius enim Dei est dare: nec cōgruit ulli creature hæc petitio. Da, Dauid canit. Omnia à te expectant, ut des illis escam in tempore. Dante te illis colligent, aperiente te manum tuam omnia implebuntur bonitate. Item, Oculi omnium in te sperant domine, & tu das illis escam in tempore opportuno. Aperis tu manum tuam, & imples omne animal benedictione. Iam Nobis da, non Mihi da, oramus, id quod iterum admonet & charitatis & coniunctionis fraternæ. Non enim nostra duntaxat quærere, sed & omnium aliorum hominum incolumitatem & conseruationem petere debemus. Vocabulum Hodie modum nobis statuit. Hoc enim dicimus, Suffice tu nobis quotidie & momentis singulis, quantum satis nobisue necessarium est: id quod tu solus optimè nouisti. Admonemur enim obiter ne immodica fluxarum rerum cupiditate ardeamus, & consequutas prodigamus luxu, perdentes & opes & nostras animas. Ideo uerò Sapiens ille legitur dixisse, Duo à te postulauī, ne deneges antequā moriar. Procul à me remoue uanitatem & mendacium. Inopiam & diuitias ne dederis mihi: sed fac ut habeam panem dimensū mei, ne satiatus te negem dicens, Quis est Deus? aut per inopiam fu-

Panem.

Matth. 4.

Deut. 8.

Nostrum.

Quotidianum.

Da.

Nobis.

Hodie.

Prouerb. 30.

rer & abiurem nomen Dei mei. Hac itaq; petitione quarta nos totos tradimus in curam Dei patris, ac prouidentiae eius nos commitimus, ut nos pascat, defendat, feruet, qui solus feruare potest. Nisi enim ille benedictionem suam in nos effundat, nisi uires conferat rebus illis medijs pertinentibus ad sustentationem & defensionem nostri, nihil omnia efficiunt. Oramus pro felici cursu uerbi Dei, pro ipsis pastoribus ecclesiarum, pro defensoribus reipublicae, pro ecclesiae & reipublicae incolumitate. Petimus ut omnia sufficiat benignus pater quaecunque necessaria sunt ad animae & corporis sustentationem & necessitatem.

Et remitte nobis.

Debita nostra.

Lucæ 7.

Sicut & nos remittimus debitoribus nostris.

Caterum ne quis se indignum crederet pane quotidiano, quod filijs non canibus debetur, & ideo segnus aut fiducia tenuiore oraret, praecipuas hanc sollicitudinem piorum dominus, quintam subiicit petitionem, hanc, Et remitte nobis debita nostra: sicut & nos remittimus debitoribus nostris. Petimus his peccatorum nostrorum ueniam. Ut autem concedatur nobis delictorum uenia, agnoscamus oportet nos esse peccatores. Nisi enim hoc faciamus, quomodo delicta nobis remitti postulabimus? Certè omnes sancti hac orandi utuntur formula. Omnes itaq; agnoscunt se esse peccatores. Reliquiae enim remanent etiam in renatis & sanctissimis hominibus, quae quotidie erumpunt in cogitationes, in dicta & facta praua, non raro etiam in scelera. Qualiacunq; uerò sint delicta uel peccata nostra, ea primum quidem deo patri humiliter confitemur, deinde oramus ut remittat. Peccata nostra ipso Deo doctore debita appellamus, quod eorum poenam Deo ceu pretium debemus. Ille uerò remittit nobis debita, cum poenam non exigit à nobis commertam, perinde de nobis iudicans ac si ipsi nihil debeamus. Allusio enim fit ad debita corporalia; quae si creditor debitori remiserit, ius non habet amplius, eum qui debitor fuerat, coniiciendi in carcerem aut exigendi poenam. Ergo remittitur nobis non tantum culpa, sed & poena. Neque uerò merita nostra patri obtendimus: sed, Remitte, uel dimitte nobis dicimus, debita nostra. Remissionis uocabulum gratuitam delictorum condonationem innuit. Etenim nobis remittit quod non sumus soluendo. Vnde in euangelio legimus, Cum debitores non essent soluendo, donauit utrique debita. Similia traduntur apud Matth. in cap. 18. Nullo ergo merito nostro, nulla satisfactione nostra, sed diuina benignitate propter Christum petimus nobis condonari omnia delicta. Nec dubitant hic sancti de remissionis certitudine. Dixit enim in euangelio dominus, Quicquid petieritis credentes in nomine meo, accipietis: propter Christum ergo nihil dubitant orantes fide omnia peccata sibi esse remissa. Sic enim & in symbolo profiteamur, Credo remissionem peccatorum.

Adiicimus his protinus, Sicut & nos remittimus debitoribus nostris: non quod putemus propter remissionem nostram mereri uel impetrare nos condonationem delictorum nostrorum: alioqui enim non constaret ratio remissionis. Qui enim aliquid uel affert uel facit, cuius gratia peccatum tollitur, aut qui pro peccato satisfacit, ei nihil remittitur, sed rependitur potius. Alijs ergo de causis hac adiecta uidetur. Principio, quia solliciti sumus de remissione, de qua multi ambigunt, uoluit dominus solari nostram infirmitatem, hoc ueluti signo adiecto, quo intelligeremus tam certò nobis à Deo dimissa esse peccata, quam certò alijs sua remisimus aut condonauimus delicta, quibus nos offenderant. Deinde uoluit nobis excutere ueternum, ac charitatis inculcare studiū, admonereq; nostri officij, ut si quid animis nostris adhærescat adhuc ueternum inimicitiarum, id sciamus omnino depouendum seu expectorandum, imò iam nunc inuocandum esse dominū, ut corda nostra commoueat, qui possimus. Grauius quidem ueteres iniurias & offensas ponimus.

ponimus. Sed æquum est ut minora remittamus fratribus, qui maximorum peccatorum ueniam accepimus à benignissimo patre; nisi forte illius fortunam experiri libeat, qui in parabola euangelica & ipse magnam domini benignitatem & liberalitatem in donando expertus, interim atrox & crudelis erat erga fratrem in exigendo debito modico & leuiculo. Notissima est parabola apud Matthæum in capite decimo octauo.

Sexta & ultima petitio est, Et ne inducas nos in tentationem: sed libera nos à malo. Nunquam enim ita remittitur peccatum, ut non remaneat in carne concupiscentia, quam excitant & in uaria peccatorum genera producunt tentationes. Eæ sunt uariæ. Principiò enim tentat nos Deus, cū aliquid obijcit, quo nos probat: ut cum iubet Abrahamum immolare filium: uel cum aduersa immittit, ut & fidem nostram exerceat, & igne tentationis scoriam excoquat scelerum. Hæ tentationes diuinæ tendunt ad salutem fidelium. Proinde simpliciter non oramus, ne tentemur. Tentatio enim diuina utilis est. Beatus enim prædicatur uir ille qui suffert tentationem. Cū enim probatus fuerit, accipiet coronam uitæ. Petimus autem ne inducamur in tentationem. Tentat enim & diabolus, tentamur à mundo, & à carne nostra. Sunt tentationes à dextris & sinistris, huc tendentes, ut subuertamur, ut demergamur in peccatorum barathrum, ac pereamus: id cum fit, nō tentamur tantum, sed & in tentationem inducimur & capimur. Tale ergo est quod petimus, Si tuis salubribus tentationibus o pater cœlestis exercere nos uolueris, præsta quæsumus ut probati reperiāmur: ne autem patiāre abduci nos per satanicam & prauam tentationem, ut te relicto, hostiū nostro mancipati & scelerum uoragī nī immerfi, retineamur & capiamur ab illo in malo & perditione nostra. Iam enim subiicimus membrum oppositum, quod & præcedens exponit, id quod alij septimam esse dicunt petitionem, Sed libera nos à malo: ἀπο τοῦ πονηροῦ, ab illo inquam malo, nimirum à satana, qui alibi tentator cognominatur. Libera nos à satana & ab omnibus malis quæ ille immittit: libera ab insidijs, artibus, deceptionibus, à bello, fame, captiuitate, peste, ab omnibus ijs quæ mala, calamitosa & noxia sunt. Ea quæ sint optimè nouit pater cœlestis, ad quæ hic dicentes, Da nobis salutaria & bona: aufer à nobis quæ tu nosti esse pernicioſa & mala, collecta breuitate orationem diuinissimā concludimus, adiicientes in super Amen. Vulgaris illa quondā confirmatio & acclamatio fuisse legitur, ut uidere est Deut. 27. Nehem. 8. 1. Cor. 14. Exprimit ea principiò nostrum desiderium. Profitemur enim illa quæ orauimus ex animo nos desiderare. Deinde fidei nostræ certitudinem exprimit. Quasi dicamus, Hæc autē certò mihi concedenda à Deo credo. Perinde enim est Amen. ac si quis dicat, Fiat. Et dominus in euangelio sæpe clamat, Amen amen dico uobis, id est, pro certo certam ueritatem dico uobis. Vel indubitatam uobis ueritatem profero. Sic autem fideles post oblatas Deo preces, pacatis sunt mentibus, alacres iam munera domini expectantes.

Porrò inferunt quidam ante dictionē Amen, mox post illa uerba recitata, Sed libera nos à malo. Quia tuum est regnū, & potestas, & gloria in secula, Amen. Cæterum Erasmus Roterod. in suis ad Nouum testamentum Annotationibus, testatur illa uerba non reperiri in ullo antiquo exemplari Latino: in Græcis quidem inueniri adiecta omnibus, sed à nemine exposita interpretum, nisi ab uno Chrysostomo & eius imitatore Theophylacto. Sibi ergo addita uideri orationi dominicæ, sicuti Psalmis quidā adpenderunt, Gloria patri & filio, &c. Idem mox subiungit, Proinde nō est quod Laurentius Valla stomachetur bonā precationis dominicæ partem fuisse decurtatā. Magis taxanda fuerat illorum temeritas, qui non

Et ne inducas
nos in tentationem.

Iacobi 1.

Sed libera nos
à malo.

Amen.

Quia tuū est re-
gnū & pote-
stas & gloria
in secula.

ueriti sint tam diuinæ precationi suas nugas assuere. Nugas enim dixerim ad diuinam doctrinam, quicquid ab hominibus profectum fuerit. Presertim si quod ab hominibus annexum sit, ad Christum authorem conferatur. Nec solus Erasmus de hac appendice addubitauit. Codex enim Hispaniæ, quem uocant Complutensem, habet magis credibile uideri ista uerba non esse de integritate orationis dominicæ, uitiōq; inserta esse scriptorum quorundam uel librariorum. In eodem codice mox subiungitur, Licet uero beatus Chrysostomus in suis super Matth. Comment. Homilia 20. exponat ista uerba, tanquā essent de textu, uerisimilius tamen præsumitur iam suis temporibus originalia in isto passu fuisse corrupta: ex quo nullus Latinorum etiam ex antiquissimis interpretibus siue tractatoribus, legatur de his uerbis aliquam fecisse mentionem. Et uerè quidem hoc dicitur. Diligentissimi enim interpretes qui singulariter orationem dominicam uerbotim explicandam sumpserunt, quales fuere S. Cyprianus, Hieronymus & Augustinus, huius appendicis ne uerbo quidem meminerunt.

Proverb. 18.

De gratiarum actione.

Hæc dixi hætenus de Oratione dominica & inuocatione nominis diuini, de quo sapientissimus hominum Solomon uerissimè pronunciauit, Turris fortissima nomen domini, ad ipsam currit iustus, & exaltatur, id est, in tuto uel in alto loco extra teli iactum consistit & conseruatur. Subijciemus his quædam & de altera orationis specie, Gratiarum actione. Quanquam uerò & ipsa comprehendatur in oratione dominica (omnia enim orationis ueræ, ergo & gratiarum actionem complectitur) singulariter tamē & post illā expositā uolui de ipsa disserere, ne ex commixtione rerum nascatur in animis confusio. Et requirit quidem à nobis gratiarum actionem dominus; cuius quidem rei euidētia in scripturis sanctis argumenta nec pauca extant. Quot enim in Psalmis laudes, gratulationes & gratiarum actiones, & à Dauide, & ab alijs prophetis cōscriptæ & relicte leguntur? Quia in lege quoque dominus peculiare oblationis uel sacrificij genus instituit, quod Eucharisticum diximus appellari. Quid quod Cœna illa paschalis nihil aliud fuit quàm gratiarum actio pro redemptione ex seruitute Ægyptiaca? Certè dominus noster Iesus Christus & memoriam instituens omnium beneficiorum, in primis autem redemptionis morte sua partæ, & omnia sacrificia recolligens in compendium, Eucharistiam ecclesiæ tradit. Quemadmodum suo loco dicemus, & partim in superioribus Sermonibus diximus. Ingenium humanum rebus secundis luxuriat, & rarò unde res secundæ oriantur secum cogitat: ita mysteria & beneficia illa spiritualia non æstimat tantū quanti aliàs debebat. Porci uerò non homines esse uidentur, qui non tantum non æstimant Dei beneficia uti debebant, sed insuper & contemnunt & pedibus conculcant. Grande hos Dei manet iudicium.

Soli Deo debemus gratiarum actionem.

Agēde deo gratie per Christum. Ephes. 5. Hebr. 13.

Porro soli Deo debetur sacrificium laudis. Solus enim omnium bonorum dator & author est; licet interim opera utatur intermedia hominum & aliarum creaturarum. Mittit tibi princeps aliquis munus sanè eximium, & id quidem per aulicum non infimæ sortis, sed selectissimum uirum: huic tamen licet nobili, non agis gratias, sed principi, à quo munus est profectū: etsi interim agnoscas ingenuè aulicum quoq; suam hic tibi contulisse operam. Non contulisset autem, nisi iussisset princeps. Ita uerò summa beneficij redit tandem ad ipsum & solum quidem principem. Quemadmodum autem omnis nostra inuocatio grata est deo patri per Iesum Christum dñm nostrū: ita nulla gratiarum actio nostra deo grata est, nisi oblata sit per Iesum Christum. Huc enim pertinet mysteriū altaris thymiamatis. De quo dictum est in Ceremonijs legis. Sed & Apostolus, Gratias, inquit, agite semper de omnibus, in nomine dñi nostri Iesu Christi, Deo & patri. Et iterum, Per ipsum, ait, offerimus

offerimus hostiam laudis semper Deo, hoc est, fructum laborum consentium nobis eius.

Vt autem pro omnibus Dei beneficiis grati esse, & continuas gratiarum actiones Deo offerre possimus, necesse est ut prius agnoscamus & probe nobiscum expendamus Dei beneficia. His enim nondum cognitis aut recte expensis, mens nostra non inardescit ad agendas gratias pro beneficiis. Hæc planè uaria, imò immensa sunt. Sunt enim priuata & publica, generalia & specialia, spiritualia & corporalia, temporalia & aterna, ecclesiastica & politica, singularia & eximia. Quis uerò omnes species & partes commemoret? Creauit Deus, ornauit, illustrauit & fecundum reddidit hunc mundum propter hominem. Ad huius ministerium ablegat angelicos spiritus, quos sibi creauerat ministros. Dat nobis corpora & animas; quæ infinitis instruit & cumulat donis ac facultatibus; & quod reliqua beneficia excellit omnia, hominem peccato implicitum explicat, diabolo mancipatum liberat. Afferit enim nos filius Dei in libertatem filiorum Dei: moriendo nos uiuificat: sanguinem profundendo purgat ac expiat: spiritu suo nos donat, quo in hoc exilio regamur & conseruemur, donec recipiamur in aeternam & ueram illam patriam nostram. Hæc qui uera fide expendunt, non possunt non rapi in laudem & celebrationem diuinæ bonitatis, & in admirationem rei profecto stupendæ, quod Deus optimus maximus tam exactam habet rationem hominum, quibus hæc tellus nihil habet uel miserabilius uel ærumnosius aliàs. Destituuntur hic uerbis sancti Dei. Neque enim uerba satis huic negotio tanto idonea suppetunt. Clamat Dauid, Domine Dominus noster, quàm admirabile est nomen tuum in uniuersa terra. Quoniam eleuata est magnificentia tua super cælos. Et quæ sequuntur Psalmo 8, Et iterum idem, Quis sum ego Domine Deus? & quæ domus patris mei, quod me tantum euehis? Quid uerò ultra potest addere Dauid, ut ad te loquatur, cum tu noueris seruum tuum Domine Deus? Et cætera quæ leguntur 2. Samuelis lib. cap. 7. Extat eiusdem Dauidis elegantissima benedicendi uel laudandi, aut gratias agendi Deo formula in Psal. 103. cuius instium est, Benedic anima mea Domino, & omnia quæ intra me sunt nomini sancto eius. Benedic anima mea Domino, & noli obliuisci omnium beneficiorum eius. Qui propiciatur omnibus iniquitatibus tuis. Et reliqua. Quid uerò pluribus opus? Vnica oratio, Dominica poterit esse perfectissima laudandi Deum, & gratias agendi Deo pro omnibus beneficiis uice multarum formula. Vt enim præfatiuncula & petitiones omnes, in memoriam reducant & absolute proponunt maxima Dei beneficia, & nobis ipsis & omnibus alijs largissime exhibita: ita si cogitemus nostri officij esse pro his singulis Deo gratias agere, incipiamusque mox ab ipso dominicæ orationis principio nobiscum expendere illud maxime, quod Deus pater pro ineffabili sua erga nos misericordia, miseros peccatores in numerum filiorum adoptauit, per quos sanctificari, & in quibus regnare, tandem & in regnum suum æternum transferre uelit: ut nihil de alijs petitionibus dicam, quàm copiosa quæso subnascetur laudandi Deum, & gratias ipsi agendi materia. Sed intelliguntur hæc rectius ex pia religiosaque exercitatione, quàm ex diligentissimis etiam præceptis.

Hanc autem gratiarum actionem oblatam ex uera animi humilitate & fide Deo, tanti facit Dominus, ut recipiat & habeat pro sacrificio gratissimo. Huius rei frequentissima fit mentio in testamento ueteri, ut cum dicitur, Sacrificium laudis honorificabit me. Non in sacrificijs tuis arguam te, nec accipiam de domo tua uitulos: Immola Deo sacrificium laudis, & redde altissimo uota tua. Inuoca-

Hh

Agnosceda Dei beneficia.

Quomodo agatur Deo a pijs gratia.

Gratiarum actio est sacrificium. Psalm. 50.

*Psalm. 115.
Osee 14.*

Malach. 1.

*De uirtute
orationis.*

me in die tribulationis, eruam te, & glorificabis me. Item, Tibi sacrificabo hostiam laudis, & nomen Domini inuocabo. Osee quoque, Tollite uobiscum uerba, inquit, & conuertimini ad Dominum, & dicite ei, Omnem aufer iniquitatem, & accipe bonum (nimis recte fuit gustum) & reddemus uitulos labiorum nostrorum, Ad quem modum & Malachias scriptum reliquit, Non est mihi uoluntas in uobis, dicit Dominus exercituum, & non accipiam munus de manu uestra. Ab ortu enim Solis usque ad occasum magnum est nomen meum in gentibus: & in omni loco sacrificatur & offertur nomini meo oblatio munda: quia magnum est nomen meum in gentibus, dicit Dominus exercituum. Caterum oblationem hanc mundam interpretantur magno consensu omnes ueteres interpretes, in primis Irenaeus & Tertullianus, Eucharistiam, id est, laudes & gratiarum actiones, & orationem perfectam ex corde puro, & conscientia bona, & fide non ficta. Certè non alia de causa appellarunt ueteres ipsam Eucharistiam siue Cœnam Christi mysticam sacrificium, quàm quòd in ea offeratur Deo laus & gratiarum actio. Nam Apostolus Paulus ostendit Christum semel immolatum, sæpius aut amplius immolari non posse.

Est enim non laudis aut gratiarum actionis tantum, sed & totius orationis, ipsius inquam inuocationis etiam, magna dignitas & uirtus. De qua etsi non nihil dixerim, ubi ostendi efficaces esse preces nostras, paucula tamen hæc adijcio. Fuit sanè omnibus sanctis ardentissimum orandi studium, propter orationis uirtutem mirificam. Nam ut nihil dicam de uetustissimis illis patribus diluuium præcedentibus, & mox consequentibus, an non Abraham acceptis promissionibus orat, & quoties sedes suas mutat, Deum inuocat? Idem cum orat, liberatur à morte Abimelech rex, & quod domui eius immiserat iratus Dominus, curatur à uitio sterilitatis, Iacob ardentissimas fundit Deo preces, & beneficia à Deo accipit inestimabilia. In Exodo non semel orat Moses, & aufert mala ab Aegyptiis, quæ iusto eis iudicio intulerat Dominus. Orante Mose, terga uertunt Amalechitæ: cessante eodem aut remittente, fugiunt Israelitæ. Rursus cum ignis Domini deuoraret extrema castrorum Israelis, clamauit hic ad Mosen, & is rursus ad Dominum, & subito absorptus est ultor ignis. Iterum murmurat populus aduersus Dominum, & paratur ultio: sed Moses blanda & iugi deprecatione extinguit iram Dei. Dicitur enim ipsi, Dimisi iuxta uerbum tuum. Mox ubi recruduisset populi murmur aduersus Mosen & Aaronem, ac Dei uindicta iam absumpsisset hominum millia quatuordecim septingentos, iubente Mose incendit thymiana Aaron, stansque inter mortuos & uiuos morti iam uicinos destinatosque, ueniam exorat precibus. Innumera huius generis alia de Mose leguntur. Successor Mosis Iosue precibus tantisper Solis & Lunæ cursum remoratus est, donec ulcisceretur se de hostibus suis. Tacite deprecatur Anna sterilitatis probrum, & protinus fit plurima sobole fecunda. Samuel Annæ piæ piissimus filius oratione Palæstinos atterit, & subito messis tempore excitat ingentem tempestatem tonitruum & hybrium. Non dissimilia legimus & de Helia. Ionas quoque orauit in uentre ceti, & proiectus est incolumis in aridam. Iosaphat & Ezechias reges religiosissimi, precibus ex fide ad Deum fuis, triumphant de hostibus potentissimis. Nihil à rege suo postulauit Nehemias nisi prius cōprecatus cœli Dominum, itaque nihil non obtinuit. Fortissima uirago Iudith insolentissimū populi Dei hostem & omnium gentium terrorem Holophernem precibus deiecit. Et ut Daniel omnia sua precibus apud Dominum conficit: ita Hesther necessarium populo Dei facinus aggreditur & feliciter perficit triduanis ieiunijs & assiduis precationibus.

In

In auspiciatissima & desideratissima natiuitate Domini Iesu audiuntur chori angelorum laudes concinentium Domino. Quid quod ipse Dominus in summo uitæ discrimine ad preces confugit, ac mox audit uoces confortantis angeli? Orant unanimis Apostolicum reliqua ecclesia ad horam diei tertiam, & accipiunt mox spiritum sanctū. Cum uerò in periculis uersarentur Apostoli, suppliciter Dei auxilium implorat ecclesia, & sentit euestigio. Accipiunt illi multam dicendi libertatem, & edunt signa & prodigia in populo maxima. Petrus per angelū Dei educitur ex carcere munitissimo. Quid quod orantibus & laudantibus in carcere Dominum Paulo & Sila, terramotu carceris fundamenta leguntur concussa, & per eam occasionem custos carceris conuersus ad Deum? Cuius quidem generis innumera proferre possem, nisi hæc p̄js sufficere crederem. Et p̄i uires has non orationi ut nostro operi, sed tanquam ex fide profectæ, adeoq̄ ipsi Deo promittenti & fidelibus hæc exhibenti tribuunt. Notum est enim iudicium de his Pauli ad Hebræos 11. cap. & quod uni Deo omnis debetur gloria. Is dignetur omnium mentes sic illustrare, ut oratio nostra ipsi semper placeat, Amen.

De signis & signorum ratione, de signis sacramentalibus, quid sit sacramentum, à quo, ob quas causas, & quot sacramenta ecclesiæ Christianæ à Christo instituta sint; quibus rebus constent: quomodo consecrentur, quomodo uel coniuncta uel discreta sint signum & signatū in sacramentis: & de loquutionibus sacramentalibus. SERMO VI.

SUPEREST tractatio de Sacramentis, quam uerbo Dei & orationibus adiunctam esse audiuius. De Sacramentis autem à Christo Rege & Pontifice maximo traditis, & à sancta eius catholicaq̄ ecclesiæ receptis, & legitime usurpatis, ipso Domino inspirante, dicturus, hunc seruabo ordinem, ut primū de his generatim, deinde speciatim uel sigillatim differam. Atq̄ hic primū de certa signi uel sacramenti significatione constitutam. In ea re si fuero paululum prolixior, condonabit id mihi C. V. Nam spero hoc non omni fructu cariturum.

SIGNVM appellant Latini scriptores notam, representationem, uestigium *Signum.* & indicium rei significantis. Sic Tull. & Fab. Hic, Signum, ait, uocant σημεῖον, quanquam id quidam indicium, quidam uestigium nominarunt, per quod res intelligitur, ut per sanguinem cædes. D. Aurel. Augu. scriptor Ecclesiasticus nobilis, de Magistro cap. 4. Dicimus ea, inquit, signa uniuersaliter omnia, quæ significant aliquid: ubi etiam uerba esse inuenimus. Idem de Doct. Christ. lib. 2. cap. 1. dicit, Signum est res præter speciem quam ingerit sensibus, aliud aliquid ex se faciens in cogitationem uenire: sicut fumo uiso, ignem subesse credimus.

Distinguit idem ille signa, in signa naturalia & data. Naturalia uocat, quæ sine *Diuisio signorum ex Augustino.* uoluntate atq̄ ullo appetitu significanti, præter se aliquid aliud ex se cognosci faciunt: sicuti est fumus, significans ignem. Non enim uolens significare id facit. Data sunt, inquit, quæ sibi quæq̄ uiuentia inuicem dant, ad demonstrandos quantū possunt motus animi sui, uel sensa aut intellecta quælibet. Et Data quidem signa rursus distinguit per sensus. Alia enim ad oculos pertinent, ut sunt uexilla & signa ducum, motus manuum & omnium membrorum. Alia ad aures, ut sunt tuba & tibia, & ipsa deniq̄ uerba, quæ inter homines obtinuerunt principatū significanti. Ad odorem refert illum odorem unguenti Euangelicū, quo Dominus aliquid *Ioan. 12.* significare uoluerit. Ad gustum retulit Cœnam Domini. Sacramento enim san- *Marc. 14.* guinis & corporis sui, inquit, prægustato, significauit quod uoluit. Addit & exem

Matth. 9.

plum ad tactum, Et cum mulier tangendo fimbriam uestimenti eius salua facta est, non nihil significat. Sic August. de Signorum generibus & differentia differuit.

Signa secundum
tempora distin-
cta.

Alij uero nihil diuersi quidem ab illo afferentes, Signa iuxta temporum rationem distinguunt. Dicunt enim Signa alia quidem esse rerum praesentium, alia rerum praeteritarum, alia uero rerum futurarum. Praesentium signa putant, quae significant res esse praesentes: ueluti haedera suspensa indicat uinum ibi uendi ubi suspensa haeret. Signa quae patrabat Dominus noster, significant adesse Messiam & regnum Dei a prophetis promissum. Sub praeterita signa referunt omnia defunctorum monimenta, & lapides illos in Iordane erectos a Iosue, posteritati significantes quid praeteritis actum sit temporibus. Futurarum rerum signum datur Vellus Gedeonis, futurae scilicet uictoriae signum.

Matth. 12.
Iosue 4.
Iudic. 7.

Signorum alia
data ab homini-
bus, alia institu-
ta a Deo.
Signa data ab
hominibus.

Ceterum expensis nec reiectis illis quidem, poterunt signa plenius & dilucidius diuidi in signa, quorum alia quidem ab hominibus data, alia uero ab ipso Deo instituta sunt. Ab hominibus dantur Signa ceu notae, quibus aliquid significant aut designant, quibus denique aliquid apud homines in memoria retinent: aut quod certum & firmum esse uolunt, obsignant. Hac ratione omnis descriptio & pictura demonstratiua dicitur Signum. Nam Ezechielis 4. picta Hierusalem dicitur Signum: uetustas quoque imagines mortuorum signa appellauit, quod his uellet memoriam eorum, quorum signa dicebantur, refricare & superstitem quasi retinere; quin ipsa etiam scriptura sancta idola appellat signa, sicuti uidere licet Isaiae 45. & 2. Paral. 33. Ita lapides quoque ad significandum aliquid positi, cuiusmodi sunt limites agrorum & omnia monimenta, signa sunt. Rahab illa Hierichuntina ad exploratores Israelitas dicit, Date mihi signum ueritatis, quod facturi sitis mecum misericordiam. Et dederunt illi funem suspensum ex fenestra. En fidei & ueritatis signum erat funis, quo illi uelut obsignabant serio & uere, se diligenter curaturos ne perderetur Rahab. Germani huiusmodi signa fidei & ueritatis gratia uel data uel accepta, nuncupamus & wortzeychen, quia uerbis adduntur, ac ea uelut obsignant, & warzeychen, quia his uelut attestamur bona fide, & absque dolo malo exequuturos, quod uerbis promissimus.

Iosue 2.

Signorum ab ho-
mine datorum
uarietas.

Sunt autem huiusmodi signa uarij generis. Alia enim muta sunt, & pertinent ad sensum oculorum: cuiusmodi sunt militaria signa, cruces, fasciae, uexilla, accensae ignes: quorum mentio fit Numeri 2. Psal. 73. & c. Neque enim quisquam huius generis enumerauerit omnia. Nascuntur enim noua subinde pro hominum arbitrio. Iudas suis dabat signum, Quemcunque osculatus fuero, ipse est, tenete eum. Consecratio datae dextrae quae ad sensum tactus pertinet, fidei, auxilij & communionis signum, est & ipsum signum mutum: quod Paulus appellauit signum societatis. Huc pertinent uarij motus & gestus. Alia uero ex his Vocalia sunt, quae auditu percipiuntur, edunturque uel per humanas, uel per inanimatorum uoces. Humana uoce eduntur uerba, sibilus, & quae alia sunt huius generis. Quod pertinent uocales tesserae, qualis illa Iudicum 12. cap. Schiboleth. Porro inanimes uoces sunt, quae fiunt per tubas, tibias, cornua, tympana, bombardas, per pulsum campanarum, & per instrumenta sonora, quae & ipsa longissime latissimeque patent.

Matth. 26.

Galat. 2.

Iudic. 12.

Signa a Deo
data.

Iam uero dantur signa a Deo in hoc, ut instruant admoneantque rerum futurarum, aut etiam praeteritarum: uel ut res ipsas quarum signa sunt, quodam modo spectatorum oculis subiiciant, & similitudine quadam representent, uel ut promissiones & uerba Dei obsignent, uisibili aliqua ceremonia, ab hominibus diuina institutione celebrata, ut denique fidem nostram exerceant, & dispersos colligant in unum aliquem coetum. Sunt autem & haec non eiusdem generis, ac manifesta

nifesta inter se habent discrimina. Quædam enim oriuntur causis naturalibus, Varietas signorum datorum
 & dantur tamen à Deo signa, quæ præteritas res, aut etiam promissiones renou-
 uent, hominesque rerum gestarum admoneant, cuius quidem generis est Iris apud
 Mosem. Genes. 9. Nam peracto diluuiò, dum Deus cum Noe repararet fœdus,
 ac fœderis signum institueret Iridem, hanc non condit de nouo, sed iam olim con-
 ditam, & causis orientem naturalibus, noua institutione consecrat, ut diluuium
 in memoriam reducat, promissionemque Dei ueluti reparet, nunquam uidelicet
 futurum porro, ut terra absorbeatur aquarum inundatione. Interim non habet
 hoc signum ullam ceremoniam, qua celebretur inter homines, institutam, nec
 colligit nos in ullius corporis cœtusue societatem. Imò refertur signum hoc ad
 Deum maximè, dicentem, Erit arcus in nube, quem cum uidero recordabor fœ-
 deris æterni inter me & uos iníti. Huic non dissimilia prorsus sunt portenta &
 ostenta, signa inquam in Sole & Luna & stellis, quibus homines cœlitus præmo-
 nentur futurarum calamitatum, nisi emendentur per poenitentiam: sed ne hæc
 quidem ullam uel ceremoniam habent institutam ad celebrandum aut colligen-
 dum. Sunt rursus signa planè miraculosa non naturalia, licet in ipsis & naturalia
 quædam concurrant: cuius generis esse uidetur Gedeonis uellus, & Umbra ho-
 rologij recedens in Solario Ezechie regis. Hæc uerò ut semel facta leguntur,
 ita nullam habent institutionem, quæ iubeat imitatione & in certum aliquem fi-
 nem celebrare. Adhibebantur tunc ad futuram uictoriam & sanitatem significan-
 dam & attestandam. Ex integro & merè miraculosa sunt, quæ Marci ultimo ab
 ipso Domino Iesu appellantur signa, beneficia, inquam, sanitatis & linguarum,
 hominibus nulla humana uirtute aut medicatione, sed solius Christi potentia,
 collata. Declarabatur ipsæ ueram & indubitatam esse prædicationem Euange-
 lij, qua annuntiatur Christus Dominus esse uniuersorum, Dominus uitæ & mor-
 tis, satanæ & ipsius etiam inferni. Iam enim cum in nomine Christi resurgunt mor-
 tui, & cedunt depulsi morbi, his ipsis signis approbatur uerum esse quod dicitur,
 Christum esse Dominum uniuersorum. Sic Mosi & Aaronis prodigia in Ægy-
 pto patrata, Exod. 4. à scriptura appellantur signa. Erant enim testimonia & mis-
 sionis legitimæ à Deo, & potentia contra Ægyptum exercendæ ingentis argu-
 menta. Verum non habebant & illa ullam ceremoniam, non colligebant in ullam
 societatem. Iam uerò legimus & signa quædam paradigmatica esse, exhibita quidem
 ab hominibus, sed non sine præcepto Dei, ut possint hæc quoque signa à Deo data
 dici. Sunt illa à miraculis prorsus aliena, ac petita quidem non modò à rebus na-
 turalibus, sed etiam uulgaribus planè: qualia fuisse leguntur Ieremie sancti pro-
 phetæ iugum, hydria atque catena, quibus, Domino iubente, res sermone copiose
 expositas, nunc etiam hypotyposi ac suffiguratione aliqua, signo, inquam, uisi-
 bili hominum oculis quasi inspiciendas uoluit subiicere. Paria uidere licet & a-
 pud Ezechielem in cap. 17. & 24. Habent autem hæc signa paradigmatica simi-
 litudinem quandam cum Christi actiuis, imò sunt Christi quædam mixtæ. Christiam
 actiuam finit Aphthonius, quæ actione aliquid declarat aut demonstrat: ueluti
 cum Pythagoras interrogaretur, quanta nam esset uita mortalium: is autem bre-
 uimomento se conspiciendum præberet, mox autem subsidens se subduceret à
 conspectu hominum: eo modo eaque actione significans, uitam hominum esse
 breuem & momentaneam. Cæterum in sacris proponuntur ferme Christi mi-
 xtæ, sermone & actione constantes: ueluti cum Dominus productus in medium
 puello, hæc insuper uerba adiicit, Amen dico uobis, nisi conuersi fueritis, & effi-
 ciamini sicut puelli, non ingrediemini in regnum cœlorum. Huiusmodi autem

Portenta
ostenta.
Lucæ 21.

Miraculosa
signa.
Isaia 38.

Signa paradi-
gmatica.

Iere. 19. 27. 28.

Christi.

Matth. 18.

Signa sacramentalia secernuntur ab alijs signis, cum quibus multa communia habent.

Christi autem signa non habent institutionem & praeceptum Dei iubentis hanc ipsam actionem solenni celebratione repetere. Habent tamen cum his cognationem aliquam sacramentalia signa, Baptismus uidelicet & Coena Dominica. Nam diuinitus quidem nobis data, & a rebus petita naturalibus, citra ullum miraculum, imò in rebus naturalibus sensibilibusque, & maxime uulgaribus instituta sunt, aqua, pane & uino. Habent haec cum alijs a Deo datis signis communia, quod renouant res praeteritas, adumbrant etiam futuras, & similitudine repraesentant res significantas. Habent peculiare quo differunt ab alijs, quod adiunctas habent cum praecipto ceremonias, quas ipse Dominus ecclesiam suam celebrare iussit: & habent hoc peculiare, quod ob signando promissa Dei, nos Deo & cum omnibus sanctis uisibiliter coniungunt, & sacrosanctis mysterijs Dei in Christum dedicata sunt. De his porro differemus paulò fusiùs & diligentius.

Sacramentum.

SIGNA sacramentalia Christi & ecclesiae Christianae, quae uidelicet Christus Dominus Ecclesiae suae tradidit, Ecclesia autem Christiana ab ipso accepit, & religiosissimè custodit, a scriptoribus Latinis appellantur Sacramenta. At uocabulum hoc nullibi extat in tota scriptura sancta, nisi quòd eo uis leguntur interpretes: uocabulum autem signi frequens est, ac quod nostrum attinet institutù, significantissimè ponitur Genes. 17. & Rom. 4. Interim uocem Latinam Sacramentum nec abhorrentes reiicimus, neque reiicientes nouam cõminiscimur. Placet uox Sacramentum, modò quis ea utatur legitimè. S. Augustinus Epist. ad Marcellinũ 5. Longum esset disputare, inquit, de uarietate signorũ, quae cum ad res diuinas pertinent, Sacramenta appellantur. Hinc petita est haud dubiè uulgaris illa descriptio aut consignatio. Sacramentum est sacrae rei signum: quae quidem ut reiici non potest, ita nemini obscurum est ea rei naturam plenè non comprehendì exprimere, aut ab ijs quae & ipsa sacra sunt signa, distingui. Profertur ergo alia, certè exactior definitio, Sacramentum est inuisibilis gratiae uisibilis forma. Quoniam uerò & haec non usquequaque rei naturam exponit, melior multis uisa est, quae sic habet. Sacramenta sunt ceremoniae, quibus exercet populum suum Dominus, ad fidem primum excitandam fouendamque, deinde & ad testificandam apud homines religionem. Rectè quidem hoc dicitur. Quid uerò si paulò copiosius liberiusque sic describas? Sacramenta sunt actiones sacrae, uerbis siue promissionibus Euangelicis & ritibus praescriptis constantes, ecclesiae diuinitus in hoc traditae, ut Euangelicam praedicationem attestentur atque ob signent, fidem exerceant, rebusque terrenis & uisibilibus magna Dei mysteria repraesentent & ob oculos statuunt, denique ut ecclesiam uisibiliter colligant, suisque moneant officijs. Est sanè longè petita, diffusa, & multiplex, multis inquam ex partibus collecta definitio: uerum libet aperte agere, & rem totam semel oculis conspiciendam proponere: singula deinceps per partes illustrabimus, & scripturarum testimonijs confirmabimus.

Quid sit sacramentum.

Sacramentum pro iureiurando.

Iam ut de Vocabulis huic rei inditis plenius disseram, uideo Latinos scriptores Sacramentum dixisse iusiurandum, aut religiosam obligationem: quòd haec quibusdam, opinor, ceremonijs perageretur. M. Varro linguae Latinae libro secundo, explicans quid sit Sacramento contendere, Qui petebat, inquit, quicque inficiabatur de rebus alijs, utriusque quingentos aëris ad pontem deponebant, de alijs item rebus certum numerum assium: qui uerò iudicio uicerat, suum sacramentum a sacro auferebat, uicti ad aërium redibat. Quia itaque sacris interpositis, Deo & omnibus sanctis per participationem sacramentorum obligamur, adeoque & ipse Deus sacramentorum testimonio se nobis uelut iureiurando obstrin-

obstringit, Sacramenti uocabulum appositissimè signis nostris inditum apparet. Legitur apud Latinos scriptores & de Militari quodam sacramento. Non enim pugnare phas erat, nisi sacramento adactis. Conceptis autem uerbis iurabant se omnia strenuè facturos (ut ait de re militari Vegetius) quæ præcepisset imperator, nunquam deserturos militiam pro republica Romana. Dabatur donatiuum ueluti pignus & authoramentum: dabant nomina: signabantur notis. Iam quia nos nostris sacramentis, baptismo maxime, recipimur & inscribimur in militiam Christi, & sacramentis sumptis nos profiteamur attestamurque esse Christi milites, inde nec absurdè nec præter rationem signa Christi & Ecclesiæ sacramenta appellantur. Interim nolo pertinaciter contendere uocem, Sacramentum, illa causa potissimum sacris illis signis nostris à ueteribus esse attributam. Nam Erasmus ille Roterodamus linguarum peritissimus & in sacris uetustis scriptoribus, si quis alius, sedulo uersatus, in Catechesi sua symbolis. Qui exactius loquuti sunt, inquit, sacramentum appellant iusiurandum aut obligationem numinis ac religionis interuentu confirmatam. At maiores nostri uocem eam accommodarunt ad significandum id quod Græci dicunt Mysterium, quod religiosum arcanum possis dicere. Quia ab his tractandis secludebatur uulgus. Hæc Erasmus. Fuerunt ergo ueteribus scriptoribus ecclesiasticis sacramenta dicta quasi mysteria.

Sacramentum militare.

Eadem enim signa appellantur à scriptoribus ecclesiasticis Græcis *μυστήρια*, *Mysteriū quid.* quæ Latini ferè interpretantur sacra & religiosa arcana, arcana inquam sacra, à quorum celebratione (ut modò dictum) excludebatur prophanum uulgus. Nam Coelius in Lectionibus antiquis dicta arbitratur mysteria *ὅτι δὲ μυστήρια τὰ κρυπτά ἐν τῷ ἁγίῳ*, quod oportet occludentes, siue qui cōclusi ea peragunt, custodire intus ac nulli proferre prophano: unde rectè uocauerimus Mysteria, seclusa & arcana sacra, solis initiatis cognita, solisque celebranda sanctis. Videri tamen poterat *μυστήριον* deriuatum à *μύσος* & *μύω*, sicut *ἀπὸ τυφλίου*, ex *ἀπὸ* & *δύω*, ut etymon apud Græcos non magis ualeat quàm testamenti apud Latinos, quod sit mentis contestatio. Quanquam non nesciam quid hic quoque nonnulli disputent. Certè Mysteria dicuntur Sacramenta, quod inuolucro tegant res alias magis sacras. Libenter autem hac uoce in epistolis suis utitur Paulus. Ac ratio patet cur attributa sit hæc uox sacris Christianæ ecclesiæ signis. Hæc enim solis nota sunt fidelibus, excluduntque prophanos. Certè prædicatio euangelica dicitur & ipsa mysterium regni Dei, nimirum quod exclusis impuris, perspecta sit solis Dei filijs. Dixit enim mystago *Matth. 13.* *Ephes. 3.* *Matth. 7.* ille noster, Ne proieceritis margaritas ante porcos, neque dederitis quod sanctum est canibus. Et Paulus, Quod si adhuc uelatum est, ait, euangelium nostrum, in his qui pereunt uelatum est, in quibus Deus huius seculi excacauit sensus incredulorum, 2. Corinth. 4.

Porro ex Græcis Ecclesiæ doctoribus plerique sacramenta nostra appellarunt *σύμβολα*, *symbolū quid.* quæ uox & à latinis recepta est, & usurpatur frequentissimè. Deducitur ea à *συμβάλλω*, id est confero. Collatione enim illustrantur & rectè perspiciuntur symbola. Significat ergo symbolum signum quod relationem habet ad aliud: quemadmodum diximus signum militare. Ac uariis quidem fuit olim symbolorum apud Græcos usus. Habebant enim in sacris sua symbola, signa, inquam, allegoricè aliquid insinuantia: ut in sacris Bacchi symbolum erat, quod circumferebant bacchantes cribrum, significantes utique ebrios esse futiles. Quid quod sententiæ reconditiore aliquid sensus comprehendentes, per allegoriam aut ænigma, symbola dici cœperunt? Nam nota sunt symbola Pytha-

goræ. Ita mystica theologia nuncupari cœpit symbolica, nimirum mysterijs implicita secretioribus. Inde symbolicum est, quod ænigmaticum & allegoricum est, longè aliud habens in recessu, quàm fronte promittat. Rursus symbolum dicitur, quod inter sponsum & sponsam ex mutuo consensu interponitur, fidei munus, ne liceat à pacto recedere. Deniq; dabantur militibus sub iisdem signis merentibus, symbola. Dabantur item in quibusdam urbibus amicis, ad uicinas & socias urbes concedere uolentibus, symbola, hoc est, tesserae, quibus uisis intelligebant offerentem humaniter esse tractandum, uelut socium & amicum singularem. Veteres itaq; Symboli uocem sacramentis nostris accommodarunt, quòd hæc nobis maxima Dei mysteria repræsentant, allegorica & ænigmatica sunt, quòd deniq; ipse dominus sacramentorum institutione se nobis, nos illorum communionem, ipsi & omnibus sanctis obstringimus, testificantes & palàm profitentes nos strenuè sub signis domini militaturos. Præterea admonent nos sacra symbola dilectionis fraternæ, ut meminerimus eos qui nobiscum de eadem mensa participant, & eodem abluuntur baptismo, impensissimè ut filios Dei & fratres nostros esse diligendos. Hæc de sacramentis quid sint, quibus uocentur nominibus, & quare sic nuncupentur, consignasse sufficiat.

Solus Deus sacramentorum author.

Isaie ult.

Leuit. 10.

EXPONENDVM autem ante omnia uidetur, à quo authore profecta sint sacramenta, & quas ob causas instituta. Confessum est apud omnes ferè, solum deum instituere posse sacramenta, non homines, non ipsam quoq; Ecclesiam. Est enim inter Scholasticos, qui submonet Ecclesiam, ut meminerit se non esse dominam sacramentorum, sed ministram, nec posse hanc magis instituere formam sacramentalem, quàm legem aliquam diuinam abrogare. Sed & Aquinas parte 3. quæst. 46. articulo 2. Ille instituit, inquit, aliquid, qui dat ei robur & uirtutem; sed uirtus sacramenti est à solo Deo: solus itaq; Deus potest instituere sacramenta. Et reuera solus Deus cultum legitimum instituere potest. Pertinent autem sacramenta ad cultum, unde solus Deus sacramenta instituit. Si quis in ueteri testamento obtulisset sacrificium non præceptum à domino, nec obtulisset eo modo quo iusserat immolare Dominus, non modò nihil utilitatis inde percepisset, sed insuper commisisset piaculum pœna expiandum longè funestissima. Quis enim ignorat filios Aaronis ignem alienum offerentes, cœlitus delapsa flamma horribiliter esse concrematos? Displicent ergo domino ceu prophana: neq; legitima sacramenta dici merentur, quæ non habent ipsum dominum authorem. His accedit, quòd sacramenta diuinæ erga nos uoluntatis & beneuolentiæ testimonia & quasi sigilla sunt. At quis oro melius, rectius & certius de diuina uoluntate testabitur, quàm ipse Deus? Sigillum Dei neutiquam appellari & haberi meretur, quod ab ipso Deo non est appensum aut impressum, imò adulterinum est sigillum quòd à Deo non est profectum, interim tamen Dei nomine uenditur. Iam & S. Augustinus, quod omnium in ore uersatur, dixisse legitur, Accedit uerbum ad elementum & fit sacramentum: unde colligimus in sacramentis potissimas partes habere ipsum Dei uerbum; uerbum inquam Dei, non uerbum hominum, non Ecclesiæ: unde denuo sequitur signum proficisci oportere ab ipso Deo, non ullis hominibus, licet numero multis, eruditione doctis, & uitæ innocentia sanctis: ut iam alius author sacramentorum esse nequeat, quàm Deus solus.

*Sacramenta uerbi ex manibus Christi accipienda.
1. Thess. 2.*

Quemadmodum uerò recipimus uerbum salutis & gratiæ, ita necesse est nos accipere & signa gratiæ. Licet autem uerbum Dei nobis annuncietur ab hominibus, non tamen illud amplectimur tanquam uerbum hominis, sed uerbi uerbum Dei, iuxta illud Apostoli, Cum acciperetis à nobis sermonem quo Deum

Deum disceratis, accepistis non sermonem hominum, sed sicut erat uerè sermonem Dei. Spectare enim nos conuenit primum authorem, qui ablegatis discipulis suis dixit, *Ite in orbem uniuersum, & prædicate euangelium omni creaturæ,* *docentes eos seruare omnia quæcunq; præcepi uobis: & baptizantes eos in nomine patris, & filij, & spiritus sancti.* Qui autè uos audierit, me audiuit: qui autem uos repulerit, me repulit. Ideoq; tametsi hominum manibus administrantur sacramenta, à religiosis tamen illa non percipiuntur tanquam ab hominibus, sed uelut è manu ipsius domini, primi sacramentorum authoris. Huc enim pertinet quod in euangelio legimus quæsiuisse dominum, Baptismus Ioannis è coelo ne an ex hominibus erat? Certè Ioannes qui baptizabat, homo erat: sed quòd baptizabat, ex institutione Dei baptizabat: erat itaq; baptismus Ioannis è coelo, licet aqua flueret ex abyssò in alueo Iordanis, ipseq; Ioannes uersaretur in terris. Huc præterea pertinet, quod Paulus disertè pronunciauit, Ego enim accepi à domino, quod & tradidi uobis. Quamquam ergo homo esset Paulus, & homo quidem peccator, quod tamen tradebat Ecclesiæ, non ex seipso, aut ullo inuento humano tradebat, sed ex traditione Christi, ut iam traditio, Christi sit traditio, diuina & cœlestis. Præterea operatur uel hodie in Ecclesia sua summus ille & æternus pontifex noster, cuius ministerio funguntur, id est, cuius iussu baptizant, & cuius institutione sacrum exhibent conuiuium, qui sunt dispensatores mysteriorum Dei. Opus ergo illius ingenuè agnoscendum est à nobis omnibus. Hæc autem de Sacramentorum authore hætenus.

Marci 16.
Matth. 28.
Lucæ 10.

Matth. 21.

1. Cor. 11.

Causas institutionis sacramentorum, cur uidelicet res spirituales & cœlestes nobis traditæ, aut commendatæ sint sub signis aut speciebus ritibusq; uisibilibus, Lombardus in sententijs tres numerat: quarum prima ita friget, ut eam pigeat commemorare. Meritum enim in eo constituit, quòd Dei imperio, ut ait, salutem homo quærit in inferioribus se. Quibus tamen mox addit, Et si non ab illis, sed per illa à Deo: satis quidem & illud ipsum effutiens inexpensum. Reliquæ duæ, nempe quòd propter eruditionem, & propter exercitationem, inuenta sint, non prorsus absurdæ esse uidentur. Verissima & maximè propria causa, cur sacramenta sint instituta sub signis uisibilibus, uidetur esse diuina partim bonitas, partim humana imbecillitas. Difficulus enim intelligimus res diuinas atq; cœlestes, si absque inuolucro aliquo, ita ut natura sua sunt, puræ & illustres proponantur: rectius autem faciliusq; intelliguntur, si suffiguntur nobis per terrena, hoc est, per signa nobis familiariter cognita. Proinde sicuti parabolis benignus dominus negotium regni Dei obtexit, imò illustrauit ornauitq;: ita symbolis quoq; idem ipsum negotiū ob oculos quodāmodo statuere, & quasi in picta tabella demonstrare, refricare, renouare & repræsentare uoluit. Hanc ut maximè propriam causam agnouit & Ioannes Chrysostomus, qui Homilia in Matth. 83. Nil sensibile, inquit, tradidit nobis dominus. Res quidem sensibiles sunt, omnia tamen intelligibilia. Sic in Baptismo per rem sensibilem datur aqua: quod autem perficitur, nempe regeneratio & renouatio, mente percipitur. Nam si tu incorporeus esses, nuda tibi hæc tradidisset omnia dona: quia autem corpori coniuncta est anima tua, in rebus sensibilibus ea quæ mente percipiuntur, tradidit. Id quod non ideo adduco, quòd humano innitar testimonio: sed quòd uideam D. Ioannem Chrysostomum obseruato scripturarum more ita esse loquutum. Quis enim nesciat sacras literas parabolis, similibus, allegorijs symbolicisq; scaterere loquutionibus? Quibus sanè Dei spiritus utitur, non propter semetipsum, sed propter nos. Notissimum est enim illud domini in euangelio cum Nicodemo de

Cur sacramenta nobis instituta in rebus uisibilibus.

Chrysostomus de causa sacramentorum. Ioan. 3.

Ioan. 3.

regeneratione cœlesti, per inuolucra aëris & aquæ disputantis atque dicentis, Si terrena dixi uobis & non creditis, quomodo si dixero uobis cœlestia, credetis? Atqui appellauit Terrena, doctrinam illam suam de regeneratione cœlesti per terrena symbola aquæ & spiritus siue aëris ac flatus suffiguratam; per Cœlestia uerò illam eandem intellexit doctrinam de regeneratione cœlesti, sed citra imaginationem, similitudinem, aut symbola nudè traditam. Significauit ergo Dominus facilius capi ab hominibus doctrinam rerum cœlestium inuolucro aliquo tectam, quàm nudè & spiritaliter planè traditam: ut facillimè ex collatione rerum non admodum disparium colligi possit, non alia causa & sacramenta diuinitus esse inuenta, quàm perspicuæ demonstrationis & illustrationis rerum cœlestium gratia. In qua re obseruanda uenit Analogia, quæ est aptitudo quædam, proportio, seu, ut Cicero uocauit, conuenientia rerum, inquam, signis sic agnatarum, ut sine ea leuiter transmissa, ratio sacramenti plenè non intelligatur, excussa autem & ad plenum obseruata, ἀναλογίᾳ, hoc est, intelligentiam reconditiorem sine labore offerat contemplanti. Exemplis id fortè in rerum tractatu illustrabitur diligentius.

Analogia.

Laudandus dominus propter instituta sacramenta.

Sapientia Dei relucet in sacramentorum institutione.

Mos sancientorum fœderum.

Hebr. 6.

Gene. 15.

Quisquis ergo exactè hanc sacramentorum inuentionem expenderit, non poterit non laudibus insignem domini uehere bonitatem, quæ mysteria regni Dei non tantùm miseris recludit mortalibus, sed rationem quoq; habet infirmitatis humanæ singularem, qua nobis condescendens, nobiscum quodammodo balbutit, dum uidelicet mysteria cœlestia terrenis adoperta symbolis, pro captu nostro formans, & declarat significantissimè, & quasi oculis contemplanda subiicit. In eadem hac sacramentorum institutione laudare etiam licet diuinam sapientiam; si modò paruis licet componere magna. Nam hic mos in mundo quasi pro lege receptus est, quòd sapientissimi quicq; maxima sapientiæ mysteria, non uerbis modò, sed & symbolis adiunctis, suis commendarunt auditoribus, nimirum ut duo sensus nobilissimi in homine, auditus & uisus, simul percellerentur & permouerentur grauius efficaciusq;. Plena sunt exemplis philosophorum gentilium uolumina. Quid quod ueteri quoque Dei populo huius generis cesserunt, & ab ipso Deo data sunt plurima?

Rursus quando in fœderibus sancientibus aut in ferijs magniq; momenti pollicitationibus confirmandis, homines signa ueritatis, gratia fidei conciliandæ promissis interponunt: idcirco dominus hac quoq; in re humanum morem imitans, fœderi suo æterno, & promissionibus uitæ, signa adiecit fidei & ueritatis, ipsa inquam sacramenta, quibus promissiones suas ipsamq; euangelij sui doctrinam obsignat. Nec hoc ipsi rarum aut nouum est. Iurant homines per ipsum dominum, dum alios de ueritate promissionum suarum uolunt reddere certos atq; securos: iurasse ergo legitur & dominus ipse in sacris literis, & iurasse quidem per semetipsum, cum uidelicet promissionū hæredibus eximie uellet ostendere, ut ait Apostolus, consilij sui firmitatem. Præterea mos fuit priscis hominibus fœdera ferientibus, hostiam dissecare in partes, atq; per partium dissectorum medium transire, eaq; testari ceremoniâ, subiicere se dissectionis pœnæ aut supplicio, nisi stent pactis firmissimè. Adeum uerò modum Dominus cum Abrahamo fœdus initurus aut reparaturus, quod Moses copiose describit Gene. 15. cap. iubet Abrahamum buculam, capram & arietem triennes, dissecare, & partes ex opposito collocare: quod cum fecisset Abraham, ipse dominus, sub specie lampadis aut facis ardentis, per partes illas medius transiuit, ut inde intelligeret Abraham terram Chanaan semini ipsius certò fore tradendam, neq; quicquam

quam eorum quæ ea pactione promiserat dominus, irritum futurum. Quando ergo bonus & uerax dominus semper sui similis est, & nunc quidem eo quo diximus modo se suæ attemperauit ecclesiæ, quid mirum aut nouum obsecro, si nobis hodie quoque sub rebus uisibilibus signacula uel sigilla suæ gratiæ & mysteriorum regni Dei reliquit? Atque hæc hæc haftenus de sacramentorum causis præcipuis, ob quas instituta sunt, disseruimus.

IAM uerò de specie & numero sacramentorum, qui locus præcedenti proximus est, uaria disputata sunt à scriptoribus postremi temporis maximè. Priscis enim res illa, utpote planissima perfectissimaque paucis absoluebatur. Atqui scripturas peruestiganti, uidentur alia quidem ueteris, alia uerò noui testamenti ac populi esse sacramenta. Et ueteris quidem populi sacramenta fuere Circumcisio & Pascha, quibus accessere sacrificia. De quibus copiose diximus Decadis 3. Sermonem 6. Similiter autem noui, id est, Christiani populi sacramenta numerant litteræ apostolicæ duo. Baptismum & Cœnam dominicam. At Petrus Lombardus septem numerat, Baptismum, Pœnitentiam, Eucharistiam, Confirmationem, Extremam unctionem, Ordinem & Matrimonium. Hunc sequitur totus grex interpretum & turba theologorum scholasticorum. Cæterum prisci doctores ecclesiæ ferè omnes, duo præcipua commemorant sacramenta: inter quos Tertull. primo & quarto libro contra Marcionem, & in libro de Corona militis significanter duo tantum recenset, Baptismum uidelicet, & Eucharistiam. August. quoque lib. de Doctr. Christ. 3. cap. 9. Dominus signis nos non onerauit, inquit, sed quædam pauca pro multis, eademque factu facillima, & intellectu augustissima, & obseruatione castissima, ipse Dominus & Apostolica tradidit disciplina: sicuti est baptismi sacramentum, & celebratio corporis & sanguinis domini. Idem rursus ad Ianuarium epist. 118. Sacramentis numero paucissimis, ait, obseruatione facillimis, significatione præstantissimis, societatem noui populi colligauit, sicuti est baptismus trinitatis nomine consecratus, communicatio corporis & sanguinis ipsius, & si quid aliud in scripturis canonicis commendatur, exceptis his, quæ seruitutem populi ueteris, pro congruentia cordis illorum & prophetici temporis onerabant, quæ in 5. libris Moysis leguntur. Obseruandum autem uidetur quod non dicit, Et si quæ alia in scripturis canonicis commendantur: sed, Et si quid aliud, &c. Id quod palam arguit ipsum non de sacramentis loqui, sed de obseruationibus quibusdam, & usurpatis & receptis ab Ecclesia: sicuti & consequentia in Augustino uerba declarant. Fateor tamen ingenuè eundem alibi & sacramenti Ordinis mentionem facere: ubi tamen illud quoque mihi expendendum uideatur, quod idem ille & Chrisma, & Prophetiam, & Orationem, & alia quædam huius notæ, non minus quam Ordinem, sacramenta appellat, & quod scripturarum sacramenta idem subinde in ore habet: unde claret sacramenti uocabulum in illius scriptis aliter ac aliter usurpari. Hæc enim sacramenta uocauit, quod sacrosancta sint è spiritu Dei sancto profecta, quod sancta sint Dei instituta ab omnibus obseruata sanctis: ut hæc iam differant ab ijs sacramentis, quæ actiones sacræ sunt, uerbis & ceremonijs constantes, consortesque in unam colligunt societatem. Sed & Rabanus Maurus diligens Augustini lucubrationum lector, & episcopus Moguntinus, lib. de Institut. clericorum 1. cap. 24. Sunt autem sacramenta, ait, Baptismus & Chrisma, Corpus & sanguis: quæ ob id sacramenta dicuntur, quia sub tegumento corporalium rerum, uirtus diuina secretius salutem eorundem sacramentorum operatur: unde & à secretis uirtutibus uel sacris, sacramenta dicuntur. Floruit hic circa annum domini 830, ut uel hinc colligere liceat

Species sacramentorum.

Numerus sacramentorum.

Rabanus Maurus.

priscæ apostolicæ ecclesiæ non fuisse plura, quàm duo sacramenta. Ambrosij hie nullam mentionem facio, licet & ipse in libris suis de Sacramentis, non tot enumeret sicuti numeravit scholasticorum grex: quòd libri eius non recipiantur ab omnibus doctis pro genuinis Ambrosij libris. Ita nihil moueor Dionysij librorum authoritate, quibus quid doctissimus optimusque quisque tribuat, in aperto est. Vt cunctis uerò illa habeant, scriptura sacra, unica uitæ & omnium in ecclesia rerum gerendarum certissima regula, Baptismum & Cœnam nobis tanquam solennia Christi instituta & sacramenta commendat. Ea ergo sufficiunt nobis, ut nihil nos moueat, quicquid tandem contra aut præter hæc afferat ingenij humani acumen, quod nullam unquam potestatem accepit instituendi sacramenta.

Salubres ritus
ecclesiæ nō con-
temnuntur.

Interea salubres ritus, & salutaria Dei instituta, obseruationesque religiosas ecclesiæ Christi non contemnimus. Diximus aliàs quid sentiamus & doceamus de Pœnitentiâ, & de ordine ecclesiastico: dicemus suo loco de reliquis illis, quæ neoterici uenditant pro sacramentis. Ita etiam alibi, quantū satis esse putauimus, disseruimus de similitudine & differentia sacramentorum ueteris & noui populi.

Lib. contra hæ-
reses 4. & 5.

VIDEAMUS modò quibus rebus sacramenta constant. Scripturarum & omnium sanctorum testimonio constant duobus, è signo & re signata, è uerbo & ritu, è promissione euangelica & ceremonia, è re externa & interna, è re, inquam, terrena & cœlesti (ut habet martyr Christi Irenæus) ex re uisibili & inuisibili, è sensibili & intelligibili. Huc enim pertinet quod D. Ioan. Chrysostomus in Matth. οὐδὲν γὰρ, inquit, αὐδῶν τὸν παρὰ τὴν ἡμῶν ὁ χριστός, ἀλλ' αὐδῶν τὰ μὲν τὰ πρᾶγματα, τὰ δὲ νοητά. Caterum appellauit αὐδῶν τὰ sensibilia, quæ uidelicet externis sensibus, utpote uisu, auditu, gustu, & tactu percipiuntur, νοητά uerò intelligibilia aut mentalia, quæ mente uidelicet, intellectu, consideratione & animi discursu aut ratiocina-

Signo & re sig-
nata constam
sacramenta.

tionem, non carnis quidem, sed fidei, percipiuntur. Scripturarum demonstratione res fiet illustrior. Dominus dicit in euangelio discipulis suis, Ite in orbem uniuersum, & prædicate euangelium omni creaturæ: qui crediderit & baptisatus fuerit, saluus erit. Baptizabitis autem in nomen patris & filij & spiritus sancti. Eadem scriptura euangelica de Ioanne Baptista dicit, Baptizabat Ioannes in deserto, prædicans baptismum pœnitentiæ in remissionem peccatorum. Ita & S. Lucas testatur D. Petrum ad Israelitas dixisse, Resipiscite, & baptizetur unusquisque uestrum in nomine Iesu Christi in remissionem peccatorum, & accipietis donum spiritus sancti. In baptismo itaque aqua uel aquæ aspersio in nomen patris & filij & spiritus sancti, & totum illud quod fit ab Ecclesia, est signum, ritus, ceremonia, ac res externa, terrena atque sensibilis, sensibus, inquam, patens & exposita: at remissio peccatorum, participatio uitæ, consortium cum Christo & membris eius, dona item sancti spiritus, quæ conceduntur nobis per gratiam Dei, in fide Iesu Christi, res est significata, interna, cœlestis, ac intelligibile illud, quod mente fideli percipitur. Ad eundem modum testificans scriptura & de Cœna Domini, altero Ecclesiæ sacramento, Dominus, inquit, Iesus accepto pane, gratias egit, fregit, distribuit discipulis suis, & ait, Accipite, edite, Hoc est corpus meum, quod pro uobis traditur. Similiter & poculo accepto dixit porrigens, Bibite ex hoc omnes, Hic est sanguis meus, qui est noui testamenti, qui pro multitudine effunditur in remissionem peccatorum. Hoc facite in mei commemorationem. Iam itaque in Cœna Domini tota illa actio quæ fit ab Ecclesia ad exemplum summi pontificis Christi, fractio inquam panis, distributio, adeoque conuiuium ipsum aut perceptio panis & uini, signum est, ritus, ceremonia, ac res externa siue terrena, ipsum illud sensibile quod patet sensibus.

Marci 1.

Actorum 2.

Matth. 26.
Luc. 22.

bus. Cæterum intelligibile & res significata, interna & cœlestis, est ipsum corpus traditum pro nobis, & sanguis effusus in remissionem peccatorum, adeoque redemptio nostra & cōmunio quam habemus cum Christo & omnibus sanctis, & quam habet ille in primis nobiscum.

Ex his facile licebit certum constituere de uocabulis iam iam huic inditis negotio. Externa enim appellantur signa, quod sint corporea, foris incurrentia sensibus, quibus hauriuntur. E diuerso appellamus ipsas res significatas internas, non quod res ipsis inclusæ signis lateant, sed quod internis animi facultatibus per spiritum Dei concessis percipiuntur. Ita quoque eadem signa nuncupantur & terrena & uisibilia, quod rebus consentiunt terra sumptis, aqua uidelicet, pane & uino; & quod in his speciebus coram uideantur. Porro cœlestes & inuisibiles dicuntur res significatae, quod fructus ipsarum sit cœlestis, quodque oculis animi seu fidei, non corporis, cernantur. Alioqui enim ipsum Domini nostri Iesu Christi corpus & sanguis, quæ in cœna specie panis & uini representantur fidelibus, suapte natura non sunt cœlestia aut inuisibilia. Corpus enim Domini nostri sua substantia & natura nostro corpori consubstantialia est: cœleste quidem & ipsum propter liberationem à corruptione & infirmitate, aut propter clarificationem, non naturæ euacuationem aut depositionem, appellatum. Id ipsum uisibile est non inuisibile sua natura, residens in cœlis: uidetur tamen à sanctis cœnam celebrantibus, non corporis quidem, sed animi oculis, ideo propter nos inuisibile dicitur, quod in seipso non est inuisibile. Iam Verbum in sacramentis dicitur, & est diuinæ uoluntatis testificatio, beneficiorum & promissionum Dei commemoratio & renouatio, institutio item & præceptum Dei, quod sacramenti authorem, modum & finem ostendit. Verbum enim in baptismo illud est, quod modò recitauimus, *Ite in mundum uniuersum, &c.* In Cœna Domini, uerbum Dei illud est, *Accipit Iesus panem, &c.* Ritus autem consuetudo & mos est, petitus ab exemplo Domini præeuntis actione sacra, in qua & preces & ea quæ recitantur è uerbo Christi, comprehendimus. Nam ut ille panem fregit & distribuit, similiter & poculum diuisit: ita sancta imitatione & ritu sacramentali idem imitamur in actione sacra: ut ille gratias egit, ita & nos agimus gratias. Inuocamus super baptisandos certis precibus auxilium & gratiam Domini: recitamus locos quos ad negotium baptismi pertinere credimus certos ex Euangelio. Idem solemus & in celebratione Cœnæ Domini exequi. Verum non est instituti nostri fuscè & exactè nunc de Ritibus sacramentorum differere: quos tamen optimos esse arbitramur, si sint petiti ex sacris, & modum non excedant. De quibus suo loco.

Alij pro uerbo reponunt promissionem, pro ritu ceremoniam. Ac in uocabulo quidem Ceremoniæ non uideo ullum periculum: siquidem per Ceremoniam intelligat externus ille cultus & ritus, quem ipse Dominus suo nobis exemplo cōmendauit, & celebrandum reliquit. Et reuera signa sacramentalia non sunt simplicia signa, sed ceremoniæ seu actiones religiosæ. Ita nullum periculum esse uidetur & in uoce Promissionis, modò per Promissionem intelligamus prædicationem Euangelij, & cōmemorationem promissionum diuinarum, quas in prædicatione Euangelij & celebratione sacramentorum recitantes usurpamus, Deum uidelicet nos propter Christum in fide recipere in suum consortium, abluere à peccatis, donare uarijs charismatibus: Christum pro peccatis nostris traditum, effudisse sanguinem ad expianda omnium peccata fidelium. Nam in celebratione baptismi usurpamus illa Domini uerba, *Sinite paruulos uenire ad me, talium enim est regnum Dei, &c.* In celebratione conuiuij sanctorum recitamus

*Signa externa
et res interna.
Signa terrena
& uisibilia, res
cœlestes & in-
uisibiles.*

*Verbum &
ritus.*

*Promissio &
Ceremonia.*

hæc sacra Domini uerba, Cœnantibus eis accepit Iesus panem, & postquam egisset gratias, fregit & dedit eis, dicens, Accipite, edite, Hoc est meum corpus quod pro uobis traditur, Hic est sanguis meus qui pro uobis effunditur, in remissionem peccatorum. Hoc facite in mei commemorationem. Et reliqua. Sunt enim illæ commemorationes, & recitationes, promissiones Euangelicæ pollicentes peccatorum remissionem credentibus, annunciantes pro ipsis Domini corpus traditum, & pro ipsis effusum esse sanguinem: quæ sanè fides unica & certissima est uitæ & salutis apprehendendæ ratio. Christus est uis & substantia sacramentorum, per quem solum efficacia sunt, extra quem nihil possunt aut efficiunt.

Cæterum si quis per promissionem intelligat pactionem, qua se Dominus singulariter obstrinxerit, ac uelut affixerit signis, in quibus aut cum quibus uelit corporaliter, essentialiter & realiter esse præsens, iam plus dicit, quam scripturis demonstrare euincereque possit. Nullibi enim promisit se Christus in signis aut cum signis corporaliter, hoc est, uero suo corpore affuturum. Alioquin non nescio Deum alicubi patribus nostris apparuisse sub figura corporali, id est, specie aliqua uisibili: ueluti dum Iacobo Izraeli scalæ incumbens & Mosi in foramine petræ ceu in specula constituto se exhibet uidendum. Verum ea huc propriè non pertinent, qui de corporali Christi præsentia, & de signis sacramentalibus differimus. Quia uerò non pauci uerba Domini, Hoc est corpus meum, Hic est sanguis meus, huc torquent, ut corporalem corporis Domini præsentiam in Cœna statuant: respondemus uerba illa Domini non rigidè ad literam exponenda esse, quasi panis & uinum essentialiter aut corporaliter sint corpus & sanguis Christi: sed symbolicè & sacramentaliter, ita ut corpus & sanguis Christi in sua substantia & natura, & in loco suo, in certo inquam aliquo cœli loco maneant, panis autem & uinum signum uel sacramentum sint, testimonium aut obsignatio, memoriaque celebris traditi pro nobis corporis ac effusi sanguinis. Verum hac de re suo loco copiosius differemus. Ex ijs quæ diximus satis claret quomodo sacramenta consistant duobus, signo & re signata, uerbo Dei & ritu uel ceremonia sacra.

S V N T tamen qui arbitrantur uerbis eam esse uim à Deo inditam, ut pronuntiata super signa, ipsa sanctificent, immutent, adeoque res significatas aduehant uel præsentem faciant, & signis ipsis inferant, uel includant, aut certè coniungant. Hinc enim exaudiuntur uoces huiusmodi, Aquam baptismi uirtute uerborum regenerare: & uirtute uerborum ipsum panem & uinum in Cœna fieri carnem & sanguinem Domini naturalem. Ac uerbo quidem & signo constant sacramenta Christi & ecclesiæ. At diligenter dispiciendum uidetur quid intelligi oporteat per uerbum. Modò dixi Verbum in sacramentis esse diuinæ uoluntatis testificationem, ipsumque Dei præceptum aut institutionem Dei, quæ sacramenti auctoritatem, modum & finem ostendit. Hoc inquam uerbo & præcepto Dei, hac uoluntate & institutione Dei, sanctificantur sacramenta, non quòd uerba à ministris sic pronunciantur, sicuti leguntur prius ab ipso Domino recitata, aut ab ipsis tradita Apostolis: sed quòd Deus sic uoluit, fecit, & facere iussit. Quod enim Deus facit, aut facere iubet, ipso Dei præcepto aut facto est sanctificatum. Nam omnia quæ fecit, ualde bona sunt: ergo quæ facere iubet, non possunt non esse sancta: quia ipse sanctus est & sanctificator unicus. Proinde ex natura, uoluntate, facto, aut iussu Dei, non ex pronuntiatione ullorum uerborum est sanctificatio sacramentorum. Cui iam, ut homini quoque applicetur ac profit, fidelis hominum obedientia accedat necesse est: quæ uidelicet omnem fiduciam defigat in misericordiam

Quid in negotio sacramentorum intelligatur per uerbum.

diam & potentiam Dei, quæ deniq; non contemnat aut respuat institutionē Dei, licet in speciem uilis & contempta uideatur. Apparebit hoc clarius in exemplo 4. Reg. 9. Naamani magistri militum regis Syriæ. Is audit à propheta, haud dubiè ex præcepto Domini, septies lauet in Iordane: sic enim futurum, ut mundetur à lepra. Audis hic uerbum, uoluntatem inquam & præceptum Dei: non audis autem ulla uerba recitari uel super Iordane, uel super Naamano, uel ulla uerba Naamano à propheta præscribi, quæ ipse recitet, quibus uidelicet aquæ indatur purificandi uis. Obtemperat per fidem præcepto Dei Naaman, & mundatur à lepra, non suo quidem merito, aut aquæ Iordanis beneficio, sed uirtute Dei & fidei obedientia. Mundantur & in Euangelio leprosi non pauci uirtute inquam & uoluntate Christi Domini fidei q; gratia, non ulla pronuntiatione uel recitatione uerborum. Dixit sanè Dominus, Volo, mundus esto: cæterum si quis hodie eadem recitarit etiā Matth. 8. centies super leproso aliquo, nihil effecerit. Vnde perspicuum est, uerbis nullam esse uim inditam sanitatis effectricem, si pronuncientur.

Dixerunt sanè Apostoli ad agrotos languentes & claudos, In nomine Domini Iesu surgite & ambulate: ac surrexerunt quidem sanati: sed non uerborum beneficio seruati, uerum nomine, potentia inquam & uirtute Christi. Petrus enim qui ad claudum Hierosolymis dixerat, In nomine Iesu Christi Nazareni surge & ambula, coram senatu Hierosolymitano, Examinamur hodie de eo, inquit, quod benefecerimus infirmo, qua ratione iste saluus factus sit: notum sit ergo omnibus uobis, quod per nomen Iesu Christi Nazareni, iste astat coram uobis sanus. Et ad populum idem, Per fiduciam nominis eius, inquit, hunc quem uidetis ac nostis, confirmauit nomen ipsius, & fides, quæ per eum est, dedit ei integritatem istam. Præterea legimus in Actis Apostolorum, filios cuiusdam Sceuæ sacerdotis exorcistas inuocare nomen Domini Iesu super eos qui habebant demonia, hæc uerò adeo non cessisse exorcismis, ut magis in exorcistas insurgentia illos ferè ad mortem usque mulctarint. Vbi apertissimum est exorcistas eadem ferè ufos esse formula, qua urebantur Apostoli (nam per nomen Domini Iesu tentabant eijcere demonem) hoc autem cum non potuerunt, quis non uideat uerba pronuntiatam nihil posse: Nec obstat hic quicquam, quod exorcistæ illi fuerunt increduli. Nam apud omnes receptissimum est, sacramenta non minus efficacia esse per malos administrata ministros quàm per optimos.

At obijcitur hic nobis illud Apostoli, Christus exposuit semetipsum pro ecclesia, ut illam sanctificaret mundatam lauacro aquæ per uerbum, uel in uerbo. Si quidem, En, inquiunt, mundantur homines aqua baptismi quæ ex uerbo uim habet sanctificandi inditam: uerbis itaque uim sanctificandi inesse necesse est. Cæterum euincemus perspicua demonstratione, non hoc sensisse Apostolum, quod illi putant. Præscribit Apostolus Christianis coniugibus officia sua: ad quam rem illustrandam utitur exemplo Christi & ecclesiæ, Christi erga ecclesiam commendans insignem illam dilectionem, qua inflammatus exposuerit sese pro ipsa, in hoc ut purgatam & gloriosam sibi sponsam adiungeret: ubi obiter mundandi modum indicat. Nam ipse Dominus Iesus, inquit, illam mundauit. Solius enim Christi est purgare. Iam sequitur modus, Lauacro aquæ per uerbum: quod quia breuiter dictum est non nihil obscuritatis habet. Duo autem commemorat, quæ Dominus suis adhibet mundandis, Lauacrum aquæ & Verbum. Lauacrum aquæ baptismus est, externa uidelicet actio, internæ purificationis, gratia & spiritu Dei factæ, testificatio: iuxta illud, Secundum suam misericordiam saluos nos fecit per lauacrum regenerationis ac renouationis spiritus sancti, quem effudit in

In nomine Domini
sanati lan-
guentes.
Acto. 3.

Acto. 19.

Explicatur locus
cui Pauli Ep.
phei. 5. cap.

Titum 3.

nos opulentè, per Iesum Christum seruatorem nostrum. Per interpretationem enim subiicit, Ac renouationis spiritus sancti, cuius quidem symbolum est lauacrum aquæ. Porro Verbum est ipsa Euangelij prædicatio, testificans gratia & misericordia patris datum nobis esse filium unigenitum, qui traditus pro peccatis nostris, credentes effecerit hæredes uitæ æternæ: ut iam hæc Pauli uerba ad Ephes. 5. congruant cum hoc præcepto Domini apud S. Marcum, Ite in orbem uniuersum, & prædicat Euangelium omni creaturæ: qui crediderit & baptizatus fuerit, saluus erit, &c. Nam his quoque adumbrat Dominus salutis modum & rationem, quòd ipse solus sit, qui purget per fidem: uelit interim, ut credentes baptismo consignentur, & palàm prædicetur in orbe, quòd ipse sit qui condonet peccata, & donet etiam gratis uitam æternam. Hæc autem omnia quid oro faciunt ad illorum institutum, qui Paulinis uerbis euincere uolunt, uerbis inesse uim sanctificantem baptismum? Elucidant nostra adhuc clarius hæc Domini uerba ad Apostolos suos dicta, iam mundi estis propter sermonem, quem dixi uobis. An enim hic dicemus propter uerba Christi recitata purgatos esse Christi Apostolos? Quid itaque opus erat ipsum postridie crucifigi & mori? An ut uerbis illam potestatem impetraret? Omnis itaque gloria uerbis porro uindicabitur. An uerò non magis dicat fides & pietas per Sermonem Domini illud intelligendum esse, quod prædicatione Domini explicatur, mors & redemptio Christi, cui quoniam crediderunt, purificati sunt? Alibi enim dicit, Fide purificans corda ipsorum. Proinde error in eo uersatur, quòd non rectè iudicant de uerbo aut sermone. Dominus enim loquitur de prædicato & credito: illi intelligunt de pronunciato, quasi sic uim habeat ex Domino sanctificandi. Nobiscum facit & S. Augustinus, qui Tractat. in Ioan. 80. Vnde ista, inquit, tanta uirtus aquæ, ut corpus tangat, & cor abluat, nisi faciente uerbo? Non quia dicitur, sed quia creditur. Nam & in ipso uerbo aliud est sonus transiens, aliud uirtus manens. Hoc est uerbum fidei quod prædicamus, ait Apostolus, quia si confessus fueris ore tuo, quòd Dominus est Iesus, & credideris in corde tuo, quia illum excitauit à mortuis, saluus eris. Corde enim creditur ad iustitiam, ore autem fit confessio ad salutem. Vnde in Actibus Apostolorum legimus, Fide mundans corda eorum. Et in Epistola sua beatus Petrus, Sic & nos, inquit, baptisma saluos facit, non carnis depositio sordium, sed conscientia bonæ interrogatio. Hoc est uerbum fidei quod prædicamus, quo sine dubio ut mundare possit consecratur & baptismus. Christus quippe nobiscum uitis, cum patre agricola, dilexit ecclesiam, & semetipsum tradidit pro ea. Lege Apostolum, & uide quid adiungat, Vt eam sanctificaret, ait, mundans eam lauacro aquæ in uerbo. Mundatio itaque nequaquam tribueretur fluxo & labili elemento nisi adderetur, In uerbo. Et reliqua. Hucusque enim S. Augustini uerba recensui, non quòd humano innitar testimonio, aut hoc quoniam urgere uelim, aut ipse humano premi sustineam testimonio, sed quòd his testimonia aliquot scripturæ de uerbo testificantia collegit, ex quibus intelligere possumus uerbum fidei prædicatum, & non recitatum aut pronunciatum, accipi oportere. Hoc, inquam, uerbum uerè purgat, id est, gratia Christi, in quam unice & uerbum & fides intendit, purificat. Ideò enim ille disertè dixit, Non quia dicitur, sed quia creditur. Deinde Verbum fidei est, inquit, quod prædicamus. Præterea, Verbo fidei, inquit, consecratur baptismus, ut mundare possit. Quod quid aliud est, quàm si dixisset, Ipsum fidei negotium efficit ut baptismus sit efficax? Sequitur enim, Mundatio itaque nequaquam fluxo elemento tribueretur, nisi adderetur, In uerbo.

Iam si prisca quoque inspicias sanctorum mysteria, non legas in celebratione Circumcisionis, Pasce & Sacrificiorum ulla esse recitata uerba, quibus ea formarentur, ac ueluti crearentur Sacramenta, redderenturque efficacia. Quo accedit, quod Baptista non tantum uulgus promiscuum, sed ipsum etiam Dominum Iesum, aqua Iordanis baptizauit, nullis interim uerbis recitatis, quibus gratiam celestem euocarit super aquam baptismi. Rursus dum in Euangelio Cœnam instituit Pontifex noster Christus, nihil iubet recitare aut pronunciare, cuius pronuntiationis uirtute, uel elementa mutantur, uel significata res cœlitus detracta adferantur aut cōiungantur symbolis: sed simpliciter quid fecerit Dominus, & quid à nobis fieri uelit, hoc est, quomodo & in quem finem cœnam instituerit, exposuerunt Euangelistæ. Nullibi legimus dixisse Dominum, Quoties hæc uerba mea recitaueritis, Hoc est corpus meum, Hic est sanguis meus, fiet uirtute uerborum meorum, ut substantia signi euacuetur & incipiat in pūcto recitationis sub speciebus panis & uini esse uerum Domini corpus, & uerus sanguis: aut manentibus speciebus & signi ueritate, incipiat simul etiam esse cum pane & uino uerum corpus & uerus sanguis. Proinde nulla est uirtus in recitatione uerborum Domini in Cœna uel deuocandi uel transmutandi. Superstitionem hæc magis quam pietatem alere uidentur. Quasi uerò uerba, concepta formula recitata, uim habeant euocandi, deducendi, sanandi, attrahendi, depellendi aut transformandi. Diuus Aurelius Augustinus inter superstitiosa numerat ligaturas & remedia, quæ medicorum quoque, ut ait, disciplina condemnat, siue in præcantationibus, siue in quibusdam notis, quas uocant characteres, siue in quibusdam rebus suspendendis, &c. Locus extat cap. 20. lib. de Doctr. Christ. 2. Et Chrysost. grauiter succensens ihs, qui Euangelium scriptum suspendunt e collo, Vbi (inquit in Matth. 23. cap.) uirtus est Euangelij, in figuris literarum, an in intellectu sensuum? Si in figuris, bene circum collum suspendis. Si in intellectu, ergo melius in corde posita sunt. Hæc ille. Atqui eadem est ratio figurarum & pronuntiationis literarum aut uocum Euangelij. Sicut ergo nihil potest figura literarum: ita nulla uirtus est & in pronuntiatione uerborum, uel in sono. Quid quod Plinius scriptor gentilis multa quidem gentilitia profert exempla, quibus ostendit uerba esse efficacia: idem tamen inter alia, Quæsitum est, inquit, ualeant ne uerba & incantamenta carminum? Sed uirum sapientissimi cuiusque respuit fides. Locus extat libro 28. cap. 2. Merito autem his omnibus ipsum Dei uerbum præfertur, quod apud Moysen Deut. 18. omnis generis superstitiones & incantamenta magna cum grauitate condemnat atque prohibet.

Scio quid mihi hic obijciant aduersarij, Benedictionem seu consecrationem, non superstitionem esse quam perficiant. Afferunt præterea plurima e sacris, posita in Decret. canonicis exempla, quibus ineptissime profecto demonstrare conantur benedictione, ut aiunt, rerum naturas mutari: unde colligunt & panem uerbis benedictionis uel consecrationis conuertere in carnem. Huius autem generis sunt, aqua manans e percussa petra, Nilus conuersus in sanguinem, aqua in nuptijs Canæ Galilææ mutata in uinum, aqua marath cōuersa in aquam dulcem, uirga Moysi in colubrum. Cæterum quid hæc oro faciunt ad Cœnam Domini- cam, cum qua nihil similitudinis habent? ut ineptissima iam sit collectio, Nilus conuersus est in sanguinem, ergo panis conuertitur in carnem: aqua in nuptijs Cananaicis mutata est in uinum, ergo uinum in cœna Domini conuertitur in sanguinem Christi. Dum enim aqua proflueret e petra percussa, dum conuerteretur Nilus in sanguinem, dum aqua in nuptijs uino commutaretur, dum dulcesce-

Verba recitata non formare et efficacia reddere sacramenta.

An benedictione, rerum naturæ mutantur.
Num. 20.
Exod. 7.
Ioan. 2.
Exod. 15.
Exod. 7.

rent aquæ marath, dum denique uirga Moſis uerteretur in ſerpentem, certè conuerſa nempe aqua, ſanguis, uinum, aqua dulcis, & ſerpens, non erant ſub ſpecie earum rerum quæ fuerant, neq; ſimul erant quod fuerant & quod facta erant: ſed aqua Nil erat uerus cruor, non aqua & cruor ſimul, neq; ſub uiſibili ſpecie aqua erat ſanguis inuiſibilis. Ita habet res & in reliquis exemplis. Nihil igitur cõgruunt cum ſignis ſacramentalibus, ac diſſimilia ſunt non ſimilia. Præterea quis facilè dixerit qua prolatione uerborum Moſes aquam elicuerit è ſaxo, Nilum conuerterit in ſanguinem, amaras aquas reddiderit dulces: qua item uerborum forma uſus ſit Dominus dum aquam conuertit in uinum? Ineptiſſimè itaq; accommodantur illa exempla benedictioni conuertenti rerum naturas, cùm non poſſit oſtendi qua benedictione uſi ſint ſancti. Similiter nō legimus Moſen aut Ioſue ulla pronunſiaſſe uerba benedictionis, quibus diſſecuerint aquas aluei maris Erithæi & fluminis Iordanis. Nil legitur benedictionis recitaſſe Helifeus dum natans ferrum manu-
briſ attraheret. Diuina in his omnibus operabatur potentia. At ab ea nō colligendum eſt quidlibet. Impotentia eſt enim nō potentia quæ iuſtitia repugnat, & contraria ueritati diuinæ patrat. Sed & potentia Domini opera huiusmodi ſunt, ut nemo non intelligat, & manifeſtè talia eſſe cernat, qualia eſſe dicuntur. Dixit Dominus, Fiat lux, & facta eſt lux: huiusmodi, inquam, lux, quæ & lux dicebatur, & pro natura lucis lucebat: non autem dicebatur aut fiebat lux, quæ lux reuera eſſet, & tamen non luceret: ſicuti panis dicitur corpus Chriſti, qui tamen corporis Chriſti ne pilum quidem habet.

4. Reg. 6.
Omnipotentia
Dei.

Genef. 1.

De uocabulo
Benedictionis.

1. Corinth. 10.

Eucharistia
Eulogia.

Porro Benedictionis uocabulum nullibi in ſcripturis ita uſurpatur, ut iſti inducunt. Benedicere in ſcripturis eſt confiteri, laudare, ſalutare, ualedicere, bene loqui & bene precari, gratulari, magnificè celebrare, gratias agere pro beneficijs, augere, ditare, multiplicare, aut fœcundare. Poſſem de ſingulis proferre exempla ſi neceſſe foret: nullibi uerò legas benedicere perinde eſſe atque Dei, uel alioqui bonis uerbis precationibusq; certa formula pronunſiatis, rerum conuertere naturas. Legimus, inquiunt, in Euangelio Dominū accepiſſe panem, & benedixiſſe: ſed & Paulum eo nomine panem & poculum appellaiſſe panem & poculum benedictionis, conſecrationis haud dubiè, qua conſecratione ſubſtantia ſignorum commutatur mirabiliter. Ego autem reſpondeo, uerba & Euangelica & Apoſtolica torqueri uiolenter ad ſenſum qui in mentem non uenit unquam uel Domino uel Apoſtoliſ. Nam quantum attinet ad locum Euangelij, Benedicere non eſt pingere geſtu manus ſignum crucis, & adhibito ore ad panem aut poculum anhelare diſtinctas etiam ſyllabas uerborum conſecrationis: ſed laudes Deo canere, ſue pro beneficijs agere gratias. Quod dixi probabo uerbis Euangelicis & Apoſtolicis. Nam Apoſtoli & Euangeliftæ utuntur indiſcriminatim uerbo benedicendi & gratias agendi. Vbi enim Marcus habet *εὐλογῶν*, Matthæus, Lucas & Paulus habent *εὐχαριſτῶν*: qua uoce & Marcus paulo poſt utens, ſcribit, Et accepto poculo *εὐχαριſτῶν*, cùm ſcilicet gratias egiſſet, dedit eis. Eſt itaque uel iſtis Apoſtoliſ interpretibus benedicere, gratias agere, cùm alterū pro altero ponant. Idipſum nō oſcitantilectori palàm cernere licet & in loco Pauli qui eſt 1. Corinth. 10. cap. quē nos in ſequentibus tractabimus ex integro. Nondum itaque probarunt ex ſcripturis aduerſarij benedicere perinde eſſe atq; res mutare, uel res iſpas ſignificatas uerbis, pronunſiatione, recitatione uerborum adducere. Myſtica benedictionis quidem meminerunt ueteres, ſed longè alio ſenſu quàm iſti conſecratores. Et de Conſecratione uera mox dicemus: conſutabimus & alio loco quæ adferuntur de benedictione aut conſecratione baptiſmi: nunc quod cœpiſmus, abſoluemus.

Verba

Verba per se in hoc instituta sunt à Deo, ut significant, & significando testentur atq; admoneant: nec habent præterea ullam uim latentem conuertendi rerum naturas, aut res ipsas ut corporaliter adsint adducendi: neq; illis sancti unquam sic usi leguntur: peccant ergo & imponunt hominibus, qui ipsis aliter quàm instituta sunt utuntur. Agnouit hoc ipsum & Aurel. August. qui in Enchiridio suo ad Laurent. cap. 22. Et utiq; uerba, inquit, propterea sunt instituta, non per quæ se homines inuicem fallant, sed per quæ in alterius quisq; notitiam cogitationes suas perferat. Verbis itaq; uti ad fallaciam, non ad id quod instituta sunt, peccatum est. Idem summam colligens totius libri de Magistro inscripti, interrogat, Sed iam mihi dicas uelim, quid de hoc toto sermone meo sentias. Ad quod mox respondet, Ego uero didici admonitione uerborum tuorum, nihil aliud uerbis, quàm admoneri hominem ut discat, & perparum esse quod per locutionem aliquanta cogitatio loquentis apparet: utrum autem uera dicantur, eum docere solum qui se intus habitare cum foris loqueretur admonuit. Hæc ille de Magistro cap. ult. Huc iam pertinent uerba sapientissimi Solomonis in Ecclesiasta dicentis, Sapientum sermones sunt uelut stimuli, & uelut clauis plantati inter folia collectitia, tradita ab uno pastore. Vbi libenter agnoscimus magnam inesse uim eloquentiæ & orationi iustæ: sicuti Græci per Herculem illum Gallicum significarunt, Cicero item multis in i. lib. de Oratore exposuit. At quod illi conminiscuntur de Pitho siue Suada aut Suadela, id reuera nos tribuimus spiritui sancto, qui & gratiam dat dicenti, & auditorum animos præparat atq; commouet. Ex his autem omnibus perspicuum esse arbitror, nouum esse commentum hominum, non doctrinam oracularem, asserere uerbis recitatis in sacramentorum celebratione eam esse uim inditam, ut res conuertant, aut res significatas faciant præsentēs, signisq; ipsis uel indant, uel coniungant. Docebimus præterea paulò post, signa non mutari uel commisceri cum rebus significatis, sed utrumq; in sua natura & proprietate permanere. Satis autem fuerit si uerbis id tribuamus, quod attribuit scriptura, significandi & admonendi, excitandi, commouendiq; ex Deo officium. Polluunt enim non decorant uerba Dei, qui alienis & ementis ornant laudibus.

Agnoscimus quidem Verbo Dei attribui omnē Dei omnipotentis uirtutem, sed quis non intelligat id dici & intelligi de æterno Dei filio, qui in scripturis appellatur Verbum Dei? Quis tam hebes ut non ualeat ritè distinguere inter æternum Dei uerbum, quod est filij Dei persona secunda in trinitate adoranda: & inter uerbum recitatum, aut pronunciatum ab homine? Verbum Dei æternum in sua manet substantia atq; natura, creator non creatura: non miscetur: non inditur aut incorporatur uocibus humanis: Verbum ab homine prolatum creatura est non creator, & creatura manet. Nam est sonus transiens, Fit tamen uirtus manens, si syncerum non adulteratum sit, recipiaturq; fide. Sic enim seruat, non sua quidem uirtute, aut quia ab homine est recitatum: sed propter uirtutem eius qui reuelauit uerbum, qui uerax est, ideoq; ea seruat quæ per uerbum promittit: ut iam reuera ipse Deus seruet, qui per uerbum se seruaturum dixit credentes. Ergo uerbū quod reuelauit nobis Deus per seruos suos prophetas & electos apostolos, non ideo uerbum Dei est ac dicitur, quod syllabæ sonus, uerba & uoces sint natura sua uerbum Dei, hoc ipsum scilicet, quod sua substantia est filius Dei: sed quia reuelatio uerbi facta est à Deo in spiritu sancto per uerbum uel sapientiam Dei: unde licet origo diuina sit non humana, uerba tamen quibus usi sint prophete & Apostoli humana sunt, nec aliud quàm significare possunt. Quibus interim

Ad quid uerba instituta sint, et quid ualeant.

Ecclesi. ult.

Eloquentia uis.

Quomodo uerbo dei attributa omnipotentia.

nolo externi uerbi Dei uim iustam eleuatam. Agnosco omnia ea quæ uerbo Dei sano intellectu tribuuntur. Verum ea de re alias fufius disputaui.

De uera sancti-
ficatione, seu
consecratione.

At dicat iam aliquis, Si ex uerborum Dei recitatione non sanctificantur sacramenta, unde ergo habent quod sunt & dicuntur sacramenta siue sacra signa? Vana ne & nullius uirtutis est consecratio? Vana certè & nullius uirtutis est consecratio illa quam finxerunt Papistæ. De Consecratione autem siue sanctificatione uera, dixi in principio huius capituli, id quod nunc paulò luculentius copiosiusq; edifferam. Sacrae literæ utuntur frequentissime in commemoratione sacrorum uocabulo $\sigma\kappa\alpha\iota$, id quod Græci interpretes ferè reddiderunt per $\sigma\kappa\alpha\iota$, Latini per sanctifico, consecro atq; initio. Latissimè autem patet eius uocabuli usus. Significat enim sanctificare, offerre Deo, purgare & iustificare, item seligere & separare, separare inquam à prophano usu & rebus sacris dedicare, nuncupare, applicare, destinare. Dicimus itaq; Consecrare in præsentia aliud non esse, quàm sanctificare, Deo utiq; dedicare, adeoq; & segregare, aut è re prophana facere sacram. Quis autem hoc facit? aut qui facit, quo obsecro medio & instrumento hoc facit? quis oro consecrat, Deus ne an homo? Deus utique non homo. Deus enim instituens rem aliquam, & uerbo suo, quid & in quem finem instituerit, testificans atque exponens, sua ac sancta uoluntate iusta & bona, sola institutione inquam sua, citra ullum aliud medium, rem iam à se institutam consecrauit. Sicut enim ipse sanctus, iustus & bonus est: ita quicquid ipse iusserit, sanctum, iustum & bonum est. Et homo ex uerbo dei intelligens Deum sic in sanctum, bonum & iustum usum aliquid instituisse, ipsum institutum pro sancto, bono & iusto habet, recipit, usurpat: non ipse demum uerbis recitatis sanctum efficit atq; consecrat. Et quia instituta Dei omnia sancta & bona esse credit, ideo & hoc Dei institutū, ita ut Deus ordinauit, celebrat, gratias Deo agit, & totus à Deo & regula uerbi eius dependet. De sanctificatione huiusmodi loquens Apostolus in alio quodam argumento, Spiritus, inquit, certò loquitur quod in posterioribus temporibus exorientur seductores, qui prohibebunt contrahere matrimonium, iubebuntq; abstinere à cibis, quos Deus creauit ad sumendum cum gratiarum actione fidelibus & his qui cognouerunt ueritatem, quod quicquid creauit Deus, bonum sit, & nihil reijciendum, si cum gratiarum actione sumatur. Sanctificatur enim per sermonem Dei & precationem. En sanctificatur, inquit, cibus per sermonem Dei & precationem. Est autem sermo uel uerbum Dei in præsentia, sicut ipse exponit Apostolus Paulus, testimonium scripturæ & uoluntatis diuinæ, quo erudimur quod omnia quæ Deus condidit ualde bona sunt, & quod ea munda non immunda sunt quæ Deus ad uescendum & ad nostros usus condidit. Audit in Actis Apostolorum beatus Petrus, Surge Petre, macta & uescere. Vidit autem in uisione ante se omnia terræ celiq; animantia. Respondit uerò Petrus, Nequaquam domine, quia nunquam edí quicquam commune & immundum. Rursus ergo audit, Quæ Deus purificauit, tu ne dixeris esse communia. Sed ubi quæso purificauit? Dum condidit & usibus hominis concessit. Accedit uerbo uel sermoni precatio, non imprecatio quidem aut præcantatio, sed fidelis gratiarum actio. Semel enim & iterum ipse Apostolus gratiarum actionis meminit, ut per genus, id est, precationem aut orationem, aliud intelligere non liceat, quàm speciem, ipsam inquam gratiarum actionem. Est enim oratio uel precatio uelutigenus ad has species, Inuocationem & Gratiarum actionem. Ideo ergo cibus sanctus est, ait, quia à Deo qui bonus est, conditus, & usibus hominis destinatus est: deinde quia cum fide & gratiarum actione ab homine recipitur.

1. Tim. 4.

Acto. 10.

recipitur. Cibus enim multis non est sanctus & bonus, non suo quidem uitio, qui semper est bona Dei creatura, sed non agnoscentium fide Dei beneficia, aut abutentium & ingurgitantium sese contra uerbum domini, culpa. Sic inquam habet illa in causa negotium sanctificationis, quod & sacramētis applicare oportet. Deus ex bona sua uoluntate & ad hominum utilitatem sacramenta ordinaturus, deligit sibi ex bonis suis creaturis, aquam, panem & uinum, & hæc in certum aliquem finem instituens, præscripto aliquo ritu usurpare uel celebrare iubet: iam itaq; iussu delectuq; diuino aqua, panis & uinum consecrata sunt, mox eadem uerbo suo signat, & quod ea pro sacramentis haberi, & quomodo celebrari uelit, exponit. Confit itaque consecratio sacramentorum, uoluntate, institutione, delectu, seu præcepto Dei, uerbisq; consignatione. Proinde aqua, panis & uinum usurpata uulgaris more, aut non ita ut à Deo delecta & instituta sunt, insculpta quodammodo nota uerbi, communia utiq; siue prophana sunt: delectu seu iussu demum diuino, usu sancto, & uerbo ceu nota accedente, incipiunt iam esse quod prius non fuerunt, sacramenta. Substantia quidem ipsis eadem manet, quæ fuerat antea, accedit autem nunc alius usus & finis, habent nunc notam uerbi Dei impressam & præceptum Dei, sunt itaq; consecrata. Quibus omnibus accedit etiam usus sanctus, fide uera celebrantium redemptionis beneficium, & gratias agentium benefico redemptori precibus fidelibus. Possumus hic ex politicis quædam proferre exempla, in quibus etiam res quædam, propter nouas accedentes causas, manente substantia sua, iam fiunt, quod antea non fuerant. Argentum enim uel aurum nondum cūsum & notatum magistratus signo, nihil aliud est quàm argentum & aurum, accedit autem, iubente magistratu, noua forma per typum, & fit numisma, quod prius non fuerat, licet substantia sua idem maneat quod fuerat prius. Cera priusquam notetur sigillo, communis & prophana est cera: ubi uero, rege sic uolente & iubente, character sigilli regis ceræ imprimitur appenditurq; tabulis & instrumento publico, mox eo haberi loco incipit, ut læsæ maiestatis reus habeatur, quisquis signatam tabulam aut ceram uiolarit. Ex quibus patere iam arbitror, ueram sanctificationem uel consecrationem sacramentorum constare uoluntate & institutione Dei, fine certo & usu sancto, quæ nobis explicantur uerbo. De quibus hucusque uerbosius fortassis, quàm quidam faciundum putent, disputauim. Sed condonabunt hanc mihi prolixitatem pii lectores, cum omnino omnia fideliter, diligenter & fusè explicare cupiam.

VINDICATO iam legitimo usu uerbi, & exposita huius uirtute, declarataq; per occasionem uera sacramentorum sanctificatione seu consecratione, redimus ad propositam & cœptam disputationem: & quoniam docuimus sacramenta constare duobus, signis & rebus significatis, reliquum est, ut demonstremus partes illas, naturas suas discretas proprietate incommunicata retinere: ex qua demonstratione, & præcedentibus & consequentibus, adeoq; toti sacramentario negotio, mira, haud dubiè, lux affulgebit. De communicatione uerò nominum dicam suo loco.

Quòd autem discretas naturas quælibet partium incommunicata proprietate retineat, hinc manifestum est, quòd multi signo participant, qui tamen cum re significata nihil commune habent. At si naturæ partium unirentur aut coirent naturaliter, necesse esset eos re quoq; significata communicare, qui signo participant. Exempla scripturæ ut in promptu, ita perspicua sunt. Nam Simon ille magus in Actis apostolorum accipit quidem signū & baptizatur: rei uerò ne tantū

Quomodo con-
secratur sacra-
menta nostra.

Signum & si-
gnatū in sacra-
mentis discre-
tas retinere na-
turas.
Acto. 8.

Ium quidem uel habet uel accipit. Iudas quoque Iscariotes, domini proditor perfidus & crudelis, edit quidem panem domini, at panem dominum non edit. Alioqui enim uixisset felix, iustus & beatus in aeternum. Qui enim edit me, ait ipse dominus, non morietur in aeternum. Perijt autem Iudas morte aeterna, ergo cibum uiuificum non edit.

Impios in comunione sacramentorum re non participare.

His claris scripturae testimonijs adijciam modò & quaedam ad idem institutum pertinentia S. Augustini, qui tractatu in Ioan. 26. Accipimus hodie, inquit, uisibilem cibum: sed aliud est sacramentum, aliud est uirtus sacramenti. Quàm multi de altari accipiunt & moriuntur accipiendo? Vnde dicit, Apostolus, Iudicum sibi manducat & bibit. Nónne buccella dominica uenenum fuit Iudae? & tamen accepit, & cum accepit, in eum intrauit inimicus: non quia malum accepit, sed quia bonum malè malus accepit. Et mox, Huius rei sacramentum, id est unitatis corporis & sanguinis Christi, de mensa dominica sumitur, quibusdam ad uitam, quibusdam ad exitium: res uero ipsa cuius & sacramentum est, omni homini ad uitam, nulli ad exitium, quicumque eius participes fuerint. Et iterum, Qui non manet in Christo, & in quo non manet Christus, proculdubio nec manducat spiritualiter carnem eius, nec bibit sanguinem eius, licet carnaliter & uisibiliter premat dentibus sacramentum corporis & sanguinis Christi, sed magis tantæ rei sacramentum ad iudicium sibi manducat & bibit. Et reliqua. Similia tradit & lib. de Ciuit. Dei 21. cap. 25. Libro quoque de Doctr. Christ. 3. cap. 9. ostendit in coniunctione opus esse distinctione, ne externo signo nimium inhæreamus.

Cognatio uerbi Dei & sacramentorum.

Hebr. 4.

Matth. 3.

1. Pet. 3.

Distinguit scriptura in ministerio hominis & operatione spiritus.

Redimus ad testimonia scripturae. Apostolus testatur in 1. ad Corinth. 10. cap. omnes patres nostros baptisatos esse, & omnes eundem cibum & potum spirituales edisse & bibisse: sed dominum plures ex ijs non approbasse. Quòd si spirituales cibum & potum edissent & bibissent spiritualiter per fidem, proculdubio approbasset illos dominus. Nam sine fide, ut idem ille ait, impossibile est placere Deo: fidem ergo habentes probantur Deo. Proinde participarunt patres nostri sacramentis quidem uisibilibus, gratia autem inuisibili caruerunt. Vnde consequens est signum atque signatum non confusas aut commixtas, sed discretas retinere naturas. Præterea habent uerba euangelicæ prædicationis cum signis sacramentalibus cognationem & similitudinem saltem aliquam. Alioqui uerba signis longè præferuntur, Apostolo dicente, se prædicatum non baptisatum esse missum. Atqui audiunt permulti foris uerbum domini qui tamen cum fide destituantur, carent interno uerbi fructu, Paulo rursus dicente, Nobis annunciatum est quemadmodum & illis: at non profuit illis audisse sermonem, quòd is non esset cum fide coniunctus. Ita enim fit, ut plures percipiant sacramenta uisibilia, careant interim inuisibili gratia, quæ fide sola percipitur. Vnde denuo consequitur signum non confundi cum signato, sed utrumque substantiam & naturam suam retinere discretam. Quid quod scriptura disertè & luculenter distinguit inter externum hominis ministerium, & internum operatorem & largitorem spirituum donorum, Deum? Nam Ioan. Baptista, Ego quidem baptizo uos, inquit, aqua, ille uerò (Christus) baptizabit uos spiritu sancto. Cum quo congruit illud Petri, Baptismus uos saluos reddit: non quo carnis sordes abluuntur, sed conscientia bonæ interrogatio in Deum.

Huc iam pertinet euidentissimum illud S. Augustini testimoniū, quod Quæst. lib. in Leuit. 3. Quæst. 83. in hæc uerba legitur, Animaduertendum est quoties dicit, Ego dominus qui sanctifico eum, loqui de sacerdote, cum hoc etiam Moses dixerit, Et sanctificabis eum. Quomodo ergo & Moses sanctificat & Dominus? Non

Non enim Moses pro domino: sed Moses uisibilibus sacramentis per ministerium suum: Dominus autem inuisibili gratia per spiritum sanctum: ubi est totus fructus etiam uisibilium sacramentorum. Nam sine ista sanctificatione inuisibilis gratiae, uisibilia sacramenta quid profunt? Hæc August. Quemadmodum uerò inter suum ministerium baptisandi & potestatem Christi distinxit Ioannes Baptista, ita idem ille discernens inter ministerium concionandi & interni doctoris tractum, Ego uox, inquit, clamans in deserto: parate uiam domini. Et iterum, Qui ^{Ioan. 1. & 3. capite.} è supernis uenit, supra omnes est. Qui è terra profectus est, terrenus est, & è terralocquitur. Qui è cœlo uenit, supra omnes est, & quod uidit & audiuit, hoc testatur, &c. Consentiens uerò his S. Paulus, Quis, inquit, est Paulus, quis autem ^{1. Cor. 3.} Apollos: nisi ministri per quos credidistis, & ut cuique dominus dedit. Ego plantauimus, Apollos rigauit: sed Deus dedit incrementum. Itaque non qui plantat est aliquid, neque qui rigat, sed qui dat incrementum Deus. Quanquam uerò prorsus & per omnia non congruat (quod & supra significabamus) ministrorum cum signis collatio: quòd ministri sint cooperarii Christi, secundum suam functionem: signa autem inanimata non item, nisi in ipsa *κατ' ἐξουίαν* transferamus, quod ministrorum est: attamen ex alijs satis liquidum fieri arbitror, signum & signatum discretas in sacramentis naturas retinere.

Impugnant hæc maximè, quibus persuasa est Papistica illa panis in corpore Christi uiniq; in substantiam sanguinis transubstantiatio. Hi enim negant modis omnibus, panem & uinum in mysterijs consecrata, in suis manere substantijs. Has enim annihilari conuertiq; contendunt in ipsum Domini corpus & sanguinem, ut à consecratione, post accidentia panis & uini, nihil substantiæ supersit prorsus. Nam aiunt dominum disertis uerbis super pane & uino pronunciasse, Hoc est corpus meum, Hic est sanguis meus. Posse autem dominum nullo quidem negotio efficere sua illa omnipotentia, ut quod dixit, ita fiat sicut dixit. Ad hoc illustrandum proferunt similia non pauca, dominum uidelicet hominem formasse ex limo terræ: mox & ex costa hominis mulierem: ex uxore item Loth statuam salis: eundem itaque eadem sua potentia efficere posse ex pane corpus, ex uino autem sanguinem. Et hæc quidem illorum firmamenta sunt. Nos uerò aliàs abunde satis disputauimus de sensu uerborum Domini, Hoc est corpus meum: ut superuacaneum sit eadem hic multis repetere. Ostendimus item ex omnipotentia Dei, non quidlibet colligendum atque statuendum esse: sed & potentiam Dei nihil facere contra ueritatem, adeoque contra seipsam: neque fideli quicquam suscipiendum esse prætextu potentiæ diuinæ quod pugnat cum apertis scripturis & catholicæ fidei articulis.

Iam uerò clarissimum est post consecrationem manere in sacramento panis ^{Panem & uinum} uiniq; substantiam. Nec alijs hic opus habemus testibus, quàm ipsis sensibus: ^{manere in suis} qui aliud nihil sentiunt, uident, gustant & palpant quàm panem & uinum. Atqui ^{substantijs post} dum terra conuerteretur in corpus hominis, costa in mulierem, uxor item Loth ^{consecrationem.} in statuam salis, non erant sicuti sacramentum altaris quod fuerant prius, neque quicquam apparebat sensibus, terræ, costæ, uxoris Loth. Ineptissimè ergo applicantur illa exempla negotio cœnæ dominicæ, cum qua nihil congruunt. Quam rem & superius attigimus. Scriptura euangelica sacrosanctam Cœnæ institutionem & modum diligentissimè describens, nullius meminit conuersionis miraculosæ: quin panem & uinum à domino acceptum & distributum discipulis, adeoque & ab his receptum, ac post recitata uerba cōsecrationis, ut uocant, panem & uinum, sicuti ante consecrationē, appellat, Quid quod Matth. 26. cap. dominus

Marci. 14.

uinum consecratum, iam non uinum tantum, sed etiam genimen uitis emphatico quodam loquendi genere nuncupat, ne quis uinum uerè uinum esse & manere ignoraret. Apud Marcum de poculo hæc legimus: Et accepto poculo, cum gratias egisset, dedit illis. Et biberunt ex eo omnes. Et dixit illis, Hic est sanguis meus noui testamenti, &c. En biberunt, inquit, ex poculo omnes, priusquam essent recitata uerba, quæ uocant, consecrationis, uinum itaq; biberunt. Quod si illi responderint locum euangelistæ explicandum esse per hysteronproteron figuram, admiserunt tropos in negotium cœnæ: quod tamen simpliciter & absque troporum auxilio contenderunt esse intelligendum. Sed & Paulus Apostolus in 1. ad Corinth. 10. cap. panem dominicum in sacro usu iam existentem, & ut sic dicam consecratum, panem nominat. Et in 1. ad Cor. 11. cap. tertium panem nuncupat.

Acto. 2. c. 20.

His accedit, quod Acta apostolica testantur totam actionem mysticam ab Apostolica ecclesia denominatam esse Fractionem panis, non fractionem corporis aut distributionem sanguinis. Claret itaq; panis & uini substantiam in sacramento Cœnæ dominicæ manere in sua natura, & transubstantiationem figmentum esse sophisticum.

An panis & uinum propter priorem substantiam, post consecrationem sic nominentur.

Est & illud sophisticum & egregiè Papisticum, quod dicunt panem & uinum consecrata in Cœna, ideo in literis Apostolicis appellari panem & uinum, quod antea fuerint panis & uinum. Hoc enim in præsentī fieri quod quondam legitur factum in Exodo, ubi uirga Aaronis dicitur deuorasse uirgas incantatorum, quæ tamen tunc non fuerint uirgæ, sed serpentes, uirgæ autem nunc nominentur, quod ante conuersionem fuerant uirgæ, quæ nunc erant serpentes, non uirgæ. Quis autem rursus non uideat exemplum illud nihil similitudinis habere cum pane & uino dominico? Virga enim dicebatur quidem uirga, sed erat interim & uidebatur clarè iam non uirga, sed serpens: panis uerò dicitur panis, nec aliud esse apparet quàm panis, nulla hic cernitur species carnis, sicuti ibi uidebatur forma serpentis. Dicitur præterea uirga conuersa esse in serpentem, & pro miro aut prodigio ostentatur: nullibi autem legas panem conuersum in carnem, miraculo quodam: sed sacramentum instituitur, quod sane sacramenti nomen & naturam amittit, cum subuersa aut ad nihilata signi substantia, nihil hic nisi res ipsa remanet significata. Nam quod de accidentibus sine subiecto miraculose subsistentibus signiq; loco manentibus nugantur, nebulae sunt. Quod si perrexerimus quælibet nostra somnia uenditare pro miraculis, nihil porro tam absurdum & ineptum fuerit, quod nostris figmentis mendacijsq; non colorauerimus. Quid quod uocabulum ipsum transubstantiationis manifestè euincit, totum hoc nugamentum, non è simplici apostolorum doctrina, sed è spinosa sophistarum schola esse petitum? At apostolus Paulus præcepit, ut caueremus nobis cum à philosophia ipsa tum à uerborum nouitatibus. Quanquam in præsentī non tantum de uocabulo nouo, sed noua item re & noua doctrina apostolicæ per omnia aduersa agatur. Pugnat enim hæc doctrina de transubstantiatione, cum doctrina Apostolica & euangelica de uera incarnatione domini, & uera humani corporis eius natura & proprietate, deq; uera corporum nostrorum resurrectione. Coguntur enim hic plurima commentari planè prodigiosa de inuisibili corpore Christi, & de subtili corpore Christi, sua subtilitate per corpus ianua & lapidis, operculi inquam, sepulchri, penetrante, de corpore dñi uero, & tamen simul & semel in pluribus locis existente, omniaq; implente: & quæ huius notæ absurda sunt & impia innumera. Iam & Ioan. Scotus doctor subtilis scripto suo in Sentent. Distinct. 11. lib. 4. Quæst. 3. author est articulum Transubstantiationis nec

Coloss. 2.
1. Tim. 6.

Ioan. Scotus doctor subtilis.

nec in symbolo Apostolorum, nec in priscis illis symbolis esse expressum: sed declaratum demum definitumque ab ecclesia (sic ille loquitur, Romanam intelligens) sub Innocentio tertio in Concilio Lateranensi. Vnde colligimus doctrinam de Transubstantiatione planè neotericam seu nouam esse: cuius historiam alicubi copiosius contexuimus. Istis autem demonstratum arbitror aperte & efficaciter satis, signa non commisceri significatis rebus, uel in ipsa commutari, sed discretis manere naturis.

Q V A N Q V A M uerò utraque partium suam retineat impermixta naturam, coeunt tamen illa duo in unum sacramentum, & coniuncta non diuisa, faciunt unum plenum ac legitimum sacramentum. Aqua enim sola & priuatim quidem uulgariterque aspersa non est sacramentum, nisi accommodetur & usurpetur secundum institutum Christi. Purgatio item siue ablutio peccatorum & insertio aut receptio in fœdus & consortium Dei omniumque sanctorum, per se non est sacramentum, nisi accedat & aquæ in nomine benedictæ Trinitatis aspersio. Pari ratione sacramentum non est si edatur in publico cœtu panis, & bibatur de eodem poculo uinum, more uulgari: nec sacramentum est si fideli cômémoratione contempleris traditum pro te corpus Domini fustumque sanguinem, pro quibus & gratias agas: nisi quatenus omnia Dei & salutis nostræ mysteria, sacramenta generaliter, id est arcana & spiritualia Dei & salutis nostræ mysteria dicuntur. Nam in pleno legitimoque sacramento concurrant necesse est & actio sacra corporalis siue sensibilis, & spiritualis celebratio eius cuius gratia inuenta est peragiturque actio sacramentalis. Atque hic nonnulli multa & uaria disputant de Vnione sacramentali, personalis ne, realis, an rationalis sit. Ego quoniam nihil huius uideo anxie traditum ab Apostolis, adeoque rem planam per se, huiusmodi sophisticationibus reddi contortam, implicatam, obscuram & difficultatibus plenam, simpliciter & clarè dico signum & signatum in sacramentis coniungi institutione diuina, contemplatione & usu fideli, significatione denique rerumque similitudine: nego autem modis omnibus duo illa uniri naturaliter, ita ut signum in sacramento id esse incipiat, quod signatum est sua substantia atque natura: nego rem signatam corporaliter cum signo coniungi, ita ut signum in sua quidem maneat substantia atque natura, interim tamen nihilominus rem signatam corporaliter secum habeat coniunctam, ut quisquis signo participet, pariter & rei ipsius, per signum aut cum signo fiat particeps. Id cur tam constanter negem, apparet, opinor, ex ijs quæ hæcenus disputaui, & quæ mox subiungentur.

Porro institutione coniuncta dico signum & signatum: quia qui sacramentum Baptismi & Cœnæ instituit, non in hoc instituit, ut aqua corporis sordes ablueremus, uti consuetum est fieri quotidiano balneorum usu: neque ut pane & uino nos satiaret: sed ut redemptionis & gratiæ suæ, denique salutis nostræ mysteria nobis commendaret signis uisibilibus, eaque representando renouaret, obsignandoque confirmaret. Contemplatione fideli coniuncta dico, quia religiosè participantibus sacramentis, oculos suos non in sensibilia tantum, sed magis in res insensibiles, in significatas & cœlestes defigunt: ut in seipsis quidem duo illa coniuncta habeant, quæ in signo aut cum signo alioqui nullo connectuntur uinculo. Corporaliter enim & sensibilibus signa percipiunt: spiritualiter uerò res possident, uersant, renouant atque exercent significatas. Significatione uerò rerumque similitudine coniuncta dico, quia signum signati signum est: ac nisi signa similitudinem haberent cum ijs rebus, quarum signa sunt, signa utique non essent. Habent ergo appositissimam coniunctissimamque inter se cognationem. Sicut enim Aqua abluunt sordes

De Vnione sacramentali.

Explicatur quomodo in sacramentis coeant signum & signatum.

corporis, sicut Panis & Vinum exatiant exhilarantq; cor hominis: ita gratia Dei purgatur populus Dei: ita corpus & sanguis Domini pro nobis tradita, fide hausta, & satiant & exhilarant totum hominem, ut totum sese in gratiarum actionem & obedientiam Dei effundat. Dicerem hic copiosius de Analogia signi & signati, nisi commodiore loco me id postea facere posse uiderem. At pluribus scripturae locis ut hæc euidentius demonstrentur opus esse non arbitror: cum sponte sua consequantur ex ijs, quæ hætenus scripturarum testimonijs confirmauimus, & porro copiosius confirmaturi sumus.

*Signa mutare
rerum signata-
rum nomina.*

Circuncisio.

*Agnus pascha-
lus.*

Sacrificia.

*Galat. 3.
Rom. 8.
Hebr. 10.*

Cæterum propter similitudinem signi & rei signatæ communicantur uocabula, aut nomina rerum ipsis signis. Id quod euidentissimis scripturae testimonijs demonstrabimus. Gen. 17. sic dicit ad Abrahamum Dominus, Et tu custodies fœdus meum, tu inquam & semen tuum post te in generationibus suis. Hoc autem est fœdus meum quod obseruabitis inter me & uos, circuncidatur uobis omnis mas, Circuncidetis uerò carnem præputij uestri, quod erit signum fœderis inter me & uos. Hæc dixit os Domini: quis uerbum Dei suggillabit? Verbum Dei appellat Circuncisionem fœdus: ergo signo datur nomen rei. Nam Circuncisio reuera non est ipsum fœdus. Fœdus enim est ipsum pactum & conuentio inter Deum & homines, certas habens condiciones, certaq; capita. Proinde per interpretationem mox Circuncisio eadem appellatur signum fœderis. At quis hanc interpretationem Dei reprehendet? Accipiunt ergo uel Deo interprete signa rerum nomina. Ita legis Exodi 12. Comedetis agnum cum festinatione, Pascha siue transitus hic Domini. Et mox, Et sanguis ille erit uobis in signum in domibus uestris, &c. Item, Erit autem uobis dies illa monumentum, &c. Quid denuo clarius, quam quod agnus appellatur Pascha, siue transitus? Quid autem est propriè Pascha? Audiamus hic rursus Dominum sese exponentem atq; dicentem, Trāsibo per terram nocte illa, & percutiam omne primogenitum in terra Ægypti, tam in hominibus quam in iumentis: ubi autem uidero sanguinem agni, præteribo seu trāsibo uos, nec erit in uobis plaga internecionis. En Pascha, ipso Deo interprete, est illa transitio uel præteritio, qua angelus Domini præteriens ædes Izraelitarum sanguine agni notatas, ipsorum pepercit primogenitis, cæsis interim Ægyptiorum primogenitis. Agnus uerò si ignoras quis aut qualis fuerit, audi rursus dicentem Dominum, Decima huius mensis tollant singuli sibi pecudem pro familia. Pecus seu agnus sit integer, masculus, anniculus, quem ex ouibus aut capris accipietis. At hic agnus aperte appellatur Pascha uel transitus. Quis autem non uideat agnum non esse transitum? attamen quia signum uel monumentum est transitus, ut ait os Domini, certè nomen accepit transitus aut præteritionis. Rursus legis Numeri 19. Sic dicit Dominus ad Moysen, Loquere ad filios Israel, ut ducant ad te buculam ruffam sine uitio, tradetisq; eam Eleazaro sacerdoti, qui educat ipsam extra castra, ubi sacrificet, atque totam comburat. Colligat autem uir mundus cineres illius buculæ, & reponat extra castra in locum mundum, ut reseruetur ab ecclesia Israelitica ad aquas sparatorias siue lustrales. Peccatum enim est. Vide iterum morem loquendi scripturarum. Iuuenca uel bucula est peccatum, hoc est, sacrificium pro peccato: sicut & Christus dicitur factus pro nobis peccatum, ut de peccato condemnaret peccatum, nimirum ut unica corporis sui hostia oblata, expiaret peccatum. Huc pertinet, quod Apostolus quoque ad Hebræos de sacrificijs loquens, Atqui in istis, inquit, commemoratio fit peccatorum quotannis. Non enim potest sanguis taurorum aut hircorum peccata auferre. Quoties ergo sacrificia, uelut iuuenca, hirci, tauri & ouiculæ, sanctificationes aut peccata appellantur, signa rerum nomina

mina accipiunt. Fuerunt enim hæc typi quidam uenturi sacerdotis & hostiæ Christi, cui imponuntur peccata nostra. Hic enim est agnus ille Dei qui tollit peccatū mundi. Venimus iam & ad noui testamenti sacramenta, quorum signa & ipsa rerum participant nominibus. Petrus enim in Actis cap. 2. Baptizetur unusquisque uestrum, inquit, in nomine Iesu Christi, in remissionem peccatorum, Et Paulus in illis ipsis Actis Apostolicis, audit, Exurge & baptizare, & ablue peccata tua, inuocato nomine Iesu. Ideo uerò appellatur baptismus purgatio & ablutio peccatorum. At Petrus alibi dicit, Baptismus uos saluos reddit, quo non carnis sordes abijciuntur, sed quo fit, ut bona conscientia bene respondeat Deo. Et Paulus quoque, Abluti estis, ait, sanctificati estis, iustificati estis per nomen Domini Iesu, & per spiritum Dei nostri. Euincit ergo iusta horum inter se locorum collatio, quod signo baptismi, aquæ uidelicet, imponitur nomen rei significatæ. Ad eundem modum habet & negotium Cœnæ Dominicæ uel Eucharistiæ. Panis appellatur corpus Christi, uinum sanguis Christi. Verum cum fides uera credat uerum corpus Christi ex hoc elatū mundo, agere nunc in cœlis, neque redire Dominum in hunc mundum amplius, donec ueniat in nubibus cœli iudicaturus uiuos & mortuos, nemo non intelligit, signo, puta panis & uino attribui per communicationem nominum, rerum ipsarum, corporis uidelicet & sanguinis, nomina.

Sacramentalibus loquutionibus non sunt admodū dissimiles & multæ aliæ in sacris literis & usu quotidiano. Legimus enim Christū esse & dici leonem, agnū, pastorem, uitem, ostium, uiam, scalam, diem, lumen, solem, aquam, fontem, panem, petram: quæ si quis rigidè urgeat hodie, contendens Christum esse agnum realē, ostium substantiale, uitem naturalem aut similia, quis oro disputantem ferat? Exploderemus talem tanquam insanum & peruersorem oraculorum Dei. Legimus sanè, Petra autem erat Christus: considerandum interim, quid consequatur. Si enim petra realiter fuisset Christus, nemo eorum, qui de petra biberunt, fuisset reprobatus. Placent enim Deo, qui sunt participes Christi. Plures autem illorū qui de petra biberunt, non approbauit Dominus. Prostrati sunt enim in deserto: ergo bibentes de petra, quæ erat Christus, Christi participes facti non sunt: proinde petra non erat realiter Christus. Videntes quoque insignia regum, principum atque urbium, signa appellamus regum, principum atque urbium nominibus, dicentes, Hic est rex Galliæ, Hic est princeps Germaniæ, Hoc est Tigurum, Hæc Berna. Ita cerantes annulum conjugalem, uel imaginem aliquam principis, nuncupamus fidem conjugalem, aut coniugem, denique ipsum principem. Proferentes enim matronæ annulum dicunt, Hic est meus ille coniunx. Demonstrantes statuam uel imaginem principis Saxoniae dicimus, Hic est princeps Saxoniae. Quod si quis pergeret pertinacius contendere, signum re ipsa esse rem signatam, quod huius nomen gerit, an non omnes clamarent, talem destitui sensu communi, & pertinacem rixatorem omnibus modis esse contemnendum?

Intelligunt itaque periti rerum, catholicum, receptum ab omnibus & orthodoxum fuisse semper, quod multis modis ostendimus, signa rerum mutuare nomina, non autem transire in illa. Ideo uerò priscis nullæ fuerunt de sacramentis rixæ & altercationes, quales inter nos hodiæ uigent. Ut enim signa rerum ornabant nominibus, ita genus loquendi agnoscebant, nec rigidè urgebāt uerba, quasi ipsa signa realiter & corporaliter illud ipsum essent, quod significabant. Ideo uerò & apud Aurelium Augustinum hæc regula uel hic canon, Signa usurpare uel mutuare rerum nomina toties repetitur & inculcatur. Eodem canone obscura quædam loca illustrat; cuius rei iam aliquot subiiciemus testimonia. De Baptismate

Zach. 3.
Isaia 35.
Ioan. 1.
1. Pet. 1.
Baptismus.
Acto. 22.

1. Corinth. 6.

Cœna Domini.

Sacramentales
& figuratæ lo-
quutiones.

Usus quotidiana-
rum loquun-
tionum.

De sacramētis
nullæ rixæ ue-
teribus.

paruulorum ad Bonifacium Epist. 23. Si sacramenta, inquit, quandam similitudinem earum rerum, quarum sacramenta sunt, non haberent, omnino sacramenta non essent. Ex hac autem similitudine plerumque etiam ipsarum rerum nomina accipiunt. Sicut de ipso Baptismo Apostolus, Consepulti, ait, sumus Christo per baptismum in mortem. Non ait sepulturam significamus, sed prorsus, ait, consepulti sumus. Sacramentum ergo tantæ rei non nisi eiusdem rei uocabulo nuncupauit. Et in Tractat. super Ioan. 63. Exeunte immundo omnes mundi remanserunt. Tale aliquid erit, cum uictus à Christo transierit hic mundus, & nemo in populo Christi remanebit immundus, cum zizanijs à tritico separatis iusti fulgebunt sicut Sol in regno patris eorum. Hoc futurum præuidens Dominus, & nunc significatum esse contestans, discedente Iuda tanquam zizanijs separatis, remanentibus tanquam tritico Apostolis sanctis, Nunc, inquit, clarificatus est filius hominis: tanquam diceret, Ecce in illa clarificatione mea quid erit, ubi malorum nullus erit, ubi bonorum nullus perit: Sic autem non est dictum, Nunc significata est clarificatio filij hominis: sed dictum est, Nunc clarificatus est filius hominis: Quemadmodum non est dictum, Petra significabat Christum, sed Petra erat Christus: nec dictum est, Semen bonum significabat filios regni: sed dictum est, Bonum semen, hi sunt filij regni, zizania autem filij maligni. Sicut ergo solet loqui scriptura, res significantes tanquam illas quæ significantur appellans: ita locutus est Dominus, dicens, Nunc clarificatus est filius hominis, postquam separato inde nequissimo, & secum remanentibus sanctis significata est glorificatio eius, quando separatis iniquis manebit in æternitate cum sanctis.

Non dicitur, Petra significat Christum, sed Petra est Christus.

Idem in Epist. ad Euodium 102. Sonitus ille uocis & columbæ species corporalis, & linguæ diuise uelut ignis, qui insedit super unumquemque eorum, sicut illa in monte Sina, quæ terribili specie facta sunt: & sicut columna illa nubis per diem, & flammæ per noctem significatiua operatione acta atque transacta sunt. Illud in his maximè cauendum est, ne cuiquam Dei natura uel patris, uel filij, uel spiritus sancti commutabilis & conuertibilis esse credatur. Nec moueat quod aliquando res quæ significat, nomen eius rei, quam significat, accipit. Spiritus sanctus dictus est corporali specie tanquam columba descendisse & mansisse super eum. Sic enim & Petra Christus, quia significat Christum.

Error eorum qui nolunt sacramentales locutiones exponi sacramentaliter.

Ex his autem recensitis scripturarum exemplis perspicuum est signa rerum mutuare nomina, non naturas atque substantias, unde indubitatum est, eos toto errore cælo, quibus persuasissimum est sacramentales locutiones, non ut translatitias & figuratas, sed maximè proprias esse exponendas: ideoque aquam, panem & uinum non iam signa aut symbola duntaxat esse regenerationis & corporis Christi sanguinisque pro nobis traditi atque effusi: sed ipsammet regenerationem, ipsissimum Domini nostri Iesu corpus & sanguinem. Sic enim sentientes peccant contra omnium seculorum communem & loquendi & interpretandi rationem, pugnant & cum uera fide adeoque & cum sensu communi. Quibus accedit, quod sua illa significationeque confusione seruilem infirmitatem, carnalemque, ut Augustini uerbis utar, seruitutem inducunt. Hic enim lib. de Doctr. Christ. 3. cap. 9. de Sacramentis disserens Christianorum, Pauca, inquit, pro multis, eaque factu facillima & intellectu augustissima, & obseruatione castissima, ipse Dominus & Apostolica tradidit disciplina: sicuti est Baptismi sacramentum, & Celebratio corporis & sanguinis Domini. Quæ unusquisque cum percipit, quo referantur imbutus agnoscit, ut ea non carnali seruitute, sed spiritali potius libertate ueneretur. Vt autem literam sequi, & signa pro rebus quæ his significantur accipere, seruilis infirmitatis est, ita inutiliter signa

Carnaliū seruitus, & seruilis infirmitas.

signa interpretari male uagantis erroris est. Et adhuc significantius cap. 5. Principio cauendum est, ne figuratam locutionem ad literam accipias. Ad hoc enim pertinet, quod ait Apostolus, *Litera occidit, spiritus autem uiuificat*. Cum enim figuratè dictum sic accipitur, quasi propriè dictum sit, carnaliter sapitur. Neque ulla mors animæ congruentius appellatur, quàm cum id etiam, quod in ea bestias antecellit, hoc est, intelligentia, carni subiicitur sequendo literam. Qui enim sequitur literam, translata uerba sicut propria tenet: neque id quod proprio uerbo significatur, refert ad aliam significationem: sed si sabbatum audierit (uerbi gratia) non intelligit nisi unum diem de septem, qui continuo uolumine repetuntur: & cum audierit sacrificium, non excedit cogitatione illud quod fieri de uictimis pecorum terrenisq; fructibus solet. Ea demum est miserabilis animæ seruitus, signa pro rebus accipere, & supra creaturam corpoream oculum mentis ad hauriendum æternum lumen leuare non posse. Hæc Augustinus. Colligimus autem ex his S. Augustini uerbis, eos sacramenta libertate spiritali uenerari, qui neque literæ inhærent, neque res uisibiles & elementares, aquam puta, panem & uinum, ueluti ipsas res significatas continent & uenerantur: sed per ipsa potius admoniti & excitati, animis in illarum contemplationem efferuntur.

Idem ille in eodem lib. cap. 15. docens, quando & quomodo recipiendus aut agnoscendus sit tropus, Seruabitur, inquit, in locutionibus figuratis regula huiusmodi, ut tam diu uersetur diligenti consideratione quod legitur, donec ad regnū charitatis interpretatio deducatur. Si autem hoc iam propriè sonat, nulla putetur figurata locutio. Et adhuc planius in sequenti 16. cap. subiungit, Si præceptiua locutio est, aut flagitiū aut facinus uetans, aut utilitatem aut beneficentiam iubens, non est figurata. Si autem flagitium aut facinus uidetur iubere, aut utilitatē beneficentiæ uetare, figurata est. Nisi manducaueritis carnem filij hominis, & sanguinem eius biberitis, non habebitis uitam in uobis, facinus uel flagitium uidetur iubere: figura ergo est præcipiens passioni Domini esse communicandum, & suauiter atque utiliter recondendum in memoria, quod pro nobis caro eius crucifixa & uulnerata sit. Ait scriptura, Si esurierit inimicus tuus, ciba illum. Hic nullo dubitante beneficentiā præcipit. Sed quod sequitur, Hoc enim faciens carbones ignis congeres super caput eius, maleuolentiæ facinus putes iuberi: ne igitur dubitaueris figuratè dictum. Et reliqua. Hæc uidelicet omnia illorum redarguunt errorem, qui sacramentales locutiones ceu proprias interpretantur, & à figuris aut tropo, in negotio Cœnæ potissimum, abhorrent.

Non nescio tamen, quid huic postremo S. Augustini testimonio opponant, Verba saluatoris Ioan. 6. nihil facere ad interpretationem negotij sacramentarij, ergo & locum S. Augustini non congruere nostro instituto. Cæterum clarum est S. August. eo libro disputare de Signis & de locutionibus sacramentalibus. Clarum est & illud ex multis alijs Augustini locis, hunc frequenter ad illustrandum Cœnæ negotium adducere uerba saluatoris ex cap. 6. Ioan. Quare uerò illa ad negotium Cœnæ nihil faciunt? An de alio corpore loquitur in Cœna, de alio uerò apud Ioan. in cap. 6? Ergone credemus Dominum fuisse & esse bicorporem? Vnum modò est corpus Domini Iesu, quod ut corporaliter comestum nihil prodest apud Ioan. in cap. 6. ita illud ipsum corporaliter comestum nihil prodest apud Matth. in cap. 26. Verum hanc rem attigimus aliàs. Nihil plus salis habet & ista eorundem obiectio, Vitiosam uidelicet consequentiam esse cum colligimus, Circumcisio est foedus, Agnus est transitus, Sacrificia sunt peccata & sanctificationes, &c. locutiones sunt sacramentales, symbolicae ac figuratae: ergo illa quoque, Hoc est cor-

Quomodo recipienda & agnoscenda oratio figurata.

Verba Domini Ioan. 6. faciunt ad explicanda uerba Cœnæ.

Argumentari à sacramētis ueterum ad nostra.

pus meum, est locutio symbolica & figurata. Cum enim par sit ratio sacramentorum, cur non liceret ab uno argumentari ad alterum? Quod autem par sit ratio sacramentorum, receptum est ab omnibus ueritatem recte agnoscentibus, & probabitur postea quoque plenius. Quod si non licet à sacramentis ueterum argumentari, & per illa collatione quadam nostra interpretari, nostrisque illa illustrare peccauit certe Apostolus, qui uitiosa consequentia per collationem, ab illorum sacramentis ad nostra argumentatus legitur in 1. ad Corinth. 10. & ad Coloss. secundo cap Sed redimus.

Sacramentalibus locutionibus uti licet.

Ergo ut finiamus tandem hunc locum, locutiones sunt sacramentales & symbolicae, cum legimus & audimus, Panem esse corpus Christi, Vinum esse sanguinem Christi; ac corpus & sanguinem Christi manducare & bibere, qui edunt & bibunt sacramentum corporis & sanguinis Domini; purgari item à peccatis, & regenerari in nouam uitam, qui baptizantur in nomine Christi; & baptismum esse ablutionem omnium peccatorum. Atque hoc modo loquuntur scripturae. Hunc loquendi modum seruauerunt & ueteres ecclesiae doctores: quos hoc nomine nemo prudens uituperat, neque nunc quisquam quenquam uituperare potest qui sic loquitur, modo hic quoque in ea maneat sinceritate, qua sanctos illos Dei uersatos constat. Nam ut libenter & simpliciter locutionibus illis utebantur, ita rigide literam & locutiones non urgebant, interpretabant easdem, ut nemo tam rudis esset, quin intelligeret signa non esse id ipsum, quod significabant, sed signa usurpare rerum nomina.

Sacramentaliter.

Utebantur ergo uocabulis significatiue, mystice symbolice, sacramentaliter. Ergo quod nonnulli nolunt sacramentales exponi, quasi plus auctoritatis, maiestatis, grauitatisque inexplicatae habeant, ingens trahit secum periculum noxiumque scandalum ponit pugnat item cum canone Apostolico, cum sana ratione

Sacramentales locutiones exponenda sunt.

ne & cum ueterum consuetudine. Cum enim huiusmodi locutiones, Panis est corpus Christi, Cum uinum bibis, Dominicum ipsum bibis Domini cruorem, Baptismus nos saluos facit, &c. inexplicatae simplicibus proponuntur, quid oro aliud quam laqueus carnalis seruitutis, sed & scandalum idololatriae periculosissimum proponitur? Verbis hic pluribus opus non est, cum experientia quid factum sit, & quid fiat in diem, abunde satis hunc locum illustret. Canon uero Apostolicus iubet oracula diuina interpretari in ecclesia, & ad sanum intellectum omnia scripturae mysteria proferre, sicut uidere licet in 1. ad Corinth. 14. cap. Ratio quoque ipsa dicat, rebus non intellectis, parum aut nihil moueri mentem hominis. Quis ergo fructus erit sacramentorum apud simplices, ad quos nulla explicatio sacramentorum peruenit? Rectius ergo ueteres omnia regni Dei mysteria, sacramentorum imprimis, non explicarunt modo, sed & exponenda esse docuerunt. Quod quamquam ex praecedentibus clare colliquescat, adiciam tamen duo S. Augustini hac de re testimonia. De catechizandis rudibus cap. 26. De sacramento quod accepit, inquit, cum ei bene commendatum fuerit, signacula quidem rerum diuinarum esse uisibilia sed res inuisibiles in eis honorari; nec sic habendam esse illam speciem benedictione sanctificatam, quemadmodum habetur in usu quolibet. Dicendum etiam quid significet & sermo ille quem audiuit: quid in illo condonatur, cuius res illa similitudinem gerit. Deinde monendus est ex hac occasione, ut si quid etiam in scripturis audiat, quod carnaliter sonet, etiam si non intelligit, credat tamen spiritale aliquid significari, quod ad sanctos mores futuramque uitam pertineat. Et quae sequuntur. Idem lib. de Doctr. Christ. 4. cap. 8. prohibet omnino doctoribus ecclesiasticis, ne ideo se putent obscure loqui oportere de mysteriis scripturarum, quia uident haec paulo intricatius tradita esse in scripturis: lucem magis perspicuitatemque

semper postulat. Verba eius si quis requirat, hæc sunt, Si nos de literis canonicorum nostrorum authorum, doctorumque, quæ sine difficultate intelliguntur, nonnulla sumimus eloquutionis exempla, nequaquam tamē putare debemus, imitandos eos nobis esse in his quæ ad exercendas & eliminandas quodammodo mentes legentium, & ad rumpenda fastidia atque acuenda studia discere uolentium, zelandos quoque, siue ut ad pietatem conuertantur, siue ut à mysteriis secludantur, animos impiorum, utili & salubri obscuritate dixerunt. Sic quippe illi loquuti sunt, ut posteriores, qui eos recte intelligerent & exponerent, alteram gratiam, disparem quidem, ueruntamen subsequenter in Dei Ecclesia reperirent. Non ergo expositores eorum ita loqui debent, tanquam se ipsi exponendos simili authoritate proponant: sed in omnibus sermonibus suis primitus ac maxime ut intelligantur elaborent, ea quantum possunt perspicuitate dicendi, ut aut multum tardus sit qui non intelligit: aut in rerum quas explicare atque ostendere uolumus, difficultate ac subtilitate, non in nostra loquutione sit causa, quo minus tardiusue quod dicimus possit intelligi. Hæc August. Et hæc hæctenus de loquutionibus sacramentalibus dixisse sufficiat. Laudemus Dominum.

Religiose differendum esse de sacramentis. Ea per se non conferre gratiam, neque hanc in se ipsis inclusam continere. Rursus quæ sit uirtus, quis finis & usus sacramentorum legitimus. Hæc sine fide non prodesse, eadem fidem habentibus non esse superuacanea: neque ipsa pendere à dignitate, vel indignitate ministrantium.

S E R M O VII.

E R I C. V. exposui quid sit sacramentum, quo authore sint profecta, *Epilogus particularis.* & quas ob causas instituta sacramenta, quibus rebus consent, signo nimirum & re signata: quid item signum sit, quid res significata, & quibus insigniantur nominibus, quomodo consecrentur: quod signum cum re signata non commisceatur, sed utrumque in sua natura naturæque proprietate maneat: quod signum non annihilatur, aut miraculose conuertatur, nec ita cum hoc signatum coniungatur, ut quicumque illius sit particeps & huius habeat communionem: exposui denique quomodo aut qua ratione coniuncta sint signum & signatum, ut plenum & legitimum sacramentum constituent, ubi & de sacramentalibus locutionibus differui: iam ergo restat ut etiam de natura, uirtute & efficacia sacramentorum, & de his quæ cum eis coniuncta & cognata sunt, consequenter dicam: ita enim ratio ordinis in finitione proposita requirit.

De uirtute & natura sacramentorum, quid uidelicet in homine efficiant, uariè & copiose disputatur à scriptoribus: mihi uidetur in hac disputatione uersandum religiose, cauendumque ne in dextram uel sinistram inclinem, hoc est, ne illis tribuam nimium in euangelicæ & apostolicæ doctrinæ derogationē: neue his detrahā aut adimā, quod ipsis tribuit scriptura, uerbum dei, in meam ipsius condemnationem. Abundè uerò satis magnam laudem & gloriā institutis Dei tribuerimus, si id de eis prædicauerimus, quod tradidit in sacris spiritus Dei: plura uelle his tribuere, non modò error est humanus, sed peccatum grande, afferens exitium atque interitum horribilem. Exemplis memorandis id nobis in sacris est expositum. Arca testificationis, populo Israelitico per Moysen data, testimoniū erat diuinæ in populo præsentiae, fœderis item & amicitiae inter deum & hominem. Nam in hæc uerba pepigerat cū populo Deus, Inhabitabo in illis, & inambulabo, & ero illorum Deus, & ipsi erunt mihi populus. Ex ea institutione ac pactiōe appellabatur arca ipsa, Dominus Deus exercituum, sedens inter cherubim, ut uidere licet

*Arca fœderis.**Leuit. 26.*

*Nimium tribue
re sacramentis.*

*Grande pecca-
tum non tribue
re tantum sacra-
mentis, quam
tribuit scriptu-
ra.*

Numeri 4.

2. Samuelis 6. & in libro Paralipomenon: appellabatur & arca foederis domini. Hæc autem cum ipsi sacramento Dei propheta dei tribuerent, abundè satis & magnificè de sacramento Dei senserunt & loquuti sunt: ubi uerò indocti & malitiosi sacerdotes, & per hos corruptus populus, longè maiora arcæ seu sacramento Dei tribuerent, quid oro factum est? Audi prius quid arcæ tribuerint. Clamant seniores Izraelis, Quare strauit nos hodie dominus coram Palæstinis? Adducemus ad nos de Silo arcam foederis domini, ut illa ueniens inter nos, seruet nos de manu hostis nostri. Audisti quid arcæ tribuerint, audi iam quid fecerint. Misit itaq; populus in Silo, & attulerunt illinc arcam foederis domini exercituum, sedentis inter cherubim. Et factum est cum uenisset arca foederis domini in castra, uociferatus est cunctus Izrael iubilo magno, ut terra tremere. Quod cum audissent Palæstini, dixerunt, Quid sibi uult clamor iste? Et audientes arcam castris illatâ Hebræorum, clamant & ipsi, Væ nobis. Venit Deus in castra, quis eruet nos è manu deorum istorum fortium, qui percusserunt Ægyptum? Sed audi modò quid factum sit, & quomodo declararit Deus arcam illam nō esse Deum, sicut dicebatur, & ab imperitis rerum sacrarum habebatur, quomodo item puniuerit peccata populi sui, id quoq; quod nimium tribuerunt sacramento. Sequitur ergo, Pugnauerunt itaq; Palæstini, & Izraelitæ cæsi sunt, fugerunt singuli in tentoria sua, & cædes facta est uehementer magna, ut caderent ex Izraele triginta millia peditum: sed & arca Dei capta fuit, ac cæsi sunt duo filij Heli. Hæc omnia leguntur 1. Sam. 4. Rursus cum irreligiosius tractaretur sacramentum Dei à porcis Palæstinis, percutiuntur & hi plaga fœda & exitiali. Gloriabantur quod dii sui & religio Palæstina uicisset deum Izraelitarum & religionem Izraeliticam, sed cadunt & confringuntur dii Palæstini, confunditurq; religio ethnica. Quid quòd Izraelitæ iam leuius contrectantes sacramentum à Palæstinis reductū in Bethsames, curiosiusq; illud contra legem Dei Numeri 4. scrutâtes, grauiori plaga nunc quàm prius concidunt? Percussit enim dominus septuaginta uiros, & quinquaginta millia hominum 1. Samuelis 6. Cum Moses negligentius distulisset circumcisionem in liberis suis, in graue incurrit periculum. Sichimitæ ob temere receptam Circumcisionem delentur. Et Simeon ac Leui propter prophanatum sacramentū graues accipiunt à patre suo sententias, Gene. 49. Quibus congruit quod Apostolus de indignè celebrantibus cœnam dicit. Propter hoc multi inter uos imbecilles & inualidi, & dormiunt multi. Huc pertinet etiam exemplum Ozæ uiri nō omnino mali, sed non legitimè hoc ipsum sacramentum tractantis, unde & subitanea morte conficitur à domino, idq; non priuatim in tabernaculo, sed in celebri pompa. De quo facto Dei postea in synodo & Ecclesia Izraelitica pronuncians Dauid dicit ad Leuitas, Dominus constituit ut portetur arca à Leuitis (non uehatur nouo plaustro à bubus) sanctificate ergo uos & transferte arcam domini Dei Izraelis ad locum, quem paraui ei. Quandoquidem enim hoc ab initio non fecistis, rupturam in nobis fecit dominus Deus noster, quia non requisuimus eum, sicuti oportuit. Et sequitur mox, Sanctificati sunt igitur sacerdotes & Leuitæ ut adducerent arcam domini Dei Izraelis: portaruntq; filij Leuitarum arcam Dei, sicut præceperat Moses iuxta uerbum domini, humeris suis impositis uectibus. Extant hæc omnia 1. Paral. 15. cap. Ex quibus colligimus nolle dominum nostras bonas intentiones & celebrationes magnificas in celebratione sacramentorum: sed illud requirere unicè, ut ita iudicemus & loquamur de sacramentis, sicuti ipse per uerbum iudicat & loquitur, & ut ipse instituit & celebrauit, ita nos usurpemus atq; celebremus. Proinde abundè satis tribuit sacramentis, quisquis id eis tribuit, quod ipse Deus in scripturis sanctis tribuit.

Excusata

Excusamus ergo ante omnia quid nostro ferè seculo tributum sit sacramentis, ut inde rectius quid tribuendum uel non tribuendum sit intelligatur. Docuit uulgus sacerdotum & monachorum sacramenta nouæ legis non tantum esse signa gratiæ, sed simul etiam gratiæ causas, hoc est, quæ habeant uirtutem conferendi gratiam. Esse enim illa ceu instrumenta, organa & infundibula quædam passionis Christi, per quæ in nos gratia Christi transfundatur: at signa ueteris testamenti patribus data, signa tantum, non causas quoque gratiæ fuisse, utpote quæ uim duntaxat significandi non conferendi gratiam habuerint.

Docetur sacramenta conferre gratiam.

Videntur autem id dogmatis hausisse ex uerbis Augustini perperam intellectis. Scribit enim in Psal. 73. Sacramenta nouæ legis salubriora & felicitiora iis, quæ in ueteri lege: eò quod illa promittant, hæc dent. Atqui non uoluit his uerbis aliud dicere S. August. quam quod alibi sic protulit, Sacramenta ueteris legis Christum prænunciarunt, nostra annunciant. Nam & contra Faustum lib. 19. cap. 14. sacramenta ueterum uocat promissiones rerum cõplendarum, nostra nominat indicia rerum completarum. Proinde in Psal. 73. Dant dixit pro eo quod est datum testantur, aut exhibitum significant. Fateor quidem illum non semel dixisse, nostra esse felicitiora & uirtute præstantiora: atqui id dixit non alia ratione quam quod præstito nobis Messia in nouo testamento omnia nostra pleniora, illustriora, siue luculentiora sunt. Christus enim plenissimè omnia absoluit: unde reuera nostra plenius significant, & quodammodo uiuidiora sunt. Cæterum si Augustinus omnino in ea fuisset sententia, quam sequuntur isti, an non suaderet ipsa pietas, ut deserta hominum authoritate, uerbo ueritatis adhæreremus?

August. nō docuit sacramenta conferre gratiam.

Videamus ergo quid colligatur ex uerbo ueritatis, id est, ex scripturis canonicis, de sacramentorum ueteris & noui testamenti similitudine & differentia. E scripturis habemus hoc certissimū, unum esse utriusque ecclesiæ æternū & immutabilem Deum ac dominum, unam per Christum in illum utriusque ecclesiæ fidem, unam in utraque Ecclesia propositam promissionibus salutis rationem, denique unā unius perpetuo Dei ex utroque populo collectam Ecclesiam. Non arbitror autem copiosa ex scripturis confirmatione horum opus esse, quod Decadis 3. Serm. 8. illa fusiùs tractauī. Illis uerò ita præstructis, & scriptura apostolica confirmatis, ita demum, non ex nostris capitibus, sed ex authoritate diuina colligimus. Quorum unus est perpetuò æternus & immutabilis Deus, una omnium salutis ab æterno in Christo proposita ratio, una fides, una Ecclesia, unus baptismus, idem spiritualis cibus & potus, eorum non possunt esse nisi eadem quod substantiam attinet sacramenta. Atqui Iudæorum & Christianorum est unus Deus, una fides, & una salutis per Christum ratio, una denique ecclesia: sunt itaque eadem quoque sacramenta, nisi quòd nostra, sub alijs data sunt signis, & quòd propter exhibitum solem iustitiæ Christum multo sunt illustriora & euidentiora. His addo scripturam testari sacramenta ueterum & nostra idem usque adeò ualere, ut Paulus dicat circuncisos qui sunt baptisati, baptisatos qui sunt circuncisi: Docet idem ille patres nostros eandem nobiscum escam spiritualem edisse, & de eodem potu spirituali bibisse, nimirum de petra. Sed addit mox, Petra uerò erat Christus. Verba apostoli notissima sunt, & leguntur 1. Cor. 10. Idem ad Coloss. cap. 2. In Christo inquit, estis completi, per quem & circuncisi estis circuncisione quæ fit sine manibus, dum exuistis corpus peccatorum carnis per circuncisionem Christi, consepulti simul cum illo per baptismum, &c. Quid his oro clarius dici potuit? circuncisio quæ fit sine manibus, est circuncisio Christiana, baptismus uidelicet. Cæterum in superiore loco Pauli ad Corinth. obseruandum est (quod alibi monuimus) In Mosen Baptis-

De similitudine & differentia sacramentorum ueteris et noui testamenti.

zari, non idem esse quod est in Christum baptizari. Nam in Mosen baptizari, per inde est ac si dixisset per Mosen baptizari, aut ministerio Mosi. Constat enim Mosen suæ fidei creditum populum unice Deo adduxisse.

August. quoque
docuit eadem
esse sacramenta
ueterum & no-
stra.

Non diuersa his legas & apud Aurel. August. non uno loco, utcumq; aduersarij differentiam illam suam inter ueterum & nostra sacramenta inducunt ad Augustinum referre cupiant. Nam contra literas Petiliani lib. 2. cap. 27. Fuerunt, inquit, in signis diuersa, in re quæ significatur, paria. Item in Tract. in Ioan. 26. in hunc locum, Hic est panis qui de coelo descendit. Hunc panem significauit manna; hunc panem significauit altare Dei. Sacramenta illa fuerunt. In signis diuersa sunt, sed in re quæ significatur paria. Non dissimilia legas contra Faustum Manichæum lib. 19. cap. 13. 16. 17. Rursus Tract. in Ioan. 45. Ante aduentum domini nostri Iesu Christi, quo humilis uenit in carne, præcesserunt iusti, sic in eum credentes uenturum quomodo nos credimus in eum qui uenit. Tempora uariata sunt, non fides. Et reliqua. Et mox, In signis diuersis eadem fides, sic in signis diuersis quomodo in uerbis diuersis: quia uerba sonos mutant per tempora, & utiq; non aliud sunt uerba quam signa. Significando enim uerba sunt: tolle significationem uerbo, strepitus inanis est. Significata sunt ergo omnia. Nunquid non eadem credebant per quos hæc signa ministrabantur, per quos eadem quæ credimus prophetata prænunciabantur? Vtiq; credebant, sed illi uentura esse, nos autem uenisse. Item in Psal. 77. Idem in mysterio, inquit, cibus & potus illorum qui noster, sed significatione idem non specie. Quia idem ipse Christus illis in Petra figuratus, nobis in carne manifestatus. Sed non in omnibus illis beneplacitum est Deo. Omnes quidem eundem cibum spiritalem manducauerunt, & eundem potum spiritalem biberunt, id est, spiritale aliquid significantem; sed non in omnibus illis beneplacitum est deo, & cum essent omnia communia sacramenta, non communis erat omnibus gratia, quæ sacramentorum uirtus est. Sicut & nunc iam reuelata fides, quæ tunc uelabatur, omnibus in nomine patris & filij & spiritus sancti baptisatis commune est lauacrum regenerationis, sed ipsa gratia cuius ipsa sunt sacramenta, qua membra corporis Christi cum suo capite regenerata sunt, non communis est omnibus. Hæc August. docens eorum signa, temporis diuersitate excepta, non imparia aut dissimilia esse, quorum eadem est fides & religio.

Gratia quid sit.

PER STRICTA autem similitudine & differentia sacramentorum ueteris & noui testamenti, idq; ex occasione dogmatis recepti, Sacramenta nouæ legis conferre ex se gratiam, expendamus & ipsum quale sit. Ac de uocabulo quidem gratiæ primò pauca hæc admonemus. Gratia fauor est numinis & beneuolentia, qua Deus pater nos propter Christum complectitur, purgat, iustificat, donis instruit & saluat. Nam apostolica scripta gratiam aperte uocant, qua saluamur & iustificamur ex fide Iesu Christi. De hac scriptum est, Non irritam facio gratiam dei. Nam si per legem est iustitia, ergo Christus gratis mortuus est. De hac scriptum est, Christus uobis factus est otiosus, quicumque per legem iustificamini, à gratia excidistis. De hac scriptum est, Si autem gratia, iam non ex operibus: alioqui gratia iam non est gratia. Quid quod ipse dei filius gratia & donum dei appellatur? Ioan. 4. Tit. 2. capite. Iam uerò Conferre quid aliud est quam dare, uel rem aliquam, quam prius non habebas, donare? Si ergo sacramenta conferunt gratiam summentibus, profectò eas res non habentibus dant, quas significant, ipsum inquam Christum cum omnibus eius donis: id est, gratos & acceptos Deo faciunt, iustificat & saluant, idq; ex seipsis, utpote quæ uirtutem ex passione Christi accepisse dicuntur sanctificandi, & non tantum significandi aut iuuandi, commendandi aut prouocandi

provehendi gratiam. Sed & perceptionem gratiæ attribuunt nostro operi quo ipsa sumimus sacramenta. Verum quantum hæc doctrina pugnet cum ueritate prophetica & apostolica, nunc demonstrabo. Vetus fuit error Iudaici populi sacramenta iustificare. Hinc est quod sancti Dei prophetae cum populo suæ fidei credito, falsis tamen imbutio opinionibus, concertantes, clamarunt, Frustra illum niti suis ritibus & sacrificijs: Deum autem delectari obedientia fidei, fide, inquam, charitate, innocentia, uera utiq; pietate. Inter quos Ieremias dicit, Sic ait dominus exercituum Deus Israelis, Holocausta uestra addite uictimis uestris, & comedite carnem: quoniam nihil locutus sum cum patribus uestris, neq; præcepi eis, eo tempore quo educebam eos ex terra Ægypti, de ratione holocausti & sacrificij: sed hoc uerbum præcepi eis dicendo, Audite uocem meam, & ero Deus uester, uos autem eritis populus meus: & ambulate in omni uia quam præcepi uobis, ut bene sit uobis. Similis locus est & apud Isaiam in cap. primo. Non reiecit dominus, neq; damnarunt diuini uates in uniuersum omnia sacrificia, cum ea ipse dominus per Moysen instituisset: sed falsam opinionem uanamq; in ipsa fiduciam oppugnabant. Vana fiducia & falsa opinio est, sacrificia per se ac propter opus nostrum reddere nos gratos domino. Nam fides acceptos efficit nos Deo per Messiam. Et dominus sacramenta uel sacrificia non instituerat, ut gratiam oblata conferrent aut iustificarent, sed ut testimonia essent gratiæ Dei, & ut in ordine retinerent populum, ut ipsum retraherent ab idolis & cultibus ethnicorum, ad Christum autem summum pontificem, & unicam totius orbis hostiam deducerent. Pædagogia enim siue exercitia fuerunt, Paulo hoc approbante atq; dicente, Lex pædagogus noster fuit ad Christum, ut ex fide iustificaremur. At postquam uenit fides, non amplius sub pædago sumus. Idcirco sacrificia ueterum sacrificantibus non conferebant gratiam, neq; iustificabant, sed symbola & testimonia erant Deum sanctificare, & iustificare quidem per hostiam omnibus seculis destinatam, per Messiam, ad cuius fidem ueluti pædagogus quidam deducuntur dirigebant.

Sacramenta nō
conferunt gra-
tiam.
Ierem. 7.

Galat. 3.

Ac prædicantibus quidem apostolis puram doctrinam euangelij, sola Dei gratia per Christum seruari credentes, auitus ille error tam altè Iudaicis insedit animis, ut illi quoq; qui Christum receperant, contenderent tamen, Christum non posse plenè, nisi sacramentis Iudaicis accedentibus, sanctificare aut iustificare. Contra quos apostoli magna grauitate & ualidissimo spiritus impetu disputantes, euicerunt hominem Christianum nullis legalibus interuenientibus, nullis denique operibus adiuuantibus, sed sola & mera siue gratuita Dei gratia misericordiæ per Christum sanctificari, purificari, iustificari, atque saluari. Quæ sanè prora, quod dici solet, & puppis est doctrinæ euangelicæ & apostolicæ, quam qui negat, nullam haud dubiè sortem habet in hæreditate Christi & euangelij ipsius. Nec obscurum aut dubium est quod modò paucis his proposui. Quis enim ne-

Error in ecclesia
apostolica.

Actor. 15.

sciat memorabilem illam concertationem maximorum apostolorum Christi Pauli ac Barnabæ, institutam contra eos qui docebant, nisi circumciderentur Christiani iuxta legem Moysi, nullo pacto saluari posse? Contra quos & Petrus concludit, Fide purificari corda, & gratia domini Iesu Christi saluari credentes.

Gratis cōferri
gratiam, recipi
per fidem.

Verum quidem est, abrogata apostolorum aduersarios reducere uoluisse, in-

Fides Christiana gratiam Dei, remissionem peccatorum, sanctificationem & iustificationem tribuit in solidum gratuita misericordiae Dei, adeoque & merito passionis Christi, & ita tribuit, ut praeterea admittat nihil prorsus in participatum. Quod ergo Lombardus dixit, Sacramenta uirtutem conferendi gratiam accepisse ex merito passionis Christi, ex se finxit. Nam ut Christus gloriam suam non dat ulli uel sanctis siue homini, nedum inanimatorum creaturae: ita qui credit se iustificatum plenè per mortem & resurrectionem domini, is in alia nulla re amplius quam in solo Christo quaerit gratiam aut iustitiam, in quo acquiescit, quem & in fide per spiritum sanctum iam sentit in corde uel mente uires suas exercere. Huc enim pertinent illa ex euangelio, Vade in pace, fides tua te saluam fecit. Item, Omnis qui bibit ex aqua hac, sitiet iterum. Quisquis autem biberit ex aqua, quam ego dabo ei, non sitiet in aeternum, &c. Huc pertinet & illud Pauli, Iustificati ex fide, pacem habemus erga deum per dominum nostrum Iesum Christum, per quem & contigit nobis, ut fide perduceremur in gratiam hanc, in qua stamus & gloriamur sub spe gloriae Dei.

Luca 7.
Ioan. 4.
Rom. 5.

Cōfutatur commentum eorum qui fingunt fidem generalem & specialem.

Non nescio quorundam sutelas commentantium esse generalem quandam deinde & specialem fidem. Generalem uocant, qua credimus nos morte & resurrectione Christi uerè iustificari. Specialem uerò, qua credimus per symbola & opus nostrum peculiariter & cuilibet nostrum singulariter applicari dona Dei. Verum quorsum attinebat e terra, in qua licebat uesci manna, respicere ad ollas & allia Aegypti? Quid Christianis, oro, negotij cum distinctionibus sophisticis? Aut unde probabunt nobis hanc suam distinctionem? Vna modò fides est, eaque non alia in usu sacramentorum, quam extra usum. Extra usum credimus nos morte & resurrectione Christi sanctificari. In baptismo & Coena dominica non aliam exercemus fidem, quam qua credimus domini gratia & misericordia purgari nos à peccatis, eiusdemque tradito corpore & effuso sanguine nos redimi à morte & haeredes fieri uitae aeternae. Applicant haec nobis non sacramenta, sed fides per spiritum sanctum. Id quod uniuersa testatur scriptura apostolica, quam huiusmodi commenta obscurant. Breuiter, Vnus est omnium Deus & saluator, una salus, una redemptio & purgatio, una fides, qua recipimus quidem oblatam nobis salutem à Deo in Christo per spiritum sanctum. Eadem annunciat aut praedicatur nobis in uerbo per ministrum, & repraesentatur ob signaturque per sacramenta.

Iam uerò quis nesciat Paulum Apostolum in omnibus suis scriptis unice contendere fide in dominum Iesum, non per ulla opera iustificari credentes? Rursus quis ignoret, sub censum operum nostrorum uenire & perceptionem aut celebrationem sacramentorum? Quibus & illud adiciam, Illud sacramenta non dare quod non habent: gratiam & iustitiam donauit coelestia non habent, ergo non conferunt.

An gratia Dei in sacramentis contineatur.

Hinc uerò exoritur nobis noua quaedam disputatio, An gratia Dei & uirtus quaedam diuina symbolis sit indita inclusae & uelut in ipsis contenta, ut ex eis infuentes deriuetur? Vulgus sacrificarum & monachorum tam uerbis quam factis suis prodit se sentire, ipsis symbolis diuinam esse inclusam uirtutem, adeoque deum ipsum in eis contineri. Non enim alia origine emergunt anxiae illorum disputationes de eo quid arrodat mus, cum sacramentum corporis Christi arrodat. Innocentius Papa libro de Sacramento altaris 4. cap. 11. Miraculose reuertitur substantia panis, inquit, non illa quae transiit in carnem, sed quod eius loco alius panis miraculose creatur, qui corroditur, &c. Vide acumen & miraculosam quandam theologiam. Omitto hic studio alia huius generis permulta. Adde his, quod characteribus impressis, & mirificis quibusdam uerbis, gestibus & exufflationibus, quae

quæ omnia benedictionis titulo ornant, aquam baptismi consecrant. Ac inter alia canunt, Deus aquam hanc regenerandis hominibus præparatam, arcana sua luminis admixtione fecundet, ut sanctificatione concepta, ab immaculato diuini fontis utero in nouam renata creaturam, emergat. Sit hæc sancta & innocens creatura, libera ab omni impugnatoris incurso, non insidiando circumuolet. Sit fons uiuus, aqua regenerans, unda purificans, ut omnes hoc lauacro salutifero diluendi, operante in eis spiritu sancto, perfectæ purgationis indulgentiam consequantur. Vnde benedico te creatura aquæ, per Deum uiuū, per Deum uerū, per Deum sanctum, per Deum qui te in principio per uerbum separauit ab arida, &c. Rursum sufflando in aquam ter, hæc protinus subiungit uerba, Tu has, Domine, supplices aquas tuo ore benedicito, ut præter naturalem emundationem, quam lauandis possunt adhibere corporibus, sint etiam purificandis mentibus efficaces. Deinde accipit minister sacrorum cereum ardentem, & impositum aquæ baptismi ter dicit, Descendat in hanc plenitudinem fontis uirtus spiritus sancti. Addit, Et totam huius aquæ substantiam regenerandi fecundet effectus. Et reliqua. Hæc omnia sine tropis simpliciter dicta intelligunt & exponunt. Id quod satis euidenter euincit, quid homines isti aquæ consecratae tribuant, & quod signis res sacras contineri sentiunt. Torsit se hac in re mirum in modum Bonauentura, qui scripto suo in 4. Magistri, Distinctio. 1. quæst. 3. inter alia, tandem, Non est aliquo modo dicendum, inquit, quod gratia contineatur in sacramentis essentialiter, tanquam aqua in uase, uel medicina in pyxide, imò hoc intelligere est erroneum. Sed dicuntur continere gratiam, quia ipsam significant, & quia nisi ibi sit defectus ex parte suscipientis, in ipsis gratia semper confertur, ita intelligendo quod gratia sit in anima, non in signis uisibilibus. Pro tanto dicuntur etiam uasa gratiæ. Possunt etiam dici uasa alia ratione. Quia sicut quod est in uase, non est de ipso nec ex ipso sed tamen ab ipso hauritur; sic gratia non est à sacramentis, nec de sacramentis, sed oritur à fonte æterno, & ab illo hauritur ab ipsa anima in ipsis sacramentis. Et sicut quis recurrit ad uas cum requirit liquorē, sic quærenti liquorē gratiæ & nō habenti recurrendum est ad ipsa sacramenta. Hæc Bonauentura, qui recte gratiam retulit ad fontem omnium bonorum Deum; utinā purius & simplicius reliqua etiā subieciisset. Recte is quoque sedem seu receptaculum gratiæ & donorum Dei animā hominis, non signa insensibilia esse sensit. Scriptura enim sancta ubique docet, mentem hominis, non elementum ullum, aut quicquid humana est conditum arte, domiciliū esse gratiæ Dei, & hanc non peti aut coli ceu inclusam in ulla re insensibili. Si cœli cœlorum, inquit Solomon, te non continent, quanto minus domus hæc? Ad quæ alludens constantissimus Christi martyr Stephanus, Non is est excelsissimus ait, qui in manufactis templis habitat, sicut propheta dicit, Cœlum mihi sedes est, terra autem scabellum pedum meorum: quam domum ædificabitis mihi, dicit Dominus, aut quis locus requietionis meæ est? Nōne manus mea hæc omnia fecit? Quæ sequutus magnus ille Christi Apostolus Paulus dixit, Deus qui fecit mundum & omnia quæ in eo sunt, hic cœli & terræ cum sit Dominus, non in manufactis templis habitat, nec manibus humanis colitur, indigens aliquo, cum ipse det omnibus uitam, &c. Vnde ipse Dominus in Euangelio significantissime pronunciauit, Venit hora quando neque in monte hoc, neque Hierosolymis adorabitis patrem: sed uenit hora, & nunc est, quando ueri adoratores adorabunt patrem spiritu & ueritate. Fideles itaque animi oculos à terrenis rebusque uisibilibus attollunt in cœlestia. Vnde & sancti maiores nostri Cœnam celebraturi illud sacris mysterijs congruentissimum audierunt sibi occini, Sursum corda, respon-

*Canuntur illa
in benedictio-
ne baptismi, in
ferijs Pasche.*

*Bonauentura
dicit gratiam
non contineri
in sacramentis.*

*Sedes gratiæ
Dei.*

*3 Reg. 8.
Acto. 7.*

Acto. 17.

Ioan. 4.

dente toto populo, Habemus ad Dominum. Quid quod ipsa rei absurditas planè euincit gratiam symbolis non contineri? Si enim per gratiam intelligis fauorem & beneuolentiam Dei: si indulgentiam peccatorumq; ueniam, purgationem inquam & iustificationem credentium: si dona denique & charismata spiritus quid absurdius quæso fingi poterat, quàm res tantas inclusas contineri aqua, pane & uino? Signis profectò nulla opus est gratia, nulla indulgentia & uenia peccatorum. Ad quid ergo contineretur gratia in sacramentis? Quis oro fructus ad homines redibit? Aut quis ignorat omnia Dei instituta ad utilitatem hominis esse ordinata? An uerò dicemus gratiã ideò inclusam teneri sacramentis, ut inde in nos transfundatur tanquam per canales? At non ita loquitur scriptura. Gratia enim, quod saepe iam reperitur, est fauor & beneuolentia Dei: qua ille in nos non per sensibilia, sed suapte propensione, potentia & uirtute fertur. Spiritualia hæc sunt: ergo spiritus munere & interuentione perficiuntur. Spiritu suo coniungitur nobis Deus, nos illi fide, spiritus dono copulamur: id quod in Euangelicis Apostolicisque literis nuspiam non obuium est.

Canon Nicenus
de Baptismo.

Proinde uerba Canonis Conc. Niceni, Baptisma nostrum non sensibilibus oculis, sed mentalibus considerandum est. Aquam uides, considera diuinam uim, quæ in aquis latet, &c. non ita crasse & ruditer intelligenda sunt. Nam oratio symbolica est, quam nemo non eo quidem tempore intelligebat: sicuti & nobis hodie nouum & difficile non est, si quis dicat in sigillo esse fidem & ueritatem: in anulo coniugali fidem & amorem coniugalem: in sceptro & corona regiam potestatem. Nam nemo tam ineptus est, ut propter huiusmodi loquutionem contendat res ipsas in signis contineri inclusas: loquutionis genus & consuetudinem quisq; agnoscit.

Apostoli bapti-
zarunt in aqua
nō consecrata.

Huc iam pertinet quòd Ioannes Baptista in Iordane flumine, quòd Apostoli deniq; ipsi baptizarunt aqua non consecrata paratæ uel ullis excantationibus, insufflationibus & characteribus, ad recipiendam & transfundendam Dei gratiam in baptizandos. Vidit Æthiops in Actis Apostolorum fontem, nullo delibutum oleo, nec ullis consecratum carminibus sacris, nullis deniq; exufflationibus, cererorum immissione, & crucium picturis formatum, nihilominus Philippo Apostolo dicit, Ecce aqua, quid uetat quò minus baptizer? At Philippus fidem requisit in Dominum Iesum, & confitentem protinus baptizauit, nulla fontis cōsecratione præmissa, qua uidelicet gratiam spiritus sancti & uim regenerantem in aquam deuocaret. protinusq; Æthiopi ad purificationem affunderet.

Elementis gra-
tiã indere, ido-
latriã gignit.

Quòd si perrexerimus elementis indere ipsam Dei gratiam, & res ipsas signis repræsentatas, quis non uideat, quanto cum periculo, apud simplices maxime, id facturi simus? His enim suppeditabitur occasio idololatriæ, inhærendiq; sensibilibus: à quibus etiam requirunt & postulabunt, quæ eleuatis in cœlum mentibus ab authore omnis boni Deo fuerant petenda. Quod enim obijcitur diuina quadam pactio sic constitutum esse diuinitus, ut in se habeant sacramenta gratiam, & ex se ipsis ueluti canales aquam gratiæ transfundant in sitientes. sine scripturarum autoritate & contra ueram religionem dicitur. Id quod ex disputatis hucusque satis patere arbitramur. Quibus & illa subiicimus,

Sancti prius iu-
stificati rece-
ptiq; in gratiã
quàm initiati
sacramentis.
Rom. 4.

Sancti & electi Dei non tum primùm gratia Dei donisq; cœlestibus participāt, cum sacramenta percipiunt. Etenim rebus prius quàm signis participant. Nam apertè traditur nobis, quòd Abraham pater noster prius fuerit iustificatus, quàm circumcissus. Inde uerò quis non colligat, circumcisionis sacramento ipsi non colatam & exhibitam esse iustificationem, sed eam quam fide prius possidebat obse-
gnatam

gnatam potius? Quis præterea inde nō colligat nos, qui filij Abrahæ sumus, non alia ratione iustificari, quàm patrem iustificatum constat, ac sacramenta nostra in nobis non aliud efficere quàm quod in illo effecerunt: præsertim cū eadem sit ratio sacramentorum ueterum & nostrorum. De quo paulò post dicemus copiosius, exposituri locum Apostoli ad Rom. 4. Eunuchus ille, cuius modò meminimus *Acto. 8.* ex Actis, uisa exitinere aqua, dicit Philippo, Ecce aqua, quid uetat quò minus baptizer? Dixit autē Philippus, Si credis ex toto corde, licet. Et respondens, ait, Credo filium Dei esse Iesum Christum. Post ea demum sequitur, Et descendunt ambo in aquā, & baptizauit eum. Credidit, inquit Euangelista, eunuchus ex toto corde, id est, uerè & non hypocriticè. Videamus iam quid scriptura de huiusmodi fide prædicet. S. Ioannes Apostolus & Euangelista, Omnis, inquit, qui credit Iesum esse Christū, ex Deo natus est. Idem, Quisquis cōfessus fuerit quòd Iesus est filius Dei, Deus in eo manet, & ipse in Deo. Sed & Paulus electum illud organum & doctor gentium, Si confessus fueris ore tuo, inquit, Dominū Iesum, & credideris in corde tuo quòd Deus illum excitauit à mortuis, saluus eris. Rursus autem beatus Ioannes in Epistola sua dicit, Qui credit in filiū Dei, habet testimoniū in seipso. Et hoc est testimonium, quòd uitam æternam dedit nobis Deus: & hæc uita in filio eius est. Qui habet filium, habet uitam: qui non habet filium Dei, uitam non habet. Ex his porrò omnibus ita colligimus, Eunuchus credidit priusquàm accepisset baptismum: ergo ante acceptum baptismum natus erat ex Deo, in quo manebat ipse, & Deus in ipso, iustus ac Deo acceptus erat, adde quòd uitam habebat in semetipso: ideoq; subsequens baptismus Eunuchō non conferebat quod habebat prius: sed cessit ipsi in testimonium ueritatis, & in ob signationem iustitiæ fidei, adeoq; in donorum continuationem & incrementum. Ad eundem modum legitur de Cornelio centurione in iisdem Apostolorum Actis, quòd prædicationi *Acto. 10.* Petri Apostoli credens acceperit spiritum sanctū etiam specie uisibili, sicuti Apostoli acceperant Hierosolymis in die Pentecostes, Petrum uerò ea re comperta, dixisse, Num quis prohibere potest, quò minus aqua baptizentur hi, qui spiritum sanctum perinde acceperunt uti nos? Quoniam ergo Cornelius cum suis ante baptismum accepit spiritum sanctum, manifestissimū est quòd eundem non primū per baptismum aut cum baptismo exhibitum consecutus sit. Rursus legimus in Actis Apostolorum, Qui libenter acceperunt sermonem Petri, baptizati sunt: priusquàm ergo tingerentur à Petro, erant consecuti gratiam Dei per fidem. Aut cur obsecro baptizamus infantes nostros? an quia corde credunt & ore confitentur? Non arbitror. An non ideo baptizamus, quia illos Deus sibi adducere iussit? quia promisit se & nostrum & seminis nostri Deum futurū? deniq; quia nos credimus Deū ex mera sua gratia & misericordia in sanguine Iesu Christi illos mundasse ac adoptasse, & hæredes uitæ æternæ cōscripsisse? Ex his ergo causis baptizantes infantes, abundè testamur baptismō eis non primū cōferri, sed ob signari quod habuerūt prius. Coniungamus his quoq; testimoniū de Cœna Domini. Apostolus docens quomodo sancti se præparent conuiuiō Dominico, Probet autem homo seipsum, inquit, & sic de pane hoc edat, & de poculo bibat. Cæterum probare significat scrutari, quantum ab homine fieri potest, cor uel mentem, diligentiq; examine excutere conscientiam. Dicitur & Deus probare corda nostra. Et idem Apostolus iubet nos probare quæ sit bona seu bene placens Dei uoluntas. Discussio autem illa fieri non potest citra scientiam & iudiciū. At scientia & iudiciū Christianorū fides est: ergo quisquis se probat antequam ad cœnā ueniat, fidem habet. Si fidem habet: ergo illis non caret quæ cum fide cōiuncta sunt. Proinde in

cœna illa non primùm accipiuntur diuina beneficia, sed pro acceptis aguntur gratia. Effeci his, opinor, euicere sacramenta non conferre gratiam.

Sacramēta euacuare, & deum arguere mendacij.

Opponunt his, sat scio, (quibus persuasum est sacramenta conferre gratiam, ac in seipsis inclusas continere res significatas) euacuare uel exinanire nos sacramenta, & docere, fideles in his aut per hæc nihil nisi nudam aquam, nudumque panem & uinum accipere: atque ea ratione Deum per nos redargui falsitatis & mendacij. Respondemus paucis, Si uacua plenis (ut sic dicam) opponunt, ut uacua sint quæ res ipsas in se non habent inclusas, sanè uacua quàm plena ingenuè confiteri malo. Si uerò uacua dicunt & prophana intelligunt, quæ uidelicet à prophanis signis nihil differunt: si per nuda intelligunt inefficacia: palàm profiteamur nos sacra non prophana, efficacia non inefficacia, diuinitus exornata non nuda, & idcirco plena non uacua aut inania habere sacramenta. Sacra enim sunt non prophana, quia à Deo, & pro sanctis non pro prophanis instituta sunt hominibus. Efficacia non inefficacia sunt. Nam in ecclesia apud pios seu fideles eum consequuntur effectum & finem, ad quem instituta sunt diuinitus. De quo mox plura. Diuinitus item exornata non nuda iure dicuntur, quæ ipsum Dei uerbum habent quo exornantur pulcherrimè. Itaque & plena non inania sunt sacramenta, quia ea habent quæ plenum constituunt sacramentum. Repetimus hic parabolas, quas superius quoque de consecratione differentes ferè adduximus, quò plus lucis huic tractationi affulgeat. Cera cum fidei testimonijs gratia literis uel tabulis non appenditur, uulgaris, uacua & nuda est cera, hoc est, nihil aliud quàm cera. Vbi uerò signatur & apponitur instrumentis, nec uacua nec nuda est iam cera: nam fides & ueritas appellatur. Signum principis uel reipublicæ alicuius dum pingitur in fenestris, aut parietibus, nudum est signum: at si id ipsum appendatur tabulis, aut imprimatur literis, magnum hoc ab illo habet discrimen. Nunc enim principis aut reipublicæ uoluntatem declarat & obsignat, idcirco eam apud omnes existimationem habet, ut hoc uiolasse aut præter principis aut reipublicæ uoluntatem alteri alicui diplomati applicasse, crimen reputetur falsationis & læsæ maiestatis. Lapis cum nondum est terminus & limes agrorum constitutus, nudus & uacuus, id est, uulgaris est lapis, quem pedibus proculcasse aut loco mouisse nihil habet piaculi: at dirimendis agrorum finibus adhibitus, amplius non est uacuus aut nudus lapis, sed testimonium legitimæ diuisionis & iustæ possessionis, quem mouisse loco iudicatur crimen capitale. Itaque aqua, panis & uinum extra institutionem & usum sacramentalem, nihil aliud sunt quàm aqua, panis & uinum, cæterum in usu sacramentali ab illis longe lateque discrepant, & sacramēta sunt à Christo signata uerbo, & ad salutem fidelium instituta.

Sacra non prophana res sacramenta.

Non nihil percipimus in sacramentis.

Ideoque qui sacramentis participant, non nihil, ut isti dicunt, percipiunt, nisi pro nihilo uideatur habenda Dei institutio. Instituit hic sacramenta ut sint gratiæ eius testimonia, & ueritatis promissionum eius sigilla. Id quod mox copiosè demonstrabimus. Vt ergo Deus uerax est, nec mentiri potest: ita uerissima sunt promissionum eius sigilla. Promisit ille se nostrum futurum, & in Christo se nobis cum omnibus donis suis communicaturum. Talem ergo se nobis certò præstat & communicat: licet id faciat non nunc primùm cum sacramentis participamus, ueluti se nobis per illa ut canales & in his ut uasis inclusum effundat. Statim enim à mundi exordio suam nobis gratiam promisit: statim atque credere cœpimus, talem ille se nobis præstare cœpit, & præstat magis magisque per omnem uitam nostram: nos fide ac spiritalitè ipsum recipimus atque haurimus. Ergo cum participamus sacramentis, pergit is se nobis singulari modo, id est, sacramentis proprio communi-

care,

nicare, adeoque nos, qui dudum participes facti sumus Christi, communionem illam in sacramentorum celebratione fide ac spiritualiter continuamus atque reparamus, eandem nobis obsignantibus signis sensibilibus. Quis autem posthac dixerit, sic sentientes de sacramentis, & hac fide his participantes, inania habere spectacula, & in his nihil percipere: licet nec signis includamus gratiam, neque ex illis hanc deriuemus? Si quis uero aliam de Deo & eius institutis opinionem concepit, id non magis Deo fraudi fuerit, aut ipsum mendacii arguerit, quam si quis uiro iusto mendacium impingat, quod id non praestet quod ille expectauerat: cum interim id quod expectauit, hic non promiserit, sed ille pro corrupta & erronea sua opinione sibi promissum somniauerit.

Et haecenus per occasionem ostendimus, quae sit similitudo & differentia sacramentorum ueteris & noui testamenti, & quod nostra sacramenta neque conferunt, neque continent gratiam, redimus modo ad id quod coeperamus, ad caput, inquam, huius disputationis primum: ut quandoquidem quid illa non efficiant diximus, tandem quid reuera efficiant adiciamus, explicantes uidelicet quae sit uirtus, quis finis & usus sacramentorum legitimus, ad quem a Deo instituta sunt. Attigi quidem caussarum locum fere in principio Serm. 6. ceterum modo & alia adiungam, quae huc pertinent, & singula tradam fufius & plenius.

Præcipuus sacramentorum finis ille est, quod ueritatis testimonia sunt, per quæ Dominus in ecclesia sua etiam uisibiliter testificatur res Euangelica prædicatione annunciatas promissionibusque ab exordio mundi promissas fidelibus, ita omnino gestas esse & certo sic habere, quemadmodum annunciantur & promissa sunt uerbo ueritatis. Ita Baptismus diuinum & publicum in ecclesia Christi testimonium extat, quo testificatur Dominus, se eum esse qui recipiat homines in gratiam gratuito, & qui purget ab omnibus maculis, denique participes hæredesque nos faciat omnium bonorum suorum. Ad eum enim modum Circūcisio quondam publicum & diuinum fuit testimonium, Deum esse qui purget & adoptet. Ideo enim Moses Deut. 30. Circūcidet, inquit, Dominus Deus tuus, cor tuum & cor seminis tui, ut diligas Dominum Deum tuum ex toto corde tuo, &c. Eadem ratione ipse Dominus instituta in ecclesia Cœna sacra, palam attestatur signis exhibitis, corpus suum certo pro nobis traditum, & sanguinem suum uere in remissionem peccatorum nostrorum effusum esse: se item uiuificum esse cibum, qui reficiat ad uitam æternam. Idcirco legimus apud Chrysost. Homelia 83. in Matth. in hæc uerba, Sicut in ueteri eodem hic modo in beneficio reliquit, memoriam mysteriorum colligendo & hinc hæreticorum ora frænando. Nam quando dicunt, Vnde patet Christum immolatum fuisse, & alia multa mysteria. Hæc enim afferentes ora eorum consuimus. Si enim mortuus Iesus non est, cuius symbolum ac signum hoc sacrificium est? Hæc ille. Intelligis, opinor, ut hic scriptor symbolum Cœnæ pro testimonio ueritatis, ueræ inquam mortis Dominicæ, contra hæreticos proferat. Quemadmodum itaque Euangelium appellatur testimonium, & prædicatores Euangelij testes: sic sacramenta nuncupamus ueritatis eiusdem testimonia, muta quidem illa, sed uisibilia tamen: quo nomine S. Augustinus eadē appellauit uerba uisibilia. Euangelij enim prædicatione, quæ constat uerbis quæ hauriuntur auribus, testimonium est loquens: sacramenta uero quæ signis constant, & percipiuntur uisu, testimonia sunt muta & quasi appendices & monimenta Euangelicæ prædicationis.

Imò inuenta sunt diuinitus sacramenta, ut bonam & propensam erga nos Dei uoluntatem, adeoque prædicationem Euangelicam atque omnes promissiones uitæ & salutis uisibiliter obsignent, sintque Euangelio & promissionibus diuinis uelut ap-

*Sacramenta sunt
testimonia ue-
ritatis.*

*Euangelium
testimonium.*

*Sacramenta be-
neuolentiæ Dei
erga nos obfig-
nāt uisibiliter.*

penſa ſigilla, quæ teſtificentur atq; confirment fidem in Chriſtum ueram eſſe iuſtitiam. Quod dixi ſcriptura approbabo Apoſtolica. Docui autem ſuperius eandem eſſe rationem ſacramentorum ueteris & noui teſtamenti, pauculis modò exceptis, ut iam iure optimo poſſimus ex collatione utrorumq; noſtrorum uim, finem & uſum æſtimare. Paulus ergo ad Rom. 4. cap. Dicimus, inquit, quòd imputata fuerit Abrahæ fides ad iuſtitia. Quomodo ergo imputata eſt? cùm eſſet in circuncifione, an cùm eſſet in præputio? Non in circuncifione, ſed in præputio. Et ſignum accepit circuncifionis, ſignaculum iuſtitia fidei, quæ fuerat in præputio: ut eſſet pater omnium credentium per præputium, uidelicet ut etiam ipſis imputaretur iuſtitia, ſimul & pater circuncifionis eſſet, non eorum modò, qui ex circuncifis ſunt, ſed & eorum, qui ingrederentur ueſtigijs fidei, quæ erat in præputio patris noſtri Abrahæ. Hæc omnia Pauli ſunt. In quibus primùm quidem uoces aliquot explicandæ uidentur: deinde indagandus ſenſus uerborum Apoſtoli: poſtremò adaptanda illa noſtro negotio ſacramentario.

Sacramenta ſigilla ſunt, & quis ſit uſus ſigillorum.

Utitur in præſenti Apoſtolus duabus uocibus, Signi uidelicet & Signaculi. Signum σημεῖον generalius eſt, & patet latiffimè. Signaculum uerò σφραγῖς, ſingulare eſt ſacramentis obſignantibus. Neq; enim omnia ſigna obſignant. Nam quædam ſignificando duntaxat abſoluunt ſuum officium. Eſt autem σφραγῖς proprie obſignare fidei faciendæ confirmandæq; gratia, unde σφραγῖς ſigillum erit, quod ſi dei ſeruandæ cōfirmandæue cauendisq; fraudibus adhibetur. Imitatur hic quoq; ut aliàs ſæpe, morem humanum Dominus. Solemus enim homines ſcripta fœdera, ſeu uerbis datam fidē, appenſis roborare ſigillis. Et ſigillorum inſtitutionem & uſum huiusmodi ſemper fuiſſe, colliqueſcit ex his ſcripturæ teſtimonijs. Cùm filij Iſrael ſub Ezra fœdus inirent cum Domino, mox fœdus in literas referunt, & ſcripturam in ueritatis teſtimonium obſignant: ſicut uidere licet Nehem. 9. cap. Hag. 2. cap. legis, Aſſumam te Zorobabel fili Salathiel, ſerue mi, dicit Dominus, & ponam te quaſi annulum ſignatorium, quia te elegi. Quaſi dicat, In Salathielis filio omnes certò diſcent, ſuper eſſe, per quem ſit propaganda Meſſiæ poſteritas. Ita ſcribit Ieremias in 22. cap. Viuo ego dicit Dominus, quia ſi eſſet Chonenias filius Iehoiakim regis Iuda, ſigillum in manu mea dextra, tamen inde auellam te. Id quod perinde eſt, ac ſi dixiſſet, Quamuis ille ſis, in quo promiſſiones meas ſeruabo, attamen in Babylonem abducēris. Huc pertinet illud ex Matthæo de Iudæis ſcriptū, Illi autem abeuntes munierunt ſepulchrū obſignato lapide, nimirum contra fraudes, adhibitis cuſtodibus. Liquet ergo ex his, quis ſit uſus ſigillorum.

Matth. 17.

Exponitur locus Pauli Rom. 4. Et accepit ſignum circuncif. &c.

His ſic expoſitis, perquiramus iam conſilium & ſenſum uerborum Apoſtoli. Demonſtrat Paulus iuſtificationem hominibus obtingere nullorum operum, nullarūue ceremoniarum uel ſacramentorum uirtute, ſed ſolius Chriſti beneficio per fidem. Ad hoc confirmandum adducit exemplum Abrahæ, de quo ſcriptura pronunciauit, Credidit Abraham Deo, & reputatum eſt ei ad iuſtitiam. Inde colligit Abrahamum eſſe iuſtificatum fide, imò hanc illi imputatam eſſe pro iuſtitia. Vbi & ex uocabulo aut uī imputationis, & ex tota Moſis ſententia, præualidè argumentatur, demonſtrans gratia per fidem eſſe iuſtitiam. Quibus coniungit & ex Dauide teſtimonium, de imputatiua iuſtitia. Tractaui eum locum Decadis 4. Sermone 1. Deinde redit iterum ad Abrahæ exemplum, & locum adductum ex Geneſi applicat ſuo inſtituto, excuſſis circumſtantijs modi temporisq; ac dicit, Quomodo ergo imputata eſt, cùm eſſet in circuncifione, an cùm eſſet in præputio? Non in circuncifione, ſed in præputio. Quæ quidem apertiora ſunt, quam ulla expoſitione indigeant. Quia uerò Iudæus obijcere poterat, Inanis ergo & uacua, inutilis

inutilis & uana fuit circuncisionis institutio & usus. Si enim prius iustificatus quam circuncisus fuit Abraham, quid potuit illi amplius conferre circuncisio? & si nihil contulit, certe superuacanea & inutilis fuit. Paulus per antipophoram respondens, Et signum accepit, inquit, circuncisionis, signaculum iustitiæ fidei, &c. Circuncisio, ait, nec inutilis fuit, neque uacua est. Licet enim non iustificet, purget, dona Dei applicet, ideo tamen non sequitur, nullum eius usum esse amplius. Alium enim finem habet. Nam signum circuncisionis accepit in signaculū quoddam iustitiæ fidei. Hoc est, Deus instituit circuncisionē, ut esset sigillum ratificans atque confirmans, adeoque uisibiliter etiam testificans, fidem esse iustitiā, hominesque fide iustificari, ita inquam, ut his quoque fides imputetur ad iustitiam, sicuti Abrahamæ imputata fuit. Nam sequitur, Ut esset pater omnium credentium per praputium, ut imputaretur & illis iustitia. Et reliqua. Et quamuis hæc luce clariora sunt, conabor tamen eadem illa magis illustrare parabola. Finge enim principem aliquem ex gratia & mera munificentia sua, seruum aliquem in aulā adeoque in participatum omnium bonorum recipere, insuper beneficium hoc ad liberos quoque posteritatemque adoptati extendere; mox uero iubere ut transactio, priuilegium & gratia illa confecta uerbis uiuis, referatur in literas, quas & appenso suo sigillo roboraret, quod istæ posteris certum sint testimoniū contra omnes tergiuersatores, gratiam illam ad ipsos quoque pertinere, principemque in bona & propensa sua uoluntate perseueraturū erga posteros adoptati, si & ipsi fideles principi esse perrexerint. Ad hunc enim modum Deus optimus maximus, rex regū & principum munificentissimus, gratis & nullo præcedente nostro bono merito, euocat Abrahamum, in quem cumulatim innumera congerit beneficia, cui & fœdus communionemque offert bonorum omnium, nec ipsi modò, sed & omnibus posteris eius, dicens, Ego deus omnisufficientia, ero deus tuus & seminis tui post te. Benedicam tibi & semini tuo. Imò in semine tuo benedicentur omnes cognationes terræ. Priuilegium hoc etiam iuramento interposito firmans sacrauit, mox & patres liberis ceu per manus, uice scripturæ tradere, deinde uero seruos suos prophetas in literas referre iussit, ipse denique circuncisione instituta, ueluti iam literis aut traditioni appenso sigillo aut diplomate obsignato, toti posteritati obsignare & roborare uoluit, quod certo ad se quoque illud pertinere scirent. Vbi tamen illud non uidetur nobis dissimulandum, sacramenta diplomatis signatis aliquid maius & uiuidius habere. Inscribuntur enim priuilegia principū membranīs, sigillatque scriptis appenduntur membranīs: Deus uero ipsis suorum corporibus suum imprimit sigillum. Membro enim genitali, unde posteritas propagatur, circuncisionem indit, ut ueluti nota impressa ipsis corporibus, plus iam quam obsignaret testareturque benedictionem & communionem bonorum omnium pertinere ad circuncisos, si pergant fideles esse domino Deo hominibus confœderato. Ideo enim significanter circuncisio à Paulo non signaculum iustitiæ dicitur, sed signaculum iustitiæ fidei: id est ratificatio, quod fides sit iustitia, quod fide uidelicet iustificati iam sumus, quod credentibus debeatur iustitia, quod Deus fidelibus certò benedicere uelit, hisque fidem imputare ad iustitiam: sicuti & Abrahamæ imputauit. Iam cum par sit ratio sacramentorum, licet hæc quoque nostris applicare sacramentis. Christus ergo dominus, redempto per mortē innoxiam mundo à potestate satanæ, & iam ascensurus ad patrem in cœlos, uocatis ad se discipulis suis dicit, Ite in orbem uniuersum & prædicate euangelium omni creaturæ: qui crediderit & baptisatus fuerit, &c. Euangelica prædicatio explicat ingens pretiosum, salutare, uiuificum & munificum, regium atque diuinū priuilegium, quod filij dei ex filijs

Parabola res illustratur.

Sacramenta aliquid uiuidius habere tabulis obsignatis.

Quomodo obsignet baptismus Marci 16.

Marci 10.
Matth. 18.

Baptizantur in
fantes non cre-
dentes.

Galat. 3.

Quomodo coe-
na domini sit si-
gillum iustitiae
fidei.

Ioan. 6.

diaboli facti sumus, hæredes inquam Dei, cohæredes autem Christi, qui sanguine fuso tantam nobis salutem parauit. Hac gratia Dei nemo exclusus est, nisi qui se suo uitio & culpa per inobedientiam excludit. Nam de liberis siue infantibus creden-
tium idem dominus in euangelio pronuncians ait, Sinite pueros uenire ad me, & ne prohibueritis illos: talium enim est regnum Dei. Et iterum, Amen dico uobis, nisi conuersi fueritis & efficiamini sicut pueri, non ingrediemini in regnum celo-
rum. Et qui receperit unum puellum talem, me recipit. Videte ne contemnatis unum ex his pusillis. Dico enim uobis, quod angeli eorum in cælis semper uident faciem patris mei, qui in cælis est, &c. Neque uerisimile est, exhibito nobis Christo, Deum inclementiorem factum, quam erat dum nondum esset exhibitus. At tunc dixit, Ero Deus tuus & seminis tui post te. Valet ergo id ipsum nunc magis, cum dominus uenerit quærere & seruare quod perierat, gratiam denique & dona sua liberalissimè in omnem effundere carnem. Ergo priuilegium illud regium, ampli-
plissimum & diuinum, primū quidem ipsius Christi domini prædicatione, mox & apostolorum eius annunciatione mundo expositum est: deinde uerò Deo sic uolente idem ab apostolis & euangelistis relatum est in literas: sacramentū uerò ipse dominus ceu appendicem & sigillum adiecit prædicationi aut scripturæ, bap-
tismum substituens circuncisioni: quam, quia cruenta, denique signum uenturi seminis benedicti erat, quod tum exhibitū fuerat, abrogari oportebat. Baptismus autem succedens circuncisioni & ipse est signaculum iustitiæ fidei, testimonium & diploma obsignans, deum certò nos mundare & hæredes constituere uitæ æter-
næ, totamque euangelij gratiam ad baptisatos pertinere, si in fide uera consistant, At non credunt, ais, infantes Christianorum baptizandi. Fateor. Cæterum non credebant Iudæorum infantes, qui nihilominus circuncidebantur, erantque in fœ-
dere Dei & communione omnium bonorum: ut idem nostris tribuere infantibus uera iubeat pietas. Vbi adoleuisset semen Iudaicum, & præuaricaretur impiè, exciderat fœdere Dei: unde & Christianorum infantes euangelica gratia excide-
runt, quando adulti impiè agunt, recipiuntur tamē rursus in eandem per fidelem poenitentiam. Sed redimus. Baptismus sigillum iustitiæ fidei, non apponitur mem-
branæ aut scripto euangelico, sed accommodatur ipsis filiorum Dei corporibus, ipsique ueluti infigitur imprimiturque. Toti enim corporibus nostris immergimur, aut toti aspergimur aqua baptismi: quæ sanè uisibilis obsignatio est, confirmans Deum uerum, esse Deum nostrum, sanctificantem ac purificantem, purificatio-
nemque & omne bonum Dei nobis tanquam hæredibus Dei deberi. Atque huc iam pertinet euidentis ille Pauli locus, qui in epistola ad Galatas sic legitur, Omnes filij Dei estis, eò quod credidistis Christo Iesu. Nam quicumque baptizati estis, Chris-
tum induistis. Et reliqua. Similis est ratio Cœnæ dominicæ, quæ & ipsa est sigil-
lum iustitiæ fidei. Moritur enim filius Dei, morte sua redimit credentes, corpore item sanguineque suo cibatur & potatur nos ad uitam æternam. Ac singulare quidem excellensque hoc priuilegium fidelibus datum, annuntiatur & scribitur ab aposto-
lis, sed ab ipso domino consecratur & obsignatur sacramento corporis & sanguinis sui, quo obsignat fide nos in traditum dominum iustificari, communicari nobiscum omnia Christi bona, pasci & uegetari nos Christo. Porro ut obsignatio ui-
uidior esset, sigillum non apponit membranæ scriptæ, sed infertur atque adeo man-
ducandum præbetur corporibus nostris, ut testimonium intra nos ipsos habeamus, totum uidelicet Christum cum omnibus donis suis ad nos propriè pertinere, si in fide perseueremus. Nam ipse dominus in euangelio, Qui edit me, inquit, ui-
uet & ipse propter me. At edit qui credit. Ibidem enim dicit dñs, Ego sum panis
uitæ,

uita, qui uenit ad me non esuriet, & qui credit in me, non sitiet unquam.

Ex his iam summam rei colligimus, sacramenta obsignare diuinas euangelicasque promissiones: ac proinde toties in ecclesia tabulas seu literas aut diplomata atque sigilla prædicationis euangelicæ diuinarumque promissionum proferri, atque adeo & totum salutis nostræ negotium renouari & continuari, quoties actiones illæ diuinitus institutæ, sacramenta uidelicet, in ecclesia celebrantur.

Huc pertinere arbitror, quæ fidelis Christi minister Zuinglius de Sacramentis in hæc uerba tradidit, Sacramenta testimonium rei gestæ præbent. Vniuersæ enim leges, mores ac instituta, authores suos initiaque prædicant. Baptismus ergo cum Christi mortem ac resurrectionem significando prædicat, eas uerè gestas esse oportet. Extant hæc in Expositione fidei ad Regem Christianum. Idem ad Principes Germaniæ contra Eggium, Cum homo ille nobilis, inquit, abiturus in regionem longinquam, panem ac uinum præbens, longè uiuidius & peculiarius sese nobis dabat, cum diceret, Hoc est corpus meum, quam si dixisset, Hoc est symbolum corporis mei: etiamsi naturale corpus suum ablaturus ac cælo illaturus esset. Nihilominus tamen minus sese totum, quod ad fidem & gratiam pertinet, his uerbis donat. Quasi diceret, Nunc in mortem pro uobis eo, paulò post ex integro hinc migraturus. At nolo de amore & cura in uos mea ambigatis. Totus uester sum, quantus quantus sum. In cuius rei testimonium, huius meæ traditionis & testamenti symbolum uobis commendo, quo memoriam mei, meorumque beneficiorum excitetis: ut cum uobis hunc panem & hunc calicem exhiberi uideatis in memoriali Cœna, non aliter sitis mei memores, quòd scilicet me pro uobis tradiderim, quam si uideretis me coram: quemadmodum nunc uidetis & uobiscum conuiuari, & mox ad supplicium pro uobis à uobis rapi. Hactenus Zuinglij uerba recensui, recensebo autem rursus alia paulò post: non quòd illis aut ullis humanis testimonijs innitar, sed ut perspicuum fiat, uirum illum non contempsisse, uti à quibusdam falsò putatur, sacramenta.

Zuinglius de sacramentis testificans certè significauit.

Interim agnoscimus hæc sancta sacra scripturæ testimonia, Qui confirmat nos unà uobiscum in Christo, & qui unxit nos Deus est: qui etiam obsignauit nos, deditque arrham spiritus in cordibus nostris. 2. Corinth. 1. Item, Postquam credidistis, obsignati estis spiritu promissionis sancto, qui est arrhabo hereditatis nostræ in redemptionem acquisitæ possessionis in laudem gloriæ ipsius. Ephes. 1. Et iterum, Ne contristetis spiritum sanctum Dei, per quē obsignati estis in diem redemptionis. Ephes. 4. Agnoscimus Dei ueritatem per se satis solidam, ueram & certam esse, nec aliunde quam ex seipsa meliorem accipere confirmationem: nisi uerò undique animus noster confirmetur, fluctuat. Deus ergo se attemperat nostræ imbecillitati, & per sacramenta quoque, quantum fieri potest, nos fulcit, ita tamen ut omne confirmationis beneficium referamus ad ipsum spiritum & eius operationē magis quam ad elementum. Quemadmodum ergo doctrinæ atque doctoribus confirmationem tribuimus, ita obsignationem sacramentis. Legimus autem in Actis cap. 14. & 18. Reuertebantur apostoli, & denuo confirmabant animos discipulorum, exhortantes, ut perseverarent in fide. Rursum 1. Thess. 3. cap. Misimus, ait Paulus, Timotheum fratrem nostrum, & ministrum Dei, ut confirmaret uos & consolaretur. Cæterum nisi interior spiritus uis rapiat, & commoueat auditorum corda, nihil efficiet exterior doctoris quantumuis bene instructa oratio: si uerò exerat uim ac cooperetur, firmissimè corroborantur animi. Sic habet & negotium sacramentarium. Si enim desit interior unctio & obsignatio spiritus sancti, actio exterior pro ludo ab incredulis habebitur, nec efficit tantillum sacramentorum

spiritus sanctus proprie obsignat.

obsignatio: cum uerò præcessit fides spiritus sancti donum, firmissima est sacramentorum obsignatio. Rectè alij quoque, Si desit mentibus, inquiunt, spiritus sanctus, nihilo plus ipsa præstant quam cæcis oculis iubar solis illustrissimum licet. Si uerò isti per spiritus illuminationē pateant, ualde afficiuntur diuino sacramentorum spectaculo. Et Zuinglius in libello ad principes Germaniæ, Nos non offendit, inquit, etiamsi uniuersa quæ spiritus operatur, ad externū sacramentū referantur: dummodo symbolicè dicta, quomodo patres locuti sunt, intelligamus. Hæc ille.

Incredulis nihil obsignant sacramenta.

Et quamuis sacramenta incredulis nō obsignent promissiones, quibus diffidēt, nihilo minus tamen sacramenta ut obsignent diuinitus instituta sunt. Non recipit doctrinam euangelicā impius, ideo tamen nemo colligit, doctrinā à Deo non esse ad docendum institutā. Est qui obsignato diplomati nō credat: ideo tamen nō sequitur, diploma signatū fidei faciendæ aut confirmandæ non seruire. Ergo cū doctrina apud rebellem nihil efficit, cum sacramenta prophanum nihil mouent, neque quicquam profunt impio, id sanè non instituentis, aut uerbi sacramentorum uel culpa fit, sed uitio increduli. Per se interim instituta sunt, ut profint & obsignēt, suūque in sanctis sanctum usum & finem habeant. Hæc autē hæc de prima sacramentorum uirtute attulimus, quòd diuinæ ueritatis, adde & beneuolentiæ erga nos diuinæ testimonia, & sigilla sunt euangelicarum promissionum omnium, obsignantia, fidem esse iustitiam, & omnia Christi bona pertinere ad credentes.

Sacramenta re præsentant res.

EST & alius signorum sacramentalium finis & usus, quòd uidelicet significant & significando repræsentant. Id quod superuacaneum esset pluribus approbare testimonijs, cum hoc omnibus sit manifestissimum, saltem ex præcedentibus. Est autem significare, indicare, notisq; & signis rem declarare aut demonstrare. Repræsentare uerò non significat rem ablatam quondam nunc rursus corporaliter, ut quidam nugantur, præsentem sistere, dare aut facere, sed similitudine & imitatione quadam referre, eamque rursus reuocare in animum, & oculis uelut obijcere. Dicimus enim filium repræsentare uel referre patrem, cum uidelicet forma & morum similitudine patrem exprimit: ita ut qui hunc uidet, putet se ipsum patrem uelut præsentem cernere.

Sacramenta excitant & iuuant fidem.

Et hac quidem ratione excitant & adiuuant sacramenta fidem nostram, dum uidelicet foris obijcitur nobis, quod animū impellit, excitat & cōmonefacit: imò illud ipsum quod animo iam dudum cōprehensum est, nunc etiam modo quodam sensibus, in similitudine, parabola, aut typo seu inuolucro, contemplandum uoluntandūque mente, uisibiliter offertur, ut iam mutua inter se opera iuuētur. Similitudo ergo seu analogia signi ad signatum obiter & in transcurso hic consideranda est.

De analogia in baptismo.

Dixi superius Analogiam esse aptitudinem, proportionem & conuenientiam quandam signi ad rem significatam: ita ut hæc in illo quasi in speculo perspicatur. Exemplis res fiet illustrissima. Recipit ex mera gratia benignus dominus genus mortalium in omnium bonorum suorum cōmunionem, & adoptat fideles, ut iam non modò sint foederati dei, sed etiā filij Dei. Id quod sancta baptismi actione, quæ uice signi aut ipsum signum est, euidentissimè omnium oculis repræsentando obijcitur. Adstat enim ad fontem sacrū dei minister, cui offertur baptisandus, qui ab ipso recipitur & baptizatur in nomen uel in nomine patris & filij & spiritus sancti. Nam utrunque est inuenire, in nomen & in nomine. Porro baptizari in nomen domini, est in uirtutem & potentiam (significat enim nomen Dei potentiam) in gratiā, misericordiā, & auxilium Dei consignari, imò inseri, & Deo uelut agglutinari, dedicari, & incorporari. Baptizari in nomine dñi, est iussione aut imperio dei baptizari, ex cōmissione, inquā, dei patris & filij & spiritus sancti, recipi in confor-

confortiū filiorum Dei, adeoq; & accenseri familiæ Dei, ut baptisati sint & dicantur Christiani, nominentur nomine Dei, appellati filij Dei patris, &c. Refert ergo locutio illius nonnihil, quod alibi legimus nomē dei inuocari super aliquo, quod perinde est, ac si dicamus, aliquem nomine Dei uocari, id est, seruum & filium Dei appellari. Ergo qui antea per gratiam inuisibiliter à Deo recepti sunt in confortiū Dei, illi idem uisibiliter iam per baptismum eidem Dei familiæ inscribuntur à ministro Dei: atq; ideo & nomen simul accipiunt, ut semper meminerint se Christo nomen in baptismo dedisse, uicissim & accepisse. Ad hunc modum refert per analogiam accommodatissimam ipsum signum rem significatam. Fit deniq; Baptismus per aquam. Aqua uerò in rebus humanis duplicem habet usum. Purgat enim sordes, hominemq; ueluti renouat: sed & potat ac refrigerat æstuantem. Sic autē representat gratiam Dei, quum fideles suos emundat à peccatis, regenerat & refrigerat spiritu suo. Porro aspergit aut affundit potius aquam minister Christi, aut immersos extrahit ex aquis: qua re significatur Deum liberaliter dona sua effundere in fideles suos: significatur deniq; nos cum Christo sepeliri in mortem eius, & cum eodem resurgere in nouitate uitæ. Suffocat sinus Erythrei maris Pharaonem, transmittit autem populum Dei. Nam uetus Adam submergi ac extinguī, nouus de die in diem reuiuiscere & emergere debet. Pulchrè ergo baptismo representatur mortificatio & uiuificatio Christianorum.

*Nomina dare
& accipere in
baptismo.*

Iam in Cœna domini Panis & Vinum representant ipsum corpus & sanguinem Christi. Ratio huius hæc est. Vt panis alit & roborat hominem, uiresq; sufficit ad laborandū: Sic Christi corpus per fidem manducatū cibatur & satiat animam hominis, totumq; hominem ad omnia pietatis officia instruit. Vt uinum potat sitientes & lætificat corda hominū: Sic sanguis domini Iesu haustus fide restinguit sitim æstuantis conscientiæ, & gaudio ineffabili perfundit corda fidelium. Frangitur uerò in Actione Cœnæ panis domini: funditur uinum. Confractum enim, id est, modis omnibus afflictū est corpus saluatoris nostri, cruorq; largissimus per hiantia erupit & manauit uulnera. Ac nos ipsi quidem panem domini proprijs frangimus manibus. Nos enim ipsi in culpa sumus, quod ille attritus est. Peccata nostra uulnerauerunt illum, & nos ipsi crucifiximus eum: id est, ille propter nos, ut morte sua nos à morte liberaret, crucifixus est. Præterea accipimus in manus nostras panem, accipimus in manus nostras similiter & poculum: eo quod ille dixit, Accipite, edite, Accipite, & diuidite inter uos: nec reponimus, aut recondimus illa: neq; alijs modò porrigimus: sed accepta edimus & bibimus in nostra traicientes corpora, deinde uerò & alijs cōmunicantes offerimus. Qui enim legitime cœnam domini celebrant, non tantū credunt Christum passum esse, aut pro alijs non pro se passum esse: sed credunt illum pro ipsis esse passum, credunt Christum omnia bona sua ipsis liberalissimè communicare, adeoq; & communicasse. Ergo sicut alimentum panis & uini traiectum in uiscera mutatur in humani corporis substantiam: ita Christus fide haustus à sanctis, ijs spiritu suo unitur, ut unum sint cum Christo, & hic unum cum illis. Et ut cibus splendide apparatus & conspectus duntaxat in mensa, non satiat: ita si audias magnificè tibi prædicari Christum, non autem credas tuum esse Christum cum omnibus bonis, nihil prodest quantumuis pulchrè instructa sit oratio aut mensa. Facit & ad amicitiam conciliandam, reparandam & conseruandam, quod de uno pane participamus, quod panem offerimus fratribus, quodq; de manu fratrum poculum accipientes bibimus. Non enim aliam ob causam uidentur ueteres Cœnam appellasse Synaxim. Verū ea de re dicemus nonnihil aliàs. Ista uerò exempli gratia de Analogia

*De analogia in
negotio Cœnæ.*

Synaxis.

signi & signati attuli, plura dicturus, nisi hæc diligentibus satis esse considerem. Occasionem enim plura atq; maiora cogitandi inueniendiq; suppeditavi.

Quomodo sacramenta fidem excitent.

Ex hac autem perfunctoria analogiæ tractatione perspicuū esse arbitror, quomodo sacramenta excitent, & adiuuent fidem sanctorum. Nam dum animus Dei beneficia, Christi benedictionem, redemptionem, & dona alia comprehendit & uoluit, dum ihs magna cum uoluptate spiritus fruitur, dum in his gestit & exultat, accedunt foris iam & sacramenta, quæ oculis adeoq; omnibus incurrentia sensibus, uisibiliter ea repræsentant, quæ animus internè comprehendit, agit & uoluit. Quoniam enim tota actio, quæ uerbis & ritu constat, signo accensetur, uident oculi symbola & omnia quæ in tractatione symbolorum geruntur, quæ quasi loquuntur omnia. Audiunt aures uerba & instituta Christi. Tactus & Gustus sentiunt & ipsi, quàm suauis & bonus sit dominus: ut iam totus homo uelut corpore & anima in cælum raptus, fidem excitari iuuariq; fructū deniq; ex fide in Christum suauissimū sentiat atq; percipiat. Hæc omnia in credentibus locum habent, apud incredulos inanimata manent signa: ergo fidei & spiritus in legitimo usu sacramentorum operantis uirtute illa fiunt, sine fide & spiritu sancto non sentiuntur.

Energia in prædicatione uerbi Dei.

Non dissimilis energia est & in prædicatione uerbi dominici. Cum enim hoc adhibitis parabolis, paradigmatis ac per hypotyposim proponitur auditoribus, si in animo reluceat spiritus fidesq; his res expositas non audire modò, sed & coram cernere sibi uidentur. Qua ratione arbitror Paulum dixisse, O stulti Galatæ quis uos fascinauit, ut nō crederetis ueritati? quibus præ oculis Iesus Christus ante fuit depictus, inter uos crucifixus. Nullibi enim uel pictum uel crucifixum constat Christum apud Galatas: loquitur ergo de euidencia sermonis, qua res dicuntur quidem, sed energia oculis etiam quodammodo subiiciuntur. Eadem est ratio & in sacramentis, quæ eò nomine à priscis appellata fuere uerba uisibilia.

Zuinglius de sacramentis fidei fulciensibus.

De his ad hunc modum disseruit Zuinglius in libello ad Principes Germaniæ contra Eggium, Nōne cupit fidelis, ubi fidem labi senserit, fulciri & in locū restituī? Id autem ubi gentium commodius, quàm in ipsa sacramentorum actione inuenturum sperare poterit, quantum ad omnia sensibilia attinet? Esto enim, omnes creaturæ inuitent nos ad contemplationem numinis: at omnis ea inuitatio muta est: in sacramentis uerò uiua & loquens inuitatio est. Loquitur enim dominus, loquuntur & elementa: atq; idem loquuntur & suadent sensibus, quod menti sermo & spiritus. Adhuc tamen hæc uisibilia omnia nihil sunt, nisi spiritus sanctificatio præcedat. Hæc copiosius tradit primū quidem in Annotationibus suis ad 27. cap. Ieremiæ: deinde in Expositione fidei ad regem Christianum.

PRAETEREA legimus sanctum Augustinum contra Manichæos disputantem libro contra Faustum 19. capite undecimo dixisse. In nullum nomen religionis seu uerum seu falsum coagulari homines possunt, nisi aliquo signaculorū uel sacramentorum uisibilium consortio colligantur, &c. Hanc Augustini sententiam ex scripturis petita agnoscentes, de sacramentis docemus, his nos colligi ac colligari in unitatem corporis Christi, segregariq; ab omnibus alijs religionibus consortijs & societatibus: adde iisdem nos ceu iureiurando obstringi in unius dei cultum uerum, inq; unam religionem synceram, in quam nos consentire cum omnibus qui communicant sacramentis, palam profiteamur. Vbi illud maxime obseruandum uenit, collectionem aut colligationem in unitatē corporis Christi, duplicem habere respectum. Vel enim cum Christo coniungimur, ut is in nobis sit, nos in ipso uiuamus. Vel copulamur cum omnibus Christi membris, nempe cum fidelibus Christi, cum ipsa inquam ecclesia catholica. Porro Christo connectimur spiritu

Cōiunctio cum Christo & cū ecclesia.

spiritu & fide. Ecclesiae uero aut membris Christi coniungimur per fidei spiritusque unitatem & uinculum charitatis. Quae quidem omnia interna spiritus dona sunt, quae gratuito nobis per solum conferuntur Dominum, non per ullas creaturas, non per ulla elementa. Sacramenta itaque inserunt nos uisibiliter consortio Christi & sanctorum eius, qui inuisibiliter quidem per ipsius gratiam inserti fuimus, priusquam sacramentis participaremus; participatione autem nunc aperimus & manifestamus, cuius corporis membra simus atque esse uelimus, Domino signis aut notis suis per ministrum nos uisibiliter quoque pro sua familia proque suo populo signante. Id quod scripturis iam plenius illustrabimus.

Qui olim ex uifœderis, ex gratia, misericordia, & promissione Dei, populus Dei erat, circuncisione uisibiliter colligebatur in unam ecclesiam & unius corporis compagem. Apostolus enim Paulus ad Ephesios, Mementote, inquit, quod uos quondam gentes in carne uocabamini praeputium, ab ea quae uocatur Circuncisio, quae circuncisio manibus fit: quod inquam eratis in tempore illo sine Christo, ab alienati à republica Israelis, & extranei à testamenti promissionis, &c. Ex quibus facile quoque intelligitur, quomodo circuncisione segregati sint ab alijs religionibus & societatibus Iudaei: quodque circuncisio alibi hanc ob causam ponitur pro ipsis circuncisis; & cur Incircuncisi uocabulum probro datum sit. Habebantur enim incircuncisi pro impijs impurisque hominibus, quibus nullum erat consortium, nulla pars aut hereditas cum Deo & sanctis eius. De Baptismo qui in locum Circuncisionis substitutus est, dicta sunt quaedam in praecedentibus. Sed & Apostolus significantissime, Quemadmodum, inquit, corpus unum est, & membra habet multa: omnia uero membra corporis unius multa cum sint, unum sunt corpus: sic & Christus. Etenim per unum spiritum nos omnes in unum corpus baptizati sumus, siue Iudaei, siue Graeci, siue serui, siue liberi; & omnes unum spiritum hausimus. Obstringimur ergo baptismi sacramento in unitatem corporis Christi, ita ut hoc rupisse uinculum & in aliud concessisse consortium religionis & societatis, sacrilegium atque proditio rite uocetur. Huc respexisse uidetur Apostolus, cum interrogaret Corinthios, An non in Christi nomen baptizati estis? Innuens utique baptizatos in nomen Christi palam iurasse, fidemque suam coram Christi ecclesia obstrinxisse, ut iam nec possint, nec debeant de ullo alio quam Christi nomine gloriari, in cuius familiam recepti sint per baptismum. Sic inquam baptismo separamur ab omnibus alijs religionibus, & Christianae duntaxat consecramur.

Similis per omnia locus est de Coena Domini apud eundem in 1. ad Corinth. cap. 10. Cum enim Apostolus Corinthiis demonstrare uellet, ab omni pietate alienum, indignum & sacrilegum esse, Christianos in idolorum templis ad idolothyrata accumbere sacrisque gentilitijs communicare, à ratione & natura sacramenti Coenae Dominicae argumentans, Fugite, inquit, à simulachrorum cultu. Ut prudentibus loquor: iudicate uos quod dico. Poculum benedictionis quo benedicimus, nonne communio sanguinis Christi est? Panis quem frangimus, nonne communio corporis Christi est? Quoniam unus panis, unum corpus, multi sumus. Nam omnes ex eodem pane participamus. Videte Israellem iuxta carnem. Nonne qui edunt uictimas consortes altaris sunt? Quid ergo dico, quod simulachrum aliquid sit? Aut quod immolatum simulachris aliquid sit? Illud potius dico, quod quae immolant gentes, daemones immolant & non Deo. Nolim autem uos consortes daemoniorum esse. Non potestis poculum Domini bibere, & poculum daemoniorum. Non potestis mensae Domini participes esse, & mensae daemoniorum.

Mm

Sacramentis uisibiliter colligimur in unam religionem, separamur ab alijs.

Philip. 3.

Rom. 15.

1. Corinth. 12.

1. Corinth. 1.

Exponitur locus Pauli 1. Corinth. 10. Panis quem frangimus.

Mos sacrificandi
Corinthiorum.

κοινωνία pro
cœtu.

Et cætera. Hæc enim omnia Pauli sunt : quæ cum instituto nostro mirificè conueniant, & clarissima sint, perstringam obiter. Principiò statum & scopum reponit, ad quem mox omnia sua dirigit. Fugite, inquit, simulachrorum cultum. Intelligit autem idololatriæ uocabulo, quicquid pertinet ad idololatriam, idolothytorum esum maximè. Si autem nescis quid sit idolothytum, scias uocem esse Græcam, qua Paulus in hac caussa utitur, ac significare idolo sacrificatum, aut sacrificio publicè idolo consecratum. Fuit autem in usu Corinthiis sacrificare ad aras deorum suorum in idoleis, id est, idolorum templis, ac ad sacrificia illa sua uocare Christianos : hi uerò accedentes accumbebant ad idolothyta, promiscuè edentes cum idololatræ, existimantes id citra omnem culpam fieri posse, quòd Evangelica luce coruscante clareret, neq; idolum, neq; ipsum Deum, quem representabat idolum, & idcirco ne idolothyta quicquam esse aliud, quàm nomina inania, res uanas & nihili. At contra hos Paulus ab 8. cap. usque ad 11. disputans, docet à Christianis esse alienissimum sacris communicare prophanis : ac dicit, Loquar uobiscum ut cum prudentibus, qui uestigis aliquot monstratis, ipsi uestri ingenij perspicacia, quid uerum, quid falsum, quò deniq; uobis inclinandum sit, intelligitis. Deinde semina quædam argumentorum spargit, quæ illi mox sua excutientes industria, excolant. Qui, inquit, cœna Domini (in qua panis Domini frangitur, poculumq; Domini hauritur) participant, eiusdem sunt communio- nis, cœtus, aut corporis cum Domino. Nam κοινωνία, quo uerbo hîc utitur Paulus, & quod uerterunt interpretes Communio uel communicatio (quanquam melius sit communio quàm communicatio : sicuti & in Germanica uersione melius est gemeind quàm gemeinschaft) non actiue, ut sic dicam, pro distributione, exhibitione aut porrectione corporis Christi per ministrum : sed passiuè pro consortio & societate, pro corpore, inquam, ecclesiastico accipitur : uelut cum ecclesia appellatur communio, id est, cœtus, collectio & societas sanctorum. Porro hæc appellatur κοινωνία siue communio corporis & sanguinis Christi, quia Christi corpore & sanguine redempta est, ac particeps Christi, uiuit per eundem. Nam ipse uiuit in sanctis, omnia sua uitæ dona ipsis communicans. Quòd autem participant cœna Domini sint corpus aut communio Christi, per subiectam rationem declarans dicit, Quia unus panis, unum corpus multi sumus. Cui mox & aliam rationem expositionis caussa illustriorem suppingit, Nam omnes ex eodem pane participamus. De uno, inquit, pane participant, palàm testamur nos eiusdem corporis esse consortes cum Christo & omnibus sanctis. Quibus pulchrè ad analogiam respexit. Vt enim ex multorum granorum adunatione, sicut Cyprianus ait, unus fit panis : ut de botris siue acinis plurimis uinum confluit : ita ex multis membris coalescit corpus ecclesiæ, quod est corpus Christi. Veniunt autem in his Pauli uerbis hæc obseruanda. Principiò, quòd nunc multitudinem signantiore uocabulo nuncupat, quod prius communionem appellauit. Est ergo communio nihil aliud, quàm multitudo siue cœtus. Dixit enim, Panis est communio corporis Christi : iam uerò dicit, Nos multi sumus unus panis, unum corpus. Multi, inquam, id est, nos omnes, qui sumus multitudo & ecclesia, Christi corpore tradito & fuso sanguine redempta. Deinde, Multi, inquit, unum corpus sumus : non dicit, Vnum corpus efficimur. Nam non primùm per sacramentorum participationem (quod iam sæpius inculcamus) inserimur corpori Christi : sed qui inserti eramus per gratiam inuisibiliter, nunc etiam uisibiliter consecramur. Rursus ex simili sacramentorum ratione, siue per exemplum scripturæ à sacramentis populi ueteris peti- tum, demonstrat sacris participantes unum esse corpus,

corpus, & cum eo cui offerunt, & cum ijs quibus cum offerunt, aut cum quibus de idolothytis edunt. Contemplamini mihi, ait, Israelitas, carnales adhuc uictimas offerentes. Nōne qui edunt uictimas κοινωνοι, id est, communicatores, socij sue consortes sunt sacrarij aut aræ? Complexus est autem uoce sacrarij aut aræ (θυσιασθίου habet) quicquid ad cultum & religionem Dei Iudæorum pertinet: ut sit sensus, An non omnes illi unum corpus sunt, una communio, unus populus, & cum Deo Israelis, & cum populo eius, qui edunt de uictimis Deo Israelis, à populo Israelitico immolatis? Quasi dicat, Nemo est qui id nesciat, aut neget, cum confessum & manifestum sit apud omnes. Ex his sua sponte colligendum relinquit Corinthijs, Proinde qui sacramentis communicant ethnicorum, unum corpus & una sunt communio cum dijs ethnicorum & ethnicis sacrificantibus. Iam per occupationem interponit, Propterea autem non dico, quod idolum aliquid ualeat, aut idolothytum aliquid diuinæ maiestatis habeat. Quibus mox addit, Hoc autem sentio, quod quæ gentiles sacrificant, non Deo sed diabolo sacrificant. His intulisset legitime, Ergo si uos perrexeritis participare de idolothytis, eritis certè unum corpus & una cōmunio, & cum ipso diabolo, & cum omnibus membris eius. Sed quia hoc acerbius à multis fuisset exceptum, reponit aliud paulò lenius & ciuilius, ac dicit, Nolui autem uos κοινωνους, id est, communicatores seu socios & consortes esse dæmoniorum. Post quæ mox collatis partibus contrarijs summam rei infert, ad quam omnia direxit, & ait, Non potestis poculum Domini bibere, & poculum dæmoniorum. Non potestis mensæ Domini participes esse, & mensæ dæmoniorum. Sacramenta itaque separant nos ab omnibus alijs cultibus & religionibus, & obstringunt, atque consecrant, adeoq; & incorporant nos uni Deo uero & sincerae religioni Christianæ. Quoniam ijs participantes palam profitemur nos esse membra Christi, quæ nemo sanus tollit & facit fornicationis & idolorum membra.

Membra diaboli sunt participantes sacris illegitimis.

Huc pertinet, quod Zuinglius in Expositione fidei Christianæ ad regem Christianum, Sacramenta, inquit, uice iurisiurandi sunt. Nam & Sacramentum Latini pro iureiurando usurpatur. Qui enim unis eisdemq; sacramentis utuntur, una quædam gens & sancta coniuratio sunt: in unum corpus, inq; unum populum coeunt: quem qui prodit, periturus est. Populus ergo Christi cum eius corpus sacramentaliter edendo in unum corpus coniungitur: iam qui perfidus est, attamen sese huic societati audet insinuare, corpus Christi prodit, tam in capite quam in membris, &c. Hæc ille.

Zuinglius de sacramentis obstringentibus, &c.

Ex his uerò omnibus nullo negotio intelligere licet, quomodo sacramenta nos nostri admoneant officij: maximè si obseruemus in Apostolorum literis, quomodo ex ratione sacramentorum suas exhortationes instituerint Apostoli. Vbi denuo analogia considerata, plurimum habet & lucis & uirium. Nos in transcurso quædam huius generis attingemus. Putantur arbores, resecanturq; ex ipsis arida, sterilia & superuacanea: itaq; circumcisione admonebantur circumcisi omnia ea cultro spiritus resecare, quæ ex carne contra legem Dei enascuntur. Huc respexit Moses, cum in Deut. dixit, Circumcidite præputium cordis uestri, & ceruicem uestram amplius ne induretis. Quem imitatus Ieremias in cap. 4. Circumcidimini Domino, & auferite præputia cordis uestri, &c. Quæ uerò de paschate celebrando tradidit Apostolus, planiora sunt quam hic referri debeant. Et nos de illis omnibus copiosè differuimus Decadis 3. Sermonem 6. Idem Apostolus in epistola ad Romanos, An ignoratis, inquit, quod quicumq; baptizati sumus in Christum Iesum, in mortem eius baptizati sumus? Sepulti ergo sumus unà cum

Sacramenta fideles sui admoneant officij.

Deut. 10.

1. Corinth. 5.

Rom. 6.

illo per baptismum in mortem: ut quemadmodum excitatus est Christus ex mortuis per gloriam patris, & ita nos in nouitate uitæ ambulemus. Et cætera. Admonemur ergo baptismi mysterio, ut renunciemus satanæ & mundo, ut mortificemus carnem nostram, sepeliamusque ueterem Adamum, quò nouus in nobis homo per Christum resurgat. Porro Cœna Domini admonet nos charitatis fraternæ, & unitatis cum omnibus membris Christi: admonet nos puritatis & synceritatis in fide: ut quoniam palam professi sumus nos cum Christo, & omnibus membris eius adunatos esse, diligentissime etiam curemus, ne perfidi simus in Dominum Christum & ecclesiam eius, ne nos peregrinis contaminemus sacris: admonemur etiam gratitudinis, ut laudemus gratiam eius, qui nos redemit, iuxta illud, Quotiescunque de pane illo ederitis, & de poculo hoc biberitis, mortem Domini annuntiabitis donec uenerit.

1. Corinth. 11.

Atque hæcenus differui de uirtute, sine, & effectu sacramentorum: quibus tantum, opinor, tribui, quantum debui, id est, quantum ex scripturis demonstrari potest. Instituta sunt Christi, non ergo amant laudes fucatas & alienas: satis laudum habent, si eas habent, quas ipsis institutor eorum Deus & summus ecclesiæ catholicæ Pontifex Iesus Christus tribuit.

QUONIAM uerò fidei toto hoc libro creberrima facta est mentio, paucis ostendam porro sine fide non prodesse sacramenta, rursus fide illa percipientibus non esse superuacanea. Hoc enim uidetur adhuc ad plenam sacramentorum explanationem considerationemque pertinere. Sine fide non prodesse sacramenta, facile est ostendere. Dictum est enim sacramenta esse appendices & sigilla Euangelicæ prædicationis. Cæterum si prædicatio Euangelica audiat citra fidem, non modò nihil prodest ad uitam, sed cedit magis ad iudicium, ipso Domino attestante atque dicente, Si quis audierit uerba mea, & non crediderit, ego non iudico eum. Veni enim ut seruem, non ut iudicem mudum. Sermo quem locutus sum, ille iudicabit eum in extremo die. Sermoni Dominico quadrat hic Apostolicus, Annunciatum est nobis Euangelium, quemadmodum & patribus. At non profuit illis audisse sermonem, quòd is non esset fide cõiunctus ijs qui audierant. Quis iam usque adeò stupidus sit, ut non colligat sacramenta sine fide inutilia esse, præsertim cum idem Apostolus dicat, Quisquis ederit panem hunc, aut biberit poculum Domini indignè, reus erit corporis & sanguinis Domini: Omnis autem dignitas nostra coram Deo fide constat, eodem Apostolo rursus ex propheta dicente, Iustus fide sua uiuet. Item patres fide meruerunt testimonium. Quò & illud pertinet, quod in Euangelio legitur, Qui inuitati fuerant, non erant digni: unde consequens est dignitatem fideli constare obedientia. Huc referenda puto exempla, quorum etiam superius non semel mentio facta est, Patres nostri omnes baptizati sunt, & omnes eandem ederunt escam spiritualem, sed quidam ipsorum displicuerunt Deo. At Paulus iterum, Sine fide, inquit, impossibile est placere Deo: unde sine fide nihil proficiunt sacramenta. Notissima sunt Simonis magi & Iudæ proditoris exempla, quorum ille tinctus, hic Cœnæ adhibitus, fructu caruerunt omni: quoniam fidem ueram non habuerunt.

Sine fide non
prodesse sacra-
menta.
Ioan. 12.

Hebr. 4.

Rom. 1.
Hebr. 11.
Matth. 22.

Hebr. 11.

Augustinus do-
cet sacramenta
sine fide esse
inutilia sumen-
tibus.

His diuinis & luculentis testimonijs adiungemus iam aliquot S. Augustini locos. Is contra Faustum lib. 19. cap. 12. Petrus ait, Baptismus nos saluos facit: & ne sufficere putarent uisibile sacramentum, per quod habebant formam pieratis, & per malos mores perditè uiuendo uirtutem eius abnegarent, continuo subiicit, Non carnis depositio sordium, sed conscientia bonæ interrogatio. Item contra literas Petiliani lib. 2. cap. 7. Non ideo, ait, putandi sunt esse in Christi corpore, quòd

re, quod est ecclesia, quia sacramentorum eius corporaliter participes fiunt. Illa enim & in talibus sancta sunt, & eis indignè tractantibus & sumentibus ad maius iudicium ualebunt. Ipsi autem non sunt in illa ecclesiae Christi compage, quæ in membris Christi per connexum & contactum crescit in incrementum Dei. Illa quippe ecclesia in petra est: sicut Dominus dicit, Super hanc petram ædificabo ecclesiam meam: illi autem in arena ædificant: sicut idem Dominus dicit, Qui audit uerba mea, & non facit ea, similabo eum uiro stulto. Et rursus Tractat. in Ioan. 13. Non aliquid profunt syllabæ nominis Christi & sacramenta Christi, ubi resistitur fidei Christi. Fides autem Christi & sacramenta, est credere in eum, qui iustificat impium, credere in mediatorem, sine quo interposito non reconciliamur Deo. Hactenus August.

Obijcitur, si sacramenta sine fide nostra non profunt, pendent ergo à nostra dignitate uel indignitate, ut integra non sint inter malos & infideles. Respondet, Per se quidem sacramenta ex institutione diuina satis rata & firma sunt, nec pendet ipsorum integritas ex conditione communicantium, ut uel meliora sint inter bonos, deteriora inter malos. Manet enim firmum & integrum, quod instituit Dominus, retinetque institutionem suam bonam semper, utcunque uariant & perduelles sint homines. Nam Apostolus, Num incredulitas illorum, inquit, si- *Sacramēta non pendent à nostra dignitate uel indignitate.* dem Dei faciet irritam? Absit. Imò sit Deus uerax: omnis autem homo mendax. Verum attigimus hoc negotij nonnihil & in superioribus. Quia tamen aliud est offerre, aliud accipere, offert quidem Deus ex bonitate sua bona dona sua hominibus in hoc, ut profit ipsis & seruet eos: quemadmodum & medicus ægroto offert medicinam, ut sanet: quoniam uerò ineptus ac uasanus beneficium non agnoscit, & ægrotus medicinam oblatam respuit, nihil prodest oblatum beneficium inepto, neque ualet quicquam medicina repellenti: non culpa offerentis, beneficii, aut medicinæ, sed repellentis uitio. Ad hunc modum disputauit hac de re & sanctus Augustinus. Nam de Baptismo cōtra Donatistas lib. 3. cap. 14. Nec interest cum de sacramenti integritate & sanctitate tractatur, quid credat, & quali fide imbutus sit ille, qui accipit sacramentum: interest quidem plurimum ad salutis uiam, sed ad sacramenti quæstionem nihil interest. Item contra literas Petilianæ lib. 2. cap. 47. Memento, inquit, sacramentis Dei nihil obesse mores hominum malorum, quò illa uel omnino non sint, uel minus sancta sint: sed ipsis malis hominibus, ut hæc habeant ad testimonium damnationis non ad adiutorium sanitatis. Idem Tractat. in Ioan. 26. Si carnaliter accipis, ait, spirituale esse non desinit, sed tibi non est.

Eadem facilitate diluitur, quod obijcitur, infantibus non profuturum baptismum, si perrexerimus asserere sine fide non prodesse sacramenta: infantulos enim non habere fidem. Sic illi loquuntur. Respondemus enim principiò, baptismum infantium gratuita misericordiæ & gratiæ Dei inniti, dicentis: Ero Deus tuus & seminis tui. Item, Sinite paruulos uenire ad me, talium enim est regnum Dei, &c. Numerantur ergo censenturque infantes ab ipso Domino inter fideles, ut his iam baptismus debeatur, quatenus debetur fidelibus. Imputatione enim Dei fideles sunt infantes, Quo nimirum pertinet hoc saluatoris dictum, Qui offenderit unum de pusillis qui in me credunt, &c. Manifestè enim appellat pusillos credentes: certè propter imputationem, non propter confessionem, quæ nulla adhuc est in pusillis. His accedit & illud, quòd pater infantuli ideò cupit signo populi Dei, baptismo, foetum suum insigniri, quia credit promissionibus Dei, infantulum uidelicet suum esse de familia Dei: est itaque in infantium baptismo fides.

Atqui non credit pater. Esto. Neque uero id fraudi est infantulo. Nam in fide ecclesie affertur ad baptismum. Credit autem ecclesia infantes adducendos esse ad Dominum: credit istos esse de familia & populo Dei, ergo initiari mysterijs iubet: ut rursus in baptismo paruulorum inuenias fidem. His addit sanctus Augustinus de Peccatorum meritis & remissione lib. 1. cap. 19. dicens, Propterea fideles recte dicuntur pueri, quoniam fidem per uerba gestantium quodam modo profitentur. Plura is eadem de re disputat in Epistola ad Bonifacium, quae ordine est 23. à quo qui plura cupit, petat.

Cæterum hæc omnia, inquit, non euincunt, infantes habere fidem propriam. Nam aliena fides est fides parentum, gestantium, aut fides ecclesie. Esto. Certissimum tamen illud est, quod Dominus infantulos inter suos, hoc est, inter fideles numerat: ut iam non tantum in aliena fide baptizentur, sed in propria, quam uidelicet ipsis imputat Dominus. Præterea alienum non est, quod eidem corpori commune est. At sunt in eodem corpore ecclesiastico infantes, unde ipsis proprium non alienum est, quod ecclesie est. Neque uero quisquam hominum facile dixerit, quos præterea habeant motus spiritus sancti infantes, &c. Quia enim Dei sunt, spiritum Dei habent: quem qui non habent, Dei non sunt, Rom. 8.

*Sacramenta fidei
dem habentibus
non esse super-
uacanea.*

Vt autem in sinistram nimium declinant, quibus uisum est, sacramenta etiam sine fide prodesse sumentibus: ita in dextram nimium recedunt, qui putant, eadem fidem habentibus esse superuacanea. Fides, inquit, plenè absoluit nos, ut post illam nihil possint addere sacramenta, idcirco necesse est ipsa esse inutilia. Tales quondam fuisse leguntur Messaliani, qui & Euchitæ & *ἐκλεκτοὶ* appellantur, diuini, si diis placet, & afflati numine. Contendebant enim fidelibus post spiritum sanctum acceptum, nullis opus esse sacramentis. Cæterum sunt isti in Deum ipsum iniurij, qui uidelicet sacramenta instituit fidelibus, non sine magna causa, nec inutiliter. Et Abraham quidem credidit Deo, id quod ipsi imputatum est pro iustitia, amicusque Dei iustus & sanctus, non utique sine spiritu sancto, habitus est: at idem ille circumcisionem accepit, signaculum iustitiæ fidei quæ fuerat in præputio. Eidem Abraham dicitur, Masculus cuius præputij caro circumcisa non fuerit, delebitur anima illa de populo suo: quia pactum meum irritum fecit. Certè angelus Domini eadem intentans imminet Mosi, quod circumcisionem iustius æquo, uel sua negligentia, uel Madianiticæ uxoris culpa, in liberis suis distulisset. An uero quisquam iustior & sanctior inuenietur Dei filio, utpote qui plenitudine spiritus accepta, ut caput, de illa in sua membra diffudit liberalissimè: attamen hic uenit ad Baptistam, & postulat ab eo baptizari in Iordane: cumque is tergiuersaretur ac diceret, Mihi opus est abs te baptizari, & ego te baptizarem: audit, Sine modò, sic oportet nos omnem implere iustitiam. Iustitia certè cuique suum tribuit. Fides ergo quæ Christianorum iustitia est, tribuit gloriam Deo, creditque hunc summè sapientem bene uelle hominibus, atque ideo nihil inutiliter instituisse, sed omnia in salutem suorum fidelium: utitur ergo omnibus Dei institutis homo fidelis absque disputatione ac contradictione. Nec quisquam hinc, opinor, dixerit nihil ad se pertinere factum Christi, quo utique nobis exemplum prætulit, quod imitaremur. Imò quod ipse fecit, alios quoque facere iussit, dum discipulos amandaret & diceret, Ite in orbem uniuersum, & prædicate Euangelium omni creaturæ, baptizantes eos in nomine patris, &c. Qui enim crediderit, & baptizatus fuerit, saluus erit: coniungens utique & fidem & baptismum, quod haud dubiè non fecisset, si sacramenta superuacanea essent, ubi fides est. Vbi manifestè claret & illos errare toto cælo, qui arbitrantur sacramenta esse in-

Exod. 4.

Matth. 3.

*Sacramenta non
sunt indifferen-
tia.*

disse-

differentia, hoc est, in nostro constitutum arbitrio, siue illis utamur, siue non utamur. Nam ut de baptismo iam apertum præceptum audiuius: ita Coenam instituens & celebrans dominus ait, Hoc facite in mei commemorationem. Qui ergo hæc Dei præcepta contemnit, non uideo quomodo fidem habeat, qua inuisibiliter sanctificari possit. Huc iam pertinet, quod fidelis ille princeps Æthiopicus confitetur, se toto corde credere in dominum Iesum, nihilominus tamen uisita aqua dicit, Ecce aqua, quid uetat quo minus baptizer? Non dicit, Credo toto corde, & sentio me iustificatum esse atque purgatum, quorsum ergo aqua abluerer, qui nihil sordium habeo reliquum? Proinde ubicunque uera fides est, ibi non contemnuntur aut repelluntur, sed petuntur magis sacramenta. Nam & Cornelius Centurio accepto spiritu sancto non contradicit Petro dicenti, Quis iam prohibere potest, quo minus baptizentur aqua hi, qui perinde ut nos spiritum acceperunt? Fidelis erat euangelij præco Petrus, peritus ueritatis doctor, neminem ergo fallit, & suo nos facto docet, fidem tum maxime ad communionem sacramentorum incitare, cum uera est in fidelibus. Cui consentiens collega Paulus, Probet seipsum homo, inquit, & deinde edat de pane, & bibat de poculo hoc. At probatio illa fide fit: fides ergo sacramenta non respuit, sed perfidia.

Scio sanè plurimos citra usum uisibilium sacramentorum sanctificatos esse, & hodie quoque sanctificari: sed nullus illorum spreuit aut contempsit illa: necessitate adacti his non communicarunt, ut hodie sunt, qui sub tyrannide antichristi & Turcæ captiui tenentur, interea uerò toto corde credunt in dominum Iesum. Ergo horum aut similium exempla ipsi nihil patrocinantur, quibus liceret communicare sacramentis, si instituta Dei curarent, tantum æstimarent, quanti facerent meritò. Ascribam hic in lectorum gratiam elegantem sancti Augustini de hac re disputationem, quod institutum nostrum pulchre illustret. Quæstio. lib. in Leuit. 3. cap. 84. Meritò, ait, quæritur, utrum etiam inuisibilis sanctificatio, sine uisibilibus sacramentis, quibus uisibiliter homo sanctificatur, nihil prosit? Quod utique absurdum est. Tolerabilius enim quisque dixerit, sine illis istam non esse, quam si fuerit non prodesse: cum in ista sit omnis utilitas illorum. Sed etiam hoc, quod sine illis ista esse non possit, quomodo rectè dicatur intuendum est. Nihil quippe profuit Simoni mago uisibilis baptismus, cui sanctificatio inuisibilis defuit: sed quibus ista inuisibilis quoniam affuit, profuit, etiam uisibilia sacramenta perceperunt similiter baptisati. Nec tamen Moses qui uisibiliter sacerdotes sanctificabat, ubi fuerit ipse uisibilibus sacrificijs uel oleo sanctificatus ostenditur: inuisibiliter uerò sanctificatum negare quis audeat, cuius tanta gratia præminebat? Hoc & de Ioanne Baptista dici potest. Prius enim baptisator quam baptisatus apparuit: unde eum sanctificatum nequaquam negare possumus: id tamen in eo factum uisibiliter non inuenimus antequam ad ministerium baptisandi ueniret. Hoc & de Latrone illo, cui secum crucifixo dominus ait, Hodie mecum eris in paradiso. Neque enim sine sanctificatione inuisibili tanta felicitate donatus est. Proinde colligitur, inuisibilem sanctificationem quibusdam adfuisse atque profuisse sine uisibilibus sacramentis: uisibilem uerò sanctificationem, quæ fieret per uisibilia sacramenta, sine ista inuisibili posse adesse, non posse prodesse. Nec tamen ideo sacramentum uisibile contemnendum est. Nam contemptor eius inuisibiliter sanctificari nullo modo potest. Hinc est, quod Cornelius & qui cum eo erant, cum iam inuisibiliter infuso sancto spiritu sanctificati apparerent, baptisati sunt tamen, nec superflua iudicata est uisibilis sanctificatio, quam inuisibilis iam præcesserat. Hæc ille.

Sine uisibilibus sacramentis sanctificamur multi.

Cypriani error
de sacramento
baptismi.

Ioan. 6.

H V I C disputationi affinis est & alia quaestio, An uidelicet sacramenta pendeant à dignitate ministrorum, an eorundem indignitate impendantur? Cyprianus non uno loco contendit, eos baptizare non posse, qui carent spiritu sancto. Qui error inde est, quòd baptisandi ministerio tribuit nimium. Arbitratur hoc homines purgari: colligit itaq; hominem impurum purgare non posse, ergo nec baptizare, baptismumq; hominis impuri non esse baptismum: unde iam deriuat anabaptismum. Ceterum si uir sanctus ritè & religiosè distinxisset inter potestatem & ministerium, deniq; inter signum & signatum, externam & internam sanctificationem, uidisset haud dubiè mera nos Dei gratia sanctificari inuisibiliter, & internam illam sanctificationem extra per ministerium representari & obsignari: ibi intellexisset obsignatas literas non minus à malo quàm bono ministro proferri posse. Dei sunt sacramenta, ad Deum referenda auctorem, qui uerax & fidelis est in omnibus institutis suis, utcunq; fallaces sint homines. Quamquam fur esset Iudas, docuit tamen & baptizauit, cuius doctrina & baptismus non minus Christi doctrina & baptismus erat, quàm Petri & Andreae, Iacobi & Ioannis. Ac de integritate quidem cùm doctrinae tum baptismi Iudae ministerio administrati, nemo dubitauit unquam, quasi nec docti nec baptisati fuerint, quos ille docuit & baptizauit, qui interim ab ipso domino non homo diabolicus, sed ipse diabolus appellatur. Nam non suo, sed Christi nomine baptizauit: non suam sed Christi doctrinam attulit. Deniq; dominus ex bonitate sua propter ueritatem suam, non propter Iudam, operatus est in fidelibus, quam operationem aliena infelicitas & malitia impedire non potuit, sicut ne hodie quidem impedit. Conandum quidem nobis modis omnibus, ut sancti & innocentes sint ministri, quantum uidelicet nostra fide & industria indagare & efficere possumus: imò gradibus suis deiciamus, quos deprehenderimus se sua functione indignos gerere: interim uerò nihil dubitemus de sacramenti integritate, quod illi nobis dum in officio fuerunt, administrarunt, ea ratione uidelicet modoq; quo dominus instituit. Ac fideles quidem ut animos suos non defigunt in elementa, ita neq; in ministros. Deum auctorem omnis boni & finem institutorum domini spectant unicè in omnibus.

Tractauit hoc negotium diligenter S. Augustinus, non inefficacia argumenta pulchrè his accommodans, cuius uerba ascribam. Libro contra Donatistas de Baptismo 3. cap. 10. Non est aqua prophana, inquit, aut adultera, super quam nomen Dei inuocatur, etiamsi à prophanis & adulteris inuocetur: quia nec ipsa creatura, nec ipsum nomen adulterum est. Baptismus uerò Christi uerbis euangelicis consecratus, & per adulteros & in adulteris sanctus est, quamuis illi impudici sint & immundi: quia ipsa eius sanctitas pollui non potest, & in sacramento suo diuina uirtus asistit, siue ad salutem bene utentium, siue ad perniciem male utentium. An uerò Solis uel etiam lucernae lux cum per cœnosa diffunditur nihil inde fordidum contrahit, & baptismus Christi potest cuiusquam sceleribus inquinari? Si enim ad ipsas res uisibiles quibus sacramenta tractantur animum conferamus, quis nesciat eas esse corruptibiles? Si autem ad id quod per illas agitur, quis non uideat non posse corrumpi: quamuis homines per quos agitur pro suis moribus uel pramía percipiant uel pœnas luant? Et cetera. Possem huius generis multa proferre, si putarem necessaria. Arbitror enim illis copiose & dilucidè satis declaratum esse, integritatem sacramentorum non aestimari dignitate uel indignitate ministrorum, sed Dei instituentis ueritate. Ei sit gloria & imperium in secula seculorum, Amen.

De

De sancto baptismo, quid, à quo, quando institutus, & quod aqua vnus duntaxat sit. De baptismo ignis. De ritu baptismi, quomodo, à quo, & quibus conferendus sit. De baptismo obstetricum, & infantibus sine baptismo decedentibus. De paruulorum baptismo, contra anabaptismum; & de virtute vel efficacia baptismi. SERMO VIII.

RESTAT ut sigillatim differamus de sancto Baptismo, & de sacra Coena domini. Id quod tanto succinctius fieri potest, quanto fufius iam diximus in genere de Sacramentis. Christus dominus aperiat vobis mentes, & dirigat linguam meam in gloriam & laudem nominis eius benedicti in secula.

Baptismus vox est à Græcis petita, qui utrunq; sicuti & Latini Baptismus & baptisma dicunt. Est autem baptismus tinctio, qua uoce libenter utitur Tertulianus. Significat enim βαπτίζω tingo uel intingo, & βάπτισμα immergo: unde & Baptizare usurpatur pro immergere, abluere uel lauare: & baptismata in scripturis ponuntur pro lauacris & purificationibus, sicuti claret apud S. Marcum in cap. 7. & apud Paulum Hebr. 9. cap. Eodem baptismo baptizari prouerbialiter dictum est, pro eo quod est eiusdem periculi uel mali consortem esse. Et baptizari sanguine, est perfundi sanguine.

Baptismum finiunt ferè symbolum esse purgationis nostræ, imò initiationis quo recipimur in Ecclesiam, ut inter filios Dei recenseamur. Copiosius uerò naturam eius describentes, dicimus baptismum esse actionem sacram, diuinitus institutam, ac uerbo Dei rituq; sacro constantem, quo Dei populus in nomine domini aqua tingitur, quo denique ipse dominus suam nobis purgationem repræsentat & obsignat, in unum corpus congregat, & baptizatos sui admonet officij.

Circa hanc Baptismi descriptionē uidentur hæc potissimū esse considerata, Quis instituerit baptismum. Quibus rebus cōstet. Simplex ne sit, an in partes distrahatur. Quis sit ritus baptisandi traditus. Quis finis, quæue uirtus baptismi.

Instituit Baptismi sacramentum non homo aliquis, sed ipse Deus, licet per hominem, nempe Ioannem, qui ex eo Baptistæ nomen inuenit. Hoc ut intellegeremus, euangelistæ multis approbarunt nobis uocationem Ioannis fuisse coelestem. Inde enim colligere possumus, ministerium eius esse diuinum. Quid quod ipse disertis uerbis, Qui misit me ut baptizarem aqua, inquit, is dixit mihi, Super quem uideris spiritum sanctum? &c. Ioan. 1. Sed & dominus noster in Euangelio innuens baptismum Ioannis non ex hominibus, sed ex Deo profectum esse, interrogat Phariseos, Baptismus Ioannis ex hominibus ne an ex cœlo erat? Proinde baptismum sancti etiam hodie accipiunt perinde ut ab ipsius Dei manibus, licet hominum ministerio baptizentur. Dominus enim spiritu suo suis assisistens institutis, operatur in electis salutem. Vnde consequens est, per malum ministrum non impediri uirtutem aut effectum baptismi. De quo aliàs dictum est atq; dicitur.

Eo tempore uerò institutus est à Deo, & inceptus à beato Ioanne baptismus, quo hic palàm predicare cœpit tempus impletum, & Christum orbi præstitum esse. Atqui re exhibita, signa rerum futurarum uel exhibendarum non manere, sed mutari in alia oportuit. Circuncisio autem fuit symbolum uenturi seminis benedicti, ipsius, inquam, Messia, qui effuso sanguine benedictionem suam totimundo collaturus erat. Ergo cum hic uenerat, & iam iam effusus erat sanguinem, circuncisionem mutari oportuit in baptismum. De quo postea.

Constat autem Baptismus signo & re signata, uerbo uel promissione Dei, &

ritu sacro uel ceremonia. Signum est actio externa, ipsa, inquam, aspersio aquæ in nomen patris, & filij, & spiritus sancti, cum inuocatione nominis diuini. Promissio uel uerbum Dei est, Baptisantes eos. Qui crediderit, & baptisatus fuerit, saluus erit. Et reliqua. De quibus Sermonem v. i. abundè satis diximus.

*Vnus duntaxat
baptismus.*

Pleriq; ueterum distinxerunt inter baptismum Ioannis Baptistæ, & baptismum Christi ac Apostolorum. Etenim negant aliqui remissionem peccatorum comprehensam fuisse baptismo Ioannis. Cæterum si diligenter inspiciamus, & expendamus scripturæ sanctæ doctrinam, deprehendemus Ioannis baptismum, & Christi, apostolorumq; unum atq; eundem esse. Certè doctrina Ioannis, Christi, & apostolorum, una & eadem est ubiq;. Omnes enim uno ore prædicant euangelium, & per hoc poenitentiam & remissionem peccatorum in nomine Christi. Conferat qui uelit ea quæ Ioannes euangelista tradidit de doctrina Ioannis Baptistæ primo & tertio capite: & ea quæ Lucas tradit in 24. cap. euangelicæ historiæ, & in Actis Apostolorum, de doctrina Christiana & apostolica, & dicet unam atq; eandem esse omnium doctrinam. Cæterum doctrinæ apponitur baptismus, ueluti sigillum tabulæ. Quis ergo credat eiusdem doctrinæ diuersa esse sigilla uel baptismata? S. Ioannes aqua baptizauit: non aliam materiam quàm aquam commendauit discipulis dominus, neq; hialiter quàm aqua baptizauerunt. Illi ipsi baptizauerunt in Christum, in poenitentiam & remissionem peccatorum. At de Ioanne baptista scribit S. Marcus, Baptizabat Ioannes in deserto prædicans baptismum poenitentiae in remissionem peccatorum. Et S. Paulus loquens de doctrina & baptismo Ioannis, Ioannes, inquit, baptizauit baptismum poenitentiae, populo loquens de eo qui uenturus esset post ipsum ut crederent, hoc est de Christo Iesu. Ex his uerò quis non colligat eundem omnino baptismum esse Ioannis & Christi? nisi fortè hoc uideatur alicui aliquid discriminis inducere, quòd Ioannes in uenturum uel reuelandum baptizauit, apostoli in reuelatum. Sed non uideo tantillum temporis spacium quidpiam posse adferre discriminis: præsertim cum tantum ab initio prædicationis suæ Ioannes loqueretur de reuelando. Mox enim & præsentem digito demonstrauit, testimoniumq; exhibuit præsentis & reuelato, non uenturo amplius aut reuelando. Huic accedit quòd Christus non alio quàm S. Ioannis baptismum tinctus est. Si autem baptismus Ioannis alienus esset à Christianæ ecclesiæ baptismum, consequeretur neque Christum in nostro, neq; nos in Christi baptismum baptizari. Atqui Christus baptismum Ioannis sanctificauit corpore suo, & in eandem societatem tingi nobiscum dignatus est, qui & ipsi tingimur hodie in baptismum, non Ioannis quidem, sed Christi, qui per Ioannem baptismum instituit, & ipse eundem consecrauit. Proinde dominus apud Matth. in 28. cap. & apud Marcum in 16. cap. non abrogat baptismum à Ioanne cœptum, non instituit nouum, sed eundem iubet continuare & conferre credentibus in nomen patris & filij & spiritus sancti.

*De baptismo
Christi, qui &
ignis.*

Quod autem ipse Ioannes dicit, Ego baptizo aqua, ille baptizabit spiritus sancto, non discreuit inter aquæ baptismum suum & Christi: sed Christo amplius quiddam tribuit, quod nullus hominum uel ministrorum (errarunt enim qui quondam baptizarunt igni) cum ipso commune habet, sed solus confert, nempe baptismum ignis, id est, singularia dona spiritus sancti, in primis autem usum linguarum sub specie ignis. Sic enim hoc negotium exponitur in Actis ab ipso primùm domino Christo, deinde per experientiam in Ecclesia. Dominus enim dicit, Ne discefferitis Hierosolyma, sed expectate promissum patris: de quo audivistis ex me, Quoniam Ioannes baptizauit quidem aqua: uos autem baptizabimini

Acto. 1.

zabimini spiritu sancto post dies hosce non multos. Et consequenter die ipso pentecostes baptismo Christi baptizati sunt, non aqua rursus, sed donati sunt spiritu sancto, insidentibus singulorum ipsorum capitibus dissectis linguis uelut igneis: & coeperunt loqui linguis diuersis. In Actis baptizati sunt baptismo Christi in aqua legitime & plenè Samaritani ciues à Philippo: sed illi ipsi postmodum baptizantur peculiari baptismo Christi, dum per impositionem manuum Petri & Ioannis accipiunt spiritum sanctum. Non quòd haftenus prorsus caruerint dono spiritus sancti, (Quomodo enim sine spiritu sancto credere potuissent?) sed quòd præterea uisibili ignis baptismo sint baptizati, & linguarum donum acceperint, aliàq; dona excellentia. Sicut & de Cornelio legitur, qui pri-
 mum quidem igne, Christi inquam baptismo peculiari baptizatus, linguis loque-
 batur, deinde uerò aqua tinctus est. Contra uiri illi Ephesij duodecim, primo
 Ioannis, adeoq; Christianæ ecclesiæ aquæ baptismo plenè tincti, deinde uerò im-
 ponente eis manus Apostolo Paulo, non rursus aqua sed igne baptizati sunt,
 Luca testante & dicente, Venit spiritus sanctus super eos, & loquebantur linguis
 & prophetabant.

Acto. 8.

Acto. 10.

Acto. 19.

Cæterum hic baptismus ignis & uisibilis exhibitio donorum disparuit unà cum miraculis, nec hodie uisatus aut uulgaris est in Ecclesia: manet autem baptismus aquæ, qui unus atq; idem est, siue administretur Ioannis, siue Apostolorum, siue ministrorum Ecclesiæ diuersis manibus. Nam diuersæ manus non faciunt diuersa baptismata. Rectissime ergo credimus unum modò & simplex esse baptismum omnium temporum fidelium. Nam & Paulus disertis uerbis, V-
 nus, inquit, Dominus est, una fides, unum baptismum, unus Deus & pater omnium. Quo nimirum & hoc apostoli eiusdem pertinet, Gratias ago Deo quòd neminem
 uestrum baptizarim, nisi Crispum & Caium, ne quis dicat quòd sub nomine meo baptizarim. Huic ueritati Apostolicæ innixi patres Constantinopol. Synod. in
 symbolo suo confessi leguntur, Credo unum baptismum in remissionem peccato-
 rum. Etenim una duntaxat est Ecclesia, unum corpus, unicum caput, & unus rex,
 princeps & pontifex catholicæ Ecclesiæ.

Ephes. 4.

1. Cor. 1.

Venimus iam ad ritum baptismi explicandum. Simplex hic fuit ab initio, & nullis ceremonijs immoderatis ecclesiæ uel sumptuosus uel onerosus. Baptiza-
 uit Ioannes in Aenon iuxta Salim, quia aquæ multæ erant illic: & baptizauit in
 nomen Christi. Sic fecerunt etiam Apostoli. Vnde indubitatum relinquitur
 optimam esse formam baptisandi, quæ sit aqua in nomen patris, & filij, & spiritus
 sancti. Sic enim præcepit dominus Matth. 28. Rogas qui factum sit quòd Lucas
 in Actis commemoret Petrum & Paulum baptizasse in nomen domini, & non
 exprimat eos baptizasse in nomen patris & filij & spiritus sancti? Respondeo
 sub nomine domini comprehendì trinitatis mysterium. Cum enim dominus di-
 xerit, Ego & pater unum sumus, qui in dominum baptizatur, etiam in patrem
 baptizatur, ita & in spiritum sanctum, qui ab illis non diuiditur. Est enim ambo-
 rum unus atq; idem spiritus. Vel certè in domini nomine baptizatos dixit Lu-
 cas ab Apostolis, quos apostoli baptizauerunt iuxta institutionem domini. Alij,
 Christus complementum est, inquit, & proprium obiectum baptismi: unde
 mirum non esse, quòd in nomen domini baptizarunt Apostoli, qui tamen iussi
 fuerant baptizare in nomen patris & filij & spiritus sancti. Omnia enim myste-
 ria baptismi in unico nobis Dei filio proponi. Dicitur autè utrumq; Baptizare in
 nomen domini, & Baptizare in nomine dñi. Priore forma loquendi usus legitur
 Matth. cap. 28. & Lucas Acto. 19. Vterque enim habet eis τὸ ὄνομα in nomen. Et ita

De ritu baptis-

mi.

Ioan. 3.

Quid Baptizare
in nomine
domini.

interpretatur etiam Tertullianus contra Praxeam dicens, iussit tingi in patrem & filium, &c. Posteriore forma ὡς τῷ ὀνόματι & ἐπὶ τῷ ὀνόματι, In nomine, utitur idem ille Lucas Acto. cap. 10. & 2. Porro quid sit Baptizare in nomen uel in nomine domini, dixi proximè præcedenti sermone, nimirum inscribi in familiam Dei, ut baptizatus recipiat iam nomen Dei, dicaturq; filius Dei, adeoque inscribatur quasi in catalogum filiorum Dei, ciuium regni cœlorum. Vnde & nomina nobis imponuntur uel dantur in baptismo, ut quoties nominari nos audimus, baptismi meminerimus & mysteriorum eius. Neq; nouum & alienum est à scripturis quòd nomina dantur nobis in baptismo. Ita enim usurpatum est & in Circuncisione, quod uidere licet Lucae 2.

1. Cor. 14.

Luc 3.

Quæritur præterea, An nudis hisce uerbis, Baptizo te in nomen patris & filij & spiritus sancti, baptizare oporteat, an aliquid addere uel coniungere liceat? Respondendum censeo, seruum domini nihil addere institutioni domini sui, sed diligenter retinere quod ille tradidit, diligenter item obseruare quid inter baptizandum ipse dominus cum apostolis suis fecerit, ac illa sanctè imitari, ut in Ecclesia omnia decenter & secundum ordinem, ita ut Paulus iussit, fiant. Caterum post traditam illam baptizandi formam sanctissimam, cernimus duo apud sanctum baptisma & in eius usu esse obseruata. Principiò enim differuerunt apostoli & uiri apostolici significanter de promissionibus Dei, & fide in Christum. Id quod claret in Actis Apostolorum. Licet ergo in actione baptismi recitare diuinas promissiones, recitare symbolum, & requirere fidem, uel à baptizandis adultis, uel ab illis qui infantes afferunt ad baptismum. Deinde cum baptizaretur dominus in Iordane à Baptista, orabat. Id quod de eo tradit Lucas in historia euangelica. Licet ergo in usu baptismi orare & solenniter inuocare dominum. Ab initio moderatissimæ hæc & breues fuerunt, non in immensum extensæ preces: temporibus succedentibus nullus seruatus est modus, non modò in prolixis benedictionibus, sed & in uarijs ritibus, quos adiecit posteritas. De quibus aliquid ex ueteribus recitare non inutile prorsus fore uidetur.

Ceremonie olim
in baptismo
adiectæ.

Tertullianus in libello de Corona militis, Aquam adituri, ibidem, inquit, sed & aliquanto prius in Ecclesia sub antistitis manu contestamur nos renunciare diabolo & pompæ & angelis eius. Dein ter mergitamur, non (quidam omittunt non) amplius aliquid respondentes, quàm dominus in euangelico determinauit. Inde suscepti lactis & mellis concordiam prægustamus: exq; ea die lauacro quotidiano per totam hebdomadam abstinemus. Audimus in his abnegationem, uel abrenunciationem, ternam mersionem, lactis & mellis degustationem, & abstentionem balneorum à baptismo per integram septimanam. Libro primo contra Mart. meminit & olei. Certè Lac conuenit infantibus, quibus etiam adulti baptizati assimilantur. Præterea in ueteri testamento frequentissima est mentio promissæ terræ lacte & melle fluentis. Ea iam prægustanda baptizatis offerebantur, ut intelligerent se duce Iesu & transmissio Iordane in terram promissionis per spem infallibilem esse repositos. S. Hierony. lacti uinum additum testatur, & ait, Comment. lib. 15. ad Isaiam, Dominus prouocat, ut non solum emamus uinum, sed & lac: quod significat innocentiam paruulorum: qui mos ac typus in Occidentis ecclesijs hodie usq; seruatur, ut renatis in Christo uinum & lac tribuatur. Hodie neutrum tribuitur infantibus, etiam ab illis qui ueterum rituum seueri uindices uideri uolunt. Interim credunt suam illam omissionem carere piaculo. Iam etiam colligere licet ex 6. lib. Augustini de Bapt. contra Donat. cap. 24. uarias & liberas fuisse circa baptismum usurpatas preces. Idem contra

contra Pelagium & Celest. lib. 2. cap. 40. In pueris baptizandis, ait, prius exorcizatur & exufflatur potestas contraria. Cui etiam uerbis eorum à quibus portantur sese renunciare respondent. Eiusdem ritus meminit & in lib. 1. de Nupt. & concup. ad Valer. cap. 20. & lib. 2. cap. 18. In Ecclesiasticis dogmatibus dicitur illum ritum in uniuerso mundo sanctam obseruare ecclesiam. Rursus August. Epistola ad Bonifacium 23. dicit susceptores fidei iubere pro paruulis & confiteri fidem. Interrogamus, ait, eos à quibus offeruntur, & dicimus, Credit in Deum? (de illa ætate quæ utrum sit Deus, ignorat) respondent Credit: & ad cætera sic respondetur singula quæ geruntur. Idem lib. de Trinitate 15. cap. 26. etiam olei meminit quo inungebantur baptizati. Sequutus deinde multa post tempora Augustinum Rabanus Maurus Moguntinus Episcopus, multò plures baptismi ceremonias commemorat. Nam lib. de Instit. cler. 1. cap. 27. In fronte & corde signantur, inquit, baptizandi cruce, ut diabolus hoc signum uidens, uas illud à se alienatum sciat. Datur puero item benedictum sal in os: ut sale sapientiæ conditus, foetore careat iniquitatis, nec à uermibus peccatorum ultra putrescat. Tanguntur illius aures & nares saliuæ, addita saluatoris uoce Ephatha, ut uirtute summi sacerdotis Christi aperiantur aures eius ad percipiendam Dei notitiam, & ad audienda mandata Dei. Hinc benedicitur puero & inungitur pectus eius oleo sancto: ut nullæ in eo inimici latentes reliquiæ resideant. Post hæc in nomine sanctæ Trinitatis ter in mersione baptizatur. Et cap. 28. Baptizatus statim signatur in cerebro chrismate, sequente simul oratione, ut regni Christi particeps fiat, & à Christiano Christianus possit uocari. Et cap. 29. Post baptismum traditur Christiano uestis candida designans puritatem & innocentiam. Sed & hanc ob causam albis uestibus induebantur baptizati, quòd meminissent se iam manumissos, & è seruis ac mancipijs diaboli liberos factos Iesu Christi. Erat præterea candidus color quondam uictoriæ consecratus & triumpho. Vnde uideri poterat uestem candidam ideò baptizatis datam, ut cogitarent sibi perpetuò dum hic uiuunt in terris esse pugnandum & uincendum in Christo. Nam militiæ est uita hominis super terram. Certè quòd donatiua baptizatis quoque dari cœpere à susceptoribus uel patrinis, & ipsum petiuit uidetur à militiæ. Nam donatiuo seu authoramento (quod Heluetij nomenamur die ynbinderen) admonetur baptizatus datæ fidei in baptismo, ut semper sit memor quem deseruerit imperatorem, & in quæ castra transierit, in quibus fidem datam nouo imperatori Christo seruet. Multa alia huius generis apud postremi seculi scriptores consignata uolens transeo, ne uidear abuti uestra beneuolentia. Quis autem non intelligat & alia huius generis innumera quotidie posse affingi baptismis? Tutissimum ergo fuerit primis insistere beatorum Apostolorum fundamentis. Si enim uetustas uidetur his posterius inuentis patrocinari ritibus, quis negare audeat authoritatem Apostolicam multis modis excellere? Nam Apostoli præcesserunt illos omnes, qui posterius adinuenerunt ac tradiderunt uarios illos in baptismo usurpandos ritus.

Venit & hoc in quæstionem. An aqua pura, an consecrata oporteat baptizare: & quare aqua iusserit Dominus baptizare? S. Cyprianus Epist. lib. 1. Epist. 12. Oportet mundari & sanctificari, inquit, aquam prius à sacerdote, ut possit baptismis suo peccata hominis, qui baptizatur, abluere. Cæterum plus apud me ualent scripturæ sanctæ exempla & testimonia, quàm S. Cypriani aut alterius hominis qualis qualis sit authoritas. Errauit aliàs quoque optimus hic uir Dei in negotio baptismi, ut scripta eius cum iudicio legere oporteat. Scriptura tradit nobis Ioannem Baptistam, & Apostolos discipulosq; Christi fideles aqua non

An aqua non
consecrata ba
ptizandum.

consecrata baptizauisse. Quid enim clarius dici aut legi poterat, quam quod Iohannes in Iordane baptizauit? Adde quod ipsum Christum in Iordane, & Apostolos quoque baptizauit. Vbi, aut quomodo consecrauerunt Apostoli aquam baptismi in Actis Apostolorum? Philippus Eunuchum aquam ex itinere ostendentem baptizat ex fonte puro ac limido. Præterea subindicaui Sermone proximè præterito, quam parum sit pura forma illa uulgaris qua consecratur fons baptismi. Si quis uerò sentiat aqua consecrata baptizari oportere: ac per consecratam intellexerit nec unctam, nec characteribus precaminibusque paratam uel sanctificatam, sed sacris delectam usibus, nihil cum eo contenderim. Aqua enim baptismi reuera est sancta, non propter uerba recitata, & additos characteres, sed ex instituyente Deo, & propter usum sanctum, orationesque sanctorum. De qua re differui cum loquerer non ita pridem de sanctificatione uel consecratione sacramentorum.

*Quare aqua
baptizare iussit
Dominus.
1. Pet. 3.
1. Corinth. 10.*

Aqua autem iussit suos baptizare propter causas varias. Præcesserunt enim typi baptismum in aqua, ut diluuium, ut mare rubrum, per quod transiit populus Israeliticus, ut ablutiones uariæ uel baptismata certa in lege tradita. Nec dissimulant illa Apostoli Christi. Petrus enim commemorat Noe seruatum esse aqua diluuii, impios autem aquis præfocatos. Paulus asserit omnes patres nostros per Moysen baptizatos esse in nube & in mari. Mortificatio ergo & uiuificatio præfigurata est. Et primarium quidem noui testamenti symbolum est baptismus, testificans plenariam ad nos peccatorum remissionem delatam esse per Christum. Hanc autem prænunciantes ac promittentes ex ore Domini sancti prophetae, libenter summum hoc beneficium adumbrarunt per aquam: ideo oportuit baptismum dari in aqua. Hæc item seruiebat mysterio pulchre representando. Qua de re dixi proximo Sermone cum differerem de Analogia. Hæc uerò ob causas potissimum oportuit baptismum in hoc, & non in alio dari elemento.

*Semel an ter
mergendus in-
fans.*

Disceptatum est & de hoc, semel ne an ter mergendus aut aspergendus sit baptizandus? Equidem nihil de his præceperunt Apostoli curiosius. Proinde liberum est uel aspergere uel immergere. Aspergio uidetur usurpata ueteribus. Honestas enim ac pudor uetabat nudare corpora. Sed & infantium conditio prohibet ferè immersionem, cum & aspergio tantum efficiat quantum immersio. Stat autem in arbitrio dantis baptismum, ut pro consuetudine ecclesiæ, cuius minister est, semel uel ter aspergat. Tertullianus aduersus Praxeam, Dominus mandauit, inquit, ut tingerent in patrem, & filium, & spiritum sanctum. Non in unum: nam nec semel, sed ter, ad singula nomina in personas singulas tingimur. Gregorius uerò Leandro respondens Episcopo, In una fide, inquit, nihil officit sanctæ ecclesiæ consuetudo diuersa. Nos quod tertio mergimus, triduanæ sepulturæ sacramenta significamus. Rursus patres Synodi Toletanæ IIII. approbarunt simplam baptismi immersionem: & addunt mox causam hanc, Et ne cuiquam sit dubium huius simpli mysterium sacramenti, uideat in eo mortem & resurrectionem. Nam in aquas mergitio, quasi ad infernum descensio est, & rursus ab aquis emissio, resurrectio est. Item uideat in eo unitatem diuinitatis & trinitatem personarum ostendi. Unitatem, dum semel mergimus: trinitatem, dum in nomine patris, & filij, & spiritus sancti baptizamus. Hæc non proferimus quod humanis testimonijs innitatur, sed ut humano quoque testimonio ostendamus liberum esse sequi, quod maxime ædificationi ecclesiarum seruit.

*De loco bap-
tismi.*

De loco item baptismi assertur quæstio, An non liceat alicubi quam in templo baptizare? Dicimus templum ministerijs & cultui Dei consecratum esse, ideoque ipsum decorum flagitare, ut baptizemus publice in templo. Si autem
necessitas

necessitas hoc non permiserit, nulli loco alligatus est Christi baptismus. Nam audiuius Philippum baptizasse ex fonte in patenti campo. Cauendum tamen ne necessitatem prætexamus prauis affectibus. Munda autem sint omnia in templo ad baptismum pertinentia: absit omnis luxur, absint sordes & impuritas, omnia decenter, ut inquit Apostolus, & secundum ordinem fiant.

De Tempore nulla præscribitur à Domino lex, iudicio piorum id relinquitur liberum. Qui crediderunt prædicationi S. Petri Hierosolymis in die Pentecostes, Eunuchus item quem Philippus tinxit, Cornelius quoque Centurio, Paulus denique Apostolus Damasci, sed & Lydia purpuraria mulier religiosa, custos item carceris Philippici & alij uiri ac mulieres fideles, simul atque gustarunt dona Christi & crediderunt uerbo eius, protinus baptizari desiderarunt: non distulerunt in ullum tempus proximum. Vnde rectissime faciunt, qui neque in semetipsis, neque in suis baptismum suscipere cunctantur. Male cessit Mosi dilatio circumcisionis in liberis suis. Vt ergo tempus baptismi libenter concedimus esse liberum, ita nostrum fuerit cauere ne abutamur nostra libertate: memores semper diuinæ sententiæ, *Genes. 17.* Anima cuius caro præputij non fuerit circumcisa, delebitur de populo suo: quia pactum meum irritum fecit. At non ignoramus in locum circumcisionis subijisse baptismum. Itaque non est libera baptismi omissio. Cypriani seculo fuerunt qui contenderent baptismum ad similitudinem circumcisionis octaua demum die recipi oportere. At Cyprianus & qui cum ipso fuerunt in Synodo Episcopi & presbyteri L X V I. diuersum statuerunt, nempe ut quisque nulla interiecta mora baptismum accipiat, ac in suis procuret maturè. Locus extat Epist. lib. 3. Epist. 8. Porro Socrates historicus lib. 5. cap. 22. Noui & aliam, ait, Thessaliæ consuetudinē, qua solis paschatis diebus baptizant. Vnde fit, ut præter admodum paucos non baptizati moriantur. Post tempora uerò aliquot lata est lex de non baptizandis fidelibus, nisi in festiuitatibus Paschæ & Pentecostes. Exceperunt tempus necessitatis. Id legere licet in Decretis Syricij Pont. apud Isidorum: item in Epistolis Leonis Papæ ad Episcopos Campaniæ & Siciliæ, quæ ordine numerantur 57. & 62. Quæ autē istos huc permouerunt, huiusmodi sunt ut facile dilui possint. Certè ab initio tempus baptismi non fuit ita circumscriptum. Reparata est tamen illa lex de baptizandis fidelibus in festo Paschæ & Pentecostes, à Pipino, Carolo, Lodeuico & Lothario Francorum regibus, ac latè propagata, cum latè imperitarent. Plurima canuntur in sacris Papistarum tempore Paschæ & Pentecostes, quæ non intelliguntur nisi per hanc legem & consuetudinem. Tandem exoleuit illa, ac baptizati sunt fideles prima quaque occasione & commoditate.

Sed & hoc controuersum est, quis baptizare debeat, & quid efficiat Baptista. De posteriore priore loco dicam. Baptista confert uisibiliter sacramentum regenerationis, & testimonium remissionis peccatorum, Dominus autē per spiritum suum inuisibiliter regenerat, peccataque remittit, & regenerationem obsignat. Ioannes & Apostoli aqua baptizant, Christus baptizat spiritu sancto: non tantum uisibili signo ignis & linguarum dono, sed idem ille confert solus omnia spiritualia dona. Id ut disertè exprimerent ueteres, diligenter secreuerunt inter potestatem & ministerium. Nam August. Tract. in Ioan. 5. Aliud est baptizare, ait, per ministerium: aliud baptizare per potestatem. Potuisset Dominus noster Iesus Christus si uoluisset dare potestatem alicui seruo ut daret baptismum suum tanquam uice sua, & transferret à se baptizandi potestatem, & constitueret in aliquo seruo suo, & tantam uim daret baptismum translato in seruum, quantam uim haberet baptismus datus à Domino. Hoc noluit ideò, ut in illo spes esset baptizatorum, à quo se bapti-

*Tempus bap-
tismi.*

Genes. 17.

*Quid efficiat
Baptista.*

Ioan. 1.

Vera simplici-
tat.Qui debeat ba-
ptizare.An obstetrices
baptizare pos-
sint.

1. Timoth. 2.

zatos agnoscerent. Noluít ergo seruum spem ponere in seruo. Ideoq; clamabat Apostolus cum uideret homines uolentes ponere spem in seipso, Nunquid Paulus pro uobis crucifixus est? aut in nomine Pauli baptizati estis? Baptizauit ergo Paulus tanquam minister, non tanquam ipsa potestas: baptizauit autem Dominus tanquam potestas. Et iterum, Ioannes Baptista à columba didicit, Super quem uideris spiritum descendantem, sicut columbam, & manentem super eum, hic est qui baptizat spiritu sancto. Non ergo te decipiant o columba seductores qui dicunt, Nos baptizamus. Columba agnosce quod columba docuit, Hic est qui baptizat spiritu sancto. Per columbam discitur, quia hic est: & tu eius potestate putas te baptizari cuius ministerio baptizaris? Si tu hoc putas, nondum es in corpore columbæ: & si non es in corpore columbæ, non mirandum, quia simplicitatem non habes. Simplicitas enim maximè per columbam demonstratur. Per simplicitatem columbæ didicit Ioannes, Quia hic est qui baptizat spiritu sancto. Hæc ille.

Porro baptizare debet legitimè constitutus ecclesiæ minister. Donatistæ contenderunt neminem nisi purum & sanctum baptizare posse: inutilem & inefficacem prædicabant esse illum baptismum quem administrasset minister malus, uel sceleribus inquinatus. Contra istos grauiter disputauit Augustinus, & scripturarum ueritate oppressit. Is Epist. 166. Videte, inquit, quàm peruersè & impiè dicatur quod dicere soletis. Quia si bonus sit homo, ipse sanctificat eum quem baptizat: si autem malus sit & nesciat ille qui baptizatur, tunc Deus sanctificat. Hoc si uerum est, optare ergo debent homines ut à malis ignoratis baptizentur potius, quàm à notis bonis, ut magis à Deo quàm ab homine possint sanctificari. Sed absit à nobis ista dementia. Quare ergo non uerum dicimus & rectè sapimus, quia semper est Dei illa gratia & Dei sacramentum, hominis autem solum ministeriū: qui si bonus est, adhæret Deo & operatur cum Deo: si autem malus est, operatur per illum Deus uisibilem sacramenti formam, ipse autem donat inuisibilem gratiam. Hoc sapiamus omnes & non sint in nobis schismata. Idem contra literas Petilianæ lib. 3. cap. 49. eandem rem luculenter proponit. Quoniam uerò nos quoque eandem rem tractauimus in fine superioris & proximè præcedentis Sermonis, non est quod idem bis dicamus.

Obijcitur hinc nobis quæstio de Baptismo obstetricum, An obstetrices foeminae in articulo necessitatis, id est, cum periculum est ne infans moribundus in manus ministri ecclesiastici peruenire possit, baptizare debeant & possint? Respondemus baptismum esse ecclesiæ sacramentum: à ministerio autem ecclesiæ arceri mulieres, has ergo non posse nec debere baptizare, quemadmodum & docere nullo modo permittuntur. Notæ sunt leges Apostolicæ. Mulieri, inquit Paulus, docere non permitto, neque authoritatem usurpare in uiros, sed esse in silentio. Eadem lex repetitur ab eodẽ Apostolo 1. Corinth. 14. & confirmatur lege diuina. Diuinis congruunt humana. Tertullianus enim de Virginibus uelandis, Non permittitur mulieri, inquit, in ecclesia loqui, sed nec docere, nec tingere, nec offerre, nec ullius uirilismuneris, nedum sacerdotalis officij sortem sibi uendicare. Hoc ipsum repetitum legitur in Concilio Carthagine. 1111. cui interfuisse dicitur etiam Aurelius Augustinus. Epiphanius Salaminæ Cypri Episcopus contra uarias hæreses disputans, & Martionem confutans, Dat etiam, inquit, permissionem mulieribus ut baptismum dent. Idem dicit de Quintilianis & Peputianis. Contra Collyridianos disserens, Si mulieribus, inquit, præceptum esset sacrificare Deo, aut regulare quicquam operari in ecclesia, oportebat magis ipsam Mariam

riam sacrificium perficere in nouo testamento, quæ digna facta est in proprijs sinibus suscipere uniuersorū regem Deum cœlestem Dei filium, cuius uterus templum factum est ac domicilium, ad Domini in carne dispensationem, per Dei benignitatem & admirandum mysterium præparatus est. At non complacuit. Sed neq; baptisma dare concreditum est. Alioqui potuisset filius ab ipsa potius, quàm à Ioanne baptizari. Addit idem, Et ministrarum quidem diaconissarum appellatarum ordo est in ecclesia: Sed non ad sacrificandum, neque ut quicquam aggredi permittantur: uerū reuerentiæ gratia muliebris generis, aut propter horam balnei, aut uisitationis, affectionis, aut laboris. Quod Sephoræ uxoris Moysi Madianiticæ filium circumcidentis in tempore necessitatis obijcitur exemplum: id quidem nullam legem communem constituit, perinde ut singulare Delboræ exemplum, non efficit omnes mulieres iudices. Sunt enim singularia multa in scripturis facta, ex quibus si quis colligere pergat generalia & leges communes, infinita inducet absurda. Quid quod Moyses eo loco indignabundæ uxoris, & non religiosæ, ministerium Deo præstare uolentis facinus describit? Impotenter enim marito adeoq; & Deo obstrepens, præputium filij resectum ad pedes patris atque mariti abijciens, non sine conuitio ait, Sponsus sanguinum tu mihi es. Quasi dicas, Ich hab wol ein blütigmann an dir. Et quamuis desierit Moysi imminere angelus, quod muliebre facinus uelut Deo bene placens opus approbare uideretur, misericordiæ tamen diuinæ id magis quàm humanæ iustitiæ imputandum est. Valde displicuit Deo quod Dauid Uriam occidisset, & Bersabeam sibi insuper uxorem duxisset, attamen ex bonitate & singulari clementia Solomonem natum ex Bersabea appellare dignatur Iedidia, eò quod Dominus diligeret eum. Ita bonus Dominus & Moysi, siue propria negligentia, siue culpa Madianiticæ uxoris, circumcisiōe in corpore filij contra legem plus æquo differenti, reconciliatur, & circumcisiōem indignatione magis quàm religione à foemina perfectam recipit ac boni consulit: interim non uult ut ad hanc, tanquam ad perfectum exemplar, aliorum hominum circumcisiōes fiant.

Cæterum baptismo, ais, à muliere administrato, præueniendum erat periculum mortis seu condemnationis æternæ, in quod incurrit infans, sine baptismo ex hoc seculo decedens. Respondeo, cum infantulus iam iam ex utero materno effusus præpropere morte excedit, ut non liceat parentibus, quantumuis desiderantibus, illum ministro ecclesiæ baptizandum offerre, certè articulus hic necessitatis huic non cedit ad mortem, quippe qui gratia Dei receptus in fœdus, propter sanguinem filij Dei, à morte liberatur. Non destituimur iustis scripturæ testimonijs. In lege phas non erat ante octauam diem circumcidere infantulum. At certum est plurimos ante octauam migrasse ex hoc seculo: interim uerò si quis puelus triduo aut quadriduo à natali excessisset, nulla ei imputabatur condemnatio. Alioqui enim Dauid uir in religione integerrimus, & liberorum amantissimus, salutisq; suæ familiæ cupidissimus, mortuo infantulo suo ex Bersabea genito, non potuisset se adeò hilarem exhibere aulicis suis, quibus inter alia prædicabat se abiturum ad puerum mortuum, nimirū in regionem uiuentium. Quod si foemellæ non erat fraudi incircuncisis mori: nam incircuncisæ saluabantur: certè nec masculis damnabile erit non baptizatis, in articulo necessitatis, decedere. Sæpe enim diximus in locum circumcisiōis subijisse sanctum baptisma. Huc pertinent illa ex lege atque prophetis testimonia. In lege enim non semel protestatus est se infantium habere rationem certissimam. Apud Ionam disertè profitetur se habere rationem eorum qui nondum ad annos discretionis peruenerunt. Pro-

Sephora circumcidit.

2. Sam. 12.

De salute infantium excedentium sine baptismo.

pter hos enim ex parte Niniue urbi famosissimæ pepercit Dominus.

Ais hæc ueteris testamenti testimonia nihil pertinere ad nos, qui uiuimus sub nouo testamento. Respondeo, Deum nobis post aduentum Christi in carnem, nō seueriorem esse factum, quā fuit ante Christi aduentum. Alioqui enim quid dicemus aliud quā Christum uenisse non ad implendas, sed abolendas aut infirmandas Dei promissiones? quando apud ueteres quondam gratia & promissio sine signo in necessitate efficaces erāt, nunc autē apud nos sine signo irritæ & inefficaces esse cœperunt. Diuinæ ergo confusus misericordiæ ac ueraci & indubitatae promissioni, credo paruulos præpropere morte priusquam baptizari possint decedentes, mera Dei gratia, in uirtute ueritatis aut promissionis diuinæ saluari per Christum dicentem in Euangelio, Sinite paruulos uenire ad me: horum enim est regnum Dei. Item, Non est uoluntas patris mei, qui in cœlis est, ut pereat unus de pusillis istis. Dixit enim qui mentiri nescit Deus, Ego sum Deus tuus & seminis tui post te. Vnde & S. Paulus eos nasci sanctos, qui ex fidelibus nascuntur, asserit: nō quod ex carne & sanguine sanctū quid nascatur: Quod enim ex carne est, caro est: sed quod sanctitas illa & segregatio à cōmuni hominum semine, ex promissione & iure fœderis sit. Omnes quidem nascimur filij iræ & mortis natura & propagatione naturali: sed speciale priuilegium tribuit Paulus fidelium liberis, quo gratia Dei purificantur qui natura fuerant immundi. Ita idem alibi ex radice sancta sanctos colligit ramos. Idē alibi, Si unius delicto, inquit, multi mortui sunt, multo magis gratia Dei & donū per gratiam quæ fuit unius hominis Iesu Christi, in multos exuberauit. Ideoq; non dubitauit Augustinus pronūciare, Sicut omnes qui moriuntur non nisi in Adamo moriuntur, ita omnes qui uiuificantur non nisi in Christo uiuificantur. Ac per hoc quisquis nobis dixerit quenquam in resurrectione mortuorum uiuificari posse nisi in Christo, tanquam pestis communis fidei detestandus est. Ad Hierony. Epist. 28.

Obijciunt, Hac ratione euacuatur & ē medio tollitur usus Baptismi: reuixit autem Pelagianismus, quem tanto cum labore S. Aurelius Augustinus cum multis alijs uiris doctis & sanctis oppressit: falsum pronunciauit, qui dixit, Anima cuius caro præputij nō fuerit circumcisa, delebitur de populo suo, quia pactum meum irritum fecit: falsum pronunciauit, qui dixit, Amen amen dico tibi, nisi quis natus fuerit ex aqua & spiritu, non potest ingredi in regnum Dei. Si autem uera ista sunt & pueri non baptizantur, certē consequens est eos sine baptismo decedentes non seruari. Respondeo, me nullo modo sanctum baptisma extenuare, multo minus tollere ē medio, cū contendo necessitate interueniente, nec ullo accedente aut contemptu aut neglectu prauo, infantes sine baptismo decedentes non damnari. Sic enim alligaretur salus signo, & euacuaretur Dei promissio, quasi sola sine signo, in articulo necessitatis, inanis nihil efficeret, manusq; Dei abbreviata, & ueluti signo uincta esset. Alioqui enim modis omnibus doceo infantes esse baptizandos, nec neglectim aut malitiosē differendum baptisma: interim uerō si præpropere morte expirent non baptizati, bene sperare iubeo de ueritate & misericordia Domini in lege & in Euangelio promittentis sc Deum esse infantium, nollecq; ut quisquam paruulorum pereat.

Cum Pelagio & Pelagianis nihil nobis est commertij: nec ignoramus quid de hac caussa scripserit S. August. ad Hierony. Epistola 28. Quisquis dixerit, inquit, quod in Christo uiuificantur etiam paruuli qui sine sacramenti eius participatione de uita exeunt, hic profectō & contra Apostolicam prædicationē uenit, & totam condemnat ecclesiam, ubi propterea cum baptizandis paruulis festinatur & cur-

ritur,

Marc. 10.
Matth. 18.
Gene. 17.
1. Cor. 7.

Rom. 11.
Rom. 5.

Gene. 17.

Ioan. 3.

Pelagiani negant pædobaptismum, & quare?

ritur, quia sine dubio creditur aliter eos in Christo uiuificari omnino non posse. Et contra Pelagianos Epist. 106. Apostolica sedes contra Pelagium agens, anathematizauit eos qui dicerent infantes non baptizatos habere uitam aeternam. Idem de Anima & eius origine lib. 1. cap. 9. ad Renatum, disputat contra Vincentium Victorem concedentem quidem paruulos originali peccato esse obstrictos, sed nihilo minus tamen saluari si non baptizentur. Contra hunc producit hoc saluatoris, Nisi quis natus fuerit ex aqua & spiritu, non potest ingredi in regnum Dei. Nos uero qui & ipsi Pelagium & Pelagianos condemnamus, utrunque quod isti negabant asserimus, nempe nasci infantes in originali peccato, & ideo sanctificationem Christi eis esse necessariam, sine qua non saluantur. Rursus baptizandos, si possibile sit, eosdem illos contendimus, tametsi iure foederis ad corpus Christi pertineant, & sanguine Christi sanctificati sint. Pelagius non baptizandos esse paruulos docebat, quod noxa, culpa uel peccato omni carere existimaret: ergo non agnoscebat impius uel corruptionem nostram, uel beneficium, quod Deus praestitit per Christum. Neutrum uero in nostra assertione & doctrina inuenias, proinde nihil nobis commercij cum Pelagianis. S. Augustinus disertè in eadem illa ad S. Hieronymum epistola dicit, Non es ex illis qui dicunt nullum reatum esse ex Adam tractum, qui per baptismum in infante soluitur. Et contra Iulianum lib. 1. cap. 2. patrum quoque sanctorum sententijs asstruit originale peccatum, deinde colligit, ideo baptizandos esse paruulos, quia peccatum habent. Nam Pelagiani ex contrario colligebant, Peccatum non habent, ergo non sunt baptizandi. Concilium enim Carthaginense ad Innocent. sic scribit, Pelagiani paruulos negant baptizandos. Quia isti, inquit, non perierunt, nec est quod in eis saluetur: quia nihil est in eis uitiatum, &c. Nos uero quia credimus paruulos in peccato nasci, adeoque & filios irae nasci & uitiatos esse, praeterea quia credimus filium Dei pure ex illibata uirgine natum ad implendas confirmandasque Dei promissiones, quae infantes ex salute non excludunt, sed in foedere includunt, ideo eos baptizandos esse contendimus. Idcirco & collectionem hanc Augustini, Extra Christi consortium ad uitam nemo peruenit: baptismo autem incorporamur Christo: ergo infantes non baptizati, sunt extra consortium Christi, ac condemnati, simpliciter probare non possumus. Sicut enim non negamus nos inseri corpori Christi per sacramentorum participationem, sicuti declarauimus proximè praecedenti Sermone de Sacramentis: ita ostendimus alibi, & iam saepe luculentissimè, non à sacramentis primum fieri initium nostrae cum Christo unionis, sed eam ipsam quae in promissione fundata est, & gratia Dei per spiritum sanctum nobis & nostris etiam ante sacramentorum usum comunicata, per sacramentorum perceptionem continuari & obfirmari. Tametsi ergo infans sine baptismo discedat, nec uisibili foederis signo, necessitate exclusus participet aut obfirmetur, tamen in uniuersum non est alienus à Christo, cui adharet spirituali foederis nexu, cuius uirtute saluatur.

Locus Gen. 17. productus de excindendis è populo Dei incircuncisis, pro ratione temporis, adultis non infantibus competat. Id quod in Mose cernitur, quem ob neglectam aut diutius iusto dilatam circuncisionem inuadit angelus domini, sicut ipse de seipso testatur. Nec ignoro ueteres aliquot interpretes id non ad Mosén, sed ad Eleazarum Moysi filiolum, referre. Verum ipse historiae contextus, ipsae circumstantiae, satis euincunt periculum in patrem non in filium incubuisse. Quid quod in uerbis legis ratio subiicitur, quae infantibus nullo modo congruit? Ideo peribit incircuncisus, ait, quia pactum meum irritum fecit. Quod si consideremus circuncisionem eo ipso loco non tantum infantibus, sed adultis, ut Abraham Isa-

De Peccat. merito
ritis & remiss.
lib. 3. cap. 4.

Expositio loci,
Anima incircū
cisa excindetur

maeli alijsq; iam consortio Dei uisibiliter coniungi cupientibus præceptam esse, non mirabimur interitum inobsequenti esse interminatum. Nam si quis hodie intelligat domini institutionem his eius comprehensam uerbis, Qui crediderit & baptisatus fuerit, saluus erit, nihilo minus baptizari nolit, sed iactitet sibi fidem sufficere ad salutem, baptismum esse superuacuum, ordinationem Dei contempnit, & pro rebelle & hoste non amico Dei condemnatur.

Expositio loci,
Nisi quis natus
fuerit ex aqua,
&c.

Porro locus Ioan. 3. non est intelligendus de externo sancti baptismi symbolo, sed simpliciter de regeneratione sancti spiritus interna & maxime spirituali, quam cum Nicodemus non liquide intelligeret, parabolis aquæ & spiritus, id est, uenti uel aeris, per elementa inquam, maxime tenuia, suffigurauit illustrauitq;. Mox enim subiicit, Quod natum est ex carne, caro est, &c. Item, Spiritus ubi uult spirat, &c. Id quod de aëre exponi necesse est. Sequitur enim altera pars collationis, Sic omnis qui natus est ex spiritu. Præterea subdit, Si terrena dixi uobis, & non creditis, quomodo si dixero uobis cœlestia credetis? Cæterum argumentum quod proposuit planè non fuit terrenum. Hoc enim est totius disputationis argumentum, Nisi quis natus fuerit è supernis, non potest uidere regnum Dei; id est, nisi quis per spiritum Dei, qui è supernis datur, id est, diuinitus infunditur, fuerit innouatus, & ueluti regenitus, non potest saluus fieri. Hæc doctrina planè cœlestis est: Sed modus quo hanc doctrinam cœlestem tradidit, illustrauit, ac proposuit: terrenus est. Rebus enim è terra sumptis, crasso homini terrenoq; rem spirituales & cœlestes adumbravit, & ueluti oculis conspiciendam proposuit. Sicuti aqua & aëre non raro corporum qualitates mutantur, & mirus est effectus in corporibus aeris & aquæ: ita etiam spiritus sancti in anima hominis, quam immutat, purgat, uiuificat, &c. Sic enim ipse dominus postea (quod & modò dixi) parabolam spiritus alteram illustrat. Quoniam uero ueteres pleriq; omnes per aquam intellexerunt symbolicam, id est sanctum baptisma, recipimus & hanc interpretationem. Libenter enim concedimus baptismum tam in adultis, quam in infantibus ad salutem esse necessarium, modò non interueniat necessitas. Alioqui enim si pergamus cum S. Augustino præfractè condemnare per hunc locum infantes, cogemur profecto etiam baptisatos, sed sine communionem corporis & sanguinis Christi decedentes, condemnare. Pari enim errore circumuentus S. Augustinus, contendit & infantibus ingerendum esse sacramentum eucharistiæ, alioqui de uita periclitaturis: eo quod scriptum sit, Nisi manducaueritis carnem filij hominis, & biberitis eius sanguinem, non habebitis uitam in uobis. Eodem ergo ordine collocat has duas sententias, Nisi quis natus fuerit ex aqua & spiritu, non potest uidere regnum Dei: &, Nisi manducaueritis carnem filij hominis, &c. Si ergo Augustinianæ sententiæ mordicus inhaerere libeat, damnabis certè totam Ecclesiam hodie, quæ infantibus eucharistiam negat. At si hac in re admissa est commoda interpretatio, cur in altero, & simili loco, & causâ non dispari, tam rigidi & pertinaces estis?

De pecca. me-
ritis & remiss.
lib. 1. cap. 20.
Ioan. 6.

Quid quod in hoc dogmate ne sibipsi quidem per omnia satisfacit Augustinus? Putat ueniale peccatum esse laico, si in tempore necessitatis baptizet. Nescit an quisquam piè dixerit laici baptismum esse repetendum. Quanto uero satius & tutius fuerat, præterita baptisandi necessitate, quæ nullas legitimas causas habet, sentire infantulos, si à morte non præoccupati fuerint, à ministro Ecclesiæ in Ecclesia procurantibus parentibus prima quaque opportunitate baptisandos esse: præproperam mortem autè (quam nos necessitatis articulum appellamus) non esse fraudi aut salutis impedimentum ad baptismum nondum delatis. Idem de poe
na

na paruulorum damnatorum propter baptismum non susceptum, definire trepidat, nec quid certò dicat, habet. De Anima & eius origine lib. 1. capite 9. Non baptisatis paruulis, inquit, nemo promittat inter damnationem regnumq; cœlorum quietis uel felicitatis cuiuslibet atque ubilibet quasi medium locum. At ea sententia hodie est recepta ferè ab omnibus: unde & medio quodam loco inter prophanum & sacrum sepeliuntur in cœmeterio innocentum. Rursus autem idem ille August. contra Iulianum Pelagianum lib. 5. capite 8. scribit infantulos illos in damnatione omnium leuissîma futuros. Ac mox subiungit, Quæ, qualis & quanta erit, quamuis definire non possim, non tamen audeo dicere, quòd eis ut nulli essent, quàm ut ibi essent potius expediret. Et iterum in epistola ad S. Hieronymum 18. Cum ad pœnas uentum est paruulorum, inquit, magnis mihi crede coartor angustijs, nec quid respondeam prorsus inuenio. Hic accedit, quod lib. cont. Donatistas 4. cap. 22. & 23. de latrone cum Christo crucifixo disputans, inter alia dicit, tunc impleri baptismum inuisibiliter, cum non contemptus religionis, sed articulus necessitatis, à uisibili baptismo excludit: Cur ergo non credamus & in infantibus præpropere morte decedentibus baptismum inuisibiliter perfici, quando non contemptus religionis, sed articulus necessitatis eos à uisibili baptismo excludit? Et cum pleriq; hodie concedant, quemuis adultæ ætatis hominem citra baptismum in articulo necessitatis saluum fieri posse, modò adsit baptismi desiderium: cur ergo infantes iam recens natos pia parentum uota à reatu non eximerent? Sed hæc hæcenus.

De eo quoque & olim & nostra ætate rixatum est acriter, qui nam baptisandi sint. Negauit olim Pelagiûs paruulos esse baptisandos. Id quod modò audiui- *Qui nam bapti-
sandi sint* mus. Negauit eos baptisandos esse ante Pelagiûm Auxentiûs Arianus cum suis. Negarunt quidam tempore beati Bernardi, ut ex eius scriptis colligere licet. Negant hodie Anabaptistæ, genus hominum in perniciem euangelij à satana excitatum. At ueritas catholica in scripturis sanctis nobis tradita simpliciter pronunciat, omnes eos esse baptisandos quos Deus agnoscit pro suo populo, participesq; purgationis uel sanctificationis remissionisue peccatorum iudicat. Nam tota hac tractatione de Sacramentis ostendi & demonstro, baptismum esse signum populi Dei & symbolum purgationis nostræ per Christum. Ergo cum infantes fidelium sint in numero uel censu populi Dei participesq; promissionis de purificatione per Christum: necessariò sequitur eos esse perinde baptizandos sicut adultos fidem profitentes.

Instituitur quidē disputatio acuta de eo qui nam sint populus Dei & parti- *De eo qui nam
sint populus dei* cipes remissionis peccatorum per Christum. Differitur ergo de arcana illa Dei electione, & de alijs huic rei coniunctis difficillimis quæstionibus. Verùm breuius & simplicius hic nos expedire possumus. Dicimus populum Dei agnosci, uel ex confessione fidei hominum, uel ex liberali promissione Dei. Ex cōfessione quidē hominum. Nam eos pro filijs Dei agnoscimus, qui iam adulti palàm confitentur Deum uerum, Deum esse suum, & Iesum Christum saluatorem esse suum, Cæterum ea confessio uel uerè, uel fictè fit. Verè, ut cum S. Petrus ait, Tu es Christus filius Dei uiui: cum Eunuchus dicit, Credo filiū Dei esse Iesum Christū: Fictè uerò, ut cum Simon Magus in Actis apostolorum dicit se credere in Iesum Christum. Siue uerò uerè, siue fictè quis credat, quando fidem in Christum palàm confitetur (anîmî penetralia solus inspicit Deus: hic enim solus rectè creditur cordium esse scrutator) nostrum non est rectè confitentem separare uel abijcere à populo Dei. Nam Philippus Simonem magum non repulit, sed

Acto. 8.

pro fidei confitentem recepit & pro fidei baptizauit: licet is reuera & coram Deo esset hypocrita. Sermone huius Decad. 1. ostendimus in Ecclesia hypocrisis quoque numerari donec reuelantur. Quod autem ad remissionem peccatorum attinet, soli inter adultos illi eam obtinent, qui uerè credunt. Id quod aliàs saepe ostensum est. S. Petrus Simoni licet baptizato, dicit, Non est tibi pars, neque fors in ratione hac. Cor enim tuum non est rectum coram Deo.

Gen. 17.

Porro ex promissione Dei gratuita & liberali, non tantum ex confessione hominum æstimamus uel agnoscimus Dei populum. Nam quibuscunque promittit Deus se ipsorum fore Deum, & quoscunque recipit ipse & agnoscit pro suis, eos nemo hominum citra grande scelus numero excluderet fidelium. Promittit autem Deus se non tantum confitentium, sed & infantium fore Deum: promittit his gratiam suam & remissionem peccatorum: Quis ergo domino uniuersorum contradicens, porro negauerit infantes Dei esse, ac purgationis per Christum fieri participes? Quod autem Deus infantes pro suis agnoscat, & eosdem sanctificet, uel ex fœderis summa claret. Statuam pactum meum inter me & te, ait ad Abrahamum dominus, & inter semen tuum post te, in generationibus suis fœdere sempiterno, ut sis Deus tuus & seminis tui post te. Addita est Circumcisio symbolum sanctificationis. De quo abunde satis dixi cum ex ordine differerem de Circumcisione. Nec est quod quis metuat cum circumcissione legalibusque abrogatam esse promissionem, & per Christi aduentum fœdus esse dissipatum. Modò enim diximus Christum uenisse adimplendis Dei promissionibus, non dissoluendis. In Euangelio ergo de infantibus, id est, nondum confitentibus fidem pronunciauit & dixit, Sinite paruulos uenire ad me, nec prohibueritis eos. Talium enim est regnum Dei. Et quamuis Talium, non Illorum dicatur, nemo tamen usque adeo rudis est, ut non intelligat inter ea quæ inter se conferuntur esse similitudinem. Proinde si adultorum est regnum Dei, eo quod similes efficiuntur paruulis, certè consequitur necessariò regni cœlorum hæreditatem & infantium uel puellorum esse. Sequitur enim in Euangelio, Quicunque non acceperit regnum Dei tanquam puellus, haudquaquam ingreditur in illud. Idcirco oportet prius esse regni Dei hæredes infantes uel paruulos. Quis autem nesciat, neminem nisi sanctificatum purgatumue ingredi in regnum cœlorum? Pueri ingrediuntur regnum Dei: ergo purgati sunt, nimirum gratia Dei: natura enim & origine sua immundi & peccatores, sed propter Christum purgati sunt: qui dixit se uenisse quæsitum seruatumque quod perierat. Paulus quoque disertè testatur per unius Adam delictum, malum propagatum esse in omnes homines ad condemnationem: ergo & per unius Christi iustificationem propagari bonum in omnes homines ad iustificationem uitæ. Certum est itaque infantulos purificationis uel remissionis peccatorum per Christum esse participes, licet non confiteantur remissionem peccatorum. Quid quod in euangelio rursus ait dominus? Non est uoluntas coram patre uestro, qui in cœlis est, ut pereat unus de pusillis istis. Item, Qui receperit unum puellum talem, in nomine meo, me recipit. Qui autem offenderit unum de pusillis istis, qui in me credunt, expedit ei ut suspendatur mola asinaria, &c. Videte ergo ne contemnatis unum ex pusillis istis. Dico enim uobis, quod angeli eorum in cœlis semper uident faciem patris mei qui in cœlis est. En quid dici poterat clarius? Non est uoluntas patris cœlestis ut intereant infantuli. Recepit ergo eos in gratiam gratuito, licet nondum confiteantur. Deinde, Qui talem, qualem nimirum ipse produxerat in mediū, recipit puellum, propter Christum, is ipsum dicitur recipere Christum. En tribuit infantium recep-

receptoribus quod prophetarum. Addit, Qui autem offenderit unum de pusillis istis, qui in me credunt. Manifestè paruulos nondum confiteri potentes, credentes uocat, eo quod ex gratia eos pro credentibus reputet. Nec mirum aut nouum hoc est, cum Deus ipsis etiam adultis fidem imputet pro iustitia. Vtrobique iustitia, acceptatio, aut sanctificatio, est gratuita & imputatiua, ut laudetur gloria gratiae suae. Præterea nō uult contemni, multo minus reijci e numero sanctorum paruulos. Quinimo angelos his additos asseuerat custodes, qui tametsi sint diuinæ maiestatis ministri, eosdem tamē illos suos stipatores paruulis esse datos, siue concessos: ut uel inde æstimemus quanti faciat dominus infantulos, & ut discamus illos non expungere ex albo populi Dei, cui debetur uitæ hereditas. Nihil hic tribuimus carnali natiuitati, sed omnia diuinæ gratiæ & promissioni. Claret iam ex his omnibus, & infantes fidelium, & adultos fidē confitētes esse baptizandos.

Infantes confitentes uel credentes.

Ex aduerso autem Anabaptistæ contendunt, neminem esse baptizandum, nisi eum solum qui & doceri & credere, adde & fidem profiteri possit. Atque in huius rei confirmationem adducunt illas saluatoris sententias. Ex Matth. Euntes ergo docete omnes gentes, baptizantes eos in nomine patris, &c. Ex Marco, Ite in orbem uniuersum & prædicate euangelium omni creaturæ: qui crediderit & baptizatus fuerit, saluus erit, &c. En doctrina præcedit, inquiunt, baptismum. Ergo qui doceri non possunt, baptizari non debent. Præterea præit credere, subiungitur baptizare. Infantes non credunt: ergo baptizandi non sunt. Ad hæc omnia, coaceruant ex Actis apostolorum exempla quæ probant fideles, hoc est, fidem confitentes, esse baptizatos ab Apostolis. Commemorant & Catechumenos ueterum: quibus nullus sane fuisset locus datus, inquiunt, si baptizassent infantes. Respondeo, Si uerborum ordo aliquid facit in hac causa, habemus & nos quod pro causa nostra faciat. Nam in Marco sic legimus, Baptizabat Ioannes in deserto, prædicans baptismum poenitentiae. Quo loco cernimus baptizare præcedere, subsequi prædicare. Sed & illum ipsum locum quem illi pro se adducunt ex Matthæo demonstrabimus facere pro nobis. Mattheus enim sic habet, Data est mihi omnis potestas, ait dominus, in cœlo & in terra: euntes ergo *μαθητεύσατε*, id est, discipulate (ut sic dicam) id est, discipulos mihi facite uel colligite omnes gentes. Sed & modum indicat, quomodo colligant ei ex omnibus gentibus, uel omnes gentes, discipulos, Baptizantes eos atque docentes. Baptizando & docendo comparabitis mihi Ecclesiam. Ac utrumque pulchrè & breuiter sigillatim illustrat, dicens, Baptizantes eos in nomen patris, & filij, & spiritus sancti. Docentes eos seruare omnia quaecumque præcepi uobis. Iam ergo baptismus præit doctrinam. Verum nos inde non colligimus gentes, quæ nunquam quicquam prius de Deo & filio Dei ac spiritu sancto audierunt, baptizandas esse, neque uerò id sustinerent: sed hæc proferimus ut ostendamus quàm non solido fundamento innitantur Anabaptistæ. Dicimus autem simpliciter uerum non esse quod isti fingunt, dominum iussisse eos duntaxat tingere, quos docuerint Apostoli. Neque uerò hic designat qui baptizandi sint in uniuersum, sed loquitur de adultis primisq; fundamentis fidei & Ecclesiæ collocandis inter gentes, rudēs adhuc & ignaras religionis. Adulti, non infantes prædicationem uel doctrinam audire, credere & confiteri possunt, infantes non item. Nihil ergo hic loquitur de infantibus. Verum ideo non excluduntur à baptismo. Generalis lex est, Qui non laborat, non manducet: uerum quis adeo barbarus ut ideo putet infantes fame esse necandos? Dominus misit Apostolos suos ab initio propagationis ueræ religionis in omnes gentes, ad eos qui & Deum ignorabāt & alieni.

Quibus argumētis Anabap. doceant infantes non esse baptizandos.

erant à testamentis Dei, hos certè non primùm tingere, deinde docere oportuit, sed primùm docere deinde tingere. Si hodie proficisceremur ad Turcas conuertendos ad fidem Christi, primùm certè doceremus, deinde baptizaremus seruos Christi dedititiosq̃. Ita ipse quoq̃ dominus quondam cum ipso Abrahamo primùm reparauit fœdus, ac instituit circuncisionem obſignationem fœderis, deinde uerò Abraham circuncisus est. At idem ille cum intellexisset infantes quoque pertinere ad fœdus, & circuncisionem esse fœderis obſignationem, non Ismaelem duntaxat tredecim annos natum & uernaculos domus suæ, sed & infantes, inter quos & Isaacum numeramus, postea circuncidit. Ita fideles qui ex gentilismo conuertebantur per prædicationem euangelij, & baptizabantur confitentes, ubi intellexissent infantes suos reputari in populo Dei, & baptismum esse symbolum populi Dei, etiam infantes suos baptizari curauerunt. Quemadmodum ergo scriptum est de Abraham, Omnes mares domus suæ circuncidit: Ita non rarò legimus in Actis & scriptis Apostolorum, patrefamiliæ conuerso totam eius domum esse baptizatam. Quod uerò ad Catechumenos attinet, accedebant apud ueteres ex gentibus quotidie ad Ecclesiam, quos isti infideles instituebant in elementis fidei, deinde uerò baptizabant. Sed illi ipsi ueteres nihilo minus & fidelium infantes baptizabant. Id quod mox demonstrabimus.

Catechumeni.

Nec legitime colligunt cum ita concludunt, Qui crediderit & baptizatus fuerit, saluus erit. Pueri non credunt, ergo non sunt baptisandi. Rursus enim de adultis, sicut & apud Matthæum, constat esse locutum. Quoniam uerò ab adultis fidem fideiq̃ confessionem requirit, inde non est consequens quòd idem requiratur ab infantibus. Hos enim pro suis reputat etiam sine confessione, ex mera sua gratia & libera promissione. Vnde nos ex aduerso sic argumentamur: Credentes sunt baptisandi. Id quod ipsi quoque aduersarij concedunt. Infantes sunt credentes. Nam Deus reputat eos in numero fidelium. Id quod superius manifestè probaui. Proinde infantes sunt baptisandi.

*Infantes baptis-
mi mysteria nō
intelligentes.*

Obijciunt infantes mysterium baptismi non intelligere, ac proinde cum ratione ac sensu communi non modò cum religione pugnare, baptizare infantes. Perinde enim esse truncum & infantem baptizare, cum neutrum utatur ratione. Cæterum laxant impuras suas linguas impuri nebulones in ipsam Dei maiestatem. Deus iussit circuncidere infantulos: & circuncisio grandia continuit mysteria, quæ infantuli non intellexerunt. An uerò Deus quicquam instituit contra rationem & sensum communem? Abite quòd digni estis tenebriones cum uestris blasphemijs. Impurissimum uerò & plus quàm barbarum est, quòd infantes cum truncis confertis. Quanti enim faciat Deus infantes, iam ante ex euangelio docuimus. Cæterum diligentissimè & sedulò docendi & commonefaciendi sunt homines ratione sana iam uti incipientes, ut meminerint se esse baptisatos, & ut conentur Dei inuocato nomine per omnia respondere suo uoto & suæ professioni. Ita uerò Abraham Isaacum suum instituit, & liberos suos sancti patres omnes.

*Baptismus paruulorum esse
ex Deo. & apostolos baptizasse infantes.*

Sed præteritis furiosis, rabiosis, maledicisq̃ illis rixatoribus, quibus nulla unquam uerba deesse audiuius, quantumlibet sæpe & seriò cum eis contulerimus, pergamus paucis, sed euidentibus argumentis demonstrare paruulos esse baptisandos, adeoq̃ Christi domini apostolos baptizauisse infantes. Dominus iussit baptizare omnes gentes; ergo & infantes. Hi enim comprehenduntur sub omnium gentium uocabulo. Item, Quoscunq̃ Deus inter fideles accen-

set,

set, fideles sunt. Petrus enim audiuit, Quod Deus purificauit, tu ne commune aut immundum dixeris. Paruulos reputat Deus inter fideles; sunt ergo fideles; nisi malimus Deo repugnare, & ipso uideri fortiores. Iam uerò extra controuersiam ponimus, Apostolos Christi eos baptizasse, quos Christus baptizare iussit. Iussit autem fideles baptizare: itaq; Apostoli baptizarunt infantes. Acto. 10.

Euangelium maius est baptismo. Paulus enim dixit, Dominus misit me Euangelizare, non baptizare: non quòd hoc negaret absolute se ad baptizandū nō esse missum, sed quòd doctrinā praeferret. Vtrumq; enim cōmendauit Apostolis Dominus. Porro in doctrina Euangelica recipiuntur pueri à Deo, non repudiantur: quis ergo nisi cum ratione infaniens excludat ex minori? In sacramentis considerantur res signata & signum. Illa potior est. Ab illa nō excluduntur infantes. Quis ergo signum neget? Etenim sancta Dei sacramenta magis ex uerbo quàm signo aestimant. Ex uerbo colligimus, & mulieres non excludi cœna Dominica. Quamquam ergo nō legamus eas in prima institutione fuisse, & ad primā Domini ueniam assedisse, neque ulla lex expressa extet quæ iubeat illas admittere ad cœnam, nihilominus ad cœnam intrepidè & sine dubitatione ex syllogismo admittimus. 1. Corinth. 1.

S. Petrus illis baptismum aquæ negare non potuit, quibus uiderat datum esse sanctum spiritum, certissimum populi Dei signum. Dicit enim in Actis Apostolorum, Num quis prohibere potest quò minus aqua baptizentur hi qui spiritum sanctum acceperunt sicut & nos? Proinde non negauit sanctus Petrus baptismum infantibus. Certò enim agnouit uel ex doctrina Domini & magistri sui, ut nihil nunc dicam de fœdere Dei æterno, infantium esse regnum cœlorum. Nemo autem recipitur in regnum cœlorum, nisi sit amicus Dei. Et hi non destituuntur spiritu Dei. Qui enim spiritum Christi non habet, hic non est eius. Pueri sunt Dei, ergo non destituuntur spiritu Dei. Ideoq; si perinde spiritum Dei acceperūt ut nos, si numerantur perinde in populo Dei ut nos adulti: quis obsecro prohibebit hos aqua tingi in nomine Domini? Olim obstrepebant Apostoli nondum satis instituti, infantes ad Dominū apportantibus. Sed increpabat eos Dominus, ac dicebat, Sinite paruulos uenire ad me. Cur ergo non obediunt præcepto Domini rebelles Anabaptistæ? Quid enim aliud faciunt hodie, qui pueros ad baptismum adferūt, quàm quod fecerunt olim qui ad Dominum infantes attulerūt? Et Dominus quidem recepit illos, benedixit eis impositis manibus: deniq; uerbis & gestibus significauit luculentissimè pueros esse populum Dei, & Deo commendatissimos. Sed quare non eadem opera, inquit, baptizauit eos? Quia scriptum est, Iesus ipse non baptizabat, sed discipuli eius. Præterea cū de re usque adeò liquidè constat, quid contendimus adhuc de signo? Hactenus uiris bonis satisfactum est, rixatores pergunt quæstiones necere. Præterea data est in ueteri populo Dei circumcisio infantibus: ergo baptismus debet dari infantibus in nouo populo. Nam baptismus successit in locum circumcisionis. Nam S. Paulus, Per Christum estis circumcisi, ait, circumcisione quæ fit sine manibus, dum exuistis corpus peccatorum carnis per circumcisionem Christi, consepulti simul cum illo per baptismum. En appellat Paulus baptismum circumcisionem Christianam, quæ fiat sine manibus: nō quòd aqua non administretur manibus, sed quòd manibus nemo amplius circumcidatur, mysterio circumcisionis manente nihilominus in fidelibus. Nec legas quenquam ueterum ecclesiæ interpretum non confessum, in locum circumcisionis baptismum subisse. Sed & paritas uel similitudo utriusq; manifestam successionem ostendit. Acto. 10.

His autem hæc atteximus, Serui Dei semper fuerunt solliciti his signa dare, qui

Iosue 5.

bus sunt instituta. Vt enim omnes alios prætereā, an non Iosue diligentissime curabat circumcidi populum priusquam ingrederetur terram promissam? Cum autē fidelissimi fuerint serui Iesu Christi prædicatores orbis Apostoli, cui posthac dubiū erit ipsos baptizasse infantulos, cum baptismus subierit in locū circūcisionis?

Certē Apostoli Christi omnia sua attemperarunt ad typos & figuras testamenti ueteris, ergo & baptismum attemperasse certum est, ideoq; & infantulos baptizasse. Quoniam hi fuerunt in typo baptismi. Nam populus Israelis, & mare rubrum, & alueum Iordanis transiit cum liberis. Et quamuis hi non semper exprimantur, sicuti nec mulieres in scripturis sanctis, cōprehenduntur tamen & subintelliguntur in his.

His accedit quod clarissime in scripturis traditur, Apostolos totas domos siue familias baptizasse. Comprehenduntur autem in domibus inprimis liberi: utpote præstantissima & clarissima domus pars. Baptizarunt ergo Apostoli liberos siue paruulos, non tantum adultos. Quod autem domus inprimis comprehendat infantes uel paruulos, nullo negotio demonstrari potest. Primum quidem ex loco Genes. 17. quem iam iam adduximus. Deinde quod Ioseph Iacobum patrem cum uniuersa domo euocat ex terra Chanaan in terram Ægypti, ne fame uidelicet domus eius intereat. Plurima sunt huius generis loca in lege & prophetis, & in uniuersa scriptura. Verū esto, non fuerint infantes (quod rixatores isti obijciunt) in domibus, quas baptizarunt Apostoli, nihilominus tamē ad domū pertinent, & in eam censentur, ut si fuissent in domibus baptizassent eos utique. Quod ergo non baptizatos in familijs illis contendunt, eam quidem culpam nos dicimus nec in pueris harere, quasi indigni fuerint baptismō, nec in Apostolis, ut qui non soliti fuerint pueros baptizare, sed in eo, quod non adfuerunt. Nam si adfuissent, baptizati fuissent: eō quod Apostoli totas baptizarunt domos, ad quas liberi pertinent.

Infantium baptismus durauit à temporibus Apostolorum.

Iam uerò ex ueterum scriptis demonstrare possumus, infantium baptismum durauisse ab Apostolorum temporibus ad nos usque, neq; ullis concilijs aut Papæ aliorumue hominum decretis institutum esse, sed ab ipsis Apostolis ex scriptura traditum. Origenes lib. Enarrat. in Epist. Pauli ad Rom. 5. exponens 6. cap. dicit ecclesiam Christi paruulorū baptismum ab ipsis accepisse Apostolis. S. Hierony. meminit baptismi infantium lib. 3. contra Pelagianos, & in Epist. ad Latam. S. Augustinus citat locum Chrysostomi, imò à Iuliano citatum illustrat lib. contra Iulian. 1. cap. 2. Idem ad S. Hierony. Epist. 28. Beatus Cyprianus non aliquod decretum nouum condens, ait, sed ecclesiæ fidem firmissimè seruans, mox natum ritē baptizari posse cum suis quibusdam coepiscopis censuit. Locus Cypriani extat in Epist. ad Fidum, sicuti supra etiam cum de tempore baptismi loqueremur ostendimus. Idem August. contra Donatistas lib. 4. cap. 23. & 24. asserit pædobaptismum non ex autoritate hominum aut conciliorum esse petatum, sed ex traditione uel doctrina Apostolorum. Cyrillus libro in Leuit. 8. & puerorum baptismum approbat, & iterationem baptismi condemnat. Id quod non in hunc finem profero, ut humanis imponam testimonijs pædobaptismum, sed ut doceam diuinis testimonijs congruere humana, & uetustatis ueritatem stare à partibus nostris, mendacia & noua figmenta à partibus effrontium Anabaptistarum, fingentium pædobaptismum à Papa esse præceptum.

Historia Anabaptismi.

Videtur autē operæpretiū esse, ut non nihil dicamus & de Anabaptismo. Decij & Galli Cæs. Imperio exorta est in Africæ partibus quæstio de Rebaptizandis hæreticis. Placuit autem S. Cypriano & reliquis Episcopis in Concilio Carthaginensi congregatis Anabaptismus. Idem Cornelio Rom. episcopo, reuera sancto & docto,

cto, adde & martyri, unà cum multis Italiæ Episcopis displicuit. Hæreticos autem placuit post abiectiōem prauī, & confessionem recti dogmatis sola eos manuum impositione purgandos. Legere hæc licet apud Euseb. Eccles. hist. lib. 7. Extat eiusdem rei tractatio, & in Dogmat. ecclesiast. cap. 52. Sciendum est autem S. Cyprianum in hac causa nihil asseruisse præfractius. In fine enim Epistolæ ad Iubaianum scribit, Hæc tibi breuiter pro nostra mediocritate rescriptimus frater chariss. ne mini præscribentes aut præiudicantes, quò minus unusquisq; Episcoporū, quod putauerit faciat, habens arbitrii sui liberam facultatem.

Post illa tempora rebaptizarunt & Ariani & Donatistæ. De Arianis scribunt historici, & in primis Sozomenus lib. 6. Attingunt eandem rem alicubi & scriptores ecclesiastici. Contra Donatistas cum alijs uiris doctis disputauit beatus Augustinus. Lata est & lex imperatoria ab Honorio & Theodosio, ne sanctum baptisma iteretur. Retulit eam in Cod. libro 1. tit. 6. Iustinianus Cæs. hisce uerbis, Si quis rebaptizare quempiam de ministris catholicæ sectæ fuerit detectus, unà cum eo qui piaculare crimen commisit (si tamen criminis per ætatem capax sit) & hic cui persuasum sit, ultimo supplicio percellatur. Porro Valentin. Valens & Gratianus ad Florianum Asiæ uicarium in hæc uerba præcipiunt: Antistitem qui sanctitatem baptismatis illicita usurpatione geminauerit, sacerdotio indignum esse censemus. Eorum enim condemnamus errorem, qui Apostolorum præcepta calcantes, Christiani nominis sacramenta sortitos, alio rursus baptismo non purificant, sed incessant lauacri nomine polluentes. Hactenus illi.

Lex imperatoria contra Anabaptistas.

Et reuera qui rebaptizant & rebaptizantur, prophanant & nomen Domini, quod super baptizatos in priore baptismo inuocatum est, & reprobant Dei institutum uelut inane & uitiosum. Nō legitur Christus nisi semel esse baptizatus. Semel & non iterum baptizati sunt Apostoli. Semel duntaxat tincti sunt omnes sancti Dei. Imò quos tinxerat semel Iudas, non leguntur à digniore ministro rebaptizati. Proximo enim sermone demonstraui integritatem sacramentorum non dependere à dignitate & indignitate ministrī. Neque uerò legas ullos apud ueteres esse secundo circumcisos, ne illos quidem quos constat ante Ezechiae & Iosiae regnum ab idololatriis circumcisos ministris, sed non in idololatriam, sed in fœdus Domini Dei. Id quod & aliàs monuimus. Nephas ergo est repetere ceremoniam baptismi, & caret exemplo; neq; ulla hic interuenit necessitas. Quorsum enim atinet iterum baptizare, cū baptismus semel datus ad totum pateat uitæ decursus? Præterea cū Anabaptismus nihil aliud sit quàm compactio, coniuratio & contesseratio quædam in nouum & seditiosum, uel saltem superstitiosum consortium, in nouam schismaticamq; ecclesiam, & in nouum doctrinæ genus, Christiano & Apostolico ex diametro aduersum, certè mirum non est Anabaptistas pertinaces publicis coerceri & puniri legibus. Nam sunt ista alioqui damnabilia, & à Christiano magistratu minimè dissimulanda aut ferenda.

Piaculum rebaptismi.

Cæterum duo in præsentī loca opponunt nobis Anabaptistæ. Priorem ex 5. cap. Iosue, ubi in hæc uerba legimus, Fac tibi cultros lapideos & circumcide secundò filios Israel. En secundò circumcidi non potuerunt, inquit, nisi prius quoque fuerint circumcisi. Respondeo, Secundò circumcidere, uel iteratò facere, non significat id quod prius factum fuerat facere. Semel enim sublato præputio, quomodo semel ablatum iterum auferri potuisset? Quod ergo aliquandiu intermissum est, id nunc iterum repetitur, & secundò factum dicitur. Refertur itaq; secundò, non ad circumcidendos, sed ad ipsum tempus quo incircumcisi circumcidebantur. Primò enim circumcisi fuerant in Ægypto solenniter, antequàm ede-

Dissoluantur loci pro Anabaptismo adducti.

rent pascha, iam ingressuri terram Chanaan secundò solenniter circumciduntur, qui hæcenus in deserto & profectiõibus circumcisi non fuerant. Atq; ita sequitur mox in eodẽ capite, mares Ægypto egressos, in deserto mortuos esse omnes, filios autem horum fuisse incircuncisos, unde eos iam oportuerit ut quondam patres eorum circumcidi. Nullum ergo in hoc legis testimonio præsidium habent Anabaptistæ.

*Duodecim uiri
Ephesij nõ re-
baptizati.*

Acto. 8.

Posterius pro Anabaptismo testimonium proferunt ex 19. cap. Actuum Apostolorum: ubi aiunt duodecim illos uiros Ephesios aquæ & Ioannis quidem baptismo semel tinctos ab Apollo: sed eosdem mox rebaptizatos esse à Paulo in nomine Christi. Respondemus duodecim illos non iterum aqua baptizatos esse à Paulo. Semel fuerunt aqua baptizati, id quod eis sufficiebat. Neque uerò alium baptismum aqua potuisset affundere Paulus, quam Ioannis. Docuimus enim & euicimus ab initio huius Sermonis, Ioannis, Christi & Apostolorum aquæ baptismum unum esse atq; eundem. Ibidem exposuimus baptismum ignis uel spiritus Christo esse peculiarem. Viri ergo illi Ephesij baptizati quidẽ fuerunt baptismo aquæ, sicut & Samaritani à Philippo: sed nondum instituti erant plenè de baptismo ignis, nec baptizati erant igne, imò fatentur se nescire an talis sit baptismus, hoc est, an sit spiritus sanctus, qui uisibili specie ignis illabatur hominibus. Absolutè enim ignorare non potuerunt esse spiritum sanctum, sine quo utiq; non crediderant, imò in quem crediderant, siquidem rectè crediderant: proinde baptismum illum ignis duntaxat ignorauerunt. Quemadmodum ergo Petrus & Ioannes Samaritanis imposuerunt manus, atq; hi protinus acceperunt spiritum sanctum. Ita Paulus Ephesijs imponit manus, & accipiunt spiritum sanctum. Lucas enim, His auditis, ait, baptizati sunt in nomine Domini Iesu. Et ne quis hoc intelligeret de aquæ baptismo, mox subiicit modum & expositionem illustrem, Cum imposuisset illis manus Paulus, uenit spiritus sanctus super eos. Hoc inquam appellarat baptizari in nomine Dñi Iesu. Sequitur enim, Et loquebantur linguis: & prophetabant. Hic autem semper fuit fructus & effectus baptismi ignis in primitiua ecclesia, sicut ab initio huius Sermonis ostendimus. Proinde non habent Anabaptistæ ullum ex scripturis pro suo Anabaptismo testimonium. Deferendos ergo & fugiendos esse bonis omnibus uident palam omnes sana ratione uti uolentes. Satis autem uidetur cum his certatum: pergitur modò illa quæ in Baptismo restat explicanda, neque postrema sunt, exponere.

De uirtute baptismi.

De uirtute enim & effectum baptismi differentes illud sequimur ordinem, quem adumbrauimus in descriptione baptismi, perstringentes saltem singula, quod copiosius de his diximus in generali consideratione sacramentorum. Præstat tamen ante omnia nouisse quid hostes ecclesiæ aliquando senserint de uirtute baptismi. Manichæi neminem suorum baptizauerunt. Nam docuerunt baptismum nihil salutis conferre percipientibus. Seleuciæni, qui & Hermiani, baptismum similiter respuerunt. Messaliani, qui & Eucheræ siue precatores (sicut & in fine præcedentis Sermonis monuimus) & Enthusiastæ, numine inquam imò furore afflati nuncupantur, senserunt baptismum neque prodesse, neque obesse cuiquam. Sic enim omnia salutis spiritus operationi internæ, imò precatiori humanæ tribuebant, ut externa omnia, etiam doctrinam tanquam inutilem & inefficacem fastidirent. Id quod de eis commemorat Theodoretus hist. Eccles. lib. 4. cap. 11. Verum scriptura docet ablui nos baptismum à peccatis. Etenim baptismus est symbolum, testimonium, ac obsignatio purgationis nostræ. Deus enim promisit ecclesiæ suæ sanctificationem, idemq; pro ueritate sua, gratia sua per sanguinem filij sui purgare ecclesiam suam ab omnibus peccatis, & spiritu suo regenerat ac mundat, quæ quidem

quidem purificatio ob signatur in nobis baptismo collato: atque ideo appellatur in scripturis ablutio & remissio peccatorum, purificatio, renouatio, regeneratio & lauacrum regenerationis: quemadmodum circuncisio, foedus: & sacrificia, peccata atq; sanctificationes nuncupantur. Legimus enim in Euangelio secundū Marcum, Baptizabat Ioannes in deserto prädicans baptismum poenitentiae in remissionem peccatorum. Idem & apud Lucam traditur. In Euangelio Ioan. 3. cap. baptizatus purificatio appellatur. In Actis Apostolorum dicit Petrus ad populum quarentem quid faciat: Resipiscite, & baptizetur unusquisq; uestrum in nomine Iesu Christi, in remissionem peccatorum. Ananias quoq; Paulo dicit, Surge & baptizare, & ablue peccata tua, inuocato nomine Iesu. Iam uerò ipse Paulus, Christus, inquit, dilexit ecclesiam, & semetipsum exposuit pro ea, ut illam sanctificaret mundatam lauacro aquae, per uerbum. Proinde promissio, imò ueritas sanctificationis & remissionis peccatorum gratuita, inscribitur corporibus nostris cum baptizamur. Deus enim spiritu suo propter sanguinem filij sui animas regenuit ac repurgauit, regenerat atq; repurgat. Valetq; & efficax est baptismus in omni uita hominum, patet item & refertur ad omnia omnium baptizatorum peccata. Verax est enim promissio Dei. Verax non fallax est sigillum promissionis. Semper efficax est Christi uirtus ad expurganda & delenda omnia suorum peccata. Quoties itaq; peccauimus in uita nostra, in memoriam reuocemus sancti baptismi mysterium, quo semel in uniuersa uitae nostrae decursu tincti sumus, ut agnoscamus neq; dubitemus peccata nobis nostra remitti ab eo Deo & Domino nostro, & per sanguinem quidem Christi, cui semel per baptismum sumus insiti, ut hic semper operetur in nobis salutē, usq; dum recipiamur ex miseria in gloriam. Nec dubitū est quin tota uita sua Abraham circuncisionis mysterium exercuerit, ac in Deo ipso & promisso sibi semine acquieuerit. Obseruandum tamen hic censeo id diligentissime, quod significanter inculcauit & S. Augustinus, peccata nobis in baptismo dimitti aut purgari, non ut non sint, (superstes enim concupiscentia uiget & parturit semper) sed ne imputentur: nec ut peccare liceat, sed ut peccasse non noceat, ut sit factis remissio non permissio faciendi. De fide & operibus cap. 20. Ac huius generis per plura citat & Gratianus Distinct. 4. de Consecrat.

Deinde colligimur baptismo in cœtum populi Dei. Vnde à nonnullis appellatus est initiale uel initiationis signum, per quod uidelicet pateat ingressus in ecclesiam. Non quod ad ecclesiam non pertinuerimus prius. Nam ad ecclesiam pertinet, quisquis Christi est, foederis illius æterni & promissionum Dei particeps. Baptismus ergo est signum uisibile & testimoniū nostrae insertionis in corpus Christi: & recte dicitur insitio, incorporatio uel insertio in corpus Christi. Diximus enim in communi consideratione Sacramentorum, primum nos baptismo coniungi cum Christo, deinde cum omnibus Christi membris, fratribus nostris. Paulus enim, Quicumq; ait, baptizati estis, Christum induistis. At Christum induere, est idem cum eo fieri, adeoq; ipsi compingi & incorporari, ut ipse in nobis uiuat, & nos in ipso. Solus enim ille per spiritum suum regenerat ac renouat nos, & omnibus donis largissime perfundit, quod & idē Apostolus alibi hisce uerbis pronunciauit, Deus saluos nos fecit per lauacrum regenerationis ac renouationis spiritus sancti, quem effudit in nos opulente per Iesum Christum seruatore nostrum. Ideo uerò & Christus Dominus in baptismo nostro baptizatus est, ut declararet se esse fratrem nostrum, nos eius cohæredes. Recte ergo dixit beatus Augustinus, ad hoc ualere baptismum, ut baptizati Christo incorporentur, & membra eius habeantur. Idem baptismum appellauit sacramentum Christianae societatis. Recola-

Baptizatur in remissionem peccatorum. Marci 1. Lucæ 3. Ioan. 2. Acto. 2. Acto. 22. Ephes. 5.

Valet baptismus in omni uita hominis.

Colligimur baptismum in populum Dei.

Galat. 3.

Titum 3.

Lucæ 3.

1. Corinth. 12.
Baptismus ser-
uit confessio-
ni nostræ.

ligimur enim uisibiliter per baptismum in unitatem corporis cum omnibus fide-
libus quotquot fuerunt, sunt, atq; erunt. Nam & Paulus dixit, Per unum spiritum
nos omnes in unum corpus baptizati sumus. Sequitur autem hinc baptismum ser-
uire confessioni nostræ, ac tesseram rectè dici Christianæ religionis. Nam nota uel
symbolum est, quo testamur & profitemur in Christianam religionem nos consenti-
re: confitemur nos natura impuros & peccatores esse, sed gratia Dei per Christum
sanctificatos. Si enim puri fuimus natura, quid erat nobis ablutione opus? Iam ue-
rò cum abluti sumus, quis dubitet de ueritate Dei? Verè ergo & liberè cōfitemur
baptismum recipientes, & peccatum quo cum nascimur, sed & gratuitam pecca-
torum remissionem.

Postremò admonet nos recordatio & consideratio mysterij baptismatis officio-
rum pietatis: nempe ut tota uita nostra expendamus apud nosmetipsos diligen-
tissimè, cuius corporis membra facti simus, ut abnegemus nosmetipsos & mun-
dum hunc, ut mortificemus carnem nostram cum concupiscentijs eius, sepelia-
murq; cum Christo in mortem eius, ut resurgamus in nouitate uitæ, & uiuamus
innocenter, ut amemus fratres nostros, tanquam membra nostra, cum quibus in
unum corpus per baptismum sumus compacti: ut maneamus in uinculo concor-
diæ & in unitate ecclesiæ, ne alienas sectemur religiones, memores nos in Christum
baptizatos esse, cui uni consecrati sumus, & longe separati atq; diuisi ab omnibus
alijs dijs, cultibus, siue religionibus, deniq; ab omnibus hæresibus. Cogitemus præ-
terea constanter & fortiter pugnandum esse contra satanam, & uniuersum satanæ
regnum. Quoties ergo recordamur nos esse tinctos Christiano baptismo, toties
animis nostris hæc suggeruntur, & officij nostri admonemur. Copiosius autem tra-
ctat hæc Apostolus in 6. cap. Epistolæ suæ ad Romanos, ubi disertè commemorat
nos per baptismum inuitos esse factos Christi, nimirum ut ex ipso ceu palmites
ex uite succrescamus, sentiamusq; in animis & corporibus nostris & mortem &
resurrectionem Christi. Quia enim spiritu Christi perfundimur, & hic in nobis
agit, corpus quidem in diem moritur, spiritus autem uiuit, & in Christo exultat.
Cui gloria in secula seculorum, Amen.

*De sancta Domini cæna, quid sit, à quo, quādo, & quibus instituta, quo ritu, quando et quo-
ties celebranda sit, de finibus eius. De genuino sensu verborū Cænæ, Hoc est corpus meum.
De præsentia Christi in cæna. De vera manducatione corporis Christi. De dignè & indignè
manducantibus: & quomodo se quisq; præpararet ad cænā Domini.* SERMO IX.

SA N C T O Christi Domini Baptismo coniunctum est sacramentum cor-
poris & sanguinis Dominici, quod appellamus Cœnam Domini. Quos
enim Dominus regenerauit lauacro regenerationis, eos etiam epulo spi-
rituali cibant, alit, sustinetq; ad uitam æternam: consequenter ergo dicendum est de
Cœna Domini sancta.

Vocabula cœ-
næ Domini.

Mensa Domini.

Varias hæc appellationes consecuta est, sicuti & epulum paschatis, in cuius
locum subiit, dicebatur quondam Transitio, uel transitus Domini, quod reuera
erat transitus memoraculū, Memoria, Signum, Solennitas, Festum uel feria, Con-
uentus, Celebritas uel cœtus sacer, Cultus obseruatio, Ceremonia & Victima tran-
sitionis, Sacrificium uel oblatio. De qua re suo loco diximus. Cœna Domini sic di-
cta est ab Apostolo Paulo, ex eo nimirum quòd hæc ceremonia à Domino in ul-
tima illa cœna est instituta, & quòd ipsa spirituale nobis epulū instruitur. Idē Pau-
lus eandem appellauit Mensam Domini, haud dubiè non diuersas ob causas. Ab
eodem

eodem rursus nuncupatur *κοινωνία*, communio, non tam quòd communionem habemus cum Christo, & hanc ille nobiscum habet, quàm quòd unus panis & unum corpus multi sumus, qui de eodem pane participamus. Lucas appellauit Fractio-
nem panis, à parte totum. Ac constat ueteres non exhibuisse cœnantibus buccellas, sed mutuum fregisse panem. Quondam arctissima fœdera fractione panis cōsecrabantur. Dicitur præterea Memoria & celebratio passionis dominicæ. Dominus enim dixit, Hoc facite in mei memoriam. Dicitur Eucharistia, quoniam Cœnam domini celebrâtes, gratias agimus domino pro omnibus beneficijs, pro morte in primis, per quam redempti sumus. Dicitur & Symbolum, & mysterium, & sacramentum corporis & sanguinis dominici. Veteres nominarunt ferè Synaxim, Est autem *συνάξις* coniunctio, coactio, coagmentatio, siue cōciliatio. Ecclesia enim Christo in sacra Cœna perquam arctissimo fœdere coniungitur ac adunitur, denique ipsa inter se membra tenacissimè cōglutinantur. Dicta est præterea Conuentus sanctorum, cœtus sacer, & collecta. Non enim celebrari antiquitus consuevit, nisi in cœtu publico ecclesiæ. Quod ex Apostolo claret 1. Corinth. 11. Porro nihil peccauerimus si Cœnam domini Testamentum Dei & domini nostri appellauerimus. Inuenias enim hic quæ ad testamentum plenum pertineant omnia. Testator enim Christus est. Hæredes instituuntur omnes Christi fideles. Legatū est ipsa peccatorum remissio, & uita sempiterna, parta per traditū corpus & effusum Christi sanguinem. Verū literæ seu tabulæ testamenti huius sunt uerba Cœnæ dominicæ, testificâtes ceu publico scripto Christum fidelium esse cibum ac uitam. Ipsa uero actio seu ritus instar sigilli est. Quemadmodum itaque literas obsignatas testamentum scripto comprehendentes & obsignantes, nuncupamus testamentū: ita ipse dñs Cœnam suam dixit testamentū. Hoc enim poculum, inquit, nouū testamentum est in meo sanguine. Alioqui enim testamentū nouum est peccatorū remissio. Id quod Ieremias disertè testatur cap 31. & Paulus Hebr. 8. Habet hoc sacrum & alia uocabula, sed hæc maximè memorabilia & uulgaria. De alijs aliàs.

Communio.

Fractio panis.

Memoria passionis domini.
Eucharistia.

Sacramentum.

Synaxis.

Conuentus.

Testamentum.

Cœnam domini definiunt ferè epulum esse spirituale, quo dominus & mortem suam in memoria retinet, & suos ad uitam pascit. Liceat autem & mihi eius descriptionem paulò copiosiore proponere in medium. Cœna domini, est actio sacra, diuinitus ecclesiæ instituta, qua dominus pane & uino in epulum apposito, suam nobis promissionem & cōmunionem attestatur, dona quæ sua nobis repræsentat, & sensibus subiicit, uisibiliter in unum corpus colligit, mortem denique suam in memoria fidelium retineri uult, & officij nos nostri monet, laudis & gratiarum actionis maximè.

Quid sit Cœna Domini.

Principiò dicimus Cœnam domini esse actionem. Dominus enim ipsam instituens gratias egit Deo, panem fregit & poculum distribuit, ac dixit, Hoc facite in mei cōmemorationem. Deinde non quæuis actio est. (Ad cibariam enim mensam benedicimus etiam Deo, panem frangimus, & poculū distribuimus) sed actio sacra, quia diuinitus & ecclesiæ quidē est instituta. Plurimum ergo differt à cibarijs & uulgaribus illis cœnis, cum quòd singulariter à filio Dei & ecclesiæ instituta est, tum quòd uerbum Dei & peculiare Christi exemplum habet. S. Paulus ergo hanc ab epulis discernens prophanis, Si quis, inquit, esurit, domi edat, ne ad condemnationem conueniatis. Et iterum, An nō habetis domus ad edendū & bibendum? Qasi dicat, Hæc utique cœna mystica est. Rursus, qualis sit actio, mox declaratur cū subiungitur, Qua dominus pane & uino in epulū apposito, suam nobis promissionem & communionē attestatur, &c. Habet itaque peculiare suos fines Cœna: de quibus etsi dixerim cū differerem generaliter de Virtute sacramentorū,

Cœna actio sacra.

repetam tamen quædam huc maximè pertinentia, cum ad finem prope huius sermonis peruenero.

*Quis author
cenæ.*

Circa hanc descriptionem autem Cœnæ, hæc potissimum ueniunt consideranda & explicanda. Primum quis instituerit & sit uerus cœnæ dominicæ author & hospes: nō homo aliquis, sed ipse Dei filius, patris sapientia, uerus Deus & homo. Vnde non ad hominum mensam, licet huic homo minister præsideat, neq; de manibus ministri tantum, sed de manibus ipsius domini sacra percipimus symbola, accumbentes ad mensam Christi domini nostri, cuius sumus hospites, si fuerimus fideles. Hic consecrauit nobis Cœnam, & cōsecrat adhuc uerbo, uoluntate & uirtute sua sancta. De qua re superius diximus. Hæc quia intelligunt fideles, ad sacras cœlestesq; epulas cum Christo accumbunt, mente & animo conuersantes in cœlestibus.

Quando instituta cœna.

Ea autem nocte qua tradebatur & postera sanguine fuso moriendoq; nouum testamentum confirmabat, cœnam instituit. Mox enim atq; agnum typicum cum discipulis edisset, ac clarè dixisset eius ceremoniæ nullum porro usum futurum, in locum abrogatæ cœnam hanc reposuit. Vt quemadmodum agnus sanguinolentus Christum passurum significauerat: ita panis incruentus testaretur Christum cibum uitæ, iam in cruce tostum ac passum, factum esse cibum omnium credentium. Obseruabilis ergo fuit nox illa, & cœna hæc ultima mysterijs est referta. Solent alioqui dicta & facta, quæ proximè mortem præcedunt, charissimorum hominum nobis esse maximè cōmendata. Ergo ut omnia Christi nobis chara sunt & pretiosa, ita meritò extrema hæc cœna debet nobis esse charissima & pretiosissima.

*Quibus rebus
constet cœna.*

Constat autem Cœna uerbo & ritu, promissione & ceremonia. Verbum est, quod annunciat Christus in mortem traditus propter peccata nostra, & fuisse sanguinem in remissionem peccatorum nostrorum. Promittitur ergo credentibus remissio peccatorum. Hæc eadem res & ritu repræsentatur. Ritum illum nobis diligenter tradiderunt literis consecratum S. Matthæus, Marcus atque Lucas, quos secutus Paulus ne tantillum quidē ab his uariauit. Ego ex quatuor illis omnia in unum recollecta contextum iam c. v. recitabo, Vespere facto ea nocte qua tradebatur, uenit dominus cum duodecim, & cum esset tempestiuum, accubuit, & duodecim cum eo. Vescentibus autem eis, accepit Iesus panem, & cum egisset gratias, fregit, deditq; discipulis, & ait, Accipite, comedite, hoc est corpus meum quod pro uobis traditur (uel) frangitur. Hoc facite in mei recordationem. Similiter & poculo (postquam cœnauit) accepto, gratias egit, & dedit eis, dicens, Accipite hoc & diuidite inter uos, Bibite ex eo omnes. Et biberunt ex eo omnes. Et dicebat illis, Hic enim est sanguis meus, qui est noui testamenti: qui pro multis effunditur in remissionem peccatorum. (Hoc est poculum nouum testamentum in sanguine meo, qui pro uobis effunditur) Hoc facite quotiescunq; biberitis in mei commemorationem. Amen dico uobis, quod non bibam posthac ex fructu uitis usq; in diem illum, cum illud bibam uobiscum nouum in regno patris mei. Hæc sunt ad uerbum solennia & sacrosancta Cœnæ domini uerba.

Quo ritu celebrata & instituta sit Cœna.

Summus Pontifex ecclesiæ catholicæ Christus dominus Cœnam celebrauit cum discipulis suis, sicut iam uidimus & audiuius citra omnem pompam, simpliciter planè & frugaliter. Abrogauit enim legis paulò operosiorē ceremoniā, nouā substituit maximè parabilem & minimè sumptuosam. Legis enim pleraq; fuerunt operosiora, euangelij omnia sunt parabilia & sumptuosa minus. Discumbit ergo dominus cum duodecim suis discipulis. Vnde discimus ante omnia cœtum esse colligendum, qui Cœnam celebret. In cœtu suo hæc facit dominus.

Princi-

Principiò diligentissimè cōcionatur suis, & de ijs maximè, quæ attinebant ad mysterium passionis & redemptionis nostræ. Cæterum ubicunq; est doctrina & auscultatio uerbi domini, uel euangelij Christi, ibi sunt gemitus & uota siue preces fidelium. Proinde celebraturi Cœnam dominicam ante omnia, ad exemplum & institutionem summi pontificis Christi domini, prædicationem euangelij audiunt diligentissimè, & precantur attentissimè. Deinde uerò accepit panem, benedixit & fregit dominus, dedit præterea discipulis suis & comedere iussit. Distribuit mox etiam poculum, & ex hoc omnes bibere mandauit. Sed & disertum & perspicuum mandatum subiecit, dicens, Hoc facite: nimirum quod me facere uidistis. Discipuli ergo & panem comederunt & de poculo biberunt omnes. Idcirco legitime Cœnam domini celebrantes, mutuò inter se panem domini de manibus ministrorum Christi acceptum, frangunt, distribuunt & manducant, poculum insuper domini de manibus ministrorum Christi acceptum inter se distributum omnes potant. Et sicut pontifex summus Christus id facere iussit in sui memoriam, ita cœnam celebrantes memoriam mortis & omnium beneficiorum Christi peragunt. Præterea sicut dominus præiit exemplo suo gratias agens Deo patri, ita fideles gratiarum actione sacrum hoc concludunt, laudantes bonitatem & misericordiam eius, quoniam bonus, quoniam in æternum misericordia eius. Hic ritus Cœnæ domini & simplicissimus & optimus est, quem apostoli à domino Christo acceptum, omnibus nationibus custodiendum tradiderunt.

Ergo cum interrogatur, an liceat alio ritu cœnare, an liceat tradito ritui addere aliquid an adimere, aut aliquid in ipso mutare, an hac ipsa iam tradita & non alia forma oporteat celebrare cœnam domini? stultitia & temeritas non modica, quinimò impietas maxima proditur. Quorsum enim attinet simplicissima, optima, perfectissimaq; cœnandi formula ab ipso domino tradita, & ab apostolis eius accepta, comminisci aliam? Quis quæso meliorem tradet ipso Dei filio, pontifice ecclesiæ catholicæ summo? Quis oro sanæ mentis addet, aut adimet aliquid institutis Dei? Quis immutare audeat tradita ab æterna Dei sapientia? Omnia Christi cum dicta tum facta sunt perfectissima: ergo & forma cœnæ dominicæ, instituti singularis & celeberrimi, perfectissima est. Perfectissimi fuerunt ritus sacramentorum ueteris testamenti, sic à prima eorum institutione traditi, ut his nihil à religiosis uel adijceretur uel adimeretur etiam post multa secula. Celebrauit enim pascha Ezechias rex, celebrauit & Iosias, sed non alio ritu, quàm tradito à Mose. Circunciderunt infantulos suos patres, sed non alia ratione, non alio ritu, quàm primitus tradito. Homicidij perpetrati accusabatur in lege quondam, si quis non sacrificasset eo loco & ritu, quem præscripserat deus per Moysen. Fulmine coelitus demisso feriuntur Nadab & Abihu, quòd alienum ignem intulissent in tabernaculum: Oza percutitur repentina morte, quòd non eo modo tractaretur arca Dei exercituum, quo in lege iussa fuerat tractari. Proinde nobis quoq; ritus à domino institutus Cœnæ, & traditus ecclesiæ ab apostolis, maxima religione custodiendus erit: nisi credere libeat sacramentorum nostrorum instituta & ritus imperfectiores esse ueterum institutis, deumq; patrem hodie minus curare prophanationem, aut religiosam obseruationem institutorum filij sui, quàm olim patrum ac Moysi. Cæterum uas electionis Paulus, intelligens institutionem Christi & perfectissimam esse & eandem simpliciter absq; additamenti retinendam in Ecclesia, Corinthiis dicit, Ego accepi à domino quod et tradidi uobis. Nā nephas putauit aliud tradere ecclesiæ, quàm quod acceperat à domino. Teneamus ergo magna religione quod traditum à domino accepimus & apostolis. Nihil autē aliud Corinthiis

An liceat ritui
aliquid addere,
etc.

Leuit. 17.
Leuit. 10.
2. Sam. 9.
Num. 4.

1. Cor. 11.

tradidit Apostolus, etiam post multos ab ascensione domini in cœlū annos, quàm quod scripto fideli tradiderunt nobis sancti Apostoli & euangelistæ, beatus Matthæus, Marcus & Lucas.

Quomodo Cœna quondam celebrata in ecclesia.

Certè seculis aliquot ab obitu Apostolorum, simplicem illam rationem celebrandi Cœnam domini obseruatam esse ab Ecclesia constat. Nam prodibat in cœtum sacrum postquam prædicasset euangelium, & præuia oratione publicas Deo preces obtulisset, pastor uel minister ecclesiæ. At in prospectu populi stabat instructa pane & uino mensa, ponè hanc astans benedicebat populo, dicens, Dominus uobiscum. Excipiebat populus, Et cum spiritu tuo. Subdebat pastor, Sursum corda, admonens ecclesiam mystica sacra fore iam celebranda, ideoq; mentes à uisibilibus eleuandas ad inuisibilia. Respondebat populus, Habemus ad dominum. Inde uerò ad gratiarum actionem inuitans totam Ecclesiam, clamabat, Gratias agamus domino deo nostro. Respondebat ecclesia, Dignum & iustum est. Pastor iterum subiungebat, Verè dignum & iustum est, æquum & salutare (& conuersus ad dominum) nos tibi semper & ubiq; gratias agere domine sancte pater omnipotens æterne Deus, per Christum dominum nostrum; qui pridie quàm pateretur accepit panem, gratias egit, fregit, deditq; discipulis suis. Et reliqua quæ commemorantur in Euangelio. His ex euangelio recitatis subdebat pastor, Oremus præceptis salutaribus moniti, & diuina institutione formati, audemus dicere, Pater noster qui es in cœlis, &c. Post recitatam orationē dominicā populus sacra percipiebat mysteria, communicabatq; & post laudes Deo oblatas dimittebatur. Atq; huius quidem ritus quædam uestigia cernere licet apud scriptores ueteres, S. Cyprianum, S. Augustinum & alios.

Immutata forma Cœnæ dominicæ.

Porro sequentibus exinde temporibus creuerunt preces & benedictiones, creuerunt in immensum usq; ritus. Immutata est præterea institutio Christi, & conuersa in alienum usum, consarcinata est deniq; Missa, in qua parum uideas uetustatis. Sed de his aliàs differui copiosissimè, intelligitq; totum hoc negotium c. v. per optimè. Nihil curamus qui Christi domini institutionem perfectissimam & purissimam ab apostolis traditam tenemus, quid quicq; hominum, & quando quisq; pontificum hoc uel illud ritui sacro addiderit, detraxerit uel immutauerit: sed quid, qui ante & super omnes est, prior & fecerit & facere iusserit. Si instituentis autoritas, doctrina & sanctitas, si uetustas ualere debet, uicimus nos qui Christum pro nobis habemus cum electissimo Apostolorum choro. Ab his enim habemus quod celebramus, & omnibus celebrandum contendimus pñs.

Quare sub specie panis & uini instituta cœna. An panis azymus an fermentatus usurpandus.

Cur autem mysterium hoc instituerit dominus sub specie panis & uini, perspicuum est. Panis enim confortat, & uinum exhilarat cor hominis. Id quod monui cum differerem de Analogia sacramentorum. Præterea ederunt patres nostri in typo manna, panem cœlo deplutum. Vñ sunt & in gratulatorijs suis oblationibus & libaminibus pane & uino. Caterum odiosa excitata est cōtentio super materia Cœnæ dominicæ: contendentes his pane azymo, alijs uerò fermentato esse cœnandum. Atqui apud ueteres quondam de his nullæ mouebatur rixæ. Nam ecclesiæ pro sua libertate utebantur utroque. Videtur quidem dominus in prima illa Cœna usus esse pane azymo in mensa, ex ueteri more celebrandi paschatis relicto. Vnde non pauca ecclesiæ infermentato pane usæ sunt: quæ tamen fermentato utentes non damnabant hæreseos. Papa autem cum suis non leui scandalo Græcos leuiculam hanc ob rem anathemate percussit. Damnatī sunt interim à priscis nonnulla de causa Artotyritæ, quorum mentio fit ab Epiphanio inter Pepuzianos & Priscillianos, in mysterijs contra institutionem Christi apponentes cum pane caseum.

Dispu-

Disputatur præterea, uinum ne merum an aqua dilutum in cœna sit fidelibus propinandum. Cyprianas martyr propter mysterium contendit non merum sed aqua dilutum esse offerendum, id est propinandum fidelibus. Sic enim scriptum reliquit, Quia nos omnes portabat Christus, qui & peccata nostra portabat, uideamus in aqua populum intelligi, in uino ostendi sanguinem Christi. Quando autem in calice uino aqua miscetur, Christo populus adunatur & credentium plebs ei in quem credidit copulatur & iungitur. Sic autem in sanctificando calice domini offerri aqua sola non potest, quomodo nec uinum solum potest. Nam si uinum tantum quis offerat, sanguis Christi esse incipit sine nobis: si uero aqua sit sola, plebs incipit esse sine Christo. Quando autem utrunque miscetur & adunatione confusa sibi inuicem copulatur, tunc sacramentum spiritale & cœleste perficitur. His pulchrum sanè mysterium aperit S. Cyprianus: uerum quare pergimus Christo esse prudentiores & plura cōminisci mysteria quàm ab ipso acceperimus? Scriptura nō meminit ullius aquæ, imò cōmemorat dominum mero usum esse uino. Nam dominus dicit, Amen dico uobis, quod posthac non bibam ex hoc fructu uitis. Significanter enim non uinum, sed uitis fructum dixit, ne ullam hic cōminisceremur mixturam. Quid quod ipse sanctus dei martyr Cyprianus modis omnibus contendit in celebranda Cœna domini id duntaxat esse sequendum fidelib. quod traditum acceperunt à Christo domino? Quoniam uero illud testimonium facit pro tota hac traditione nostra, de Cœna Christi secundum uerbum euangelij celebranda, recitabo hoc ex 2. Epist. lib. epist. 3. de uerbo ad uerbum.

Ab euangelicis præceptis omnino recedendum non esse, inquit, & eadē quæ magister docuit & fecit, discipulos quoque obseruare & facere debere, constantius & fortius alio in loco beatus Apostolus docet, dicens, Miror quod sic tam citò de mutamini ab eo qui uos uocauit in gratiam ad aliud euangelium: quod non est aliud, nisi sunt aliqui qui uos perturbant & uolunt conuertere euangelium Christi. Sed licet nos aut angelus de cœlo aliter annunciet præterquam quod annunciauimus uobis, anathema sit. Sicut prædiximus & nunc iterum dico, Si quis uobis annunciauerit præterquam quod accepistis, anathema sit. Cum ergo neque ipse apostolus neque angelus de cœlo annunciare posset aliter aut docere, præterquam quod semel Christus docuit, & Apostoli eius annunciauerunt, miror satis unde hoc usurpatum sit, ut contra euangelicam & apostolicam disciplinam quibusdam in locis aqua offeratur in dominico calice, quæ sola Christi sanguinem non possit exprimere. Et iterum, Nō est frater charissime, quod aliquis existimet sequendam esse quorundam consuetudinem, si qui in præteritum in calice dominico aquam solam offerendam putauerunt. Quarendum est enim ipsi quem sint secuti. Nam si in sacrificio, quod Christus est, non nisi Christus sequendus est, utique id nos audire & facere oportet, quod Christus fecit & faciendum esse mandauit: cum ipse in euangelio suo dicat, Si feceritis quod mando uobis, iam non dico uos seruos sed amicos. Et quod Christus debeat solus audiri, pater etiā de cœlo contestatur, dicens, Hic est filius dilectissimus, in quo bene sensi: ipsum audite. Quare si solus Christus audiendus est, non debemus attendere quid aliquis ante nos faciendum putauerit: sed quid qui ante omnes est Christus prior fecerit. Neque enim hominis consuetudinem sequi oportet, sed Dei ueritatem. Cum apud Isaiam prophetā Deus loquatur & dicat, Sine caussa autem colunt me, mandata & doctrinas hominum docentes. Et iterum dominus in euangelio hoc idem repetat, dicens, Reijcitis mandatum Dei ut traditionem uestram statuatis. Sed & alio loco ponit, & dicit, Qui soluerit unum ex mandatis istis minimis, & sic docuerit homines, minimus

Vino ne miscēda aqua.

In cœna celestī brāda nihil aliud sequendum quàm quod à Christo accepimus.

uocabitur in regno cœlorum. Quòd si nec minima de mādatis dominicis licet soluere, quanto magis tam magna, tam grandia, tam ad ipsum dominicæ passionis & nostræ redemptionis sacramentum pertinentia phas non est infringere, aut in aliud quàm quod diuinitus institutum est, humana traditione mutare? Et reliqua. Ea autem contra authorem ipsum ualere nemo negare potest. Nam scripturis & exemplo Christi demonstrari non potest, uino aquam esse mixtam in cœna. Quæ idem author profert testimonia, nemo non uidet ad propositū negotiū nihil facere, adde & à natiuo sensu deflexa esse. Euangelium simpliciter pronunciat, dominum suis fructum uitis propinasse. Et cum S. Paulus toties meminit poculi, nupiam tamen aquam uino infusam aut infundendā esse docet. Proinde rectè damnantur aquarij, id est, aqua pura utentes in cœna: quales fuisse cōmemorant Martionitas & Tatianos. Porro indifferens est, uino utaris in cœna rubro an albo.

De utraq; specie in cœna danda & accipienda.

Rursus cur non sub una uel panis uel uini specie, sed sub utraq; sacramentum cœnæ nobis tradiderit dominus: illud unanimiter in caussa omnes doctores ecclesiarum esse arbitrantur, quòd ita significare, imò attestari uoluit, & animam & carnem se suscepisse, eademq; impendisse pro nobis, sed & animam & carnem nostram liberasse ab interitu sempiterno. Quamuis uerò duæ sint species, unū tamen duntaxat constituunt sacramentum. Neq; enim separandæ sunt. Neq; probanda est eorum sententiā qui priuata, imò sacrilega quadam potestate institutū Christi corruperunt, offerentes communicantibus laicis unam duntaxat speciem panis, sacerdotibus autem utranq; concedentes, adeoq; & solis his uendicantes. Etenim S. apostolus Paulus ab ipso dño accepit ius, omnes Christi fideles admittendi ad poculum dominicū: uideant ergo audaculi illi à quo acceperint præceptum arcendi laicos, & prohibendi his concessum à dño Deo poculum. Nam Christus disertis uerbis, & ueluti prophetico spiritu prænosens quid futurum esset in ecclesia, non ad panem adiecit, Edite ex hoc omnes: sed ad poculum addidit, Bibite ex hoc omnes. Marcus quoq; non sine graui caussa subiungit, Et biberunt ex eo omnes. Quibus accedit quod apud Lucam dominus dicit, Accipite hoc, & diuidite inter uos. Hoc luculentum & disertum Christi institutum spectans apostolus Paulus ter aut quater panē connectit poculum, dicens, Quotiescunq; comederitis panem hunc, & de poculo hoc biberitis, mortem domini annunciate. Item, Quisquis ederit panem hunc, aut biberit de poculo domini indignè, reus erit corporis & sanguinis domini. Et iterum, Probet semetipsum homo, & sic de pane edat, & de poculo bibat. Rursus, Qui edit & bibit indignè, &c. Multiplex est hoc testimonium, dignum planè cui credatur, & cui cedant omnes omnium hominum traditiones. Omnibus fidelibus instituit dominus poculum cœnæ: ergo Apostoli eius omnibus fidelibus exhibuerunt. Etenim si sacramentū sanguinis Christi solis datum est apostolis, certè res ipsa, nempe peccatorum remissio per sanguinē Christi parta, ad solos pertinet Apostolos. Cæterum dominus disertè dicit, Hic est sanguis noui testamenti, qui effunditur pro multis in remissionē peccatorū. In alijs quoq; scripturæ locis traditur disertè, sanguinē Christi effusum esse pro remissione peccatorum omnium fidelium. Proinde cum laici rei capaces sint, quāto magis signi? Si uero aduersarij perrexerint dicere, solos ad cœnam accubuisse apostolos, (qui typum prætulerint sacerdotū) & his solis usum calicis esse concessum, nec alijs nisi in prima cœna præsentibus concedendum: interrogamus eos quo iure panē domini offerant laicis, aut quo iure ad cœnam admittant mulierculas? cum satis constet nec has nec illos (uti isti hac de re loquuntur) assedisse mensæ domini. Atq; hic deprehensi hærent. Sed obijciunt periculū calicis, qui si offeratur promiscuè omnibus,

nibus, futurum ut hominum ineptia imperitiaque magno cum scandalo effundatur in pavementum. Quasi uero aeterna Dei prouidentia non prouiderit tantum scandalum, quod sapientes isti demum in fine seculi perspiciunt, & quod Dei filio defuit, sarciant. Sufficere autem clamitant laicis unam speciem, cum per concomitantiam ibi deprehendatur esse sanguis Christi, ubi est corpus Christi. Ita uero sequeretur alteram speciem frustra esse institutam. Sed separatim quidem primum obtulit Dominus panem, deinde uero poculum: neque quicquam eorum quae Dominus instituit redundat: proinde utraque species omnibus debet, sic iubente Domino, fidelibus distribui. Id quod fecisse omnem uetustatem ad tempora ferme usque Concilij Constantiensis testabuntur, quotquot ueterum scripta perlegerunt. Ex quibus nonnulli nihil ueriti sunt dicere, non sine sacrilegio diuisionem fieri huius sacramenti.

Post materiam coenae explicatam, solet quaestio texti de forma uel de consecratione panis & uini. Sed quoniam de hac dixi in generali sacramentorum consideratione, non est quod cum fastidio auditorum eandem rem repetam. Non agnoscimus ullam transubstantiationem uel uerborum & characterum factam, sed panem & uinum in suis substantiis, id quod sunt, manere asserimus, accedere autem institutionem, uoluntatem, ac uerbum Christi, & fieri sacramentum, atque sic plurimum differre a pane & uino prophano, ut suo loco diximus.

De Consecratione panis & uini.

Sequitur iam quaestio de eo, Quis administret coenam: id est, An aliquis ex ecclesia actioni coenae debeat praeesse, & quis? Certe res ipsa flagitat, & iubet natura, ut omnia fiant decenter ac iusto ordine: flagitat religio, ut omnia coenae fiant ad exemplum Christi. At hic praefuit coenae. Idem ministros ecclesiae instituit, per quos uoluit administrari sacramenta. Quemadmodum ergo non quiuis baptizat, sed legitimus ecclesiae minister: ita non est cuiusuis instruere sacramentum coenam, & administrare, sed a Deo ordinati ministri. Improbamus autem in praesenti doctrinam Papisticam approbantem Missas priuatas, tradentemque sacerdotem offerre corpus & sanguinem Domini pro astantibus, & applicare per Missam meritum redemptionis, sacrum hoc deuote contemplantibus. Ut enim nullum extat uerbum Domini quod sacerdotes sacrificare uel priuatim applicare iubeat coenam pro alijs, aut quod contemplantibus coenam quicquam promittat, Hoc facite, inquit, edite & bibite omnes in mei memoriam, non autem dicit edentes aut bibentes solos sacerdotes pro uobis, contemplamini: ita corporaliter non adest panis & uino Christus: animis nostris spiritu suo coniunctus est: nullo cum fructu resideret in pane. Et ut adsit maxime, sacrificari tamen non posset, cum quod ipse semetipsum semel in cruce obtulit, nec ab ullo homine peccatore Deo patri unigenitus & dignissimus Dei filius amplius offerri possit: tum quod nihil necesse sit eum offerre denuo, Paulo dicente, Christus una pro peccatis oblata uictima perpetuo sedet ad dexteram Dei, id quod superest expectans donec reddantur inimici eius scabellum pedum eius. Unica enim oblatione perfectos effecit in perpetuum eos qui sanctificantur. Et iterum idem, Vbi est plenaria peccatorum remissio, ibi non est amplius oblatio pro peccato. Atqui plenaria nobis collata est remissio peccatorum per mortem Christi semel factam. Proinde nullum est amplius sacrificium ecclesiae pro peccato. Celebrat itaque ecclesia commemorationem sacrificij semel in cruce peracti: non sacrificat amplius uel cruentum uel incruentum. Est quidem laus & gratiarum actio sacrificium Domino gratissimum: uerum hoc non offert minister pro alijs, sed cum alijs. Nihil ergo hic ministro aliud tribuimus quam ministerium, ut in celebratione coenae praestet precibus recitandis, ac post praedicationem

An aliquis praesse debeat actioni coenae.

Hebr. 10.

sacram uerborumque solennium pronunciationem, ipse, Christi ad exemplum, panem Domini frangere, & poculum eius distribuere incipiat, ipse quoque sicut alij fideles, & ut consors fidei pro se sacramenta percipiat, & communione peracta, sacram actionem gratiarum actione & sancta exhortatione concludat.

De loco coenae
Domini.
Acto. 10.

De loco in quo celebretur coena, nihil uideo rixatum apud uetustissimos ecclesiae ministros. Dominus Iesus usus legitur aula priuata cuiusdam domus. Sed & Paulus Apostolus Troade & praedicat, & panem frangit in quodam coenaculo. Ac uetus quidem ecclesia, proximè sequens Apostolorum mortem, ad magni Constantini ferè tempora usque, uel rarissima uel nulla habuit templa augusta & publica. Vix enim Christianis in tam atroci tempestate licebat in publicum prorepere. Interim utebantur locis honestissimis, in quibus in coetum coibant sacrum, habentes oratoria. Hodie non uidetur ullus locus & dignior & commodior esse Coenae sacrae, quam idem ille qui destinatus est doctrinae & precibus. Sic enim à Paulo didicimus 1. Corinth. 11. cap. Ceterum si uis tyrannica non concedat templum, in aedibus priuatis, sed honestis, honestè coenare quid uetaret? De instrumentis quoque Coenae sacris non nihil in medium proferre ipsa poscit res. Apostolica secula mensis positis coenabant: ignorabant aras fixas & extructas lapide, quae magis idoneae sunt fouendis ignibus pecudibusque cremandis. Et portatilis quidem mensa magis congruit exemplo Christi. Altaria interim statim minimè damnamus, modò legitimo usui Coenae duntaxat seruiant. S. Paulus in 1. ad Corinthios aras ethnicorum, mensas appellauit, ut mirari non debeamus cur ueteres mensas nostras nuncupauerint altaria. Facilis est enim transitus de altero ad alterum: uideturque ab illis allusum ad aram illam tabernaculi Dei unicam. Insternebantur mensae quondam mundo aliquo panno, linteo, uel mappa. Vnde fortassis mutuata sunt quae appellantur Corporalia. Splendorem autem & ornatum illum mundanum tum quidem ignorauerunt aera Christianorum. In lege enim cautum legimus, ne qua extrueretur ara lapidibus politis: qua lege omnis sumptus & splendor in religionibus prohibitus est.

De ara uel mensa
Dei.

De Vasis coenae
Domini.

Vnde nec uasa quidem Coenae quondam pretiosa fuisse constat. Vt enim Christus & Apostoli ubique frugalitatem docuerunt, & luxum damnarunt, contemptumque auri & argenti inculcauerunt: ita sacris mysticis doctrinam illam suam non subuerterunt, aut occasionem praebuerunt luxui. Cum pax post diutinam persecutionem reddita esset ecclesiae, coeptum est aureis & argenteis uasis libari in templis. Sed tum quoque non defuerunt qui istud reuocarent ad antiquam frugalitatem & simplicitatem. Chrysostomus enim clamabat (quod & alias monui) in Coena Domini peragenda non aureis uasis, sed animis esse opus. Et Ambrosius, Aurum, inquit, sacramenta non quaerunt, neque auro placent quae auro non emuntur. Ornatus sacramentorum redemptio captiuorum est. Laudat S. Hieronymus S. Exuperium Tolosanum Episcopum, qui corpus Domini canistro uimineo, sanguinem portabat in uitro, & qui auaritiam eiecerat ex templo. Et quidem quasdam ecclesias post octingentos annos & amplius à passione Domini, usas esse ligneis uasculis in propinando sanguine Christi, ille canon Concilij Triburiensis. couincit, qui adhuc extat in Decretis Pontificijs, uetans ne quis sacerdos sacrum mysterium in ligneis uasculis conficiat. Antiquissima sunt itaque pocula in coena Domini ligneae. Rogatus olim Bonifacius archiepiscopus (quod etsi alibi adduxerim, cogor tamen hic propter argumenti conuenientiam repetere) an liceret in uasculis ligneis sacramenta conficere? Respondit, Quondam sacerdotes aurei ligneis calicibus utebantur: nunc è contrario, lignei sacerdotes aureis utuntur calicibus. Quod si quis

si quis ex alia materia parata, citra luxum & superstitionem proferat, non contemderim odiosius, modo agnoscat nihil peccare ligneis usurpantes calicibus. Nam quantum ad formam & materiam poculorum attinet, libera sunt omnia fidei ecclesiae.

Porro constat ipsum Dominum nostrum in prima Coena, adde & Apostolos in celebratione Coenae usos esse ueste uulgari & honesta. A primogenia ergo institutione non discrepat, si minister ad mensam Domini prodeat tectus suo, ceterum decoro & honesto uestimento. Certè qui percipiunt, non alia quàm uulgari ueste induuntur. Cauendum ergo ne hic subrepat superstitio. Veteres unico tecti uidentur pallio superinducto uulgari uestimento: idè non exemplo Christi, uel Apostolorum, sed ex traditione humana. Tandem suppellex illa quæ hodie uisitur, ex imitatione uestitus sacerdotalis ueteris legis collecta est & iniecta ministris Coenam celebrare uolentibus. Nec dissimulat hoc Innocentius eius nominis I I. in lib. de Sac. alt. myst. 4. cap. 4. At nos dudum didicimus Leuitica omnia non tantum esse abrogata, sed à nemine rursus reducenda in ecclesiam. Ergo cum in luce Euangelica, non in umbra legis uersetur, meritò reijcimus uestitum illum missalem Leuiticum.

Lingua uerò patria & omnibus intelligibili, uel uulgari in celebrandis sacramentis quamlibet gentem ab antiquo esse usam dixi aliàs. De Gesticulationibus, quibus in Coena celebranda utantur ministri, ex Euangelio aliud nihil dicere possumus, quàm quod didicimus. Accipit Dominus panem, benedixit, fregit, distribuit, &c. Hæc si imitetur minister, non est quòd de alijs sit sollicitus gesticulationibus. Quæ hodie in Missarum celebratione sunt recepta hominum arbitrio, adeò nihil maiestatis addunt mysterijs, ut plus contemptus concilient, ne quid dicam aliud quod uideatur atrocius.

Indifferens est autem accumbendo uel adeundo Coenam peragat ecclesia, ac sacra symbola in manus proprias accipiat, uel in ipsum os de manu præsidentium excipiat. Primogeniæ simplicitati & institutioni magis congruit, & sedere, & sacramenta in manus proprias accipere de manibus præsidentium, deinde uerò frangere, percipere, ac alijs impartiri. Ut enim Dominus ad mensam cū discipulis accubuit, ita dixit porrectis symbolis, Accipite, Diuidite inter uos. Præterea sicut tranquillius & minore turba coenatur sedendo, circumferentibus per ecclesiam mysteria sacra ministris: ita satis constat ex ueterum historijs eucharistiam quondam datam esse in manus sumentium. Superstitio est pugnans cum doctrina Apostolorum, qua raduntur manus laicorum, attingentium sacram Eucharistiā. Quare non radunt eodem iure labia, linguam & fauces communicantium?

Retexitur ex his & alia quæstio, quid iudicare oporteat de reliquijs coenæ Dominicæ, an aliquid recondendum de Coena, an reconditum uel reclusum sit adorandum? Sed uidetur hæc quæstio nihil habere pietatis, superstitiosa autè & perniciosa esse prorsus. Quis enim nesciat panem & uinum extra usum sacrum legitimumque non esse sacramentum? An pergemus unà cum sophistis inquirere, quid arrodat mus, cum arrodit panem Dominicum? Indignissimæ sunt hæc quæstiones & obruendæ obliuione sancta. De recludenda uerò Eucharistia ne uerbum quidem docet nos in Euangelio Dominus, multò minus de adoranda. Accipite, inquit, edite, diuidite inter uos: non autè dicit, Recondite, adorate. Nam ueri adoratores adorant patrem in spiritu & ueritate. Præterea legimus disertis uerbis dixisse Dominum in Euangelio, Si dixerint uobis, Ecce in deserto est, nolite exire: ecce in penetralibus est, nolite credere. Rationem huius sui præcepti subiungit,

Coloss. 3.

Sicut enim fulgur exit ab oriente & apparet usque in occidentem, ita erit aduentus filij hominis. Gloriosus non obscurus erit reditus, ait, in mundum filij hominis: nec ueniet amplius, nisi iudicaturus uiuos & mortuos. Paulus ergo Apostolus docens nos ueram religionem, non in terris, sed mentibus exaltatis iubet nos adorare Christum in coelis ad dexteram patris. Et quis obsecro tam uasanus sit, qui adoret signum sacrum pro re ipsa sacrosancta? Ex decretis recenter conditis palam constat humano arbitrio illa esse inuenta. Certum est, Festum, quod corporis Christi uocant, serò sub Urbano Papa demum esse institutum, anno Domini 1264. Id uidere licet in Clement. lib. 3. tit. 16. cap. Si Dominum.

Quando celebranda Coena.

Restat iam excutienda quaestio temporis Coenae Dominicae, Quando celebranda sit Coena Christi, mane ne an uespere? An simul oporteat coenare? An accipienda ieiunis an pransis? Quoties item celebranda sit coena, semel an multoties rariusue? Constat quidem aperte satis, Christum uespere cum suis discubuisse, sed inde non sequitur alio tempore coenam non posse peragi legitime nisi uespertino. Dominus enim ex occasione epuli paschalis, & quoniam ea ipsa nocte tradendus erat, uespere cum suis & coenabat, & coenam nobis instituebat. Liberum interim reliquit sacrum hoc transferre ad horas matutinas: quòd sobrijs ad res gerendas omnes, religionis maxime, longè aptiores sumus, quàm repleti dapibus. Ipsa itaque res flagitat conuiuia ieiunos: non ita tamen ieiunos, ne liceat ualetudinis gratia prægustare aliquid. Paulus enim dixit, Quòd si quis esurit, domi edat. Idem Apostolus non uult simul instrui conuiuia cum coena Domini mystica. Vnde nos dicimus, non oportere simul coenare. Docet quidem Tertullianus Christianos frequenter simul coenitare consueisse: quod Coenae genus ἀγάπη uocatum tradit, à dilectione mutuato uocabulo: quòd ibi ditiorum epulis pauperes reficerentur. Verùm his cibo, potu alijsque necessarijs etiam extra templum poterat prospici. Paulus non uult eodem in loco & conuiuia publica agitari, & Coenam mysticam celebrari.

Agape.

Quoties celebranda Coena.

Porro quoties sumenda sit Eucharistia à fidelibus in anno, nihil lege lata definitum est, sed liberum reliquerunt in cuiusque ecclesiae arbitrio. Quid enim clarius est, quàm quòd Paulus dixit? Quotiescunque comederitis panem hunc, & de poculo hoc biberitis, mortem Domini annunciabitis donec uenerit. Nam Dominus (eodem Apostolo authore) prior præcipiens dixerat, Hoc facite, quotiescunque biberitis, in mei commemorationem. Nemo interim ita sibi liberam faciam existimet coenae celebrationem, ut nunquam illam peragat. Non ea esset libertas iusta, sed licentia iniquissima. Qui certis uel statis in anno diebus coenam celebrant Dominicam, frequentia quotidiana nolunt eam abduci in contemptum aut fastidium. Habent enim rationem sui populi & coenam dignè adeoque & cum desiderio cupiunt peragi. Qui uerò eam creberrimè repetunt, existimant iniquum esse si res bonae frequentia abeant in despectum. Quantò enim meliores sunt res, tanto aiunt usurpandas frequentius. Vtrique cupiunt inseruire Domino, & multo cum fructu peragi quod liberum fecit Dominus. Inter hos si arbiter siue sequenter institueretur hodie beatus Augustinus, nihil aliud pronuntiaret proculdubio, quàm quod pronunciauit de ipsa causa scribens Ianuario, & dicens, Rectius inter istos quispiam dirimit litem, qui monet præcipue in Christi pace permaneant, faciat autem unusquisque quod secundum fidem suam piè credit esse faciendum. Neuter enim exhonorat corpus & sanguinem Domini, Contemptum solum non uult cibum ille.

Iam

Iam quibus instituta & exhibenda sit sacra hæc Cœna etiam consyderandum est. Videtur autem instituta & exhibenda omnibus Christi fidelibus, cuiuscunq; sexus, uiris & mulieribus, summis & infimis. Ergo non est spargendum tantum mysterium porcis & canibus ad contemptum & conculcationem. Priusquam enim celebretur, seriò & significanter admonendi sunt omnes homines, quorum sit hic cibus, peccata agnoscentium, dolentium de commissis, & credentium in Christum: admonendi sunt omnes, ut quisq; in semetipsum descendens sese probet, deinde uerò de pane hoc sacro edat, & de poculo bibat, ne indignè ad iudiciũ sibi manducet & bibat. Cæterum si qui post seueram admonitionem accedentes accumbant, accumbendoq; quasi profiteantur palàm se & esse & cupere manere Christi cultores, à quo sperent peccatorum remissionem, sanè non sunt arcendi à ministris neq; eis sacra deneganda mysteria. Nam ipse Dominus cordium scrutator, seuerè, diligenter, perspicuè & multis in cœna ultima, etiam ante mysteriorum exhibitionem, admonuerat Iudam hypocritam, furem, proditorem, latronè, imò parricidam, blasphemum & desertorem, sed cùm admonitus nihilominus non discederet à tabula, sed maneret inter sanctos, non repulit eum uiolenter Dominus, nec palàm recedere iussit, nec panem Dominicũ eidem detraxit, sed perinde ut alijs obtulit, utcunque certò sciret qualis esset: id quod ministri ecclesiarum non ita certò de accumbentibus semper nouerunt. Nec peccauit hic quicquam Dominus, nec sanctum canibus proieciſſe uidetur. Nam diligenter admonuit eum Dominus de omnibus, de quibus erat admonendus, ipse uerò illa omnia audiens & intelligens, nihilominus inter sanctos hæret, & se pro fidei, non porco uenditat, & tanquam fidelis de pane & poculo participat. Qua hypocrisis tamen graue in se Dei iudiciũ prouocauit. Quemadmodum hodie quoq; omnibus hypocritis hic cibus & potus sacer cedit ad perniciem corporis & animæ. Neq; uerò contaminauit hypocritæ in cœna Domini præsentia alios accumbentes fideles Christi discipulos: quemadmodum ne hodie quidem fideles polluantur, tametsi cernant plurimos secum accumbere hypocritas. Non enim cœnant cum eis ut cum hypocritis, sed tanquam cum fidelibus. Sibi interim non alijs nocet, sibi cadit & perit, sibi iudiciũ manducat & bibit hypocrita, fidelis autem fide sua uiuit. Qua de re diximus in alijs Sermonibus.

Et quamuis infantes reputentur in numero & ecclesia fidelium, cœnæ tamen non sunt capaces. Ea in re turpiter aberrarunt ueteres: id quod in Sermone de Baptismo admonui. Non excidunt uita æterna infantes, etiamsi decedant ex hoc seculo sine hoc cibo mystico. Hic institutus est adultis, non infantibus. Probet semetipsum homo, inquit Apostolus, & sic edat de pane, & bibat de calice. Et Dominus, Hoc facite, inquit, in mei memoriã. Et iterum, Mortem Domini annunciate donec uenerit. Quæ sanè omnia in adultis, non infantibus, locum habent. Diligenter autem mox à pueris instituendi sunt liberi nostri, ut mysteria maturè intelligant & frequentent. Hoc ipsum filijs Israel præcepit Dominus, dicens, Si filij uestri dixerint ad uos, Quis hic cultus uester? respondebitis, Victima transitus Domini est, qui transiuit uel præterijt domus filiorum Israel cùm caderet Ægyptios, & domus nostras liberauit. Certè minimè nobis cõmittendum, ut in liberis nostris instituendis simus segniores, cùm beneficium acceperimus præclariùs quàm isti.

Huic quæstioni affines sunt aliæ, An cœna quamuis ob causam uel necessitatem priuatim sit instituenda? An deferenda agris uel decumbentibus? An applicanda mortuis, id est, an offerenda pro defunctis ad impetrandum eis refrigeriũ? Scio quid hic dicatur & fiat uulgo. Incidit pestis, fames, bellum, aut cœli intem-

Quibus instituta sit Cœna.

Infantibus non instituta cœna.

An contra iminentia mala sit cœna celebranda.

peries, mox celebrari iubetur cœna, ut hac uelut expiatione calamitas auferatur. Rursus, ægrotat aliquis, alius tabescit fame, & affligitur omnium rerum inopia, petit & hic à sacerdote ut cœnet, quò morbus hac ceu probatissima medicina curetur, ac fames & egestas tollatur. Cæterum hæc non est legitima cœnæ celebratio, sed prophanatio fœda. Nam Dominus non instituit piacularem hostiam contra omnes calamitates, quæ placari uoluit, sed memoriam mortis suæ, & debitam gratiarum actionem. Neque uerò ei quicquam offerimus cœnantes, propter quod sit nobis propitius, ac hoc à nobis malum auertat, bonum uerò desideratum nobis largiatur, uerum pro acceptis beneficiis agimus gratias. Licet alioqui calamitatibus oppressis uota, id est preces, offerre Domino, sed non licet mystica eius sacra in alium conuertere finem, quam ille instituit. Nec habemus ulla exempla, quæ doceant ullos uiros sanctos sic usurpasse unquam Domini cœnam, sicuti illi faciunt. Acceperant filij Israel epulum agni paschalis in cômémorationem liberationis ex Ægypto, & ut grati esse pergerent benefico Domino: quantum uerò admisisse piaculum si toties epulari instituisse, quoties calamitatibus pressi, liberationem ambuisse, & hoc quidem opere perfecto ambuisse? Illi ipsi Arcam fœderis à Domino acceperant in symbolum diuinæ præsentis & certi auxilij, sed cum illam contra finem institutum in castra detulissent, in hoc ut per ipsam cõsequerentur uictoriam, ipsi quidem fugati & cæsi sunt, & arca ipsa abducta est à Palæstinis in captiuitatē.

*Priuatim nec
domi ægris, nec
in templo sanis
cœna instituenda.*

Rursus, si cœna Domini est publicum totius ecclesiæ in unum collectæ epulum sacrum, in quo debet fractio, distributio, comestio & potatio fieri, illoque declarari & obsignari cômuniõ corporis & sanguinis Christi: consequens est, cœnam Domini nulli neque sano neque ægro, decumbentiue aut moribundo priuatim uel domi uel in templo instruendam esse, neque pios cœnam ad tales priuatos usus exposcere posse. Nam institutionē Christi Domini non oportet humana autoritate aut consuetudine mutare. Certè Paulus requirit publicum conuentum ecclesiæ, & uniuersalem quidem cœtum ad cœnam rectè obeundam. Conuenientibus uobis, inquit, in unum, uel ad eundem locum, aut ad idem, non est cœnam Domini sumere, id est, non editis cœnam Domini. Ratio, Nam quisque priuatam uel suam aut propriam præoccupat in comedendo. Proinde non uult hic priuati quicquam fieri. Idem enim in eodem loco in condemnationem eos conuenire & edere cœnam Domini, ait, qui cœnando festinant, non expectata ecclesia, donec omnes conuenerint, & tum demum simul ederint & biberint. Dicit enim, Itaque fratres mei, cum conuenitis ad comedendum, alius alium expectate, (quod si quis esurit, domi edat, nimirum ne propter famem præoccupare cogatur) ne ad condemnationem conueniatis. Ergo cœna Domini non est priuata, sed publica cœna nulli priuatim danda. Et quoniam non est publicus uel generalis cœtus, quando quatuor uel quinque cum ægro communicant, nihil dicunt qui aiunt apud ægros cœnam instrui posse, si alij quoque simul cœnent. Præterea quis neget exemplum Christi & Apostolorum hic perpetuò esse sequendum? Atqui satis constat Christum in publico cœnaculo, in collecta ad se (ut tunc temporis colligi potuit) ecclesia cœnasse, Sed & Paulus dicit ea in re secutum se exemplum Dñi, ecclesijs nihil tradidisse aliud, quam quod acceperit à Domino. Neque legimus uspiam in sacris literis alios Christi Apostolos Eucharistiā detulisse ad infirmos, & priuatim cuique pro sua tentatione sedanda cœnam instruxisse sacrā. Vbiq; uerò Apostoli omnes, ægros & conscientia perturbatos uerbo Domini cõfirmare & erigere mandat: sed & orationibus sedulis docent afflictis succurrere. S. Iacobus diligenter scripsit, quemodo gerant se fideles apud ægros & moribundos, sed delationis ad ipsos aut celebrationis Eucharistiæ

Iacobi 5.

ristiæ nō meminit uel uerbo. Nec uerisimile est, fidelissimos ecclesiæ doctores apostolos, dissimulatuos, si credidissent id maxime ad salutē nostram pertinere. Monuerunt nos sæpe de rebus longè minutioribus. Ac certum est, oīa illos ecclesiā docuisse, quæ ueræ pietatis & salutis sunt: nunc huius ne uerbo quidē meminerunt.

Obijciunt illud ex Actis apost. Et frangentes per singulas domos panem, inuicem sumebant cibum cum exultatione & simplicitate cordis laudātes Deum. Cæterum is locus pertinet ad corporalem & nutritium, non mysticum cibum. Sequitur enim, μετελάμβανον τροφῆς, sumebant inuicem cibum uel alimentum. Proinde ut apud Isaiam in 58. cap. panem frangere pro cibare ponitur, ita hic quoque. Ditiores enim suppeditabant tenuioribus uictum, idē faciebant ditiores animo hilari, non subtristi: & qui percipiebant beneficia, laudabant Deum. Quod si quis pertinaciter contendat apostolos in priuatis ædibus cœnasse, respōdemus id nihil facere ad causam præsentem ægrorum, ac ad priuatam communionem. Priuatas enim ædes tunc illis templorum uice fuisse dixi superius. Ergo non cœnarunt in priuatis ædibus propter ægros cibandos pane Eucharistiæ, sed quod in eas confluxisset uniuersalis eius loci ecclesia: sicuti & Actor. 20. cap. apparet. Sicuti & in persecutionibus fieri consueuit. Rursus obijciunt, ueteres Eucharistiā uinctis ad carceres, & decessuris uiatīci loco misisse. Verūm alibi diximus qua de causā id fecerint antiqui. His iam addimus humanā consuetudinē non præiudicare uerbo dei. Commemorat beatus martyr Irenæus, Romanos episcopos solitos fuisse Eucharistiā transmittere episcopis aliunde Romam uenientibus in signum cōsensionis seu concordiae. Atqui is ritus non fuit omnibus episcopis uulgaris, nec usurpatur hodie in ecclesijs. Vnde consequens est multa ueteribus fuisse in usu (quale illud quoque fuisse iam ante diximus, quod Eucharistiā dederunt infantibus) quæ nobis nullam interim legem cōstituunt. Possent uel hodie uiri boni priuatam admittere cœnam, ad tempus, his qui nondum plenum cœnæ usum intellexerunt. Verūm quis hinc collegerit iure ab omnibus fieri debere, quod indulgentia fit à quibusdam? Quod si omnino & contentiose perrexerimus asserere uaticum illud, renascetur ex eo (quod iam seculis aliquot receptum uidimus) fiducia in ipsam perceptionem sacramenti, quasi propter eam grati simus domino, discedentesque ex hoc seculo, rectā euolemus ad cœlos, sine Eucharistiā autem percepta deferamur rectā ad inferos. Subnascuntur & alij errores plurimi. Neque uerò ulla necessitas cogit ægris deferre Eucharistiā. Vt enim captiui citra salutis periculum absint à celebratione cœnæ, sic etiam ægri ac moribundi. Cæterum cum sint interim per fidem ueram colligati corpori Christi, ecclesiæ, licet corpore absint cœtu sacro, mente tamen præsentēs, omnium bonorum spiritalium participes sunt. His enim satis est quod, dum per ualeitudinem potuerunt, semper sacris adfuerunt mysticis. Epulum paschale nō ubilibet exhibebatur, sed Hierosolymis duntaxat, uno in loco. At quot putamus per ualeitudinem corporis male affectā, & propter senium, ex regno tam amplo Hierosolymas attingere non potuisse? Et quamuis nemo his in sacculo quicquam deferret ex carnibus agni, nihilominus tamen cōmunicabant cum tota Israelis ecclesia. Quis autem dubitet per aduentum Christi, cōditionem Christianorum minime factam esse deteriore?

Pro mortuis non est instituta Cœna mystica à Christo domino, sed pro uiuentibus duntaxat: ergo pro mortuis non est celebranda eorumue applicanda redemptioni. Qui sine fide moriuntur, subeunt rectā iudicium condemnationis. Qui uero mortui sunt in Christo, iam nunc choro seniorum inserti ante agnum stantes concinunt æternum Halleluiā. Nam certissimam esse salutem animarum fide-

Deut. 16.

Pro mortuis
non offerenda
est eucharistia.

lium à morte corporea, demonstraui in sermone de Anima. Quod uerò nonnulli obijciunt, ueteres meminisse oblationis pro mortuis, nihil ad nos pertinere putamus. Scripturæ enim Canonice citra contradictionem credimus: patribus non credimus, nisi quatenus sua nobis approbât scripturis canonicis. Nec ipsi sibi aliter credi uoluerunt. Proinde si ueteres sentiunt Cœnam esse sacrificium, & hanc pro refrigerio animarum defunctorum offerendam, non recipimus eorum sententiam, utpote non congruam scripturis canonicis, docentibus Cœnam à domino non in hunc finem esse institutam, ergo abusu Cœnæ deū exasperari magis quàm placari: imò nullum esse opus hominis quātumuis bonum, nedum uerbo Dei aduersum, quod sanctificare possit, cum ea prærogatiua sit solius meriti filij dei: præterea animas defunctorum non esse in huiusmodi statu in alio illo seculo, ut uiuari possint aut debeant ullis huius seculi operibus. Porro si ueteres per oblationem intelligunt sacrificium laudis, nō repugnamus, quò minus fiant pro mortuis oblationes, hoc est ut gratiæ agantur Deo, laudeturq; bonitas eius qui uera fide donatos euocarit ex hoc misero seculo, coniunxeritq; angelorum & omnium beatorum agminibus in æterna illa omnium gaudiorum patria. At cœnam propter defunctos celebrare, nulla iubet ueritas uel pietas.

Sacrificium duplex, expiationis & confessionis.

Ac in sacrificio uel oblatione distinguimus. Est enim sacrificium expiatorium, est & sacrificium confessionis uel laudis. Expiatorium offertur pro expiandis uel purgandis peccatis, adeoq; & pro satisfactione pro peccatis. Id nequit esse sine morte & sanguine: quod Apostolus disertè ostendit in 9. cap. ad Hebræ. Tale uerò Christi sacrificium est (cui typum prætulere omnia omnium sanctorum ueteris testamenti sacrificia) qui & sacerdos & hostia semel semetipsum Deo patri obtulit, dum in cruce passus & profuso sanguine innoxio expirauit. Tale sacrificiū hodie Cœna non est, sed commemoratio mortis, uel sacrificij semel peracti in cruce. Neq; enim Christus iterum sacrificari uel debet uel potest, qui semel oblatus sufficit expiandis omnibus omnium seculorum delictis. Quorsum ergo iterum sacrificaretur? Neq; à quoquam hominum filius Dei sacrificari potest, quia ea de causa semetipsum semel Deo obtulit, quippe sacerdos in æternum secundum ordinem Melchizedek.

Proinde minister ecclesiæ, Christi corpus & sanguinem Christi in cœna prouidentibus in ecclesia non sacrificat: sed cum tota ecclesia commemorationē peragat sacrificij in cruce semel peracti. A quo alibi dixi & Cœnam denominari posse sacrificium, eò quod sacrificij semel peracti à Christo sacramentum sit, sicuti & S. Augustinus scriptum reliquit. Confessionis uerò sacrificium, laudis est & gratiarum actionis, quod nos deo offerimus pro redemptione & beneficijs Dei gratis ecclesiæ collatis. Hanc cū semper offeramus deo orantes, maximè uerò peragentes eucharistiam, uel celebrantes Cœnam, Cœna à ueteribus appellata est sacrificium, eo quòd in ipsa gratias deo agamus pro liberatione à morte & pro hæreditate donata uitæ æternæ. Offerri autē hoc sacrificium deo promiscuè ab uniuersali ecclesia cœnante, non à solo ministro ecclesiæ, pro uiuentibus in ecclesia, supra diximus.

De finibus Cœnæ dominicæ.

Cum autem hætenus, quantum necessitati huius causæ seruire uidebatur, & quantum nostra potuit præstare exilitas ac inopia, pleraq; Cœnæ circumstantias, uel quæstiones de ipsa proponi solitas excusserimus, superest ut & ad finem propter quem Cœna domini à domino instituta est (qui locus sanè inter præcipuos non temere numeratur) explicandum descendamus. Eum uerò in descriptione Cœnæ ab initio protinus huius sermonis enumerauimus. Dominus enim pane & uino

& uino in sacrum nobis epulum apposito, suam nobis promissionem & communionem uoluit attestari, donaꝫ sua nobis repræsentare & sensibus subiicere, uisibiliter quoq; in unum corpus colligere, mortem denique suam in memoria fidelium retinere, & officij nos nostri admonere, laudis & gratiarum actionis maxime. Atq; hæc quidem omnia sigillatim exponentes prosequuti sumus in generali consideratione uel tractatione Sacramentorum: eadem ergo in præsentiduntaxatrefricantes perstringemus, ea paulò copiosius tractaturi, quæ ex illis disputanda proueniunt.

Cæterum per communionem intelligo societatem, coniunctionem uel participationem Christi domini, qua ipse per spiritum suum se totū nobis insinuat atq; coniungit, nosq; eius per fidem participes efficimur, ac ipsi connectimur: ita ut per ipsum liberati à peccato & morte, in ipso uiuamus hæredes uitæ æternæ, ac ipse se uiuat in nobis, ac totus noster sit quemadmodū ipsi sumus eius toti. Neq; aliud esse dicimus communionē corporis & sanguinis domini. Nam corpore in mortem pro nobis tradito, & sanguine in remissionem peccatorum nostrorum effuso effectum est, ut purgati à peccatis, ipsius membra facti simus, ac ipse iam uiuificet, & ueluti alimentum uiuificum sustentet nos: unde etiam ipsum, utpote cibū & potū uitæ, edere & bibere dicimur. Itaq; promissio, cuius modò meminimus, & ipsa aliud non est, quàm ipsum dei uerbum, quod nobis annunciat in solo Christo esse uitam: Christum enim corpus suum tradidisse in mortem, & effudisse sanguinem in remissionem peccatorum nostrorum, ut credentes ipsi habeamus uitam æternam. Cæterum hæc promissio & communio Christi nō nunc primum ad nos in Cœna aut per Cœnam defertur. Dominus enim Deus noster mox à mundi initio uitam & remissionem peccatorum Adæ & semini eius per Christū promisit: deinde eandem promissionem cum Noe, Abraham, Mose & Dauide, alijsq; patribus renouauit. Et patres communicasse cum Christo, bonorumq; eius participes factos esse, testis est Apostolus cum uniuersa scriptura. At non solis patribus tantum obuenit bonum. Facta est & nobis promissio, & delata ad nos communio Christi, ac defertur singulariter in sancto baptismo, adde & in clarissima euangelij prædicatione: præterea nos illam recipimus fide, per quam Christo coniungimur, membraq; eius efficimur. Ergo ut ante Cœnam, Christi nō sumus expertes aut uacui, sed uiuificati ab eo ac membra eius siue cōsortes: ita in ipsa actione, seu celebratione Cœnæ, reparatur nobis promissio, & nos cōmunionem illam Christi in qua sumus, renouamus & continuamus, corpore & sanguine Christi spiritaliter, uita & donis eius omnibus uerè per fidē participantēs. Atq; hoc modo corpus domini edimus, & sanguinem eius bibimus. Porro cōmunionem illam spiritualement, & promissionem uitæ per Christum, ipse dominus symbolis uisibilibus, epulo inquam panis & uini, uerbo uel promissioni suæ adiunctis, uisibiliter attestatur & obsignat, se uidelicet esse panem & potum uiuificum: nos autem (symbolis, fide & obedientia susceptis) obsignari in nobis promissionem illam & communionem Christi sustinemus, impresso uel traiecto in corpus nostrum corporis & sanguinis domini sigillo, uel sacramento. De quare Apostolus quoq; disse-ruit in 1. ad Corinth. 10. cap. & ad Romanos 4. & nos ex ipso plura diximus in generali consideratione sacramentorum.

Priusquam de alijs Cœnæ finibus positis in descriptione eius dicam, commemorabo quæ alij de promissione & communionē Christi proferunt. Damnat nostram doctrinam tanquam hæreticam. Contendunt enim dominum promississe corpus & sanguinem suum uerum, sub specie panis & uini daturum in cibum

Dominus promissionem & communionem suam nobis attestatur.

Confutatur sententia de corporali præsentia Christi in cœna.

& potum fidelibus, ergo modis omnibus & sine ulla contradictione credendum, ipsum panem naturale domini corpus, uinum sanguinem esse, & hæc ipsa manducari & potari oportere non tantum spiritualiter, sed & corporaliter, ad uitam æternam. Quod autem Christus corporaliter præsens sit in cœna, adeoq; panis eius corpus, uinum sanguis sit, sic probant, Quod dominus dicit, falsum esse non potest, quia ipse ueritas est, Dicit autem panem esse corpus suum, uinum esse sanguinem suum: itaq; panis & uinum eucharistiæ sunt uerè, realiter & essentialiter corpus & sanguis Christi. Cui quidem ueritati simpliciter credendum aiunt, licet ipsa ratio, totus mundus, omnes sensus, & ipsa natura rerum reclamet. Respondemus uera esse omnino quæ dixit dominus qui ueritas est: sed eo sensu quo ipse dixit ac intellexit, non autem eo sensu quem nos uerbis eius obtrudimus. Indagandum est ergo ante omnia quis sit uerus uerborum domini in Cœna, Hoc est corpus meum, Hic est sanguis meus, &c. sensus.

De genuino sensu uerborum domini, Hoc est corpus meum.

Isti quidem clamitant uerba domini simpliciter ad literam esse exponenda. Est enim uerba testamenti; hoc autem non admittere ut uerba eius exponantur per tropum. Nos uerò dicimus omnes libros euāgelicos & Apostolicos recenseri sub titulo testamenti, ergo in omnibus & singulis scripturæ locis nihil corrumpe dum, nihil adijciendum, nihil detrahendum, nisi maledictioni dei subiacere libeat. Interim tamen fateri cogimur, infinitas esse in diuinis scripturis sententias, quas si pergamus simpliciter ad literam exponere, subuertemus cum fide uera scripturam uniuersam, aut mendacij & cōtradictionis arguere uidebimur. Proferā huius generis unum & alterum exemplum. Scribit beatus Apostolus & euangelista Ioannes, Verbum caro factum est. At si pergamus inhærere uerbis, dicemus deū mutatum esse in hominem. Sed quia hic sensus fidei & scripturæ cōtrarius est, Deus enim immutabilis est: & Christus Deus & homo uerus est, naturis non immixtis aut conuersis, sed in suis proprietatibus permanētibus, admittimus expositionē, quæ tradit Verbum assumpsisse carnem, deum factum esse hominem. Et hic quidem sensus non est alienus à scriptura: Paulus enim dicit filiū Dei nuspiam assumpsisse angelos, sed semen Abraham. Proinde uocabulum Est, exponunt orthodoxi cum Apostolo per assumpsit. Qua de re pluribus egit beatus Theodoretus in Polymorpho suo, Dialogo 1. Rursus apud eundem Ioannem dicit dominus. Pater maior me est: inæqualitatē adorandæ trinitati obtrudemus, si contenderimus uerba domini absq; interpretatione simpliciter esse accipienda. Adhibitis autem locis alijs, & in consilium aduocata fide, dicimus filium iuxta diuinitatem patri æqualem esse, secundum humanitatem minorem, iuxta illud propheta apud Apostolum quoque usurpatum in hoc argumento, Minuisti eum paulò minus ab angelis. Legimus in euangelio Christum dominum habuisse fratres, & Ioannē apostolum appellari filium Mariæ, Mariam matrem Ioannis, Quis autem, nisi Heluidiana labe infectus, contendit illa exponenda esse ad literam? præsertim cum alijs loci scripturæ manifestè testentur, fratres appellatos, qui reuera erant patruales & consobrini, affines uel consanguinei: sed & circumstantia loci apud Ioan. in 19. cap. euincat Mariam Ioanni ut matrem filio esse cōmendatam. Si uerò ita tumultuari libet, ut illis hætenus licere experti sumus, clamantibus & clamando repetentibus, Hoc est corpus meum, Hic est sanguis meus, Hoc est, Hic est, Hoc est, Hic est, Est, Est, Est, repetemus & nos, Verbum caro factum est, factum est, factum est. Pater maior me est, est, est. Christus fratres habet, fratres inquam, fratres habet. Scriptura hoc habet. Veritas sic dicit. Verū quis ex his molestis & odiosis clamoribus, & pertinacissimis rixis fructus redibit ad ecclesiā? Quomodo ædificabuntur audito-

auditores? Quomodo propagabitur gloria Dei? Quomodo illustrabitur ueritas? Necessitas ergo cogit nos fateri alicubi recedendum esse à litera, sed non à sensu, sensum autem adferendum quem ipsa fides, quem alij scripturæ loci cum hoc collati, quem deniq; loci eius circumstantiæ, præcedentia cum consequentibus sponte sua suppeditant. Interim à simplicitate uerborum non facile discedendum esse, clamamus etiam ipsi & inculcamus. Verum ubi cogit absurditas, nō rationis, sed pietatis, & scripturarum repugnantia, & cum articulis fidei pugnantia, dicimus, asserimus & contendimus, pium, imò necessarium esse recedere à litera & simplicitate uerborum. Iam uerò cogere nos illa ipsa quæ modò commemorauimus, recedere à litera in his domini uerbis, Hoc est corpus meum, Hic est sanguis meus, solidis scripturæ argumentis demonstrabimus, si prius genuinum & ueterem sensum uerborum solennium paucis explicauerimus.

Quando recedendum à litera.

Dominus panē discipulis suis in eadem mensa accumbens, manu propria porrexit. Et cū unum modò corpus uerum, humanū & naturale haberet, hoc ipso utique uero corpore suo panē, non corpus uel alienū uel hoc ipsum suum discipulis porrexit. Neq; obturbat quod S. Augustinus enarrans Psal. 33. illud de Dauide citat, Et ferebatur in manibus suis: quibus mox subiungit, Quis uerò portatur in manibus suis? Manibus aliorū potest portari homo, manibus suis nemo portatur. De Dauide ergo id nō intelligitur, sed de Christo. Ferebatur enim Christus in manibus suis, quando cōmendans ipsum corpus suū, ait, Hoc est corpus meum. Ferebat enim illud corpus in manibus suis. His enim uerbis S. Augustinus non affinxit duo corpora Christo humana, sed sensit corpus humanum tulisse in suis manibus corpus sacramentale, id est ipsum panē qui est corporis uerī sacramētum. Significanter enim dicit, Commendans corpus suum, ferebat illud corpus in manibus. Nam Concione secunda iisdem prope uerbis, pauculis modò mutatis, Quomodo, inquit, ferebatur in manibus suis? Quia cum commendaret ipsum corpus suum & sanguinem suum, accepit in manus suas quod norunt fideles: & ipse se portabat quodammodo cum diceret, Hoc est corpus meū. Quibus uerbis manifestè declarauit se nō sentire ipsum corpus Christi naturale, Christū corpore suo naturali porrexisse discipulis: sed hoc quod norunt fideles, nimirum sacramentū uel mysteriū. Sequitur enim, Et ipse se portabat quodammodo (obseruate quæso illud quodammodo) cum diceret, Hoc est corpus meum. Proinde uerba illa solennia, Hoc est corpus meū, quod pro uobis frangitur: & , Hic est sanguis meus, qui pro uobis effunditur, non aliū sensum habere possunt, quā hunc, Hoc est memoraculum, memoriale uel memoria, symbolū uel sacramentū corporis mei pro uobis traditi. Hic calix, uel ipsum uinū potius in calice, significat aut repræsentat uobis sanguinem meum semel effusum pro uobis. Sequitur enim in uerbis domini solennibus, quod mirè hunc sensum confirmat, Hoc facite in mei cōmemorationem. Quasi dixerit, Nunc quidem præsens ante oculos omniū uestrum obuersor: moriar autem & ascendam in cœlum, tum uerò panis & calix hic sacer memoracula seu symbola erunt traditi mei corporis & effusi cruoris pro uobis. Tunc frangite panem & mādate, poculum distribuite & bibite, & hæc in mei memoriā facite, laudantes mea in uos collata redemptionis & uitæ beneficia.

Vetus expositio uerborū conne, Hoc est corpus meum.

Quanquam uerò hæc interpretatio calumnijs & conuictijs tantū nō oppressa, abominabilis cœperit esse plerisq; ueram tamen, genuinam, & omnium uetustissimam esse constat. Tertullianus lib. contra Mart. 4. Christus acceptū, inquit, panem & distributum discipulis, corpus suum illum fecit, Hoc est corpus meum dicendo, id est, figura corporis mei. S. Hierony, in euang. Matth. Quomodo in

præfiguratione Christi, inquit, Melchizedek summi Dei sacerdos uinum & panem proferens fecerat, ipse quoque ueritatē corporis repræsentaret. Chrysost. Homil. in Matth. 83. Si mortuus Iesus non est, inquit, cuius symbolum ac signum hoc sacrificium est? S. Ambrosius in 1. ad Corinth. 11. cap. Quia morte domini liberati sumus, ait, huius rei memores in edendo & potando, carnem & sanguinem quæ pro nobis oblata sunt, significamus. S. Aurel. Augustinus non uno loco in eandem locutionū classē coniicit has locutiones, Sanguis est anima, Petra erat Christus, & Hoc est corpus meū. Videamus ergo quid dicat de illis locutionibus, ut intelligamus quid de uera huius, Hoc est corpus meum, interpretatione iudicemus. Lib. Quæst. 3. in Leuit. quæst. 57. Restat, inquit, ut illud appelleretur anima, quod significat animam. Solet autē res quæ significat, eius rei nomine, quam significat, nuncupari. Sicut scriptum est, Septem spicæ septem anni sunt. Non enim dixit. Septem annos significant. Et septem boues, septē anni sunt, & multa huiusmodi. Hinc est quod dictū est, Petra erat Christus. Non enim dixit, Petra significat Christum, sed tanquam hoc esset, quod utique per substantiam hoc non erat, sed per significationem. Sic & sanguis, quoniam propter uitalem quandam corpulentiam, animam significat, in sacramentis anima dictus est. Tantum ille. Idem August. contra Adimantum cap. 12. Sic est sanguis anima, quomodo petra erat Christus. Et iterum ibidem, Possum etiam præceptum illud (de sanguine & anima pecoris, &c.) interpretari in signo esse positum. Non enim dominus dubitauit dicere, Hoc est corpus meum, cum signum daret corporis sui. Hæc ille. Obscura aut dubia esse hæc Augustini, ne Choroebus quidem dixerit. Coniungat his qui uult quæ idem hic author clarè tradit de figurata locutione lib. 2. contra Aduers. legis cap. 9.

*Demonstratio
tropice locutio-
nis in uerbis
cœnæ, Hoc est
corpus meum.*

Sed desinamus humana proferre testimonia de genuina & uetustissima uerborum Christi, Hoc est corpus meū, expositione, pergamus potius solida ex scripturis, quæ & promissimus cōmemorare argumenta, quibus euincamus recedendum à litera necessario, & uerba Christi ad eum quem diximus modum explicanda esse per tropum.

Principio constat dominum in præsentī instituisse sacramentum: unde manifestum est eo modo locutum esse, quo solet scriptura alias in negotio sacramentario, ut cum dicit circumcisionem esse fœdus domini, Agnum esse transitum domini, Sacrificia esse & peccata, & sanctificationes, Baptismum esse lauacrum regenerationis. At demonstrauimus huius Decad. Sermone 6. has locutiones omnes admittere expositionem. Admittit ergo & hæc locutio, Hoc est corpus meū, Hic est sanguis meus, expositionem, quia sacramentalis est. Admittit autem uulgarem illam, quam certissimum est receptam & usurpatam esse à catholica ecclesia ab Apostolorum temporibus, imò & à patriarcharum seculo ad nos usque, signa accipere rerum signatarum uocabula uel nomina, ut interim de substantia earum nihil participant, sed in sua natura propria permaneant.

Huc accedit quod dominus in euangelio secundum Lucam epulum paschale coniunxit cum cœna hac dominica nostra, adeoque & hanc in illius locum substituit; ut nihil mirum si in cœna nostra dixerit, Hoc est corpus meum. Nam in epulo paschali dicitur, Agnus est transitus domini. Quod quidē locutionis genus non erat obscurum Apostolis intelligentibus agnum hunc memoraculū esse transitus semel peracti. Ex illa itaque intelligebant panē domini à domino illis oblatū, corporis esse memoraculum. Alioqui enim in rebus multo minoris momenti diligenter percontabantur de genuino uerborū sensu dominū. At in præsentī nihil interrogarunt. Erant enim omnibus sanctis locutiones sacramentales perspectissimæ.

Præterea

Præterea si pergamus simpliciter ad literam uerba cœnæ intelligere, consequens erit Dominum nobis corpus & sanguinem suum corporaliter haurienda obtulisse. At in quem finem oro obtulisset, nisi ut ea corporaliter haurientes uiuamus? Cæterum uniuersa scriptura canonica docet uitam uel salutem & iustitiam nostram sola fide (quæ & spiritalis manducatio est) in traditum corpus & effusum sanguinem, nullo autem opere nostro, nedum corporali manducatione corporis Christi, quam ipse alibi docet nihil prodesse, constare. Cum autem non sit nisi una eaq; simplicissima uitæ & iustitiæ parandæ ratio, per solam fidem, non per opus manducationis nostræ, neque sibi ipsi contradicat scriptura, certè huiusmodi opus manducationis non instituit Dominus: & idcirco expositionem recipiunt uerba solennia cœnæ.

Si panis esset uerum & naturale corpus Domini, omnino sequeretur etiam impios hoc pane participantes, percipere corpus Christi, adeoq; carnem eius fieri cibum uentris: cum careant illi mente fideq;. Verum ab ea cogitatione ut absurda & indignissima omnes sancti abhorrent. De qua re paulò post dicā pluscula. Recipit ergo interpretationem sententia Christi, Hoc est corpus meum.

Vniuersa scriptura canonica testatur Dominū Iesum Christum assumpsisse de intemerata uirgine corpus corpori nostro, id est humano, per omnia consubstantiali, imò factum esse illum nobis per omnia similem, excepto peccato. Iam uerò constat ipsum de uero corpore suo sensibili loquutum, cum ait, Hoc est corpus meum. Nam addit, Quod pro uobis frangitur, uel traditur. Verum enim, naturale, sensibile, uel humanum pro nobis traditum & mortuum est. At hoc nusquam apparet in pane, uel sub pane. Recipiunt ergo uerba Domini interpretationem.

Certè si Domini sententia fuisset ex pane facere corpus, ex uino sanguinem, iuxta potentiā qua uerbo condidit omnia, simul atq; dixisset, Hoc est corpus meum, panis fuisset corpus Christi, & illud ipsum corpus quo de loquebatur, mortale, passibile & palpabile, uisibileq;. Dixit enim & facta sunt: ipse mandauit & creata sunt. Dixit, Fiat lux: & facta est lux, & huiusmodi quidem lux, quæ & sentiretur & luceret. Cæterum in Cœna nihil uidemus in manibus Christi, quàm panem, nullum corpus. Proinde mens saluatoris non fuit hisce uerbis, Hoc est corpus meum, condere aut facere ex pane corpus. Alioqui enim factum fuisset.

Nec est quòd hic nobis nebulas suas spargentes offundant, & fucos suos alligant putridæ structuræ, utentes uocabulis ineffabiliter, supernaturaliter, inuisibiliter, non qualitatiuè, non quantitatiuè, non ut in loco. His enim omnia sua, aliud interim effecturi, miro Dei iudicio, subuertunt. Si enim mysterium hoc ipsorum ineffabile est, quare utuntur hisce uocibus essentialiter, substantialiter, realiter, corporaliter? Effantur certè modum præsentia, qui sic loquuntur. Si supernaturaliter est panis corpus Christi, quare ipsi adijciunt naturaliter? Si uerò panis est corpus Christi inuisibiliter, nequit esse corporaliter, nequit esse uerum corpus, cuius proprietas est uisibile esse. Quis non rideat, si audiat ignem alicubi ardere & splendere lumen, sed frigide & sine luce? Si non adest qualitatiuè, quantitatiuè, & ut in loco, ergo corporaliter non adest. An non corporum sunt quantitates, qualitates & locus? Audite enim quid Augustinus dicat ad Dardanum de præsentia Dei, Spacia locorum tolle corporibus, inquit, nusquam erunt, & quia nusquam erunt, nec erunt. Tolle ipsa corpora qualitatibus corporum, non erit ubi sint, & ideò necesse est ut non sint. Nos ergo ne spoliemus corpus Domini suis proprietatibus & sic negemus ueritatem corporis eius: rursus ne in eadem sententia adducamus tot contraria & absurda, exponimus uerba Domini.

Hoc est corpus meum, hoc est memoraculum corporis mei: uel, Hoc significat corpus meum.

Item si uocula EST, substantiue accipienda est in uerbis Domini, Hoc est corpus meum, consequitur panem conuerti in carnem Christi. Sed hoc non fieri omnes sensus arguunt, manente substantia non tantum accidentibus panis. Necessesse est itaque ut aduersarij intelligant in hoc, cum hoc, uel sub hoc esse corpus Christi. Verum ita discesserunt & ipsi à simplicitate uerborum Domini, dicentis, Hoc est corpus meum: & non, Sub hoc est corpus meum.

Rursus si uerbis præscriptis affixi ne latum quidem pilum ab ijs citra sacrilegium deflexerimus, cur obsecro ausi sunt uerba quæ calicis uocant alio prorsus modo recitare S. Lucas & Paulus, quam S. Matthæus & Marcus? Hi enim uerba sacri calicis sic reddunt, Hic est sanguis meus, qui est noui testamenti, qui pro multis effunditur in remissionem peccatorum. Illi uerò sic commemorant, Hoc poculum nouum testamentum per sanguinem meum, qui pro uobis effunditur: & Hoc poculum nouum testamentum est in meo sanguine. An uerò existimamus nihil differentia esse inter sanguinem Christi & inter nouum testamentum? Nouum testamentum finit post Ieremiam Paulus esse plenariam omnium peccatorum remissionem. Ac idem ille dicit sanguine Christi hanc peccatorum remissionem esse partam. Quis uerò fuerit tam impudenter contentiosus ut audeat asserere ipsum poculum, aut uinum in poculo realiter & substantialiter esse remissionem peccatorum? Quid quod poculum uel calicem, non uinum, non potum, cogemur fateri uel sanguinem Christi, uel nouum testamentum, aut remissionem peccatorum esse, si pergamus literæ inhaerere mordicus? Non enim dicit Dominus, Hoc uinum, sed hoc poculum. Libenter autem hic propter absurditatem uitandam admittimus tropum: Quare ergo in æquali causa sumus iniquiores? Ergo sicut poculum uel uinum est testamentum uel remissio peccatorum, ita poculum uel uinum est sanguis Christi, eademque ratione panis est corpus Christi. Poculum autem substantialiter non est peccatorum remissio aut sanguis, sed sacramentum sanguinis Christi quo dedicatum est testamentum nouum, & nobis obtemporaria peccatorum remissio; ergo panis est corpus Christi, quia sacramentum est corporis Christi.

Firmum quidem est argumentum quod produximus, sed non minus firmum futurum speramus, quod modò producturi sumus. Dominus coenam sacram peragens, Hoc facite, inquit, in mei memoriam. Ac ea uerba non permittunt, ut eorum præsentiam realem statuamus, quorum meminisse debemus. Quis enim eorum meminisse dicitur, quæ coram præsentia contemplatur? Non debemus autem recedere à simplici significatione reminiscentiæ, aut memoriæ, præsertim cum Paulus dicat, Mortem Domini annunciate donec uenerit. Inde enim sic colligimus, Cuius memoria peragitur donec ueniat uel redeat, is certè non præsens habetur sed uenturus expectatur: ergo corpus Domini traditum pro nobis, cuius memoria peragitur in coena mystica, non habetur præsens. Venturum enim expectatur.

Iam & loci illi qui de relinquendo per Christum mundo, de abeundo hinc loquuntur, non admittunt simpliciter uerborum coenæ interpretationem. Expedi uobis, inquit, ut ego uadam. Si enim non abiero, consolator ille non ueniet ad uos. Sin autem abiero, mittam illum ad uos. Item, Exiui à patre, & ueni in mundum: iterum relinquo mundum, & uado ad patrem. Et iterum, Et posthac non sum in mundo: & hi in mundo sunt, & ego ad te uenio. Pugnant sanè hæc Abiisse hinc,

hinc, Amplius non esse in mundo. Reliquisse mundum: & corpus suum naturale esse in mundo, adeoque in cœna realiter & substantialiter exhiberi & recipi. Neque uerò licet testimonia ex Euangelio Ioannis de abitione Christi adducta tropicè interpretari. Apostoli enim fatentur Dominum clarè uel disertè citra parabolam esse loquutum. Quia ergo Apostoli testantur hunc Domini sermonem simplicem esse, uel simpliciter pronunciatum, necesse est alia illa opposita his uerba, Hoc est corpus meum, interpretari per tropum, ne secum pugnet scriptura. Præterea loci qui testantur post ipsam resurrectionem Christi corpus loco circumscribi, uideri & tangi, quæ & ipsa discrimen constituunt inter corpus Christi clarificatum, & angelicos spiritus, (ubi obiter cernis commentum modi definitiui nullum hîc habere locum) minime admittunt nudam uerborum Domini solennium interpretationem. Angeli dicunt, Surrexit, Non est hîc. Ecce locus, ubi posuerunt eum *Marci 16.* Item, Præcedet uos in Galilæam. Ibi eum uidebitis. Et iterum ipse ad discipulos, Contrectate me & uidete. Spiritus carnem & ossa non habet sicut uidetis me habere. *Luce 24.* Hæc de corpore clarificato (quale est quod ascendit, sedetq; ad dexteram patris) pugnant prorsus cum Ubiquitate, cum insensibilitate corporis Christi: quâ tamen omnino statui necesse est, si pergamus realem corporis Christi præsentiam ex uerbis Cœnæ simpliciter intellectis urgere. Quibus accedit quod Apostolus *1. Corinth. 15.* de resurrectione disputans, Si mortui non resurgunt, inquit, ne Christus quidem resurrexit. Resurrexit autem Christus primitiæ dormientium: ergo nos quoque resurgemus. Ex nostris ergo corporibus resuscitatis apparet etiam quale fuerit, aut sit corpus Christi gloriosum, cui corpora nostra fiunt conformia. Nostra autem futura sunt uera, neruis, uenis, carne, cute & ossibus constantia, uisibilia non inuisibilia, & in loco aliquo cœli certo, non ubiq; unde consequens est, ne Domini quidem corpus inuisibile & ubiq; esse. Quod si quis arbitratur uitiosum esse argumentum quod à corpore nostro resuscitato ducitur ad corpus Domini resuscitatum, aut contra, Paulum accuset qui hoc nos docuit suo exemplo. Fides ergo ca *1. Corinth. 15.* tholica & orthodoxa cogit nos per tropum exponere uerba cœnæ.

Cum denique Capernaitæ differentem Dominum de manducatione corporis sui & potando eius cruore audissent, & modum cogitarent imaginarenturq; edendi bibendiq; carnalem, ille dixit se ascensurum in cœlum: uidelicet illis non esse cogitandum de naturalis sui corporis esu, quando in eo ipso corpore in cœlos ascensurus esset. Neque hîc locum habet quorundam nouum & elumbe commentum, confingentium, Ascendere in cœlum, aliud non esse quàm conditionem infirmam deponere, recipere supernaturalem. Nam Lucas, cui omnino plus *Ascendere in cœlum. Acto. 1.* credendum est, quàm huiusmodi argutijs imò ineptijs, dicit Dominum in altum esse sublatum, & in cœlos à discipulorum conspectu subductum, adde & nubem suscepisse eius corpus: discipulos item defixis in cœlum oculis euntem prosequutos, donec audirent ab angelis, ad eum omnino modum rediturum, quo abeuntem uiderant. Quis autem ignorat ipsum rediturum in nubibus cœli? Proinde cœlum in quod ascendit Dominus, loci nomen est, non conditionis. Locum nobis quoque promittit apud semetipsum in Euangelio, dicens, Si abiero ad pa- *Ioan. 14.* randum uobis locum, iterum ueniam & assumam uos ad meipsum, ut ubi sum ego & uos sitis. Quid quod omnes mortalis corporis conditiones uel infirmitates in ipsa resurrectione deposuerat, ut eas nihil necesse habuerit in ascensione sua deponere?

Non negabit, opinor, quisquam fidelium, nihil instituisse nobis Dominum inutiliter aut sine luculento aliquo fructu nostro. Cum autem in Euangelio dixerit

Dominus carnem suam corporaliter manducatam non prodesse: ubi non de alio corpore locutus est, quàm de eo ipso de quo in uerbis cœnæ, quod uidelicet tradidit pro nobis: irrefragabiliter sequitur, Dominum in cœna nobis non tradidisse quod non prodest. Tradidisset autem quod nō prodesset, si corpus suū corporaliter manducandū tradidisset. Claret ergo uerba cœnæ omnino interpretari oportere.

Matth. 24.

His omnibus accedit illustris prophetia ac mandatum disertum & minime obscurum Domini nostri Iesu Christi, dicentis in Euangelio, Tunc si quis uobis dixerit, Ecce hic Christus, aut illic, nolite credere. Surgent enim pseudochristi & pseudoprophetae, & dabunt signa magna & prodigia, ita ut in errorē inducantur si fieri possit etiam electi. Ecce prædixi uobis. Si ergo dixerint uobis, Ecce in deserto est, nolite exire. Ecce in penetralibus (*ὅτι τοῖς ταμείοις* in claustris inquam, *ταμεία* enim loca sunt abstrusiora penitioraq; in ædibus, in quæ reponimus quæ uolumus esse tutissima, quæ Germanicè appellamus *schryn/ schlossz vnd ghalt*) nolite credere. Sicut enim fulgur exit ab oriente & apparet usq; in occidentem, ita erit aduentus filij hominis. Quamuis uerò hic locus à multis soleat exponi de Iudaicis calamitatibus, negari tamen non potest, quod & ipse fatetur beatus Hieronymus, eadem opera totius mundi ad finem usque seculi fata contexi. Concluditur certè hic locus quem adduximus, sententia de ultimo Christi in mundum sub diem iudicij aduentu prolata: præterea negari non potest, simpliciter hic damari à Domino doctrinam, quæ Christum in terrarū diuersis locis, in scrinijs aut munitis locis commorantem uel præsentem, ostendit. Id quod transsubstantiationis doctores facere non libri modò ipsorum, sed & erecta corpori Christi, quæ ubique locorum cernuntur, tabernacula (quæ uocant Ciboria) sacella item, atq; adeò etiam augusta templa & monasteria testantur. In his locis omnibus & singulis, in his, inquam, locis cōmonstrant nobis Christum, dicentes, Ecce hic, ecce illic Christus, Ecce panis angelorum. In his hostijs omnibus totus est Christus, & in quolibet partium earum totus & plenus, talis qualis natus est de uirgine & pependit à cruce. Id quod protinus astruunt miraculis & prodigijs, ornant item uerborum inuolucris, mysteria tanta non inquirenda esse, sed credenda simpliciter. Ista enim fieri ineffabiliter & inuisibiliter per omnipotentiam Dei. Nec dissimulauit Dominus quantum hic error profecturus sit. Tantus erit prouentus, tanta frequentia errorem recipientium, & post Christum in deserta & ad penetralia concurrentium, ut etiam electi periculo inuoluantur. Sed quid interim in tanto periculo rerumq; discrimine suos docet facere Christus? Secundum repetit, Nolite credere. Quid nolite credere? Christum hic aut illic in terris, in deserto aut in penetralibus, uel etiam in medijs urbibus, uel in agro esse. Addit, Nolite exire. Ne sequamini turbam per distantiam locorum inquirentem Christum quasi in terris adhuc conuersantem. Proinde si iam uniuersus mundus, & omnia in mundo concilia, omnes reges & principes, adde & omnes angeli & diuī iubeant nos credere Christum corporaliter hic & illic esse, solius tamen redemptoris Christi filij Dei sapientiæ patris, per quem omnia condita sunt, præceptum, illud ipsum credere prohibentis, eam apud omnes pios habebit authoritatem, ut sciant non ita credendum esse sicut præcipiunt creaturæ, sed sicut mandauit creator. Quinimò dignatur Dominus in hoc ipso Euangelij loco rationē nobis reddere suæ doctrinæ. Quare enim non credendum est Christum in hisce terris conuersari uel præsentem esse corporaliter, sed interim inuisibiliter? Quia sicut fulgur exit ex oriente, & apparet usq; in occidentem, ita erit aduentus filij hominis. Id quod perinde est ac si dixisset, Semel uenit humilis in terras filius Dei ad liberandos nos per humilitatem

litem & mortem crucis, ea re peracta relictis terris ascendit in cœlum, & sedet ad dexteram patris: inde non redibit in has nostras regiones nisi ad iudicium. Tum uerò apparebit gloriosus, illustris, omnibus conspicuus ueluti clarissimus sol, imò ueluti terrificum omnibus impijs fulgur. Proinde non est quòd illum ab ascensione usque ad reditum in iudicium expectemus inuisibiliter aduenturum, & nobiscum tamē corporaliter præsensem futurum. S. Hieronymus hunc ipsum locum enarrans, Hoc quoq; dicendū est, ait, quòd secundus saluatoris aduentus, non in humilitate ut prius, sed in gloria demonstrandus sit. Stultum est itaq; eum in paruo loco uel in abscondito quærere, qui totius mundi lumen sit. Hæc ille. Verum ne uidear humano inniti testimonio, commemorabo quæ Paulus nos docuit in Epistola ad Hebræos. Christus semel, inquit, sub consummationem seculorum ^{Hebr. 9.} ad profligationem peccati per immolationē suipsius apparuit. Et quatenus constitutum est hominibus semel mori, post hoc autem iudicium: ita & Christus semel oblatus, ut multorum peccata tolleret, secundò absq; peccato conspicietur ijs qui eum expectant in salutem. Quoniam ergo Dominus noster semel uenit in mundum, semel oblatus est, iterum autem uel secundò uenturus est in fine seculi, certè non uenit quotidie iterum in hunc mundum. Et quoniam prohibuit credere, si quis illum nobis in mundo hic & illic præsensem commonstret: necessariò autem sequeretur ipsum hic & illic, imò in omnibus locis ubi eucharistia celebratur commonstrari posse præsensem, si uerba cœnæ ad literam intelligamus: ergo irrefragabiliter per collationem locorum consequitur, uerba cœnæ Dominicæ non iuxta literam interpretari oportere.

His puto satis factum minime contentiosis ingenijs. Intelligunt haud dubiè de sacramentis loquendum esse sacramentaliter, & locutiones sacramentales sacramentaliter esse exponendas. Præterea contra credendi regulam nihil oportere credi. Miracula uerò & omnipotentia Dei, quæ hic ad ornandam & persuaden- ^{Miracula & omnipotentia Dei.} dam causam malam producuntur, nihil probant post tot & tam euidentia argumenta ueritatis. Miracula adiunguntur uerbo ueluti sigilla. Id quod apud Marcū attestatur ipse Dominus. Si ergo illa pugnent cum uerbo, & illud asseuerent quod uerbum omnibus modis negat: quis non intelligat de eorum esse miraculorum genere, quo de loquitur Apostolus in 2. ad Thessaloniceñ. 2. cap. & de quo iam au diuimus admonuisse in Euangelio Dominum, ne eis credamus: Omnia quidem potest Dominus, sed ideo non facit omnia. Omnia quæcunq; uoluit fecit Dominus, ait propheta, in cœlo & in terra. Porro non uult uerbo suo & fidei suæ contraria facere: ergo ea non potest quæ non uult. Theodoretus in Polymorphi dialogo 3. Dominus Deus, inquit, nihil uult eorum, quæ non sibi suapte natura insunt. Potest autem quæcunq; uult. Vult autem quæ sunt suæ naturæ apta & conuenientia. Natura autem cū uerax sit Deus, non potest quæ uerbo eius contraueniunt. Addunt alij orthodoxi, Non quòd omnia non possit, sed quòd id nolit quod contra naturam eius est, neq; deceat, ut contra semetipsum agat.

Interim disertè profiteor, me non omnem Christi præsentiā in ecclesia, & in ipsa quoque actione cœnæ damnare aut oppugnare simpliciter. Oppugno enim ^{De præsentiā Christi in cœna.} significanter corporalem illam præsentiā Christi in pane, quam tuentur & obtrudunt ecclesiæ Dei Papistæ. Fateor autem ingenuè, pleno ore, & corde synce- ro, spirituales illam diuinam & uiuificam Christi & in cœna & extra cœnam Domini præsentiā, qua ille se non symbolis quidem inanimis, sed nobis per spiritum suum insinuare, nos omnium bonorum suorum participes facere, iustificare, uiuificare, alere, sustentare & satiare pergit: quam & nos per fidem in

nobis ipsis sentimus, per quam & sustentamur, alimur atque satiamur. Est enim Christus ecclesiae suae caput; & nos cum ipso communionem habemus. At quomodo esset sine capite suo corpus uiuum? Quomodo nos Christo participaremus, si ipsum in nobis non sentiremus praesentem, imò uiuentem atque operantem? Verum de his suo quoque loco dictum est copiosius.

Matth. 28.

His obstrepunt, fat scio, alij quidam ueritati aliàs non iniqui, clamantes hac ratione modum praesentiae Christi in cena non plenè satis exprimi, praesertim cum ipse dixerit aliàs quoque, Ecce ego uobiscum sum omnibus diebus usque ad consummationem saeculi. Ego, inquit, totus, non mea uirtus aut diuinitas, non meus spiritus, aut mea uis. Praeterea periculum esse ne Christum uideamur discernere, cum is totus nobiscum esse non possit, nisi corpore perinde ut diuinitate nobiscum sit. Nos uerò miramur illorum cogitationes. An non intellexerunt Dominum in diuino illo sermone suo, & in ipsa cena & protinus à cena habitato, nihil perinde inculcasse atque illud ipsum quod ipsi impugnant, nempe Christum abiturum corpore, praesentem autem futurum spiritu: & hanc quidem praesentiam ecclesiae utiliore futuram, quam corpoream? An non intellexerunt quare incarnatus & cruci affixus sit, hoc est, quis sit effectus & usus corporis Christi, nimirum ut semel pro nobis litata in terris hostia corporis sui, hoc efferret in coelum, in argumentum quòd & corpora & animae nostrae per eius meritum illuc post mortem sint euehendae? Postquam ergo in terris expleuit corpus Domini ad quod explendum uenerat, nihil est quod amplius agat in terris. Sedet iam, & sedere debet ad dexteram patris, ut illuc nos omnes ad se trahat. Legat autem doctrinam Apostoli Pauli in 9. & 10. cap. Epist. ad Hebraeos, si quis hinc nostris nondum plenè credit. Legat 14. & 16. cap. Euangelij Ioannis. Si autem istis uolupte est contentionis funem trahere, & his uerbis Domini, Ego uobiscum sum usque ad consummationem saeculi, perinde ut illis, Hoc est corpus meum, Hic est sanguis meus, mordicus inhærere, age explicent hæc mihi sancta sanctae scripturae testimonia. Paulus dicit habitare Christum in cordibus nostris, Uiuere in ipso Christum, & se in Christo uiuere, Dominus dicit ad latronem, Hodie mecum eris in paradiso. Et Euangelista dicit de mortuo Domino, Posuerunt eum in monumento. Non dicit scriptura, Posuerunt carnem & ossa in monumento: sed posuerunt eum in monumento. Non dixit Dominus latroni, Anima tua erit cum spiritu uel anima mea in paradiso: sed, Amen dico tibi, hodie mecum eris in paradiso. Nec dicit Paulus Christi spiritum & uitam uiuere in ipso, aut habitare in cordibus nostris: sed Christum simpliciter dicit habitare in cordibus nostris. Quis autem tam absurdus & rixis impexus, ut propter ista loca & uerba scripturae, contendat diuinitatem simul cum corpore Christi esse sepultam, corpus Christi simul cum anima fuisse eo die in paradiso, quo uterque excessit, Christi corpus simul cum spiritu habitare in cordibus fidelium & uiuere in Paulo, & Paulum uiuere in carne Christi? Libenter admittunt omnes catholicum catholicæ ecclesiae ex uerbo Dei sensum, nempe Christum spiritu suo ecclesiae suae in finem usque saeculi praesentem esse, corpore absentem, latronis animam in paradiso cum anima Christi non cum corpore fuisse collectam. Sic iudicat & de reliquis. Quòd si quis meae interpretationi diffidit, audiat S. Augustinum Tract. in Ioannem 50. sic dicentem, Loquitur de praesentia corporis, cum dicit, Pauperes semper habebitis uobiscum, me non semper habebitis. Nam secundum maiestatem suam, secundum prouidentiam, secundum ineffabilem gratiam impletur quod ab eo dictum est, Ecce ego uobiscum sum omnibus diebus usque ad consummationem saeculi.

summationem seculi. Secundum carnem autem quam uerbum assumpsit, secundum id quod de uirgine natus est, secundum id quod à Iudæis comprehensus est, quod ligno affixus, quod de cruce depositus, quod linteo inuolutus, quod in sepulchro conditus, quod in resurrectione manifestatus, non semper habebitis me uobiscum. Quare? Quoniam conuersatus est secundum corporis præsentiam quadraginta diebus cum discipulis suis, & eis deducantibus uidendo, non sequendo, ascendit in cælum: **ET NON EST HIC.** Ibi enim sedet ad dexteram patris. **ET HIC EST.** Non enim recessit præsentia maiestatis. Tantum Augustinus. Porro si his omnibus spretis pergunt urgere & inculcare illud domini ex Matthæo, Ecce ego, ego inquam (μετ' ὑμῶν) uobiscum sum: opponimus eis hoc domini & ipsum ex euangelio, Expedit uobis ut ego (en habent hic quoque ego) abeam: opponimus item hoc angelorum testimonium ex Luca, Hic Iesus qui assumptus est (ἀφ' ὑμῶν) à uobis in cælum, &c. Cogentur tandem uelint nolint in speciem pugnantia conciliare loca, & uniuersalem admittere sensum quem hætenus defendentes protulimus.

Neque ullum est hic diuisionis Christi periculum: neque diuidimus personam Christi cum Nestorio, cum proprietatem utriusque naturæ in Christo contra Eutychianos asserimus. Cum in terris corpore adhuc uersaretur Christus dominus, in cælis se nihilo minus etiam fuisse aut esse ipsemet in euangelio testatur. Et reuera Christus, qui & Deus & homo pariter erat, tunc in cælis erat, quando crucifigebatur & uersabatur in terris, tametsi in cælis minimè crucifigeretur corpus eius. Quemadmodum autem ipse Christus semetipsum non diuidebat, licet in cælo existens, in terris tamen non in cælo & uersabatur & crucifigebatur in corpore: ita neque nos diuidimus Christum Deum & hominem, etiamsi ipsum cœnantibus præsentem adesse & nos ei communicare dicamus, nihilo minus tamen corpore suo in cælo ad dexteram patris manere affirmamus: atque ita intra fines scripturæ consistamus. Ea de re pluribus disputauimus, cum differerem de una persona, & de duabus in Christo impermixtis naturis.

Hætenus de sententia genuina uerborum Cœnæ domini, qua potui breuitate & euidentia, dixi. De loco Pauli 1. Corinth. 10. Calix benedictionis cui benedicimus, &c. quem illi quoque pro corporali præsentia asserenda proferunt, non est quod pluribus agamus: semel enim & iterum is à nobis locus est tractatus.

Restat ergo ut expendamus quid illi de manducatione corporis Christi tradant, & quid de ipsa sentiendum doceant scripturæ canonicæ. Illi, Quod promissit dominus, inquiunt, id præstat certissimè & plenissimè. Subiungunt, Promissit autem se daturum sub specie panis & uini, uerum suum corpus, & uerum suum sanguinem, ad cibum & potum in uitam æternam. Colligunt, Verum ergo corpus & sanguinem suum dedit fidelibus sub specie panis & uini ad cibum & potum uitæ æternæ. Vnde & talem omnino manducari oportet qualis est, corporalis, corporaliter. Ad quam rem confirmandam adducunt sermonem domini, qui contextitur in euangelica historia apud Ioannem in cap. 6. Respondemus Deum plenissimè & perfectissimè quod promissit præstare, sed addimus ipsum non ad eum quem ipsi nobis sensum confingimus, sed quem uerbum eius uerè habet, præstare. Videndum ergo ante omnia quo sensu promiserit dominus se carnem suam in panem, & sanguinem suum in potum fidelibus exhibiturum: deinde quomodo edamus eius carnem & bibamus eius sanguinem. Allegorica sunt planè, uel parabolica quæ proferuntur hic à domino propè omnia. Promittit domi-

De uera manducatione corporis Christi.

Quomodo Christus dedit rit Carnē suam nobis in panē, id est ad cibum uitæ.

nus se carnem daturum in panem, uel ad cibum, sanguinem ad potum. Quoniam uerò cibus & potus instituta sunt & dantur hominibus ad uitam corporalem conseruandam, dominus autem Ioannis 6. cap. non de corporis, sed animæ uita loquitur, transitus certè fit à rebus corporalibus ad spiritualia. Iam ergo cum promisit dominus daturum se carnem suam ad panem, uel in cibum, sanguinem suum ad potum, quid aliud promisit quàm traditurum se corpus suum in mortem, sanguinem suum effusurum in remissionem peccatorum? Nam morte Christi conseruamur, ceu cibo in uita, & liberamur à morte. Sanguine Christi abluimur à peccatis, & ueluti potu inebriantur animæ nostræ. Nihil ergo loquitur hic dominus de pane eucharistiæ, nec promittit se ex pane in cœna effecturum carnem suam, aut sub specie panis daturum suum corpus. Commentitiæ autem & falsa sit hæc mea expositio uerborum Christi de corpore uel carne dando in panem, &c. nisi uerbis Christi expositionem meam confirmauero. Dixerat in euangelio dominus, Operemini cibum qui non perit, sed qui permanet in uitam æternam, quem filius hominis dabit uobis. Idem paulò post per interpretationem subdit, Et panis quem ego dabo, caro mea est, quam ego dabo pro mundi uita. Dixi me panem uel cibum uobis daturum (Panis enim domino more Hebraico cibum & sustentamentum significat) hic autem panis, uel hic cibus est caro mea inquit, carnem ergo meam me uobis daturum promitto, cum panem uitæ promitto. Habes expressè dominum per panem non intelligere corporalem panem, uel eucharistiæ panem. Sed quomodo carnem promittit ad panem, id est ad cibum uel ad uiuificandum? Repetit iterum dominus uerbum Dabo, & ait, Quam ego dabo pro mundi uita. Impendam nimirum eam in mortem, ut morte mea uos uiuificem. Moriendo itaque cibabit, id est uiuificabit caro mea. Hæc de promissione carnis in panem: sequitur de manducatione.

Quomodo edatur corpus Christi & bibatur eius sanguis.

Sicut autem scriptura sancta ubique citra tropum & extra allegoriam tradit nos mortis Christi, aut traditi eius corporis pro mundo participes fieri ad uitam per fidem: ita & in præsentī per tropum uel allegoriam iubet nos edere & bibere carnem & sanguinem Christi ad uitam æternam. Proinde edere carnem Christi, ac bibere eius sanguinem, nihil est aliud, quàm credere corpus Christi pro nobis traditum, sanguinem autem effusum esse pro nobis in remissionem peccatorum, ac per consequens manere in Christo, & manentem in nobis Christum habere. Fides enim de qua loquimur, non est imaginatio aut cogitatio duntaxat rerum præteritarum & extra nos positarum, sed certissimus assensus adeoq; sensus quidam rerum diuinarum, intra nos magno cum fructu perceptarum. Ideo enim & per allegoriam edendi & bibendi, non modò fides, sed & fidei uirtus à domino per Ioan. significatur. Cibus non sine uoluptate transit in corporis nostri substantiam: fide ergo magno spiritus desiderio coniungimur cum Christo, ut is uiuat in nobis, nos in Christo uiuamus, communicantes omnibus bonis eius. Spiritualis est hæc Christi manducatio: qui ne hilum quidem hic de crassa uel corporali manducatione, inutiles planè, uel somniauit. Verùm cum in uocibus edere & bibere carnem & sanguinem domini cardo controuersæ uoluatur, illis corporaliter ipsas interpretantibus, nobis spiritualiter, demonstrandum uidetur, dominum per edere & bibere nil aliud intelligere uoluisse, quàm credere, & per consequens manere in Christo & manentem in nobis Christum habere: proferemus itaq; nostræ assertionis per collationem locorum scripturæ testimonia diserta sex.

1. Dominus, Ego sum panis illæ uitæ, inquit, qui uenit ad me, non esuriet: & qui credit

credit in me, non sitiet unquam. Quis autem negabit relationem inuicem habere Edere & non esurire, bibere & non sitire? Quoniam ergo dixit dominus, Non esuriet, præmisisset, Qui edit me: sed maluit uti uerbo ueniendi, & dicere, Qui uenit ad me non esuriet. Edere ergo est uenire, & uenire edere. Quid autem sit uenire ad ipsum, ipse mox explicat & ait, Omnis qui audiuit à patre & didicit, uenit ad me: id est recipit me, & credit in me. Nam & Paulus dixit, Oportet accedentem ad Deum credere. Hæc autem irrefragabiliter euincunt Edere aliud non esse quàm credere. Sequitur enim adhuc clarius, Et qui credit in me, non sitiet unquam. Qui bibit non sitit: pro bibere ergo reposuit credere: ergo bibere est credere. Nam fides mentes nostras satiat & pacificat. Habent hic responsionem qui obijciunt, An non dominus ipse uerba habuisset, quibus explicare potuisset mentem suam, siquidem intellexisset per edere & bibere credere? Habent inquam apertum testimonium quo alterum usurpat pro altero.

Rursus dicit in eodem sermone dominus, Qui edit carnem meam & bibit meum sanguinem, habet uitam æternam, & ego suscitabo eum in nouissimo die. Idem in eodem sermone, Hæc est uoluntas eius qui misit me, ut omnis qui uidet filium & credit in eum, habeat uitam æternam, & ego suscitabo eum in nouissimo die. En habes iterum æquipollere, edere carnem Christi bibereque eius sanguinem, & credere in Christum.

Item, Ego sum panis uiuus, ait dominus, qui de cœlo descendi, si quis ederit ex hoc pane, uiuet in æternum. Rursus autem, Amen dico uobis, inquit, qui confidit mihi, habet uitam æternam. In idem ergo recidunt edere Christum & credere Christo.

Et iterum, Qui edit meam carnem & bibit meum sanguinem, in me manet & ego in illo. Porro Ioannes Apostolus in sua canonica dicit, Quisquis confessus fuerit, id est crediderit, quod Iesus est filius Dei, Deus in eo manet & ipse in Deo.

Item, Amen amen dico uobis, nisi ederitis carnem filij hominis, & biberitis eius sanguinem, non habebitis uitam in uobis. Et Ioan. 8. dicit idem dominus, Si nō credideritis quod ego sum, moriemini in peccatis uestris. Et iterum, Amen amen dico uobis, si quis sermonem meum seruauerit, mortem non uidebit in æternum.

Rursus dicit dominus, Sicut me misit uiuens pater, & ego uiuo propter patrem: ita & qui ederit me, uiuet ipse quoque propter me. Et Ioan. 5. cap. Sicut pater habet uitam in semetipso, sic dedit & filio uitam habere in semetipso. Et in eptola canonica, Qui credit in filium Dei, habet testimonium in seipso. Et, Qui habet filium, habet uitam.

Diuinis hisce & euidentissimis testimonijs subiungimus modo humana, perbibentia & ipsa Christum edere aliud nihil esse quàm credere & in Christo manere. August. Tract. in Ioan. 25. hæc uerba domini exponens, Hoc est opus Dei, ut credatis in eum quem misit ille, sicut scriptum reliquit, Hoc est ergo manducare cibum qui non perit, sed qui permanet in uitam æternam. Ut quid paras dentem & uentrem? Crede & manducaisti. Idem iterum Tract. 26. Credere in eum, inquit, hoc est manducare panem uiuum. Qui credit in eum, manducat inuisibiliter, saginatur, quia inuisibiliter renascitur. Et iterum in eodem Tractatu, Hoc est manducare illā escā, ait, & illum bibere potum, in Christo manere, & illum manentem in se habere: ac per hoc qui non manet in Christo, & in quo non manet Christus, proculdubio nec manducat spiritualiter carnem eius, &c. Idem iterum lib. de Doctr. Christ. cap. 16. docens quando admittenda sit figurata locutio, quando non

admittenda, dicit, Si præceptiua locutio est, aut flagitium aut facinus uetans, aut utilitatem aut beneficentiam iubens, non est figurata. Si autem flagitium aut facinus uidetur iubere, aut utilitatem aut beneficentiam uetare, figurata est. Nisi manducaueritis carnem filij hominis, & sanguinem eius biberitis, non habebitis uitam in uobis, facinus uel flagitium uidetur iubere: figurata est ergo, præcipiens passioni domini esse cōmunicandum, & suauius atq; utiliter recondendum in memoria, quod pro nobis caro eius crucifixa & uulnerata sit, Hæc Augustinus, qui proculdubio non tantum suum sensum protulit, sed totius catholice quæ tunc erat ecclesie. Videant ergo quid agant aduersarij, qui omnes sanctos uolunt ad hoc scelus uel facinus adigere, ut uidelicet corpus Christi corporaliter manducemus.

Caro non prodest quicquam.

His omnibus præterea illud etiam accedit, euidentia & perspicacia sua omnia propè præcedentia excellens, quod ipse dominus Iesus admirantibus, imò obmurmurantibus atq; dicentibus, Quomodo potest hic carnem illam suam dare ad edendum, post explicatam ueræ fidei summam, respondet, Hoc ne uos offendit, quod dixi me panem cœlo delatum, carnem meam in cibum uitæ daturum credentibus? Non arbitror offensionem illam iustum habituram locum, ubi uideritis me in cœlos ascensurum, unde ad uos descendi, & in quo cum patre ab æterno eram. Tunc enim ex ascensione diuina intelligetis me panem esse cœlestem, naturalem Dei filium, & uitam mundi: intelligetis præterea carnem meam non morsibus corporaliter dilaniandam & absumendam fore, ut quæ sublata est in cœlos in arrhabonem salutis humanæ. Quibus protinus subiungit, Spiritus est qui uiuificat: caro non prodest quicquam. Et adhuc clarius, Verba quæ ego loquor uobis, spiritus & uita sunt. Constat autem carnem Christi permultum prodesse, & multo plus prodesse mundo, quàm ulla possit quantumuis eloquens lingua effari. Quinimò prædixit dominus, nos non habituros uitam, nisi manducata carne eius. Sic ergo negauit dñs carnem suam prodesse quicquam, ut Capernaïtæ intellexerunt manducandam, corporaliter. Corporaliter manducata non prodest quicquam, spiritualiter autem manducata uiuificat: ac de spiritali manducatione, ex qua uita existit, locutum se dominus disertè dixit.

Istis ad hunc modum expositis & confirmatis, in breuem summam recolligimus quod ad aduersariorum obiectionem responderi posse existimamus. Vera est propositio, quæ asserit dominum certò quæ promissit præstare. Sed falsa est secunda propositio, quæ enunciat dominum in sermone suo Ioan. 6. cap. per panem intellexisse materialem eucharistiae panem, atq; hunc se in carnem suam conuersurum promississe. Nam per panem non intellexit materialem Eucharistiae panem, sed ad idioma Hebraicum cibum uitalem, adeoq; carnem suam ueram, quam in mortem tradidit, in cibum inquam, ut nos per Christi mortem uiueremus. Sic ergo texenda fuerat argumentatio, Quod Deus promittit præstat: promittit se autem carnem suam in panem, id est, in cibum & uitam daturum. Dedit ergo carnem suam in cibum: id est, impendit se in mortem, ut per mortem eius uiueremus. Quæ cum ita habeant, cibus certè quo de loquitur dominus, non est corporalis cibus, licet ipse dominus uerum, humanum, & naturale corpus nostro consubstantiali habeat, sed spiritalis: non quod caro conuertatur in spiritum: sed quod spiritaliter non corporaliter hauriendus traditur. Fide autem non ore corporeo spiritaliter manducatur. Nam ut esus uel manducatio cibi nos facit participes: ita corporis & sanguinis Christi per fidem effici-mur consortes.

Sed

Sed quia factum est, ais, cum panis cuius mentio fit Ioan. cap. 6. non significet panem cœnæ, quod omnes ferè ecclesiarum doctores, interpretes, & ministri hunc sermonem adaptarunt cœnæ domini? Respondeo adaptari posse hunc domini sermonem negotio cœnæ domini propter alias causas, tamen si panis non significet Eucharistiæ panem. Imò confiteor hunc domini sermonem de manducanda carne, & bibendo sanguine eius, plurimum lucis inferre negotio cœnæ domini. Augustinus certè lib. de Cons. euangelistarum 3. cap. 1. Ioannes de corpore & sanguine domini, inquit, hoc loco (Ioan. 13.) nihil dixit, sed planè alibi multò uberius hinc dominum locutum esse testatur. Hæc ille de capite nimirum loquens Ioan. 6. Quia enim una atq; eadem caro & idem corpus est domini nostri, de quo ipse utrobique loquitur & Ioan. 6. & Matth. 26. & utrobique id ipsum pro nobis uel pro uita nostra in mortem tradi dicitur: quia item non est nisi unica participandi Christi ratio per fidem in traditum corpus & in fustum sanguinem, quia deniq; catholica uel uniuersalis ac indubitata doctrina est, carnē Christi corporaliter manducatam non prodesse, congruunt ac illustrent planè negotium cœnæ dominicæ quæ præmissa sunt in cap. Ioan. 6.

*Rectè adaptari
negotio cœnæ
domini uerba
Ioan. 6.*

Et ut hoc rectius adhuc intelligatur, commemorabo quæ semper in Ecclesia ex scripturis de duobus modis manducandi Christi prolata sunt. Manducatur corpus Christi, & bibitur eius sanguis spiritualiter, manducatur idem bibiturq; sacramentaliter. Spiritualis modus perficitur fide, qua Christo connexi omnibus eius bonis communicamus. Sacramentalis modus perficitur duntaxat in celebratione cœnæ dominicæ. Pius spiritualis manducatio perpetua est, quia fides eis perpetua est. Extra cœnam, & in Cœna Christo communicant, & in hac quidem magis reparant & continuant dudum cœptam: quod prius diximus: & nunc quidem adiuncta actione sacra multò celebrius & euidentius omnia fiunt. Increduli uerò ac hypocritæ cum coryphæo suo Iuda, nunquam ipso Christo communicant, neq; ante cœnam, neq; in cœna, neq; post cœnam, quatenus scilicet in incredulitate sua perseverant, sacramentis autem dominicis participant sibi in iudicium & condemnationem.

*De duobus modis
manducandi
corpus domini.*

Scio quid hic nonnulli doceant, & quomodo tertium quendam modum manducandi Christi comminiscantur, qui nec spiritualis sit, nec merè sacramentalis, sed mixtus ex sacramentali & corporali. Contendunt enim ipsum domini corpus uerum ac naturale sub speciebus sacramenti ab infidelibus percipi corporaliter. Caterum commentum esse humanum, nullo apparebit negotio ex solidis aliquot scripturæ argumentis: quæ Iudæ adaptabimus proditori, ut in hoc uno exemplo omnes impij discant quid in cœna domini manducant & bibant. Iudicio enim capitis reuelato, facile erit & de membris iudicare.

*Tertium mandu-
candi modum.*

Adfuisse quidem in cœna Iudam, dum distribueret mysteria dominus, in dubium uocant nonnulli, inter quos est & S. Hilarius. Caterum historia euangelica disertè commemorat, dominum accubuisse cum duodecim. Sed & Lucas narrationē suam sic contexit, ut dubitare non possimus Iudam mysterijs communicasse etiam cum cæteris apostolis. Id quod & Augustinus contendit lib. 3. de Cons. euang. cap. 1. Tractatur item in Ioan. 62. & in Psal. 10. ac epist. 163. Quibus accedit quod ipse quoq; Aquinas Hilario respondens idem approbat nobiscum Parte 3. quæst. 81. art. 2. Cum autem constet Iudam adfuisse in cœna inter apostolos, cognoscendum iam uidetur quid acceperit à domino. Accepit quidem sacramentū corporis Christi, perinde ut alij discipuli, sed quoniam fidem, ut reliqui, non habuit, Christo non comunicauit, corpus & sanguinē domini nec edit nec bibit,

*Iudam fuisse in
cœna domini.*

*Quid accepe-
rit Iudas à do-
mino in cœna.*

2. Cor. 6.

Nam quotquot edunt corpus domini, & bibunt eius sanguinem, non esuriunt aut sitiunt: manent enim in Christo, & Christus in eis: sunt membra Christi, nec moriuntur in æternum. Contraria omnia apparent in Iuda & omnibus eius socijs: ergo increduli non edunt corpus domini, nec bibunt eius sanguinem. Præterea indubitatum est nullam esse conuentionem inter Christum & Belial. Hoc enim pronunciauit Apostolus ex scripturarum unanimi consensu. Iudas autem ab ipso Christo satanas appellatur: ergo Iudas non cōmunicauit Christo. Quod si omnino contenderimus Iudam ipsum domini corpus manducasse, profectò adfirmabimus impiè Christi corpus, non modò inutilem, sed & noxium esse cibum. Cæterum pietas tradit, Christum semper omnibus ipsum uerè manducantibus salutarem esse cibum. Negauit ipse quocq; Augustinus Iudam ipsum edisse corpus domini, & bibisse eius sanguinem. Tractatu in Ioan. 59. Apostoli inquit, manducabant panem dominum, Iudas panem domini contra dominum. Illi uitam: hic pœnam. Item Tractatu 26. Qui non manet in Christo, & in quo non manet Christus, proculdubio nec manducat spiritualiter carnem eius, nec bibit eius sanguinem: licet carnaliter & uisibiliter premat dentibus sacramentum corporis & sanguinis Christi: sed magis tantæ rei sacramentum ad iudicium sibi manducat & bibit, &c. Similia & propemodum clariora tradit lib. de Ciuit. Dei 21. cap. 25.

Quomodo in-
creduli rei fiant
corporis et
sanguinis do-
mini.
Ioan. 13.
Matth. 25.

Opponunt his S. Pauli auctoritatem dicentis, indignè manducantes non panis manducati aut e poti calicis, sed corporis & sanguinis domini fieri reos: hos item manducare & bibere sibi iudicium, eo quod non diiudicent corpus domini: unde necessariò consequi indignos ipsum domini corpus & sanguinem manducare & bibere, non tantum sacramenta corporis & sanguinis Christi. Respondemus Paulum disertis uerbis ita loqui, Quisquis ederit panem hunc, & biberit de poculo domini, &c. En qui ederit panem hunc, inquit, & de poculo biberit indignè: non autem dicit, Qui ederit carnem & biberit sanguinem indignè. Nam qui ipsum dominum edunt, non carent fide, ac manet Christus in ipsis, & ipsi in illo. Si autem miraris adhuc quomodo increduli possint rei fieri corporis & sanguinis domini, non nisi sacramentaliter manducati, ex alijs hoc scripturæ locis discito. Apud Ioannem dicit dominus, Amen amen dico uobis, qui recipit quemcumq; misero, me recipit: qui autem me recipit, recipit eum qui me misit. Ergo qui apostolum non recipit, non in apostolum peccat, sed in ipsum Deum, licet interim ipsum Deum nec uiderit, nec repulisse uideri uelit. Iudex dicturus legitur ad constitutos in sinistra, Discedite à me maledicti in ignem æternum. Esuriui enim & non dedistis mihi cibum. Sitiui & non dedistis mihi potum, &c. Verum audi quomodo excepturi sint impij hanc iudicis sententiam. Domine quando uidimus te esurientem, aut sitientem, & non ministrauimus tibi? Sed audi uicissim quid responsurus sit iudex, Amen dico uobis, quatenus non fecistis uni de minimis his, nec mihi fecistis. Sicut ergo in ipsum Christum peccauit, qui peccauit in ministrum, aut mendicum, etsi interim Christi personam nihil læserit: ita corporis & sanguinis Christi reus fit, quisquis sacramentum corporis & sanguinis Christi indignè sumpserit, tametsi interim ipsum corpus & sanguinem domini non hauserit. S. Paulus alibi dicit apostatas ab integro rursus sibi metipsis crucifigere filium Dei. Atq; idem alibi negat modis omnibus, Christum uel crucifigi, uel mori posse. Proinde non potest iterum crucifigi Christus ab apostatis, interim tamen foeda ipsorum defectio sic æstimatur, quasi crucifixissent filium Dei. Vtuncq; ergo impij non edant ipsum domini corpus, &

Hebr. 6.

biban

bibant eius sanguinem, rei tamen nihilominus fiunt corporis & sanguinis proditi uidelicet quantum in ipsis est. Calcat rebellis aliquis principis aut magistratus sui sigillum & literas discerpit; hic etsi ipsum magistratum non attigerit, aut conculcarit, dicitur tamen magistratum conculcasse, & accusatur non læsi sigilli aut uiolatarum literarum, sed impingitur ei crimen læsæ maiestatis & conculcati principis. Quid ergo mirum si audiamus indignè manducantes panem Domini, reos agi corporis & sanguinis Christi? Huius enim sacramentum & sigillum atq; obsignatio sunt panis & poculum mysticum.

Hæc hætenus de manducatione corporis Christi & potu sanguinis eius disputauimus, singula huius qua potuimus breuitate tractantes, transimus iam ad refectus Cœnæ Dominicæ fines (in descriptione Cœnæ positos) perstringendos. Institutam diximus à Domino Cœnam, ut dona Dei uisibiliter ecclesiæ repræsenteret, oculisq; omnium subiiciat. Didicimus autem ex tota huius negotij disputatione, ipsum Christum omnium donorum Dei aceruum esse plenissimum, utpote ex quo pro nobis in mortem tradito habemus omnia uitæ, remissionem peccatorum, & uitam æternam. Hæc cum sint inuisibilia haurianturq; fide, uisibiliter etiam, id est per sacramenta sensibus repræsentantur prope omnibus, uisui, auditui, gustui & tactui, ut totus homo corpore & anima commotus magno cordis iubilo sacrum hoc iucundissimum celebret. Huc iam pertinet analogia. De qua dixi Sermone huius Decadis 7. unde hæc plenius disci uolo.

De reliquis Cœnæ Dominicæ finibus.

Institutam præterea diximus à Domino Cœnam, ut uisibiliter in unum corpus colligat omnia in terris alioqui dispersa membra. Vnde & foedus & confœderationem alibi diximus Cœnam à sanctis cognominari. Fidei unitate & spiritus unius participatione inuisibiliter cum Christo & membris eius omnibus sumus connexi: In cœna autem coimus etiam uisibili coniunctione. Non enim iam uerbis, sed factis quoq; sed contestatione, sed sacramento coalescimus & connectimur arctissime, ipsa Cœnæ actione aperientes demonstrantesq; omnibus & nos esse de eorum numero, qui credunt se per Christum redemptos, Christi membra & populum esse. Pariter autem obligamus nos Christo & ecclesiæ, & fidem synaceram nos seruaturos, & beneficentiam ac charitatem erga omnes exercitaturos stipulantes. Plura de his require ex Sermone huius Decadis 7. Certè hinc probauit Paulus, consortibus mensæ Dominicæ non licere uesci idolothytis, & sacris communicare prophanis. Quod si rectè expenderent hodie multi, minus frequentes conspicerentur in sacris alienis seu peregrinis.

Institutam item diximus à Domino Cœnam, ut ea mortem suam retineret in memoria, ne unquam obliuione oblitteretur. Est autem mors Christi compendium omnium beneficiorum Dei. Ergo uult in memoria retineri beneficium incarnationis, passionis, redemptionis, amoris seu dilectionis. Licet autem memoria peragatur rei præteritæ, nempe mortis, ea tamen ad nos maximè pertinet, & uiuificat. Neque putabimus hunc esse postremum finem. Nullus enim tam diligenter atq; hic est expressus. Semel enim & iterum dicit Dominus, Hoc facite in mei memoriam. At ritus sacer & actio illa sacra, uerbis uel prædicationi de morte Christi & redemptione humani generis coniuncta, mirum est quàm renouet subinde beneficium, neq; in obliuionem uenire atq; intercidere patiatur.

Institutam postremò diximus à Domino Cœnam, ut per ipsam admoneremur nostri officij, laudis & gratiarum actionis. Nostrum officium est, synceros esse in fide Christi, & omnes complecti fratres Christiana charitate propter Dominum, ac cauere ne corpora nostra coinquinemus mundis sordibus, quando

1. Pet. 2.

sanguine Christi abluti sumus. Paulus Apostolus, Quotiescunque de pane hoc ederitis, inquit, & de poculo Domini biberitis, mortem Domini annunciate donec uenerit. Annunciare autem mortem Domini, est laudare bonitatem Dei, & gratias agere pro redemptione per mortem parata. Nam & Petrus Apostolus dixit, Vos genus electum, regale sacerdotium, gens sancta, populus acquisitionis, ut uires annuncietis illius qui est tenebris uos uocauit in admirabilem lucem. Sed de his aliis quoque diximus.

Dignè & indignè manducare & bibere, &c.

Acto. 13.

Hac paucis de finibus cœnæ uolui repetere, quæ pñ spiritu sancto instructi singuli expendunt diligentius. Dimitterem modò c. v. nisi ex utilitate publica futurum uiderem, erudire paucis, quomodo se quisque ad Cœnam Domini præparet, ne ad ipsam indignè accedat. Operæpretium autem fuerit ante omnia inuestigare qui dignè uel indignè edant & bibant de pane & poculo Domini. Et gradus quidem esse in dignitate & indignitate nostra, nemo est, qui iudicijs Dei ritè expensis & religionis natura penitus inspecta iudicat, negare possit. Præcipuus quidem indignitatis gradus est, sine fide accedere ad mysteria fidei. Dignè accedit qui cum fide accedit: indignè qui sine fide. Digni pœnitentia fructus in Euangelio appellantur, opera pœnitentes uel pœnitentiam professam decentia. Quid autem decentius, æquius & iustius est, quàm ut celebraturus Cœnam Domini, credat se morte Christi in pretium pro mundo oblata redemptum, quo nomine & Christo redemptori gratias agere cupiat? Quid contra indecentius & iniquius est, quàm ob signationem corporis Christi percipere, ac nullam interim cum Christo communionem habere? ad gratiarum actionem accedere, & nullas interim ex animo gratias effundere? Quid autem unit nos Christo, aut quid efficit omnium beneficiorum eius participes & proinde etiam gratos, nisi fides? Quid disiungit à Christo? & spoliât nos omnibus eius donis, redditque ingratissimos, nisi incredulitas? Proinde fides uel incredulitas dignè uel indignè facit nos participare de mensa Domini. Apostolus Paulus in Actis ad Iudæos per incredulitatem Euangelij prædicationem reiicientes dicit, Vobis quidem primùm oportebat loqui sermonem Dei: sed quoniam repellitis illum & indignos uos iudicatis uita æterna, ecce conuertimur ad gentes. Quomodo autem Iudæi contra semetipsos se uita æterna indignos esse pronunciabāt, ac ueluti iudices in semetipsos deferebant sententiam? Incredulitate se opposcentes uerbo Dei, nec fide apprehendentes Christum uitam & iustitiam mundi. Proinde dignitatis & indignitatis nostræ primaria & maxima portio, uersatur & consistit in fide uel incredulitate. Fide testatur S. Petrus purificari corda nostra: fides ergo uera est Christianorum munditia. Vnde & S. Augustinus, Incredulus non manducat carnem Christi spiritualiter, sed magis tantæ rei sacramentum ad iudicium sibi manducat & bibit. Quia immundus præsumpsit ad Christi accedere sacramenta, quæ aliquis non dignè sumit, nisi qui mundus est. De quibus dicitur, Beati mundo corde, quoniam ipsi Deum uidebunt, &c.

Acto. 15.

Dijudicare corpus Domini.

Deinde indignè edunt & bibunt de Cœna Domini, qui etsi fide non destituantur, abusu tamen suo peruertunt rectum Domini institutum: qualis uidetur fuisse Corinthiacæ ecclesiæ error, miscentis priuatum & prophanum conuiuium cum ecclesiastico & mystico, nec discernentis panem Domini, qui dicitur Corpus Christi, à cibo uulgaris. Nam Paulus, Qui indignè, inquit, edit & bibit, iudicium sibi manducat & bibit, non dijudicans corpus Domini. Ergo non dijudicare corpus Domini, est indignè edere panem, & bibere poculum Domini. Dijudicare autem (*διαικρίνειν*) est cum iudicio animi facultate exactè rem pensitare, æstimare, ac ita

ita ut decet discernere à rebus alijs. Porro corpus Domini est non modò spirituale illud Domini corpus ecclesia fidelium, sed ipsum corpus quod Dominus assumpsit de uirgine, ac pro nobis in redemptionem obtulit, quodq; modò confidet ad dexteram patris. Denique panis Eucharistiæ in cœna est ipsum Domini corpus, ueri inquam corporis pro nobis traditi sacramentum. Hunc ergo panem Domini mysticum quisquis non discernit à cibo prophano, sed ad mensam Christi ueluti cibariam accedit, nec agnoscit hunc cibum diuinum multum ab illo humano differre, nec eo modo quo instituit Dominus accedit, sed suas rationes sequitur, is certè non diiudicat corpus Domini, & iudicium sibi manducat & bibit, Paulo iterum se explicante & dicente, Itaque fratres mei, cùm conuenitis ad comedendum alius alium expectate, ne ad iudicium conueniatis. Proinde qui præoccupat cœnam publicam sua priuata, hoc est, qui non ita cœnat ut instituit Dominus, indignè manducat & bibit. Superius enim iudicium manducare & bibere dicuntur indignè manducantes & bibentes; & hic in iudicium conuenire perhibentur, qui non expectatis fratribus festinant: ac idem illi non diiudicant corpus Domini. S. August. Tract. in Ioan. 62. De his sermo est Apostolo, inquit, qui Domini corpus uelut alium cibum quemlibet indiscretè negligenterq; sumebant. Hic ergo si corripitur qui non diiudicat, id est, non discernit à cæteris cibis Dominicum corpus, quomodo non damnaretur (Iudas) qui ad eius mensam fingens amicum accessit inimicus? &c. Quanto uerò grauius hodie uidentur peccare, qui subuerso Domini legitimo & primario usu, abusum suum magna cum cõtentione stabiliunt, adde & nolentibus reclamantibusq; grauem persecutionem obtrudunt?

Præterea cum re ipsa experiamur in diem, fidei nostræ multa deesse, unde uaria inter nos exoriuntur uitia, ex quibus deinde et indignitas nostra, leuissima quidem omnium existit: utpote quam Dominus gratia sua facilè diluit, ac ferè cruce immissa extergit, infirmitates huiusmodi non imputans ad condemnationem. Alibi enim Apostolus pronunciat nihil cõdemnationis esse ijs qui insiti sunt Christo Iesu, nec ambulant iuxta carnem, sed secundum spiritum.

Nec parietiam supplicio diuersos hos indignitatis gradus punit iustissimus Dominus. Inspiciamus ergo quid nos doceat beatus Apostolus de pœna & supplicio indignè manducantium. Itaque quisquis ederit panem hunc, inquit, aut biberit de poculo Domini indignè, reus erit corporis & sanguinis Domini. Quæ sane intelligit de præcipua illa et omnium fœdissima incredulitatis indignitate. Etenim reus fit corporis & sanguinis Domini, cui culpa imputatur mortis Christi, hoc est, cui mors Christi ad mortem non ad uitam cedit: sicut & illis cessit qui ipsum corporaliter ex incredulitate impietateq; crucifixerunt. His enim sanguis Christi prophanus tanquam pecoris aut latronis sceleratq; hominis uisus est, quasi meritò propter delicta effusus sit. Et quid obsecro sentit aliud quàm prophanum esse sanguinem Christi, qui non credit ipsum pro peccatis mundi esse effusum? Audet tamen hic participare de cœna Domini, ut meritò iam dicatur reus fieri corporis & sanguinis Domini. Prægrande peccatum est per incredulitatem indignè panem Domini edere, & calicem eius potare. Id quod uel Iudæ exemplo nobis ob oculos statuitur. Non credidit hic in Dominum Iesum, imò cogitabat ipsum tradere in manus latronum, nihilominus accumbebat & participabat de mensa Domini, meritò ergo ipsum sibi totum tandem uendicabat diabolus. Testatur enim Ioannes diabolum sub finem cœnæ ingressum esse in Iudam: Ioan. 13. non quòd priusquam ad cœnam uenisset non fuisset in ipsum ingressus: dudum enim ipsum inhabitare ac exagitare cœperat: sed quòd post tot Christi Domini Lucæ 22.

admonitiones, & postprophanata mysteria Christi, adeoque & conculcata, totum illum sibi usurpasset, ac plenissime possedisset.

Idem Apostolus Paulus corpus Domini non diiudicantibus, ueluti in alio gradu indignitatis constitutis interminatur iudicium, dicens, Nam qui edit & bibit indigne, iudicium sibi edit & bibit. Rationem autem hac sententia reddit, cur non temere, nec nisi excussis animis ad mensam Domini accedere oporteat: quod uidelicet ad iudicium accedatur. Est autem iudicium, poena uel supplicium, quod Dominus suis irrogat fidelibus peccantibus, non in alio quidem mundo, sicut incredulis, sed in hoc seculo. Sequitur enim in uerbis Apostoli, quod cum nobis suppeditat sensum. Propter hoc inter uos multi imbecilles & inualidi, & dormiunt multi. Etenim si nos ipsos diiudicassemus, haudquaquam iudicati fuisset. At cum iudicamur, a Domino corripimur, ne cum mundo condemnemur. Distinguit aperte Apostolus inter indigne manducantes ferulae diuinae subditos, & inter mundanos, id est incredulos homines, quibus uidelicet poenam Dominus differt in aliud istud seculum: fidelibus suis, sed tamen ex incuria peccantibus, & non omni parte instructis, ad coenam accedentibus, uarias iniecit calamitates, ut pestes, famem, morbos, & huius generis alia, ad excutiendum ueternum. Sequitur enim, Si nos ipsos diiudicassemus, hoc est, si uicia nostra ipsi coercuisset, & nosmet a malis separauisset, haudquaquam iudicati, id est, supplicij affectu & correpti fuisset. Protinus enim subiicit, At cum iudicamur, a Domino corripimur. Iudicari ergo est corripi. Discimus autem ex his unde in ecclesiam exundent uaria mala, nimirum ex indigno coenae Dominae usu.

Quomodo praeparemus nos ad coenam Domini.

Respondeat autem hic aliquis, Si sic res habeat, tutius fore, ut in uniuersum abstineatur a coena Domini. Caeterum si in uniuersum quis abstineat, peccat etiam sic contra Dominum, & grauiter quidem. Contemnit enim mandatum Dei dicentis, Hoc facite: imò contemnit & mortem Domini & omnia dona Dei. Proinde periculum non euasit, qui coenae celebrationem omisit: id quod & superius diximus. Alia uia ingrediendum erit, si cupias & periculum & peccatum uitare. Audi consilium Apostoli Pauli miro compendio dicentis, Probet autem homo semetipsum, & sic de pane illo edat, & de poculo bibat. Obseruandum autem quod in hac probatione neminem relegat ad alium, sed quemlibet ad semetipsum. Pastores iubent te confessorem auricularium accedere, confiteri, absolutionem suscipere, & ad indictam formam pro peccatis satisfacere. Sic enim abunde purgatum iubent te ad mensam Domini accedere. Caeterum Paulus doctor gentium & uas electionis, horum ne uerbo quidem meminit, sed simpliciter, Probet homo semetipsum, ait, & sic de pane illo edat, & de poculo bibat. Sicut enim Deus cordium est scrutator, & animi affectum requirit, hypocrisim odit: ita nemo nouit quid sit in corde hominis, aut quales sint erga Deum affectus nostri, quam nos ipsi: nos ergo metipsos iubet omnia explorare in nobis ipsis: hoc est, iubet quemlibet in semetipsum descendere, & sese examinare. Examen hoc sine fide & face uerbi Dei fieri non potest. Prælucente autem luce uerbi Dei, & fide uires suas exerente, inquirat apud seipsum fidelis, an peccata sua omnia multipliciter contra Deum commissa agnoscat: an propter commissa doleat: an sincera cordis fiducia credat Christum abluisse ac condonasse peccata omnia: an ingenuè confiteatur ore, sicut corde credit, non in alio quam in solo Christo esse salutem & uitam: & an apud semetipsum constituerit huic confessioni immori: an ad innocentiam & sanctitatem sedulo & serio aspiret: an omnia membra corporis Christi, cuius & ipse membrum est, diligere, iuuare, & pro eis ad exemplum Christi se im-

se impendere paratus sit; an iras & inimicitias omnes remiserit: an passionem Christi, redemptionisq; mysteriū uniuersum recolere, & pro redemptione omnibusq; Dei beneficijs acceptis & accipiendis gratias Deo agere anhelet. Hęc est iusta probatio, & cœnæ mysticæ congrua: hac facta, licet in humilitate & timore Domini cum gaudio ad cœnam Christi Domini accedere.

Verūm trepidant hic fideles, utpote conscij sibi suæ imperfectionis & infirmitatis. Neque enim ista inueniunt in animis suis sic esse absoluta, ut alioqui intelligunt perfectionem iustam requirere. Accedit satanas, & multas & magnas remoras iniicit, quo à cœnæ celebratione retrahat. Ad ea dicimus, si quis putet neminem ad cœnam admittendum, quàm eum qui sit ab omni repurgatus peccato & infirmitate, is profectò à cœna arcebit & excludet omnes quotquot in hoc seculo uiuunt homines, imò abrogabit in uniuersum cœnam Domini, iam non amplius hominibus peccatoribus, sed angelis institutam. Meminerimus probationem illam etiam intra metas suas consistere, & Deum hic quoque ut ubique sua erga nos uti clementia seu misericordia. Nouit ille infirmitatem & corruptionem nostram, ac potest compati infirmitatibus nostris. Israelitæ sub Ezechia rege non ad plenum purgati participabant de agno paschali. Orauit autem rex, & dixit, Dominus qui bonus est propitiabitur cunctis, qui in toto corde requirunt Deum patrum suorum: & non imputabit eis, quòd minus sanctificati sunt. Ac subiungitur his in sacra historia 2. Paralip. 30. Et Dominus exaudiuit Ezechiam, & placatus est populo. Dignitas quæ per exactam probationem inquiritur, non est perfectio absoluta, sed uoluntas & mens à Deo instructa, quæ humiliter suam agnoscit indignitatem, ideoq; augmentum fidei & charitatis poscit suppliciter, omnemq; perfectionem in solo Christo requirit. In prima illa cœna conuiuæ Domini fuerunt Apostoli, & inter hos Iudas: sed quoniam hic fide caruit, & proditor, imò parricida erat, reus factus est corporis & sanguinis Domini. Cæteri Apostoli fuerunt & ipsi peccatores, sed non impij, habuerunt fidem in Christum, amarunt Christum, & se mutuò ut fratres: ergo non indignè sicut Iudas, manducarunt de mensa Domini. Licet interim ad illam ipsam mensam specimina ederent magnæ imperfectionis. Nam Petrus non sine contemptu & contumelia fratrum præfert se omnibus. Præterea contendunt ambitioso certamine de eo quis inter ipsos uideatur maior futurus. Non enim nunc commemorabo, quòd mox à mensa deserto Domino turpiter fugiunt, & multis modis se indignè gerunt: sed hæc omnia facile diluuntur, quòd in ipsis fides esset altissimis defixa radicibus.

Consolatio afflictorum conscientiarum.

*Matth. 26.
Lucæ 22.*

Non pigebit hic recitare uerbotim consolationem D. Ioannis Caluini, uiri pij & docti, magna cum laude etiamnum in ecclesia docentis, symmystæ mei, & fratris longe colendissimi charissimiq;, quam pro afflictis in hac causa sic protulit, Meminerimus has sacras epulas ægrotis esse pharmacum, peccatoribus solatium, pauperibus largitionem, quæ sanis, iustis, & diuitibus, si qui reperiri possent, nullum afferrent operæpretium. Nam cū in illis Christus nobis in cibum detur, intelligimus nos sine ipso tabescere, linqui, deficere. Deinde cū in uitam detur, intelligimus nos sine ipso in nobis planè mortuos esse. Quare ea est dignitas quam unam & optimam afferre Deo possumus, si nostram ei uilitatem, & ut ita loquar, indignitatem afferamus, ut sua misericordia nos se dignos faciat: si animos in nobis despondeamus, ut nos in ipso consolemur: si nos humiliemus, ut ab ipso erigamur: si nos accusemus, ut ab ipso iustificemur. Præterea si ad eam quam in sua cœna nobis commendat unitatem aspiremus: & quemadmodum

nos omnes unum in seipso esse facit, ita unam omnium animam, cor unum, linguam unam nobis omnibus optemus. Hæc si perpensa & meditata habuerimus, nunquam nos illæ cogitationes perturbabunt. Nos bonorum omnium egeni & nudî, nos peccatorum sordibus inquinati, nos semimortuî quomodo corpus Domini dignè manducaremus? Magis cogitabimus nos pauperes uenire ad benignum largitorem, ægros ad medicum, peccatores ad saluatorem. Dignitatem illam, quæ à Deo mandatur, fide præcipuè constare, quæ omnia in Deo, nihil in nobis reponit: deinde charitate, & ea quidem ipsa, quæ Deo imperfectam offerre satis sit, ut ipsam in melius augeat, quando præstari solida non potest. Tantum ille.

Illa uerò dixi hæctenus de sanctissima Domini nostri Iesu Christi Cœna, sacramento Christianorum præstantissimo & saluberrimo, cui mox ab initio, & uiuentibus adhuc Apostolis, satan salutis nostræ insensissimus hostis, insidiatus, ipsam multis conatus est adobruere contaminationibus: à quibus cum tempore iam aliquo fideliter sit repurgata, non desinit ille eam, quæ ecclesiæ cessit in symbolum fœderis nunquam rumpendi, ceu glomum aliquem litium obhære & insinuare. Vnde ipsa res & salus nostra requirit, ut uigiles locum tentatori nullum cedamus, sed omnes in Christo concordēs & in unum (per cœnæ celebrationem fidelem) corpus compacti, amemus nos mutuò, & æternas agamus gratias redemptori nostro Christo Domino: cui sit laus & gloria nunc & usq; in seculum, Amen, amen.

De quibusdam ecclesiæ Dei institutis. De scholis. De bonis ecclesiasticis, & horum usu & abusu. De templis & instrumentis Christianorum sacris. De admonitione & correctione ministrorum ecclesiæ, adeoq; totius ecclesiæ. De matrimonio. De Viduis. De Virginitatibus. De Monachis. Quid agat cum ægrotis ecclesiæ Christi, & de funeribus & sepultura.
S E R M O X.

RESTANT adhuc quædam & paucula quidem illa explicanda c. v. quæ partim pertinent ad ministerij ecclesiastici institutionem & conseruationem, partim uerò sunt peculiarîa quædã ecclesiæ instituta, quibus hæc carere non potest. De quibus hoc Sermon Decadis huius ultimo, quæ loqui dederit Dominus, quanta potero breuitate, explicabo.

Dominus non oneravit infinitis legibus suam ecclesiam.

Ante omnia sciendum est, Dominum Deum nostrum non onerasse in immensum extensis legibus & institutis ecclesiam suam, sed paucula seu numerata quædam dedisse, eaq; non sumptuosa, nec intricata aut proluxa, sed frugalîa, simplicia, exposita & succincta. Olim cum lege lata, populo suo cultum alioqui sumptuosorem institueret Dominus, certa tamen, numerata & moderata erant omnia: nec uolebat his addi uel adimi pro arbitrio hominum aliquid, uel aliter quàm ipse instituisset usurpari. Quis ergo crederet Dominum ecclesiæ noui sui populi, post abrogatam legem, sumptuosam & in immensum extensam tradidisse disciplinam? Sumptuosa ergo & immensa omnia in ecclesia fecit partim pastorum & procerum ecclesiæ auaritia, partim prodigiosa superstitio plebis. Teneamus nos, Dominum Deum nostrum admodum pauca, nec nisi necessaria suæ instituisse ecclesiæ: ideoq; omnibus nobis annitendum esse, ne adobruatur ecclesia traditionibus & institutis nō ab ipso Deo profectis. Satis magnificè ornata & instructa est ecclesia Dei, si teneat Dei & Domini sui instituta.

Potissima, uere pietatis capita in ecclesia.

Præcipua autem & primaria ecclesiæ Dei capita pietatis sunt, Doctrina sincera legis & prophetarum, Christi & Apostolorum, Oratio fidelis uni Deo per solum Christum oblata, Religiosa item legitimaq; sacramentorum Christi administratio

& perceptio. De quibus haftenus per quinque Decades differui. Accedit illis & Charitas, communicatio opum seu beneficentia. De qua nonnihil dictum est Decade prima, & dicentur in hoc Sermonem quoque nonnulla. Nec alia commemorat beatus Lucas in Actis, describens qualis fuerit primitiua Christi per Apostolos Acto. 2. fundata fidelis Ecclesia, & quae potissima eius capita. Erant autem perseverantes, inquit, in doctrina Apostolorum, & communicatione, & fractione panis, & precationibus. In his paucis capitibus uniuersa pietas comprehensa consistit.

Cum ministerio ecclesiastico sunt coniuncta quae sequuntur. Primum autem De Scholis. locum habent scholae Christianae, uberem prophetarum uel ministrorum Ecclesiae segetem proferentes. Intellexerunt omnes gentes non omnino barbarae, sine scholis nulla regna, nullas respub. feliciter conseruari posse. Igitur Aegyptios amplissima instituisse sacerdotum uel philosophantium collegia non modo Moses in Genesi, sed & Strabo Geographiae lib. 17. author est. Historiae quoque commemorant celeberrimos quosque orbis uiros percipiendae sapientiae gratia descendisse in Aegyptum: in quorum numero & Plato ille philosophorum Alpha numeratur. Nec temere scribitur in libro Regum Solomonem sapientia excelluisse sapientes Aegyptiorum. Quid quod non soli Aegyptij, sed etiam Palestini, gens alioqui bellis quam literis illustrior, suos habuisse dicuntur sacerdotes, quos in rebus dubijs consuluisse author est Samuel in historia sacra: Sed & Daniel testatur scholas celeberrimas fuisse Babylonij, Medis ac Persis, unde prodierint magi, sapientes inquam in omni parte philosophiae illustres. De Graecis & Romanis non est quod quicquam commemorem, cum nemo ignoret istorum decantatiss. ab omnibus doctis Athenas, & horum amplissima pontificum & augurum collegia. Sed omisis exteris, proferamus nostratia uel Ecclesiastica. Deus qui absolutissimam dedit populo suo, & reipub. & regni felicitis formam, distribuit scholas per XLVIII. oppida regni. Oppida ea a Leuitis philosophantibus, Leuitica dicebantur. Totam enim Leuiticam tribum consecrarat sacerdotio & studijs: non quod non liceret & ex alijs tribubus ingenuis hominibus philosophari: sed quod Leuitae studijs sacris peculiariter destinati essent. Ex tribu enim Iuda constat fuisse Isaiam & Daniele clarissima prophetantium lumina. Dederunt aliae quoque tribus praestantissimos in omni sapientia uiros. Ac dicebantur oppida illa & Leuitica & sacerdotalia, non quod in his soli sacerdotes agerent, sed quod in eis synagogas haberent. Caterum apud tabernaculum in Silo & maxime in Hierosolymorum urbe erat schola omnium praeclarissima & ueluti uniuersalis, ut hodie nuncupant. Clarissimos autem uiros scholis praefuisse eadem testatur sacra Rectores scho- historia. Nam in Rama legimus Samuelem, apicem omnis sapientiae, pietatis & larum. eruditionis, praefuisse Naioth, id est bursae (ut uocant) uel collegio prophetarum. 1. Sam. 10. Scholae Hierichuntinae & Gilgal rectores fuerunt Helias & Heliseus clarissima 4. Reg. 2. Israeliticae Ecclesiae lumina. Subuerterat impurus Ieroboam scholas, & conculcarat sacerdotalem ordinem, in sacerdotium admissis ex fece populi citra delectum quibuslibet. Intellexerunt autem uiri Dei Helias & Heliseus sine scholis doctrinam sanam non posse uel florere uel conseruari: toti ergo erant in instaurandis scholis. Cumque iusta his negarentur uectigalia, impijs regibus ea transferentibus ad adulatores, uentres, id est, ad sacerdotes idolorum, uitulorum & Baalis, factum est tamen bonitate domini, ut uiri aliquot boni aliquid conferrent studiosis, & hi modico contenti uictu, fortiter se gererent in deprauatissimo seculo. Qui uero Scholis sic praerant probatissimi uiri, sapientes ac prophetae, appellabantur patres, Vnde & discipuli uel scholares nuncupabantur filij prophetarum. Amos & Amos 7.

Amos 2.

Ieremias appellarunt & Nazareos. Ille enim, Non sum ego propheta, inquit, nec filius prophetae, nimirum liberalibus eruditus artibus. Et idem iterum, Suscitaui de filiis uestris prophetas, & de iuuenibus uestris Nazareos. Hic uerò commendat etiam formam studiosorum in Threnis quam in captiuitate prorsus corruptam lamentatur. Præterea filij prophetarum appellabantur, propter affectum in præceptores tanquam in parentes, & propter obedientiam & studium assiduum. Quò autem clariores sapientioresque erant principes, tanto maiorem operam impendebant reparandis scholis & restituendis ordinibus Ecclesiasticis. Id quod uideri licet non in Dauide & Solomone duntaxat, sed & in Iosaphat, Ezechia & Iosia regibus optimis & felicissimis. In captiuitate & post captiuitatem Babyloniam dispergebatur domini populus per uaria regna longè & latè. Quocumque autem deferrentur, scholas seu synagogas instituebant, & restituta urbe Hierosolymorum ad hanc subinde aspirabant. Ideo enim commemorant Acta Apostolorum Paulum apud gentes prædicantem uerbum Dei, ingressum synagogas docuisse. Et Iacobus Apostolus, Moses, inquit, ab ætatibus antiquis in singulis ciuitatibus habet, qui ipsum prædicent in synagogis. Vbi non loquitur de ciuitatibus Iudææ aut Galilææ, sed de ciuitatibus Gentium in Syria, Cilicia & Asia. Ceterum dispersos subinde aspirasse ad sacram Hierosolymorum urbem, illud arguit, quod in Actis legimus. Erant autem Hierosolymis habitantes Iudæi uiri religiosi ex omni natione earum quæ sub cœlo sunt. Et quòd commemoratur Paulus cum esset natus ciuis Tarsensis, Hierosolymas concessisse ad pedes Gamalielis, id est, ut se subderet disciplinæ auditorque fieret Gamalielis. Sic legimus Hierosolymis fuisse collegia siue synagogas Libertinorum, Cyrenensium, Alexandrinorum, Cilicum & Asianorum. Durauit ergo scholarum usus ad tempora usque Christi, imò & post ascensionem eius ad cœlos, ad usque ferè urbis excidium, licet interim non semel uideatur deprauatus.

Christus et apostoli instituunt scholas.

Christus quoque Dei filius, rex & pontifex noster, & ipse omnium nobilissimam instituit scholam, uocatis duodecim Apostolis & discipulis septuaginta, uiris, inquam, delectissimis octoginta duobus. Sed & Apostoli permultos sibi compararunt discipulos, in primis autem Paulus organum Dei ad conuertendas gentes electiss. qui in comitatu suo habuisse legitur Sopatrem Berrhoensem, Lucam Antiochenum, Marcum Hierosolymitanum, Barnabam, Syluam uel Syluanum, Caium & Timotheum, Aristarchum & Secundum, Tychicum & Trophimum, Titum & Linum, Crescentem & Epaphram, Archippum & Philemonem, Epaphroditum & Artemam, & multos alios. Idem diligentissimè uiris bonis commendauit studiosos & ministros Ecclesiarum, adhortans omnes ad liberalitatem, ne quid his deesset. Ad Titum scribens, Zenam legisperitum, inquit, & Apollo studiose deducito, ne quid illis desit. Iam & Antiochiæ percelebrem fuisse in Syria scholam, & apostolicam quidem illam, non obscuris quidem argumentis, uel ex 13. cap. Actorum colligere licet. Sed & Eusebius Cæsariens. abundè testatur quàm illustres scholæ fuerint Alexandria in Ægypto, & in alijs illustribus Ecclesijs. Et nos hoc ipsum exposuimus aliquando paulò copiosius in libro quem scripsimus de Institutione episcoporum. Tandem uerò omnibus Ecclesiæ rebus in peius declinantibus, degenerarunt & ecclesiasticæ scholæ in monasteria siue collegia canonicorum & monachorum.

Titum 3.

Ad conseruationem ministerij pertinet scholæ

Cæterum ex his quæ diximus nulli obscurum esse puto, ad incolumitatem Ecclesiæ ministerijque sacri conseruationem imprimis pertinere scholas, in quibus tradantur bonæ artes ad sacra studia promouenda utiles: cuius generis sunt

sunt linguarum sacrarum præcipue, sermocinatricis philosophiæ, physices & matheseos studia: & hæc quidem moderata, & ad certum pietatis scopum delineata. Inuenias enim ingenia quæ in artibus & disciplinis consenescent, sacra uerò attingant nunquam. Atque utinam ex prophanis nimium ingurgitatis non etiam ipsa sacra, ueluti barbara, contemnere discerent impij. Inuenias ingenia alia quæ studijs matheseos ita inhærescunt, ut meliores agere possint ædificiorum magistros, quàm rectores uel pastores ecclesiarum, imò quæ cœlo astronomico sic implicentur, ut uerum cœlum sedem beatorum nihil ad se pertinere arbitrentur, satis beati futuri, si modò motus illos cœli uisibilis & astrorum cursum uel puncto attingere possint. Qui autem philosophiæ studijs & dialecticorum tricis rhetoricarumque præceptis plus nimium immorantur, nec finem ullum attingunt, aut seriò cogitant studia sua ad ædificationem Ecclesiæ conferre, ferè disputatores rixosi, & censores superbissimi fiunt, quibus nihil propriè, tersè & expensè satis dictum aut factum uidetur ab alijs, nisi quod ipsorum capitibus grauidis admodulatum, regulisque præscriptis pilo tenus etiam congruit. Hi ferè disputationibus impexissimis omnia inuoluunt, nihil aliud quàm disputationes & rixas spirant, omnia omnium aliorum etiam bene aut tolerabiliter dicta & facta arrogantisimè censent, arrodunt, & malignè cauillantur, philosophastri uerius quàm philosophi, imò scholarum & Ecclesiarum pestes: ex quibus uenenum altercationum, simultatum, dissidiorum, & scissionum effunditur in Ecclesiam. Contra hos uidetur locutus Apostolus Paulus ad Timotheum. Nam post compendium sanæ doctrinæ redditum, subiungit, Hæc doce & exhortare. Si quis aliter docet, nec acquiescit sanis sermonibus domini nostri Iesu Christi, & ei quæ secundum pietatem est doctrinæ, inflatus est, nihil sciens sed languens circa quæstiones & pugnas uerborum: ex quibus oritur inuidia, contentio, maledicentiæ, suspiciones malæ, superuacuae conflictationes, hominum mente corruptorum, & qui ueritate priuati sunt, existimantium quæstum esse pietatem. Seiungere à talibus.

1. Tim. 6.

Equidem feliciter nunquam celsit Ecclesiæ, quando homines docti & studiosi deserta simplicitate & puritate uerbi Dei, aliò conuerterunt oculos, neque hos unice in solum uerbum Dei collimarunt. Ex ueteribus quidam non contempserunt uerbum Dei, sed interim plus quàm decebat tribuerunt traditionibus. At ea re & erroribus occasionem præbuerunt, & inductos abusus confirmarunt. Ante secula aliquot Gratianus & Lombardus & alij quidam ex scriptoribus Ecclesiasticis, conciliationem dogmatum facere, & certam plenamque theologiam conati sunt colligere. Verùm ea re non modò à scripturis abduxerunt scholas, sed & doctrinas peregrinas Ecclesiæ obtruserunt. Secuti istos Alexander, Albertus, & Thomas, qui non modò ipsi à sententijs illis pependerunt, & ea alijs etiam commendarunt, uerùm ipsam quoque philosophiam miscere cum theologia, & in unum ueluti corpus redigere contenderunt. Sed inde nobis tot uix ac sectæ, tot inquam paludes ranis scatentes, tot scholæ, tot monasteria, ac sophistæ. Proinde si hodie quoque pergamus scripturis sanctis male copulare philosophiam, & illas superstitiose ad disputationes reuocare, ac sub regulas cogere humanas uel artium, corrumpemus & ipsi in scholis, grandi cum Ecclesiæ detrimento, synceritatem doctrinæ Apostolicæ. Interim certum est bonas artes uel literas plurimum facere ad perspicuitatem ac euidentiam, sed moderatè cum iudicio religiosè adhibitas, ut imperium relinquatur sacris literis, seruiant autem omnes artes exoticæ.

Corruptio scholarum.

Scholarum cer-
tus scopus.

Disciplina scho-
larum.

De bonis eccle-
siasticis.

Ecclesia noui
testamēti habet
facultates.

Luce 8.
Matth. 10.

Acto. 4.

Doceatur ergo in scholis ecclesiasticis pura pietas, imò sit PIETAS scopus studiorum omnium: inculcetur studiosis mox ab initio studiorum Catechesis, nec ulla eis permittatur requies, donec eam plenè & imbiberint, & familiarem sibi fecerint: augeatur deinde concepta pietas quotidianis lectionibus & concionibus sacris: prælegantur perpetuò scripta euangelica & apostolica, ut & hæc illis maturè fiant familiaria: simul autem commodè imbuantur linguis & artibus, exerceanturq; & scribendo & dicendo. In primis autem exulet ex scholis piè institutis & Christianis, luxus & libido. Floreat disciplina etiam seuerior. Si enim corrumpatur iuuentus in scholis, atq; in corruptione adoleuerit, quid obsecro ab his expectemus quando præfecti fuerint muneribus ecclesiasticis? Illos ne credamus futuros Ecclesiæ sal, qui ut dissolutissimi insulsiq; sunt, ita acrimoniam in alijs ferre non possunt? Illos ne putabimus fore ecclesiæ lumina, qui ipsi odere lucem, & delectantur tenebris, & tenebrarum operibus? Quod ergo in Ecclesia Israelis fuerunt filij Heli, id ipsum erunt & sunt in Ecclesia Christi corrupti prophetarum filij. Peribunt itaq; simul cum plebe sibi credita. Proinde indulgentia nimia peccatur hodie in scholis scelere nunquam eluibili. Venias enim in scholas non paucas, in quibus milites & scurras, non scholares aut studiosos credas, quos uulgus clericos appellat. Neque uictus, neque uestitus, neque mores, neq; dicta, neque facta referunt homines ingenuos, honestos, aut studiosos. Scio interim multa deberi infelici & dissolutissimo nostro seculo, in quo à contumacibus & rebellibus non audiuntur seniorum consilia: sed rursus noui plurimum non rarò delinqui præsentium incuria & indulgentia. Quoniam uerò in scholis rectè institutis incolumitas consistit ecclesiarum, annitendum erit summa ope nobis omnibus, ne quid hac parte per nostram peccetur incuriam ac oscitantiam. Hæc de scholis ecclesiasticis, qua potui breuitate recensui: de quibus plura dixi in libro de Institutione episcoporum.

Porro ut conseruari possint scholæ cum ministerio uniuerso, & omnibus ædificijs sacris, sumptibusq; ecclesiasticis, opus est omnino iustis facultatibus. Locus ergo hic admonet aliquid proferre de Bonis Ecclesiasticis. Deus in eare pub. quam alijs præluere, ut optimè in omnibus rebus necessarijs institutam, uoluit, ex publico uectigalia sacro ministerio deputauit, decimas uidelicet, primitias & uarij generis oblationes. Extant hæc multis ab ipso uiro Dei Mose in lege exposita: qui nihil ueritus est, ne eam ob tractationem accusaretur iniquæ cupiditatis aut auaritiæ. Disertè enim quæ Deus loqui iubebat, fideliter reddidit. Quid quod ipsa lex naturæ iubet laboranti dare mercedem, & publicos sumptus ex collatione publica suppeditare? Et uectigalia uel tributa illa quæ ex publico colligebantur, non erogabantur nisi in usus publicos. Partim enim cedebant ministris pro ipsorum ministerio, partim impendebantur publicis ædificijs & sumptibus sacris. Seruiebat item portio subleuandis pauperibus.

Tametsi uerò abrogata sit nouo testamento lex Leuitica cum sacerdotio uniuerso, certum est tamen uniuersalem illam legem, publicos sumptus ex publicis collationibus facere iubentem, non esse abolitam. Nam legimus dominum Iesum Christum, licet non ex decimis & sacerdotum uectigalibus, ex collationibus tamen nihilo minus piorum uixisse. Nam publico fungebatur munere. Idem discipulos suos ad prædicandum ablegans, disertè dicit, Nolo uos de uictu & amictu esse sollicitos. Dignus est enim operarius mercede sua. Ergo confert primitiua ecclesia, ab apostolis Christo collecta domos, prædia & pecunias suas ad conseruationem ministerij rerumq; Ecclesiæ necessariarum. Sacerdotes & Le-
uitæ

uitæ tunc occupabant sacra uectigalia, neque culmum impendebant apostolicæ Ecclesiæ, utpote quam fame extinctam cupiebant. At intelligebant interim p̄i & fideles homines ad ecclesiæ conseruationem omnino pertinere terrenas facultates. Homines enim dedit ministros Ecclesiæ, non angelos: pauperes item loco sui Ecclesiæ commendauit. At hi utpote homines uarijs rebus indigent. Conserunt ergo sancti, spiritu sancto exagitati, ædes, pecunias, fundos, aliasq; suas facultates, ut ex his & pauperes, & ministerium sacrum conseruetur. Certissimum est itaq; ecclesiam populi noui testamenti ab ipsis Christi & Apostolorum temporibus facultates habuisse collatas è publico, & erogatas esse rursus in usus publicos.

Gregorius eius nominis primus, episcopus Romanus, commemorat suo tempore, & ante sua tempora moris fuisse, ut ex bonis ecclesiasticis fierent portiones quatuor, Vna episcopo & familiæ eius: alia clero: tertia pauperibus: quarta Ecclesijs reparandis. Negant autem non pauci iustè episcopos stipendium accipere ab Ecclesia. Videamus ergo quid ea in re nos doceant cum Christo domino Apostoli. Christus dominus, qui nihil unquam admisit iniqui, à mulieribus legitur accepisse, quæ ipsi ministrarunt docenti de facultatibus suis. Idem amandans discipulos & iubens ne solliciti sint de uictu & amictu, subiungit, Dignus est enim operarius mercede sua. Dignum æquum & iustum iudicat dominus prædicatoribus suppeditare necessaria. Ergo indignè se non gerunt qui accipiunt stipendium, unde parent sibi suisq; necessaria: imò comparat prædicates non ociosis uentribus, non gratis manducantibus panem alienum, neq; mendicis, sed operarijs. Vt autem in lege testatur dominus ingens esse flagitium negare mercedem operarijs: ita non peccant uulgariter, qui fidos pastores fame contabescere & inedia perire sinunt. Alibi quidem, Gratis accepistis, ait ad discipulos dominus, gratis date. Sed loquitur de dono miraculorum, sanitatisq; beneficio infirmis aut morbo laborantibus & oppressis conferendo. Ita enim scriptum est, Infirmos sanate, leprosos mundate, mortuos suscite, dæmonia eijcite. His demum subiicit, Gratis accepistis, gratis date. Proinde licet Apostoli stipendium acceperint ab eis quibus prædicarunt: pro dono tamen sanitatis, in nomine domini collato, nihil unquam accepisse à quoquam leguntur. Sicuti ne Heliseus qui dem à Naamano Syriæ imperatore, ultrò magna offerente dona, uel tantillum accipere sustinuit, quòd eius consilio à lepra fuisset mundatus. At idem ille donum uiri à Baal salisa uenientis non respuit. Ex eodem Christi domini euangelio discunt ministri ecclesiarum ad quos usus conuertant stipendium ab Ecclesia acceptum. Cum enim dominus secedere iussisset Iudam loculos gerentem, existimarunt cæteri discipuli illum accepisse mandatum emendi necessaria diei festo, aut egenis aliquid erogandi. Proinde dominus stipendio accepto usus est ad res sibi suisq; necessarias parandas, & ad eleemosynam largiendam. En omnia uitæ & muneri suo necessaria possunt ministri ex stipendio ecclesiastico sibi & familiæ suæ parare. Deinde ex eodem possunt & eleemosynam elargiri pauperibus, uelut de proprijs & iustè partis opibus. Etenim in Lege quoque Dominus disertè dicit, sacrificia Leuitarum facta ex decimis & alijs oblationibus uel uectigalibus sacris, tam sibi grata futura, quàm eorum est oblatio, qui offerunt aliquid ex propria arca aut ex proprio torculari prædij sue proprijs. Certè si operarius aliquid de mercede sua offerat Deo, hoc est, largiatur pauperi, an non gratissima Deo uidetur esse oblatio? Gratissima ergo Deo fuerit eleemosyna collata à ministro Ecclesiæ ex stipendio accepto ex sacro ministerio,

Quomodo erogata sint quondam opes ecclesie.

Ministris ecclesiarum deberi mercedem.

Matth. 10.

Ioan. 13.

Laborat operarius aliquis in extruendo templo, ac mercedem operis percipit ex bonis ecclesiasticis. Quis uerò eam obrem dixerit operarium eleemosynam accepisse, nec eleemosynam ex eleemosyna conferre posse? Mercedem operis accepit. Nam laborauit. Ex mercede ergo & iustis proprijs suis opibus eleemosynam dat. Quare itaq; uideatur minister ecclesiae eleemosyna uiuere & ex eleemosyna eleemosynam non posse conferre, qui tamen & ipse pro suo stipendio laborauit, unde & mercedem operis accepit, sicuti operarius, cui ministrum ipse dominus comparauit? An uerò dicet aliquis, ministrum ecclesiae suo fungentem munere fideliter, nihil laborare? Si quis ea est impudentia adobrutus, non me, sed Paulum audiat apostolum dicentem, Si nos spiritualia uobis seminauimus, magnum est si nos uestra carnalia messuerimus? Et iterum, Qui bene praesunt presbyteri, duplici honore digni habeantur, maxime ij qui laborant in sermone & doctrina. Dicit enim scriptura, Boui trituranti non obligabis os. Et, Dignus est operarius mercede sua. En non arbitratur apostolus bonum ministerij inestimabile, re uilissima, stipendio inquā terreno, compensari ullo modo posse. Deinde, Qui laborant, inquit: qui laborant inquam, non qui ociantur inquit, in doctrina. Hos & boui laborioso animanti & trituranti quidem confert, deniq; & operario. Id quod tam diligenter admoneo quòd in maligno & ingratisimo hoc seculo nostro homines, imò monstra potius ingratitudinis inueniuntur, quibus persuasum est ministros nihil agere, etiam eos qui fideliter suum obeunt munus. Nam clamitant hos gratis suum panem, ueluti mendicos, edere. Quo nomine multa egregia ingenia absterrentur à studijs bonis & sacris, ut planè abhorreant à ministerio, ceu à mendicitate & re inhonestissima. Ita enim nouit satan res suas conficere pro regno suo augendo, abutens imò bene sibi utens nostra ingratitudine & malitia. Quare non potius sustinent illi cum Christo & Apostolis, qui & ipsi stipendio alti sunt ecclesiastico numerari, quàm inter ingratos & superbos illos recenferi, qui ferè usuris & malis artibus suas sibi opes parauerunt? aut si non malis artibus parauerunt, certè ex liberalitate & mero Dei dono, pro quo nihil laborauerunt, acceperunt?

1. Cor. 9.

1. Tim. 5.

1. Cor. 9.

Apostoli acciperunt stipendium.

Marc. 6.

Paulus grauib; & multis argumentis approbat ius accipiendi stipendij ex ministerio sacro. An non, inquit, habemus potestatem edendi & bibendi? an non habemus potestatem sororem mulierem circunducendi? Intelligit autem potestatem accipiendi & pro sua, & pro uxoris, totiusq; familiae necessitate. Ac per interrogationem quod uult enunciat, ut sic significet aequitatem confessam apud omnes, imò & exempla adiungit, nec quorumlibet, sed omnium, adde & maximorum Christi apostolorum, Christo etiam sanguine coniunctorum, dicens, Quemadmodum & ceteri apostoli & fratres domini, & Cephas? Quis ille Cephas nisi Petrus? Ad hunc enim Ioan. 1. cap. dicit dominus, Tu uocaberis Cephas, quod sonat, si interpreteris, lapis. Sed & Petrus à petra cognominatus est: ut in idem semper recidat etymon nominis. Qui uerò sunt fratres domini, nisi Ioannes & Iacobus, Iacobus item Iudae, Iudas Iacobi & Simon? Hos autem omnes dicit Paulus stipendio accepto uixisse ex publicis Ecclesiae collationibus. Exemplis his coniungit aliquot similia petita è uulgo, Quis, inquit, militat unquam suis stipendijs? Quis plantat uineam, & de fructu eius non edit? Aut quis pascit gregem, & de lacte gregis non edit? Eleganter autem his, & proprijsimè quidem his, non alijs utitur similibus. Nam ministri ecclesiarum alibi milites, uinitores uel agricolae & pastores apellantur. Quis uerò tam iniquus ut neget militibus, agricolis & pastoribus uictum & amictum ex militia, agricultura & re

re pecuaria? Agnoscunt ergo cordati & æquissimi iudicii omnes homines, ministrum ecclesiæ uiuere posse ex ministerio ecclesiastico. Cæterum ne quis obijceret, parabolas illas humanas & à uulgo petitas, in causa ecclesiastica nihil probare, subiungit protinus, Num secundum hominem hæc dico? An non & lex eadem dicit? Etenim scriptum est in lege Moysi, Non obligabis os boui trituranti. Quasi dixerit, Sunt mihi in promptu pro iure nostro asserendo, non tantum humanæ similitudines, sed & diuinæ scripturæ testimonia. Profert autem locum ex Deut. 25. cap. de alendis bobus laborantibus. Rursus ne quis eum locum non de prædicatoribus, sed simpliciter de bobus interpretandum contenderet, subdit, Nunquid boves curæ sunt Deo? An hoc propter nos omnino dicit? Propter nos enim hoc scriptum est, quod sub spe debeat is qui arat, arare, & qui triturat sub spe, spei suæ particeps esse. Nobis, inquit, uoluit in lege sua Dominus consulere. Voluit enim æquitatem syllogismo quodam colligi, ad hunc uel similem modum, Si Deus prospexit armento & pecudibus, eorumque rationem haberi uoluit, quanto magis hominum? Iniquissimum certe foret, si agricola cum boue sine spe, id est, frustra & sine fructu laboraret: iniquissimum ergo foret & ministerium in ecclesia sine spe ac debito stipendio agriculturam exercere ecclesiasticam. Porro cum his iterum opponi solet, spirituali ministerio præmium deberi, non corporale, sed spirituale, respondet Apostolus, Si nos uobis spiritualia seminauimus, magnum est si nos uestra carnalia messuerimus? Nihil ergo Corinthios conferre sentit, cum dant temporalia, si uidelicet hæc cum æternis conferantur bonis, quæ ministri docendo afferunt. Nam quanto antecellit anima corpus, tanto præstantiora sunt spiritualia corporalibus. Et occulit interim Apostolus in his argumentum euidens, dum admonet æquum esse ut qui seminat, etiam idem ille & metat. In eo autem inæqualitas magna est, quod ministri seminant meliora, metunt autem deteriora. Homines quia & Deum & diuinum ministerium floccifaciunt, ideo ministros nihil agere iudicant. Paulus uero rursus ab aliorum exemplo ius suum confirmat dicens, Si cæteri erga uos potestatis participes sunt, cur non potius nos? Cum enim apud Corinthios nemo plus laborasset, quam Paulus, nemo erat mercede dignior. Idem rursus ab exemplo & præcepto ac ordinatione Domini ius suum approbans, An nescitis, inquit, quod hi qui in sacris operantur, ex sacrario edunt? & qui altari ministrant, altaris sunt participes? Sic & Dominus ordinauit, ut qui Euangelium annunciant, ex Euangelio uiuant. Vbi uero hoc ordinauit Dominus? Cum in Euangelio dixit operarium sua mercede esse dignum. Obseruandum autem puto in primis quod Apostolus disertè dicit, Dominum suam ordinationem de alendis ministris ecclesiæ, ad imitationem antiquarum populi Iudaici legum instituisse. Hinc enim colligimus non aberrare nos à scopo, si in hac & similibus causis uetera quoque instituta non omnino reiiciamus.

His omnibus nihil derogat, quod ipse Apostolus Paulus suo iure non est usus. *Paulus non accepit stipendium.* Alia enim est quæstio facti, alia iuris. A Corinthiis quidem certas ob causas nihil accepit, sed nihilominus accepit ab alijs ecclesijs. Sed & à Thessaloniceis, nihil accepit: cæterum hoc factum suum non uult præiudicare æquo iuri. Nam ad Corinthios, Alias, inquit, deprædatus sum ecclesias, accepto ab illis stipendio, quod uobis inferuirem. Et cum apud uos essem & egerem, non onerosus fui cuiquam. Nam quod mihi deerat, suppleuerunt fratres qui uenerant à Macedonia. Et ad Thessaloniceis, Non inordinatè gessimus nos inter uos, inquit, neque gratis panem accepimus à quoquam, sed cum labore & sudore nocte dieque facientes opus, ad hoc ne cui uestrum essemus oneri. Non quod id nobis non liceat, sed ut nosmet-

1. Theff. 5.

iplos formam exhiberemus uobis ad imitandum nos. Ac idem ad eosdem Theſſa Ioniceñ. Rogo uos, inquit, ut agnoscatís eos qui laborant inter uos, & qui praeſunt uobis in Domino, & admonent uos, ut habeatis illos in ſummo pretio, per charitatem: propter opus illorum pacem habere cum eis. Cedat ergo ex facultatibus eccleſiae paſtoribus quantum ſatis eſt, & quantum honeſta requirit neceſſitas. Hæc autem hætenus de portione paſtoribus debita.

ſtudioſi alatur
ſtipendio eccle
ſiae.

Clericis olim cedebat ſecunda pars opum eccleſiaſticarum. Sunt autem cleri- ci paſtorum ſeges, ſtudioſi rheologia, & miniſterio ſacro dediti. Quoniam enim & hi ſeſe & omnia ſua in uniuerſum eccleſiae & miniſterio eius conſecrauerunt, æquiſſimum eſt ut eccleſiae ſumptibus alantur. Alantur autem frugaliter, qui alijs debent præferre frugalitatis exemplum. In delicijs educati, miniſterijs eccleſiae minimè congruunt. Ideò enim & Amos querebatur uinum propinari nazareis, quòd intelligeret ebrios eccleſiam non ſeruare, ſed perdere funditus. De qua re aliàs dictum eſt. Præterea æquum eſt, ut præbyteris, ſcholarum rectoribus, profeſſoribus, & omnibus, ſinguliſq; perſonis eccleſiaſticis ſua perſoluatur por- tio iuſta.

Pauperibus
proſpiciatur
ex bonis eccle
ſiae.

Porro pauperibus in eccleſia deſtinata eſt tertia bonorum eccleſiaſticorū por- tio. Sunt autem uaria pauperum genera. Sunt uiduæ, pupilli, orphani, infantesq; expoſiti. Sunt ſenio & morbis attriti atq; conſecti. Morborum autem genera infi- nita ſunt. Grauiora numerantur lepra, furor & mania, poſcæ Gallicæ, uel ſcabies Indica uel Neapolitana, paralyſis, podagra, & multa alia. Sunt & peregrini non tantum indigenæ pauperes: ſunt exules ſuis eiecti ſedibus propter iuſtitiam & uer- bum Dei. Sunt alijs qui nondum ad imam peruenerunt inopiam, ſed in proclui ta- men ſtant, ita ut ſi non pecunijs numeratis iuuentur, mox toti ueniant publicis eccleſiae bonis alendi. Sunt rursus quos captiuitates, bella, aquarum inundatio- nes, incendia, atq; alia calamitates, grandinis, pruinæ, ac intemperies cœli attriue- re. Quorum omnium ſalutem & incolumitatem commendauit nobis Dominus Deus noſter, qui apertè teſtatur ſibi ipſi impenſum eſſe quod impenderimus pau- peribus. Proinde ſi contempſerimus aut neglexerimus pauperes, ipſum Deum no- ſtrum proculdubio in ipſis ſpreuimus & negleximus pauperibus. Iuuare autem oportet pauperes beneuolentia ſpontanea, conſilio, conſolatione, medicina, cura, pecunia, cibo, potu, ueſtimentis, hoſpicio, patrociniò, & quocunq; poſſumus mo- do, ac in omnibus ijs rebus in quibus illi noſtro auxilio indigent. Si hiſ non plenè ſufficere poſſunt opes eccleſiaſticae, ſarciat horum inopiam omnium fidelium co- pia. Si autem opes alioqui ſufficientes olim piorum liberalitate collatae in prom- ptu ſunt, quæ tamen procerum negligentia uel iniquitate, pauperum neceſſitati ſubducuntur, inde proſectò ſæuiſſimæ infelicitatum tempeſtates effunduntur & in reſpub. & in regna. Etenim puniuntur grauiffimè qui priuatim de ſuo, cum poſſunt, nihil conferunt pauperibus: quanto ergo atrocioribus ſupplicijs afficien- dos exiſtimamus, qui dudum ab alijs ad publicos pauperum uſus collatas opes, ad priuatos uſus impiè & ſacrilegè rapiunt? Qui habet huius mundi ſubſtantiam, & uidet fratrem ſuum egentem, clauſeritq; uiſcera ſua ab eo, crudelis eſt: ergo qui munus pauperi datum ipſe ſibi rapit, crudelior adeoq; ſacrilegus eſt. Sodomitæ cum ſocijs urbibus ſubuerſi leguntur, quòd manum pauperum non confortau- runt, ſed diſſoluerunt potius. Moabitæ & Chananæi excinduntur, quòd aſperna- ti fuiſſent peregrinos, & nullam prorsus habuiſſent pauperum rationem. Sed cur tam longe petita adducimus exempla? cur non reuocamus in animos ultimã illam ſupremi iudicis è tribunali cœleſti, in ipſis firmato nubibus, ſententiam, ad hunc

Fraudare pau-
peres ſua por-
tione.

Ezech. 16.

Iſaia 16.

1. Ioan. 3.

Ezech. 16.

Eſaia 16.

hunc modum pronunciatam, Venite benedicti patris mei, possidete regnum pa-
 ratum uobis ab exordio mundi. Esuriui enim, & dedistis mihi edere. Sitiui, & de-
 distis mihi bibere. Hospes eram, & collegistis me. Nudus, & operuistis me. Infirmus,
 & uisitastis me: in carcere eram, & uenistis ad me. Subdit autem Euāgelista,
 quæ mirè nostro congruunt instituto, Tunc respondebunt ei iusti, dicentes, Domine,
 quando te uidimus esurientem, & pauimus: & sitientem, & dedimus tibi
 potum? Quando autem uidimus te hospitem, & collegimus te: aut nudum, &
 cooperuimus te? Aut quando uidimus te infirmum, aut in carcere, & uenimus
 ad te? Et respondens rex, dicet illis, Amen dico uobis, quatenus fecistis uni ex his
 fratribus meis minimis, mihi fecistis. Tunc dicet & his qui à sinistris erunt, Disce-
 dite à me maledicti in ignem æternum, qui paratus est diabolo & angelis eius.
 Esuriui enim & non dedistis mihi cibum. Sitiui, & non dedistis mihi potum. Ho-
 spes eram, & non collegistis me. Nudus, & non operuistis me. Infirmus, & in car-
 cere eram, & non uisitastis me. Tunc respondebunt ei & ipsi dicentes, Domine,
 quando te uidimus esurientem, aut sitientem, aut hospitem, aut nudum, aut infir-
 mum, aut in carcere, & non ministrauimus tibi? Tunc respondebit illis, dicens,
 Amen dico uobis, quatenus non fecistis uni de minimis his, nec mihi fecistis. Se-
 quitur ergo. Et ibunt hi in supplicium æternum, iusti uerò in uitam æternam. Ali-
 bi enim in Euangelio Dominus pauperes sui loco, qui ascēsurus erat in cœlos, no-
 bis substituens, Semper, inquit, pauperes habetis uobiscū: & quodocunq; uolue-
 ritis, potestis illis benefacere: me uerò non semper habetis. Proinde legimus pri-
 mitiuam ecclesiam in pauperibus curandis ad miraculū usq; fuisse sollicitam. Pau-
 lus ecclesiæ Dei ubiq; commendat pauperes: pauperibus collegit in omnibus ferè
 ecclesijs, & collectam benedictionem mira procurauit maturitate, fide & diligen-
 tia. Id quod uidere licet in omnibus ferè eius Epistolis, præcipue uerò in 15. ad
 Rom. in 1. ad Corinth. 16. in 2. ad Corinth. 8. & 9. cap. Ad Galatas, Dum tempus
 habemus operemur bonum, inquit, cum erga omnes, tum uerò maxime erga do-
 mesticos fidei. In Epistola priore ad Timoth. monet etiam rationem habendā esse
 eorum quibus subueniatur, & quibus non subueniatur. In eadem Epistola præce-
 ptum dat Timotheo, & omnibus episcopis, quid agant cum ditioribus in ecclesia,
 dicens, His qui diuites sunt in hoc seculo præcipe, ne elato sint animo, neq; spem
 ponant in diuitijs incertis, sed in Deo uiuente, qui præbet nobis omnia affatim ad
 fruendum, ut bene faciant, ut diuites sint operibus bonis, ut faciles sint ad imper-
 tiendum, libenter communicantes, recedentes sibiipsis fundamentum bonum in
 posterum, ut apprehendant uitam æternam. Idem ad Hebr. Beneficentiæ, inquit,
 & communionis ne obliuiscamini. Talibus enim uictimis placetur Deo. Paratæ
 sunt ergo opes mox inde ab Apostolorum temporibus pro necessitate pauperum
 subleuanda. Dati sunt ab ecclesia diaconi curatores seu œconomi. Inter quos illu-
 striores fuere primi illi diaconi, quorum meminerunt Acta Apostolorum, & præ-
 clarus Christi martyr Laurentius. Ac ueterum scripta testantur, ex bonis illis eccle-
 siasticis liberatos fuisse per frequenter captiuos, nobiles pauperes uirgines dota-
 tas, deniq; extructa esse Xenodochia, Ptochotrophia, Nosocomia, Gerontoco-
 mia, Brephotrophia, & Orphanotrophia, nimirum pro excipiendis pauperibus
 peregrinis, pro alendis pauperibus indigenis, pro ægrotantium & languentium
 cura, pro senum necessitate, proq; infantium pupillorum & orphanorum educa-
 tione honesta. De his extant adhuc imperatoriæ leges.

In reformandis ergo ecclesijs aduigilandum est diligentissime, ne quid hic pec-
 cetur negligentia aut malitia, ne fraudentur pauperes, neue abusum unum tollen-

tes, plures inducamus. Si suppetunt opes, conseruentur: si non suppetunt, colligantur ex ditioribus. Deinde inspiciatur pauperum conditio, & cuius rei quisque maximè sit indigus, aut quomodo cuiq; commodissimè prospici possit. Ea re deprehensa, maturè, benignè & diligenter fiat quod fieri conuenit ac necesse est. Si quid de opibus superfuerit publicis, seruetur futuris calamitatibus. Nihil prodigatur inutiliter & impiè. Rursus non coaceruetur fraude & inopia pauperum thesaurus infelix. Vtrobique enim ex æquo peccatur. Vtrobique enim fraudantur suis opibus pauperes. De beneficentia diximus alibi in hisce nostris Decadibus: de curandis item pauperibus, in alijs nostris lucubrationibus. Optimè uerò de subuentione pauperum scripsit Lodouicus Viues.

Aedificia sacra.

De Templis Christianorū.

Quarta & ultima portio bonorum ecclesiae debetur aedificijs sacris, ut templis, scholis, & domibus ad templum scholasq; pertinentibus. Tempora quæ & ecclesiae à cœtu appellantur, sunt domus Domini Dei nostri. Non quòd in domibus huiusmodi Deus, quem cœli cœlorum non capiunt, habitet, sed quòd ecclesia uel populus Dei coit in huiusmodi domibus ad cultum Deo præstandū, ad audiendū uerbum Dei, ad percipienda sacramenta Domini, & ad precandum faciem Dei. Tempora ergo ecclesiae Dei omnino necessaria sunt. De cœtibus sacris dixi in disputatione de Oratione. Quamuis uerò iubente Deo Moles portatile templum, deinde uerò sapientissimus Solomon fixum templum, non sine sumptu magno, parauerint, non ideo tamen existimandum est maximos sumptus probari Deo post exhibitū Christum adimpletasq; figuras. Nam ut ante legem latā Patriarchæ nullas leguntur Domino extruxisse basilicas, ita post abrogatam legē in ecclesia Christi placet Deo frugalis mundicia. Displicet autem infania illa aedificandi non admodum dispar furori Babylonico, conanti summum turris fastigium ipsis imponere nubibus. Non placet Deo luxus templorum, qui sine luxu ex toto terrarum orbe collegit ecclesiam, quam & frugalitatem & omnis luxus contemptum docuit. Satis amplum & magnificum fuerit templum, si sufficiat recipiendis omnibus ad ecclesiam istam pertinentibus. Hominibus enim non Deo paratur locus. Sit autem locus ille mundus & sanctus. Sanctificatur consecraturue templum, non (ut superstitiosè à quibusdam creditur) ullis uerborum recitationibus, aut impressis characteribus, non oleo, & ignibus piacularibus, sed Dei uoluntate & præcepto, iubentis conuenire, & promittentis suam præsentiam, consecratur item usu sacro. Congregatur enim in templo sancta Dei ecclesia: annuntiatur in templo ipsum Dei uerbū sanctissimum: percipiuntur in templo sacrosancta Dei sacramenta: funduntur item ad Deum preces Deo gratissimæ. Locus quidem per se sanctus non est: sed quoniam hæc sancta in loco fiunt, quatenus fiunt & ipse locus appellatur sanctus. Merito ergo abest à Dei templo sancto omnis prophanatio & res turpis atq; fœda. Curia senatoria ab omnibus habetur sacra, adeò ut maiestatis reus ageretur quisquis illam dicto uel facto indecoro uiolaret. At in hac colliguntur duntaxat senatores, audituri causas litigantium de rebus fluxis & perituris. Quanto uerò maior debetur reuerentia templis, in quibus ad cultum Dei filij Dei conueniunt, ipsa Dei uerba audituri, & sacramenta eius percepturi? Vt ergo in templis superstitionem odimus, ita prophanationem ipsorum non amamus, imò minimè ferimus. Neq; uacat modò omnes circa templorum considerationem superstitiones manifestas recitare & excutere. Id quod feci aliàs.

Ad quam mundi plagam adorandum.

Disputatum uideo apud ueteres ad quam orbis plagā adorantes oporteat conuerti. De uetustissima orbis Apostolica ecclesia Antiochiæ, Socrates historiarum lib. 5, cap. 22. Antiochiæ, inquit, Syriæ inuersum habet ecclesia sitū. Altare siquidē non

non ad orientem, sed ad occidentem spectat. Fortassis imitati sunt ueteris populi in extructione ac situ tabernaculi & templi morem. Ad occidentem enim conuersi adorarunt, haud dubie propter Christum in fine & occasu seculorum uenturum. Alioqui uulgo receptum est adorare uersis ad orientem uultibus. Sed in his, si absit superstitio, altercatio, licentia & offensio, ualet libertas.

Porro diuis non debent ulla extrui templa. Soli enim Deo, cui debetur cultus, ponendum est templum. Id quod exemplis ueterum docemur, & consensu totius scripturæ. Ethnici idololatæ creaturis posuerunt templa, atroci præuaricatione peccantes contra Deum uerum & æternum. S. Augustinus libro de Ciuit. Dei, sine uerborum inuolucro dixit, Martyribus nostris templa non ponimus, uel extruimus. Idem lib. i. contra Maximinum Arianorum Episcopum, Nõne si templum, inquit, alicui sancto angelo excellentissimo, de lignis & lapidibus faceremus, anathematizaremur à ueritate Christi & ecclesia Dei? Quoniã creaturæ exhiberemus eam seruitutem, quæ uni tantum debetur Deo. Si ergo sacrilegi essemus faciendo templum cuicunq; creaturæ, quomodo non est Deus uerus cui non templum facimus, sed nos ipsi templum sumus? Hæc ille. Proinde mendaces sunt qui audent asserere uiuentibus Apostolis posita à religiosis hominibus templa. De qua re diximus olim, ut & contra templorum luxum & sumptus inutiles, primo libro de Origine erroris, capite uigesimo primo.

*Templa Diuis
nõ extruenda.*

Instrumenta templi sacra sint, & ipsa munda, & ab omni luxu aliena, à superstitione uerò alienissima. Instrumenta sunt cathedra sacra, è qua doceat minister: sedilia commoda auditoribus ecclesiasticis: baptisteriũ baptizandis fidelibus paratum, & Mensa Dominica, denique quæ ad hæc ipsa uelut necessaria uidentur, aqua, panis, uinum, libri, lucernæ, calathi uel catini & pocula. Fuerunt sanè hæc aliquando aurea: sed conflauerunt optimi & sanctissimi quicq; Episcopi hæc non raro, ac liberarunt captiuos, cibaueruntq; fame tabescentes. Plurima horum collegi exempla, lib. de Instit. episcoporum capite 9. Et Lucernas quidem, quarum iam iam meminimus, adhibuisse ueteres in templis ad discussionē nocturnæ caliginis certum est, uel ex Actorum cap. 20. Stultum est autem & minimè religiosum, lumina ad cultum Dei adhibere. Clamat Lactantius, Num mentis suæ compos putandus est, qui authori aut datori luminis candelarum aut cereorum lumen offert pro munere? Aliud uerò ille exigit à nobis lumen, & quidem non fumidum, sed liquidum atq; clarum, mentis scilicet. At contra tam liquidam ueritatem uideas hodie bonam cultus Dei partem in oblatione luminum collocari. Inter instrumenta ecclesiastica recensentur & Campanæ, quæ hodie id nobis sunt quod olim erant populo Dei Tubæ. Seruiunt enim cœtui conuocando, & referuntur ad signa. Circa illas mira exercetur superstitio. Baptizantur ab Episcopis: creduntur uim habere dispellendæ tempestatis atræ. Olim pulsu prouocabantur homines ad preces ingruente tempestate sæua, nunc ipse campanarum sonus ex consecratione uidetur peculiarem habere uirtutem. Quis non obstupescat ad extremam hanc cæcitatem? Vsurpant præterea campanas ad plangendum mortuos. Quæ quidem omnia superstitiosa & modis omnibus contemnenda sunt.

Cùm autem in illis quæ commemorauimus uerus sit usus bonorum ecclesiasticorum, consequens est in contrarijs uersari abusum: siue peccetur in una specie, siue in pluribus. Iustitia in his, ut in omnibus, colenda est. Non eripiendum uni & dandum est alteri: sed suum cuique dandum est. Ergo non eripiendum ali- quid pauperibus & dandum est ecclesiæ ministris: neque his sua portio & necessitas rapienda, ut habeant unde uiuant pauperes. Scriptura concedit bonorum

Abusus bonorum ecclesiæ.

ecclesiasticorū portionem ministris ecclesiae: eadem iubet & pauperibus suum tribuere demensum. Ergo si Episcopi uel ministri ecclesiastici omnia sibi bona ecclesiastica uendicent, nec suas partes pauperibus distribuunt, sacrilegio se polluant. Si ministri non omnia sibi bona uendicent, interim plus quam decet & necessitas poscit, ac ordinatio Domini & Apostolica admittit, sibi usurpant: aut si portionem sibi debitam turpiter concoquunt, grauiter delinquent: grauius imò grauissimè peccant, si uenationibus, alea, poculis & luxu, scortis, adde & militia, bona etiam pauperum prodigunt: interim & aedificia sacra nec curant, nec ullam rationem habent eorum quæ fiunt in templo, aut quomodo fiant. Quod si portio iusta cedat pauperibus, erretur autem hic fauore uel odio ab œconomis uel dispensatoribus, ut maximè indigis & miseris cedat nihil, indignis autem supersit multum, peccatur etiam hac ratione turpi abusu. Omnium autem fœdissimus abusus is esse uidetur, qui hodie ferè uulgatissimus est. Fit sumptus ingens in saxa et truncos, hoc est, in idola omni sensu carentia, pauperibus ueris Dei imaginibus nullus fit honor. Qui quidem furor est gentilis & extrema dementia. Sed cum alij de abusu bonorum ecclesiae dixerint copiosissimè, & nos quoq; de hoc alibi quædam proposuerimus, de his iam dicendi finem faciam.

Tempus sacrum

Dicerem iam & de Tempore sacro, quæ tractatio omnino affinis est Loco sacro, de quo iam disputauimus, nisi de illo quoq; Decalogum exponentes differuissemus. Hoc duntaxat adiiciam in præsentî, non oportere propter hoc contendî o-diosius in ecclesia, sed disciplinâ cum charitate esse in hac causa & similibus constanter seruandam. Memores enim nos esse decet concertationis perniciosissimæ de Paschate celebrando, quæ multo cum periculo & detrimento multum diuq; exercuit & orientis & occidentis ecclesias, cauereq; modis omnibus ne per contentiones satanæ aperiat̃ur fenestra. Vtile fuerit mea sententia in hac causa & nō dissimilibus illius beati Augustini meminisse consilij, Quod neq; cōtra fidem, neq; contra bonos mores iniungitur, indifferenter est habendum, & pro eorum inter quos uiuitur societate seruandum est. Ad Ianuariū Epistola 118.

Disciplina & correctio ministrorum.

Ad ministerium sacrum pertinet & disciplina correctioq; ministrorum. Quam uerò hæc sit necessaria, colligi potest uel ex his Christi Domini uerbis, Vos estis sal terræ. Quod si sal infatuatus fuerit, quo salietur? Ad nihil ualet ultra, nisi ut proijciatur foras, & conculcetur ab hominibus. Scio iactare quosdam priuilegia nescio quæ, eximentia ipsos ab omni disciplina. Sed errant isti. Omnes enim ecclesiae suæ ministros subiecit Dominus disciplinæ. Qui itaque à disciplina exempti esse uolunt, non sunt ministri Christi. Aut quis obsecro eum liberum à disciplina pronunciet, quem Dominus omnino uoluit esse subiectum atq; obstrictū? Contra mandatum Domini non ualet ulla lex Pontificia, aut ullum priuilegium regium uel imperatorium. Nemo enim potest abrogare summi Dei decretum. Et Dominus quidem iubet monere & corripere quemlibet fratrem peccantem: uult ergo idem ut caecutientes & impingentes ministros ecclesiarum acrius admoneamus. Ipse certè totum sacerdotum ordinem ecclesiae Hierosolymitanæ increpauit, & creberrimè & acerbissimè. Heli sacerdos Domini pessimè audit in sacra historia, quod se uerore disciplina filios suos sacerdotes nō coërceret. Propheta Domini acerrimè leguntur accusasse & tota sacerdotum collegia & summos sacerdotes. Exempla ubiq; occurrunt in historia diuina, & in prophetarum sermonibus. Quid quod S. Paulus sanctissimū Apostolum Petrum Antiochiæ Syriæ in conspectu totius ecclesiae increpuit, quod non recto pede ad regulam Euangelij incederet? Christus deniq; ipse in reuelatione sua facta Ioanni Apostolo, angelos, id est ministros

Galat. 2.

ministros ecclesiarum, grauissimè & admonet & increpat. Rursus uerò Aposto-^{1. Timoth. 5.} lus Paulus, Aduersus presbyterum, inquit, accusationem ne admiseris, nisi sub duobus aut tribus testibus. Eos uerò qui peccant, coram omnibus argue, ut ceteri timorem habeant. Ergo nō pauca extant in scripturis clarissima exempla sanctis-
simorum principum, qui primarios etiam ministros ecclesiarum legibus coercue-
runt, & non bene suo munere fungentes è gradu & cathedris deturbarunt. Sed &
ipsa deposcit necessitas, & salus populi Dei, ut deprauati ecclesiarum ministri de-
ponantur. Et satius quidem est conturbare aliquot ministros prauos, quàm in di-
scrimen animæ & corporis tot ecclesias conijcere. Perduntur enim funditus eccle-
siæ incuria & impietate deprauatorum pastorum. Deponantur itaq; maturè.

Cæterum quò facilius & rectius in officio retinerentur ecclesiarum ministri,^{De Synodis.} celebrarunt quondam ueteres semel & iterum in anno Synodos sacerdotales, & has ueluti medicinam adhibuerunt ministrorum morbis. Et ne quid hic longè pe-
titum afferam, recitabo C. V. quæ leguntur in Constitut. imperatoria Iustin. Cæs,
sic mandantis, Veteres definierunt ut bis per singulos annos sacerdotum seu Epi-
scoporum in quacunq; prouincia celebrentur Synodi, & quæ suppullularent, ibi
examinarentur, & cōpetenti correctione sanarentur. Id cum hucusq; non sit obser-
uatum, necessarium uidetur id denuo ad rectam uiam reducere. Nos ergo cum
inuenerimus multos ob hanc negligentiam uarijs implicitos esse erroribus atque
peccatis, iubemus ut omnibus in quacunque prouincia per singulos annos, uel in
mense Iulio, uel Septembri una Synodus celebretur, coeantq; in unum uel apud
Patriarchas uel Episcopos presbyteri, & agitentur causæ fidei, quæstionum item
canonicarum, & de administratione rerum ecclesiasticarum, uel de reprehensibili
uita, aut alijs quæ correctionem desiderant. His enim ita obseruatis laici quoque
magnum circa rectam fidem & honestam uitam profectum atque in melius emen-
dationem promerebuntur. His protinus subiungit & hæc, Iubemus autem & pro-
uinciarum præsides, si ita negligenter curari uiderint, Episcopos urgeant ad cele-
brandas Synodos. Quòd si eos moram necere & segnius eas senserint peragere,
nos ea de re certiores reddant, ut contra cunctatores conueniens à nobis proce-
dat correctio. Hactenus Cæs. decretum recensui. Videant ergo Episcopi, ne quid
hic eorum negligentia peccetur: & his quidem negligentibus, uideat magistratus
ne ad socordiam horum conuiueat in perniciem totius ecclesiæ & omnium mini-
strorum Christi. Sicubi uerò exoleuit salubre celebrandi Synodos institutum, re-
uocetur, & iusta cum grauitate reparetur ad ministerij conseruationem incolumi-
tatemq; ecclesiarum. Subrepunt in horas uaria & multa uitia, quòd carnis inge-
nium admodum sit deprauatum: nisi ergo in ecclesia ualeat admonitio, & in quo-
tidiano usu sit correctio, citius quàm ipsi putemus collabuntur & intereunt ea
quoq; quæ firmissima credebantur.

Sicut autem Dominus priuatim uoluit admoneri & corripi præuaricantes ec-^{Admonitio & correctio ecclesiastica.} clesiæ ministros, ita eiusdem admonitionis & correctionis bonū extendit ad uni-
uersam ecclesiam. Ergo habuit uetus ecclesia sanctum presbyterorum senatū, qui
delinquentes in ecclesia diligenter admonebat, corripiebat grauiter, adde & con-
sortio excluderat ecclesiastico, si uidelicet nihil emendationis expectari posse ui-
deretur. Posterioribus uerò seculis Pontifices & Episcopi hoc uindictæ genus ad
se rapientes per tyrānidem, & sacrilegè contra primā institutionē exercentes, con-
uerterunt salutarem medicinā in letale uenenū, reddideruntq; tam probis quàm
improbis abominabilem. S. Paulus docens non paucorū libidini hanc permissam
esse diuinitus uindictam, Decreui, ait, ut is qui hoc scelus patrauit, in nomine Do-^{1. Corinth. 5.} mini nostri Iesu Christi congregatis uobis & meo spiritu, unā cum potestate Do-

2. Theff. 3.

2. Corinth. 12.

Matth. 13.

3. Corinth. 2.

De matrimo-
nio Christia-
no.

Hebr. 13.

1. Tim. 4.

1. Tim. 5.
Titum 1.

mini nostri Iesu Christi, tradatur satanae ad interitum carnis, quò spiritus saluus sit in die Domini Iesu. En ecclesiae seniorumque in ecclesia est ista potestas uel uindicta. Modus autem est, interitus carnis. Finis uerò, salus spiritus, siue conseruatio fidelis hominis. Nam & ad Theffal. idem Apostolus, Si quis, inquit, non obedit sermoni nostro, hunc per Epistolam indicat, & ne commercium habeatis cum illo, ut pudore suffundatur: neque uelut inimicum habeatis, sed admonete ut fratrem. Idem Apostolus alibi quoque satis disertè indicans, qui nam ecclesiastico ferendi sint gladio, non peccatores quidem infirmi, aut uiri boni, à solis episcopis & coniu-ratis ipsorum haeretici iudicati, aut pauperes propter pecuniam nondum numeratam officiali aut uicario in spiritualibus, sed scelerati & nepharii, manifesteque flagitiosi homines. Si quis cum frater appelletur, inquit, fuerit scortator, aut avarus, aut idololatra, aut conuitiator, aut ebriosus, aut rapax, cum eiusmodi ne cibum quidem capiat, S. Augustinus in uindicta exercenda admittit moderationem, tum maximè cum ex uindicta non aedificatio, sed destructio ecclesiae metuitur. Qui metus fortè inanis, aut nimius uideri potuisset, si non idem Apostolus, qui incestuosum moechum satanae tradi iusserat, in posteriori dixisset Epistola ad Corinthios, Timeo autem ne fortè cum uenero, non quales uolo, inueniam uos, & luceam multos ex his qui ante peccauerunt, & non egerunt poenitentiam super immunditia & scortatione & impudicitia quam gesserunt, &c. Minatur his quidem grauiter, se eis non parsurum: sed quoniam uidebat ad dissipationem ecclesiae non collectionem spectare, si omnes, moechi instar, satanae tradidisset, moderationem adhibuit, iuxta praeceptum Domini, Sinite crescere utraq; ne dum euellitis zizania, simul eradicetis & triticum. Opus est ergo sancto iudicio, ne hic nimia peccetur uel indulgentia uel seueritate. Preterea ualeat in resipiscentibus matura reconciliatio. S. Paulus, Sufficit, inquit, homini istiusmodi increpatio haec. S. Petrus qui turpiter abnegarat Dominum, audit sibi in ipsa resurrectionis die à mulieribus per angelos nunciari Euangelium.

Porro esse in ecclesia etiam magistratum, & ius gladii ferientis maleficos, & magistratum iudicantem ferientemque gladio, nihilominus numerari inter uera ecclesiae membra, imò magistratum officio suo ecclesiae omnino utilem esse, docui Ser-mone 7. & 8. Decadis 2.

Singularia uerò Dei instituta in ecclesia sunt ea quae sequuntur. Et coniugium quidem inter ecclesiae instituta non postremas obtinet partes: quod si rectè colatur, fructus egregios & innumeros in ecclesia profert: si non rectè colatur, scandala & mala pestifera & infinita ex se profundit in ecclesiam. Rectè enim iudicant qui aiunt ex plurimis bene institutis domibus, optimè & sanctissimè institutam colligi ecclesiam: rursus ex multis impijs domibus, impiam constitui ecclesiam. Deus ergo uerbo suo diligenter instituit coniuges, & coniugium ornat pulcherrimè. Non est autè praesentis instituti matrimonij encomiū canere, sufficit nosse ipsum Deum matrimonij esse authorē: instituisse autè hoc in ipsa paradiso, & in hunc finē, ut bene uel cōmodè apud sodalem homo uiuat: denique illum ipsum primos copulasse coniuges, & copulatis benedixisse. Vixisse autè in hoc uiuendi genere sanctissimos quosque Dei amicos patriarchas, principes, prophetas, reges pontifices, sapientes & sacerdotes. Vnde fortassis Paulus dixisse legitur, Honorabile est coniugiū apud omnes, & cubile impollutum. Idem alibi doctrinam prohibentē contrahere matrimonium appellat damoniorū doctrinā. Cōstat enim ipsos quoque Christi discipulos & Apostolos fuisse cōiugatos, neque dimisisse (quod tamen quidam impudenter cōfingunt) cōiuges, cum obirent munus praedicandi. Clarissimū enim illud est quod Apostolus ab Episcopo uel presbytero requirit, ut sit unius uxoris

uxoris maritus: & quòd alibi potestatem uxorem Christianam circumducendi in munere apostolico, disertè asserit, & sibi quoq; ac Barnabæ uendicat. Quid quod in Concilio Niceno pronunciatum est, concubitum cum uxore propria esse castitatem? Nam Paulus prior dixerat, Ad fornicationem uitandam habeat quisq; uxorem propriam. Et, Coniugij cubile est immaculatum: item, Virgo si nupserit non peccauit. Talem ergo omnino esse iudicamus Papisticam doctrinam, prohibentem coniugia ministris, qualem esse pronunciauit Paulus, damoniacam. Coguntur hoc nobiscum fateri uel ipsi Papistæ, qui nondum omnem absterferunt pudorem. Dum enim ex fructibus iudicamus arborem, quos obsecro coelibatus illius fructus recensere possumus, quam spurcitiam, obscœnitatem, fornicationes, stupra, adulteria, incestus & nepharios concubitus? Quis uiuit hodie impurius & impudentius, quàm ordo ille sacerdotum & monachorum? Vt enim non curant Dei uerbo & legibus obsequi, deumq; sancta uita casto in coniugio glorificare: ita tradidit eos Deus per cupiditates cordium suorū in immunditiam, ut ignominia afficiant corpora sua.

Principiò autem docet scriptura sancta diligenter omnes inuigilare homines, ut sanctè, sobriè, prudenter & legitime in timore domini contrahant matrimonium, ne affectus deprauatus, auaritiæ, ambitionis, aut libidinis prædominetur & exagitet, ne contra leges uel scriptas uel charitatis coëat connubium. Locum hic habent gradus consanguinitatis & affinitatis, honestas publica, reuerentia sanguinis, scandalum, & ne quis uxorem prophanae & contrariae religionis ducat. Veramur enim iugum ducere cum incredulis. Deinde docemur contractum legitime, piè, & sanctè auspicari cum precibus & perceptione benedictionis Dei in templo domini, & in conspectu & inter preces totius Ecclesiæ, cauereq; ne hic cum impuro mundo omni prophanatione polluamur. Neque enim ignoramus quid hic soleant homines huius seculi, diabolo uidelicet, non Deo celebrare nuptias, in luxu, superbia, crapula, ebrietate, & omni lasciuiâ. Præterea docemur coniugibus cohabitare cum scientia, moderatione, patientia, fide & dilectione: sanctè item & honestè educare sobolem, eandemq; suo tempore etiam sancto consecrare coniugio.

Quòd si propter adulteria, aut adulterio grauiora scelera, ipsa ineuitabilis necessitas dissuere coniugia cogat, ecclesia tamen hic nihil agit temerè. Habet suos iudices, qui in causis & litibus matrimonialibus iuxta æquum & bonum, imò iuxta leges diuinas & secundum honestatis regulam iudicant. Noluît Apostolus fideles litigare in foro infidelium, ergo sequestres constituerent hortabatur, qui litigantes amicè componerent. At in causis matrimoniorum longè grauiora sunt quæ uetant litigantes ad incredulos concedere iudices. Rectè ergo Ecclesia Dei forum habet matrimoniale. Quoniam uerò de coniugio differui Decadis 2. Ser-mone 10. & peculiarem de eodem librum quondam edidî, perstrinxi saltem hæc hæc hactenus de connubio Christiano.

Viduas habet ecclesia Dei, sed tales quales Christi Apostolus describit, dicens, Quæ uerè uidua est ac desolata, sperat in Deo, & perseverat in obsecrationibus ac precationibus, noctu dieq;. Porro quæ in delitijs uersatur, ea uiuens mortua est. Idem iubet iuniores nubere, liberos gignere, & domum administrare, nec ullam occasionem dare aduersario maledicendi. Notus est locus Pauli 1. Timoth. 5. Habet item uirgines Ecclesia. Hæ curant ea duntaxat quæ domini sunt, & uerè sunt uirgines sine fucò & hypocrisi. Paulus, Virgo, inquit, curat ea quæ sunt Domini, ut sit sancta cum corpore tum spiritu. Multæ quidem corpore sibi temperant, non animo: Deus utrumque requirit, & animum

maximè. Possumus quidem hominibus facere fucum: Deus autem non fallitur. S. Paulus in 1. ad Corinth. 7. cap. encomium Virginitatis canit, & per comparationem uirginis cum nupta ostendit, quantum sit uirginitatis bonum. Cæterum possumus, si uelint, uirgines nubere. Id quod clarè docet eodem illo loco Apostolus. Diuino testimonio congruit etiam humanum. Cyprianus enim cum socijs episcopis & presbyteris respondens Pomponio, dicit, Desideras ut tibi rescriberemus quid nobis de ijs uirginibus uideatur, quæ cum semel statum suum continenter & firmiter tenere decreuerint, detectæ sint postea in eodem lecto pariter mansisse cum masculis? Circa quam rem quoniam consilium nostrum desiderasti, scias nos ab euangelicis & apostolicis traditionibus non recedere, quo minus fratribus & sororibus nostris constanter & fortiter consulatur, & per omnes utilitatis & salutis uias ecclesiastica disciplina seruetur. Et mox, Quod si se ex fide Christo dicauerunt, pudicè & castè sine ulla fabula perseuerent, ita fortes & stabiles præmium uirginitatis expectent. Si autem perseuerare nolunt, uel non possunt, melius est ut nubant, quàm in ignem delitijs suis cadant. Et reliqua. S. August. disputans de uerbis Apostoli, Damnationem habentes quod primam fidem irritam fecerunt, damnationem non in consequens reijcit coniugium, sed in præcedentem inconstantiam. Damnantur, inquit, tales, non quia conjugalem fidem posterius inierunt, sed quia continentia primam fidem irritam fecerunt. Et his paulò post addit, Proinde qui dicunt, talium nuptias non esse nuptias, sed potius adulteria, non mihi uidentur satis acutè & diligenter considerare quid dicant, Hæc ille. Ego per *νεῖμα*, id est, condemnationem uel iudicium, intelligo in apostolo reprehensionem, quam Heluetij uocamus *ein außrichten oder nachred*. Nam apud multos male audiunt, quod primam fidem, id est, continentia pactum disfuerunt. Satiùs ergo putat Apostolus, iuuenulas se applicare coniugio, quàm ei instituto uitæ, à quo postmodum resilire per necessitatem non sine reprehensione hominum compelluntur. Loquitur autem eo loci non de Virginibus, sed de Viduis. Cyprianus simpliciter de Virginibus.

1. Tim. 5.

De bono uiduitatis cap. 9.

De monasterijs & monachis.

Monachos & monachas nesciuit primitiua Christi & Apostolorum Ecclesia: posteriora secula monachos habuerunt, sed non tales quales hodie cernuntur, qui sibi ipsis regula sunt & lex, quorum monasteria omni obscenitate & impuritate scatent. Id quod omnibus nobis tacentibus, ipsa res adeoq; experientia loquitur. Et quæ uidentur coërceri paulo seueriore disciplina, hypocrisis sunt conspurcata, ut ne quid addam aliud. Et primi quidem monachi non inhabitauerunt urbes, non inseruerunt semetipsos secularibus negotijs. Monuimus aliàs, quendam ex mediæ ætatis scriptoribus postulasse ut clericatu se abdicet qui factus sit abbas, eò quod monachus simul esse & clericus ritè nemo queat, cum alterum alteri sit impedimento. Ergo non uixerunt ex publicis Ecclesiæ uectigalibus, sed propriarum manuum laboribus sicut laici. S. Hieronymus disputans de origine monachorum in uita Pauli, sic reliquit scriptum, Inter multos sæpe dubitatum est à quo potissimum monachorum eremus habitari cœpta sit. Quidam enim altius repetentes à beato Helia & Ioanne sumpsere principium: quorum & Helias plus nobis uidetur fuisse, quàm monachus: & Ioannes ante prophetare cœpisse quàm natus est. Alij autem (in quam opinionem uulgus omne consentit) asserunt Antonium huius propositi fuisse caput: quod ex parte uerum est. Non enim tam ipse ante omnes fuit, quàm ab eo omnium incitata sunt studia. Amathas uero & Macarius discipuli Antonij, quorum superior magistri corpus sepeliuit, etiam nunc affirmant Paulum quendam Thebeum principem istius rei fuisse: quod non tam nomine quàm opinione nos quoq; cōprobamus. Idem mox addit Paulum

lum sub Decio & Valeriano persecutoribus, metu tormentorum adactum, reli-
cta urbe, commigraffe in desertum, in quo specum repperit atq; in eo latitauerit,
donec ab ipso repertus sit Antonio. Tenuerunt imperium Decius & Valerius
circa annum domini 260. mortuus autem dicitur beatus Antonius anno ætatis
sue centesimo quinto, anno autem domini 360. Beatus Augustinus qui epistola
80. ad Hesychium se uixisse testatur anno domini 420. ab Eutropio autem ac Be-
da mortuus refertur anno domini 430. de Moribus ecclesiæ catholicæ cap. 31. mo-
nachorum sui seculi mores & instituta referens, ea commemorat, quæ alienissima
sunt ab institutis nostrorum monachorum. Tempore imperatoris Iustiniani, qui
aliquot leges de monasterijs & monachis tulit, uixit quidam Benedictus, quem
multi monachorum patrem nuncupant, cuius uitam modò ex Tritthenheimio
(qui ante annos propè 50. excessit) c. v. recitabo, ut ex ea intelligat quantas uires
& dignitates imbelles & contempti illi ab initio, successu temporis acceperint. Be-
nedictus abbas Cassinensis, inquit, primus fundator institutorq; & princeps mo-
nachorum occidentalium, scripsit luculento sermone & præcipua discretione re-
gulam monachorum libro uno, cuius initium est, Ausculta o fili præcepta. Et ca-
pita habet 73. Mortuus est anno 543. Sed Marianus Scotus mortuum autumat
anno 601. ultimo anno Mauritiij imperatoris. Idem ille commemorat sub Benedi-
cti regula militare ordines uiginti. Ex Benedictinis Romanam sedem habuisse
Pontifices xviii. Cardinales plus quam cc. Archiepiscopos in diuersis Ecclesijs
m d c. Episcopos quatuor ferme millia. Abbates insignes, qui uita doctrina & scri-
ptis claruerunt quindecim millia septingentos. Canonizatos autem quindecim mil-
lia sexcentos. Vt autem multos alios monachorum ordines non recenseam, con-
stat mendicantes monachos, fideles, sedulos & fortes Papæ & monarchiæ spiri-
tualis, ut uocant, Romanæ satellites, ab Honorio fuisse confirmatos, circa annum
domini m. c. c. xxii. His autem omnibus nihil aliud effectum uolo, quam ut in-
telligant omnes monachismum humana inuentione conditum, non ab apostolis
Christi ecclesiæ traditum; & ab initio quidem utcunq; uisum tolerabilem, postre-
mò redditum esse omnino intolerabilem.

Quantum enim incommodet reipub. experientia loquitur. Cum religio-
ne uera illum ex integro pugnare qui nescit, omnia nescit. Fingunt illum esse
meritorium coram Deo & perfectionis statum. At quis non uideat quam hoc
pugnet cum merito Christi, & cum doctrina euangelij syncera? Quæ uerò pie-
tas aut necessitas suadet post nomina nostra uni Deo in baptismo data, eadem
etiam dare diuis, & his uouere, eorumq; regulis nos per iuramenti religionem
interpositam obstringere? Vetat uera religio nomina dare diuis, his nos qua-
licunque modo initiare. Vetat uera religio alios nobis patres & magistros de-
ligere. Vetat uera religio novos nobis cultus, nouasq; religiones confingere,
aut ab alijs confictas recipere. Territat Ieroboami & sociorum eius exemplum.
Vetat uera religio iurare per nomina aliorum Deorum. Religio uni Deo nos
per fidem & obedientiam religat. Superstitio dissoluto hoc uinculo, creaturas
admittit. S. Paulus ad Corinthios, Vnusquisque uestrum dicit (ait) ego quidem
sum Pauli, ego uero Apollo, ego uero Cepha, ego uero Christi. Num diuisus 1. Cor. 3.
est Christus? Num Paulus crucifixus est pro uobis? aut in nomine Pauli
baptizati estis? En Christus est redemptor & magister noster. Christi fides in
unum nos compegit corpus. Baptismo in unum corpus baptizati sumus, ut uo-
cemur Christiani, non Petrini aut Paulini. Noluit Paulus denominari Christia-
nos ab Apostolis, quanto minus hodie ferret alios dici Benedictinos, alios Fran-
ciscanos, alios Dominicanos? Sumus domini peculium: non licet nos addicere in

hominum seruitutem. Qui autem se addicunt, unitatem corporis Christi lacerant, crucem & baptismum Christi prophanant. Disertè enim dicit Apostolus, Num diuisus est Christus: num Paulus crucifixus est pro uobis, aut in nomine Pauli baptizati estis? Licet ergo spirituales uulgò appellentur, nihil minus tamen sunt quàm spirituales. Nā idem ille Apostolus, Cum dicat unus, Ego sum Pauli, ait, aliter uerò ego Apollo, nōne carnales estis? Quorsum uerò atunebat post euangelium Iesu Christi, & doctrinam apostolorum omnem pietatem complectentem & tradentem, nouas comminisci regulas? Certè cum semel priuatas uiuendi leges adinuenerunt, toto etiam externo uitæ habitu, & moribus omnibus adeoq; & uestibus à uulgo Christianorum sese separauerunt, ut uel ita omnibus notum facerent, se uelle separatim à uulgari illa & ueluti laica & imperfecta Ecclesia, sanctius, perfectius & spiritualiter magis uiuere. Sed quomodo id eis cesserit & cecidat, uel hodie totus loquitur mundus.

De uotis monasticis.

Vota quæ uouent ineptissima sunt. Castitatem quam non habent, uouent. Donum Dei est castitas, nec omnium est. Et Paulus dicit, Qui se non continent, contrahant matrimonium. Satiùs est matrimonium contrahere, quàm uri. Et Vri quidem dixit simpliciter, siue sub uoto, siue extra uotum. Neq; uerò decet diuinæ legi præiudicare humanum & stultè susceptum uotum. Paupertas uerò in monasterijs qualis sit, res ipsa docet. Paupertatem ueram exuunt isti cum deponunt uestem uulgarem, & cum cuculla maximas induunt opes. Nam & monachi, quod ueteribus prodigij & monstri loco fuisset, principes fiunt. Vulgares autem omnes uiuunt in otio, & panem suum gratis edunt, contra canonem apostolicum 2. Thessal. 3. Vbi & anathemate percutiuntur. Illi ipsi parentes & cognatos deserunt, quibus iure diuino tenebantur obsequi atq; inseruire, atque se addicunt alienis hominibus, à quibus ad infinitas adiguntur superstitiones. Et qui spontè à parentibus manu mittuntur, uel ex superstitione manu mittuntur, uel ut habeant unde tota sua uita in otio computrescant. Vt manifestum sit tales uentris non religionis gratia induere cucullam. Qualis uerò illa obedientia quæ uerbo dei reuelatæ obedientiæ repugnat ex integro? Dum magistratus iubet istos publica unà cum alijs fidelibus subire ac ferre onera, exempti & immunes sunt perpetuò. Habuerunt quondam ministri peregrinarum religionum sub regibus Iuda priuilegia regalia & consuetudines præscriptione longi temporis confirmatas: sed quoniam ministerium ipsorum destituebatur diuina comprobatione, imò uerbo Dei aduersabatur, non impiè, neq; iniustè aut sacrilegè à pijs regibus dissipata sunt.

Quis uerò audiat istorum excusationem, cum admoniti, ut de commissis peccatis agant poenitentiam, excipiunt se fide iuramenti religari ad ordinem monasticum, ut inde salua conscientia emergere non possint. Etenim constat iuramentum illud quod prætexunt, planè esse temerarium: quod minimè præstandum esse ostendi Decad. 2. Serm. 3. Quid obsecro uinculū ab homine sine Deo, imò contra uerbum Dei connexum, uel imprudenter uel scienter, obstringeret? Si tantam habet uirtutem crux Christi, ut nos à maledictione, qua obstricti tenebamur omnes, absoluat, quanto magis liberabit ab extraneis uinculis, non ab ipso Deo, sed aliunde, uel hominū stultitia & impietate, uel diabolica arte iniecta? Clamat apostolus Paulus, Precio empti fuistis, nolite fieri hominum serui. Quòd si hominum malitia aut propria inertia facti sumus serui, conandum est pijs ut restituantur rursus per ueram fidem & obedientiam in libertatem filiorum Dei. Euangelium certe annunciat nobis, ut liberemur ab omni iniqua captiuitate, & seruamus Deo in spiritu & ueritate.

1. Cor. 7.

Porro obijcientibus, Monasteria omnia per orbem reformari oportere ad primam

primam illam simplicitatem: respondemus, hoc nostro illo infelici seculo frustra, imò stultè sperari. Nec poterunt illa reduci ad antiquā simplicitatem, nec patientur principes & monachi talem fieri reformationem: quia intelligunt suis compendijs, honoribus, & uoluptatibus, multa nedum omnia decedere. At malunt hi totum orbem multis bellis collidi, quàm tradere Deo regnum suum, quod hactenus obtinuerunt. Vt autem ex his nihil sit periculi, quis uerò persuadebit nobis res cœnobiticas, ut maximè reformentur ad primum institutum, nostro illo seculo uel æquè feliciter uel felicius quàm in ueteri illo factitatum uidimus, administrandas fore? Vidimus quale initiū habuerint, qualem item progressum, & quale incrementum. Vidimus quid potuerit hypocrisis, ambitio ac auaritia, uoluptas ac otium, & quo tandem reciderint omnia. An uerò putamus hominum cupiditates hodie fore moderatiores? An putamus nunc disciplinam minus fore à nobis & posteris nostris corrumpendam quàm à maioribus corrupta est? Quinimò non meliora sperare, sed peiora metuere cogimur, qui quotidie deteriora experimur. Viuimus enim in facie mundi, & in extremo seculi fine, in quo draco ille abyssi, hominum malitia & impietate mirificas acquisiuit uires, omnes res in toto orbe perturbandi & corrumpendi. Vbitamen illud nos non parum in tantis consolatur periculis, quod uerbum ueritatis habet, dies illos propter electos fore abbreviandos, & illum breui soluendum tempore, mox autem cōficiendum in stagnum sulphuris. Præterea si legitimè reformare uolumus, ad fontes ipsos accedamus oportet. At in primitiua ecclesia, in doctrina Christi & apostolorum, nihil legimus traditum de monachismo, intelligimus ergo non necessarium esse ecclesie: imò didicimus ipsa nos experientia docente pestiferum esse Ecclesie. Vera ergo reformatio suadet monachismum prorsus abrogare: non reiectis interim aut neglectis ijs, pœnitentiam agentibus, quos temporum iniquitas & sibīpsīs & alijs reddidit inutiles, sed in curam & alimoniam ecclesie benignè receptis. Hæc autem hactenus per occasionem & obiter diximus de monachismo, cui nullum locum in primitiua Christi & apostolorum ecclesia fuisse indicauimus. Redimus ergo ad reliqua ecclesie utilia instituta.

Circa ægrotantes & moribundos utitur etiam disciplina fidelis Christi Ecclesie. Accurrunt enim uicini & fratres, ac faciunt certatim charitatis seu pietatis officia: iuuant facultatibus indigos, aut si indigi non sunt decumbentes, præstāt his alia pietatis officia. Accedit & minister ecclesie, qui ægrotum cōsolans morti præparat, præuia ad Deum confessione peccatorum: quorum remissionem si credat uerè certò annunciat ex uerbo euangelij. Requirit ab eo quoque condonationem, siue ut in gratiam redeat cum omnibus, ne quid retineat ueteris iræ aut inimicitiarum. Post quæ publica fit ad deum ab ægroto, & ab ijs qui moribundo adsunt, oratio. Admonetur præterea de uarijs, confirmatur in fide, uocatur ad patientiam, & instituitur prout res eius deponere uidentur: discedens ex hoc seculo docetur animam suam commendare in manus Dei patris iuxta redemptoris doctrinam & exemplum, in ipso mortis articulo exclamantis, Pater in manus tuas commendo spiritum meum. Atque hanc disciplinam ab ipsis Christi Domini apostolis didicimus. Nam Iacobus Apostolus, Infirmatur quis inter uos, inquit, accersat presbyteros Ecclesie, & orent super eum, ungentes eum oleo in nomine Domini. Et obsecratio fidei saluum faciet laborantem. Eteriget eum Dominus. Et si in peccatis fuerit, remittentur ei. Confitemini inuicem alius alij delicta: & orate pro uobis inuicem ut salui sitis. Multum enim ualet deprecatio iusti efficax, &c. Hæc est apostolica illa disciplina. Si uerò rogas ubi sit oleum? Respon-
Quid agat ecclesia apud ægrotantes.
Iacobi 5.
Vngentes eum oleo.

Marci 6.

Marci 16.

miraculosum illud sanandi ægros beneficium. De eo legimus in euangelio Marci, Et egressi discipuli prædicabant ut resipiscerent, & dæmonia multa eijciebant, & ungebant oleo multos ægros & sanabant. Et iterum in eodem, Porro signa eos, inquit, qui crediderint, hæc sequentur, Per nomen meum dæmonia eijcient, &c. Et mox super ægros manus imponent, & bene habebunt. Quoniam ergo beneficium illud adhuc erat in Ecclesia, Iacobus iubet apud ægros usurpare oleum, & usurpare quidem in nomine domini, sicuti præceperat dominus. Cæterum cum illa gratia dudum desierit in Ecclesia, & re ipsa experiamur oleum nihil efficere apud ægotantes, pro ratione nostri temporis, & pro officio nostro, ægotantium morbos, fomentis morbo congruentibus maxime, adhibitis in nomine Christi, lenire & his medicari satagimus.

Extrema un-
ctio.

Scio quomodo ex hoc apostoli testimonio suam illam extremam unctionem ornare contendant Papistæ: sed laborant frustra. Vt enim non commemorem quod Iacobus nihil loquitur de oleo consecrato: & quod isti hanc medicinam non nisi in extremis admittunt, cum Iacobus iubeat quemlibet inungere ægotantem: quomodo obsecro ex uerbis S. Iacobi tuebuntur, quod sacrificus ægotum rogat, Credis ne quod propter merita & preces sanctorum dominus uelit exaudire preces nostras: ac respondente moribundo, Credo, ingerit, Inuocemus ergo deum & sanctos eius. Aut ubi obsecro docuit uel Iacobus, uel alius Christi apostolus, quod ad unctionem illam suam proferunt? In nomine patris & filij & spiritus sancti, ungo te oleo sacro, ut per hanc unctionem accipias plenam remissionem peccatorum tuorum. Quæ oro scriptura docet per unctionem illam consequi nos plenam peccatorum remissionem? Fiunt hæc manifestè contra primum religionis nostræ articulum, tradentem per solum Christi sanguinem purgari nos à peccatis omnibus, & plenissimè quidem. Huic soli debetur gloria, non oleo aut ulli in toto orbe creaturæ.

De funeribus
& sepultura.

Iam & mortuorum corpora non abiicit Christi Ecclesia, instar mortui canis. Agnoscit enim corpora templa fuisse eius qui inhabitauit sancti spiritus. Agnoscit corpora sepeliri in resurrectionem & gloriam uitæ æternæ. Colligit ergo corpora honestissimè, inuoluit panno & adoperit decetissimè, impositaq; loculis defert sollicitè in cœmeterium uel campum ecclesiasticum, ponè necessarijs amicis, uicinis & fratribus consequentibus, ipsumq; funus deducuntibus. Cæterum dum deponitur funus & telluri mādatur corpus, fiunt preces publicæ ab his qui deduxere funus. Nam gratias agunt domino, quod in uera fide ex hoc seculo euocauit mortuum, & orant dominum ut ipsos quoq; uera fide illuminatos maturè ad se transferat. Præterea in cœtu ecclesiæ publico cū honore recitatur de mortui fratris, uel de mortuæ sororis nomen, omnesq; admonentur sortis suæ & ut maturè se morti præparent. Atq; ad hunc modum legimus in literis sanctis, patres nostros suos cōdidisse mortuos etiā sanctissimos. Nihil autem legimus de canonisatione, de reliquiarum ueneratione, de anniuersarijs & oblationibus pro defunctis, in hoc oblati ut ex pœnis purgatorij liberentur. Aliquot nobis in ueteri testamēto funera, ut Abraham, Sare, Isaac, Iacobi & Iosephi, Aaronis, Mariæ, Iosue, Samuelis & Davidis, &c. in nouo testam. Ioan. Bapt. & Stephani describuntur, sed frugaliter illa omnia, neque quicquā habentia superstitionis. Quod Iosephi ossa elata sunt, mysterio elata sunt, & ut inde colligerent Israelitæ se reponendos in terram promissam. Quo & illud pertinet, quod patriarchæ unam in Hebron sepulturam elegerunt. Alioqui enim locus nihil facit ad conciliandum uel meliorem uel peiorem corpori sepulto sortem. Iudicandum est enim locum propter sanctorum in ipso sepulta corpora, quodam modo sanctificari aut certè sanctum appellari: non autem corpora quicquam sanctitatis aut salutis ex terra contrahere. Ergo nisi aliud uideatur diuinæ prou-

prouidentia, libenter cubant sancti cum suis maioribus in coemeterio eodem. Sin Deo uideatur aliud, agnoscunt se ab eadē terra ubiq; recipi indiscriminatim, nec locorū distātia se separari à suis maioribus. Proinde in ecclesia Dei nulla est superstitio circa funera & sepulchra. At quāta fuerit in papatu, nemo paucis explicauerit.

Hæc instituta ecclesiae dei necessaria sunt, & religiosè obseruantur citra superstitionē à fidelibus ad ædificationem: cætera arbitrio duntaxat hominum inuenta nihil morantur pīj. Scio interim quæ hic obijciantur, Veteri populo fuisse uarios multiplicesq; institutos à Deo per prophetas ritus & ceremonias, eò quod rudes huiusmodi pædagogia indigerent. Ceterum cum uulgus Christianorum & ipse ferè plus satis sit rudis, non sine spiritus instinctu à patribus tot & tam multiplices inuentas esse ceremonias, quibus & parere oporteat. Respondeo hanc non esse ueram & solidam rationem qua infirmis in fide consulitur. Alioqui enim apostoli Christi non tacuissent. Præterea ita comparatas esse res infirmorum & simplicium ipsa nos docet experientia, ut quo plures eis relinquuntur ceremoniæ, hoc magis dispergantur animi ipsorum in diuersa, minusq; ad Christum colligantur, cui unī tribuenda sunt omnia. Nam placuit patri in ipso habitare omnem plenitudinem, & in eodē ut compendio colligere omnia uitæ & salutis nostræ. Quid quod ipsa diuina sapientia ē medio sustulit totam illam externam pædagogiam, discrimine inter nos & illos constituto? Reducere ergo pergeremus Iudaismum, si non desineremus multiplicare ritus uel ceremonias ad ueteris ecclesiae morem. Olim quidem habuerunt suum usum ceremoniæ illæ, quamuis & hæ non fuerint infinitæ, sed numeratæ. Hodie nullum usum nec locum habent in Ecclesia. Neq; grauissima hic autoritate destituimur. Apostoli enim & presbyteri Hierosolymis magna coeunt frequentia in Conciliū, in quo Petrus Apostolus disertè dicit, eos tentare dominum, qui iugum legis super liberas Christianorum ceruices imponere nituntur. Scribitur & Synodica epistola, in qua unanimiter & spiritui sancto & ipsis testantur placere ne quid amplius imponatur Ecclesiae Christi, quàm quod paucis recensent. Ut uel inde inclarescat, sufficere doctrinam euangelij Ecclesiae, sine legis ceremonijs. Si autem euangelio ritus olim à Deo institutos tunc misceri noluit, quanto minus hodie eidem commiscere decet humanas adinventiones? Quibus præterea impiè tribuitur, uel ipsa ad gratiam cultūue Dei præparatio, uel salutis nostræ portio, ut non minus hodie, quàm olim Paulus, dicere possimus, Posteaquā cognouistis Deū, quomodo cōuertimini denuo ad infirma & egenā elementa, quibus iterū ab integro seruire uultis? Dies obseruatīs & mensēs, & tempora & annos. Metuo de uobis ne frustra laborauerim erga uos. His oībus illud quoq; accedit, quòd hæc pædagogia, de qua isti loquuntur, pertinet ad cultū Dei. At phibemur ipsi nobis fingere cultū: phibetur nobis ne quid institutioni ac uerbo Dei uel addamus uel detrahāmus. Proinde ecclesia Dei huiusmodi cōstitutiones nec instituit, nec ab alijs institutas recipit. De qua re superius quoq; nonnulla attulimus, cū differeremus de Abrogatione legis, & de Libertate Christi.

*Ecclesiae non
esse opus legali
pædagogia.*

Acto. 15.

Galat. 4.

S P E R O his me Sermonibus quinquaginta totū fidei, pietatis, siue religionis ueræ, Ecclesiaeq; negotiū satis succincta breuitate comprehendisse. Quod autem in omnibus meis Sermonibus & libris inculco, id ipsum hic quoq; repeto, meliora ex scripturis doctū, meliora libenter & cum gratiarum actione amplexurum. Domino Deo nostro, omnium bonorum fonti inexhausto, sit laus & gloria per Iesum Christum Dominum nostrum.

F I N I S.